


Tnúhu ní cáhá<sup>n</sup> yă  
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec, Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

### Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

SAN MATEO . . . . .	1
SAN MARCOS . . . . .	76
SAN LUCAS . . . . .	122
SAN JUAN . . . . .	194
LOS HECHOS . . . . .	243
ROMANOS . . . . .	309
1 CORINTIOS . . . . .	339
2 CORINTIOS . . . . .	370
GÁLATAS . . . . .	390
EFESIOS . . . . .	401
FILIPENSES . . . . .	412
COLOSENSES . . . . .	419
1 TESALONICENSES . . . . .	426
2 TESALONICENSES . . . . .	432
1 TIMOTEO . . . . .	436
2 TIMOTEO . . . . .	445
TITO . . . . .	451
FILEMÓN . . . . .	455
HEBREOS . . . . .	457
SANTIAGO . . . . .	481
1 PEDRO . . . . .	488
2 PEDRO . . . . .	496
1 JUAN . . . . .	501
2 JUAN . . . . .	508
3 JUAN . . . . .	509
JUDAS . . . . .	510
APOCALIPSIS . . . . .	513

## TNÚHU NÍ CHÍDÓ TNŪNÍ TĒ MÀTEÚ

*Nchaa cue tée ní xíndecu ndéé sanaha cǔtnàhá vátá quíxí-gǎ Xítóhó Jesucrístú*

*(Lc. 3:23-38)*

<sup>1</sup> Te ñaní tnáhá Xítóhó Jesucrístú ní cuu ndí Dàvíí ndíhí ndí Ábrahám, cue tée ní xíndecu ndéé sanaha víhi-gá ñuyíú-a. Te duha ndùu cuendá dava-gá cue tée ní cuu ñaní tnáhá-gá ní xíndecu ndéé sanaha.

<sup>2</sup> Ndí Ábrahám ní xóo ìí<sup>n</sup> déhe ndí, te ndí-á<sup>n</sup> ní xínani ndí Isàác. Te déhe ndí Isàác-á<sup>n</sup> ní cuu ndí Jàcób, te déhe ndí Jàcób-á<sup>n</sup> ní cuu ndí Jùdá, te ñu-ndí ndí Jàcób-á<sup>n</sup> ní cuu tātá dava-gá cue ñaní ndí Jùdá-á<sup>n</sup>.

<sup>3</sup> Te déhe ndí Jùdá-á<sup>n</sup> ndíhí ñadìhí ndí, ndí Tàmár ní cuu ndí Fàrés ndíhí ndí Zàrá. Te déhe ndí Fàrés-á<sup>n</sup> ní cuu ndí Èsróm, te déhe ndí Èsróm-á<sup>n</sup> ní cuu ndí Àrám.

<sup>4</sup> Te déhe ndí Àrám-á<sup>n</sup> ní cuu ndí Aminàdáb, te déhe ndí Aminàdáb-á<sup>n</sup> ní cuu ndí Nàson, te déhe ndí Nàson-á<sup>n</sup> ní cuu ndí Sàlmón.

<sup>5</sup> Te ñadìhí ndí Sàlmón-á<sup>n</sup> ní xínani-a<sup>n</sup> Ràháb, te ní xóo ìí<sup>n</sup> déhe-yu ní xínani-dě Bòóz. Te ñadìhí ndí Bòóz-á<sup>n</sup> ní xínani-a<sup>n</sup> Rút, te ní xóo ìí<sup>n</sup> déhe-yu ní xínani-dě Òbéd, te déhe ndí Òbéd-á<sup>n</sup> ní cuu ndí Isàí.

<sup>6</sup> Te déhe ndí Isàí-á<sup>n</sup> ní cuu ndí Dàvíí tée ní xíndaha ñàha xii cue ñáyíu isràél. Te déhe ndí Dàvíí-á<sup>n</sup> ndíhí ñadìhí ndí ní cuu ndí Salòmón. Te díhna-gá ndí Ùriás ní cándeca ndí ñadìhí-á<sup>n</sup> te dàtnùní ní naquehe<sup>n</sup> ñaha ndí Dàvíí-á<sup>n</sup>.

<sup>7</sup> Te déhe ndí Salòmón ní cuu ndí Ròboám, te déhe ndí Ròboám-á<sup>n</sup> ní cuu ndí Àbíás, te déhe ndí Àbíás-á<sup>n</sup> ní cuu ndí Àsá.

<sup>8</sup> Te déhe ndí Àsá-á<sup>n</sup> ní cuu ndí Josáfát, te déhe ndí Josáfát-á<sup>n</sup> ní cuu ndí Jòrám, te déhe ndí Jòrám-á<sup>n</sup> ní cuu ndí Ùziás.

<sup>9</sup> Te déhe ndí Ùziás-á<sup>n</sup> ní cuu ndí Jótám, te déhe ndí Jótám-á<sup>n</sup> ní cuu ndí

Àcáz, te déhe ndí Àcáz-á<sup>n</sup> ní cuu ndí Ezèquiás.

<sup>10</sup> Te déhe ndí Ezèquiás-á<sup>n</sup> ní cuu ndí Manàsés, te déhe ndí Manàsés-á<sup>n</sup> ní cuu ndí Àmón, te déhe ndí Àmón-á<sup>n</sup> ní cuu ndí Jòsiás.

<sup>11</sup> Te déhe ndí Jòsiás-á<sup>n</sup> ní cuu ndí Jecóniás. Te ñu-ndí ndí Jòsiás-á<sup>n</sup> ní cuu tātá nchaa dava-gá cue ñaní ndí Jecóniás-á<sup>n</sup>. Te dàvá-á<sup>n</sup> ní quide yica cuè tée ñuú Babiloniá ndécá-güedé ñáyíu isràél cuáhá<sup>n</sup> ñuú-güedé cuendá yàcá<sup>n</sup> cundecú-yu.

<sup>12</sup> Te sátá ní yáha duca<sup>n</sup> ní cuu, te ndí Jecóniás ní xóo ìí<sup>n</sup> déhe ndí ndíhí ñadìhí ndí, te tée-á<sup>n</sup> ní xínani-dě Salàtiél. Te déhe ndí Salàtiél-á<sup>n</sup> ní cuu ndí Zorobàbél.

<sup>13</sup> Te déhe ndí Zorobàbél-á<sup>n</sup> ní cuu ndí Àbíúd, te déhe ndí Àbíúd-á<sup>n</sup> ní cuu ndí Eliàquím, te déhe ndí Eliàquím-á<sup>n</sup> ní cuu ndí Àzór.

<sup>14</sup> Te déhe ndí Àzór-á<sup>n</sup> ní cuu ndí Sàdóc, te déhe ndí Sàdóc-á<sup>n</sup> ní cuu ndí Àquím, te déhe ndí Àquím-á<sup>n</sup> ní cuu ndí Èliúd.

<sup>15</sup> Te déhe ndí Èliúd-á<sup>n</sup> ní cuu ndí Eleàzár, te déhe ndí Eleàzár-á<sup>n</sup> ní cuu ndí Mátán, te déhe ndí Mátán-á<sup>n</sup> ní cuu ndí Jàcób.

<sup>16</sup> Te déhe ndí Jàcób-á<sup>n</sup> ní cuu ndí Chèé tée ní cuu yíí tá Màriá xíchí ní cuu náná Jèsús Yáá ní tendaha Dütú Ndiòxí ní quixi ñuyíú-a.

<sup>17</sup> Te sa ní cuu úxúú tnàhá cue tée cùu ñaní tnáhá ndí Ábrahám ndécú dàvá-á<sup>n</sup>, te dàtnùní ní cacu ndí Dàvíí ñu-ndí ñaní tnáhá ndí. Te núú tnàhá méé ndí Ábrahám ndíhí ndí Dàvíí ní cuu úxícúmí tnàhá-güedé. Te duca<sup>n</sup> te sa ní xínu úxícúmí-gǎ tucu-güedé ní cacu, te dàtnùní ní tñí ñaha cuè tée ñuú Babiloniá xii ñáyíu isràél ndécá ñaha-güedé xii-yu cuáhá<sup>n</sup> ñuú-güedé cuendá yàcá<sup>n</sup> cundecú-yu. Te sátá ní yáha sá dúcá<sup>n</sup> ní cuu, te ní cacu úxúní tucu cue tée ní cuu ñaní tnáhá ndí Ábrahám ndíhí ndí Dàvíí, te dàtnùní ní cacu Xítóhó Jesucrístú ñuyíú-a. Te núú tnàhá méé-gǎ ní cuu úxícúmí tnàhá-güedé.

*Ní cacu Jèsús  
(Lc. 2:1-7)*

18 Te duha ní cuu cútnàhá ní cacu Xítohó Jesucristú, chi dàvá-án nǐ xíndecu ìn xíchí cuéchí nǐ xínani Màriá. Te xíchí-án sa ní cundáá tnúhu sá tnándaha-xi ndìhi ìn téé nàni Chèé. Te cùmání-gǎ tnándaha-xi ndìhi téé-án te Espíritú Yǎ Ndiǒxí ní quide ní ngúhu<sup>n</sup> déhe-xi.

19 Te té Chèé téé cuení candeca ñaha xii xíchí-án nǐ cutnùní iní-dé sá ñúhú déhe-xi. Te cùu-dé ìn téé quide ndáá, núu xǎ<sup>n</sup> duu<sup>n</sup> duu<sup>n</sup> ní sani iní-dé sá vǎ tnándaha-gǎ-dé ndìhi-xi, te dícó-ni sá ñà túú ní cǎhá<sup>n</sup>-dé chi ní cuení-dé sá vǎ cǎhá<sup>n</sup> cuèhé cǎhá<sup>n</sup> duha ñáyiu cuendá-xi.

20 Te sátá dúcá<sup>n</sup> nǐ sani iní-dé te ní ngáva-dé ní xídí-dé, te núú sàní-dé ní sáhá<sup>n</sup> ìn espíritú xínú cuèchi núú Yǎ Ndiǒxí ní xáha<sup>n</sup>-xi xii-dé:

—Yòhó té Chèé téé cùu ñaní tnáhá ndii Dàvíí, yúhú cǎchí tnúhu-í xii-n sǎ ñà túú nǎ caní iní-n, tnándaha nahi-ni-n ndìhi tá Màriá cuèi ñúhu déhe-xi, chi mee Espíritú Yǎ Ndiǒxí ní quide-xi duca<sup>n</sup> nǐ ngúhu<sup>n</sup> déhe-xi.

21 Te na cǎcu déhe-xi-án te danàni-n-dé Jèsús. Te duca<sup>n</sup> cùnani-dé, chi téé-án cada-dé cuendá sá vǎ cùndecu-gǎ cue ñaní tnáhá-dé ñáyiu isràél ichi cuèhé ichi duha —duha ní xáha<sup>n</sup> espíritú-án xii té Chèé-án núú sàní-dé.

22 Te duca<sup>n</sup> nǐ cuu chi ní quee ndáá-xi nǎcuáa ní xáha<sup>n</sup> Yǎ Ndiǒxí xii ìn téé ní cǎhá<sup>n</sup> tnúhu-gǎ ndéé sanaha. Te téé-án nǐ chídó tnùní-dé núú tütú-gǎ nǎcuáa ní xáha<sup>n</sup>-gǎ xii-dé, te duha ní xáha<sup>n</sup>-gǎ:

23 Cundeçu ìn xíchí cuéchí ndèè cuèé-gǎ.

Te òré ndécú íí-xi vátá nihí-gǎ yíi-xi te ngúhu<sup>n</sup> déhe-xi.

Te òré ná cǎcú dèhe-xi te danàni ñahá-yu Emànuél.

Duha ní xáha<sup>n</sup>-gǎ xii téé-án nǐ chídó tnùní-dé núú tütú-gǎ. Te tnúhu Emànuél-án queé-xi: Yǎ Ndiǒxí ndécú ndìhi-o. Núu xǎ<sup>n</sup> duca<sup>n</sup> nǐ cuu vitna.

24 Te òré ní ndiquíú iní té Chèé-án te ní quide-dé nǎcuáa ní xáha<sup>n</sup> espíritú-án xii-dé chi ní tnándaha-dé ndìhi tá Màriá.

25 Dico ndi dǐ<sup>n</sup> nǐ xíndecu-yu ndéé ní sáá nduu nǐ cacu déhe-xi. Te òré ní cacu déhe-xi-án te ní dánání ñaha-dé Jèsús.

## 2

*Cue téé cuángoto ñaha xii Jèsús*

1 Te Jèsús ní cacu-gǎ ìn ñúú nání Bèlén, te ñúú-án yíndèhu-xi distritú Jùdeá. Te dàvá-án cùnùu té Hèrodés yíndàha-dé ñáyiu. Te ñúú Jerusalén ní quexio cue téé véxi ndàa xio nacuáa quène nchíanchii, cue téé túha dàcuaha cuendá nchaa sá ndéé andiu.

2 Te ndúcu tnúhu-güedé núú ñáyiu ñúú-án, te xáha<sup>n</sup>-güedé:

—¿Vá cùndèè iní-ndó cǎchí tnúhu-ndo ndéé ndécú tée quíndaha ñaha xii ñáyiu isràél-án? Chi ní xíní-ndí ní quene chódíní-dé ndàa xio nacuáa quène nchíanchii, núu xǎ<sup>n</sup> véxi-ndí chi cuení-ndí quíní-ndí-dé te chiñuhu-ndí-dé —cǎchí-güedé xáha<sup>n</sup>-güedé xii-yu.

3 Te òré ní níhí tée cùnùu nani Herodés tnúhu sá ndúcú tnúhu cue téé-án ndéé ndécú tée quíndaha ñaha xii ñáyiu isràél, te ñá túú tnàhí ni cùu váha iní-dé, te diu-ni duca<sup>n</sup> ñà túú ní cùu váha iní tnáhá nchaa ñáyiu ñúú-án.

4 Te ní cana-dé cue téé cùu dútu cùnùu, ndìhi cue téé dàcuaha ñaha xii ñáyiu nchaa tnúhu ní chídó tnùní ndii Moisés, te ní xícá<sup>n</sup> tnúhú-dé núú-güedé núu xíní-güedé ndéé cacu Cristú téé tendaha Yǎ Ndiǒxí quixi ñuyíú-a.

5 Te ní xáha<sup>n</sup>-güedé xii-dé:

—Ìn ñúú yíndèhu distritú Jùdeá cacu-dé, te ñúú-án nání-xi Bèlén, chi quee ndáá-xi nǎcuáa ní xáha<sup>n</sup> Yǎ Ndiǒxí xii ìn téé ní xóo cǎhá<sup>n</sup> tnúhu-gǎ ndéé sanaha. Te duha ndùu tnúhu ní chídó tnùní-dé núú tütú-gǎ:

6 Núú Bèlén cúu-xi ìn ñúú líhli yíndèhu distritú Jùdeá, te ío-gǎ cùnùu-xi dacúxí dàva-gǎ ñúú cùnùu yíndèhu distritú-án,

chi diu ñúú-án quee ìn téé ío cùnùu. Te téé cùnùu-án quíndaha-dé ñáyiu cùu cuendá-í ñáyiu isràél.

Duha ní xáha<sup>n</sup>-gã xii téé ní xóo cáhá<sup>n</sup> tnúhu-gá, te duca<sup>n</sup> ní chídó tnùnì-dé núú tùtú-gá —càchí-güedé xáha<sup>n</sup>-güedé xii té Hèrodés.

<sup>7</sup> Te sáta dúcá<sup>n</sup> te té Hèrodés dayuhu ní cana-dé cue téé ndùcu tnúhu núu ndéé ní cacu téé quindaha ñaha xii ñáyiú isràél, te ní xíca<sup>n</sup> tnúhú-dé núú-güedé ná nduu cùu-xi nduu díhna nuu ní xiní-güedé chódíní.

<sup>8</sup> Te sáta dúcá<sup>n</sup> te ní xáha<sup>n</sup>-dè xii-güedé:

—Chí cuáhá<sup>n</sup> ñuú Bèlén te nducu tnúhu váha-ndo ñuú ndéé ní cacu téé duca<sup>n</sup> quindaha ñaha xii ñáyiú isràél. Te òré ná nàníhí-ndó-dé te quixi-ndo càchí tnúhu-ndo cuendá quíhí<sup>n</sup>-í tnàhá-í chiñuhu-í-dé —càchí-dé xáha<sup>n</sup>-dè xii-güedé.

<sup>9</sup> Te sáta dúcá<sup>n</sup> ní xáha<sup>n</sup> tē Hèrodés-á<sup>n</sup> te ní xica-güedé cuáhá<sup>n</sup>-güedé. Te chódíní ní xiní-güedé ní quene ndàa xio nacuaa quène nchíanchii-á<sup>n</sup> yòdo nuu-dì núú-güedé cuáhá<sup>n</sup>. Te ní ngüíñí chódíní-á<sup>n</sup>, te núú ní ngüíñí-dì-á<sup>n</sup> yíndáá núú ndécú Jèsús.

<sup>10</sup> Te òré ní xiní cue téé-á<sup>n</sup> ní ngüíñí chódíní-á<sup>n</sup> núú yíndáá ndécú-gã, te ní cudíí víhí ínì-güedé.

<sup>11</sup> Te duca<sup>n</sup> te ní quexìo-güedé ndéé núú cáá vèhe ndecu Jèsús. Te òré cuánguihu-güedé xítí vehe te ní xiní-güedé Jèsús ndécú-gã ndihí náná-gã Màriá. Te ní ngüíñí xítí-güedé, te ní ngüíta-güedé ní cachí-güedé sá ìo càhnu cuu Jèsús. Te dátñuní ní nacaá<sup>n</sup>-güedé càjá xínehe-güedé, te ní tava-güedé díhú<sup>n</sup> cuáá<sup>n</sup>, ndihí dúsa sá ìo váha sàhá<sup>n</sup> tnámí nàni insiensú, ndihí yúcu sá nání mírà ní taxi ndecu-güedé núú Jèsús cuendá cuu-xi ñ<sup>n</sup> táhú sã cúu-xí-gã.

<sup>12</sup> Te Yá Ndiöxí ní cáhá<sup>n</sup>-gá núú sàní-güedé, te xáha<sup>n</sup>-gã xii-güedé sá vã náyaha-gã-güedé cáhá<sup>n</sup> ndihí-güedé té Hèrodés. Núu xíá<sup>n</sup> cue téé-á<sup>n</sup> cuánuhú-güedé ingá ichi, te ñá túú-gã ní náyaha-güedé núú ndécú tē Hèrodés.

*Cuáhá<sup>n</sup>-yu ndihí Jèsús nàció<sup>n</sup> Ègiptú*

<sup>13</sup> Te sáta ní yáha cuánuhú cue téé ní sángoto ñaha xii Jèsús, te ní quexìo ñ<sup>n</sup> espíritú xínú cuèchi núú Yá Ndiöxí núú sàní té Chèé, te xáha<sup>n</sup>-xi xii-dé:

—Véxi-í càchí tnúhu-í xii-n sã ndácóo-n, te ndee-n ñuú-a ndihí Jèsús, ndihí náná-gã cunu-ndo quíhí<sup>n</sup>-ndó nàció<sup>n</sup> Ègiptú, chi té Hèrodés tendaha-dé cue téé quixi nanducu ñaha xii Jèsús cuendá cahni ñaha-güedé. Te yáca<sup>n</sup> cundecu-ndo ndéé cachí tnúhu-í xii-n ndùu ndixi-ndo —cachí espíritú-á<sup>n</sup> xáha<sup>n</sup>-xi xii té Chèé núú sàní-dé.

<sup>14</sup> Te té Chèé-á<sup>n</sup> ní ndacóo-dé, te niú ní xica-dé ndihí tá Màriá ndécá-yu Jèsús cuáhá<sup>n</sup> nàció<sup>n</sup> Ègiptú.

<sup>15</sup> Te nàció<sup>n</sup> Ègiptú-á<sup>n</sup> ndécú-yu ní xihí té Hèrodés. Te duca<sup>n</sup> ní cuu chí ní quee ndáá-xi nàcuáa ní cachí ñ<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha ní quide-dé núú-gã ní cáhá<sup>n</sup>-dé yuhu-gá, te duha ní xáha<sup>n</sup>-gã ní cáhá<sup>n</sup>-dé: “Nàció<sup>n</sup> Ègiptú ndécú Dèhe-í ní cùu, te ní xáha<sup>n</sup>-í xii-dé sá ndéé-dé ñuú-á<sup>n</sup> vã cùndècu-gá-dé”, duha ní xáha<sup>n</sup>-gã xii téé ní cáhá<sup>n</sup> tnúhu-gá ní quide-dé núú-gã.

*Té Hèrodés ní táuchíú<sup>n</sup>-dè cahni-güedé cue landú*

<sup>16</sup> Te cue téé ní sángoto ñaha xii Jèsús ní dándàhú-güedé té Hèrodés, chi ñá túú ní náyaha-güedé cúñaha-güedé sá ní naníhí-güedé Jèsús. Te sáta ní cutnùnì ínì té Hèrodés sá ní dándàhú ñáhá-güedé xii-dé te ní cudéé<sup>n</sup> víhí-dé, te ní tendaha-dé cue téé cuáhá<sup>n</sup> ñuú Bèlén, ndihí nchaa dava-gã ñuú cáá yàtni xíá<sup>n</sup> cuendá cahni-güedé mee-ni cuè landú téé. Te ndéé cue landú íchí ní cacu, ndihí ndéé cue landú sa ní nútnahá úu cuíá-xi nchaa-güexi cahni-güedé ní xáha<sup>n</sup>-dè. Te duca<sup>n</sup> ní quide-dé chí ní quide cuendá-dé nàcuáa ndùu tnúhu ní xáha<sup>n</sup> cuè téé ní sángoto ñaha xii Jèsús nduu ní xiní-güedé chódíní, núu xíá<sup>n</sup> duca<sup>n</sup> ní táuchíú<sup>n</sup>-dè ní quide cue téé-á<sup>n</sup>.

<sup>17</sup> Te duca<sup>n</sup> ní cuu chí ní quee ndáá-xi nàcuáa ní cachí ndí Jeremiás téé ní xóo cáhá<sup>n</sup> tnúhu Yá Ndiöxí ndéé sanaha, te duha ní cachí ndí:

18 Ní tecú ndàhí víhí ñáyiú ñuú Ràmá sá ndìhú iní-yu, te ñáyiú xíndáhyú-á<sup>n</sup> cúy-yu ñaní tnáhá tã Ràquél, te ndàhyú-yu cuèndá sá ñí xíhí déhe-yu. Te ñáyiú-á<sup>n</sup> ñà túú ní cuíní-yu dàñá-yu sá ndìhú iní-yu cuèndá sá ñí xíhí déhe-yu. Duha ní cachí ndí Jeremiás.

19 Te sáta ñí xíhí té Hèrodés te ní sáhá<sup>n</sup> tucu espíritú xínú cuèchi núú Yá Ndiöxí núú sàní té Chèè òré ndécú-dé nàció<sup>n</sup> Ègíptú, te ní xáha<sup>n</sup>-xi xii-dé:

20 —Véxi tucu-í càchí tnúhu-í xii-n sã ndácõ-n, te núhú-n ndìhí Jesús ndìhí nãná-gã ñuú cue ñaní tnáhá-n ñáyiú isràél cundecu-ndo, chi sa ní xíhí cue té cuíní cahni ñaha xii Jesús ní cùu —cachí espíritú-á<sup>n</sup> xáha<sup>n</sup>-xi xii té Chèè núú sàní-dé.

21 Te té Chèè-á<sup>n</sup> ñí ndacóo-dé, te ní ndee-dé ndìhí Jèsús ndìhí nãná-gã cuánuhú-yu ñuú cue ñáyiú isràél ñáyiú cùu ñaní tnáhã-yu.

22 Te té Chèè ní níhí-dé tnúhu sá tè Arquelaú ní nucúnutnii-dé núú tãtã-dé té Hèrodés distritú Jùdeá yíndàha-dé ñáyiú. Te ní yùhú té Chèè-á<sup>n</sup>, te ñá túú ní cuíní-dé quíhí<sup>n</sup>-dé cundecu-dé distritú-á<sup>n</sup>. Te Yá Ndiöxí ní cáhá<sup>n</sup>-gá núú sàní-dé, te ní xáha<sup>n</sup>-gã xii-dé sá quíhí<sup>n</sup>-dé distritú Galileá, núú xiã<sup>n</sup> yacá<sup>n</sup> cuáhá<sup>n</sup>-yu.

23 Te òré ní quexió-yu distritú Galileá, te ní sáhá<sup>n</sup>-yu ñí ñuú nání Nàzarét ní xíndecú-yu. Te duca<sup>n</sup> ní cuu chi ní quee ndáá-xi nàcuáa ní cachí cue té ní xóo cáhá<sup>n</sup> tnúhu Yá Ndiöxí ndéé sanaha sá Jèsús cuu-gá té ñuú Nazàrét.

### 3

*Té Juàá té dacuandute ñaha xii ñáyiú cáhá<sup>n</sup>-dé tnúhu Yá Ndiöxí xití yucu*  
(Mr. 1:1-8; Lc. 3:1-9, 15-17; Jn. 1:19-28)

1 Te ní xica nduu sá dúcá<sup>n</sup> ñí cuu, te té nani Juaá té dacuandute ñaha xii ñáyiú ní quexìo-dé yucu distritú Jùdeá cáhá<sup>n</sup>-dé tnúhu Yá Ndiöxí núú ñáyiú xití yucu-á<sup>n</sup>.

2 Te xáha<sup>n</sup>-dè xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndiöxí xii-ndo —càchí-dé xáha<sup>n</sup>-dè xii-yu.

3 Te ñuú cuèndá té Juàá-á<sup>n</sup> ñí chídó tnùní ndí Chàíá té ní xóo cáhá<sup>n</sup> tnúhu Yá Ndiöxí ndéé sanaha, te duha ndùu tnúhu ní chídó tnùní ndí cuèndá-dé:

Tècú cáhá<sup>n</sup> níhí ñí tée yìhí xití yucu, te càchí-dé:

“Chí dáñá nchàa ichi cuehé ichi duha ndècu-ndo, te tñi-ndo ìchi váha,

Te duca<sup>n</sup> càda-ndo cuèndá cundecu túha-ndo chi véxi Yaá ío cùnuu”, duha quesaha tée-á<sup>n</sup>.

Duha ndùu tnúhu ní chídó tnùní ndí Chàíá-á<sup>n</sup> cuèndá té Juàá.

4 Te té Juàá-á<sup>n</sup> ñí xóo cuihnu-dé dóo idi caméyu, te ñí ñí ní cuu pãñú xití-dé, te ní xóo caxi-dé tíca làngóstá ndìhí ndudí ñúñú cuéchi.

5 Te ñáyiú ñuú Jerusalén, ndìhí ñáyiú nchaa ñuú yíndèhu distritú Jùdeá, ndìhí ñáyiú nchaa ñuú cáa yàtni yúte Jòrdán ní sáhá<sup>n</sup>-yu ní xíndedóho-yu nàcuáa ní cáhá<sup>n</sup> té Juàá.

6 Te ní ngüíta-yu ní náhmá-yu nchaa cuéchi-yu núú Yá Ndiöxí. Te òré duca<sup>n</sup> ñí náhmá-yu te ní dácúandute ñaha té Juàá xii-yu yúte Jòrdán.

7 Te vài cue té cùu fariséú ndìhí cue té cùu saducéú cuáhá<sup>n</sup>-güedé núú ndécú tè Juàá cuíní-güedé dacuandute ñaha-dé xii-güedé. Te òré ní quexìo-güedé núú ndécú-dé, te ní xáha<sup>n</sup>-dè xii-güedé:

—¡Nchaa nchòhó cúu-ndó dàtná ñí cóo dèé<sup>n</sup> chi ío cuihna ñí-ndó! ¿Te nása ní cuu núu tnáhá nchòhó ndúcú-ndó nàcuáa cada-ndo càcu nihnu-ndo núu tnúndóho cahnu vihi ta cuyatni ñaha xii-ndo véxi-í?

8 Te chí cáda váha vitna cundecu-ndo cuèndá duca<sup>n</sup> cùtnuní sá ñí dáñá-ndó nchàa ichi cuehé ichi duha ndècu-ndo.

9 Te vá càchí-ndó sã ío càhnu cuu-ndo cuèndá sá cúu-ndó ñaní tnáhá ndí Àbrahám. Chi cuéi ndéé yúu te ndacu Yá Ndiöxí ndada-gá

ñáyiú te cuú-yu ñaní tnáhá ndïi Àbrahám.

<sup>10</sup> Te caá chi ndècu túha-xi sá quèhndé-xi nchaa yutnu sá dúcá<sup>n</sup> ñà túú càváha sávídí-xi-á<sup>n</sup>, chi nchaa yutnu-á<sup>n</sup> tèhndé-xi te cuánee-xi núú ñùhú càyú-xi. Te duha sãtnáhá-xi ndoho nchaa ñáyiú ñá túú quide váha-á<sup>n</sup> chi nchaa ñáyiú ñá túú quide váha cuú-yu dàtná nchaa yutnu sá ñà túú càváha sávídí-xi.

<sup>11</sup> Te na càchí tnúhu ndáá-í xii-ndo sã yùhú dácuañdute-í mee-ni ñáyiú ní dáñá nchaa ichi cuehé ichi duha. Dico nchicú<sup>n</sup> tucu ingá téé véxi, te téé-á<sup>n</sup> taxi-dé Espiritú Yã Ndiöxí cundecu ndihí-ndo. Te cuú-xi datná ñ<sup>n</sup> ñuhú, chi ndada ndoo ndada nine-xi iní-ndó. Te téé-á<sup>n</sup> ïo-gá cúnúu-dé dácúúxí yùhú, chi yùhú cuú-í ñ<sup>n</sup> téé duu<sup>n</sup> duu<sup>n</sup> ñá túú tàú cuita nehe ni chàú-dé dico quide-í chiú<sup>n</sup>-dé.

<sup>12</sup> Te téé-á<sup>n</sup> sa véxi túha-dé sá cáda ñ<sup>n</sup> ñaha-dé xii-o dàtná quidé ñáyiú ndàda ndoo triú, chi ñáyiú-á<sup>n</sup> sa nèhe túha-ná-yu yaxí<sup>n</sup>-yu òré náñani cuendá ndada ndoó-yu. Te òré ndadá ndoó-yu triú-á<sup>n</sup> te dàquee ñ<sup>n</sup>-yu mihi-xi, te tàxúha-yu mee-nã triú-á<sup>n</sup> te sãhmí-yu mihi-xi-á<sup>n</sup>. Te dàtná quidé-yu mihi triú-á<sup>n</sup> duca<sup>n</sup> sãtnahá-xi cada ñaha téé-á<sup>n</sup> xii nchaa ñáyiú ñá túú quide váha, chi daquihí<sup>n</sup> ñáhá-dé xií-yu núú ñùhú núú càyú, te ñuhú-á<sup>n</sup> ñà túú tnáhí ndàhvã — càchí-dé xãha<sup>n</sup>-dë xii-güedé.

### *Sãndute Jesús*

(Mr. 1:9-11; Lc. 3:21-22)

<sup>13</sup> Te Jèsús ní quee-gá distritú Galileá cuáhá<sup>n</sup>-gá yúte Jòrdán núú ndécú tè Juàá cuendá dácuañdute ñaha-dé xii-gá.

<sup>14</sup> Te òré ní quexìo Jesús núú ndécú tè Juàá, te ñá cuiní-dé dácuañdute ñaha-dé xii-gá ní cuú, te ní xãha<sup>n</sup>-dë xii-gá:

—Yùhú tàú-í sá dácuañdute ñaha-n xii-í, te ñá díú dà yùhú dácuañdute ñaha-í xii-n —càchí-dé xãha<sup>n</sup>-dë xii-gá.

<sup>15</sup> Te Jèsús ní xãha<sup>n</sup>-gã xii-dé:

—Quehe<sup>n</sup> dañá, chi dacuití<sup>i</sup> xìni ñuhu-xi duca<sup>n</sup> cada-o nacuaá

cundáá-ó núú Yã Ndiöxí —càchí-gá xãha<sup>n</sup>-gã xii-dé.

Te tè Juàá-á<sup>n</sup> ñí sáhá<sup>n</sup> uu<sup>n</sup>-dé tnúhu ní xãha<sup>n</sup> Jèsús xii-dé.

<sup>16</sup> Te ní dácuañdute-dé Jèsús. Te òré ní nene-gá xití ndute te ní xiní-gá nchí andíu, te ní quee Espiritú Yã Ndiöxí véxi cuu<sup>n</sup>-xi ngúndecu ndihí ñaha-xi xii-gá, te dàtná cáá ñ<sup>n</sup> lómá cáá Espiritú-á<sup>n</sup> véxi cuu<sup>n</sup>-xi.

<sup>17</sup> Te òré-á<sup>n</sup> ñí tecú ní cáhá<sup>n</sup> Yã Ndiöxí ndéé andíu, te xãha<sup>n</sup>-gã xii Jèsús:

—Yòhó cuú-n Dëhe-í téé ío cuú iní-í te ío cùdí ñí ñáhá-í xii-n —càchí-gá xãha<sup>n</sup>-gã xii Jèsús.

## 4

*Sácuíhná quidé yica-xi cada Jesús sá ñà túú tàú-gá cada-gá ní cuú*

(Mr. 1:12-13; Lc. 4:1-13)

<sup>1</sup> Te Espiritú Yã Ndiöxí ndécá-xi Jèsús cuáhá<sup>n</sup> ñ<sup>n</sup> xití yucu cuendá yacá<sup>n</sup> cundecu tnaa-gá, te yacá<sup>n</sup> quexìo sácuíhná coto ndéé ñáhá-xi xii-gá te núú ndisa sá vã cáda-gã ñ<sup>n</sup> sá ñà túú tàú-gá cada-gá.

<sup>2</sup> Te Jèsús ñá ní xèxi-gá údico nduu údico niú, te duca<sup>n</sup> te dàtnúni ní xicá<sup>n</sup> iní-gá caxi-gá.

<sup>3</sup> Te sátá dúcá<sup>n</sup> te ní quexìo sácuíhná quidé yica-xi cada Jesús ñ<sup>n</sup> sá ñà túú tàú-gá cada-gá, te xãha<sup>n</sup>-xi xii-gá:

—Te núú ndisa sá cuú-n Dëhe Yã Ndiöxí te cúñaha xii yúú-a na ndúu-xi paá —càchí-xi xãha<sup>n</sup>-xi xii-gá.

<sup>4</sup> Te Jèsús ní xãha<sup>n</sup>-gã xii-xi:

—Núú tütú Yã Ndiöxí càchí-xi: “Ñá díú mèe-ni paá candeca-xi iní ñáyiú ñuyíú, chi tnáhá nchaa tnúhu càhá<sup>n</sup> Yã Ndiöxí candeca-xi iní-yu”, duha càchí-xi núú tütú-gá —càchí-gá xãha<sup>n</sup>-gã xii-xi.

<sup>5</sup> Te dàtnúni sácuíhná-ã<sup>n</sup> ndécá ñaha-xi xii-gá cuáhá<sup>n</sup> ñuu Jerusálén, te yacá<sup>n</sup> ní xãha<sup>n</sup>-xi xii-gá cuásaá-gá díquí véñúhu càhnu sá ïo cúnúu núú ñáyiú isràél,

<sup>6</sup> te dàtnúni ní xãha<sup>n</sup> tùcu-xi xii-gá:

—Te núú ndisa cuú-n Dëhe Yã Ndiöxí te cuandëe ndava núú ñuhú cuendá quee ndáá-xi nãcuáa càhá<sup>n</sup>-xi núú



tùtú-gá núú càchí-xi: “Yá Ndiöxí tendaha-gã cue espíritú xínú cuèchi núú-gã quixi-xi cuèndá coto ñaha-xi xii-n, te núú ndáhá-xí càundodo-n cuendá sá vã dánicuèhé yúú sãhá-n”, duha càchí-xi núú tùtú-gá –càchí sácuíhná-ã<sup>n</sup> xãhá<sup>n</sup>-xi xii Jesús.

<sup>7</sup> Te Jèsús ní xãhá<sup>n</sup>-gã xii-xi:

–Te càchí tucu-xi núú tùtú Yã Ndiöxí: “Vã cání iní-n coto ndeé-n Dütú Ndiöxí Yaa cúú Ndiöxí-n cuèndá-ni sá cuíní-n sã dácãcu nihnu ñaha-gã xii-n ñ<sup>n</sup> sá sání iní-n càda-n”, duha càchí-xi núú tùtú-gá –càchí-gã xãhá<sup>n</sup>-gã xii-xi.

<sup>8</sup> Te sácuíhná ndécá tucu-xi Jèsús cuáhá<sup>n</sup> ñ<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xii-gã nchaandi túhú nació<sup>n</sup> cáá ñúyúú, ndihi nchaa sá vãha ló ñ<sup>n</sup> ñ<sup>n</sup> nació<sup>n</sup>-á<sup>n</sup>.

<sup>9</sup> Te ní xãhá<sup>n</sup>-xi xii-gã:

–Te núu yòhó ngüíñí xítí-n núú-í chiñuhu ñaha-n xii-í ñá, te taxi cuèndá-í nchaa sá ñí dánèhé ñáhà-í-a cuu cuèndá-n –càchí-xi xãhá<sup>n</sup>-xi xii-gã.

<sup>10</sup> Te Jèsús ní xãhá<sup>n</sup>-gã xii-xi:

–Xocuñí yòhó sácuíhná núú ndécù-í-a, chi vá cúú càda-í nacuáa càchí-n, chi núú tùtú Yã Ndiöxí càchí-xi: “Chiñuhu-ndo Dütú Ndiöxí Yaa cúú Ndiöxí-ndó, te ñu-ni-gã cada-ndo nchaa nacuáa càhá<sup>n</sup>-gã”, duha càchí-xi núú tùtú-gá –càchí-gã xãhá<sup>n</sup>-gã xii-xi.

<sup>11</sup> Te dătnùní sácuíhná ñí dáñá-xí Jèsús ní xica-xi cuáhá<sup>n</sup>-xi. Te sátá dúcá<sup>n</sup> te ní quexìo cue espíritú xínú cuèchi núú Yã Ndiöxí ní xinu cuechi-xi núú Jèsús.

*Distritú Galileá ní chisaha Jèsús chiú<sup>n</sup> ní táhú Tátá-gã Dütú Ndiöxí cada-gã*

*(Mr. 1:14-15; Lc. 4:14-15)*

<sup>12</sup> Te òré ní níhí Jèsús tnúhu sá ñí ngava té Juáá té dăcuandute ñaha xii ñáyiu vecaá, te ní xica-gã cuáhá<sup>n</sup>-gã distritú Galileá.

<sup>13</sup> Te ní ñà túú ní xíndecu-gã ñuú Nazàrét, chi ní yáha-gã cuáhá<sup>n</sup>-gã ndéé ñuú Capèrnaúm yacá<sup>n</sup> ní xíndecu-gã, te ñuú-á<sup>n</sup> cáá yatni yuhu

lagúná, te yatni xiá<sup>n</sup> cáá ñúhu nani Zabulón, ndihi ñuhu nani Neftalí.

<sup>14</sup> Te duca<sup>n</sup> ñí cuu chi ní quee ndáá-xi nacuáa ní chídó tnùní ndí Chàíá téé ní xóo cáhá<sup>n</sup> tnúhu Yá Ndiöxí ndéé sanaha núú tùtú-gá núú càchí-xi:

<sup>15</sup> Ñuhu nani Zabulón, ndihi ñuhu nani Neftalí, ñuhu-á<sup>n</sup> yíndèhu-xi distritú Galileá,

te xiá<sup>n</sup> xíndecu cue ñáyiu ñá túú cùu ñáyiu isràél,

te càa-xi yatni yuhu lagúná te ndàa ingá xio yúte Jòrdán cúú-xí.

<sup>16</sup> Te cue ñáyiu-á<sup>n</sup> ndécü-yu ñ<sup>n</sup> núú néé chi ndécü-yu ichi cuèhé ichi duha,

te sáá nduu te cada iní-ndó sã ñáyiu-á<sup>n</sup> queé-yu núú ñitó chi vá cundecu-gã-yu ichi cuèhé ichi duha.

Te ñu-ni ñáyiu-á<sup>n</sup> cúu-yu ñáyiu ta xíta nihnu duu<sup>n</sup> cuáhá<sup>n</sup>,

dico sáá nduu te vá cuíta nihnu-gã-yu.

Duha ní chídó tnùní ndí núú tùtú-gá.

<sup>17</sup> Te dàvá-á<sup>n</sup> ñí ngüíta Jèsús ní dánèhé-gã ñáyiu, te ní xãhá<sup>n</sup>-gã xií-yu:

–Chí dándixi túu iní sá ñà túú quide váha-ndo ndecu-ndo te dañá-ndo nchaa ichi cuehé ichi duha, chi sa ní cuyatni nduu ndíhu ndaha ñaha Yá Ndiöxí xii-ndo –càchí-gã xãhá<sup>n</sup>-gã xií-yu.

*Jèsús càhá<sup>n</sup>-gã cúmí tnàhá cue téé tní chácá*

*(Mr. 1:16-20; Lc. 5:1-11)*

<sup>18</sup> Te Jèsús ñúhú-gã ichi cuáhá<sup>n</sup>-gã tá yãha-gã yuhu làgúná Galileá, te ní xiní-gã úú tnàhá cue téé xídáquë-güedé ñunu-güedé xítí ndute tní-güedé chácá, chi quiti tnàhí-á<sup>n</sup> cúú chiú<sup>n</sup>-güedé tní-güedé-di. Te ñ<sup>n</sup>-dé nání-dě Xímú, àdi Pelú chi úú ñu-dé, te ñaní-dé cúú ñngá téé ndihi-dé te téé-á<sup>n</sup> nání-dě Ndríxí.

<sup>19</sup> Te Jèsús ní xãhá<sup>n</sup>-gã xii-güedé:

–Chí dáñá chiú<sup>n</sup> quide-ndo-á<sup>n</sup> te quixi-ndo chitnahá ñáhá-ndó xii-í, te taxi-í ñngá núú chiú<sup>n</sup> cada-ndo chi quíhí<sup>n</sup>-ndó dăcahá<sup>n</sup>-ndó ñáyiu cuèndá

tuha ñàhá-yu xii-í —càchí-gá xăha<sup>n</sup>-gă xii-güedé.

<sup>20</sup> Te òré-ni-á<sup>n</sup> ñí dáñá cuè téé-á<sup>n</sup> ñunu-güedé, te ní tuha-güedé Jèsús.

<sup>21</sup> Te ní xica tucu Jèsús cuáhá<sup>n</sup>-gá luha-gá, te ní xiní tucu-gá úú-gá tnàhá cue téé tñì chácá. Te ì<sup>n</sup> téé-á<sup>n</sup> nání-dě Jàcobó, te ñani-dé cúú ìngá téé ndìhi-dé te téé-á<sup>n</sup> nání-dě Juáá, te ndì ndúú-güedé cúú-güedé déhe té Zebèdeú. Te xíxínucóo-güedé ndìhi tătá-güedé xití bàrcú xínatícu-güedé ñunu-güedé, te Jèsús ní cana ñaha-gă xii-güedé.

<sup>22</sup> Te òré-ni-á<sup>n</sup> ñí dándöo-güedé bàrcú-güedé, ndìhi tătá-güedé, te ní tuha ñaha-güedé xii-gá.

*Jèsús dánèhé-gá cuèhé víhí ñáyi*  
(Lc. 6:17-19)

<sup>23</sup> Te Jèsús tá xica ndodo-gá nihíi distritú Galileá cuáhá<sup>n</sup> tá dānehé-gá ñáyi tñúhu váha tñúhu sá sánú ìchi ñaha xií-yu nācuáa ndíhu ndaha ñaha Yá Ndiöxí xií-yu. Te ndì tnahá ì<sup>n</sup> ì<sup>n</sup> ñuú sáa-gá te duca<sup>n</sup> cuānguihu-gá xití veñúhu dānehé-gá ñáyi tñúhu-á<sup>n</sup>. Te ndì díí<sup>n</sup> ndì díí<sup>n</sup> núú cuèhé tnàhá ì<sup>n</sup> ì<sup>n</sup> ñáyi dīco nchaá-ní-yu ta quide tātna-gá cuáhá<sup>n</sup>.

<sup>24</sup> Te ndéé nchaá ñáyi yìndehu distritú Síríá ní níhí-yu tñúhu nchaá nācuáa quide Jèsús. Te ní queé-yu ñuú-yu te ndècá-yu nchaá ñáyi tnàhá ndì díí<sup>n</sup> núú cuèhé cuáhá<sup>n</sup> núú ndécú Jèsús. Te cuèi ñáyi xiyíhí, ndìhi ñáyi ñá túú-gă cāndá nihnu, ndìhi ñáyi yìhi ñaha espíritú cūndìhi yucu ñávāha ndècá-yu cuáhá<sup>n</sup> núú-gă, te nchaá-yu ní quide tātna ñaha-gă xií-yu.

<sup>25</sup> Te ío vai ñáyi ní chinchícú<sup>n</sup> ñáhá xii Jèsús, chi ní chinchícú<sup>n</sup> ñáhá ñáyi distritú Galileá, ndìhi ñáyi nchaá ñuú xīndāa Dècāpólís, ndìhi ñáyi ñuú Jerusálén, ndìhi cue ñáyi nchaá ñuú yīndèhu distritú Jùdeá, ndìhi ñáyi xīndecu yatni yúte Jòrdán ndāa xio quene nchícanhii.

## 5

*Jèsús núcöo-gá ì<sup>n</sup> núú tìndúú dánèhé-gá ñáyi*

<sup>1</sup> Te sātá ní xiní Jèsús sá cuèhé víhí ñáyi nchícú<sup>n</sup> ñáhá xii-gá, te ní xica-gá cuásaa-gá ì<sup>n</sup> núú tìndúú te xiá<sup>n</sup> ñí ngóo-gá, te cue téé xica cuu ndìhi-gá ní nadúcú<sup>n</sup> ndèé ñáhá-güedé xii-gá.

<sup>2</sup> Te ní ngüíta-gá dánèhé ñáhá-gă xii-güedé ndìhi cue ñáyi-á<sup>n</sup>, te xăha<sup>n</sup>-gă:

*Cuendá ñáyi ío váha táhú-xi*  
(Lc. 6:20-23)

<sup>3</sup> —Váha táhú nchaá ñáyi cūtnuní iní-xi sá ío-gá cūmāñi-yu cudíu-yu núú Yá Ndiöxí, chi ñáyi-á<sup>n</sup> nduu táhú-yu ndíhu ndaha ñaha-gá xií-yu.

<sup>4</sup> Váha táhú nchaá ñáyi ndàhyú sá ndíhú iní-yu, chi Yá Ndiöxí cuāñaha-gă tñúhu ndee iní cundecu ndíhí-yu.

<sup>5</sup> Váha táhú nchaá ñáyi ndàhú iní-xi, chi ñáyi-á<sup>n</sup> nduu táhú-yu cundecú-yu ì<sup>n</sup> xichi núú cuāñaha Yá Ndiöxí xií-yu.

<sup>6</sup> Váha táhú nchaá ñáyi ío cūnì cada nchaá nācuáa cāhá<sup>n</sup> Yá Ndiöxí, chi ñáyi-á<sup>n</sup> ío nduu vétú iní-yu.

<sup>7</sup> Váha táhú nchaá ñáyi cūndahú iní tnàha ñáyi-xi, chi ñáyi-á<sup>n</sup> dīu-ni duca<sup>n</sup> cāda ñaha Yá Ndiöxí xií-yu cundahú iní ñáhá-gă.

<sup>8</sup> Váha táhú nchaá ñáyi ní nduu ndoo ní nduu nine iní-xi, chi cue ñáyi-á<sup>n</sup> nduu táhú-yu cundecú-yu ndìhi Yá Ndiöxí.

<sup>9</sup> Váha táhú nchaá ñáyi cāhá<sup>n</sup> dóho tnàha ñáyi-xi nācuáa cundecu ndìhi váha tnàhá-yu, chi cūtnuní sá ñáyi-á<sup>n</sup> cuú-yu déhe Yá Ndiöxí.

<sup>10</sup> Váha táhú nchaá ñáyi ío ndòho ndecu ñuyíú-a sá cuendá sá quidè-yu nācuáa cāhá<sup>n</sup> Yá Ndiöxí, chi ñáyi-á<sup>n</sup> nduu táhú-yu ndíhu ndaha ñaha-gá xií-yu.

<sup>11</sup> Te cū-ndo ñáyi ío váha táhú-xi te núu na cūcuèhé ñáhá ñáyi, àdi cada úhú ñáhă-yu xii-ndo, àdi dācaā díquí ñáhă-yu nāndi cuèchi neñuú xii-ndo sá cuendá-í.

12 Te òré duca<sup>n</sup> na càda ñahá-yu xii-ndo te cudíí víhí-ní ìní-ndó cùndecu-ndo, chi ío váha càa sá ndécú àndi<sup>u</sup> nduu táhú-ndó cùndecu ndi<sup>hi</sup>-ndo nduu na saá-ndó yàcá<sup>n</sup> cundecu-ndo, chi ñi<sup>u</sup>-ni duca<sup>n</sup> ñí xóo cada ñaha cuè ñani tnáhã-yu xii cue tée ní xóo cáhá<sup>n</sup> tnúhu Yá Ndiöxí ní xíndecu ndéé sanaha.

*Cuèndá ñíí ndi<sup>hi</sup> cuèndá ñuhú  
(Mr. 9:50; Lc. 14:34-35)*

13 "Te nchòhó cada ìní-ndó sá cúu-ndó dàtná ñíí cuèndá ñuyíu-a. Te ñíí chi nàndí<sup>hi</sup>-xi dico núu na ndùu víxi<sup>n</sup>-xi, te ñá túú-gã nándí<sup>hi</sup>-xi chi dǎngoyo-ná-ó, te yãha ñáyiu xèihnú-yu. Te duca<sup>n</sup> sǎtnahá-xi cùu nchohó chi cùu-ndo datná ñíí vãha te núu na càda váha-ndo, te núu vá cáda váha-ndo te quee tíhú-ndó.

14 "Te nchòhó cada ìní-ndó sá cúu-ndó dàtná ñíí sá dáyehé ndécú ñuyíu-a, chi sànu ichi-ndo ñáyiu ichi váha. Te nchòhó xìní-ndó sá nũu ñíí ñúú cáá ñíí núú tìndúú te vá cúu cǎchí-ó sá nguivãha-xi.

15 Te ñá túú xìní-ó ñíí ñáyiu teñuhú-yu ñíí ìntèrná te chivãha-yu xití ñíí càjá, chi tàxi ndecú-yu núu ñíí cuèndá cutnùní núu nchãa ñáyiu ndècu vehe.

16 Te duca<sup>n</sup> càda nchohó cada váha-ndo dàtná quidé ñíí ñuhú dayèhe-xi núu ñáyiu, te duca<sup>n</sup> quini ñáyiu nãcuáa quide-ndo ndecu-ndo, te tnáhã-yu cachí-yu sá ño cãhnu cuu Dútú Ndiöxí Yaá cúu Tǎtá-ndó ndècu andi<sup>u</sup> chi quini-yu sá quidé vãha-ndo ndècu-ndo.

*Cuèndá tnúhu ní chídó tnùní ndíi Moisés*

17 "Te vá cáni ìní-ndó sá yǎhú véxi-í xocani-í tnúhu ní chídó tnùní ndíi Moisés, te ní vá cáni ìní-ndó sá véxi-í xocani-í tnúhu ní chídó tnùní cue tée ní xóo cáhá<sup>n</sup> tnúhu Yá Ndiöxí ndéé sanaha, chi yúhú véxi-í sá cáda-í nãcuáa cáhá<sup>n</sup> nchaa tnúhu-á<sup>n</sup>.

18 Te na cǎchí tnúhu ndáá-í xii-ndo sá tnúhu ní chídó tnùní ndíi Moisés ío ndáá cáhá<sup>n</sup>-xi, chi dacuítí cùu nchaa nacuáa cáhá<sup>n</sup>-xi. Te yáchí-gá naa

andi<sup>u</sup> ndi<sup>hi</sup> ñuyíu dàcúúxí sǎ quèe cáva ñíí tnúhu-á<sup>n</sup>.

19 Núu xǎã<sup>n</sup> nchaa ñáyiu na cǎchí sá dává tnúhu ní chídó tnùní ndíi Moisés ñá túú xini ñuhú-xi chi ñá túú cùnũu-xi, te ñáyiu-á<sup>n</sup> ñi<sup>u</sup>-ni duca<sup>n</sup> dànehé-yu nchaa dava-gá tnàha ñáyíu-yu, te sá dúcá<sup>n</sup> quidé-yu te vá cùnũu vihi-yu núu ndécú Yǎ Ndiöxí táxi tnùní-gá, chi cuú-yu dàtná ñíí ñáyiu nchicú<sup>n</sup> cuíí-nǎ. Dico nchaa ñáyiu nchicú<sup>n</sup> nihnu quide nchaa nacuáa cáhá<sup>n</sup> nchaa tnúhu-á<sup>n</sup>, te ñi<sup>u</sup>-ni duca<sup>n</sup> dànehé-yu nchaa dava-gá tnàha ñáyíu-yu, te ñáyiu-á<sup>n</sup> ío cùnũu-yu núu ndécú Yǎ Ndiöxí táxi tnùní-gá.

20 Te na cǎchí tnúhu-í xii-ndo sǎ ño xini ñuhú-xi cada-ndo nchaa nacuáa cáhá<sup>n</sup> Yǎ Ndiöxí, te vá cáda-ndó dàtná xǎquide cue tée dànehé ñáhã xii ñáyiu nchaa tnúhu ní chídó tnùní ndíi Moisés, ndi<sup>hi</sup> dàtná xǎquide cue tée cùu fariséú, chi núu na càda-ndo datná xǎquide cue tée-á<sup>n</sup> ñá, te vá ndúú táhú-ndó ndi<sup>hu</sup> ndaha ñàha Yá Ndiöxí xii-ndo.

*Jesús cáhá<sup>n</sup>-gá cuèndá ñáyiu cùdèé<sup>n</sup>  
(Lc. 12:57-59)*

21 "Te nchòhó sa xìní-ndó sǎ ncháá ñáyiu ní cuu ñani tnáhã-ndó ní xíndecu ndéé sanaha ñíí níhí-yu tnúhu sá vá cúu cãhni-yu tnàha ñáyíu-yu, chi núu duca<sup>n</sup> na cáda-yu te nacháhu-yu cuéchi-yu.

22 Dico vitna na cǎchí tnúhu-í xii-ndo sǎ nũu ndédani càa-ndo na cudéé<sup>n</sup>-ndó nũu tnàha ñáyiu-ndo, te nacháhu-ndo sǎ dúcá<sup>n</sup> quide-ndo, àdi núu na cǎcuèhé-ndó-yu te núu chítú nũu tàcá cundáá cuéchi-ndo te núu duca<sup>n</sup> na càda-ndo, àdi núu nà cúu-ndo tnàha ñáyiu-ndo ñíí tnúhu vée vihi, te cucuèchi vihi xii-ndo chi quíhí<sup>n</sup>-ndó nũu ùhú núu ndàhú.

23 "Te xǎã<sup>n</sup> nũu nchòhó òré ndécú ndi<sup>hi</sup>-ndo ñíí sá cuìní-ndó cuãha-ndo Yǎ Ndiöxí nduu táhú-gã, te òré cuáhã<sup>n</sup>-ndó cuãñaha-ndo xii-gá, te òré ní quexìo-ndo núu dúcá<sup>n</sup> cuãñaha-ndo xii-gá sá ndúú táhú-gã, te ní ndacu ìní-ndó sǎ ndécú ñáyiu ñá

túú cùu váha iní ñáhá xii-ndo cuendá ìí<sup>n</sup> sá ñí cumání núú tnáhá-ndó.

24 Te dàndóo-ndo sá dúcá<sup>n</sup> nèhe-ndo cuáhá<sup>n</sup> nduu táhú Yá Ndiõxí, te díhna-gá quíhí<sup>n</sup>-ndó nàcahá<sup>n</sup> cáhnú iní tnáhá-ndó ndìhí ñáyiu ñá túú cùu váha iní ñáhá xii-ndo-á<sup>n</sup>, te dàtnùní duca<sup>n</sup> te quíhí<sup>n</sup>-ndó cuáha-ndo Yá Ndiõxí sá ndúú táhú-gă.

25 "Te núu ió ìí<sup>n</sup>-ndo ñí sáhá<sup>n</sup> ñáyiu núú tée cùchiu<sup>n</sup> ní sacá<sup>n</sup> cuéchi-yu cuendá-ndó cuendá ìí<sup>n</sup> sá ñí quide-ndo, te òré ní naníhí tnáhá-ndó ndìhí-yu cuáhá<sup>n</sup>-ndó núú tée cùchiu<sup>n</sup>-á<sup>n</sup>, te nacáhá<sup>n</sup> cáhnú iní tnáhá-ndó ndìhí-yu cuendá sá vă cuáha cuendá ñáhá-gă-yu xii-ndo núú tée cùchiu<sup>n</sup>, chi núu duca<sup>n</sup> na cãdá-yu te tée cùchiu<sup>n</sup>-á<sup>n</sup> cuáha cuendá ñáhá-dě xii-ndo núú cué tée cùu poleciá, te cue tée-á<sup>n</sup> chihi ñaha-güedě vecaá xii-ndo.

26 Te na cãchí tnúhu ndáá-í xii-ndo sá vă cãcu-ndo te núu na ngáva-ndo vecaá ndéé nacháhu-ndo nchaa sá tàú-ndó.

*Cuendá cue ñáyiu ñá túú quide váha*

27 "Te nchòhó sa xini-ndó nacuáa ndùu tnúhu ní cãhá<sup>n</sup> cue tée ní xindecu ndéé sanaha, te duha ní cachí-güedé: "Nchaa cue tée vá cúú cãhá<sup>n</sup> ndìhí-güedé ñadìhí te núu ñá díú ñadìhí-güedé cúú-yu, te diu-ni duca<sup>n</sup> tùcu nchaa cue ñáyiu dìhí vá cúú cãhá<sup>n</sup> ndìhí-yu tée te núu ñá díú yíí-yu cùu-güedé", duha ní cachi-güedé.

28 Dico yúhú cãchí tnúhu-í xii-ndo sá nděda-ni cãa cue tée na cundehe ìí<sup>n</sup> ñadìhí te núu na cãni iní-güedé cundecu díí iní-güedé ndìhí-yu te cada iní-ndó sá dàtná sá sá ní cãhá<sup>n</sup> ndìhí ñaha-güedě xii-yu sá dúcá<sup>n</sup> ñí sani iní-güedé.

29 "Te núu ìí<sup>n</sup> xio tinùu-ndo quide-xi quide-ndo nándi sá cuèhé sá dúhá te tava-ndo, chi váha-gá sá ná cuíta te ñá díú ñihí ní ndúú yiquí cuñú-ndó quíhí<sup>n</sup>-xi núú ùhú núú ndàhú.

30 Te núu ìí<sup>n</sup> xio ndaha-ndo quide-xi quide-ndo nándi sá cuèhé sá dúhá te quehndé-ndó, chi váha-gá sá ná cuíta ìí<sup>n</sup> xio ndaha-ndo te ñá díú sá ñihí

ní ndúú yiquí cuñú-ndó quíhí<sup>n</sup>-xi núú ùhú núú ndàhú.

*Jèsús cãhá<sup>n</sup>-gá cuendá cue ñáyiu dàña tnaha*

(Mt. 19:9; Mr. 10:11-12; Lc. 16:18)

31 "Te nchòhó sa naha tucu-ndo nacuaa ní cãhá<sup>n</sup> tucu cue tée ní xindecu ndéé sanaha, te duha ní cachí-güedé: "Te núu ìí<sup>n</sup> tée na dàña tnaha-dé ndìhí ñadìhí-dé, te xini ñuhu-xi cadúha-dé ìí<sup>n</sup> tutú cuañaha-dě núú cãhá<sup>n</sup>-xi sá ñí dáña ñaha-dé", duha ní cachí-güedé.

32 Dico yúhú cãchí tnúhu-í xii-ndo sá cúú dàña ìí<sup>n</sup> tée ñadìhí-dé, te núu cùtnuní ndáá iní-dé sá cãhá<sup>n</sup> ndìhí-a<sup>n</sup> ingá tée. Dico núu ñá túú dùca<sup>n</sup> quide-a<sup>n</sup> te ñá túú ndùu váha-xi daña ñaha-dé. Te núu ñá túú dùca<sup>n</sup> quide ñadìhí-dé, te cada iní-ó sá méé-dě ní sanu ichi ñaha-dě xii-a<sup>n</sup> cãhá<sup>n</sup> ndìhí-a<sup>n</sup> ingá tée te núu na dàña ñaha-dé. Te tée na nàquehe<sup>n</sup> ñaha xii ñaha ní dáña ñaha yíí-xi-á<sup>n</sup>, te diu-ni ñá túú ní quide váha-dé sá dúcá<sup>n</sup> ñí naquehe<sup>n</sup>-dé ñaha-á<sup>n</sup>.

*Ñáyiu cãcunehe ñaha xii Yá Ndiõxí cuendá cutnùní iní tnaha ñáyiu-yu sá ndáá cada-yu ìí<sup>n</sup> sá sání iní-yu cada-yu*

33 "Te sa naha tucu-ndo nacuaa ní cãhá<sup>n</sup> tucu cue tée ní xindecu ndéé sanaha, chi cue tée-á<sup>n</sup> ní cachí-güedé: "Te núu cãcunehe-ndo Yá Ndiõxí núú tnaha ñáyiu-ndo nacuáa cutnùní iní-yu sá ndáá cada-ndo ìí<sup>n</sup> sá sání iní-ndó cãda-ndo, te cada-ndo", duha ní cãhá<sup>n</sup> dóho tnaha-güedé.

34 Dico yúhú cãchí tnúhu-í xii-ndo sá ñá túú nã cacunehe-ndo sá ndáá cada-ndo ìí<sup>n</sup> sá sání iní-ndó cãda-ndo. Te ni vă cãcú nèhe-ndo andiu chi yacá<sup>n</sup> cúú-xi núú núcõo Yá Ndiõxí táxí tnùní-gá.

35 Te ni vă cãcú nèhe-ndo ñuyíú-a, chi tnáhá ñuyíú-a ndècu-gá, te ni vă cãcú nèhe-ndo ñuú Jerusalén chi ñuú-á<sup>n</sup> cúú cuendá-gá, te diu-gá cúú-gă Yaá ío cùnuu.

36 Te ni vă cãcú nèhe-ndo díquí-ndó chi naha-ndo sá ñí ìí<sup>n</sup> idi díquí-ndó ñă ndácú-ndó ndàda cuixí<sup>n</sup>-ndó àdi ndada tnuu-ndo.

37 Te váha-gá sá núu ñ<sup>n</sup> sá sání iní-ndó càda-ndo, te cachí-ni-ndo: “Cuu cada-ndí, àdi vá cúú càda-ndí”, cachí-ni-ndo. Chi nchaa dava-gá sá chídó-ndó càhá<sup>n</sup>-ndó òré duca<sup>n</sup> sání iní-ndó càda-ndo ñ<sup>n</sup> sá cáda-ndó cùu-xi sá dácàhu iní ñáhá yùcu ñávàha.

*Cuèndá ñáyiu nàchinaa sá quidé ñàha tnaha ñáyiu-xi*

*(Lc. 6:29-30)*

38 Te sa nàha tucu-ndo nacuáa ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Ñáyiu na càda ñaha tnaha ñáyiu-xi ñ<sup>n</sup> sá ñà túú vâha, te nanchòcáva-yu nachinaá-yu sá ñi quide ñaha tnaha ñáyíu-yu”, duha ní cachí-güedé.

39 Dico yúhú càchí tnúhu-í xii-ndo sá ñà túú ñà cada-ndo nchàa cue ñáyiu cuihna iní-xi te núu quide ñahá-yu ñ<sup>n</sup> sá ñà túú vâha xii-ndo. Te núu ní canihá-yu ñ<sup>n</sup> xito te cuíni tucú-yu canihá-yu ingá xito te dañà-ndo na canihá-yu.

40 Àdi ní sacá<sup>n</sup> cuéchi-yu núu cuè téé cùchiu<sup>n</sup> cuendá-ndó, te cuíni-yu quendeé-yu dúhnú-ndó te dañà-ndo na canehé-yu quíhí<sup>n</sup>, te tnàhá-ni dóó ndíxí ndòdo-ndo dañà-ndo na canehé-yu quíhí<sup>n</sup>.

41 Te núu quide yicá-yu caca-ndo dàtná úú kilómetrú cuido-ndo ndàchiú<sup>n</sup>-yu ña, te chido-ndo úú-gá tucu kilómetrú cuido-ndo ndàchiú<sup>n</sup>-yu.

42 Te núu ió ñ<sup>n</sup> sá xìcá<sup>n</sup>-yu núu-ndó te cuáñaha-ndo, àdi ió ñ<sup>n</sup> sá sánúu-yu núu-ndó te cuáñaha nùu-ndo.

*Cuu iní-ó nchàa ñáyiu cùu úhú iní ñáhá xii-o*

*(Lc. 6:27-28, 32-36)*

43 Te sa nàha tucu-ndo nacuáa ní cachí tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Cuu iní-ndó cuè ñáyiu ndècu ndihí váha-ndo, te cuu úhú iní-ndó cuè ñáyiu cùu úhú iní ñáhá xii-ndo”, duha ní cachí-güedé.

44 Dico yúhú càchí tnúhu-í xii-ndo sá cúú iní-ndó cuè ñáyiu cùu úhú iní ñáhá xii-ndo, te cáhá<sup>n</sup> váha-ndo cuèndá cue ñáyiu càhá<sup>n</sup> úhú ñáhá

xii-ndo, te cada-ndo sá vâha sá cúú-xi cuè ñáyiu cùu úhú iní ñáhá xii-ndo, te cáhá<sup>n</sup> ndihí-ndo Yá Ndiöxí cuèndá cue ñáyiu xícuèhé ñáhá xii-ndo, ndihí cuèndá cue ñáyiu quide úhú ñáhá xii-ndo.

45 Te núu na càda-ndo nchaa nacuáa càhá<sup>n</sup>-í-a, te duca<sup>n</sup> te cutnùni sá cúú-ndó dèhe Tátá-ndó Dútú Ndiöxí Yáa ndécú àndiu. Te diu-gá cúú-gá Yáa quidé quène nchíanchii, te diu-ni-gá cúú-gá Yáa dácùu<sup>n</sup> dáú ñuyíu-a, te duca<sup>n</sup> quide-gá cuèndá cuu-xi sá vâha sá cúú-xi cuè ñáyiu quide váha, ndihí sá cúú-xi cuè ñáyiu ñà túú quide váha.

46 Te núu nchòhó ná cúú iní-ndó mèe-ni ñáyiu na cùu iní ñáhá xii-ndo, te vá càchí-ndó sá Yá Ndiöxí taxi-gá sá ndúú tãhú-ndó sá dúcá<sup>n</sup> quide-ndo, chi cuèi cue téé cuihna iní-xi quide cobrá ñáhá xii cue ñáyiu cuèndá impuèstú duca<sup>n</sup> xíquide-güedé.

47 Te núu mee-ni ñáyiu ndècu ndihí váha-ndo ïo váha cáhá<sup>n</sup> ndihí-ndó-yu, te vá càchí-ndó sá ïo váha quide-ndo sá dúcá<sup>n</sup> quide-ndo, chi cuèi ndéé nchaa ñáyiu ñà túú xini dana cuèndá Yá Ndiöxí duca<sup>n</sup> xíquide-yu.

48 Te duha ndùu tnúhu càhá<sup>n</sup>-í cuèndá sá nchòhó cada ndáá-ndó cùndecu-ndo datná quidé ndáá méé Tátá-ndó Dútú Ndiöxí Yáa ndécú àndiu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáyiu.

## 6

*Jèsús dánèhé-gá ñáyiu nàcuáa cadá-yu sá vâha*

1 Te Jèsús ndécú-ni-gá dánèhé-gá cue téé xica cuu ndihí-gá ndihí nchaa ñáyiu, te xãha<sup>n</sup>-gã:

—Te òré quidé-ndó sá vâha te vá cáda-ndó núú ñáyiu cuèndá-ni sá cuíni-ndó cãhá<sup>n</sup> váha-yu cuèndá-ndó, chi núu núú ñáyiu duca<sup>n</sup> na càda-ndo te Dútú Ndiöxí Yáa cúú Tátá-ndó vá táxi-gã sá ndúú tãhú-ndó.

2 Te xiã<sup>n</sup> núu nchòhó òré chindèe-ndo ñáyiu ndàhú, te vá cñaha-ndo xii cue ñáyiu sá chindèe-ndo cue ñáyiu ndàhú-á<sup>n</sup> dàtná xíquide cue ñáyiu dândahú méé-xi sá quidé

ndää te ñá ndää sá quidé ndää-yu, chi ñáyiú-á<sup>n</sup> duca<sup>n</sup> xíquidé-yu òré sàhá<sup>n</sup>-yu veñúhu, chi dàtecú tnúhu-yu nchaa ñáyiú òré duca<sup>n</sup> chindeé-yu ñáyiú ndàhú. Te ñáyiú-á<sup>n</sup> duca<sup>n</sup> quidé-yu xáhã<sup>n</sup>-yu xii cue ñáyiú sá chindèé-yu cue ñáyiú ndàhú-á<sup>n</sup> nchaa núú xicá cùú-yu, te duca<sup>n</sup> xíquidé-yu cuèndá cuíní-yu cáhá<sup>n</sup> váha ñáyiú cuèndá-yu. Te yúhú na càchí tnúhu ndáá-í xii-ndo sã ñà túú nã nduu táhú ñáyiú-á<sup>n</sup> núú Yã Ndiõxí sá dúcá<sup>n</sup> quidé-yu chi mee-ni núú tnàha ñáyiú-yu cùú-yu.

<sup>3</sup> Te nchòhó òré chindèe-ndo ñáyiú ndàhú, te cuèi ñáyiú ío-gá váha ndècu ndihi-ndo dico vá cũñaha-ndo sã dúcá<sup>n</sup> chindee-ndo cue ñáyiú ndàhú-á<sup>n</sup>, te ni cuè dava-gá ñáyiú vá cũñaha-ndo.

<sup>4</sup> Chi váha-gá sá ìní méé-ní-ndó ná cùhu<sup>n</sup> sá dúcá<sup>n</sup> chindee-ndo cue ñáyiú ndàhú-á<sup>n</sup>. Te núú duca<sup>n</sup> na càda-ndo ña, te Dútú Ndiõxí Yaá cúú Tãtã-ndó tàxi-gá sá ndúú táhú-ndó chi ñáyiú-á<sup>n</sup> mee-gã ndéhé-gã nãcuáa quide-ndo ndecu-ndo.

*Jèsús dánhé-gá ñáyiú nãcuáa cáhá<sup>n</sup> ndihi-yu Yã Ndiõxí (Lc. 11:2-4)*

<sup>5</sup> Te nchòhó òré cáhá<sup>n</sup> ndihi-ndo Yã Ndiõxí, te vá cádá-ndó dàtná xíquide cue ñáyiú dándahú méé-xí càchí sá quidé ndää te ñá ndää sá quidé ndää-yu, chi ñáyiú-á<sup>n</sup> tnàhá ìní-yu cunutñí-yu cáhá<sup>n</sup> ndihi-yu Yã Ndiõxí òré yíhí-yu veñúhu. Te ñáyiú-á<sup>n</sup> duca<sup>n</sup> xíquidé-yu nchaa núú xicá cùú-yu, te duca<sup>n</sup> quidé-yu cuèndá sá cuíní-yu quíní ñáyiú nãcuáa xíquidé-yu. Te na càchí tnúhu ndáá-í xii-ndo sã ñà túú nã nduu táhú ñáyiú-á<sup>n</sup> núú Yã Ndiõxí sá dúcá<sup>n</sup> quidé-yu chi mee-ni núú tnàha ñáyiú-yu cùú-yu.

<sup>6</sup> Te nchòhó òré cuíní-ndó cáhá<sup>n</sup> ndihi-ndo Yã Ndiõxí, te ndíhu ndedí nihnu-ndo xití vehe-ndo, chi ñáyiú-á<sup>n</sup> dúú Tãtã-ndó te ndècu ndihi ñaha-gá xii-ndo, te ñáyiú-á<sup>n</sup> mee-gã ndéhé ñaha-gá xii-ndo nãcuáa quide-ndo, te núú duca<sup>n</sup> na càda-ndo te taxi-gá sá ndúú táhú-ndó.

<sup>7</sup> Te òré cáhá<sup>n</sup> ndihi-ndo Yã Ndiõxí te vá súúni cuèndá-ni dàcaá-ndó tnúhu cáhá<sup>n</sup> ndihi-ndo-gã dàtná xíquide cue ñáyiú ñá túú xini tnúhu-gá, chi ñáyiú-á<sup>n</sup> sání ìní-yu sá tédõho ñaha vihi-gá Yã Ndiõxí xii-yu sá dúcá<sup>n</sup> súúni dàcaá-yu tnúhu cáhá<sup>n</sup> ndihi ñaha-yu xii-gá dico ñaha.

<sup>8</sup> Dico nchòhó, vá cádá-ndó dàtná xíquide cue ñáyiú-á<sup>n</sup>, chi mee Tãtã-ndó Dútú Ndiõxí sa ñaha-gá ná cúú nchaa sá xini ñuhu-ndo cuèi òré vátá cacá<sup>n</sup>-gã-ndó núú-gã.

<sup>9</sup> Te duha cáhá<sup>n</sup>-ndó òré cáhá<sup>n</sup> ndihi-ndo Yã Ndiõxí:

Yòhó Tãtã-ndí Dútú Ndiõxí Yaá ndécú àndíu,

nchaa ñáyiú na cáhá<sup>n</sup>-yu sá cúú-n Yàá ío yíñúhu.

<sup>10</sup> Te xicá<sup>n</sup> táhú-ndí núú-n sã ná sàá nduu ndíhu ndàhá-n-yu.

Te cada-n dàtná càchí ìní-n ñùyíú-a dàtná quidé-n àndíu.

<sup>11</sup> Te xicá<sup>n</sup> táhú-ndí núú-n sã táxi-n sã cóhó-ndí sá cáxi-ndí ñá nduu ñá nduu.

<sup>12</sup> Te cada càhnu ìní-n nchaa yicá cuèchi-ndí, chi tnàhá nchúhú quidé càhnu ìní-ndí nchaa sá quidé ñaha tnaha ñáyiú-ndí.

<sup>13</sup> Te vá dáñá-n dàcahá<sup>n</sup> ñaha yùcu ñávãha xii-ndí cada-ndí sã ñà túú vãha, chi coto ñaha-n xii-ndí cuèndá sã vã dúcá<sup>n</sup> càda ñaha-xi.

Te ñáyiú-á<sup>n</sup> cùú-n Yãá ío cùnnu nchaa nduu nchaa quíú, te ío càhnu cuu-n, te ñáyiú-á<sup>n</sup> ni-n quíndaha ñaha-n xii-ndí ni caa ni quíhí<sup>n</sup>. Te duca<sup>n</sup> na cùnduu.

Duha dánhé ñaha-í xii-ndo cáhá<sup>n</sup> ndihi-ndo Yã Ndiõxí.

<sup>14</sup> Te núú nchòhó quidé càhnu ìní-ndó nchaa sá quidé ñaha tnaha ñáyiú-ndo, te duca<sup>n</sup> te Tãtã-ndó Dútú Ndiõxí Yaá ndécú àndíu cada càhnu ìní-gã nchaa sã ñà túú váha quide-ndo tucu.

<sup>15</sup> Dico núú nchòhó vá cádá càhnu ìní-ndó nchaa sá quidé ñaha tnaha ñáyiú-ndo ña, te ni Dútú Ndiõxí Yaá cúú Tãtã-ndó vã cádá càhnu ìní-gã nchaa sá quidé-ndó tucu.

*Cuendá ñáyiú ñá túú tnàhí ná xéxí  
ãma càhá<sup>n</sup> ndihí-yu Yá Ndiõxí*

16 "Te nchòhó, nduu ñà túú tnàhí ná xéxí-ndó càhá<sup>n</sup> ndihí-ndo Yá Ndiõxí, te vá cùndiyí-ndó dàtná xĩquide nchaa ñáyiú dándahú méé-xí càchí sá quidé ndáá te ñá ndáá sá quidé ndáá-yu, chi ñáyiú-á<sup>n</sup> duca<sup>n</sup> xĩquidé-yu cuendá sá cuíní-yu cutnùní iní ñáyiú sá ñà túú tnàhí ná xéxí-yu càhá<sup>n</sup> ndihí-yu Yá Ndiõxí. Te yúhú càchí tnúhu-í xii-ndo sá sà dúcá<sup>n</sup> quidé-yu te ñá túú nã chindee ñàha-xi xii-yu cuendá nihí-yu ì<sup>n</sup> sá ndúú tãhú-yu núú Yá Ndiõxí.

17 Dico nchòhó, nduu dùca<sup>n</sup> quide-ndo ñá túú tnàhí ná xéxí-ndó càhá<sup>n</sup> ndihí-ndo Yá Ndiõxí, te váha váha naquete-ndo núú-ndó, te váha váha chihi-ndo cùcá

18 cuendá sá vã cùtnùní iní ñáyiú sá ñà túú nã xéxí-ndó nduu duca<sup>n</sup> càhá<sup>n</sup> ndihí-ndo Yá Ndiõxí. Te Dútú Ndiõxí Yaá cúú Tãtá-ndó ndècu ndihí-ndo ñu-ni mee-gã ndéhe-gã nàcuáa quide-ndo ndecu-ndo, te ñu-gã taxi-gã sá ndúú tãhú-ndó.

*Cuendá nchaa sá váha nduu táhú-ó  
(Lc. 12:33-34)*

19 "Te vá caní iní-ndó cùu-ndo ñáyiú cuica nãndi sá cùndècu ndihí-ndo ñuyiú-a chi vá cùdii-xi, chi dava quee tíquidi, te dava caxi cudi ñùhu, àdi quíhu ñadúhú vehe-ndo te duhu-güedè.

20 Te váha-gã chí ndúcú nàcuáa cada-ndo cuendá duca<sup>n</sup> ngündecu sá ndúú tãhú-ndó àndiu, te xiã<sup>n</sup> cudii-xi cundecu ndihí-ndo ñi caa ñi quíhí<sup>n</sup>, chi yàcá<sup>n</sup> vá queé-gã tíquidi, te ñi vã cáxí-gã cudi ñùhu, te ñi vã quíní-gã-ndó ñadúhú duhu-güedè ndachii<sup>n</sup>-ndo.

21 Te núú cùu-ndo ñáyiú cuica ndècu ñuyiú-a, te ñu-ni nchaa sá ndécú ndihí-ndo ñuyiú-a ñùhu iní-ndó. Àdi cuu-ndo ñáyiú quide nacuáa ngündecu sá ndúú tãhú-ndó àndiu, te ñu-ni sá ndúú tãhú-ndó ndècu àndiu-á<sup>n</sup> ñùhú iní-ndó.

*Núú-ó cùu-xi datná ì<sup>n</sup> ñuhú  
(Lc. 11:34-36)*

22 "Te cada iní-ndó sã núú-ndó cùu-xi datná ì<sup>n</sup> ñuhú. Te núú núú-ndó càváha te cùtnùní iní-ndó nã cúú sã ndécú núú-ndó.

23 Dico núú cùhú núú-ndó ñà túú cùtnùní cundehe-ndo ña, te ñá túú cùtnùní iní-ndó nã cúú sã ndécú núú-ndó. Te sá dúcá<sup>n</sup> cùhú núú-ndó te cada iní-ndó sã ndécú-ndó dàtná ì<sup>n</sup> núú néé. Te duha nduu tnúhu càhá<sup>n</sup>-í chi núú sàni váha iní-ndó cuendá Yá Ndiõxí ñá, te cùu vii cuu váha iní-ndó ndècu-ndo. Á<sup>n</sup> te núú ñá túú sàni váha iní-ndó cuendá-gã ñá, te ñá túú tnàhí cùu váha iní-ndó ndècu-ndo. Te sá dúcá<sup>n</sup> ñà túú sàni váha iní-ndó cuendá-gã te cada iní-ndó sã ndécú-ndó dàtná ì<sup>n</sup> núú néé.

*Vá ndácú ì<sup>n</sup> téé cunu cuechi-dè núú  
ùú pãtróó<sup>n</sup>  
(Lc. 16:13)*

24 "Te ñi ì<sup>n</sup> téé xĩnu cuechi vá ndácú-dè cunu cuechi-dè núú ùú pãtróó<sup>n</sup>, chi téé-á<sup>n</sup> cuu váha iní-dé núú ì<sup>n</sup> pãtróó<sup>n</sup>-dè te tnii-dé nchaa tnúhu càhá<sup>n</sup> pãtróó<sup>n</sup> téé cùu váha iní-dé núú-xi-á<sup>n</sup>. Te núú ñngá tucu pãtróó<sup>n</sup>-dè vá cúú váha iní-dé, te ñi vã tnii-dè tnúhu càhá<sup>n</sup> ñngá téé-á<sup>n</sup>. Te duca<sup>n</sup> sãtnahá-xi cùu nchahó chi vá ndácú-ndó cunu cuechi-ndo núú Yá Ndiõxí te cuhu<sup>n</sup> iní-ndó nchaa sá ño ñuyiú-a.

*Yá Ndiõxí xitó-gã nchaa ñáyiú cùu  
déhe-gã  
(Lc. 12:22-31)*

25 "Te na càchí tnúhu-í xii-ndo sã vã ño caní iní-ndó núú nása nihí-ndó sã cóhó sã cáxí-ndó, te ñi vã ño caní iní-ndó núú nása nihí-ndó dõó cuihnu-ndo, chi cùnuu-gã méé-ndó dàcúxí sã nchító-ndó, te duca<sup>n</sup> cùnuu-gã yiqui cùnú-ndó dàcúxí dõó sácuihnu-ndo.

26 Te chí cadá cuendá sá ncháá quiti ndava ñá túú tnàhí ná xitú-güedi, te ñi ñà túú ndèé cuáhá<sup>n</sup>-güedi nàtahu-güedi, te ñi ñà túú nã nãtãxúha-güedi, te ñi ñà túú ndèé cáá yàcá-güedi, chi mee Tãtá-ó Dútú Ndiõxí Yaá ndécú àndiu xito ñaha-gã xii-güedi nihí-güedi sá xéxí-güedi. Te núú cue quiti-á<sup>n</sup> duca<sup>n</sup> xito ñaha-gã

xii-güedi, jte uu<sup>n</sup>-gá xító ñàha-gá xii nchòhó, chi nchòhó ío-gá cúnùu-ndo dacúxí cuè quiti-á<sup>n</sup>!

27 Te cuèi nándi sá sání vîhi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ì<sup>n</sup> yiqui-gă.

28 Te vá ìo cani iní-ndó nûu nása níhí-ndó dõo cuihnu-ndo. Te chí cáda cuendá nacuáa sàhnu nchaa itá ío yucu, chi nchaa itá-á<sup>n</sup> ñà túú quide chiu<sup>n</sup>-xi, te ni ñà túú quèhe<sup>n</sup>-xi idi.

29 Te na càchí tnúhu-í xii-ndo sã ndîi Salòmón cuèi ío vii ní xínduu dóo ñi xóo cuihnu ndîi, dico ñá túú nûtnahá-xi nacuáa càa nchaa itá, chí ío-gá vii càa nchaa itá.

30 Te nchaa itá ío yucu tnaa-ni cùdí-xi, te yìchí-xi te sàhmi ñáyiu. Te cuèi duca<sup>n</sup> dico mee Yã Ndiõxí quidé-gă ío vii sácúnduu-xi. Te núu nchaa itá-á<sup>n</sup> duca<sup>n</sup> quide-gă xító-gă sácúnduu vii-xi, te xíã<sup>n</sup> cùtnùní sá ío-gá coto ñaha-gă xii-ndo, dicó-ni sá ñà túú sàndáá vâha iní-ndó-gă.

31 Te xíã<sup>n</sup> nûu ñà túú xìni ñuhu vîhi-xi cani iní-ndó nûu nása níhí-ndó sã cóhó sã cáxí-ndó, àdi nása níhí-ndó dõo cuihnu-ndo.

32 Chi nchaa ñáyiu ñà túú xìní nacuáa càhá<sup>n</sup> tnúhu Yã Ndiõxí mee-ni nchaa xíã<sup>n</sup> ñúhú iní-yu. Dico nchòhó chí mee Tãtã-ndó Dütú Ndiõxí sa ñaha-gá ná cúú sã xìní ñuhu-ndo.

33 Te xíã<sup>n</sup> nûu ío xìni ñuhu-xi sá cúhú<sup>n</sup> iní-ndó sã Yã Ndiõxí yíndàha ñaha-gá xii-ndo, te duca<sup>n</sup> càda-ndo nchaa nacuáa cùní-gá, te duca<sup>n</sup> te taxi-gá nchaa sá xìní ñuhu-ndo.

34 Núu xíã<sup>n</sup> vá ìo cani iní-ndó nása cundecu-ndo ndùu tneé, chí cani iní-ndó nacuáa càda-ndo cundecu-ndo vitna, chí nduu tnèé-á<sup>n</sup> te òré-ñà te cutnùní nûu nása càda-ndo cundecu-ndo. Chi nchòhó sa ñaha-ndo sá ío títí níúú sã quidé-xí ì<sup>n</sup> nduu ì<sup>n</sup> nduu —duha ní dánèhé ñáhá Jèsús xii cue téé xica cuu ndîhi-gá ndîhi nchaa ñáyiu.

## 7

*Vá càhá<sup>n</sup> cuèhé-ó cuendá tnàha ñáyiu-o*

*(Lc. 6:37-38, 41-42)*

1 Te Jèsús ndècuu-ni-gá dánèhé-gá cue téé xica cuu ndîhi-gá ndîhi nchaa ñáyiu, te xãha<sup>n</sup>-gă:

—Vá càhá<sup>n</sup> cuèhé-ndó cuendá tnàha ñáyiu-ndo, te duca<sup>n</sup> te Yã Ndiõxí ñà túú ñà tnúhu cúñaha-gă xii-ndo.

2 Chi núu na càhá<sup>n</sup> cuèhé-ndó cuendá tnàha ñáyiu-ndo, te Yã Ndiõxí ío ì<sup>n</sup> sá cáda ñaha-gá xii-ndo. Te núu nchòhó ná càhá<sup>n</sup> cuèhé vîhí-ndó cuendá tnàha ñáyiu-ndo te Yã Ndiõxí ío-gá dandòho ñaha-gá xii-ndo.

3 ¿Te ná cuendá ndéhé-ndó ì<sup>n</sup> sá ñà túú vâha quide tnaha ñáyiu-ndo te mee-ndo vîhi-gá quidé-ndó-í? Te sá dúcá<sup>n</sup> quide-ndo te cada iní-ndó sã ndéhé-ndó dàtná ì<sup>n</sup> mihi líhli ñuhu núú tnàha ñáyiu-ndo te mee-ndo ñuhu ì<sup>n</sup> mihi cahnu-gá núú-ndó te ñà túú quide cuendá-ndó.

4 Te núu na nacanu ichi-ndo tnaha ñáyiu-ndo cuendá sá ñà túú quide vâha-yu ndècú-yu, te mee-ndo vîhi-gá quidé-ndó ñà, te cada iní-ndó sã xãha<sup>n</sup>-ndo xì tnaha ñáyiu-ndo sã nátava-ndo mihi líhli ñuhu núú-yu sá dúcá<sup>n</sup> quide-ndo, te mihi càhnu ñuhu núú méé-ndó ñà túú quide cuendá-ndó.

5 Te sá dúcá<sup>n</sup> quide-ndo te ío dandahú-ndó mèe-ndo sá quidé ndáá-ndó te ñà ndáá sá quidé ndáá-ndó, te xìni ñuhu-xi díhna-gá dañà-ndo nchaa sá ñà túú vâha quide-ndo, te dàtnùní duca<sup>n</sup> te cuu nacanu ichi-ndo tnàha ñáyiu-ndo cuendá nchaa sá ñà túú vâha quidé-yu.

6 Te nchaa ñáyiu ío sàá iní-xi, te vá cáda yìca-ndó-yu cundedòho-yu tnúhu Yã Ndiõxí, chí núu na càda yìca-ndó-yu te ngóo-yu cuu úhú iní ñáhã-yu xii-ndo. Te ñáyiu-á<sup>n</sup> cúú-yu dàtná iná chí quiti-á<sup>n</sup> nûu na cuãñaha-o ì<sup>n</sup> sá cuãñaha-o, te núu ñà túú cùtnuní iní-dí ná cúú xíã<sup>n</sup> te tnî ñaha-dí xì-o. Te cùu tucú-yu dàtná cùchí chí quiti-á<sup>n</sup> nûu na chùcu-o núú-dí yúú vâha sá ío vii càa nani pérlá, te dicó-ni cùnu sáhã-dí chí ñà túú cùtnuní iní-dí sá cúú-xí yúú vâha.

*Cácá<sup>n</sup>-ó núú Yã Ndiõxí nûu ná*



*cuini-ó*

*(Lc. 11:9-13; 6:31)*

7 Te na cächí tnúhu-í xii-ndo sã cãcã<sup>n</sup>-ndó nũú Yã Ndiõxí te núu ná cuini-ndó te taxi-gá, te vá dáñá ndeé-ndó cãcã<sup>n</sup>-ndó nũú-gã núu ná cuini-ndó te duca<sup>n</sup> te níhí-ndó. Te cada iní-ndó sã ní quexio-ndo vehe ì<sup>n</sup> tnaha ñáyiu-ndo te ní cáhá<sup>n</sup>-ndó, te ñáyiu-á<sup>n</sup> ní tedóho ñahá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chí Yã Ndiõxí tedóho ñaha-gã xii-ndo, te taxi-gá sã ná cãcã<sup>n</sup>-ndó nũú-gã.

8 Chi nchaa ñáyiu duca<sup>n</sup> xĩquide, te Yã Ndiõxí tédóho ñaha-gã xii-yu te nihí-yu sã cuini-yu. Te ñu-ni duca<sup>n</sup> tucu nchaa ñáyiu na cãcã<sup>n</sup> núú-gã ì<sup>n</sup> sã cuini-yu, chí sãñaha-gã sã xicã<sup>n</sup>-yu núú-gã. Te ñu-ni duca<sup>n</sup> tucu nchaa ñáyiu ñá túú dàña ndeé xicã<sup>n</sup> núú Yã Ndiõxí sã cuini-yu chí nihí-yu.

9 Te nchòhó cue téé cùu tátá, ñá túú cùndee iní-ndó cuãñaha-ndo xii cue déhe-ndo ì<sup>n</sup> yúú caxi-güexi òré xicã<sup>n</sup>-güexi ì<sup>n</sup> pãá núú-ndó cãxi-güexi.

10 Te ní ñá túú cùndee iní-ndó cuãñaha-ndo ì<sup>n</sup> cóó caxi-güexi òré xicã<sup>n</sup>-güexi ì<sup>n</sup> chácá núú-ndó cãxi-güexi.

11 Te nchòhó cuèi ndeé dau-na sàá iní-ndó dico sãha-ndo cuè déhe-ndo sã vãha xèxi-güexi òré ná cúú sã xicã<sup>n</sup>-güexi núú-ndó cãxi-güexi. Te núu nchòhó duca<sup>n</sup> quide-ndo, jte uu<sup>n</sup>-gá duca<sup>n</sup> quide Tátá-ndó Dütú Ndiõxí Yaá ndécú àndiú, chí taxi-gá sã vãha sã cúú-xí-ndó te núu na cãcã<sup>n</sup>-ndó nũú-gã!

12 Te nchaa sã vãha cuini-ndó càda tnaha ñáyiu-ndo, te cada-ndo tnàhá-ndó ndihí-yu, chí duca<sup>n</sup> sãnu ichi ñaha tnúhu ní chídó tnùní ndí Moisés, te ñu-ni duca<sup>n</sup> sãnu ichi ñaha tucu nchaa tnúhu ní chídó tnùní cue téé ní xóo cáhá<sup>n</sup> tnúhu Yã Ndiõxí ndeé sanaha.

*Yuyèhe cuiñi*

*(Lc. 13:24)*

13-14 Te xini ñuhu-xi nducu-ndo nacuaá cada-ndo tnì-ndo ichi Yã Ndiõxí. Te ichi-gá-á<sup>n</sup> cúú-xí dàtná ì<sup>n</sup> ichi cuiñi, àdi datná ì<sup>n</sup> yuyèhe

cuiñi. Te duha cãhá<sup>n</sup>-í chí ío úhú xínu iní-ndó tnì-ndo ichi Yã Ndiõxí, te sacú-ni nchòhó cue ñáyiu ndècu ñuyíú-a tnì-ndo ìchi-gá. Te nchaa ñáyiu ndècu ichi cuehé ichi duha ta xíta nihnú-yu cuáhá<sup>n</sup>. Te ichi ndècú-yu-á<sup>n</sup> cada iní-ndó sã cúú-xí ì<sup>n</sup> ichi cahnu ichi quehé<sup>n</sup>, àdi ì<sup>n</sup> yuyèhe quehé<sup>n</sup>. Te duha cãhá<sup>n</sup>-í chí ío vãi ñáyiu ndècú-yu ichi-á<sup>n</sup>.

*Ndi ñí<sup>n</sup> núú yutnu xini-ó nã yutnu cùu-xi cuendá sã sãvidí-xi*  
*(Lc. 6:43-44)*

15 Te cächí tnúhu-í xii-ndo sã ío quíhi iní-ndó cùndecu-ndo cuendá sã vã dándahú ñáhá cuè téé cächí sã cãhá<sup>n</sup> tnúhu Yã Ndiõxí te ñá ndàá sã cãhá<sup>n</sup>-güedé tnúhu-gá. Chí cue téé-á<sup>n</sup> sãnuu sã quidé-güedé dàtná quidé mbéé quiti ío váha iní-xi, dico ñá ndàá chí ñá túú ñuhu váha iní-güedé, chí quide-güedé dàtná quidé quiti déé<sup>n</sup> quiti nani yíhí.

16 Te òré quexio-güedé núú ndécú-ndó te cada cuendá-ndó nãcuáa quide-güedé cuendá duca<sup>n</sup> cùtnuní iní-ndó nã ñáyiu cùu-güedé. Te nchòhó xini-ndó sã ñá túú cùu<sup>n</sup> ndéhe yoho yãha stilé tnu ñu, te ní ñá túú xini-ndó cùu<sup>n</sup> ngúxí ì<sup>n</sup> tnu ñu.

17-18 Te xini tucu-ndo sã ncháá yutnu váha cùu<sup>n</sup> sãvidí váha, te nchaa yutnu váha-á<sup>n</sup> ñá túú cùu<sup>n</sup> sãvidí sã ñá túú vãha. Te nchaa yutnu sã ñá túú vãha ñá túú cùu<sup>n</sup> sãvidí váha, chí mee-ni sãvidí sã ñá túú vãha cùu<sup>n</sup>.

19 Te nchaa yutnu sã ñá túú cùu<sup>n</sup> sãvidí váha xèhndé-güedé, te cuánguee-xi núú ñuhú càyú-xi. Te duca<sup>n</sup> sãtnahá-xi yãha nchaa cue téé dándahú ñáhá cächí sã cãhá<sup>n</sup> tnúhu Yã Ndiõxí te ñá ndàá sã cãhá<sup>n</sup>-güedé tnúhu-gá, chí quíhí<sup>n</sup>-güedé núú ñuhú núú càyú.

20 Te nchòhó cùtnuní iní-ndó nã ñáyiu cùu cue téé-á<sup>n</sup> cuendá nchaa sã quidé-güedé.

*Ñá ncháá ñáyiu ngúndecú-yu núú ndécú Yã Ndiõxí táxi tnùní-gá*  
*(Lc. 13:25-27)*

21 Te na cächí tnúhu-í xii-ndo sã ío vãi ñáyiu cachí-yu sã yúhú

cúu-í Xítóhó-yu, dico ñá ncháá-yu nduu táhũ-yu cundecú-yu núú ndécú Tātá-í Dútú Ndiõxí táxí tnùní-gá, chí mee-ni nchàa ñáyiú na càda nchaa nacuáa càhá<sup>n</sup>-gá ñáyiú-á<sup>n</sup> nduu táhũ-yu cundecú-yu núú ndécú-gá táxí tnùní-gá.

22 Te na sàá nduu càda ndáá Yă Ndiõxí cuéchi nchaa ñáyiú, te vâi-yu cúñàhá-yu xii-í: “Yòhó Xítóhó Jesu-crístú nchúhú cúú-ndĭ ñáyiú ní cáhá<sup>n</sup> tnúhu-n nâcuáa ní cachí-n, te diu-ni-n nĭ cacunehe-ndĭ te ní sándáá iní ñáhá nchàa espíritú cundĭhi yucu ñávâha xii-ndĭ ní quee-xi yiqui cùñú ñáyiú, te diu-ni yòhó ní chindee ñàha-n xii-ndĭ ní ndacu-ndĭ ní quide-ndĭ tĭtnĭ núú sã vã yõo tnàhĭ ndàcu cada”, duha cúñàhá-yu xii-í dàvã-á<sup>n</sup>.

23 Dico yúhú cúñaha-ĭ xii-yu: “Ñá túú tnàhĭ xini ñáhã-í xii nchòhó nũu ndéé ñáyiú cùu-ndo, te chí xócuĩñĭ nchaa nchòhó ñáyiú quide nchaa sã cuéhé sã dúhá nũú ndécú-í-a”, duha cúñaha-ĭ xii-yu.

*H<sup>n</sup> vehe ndècu cimientú-xi ndĭhi ĩ<sup>n</sup> vehe ñá túú cimientú-xi*  
(Mr. 1:22; Lc. 6:47-49)

24 Te nchaa ñáyiú sàcúndedóho tnúhu càhá<sup>n</sup>-í te núu na tnĭ-yu, te ñáyiú-á<sup>n</sup> cúũ-yu dàtná ĩ<sup>n</sup> téé ío váha cùtnunĭ iní-xi. Chí téé-á<sup>n</sup> nĭ dácáá-dĕ ĩ<sup>n</sup> vehe, dico díhna-gá ní xete-dé ndéé ní tnahá-dé yúú cáxĭ<sup>n</sup> te dàtnunĭ ní tava-dé cimientú-xi.

25 Te òré ní cuu<sup>n</sup> dáú te ní ndee ndute ñuhu, te ní dándáá-xĭ ndéé núú cáá vèhe-á<sup>n</sup>, dico ñá túú ní ndàcu-xi cuido-xi. Te ní quene tucu táchĭ nĭhi dico ñá túú ní ndàcu-xi cuido-xi vehe-á<sup>n</sup>, te duca<sup>n</sup> chí téé ní dácáá vèhe-á<sup>n</sup> nĭ tava-dé cimientú-xi núú yúú cáxĭ<sup>n</sup>. Duha sãtnahá-xi cùu nchaa ñáyiú tnĭ tnúhu càhá<sup>n</sup>-í.

26 Dico nchaa ñáyiú sàcúndedóho tnúhu càhá<sup>n</sup>-í te ñá túú cuinĭ-yu tnĭ-yu, ñáyiú-á<sup>n</sup> cúũ-yu dàtná ĩ<sup>n</sup> téé ñá túú tnàhĭ cùtnunĭ iní-xi. Chí téé-á<sup>n</sup> nĭ dácáá-dĕ ĩ<sup>n</sup> vehe núú yúcu mĕe-ni ñuhu cúchĭ.

27 Te òré ní cuu<sup>n</sup> dáú te ní ndee ndute ñuhu, te ní dándáá-xĭ ndéé núú

cáá vèhe-á<sup>n</sup>, te ní quene táchĭ nĭhi te íi-ni ní xido-xi vehe-á<sup>n</sup> cuendá sã nũú ñuhu cúchĭ nĭ sáá. Duha sãtnahá-xi cùu nchaa ñáyiú sàcúndedóho tnúhu càhá<sup>n</sup>-í te ñá túú cuinĭ-yu tnĭ-yu — duha ní dánèhé ñáhá Jèsús xii cue téé xica cuu ndĭhi-gá ndĭhi nchaa ñáyiú.

28 Te òré ní ndĭhi Jèsús sã dúcã<sup>n</sup> nĭ cáhá<sup>n</sup>-gá, te nchaa ñáyiú ní xĭndedóho nchaa tnúhu ní cáhá<sup>n</sup>-gá ío ní cuñúhu-yu nâcuáa ní dánèhé ñáhã-gã xii-yu.

29 Chí ní cáhá<sup>n</sup>-gá dàtná càhá<sup>n</sup> cue téé cùnuu, te cùnuu ndisa-gá, te ñá túú ní cáhá<sup>n</sup>-gá dàtná càhá<sup>n</sup> nchaa cue téé dàcuaha ñaha xii ñáyiú nchaa tnúhu ní chídó tnùnĭ ndĭ Moisés.

## 8

*Jèsús quidé tãtna-gã ĩ<sup>n</sup> téé tnàhá cuéhé sã dátèhyú nihnu-xi yiqui cùñú-ó*  
(Mr. 1:40-45; Lc. 5:12-16)

1 Te Jèsús ní xica-gã cuánuu-gã dĭñĭ tĭndúú nũú dúcã<sup>n</sup> nĭ xĭndecu-gã ní dánèhé-gã ñáyiú-á<sup>n</sup>, te cuéhé víhĭ ñáyiú nchicú<sup>n</sup> ñáhã xĭ-gã cuánuu.

2 Te ní quexĭo ĩ<sup>n</sup> téé tnàhá cuéhé sã dátèhyú nihnu-xi yiqui cùñú-ó nũú Jèsús, te ní ngüĩñĭ xĭtĭ-dĕ núú-gã, te xãhá<sup>n</sup>-dĕ xii-gã:

—Mèstrú, véxi-í càhá<sup>n</sup> ndàhú-í núú-n nũú vá cùndĕe inĭ-n càda tãtna ñaha-n xĭ-í, chí cùtnunĭ inĭ-í sã ndácú-n —càchĭ-dĕ xãhá<sup>n</sup>-dĕ xii-gã.

3 Te Jèsús ní dácáá-gã ndaha-gã ní tendaha ñàha-gã xii-dĕ, te xãhá<sup>n</sup>-gã:

—Cuu cada tãtna ñaha-ĭ xii-n, te vitna ndúha-n —càchĭ-gã xãhá<sup>n</sup>-gã xii-dĕ.

Te òré-ni-á<sup>n</sup> nĭ xócuĩñĭ cuéhé tnàhá-dĕ.

4 Te Jèsús ní xãhá<sup>n</sup> tùcu-gã xii-dĕ:

—Te vitna cuanùhú te vá yõo ĩ<sup>n</sup> cúñaha-n sã yúhú ní quide tãtna ñaha-ĭ xii-n, núú dütú-ni cuahã<sup>n</sup> cuendá sã ná quinĭ ñáhã-dĕ xii-n sã nĭ ndúha-n, te cuãñaha-n sã ndúú tãhú Yă Ndiõxĭ dàtná ní cachĭ ndĭ Moisés. Te duca<sup>n</sup> càda-n cuendá cutnùnĭ inĭ ñáyiú sã ní ndúha-n —càchĭ-gã xãhá<sup>n</sup>-gã xii téé ní quide tãtna-gã-á<sup>n</sup>.

*Jèsús quidé tǎtna-gá ì<sup>n</sup> téé xìnu cuechi núú ì<sup>n</sup> téé cùu capitá<sup>n</sup> (Lc. 7:1-10)*

<sup>5</sup> Te Jèsús ní xica-gá cuáhá<sup>n</sup>-gá ñúú Capèrnaúm. Te òré cuánguihu-gá ñúú-á<sup>n</sup> te ní quexìo ì<sup>n</sup> téé cùu capitá<sup>n</sup> càhá<sup>n</sup> ndàhú-dé núú-gǎ,

<sup>6</sup> te xǎha<sup>n</sup>-dǎ xii-gá:

—Mèstrú, véxi-í càhá<sup>n</sup> ndàhú-í núú-n nǔu vá cùndèe iní-n càda tǎtna-n ì<sup>n</sup> téé xìnu cuechi núú-í, chi cùhú-dé te càhú víhí tnàhá-dé, te ío ndòho-dé te ní ñǎ cùndèe-gá-dé candá nihnu-dé —càchí-dé xǎha<sup>n</sup>-dǎ xii-gá.

<sup>7</sup> Te Jèsús ní xǎha<sup>n</sup>-gǎ xii-dé:

—Te na quíhí<sup>n</sup>-ó càda tǎtna-í-dé —càchí-gá xǎha<sup>n</sup>-gǎ xii-dé.

<sup>8</sup> Te téé cùu capitá<sup>n</sup>-á<sup>n</sup> ñí xǎha<sup>n</sup>-dǎ xii-gá:

—Mèstrú, ñǎ túú tàú-í sá quǐhu-n ndèé xití vehe-í, chi cùu-í ì<sup>n</sup> téé cùtèxínu sá cúú-xí-n, te càhá<sup>n</sup>-ní sá ndúha téé xìnu cuechi núú-í te ndúha-dé.

<sup>9</sup> Chi yúhú ndècu cue téé tàxi tnuní ñáhá xii-í, te duca<sup>n</sup> yúhú tucu ndècu cue sandadú táxi tnùn-í. Te òré xǎha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chiu<sup>n</sup> te cuáhá<sup>n</sup>-dé, te òré xǎha<sup>n</sup>-í xii ìngá-dé quixi-dé te véxi-dé, te òré xǎha<sup>n</sup>-í xii ì<sup>n</sup> téé xìnu cuechi núú-í cada-dé ì<sup>n</sup> chiu<sup>n</sup> te quide-dé. Núu xǎhà yòhó càhá<sup>n</sup>-ní sá ndúha téé xìnu cuechi núú-í te ndúha-dé —càchí-dé xǎha<sup>n</sup>-dǎ xii Jèsús.

<sup>10</sup> Te Jèsús ío ní cuñúhu-gá sá dúcá<sup>n</sup> ñí càhá<sup>n</sup> téé cùu capitá<sup>n</sup>-á<sup>n</sup>, te ní xǎha<sup>n</sup>-gǎ xii nchaa ñáyíu nchicú<sup>n</sup> ñáhá xii-gá:

—Na càchí tnúhu ndáá-í xii-ndo sǎ vǎtá quíní-gá-í ní ì<sup>n</sup> ñáyíu isràél, ñáyíu súúní ío váha sàndáá iní ñáhá xii Yá Ndiòxí dàtná sàndáá iní ñáhá tǎe-a xii-gá.

<sup>11</sup> Te na càchí tnúhu ndáá tucu-í xii-ndo sǎ ío cuéhé ñáyíu quixi ndàa xio nacuáa quène nchíanchii, te ñu-ni duca<sup>n</sup> ío cuéhé tucu-yu quixi ndàa xio nacuáa quée tucu nchíanchii. Te nchaa ñáyíu-á<sup>n</sup> naníhí tnáhǎ-yu ndíhi té Àbrahám, ndíhi té Isàác, ndíhi té Jàcób núú ndécú Yá

Ndiòxí táxi tnùn-í-gá te yàcá<sup>n</sup> cundecu ndíhi ñáhá-yu xii-güedé.

<sup>12</sup> Te nchaa ñáyíu tàú nduu táhú cundecu núú ndécú Yá Ndiòxí táxi tnùn-í-gá ní cùu, ñáyíu-á<sup>n</sup> quee tíhú-yu, chi quíhí<sup>n</sup>-yu ì<sup>n</sup> xichi núú néé nǔú ío ndohó-yu cundecú-yu, te yàcá<sup>n</sup> ío ndáhí-yu, te dìcò rúhñú-ñǎ cuu núhu-yu sá sàtú iní-yu cuèndá sá ndóhó-yu —càchí-gá xǎha<sup>n</sup>-gǎ xii-yu.

<sup>13</sup> Te Jèsús ní xǎha<sup>n</sup> tucu-gá xii téé cùu capitá<sup>n</sup>-á<sup>n</sup>:

—Yòhó téé ndècu ndíhi téé cùhú cuanùhú vehe-n vitna chi ndúha-dé chi ní sàndáá iní-n Yá Ndiòxí —càchí-gá xǎha<sup>n</sup>-gǎ xii-dé.

Te ñu-ni òré duca<sup>n</sup> ñí xǎha<sup>n</sup> Jèsús xii téé cùu capitá<sup>n</sup>-á<sup>n</sup> ñí ndúha téé xìnu cuechi núú-dé.

*Jèsús quidé tǎtna-gá ñǎná ñadìhí té Pèlú*

*(Mr. 1:29-31; Lc. 4:38-39)*

<sup>14</sup> Te Jèsús ní xica-gá cuáhá<sup>n</sup>-gá vehe té Pèlú, te òré ní quexìo-gá vehe-dé te ní xiní-gá cáá ñǎná ñadìhí-dé cùhú-a<sup>n</sup> ñúhu vihi-a<sup>n</sup> cahni.

<sup>15</sup> Te Jèsús ní tñi-gá ndaha ñaha cùhú-á<sup>n</sup>, te òré-ni-á<sup>n</sup> ñí nchíco-a<sup>n</sup> cahni te ní ndacóo-a<sup>n</sup> ní xinu cuechi-a<sup>n</sup> nǔú-güedé ndíhi-gá.

*Jèsús quidé tǎtna-gá vǎi ñáyíu cùhú*

*(Mr. 1:32-34; Lc. 4:40-41)*

<sup>16</sup> Te òré ní dáhu nchíanchii te ní quexìo ñáyíu núú ndécú Jèsús, te ndécá-yu vǎi ñáyíu yíhi ñaha espíritú cùndíhi yucu ñávǎha ní sáá núú-gǎ te ndèca tucu-yu vǎi ñáyíu tnàhá dava-gá núú cuéhé. Te ì<sup>n</sup>-ni tnúhu ní càhá<sup>n</sup> Jèsús ní tenáá-gá nchaa espíritú cùndíhi yucu ñávǎha yíhi ñaha xii nchaa ñáyíu-á<sup>n</sup>, te ní quee-xi yiqui cùñú-yu cuáhá<sup>n</sup>-xi. Te tnàhá nchaa dava-gá ñáyíu cùhú-á<sup>n</sup> ñí quide tǎtna-gá.

<sup>17</sup> Te duca<sup>n</sup> ñí cuu chi ní quee ndáá-xi nàcuáa ní càhá<sup>n</sup> ndíi Chàíá téé ní xóo càhá<sup>n</sup> tnúhu Yá Ndiòxí ndéé sanaha, te duha ní cachí ndíi: “Mee-gǎ cada tǎtna ñaha-gǎ xii-o, chi ñu-ni xocàni-gá nchaa sá quidé ùhú yiqui cùñú-ó”, duha ní cachí ndíi.

*Ñáyiú cuíní tuha ñaha xii Jesús  
(Lc. 9:57-62)*

18 Te òré ní xiní Jèsús sá ïo cuéhé ñáyiú xixúcu núú ndécú-gă, te ní xáha<sup>n</sup>-gă xii cue téé xica cuu ndihi-gă sá quëe-gă ndihi-güedé bàrcú cuendá téhndé-gă ndihi-güedé ndàa ingá xio yuhu làgúná.

19 Te mei òré-á<sup>n</sup> nĩ quexìo ì<sup>n</sup> téé dàcuaha ñaha xii cue ñáyiú nchaa tnúhu ní chídó tnùnì ndíi Moisés, te xáha<sup>n</sup>-dë xii-gă:

—Mèstrú, cuíní-í canchicú<sup>n</sup> ñáhà-í xii-n ndëni ní cuu na quihí<sup>n</sup>-n — cächí-dé xáha<sup>n</sup>-dë xii-gă.

20 Te Jèsús ní xáha<sup>n</sup>-gă xii-dé:

—Nchaa ñúcuu chi ndècu yaú cúú vèhe-güedi saquíhi-güedi, te nchaa cue quiti ndàva caa tacá-güedi diquí yutnu. Dico yúhú Téé cùu ñanì tnáhá-ndó nchàa-ndo chi ñá túú ndèé cáá vèhe-í ñuyíú-a ndetatú-í — cächí-gă xáha<sup>n</sup>-gă xii-dé.

21 Te ì<sup>n</sup> téé ní chitnahá ñáhá xii Jesús ní xáha<sup>n</sup>-dë xii-gă:

—Jèsús, dañà na nùhú-í cundetú-í cuú tātá-í te chindúxi-í-dé dātnùnì quixi-í chitnahá ñáhá dùca<sup>n</sup>-ná-í xii-n — cächí-dé xáha<sup>n</sup>-dë xii-gă.

22 Te Jèsús ní xáha<sup>n</sup>-gă xii-dé:

—Daña ñáyiú ñá túú sàndáá iní ñáhá xii-í ná chindúxi tnàha meé-yu, chi ñáyiú-á<sup>n</sup> cúú-yu dàtná ñáyiú ní xihí cuëi ndècu-ní-yu núú ñuyíú-a, te yòhó canchicú<sup>n</sup> ñáhá-ní xii-í — cächí-gă xáha<sup>n</sup>-gă xii-dé.

*Jèsús ngání-gă táchí ndihi ndute làgúná*

*(Mr. 4:35-41; Lc. 8:22-25)*

23 Te sátá dúcá<sup>n</sup> te Jèsús cuánguee-gă bàrcú ndihi cue téé xica cuu ndihi-gă, te ní xica bàrcú-á<sup>n</sup> cuáhá<sup>n</sup>-xi.

24 Te nini ñùhu bàrcú-á<sup>n</sup> ichi cuáhá<sup>n</sup>-xi núú ndute ní xidí Jèsús, te ní ngüíta-xi níhi vihi quene táchí, te ta nādachitú-xi ndute xití bàrcú cuáhá<sup>n</sup>.

25 Te cue téé xica cuu ndihi-gă cuáhá<sup>n</sup>-güedé núú cáá-gă xidí-gă, te xáha<sup>n</sup>-güedé xii-gă:

—¡Mèstrú, ndiquíú iní chi dàcácu ñaha-n xii-o chi quée naa-o cuíní-xi! — cächí-güedé xáha<sup>n</sup>-güedé xii-gă.

26 Te Jèsús ní xáha<sup>n</sup>-gă xii-güedé:

—¿Ná cuendá ndéé duca<sup>n</sup> ïo yùhú-ndó? ¿Náa ñá túú sàndáá iní ñáhá ndisa-ndo xii-í-á<sup>n</sup>? —cächí-gă xáha<sup>n</sup>-gă xii-güedé.

Te Jèsús ní ndacóo-gă te ní tenàá-gă táchí-á<sup>n</sup> ndihi ndute-á<sup>n</sup>, te ní ngüíñí táchí-á<sup>n</sup> te ní nucúndecu nahi-ñá ndute làgúná-á<sup>n</sup>.

27 Te nchaa cue téé ñùhu xití bàrcú-á<sup>n</sup> nĩ cuñúhu-güedé sá dúcá<sup>n</sup> nĩ quide-gă ní xiní-güedé, te ní xitnàha-güedé:

—¿Te ná téé cùu téé-a núu duha ní cáhá<sup>n</sup>-ni-dé te ní ngüíñí táchí te ní nucúndecu nahi-ni ndute làgúná-a-í? —cächí-güedé xitnàha-güedé.

*Cue téé ñuú Gàdará cue téé yìhi ñaha espíritú cündìhi yucu ñávãha  
(Mr. 5:1-20; Lc. 8:26-39)*

28 Te òré ní quèxio Jesús ndàa ingá xio yuhu làgúná yucu cue téé ñuú Gàdará, te úú tnáhá cue téé quide vehe núú yindúxi ndíyi ní quee-güedé cuáhá<sup>n</sup>-güedé núú ndécú Jèsús, te ndi nduú-güedé yíhí ñàha espíritú cündìhi yucu ñávãha xii-güedé, te ío màñá-güedé chi vá yòo tnàhí dañà-güedé yáha yatni núú ndécú-güedé.

29 Te cue espíritú yíhí ñàha xii-güedé-á<sup>n</sup> nĩ quide-xi níhi ní cáhá<sup>n</sup>-güedé, te xáha<sup>n</sup>-güedé xii-gă:

—¿Ná cuendá véxi-ò Jèsús Déhe Dútú Ndiòxí chidáca ñáhá-n xii-ndí? ¿Á<sup>n</sup> sàma véxi-n dāndoho ñaha-n xii-ndí? Te vátá sàá-gă nduu dùca<sup>n</sup> cada-n — cachí-güedé xáha<sup>n</sup>-güedé xii-gă.

30 Te yatni xía<sup>n</sup> xixica cuu vài cuchí xixexi-güedi.

31 Te cue espíritú cündìhi yucu ñávãha yìhi ñaha xii cue téé-á<sup>n</sup> nĩ cáhá<sup>n</sup> ndàhú-xi núú Jèsús, te xáha<sup>n</sup>-xi:

—Te núu vá dañá-gă-n quihí-ndí yiqui cùñú cue téé-a, te cáhá<sup>n</sup> ndàhú-ndí núú-n sã dañà-n na quihí<sup>n</sup>-ndí quihu-ndí yiqui cùñú

nchaa cùchí-á<sup>n</sup> —càchí cue espíritú-á<sup>n</sup> xáha<sup>n</sup>-xi xii-gá.

32 Te Jèsús ní xáha<sup>n</sup>-gã xii cue espíritú cùndìhi yucu ñávãha-á<sup>n</sup>:

—Chí táquèe yiqui cuñú cue té-á<sup>n</sup> te quíhí<sup>n</sup>-ndó nũu ndèe ichi quíhí<sup>n</sup>-ndó —càchí-gá xáha<sup>n</sup>-gã xii nchaa espíritú-á<sup>n</sup>.

Te cue espíritú cùndìhi yucu ñávãha-á<sup>n</sup> ñi quee-xi yiqui cùñú cue té-á<sup>n</sup>, te cuáhá<sup>n</sup>-xi cuánguìhu-xi nchaa cùchí-á<sup>n</sup>. Te cue quiti-á<sup>n</sup> ñi xinu-güedi duha ní quée-güedi ndàa núú dèhvá yuhu làgúná-á<sup>n</sup>, te ní ngaunihnu-güedi xití ndute, te ní ndìhi-güedi ní cáhá.

33 Te cue té-á<sup>n</sup> xito ñaha xii nchaa cùchí-á<sup>n</sup> ñi yùhú-güedé te ní xinu-güedé, te ní sáhá<sup>n</sup>-güedé ní cani-güedé cuèndú núú cuè ñáyiu ndècu xití ñuú nchaa nàcuáa ní cuu cuèndá cue té-á<sup>n</sup> ní xíhi ñaha nchaa espíritú cùndìhi yucu ñávãha-á<sup>n</sup>.

34 Te nchaa ñáyiu ñuú-á<sup>n</sup> ñi queé-yu cuáhá<sup>n</sup>-yu núú ndécú Jèsús. Te òré ní quexió-yu núú ndécú-gã te ní cáhá<sup>n</sup> ndàhú-yu núú-gã sá ná quèe-gá yucu ñuú-yu núhú-gã.

## 9

*Jèsús quidé tãtna-gá ñi té cùhú ñá cúu-gã candá nihnu*

(Mr. 2:1-12; Lc. 5:17-26)

1 Te sátá dúcá<sup>n</sup> ñi cuu te Jèsús cuánde-gá bàrcú cuáhá<sup>n</sup>-gã ní natehndé-gá ndàa ingá xio yuhu làgúná. Te xía<sup>n</sup> ñi ndexio-gã ñuú núú quidé ñuú-gã.

2 Te xía<sup>n</sup> ndécú-gã ní quexió cue té nchido-güedé ñi té cùhú ñá cúu-gã candá nihnu ñuhu-dé xito, te Jèsús ní cutnùní iní-gá sá sàndáa ndisa iní ñáhá-güedé xii-gá nũu ní xáha<sup>n</sup>-gã xii té cùhú-á<sup>n</sup>:

—Yòhó té cùhú vá ndìhú-gá iní-n, chi sa ní quide càhnu iní-í nchaa cuéchi-n —càchí-gá xáha<sup>n</sup>-gã xii-dé.

3 Te sá dúcá<sup>n</sup> ñi cáhá<sup>n</sup>-gã nũu xía<sup>n</sup> cue té dàcuaha ñaha xii ñáyiu nchaa tnúhu ní chídó tnùní ndíi Moisés ní sani iní-güedé: “Tée-a càhá<sup>n</sup> cuéhé-dé

cuèndá Yã Ndiöxí”, duha ní sani iní-güedé.

4 Te Jèsús ní cutnùní iní-gá nàcuáa sàni iní-güedé nũu ní xáha<sup>n</sup>-gã xii-güedé:

—¿Ná cuèndá duca<sup>n</sup> sàni cuéhé sání dùha iní-ndó?

5 Te sá dúhá ñi xáha<sup>n</sup>-í xii té cùhú-a sá ñi quide càhnu iní-í nchaa yíca cuéchi-dé, te xía<sup>n</sup> nchòhó ñá túú cutnùní iní-ndó nũu ndáa càhá<sup>n</sup>-í àdi ñá ndáa. Dico núu cúu-í-dé sá ndácóo-dé te caca-dé, te cutnùní ndáa iní-ndó nũu ndáa càhá<sup>n</sup>-í àdi ñá ndáa, chi cundehe nũú-ndó nàcuáa cada-í.

6 Te vitna na càda-í nàcuáa cutnùní iní-ndó nchaa-ndo sá yùhú Tée cùu ñaní tnáhá-ndó nchaa-ndo ndecu ndìhi-í tnúhu ndee iní ñuyíu-a sá cáda càhnu iní-í nchaa cuéchi ñáyiu —càchí-gá xáha<sup>n</sup>-gã xii-güedé.

Te sátá dúcá<sup>n</sup> te ní xáha<sup>n</sup>-gã xii té cùhú-á<sup>n</sup>:

—Ndacóo, te ndocani-n xito ñuhu-n véxi-á<sup>n</sup> te núhú-n vehe-n —cachí-gá xáha<sup>n</sup>-gã xii-dé.

7 Te òré-ni-á<sup>n</sup> ñi ndúha té cùhú-á<sup>n</sup> te ní ndacóo-dé te ní ndocani-dé xito ñuhu-dé ní quexió-á<sup>n</sup> te ní xica-dé cuánuhú-dé vehe-dé.

8 Te nchaa ñáyiu xíndecu-á<sup>n</sup> ño ní cuñúhu-yu sá dúcá<sup>n</sup> ñi quide Jèsús ní xiní-yu, te ní cachí-yu sá ño càhnu cuu Yã Ndiöxí cuèndá sá ñi sáñaha-gã xii Jèsús tnúhu ndee iní cada-gã nchaa sá vã yòo tnàhí ndàcu cada.

*Jèsús càhá<sup>n</sup>-gã ñi té nàni Mateú chitnahá ñáhá-dé xii-gã*

(Mr. 2:13-17; Lc. 5:27-32)

9 Te Jèsús ní nucúhu<sup>n</sup> tucu-gã ichi cuáhá<sup>n</sup>-gã, te ichi ñuhu-gã ní xiní-gã núcóo ñi té nàni Mateú quidé còbrá-dé ñáyiu chi còbrádór impuèstú cúu-dé, te ní xáha<sup>n</sup>-gã xii-dé:

—Màteú, néhé chitnahá ñáhá-n xii-í —càchí-gá xáha<sup>n</sup>-gã xii-dé.

Te té Màteú-á<sup>n</sup> ñi ndacuíñí-dé ní chitnahá ñáhá-dé xii-gã.

10 Te ñi xito ndècu Jèsús ñi vehe, te yìhi-gã mèsá ndìhi cue té xica cuu ndìhi-gã xéxí ndìhi ñaha-gã xii-güedé. Te tnàhá cue té cuihna iní-xi quide còbrá ñáhá xii ñáyiu cuèndá impuèstú

yíhí ndíhi-gá mèsá, te tnàhá tucu dava-gá cue té ndècu ichi cuehé ichi duha yíhi ndíhi-gá mèsá.

11 Te sá ní xíní cue té cùu fariséú xéxí Jèsús ndíhi nchaa cue té-án, te ní xíca<sup>n</sup> tnúhú-güedě núú cuè té xíca cuu ndíhi-gá, te xáha<sup>n</sup>-güedě:

—¿Ná cuendá duca<sup>n</sup> quide té cùu mestrú-ndó xèxi-dé ndíhi cue té cuihna iní-xi quide cobrá ñáhá xì ñáyiú cuendá impuèstú, ndíhi nchaa dava-gá cue té ndècu ichi cuehé ichi duha-í? —càchí-güedě xáha<sup>n</sup>-güedě.

12-13 Te Jèsús ní tecú dóho-gá nàcuáa ndùu tnúhu ní xáha<sup>n</sup>-güedě xii cue té xíca cuu ndíhi-gá, núu ní xáha<sup>n</sup>-gá xii-güedě:

—Nchaa ñáyiú ñá túú cùhú chi ñá túú xìni ñuhú-yu ñátátná, dico nchaa ñáyiú cùhú chi xìni ñuhú-yu ñátátná. Te yúhú véxi-í cáhá<sup>n</sup>-í ñáyiú cùtnuní iní-xi sá ndécú cuèchi-xi cuendá dàñá-yu nchaa sá cuèhé sá dúhá quide-yu, te ñá túú véxi-í cáhá<sup>n</sup>-í ñáyiú càchí sá ñá túú ndècu cuèchi-xi. Te chí cádá cuendá váha nàcuáa càhá<sup>n</sup> Yá Ndiòxí núú tütú-gá núú càchí-xi: “Yúhú cuíní-í sá cùndàhú iní-ndó cuè tnaaha ñáyiú-ndo, te ñá díú mèe-ni sá cáhni-ndó quèti nduu táhù-í”, duha càchí-gá núú tütú-gá —càchí Jèsús xáha<sup>n</sup>-gá xii-güedě.

*Cue té ndècu tnúhu núú Jèsús cuendá ñáyiú ñá túú tnàhí ná xéxí áma càhá<sup>n</sup> ndíhi-yu Yá Ndiòxí*

(Mr. 2:18-22; Lc. 5:33-39)

14 Te cue té xíca cuu ndíhi té Juáá té dàcuandute ñaha xii ñáyiú ní sáhá<sup>n</sup>-güedě núú ndécú Jèsús, te xíca<sup>n</sup> tnúhú-güedě núú-gá, te xáha<sup>n</sup>-güedě:

—Cuíní-ndí cachí tnúhu-n ñá cuendá nchúhú, ndíhi cue té cùu fariséú ñá túú tnàhí ná xéxí-ndí áma càhá<sup>n</sup> ndíhi-ndí Yá Ndiòxí, te cue té xíca cuu ndíhi-n ñá túú dùca<sup>n</sup> quide-güedě —càchí-güedě xáha<sup>n</sup>-güedě xii-gá.

15 Te Jèsús ní xáha<sup>n</sup>-gá xii-güedě:

—Nchòhó xíní-ndó sá vǎ cúú cùñaha-o xì ñáyiú ñùhu vico tnándaha sá vǎ cúú càxí-yu nini ndècu ndíhi ñaha té tnándaha xii-yu, dico sáá

nduu vǎ cùndècu ndíhi ñaha-gá té tnándaha-án xii-yu, te dàvá-án te cahni iní-yu vá càxí-yu cuendá sá ndíhú iní-yu.

16 Te ni vǎ yǎo dándée luha dóó sáá ñí<sup>n</sup> dóó sa ní cuu tùhú víhí, chi dóó sáá-án nàndiyi-xi te uu<sup>n</sup>-gá ndata-xi dóó sǎ ní cuu tùhú-án.

17 Te ni vǎ yǎo chíhi ndidí sáá xítí ñí<sup>n</sup> lamba sa ní cuu tùhú víhí, chi núu yoo duca<sup>n</sup> na càda te ndava lamba sa ní cuu tùhú-án chí ío níhi yóco ndidí-án, te cuíta-ni ndidí-án te cuíta-ni lamba-án te núu duca<sup>n</sup> na càdá-yu, núu xíá<sup>n</sup> xíní ñùhu-xi quée ndidí sáá-án xítí ñí<sup>n</sup> lamba saa cuendá duca<sup>n</sup> ñà túú ñá cuu cováha-xi —càchí-gá xáha<sup>n</sup>-gá xii-güedě.

*Cuendá déhe yoco té Jàirú ndíhi cuendá ñí<sup>n</sup> ñaha ní tnándeé dóó Jèsús*

(Mr. 5:21-43; Lc. 8:40-56)

18 Te càhá<sup>n</sup> dúca<sup>n</sup>-ní Jèsús ní quexìo ñí<sup>n</sup> té cùnnoo núú ndécú-gǎ, ñí<sup>n</sup> té tǎxi tnuní veñúhu, te ní ngúñí xítí-dě núú-gǎ càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n nùu vá cùndèe iní-n quíhí<sup>n</sup>-ó vèhe-í dandòto-n déhe yoco-í chí ní xíhí-xi tnávíí, te yúhú cùtnuní iní-í sá nùu quíhí<sup>n</sup>-n tëndaha-n yiqui cuñú-xi te ndoto-xi —càchí-dé xáha<sup>n</sup>-dě xii-gá.

19 Te Jèsús ní xíca-gá cuáhá<sup>n</sup>-gá ndíhi-dé ndíhi cue té xíca cuu ndíhi-gá.

20 Te ichi ñùhu-gá cuáhá<sup>n</sup>-gá ní sáhá<sup>n</sup> ñí<sup>n</sup> ñadìhí ní tnándeé-a<sup>n</sup> yuhu dóó-gǎ ndàa sátá-gǎ, te ñaha-án sa ní cuu úxúú cuía sǎ cùhú-a<sup>n</sup> ngòyo ñaha níhí xii-a<sup>n</sup>.

21 Te duca<sup>n</sup> ní quide-a<sup>n</sup> chí ní sani iní-a<sup>n</sup> sá nùu ndacu-a<sup>n</sup> tnándeé-a<sup>n</sup> cuèdicó luha yuhu dóó Jèsús te ndúha-a<sup>n</sup> ní sani iní-a<sup>n</sup>.

22 Te Jèsús ní nchócótó-gǎ ndàa sátá-gǎ te ní xíní-gá ñadìhí-án, te ní xáha<sup>n</sup>-gǎ:

—Yòhó ñaha cùhú, vá ndíhú-gá iní-n vitna chí sa ní ndúha-n, chí ní sándáá iní ñáhá-n xii-í —càchí-gá xáha<sup>n</sup>-gǎ xii-a<sup>n</sup>.

Te òré-ni-á<sup>n</sup> nǐ ndúha ñaha cùhú-ǎ<sup>n</sup>.  
<sup>23</sup> Te òré ní quexìo Jesús vehe tée cùnnoo taxi tñuní veñúhu-á<sup>n</sup>, te ní xini-gá xǐndáhí víhí ñáyi, te xǐndecu mǔsicú.

<sup>24</sup> Te ní xáha<sup>n</sup>-gǎ xií-yu:

—Chí táquèe xití vehe-a, chí xíchí-a ñá túú ní xihí-xi chí dícó xidí-xi —càchí-gá xáha<sup>n</sup>-gǎ xií-yu.

Te ní sácú ndeé ñáhǎ-yu xii-gá sá dúcá<sup>n</sup> nǐ cáhá<sup>n</sup>-gá, chí sá cúu-xi mée-yu te ní xihí ndisa xíchí-ǎ<sup>n</sup>.

<sup>25</sup> Te ñáyi-á<sup>n</sup> nǐ queé-yu te cuánguihu Jesús núú cándòdo xíchí nǐ xihí-á<sup>n</sup>, te ní tñi-gá ndaha-xi te òré-ni-á<sup>n</sup> nǐ ndacóo-xi.

<sup>26</sup> Te nchaa ñúú cáá yàtni xiá<sup>n</sup> nǐ níhí ñáyi tñúhu nàcuáa ní quide Jesús.

*Jesús quidé tǎtna-gá núú úú tnàhá cue tée cuàá*

<sup>27</sup> Te sáta dúcá<sup>n</sup> nǐ cuu te ní xica Jesús cuánuhú-gá, te ichi ñúhu-gá ní chinchícú<sup>n</sup> ñáhá úú tnàhá cue tée cuáá xii-gá, te níhí cáhá<sup>n</sup>-güedé, te xáha<sup>n</sup>-güedé xii-gá:

—Yòhó Jesús, tée cùu ñaní tnàhá ndí Dàvíí, cundàhú iní ñáhá xii-ndí —càchí-güedé xáha<sup>n</sup>-güedé xii-gá.

<sup>28</sup> Te òré ní nasáá Jesús núú quidé vehe-gá, te cue tée cuáá-á<sup>n</sup> nǐ quexìo-güedé ndeé núú-gǎ, te ní xicá<sup>n</sup> tñúhú-gǎ núú-güedé, te xáha<sup>n</sup>-gǎ:

—¿Sàndáá iní-ndó sǎ yǐhú ndacu-í cada tǎtna-í núú-ndó-ǎ<sup>n</sup>? —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé xii-gá:

—Sàndáá iní-ndí sá díú yòhó Jesús ndacu-n càda tǎtna-n núú-ndí —càchí-güedé xáha<sup>n</sup>-güedé xii-gá.

<sup>29</sup> Te Jesús ní dácáá-gá ndaha-gá ní tendaha-gǎ núú-güedé, te ní xáha<sup>n</sup>-gǎ xii-güedé:

—Te vitna, ndúha núú-ndó chí ní sàndáá iní-ndó sǎ díú yǐhú ndacu-í cada tǎtna-í núú-ndó —càchí-gá xáha<sup>n</sup>-gǎ xii-güedé.

<sup>30</sup> Te òré-ni-á<sup>n</sup> nǐ ndúha núú-güedé, te Jesús ní cáhá<sup>n</sup> víhí-gǎ dóho-güedé cuendá sá vǎ cáhá<sup>n</sup>-güedé nàcuáa ní cuu ní ndúha núú-güedé.

<sup>31</sup> Te cue tée-á<sup>n</sup> òré ní ndee-güedé núú ndécú Jesús, te ní ngüíta-ni-güedé

ní cani-güedé cuendú núú ñáyi nàcuáa ní quide ñaha-gǎ xii-güedé. Te nchaa dava-gá ñúú cáá yàtni xiá<sup>n</sup> nǐ sáhá<sup>n</sup>-güedé ní cani-güedé cuendú núú ñáyi nàcuáa ní quide ñaha Jesús xii-güedé.

*Jesús quidé tǎtna-gá ñi<sup>n</sup> téé ñihí*

<sup>32</sup> Te íchí nǐ ndee cue téé ní ndúha núú-xi-á<sup>n</sup> núú ndécú Jesús, te ní quexìo ñi<sup>n</sup> úú ñáyi ndécá-yu ñi<sup>n</sup> téé ñihí yíhí ñaha espíritú cundíhí yucu ñávǎha.

<sup>33</sup> Te Jesús ní queñuhu-gá espíritú cundíhí yucu ñávǎha yíhí ñaha xii téé-á<sup>n</sup>, te òré-ni-á<sup>n</sup> nǐ cuu ní nacáhá<sup>n</sup>-dé. Te nchaa ñáyi xǐndecu-á<sup>n</sup> ïo ní cuñúhu-yu, te ní xitnàhá-yu:

—Ñá túú tnàhí xini-ó ñi<sup>n</sup> téé duha cada ñúú nchoo cué ñáyi isràél ní cùu —cachí-yu xitnàhá-yu.

<sup>34</sup> Te cue téé cùu fariséu ní ngüíta-güedé xitnàhá-güedé:

—Tée-a chí sácúíhná chindé ñaha-xi xii-dé queñuhu-dé nchaa espíritú yíhí ñaha xii ñáyi te ñi<sup>n</sup>-ni sácúíhná-á<sup>n</sup> táxi tñuní-xi nchaa espíritú-á<sup>n</sup> —càchí-güedé xitnàhá-güedé.

*Jesús cundàhú iní-gá ñáyi*

<sup>35</sup> Te Jesús cuáhá<sup>n</sup>-gá nchaa ñúú náhnú ndíhí nchaa ñúú líhli, te ndí tnàhá ñi<sup>n</sup> ñi<sup>n</sup> ñúú sáá-gá te duca<sup>n</sup> cuánguihu-gá ñi<sup>n</sup> ñi<sup>n</sup> veñúhu càa nchaa ñúú-á<sup>n</sup> dánèhé-gá ñáyi tñúhu váha, tñúhu sá sánú ichi ñaha xií-yu nàcuáa ndíhu ndaha ñaha Yá Ndiöxí xií-yu. Te duca<sup>n</sup>-ni ta quide tǎtna-gá nchaa ñáyi cùhú cuáhá<sup>n</sup> cuéi ndí díí<sup>n</sup> ndí díí<sup>n</sup> núú cuéhé tnàhá-yu ñi<sup>n</sup> ñi<sup>n</sup>-yu.

<sup>36</sup> Te sá nǐ xini Jesús sá ïo vai ñáyi nchícú<sup>n</sup> ñáhá xii-gá, te ní cundàhú iní ñáhá-gǎ xií-yu chí ïo ndíhú iní-yu, te vá yòo nèhe cuendá ñáhá xií-yu, te cùu-yu dàtná cue mbéé cue quití ñá túú tòli-xi.

<sup>37</sup> Te Jesús ní xáha<sup>n</sup>-gǎ xii cue téé xica cuu ndíhí-gá:

—Nchòhó xini-ndó sǎ òré ná sáa nduu cùu nchaa sá xitú ñáyi te ïo vai cuu. Te na càchí tñúhu ndáá-í xii-ndo sǎ dàtná ïo vai sá xitú ñáyi

cùu, duca<sup>n</sup> ìo vài ñáyiú cùmání cund-edóho tnúhu-í, te ío sacú ñáyiú dàcuaha ñaha xií-yu.

<sup>38</sup> Núu xiá<sup>n</sup> xíní ñúhu-xi cáca<sup>n</sup>-ndó núú Yá Ndióxi Yaá cúú Xítoho-ndó ndíhi-yu cuèndá sá ná dàcahá<sup>n</sup>-gá iní-yu cáhá<sup>n</sup>-yu tnúhu-gá núú ncháa dawa-gá tnàha ñáyiú-yu cùmání cund-edóho tnúhu-gá —càchí-gá xáha<sup>n</sup>-gá xii-güedé.

## 10

*Jèsús sãñaha-gã tnúhu ndee iní xii ndi ùxúú cue tée xica cuu ndíhi-gá (Mr. 3:13-19; Lc. 6:12-16)*

<sup>1</sup> Te Jèsús ní cana-gá ndi ùxúú cue tée xica cuu ndíhi-gá, te ní sãñaha-gã xii-güedé tnúhu ndee iní cundecu ndíhi-güedé cuèndá queñuhu-güedé nchaa espíritú cundíhi yucu ñávãha yíhi ñaha xii ñáyiú, ndíhi cuèndá sá cáda tátna-güedé nchaa dawa-gá ñáyiú cùhú cuèi náandi núú cuéhé tnàhá-yu.

<sup>2</sup> Te duha xínani ndi ùxúú cue tée-á<sup>n</sup>: tée cunu-gá nani-dé Xímú, àdi Pelú chi úú ñíu-dé, te ñaní-dé cúú tẽ Ndríxi, te tnàhá tée-á<sup>n</sup> cúú-dẽ tée xica cuu ndíhi Jesús, ndíhi té Jàcobó ndíhi ñaní té Jàcobó-á<sup>n</sup> tẽe nani Juaá, te ndi ndúú cue tée-á<sup>n</sup> cúú-güedé déhe té Zebèdeú.

<sup>3</sup> Te tnàhá té Lìpé xicá cùu ndíhi-gá, ndíhi té Bartolómé, ndíhi té Mǎxi, ndíhi té Mǎteú tée cùu cobradór impuèstú ní cùu, ndíhi té Jàcobó déhe té Àlfeú, ndíhi té Lèbeú tée dãnani-güedé Tǎdeú,

<sup>4</sup> ndíhi té Xímú tée ní cundíhi cue tée cananistá, ndíhi té Jùdás Iscarioté tée ní sáá nduu ní sáha cuèndá ñáhá xii Jesús núú cuè tée cùu úhú iní ñáhá xii-gá.

*Jèsús téndãha-gá ndi ùxúú cue tée xica cuu ndíhi-gá quíhi<sup>n</sup>-güedé cáhá<sup>n</sup>-güedé tnúhu-gá núú ñáyiú (Mr. 6:7-13; Lc. 9:1-6)*

<sup>5-6</sup> Te Jèsús ní xáha<sup>n</sup>-gã xii ndi ùxúú cue tée xica cuu ndíhi-gá sá quíhi<sup>n</sup>-güedé cáhá<sup>n</sup>-güedé tnúhu-gá núú ñáyiú, te cùmání-gã caca-güedé quíhi<sup>n</sup>-güedé, te ní xáha<sup>n</sup>-gã xii-güedé:

—Na càchí tnúhu-í xii-ndo sã méé-ní ñúú núú xíndecu cue ñáyiú isràél quíhi<sup>n</sup>-ndó cáhá<sup>n</sup>-ndó tnúhu-í, te vã quíhi<sup>n</sup>-ndó ni ñúú ñúú yíndèhu distritú Sàmariá, te ni vã quíhi<sup>n</sup>-ndó dawa-gá ñúú núú xíndecu ñáyiú ñá túú cùu ñáyiú isràél. Te cue ñáyiú isràél-á<sup>n</sup> cúú-yu dàtná cue mbéé cue quíti ní xíta chi ta xíta nihnú-yu cuáhá<sup>n</sup>.

<sup>7</sup> Te cúñaha-ndo xii-yu sá sà ní cuyatni nduu ndíhu ndaha ñaha Yá Ndióxi xií-yu.

<sup>8</sup> Te cada tátna-ndo ncháa ñáyiú cùhú cuèi ñáyiú tnàhá cuéhé sã dátèhyú nihnu-xi yiqui cùñú-yu, te queñuhu-ndo ncháa espíritú cundíhi yucu ñávãha yíhi ñaha xii ñáyiú, te dandòto-ndo cue ñáyiú sa ní xíhi, te vã cáca<sup>n</sup>-ndó yãhu-ndo núú ñáyiú òré cada-ndo ncháa chiu<sup>n</sup>-á<sup>n</sup>, chi sa nàha-ndo sá dícó duca<sup>n</sup> ní taxi-í tnúhu ndee iní ndécú ndíhi-ndo.

<sup>9</sup> Te vã cánèhe-ndo díhú<sup>n</sup> cuu ichi-ndo,

<sup>10</sup> te ni vã cánèhe-ndo ñunu cuhu<sup>n</sup> ndachiu<sup>n</sup>-ndo, te ni vã cánèhe-ndo ñngá ichi dóó-ndó nãdáma-ndo, te ni vã cánèhe-ndo úú-gá chàú-ndó chi ñíu-ni chàú yíhi-ndó-ã<sup>n</sup> xiá<sup>n</sup>-ni quíhi-ndo, te ni vã cánèhe-ndo tatnu, te duca<sup>n</sup> càda-ndo chi nchòhó sa nàha-ndo sá ncháá ñáyiú quide chiu<sup>n</sup> te ñíu-ni cuèndá chiú<sup>n</sup> quidé-yu nihí-yu sá xéxi-yu.

<sup>11</sup> Te ndi tnàhá ñúú ná quèxio-ndo te nducu-ndo ñáyiú cùtnuní iní-ndó sã cúú-yu ñáyiú vãha, te vehe ñáyiú-á<sup>n</sup> cundecu-ndo ndèé sáá nduu ndèe-ndo ñúú-á<sup>n</sup>.

<sup>12</sup> Te òré quèxio-ndo vehé-yu te cúñaha-ndo xii-yu: “Yá Ndióxi chindèe chitúu ñaha-gã xii-ndo ndècu-ndo”, duha cúñaha-ndo xii-yu.

<sup>13</sup> Te núu ní cáhá<sup>n</sup> vãha ndíhi ñáhá-yu xii-ndo, te cuu-xi sá vãha sá cúú-xi-yu cuèndá tnúhu ní xáha<sup>n</sup>-ndo-ã<sup>n</sup>, dico núu ñá túú ní cáhá<sup>n</sup> vãha ndíhi ñáhá-yu xii-ndo, te cúñaha-ndo xii-yu sá vã cúú-xi sã vãha xií-yu tnúhu ní xáha<sup>n</sup>-ndo-ã<sup>n</sup>.

<sup>14</sup> Te núu ní sáá-ndó ñúú ñúú àdi ñúú vehe, te núu ñá túú ní cáhá<sup>n</sup>



ndihi ñaha vâha-yu xii-ndo te ni ñà túú ní cuení-yu cundedóho-yu tnúhu cáhá<sup>n</sup>-ndó te ndee-ndo ñúú-á<sup>n</sup> àdi vehe-á<sup>n</sup>, te naquidi-ndo ticá chúhmá ní tníi sáhá-ndó cuendá ná cùtnuní iní-yu sá ñà túú quide váha-yu.

15 Te na cächí tnúhu ndáá-í xii-ndo sá sáá nduu te ío-gá dandóho ñaha Yá Ndióxi xii ñáyiú duca<sup>n</sup> na càda ñaha xii-ndo-á<sup>n</sup> dàcúúxí ñáyiú ní xíndecu ñúú Sòdomá ndihi ñúú Gòmorrá.

### *Ndoho tnahá-ó cùndecu-o ichi Xítoho Jesucristú*

16 Te cada iní-ndó sá cúú-ndó dàtná cue mbée cue quiti cuáhá<sup>n</sup> núú ío yíhí. Te duca<sup>n</sup> sãtnahá-xi cùu-ndo chi yúhú tendaha ñaha-í xii-ndo quíhí<sup>n</sup>-ndó núú xíndecu cue ñáyiú cuihna iní-xi, te ío váha cuáha-ndo cuendá nacuaa cada-ndo dàtná quidé cõó, dico cunduu váha iní-ndó ñà túú nã cada-ndo dàtná quidé lõmá.

17 Te quíhi iní-ndó chi cue ñáyiú na cùu úhú iní ñáhá xii-ndo, te cuáha cuendá ñáhã-yu xii-ndo núú cuè té cùchiu<sup>n</sup>, te caniha-güedé xii-ndo xití veñúhu-güedé.

18 Te dava tucu ñáyiú cuu úhú iní ñáhá xii-ndo candeca ñahá-yu xii-ndo quíhí<sup>n</sup> núú cuè té cùnuu yíndaha naciõ<sup>n</sup>, àdi núú dàva-gá cue té cùnuu sá cuendá-í. Te nchòhó níhí-ndó nacuaa cada-ndo cáhá<sup>n</sup> váha-ndo cuendá-í núú-güedé ndihi núú cuè ñáyiú ñà túú cùu ñáyiú isràél.

19-20 Dico òré cuáha cuendá ñáhã-yu xii-ndo núú nchàa cue té-á<sup>n</sup>, te vá cání iní-ndó núú nása cunduu tnúhu cáhá<sup>n</sup>-ndó núú-güedé, chi òré-nã te níhí-ndó tnúhu cáhá<sup>n</sup>-ndó. Te ñà díú mèe-ndo cahu iní-ndó tnúhu cáhá<sup>n</sup>-ndó, chi mee Espiritú Yá Ndióxi Yá cúú Tãtã-ndó dàcahú iní ñáhã-xi xii-ndo nacuaa cunduu tnúhu cáhá<sup>n</sup>-ndó.

21 Te dava cue té cuáha cuendá-güedé ñaní-güedé núú cuè té cùchiu<sup>n</sup> cuendá cahni ñaha-güedé, te dava cue té cùu tátã díu-ni duca<sup>n</sup> càda-güedé déhe-güedé, te díu-ni duca<sup>n</sup> càda ñaha dava cue ñáyiú cùu déhe xii tátã-yu ndihi nãñã-yu, chi cuáha cuendá ñáhã-yu núú cuè té

cùchiu<sup>n</sup> cuendá cahni ñaha-güedé xií-yu.

22 Te nchòhó chi nchaa ñáyiú ngúita-yu cuu úhú iní ñáhã-yu xii-ndo sã cuendá-í. Te núu na càda ndee-ni iní-ndó cãchicú<sup>n</sup> ni-hnu-ni-ndo ìchi-í cuèi nándi sá ná càda ñahá-yu xii-ndo ndèé ná sáá nduu vã cùndecu-gá-ndó ñùyíú-a ña, te nduu táhú-ndó cùndecu-ndo ni caa ni quíhí<sup>n</sup> ndihi Yá Ndióxi.

23 Te núu ñúú cùní-güedé tníi ñaha-güedé xii-ndo càda úhú ñáhã-güedé sá cuendá-í, te cunu-ndo núú-güedé quíhí<sup>n</sup>-ndó ìngá ñúú. Te na cächí tnúhu ndáá-í xii-ndo sã cùmání-gã quíhí<sup>n</sup>-ndó nchàa dava-gá ñúú núú xíndecu ñáyiú isràél cáhá<sup>n</sup>-ndó tnúhu-í, te sa quixi tucu yúhú, Té cùu ñaní tnahá-ndó nchàa-ndo ñuyíú-a.

24-25 Te nchòhó xini-ndó sã nì ñúú té dácuaha ñà túú cùnuu-dé dàcúúxí mèstrú-dé, te núu mèstrú té-á<sup>n</sup> nándi yãha-dé ndécú-dé te tàú-dé nduu vétú iní-dé te núu tnahá-dé yãha-dé dàtná yãha mèstrú-dé-á<sup>n</sup>. Te díu-ni duca<sup>n</sup> sãtnahá tucu-xi cùu ñúú té xinu cuechi, chi ñà túú cùnuu-dé dàcúúxí pãtróo<sup>n</sup>-dã, te nchaa sá yãha pãtróo<sup>n</sup>-dã-á<sup>n</sup> te tàú-dé nduu vétú iní-dé te núu tnahá-dé yãha-dé dàtná yãha pãtróo<sup>n</sup>-dã-á<sup>n</sup>. Te núu yúhú Yá táxi tnúni ñáhã xii-ndo cachí-yu sá cúú-í sãcuíhná, te uu<sup>n</sup>-gá duca<sup>n</sup> cùñahá-yu xii nchòhó cue té cùndihi-í.

### *Vá yùhú-ó cuendá nchaa sá cáda ñaha ñáyiú xii-o*

(Lc. 12:2-7)

26 Te nchòhó vá yùhú-ndó núú ñáyiú. Chi nchaa tnúhu sá cúú yùhu ni cuu vá cúú yùhu-gá, chi nchaa dacuitíi sã quée túu-xi núú ñáyiú.

27 Te nchaa tnúhu sá cächí tnúhu-í xii-ndo núú méé núú ñúú-ó, cùu-xi tnúhu sá ndúú yùhu ni cuu datúu-ndo núú cuè ñáyiú cuèi núú chítú núú tàcã.

28 Te xini ñuhu-xi sá vã yùhú-ndó cuè ñáyiú cuèi na càhni ñahá-yu xii-ndo, chi díu-ni yiqui cùñú-ndó

ndacú-yu cahní-yu, dico ñá túú năgá ndacú-yu cada ñáhá-yu xii-ndo. Te tàú-ndó sǎ Yǎ Ndiǒxí yùhú-ndó chi Yaá-á<sup>n</sup> ndacu-gá danàa-gá yiqui cùñú-ndó, te ndacu-gá daquihí<sup>n</sup> ñáhá-gǎ xii-ndo nǔú ùhú núú ndàhú.

29 'Te nchòhó xìní-ndó sǎ ndéé úú tnàhá tǐlaá cùyǎhu-dì núú ì<sup>n</sup>-ní dǐhú<sup>n</sup>, te ni ì<sup>n</sup>-dì ñá túú xihí cùtexínu-dì chi ndéé nǔu mee Yǎ Ndiǒxí Yaá cúú Tǎtá-ndó ná càchí-gá te xihí-dì.

30 Dico nchòhó chi ío-gá néhé cuendá ñáhá Yǎ Ndiǒxí xii-ndo chi ndéé idi dǐquí-ndó yǐndehu.

31 Núu xiǎ<sup>n</sup> càchí-í sǎ vǎ yùhú-ndó chi cùnūu-gá-ndó dàcúúxí tǐlaá cuèi vǎi vihi-güedì.

*Nchaa ñáyiu dàtúu núú tnàha ñáyiu-xi sǎ ndécú ndihí-yu Xítóhó Jesucrístú*

*(Lc. 12:8-9)*

32 'Te na càchí tnúhu-í xii-ndo sǎ ncháá ñáyiu na dàtúu núú tnàha ñáyiu-xi sǎ ndécú ndihí ñáhá-yu xii-í, te duca<sup>n</sup> te tnàhá yùhú dàtúu-í núú Tǎtá-í Dútú Ndiǒxí Yaá ndécú àndiū sǎ ndécú ndihí-í-yu.

33 Dico nchaa ñáyiu na cǔñaha xii tnàha ñáyiu-xi sǎ ñà túú ndècu ndihí ñáhá-yu xii-í, te diu-ni duca<sup>n</sup> càda yùhú tucu chi cǔñaha-í xii Tǎtá-í Dútú Ndiǒxí Yaá ndécú àndiū sǎ ñà túú ndècu ndihí-í-yu.

*Ñá túú cùu ì<sup>n</sup>nuu ñáyiu*  
*(Lc. 12:51-53; 14:26-27)*

34 'Te na càchí tnúhu-í xii-ndo sǎ vǎ cání iní-ndó sǎ yùhú véxi-í ñuyíú-a te cuu ì<sup>n</sup>nuu-gǎ ñáyiu cundecú-yu, chi da ngüita-yu vǎ cúú ì<sup>n</sup>nuu-gá-yu cundecú-yu, te duca<sup>n</sup> chi nchaa ñáyiu vǎ quíndáá iní ñáhá xii-í ñáyiu-á<sup>n</sup> ngóo-yu cuu úhú iní-yu nchaa ñáyiu quíndáá iní ñáhá xii-í.

35 Te daya cue tée xǐndecu tǎtá-xi te ngóo-güedé cuu úhú iní-güedé tǎtá-güedé, te diu-ni duca<sup>n</sup> càda cue ñáyiu dǐhí xǐndecu nǎná-xi, chi ngóo-yu cuu úhú iní-yu nǎná-yu, te diu-ni duca<sup>n</sup> càda tucu cue ñáyiu cùu

sánu, chi ngóo-yu cuu úhú iní-yu nǎná yíi-yu.

36 Te ndi mèe-yu vehé-yu ngóo-yu vǎ cúú ì<sup>n</sup>nuu-gá-yu cundecú-yu.

37 'Te na càchí tnúhu tucu-í xii-ndo sǎ ncháá ñáyiu ío-gá ná cùu iní tǎtá-xi àdi nǎná-xi dàcúúxí yùhú, te ñáyiu-á<sup>n</sup> ñà túú tàú-yu cundecu ndihí ñáhá-yu xii-í, te nchaa ñáyiu ío-gá ná cùu iní déhe ducu<sup>n</sup>-xi, àdi déhe yoco-xi dàcúúxí yùhú, te diu-ni duca<sup>n</sup> ñà túú tàú-yu cundecu ndihí ñáhá-yu xii-í.

38 Te nchaa ñáyiu vǎ cǎnchícú<sup>n</sup> ni-hnu ñaha xii-í cuendá sǎ yùhú-yu ndohó-yu dàtná ndoho-í ñáyiu-á<sup>n</sup> ñà túú tàú-yu cundecu ndihí ñáhá-yu xii-í.

39 Te cue ñáyiu na yùhú cuú sǎ cuendá-í te ñáyiu-á<sup>n</sup> cuíta nihnú-yu, dico nchaa ñáyiu vǎ yùhú cuú sǎ cuendá-í, te ñáyiu-á<sup>n</sup> nduu táhú-yu cundecú-yu ni caa ni quíhí<sup>n</sup> ndihí Yá Ndiǒxí.

*Cuendá sǎ ndúú tǎhú-ó*  
*(Mr. 9:41)*

40 'Te nchaa ñáyiu na quèhe<sup>n</sup> cuendá ñáhá xii-ndo te cada iní-yu sǎ tnàhá yùhú ní quehe<sup>n</sup> cuendá-yu. Te nchaa ñáyiu na quèhe<sup>n</sup> cuendá ñáhá xii-í, te cada iní-yu sǎ tnàhá Tǎtá-í Dútú Ndiǒxí Yaá ní tendaha ñàha xii-í véxi-í ñuyíú-a ní quehe<sup>n</sup> cuendá-yu.

41 Te nchaa ñáyiu na quèhe<sup>n</sup> cuendá ì<sup>n</sup> tée càhá<sup>n</sup> tnúhu Yá Ndiǒxí cuendá sǎ quídé-dě chiu<sup>n</sup>-gá, te dàtná-ni càa táhú cuǎñaha-gǎ nduu táhú tée duca<sup>n</sup> càhá<sup>n</sup> tnúhu-gá-á<sup>n</sup>, diu-ni duca<sup>n</sup> cùnduu táhú cuǎñaha-gǎ nduu táhú ñáyiu duca<sup>n</sup> na quèhe<sup>n</sup> cuendá ñáhá xii-dé. Te nchaa ñáyiu na quèhe<sup>n</sup> cuendá ì<sup>n</sup> tée quíde váha cuendá sǎ dúcá<sup>n</sup> quíde váha-dé, te dàtná-ni càa táhú nduu táhú tée-á<sup>n</sup> diu-ni duca<sup>n</sup> cùnduu táhú nduu táhú ñáyiu na quèhe<sup>n</sup> cuendá ñáhá xii-dé.

42 Te nchaa ñáyiu na cuǎñaha ì<sup>n</sup> yaxi<sup>n</sup> ndute coho ì<sup>n</sup> ñáyiu cùu cuendá-í cuendá sǎ ní tuha ñáhá-yu xii-í cuèi ñá túú cùnūu vihi-yu, te ñáyiu duca<sup>n</sup> na cuǎñaha ndùte-á<sup>n</sup> nǐhí-yu sǎ ndúú tǎhú-yu núú

Yă Ndiöxí —càchí Jèsús xăha<sup>n</sup>-gă xii-güedé.

## 11

*Jèsús càhá<sup>n</sup> ndihí-gá cue téé xica cuu ndihí té Juàá*

*(Lc. 7:18-35)*

<sup>1</sup> Te sátá nǐ yáha duca<sup>n</sup> nǐ xáha<sup>n</sup> Jèsús xii ndi ùxúú cue téé xica cuu ndihí-gá, te ní xica-gá cuáhá<sup>n</sup>-gá nchaa ñuú cáá yàtni xiá<sup>n</sup> dánèhé-gá ñáyiu tnúhu-gá.

<sup>2</sup> Te té Juàá yìhi-dé vecaá te ní níhí-dě tnúhu nchaa nàcuáa quide Xitohó Jesucristú. Te sátá dúcá<sup>n</sup> te ní tendaha-dě ì<sup>n</sup> ũú cue téé xica cuu ndihí-dé cuáhá<sup>n</sup>-güedé núú ndécú Jèsús.

<sup>3</sup> Te òré ní quexìo-güedé núú ndécú-gă, te xicá<sup>n</sup> tnúhú-güedé núú-gă nàcuáa ní xáha<sup>n</sup> tǐ Juàá xii-güedé, te xăha<sup>n</sup>-güedé xii-gă:

—Véxi-ndí xicá<sup>n</sup> tnúhú-ndí núú-n nũu sá díú-n cùu-n Cristú Yaá ní tendaha Yă Ndiöxí véxi ñuyíú-a, àdi sá cündetu nahi-ni-ndí mei Yàá-á<sup>n</sup> —càchí-güedé xăha<sup>n</sup>-güedé xii-gă.

<sup>4</sup> Te Jèsús ní xáha<sup>n</sup>-gă xii-güedé:

—Chí cuánuhú te cani-ndo cuèndú núú tǐ Juàá nchaa sá nǐ xiní-ndó quide-í, ndihí nchaa nàcuáa ndùu tnúhu ní cáhá<sup>n</sup>-í ní xíndedóho-ndo.

<sup>5</sup> Te cúñaha-ndo xii-dé sá quidé tătna-í núú cuè ñáyiu cuáa, te quide tătna-í cue ñáyiu yacua, ndihí cue ñáyiu tnàhá cuéhé sǎ dátèhyú ni-hnu-xi yiqui cùñú-yu, ndihí cue ñáyiu doho, nchaa ñáyiu-á<sup>n</sup> quidé tătna-í, te ndũha-yu, te ndéé tnàhá cue ñáyiu sa ní xíhí dándòto-í cúñaha-ndo. Te cúñaha tucu-ndo xii-dé sá ndécuu-í dánèhé-í nchaa ñáyiu ndàhú, tnúhu sá sánú ìchi ñaha xii-yu nàcuáa naníhí tǎhú-yu.

<sup>6</sup> Te cúñaha tucu-ndo xii-dé sá ìo vǎha tǎhú nchaa ñáyiu ñá túú quide sáá iní-xi nchaa tnúhu càhá<sup>n</sup>-í, duha cúñaha-ndo xii-dé —càchí-gá xăha<sup>n</sup>-gă xii-güedé.

<sup>7</sup> Te sátá nǐ yáha-güedé cuánuhú-güedé te ní ngüíta Jèsús ní cáhá<sup>n</sup>-gá núú ñáyiu cuèndá té Juàá, te xăha<sup>n</sup>-gă xii-yu:

—Nchòhó ní sáhá<sup>n</sup> ndéhé-ndó ì<sup>n</sup> téé ndècu xití yucu, te téé-á<sup>n</sup> ñà túú sàni ì<sup>n</sup> sani úú iní-dé, chi ñá túú quide-dé dàtná quidé nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tǎchí.

<sup>8</sup> Te ni ñà túú ní sáhá<sup>n</sup> ndéhé-ndó ì<sup>n</sup> téé ñihnu dóó vǎha dóó vii càa. Te nchòhó xini-ndó sǎ ncháá ñáyiu ñihnu dóó vǎha dóó vii càa xíndecú-yu vehe cue téé cùnūu yíndaha ñáyiu.

<sup>9</sup> Dico nchòhó chi ní sándéhé-ndó ì<sup>n</sup> téé càhá<sup>n</sup> tnúhu Yá Ndiöxí, te ndáá sá díú ì<sup>n</sup> téé càhá<sup>n</sup> tnúhu-gá cúú-dě, te cùnūu-gá-dé dàcúxí dàva-gá cue téé càhá<sup>n</sup> tnúhu-gá.

<sup>10</sup> Te diu cuèndá té Juàá-á<sup>n</sup> càhá<sup>n</sup>-xi núú tütú Yă Ndiöxí nàcuáa ní xáha<sup>n</sup>-gă xii Cristú, te duha ní xáha<sup>n</sup>-gă:

Tendaha-ì ì<sup>n</sup> téé cáhá<sup>n</sup>-dé tnúhu-í codonūu-dé núú-n,

cuèndá dàtúha-dé ñáyiu cuèndá quíndáá iní-yu tnúhu-n.

Duha ní xáha<sup>n</sup>-gă, te duca<sup>n</sup> nǐ ngódó tnùní núú tütú-gă.

<sup>11</sup> Te na càchí tnúhu ndáá-í xii-ndo sǎ nǐ ì<sup>n</sup> cue téé ñuyíú-a ñá túú cùnūu-güedé dàtná cùnūu té Juàá téé dàcuandute ñaha xii ñáyiu. Te nchaa ñáyiu sa ta ndĩhu ndaha ñaha Yá Ndiöxí vitna cuáhá<sup>n</sup> cùnūu-gá-ni tucú-yu dàcúxí tǐ Juàá cuèi cùu-yu ñáyiu ñá túú cùnūu dacúxí dàva-gă ñáyiu yíndaha-gă.

<sup>12</sup> Te ndéé cútnàhá ní ngüíta té Juàá téé dàcuandute ñaha xii ñáyiu càhá<sup>n</sup>-dé tnúhu Yá Ndiöxí ñuyíú-a, ndéé dàvá-á<sup>n</sup> nǐ ngüíta ñáyiu cuíni-yu sá ndĩhu ndaha ñaha Yá Ndiöxí xii-yu te ndùcu ndéé-yu quidé-yu nàcuáa ndĩhu ndaha ñaha-gă xii-yu.

<sup>13</sup> Te nchaa cue téé ní xóo cáhá<sup>n</sup> tnúhu Yá Ndiöxí ndéé sanaha nǐ cáhá<sup>n</sup>-güedé sá díú-gă ndĩhu ndaha-gă cue ñáyiu, te diu-ni duca<sup>n</sup> nǐ cáhá<sup>n</sup> tucu ndíi Moisés ní ngódó tnùní núú tütú ndíi. Te diu-ni duca<sup>n</sup> cùnūu nchaa tnúhu-á<sup>n</sup> càhá<sup>n</sup>-xi nàcuáa ndĩhu ndaha Yă Ndiöxí ñáyiu ndéé ní sáá nduu nǐ ngüíta té Juàá càhá<sup>n</sup>-dé tnúhu-gă ñuyíú-a.

14 Te na cächí tnúhu-í xii-ndo sã cáda cuendá-ndó, chi núú tütú Yá Ndiöxí cächí-xi sá ndíxí tẽ Èliás, te ñiu núú tẽ Èliás-án ñi quide té Juàá.

15 Te nchaa nchòhó ñáyiú ndédóho nchaa tnúhu cãhá<sup>n</sup>-í-a te ío váha chí cuãha cuendá.

16 "Te na cächí tnúhu tucu-í xii-ndo nãcuáa sãtnahá-xi cùu ñáyiú ndècu vitna. Chi ñáyiú-án cúu-yu dàtná cue landú sácõo núú yãhu dàdiqui-güexi te níhi cãhá<sup>n</sup>-güexi, te xĩtnãha-güexi ndi mee landú-güexi:

17 "Ní tiú-ndí yaá ndihi vïlu te ñá túú ní cuiní-ndó càta-ndo. Te ío yica iní ní xita yuhu-ndí te ñá túú ní ndãhyú-ndó", cächí-güexi xĩtnãha-güexi. Te duca<sup>n</sup> sãtnahá-xi cùu ñáyiú ndècu vitna,

18 chi té Juàá ío ndàhú ní xóo caxi-dé, te ñi ñà túú ní xóo coho-dé ndudí ndéhé yoho yãha stilé sá sà ní nduu-xi ndidí, te sá dúcá<sup>n</sup> ñi xóo cada-dé te ní cachí-yu sá ñi xĩndecu ndihi-dé espíritú cündihí yucu ñãvãha.

19 Te sátá ñi quexio yúhú Tée cùu ñani tnáhá-ndó nchãa-ndo, te xèxi-í xihí-í quidè-í, te cächí-yu sá yúhú cúu-í ñ<sup>n</sup> tée xèxi vihi te xihí vihi, te cächí tucu-yu sá cúu-í tée xica cuu ndihi cue tée cuihna iní-xi quide cobrá ñáhá xii-yu cuendá impuèstú ndihi nchaa dava-gá cue tée ndècu ichi cuehé ichi duha, duha cächí-yu. Te ñáyiú ní tnahá tnúhu ndihi Yá Ndiöxí, ñáyiú-án quidè-yu sá vãha nãcuáa cutnùní sá méé-gã ío ndècu ndihi-gá sá xini tnùní-gá —cächí-gá xãha<sup>n</sup>-gã xii-yu.

*Cuendá ñáyiú dava ñuú ñá túú sãndáá iní tnúhu Xitohó Jesucristú*  
(Lc. 10:13-15)

20 Te Jèsús ní ngüíta-gá cãhá<sup>n</sup>-gá dóho nchaa ñáyiú ñuú núú ío-gá vai núú sã vã yõo tnãhí ndàcu cada ní quide-gá, chi nchaa ñáyiú ñuú-án ñà túú cuiní-yu ndixi túu iní-yu sá ñà túú quide váha-yu ndècú-yu, te xãha<sup>n</sup>-gã xii-yu:

21 —;Ndàhú nchòhó cue ñáyiú ñuú Corazín! ;Te ndàhú nchòhó cue ñáyiú ñuú Bètsaidá! Chi núú dicó ñuú Tírú

ndihi ñuú Sídón ní quide-í nchaa sá vã yõo tnãhí ndàcu cada datná ní quide-í ñuú-ndó-á ñi xini-ndó ñá, te sá ndéé ama-gá cuihnú-yu dóo ndàhú te cunu cóo-yu núú yãa cuendá sá ndíxí cuèchi iní-yu sá ñà túú quide váha-yu ñi cùu.

22 Dico sáa nduu te ío-gá dandòho ñaha Yá Ndiöxí xii-ndo dàcúxí ñáyiú ñuú Tírú ndihi ñáyiú ñuú Sídón.

23 Te nchòhó cue ñáyiú ñuú Capèrnaúm ío quide cahnu-ndo mee-ndo, te quide iní-ndó sã sã cuãndaa-ná-ndó àndiu, dico ñáhá chi núú ùhú núú ndàhú nduu táhú-ndó cùndecu-ndo. Te núú dicó ñuú Sòdomá ní quide-í nchaa sá vã yõo tnãhí ndàcu cada datná ní quide-í ñuú-ndó ñi xini-ndó ñá, te ñáyiú-án vã náã-yu chi cundecu-ní-yu ndéé vitna ñi cùu.

24 Te na cächí tnúhu-í xii-ndo sã sãa nduu te ío-gá dandòho ñaha Yá Ndiöxí xii-ndo dàcúxí ñáyiú ñuú Sòdomá —cächí-gá xãha<sup>n</sup>-gã xii nchaa ñáyiú ñuú-án.

*Jèsús cuiní-gá sá túhá ñaha ñáyiú xii-gá*

(Lc. 10:21-22)

25 Te sátá xã<sup>n</sup> te Jèsús ní ngüíta-gá cãhá<sup>n</sup> ndihi-gá Tãtã-gã Dútú Ndiöxí, te xãha<sup>n</sup>-gã:

—Yòhó Tãtã-í Dútú Ndiöxí, ío chĩñuhu ñaha-í xii-n chi ñiu-n tàxi tnuní-n àndiu ndihi ñuyíú-a, te dãnehé-n cuè ñáyiú nchaa tnúhu váha, te ñiu-ni ñáyiú-án cúu-yu ñáyiú ñá túú cùtnuní iní-xi nchaa tnúhu cãhá<sup>n</sup> cue tée cächí sá ío túha, te nchaa tnúhu váha-án ñà túú dàtúu-n núú ñáyiú cächí sá ío túha te ío váha sãa díquí-xi.

26 Chi duca<sup>n</sup> cuiní-n cùnduu —cachí-gá xãha<sup>n</sup>-gã xii Tãtã-gã.

27 Te xãha<sup>n</sup>-gã xii nchaa ñáyiú xĩndecu-án:

—Mee Tãtã-í Dútú Ndiöxí ní cachí-gá sá cùnùu-í núú nchãandí túhú sá ío. Te vá yõo ñ<sup>n</sup>-gá xini nãcuáa sãni iní yúhú Déhe Dútú Ndiöxí, chi ñ<sup>n</sup>dii díí-ni mee-gã xini-gá nãcuáa sãni iní-í, te mee-í xini-í nãcuáa sãni iní méé-gã. Te nchaa ñáyiú cächí iní-í sá quini-yu nãcuáa sãni iní Tãtã-í Dútú Ndiöxí te xĩtnúhu-í-yu, te vá

yõo ì<sup>n</sup>-gá xìní chi diu-ni ñáyiú duca<sup>n</sup> xítñúhu-í-á<sup>n</sup> xìní-yu.

<sup>28</sup> Te nchaa nchòhó ñáyiú ñá túú ndècu váha, ñáyiú ñá túú ñihí nàcuáa cada cundecu váha iní-xi quixi-ndo tùha ñaha-ndo xii-í nàcuáa duca<sup>n</sup> cundecu váha iní-ndó.

<sup>29</sup> Te cuu vii cuu váha iní-ndó tñi-ndo nchaa tñúhu càhá<sup>n</sup>-í, te ío dacuáha-ndo, te duca<sup>n</sup> càda-ndo chi yúhú ío càhnu iní-í, te ío ndàhú iní-í. Te núu duca<sup>n</sup> na càda-ndo te ío váha cuu iní-ndó cundecu-ndo.

<sup>30</sup> Te tñi-ndo nchaa tñúhu càhá<sup>n</sup>-í chi ñá túú cùu-xi ì<sup>n</sup> sá vëe, chi cada iní-ndó sá cúu-xí dàtná ì<sup>n</sup> chiù<sup>n</sup> ñamá –càchí-gá xàha<sup>n</sup>-gã xii-yu.

## 12

*Cue tée xica cuu ndihi Jesús sàhnú-güedé yoco triú nduu ndetátú ñáyiú*

*(Mr. 2:23-28; Lc. 6:1-5)*

<sup>1</sup> Te ì<sup>n</sup> nduu cùu-xi nduu ndetátú ñáyiú ñúhu Jesús ichi ndihi cue tée xica cuu ndihi-gá, te ta yáha-gá ndihi-güedé ì<sup>n</sup> xichi núu cáá triú te xixíhí-güedé docó nñu xíá<sup>n</sup> ní ngüíta-güedé sàhnú-güedé yoco triú-á<sup>n</sup>, te ndihi ndaha-güedé quí<sup>n</sup>-güedé quée triú-á<sup>n</sup> tá xèxi-güedé cuáhá<sup>n</sup>.

<sup>2</sup> Te cue tée cùu fariséú ní xini-güedé nàcuáa quide cue tée xica cuu ndihi Jesús, núu ní xáha<sup>n</sup>-güedé xii-gá:

–¿Ná cuèndá duca<sup>n</sup> quide cue tée xica cuu ndihi-n sàhnú-güedé yoco triú, te vitna cùu-xi nduu ndetátú-í? Te ñá túú tàú-güedé duca<sup>n</sup> càda-güedé –càchí-güedé xàha<sup>n</sup>-güedé xii-gá.

<sup>3</sup> Te Jèsús ní xáha<sup>n</sup>-gã xii-güedé:

–¿Náa ñá túú dàcuaha-ndo núu tütú Yá Ndióxi núu càhá<sup>n</sup>-xi nàcuáa ní quide ndíi Dàvií cùtnàhá ní xihí ndíi docó ndihi cue tée ní xica cuu ndihi ndíi-á<sup>n</sup>?

<sup>4</sup> Chi ndíi-á<sup>n</sup> ní quíhu ndíi vehe Yá Ndióxi ní quehe<sup>n</sup> ndíi pàá ní cuu íi ndécú-á<sup>n</sup> ní xexi ndíi ndihi cue tée ní xica cuu ndihi ndíi, te ñá túú tàú ndíi sá dúcá<sup>n</sup> càda ndíi ndihi cue tée-á<sup>n</sup> ní cùu, chi mee-ni cuè dütú tàú-güedé caxi-güedé pàá-á<sup>n</sup> ní cùu.

<sup>5</sup> ¿Te náa ñá túú xini-ndó nàcuáa càhá<sup>n</sup>-xi núu tütú ndíi Moisés sá ncháá cuè dütú vã ndetátú-güedé nduu cùu-xi nduu ndetátú-á<sup>n</sup>? Te ñá díú ì<sup>n</sup> cuéchi cùu-xi sá dúcá<sup>n</sup> ñá túú ndetátú-güedé nduu cùu-xi nduu ndetátú.

<sup>6</sup> Te na càchí tñúhu-í xii-ndo sã yúhú cùu-í téé ío-gá cùnùu ndecu ndihi-ndo dacúxí vèñúhu sá ío cùnùu.

<sup>7</sup> Dico nchòhó chi ñá təcú tñùní-ndó nàcuáa càhá<sup>n</sup> Yá Ndióxi núu tütú-gá núu càchí-xi: “Yúhú cuini-í sá cùndàhú iní-ndó cuè tñaha ñáyiú-ndo te ñá díú mèe-ni sá cáhni-ndó quiti nduu táhú-í”, duha càchí-gá núu tütú-gá. Te núu dicó nchòhó təcú tñùní-ndó ñá, te vá càhá<sup>n</sup> cuèhé-ndó cuèndá nchaa ñáyiú ñá túú ndecu cuéchi-xi.

<sup>8</sup> Te yúhú Téé cùu ñaní tñahá-ndó nchaa-ndo, tñahá-í ndécú ndihi-í tñúhu ndee iní sá cùu-í nchaa ñáyiú nàcuáa cadá-yu nduu ndetátú-ó-á –càchí-gá xàha<sup>n</sup>-gã xii-güedé.

*Ì<sup>n</sup> téé ní yíchí ì<sup>n</sup> xio ndaha-xi*

*(Mr. 3:1-6; Lc. 6:6-11)*

<sup>9</sup> Te Jèsús ní xica-gá cuáhá<sup>n</sup>-gá, te cuànguihu-gá xiti ì<sup>n</sup> veñúhu.

<sup>10</sup> Te xía<sup>n</sup> ndécú ì<sup>n</sup> téé ní yíchí ì<sup>n</sup> xio ndaha-dé. Te dava cue téé xíndecu-á<sup>n</sup> ndúcú-güedé nàcuáa cada-güedé cacá<sup>n</sup> cuéchi-güedé cuèndá-gá núu cuè téé cùnùu, te ní xicá<sup>n</sup> tñuhú-güedé núu-gã, te xàha<sup>n</sup>-güedé:

–Cachí tñúhu xii-ndí nñu cuu cada tátna-o ì<sup>n</sup> téé cùhú nduu cùu-xi nduu ndetátú-ó á<sup>n</sup> ñáhá –càchí-güedé xàha<sup>n</sup>-güedé xii-gá.

<sup>11</sup> Te Jèsús ní xáha<sup>n</sup>-gã xii-güedé:

–Te nchòhó òré ná ngàunihnu ì<sup>n</sup> mbéé-ndó ì<sup>n</sup> déhvä cùnùu te nàtava-ndo-di cuéi cùu-xi nduu ndetátú-ó.

<sup>12</sup> Te ì<sup>n</sup> ñáyiú ío-gá cùnùu-yu dàcúxí ì<sup>n</sup> mbéé, núu xíá<sup>n</sup> tàú-ó sã cadá-ó sã váha sá cúu-xi-yu cuéi cùu-xi nduu ndetátú-ó –càchí-gá xàha<sup>n</sup>-gã xii-güedé.

<sup>13</sup> Te dàtnùní ní xáha<sup>n</sup>-gã xii téé cùhú ndaha-xi-á<sup>n</sup>:

–Ndacani ndaha-n –càchí-gá xàha<sup>n</sup>-gã xii-dé.

Te téé-á<sup>n</sup> nǐ ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé.

14 Te cue téé cùu fariséú ní ndee-güedé xití veñúhu, te ní ngüíta-güedé ndátnúhu-güedé nùu nása cada-güedé cahni-güedé Jèsús.

*Nàcuáa sa ndèé tñuní cuèndá Jèsús*

15 Te sátá nǐ cutnùní iní Jèsús nàcuáa cuìní-güedé cada ñaha-güedé xii-gá te ní xica-gá cuáhá<sup>n</sup>-gá, te ío vǎi ñáyiú nchicú<sup>n</sup> ñáhá xii-gá cuáhá<sup>n</sup>, te tñáhá cue ñáyiú cùhú nchìcú<sup>n</sup> ñáhá xii-gá cuáhá<sup>n</sup>, te ní quide tátna-gá cue ñáyiú-á<sup>n</sup>.

16 Te ní xáha<sup>n</sup>-gǎ xii-yu sá vǎ cǎhá<sup>n</sup>-yu yoo cùu-gá.

17 Te duca<sup>n</sup> nǐ cuu chi ní quee ndáá-xi nàcuáa ní xáha<sup>n</sup> Yǎ Ndiòxí xii ndíi Chàíá téé ní xóo cáhá<sup>n</sup> tñúhu-gá ndéé sanaha nǐ chídó tñuní ndíi núú tütú-gá, te duha ndùu tñúhu ní xáha<sup>n</sup>-gǎ:

18 Téé-a cùu-dé téé ní sani iní-í sá cúnú cuèchi-dé núu-í,

te ío cùu iní-í-dé, te cùdíí iní-í-dé.

Te yúhú cuáñaha-í Espíritú-í cundecu ndíhi-dé,

te ñu-dé cùñaha-dé xii nchaa ñáyiú ñuyíú sǎ yúhú ío ndáá quidè-í.

19 Te vǎ dǎcǎá-dé tñúhu cáhá<sup>n</sup>-dé ndíhi ñáyiú, te ni vǎ cǎná sǎa-dé òré cáhá<sup>n</sup>-dé,

te ni vǎ yóo níhi tñúhu nása cáhá<sup>n</sup>-dé cùhú-dé ichi.

20 Te ní ñà túú nǎ cada-dé cue ñáyiú cùu datná ñ<sup>n</sup> tnu ndóó sá cuìní-xi tñáhnú, te ñu-ni ñáyiú-á<sup>n</sup> cúú tucú-yu dàtná ñ<sup>n</sup> méchá cǎndíl sǎ ío quène ñúhmá te cuìní-xi ndahvá.

Te duca<sup>n</sup> sǎtnahá-xi cùu ñáyiú-á<sup>n</sup> chi ñá túú níhi ndéé-yu cundecú-yu sá cúú-xi-í, te mee-ni sǎ vǎha cada ñaha-dé xii-yu,

te ñu-ni duca<sup>n</sup> cǎda-dé ndéé sǎá nduú cùtñuní iní nchaa ñáyiú sǎ ío ndáá quidè-dé.

21 Te nchaa ñáyiú níhi ñuyíú ío cundee cùu cahnu iní ñáhǎ-yu xii-dé.

Duha ní xáha<sup>n</sup>-gǎ xii ndíi Chàíá ní chídó tñuní ndíi núú tütú-gá.

*Càchí-güedé sá ndécú ndíhi Jèsús espíritú cùndíhi yucu ñávǎha*

(Mr. 3:20-30; Lc. 11:14-23; 12:10)

22 Te ní quexíó ñ<sup>n</sup> úú cue téé núú ndécú Jèsús, te ndéca-güedé ñ<sup>n</sup> téé ñíhi te cuáá-dé, te yíhi ñaha espíritú cùndíhi yucu ñávǎha xii-dé, te Jèsús ní queñuhu-gá espíritú cùndíhi yucu ñávǎha yíhi ñaha xii-dé, te òré-ni-á<sup>n</sup> nǐ cuu ní nacáhá<sup>n</sup>-dé te ní ndúha núú-dé.

23 Te nchaa ñáyiú xǐndecu-á<sup>n</sup> ío ní cuñúhu-yu sá dúcá<sup>n</sup> nǐ quide-gá, te ní xítñahá-yu:

—Vǎa téé-a cùu-dé ñaní tñáhá ndíi Dávíí téé tendaha Yǎ Ndiòxí quixi ñuyíú-a —càchí-yu xítñahá-yu.

24 Te cue téé cùu fariséú ní tecú dóho-güedé nàcuáa ndùu tñúhu xítñahá-yu, núu xǎá<sup>n</sup> ní xítñaha-güedé:

—Téé-a ndèñuhu-dé nchaa espíritú cùndíhi sácuíhná yíhi ñaha xii ñáyiú, chi ñu-ni sácuíhná-á<sup>n</sup> chǐndèe ñaha-xi xii-dé te ñu-ni-xi tǎxi tñuní-xi nchaa espíritú-á<sup>n</sup> —duha ní xítñaha-güedé.

25 Te Jèsús ní cutnùní iní-gá nàcuáa ndùu tñúhu ní xítñaha-güedé, núu ní xáha<sup>n</sup>-gǎ xii-güedé:

—Te nchòhó xíní-ndó sǎ nùu ñ<sup>n</sup> téé yǐndaha ñ<sup>n</sup> nació<sup>n</sup> vǎ cúú ñ<sup>n</sup>nuu-dé ndíhi cue téé cùndíhi-dé, te vǎ cùdíí-dé cunuu-dé. Te ñu-ni duca<sup>n</sup> sǎtnahá tucu-xi cùu tucu cue téé cùchiu<sup>n</sup> ñ<sup>n</sup> ñuú, chi núu vǎ cúú ñ<sup>n</sup>nuu-güedé cundecu-güedé, te vǎ cùdíí-güedé cundecu-güedé taxi tñuní-güedé. Te ñu-ni duca<sup>n</sup> sǎtnahá tucu-xi cùu cue ñáyiú xǐndecu ñ<sup>n</sup>-ni vèhe, chi núu vǎ cúú ñ<sup>n</sup>nuú-yu cundecú-yu te vǎ cùdíí-yu cundecu cǎhnú-yu.

26 Te núu sácuíhná duca<sup>n</sup> quide-xi queñuhu-xi cue espíritú cùndíhi-xi yíhi ñaha xii ñáyiú ña, te ñá túú cùu ñ<sup>n</sup>nuu-xi ndecu-xi te núu duca<sup>n</sup>, te vǎ cùdíí sácuíhná-á<sup>n</sup> cundecu-xi taxi tñuní-xi te núu duca<sup>n</sup> quide-xi.

27 Te duha cǎhá<sup>n</sup>-í chi nchòhó càchí-ndó sǎ chǐndèe ñaha sácuíhná xii-í queñúhu-í nchaa espíritú cùndíhi-xi yíhi ñaha xii ñáyiú. Te núu yúhú quidè cuèndá-ndó sǎ sácuíhná chǐndèe ñaha-xi xii-í, te xíni ñuhu-xi cada cuendá-ndó yóo

chindee ñaha xii cue tée xica cuu ndihi-ndo queñuhu-güedé nchaa espíritú cündihi yucu ñávaha yíhi ñaha xii ñáyi. Te mee-güedé cächí-güedé sá nchòhó ñá túú cãhá<sup>n</sup> ndáá-ndó sã dúcá<sup>n</sup> cãhá<sup>n</sup>-ndó.

<sup>28</sup> Dico yúhú chi Espíritú Yã Ndiõxí chindèe ñaha-xi xii-í queñuhu-í nchaa espíritú cündihi sácuhlá yíhi ñaha xii ñáyi, te sã dúcá<sup>n</sup> chindee ñaha Espíritú-gá xii-í, xiã<sup>n</sup> cútnuní sã sã ní sáá nduu cuiní-gá ndíhu ndaha ñaha-gá xii-ndo.

<sup>29</sup> Te nchòhó xini-ndó sã cuè ñadúhú chi vá ndácú-güedé cuendá-ni quíhu-güedé duhu-güedé vehe ñá tée ío ndee, chi díhna-gá xini ñuhu-xi tñi-güedé tée-á<sup>n</sup> dacutu ñaha-güedé xii-dé dãtnuní duca<sup>n</sup> te ndacu-güedé duhu-güedé nchaa sã ndécú ndihi-dé.

<sup>30</sup> Te nchaa ñáyi ñá túú cündihi ñaha xii-í, te cùu úhú iní ñáhã-yu. Te nchaa ñáyi ñá túú chindee ñaha xii-í, te dàquee tíhũ-yu chiú<sup>n</sup> quide-í.

<sup>31</sup> Te na cächí tnúhu-í xii-ndo sã ncháá ñáyi quide nchaa sã cuèhé sã dúhá cuu cada cãhnu iní ñáhá Yã Ndiõxí xii-yu, te ñi-ni duca<sup>n</sup> cùu cada cãhnu iní-gá nchaa tnúhu cuèhé tnúhu duha cãhá<sup>n</sup>-yu. Dico cue ñáyi na cãhá<sup>n</sup> úhú cuendá Espíritú-gá, te ñáyi-á<sup>n</sup> vã cádá cãhnu iní ñáhá tnàhí-gá xii-yu.

<sup>32</sup> Te nchaa ñáyi na cãhá<sup>n</sup> úhú cuendá yúhú Tée cùu ñaní tnáhã-yu ncháá-yu, te cuu cada cãhnu iní ñáhá Yã Ndiõxí xii-yu. Dico cue ñáyi na cãhá<sup>n</sup> úhú cuendá Espíritú-gá te vá cádá cãhnu iní ñáhá tnàhí-gá xii-yu cuèi vitna ndècu vívũ-yu, te cuèi na cùu-yu.

*Ndi díí<sup>n</sup> núú yutnu xini-ó ñá yutnu cùu-xi cuendá sã sãvidí-xi (Lc. 6:43-45)*

<sup>33</sup> Te nchòhó xini-ndó sã ndi díí<sup>n</sup> núú yutnu xini-ó ñá yutnu cùu-xi cuendá sã sãvidí-xi, te xini-ó sã ncháá yutnu váha cùu<sup>n</sup> mee-ni sãvidí váha, dico nchaa yutnu sã ñá túú váha te cùu<sup>n</sup> mee-ni sãvidí sã ñá túú váha. Te duha cãhá<sup>n</sup>-í cuendá cada cuendá váha-ndo nacuaa nduu chiú<sup>n</sup>

quide-ndo ñá ñá-ndo cuendá duca<sup>n</sup> cùtnuní ná ñáyi cùu-ndo.

<sup>34</sup> Dico nchòhó cúu-ndó dàtná ñá cóo dèé<sup>n</sup> chi ío cuihna iní-ndó, te vá cáni iní-ndó sã ndácú-ndó cãhá<sup>n</sup>-ndó ñá tnúhu váha, chi ío cuihna iní-ndó. Te nchòhó xini-ndó sã ncháá ñáyi cãhá<sup>n</sup>-yu náni véxi iní-yu.

<sup>35</sup> Te nchaa ñáyi váha iní-xi cãhá<sup>n</sup>-yu tnúhu váha, chi ñi-ni tnúhu váha-á<sup>n</sup> ñúhú iní-yu. Te nchaa ñáyi cuihna iní-xi cãhá<sup>n</sup>-yu tnúhu cuèhé tnúhu duha, chi ñi-ni tnúhu cuèhé tnúhu duha-á<sup>n</sup> ñúhú iní-yu.

<sup>36</sup> Te na cächí tnúhu-í xii-ndo sã ná sáá nduu cada ndáá Yã Ndiõxí cuèchi nchaa nchòhó ñáyi ndècu ñuyíú-a, te nchaa tnúhu cuèhé tnúhu duha cãhá<sup>n</sup>-ndó cãhá<sup>n</sup>-gá sã ñá túú ní quide váha-ndo sã dúcá<sup>n</sup> ní cãhá<sup>n</sup>-ndó tnúhu-á<sup>n</sup>.

<sup>37</sup> Te nacuaa nduu tnúhu ní cãhá<sup>n</sup>-ndó ñá ñá-ndo, te duca<sup>n</sup> cãhá<sup>n</sup> Yã Ndiõxí te núu ndècu cuèchi-ndo àdi ñá túú ndècu cuèchi-ndo. Te núu ñá túú cuèchi-ndo te cácu-ndo, dico núu ndècu cuèchi-ndo te vá cácu-ndo —cächí-gá xãhá<sup>n</sup>-gã xii cue tée cùu fariséu-á<sup>n</sup>.

*Cue tée cuiní sã cádá Jèsús ñá sã vã yõo tnàhí ndàcu cada*

*(Mr. 8:12; Lc. 11:29-32)*

<sup>38</sup> Te cue tée cùu fariséu, ndihi cue tée dàcuaha ñaha xii ñáyi nchaa tnúhu ní chidó tnuní ndi Moisés xãhá<sup>n</sup>-güedé xii Jèsús:

—Mèstrú, cuiní-ndí cada-n ñá sã vã yõo tnàhí ndàcu cada cuendá duca<sup>n</sup> cùtnuní iní-ndí sã Yã Ndiõxí chindèe ñaha-gá xii-n —cächí-güedé xãhá<sup>n</sup>-güedé xii-gá.

<sup>39</sup> Te Jèsús ní xãhá<sup>n</sup>-gã xii-güedé:

—Ñáyi ndècu ichi cuèhé ichi duha ñá túú cuiní-yu tñi-yu tnúhu cãhá<sup>n</sup> Yã Ndiõxí, te ñáyi-á<sup>n</sup> cuiní-yu cada-í ñá sã vã yõo tnàhí ndàcu cada nacuaa cùtnuní iní-yu núu ndáá sã Yã Ndiõxí chindèe ñaha-gá xii-í. Dico yúhú chi ñá túú ñágá cada-í quini-yu, chi sa ñi-yu tnúhu nacuaa ní yãha ndi Jónás tée ní xóo cãhá<sup>n</sup> tnúhu Yã Ndiõxí ndéé sanaha, te ñi-ni duca<sup>n</sup> yãha yúhú tucu.

40 Chi ndíi Jònás-á<sup>n</sup> nǐ xúhu<sup>n</sup> ndíi úní nduu úní niú xití ì<sup>n</sup> chácá cáhnú vǐhi nani ballená. Te ñiú-ni duca<sup>n</sup> yáha yúhú Tée cùu ñani tnáhá-ndó nchaa-ndo, chi úní nduu úní niú cuhu<sup>n</sup>-í xití ñuhu.

41 Te na sáá nduu càda ndáá Yă Ndiöxí cuéchi nchaa ñáyiú ndècu ñuyúú-a, te dàvá-á<sup>n</sup> cachí nchaa ñáyiú ñuú Nínivé sá ñà túú ní quide ndáá nchaa ñáyiú ndècu vitna, te duca<sup>n</sup> cǎhá<sup>n</sup>-yu chi mèé-yu ní dáñá-yu ichi cuéhé ichi duha cútnáhá ní sáhá<sup>n</sup> ndíi Jònás ñuú-yu ní cǎhá<sup>n</sup> ndíi tnúhu Yă Ndiöxí núú-yu. Dico vitna iha ndècu ndíhi ñaha-ndo xii yúhú, te ñiú-í ío-gá cúnúu-í dàcúúxí ndíi Jònás.

42 Te nduu càda ndáá Yă Ndiöxí cuéchi nchaa ñáyiú, te dàvá-á<sup>n</sup> quiní-ndó ì<sup>n</sup> ñadihí ñaha ní xíndaha ì<sup>n</sup> nació<sup>n</sup> cáá ndàa xio datni núú quéné nchǐcanchii, te ñaha-á<sup>n</sup> ïo xica nǐ xíndecu-a<sup>n</sup> te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cǎhá<sup>n</sup> ndíi Salòmón, chi ndíi-á<sup>n</sup> ïo ní sáá sá xíní tnùní ndíi. Te tnáhá ñaha-á<sup>n</sup> cǎhá<sup>n</sup>-a<sup>n</sup> sá ñà túú ní quide ndáá nchaa ñáyiú ndècu vitna. Dico vitna iha ndècu ndíhi ñaha-ndo xii yúhú, te ñiú-í ío-gá cúnúu-í dàcúúxí ndíi Salòmón.

*Espíritú cúndíhi yucu ñávãha sá nánchòcáva xito cùu uú*  
(Lc. 11:24-26)

43 "Te òré ná quée ñaha ì<sup>n</sup> espíritú cúndíhi yucu ñávãha xii ì<sup>n</sup> ñáyiú, te cuáhá<sup>n</sup>-xi ndùcu-xi ì<sup>n</sup> xichí núú cúndècu-xi te ñà ñihí-xi te ní sani iní-xi:

44 "Váha-gá núhú tucu-í núú nǐ xíndecu-í", duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáyiú-á<sup>n</sup> dàtná cáá-ñá ì<sup>n</sup> vehe ní natíhú ní nduu vii-ná te vá yòo-gá ndécú.

45 Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xi ùsá tnáhá espíritú cúndíhi-xi sá nèhé víhí-gá xíquide. Te òré ní ñihí-xi cue espíritú-á<sup>n</sup> te ndèca ñaha-xi cuáhá<sup>n</sup> cuèndá ngúndecu ndíhi-xi ñáyiú-á<sup>n</sup>. Te ñáyiú-á<sup>n</sup> uu<sup>n</sup>-gá nándi yáha-yu dàcúúxí ndèé díhna. Te ñiú-ni duca<sup>n</sup>

sǎtnahá-xi yáha nchaa ñáyiú cuihna iní-xi ndècu ñuyúú-a vitna —càchí-gá xáha<sup>n</sup>-gǎ xii-güedé.

*Cue ñani Jèsús ndíhi nǎná-gǎ*

(Mr. 3:31-35; Lc. 8:19-21)

46 Te cǎhá<sup>n</sup> dúcá<sup>n</sup>-ní Jèsús ní quexìo náná-gǎ ndíhi cue ñani-gá cuíní-yu cǎhá<sup>n</sup> ndíhi ñáhá-yu xii-gá, te ní ngúnu tní-yu ndàa quehé vehe núú ndécú-gǎ.

47 Te ì<sup>n</sup> cue ñáyiú xíndecu-á<sup>n</sup> nǐ xáhá<sup>n</sup>-yu xii-gá:

—Ní quexìo náná-n ndíhi cue ñani-n xínutnǐ-yu quehé, te cuíní-yu cǎhá<sup>n</sup> ndíhi ñáhá-yu xii-n —càchí ñáyiú-á<sup>n</sup> xáhá<sup>n</sup>-yu xii-gá.

48 Te ní xáha<sup>n</sup>-gǎ xii ñáyiú duca<sup>n</sup> xáha<sup>n</sup> xii-gá-á<sup>n</sup>:

—Te cachí tnúhu yóndi-gá ñáyiú cùu datná nǎná-í ndíhi dàtná cue ñani-í —càchí-gá xáha<sup>n</sup>-gǎ xii ñáyiú-á<sup>n</sup>.

49 Te ní dánèhé ñáhá-gǎ nchaa cue tée xica cuu ndíhi-gá, te ní xáha<sup>n</sup>-gǎ xii ñáyiú-á<sup>n</sup>:

—Cue tée-a cùu-güedé dàtná nǎná-í, ndíhi dàtná cue ñani-í.

50 Te nchaa ñáyiú na càda nchaa nacuaá cǎhá<sup>n</sup> Tǎtà-í Dútú Ndiöxí Yaá ndécú àndiú, te ñáyiú-á<sup>n</sup> cúú-yu dàtná nǎná-í, ndíhi dàtná cue ñani-í, ndíhi dàtná cue cúha-í —càchí-gá xáha<sup>n</sup>-gǎ xii ñáyiú duca<sup>n</sup> nǐ dáyãha tnúhu núú-gǎ-á<sup>n</sup>.

## 13

*Nàcuáa quide tée cuángacá<sup>n</sup> triú*

(Mr. 4:1-9; Lc. 8:4-8)

1 Te ñiú-ni nduu-á<sup>n</sup> ní quee Jèsús vehe núú ndécú-gǎ, te ní xica-gá cuáhá<sup>n</sup>-gá ní ngóo-gá yuhu làgúná.

2 Te ío cuéhé ñáyiú ní tacá núú ndécú-gǎ. Te sá dúcá<sup>n</sup> ïo cuéhé ñáyiú núu ní quée-gá xití ì<sup>n</sup> bàrcú núnǐ xití ndute làgúná-á<sup>n</sup>, te núú xǎ<sup>n</sup> ní ngóo-gá, te nchaa ñáyiú-á<sup>n</sup> xixúcu-yu yuhu làgúná-á<sup>n</sup>.

3 Te Jèsús ní ngúita-gá ní cani-gá titní cuèndú núú-yu nàcuáa tecú tnùní-yu nchaa nàcuáa ndùu tnúhu-gá, te xáha<sup>n</sup>-gǎ xií-yu:

—Ì<sup>n</sup> tée cuángacá<sup>n</sup>-dé triú,



4 te òré ní ngüíta-dé dǎngoyo-dé triú-á<sup>n</sup>, te dava ní quene ndava ní ngava ndéé ichi, te ní xiní cue túlaá te ní nadatàcá-güedi.

5 Te dava ní ngava ñuhu yadi nǔú yíhí vìhi yúú, te ndǐhi-ni ní xínu-xi chi ñá túú cǎvìhi ñuhu.

6 Dico òré ní nayehé te ñá túú ní cùndee iní-xi chi ní yíchí-xi, chi ñá túú ní ñhí quǐhí<sup>n</sup> cùnú yóho-xi.

7 Te dava ní ngava núú yúcu ndǐquí<sup>n</sup> tnu ñhu, te ñ<sup>n</sup>nuu-ni ní xínu-xi ndǐhi tnu ñhu. Te tnu ñhu-á<sup>n</sup> ní sahnú-xi te ní dánáá-xí nchàa triú sá ní xínu-á<sup>n</sup>.

8 Dico dava-gá triú ní ngava núú ndécú ñuhu coçó<sup>n</sup> te xiǎ<sup>n</sup> ío váha ní cuu, chi núú ñ<sup>n</sup>-ní triú-á<sup>n</sup> te dava yoco-xi ní nguǐhi ócó úxí triú-xi, te dava yoco-xi ní nguǐhi únídico triú-xi, te dava yoco-xi ní nguǐhi ñ<sup>n</sup> ciendú triú-xi.

9 Te vitna nchaa nchòhó ñáyiu ní xíndedóho tnúhu ní cǎhá<sup>n</sup>-í-a, te ío váha chí cuǎha cuendá —cǎchí-gá xǎha<sup>n</sup>-gǎ xii-yu.

*Cue téé xica cuu ndǐhi Jesús ndúcu tnúhu-güedé núú-gǎ ná cuendá cǎní-gǎ cuendú núú ñáyiu*

(Mr. 4:10-12; Lc. 8:9-10)

10 Te cue téé xica cuu ndǐhi Jesús ní sǎhá<sup>n</sup>-güedé ndéé núú-gǎ, te xǎha<sup>n</sup>-güedé xii-gǎ:

—Ndùcu tnúhu-ndí núú-n nǔú ná cuendá duca<sup>n</sup> mée-ni cuendú cǎní-n núú ñáyiu —cǎchí-güedé xǎha<sup>n</sup>-güedé xii-gǎ.

11 Te ní xǎha<sup>n</sup>-gǎ xii-güedé:

—Nchòhó chi sa cǎchí tnúhu Yá Ndiöxí xii-ndo ñ<sup>n</sup> sá vǎtá quíní-gá-ndó, chi cǎchí tnúhu-gá nàcuáa quide-gá ndǐhu ndaha-gǎ ñáyiu, dico dava-gá ñáyiu chi ñá túú nǎ xǎha<sup>n</sup>-gǎ xii-yu.

12 Te nchaa ñáyiu sa tècú tnùní te uu<sup>n</sup>-gá cuita tecú tnùní-yu quǐhí<sup>n</sup>, te nchaa ñáyiu ñá túú tècú tnùní te uu<sup>n</sup>-gá vá tècú tnùní-yu.

13 Te xiǎ<sup>n</sup> nǔú duha cǎní-í mee-ni cuendú núú-yu, chi cuéi na quíní-yu nchaa nàcuáa cuu dico ní vǎ cùtnùní iní-yu ná cuendá duca<sup>n</sup> cùu, te cuéi

na cùndedóho-yu dico ní vǎ tècú tnùní-yu.

14 Te diu cuendá ñáyiu-á<sup>n</sup> ní xǎha<sup>n</sup> Yá Ndiöxí xii ndí Chàíá téé ní xóo cǎhá<sup>n</sup> tnúhu-gá ndéé sanaha ní chídó tnùní ndí núú tütú-gá núú cǎchí-xi:

Nchaa nchòhó cundedóho-ndo tnúhu cǎhá<sup>n</sup>-í, dico ní vǎ tècú tnùní-ndó,

te cuéi na quíní-ndó nchàa nacuáa cada-xi, dico ní vǎ cùtnùní iní-ndó nǎ cuendá duca<sup>n</sup> quide-xi.

15 Te duca<sup>n</sup> chi cùu-ndo ñáyiu ío sàá iní-xi,

te cùu-ndo ñáyiu ñá túú tècú tnùní tnúhu cǎhá<sup>n</sup>-í,

te cùu tucu-ndo datná cue ñáyiu cuáa chi ñá túú cuíní-ndó càda cuendá-ndó tnúhu-í,

te ní ñà túú cuíní-ndó cùndedóho-ndo,

te ní ñà túú cuíní-ndó tècú tnùní-ndó,

te ní ñà túú cuíní-ndó nàtuha

ñaha-ndo xii-í cuendá cada

cǎhnu iní-í nchaa yíca

cuéchi-ndo nàcuáa ío váha cuu

iní-ndó cùndecu-ndo.

Duha ní xǎha<sup>n</sup> Yá Ndiöxí xii ndí Chàíá

ní chídó tnùní ndí núú tütú-gá.

16 Dico nchòhó chi ío váha táhú-ndó

chi cùtnùní iní-ndó nchàa nacuáa

quide-í, te cùtnùní tucu iní-ndó nchàa

nacuáa ndùu tnúhu cǎhá<sup>n</sup>-í.

17 Te na cǎchí tnúhu ndáá-í xii-ndo

sǎ ío vǎi cue téé ní xóo cǎhá<sup>n</sup> tnúhu

Yá Ndiöxí ndéé sanaha ndǐhi nchaa

dava-gá ñáyiu váha iní-xi ní cuíní-yu

cundehé-yu nchaa sá ndéhé-ndó

vitna quide-í dico ñá túú ní xiní-yu, te

ní cuíní tucú-yu cundedóho-yu nchaa

tnúhu ndèdóho-ndo vitna cǎhá<sup>n</sup>-í te ñá

túú ní xíndedóho-yu.

*Jesús cǎhá<sup>n</sup>-gǎ nàcuáa quèe-xi*

*cuendá téé cuángacá<sup>n</sup> triú*

(Mr. 4:13-20; Lc. 8:11-15)

18 Te vitna cundedóho váha-ndo na

cǎchí tnúhu-í xii-ndo nàcuáa quèe-xi

cuendú téé cuángacá<sup>n</sup> triú ní caní-í

núú-ndó.

19 Te triú sá ní quene ndava ní

ngava ndéé ichi, xiǎ<sup>n</sup> cúu-xí dàtná

ñáyiu ní xíndedóho tnúhu sá cǎhá<sup>n</sup>

nàcuáa ndǐhu ndaha ñàha Yá Ndiöxí

xii-yu, dico ñá túú ní cuíní-yu tní-yu,

chi sácuíhná cuǎhá<sup>n</sup>-xi nàdatuhú-xi

iní-yu cuendá sá vǎ cáncchícú<sup>n</sup> ni-  
hnú-yu nàcuáa càhá<sup>n</sup> tnúhu-á<sup>n</sup>.

20 Te triú sá nǐ ngava ñuhu yadi  
núú yíhí vihi yúú-ǎ<sup>n</sup>, xiǎ<sup>n</sup> cúú-xí dàtná  
ñáyiú ní xíndedóho tnúhu Yá Ndiǒxí te  
díí ínǐ ní tní-yu tnúhu-gá,

21 dico òré ná nguíta ñáyiú cúcuèhé  
ñáhǎ-yu xií-yu àdi nándi-gá sá  
yǎha-yu sá cuendá tnúhu-gá, te ñá  
cúndèe ínǐ-yu chi dàñá-yu tnúhu-gá  
cuendá sá ñà túú ñihí ndéě-yu.

22 Te triú sá nǐ ngava núú yúú  
ndíquí<sup>n</sup> tnu ñu-á<sup>n</sup>, xiǎ<sup>n</sup> cúú-xí dàtná  
ñáyiú ní tecú dóho-xi tnúhu Yá Ndiǒxí  
dico cuèé cuèé ní nacuanaá-yu  
tnúhu-gá, chi cuendá mee-ni sǎ ió  
ñuyúú-a ñuhu ínǐ-yu, ndihí cuendá sá  
ío sàni ínǐ-yu cuu cuicá-yu, te mee-ni  
nchàa xiǎ<sup>n</sup> ñúhú ínǐ-yu te ñá túú ñuhu  
ínǐ-yu tnúhu sá nǐ xíndedóho-yu-á<sup>n</sup>  
nàcuáa cada váha-yu cundecú-yu.

23 Dico triú sá nǐ ngava núú ndécú  
ñuhu cocó<sup>n</sup>-á<sup>n</sup>, xiǎ<sup>n</sup> cúú-xí dàtná  
ñáyiú ní xíndedóho tnúhu Yá Ndiǒxí  
te quidé-yu nàcuáa càhá<sup>n</sup> tnúhu-gá.  
Te cada ínǐ-ndó sǎ ñáyiú-á<sup>n</sup> cúú-yu  
dàtná triú sá nǐ nguíhi yoco-xi  
óco úxí triú-xi, ndihí triú sá nǐ  
nguíhi yoco-xi únídico triú-xi, ndihí  
triú sá nǐ nguíhi yoco-xi ñ<sup>n</sup> cièndú  
triú-xi. Duca<sup>n</sup> sǎtnahá-xi cúú-yu chi  
ío váha quidé-yu —càchí-gá xǎha<sup>n</sup>-gǎ  
xii-güedé.

*Cuendá nchaa cúhú sǎ ñà túú vǎha  
xǎnu xití triú*

24 Te Jèsús ní caní-gá ñ<sup>n</sup> cuèndú núú  
ñáyiú nàcuáa tecú tnùnǐ-yu tnúhu-gá,  
te xǎha<sup>n</sup>-gǎ xií-yu:

—Te vitna na càni-í ñ<sup>n</sup> cuèndú  
núú-ndó nàcuáa tecú tnùnǐ-ndó  
nàcuáa cada-xi òré ndíhu ndaha ñàha  
Yá Ndiǒxí xii ñáyiú. ñ<sup>n</sup> tée ío váha triú  
ní sacá<sup>n</sup>-dé núú ñúhú-dě.

25 Dico xití niú ní sáhá<sup>n</sup> ñ<sup>n</sup> tée cùu  
úhú ínǐ ñáhá xii-dé, te ní dǎngoyo-dé  
ndíquí<sup>n</sup> yúú sǎ ñà túú vǎha núú nǐ  
sacá<sup>n</sup>-dé triú-á<sup>n</sup>.

26 Te òré vitna váha váha ní  
nguíta-xi quène yoco nchaa triú-á<sup>n</sup>,  
te ní xínu coyo nchaa yúú sǎ ñà túú  
vǎha-á<sup>n</sup>.

27 Te cue tée xínu cuechi núú tée  
ní sacá<sup>n</sup> triú-á<sup>n</sup> nǐ xítnúhu ñàha-güedé  
xii-dé sá dúcá<sup>n</sup> nǐ xínu cúhú sǎ ñà túú  
vǎha-á<sup>n</sup> núú triú-dé, te xǎha<sup>n</sup>-güedé:  
“Pàtróó<sup>n</sup>, ¿nása ní cuu núú ní xínu  
cúhú sǎ ñà túú vǎha núú triú-n, te  
ío váha càa triú ní sacá<sup>n</sup>-n ní cùu?”,  
cachí-güedé xǎha<sup>n</sup>-güedé.

28 Te tée cùu patróó<sup>n</sup>-güedé-á<sup>n</sup> nǐ  
xáha<sup>n</sup>-dě xii-güedé: “ñ<sup>n</sup> tée cùu úhú ínǐ  
ñáhá nàhi xii-í duca<sup>n</sup> nǐ quide-dé ní  
sáhá<sup>n</sup>-dé ní dǎngoyo-dé ndíquí<sup>n</sup> cùhú  
sǎ ñà túú vǎha-á<sup>n</sup> núú triú-í ñu duca<sup>n</sup>  
nǐ xínu coyo-xi”, càchí-dé xǎha<sup>n</sup>-dě  
xii-güedé. Te cue tée xínu cuechi  
núú-dě ní xáha<sup>n</sup>-güedé xii-dé: “Te  
núu cuini-n te quíhí<sup>n</sup>-ndí tnuhu-ndí  
nchaa cúhú sǎ ñà túú vǎha ní xínu  
núú triú-n”, càchí-güedé xǎha<sup>n</sup>-güedé  
xii-dé.

29 Te tée cùu xítóhó triú-á<sup>n</sup> nǐ  
xáha<sup>n</sup>-dě xii cue tée xínu cuechi  
núú-dě-á<sup>n</sup>: “Ñáhá, vá quíhí<sup>n</sup>-ndó  
tnùhu-ndo, chi òré tnuhu-ndo te  
tnàhá-ni triú quene chi càa vihi  
cúhú-ǎ<sup>n</sup>.

30 Váha-gá chí dáñá ná cuìhnu nahi  
ndéé ná cùu triú, te dàtnùnǐ nducu-í  
cue tée quíhí<sup>n</sup>-güedé tnuhu-güedé  
nchaa cúhú sǎ ñà túú vǎha-á<sup>n</sup>, te  
dacùtu nuhní-güedé te cahmi-güedé,  
te dàtnùnǐ nàquehdé-güedé triú  
nacani-güedé te nataxúha-güedé xití  
yacá-í”, càchí-dé xǎha<sup>n</sup>-dě xii-güedé —  
duha ní caní Jèsús cuèndú núú-yu.

*Cuendá ndíquí<sup>n</sup> yutnu nàni mostázá  
(Mr. 4:30-32; Lc. 13:18-19)*

31 Te Jèsús ní caní tucu-gá ingá  
cuèndú núú ñáyiú nàcuáa tecú  
tnùnǐ-yu tnúhu-gá, te xǎha<sup>n</sup>-gǎ xií-yu:

—Na càni-í ñ<sup>n</sup> cuèndú núú-ndó  
nàcuáa tecú tnùnǐ-ndó nàcuáa cada-xi  
òré ndíhu ndaha ñàha Yá Ndiǒxí xii  
ñáyiú. ñ<sup>n</sup> tée ní quehe<sup>n</sup>-dé ndíquí<sup>n</sup>  
yutnu nàni mostázá te nèhe-dé cuáhá<sup>n</sup>  
ní sacá<sup>n</sup>-dé núú ñúhú-dě.

32 Te ndíquí<sup>n</sup> yutnu-á<sup>n</sup> ío chàhu, dico  
òré ná xínu-xi te sàhnu-gá-xi dàcúúxí  
nchàa cúhú, te cue quití ndàva núú  
tàchí cadúha-güedi tacá-güedi núú  
dité-xi —càchí-gá xǎha<sup>n</sup>-gǎ xií-yu.

*Nàcuáa quide levadurá  
(Lc. 13:20-21)*

<sup>33</sup> Te Jèsús ní xáha<sup>n</sup> tùcu-gá xii ñáyiú:  
—Te na cächí tnúhu tucu-í xii-ndo nàcuáa cada-xi òré ndíhu ndaha ñàha Yá Ndiöxí xii ñáyiú. Ì<sup>n</sup> ñadihi ní chihi-a<sup>n</sup> levadurá úní arròbá yuchi triú, te levadurá-á<sup>n</sup> ñí quide-xi ní ndaa nihí yusa<sup>n</sup>-á<sup>n</sup> —cächí-gá xáha<sup>n</sup>-gá xií-yu.

*Mee-ni cuèndú ní caní Jèsús núú ñáyiú  
(Mr. 4:33-34)*

<sup>34</sup> Te mee-ni cuèndú ní caní Jèsús núú ñáyiú ndi tnahá òré ní dánèhé ñáhá-gá xií-yu tnúhu-gá.

<sup>35</sup> Te duca<sup>n</sup> ñí quide-gá chi ní quee ndáa-xi nàcuáa ní chídó tnùnì Ì<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha núú tütú-gá núú cächí-xi:

Mee-ni cuèndú caní-í núú ñáyiú òré danèhé-í-yu tnúhu-í cuèndá tecú tnùnì-yu,

te nchaa tnúhu sá vátá yõo-gá cund-edóho danèhé-í-yu, te nchaa tnúhu-á<sup>n</sup> ndúú yùhu-xi ndéé cùtnàhá ní ngáva ñuyíú.

Duha ní chídó tnùnì téé-á<sup>n</sup> núú tütú-gá.

*Jèsús cáhá<sup>n</sup>-gá nàcuáa quèe-xi cuendá cùhú sã ñà túú vãha càa xití triú*

<sup>36</sup> Te Jèsús ní dándácá-gá ñáyiú te cuánuhú-gá vehe, te cue téé xica cuu ndihi-gá ní xáha<sup>n</sup>-güedé xii-gá:

—Cächí tnúhu xii-ndí nása quèe-xi cuendá cùhú sã ñà túú vãha càa xití triú —cächí-güedé xáha<sup>n</sup>-güedé xii-gá.

<sup>37</sup> Te Jèsús ní xáha<sup>n</sup>-gá xii-güedé:  
—Téé cächí-í ní sacá<sup>n</sup> triú cávãha-á<sup>n</sup> cúú yùhú Téé cùu ñaní tnahá-ndo nchàa-ndo.

<sup>38</sup> Te nchaa núú ñí sacá<sup>n</sup> téé-á<sup>n</sup> triú cúú-xi ñuyíú. Te tatá váha-á<sup>n</sup> cúú-xi cuè ñáyiú yìndaha ñaha Yá Ndiöxí. Te nchaa cùhú sã ñà túú vãha-á<sup>n</sup> cúú-xi ñáyiú yìndaha ñaha sácúíhná.

<sup>39</sup> Te téé ní dāngoyo ndíquí<sup>n</sup> cùhú sã ñà túú vãha núú triú-á<sup>n</sup> cúú-dé mee sácúíhná. Te nduu nàtehndé-ñá triú-á<sup>n</sup> cúú-xi nduu ndihi nihnu-ná nchaa sá ío ñuyíú-a. Te nchaa ñáyiú

nàquehndé triú-á<sup>n</sup> cúú-yu mee-ni cuè espíritú xínú cuèchi núú Yá Ndiöxí.

<sup>40</sup> Te dàtná cada cue téé quíhí<sup>n</sup> tnuhu nchaa cùhú sã ñà túú vãha-á<sup>n</sup> dacùtu nuhní-güedé te cahmi-güedé, duca<sup>n</sup> sàtnahá-xi yáha nchaa ñáyiú cùndihi yucu ñávãha na sáa nduu.

<sup>41</sup> Te yúhú Téé cùu ñaní tnahá-ndo nchàa-ndo tendaha-í nchaa espíritú xínú cuèchi núú-í quíhí<sup>n</sup>-xi nadatacá-xi nchaa ñáyiú sànu ichi cue tnahá ñáyiú-xi ichi cuèhé ichi duha, ndihi nchaa dava-gá ñáyiú ñá túú quide váha, te nchaa ñáyiú-á<sup>n</sup> xĩndecú-yu nchaa núú ndécú cuè ñáyiú yìndaha-í.

<sup>42</sup> Te cue espíritú-á<sup>n</sup> daquihí<sup>n</sup>-xi cue ñáyiú-á<sup>n</sup> núú ñùhú núú càyú, te yacá<sup>n</sup> ío ndáhyú-yu te dicó rúhñú-ñá cuu núhu-yu sá sàtú iní-yu sá ndóhõ-yu.

<sup>43</sup> Te nchaa ñáyiú quide nchaa nacuáa cuínì Tātá-yu Dútú Ndiöxí, ñáyiú-á<sup>n</sup> ío cunúú-yu cundecú-yu núú ndécú-gá táxí tnùnì-gá, chi cuú-yu dàtná nchícanhii dayèhé-yu cundecú-yu núú ndécú-gá. Te nchaa nchòhó ñáyiú ndèdóho nchaa tnúhu cáhá<sup>n</sup>-í-a, te ío váha chí cuáha cuèndá —cächí-gá xáha<sup>n</sup>-gá xii-güedé.

*Cuèndá Ì<sup>n</sup> sá ío ndèyáhu*

<sup>44</sup> Te Jèsús xáha<sup>n</sup> tùcu-gá xii-güedé:

—Na càni tucu-í ìngá cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiöxí xii ñáyiú. Ì<sup>n</sup> téé ní naníhí-dé Ì<sup>n</sup> sá ío ndèyáhu yìndúxi Ì<sup>n</sup> xichi, te ní nachindúxi tucu-dé dīu-ni núú ñí naníhí-dé-á<sup>n</sup>, te ío ní cudí ìní-dé sá dúcá<sup>n</sup> ñí naníhí-dé xíã<sup>n</sup>. Te ní xica-dé cuánuhú-dé te ní nadico-dé nchaa sá ndécú ndihi-dé, te ní nacuaa<sup>n</sup>-dé ñuhu núú dúcá<sup>n</sup> ñí naníhí-dé xíã<sup>n</sup>.

*Cuèndá Ì<sup>n</sup> sá ío ndèyáhu nani pérá*

<sup>45</sup> Te na càni tucu-í ìngá cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiöxí xii ñáyiú. Ì<sup>n</sup> téé quide ndáhu ndúcú-dé sá nani pérá sá ío ndèyáhu.

<sup>46</sup> Te ní naníhí-dé ñáyiú ndècu ndihi Ì<sup>n</sup> pérá sá ío-gá ndèyáhu, te ní xica-dé cuánuhú-dé te ní nadico-dé nchaa

sá ndécú ndìhi-dé, te ní sáhá<sup>n</sup>-dé ní saa<sup>n</sup>-dé pèrlá sá ìo-gá ndèyáhu-á<sup>n</sup>.

*Cuèndá ñunu tn̄i-güedé chácá*

47 'Te na càni tucu-í ingá cuèndú núú-ndó nàcuáa tecú tn̄n-ndó nàcuáa cada-xi òré ndìhu ndaha ñàha Yá Ndiòxí xii ñáyiu. Cue téé tn̄i chácá ñí dáquèe-güedé ñunu-güedé xití ndute làmár tn̄i-güedé chácá, te dàcá nuu dàcá nihnu chácá cuãnguee-güedi xití ñunu-á<sup>n</sup>.

48 Te òré ní cutnùn-í iní-güedé sá ñí chítú ñunu-güedé, te ní natava-güedé ní nene yuhu làmár, te ní ngüíta-güedé nácãxi-güedé nchaa chácá-á<sup>n</sup>. Te nchaa chácá vâha dàquèe-güedé-di xití tídihi, te nchaa chácá nèhé dãngoyo-güedé-di.

49 Te dàtná ní quide cue téé-á<sup>n</sup> duca<sup>n</sup> càda cue espíritú xínú cuèchi núú Yá Ndiòxí ná sàá nduu vâ cùndècu-gá nchaa sá ìo ñuyíú-a, chi cue espíritú-á<sup>n</sup> daquèe d̄i<sup>n</sup>-xi nchaa ñáyiu ní quide váha tnuú nchaa ñáyiu ñá túú ní quide váha.

50 Te nchaa ñáyiu ñá túú ní quide váha-á<sup>n</sup> daquèe ñáhá-xí xii-yu núú ñùhú núú càyú, te yàcá<sup>n</sup> ìo ndáhyú-yu, te d̄icó rúhñú-nã cuu núhu-yu sá sàtú iní-yu cuèndá sá ndóhò-yu —càchí-gá xãha<sup>n</sup>-gá xii cue téé xica cuu ndìhi-gá.

*Cuèndá cue téé ndècu ndìhi sá ñí quee túu d̄ihna ndìhi sá ñí quee túu saa*

51 Te Jèsús ní xicá<sup>n</sup> tnúhú-gá núú-güedé, te xãha<sup>n</sup>-gá xii-güedé:

—¿Ní tecú tn̄n-ndó nàcuáa ndùu nchaa tnúhu ní cáhá<sup>n</sup>-í-á<sup>n</sup>? —càchí-gá xãha<sup>n</sup>-gá xii-güedé.

Te ní xãha<sup>n</sup>-güedé xii-gá:

—Ní tecú tn̄n-ndí —càchí-güedé xãha<sup>n</sup>-güedé xii-gá.

52 Te ní xãha<sup>n</sup> tucu Jèsús xii-güedé:

—Te núú ñí<sup>n</sup> téé dàcuaha ñàha xii ñáyiu nchaa tnúhu ní chídó tn̄n-ndí Moisés ná cutnùn-í iní-dé nàcuáa quide Yá Ndiòxí ndìhu ndaha-gá ñáyiu, te téé-á<sup>n</sup> cúú-dé dàtná ñí<sup>n</sup> téé cùu xítohó vehe. Te téé cùu xítohó vehe-á<sup>n</sup> ñí queñuhu-dé nchaa sá ñí quee túu d̄ihna ndècu ndìhi-dé, ndìhi nchaa sá ñí quee túu saa. Te duca<sup>n</sup>

sãtnahá-xi cùu téé-á<sup>n</sup> te núu na cùtnùn-í iní-dé nàcuáa quide Yá Ndiòxí ndìhu ndaha-gá ñáyiu —càchí-gá xãha<sup>n</sup>-gá xii-güedé.

*Jèsús ndécú-gá ñuu núú ñí sahnú-gá (Mr. 6:1-6; Lc. 4:16-30)*

53 Te sàtá ñí yáha duca<sup>n</sup> ñí cani Jèsús cuèndú núú-güedé, te ní xica-gá cuãnuhú-gá.

54 Te ní ndexio-gá ñuu núú cúú ñùú-gá, te cuãngüihu-gá xití veñúhu càa ñuu-á<sup>n</sup> te ní ngüíta-gá dánèhé-gá ñáyiu. Te nchaa ñáyiu ndèdóho nchaa tnúhu càhá<sup>n</sup>-gá xicũñúhu-yu, te xitnãhá-yu:

—¿Nása ní cuu núú ìo váha cùtnùn-í iní téé-a nàcuáa cunduu tnúhu cáhá<sup>n</sup>-dé, te quide-dé nchaa sá vâ yõo tnãhí ndàcu cada-i?

55 Te d̄icó déhe téé cùu carpinterú ndìhi tá Màriá cúú-dé, te ñan-í-dé cúú tẽ Jàcobó, ndìhi té Chèé, ndìhi té Xímú, ndìhi té Jùdás.

56 Te cue cúha-dé ndécú ndìhi ñáhá-yu xii-o ñuu-a. ¿Te nása ní quide-dé ñuu ndéé dàcá<sup>n</sup> ìo váha cùtnùn-í iní-dé nàcuáa cunduu tnúhu cáhá<sup>n</sup>-dé-i? —càchí-yu xitnãhá-yu.

57 Te ñá túú ní cuñi-yu cáhá<sup>n</sup> ndìhi váha-yu Jèsús, d̄ico mee-gá ñí xãha<sup>n</sup>-gá xii-yu:

—Te núú ñí<sup>n</sup> téé càhá<sup>n</sup> tnúhu Yá Ndiòxí ná nàsáá-dé ñuu-dé, te nchaa ñáyiu ñuu-dé-á<sup>n</sup> ndìhi nchaa ñáyiu cùu ndimee-dé ñá túú nèhé-yu sá yíñùhu núú-dé, d̄ico cue ñáyiu nchaa dáva-gá ñuu chi nèhé-yu sá yíñùhu núú-dé —càchí-gá xãha<sup>n</sup>-gá xii-yu.

58 Te ñá túú ní quide Jèsús titní núú sã vâ yõo tnãhí ndàcu cada ñuu-á<sup>n</sup>, chi ñá túú ní cuñi-yu quindáá iní ñáhã-yu xii-gá.

## 14

*Nàcuáa ní cuu ní xihí té Juáá té dàcuandute ñàha xii ñáyiu*

(Mr. 6:14-29; Lc. 9:7-9)

1 Te d̄iu-ni dàvá-á<sup>n</sup> ñí níhí tẽ Hèrodés tnúhu nchaa nàcuáa quide Jèsús, te tẽ Hèrodés-á<sup>n</sup> cúú-dé téé tàxi tnùn-í d̄itritú Galileá.

2 Te ní xáha<sup>n</sup>-dě xii nchaa cue té ndècu ndìhi-dé:

—Tée dii cuèndú-xi ñìhí-ó-á<sup>n</sup> cùu-dé té Juàá té dàcuandute ñaha xii ñáyíu, té ní xíhí ní cùu te ní ndoto-dé nùu dàcá<sup>n</sup> ndácú-dé quidé-dé nchaa sá vǎ yǎo tnàhí ndàcu cada —cachí-dé xáha<sup>n</sup>-dě xii-güedé.

3 Te duca<sup>n</sup> ñí cáhá<sup>n</sup> té Hèrodés chi mee-dé ní táuchíú<sup>n</sup>-dě ní tñii ñaha-güedé xii té Juàá, te ní dácútú ñaha-güedé xii-dé, te ní chihi ñaha-güedé vecaá. Te duca<sup>n</sup> ñí quide té Hèrodés-á<sup>n</sup> sǎ cuèndá ñaha nàni Herodiás, ñaha ní cándeca ñaní-dé té Lipé, te ní naquehe<sup>n</sup> ñaha-dé xii-a<sup>n</sup> ndèca ñaha-dé.

4 Te té Juàá ní xáha<sup>n</sup>-dě xii té Hèrodés:

—Ñá túú ní quide váha-n dùha ní naquehe<sup>n</sup>-n ñaha ní cándeca ñaní-n —duha ní xáha<sup>n</sup> tǎ Juàá xii té Hèrodés.

5 Te sá dúcá<sup>n</sup> ñí xáha<sup>n</sup> tǎ Juàá-á<sup>n</sup> xii té Hèrodés, te ní cuini té Hèrodés-á<sup>n</sup> cahni-dé té Juàá-á<sup>n</sup>, dico ñá túú ní cùyii-dé chi ní yùhú-dé núú cuè ñáyíu, chi ncháa-yu ní cutnùní iní-yu sá tǎ Juàá cúú-dé ñí tée càhá<sup>n</sup> tnúhu Yá Ndiǒxí.

6 Te ñí nduu ní quide té Hèrodés vico vehe-dé ní quide càhnu-dé nduu ñí cacu-dé. Te ndècu ñí déhe yoco ñaha nani Herodiás-á<sup>n</sup>, te xíchí-á<sup>n</sup> ñí quíhu-xi xití vehe núú cúú vico-á<sup>n</sup> ñí xita saha-xi. Te nùcáo té Hèrodés ndìhi cue tée ní cáhá<sup>n</sup>-dé ndéhé-güedé, te ío ní cudíí ìní-dé nàcuáa ní xita xíchí-á<sup>n</sup>.

7 Te té Hèrodés-á<sup>n</sup> ñí cacunehe-dé ndéé Yá Ndiǒxí nàcuáa cutnùní iní xíchí-á<sup>n</sup> sǎ ndáa cuañaha-dé nùu ná cúú sǎ ná càcá<sup>n</sup>-xi núú-dé.

8 Te xíchí-á<sup>n</sup> ñí dácáhú ìní ñáhá ñáná-xi xii-xi ná cúú sǎ càcá<sup>n</sup>-xi núú té Hèrodés, nùu xíá<sup>n</sup> ní xáha<sup>n</sup>-xi xii-dé:

—Cuini-í quehndé-n díquí tǎ Juàá té dàcuandute ñaha xii ñáyíu te taxi-n, dico na cùhu<sup>n</sup> ñí xití cóhó taxi-n —càchí-xi xáha<sup>n</sup>-xi xii-dé.

9 Te sá dúcá<sup>n</sup> ñí xáha<sup>n</sup>-xi, te ní cundiyí té Hèrodés, dico ñá túú ní ñíhí-dé nása cada-dé, chi ndèdóho ñáyíu òré ní cacunehe-dé Yá Ndiǒxí sá ndáa cuañaha-dé ñí sá ná càcá<sup>n</sup>-xi

núú-dé. Te ní quide-dé nàcuáa ní xáha<sup>n</sup>-xi.

10 Chi ní táuchíú<sup>n</sup>-dě ní sáhá<sup>n</sup> cue tée ní xehndé-güedé díquí tǎ Juàá òré yíhí-dé vecaá.

11 Te ní chihi-güedé díquí-dé ñí xití cóhó te nèhe-güedé cuánuhú ní sáñaha-güedé xii xíchí-á<sup>n</sup>, te xíchí-á<sup>n</sup> ñí nacuañaha-xi xii náná-xi.

12 Te cue tée xica cuu ndìhi té Juàá-á<sup>n</sup> ñí sáhá<sup>n</sup>-güedé ní naquehe<sup>n</sup>-güedé yíquí cùñú-dé ní chindúxi-güedé, te dàtnùní ní sáhá<sup>n</sup>-güedé ní xáha<sup>n</sup>-güedé xii Jèsús nàcuáa ní cuu.

*Jèsús dácàxi-gá úhú<sup>n</sup> mìl cue tée te dèñí ñáyíu dèhí ndìhi landú*

(Mr. 6:30-44; Lc. 9:10-17; Jn. 6:1-14)

13 Te Jèsús ní níhí-gǎ tnúhu nàcuáa ní cuu ní xíhí té Juàá. Te sátá xíá<sup>n</sup> te cuánguee-gá ñí bàrcú cuáhá<sup>n</sup>-gá ñí xichi núú ñá túú ñáyíu ndècu, dico nchaa ñáyíu xíndecu nchaa ñuú cáa yàtni xíá<sup>n</sup> ñí níhí-yu tnúhu sá cuáhá<sup>n</sup>-gá, te ní queé-yu ñuú-yu xica sahá-yu cuáhá<sup>n</sup> núú quidè-yu cuèndá quexio Jèsús.

14 Te òré ní quexio Jèsús núú cuáhá<sup>n</sup>-gá, te ní quene-gá bàrcú, te ní xiní-gá cuéhé víhí ñáyíu xíxúcu-yu xíá<sup>n</sup>, te ní cundàhú iní ñáhá-gǎ xii-yu, te ní quide tátna-gá nchaa ñáyíu cùhú ndìhí-yu.

15 Te sátá ñí cuaa te ní sáhá<sup>n</sup> cue tée xica cuu ndìhi Jèsús núú-gǎ, te xáha<sup>n</sup>-güedé xii-gá:

—Sa ní cuu dandàca-n nchaa ñáyíu-a chi sa ní cuaa, te na quíhí<sup>n</sup>-yu nchaa ñuú cáa yàtni iha cuaá<sup>n</sup>-yu sá caxí-yu, chi núú ndécú-ó ìha ñá túú tnàhí ná ío —càchí-güedé xáha<sup>n</sup>-güedé xii-gá.

16 Te Jèsús ní xáha<sup>n</sup>-gǎ xii-güedé:

—Ñáhá, vá dándàca-í-yu, váha-gá mee-ndo chí cuañaha sǎ ná càxí-yu —càchí-gá xáha<sup>n</sup>-gǎ xii-güedé.

17 Te ní xáha<sup>n</sup>-güedé xii-gá:

—Ñá túú nǎgá ndécú ndìhi-ndí, chi úhú<sup>n</sup> duha-ná pàa ndìhi úú-nǎ

chácá ndécú ndìhi-ndí —càchi-güedé xăha<sup>n</sup>-güedě xii-gá.

18 Te Jèsús ní xáha<sup>n</sup>-gă xii-güedé:

—Chí cánèhe paá-á<sup>n</sup> ndìhi chácá-ă<sup>n</sup> táquixi iha —cachí-gá xăha<sup>n</sup>-gă xii-güedé.

19 Te Jèsús ní xáha<sup>n</sup>-gă xii nchaa ñáyiú sá ná ngõo-yu nchaá-yu núú ité cuí cãa xiá<sup>n</sup>, te ní quehe<sup>n</sup>-gá ndi ùhú<sup>n</sup> pãá-á<sup>n</sup> ndìhi ndi ndúú chácá-ă<sup>n</sup> te ní ndacoto-gá andiú, te ní ndacá<sup>n</sup> táhú-gă núú Yă Ndiõxí, te dătnùní ní táhú cuèchi-gá pãá-á<sup>n</sup> te ní sãñaha-gă xii cue tée xica cuu ndìhi-gá ní dácãñu-güedé cue ñáyiú ní xexí-yu.

20 Te nchaá-yu ní xexí-yu ní ndahá xití-yu. Te sátá ñí túhú cóhõ-yu te ní nadatácá-güedé nchaa sá ñí quendóo, te ní chítú ùxúú tnáhá tídihi mee-ni sã ñí quendóo.

21 Te nchaa ñáyiú ní xexi-á<sup>n</sup> ñí xínu úhú<sup>n</sup> mĩl mee-ni cuè tée chi mee-ni cuè tée-á<sup>n</sup> ñí quiúndehu, te ñí<sup>n</sup> cue ñáyiú ñí<sup>n</sup> ndìhi cue landú.

*Jèsús xicá-gă núú ndute  
(Mr. 6:45-52; Jn. 6:16-21)*

22 Te òré-ni-á<sup>n</sup> ñí xáha<sup>n</sup> Jèsús xii cue tée xica cuu ndìhi-gá sá quèe-güedé bàrcú téhndé-güedé ndàa ingá xio yuhu làgúná, te mee-gă quendóo-gá cada ndee ñí tnáhá-gă ndìhi cue ñáyiú.

23 Te sátá ñí yáha ní quide ndee ñí tnáhá-gă ndìhi cue ñáyiú, te medì-gá ní xica-gá cuásaá-gá ñí<sup>n</sup> tĩndúú cáa yàtni xiá<sup>n</sup> cuendá cáhá<sup>n</sup> ndìhi-gá Yă Ndiõxí, te ñí<sup>n</sup> medì-gá ndécú xiá<sup>n</sup> ñí cundiqui<sup>n</sup>.

24 Te bàrcú sá ñí<sup>n</sup>hú cuè tée xica cuu ndìhi-gá-á<sup>n</sup> sa cuáhá<sup>n</sup>-xi ndéé cuádava xití làgúná-á<sup>n</sup>, te ní<sup>n</sup>hi vñhi quene táchí ndàa ichi cuáhá<sup>n</sup>-xi, te dácandau ndéé-xi ndute nchaa ñí<sup>n</sup>-xi.

25 Te tàculhndá váhi-gá tá xica Jèsús núú ndute cuáhá<sup>n</sup> tá cùyatni-gá bàrcú-á<sup>n</sup>.

26 Te cue tée xica cuu ndìhi-gá ní xiní ñáhá-güedě xii-gá tá xica-gá núú ndute cuáhá<sup>n</sup>, te ní yùhú-güedé te ní<sup>n</sup>hi ní cáhá<sup>n</sup>-güedé te xĩtnàha-güedé:

—¡ñí<sup>n</sup> àlmá! —càchí-güedé xĩtnàha-güedé

27 Te Jèsús ní cáhá<sup>n</sup>-gá, te xăha<sup>n</sup>-gă xii-güedé:

—Ñí<sup>n</sup> cunduu-ndo vă yùhú-ndó, chi yùhú cúu-í —càchí-gá xăha<sup>n</sup>-gă xii-güedé.

28 Te té Pèlú ní xáha<sup>n</sup>-dě xii-gá:

—Mèstrú, te núú ñí<sup>n</sup> te tauchìu<sup>n</sup> sá tnáhá-í ná cãca-í núú ndute quixi tnáhá ñáhà-í xii-n —càchí-dé xăha<sup>n</sup>-dě xii-gá.

29 Te Jèsús ní xáha<sup>n</sup>-gă xii-dé:

—Taqùixi —cachí-gá xăha<sup>n</sup>-gă xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáhá<sup>n</sup> cuátnahá ñáhá-dě xii-gá.

30 Te ní cutnùní ñí<sup>n</sup>-dé sá ñó ní<sup>n</sup>hi xico táchí, te ní ngüíta-dé yùhú-dé. Te òré-ni-á<sup>n</sup> tá quèe naa-dé xití ndute cuáhá<sup>n</sup> ní cùu, te ní<sup>n</sup>hi ní cáhá<sup>n</sup>-dé xăha<sup>n</sup>-dě xii Jèsús:

—¡Mèstrú, vă dáñá-n quèe naa-í xití ndute! —càchí-dé xăha<sup>n</sup>-dě xii-gá.

31 Te òré-ni-á<sup>n</sup> ñí tñí Jèsús ndaha-dé, te ní xáha<sup>n</sup>-gă xii-dé:

—¿Ná cuendá ñá túú sàndáá ndisa ñí ñáhá-n xití-í sàni ñí<sup>n</sup> sàni úú ñí<sup>n</sup>-í? —càchí-gá xăha<sup>n</sup>-gă xii-dé.

32 Te òré cuánguee Jèsús ndìhi té Pèlú xití bàrcú, te òré-ni-á<sup>n</sup> ñí ngüíñí táchí.

33 Te cue tée ñí<sup>n</sup>hu xití bàrcú-á<sup>n</sup> ñí ngüíñí xití-güedě núú-gă, te xăha<sup>n</sup>-güedě xii-gá:

—Sá ndàá sá cuítí sã díú yòhó cúu-n Dèhe Dútú Ndiõxí —càchí-güedé xăha<sup>n</sup>-güedě xii-gá.

*Jèsús quidé tãtna-gă ñáyiú cùhú ñí<sup>n</sup>  
xichi núú nání Gènesarét  
(Mr. 6:53-56)*

34 Te ní quexìo Jèsús ndìhi cue tée xica cuu ndìhi-gá ndàa ingá xio yuhu làgúná, te núú ñí quexìo-gá ndìhi-güedé-á<sup>n</sup> nání-xi Gènesarét.

35 Te nchaa ñáyiú xĩndecu xiá<sup>n</sup> ñí cutnùní ñí<sup>n</sup>-yu sá díú-gă ní quexìo, te ní dátécú tñí<sup>n</sup>hu-yu nchaa ñí<sup>n</sup>hu-gă ñáyiú xĩndecu yatni xiá<sup>n</sup> sã ñí quexìo-gá. Te ndécá-yu nchaa ñáyiú cùhú ndécú ndìhi-yu cuáhá<sup>n</sup> núú ndécú Jèsús.

36 Te nchaa ñáyiú cùhú-á<sup>n</sup> ñí ngüíta-yu càhá<sup>n</sup> ndàhú-yu núú Jèsús

sá ná dàña-gá tnándeé-yu cuèdicó luha yuhu dǒo-gǎ cuendá ndúha-yu, te cue ñáyiú cùhú, ñáyiú ní tnándeé yuhu dǒo-gǎ ní ndúha-yu.

## 15

*Cuendá nchaa sá quidé-xí ngüñdecu cuéchi ñáyiú*

*(Mr: 7:1-23)*

<sup>1</sup> Te sáta dúcá<sup>n</sup> te ñ<sup>n</sup> úú cue téé cùu fariséú ní quee-güedé ñuú Jerusálén, ndíhi cue téé dàcuaha ñaha xii ñáyiú nchaa tnúhu ní chídó tnùní ndíi Moisés ní quexìo-güedé núú ndécú Jèsús, te xǎha<sup>n</sup>-güedé xii-gá:

<sup>2</sup> —¿Ná cuendá cue téé xica cuu ndíhi-n ñá túú nàquete-güedé ndaha-güedé òré caxi-güedé nàcuáa ní cachí cue ñaní tnáhá-ó ñí xíndecu ndéé sanaha-i? —càchí-güedé xǎha<sup>n</sup>-güedé xii-gá.

<sup>3</sup> Te Jèsús ní xǎha<sup>n</sup>-gǎ xii-güedé:

—Te nchòhó tucu, ¿ná cuendá ñá túú quide-ndo nacuáa ní cachí Yǎ Ndiǒxí cada-ndo, núú da nàcuáa ta quide cue téé ñuyíú-a quide-ndo-i?

<sup>4</sup> Te Yǎ Ndiǒxí càchí-gá núú tùtú-gá: “Canehe-ndo sǎ yíñùhu núú tǎtá-ndó ndíhi núú nǎná-ndó”, càchí-gá. Te càchí tucu-gá ìngá xichi núú tùtú-gá: “Nchaa ñáyiú na càhá<sup>n</sup> úhú tǎtá-xi àdi náná-xi te cahni ñaha-güedé xii-yu”, duha càchí-gá núú tùtú-gá.

<sup>5</sup> Dico nchòhó càchí-ndó sǎ cué ñáyiú chi cuu cúñahá-yu xii tǎtǎ-yu àdi nánǎ-yu: “Vá cúú chindee ñaha-ndí xii-n, chi sá táxí-ndí xii-n ni cùu, xǎ<sup>n</sup> ní nduu cuendá Yǎ Ndiǒxí”, cuu duha cúñaha ñáyiú xii tǎtǎ-yu àdi nánǎ-yu càchí-ndó.

<sup>6</sup> Te càchí-ndó sǎ cué ñáyiú duca<sup>n</sup> na cǔñaha xii tǎtǎ-xi àdi náná-xi te ñá túú-gǎ tàú-yu chindéé-yu ni tǎtǎ-yu ni nánǎ-yu. Te duca<sup>n</sup> quide-ndo chi ní dáquéeé tǐhú-ndó nàcuáa ní cachí Yǎ Ndiǒxí cada-ndo, te mee-ni nàcuáa ta quide cue téé ñuyíú-a véxi nchìcú<sup>n</sup> nihnu-ndo quide-ndo.

<sup>7</sup> ¡Te nchòhó cúú-ndó ñáyiú ío dàndahú méé-xí, chi càchí-ndó sǎ quidé ndǎá-ndó te ñá ndǎá sá quidé ndǎá-ndó! Te ní quee ndǎá-xi nàcuáa

ní chídó tnùní ndíi Chàíá téé ní xóo càhá<sup>n</sup> tnúhu Yǎ Ndiǒxí ndéé sanaha núú tùtú-gá núú càhá<sup>n</sup>-xi nàcuáa ní càhá<sup>n</sup>-gá cuendá-ndó, te duha ní cachí-gá:

<sup>8</sup> Ñáyiú-a càchí-yu sá ío cànmu cuu-í dico dicó-ni yuhu càhá<sup>n</sup>-yu, chi duu<sup>n</sup> duu<sup>n</sup> ñá túú ñùhu iní ñáhǎ-yu xii-í.

<sup>9</sup> Te àú<sup>n</sup> nǎ cuu chiñuhu ñahá-yu xii-í chi ñá túú vèdana ndéé nándíhi-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá ñí cahu iní cue ñáyiú ñuyíú-a càhá<sup>n</sup>-yu.

Duha ní chídó tnùní ndíi Chàíá núú tùtú Yǎ Ndiǒxí nàcuáa ní càhá<sup>n</sup>-gá cuendá-ndó —càchí-gá xǎha<sup>n</sup>-gǎ xii-güedé.

<sup>10</sup> Te ní xǎha<sup>n</sup>-gǎ xii cue ñáyiú:

—Chí táquixi ndehe iha, te cundedóho váha-ndo tnúhu na càhá<sup>n</sup>-í, te ío váha cuáha-ndo cuendá.

<sup>11</sup> Nchaa sá xéxí-ndó chi ñá túú nǎ quidé-xí ìní-ndó, dico nchaa sá cuèhé sá dúhá sàni ìní-ndó càhá<sup>n</sup>-ndó nchàa xǎ<sup>n</sup> quidé-xí ndècu cuéchi-ndo —càchí-gá xǎha<sup>n</sup>-gǎ xii-yu.

<sup>12</sup> Te cue téé xica cuu ndíhi-gá ní sáhá<sup>n</sup>-güedé ndéé núú-gǎ, te xǎha<sup>n</sup>-güedé xii-gá:

—Véxi-ndí càchí tnúhu-ndí xii-n sǎ cué téé cùu fariséú ñá túú cùu váha ìní-güedé cuendá tnúhu ní càhá<sup>n</sup>-n —càchí-güedé xǎha<sup>n</sup>-güedé xii-gá.

<sup>13</sup> Te ní xǎha<sup>n</sup>-gǎ xii-güedé:

—Nchaa ñáyiú ñá túú cùu cuendá Tǎtǎ-í Dútú Ndiǒxí cuíta nihnú-yu, chi ñáyiú-á<sup>n</sup> cúú-yu dàtná nchaa cúhú sǎ ñà túú nándíhi te tnùhu ñáyiú.

<sup>14</sup> Te vá cáda cuendá-ndó nàcuáa càhá<sup>n</sup> cue téé-á<sup>n</sup>, chi cùu-güedé dàtná cue ñáyiú cuáa sácuíta nehe tnàha. Te nchòhó xini-ndó sǎ núu ñ<sup>n</sup> ñáyiú cuáa ná cuítá nèhe tucú-yu ìngá ñáyiú cuáa, te ndí ndùú-yu quée-yu déhva —càchí-gá xǎha<sup>n</sup>-gǎ xii-güedé.

<sup>15</sup> Te té Pèlú ní xǎha<sup>n</sup>-dǎ xii-gá:

—Cachí tnúhu xii-ndí nàcuáa quée-xi tnúhu ní càhá<sup>n</sup>-n-ǎ<sup>n</sup> —càchí-dé xǎha<sup>n</sup>-dǎ xii-gá.

<sup>16</sup> Te Jèsús ní xǎha<sup>n</sup>-gǎ:

—¿Náa tnàhá nchòhó ñá túú ní təcú tnùnì-ndó nàcuáa ndùu tnúhu ní cáhá<sup>n</sup>-í núú ñáyiu-á<sup>n</sup> ñǎ?

17 Nchaa sá xéxi-yu cuánguee-xi xití-yu, te dǎtnùnì náyǎha ñaha-xi xii-yu.

18 Dico nchaa tnúhu cuèhé tnúhu duha cáhá<sup>n</sup>-yu xiǎ<sup>n</sup> véxi quene-xi iní-yu, te ñu nchaa xiǎ<sup>n</sup> quidé-xi ndècu cuéchi-yu.

19 Te iní-yu-á<sup>n</sup> cǎcú ñihnu nchaa sá cuèhé sá dúhá, chi sàni cuehé sání dùha iní-yu, te sàhní-yu tnàha ñáyíu-yu, te cue téé cáhá<sup>n</sup> ndihí-güedé ñáyíu ñihí te ñá díú ñàdihí-güedé cúu-yu. Te ñu-ni duca<sup>n</sup> quide cue ñáyíu ñihí cáhá<sup>n</sup> ndihí-yu cue téé te ñá díú yǎ-yu cùu-güedé, te cuèi téé te cuèi ñadìhí mee-ni ìchi díí ñí cúdíí ñí-yu cundecú-yu, te dùhu ndachiu<sup>n</sup> tnahá-yu, te dàcuandehndé-yu, te cáhá<sup>n</sup> cuèhé-yu cuèndá tnàha ñáyíu-yu.

20 Te nchaa xiǎ<sup>n</sup> quidé-xi ndècu cuéchi-yu, dico ñá díú sǎ ñà túú ndàhá-yu dǎtná ní cachí cue téé ndéé sanaha, chi xiǎ<sup>n</sup> ñá túú quide-xi cuèndá ngúndecu cuéchi-yu —càchí-gá xǎha<sup>n</sup>-gǎ xii-güedé.

*Ñ<sup>n</sup> ñadìhí ñaha cùu ñaní tnàhá ñáyíu canàneá ní sándáá iní-a<sup>n</sup> Jèsús (Mr: 7:24-30)*

21 Te Jèsús ní xica-gá cuáhá<sup>n</sup>-gá ní sáa-gá yucu cue téé ñuú Tírú, ndihí yucu cue téé ñuú Sidón.

22 Te ñ<sup>n</sup> ñadìhí ñaha cùu ñaní tnàhá ñáyíu canàneá ndécú yàtni-a<sup>n</sup> xiǎ<sup>n</sup>, te níhi ta cáhá<sup>n</sup>-a<sup>n</sup> ní quexìo núú ndécú Jèsús, te xǎha<sup>n</sup>-a<sup>n</sup> xii-gá:

—¡Mèstrú, ñaní tnàhá ndíi Dàvíi, cundàhú iní ñáhá xii-í cada tátna-n déhe yoco-í! Chi yǎhi ñaha espíritú cúndihí yucu ñávǎha xii-xi te ío dǎndoho ñaha-xi —cachí-a<sup>n</sup> xǎha<sup>n</sup> xii-gá.

23 Dico Jèsús ñá túú tnàhí ní cáhá<sup>n</sup>-gá, te cue téé xica cuu ndihí-gá ní sáhá<sup>n</sup>-güedé núú-gǎ, te xǎha<sup>n</sup>-güedé xii-gá:

—Cúñaha xii ñaha-á<sup>n</sup> ná nùhú-a<sup>n</sup>, chi ío níhi cáhá<sup>n</sup>-a<sup>n</sup> nchìcú<sup>n</sup> ñáhá-á<sup>n</sup> xii-o —cachí-güedé xǎha<sup>n</sup>-güedé xii-gá.

24 Te Jèsús ní xáhá<sup>n</sup>-gǎ xii-güedé:

—Yá Ndiǒxí ní tendaha ñàha-gá xii-í véxi-í mee-ni ñuú núú xǎndecu cue ñáyíu isràél, chi ñáyíu-á<sup>n</sup> cúu-yu dǎtná cue mbéé cue quiti ní xíta, chi ta xíta nihnú-yu cuáhá<sup>n</sup> —càchí-gá xǎha<sup>n</sup>-gǎ xii-güedé.

25 Te ñadìhí-á<sup>n</sup> ñí sáhá<sup>n</sup>-a<sup>n</sup> ndéé núú Jèsús ní ngüñí xití-á<sup>n</sup>, te xǎha<sup>n</sup>-a<sup>n</sup> xii-gá:

—¡Mèstrú, chindee ñàha xii-í! —càchí-a<sup>n</sup> xǎha<sup>n</sup>-a<sup>n</sup> xii-gá.

26 Te Jèsús ní xáhá<sup>n</sup>-gǎ xii-a<sup>n</sup>:

—Vá cúu chindee-í cue ñáyíu ñá túú cùu ñáyíu isràél, chi ñ<sup>n</sup>-ni cùu-xi núu na quèhe<sup>n</sup>-o paá cúu cuèndá cue landú te cuáha-o ñá caxi-ñi —càchí-gá xǎha<sup>n</sup>-gǎ xii-a<sup>n</sup>.

27 Dico ñaha-á<sup>n</sup> ñí xáhá<sup>n</sup>-a<sup>n</sup> xii-gá:

—Ndáá cáhá<sup>n</sup>-n, dico cue ñá chi nàdatacá-güedi sá ngóyó yùhu cóhó xitohó-güedi —càchí-a<sup>n</sup> xǎha<sup>n</sup>-a<sup>n</sup> xii-gá.

28 Te Jèsús ní xáhá<sup>n</sup>-gǎ xii-a<sup>n</sup>:

—¡Yòhó ñaha cùhú déhe-xi, ío váha sàndáá iní ñáhá-n xii-í! Te na càda-í nàcuáa cuñí-n —càchí-gá xǎha<sup>n</sup>-gǎ xii-a<sup>n</sup>.

Te òré-ni-á<sup>n</sup> ñí ndúha déhe-a<sup>n</sup>.

*Jèsús quidé tátna-gá vai ñáyíu cùhú*

29 Te sáta dúcá<sup>n</sup> ñí cuu te Jèsús ní xica-gá cuáhá<sup>n</sup>-gá ní yáha-gá yuhu làgúná distritú Galileá, te cuásaá-gá ñ<sup>n</sup> tindúú te xiǎ<sup>n</sup> ñí ngóo-gá.

30 Te xiǎ<sup>n</sup> núcǒo-gá ní quexìo cuéhé víhi ñáyíu, te ndécá-yu ñáyíu yacua, ndihí ñáyíu ní yíchí ñ<sup>n</sup> xio ndaha-xi, ndihí ñáyíu cuáá, ndihí ñáyíu ñihí, te vai dava-gá cue ñáyíu cùhú tnàhá dava-gá núú cuéhé ndécá-yu ní quexìo núú ndécú-gǎ. Te ní taxi ndecu ñàhá-yu núú Jèsús te ní quide tátna ñaha-gǎ xii-yu te ní ndúha-yu.

31 Te nchaa ñáyíu xǎndecu-á<sup>n</sup> ío ní cuñúhu-yu sá dúcá<sup>n</sup> ñí xini-yu ní cuu ní nacáhá<sup>n</sup> nchaa ñáyíu ñihí, ndihí cuèndá sá ñí ndúha nchaa cue ñáyíu yacua, ndihí cuèndá sá ñí ndúha cue ñáyíu ní yíchí ñ<sup>n</sup> xio ndaha-xi, ndihí cuèndá sá ñí ndúha núú cuè ñáyíu



cuáa. Te nchaá-yu ní cachí-yu sá ïo cãhnu cuu Yá Ndiõxí Yaa cúu Ndiõxí cue ñáyiú isrâél.

*Jèsús dácaxi-gá cúmí mìl cue téé te ðí<sup>n</sup> ñáyiú ðíhí ndíhí landú*  
(Mr. 8:1-10)

<sup>32</sup> Te Jèsús ní cana-gá cue téé xica cuu ndíhí-gá, te ní xáha<sup>n</sup>-gã xii-güedé:

—Yúhú cündáhú iní-í nchaá ñáyiú-a, chi sa ní cuu úní nduu ndècu ndíhí ñáhá-yu xii-o ïha, te ñá túú tnàhí-gá sá cáxí-yu, te ñá túú cuiní-í naten-daha-ï-yu núhú tnámã-yu vehé-yu, chi ná ndèé cuáhán cuneé-yu docó ichi —càchí-gá xáha<sup>n</sup>-gã xii-güedé.

<sup>33</sup> Te ní xáha<sup>n</sup>-güedé xii-gá:

—¿Te ndèé níhí-ó sã cuãñaha-o càxi nchaá ñáyiú-a, te ío cuéhë-yu te ñá túú nã ïo ïha chi cùu-xi xití yucu-i? —càchí-güedé xáha<sup>n</sup>-güedé xii-gá.

<sup>34</sup> Te Jèsús ní xicá<sup>n</sup> tnúhú-gã núu-güedé, te xáha<sup>n</sup>-gã:

—¿Ná daha-gá pàá ndécú ndíhí-ndo-i? —cachí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Ndècu ndíhí-ndí úsá-gá tnàhá pàá ndíhí ï<sup>n</sup> úú-gá chácá —càchí-güedé xáha<sup>n</sup>-güedé xii-gá.

<sup>35</sup> Te Jèsús ní xáha<sup>n</sup>-gã xii nchaá ñáyiú sá ná ngõo-yu nchaá-yu, te ní ngóo-yu.

<sup>36</sup> Te ní quehe<sup>n</sup>-gá ndí úsá pàá-án ndí ï<sup>n</sup> úú-gá chácá-ã<sup>n</sup>, te ní ndacá<sup>n</sup> táhú-gã núú Yá Ndiõxí, te dãtnùní ní táhú cuèchi-gá pàá-án ndíhí chácá-ã<sup>n</sup> te ní sãñaha-gã xii cue téé xica cuu ndíhí-gá ní dácãhñu-güedé nchaá ñáyiú-án.

<sup>37</sup> Te nchaá-yu ní xexí-yu ní ndahá xití-yu. Te sátá nĩ túhú cóhõ-yu te ní nadatácá-güedé nchaá sá nĩ quendóo, te ní chítú úsá tnàhá tídihi mee-ni sã nĩ quendóo-án.

<sup>38</sup> Te núú ncháá ñáyiú ní xexi te ní xínu cúmí mìl mee-ni cuè téé chi ðiu-ni cue téé-án nĩ quiúndehu, te ðí<sup>n</sup> cue ñáyiú ðíhí ndíhí cue landú.

<sup>39</sup> Te sátá dúcá<sup>n</sup> te Jèsús ní dándácá ñàha-gá xii-yu, te cuánguee-gá bàrcú cuáhán-gá yucu cue téé ñúú Màgdalá.

## 16

*Cue téé cùu fariséú ndíhí cue téé cùu saducéú xáha<sup>n</sup>-güedé xii Jèsús cada-gá ï<sup>n</sup> sá vã yõo tnàhí ndàcu cada*

(Mr. 8:11-13; Lc. 12:54-56)

<sup>1</sup> Te cue téé cùu fariséú ndíhí cue téé cùu saducéú ní sáá-güedé núú ndécú Jèsús xitó ndèé ñáhá-güedé xii-gá, te xáha<sup>n</sup>-güedé sá ná cádá-gã ï<sup>n</sup> sá vã yõo tnàhí ndàcu cada cundehe-güedé nàcuáa cutnùní iní-güedé núu ndáá sá Yá Ndiõxí ní tendaha ñàha-gá xii-gá véxi-gá ñuyíú-a.

<sup>2</sup> Te Jèsús ní xáha<sup>n</sup>-gã xii-güedé:

—Nchòhó chi òré tá cuàa cuáhán te ndàcoto-ndo andíu, te càchí-ndó: “Ío váha cada-xi tneé chi càa vícò tícuèhé andíu”, duha càchí-ndó.

<sup>3</sup> Te òré dátneé ndácòto tucu-ndo andíu, te càchí-ndó: “Vá cádá vãha-xi nduu vitna chi tícuèhé andíu, te càa vícò”, duha càchí-ndó. ¡Dico nchòhó cúu-ndó ñáyiú ío dándahú méé-xí sã quidé ndáá te ñá ndáá sá quidé ndáá-ndó! Te cùtnuní iní-ndó nàcuáa quide-xi andíu, dico ñá túú cùtnuní iní-ndó nàcuáa quèe-xi nchaá sá quidé Yá Ndiõxí vitna.

<sup>4</sup> Dico nchaá nchòhó ñáyiú ndècu ñuyíú vitna ío cuihna iní-ndó, te ñá túú cuiní-ndó càda ndáá-ndó núú Yá Ndiõxí, te cuiní-ndó càda-í ï<sup>n</sup> sá vã yõo tnàhí ndàcu cada dico ñá túú nãgá cada-í, chi ðiu-ni nàcuáa ní quide Yá Ndiõxí ndí Jónás ðiu-ni ðuca<sup>n</sup> càda tucu-gá vitna —càchí-gá xáha<sup>n</sup>-gã xii-güedé.

Te ðuca<sup>n</sup> te ní xica-gá cuáhán-gá ndíhí cue téé xica cuu ndíhí-gá.

*Cuèndá cue téé cùu fariséú ndíhí cuèndá cue téé cùu saducéú*

(Mr. 8:14-21)

<sup>5</sup> Te òré ní quexìo ndíhí ñàha-gá xii-güedé ndàa ìngá xio yuhu làgúná, te ní ndacu iní-güedé sá nĩ cunaa-güedé canehe-güedé pàá quíhí<sup>n</sup> caxi-güedé.

<sup>6</sup> Te Jèsús ní cáhá<sup>n</sup>-gá dóho-güedé, te xáha<sup>n</sup>-gã xii-güedé:

—Na càchí tnúhu-í xii-ndo sã ïo quihi iní-ndó cùndecu-ndo, te vá cádá cuèndá tnàhí-ndo lèvadurá cue téé cùu

fariséu ndihi cue tée cùu saducéu — cächí-gá xǎha<sup>n</sup>-gǎ xii-güedé.

<sup>7</sup> Te ní ngüíta-güedé xǎtnàha-güedé: —Cuèndá sá ñà túú ní cǎnehe-o pǎá quixi xǎ<sup>n</sup> duha cǎhá<sup>n</sup>-gá — cächí-güedé xǎtnàha-güedé.

<sup>8</sup> Te Jèsús ní cutnúni iní-gá nàcuáa ndùu tnúhu xǎtnàha-güedé, núu ní xǎha<sup>n</sup>-gǎ xii-güedé:

—Nchòhó chi ñá túú sàndáá iní ñáhá vǎha-ndo xii-í núu xǎ<sup>n</sup> da sá ñà túú ní cǎnehe-ndo pǎá quixi cǎhá<sup>n</sup>-ndó.

<sup>9</sup> ¿Te náa ñá ndácú iní-ndó sǎ núu ùhú<sup>n</sup>-ni pǎá, te ní taxi-í ní dǎcǎhñu-ndo ní xexi ùhú<sup>n</sup> mǐl cue tée, chi ñu-ni cue tée-á<sup>n</sup> ní quíúndehu, te sátá ní túhú cóhó-güedé te ní chítú tǐtní tídihi mee-ni sǎ ní quendóo-ǎ<sup>n</sup>? Te ñá tècú tnùnín-dó nàcuáa quèe-xi nacuáa ní quide-í.

<sup>10</sup> ¿Te náa ñá ndácú tucu iní-ndó sǎ núu úsá-ni pǎá te ní taxi-í ní dǎcǎhñu tucu-ndo ní xexi cúmí mǐl cue tée, chi ñu-ni cue tée-á<sup>n</sup> ní quíúndehu, te sátá ní túhú cóhó-güedé te ní nadatácá-ndó nchàa sá ní quendóo, te ní chítú tǐtní tídihi mee-ni sǎ ní quendóo-ǎ<sup>n</sup>?

<sup>11</sup> Dico nchòhó chi ñá túú ní quide cuendá-ndó nàcuáa ndùu tnúhu cǎhá<sup>n</sup>-í òré ní cachí-í sá vǎ quéhé<sup>n</sup> cuèndá-ndó lèvadurá cue tée cùu fariséu ndihi cue tée cùu saducéu, chi ñá díú cuendá pǎá ní cǎhá<sup>n</sup>-í — cächí-gá xǎha<sup>n</sup>-gǎ xii-güedé.

<sup>12</sup> Te sátá dúcá<sup>n</sup> ní xǎha<sup>n</sup> Jèsús xii cue tée xica cuu ndihi-gá, te ní tecú tnùnín-güedé sá xǎha<sup>n</sup>-gǎ xii-güedé sá vǎ tníí-güedé tnúhu cǎhá<sup>n</sup> cue tée cùu fariséu ndihi cue tée cùu saducéu, te ñá díú cuendá levadurá sá quíhu yuchi cuǎha pǎá ní cǎhá<sup>n</sup>-gá.

*Té Pèlú xǎha<sup>n</sup>-dě xii Jèsús sá díú-gǎ cúu-gǎ Crìstú*

(Mr. 8:27-30; Lc. 9:18-21)

<sup>13</sup> Te Jèsús ní quexio-gá yucu cue tée ñuú Cèsareá Filipú, te ní xicá<sup>n</sup> tnúhú-gǎ núu cuè tée xica cuu ndihi-gá, te xǎha<sup>n</sup>-gǎ xii-güedé:

—¿Yoo cùu yúhú Tée cùu ñani tnáhá-ndó nchàa-ndo cachí cue

ñáyiu-va? —cächí-gá xǎha<sup>n</sup>-gǎ xii-güedé.

<sup>14</sup> Te ní xǎha<sup>n</sup>-güedé xii-gá:

—Davá-yu cächí-yu sá cúu-n ndíi Juáa tée ní xóo dacuàndute ñaha xii ñáyiu, te davá-yu cächí-yu sá cúu-n tē Èliás, te davá-yu cächí-yu sá cúu-n ndíi Jeremiás tée ní xóo cǎhá<sup>n</sup> tnúhu Yá Ndióxi ndéé sanaha, àdi cuu-n ingá tée ní xóo cǎhá<sup>n</sup> tnúhu-gá ndéé sanaha, duha cächí-yu —cächí-güedé xǎha<sup>n</sup>-güedé xii-gá.

<sup>15</sup> Te Jèsús ní xicá<sup>n</sup> tnúhú tucu-gá núu-güedé, te xǎha<sup>n</sup>-gǎ xii-güedé:

—Te nchòhó, ¿yoo sàni iní-ndó cùu-í-í? —cächí-gá xǎha<sup>n</sup>-gǎ xii-güedé.

<sup>16</sup> Te té Ximú, àdi Pelú chi úu diu-dé, ní xǎha<sup>n</sup>-dě xii-gá:

—Yòhó cúu-n Crìstú Yaá ní tendaha Yǎ Ndióxi véxi ñuyíu-a, te diu Yá Ndióxi cúu-gǎ Yaá ndécú nchàa nduu nchaa quíú, te yòhó cúu-n Dèhe-gá — cächí-dé xǎha<sup>n</sup>-dě xii-gá.

<sup>17</sup> Te Jèsús ní xǎha<sup>n</sup>-gǎ xii-dé:

—Yòhó té Ximú déhe té Jónás, ío vǎha táhú-n chi mee Tǎtà-í Dútú Ndióxi ní dǎcǎhú iní ñáhá-gǎ xii-n nàcuáa cundu tnúhu cǎhá<sup>n</sup>-n, te ñá díú ñáyiu ñuyíu-a duca<sup>n</sup> ni dàcahu iní ñáhǎ-yu xii-n tnúhu-á<sup>n</sup>.

<sup>18</sup> Te yúhú xǎha<sup>n</sup>-í Pèlú xii-n, te tnúhu-á<sup>n</sup> quéé-xí yúú, chi quèe ndáá-xi nàcuáa nani-n, chi cuu-n ñ<sup>n</sup> tée vá cání ñ<sup>n</sup> cani úu iní-xi canu ichi-n cuè ñáyiu nàcuáa cundecu ndihi ñáhá-yu xii-í. Te nchaa ñáyiu cùu cuendá-í vá ndácú yucu ñávǎha dacuíta nihnu ñaha-xi xii-yu.

<sup>19</sup> Te yúhú taxi-í tnúhu ndee iní cundecu ndihi-n cuendá cunuu-n núu cuè ñáyiu yindaha ñaha Yá Ndióxi, te nchaa sá ná cǎhá<sup>n</sup>-n sǎ cúu-xí sǎ vǎha, te diu-ni duca<sup>n</sup> cǎhá<sup>n</sup> Yǎ Ndióxi, te nchaa sá ná cǎhá<sup>n</sup>-n sǎ ñà túú cùu-xi sá vǎha, te diu-ni duca<sup>n</sup> cǎhá<sup>n</sup> tucu-gá, chi quide-n nacuáa cuini-gá —cächí-gá xǎha<sup>n</sup>-gǎ xii-dé.

<sup>20</sup> Te sátá dúcá<sup>n</sup> te ní xǎha<sup>n</sup> Jèsús xii cue tée xica cuu ndihi-gá sá vǎ yóo cúñaha-güedé sá díú-gǎ cúu-gǎ Crìstú Yaá ní tendaha Yǎ Ndióxi véxi ñuyíu-a.

*Jèsús càhá<sup>n</sup>-gá sá cáhni ñàha-güedé xii-gá*

*(Mr. 8:31-9:1; Lc. 9:22-27)*

21 Te ndéé dàvá-á<sup>n</sup> ñi ngüíta Jèsús xàha<sup>n</sup>-gá xii cue téé xica cuu ndihi-gá:

—Dacuitíi sã quihí<sup>n</sup>-í ñuú Jerusálén, te yacá<sup>n</sup> cue téé cùu sacuéhé nùú ñáyiu israél, ndihi cue dútú cúnùu, ndihi cue téé dàcuaha ñaha xii ñáyiu nchaa tnúhu ní chídó tnùnì ndíi Moisés, nchaa cue téé-á<sup>n</sup> ño dandòho ñaha-güedé xii-í, te cahni ñaha-güedé, dico nduu únì sá cùú-í te ndoto-í —càchí-gá xàha<sup>n</sup>-gá xii-güedé.

22 Te té Pèlú ní cana-dé Jèsús ñ<sup>n</sup> xio, te ní ngüíta-dé ténàà ñáhá-dé xii-gá, te xàha<sup>n</sup>-dè:

—Sá vã càchí Ndiöxí sá dúcá<sup>n</sup> ndòho-n chi ñá túú tàú-n sã dúcá<sup>n</sup> ndòho-n! —cachí-dé xàha<sup>n</sup>-dè xii-gá.

23 Te ndàa sátá Jèsús nútñi té Pèlú òré duca<sup>n</sup> xàha<sup>n</sup>-dè xii-gá nùu ní nchócuñhu-gá, te xàha<sup>n</sup>-gá xii-dé:

—Xocuiñi yòhó yucu ñävãha núu-í-a chi dícó quidé tñèñu-n! Chi ñá túú sàni iní-ò dàtná sání ñi Yã Ndiöxí chi ñ<sup>n</sup>-ni sàni iní-ò ndihi dava-gá cue ñáyiu ndècu ñuyíú-a —càchí-gá xàha<sup>n</sup>-gá xii-dé.

24 Te sátá dúcá<sup>n</sup> te ní xàha<sup>n</sup>-gá xii nchaa cue téé xica cuu ndihi-gá:

—Nchaa ñáyiu cuini chitnahá ñáhá xii-í, te xini ñuhu-xi dañá-yu vá cáda-gã-yu sá sání ñi mée-yu, te ío cada ndee ñi-yu cundecu túha-yu ndohó-yu cuendá-í, te cuèi na ndohó-yu dàtná ndohó-í.

25 Te nchaa ñáyiu cuini sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiu ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuendá-í, te ñáyiu-á<sup>n</sup> naníhí tãhú-yu.

26 Te cuèi nchaandi túhú sá ío ñuyíú-a na ñihí ñáyiu cundecu ndihí-yu, dico núu ñi nchaa xiã<sup>n</sup> ná càda cuíta nihnú-yu te ñá túú vèdana nándihí-xi sá dúcá<sup>n</sup> ndècu ndihí-yu nchaa xiã<sup>n</sup>. Te ni ñ<sup>n</sup> sá ío ñuyíú-a vá chindèe ñaha-xi xií-yu cuendá naníhí tãhú-yu.

27 Te ndáá quée-xi tnúhu càhá<sup>n</sup>-í, chi na quixi tucu yúhú Téé cùu ñani tnáhã-yu nchaá-yu, te dàvá-á<sup>n</sup> quini-yu sá ío càhnu cuu-í dàtná càhnu cuu Tátà-í Dútú Ndiöxí, te quixi-í ndihi cue espíritú xínú cuèchi núú-gã, te dàvá-á<sup>n</sup> cuãha-í nchaa ñáyiu sá ndúú tãhú-yu nàcuáa ndùu sá ñi quidé-yu ñ<sup>n</sup> ñ<sup>n</sup>-yu.

28 Te na càchí tnúhu ndáá-í xii-ndo sã ío dava nchòhó ñáyiu ndècu iha vitna vá cùú-ni-ndo, chi cundecu-ni-ndo ndéé quini-ndó quixi tucu yúhú Téé cùu ñani tnáhã-ndó nchaa-ndo taxi tnuní-í nchaa ñáyiu —càchí-gá xàha<sup>n</sup>-gá xii-güedé.

## 17

*Ní nadáma dóo Jèsús ndihi núú-gã*  
*(Mr. 9:2-13; Lc. 9:28-36)*

1 Te núú ññú nduu sá dúcá<sup>n</sup> ñi cáhá<sup>n</sup> Jèsús, te ní xica-gá cuásaá-gá ñ<sup>n</sup> yucu dúcú<sup>n</sup>, te ndèca-gá té Pèlú, ndihi té Jàcobó, ndihi té Juáa ñani té Jàcobó-á<sup>n</sup> cuásaá. Te únì tnàhí-ni cue téé-á<sup>n</sup> ndécá-gã cuásaá.

2 Te yucu-á<sup>n</sup> ndécú-gã ní nadáma núú-gã ndihi dóo-gã, te núú-gã súúni dàtása-xi dàtná quidé-xi nùu nchícanhii, te dóo-gã súúni ñi nduu cuixí<sup>n</sup> dàtná cáá ññhú cuixí<sup>n</sup>.

3 Te òré-ni-á<sup>n</sup> ñi xini-güedé ndíi Moisés ndihi té Èliás nútñi-güedé ndihi-gá ndátnúhu ndihi ñaha-güedé xii-gá.

4 Te té Pèlú ní xàha<sup>n</sup>-dè xii Jèsús:

—Mèstrú, ñvãha ní cuu sá ndécú-ó iha vitna! Te núu cuini-n, te na dàcaa-ndí únì tnáhã vehe tnuvixi<sup>n</sup>, te ñ<sup>n</sup> cuu cuendá-n, te ñ<sup>n</sup> cuu cuendá té Moisés, te ñ<sup>n</sup> cuu cuendá té Èliás —càchí-dé xàha<sup>n</sup>-dè xii-gá.

5 Te ñini dùca<sup>n</sup> cáhá<sup>n</sup> té Pèlú ní quexio ñ<sup>n</sup> vícò nùú ndécú-güedé ní dàdãhu ñaha-xi xii-güedé te súúni chàhñchí. Te xití vícò-ã<sup>n</sup> ñi tecú ní cáhá<sup>n</sup> Yã Ndiöxí, te xàha<sup>n</sup>-gá xii-güedé:

—Téé-a cùu-dé Déhe-í téé ío cùu iní-í, te ío cùdí ñi-í-dé, te cundèdòho-ndo nchaa tnúhu càhá<sup>n</sup>-dè —duha ní xàha<sup>n</sup>-gá xii-güedé.

6 Te sá dúcá<sup>n</sup> ní cáhá<sup>n</sup> Yă Ndiöxí ní tecú dóho cue téé xica cuu ndihí Jesús te ío ní yùhú-güedé, te ní ngüñí xítí-güedé te ní nuu núú-güedé ndàa núú ñúhú.

7 Te Jèsús cuáhá<sup>n</sup>-gá núú xíndecu cue téé xica cuu ndihí-gá, te ní tendaha ñaha-gá, te xáha<sup>n</sup>-gá xii-güedé:

—Chí ndácuñí, vá yùhú-ndó — cächí-gá xáha<sup>n</sup>-gá xii-güedé.

8 Te òré ní ndanehe núú-güedé, te ñá túú-gá ní xíní-güedé cue téé úú-á<sup>n</sup> chi mee-nă Jèsús.

9 Te òré cuánuu ndihí ñaha Jèsús xii-güedé tìndúú-ă<sup>n</sup>, te ní xáha<sup>n</sup>-gá xii-güedé:

—Vá yõ cúñaha-ndo nì ì<sup>n</sup> sá ní xíní-ndó núú nì sáá-ó-á, te cuu cáhá<sup>n</sup>-ndó dico ndéé ná yăha ndoto yùhú Téé cùu ñaní tnáhá-ndó nchàa-ndo sá cùú-í —cächí-gá xáha<sup>n</sup>-gá xii-güedé.

10 Te cue téé xica cuu ndihí-gá ní xáha<sup>n</sup>-güedé xii-gá:

—Cuñí-ndí cachí tnúhu-n nă cuëndá cue téé dàcuaha ñaha xii ñáyi nchaa tnúhu ní chídó tnùní ndí Moisés cächí-güedé sá dñha-gá té Èliás quixi, te dàtnùní quixi Yaá tendaha Yă Ndiöxí quixi ñuyú-a —cächí-güedé xáha<sup>n</sup>-güedé xii-gá.

11 Te Jèsús ní xáha<sup>n</sup>-gá xii-güedé:

—Ndáá sá códó núu ì<sup>n</sup> téé quixi-dé te cada-dé dàtná ní quide té Èliás te téé-á<sup>n</sup> cada ndáá-dé nchaa nàcuáa cùu.

12 Te na cächí tnúhu-í xii-ndo vñna sá sà ní quixi téé ní quide dàtná ní xóo cada té Èliás, te cue ñáyi ñá túú ní cùtnuní iní-yu sá díú-dé, te ní quide ñahá-yu xii-dé nchaa nàcuáa ní quixi iní méé-yu, te ñu-ndú duca<sup>n</sup> càda ñaha tucú-yu xii yùhú Téé cùu ñaní tnáhá-yu ncháa-yu, chi dandòho ñahá-yu xii-í —cächí-gá xáha<sup>n</sup>-gá xii-güedé.

13 Te cue téé xica cuu ndihí-gá ní cutnùní iní-güedé sá cuëndá ndí Juáá téé ní xóo dacuàndute ñaha xii ñáyi ní cáhá<sup>n</sup>-gá.

*Jèsús quidé tătna-gá ì<sup>n</sup> téé cuechi tnàhá cuéhé xíyíhí*

(Mr. 9:14-29; Lc. 9:37-43)

14 Te Jèsús ní nasáá-gá ndihí cue téé ní sáá ndihí-gá tìndúú-ă<sup>n</sup> núú xíndecu vài ñáyi, te ní quexìo ì<sup>n</sup> téé núú-gá ní ngüñí xítí-dé, te xáha<sup>n</sup>-dē xii-gá:

15 —Mèstrú, cundàhú iní déhe-í chi tnàhá-dé cuéhé xíyíhí, te ío dandòho ñaha-xi xii-dé, te ní cuu vài xito daquée ñaha-xi núú ñùhú xii-dé, te ní cuu vài tucu xito dangauñhu ñaha-xi ndute xii-dé.

16 Te sa ndéca-í-dé ní quixi núú cuè téé xica cuu ndihí-n dico ñá túú ní ndácu-güedé cada tătna ñaha-güedé xii-dé —cächí-dé xáha<sup>n</sup>-dē xii-gá.

17 Te Jèsús ní xáha<sup>n</sup>-gá xii nchaa ñáyi xíndecu-á<sup>n</sup>:

—Nchaa nchòhó ñáyi ndècu ñuyú-a, ío sáá iní-ndó chi ñá túú cuñí-ndó quíndáá iní-ndó Yă Ndiöxí, te ní cuu vài nduu quide ndee iní-í nchaa sá quíde-ndó. ¿Te ná ndéé ama vá dúcá<sup>n</sup>-gá cada-ndo-í? Te chí cándèca téé cùhú-á<sup>n</sup> táquixi iha —cachí-gá xáha<sup>n</sup>-gá xii-yu.

18 Te Jèsús ní tenáá-gá espíritú cùndihí yucu ñávãha yíhí ñaha xii téé-á<sup>n</sup>, te ní quee ñaha-xi xii-dé, te òré-ni-á<sup>n</sup> ní ndúha-dé.

19 Te sáta dúcá<sup>n</sup> te òré ndécú mée Jesús ndihí cue téé xica cuu ndihí-gá, te ní xícá<sup>n</sup> tnúhú-güedé núú-gá, te xáha<sup>n</sup>-güedé xii-gá:

—Cachí tnúhu xii-ndí ná cuëndá ñá túú ní ndàcu-ndí queñuhu-ndí espíritú cùndihí yucu ñávãha yíhí ñaha xii téé-ă<sup>n</sup> —cächí-güedé xáha<sup>n</sup>-güedé xii-gá.

20 Te Jèsús ní xáha<sup>n</sup>-gá xii-güedé:

—Te ñá túú ní ndàcu-ndo, chi ñá túú sándáá ndisa iní-ndó Yă Ndiöxí. Te na cächí tnúhu ndáá-í xii-ndo sá núu nchòhó quíndáá ndisa iní-ndó Yă Ndiöxí cuédìcò luha líí dàtná líhli ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> tìndúú xocuíñí-xi núú ndécú-xí te xocuíñí-xi. Te nchaa núú sá vãha ndacu-ndo càda-ndo te núu na quíndáá iní ndisa-ndo Yă Ndiöxí.

21 Te xini ñuhu-xi sá ïo cáhá<sup>n</sup> ndihi-ndo-gã te ñá túú tnàhí ná caxi-ndo cáhá<sup>n</sup> ndihi-ndo-gã, te duca<sup>n</sup> te ndacu-ndo quèñuhu-ndo espíritú cúndihi yucu ñávãha yìhi ñaha xii ñáyi, dàtná cúú espíritú sá yíhí ñaha xii té-ã<sup>n</sup> ní cùu —cachí-gá xãha<sup>n</sup>-gã xii-güedé.

*Jèsús càhá<sup>n</sup> tucu-gá sá cáhni ñaha-güedé xii-gá*

(Mr. 9:30-32; Lc. 9:43-45)

22 Te nini xica cuu Jèsús ndihi cue téé xica cuu ndihi-gá distritú Galileá, te ní xáha<sup>n</sup>-gã xii-güedé:

—Yúhú Téé cùu ñaní tnáhã-ndó nchãa-ndo sáá ï<sup>n</sup> nduu te cuáha cuendá ñáhã-güedé xii-í núú cuè téé cùu úhú iní ñáhã,

23 te cahni ñaha-güedé xii-í dico nduu úní sá cùú-í te ndoto-í —cächí-gá xãha<sup>n</sup>-gã xii-güedé.

Te sá dúcã<sup>n</sup> ñí xáha<sup>n</sup>-gã xii-güedé, te ïo ní ndíhú iní-güedé.

*Díhú<sup>n</sup> cuendá veñúhu*

24 Te òré ní quexìo Jèsús ndihi cue téé xica cuu ndihi-gá ñuú Capernaúm, te cue téé quide cobrá díhú<sup>n</sup> cuendá veñúhu ní sáhã<sup>n</sup>-güedé ní cáhá<sup>n</sup> ndihi-güedé té Pèlú, te xãha<sup>n</sup>-güedé:

—¿Chãhu mèstrú-ndó úú díhú<sup>n</sup> sã nání drãcmã cuendá veñúhu ã<sup>n</sup> ñáhã? —cächí-güedé xãha<sup>n</sup>-güedé xii-dé.

25 Te té Pèlú ní xáha<sup>n</sup>-dë:

—Chãhu-dé —cächí-dé xãha<sup>n</sup>-dë xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáhá<sup>n</sup>-gã, te xãha<sup>n</sup>-gã xii-dé:

—Xímú, ¿nása sãni iní-n, ná cúú ñáyi quide cobrá ñáhã cuè téé yìndaha ñáyi ndècu ñuyú-a cuendá nchaa sá ndúú yãhu ñuú-güedé ndihi cuendá nchaa díhú<sup>n</sup> sã ngãútnãha, cue ñáyi ñuú-güedé ã<sup>n</sup> cuè ñáyi véxi xica quide cobrá-güedé? —cächí-gá xãha<sup>n</sup>-gã xii-dé.

26 Te té Pèlú ní xáha<sup>n</sup>-dë xii-gá:

—Cue ñáyi véxi xica quide cobrá-güedé —cächí-dé xãha<sup>n</sup>-dë xii-gá.

Te Jèsús ní xáha<sup>n</sup>-gã xii-dé:

—Te núu duca<sup>n</sup> te cue ñáyi ñuú-güedé ñá túú ñã chãhu-yu te núu duca<sup>n</sup>.

27 Dico cuendá sá vã yõo dasátú-ó ìní-xi, te cuáhã<sup>n</sup> làgúnã te dàquée-n sã tní<sup>n</sup>-n chãcã xití ndute, te chãcã díhnanuu na tàva-n te cundehe-n yùhu-dí, chi yìhi ï<sup>n</sup> díhú<sup>n</sup> cuìxí<sup>n</sup>. Te díhú<sup>n</sup>-ã<sup>n</sup> canehe-n quíhí<sup>n</sup> cháhu-n cuendá-í ndihi cuendá-n, chi díhú<sup>n</sup>-ã<sup>n</sup> sa tnahã quéyãhu cuendá-ó ndí ndúú-ó —cächí-gá xãha<sup>n</sup>-gã xii-dé.

## 18

*Cue téé ndùcu tnúhu núú Jèsús yoo ïo-gá cùnùu*

(Mr. 9:33-37; Lc. 9:46-48)

1 Te sátã dúcã<sup>n</sup> te cue téé xica cuu ndihi Jèsús ní sáhã<sup>n</sup>-güedé núú-gã, te xãha<sup>n</sup>-güedé xii-gá:

—Cächí tnúhu xii-ndí, yoo ïo-gá cùnùu núú cuè ñáyi yìndaha ñaha Yá Ndiõxí —cächí-güedé xãha<sup>n</sup>-güedé xii-gá.

2 Te Jèsús ní cana-gã ï<sup>n</sup> té líhli te ní sanutnì ñaha-gã xii-dé cuádava tnuú-güedé.

3 Te xãha<sup>n</sup>-gã xii-güedé:

—Na cächí tnúhu ndãá-í xii-ndo sã ñuu vá dáñã-ndó nchãa sã ñã túú vãha quide-ndo, te nduu ndãhú ìní-ndó dàtnã ndãhú ìní té líhli-a, te vá ndúú tãhú-ndó ndíhu ndaha ñaha Yá Ndiõxí xii-ndo.

4 Te ñáyi quide datná quidé tã líhli-a ndãhú ìní-yu, te ñã túú quide cahnú-yu mèé-yu, ñáyi-ã<sup>n</sup> ïo cunúú-yu núú ndécú Yá Ndiõxí táxi tnùní-gã.

5 Te nchaa ñáyi na quèhe<sup>n</sup> cuendá ï<sup>n</sup> landú dàtnã té líhli-a cuendá sã cúú ìní ñãhã-yu xii-í ñã, te cada ìní-yu sã yùhú ní quehe<sup>n</sup> cuendá-yu —cächí-gá xãha<sup>n</sup>-gã xii-güedé.

*Quihi iní-ó vã cùndècu-o ichi cuehé ichi duha*

(Mr. 9:42-48; Lc. 17:1-2)

6 Te Jèsús xãha<sup>n</sup> tùcu-gã xii-güedé:

—Te núu ï<sup>n</sup> téé na dàcãhã<sup>n</sup>-dë cue ñáyi sãndãá ìní ñáhã xii-í cadã-yu nãndí sã cuèhé sã dúhá, te vãha-gã sã ná dàcutu ndeé-güedé ï<sup>n</sup> yúú

yǒdó dǔcún-dě, te dàquée ñaha-güedé xii-dé xití ndute làmár, te ñá díú sǎ cǔndècu-dé duca<sup>n</sup> càda-dé.

<sup>7</sup> ¡Te ndàhú ní cuu nchaa ñáyiu xǐndecu ñuyíú-a, chi coo cue téedacáhá<sup>n</sup> ñáhá xii-yu cadá-yu nándi sǎ cuèhé sǎ dúhá te dacuití sǎ dúcá<sup>n</sup> càda-xi! ¡Dico ndàhú ní cuu cue téeduca<sup>n</sup> na dàcahá<sup>n</sup> ñáhá xii-yu cadá-yu nándi sǎ cuèhé sǎ dúhá!

<sup>8</sup> Te núu ñá xio ndaha-ndo àdi ñá xio sáhá-ndó quide-xi quide-ndo nándi sǎ cuèhé sǎ dúhá, te quehndé-ndó ná cuíta, chi váha-gá sǎ nánihí tǎhú-ndó cuèi na cuíta ñá xio ndaha-ndo àdi ñá xio sáhá-ndó, te ñá díú sǎ quihí<sup>n</sup>-ndó ñihí ní ndúú-ndó núú ñuhú núu càyú.

<sup>9</sup> Te núu ñá xio tinùu-ndo quide-xi quide-ndo nándi sǎ cuèhé sǎ dúhá, te tava-ndo na cuíta-xi, chi váha-gá sǎ nánihí tǎhú-ndó cuèi na cuíta ñá xio tinùu-ndo, te ñá díú sǎ ndi ndúú xio núú-ndó quihí<sup>n</sup>-ndó núú ñuhú núu càyú.

*Cuèndá ñá mbéé quiti ní xíta  
(Lc. 15:3-7)*

<sup>10</sup> Te vá dáquée tihú-ndó cuè ñáyiu cùu cuendá-í cuèi cùu-yu ñáyiu ío ndàhú iní-xi. Te na càchí tnúhu-í xii-ndo sǎ cuè espíritú xínú cuèchi núu Yá Ndiǒxí, cue espíritú néhé cuèndá ñáhá xii-yu ñuyíú-a, nchaa-ni nduu nchaa-ni òré ndécú-xí núú Tǎtá-í Dútú Ndiǒxí Yáá ndécú àndi.

<sup>11</sup> Te duca<sup>n</sup> chi yúhú Téé cùu ñani tnáhá-ndó nchaa-ndo véxi-í ñuyíú-a dàcácu nihnu-í ñáyiu núu ùhú núu ndàhú, ñáyiu ta xíta nihnu cuáhá<sup>n</sup>.

<sup>12</sup> ¿Te nása sàni iní-ndó cuèndá ñá téé ndècu ñá ciendú mbéé-xi?, chi núu na cuíta ñá-di te dàndóo-dé cúmídíco sǎhú<sup>n</sup> cúmí-di cundecu-di ñá yucu te quihí<sup>n</sup>-dé cúnúndúcú-dě quiti ní xíta-á<sup>n</sup>.

<sup>13</sup> Te núu na nánihí-dě-di, te nchòhó sa cùtnuní iní-ndó sǎ ño-gá cudí iní-dé cuèndá quiti ní xíta-á<sup>n</sup> òré naníhí-dě-di dàcúúxí cúmídíco sǎhú<sup>n</sup> cúmí quiti ñá túú ní xíta-á<sup>n</sup>.

<sup>14</sup> Te duca<sup>n</sup> sǎtnahá-xi quide Tǎtá-ó Dútú Ndiǒxí Yáá ndécú àndi, chi

cuíní-gá sǎ vǎ cuíta ni ñá cue ñáyiu cùu cuendá-gá.

*Cada càhnu iní-ó sǎ quidé ñaha  
tnaha ñáyiu-o*

*(Lc. 17:3)*

<sup>15</sup> Te núu ñá ñáyiu ndècu ndihi-ndo ní quidé-yu ñá sǎ ñá túú tǎu-yu cadá-yu sǎ cúú-xi-ndó, te cáhá<sup>n</sup>-ndó dǒho-yu núú méé núú ñá-ndó ndihí-yu cuèndá sǎ ná ndixi cuèchi iní-yu sǎ ñá túú quide váha-yu. Te núu ní tní-yu tnúhu ní xáha<sup>n</sup>-ndo xii-yu, te ní ndacu-ndo ní nacanu ichi-ndó-yu.

<sup>16</sup> Te núu ñá túú ní cuíní-yu tní-yu tnúhu xáha<sup>n</sup>-ndo xii-yu, te nducu-ndo ñá àdi úú tnàhá cue téé canehe núu-güedé cuèndá cundedóho-güedé nàcuáa nduu tnúhu ndàtnúhu-ndo ndihí-yu.

<sup>17</sup> Te tnàhá cue téé-á<sup>n</sup> càhá<sup>n</sup>-güedé dǒho-yu, dico núu ni tnúhu càhá<sup>n</sup> cue téé-á<sup>n</sup> ñá túú ní cuíní-yu tní-yu, te dàtúu-ndo núú dàva-gá ñáyiu ndècu ndihi-ndo ichi Xítóhó Jesucristú cuèndá cutnùní iní-yu nàcuáa quide ñáyiu-á<sup>n</sup>. Te núu ñáyiu ndècuéchi-á<sup>n</sup> ñá túú ní cuíní-yu tní-yu tnúhu sǎ ní xáha<sup>n</sup> dàva-gá cue ñáyiu ndècu ichi-gá, te cada-ná iní-ndó sǎ cúú-yu ñáyiu ñá túú ndècu ichi Yá Ndiǒxí dàtná cue téé cuihna iní-xi quide cobrá ñáhá xii ñáyiu cuèndá impuèstú.

<sup>18</sup> Te na càchí tnúhu ndáá-í xii-ndo sǎ núu nchòhó ná càchí-ndó sǎ ndécú cuèchi ñáyiu, te diu-ni duca<sup>n</sup> càhá<sup>n</sup> Yá Ndiǒxí, àdi cachí-ndó sǎ ñá túú cuèchi-yu te diu-ni duca<sup>n</sup> càhá<sup>n</sup> tucu-gá, te duca<sup>n</sup> chi nchòhó quidé-ndó nàcuáa càhá<sup>n</sup>-gá.

<sup>19</sup> Te na càchí tnúhu-í xii-ndo sǎ núu úú tnàhá-ndó cùu ñá nuu-ndo cáhá<sup>n</sup> ndihi-ndo Tǎtá-í Dútú Ndiǒxí Yáá ndécú àndi xicá<sup>n</sup>-ndó núú-gǎ núu ná cúú sǎ cuíní-ndó, te taxi-gá núu ná cúú sǎ xicá<sup>n</sup>-ndó núú-gǎ.

<sup>20</sup> Te núu úú tnàhá-ndó àdi úní tnàhá-ndó ní natacá-ndó ñá xichi cuèndá sǎ ñuhú iní ñáhá-ndó xii-í, te xía<sup>n</sup> ndécú ndihí ñaha-í xii-ndo — càchí-gá xáha<sup>n</sup>-gǎ xii-güedé.

<sup>21</sup> Te té Pèlú ní sáhá<sup>n</sup> ndehe yatni-dé núu Jèsús, te xáha<sup>n</sup>-dě xii-gá:

—Mèstrú, cachí tnúhu xii-í ná daha xito cada cànhu iní-í tnàha ñáyiú-í te núu ì<sup>n</sup> sá ná càda ñahá-yu xii-í. ¿Cuèdicó úsá xito-ǎ<sup>n</sup>? —càchí-dé xǎha<sup>n</sup>-dě xii-gá.

22 Te Jèsús ní xáha<sup>n</sup>-gǎ xii-dé:

—Yúhú càchí-í sá ñà díú-ní úsá xito cada cànhu iní-n-yu, chì únídico úxí xito ndìhì úsá ndìhì úsá xito cada cànhu iní-n-yu —càchí-gá xǎha<sup>n</sup>-gǎ xii-dé.

*Cuèndá téé ñá túú quide cahnú iní tnàha ñáyiú-xi*

23 Te xǎha<sup>n</sup> tùcu-gá xii-güedé:

—Na càni-í ì<sup>n</sup> cuèndú núú-ndó nàcuáa tecú tnùn-í-ndó nàcuáa cada-xi òré ndìhu ndaha ñàha Yá Ndiöxí xii ñáyiú. Ì<sup>n</sup> téé yìndaha ñaha xii ñáyiú ní sani iní-dé sá cáda ndǎá-dé ndìhì cue téé xìnu cuechi núú-dé cuèndá nchaa sá tàú-güedé núú-dě.

24 Te òré sa ní ngúndecu túha-dé te ní quexio ì<sup>n</sup> téé xìnu cuechi núú-dě. Te téé-án tàú-dé cuéhé víhí díhú<sup>n</sup> núú-dě, chì tàú-dé úxí mìl díhú<sup>n</sup> sá nání tàlentú.

25 Te téé xìnu cuechi-án ñà túú díhú<sup>n</sup> ndécú ndìhì-dé nacháhu-dé sá tàú-dé núú patróó<sup>n</sup>-dě-án, núú xǎ<sup>n</sup> ní táuchíú<sup>n</sup> téé cùu patróó<sup>n</sup>-dě-án dico ñàha-güedé xii-dé ndìhì ñadìhí-dé ndìhì cue déhe-dé ndìhì nchaa sá ndécú ndìhì-dé cuèndá ncháa-yu cuú-yu ñáyiú ñá túú tnàhí dàñá quee núú chíú<sup>n</sup> patróó<sup>n</sup>-xi, te duca<sup>n</sup> te ndéyǎhu sá tàú-dé núú patróó<sup>n</sup>-dě.

26 Te téé xìnu cuechi-án ñí ngüíñí xítí-dě núú patróó<sup>n</sup>-dě, te xǎha<sup>n</sup>-dě: “Patróó<sup>n</sup>, càhá<sup>n</sup> ndàhú-í núú-n sǎ ìo ndee ìo cànhu cada iní-n sǎ dúhá tàú-í núú-n, te ñá túú ñá caní iní-n chì nacháhu-í nchaa sá tàú-í núú-n”, càchí-dé xǎha<sup>n</sup>-dě xii patróó<sup>n</sup>-dě.

27 Te téé cùu patróó<sup>n</sup>-dě-án ñí cundàhú iní ñáhá-dě xii-dé, te ní quide cànhu iní ñáhá-dě, te ní dáñá ñàha-dé cuánuhú-dé.

28 Te téé xìnu cuechi-án ñí naníhí-dě ì<sup>n</sup> téé xìnu cuechi ndìhì-dé ichi cuánuhú-dé, te téé ní naníhí-dě-án tàú-dé sacú-ni díhú<sup>n</sup> núú-dě chì ì<sup>n</sup> cièndú-ni díhú<sup>n</sup> denàriú tàú-dé. Te ní tnì-dé téé tàú núú-dě-án dácüèhné

ñáhá-dě xii-dé, te xǎha<sup>n</sup>-dě: “Nacháhu sá tàú-n núú-í”, càchí-dé xǎha<sup>n</sup>-dě.

29 Te téé tàú-án ñí ngüíñí xítí-dě núú téé dii núú-xi tàú-dé-án, te xǎha<sup>n</sup>-dě: “Càhá<sup>n</sup> ndàhú-í núú-n sǎ cáda cànhu iní ñáhá-n xii-í sá tàú-í núú-n, te nacháhu cuèé-ínchaa sá tàú-í núú-n”, càchí-dé xǎha<sup>n</sup>-dě.

30 Dico téé dii núú-xi tàú-dé-án ñà túú ní cuèní-dé cada ndee iní-dé cundetu-dé nacháhu cuèé téé-án sá tàú-dé, chì ní chíhì ñaha-dě vecaá cuèndá yàcá<sup>n</sup> quíhì-dé ndéé nacháhu-dé nchaa sá tàú-dé.

31 Te dava-gá cue téé xìnu cuechi ní xini-güedé nàcuáa ní quide téé-án, te ní cudéé<sup>n</sup>-güedé núú-dě, te ní sáhá<sup>n</sup>-güedé ní xitnùhu-güedé téé cùu patróó<sup>n</sup>-güedé sá dúcá<sup>n</sup> ñí quide-dé.

32 Te téé cùu patróó<sup>n</sup>-güedé-án ñí cana-dé téé duca<sup>n</sup> ñí quide-án, te ní xáha<sup>n</sup>-dě: “Yòhó cúú-n ì<sup>n</sup> téé ìo cuihna ìní-xi xìnu cuechi núú-í, chì yúhú ní quide cànhu iní ñàhà-í xii-n cuèndá nchaa sá tàú-n núú-í òré ní càhá<sup>n</sup> ndàhú-n.

33 Te tnàhá yòhó tàú-n dùca<sup>n</sup> cada-n cada cahnú iní-n téé xìnu cuechi ndìhì-n núú-í cuèndá nchaa sá tàú-dé núú-n dàtná ní quide ñaha-í xii-n ñí quide cànhu iní-í cuèndá nchaa sá tàú-n”, càchí téé cùu patróó<sup>n</sup>-án xǎha<sup>n</sup>-dě xii téé duca<sup>n</sup> ñí quide-án.

34 Te téé cùu patróó<sup>n</sup>-án ñí cudéé<sup>n</sup> víhí-dě sá dúcá<sup>n</sup> ñí quide téé-án, te ní táuchíú<sup>n</sup>-dě dandòho ñaha-güedé xii-dé ndéé nacháhu-dé nchaa sá tàú-dé —duha ní caní Jèsús cuèndú núú-güedé.

35 Te xǎha<sup>n</sup> tùcu-gá xii-güedé:

—Dàtná ní quide téé cùu patróó<sup>n</sup>-án ñí dándóhó-dě téé tàú núú-dě-án duca<sup>n</sup> càda ñaha Tàtá-í Dútú Ndiöxí Yáa ndécú àndìu xii-ndo, te núú vá ní yùhu ni iní-ndó càda cahnú iní-ndó sǎ quidé ñàha tnaha ñáyiú-ndo xii-ndo —cachí-gá xǎha<sup>n</sup>-gǎ xii-güedé.

## 19

*Jèsús càhá<sup>n</sup>-gá cuèndá cue ñáyiú dàña tnaha*

(Mr. 10:1-12; Lc. 16:18)

1 Te sátá ñí yáha duca<sup>n</sup> ñí càhá<sup>n</sup> Jèsús, te ní ndee-gá distritú Galilea

cuáhá<sup>n</sup>-gá ndàa ingá xio yúte Jòrdán yucu distritù Jùdeá.

<sup>2</sup> Te ío cuéhé ñáyiú nchícú<sup>n</sup> ñáhá xii-gá cuáhá<sup>n</sup>, te yàcá<sup>n</sup> ní quide tátna-gá nchaa ñáyiú cùhú.

<sup>3</sup> Te ní quexìo ì<sup>n</sup> úú cue téé cùu fariséú núú ndécú Jèsús xító ndèé ñáhá-güedě xii-gá núu nása cunduu tnúhu cáhá<sup>n</sup>-gá, te xáha<sup>n</sup>-güedě xii-gá:

—Véxi-ndí xicá<sup>n</sup> tnúhú-ndí núú-n, ¿cúu daña ì<sup>n</sup> téé ñadìhí-dé núu ndèdani càa ì<sup>n</sup> sá ñà túú cùndáá-yu-á<sup>n</sup>? —càchí-güedě xáha<sup>n</sup>-güedě xii-gá.

<sup>4</sup> Te Jèsús ní xáha<sup>n</sup>-gá xii-güedé:

—Te nchòhó, ¿náa ñá túú dàcuaha-ndo núú tùtú Yá Ndiòxí, te diu núú tùtú-gá càhá<sup>n</sup>-xi sá cùtnàhá ní cadúha-gá ñáyiú, te téé ñadìhí ní cadúha-gá-á<sup>n</sup>?

<sup>5</sup> Te duha càchí tucu-xi núú tùtú Yá Ndiòxí nàcuáa ní cáhá<sup>n</sup>-gá: “Cue téé na ñihí ñadìhí-xi te dè<sup>n</sup>-ná cada-güedé tátá-güedě ndihí ñaná-güedě, chi ñadìhí-ñá-güedé cuu cuu ndihí-güedé, te cada iní-ndó sá ì<sup>n</sup>-ná yiqui cùñú cúu-yu cundecú-yu”, duha càchí Yá Ndiòxí núú tùtú-gá.

<sup>6</sup> Te xíá<sup>n</sup> núu cada iní-ndó sá cué ñáyiú úú-á<sup>n</sup> ì<sup>n</sup>-ná yiqui cùñú cúu-yu, te ñá túú-gá ndí dè<sup>n</sup> ndí dè<sup>n</sup> yiqui cùñú cúu-yu. Núu xíá<sup>n</sup> ñá túú nduu váha-xi daña cué téé ñadìhí-güedé, chi mee Yá Ndiòxí ní cachí-gá sá cúú úú-yu cundecú-yu —càchí Jèsús xáha<sup>n</sup>-gá xii-güedé.

<sup>7</sup> Te ní xáha<sup>n</sup>-güedě xii Jèsús:

—Te núu duca<sup>n</sup>, ¿te ná cuendá ndí Moisés ní cachí ndí sá núu ì<sup>n</sup> téé cuiní-dé daña-dě ñadìhí-dé, te cuu cadúha-dé ì<sup>n</sup> tutú núú càhá<sup>n</sup>-xi sá ní dáña-dě ñadìhí-dé, te duca<sup>n</sup> te cuu daña ñàha-dé ní cachí ndí vā<sup>n</sup>? —càchí-güedě xáha<sup>n</sup>-güedě xii-gá.

<sup>8</sup> Te Jèsús ní xáha<sup>n</sup>-gá xii-güedé:

—Te duca<sup>n</sup> ní cachí ndí Moisés sá cúú dàña-ndo ñadìhí-ndó, chi nchòhó ío sáa iní-ndó, dico ndéé díhna chi ní tecú tnúhu nchaa cue téé sá vā dáña-güedě ñadìhí-güedé.

<sup>9</sup> Dico yúhú càchí tnúhu-í xii-ndo sá núu ì<sup>n</sup> téé na dàña-dé ñadìhí-dé te naquehe<sup>n</sup>-dé ingá ñadìhí te ío nèhé

quidé-dě, te núu ñá díú cuendá sá càhá<sup>n</sup> ndihí-a<sup>n</sup> ingá téé duca<sup>n</sup> na dàña ñàha-dé. Te sá dúcá<sup>n</sup> cuendá-ni na dàña ì<sup>n</sup> téé ñadìhí-dé, te ì<sup>n</sup>-ni cuèchi cùu-xi ndihí cuèchi quide téé ndèca ñadìhí te càhá<sup>n</sup> ndihí-dé ingá ñadìhí —càchí-gá xáha<sup>n</sup>-gá xii-güedé.

<sup>10</sup> Te cue téé xica cuu ndihí-gá ní xáha<sup>n</sup>-güedě xii-gá:

—Te núu duca<sup>n</sup> cùu cuendá cue téé ndihí ñadìhí-güedé, te váha-gá sá vā cándèca cue téé ñadìhí —càchí-güedě xáha<sup>n</sup>-güedě xii-gá.

<sup>11</sup> Te Jèsús ní xáha<sup>n</sup>-gá xii-güedé:

—Ñá ncháá ñáyiú duca<sup>n</sup> nduu táhú-yu cundecú-yu, chi mee-ni ñáyiú ní cachí Yá Ndiòxí sá dúcá<sup>n</sup> tnàhí nduu táhú cundecu mee.

<sup>12</sup> Te ío cue téé duca<sup>n</sup> tnàhí ní nduu táhú-güedě ndéé òré ní cacu-güedé sá vā cándèca-güedé ñadìhí. Te ío cue téé ñá ndácú-güedé candeca-güedé ñadìhí cuendá sá ní quide ñàha dàva-gá cue tnàha téé-güedé xii-güedé. Te dava-güedé ñá túú cāndeca-güedé ñadìhí chi cuiní-güedé sá vā dáña ndéé-güedé cunu cuechi-güedé núú Yá Ndiòxí. Te nchaa cue téé duca<sup>n</sup> ní nduu táhú núú Yá Ndiòxí cundecu mee, te váha-ni te núu na cundecu mee-güedé —càchí-gá xáha<sup>n</sup>-gá xii-güedé.

*Jèsús xicá<sup>n</sup> táhú-gá núú Yá Ndiòxí cuendá landú*

*(Mr. 10:13-16; Lc. 18:15-17)*

<sup>13</sup> Te ì<sup>n</sup> úú ñáyiú ndècá-yu landú lìhli cuáhá<sup>n</sup> núú Jèsús, chi cuiní-yu sá téndàha ñàha-gá xii-güexi, te cacá<sup>n</sup> táhú-gá núú Yá Ndiòxí cuendá-güexi. Te cue téé xica cuu ndihí-gá ní ngúita-güedé ténàá ñáhá-güedě xii-yu, te xáha<sup>n</sup>-güedě sá vā dúcá<sup>n</sup> càdà-yu.

<sup>14</sup> Te Jèsús ní xáha<sup>n</sup>-gá xii-güedé:

—Chí dáña ná quixi nahi cue landú lìhli-á<sup>n</sup> núu-í-a, te vā càdí-ndó ìchi-güexi, chi dàtná cúú vāha iní cue landú lìhli-á<sup>n</sup> duca<sup>n</sup> cùu váha iní cue ñáyiú yindaha ñàha Yá Ndiòxí —càchí-gá xáha<sup>n</sup>-gá xii-güedé.



15 Te ní tendaha ñàha-gá xii-güexi, te ní xicá<sup>n</sup> táhú-gă núú Yă Ndiöxí cuendá-güexi, te sátá dúcá<sup>n</sup> nǐ quide-gá te ní xica-gá cuáhá<sup>n</sup>-gá.

*Ë<sup>n</sup> téé cuica càhá<sup>n</sup> ndihí-dé Jèsús  
(Mr. 10:17-31; Lc. 18:18-30)*

16 Te ì<sup>n</sup> téé cuechi nǐ quexìo-dé núú ndécú Jèsús, te xicá<sup>n</sup> tnúhú-dě núú-gă, te xàha<sup>n</sup>-dě xii-gá:

—Yòhó Mèstrú, cùu-n téé ío váha iní-xì, te cuíní-í nǔu vá cündée iní-n cächí tnúhu-n nă cúú sǎ váha cada-í cuendá nduu táhú-í cundecu-í ndihí Yá Ndiöxí nǐ caa nǐ quíhí<sup>n</sup> —cächí-dé xàha<sup>n</sup>-dě xii-gá.

17 Te Jèsús ní xàha<sup>n</sup>-gă xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n sǎ yǔhú váha iní-ǎ<sup>n</sup>?, chi ì<sup>n</sup>ndí dǐí-ní Yá Ndiöxí ío váha iní-gá. Te núu cuíní-n nàníhí táhú-n te tni<sup>n</sup>-n nchàa tnúhu càhá<sup>n</sup> Yă Ndiöxí, tnúhu sǎ sánú ìchi ñàha xii ñáyíu nàcuáa cada-yu cundecu-yu —cächí-gá xàha<sup>n</sup>-gă xii-dé.

18 Te téé cuechi-ǎ<sup>n</sup> ní xàha<sup>n</sup>-dě xii-gá:

—¿Te ndëndida càa tnúhu càhá<sup>n</sup> Yă Ndiöxí cada-í-í? —cächí-dé xàha<sup>n</sup>-dě xii-gá.

Te Jèsús ní xàha<sup>n</sup>-gă xii-dé:

—Te duha ní cachí Yă Ndiöxí cada ñáyíu: “Vá cáhni-ndó tnàha ñáyíu-ndo, vá càhá<sup>n</sup> ndihí-ndo ñàdihí te núu ñá díú ñàdihí-ndó cùú-yu, te duca<sup>n</sup>-ni nchòhó cue ñáyíu dǐhí tucu vá càhá<sup>n</sup> ndihí-ndo tée te núu ñá díú yǐ<sup>n</sup>-ndo cuu-güedé, te vá dúhú-ndó sǎ ndécú ndihí tnàha ñáyíu-ndo, vá dácàcu-ndo cuéchi neñùú sǎ cúú-xí tnàha ñáyíu-ndo.

19 Te canehe-ndo sǎ yǐñùhu núú tātá-ndó ndihí núú nǎná-ndó, te cundàhú iní-ndó tnàha ñáyíu-ndo dàtná cündàhú iní-ndó mèe-ndo”, duha ní cachí Yă Ndiöxí cada ñáyíu —cächí-gá xàha<sup>n</sup>-gă xii-dé.

20 Te téé cuechi-ǎ<sup>n</sup> ní xàha<sup>n</sup>-dě xii-gá:

—Nchaa xǐǎ<sup>n</sup> ní ngüíta-í quidè-í ndéé cùtnàhá cúú làndú-í, ¿te vitna nágá cúmǎní cada-í-í? —cächí-dé xàha<sup>n</sup>-dě xii-gá.

21 Te Jèsús ní xàha<sup>n</sup>-gă xii-dé:

—Te núu cuíní-n cùu-n ì<sup>n</sup> téé ío váha cada ndáá, te cuáhá<sup>n</sup> dico-n nchàa sǎ ndécú ndihí-n, te dǐhú<sup>n</sup>-n cuàha táhú-n cuè ñáyíu ndàhú, te duca<sup>n</sup> te nduu táhú-n ngündecu váha-n nǔú ndécú Yă Ndiöxí táxí tnúní-gá. Te sátá ná yàha duca<sup>n</sup> càda-n te quixi-n chìtnahá ñàhá-n xii-í —cächí-gá xàha<sup>n</sup>-gă xii-dé.

22 Te sǎ dúcá<sup>n</sup> nǐ xàha<sup>n</sup> Jèsús xii-dé te ío ní cundǐyí-dé, chi ío cuica-dě, te ní xica-dé cuáhá<sup>n</sup>-dé.

23 Te Jèsús ní xàha<sup>n</sup>-gă xii cue téé xica cuu ndihí-gá:

—Na cächí tnúhu ndáá-í xii-ndo sǎ ìo úhú quíndáá iní ñàha cuè ñáyíu cuica xii Yá Ndiöxí cuendá ndǐhu ndaha ñàha-gá xii-yu.

24 Te na cächí tnúhu tucu-í xii-ndo sǎ yáchí-gá yàha ì<sup>n</sup> càméyu yaú ì<sup>n</sup> yǐqui tìcú dácúúxí sǎ quíndáá iní ì<sup>n</sup> ñáyíu cuica Yă Ndiöxí cuendá ndǐhu ndaha ñàha-gá xii-yu —cächí-gá xàha<sup>n</sup>-gă xii-güedé.

25 Te sǎ dúcá<sup>n</sup> nǐ càhá<sup>n</sup> Jèsús, xǐǎ<sup>n</sup> ío ní cuñúhu cue téé xica cuu ndihí-gá, te ní ngüíta-güedé xǐtnàha-güedé:

—¿Yoo naníhí táhú te núu duca<sup>n</sup> vai<sup>n</sup>? —cächí-güedé xǐtnàha-güedé.

26 Te Jèsús ní ndacoto-gá núú-güedé, te xàha<sup>n</sup>-gă xii-güedé:

—Nchaa ñáyíu ñuyúú-a chi vá ndácü-yu ná cada-yu nàcuáa ndǐhu ndaha ñàha Yá Ndiöxí xii-yu, dico mee-gă chi ndacu-gá ndǐhu ndaha ñàha-gá xii-yu chi nchaandi túhú sǎ váha ndàcu-gá quidé-gă —cächí-gá xàha<sup>n</sup>-gă xii-güedé.

27 Te té Pèlú ní xàha<sup>n</sup>-dě xii-gá:

—Nchúhú ní dándõo-ndí nchaa sǎ ndécú ndihí-ndí, te ní tuha ñàha-ndǐ xii-n, ¿te ná cúú sǎ nihí-ndí nduu táhú-ndǐ sǎ dúcá<sup>n</sup> nǐ quide-ndí-í? —cächí-dé xàha<sup>n</sup>-dě xii-gá.

28 Te Jèsús ní xàha<sup>n</sup>-gă xii-güedé:

—Na cächí tnúhu ndáá-í xii-ndo sǎ ná sǎá nduu, ndùu saa nchaa sǎ ìo andíu ndihí ñuyúú-a, te dàvá-án cunucóo yúhú Téé cùu ñàní tnàhá-ndó nchàa-ndo ì<sup>n</sup> núú xilé váha, te nchaa

ñáyiú quini-yu sá ïo càhnu cuu-í, te nchòhó cue téé ní tuha ñaha xii-í tñàhá-ndó cùnucóo-ndo núú ï<sup>n</sup> caa xilé váha ndi ùxúú tñàhá-ndó, te xiá<sup>n</sup> cùnucóo-ndo càda ndáá-ndó cuèchi ndi ùxúú xichi cue ñáyiú isràél.

29 Te nchaa ñáyiú na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu duca<sup>n</sup> na càdá-yu sá cuèndá-í te ío-gá cuéhé sá cuãñaha Yã Ndiöxí cundecu ndihí-yu, te ñá díú-ní xiá<sup>n</sup> chi tñàhá nduu táhü-yu cundecú-yu ndihi-gá ni caa ni quíhí<sup>n</sup>.

30 Te dava ñáyiú cùnuu ndecu ichi Yá Ndiöxí vitna, ñáyiú-á<sup>n</sup> sáá nduu te vá ïo-gá cunúú-yu dàtná cùnúú-yu vitna, te dava ñáyiú nchícú<sup>n</sup> ñá túú cùnuu vitna, ñáyiú-á<sup>n</sup> sáá nduu te ío cunúú-yu —càchí-gá xáha<sup>n</sup>-gã xii-güedé.

## 20

### *Cuèndá cue téé quide chiu<sup>n</sup>*

1 Te xáha<sup>n</sup> tùcu Jesús xii cue téé xica cuu ndihi-gá:

—Na càni-í ï<sup>n</sup> cuèndú núú-ndó cuèndá tecú tñuní-ndó nàcuáa cada-xi òré ndihu ndaha ñaha Yá Ndiöxí xii ñáyiú. ï<sup>n</sup> téé ní xitu-dé yoho yàha stilé, te ï<sup>n</sup> nduu ní quee-dé nehé-ni cuándúcú-dé cue téé cada chiu<sup>n</sup> núú dúcá<sup>n</sup> ní xitu-dé yoho yàha stilé-á<sup>n</sup>.

2 Te òré ní níhí-dé cue téé cada chiu<sup>n</sup>-á<sup>n</sup>, te ní quide ndáá-dé ndihi-güedé sá chãhu ñaha-dé xii-güedé ï<sup>n</sup> díhú<sup>n</sup> denàriú ï<sup>n</sup> nduu. Te sáta dúcá<sup>n</sup> te ní tendaha ñaha-dé xii-güedé cuáhá<sup>n</sup>-güedé cada chiu<sup>n</sup>-güedé núú dúcá<sup>n</sup> ní xitu-dé yoho yàha stilé-á<sup>n</sup>.

3 Te dàtnúni ní xica tucu-dé cuáhá<sup>n</sup>-dé dàtná òré caá ï<sup>n</sup> dátneé cuándúcú-gã-dé cue téé cada chiu<sup>n</sup> núú ní xitu-dé yoho yàha stilé-á<sup>n</sup>, te ní xiní-dé xĩnutnĩ ï<sup>n</sup> úú cue téé núú yáhu te ñá túú nã chiu<sup>n</sup> xiquide-güedé.

4 Te ní xáha<sup>n</sup>-dè xii-güedé: “Ñá túú cùdana cuyáchí-ndó càda-ndo chiu<sup>n</sup>-í te cháhu ñaha-í xii-ndo nàcuáa tàú-xi cunduu-á<sup>n</sup>”, càchí-dé xáha<sup>n</sup>-dè xii-güedé. Te cue téé-á<sup>n</sup> ní

sáha-güedé tñuhu cada chiu<sup>n</sup>-güedé te ní xica-güedé cuáhá<sup>n</sup>-güedé.

5 Te téé ní xitu yoho yàha stilé-á<sup>n</sup> ní xica tucu-dé dàtná òré caúxúú nduu cuándúcú-gã-dé cue téé cada chiu<sup>n</sup>-dé, te ní níhí tucu-dé cue téé cada chiu<sup>n</sup>. Te ní quee tucu-dé dàtná òré caá úní sacuaa, te ñu-ni duca<sup>n</sup> ní quide tucu-dé.

6 Te ní quee tucu-dé dàtná òré caá úhú<sup>n</sup> sacuaa cuándúcú-gã-dé cue téé cada chiu<sup>n</sup>-dé, te ní xiní-dé xĩnutnĩ ï<sup>n</sup> úú cue téé ñu-ni núú yáhu-á<sup>n</sup> te ñá túú nã chiu<sup>n</sup> quide-güedé, te ní xáha<sup>n</sup>-dè xii-güedé: “Sànuu sá nchòhó ní cuu nchàca vitna ñá túú ñihí-ndó chiu<sup>n</sup> cada-ndo”, càchí-dé xáha<sup>n</sup>-dè xii-güedé.

7 Te cue téé-á<sup>n</sup> ní xáha<sup>n</sup>-güedé xii-dé: “Ñá túú ñihí-ndí chiu<sup>n</sup> cada-ndí chi vá yõo ndücu ñaha xii-ndí”, càchí-güedé xáha<sup>n</sup>-güedé xii-dé. Te ní xáha<sup>n</sup>-dè xii-güedé: “Yúhú taxi-í chiu<sup>n</sup> cada-ndo, te quíhí<sup>n</sup>-ndó núú ní xitu-í yoho yàha stilé yacá<sup>n</sup> cada chiu<sup>n</sup>-ndo, te cháhu ñaha-í xii-ndo nàcuáa tàú-xi cunduu”, càchí-dé xáha<sup>n</sup>-dè xii-güedé.

8 Te sáta ní dáhu nchícanchii, te téé dii chiu<sup>n</sup>-xi-á<sup>n</sup> ní xáha<sup>n</sup>-dè xii téé tàxi tñuní ñáhá xii cue téé quide chiu<sup>n</sup>-á<sup>n</sup>: “Cúñaha xii nchaa cue téé quide chiu<sup>n</sup>-á<sup>n</sup> ná quixí-güedé te cháhu-n-güedé, te díhna-gá cue téé nchícú<sup>n</sup> cuí-nã cuánguihu núú chíú<sup>n</sup> ngüita-n chãhu-n, te ndéé núú ní ndihi-ná cháhu-n cuè téé cuánguihu díhna nuu-gã núú chíú<sup>n</sup>”, càchí-dé xáha<sup>n</sup>-dè xii téé tàxi tñuní ñáhá xii cue téé quide chiu<sup>n</sup>-á<sup>n</sup>.

9 Te díhna-gá cue téé cuánguihu caá úhú<sup>n</sup> sacuaa ní quexio-güedé cuèndá cháhu ñaha-dé, te ní cháhu ñaha-dé ï<sup>n</sup> caa díhú<sup>n</sup> denàriú xii ï<sup>n</sup> ï<sup>n</sup>-güedé.

10 Te sáta ní cháhu-dé dava-gá cue téé ní quide chiu<sup>n</sup>. Te ndéé núú ní ndihi-ná ní cháhu-dé cue téé cuánguihu díhna nuu-gã núú chíú<sup>n</sup>. Te cue téé-á<sup>n</sup> ní sani iní-güedé sá vái-gã cháhu ñaha-dé xii-güedé, dico ñáhá chi ï<sup>n</sup> caa-ni díhú<sup>n</sup> denàriú ní cháhu ñaha-dé xii ï<sup>n</sup> ï<sup>n</sup>-güedé.

11 Te cue téé-á<sup>n</sup> ní quehe<sup>n</sup> cuèndá-güedé díhú<sup>n</sup>-güedé dico ñá túú

ní quide váha-xi iní-güedé.

<sup>12</sup> Te ní xáha<sup>n</sup>-güedě xii téé dii chiú<sup>n</sup>-xi ní quide-güedé: “¿Ná cuendá cue téé nchícú<sup>n</sup> cuií-nă cuánguihu núú chíú<sup>n</sup> ñ<sup>n</sup>-ni ní cháhu ñaha-n xii-ndí ndihí-güedé, te ñ<sup>n</sup>-dii oré duha ní quide chiú<sup>n</sup>-güedé? Te nchúhú nchàca nchaa ní sahani iní-ndí ní quide chiú<sup>n</sup>-ndí, te ní ndoho-ndí cahni, te ñ<sup>n</sup>-ni ní cháhu ñaha-n xii-ndí ndihí-güedé”, cächí-güedé xáha<sup>n</sup>-güedě xii téé dii chiú<sup>n</sup>-xi ní quide-güedé.

<sup>13</sup> Te téé dii chiú<sup>n</sup>-xi ní quide-güedé-á<sup>n</sup> ní xáha<sup>n</sup>-dě xii ñ<sup>n</sup> téé-á<sup>n</sup>: “Yòhó, ñá túú quide-í ñ<sup>n</sup> sá ñà túú tàú-í cada-í sá cúú-xí-n, chi ní quide ndáá-ó sá díú-ní ñ<sup>n</sup> díhú<sup>n</sup> denàriú cháhu ñaha-í xii-n ñ<sup>n</sup> nduu.

<sup>14</sup> Te vitna quehe<sup>n</sup> díhú<sup>n</sup> cuendá nduu-n te núhú-n, chi yúhú cuení-í sá ñ<sup>n</sup>-ní cháhu ñaha-í xii-n ndihí cue téé nchícú<sup>n</sup> cuií-nă cuánguihu núú chíú<sup>n</sup>.

<sup>15</sup> Chi yúhú cuu-ni cada-í nani cuení-í ndihí díhú<sup>n</sup>-í, ¿adi dico ñá túú quide váha-xi iní-n sá dúhá cùndahú iní-í cue téé-á<sup>n</sup> duca<sup>n</sup> cháhu-í-güedé?”, cächí téé cùu patróó<sup>n</sup>-á<sup>n</sup> xáha<sup>n</sup>-dě xii téé-á<sup>n</sup>. Duha nduu cuendú caní-í núú-ndó.

<sup>16</sup> Te duha càhá<sup>n</sup>-í chi dava ñáyiú cùnuu ndecu ichi Yá Ndióxi vitna sáá nduu te vá cùnùu vihi-gá-yu dàtná cùnùu-yu vitna, te dava ñáyiú ñá túú cùnuu vitna sáá nduu ío cùnùu-yu. Te ío cuéhé ñáyiú càhá<sup>n</sup> ñáhá Yá Ndióxi xii-yu dico sacú-ni-yu nduu táhú-yu cundecú-yu ndihí-gá – cächí-gá xáha<sup>n</sup>-gă xii-güedé.

*Jèsús càhá<sup>n</sup> tucu-gá sá cáhni ñàha-güedé xii-gá*

*(Mr. 10:32-34; Lc. 18:31-34)*

<sup>17</sup> Te ñùhu Jèsús ichi cuásaá-gá ñúú Jerusalén ndihí cue téé xica cuu ndihí-gá, te ní cana ñaha-gă xii-güedé ní naníhí tnáhá-güedě ndihí-gá, te ta ndàtnúhu ndihí ñaha-gă xii-güedé cuáhá<sup>n</sup>, te xáha<sup>n</sup>-gă xii-güedé:

<sup>18</sup> –Vitna ñùhu-o ichi cuásaá-ó ñúú Jerusalén, te yacá<sup>n</sup> cuáha cuendá ñáhá-güedě xii yúhú Téé cùu ñani tnáhá-ndó nchàa-ndo núú cuè téé cùu

dútú cùnùu, ndihí núú cuè téé dàcuaha ñaha xii ñáyiú nchaa tnúhu ní chídó tnùní ndíi Moisés. Te diu cue téé-á<sup>n</sup> cùñaha-güedě xii dava-gá cue téé sá cáhni ñàha-güedé xii-í.

<sup>19</sup> Te cuáha cuendá ñáhá-güedě xii-í núú cuè téé ñá túú cùu cue téé israhél, te cue téé-á<sup>n</sup> cudíquí ndeé ñáhá-güedě xii-í, te caniha-güedě ndihí ñ<sup>n</sup>, te dàtnúni cata caa ñaha-güedě xii-í núú cùrúxí te núú cùrúxí-á<sup>n</sup> cuú-í, dico nduu úní sá cùú-í te ndoto-í –cächí-gá xáha<sup>n</sup>-gă xii-güedé.

*Năná tē Jàcobó ndihí té Juàá cuení-a<sup>n</sup> sá cùnùu-güedé ndihí Jèsús*

*(Mr. 10:35-45)*

<sup>20</sup> Te cue déhe té Zebèdeú té Jàcobó ndihí té Juàá ndécá ñaha náná-güedě xii-güedé cuáhá<sup>n</sup> núú ndécú Jèsús, te òré ní quexìo-a<sup>n</sup> ndihí-güedé núú ndécú-gă te ní ngüíñí xití-á<sup>n</sup> nùú-gă cuendá cuení-a<sup>n</sup> ndàtnúhu ndihí ñaha-a<sup>n</sup> xii-gá cuendá sá cúú-xí cuè déhe-a<sup>n</sup>.

<sup>21</sup> Te cùmání-gă cáhá<sup>n</sup>-a<sup>n</sup> te ní xicá<sup>n</sup> tnúhú Jèsús núú-a<sup>n</sup>, te xáha<sup>n</sup>-gă:

–¿Ná cuení-n? –cächí-gá xáha<sup>n</sup>-gă xii-a<sup>n</sup>.

Te ní xáha<sup>n</sup>-a<sup>n</sup> xii-gá:

–Véxi-í càhá<sup>n</sup> ndáhú-í núú-n nùu vá cùndèe iní-n cùnucóo ñ<sup>n</sup> déhe-í-a xio cùha-n, te ingá-dé cùnucóo-dé xio dàtni-n na saá nduu cùnucóo-n nùú táxí tnùní-n –cächí-á<sup>n</sup> xáha<sup>n</sup>-a<sup>n</sup> xii-gá.

<sup>22</sup> Te Jèsús ní xáha<sup>n</sup>-gă xii úú cue téé-á<sup>n</sup>:

–Nchòhó, ñá túú cùtnuní váha iní-ndó nàcuáa nduu sá xicá<sup>n</sup>-ndó nùú-í. ¿Te náa cundee iní-ndó dàndoho ñaha ñáyiú xii-ndo dàtná dandòho ñahá-yu xii-í, te cundee tucu iní-ndó càhni ñahá-yu xii-ndo dàtná cahni ñahá-yu xii-í-á<sup>n</sup>? –cächí-gá xáha<sup>n</sup>-gă xii-güedé.

Te ní xáha<sup>n</sup>-güedě xii-gá:

–Cundee iní-ndí yáha-ndí nchaa nàcuáa càhá<sup>n</sup>-n-á<sup>n</sup> –cächí-güedé xáha<sup>n</sup>-güedě xii-gá.

<sup>23</sup> Te Jèsús ní xáha<sup>n</sup>-gă xii-güedé:

–Ndáá sá cùndèe iní-ndó ndòho-ndo nchaa nàcuáa ndòho-í, dico sá dúcá<sup>n</sup> cuení-ndó sá ñ<sup>n</sup>-ndó cùnucóo-ndo xio cuhá-í, te ñ<sup>n</sup>-ndo cùnucóo-ndo xio

datni-í, te xíã<sup>n</sup> chi ñá díú yǔhú tàú-í cachí-í nǔu sá cúu cùnucóo-ndo àdi sá vǎ cúu cùnucóo-ndo, chi mee Tǎtà-í Dútú Ndiõxí cachí-gá te núu ná cúu ñǎyiu nduu táhú cunucóo ñíñi-í ðává-á<sup>n</sup> —càchí-gá xǎha<sup>n</sup>-gǎ xii-güedé.

<sup>24</sup> Te òré ní níhí ùxí-gá cue téé xica cuu ndihi-gá tnúhu nàcuáa ndúu sá cuení cue téé úú-á<sup>n</sup>, te ní cudéé<sup>n</sup>-güedé núu cuè téé úú-á<sup>n</sup>.

<sup>25</sup> Te Jèsús ní cana-gá nchaa cue téé xica cuu ndihi-gá, te ní xáha<sup>n</sup>-gǎ xii-güedé:

—Nchòhó xini-ndó sǎ cuè téé yìndaha nació<sup>n</sup> quidé-güedé sá ìo cùnuu-güedé, te nchaa dava-gá cue téé cùnuu ndihi-güedé quidé-güedé tnàhá-güedé sá ìo cùnuu-güedé.

<sup>26</sup> Dico nchòhó chí vá dúcá<sup>n</sup> càda-ndo, chí núu dava-ndo cuení-ndó cùnuu-ndo, te xini ñuhu-xi cunu cuechi núu tnàhá-ndó te vá cáda-ndó sǎ cùnùu-ndo.

<sup>27</sup> Te núu dava-ndo cuení-ndó quène cáva-ndo, te cuu-ndo dàtná cue ñáyiu ñá túú tnàhí dàñá quee núu chíú<sup>n</sup> pàtróo<sup>n</sup>-xi cunu cuechi nǔu tnàhá-ndó.

<sup>28</sup> Te cada-ndo dàtná quidé yǔhú Téé cùu ñaní tnàhá-ndó nchaa-ndo, chí yǔhú véxi-í ñuyíú-a dico ñá díú sǎ cúnú cuèchi ñáyiu núu-í chí véxi-í sǎ cúnú cuèchi-í nǔǔ-yu. Te cuú-í ñuyíú-a cuèndá vǎi-yu cácu nihnú-yu núu ùhú núu ndàhú —càchí-gá xǎha<sup>n</sup>-gǎ xii-güedé.

*Jèsús quidé tǎtna-gá núu úú tnàhá cue téé cuáá*

(Mr. 10:46-52; Lc. 18:35-43)

<sup>29</sup> Te òré ní quee Jèsús ñuú Jericó ndihi cue téé xica cuu ndihi-gá, te cuéhé víhí ñáyiu nchícú<sup>n</sup> ñáhá xii-gá cuáhá<sup>n</sup>.

<sup>30</sup> Te yuhu ìchi cuáhá<sup>n</sup>-gá xñucóo úú tnàhá cue téé cuáá, te cue téé-á<sup>n</sup> ñí cutnùní iní-güedé sá Jèsús ñúhú-gǎ ichi-á<sup>n</sup> te ní ngúíta-güedé níhi càhá<sup>n</sup>-güedé, te xǎha<sup>n</sup>-güedé xii-gá:

—Yòhó Mèstrú, ñaní tnàhá ndíi Dàvíí, cundàhú iní ñáhá xii-ndí! —càchí-güedé xǎha<sup>n</sup>-güedé xii-gá.

<sup>31</sup> Te cue ñáyiu tènáá ñáhá-yu xii-güedé, te xǎhá<sup>n</sup>-yu sá ná

càdí-güedé yuhu-güedé, dico uu<sup>n</sup>-gá níhi ní cáhá<sup>n</sup>-güedé, te xǎha<sup>n</sup>-güedé xii-gá:

—Yòhó Mèstrú, ñaní tnàhá ndíi Dàvíí, cundàhú iní ñáhá xii-ndí! —càchí-güedé xǎha<sup>n</sup>-güedé xii-gá.

<sup>32</sup> Te ní ngúíñí Jèsús te ní cana ñaha-gǎ xii-güedé, te ní xicá<sup>n</sup> tnúhú-gǎ núu-güedé, te xǎha<sup>n</sup>-gǎ:

—¿Ná cuení-ndó càda ñaha-í xii-ndo-i? —càchí-gá xǎha<sup>n</sup>-gǎ xii-güedé.

<sup>33</sup> Te ní xáha<sup>n</sup>-güedé xii-gá:

—Mèstrú, cuení-ndí sá cáda tǎtna-n nǔú-ndí cuèndá cundehe-ndí —càchí-güedé xǎha<sup>n</sup>-güedé xii-gá.

<sup>34</sup> Te Jèsús ní cundàhú iní ñáhá-gǎ xii-güedé, te ní tendaha-gǎ núu-güedé. Te òré-ni ní ndúha núu-güedé, te nchícú<sup>n</sup> ñáhá-güedé xii-gá cuáhá<sup>n</sup>.

## 21

*Jèsús cuánguihu-gá ñuú Jerusàlén*  
(Mr. 11:1-11; Lc. 19:28-40; Jn. 12:12-19)

<sup>1</sup> Te òré sa ta cùyatni Jèsús ndihi cue téé xica cuu ndihi-gá ñuú Jerusàlén, te ní quexìo-gá ndihi-güedé yatni víi-nǎ ñuú Bèttagé, te xíá<sup>n</sup> cáá yùcu nani Olívú. Te ní ndatnúhu-gá ndihi úú cue téé xica cuu ndihi-gá,

<sup>2</sup> te ní xáha<sup>n</sup>-gǎ xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te nanihí-ndó ñí búrru ñíhí ndètníi-di ndihi déhe-di, te nandaxi-ndo-güèdi te candeca-ndo-güèdi quixi.

<sup>3</sup> Te núu ìo ñáyiu dàdaha<sup>n</sup> ñaha xii-güedi, te cúñaha-ndo xii-yu sá yǔhú Yaá xicá cùu ndihi-ndo xini ñuhu-í-güedi, te ndíhi-ni naten-daha-í-güedi núhú-güedi cúñaha-ndo —càchí-gá xǎha<sup>n</sup>-gǎ xii-güedé.

<sup>4</sup> Te duca<sup>n</sup> ñí cuu chí ní quee ndáá-xi nàcuáa ní chídó tnùní ñí téé ní xóo cáhá<sup>n</sup> tnúhu Yá Ndiõxí ndéé sanaha núu tütú-gá núu càchí-xi:

<sup>5</sup> Chí cúñaha cuè ñáyiu ñuú Sión ná cáda cuèndá-yu, chí véxi téé yìndaha ñaha xii-yu yòdo-dé ñí

bǔrru líhli déhe ì<sup>n</sup> bǔrru quiti sa xido,

te cùu-dé ì<sup>n</sup> téé ío ndàhú iní-xi.  
Duha ní chídó tñùnì ì<sup>n</sup> téé ní xóo cáhá<sup>n</sup>  
tñúhu Yá Ndiǒxí ndéé sanaha nǔú  
tùtú-gá.

<sup>6</sup> Te cue téé xica cuu ndihi-gá  
ní xica-güedé cuáhá<sup>n</sup>-güedé, te ní  
quide-güedé nàcuáa ní xáha<sup>n</sup>-gǎ  
xii-güedé cada-güedé.

<sup>7</sup> Te ní ndexìo-güedé ndécá-güedé ì<sup>n</sup>  
bǔrru dìhí ndihi déhe-di, te ní sacá<sup>n</sup>  
ndodo-güedé dóo-güedé sátá-güedi, te  
dǎtñùnì cuásaá Jèsús sátá ì<sup>n</sup>-di ní  
ngódó ñaha-gá xii-di.

<sup>8</sup> Te ío cuéhé ñǎyiu ta sàcá<sup>n</sup>-yu  
dóo-yu ichi cuáhá<sup>n</sup>-gá cuendá núú  
dóo-yu-á<sup>n</sup> yáha-gá ndihi quiti yòdo-gá.  
Te davá-yu xèhndé-yu ndaha yùtnu  
ñúú tá sàcá<sup>n</sup>-yu cuáhá<sup>n</sup>.

<sup>9</sup> Te nchaa ñǎyiu yòdonuu núú-gǎ  
ndihi nchaa ñǎyiu nchìcú<sup>n</sup> ndàa  
sátá-gǎ ní ngüíta-yu níhi càhá<sup>n</sup>-yu, te  
càchí-yu:

—Ío càhnu cuu Yaá cúú ñàní tnáhá  
ndii Dàvií! ;Te Yá Ndiǒxí ío na chindee  
ñaha-gá chí cùu-gá Yaá ní tendaha Yá  
Ndiǒxí véxi quide núú-gǎ! ;Te ndéé  
nchaa sá ío andi na càchí-xi sá ío  
càhnu cuu-gá! —duha càchí-yu.

<sup>10</sup> Te òré cuánguihu Jèsús ñúú  
Jerusalén, te nchaa ñǎyiu ñúú-á<sup>n</sup> ní  
ngüíta-yu xícuáa-yu, te davá-yu ní  
ngüíta-yu xitnàhá-yu:

—¿Yoo cùu téé-á<sup>n</sup>? —càchí-yu  
xitnàhá-yu.

<sup>11</sup> Te davá-yu xitnàhá-yu:

—Téé-á<sup>n</sup> cúú-dé Jèsús téé càhá<sup>n</sup>  
tñúhu Yá Ndiǒxí, te cùu-dé téé ñúú  
Nazàrét ñúú yíndèhu distritú Galileá  
—càchí-yu xitnàhá-yu.

*Jèsús ñá túú tnáhá iní-gá nàcuáa  
xíquide ñǎyiu xití veñúhu*

*(Mr. 11:15-19; Lc. 19:45-48; Jn.  
2:13-22)*

<sup>12</sup> Te Jèsús cuánguihu-gá xití veñúhu  
càhnu sá ío cùnuu, te xití veñúhu-á<sup>n</sup>  
xíndecu ñǎyiu quide ndáhu nádìcò-yu,  
ndihi ñǎyiu xísaa<sup>n</sup>, te ncháa-yu ní  
queñuhu ñaha Jèsús xii-yu quehé, te  
ní dándùá-gá mèsá nchaa ñǎyiu dàma

díhú<sup>n</sup>, ndihi nchaa xilé sácóo nchihì  
ñǎyiu dìcò lómá xíndecu xití veñúhu-á<sup>n</sup>.

<sup>13</sup> Te ní xáha<sup>n</sup>-gǎ xii-yu:

—Núú tùtú Yá Ndiǒxí càhá<sup>n</sup>-xi  
nàcuáa ní càhá<sup>n</sup>-gá, te ní cachí-gá:  
“Vehe-í cúú-xi nǔú càhá<sup>n</sup> ndihi ñaha  
ñǎyiu xii-í”, duha ní càhá<sup>n</sup>-gá càchí-xi  
núú tùtú-gá. Dico nchòhó quidé-ndó  
vèhe-gá vehe ñadúhú —càchí-gá  
xáha<sup>n</sup>-gǎ xii-yu.

<sup>14</sup> Te xía<sup>n</sup> ndécú Jèsús ní quexìo cue  
téé cuáa ndihi cue téé yacua, te ní  
quide tátna ñaha-gǎ xii-güedé te ní  
ndúha-güedé.

<sup>15</sup> Te cue dútú cùnùu ndihi cue téé  
dàcuaha ñaha xii ñǎyiu nchaa tñúhu ní  
chídó tñùnì ndii Moisés ní xiní-güedé  
ní quide Jèsús sá vǎ yòo tñahí ndàcu  
cada, te ndèdóho tucu-güedé níhi  
xícáhá<sup>n</sup> cue landú xití veñúhu càhnu  
sá ío cùnuu-á<sup>n</sup>, te càchí-güexi: “Ío càhnu  
cuu Yaá cúú ñàní tnáhá ndii Dàvií”,  
càchí-güexi. Te ní cudéé<sup>n</sup>-güedé,

<sup>16</sup> te ní xáha<sup>n</sup>-güedé xii Jèsús:

—¿Ndèdóho-n nàcuáa càhá<sup>n</sup> cue  
landú-á<sup>n</sup> ñǎ? —càchí-güedé xáha<sup>n</sup>-güedé  
xii-gá.

Te Jèsús ní xáha<sup>n</sup>-gǎ xii-güedé:

—Ndèdóho-í, te nchòhó náa ñá túú  
dàcuaha-ndo núú tùtú Yá Ndiǒxí núú  
càhá<sup>n</sup>-xi cuendá cue landú-á<sup>n</sup>, te duha  
càchí-xi:

Yòhó ní quide-n sǎ cuè landú vitna  
sàdi, ndihi cue dava-gá landú,  
chiñuhu ñaha-güexi xii-n nàcuáa tàú-xi  
cunduu.

Duha càchí-xi núú tùtú-gá —càchí-gá  
xáha<sup>n</sup>-gǎ xii-güedé.

<sup>17</sup> Te xía<sup>n</sup> ní dándóo ñaha Jèsús  
xii-güedé, te ní xica-gá cuáhá<sup>n</sup>-gá ñúú  
Bètaniá, yàcá<sup>n</sup> ní xíndecu-gá niú-á<sup>n</sup>.

*Jèsús xáha<sup>n</sup>-gǎ xii yutnu ngüxí sá vǎ  
cúú<sup>n</sup>-gǎ sávidí-xi*

*(Mr. 11:12-14, 20-26)*

<sup>18</sup> Te nduu tnéé-á<sup>n</sup> nehé-ni cuáhá<sup>n</sup>  
tucu Jèsús ñúú Jerusalén, te ichi  
ñùhu-gá ní xihí-gá docó.

<sup>19</sup> Te ní xiní-gá ì<sup>n</sup> yutnu ngüxí  
nútnǎ ì<sup>n</sup> xio yuhu ichi, te ní xica-gá  
cuáhá<sup>n</sup> ndéhé-gǎ nǔu ndèé sávidí-xi,  
dico ñá túú ñǎ ndèé chi mee-ni

ndàha-xi ndeé. Te ní xáha<sup>n</sup>-gã xii yutnu ngǔxí-á<sup>n</sup>:

—¡Vitna te vá ì<sup>n</sup> ndùu-gá cuu<sup>n</sup> sávidí-n! —càchí-gá xǎha<sup>n</sup>-gã xii-xi.

Te òré-ni-á<sup>n</sup> nǐ yíchí yutnu ngǔxí-á<sup>n</sup>.  
20 Te sá dúcá<sup>n</sup> nǐ cuu ní xiní cue téé xíca cuu ndìhi Jesús, te ío ní cuñúhu-güedé, te ní xícá<sup>n</sup> tnúhú-güedé núú-gã, te xǎha<sup>n</sup>-güedé:

—¿Ná cuendá ndeé dàcá<sup>n</sup> ío ndìhi ní yíchí yutnu ngǔxí-á<sup>n</sup>-i? —càchí-güedé xǎha<sup>n</sup>-güedé xii-gá.

21 Te Jèsús ní xáha<sup>n</sup>-gã xii-güedé:

—Na càchí tnúhu ndáá-í xii-ndo sǎ nǔu nchòhó quíndáá ndisa iní-ndó Yǎ Ndiòxí, te vá cání ì<sup>n</sup> caní úú iní-ndó, te ñá díú-ní sǎ nǐ quide-í-a ní xiní-ndó ndàcu-ndo cada-ndo, chi ndeé tíndúú-a xocuíñí-xi núú ndécú-xí te núu cuñaha-ndo sǎ xocuíñí-xi te quíhí<sup>n</sup>-xi quée-xi xití lámár. Te ñu duca<sup>n</sup> càda-xi te núu na quíndáá iní-ndó.

22 Te nchaa sá ná càcá<sup>n</sup>-ndó nǔú Yǎ Ndiòxí òré càhá<sup>n</sup> ndìhi-ndo-gã te taxi-gá te núu sàndáá ndisa iní-ndó sǎ táxí-gá sá xícá<sup>n</sup>-ndó núú-gã —càchí-gá xǎha<sup>n</sup>-gã xii-güedé.

*Jèsús ndécú ndìhi-gá tnúhu ndee iní (Mr. 11:27-33; Lc. 20:1-8)*

23 Te Jèsús cuánguihu-gá xití veñúhu càhnu sá ío cùnūu danehé-gá ñáyiú, te xía<sup>n</sup> ndécú-gã ní quexìo cue dútú cúnūu ndìhi cue téé cùu sacuéhé nǔú ñáyiú isràèl, te xǎha<sup>n</sup>-güedé xii-gá:

—Cuíní-ndí cachí tnúhu-n xii-ndí nása ndùu tnúhu ndee iní ndécú ndìhi-n núu quide-n nándi sá quidé-n, ¿te yoo duca<sup>n</sup> nǐ taxi tnúhu ndee iní-á<sup>n</sup> xii-n-i? —càchí-güedé xǎha<sup>n</sup>-güedé xii-gá.

24 Te Jèsús ní xáha<sup>n</sup>-gã xii-güedé:

—Yúhú tnàhá-í cuíní-í càcá<sup>n</sup> tnúhu-í ì<sup>n</sup> sá càcá<sup>n</sup> tnúhu-í núú-ndó, te núu na càchí tnúhu-ndo te cachí tnúhu-í xii-ndo yòo ní taxi tnúhu ndee iní duha quide-í.

25 Te chí càchí tnúhu xii-í yoo ní táuchíú<sup>n</sup> nǐ dácúándüte ndí Juàá ñáyiú, ¿Yá Ndiòxí á<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndí?, te

chí càchí tnúhu —càchí-gá xǎha<sup>n</sup>-gã xii-güedé.

Te ní ngüíta-güedé xitnàha-güedé:

—¿Nása cúñaha-o? Chi núu na cúñaha-o sǎ Yǎ Ndiòxí ní táuchíú<sup>n</sup> dùca<sup>n</sup> ní quide ndí Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní càhá<sup>n</sup> ndí vǎi<sup>n</sup>?”, quesaha-dé.

26 Te núu na cúñaha-o sǎ cuè ñáyiú ñuyíú-a ní táuchíú<sup>n</sup> dùca<sup>n</sup> ní quide ndí ñá, te cudéé<sup>n</sup> ñáyiú núú-ó, chi ncháá-yu càchí-yu sá Yǎ Ndiòxí ní xáha<sup>n</sup>-gã xii ndí sá càhá<sup>n</sup> ndí tnúhu-gá núú ñáyiú —càchí-güedé xitnàha-güedé.

27 Te ní xáha<sup>n</sup>-güedé xii Jèsús:

—Ñá túú xíní-ndí yoo ní táuchíú<sup>n</sup> dùca<sup>n</sup> ní dácúándüte ndí Juàá ñáyiú —càchí-güedé xǎha<sup>n</sup>-güedé xii-gá.

Te ní xáha<sup>n</sup>-gã xii-güedé:

—Te núu duca<sup>n</sup> te ni yǔhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xǎha<sup>n</sup>-gã xii-güedé.

*Cuendá ì<sup>n</sup> téé ndìhi úú déhe-dé*

28 Te Jèsús ní xáha<sup>n</sup> tucu-gá xii-güedé:

—Na càni-í ì<sup>n</sup> cuendú núú-ndó nàcuáa tecú tnúní-ndó tnúhu càhá<sup>n</sup>-í. ì<sup>n</sup> téé ndècu úú déhe-dé, te ní xáha<sup>n</sup>-dè xii déhe-dé téé sacuéhé-gã: “Yòhó déhe-í, véxi-í càhá<sup>n</sup> ndàhú-í núú-n nǔu vá cündèe iní-n cuánundaha ñaha-n xii-í cada chiu<sup>n</sup>-o núú nǐ xitu-í yoho yàha stilé”, càchí-dé xǎha<sup>n</sup>-dè.

29 Te ní xáha<sup>n</sup> dèhe-dé xii-dé: “Vá quíhí<sup>n</sup>-í cada chiu<sup>n</sup>-í núú chíú<sup>n</sup>-n”, càchí-dé xǎha<sup>n</sup>-dè xii tǎtá-dé. Dico cuéé ní nacani iní-dé te ní sǎhá<sup>n</sup>-dè ní quide chiu<sup>n</sup>-dè núú chíú<sup>n</sup> tǎtá-dé.

30 Te téé-á<sup>n</sup> nǐ sǎhá<sup>n</sup> tucu-dé ní xáha<sup>n</sup>-dè xii déhe-dé té líhli-gá nǔu vá cündèe iní-dé cuánundaha ñaha-dé, te ní xáha<sup>n</sup> dèhe-dé-á<sup>n</sup> xii-dé: “Cuu cuánundaha ñaha-í xii-n”, càchí-dé xǎha<sup>n</sup>-dè. Dico ñá túú ní sǎhá<sup>n</sup>-dè cada chiu<sup>n</sup>-dè.

31 Te vitna chí càhá<sup>n</sup> nǔu ndédacaa cue téé úú-á<sup>n</sup> nǐ quide-güedé sá cuíní tǎtá-güedé —càchí-gá xǎha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Tée cùu sacuéhé-gă, tée ní cáhá<sup>n</sup> ndihí-dé díhna —càchí-güedé xăha<sup>n</sup>-güedě xii-gá.

Te Jèsús ní xăha<sup>n</sup>-gă xii-güedé:

—Na càchí tnúhu ndáá-í xii-ndo să ncháá cuè tée cuihna ìní-xi quide cobrá ñáhá xii ñáyiú cuendá impuèstú, ndihí cue ñáyiú dîhí xîndecu ichi díí ìní yáchí-gá ndíhu ndaha ñàha Yá Ndiöxí xii cue tée-á<sup>n</sup> ndihí cue ñáyiú dîhí-á<sup>n</sup> dàcúxí nchòhó.

<sup>32</sup> Chi ndíi Juáá tée ní xóo dacuàndute ñaha xii ñáyiú ní cáhá<sup>n</sup> ndíi nàcuáa cadá-yu cundecú-yu, dico nchòhó chi ñá túú cuìní-ndó quindáá ìní-ndó nàcuáa ní cáhá<sup>n</sup> ndíi, dico cue tée cuihna ìní-xi quide cobrá ñáhá xii ñáyiú cuendá impuèstú, ndihí cue ñáyiú dîhí xîndecu ichi díí ìní, chi sàndáá ìní-güedé ndihí-yu tnúhu ní cáhá<sup>n</sup> ndíi. Te nchòhó cuèi ndèhe-ndo sá sàndáá ìní cue ñáyiú-á<sup>n</sup> nchaa tnúhu ní cáhá<sup>n</sup> ndíi, dico ñá túú cuìní-ndó ndixi cuèchi ìní-ndó cuendá nchaa sá cuèhé sá dúhá quide-ndo cuendá tñi-ndo tñuhu ní cáhá<sup>n</sup> ndíi —càchí-gá xăha<sup>n</sup>-gă xii-güedé.

*Cuendá cue tée cuihna ìní-xi  
(Mr. 12:1-12; Lc. 20:9-19)*

<sup>33</sup> Te xăha<sup>n</sup> tùcu Jèsús xii-güedé:

—Cundedóho-ndo na càni tucu-í ìngá cuendú núú-ndó cuendá tecú tnùní-ndó tñuhu càhá<sup>n</sup>-í. Ì<sup>n</sup> tée ní nacúxi-dé mee-ni yòho yaha stilé núú ñúhú-dě, te ní chidoco-dě cuendá sá vă cúú dăñú, te ní cadúha-dé núú quíhni-dě ndéhé yoho yàha stilé-á<sup>n</sup> òré ná cùu, te ní cadúha-dé Ì<sup>n</sup> xító dùcú<sup>n</sup> núú cáúndòdo cue tée coto nchaa yoho yàha stilé-á<sup>n</sup>.

”Te ní sáá Ì<sup>n</sup> nduu quèe-dé quíngaca cuu xica-dě te ní dándöo ndaha-dě sá ní xitu-dé-á<sup>n</sup> xii Ì<sup>n</sup> úú cue tée xíní tnáhá ndihí-dé cuendá cada chiu<sup>n</sup>-güedé, te ní ndatnúhu-güedé sá òré ná cúú te cuu cuendá dava-güedé, te duca<sup>n</sup> te ní quee-dé cuáhá<sup>n</sup>-dě.

<sup>34</sup> Te sáta ní sáá nduu ní cuu ndéhé nchaa yoho yàha stilé sá ní xitu-dé-á<sup>n</sup>, te ní xăha<sup>n</sup>-dě xii Ì<sup>n</sup> úú cue tée xínu cuechi núú-dě: “Chí cuáhá<sup>n</sup> cáca<sup>n</sup>-ndó sá cúú cuendá-í núú cuè tée ní dándöo

ndàha-í nchaa yoho yàha stilé sá ní xitu-í”, càchí-dé xăha<sup>n</sup>-dě xii-güedé.

<sup>35</sup> Te cue tée ní dándöo ndaha-dě nchaa yoho yàha stilé sá ní xitu-dé-á<sup>n</sup> ní tñi-güedé cue tée xínu cuechi núú-dě-á<sup>n</sup>, te Ì<sup>n</sup>-dè ní cani-güedé, te Ì<sup>n</sup>-dè ní sahani ñaha-güedé, te ìngá-dé ní sáñaha-güedé yúú.

<sup>36</sup> Te tée ní xitu yoho yàha stilé-á<sup>n</sup> ní tendaha-dě titní-gá tucu cue tée xínu cuechi núú-dě cuáhá<sup>n</sup>-güedé cuángacá<sup>n</sup>-güedé sá cúú cuendá-dé núú cuè tée ní dándöo ndaha-dě sá ní xitu-dé-á<sup>n</sup>, dico dîu-ni duca<sup>n</sup> ní quide ñaha cuè tée-á<sup>n</sup> xii cue tée xínu cuechi núú-dě-á<sup>n</sup>.

<sup>37</sup> ”Te tée cùu xítóhó nchaa yoho yàha stilé-á<sup>n</sup> ní sani ìní-dé: “Váha-gá nñu tendaha-í déhe-í-a núhú-dě, chi òré quini ñáhá-güedě xii-dé te canehe-güedé sá yíñùhu núú-dě”, duha ní sani ìní-dé. Te ní tendaha-dé déhe-dé cuánuhú-dé.

<sup>38</sup> Dico òré ní xíní cue tée quide chiu<sup>n</sup>-á<sup>n</sup> dèhe tée cùu xítóhó nchaa yoho yàha stilé-á<sup>n</sup>, te ní xítñaha-güedé: “Tée-á<sup>n</sup> tée véxi nduu táhú ñuhu-a ndihí nchaa sá cáá núú-xi, dico cahni-o-dě te mee-o nduu táhú-ó sá ndúú táhú-dě”, càchí-güedé xítñaha-güedé.

<sup>39</sup> Te ní tñi-güedé tée-á<sup>n</sup> te ndèca ñaha-güedé cuáhá<sup>n</sup> Ì<sup>n</sup> xio yuhu ñùhu-á<sup>n</sup>, te ní sahani ñaha-güedé xii-dé —duha cuáhá<sup>n</sup> cuendú ní cani Jèsús núú-güedé.

<sup>40</sup> Te ní xăha<sup>n</sup> tùcu Jèsús xii-güedé:

—¿Te nchòhó sa cùtnuní ìní-ndó năsa cada ñaha xítóhó ñuhu-á<sup>n</sup> xii cue tée-á<sup>n</sup> ñă? —càchí-gá xăha<sup>n</sup>-gă xii-güedé.

<sup>41</sup> Te cue tée-á<sup>n</sup> ní xăha<sup>n</sup>-güedé xii-gá:

—Tée cùu xítóhó ñuhu-á<sup>n</sup> nñhú-dé, te vă cundàhú ìní-dé cue tée cuihna ìní-xi-á<sup>n</sup> chí cahni ñaha-dě xii-güedé, te dándöo ndaha-dě ñuhu-dé xii cue tée cùtnuní ìní-dé cada ndáá cuendá ndi tnáhá cúú<sup>n</sup> ndéhé nchaa yoho yàha stilé sá ní xitu-dé-á<sup>n</sup> te cuáñaha-güedé xii-dé sá cúú cuendá-dé —càchí-güedé xăha<sup>n</sup>-güedé xii-gá.

<sup>42</sup> Te Jèsús ní xăha<sup>n</sup>-gă xii-güedé:

—Te nchòhó, náa ñá túú dàcuaha-ndo núú tütú Yá Ndiöxí núú cächí-xi:

Yúú sã ní dáquéé tǐhú cue téé dàcaa vehe, ní cuu-xi yúú cúnùu vitna.

Chi mee Dütú Ndiöxí duca<sup>n</sup> ñí cachí-gá cunduu, te cùu-xi ñ<sup>n</sup> sá ïo cǔñúhu-o vitna.

Duha cächí-xi núú tütú-gá.

43 Te duha cãhá<sup>n</sup>-í chi Yá Ndiöxí cada-gá te vá ñihí-ndó tnǔhu ndee ñí cundecu ndíhi-ndo cuendá ndíhu ndaha ñaha-gá xii-ndo, chi tnúhu ndee ñí-á<sup>n</sup> cundecu ndíhi cue ñáyiu cada ndáá cuendá ndíhu ndaha ñaha Yá Ndiöxí xii-yu.

44 Te yúú sã cúnùu-á<sup>n</sup> cúu-xí yǔhú, te nchaa ñáyiu ñá túú tnǐ tnúhu-í cùu-yu dàtná ñ<sup>n</sup> ñáyiu ndúá núú yúú-á<sup>n</sup> te tnàhnú duú<sup>n</sup>-yu, àdi núu na tàú ñáhá-xí xii-yu, te dacàchi duu<sup>n</sup> ñaha-xi —cachí-gá xãha<sup>n</sup>-gã xii-güedé.

45 Te sá dúcá<sup>n</sup> ndùu cuendú ní cani Jèsús te cue téé cùu dútú cúnùu-á<sup>n</sup>, ndíhi cue téé cùu fariséú ní cutnùní ñí-güedé sá cuendá-güedé ní cãhá<sup>n</sup>-gá.

46 Te ní cuiní-güedé tnǐ ñaha-güedé xii-gá òré-á<sup>n</sup> dico ñá túú ní cùyǐ-güedé, chi ní yùhú-güedé cue ñáyiu, chi ní cutnùní ñí-yu sá cúu-gã ñ<sup>n</sup> téé cãhá<sup>n</sup> tnúhu Yá Ndiöxí.

## 22

### *Cuendá ñ<sup>n</sup> vico tnãndaha*

1 Te Jèsús ní ngüita tucu-gá cání-gã ñíngá cuendú núú-güedé, te xãha<sup>n</sup>-gã:

2 —Na càni tucu-í ñíngá cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiöxí xii ñáyiu. ñ<sup>n</sup> téé yìndaha ñaha xii ñáyiu ní quide-dé ñ<sup>n</sup> vico ní dàtnãndaha-dé déhe ducu<sup>n</sup>-dé.

3 Te ní tendaha-dé cue téé xìnu cuechi núú-dé cuáhã<sup>n</sup>-güedé cuàngana-güedé cue ñáyiu sa ní cãhá<sup>n</sup>-dé cuhu<sup>n</sup> vico, dico ñáyiu-á<sup>n</sup> ñà túú ní cuiní-yu quíhí<sup>n</sup>-yu.

4 Te ní xãha<sup>n</sup> tucu-dé xii dava-gá cue téé xìnu cuechi núú-dé: “Quíhí<sup>n</sup>-ndó cǔñaha-ndo xii cue ñáyiu sa ní cãhá<sup>n</sup>-í cuhu<sup>n</sup> vico sá sã ní quide túha-í sã cáxí-yu, te sa ní sahani-í ndicutu ndíhi

nchaa dava-gá quiti ní dánucũhnu-í, te nchaa sa ní quide túha-í, te na quixí-yu cuhú<sup>n</sup>-yu vico cächí-í cǔñaha-ndo”, cächí-dé xãha<sup>n</sup>-dë xii cue téé xìnu cuechi núú-dé-á<sup>n</sup>.

5 Dico ní ñ<sup>n</sup> ñáyiu ní cãhá<sup>n</sup>-dé-á<sup>n</sup> ñà túú ní cuiní-yu quíhí<sup>n</sup>-yu cuhú<sup>n</sup>-yu vico. Chi ñ<sup>n</sup>-yu ní sãhá<sup>n</sup>-yu ní quide chiú<sup>n</sup>-yu núú ñúhǔ-yu, te ñíngá-yu ní sãhá<sup>n</sup>-yu ní nadìcò-yu núu nándi cùu ndáhú quidé-yu.

6 Te dava-gá-yu ní tnǐ-yu dava cue téé xìnu cuechi núú tēe quide vico-á<sup>n</sup>, te ní canihá-yu ndéé ní sahani ñáhã-yu xii-güedé.

7 Te téé yìndaha ñaha xii ñáyiu quide vico-á<sup>n</sup> ñí cudéé<sup>n</sup> víhí-dë sá dúcá<sup>n</sup> ñí quidé-yu, te ní tendaha-dé cue sandádú-dé ní sãhá<sup>n</sup>-güedé ní sahani-güedé cue ñáyiu duca<sup>n</sup> ñí quide-á<sup>n</sup>, te ní sahani-güedé nchaa vehe càa ñuú-yu.

8 Te sátá dúcá<sup>n</sup> te ní xãha<sup>n</sup>-dë xii dava-gá cue téé xìnu cuechi núú-dé: “Nchaa sa ndècu túha, te cue ñáyiu ní cãhá<sup>n</sup>-í cuhu<sup>n</sup> vico-a ní cùu ñá túú-gã tàú-yu sá cùhǔ<sup>n</sup>-yu.

9 Te chí cuáhã<sup>n</sup> ndëni ní cuu te cãhá<sup>n</sup>-ndó nchãa ñáyiu na naníhí-ndó ìchi na quixí-yu cuhú<sup>n</sup>-yu vico-a”, cächí-dé xãha<sup>n</sup>-dë xii-güedé.

10 Te cue téé xìnu cuechi-á<sup>n</sup> ñí quee-güedé cuáhã<sup>n</sup>-güedé, te ní cãhá<sup>n</sup>-güedé nchaa ñáyiu ní naníhí-güedé ìchi, te cuëi ñáyiu váha ñí-xi, te cuëi ñáyiu cuihna ñí-xi, te ní chítǔ-yu núú cúu vico-á<sup>n</sup>.

11 Te sátá dúcá<sup>n</sup> te téé yìndaha ñáyiu quide vico-á<sup>n</sup> ñí quíhu-dé xití vehe ní xíndéhé-dé cue ñáyiu ñùhu vico-á<sup>n</sup>, te ní xini-dé ñ<sup>n</sup> téé ñùtnahá tnuú-yu te ñá túú càa dóó-dé dàtná cáá dǒó níhnú cuè ñáyiu ñùhu vico-á<sup>n</sup>.

12 Te ní xãha<sup>n</sup>-dë xii téé-á<sup>n</sup>: “¿Tãta, nása ní cuu cuànguihu-ò iha, te ñá túú càa dóó-n dàtná cáá dǒó níhnú cuè ñáyiu ñùhu vico tnãndaha-i?”, cächí-dé xãha<sup>n</sup>-dë xii téé-á<sup>n</sup>. Dico téé-á<sup>n</sup> ñà túú ní ñíhí-dë tnúhu cãhá<sup>n</sup>-dé.

13 Te téé yìndaha ñáyiu quide vico-á<sup>n</sup> ñí xãha<sup>n</sup>-dë xii cue ñáyiu xìnu



cuechi núú mèsá: “Chí tníí tǎe-án te dacùtu-ndo-dé, te queñuhu-ndo-dé ná quihí<sup>n</sup>-dé cundecu-dé ì<sup>n</sup> xichi núú néé núú ìo ndoho-dé, te yàcá<sup>n</sup> ìo ndáhyú-dé te dicó rúhñú-ná cuu núhu-dé sá sàtú iní-dé sá ndóhó-dé”, càchí-dé xáha<sup>n</sup>-dè xii cue ñáyiú xìnu cuechi núú mèsá-án.

<sup>14</sup> Te duha ndùu cuendú càhá<sup>n</sup>-í chi ìo cuéhé ñáyiú càhá<sup>n</sup> ñáhá Yá Ndiòxí xií-yu, dico sacú-ni-yu nduu táhũ-yu cundecú-yu ndihí-gá — càchí-gá xáha<sup>n</sup>-gá xii-güedé.

### *Cuendá impuèstú*

(Mr. 12:13-17; Lc. 20:20-26)

<sup>15</sup> Te cue tée cùu fariséú ní sáhá<sup>n</sup>-güedé ì<sup>n</sup> xichi ní ndatnúhu-güedé nàcuáa cada-güedé datìcánuu-güedé Jèsús núú tnúhu càhá<sup>n</sup>-gá cuendá duca<sup>n</sup> ñihí-güedé nàcuáa cada-güedé cacá<sup>n</sup> cuéchi-güedé cuendá-gá.

<sup>16</sup> Te ní tendaha-güedé ì<sup>n</sup> úú cue tée cùndihí-güedé, ndihí cue tée cùndihí té Hèrodés cuáhá<sup>n</sup>-güedé núú ndécú Jèsús. Te òré ní quexìo-güedé núú ndécú-gá, te ní xáha<sup>n</sup>-güedé xii-gá:

—Mèstrú, ñihí-ndí tnúhu sá ìo ndáá càhá<sup>n</sup>-n, te càhá<sup>n</sup> ndáá-n nàcuáa càhá<sup>n</sup> Yá Ndiòxí cundecu-o ñùyíú-a, te cuèi ndèda-ni cà ñáyiú ì<sup>n</sup>-ni càhá<sup>n</sup>-n ndihí-yu chi ñá túú quide cuendá-n cuèi ná ñáyiú cùu-yu.

<sup>17</sup> Te cachí tnúhu xii-ndí, núu váha-ni quide-ndí sá chãhu-ndí té Cèsár tée ìo cùnuu cuendá impuèstú án ñáhá —càchí-güedé xáha<sup>n</sup>-güedé xii-gá.

<sup>18</sup> Dico Jèsús ní cutnùnì iní-gá sá xító ndèé ñáhá-güedé xii-gá, núu ní xáha<sup>n</sup>-gá xii-güedé:

—Nchòhó cue tée dándahú mée-xí sã quidé ndáá te ñá ndáá sá quidé ndáá-ndó, ¿ná cuendá xító ndèé ñáhá-ndó xii-í?

<sup>19</sup> Chí dánèhé ñáhá xii-í ì<sup>n</sup> díhú<sup>n</sup> sã chãhu-ndo cuendá impuèstú núu nása càa —cachí-gá xáha<sup>n</sup>-gá xii-güedé.

Te ní dánèhé ñáhá-güedé xii-gá ì<sup>n</sup> díhú<sup>n</sup> sã nánì dènaríú.

<sup>20</sup> Te òré ní xini-gá díhú<sup>n</sup>-án te ní xicá<sup>n</sup> tnúhú-gá núú-güedé, te xáha<sup>n</sup>-gá:

—Chí càchí tnúhu yoo núú-xi ndèé ndihí yoo diu-xi ndèé —càchí-gá xáha<sup>n</sup>-gá xii-güedé.

<sup>21</sup> Te ní xáha<sup>n</sup>-güedé xii-gá:

—Núú tǎe Cèsár ndèé ndihí diu-dé —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí nàcuáha té Cèsár sá cúu cuendá-dé, te sá cúu cuendá mée Yá Ndiòxí te xíá<sup>n</sup> nàcuáha-ndo-gá —càchí-gá xáha<sup>n</sup>-gá xii-güedé.

<sup>22</sup> Te cue tée-án ìo ní cuñúhu-güedé sá dúcá<sup>n</sup> ñí càhá<sup>n</sup>-gá, te ní natnì-güedé ichi cuánuhú-güedé.

### *Cuendá cue ñáyiú ndoto*

(Mr. 12:18-27; Lc. 20:27-40)

<sup>23</sup> Te diu-ni nduu-án ñí quexìo ì<sup>n</sup> úú cue tée cùu saducéú núú ndécú Jèsús. Te cue tée-án ñá túú sàndáá iní-güedé sá ndótó cue ñáyiú ní xihí, te ní xáha<sup>n</sup>-güedé xii-gá:

<sup>24</sup> —Mèstrú, ndí Moisés ní cachí ndí sá núu ì<sup>n</sup> tée ndècu ñadìhí-xi cuú-dé te quendóo ñadìhí-dé, te núu ñá túú dèhe-dé ní xòo ndihí-a<sup>n</sup> te tée cùu ñaní-dé naquehe<sup>n</sup>-dé ñaha ní quendóo quèé-án cuendá coo déhe-dé ndihí-a<sup>n</sup> cuendá ñaní-dé tée ní xihí-án.

<sup>25</sup> Te ñuú-ndí-a ní xíndecu úsá tnàhá cue tée mee-ni ndí ñaní-güedé. Te tée díhna ní níhí ñadìhí-dé te ñá túú ní cùdí-dé cundecu-dé chi ní xihí-dé, te ní ì<sup>n</sup> déhe-dé ñá túú ní xòo ndihí ñadìhí-dé-án. Te tée cùu uú ní nàquehe<sup>n</sup>-dé ñaha ní quendóo quèé-án.

<sup>26</sup> Dico ní xihí tucu-dé, te ní ì<sup>n</sup> tucu déhe-dé ñá túú ní xòo ndihí ñaha-án, te diu-ni duca<sup>n</sup> ñí yáha tée cùu uní, te ní xínu ndí ùsá-güedé ní cándeca ñaha-güedé xii ñaha-án dico diu-ni duca<sup>n</sup> ñí xihí-güedé.

<sup>27</sup> Te ndéé núú ñí ndihí-ná te ní xihí tnàhá ñadìhí-án.

<sup>28</sup> Te na sáá nduu ndòto-güedé ndihí ñaha-án, ¿te ndèdacàa-güedé ñadìhí-güedé cuu-a<sup>n</sup>-i? Chi ndí ùsá-güedé ní cándeca ñaha-güedé xii-a<sup>n</sup> —càchí-güedé xáha<sup>n</sup>-güedé xii-gá.

<sup>29</sup> Te Jèsús ní xáha<sup>n</sup>-gá xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xini-ndó nàcuáa càhá<sup>n</sup> Yá

Ndiõxí núú tütú-gá, te ni ñà túú cùtnuní iní-ndó sã díú-gã ndácú-gã quidé-gã nchaandi túhú sã vãha.

<sup>30</sup> Te na cãchí tnúhu-í xii-ndo sã òré ná sãá nduu ndòto nchaa ñáyiu ní xíhí, te dàvá-án vã yõo-gá dasa<sup>n</sup> ðehe yoco-xi chi vá yõo-gá candeca tnàha, chi cuu-ná-yu dàtná cue espíritú xínú cuèchi núú Yã Ndiõxí.

<sup>31</sup> ¿Te náa ñá túú quide cuendá-ndó nãcuáa cãhá<sup>n</sup> Yã Ndiõxí núú tütú-gá núú cãhá<sup>n</sup>-gã cuendá cue ñáyiu ní xíhí-ã<sup>n</sup>? Te duha cãchí-gá:

<sup>32</sup> “Yúhú cúú-í Ndiõxí tẽ Àbrahám, ndihi té Isàác, ndihi té Jácób”, duha cãchí-gá núú tütú-gá. Te cue tée-án chi cuèi ní xíhí-güedé núú ñùyíú-a, dico sã cúú-xí Yã Ndiõxí chi ndècu vívú-ni-güedé. Chi ðiu-gá cúú-gã Ndiõxí mee-ni cuè ñáyiu xĩndecu vívú, te ñá túú cùu-gá Ndiõxí cue ñáyiu ñá túú ndècu vívú –cãchí-gá xãha<sup>n</sup>-gã xii-güedé.

<sup>33</sup> Te sã dúcá<sup>n</sup> ñí cãhá<sup>n</sup>-gã ní xíi-gá cue tée-án, te ío ní cuñúhu nchaa ñáyiu cuendá sã ïo vãha ndùu tnúhu ní cãhá<sup>n</sup>-gã.

*Tnúhu sã ïo-gá cúnùu*  
(Mr. 12:28-34)

<sup>34</sup> Te cue tée cùu fariséú ní xiní-güedé ní sadí Jèsús yuhu cue tée cùu saducéú, chi ñá túú ní ñíhí-gã-güedé tnúhu cúñaha-güedé xii-gá, te cue tée cùu fariséú-án ñí nataká-güedé te cuáhá<sup>n</sup>-güedé núú ndécú Jèsús.

<sup>35</sup> Te ì<sup>n</sup> tée cùu fariséú-án ïo vãha cùtnuní iní-dé nãcuáa ndùu nchaa tnúhu ní chídó tnùní ndíi Moisés te xító ndéé-dé Jèsús, te xãha<sup>n</sup>-dẽ xii-gá:

<sup>36</sup> –Mèstrú, cachí tnúhu ndèdacàa tnúhu sã ñí chídó tnùní ndíi Moisés ío-gá cúnùu cada-o –cachí-dé xãha<sup>n</sup>-dẽ xii-gá.

<sup>37</sup> Te Jèsús ní xãha<sup>n</sup>-gã xii-dé:

–Duha cãhá<sup>n</sup> tnúhu sã ïo-gá cúnùu: “Cuu iní-ndó Dütú Ndiõxí Yaá cúú Ndiõxí-ndó ñí yuhu ñí iní-ndó, te caní iní-ndó càda-ndo datná cuení mée-gã, te mee-ni tnúhu vãha caní iní-ndó nãcuáa cuu víi cuu vãha-ndo nũú-gã”,

<sup>38</sup> duha cãhá<sup>n</sup> tnúhu sã ïo-gá cúnùu.

<sup>39</sup> Te duha cãhá<sup>n</sup> tucu ingá tnúhu cùu uú sã ïo cùnuu, te sa yatni ì<sup>n</sup>-ni cùu-xi ndíhi tnúhu díhna nuu, te cãchí-xi: “Cuu iní-ndó tnàha ñáyiu-ndo dàtná cúú ìní-ndó mèe-ndo”, duha cãhá<sup>n</sup> tnúhu cùu uú-án.

<sup>40</sup> Te cuendá úú tnúhu-a ní cáá nchaa tnúhu ní cãhá<sup>n</sup> ndíi Moisés nãcuáa cada ñáyiu, te ðiu-ni cuendá úú tnúhu-a ní cáá tnúhu ní cãhá<sup>n</sup> nchaa cue tée ní xóo cãhá<sup>n</sup> tnúhu Yã Ndiõxí ndéé sanaha –cãchí-gã xãha<sup>n</sup>-gã xii-güedé.

*Yoo cùu Xítóhó Jesucristú*  
(Mr. 12:35-37; Lc. 20:41-44)

<sup>41</sup> Te ndècu duca<sup>n</sup>-ni cue tée cùu fariséú núú ndécú Jèsús.

<sup>42</sup> Te ní xícá<sup>n</sup> tnúhú-gã núú-güedé, te xãha<sup>n</sup>-gã:

–Cuení-í cachí tnúhu-ndo yòo ðehe-xi cùu Cristú Yaá tendaha Yã Ndiõxí quixi ñuyíú-a –cãchí-gã xãha<sup>n</sup>-gã xii-güedé.

Te ní xãha<sup>n</sup>-güedé xii-gá:

–Déhe ndíi Dàvíí cúú Yàá-án –cãchí-güedé xãha<sup>n</sup>-güedé xii-gá.

<sup>43</sup> Te Jèsús ní xãha<sup>n</sup>-gã xii-güedé:

–¿Te nása cãchí-tu-ndo sã ðehe ndíi Dàvíí cúú Cristú Yaá tendaha Yã Ndiõxí quixi ñuyíú-a, te mee ndíi Dàvíí-án ñí dácáhu ìní ñáhá Espíritú Yã Ndiõxí xii ndíi, te ní cachí ndíi sã Cristú Yaá tendaha Yã Ndiõxí quixi ñuyíú-a cùu-gá Xítóhó ndíi? Te duha ní cachí ndíi:

<sup>44</sup> Dütú Ndiõxí ní xãha<sup>n</sup>-gã xii Yaá cúú Xítóhó-í:

“Ngóo xio cùha-í, te yúhú cada-í te nchaa sã cúú ùhú ìní ñáhá xii-n canehe-xi sã yíñùhu núú-n.”

Duha ní xãha<sup>n</sup> Dütú Ndiõxí xii Yaá cúú Xítóhó-í, cãchí ndíi.

<sup>45</sup> ¿Te nása cùu Cristú ðehe ndíi Dàvíí, te mee ndíi ní cachí ndíi sã cúú-gã Xítóhó ndíi? –cãchí Jèsús xãha<sup>n</sup>-gã xii-güedé.

<sup>46</sup> Te ni ì<sup>n</sup>-güedé ñá túú-gã ní ñíhí-güedé tnúhu cúñaha-güedé xii-gã. Te ndéé nduu-ã<sup>n</sup> ñá túú-gã ní cùyí-güedé ná tnúhu cáca<sup>n</sup> tnúhú-güedé núú-gã.

## 23

*Jèsús càhá<sup>n</sup>-gá cuendá cue tée cùu fariséú ndihí cuendá cue tée dàcuaha ñaha xii ñáyiú*

(Mr. 12:38-40; Lc. 11:37-54; 20:45-47)

<sup>1</sup> Te Jèsús ní cáhá<sup>n</sup> ndodo-gá núu nchaa ñáyiú, ndihí núu cuè tée xica cuu ndihí-gá, te xáha<sup>n</sup>-gă:

<sup>2</sup> —Cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndihí cue tée cùu fariséú ndécú ndihí-güedé tnúhu ndee iní cáhá<sup>n</sup>-güedé nchaa tnúhu sá ní chídó tnùní ndí Moisés-á<sup>n</sup>.

<sup>3</sup> Te cada-ndo nàcuáa dānehé ñáhá-güedé xii-ndo, dico vá cáda-ndó dàtná xíquide-güedé, chi tucu ndùu tnúhu càhá<sup>n</sup>-güedé, te tucu quide-güedé.

<sup>4</sup> Te quide-güedé dàtná quidé ñáyiú dàcuído ñ<sup>n</sup> tnaha ñáyiú-xi ñ<sup>n</sup> sá ïo vée, te mèe-yu ni lùha ñá túú cuiní-yu cuidó-yu. Te duca<sup>n</sup> sãtnahá-xi cùu-güedé chi dānehé ñáhá-güedé xii-ndo nàcuáa cada-ndo, dico mee-güedé chi ni lùha ñá túú cuiní-güedé cada-güedé nàcuáa dānehé ñáhá-güedé xii-ndo.

<sup>5</sup> Te mee-ni ndùcu-güedé nàcuáa quide-güedé cuendá quini ñáyiú sá ïo cùu cahnu-güedé. Te ndèe xindá sá ndèe ñ<sup>n</sup> úú tnúhu Yá Ndiöxí tneé-güedé ndihí ndaha-güedé, te tnàhá iní-güedé sá ïo-gá cunduu quèhé<sup>n</sup> xindá-á<sup>n</sup> dàcúúxí xindá dāva-gá ñáyiú. Te tnàhá tucu iní-güedé sá ïo-gá cunduu nani núu dōó sácúhnu-güedé dàcúúxí dōó sácúhnu dāva-gá-yu.

<sup>6</sup> Te ndi tnahá òré sácōo vico, òré quihu-güedé mèsá caxi-güedé te ïo-gá cúdí iní-güedé cunucóo-güedé núu xilé núu sácōo cue tée cūnuu-gá, te diu-ni duca<sup>n</sup> quide tucu-güedé cuéi xití veñúhu.

<sup>7</sup> Te nchaa núu xicá cùu-güedé cuiní-güedé sá ndihí tnúhu yñùhu cáhá<sup>n</sup> ndihí ñaha ñáyiú xii-güedé, te cuiní tucu-güedé sá cūñahá-yu xii-güedé mèstrú.

<sup>8</sup> 'Dico nchòhó vá cūñaha-ndo xii ñáyiú sá cūñahá-yu mèstrú xii-ndo, chi nchòhó ñ<sup>n</sup>-ni cùu-ndo ndecu-ndo, chi duca<sup>n</sup> ñ<sup>n</sup>-ni yúhú Yaá ní tendaha Yá Ndiöxí véxi ñuyúú-a cùu-í Mèstrú ndécú ndihí ñaha-í xii-ndo.

<sup>9</sup> Te ñ<sup>n</sup>-ni Dútú Ndiöxí Yaá ndécú àndiu cuu-gá Tātá-ndó, núu xiá<sup>n</sup> vá cáhá<sup>n</sup>-ndó sá dāva cue tée ñuyúú-a cùu-güedé tātá-ndó.

<sup>10</sup> Te ni vã cáni iní-ndó càda-ndo nacuáa cáhá<sup>n</sup> ñáyiú sá cūnuu-ndo, chi ñ<sup>n</sup>-ni yúhú Cristú Yaá ní tendaha Yá Ndiöxí véxi ñuyúú-a cūnuu-í.

<sup>11</sup> Te ñáyiú ïo-gá cūnuu ndecu ndihí-ndo, ñáyiú-á<sup>n</sup> cúú-yu ñáyiú xinu cuechi núú-ndó.

<sup>12</sup> Te nchaa ñáyiú quide cahnu mee-xi ñáyiú-á<sup>n</sup> vã cúú-yu ñáyiú cūnuu, te nchaa ñáyiú ñá túú quide cahnu mee-xi ñáyiú-á<sup>n</sup> cūnuu-yu.

<sup>13</sup> 'Te nchòhó cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndihí nchòhó cue tée cùu fariséú, cùu-ndo cue tée ïo dāndahú méé-xí sã quidé ndáá te ñá ndáá sá quidé ndáá-ndó, te ndáhú ní cuu-ndo chi sādí-ndó ìchi ñáyiú ñá dāñá-ndó ndíhu ndaha ñaha Yá Ndiöxí xií-yu, te ni mèe-ndo ñá túú quide-ndo nacuáa ndíhu ndaha ñaha-gá xii-ndo, te ni dāva-gá cue ñáyiú cuiní sá ndíhu ndaha ñaha-gá xií-yu ñá dāñá-ndó.

<sup>14</sup> 'Te nchòhó cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndihí nchòhó cue tée cùu fariséú, cúú-ndó cuè tée ïo dāndahú méé-xí sã quidé ndáá te ñá ndáá sá quidé ndáá-ndó, te ndáhú ní cuu-ndo chi quendeé-ndó vèhe cue ñáyiú quèé, te ïo naha cáhá<sup>n</sup> ndihí-ndo Yá Ndiöxí cuendá cuiní-ndó sã vã yōo cutnùní iní-xi nàcuáa quide-ndo. Te sá dúcá<sup>n</sup> quide-ndo te ïo-gá ndoho-ndo núu ùhú núu ndáhú dàcúúxí dāva-gá ñáyiú.

<sup>15</sup> 'Te nchòhó cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndihí nchòhó cue tée cùu fariséú, cúú-ndó cuè tée ïo dāndahú méé-xí sã quidé ndáá te ñá ndáá sá quidé ndáá-ndó, te ndáhú ní cuu-ndo chi sãhni iní-ndó

cuăhá<sup>n</sup>-ndó nděni ní cuu dàçahá<sup>n</sup>-ndó ñăyiu cuendá cuiní-ndó tñi<sup>n</sup>-yu ichi ndècu-ndo. Te òré ná xñu iní-yu tñi<sup>n</sup>-yu ichi ndècu-ndo-á<sup>n</sup> te uu<sup>n</sup>-gá cuíta nihnú-yu dàcúxí mèe-ndo.

16 'Te nchòhó cúú-ndó dàtná cue ñăyiu cuàá, chi ñá cútñuní iní-ndó nàcuáa canu ichi-ndo ñăyiu, te ndàhú ní cuu-ndo chi càchí-ndó: "H<sup>n</sup> ñăyiu na càcunehe veñúhu càhnu sá ïo cùnūu òré cuiní-yu cutñuní iní tñaha ñăyiu-yu sá ndàá cadá-yu h<sup>n</sup> sá sání iní-yu cadá-yu, te vá cúú cuěchi xií-yu cuěi vá cáđă-yu. Dico núu na càcu nehé-yu díhú<sup>n</sup> cuàá<sup>n</sup> yíhí xítí veñúhu-á<sup>n</sup> te cuu cuěchi xií-yu te núu vá cáđă-yu sá ñi cachí-yu cadá-yu", duha càchí-ndó.

17 'Nchòhó cúú-ndó cuè téé ío ñi ðíquí-xi, te cùu-ndo datná cue ñăyiu cuàá chi ñá tècú tñuní-ndó! Te vá càchí-ndó sá ïo-gá cùnūu díhú<sup>n</sup> cuàá<sup>n</sup> dàcúxí veñúhu, chi ðiu cuendá veñúhu-á<sup>n</sup> ní cuu íí díhú<sup>n</sup> cuàá<sup>n</sup>-á<sup>n</sup>.

18 Te càchí tucu-ndo: "H<sup>n</sup> ñăyiu na càcunehe xító núú sácòdó sá ndúú tǎhú Yă Ndiòxí òré cuiní-yu cutñuní iní tñaha ñăyiu-yu sá ndàá cadá-yu h<sup>n</sup> sá sání iní-yu cadá-yu, te vá cúú cuěchi xií-yu cuěi vá cáđă-yu, dico núu na càcu nehé-yu sá ndúú tǎhú Yă Ndiòxí yódó núú xító-á<sup>n</sup> te cuu cuěchi xií-yu te núu vá cáđă-yu sá ñi sani iní-yu cadá-yu", duha càchí-ndó.

19 'Te cùu-ndo cue téé ío ñi ðíquí-xi, te cùu-ndo datná cue ñăyiu cuàá chi ñá tècú tñuní-ndó! Te vá cání iní-ndó sá ïo-gá nándi<sup>n</sup> sá ndúú tǎhú Yă Ndiòxí sácòdó núú xító núú sácòdó tñahí sá ndúú tǎhú-gă-á<sup>n</sup> dàcúxí mèe xító-á<sup>n</sup>.

20 Chi nchaa ñăyiu duca<sup>n</sup> càcunehe xító-á<sup>n</sup>, te tñahá-ni sá yódó núú-xi càcu nehé-yu òré duca<sup>n</sup> càhá<sup>n</sup>-yu.

21 Te nchaa ñăyiu duca<sup>n</sup> càcunehe veñúhu càhnu sá ïo cùnūu te ñá díú mèe-ni veñúhu càcu nehé-yu òré duca<sup>n</sup> càhá<sup>n</sup>-yu, chi tñahá-ni Yă Ndiòxí Yaá cúú cuendá veñúhu-á<sup>n</sup> cáciu nèhé-yu òré duca<sup>n</sup> càhá<sup>n</sup>-yu.

22 Te nchaa ñăyiu càcunehe andiu cuendá cutñuní iní tñaha ñăyiu-yu sá ndàá cadá-yu h<sup>n</sup> sá sání iní-yu

cadá-yu, te ñá díú mèe-ni andiu cacu nehé-yu chi tñahá-ni núú núcõo Yă Ndiòxí táxí tñuní-gá cáciu nèhé-yu òré duca<sup>n</sup> càhá<sup>n</sup>-yu, te tñahá mèé-gă cáciu nèhé-yu òré duca<sup>n</sup> càhá<sup>n</sup>-yu.

23 'Te nchòhó cue téé dàcuaha ñaha xii ñăyiu nchaa tñuhu ní chídó tñuní ndíi Moisés, ndi<sup>n</sup> nchòhó cue téé cùu fariséú, cúú-ndó cuè téé ío dándahú mèé-xí sá quidé ndàá te ñá ndàá sá quidé ndàá-ndó. Te cuěi núú ùxí xichi yúcu mèntá ñihí-ndó, te sǎñaha-ndo h<sup>n</sup> xichi xii Yă Ndiòxí, te ðiu-ni duca<sup>n</sup> quide-ndo yúcu nání àní, ndi<sup>n</sup> yúcu nání còminú, dico ndàhú ní cuu-ndo chi ñá túú quide cuendá-ndó nàcuáa càhá<sup>n</sup> nchaa tñuhu sá ïo-gá cùnūu sanu ichi ñaha xii-ndo, te tñuhu-á<sup>n</sup> càchí-xi sá ïo xini ñuhu-xi cada ndàá-ndó cùndecu-ndo, te cundàhú iní-ndó cuè tñaha ñăyiu-ndo, te quindáá iní-ndó Yă Ndiòxí, te cada-ndo nchaa nacuáa ndūu tñuhu càhá<sup>n</sup>-ndó, te nchaa tñuhu-á<sup>n</sup> cúú-xí tñuhu sá ïo cùnūu xini ñuhu-xi cada-ndo nacuáa càhá<sup>n</sup>-xi, dico vá dáñá ndèé-ndó càda-ndo nchaa dava-gá nàcuáa càhá<sup>n</sup> tñuhu sá sánú ìchi ñaha xii-ndo.

24 'Te nchòhó cúú-ndó dàtná cue ñăyiu cuàá, chi ñá túú cùtnuní iní-ndó nàcuáa canu ichi-ndo ñăyiu, chi quide cuendá-ndó mèe-ni nchaa tñuhu sá ñá túú ïo cùnūu, dico nchaa tñuhu sá ïo-gá cùnūu xini ñuhu-xi cada cuendá-ndó ñá túú quide cuendá-ndó!

25 'Te nchòhó cue téé dàcuaha ñaha xii ñăyiu nchaa tñuhu ní chídó tñuní ndíi Moisés, ndi<sup>n</sup> nchòhó cue téé cùu fariséú, cùu-ndo cue téé ío dándahú mèé-xí sá quidé ndàá te ñá ndàá sá quidé ndàá-ndó. Te ndàhú ní cuu-ndo chi cùu-ndo datná cue ñăyiu nàquete sátá-ni tàsá<sup>n</sup> ndi<sup>n</sup> sátá-ni cõhó te xítí-xi càndehe caduha-ni. Te duca<sup>n</sup> sãtnahá-xi cùu-ndo chi mee-ni sá ndécú ndi<sup>n</sup> tñaha ñăyiu-ndo ñuhu iní-ndó, te nándi dándahú-ndõ-yu te quèhe<sup>n</sup>-ndo sá ndécú ndi<sup>n</sup>-yu.

26 Te nchòhó cue téé cùu fariséú, cúú-ndó dàtná cue ñăyiu cuàá, chi ñá túú cùtnuní iní-ndó nàcuáa ndūu sá quidé-ndó. Te ío xini ñuhu-xi sá

cadá-ndó nàcuáa nduu ndoo nduu nine iní-ndó cuendá ndacu-ndo cada-ndo sá váha, te xiá<sup>n</sup> núu chí cáda dàtná xíquide ñáyiú nàquete ndaa xití tàsá<sup>n</sup> ndihi ndaa xití cóhó.

<sup>27</sup> Te nchòhó cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndihi nchòhó cue tée cùu fariséú, cùu-ndo cue tée ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná núú yíndüxi ndíyi núú nì cuáha vii te ní nacáhyú sá cuixí<sup>n</sup>, dico xití yaú-á<sup>n</sup> chi cãndehe caduha chi mee-ni yìqui ndíyi ñùhu.

<sup>28</sup> Te duca<sup>n</sup> sãtnahá-xi cùu-ndo chi sãnuu sá cúú-ndó cuè tée váha dico iní-ndó chi mee-ni sã cuèhé sá dúhá ñùhu, te ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó.

<sup>29</sup> Te nchòhó cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndihi nchòhó cue tée cùu fariséú, cúú-ndó cuè tée ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chi càdúha-ndo nchaa núú nì nguíndüxi cue tée ní xóo cáhá<sup>n</sup> tnúhu Yá Ndiòxí ndéé sanaha, te ío vii quíde-ndo nchaa núú sã nì cuáha núú yíndüxi cue ñáyiú ní quíde váha ní xíndecu ñuyíú-a.

<sup>30</sup> Te càchí-ndó: “Te núu dìcò nchoo ní xíndecu-o cùtnàhá ní xíndecu cue ñaní tnáhá-ó ndéé sanaha, te vá chítàhá-ó-güedé cahni-o cuè tée ní xóo cáhá<sup>n</sup> tnúhu Yá Ndiòxí dàvá-á<sup>n</sup> ní cùu”, duha càchí-ndó.

<sup>31</sup> Te sá dúcá<sup>n</sup> càhá<sup>n</sup>-ndó, te xiá<sup>n</sup> cútnùnì sá íí<sup>n</sup>-ní cùu-ndo ndihi cue ñaní tnáhá-ndó cuè tée ní xíndecu ndéé sanaha, cue tée ní sahani ñaha xii cue tée ní cáhá<sup>n</sup> tnúhu Yá Ndiòxí dàvá-á<sup>n</sup>.

<sup>32</sup> Te núu duca<sup>n</sup> te chí dáxínu cava chiú<sup>n</sup> ní tausaha-güedé.

<sup>33</sup> ;Te nchòhó cúú-ndó cuè tée ío cuihna iní-xi, chi cùu-ndo datná cóo dèé<sup>n</sup>! Te nchòhó vá nihí-ndó nàcuáa cada-ndo càcu nihnu-ndo núú ùhú núú ndàhú.

<sup>34</sup> Te cuendá xiá<sup>n</sup> núu tendaha-í cue tée càhá<sup>n</sup> tnúhu Yá Ndiòxí quixi núú-ndó, ndihi cue tée cùu mestrú

danèhé ñáhá xii-ndo tnúhu-gá, ndihi cue tée ío váha cùtnunì iní-xi cuendá cáhá<sup>n</sup>-güedé tnúhu-gá núú-ndó. Dico nchòhó chi da cùu ùhú iní-ndó-güedé, chi dava-güedé cahni-ndo-güedé, te dava-güedé cata caa-ndo-güedé núú cùrúxí, te dava-güedé cani-ndo-güedé xití veñúhu, te ndi tnahá ñuu ndi tnahá ñuu quíhí<sup>n</sup>-ndó nànducu-ndo-güedé cuendá cada ùhú iní-ndó-güedé.

<sup>35</sup> Te sá dúcá<sup>n</sup> ná cada-ndo, te ndadíquí-ndó cuè tée ní quíde ndáá ní xíndecu ní xihí ní sahani ñaha cuè ñaní tnáhá-ndó. Te ndéé ndíi Àbél tée ío váha ní quíde ndáá ní xíndecu ní sahani-güedé ndadíquí-ndó, ndihi nchaa dava-gá cue tée ní sahani-güedé, ndihi ndéé ndíi Zacàriá déhe ndíi Berèquiás tée ní sahani-güedé ndéé núú nì ndihi-ná ndadíquí-ndó, te ndíi-á<sup>n</sup> nì sahani-güedé mei tnúú veñúhu càhnu sá ío cùnuu ndihi xító núú sácòdó sã ndúú tãhú Yá Ndiòxí, te nchaa cue tée-á<sup>n</sup> ndadíquí-ndó chí dàtná tnúhu mee-ndo nì sahani-ndo cuè tée-á<sup>n</sup>, chí diu-ni ñaní tnáhá mèe-ndo duca<sup>n</sup> ní sahani ñaha xii-güedé.

<sup>36</sup> Te na càchí tnúhu ndáá-í xii-ndo sã nchaa cue tée ní quíde ndáá ní xíndecu ní sahani-güedé, nchaa cue tée-á<sup>n</sup> ndadíquí nchaa ñáyiú ndècu vitna –cachí-gá xãha<sup>n</sup>-gã xii-güedé.

*Jèsús càhá<sup>n</sup>-gá cuendá ñáyiú ñuu Jerusàlén*

*(Lc. 13:34-35)*

<sup>37</sup> Te xãha<sup>n</sup> Jèsús xii ñáyiú ñuu Jerusàlén:

–Nchòhó ñáyiú ñuu Jerusàlén sãhni-ndo cue tée ní tendaha Yá Ndiòxí véxi càhá<sup>n</sup> tnúhu-gá núú-ndó, te mee-ni ndihi yúú sãhni-ndó dàva-güedé. ;Te yúhú titní xito ní cuiní-í coto ñaha-í xii-ndo dàtná quidé nchùxi xito-güedi déhe-güedi sàquíhi-güedi xití ndíxí<sup>n</sup>-güedi, dico nchòhó ñá túú ní cuiní-ndó, te diu-ni duca<sup>n</sup> sãni iní-í ndéé vitna!

<sup>38</sup> Te na càchí tnúhu ndáá-í xii-ndo sã sàá nduu te ío ndàhú yáha ñuu-ndó, te vá cùndècu-gá-ndó.

<sup>39</sup> Te na cächí tñúhu tucu-í xii-ndo sã vã quíni ñáhá-gã-ndó xii-í, dico sãá nduu quíni ñáhá tucu-ndo, te dává-án cachí-ndó: “Ío cãhnu cuu Yaá ní tendaha Dütú Ndiöxí véxi”, duha cachí-ndó –cächí-gã xãha<sup>n</sup>-gã xii-yu.

## 24

*Jèsús cächí-gã sã ngóyó veñúhu*  
(Mr. 13:1-2; Lc. 21:5-6)

<sup>1</sup> Te Jèsús ní quee-gã veñúhu cãhnu sã ïo cùnunu, te mei òré ní quehe<sup>n</sup>-gã ichi quíhí<sup>n</sup>-gã ï<sup>n</sup> xichi, te ní sãndehe yatni cue tée xica cuu ndihí-gã ðíñi-gã, te xãha<sup>n</sup>-güedé xii-gã:

–Cundehe veñúhu-a nã ío váha ní sãá –cächí-güedé xãha<sup>n</sup>-güedé xii-gã.

<sup>2</sup> Te Jèsús ní xãha<sup>n</sup>-gã xii-güedé:

–Na cächí tñúhu ndáá-í xii-ndo sã ncháá sã ndéhé-ndó-á vitna saá nduu te vá cündüu-gã-xi ðãtná cáá-xí vitna, chi ni ï<sup>n</sup>-gã yúú vã códó nchíhi tnaha-xi chi ndihí ngoyo –cächí-gã xãha<sup>n</sup>-gã xii-güedé.

*Nàcuáa cada-xi nduu ta cùyatni naa ñuyúu-a*

(Mr. 13:3-23; Lc. 21:7-24; 17:22-24)

<sup>3</sup> Te Jèsús ní sãá-gã ndihí cue tée xica cuu ndihí-gã yucu Òlívú, te xiá<sup>n</sup> ñí ngóo-gã te núú núcõo-gã-á<sup>n</sup> ñí sáhá<sup>n</sup> cue tée xica cuu ndihí-gã, te dayuhu ñí xãha<sup>n</sup>-güedé xii-gã:

–Cuíni-ndí cachí tñúhu-n nã nduu ðuca<sup>n</sup> cada-xi ngoyo veñúhu cãhnu sã ïo cùnunu, ndihí nãndi cùu sã cádá-xí òré sa ta cùyatni nduu quixi tucu-n ñuyúu-a, ndihí òré sa ta cùyatni naa-xi –cachí-güedé xãha<sup>n</sup>-güedé xii-gã.

<sup>4</sup> Te Jèsús ní xãha<sup>n</sup>-gã xii-güedé:

–Ío quíhi iní-ndó cündecu-ndo cuendá sã vã yõo dandàhú ñáhá xii-ndo.

<sup>5</sup> Chi ío cuéhé cue tée coo ñuyúu, te danàni-güedé méé-güedé ðãtná nãni-í, te cachí-güedé: “Yúhú cùu-í Cristú Yaá ní tendaha Yã Ndiöxí véxi ñuyúu-a”, duha cachí-güedé. Te sã dúcá<sup>n</sup> cáhá<sup>n</sup>-güedé te ío vãi ñáyiu dandàhú-güedé.

<sup>6</sup> Te níhí-ndó tñúhu nàá-güedé ndëni ní cuu, dico vá yùhú-ndó chi

dacuití sã dúcá<sup>n</sup> càda-xi, dico vátá sãá-gã nduu nãa ñuyúu òré duca<sup>n</sup> càda-xi.

<sup>7</sup> Chi cue tée ï<sup>n</sup> nació<sup>n</sup> nàá-güedé ndihí cue tée ingá nació<sup>n</sup>, te titní ñuu ngüita-güedé nàá-güedé, te titní xichi ñuyúu coo tnamá, te titní tucu xichi ñuyúu quixi cuéhé, te titní tucu xichi ñuyúu ïo níhi tnáa.

<sup>8</sup> Te nchaa xiá<sup>n</sup> cuu-xi tñúndòho sã vitná vãha váha quèsaha sã cúu-xí cué ñáyiu xĩndecu ñuyúu.

<sup>9</sup> Te cue ñáyiu na cùu úhú iní ñáhá xii-ndo, cuáha cuendá ñáhã-yu núú cué tée cùchiu<sup>n</sup> cuendá caniha-güedé xii-ndo, te dava-ndo cãhni ñaha-güedé, te nchaa ñáyiu cuu úhú iní ñáhã-yu xii-ndo sã cuendá-í.

<sup>10</sup> Te dává-á<sup>n</sup> ïo vãi ñáyiu dàñã-yu sã sãndáá iní-yu Yá Ndiöxí, te ngóo-yu cuu úhú iní tnáhã-yu, te cuáha cuendá tnáhã-yu núú cué tée cùchiu<sup>n</sup>.

<sup>11</sup> Te ío vãi cue tée cachí-güedé sã cáhá<sup>n</sup>-güedé tñúhu Yá Ndiöxí te ñá ndáá sã cáhá<sup>n</sup>-güedé tñúhu-gã, te duca<sup>n</sup> ïo vãi ñáyiu dandàhú-güedé.

<sup>12</sup> Te dává-á<sup>n</sup> cunuu mée-ni nchaa sã cuéhé sã dúhá cáda-yu, te vãi-yu vá cúu iní-gã-yu tnàha ñáyiu-yu.

<sup>13</sup> Dico nchaa ñáyiu na càda ndee-ni iní canchicú<sup>n</sup> nihnu ñaha-ni xii-í, ñáyiu-á<sup>n</sup> naníhí tãhú-yu.

<sup>14</sup> Te nihí ñuyúu quíhí<sup>n</sup> ñáyiu cáhá<sup>n</sup>-yu tñúhu váha, tñúhu sã cáhá<sup>n</sup> nãcuáa ndíhu ndaha ñaha Yá Ndiöxí xii ñáyiu, te sátá ná nihí nchaa ñáyiu tñúhu-á<sup>n</sup> te naa ñuyúu.

<sup>15</sup> Te ndí Dániel tée ní xóo cáhá<sup>n</sup> tñúhu Yá Ndiöxí ndéé sanaha ñí chídó tñúni ndí cuendá ï<sup>n</sup> sã dáquèe tihú Yá Ndiöxí cundecu ï<sup>n</sup> xichi núú ñí cuu íí, te xiá<sup>n</sup> cada-xi sã vã cündecu-gã ni ï<sup>n</sup> ñáyiu xiá<sup>n</sup>. Te cada cuendá váha-ndo nãcuáa ní cáhá<sup>n</sup> ndí, chi nduu na quíni-ndó xiá<sup>n</sup> cundecu-xi núú dúcá<sup>n</sup> ñí cuu íí,

<sup>16</sup> te dává-á<sup>n</sup> nchaa ñáyiu xĩndecu distrítú Júdeá xini ñùhu-xi cunú-yu quíhí<sup>n</sup>-yu xití yucu.

<sup>17</sup> Te nchaa ñáyiu ndáa ndódó ðíquí véhé-xí vã ndíhu-gã-yu vehé-yu

quehé<sup>n</sup>-yu ñ<sup>n</sup> ndachìu<sup>n</sup>-yu canehé-yu quíhí<sup>n</sup>.

18 Te nchaa ñáyi cuáhá<sup>n</sup> yucu vá nùhú-gá-yu vehé-yu cúnúquehé<sup>n</sup>-yu dóo-yu.

19 Te ndàhú ní cuu nchaa ñáyi dèhí ñùhú dèhe-xi, ndihí cue ñáyi dèhí xñdeca déhe vitna sàdi na saá nduu dùca<sup>n</sup> cada-xi!

20 Te nchòhó, chí càcá<sup>n</sup> táhú núú Yá Ndiöxí cuendá sá vâ dúcá<sup>n</sup> ndòho-ndo yóo quidé vixi<sup>n</sup>-xi, te ni vâ dúcá<sup>n</sup> ndòho-ndo nduu cuu-xi nduu nde-tatú-ndó.

21 Chi dàvá-á<sup>n</sup> coo tnúndòho cahnu vihi ñuyíú, te vátá ñ<sup>n</sup> ndùu-gá coo tnúndòho cahnu vihi-á<sup>n</sup> ndéé cútñàhá ní ngáva ñuyíú, chi diu-ni dàvá-á<sup>n</sup> coo tnúndòho cahnu vihi-á<sup>n</sup>, te ni núú cuáhá<sup>n</sup> núú vèxi vá cóo-gá tnúndòho-á<sup>n</sup>.

22 Te Yá Ndiöxí càchí-gá sá vâ ño vâi nduu coo tnúndòho cahnu vihi-á<sup>n</sup> sá cuendá nchaa ñáyi ní càhá<sup>n</sup>-gá cundecu ndihí-gá. Chi núu vâi nduu na coo tnúndòho-á<sup>n</sup> te vâ yóo cácu nihnu.

23 Te núu ño ñáyi càchí-yu xii-ndo: “Chí cundèhe iha, chi iha ní quexìo Cristú Yaá ní tendaha Yá Ndiöxí véxi ñuyíú-a”, àdi cachí-yu: “Chí cundèhe yacá<sup>n</sup> chi yacá<sup>n</sup> ndécú-gá”, càchí-yu ña. Te vá quíndáá iní-ndó tnùhu càhá<sup>n</sup>-yu.

24 Chi coo cue tée cachí-güedé sá cúu-güedé Yaá ní tendaha Yá Ndiöxí véxi ñuyíú-a, te dava-güedé cachí-güedé sá cúu-güedé cue tée càhá<sup>n</sup> tnùhu Yá Ndiöxí dico ñá ndáá sá cúu-güedé cue tée càhá<sup>n</sup> tnùhu-gá, te cada-güedé titní núú sá vâ yóo tnàhí ndàcu cada cuendá dandàhú-güedé ñáyi. Te caní iní-güedé dandàhú-güedé ndéé cue ñáyi ní càhá<sup>n</sup> Yá Ndiöxí cundecu ndihí-gá.

25 Te duha ndùu tnùhu càhá<sup>n</sup>-í dátùha ñaha-í xii-ndo.

26 Te núu càchí-yu xii-ndo: “Xití yucu-á<sup>n</sup> ní quexìo Yaá ní tendaha Yá Ndiöxí véxi ñuyíú-a”, càchí-yu. Te vá quíndáá iní-ndó quíhí<sup>n</sup>-ndó, àdi cachí-yu: “Vehe-á<sup>n</sup> ndécú Yáá ní tendaha Yá Ndiöxí véxi ñuyíú-a”,

càchí-yu. Te vá quíndáá iní-ndó tnùhu càhá<sup>n</sup>-yu.

27 Chi dàtná xìní nchaa ñáyi quide-xi oré sáá nduté dàyehé-xi ni càa xico ñuyíú duca<sup>n</sup> càda-xi oré quixi tucu yúhú Tée cùu ñaní tnáhá-ndó nchàa-ndo chi ncháa-yu quini ñáhá-yu xii-í.

28 Te nchòhó xìní-ndó sá ncháa núú yúcú yiqui cuñú ní xihí te yacá<sup>n</sup> tàcá nchaa ndixí xéxi-güedé.

*Nàcuáa cada-xi òré quixi tucu Tée cùu ñaní tnáhá cuè ñáyi*

(Mr. 13:24-37; Lc. 21:25-33; 17:26-30, 34-36)

29 Te na yáha-ni coo tnúndòho cahnu vihi-á<sup>n</sup>, te vá dáyehé-gá nchíanchii, te ni vâ dáyehé-gá yóo, te ngoyo nchaa chódíní ndéé andi, te quidi-xi andi

30 nàcuáa cutnùní iní ñáyi sá sá véxi yúhú Tée cùu ñaní tnáhá-yu ncháa-yu. Te cue ñáyi nihí ñuyíú ndáhyú-yu sá ndihú iní-yu òré duca<sup>n</sup> càda-xi, te ncháa-yu quini ñáhá-yu xii-í quee-í andi quixi-í ichi xití vícò, te quini-yu sá ño càhnu cuu-í, te quide-í nchaa sá vâha.

31 Te tauchìu<sup>n</sup>-í cue espíritú xínú cuèchi núu-í níhi tñú-xi cútú nàdatàcá-xi nchaa ñáyi ní càhá<sup>n</sup>-í chitnahá ñáhá xii-í xñdeca ni càa xico ñuyíú.

32 Te nchòhó sa xìní-ndó nàcuáa quide yutnu ngúxí, chi yutnu-á<sup>n</sup> ndúú yùte núú dité-xi te nàtáhu ndaha-xi. Te òré duca<sup>n</sup> quide-xi te càchí-ndó sá sá ní cuyatni nuu cahni.

33 Te diu-ni duca<sup>n</sup> sàtnahá-xi cada-xi ñuyíú-a òré ná quini-ndó càda-xi nchaa nàcuáa ní càhá<sup>n</sup>-í, te cutnùní iní-ndó sá sá ní cuyatni vii-ñá nduu nà ñuyíú.

34 Te na càchí tnùhu ndáá-í xii-ndo sá òré vátá cúu-gá nchaa ñáyi xñdeca ñuyíú-a vitna, te cada-xi nchaa nàcuáa ní càhá<sup>n</sup>-í.

35 Te andi ndihí ñuyíú-a chi ndihí nihnu-xi, dico tnùhu-í chi vá ndihí nihnu-xi chi cùu-xi tnùhu ndáá cuiti.

36 Dico ñá túú cutnùní ná nduu quixi tucu-í, te ni ña túú cutnùní ná

òré chi vá yõo xìní, te ni cuè espíritú xínú cuèchi núú Yã Ndiõxí ñá túú xìní-xi ná nduu quìxi-í, te ni mèe yúhú Tée cùu Déhe Dútú Ndiõxí ñá túú xìní-í ná nduu quìxi tucu-í, chi ìndi díi-ni mee-gã xìní-gá nõu ná nduu quìxi-í.

37 Te nduu na quìxi tucu yúhú Tée cùu ñaní tnáhá-ndó nchàa-ndo ñuyú-a te cada-xi dàtná ní quide-xi cùtnàhá ní xíndecu ndíi Nõé.

38 Chi nchaa ñáyiu ní xíndecu dàvá-án òré vátá ndáá-gã ndute ñuyú, te xèxi-yu xihí-yu quidé-yu, te davá-yu ío-yu vico tnãndaha, te davá-yu dásá-yu déhe yòcò-yu candeca ñaha tõe, te duca<sup>n</sup>-ni xíquidé-yu ndéé ní sáá nduu cuãnguee té Nõé xití bàrcú.

39 Te ñá túú ní cùtnuní iní-yu nàcuáa cada-xi ñuyú ndéé ní sáá nduu ñi ngüíta-xi ní cuu<sup>n</sup> dáú ñi ndaa ndute ñuyú ñi dánáá ñaha-xi xií-yu. Te diu-ni duca<sup>n</sup> sãtnahá tucu-xi cada-xi nduu na quìxi tucu yúhú Tée cùu ñaní tnáhã-yu ncháá-yu ñuyú-a, chi nduu ñà túú ñá yíhí iní-yu te quixi tucu-í.

40 Te dàvá-án nõu úú tnàhá cue tée yíhi-güedé xití yucu, te ìndé ndanchita te ìndé quendóo.

41 Àdi úú ñáyiu dìhí nchícõ-yu ìndé-ni vèhe, te ìndé-yu ndanchita te ìndé-yu quendóo.

42 Te duha nduu tnúhu càhá<sup>n</sup>-í cuendá nchòhó cundecu túha-ndo, chi ñá túú xìní-ndó ñá òré quixi tucu yúhú Yaá cúú Xitohó-ndó.

43 Te nchòhó xìní-ndó sã nõu ìndé tée cùu xitohó vehe xìní-dé ná òré cúú-xí niú quíhu ñadúhú vehe-dé duhu-güedé, te quíhi iní-dé cundecu-dé cuendá sá vã dáñá-dé quíhu ñadúhú-ã<sup>n</sup> vehe-dé duhu-güedé, dico ñá túú xìní-dé.

44 Te duha càhá<sup>n</sup>-í chi nchòhó xíní ñúhu-xi cundecu túha-ndo, chi na cuáhá<sup>n</sup> òré ñá túú ñá yíhí iní-ndó quèxio yúhú Tée cùu ñaní tnáhá-ndó nchàa-ndo.

*Cuendá ìndé tée xínu cuechi (Lc. 12:41-48)*

45 Te na càni-í ìndé cuendú núú-ndó. ìndé tée xínu cuechi núú ìndé patróón<sup>n</sup> cúú-dé ìndé tée ío váha tècú tnùní,

te quide ndáá-dé ndécú-dé. Te ìndé xito ní dándõo ndaha ñaha patróón<sup>n</sup>-dè xii-dé nchaa cue ñáyiu ndècu vehe-dé cuendá coto ñaha-dé xií-yu cuáhaha-dé sá caxí-yu òré tàú-xi caxí-yu, te tée cùu patróón<sup>n</sup>-án ñi quee-dé cuáhá<sup>n</sup>-dé.

46 Te váha táhú tõe xínu cuechi-án te núu ndècuu-dé quidé-dé nchaa nàcuáa ní xáha<sup>n</sup> patróón<sup>n</sup>-dè cada-dé mei òré ní nasáá patróón<sup>n</sup>-dè-án.

47 Te na càhí tnúhu ndáá-í xii-ndo sã tõe cùu patróón<sup>n</sup>-dè-án cùñaha-dé xii-dé sá quíndaha-dé nchaa sá ndécú ndíhi-dé.

48 Dico núu tée xínu cuechi-án ní cùu-dé ìndé tée cuíhna iní-xi, te ngóo-dé cani iní-dé sá cúyaa patróón<sup>n</sup>-dè vá nasáá ndíhi-dé.

49 Te ngüíta-dé cani-dé nchaa dava-gá cue ñáyiu xínu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quíhu.

50 Te ìndé nduu òré ñá túú yíhi iní-dé nasáá patróón<sup>n</sup>-dè,

51 te ío dandõho ñaha patróón<sup>n</sup>-dè xii-dé, chi daquíhí<sup>n</sup> ñáhá-dé xii-dé núu xíndecu cue ñáyiu ní cachí sá ñi quide ndáá te ñá ndáá sá ñi quide ndáá-yu. Te duca<sup>n</sup> sãtnahá-xi dandõho ñaha Yá Ndiõxí xii ñáyiu, chi daquíhí<sup>n</sup> ñáhá-gã xií-yu ìndé xichi núú ïo ndohó-yu te yacá<sup>n</sup> ío ndáhyú-yu, te dicó rúhñú-ñá cuu núhu-yu sá sàtú iní-yu sá ndóhõ-yu —càhí-gá xáha<sup>n</sup>-gã xii-güedé.

## 25

*Cuendá úxí ñáyiu dìhí*

1 Te xáha<sup>n</sup> tucu Jesús xii-güedé:

—Na càni-í ìndé cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiu. Te úxí tnàhá ñáyiu dìhí ñáyiu cuechi ñi quehé<sup>n</sup>-yu lintèrnã-yu, te cuáhá<sup>n</sup>-yu ìndé xichi núú cóo vico tnándaha cuendá cundetú-yu quèxio tée tnándaha.

2 Te úhú<sup>n</sup> ñáyiu cuechi-ã<sup>n</sup> ïo váha cùtnuní iní-yu, te úhú<sup>n</sup>-yu ñáhá.



3 Te ndi ùhú<sup>n</sup> ñáyi cuечи dùca<sup>n</sup> ñá túú cùtnuní iní-xi-á<sup>n</sup> ñà túú ní cãnehé-yu sá ndëe linté<sup>n</sup>ã-yu.

4 Dico ndi ùhú<sup>n</sup> ñáyi cuечи cùtnuní iní-xi-á<sup>n</sup> néhë-yu sá ndëe linté<sup>n</sup>ã-yu.

5 Te tée tnándaha-á<sup>n</sup> cuyaa-dé quexio-dé núú ndétú ñàhá-yu-á<sup>n</sup>, te nini dùca<sup>n</sup> cuyaa-dé ní tni ñaha sàni xií-yu ní xidí-yu.

6 Te cùu-xi datná dava niú níhi ní cáhá<sup>n</sup> dava-gá ñáyi, te cãchi-yu: “Sa véxi tée tnándaha, chí táquèe quehé quehe<sup>n</sup> cuendá-ndó-dë”, cãchi-yu.

7 Te ndi ùxí ñáyi cuечи-ã<sup>n</sup> ñi ndacóo-yu quide túha-yu linté<sup>n</sup>ã-yu.

8 Te ndi ùhú<sup>n</sup> ñáyi cuечи ñà túú cùtnuní iní-xi-á<sup>n</sup> ñi xáhã<sup>n</sup>-yu xii cue ndi ùhú<sup>n</sup> ñáyi cùtnuní iní-xi-á<sup>n</sup>: “Chí táxi nùu luha sá ndëe linté<sup>n</sup>ã-ndó ná ndëe linté<sup>n</sup>ã-ndi chí ñà cuèni-xi cáyú mee-ni ndàhvá”, cãchi-yu xáhã<sup>n</sup>-yu.

9 Te cue ñáyi cuечи cùtnuní iní-xi-á<sup>n</sup> ñi xáhã<sup>n</sup>-yu: “Vá táxi nùu-ndi chí vá tnàhá canehe chiú<sup>n</sup> mee-ndi, te váha-gá chí cuáhã<sup>n</sup> cuaa<sup>n</sup>-ndo núú cuè ñáyi xidíco cuendá sá vã cúmãní xii-ndo, te vá cúmãní xii nchúhú tucu”, cãchi-yu xáhã<sup>n</sup>-yu.

10 Te nini cuáhã<sup>n</sup> ndi ùhú<sup>n</sup> ñáyi duca<sup>n</sup> ñà túú cùtnuní iní-xi-á<sup>n</sup> cuãguaa<sup>n</sup>-yu sá ndëe linté<sup>n</sup>ã-yu ní quexio tée tnándaha. Te ndi ùhú<sup>n</sup> ñáyi cuечи cùtnuní iní-xi-á<sup>n</sup> ñi quehe<sup>n</sup> cuendá ñáhã<sup>n</sup>-yu xii-dé, te cuãnguïhu ndihi ñàhá-yu xii-dé núú cóo víco tnándaha, te sátá dúcã<sup>n</sup> te ní nandedí yuyèhe.

11 Te òré ní nasáá cue ñáyi cuечи ñáyi ní sãnguaa<sup>n</sup> sá ndëe linté<sup>n</sup>ã-xi-á<sup>n</sup>, te ní ngüita-yu cãhá<sup>n</sup>-yu xĩnutni-yu ndaa sátá yuyèhe ndaa quehé, te xáhã<sup>n</sup>-yu xii tée tnándaha-á<sup>n</sup>: “¡Tãta, nacaá<sup>n</sup> yuyèhe na quíhu-ndi!”, cãchi-yu xáhã<sup>n</sup>-yu xii-dé.

12 Te tée tnándaha-á<sup>n</sup> ñi xáhã<sup>n</sup>-dë xií-yu: “Na cãchi tñuhu ndáá-í xii-ndo sã nchòhó ñá túú tàú-ndó quíhu-ndo víco-a, chí ñá túú tnàhá tñuhu ndihi ñaha-ndo xii-í”, cãchi-dé xáhã<sup>n</sup>-dë xií-yu —cãchi Jesús xáhã<sup>n</sup>-gã xii-güedé.

13 Te xáhã<sup>n</sup> tucu Jesús xii-güedé:

—Ío quihi iní-ndó cùndecu-ndo, chí ñá túú xini-ndó ñà nduu, te ni ñà túú xini-ndó ñà òré quixi tucu yúhú Téé cùu ñani tnàhá-ndó nchaa-ndo —cachí-gá xáhã<sup>n</sup>-gã xii-güedé.

*Cuendá cue téé ní ndóo ndaha dñhú<sup>n</sup> (Lc. 19:11-27)*

14 Te xáhã<sup>n</sup> tucu Jesús xii-güedé:

—Na cãni tucu-í ingá cuendú núú-ndó nãcuáa tecú tñuni-ndó nãcuáa cada-xi òré ndihu ndaha ñaha Yá Ndióxi xii ñáyi. I<sup>n</sup> téé sa ñuhu ichi-ná-dé sá cáca-dë quíngaca cuu xica-dë, te ní cana-dé cue téé xinu cuечи núú-dë cuendá dándóo ndaha ñaha-dé dñhú<sup>n</sup>-dë xii-güedé.

15 Te nãcuáa nduu chiú<sup>n</sup> quide i<sup>n</sup> i<sup>n</sup>-güedé te duca<sup>n</sup> dñhú<sup>n</sup> ñi sãñaha-dë xii-güedé, te i<sup>n</sup>-dé ní sãñaha-dë úhú<sup>n</sup> tnàhá dñhú<sup>n</sup> sã ío yahu nani talentú, te ingá-dé ní sãñaha-dë úú tnàhá dñhú<sup>n</sup>-ã<sup>n</sup>, te ingá-dé ní sãñaha-dë i<sup>n</sup> dñhú<sup>n</sup>-ã<sup>n</sup>, te dàtnuní ní quee-dé cuáhã<sup>n</sup>-dé.

16 Te téé ní quehe<sup>n</sup> cuendá úhú<sup>n</sup> tnàhá dñhú<sup>n</sup> sã nani talentú ní quide-dé ndáhú ndihi-xi te ní níhi tucu-dé úhú<sup>n</sup>-gá tucu tnàhá dñhú<sup>n</sup>-ã<sup>n</sup>.

17 Te diu-ni duca<sup>n</sup> ñi quide tucu téé ní níhi úú dñhú<sup>n</sup> sã nani talentú-á<sup>n</sup>, chí ní quide-dé ndáhú te ní níhi tucu-dé úú-gá tucu tnàhá.

18 Dico téé ní níhi i<sup>n</sup>-ni dñhú<sup>n</sup>-ã<sup>n</sup> chí da ní chiváha-dé dñhú<sup>n</sup> patróo<sup>n</sup>-dë, chí ní xete-dé i<sup>n</sup> yaú te ní chindúxi-dé.

19 Te ní cuu cuéhé nduu sá ñi quee patróo<sup>n</sup>-güedë-á<sup>n</sup> ní sãngaca cuu-dé, te ní nasáá-dé te ní ngüita-dé quide ndáá-dé ndihi-güedé cuendá dñhú<sup>n</sup> sã ñi dándóo ndaha ñaha-dé xii-güedé.

20 Te téé ní quendóo ndaha úhú<sup>n</sup> tnàhá dñhú<sup>n</sup>-ã<sup>n</sup> ñi xáhã<sup>n</sup>-dë xii patróo<sup>n</sup>-dë: “Patróo<sup>n</sup>, náu úhú<sup>n</sup> tnàhá dñhú<sup>n</sup> sã ñi dándóo ndaha ñaha-n xii-í-a, te ní sáhã<sup>n</sup>-í ní quide-í ndihi-xi ndáhú te ní chidó-xi úhú<sup>n</sup>-gá tucu tnàhá, te náu-a naquehe<sup>n</sup> cuendá-n”, cãchi-dé xáhã<sup>n</sup>-dë xii patróo<sup>n</sup>-dë.

21 Te téé cùu patróo<sup>n</sup>-dë-á<sup>n</sup> ñi xáhã<sup>n</sup>-dë xii-dé: “Ío váha ní quide-n, te vitna quide ñaha-í xii-n i<sup>n</sup> téé váha téé quide ndáá, te sá sácú dñhú<sup>n</sup> ñi dándóo

ndaha ñaha-í xii-n te ní quide ndáá-n, te sá dúcá<sup>n</sup> ñí quide-n te vâi-gá taxi cuendá ñáhà-í xii-n. Te vitna cuu cundecu-n nũú ndécù-í, te ío cudíí ìní-ó cùndecu ndíhi tñaha-o”, cachí tée cùu patróó<sup>n</sup>-dẽ-á<sup>n</sup> xãha<sup>n</sup>-dẽ xii-dé.

22 Te sátá dúcá<sup>n</sup> te tée ní quendóo ndaha úú tñahá díhú<sup>n</sup> sã nání tàlentú-á<sup>n</sup> ñí xãha<sup>n</sup>-dẽ xii patróó<sup>n</sup>-güedé: “Patróó<sup>n</sup>, nãu úú tñahá díhú sã ñí dándõo ndaha ñaha-n-a, te ní sáhá<sup>n</sup>-í ní quide-í ndíhi-xi ndáhú, te ní chídó-xí úú-gá tucu tñahá, te nãu-a naquehe<sup>n</sup> cuendá-n”, cãchí-dé xãha<sup>n</sup>-dẽ xii patróó<sup>n</sup>-güedé.

23 Te ní xãha<sup>n</sup> tée cùu patróó<sup>n</sup>-á<sup>n</sup> xii-dé: “Ío váha ní quide-n, te vitna quide ñaha-í xii-n ñí tée váha tée quide ndáá, te sá sácú díhú<sup>n</sup> ñí dándõo ndaha ñaha-í xii-n te ní quide ndáá-n, te sá dúcá<sup>n</sup> ñí quide-n te vâi-gá taxi cuendá-í. Te vitna cuu cundecu-n nũú ndécù-í, te ío cudíí ìní-ó cùndecu ndíhi tñaha-o”, cachí tée cùu patróó<sup>n</sup>-á<sup>n</sup> xãha<sup>n</sup>-dẽ xii-dé.

24 Te tée ní ndóo ndaha ñí-ni díhú<sup>n</sup>-ã<sup>n</sup> ñí xãha<sup>n</sup>-dẽ xii tée cùu patróó<sup>n</sup>-dẽ-á<sup>n</sup>: “Patróó<sup>n</sup>, yúhú sa ñaha-í sá yòhó cúú-n ñí tée ndùcu mee-ni sá cúú-xí mée-xi te tàhu-n chiu<sup>n</sup> cuáhá<sup>n</sup> nchúhú cue tée xínu cuechi núú-n sàcá<sup>n</sup>-ndí triú, te òré ná nãtaxi tñaha-ndí, te yòhó dícó-nã náquehe<sup>n</sup> cuendá-n tàxúha-n.

25 Te núu xã<sup>n</sup> ní yùhú-í cada-í ndáhú ndíhi díhú<sup>n</sup>-n, te ní sáhá<sup>n</sup>-í ní xete-í ñí yaú te ní chindúxi-í, te nãu díhú<sup>n</sup>-n-á<sup>n</sup> naquehe<sup>n</sup> cuendá-n”, cãchí-dé xãha<sup>n</sup>-dẽ xii tée cùu patróó<sup>n</sup>-á<sup>n</sup>.

26 Te tée cùu patróó<sup>n</sup>-á<sup>n</sup> ñí xãha<sup>n</sup>-dẽ: “Yòhó cúú-n ñí tée cuihna ìní-xi xínu cuechi núú-í te cuhndu-n, te núu yòhó sání ìní-n sã cúú-í ñí tée tàuchiu<sup>n</sup> cuáhá<sup>n</sup>-ndó sàcá<sup>n</sup>-ndó triú te òré nãtaxi tñaha-ndo, te yúhú dícó-nã náquehe<sup>n</sup> cuendá-í nãtàxúha-í.

27 Te núu sání ìní-n sã dúcá<sup>n</sup> quide-í, te dasa<sup>n</sup> núu-n díhú<sup>n</sup>-í te cùñaha-n chãhu-yu díquí-xi ní cùu, te òré ndexìo-í te sa ngódó lùha-gá díquí-xi naquehe<sup>n</sup>-í ní cùu”, cachí-dé xãha<sup>n</sup>-dẽ xii tée xínu cuechi-á<sup>n</sup>.

28 Te tée cùu patróó<sup>n</sup>-á<sup>n</sup> ñí xãha<sup>n</sup>-dẽ xii dava-gá cue tée ndècu ndíhi-dé: “Chí quèndèé ñí díhú<sup>n</sup> sã nání tàlentú néhé tée-á<sup>n</sup>, te cuáha-ndo tée nèhe úxí tñahá díu-ni díhú<sup>n</sup>-ã<sup>n</sup>.

29 Chí cue tée sa ndècu ndíhi te níhí-gã-güedé cundecu ndíhi-güedé, te ní vã ñíhí-gã-güedé ndèé cundecu nchaa sá cùndecu ndíhi-güedé. Te cue tée ñá túú nã ndécú ndíhi vai, te nchaa sá ndécú ndíhi-güedé vá cùndecu ndíhi-gã-güedé.

30 Te tée xínu cuechi ñá túú vèdana nãndíhi-á<sup>n</sup>, chí tñí-dẽ te daquihí<sup>n</sup>-ndó-dẽ ñí xichi núú néé nũú ño ndoho-dé, te yàcá<sup>n</sup> ndáhyú-dé, te dícó rúhñú-nã cuu núhu-dé sá sàtú ìní-dé sá ndóhó-dẽ”, cãchí tée cùu patróó<sup>n</sup>-á<sup>n</sup> xãha<sup>n</sup>-dẽ xii-güedé. Duha sãtnahá-xi ndoho nchaa ñáyiú ñá túú quide váha –cãchí-gá xãha<sup>n</sup>-gã xii-güedé.

*Cuendá cue ñáyiú ní quide váha ndíhi cuendá cue ñáyiú ñá túú ní quide váha*

31 Te xãha<sup>n</sup> tucu Jesús xii-güedé:

–Te nduu na quixi tucu yúhú Tée cùu ñaní tñahá-ndó nchaa-ndo, te quixi-í ndíhi nchaa cue espíritú xínu cuèchi núú-í, te nchaa ñáyiú quini-yu sá ño càhnu cuu-í, te dàvá-á<sup>n</sup> cunucóo-í núú táxí tñúni-í, te ío cuñúhu ñáyiú sá ño càhnu cuu-í.

32 Te dàvá-á<sup>n</sup> nataká nchaa ñáyiú xĩndecu ní càa xico ñuyíú cundecú-yu núú-í, te cada-í-yu dàtná quidé ñí toli oré táú dè<sup>n</sup>-dé nchaa mbéé ndíhi nchaa chivá chí dè<sup>n</sup> taxi ndecu-dé nchaa mbéé, te dè<sup>n</sup> taxi ndecu-dé nchaa chivá.

33 Te duca<sup>n</sup> sãtnahá-xi cada-í chí nchaa ñáyiú ní quide ndáá núú-í ñáyiú-á<sup>n</sup> taxi ndecu-í-yu xio cùha-í, te nchaa ñáyiú cuihna ìní-xi ñá túú ní cuini cada ndáá núú-í ñáyiú-á<sup>n</sup> taxi ndecu-í-yu xio dàtni-í.

34 Te duca<sup>n</sup> te yúhú tée ío cùnuu cùñaha-í xii ñáyiú na cùndecu xio cuha-í: “Nchaa nchòhó ñáyiú ní quide váha ñaha Tãtà-í Dútú Ndiõxí, chí nèhé chí vitna ní sáá nduu cùndecu-ndo núú ndécú-gã táxí tñúni-gã, chí ndéé cútnahá ní ngáva ñuyíú sa ndècu túha

tnàhí núú ndécú-gă-á<sup>n</sup> sã nchòhó nduu táhú-ndó cùndecu-ndo.

<sup>35</sup> Te duca<sup>n</sup> chi òré xihí-í docó te ní taxi-ndo sã ñí xexi-í, te òré yìchí-í ndute te ní taxi-ndo ndùte ní xihí-í, te òré ñùhù-í ichi te ní taxi-ndo vèhe ní ndetatú-í.

<sup>36</sup> Te òré xíní ñùhu-í dóó cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vecaá te ní quixi tucu-ndo ñí quixi coto ñaha-ndo xii-í”, duha cúñaha-í xii nchaa ñáyiu-á<sup>n</sup>.

<sup>37</sup> Te nchaa ñáyiu duca<sup>n</sup> ñí quide ndáá-á<sup>n</sup> cùñahá-yu xii-í: “Yòhó Yaá cúú Xìtohó-ndí, ni ñí xito ñá túú ní tàxi-ndí sá cáxí-n òré xihí-n dòcò, te ni ñí xito ñá túú ní tàxi-ndí ndute coho-n òré yìchí-n.

<sup>38</sup> Te ni ñá túú ní tàxi-ndí vehe ndetatú-n òré ñùhù-n ichi, te ni ñá túú ní tàxi-ndí dóó cuihnu-n òré xíní ñùhu-n.

<sup>39</sup> Te ni ñá túú ní quixi coto ñaha-ndí xii-n òré ní cuhú-n, te ni ñá túú ní quixi coto ñaha-ndí xii-n òré ní xihí-n vècaá”, duha quesàhá-yu cúñahá-yu xii-í.

<sup>40</sup> Te yúhú téé cùnuu cúñaha-í xii-yu: “Na càchí tnúhu ndáá-í xii-ndo sã sã ncháá sã vãha ní quide-ndo sã cúú-xí nchaa ñáyiu xíndecu ichi-í cuèi ío ndàhú xíndáa-yu, te sá dúcá<sup>n</sup> ñí quide-ndo sã vãha sá cúú-xí-yu, te cada iní-ndó sã mèe-í duca<sup>n</sup> ñí quide-ndo ñí xito ñaha-ndo xii-í”, duha cúñaha-í xii-yu.

<sup>41</sup> Te dǎtnùní cúñaha-í xii ñáyiu na cùndecu xio datni-í: “Nchaa nchòhó ñáyiu ní xíta nihnu chí xócuíñí núú ndécú-í-a, chi nchòhó ní nduu táhú-ndó cùndecu-ndo núú ñùhú núú càyú, ñíu-ni núú ñí quide túha-í cùndecu sácuíhna ndihí nchaa espíritú cùndihí-xi, te yàcá<sup>n</sup> cùndecu-ndo ñí caa ni quíhí<sup>n</sup>.

<sup>42</sup> Chi yúhú òré xihí-í docó te ñá túú ní taxi-ndo sá cáxí-í, te ni òré yìchí-í ndute te ñá túú ní tàxi-ndo ndute coho-í.

<sup>43</sup> Te ni òré ní xúhu<sup>n</sup>-í ichi ñá túú ní taxi-ndo vehe ndetatú-í, te ni òré xíní ñùhu-í dóó cuihnu-í te ñá túú ní taxi-ndo, te ni òré ní cuhú-í te ñá

túú ní quixi-ndo quixi coto ñaha-ndo xii-í, te ni òré ní xihí-í vecaá te ñíu-ni duca<sup>n</sup> ñí quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu.

<sup>44</sup> Te ñáyiu-á<sup>n</sup> cùñahá-yu xii-í: “Yòhó Yaá cúú Xìtohó-ndí ni ñí xito ñá túú ní xíní-ndí òré xihí-n dòcò cuendá taxi-ndí sá cáxí-n, te ni ñí xito ñá túú ní xíní-ndí òré yìchí-n ndute cuendá taxi-ndí ndute coho-n, te ni ñí xito ñá túú ní xíní-ndí cuhu<sup>n</sup>-n ichi cuendá taxi-ndí vehe ndetatú-n, te ni ñí xito ñá túú ní xíní-ndí òré xíní ñùhu-n dóó cuendá taxi-ndí dóó cuihnu-n, te ni ñí xito ñá túú ní xíní-ndí òré cuhú-n cuendá quixi coto ñaha-ndí xii-n, te ni ñí xito ñá túú ní xíní-ndí quihí-n vècaá cuendá quixi coto ñaha-ndí xii-n”, duha quesàhá-yu cúñahá-yu xii-í.

<sup>45</sup> Te yúhú cúñaha-í xii-yu: “Na càchí tnúhu ndáá-í xii-ndo sã sã cuendá sá ñá túú ní quide-ndo ñí sá vãha sá cúú-xí cuè ñáyiu ndècu ichi-í cuèi ío ndàhú xíndáa-yu, te sá dúcá<sup>n</sup> ñí quide-ndo ñá túú ní quide-ndo sá vãha sá cúú-xí-yu, te cada iní-ndó sã mèe-í duca<sup>n</sup> ñí quide-ndo ñá túú ní quide-ndo sá vãha sá cúú-xí-í”, duha cúñaha-í xii-yu.

<sup>46</sup> Te nchaa ñáyiu-á<sup>n</sup> quíhí<sup>n</sup>-yu núú ùhú núú ndàhú ni caa ni quíhí<sup>n</sup>. Te nchaa ñáyiu ní quide ndáá núú-í ní xíndecu ñuyíú-a, ñáyiu-á<sup>n</sup> nduu táhú-yu ío vãha cùndecu-yu ni caa ni quíhí<sup>n</sup> —càchí-gá xãha<sup>n</sup>-gã xii-güedé.

## 26

*Cue téé cùu úhú iní ñáhá xii Jesús ndúcú-güedé nàcuáa cada-güedé tñí ñaha-güedé xii-gá*

(Mr. 14:1-2; Lc. 22:1-2; Jn. 11:45-53)

<sup>1</sup> Te sátá ñí yáha duca<sup>n</sup> ñí cáhán Jèsús, te ní xáha<sup>n</sup>-gã xii cue téé xica cuu ndihí-gá:

<sup>2</sup> —Nchòhó sa xíní-ndó sã cùmání ùú-gá nduu te coo vico pàscuá, te càchí tnúhu-í xii-ndo sã yúhú Téé cùu ñaní tnáhá-ndó nchaa-ndo tñí ñaha-güedé xii-í, te cuáha cuendá

ñáhá-güedě núú cuè téé cùu úhú iní ñáhá xii-í, te cata caa ñaha-güedě núú cùrúxí te núú cùrúxí-án cuú-í — cächí-gá xáha<sup>n</sup>-gã xii-güedé.

<sup>3</sup> Te ñáha-ni òré cãhá<sup>n</sup> ndihí Jèsús cue téé xica cuu ndihí-gá ní natacá cue téé cùu dútú cùnùu, ndihí cue téé dâcuaha ñaha xii ñáhiu nchaa tnúhu ní chídó tnùní ndíi Moisés, ndihí cue téé cùu sacuéhé núú ñáhiu isràél. Te mei quèhé vehe núú cúú vèchiu<sup>n</sup> té Caifás téé cùu dútú ño-gá cùnùu ní nat-acá-güedé.

<sup>4</sup> Te xíá<sup>n</sup> ñí ndatnúhu-güedé nâcuáa cada-güedé dandàhú-güedé Jèsús cuendá tñi ñaha-güedě xii-gá, te cahni ñaha-güedě.

<sup>5</sup> Te ní xitnàha-güedé:

—Váha-gá sá vã tñí-ó Jèsús mei ndùu vico, chi núu duca<sup>n</sup> na càda-o te ío dusa<sup>n</sup> càda ñáhiu —cächí-güedé xitnàha-güedé.

*Ñí ñadìhí chihí-án àciti díquí Jèsús  
(Mr. 14:3-9; Jn. 12:1-8)*

<sup>6</sup> Te ndècu Jèsús ñúu Bètaniá vehe ñí teé nàni Xímú, téé ní tnahá cuéhé sã dátèhyú nihnu-xi yiqui cùñú-ó.

<sup>7</sup> Te xíá<sup>n</sup> ndécú-gã ní quexìo ñí ñadìhí néhé-án ñí sá ñí cuáha yúú vãha nàni alabastrú, te xití xíá<sup>n</sup> ñúhú àciti sãhá<sup>n</sup> tnámí sã ño ndèyáhu. Te yìhi Jèsús mèsá xéxí-gã, te ñaha-án ñí sãhá<sup>n</sup>-a<sup>n</sup> ní sódó-a<sup>n</sup> àciti ñúhú xití xíá<sup>n</sup> díquí-gã.

<sup>8</sup> Te òré ní xiní cue téé xica cuu ndihí Jèsús sá dúcá<sup>n</sup> ñí quide ñaha-án te ní cudéé<sup>n</sup>-güedě, te ní ngüíta-güedé xitnàha-güedé:

—Ñá túú quide váha ñaha-ã<sup>n</sup> dàcá<sup>n</sup> quidé-án dacuíta-a<sup>n</sup> acití-ã<sup>n</sup>.

<sup>9</sup> Chi váha-gá núu cuyáhu acití-ã<sup>n</sup> ní cùu chi ío ndèyáhu, te díhú<sup>n</sup> cuyáhu acití-ã<sup>n</sup> cuu cuendá cue ñáhiu ndàhú ní cùu —cachí-güedé xitnàha-güedé.

<sup>10</sup> Te Jèsús ní cutnùní iní-gá nâcuáa ndùu tnúhu xitnàha-güedé, núu ní xáha<sup>n</sup>-gã xii-güedé:

—Vá dásatú-ndó iní ñadìhí-a, chi sá ñí quide ñaha-a<sup>n</sup> xii-í cúú-xí ñí sá vãha.

<sup>11</sup> Chi cue ñáhiu ndàhú duca<sup>n</sup>-ni cùtnahá ñáhiu-án tnuú-ndó, dico yúhú chi vá ncháá ndùu cundecu ndihí ñaha-í xii-ndo ñúyíú-a.

<sup>12</sup> Te sá dúhá ñí quide ñaha ñadìhí-a xii-í ní sódó-a<sup>n</sup> àciti díquí-í, te xíá<sup>n</sup> cada iní-ndó sã sã quide túha-a<sup>n</sup> yiqui cùñú-í cuendá nguindüxi-xi.

<sup>13</sup> Te na cächí tnúhu ndáá-í xii-ndo sã ndèni ní cuu nihí ñúyíú ná cãhá<sup>n</sup> ñáhiu tnúhu-í, te cãhá<sup>n</sup>-yu tnàhá cuendá ñadìhí-a cuendá quiní nchaa ñáhiu nâcuáa ní quide-a<sup>n</sup> te duca<sup>n</sup> vã nâcuánaá-yu —cächí-gá xáha<sup>n</sup>-gã xii-güedé.

*Té Jüdás ndúcú-dě nâcuáa cada-dé  
cuáha cuendá-dé Jèsús núú cuè téé cùu  
úhú iní ñáhá xii-gá*

*(Mr. 14:10-11; Lc. 22:3-6)*

<sup>14</sup> Te sáta dúcá<sup>n</sup> te té Jüdás Iscarioté ní sãhá<sup>n</sup>-dé ní ndatnúhu-dé ndihí cue téé cùu dútú cùnùu. Te núú tnàhá té Jüdás-án cúú ùxúú cue téé xica cuu ndihí Jèsús.

<sup>15</sup> Te ní xáha<sup>n</sup>-dě xii cue téé cùu dútú cùnùu-án:

—¿Ndédau cháhu ñaha-ndo xii-í te taxi cuendá-í Jèsús xii-ndo-i? — cächí-dé xáha<sup>n</sup>-dě xii-güedé.

Te cue dútú-ã<sup>n</sup> ñí xáha<sup>n</sup>-güedě xii-dé sã cuãhaha-güedě ócú úxí díhú<sup>n</sup> cuixí<sup>n</sup>, te ñáhiu duca<sup>n</sup> ñí sãhaha-güedě xii-dé.

<sup>16</sup> Te ndéé òré ní quehe<sup>n</sup> cuendá té Jüdás-án díhú<sup>n</sup>, te ní ngüíta-dé ndúcú-dě nâcuáa cada-dé cuáha cuendá-dé Jèsús núú-güedé.

*Cùdini Jèsús ndihí cue téé xica cuu  
ndihí-gá*

*(Mr. 14:12-25; Lc. 22:7-23; Jn. 13:21-30; 1 Co. 11:23-26)*

<sup>17</sup> Te ní sáá nduu ñí quesaha vico xexi ñáhiu pàá sã ñà túú yìhi levadurá ñáhiu-ni vico pascuá, te cue téé xica cuu ndihí Jèsús ní sãndehe yatni-güedé ñíhi-gá, te xáha<sup>n</sup>-güedě xii-gá:

—Mèstrú, véxi-ndí xicá<sup>n</sup> tnúhú-ndí núú-n núu ndéé cuiní-n càda túha-ndí cuendá cudini-o sacuaa nduu vico pascuá —cächí-güedé xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gã xii-güedé:

—Chí cuáhá<sup>n</sup> xití ñuú-á<sup>n</sup>, te yacá<sup>n</sup> naníhí-ndó ñ<sup>n</sup> té cùtnuní iní-ndó sá sà xiní ñáhá-dě xii-o, te cúñaha-ndo xii-dé: “Yaá cúú Mèstrú cächí-gá sá sà ní cuyatni nduu vǎ cùndècu-gá ñuyú-a, te vehe-n cuíní-gá cada-gá vico pásuá ndihí cue téé xica cuu ndihí-gá”, duha cúñaha-ndo xii téé-á<sup>n</sup> —cächí-gá xǎha<sup>n</sup>-gǎ xii-güedé.

19 Te cue téé xica cuu ndihí-gá-á<sup>n</sup> ñí xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gǎ xii-güedé, te ní quide túha-güedé sá cùdini-güedé ndihí-gá sacuaa nduu vico pásuá-á<sup>n</sup>.

20 Te òré sa ní cundiquí<sup>n</sup> te cuánguihu Jèsús ndihí ndi ùxúú cue téé xica cuu ndihí-gá mèsá cuèndá cudini-gá ndihí-güedé.

21 Te ñini xèxi-gá ndihí-güedé ní xáha<sup>n</sup>-gǎ xii-güedé:

—Na cächí tñuhu ndáá-í xii-ndo sǎ díú ñ<sup>n</sup> nchohó cue téé xica cuu ndihí-í cuáha cuèndá ñáhá-ndó xii-í núú cuè téé cùu úhú iní ñáhá —cächí-gá xǎha<sup>n</sup>-gǎ xii-güedé.

22 Te sá dúcá<sup>n</sup> ñí xáha<sup>n</sup>-gǎ xii-güedé te nchaa-güedé ní ngüíta-güedé cùndiyí-güedé, te da ñ<sup>n</sup> da ñ<sup>n</sup>-güedé ní ngüíta-güedé xǎha<sup>n</sup>-güedé xii-gá:

—Mèstrú, ¿ñá díú yǔhú duca<sup>n</sup> sàni iní-n càda-í-u? —cächí-güedé xǎha<sup>n</sup>-güedé xii-gá.

23 Te ní xáha<sup>n</sup>-gǎ xii-güedé:

—Téé nacaxi ndihí-í ñ<sup>n</sup>-ni cóhó caxi-ndí, téé-á<sup>n</sup> cuáha cuèndá ñáhá-dě xii-í núú cuè téé cùu úhú iní ñáhá.

24 Te yúhú Téé cùu ñani tñáhá-ndó nchaa-ndo ñuhu ichi-í cuáhá<sup>n</sup>-í yáha-í nàcuáa càhá<sup>n</sup>-xi núú tütú Yǎ Ndiöxí, dico ndàhú ní cuu téé duca<sup>n</sup> na cuáha cuèndá ñáhá xii-í núú cuè téé cùu úhú iní ñáhá, chí váha-gá sá vǎ cacú téé-á<sup>n</sup> cundecu-dé ní cùu, te ñá díú sǎ ñí cacu-dé te duca<sup>n</sup> càda-dé —cächí-gá xǎha<sup>n</sup>-gǎ xii-güedé.

25 Te sátá dúcá<sup>n</sup> te ní cáhá<sup>n</sup> té Júdás téé cuáha cuèndá ñáhá xii-gá, te xáha<sup>n</sup>-dè:

—Mèstrú, ¿te náa sàni iní-n sǎ yǔhú cuáha cuèndá ñáhá-í xii-n núú cuè téé cùu úhú iní ñáhá xii-n-á<sup>n</sup>? —cächí-dé xáha<sup>n</sup>-dè xii-gá.

Te Jèsús ní xáha<sup>n</sup>-gǎ xii-dé:

—Diu-n —cächí-gá xǎha<sup>n</sup>-gǎ xii-dé.

26 Te ñini cùdini cue téé xica cuu ndihí Jèsús ní quehe<sup>n</sup>-gá pǎá, te ní ndacá<sup>n</sup> táhú-gǎ núú Yǎ Ndiöxí, te dàtnuní ní táhú cuèchi-gá te ní ngüíta-gá dácǎhñu-gá cue téé xica cuu ndihí-gá-á<sup>n</sup>, te xǎha<sup>n</sup>-gǎ xii-güedé:

—Chí quehé<sup>n</sup> pǎá-a caxi-ndo, te cada iní-ndó sǎ yìqui cuñú-í cúú-xí —cächí-gá xǎha<sup>n</sup>-gǎ xii-güedé.

27 Te ní quehe<sup>n</sup>-gá vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núú Yǎ Ndiöxí, te dàtnuní ní ngüíta-gá sǎñaha-gǎ xii-güedé cuèndá coho-güedé luha luha sá ñúhú xití-xi, te xǎha<sup>n</sup>-gǎ xii-güedé:

—Chí cóhó nchaa nchohó ndudí ndéhé yoho yàha stilé ñúhú xití vàsú-a.

28 Te cada iní-ndó sǎ cúú-xí dàtná ñíñi-í sá catí òré cahni ñaha-güedé xii-í, te sá dúcá<sup>n</sup> catí ñíñi-í xǎ<sup>n</sup> cutnùní ndáá sá Yǎ Ndiöxí cada-gá ingá núú sǎ váha sá cúú-xí vai ñáyiú dàtná ní cachí-gá cada-gá, te ío vai ñáyiú cada càhnu iní-gá cuèchi-yu.

29 Te na cächí tñuhu-í xii-ndo sǎ vítá-nǎ duha xihí ndihí ñaha-í xii-ndo ndùdí ndéhé yoho yàha stilé-a, te vá cóhó ndihí ñaha-gá-í xii-ndo, dico na sǎa nduu nànihí tñáhá-ó núú ndécú Tǎtà-í Dútú Ndiöxí táxi tñuní-gá te dàvá-á<sup>n</sup> cada iní-ndó sǎ dàtná sá cóhó ndihí ñaha tucu-í xii-ndo chí ío cudíí ñí-ó —cächí-gá xǎha<sup>n</sup>-gǎ xii-güedé.

*Té Pèlú cúñaha-dě xii ñáyiú sá ñà túú xini-dé Jèsús*

(Mr. 14:26-31; Lc. 22:31-34; Jn. 13:36-38)

30 Te Jèsús ní xita-gá ñ<sup>n</sup> ndudú ndihí cue téé xica cuu ndihí-gá, te dàtnuní ní xica-gá cuáhá<sup>n</sup>-gá ndihí-güedé yucu Òlívú.

31 Te yacá<sup>n</sup> ní xáha<sup>n</sup>-gǎ xii-güedé:

—Na cächí tñuhu-í xii-ndo sǎ ncháá-ndó dándóo ñaha-ndo xii-í niú vitna, chí quee ndáá-xi nàcuáa càhá<sup>n</sup>-xi núú tütú Yǎ Ndiöxí núú cächí-xi: “Yúhú cuáha-í tñuhu cahni-güedé téé cùu toli, te nchaa

mbéé-dě ndihi-güedi cuténuu”, duha cächí-xi núú tütú-gá.

<sup>32</sup> Dico na ndòto-í te codonùu-í núú-ndó quíhí<sup>n</sup> distritú Galileá — cächí-gá xáha<sup>n</sup>-gã xii-güedé.

<sup>33</sup> Te té Pèlú ní xáha<sup>n</sup>-dě xii-gá:

—Te cuèi nchaa-güedé ná dándóo ñaha-güedé xii-n, dico yúhú chi vá dándóo ñaha-í xii-n —cächí-dé xáha<sup>n</sup>-dě xii-gá.

<sup>34</sup> Te Jèsús ní xáha<sup>n</sup>-gã xii-dé:

—Na cächí tñúhu ndáá-í xii-n sã niú vitna cùmání-gã cana ñ<sup>n</sup> líhi, te úní xito cáhá<sup>n</sup>-n núú ñáyiú sá ñà túú xini ñáhá-n xii-í —cächí-gá xáha<sup>n</sup>-gã xii-dé.

<sup>35</sup> Te té Pèlú ní xáha<sup>n</sup>-dě xii-gá:

—Cuèi na cùú ndihi ñaha-í xii-n dico vá càhá<sup>n</sup>-í núú ñáyiú sá ñà túú xini ñáhà-í xii-n —cächí-dé xáha<sup>n</sup>-dě xii-gá.

Te nchaa dava-gá cue téé xica cuu ndihi-gá ñu-ni duca<sup>n</sup> ní xáha<sup>n</sup>-güedé xii-gá.

*Jèsús càhá<sup>n</sup> ndihi-gá Yă Ndiöxí ñ<sup>n</sup> xi-chi núú nání Gètsemaní*

*(Mr. 14:32-42; Lc. 22:39-46)*

<sup>36</sup> Te Jèsús ní quexìo-gá ndihi cue téé xica cuu ndihi-gá ñ<sup>n</sup> xichi núú nání Gètsemaní, te xiá<sup>n</sup> ní xáha<sup>n</sup>-gã xii-güedé:

—Chí cúnúcoo iha cundetú-ndo na quíhí<sup>n</sup>-í yacá<sup>n</sup> cáhá<sup>n</sup> ndihi-í Yă Ndiöxí —cächí-gá xáha<sup>n</sup>-gã xii-güedé.

<sup>37</sup> Te ndèca-gá té Pèlú, ndihi ndi nduú déhe té Zebèdeú cuáhá<sup>n</sup>, te ní ngüíta-xi súúni ndihú iní-gá.

<sup>38</sup> Te ní xáha<sup>n</sup>-gã xii cue téé úní-á<sup>n</sup>:

—Súúni ndihú iní-í dàtná sá cùú-í, te chí quéndóo nchòhó iha te vá cùú-ndó chi yúhú vá cùú-í —cächí-gá xáha<sup>n</sup>-gã xii-güedé.

<sup>39</sup> Te sa ñùnchií luha ní xica ndehe Jèsús núú ndécú-güedé, te ní ngüíñi xítí-gã te ní nuu núú-gã ndàa núú ñúhú, te ní ngüíta-gã càhá<sup>n</sup> ndihi-gá Tătá-gã Dútú Ndiöxí, te xáha<sup>n</sup>-gã:

—Yòhó Tătá mèe-í, càhá<sup>n</sup> ndàhú-í núú-n nñu vá cùndèe iní-n tàunihnu ñaha-n xii-í cuendá sá vá ndòhò-í ná sàá òré, dico vá cádá-n nàcuáa cächí iní mèe-í, chi cada-n nàcuáa cächí iní mèe-n —cächí-gá xáha<sup>n</sup>-gã xii Tătá-gã Dútú Ndiöxí.

<sup>40</sup> Te sátá ní yáha ní cáhá<sup>n</sup> ndihi-gá Tătá-gã Dútú Ndiöxí, te cuánuhú-gá núú ní dándóo-gá cue téé úní-á<sup>n</sup> te xixídí-güedé òré ní nasáá-gá, te ní xáha<sup>n</sup>-gã xii té Pèlú:

—¿Náa ñá cùndèe iní-ndó vá cùú-ñi-ndo cuèdicó ñ<sup>n</sup> òré nini càhá<sup>n</sup> ndihi-í Yă Ndiöxí-á<sup>n</sup>?

<sup>41</sup> Te chí quéndóo tucu te cuhú<sup>n</sup> iní-ndó vá cùú-ndó, te cáhá<sup>n</sup> ndihi-ndo Yă Ndiöxí cuendá sá vá dácàhá<sup>n</sup> ñáhá yùcu ñávàha xii-ndo càda-ndo sá ñà túú tàú-ndó càda-ndo. Te xini ndáá-í sá nchòhó cuini-ndó càda-ndo nchaa nacuáa càhá<sup>n</sup>-í dicó-ñi sá ñà túú nihí ndéé-ndó —cächí-gá xáha<sup>n</sup>-gã xii-güedé.

<sup>42</sup> Te xito cùu uú cuáhá<sup>n</sup> tucu Jèsús cáhá<sup>n</sup> ndihi-gá Tătá-gã Dútú Ndiöxí, te xáha<sup>n</sup>-gã:

—Yòhó Tătá mèe-í, te núu vá cùndèe iní-n tàunihnu ñaha-n xii-í cuendá sá vá ndòhò-í, te cada nàcuáa cächí iní mèe-n —cächí-gá xáha<sup>n</sup>-gã xii Tătá-gã Dútú Ndiöxí.

<sup>43</sup> Te òré ní yáha ní cáhá<sup>n</sup> ndihi-gá Tătá-gã Dútú Ndiöxí, te cuánuhú tucu-gá núú xíndecu cue téé úní xicá cùu ndihi-gá-á<sup>n</sup>, te xidí-ñi tucu-güedé òré ní nasáá-gá, te duca<sup>n</sup> ní quide-güedé chi súúni ñúhu saní núú-güedé.

<sup>44</sup> Te ní dándóo ñaha tucu Jesús xii-güedé xiá<sup>n</sup>, te cuáhá<sup>n</sup> tucu-gá xito cùu úní cáhá<sup>n</sup> ndihi tucu-gá Tătá-gã Dútú Ndiöxí, te ñu-ni tñúhu sá sá ní xáha<sup>n</sup>-gã xii Tătá-gã Dútú Ndiöxí, ñu-ni tñúhu-á<sup>n</sup> ní xáha<sup>n</sup> tucu-gá.

<sup>45</sup> Te sátá ní yáha ní cáhá<sup>n</sup> ndihi-gá Tătá-gã Dútú Ndiöxí, te cuánuhú tucu-gá núú ndécú cuè téé xica cuu ndihi-gá-á<sup>n</sup>, te òré ní nasáá-gá, te ní xáha<sup>n</sup>-gã xii-güedé:

—¿Te náa xidí-ñi tucu-ndo? Te sa ní sáá òré cuáha cuendá ñáhá-güedé xii-í núú cuè téé ndècu ichi cuehé ichi duha.

<sup>46</sup> Dico vitna chí ndácóo na quíhí<sup>n</sup>-ó, chi sa véxi téé cuáha cuendá ñáhá xii-í núú cuè téé cùu úhú iní ñáhá —cächí-gá xáha<sup>n</sup>-gã xii-güedé.

*Ní tñi-güedé Jèsús ndécá ñàha-güedé xii-gá cuáhá<sup>n</sup>*

*(Mr. 14:43-50; Lc. 22:47-53; Jn. 18:2-11)*

<sup>47</sup> Te càhá<sup>n</sup> dúcá<sup>n</sup>-ní Jèsús ní quexìo té Jùdás. Te núú tñàhá téé-á<sup>n</sup> cúú ùxúú tñàhá cue téé xìca cuu ndihi-gá ní cùu te duca<sup>n</sup> ñí quide-dé. Te ndihi-dé vài cue téé ní quexìo te dava-güedé xínehe-güedé machítí, te dava-güedé xínehe-güedé carrutí. Te cue téé-á<sup>n</sup> ñí tendaha ñàha cue dútú cúnùu, ndihi cue téé cùu sacuéhé núú ñáyiú isràél.

<sup>48</sup> Te té Jùdás téé cuáha cuendá ñáhá xii-gá-á<sup>n</sup> sa ní xítñùhu-dé cue téé-á<sup>n</sup> nàcuáa cada-dé cuáha cuendá-dé Jèsús núú-güedé, te duha ní xáha<sup>n</sup>-dè xii-güedé:

—Cundehe-ndo tõe na tøyuhu-í te téé-á<sup>n</sup> tñi-ndo-dè chi téé-á<sup>n</sup> cúú-dè téé ndèè iní-ndó —duha ní xáha<sup>n</sup>-dè xii-güedé.

<sup>49</sup> Te sátá dúcá<sup>n</sup> ñí xáha<sup>n</sup>-dè xii-güedé, te ní sàndehe yatni-dé núú Jèsús, te ní xáha<sup>n</sup>-dè xii-gá:

—¡Ràció<sup>n</sup> Mèstrú! —càchí-dé xáha<sup>n</sup>-dè xii-gá.

Te ní tøyuhu ñàha-dé xii-gá.

<sup>50</sup> Te Jèsús ní xáha<sup>n</sup>-gã xii-dé:

—Yòhó téé ní chitnahá ñáhá xii-í, ¿ná cuíní-n núu véxi-n núù-í? —càchí-gá xáha<sup>n</sup>-gã xii-dé.

Te òré-ni-á<sup>n</sup> ñí tñi ñàha cuè téé ndihi té Jùdás-á<sup>n</sup> xii Jèsús, te ndéca ñàha-güedé xii-gá cuáhá<sup>n</sup>.

<sup>51</sup> Te ñí cue téé ndihi Jèsús ní tava-dé machítí-dé, te ní xehndé-ni-dé ñí xio lóho ñí téé xínu cuechi núú dútú cúnùu te ní quendeé duu<sup>n</sup> lóho-dé.

<sup>52</sup> Te Jèsús ní xáha<sup>n</sup>-gã xii téé duca<sup>n</sup> ñí xehndé lóho téé-á<sup>n</sup>:

—Nachihí machítí-n ñí-xi, chi nchaa cue téé na nàá ndihi machítí cahni-güedé tñàha ñáyiú-güedé te diu-ni ndihi machítí cúú méé-güedé tucu.

<sup>53</sup> Te na càchí tñùhu-í xii-ndo sã núu yúhú cuíní-í cácu-í te càhá<sup>n</sup> ndihi-í Tàtà-í Dútú Ndióxi, te tendaha-gã cuéhé víhí espíritú xínú cuèchi núú-gã quixi-xi dàcácu ñàha-xi xii-í.

<sup>54</sup> Dico núu duca<sup>n</sup> na càda-í te vá quéé ndáá-xi nàcuáa càhá<sup>n</sup>-xi núú tütú Tàtà-í Dútú Ndióxi núú ndèè

tnuní sá dàcuítí xini ñuhu-xi nándi ndoho-í —càchí-gá xáha<sup>n</sup>-gã xii-dé.

<sup>55</sup> Te Jèsús ní xáha<sup>n</sup>-gã xii cue téé duca<sup>n</sup> ñí tñi ñàha xii-gá-á<sup>n</sup>:

—Nchaa-ni nduu ní xiní-ndó ñí xóo cunucóo-í xití veñúhu càhnu sá ño cúnuu ní xóo danèhé-í ñáyiú, te ñá túú ní tñi ñàha-ndo xii-í, ¿te ná cuendá vitna quide ñàha-ná-ndó xii-í dàtná quidé-ndó ñí ñadúhú, nèhe-ná-ndó màchítí nèhe-ná-ndó càrrutí ní quexìo ní tñi ñàha-ndo xii-í-í?

<sup>56</sup> Dico dacuítí sã dúhá càda-xi nacuaa quee ndáá-xi nàcuáa ní càhá<sup>n</sup> cue téé ní xóo càhá<sup>n</sup> tñùhu Yá Ndióxi ndéé sanaha ñí ngódó tñuní núú tütú-gá —càchí-gá xáha<sup>n</sup>-gã xii-güedé.

Te nchaa cue téé xìca cuu ndihi-gá ní xinu-güedé ní dándóo ñàha-güedé xii-gá.

*Jèsús ndécú-gã jùndá*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Te cue téé ní tñi ñàha xii Jesús ndécá ñàha-güedé xii-gá cuáhá<sup>n</sup> núú tẽ Caifás téé cùu dútú cúnùu-gá. Te núú ndécú dútú cúnùu-gá-á<sup>n</sup> sa ní tacá cue téé dàcuaha ñàha xii ñáyiú nchaa tñùhu ní chídó tñuní ndí Moisés, ndihi cue téé cùu sacuéhé núú ñáyiú isràél cuendá cada-güedé jùndá.

<sup>58</sup> Te té Pèlú xica xica-ni nchicú<sup>n</sup> ñáhá-dè xii-gá cuáhá<sup>n</sup> ní sáá-dé ndéé quehé vehe núú ndécú tõe cùu dútú cúnùu-gá-á<sup>n</sup>, te xía<sup>n</sup> ñí ngóo-dé ndihi cue téé cùu poleciá cuendá cuíní-dé quiní-dé nása cada ñàha-güedé xii Jèsús.

<sup>59</sup> Te cue téé cùu dútú cúnùu, ndihi cue téé cùu sacuéhé núú ñáyiú isràél, ndihi nchaa dava-gá cue téé xíndecu jùndá ndúcú-güedé nàcuáa cada-güedé dacàa-güedé ñí cuéchi díquí Jèsús cuèi cùu-xi ñí sá ñá ndáá cuendá níhí-güedé nàcuáa cada-güedé cahni ñàha-güedé xii-gá.

<sup>60</sup> Te vài cue téé ní ngúita-güedé dácàa-güedé cuéchi díquí-gã, dico ñá túú ní cùndee tñùhu-güedé chi mee-ni tñùhu ndehnde cùu-xi. Te sátá dúcá<sup>n</sup> te ní quexìo tucu úú tñàhá cue téé dàcuandehnde-güedé,

61 te xăha<sup>n</sup>-güedě xii nchaa cue tée xĩndecu jũndá:

—Véxi-ndí cächí tnúhu-ndí xii-ndo sã tée-a cächí-dé sã dãngòyo-dé veñúhu cãhnu sã ïo cũnuu núu chíñúhu-o Yá Ndiõxí, te dandàa-dé ingá veñúhu saa, ðiu-ni núu cáá tnàhí veñúhu-ã<sup>n</sup>, te xití úní-ni nduu sa nadaxĩnu-dé, duha cächí-dé — cächí-güedé xăha<sup>n</sup>-güedě.

62 Te tée cùu dútú cùnùu-gá-á<sup>n</sup> nĩ ndacuñí-dé, te xăha<sup>n</sup>-dě xii Jèsús:

—¿Ná cuendá duha ndùu tnúhu cãhá<sup>n</sup> cue tée-a cuendá-n? Te cãhá<sup>n</sup> nõu nása cunduu tnúhu cãhá<sup>n</sup>-n — cächí-dé xăha<sup>n</sup>-dě xii-gá.

63 Dico Jèsús ñá túú tnàhí ni cãhá<sup>n</sup>-gá. Te tée cùu dútú cùnùu-gá-á<sup>n</sup> nĩ xáha<sup>n</sup> tùcu-dé xii-gá:

—Yúhú, cáciu nèhe-í Yá Ndiõxí chi cuení-í sã cächí tnúhu ndáá-n xii-ndí nõu sã ðíú Crìstú Déhe Yá Ndiõxí Yaa ní tendaha-gã véxi ñuyíú-a cùu-n — cächí-dé xăha<sup>n</sup>-dě xii-gá.

64 Te Jèsús ní xáha<sup>n</sup>-gã xii-dé:

—Ðiu Yaa-á<sup>n</sup> cùu-í dàtná cächí-n-ã<sup>n</sup>, te na cächí tnúhu-í xii-ndo sã sãá nduu te quini-ndó yũhú Tée cùu ñani tnáha-ndó nchàa-ndo cunucóo-í xio cùha Dútú Ndiõxí Yaa ndácú quide nchaandi túhú sã vãha. Te ðavá-á<sup>n</sup> quini ñáha-ndó xii-í quee-í andiu quixi-í ichi xití vícó — cächí-gá xăha<sup>n</sup>-gã xii-dé.

65 Te dútú cùnùu-gá-á<sup>n</sup> nĩ ndátá-dě dóo níhnú-dě cuendá sã ñà túú ní tnàhá iní-dé nàcuáa ní cãhá<sup>n</sup> Jèsús, te ní xáha<sup>n</sup>-dě xii nchaa cue tée xĩndecu jũndá:

—Tée-a cãhá<sup>n</sup> úhú-dé cuendá Yá Ndiõxí, te vitna ñá túú-gã xini ñúhu-xi cue tée cãhá<sup>n</sup> ndáá nõu ndáá sã ndècuéchi-dé àdi ñá túú ndècuéchi-dé, chi sa ní tecú dóho-o nàcuáa ndùu tnúhu ní cãhá<sup>n</sup>-dé ní cãhá<sup>n</sup> úhú-dé cuendá Yá Ndiõxí.

66 Te nchaa-ndo chí cãhá<sup>n</sup> vitna núu nása sàni iní-ndó cunduu cuendá tée-a — cächí-dé xăha<sup>n</sup>-dě xii nchaa cue tée-á<sup>n</sup>.

Te cue tée-á<sup>n</sup> nĩ xáha<sup>n</sup>-güedě:

—Nchúhú cächí-ndí sã tàù-xi cuú-dé chi ndècuéchi-dé — cächí-güedé xăha<sup>n</sup>-güedě.

67 Te ní ngüíta-güedé ní tíú ðí ñáha-güedě xii-gá te ní caniha-güedě, te tnàhá núu-gã ní cani-güedé.

68 Te ní cudíquí ndeé ñáha-güedě xii-gá, te xăha<sup>n</sup>-güedě:

—Yòhó Tée cächí sã cùu Crìstú Yaa ní tendaha Yá Ndiõxí véxi ñuyíú-a, cãhá<sup>n</sup> ná còto yoo ní caniha xii-n — cächí-güedé xăha<sup>n</sup>-güedě xii-gá.

*Té Pèlú xăha<sup>n</sup>-dě xii ñáyiu sã ñà túú xini-dé Jèsús*

(Mr. 14:66-72; Lc. 22:56-62; Jn. 18:15-18, 25-27)

69 Te nini núcóo té Pèlú quehé, te ní sáhá<sup>n</sup> ì<sup>n</sup> xíchí xínú cuèchi vehe-á<sup>n</sup> nõu-dě, te xăha<sup>n</sup>-xi xii-dé:

—Yòhó tnàhá-n cùu-n tée xica cuu ndihí Jèsús tée ðistrítú Galiléa — cächí-xi xăha<sup>n</sup>-xi xii-dé.

70 Te té Pèlú ñá túú ní nõnuu-dé, te ndédóho nchaa ñáyiu xĩndecu-á<sup>n</sup> nĩ xáha<sup>n</sup>-dě xii xíchí-ã<sup>n</sup>:

—Yúhú, ñá túú cùtnuní iní-í nása ndùu tnúhu cãhá<sup>n</sup>-n — cächí-dé xăha<sup>n</sup>-dě xii-xi.

71 Te ní xica té Pèlú cuáhá<sup>n</sup>-dé ndàa nacuáa nchìi yuyèhe vehe-á<sup>n</sup>, te ní xiní ñáha tùcu ingá xíchí xínú cuèchi vehe-á<sup>n</sup>, te xăha<sup>n</sup>-xi xii nchaa ñáyiu xĩndecu-á<sup>n</sup>:

—Tée-a tnàhá-dé xicá cùu-dé ndihí Jèsús tée ñuú Nazàrét — cächí-xi xăha<sup>n</sup>-xi xii-yu.

72 Te té Pèlú ní xáha<sup>n</sup>-dě:

—Nchàcuìti Yá Ndiõxí sã ñà túú xini-í tée càcunehe-ndo-á<sup>n</sup> — cächí-dé xăha<sup>n</sup>-dě xii-yu.

73 Te tna tnaa-ni ní cuu, te dava ñáyiu xĩndecu xiá<sup>n</sup> nĩ xáha<sup>n</sup> tùcú-yu xii té Pèlú:

—Ndáá sã tnàhá-n xica cuu-n ndihí tée ndèca-güedé cuánguñhu-ã<sup>n</sup>, chí ñáyúhú cãhá<sup>n</sup>-n — cächí-yu xăhá<sup>n</sup>-yu xii-dé.

74 Te té Pèlú ní xáha<sup>n</sup>-dě xii-yu:

—Nchàcuìti Yá Ndiõxí sã yũhú cãhá<sup>n</sup> ndáá-í sã ñà túú xini-í tée càcunehe-ndo-á<sup>n</sup> — cächí-dé xăha<sup>n</sup>-dě xii-yu.

Te òré-ni-á<sup>n</sup> nĩ cana ì<sup>n</sup> líhi.

75 Te ní ndacu iní té Pèlú nàcuáa ní xáha<sup>n</sup> Jèsús xii-dé sã cùmání-gã cana ì<sup>n</sup> líhi te úní xito cãhá<sup>n</sup>-dé sã ñà túú xiní ñáha-dě xii-gá. Te ní quee-dé tnuú ñáyiu-á<sup>n</sup> cuáhá<sup>n</sup>-dé ì<sup>n</sup>



xio ní ndáhyú víhí-dě ní ndixi cuéchi iní-dé.

## 27

*Ndèca-güedé Jèsús cuáhá<sup>n</sup> núú tē Pilatú*

(Mr. 15:1; Lc. 23:1-2; Jn. 18:28-32)

<sup>1</sup> Te sátá nǐ túndaá te nchaa cue tée cùu dútú cúnùu, ndihì cue tée cùu sacuéhé nǔú ñáyiú isràél ní ndatnúhu-güedé nàcuáa cada-güedé cahni-güedé Jèsús.

<sup>2</sup> Te ní dácútú ñàha-güedé xii-gá, te ndèca ñàha-güedé cuáhá<sup>n</sup> núú tē Pilatú tée cùu gobiernú.

*Ní xíhí tē Jùdás*

<sup>3</sup> Te tē Jùdás tée ní sáha cuèndá ñáhá xii Jèsús ní cutnùní iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcá<sup>n</sup> nǐ quide-dé ní sáha cuèndá ñáhá-dě xii-gá núú cuè tée cùu úhú iní ñáhá, te ní xica-dé cuáhá<sup>n</sup>-dé danchòcáva-dé ócò úxí dǐhú<sup>n</sup> cuixí<sup>n</sup> núú cuè dútú cúnùu-á<sup>n</sup>, ndihì núú cuè tée cùu sacuéhé nǔú ñáyiú isràél, chi ñu cue tée-á<sup>n</sup> nǐ sáñaha-güedé dǐhú<sup>n</sup> xii-dé.

<sup>4</sup> Te òré ní quexìo tē Jùdás-á<sup>n</sup> nǔú ndécú-güedé, te xàha<sup>n</sup>-dē xii-güedé:

—Yúhú, ñá túú ní quide váha-í sá dúcá<sup>n</sup> nǐ quide-í ní taxi cuèndá-í ñ<sup>n</sup> tée ñá túú tñahí cuéchi-xi cahni-ndo-dē —càchí-dé xàha<sup>n</sup>-dē xii-güedé.

Te cue tée-á<sup>n</sup> nǐ xàha<sup>n</sup>-güedé xii-dé:

—Nchúhú, ñá túú nǎgá cuèndú cuiní-ndí cáhá<sup>n</sup> ndihì ñàha-ndǐ xii-n, te mee-n nàha núu nása sàni iní-n càda-n —cachí-güedé xàha<sup>n</sup>-güedé xii-dé.

<sup>5</sup> Te tē Jùdás ní dǎngoyo-dé dǐhú<sup>n</sup>-á<sup>n</sup> xití veñúhu càhnu sá ño cùnùu, te ní xica-dé cuáhá<sup>n</sup>-dé ní dácüèhné-dé méé-dé.

<sup>6</sup> Te cue dútú cúnùu ní naquehe<sup>n</sup>-güedé dǐhú<sup>n</sup>-á<sup>n</sup>, te ní xitnàha-güedé:

—Dǐhú<sup>n</sup>-a ní quéyáhu cuèndá sá cùú ñ<sup>n</sup> ñáyiú, núu xíá<sup>n</sup> vá cùú nàchihi-o xití càjá núú ñúhú sǎ cùú cuèndá Yá Ndiòxí —càchí-güedé xitnàha-güedé.

<sup>7</sup> Te ní ndatnúhu-güedé te ní cuu ñ<sup>n</sup>nuu-güedé cuèndá nacuaa<sup>n</sup>-güedé ñ<sup>n</sup> xichi núú cáá ñúhu danani-güedé

Núú Cuáha Nchaa Sá Cuáha Ñuhu, te xíá<sup>n</sup> nǐ saa<sup>n</sup>-güedé cuèndá xíá<sup>n</sup> nguñdüxi nchaa ñáyiú véxi xica.

<sup>8</sup> Te ní nadáma ñu ñuhu-á<sup>n</sup>, te vitna ñanani-güedé Ñuhu Yáhu Níñí, duha ñanani-güedé.

<sup>9</sup> Te duca<sup>n</sup> nǐ cuu chi ní quee ndáá-xi nàcuáa ní cáhá<sup>n</sup> ndí Jeremiás tée ní xóo cáhá<sup>n</sup> tñuhu Yá Ndiòxí ndéé sanaha, te duha ní cachí ndí: “Cue tée isràél ní cachí-güedé sá ócò úxí dǐhú<sup>n</sup> cuixí<sup>n</sup> cháhu-güedé cuèndá ñ<sup>n</sup> tée quehe<sup>n</sup> cuèndá-güedé. Te dǐhú<sup>n</sup>-á<sup>n</sup> nàquehe<sup>n</sup>-güedé,

<sup>10</sup> te cuaa<sup>n</sup>-güedé ñ<sup>n</sup> xichi núú nání Nǔú Cuáha Nchaa Sá Cuáha Ñuhu, te duca<sup>n</sup> càda-xi chi duca<sup>n</sup> nǐ cachí Yá Ndiòxí cunduu”, duha ní cachí ndí Jeremiás-á<sup>n</sup>.

*Jèsús ndécú-gǎ núú tē Pilatú*

(Mr. 15:2-5; Lc. 23:3-5; Jn. 18:33-38)

<sup>11</sup> Te Jèsús ndécú-gǎ núú tē Pilatú tée cùu gobiernú, te tée-á<sup>n</sup> nǐ xicá<sup>n</sup> tñuhú-dé núú-gǎ, te xàha<sup>n</sup>-dē xii-gá:

—¿Ndáá sá dǐú-n cùu-n tée yìndaha ñàha xii ñáyiú isràél-á<sup>n</sup>? —càchí-dé xàha<sup>n</sup>-dē xii-gá.

Te Jèsús ní xàha<sup>n</sup>-gǎ xii-dé:

—Dǐu-í yìndàha-í-yu —càchí-gá xàha<sup>n</sup>-gǎ xii-dé.

<sup>12</sup> Te cue dútú cúnùu ndihì cue tée cùu sacuéhé nǔú ñáyiú isràél sàcá<sup>n</sup> cuéchi-güedé núú tē Pilatú cuèndá Jèsús, dico mee-gǎ ni ñ<sup>n</sup> tñuhu ñá túú ní cáhá<sup>n</sup>-gá.

<sup>13</sup> Te tē Pilatú ní xàha<sup>n</sup>-dē xii-gá:

—Cáhá<sup>n</sup>, ná cuèndá ñá túú càhá<sup>n</sup>-n, te cundehe nǎ ndéé duha titní cuéchi dàcaa cue tée-a dǐquí-n —càchí-dé xàha<sup>n</sup>-dē xii-gá.

<sup>14</sup> Dico Jèsús ñá túú tñahí ní cáhá<sup>n</sup>-gá, te tē Pilatú tée cùu gobiernú-á<sup>n</sup> ño ní cuñúhu-dé sá dúcá<sup>n</sup> ñá túú tñahí ní cáhá<sup>n</sup>-gá.

*Ní quide ndáá-güedé sá cáhni-güedé Jèsús*

(Mr. 15:6-20; Lc. 23:13-25; Jn. 18:38-19:16)

<sup>15</sup> Te ndi tñahá nduu vico pascua dácäcu tē Pilatú tée cùu gobiernú-á<sup>n</sup>

ɨ̃n tée yìhi vecaá chi duca<sup>n</sup> tnàhí quide-dé, te mee ñáyiú càhá<sup>n</sup>-yu te núú ndédacàa tée yìhi vecaá-á<sup>n</sup> cǎcu-dé te tée-á<sup>n</sup> dǎcǎcu-dé.

16 Te dàvá-á<sup>n</sup> yìhí ɨ̃n tée nàni Barrabás vecaá, te tée-á<sup>n</sup> íó cuendú-dé sá ìo nèhé ní quide-dé.

17 Te ní natacá nchaa ñáyiú, te té Pilatú ní xícá<sup>n</sup> tnúhú-dě núú-yu, te xǎhá<sup>n</sup>-dě:

—¿Ndédacàa núú ùú cue tée-a cuíní-ndó dǎcǎcu-í-güedé-í? ¿Té Barrabás ǎ<sup>n</sup> Jèsús tée nàni Cristú? —càchí-dé xǎhá<sup>n</sup>-dě xii-yu.

18 Te duca<sup>n</sup> ñí cáhá<sup>n</sup> té Pilatú, chi ní cutnùní iní-dé sá dícó sá cuedú iní-güedě duca<sup>n</sup> ñí quide-güedé ní sáha cuendá ñáhá-güedě xii Jèsús núú-dě.

19 Te nini nùcáo té Pilatú núú xèhndé-dé cuéchi ní tendaha ñàdihí-dé tnúhu cuáhá<sup>n</sup> núú-dě, te duha ndùu tnúhu ní tendaha-a: “Vá caní iní-n ñà cada-n tée ní taxi cuendá ñáhá-güedě xii-n, tée ñá túú tnàhí cuéchi-xi, chi icuini ío nèhé ní dǎcótó ñàha saní-í cuendá-dé”, duha ndùu tnúhu ní xáha<sup>n</sup>-a<sup>n</sup> xii té Pilatú.

20 Dico cue tée cùu dútú cúnùu, ndihí cue tée cùu sacuéhé núú ñáyiú isràél ní xáha<sup>n</sup>-güedě xii ñáyiú sá ná cǔñáhá-yu xii té Pilatú dǎcǎcu-dé té Barrabás te cahni-dé Jèsús, te ní quidé-yu nàcuáa ní xáha<sup>n</sup>-güedě.

21 Te té Pilatú-á<sup>n</sup> ñí xáha<sup>n</sup> tùcu-dé xii-yu:

—¿Ndédacàa núú ùú cue tée-a cuíní-ndó dǎcǎcu-í? —càchí-dé xǎhá<sup>n</sup>-dě xii-yu.

Te ní xáhǎ<sup>n</sup>-yu xii-dé:

—Té Barrabás dǎcǎcu-n —càchí-yu xáhǎ<sup>n</sup>-yu xii-dé.

22 Te té Pilatú ní xícá<sup>n</sup> tnúhú-dě núú-yu, te xǎhá<sup>n</sup>-dě:

—¿Te ná cuíní-ndó càda-í Jèsús tée nàni Cristú tée càchí sá Yǎ Ndiòxí ní tendaha ñàha xii-dé véxi-dé ñuyíú-a-í? —càchí-dé xǎhá<sup>n</sup>-dě xii-yu.

Te nchaá-yu ní cáhá<sup>n</sup>-yu, te xáhǎ<sup>n</sup>-yu:

—Cata caa-dé núú cùrúxí —càchí-yu xáhǎ<sup>n</sup>-yu xii-dé.

23 Te té Pilatú ní xáha<sup>n</sup> tùcu-dé xii-yu:

—¿Te ná cúú cuéchi ní quide-dé núú duca<sup>n</sup> cuíní-ndó càda-í-dé-í? —càchí-dé xǎhá<sup>n</sup>-dě xii-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xáhǎ<sup>n</sup>-yu xii-dé:

—¿Cata caa-dé núú cùrúxí! —càchí-yu xáhǎ<sup>n</sup>-yu xii-dé.

24 Te té Pilatú ní cutnùní iní-dé sá vǎ nihí-dé nàcuáa cada-dé, chi uu<sup>n</sup>-gá ní ngüíta ñáyiú xícuaá-yu, te xǎhá<sup>n</sup> ní xícá<sup>n</sup>-dé ndute ní ndáhá-dě núú ncháa ñáyiú, te ní xáha<sup>n</sup>-dě xii-yu:

—Tée-a cùu-dé ɨ̃n tée ñá túú tnàhí cuéchi-xi, te nchòhó cuíní-ndó sǎ cùú-dé, dico diu-ni mee-ndo cuído yáhu-ndo-dě chi yúhú vǎ cuído yáhu-í-dé —càchí-dé xǎhá<sup>n</sup>-dě xii-yu.

25 Te nchaá-yu ní xáhǎ<sup>n</sup>-yu xii-dé:

—¿Diu nchúhú ndihí cue déhe-ndí cuído yáhu-ndí-dé! —càchí-yu xáhǎ<sup>n</sup>-yu.

26 Te sátá dúcá<sup>n</sup> te té Pilatú ní dǎcǎcu-dé té Barrabás, te ní táuchíú<sup>n</sup>-dě ní cani-güedé Jèsús. Te sátá dúcá<sup>n</sup> ñí quide ñaha-güedě xii-gá, te ní táuchíú<sup>n</sup>-dě candeca ñaha-güedě xii-gá quíhí<sup>n</sup> cata caa ñaha-güedě xii-gá núú cùrúxí.

27 Te cue tée cùu sandadú té Pilatú ndécá-güedě Jèsús cuánguihu xiti vehe càhnu cuu cuendá-dé, te cue tée cùu sandadú-á<sup>n</sup> ñí cana-güedé dava-gá cue sandadú núú dúcá<sup>n</sup> ndèca-güedé Jèsús cuánguihu-á<sup>n</sup>.

28 Te xía<sup>n</sup> ñí taunuu-güedé dóó-gǎ, te ní dǎcuíhnú ñàha-güedé xii-gá ɨ̃n dóó tícuèhé víhí.

29 Te ní cadúha-güedé ɨ̃n coróná iñu ní chihi-güedé díquí-gǎ, te ní chitnii-güedé ɨ̃n carrutí ndaha cùha-gá, te ní ngüíñí xítí-güedé núú-gǎ cúdíquí ndeé ñáhá-güedé xii-gá, te xáhǎ<sup>n</sup>-güedě:

—¿Ío càhnu cuu yohó tée yìndaha ñàha xii ñáyiú isràél! —càchí-güedé xáhǎ<sup>n</sup>-güedé xii-gá.

30 Te ní tíú díí ñáhá-güedé xii-gá, te ní quehe<sup>n</sup>-güedé carrutí sá ñí sáñaha-güedé xii-gá te ní ducu<sup>n</sup>-güedé díquí-gǎ.

31 Te sáta nǐ yáha ní cudíquí ndeé ñáhá-güedě xii-gá, te ní nataunuu ñaha-güedě xii-gá dóo tícuèhé víhí sá nǐ dácúíhnú ñaha-güedé xii-gá, te ní dándǐúnuu ñaha-güedě xii-gá dóo méé-gǎ, te dǎtnúní ndécá ñaha-güedé cuáhá<sup>n</sup> núú catá càa ñaha-güedé xii-gá núú cùrúxí.

*Sàta caa-güedé Jèsús núú cùrúxí*  
(Mr. 15:21-32; Lc. 23:26-43; Jn. 19:17-27)

32 Te ñuhu-güedé ndihí-gá ichi, te ní naníhí-güedě ñ<sup>n</sup> tée ñúú Cirené nání-dě Xímú, te tée-á<sup>n</sup> nǐ quide yica-güedě ní xido-dé cùrúxí sá nchídó Jèsús.

33 Te ní sáa-güedé ndihí-gá ñ<sup>n</sup> xichi núú nání Gǒlgotá, te tnúhu-á<sup>n</sup> quée-xí: Núú nání yìquí díquí ndǐyi, duha quèe-xi tnúhu-á<sup>n</sup>.

34 Te xía<sup>n</sup> sǎñaha-güedě ndudí úa coho-gá ní cùu, te ñá túú ní xihí-gá chi dico-ní ní xito ndée-gá.

35 Te ní sata caa ñaha-güedě xii-gá núú cùrúxí, te sáta dúcá<sup>n</sup> te cue tée cùu sandadú-á<sup>n</sup> nǐ xito ndée-güedé ñúu ndédacàa-güedé cuu cuèndá-güedé dóo-gǎ. Te duca<sup>n</sup> nǐ cuu chi ní quee ndáa-xi nàcuáa ní cáhá<sup>n</sup> ñ<sup>n</sup> tée ní xóo cáhá<sup>n</sup> tnúhu Yá Ndiǒxí ndée sanaha yòdo tnuní núú tütú-gá, te duha càchí-xi: “Ní xito ndée-güedé ñúu ndédacàa-güedé cuu cuèndá-güedé dóo-gǎ”, duha ní cachí tée-á<sup>n</sup> te duca<sup>n</sup> nǐ ngódó tnuní núú tütú-gá.

36 Te sáta dúcá<sup>n</sup> nǐ quide-güedé, te ní ngóo-güedé ndée ñáhá-güedě xii-gá.

37 Te ní taxi ndecu-güedé ñ<sup>n</sup> sá ndée lètrá ndàa díquí-gǎ. Te lètrá-á<sup>n</sup> càhá<sup>n</sup>-xi ná cuèndá duca<sup>n</sup> nǐ quide ñaha-güedě xii-gá, te duha càhá<sup>n</sup> lètrá-á<sup>n</sup>: “Tée-a cùu-dé tée yìndaha ñaha xii ñáyiú isràél”, duha càchí-xi.

38 Te tnàhá úu cue tée cùu ñadúhú nǐ sata caa-güedé ñ<sup>n</sup> núú cùrúxí tucu, te ñ<sup>n</sup>-dé ní sata caa-güedé xio cùha-gá, te ingá-dé ní sata caa-güedé xio dǎtní-gá.

39 Te nchaa ñáyiú yáha yatni núú tǎcàa-gá-á<sup>n</sup>, te dàcuicó-yu díquí-yu ndèhe ñahá-yu xii-gá, te xǐcuèhé ñáhǎ-yu.

40 Te xǎhǎ<sup>n</sup>-yu xii-gá:

—Yòhó càchí-n sǎ dǎngoyo-n veñúhu càhnu sá ìo cùnuu, te dandàa-n ingá veñúhu saa, te xití úní-ni nduu sa nadaxǐnu-n, te vitna tanùu núú cùrúxí-á<sup>n</sup> dácácu-n mèe-n te núu ndisa sá Dèhe Yá Ndiǒxí cúu-n —càchí-yu xǎhǎ<sup>n</sup>-yu xii-gá.

41 Te ñ<sup>n</sup>-ni duca<sup>n</sup> cùdíquí ndeé ñáhá cuè tée cùu dútú cùnùu xii-gá, ndihí cue tée dàcuaha ñaha xii ñáyiú nchaa tnúhu ní chídó tnuní ndí Moisés, ndihí cue tée cùu fariséú, ndihí cue tée cùu sacuéhé núú ñáyiú isràél, te xǐtnàha-güedé:

42 —Tée-a ní ndacu-dé ní dácácu-dé dava ñáyiú, te mee-dé ñá ndácú-dé dácácu nihnu-dé méé-dě. Te núu ndisa sá cúu-dé tée yìndaha ñaha xii ñáyiú isràél, te na cùndehe-o nuu-dé núú cùrúxí-a cuèndá quíndáa iní-ó-dě.

43 Te càchí-dé sá sàndáa iní-dé Yá Ndiǒxí, te mee-gǎ ná dácácu ñaha-gǎ xii-dé te núu cùndahú iní ñáhá-gǎ, chi mee-dé càchí-dé sá Dèhe-gá cúu-dé —càchí-güedé xǐtnàha-güedé.

44 Te ndée tnàhá cue tée cùu ñadúhú tǎcàa xio xio ñ<sup>n</sup>-gá xǐcuèhé ñáhá-güedě xii-gá.

*Ní xihí Jèsús*

(Mr. 15:33-41; Lc. 23:44-49; Jn. 19:28-30)

45 Te òré ní cuu cuádava nduu te ní cunee ñihí ñuyú, te duca<sup>n</sup>-ni càa ní cuu caá úní sacuaa.

46 Te òré sa ta cùyatni cuu caá úní sacuaa-á<sup>n</sup>, te níhi ní cáhá<sup>n</sup> Jèsús, te càchí-gá:

—Èlí, Èlí, ¿láma sabàctaní? —càchí-gá.

Te tnúhu-á<sup>n</sup> quée-xí: Ndiǒxí mèe-í, Ndiǒxí mèe-í, ¿ná cuèndá ní dáñá ñaha-n xii-í?, duha quèe-xi tnúhu-á<sup>n</sup>.

47 Te dava cue tée xǐndecu yatni núú tǎcàa-gá-á<sup>n</sup> nǐ tecú dóho-güedé nàcuáa ní cáhá<sup>n</sup>-gá, te ní xǐtnàha-güedé:

—Tée-a càna-dé té Èliás —càchí-güedé xǐtnàha-güedé.

48 Te òré-ni-á<sup>n</sup> nǐ quene cunu ñ<sup>n</sup> cue tée xǐndecu-á<sup>n</sup> nǐ quehe<sup>n</sup>-dé luha cáchí, te ní chindóyo-dé xití ndudí ía, te ní

chinenu-dé díquí ñ<sup>n</sup> yutnu càni te ní ndocani-dé ní chihi-dé yuhu-gá.

49 Te dava-güedé ní xáha<sup>n</sup>-güedě xii téé-á<sup>n</sup>:

—Cundetú tnaa na cundehe-o nacoto núu quixi té Eliás dàcácu ñaha-dě xii-dé —càchí-güedé xáha<sup>n</sup>-güedě xii téé-á<sup>n</sup>.

50 Te Jèsús níhi ní cana saa-gá, te ní xíhí-ni-gá.

51 Te sátá dúcá<sup>n</sup> te ní ndátá dǒó cúu còrtiná xití veñúhu càhnu sá ïo cùnnu ní quée dava ndáá, te ndàa núu ñnu ní ngúita-xi ní ndátá, te ní tnáa, te dava cava nàhnu ní táhú.

52 Te dava yaú núu yíndǔxi ñáyiu ní xíhí ní sándáá iní ñáhá xii Yá Ndiǒxí ní nacaá<sup>n</sup> te ní ndotó-yu.

53 Te sátá ñí yáha ní ndoto Jèsús, te cue ñáyiu ní ndoto-á<sup>n</sup> cuãnguihú-yu xití ñuu Jerusálén, te cue ñáyiu ñuu-á<sup>n</sup> ïo vâi-yu ní xiní-yu cue ñáyiu duca<sup>n</sup> ní ndoto-á<sup>n</sup>.

54 Te sá dúcá<sup>n</sup> nãndi ní quide-xi, ndihi sá dúcá<sup>n</sup> ñí tnáa xíá<sup>n</sup> ïo ní yuhú téé cùu capitá<sup>n</sup> ndihi nchaa dava-gá cue téé ndècu ndihi-dé ndèé-güedé yiqui cùñú Jèsús, te ní xítnàha-güedé:

—Sá ndáá ndisa sá díú tée-a cùu-dé Déhe Yá Ndiǒxí ní cùu —cachí-güedé xítnàha-güedé.

55 Te xica xínutní vâi ñáyiu ñíhí ndéhě-yu nchaa nàcuáa ní quide ñaha-güedě xii Jèsús, te ñáyiu-á<sup>n</sup> cúu-yu ñáyiu ní chindèé-yu Jèsús, te ndéé distritú Galileá ní chinchícú<sup>n</sup> ñáhá-yu xii-gá.

56 Te tnuú ñáyiu-á<sup>n</sup> tnàhá tá Màriá Magdaléná, ndihi tá Màriá nãná tē Jàcobó ndihi té Chèé, ndihi nãná cue déhe té Zebèdeú.

### *Chìndúxi-güedé Jèsús*

(Mr. 15:42-47; Lc. 23:50-56; Jn. 19:38-42)

57 Te ndècu ñ<sup>n</sup> téé cuica nàni-dé Chèé te cùu-dé téé ñuu Arimateá, te tnàhá-dé ní tnàhá tnúhu-dé ndihi Jèsús. Te òré sa ní cuaa,

58 te ní sáha<sup>n</sup>-dé núu tē Pilatú, te xáha<sup>n</sup>-dē ñuu vá cùndèe iní-dé dañá-dé chindúxi-dé yiqui cùñú Jèsús. Te té Pilatú-á<sup>n</sup> ñí sáha-dé tnúhu, te ní

taúchíú<sup>n</sup>-dē sá cuãha cuendá-güedé té Chèé-á<sup>n</sup> yiqui cùñú-gá.

59 Te té Chèé-á<sup>n</sup> ñí quehe<sup>n</sup> cuendá-dé yiqui cùñú-gá, te ní chidúcú<sup>n</sup>nuu-dé ñ<sup>n</sup> dǒó cuixí<sup>n</sup> dǒó cándòo.

60 Te sa nchii ñ<sup>n</sup> yaú sáá ñí caá<sup>n</sup> té Chèé-á<sup>n</sup> ñ<sup>n</sup> yiqui naha càva te xíá<sup>n</sup> cúu cuendá-dé, te yaú-á<sup>n</sup> ñí chihi-dé yiqui cùñú Jèsús, te dàtnùní ní sadí-dé ñ<sup>n</sup> yúu cáhnú yúu quèhè<sup>n</sup> yuhu yaú-á<sup>n</sup>, te ní xica-dé cuánuhú-dé.

61 Te tnàhá tá Màriá Magdaléná, ndihi ñngá xíchí nání Màriá ní quexió-yu ní ngóo-yu yatni núu nchii yaú-á<sup>n</sup>.

### *Cue téé ndèé yaú núu yíhí yiqui cùñú Jèsús*

62 Te sátá ñí yáha ní quide túha ñáyiu nchaa sá nándíhi-yu nduu tnèé nduu ndètatú-yu-á<sup>n</sup>, te ñu-ni nduu ndètatú-yu-á<sup>n</sup> ñí sáha<sup>n</sup> cue dútú cùnùu, ndihi cue téé cùu fariséu ní cáhá<sup>n</sup> ndihi-güedé té Pilatú.

63 Te xáha<sup>n</sup>-güedě xii-dé:

—Yòhó téé cùnnu, véxi-ndí càchí tnúhu-ndí sá ñí ndacu iní-ndí sá tée ndehnde ñí xíhí-á<sup>n</sup> càchí-dé òré ndécú-gá-dé sá ndùu úní sá cùu-dé, te ndoto-dé.

64 Te tendaha-n cuè téé na quíhí<sup>n</sup>-güedé cundeé-güedé yuhu yaú núu ñí chihi-güedé yiqui cùñú-dé, chi na cuáhá<sup>n</sup> quíhí<sup>n</sup> cue téé ní xica cuu ndihi-dé duhu-güedě yiqui cùñú-dé, te cùñaha-güedě xii ñáyiu sá ñí ndoto-dé. Chí núu duca<sup>n</sup> na càda-güedé te ïo-gá dandàhú-güedé cue ñáyiu dàcúúxí dàtná ní quide mee tée ní xíhí-á<sup>n</sup> —cachí-güedé xáha<sup>n</sup>-güedě.

65 Te té Pilatú ní xáha<sup>n</sup>-dē xii-güedé:

—Náu cue sandàdú-a candeca-ndo-güedě quíhí<sup>n</sup>, te cadí váha-ndo ndihi-güedé yuhu yaú-á<sup>n</sup> nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xáha<sup>n</sup>-dē xii-güedé.

66 Te cue téé-á<sup>n</sup> ñí xica-güedé cuáhá<sup>n</sup>-güedé, te ní tee-güedé ñ<sup>n</sup> sèñá yúu ndèdí yèhe yaú-á<sup>n</sup>, te ní dándòo-güedé cue sandàdú-á<sup>n</sup>

ndèé-güedé yaú-án, te duca<sup>n</sup> nĩ quide-güedé cuendá sá vǎ yõo quihí<sup>n</sup> nacaá<sup>n</sup> yaú-án.

## 28

### *Ní ndoto Jèsús*

(Mr. 16:1-8; Lc. 24:1-12; Jn. 20:1-10)

<sup>1</sup> Te sátá nĩ yáha nduu ndètatú ñáyiú, te ndumìngú nehé víhí-ní nĩ xica tá Màriá Magdalèná ndihí ingá xíchí nání Màriá cuángotó-yu yaú núú nĩ chihí-güedé yiqui cuñú Jèsús.

<sup>2</sup> Te uu<sup>n</sup>ni níhi víhi ní tnáa, te òré duca<sup>n</sup> nĩ quide-xi chí ì<sup>n</sup> espíritú xínú cuèchi núú Yǎ Ndiõxí ní quexìo-xi núú dúcá<sup>n</sup> nchìi yaú núú nĩ chihí-güedé yiqui cuñú Jèsús, te ní xócání espíritú-án yũú ndedí yèhe yaú-án te ní ngóo-xi núú yũú-ǎ<sup>n</sup>.

<sup>3</sup> Te dátá dátsa<sup>n</sup>-xi òré sàá nduté dùca<sup>n</sup> datása<sup>n</sup>-xi núú espíritú-án, te dóo níhnú-xí cuixí<sup>n</sup> quiyí.

<sup>4</sup> Te òré duca<sup>n</sup> nĩ quide-xi te cue sandàdú ndèé yaú-án nĩ quidi ñaha-xi xii-güedé sá nĩ yùhú-güedé, te ní nduá-güedé, te ní xíta sá xìnì tnùnì-güedé.

<sup>5</sup> Te espíritú-án nĩ xáha<sup>n</sup>-xi xii cue ñáyiú dìhí cuángoto yaú-án:

—Nchòhó ñáyiú dìhí véxi coto yaú-a, vǎ yùhú-ndó chí yùhú cútnùnì iní-í sá nchòhó véxi-ndo nànducu-ndo yiqui cuñú Jèsús Yaá ní xihí núú cùrúxí.

<sup>6</sup> Dico Yaá-án chí ñá túú-gǎ ndécú yiqui cuñú-gǎ iha, chí sa ní ndoto-gǎ, te ñu duca<sup>n</sup> nĩ cachí-gǎ sá ndótó-gǎ cútnàhá vátá cùú-gǎ, te chí táquixi cundehe-ndo núú nĩ sacá<sup>n</sup>-güedé yiqui cuñú-gǎ ní cùu te quiní-ndó ñá túú-gǎ.

<sup>7</sup> Te vitna ío ndihí chí cuahá<sup>n</sup> núú xĩndecu cue téé ní xica cuu ndihí-gǎ, te duha cúñaha-ndo xii-güedé: “Ní ndoto Jèsús Yaá ní xihí ní cùu, te codonuu-gǎ núú-ndó quihí<sup>n</sup> distritú Galileá te yacá<sup>n</sup> quiní-ndó-gǎ”, duha cúñaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-án xáha<sup>n</sup>-xi xii cue ñáyiú dìhí-án.

<sup>8</sup> Te cue ñáyiú dìhí-án nĩ natnii-yu ichi, te súuní ndihí cuánuhú-yu núú xĩndecu cue téé ní xica cuu ndihí Jèsús cuendá nacani tnúhu-yu núú-güedé nàcuáa ní xáha<sup>n</sup> espíritú-án xii-yu, te cuèi ní yùhú-yu dico súuní cùdìí iní-yu.

<sup>9</sup> Te ichi ñùhú-yu cuánuhú-yu, te na iní-yu ní quexìo Jèsús núú-yu ní dándácõo váha ñaha-gǎ xii-yu. Te ñáyiú-án nĩ ngüíñí xiti-yu núú-gǎ, te ní numi ñàhá-yu xii-gǎ, te ní chiñuhu ñàhá-yu.

<sup>10</sup> Te ní xáha<sup>n</sup>-gǎ xii-yu:

—Vǎ yùhú-ndó, chí cuahá<sup>n</sup> cúñaha-ndo xii cue téé ní xica cuu ndihí-í sá ná quihí<sup>n</sup>-güedé distritú Galileá, te yacá<sup>n</sup> quiní ñàhá-güedé xii-í —càchí-gǎ xáha<sup>n</sup>-gǎ xii-yu.

*Nàcuáa ndùu tnúhu ní nacani cue sandàdú*

<sup>11</sup> Te nini ñùhu cue ñáyiú dìhí-án ichi cuánuhú-yu, te dava cue sandàdú cue téé ndèé yaú-án ní cùu ní xica-güedé cuánuhú-güedé ñuú cuendá nacani tnúhu-güedé núú cuè téé cùu dútú cùnùu nàcuáa ní cuu.

<sup>12</sup> Te cue téé cùu dútú cùnùu-án nĩ quide-güedé jùndá ndihí cue téé cùu sacuéhé núú ñáyiú israhél, te ní ndatnúhu-güedé nàcuáa cada-güedé, te ní quide ndáá-güedé ndihí cue sandàdú-án sǎ cuñaha-güedé vǎi díhú<sup>n</sup> cuendá dacuàndehnde-güedé.

<sup>13</sup> Te ní xáha<sup>n</sup>-güedé xii cue sandàdú-án:

—Cuñí-ndí sá vǎ càhá<sup>n</sup> ndáá-ndó núú ñáyiú nàcuáa ní cuu, chí cúñaha-ndo xii-yu sá òré xidí-ndó nĩ quixi cue téé ní xica cuu ndihí-dé ní dúhú-güedé yiqui cuñú-dé nehé-güedé cuahá<sup>n</sup>, duha cúñaha-ndo xii-yu.

<sup>14</sup> Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndihí-dé cuendá sá ñá túú ñá cada ñaha-dé xii-ndo —càchí-güedé xáha<sup>n</sup>-güedé xii cue sandàdú-án.

<sup>15</sup> Te cue sandàdú-án nĩ quehe<sup>n</sup> cuendá-güedé díhú<sup>n</sup>, te ní xica-güedé cuahá<sup>n</sup>-güedé te ní càhá<sup>n</sup>-güedé

nàcuáa ní xáha<sup>n</sup> cuè téé-á<sup>n</sup> cǎhá<sup>n</sup>-güedé.  
Te nchaa ñáyiú isràél ní níhǐ-yu tnúhu  
ní cǎhá<sup>n</sup>-güedé-á<sup>n</sup>, te diu-ni tnúhu-á<sup>n</sup>  
cǎhá<sup>n</sup>-yu ndéé vitna.

*Jèsús xǎha<sup>n</sup>-gǎ xii cue téé ní xica cuu  
ndihǐ-gǎ nàcuáa ndiú chiu<sup>n</sup> cada-güedé  
(Mr. 16:14-18; Lc. 24:36-49; Jn.  
20:19-23)*

<sup>16</sup> Te ndi úxí ñ<sup>n</sup> cue téé ní  
xica cuu ndihǐ Jèsús ní xica-güedé  
cuáhá<sup>n</sup>-güedé ñ<sup>n</sup> yucu càa distritú  
Galileá núú ñǐ xáha<sup>n</sup>-gǎ naníhǐ  
tnáhá-güedé ndihǐ-gǎ.

<sup>17</sup> Te òré ní xiní-güedé Jèsús te  
ní chiñuhu ñaha-güedé xii-gǎ, dico  
dava-güedé sàni ñ<sup>n</sup> sani úú iní-güedé  
nũu diu-gǎ àdi ñá díú-gǎ.

<sup>18</sup> Te Jèsús ní sǎndehe yatni-gǎ ndéé  
núú-güedé, te ní xáha<sup>n</sup>-gǎ xii-güedé:

—Yúhú ndécú ndihǐ-í tnúhu ndee ìní  
tǎxí tnùnǐ-í cuèi andiú te cuèi ñuyíú-a.

<sup>19</sup> Te vitna tàuchiu<sup>n</sup>-í sǎ quihǐ<sup>n</sup>-ndó  
nèhǐ ñuyíú cǎhá<sup>n</sup>-ndó tnũhu-í núú  
ñáyiú cuèndá tuha ñàhá-yu xii-í, te  
dacuàndute-ndó-yu. Te òré duca<sup>n</sup>  
càda-ndo, te cacunehe-ndo tǎtá-ó  
Dútú Ndiöxí ndihǐ yúhú Yaá cúú  
Déhe-gǎ ndihǐ Espiritú-gǎ.

<sup>20</sup> Te cúñaha-ndo xii-yu sǎ ná  
càdá-yu nchaa nàcuáa sa ní dánèhé  
ñàhá-í xii-ndo càda-ndo. Te na cǎchǐ  
tnúhu-í sǎ cùndècu ndihǐ ñaha-ni-í  
xii-ndo ñuyíú-a ndéé ná sǎá nduu  
nàa-xi —cachǐ-gǎ xǎha<sup>n</sup>-gǎ xii-güedé.  
Te duca<sup>n</sup> na cùnduu.

## TNÚHU NÍ CHÍDÓ TNUNÍ TÈ MÀCÚ

*Té Juàá téè dàcuandute ñaha xii ñáyi*  
*càhá<sup>n</sup>-dé tnúhu Yá Ndiõxí xití yucu*  
(Mt. 3:1-12; Lc. 3:1-9, 15-17; Jn.  
1:19-28)

<sup>1</sup> Duha ní quesaha tnúhu sá càhá<sup>n</sup>  
nàcuáa naníhí tãhú-ó tnúhu Xítohó Je-  
sucristú Déhe Yá Ndiõxí.

<sup>2</sup> Te ndii Chàíá téè ní xóo càhá<sup>n</sup>  
tnúhu Yá Ndiõxí ndéé sanaha ní chídó  
tnuní ndii nàcuáa ní xáha<sup>n</sup> Yá Ndiõxí  
xii Déhe-gá, te duha ní xáha<sup>n</sup>-gã:  
Tendaha-í ñ<sup>n</sup> téè codonúu-dé núú-n,  
te dàtúha-dé ñáyi cuèndá tñi<sup>n</sup>-yu  
tnúhu-n.

<sup>3</sup> Te téè-á<sup>n</sup> quihi-dé xití yucu te níhi  
càhá<sup>n</sup>-dé cúñaha-dě xii ñáyi:  
“Chí dáñá nchàa ichi cuehé ichi duha  
ndècu-ndo, te tñi<sup>n</sup>-ndo ichi  
váha, te duca<sup>n</sup> càda-ndo cuendá  
cundecu túha-ndo, chi véxi  
Yaá ío cùnuu”, duha cúñaha-dě  
xií-yu.

Duha nduu tnúhu ní chídó tnuní ndii  
Chàíá nàcuáa ní xáha<sup>n</sup> Yá Ndiõxí xii  
Déhe-gá.

<sup>4</sup> Te téè dii cuèndá-xi ní ngódó tnuní-á<sup>n</sup>  
nání-dě Juàá, te téè-á<sup>n</sup> ní xíhi-dé xití  
yucu ní càhá<sup>n</sup>-dé tnúhu Yá Ndiõxí, te  
ní xóo dacuandute-dé ñáyi, te duha ní  
xáha<sup>n</sup>-dě xií-yu:

—Chí dándixi túu iní sá ñà túú quide  
váha-ndo ndècu-ndo, te dañà-ndo  
nchàa ichi cuehé ichi duha te cuan-  
dute-ndo, te duca<sup>n</sup> te Yá Ndiõxí cada  
càhnu iní-gá nchaa yíca cuèchi-ndo —  
duha ní xáha<sup>n</sup>-dě xií-yu.

<sup>5</sup> Te nchaa ñáyi distritú Jùdeá,  
ndihi ñáyi ñuu Jerusálén ní sáhá<sup>n</sup>-yu  
ndéé yúte Jòrdán núú ndécú tē Juàá  
ní xíndedóho-yu nchaa tnúhu ní  
càhá<sup>n</sup>-dé. Te cue ñáyi ní náhmá  
nchaa yíca cuèchi-xi te ní dácúandute  
ñaha-dé xií-yu.

<sup>6</sup> Te té Juàá-á<sup>n</sup> ñí xíhnu-dé dóo idi  
cáméyu, te ñ<sup>n</sup> ñ<sup>n</sup> ní cuu pãñú xití-dé,  
te ní xóo caxi-dé tíca làngóstá ndihi  
ndudí ñúñú cuéchi.

<sup>7</sup> Te ní xáha<sup>n</sup> tùcu-dé xii ñáyi:

—Nchícú<sup>n</sup> ñ<sup>n</sup> téè véxi, te téè-á<sup>n</sup> ño-gá  
cúnúu-dé dàcúxí yúhú, chi yúhú  
cúu-í ñ<sup>n</sup> téè duu<sup>n</sup> duu<sup>n</sup> ñà túú tàú-í  
ngúnundeyi-í nandaxi cuèdicó ñ<sup>n</sup> ni-  
hnu chàú-dé dico quide-í chiú<sup>n</sup>-dé.

<sup>8</sup> Te yúhú dácúandute ñaha-í xii-ndo,  
dico mee-dě taxi-dé Espiritú Yá  
Ndiõxí cundecu ndihi-ndo —càchí-dé  
xáha<sup>n</sup>-dě xií-yu.

*Sàndute Jesús*

(Mt. 3:13-17; Lc. 3:21-22)

<sup>9</sup> Te dàvá-á<sup>n</sup> ñí quee Jèsús ñuu  
Nazàrét ñ<sup>n</sup> ñuu yíndèhu distritú  
Galileá cuáhá<sup>n</sup>-gá yúte Jòrdán. Te  
yàcá<sup>n</sup> ní dácúandute ñaha té Juàá  
xii-gá.

<sup>10</sup> Te òré ní nene-gá xití ndute,  
te ní xiní-gá nchí andi, te ní  
quee Espiritú Yá Ndiõxí véxi cuu<sup>n</sup>-xi  
ngúndecu ndihi ñaha-xi xii-gá, te  
dàtná cáá ñ<sup>n</sup> lómá cáá Espiritú-á<sup>n</sup> véxi  
cuu<sup>n</sup>-xi.

<sup>11</sup> Te òré-á<sup>n</sup> ñí tecú ní càhá<sup>n</sup> Yá  
Ndiõxí ndéé andi, te xáha<sup>n</sup>-gã xii  
Jèsús:

—Yòhó cúu-n Déhe-í téè ío cùu iní-í  
te ío cùdí iní ñáhà-í xii-n —càchí-gá  
xáha<sup>n</sup>-gã.

*Sácuñhá quidé yíca-xi cada Jesús sá  
ñà túú tàú-gá cada-gá dico ñà túú ní  
quide-gá*

(Mt. 4:1-11; Lc. 4:1-13)

<sup>12</sup> Te Espiritú Yá Ndiõxí ndécá-xí  
Jèsús cuáhá<sup>n</sup> ñ<sup>n</sup> xití yucu.

<sup>13</sup> Te xití yucu-á<sup>n</sup> ío víhí quiti déé<sup>n</sup>,  
te xíá<sup>n</sup> ndécú Jèsús ní ngúita sácuñhá  
quidé yíca-xi cada-gá ñ<sup>n</sup> sá ñà túú  
tàú-gá cada-gá dico ñà túú ní sàndáá  
iní-gá. Te cue espíritú xínú cuèchi  
núú Yá Ndiõxí ní xinú cuechi-xi  
núú-gã. Te ní xíndecu-gá údico nduu  
xití yucu-á<sup>n</sup>.

*Distritú Galileá ní chisaha Jèsús  
chiú<sup>n</sup> ní táhú Tãtã-gã Dútú Ndiõxí  
cada-gá*

(Mt. 4:12-17; Lc. 4:14-15)

<sup>14</sup> Te sátá ñí ngava té Juàá ve-  
caá, te Jèsús cuáhá<sup>n</sup>-gá distritú Galileá  
dànehé-gá ñáyi tnúhu váha, tnúhu sá

càhá<sup>n</sup> nàcuáa ndíhu ndaha ñaha Yá Ndióxi xii-yu.

15 Te xáha<sup>n</sup>-gã xii-yu:

—Vitna sa ní cuyatni nduu ndíhu ndaha ñaha Yá Ndióxi xii-ndo, te chí dáña nchaa ichi cuehé ichi duha ndècu-ndo, te quindáá iní-ndó tnúhu váha, tnúhu sá càhá<sup>n</sup> nàcuáa naníhi tãhú-ndó —càchí-gã xáha<sup>n</sup>-gã xii-yu.

*Jèsús càhá<sup>n</sup>-gã cúmi tnàhá cue té tñi chácá*

(Mt. 4:18-22; Lc. 5:1-11)

16 Te Jèsús ñúhú-gã ichi cuáhá<sup>n</sup>-gã tá yáha-gã yuhu làgúná Galileá, te ní xiní-gã té Xímú ndíhi ñaní-dé té Ndríxi xídáquëe-güedé ñunu-güedé xití ndute tñi-güedé chácá, chi quití tnàhí-á<sup>n</sup> cúu chiu<sup>n</sup>-güedé tñi-güedé-di.

17 Te Jèsús ní xáha<sup>n</sup>-gã xii-güedé:

—Chí dáña chiu<sup>n</sup> quide-ndo-á<sup>n</sup>, te quixi-ndo chitnahá ñáhá-ndó xii-í te taxi-í ingá núu chiu<sup>n</sup> cada-ndo chi quíhí<sup>n</sup>-ndó cãhá<sup>n</sup>-ndó ñáyiu cuendá dacuàhá-yu tnúhu-í —càchí-gã xáha<sup>n</sup>-gã xii-güedé.

18 Te òré-ni-á<sup>n</sup> ñí dáña cuè téé-á<sup>n</sup> ñunu-güedé te ní tuha ñaha-güedé xii-gã.

19 Te cuáhá<sup>n</sup>-gã luha-gã, te ní xiní-gã té Jàcobó ndíhi ñaní-dé té Juáá ñúhú-güedé xití bàrcú-güedé nátícu-güedé ñunu-güedé, te ndi ndúú-güedé cúu-güedé déhe té Zebèdeú.

20 Te ní cana ñaha-gã xii-güedé, te ní dándõ-güedé tãtá-güedé ndíhi cue téé xinu cuechi núu-güedé xití bàrcú, te ní tuha ñaha-güedé xii-gã.

*Hi<sup>n</sup> téé yíhi ñaha espíritú cündíhi yucu ñávãha*

(Lc. 4:31-37)

21 Te ní quexio Jesús ndíhi cue téé-á<sup>n</sup> hi<sup>n</sup> ñúu nání Càpernaúm, te yacá<sup>n</sup> ndécú-gã ní tnahá nduu ndétatú ñáyiu, te cuánguihu-gã veñúhu ñáyiu isràél dānehé ñáhá-gã xii-yu.

22 Te xicuñúhu vñí-yu nchaa tnúhu càhá<sup>n</sup>-gã, chi quide-gã sá cúu-gã hi<sup>n</sup> Yaá táxi tnúni víhí, te ñá túú dàcuaha ñaha-gã xii-yu dàtná dácuàha ñaha cue

tée dàcuaha ñaha xii-yu nchaa tnúhu ní chídó tnúni ndí Moisés.

23 Te xití veñúhu-á<sup>n</sup> ndécú tnàhá hi<sup>n</sup> téé yíhi ñaha hi<sup>n</sup> espíritú cündíhi yucu ñávãha, te espíritú-á<sup>n</sup> ñí quide-xi níhi ní càhá<sup>n</sup> téé-á<sup>n</sup>, te xáha<sup>n</sup>-dē xii Jèsús:

24 —¿Te ná cuini yòhó Jèsús téé ñúu Nazàrét cada ñaha-n xii-ndí núu véxi-n núu ndécú-ndí-i? ¿Á<sup>n</sup> véxi-n dànaa ñaha-n xii-ndí? Chi yúhú xini ñáhá-í xii-n sã cúu-n hi<sup>n</sup> téé ñá túú tnàhí cuéchi-xi, chi núu Yá Ndióxi ní quee-n véxi-n ñuyú-a —càchí-dé xáha<sup>n</sup>-dē xii-gã.

25 Dico Jèsús ní tenáá-gã espíritú cündíhi yucu ñávãha-á<sup>n</sup>, te xáha<sup>n</sup>-gã:

—¿Cadí yuhu-n, te taquëe yiqui cuñú téé-á<sup>n</sup>! —càchí-gã xáha<sup>n</sup>-gã xii espíritú-á<sup>n</sup>.

26 Te espíritú cündíhi yucu ñávãha-á<sup>n</sup> ñí dácuyíhí ñáhá-xi xii téé-á<sup>n</sup>, te ní dácáná sàa ñaha-xi, te ní quee-xi yiqui cuñú-dé cuáhá<sup>n</sup>-xi.

27 Te nchaa ñáyiu xīndecu-á<sup>n</sup> ño ní cuñúhu-yu, te ní xitnahá-yu:

—¿Te nása nduu-tu sá quidé tēe-a? ¿Ndudú sáá càhá<sup>n</sup>-tu-dé sánuu? Te quide-dé dàtná quidé hi<sup>n</sup> téé cūnuu vihi, chi càhá<sup>n</sup>-ni-dé te sàndáá iní ñáhá nchaa espíritú cündíhi yucu ñávãha —càchí-yu xitnahá-yu.

28 Te ío ndíhi ní níhi nchaa ñáyiu dava-gã ñúu yíndèhu distritú Galileá tnúhu nchaa nàcuáa càhá<sup>n</sup> Jèsús ndíhi nchaa sá quidé-gã.

*Jèsús quidé tãtna-gã nãná ñadíhi té Xímú*

(Mt. 8:14-15; Lc. 4:38-39)

29 Te òré ní ndee Jèsús veñúhu cue ñáyiu isràél, te cuáhá<sup>n</sup>-gã ndíhi té Jàcobó ndíhi té Juáá vehe té Xímú ndíhi té Ndríxi.

30 Te nãná ñadíhi té Xímú cùhú-a<sup>n</sup> ñúhu vihi-a<sup>n</sup> cahni, te ndíhi-ni ní xáha<sup>n</sup>-güedé xii Jèsús sá cùhú-a<sup>n</sup>.

31 Te ní sáhá<sup>n</sup>-gã núu cáá ñaha cùhú-á<sup>n</sup> te ní tñi-gã ndaha-a<sup>n</sup> ní ndo-cani ñaha-gã xii-a<sup>n</sup>. Te òré-ni-á<sup>n</sup> ñí nchíco-a<sup>n</sup> cahni, te ní ngúíta-a<sup>n</sup> xinu cuechi-a<sup>n</sup> núu-güedé ndíhi-gã.



*Jèsús quidé tātna-gá vại ñáyiú cùhú*  
(Mt. 8:16-17; Lc. 4:40-41)

<sup>32</sup> Te òré sa cuení-xi cundiqui<sup>n</sup> te ní quexìo ñáyiú núú ndécú Jèsús, te nchaa ñáyiú cùhú ní dátacá-yu ndecá-yu ní sáá núú-gă, te tnahá cue ñáyiú yìhi ñaha espíritú cundìhi yucu ñávãha ndecá-yu ní sáá núú-gă.

<sup>33</sup> Te nchaa ñáyiú ñuú-á<sup>n</sup> ñi chítú níhnũ-yu yuyèhe vehe núú ñi quexìo Jèsús.

<sup>34</sup> Te Jèsús ní quide tātna-gá nchaa ñáyiú cùhú cuéi ndi díí<sup>n</sup> ndi díí<sup>n</sup> núú cuéhé tnahá-yu ñi ñi<sup>n</sup>-yu, te ní queñuhu-gá nchaa espíritú cundìhi yucu ñávãha yìhi ñaha xii ñáyiú, te ñá túú ní dàña-gá cáhá<sup>n</sup> cue espíritú cundìhi yucu ñávãha-á<sup>n</sup> ñi ñi<sup>n</sup> tnúhu, te duca<sup>n</sup> ñi quide-gá chi cue espíritú-á<sup>n</sup> sa xini-xi yoo cùu-gá.

*Jèsús càhá<sup>n</sup>-gá tnúhu Yá Ndiõxí distritú Galileá*  
(Lc. 4:42-44)

<sup>35</sup> Te òré vátá tũndaá váha-gá ní ndacóo Jèsús cuáhá<sup>n</sup>-gá ñi xio yuhu ñuú núú ña túú ñáyiú ndecu cuendá yacá<sup>n</sup> cáhá<sup>n</sup> ndihi-gá Yá Ndiõxí.

<sup>36</sup> Te té Xímú ndihi cue té cundìhi-dé nándücu ñaha-güedé xii-gá.

<sup>37</sup> Te òré ní naníhí ñáhá-güedé xii-gá, te ní xáha<sup>n</sup>-güedé:

—Nchaa ñáyiú nanducu ñahá-yu xii-n —càchí-güedé xáha<sup>n</sup>-güedé xii-gá.

<sup>38</sup> Te ní xáha<sup>n</sup>-gá xii-güedé:

—Chí ná quíhí<sup>n</sup>-ó nchaa ñuú xĩndáa yatni-a, chí danèhé-í ñáyiú tnúhu Yá Ndiõxí chi ñi chiu-á<sup>n</sup> vèxi-í —càchí-gá xáha<sup>n</sup>-gá xii-güedé.

<sup>39</sup> Te Jèsús tá xica ndodo-gá cuáhá<sup>n</sup> nchaa ñuú yĩndèhu distritú Galileá dánèhé-gá ñáyiú, te ndi tnahá ñi ñi<sup>n</sup> ñuú sàá-gá te duca<sup>n</sup> cuãnguìhu-gá veñúhu-yu dànehé ñáhá-gá xií-yu tnúhu Yá Ndiõxí, te cue ñáyiú yìhi ñaha espíritú cundìhi yucu ñávãha ta queñuhu-gá nchaa espíritú-á<sup>n</sup> yiqui cùñú-yu cuáhá<sup>n</sup>.

*Jèsús quidé tātna-gá ñi té tnahá cuéhé sã dátèhyú nihnu-xi yiqui cùñú-ó*  
(Mt. 8:1-4; Lc. 5:12-16)

<sup>40</sup> Te ní quexìo ñi té tnahá cuéhé sã dátèhyú nihnu-xi yiqui cùñú-ó núú Jèsús, te ní ngüíñi xítí-dé núú-gă cáhá<sup>n</sup> ndàhú-dé, te xáha<sup>n</sup>-dè xii-gá:

—Vèxi-í cáhá<sup>n</sup> ndàhú-í núú-n núú vá cundèe ini-n càda tātna ñaha-n xii-í chí cùtnuní ini-í sã ndácú-n —càchí-dé xáha<sup>n</sup>-dè xii-gá.

<sup>41</sup> Te Jèsús ní cundàhú ini ñáhá-gă xii-dé te ní dácàá-gá ndaha-gá ní tendaha ñaha-gá xii-dé, te xáha<sup>n</sup>-gă:

—Cuu cada tātna ñaha-í xii-n, te vitna ndúha-n —càchí-gá xáha<sup>n</sup>-gă xii-dé.

<sup>42</sup> Te òré-ni-á<sup>n</sup> ñi xócuíñi cuéhé tnahá-dé.

<sup>43-44</sup> Te Jèsús ní cáhá<sup>n</sup> víhí-gă dóho-dé, te xáha<sup>n</sup>-gă xii-dé:

—Vitna cuanùhú-na, dico vá yõ ñi cùñaha-n sã ní quide tātna ñaha-í xii-n, te núú dütú-ñi cuáhá<sup>n</sup> cuendá sã ná quini ñáhá-dé xii-n sã ní ndúha-n te cuáha-n-dé sã ndúú tãhú Yá Ndiõxí dàtná ní cachí ndi Moisés cuendá ná quini ñáyiú sã ndàá ní ndúha-n —càchí-gá xáha<sup>n</sup>-gă xii-dé.

<sup>45</sup> Te té ní cuhú-á<sup>n</sup> ñi xica-dé cuáhá<sup>n</sup>-dé, te ní ngüíta-dé xáha<sup>n</sup>-dè xii nchaa ñáyiú ta naníhí-dé nacuáa ní quide Jèsús ní quide tātna ñaha-gă xii-dé. Te sã dúcá<sup>n</sup> ñi xité nuu té-á<sup>n</sup> cuendú nacuáa ní quide ñaha Jèsús xii-dé ní quide tātna ñaha-gă ní ndúha-dé, te xiá<sup>n</sup> núu dayuhu ñi xóo quíhu-gá dava ñuú núú ño vại ñáyiú ndèhe ñaha xii-gá, te ní xóo cundecu-gá xítí yucu núú ña túú ñáyiú ndecu. Te nchaa ñuú ní quee ñáyiú ní sáhá<sup>n</sup>-yu núú ndécú-gă ní cáhá<sup>n</sup> ndihi ñáhá-yu xii-gá.

## 2

*Jèsús quidé tātna-gá ñi té cùhú ña cùu-gă candá nihnu*

(Mt. 9:1-8; Lc. 5:17-26)

<sup>1</sup> Te sátá ñi cuu ñi úú nduu sã ñi quee Jèsús ñuú Capèrnaúm te ní nasáa tucu-gá, te cue ñáyiú ní níhí-yu tnúhu sã ñi ndexìo-gá núú quidé vèhe-gá.

<sup>2</sup> Te ndihi-ni ní tacá cuéhé víhí-yu, te ní chítú víhí-yu ndéé yuyèhe te ña ní tnahá-gá-yu. Te ní ngüíta-gá

ní dánèhé ñáhá-gă xii-yu tnúhu Yá Ndiöxí.

<sup>3</sup> Te òré-án nǐ quexìo cúmí tnàhá cue téé núú ndécú-gă nchídó-güedě ì<sup>n</sup> téé cùhú ñá cúú-gă candá nihnu-dé.

<sup>4</sup> Dico ñá túú ní ndàcu-güedé sáá-güedé ndéé núú-gă chi ío cuéhé ñáyiú ndècu. Te xíá<sup>n</sup> nǔú ní sáá-güedé díquí véhé nǔú yíhí-gă-án nǐ caá<sup>n</sup>-güedé, te ichi ndàa díquí véhé-ǎ<sup>n</sup> nǐ dáquëe-güedé téé cùhú-án, te ñùhu-dé ì<sup>n</sup> xító ní dáquëe ñaha-güedé ndéé núú-gă.

<sup>5</sup> Te Jèsús sa ní cutnùní iní-gá sá sàndáá iní ñáhá-güedě xii-gá nǔú ní xáha<sup>n</sup>-gă xii téé cùhú-án:

—Yòhó téé cùhú, sa ní quide càhnu iní-í nchaá cuéchi-n —càchí-gă xáha<sup>n</sup>-gă xii-dé.

<sup>6</sup> Te xíá<sup>n</sup> xǐnucóo ì<sup>n</sup> ùú cue téé dàcuaha ñaha xii ñáyiú nchaá tnúhu ní chídó tnùní ndí Moisés, te sá dúcá<sup>n</sup> nǐ cáhá<sup>n</sup> Jèsús núú cue téé-án nǐ sani iní-güedé:

<sup>7</sup> “Téé-a càhá<sup>n</sup> cuéhé-dé cuendá Yá Ndiöxí duha càhá<sup>n</sup>-dé, chi vá yòo ì<sup>n</sup> ndàcu cada cahnu iní nchaá yíca cuéchi ñáyiú chi ì<sup>n</sup> dǐí-ni Yá Ndiöxí quidé càhnu iní-gá”, duha ní sani iní-güedé.

<sup>8</sup> Dico òré-ni-án nǐ cutnùní iní Jèsús nàcuáa sàni iní-güedé, núú ní xáha<sup>n</sup>-gă xii-güedé:

—¿Te ná cuendá duca<sup>n</sup> sàni iní-ndó-í?

<sup>9</sup> Te sá dúhá nǐ xáha<sup>n</sup>-í xii téé cùhú-a sá ní quide càhnu iní-í nchaá yíca cuéchi-dé, te xíá<sup>n</sup> nchòhó ñá túú cùtnuní iní-ndó nǔú ndáá càhá<sup>n</sup>-í àdì ñá ndáá. Dico núú cúú-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùní ndáá iní-ndó nǔú ndáá càhá<sup>n</sup>-í àdì ñá ndáá chi cundehe nǔú-ndó nàcuáa cada-í.

<sup>10</sup> Te vitna na càda-í nàcuáa cutnùní iní-ndó nchàa-ndo sá yùhú Téé cùu ñaní tnáhá-ndó nchàa-ndo ndecu ndihí-í tnúhu ndee iní sá cáda càhnu iní-í nchaá cuéchi ñáyiú ñuyíú-a —càchí-gă xáha<sup>n</sup>-gă xii-güedé.

Te sátá dúcá<sup>n</sup> te ní xáha<sup>n</sup>-gă xii téé cùhú-án:

<sup>11</sup> —Ndacóo te ndocani-n xító ñùhu-n véxi-án, te núhú-n vehe-n —cachí-gă xáha<sup>n</sup>-gă xii-dé.

<sup>12</sup> Te òré-ni-án nǐ ndacóo-dé, te ní ndocani-dé xító ñùhu-dé ní quexìo-án, te ndèhe nchaá ñáyiú xǐndecu-án nǐ ndee-dé tnuú-yu cuáhá<sup>n</sup>-dé. Te sá dúcá<sup>n</sup> nǐ quide Jèsús ní quide tátna-gă téé-án, xíá<sup>n</sup> ío ní cuñúhu nchaá ñáyiú, te ní xítñahá-yu:

—Càhnu vihi cuu Yá Ndiöxí, chi ñá ì<sup>n</sup> ndùu quini-ó dùha cuu datná ní cuu vitna —càchí-yu xítñahá-yu.

*Jèsús càhá<sup>n</sup>-gă ì<sup>n</sup> téé nàni Leví  
(Mt. 9:9-13; Lc. 5:27-32)*

<sup>13</sup> Te Jèsús cuáhá<sup>n</sup> tucu-gă yuhu làgúná, te ío cuéhé ñáyiú ní sátñahá ñáhá xii-gă, te ní dánèhé ñáhá-gă xii-yu tnúhu Yá Ndiöxí.

<sup>14</sup> Te òré ní yáha ní dánèhé ñáhá-gă xii-yu, te ní naquehe<sup>n</sup>-gă ichi, te ní yáha yatni-gă ì<sup>n</sup> xichi núú núcóo ì<sup>n</sup> téé nàni Leví déhe ì<sup>n</sup> téé nàni Alfeú quidé còbrá-dé ñáyiú cuendá impuèstú chi còbrádór cúú-dé. Te òré ní xini ñáhá-gă xii-dé, te ní xáha<sup>n</sup>-gă:

—Néhe chitnahá ñáhá-n xii-í —càchí-gă xáha<sup>n</sup>-gă xii-dé.

Te té Lèví-án nǐ ndacuñí-dé, te ní tuha ñaha-dé xii-gă.

<sup>15</sup> Te té Lèví-án cuáhá<sup>n</sup>-dé ndihí Jèsús vehe-dé. Te yíhí Jèsús mèsá xéxi-gă ndihí cue téé xica cuu ndihí-gă, te tnàhá vài cue téé cuihna iní-xi quide còbrá ñáhá xii ñáyiú cuendá impuèstú, ndihí dava-gă cue téé ndècu ichi cuéhé ichi duha núcóo ndihí ñaha-güedě xii-gă xéxi ndihí ñaha-güedé, te duca<sup>n</sup> chi ío vài ñáyiú nchícú<sup>n</sup> ñáhá xii-gă.

<sup>16</sup> Te sá nǐ xini cue téé dàcuáha ñaha xii-yu nchaá tnúhu ní chídó tnùní ndí Moisés, ndihí cue téé cùu fariséú xéxi Jèsús ndihí nchaá cue téé-án nǔú ní xíca<sup>n</sup> tnúhú-güedě núú cuè téé xica cuu ndihí-gă, te xáha<sup>n</sup>-güedé:

—¿Ná cuendá duca<sup>n</sup> quide téé cùu mestrú-ndó xèxi-dé ndihí cue téé cuihna iní-xi quide còbrá ñáhá xii ñáyiú cuendá impuèstú, ndihí nchaá dava-gă cue téé ndècu ichi cuéhé ichi duha-í? —càchí-güedé xáha<sup>n</sup>-güedé.

17 Te Jèsús ní tecú dóho-gá nàcuáa ndùu tnúhu ní xáha<sup>n</sup>-güedé xii cue tée xica cuu ndihi-gá, núu ní xáha<sup>n</sup>-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í càhá<sup>n</sup>-í ñáyiú cùtnuní iní-xi sá ndécú cuèchi-xi te ñá túú véxi-í càhá<sup>n</sup>-í ñáyiú càchí sá ñà túú ndècu cuèchi-xi —càchí-gá xáha<sup>n</sup>-gã xii-güedé.

*Cuèndá cue ñáyiú ñá túú tnàhí ná xéxi áma càhá<sup>n</sup> ndihí-yu Yá Ndiöxí*  
(Mt. 9:14-17; Lc. 5:33-39)

18 Te cue tée xica cuu ndihi té Juàá, ndihi cue tée xica cuu ndihi cue tée cùu fariséú ñá túú tnàhí ná xéxi-güedé áma càhá<sup>n</sup> ndihi-güedé Yá Ndiöxí. Te ì<sup>n</sup> nduu duca<sup>n</sup> xiquide-güedé, te ní sáhá<sup>n</sup> ñáyiú ní xicá<sup>n</sup> tnúhũ-yu núu Jèsús, te xähã<sup>n</sup>-yu xii-gá:

—Cuèni-ndí cachí tnúhu-n ñá cuèndá cue tée xica cuu ndihi té Juàá, ndihi cue tée xica cuu ndihi cue tée cùu fariséú ñá túú tnàhí ná xéxi-güedé áma càhá<sup>n</sup> ndihi-güedé Yá Ndiöxí, te cue tée xica cuu ndihi-n ñá túú dùca<sup>n</sup> quide-güedé —càchí-yu xähã<sup>n</sup>-yu xii-gá.

19 Te Jèsús ní xáha<sup>n</sup>-gã xií-yu:

—Nchòhó xini-ndó sã vã cúú cũñaha-o xii ñáyiú ñùhu víco tnándaha sá vã cúú càxí-yu nini ndècu ndihi ñaha tée tnándaha xii-yu.

20 Dico sáá nduu te vá cùndècu ndihi ñaha-gá tée tnándaha-á<sup>n</sup> xií-yu, te dàvá-á<sup>n</sup> te cahni iní-yu vá cáxí-yu cuèndá sá ndihú iní-yu.

21 Te vá yõ ì<sup>n</sup> dándée luha dóó sáá ì<sup>n</sup> dóó sa ní cuu tühú víhí, chi dóó sáá-á<sup>n</sup> nàndiyi-xi te uu<sup>n</sup>-gá ndata-xi dóó sà ní cuu tühú-á<sup>n</sup>.

22 Te ni vã yõ ì<sup>n</sup> chihí ndidí sáá xití ì<sup>n</sup> lamba sa ní cuu tühú víhí, chi núu yoo duca<sup>n</sup> na càda te ndava lamba sa ní cuu tühú-á<sup>n</sup>, chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núu duca<sup>n</sup> na càdá-yu. Núu xíá<sup>n</sup> xini ñùhu-xi quée ndidí sáá-á<sup>n</sup> xití ì<sup>n</sup> lamba saa —càchí-gá xáha<sup>n</sup>-gã xií-yu.

*Cue tée xica cuu ndihi Jèsús sàhnú-güedé yoco triú nduu ndètatú ñáyiú*

(Mt. 12:1-8; Lc. 6:1-5)

23 Te ì<sup>n</sup> nduu cùu-xi nduu ndètatú ñáyiú ñùhu Jèsús ichi ndihi cue tée xica cuu ndihi-gá, te ta yãha-gá ndihi-güedé ì<sup>n</sup> xichi núú cáá triú, te ní ngüita-güedé sàhnú-güedé yoco triú-á<sup>n</sup>.

24 Te cue tée cùu fariséú ní xáha<sup>n</sup>-güedé xii-gá:

—¿Ná cuèndá duca<sup>n</sup> quide cue tée xica cuu ndihi-n sàhnú-güedé yoco triú vitna cùu-xi nduu ndètatú-í? Te ñá túú tàú-güedé duca<sup>n</sup> càda-güedé —càchí-güedé xáha<sup>n</sup>-güedé xii-gá.

25 Te ní xáha<sup>n</sup>-gã xii-güedé:

—¿Te náa vátá dácuàha tnahi-gá-ndó núu tütú Yá Ndiöxí núú càhá<sup>n</sup>-xi nàcuáa ní quide ndí Dàvíí cùtnàhá ní xihí ndí docó ndihi cue tée ní xica cuu ndihi ndí-á<sup>n</sup>?

26 Te dàvá-á<sup>n</sup> ñí xíndecu ì<sup>n</sup> tée ní xínani Abiátár ní cuu-dé dütú cúnùu, te ndí Dàvíí ní quihu ndí xití vehe Yá Ndiöxí ní quehe<sup>n</sup> ndí pàá ní cuu íí ndécú-á<sup>n</sup> ñí dácãhñu ndí cue tée ní xica cuu ndihi ndí ní xexi ndí ndihi-güedé, te mee-ni cuè dütú tàú-güedé caxi-güedé pàá-á<sup>n</sup> ní cùu —cachí-gá xáha<sup>n</sup>-gã xii-güedé.

27 Te ní xáha<sup>n</sup> tucu Jèsús xii-güedé:

—Mee Yá Ndiöxí ní taxi ndecu-gá nduu ndètatú ñáyiú, te ñá túú ní càchí-gá sá mée-yu nándi cani iní-yu cadá-yu canehé íí-yu nduu ndètatú-yu-á<sup>n</sup>.

28 Te yúhú Téé cùu ñaní tnàhá-ndó nchàa-ndo, tnàhá-í ndécú ndihi-í tnúhu ndee ìní sá cùu-í nchaa ñáyiú nàcuáa cadá-yu nduu ndètatú-ó-á<sup>n</sup> —càchí-gá xáha<sup>n</sup>-gã xii-güedé.

### 3

*Ì<sup>n</sup> téé ní yíchí ì<sup>n</sup> xio ndaha-xi*  
(Mt. 12:9-14; Lc. 6:6-11)

1 Te Jèsús cuánguihu tucu-gá xití veñúhu, te xití veñúhu-á<sup>n</sup> ndécú ì<sup>n</sup> téé ní yíchí ì<sup>n</sup> xio ndaha-dé.

2 Te xíá<sup>n</sup> ndécú cuè téé xito dayuhu ñaha xii-gá, te núu cada tátna-gá

tée cùhú-á<sup>n</sup> nduu cùu-xi nduu ndetatú-güedé ndihí ñáyiú, cuendá duca<sup>n</sup> te níhí-güedé nàcuáa cada-güedé cacá<sup>n</sup> cuéchi-güedé cuendá-gá.

<sup>3</sup> Te ní xáha<sup>n</sup>-gã xii té cùhú ndaha-xi-á<sup>n</sup>:

—Ndacuíñí te ngúnutní-n cuădava iha —càchí-gá xăha<sup>n</sup>-gã xii-dé.

<sup>4</sup> Te ní xícá<sup>n</sup> tnúhú-gã núú-güedé, te xăha<sup>n</sup>-gã:

—Chí càchí tnúhu ná cúú sã cúú càda-o nduu ndetatú-ó. ¿Sá văha ñă sá cuéhé? ¿Sá cáda tătna-o ñăyiú cùhú ñă sá cáhni-ó-yu? —càchí-gá xăha<sup>n</sup>-gã xii-güedé.

Dico ni ñ<sup>n</sup>-güedé ñă túú tnàhí ni cãhá<sup>n</sup>-güedé.

<sup>5</sup> Te Jèsús ní xíndéhé văha-gá núú nchaa-güedé te ní cudéé<sup>n</sup>-gã, te ní ndihú iní-gá chi ío sàá iní-güedé, te ní xáha<sup>n</sup>-gã xii té cùhú ndaha-xi-á<sup>n</sup>:

—Ndocani ndaha-n —càchí-gá xăha<sup>n</sup>-gã xii-dé.

Te ní ndocani-dé ndaha-dé, te òré-ni-á<sup>n</sup> ñă ndúha.

<sup>6</sup> Te cue té cùu fariséú ní xica-güedé cuáhá<sup>n</sup>-güedé ñ<sup>n</sup> xichi núú ñă naníhí tnàhá-güedé ndihí cue té cündihí té Hèrodés cuendá ndatnúhu-güedé nása cada-güedé cahni-güedé Jèsús.

*Cuéhé vñí ñăyiú ní quexìo yuhu lagúná*

<sup>7</sup> Te Jèsús ní xica-gá cuáhá<sup>n</sup>-gá ndihí cue té xica cuu ndihí-gá yuhu làgúná distritú Galileá, te ío cuéhé ñăyiú distritú-á<sup>n</sup> nchicú<sup>n</sup> ñăhă-yu xii-gá cuáhá<sup>n</sup>.

<sup>8</sup> Te núú ñă quexìo-gá-á<sup>n</sup> ñă sáhá<sup>n</sup> ñăyiú distritú Júdeá, ñăyiú ñuú Jerusálén, ñăyiú distritú Idùmeá, ñăyiú xíndecu ndaa ingá xio yúte Jòrdán, ndihí ñăyiú xíndecu yatni ñuú Tirú ndihí ñuú Sidón, te duca<sup>n</sup> ío vái-yu ní sáhá<sup>n</sup> núú ndécú-gã chi ní níhí-yu tnúhu nchaa nàcuáa quide-gá.

<sup>9</sup> Te Jèsús ní xáha<sup>n</sup>-gã xii cue té xica cuu ndihí-gá sá cáda tŭha-güedé ñ<sup>n</sup> bàrcú cuendá caa-gá núú-xi cuendá sá vă dádèhnde ñăhá-yu xii-gá chi ío cuéhé-yu.

<sup>10</sup> Te sá dúcá<sup>n</sup> ñă níhí-yu tnúhu sá quidé tătna-gá ñăyiú cùhú, núú xíá<sup>n</sup> nchaa dava-gá ñăyiú cùhú súúni dícó ngõnchihi tnàhá-yu cuáhá<sup>n</sup>-yu núú ndécú-gã cuini-yu tnándeé ñăhă-yu xii-gá cuendá sá cuini-yu ndúha-yu.

<sup>11</sup> Te cue ñăyiú yihí ñăha espíritú cündihí yucu ñávăha ní sanu xiti ñăha-xi xii-yu núú Jèsús òré ní xini ñăhá-xí xii-gá, te xíá<sup>n</sup> ní quide níhi ní cãhá<sup>n</sup>-yu, te xăhă<sup>n</sup>-yu xii Jèsús:

—¡Yòhó cúú-n Dèhe Yá Ndiõxí! —càchí-yu xăhă<sup>n</sup>-yu xii-gá.

<sup>12</sup> Te Jèsús ní tenàá-gá nchaa espíritú cündihí yucu ñávăha-á<sup>n</sup>, te ní xáha<sup>n</sup>-gã xii nchaa ñăyiú ní xihí-xi-á<sup>n</sup> sã vă cãhá<sup>n</sup>-yu núú ñăyiú yoo cùu-gá.

*Jèsús cãxi-gá úxúú tnàhá cue tée dacuăha ñăha xii ñăyiú tnúhu-gá*

*(Mt. 10:1-4; Lc. 6:12-16)*

<sup>13</sup> Te sáta dúcá<sup>n</sup> ñă cuu te Jèsús ní sáa-gá ñ<sup>n</sup> yucu, te xíá<sup>n</sup> ndécú-gã ní cana-gá nchaa cue té cãchí iní-gá. Te òré ní quexìo nchaa cue té-á<sup>n</sup> núú-gã,

<sup>14</sup> te ní cáxi-gá úxúú tnàhá cue té caca cuu ndihí-gá, te diu-ni cue té-á<sup>n</sup> tendaha-gã quihí<sup>n</sup>-güedé cãhá<sup>n</sup>-güedé tnúhu-gá núú ñăyiú.

<sup>15</sup> Te ní sãhaha-gã xii-güedé tnúhu ndee iní cundecu ndihí-güedé cuendá cada tătna-güedé ñăyiú cùhú, ndihí cuendá queñuhu-güedé nchaa espíritú cündihí yucu ñávăha yihí ñăha xii ñăyiú.

<sup>16</sup> Te duha xñani ndi úxúú cue té-á<sup>n</sup>: ñ<sup>n</sup>-dé nání-dě Xímú, te mee-gã ní taudìu ñăha-gá xii-dé sá cúnani-dé Pèlú.

<sup>17</sup> Te ingá-dé nání-dě Jàcobó, te ingá-dé nání-dě Juàá, te ñani té Jàcobó-á<sup>n</sup> cúú tē Juàá te ndi ndùú-güedé cúú-güedé déhe té Zebèdeú, te ndi ndùú cue té-á<sup>n</sup> ñă dánání ñăha Jèsús xii-güedé Boànergés, te tnúhu-á<sup>n</sup> quée-xi: Cue té ío yáchí cudéé<sup>n</sup>, duha quèe-xi tnúhu-á<sup>n</sup>.

<sup>18</sup> Te duha xñani dăva-gá-güedé: Té Ndrìxí, té Lìpé, té Bartolòmé, té Mâteú, té Măxí, té Jàcobó déhe té Àfeú, té

Tàdeú, té Xímú téé ní cundìhi cue téé canànistá ní cùu,

<sup>19</sup> ndìhi té Jùdás Iscàrioté téé ní sáá nduu nǐ sáha cuendá ñáhá xii Jesús núú cuè téé cùu úhú iní ñáhá xii-gá, duha xǐnani cuè téé ní cáxi Jèsús ní xica cuu ndìhi-gá.

*Càchí-güedé sá ndécú ndìhi Jesús yucu ñávàha dico ñá ndàá*

*(Mt. 12:22-32; Lc. 11:14-23; 12:10)*

Te sátá dúcá<sup>n</sup> te cuáhá<sup>n</sup>-gá ndìhi-güedé núú quidé vèhe-gá.

<sup>20</sup> Te ío vài ñáyiu ní tacá-ni tucú-yu xíá<sup>n</sup>, te ni ñá ní nǐhí-gǎ nása cada-gá caxi-gá ndìhi cue téé xica cuu ndìhi-gá cuendá sá ío vái-yu.

<sup>21</sup> Te cue ñáyiu cùu ndi mee Jesús ní nǐhí-yu tnúhu nchaa nàcuáa cùu, te nchaa ñáyiu ñá cùtnuní váha iní-xi ní cachí-yu sá nǐ nduu lùcú-gá nǔu xǐá<sup>n</sup> cuáhá<sup>n</sup> ñáyiu cùu ndi mee Jesús núú ndécú-gǎ cuendá candeca ñáhá-yu xii-gá núhú ní cùu.

<sup>22</sup> Te cue téé dàcuaha ñaha xii ñáyiu nchaa tnúhu ní chídó tnùní ndí Moisés véxi ndéé ñúú Jerusálén ní cáhá<sup>n</sup> cuèhé-güedé cuendá Jèsús, chi ní xítnàha-güedé:

—Téé-a ndècu ndìhi-dé sácuíhná, te diu xíá<sup>n</sup> chíndèe ñaha-xi xii-dé queñuhu-dé nchaa espíritú cundìhi-xi yíhi ñaha xii ñáyiu, te diu-ni-xi tàxi tnuní-xi nchaa espíritú-á<sup>n</sup> —duha ní xítnàha-güedé.

<sup>23</sup> Te Jèsús ní cana ñaha-gǎ xii-güedé, te ní cani-gá ñá<sup>n</sup> cuendú núú-güedé nàcuáa tecú tnùní-güedé tnúhu-gá, te xǎhá<sup>n</sup>-gǎ xii-güedé:

—¿Te nása cada sácuíhná queñuhu-xi cue espíritú cundìhi-xi yíhi ñaha xii ñáyiu-í?

<sup>24</sup> Te nchòhó xini-ndó sǎ nǔu ñá<sup>n</sup> téé yíndaha ñá<sup>n</sup> nació<sup>n</sup> vá cúú ñá<sup>n</sup>nuu-dé ndìhi cue téé cundìhi-dé, te vá cúdǐ-dé cunuu-dé.

<sup>25</sup> Te diu-ni duca<sup>n</sup> sǎtnahá-xi cùu tucu ñáyiu xíndecu ñá<sup>n</sup>-ni vèhe, chi núu vá cúú ñá<sup>n</sup>nuú-yu, te vá cúdǐ-yu cundecu càhnú-yu.

<sup>26</sup> Te núu sácuíhná ñà túú cùu ñá<sup>n</sup>nuu-xi ndìhi cue espíritú cundìhi-xi,

te vá cúdǐ-xi cundecu-xi taxi tnùní-xi te núu duca<sup>n</sup> quide-xi.

<sup>27</sup> Te nchòhó xini-ndó sǎ cuè ñadúhú chi vá ndácú-güedé cuendá-ni quíhu-güedé duhu-güedé vèhe ñá<sup>n</sup> téé ío ndee, chi díhna-gá xini ñúhu-xi tñi-güedé téé-á<sup>n</sup> dacùtu ñaha-güedé xii-dé dǎtnùní duca<sup>n</sup> te ndacu-güedé duhu-güedé nchaa sá ndécú ndìhi-dé.

<sup>28</sup> Te na cǎchí tnúhu ndáá-í xii-ndo sǎ ncháá sǎ cuèhé sá dúhá quide ñáyiu, ndìhi nchaa tnúhu cuèhé tnúhu duha càhá<sup>n</sup>-yu cuendá Yǎ Ndióxi cuu cada càhnu iní-gá.

<sup>29</sup> Dico cue ñáyiu na càhá<sup>n</sup> cuèhé cuendá Espíritú Yǎ Ndióxi, ñáyiu-á<sup>n</sup> vǎ cádá càhnu iní ñáhá tnàhí-gá xii-yu, chi cundecu-ni cuèchi-yu núú-gǎ ni caa ni quíhí<sup>n</sup> —cǎchí-gá xǎhá<sup>n</sup>-gǎ xii-güedé.

<sup>30</sup> Te duca<sup>n</sup> nǐ cáhá<sup>n</sup>-gá chi cǎchí-güedé sá ndécú ndìhi-gá espíritú cundìhi yucu ñávàha.

*Nǎná Jèsús ndìhi cue ñani-gá*

*(Mt. 12:46-50; Lc. 8:19-21)*

<sup>31</sup> Te ní quexio náná Jèsús ndìhi cue ñani-gá núú ndécú-gǎ xínutnǐ-yu quehé, te ní xáhǎ<sup>n</sup>-yu xii ñá<sup>n</sup> ñáyiu xíndecu-á<sup>n</sup> sǎ dáyǎha-yu tnúhu núú-gǎ cuendá quee-gá ndatnúhu ndìhi ñaha-gǎ xii-yu.

<sup>32</sup> Te cue ñáyiu xínucóo ni càndéé dǐñi-gá ní xáhǎ<sup>n</sup>-yu xii-gá:

—Nǎná-n ndìhi cue ñani-n ndécú-yu quehé nándùcu ñahá-yu xii-n — cǎchí-yu xáhǎ<sup>n</sup>-yu xii-gá.

<sup>33</sup> Te Jèsús ní xáha<sup>n</sup>-gǎ xii-yu:

—Te cachí tnúhu-ndo yǒndi-gá ñáyiu cùu datná nǎná-í ndìhi dàtná cue ñani-í —cǎchí-gá xǎhá<sup>n</sup>-gǎ xii-yu.

<sup>34</sup> Te dǎtnùní ní xíndéhé vǎha-gá núú ncháa ñáyiu xínucóo ni càndéé dǐñi-gá-á<sup>n</sup>, te ní xáha<sup>n</sup>-gǎ xii-yu:

—Nchaa ñáyiu-a cùu-yu dàtná nǎná-í ndìhi dàtná cue ñani-í.

<sup>35</sup> Chi nchaa ñáyiu quide nacúaa càhá<sup>n</sup> Yǎ Ndióxi, ñáyiu-á<sup>n</sup> cúu-yu dàtná cue ñani-í, ndìhi dàtná cue cúha-í, ndìhi dàtná nǎná-í —cǎchí-gá xǎhá<sup>n</sup>-gǎ xii-yu.

## 4

*Nàcuáa quèe-tée cuángacá<sup>n</sup> triú*  
(Mt. 13:1-9; Lc. 8:4-8)

<sup>1</sup> Te Jèsús ní ngüíta-gá dácuaàha tucu-gá ñáyiú yuhu làgúná. Te cuéhé víhí-yu ní tacá xíá<sup>n</sup> núu cuásaá-gá núú ì<sup>n</sup> bàrcú nútní xítí ndute làgúná-á<sup>n</sup>, te núú xǎ<sup>n</sup> ní ngóo-gá te ní ngüíta-gá dánèhé ñáhá-gá xií-yu, te nchaá-yu xǎxúcu-yu yuhu làgúná-á<sup>n</sup>.

<sup>2</sup> Te ní ngüíta-gá ní cani-gá títí cuèndú núú-yu nàcuáa tecú tnùní-yu tnúhu-gá, te xǎha<sup>n</sup>-gǎ xií-yu:

<sup>3</sup> —Chí cúndedóho váha ì<sup>n</sup> cuèndú ná càni-í-a. ì<sup>n</sup> tée cuángacá<sup>n</sup>-dé triú.

<sup>4</sup> Te òré ní ngüíta-dé dǎngoyo-dé triú-á<sup>n</sup>, te dava ní quene ndava ní ngava ndéé ichi, te ní xiní cue tílaá te ní nadatàcá-güedi.

<sup>5</sup> Te dava ní ngava ñuhu yadi núú yíhí víhi yúú, te ndíhi-ni ní xínu-xi cuèndá sá ñà túú càvihi ñuhu.

<sup>6</sup> Dico òré ní nayehé ñá túú ní cùndee iní-xi chí ní yíchí-xi, chí ñá túú ní níhí quíhí<sup>n</sup> cùnú yóho-xi.

<sup>7</sup> Te dava ní ngava núú yúcu ndíquí<sup>n</sup> tnu ñhu, te ì<sup>n</sup>nuu-ni ní xínu-xi ndíhi tnu ñhu, te tnu ñhu-á<sup>n</sup> ní sahnú-xi te ní dánáá-xi ncháa triú sá ní xínu-á<sup>n</sup>.

<sup>8</sup> Dico dava triú-á<sup>n</sup> ní ngava-xi núú ndécú ñuhu cocó<sup>n</sup>, te xǎ<sup>n</sup> ní xínu-xi te ní sahnú-xi te ío váha ní cuu, chí núú ì<sup>n</sup>-ní triú-á<sup>n</sup> te dava yoco-xi ní nguíhi ócó úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ì<sup>n</sup> cièndú triú-xi —càchí-gá xǎha<sup>n</sup>-gǎ xií-yu.

<sup>9</sup> Te xǎha<sup>n</sup> tùcu-gá xií-yu:

—Ncha nchòhó ñáyiú ní xíndedóho nchaa tnúhu ní cáhá<sup>n</sup>-í-a, te ío váha chí cuàha cuèndá —càchí-gá xǎha<sup>n</sup>-gǎ xií-yu.

*Jèsús càhá<sup>n</sup>-gá ná cuèndá duca<sup>n</sup> càni-gá cuèndú*

(Mt. 13:10-17; Lc. 8:9-10)

<sup>10</sup> Te sátá ní ndaca ñáyiú-á<sup>n</sup> te ní quendóo mee-nǎ Jèsús ndíhi cue tée xíca cuu ndíhi-gá, ndíhi ì<sup>n</sup> úú-nǎ ñáyiú. Te ñáyiú-á<sup>n</sup> ndíhi cue tée-á<sup>n</sup> ní xíca<sup>n</sup> tnúhú-yu ndíhi-güedé núú-gǎ,

núu nása quèe-xi cuèndú ní cani-gá núú-yu ndíhi-güedé.

<sup>11</sup> Te ní xǎha<sup>n</sup>-gǎ:

—Nchòhó chí sa càchí tnúhu Yá Ndiòxí xii-ndo ì<sup>n</sup> sá vǎtá quíní-gá-ndó, chí càchí tnúhu-gá nàcuáa cada-gá ndíhu ndaha-gǎ ñáyiú, dico dava-gá ñáyiú càni-í mee-ni cuèndú núú-yu.

<sup>12</sup> Chí cuèi na quíní-yu nchaa nàcuáa cuu dico ní vǎ cútnùní iní-yu ná cuèndá duca<sup>n</sup> cuu, àdi cuèi na cùndedóho-yu dico ní vǎ tècú tnùní-yu. Te duca<sup>n</sup> ndòhó-yu cuèndá sá vǎ quíndáá iní-yu Yá Ndiòxí, ndíhi cuèndá sá vǎ cádá càhnú iní-gá nchaa yíca cuèchi-yu —càchí-gá xǎha<sup>n</sup>-gǎ xií-yu ndíhi-güedé.

*Jèsús càhá<sup>n</sup>-gá nàcuáa quèe-xi cuèndá tée cuángacá<sup>n</sup> triú*

(Mt. 13:18-23; Lc. 8:11-15)

<sup>13</sup> Te ní xǎha<sup>n</sup> tùcu Jèsús xii cue tée xíca cuu ndíhi-gá, ndíhi cue ñáyiú-á<sup>n</sup>:

—Nchòhó, ñá túú ní tècú tnùní-ndó cuèndú ní cani-í núú-ndó, te núu duca<sup>n</sup>, ¿te nása tecú tnùní-ndó dàva-gá cuèndú cani-í núú-ndó-í? Te na càchí tnúhu-í xii-ndo nàcuáa quèe-xi cuèndú ní cani-í núú-ndó.

<sup>14</sup> Te tée cuángacá<sup>n</sup> triú-á<sup>n</sup> cúú-dě dàtná ì<sup>n</sup> tée cuáhá<sup>n</sup> càhá<sup>n</sup> tnúhu Yá Ndiòxí núú ñáyiú.

<sup>15</sup> Te triú-á<sup>n</sup> cúú-xí dàtná tnúhu Yá Ndiòxí, te triú sá ní quene ndava ní ngava ndéé ichi, xǎ<sup>n</sup> cúú-xí dàtná ñáyiú ní tnahá iní-xi tnúhu Yá Ndiòxí, dico sácuíhná cuáhá<sup>n</sup>-xi xòcani-xi tnúhu-gá iní-yu cuèndá sá vǎ cǎnchícú<sup>n</sup> nihnú-yu nàcuáa càhá<sup>n</sup> tnúhu-á<sup>n</sup>.

<sup>16</sup> Te triú sá ní ngava ñuhu yadi núú yíhí víhi yúú, xǎ<sup>n</sup> cúú-xí dàtná ñáyiú ní xíndedóho tnúhu Yá Ndiòxí te díí iní ní tní-yu tnúhu-gá.

<sup>17</sup> Dico òré ná ngüíta ñáyiú cúcuèhé ñáhá-yu xií-yu àdi nǎndí-gá sá yǎha-yu sá cuèndá tnúhu-gá, te ñá cùndee iní-yu chí dàñá-yu tnúhu-gá cuèndá sá ñà túú nihí ndéé-yu.

<sup>18</sup> Te triú sá ní ngava núú yúcu ndíquí<sup>n</sup> tnu ñhu xǎ<sup>n</sup> cúú-xí dàtná ñáyiú ní tecú dóho-xi tnúhu Yá Ndiòxí,

19 dico cuèé cuèé ní nacuanaá-yu tnúhu-gá, chi cuendá mee-ni sã cúu-xí mèé-yu ñùhu iní-yu, ndihi cuendá sá ïo sàni iní-yu cuu cuicá-yu, ndihi cuendá sá ïo cùdí iní-yu nchaa sá ïo ñuyú-a, te ñá túú ñùhu iní-yu tnúhu sá ñí xíndedóho-yu-án nàcuáa cada váha-yu cundecú-yu.

20 Dico triú sá ñí ngava núú ndécú ñùhu coco<sup>n</sup>, xíã<sup>n</sup> cúu-xí dàtná ñáyiu ní xíndedóho tnúhu Yá Ndiõxí te quidé-yu nchaa nàcuáa càhá<sup>n</sup> tnúhu-án. Te cada iní-ndó sã ñáyiu-án cúu-yu dàtná triú sá ñí nguíhi yoco-xi ócò úxí triú-xi, ndihi triú sá ñí nguíhi yoco-xi únídico triú-xi, ndihi triú sá ñí nguíhi yoco-xi ñí cièndú triú-xi. Te duca<sup>n</sup> sãtnahá-xi cùu-yu chi ïo váha quidé-yu —càchí-gá xãha<sup>n</sup>-gã xii cue téé xica cuu ndihi-gá ndihi cue ñáyiu-án.

*Cuendá iti  
(Lc. 8:16-18)*

21 Te xãha<sup>n</sup>-gã xii nchaa ñáyiu:

—Ñá túú ñí ñí ñáyiu tẽñuhú iti te chiváha-yu ñí xití quídi, àdi chiváha-yu ñí caha cãmá, chi tàxi ndecú-yu ñí núú dùcú<sup>n</sup> cuendá cutnùní núú nchaa ñáyiu.

22 Te ñí ñí tnúhu sá ñã tècú tnùní ñáyiu vitna cachí-ó sã vã tècú tnùní-yu chi dacuití sã tècú tnùní-yu, te ñí ñí tnúhu sá càchí-ó cùu yuhu vitna vá cúu yùhu chi dacuití sã quée tũu-xi núú ñáyiu.

23 Te nchòhó cue ñáyiu ní xíndedóho nchaa tnúhu ní cáhá<sup>n</sup>-í-a, te ïo váha chí ná cuãha cuendá —càchí-gá xãha<sup>n</sup>-gã xií-yu.

24 Te ní xãha<sup>n</sup> tùcu-gá:

—Ío váha chí cùndedóho tnúhu na càhá<sup>n</sup>-í-a. Te nàcuáa-ni quide-ndo danehé-ndó ñáyiu tnúhu Yá Ndiõxí, te ñí duca<sup>n</sup> càda ñaha-gá xii-ndo, te uu<sup>n</sup>-gá duca<sup>n</sup> càda-gá sá cúu-xí-ndó.

25 Te nchaa nchòhó ñáyiu tècú tnùní tnúhu Yá Ndiõxí, uu<sup>n</sup>-gá cuita tecú tnùní-ndó tnúhu-gá quíhí<sup>n</sup>. Te nchaa nchòhó ñáyiu ñá túú tècú tnùní tnúhu-gá, te uu<sup>n</sup>-gá vá tècú tnùní-ndó —càchí-gá xãha<sup>n</sup>-gã xií-yu.

*Nàcuáa sãhnu triú*

26 Te Jèsús xãha<sup>n</sup> tùcu-gá:

—Na càni-í ñí cuèndú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiu. ñí téé cuángacá<sup>n</sup>-dé triú.

27-28 Te sátá ñí yáha ní sacá<sup>n</sup>-dé triú-án, te cuánuhú-dé vehe-dé ndétátú-dé. Te duca<sup>n</sup>-ni ta xica nduu cuáhá<sup>n</sup> te ní xínu triú-án, te nàcuáa ta sãhnu-xi cuáhá<sup>n</sup> te ta quèe ndaha-xi, te duca<sup>n</sup>-ni cùu ní sáá nduu ñí quene yoco-xi te ní nguíhi triú-xi, dico téé ní sacá<sup>n</sup> triú-án ñá túú xini-dé nása ní sãhnu-xi, chi mee ñùhu ní quide-xi ní sãhnu triú-án.

29 Te òré sã ní ndihi ní cuaa<sup>n</sup> te ní nguíta téé ní sacá<sup>n</sup>-án náquèhndé-dé nátaxi tnahá-dé —càchí-gá xãha<sup>n</sup>-gã xií-yu.

*Cuendá ndíquí<sup>n</sup> yutnu nàni mostázá  
(Mt. 13:31-32; Lc. 13:18-19)*

30 Te xãha<sup>n</sup> tùcu Jesús xií-yu:

—Na càni tucu-í ingá cuèndú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiu.

31 ñí yutnu nàni mostázá cúu-xi ñí yutnu sá líhli vìhi-gá ndíquí<sup>n</sup>-xi dàcúúxí ndíquí<sup>n</sup> nchaa cúhú,

32 dico òré ná càcá<sup>n</sup>-güedé núú ñúhú-güedé, te na xínu-xi te sãhnu-gá-xi dàcúúxí nchaa cúhú, te nchaa dité-xi ïo cùu cahnu-xi, te ndéé cue quití ndava núú tàchí sácõo-güedi nchaa núú dité-xi xínu ndeti-güedi —cachí-gá xãha<sup>n</sup>-gã xií-yu.

*Ío titní cuèndú ní cani Jèsús núú ñáyiu  
(Mt. 13:34-35)*

33 Te ío-gá vai cuèndú ní cani Jèsús núú ñáyiu cuendá tecú tnùní-yu tnúhu Yá Ndiõxí, dico dava cuèndú ñá túú ní càni-gá núu-yu, chi ní cutnùní iní-gá sã vã tècú tnùní-yu nchaa.

34 Te mee-ni cuèndú ní cani Jèsús núú ñáyiu ndi tnahá òré ní dánèhé ñáhá-gã xií-yu tnúhu-gá. Te òré ndécú mèe Jesús ndihi cue téé xica cuu ndihi-gá, te ní xãha<sup>n</sup>-gã xii-güedé nàcuáa quèe-xi ñí ñí cuèndú ní cani-gá núú ñáyiu.

*Jèsús ngání-gă táchí ndìhi ndute làgúná*

(Mt. 8:23-27; Lc. 8:22-25)

35 Te ñi-u-ni nduu-ã<sup>n</sup> òré sa ta cùndiqui<sup>n</sup> cuáhá<sup>n</sup> ní xáha<sup>n</sup> Jèsús xii cue téé xica cuu ndìhi-gá:

—Chí ná quíhí<sup>n</sup>-ó ndàa ingá xio yuhu làgúná —càchí-gá xáha<sup>n</sup>-gă xii-güedé.

36 Te ní quide ndee ìní-gá nchaa ñáyiú xíxúcu-á<sup>n</sup>, te ñi-u-ni bàrcú sá ñúhú-gă òré ní dánèhé-gá ñáyiú tnúhu-gá ñi-u-ni xíã<sup>n</sup> ní dácácá cuè téé xica cuu ndìhi-gá ndécá ñàha-güedé xii-gá cuáhá<sup>n</sup>, te tnàhá ñ<sup>n</sup> úú-gá bàrcú ní xica-xi nchìcú<sup>n</sup>-xi bàrcú ñúhú-gă-á<sup>n</sup> cuáhá<sup>n</sup>.

37 Te ñùhu bàrcú ñúhú-gă-á<sup>n</sup> ichi cuáhá<sup>n</sup>-xi núú ndute, te ní quexìò ñ<sup>n</sup> táchí ñìhi, te ta nàdachitú-xi ndute xití bàrcú-á<sup>n</sup> cuáhá<sup>n</sup>, te sa cuìní-nă-xi quée naa bàrcú-á<sup>n</sup> xití ndute ni cùu.

38 Te Jèsús cáá-gă xidí-gá ñ<sup>n</sup> xichi ndàa sátá bàrcú-á<sup>n</sup>, te yìnchìhi ñ<sup>n</sup> dóó ñìquí-gă. Te sá dúcá<sup>n</sup> cuìní-xi quée naa bàrcú-á<sup>n</sup> núú ní sáhá<sup>n</sup>-güedé ní ndocani ñàha-güedé xii-gá, te xáha<sup>n</sup>-güedé:

—¡Mèstrú, ndiquíú ìní! ¿Náa ñá túú ndìhú ìní-n sã tá quée naa-o cuáhá<sup>n</sup>-ã<sup>n</sup>? —càchí-güedé xáha<sup>n</sup>-güedé xii-gá.

39 Te Jèsús ní ndiquíú ìní-gá te ní ndacóo-gá, te ní tenàá-gá táchí-ã<sup>n</sup>, te ní xáha<sup>n</sup>-gă xii ndute làgúná:

—¡Tnavíí-nă cuhu<sup>n</sup>, chí ío dusa<sup>n</sup>! —càchí-gá xáha<sup>n</sup>-gă xii ndute-á<sup>n</sup>.

Te òré-ni ní ngüíñí táchí-ã<sup>n</sup> te ní nucúndecu nahi-nă ndute làgúná-á<sup>n</sup>.

40 Te Jèsús ní xáha<sup>n</sup>-gă xii-güedé:

—¿Ná cuèndá ndéé dúcá<sup>n</sup> yùhú-ndó-í? ¿Náa ñá túú sàndáá ìní ñáhá ndìsa-ndo xii-í-ã<sup>n</sup>? —càchí-gá xáha<sup>n</sup>-gă xii-güedé.

41 Dico mee-güedé chí ío ní yùhú-güedé sá duca<sup>n</sup> ñí quide-gá ní xini-güedé, te ní xitnàha-güedé:

—¿Te ná téé cùu téé-a núú ní cáhá<sup>n</sup>-ni-dé, te ní ngüíñí táchí te ní nucúndecu nahi ndute làgúná-a-í? —càchí-güedé xitnàha-güedé.

## 5

*Í<sup>n</sup> téé yìhi ñàha espíritú cùndìhi yucu ñávãha*

(Mt. 8:28-34; Lc. 8:26-39)

1 Te ní sáá Jèsús ndìhi cue téé xica cuu ndìhi-gá ndàa ingá xio yuhu làgúná yucu cue téé ñuú Gàdará.

2 Te òré ní quene-gá xití bàrcú te ñ<sup>n</sup> téé yìhi ñàha espíritú cùndìhi yucu ñávãha ní quee-dé núú yíndüxi ndíyì cuáhá<sup>n</sup>-dé núú-gă.

3 Te mee-ni núú yíndüxi ndíyì-á<sup>n</sup> quidé vèhe-dé, te cuèi dàcutu ñàha-güedé cadèná xii-dé dico ñá túú tnàhí ndàcu-güedé núú-dě.

4 Te ío titní xito ní dácútú-güedé cadèná sáhá-dě ndìhi ndaha-dé dico ní dándává-ni-dě, te ní xóo dacàchi-gá-dé nchaa cadèná-á<sup>n</sup>, te ñá túú tnàhí ni ndàcu-güedé núú-dě.

5 Te cuèi nduu cuèi niú ní xóo cana saa-dé, te váha-ni núú xití yucu ndècu-dé àdi núú yíndüxi ndíyì dico càna saa nahi-ni-dé, te ío ní xóo dànícùehé-dé mée-dě ndìhi yúú.

6 Te òré ní xini-dé Jèsús te xinu-dé ní sáhá<sup>n</sup> núú-gă, te ní ngüíñí xití-dě,

7 te espíritú yìhí ñàha xii-dé-á<sup>n</sup> ñí quide-xi ñìhi ní cáhá<sup>n</sup>-dé, te xáha<sup>n</sup>-dě xii-gá:

—¿Ná cuèndá véxi yòhó Jèsús Déhe Dútú Ndiöxí sàdí-n ìchi-í? Te càhá<sup>n</sup> ndàhú-í núú Ndiöxí yuhu núú-n sã vã dándòhò ñàha-n xii-í —càchí-dé xáha<sup>n</sup>-dě xii-gă.

8 Te duca<sup>n</sup> ñí cáhá<sup>n</sup>-dé cuèndá sá Jèsús ní xáha<sup>n</sup>-gă xii espíritú cùndìhi yucu ñávãha yìhi ñàha xii-dé-á<sup>n</sup> sã quée ñàha-xi xii-dé.

9 Te Jèsús ní xicá<sup>n</sup> tnúhú-gă núú-dě, te xáha<sup>n</sup>-gă:

—¿Nása nàni-n-í? —cachí-gá xáha<sup>n</sup>-gă xii-dé.

Te ní xáha<sup>n</sup>-dě:

—Vài Sandadú, duha nàni-í chí ío cuéhé-ndí —càchí-dé xáha<sup>n</sup>-dě xii-gă.

10 Te cue espíritú cùndìhi yucu ñávãha-á<sup>n</sup> ñí cáhá<sup>n</sup> ndàhú-xi núú Jèsús sá vã téndàha ñàha-gá xii-xi quíhí<sup>n</sup>-xi ingá xichi.



11 Te ñi-yatni yucu núú ndécú Jèsús-án yíhí vài cuchí xixexi-güedi.

12 Te nchaa cue espíritú-án ní cáhá<sup>n</sup> ndàhú-xi núú-gă, te xăha<sup>n</sup>-xi xii-gá:

—Càhá<sup>n</sup> ndàhú-ndí núú-n sã dáñá-n quǐhu-ndí yiqui cùñú nchaa cùchí-ă<sup>n</sup> —càchí-xi xăha<sup>n</sup>-xi xii-gá.

13 Te Jèsús ní xăha<sup>n</sup>-gă sá cúú quǐhu-xi yiqui cùñú-güedi, te xĩnu dàtná úú mĩl-güedi yìhi yucu-án. Te nchaa espíritú cùndìhi yucu ñávãha yìhi ñaha xii téé-án ní quee ñaha-xi xii-dé, te cuánguǐhu-xi yiqui cùñú nchaa cùchí-án, te nchaa-güedi ní xinu-güedi duha ní quée-güedi ndàa núú dèhvã yuhu làgúná-án, te ní ngaunihnu-güedi xití ndute te ní ndìhi-güedi ní cáhá.

14 Te òré ní xiní cue téé xitò cuchí-án nàcuáa ní cuu te ní xinu-güedé, te ní sáhá<sup>n</sup>-güedé ní caní-güedé cuèndú núú cuè ñáyiu ndècu xití ñuú, ndìhi núú cuè ñáyiu ndècu xití yucu. Te nchaa ñáyiu ní níhí tñũhu ní xicá-yu cuáhá<sup>n</sup> ndéhě-yu nàcuáa ní cuu.

15 Te òré ní quexió-yu núú ndécú Jèsús te ní xiní-yu téé ní xíhi ñaha cuè espíritú cùndìhi yucu ñávãha-án núcõo-dé núú sáhá Jèsús, te nihnu-ná-dé dóó-dě te núcõo-ná-dé dàtná ñ<sup>n</sup> ñáyiu váha, te ní yùhú-yu òré ní xiní ñáhã-yu xii-dé.

16 Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávãha-án ní cùu ní caní-yu cuèndú núú nchàa ñáyiu ní quexió-án nàcuáa ní cuu ní ndúha téé-án ndìhi nàcuáa ní cuu cuèndá nchaa cùchí-án.

17 Te sá dúcã ni níhí ñáyiu-án tñũhu nàcuáa ní cuu núu ncháa-yu ní ngüíta-yu càhá<sup>n</sup> ndàhú-yu núú Jèsús sá ná quèe-gá yucu ñuú-yu núhú-gá.

18 Te ní xica-gá cuáhá<sup>n</sup>-gá núú ndécú bàrcú, te òré ndée-gá bàrcú-án nũhú-gá ní ngüíta téé ní xíhi ñaha cuè espíritú cùndìhi yucu ñávãha-án càhá<sup>n</sup> ndàhú-dé núú-gă nõu vá cùndèe iní-gá quíhí<sup>n</sup> ndìhi ñaha-gă xii-dé.

19 Dico ñá túú ní sãha-gá tñũhu quíhí<sup>n</sup> ndìhi ñaha-gă xii-dé, te ní xăha<sup>n</sup>-gă xii-dé:

—Cuanùhú vehe-n, te caní-n cuèndú núú cuè ñáyiu sá Yã Ndiõxí ní cundàhú iní ñáhã-gă xii-n, te ío càhnu cuu nchaa sá vãha ní quide-gá sá cúú-xi-n —càchí-gá xăha<sup>n</sup>-gă xii-dé.

20 Te téé-án ní xica-dé cuánuhú-dé, te ní sáhá<sup>n</sup>-dé ndi ùxí ñuú nání Dècápolís, te ní caní-dé cuèndú núú nchàa ñáyiu sá ío càhnu cuu nchaa sá vãha ní quide ñaha Jèsús xii-dé, te ncháa-yu ío ní cuñúhu-yu.

*Cuèndá déhe yoco té Jàirú ndìhi cuèndá ñ<sup>n</sup> ñadìhí ní tnándeé dóó Jèsús (Mt. 9:18-26; Lc. 8:40-56)*

21 Te Jèsús cuándeé-gá bàrcú, te ní natehndé-gá ndàa ingá xio yuhu làgúná, te ío vài ñáyiu ní tacá núú ní quexió-gá-án, te xía<sup>n</sup> ndécú-gă

22 ní quexió ñ<sup>n</sup> téé tàxi tñuní veñúhu núú-gă, te téé-án nání-dě Jàirú, te ní ngüíñí xití-dě núú-gă.

23 Te ní ngüíta-dé càhá<sup>n</sup> ndàhú-dé núú-gă, te xăha<sup>n</sup>-dě xii-gá:

—Ío càhú tñáhã déhe yoco-í cùhú-xi, te ndècu-ná-xi sá cùú-xi, te véxi-í càhá<sup>n</sup> ndàhú-í núú-n nõu vá cùndèe iní-n quíhí<sup>n</sup>-ó vèhe-í tendaha-n-xi cuèndá ndúha-xi, te cundecu-xi —càchí-dé xăha<sup>n</sup>-dě xii-gá.

24 Te Jèsús ní xica-gá cuáhá<sup>n</sup>-gá ndìhi téé-án, te ío vài ñáyiu nchìcú<sup>n</sup> ñáhã xii-gá cuáhá<sup>n</sup>, te dàdehnde ñaha-ná-yu xii-gá ní cùu.

25 Te tnuú nchaa ñáyiu-án ñũtnáhã ñ<sup>n</sup> ñaha cùhú, te ñaha-án sa ní cuu úxúú cuíá sã cùhú-a<sup>n</sup> ngòyo ñaha níñí xii-a<sup>n</sup>.

26 Te ío ta ndòho-a<sup>n</sup> véxi, te ío cuéhé ñátátná ní cuu ta quide tátna ñaha xii-a<sup>n</sup>, te sa ní ndìhi nchaa sá ndécú ndìhi-a<sup>n</sup> ní nadico-a<sup>n</sup> cuèndá ní níhí-a<sup>n</sup> díhú<sup>n</sup> ní quehe<sup>n</sup> nchaa ñáyiu ní quide tátna ñaha xii-a<sup>n</sup> dico ní ñ<sup>n</sup>-yu ñá túú ní ndàcú-yu ndúha-a<sup>n</sup>, chi da uu<sup>n</sup>-gá tá cùu cahú-a<sup>n</sup> cuáhá<sup>n</sup>.

27 Te òré ní níhí-a<sup>n</sup> tñũhu cuèndá Jèsús, te ní xica-a<sup>n</sup> cuáhá<sup>n</sup>-a<sup>n</sup> núú ndécú-gă. Te òré ní quexió-a<sup>n</sup> núú

ndécú-gă te ní sáhá<sup>n</sup> ndehe yatni-a<sup>n</sup> ndàa sátá-gă ní tnándeé-a<sup>n</sup> dóó-gă.

28 Te duca<sup>n</sup> nǐ quide-a<sup>n</sup> chi ní sani iní-a<sup>n</sup> sá nǔu ndacu-a<sup>n</sup> tnándeé-a<sup>n</sup> cuèdicó luha yuhu dǒó Jèsús te ndúha-a<sup>n</sup> ní sani iní-a<sup>n</sup>.

29 Te òré duca<sup>n</sup> nǐ quide-a<sup>n</sup> te ñá túú-gă ní ngòyo ñaha-gă níñí xii-a<sup>n</sup>, te òré-á<sup>n</sup> nǐ cutnùní iní-a<sup>n</sup> sá nǐ ndúha-a<sup>n</sup> cuéhé tnàhá-a<sup>n</sup>.

30 Te Jèsús ní cutnùní iní-gă sá ì<sup>n</sup> ñáyiu ní ndúha sá cuendá-gă, núu ní nchócótó-gă ndàa sátá-gă te ní xícá<sup>n</sup> tnúhú-gă núu nchàa ñáyiu nchìcú<sup>n</sup> ñáhá xii-gă, te xăha<sup>n</sup>-gă xii-yu:

—¿Ndédacàa-ndo ní tnándeé ñáhá xii-í? —càchí-gă xăha<sup>n</sup>-gă xii-yu.

31 Te cue téa xica cuu ndihi-gă ní xăha<sup>n</sup>-güedě xii-gă:

—Mèstrú, ndèhe-n sá váí ñáyiu nchìcú<sup>n</sup> ñáhá xii-n, te texio texio dàdehnde ñahá-yu xii-n te xícá<sup>n</sup> tnúhú-gă-n yòo ní tnándeé ñáhá xii-n —càchí-güedě xăha<sup>n</sup>-güedě xii-gă.

32 Te Jèsús ní xíndéhé văha-gă xio xio dǐñi-gă nǔu ndédacàa ñáyiu ní tnándeé ñáhá xii-gă.

33 Te sá dúcá<sup>n</sup> nǐ cutnùní iní ñadìhí-á<sup>n</sup> nàcuáa ní cuu, núu yùhú yùhú-a<sup>n</sup> ní sáhá<sup>n</sup>-a<sup>n</sup> ní ngüíñí xítí-á<sup>n</sup> nǔú Jèsús, te ní xăha<sup>n</sup> ndáá-a<sup>n</sup> xii-gă nàcuáa ndùu cuendá-a<sup>n</sup>.

34 Te Jèsús ní xăha<sup>n</sup>-gă xii-a<sup>n</sup>:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndìhú-gă iní-n, chi vá dúcá<sup>n</sup>-gă ndoho-n —càchí-gă xăha<sup>n</sup>-gă xii-a<sup>n</sup>.

35 Te càhá<sup>n</sup> dúcá<sup>n</sup>-ní Jèsús ní sáa cue téa xinu cuechi vehe té Jàirú téa tàxi tnuní veñúhu-á<sup>n</sup>, te xăha<sup>n</sup>-güedě xii-dé:

—Sa ní xíhí déhe-n, vá chíchìu<sup>n</sup>-gă-n Mèstrú —càchí-güedě xăha<sup>n</sup>-güedě xii-dé.

36 Dico Jèsús ñá túú ní quide cuendá-gă nàcuáa ndùu tnúhu ní càhá<sup>n</sup> cue téa-á<sup>n</sup>, te ní xăha<sup>n</sup>-gă xii téa tàxi tnuní veñúhu-á<sup>n</sup>:

—Ñá túú nă cani iní-n, quindáá iní ñáhá-ní-n xii-í —càchí-gă xăha<sup>n</sup>-gă xii-dé.

37 Te Jèsús vá yòo-gă ní cuení-gă canchicú<sup>n</sup> ñáhá xii-gă quíhí<sup>n</sup>, chi té Pèlú-ni, ndihí té Jàcobó-ni, ndihí ñaní-ni-dé té Juàá cuáhá<sup>n</sup> ndihí ñaha-gă xii-güedě.

38 Te òré ní quexìo-gă ndihí-güedě vehe téa tàxi tnuní veñúhu-á<sup>n</sup>, te ní xiní-gă sá ìo vâi ñáyiu xíndecu, te súúní dùsa<sup>n</sup> quidé-yu te níhí xícáhá<sup>n</sup>-yu te xíndáhí-yu.

39 Te òré cuánguihu-gă xití vehe, te ní xăha<sup>n</sup>-gă xii-yu:

—¿Ná cuendá ndeé dúcá<sup>n</sup> ìo dusa<sup>n</sup> quide-ndo, te ndàhyú-ndó? Te xíchí-a ñá túú ní xíhí-xi chi dicó xidí-xi —càchí-gă xăha<sup>n</sup>-gă xii-yu.

40 Te ní sácú ndeé ñáhă-yu xii-gă sá dúcá<sup>n</sup> nǐ càhá<sup>n</sup>-gă, chi sá cúú-xi mèe-yu chi ní xíhí ndisa xíchí-ă<sup>n</sup>. Te òré-á<sup>n</sup> nǐ queñuhu-gă nchàa-yu quehé, te cuánguihu-gă núu cándodo yiqui cuñú xíchí ní xíhí-á<sup>n</sup>. Te ndèca-gă tătá xíchí ní xíhí-á<sup>n</sup> ndihí năná-xi cuánguihu, te tnàhá cue téa úní ndihí-gă-á<sup>n</sup> cuánguihu ndihí-gă.

41 Te ní tni-gă ndaha xíchí ní xíhí-á<sup>n</sup>, te ní xăha<sup>n</sup>-gă:

—Tàlíta, cúmí —càchí-gă xăha<sup>n</sup>-gă.

Te tnúhu-á<sup>n</sup> quée-xi: Yòhó xíchí cuéchí yúhú càchí-í sá ndácòo-n, duha quèe-xi tnúhu-á<sup>n</sup>.

42 Te òré-ni-á<sup>n</sup> nǐ ndoto xíchí cuéchí-ă<sup>n</sup> nǐ ndacòo-xi ní nacaca cuu-xi, te ndècu-xi úxúú cuíá-xi. Te ío ní cuñúhu nchaa ñáyiu sá dúcá<sup>n</sup> ní dándótó ñaha Jesús xii-xi.

43 Te Jèsús ní càhá<sup>n</sup> víhí-gă dóho tătá-xi ndihí năná-xi sá vă yòo ì<sup>n</sup> cúñàhá-yu sá ní dándótó ñaha-gă xii-xi. Te sátá dúcá<sup>n</sup> te ní xăha<sup>n</sup>-gă xii-yu sá cuñàhá-yu xii-xi sá caxí-xi.

## 6

### *Jèsús ndécú-gă ñuú Nazàrét* (Mt. 13:53-58; Lc. 4:16-30)

1 Te Jèsús ní ndee-gă ñuú núu ní dándótó-gă xíchí ní xíhí-á<sup>n</sup>, te cuánuhú-gă núu cúú ñuú-gă, te tnàhá cue téa xica cuu ndihí-gă cuánuhú ndihí-gă.

2 Te ndècu Jesús ñuú-gă ní tnahá nduu ndètátú ñáyiu. Te nduu-ă<sup>n</sup>

cuãnguihu-gá xití veñúhu dàcuaha ñaha-gá xií-yu. Te vai ñáiyu ndèdóho nchaa tnúhu càhá<sup>n</sup>-gá, te xicuñúhu vîhî-yu, te xitnàhá-yu:

—¿Ndèé ní sáhá<sup>n</sup> dâcuáhá tõe-a núu ndéé duha váha càhá<sup>n</sup>-dé, nása ní quide-dé núu ndéé duha ío váha cùtnuní iní-dé, te ndâcu-dé quidé-dé nchaa sá vâ yõo tnàhî ndâcu cada-i?

<sup>3</sup> Te dicó carpintèrú cúú-dě, dicó déhe tá Màriá cúú-dě, te ñaní-dé cúú tẽ Jâcobó, ndihî té Chèé, ndihî té Jùdás, ndihî té Xímú, te ñu-ni cue cúha-dé cúú ñáiyu ndècu ndihî-o ñuú-a —câchî-yu xitnàhá-yu.

Te ñá túú ní cuínî-gá-yu càhá<sup>n</sup> ndihî váha ñàhá-yu xii-gá.

<sup>4</sup> Te Jèsús ní xáha<sup>n</sup>-gã xii-yu:

—Te núu ì<sup>n</sup> tée càhá<sup>n</sup> tnúhu Yá Ndiõxí ná nâsáá-dé ñuú-dé dâcuàha-dé ñáiyu tnúhu-gá, te nchaa ñáiyu ñuú-dé-á<sup>n</sup>, ndihî nchaa ñáiyu ndècu ndihî-dé vehe-dé, ndihî nchaa ñáiyu cùu ndi mee-dé ñá túú nèhé-yu sá yíñùhu núú-dě, dico cue ñáiyu nchaa dava-gá ñuú chi nèhé-yu sá yíñùhu núú-dě —câchî-gá xãha<sup>n</sup>-gã xií-yu.

<sup>5</sup> Te ñá túú ní quide tátna Jèsús vai ñáiyu cuendá sá ñà túú ní sândáá iní ñáhã-yu xii-gá, dico ní quide tátna-gá ì<sup>n</sup> úú ñáiyu cùhú ní sândáá iní ñáhã xii-gá. Te ní tendaha ñàha-ni-gá xií-yu te ní ndúha-yu.

<sup>6</sup> Te ío ní cuñúhu-gá sá dúcá<sup>n</sup> ñà túú ní cuínî-yu quindáá iní ñáhã-yu xii-gá. Te sátá dúcá<sup>n</sup> te ní xica-gá cuáhá<sup>n</sup>-gá nchaa dava-gá ñuú lìhli càa yatni xíá<sup>n</sup> cuendá dâcuàha-gá ñáiyu tnúhu-gá.

*Jèsús táuchìu<sup>n</sup>-gá quíhî<sup>n</sup> cue tée xica cuu ndihî-gá càhá<sup>n</sup>-güedé tnúhu Yá Ndiõxí núú ñáiyu*

*(Mt. 10:5-15; Lc. 9:1-6)*

<sup>7</sup> Te Jèsús ní cana-gá ndi ùxúú cue tée xica cuu ndihî-gá, te ní sáñaha-gã xii-güedé tnúhu ndee iní cundecu ndihî-güedé cuendá queñuhu-güedé nchaa espíritú cündihî yucu ñávãha yìhî ñaha xii ñáiyu. Te ní xáha<sup>n</sup>-gã xii-güedé sá ndi ndúú ndi ndúú-güedé

quíhî<sup>n</sup>-güedé càhá<sup>n</sup>-güedé tnúhu Yá Ndiõxí núú ñáiyu.

<sup>8-9</sup> Te cùmání-gã caca-güedé quíhî<sup>n</sup>-güedé, te ni xáha<sup>n</sup>-gã xii-güedé:

—Vá cânèhe-ndo ñunu cuhu<sup>n</sup> ndachiu<sup>n</sup>-ndo, te ni vâ cânèhe-ndo sá cáxí-ndó, te ni vâ cânèhe-ndo díhú<sup>n</sup>, chi ì<sup>n</sup> caa-ni tàtnu canehe-ndo, te chàú yíhî-ní-ndó-ã<sup>n</sup> xíã<sup>n</sup>-ni quíhî-ndo, te vá cânèhe-gá-ndó ìngá ichi dóó-ndó chi ñu-ni dóó níhnú-ndó-ã<sup>n</sup> xíã<sup>n</sup> tnàhî-ni cuihnu-ndo te ñá túú tnàhî-gá ná canehe-ndo —câchî-gá xãha<sup>n</sup>-gã xii-güedé.

<sup>10</sup> Te xãha<sup>n</sup> tùcu-gá:

—Te òré ná sàá-ndó ì<sup>n</sup> ñuú, te ío ñáiyu càhá<sup>n</sup> ñáhã-yu xii-ndo vehé-yu, te xíã<sup>n</sup>-ni cundecu-ndo ndèé ná sàá nduu ndèe-ndo ñuú-á<sup>n</sup>.

<sup>11</sup> Te núu ío dava ñuú ñá túú cuínî-yu càhá<sup>n</sup> ndihî ñaha váha-yu xii-ndo, te ni ñà túú cuínî-yu cundedóho-yu tnúhu càhá<sup>n</sup>-ndó, te ndee-ni-ndo ñuú-á<sup>n</sup> te naquidi-ndo ticáchúhmá ñi tnîi sáhã-ndó cuendá ná cùtnuní iní-yu sá ñà túú quide váha-yu. Te na câchî tnúhu ndáá-í xii-ndo sã ná sàá nduu càda ndáá Yá Ndiõxí cuéchi nchaa ñáiyu, te cue ñáiyu duca<sup>n</sup> na càda ñaha xii-ndo-á<sup>n</sup> ìo-gá ndohó-yu dàvã-á<sup>n</sup> dâcúúxí dàtná ndoho cue ñáiyu ñuú Sòdomá ndihî cue ñáiyu ñuú Gòmorrá —câchî-gá xãha<sup>n</sup>-gã xii-güedé.

<sup>12</sup> Te cue tée-á<sup>n</sup> ñi xica-güedé cuáhã<sup>n</sup>-güedé te ní ngüíta-güedé dâcuàha-güedé cue ñáiyu tnúhu Yá Ndiõxí, te xãha<sup>n</sup>-güedé xií-yu:

—Chí dândixi túu iní sá ñà túú quide váha-ndo ndècu-ndo, te ñãña-ndo nchãa ichi cuehé ichi duha ndècu-ndo. —câchî-güedé xãha<sup>n</sup>-güedé xií-yu.

<sup>13</sup> Te vai espíritú cündihî yucu ñávãha yìhî ñaha xii ñáiyu ta queñuhu-güedé yiqui cùñú-yu cuáhã<sup>n</sup>, te vai tucu ñáiyu cùhú tá quide tátna-güedé cuáhã<sup>n</sup> chíhî ñàha-güedé acítí xií-yu te ndúha-yu.

*Nâcuáa ní cuu ní xihî té Juáa tée dàcuandute ñaha xii ñáiyu*

*(Mt. 14:1-12; Lc. 9:7-9)*

<sup>14</sup> Te nchaa xichi ní níhí ñǎyiu tnúhu nchaa nàcuáa quide Jesús, te tnàhá té Hèrodés té yìndaha ñaha xii ñáyiu ní níhí-dě tnúhu nchaa nàcuáa quide-gá, te ní cachí-dé:

—Té Juàá té ní xóo dacuàndute ñaha xii ñáyiu ní ndoto núu dàcá<sup>n</sup> ndácú-dě quide-dě nchaa sá vǎ yǎo tnàhí ndàcu cada —duha ní cachí-dé.

<sup>15</sup> Te dava ñáyiu càchí-yu sá tǎ Èliás té ní xóo cáhá<sup>n</sup> tnúhu Yá Ndiǒxí ndéé sanaha ní nasáá-dé.

Te davá-yu càchí-yu sá cúú-gǎ dàtná ñ<sup>n</sup> té ní xóo cáhá<sup>n</sup> tnúhu Yá Ndiǒxí ndéé sanaha.

<sup>16</sup> Te té Hèrodés ní níhí-dě tnúhu nchaa nàcuáa cáhá<sup>n</sup>-yu, te ní cachí-dé:

—Diu té Juàá té ní táuchí<sup>n</sup>-í ní xehndé-güedé díquí-xi ní ndoto —càchí-dé.

<sup>17-18</sup> Te duha ní cuu cútnàhá ní sahani té Hèrodés té Juàá, chí dàvá-á<sup>n</sup> ñǎ naquehe<sup>n</sup> té Hèrodés-á<sup>n</sup> ñ<sup>n</sup> ñaha nàni Herodiás ndécá-dě, te ñaha-á<sup>n</sup> sá ní cándeca ñaha ñàní-dé té Lìpé. Te té Juàá ní xáha<sup>n</sup>-dě xii té Hèrodés sá ñà túú ní quide váha-dé sá dúcá<sup>n</sup> ñǎ naquehe<sup>n</sup>-dé ñaha ní cándeca ñàní-dé, núu sá cuendá ñaha-á<sup>n</sup> ñǎ táuchíú<sup>n</sup> tǎ Hèrodés ní tñi-güedé té Juàá ní chihi ñaha-güedé vecaá, te ní dácútú ñaha-güedé xii-dé, te duca<sup>n</sup> ñǎ quide-dé cuendá sá ndécá ñaha-dé xii-a<sup>n</sup>.

<sup>19</sup> Te ñaha nàni Herodiás ndécá tǎ Hèrodés-á<sup>n</sup> ño ní cuu úhú iní-a<sup>n</sup> té Juàá, te ní cuiní-a<sup>n</sup> cahni-a<sup>n</sup>-dé, dico ñà túú ní níhí-a<sup>n</sup> nàcuáa cada-a<sup>n</sup>.

<sup>20</sup> Te mee tǎ Hèrodés chí ní cutnùní ndáá iní-dé sá tǎ Juàá cúú-dě ñ<sup>n</sup> té quide mee-ni sá vǎha, te quide ndáá-dé núu Yá Ndiǒxí, te ní xóo yùhú ñáhá-dě núu xǎ<sup>n</sup> ñà túú ní dàña-dé ná cada ñaha ñaha ndeca-dé-á<sup>n</sup> xii té Juàá. Te té Hèrodés-á<sup>n</sup> ño ní cudíí iní-dé ní xíndedóho-dé nchaa tnúhu ní xáha<sup>n</sup> tǎ Juàá xii-dé, dico ñà túú ní sàni iní-dé duu<sup>n</sup> duu<sup>n</sup> tñi-dé tnúhu-á<sup>n</sup>.

<sup>21</sup> Te ñ<sup>n</sup> nduu ní xóo vico vehe té Hèrodés ní quide cǎhnu-dé nduu ní cacu-dé. Te nduu-á<sup>n</sup> ñǎ níhí ñaha nàni Herodiás-á<sup>n</sup> nàcuáa cada-a<sup>n</sup> cuendá cúú té Juàá. Te nduu-á<sup>n</sup> ní cáhá<sup>n</sup> té Hèrodés nchaa cue té cùchiu<sup>n</sup>, ndihi nchaa cue té tàxi tñuní ñáhá xii cue

sandadú, ndihi nchaa cue té cuica ndècu distritú Galileá cuendá cudini ndihi ñaha-dé xii-güedé nduu-á<sup>n</sup>.

<sup>22</sup> Te ndècu ñ<sup>n</sup> déhe yoco ñaha nani Herodiás-á<sup>n</sup>, te xíchí-á<sup>n</sup> ñǎ quíhu-xi vehe núu cúú vico-á<sup>n</sup> ñǎ xita saha-xi mèi oré yíhí tǎ Hèrodés mèsá ndihi nchaa cue té ní cáhá<sup>n</sup>-dé, te ío ní cudíí iní-dé ndihi nchaa cue té-á<sup>n</sup> nàcuáa ní xita xíchí-á<sup>n</sup>. Te té Hèrodés ní xáha<sup>n</sup>-dě xii-xi:

—Cáca<sup>n</sup> núu-í núu ná cuiní-n te taxi-í —càchí-dé xáha<sup>n</sup>-dě xii-xi.

<sup>23</sup> Te ní cacunehe-dé ndéé Yá Ndiǒxí nàcuáa cutnùní iní xíchí-á<sup>n</sup> sá ndáa cuañaha-dé núu ná cúú sá ná càcá<sup>n</sup>-xi núú-dě cuèi ndéé cuádava nchaa sá ndécú ndihi-dé, te núu na càcá<sup>n</sup>-xi.

<sup>24</sup> Te sá dúcá<sup>n</sup> ñǎ xáha<sup>n</sup>-dě xii-xi núu ní quee-xi quehé ní xáha<sup>n</sup>-xi xii náná-xi:

—Nǎá, ¿ná cúú sǎ càcá<sup>n</sup>-í núú tǎ Hèrodés? —càchí-xi xáha<sup>n</sup>-xi xii-a<sup>n</sup>.

Te náná-xi-á<sup>n</sup> ñǎ xáha<sup>n</sup>-a<sup>n</sup> xii-xi:

—Cuahá<sup>n</sup> cáca<sup>n</sup>-n díquí tǎ Juàá tée dàcuandute ñaha xii ñáyiu —càchí-a<sup>n</sup> xáha<sup>n</sup>-a<sup>n</sup>.

<sup>25</sup> Te ndihi-ni cuándihu xíchí-á<sup>n</sup> xití vehe núu yíhí tǎ Hèrodés-á<sup>n</sup>, te xáha<sup>n</sup>-xi xii-dé:

—Cuiní-í sá mèi nduu vitna quehndé-n díquí tǎ Juàá tée dàcuandute ñaha xii ñáyiu te taxi-n, dico na cùhu<sup>n</sup> ñ<sup>n</sup> xití cóhó taxi-n —càchí-xi xáha<sup>n</sup>-xi xii-dé.

<sup>26</sup> Te té Hèrodés ní ngúita-dé ndihú víhí iní-dé sá dúcá<sup>n</sup> ñǎ xáha<sup>n</sup>-xi xii-dé, dico ñà túú ní cùyi-dé cúñaha-dě xii-xi sá vǎ cúú cuañaha-dě sá xicá<sup>n</sup>-xi, chí cuendá sá núu nchaa ñáyiu ní xáha<sup>n</sup>-dě sá cúú cuañaha-dě núu ná cúú sǎ ná càcá<sup>n</sup>-xi, te ní cacunehe-dé ndéé Yá Ndiǒxí nàcuáa cutnùní iní-xi sá ndáa cuañaha-dě sá ná càcá<sup>n</sup>-xi núú-dě.

<sup>27</sup> Te té Hèrodés-á<sup>n</sup> ndihi-ni ní xáha<sup>n</sup>-dě xii ñ<sup>n</sup> sandadú sá quíhí<sup>n</sup>-dě quehndé-dé díquí tǎ Juàá.

<sup>28</sup> Te sandadú-á<sup>n</sup> ñǎ xica-dé cuahá<sup>n</sup>-dé vecaá núu yíhí tǎ Juàá-á<sup>n</sup>, te ní quexìo-dé te ní xehndé-ni-dé díquí tǎ Juàá, te ní chihi-dé ñ<sup>n</sup> xití cóhó te nèhe-dé cuánuhú ní sáha-dé

xíchí xìcá<sup>n</sup>-á<sup>n</sup>, te xíchí-ǎ<sup>n</sup> nǐ nacuáha-xi nǎná-xi.

29 Te òré ní níhí nchaa cue téé ní xica cuu ndíhi ndí Juàá-á<sup>n</sup> tnúhu sá dúcá<sup>n</sup> nǐ sahani ñaha-güedé xii ndí, te ní sáhá<sup>n</sup>-güedé ní ndocani-güedé yiqui cùnú ndí te ní chindúxi-güedé.

*Jèsús dácàxi-gá úhú<sup>n</sup> mǐl cue téé te dǐ<sup>n</sup> ñáyiú dǐhí ndíhi landú*

(Mt. 14:13-21; Lc. 9:10-17; Jn. 6:1-14)

30 Te nchaa cue téé ní táuchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndióxi núú ñáyiú ní ndexìo-güedé núú-gǎ te ní ngüíta-güedé nácàni tnúhu-güedé nchaa nàcuáa ní quide-güedé ndíhi nchaa nàcuáa ní dánèhé ñáhá-güedé xii-yu.

31 Te Jèsús ní xáha<sup>n</sup>-gǎ xii-güedé:

—Chí nèhé ná quihí<sup>n</sup>-ó ì<sup>n</sup> xichi núú ñà túú ñáyiú ndetatú-ó —càchí-gá xǎha<sup>n</sup>-gǎ xii-güedé.

Te duca<sup>n</sup> nǐ xáha<sup>n</sup>-gǎ xii-güedé, chí ío cuéhé ñáyiú cuáhá<sup>n</sup> véxi-yu cùú-yu núú ndécú-gǎ. Te ní ñǎ nihí-gá nása cada-gá caxi-gá ndíhi cue téé xica cuu ndíhi-gá.

32 Te Jèsús cuánguee-gá bàrcú ndíhi mee-ni cuè téé ní táuchíú<sup>n</sup>-gǎ cáhá<sup>n</sup> tnúhu-gá, te cuáhá<sup>n</sup>-gá ndíhi-güedé ì<sup>n</sup> xichi núú ñà túú ñáyiú ndècu.

33 Dico vai ñáyiú ní cutnùnì iní-yu sá díú-gǎ ñúhú bàrcú-á<sup>n</sup> cuáhá<sup>n</sup> ndíhi cue téé xica cuu ndíhi-gá, te nchaa ñúú cáá yàtni xía<sup>n</sup> nǐ quee ñáyiú xixinú-yu cuáhá<sup>n</sup> núú nǐ quidé-yu cuèndá quexìo Jèsús, te sa ndécú-yu xía<sup>n</sup> nǐ quexìo-gá.

34 Te òré ní quene Jèsús xití bàrcú, te ní xiní-gá cuéhé víhí ñáyiú xixúcu núú nǐ quexìo-gá-á<sup>n</sup>, te ní cundàhú iní ñáhá-gǎ xii-yu chí ndécú-yu dàtná xǐndecu cue mbéé cue quití ñà túú tòli-xi, te ío vai núú sǎ nǐ ngüíta-gá ní dácúhá ñaha-gá xii-yu.

35 Te sátá tá cuàa cuáhá<sup>n</sup> te ní sáhá<sup>n</sup> cue téé xica cuu ndíhi Jèsús núú-gǎ, te xǎha<sup>n</sup>-güedé xii-gá:

—Sa ní cuaa te ñà túú ñáyiú ndècu yatni iha.

36 Váha-gá dandàca nchaa ñáyiú-a chí na quihí<sup>n</sup>-yu nchaa vehe càa xití yucu-a, ndíhi nchaa ñúú cáá nchàa yatni iha cuaá<sup>n</sup>-yu sá caxi-yu —càchí-güedé xǎha<sup>n</sup>-güedé xii-gá.

37 Te Jèsús ní xáha<sup>n</sup>-gǎ:

—Mee-ndo chí cuǎñaha sǎ ná caxi-yu —càchí-gá xǎha<sup>n</sup>-gǎ xii-güedé.

Te xǎha<sup>n</sup>-güedé xii-gá:

—¿Te nása cada-ndí, chí xini ñuhu-xi datná úú cièndú díhú<sup>n</sup> denàriú cuèndá cuaa<sup>n</sup>-ndí sá caxi-yu? —càchí-güedé xǎha<sup>n</sup>-güedé xii-gá.

38 Te Jèsús ní xáha<sup>n</sup>-gǎ xii-güedé:

—Chí cuáhá<sup>n</sup> cundehe-ndo núu ná daha pàá ndécú ndíhi-ndo te cachí tnúhu-ndo —càchí-gá xǎha<sup>n</sup>-gǎ xii-güedé.

Te ní sáhá<sup>n</sup> ndéhé-güedé núu ná daha pàá ndécú, te ní xáha<sup>n</sup>-güedé xii-gá:

—Úhú<sup>n</sup> duha-ná pàá ndíhi úú-nǎ chácá ndécú —càchí-güedé xǎha<sup>n</sup>-güedé xii-gá.

39 Te Jèsús ní xáha<sup>n</sup>-gǎ xii nchaa ñáyiú sá ná nihí tnáhǎ-yu cuu titní xichí-yu, te ngóo-yu nchaa núú cǐhú cuí càa xía<sup>n</sup>.

40 Te ncháa-yu ní ngóo-yu, te dava xichí-yu ní ngóo ì<sup>n</sup> cièndú-yu, te dava xichí-yu ní ngóo údico úxi-yu.

41 Te sátá nǐ ndíhi-yu ní ngóo, te ní quehe<sup>n</sup> Jèsús ndí ùhú<sup>n</sup> pàá ndí úú chácá-ǎ<sup>n</sup>, te ní ndacoto-gá andíu te ní ndacá<sup>n</sup> táhú-gǎ núú Yá Ndióxi, te dàtnùnì ní táhú cuèchi-gá pàá-á<sup>n</sup> te ní sáñaha-gǎ xii cue téé xica cuu ndíhi-gá ní dácǎhñu-güedé nchaa ñáyiú-á<sup>n</sup> nǐ xexí-yu. Te díu-ni duca<sup>n</sup> nǐ quide tucu-gá úú chácá-ǎ<sup>n</sup>.

42 Te ncháa-yu ní xexí-yu ní ndahá xití-yu.

43 Te sátá nǐ túhú cóhǒ-yu te ní nà-datàcá-güedé nchaa sá nǐ quendóo, te ní chítú ùxúú tnàhá tídihi mee-ni sǎ nǐ quendóo núú ùhú<sup>n</sup>-ni pàá, ndíhi núú úú-ni chácá.

44 Te nchaa ñáyiú ní xexi-á<sup>n</sup> chí xǐnu úhú<sup>n</sup> mǐl mee-ni cuè téé chí díu-ni cue téé-á<sup>n</sup> nǐ quíundehe, te dǐ<sup>n</sup> ñáyiú dǐhí ndíhi cue landú.

*Jèsús xicá-gã núú ndute  
(Mt. 14:22-27; Jn. 6:16-21)*

<sup>45</sup> Te òré-ni-á<sup>n</sup> ñí xáha<sup>n</sup> Jèsús xii cue tée xica cuu ndihi-gá sá quëe-güedé bàrcú codonù-güedé quíhí<sup>n</sup>-güedé ì<sup>n</sup> ñúú nání Bètsaidá cáá ndàa ingá xio yuhu làgúná núú ndécú-güedě-á<sup>n</sup>, te mee-gã quendóo-gá cada ndee iní tnáhá-gã ndihi cue ñáyiu.

<sup>46</sup> Te sátá ñí yáha ní quide ndee iní tnáhá-gã ndihí-yu, te ní xica-gá cuáhá<sup>n</sup>-gá ì<sup>n</sup> tìndúú cáá yàtni xiá<sup>n</sup> cuèndá cáhá<sup>n</sup> ndihi-gá Yã Ndiòxí.

<sup>47</sup> Te òré sa ní cundiqui<sup>n</sup> te bàrcú sá ñúhú cuè tée xica cuu ndihi-gá sa cuáhá<sup>n</sup>-xi ndéé cuádava xití làgúná-á<sup>n</sup>, te mee-gã ndécú-gã ì<sup>n</sup> núú tìndúú.

<sup>48</sup> Te túu ndèhe-gá sá sũúni ndòho-güedé tá dàcaca-güedé bàrcú-á<sup>n</sup> cuáhá<sup>n</sup>, chi cuèndá ndàa nacuáa cuáhá<sup>n</sup>-xi-á<sup>n</sup> duha véxi táchí te nàtúndaha-xi. Te ingá nduu-ã<sup>n</sup> tàcuíhndá-gá sa ní cuyatni víí-nã Jèsús bàrcú ñúhú-güedě-á<sup>n</sup>, dico núú ndute tá xica-gá cuáhá<sup>n</sup> te luha-ná te yáha ñaha-gã xii-güedé ní cùu.

<sup>49-50</sup> Te òré ní xiní ñáhá cuè tée ñùhu barcú-á<sup>n</sup> xii-gá te ní yùhú-güedé ní cana saa-güedé, chi ní sani iní-güedé sá ì<sup>n</sup> almá cúú-gã. Te ní xáha<sup>n</sup>-gã xii-güedé:

—Ñí cunduu-ndo, vá yùhú-ndó, chi yùhú cúú-í! —càchí-gã xáha<sup>n</sup>-gã xii-güedé.

<sup>51</sup> Te Jèsús cuánguee-gá xití bàrcú ñúhú-güedě-á<sup>n</sup>, te sátá cuánguee-gá te òré-ni ní ngúíñí táchí, te ní cuñúhu vèhi-güedé.

<sup>52</sup> Te duca<sup>n</sup> chi cue tée-á<sup>n</sup> ñà túú ní cùtnuní iní-güedé nása quide-gá, chi ñá túú ní cùtnuní váha iní-güedé nàcuáa ndùu sá ñí quide-gã òré ní nadacàyá-gá pàá, chi ío ñí dǐquí-güedě.

*Jèsús quidé tãtna-gã ñáyiu cùhú ñúú  
Genesàrét  
(Mt. 14:34-36)*

<sup>53</sup> Te ní yáha-güedé ndihi-gá ndàa ingá xio yuhu làgúná, te ní sáá-güedé ndihi-gá yucu cue tée ñúú Genesàrét.

Te yacá<sup>n</sup> ní dácútú ndèe-güedé bàrcú-güedé yuhu làgúná.

<sup>54</sup> Te òré ní quene Jèsús ndihi cue tée xica cuu ndihi-gá xití bàrcú, te nchaa ñáyiu xǐndecu-á<sup>n</sup> ñí cutnùní iní-yu sá díú-gã.

<sup>55</sup> Te ñáyiu-á<sup>n</sup> ndihi-ni ní sáhá<sup>n</sup>-yu nchaa núú xǐndecu cue ñáyiu cùhú, te cue ñáyiu cùhú-á<sup>n</sup> ñí quée-yu xító nchido ñahá-yu cuáhá<sup>n</sup> ndi tnahá ì<sup>n</sup> ì<sup>n</sup> xichi núú nihí-yu tnúhu quèxio Jèsús.

<sup>56</sup> Te nchaa ñúú náhnú ndihi nchaa ñúú líhli núú cuáhá<sup>n</sup> Jèsús, duca<sup>n</sup> xǐndecá-yu nchaa ñáyiu cùhú cuáhá<sup>n</sup> xití ñúú sàcá<sup>n</sup> ñáhã-yu núú-gã cuèndá cada tátna ñaha-gã xií-yu. Te diu-ni duca<sup>n</sup> xǐquidé-yu nchaa dava-gá xichi núú cuáhá<sup>n</sup>-gá núú xǐndecu cue ñáyiu, te càhá<sup>n</sup> ndàhú-yu núú-gã sá ná dáñá-gã tnàndeé cue ñáyiu cùhú-á<sup>n</sup> cuèdicó luha yuhu dǒó-gã cuèndá ndúha-yu. Te nchaa ñáyiu cùhú ní tnàndeé yuhu dǒó-gã ní ndúha-yu.

## 7

*Cuèndá nchaa sá quidé-xí ngǐndecu  
cuéchi ñáyiu  
(Mt. 15:1-20)*

<sup>1</sup> Te ñúú Jerusalén ní quee cue tée dàcuaha ñaha xii ñáyiu nchaa tnúhu ní chídó tnùní ndíi Moisés, te ní quexìo-güedé núú ndécú Jèsús, te tnáhá cue tée cùu fariséú ní quexìo ndihi-güedé.

<sup>2</sup> Te cue tée-á<sup>n</sup> ñí xiní-güedé sá dàva cue tée xica cuu ndihi Jèsús ñá túú ndàha-güedé dàtná ndáhá mèe cue tée cùu fariséú-á<sup>n</sup> òré caxi-güedé. Te xiá<sup>n</sup> nùu cue tée ní quexìo-á<sup>n</sup> ñí cáhá<sup>n</sup> cuèhé-güedé cuèndá cue tée xica cuu ndihi-gá.

<sup>3</sup> Te duca<sup>n</sup> chi nchaa cue tée cùu fariséú-á<sup>n</sup> ndihi nchaa ñáyiu isràél nchìcú<sup>n</sup> nihnú-yu quidé-yu dàtná ní xóo cada nchaa cue ñaní tnáhã-yu ní xǐndecu ndéé sanaha, chi nchaa ñáyiu-á<sup>n</sup> và caxí-yu te núu vá ndáhã-yu dàtná ní xóo ndaha nchaa cue ñaní tnáhã-yu ní xǐndecu ndéé sanaha-ã<sup>n</sup>.

4 Te ñáyiú-á<sup>n</sup> ndi tnahá òré cuahá<sup>n</sup>-yu núú yáhu te nàsáá-yu, te ndàhá-yu nàcuáa sàni iní-yu ndùvétú iní Yá Ndiòxí, te núú vá dúcá<sup>n</sup> càdá-yu te vá cáxí-yu. Te tnahá náquété-yu vàsú sá sácũhu<sup>n</sup> sá xíhí-yu, ndihí lítu, ndihí cóhó càá, ndihí càamá. Te nchaa xéhé náquété-yu nàcuáa sàni iní-yu ndùvétú iní Yá Ndiòxí. Te ío-gá títní sá ñí xóo cada nchaa ñáyiú ní xíndecu ndéé sanaha-á<sup>n</sup> nchìcú<sup>n</sup> nihnú-yu quidé-yu.

5 Te cue téé cùu fariséú-á<sup>n</sup>, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés-á<sup>n</sup> ñí xáha<sup>n</sup>-güedé xii Jèsús:

—¿Ná cuèndá cue téé xica cuu ndihí-n ñá túú nàquete-güedé ndaha-güedé òré caxi-güedé dàtná ní cachí nchaa cue téé ní xíndecu ndéé sanaha-í? —càchí-güedé xáha<sup>n</sup>-güedé xii-gá.

6 Te Jèsús ní xáha<sup>n</sup>-gá xii-güedé:

—Nchòhó cúú-ndó cuè téé ío dàndahú méé-xí chí càchí-ndó sá ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùní ndíi Chàíá téé ní xóo càhá<sup>n</sup> tnúhu Yá Ndiòxí ndéé sanaha núú tütú-gá núú càhá<sup>n</sup>-xi nàcuáa ní càhá<sup>n</sup>-gá cuèndá-ndó, te duha ní cachí-gá:

Ñáyiú-a càchí-yu sá ío càhnu cuu-í, dico dícó-ni yuhu càhá<sup>n</sup>-yu, chí ñá túú ñùhu iní ñáhã-yu xii-í.

7 Te àú<sup>n</sup> nã cuu chĩñuhu ñahá-yu xii-í, chí ñá túú vèdana ndéé nándĩhi-xi,

chí cue ñáyiú-a dàcuahá-yu cue tnahá ñáyiú-yu nàcuáa cundecú-yu, dico mee-ni tnúhu sá ñí cahu iní cue ñáyiú ñuyíú-a càhá<sup>n</sup>-yu.

Duha ní chídó tnùní ndíi Chàíá núú tütú Yá Ndiòxí nàcuáa ní càhá<sup>n</sup>-gá cuèndá-ndó.

8 Te nchòhó ní dáñá-ndó nàcuáa ní cachí Yá Ndiòxí cada-ndo, te nchìcú<sup>n</sup> nihnu-ndo quide-ndo nàcuáa ní cahu iní cue ñáyiú ñuyíú-a, chí nàquete-ni-ndo lítu, te nàquete-ni-ndo vàsú sácũhu<sup>n</sup> sá xíhí-ndó nàtava-ndo nàcuáa ní xóo cada ñáyiú-á<sup>n</sup> ñí xóo naqueté-yu nchaa xíã<sup>n</sup>, te nándi-gá

nchaa núú sã quidé-ndó —càchí Jèsús xáha<sup>n</sup>-gá xii-güedé.

9 Te ní xáha<sup>n</sup> tùcu-gá xii-güedé:

—Te nchòhó, ñá túú cuení-ndó càda-ndo nàcuáa cuení Yá Ndiòxí, chí mee-ni nàcuáa ní cachí cue téé ní xíndecu ndéé sanaha nchìcú<sup>n</sup> nihnu-ndo quide-ndo.

10 Te ndíi Moisés ní cachí ndíi sá ncháá ñáyiú canehé-yu sá yíñùhu núú tãtã-yu ndihí núú nãñã-yu. Te nchaa ñáyiú na càhá<sup>n</sup> úhú cuèndá tãtã-yu àdi cuèndá nãñã-yu te cahni ñaha-güedé xii-yu ní cachí ndíi.

11 Te nchòhó càchí-ndó sã ñùu ñ<sup>n</sup> téé na cũñaha-dé xii tãtã-dé ndihí nãñã-dé sá sã ñí sani iní-dé cuañaha-dé xii-yu cùu-xi Corbán, te ñá túú-gá xíni ñùhu-xi sá cuañaha-dé xii-yu, te tnúhu Còrbán-á<sup>n</sup> quée-xí: Sã cúú cuèndá Yá Ndiòxí.

12 Te sá dúcá<sup>n</sup> ná càhá<sup>n</sup> ñ<sup>n</sup> téé-á<sup>n</sup> te nchòhó chindéè tnúhu-ndo-dé cuèndá sá vã chindéè-gá-dé tãtã-dé ndihí nãñã-dé.

13 Te duca<sup>n</sup> quide-ndo chí ní dáquée tĩhú-ndó nàcuáa ní cachí Yá Ndiòxí cada-ndo, te mee-ni nàcuáa ta quide cue téé ñuyíú-a véxi nchìcú<sup>n</sup> nihnu-ndo quide-ndo, te ñi-ñi duca<sup>n</sup> ta sànu ichi tnahá-ndo véxi, te nándi-gá nchaa sá càhú iní-ndó quide-ndo —cachí-gá xáha<sup>n</sup>-gá xii-güedé.

14 Te Jèsús ní xáha<sup>n</sup> tùcu-gá xii cue ñáyiú xíndecu-á<sup>n</sup>:

—Chí táquixi ndehe iha, te cundedóho váha-ndo tnúhu na càhá<sup>n</sup>-í-a te ío váha cuáha-ndo cuèndá.

15 Nchaa sá xéxi-ndó chí ñá túú nã quidé-xí iní-ndó, dico nchaa sá cuèhé sá dúhá sàni iní-ndó quide-ndo, nchaa xíã<sup>n</sup> quidé-xí ndècu cuéchi-ndo.

16 Te nchaa nchòhó ñáyiú ndédóho nchaa tnúhu càhá<sup>n</sup>-í-a ío váha chí cuáha cuèndá —càchí-gá xáha<sup>n</sup>-gá xii-yu.

17 Te Jèsús ní dándõ-gá nchaa ñáyiú núú xíxúcu-yu-á<sup>n</sup> te cuándihu-gá xití vehe. Te cue téé xica cuu ndihí-gá ní xíca<sup>n</sup> tnúhú-güedé núú-gá ñùu nása quèe-xi cuèndú ní cani-gá núú ñáyiú-á<sup>n</sup>.

18 Te ní xáha<sup>n</sup>-gá xii-güedé:

—¿Te náa tnàhá nchòhó ñá túú ní təcú tnùnì-ndó cuèndú ní canì-í núú ñáyiú-ǎn? Nchaa sá xéxì-yu cuánguee xití-yu ñá túú quide-xi iní-yu nàcuáa ngúndecu cuéchi-yu.

19 Chi ñá díú iní-yu cuánguee-xi chi cuánguee ndáá-xi xití-yu, te nàyáha ñaha-xi xii-yu —càchì-gá xǎha<sup>n</sup>-gǎ xii-güedé.

Te sá dúcá<sup>n</sup> ñí cáhá<sup>n</sup>-gá te ní dátũu-gá sá cúú càxi-o nchaa núú sá cúú càxi-o.

20 Te ní xáha<sup>n</sup> tùcu-gá xii-güedé:

—Nchaa sá cuèhé sá dúhá quide ñáyiú xǎ<sup>n</sup> cǎcú ñihnu-xi iní-yu, te nchaa xǎ<sup>n</sup> quidé-xi ndècu cuéchi-yu.

21 Te iní-yu-á<sup>n</sup> cǎcú ñihnu nchaa sá cuèhé sá dúhá, chi sàni cuehé sání dùha iní-yu. Te cue téè càhá<sup>n</sup> ndihì-güedé ñadìhì te ñá díú ñadìhì-güedé cúú-yu, te díu-ni duca<sup>n</sup> quide cue ñáyiú dìhì càhá<sup>n</sup> ndihì-yu téè te ñá díú yǎ<sup>n</sup>-yu cùu-güedé. Te sàhni-yu cue tnàha ñáyiú-yu, te mee-ni ìchi díí iní cúdíí iní-yu cundecú-yu.

22 Te dùhu ndachiu<sup>n</sup> tnahá-yu, te xihó-yu cundecu ndihì-yu sá ndécú ndihì tnaha ñáyiú-yu, te ío quide úhú iní-yu sá cúú-xí tnàha ñáyiú-yu, te ío dándahú tnáhǎ-yu, te mee-ni nchàa sá cuèhé sá dúhá cùdíí iní-yu quidé-yu, te ío cuédú iní-yu, te ío yitì yùhú-yu, te ío quide cahnú-yu mèe-yu, te quidé-yu nándi-gá sá ñá túú tàú-yu cadá-yu.

23 Te nchaa sá cuèhé sá dúhá-ǎ<sup>n</sup> cǎcú ñihnu-xi iní-yu, te nchaa xǎ<sup>n</sup> quidé-xi ndècu cuéchi-yu, te ñá túú cùu-xi sá vǎha sá cúú-xí iní-yu.

*È<sup>n</sup> ñadìhì véxi ñuú xícá ñí sándáá iní-a<sup>n</sup> Jèsús*

*(Mt. 15:21-28)*

24 Te ní xica Jèsús cuáhá<sup>n</sup>-gá ndéé yucu cue téè ñuú Tírú, ndihì yucu cue téè ñuú Sidón. Te òré ní quexìo-gá xǎ<sup>n</sup> te cuánguìhu-gá è<sup>n</sup> vehe te xǎ<sup>n</sup> cundecu-gá, te cuinì-gá sá vǎ quini ñáyiú sá xǎ<sup>n</sup> ndécú-gǎ ní cùu, dico dai ní ñihì-yu tnúhu.

25 Te è<sup>n</sup> ñadìhì ndécú è<sup>n</sup> déhe yoco-a<sup>n</sup>, te yìhì ñaha espíritú cündihì

yucu ñávǎha xii-xi, te ñaha-á<sup>n</sup> ío ndìhì ní ñihì-a<sup>n</sup> tnúhu sá ñí quexìo Jèsús xǎ<sup>n</sup> núu ní sáhá<sup>n</sup>-a<sup>n</sup> núú ndécú-gǎ, te ní ngüíñí xití-á<sup>n</sup> núú-gǎ.

26 Te ní ngüíta-a<sup>n</sup> càhá<sup>n</sup> ndàhú-a<sup>n</sup> núú-gǎ, te xǎha<sup>n</sup>-a<sup>n</sup> sǎ núu vá cündèè iní-gá queñuhu-gá espíritú cündihì yucu ñávǎha yìhì ñaha xii déhe-a<sup>n</sup>. Dico ñá díú ñàha israél cúú-á<sup>n</sup> chi ñaha ñuú Sirofèniciá cúú-á<sup>n</sup> te tnúhu griégú cúú tnúhu-a<sup>n</sup>.

27 Te xǎ<sup>n</sup> núu ní xáha<sup>n</sup> Jèsús xii-a<sup>n</sup>:

—Daña na càxi tnaa nchaa landú chítú xití-güexi, te dǎtnùnì caxi cue iná, chi ñá túú ndùu váha-xi quehe<sup>n</sup>-o sá xéxì làndú te cuáha-o iná —càchì-gá xǎha<sup>n</sup>-gǎ xii-a<sup>n</sup>.

28 Te ní xáha<sup>n</sup>-a<sup>n</sup> xii-gá:

—Mèstrú, ndáá-ni càhá<sup>n</sup>-n, dico iná chi nàdatacá-güedè sá ngóyó yùhu cóhó làndú —càchì-a<sup>n</sup> xǎha<sup>n</sup>-a<sup>n</sup> xii-gá.

29 Te Jèsús ní xáha<sup>n</sup>-gǎ xii-a<sup>n</sup>:

—Ío váha ní cáhá<sup>n</sup>-n, te cuanùhú te ñá túú-gǎ ná canì iní-n, chi sa ní quee espíritú cündihì yucu ñávǎha yìhì ñaha xii déhe-n —càchì-gá xǎha<sup>n</sup>-gǎ xii-a<sup>n</sup>.

30 Te ñaha-á<sup>n</sup> ñí nasáá-a<sup>n</sup> vehe-a<sup>n</sup> te càa déhe-a<sup>n</sup> núú càmá, dico ñá túú-gǎ espíritú cündihì yucu ñávǎha yìhì ñaha xii-xi chi sa ní quee ñaha-xi.

*Jèsús quidé tǎtna-gá è<sup>n</sup> téè ñá cúú càhá<sup>n</sup> váha te doho-dé*

31 Te Jèsús ní ndee-gá yucu cue téè ñuú Tírú te ní yáha-gá yucu cue téè ñuú Sidón, ndihì yucu ndi ùxí ñuú nání Dècápolis, te ní sáá-gá ndéé yuhu làgúná distrítú Galileá.

32 Te xǎ<sup>n</sup> ndécú-gǎ ní quexìo ñáyiú ndéé núú-gǎ ndécǎ-yu è<sup>n</sup> téè ñá cúú cǎhá<sup>n</sup> váha-dé te doho-dé. Te càhá<sup>n</sup> ndàhú-yu núú-gǎ sá ná tëndaha ñaha-gá xii-dé cuèndá ndúha-dé.

33 Te Jèsús ní queñuhu ñaha-gǎ xii-dé tnuú-yu, te ndèca ñaha-gá cuáhá<sup>n</sup> è<sup>n</sup> xio, te ní dáquìhu-gá díquí ndáhá-gǎ yaú lóho-dé, te ní dácánùu-gá díí-gá díquí ndáhá-gǎ, te ní tendaha-gǎ yàa-dé.



34 Te ní ndacoto-gá andiu te ní sánuu iní-gá, te ní cáhá<sup>n</sup>-gá tnúhu mee-gă, te xăha<sup>n</sup>-gă:

—Ĳĕfatá! —càchí-gá xăha<sup>n</sup>-gă xii-dé.

Te tnúhu-á<sup>n</sup> quée-xí: Nacaá<sup>n</sup> yòhó lóho.

35 Te òré-ni-á<sup>n</sup> nǐ nacaá<sup>n</sup> lóho-dé, te ní nduu váha yàa-dé, te ní cuu cáhá<sup>n</sup> váha-dé.

36 Te Jèsús ní cáhá<sup>n</sup> víhí-gă dóho ñáyiú ndihi ñaha xì téé ní quide tátna-gá-á<sup>n</sup> sǎ vǎ yǒo ñ<sup>n</sup> cúñàhá-yu sá nǐ quide tátna ñaha-gă xii-dé, dico uu<sup>n</sup>-gá ní quidé-yu ní cáhá<sup>n</sup>-yu núú ñáyiú sá nǐ quide tátna-gá téé-á<sup>n</sup>.

37 Te nchaá-yu ío ní cuñúhu-yu, te ní xítñàhá-yu:

—Váha vǐhi quide-dé, chi nchaa-ni ndàcu-dé quidé-dě, chi quide tátna-ni-dé ñáyiú doho, te quide tátna-ni-dé ñáyiú ñìhí —càchí-yu xítñàhá-yu.

## 8

*Jèsús dácàxi-gá cúmí mǐl ñáyiú  
(Mt. 15:32-39)*

1 Te ñ<sup>n</sup> nduu tucu ío cuéhé ñáyiú ní tacá núú ndécú Jèsús, te ñá túú tñàhí sá cǎxǐ-yu. Te ní cana-gá cue téé xìca cuu ndihi-gá, te ní xăha<sup>n</sup>-gă xii-güedé:

2 —Yúhú, cùndahú iní-í nchaa ñáyiú-a chi sa ní cuu úní nduu ndècu ndihi ñàhá-yu xii-o ìha, te ñá túú tñàhí ná sá cǎxǐ-yu.

3 Te núu na nàtendaha-í-yu núhú tñámă-yu vehé-yu, te cunee-yu docó ichi, chi davá-yu ío xica ndècú-yu —càchí-gá xăha<sup>n</sup>-gă xii-güedé.

4 Te ní xăha<sup>n</sup>-güedé xii-gá:

—ĲTe ndèé níhí-ó sǎ cuñaha-o cǎxi nchaa ñáyiú-a, te iha ñá túú nǎ ìo chi cùu-xi xítí yucu-i? —càchí-güedé xăha<sup>n</sup>-güedé xii-gá.

5 Te Jèsús ní xícá<sup>n</sup> tnúhú-gă núú-güedé, te xăha<sup>n</sup>-gă:

—ĲNá daha-gá pàá ndécú ndihi-ndo-i? —cachí-gá xăha<sup>n</sup>-gă xii-güedé.

Te ní xăha<sup>n</sup>-güedé xii-gá:

—Ndècu ndihi-ndí úsá-gá tñàhá —càchí-güedé xăha<sup>n</sup>-güedé xii-gá.

6 Te Jèsús ní xăha<sup>n</sup>-gă xii nchaa ñáyiú sá ngǒo-yu nchaá-yu, te ní ngóo-yu, te ní quehe<sup>n</sup>-gá ndi úsá pàá-á<sup>n</sup>, te ní ndacá<sup>n</sup> táhú-gă núú Yă Ndiǒxí. Te dǎtnùní ní táhú cuèchi-gá te ní sǎñaha-gă xii cue téé xìca cuu ndihi-gá ní dácăhñu-güedé nchaa ñáyiú-á<sup>n</sup>.

7 Te ndècu ndihi-güedé ñ<sup>n</sup> úú chácá lǐhli, te diu-ni duca<sup>n</sup> nǐ quide-gá ní ndacá<sup>n</sup> táhú-gă núú Yă Ndiǒxí. Te dǎtnùní ní táuchíú<sup>n</sup>-gă ní dácăhñu ñaha-güedé xii-yu.

8 Te nchaá-yu ní xexí-yu ní ndahá xítí-yu. Te sátá nǐ túhú cóhǒ-yu te ní nadatàcá-güedé nchaa sá nǐ quendóo, te ní chítú úsá tñàhá tídihi mee-ni sǎ nǐ quendóo-á<sup>n</sup>.

9 Te núú ncháá ñáyiú ní xexi-á<sup>n</sup> xǐnu dǎtná cúmí mǐl-yu. Te sátá nǐ yáha ní dácáxí ñàha Jèsús xii-yu te ní dándácá ñàha-gá.

10 Te dǎtnùní cuánguee-gá bàrcú ndihi cue téé xìca cuu ndihi-gá cuáhá<sup>n</sup>-gá ndihi-güedé yucu cue téé ñúú Dalmànutá.

*Cue téé cùu fariséú xăha<sup>n</sup>-güedé xii  
Jèsús cada-gá ñ<sup>n</sup> sá vǎ yǒo tñàhí ndàcu  
cada  
(Mt. 16:1-4; Lc. 12:54-56)*

11 Te núú nǐ quexì Jèsús xía<sup>n</sup> nǐ sáá cue téé cùu fariséú, te ní ngúita-güedé nándi tnúhu xăha<sup>n</sup>-güedé xii-gá xító ndèé ñàhá-güedé. Te xăha<sup>n</sup>-güedé sá ná cádá-gă ñ<sup>n</sup> sá vǎ yǒo tñàhí ndàcu cada cundehe-güedé nàcuáa cutnùní iní-güedé núu ndáá sá Yă Ndiǒxí ní tendaha ñàha-gá xii-gá véxi-gá ñuyíú-a.

12 Te ní sánuu iní-gá te ní xăha<sup>n</sup>-gă xii-güedé:

—Nchaa nchòhó ñáyiú ndècu ñuyíú-a cuíní-ndó càda-í ñ<sup>n</sup> sá vǎ yǒo tñàhí ndàcu cada nacuáa cutnùní iní-ndó núu ndáá sá Yă Ndiǒxí chíndèe ñàha-gá xii-í. Dico na cǎchí tnúhu ndáá-í xii-ndo sǎ vǎ càdà-í sá cuíní-ndó —càchí-gá xăha<sup>n</sup>-gă xii-güedé.

13 Te ní dándǒo-gá ñáyiú xǐndecu-á<sup>n</sup>, te cuánde-gá bàrcú ndihi cue téé xìca

cuu ndihi-gá te cuáhá<sup>n</sup>-gá ndihi-güedé ndàa ìngá xio yuhu làgúná.

*Nàcuáa quide cue tée cùu fariséu*  
(Mt. 16:5-12)

<sup>14</sup> Te ní cunaa-güedé canehe-güedé sá cáxí-güedě quíhí<sup>n</sup>, te ì<sup>n</sup>dìi-ni paá ndécú xití bàrcú-á<sup>n</sup> nǎ naníhí-güedě.

<sup>15</sup> Te Jèsús ní cáhá<sup>n</sup>-gá dóho-güedé, te xáha<sup>n</sup>-gǎ xii-güedé:

—Na càchí tnúhu-í xii-ndo sǎ ìo quíhí iní-ndó cùndecu-ndo te vá cádá cuendá tnàhí-ndo lèvadurá cue tée cùu fariséu, ndíhi levadurá cue tée cùndíhi té Hèrodés —càchí-gá xáha<sup>n</sup>-gǎ xii-güedé.

<sup>16</sup> Te ní ngúita-güedé xítnàha-güedé:

—Cuendá sá ñà túú ní cǎnehe-o paá quixi núu xíá<sup>n</sup> duha càhá<sup>n</sup>-gá —càchí-güedé xítnàha-güedé.

<sup>17</sup> Te Jèsús ní cutnùní iní-gá nàcuáa ndùu tnúhu xítnàha-güedé, núu ní xáha<sup>n</sup>-gǎ xii-güedé:

—¿Ná cuendá da sá ñà túú ní cǎnehe-ndo paá quixi càhá<sup>n</sup>-ndó? Te ñá díú cuendá paá-á<sup>n</sup> ní cǎhá<sup>n</sup>-í, te dícó-ni sá méé-ndó ñà túú quide cuendá váha-ndo nàcuáa ndùu tnúhu càhá<sup>n</sup>-í, te ni ñǎ tècú tnùnín-ndó chí ío nǎ díquí-ndó.

<sup>18</sup> Te cuèi ndèhe-ndo dico ñá túú cùtnuní iní-ndó nǎ cúú nchàa sá quidè-í, te cuèi ndèdóho-ndo nchàa tnúhu càhá<sup>n</sup>-í dico ñá cùtnuní iní-ndó nǎsa ndùu-xi, te ni ñǎ ndácú iní-ndó nchàa sá tá quide-í véxi.

<sup>19</sup> Te chí dándàcu iní cùtnàhá ní táhú cuèchi-í úhú<sup>n</sup>-ni paá te ní xexi úhú<sup>n</sup> mǐl mee-ni cuè tée chí díu-ni cue tée-á<sup>n</sup> nǎ quíundehu. Te chí càchí tnúhu ná daha tídihi ní chítú mee-ni sǎ nǎ quendóo òré ní nadatàcá-ndó —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Úxúú tnàhá tídihi ní chítú mee-ni sǎ nǎ quendóo —càchí-güedé xáha<sup>n</sup>-güedě xii-gá.

Te xáha<sup>n</sup> tùcu-gá:

<sup>20</sup> —Te cùtnàhá ní táhú cuèchi tucu-í úsá tnàhá paá ní xexi cúmí mǐl ñáyiú, te chí càchí tnúhu ná daha tucu tídihi ní chítú mee-ni sǎ nǎ quendóo —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Úsá tnàhá tídihi ní chítú mee-ni sǎ nǎ quendóo —càchí-güedé xáha<sup>n</sup>-güedě xii-gá.

<sup>21</sup> Te Jèsús ní xáha<sup>n</sup> tùcu-gá xii-güedé:

—Vitna, ¿te sa ní tecú tnùnín-ndó tnúhu ní cáhá<sup>n</sup>-í ǎ<sup>n</sup> ñǎhá? —càchí-gá xáha<sup>n</sup>-gǎ xii-güedé.

*Jèsús quidé tǎtna-gá ì<sup>n</sup> tée cuáa ñuú Bètsaidá*

<sup>22</sup> Te Jèsús ní sáa-gá ndíhi cue tée xica cuu ndíhi-gá ñuú Bètsaidá. Te ñuú-á<sup>n</sup> ndécú-gǎ ní quexio ñáyiú núu-gǎ tánèhé-yu ì<sup>n</sup> tée cuáa, te càhá<sup>n</sup> ndáhú-yu núu-gǎ núu vá cùndèe iní-gá tendaha ñàha-gá xii-dé cuendá ndúha núu-dě.

<sup>23</sup> Te Jèsús ní tñi-gá ndaha tée cuáa-á<sup>n</sup>, te ní queñuhu ñaha-gǎ tnuú-yu, te ndèca ñaha-gá cuáhá<sup>n</sup> ì<sup>n</sup> xio yuhu ñuú. Te yàcá<sup>n</sup> ní dácànùu-gá dí-gá núu-dě te ní tendaha ñàha-gá xii-dé, te dàtnùnín ní xicá<sup>n</sup> tnúhú-gǎ núu-dě, te xáha<sup>n</sup>-gǎ:

—¿Cùtnuní núu-n-ǎ<sup>n</sup>? —càchí-gá xáha<sup>n</sup>-gǎ xii-dé.

<sup>24</sup> Te tée cuáa-á<sup>n</sup> nǎ ndonehe núu-dě, te xáha<sup>n</sup>-dě xii-gá:

—Cùtnuní núu-í ndéhè-í nchaa cue tée-ǎ<sup>n</sup>, dico dà ndáa yutnu cuí ndáa-güedé te xica-güedé —càchí-dé xáha<sup>n</sup>-dě xii-gá.

<sup>25</sup> Te Jèsús ní tendaha tùcu-gá núu-dě te ní cuu ní ndacoto váha-gá-dé, te òré-á<sup>n</sup> nǎ ndúha núu-dě. Te nchaandi túhú sá ndéhé-dé ní cutnùnín váha núu-dě nándi cùu nchaa xíá<sup>n</sup>.

<sup>26</sup> Te ní xáha<sup>n</sup> Jèsús xii-dé:

—Vitna te núhú-n, dico ndáa ichi vehe-n núhú-n te ñá díú dà xití ñuú quíhí<sup>n</sup>-n, te vá yǎo ì<sup>n</sup> cúñaha-n sǎ yǎhú ní quide tǎtna-í núu-n nǎ ndúha —càchí-gá xáha<sup>n</sup>-gǎ xii-dé.

*Té Pèlú xáha<sup>n</sup>-dě xii Jèsús sá díú-gǎ cúu-gǎ Cristú*

(Mt. 16:13-20; Lc. 9:18-21)

<sup>27</sup> Te Jèsús ní xica-gá cuáhá<sup>n</sup>-gá ndíhi cue tée xica cuu ndíhi-gá nchaa ñuú líhli càa ñuú Cèsareá Filipú, te òré ñúhú-gǎ ndíhi-güedé ichi te ní

xícá<sup>n</sup> tnúhú-gă núú-güedě, te xăha<sup>n</sup>-gă xii-güedě:

—Chí cächí tnúhu nása cáhá<sup>n</sup> ñáyiú cuendá-í. ¿Yoo cùu-í cächí-yu-va? — cächí-gă xăha<sup>n</sup>-gă xii-güedě.

28 Te ní xăha<sup>n</sup>-güedě xii-gă:

—Davá-yu cächí-yu sá cúu-n ndïi Juáá téé ní xóo dacuàndute ñaha xii ñáyiú, te davá-yu cächí-yu sá cúu-n tē Èliás, te dava tucú-yu cächí-yu sá cúu-n ñ<sup>n</sup> téé ní xóo cáhá<sup>n</sup> tnúhu Yá Ndióxi ndéé sanaha, duha cächí-yu — cächí-güedě xăha<sup>n</sup>-güedě xii-gă.

29 Te ní xícá<sup>n</sup> tnúhú tùcu-gă núú-güedě, te xăha<sup>n</sup>-gă xii-güedě:

—Te nchòhó, ¿yoo sàni iní-ndó cùu-í-í? —cächí-gă xăha<sup>n</sup>-gă xii-güedě.

Te té Pèlú ní xăha<sup>n</sup>-dě xii-gă:

—Yòhó cúu-n Crìstú Yaá ní tendaha Yá Ndióxi véxi ñuyíú-a —cächí-dé xăha<sup>n</sup>-dě xii-gă.

30 Te Jèsús ní cáhá<sup>n</sup>-gă dóho-güedě, te xăha<sup>n</sup>-gă:

—Vá yòo ñ<sup>n</sup> cúñaha-ndo yòo cuu-í — cächí-gă xăha<sup>n</sup>-gă xii-güedě.

*Jèsús cáhá<sup>n</sup>-gă sá cáhni ñàha-güedě xii-gă*

*(Mt. 16:21-28; Lc. 9:22-27)*

31 Te Jèsús ní ngüíta-gă xitnùhu-gă cue téé xica cuu ndihí-gă nàcuáa yáha-gă, te xăha<sup>n</sup>-gă xii-güedě:

—Yúhú Téé cùu ñaní tnáhá-ndó nchàa-ndo chi ío ndoho-í, chi daquèe tíhú ñáhá nchàa cue téé cùu sacuéhé núú ñáyiú israhél, ndihí cue dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùní ní chídó tnùní ndíi Moisés, nchaa cue téé-á<sup>n</sup> dàquee tíhú ñáhá-güedě xii-í. Te sáá nduu te cahni ñaha-güedě xii-í, dico nduu úní sá cùu-í te ndoto-í — cächí-gă xăha<sup>n</sup>-gă xii-güedě.

32 Te duca<sup>n</sup> ñí cáhá<sup>n</sup> Jèsús núú cuè téé xica cuu ndihí-gă nàcuáa tecú tnùní váha-güedě tnúhu cáhá<sup>n</sup>-gă. Te té Pèlú ní cana ñaha-dě xii-gă ñ<sup>n</sup> xio, te ní ngüíta-dé ténàá ñáhá-dě xii-gă ní cùu.

33 Dico Jèsús ndihí-ni ní nchócuñhu-gándácú-gă quidé-gă nchaandi túhú sá ní ndàcoto-gă núú nchàa-güedě chi ndàa sátá-gă xíndecu-güedě, te ní

ngüíta-gă ténàá-gă té Pèlú, te xăha<sup>n</sup>-gă xii-dé:

—¡Xocuiñí yòhó núu-í-a, chi dàtná cáhá<sup>n</sup> yucu ñávãha cáhá<sup>n</sup>-n! Chi ñá túú sàni iní-ò dàtná sání iní Yá Ndióxi, chi ñ<sup>n</sup>-ni sàni iní-ò ndihí dava-gă cue ñáyiú ndècu ñuyíú-a —cächí-gă xăha<sup>n</sup>-gă xii-dé.

34 Te Jèsús ní cana-gă nchaa cue téé xica cuu ndihí-gă, ndihí nchaa ñáyiú xíndecu-á<sup>n</sup>, te ní xăha<sup>n</sup>-gă:

—Nchaa ñáyiú cuení chitnahá ñáhá xii-í, te xini ñuhu-xi vá cáda-gă-yu sá sání iní méé-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í.

35 Te nchaa ñáyiú cuení sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuendá-í, ndihí sá cuendá tnúhu-í, te ñáyiú-á<sup>n</sup> naníhí tàhú-yu.

36 Te cuèi nchaandi túhú sá ío ñuyíú-a na ñihí ñáyiú cundecu ndihí-yu, dico núu ñ<sup>n</sup> nchaa xíá<sup>n</sup> ná cáda cuíta nihnú-yu te ñá túú védana nándihí-xi sá dúcá<sup>n</sup> ndècu ndihí-yu nchaa xíá<sup>n</sup>.

37 Te ní ñ<sup>n</sup> sá ío ñuyíú-a vá chíndèe-xi ñáyiú cuendá naníhí tàhú-yu.

38 Te nchaa ñáyiú na cùcaha<sup>n</sup> núu-xi cáhá<sup>n</sup> váha cuendá-í, ndihí cuendá tnúhu-í núú nchàa ñáyiú dàquee tíhú ñáhá xii Yá Ndióxi, ñáyiú xíndecu ichi cuèhé ichi duha, te tnàhá yúhú Téé cùu ñaní tnáhã-yu ncháa-yu cucaha<sup>n</sup> núu-í núú-yu òré ná quixi tucu-í ndihí cue espíritú xínú cuèchi núú Tàtá-í Dútú Ndióxi. Te mee-gă cada cutnùní iní nchaa ñáyiú sá yùhú ío càhnu cuu-í.

## 9

1 Te na cächí tnúhu ndáá-í xii-ndo sã ío dava nchòhó ñáyiú xíndecu iha vitna vá cùu-ni-ndo, chi cundecu-ni-ndo ndéé quini-ndó sáá nduu ndíhu ndaha ñàha Yá Ndióxi xii ñáyiú, te davá-á<sup>n</sup> quini-ndó sã váha —cächí-gă xăha<sup>n</sup>-gă xii cue téé xica cuu ndihí-gă ndihí cue ñáyiú-á<sup>n</sup>.

*Jèsús ní nadama dóó-gă ndihi núú-gă*

*(Mt. 17:1-13; Lc. 9:28-36)*

<sup>2</sup> Te núú ìnú nduu sá dúcá<sup>n</sup> ñí cáhá<sup>n</sup> Jèsús te ní xica-gá cuásaá-gá ì<sup>n</sup> yucu dùcú<sup>n</sup>, te ndèca-gá té Pèlú, ndihi té Jàcobó, ndihi té Juàá cuásaá, te úní tnháí-ni cue téé-á<sup>n</sup> ndécá-gă cuásaá. Te yucu-á<sup>n</sup> ndécú-gă ní nadama núú-gă,

<sup>3</sup> te ní nadama dóó-gă. Te dóó-gă-á<sup>n</sup> sùú<sup>n</sup> ñí nduu cuixí<sup>n</sup> quiyí te tãsa<sup>n</sup>, te ni ì<sup>n</sup> ñáyiú ñuyíú-a ñá túú ndàcú-yu naqueté-yu ì<sup>n</sup> dóó nduu cuixí<sup>n</sup> dàtná ní nduu dóó-gă.

<sup>4</sup> Te ní xiní-güedé té Moisés ndihi té Èliás nútñi-güedé ndihi-gá ndátnuhu ndihi ñaha-güedé xii-gă.

<sup>5</sup> Te té Pèlú ní xáha<sup>n</sup>-dě xii Jèsús:

—Mèstrú, ñváha ní cuu sá ndécú-ó ìha vitna! Te na dàcaa-ndí úní tnhá vehe tnuvixi<sup>n</sup>, te ì<sup>n</sup> cuu cuendá-n te ì<sup>n</sup> cuu cuendá té Moisés te ì<sup>n</sup> cuu cuendá té Èliás —càchí-dé xáha<sup>n</sup>-dě xii-gă.

<sup>6</sup> Te duca<sup>n</sup> ñí cáhá<sup>n</sup>-dé chí ío ní yùhú-güedé, te cuendá-ni ní cuu yáchí-dé ní cáhá<sup>n</sup>-dé, te ni mèe-dé ñá túú ní cùtnuní iní-dé nása ndùu tnhúhu ní cáhá<sup>n</sup>-dé.

<sup>7</sup> Te òré-á<sup>n</sup> ñí quexìo ì<sup>n</sup> vícò nùú ndécú-güedé ndihi Jèsús ní dádáhu ñaha-xi xii-güedé ndihi-gă, te xití vícò-á<sup>n</sup> ñí cáhá<sup>n</sup> Yă Ndiõxí ní tecú dóho-güedé, te xáha<sup>n</sup>-gă xii-güedé:

—Tée-a cùu-dé Déhe-í téé ío cùu iní-í, te cundedóho-ndo nchàa tnhúhu càhá<sup>n</sup>-dé —càchí-gă xáha<sup>n</sup>-gă xii-güedé.

<sup>8</sup> Te òré ní quide cuendá-güedé, te ñá túú-gă ní xiní-güedé cue téé úú-á<sup>n</sup> chí mee-ñă Jèsús ndécú.

<sup>9</sup> Te òré cuánuu ndihi ñaha-gă xii-güedé yucu-á<sup>n</sup>, te ní cáhá<sup>n</sup>-gă dóho-güedé, te xáha<sup>n</sup>-gă:

—Vá yõo ì<sup>n</sup> cúñaha-ndo nchàa sá ñí xiní-ndó nùú ñí sáá-ó-á, te cuu cáhá<sup>n</sup>-ndó dico ndéé ná yáha ndoto yùhú Tée cùu ñani tnháá-ndó nchàa-ndo sá cùú-í —càchí-gă xáha<sup>n</sup>-gă xii-güedé.

<sup>10</sup> Nùu xíá<sup>n</sup> cue téé-á<sup>n</sup> ñí xúhu<sup>n</sup> nahi-ni ìní-güedé nchaa sá ñí xiní-güedé núú ñí sáhá<sup>n</sup>-güedé ndihi

Jèsús te ñá túú tnháí ni cáhá<sup>n</sup>-güedé, dico ní ndúcú tnhúhu núú tnháá-güedé ná cuendá duca<sup>n</sup> ñí cáhá<sup>n</sup>-gă sá ndéé ná yáha ndoto-gă sá cùú-gă te dàtnuní cáhá<sup>n</sup>-güedé nàcuáa ndùu nchaa sá ñí xiní-güedé.

<sup>11</sup> Te ní xicá<sup>n</sup> tnhúhú-güedé núú Jèsús, te xáha<sup>n</sup>-güedé xii-gă:

—¿Cùú-ndí cachí tnhúhu-n ñă cuendá càchí cue téé dàcuaha ñaha xii ñáyiú nchaa tnhúhu ní chídó tnhúú ndí Moisés sá dñhna-gă té Èliás ndixi-dé te dàtnuní quixí Yáá tendaha Yă Ndiõxí quixí ñuyíú-a? —càchí-güedé xáha<sup>n</sup>-güedé xii-gă.

<sup>12</sup> Te Jèsús ní xáha<sup>n</sup>-gă:

—Ndáá sá códó nùu ì<sup>n</sup> téé quixi-dé te cada-dé dàtná ní quide té Èliás, te téé-á<sup>n</sup> cada ndáá-dé nchaa nàcuáa cùu. Dico núú tütú Yă Ndiõxí càhá<sup>n</sup>-xi cuendá yùhú Tée cùu ñani tnháá-ndó nchàa-ndo sá ío ndoho-í, te daquèe tihú ñáhá ñáyiú xii-í.

<sup>13</sup> Te na càchí tnhúhu-í xii-ndo vitna sá sà ní quixi ì<sup>n</sup> téé ní quide dàtná ní xóo cada té Èliás, te cue ñáyiú ñá túú ní cãnehé-yu sá yíñùhu núú-dé, te ní quide ñáhá-yu xii-dé nchaa nàcuáa ní quixi iní mèe-yu. Te núú tütú Yă Ndiõxí sa ndéé tnhúú nchaa nàcuáa yáha-dé, te nchaa xíá<sup>n</sup> sa ní quide ñaha ñáyiú xii-dé —càchí-gă xáha<sup>n</sup>-gă xii-güedé.

*Jèsús quidé tãtna-gă ì<sup>n</sup> téé cuechi yíhi ñaha espíritú cùndíhi yucu ñávãha*

*(Mt. 17:14-21; Lc. 9:37-43)*

<sup>14</sup> Te Jèsús ní ndexìo-gă ndihi cue téé úní-á<sup>n</sup> nùú xñdecu dava-gă cue téé xica cuu ndihi-gă, te vâi vihi ñáyiú ndècu núú ndécú-güedé-á<sup>n</sup>, te tnháá cue téé dàcuaha ñaha xii-yu nchaa tnhúhu ní chídó tnhúú ndí Moisés xñdecu, te cue téé-á<sup>n</sup> nãndi tnhúhu xáha<sup>n</sup>-güedé xii cue téé xica cuu ndihi Jesús.

<sup>15</sup> Te òré ní xiní-yu ní ndexìo-gă, te ncháá-yu ío ní cuñúhu-yu, te xinú-yu ní sáhá<sup>n</sup> ní cáhá<sup>n</sup> ndihi ñáhá-yu xii-gă.

<sup>16</sup> Te ní xicá<sup>n</sup> tnhúhú-gă núú cue téé xica cuu ndihi-gă nùu ná tnhúhu ndátnúhu-güedé ndihi cue téé-á<sup>n</sup>.

17 Te ñáyu xĩndecu xía<sup>n</sup> ñí xáhã<sup>n</sup>-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhi ñaha espíritú cúndìhi yucu ñávãha xii-dé, te diu xía<sup>n</sup> ní quide ní cuu ñìhí-dé.

18 Te ío ndòho-dé chi súúni ndèni ní cuu ngòtni ñaha-xi xii-dé, te òré duca<sup>n</sup> quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú ñuhu-dé, te ndàda ruú<sup>n</sup> ñáhá-xí xii-dé. Te sa ní xáha<sup>n</sup>-í xii cue téé xica cuu ndìhi-n sá queñuhu-güedé espíritú cúndìhi yucu ñávãha yìhi ñaha xii-dé dico ñá túú ní ndàcu-güedé queñuhu-güedé-xi —càchí ñáyu-á<sup>n</sup> xáhã<sup>n</sup>-yu xii-gá.

19 Te Jèsús ní xáha<sup>n</sup>-gã:

—¡Nchaa nchòhó ñáyu ndècu ñuyú-a ío sàá iní-ndó, chi ñá túú cuíni-ndó quèndáá iní-ndó Yã Ndiöxí, te ní cuu vãi nduu quide ndee iní-í nchaa sá quidé-ndó! ¿Te ná ndéé ama vá dúcã<sup>n</sup>-gã cada-ndo-i? Te chí cándèca téé cùhú-á<sup>n</sup> táquixi iha —cachí-gá xáha<sup>n</sup>-gã xií-yu.

20 Te ñáyu ndìhi ñaha xii téé yìhi ñaha espíritú cúndìhi yucu ñávãha-á<sup>n</sup> ndécã ñáhá-yu xii-dé cuáhã<sup>n</sup> ndéé núú Jèsús, te òré ní xini ñáhá espíritú cúndìhi yucu ñávãha-á<sup>n</sup> xii-gá, te ní ngúita-ni-xi sàhni yìhí ñáhá tùcu-xi xii-dé, te ní dánduá ñáhá-xí xii-dé, te ní ngúita-dé xíchí ñuhu-dé, te quène tíñú yuhu-dé.

21 Te Jèsús ní xicã<sup>n</sup> tnúhú-gã núú tãtã-dě, te xáha<sup>n</sup>-gã xii-dé:

—¿Ná ndéé ama ní ngúita-xi duha ndòho déhe-n? —càchí-gá xáha<sup>n</sup>-gã xii-dé.

Te téé-á<sup>n</sup> ñí xáha<sup>n</sup>-dě xii-gá:

—Ndéé cútnãhá cúú líhli-dé ní ngúita espíritú cúndìhi yucu ñávãha duha quide ñaha-xi xii-dé.

22 Te ní cùtĩtní xito dàngaunihnu ñaha-xi xii-dé núú ñùhú, te ní cutĩtní tucu xito dàngaunihnu ñaha-xi xii-dé ndute cuíni-xi cahni ñaha-xi xii-dé. Te ndèca-í-dé véxi núú-n te núú ndacu-n càda tátna-n-dě, te cundãhú

iní ñáhá-n xii-ndí chindee ñaha-n —cachí-dé xáha<sup>n</sup>-dě xii-gá.

23 Te Jèsús ní xáha<sup>n</sup>-gã:

—Te ná cuèndã càchí-n nõu ndacu-í cada tátna-í déhe-n, chi nchaa ñáyu na quèndáá iní ñáhá xii-í te ñihí-yu sá ná càcã<sup>n</sup>-yu núú-í —càchí-gá xáha<sup>n</sup>-gã xii-dé.

24 Te tãtã tẽe cuechi-ã<sup>n</sup> ñihí ní cáhá<sup>n</sup>-dé xáha<sup>n</sup>-dě xii-gá:

—Sàndáá iní ñáhã-í xii-n, dico chindee ñaha xii-í cuèndã ná quèndáá iní ñáhã-gã-í xii-n —càchí-dé xáha<sup>n</sup>-dě xii-gá.

25 Te Jèsús ndéhé-gã sá ío vãi ñáyu ta tàcã núú ndécú-gã-á<sup>n</sup>. Te ní tenãá-gã espíritú cúndìhi yucu ñávãha-á<sup>n</sup>, te xáha<sup>n</sup>-gã xii-xi:

—Yòhó espíritú cúndìhi yucu ñávãha, ní quide ñìhí-n ñí quide doho-n tẽe-a, dico vitna yúhú càchí-í sá quèé-n yiqui cuñú-dé te vá ndìhu-gã-n —càchí-gá xáha<sup>n</sup>-gã xii espíritú cúndìhi yucu ñávãha-á<sup>n</sup>.

26 Te espíritú cúndìhi yucu ñávãha-á<sup>n</sup> ñí dácãná sãa ñaha-xi xii téé-á<sup>n</sup>, te ní sahni yìhí ñáhã tùcu-xi xii-dé, te dàtnùni ní quee ñaha-xi xii-dé cuáhã<sup>n</sup>-xi, dico téé-á<sup>n</sup> chi dacãa-ni ndíyì càa-dé càtùu-dé. Te nchaa ñáyu xĩndecu xía<sup>n</sup> càchí-yu sá ñí xihí-dé ní cùu.

27 Te Jèsús ní tni-gã ndaha-dé ní ndocani ñaha-gã xii-dé, te ní ndacóo-dé ní nucúnutni-dé.

28 Te Jèsús cuándihu-gã xití vehe ndìhi cue téé xica cuu ndìhi-gã, te òré ndéhé-güedě ñá túú-gã ñáyu, te ní xicã<sup>n</sup> tnúhú-güedě núú-gã, te xáha<sup>n</sup>-güedě xii-gá:

—Cachí tnúhu xii-ndí ná cuèndã ñá túú ní ndàcu-ndí queñuhu-ndí espíritú cúndìhi yucu ñávãha yìhi ñaha xii téé-á<sup>n</sup> —càchí-güedé xáha<sup>n</sup>-güedé xii-gá.

29 Te Jèsús ní xáha<sup>n</sup>-gã xii-güedé:

—Na càchí tnúhu-í xii-ndo sã nõu òré cuíni-ndó queñuhu-ndo espíritú cúndìhi yucu ñávãha yìhi ñaha xii ñáyu dàtnã cúú espíritú cúndìhi-xi

yìhi ñaha xii téé-ǎ<sup>n</sup> ní cùu ña, te xini ñuhu-xi sá ïo cáhá<sup>n</sup> ndìhi-ndo Yá Ndiõxí te ñá túú tnàhí ná caxi-ndo cáhá<sup>n</sup> ndìhi-ndo-gǎ, te duca<sup>n</sup> te ndacu-ndo quèñuhu-ndo espíritú cùndìhi yucu ñávãha yìhi ñaha xii ñáyiu —càchí-gá xǎha<sup>n</sup>-gǎ xii-güedé.

*Jèsús càhá<sup>n</sup> tucu-gá sá cáhni ñaha-güedé xii-gá*

*(Mt. 17:22-23; Lc. 9:43-45)*

<sup>30</sup> Te Jèsús ní quee-gá núú ndécú-gǎ-ǎ<sup>n</sup> ndìhi cue téé xica cuu ndìhi-gá cuáhá<sup>n</sup>-gá ndìhi-güedé distritú Galileá, te cuini-gá sá vǎ quini ñáyiu ndéé ichi cuáhá<sup>n</sup>-gá.

<sup>31</sup> Te duca<sup>n</sup> ñi sani iní-gá, chi mee-gǎ sa naha-gá sá ndàá cada-xi nàcuáa xǎha<sup>n</sup>-gǎ xii cue téé xica cuu ndìhi-gá, te duha xǎha<sup>n</sup>-gǎ xii-güedé:

—Yúhú Téé cùu ñani tnáhá-ndó nchàa-ndo sáá ñ<sup>n</sup> nduu te cuáha cuendá ñáhá-güedé xii-í núú cuè téé cùu úhú iní ñáhá, te cahni ñaha-güedé xii-í, dico nduu úní sá cùú-í te ndoto-í —càchí-gá xǎha<sup>n</sup>-gǎ xii-güedé.

<sup>32</sup> Dico ñá túú tnàhí ni tècú tnùnì-güedé nása ndùu tnúhu ní cáhá<sup>n</sup>-gá, te ni ñà túú ní cùyi-güedé cáca<sup>n</sup> tnúhú-güedé núú-gǎ.

*Cue téé ndùcu tnúhu núú tnáhá nùu ndédacàa-güedé ïo-gá cùnùu*

*(Mt. 18:1-5; Lc. 9:46-48)*

<sup>33</sup> Te Jèsús ní quexio-gá ndìhi cue téé xica cuu ndìhi-gá ñuú Capernaúm, te òré sa ndècu-gá ñ<sup>n</sup> vehe te ní xicá<sup>n</sup> tnúhú-gǎ núú-güedé, te xǎha<sup>n</sup>-gǎ xii-güedé:

—¿Nándi cùu tnúhu ta xitnaha-ndo véxi? —càchí-gá xǎha<sup>n</sup>-gǎ xii-güedé.

<sup>34</sup> Dico ñá túú tnàhí ni cáhá<sup>n</sup>-güedé cúñaha-güedé xii-gá nùu ná tnúhu xitnaha-güedé òré ñúhú-güedé ichi. Te duca<sup>n</sup> ñi quide-güedé chi cuendá tá ndàtnúhu-güedé nùu ndédacàa-güedé ïo-gá cùnùu.

<sup>35</sup> Te Jèsús ní ngóo-gá, te ní xáha<sup>n</sup>-gǎ xii ndi ùxúú cue téé xica cuu ndìhi-gá:

—Chí táquixi iha te cundedóho-ndo tnúhu na càhá<sup>n</sup>-í-a. Te núu ïo dava-ndo cuini-ndó cùnuu-ndo, te cada-ndo sǎ cúú-ndó ñáyiu nchìcú<sup>n</sup> cuì-nǎ, te cunu cuechi-ndo nùu

tnàha ñáyiu-ndo —càchí-gá xǎha<sup>n</sup>-gǎ xii-güedé.

<sup>36</sup> Te Jèsús ní sanutnii-gá ñ<sup>n</sup> té lĩhli cuádava tnuú-güedé, te dàtnùnì ní nguídèhé ñáhá-gǎ xii-dé, te xǎha<sup>n</sup>-gǎ xii-güedé:

<sup>37</sup> —Nchaa ñáyiu na quèhe<sup>n</sup> cuendá ñ<sup>n</sup> té lĩhli dàtnǎ té lĩhli-a cuendá sá ñúhú ìní ñáhǎ-yu xii-í ñá, te cada iní-yu sá yúhú ní quehe<sup>n</sup> cuendá-yu. Te nchaa ñáyiu na quèhe<sup>n</sup> cuendá ñáhá xii-í te ñá díú-ní mèe-í ní quèhe<sup>n</sup> cuendá-yu, chi tnàhá Tàtá-í Dútú Ndiõxí Yaá ní tendaha ñaha xii-í véxi-í ñuyú-a ní quehe<sup>n</sup> cuendá-yu —càchí-gá xǎha<sup>n</sup>-gǎ xii-güedé.

*Nchaa ñáyiu ñá túú cùu úhú iní ñáhá xii-o te cùndìhi ñáhá-yu*

*(Mt. 10:42; Lc. 9:49-50)*

<sup>38</sup> Te té Juáa diu-ni ñ<sup>n</sup> téé xica cuu ndìhi-gá ní xáha<sup>n</sup>-dǎ xii-gá:

—Mèstrú, ní xiní-ndí ñ<sup>n</sup> téé càcunehe ñaha-dé xii-n, te quèñuhu-dé espíritú cùndìhi yucu ñávãha yìhi ñaha xii ñáyiu, te nchúhú ñá túú ní dàña-gá-ndí duca<sup>n</sup> càda-dé, chi ñá túú xica cuu ndìhi ñaha-dé xii-o —càchí-dé xǎha<sup>n</sup>-dǎ xii-gá.

<sup>39</sup> Te Jèsús ní xáha<sup>n</sup>-gǎ xii-güedé:

—Daña-ndo na càda nahì-dé ní cùu, chi ñá túú ni ñ<sup>n</sup> ñáyiu ndìhi ndìhi-ni ndacu cáhá<sup>n</sup> cuèhé cuendá-í te núu càcunehe ñáhá-yu xii-í, te quidé-yu sá vǎ yóo tnàhí ndàcu cada.

<sup>40</sup> Te nchaa ñáyiu ñá túú cùu úhú iní ñáhá xii-o te cùndìhi ñáhá-yu.

<sup>41</sup> Te na càchí tnúhu-í xii-ndo sǎ cuè ñáyiu na tàxi ñ<sup>n</sup> yaxi<sup>n</sup> ndute coho-ndo cuendá sá cúú-ndó cuè téé xica cuu ndìhi-í, te ñáyiu-án sǎá nduu te dacuèi sá nihí-yu sá ndúú tǎhǔ-yu —càchí-gá xǎha<sup>n</sup>-gǎ xii-güedé.

*Cada cuendá-ó vǎ cùndècu-o ichi cuehé ichi duha*

*(Mt. 18:6-9; Lc. 17:1-2)*

<sup>42</sup> Te xǎha<sup>n</sup> tùcu Jesús xii-güedé:

—Te núu ñ<sup>n</sup> téé na dàcáhá<sup>n</sup>-dé cue ñáyiu sàndáá iní ñáhá xii-í cadá-yu nándi sá cuèhé sá dúhá, te váha-gá sá nùu na dàcutu ndéé-güedé ñ<sup>n</sup> yúú yódo dǔcú<sup>n</sup>-dǎ, te dàquée ñaha-güedé

xii-dé xití ndute làmár, te ñá díú sã cùndècu-dé duca<sup>n</sup> càda-dé.

<sup>43</sup> Te núu ì<sup>n</sup> xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tàhú-ndó cuèi na cuíta ì<sup>n</sup> xio ndaha-ndo te ñá díú sã quíhí<sup>n</sup>-ndó ñihíí ní ndúú-ndó núú ùhú núú ndàhú núú dícó sãá ndáhá itá ñuhú ní caa ní quíhí<sup>n</sup>.

<sup>44</sup> Chi yàcá<sup>n</sup> cúu-xí núú ñà túú tnàhí ndàhvá ñuhú, te ío ndoho-ndo cùndecu-ndo xíá<sup>n</sup> ní caa ní quíhí<sup>n</sup>.

<sup>45</sup> Te núu ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tàhú-ndó cuèi na cuíta ì<sup>n</sup> xio sáhá-ndó, te ñá díú sã quíhí<sup>n</sup>-ndó ñihíí ní ndúú-ndó núú ùhú núú ndàhú núú dícó sãá ndáhá itá ñuhú ní caa ní quíhí<sup>n</sup>.

<sup>46</sup> Chi yàcá<sup>n</sup> ñá túú tnàhí ndàhvá ñuhú, te ío ndoho-ndo cùndecu-ndo xíá<sup>n</sup> ní caa ní quíhí<sup>n</sup>.

<sup>47</sup> Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cùndècu-ndo núú ndécú Yã Ndiõxí táxí tnùní-gá cuèi na cuíta ì<sup>n</sup> xio tinùu-ndo, te ñá díú sã ndì nduú xio núú-ndó quíhí<sup>n</sup>-ndó núú ùhú núú ndàhú.

<sup>48</sup> Chi yàcá<sup>n</sup> ñá túú tnàhí ndàhvá ñuhú, te ío ndoho-ndo cùndecu-ndo xíá<sup>n</sup> ní caa ní quíhí<sup>n</sup>.

<sup>49</sup> Te dàtná quidé-güedé quití sàhni-güedé chìhi-güedé cuñú-di ñíí te dàquée-güedé núú ñuhú, duca<sup>n</sup> sãtnahá-xi ndoho cue ñáyíu chi ío ndohó-yu.

<sup>50</sup> Te ñíí chi ío váha nàndíhi-xi, dico núu na ndùu víxi<sup>n</sup>-xi te ñá túú-gã nándíhi-xi te ní ñà túú-gã nása cada-o ndùu úhá tucu-xi. Te ío váha cada cuèndá-ndó nàcuáa cundecu-ndo cuèndá cuu-ndo ñáyíu váha, te duca<sup>n</sup> te cuu-ndo dàtná ñíí sã ñà túú ndùu víxi<sup>n</sup>, te ío váha cundecu ndíhi tnàha-ndo —cachí-gá xãha<sup>n</sup>-gã xii-güedé.

*Jèsús càhá<sup>n</sup>-gá cuèndá cue ñáyíu dàña tnaha*

(Mt. 19:1-12; Lc. 16:18)

<sup>1</sup> Te Jèsús ní xica-gá cuáhá<sup>n</sup>-gá ní yáha-gá yucu distritú Jùdeá ní téhndé-gá ndàa ingá xio yúte Jòrdán. Te yàcá<sup>n</sup> ndécú-gã ní tacá tucu cuèhé víhí ñáyíu, te ní ngúíta-ni tucu-gá dánèhé ñáhá-gã xii-yu tnúhu-gá chi duca<sup>n</sup> tnàhí quide-gá.

<sup>2</sup> Te ní quèxio ì<sup>n</sup> úú cue téé cùu fariséú núú ndécú Jèsús xito ndèé ñáhá-güedé xii-gá núu nása cunduu tnúhu càhá<sup>n</sup>-gá, te xãha<sup>n</sup>-güedé xii-gá:

—Véxi-ndí xicá<sup>n</sup> tnúhú-ndí núú-n núu cuu dàña ì<sup>n</sup> téé ñadìhí-dé ã<sup>n</sup> ñáhá —càchí-güedé xãha<sup>n</sup>-güedé xii-gá.

<sup>3</sup> Te Jèsús ní xãha<sup>n</sup>-gã xii-güedé:

—Te nchòhó, ¿nása ní cachí ndíi Moisés cada-ndo-i? —càchí-gá xãha<sup>n</sup>-gã xii-güedé.

<sup>4</sup> Te ní xãha<sup>n</sup>-güedé xii-gá:

—Ndíi Moisés ní cachí ndíi sá cúú dàña ì<sup>n</sup> téé ñadìhí-dé dícó-ni sá cadúha-dé ì<sup>n</sup> tutú cuãñaha-dé, te núú tütú-á<sup>n</sup> codo tnùní sá ní dáñá ñàha-dé, te duca<sup>n</sup> te cuu dàña-dé ñadìhí-dé —càchí-güedé xãha<sup>n</sup>-güedé xii-gá.

<sup>5</sup> Te Jèsús ní xãha<sup>n</sup>-gã xii-güedé:

—Te duca<sup>n</sup> ní chídó tnùní ndíi Moisés cada-ndo cuèndá sá ío sãá iní-ndó.

<sup>6</sup> Dico Yá Ndiõxí cútnàhá ní cadúha-gá ñuyíu ndíhi nchaa sá ío, chi téé ñadìhí ní cadúha-gá.

<sup>7</sup> Te xíá<sup>n</sup> núu nchaa cue téé na ñihí ñadìhí-xi, te dè<sup>n</sup>-ná cada-güedé tãtã-güedé ndíhi nãná-güedé, chi mee-nã ñadìhí-güedé cuu cuu ndíhi-güedé.

<sup>8</sup> Te cue ñáyíu úú-á<sup>n</sup> ñà túú-gã ndí díí<sup>n</sup> ndí díí<sup>n</sup> yèqui cuñú cúu-yu, chi cada iní-ndó sã ì<sup>n</sup>-nã yèqui cuñú cúu-yu.

<sup>9</sup> Te xíá<sup>n</sup> núu ñá túú ndùu váha-xi dàña cuè téé ñadìhí-güedé, chi mee Yã Ndiõxí ní cachí-gá sá cúú úu-yu cundecú-yu ndéé naa ndéé cúu-yu —càchí-gá xãha<sup>n</sup>-gã xii-güedé.

<sup>10</sup> Te òré yíhí Jèsús ndíhi cue téé xica cuu ndíhi-gá vehe, te ní xicá<sup>n</sup> tnúhú-güedé núú-gã nása ndùu tnúhu

ní cáhá<sup>n</sup>-gá cuendá cue ñáyiú dàña tnaaha.

<sup>11</sup> Te Jèsús ní xáha<sup>n</sup>-gã xii-güedé:

–Te núu ì<sup>n</sup> tée na dàña-dé ñadìhí-dé te naquehe<sup>n</sup>-dé ingá ñadìhí, te ío nèhé quidé-dě, te ì<sup>n</sup>-ni cuèchi cùu-xi ndihí cuèchi quide tée ndèca ñadìhí te càhá<sup>n</sup> ndihí-dé ingá ñadìhí.

<sup>12</sup> Te ò<sup>n</sup>-ni duca<sup>n</sup> sãtnahá-xi cùu tucu ñáyiú ò<sup>n</sup> te núu na dàña-yu yí-yu te naquehé<sup>n</sup>-yu ingá tée, chi ì<sup>n</sup>-ni cuèchi cùu-xi sá quidé-yu ndihí sá quidé cuè ñáyiú ò<sup>n</sup> ndécú yì-xi, te càhá<sup>n</sup> ndihí-yu ingá tée –càchí-gá xáha<sup>n</sup>-gã xií-yu.

*Jèsús xicá<sup>n</sup> táhú-gã núú Yã Ndiõxí cuendá landú*

*(Mt. 19:13-15; Lc. 18:15-17)*

<sup>13</sup> Te ì<sup>n</sup> ùú ñáyiú ndècá-yu landú lìhli cuáhá<sup>n</sup> núú Jèsús, chi cuíní-yu sá téndàha ñaha-gá xii-güexi. Te cue tée xica cuu ndihí-gá ní ngüíta-güedé ténàá ñáhá-güedé xii-yu, te xáha<sup>n</sup>-güedé sá vã dúcá<sup>n</sup> càdá-yu.

<sup>14</sup> Te òré ní xiní-gá sá dúcá<sup>n</sup> quide-güedé, te ní cudéé<sup>n</sup>-gã núú-güedé, te xáha<sup>n</sup>-gã xii-güedé:

–Chí dáña ná quixi nahi cue landú lìhli-á<sup>n</sup> núú-í-a te vã càdí-ndó ìchi-güexi, chi dàtná cúú váha iní cue landú lìhli-á<sup>n</sup> duca<sup>n</sup> cùu váha iní cue ñáyiú yindaha Yã Ndiõxí.

<sup>15</sup> Te na càchí tnúhu ndáá-í xii-ndo sã núu vá quindáá iní ñáhá-ndó dàtná quidé cuè landú lìhli sàndáá iní ñáhá xii-í, te vã ndìhu ndaha ñaha Yã Ndiõxí xii-ndo –càchí-gá xáha<sup>n</sup>-gã xii-güedé.

<sup>16</sup> Te sátá dúcá<sup>n</sup> ñí xáha<sup>n</sup>-gã te ní nguídèhé-gá cue landú-á<sup>n</sup> te ní tendaha ñaha-gá xii-güexi, te ní xicá<sup>n</sup> táhú-gã núú Yã Ndiõxí cuendá-güexi.

*Ì<sup>n</sup> tée cuica càhá<sup>n</sup> ndihí-dé Jèsús*

*(Mt. 19:16-30; Lc. 18:18-30)*

<sup>17</sup> Te òré sa ñùhu ichi Jèsús caca-gá quíhí<sup>n</sup>-gá ingá xichi ni cùu ní quexìo cunu ì<sup>n</sup> tée ní ngüíñí xítí-dě núú-gã, te xáha<sup>n</sup>-dě xii-gá:

–Yòhó Mèstrú, cùu-n tée ío váha iní-xi, te cuíní-í núu vá cündèe iní-n càchí tnúhu-n ná cúú sã càdá-í cuendá nduu táhú-í cundecu-í ndihí Yã Ndiõxí ni caa ni quíhí<sup>n</sup> –càchí-dé xáha<sup>n</sup>-dě xii-gá.

<sup>18</sup> Te Jèsús ní xáha<sup>n</sup>-gã xii-dé:

–¿Te cùtnuní iní-n nàcuáa ndùu tnúhu càhá<sup>n</sup>-n sã yùhú váha iní-ã<sup>n</sup>? Chi ì<sup>n</sup>-ni díí-ni Yã Ndiõxí ío váha iní-gá.

<sup>19</sup> Te yòhó xiní-n nàcuáa ní cachí Yã Ndiõxí cada ñáyiú, te duha ní cachí-gá: “Nchòhó cue tée vá càhá<sup>n</sup> ndihí-ndo ñadìhí te núu ñá díú ñadìhí-ndó cúú-yu, te duca<sup>n</sup>-ni nchòhó cue ñáyiú ò<sup>n</sup> tucu vá càhá<sup>n</sup> ndihí-ndo tée te núu ñá díú yì-ndo cuu-güedé, te vã cáhní-ndó tnaaha ñáyiú-ndo, te ni vã dúhú-ndó sã ndécú ndihí-yu, te ni vã dácàcu-ndo cuèchi neñùú sá cúú-xi tnaaha ñáyiú-ndo, te ni vã dácùandehnde-ndo, te canehe-ndo sã yíñùhu núú tãtá-ndó ndihí núú nãná-ndó”, duha ní cachí Yã Ndiõxí cada ñáyiú –càchí-gá xáha<sup>n</sup>-gã xii-dé.

<sup>20</sup> Te tée-á<sup>n</sup> ñí xáha<sup>n</sup>-dě xii-gá:

–Mèstrú, nchaa xíã<sup>n</sup> ní ngüíta-í quidè-í ndéé cùtnahá cúú làndú-í –càchí-dé xáha<sup>n</sup>-dě xii-gá.

<sup>21</sup> Te Jèsús ní xíndéhé ñaha váha-gá xii-dé, te ní cuu váha iní ñáhá-gã, te ní xáha<sup>n</sup>-gã xii-dé:

–Dico cùmání ìngá núú sã càdá-n. Vitna te quíhí<sup>n</sup>-n te dico-n nchàa sã ndécú ndihí-n, te díhú<sup>n</sup>-n cuáha táhú-n cuè ñáyiú ndàhú. Te duca<sup>n</sup>, te nduu táhú-n nùcündecu váha-n núú ndécú Yã Ndiõxí táxí tnùní-gá, te sátá ná yãha duca<sup>n</sup> càda-n, te quixi-n chìtnahá ñáhá-n xii-í cuèi na ndòho-n dàtná ndòho-í –càchí-gá xáha<sup>n</sup>-gã xii-dé.

<sup>22</sup> Te sá dúcá<sup>n</sup> ñí xáha<sup>n</sup> Jèsús xii-dé te ío ní cundiyí-dé chi ío cuica-dě, te ní xica-dé cuánuhú-dé.

<sup>23</sup> Te ní ndacoto-gá ni càndéé ò<sup>n</sup>-gá, te ní xáha<sup>n</sup>-gã xii cue tée xica cuu ndihí-gá:



—Cue ñáyi cuica chi ío úhú quíndáá iní-yu Yá Ndiöxí cuendá ndíhu ndaha ñàha-gá xii-yu — càchí-gá xàha<sup>n</sup>-gã xii-güedé.

<sup>24</sup> Te cue téé xica cuu ndihí-gá-á<sup>n</sup> ío ní cuñúhu-güedé nàcuáa ní cáhá<sup>n</sup>-gá, te ní xáha<sup>n</sup> tucu-gá xii-güedé:

—Nchòhó cue téé xica cuu ndihí-í càchí tnúhu tucu-í xii-ndo sã ío úhú quíndáá iní cue ñáyi cuica Yá Ndiöxí cuendá ndíhu ndaha ñàha-gá xii-yu, chi sàni iní-yu sá ncháá sã ndécú ndihí-yu dàcácu nihnu ñaha-xi xii-yu núú úhú núú ndàhú.

<sup>25</sup> Te yáchí-gá yáha ì<sup>n</sup> càméyu yaú ì<sup>n</sup> yiqui tìcú dàcúxí sã quíndáá iní ì<sup>n</sup> ñáyi cuica Yá Ndiöxí cuendá ndíhu ndaha ñàha-gá xii-yu —càchí-gá xàha<sup>n</sup>-gã xii-güedé.

<sup>26</sup> Te cue téé xica cuu ndihí-gá ní cuñúhu vñhi-gá-güedé sá dúcá<sup>n</sup> ñí cáhá<sup>n</sup>-gá, te ní ngüíta-güedé xítnàha-güedé:

—¿Te yoo sa ndacu naníhí tàhú te núu duca<sup>n</sup> vání? —càchí-güedé xítnàha-güedé.

<sup>27</sup> Te Jèsús ní xíndéhé vãha ñaha-gã xii-güedé, te ní xáha<sup>n</sup>-gã:

—Nchaa ñáyi ñuyíú-a chi vá ndácü-yu ná cadá-yu nàcuáa ndíhu ndaha ñàha Yá Ndiöxí xii-yu, dico mee-gã chi ndacu-gá ndíhu ndaha ñàha-gá xii-yu, chi nchaandi túhú sá vãha ndacu-gá quidé-gã —càchí-gá xàha<sup>n</sup>-gã xii-güedé.

<sup>28</sup> Te té Pèlú ní xáha<sup>n</sup>-dë xii-gá:

—Nchúhú ní dándóo-ndí nchaandi túhú sá ndécú ndihí-ndí te ní tuha ñaha-ndí xii-n —càchí-dé xàha<sup>n</sup>-dë xii-gá.

<sup>29</sup> Te Jèsús ní xáha<sup>n</sup>-gã xii-dé:

—Na càchí tnúhu ndáá-í xii-ndo sã ncháá ñáyi na dándóo vehe-xi, àdi ñaní-xi, cúha-xi, tãtá-xi, nãná-xi, déhe-xi, àdi ñuhu-xi, te núu duca<sup>n</sup> na càdá-yu sá cuendá-í ndihí sá cuendá tnúhu-í,

<sup>30</sup> te ío-gá cuéhé sã cuãñaha Yá Ndiöxí cundecu ndihí-yu, chi níhí-yu vehé-yu, ñuhú-yu, ñaní-yu, cúha-yu, nãná-yu, déhe-yu, te ñá díú-ní sã

nchaa xíã<sup>n</sup> níhí-yu cundecu ndihí-yu, chi tnàhá nduu táhü-yu cundecu ndihí ñàhá-yu xii-í ní caa ní quíhí<sup>n</sup> ná sãá nduu. Dico díhna-gá ndoho tnàhá-yu núú ñuyíú-a sá cuendá-í.

<sup>31</sup> Te dava ñáyi cunuu ndecu ichi Yá Ndiöxí vitna, ñáyi-á<sup>n</sup> sãá nduu te vá ío-gá cunúú-yu dàtná cunúú-yu vitna, te dava ñáyi nchícú<sup>n</sup> ñá túú cunuu vitna ñáyi-á<sup>n</sup> sãá nduu te ío cunúú-yu —càchí-gá xàha<sup>n</sup>-gã xii-güedé.

*Jèsús càhá<sup>n</sup> tucu-gá sá cáhni ñàha-güedé xii-gá*

*(Mt. 20:17-19; Lc. 18:31-34)*

<sup>32</sup> Te ñuhu Jèsús ichi ndihí cue téé xica cuu ndihí-gá cuásaá ndihí ñaha-gã xii-güedé ñuu Jerusàlén, te yòdo nuu-gá núú-güedé cuásaá. Te cue téé-á<sup>n</sup> xícunúhu-güedé sá dúcá<sup>n</sup> cuãhá<sup>n</sup>-gá ñuu Jerusàlén, te dava cue ñáyi xínchícú<sup>n</sup> xiyuhú-yu. Te ní taudí<sup>n</sup>-gá ndi ùxúú cue téé xica cuu ndihí-gá, te ní ngüíta-gá cání-gã cuendú núú-güedé nchaa nàcuáa yáha-gá.

<sup>33</sup> Te xàha<sup>n</sup>-gã xii-güedé:

—Vitna ñuhu-o ichi cuásaá-ó ñuu Jerusàlén, te yàcá<sup>n</sup> cuáha cuendá ñàhá-güedé xii yuhú Téé cùu ñaní tnàhá-ndó nchaa-ndo núú cué téé cùu dútú cunúu, ndihí núú cué téé dàcuaha ñaha xii ñáyi nchaa tnúhu ní chídó tñuní ndí Moisés. Te díu cue téé-á<sup>n</sup> cññaha-güedé xii dava-gã cue téé sá cáhni ñàha-güedé xii-í, te cuáha cuendá ñàhá-güedé xii-í núú cué téé ñá túú cùu cue téé isràél.

<sup>34</sup> Te cue téé-á<sup>n</sup> cudíquí ndeé ñàhá-güedé xii-í, te caníha-güedé ndihí ñí, te tíú díí ñàhá-güedé, te cahni ñaha-güedé xii-í dico nduu úní sá cùú-í te ndoto-í —càchí-gá xàha<sup>n</sup>-gã xii-güedé.

*Té Jàcobó ndihí té Juàá càhá<sup>n</sup> ndàhú-güedé núú Jèsús sá càdá-gã ì<sup>n</sup> sá cuíní-güedé*

*(Mt. 20:20-28)*

<sup>35</sup> Te cue déhe té Zebèdeú té Jàcobó ndihí té Juàá ní quexìo-güedé núú Jèsús, te xàha<sup>n</sup>-güedé xii-gá:

—Mèstrú, véxi-ndí càhá<sup>n</sup> ndàhú-ndí núú-n nũu vá cùndèe iní-n càda-n ì<sup>n</sup> sá cuìní-ndí —càchí-güedé xãha<sup>n</sup>-güedé xii-gá.

<sup>36</sup> Te Jèsús ní xicá<sup>n</sup> tnúhú-gã núú-güedé, te xãha<sup>n</sup>-gã:

—¿Ná cúú sã cuìní-ndó càda-í-i? —càchí-gã xãha<sup>n</sup>-gã xii-güedé.

<sup>37</sup> Te ní xáha<sup>n</sup>-güedé xii-gá:

—Cuìní-ndí sá òré ná sàá nduu cùndecu-n núú táxí tnùní-n, te ì<sup>n</sup>-ndí cunucóo-ndí xio cùha-n te ì<sup>n</sup>-ndí cunucóo-ndí xio dàtni-n —cachí-güedé xãha<sup>n</sup>-güedé xii-gá.

<sup>38</sup> Te Jèsús ní xáha<sup>n</sup>-gã xii-güedé:

—Nchòhó, ñá túú cùtnuní iní-ndó nàcuáa ndùu sá xicá<sup>n</sup>-ndó nũú-í. ¿Te náa cundee iní-ndó dàndoho ñaha ñáyiu xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-ã<sup>n</sup>? —càchí-gã xãha<sup>n</sup>-gã xii-güedé.

<sup>39</sup> Te ní xáha<sup>n</sup>-güedé xii-gá:

—Cundee iní-ndí yáha-ndí nchaa nàcuáa càhá<sup>n</sup>-n-ã<sup>n</sup> —càchí-güedé xãha<sup>n</sup>-güedé xii-gá.

Te Jèsús ní xáha<sup>n</sup>-gã xii-güedé:

—Ndáá sá cùndèe iní-ndó ndòho-ndo nchaa nacuáa ndòho-í, te cundee tùcu iní-ndó càhni ñahá-yu xii-ndo, chi yúhú cahni ñahá-yu xii-í.

<sup>40</sup> Dico sá dúcá<sup>n</sup> cuìní-ndó sã ì<sup>n</sup>-ndó cùnucóo-ndo xio cuhá-í te ì<sup>n</sup>-ndo cùnucóo-ndo xio datni-í, te xiã<sup>n</sup> chi ñá díú yúhú tàú-í cachí-í te núú sá cúú cùnucóo-ndo àdi sá vã cúú cùnucóo-ndo, chi mee Tãtã-í Dútú Ndiõxí cachí-gã te núú ná cúú ñáyiu nduu táhú cunucóo dìñi-í dàvá-á<sup>n</sup> —càchí-gã xãha<sup>n</sup>-gã xii-güedé.

<sup>41</sup> Te òré ní níhí ùxí-gã cue téé xica cuu ndihi-gã tnúhu nàcuáa ndùu sá cuìní té Jàcobó ndihi ñaní-dé té Juáá, te ní cudéé<sup>n</sup>-güedé núú cuè téé úú-á<sup>n</sup>.

<sup>42</sup> Te Jèsús ní cana-gã nchaa cue téé xica cuu ndihi-gã-á<sup>n</sup>, te ní xáha<sup>n</sup>-gã xii-güedé:

—Nchòhó xini-ndó sã cuè téé yíndaha ì<sup>n</sup> nació<sup>n</sup> quide-güedé sá ìo cùnucóo-güedé, te nchaa dava-gã cue téé cùndihi-güedé tnàhá-güedé quidé-güedé sá ìo cùnucóo-güedé.

<sup>43</sup> Dico nchòhó chi vá dúcá<sup>n</sup> càda-ndo. Chi núú dava-ndo cuìní-ndó cùnucóo-ndo te xini ñuhu-xi cunu cuechi núú tnàhá-ndó te vá cãdá-ndó sã cùnucóo-ndo.

<sup>44</sup> Te núú dava-ndo cuìní-ndó quène cáva-ndo, te cuu-ndo dàtná cue ñáyiu ñá túú tnàhí dàñá quee núú chíú<sup>n</sup> pàtróó<sup>n</sup>-xi cunu cuechi nũú tnàhá-ndó.

<sup>45</sup> Te yúhú Tée cùu ñaní tnàhá-ndó nchaa-ndo, chi ñá túú véxi-í sá cùnucóo-ndo cuèchi ñáyiu núú-í, chi véxi-í sá cùnucóo-ndo cuèchi-í núú-yu. Te cuú-í ñuyúú-a cuendá vai-yu cácu nihnu núú ùhú núú ndàhú —càchí-gã xãha<sup>n</sup>-gã xii-güedé.

*Jèsús quidé tãtna-gã ì<sup>n</sup> téé cuáá nání-dé Bartimeú*  
(Mt. 20:29-34; Lc. 18:35-43)

<sup>46</sup> Te Jèsús ní quexìo-gã ñuú Jericó ndihi cue téé xica cuu ndihi-gã, te ní yáha-gã ndihi-güedé ichi xití ñuú-á<sup>n</sup>, te ìo cuéhé ñáyiu nchicú<sup>n</sup> ñahá xii-gã cuáhá<sup>n</sup> te ì<sup>n</sup> xio yuhu ichi sá ñí quee xití ñuú-á<sup>n</sup> núcõo ì<sup>n</sup> téé cuáá nání-dé Bartimeú, te tãtã-dé nání-dé Timeú, te téé-á<sup>n</sup> núcõo-dé yuhu ichi-á<sup>n</sup> xicá<sup>n</sup> ndàhú-dé.

<sup>47</sup> Te téé-á<sup>n</sup> ñí cutnùní iní-dé sá Jèsús téé ñuú Nazàrét ñúhú-dé ichi, te ní ngüíta-dé níhi càhá<sup>n</sup>-dé, te xáha<sup>n</sup>-dè xii-gã:

—Jèsús, ñaní tnàhá ndíi Dàvíi, cundàhú iní ñahá xii-í! —càchí-dé xáha<sup>n</sup>-dè xii-gã.

<sup>48</sup> Te vai ñáyiu tènãá ñahã-yu xii-dé, te xãhã<sup>n</sup>-yu sá ná càdí-dé yuhu-dé dico uu<sup>n</sup>-gã níhi ní cáhá<sup>n</sup>-dé xáha<sup>n</sup>-dè xii-gã:

—Jèsús, ñaní tnàhá ndíi Dàvíi cundàhú iní ñahá xii-í! —càchí-dé xáha<sup>n</sup>-dè xii-gã.

<sup>49</sup> Te Jèsús ní ngüíñi-gã te ní xáha<sup>n</sup>-gã xii cue téé ndihi-gã:

—Chí cuãnguaca téé cuáá-ã<sup>n</sup> can-deca-ndo-dé quixi iha —càchí-gã xáha<sup>n</sup>-gã.

Te cue téé-á<sup>n</sup> ñí xica-güedé cuãnguaca-güedé téé cuáá-á<sup>n</sup>, te òré ní quexìo-güedé núú-dé te ní xáha<sup>n</sup>-güedé xii-dé:

—Ndacuíñi te vá ndihú-gá iní-n, na quihí<sup>n</sup>-ó chi càna ñaha Jesús xii-n —càchí-güedé xáha<sup>n</sup>-güedé xii-dé.

<sup>50</sup> Te téé-á<sup>n</sup> ñi xócání-dě dóó ndíxí-dě, te ndíhi-ni ní ndacuíñí-dé te ní xica-dé cuáhá<sup>n</sup>-dé núú Jèsús.

<sup>51</sup> Te òré ní quexìo-dé te ní xicá<sup>n</sup> tnúhú-gă núú-dě, te xáha<sup>n</sup>-gă xii-dé:

—¿Ná cuení-n cada ñaha-í xii-n-í? —càchí-gă xáha<sup>n</sup>-gă xii-dé.

Te téé cuáá-á<sup>n</sup> ñi xáha<sup>n</sup>-dě xii-gă:

—Mèstrú, cuení-í cada tátna-n núú-í cuèndá cundehe-í —càchí-dé xáha<sup>n</sup>-dě xii-gă.

<sup>52</sup> Te Jèsús ní xáha<sup>n</sup>-gă xii-dé:

—Cuanùhú vitna, chi sa ní ndúha núú-n chi ní sándáá iní-n Yá Ndiöxí —càchí-gă xáha<sup>n</sup>-gă xii-dé.

Te òré-ni-á<sup>n</sup> ñi ndúha núú-dě te nchícú<sup>n</sup>-dé Jèsús cuáhá<sup>n</sup>.

## 11

*Jèsús cuánguihu-gă ñuú Jerusàlén*  
(Mt. 21:1-11; Lc. 19:28-40; Jn. 12:12-19)

<sup>1</sup> Te Jèsús ní cuyatni-gă ndíhi cue téé xica cuu ndíhi-gă ñuú Bètaniá, ndíhi ñuú Bèttagé, te xía<sup>n</sup> cáá yùcu nani Olívú, te yatni víi-nă xía<sup>n</sup> cáá ñuú Jerusàlén. Te Jèsús ní cana-gă úú-ni tnàhá cue téé xica cuu ndíhi-gă.

<sup>2</sup> Te ní xáha<sup>n</sup>-gă xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te naníhí-ndó ñ<sup>n</sup> búrru ndètníi-di, te vátá yòo ñ<sup>n</sup>-gă codo ñàha xii-di, te nandaxi-ndo-di te candeca-ndo-di quixi.

<sup>3</sup> Te núú yoo na càcá<sup>n</sup> tnúhú núú-ndó ñă cuèndá nándàxi-ndo-di, te cúñaha-ndo sã yùhú Yáá xicá cùu ndíhi-ndo xini ñuhu-í-di, te na yáha canehe chiu<sup>n</sup>-í-di te ndíhi-ni natendaha-í-di, duha cúñaha-ndo —càchí-gă xáha<sup>n</sup>-gă xii-güedé.

<sup>4</sup> Te cue téé-á<sup>n</sup> ñi xica-güedé cuáhá<sup>n</sup>-güedé, te òré ní quexìo-güedé ñuú-á<sup>n</sup> te ní naníhí-güedé ñ<sup>n</sup> búrru ndètníi-di ñ<sup>n</sup> yutnu ñihnu yatni ñ<sup>n</sup> yuyehe vehe caa yatni yuhu ichi, te ní ngüíta-güedé nándàxi-güedé-di.

<sup>5</sup> Te mei òré nándàxi-güedé-di ní quexìo ñáyiu xáhã<sup>n</sup>-yu xii-güedé:

—¿Ná cuèndá nándàxi-ndo búrru-á<sup>n</sup>-í? —càchí-yu xáhã<sup>n</sup>-yu xii-güedé.

<sup>6</sup> Te cue téé-á<sup>n</sup> ñi xáha<sup>n</sup>-güedé xií-yu nàcuáa ní xáha<sup>n</sup> Jèsús cúñaha-güedé. Te sátá dúcá<sup>n</sup> te ní dáñã-yu ndèca-güedé búrru-á<sup>n</sup> cuáhá<sup>n</sup> núú ndécú Jèsús.

<sup>7</sup> Te òré ní quexìo-güedé ndíhi-di núú ndécú-gă, te ní sacá<sup>n</sup> ndodo-güedé dóó-güedé sátá-di, ní ngódó ñàha Jesús xii-di.

<sup>8</sup> Te ío cuéhé ñáyiu ta sácá<sup>n</sup>-yu dóó-yu ichi cuáhá<sup>n</sup>-gă cuèndá núú dõö-yu-á<sup>n</sup> yáha-gă ndíhi quiti yòdo-gă, te davá-yu xèhndé-yu ndaha yùtnu ta sacá<sup>n</sup>-yu cuáhá<sup>n</sup>.

<sup>9</sup> Te nchaa ñáyiu yòdo nuu núú-gă ndíhi nchaa ñáyiu nchícú<sup>n</sup> ndàa sátá-gă ní ngüíta-yu níhi càhá<sup>n</sup>-yu, te càchí-yu:

—¡Ío càhnu cuu Yáá-a! ¡Te Yá Ndiöxí ná chindee ñaha-gă, chi ñuú-gă cúú-gă Yáá ní tendaha-gă véxi quide núú-gă!

<sup>10</sup> ¡Te ñuú-ni Yáá-á cúú-gă Yáá véxi quindaha ñàha xii-o datná ní xóo cada ndí Dávíí! ¡Te ndéé nchaa sá ío andíu na càchí-xi sá ío càhnu cuu-gă! —duha càchí-yu.

<sup>11</sup> Te Jèsús ní quexìo-gă ñuú Jerusàlén, te cuánguihu-gă xití veñúhu càhnu sá ío cùnuu, te ní xíndéhé vãha-gă nchaa sá ndécú xití veñúhu-á<sup>n</sup>. Te sátá dúcá<sup>n</sup> te ní ndee-gă cuáhá<sup>n</sup>-gă ñuú Bètaniá ndíhi ndi ùxúú cue téé xica cuu ndíhi-gă chi sa ní cuaa.

*Jèsús xáha<sup>n</sup>-gă xii yutnu ngüxí sá vã cúú<sup>n</sup>-gă sávidí-xi*  
(Mt. 21:18-19)

<sup>12</sup> Te nduu tnéé-á<sup>n</sup> ñi quee Jèsús ñuú Bètaniá ndíhi cue téé xica cuu ndíhi-gă, te ichi ñuhu-gă ní xíhí-gă docó.

<sup>13</sup> Te xica ñi xíní-gă nútñi ñ<sup>n</sup> yutnu ngüxí, te ní xica-gă cuándéhé-gă ñuú ndéé sávidí-xi te ñá túú ñă ndéé, chi mee-ni ndàha-xi ndéé chi ñá díú yòo sácundeé sávidí-xi.

<sup>14</sup> Te Jèsús ní xáha<sup>n</sup>-gă xii yutnu ngüxí-á<sup>n</sup>:

—Vitna te vá yõo ñ<sup>n</sup>-gá caxi sávidí-n, chi vá cúú<sup>n</sup>-gã —càchí-gá xãha<sup>n</sup>-gã xii yutnu ngũxí-á<sup>n</sup>.

Te cue tée xica cuu ndihi-gá ní tecú dóho-güedé nàcuáa ní xáha<sup>n</sup>-gã xii yutnu ngũxí-á<sup>n</sup>.

*Jèsús ñá túú tnàhá iní-gá nàcuáa quide ñáyiú xití veñúhu*

(Mt. 21:12-17; Lc. 19:45-48; Jn. 2:13-22)

<sup>15</sup> Te Jèsús ní quexio tucu-gá ndihi cue tée xica cuu ndihi-gá ñúú Jerusálén, te cuánguihu tucu-gá xití veñúhu càhnu sá ño cùnunu, te xití veñúhu-á<sup>n</sup> xíndecu cue ñáyiú quide ndáhú nádíco-yu, ndihi cue ñáyiú xísaa<sup>n</sup>. Te nchaá-yu ní queñuhu ñaha Jèsús xii-yu quehé, te ní dándúá-gá mèsá cue ñáyiú dàma díhú<sup>n</sup>, ndihi nchaá xilé sácõo nchihí cue ñáyiú dícõ lómá xíndecu xití veñúhu-á<sup>n</sup>.

<sup>16</sup> Te ñá túú tnàhí-gá ní dàña-gá yáha cue ñáyiú ndihi nchaá sá nchídõ-yu ichi xití veñúhu-á<sup>n</sup>.

<sup>17</sup> Te ní xáha<sup>n</sup>-gã xii-yu:

—Núú tütú Yã Ndiõxí càhá<sup>n</sup>-xi nàcuáa ní cáhá<sup>n</sup>-gá, te ní cachí-gá: “Vehe-í cúú-xí vèhe núú tàcá ñáyiú ñihí ñuyíú càhá<sup>n</sup> ndihi ñàhá-yu xii-í”, duha ní cáhá<sup>n</sup>-gá càchí-xi núú tütú-gá. Dico nchòhó quidé-ndó vèhe-gá vèhe ñadúhú —càchí-gá xãha<sup>n</sup>-gã xii-yu.

<sup>18</sup> Te nchaá dútú cúnunu, ndihi nchaá cue tée dàcuaha ñaha xii-yu nchaá tnúhu ní chídó tnùní ndíi Moisés ní tecú dóho-güedé nàcuáa ní cáhá<sup>n</sup>-gá te ní ngúita-güedé ndúcú-güedé nàcuáa cada-güedé cahni ñaha-güedé xii-gá, chi yùhú-güedé sá ño cunuu-gã, te duca<sup>n</sup> chi nchaá ñáyiú ío cùnúhu-yu nchaá tnúhu càhá<sup>n</sup>-gá.

<sup>19</sup> Te òré sa ní cuaa cuí-nã, te ní quee tucu Jèsús ndihi cue tée xica cuu ndihi-gá ñúú Jerusálén cuáhá<sup>n</sup>-gá ndihi-güedé ingá xichi.

*Ní yíchí yutnu ngũxí*

(Mt. 21:20-22)

<sup>20</sup> Te nduu tnéé nehé-ni ní yáha tucu Jèsús ndihi cue tée xica cuu ndihi-gá núú níhnú yùtnu ngúxí, te

ní xiní-güedé sa ní yíchí ñihí ndéé yóho-xi.

<sup>21</sup> Te té Pèlú ní ndacu iní-dé nàcuáa ní xáha<sup>n</sup> Jèsús xii yutnu ngũxí-á<sup>n</sup>, te ní xáha<sup>n</sup>-dë xii-gá:

—Mèstrú, cundehe nã ní yíchí yutnu ngũxí sá ñí xáha<sup>n</sup>-n sã vá cúú<sup>n</sup>-gã sávidí-xi —càchí-dé xãha<sup>n</sup>-dë xii-gá.

<sup>22</sup> Te Jèsús ní xáha<sup>n</sup>-gã xii-güedé:

—Quindáá ndisa iní-ndó Yã Ndiõxí.

<sup>23</sup> Te na càchí tnúhu ndáá-í xii-ndo sã núu nchòhó cuñaha-ndo xii tindúú-a xocuiñí-xi núú ndécú-xí, te quíhí<sup>n</sup>-xi quée-xi xití lámár. Te ñu duca<sup>n</sup> càda-xi te núu nchòhó vá cání ñ<sup>n</sup> cani úú iní-ndó, te quindáá iní-ndó sã dúcá<sup>n</sup> càda-xi.

<sup>24</sup> Te xíã<sup>n</sup> núu càchí tnúhu-í xii-ndo sã nchàa sá ná càcá<sup>n</sup>-ndó núú Yã Ndiõxí òré càhá<sup>n</sup> ndihi-ndo-gã, te taxi-gá te núu nchòhó sàndáá ndisa iní-ndó sã táxi-gã sá xicá<sup>n</sup>-ndó núú-gã.

<sup>25</sup> Te òré càhá<sup>n</sup> ndihi-ndo Yã Ndiõxí te dandacu iní-ndó te núu ndècu ñáyiú ñá túú cùu vãha iní ñàhá xii-ndo, te cada càhnu iní-ndõ-yu cuendá duca<sup>n</sup> càda cahnu iní ñàhá Tãtá-ndó Dütú Ndiõxí Yaá ndécú àndiú xii-ndo cuendá nchaá sá ñà túú vãha quide-ndo.

<sup>26</sup> Dico núu nchòhó vá cáda càhnu iní-ndó sã quidé ñàha tñaha ñáyiú-ndo xii-ndo, te ni Tãtá-ndó Dütú Ndiõxí vá cáda càhnu iní ñàhá-gã xii-ndo cuendá nchaá sá ñà túú vãha quide-ndo —cachí-gá xáha<sup>n</sup>-gã xii-güedé.

*Jèsús ndécú ndihi-gá tnúhu ndee iní*

(Mt. 21:23-27; Lc. 20:1-8)

<sup>27</sup> Te Jèsús ní ndexio tucu-gá ñúú Jerusálén ndihi cue tée xica cuu ndihi-gá, te cuánguihu tucu-gá xití veñúhu càhnu sá ño cùnunu ndihi-güedé. Te xití veñúhu-á<sup>n</sup> yíhí-gã ní quexio cue dütú cúnunu ndihi cue tée dàcuaha ñaha xii ñáyiú nchaá tnúhu ní chídó tnùní ndíi Moisés, ndihi cue tée cùu sacuéhé núú ñáyiú isràél.

<sup>28</sup> Te xáha<sup>n</sup>-güedé xii-gá:

—Cuíní-ndí cachí tnúhu-n xii-ndí nása nduu tnúhu ndee iní ndécú ndihi-n núu quide-n nãndí sá quidé-n,

¿te yoo duca<sup>n</sup> nĩ taxi tnúhu ndee ìní-á<sup>n</sup> xii-n-i? —càchí-güedé xǎha<sup>n</sup>-güedé xii-gá.

<sup>29</sup> Te Jèsús ní xáha<sup>n</sup>-gǎ xii-güedé:

—Yúhú tnàhá-í cuìní-í cǎcǎ<sup>n</sup> tnúhu-í ì<sup>n</sup> sá cǎcǎ<sup>n</sup> tnúhu-í núú-ndó te núu na cǎchí tnúhu-ndo, te cǎchí tnúhu-í xii-ndo yòo ní taxi tnúhu ndee ìní xii-í duha quide-í.

<sup>30</sup> Te chí cǎchí tnúhu xii-í yoo ní táuchíú<sup>n</sup> nĩ dǎcuándüte ndíi Juàá ñáyiu, ¿Yá Ndiǒxí ǎ<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndíi? Te chí cǎchí tnúhu —cǎchí-gǎ xǎha<sup>n</sup>-gǎ xii-güedé.

<sup>31</sup> Te ní ngüíta-güedé xǐtnàha-güedé:

—¿Nása cúñaha-o? Chi núu na cúñaha-o sǎ Yá Ndiǒxí ní táuchíú<sup>n</sup> dùca<sup>n</sup> ní quide ndíi Juàá ñá, te quesaha-dě: “¿Ná cuèndá ñá túú ní sǎndáá ìní-ndó tnúhu ní cǎhá<sup>n</sup> ndíi vǎi<sup>n</sup>?”, quesaha-dě.

<sup>32</sup> Te ni vǎ cúú cúñaha-o sǎ cuè ñáyiu ñuyíú-a ní táuchíú<sup>n</sup> dùca<sup>n</sup> ní quide ndíi Juàá —cǎchí-güedé xǐtnàha-güedé.

Te duca<sup>n</sup> nĩ xǐtnàha-güedé chí ñá túú ní cùtnuní ìní-güedé nása cúñaha-güedé xii-gá, chí xǐyùhú-güedé cue ñáyiu chí nchaa ñáyiu-á<sup>n</sup> nĩ cutnùní ndáá ìní-yu sá Yá Ndiǒxí ní táuchíú<sup>n</sup>-gǎ duca<sup>n</sup> nĩ quide ndíi Juàá.

<sup>33</sup> Te ní xáha<sup>n</sup>-güedé xii Jèsús:

—Ñá túú xìní-ndí yoo ní táuchíú<sup>n</sup> dùca<sup>n</sup> ní dǎcuándüte ndíi Juàá ñáyiu —cǎchí-güedé xǎha<sup>n</sup>-güedé xii-gá.

Te Jèsús ní xáha<sup>n</sup>-gǎ xii-güedé:

—Te núu duca<sup>n</sup> te ni yùhú vǎ cǎchí tnúhu-í xii-ndo yòo ní taxi tnúhu ndee ìní duha quide-í —cǎchí-gǎ xǎha<sup>n</sup>-gǎ xii-güedé.

## 12

*Cuèndá cue téé cuihna ìní-xi  
(Mt. 21:33-46; Lc. 20:9-19)*

<sup>1</sup> Te Jèsús ní ngüíta-gǎ cání-gǎ ì<sup>n</sup> cuèndú núú ñáyiu nǎcuáa tecú tnùní-yu tnúhu-gǎ, te xǎha<sup>n</sup>-gǎ xii-yu:

—Ì<sup>n</sup> téé ní nacúxi-dé mee-ni yòo yaha stilé núú ñúhú-dě, te ní chidoco-dě cuèndá sá vǎ cúú dàñú, te ní cadúha-dé núú quíhni-dě ndéhé yoho yàha stilé-á<sup>n</sup> òré ná cùu, te ní

cadúha-dé ì<sup>n</sup> xító dùcú<sup>n</sup> núú cáundòdo cue téé coto yoho yàha stilé-á<sup>n</sup>.

<sup>2</sup> Te ní sǎá ì<sup>n</sup> nduu quèe-dé quíngaca cuu xica-dě vǎi nduu, te ní dándòo ndaha-dě sá nĩ xitu-dé-á<sup>n</sup> xii ì<sup>n</sup> úú cue téé cǎhá<sup>n</sup> ndíhi-dé cuèndá cada chiù<sup>n</sup>-güedé, te ní ndatnúhu-güedé sá òré ná cúú te cuu cuèndá dava-güedé te duca<sup>n</sup> te ní quèe-dé cuáhá<sup>n</sup>-dé.

<sup>2</sup> Te sǎtá nĩ sǎá nduu nĩ cuu ndéhé yoho yàha stilé sá nĩ xitu-dé-á<sup>n</sup>, te ní xáha<sup>n</sup>-dě xii ì<sup>n</sup> téé xìnu cuechi núú-dě: “Cuáhá<sup>n</sup> cǎcǎ<sup>n</sup>-n sǎ cúú cuèndá-í núú cuè téé ní dándòo ndàha-í nchaa yoho yàha stilé sá nĩ xitu-í-á<sup>n</sup>”, cǎchí-dé xǎha<sup>n</sup>-dě. Te téé xìnu cuechi-á<sup>n</sup> nĩ xica-dé cuáhá<sup>n</sup>-dé.

<sup>3</sup> Te cue téé-á<sup>n</sup> nĩ tniì-güedé téé xìnu cuechi-á<sup>n</sup>, te ní caniha-güedé xii-dé, te dǎtnùní ní nacúí<sup>n</sup> ñáhá-güedé, te ñá túú tnàhí ná ní sǎñaha-güedé.

<sup>4</sup> Te téé cùu xítóhó yoho yàha stilé-á<sup>n</sup> nĩ tendaha tùcu-dé ìngá téé xìnu cuechi núú-dě cuáhá<sup>n</sup>-dé. Te òré ní quexìo téé xìnu cuechi-á<sup>n</sup> te cue téé-á<sup>n</sup> nĩ sáha ñaha-güedé yúú xii-dé, te ní táhú-güedé díquí-dě, te ní xícuèhé ñáhá-güedé xii-dé.

<sup>5</sup> Te téé cùu xítóhó nchaa yoho yàha stilé-á<sup>n</sup> nĩ tendaha tùcu-dé ìngá téé xìnu cuechi núú-dě cuáhá<sup>n</sup>-dé núú cuè téé-á<sup>n</sup>, dico téé-á<sup>n</sup> òré ní quexìo-dé te ní sahani ñaha-güedé xii-dé. Te téé cùu xítóhó nchaa yoho yàha stilé-á<sup>n</sup> nĩ tendaha-dě vǎi-gǎ cue téé xìnu cuechi núú-dě cuáhá<sup>n</sup> ngácá<sup>n</sup>-güedé sá cúú cuèndá-dé ní cùu dico ñu-ni duca<sup>n</sup> nĩ quide ñaha tùcu cue téé ndéé nchaa yoho yàha stilé-á<sup>n</sup> xii-güedé, chí dava-güedé ní caniha-güedé te dava-güedé ní sahani ñaha-güedé.

<sup>6</sup> Te téé cùu xítóhó nchaa yoho yàha stilé-á<sup>n</sup> ndécú ì<sup>n</sup>ndii-ná téé tendaha-dě quíhí<sup>n</sup> núú cuè téé ní dándòo ndaha-dě sá nĩ xitu-dé-á<sup>n</sup>, te téé tendaha-dé-á<sup>n</sup> cúú-dě déhe ducu<sup>n</sup>-dé, te ío cùu ìní ñáhá-dě. Te ní sani ìní-dé: “Váha-gǎ núu tendaha-í déhe-í-a núhú-dé, chí òré quiní ñáhá-güedé xii-dé te cǎnehe-güedé sá yíñùhu núú-dě”, duha ní sani ìní-dé. Te duca<sup>n</sup> te ní xáha<sup>n</sup>-dě xii déhe-dé-á<sup>n</sup> sǎ núhú-dé, te téé-á<sup>n</sup> cuánuhú-dé cuáhá<sup>n</sup>

ngacá<sup>n</sup>-dé sá cúu cuendá tătă-dě núu cuè téé-á<sup>n</sup>.

<sup>7</sup> Dico òré ní xiní cue téé quide chiu<sup>n</sup>-á<sup>n</sup> dēhe téé cùu xítóhó nchaa yoho yàha stilé-á<sup>n</sup>, te ní xítnáha-güedé: “Téé-á<sup>n</sup> téé véxi nduu táhú ñuhu-a ndihí sá cáá núú-xi, dico cahni-o-dě te mee-o ndùu táhú-ó sá ndúú táhú-dě”, duha ní xítnáha-güedé.

<sup>8</sup> Te ní tñi-güedé téé-á<sup>n</sup>, te ní sahani ñaha-güedé, te ní dáquéné-güedé yiqui cùñú-dé ñ<sup>n</sup> xio yuhu ñuhu núu cáá yòho yaha stilé-á<sup>n</sup> —duha cuáhá<sup>n</sup> cuendú ní cani Jèsús núú-yu.

<sup>9</sup> Te Jèsús ní xáha<sup>n</sup> tùcu-gá xii-yu:

—¿Te nchòhó sa cùtnuní iní-ndó nàcuáa cada xítóhó ñuhu-á<sup>n</sup> ã<sup>n</sup>? Chi núhú-dé te cahni-dé cue téé-á<sup>n</sup> te dàndóo ndaha-dě ñuhu-dé xii cue téé cùtnuní iní-dé cada ndáá —càchí-gá xáha<sup>n</sup>-gá xii-yu.

<sup>10</sup> Te xáha<sup>n</sup> tùcu-gá xii-yu:

—Te nchòhó, náa ñá túú dàcuaha-ndo núu tùtú Yá Ndióxi núu càchí-xi:

Yúu sá ñí dáquée tñú cue téé dàcaa vehe,

ní cuu-xi yúu cùnùu vitna.

<sup>11</sup> Chi mee Yá Ndióxi duca<sup>n</sup> ñí cachí-gá cunduu, te cùu-xi ñ<sup>n</sup> sá ïo cùñúhu-o vitna.

Duha càchí-xi núu tùtú-gá —càchí Jèsús xáha<sup>n</sup>-gá xii-yu.

<sup>12</sup> Te cue téé ní xíndedóho nàcuáa ndùu tnúhu ní cáhá<sup>n</sup>-gá ní cuiní-güedé tñi ñaha-güedé xii-gá ní cùu, chi ní cutnùní iní-güedé sá cuendá-güedé ní cáhá<sup>n</sup>-gá, dico ní yùhú-güedé tñi ñaha-güedé xii-gá cuendá sá ïo vài ñáyi, te ná ïó ná cada ñahá-yu xii-güedé ní sani iní-güedé, te ní xica-güedé cuáhá<sup>n</sup>-güedé.

### *Cuendá impuèstú*

(Mt. 22:15-22; Lc. 20:20-26)

<sup>13</sup> Te sátá ñí xica-güedé cuáhá<sup>n</sup>-güedé, te ní tendaha-güedé ñ<sup>n</sup> ùú cue téé cùu fariséu, ndihí ñ<sup>n</sup> ùú cue téé cùndihí té Hèrodés cuáhá<sup>n</sup>-güedé núu ndécú Jèsús ndúcú-güedé nàcuáa cada-güedé dàticanuu ñaha-güedé xii-gá núu tnúhu càhá<sup>n</sup>-gá.

<sup>14</sup> Te cue téé-á<sup>n</sup> ñí quexìo-güedé núu Jèsús, te xáha<sup>n</sup>-güedé xii-gá:

—Mèstrú, cùtnuní iní-ndí sá ïo ndáá càhá<sup>n</sup>-n, te ñá túú quide cuendá-n nàcuáa càhá<sup>n</sup> ñáyi, te cuèi ndédani cáa-yu ñ<sup>n</sup>-ni càhá<sup>n</sup>-n ndihí-yu chi ñá túú quide cuendá-n cuèi ná ñáyi cùu-yu, te càhá<sup>n</sup> ndáá-n nàcuáa càhá<sup>n</sup> Yá Ndióxi cundecu-o ñùyíú-a. Te cachí tnúhu xii-ndí núu váha-ni quide-ndí sá cháhu-ndí té Cèsár téé ïo cùnuu cuendá impuèstú ã<sup>n</sup> ñáhá —càchí-güedé xáha<sup>n</sup>-güedé xii-gá.

<sup>15</sup> Dico Jèsús ní cutnùní iní-gá sá xító ndèé ñáhá-güedé xii-gá, núu ní xáha<sup>n</sup>-gá xii-güedé:

—¿Ná cuendá duca<sup>n</sup> xító ndeé ñáhá-ndó xii-í? Chí dánèhé ñáhá xii-í ñ<sup>n</sup> díhú<sup>n</sup> sá cháhu-ndo cuendá impuèstú te núu nása cáa —cachí-gá xáha<sup>n</sup>-gá xii-güedé.

<sup>16</sup> Te cue téé-á<sup>n</sup> ñí dánèhé ñáhá-güedé xii-gá ñ<sup>n</sup> díhú<sup>n</sup> sá cháhu-güedé cuendá impuèstú. Te Jèsús ní xáha<sup>n</sup>-gá xii-güedé:

—Chí càchí tnúhu xii-í núu yoo núu-xi ndèé ndihí yoo dñu-xi ndeé —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tē Cèsár ndèé ndihí dñu-dé —càchí-güedé xáha<sup>n</sup>-güedé xii-gá.

<sup>17</sup> Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí nàcuáha té Cèsár sá cúu cuendá-dé, te sá cúu cuendá mée Yá Ndióxi te xíá<sup>n</sup> nàcuáha-ndo-gá —càchí-gá xáha<sup>n</sup>-gá xii-güedé.

Te cue téé-á<sup>n</sup> ïo ní cuñúhu-güedé sá dúcá<sup>n</sup> ñí cáhá<sup>n</sup>-gá.

### *Cuendá cue ñáyi ndoto*

(Mt. 22:23-33; Lc. 20:27-40)

<sup>18</sup> Te sátá dúcá<sup>n</sup> te ní quexìo ñ<sup>n</sup> úú cue téé cùu saducéu núu ndécú Jèsús, te cue téé-á<sup>n</sup> ñá túú sàndáá iní-güedé sá ndótó cuè ñáyi ní xihí, te ní xáha<sup>n</sup>-güedé xii-gá:

<sup>19</sup> —Mèstrú, ndíi Moisés càchí ndíi núu tùtú ndíi ndècu vitna sá núu ñ<sup>n</sup> téé na cùu-dé te quendóo ñadihí-dé, te núu ñá túú ní xóo déhe-dé ndihí ñadihí-dé-á<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuendá coo déhe-dé ndihí-á<sup>n</sup> cuendá téé ní xihí-á<sup>n</sup>.

20 Te ní x̄ndecu úsá tnàhá cue téé mee-ni ndì ñaní-güedé. Te téé díhna ní níhí ñadìhí-dé, te ñá túú ní cùdí-dé cundecu-dé chi ní x̄hí-dé, te ni ñ<sup>n</sup> déhe-dé ñá túú ní x̄o ndihí ñadìhí-dé.

21 Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup>, dico ní x̄hí tucu-dé, te ni ñ<sup>n</sup> tucu déhe-dé ñá túú ní x̄o ndihí ñaha-á<sup>n</sup>. Te ñ<sup>n</sup> duca<sup>n</sup> ní x̄hí téé cùu uní.

22 Te ní x̄ínu ndì úsá-güedé ní cándeca ñaha-güedé xii ñaha-á<sup>n</sup>, dico ni ñ<sup>n</sup>-güedé ñá túú ní x̄o déhe-güedé ndihí-a<sup>n</sup>, te ní ndihí-güedé ní x̄hí te ndéé núú ní ndihí-ná ní x̄hí tnàhá ñadìhí-á<sup>n</sup>.

23 Te na sàá nduu ndòto-güedé ndihí ñaha-á<sup>n</sup>, ¿te ndèdaca-güedé ñadìhí-güedé cuu-a<sup>n</sup>-i? Chi ndì úsá-güedé ní cándeca ñaha-güedé xii-a<sup>n</sup> —càchí-güedé x̄aha<sup>n</sup>-güedé xii-gá.

24 Te Jèsús ní x̄aha<sup>n</sup>-gá xii-güedé: —Ní x̄íta nchòhó tnúhu càhá<sup>n</sup>-ndó, chi ñá túú x̄íní-ndó nàcuáa càhá<sup>n</sup> Yá Ndiòxí núú tütú-gá, te ni ñá túú x̄íní-ndó sã díú-gá ndácú-gá quídé-gá nchaandi túhú sã v̄aha.

25 Te na càchí tnúhu-í xii-ndo sã òré ná sàá nduu ndòto nchaa ñáyiu ní x̄hí, te dàvá-á<sup>n</sup> v̄a ȳo-gá dasa<sup>n</sup> dēhe yoco-xi chi vá ȳo-gá candeca tnàha, chi na ndòtó-yu te cuu-ná-yu dàtná cue espíritú x̄ínú cuèchi núú Yá Ndiòxí.

26 Te núú nchòhó cuení-ndó càhá<sup>n</sup>-ndó cuèndá nchaa ñáyiu ndoto, te díhna-gá dacuàha-ndo nacuáa ní chídó tnùnì ndíi Moisés núú tütú ndíi ni cùu. Chi ñ<sup>n</sup> núú tütú ndíi càhá<sup>n</sup>-xi nàcuáa ní x̄aha<sup>n</sup> Yá Ndiòxí xii ndíi cùtnàhá ní càhá<sup>n</sup> ndihí ñaha-gá ñ<sup>n</sup> x̄ichi núú níhnú tnùtaú nchìcú<sup>n</sup> ñuhú. Te duha ní x̄aha<sup>n</sup>-gá xii ndíi: “Yúhú cù-í Ndiòxí tē Àbrahám, ndihí té Isàác, ndihí té Jàcób”, duha ní x̄aha<sup>n</sup> Yá Ndiòxí xii ndíi càchí-xi núú tütú ndíi.

27 Te Yá Ndiòxí ñá túú cùu-gá Ndiòxí cue ñáyiu ní x̄hí, chi cùu-gá Ndiòxí cue ñáyiu x̄ndecu vívú, núú x̄iá<sup>n</sup> nchòhó ío x̄íta-ndo tnúhu càhá<sup>n</sup>-ndó. Te sã dúcá<sup>n</sup> ní càhá<sup>n</sup>-gá cuèndá cue téé-á<sup>n</sup>, te x̄iá<sup>n</sup> cùtnùnì sã cuèi ní x̄hí-güedé sã cùu-xi tnàha

ñáyiu-güedé, dico ndècu vívú-güedé sã cùu-xi-gá —càchí-gá x̄aha<sup>n</sup>-gá xii-güedé.

### *Tnúhu sã ño-gá cùnùu*

(Mt. 22:34-40)

28 Te tnàhá ñ<sup>n</sup> téé dàcuaha ñaha xii ñáyiu nchaa tnúhu ní chídó tnùnì ndíi Moisés ndèdóho-dé nchaa tnúhu càhá<sup>n</sup> Jèsús ndihí cue téé cùu saducéu-á<sup>n</sup>, te ndèdóho-dé sã s̄únì v̄aha ñihí-gá tnúhu nàdanchocáva-gá. Te ní sãndehe yatni-dé núú-gá, te x̄aha<sup>n</sup>-dē xii-gá:

—Cachí tnúhu xii-í ndèdaca tnúhu sã ní càhá<sup>n</sup> Yá Ndiòxí ío-gá cùnùu cuu díhna —càchí-dé x̄aha<sup>n</sup>-dē xii-gá.

29 Te Jèsús ní x̄aha<sup>n</sup>-gá xii-dé:

—Duha càhá<sup>n</sup> tnúhu sã ño-gá cùnùu: “Nchòhó ñáyiu isràél ío váha chí cùndèdóho tnúhu-a. ñ<sup>n</sup> d̄ii ní Yá Ndiòxí ndécú, te ñ<sup>n</sup> ní-gá cùu-gá Ndiòxí-ó.

30 Te cuu iní-ndó Dütú Ndiòxí Yaá cùu Ndiòxí-ndó ñ<sup>n</sup> yuhu ni iní-ndó, te cani iní-ndó càda-ndo datná cuení mée-gá, te mee-ni tnúhu váha cani iní-ndó cuèndá cuu vii cuu váha-ndo núú-gá, te coo iní-ndó càda-ndo nacuáa cuu váha iní-gá”, duha càhá<sup>n</sup> tnúhu sã ño-gá cùnùu.

31 Te duha càhá<sup>n</sup> tucu ñngá tnúhu cùu uú sã ño cùnùu: “Cuu iní-ndó tnàha ñáyiu-ndo dàtná cùu iní-ndó mèe-ndo”, duha càhá<sup>n</sup> tnúhu cùu uú-á<sup>n</sup>. Te úú duha-ni tnúhu-a cùu-xi tnúhu sã ño-gá cùnùu —cachí-gá x̄aha<sup>n</sup>-gá xii-dé.

32 Te téé dàcuaha ñaha xii ñáyiu nchaa tnúhu ní chídó tnùnì ndíi Moisés ní x̄aha<sup>n</sup>-dē xii-gá:

—Mèstrú, váha-ni càhá<sup>n</sup>-n chi ndáá sã ñ<sup>n</sup> d̄ii-ni Yá Ndiòxí ndécú, te ñá túú-gá ndéé ndécú ñngá ndiòxí.

33 Te dàtná ní cachí-n sã ñ<sup>n</sup> yuhu ni iní-ó cùu iní-ó Yá Ndiòxí, te cani iní-ó càda-o nacuáa cuu vii cuu váha iní-gá te ío vii ío váha cuu iní-ó dàtná cuení mée-gá, te coo iní-ó càda-o nacuáa cuu váha iní-gá, te cuu iní-ó cuè tnàha ñáyiu-o dàtná cùu iní-ó mèe-o. Te nchaa x̄iá<sup>n</sup> ío-gá x̄ínì ñuhú-xi cada-o dacúxí sã cuñaha-o quèti cahni-güedé te cáyú-dì nduu táhú

ñáhá Yá Ndiǒxí, ndíhi dàcúúxí ncháa dává-gá sá sãñaha-o ndùu táhú-gã — càchí-dé xãha<sup>n</sup>-dẽ xii-gá.

<sup>34</sup> Te sá dúcá<sup>n</sup> ìo váha ndùu tnúhu ní cáhá<sup>n</sup> téé-á<sup>n</sup>, núu ní xáha<sup>n</sup> Jèsús xii-dé:

—Luha-ná cúmãní xii-n te ndíhu ndaha ñaha Yá Ndiǒxí —càchí-gá xãha<sup>n</sup>-gã xii-dé.

Te sá dúcá<sup>n</sup> ñí xáha<sup>n</sup>-gã xii téé-á<sup>n</sup>, núu vá yõo ñ<sup>n</sup>-gá ní cùy<sup>ii</sup> nágá tnúhu nducu tnúhu-yu núú-gã.

*Yoo cùu Xítóhó Jesucristú  
(Mt. 22:41-46; Lc. 20:41-44)*

<sup>35</sup> Te Jèsús yíhí-gã xití veñúhu càhnu sá ìo cùnuu danehé-gá ñáyi, te xãha<sup>n</sup>-gã xií-yu:

—Cue téé dàcuaha ñaha xii ñáyi nchaa tnúhu ní chídó tnùní ndíi Moisés càchí-güedé sá Cristú Yaá tendaha Yá Ndiǒxí quixi ñuyíú-a cùu-gá déhe ndíi Dàvíí, te ndíi-á<sup>n</sup> ñí cunaha vihi ní xíhí ndíi. ¿Te ná cuendá duca<sup>n</sup> càhá<sup>n</sup>-güedé?

<sup>36</sup> Te mee ndíi Dàvíí-á<sup>n</sup> ñí dácáhu ìní ñáhá Espiritú Yá Ndiǒxí xii ndíi nàcuáa cáhá<sup>n</sup> ndíi, te duha ní cachí ndíi:

Dútú Ndiǒxí ní xáha<sup>n</sup>-gã xii Yaá cúu Xítóhó-í:  
“Ngóo xio cùha-í,  
te yúhú cada-í te nchaa sá cúu ùhú ìní ñáhá xii-n canehe-xi sá yíñúhu núú-n.”

Duha ní xáha<sup>n</sup> Dútú Ndiǒxí xii Yaá cúu Xítóhó-í.

Duha ní cachí ndíi.

<sup>37</sup> ¿Te nása cùu Cristú déhe ndíi Dàvíí, te mee ndíi ní cachí ndíi sá cúu-gã Xítóhó ndíi? —càchí Jèsús xãha<sup>n</sup>-gã xií-yu.

Te ío cuéhé ñáyi ní xíndedóho nchaa tnúhu ní cáhá<sup>n</sup>-gá, te ío ní cudíi ìní-yu ní xíndedóho ñáhá-yu xii-gá.

*Jèsús càhá<sup>n</sup>-gá cuendá cue téé dàcuaha ñaha xii ñáyi nchaa tnúhu ní chídó tnùní ndíi Moisés*

*(Mt. 23:1-36; Lc. 11:37-54; 20:45-47)*

<sup>38</sup> Te òré dánèhé ñáhá Jèsús xii cue ñáyi, te xãha<sup>n</sup>-gã xií-yu:

—Cada cuendá-ndó vã cáda-ndó dàtná quidé cuè téé dàcuaha ñaha xii ñáyi nchaa tnúhu ní chídó tnùní ndíi

Moisés, chi cue téé-á<sup>n</sup> tnàhá ìní-güedé cuihnu-güedé dóó nání sã sácúhnu cue téé cùnuu-gá te cuíni-güedé sá méé-ní ndíhi tnúhu yíñúhu cáhá<sup>n</sup> ndíhi ñaha ñáyi xii-güedé nchaa núú xícá cùu-güedé.

<sup>39</sup> Te nàcáxi-güedé xilé sácóo nchíhi cue téé cùnuu-gá xití veñúhu sácóo nchíhi-güedé. Te duca<sup>n</sup>-ni quíde-güedé cuèi òré quíhu-güedé mèsá caxi-güedé òré ndécú-güedé ñ<sup>n</sup> vico, chi mee-ni núú sácóo cue téé cùnuu cuíni-güedé coo-güedé.

<sup>40</sup> Te quèndé-güedé vehe nchaa ñáyi quèé, te ío naha càhá<sup>n</sup> ndíhi-güedé Yá Ndiǒxí dándahú-güedé méé-güedé sá ìo quíde ndáá-güedé cuendá sá cuíni-güedé cáhá<sup>n</sup> váha ñáyi cuendá-güedé. Te sá dúcá<sup>n</sup> quíde-güedé te ío-gá ndoho-güedé núú ùhú núú ndàhú dàcúúxí dává-gá ñáyi —càchí-gá xãha<sup>n</sup>-gã xií-yu.

*Díhú<sup>n</sup> nduu táhú Yá Ndiǒxí ní dáquẽe ñ<sup>n</sup> ñaha ndàhú ñaha quèé*

*(Lc. 21:1-4)*

<sup>41</sup> Te núcóo Jèsús xití veñúhu yatni núú ndécú alcanciá te ndèhe-gá xídáquẽe ñáyi díhú<sup>n</sup> xití alcanciá-á<sup>n</sup>, te tnàhá cue ñáyi cuica xídáquẽe-yu vãi díhú<sup>n</sup>.

<sup>42</sup> Te ní quexio ñ<sup>n</sup> ñaha ndahú ñaha quèé, te ndèhe-gá ní dáquẽe-a<sup>n</sup> úú tnàhá díhú<sup>n</sup> còbrí xití alcanciá, te díhú<sup>n</sup>-ã<sup>n</sup> ìo sacú yáhu-xi.

<sup>43</sup> Te Jèsús ní cana-gá cue téé xica cuu ndíhi-gá, te ní xáha<sup>n</sup>-gã xii-güedé:

—Na càchí tnúhu ndáá-í xii-ndo sã ñaha ndahú ñaha quèé-a ío-gá nándíhi díhú<sup>n</sup> ñí dáquẽe-a<sup>n</sup> xití alcanciá dàcúúxí díhú<sup>n</sup> ñí dáquẽe dává-gá-yu.

<sup>44</sup> Chi nchaa ñáyi-á<sup>n</sup> ñí dáquẽe-yu mee-nã díhú<sup>n</sup> sã ñí quendóo-ná, dico ñaha quèé-a cuèi ndàhú-a<sup>n</sup> dico ní dáquẽe-a<sup>n</sup> ñíhí díhú<sup>n</sup> sã cuáá<sup>n</sup> sã caxí-á<sup>n</sup> ní cùu —cachí-gá xãha<sup>n</sup>-gã xii-güedé.

## 13

*Jèsús càchí-gá sá ngóyó veñúhu  
(Mt. 24:1-2; Lc. 21:5-6)*



1 Te òré ní ndee Jèsús xití veñúhu càhnu sá ìo cùnuu, te ìn tée xìca cuu ndihì-gá ní xáha<sup>n</sup>-dě xii-gá:

—jMèstrú, cundehe ná ío vii ní sáá veñúhu-a<sup>n</sup> ndihì nchaa vehe nèhe tnaha ndihì-xi, te ío vii ndáa nchaa yúú yíhí! —càchí-dé xáha<sup>n</sup>-dě xii-gá.

2 Te Jèsús ní xáha<sup>n</sup>-gã xii-dé:

—Nchaa nàcuáa càa nchaa vehe sá cúñúhu-n-a vítina sáá nduu te vá cùndù-gá-xi dàtná cáá-xí vítina, chi ní ìn-gá yúú vã códó nchihì tnaha-xi, chi ndihì ngoyo —càchí-gá xáha<sup>n</sup>-gã xii-dé.

*Nàcuáa cada-xi nduu ta cùyatni naa ñuyú*

(Mt. 24:3-28; Lc. 21:7-24; 17:22-24)

3 Te Jèsús ní xica-gá ndihì cue tée xìca cuu ndihì-gá cuáhá<sup>n</sup> ndihì ñaha-gã xii-güedé yucu nàni Olívú, te yucu Òlívú-á<sup>n</sup> túu ndáa núú cáá veñúhu càhnu sá ìo cùnuu. Te Jèsús ní quexìo-gá ndihì-güedé yucu Òlívú-á<sup>n</sup>, te xíá<sup>n</sup> ní ngóo-gá te núú núcòo-gá-á<sup>n</sup> ní sáhá<sup>n</sup> té Pèlú ndihì té Jàcobó ndihì té Juáá ndihì té Ndríxí, te dayuhu ní xáha<sup>n</sup>-güedé xii-gá:

4 —Cùnì-ndí cachí tnúhu-n ná nduu dùca<sup>n</sup> cada-xi ngoyo veñúhu càhnu sá ìo cùnuu, àdi nándi cùu sá cádá-xí cuendá cutnùnì iní-ndí sá sá ta cuyatni nduu duca<sup>n</sup> cada-xi —cachí-güedé xáha<sup>n</sup>-güedé xii-gá.

5 Te Jèsús ní xáha<sup>n</sup>-gã xii-güedé:

—Ío quihì iní-ndó cùndecu-ndo cuendá sá vã yòo dandàhú ñáhá xii-ndo.

6 Chi ío cuéhé cue tée coo ñuyú te danàni-güedé méé-güedé dàtná nàni-í, te cachí-güedé: “Yúhú cùu-í Crístú Yaá ní tendaha Yã Ndiòxí véxi ñuyú-a”, duha cachí-güedé. Te sá dúcá<sup>n</sup> cãhá<sup>n</sup>-güedé te ío vài ñáyiu dandàhú-güedé.

7 Te òré ná ñihí-ndó tnúhu sá nàá-güedé ndèni ní cuu, te vá yùhú-ndó chi dacuití sã dúcá<sup>n</sup> càda-xi, dico vátá sáá-gá nduu nàa ñuyú òré duca<sup>n</sup> càda-xi.

8 Chi cue tée ìn nàció<sup>n</sup> nàá-güedé ndihì cue tée ìngá nàció<sup>n</sup>, te titní ñuu

ngüita-güedé nàá-güedé, te titní xichi ñuyú níhi vèhi tnáa, te titní tucu xichì ñuyú coo tnamá, te ío-gá cuéhé sã yãha ñáyiu. Te nchaa sá dúcá<sup>n</sup> càda-xi-á<sup>n</sup> cúu-xí tnündòho sá vítiná váha váha quèsaha-xi sácúu-xí cuè ñáyiu ndècu ñuyú-a.

9 'Dico nchòhó ío quihì iní-ndó cùndecu-ndo, chi nchaa ñáyiu na cùu úhú iní ñáhá xii-ndo cuáha cuendá ñáhá-yu xii dava-ndo núú cuè tée cùchiu<sup>n</sup>, te candeca ñaha-güedé xii-ndo quíhí<sup>n</sup> xití veñúhu-güedé, te yácá<sup>n</sup> caniha-güedé xii-ndo. Te quíhí<sup>n</sup>-ndó núú cuè tée yìndaha nació<sup>n</sup> àdi núú dàva-gá cue tée cùnuu sá cuendá-í, te nchòhó ñihí-ndó nàcuáa cada-ndo cãhá<sup>n</sup> váha-ndo cuendá-í núú-güedé.

10 Te cùmání-gã sáá nduu nàa ñuyú-a te sa cutènuu tnúhu-í ní càa xico ñuyú-a, te tnúhu-á<sup>n</sup> cãhá<sup>n</sup>-xi nàcuáa naníhí tãhú ñáyiu.

11 Te òré ná càndeca ñaha ñáyiu xii-ndo quíhí<sup>n</sup> núú cuè tée cùchiu<sup>n</sup> cuáha cuendá ñáhá-yu, te òré vátá sáá-gá-ndó núú-güedé te vá cánì ìní-ndó núu nàsa cunduu tnúhu cùñaha-ndo xii-güedé. Chi òré-ná te Yã Ndiòxí dacàhu iní ñáhá-gã xii-ndo nàsa cunduu tnúhu cùñaha-ndo xii-güedé, te ñiu-ni tnúhu sá dacàhu iní ñáhá-gã-á<sup>n</sup> cùñaha-ndo xii-güedé. Te ñá díú mèe-ndo cãhá<sup>n</sup>-ndó chi Espiritú Yã Ndiòxí cãhá<sup>n</sup>-xi yuhu-ndo.

12 Te dava cue tée cuáha cuendá-güedé ñanì-güedé núú cuè tée cùchiu<sup>n</sup> cuendá cahni ñaha-güedé. Te dava cue tée cùu tátá ñiu-ni duca<sup>n</sup> càda-güedé cuáha cuendá-güedé déhe-güedé núú cuè tée cùchiu<sup>n</sup>. Te dava cue tée cùu déhe cuu úhú iní-güedé tátá-güedé ndihì náná-güedé, te cuáha cuendá ñáhá-güedé xii-yu núú cuè tée cùchiu<sup>n</sup> cuendá cahni ñaha-güedé xii-yu.

13 Te ío cuéhé ñáyiu cuu úhú iní ñáhá-yu xii-ndo sã cuendá-í, dico nchaa nchòhó ñáyiu na càda ndee-ni iní canchicú<sup>n</sup> nihnu ñaha-ni xii-í te naníhí tãhú-ndó.

14 Te ndí Dániél tée ní xóo cãhá<sup>n</sup> tnúhu Yã Ndiòxí ndéé sanaha ní chídó

tnùní ndíi núú tütú ndíi cuendá ì<sup>n</sup> sá dáquèe tíhú Yá Ndiöxí cundecu ì<sup>n</sup> xichi núú ñà túú tàú-xi cundecu-xi, te xíá<sup>n</sup> cada-xi sá vǎ cúndècu-gá ni ì<sup>n</sup> ñáyíu xíá<sup>n</sup>. Te cada cuendá váha-ndo nàcuáa ní cáhá<sup>n</sup> ndíi, chi nduu na quíní-ndó xíá<sup>n</sup> cundecu-xi ì<sup>n</sup> xichi núú ñà túú tàú-xi cundecu-xi, te dàvá-á<sup>n</sup> nchaa ñáyíu xíndecu distritú Júdeá xíní ñùhu-xi cunú-yu quíhí<sup>n</sup>-yu xítí yucu.

15 Te nchaa ñáyíu ndáa ndódó ò<sup>n</sup>quí véhé-xí vǎ ndíhu-gá-yu vehé-yu quehé<sup>n</sup>-yu ì<sup>n</sup> ndachíu<sup>n</sup>-yu canehé-yu quíhí<sup>n</sup>.

16 Te nchaa ñáyíu cuáhá<sup>n</sup> yucu ni vǎ nùhú-gá-yu vehé-yu cúnúquehé<sup>n</sup>-yu dóó-yu.

17 Te ndàhú ní cuu nchaa ñáyíu ò<sup>n</sup>hí ñùhú ò<sup>n</sup>he-xi, ndíhi cue ñáyíu ò<sup>n</sup>hí xíndeca ò<sup>n</sup>he vitna sàdi na saá nduu ò<sup>n</sup>ca<sup>n</sup> cada-xi!

18 Te nchòhó ío chí càcá<sup>n</sup> táhú núú Yá Ndiöxí cuendá sá vǎ dúcá<sup>n</sup> ndòho-ndo yóó quíde víxi<sup>n</sup>-xi.

19 Chí dàvá-á<sup>n</sup> coo tnúndòho cahnu vihi ñuyíú, te vátá ì<sup>n</sup> ndúu-gá coo tnúndòho cahnu vihi-á<sup>n</sup> ndéé cúnàhá ní cadúha Yá Ndiöxí ñuyíú, chí ò<sup>n</sup>ni dàvá-á<sup>n</sup> coo tnúndòho cahnu vihi-á<sup>n</sup>, te ni núú cuáhá<sup>n</sup> núú vǎxi vǎ cóo-gǎ tnúndòho-á<sup>n</sup>.

20 Te Yá Ndiöxí càchí-gá sá vǎ ío vǎi nduu coo tnúndòho cahnu vihi-á<sup>n</sup> ñuyíú sǎ cuendá nchaa ñáyíu ní cáhá<sup>n</sup>-gá cundecu ndíhi-gá. Te núú vǎi nduu na coo tnúndòho-á<sup>n</sup>, te vǎ yóo cácu nihnu.

21 "Te dàvá-á<sup>n</sup> cǎñaha ñáyíu xii-ndo: "Chí cúnòhe iha, chi iha ní quexíò Cristú Yaá ní tendaha Yá Ndiöxí véxi ñuyíú-a", duha cúñàhá-yu xii-ndo. Àdi quesahá-yu: "Chí cúnòhe yacá<sup>n</sup> chi yacá<sup>n</sup> ndécú-gǎ", quesahá-yu. Te vǎ quíndáá iní-ndó tnùhu càhá<sup>n</sup>-yu.

22 Te coo cue tée danàni-güedé mée-güedé dàtná nání-í te cachí-güedé sá cúu-güedé Yaá ní tendaha Yá Ndiöxí véxi ñuyíú-a. Te dava-güedé cachí-güedé sá cúu-güedé cue tée càhá<sup>n</sup> tnùhu Yá Ndiöxí dico ñá ndáá sá cúu-güedé cue tée càhá<sup>n</sup>

tnùhu-gá, te cada-güedé titní núú sǎ vǎ yóo tnàhí ndàcu cada cuendá dandàhú-güedé ñáyíu, te cani iní-güedé dandàhú-güedé ndéé cue ñáyíu ní cáhá<sup>n</sup> Yá Ndiöxí cundecu ndíhi-gá.

23 Te vitna ío váha cuáha-ndo cuendá, te quíhi iní-ndó cundecu-ndo, chí nchaa sa ní dátùha ñaha-í xii-ndo.

*Nàcuáa cada-xi ò<sup>n</sup>re quíxi tucu Tée cùu ñani tnàhá nchaa ñáyíu*  
(Mt. 24:29-35,42-44; Lc. 21:25-36)

24 "Te nà yáha-ni coo tnúndòho cahnu vihi-á<sup>n</sup>, te vǎ dáyhé-gá nchícanhii te ni vǎ dáyhé-gá yóó.

25 Te ngoyo nchaa chódíní ndéé andíu, te quídi-xi andíu.

26 Te dàvá-á<sup>n</sup> quíní ñáhá nchaa ñáyíu xii yúhú Tée cùu ñani tnàhá-yu ncháa-yu quee-í andíu quíxi-í ichi xítí vícò, te quíní-yu sá ío càhnu cuu-í, te quíde-í nchaa sá vǎha.

27 Te tendaha-í cue espíritú xínú cuèchi núú-í quíhí<sup>n</sup>-xi nadatàcá-xi nchaa ñáyíu ní cáhá<sup>n</sup>-í chitnahá ñáhá xii-í xíndecu ni càa xico ñuyíú.

28 "Te cundehe-ndo nàcuáa quíde yutnu ngúxí, chí yutnu-á<sup>n</sup> ndúú yùte núú ò<sup>n</sup>te-xi te nàtahú ndaha-xi, te ò<sup>n</sup>re ò<sup>n</sup>ca<sup>n</sup> quíde-xi te càchí-ndó sǎ sǎ ní cuyatni nuu cahni.

29 Te ò<sup>n</sup>ca<sup>n</sup> sǎtnahá-xi cada-xi ò<sup>n</sup>re ná quíní-ndó càda-xi nchaa nacúáa ní cáhá<sup>n</sup>-í, te cutnùní iní-ndó sǎ sǎ ní cuyatni víi-nǎ nduu nàa ñuyíú.

30 Te na càchí tnùhu ndáá-í xii-ndo sǎ ò<sup>n</sup>re vátá cùu-gá cue ñáyíu xíndecu ñuyíú-a vitna, te cada-xi nchaa nàcuáa ní cáhá<sup>n</sup>-í.

31 Te andíu ndíhi ñuyíú-a chí ndíhi nihnu-xi, dico tnùhu-í chí vǎ ndíhí nihnu-xi chí cùu-xi tnùhu ndáá.

32 "Dico ñá túú cúnùní ná nduu quíxi tucu-í, te ni ñà túú cúnùní ná ò<sup>n</sup>re chí vǎ yóo xíní, te ni cuè espíritú xínú cuèchi núú Yá Ndiöxí ñá túú xíní-xi ná nduu quíxi-í, te ni mée yúhú tée cùu Déhe Dútú Ndiöxí ñá túú xíní-í ná nduu quíxi tucu-í, chí ì<sup>n</sup>di díi-ni mee Tǎtà-í Dútú Ndiöxí xíní-gá núu ná nduu quíxi-í.

33 Te nchòhó xíní ñùhu-xi sá ïo quihi iní-ndó cùndecu-ndo, te cáhá<sup>n</sup> ndihí-ndo Yá Ndióxi, chi ñá túú xíní-ndó nã nduu quixi tucu-í.

34 Te na càchí tñúhu-í xii-ndo cuèndá ñ<sup>n</sup> téé cuení quíngaca cuu xica. Te téé-á<sup>n</sup> cùmání-gã quee-dé vehe-dé te ní xáha<sup>n</sup>-dẽ xii cue téé xinu cuechi núú-dé sá nã cáda cuèndá-güedé vehe-dé. Te ní sáñaha-dẽ xii-güedé ndí díí<sup>n</sup> núú-güedé chù<sup>n</sup> cada-güedé. Te ní xáha<sup>n</sup>-dẽ xii téé ndèé yuyèhe sá ná cùndecu túha-ni-dé yuyèhe ndéé nàsáá-dé.

35 Te duha ndùu tñúhu càhá<sup>n</sup>-í cuèndá nchòhó cùndecu túha-ndo, chi ñá túú xíní-ndó nã nduu te ni ñá túú xíní-ndó nã òré quixi tucu yúhú Yáa cúú Xítohó-ndó, núu òré sa ní cundiquí<sup>n</sup>, àdi dava niú, àdi oré sa ní cana uu<sup>n</sup> líhi, àdi oré sa ta cùditó cuáhá<sup>n</sup>, núu xiá<sup>n</sup> ío chí cùndecu túha.

36 Te duha càhá<sup>n</sup>-í chi na cuáhá<sup>n</sup> òré ñá túú nã yíhí iní-ndó quèxio-í, te ñá túú ndècu túha-ndo.

37 Te dàtná-ni xáha<sup>n</sup>-í xii nchòhó sá cùndecu túha-ndo, te diu-ni duca<sup>n</sup> xáha<sup>n</sup>-í xii nchaa dava-gá ñáyiú sá cùndecu túha-yu —càchí-gá xáha<sup>n</sup>-gã xii-güedé.

## 14

*Ndùcu-güedé nàcuáa cada-güedé cahni-güedé Jèsús*

(Mt. 26:1-5; Lc. 22:1-2; Jn. 11:45-53)

<sup>1</sup> Te cùmání úú-gá nduu te quesaha vico pascuá, vico xèxi ñáyiú pàa sá ñá túú yíhi levadurá. Te cue dútú cúnùu, ndihí cue téé dàcuaha ñaha xii ñáyiú nchaa tñúhu ní chídó tñúní ndíi Moisés ndúcú-güedé nàcuáa cada-güedé dandàhú-güedé Jèsús cuèndá tñi ñaha-güedé xii-gá te cahni ñaha-güedé.

<sup>2</sup> Te ní xítñaha-güedé:

—Váha-gá sá vã tñí-ó Jèsús mei ndùu vico, chi núu duca<sup>n</sup> na càda-o te ío dusa<sup>n</sup> càda ñáyiú —càchí-güedé xítñaha-güedé.

*Ñ<sup>n</sup> ñadìhí chíhí-á<sup>n</sup> àcítí díquí Jèsús*  
(Mt. 26:6-13; Jn. 12:1-8)

<sup>3</sup> Te Jèsús ndécú-gã ñuú Bètaniá vehe ñ<sup>n</sup> téé nani Xímú, téé ní tnahá cuéhé sã dátèhyú nihnu-xi yiqui cùñú-ó. Te yíhi Jèsús mèsá xéxi-gã ní quexìo ñ<sup>n</sup> ñadìhí néhé-á<sup>n</sup> ñ<sup>n</sup> sá ñí cuáha yúú vaha yúú nání àlabastrú, te xítí xiá<sup>n</sup> ñúhú àcítí sàhá<sup>n</sup> tñámí sã nání nãrdú sá ïo ndèyáhu, te ní táhú-á<sup>n</sup> xiá<sup>n</sup> te acítí ñúhú xítí-xi-á<sup>n</sup> ñí sódo-a<sup>n</sup> díquí Jèsús.

<sup>4</sup> Te ñ<sup>n</sup> úú cue téé xíndecu-á<sup>n</sup> ñí cudéé<sup>n</sup>-güedé sá dúcá<sup>n</sup> ñí quide-a<sup>n</sup>, te ní xítñaha-güedé:

—Ñá túú quide váha ñaha-á<sup>n</sup> dàcá<sup>n</sup> quidé-á<sup>n</sup>, chí íí ñí dáciuíta-a<sup>n</sup> acítí váha-á<sup>n</sup>.

<sup>5</sup> Chí váha-gá ñuú cuyáhu acítí-á<sup>n</sup> sá ùní cièndú díhú<sup>n</sup> denariú, te díhú<sup>n</sup> sã cùyáhu acítí-á<sup>n</sup> cuu cuèndá ñáyiú ndàhú ní cùu —cachí-güedé xítñaha-güedé.

Te ní tenàá-güedé ñaha-á<sup>n</sup> sã dúcá<sup>n</sup> ñí quide-a<sup>n</sup>.

<sup>6</sup> Te Jèsús ní xáha<sup>n</sup>-gã xii-güedé:

—Chí dáñá, vá dásatú-ndó ñí ñadìhí-a, chí sá ñí quide ñaha-a<sup>n</sup> xii-í cúú-xí ñ<sup>n</sup> sá vaha.

<sup>7</sup> Chí cue ñáyiú ndàhú duca<sup>n</sup>-ni cùtnahá ñáyiú-á<sup>n</sup> tnuú-ndó, te nání òré càchí iní-ndó te chindee-ndó-yu. Dico yúhú chí vá ncháá ndùu cùndecu ndihí ñaha-í xii-ndo ñuyíú-a.

<sup>8</sup> Te ñadìhí-a ní quide-a<sup>n</sup> ñ<sup>n</sup> sá vaha ndèé neni ní ndacu-a<sup>n</sup>, chí sá dúhá ñí quide ñaha-a<sup>n</sup> xii-í ní chíhi ñaha-a<sup>n</sup> àcítí, te xiá<sup>n</sup> cada iní-ndó sã sã quide túha-a<sup>n</sup> yiqui cùñú-í cuèndá quíndúxi-xi.

<sup>9</sup> Te na càchí tñúhu ndáá-í xii-ndo sã ndèni ní cuu nihí ñuyíú ná càhá<sup>n</sup> ñáyiú tñúhu-í, te cáhá<sup>n</sup>-yu tnahá cuèndá ñadìhí-a cuèndá quini nchaa ñáyiú nàcuáa ní quide-a<sup>n</sup>, te duca<sup>n</sup> vã nàcuánaá-yu —càchí-gá xáha<sup>n</sup>-gã xii-güedé.

*Té Jùdás ndúcú-dẽ nàcuáa cada-dé cuáha cuèndá-dé Jèsús núú cue téé cùu úhú iní ñáhá xii-gá*

(Mt. 26:14-16; Lc. 22:3-6)

<sup>10</sup> Te té Jùdás Iscarioté ní sáhá<sup>n</sup>-dé ní ndatnúhu-dé ndihí cue téé cùu dútú cúnùu sá cuáha cuèndá-dé Jèsús

núú-güedě, te núú tnàhá té Jùdás-án cúú ùxúú tnàhá cue téé xìca cuu ndihì-gá ní cùu.

<sup>11</sup> Te òré duca<sup>n</sup> nǐ ndatnúhu-dé ndihì-güedé, te ío ní cudíí ìní-güedé, te ní xáha<sup>n</sup>-güedě xii-dé sá cuãñaha-güedě díhú<sup>n</sup> xii-dé. Te té Jùdás-án nǐ ngüíta-dé ndúcú-dě nàcuáa cada-dé cuáha cuèndá-dé Jèsús núú-güedě.

*Cùdini Jesús ndihì cue téé xìca cuu ndihì-gá*

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Te ní sáá nduu nǐ quesaha vico pascuá, vico ñá túú xèxi ñáyiú pàá sá ñà túú yìhì levadurá, te ñu-ni nduu-án sáhní-güedě ì<sup>n</sup> mběé lìhli xèxí-yu nduu vico pascuá-án. Te cue téé xìca cuu ndihì Jesús ní xìcá<sup>n</sup> tnúhú-güedě núú-gǎ, te xáha<sup>n</sup>-güedě xii-gá:

—Mèstrú, véxi-ndí xìcá<sup>n</sup> tnúhú-ndí núú-n nǐ ndèé cáá vèhe cuiní-n càda túha-ndí sá cùdini-o sacuaa nduu vico pascuá —càchì-güedé xáha<sup>n</sup>-güedě xii-gá.

<sup>13</sup> Te Jèsús ní xáha<sup>n</sup>-gǎ xii úú-ni tnàhá cue téé xìca cuu ndihì-gá:

—Chí cuáhá<sup>n</sup> xití ñuú-án, te yacá<sup>n</sup> naníhí-ndó ì<sup>n</sup> téé tànehe yóó ndute, te téé-án cándèndaha-ndo-dě quíhí<sup>n</sup>.

<sup>14</sup> Te núú ndèdaçaa vehe na ndíhu-dé te xíá<sup>n</sup> quíhu-ndo. Te cúñaha-ndo xii xítóhó vehe-án: “Yaá cúú Mèstrú càchì-gá sá núú ndèdaçaa xichi xití vehe-n cuãñaha nùu-n xii-gá cudini-gá ndihì cue téé xìca cuu ndihì-gá sacuaa nduu pascuá”, duha cúñaha-ndo.

<sup>15</sup> Te dàtnùnì danèhé ñáhá-dě xii-ndo ì<sup>n</sup> quartú cáhnú càa núú nǐnu, chí vehe yòdo tnaha cuu-xi, te sa ní quide túha-dé nchaa sá nándihì, te nchòhó dícó-ñá comidá cada túha-ndo cùdini-o —cachì-gá xáha<sup>n</sup>-gǎ xii-güedé.

<sup>16</sup> Te cue téé-án nǐ xica-güedé cuáhá<sup>n</sup>-güedé xití ñuú-án, te nchaa-ni nàcuáa ní xáha<sup>n</sup> Jèsús ní cuu. Te ní quide túha-güedé sá cùdini-güedé ndihì-gá sacuaa nduu vico pascuá-án.

<sup>17</sup> Te sátá nǐ cundiqui<sup>n</sup> te ní quexìo Jesús ndihì ndí ùxúú cue téé xìca cuu ndihì-gá.

<sup>18</sup> Te cuánguihu-gá mèsá ndihì-güedé cuèndá cudini ndihì ñaha-gá xii-güedé, te òré yíhì-gǎ mèsá ndihì-güedé, te xáha<sup>n</sup>-gǎ xii-güedé:

—Na càchì tnúhu ndáá-í xii-ndo sǎ ì<sup>n</sup> nchòhó cue téé xèxi ndihì ñaha xii-í cuáha cuèndá ñáhá-ndó núú cuè téé cùu úhú iní ñáhá xii-í —càchì-gá xáha<sup>n</sup>-gǎ xii-güedé.

<sup>19</sup> Te sá dúcá<sup>n</sup> nǐ xáha<sup>n</sup>-gǎ xii-güedé, te nchaa-güedé ní ngüíta-güedé cùndiyí-güedé. Te da ì<sup>n</sup> da ì<sup>n</sup>-güedé ní ngüíta-güedé xìcá<sup>n</sup> tnúhú-güedé núú-gǎ, te xáha<sup>n</sup>-güedě xii-gá:

—¿Ñá díú yùhú duca<sup>n</sup> sàni iní-n càda-í-u? —càchì-güedé xáha<sup>n</sup>-güedě xii-gá.

<sup>20</sup> Te Jèsús ní xáha<sup>n</sup>-gǎ xii-güedé:

—Ñu-ni ì<sup>n</sup> nchòhó cue téé úxúú xìcá cùu ndihì-í, téé na dàquèndaha còhó òré daquèndaha-í, téé-án cuáha cuèndá ñáhá-dě xii-í núú cuè téé cùu úhú iní ñáhá.

<sup>21</sup> Te yùhú Téé cùu ñanì tnàhá-ndo nchaa-ndo ñuhu ichi-í cuáhá<sup>n</sup>-í ndòho-í nàcuáa càhá<sup>n</sup>-xi núú tütú Yǎ Ndiòxí. Dico ndàhú ní cuu téé duca<sup>n</sup> na cuáha cuèndá ñáhá xii-í núú cuè téé cùu úhú iní ñáhá, chí váha-gá sá vǎ cǎcú tēe-án cundecu-dé ní cùu, te ñá díú sǎ nǐ cacu-dé te duca<sup>n</sup> càda-dé —càchì-gá xáha<sup>n</sup>-gǎ xii-güedé.

<sup>22</sup> Te nini cùdini cue téé xìca cuu ndihì Jesús ní quehe<sup>n</sup>-gǎ pǎá, te ní ndacá<sup>n</sup> táhú-gǎ núú Yǎ Ndiòxí, te dàtnùnì ní táhú cuèchi-gá, te ní ngüíta-gá dácǎhñu ñaha-gǎ xii-güedé, te xáha<sup>n</sup>-gǎ:

—Chí quéhé<sup>n</sup> pǎá-a caxi-ndo, te cada iní-ndó sǎ cúú-xí dàtná yiqui cùnú-í —càchì-gá xáha<sup>n</sup>-gǎ xii-güedé.

<sup>23</sup> Te ní quehe<sup>n</sup>-gǎ vǎsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núú Yǎ Ndiòxí, te dàtnùnì ní ngüíta-gá sǎñaha-gǎ xii-güedé cuèndá coho-güedé luha luha sá ñúhú xití-xi, te nchaa-güedé ní xihì.

<sup>24</sup> Te ní xáha<sup>n</sup>-gǎ xii-güedé:

—Ndudí ndéhé yoho yàha stilé-a cada iní-ndó sá cúú-xí dàtná níñi-í sá cáti òré cahni ñaha-güedé xii-í. Te sá dúcá<sup>n</sup> càti níñi-í xíá<sup>n</sup> cutnùní ndáá sá Yá Ndiòxí cada-gá ìngá núú sá vâha sá cúú-xí vâi ñâyiu dàtná ní cachí-gá cada-gá.

<sup>25</sup> Te na càchí tnúhu ndáá-í xii-ndo sá vítná-nâ duha xîhi-í ndudí ndéhé yoho yàha stilé-a te vá cóhó-gã-í, dico na sâá nduu cùndecu-í núú ndécú Yá Ndiòxí táxi tnùnigá, te dàvá-án cada iní-í sá dàtná sá cóhó tùcu-í chí ío cudíí iní-í —càchí-gá xâha<sup>n</sup>-gã xii-güedé.

*Jèsús càhá<sup>n</sup>-gá sá tẽ Pèlú cúñaha-dẽ xii ñâyiu sá ñà túú xini ñáhã-dẽ xii-gá*  
(Mt. 26:30-35; Lc. 22:31-34; Jn. 13:36-38)

<sup>26</sup> Te Jèsús ní xita-gá ñ<sup>n</sup> ndudú ndihi cue téé xica cuu ndihi-gá, te dàtnùní ní xica-gá cuáhã<sup>n</sup>-gá ndihi-güedé yucu Olívú.

<sup>27</sup> Te yacá<sup>n</sup> ní xâha<sup>n</sup>-gã xii-güedé:

—Na càchí tnúhu-í xii-ndo sá ncháã-ndó dàña nihnu ñaha-ndo xii-í niú vitna, chí quee ndáã-xi nâcuáa càhá<sup>n</sup>-xi núú tûtú Yá Ndiòxí núú càchí-xi: “Yúhú cuáha-í tnúhu cahni-güedé téé cùu toli, te nchaa mbéé-dẽ ndihi-güedi cuténuu”, duha càchí-xi núú tûtú-gá.

<sup>28</sup> Dico na cùú-í te ndoto-í te codonùu-í núú-ndó quíhí<sup>n</sup> distritú Galiléa —càchí-gá xâha<sup>n</sup>-gã xii-güedé.

<sup>29</sup> Te té Pèlú ní xâha<sup>n</sup>-dẽ xii-gá:

—Te cuëi nchaa-güedé ná dândóo ñaha-güedé xii-n, dico yúhú chí vá dândóo ñaha-í xii-n —càchí-dé xâha<sup>n</sup>-dẽ xii-gá.

<sup>30</sup> Te Jèsús ní xâha<sup>n</sup>-gã xii-dé:

—Na càchí tnúhu ndáá-í xii-n sá niú vitna cùmánigã cana líhi úú xito, te úní xito cáhá<sup>n</sup>-n núú ñâyiu sá ñà túú xini ñáhã-n xii-í —càchí-gá xâha<sup>n</sup>-gã xii-dé.

<sup>31</sup> Dico té Pèlú ní cáhá<sup>n</sup> ñí-dé, te xâha<sup>n</sup>-dẽ xii-gá:

—Cuëi na cùú ndihi ñaha-í xii-n dico vá cáhá<sup>n</sup>-í núú ñâyiu sá ñà túú xini ñáhã-í xii-n —càchí-dé xâha<sup>n</sup>-dẽ xii-gá.

Te nchaa dava-gá cue téé xica cuu ndihi-gá diu-ni duca<sup>n</sup> ñí xâha<sup>n</sup>-güedé xii-gá.

*Jèsús càhá<sup>n</sup> ndihi-gá Yá Ndiòxí ñ<sup>n</sup> xichi núú nání Gètsemaní*  
(Mt. 26:36-46; Lc. 22:39-46)

<sup>32</sup> Te Jèsús cuáhã<sup>n</sup>-gá ndihi cue téé xica cuu ndihi-gá ñ<sup>n</sup> xichi núú nání Gètsemaní. Te òré ní quexiò-gá ndihi-güedé xíá<sup>n</sup>, te ní xâha<sup>n</sup>-gã xii-güedé:

—Chí cúnúcoo iha cundetú-ndo na quíhí<sup>n</sup>-í yacá<sup>n</sup> cáhá<sup>n</sup> ndihi-í Yá Ndiòxí —càchí-gá xâha<sup>n</sup>-gã xii-güedé.

<sup>33</sup> Te ndéca-gá té Pèlú, ndihi té Jàcobó, ndihi té Juáã cuáhã<sup>n</sup>, te ñà túú tnàhí-gá cúú vâha iní-gá te ní ngúita-xi súúni ndihú iní-gá.

<sup>34</sup> Te ní xâha<sup>n</sup>-gã xii cue téé úní-án:

—Súúni ndihú iní-í dàtná sá cùú-í, te chí quéndóo iha te vá cùdú-ndó —càchí-gá xâha<sup>n</sup>-gã xii-güedé.

<sup>35</sup> Te sa ñùnchií luha ní xica ndehe Jèsús núú ndécú-güedé, te ní ngáundeyi-gá ndéé ñuhu càhá<sup>n</sup> ndihi-gá Tãtã-gã Dútú Ndiòxí sá núu vá cùndèe iní-gá taunihnu ñaha-gã xii-gá cuendá nchaa nâcuáa yâha-gá.

<sup>36</sup> Te òré càhá<sup>n</sup> ndihi Jèsús Tãtã-gã Dútú Ndiòxí, te xâha<sup>n</sup>-gã:

—Yòhó tãtã mèe-í, nchaandi túhú sá vâha ndâcu-n quide-n, te càhá<sup>n</sup> ndâhú-í núú-n núu vá cùndèe iní-n taunihnu ñaha-n xii-í cuendá sá vâ ndóhò-í ná sâá òré, dico vá cádá-n nâcuáa càchí iní mèe-í chí cada-n nâcuáa càchí mee-n —càchí-gá xâha<sup>n</sup>-gã xii Tãtã-gã Dútú Ndiòxí.

<sup>37</sup> Te sátã ñí yâha ní cáhá<sup>n</sup> ndihi-gá Tãtã-gã Dútú Ndiòxí, te cuánuhú-gá núú ñí dândóo-gá cue téé úní-án, te xixídí-güedé òré ní nasáã-gá, te ní xâha<sup>n</sup>-gã xii té Pèlú:

—Xímú, ¿náa sama xidí-n? ¿Náa ñà cùndèe tnahi núú-n vá cùdú-ni-n cuèdicó ñ<sup>n</sup> òré-án? —càchí-gá xâha<sup>n</sup>-gã xii-dé.

Te ní xâha<sup>n</sup> tùcu-gá xii-güedé:

<sup>38</sup> —Te chí quéndóo tucu, te cuhú<sup>n</sup> iní-ndó vâ cùdú-ndó, te cáhá<sup>n</sup> ndihi-ndo Yá Ndiòxí cuendá sá vâ dâcâhá<sup>n</sup> ñáhã yùcu ñávâha xii-ndo càda-ndo sá ñà túú tàú-ndó càda-ndo. Te na càchí tnúhu ndáá-í xii-ndo sá nchòhó cuíní-ndó càda-ndo nchaa nacúãa càhá<sup>n</sup>-í dicó-ni sá ñà túú

nihí ndéé-ndó —càchí-gá xǎha<sup>n</sup>-gǎ xii-güedé.

<sup>39</sup> Te Jèsús ní xica tucu-gá cuáhá<sup>n</sup>-gá cáhá<sup>n</sup> ndihí-gá Tátá-gǎ Dútú Ndiǒxí, te ðiu-ni nàcuáa ní xáha<sup>n</sup>-gǎ díhna xǎha<sup>n</sup> tucu-gá.

<sup>40</sup> Te òré ní yáha ní cáhá<sup>n</sup> ndihí-gá Tátá-gǎ Dútú Ndiǒxí, te cuánuhú tucu-gá núú xǐndecu cue téé úní xíca cùu ndihí-gá-á<sup>n</sup>, te xidí-ni tucu-güedé òré ní nasáá-gá, te duca<sup>n</sup> nǐ quide-güedé chi súúní ñuhu saní núú-güedé, te ñá ní ñihí-güedé tnúhu cúñaha-güedé xii-gá òré ní nasáá-gá.

<sup>41</sup> Te ní sáhá<sup>n</sup> tucu-gá xito cùu uní ní cáhá<sup>n</sup> ndihí-gá Tátá-gǎ Dútú Ndiǒxí, te òré ní nasáá tucu-gá núú xǐndecu-güedé, te xǎha<sup>n</sup>-gǎ xii-güedé:

—¿Te náa xidí-ni tucu-ndo?, te vitna vá cùdú-gá-ndó chi sa ní sáá òré cuáha cuendá ñáhá-güedé xii yúhú Téé cùu ñani tnáhá-ndó nchàa-ndo núú cué téé ndécu ichi cuehé ichi duha.

<sup>42</sup> Te vitna chí ndácõo na quihí<sup>n</sup>-ó chi sa véxi téé cuáha cuendá ñáhá xii-í núú cué téé cùu úhú iní ñáhá —càchí-gá xǎha<sup>n</sup>-gǎ xii-güedé.

*Ní tnǐ-güedé Jèsús ndécá ñaha-güedé xii-gá cuáhá<sup>n</sup>*

*(Mt. 26:47-56; Lc. 22:47-53; Jn. 18:2-11)*

<sup>43</sup> Te càhá<sup>n</sup> dúcá<sup>n</sup>-ní Jèsús ní quexìo té Jùdás. Te núú tnáhá téé-á<sup>n</sup> cùú ùxúú tnáhá cue téé xica cuu ndihí-gá. Te ndihí-dé vai cue téé ní quexìo, te dava-güedé xǐnehe-güedé machití te dava-güedé xǐnehe-güedé carrutí. Te cue téé-á<sup>n</sup> nǐ tendaha ñaha cue dútú cúnùu ndihí cue téé dàcuaha ñaha xii ñáyi nchaa tnúhu ní chídó tnùní ndí Moisés, ndihí cue téé cùu sacuéhé núú ñáyi isràél.

<sup>44</sup> Te té Jùdás téé cuáha cuendá ñáhá xii Jesús sa ní xitnúhu-dé cue téé-á<sup>n</sup> nàcuáa cada-dé cuáha cuendá ñáhá-dé xii Jesús núú-güedé. Te duha ní xáha<sup>n</sup>-dě xii-güedé:

—Cundehe-ndo tée na tèyuhu-í, te téé-á<sup>n</sup> tnǐ-ndo-dě chi téé-á<sup>n</sup> cùú-dé téé ndéé iní-ndó, te ío quihí iní-ndó càndeca-ndo-dé quihí<sup>n</sup> —duha ní xáha<sup>n</sup>-dě xii-güedé.

<sup>45</sup> Te òré ní quexìo té Jùdás ndihí cue téé-á<sup>n</sup> núú ndécú Jèsús, te ní xáha<sup>n</sup>-dě xii-gá:

—Mèstrú —càchí-dé xǎha<sup>n</sup>-dě xii-gá.

Te ní teyuhu ñaha-dé.

<sup>46</sup> Te nchaa cue téé ndihí-dé-á<sup>n</sup> nǐ tnǐ-güedé Jèsús cuendá candeca ñaha-güedé xii-gá quihí<sup>n</sup>.

<sup>47</sup> Te ñ<sup>n</sup> cue téé cùndihí Jesús ní tava-dé machití-dé, te ní xehndé-ni-dé ñ<sup>n</sup> xio lóho ñ<sup>n</sup> téé xinu cuechi núú dútú cúnùu, te ní quendé duu<sup>n</sup> lóho téé-á<sup>n</sup>.

<sup>48</sup> Te Jèsús ní xáha<sup>n</sup>-gǎ xii cue téé ní tnǐ ñaha xii-gá-á<sup>n</sup>:

—Nchòhó, nèhe-ná-ndó màchití, nèhe-ná-ndó càrutí véxi ní tnǐ ñaha-ndo xii-í, dàtná quidé-ndó ñ<sup>n</sup> ñadúhú quidé ñaha-ndo xii-í.

<sup>49</sup> Te nchaa-ni nduu ní xiní-ndó nǐ xǐndecu-í xití veñúhu càhnu sá ío cúnùu ní xóo danèhé-í ñáyi, te ñá túú ní tnǐ ñaha-ndo xii-í. Dico dàcutí sǎ dúhá yǎha-í cuendá quee ndáá-xi nàcuáa càhá<sup>n</sup>-xi núú tütú Yǎ Ndiǒxí —càchí-gá xǎha<sup>n</sup>-gǎ xii-güedé.

<sup>50</sup> Te nchaa cue téé xica cuu ndihí-gá ní xinu-güedé ní dándõ ñaha-güedé xii-gá.

*Ñ<sup>n</sup> téé cuechi nǐ xinu-dé*

<sup>51</sup> Te ñ<sup>n</sup> téé cuechi ndëndaha-dě Jèsús cuáhá<sup>n</sup>, te lavichi-dě, ñ<sup>n</sup>-ni dóo yadí yidúcú<sup>n</sup> nuu-dé ñihí-dé, te ní tnǐ ñaha-güedé xii-dé,

<sup>52</sup> dico ní ndacu-dé ní quenuñ<sup>n</sup>-dě te ní dándõ-dé dóo yidúcú<sup>n</sup> nuu-dé-á<sup>n</sup> nǐ xinu-dé.

*Jèsús ndécú-gǎ jùndá*

*(Mt. 26:57-68; Lc. 22:54-55, 63-71; Jn. 18:12-14, 19-24)*

<sup>53</sup> Te cue téé ní tnǐ ñaha xii Jesús ndécá ñaha-güedé xii-gá cuáhá<sup>n</sup> núú tée cùu dútú cúnùu-gá. Te xiá<sup>n</sup> nǐ tacá nchaa dava-gá cue téé cùu dútú cúnùu, ndihí cue téé cùu sacuéhé núú ñáyi isràél, ndihí cue téé dàcuaha ñaha xi-yu nchaa tnúhu ní chídó tnùní ndí Moisés cuendá cada-güedé jùndá.

<sup>54</sup> Te té Pèlú xica xica-ni nchicú<sup>n</sup> ñáhá-dě xii-gá cuáhá<sup>n</sup> ní sáá-dé ndéé quehé vehe núú ndécú tée cùu dútú

cúnù-gá-án, te xíán nǐ ngóo teté-dé yuhu nùhú ndíhi cue tée cùu poleciá.

55 Te cue tée cùu dútú cúnù ndíhi nchaa dava-gá cue tée xĩndecu jùndá ndúcú-güedě ñáyiú dacàa ì<sup>n</sup> cuéchi díquí Jèsús cuendá duca<sup>n</sup> ñhí-güedě nàcuáa cada-güedé cahni ñaha-güedě xii-gá, dico ñá túú ní ndàcu-güedé.

56 Te cuéi vài ñáyiú dàcaá-yu cuéchi díquí-gă dico mee-ni sǎ nǐ cahu iní méé-yu ní cáhá<sup>n</sup>-yu, chi tucu càhá<sup>n</sup> ì<sup>n</sup> tucu càhá<sup>n</sup> ì<sup>n</sup>-yu.

57 Te davá-yu ní ndacuñí-yu te ní ngüíta-yu dàcaá-yu ì<sup>n</sup> cuéchi neñùú díquí-gă, te xǎhá<sup>n</sup>-yu xii nchaa cue tée cùnùu:

58 —Nchúhú ní tecú dóho-ndí cächí-dé sá dǎngòyo-dé veñúhu càhnu sá ìo cùnùu sá nǐ dácáá cuè tée ñuyíú-a, te dandàa tucu-dé ingá veñúhu saa, diu-ni núú cáá tnahí veñúhu-án te xití úní-ni nduu sa nadaxĩnu-dé, te vá cúú-gă-xi veñúhu sá nǐ dácáá cuè tée ñuyíú-a, duha cächí-dé ní tecú dóho-ndí —cächí-yu xǎhá<sup>n</sup>-yu xii-güedé.

59 Dico ni dùca<sup>n</sup> ñá túú ní cùu ì<sup>n</sup>nuú-yu nchaa tnúhu ní cáhá<sup>n</sup>-yu.

60 Te tée cùu dútú cúnù-gá ní ndacuñí-dé tnuú nchaa ñáyiú, te xǎhá<sup>n</sup>-dě xii Jèsús:

—¿Ná cuendá duha ndùu tnúhu càhá<sup>n</sup> ñáyiú-a cuendá-n? Te cáhá<sup>n</sup> nùu nása ndùu tnúhu cáhá<sup>n</sup>-n —cächí-dé xǎhá<sup>n</sup>-dě xii-gá.

61 Dico Jèsús ñá túú tnahí ni cáhá<sup>n</sup>-gá. Te tée cùu dútú cúnù-gá-án nǐ xáha<sup>n</sup> tucu-dé xii-gá:

—Cuñí-í cachí tnúhu-n xì-ndí nùu sá díú Crístú Déhe Yá Ndiöxí Yaá ní tendaha-gă véxi ñuyíú-a cùu-n. Te diu Yá Ndiöxí cúú-gă Yaá quidé càhnu-ndí —cächí-dé xǎhá<sup>n</sup>-dě xii-gá.

62 Te Jèsús ní xáha<sup>n</sup>-gă xii-dé:

—Diu Yaá-án cúú-í, te na cächí tnúhu-í xii-ndo sá sàá nduu te quini-ndó yúhú Téé cùu ñani tnahá-ndó nchàa-ndo cunucóo-í xio cùha Dútú Ndiöxí Yaá ndácú quide nchaandi túhú sá vaha. Te dàvá-án quini ñáhá-ndó xì-í quee-í

andiu quixi-í ichi xití vícò —cächí-gá xǎhá<sup>n</sup>-gă xii-dé.

63 Te dútú cúnù-gá-án nǐ ndátá-dě dóo cáni ñhnu-dé cuendá sá ñá túú ní tnahá ini-dé nàcuáa ní cáhá<sup>n</sup> Jèsús, te ní xáha<sup>n</sup>-dě xii nchaa cue tée xĩndecu jùndá:

—Ñá túú-gă xini ñuhu-xi cue tée cáhá<sup>n</sup> nùu ndáá sá ndècuéchi-dé àdi ñá túú ndècuéchi-dé.

64 Chi sa ní xĩndedóho-o nàcuáa ndùu tnúhu ní cáhá<sup>n</sup>-dé ní cáhá<sup>n</sup> úhú-dé cuendá Yá Ndiöxí, te nchaa-ndo chǐ càhá<sup>n</sup> vitna núu nása sàni iní-ndó cùnduu cuendá téé-a —cächí-dé xǎhá<sup>n</sup>-dě xii-í-güedé.

Te nchaa-güedé ní cachí-güedé sá ná cùú-dé.

65 Te dava-güedé ní ngüíta-güedé ní tiú díí ñáhá-güedě xii-gá, te ní dádǎhu-güedé núú-gă, te ní ngüíta-güedé caniha-güedé xii-gá, te xǎhá<sup>n</sup>-güedé:

—¡Cáhá<sup>n</sup> ná cótó nǎ cúú tée ní caniha xì-n! —cachí-güedé xǎhá<sup>n</sup>-güedé xii-gá.

Te cue tée cùu poleciá ní cani-güedé núú-gă.

*Té Pèlú càhá<sup>n</sup>-dé núú ñáyiú sá ñá túú xini-dé Jèsús*

(Mt. 26:69-75; Lc. 22:56-62; Jn. 18:15-18, 25-27)

66 Te ndéé xití vehe càa núú ñinu quide-güedé jùndá, chǐ vehe yòdo tnahá cuu-xi, te té Pèlú núcòo-dé quehé vehe-án. Te ì<sup>n</sup> xíchí xínú cuèchi núú dútú cúnù-án nǐ quexìo-xi núú núcòo té Pèlú.

67 Te òré ní xini ñáhá-xí xì-dé núcòo teté-dé yuhu nùhú, te ní xĩndéhé ñaha váha-xi xii-dé, te xǎhá<sup>n</sup>-xi:

—Yòhó tnahá-n cùu-n téé xica cuu ndíhi Jèsús téé ñuu Nazàrét —cächí-xi xǎhá<sup>n</sup>-xi xì-dé.

68 Te té Pèlú ní xáha<sup>n</sup>-dě xii-xi:

—Yúhú ñá túú xìní-í téé-ǎ<sup>n</sup>, te ní ñá túú cùtnuní iní-í nása ndùu tnúhu càhá<sup>n</sup>-n —cächí-dé xǎhá<sup>n</sup>-dě xii-xi.

Te té Pèlú ní xica-dé cuáhá<sup>n</sup>-dé ndàa nàcuáa nchii yuyèhe vehe-án, te ní cana ì<sup>n</sup> lǐhi.

69 Te xíchí xínú cuèchi-án nǐ xini ñáhá tucu-xi xì-dé, te xǎhá<sup>n</sup>-xi xì nchaa ñáyiú xĩndecu-án:

—Diu tée-ǎn tnàhá-dé xícá cùu-dé ndihí tée ndèca-güedé cuánguihu-a — càchí-xi xǎha<sup>n</sup>-xi xii-yu.

<sup>70</sup> Dico té Pèlú ñá túú ní nūnuu tucu-dé sá xícá cùu-dé ndihí Jèsús. Te tna tnaa-ni ní cuu sá dúcá<sup>n</sup> ñí xáha<sup>n</sup> xíchí-ǎn xii-dé, te ní xáha<sup>n</sup> tucu dava cue ñáyiú xĩndecu-á<sup>n</sup> xii-dé:

—Ndáá sá tnàhá-n cùu-n tée xica cuu ndihí tée ndèca-güedé cuánguihu-ǎn chi cùu-n tée distritú Galileá, te càhá<sup>n</sup>-n dàtná càhá<sup>n</sup>-güedé —càchí-yu xǎhǎ<sup>n</sup>-yu xii-dé.

<sup>71</sup> Te té Pèlú ní xáha<sup>n</sup>-dǎ xii-yu:

—Nchàcui<sup>t</sup>i Yá Ndiöxí sá yǔhú càhá<sup>n</sup> ndáá-í sá ñá túú xini-í tée càcunehe-ndo-á<sup>n</sup> —càchí-dé xǎha<sup>n</sup>-dǎ xii-yu.

<sup>72</sup> Te òré-ni-á<sup>n</sup> ñí cana tucu líhi xito cùu uú, te òré-á<sup>n</sup> ñí ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gǎ cana ñí líhi úú xito te úní xito càhá<sup>n</sup>-dé núú ñáyiú sá ñá túú xini ñáhá-dǎ xii-gá. Te òré duca<sup>n</sup> ñí ndacu iní-dé nàcuáa ní xáha<sup>n</sup> Jèsús xii-dé, te ní ndáhyú-dé ní ndixi cuéchi iní-dé.

## 15

*Jèsús ndécú-gǎ núú tǎ Pìlatú*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Te sátá ñí túndaá te cue tée cùu dútú cúnùu, ndihí cue tée cùu sacuéhé núú ñáyiú isràél, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchaa dava-gá cue tée cúnúu ní xĩndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáhá<sup>n</sup> núú tǎ Pìlatú.

<sup>2</sup> Te té Pìlatú ní xícá<sup>n</sup> tnúhú-dǎ núú Jèsús, te xǎha<sup>n</sup>-dǎ xii-gá:

—¿Ndáá sá díú-n cùu-n tée yìndaha ñaha xii ñáyiú isràél-ǎn? —càchí-dé xǎha<sup>n</sup>-dǎ xii-gá.

Te Jèsús ní xáha<sup>n</sup>-gǎ xii-dé:

—Diu-í yìndaha-í-yu —càchí-gá xǎha<sup>n</sup>-gǎ xii-dé.

<sup>3</sup> Te cue tée cùu dútú cúnùu da-caa-güedé vai cuéchi díquí-gǎ.

<sup>4</sup> Te té Pìlatú ní xícá<sup>n</sup> tnúhú tucu-dé núú-gǎ, te xǎha<sup>n</sup>-dǎ xii-gá:

—Cáhá<sup>n</sup>, ná cuendá ñá càhá<sup>n</sup>-n te cundehe ñá ndéé duha titní cuéchi dàcaa díquí ñáhá cuè tée-a xii-n — càchí-dé xǎha<sup>n</sup>-dǎ xii-gá.

<sup>5</sup> Dico Jèsús ñá túú tnàhí ni càhá<sup>n</sup>-gá te té Pìlatú ío ní cuñúhu-dé sá dúcá<sup>n</sup> ñá túú tnàhí ni càhá<sup>n</sup>-gá.

*Cue ñáyiú xǎhǎ<sup>n</sup>-yu xii té Pìlatú sá cáhni-dǎ Jèsús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Te ndi tnahá nduu víco pascuá dácácu té Pìlatú ñí tée yìhi vecaá chi duca<sup>n</sup> tnàhí quide-dé, te mee ñáyiú càhá<sup>n</sup>-yu te núu ndédacàa tée yìhi vecaá-á<sup>n</sup> cǎcu-dé, te tée-á<sup>n</sup> dácácu-dé.

<sup>7</sup> Te yìhi ñí tée nàni Barrabás vecaá ndihí dava-gá cue tée cùndihí-dé. Te té Barrabás-á<sup>n</sup> ñí sanu ichi-dé ñáyiú ñúú ñngá ichi, te ní ngúita-yu ndihí-dé ní cuu úhú iní-yu cue tée cùchiu<sup>n</sup>, te ní sahani-dé ndíyí núu xiǎ<sup>n</sup> ní chihí ñaha-güedé vecaá xii-dé.

<sup>8</sup> Te nchaa ñáyiú ní sáhá<sup>n</sup>-yu núú tǎ Pìlatú, te càhá<sup>n</sup> ndàhú-yu núú-dǎ sá ná cáda nàhi-ni-dé dàtná quide-dǎ.

<sup>9</sup> Te té Pìlatú ní xáha<sup>n</sup>-dǎ xii-yu:

—¿Cuini-ndó sǎ dácácu-í tée yìndaha ñaha xii ñáyiú isràél-ǎn? —càchí-dé xǎha<sup>n</sup>-dǎ xii-yu.

<sup>10</sup> Te duca<sup>n</sup> ñí càhá<sup>n</sup> té Pìlatú, chi ní cutnùní iní-dé sá dicó sá cuédú iní cuè dútú cúnùu núu xiǎ<sup>n</sup> duca<sup>n</sup> ñí quide-güedé ní sáha cuendá ñáhá-güedé xii Jèsús núú-dǎ.

<sup>11</sup> Te cue dútú cúnùu ní xáha<sup>n</sup>-güedé xii nchaa ñáyiú sá ná cùñàhá-yu xii té Pìlatú dácácu-dé té Barrabás, te ní quide-yu nàcuáa ní xáha<sup>n</sup>-güedé.

<sup>12</sup> Te té Pìlatú ní xícá<sup>n</sup> tnúhú-dǎ núú-yu, te xǎha<sup>n</sup>-dǎ xii-yu:

—¿Ná cuini-ndó càda-í tée càchí-ndó yìndaha ñaha xii ñáyiú isràél-í? —càchí-dé xǎha<sup>n</sup>-dǎ xii-yu.

<sup>13</sup> Te ncháa-yu níhi ní càhá<sup>n</sup>-yu, te xǎhǎ<sup>n</sup>-yu xii-dé:

—¿Cata caa-dé núú cùrúxí! —càchí-yu xǎhǎ<sup>n</sup>-yu xii-dé.

<sup>14</sup> Te té Pìlatú ní xáha<sup>n</sup>-dǎ xii-yu:



—¿Te ná cúu cuèchi ní quide-dé te núu duca<sup>n</sup> cuíní-ndó càda-í-dé-i? — cächí-dé xähá<sup>n</sup>-dë xii-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xähá<sup>n</sup>-yu xii-dé:

—¡Cata caa-dé núú cùrúxí! — cächí-yu xähá<sup>n</sup>-yu xii-dé.

15 Te té Pilatú ní quide-dé nàcuáa ní xähá<sup>n</sup>-yu xii-dé cuendá sá cúdù-dé núu-yu, te ní dácäcu-dé té Barrábás, te ní táuchíú<sup>n</sup>-dë ní cani-güedé Jèsús ndihí ñi. Te sátá dúcá<sup>n</sup> ní quide ñaha-güedé xii-gá, te ní táuchíú<sup>n</sup>-dë candeca ñaha-güedé quíhí<sup>n</sup> cata caa ñaha-güedé xii-gá núú cùrúxí.

16 Te cue tée cùu sandadú ndéca ñaha-güedé xii-gá cuáhá<sup>n</sup> vechi<sup>n</sup>, te ñu-ni xía<sup>n</sup> cúu vèhe tée cùu gobiernú. Te xía<sup>n</sup> ní tacá nchaa dava-gá cue tée cùu sandadú.

17 Te xía<sup>n</sup> ní dácuihnú ñaha-güedé xii-gá ñi dóo tìcuèhé víhí, te ní cadúha-güedé ñi coróná iñu ní chihí-güedé díquí-gá.

18 Te ní ngüíta-güedé níhi càhá<sup>n</sup>-güedé cúdíquí ndeé ñáhá-güedé xii-gá, te xähá<sup>n</sup>-güedé:

—¡Io càhnu cuu yohó tée yìndaha ñaha xii ñáyi isràél! —cächí-güedé xähá<sup>n</sup>-güedé xii-gá.

19 Te càni-güedé díquí-gá ndihí ñi carrutí, te tìú díí ñáhá-güedé xii-gá, te ngüñí xítí-güedé núú-gá quídé-güedé sá néhé-güedé sá yíñùhu núú-gá dico ñá ndàá chi dícó cúdíquí ndeé ñáhá-güedé xii-gá.

20 Te sátá dúcá<sup>n</sup> ní cudíquí ndeé ñáhá-güedé xii-gá, te ní nataunuu ñaha-güedé xii-gá dóo tìcuèhé víhí sá ní dácuihnú ñaha-güedé, te ní dándíunuu ñaha-güedé xii-gá dóo méé-gá. Te dàtnùní ndéca ñaha-güedé cuáhá<sup>n</sup> núú catá cää ñaha-güedé xii-gá núú cùrúxí.

*Sàta caa-güedé Jèsús núú cùrúxí*

(Mt. 27:32-44; Lc. 23:26-43; Jn. 19:17-27)

21 Te ichi cuáhá<sup>n</sup>-güedé ndihí Jèsús ní naníhí-güedé ñi tée ñuú Cirené nání-dë Xímú, te déhe-dé cúu ñi tée

nàni Lijandrú, ndihí ingá tée nàni Rúfú. Te té Xímú-án ñuhú-dë ichi duha cuándixi-dé ní sáhá<sup>n</sup>-dé yucu, te ní quide yica-güedé ní xido-dé cùrúxí sá nchídó Jèsús.

22 Te ndéca-güedé Jèsús cuáhá<sup>n</sup> ñi xichi núú nání Gölgotá, te tnúhu-án quée-xí: ñi xichi núú nání yìquí díquí ndíyi, duha quée-xi tnúhu-án.

23 Te ní sáñaha-güedé xii-gá ndudí sá ní quée yúcú nání mìrrá coho-gá ní cùu dico ñá túú ní xihí-gá.

24 Te ní sata caa ñaha-güedé xii-gá núú cùrúxí. Te sátá dúcá<sup>n</sup> te cue tée cùu sandadú-án ní xito ndeé-güedé ñu ndédacää-güedé cuu cuendá-güedé dóo-gá.

25 Te cùu-xi caá ñi dátneé òré ní sata caa ñaha-güedé xii-gá núú cùrúxí.

26 Te ní taxi ndecu-güedé ñi sá ndeé lètrá núú tákää-gá. Te lètrá-án càhá<sup>n</sup>-xi ná cuendá duca<sup>n</sup> ní quide ñaha-güedé xii-gá. Te duha càhá<sup>n</sup> lètrá-án: “Tée yìndaha ñaha xii ñáyi isràél”, duha cächí-xi.

27 Te tnàhá úú cue tée cùu ñadúhú ní sata caa-güedé ñu-ni núú cùrúxí tucu. Te ñi-dé ní sata caa-güedé xio cùha-gá, te ingá-dé ní sata caa-güedé xio dàtni-gá.

28 Te duca<sup>n</sup> ní cuu chi ní quee ndáá-xi nàcuáa càhá<sup>n</sup>-xi núú tütú Yá Ndióxi núú cächí-xi: “Ñi-ni ní quide ñaha-güedé xii-gá ndihí cue tée ndecu cuèchi-xi”, duha cächí-xi núú tütú-gá.

29 Te nchaa ñáyi yäha yatni núú tákää-gá dácuiçó-yu díquí-yu te xìcuèhé ñáhá-yu xii-gá, te xähá<sup>n</sup>-yu:

—Te ná cuendá duca<sup>n</sup> cää-n tacaa-n xía<sup>n</sup>, te cächí-n sá dängoyo-n veñúhu càhnu sá ño cùnuu te dandää-n ingá veñúhu saa, te xítí úní-ni nduu sa nadaxinu-n cächí-n.

30 Te vitna tanuu núú cùrúxí-án dácacu-n mée-n —cachí-yu xähá<sup>n</sup>-yu xii-gá.

31 Te ñu-ni duca<sup>n</sup> ní quide cue tée cùu dütú cùnù, ndihí cue tée dácuaaha ñaha xii ñáyi nchaa tnúhu ní chídó tnùní ndí Moisés, chi ní cudíquí ndeé ñáhá-güedé xii-gá, te ní xitnaha-güedé:

—Tée-a ní ndacu-dé ní dácácu nihnu-dé ñáyiú, ¿te ná cuèndá ñá ndácú-dé dácácu nihnu-dé méé-dé-i?

<sup>32</sup> Te núu ndáá sá díú-dé cúú-dé Cristú Yaá ní tendaha Yá Ndiõxí véxi ñuyíú-a quindaha ñaha xii ñáyiú is-ráel, te na cundehe-o nuu-dé núú cùrúxí, cuèndá quíndáá iní-ó-dé — cächí-güedé xítnàha-güedé.

Te ndéé tnàhá cue téé tácaa xio xio diñi-gá xicuèhé ñáhá-güedé xii-gá.

### *Ní xíhí Jèsús*

(Mt. 27:45-56; Lc. 23:44-49; Jn. 19:28-30)

<sup>33</sup> Te òré ní cuu cuádava nduu, te ní cunee ñihí ñuyíú, te duca<sup>n</sup>-ni càa ní cuu ndéé caá úní sacuaa.

<sup>34</sup> Te diu-ni òré caá úní sacuaa-á<sup>n</sup> ñhi ní cáhá<sup>n</sup> Jèsús, te xáha<sup>n</sup>-gá xii Tátá-gá Dútú Ndiõxí:

—Elói, Elói, láma sabàctaní — cächí-gá xáha<sup>n</sup>-gá.

Te tnúhu-á<sup>n</sup> quée-xí: Ndiõxí méè-í, Ndiõxí méè-í, ná cuèndá ní dáña ñaha-n xii-í, duha quée-xi tnúhu-á<sup>n</sup>.

<sup>35</sup> Te dava cue téé xíndecu yatni núú táca-gá-á<sup>n</sup> ní tecú dóho-güedé nàcuáa ní cáhá<sup>n</sup>-gá, te ní xítnàha-güedé:

—Chí cùndédóho chi càna-dé té Èliás — cächí-güedé xítnàha-güedé.

<sup>36</sup> Te ñ<sup>n</sup> cue téé xíndecu-á<sup>n</sup> xínú-dé ní sáhá<sup>n</sup> ní chindóyo-dé luha cächí xití ndudí íá, te ní chinenu-dé díquí ñ<sup>n</sup> yutnu càni te ní ndocani-dé chíhí-dé yuhu-gá cuèndá coho-gá. Te ní xáha<sup>n</sup> cuè téé xíndecu-á<sup>n</sup> xii téé-á<sup>n</sup>:

—Cundetú tnaa ña cundehe-o nacoto núu quixi té Èliás nunehe ñaha-dé xii-dé núú cùrúxí — cächí-güedé xáha<sup>n</sup>-güedé xii-dé.

<sup>37</sup> Te Jèsús ñhi ní canasaa-gá te ní xíhí-ni-gá.

<sup>38</sup> Te sátá dúcá<sup>n</sup> te ní ndátá dõó cúú còrtiná xití veñúhu càhnu sá ïo cùnnu ní quée dava ndáá, te ndàa núú ñnu ní ngúita-xi ní ndátá.

<sup>39</sup> Te téé cùu capitá<sup>n</sup> nútñi-dé ndàa núú Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:

—Sá ndáá ndisa sá díú tée-a cùu-dé Déhe Yá Ndiõxí ní cùu —duha ní cachí-dé.

<sup>40</sup> Te xica xínutñi ñ<sup>n</sup> úú ñáyiú diñi ndéhé-yu nchaa nàcuáa ní quide ñaha-güedé xii Jèsús, te tnàhá tá Màriá Magdalèná, ndihí tá Salómé, ndihí tá Màriá náná tē Chèé ndihí té Jàcobó tē cächí-güedé cúú líhli-gá.

<sup>41</sup> Te cue ñáyiú diñi-á<sup>n</sup> ñi xica cuú-yu ndihí Jèsús distritú Galileá ní xinu cuèchí-yu núú-gá. Te cue ñáyiú diñi-á<sup>n</sup> nchícú<sup>n</sup> ñáhã-yu xii-gá ní quexìo ndéé ñuu Jerusàlén ndihí dava-gá ñáyiú diñi nchícú<sup>n</sup> ñáhã xii-gá cuáhã<sup>n</sup>.

### *Chindúxi-güedé Jèsús*

(Mt. 27:57-61; Lc. 23:50-56; Jn. 19:38-42)

<sup>42</sup> Te cùu-xi nduu vispré nduu ndètatú ñáyiú. Te nduu-á<sup>n</sup> xíquide túha-yu sá cúú ìngá nduu nduu ndètatú-yu-á<sup>n</sup>, te diu-ni nduu-á sa ní cuaa vihi,

<sup>43</sup> te ñ<sup>n</sup> tēe nani Cheé tēe ñuu Arimateá ní cuyi-dé ní sáhá<sup>n</sup>-dé núú tē Pilatú, te ní xáha<sup>n</sup>-dē sá ñuu vá cùndēe iní-dé dáña-dé chindúxi-dé yiqui cùñú Jèsús. Te tnàhá tē Chèé-á<sup>n</sup> cúú-dé ñ<sup>n</sup> tēe cùnnu cundihí-dé cue tēe quide jundá, te tnàhá-dé ndétú-dé sáá nduu ndíhu ndaha ñaha Yá Ndiõxí xii-dé ndihí cue ñáyiú.

<sup>44</sup> Te tē Pilatú ío ní cuñúhu-dé sá dúcá<sup>n</sup> ïo ndihí ní xíhí Jèsús, te ní cana-dé tēe cùu capitá<sup>n</sup> ní xícá<sup>n</sup> tnúhú-dé núú-dé ñuu ndisa sá sà ní xíhí-gá.

<sup>45</sup> Te tēe cùu capitá<sup>n</sup>-á<sup>n</sup> ñi xáha<sup>n</sup>-dē xii tē Pilatú sá ndáá ní xíhí Jèsús, núu xíá<sup>n</sup> tē Pilatú-á<sup>n</sup> ñi sáha-dé tnúhu chindúxi tē Chèé-á<sup>n</sup> yiqui cùñú-gá.

<sup>46</sup> Te tē Chèé-á<sup>n</sup> ñi saá<sup>n</sup>-dé ñ<sup>n</sup> dóó vãha, te ní sáhá<sup>n</sup>-dē ní nunehe-dé yiqui cùñú Jèsús núú cùrúxí, te ní chidúcú<sup>n</sup>-nuu-dé yiqui cùñú-gá dóó vãha sá ñi saá<sup>n</sup>-dé-á<sup>n</sup>, te dàtnùní néhé-dé yiqui cùñú-gá cuáhã<sup>n</sup> ní chihi-dé ñ<sup>n</sup> yaú nchìi yiqui naha càva, te ní sadí-dé yuhu yaú-á<sup>n</sup> ndihí ñ<sup>n</sup> yúú quèhé<sup>n</sup>.

<sup>47</sup> Te tá Màriá Magdalèná, ndihí tá Màriá náná tē Chèé ní xiní-yu núú ñi chihi-dé yiqui cùñú Jèsús.

## 16

### *Ní ndoto Jèsús*

(Mt. 28:1-10; Lc. 24:1-12; Jn. 20:1-10)

<sup>1</sup> Te sáta nǐ cundiqui<sup>n</sup> nduu ndètatú ñáyíu, te tá Màriá Magdalèná, ndihí tá Salómé, ndihí tá Màriá nǎná tǎ Jàcobó ní saá<sup>n</sup>-yu acítí sàhá<sup>n</sup> tnámí cuèndá canehé-yu quíhí<sup>n</sup> chihí-yu yíqui cùñú Jèsús.

<sup>2</sup> Te ndumìngú nehé-ni òré vitna váha váha ní xínu coto núú nchĩçanchii ní quexió-yu núú nchí yaú yíhí yíqui cùñú Jèsús.

<sup>3</sup> Te ní xítñàhá-yu:

—Yoo cúñaha-o xòcani yúú ndèdí yuhu yàú-a, chi vá yò tñàhí ndècu ìha —cachí-yu xítñàhá-yu.

<sup>4</sup> Te òré ní xíndéhé vǎha-yu te ní xiní-yu sá yúú cáhnú ndèdí yuhu yàú-á<sup>n</sup> ì<sup>n</sup> xio-ná ndécú.

<sup>5</sup> Te cuánguìhú-yu xítí yaú-á<sup>n</sup>, te ní xiní-yu nùcòo ì<sup>n</sup> espíritú xínu cuèchi núú Yǎ Ndiòxí ndǎa xio cuhá-yu, te càa-xi datná cáá ì<sup>n</sup> tée cuechi, te nìhnu-xi ì<sup>n</sup> dóo cuixí<sup>n</sup> dóo cání, te ní yùhú-yu òré ní xiní-yu espíritú-á<sup>n</sup>.

<sup>6</sup> Te espíritú-á<sup>n</sup> nǐ xáha<sup>n</sup>-xi xì-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nànducu-ndo yíqui cùñú Jèsús tée ñúú Nazàrét tée ní sahani-güedé núú cùrúxí, dico ñá túú-gǎ yíqui cùñú-dé ndécú ìha chi sa ní ndoto-dé, te chí cùndèhe núú nǐ sacá<sup>n</sup>-güedé yíqui cùñú-dé te quiní-ndó nǎ ñá túú-gǎ-dé.

<sup>7</sup> Te chí cuàhá<sup>n</sup> núú ndécú tǎ Pèlú ndihí dava-gǎ cue tée ní xica cuu ndihí-dé, te duha cúñaha-ndo xii-güedé: “Jèsús codonùu-gǎ núú-ndó quíhí<sup>n</sup> distritú Galileá, te yàcá<sup>n</sup> quiní-ndó-gǎ dàtná ní cachí-gǎ xii-ndo”, duha cúñaha-ndo xii-güedé —cachí espíritú-á<sup>n</sup> xáha<sup>n</sup>-xi xì-yu.

<sup>8</sup> Te cue ñáyíu dǐhí-á<sup>n</sup> ìo ní yùhú-yu, te ní quene cunú-yu cuánuhú-yu, te quídí ñaha-ná-xi xii-yu sá ìo ní yùhú-yu, te ñá túú tñàhí ná tñúhu ní xáhǎ<sup>n</sup>-yu xii cue ñáyíu ní naníhí-yu ichi cuèndá sá ìo ní yùhú-yu.

### *Tá Màriá Magdalèná ní xiní-xi Jèsús (Jn. 20:11-18)*

<sup>9</sup> Te sáta dúcá<sup>n</sup> nǐ ndoto Jèsús ndumìngú nehé-ni-á<sup>n</sup>, te díhna nuu-gǎ tá Màriá Magdalèná ní quee túu-gǎ núú-xi, te diu tá Màriá-á<sup>n</sup> cúu-xí xíchí nǐ xíhí ñaha ùsá espíritú cùndihí yucu ñávǎha ni cùu, te Jèsús ní queñuhu-gǎ nchaa espíritú-á<sup>n</sup> yíqui cùñú-xi.

<sup>10</sup> Te xíchí-ǎ<sup>n</sup> nǐ sáhá<sup>n</sup>-xi ní xítñúhu-xi cue tée ní xica cuu ndihí Jèsús nàcuáa ní cuu, te xíndáhí-güedé sá ndihú iní-güedé òré ní quexió-xi núú ndécú-güedé.

<sup>11</sup> Te òré ní xáha<sup>n</sup> tǎ Màriá xii-güedé sá nǐ ndoto Jèsús ndihí sá ní xiní ñáhá-xí xii-gǎ, te ñá túú ní sàndáá iní-güedé.

### *Jèsús ní quee túu-gǎ núú úú cue tée ní xica cuu ndihí-gǎ*

(Lc. 24:13-35)

<sup>12</sup> Te úú tñàhá cue tée ní xica cuu ndihí Jèsús ñúhú-güedé ichi cuáhá<sup>n</sup>-güedé yucu, te uu<sup>n</sup>ni ní quee túu-gǎ núú-güedé, te ní dácótó ñàha-xi xii-güedé sá ñà túú-gǎ cáá-gǎ dàtná cáá-gǎ.

<sup>13</sup> Te cue tée úú-á<sup>n</sup> nǐ xica-güedé cuáhá<sup>n</sup>-güedé ní xítñúhu-güedé nchaa dava-gǎ cue tée ní xica cuu ndihí-gǎ sá nǐ xiní ñáhá-güedé xii-gǎ, dico diu-ni duca<sup>n</sup> ñà túú ní sàndáá iní cue tée-á<sup>n</sup> tñúhu ní cáhá<sup>n</sup>-güedé.

### *Jèsús xáha<sup>n</sup>-gǎ xii cue tée ní xica cuu ndihí-gǎ nàcuáa ndiù chiu<sup>n</sup> cada-güedé*

(Mt. 28:16-20; Lc. 24:36-49; Jn. 20:19-23)

<sup>14</sup> Te ndi ùxí ì<sup>n</sup> cue tée ní xica cuu ndihí Jèsús yíhí-güedé mèsá xéxí-güedé, te ní quee túu-gǎ núú-güedé te ní tenáá ñáhá-gǎ xii-güedé cuèndá sá ìo sáá iní-güedé ñá túú sàndáá iní ñáhá vǎha-güedé xii-gǎ, chi ñá túú ní cuíní-güedé quíndáá iní-güedé nàcuáa ní xáha<sup>n</sup> ñáyíu ní xiní ñáhá xii-gǎ sáta nǐ yáha ní ndoto-gǎ.

<sup>15</sup> Te ní xáha<sup>n</sup>-gǎ xii-güedé:

—Quíhí<sup>n</sup>-ndó ñihí ñuyíú cǎhá<sup>n</sup>-ndó nǔú nchàa ñáyiú tnúhu váha tnúhu sá cǎhá<sup>n</sup> nàcuáa naníhí tǎhú-yu.

<sup>16</sup> Te nchaa ñáyiú na quíndáá iní tnúhu-á<sup>n</sup> te cuanduté-yu, te naníhí tǎhú-yu, dico nchaa ñáyiú vá quíndáá iní tnúhu-á<sup>n</sup> te cuíta nihnú-yu.

<sup>17</sup> Te nchaa ñáyiú na quíndáá iní ñáhá xii-í te cadá-yu sá vǎ yǒo tnàhí ndàcu cada, te cacunehe ñàhá-yu xii-í, te queñuhú-yu nchaa espíritú cúndìhí yucu ñávǎha yìhí ñaha xii ñáyiú. Te uu<sup>n</sup>ni ndacú-yu cǎhá<sup>n</sup>-yu ingá núú tnúhu sá vǎtá dácuàha-gá-yu.

<sup>18</sup> Te cuèi na tnǐ-yu cóo dǎé<sup>n</sup> dico ñá túú nǎ cada ñaha-di xii-yu, te cuèi venènú ná cǎxí-yu dico ñá túú nǎ tnahá-yu, te tendàhá-yu cue ñáyiú cùhú te ndúha-yu —cǎchí-gá xǎha<sup>n</sup>-gǎ xii-güedé.

*Jèsús cuándaa-gá andiu*  
(Lc. 24:50-53)

<sup>19</sup> Te sátá ñí yáha duca<sup>n</sup> ñí xáha<sup>n</sup> Jèsús xii cue téé ní xica cuu ndìhí-gá, te ní ndanchita-gá cuándaa-gá andiu te ní ngóo-gá xio cùha Dútú Ndiǒxí.

<sup>20</sup> Te cue téé-á<sup>n</sup> ñí xica-güedé cuáhá<sup>n</sup>-güedé, te ní ngüíta-güedé cǎhá<sup>n</sup>-güedé tnúhu Xítóhó Jesucristú nchaa xichi. Te mee-gǎ ní chindee ñàha-gá xii-güedé ní quide-güedé nchaa sá vǎ yǒo tnàhí ndàcu cada cuendá cutnùní iní ñáyiú sá ndàá cǎhá<sup>n</sup>-güedé tnúhu-gá. Duha ní cuu dàvá-á<sup>n</sup>.

## TNÚHU NÍ CHÍDÓ TNÜNÍ TĒ LŪCÁ

*Nàcuáa ní ngódó tnùnì tnúhu Yá Ndiöxí*

<sup>1</sup> Te vâi ñáiyu chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu.

<sup>2</sup> Te ñu-ni nchaa tnúhu chîdo tnuní-yu-á<sup>n</sup> cúu-xí tnúhu ní cáhá<sup>n</sup> nchaa cue téé ní xiní ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndiöxí.

<sup>3</sup> Te yúhú sa ní cuu nduu quide cuendá-í nchaa nàcuáa ní cuu, núu xíá<sup>n</sup> ní sani iní-í tee váha-í nchaa tnúhu-a núu tütú sá cúu-xí yòhó té Tëofilú chi ío váha cùu iní-í sá cúu-xí-n,

<sup>4</sup> te tée-í cuendá cutnùnì iní-n sá sá ndáá cúu-xí nchaa sá ñi dánèhé ñáhá-güedé xii-n.

*Ë<sup>n</sup> espíritú xínú cuèchi núú Yá Ndiöxí cächí-xi sá cácu ñ<sup>n</sup> téé cunani Juáá*

<sup>5</sup> Te cútnàhá ní xíndaha té Hèrodés ñáiyu distritú Júdeá dàvá-á<sup>n</sup> ñi xíndecu ñ<sup>n</sup> dútú ñi xínani-dě Zacàriá, te ní cundihí-dé cue dútú Àbiás. Te ñadìhí-dé ní xínani-a<sup>n</sup> Èlisabét, te ñaha-á<sup>n</sup> ñi cuu-a<sup>n</sup> ñani tnàhá ndii Àrón.

<sup>6</sup> Te ndi ndúu-yu ío ní quide ndáá-yu núu Dütú Ndiöxí, chi ní tní-yu nchaa tnúhu ní cáhá<sup>n</sup>-gá.

<sup>7</sup> Te ñá túu ñi ñ<sup>n</sup> déhe-yu, chi duca<sup>n</sup> tãhú tã Elisabét sá vã cóó dèhe-a<sup>n</sup>, te duca<sup>n</sup> ndi ndúu-yu ío ní sahnú-yu.

<sup>8</sup> Te ñ<sup>n</sup> nduu xínu cuechi tuçu té Zacàriá ndihí nchaa cue téé cundihí-dé núu Yá Ndiöxí xiti veñúhu.

<sup>9</sup> Te dàvá-á<sup>n</sup> ñi xito ndeé-güedé cuendá cutnùnì iní-güedé núu ndédacàa-güedé quíhu núu nàá xiti veñúhu-á<sup>n</sup> cahmi-güedé sá sàhá<sup>n</sup> tnámí, te ní cutnùnì sá tē Zacàriá quíhu-dé. Te duca<sup>n</sup> ñi quide-güedé, chi duca<sup>n</sup> tnàhí ní xóo cada nchaa cue dútú dàvá-á<sup>n</sup>.

<sup>10</sup> Te ñini sàhmi té Zacàriá sá sàhá<sup>n</sup> tnámí núu nàá, te vâi vihi

ñáiyu xíndecu quehé veñúhu-á<sup>n</sup> cãhá<sup>n</sup> ndihí-yu Yá Ndiöxí.

<sup>11</sup> Te ní xiní té Zacàriá ñ<sup>n</sup> espíritú xínú cuèchi núu Yá Ndiöxí nútní-xi xio cùha núu nàá núu càyú sá sàhá<sup>n</sup> tnámí-á<sup>n</sup>.

<sup>12</sup> Te òré ní xiní té Zacàriá espíritú-á<sup>n</sup> te ñá ní cutnùnì iní-dé nása cada-dé chi ío ní yùhú-dé.

<sup>13</sup> Te espíritú-á<sup>n</sup> ñi xáha<sup>n</sup>-xi:

—Zacàriá, vá yùhú-n chi Yá Ndiöxí ní tedóho-gá tnúhu ní cáhá<sup>n</sup>-n, te vitna coo ñ<sup>n</sup> déhe ñadìhí-n tã Elisabét te danani-n-dé Juáá.

<sup>14</sup> Te ío cudíí iní-n, te duca<sup>n</sup> ño vâi ñáiyu cudíí iní-yu na càcu-dé.

<sup>15</sup> Te ío cudíu-dé núu Yá Ndiöxí, te ñi vã cóhó-dě ndidí te ñi vã cóhó-dě ndudí sá ñi natiu, te sa cundecu ndihí-dé Espíritú Yá Ndiöxí òré cacu-dé.

<sup>16</sup> Te ñu-dé cada te ío vâi ñáiyu is-ràel natuhá-yu ichi Dútú Ndiöxí Yá cúu Ndiöxí-ó.

<sup>17</sup> Te té Juáá-á<sup>n</sup> codonù-dé núu-gã, te cundecu ndihí-dé Espíritú-gá, te taxi tnùnì-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá vãha sá cúu-xí cuè téé cuechi, te cuèi cue téé ío sàá iní-xi, te ñu-dé cada te tní-güedé tnúhu váha, tnúhu cãhá<sup>n</sup> ñáiyu quide ndáá. Te duca<sup>n</sup> càda-dé cada túha-dé ñáiyu cuendá cunu cuèchí-yu núu Dütú Ndiöxí —cächí-xi xáha<sup>n</sup>-xi xii-dé.

<sup>18</sup> Te té Zacàriá ní ndúcú tnúhu-dé núu espíritú-á<sup>n</sup>, te xáha<sup>n</sup>-dě:

—¿Te nása cutnùnì ndáá iní-í tnúhu cãhá<sup>n</sup>-n-í? Chi yúhú ío ní sahnú-í ndihí ñadìhí-í —cächí-dé xáha<sup>n</sup>-dë xii-xi.

<sup>19</sup> Te espíritú-á<sup>n</sup> ñi xáha<sup>n</sup>-xi:

—Yúhú cùu-í espíritú nání Gàbriél, te xínu cuechi-í núu Yá Ndiöxí, te mee-gã ní táuchíu<sup>n</sup>-gã náhá-í tnúhu-gá véxi cuendá cutnùnì iní-n nàcuáa cada ñaha-gã xii-ndo.

<sup>20</sup> Te vitna cuu ñihí-n te vá cãhá<sup>n</sup>-gá-n ndéé ná sàá nduu càcu déhe ñadìhí-n, chi ñá túu ní sàndáá-ni iní-n tnúhu ní cáhá<sup>n</sup>-í. Te dacuítí sáá nduu càda-xi nacuáa ní cáhá<sup>n</sup>-í-a —cächí espíritú-á<sup>n</sup> xáha<sup>n</sup>-xi xii-dé.

21 Te nchaa ñáyiú xĩndecu quehé ndétũ-yu té Zacàriá, te xĩcuñúhu-yu sá ïo cùyaa-dé xití veñúhu.

22 Te òré ní ndee té Zacàriá, te ñá ní cùu-gá cáhá<sup>n</sup> ndĩhi ñaha-dě xii-yu, te òré-á<sup>n</sup> ñĩ cutnùní iní-yu sá ñĩ xini-dé ì<sup>n</sup> espíritú xínú cuèchi núú Yă Ndiöxí xití veñúhu. Te mee-nă ndaha-dé ní quide-dé núu-yu chi ñá ní cùu-gá cáhá<sup>n</sup>-dé.

23 Te ní xínu nduu ñĩ xinu cuechi tẽ Zacàriá núú Yă Ndiöxí xití veñúhu, te cuánuhú-dé vehe-dé.

24 Te sátá dúcá<sup>n</sup> ñĩ cuu te ñadĩhí-dé tá Elisàbét ní ngúhu<sup>n</sup> déhe-a<sup>n</sup>, te úhú<sup>n</sup> yóó ñà túú tnàhí-gá ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>:

25 “Mee Dútú Ndiöxí duha ní cundàhú iní ñáhá-gă sá cóó ì<sup>n</sup> déhe-í cuendá sá vă cúú yĩchí iní ñáhá ñăyiú xii-í”, duha ní cachí-a<sup>n</sup>.

*Ì<sup>n</sup> espíritú xínú cuèchi núú Yă Ndiöxí cächí-xi sá cácu Jèsús*

26-27 Te núú ìnú yóó sã ñĩ ngúhu<sup>n</sup> déhe tá Elisàbét, te ní tendaha tũcu Yă Ndiöxí espíritú nání Gábriél cuáhá<sup>n</sup>-xi ì<sup>n</sup> ñuu nání Nàzarét cuáhá<sup>n</sup> ngoto-xi ì<sup>n</sup> xichí cuéchí nani Mariá. Te ñuu-á<sup>n</sup> yĩndèhu-xi distritú Galileá. Te xichí-ă<sup>n</sup> sa ní cundáá tnúhu sá tnăndaha-xi ndĩhi ì<sup>n</sup> tée nani Cheé ñani tnàhá ndii Dàvií.

28 Te espíritú-á<sup>n</sup> ñĩ quĩhu-xi ndéé xití vehe núú ndécú tă Măriá, te ní xáha<sup>n</sup>-xi:

—¡Cováha-n-a<sup>n</sup>! Dútú Ndiöxí ío cùu iní ñáhá-gă xii-n te ndècu ndĩhi ñaha-gá, te ío-gá xitó ñaha-gá xii-n dăcúxí dăva-gă ñăyiú dĩhí —cächí espíritú-á<sup>n</sup> xáha<sup>n</sup>-xi.

29 Dico òré ní xini tá Măriá espíritú-á<sup>n</sup>, te ní quiyùhú iní-xi sá dúcá<sup>n</sup> ñĩ cáhá<sup>n</sup> espíritú-á<sup>n</sup>. Te ní sani iní-xi: “¿Ná cuendá duha cãhá<sup>n</sup>-tu espíritú-a-í?”, duha ní sani iní-xi.

30 Te espíritú-á<sup>n</sup> ñĩ xáha<sup>n</sup>-xi:

—Măriá, vá yùhú-n chi duca<sup>n</sup> ñĩ nduu táhú-n nõu Yă Ndiöxí.

31 Te vitna ngúhu<sup>n</sup> déhe-n, te na cãcu-dé te danani-n-dé Jèsús.

32 Te ío cunuu-dě, chi Dútú Ndiöxí Yaá ío cunuu cachí-gá sá Dèhe-gá cúu-dě, te diu-gá cada te cuu-dé ì<sup>n</sup>

tée cunuu núú ñăyiú isràél dàtná ní quide-gá ndii Dàvií.

33 Te taxi tnùnı-dé ñăyiú isràél, te duca<sup>n</sup>-ni cunuu-dé ni caa ni quĩhı<sup>n</sup> —cächı-xi xáha<sup>n</sup>-xi.

34 Te tá Măriá ní xáha<sup>n</sup>-xi xii espíritú-á<sup>n</sup>:

—¿Te nása cuu tnúhu cãhá<sup>n</sup>-n te ñá túú yĩ-ı-ı? —cächı-xi xáha<sup>n</sup>-xi.

35 Te ní xáha<sup>n</sup> espíritú-á<sup>n</sup>:

—Espíritú Yă Ndiöxí quixi cundecu ndĩhi-n, te duca<sup>n</sup> Yă Ndiöxí cada-gá ì<sup>n</sup> sá vãha sá cúú-xi-n ná cãcu déhe-n. Te Yă Ndiöxí cächı-gá sá ïo cundecu yĩñùhu-dé núú-gă, chi Dèhe-gá cúu-dě.

36 Te tnàhá didı-n tă Elisàbét ñúhú dèhe-a<sup>n</sup> cuèi ío ní sahu-a<sup>n</sup>, te diu-a<sup>n</sup> cächı-yu sá vă cóó dèhe-a<sup>n</sup> ni cùu, te vitna sa ní cuu ìnú yóó ñúhú dèhe-a<sup>n</sup>.

37 Chi Yă Ndiöxí ndácú-gă quidé-gă nchaa sá vă yõo tnàhı ndăcu cada —cachı-xi xáha<sup>n</sup>-xi.

38 Te tá Măriá ní xáha<sup>n</sup>-xi:

—Yúhú ná cúnú cuèchi-ı núú Dútú Ndiöxı, te mee-gă ná cádá ñaha-gá xii-ı năcuáa ní cachı-n —cächı-xi xáha<sup>n</sup>-xi xii espíritú-á<sup>n</sup>.

Te sátá dúcá<sup>n</sup> te espíritú-á<sup>n</sup> ñĩ xica-xi cuáhá<sup>n</sup>-xi.

*Tá Măriá cuáhá<sup>n</sup> ngoto-xi tá Elisàbét*

39 Te tá Măriá ío ndĩhi cuáhá<sup>n</sup>-xi ì<sup>n</sup> ñuu cáá xitı yucu distritú Jùdeá.

40 Te ní sáa-xi vehe té Zacàriá, te cuánguihu-xi ní dándăcõo váha-xi tá Elisàbét.

41 Te òré ní tecú dóho tá Elisàbét ní cáhá<sup>n</sup> tá Măriá, te ní candá déhe-a<sup>n</sup> xitı-a<sup>n</sup>, te òré-á<sup>n</sup> ñĩ ngúndecu ndĩhi-a<sup>n</sup> Espíritú Yă Ndiöxı.

42 Te níhi ní cáhá<sup>n</sup>-a<sup>n</sup>, te xáha<sup>n</sup>-a<sup>n</sup> xii tá Măriá:

—Yă Ndiöxı ío xitõ ñaha-gá xii-n dăcúxı dăva-gă tnàha dıhı-õ, te duca<sup>n</sup>-ni xitõ-gă cuèi déhe-n.

43 ¿Te ná cúú yùhú nõu véxi coto ñaha yõhõ năná Yaá cúú Xitõhõ-ı-ı?

44 Chi òré-ni ní tecú dóho-ı ní cáhá<sup>n</sup>-n te ní candá-ni déhe-ı xitı-ı sá cùdı inı-dé.

45 Te váha táhú yõhõ sá ni sândáá inı-n, chi dacuitı sã cádá Dútú Ndiöxı

nàcuáa ní cáhá<sup>n</sup> espíritú ní tendaha-gă ní quixi ní cachí tnúhu xii-n nàcuáa cada-gă —càchí-a<sup>n</sup> xăha<sup>n</sup>-a<sup>n</sup> xii tá Màriá.

<sup>46</sup> Te ní xăha<sup>n</sup> tă Màriá:  
Ío càhnu cuu Dútú Ndiöxí,  
<sup>47</sup> Ío cùdíí ìní-í chi ðiu-gă taunihnu ñaha-gă xii-í núú ùhú núú ndàhú.

<sup>48</sup> Chi ní ndacu ìní ñáhá-gă xii yúhú, te ðicó ñ<sup>n</sup> xíchí xínú cuèchi núú-gă cùú-í,  
te vitna te nchaandi túhú ñáyiu cachí-yu sá Ío váha táhù-í.

<sup>49</sup> Te Yá Ndiöxí cándòo caa nine ìní-gă, te Ío càhnu ñ<sup>n</sup> sá váha ní quide-gă sá cúú-xì-í.

<sup>50</sup> Te cùndahú ìní-gă nchaa ñáyiu nèhe sá yíñùhu núú-gă.

Te duca<sup>n</sup>-ni cuèi ñáyiu sa ndècu ñuyúú-a ndihí ñáyiu vitna véxi.

<sup>51</sup> Chi ta quide-gă nchaa sá vă yõ tnàhí ndàcu cada véxi,  
te ta dàndòo canúú-gă cue ñáyiu quide cahnu mee-xi.

<sup>52</sup> Te cue ñáyiu tàxi tnuní ñá túú-gă dáñá-gă taxi tnùn-í-yu,  
te cue ñáyiu ndàhú ní quide nínu ñaha-gă xií-yu.

<sup>53</sup> Te cue ñáyiu ndècu ndihí tnúndòho tnúhu ndàhú ní quide váha ñaha-gă xií-yu,

te cue ñáyiu cuica ñà túú nă ní ñihí-gă-yu cundecu ndihí-yu.

<sup>54</sup> Te chindee-gă ñáyiu isrâél, ñáyiu xínu cuechi núú-gă, te ñá túú dàña nihnu ñaha-gă xií-yu, chi cùndahú ìní ñáhá-gă.

<sup>55</sup> Chi duca<sup>n</sup> ñí xăha<sup>n</sup>-gă xii ndíi Àbrahám, ndihí cue ñaní tnáhá ndíi.

Duha ní xăha<sup>n</sup> tă Màriá xii tá Elisàbét.

<sup>56</sup> Te ní xíndecu tá Màriá dàtná úní yóó ndihí tá Elisàbét te dàtnùnì cuánuhú-xi vehe-xi.

*Ní cacu té Juàá tée dacuàndute ñaha xii ñáyiu*

<sup>57</sup> Te ní sáá nduu ñí cacu ñ<sup>n</sup> déhe tée tá Elisàbét.

<sup>58</sup> Te nchaa ñáyiu ndècu yatni ndihí-a<sup>n</sup>, ndihí nchaa ñaní tnáhá-á<sup>n</sup> ñí ñihí-yu tnúhu nàcuáa ní chindee ñaha

Yá Ndiöxí xii-a<sup>n</sup>. Te Ío ní cudíí ìní-yu cuèndá-a<sup>n</sup>.

<sup>59</sup> Te núú ùná nduu sá ñí cacu déhe-a<sup>n</sup>, te ní sáhá<sup>n</sup> ñáyiu núú ndécú-á<sup>n</sup> cuèndá cuáhă-yu sèñá ñí déhe-a<sup>n</sup>. Te cuìní-yu cunani déhe-á<sup>n</sup> Zacàriá dàtná nání tătá ní cùu.

<sup>60</sup> Te ní xăha<sup>n</sup> năná déhe-á<sup>n</sup>:  
—Ñáhá, chi Juàá cunani-dě —  
càchí-a<sup>n</sup> xăha<sup>n</sup>-a<sup>n</sup> xii-yu.

<sup>61</sup> Te ní xáhă<sup>n</sup>-yu:  
—¿Te ná cuèndá te ñá túú ñí ñaní tnáhá-ndó dùca<sup>n</sup> nani-i? —cachí-yu xáhă<sup>n</sup>-yu.

<sup>62</sup> Te ní quidé-yu ndàhá-yu núú tătá déhe-á<sup>n</sup> cuèndá cuìní-yu núú nása cuìní méé-dě cunani déhe-dé.

<sup>63</sup> Te ní xícá<sup>n</sup>-dé ñ<sup>n</sup> tutú ní chídó tnùn-í-dé nàcuáa cunani déhe-dé, te duha ní chídó tnùn-í-dé: “Juàá cunani-dě”, càchí-xi núú tütú ní tee-dé-á<sup>n</sup>. Te nchaa ñáyiu xíndecu-á<sup>n</sup> ñí cuñúhu-yu nàcuáa ní cuu.

<sup>64</sup> Te òré-á<sup>n</sup> ñí nacáhá<sup>n</sup> té Zacàriá sá ñí cuu ñihí-dé ní cùu, te ní ngúíta-dé ní cachí-dé sá Ío càhnu cuu Yá Ndiöxí.

<sup>65</sup> Te nchaa ñáyiu xíndecu yatni ndihí-dé ní cuñúhu-yu, te nchaa ñáyiu xíndecu ñihí xití yucu ðistritú Jùdeá ní ñihí-yu tnúhu nàcuáa ní cuu.

<sup>66</sup> Te nchaa ñáyiu-á<sup>n</sup> Ío vâi ní sani ìní-yu, te ní xítnáhá-yu:

—¿Ná cúú să cádá tēe-ă<sup>n</sup> ndéé ìdá-gă ná cuèhnu-dé? —càchí-yu xítnáhá-yu.

Te duca<sup>n</sup> ñí xítnáhá-yu chi Dútú Ndiöxí ndécú ndihí ñaha-gă xii-dé.

*Té Zacàriá càchí-dé sá Ío càhnu cuu Yá Ndiöxí*

<sup>67</sup> Te té Zacàriá tătá tē ñihí-á<sup>n</sup> ñí ngúndecu ndihí-dé Espíritú Yá Ndiöxí te ní cáhá<sup>n</sup>-dé nchaa tnúhu sá ñí dánèhé ñáhá-gă, te ní cachí-dé:

<sup>68</sup> Ío càhnu cuu Dútú Ndiöxí nchoo ñáyiu isrâél,

chi ní quixi coto ñaha-gă xii-o, te cùu-o ñáyiu cùu cuèndá-gă, chi dàcácu nihnu ñaha-gă xii-o vitna.

<sup>69</sup> Chi ní tendaha-gă ñí tēe véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíí tée ní xinu cuechi nùú-gã ndéé sanaha.

70 Te ñu-ni tnúhu ní cáhá<sup>n</sup> Yã Ndiõxí ní cáhá<sup>n</sup> cue tée ní quide ndáá ní xíndecu nùú-gã ñuyíú-a ndéé sanaha.

71 Te ní cachí-güedé sá táunìhnu ñaha-gá xii-o nùú nchàa ñáyíu cùu úhú iní ñáhá, ndíhi nùú nchàa ñáyíu ñá túú cùu quini ndee ñáhá.

72 Te ní xáha<sup>n</sup>-gã sá cündàhú iní ñáhá-gã xii-o, te duca<sup>n</sup> càda-gá chi vá nácuànaa-gá tnúhu ní cáhá<sup>n</sup>-gã ndíhi-güedé.

73 Te ñu duca<sup>n</sup> ndùu tnúhu ní xáha<sup>n</sup>-gã xii ndíi Àbrahám sá

74 táunìhnu ñaha-gá xii-o nùú nchàa ñáyíu cùu úhú iní ñáhá, cuendá sá vã yùhú-ó cùnu cuechi-o nùú-gã.

75 Te cada ndáá-ó, te cundecu yíñuhu-o nùú-gã ndí nchàa nduu cundecu-o ñuyíú-a.

Duha ní cachí té Zacàriá.

76 Te xáha<sup>n</sup>-dë xii té líhli-á<sup>n</sup>:  
Te yòhó té líhli, cáhá<sup>n</sup> ñáyíu cuendá-n sá cúu-n ñ<sup>n</sup> tée càhá<sup>n</sup> tnúhu Dútú Ndiõxí Yáá ío cùnnuu,

chi quíhí<sup>n</sup>-n còdonuu-n nùú Yáá cúu Xítohó-ó dàtúha-n ñáyíu cuendá cundecu túha-yu òré quexìo-gá.

77 Te cúñaha-n xii ñáyíu isràél sá cuiní-gá cada càhnu iní-gá nchaa cuéchi-yu,

te naníhí tàhú-yu.

78 Te duca<sup>n</sup> càda-gá chi ío cùu iní ñáhá-gã xii-o, chi ndéé andíu ní tendaha-gã ñ<sup>n</sup> tée véxi

cuu<sup>n</sup>-dé dandíxi túu-dé iní-ó cuendá cutnùní iní-ó nácuáa ndùu cuendá Yã Ndiõxí.

79 Te duca<sup>n</sup> dandíxi túu-dé iní nchaa ñáyíu ndècu ichi cuehé ichi duha ta xíta nihnu cuáhá<sup>n</sup> cuendá nucúnu ichí-yu ñ<sup>n</sup> ichi váha.

Duha ní xáha<sup>n</sup> tã Zacàriá xii déhe-dé.

80 Te té líhli-á<sup>n</sup> tá sàhnu-dé, te ta chíndee chítúu ñaha Yã Ndiõxí xii-dé cuáhá<sup>n</sup>, te ní xíndecu-dé xití yucu ndéé

ní sáa nduu ní ngüíta-dé ní cáhá<sup>n</sup>-dé nùú cuè ñáyíu isràél tnúhu Yá Ndiõxí.

## 2

### *Ní cacu Jèsús (Mt. 1:18-25)*

1 Te dàvá-á<sup>n</sup> ní táuchíú<sup>n</sup> tã Àugustú Cèsár nucódó tnùnì nchaa ñáyíu nació<sup>n</sup> yíndàha-dé.

2 Te xéhé sã díhnanuu ní nucódó tnùnì ñáyíu, te ñu-ni dàvá-á<sup>n</sup> ní cunuu té Cìreníú distritú Sìriá.

3 Te nchaa ñáyíu ní natacá-yu ñuú nùú ní cacú-yu cuendá nucódó tnùnì-yu.

4 Nùu xíá<sup>n</sup> ní quee té Chèé ñuú Nazàrét ñ<sup>n</sup> ñuú yíndèhu distritú Galileá, te cuáhá<sup>n</sup>-dé ñuú Bèlén ñ<sup>n</sup> ñuú yíndèhu distritú Jùdeá, chi xíá<sup>n</sup> ní cuu ñuú ndíi Dàvíí, te ñu-ni ñaní tnáhá tã Chèé-á<sup>n</sup> ní cuu ndíi.

5 Nùu xíá<sup>n</sup> cuáhá<sup>n</sup>-dé ndéé ñuú Bèlén nucódó tnùnì-dé, te tnáhá tá Màriá xíchí ní cundáá tnúhu sá tnàndaha ndíhi-dé cuáhá<sup>n</sup> ndíhi ñaha-dë, te sa ñuhu déhe-xi.

6 Te ñini cùyaá-yu ñuú Bèlén-á<sup>n</sup> ní sáa òré cacu déhe-xi.

7 Te ní cacu déhe díhna-xi, te ní chidúcú<sup>n</sup>nuu-xi dóó, te ní sacá<sup>n</sup> ñáhá-xí ñ<sup>n</sup> vehe nùú cúu vèhe quiti, chi ñá túú ní ñíhí-yu vehe coó-yu.

### *Cue espíritú xínú cuèchi nùú Yã Ndiõxí ndíhi cue toli.*

8 Te yatni ñuú-á<sup>n</sup> xíndecu ñ<sup>n</sup> úú toli ndéé-güedé mbéé-güedé ndécú-güedé majadá niú-á<sup>n</sup>.

9 Te uu<sup>n</sup>ni ní quexìo ñ<sup>n</sup> espíritú xínú cuèchi nùú Yã Ndiõxí, te Yá Ndiõxí ní quide-gá ní dáyhé-xi ní càndéé nùú xíndecu-güedé, te ní yùhú víhí-güedé.

10 Te ní xáha<sup>n</sup> espíritú-á<sup>n</sup>:

—Vá yùhú-ndó, chi nàha-í ñ<sup>n</sup> tnúhu váha véxi sá cúu-xí-ndó, te ío cudíí iní-ndó ndíhi nchaa ñáyíu.

11 Chi vitna ní cacu ñ<sup>n</sup> tée dàcácu nihnu ñaha xii-ndo nùú úhú nùú ndàhú ñuú ndíi Dàvíí, te tée-á<sup>n</sup> cúu-dë Xítohó Jesucristú.

12 Te dàtná ñ<sup>n</sup> sèñá te naníhí-ndó tã líhli-á<sup>n</sup> yídúcú<sup>n</sup> nuu-dé dóó cáá-dë



ɨ<sup>n</sup> vehe quiti —càchí-xi xǎha<sup>n</sup>-xi xìi-güedé.

13 Te òré-á<sup>n</sup> nǐ quexìo cuéhé víhí espíritú véxi cuu<sup>n</sup> andi<sup>u</sup> nǐ naníhí tñáhá-xí ndíhí espíritú-á<sup>n</sup>, te ní ngüíta-xi ní chiñuhu-xi Yǎ Ndiöxí, te càchí-xi:

14 ¡Ío càhnu cuu Yá Ndiöxí Yaá ndécú àndi<sup>u</sup>,

te na cùndecu váha-ni nchaa ñáyi<sup>u</sup> cùu iní méé-gǎ!

Duha càchí cue espíritú-á<sup>n</sup>.

15 Te òré cuándaa cue espíritú-á<sup>n</sup> andi<sup>u</sup>, te ní ngüíta cue toli-ǎ<sup>n</sup> xǐtnàha-güedé:

—Na quíhí<sup>n</sup>-ó ñùú Bèlén quini-ó nàcuáa ní cuu, chi Dútú Ndiöxí sa ní cachí tñúhu-gá —càchí-güedé xǐtnàha-güedé.

16 Te ní tñi-güedé ichi súúni ndíhí cuáhá<sup>n</sup>-güedé, te ní naníhí-güedé tá Màriá ndíhí té Chèé, ndíhí té líhli-á<sup>n</sup> cáá-dě xítí ɨ<sup>n</sup> vehe quiti.

17 Te òré ní xiní ñáhá-güedé te ní xáha<sup>n</sup>-güedé xii-yu nàcuáa ní xáha<sup>n</sup> espíritú-á<sup>n</sup> xii-güedé cuendá té líhli-á<sup>n</sup>.

18 Te nchaa ñáyi<sup>u</sup> ní tecú dóho-xi ní cuñúhu-yu nàcuáa ní cáhá<sup>n</sup>-güedé.

19 Dico tá Màriá chi ñúhu nahi-ni iní-xi, te dícó-ni sàni iní-xi cuendá nchaa tñúhu-á<sup>n</sup>.

20 Te cue toli-ǎ<sup>n</sup> nǐ natñi-güedé ichi, te ta xǐtnàha-güedé cuanuhú sá ío càhnu cuu Yá Ndiöxí cuendá nchaa tñúhu ní xǐndedóho-güedé, ndíhí cuendá nchaa sá nǐ xiní-güedé, chi cuendá sá ndáa ní cuu nchaa nàcuáa ní tecú tñúhu-güedé.

### *Ndècá-yu Jèsús cuáhá<sup>n</sup> veñúhu*

21 Te núú ùná nduu sá nǐ cacu té líhli-á<sup>n</sup>, te ní sáha-güedé sèñá ñi-dé, te ní dánání ñaha-güedé Jèsús xii-dé, di<sup>u</sup>-ni nàcuáa ní xáha<sup>n</sup> espíritú xínú cuèchi núú Yá Ndiöxí xii tá Màriá ndéé cùtnàhá vátá ngúhu<sup>n</sup>-gá-dé xítí-xi.

22 Te sátá nǐ tnahá nduu, ndùu ï<sup>u</sup>-yu nàcuáa càhá<sup>n</sup> nchaa tñúhu ní chídó tñùní ndíi Moisés, te ndècá-yu té líhli-á<sup>n</sup> cuáhá<sup>n</sup> ñuú Jerusàlén cuendá quee túu-dé núú Dútú Ndiöxí.

23 Te duca<sup>n</sup> nǐ quidé-yu, chi duca<sup>n</sup> càhá<sup>n</sup>-xi núú tütú Yá Ndiöxí sá ncháá làndú téé na càcu díhna quetúu-güexi núú-gǎ cuendá cundecu-ná-güexi cuendá-gá.

24 Te ní quidé-yu nàcuáa càhá<sup>n</sup> Yá Ndiöxí núú tütú-gá núú càchí-xi: “Canehe-ndo úú lõmá àdi úú cùcu quíhí<sup>n</sup> nduu táhú ñáhá Yá Ndiöxí”, duha càhá<sup>n</sup>-gá núú tütú-gá.

25 Te dàvá-á<sup>n</sup> ndécú ɨ<sup>n</sup> téé nàni Mió ñuú Jerusàlén. Te ío váha iní-dé, te chiñuhu-dé Yá Ndiöxí, te ndètu-dé sáa nduu chindee ñaha Yá Ndiöxí xii ñáyi<sup>u</sup> isràél. Te ndècu ndíhí té Mió-á<sup>n</sup> Espíritú Yá Ndiöxí.

26 Te sa ní xáha<sup>n</sup>-xi xii-dé sá vǎ cùu-ni-dé, chi dacuítí quini-dé Crístú Yaá tendaha Yá Ndiöxí quixi ñuyíú-a.

27 Te téé-á<sup>n</sup> ndécá ñaha Espíritú Yá Ndiöxí xii-dé cuáhá<sup>n</sup> veñúhu càhnu sá ío cùnuu. Te cuáhá<sup>n</sup>-yu ndíhí Jèsús veñúhu-á<sup>n</sup> cuendá cadá-yu ndíhí-gá nàcuáa càhá<sup>n</sup> tñúhu ní chídó tñùní ndíi Moisés.

28 Te òré ní sáa-yu, te té Mió-á<sup>n</sup> nǐ nguídèhé-dé Jèsús, te ní cáhá<sup>n</sup>-dé sá ío càhnu cuu Yá Ndiöxí, te ní xáha<sup>n</sup>-dè xii-gá:

29 Yòhó Dútú Ndiöxí sa ní cuu dañá-n cùu-í vitna,

chi sa ní quide-n nàcuáa ní cachí-n xii yúhú téé xínu cuechi núú-n.

30 Chi sa ní xiní núu-í Yaá dácacu ni-hnu ñaha xii ñáyi<sup>u</sup> núú ùhú núú ndáhú vitna.

31 Te Yaá ní tendaha-n vèxi núú ndécú ncháa ñáyi<sup>u</sup> ñuyíú-a.

32 Te cùu-gá dàtná ɨ<sup>n</sup> ñuhú, chi dandixi túu-gá iní ñáyi<sup>u</sup> cuendá cutnùní iní-yu cuendá Yá Ndiöxí cuèi ñá díú ñáyi<sup>u</sup> isràél cúú-yu.

Te di<sup>u</sup>-gá cada, te canehe ñáyi<sup>u</sup> dava-gá ñuú sá yíñuhu núú ñáyi<sup>u</sup> isràél chi di<sup>u</sup> ñáyi<sup>u</sup> isràél cúú-yu ñáyi<sup>u</sup> cùu cuendá-n.

Duha ní xáha<sup>n</sup> tǎ Mió xii Yá Ndiöxí.

33 Te té Chèé ndíhí nǎná Jèsús ní cuñúhu-yu tñúhu ní cáhá<sup>n</sup> té Mió cuendá-gá.

34 Te dàtnùní té Mió ní xícá<sup>n</sup> táhú-dé núú Yá Ndiöxí cuendá-yu, te xáha<sup>n</sup>-dè xii tá Màriá nǎná Jèsús:

—Cundedóho tnúhu na cãhá<sup>n</sup>-í-a, té lihli-a ní nduu táhú-dě nacanu ichi-dé dava ñáyiú israhél ichi Yá Ndiöxí, te davá-yu vá tñí-yu tnúhu cãhá<sup>n</sup>-dé, te ñáyiú-án cuíta nihnú-yu, te cada-dé nãcuáa cutnùní iní ñáyiú sá Yá Ndiöxí ní tendaha ñaha-gá xii-dé, dico vá quindáá iní-yu, chi daquèe tíhú ñáhã-yu xii-dé.

35 Te duca<sup>n</sup> te cutnùní nãcuáa sàni iní ñ<sup>n</sup> ñáyiú. Dico sá cúú-xí yòhó chi ío cada ndàhú-xi iní-n, chi súúni dàtná sá ñí nícuèhé iní-n càda-xi — cachí-dé xãha<sup>n</sup>-dě xii tá Màriá.

36 Te xiá<sup>n</sup> ndécú tnhá ñ<sup>n</sup> ñaha cãhá<sup>n</sup> tnúhu Yá Ndiöxí nání-án Áná, te tãtá-a<sup>n</sup> ní xínani-dě Fànuél ñaní tnhá ndí Àsér. Te ñaha-án sa ní sahnu vèhi-a<sup>n</sup>, te cuechi-ni-a<sup>n</sup> ñí tñándaha-a<sup>n</sup> te úsá-ni cuiá ñí xíndecu-a<sup>n</sup> ndíhi yí-a<sup>n</sup>,

37 te ní quendóo quèé-a<sup>n</sup>, te sa ñùhu-a<sup>n</sup> cúmídícó cùmí cuiá-a<sup>n</sup>. Te ñá túú ní xòo quee-a<sup>n</sup> veñúhu càhnu sá ío cùnuu, chi nduu niú ní xóo chiñuhu-a<sup>n</sup> Dútú Ndiöxí, te áma ñá túú tnhá ná ní xòo caxi-a<sup>n</sup> ní xóo cãhá<sup>n</sup> ndíhi-a<sup>n</sup> Yá Ndiöxí.

38 Te ði-u-ni òré ndécú-yu ndíhi Jèsús ní quexìo-a<sup>n</sup> núú-yu, te ní ndacá<sup>n</sup> táhú-án núú Yá Ndiöxí cuèndá sá ñí xíní-a<sup>n</sup> Jèsús, te dàtnùní ní ngüíta-a<sup>n</sup> cãhá<sup>n</sup> váha-a<sup>n</sup> cuèndá-gá núú nchàa ñáyiú, ñáyiú ndètu quini sáá nduu dàcácu Yá Ndiöxí ñáyiú Jerusàlén núú tñndòho tnúhu ndàhú.

### *Cuánuhú-yu ñuú Nazàrét*

39 Te sátá ñí quidé-yu nchaa nãcuáa cãhá<sup>n</sup> tnúhu Yá Ndiöxí, te cuánuhú-yu ñuú Nazàrét núú ndécú tnhá-yu, te ñuú-án yíndèhu-xi distritú Galileá.

40 Te té lihli nàni Jesús-án tá sàhnu-dé, te ta nihí ndéé-dě cuáhá<sup>n</sup>, te duca<sup>n</sup> ío váha ta sáá sá xíní tñùní-dé cuáhá<sup>n</sup>, chi Yá Ndiöxí ndécú ndíhi ñaha-gá xii-dé.

### *Jèsús ndécú-gã veñúhu*

41 Te ndí tnhá cuiá ñí xóo quíhí<sup>n</sup> té Chèé ndíhi nãná Jèsús vico pãscuá ñuú Jerusàlén.

42 Te cútnhá ní chítú Jèsús úxúú cuiá-gã, te cuáhá<sup>n</sup>-yu ndíhi-gã ñuú

Jerusàlén vico pãscuá, chi duca<sup>n</sup> tnhá quidé-yu.

43 Te òré ní yáha vico, te ní natnì-yu ichi cuánuhú-yu, te ní quendóo-gá ñuú Jerusàlén, te ni nãná-gã, te ni tẽ Chèé ñá túú ní xíní ní quendóo-gá.

44 Chi ní sani iní-yu sá ñútnhá-gá tnuú nchaa ñáyiú ní sáhá<sup>n</sup> vico cuánuhú. Te ní xúhu<sup>n</sup>-yu ñ<sup>n</sup> nduu ichi ta ndùcu tnúhu-yu-gá núú nchàa ñaní tnhá-yu, ndíhi núú nchàa ñáyiú xíní tnhá ndíhi-yu,

45 te ñá túú ní náníhí ñáhã-yu xii-gá. Núú ní nacuicó-yu cuánuhú tucú-yu ñuú Jerusàlén cuèndá yacá<sup>n</sup> nanducu ñhá-yu xii-gá.

46 Te núú ùní nduu sá ñí dana núú ñáhã-yu xii-gá, te ní naníhí ñáhã-yu núcóo-gá xití veñúhu càhnu sá ío cùnuu tnuú cue téè dàcuaha ñaha xii-yu nchaa tnúhu ní chídó tñùní ndí Moisés, te ndédóho ñaha-gã xii-güedé, te nándí sá ndúcú tñhu-gá núú-güedé.

47 Te nchaa cue téè xíndedóho ñaha xii-gá xícuñúhu-güedé sá ío váha sáá sá xíní tñùní-gá, te ío váha nihí-gá tnúhu nãdanchocáva-gá.

48 Te òré ní xíní ñáhá tẽ Chèé ndíhi nãná-gã xii-gá, te ío ní cuñúhu-yu, te ní xáha<sup>n</sup> nãná-gã xii-gá:

—Yòhó déhe-í, ¿ná cuèndá duca<sup>n</sup> ñí quide ñaha-n xii-ndí? Te tãtá-n ndíhi yúhú ndíhú iní-ndí xicá nãnducu ñaha-ndí xii-n —càchí-xi xãha<sup>n</sup>-xi xii-gá.

49 Te ní xáha<sup>n</sup> Jèsús xii-yu:

—¿Ná cuèndá nãnducu ñaha-ndo? ¿Náa ñá túú xíní-ndó sã núú chíú<sup>n</sup> Tãtá-í tàú-í caca cuu-í-án? —càchí-gã xãha<sup>n</sup>-gã xii-yu.

50 Dico mèé-yu ñá túú ní tècú tñùní-yu nãcuáa ní xáha<sup>n</sup>-gã.

51 Te sátá dúcá<sup>n</sup> te cuánuhú ndíhi ñhá-yu xii-gá ñuú Nazàrét, te ío ní sãndáá iní ñáhã-gã xii-yu. Te nchaa sá ñí quide-gá-án ñí xúhu<sup>n</sup> nahi-ni iní nãná-gã.

52 Te Jèsús duca<sup>n</sup>-ni ta sàhnu-gã cuáhá<sup>n</sup>, te ta sáá-gã sá xíní tñùní-gã cuáhá<sup>n</sup>, te duca<sup>n</sup> cùði-u-gã núú Yá Ndiöxí, ndíhi núú nchàa ñáyiú.

## 3

*Té Juàá téè dàcuandute ñaha xii ñáyiú cáhá<sup>n</sup>-dé tnúhu Yá Ndiõxí xití yucu (Mt. 3:1-12; Mr. 1:1-8; Jn. 1:19-28)*

<sup>1</sup> Te ní cuu sáhú<sup>n</sup> cuíá sã yíndàha té Tiberiú cuéhé nàció<sup>n</sup>, te dàvá-á<sup>n</sup> ñí cunuu té Pilatú distritú Jùdeá, te té Hèrodés ní cunuu-dé distritú Galileá, te ñaní-dé té Lìpé ní cunuu-dé distritú Itùreá ndíhi ìngá distritú nání Tràconité, te té Lisàniás ní cunuu-dé distritú Abìliniá.

<sup>2</sup> Te té Ànás ndíhi té Caifás ní cuu-güedé dútú cùnùu. Te dàvá-á<sup>n</sup> ñí cáhá<sup>n</sup> ndíhi ñaha Yá Ndiõxí xii té Juàá déhe té Zacàriá xití yucu sá quíhí<sup>n</sup>-dé cáhá<sup>n</sup>-dé tnúhu-gá núú ñáyiú.

<sup>3</sup> Te té Juàá ní yáha-dé nchaa ñuú cáá yàtni yúte Jòrdán, te xáha<sup>n</sup>-dè xii nchaa ñáyiú:

—Chí dándìxi túu iní sá ñà túú quíde váha-ndo, te dañá-ndo nchaa ichi cuehé ichi duha ndècu-ndo, te cuandute-ndo, te duca<sup>n</sup> te cada càhnu iní Yá Ndiõxí nchaa yíca cuèchi-ndo — duha ní xáha<sup>n</sup>-dè xii-yu.

<sup>4</sup> Te duca<sup>n</sup> ñí quíde-dé chi ní quee ndáá-xi nàcuáa ní chídó tñuní ndí Chàíá téè ní xóo cáhá<sup>n</sup> tnúhu Yá Ndiõxí ndéé sanaha núú tütú ndí núú càchí-xi:

Tècú càhá<sup>n</sup> níhi ì<sup>n</sup> téè yìhi xití yucu, te xáha<sup>n</sup>-dè xii ñáyiú:

“Chí dañá nchaa ichi cuehé ichi duha ndècu-ndo, te tñi-ndo ichi váha,

te duca<sup>n</sup> càda-ndo cuendá cundecu túha-ndo, chi véxi Yaá ío cùnùu.

<sup>5</sup> Te nchaa núú cùnú nachítú, te nchaa tìndúú ndíhi nchaa yucu ngoyo nihnu cuendá nduu ndáá,

te nchaa ichi ñá túú cuáhá<sup>n</sup> ndáá nduu ndáá,

te nchaa ichi ñá túú càváha nduu váha.

<sup>6</sup> Te nchaa ñáyiú ñuyíú-a níhí-yu tnúhu sá Yá Ndiõxí véxi-gá dàcácu nihnu ñaha-gã xii-yu núú ùhú núú ndàhú.”

Duha ní chídó tñuní ndí Chàíá núú tütú ndí.

<sup>7</sup> Te òré ní xica ñáyiú cuáhá<sup>n</sup>-yu cuendá dacuandute ñaha té Juàá xii-yu, te ní xáha<sup>n</sup>-dè:

—ìNchaa nchòhó cúú-ndó dàtná ì<sup>n</sup> cóó déé<sup>n</sup> chí ío cuihna ìní-ndó! ¿Te nása ní cuu núu tñàhá nchòhó ndúcú-ndó nàcuáa cácu nihnu-ndo núú tñùndòho cahnu vihi sá tá cùyatni ñaha xii-ndo véxi-i?

<sup>8</sup> Te chí cáda vãha vitna cuendá duca<sup>n</sup> cùnùnì sá ñí dañá-ndó nchaa ichi cuehé ichi duha ndècu-ndo. Te vá càchí-ndó sã ío càhnu cuu-ndo cuendá sá cúú-ndó ñaní tñáhá ndí Abrahám, chí cuèi ndéé yúú te ndacu Yá Ndiõxí ndada-gá ñáyiú te cuú-yu ñaní tñáhá ndí Abrahám.

<sup>9</sup> Te caá chí ndècu túha-xi sá quèhndé-xi nchaa yutnu sá ñà túú càváha sávidí-xi, chí nchaa yutnu-án tèhndé-xi te cuánguee-xi núú ñùhú càyú-xi. Te duha sãtnahá-xi ndoho nchaa ñáyiú ñá túú quíde váha, chí nchaa ñáyiú duca<sup>n</sup> ñà túú quíde váha cúú-yu dàtná nchaa yutnu sá ñà túú càváha sávidí-xi. —càchí-dé xáha<sup>n</sup>-dè xii-yu.

<sup>10</sup> Te ní xíca<sup>n</sup> tnúhu-yu núú-dè, te xáhá<sup>n</sup>-yu:

—¿Te nása cada-ndí váí<sup>n</sup>? —càchí-yu xáhá<sup>n</sup>-yu xii-dé.

<sup>11</sup> Te xáha<sup>n</sup>-dè:

—Te núu ndèdacàa-ndo ndecu ndíhi-ndo úú dóó te cuáñaha-ndo ì<sup>n</sup> xii ñáyiú ñá túú ndècu ndíhi, àdi núu ndècu ndíhi-ndo sá nchító-ó te cuáha-ndò-yu na càxí-yu —càchí-dé xáha<sup>n</sup>-dè xii-yu.

<sup>12</sup> Te ní quexio ì<sup>n</sup> úú cue téè cuihna ìní-xi quíde cobrá ñáhá xii ñáyiú cuendá impuèstú cuendá cuandute-güedé, te ní xíca<sup>n</sup> tnúhu-güedé núú tè Juàá, te xáha<sup>n</sup>-güedé:

—Mèstrú, ¿te nása cada-ndí cuendá cuu váha iní Yá Ndiõxí-i? — càchí-güedé xáha<sup>n</sup>-güedé xii-dé.

<sup>13</sup> Te té Juàá ní xáha<sup>n</sup>-dè:

—Vá cuídó-ndó càda cobrá-ndó ñáyiú —càchí-dé xáha<sup>n</sup>-dè xii-güedé.

<sup>14</sup> Te tñàhá ì<sup>n</sup> úú cue téè cùu sandadú xíndecu-án ñí xíca<sup>n</sup> tñùhú-güedé núú tè Juàá, te xáha<sup>n</sup>-güedé:

—Te nchúhú ¿nása cada-ndí cuendá cuu váha iní Yá Ndiöxí-i? —  
càchí-güedé xáha<sup>n</sup>-güedé xii-dé.

Te ní xáha<sup>n</sup> tē Juàá:

—Vá quéndèé-ndó sã néhé tnàha ñáyiu-ndo, te ni vã dácàa díquí-ndõ-yu ì<sup>n</sup> sá ñà túú nã quidè-yu, te nduu vétú iní-ndó nàcuáa ñùhu yáhu-ndo —càchí-dé xáha<sup>n</sup>-dè xii-güedé.

15 Te nchaá ñáyiu xĩndetu sá quíxí Crístú sàni ì<sup>n</sup> sàni úú iní-yu núu sá díú Crístú Yaá tendaha Yá Ndiöxí quixi ñuyúú-a cùu te Juàá àdi ñáhá.

16 Dico té Juàá ní cáhá<sup>n</sup> ndodo-dé núu-yu nchaá-yu, te xáha<sup>n</sup>-dè:

—Na càchí tnúhu ndáá-í xii-ndo sã yúhú véxi-í sá cuendá-ni dacuàndute ñaha-í xii-ndo dàtná ní cachí Yá Ndiöxí, dico nchìcú<sup>n</sup> ingá tée véxi, te tée-á<sup>n</sup> taxi-dé Espíritú Yá Ndiöxí cundecu ndihí-ndo, te cùu-xi datná ì<sup>n</sup> ñuhú, chi ndada ndoo ndada nine-xi iní-ndó. Te tée-á<sup>n</sup> ïo-gá cúnùu-dé dàcúxí yúhú, chi yúhú cùu-í ì<sup>n</sup> tée duu<sup>n</sup> duu<sup>n</sup> ñá túú tàú-í nandaxi-í cuèdicó ñì chàu-dé dico quide-í chiu<sup>n</sup>-dè.

17 Te tée-á<sup>n</sup> sa véxi túha-dé sá cáda ì<sup>n</sup> ñaha-dé xii-o dàtná quidè ñáyiu ndàda ndoo triú, chi ñáyiu-á<sup>n</sup> sa nèhe túha-ná-yu yaxí<sup>n</sup>-yu òré nãñani cuendá ndada ndoó-yu, te òré ndádá ndòó-yu triú-á<sup>n</sup> te dàquee dí<sup>n</sup>-yu mihi-xi, te tàxúha-yu mee-nã triú-á<sup>n</sup>, te mihi-xi-á<sup>n</sup> sáhmí-yu. Te dàtná quidè-yu mihi triú-á<sup>n</sup> duca<sup>n</sup> sãtnahá-xi cada ñaha tée-á<sup>n</sup> xii nchaá ñáyiu ñá túú quide váha, chi daquihí<sup>n</sup> ñáhá-dè xií-yu núú ñùhú núú càyú, te ñuhú-á<sup>n</sup> ñà túú tnàhí ndàhvã —càchí-dé xáha<sup>n</sup>-dè xií-yu.

18 Te titní víhí-gã tnúhu váha ní xáha<sup>n</sup> tē Juàá xii-yu òré ní dásàhú ñáhá-dè.

19 Te ní cáhá<sup>n</sup>-dé dóho té Hèrodés cuendá sá ndécá-dè ì<sup>n</sup> ñaha nàni Herodiás ñaha ní cándeca ñani-dé té Lìpé, te ní xáha<sup>n</sup>-dè cuendá nchaá dava-gá sá cuèhé sá dúhá quide-dé.

20 Dico té Hèrodés ñá túú ní quide cuendá-dé tnúhu ní cáhá<sup>n</sup> té Juàá, chi

nèhé-gá tucu ní quide-dé, chi da ve-caá ní chihi-dé té Juàá.

*Sàndute Jesús*

(Mt. 3:13-17; Mr. 1:9-11)

21 Te òré dacuàndute té Juàá nchaá ñáyiu, te tnàhá Jèsús ní dacuàndute ñaha-dé xii-gá. Te ñini càhá<sup>n</sup> ndihí-gá Dútú Ndiöxí ní nacaá<sup>n</sup> andiu,

22 te ní quee Espíritú Yá Ndiöxí véxi cuu<sup>n</sup> túu-xi, te càa-xi datná cáá ì<sup>n</sup> lómá, te òré-á<sup>n</sup> ñì tecú ní cáhá<sup>n</sup> Yá Ndiöxí ndéé andiu, te xáha<sup>n</sup>-gã xii Jèsús:

—Yòhó cúu-n Dèhe-í tée ío cùu iní-í, te ío cùdí ìní ñáhà-í xii-n —càchí-gã xáha<sup>n</sup>-gã xii Jèsús.

*Cue tée ní xíndecu díhna-gã ñuyúú-a dàcúxí Xìtohó Jesucristú*

(Mt. 1:1-17)

23 Te ndècu Jesús dàtná ócò úxí cuíá-gã cùtnàhá ní chisaha-gã chiu<sup>n</sup> ní táhú Tátá-gã Dútú Ndiöxí cada-gá. Te ní cuu-gá déhe té Chèé chi duca<sup>n</sup> sàni iní ñáyiu ñuyúú-a. Te té Chèé-á<sup>n</sup> ñì cuu-dé déhe té Èlí,

24 te tée-á<sup>n</sup> ñì cuu-dé déhe té Màtát. Te té Màtát-á<sup>n</sup> ñì cuu-dé déhe té Lèví, te tée-á<sup>n</sup> ñì cuu-dé déhe té Mèlquí. Te té Mèlquí-á<sup>n</sup> ñì cuu-dé déhe té Jàná, te tée-á<sup>n</sup> ñì cuu-dé déhe té Chèé.

25 Te té Chèé-á<sup>n</sup> ñì cuu-dé déhe té Matatiás, te tée-á<sup>n</sup> ñì cuu-dé déhe té Àmós. Te té Àmós-á<sup>n</sup> ñì cuu-dé déhe té Nàhúm, te tée-á<sup>n</sup> ñì cuu-dé déhe té Èslí. Te té Èslí-á<sup>n</sup> ñì cuu-dé déhe té Nagái,

26 te tée-á<sup>n</sup> ñì cuu-dé déhe té Màát. Te té Màát-á<sup>n</sup> ñì cuu-dé déhe té Matatiás, te tée-á<sup>n</sup> ñì cuu-dé déhe té Semèí. Te té Semèí-á<sup>n</sup> ñì cuu-dé déhe té Chèé, te tée-á<sup>n</sup> ñì cuu-dé déhe té Jùdá.

27 Te té Jùdá-á<sup>n</sup> ñì cuu-dé déhe té Joaná, té tée-á<sup>n</sup> ñì cuu-dé déhe té Rèsá. Te té Rèsá-á<sup>n</sup> ñì cuu-dé déhe té Zorobàbél, te tée-á<sup>n</sup> ñì cuu-dé déhe té Salàtiél. Te té Salàtiél-á<sup>n</sup> ñì cuu-dé déhe té Nèrí,

28 te tée-á<sup>n</sup> ñì cuu-dé déhe té Mèlquí. Te té Mèlquí-á<sup>n</sup> ñì cuu-dé déhe té Àdí, te tée-á<sup>n</sup> ñì cuu-dé déhe té Còsám. Te té Còsám-á<sup>n</sup> ñì cuu-dé déhe té Elmòdám, te tée-á<sup>n</sup> ñì cuu-dé déhe té Ęr.

29 Te té Ęr-án nǐ cuu-dé déhe té Jòsué, te té-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te té-án nǐ cuu-dé déhe té Mátát.

30 Te té Mátát-án nǐ cuu-dé déhe té Lèví, te té-án nǐ cuu-dé déhe té Mìó. Te té Mìó-án nǐ cuu-dé déhe té Jùdá, te té-án nǐ cuu-dé déhe té Chèé. Te té Chèé-án nǐ cuu-dé déhe té Jònán, te té-án nǐ cuu-dé déhe té Eliàquím.

31 Te té Eliàquím-án nǐ cuu-dé déhe té Mèléá, te té-án nǐ cuu-dé déhe té Mainán. Te té Mainán-án nǐ cuu-dé déhe té Mátatá, te té-án nǐ cuu-dé déhe té Nátán.

32 Te té Nátán-án nǐ cuu-dé déhe té Dàvíí, te té-án nǐ cuu-dé déhe té Isàí. Te té Isàí-án nǐ cuu-dé déhe té Òbéd, te té-án nǐ cuu-dé déhe té Bòóz. Te té Bòóz-án nǐ cuu-dé déhe té Sàlmón, te té-án nǐ cuu-dé déhe té Naàson.

33 Te té Naàson-án nǐ cuu-dé déhe té Aminadáb, te té-án nǐ cuu-dé déhe té Àrám. Te té Àrám-án nǐ cuu-dé déhe té Èsróm, te té-án nǐ cuu-dé déhe té Fàrés. Te té Fàrés-án nǐ cuu-dé déhe té Jùdá,

34 te té-án nǐ cuu-dé déhe té Jàcób. Te té Jàcób-án nǐ cuu-dé déhe té Isàác, te té-án nǐ cuu-dé déhe té Àbrahám. Te té Àbrahám-án nǐ cuu-dé déhe té Tàré, te té-án nǐ cuu-dé déhe té Nàcór.

35 Te té Nàcór-án nǐ cuu-dé déhe té Sèrúg, te té-án nǐ cuu-dé déhe té Ragàú. Te té Ragàú-án nǐ cuu-dé déhe té Pèlég, te té-án nǐ cuu-dé déhe té Hèbér. Te té Hèbér-án nǐ cuu-dé déhe té Sàlá,

36 te té-án nǐ cuu-dé déhe té Cainán. Te té Cainán-án nǐ cuu-dé déhe té Arfàxád, te té-án nǐ cuu-dé déhe té Sēm. Te té Sēm-án nǐ cuu-dé déhe té Nòé, te té-án nǐ cuu-dé déhe té Làméc.

37 Te té Làméc-án nǐ cuu-dé déhe té Matusalén, te té-án nǐ cuu-dé déhe té Ènóc. Te té Ènóc-án nǐ cuu-dé déhe té Jàréd, te té-án nǐ cuu-dé déhe té Mahalàleél. Te té Mahalàleél-án nǐ cuu-dé déhe té Cainán,

38 te té-án nǐ cuu-dé déhe té Ènós. Te té Ènós-án nǐ cuu-dé déhe té Sèt, te té-án nǐ cuu-dé déhe té Àdán. Te té Àdán-án chi mee Yá Ndiòxí ní cadúha ndaha ñaha-gá xii-dé.

## 4

*Sácuíhná quidé yica-xi cada Jesús sá ñà túú tàú-gá cada-gá ní cùu*  
(Mt. 4:1-11; Mr. 1:12-13)

1 Te Jèsús ní naquehe<sup>n</sup>-gá ichi yuhu yúte Jòrdán cuánuhú-gá. Te sa ndècu ndihí-gá Espíritú Yá Ndiòxí, te Espíritú-án ndécá ñaha-xi xii-gá cuáhá<sup>n</sup> ì<sup>n</sup> xití yucu.

2 Te yàcá<sup>n</sup> ní xíndecu-gá údico nduu, te sácuíhná nǐ cuiní-xi coto ndeé ñáhá-xí xii-gá te núu ndisa sá vǎ cádá-gǎ ì<sup>n</sup> sá ñà túú tàú-gá cada-gá. Te ñá túú tnàhí ná ní xèxi-gá ndi údico nduu-án, te sátá dúcá<sup>n</sup> te ní xícá<sup>n</sup> iní-gá caxi-gá.

3 Te sácuíhná-ǎ<sup>n</sup> nǐ xáha<sup>n</sup>-xi xii-gá:

—Te núu ndisa sá cúú-n Dèhe Yá Ndiòxí, te cúñaha xii yúú-a na ndùu-xi paá —càchí-xi xǎha<sup>n</sup>-xi xii-gá.

4 Te Jèsús ní xáha<sup>n</sup>-gǎ xii-xi:

—Núú tütú Yá Ndiòxí càchí-xi: “Ñá díú mèe-ni paá candeca-xi iní ñáyíu, chi tnàhá nchaa tnúhu càhá<sup>n</sup> Yá Ndiòxí candeca-xi iní-yu”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

5 Te dǎtnùní sácuíhná ndécá ñaha-xi xii-gá cuáhá<sup>n</sup> ì<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xii-gá nchaandi túhú nàció<sup>n</sup> cáá ñùyíú.

6 Te ní xáha<sup>n</sup>-xi xii-gá:

—Yúhú cada-í, te taxi tnùnín nchàa-ndi túhú nàció<sup>n</sup>-a ndihí nchaa sá vǎha ió díu-ni nchaa nàció<sup>n</sup>-a, te cachí ñáyíu sá ìo cùnuu-n, chi yúhú cúú cuèndá-í nchaa sá ió nchaa nàció<sup>n</sup>-a, te ndédani càa ñáyíu cùu iní-í te cúñaha-í xii-yu taxi tnùnín-yu.

7 Te núu ni yúhu ni iní-n chiñuhu ñaha-n xii-í ñá, te nchaa taxi-í cuu cuèndá-n —càchí-xi xǎha<sup>n</sup>-xi xii-gá.

8 Te Jèsús ní xáha<sup>n</sup>-gǎ xii-xi:

—Xocuñí yòhó sácuíhná núú ndécù-í-a, chi vǎ cúú càda-í nàcuáa càchí-n chi núú tütú Yá Ndiòxí càchí-xi: “Chiñuhu-ndo Dütú Ndiòxí Yá cúú Ndiòxí-ndó, te ì<sup>n</sup>ndi díí-ni-gǎ cada-ndo nchàa nacuáa càhá<sup>n</sup>-gǎ”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

9 Te sácuihná ndécá ñaha tucu-xi xii-gá cuáhá<sup>n</sup> ñuú Jerusálén, te ní xáha<sup>n</sup>-xi xii-gá cuásaá-gá díquí veñúhu càhnu sá ïo cùnuu, te ní xáha<sup>n</sup> tucu-xi:

—Te núu ndisa cùu-n Déhe Yá Ndiöxí te cuandèe ndava ndéé núú ñúhú

10 cuendá quee ndáá-xi nàcuáa càhá<sup>n</sup>-xi núú tütú Yá Ndiöxí núú cächí-xi:

Yá Ndiöxí tendaha-gã cue espíritu xínú cuèchi núú-gã quixi-xi coto ñaha-xi xii-n.

11 Te núú ndáhá-xí cãundodo-n cuendá sá vã dánicuèhé yúú sãhá-n,

duha cächí-xi núú tütú-gá —cächí sácuihná xãha<sup>n</sup>-xi xii-gá.

12 Te Jèsús ní xáha<sup>n</sup>-gã xii-xi:

—Te cächí tucu-xi núú tütú Yá Ndiöxí: “Vã cãní ñí-n còto ndeé-n Dütú Ndiöxí Yaá cúú Ndiöxí-n ñuu ndisa sá dácãcu nihnu ñaha-gã xii-n cuendá ñ<sup>n</sup> sá sání ñí-n càda-n sá cúú-xí mèe-n”, duha cächí-xi núú tütú-gá —cächí-gã xãha<sup>n</sup>-gã xii-xi.

13 Te sátá dúcá<sup>n</sup> te sácuihná ñà túú-gã ní cùtnuní ñí-xi nása cada-xi Jèsús, núú xíã<sup>n</sup> ní xica-xi cuáhá<sup>n</sup>-xi ní sanaa tnaa-xi.

*Distritú Galileá ní chisaha Jèsús chiú<sup>n</sup> ní táhú Tátá-gã Dütú Ndiöxí cada-gá*

*(Mt. 4:12-17; Mr. 1:14-15)*

14 Te Jèsús cuáhá<sup>n</sup> tucu-gá distritú Galileá, dico sa ndècu ndihí-gá Espiritú Yá Ndiöxí, te ní càa xico xíã<sup>n</sup> ní níhí-yu tnúhu nchaa nàcuáa quide-gá.

15 Te ndi tnahá ñuú cuáhá<sup>n</sup>-gã duca<sup>n</sup> cuãnguihu-gá veñúhu-yu dànehé ñáhá-gã xii-yu, te ncháá-yu cächí-yu sá ïo càhnu cuu-gá.

*Jèsús ndécú-gã ñuú Nazàrét*

*(Mt. 13:53-58; Mr. 6:1-6)*

16 Te Jèsús ní sáhá<sup>n</sup>-gã ñuú Nazàrét ñuú núú ní sahnu-gá. Te nduu ndètatú ñáyiu ní quíhu-gá veñúhu, chi duca<sup>n</sup> tnàhí quide-gá, te ní ngúnutnii-gá dácuaàha-gá tutú ndèé tnúhu Yá Ndiöxí.

17 Te ní sãñaha-güedë xii-gá tutú ndèé tnúhu ní cáhá<sup>n</sup> ndíi Chàíá téé

ní xóo cáhá<sup>n</sup> tnúhu Yá Ndiöxí ndéé sanaha, te òré ní nandicá-gá núú tütú-á<sup>n</sup> te ní naníhí-gã núú cächí-xi:

18 Espiritú Yá Ndiöxí ndécú ndihí ñaha-xi xii-í,

chi ní cachí-gá sá càhá<sup>n</sup>-í tnúhu-gá sá cúú-xí ñáyiu ndàhú,

ñáyiu vátá cündèdóho tnàhí-gá.

Te véxi-í cuendá vá ndihú-gá ñí ñáyiu ñá túú ndècu váha ñí-xi,

te cue ñáyiu sa nèhe váha ñaha-nã yucu ñävãha dácãcu ni-hnu-í-yu.

Te cue ñáyiu cuáá nacaá<sup>n</sup>-í núú-yu, te ñáyiu ndòho dandoho ñaha tnaha ñáyiu-xi taunihnu-í-yu.

19 Te cúñaha-í xii ñáyiu sá sáá nduu càda Yá Ndiöxí ñ<sup>n</sup> sá vãha sá cúú-xí-yu.

Duha cächí-xi núú tütú dácuaàha-gá.

20 Te Jèsús ní nacadí-gá núú tütú-á<sup>n</sup>, te ní nacuaàha-gá ñ<sup>n</sup> téé xínu cuechi veñúhu-á<sup>n</sup>, te ní ngóo-gá. Te nchaa ñáyiu yihí veñúhu ñá núú núú-yu ndèhe ñahá-yu xii-gá.

21 Te xãha<sup>n</sup>-gã xii-yu:

—Mei vitna ní quee ndáá-xi nàcuáa càhá<sup>n</sup>-xi núú tütú Yá Ndiöxí —cächí-gã xãha<sup>n</sup>-gã xii-yu.

22 Te ncháá-yu ní cáhá<sup>n</sup> váha-yu cuendá-gá, te ní cuñúhu-yu tnúhu váha càhá<sup>n</sup>-gá, te xitnàhá-yu:

—¿Te náa ñá díú tõe-a cùu-dé déhe té Chèé-ã<sup>n</sup>? —cächí-yu xitnàhá-yu.

23 Te Jèsús ní xáha<sup>n</sup>-gã:

—Na cächí tnúhu ndáá-í xii-ndo sã ñúhú ñí-ndó cũñaha-ndo xii-í ñ<sup>n</sup> tnúhu cùtexínu sá càhá<sup>n</sup> mée-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní níhí-ndí tnúhu nàcuáa ní quide-n ñúú Capèrnaúm, te cada-n tnàhá ñuú núú ní sahnu-n”, duha quesaha-ndo —cächí-gã xãha<sup>n</sup>-gã xii-yu.

24 Te ní xáha<sup>n</sup> tucu-gá:

—Na cächí tnúhu ndáá-í xii-ndo sã ní ñ<sup>n</sup> téé càhá<sup>n</sup> tnúhu Yá Ndiöxí ñá túú tnàhá ñí ñáhá ñáyiu ñuú-dé.

25 Te na cächí tnúhu ndáá tucu-í xii-ndo sã ïo vai ñáyiu dñí ñáyiu quèé ní xíndecu nació<sup>n</sup> Isràél cùtnàhá ní

xindecu té Èliás cùtnàhá ñá túú ní cùu<sup>n</sup> dáú ùní cuíá dava, te dává-á<sup>n</sup> ïo ní ndoho ñáyiú docó nitùhú nàció<sup>n</sup>.

26 Dico Yá Ndiöxí ñá túú ní tëndaha-gá té Èliás quíhí<sup>n</sup>-dé vehe ndédani càa ñáyiú dìhí-á<sup>n</sup>, chi vehe ì<sup>n</sup> ñaha ñuú Sàreptá ní xáha<sup>n</sup>-gã ní sáhá<sup>n</sup>-dé, te ñuú-á<sup>n</sup> cáá yàtni-xi ñuú Sìdón.

27 Te ní xindecu tucu ingá téé ní xóo cáhá<sup>n</sup> tnúhu Yá Ndiöxí ndéé sanaha, te téé-á<sup>n</sup> ñí xínani-dě Eliseú, te diu-ni dává-á<sup>n</sup> ñí xindecu tucu vài ñáyiú cùhú nàció<sup>n</sup> Isràél, ñáyiú ní tnahá cuéhé sã dátèhyú nihnu-xi yiqui cùnú-yu dico ñá túú ní ndúha-yu, chi ì<sup>n</sup>dìi-ni té Nàamán téé distritú Sìriá ní ndúha-dé —càchí-gá xáha<sup>n</sup>-gã xii-yu.

28 Te sá dúcá<sup>n</sup> ñí cáhá<sup>n</sup>-gá te xiã<sup>n</sup> ní cudéé<sup>n</sup> víhí nchàa ñáyiú yìhí veñúhu-ã<sup>n</sup> núú-gã.

29 Te ní queñuhú-yu Jèsús yuhu dèhvá tìndúú núú cáá ñuú-yu-á<sup>n</sup> cuèndá yacá<sup>n</sup> dàquée-yu-gá dèhvá ní cùu.

30 Dico Jèsús vii-ni ní quee-gá tnuú-yu cuáhá<sup>n</sup>-gá.

*Ì<sup>n</sup> téé yìhí ñaha espíritú cùndìhí yucu ñávãha*  
(Mr. 1:21-28)

31 Te Jèsús cuáhá<sup>n</sup>-gá ñuú Capèrnaúm, te ñuú-á<sup>n</sup> yíndèhu-xi distritú Galileá. Te yacá<sup>n</sup> ndécú-gã ní tnahá nduu ndètatú ñáyiú, te ní ngüíta-gá dácuãha-gá ñáyiú.

32 Te xicuñúhu-yu nchaa nàcuáa dànehé ñáhá-gã xii-yu, chi càhá<sup>n</sup>-gá dàtná càhá<sup>n</sup> ì<sup>n</sup> téé cùnuu, te cùnuu ndisa-gá.

33 Te xití veñúhu yìhí ì<sup>n</sup> téé yìhí ñaha ì<sup>n</sup> espíritú cùndìhí yucu ñávãha, te espíritú-á<sup>n</sup> ñí quide-xi níhi ní cáhá<sup>n</sup> téé-á<sup>n</sup>, te xáha<sup>n</sup>-dè xii Jèsús:

34 —¿Te ná cùní yohó Jèsús téé ñuú Nazàrét cada ñaha-n xii-ndí nùu vèxi-n núú ndécú-ndí-i? ¿Á<sup>n</sup> vèxi-n dànaa ñaha-n xii-ndí? Chi yúhú xini ñáhà-í xii-n sã cúú-n ì<sup>n</sup> téé ñá túú tnahá cuéchi-xi chi núú Yá Ndiöxí ní quee-n vèxi-n ñùyíú-a —càchí-dé xáha<sup>n</sup>-dè xii-gá.

35 Te Jèsús ní tenáa-gá espíritú cùndìhí yucu ñávãha-á<sup>n</sup>, te xáha<sup>n</sup>-gã:

—¿Cadí yuhu-n, te taquèe yiqui cuñú téé-á<sup>n</sup>! —càchí-gá xáha<sup>n</sup>-gã.

Te espíritú cùndìhí yucu ñávãha-á<sup>n</sup> ñí dándùá-xi téé-á<sup>n</sup> ndéé ñuhu tnuú ñáyiú xindecu-á<sup>n</sup>, te ñá túú-gã ná ní quide ñaha-xi, te ní quee ñaha-xi xii-dé.

36 Te nchaa ñáyiú xindecu-á<sup>n</sup> ñí cuñúhu-yu, te ní xitnàhá-yu:

—¿Te nása ndùu-tu tnúhu càhá<sup>n</sup> téé-á<sup>n</sup> ñá? ¿Te càhá<sup>n</sup>-dé dàtná càhá<sup>n</sup> ì<sup>n</sup> téé tàxi tnuní víhí, chi càhá<sup>n</sup>-ni-dé te nchaa espíritú cùndìhí yucu ñávãha quèe-ni-xi yiqui cuñú-yu! —càchí-yu xitnàhá-yu.

37 Te nchaa xichi ní níhí-yu tnúhu nàcuáa quide Jèsús.

*Jèsús quidé tãtna-gá nãná ñadìhí té Xímú*  
(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáhá<sup>n</sup>-gá vehe té Xímú. Te nãná ñadìhí té Xímú-á<sup>n</sup> cùhú-a<sup>n</sup> ñuhu vihi-a<sup>n</sup> cahni, te ní cáhá<sup>n</sup> ndáhú-yu núú Jèsús cuèndá-a<sup>n</sup>.

39 Te Jèsús ní sáhá<sup>n</sup>-gá núú ndécú-á<sup>n</sup>, te ní ngúnundeyi-gá te ní xáha<sup>n</sup>-gã xii cahni-á<sup>n</sup> sã ná xòcuñí-xi, te ní xòcuñí-ni-xi, te òré-ni-á<sup>n</sup> ñí ndúha ñaha cùhú-á<sup>n</sup> te ní ndacóo-a<sup>n</sup> ní xinu cuechi-a<sup>n</sup> núú güedé ndìhí-gá.

*Jèsús quidé tãtna-gá vài ñáyiú cùhú*  
(Mt. 8:16-17; Mr. 1:32-34)

40 Te òré ní ngódó tnuú nchícanchii, te nchaa ñáyiú xindecu ndìhí ñáyiú cùhú vehe-xi ndèca ñahá-yu cuáhá<sup>n</sup> núú Jèsús. Te Jèsús ní sacá<sup>n</sup> ndodo-gá ndaha-gá díquí ì<sup>n</sup> ñáyiú cùhú-á<sup>n</sup>, te duca<sup>n</sup> ñí quide-gá te ní ndúha-yu. Te ndi díí<sup>n</sup> núú cuéhé tnahá-yu ì<sup>n</sup> ì<sup>n</sup>-yu ní cùu.

41 Te tnahá dava ñáyiú cùhú-á<sup>n</sup> yíhí ñaha espíritú cùndìhí yucu ñávãha xii-yu ní cùu, te òré ní quee ñaha-xi xii-yu, te xiã<sup>n</sup> ní quide-xi níhi ní cáhá<sup>n</sup>-yu, te xáha<sup>n</sup>-yu xii Jèsús:

—Yohó cúú-n Dèhe Dútú Ndiöxí —càchí-yu xáha<sup>n</sup>-yu xii-gá.

Dico Jèsús níhi ní cáhá<sup>n</sup>-gá ní tenáá-gá nchaa espíritú cùndìhi yucu ñávãha-á<sup>n</sup>, te xãha<sup>n</sup>-gã sá vã dúcá<sup>n</sup>-gã cada-xi, chi sa xìní-xi sá díú-gã cúú-gã Crístú Yaa ní tendaha Yã Ndiõxí véxi ñuyíú-a.

*Jèsús dánèhé-gá ñáyiu distritú Galiléa*  
(Mr. 1:35-39)

<sup>42</sup> Te ì<sup>n</sup> nduu ní túndaá-ni ní quee Jèsús ñuú núú ndécú-gã-á<sup>n</sup> cuáhá<sup>n</sup>-gá ì<sup>n</sup> xichi núú ñã túú ñáyiu ndècu. Te cue ñáyiu ní ngüíta-yu nànducu ñahá-yu xii-gá te ní naníhí ñáhã-yu, te cuíní-yu ngani ñahá-yu xii-gá cuendá sá ñà túú-gã ndèé quíhí<sup>n</sup>-gá ní cùu.

<sup>43</sup> Dico ní xáha<sup>n</sup>-gã xií-yu:

—Dacutíí quíhí<sup>n</sup>-í cúñaha-í xii nchaa ñáyiu ðava-gá ñuú tnúhu sá càhá<sup>n</sup> nàcuáa ndíhu ndaha ñàha Yã Ndiõxí xií-yu, chi chiú<sup>n</sup> tnahí-ã<sup>n</sup> véxi-í —càchí-gá xãha<sup>n</sup>-gã xií-yu.

<sup>44</sup> Te ní xica cuu Jèsús ní dánèhé-gá ñáyiu tnúhu-gá nchaa xití veñúhu ndãa distritú Galiléa.

## 5

*Jèsús ní quide-gá ní níhí-güedě chácá*  
(Mt. 4:18-22; Mr. 1:16-20)

<sup>1</sup> Te ì<sup>n</sup> xito ndècu Jèsús yuhu làgúná Genesàrét, te ío cuéhé ñáyiu ní sáá, te ta dàdehnde ñaha-ná-yu xii-gá cuáhá<sup>n</sup> sá cuíní-yu cundedóho-yu nchaa tnúhu càhá<sup>n</sup>-gá.

<sup>2</sup> Te Jèsús ní xiní-gá úú bàrcú cue té tñi chácá xĩnutnĩ-xi yatni yuhu làgúná-á<sup>n</sup>, te sa ní quene cue té ñùhu xití-xi-á<sup>n</sup> xĩnaquete-güedé ñunu-güedé.

<sup>3</sup> Te Jèsús cuásaá-gá núú ì<sup>n</sup> bàrcú-á<sup>n</sup>, te bàrcú-á<sup>n</sup> cúú-xí bàrcú té Xímú, te ní xáha<sup>n</sup>-gã xii té Xímú-á<sup>n</sup> sã dánũndehe-dé-xi luha-gá xití ndute. Te dátñuní ní ngóo-gá núú bàrcú-á<sup>n</sup>, te xíá<sup>n</sup> núcõo-gá ní ngüíta-gá dánèhé-gá ñáyiu.

<sup>4</sup> Te òré ní túhú ní dánèhé ñahá-gã xií-yu, te ní xáha<sup>n</sup>-gã xii té Xímú:

—Daquihí<sup>n</sup> bàrcú-a xití làgúná mei núú cùnú-gá, te dàquée-ndo ñunu-ndo

tni-ndo chácá —càchí-gá xãha<sup>n</sup>-gã xii-dé.

<sup>5</sup> Te té Xímú ní xáha<sup>n</sup>-dë:

—Mèstrú, ni niú ní quide chiú<sup>n</sup>-ndí te ni ì<sup>n</sup> chácá ñà túú ní níhí-ndí, dico vitna cuendá-ni sá yòhó táuchìu<sup>n</sup>-n te na dàquée-ndí ñunu-ndí vá<sup>n</sup> —càchí-dé xáha<sup>n</sup>-dë xii-gá.

<sup>6</sup> Te òré ní dáquëe-güedé ñunu-güedé te súuní vai chácá ní níhí-güedé, te ta ndátá-ñã ñunu-güedé cuáhá<sup>n</sup> ní cùu.

<sup>7</sup> Núu ní quide-güedé ndaha-güedé núú ðava-gá cue té cùndìhi-güedé xixúhu<sup>n</sup> ingá bàrcú cuendá quíhí<sup>n</sup>-güedé chindee ñàha-güedé. Te cue té-á<sup>n</sup> ní sáhá<sup>n</sup>-güedé ní chindee tñaha-güedé ní dáchitú-güedé ndí ndúú bàrcú mee-ni chácá, te súuní ní cuu véé núu cuíní-na-xi quée naa-güedé ndíhi bàrcú ní cùu.

<sup>8</sup> Te sá dúcá<sup>n</sup> cuíní-xi quée naa bàrcú ní cùu, núu té Xímú, àdi Pelú chi úú ðiu-dé, ní ngüíñí xití-dé núú Jèsús, te xáha<sup>n</sup>-dë:

—Xocuiñí yòhó Jèsús núú ndécú-í-a, chi yuhú cúú-í ì<sup>n</sup> téé ío ndècu cuéchi-xi —càchí-dé xáha<sup>n</sup>-dë xii-gá.

<sup>9</sup> Te duca<sup>n</sup> ní cáhá<sup>n</sup>-dé chi ní yuhú-dé, te ní cuñúhu-dé ndíhi nchaa cue téé ndíhi-dé-á<sup>n</sup> cuendá sá ío vai chácá ní níhí-güedé.

<sup>10</sup> Te tñahá té Jàcobó ndíhi té Juàá cue déhe té Zebèdeú ío ní cuñúhu-güedé, te ðiu-ni cue téé cùndìhi té Xímú-á<sup>n</sup> cúú-güedé tñahá-güedé. Te Jèsús ní xáha<sup>n</sup>-gã xii té Xímú:

—Vá yuhú-n, chi neni vitna quíhí<sup>n</sup>-n dàcahá<sup>n</sup>-n ñáyiu cuendá tuha ñahá-yu xii-í —càchí-gá xãha<sup>n</sup>-gã xii-dé.

<sup>11</sup> Te ní quene-güedé ndíhi bàrcú ndéé ñuhu yìchí yuhu làgúná-á<sup>n</sup>. Te òré-á<sup>n</sup> ní dándõo-güedé nchaandi túhú sá ndécú ndíhi-güedé, te ní tuha-güedé Jèsús.

*Jèsús quidé tãtna-gá ì<sup>n</sup> téé tñahá cuéhé sã dátèhyú nihnu-xi yiqui cùñú-ó*  
(Mt. 8:1-4; Mr. 1:40-45)

<sup>12</sup> Te òré ní quexìo Jèsús ì<sup>n</sup> ñuú, te ní quexìo ì<sup>n</sup> téé cùhú tñahá-dé cuéhé sã dátèhyú nihnu-xi yiqui cùñú-ó, te



òré ní xini-dé Jèsús te ní sáhá<sup>n</sup>-dé núú ndécú-gă, te ní ngüíñí xítí-dé núú-gă te ní nuu núú-dé ndàa núú ñhú te càhá<sup>n</sup> ndàhú-dé, te xàhá<sup>n</sup>-dè xii-gă:

—Mèstrú, véxi-í càhá<sup>n</sup> ndàhú-í núú-n núu vá cùndèe iní-n cada tátna ñaha-n xii-í, chi cùtnuní iní-í sá ndácú-n —càchí-dé xàhá<sup>n</sup>-dè xii-gă.

<sup>13</sup> Te Jèsús ní dácáa-gă ndaha-gă ní tendaha ñaha-gă xii-dé, te xàhá<sup>n</sup>-gă:

—Cuu cada tátna ñaha-í xii-n, te vitna te ndúha-n —càchí-gă xàhá<sup>n</sup>-gă xii-dé.

Te òré-ni ní xócuíñí cuéhé tnàhá-dé.

<sup>14</sup> Te dàtnuní ní xàhá<sup>n</sup> tùcu Jesús xii-dé:

—Vá yõo ñ<sup>n</sup> cúñaha-n sã ñí quide tátna ñaha-í xii-n, núú dütú-ni cuáhá<sup>n</sup> cuèndá sá ná quíñí ñáhá-dé xii-n sã ñí ndúha-n te cuáha-n-dé sá ndúú tãhú Yá Ndiõxí dàtná ní cachí ndíi Moisés cuèndá ná quíñí ñáyiu sá ndáa ní ndúha-n —càchí-gă xàhá<sup>n</sup>-gă xii-dé.

<sup>15</sup> Te duca<sup>n</sup> ta xíté nuu-gă tnúhu nchaa nàcuáa quide Jesús, te ío cuéhé ñáyiu ní xóo tacá nchaa núú ñí xíndecu-gă cuèndá sá cuíni-yu cundedóho-yu tnúhu càhá<sup>n</sup>-gă, ndíhi cuèndá sá cuíni-yu cada tátna ñaha-gă xii-yu.

<sup>16</sup> Dico Jèsús ní xóo quee nihni-gă tnuú-yu ní xóo quíhí<sup>n</sup>-gă núú ñà túú ñáyiu ndècu ní xóo càhá<sup>n</sup> ndíhi-gă Yá Ndiõxí.

*Jèsús quidé tátna-gă ñ<sup>n</sup> té cùhú ñá cúú-gă candá nihnu*

*(Mt. 9:1-8; Mr. 2:1-12)*

<sup>17</sup> Te ñ<sup>n</sup> nduu dànehé-gă ñáyiu, te xíncúo ñ<sup>n</sup> úú cue tée cùu fariséú, ndíhi cue tée dàcuaha ñaha xii ñáyiu nchaa tnúhu ní chídó tnùní ndíi Moisés. Te cue tée-á<sup>n</sup> ñí quee-güedé nchaa ñúú yíndèhu distritú Galileá, ndíhi distritú Júdeá, ndíhi ñúú Jerusálén, te nchaa ñúú-á<sup>n</sup> ñí quee-güedé cuáhá<sup>n</sup>-güedé núú ndécú-gă. Te Yá Ndiõxí chíndèe ñaha-gă quidé tátna-gă ñáyiu cùhú.

<sup>18</sup> Te ñ<sup>n</sup> úú cue tée nchído-güedé ñ<sup>n</sup> té cùhú ñá cúú-gă candá nihnu ñùhu-dé xító ní quexìo ndíhi ñaha-güedé, te cuíni-güedé quíhu

ndíhi ñaha-güedé ndéé xítí vehe, sáa-güedé ndéé núú Jèsús ndíhi té cùhú-á<sup>n</sup>.

<sup>19</sup> Dico ñá túú ní ñíhi-güedé ndéé ichi quíhu-güedé, chi cuèndá ío cuéhé ñáyiu ndècu, núu xíá<sup>n</sup> ní sáa-güedé díquí véhé-á<sup>n</sup> ñí caá<sup>n</sup>-güedé te ndàa díquí véhé-á<sup>n</sup> ñí dáquèe-güedé té cùhú-á<sup>n</sup>, te ñùhu-ni-dé xító ní dáquèe ñaha-güedé tnuú ñáyiu ní sáa ndéé núú Jèsús.

<sup>20</sup> Te Jèsús ní cutnùní iní-gă sá ñí yuhu ñí iní-güedé sàndáa iní ñáhá-güedé xii-gă, núu ní xàhá<sup>n</sup>-gă xii té cùhú-á<sup>n</sup>:

—Yòhó té cùhú, sa ní quide càhnu iní-í nchaa cuèchi-n —càchí-gă xàhá<sup>n</sup>-gă xii-dé.

<sup>21</sup> Te cue tée dàcuaha ñaha xii-yu nchaa tnúhu ní chídó tnùní ndíi Moisés ndíhi cue té cùu fariséú ní sani iní-güedé: “¿Ná cúú tée-a núu càhá<sup>n</sup> cuéhé-dé cuèndá Yá Ndiõxí-i? Te vá yõo ñ<sup>n</sup> ndàcu cada càhnu iní nchaa yíca cuèchi ñáyiu, chi ñ<sup>n</sup> dñí díi-ni Yá Ndiõxí quidé càhnu iní-gă”, duha ní sani iní-güedé.

<sup>22</sup> Dico Jèsús sa ní cutnùní iní-gă nàcuáa sàni iní-güedé núu ní xàhá<sup>n</sup>-gă xii-güedé:

—¿Te ná cuèndá duca<sup>n</sup> sàni iní-ndó-í?

<sup>23</sup> Te sá dúhá ñí xàhá<sup>n</sup>-í xii té cùhú-a sá cáda càhnu iní-í nchaa yíca cuèchi-dé, te xíá<sup>n</sup> nchòhó ñá túú cùtnuní iní-ndó núu ndáa càhá<sup>n</sup>-í àdi ñá ndáa. Dico núu cúu-í-dé sá ndácóo-dé, te caca-dé te cutnùní ndáa iní-ndó núu ndáa càhá<sup>n</sup>-í àdi ñá ndáa, chi cundehe núu-ndó nàcuáa cada-í.

<sup>24</sup> Te vitna na càda-í nàcuáa cutnùní iní-ndó nchàa-ndo sá yùhú Té cùu ñaní tnáhá-ndó nchàa-ndo ndecu ndíhi-í tnúhu ndee iní sá cáda càhnu iní-í nchaa cuèchi ñáyiu ñuyíú-a —càchí-gă xàhá<sup>n</sup>-gă xii-güedé.

Te sátá dúcá<sup>n</sup> te ní xàhá<sup>n</sup>-gă xii té cùhú-á<sup>n</sup>:

—Ndacóo, te ndocani-n xító ñùhu-n véxi-á<sup>n</sup>, te núhú-n vèhe-n —cachí-gă xàhá<sup>n</sup>-gă xii-dé.

<sup>25</sup> Te òré-ni-á<sup>n</sup> ñí ndúha té cùhú-á<sup>n</sup> te ní ndacóo-dé, te ní ndocani-dé xító ñùhu-dé ní quexìo-á<sup>n</sup>, te ní natñí-dé

ichi ta cǎhá<sup>n</sup>-dé cuánuhú sá ïo cǎhnu cuu Yá Ndiǒxí.

26 Te nchaa ñáyiú xǐndecu-á<sup>n</sup> nǐ cuñúhu-yu, te tnàhá-yu ní cachí-yu sá ïo cǎhnu cuu Yá Ndiǒxí, te duca<sup>n</sup> ïo ní yùhú-yu, te ní xítñàhá-yu:

—Vitna ní xiní-ó ï<sup>n</sup> sá ñà túú tnàhí xiní-ó ní cùu —cachí-yu xítñàhá-yu.

*Jèsús cǎná-gǎ té Lèví*

(Mt. 9:9-13; Mr. 2:13-17)

27 Te sátá dúcá<sup>n</sup> nǐ cuu te ní quee Jèsús xíá<sup>n</sup>, te ní xiní-gá ï<sup>n</sup> té nàni Leví núcǎo-dé ï<sup>n</sup> xichi quide cobrá-dé ñáyiú cuendá impuèstú, chi cobràdór cúú-dě, te ní xǎhá<sup>n</sup>-gǎ xii-dé:

—Néhé chítñahá ñáhá-n xii-í —cachí-gá xǎhá<sup>n</sup>-gǎ xii-dé.

28 Te té Lèví-á<sup>n</sup> nǐ ndàcuíñí-dé te ní dándǎo-dé nchaa sá ndécú ndihí-dé núú núcǎo-dé-á<sup>n</sup>, te ní tuha-dé Jèsús.

29 Te sátá dúcá<sup>n</sup> te té Lèví-á<sup>n</sup> nǐ quide-dé ï<sup>n</sup> vico cǎhnu vehe-dé sá cúú-xí Jèsús, te ní tacá vǎi cue té quide chiu<sup>n</sup> quide-dé, te nchaa-güedé cuánguihu-güedé mèsá ní ngóo-güedé ndihí dava-gá ñáyiú ní quexio cuendá caxi-güedé ndihí-yu.

30 Dico cue té cùu fariséú ndihí cue té dàcuaha ñaha xii-yu nchaa tnúhu ní chídó tnùní ndí Moisés ní ngúita-güedé xícuehé-güedé cue té xica cuu ndihí-gá, te xǎhá<sup>n</sup>-güedě:

—¿Ná cuendá xéxí-ndó xihí-ndo ndihí cue té cuihna ìní-xi quide cobrá ñáhá xii ñáyiú cuendá impuèstú, ndihí nchaa dava-gá cue té ndècu ichi cuehé ichi duha-í? —cachí-güedé xǎhá<sup>n</sup>-güedě.

31 Te Jèsús ní xǎhá<sup>n</sup>-gǎ xii-güedé:

—Nchaa ñáyiú ñà túú cùhú chi ñà túú xini ñuhú-yu ñátátná, dico nchaa ñáyiú cùhú chi xini ñuhu ñahá-yu.

32 Te yúhú véxi-í cǎhá<sup>n</sup>-í ñáyiú cùtnuní ìní-xi sá ndécú cuèchi-xi cuendá dàñá-yu nchaa sá cuèhé sá dúhá quide-yu, te ñà túú véxi-í cǎhá<sup>n</sup>-í ñáyiú cachí sá ñà túú ndècu cuèchi-xi —cachí-gá xǎhá<sup>n</sup>-gǎ xii-güedé.

*Cue té ndècu tnúhu núú Jèsús cuendá ñáyiú ñà túú tnàhí ná xéxí áma cǎhá<sup>n</sup> ndihí-yu Yá Ndiǒxí*

(Mt. 9:14-17; Mr. 2:18-22)

33 Te ní xǎhá<sup>n</sup>-güedě xii Jèsús:

—Te áma ñà túú tnàhí ná xéxí cuè té xica cuu ndihí té Juáá cǎhá<sup>n</sup> ndihí-güedé Yá Ndiǒxí, te ñu-ni duca<sup>n</sup> quide cue té xica cuu ndihí nchúhú cue té cùu fariséú. ¿Te ná cuendá cue té xica cuu ndihí-n ñà túú dùca<sup>n</sup> quide-güedé núu nchaa-ni nduu xèxi-güedé xihí-güedé quide-güedě-í? —cachí-güedé xǎhá<sup>n</sup>-güedě xii-gá.

34 Te Jèsús ní xǎhá<sup>n</sup>-gǎ xii-güedé:

—Nchòhó xiní-ndó sǎ vǎ cúú cùñaha-o xii cue ñáyiú ñuhu vico tnándaha sá vǎ cúú cǎxi-yu nini ndècu ndihí ñaha té tnándaha-á<sup>n</sup> xii-yu.

35 Dico sáá nduu te vǎ cùndècu ndihí ñaha-gá té tnándaha-á<sup>n</sup> xii-yu, te dàvá-á<sup>n</sup> te cahni ìní-yu vǎ cǎxi-yu sá ndihú ìní-yu —cachí-gá xǎhá<sup>n</sup>-gǎ xii-güedé.

36 Te ní cani-gá ï<sup>n</sup> cuendú núú ñáyiú nàcuáa tecú tnùní-yu tnúhu-gá, te xǎhá<sup>n</sup>-gǎ:

—Vǎ yóo ï<sup>n</sup> dándée luha dóo sáá ï<sup>n</sup> dóo sa ní cuu tùhú víhí, chi núu yoo duca<sup>n</sup> na càda, te dóo sáá-á<sup>n</sup> nàndiyi-xi te uu<sup>n</sup>-gá ndata-xi dóo sǎ nǐ cuu tùhú-á<sup>n</sup>, te luha dóo sáá-á<sup>n</sup> ñà túú nàtaú-xi ndée dóo sǎ nǐ cuu tùhú-á<sup>n</sup>.

37 Te nǐ vǎ yóo ï<sup>n</sup> chihí ndidí sáá xití ï<sup>n</sup> lamba sa ní cuu tùhú víhí, chi núu yoo duca<sup>n</sup> na càda, te ndava lamba sa ní cuu tùhú-á<sup>n</sup> chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup>.

38 Núu xíá<sup>n</sup> xiní ñuhu-xi quée ndidí sáá-á<sup>n</sup> xití ï<sup>n</sup> lamba saa cuendá duca<sup>n</sup> ñà túú nǎ cuu cováha-xi.

39 Te nǐ ï<sup>n</sup> ñáyiú ñà túú tnàhí ìní-yu cohó-yu ndidí sáá, te núu díhna-gá ná cohó-yu ndidí sá nǐ quene díhna-gá, chi cachí-yu sá xihí vǎha-gá ndidí sá nǐ quene díhna-gá-á<sup>n</sup> dàcúuxí ndidí sáá —cachí-gá xǎhá<sup>n</sup>-gǎ xii-yu.

## 6

*Cue té xica cuu ndihí Jèsús sàhnú-güedé yoco triú nduu ndètatú ñáyiú*

(Mt. 12:1-8; Mr. 2:23-28)

1 Te ï<sup>n</sup> nduu cùu-xi nduu ndètatú ñáyiú ñuhu Jèsús ichi ndihí cue té xica cuu ndihí-gá, te ta

yáha-gá ndihi-güedé ñ<sup>n</sup> xichi núú cáá triú, te ní ngúíta-güedé sàhnú-güedé yoco triú-á<sup>n</sup> te ndihi ndaha-güedé quíí<sup>n</sup>-güedé quée triú tá xèxi-güedé cuáhá<sup>n</sup>.

<sup>2</sup> Te ñ<sup>n</sup> úú cue téé cùu fariséú ní xáha<sup>n</sup>-güedé xii cue téé xica cuu ndihi-gá:

—¿Te ná cuendá duca<sup>n</sup> quide nchohó ñ<sup>n</sup> sá ñà túú tàú-ó càda-o vitna cuu-xi nduu ndetátú-ó-í? —càchí-güedé xáha<sup>n</sup>-güedé.

<sup>3</sup> Te Jèsús ní xáha<sup>n</sup>-gá xii-güedé:

—¿Te náa ñà túú dàcuaha-ndo núú tütú Yá Ndióxi núú càhá<sup>n</sup>-xi nàcuáa ní quide ndíi Dàvíí cútnàhá ní xíhí ndíi docó ndihi cue téé ní xica cuu ndihi ndíi-á<sup>n</sup>?

<sup>4</sup> Chi ní quíhu ndíi vehe Yá Ndióxi, te ní quehe<sup>n</sup> ndíi pàá ní cuu íí ndécú-á<sup>n</sup> ñí dácãhñu ndíi cue téé xica cuu ndihi ndíi ní xexi ndíi ndihi-güedé, te ñà túú tàú ndíi sá dúcá<sup>n</sup> càda ndíi ni cùu, chi mee-ni cuè dútú tàú-güedé caxi-güedé pàá-á<sup>n</sup> ní cùu —cachí-gá xáha<sup>n</sup>-gá xii-güedé.

<sup>5</sup> Te ní xáha<sup>n</sup> tùcu-gá:

—Te yúhú Téé cùu ñaní tnàhá-ndó nchàa-ndo, tnàhá-í ndécú ndihi-í tnúhu ndee ìní sá cùu-í nchaa ñáyiu nàcuáa cadá-yu nduu ndetátú-ó-á —càchí-gá xáha<sup>n</sup>-gá xii-güedé.

*Ñ<sup>n</sup> téé ní yíchí ñ<sup>n</sup> xio ndaha-xi  
(Mt. 12:9-14; Mr. 3:1-6)*

<sup>6</sup> Te ñngá nduu ñiu-ni nduu ndetátú ñáyiu cuánguihu Jèsús xití veñúhu dànehé-gá ñáyiu. Te xía<sup>n</sup> ndécú ñ<sup>n</sup> téé cùhú ní yíchí nihnu ñ<sup>n</sup> xio ndaha cùha-dé.

<sup>7</sup> Te cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihi cue téé cùu fariséú ndéhé-güedé ñuu cada tátna ñaha Jèsús xii téé cùhú-á<sup>n</sup> nduu ndetátú-güedé-á<sup>n</sup> cuendá níhí-güedé nàcuáa cada-güedé cacá<sup>n</sup> cuéchi-güedé cuendá-gá.

<sup>8</sup> Dico Jèsús sa ní cutnùní iní-gá nàcuáa sàni iní-güedé, te ní xáha<sup>n</sup>-gá xii téé cùhú ndaha-xi-á<sup>n</sup>:

—Ndacuíñí te ngúnutñí-n cuádava tnuú-ndí-a —càchí-gá xáha<sup>n</sup>-gá xii-dé.

Te téé-á<sup>n</sup> ñí ndacuíñí-dé te ní ngúnutñí-dé cuádava tnuú-güedé ndihi-gá.

<sup>9</sup> Te dātnùní Jèsús ní xicá<sup>n</sup> tnúhú-gá núú cuè ñáyiu xīndecu-á<sup>n</sup>, te xáha<sup>n</sup>-gá xii-yu:

—Cuñí-í cachí tnúhu-ndo ñă cùú sã vãha cada-o nduu ndetátú-ó. ¿Ñ<sup>n</sup> chiú<sup>n</sup> váha àdi ñ<sup>n</sup> chiu<sup>n</sup> cuehé, sá cáda tátna-o ñáyiu cùhú àdi sá cáhni-ó-yu? —càchí-gá xáha<sup>n</sup>-gá xii-yu.

<sup>10</sup> Te dātnùní ní ndacoto-gá núú-yu ncháá-yu, te ní xáha<sup>n</sup>-gá xii téé cùhú ndaha-xi-á<sup>n</sup>:

—Ndocani ndaha-n —càchí-gá xáha<sup>n</sup>-gá xii-dé.

Te ní ndocani-dé ndaha-dé, te òre-ni ní ndúha.

<sup>11</sup> Te cue téé xīndecu-á<sup>n</sup> sūúní ñí cudéé<sup>n</sup>-güedé sá dúcá<sup>n</sup> ñí quide tátna Jèsús téé cùhú-á<sup>n</sup>, te ní ngúíta-güedé ndātnúhu-güedé ñuu nása cada ñaha-güedé xii-gá.

*Jèsús cãxi-gá úxúú tnàhá cue téé  
dacuáha ñaha xii ñáyiu tnúhu-gá  
(Mt. 10:1-4; Mr. 3:13-19)*

<sup>12</sup> Te sátá dúcá<sup>n</sup> ñí cuu te ní xica Jèsús cuáhá<sup>n</sup>-gá xití yucu cuendá yacá<sup>n</sup> cáhá<sup>n</sup> ndihi-gá Tátá-gá Dútú Ndióxi, te ñí niú ní cáhá<sup>n</sup> ndihi ñaha-gá.

<sup>13</sup> Te sátá ñí tūndaá, te ní cana-gá nchaa cue téé xica cuu ndihi-gá, te ní cáxi-gá úxúú tnàhá-güedé, te cue téé-á<sup>n</sup> ñí xáha<sup>n</sup>-gá sá díú-güedé cuu-güedé cue téé quíhí<sup>n</sup> cáhá<sup>n</sup> tnúhu-gá núú ñáyiu.

<sup>14</sup> Te duha xīnani ndi úxúú cue téé-á<sup>n</sup>. Té Xímú, àdi Pelú chi úú ñiu-dé, ndihi ñaní-dé té Ndríxí, ndihi té Jàcobó, ndihi té Juáá, ndihi té Lipé, ndihi té Bartolómé,

<sup>15</sup> ndihi té Mâteú, ndihi té Mǎxí, ndihi té Jàcobó déhe té Àlfeú, ndihi ñngá té Xímú téé ní cundíhi cue téé canànistá,

<sup>16</sup> ndihi té Júdás ñaní té Jàcobó, ndihi té Júdás Iscarioté téé ní sáá nduu ñí sáha cuendá ñáhá xii Jèsús núú cuè téé cùu úhú ñí ñáhá xii-gá, duha xīnani cuè téé ní cáxi Jèsús ní xica cuu ndihi-gá.

*Jèsús dánèhé-gá cuéhé víhí ñáiyu  
(Mt. 4:23-25)*

17 Te Jèsús cuánuu-gá yucu núú ñí sáá-gá-á<sup>n</sup>, te ní ngava-gá ñí núú ndàá ndihí cue téé xica cuu ndihí-gá, te xíá<sup>n</sup> ñí ngúnutnii-gá. Te xíá<sup>n</sup> ndécú dàva-gá cue téé xica cuu ndihí-gá ndihí vâi ñáiyu ndètu ñahá-yu xii-gá, te ñáiyu-á<sup>n</sup> vèxi-yu nchaa ñúú cáá distritú Jùdeá, ndihí ñúú Jerusalén, te ndècu ñáiyu véxi ndàa yuhu lamár yatni ñúú Tírú, ndihí ñúú Sidón. Te nchaa ñáiyu-á<sup>n</sup> ñí quexió-yu cuiní-yu cundedóho-yu nchaa tnúhu càhá<sup>n</sup> Jèsús, ndihí cuendá sá cuiní-yu ndúha-yu nchaa cuéhé tnàhá-yu.

18 Te tnàhá ñáiyu yíhi ñaha espíritú cundihí yucu ñávâha.

19 Te ncháa-yu cuiní-yu dacáa-yu ndahá-yu tendàhá-yu Jèsús ní cùu cuendá sá ñí níhí-yu tnúhu sá ndècu ndihí-gá tnúhu ndee ìní quidé tâtna-gá nchaa ñáiyu cùhú.

*Cuendá ñáiyu ío váha táhú-xi  
(Mt. 5:1-12)*

20 Te Jèsús ní ndacoto-gá núú cuè téé xica cuu ndihí-gá, te ní xáha<sup>n</sup>-gá:

—Váha táhú nchaa nchòhó cue ñáiyu ndàhú, chi nduu táhú-ndó cùndecu-ndo núú táxí tnùní Yá Ndiöxí.

21 Váha táhú nchaa nchòhó ñáiyu ío cuiní cundedóho tnúhu Yá Ndiöxí chi ío víi ío váha cuu iní-ndó.

Váha táhú nchaa nchòhó ñáiyu ndàhyú sá ndihí iní-ndó, chi sáá nduu te cudíí iní-ndó ñí caa ñí quíhí<sup>n</sup>.

22 Váha táhú nchaa nchòhó ñáiyu na cùu úhú iní ñáhá tnàha ñáiyu-xi, chi sáá nduu te vá dáñá-gã-yu quíhu-ndo vèñúhu, te cúcuéhé ñáhã-yu xii-ndo, te cachí-yu sá ñà díú ñáiyu váha cùu-ndo, te duca<sup>n</sup> càda ñahá-yu xii-ndo sá cuendá yúhú Téé cùu ñaní tnàhá-ndó nchaa-ndo.

23 Te òré duca<sup>n</sup> na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndúu táhú-ndó sá ío váha càa ndecu andu cundecu ndihí-ndo nduu na nasaá-ndó yàcá<sup>n</sup> cundecu-ndo, chi díu-ni duca<sup>n</sup> ñí xóo cada ñaha cuè

ñaní tnàhá-yu xii cue téé ní xóo cáhá<sup>n</sup> tnúhu Yá Ndiöxí ní xíndecu ndéé sanaha.

24 Te ndàhú ní cuu nchaa ñáiyu cuica ñà túú sàndáá iní ñáhá xii Yá Ndiöxí, chi vitna ío váha ndécú-yu, dico sáá nduu te nduu ndàhú-yu.

25 Te ndàhú ní cuu tucu nchaa ñáiyu ñà túú tnàhí ná cúmání xii-xi vitna, chi sáá nduu quíní-yu tnúndòho tnúhu ndàhú.

Te ndàhú ní cuu nchaa ñáiyu cudíí ìní-xi ndècu ichi cuehé ichi duha vitna, chi sáá nduu te ndàhyú-yu sá ndihí iní-yu.

26 Te ndàhú ní cuu nchaa ñáiyu na càhá<sup>n</sup> váha dáva-gá ñáiyu cuendá-xi, chi duca<sup>n</sup> ñí xóo cáhá<sup>n</sup> váha-yu cuendá nchaa cue téé ní xóo dandàhú ñáhá xii ñáiyu ndéé sanaha, chi ní cachí-güedé sá càhá<sup>n</sup>-güedé tnúhu Yá Ndiöxí te ñà ndàá —càchí-gá xãha<sup>n</sup>-gã xii-güedé.

*Cuu iní-ó nchaa ñáiyu cùu úhú iní  
ñáhá xii-o*

*(Mt. 5:38-48; 7:12)*

27 Te Jèsús ní xáha<sup>n</sup>-gã xii nchaa ñáiyu xíndecu-á<sup>n</sup>:

—Nchaa nchòhó ñáiyu xíndedóho ñaha càchí tnúhu-í xii-ndo, sá cúú ìní-ndó ñáiyu cùu úhú iní ñáhá xii-ndo, te cada-ndo sá vãha sá cúú-xi-yu cuèi nándi sá ná cáda ñahá-yu xii-ndo.

28 Te cáca<sup>n</sup> táhú-ndó núú Yá Ndiöxí cuendá ñáiyu càhá<sup>n</sup> úhú ñáhá xii-ndo, ndihí cuendá ñáiyu tèe ñaha cuéchi neñúú xii-ndo.

29 Te núu ní canihá-yu xii-ndo ñí xito te cuiní tucú-yu canihá-yu, te dañá-ndo na canihá-yu, àdi núu na quèndeé-yu dóó ndíxí ndòdo-ndo, ndihí dúhnú-ndó, te dañá-ndo na cànehé-yu quíhí<sup>n</sup>.

30 Te núu xicá<sup>n</sup>-yu ñí sá nándíhi-yu núu-ndó te cuáñaha-ndo, àdi quendeé-yu ñí ndachíu<sup>n</sup>-ndo, te vá nándácá<sup>n</sup>-ndó núu-yu.

31 Te nchaa sá vãha cuiní-ndó càda tnaha ñáiyu-ndo, te cada-ndo tnàhá-ndó ndihí-yu.

32 Chi núu nchòhó ná cùu iní-ndó mèe-ñí ñáiyu cùu iní ñáhá xii-ndo, te vá càchí-ndó sá ío váha quède-ndo, chi

tnàhá nchaa ñáiyu ndècu ichi cuehé ichi duha duca<sup>n</sup> xǐquidé-yu.

33 Àdi mee-ni ñáiyu quide ñaha sá vâha xii-ndo quide váha-ndõ-yu, te vá càchí-ndó sǎ ïo váha quide-ndo, chi tnàhá nchaa ñáiyu ndècu ichi cuehé ichi duha duca<sup>n</sup> xǐquidé-yu.

34 Àdi mee-ni ñáiyu sàni iní-ndó nàcoto ñaha xii-ndo cuañaha-ndo ì<sup>n</sup> sá xicá<sup>n</sup>-yu núú-ndó, te vá cání iní-ndó sǎ ïo quide váha-ndo, chi tnàhá ñáiyu ndècu ichi cuehé ichi duha dâsa<sup>n</sup> nuú-yu ì<sup>n</sup> sá néhé vâha-yu, te ndètu cahnu-ná-yu nacoto ñaha ñáiyu ní sáha nuú-yu-á<sup>n</sup>.

35 Dico nchòhó xíní ñùhu-xi cuu iní-ndó ñáiyu cùu úhú iní ñáhá xii-ndo, te cada-ndo sǎ vâha sá cúu-xí-yu, te cuañaha nuu-ndo ì<sup>n</sup> sá ná ndíhi-yu te núu xicá<sup>n</sup>-yu núú-ndó, te vá cùndètu-ndo nacoto ñahá-yu xii-ndo. Te duca<sup>n</sup> te ío-gá cuehé ñíhí-ndó cùndecu ndíhi-ndo, te cuu ndisa-ndo dèhe Dútú Ndiõxí, chi ío càhnu iní-gá sá cúu-xí nchàa ñáiyu ñá túú ndàcá<sup>n</sup> táhú núú-gǎ cuendá nchaa sá vâha quide-gá, ndíhi sá cúu-xí nchàa ñáiyu ndècu ichi cuehé ichi duha.

36 Te cunduu càhnu iní nchòhó tucu datná càhnu iní Tǎtá-ó Dútú Ndiõxí.

*Vá càhá<sup>n</sup> cuèhé-ó cuendá tnàha ñáiyu-o*

*(Mt. 7:1-5)*

37 'Te vá càhá<sup>n</sup> cuèhé-ndó cuendá sá quidé tnàha ñáiyu-ndo, te duca<sup>n</sup> te Yá Ndiõxí ñá túú nà tnúhu cúñaha-gǎ xii-ndo. Te vá cùñaha-ndo xii ñáiyu sá quíhí<sup>n</sup>-yu ì<sup>n</sup> xichi núú ùhú núú ndàhú ndohó-yu cuendá nchaa sá ñà túú vâha quidé-yu, te duca<sup>n</sup> te Yá Ndiõxí vá cùñaha-gǎ xii-ndo sǎ tnàhá-ndó quíhí<sup>n</sup>-ndó ì<sup>n</sup> xichi núú ùhú núú ndàhú ndoho-ndo. Te chí cáda càhnu iní nchaa sá quidé-yu, te duca<sup>n</sup> te Yá Ndiõxí cada càhnu iní ñáhá-gǎ xii-ndo tucu.

38 Te chí cuañaha xii ñáiyu núu ná cúu sǎ xíní ñùhú-yu, te datná chitu ì<sup>n</sup> yicá súúní xidó coyo-ná, duca<sup>n</sup> tàxi Yá Ndiõxí xii-ndo. Te nánicuáa na càda-ndo cada váha-ndo sǎ cúu-xí

tnàha ñáiyu-ndo, te diu-ni duca<sup>n</sup> càda ñaha Yá Ndiõxí xii-ndo —càchí Jèsús xǎha<sup>n</sup>-gǎ xii-yu.

39 Te dǎtnúní ní cani-gá ì<sup>n</sup> cuendú núú-yu nàcuáa tecú tnúní-yu tnúhu-gá, te xǎha<sup>n</sup>-gǎ:

—Ì<sup>n</sup> tée cuáá chi ñá ndácú-dě cuita nehe-dé ingá tée cuáá, chi núu duca<sup>n</sup> na càda-güedé te ndí ndúú-güedé ngaunihnu-güedé déhvá.

40 Te ni ì<sup>n</sup> landú yíhí scuèlá ñá túú cùnuu-gá-güexi dácúxí mèstrú-güexi, te ndéé núu na cùtúha váha-güexi, te dǎtnúní nútahá-güexi tée dānehé ñáhá xii-güexi.

41 'Te na càchí tnúhu-í xii-ndo sǎ nchàa cuéchi quide ñáiyu cùu-xi datná ì<sup>n</sup> mihi líhli. ¿Te ná cuendá ndéhé-ndó ì<sup>n</sup> sá ñà túú vâha quide tnàha ñáiyu-ndo, te mee-ndo vîhi-gá quidé-ndó-í? Te sá dúcá<sup>n</sup> quide-ndo te cada iní-ndó sǎ ndéhé-ndó datná ì<sup>n</sup> mihi líhli ñùhu núú tnàha ñáiyu-ndo, te mee-ndo ñùhu ì<sup>n</sup> mihi cahnu-gá núú-ndó.

42 Te núu na nàcanu ichi-ndo tnàha ñáiyu-ndo cuendá sá ñà túú quide váha-yu ndècú-yu te mee-ndo vîhi-gá quidé-ndó ñá, te cada iní-ndó sǎ xǎha<sup>n</sup>-ndo xii-yu sá nátava-ndo mihi líhli ñùhu núú-yu, te mihi càhnu ñùhu núú méé-ndó ñà túú quide cuendá-ndó. ¿Te sá dúcá<sup>n</sup> quide-ndo te ío dāndahú-ndó mèe-ndo sá quidé ndǎá-ndó te ñá ndǎá sá quidé ndǎá-ndó! Te xini ñùhu-xi díhna-gá dañha-ndo nchàa sá ñà túú vâha quide-ndo, te dǎtnúní duca<sup>n</sup> te cutnúní váha iní-ndó nàcuáa nacanu ichi-ndo tnàha ñáiyu-ndo.

*Ndi dí<sup>n</sup> núú yutnu xíní-ó nǎ yutnu cùu-xi cuendá sá sǎvidí-xi*  
*(Mt. 7:17-20; 12:34-35)*

43 'Te ñá túú nì ì<sup>n</sup> yutnu váha te quiní-ó cùu<sup>n</sup> sǎvidí sá ñà túú vâha, te ni ì<sup>n</sup> yutnu sá ñà túú vâha, te quiní-ó cùu<sup>n</sup> sǎvidí váha, chi mee-ni sǎvidí sá ñà túú vâha cùu<sup>n</sup>.

44 Te ndí dí<sup>n</sup> núú yutnu xíní-ó nǎ yutnu cùu-xi cuendá sá sǎvidí-xi, chi ñá túú xíní-ó cùu<sup>n</sup> ngúxí ì<sup>n</sup> tnu ñù, te

ni ñà túú xìní-ó cùu<sup>n</sup> ndéhé yoho yàha stilé díquí ì<sup>n</sup> yoho yàha cutexínu.

45 Te nchaa ñáyu váha iní-xi càhá<sup>n</sup>-yu tnúhu váha, chi ñu-ni tnúhu váha tnàhí-á<sup>n</sup> ñúhú iní-yu, te nchaa ñáyu ñá túú váha iní-xi càhá<sup>n</sup> cuèhé-yu, chi ñu-ni tnúhu cuèhé tnàhí-á<sup>n</sup> ñúhú iní-yu, chi nchaa sá ñúhú iní-yu te xí<sup>n</sup> càhá<sup>n</sup>-yu.

*È<sup>n</sup> vehe ndècu cimientú-xi ndihì ì<sup>n</sup> vehe ñá túú cimientú-xi*  
(Mt. 7:24-27)

46 '¿Te ná cuèdá càchí-ndó sã yùhú cùu-í Yaá cùú Xìtohó-ndó te ñá túú quìde-ndo nchaa nacuaá càhá<sup>n</sup>-í-i?

47 Te na càchí tnúhu-í xii-ndo cuèdá ñáyu tùha ñaha xii-í, chi ñáyu-á<sup>n</sup> sácúndedóho-yu nchaa tnúhu càhá<sup>n</sup>-í te tñí-yu.

48 Te ñáyu-á<sup>n</sup> cùú-yu dàtná ì<sup>n</sup> tée ní dácáá ì<sup>n</sup> vehe, chi tée-á<sup>n</sup> dñha-gá ní xete-dé ndéé ní tnahá-dé yúú cáxí<sup>n</sup> te dàtnùní ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, dico ñá túú ní ndàcu-xi cuído-xi, te duca<sup>n</sup> chi tée ní dácáá vèhe-á<sup>n</sup> ñí tava-dé cimientú-xi núú yúú cáxí<sup>n</sup>. Duha sãtnahá-xi cùu nchaa ñáyu sácúndedóho tnúhu càhá<sup>n</sup>-í te tñí-yu.

49 Te ñáyu sácúndedóho tnúhu càhá<sup>n</sup>-í te ñá túú tñí-yu, ñáyu-á<sup>n</sup> cùú-yu dàtná ì<sup>n</sup> tée ní dácáá ì<sup>n</sup> vehe, te ñá túú ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, te íí-ni ní xido-xi vèhe-á<sup>n</sup> cuèdá sá ñà túú ní quène cimientú-xi. Duha sãtnahá-xi cùu nchaa ñáyu sácúndedóho tnúhu-í te ñá túú cuíní-yu tñí-yu —càchí-gá xãha<sup>n</sup>-gã xii-yu.

## 7

*Jèsús quidé tãtna-gá ì<sup>n</sup> tée xínu cuechi núú ì<sup>n</sup> tée cùu capitá<sup>n</sup>*

(Mt. 8:5-13)

1 Te sáta ñí yáha ní cáhá<sup>n</sup> Jèsús ndihì ñáyu, te cuáhá<sup>n</sup>-gá ñúú Capernaúm.

2 Te yacá<sup>n</sup> ndécú ì<sup>n</sup> tée cùu capitá<sup>n</sup>, te cùhú ì<sup>n</sup> tée xínu cuechi núú-dé tée

ío-gá cùú iní-dé, te sa ndècu-ná-dé sá cùú-dé.

3 Te òré ní níhí tée cùu capitá<sup>n</sup>-á<sup>n</sup> tnúhu cuèdá Jèsús, te ní tendaha-dé ì<sup>n</sup> úú cue tée cùu sacuéhé núú ñáyu israél cuáhá<sup>n</sup>-güedé cáhá<sup>n</sup> ndàhú-güedé núú-gã núu vá cündèe iní-gá quíhí<sup>n</sup>-gá cada tãtna-gá tée xínu cuechi núú-dé-á<sup>n</sup>.

4 Te ní quexìo-güedé núú ndécú Jèsús, te ní ngüita-güedé càhá<sup>n</sup> ndàhú víhí-güedé núú-gã, te xãha<sup>n</sup>-güedé:

—Tée cùu capitá<sup>n</sup> ní cachí-dé véxi-ndí núu vá cündèe iní-n quíhí<sup>n</sup>-n càda tãtna-n ì<sup>n</sup> tée xínu cuechi núú-dé chi cùhú-dé, te tàú ndisa-n càda-n nacuaá càhá<sup>n</sup> capitá<sup>n</sup>-á<sup>n</sup>,

5 chi tée-á<sup>n</sup> ío cùu iní ñáhá-dé xii nchaa nchúhú ñáyu israél te ñu-dé ní táuchíú<sup>n</sup>-dé ní sáá veñúhu-ndí —càchí-güedé xãha<sup>n</sup>-güedé xii-gã.

6 Te sáta dúcá<sup>n</sup> te Jèsús ní xica-gá cuáhá<sup>n</sup>-gá ndihì-güedé, te òré tá cüyatni-gá vehe núú ndécú tée cùhú-á<sup>n</sup> cuáhá<sup>n</sup>, te tée cùu capitá<sup>n</sup>-á<sup>n</sup> ñí xãha<sup>n</sup>-dë xii ì<sup>n</sup> úú cue tée càhá<sup>n</sup> ndihì-dé:

—Quíhí<sup>n</sup>-ndó cñaha-ndo xii Yaá cùú Mèstrú sá càchí-í sá ñà túú ñá cani iní-gá, chi ñá túú tàú-í sá quíhu-gá ndéé xití vehe-í,

7 chi ñí sá cùnú ndúcú mè-í-gá ñá túú ní cùyí-í. Núu xí<sup>n</sup> cñaha-ndo xii-gá sá ná càhá<sup>n</sup>-ni-gá sá ndúha tée xínu cuechi núú-í-a te ndúha-dé.

8 Chi yúhú ndécú cuè tée tàxi tñuní ñáhá xii-í, te duca<sup>n</sup> yúhú tucu ndècu cue sandadú táxi tñuní-í. Te òré xãha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chiú<sup>n</sup> te cuáhá<sup>n</sup>-dé, te òré xãha<sup>n</sup>-í xii ingá-dé quixi-dé te véxi-dé, te òré xãha<sup>n</sup>-í xii tée xínu cuechi núú-í cada-dé ì<sup>n</sup> chiú<sup>n</sup> te quìde-dé. Duha càchí-í cñaha-ndo xii-gá —càchí-dé xãha<sup>n</sup>-dë xii cue tée càhá<sup>n</sup> ndihì-dé-á<sup>n</sup>.

9 Te sáta dúcá<sup>n</sup> ñí xãha<sup>n</sup>-güedé xii Jèsús, te ní cuñúhu-gá nchaa tnúhu ní cáhá<sup>n</sup> tée cùu capitá<sup>n</sup>-á<sup>n</sup>, te ní nchócótó-gá núú nchaa ñáyu nchìcú<sup>n</sup> ñáhá xii-gá cuáhá<sup>n</sup>, te ní xãha<sup>n</sup>-gã:

—Na càchí tnúhu ndáá-í xii-ndo sã vátá quíní-gá-í ñí ì<sup>n</sup> ñáyu israél, ñáyu ío váha sãndáá iní-xi Yá Ndiöxí

dàtná sàndáá iní ñáhá tée-á<sup>n</sup> xii-gá —  
càchí-gá xàha<sup>n</sup>-gã xií-yu.

<sup>10</sup> Te òré ní ndexìo cue tée nèhe  
tnúhu-á<sup>n</sup> ñí sáhá<sup>n</sup> núú Jèsús, te sa ní  
ndúha tée cùhú-á<sup>n</sup>.

*Jèsús dándòto-gá déhe ì<sup>n</sup> ñaha quèé*

<sup>11</sup> Te sáta dúcá<sup>n</sup> ñí cuu te ní xica  
Jèsús cuáhá<sup>n</sup>-gá ì<sup>n</sup> ñuu nání Nàín,  
ndihì cue tée xica cuu ndihì-gá, ndihì  
vài ñáyiu.

<sup>12</sup> Te òré ní sáa-gá yuhu ñuu-á<sup>n</sup>,  
te ní xiní-gá nchídó-güedé ì<sup>n</sup> ndíyì  
cuáhá<sup>n</sup> chindúxi ñaha-güedé, te  
ndíyì-á<sup>n</sup> cúu dèhe ì<sup>n</sup> ñaha quèé, te  
ì<sup>n</sup>ndí duca<sup>n</sup>-ni déhe-a<sup>n</sup> ndècu ni cuu  
te ní xihí-dé. Te ío cuéhé ñáyiu cuáhá<sup>n</sup>  
chindúxi ñaha.

<sup>13</sup> Te òré ní xiní ñáhá Jèsús xii-a<sup>n</sup>  
ndàhyú-a<sup>n</sup> te ní cundàhú iní ñáhá-gã,  
te ní xáha<sup>n</sup>-gã:

—Vá ndàhyú-n —càchí-gá xàha<sup>n</sup>-gã  
xii-a<sup>n</sup>.

<sup>14</sup> Te ní dáyátní-gã càjá ñúhú  
ndíyì-á<sup>n</sup> te ní dácàa-gá ndaha-gá te ní  
tendaha-gã càjá-á<sup>n</sup>, te ní ngüíñí cue  
tée nchìdo ñaha-á<sup>n</sup>. Te ní xáha<sup>n</sup>-gã xii  
ndíyì-á<sup>n</sup>:

—Tée cuechi, yúhú càchí-í sá  
ndácòo-n —càchí-gá xàha<sup>n</sup>-gã xii  
ndíyì-á<sup>n</sup>.

<sup>15</sup> Te tée ní xihí-á<sup>n</sup> ñí nucúnucóo-dé  
te ní ngüíta-dé càhá<sup>n</sup>-dé, te Jèsús ní  
nacuáha cuèndá ñáhá-gã xii-dé ndaha  
náná-dé.

<sup>16</sup> Te sá dúcá<sup>n</sup> ñí quide Jèsús  
ní xiní-yu te ío ní yùhú-yu, te ní  
xítnàhá-yu:

—Ío càhnu cuu Yá Ndiòxí chi ì<sup>n</sup> tée  
càhá<sup>n</sup> tnúhu-gá ní quexìo núú ndécú-ó  
—càchí-yu xítnàhá-yu.

Te ní xítnàha tucú-yu:

—Yá Ndiòxí véxi-gá chindee  
ñaha-gá xii nchaa nchoo ñáyiu cùu  
cuèndá-gá —càchí-yu xítnàhá-yu.

<sup>17</sup> Te nchaa ñuu distritú Jùdeá, ndihì  
dava-gá ñuu ní níhì-yu tnúhu nacuáa  
ní quide Jèsús.

*Cue tée ní tendaha té Juàá cuáhá<sup>n</sup>  
núú ndécú Jèsús  
(Mt. 11:2-19)*

<sup>18</sup> Te cue tée xica cuu ndihì té  
Juàá ní xáha<sup>n</sup>-güedé xii-dé nchaa  
sá ñí quide-gá, núu ní cana-dé úu  
tnàhá-güedé

<sup>19</sup> cuèndá cúñaha-dé quíhí<sup>n</sup>-güedé  
nducu tnúhu-güedé núú Jèsús, te núu  
sá díú-gã cúú-gã Crìstú Yaá ní ten-  
daha Yá Ndiòxí véxi ñuyíú-a àdi sá  
cúndètu nahi-ni-güedé mei Yàá-á<sup>n</sup>.

<sup>20</sup> Te òré ní quexìo cue tée ní ten-  
daha tẽ Juàá núú ndécú Jèsús, te  
xàha<sup>n</sup>-güedé xii-gá:

—Té Juàá tée dàcuandute ñaha xii  
ñáyiu ní tendaha ñaha-dé xii-ndí  
véxi-ndí caca<sup>n</sup> tnúhú-ndí núú-n, núu  
sá díú-n cùu Crìstú Yaá quixi ñuyíú-a,  
àdi sá cúndètu-ndí mei Crìstú càchí-dé  
—càchí-güedé xáha<sup>n</sup>-güedé xii-gá.

<sup>21</sup> Te mei òré ní quexìo-güedé-á<sup>n</sup> ñí  
quide tátna Jèsús vài ñáyiu cùhú, te  
davá-yu càhú víhí tnàhá-yu, te ndí  
díí<sup>n</sup> ndí díí<sup>n</sup> núú cuéhé tnàhá-yu ì<sup>n</sup>  
ì<sup>n</sup>-yu, te cue ñáyiu yihì ñaha espíritú  
cúndèhì yucu ñávaha ní queñuhu-gá  
espíritú-á<sup>n</sup> yiqui cùñú-yu, te ío vài  
ñáyiu cuàá ní nacaá<sup>n</sup>-gá núú-yu.

<sup>22</sup> Te Jèsús ní xáha<sup>n</sup>-gã xii-güedé:

—Chí cuánùhú te cani-ndo cuèndú  
núú tẽ Juàá nchaa sá ñí xiní-ndó  
quide-í, ndihì nchaa nacuáa ndùu  
tnúhu ní càhá<sup>n</sup>-í ní xíndedóho-ndo. Te  
cúñaha-ndo xii-dé sá quidé tátna-í núú  
cuè ñáyiu cuàá, te quide tátna-í cue  
ñáyiu yacua, ndihì cue ñáyiu tnàhá  
cuéhé sã dátèhyú nihnu-xi yiqui  
cùñú-yu, ndihì cue ñáyiu doho, nchaa  
ñáyiu-á<sup>n</sup> quide tátna-í te ndúha-yu, te  
ndéé cue ñáyiu sa ní xihí dándòto-í  
cúñaha-ndo xii-dé, te cúñaha tùcu-ndo  
xii-dé sá ndècuu-í dánèhé-í nchaa  
ñáyiu ndàhú tnúhu sá sánú ìchi ñaha  
xií-yu nacuáa naníhí tàhú-yu.

<sup>23</sup> Te cúñaha tùcu-ndo xii-dé sá ìo  
váha táhú nchaa ñáyiu ñá túú quide  
sáa iní nchaa tnúhu càhá<sup>n</sup>-í, duha  
cúñaha-ndo xii-dé —càchí-gá xáha<sup>n</sup>-gã  
xii-güedé.

<sup>24</sup> Te sáta ñí yáha-güedé cuánuhú-güedé,  
te ní ngüíta Jèsús ní càhá<sup>n</sup>-gá núú  
ñáyiu cuèndá té Juàá, te xáha<sup>n</sup>-gã  
xii-yu:

—Nchòhó ní sándéhé-ndó ìḡn téé ndècu xití yucu, te téé-án ñà túú sàni ìḡn saní úú iní-dé, chi ñá túú quìde-dé dàtná quidé nchàa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tǎchí.

<sup>25</sup> Te ni ñà túú ní sándéhé-ndó ìḡn téé nìhnu dóó vǎha dóó vii càa. Te nchòhó xìní-ndó sǎ ñǎyiu sàcuìhnu dóó vǎha dóó vii càa ñá túú nǎ cúmǎni xií-yu, te nchaa ñáyiu-án ndécǔ-yu vehe cue téé cùnūu yìndaha ñaha xii ñáyiu.

<sup>26</sup> Dico nchòhó chi ní sándéhé-ndó ìḡn téé càhá<sup>n</sup> tnúhu Yá Ndiòxí. Te ndáá sá díú tǎe càhá<sup>n</sup> tnúhu-gá cúú-dě dico cùnūu-gá-dé dàcúúxí dàva-gá cue téé càhá<sup>n</sup> tnúhu-gá.

<sup>27</sup> Te diu cuèndá té Juàá-án càhá<sup>n</sup>-xi núú tütú Yá Ndiòxí nàcuáa ní xáha<sup>n</sup>-gǎ xii Crìstú, te duha ní xáha<sup>n</sup>-gǎ:

Tendaha-ì ìḡn téé càhá<sup>n</sup> tnúhu-í  
           codonūu-dé núú-n cuèndá  
           dátúha-dé ñáyiu cuèndá  
           quíndáá iní-yu tnúhu-n.

Duha ní xáha<sup>n</sup>-gǎ, te duca<sup>n</sup> ñi ngódó tnùní núú tütú-gá.

<sup>28</sup> Te na cǎchí tnúhu-í xii-ndo sǎ ñi ìḡn cue téé ñuyíú-a ñá túú cùnūu-güedé dàtná cùnūu té Juàá téé dàcuandute ñaha xii ñáyiu. Te nchaa ñáyiu sa ta ndǎhu ndaha ñaha Yá Ndiòxí vitna cuáhá<sup>n</sup> cùnūu-gá-ni tucú-yu dàcúúxí tǎ Juàá cuèi cùú-yu ñáyiu ñá túú cùnūu dacúúxí dàva-gá ñáyiu yìndaha-gá —cǎchí Jèsús xǎha<sup>n</sup>-gǎ xií-yu.

<sup>29</sup> Te sá dúcá<sup>n</sup> ñi càhá<sup>n</sup> Jèsús, núu nchaa ñáyiu ní dǎcuándute té Juàá ní cǎchí-yu sá ò vǎha quìde Yá Ndiòxí, te diu-ni duca<sup>n</sup> ñi càhá<sup>n</sup> cue téé cuìhna ìní-xi quìde cobrá ñáhá xii ñáyiu cuèndá impuèstú, cue téé ní dǎcuándute-dé.

<sup>30</sup> Dico cue téé cùu fariséú, ndìhi cue téé dàcuaha ñaha xii ñáyiu nchaa tnúhu ní chídó tnùní ndíi Moisés, cue téé ñá túú ní dàcuandute té Juàá ñá túú ní tnàhá iní-güedé cada-güedé nchaa sá vǎha cuìní Yá Ndiòxí.

<sup>31</sup> Te Xítòhó Jesucrìstú ní xáha<sup>n</sup>-gǎ xií-yu:

—Na cǎchí tnúhu-í xii-ndo nàcuáa sǎtnahá-xi cùu ñáyiu ndècu vitna.

<sup>32</sup> Chi ñáyiu-án cúú-yu dàtná cue landú sácòo núú yǎhu dàdiqui-güexi te níhi càhá<sup>n</sup>-güexi, te xǎtnàha-güexi: “Ní tǔú-ndí yaá ndìhi vǐlu te ñá túú ní cuìní-ndó càta-ndo. Te ò yica ìní ní xita yuhu-ndí te ñá túú ní ndǎhyú-ndó”, cǎchí-güexi xǎtnàha-güexi. Te duca<sup>n</sup> sǎtnahá-xi cùu ñáyiu ndècu vitna.

<sup>33</sup> Te té Juàá téé ní xóo dacuandute ñaha xii ñáyiu ò ndàhú ní xóo caxi-dé, te ni ñà túú ní xóo coho-dé ndudí ndéhé yoho yàha stilé sá sà ní nduu-xi ndidí, te ní cǎchí-ndó sǎ ñi xíndecu ndìhi-dé espíritú cùndìhi yucu ñávǎha.

<sup>34</sup> Te sǎtá ñi quexio yúhú Téé cùu ñaní tnàhá-ndó nchàa-ndo, te xèxi-í xǐhi-í ndécù-í te cǎchí-ndó sǎ cúú-í téé xèxi vihi te xǐhi vihi-í. Te cǎchí tucu-ndo sǎ cúú-í téé xǐca cuu ndìhi cue téé cuìhna ìní-xi quìde cobrá ñáhá xii ñáyiu cuèndá impuèstú, ndìhi nchaa dàva-gá cue téé ndècu ichi cuehé ichi duha, duha cǎchí-ndó.

<sup>35</sup> Te ñáyiu ní tnàhá tnúhu ndìhi Yá Ndiòxí, ñáyiu-án quidé-yu nàcuáa cutnùní sá mée-gǎ ò ndècu ndìhi-gá sá xìní tnùní-gá —cǎchí-gá xǎha<sup>n</sup>-gǎ xií-yu.

*Jèsús ndécú-gǎ vehe ìḡn téé cùu fariséú téé nàni Xímú*

<sup>36</sup> Te ìḡn téé cùu fariséú ní càhá<sup>n</sup>-dé Jèsús vehe-dé caxi-gá, te òré ní quexio-gá te cuánguìhu-gá mèsá.

<sup>37</sup> Te xía<sup>n</sup> núcòo-gá ní sáa ìḡn ñadìhi te diu-ni ñaha ñuú-án cúú-án, te ndècu-a<sup>n</sup> ichi díi ìní, te sá ñi níhi-a<sup>n</sup> tnúhu sá cuángaxi Jèsús vehe téé cùu fariséú-án, núu nèhe-a<sup>n</sup> ìḡn yoó chitu àcítí sàhá<sup>n</sup> tnámí.

<sup>38</sup> Te ní ngóo-a<sup>n</sup> ìḡn xio díi Jèsús, te ní ngüíta-a<sup>n</sup> ndǎhyú-a<sup>n</sup> te ndìhi ndute núú-a<sup>n</sup> ní naquete-a<sup>n</sup> sáhá-gǎ. Te dàtnùní ní nadayìchí-a<sup>n</sup> ndìhi idi díquí-a<sup>n</sup>, te ní teyuhu-a<sup>n</sup> sáhá-gǎ, te ní chíhi ñaha-a<sup>n</sup> àcítí sàhá<sup>n</sup> tnámí-án.

<sup>39</sup> Te sá dúcá<sup>n</sup> ñi quide-a<sup>n</sup> ní xini téé cùu fariséú téé ní càhá<sup>n</sup> ñáhá xii-gá-án núu ní saní iní-dé: “Te núu dìcò ndisa téé càhá<sup>n</sup> tnúhu Yá Ndiòxí cúú tǎe-a ña, te sa cutnùní iní-dé yoó cùu ñaha tnàndéé ñáhá xii-dé, àdi ná



ñáyiú cùu-a<sup>n</sup>, te dìcò ì<sup>n</sup> ñaha ndècu ichi dǐ ìní cúú-á<sup>n</sup>”, duha ní sani iní-dé.

<sup>40</sup> Te Jèsús ní xáha<sup>n</sup>-gǎ xii-dé:

—Xǐmú, ndècu ì<sup>n</sup> tnúhu cachí tnúhu-í xii-n —càchí-gǎ xáha<sup>n</sup>-gǎ xii-dé.

Te té cùu fariséú-á<sup>n</sup> xáha<sup>n</sup>-dě xii-gǎ:

—Cachí tnúhu, Mèstrú —càchí-dé xáha<sup>n</sup>-dě xii-gǎ.

<sup>41</sup> Te Jèsús ní xáha<sup>n</sup>-gǎ:

—Ní xíndecu ì<sup>n</sup> té ní xóo dasa<sup>n</sup> núu díhú<sup>n</sup>, te ní xítaú úú tnàhá-güedé núú-dě. Te ì<sup>n</sup>-dé ní sáha-dé úhú<sup>n</sup> cièndú díhú<sup>n</sup> denàriú, te ingá-dé ní sáha-dé údico úxí.

<sup>42</sup> Te ñá ní ñíhí-güedé nacháhu-güedé núú-dě, te té ní sánùu ñaha-á<sup>n</sup> ní quide càhnu iní-dé ndi ndúú-güedé. Te vitna cachí-ò tucu te núu nděda càa-güedé cúú ìní ñáhá-gǎ-güedé xii-dé —càchí-gǎ xáha<sup>n</sup>-gǎ xii-dé.

<sup>43</sup> Te ní xáha<sup>n</sup> tǎ Xǐmú-á<sup>n</sup>:

—Sànuu sá té tǎu vǎi-gǎ díhú<sup>n</sup> ìo-gǎ cúú ìní-dé té ní sánùu ñaha díhú<sup>n</sup>-á<sup>n</sup> —càchí-dé xáha<sup>n</sup>-dě xii-gǎ.

Te ní xáha<sup>n</sup> Jèsús:

—Sá ndàá càhá<sup>n</sup>-n —càchí-gǎ xáha<sup>n</sup>-gǎ xii-dé.

<sup>44-46</sup> Te Jèsús ní ndacoto-gǎ núu ñadìhí-á<sup>n</sup>, te ní xáha<sup>n</sup>-gǎ xii té Xǐmú-á<sup>n</sup>:

—¿Ndèhe-n nacuáa quide ñadìhí-a ñǎ? Chi cuánguìhu-í vehe-n, dico ñá túú ní tàxi-n ndute ndoo sáhà-í, te ni ñà túú ní tǎyuhu ñaha-n, te ni ñà túú ní chíhi-n acití díquì-í, dico ñadìhí-a ní naquete-a<sup>n</sup> ndìhi ndute núú-a<sup>n</sup> sáhà-í, te ní nadayìchí-a<sup>n</sup> ndìhi idi díquí-a<sup>n</sup>, te nuu núu teyuhu-a<sup>n</sup> sáhà-í, te ní chíhi-a<sup>n</sup> acití sàhá<sup>n</sup> tnámí sáhà-í.

<sup>47</sup> Te na càchí tnúhu-í xii-n sǎ ìo cùu ìní ñáhá-á<sup>n</sup> xii-í, te núu xía<sup>n</sup> cútnùní ìní-ó sǎ cuèí ìo vǎi sǎ cuèhé sǎ dúhá ní quide-a<sup>n</sup>, dico Yá Ndiòxí sa ní quide càhnu ìní ñáhá-gǎ xii-a<sup>n</sup>. Chi Yá Ndiòxí quidé càhnu ìní-gǎ ñáyiú cuèí vǎi àdi sacú cuèchi-yu, te núu sacú cuèchi-yu te sacú cúú ìní ñáhǎ-yu xii-í —càchí-gǎ xáha<sup>n</sup>-gǎ xii-dé.

<sup>48</sup> Te ní xáha<sup>n</sup>-gǎ xii ñadìhí-á<sup>n</sup>:

—Sa ní quide càhnu ìní-í nchaa cuèchi-n —càchí-gǎ xáha<sup>n</sup>-gǎ xii-a<sup>n</sup>.

<sup>49</sup> Te cue té xǐnucóo ndìhi-gǎ xǐtnàha-güedé:

—¿Ná té cùu té-a núu nándi sǎ quidé-dě, te ndéé nchaa yíca cuèchi ñáyiú quide cahnu iní-dé-í? —càchí-güedé xǐtnàha-güedé.

<sup>50</sup> Te Jèsús ní xáha<sup>n</sup> tucu-gǎ xii ñadìhí-á<sup>n</sup>:

—Sa ní cácu nihnu-n nǔú ùhú núu ndàhú vitna chí ní sándáá ìní ñáhá-n xii-í, te vitna cuanùhú te ñá túú-gǎ ná cani ìní-n —càchí-gǎ xáha<sup>n</sup>-gǎ xii-a<sup>n</sup>.

## 8

### *Ñáyiú dǐhí ní chindee ñàha xii Jesús*

<sup>1</sup> Te sátá dúcá<sup>n</sup> ní cuu te Jèsús ní xica-gǎ cuáhá<sup>n</sup>-gǎ tǐtní víhí ñúú náhnú, ndìhi ñúú líhli dǎnehé-gǎ ñáyiú nàcuáa ndìhu ndaha ñàha Yá Ndiòxí xii-yu. Te cuáhá<sup>n</sup> ndìhi-gǎ ndi ùxúú tnàhá cue té xica cuu ndìhi-gǎ,

<sup>2</sup> ndìhi ì<sup>n</sup> úú ñáyiú dǐhí ní quide tátna-gǎ ní xíhi ñaha espíritú cündìhi yucu ñávǎha, ndìhi ñáyiú tnàhá dava-gǎ cuèhé ùhú ní cùu. Te xía<sup>n</sup> tnàhá tucu ì<sup>n</sup> ñaha nàni Mariá Magdaléná, te ñaha-á<sup>n</sup> ní xíhi ñaha ùsǎ espíritú cündìhi yucu ñávǎha xii-a<sup>n</sup> ni cùu, te ní quee ñaha-xi.

<sup>3</sup> Te tnàhá ì<sup>n</sup> ñaha nàni Juáná ñadìhí ì<sup>n</sup> té nàni Chúza té ní cunuu ní xinu cuechi vèhe té Hèrodés, ndìhi ingá ñaha nàni Susaná nchaa ñáyiú-á<sup>n</sup> ní chindee ñáhá-yu xii-gǎ ndìhi nchaa sǎ ndécú ndìhí-yu, te diu-ni duca<sup>n</sup> ní quide vǎi-gǎ tucu ñáyiú nchìcú<sup>n</sup> ñáhá xii-gǎ cuáhá<sup>n</sup>.

### *Nàcuáa quide té cuángacá<sup>n</sup> triú (Mt. 13:1-9; Mr. 4:1-9)*

<sup>4</sup> Te ìo vǎi ñáyiú ndaa ñúú ní tacá-yu núu ndécú Jèsús, te ní ngüíta-gǎ ní cani-gǎ ì<sup>n</sup> cuèndú núú-yu cuèndá tecú tnùnì-yu tnúhu-gǎ, te xáha<sup>n</sup>-gǎ xii-yu:

<sup>5</sup> —Ì<sup>n</sup> té cuángacá<sup>n</sup>-dé triú. Te òré ní ngüíta-dé dǎngoyo-dé triú-á<sup>n</sup> te dava ní quene ndava ní ngava ndéé ichi, te ní xénihnu ñáyiú, te ní xini tǐlaá te ní nadatàcá-güedi.

<sup>6</sup> Te dava ní ngava ñuhu yadi nǔú yíhí vǐhi yúú, te ní xínu-xi dico núu

sàcú-ni nduu te ní yíchí-xi, chi ñá túú còhyo yìhi.

<sup>7</sup> Te dava ní ngava núú yúcu ndíquín tnu ññu, te ññu-ni ñí xínu-xi ndíhi tnu ññu-án, te tnu ññu-án ñí dánáá-xi nchàa triú sá ñí xínu-án.

<sup>8</sup> Dico dava triú-án ñí ngava-xi núú ndécú ññu cocón, te xián ní xínu-xi te ní sahnu-xi, te ío váha ní cuu, chi núú ññu-ní triú te ní nguíhi yoco-xi ññu cièndú triú-xi —càchí-gá xáha-gã xií-yu.

Te níhi ní cáhá-gá ní xáha-gã tucu-gá xií-yu:

—Nchaa nchòhó ñáyiu ní xíndedóho tnúhu ní cáhá-í-a, te ío váha chí cuáha cuèndá —càchí-gá xáha-gã xií-yu.

*Nàcuáa quèe-xi tnúhu ní cáhá Jèsús*  
(Mt. 13:10-17; Mr. 4:10-12)

<sup>9</sup> Te cue téé xica cuu ndíhi Jèsús ní xicá tnúhú-güedé núú-gã ññu nása quèe-xi cuèndú ní caní-gá núú ñáyiu.

<sup>10</sup> Te ní xáha-gã xii-güedé:

—Nchòhó chí sa càchí tnúhu Yá Ndiòxí xii-ndo ññu sá vátá quíní-gá-ndó, chí càchí tnúhu-gá nàcuáa cada-gá ndíhu ndaha-gã ñáyiu, dico dava-gá ñáyiu caní-í mee-ni cuèndú núú-yu, chí cuéi na quíní-yu nchaa nàcuáa cuu dico ní vá cùtnùní iní-yu ná cuèndá duca<sup>n</sup> cùu, àdi cuéi na cùndedóho-yu dico ní vá tècú tnùní-yu —càchí-gá xáha-gã xii-güedé.

*Jèsús càhá-gá nàcuáa quèe-xi tnúhu cuèndá téé cuángacá triú*  
(Mt. 13:18-23; Mr. 4:13-20)

<sup>11</sup> Te xáha-gã tucu-gá xii-güedé:

—Duha quèe-xi cuèndú ní caní-í núú-ndó, chí triú ní sacá<sup>n</sup> téé-án cúu-xí dàtná tnúhu Yá Ndiòxí.

<sup>12</sup> Te triú sá ñí quene ndava ní ngava ndéé ichi-án, xián cúu-xí dàtná ñáyiu ní quée iní-xi tnúhu Yá Ndiòxí, dico sácuíhná cuáhá-xi xòcani-xi tnúhu-gá iní-yu cuèndá sá vã quíndáá iní-yu, te vá nánihí tãhú-yu.

<sup>13</sup> Te triú sá ñí ngava ññu yadi núú yíhí víhi yúú, xián cúu-xí dàtná ñáyiu ní xíndedóho tnúhu Yá Ndiòxí te díí iní ní tñí-yu tnúhu-gá, dico òré ná dàcáhá ñáhá yùcu ñávãha

xií-yu nándi cadá-yu, te dàña ni-ñnú-yu tnúhu-gá chí ñá nihí ndéé-yu canchicú<sup>n</sup> niñnú-yu nàcuáa càhá<sup>n</sup> tnúhu-gá.

<sup>14</sup> Te triú sá ñí ngava núú yúcu ndíquín tnu ññu-án, xián cúu-xí dàtná ñáyiu ní tecú dóho-xi tnúhu Yá Ndiòxí, dico cuéé cuéé ní nacuanaá-yu tnúhu-gá, chí cuèndá mee-ni sá cúu-xí mèe-yu ññu iní-yu, ndíhi cuèndá sá ío sàni iní-yu cuu cuicá-yu, ndíhi cuèndá sá ío cùdíí iní-yu nchaa sá ío ñuyíú-a núu xián àú<sup>n</sup> nã cuu ní xíndedóho-yu tnúhu-gá.

<sup>15</sup> Dico triú sá ñí ngava núú ndécú ññu cocón, xián cúu-xí dàtná ñáyiu váha iní-xi ní xíndedóho tnúhu Yá Ndiòxí chí ñá túú dàña niñnú-yu, te ní yùhu ni iní-yu quidé-yu nchaa nàcuáa càhá<sup>n</sup> tnúhu-gá.

*Nàcuáa quidé-yu iti*  
(Mr. 4:21-25)

<sup>16</sup> Te ñá túú ní ññu ñáyiu tènñuhú-yu ññu iti te dàdáhu-yu, àdi chiváha-yu ññu caha càamá, chí tàxi ndecú-yu núú ññu cuèndá cutnùní núú nchaa ñáyiu ndècu vehe.

<sup>17</sup> Te ní ññu tnúhu sá ñã tècú tnùní ñáyiu vitna vá càchí-ó sã vã tècú tnùní-yu chí dacuéi sá tècú tnùní-yu, te ní ññu tnúhu sá càchí-ó cùu yuhu vitna vá cúu yùhu chí dacuítí sã quée tũ-xi núú ñáyiu.

<sup>18</sup> Te chí cùndedóho váha tnúhu na càhá-í-a. Nchaa ñáyiu sàndáá iní ñáhá xii Yá Ndiòxí ío-gá cuita quíndáá-gá iní ñáhã-yu xii-gá quíhí<sup>n</sup>, te nchaa ñáyiu ñá túú sàndáá iní ñáhã xii-gá uu<sup>n</sup>-gá cuita cuu sáá-gá iní-yu núú-gã quíhí<sup>n</sup> —càchí-gá xáha-gã xii-güedé.

*Cue ñani Jèsús ndíhi nãná-gã*  
(Mt. 12:46-50; Mr. 3:31-35)

<sup>19</sup> Te ní quexìo náná Jèsús ndíhi cue ñani-gá vehe núú ndécú-gã, te ñá ndácú-yu cáhá<sup>n</sup> ndíhi ñáhã-yu xii-gá chí ío cuéhé ñáyiu ndècu núú ndécú-gã.

<sup>20</sup> Te ññu ñáyiu xíndecu-án ñí dáyãha-yu tnúhu núú-gã, te xáhá<sup>n</sup>-yu:

—Ní quexio náná-n ndìhi cue ñaní-n xĩnutnĩ-yu quehé, te cuíní-yu cáhá<sup>n</sup> ndìhi ñàhá-yu xii-n —càchí-yu xáhã<sup>n</sup>-yu xii-gá.

21 Te ní xáha<sup>n</sup>-gã:

—Nchaa ñáyiú sàcúndedóho tnúhu Yá Ndiõxí te quidé-yu nchaa nàcuáa càhá<sup>n</sup> tnúhu-gá, ñáyiú-á<sup>n</sup> cúy-yu dàtná nãná-í ndìhi dàtná cue ñaní-í —càchí-gá xáha<sup>n</sup>-gã xii ñáyiú ní dáyãha tnúhu núú-gã-á<sup>n</sup>.

*Jèsús ngání-gã táchí ndìhi ndute làgúná*

(Mt. 8:23-27; Mr. 4:35-41)

22 Te ñ<sup>n</sup> nduu ní quée Jèsús bàrcú ndìhi cue téé xica cuu ndìhi-gá, te ní xáha<sup>n</sup>-gã:

—Chí ná quihí<sup>n</sup>-ó ndàa ingá xio yuhu làgúná —càchí-gá xáha<sup>n</sup>-gã xii-güedé.

Te cuáhã<sup>n</sup>-güedé ndìhi-gá.

23 Te ñini ñùhu bàrcú ichi cuáhã<sup>n</sup>-xi núú ndute ní xidí Jèsús. Te ní ngüíta-xi níhi vèhi quene táchí te ta nàdachitú-xi ndute xití bàrcú-á<sup>n</sup> cuáhã<sup>n</sup>, te sa cuíní-nã-xi quée naa bàrcú-á<sup>n</sup> xití ndute ni cùu.

24 Te ní sáhã<sup>n</sup>-güedé núú cáá Jèsús xidí-gá, te ní xáha<sup>n</sup>-güedé xii-gá:

—¡Mèstrú, ndiquíú ìní chi tà quée naa-o cuáhã<sup>n</sup>! —càchí-güedé xáha<sup>n</sup>-güedé xii-gá.

Te Jèsús ní ndiquíú ìní-gá te ní ndacóo-gá te ní tenàá-gá táchí-ã<sup>n</sup> ndìhi ndute làgúná-á<sup>n</sup>, te ní ngüíñí-ni táchí-ã<sup>n</sup> te ní nucúndecu nahi-nã ndute làgúná-á<sup>n</sup>.

25 Te ní xáha<sup>n</sup>-gã xii-güedé:

—¿Náa ñá túú sàndáá ìní ñáhã ndìsa-ndo xii-í ã<sup>n</sup>? —càchí-gá xáha<sup>n</sup>-gã xii-güedé.

Te ní cuñúhu-güedé sá dúcã<sup>n</sup> ñí quide-gá ní xiní-güedé, te ní yuhú-güedé, te ní xitnàha-güedé:

—¿Te ná téé cùu téé-a núú ní cáhá<sup>n</sup>-ni-dé te ní ngüíñí táchí te ní nucúndecu nahi-ni ndüte làgúná-a-í? —càchí-güedé xitnàha-güedé.

*Tée yìhi ñaha cue espíritú cúndìhi yucu ñávãha*

(Mt. 8:28-34; Mr. 5:1-20)

26 Te ní sáá-gá ndìhi-güedé yucu cue téé ñuú Gàdará, te yìhi ndáá-ni ndàa ingá xio làgúná-á<sup>n</sup> cáá dístítú Galiléa.

27 Te òré ní quene Jèsús xití bàrcú te ní dáyátní ñàha ñ<sup>n</sup> téé ñuú-á<sup>n</sup> xii-gá, te yìhi ñaha titní espíritú cúndìhi yucu ñávãha xii-dé. Te ní cunaha ñà túú-gã sácũhnu-dé dóó-dě, te ni ñà túú-gã sácũndecu-dé vehe-dé, chi da nchaa núú yĩndũxi ndíyí quide vehe-dé.

28 Te òré ní xiní-dé Jèsús te ní ngüíñí xití-dě núú-gã, te cue espíritú yìhí ñàha xii-dé-á<sup>n</sup> ñí quide-xi níhi ní cáhá<sup>n</sup>-dé, te xáha<sup>n</sup>-dě xii-gá:

—¿Ná cuendá véxi-õ Jèsús Déhe Dútú Ndiõxí sàdí-n ìchi-í-í? Te càhá<sup>n</sup> ndáhú-í núú-n sã và dándòho ñaha-n xii-í —càchí-dé xáha<sup>n</sup>-dě xii-gá.

29 Te duca<sup>n</sup> ñí cáhá<sup>n</sup>-dé cuendá sá Jèsús ní xáha<sup>n</sup>-gã xii nchaa espíritú cúndìhi yucu ñávãha yìhi ñaha sá ná quée ñaha-xi xii-dé. Te nchaa xiã<sup>n</sup> ní xóo dacáhã<sup>n</sup>-xi ìní-dé nãndí sá ñí xóo cada-dé ñuu ní xóo dacùtu ñaha-güedé cadená xii-dé cuendá sá ñà túú-gã ná cada-dé, te ní xóo cundeé ñáhã-güedé, dico cuèi duca<sup>n</sup> dico ní xóo dandáva-ni-dé cadená, te cue espíritú cúndìhi yucu ñávãha-á<sup>n</sup> ñí xóo dacùnu ñaha-xi xii-dé ní xóo quihí<sup>n</sup>-dé xití yucu.

30 Te Jèsús ní xicã<sup>n</sup> tnúhú-gã núú-dě, te xáha<sup>n</sup>-gã:

—¿Nása nàni-n-í? —cachí-gá xáha<sup>n</sup>-gã.

Te ní xáha<sup>n</sup>-dě:

—Vài Sandadú nánì-í —càchí-dé xáha<sup>n</sup>-dě xii-gá.

Te duca<sup>n</sup> ñí xáha<sup>n</sup>-dě xii-gá cuendá sá ño cuéhé espíritú cúndìhi yucu ñávãha yìhi ñaha xii-dé.

31 Te nchaa espíritú-á<sup>n</sup> ñí cáhá<sup>n</sup> ndáhú-xi núú Jèsús sá và téndàha ñaha-gã xii-xi quihí<sup>n</sup>-xi núú ùhú núú ndáhú.

32 Te ñiú-ni yatni yucu núú ndécú Jèsús-á<sup>n</sup> yìhí vài cuchí xixexi-güedi, te nchaa espíritú-á<sup>n</sup> ñí cáhá<sup>n</sup> ndáhú-xi

núú-gă sá ná dàña-gá quíhu-xi yiqui cùñú nchaa cùchí-án, te Jèsús ní xáha<sup>n</sup>-gă sá cúú quíhu-xi yiqui cùñú-güedi.

<sup>33</sup> Te ní quee ñaha nchàa espíritú-án xii téé-án, te ní quíhu-xi nchaa cùchí-án, te cùchí-án ní xinu-güedi duha ní quée-güedi ndàa núú dèhvá yuhu làgúná-án, te ní ngauni-hnu-güedi xití ndute te ní ndihi-güedi ní cáhá.

<sup>34</sup> Te òré ní xiní cue téé xito cuchi-án nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní cani-güedé cuèndú núú cuè ñáyi ndècu xití ñuú, ndihi núú cuè ñáyi ndècu xití yucu.

<sup>35</sup> Te nchaa ñáyi ní níhí tnùhu ní queé-yu cuáhá<sup>n</sup> ndéhě-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhi ñaha cuè espíritú cùndìhi yucu ñávãha-án núcóo-dé núú sáhá Jèsús, te ñhnu-ná-dé dóo-dě, te núcóo-dé dàtná ñáyi váha, te ní yùhú-yu òré ní xiní ñáhã-yu xii-dé.

<sup>36</sup> Te nchaa ñáyi ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávãha-án ní cùu ní cani-yu cuèndú núú nchàa ñáyi ní quexió-án nàcuáa ní cuu ní ndúha téé-án ndihi nàcuáa ní cuu cuèndá nchaa cùchí-án.

<sup>37</sup> Te sá dúcá<sup>n</sup> ní níhí-yu tnúhu nàcuáa ní cuu, núu nchaa ñáyi ñuú Gàdará ío ní yùhú-yu te ní ngüíta-yu càhá<sup>n</sup> ndàhú-yu núú Jèsús sá ná nùhú-gá nùu ndéé ichi véxi-gá. Te sá dúcá<sup>n</sup> ní cáhá<sup>n</sup>-yu núu cuáhá<sup>n</sup>-gá núú ndécú bàrcú. Te òré ndée-gá bàrcú-án nùhú-gá

<sup>38</sup> ní ngüíta téé ní xíhi ñaha cuè espíritú cùndìhi yucu ñávãha càhá<sup>n</sup> ndàhú-dé núú-gă nùu vá cùndèe iní-gá quíhí<sup>n</sup> ndihi ñaha-gă xii-dé, dico Jèsús ní quide ndee iní ñáhã-ni-gă xii-dé, te ní xáha<sup>n</sup>-gă:

<sup>39</sup> —Cuanùhú vehe-n, te cani-n cuèndú núú nchàa ñáyi sá ío càhnu cuu nchaa sá vãha ní quide ñaha

Yă Ndiõxí xii-n —càchí-gá xáha<sup>n</sup>-gă xii-dé.

Te téé-án ní xica-dé cuánuhú-dé te ní ngüíta-dé ní cani-dé cuèndú núú nchàa ñáyi xíndecu ñhí ñuú sá ío càhnu cuu nchaa sá vãha ní quide ñaha Jèsús xii-dé.

*Cuèndá déhe yoco tẽ Jàirú, ndihi cuèndá ñá ñadìhí ní tnándeé dóó Jèsús (Mt. 9:18-26; Mr. 5:21-43)*

<sup>40</sup> Te òré ní ndexìo Jèsús ndàa ingá xio yuhu làgúná, te ñáyi xíndecu xián sa ndètu càhnu ñaha-ná-yu, te ío váha ní cáhá<sup>n</sup> ndihi ñáhã-yu xii-gá òré ní nasáá-gá.

<sup>41</sup> Te ñá téé tàxi tnuní veñúhu ní quexió-dé núú ndécú Jèsús, te téé-án nání-dě Jàirú, te ní ngüíñí xití-dě núú-gă càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n nùu vá cùndèe iní-n quíhí<sup>n</sup>-ó vèhe-í cada tátna-n déhe yoco-í —càchí-dé xáha<sup>n</sup>-dě xii-gá.

<sup>42</sup> Te duca<sup>n</sup> ní xáha<sup>n</sup>-dě chi ndècu ñá dii-ni déhe yoco-dě, te ndècu-xi datná úxúú cuíá-xi, te càhú víhí tnáhã-xi cùhú-xi te cùnì-xi cuú-xi. Te Jèsús ní xica-gá cuáhá<sup>n</sup>-gá ndihi téé-án, te ío vãi ñáyi nchìcú<sup>n</sup> ñáhã xii-gá cuáhá<sup>n</sup>, te dàdehnde ñaha-ná-yu xii-gá ní cùu.

<sup>43</sup> Te tnuú nchaa ñáyi-án ñútnàhá ñá ñaha cùhú, te ñaha-án sá ní cuu úxúú cuíá sã cùhú-a<sup>n</sup> ngòyo ñaha níhí xii-a<sup>n</sup>, te ío cuéhé díhú<sup>n</sup> ní cuu dàndoñuhu-a<sup>n</sup> chi ní nadico-a<sup>n</sup> nchàa sá ndécú ndihi-a<sup>n</sup> cuèndá ní níhí-a<sup>n</sup> díhú<sup>n</sup> ní quehe<sup>n</sup> nchaa ñáyi ní quide tátna ñaha xii-a<sup>n</sup>, dico ni ñá-yu ñá túú ní ndàcú-yu ndúha-a<sup>n</sup>.

<sup>44</sup> Te ní sáhá<sup>n</sup> ndehe yatni-a<sup>n</sup> ndàa sátá Jèsús, te ní tnándeé-a<sup>n</sup> luha yuhu dóo-gă te òré-ni-án ní ndúha-a<sup>n</sup>.

<sup>45</sup> Te Jèsús ní xícá<sup>n</sup> tnúhú-gă núu-yu, te xáha<sup>n</sup>-gă:

—¿Ndédacàa-ndo ní tnándeé ñáhã xii-í? —càchí-gá xáha<sup>n</sup>-gă xii-yu.

Te nchá-yu ní xáhã<sup>n</sup>-yu sá ní ñá-yu ñá túú ní tnándeé ñáhã xii-gá. Te té Pèlú ndihi cue téé cùndìhi-dé ní xáha<sup>n</sup>-güedé xii-gá:

—Mèstrú, ndèhe-n sá vái ñáyiú nchícú<sup>n</sup> ñáhá xii-n, te xio xio dàdehnde ñáhá-yu, te xicá<sup>n</sup> tnúhú-gã-n yò ní tnándeé ñáhá xii-n —cachí-güedé xáha<sup>n</sup>-güedé xii-gá.

46 Dico Jèsús ní xáha<sup>n</sup>-gã xii-yu:

—Dico ñu ñ<sup>n</sup>-ndo ñí tnándeé ñáhá xii-í, chí ní cutnùní iní-í sá ñ<sup>n</sup> ñáyiú cùhú ní tnándeé ñáhá xii-í te ní ndúha-yu —cachí-gã xáha<sup>n</sup>-gã xii-yu.

47 Te sáta ñí xini ñaha-á<sup>n</sup> sã ñí cutnùní iní Jèsús sá ñí tnándeé ñáhá-á<sup>n</sup> xii-gá, te yùhú yùhú-a<sup>n</sup> ní sáhá-a<sup>n</sup> ní ngüñí xití-á<sup>n</sup> núú-gã, te ní náhmá-a<sup>n</sup> núú-gã, ndihí núú nchaa ñáyiú ná cuendá duca<sup>n</sup> ñí quide-a<sup>n</sup> ní tnándeé-a<sup>n</sup>-gã, ndihí cuendá sá òré-ni-á<sup>n</sup> ñí ndúha-a<sup>n</sup>.

48 Te Jèsús ní xáha<sup>n</sup>-gã xii-a<sup>n</sup>:

—Yòhó ñaha cùhú, ní sándáá iní ñáhá-n xii-í núú ní ndúha-n, te cuanùhú vitna te ñá túú-gã ná caní iní-n —cachí-gã xáha<sup>n</sup>-gã xii-a<sup>n</sup>.

49 Te càhá<sup>n</sup> dúcá<sup>n</sup>-ní Jèsús ní sáá ñ<sup>n</sup> té xinu cuechi vehe té Jàirú té tàxi tnuní veñúhu, te xáha<sup>n</sup> tõe xinu cuechi-á<sup>n</sup> xii-dé:

—Sa ní xihí déhe-n, vá chíchi<sup>n</sup>-gã-n Mèstrú —cachí-dé xáha<sup>n</sup>-dẽ.

50 Te sá dúcá<sup>n</sup> xáha<sup>n</sup> tõe xinu cuechi-á<sup>n</sup> xii té Jàirú ní tecú dóho Jèsús, núú ní xáha<sup>n</sup>-gã xii-dé:

—Vá ndihú iní-n, quindáá iní ñáhá-ni-n xii-í te ndúha déhe-n —cachí-gã xáha<sup>n</sup>-gã xii-dé.

51 Te òré ní sáá-gã vehe té Jàirú te ñá ní dàña-gã quihu ñáyiú cùtexínu, núú té Pèlú-ni ndihí té Jàcobó-ni, ndihí té Juàá-ni, ndihí tãtá ndihí nãná-ni xihí ñí xihí-á<sup>n</sup> cuãnguihu ndihí-gã xití vehe.

52 Te nchaa ñáyiú sa xindecu vehe-dé-á<sup>n</sup> xindáhyú-yu sá ndihú iní-yu cuendá sá ñí xihí-xi. Te Jèsús ní xáha<sup>n</sup>-gã xii-yu:

—Vá ndàhyú-ndó, chí dícó-ni xidí-xi ñá túú ní xihí-xi —cachí-gã xáha<sup>n</sup>-gã xii-yu.

53 Te ní sácú ndeé ñáhã-yu xii-gã, chí sá cúú-xi mèé-yu chí ní xihí ndisa xihí-ã<sup>n</sup>.

54 Te Jèsús ní tní-gã ndaha xihí ñí xihí-á<sup>n</sup>, te níhi ní cáhá<sup>n</sup>-gã, te xáha<sup>n</sup>-gã: —Xihí cuéchí, ndacóo —cachí-gã xáha<sup>n</sup>-gã.

55 Te xihí-ã<sup>n</sup> ñí ndoto-xi, te òré-ni ní ndacóo-xi, te Jèsús ní xáha<sup>n</sup>-gã sá ná cuãñáhã-yu sá cáxi-xi.

56 Te tãtá-xi ndihí nãná-xi súúni ñí cuñúhu-yu sá dúcá<sup>n</sup> ñí dándótó ñaha Jèsús xii-xi, te ní xáha<sup>n</sup>-gã xii-yu sá vã yòo ñ<sup>n</sup> cúñáhã-yu sá dúcá<sup>n</sup> ñí quide-gã.

## 9

*Jèsús téndàha-gã ndi ùxúú cue tée xica cuu ndihí-gã quihí<sup>n</sup>-güedé cáhá<sup>n</sup>-güedé tnúhu-gã*

(Mt. 10:5-15; Mr. 6:7-13)

1 Te Jèsús ní cana-gã ndi ùxúú cue tée xica cuu ndihí-gã, te ní sãñaha-gã xii-güedé tnúhu ndee iní cundecu ndihí-güedé cuendá queñuhu-güedé nchaa espíritú cündihí yucu ñávãha yihí ñaha xii ñáyiú, ndihí cuendá sá cadá tãtna-güedé nchaa ñáyiú cùhú.

2 Te ní xáha<sup>n</sup>-gã xii-güedé sá quihí<sup>n</sup>-güedé danèhé-güedé ñáyiú nàcuáa cada Yá Ndiõxí ndihu ndaha ñaha-gã xii-yu, te duca<sup>n</sup> cada tãtna-güedé cue ñáyiú cùhú.

3 Te cùmání-gã caca-güedé quihí<sup>n</sup>-güedé, te ní xáha<sup>n</sup>-gã xii-güedé:

—Ñá túú tnàhí ná canehe-ndo cùu ichi-ndo, ní tãtnu, ní ñunu, ní sã cáxi-ndó, ní dñhú<sup>n</sup>. Te ní vã cànèhe-ndo ñngá ichi dóó-ndó, chí ñu-ni dóó níhnú-ndó-ã<sup>n</sup> xíã<sup>n</sup> tnàhí-ni.

4 Te ndédani cãa vehe na saá-ndó, te xíã<sup>n</sup> cundecu-ndo ndeé ná sáá nduu ndeé-ndo.

5 Te núú ñá túú cùní-yu quehe<sup>n</sup> cuendá ñáhã-yu xii-ndo, te ndee-ndo ñúú-á<sup>n</sup>, te naquidi-ndo ticá chúhmá ñí tní sáhá-ndó cuendá sá ná cùtnuní iní-yu sá ñá túú quide váha-yu —cachí-gã xáha<sup>n</sup>-gã xii-güedé.

6 Te sáta dúcá<sup>n</sup> ñí xáha<sup>n</sup> Jèsús xii-güedé, te ní quee-güedé cuáhã<sup>n</sup>-güedé nchaa ñuú dácuãha-güedé ñáyiú tnúhu Yá Ndiõxí, tnúhu sá càhá<sup>n</sup> nàcuáa naníhí tãhú-yu, te duca<sup>n</sup> ta quide tãtna-güedé nchaa ñáyiú cùhú cuáhã<sup>n</sup>.

*Nàcuáa ní cuu ní xihí té Juàá té d'acuandute ñaha xii ñáyi*

*(Mt. 14:1-12; Mr. 6:14-29)*

<sup>7</sup> Te té Hèrodés té cuu gobiernú ní níhí-dě tnúhu nchaa nàcuáa quide Jesús, te quìyuhú iní-dé te sàni iní-dé yoo cùu-gá. Te duca<sup>n</sup> ñi sani iní-dé chi dava ñáyi c'achí-yu sá tē Juàá té ní xóo dacuandute ñaha xii ñáyi ní ndoto cùu-gá.

<sup>8</sup> Te davá-yu c'achí-yu sá tē Èliás cúu-gã, te davá-yu c'achí-yu sá ñi<sup>n</sup> té ní xóo cáhá<sup>n</sup> tnúhu Yá Ndiõxí ndéé sanaha vihi ní ndoto cùu-gá, c'achí-yu.

<sup>9</sup> Dico té Hèrodés ní cachí-dé:

—Yúhú ní táuchíu<sup>n</sup>-í ní xehndé-güedé díquí tē Juàá. ¿Te yoo cùu téé dii cuëndú-xi ñihí-a sá sùúni cuéhé nùú sá quidé-dé v'áí<sup>n</sup>? —duha ní cachí-dé.

Te té Hèrodés ndúcú-dě nàcuáa cada-dé cuëndá quini-dé Jesús.

*Jèsús d'acaxi-gá úhú<sup>n</sup> mĩl cue téé te d'ñi<sup>n</sup> ñáyi d'ihí ndihí landú*

*(Mt. 14:13-21; Mr. 6:30-44; Jn. 6:1-14)*

<sup>10</sup> Te nchaa cue téé ní táuchíu<sup>n</sup> Jesús cuáhá<sup>n</sup> cáhá<sup>n</sup> tnúhu Yá Ndiõxí núú ñáyi ní ndexiõ-güedé núú-gã te ní ngúita-güedé nác'ani tnúhu-güedé nchaa nàcuáa ní quide-güedé. Te d'atnùni ní xica-gá medii-ni-gá ndéca ñaha-gá xii-güedé cuáhá<sup>n</sup> ñi<sup>n</sup> xichi núú ñà túú ñáyi ndècu, yatni núú cáá ñuú Bètsaidá.

<sup>11</sup> Dico òré ní níhí ñáyi tnúhu sá cuáhá<sup>n</sup> Jesús, te nchicú<sup>n</sup>-yu-gá cuáhá<sup>n</sup>, te òré ní quexiõ-yu núú-gã, te ní quehe<sup>n</sup> cuëndá ñahá-gã xií-yu, te ní dánèhé ñahá-gã xií-yu nàcuáa ndihu ndaha ñaha Yá Ndiõxí xií-yu, te ní quide tátna-gá nchaa ñáyi cùhú.

<sup>12</sup> Te òré sa ní cuaa te ní natacá ndi ùxúú cue téé xica cuu ndihí-gá núú-gã, te ní xáha<sup>n</sup>-güedé xii-gá:

—Sa ní cuu dandaca-n nchaa ñáyi-a, chi sa ní cuaa, te na quihí<sup>n</sup>-yu nchaa vehe càa yatni iha, ndihí nchaa xití ñuú cáá yatni iha cuaá<sup>n</sup>-yu sá cáxi-yu, te diu-ni yacá<sup>n</sup> ndetatú-yu, chi núú ndécú-ó iha ñà túú t'nhí ná iò —c'achí-güedé xáha<sup>n</sup>-güedé xii-gá.

<sup>13</sup> Te Jesús ní xáha<sup>n</sup>-gã xii-güedé:

—Mee-ndo chí cuãñaha sã ná c'axí-yu —c'achí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Ñà túú nãgá ndécú ndihí-ndí, chí úhú<sup>n</sup> duha-ná p'aa, ndihí úú-nã chácá ndécú ndihí-ndí, te diu-ni núu quihí<sup>n</sup>-ndí cuaa<sup>n</sup>-ndí sá cáxi-yu —c'achí-güedé xáha<sup>n</sup>-güedé xii-gá.

<sup>14</sup> Te xĩnu d'atná úhú<sup>n</sup> mĩl mee-ni cué téé, te d'ñi<sup>n</sup> ñáyi d'ihí ndihí landú. Te Jesús ní xáha<sup>n</sup>-gã xii cue téé xica cuu ndihí-gá:

—Chí c'ñaha na ngõo ndi údico úxí ndi údico úxí-yu ñi<sup>n</sup> ñi<sup>n</sup> xichi —c'achí-gá xáha<sup>n</sup>-gã xii-güedé.

<sup>15</sup> Te duca<sup>n</sup> ñi quide-güedé, te ní ngóo-yu nchaa-yu.

<sup>16</sup> Te d'atnùni ní quehe<sup>n</sup>-gá ndi ùhú<sup>n</sup> p'aa-á<sup>n</sup>, ndihí ndi ndúú chácá-ã<sup>n</sup>. Te ní ndacoto-gá andi, te ní ndacá<sup>n</sup> táhú-gã núú Yá Ndiõxí, te d'atnùni ní táhú cuèchi-gá p'aa-á<sup>n</sup> ndihí chácá-ã<sup>n</sup>, te ní sáha-gá nchaa cue téé xica cuu ndihí-gá ní d'acãhñu ñaha-güedé xií-yu.

<sup>17</sup> Te nchaa-yu ní xexí-yu ní ndahá xití-yu. Te sátá ñi túhú cóhõ-yu te ní nadatácá-güedé nchaa sá ñi quendóo, te ní chítú ùxúú t'nhá tídihi mee-ni sá ñi quendóo.

*Té Pèlú xáha<sup>n</sup>-d'ě xii Jèsús sá d'íu-gã cúu-gã Crístú*

*(Mt. 16:13-19; Mr. 8:27-29)*

<sup>18</sup> Te ñi<sup>n</sup> nduu ndècu mee Jesús ndihí cue téé xica cuu ndihí-gá, te c'ahá<sup>n</sup> ndihí-gá Yá Ndiõxí, te sátá ñi yáha ní cáhá<sup>n</sup> ndihí-gá Yá Ndiõxí, te ní xicá<sup>n</sup> tnúhú-gã núú-güedé, te xáha<sup>n</sup>-gã xii-güedé:

—¿Yoo cùu yúhú c'achí ñáyi-va? —c'achí-gá xáha<sup>n</sup>-gã xii-güedé.

<sup>19</sup> Te ní xáha<sup>n</sup>-güedé xii-gá:

—Davá-yu c'achí-yu sá cúu-n ndi Juàá téé ní xóo dacuandute ñaha xii ñáyi, te davá-yu c'achí-yu sá cúu-n tē Èliás, te davá-yu c'achí-yu sá ñi<sup>n</sup> téé ní xóo cáhá<sup>n</sup> tnúhu Yá Ndiõxí ndéé sanaha ñi ndoto cùu-n, duha c'achí-yu —c'achí-güedé xáha<sup>n</sup>-güedé xii-gá.

20 Te ní xicá<sup>n</sup> tnúhú tùcu-gá núu-güedě, te xáha<sup>n</sup>-gã xii-güedé:

—Te nchòhó, ¿yoo sàni iní-ndó cùu-í-í? —càchí-gá xáha<sup>n</sup>-gã xii-güedé.

Te té Pèlú ní xáha<sup>n</sup>-dě xii-gá:

—Yòhó cúú-n Crìstú Déhe Dútú Ndiòxí —càchí-dé xáha<sup>n</sup>-dě xii-gá.

*Jèsús càhá<sup>n</sup>-gá sá cáhni ñàha-güedé xii-gá*

*(Mt. 16:20-28; Mr. 8:30-9:1)*

21 Te ní xáha<sup>n</sup>-gã xii-güedé sá vã yòo ì<sup>n</sup> cúñaha-güedě yoo cùu-gá.

22 Te ní xáha<sup>n</sup>-gã xii-güedé:

—Yúhú Tée cùu ñàni tnàhá-ndó nchàa-ndo ío cuéhé sã ndòhò-í, chí daquèe tíhú ñàhá cuè tée cùu sacuéhé nũ ñáyiú isràél, ndihí cue dútú cùnùu, ndihí cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, te sáá nduu te cahni ñaha-güedě xii-í, dico nduu úní sá cùú-í te ndoto-í —càchí-gá xáha<sup>n</sup>-gã xii-güedé.

23 Te dàtnùnì ní xáha<sup>n</sup>-gã xii nchaa ñáyiú:

—Nchaa ñáyiú cuìní chitnahá ñàhá xii-í, te xìni ñuhu-xi vã cáda-gã-yu sá sání ìní mée-yu, te ì<sup>n</sup> nduu ì<sup>n</sup> nduu cada ndee ìní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í.

24 Te nchaa ñáyiú cuìní sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiú ñà túú yùhú cuèi nándi sá ná yáha-yu cundecú-yu ñuyíú-a sá cuèndá-í, te ñáyiú-á<sup>n</sup> naníhí tãhú-yu.

25 Te cuèi nchaandi túhú sá ío ñuyíú-a na nihí ñáyiú cundecu ndihí-yu, dico núu diu nchaa xíá<sup>n</sup> ná càda cuíta nihnú-yu te ñà túú vèdana nàndihí-xi sá dúcá<sup>n</sup> ndècu ndihí-yu nchaa xíá<sup>n</sup>.

26 Te nchaa ñáyiú na cùcaha<sup>n</sup> núu-xi cáhá<sup>n</sup> váha cuèndá-í ndihí cuèndá nchaa tnúhu-í, te tnàhá yúhú Tée cùu ñàni tnàhá-ndó nchàa-ndo cucaha<sup>n</sup> núu-í núu-yu òré quixi tucu-í ndihí cue espíritú xínú cuèchi núu Tãtà-í Dútú Ndiòxí, te mee-gã cada cutnùnì iní nchaa ñáyiú sá ío càhnu cuu-í.

27 Te na càchí tnúhu ndáá-í xii-ndo sã ío dava nchòhó ñáyiú ndècu iha vitna vã cùu-ni-ndo, chí cundecu-ni-ndo ndèé quiní-ndó sáá nduu ndíhu ndaha ñàha Yá Ndiòxí xii ñáyiú —càchí-gá xáha<sup>n</sup>-gã xii-yu.

*Ní nadáma dóó Jèsús ndihí núu-gã*  
*(Mt. 17:1-8; Mr. 9:2-8)*

28 Te ní cuu dàtná úná nduu sá dúcá<sup>n</sup> ní cáhá<sup>n</sup> Jèsús, te cuásaá-gá ì<sup>n</sup> yucu cáhá<sup>n</sup> ndihí-gá Yá Ndiòxí, te ndèca-gá té Pèlú, ndihí té Jàcobó, ndihí té Juàà cuásaá.

29 Te nini càhá<sup>n</sup> ndihí-gá Yá Ndiòxí ní nadáma núu-gã ndihí dóó-gã, te dóó-gã-á<sup>n</sup> sùúnì ní nduu cuixí<sup>n</sup> víhí, te sùúnì dàtása<sup>n</sup>-xi.

30 Te òré-ni-á<sup>n</sup> ní xiní-güedé úú tnàhá cue tée càhá<sup>n</sup> ndihí-gá, te ì<sup>n</sup>-dé cúú-dě té Moisés, te ìngá-dé cúú-dě té Èliás,

31 te sùúnì dàtása<sup>n</sup>-xi ni càndéé núu ndécú cuè tée úú-á<sup>n</sup> ndihí-gá, te xíndatnúhu-güedé nàcuáa ndoho Jèsús cuú-gá ñuú Jerusàlén dàtná ní cachí mée-gã.

32 Te té Pèlú ndihí úú-gá-güedé cuìní víhí-güedé cúdu-güedé, dico ní sahani iní-güedé ñà túú ní xídí-güedé, te ní dánèhé núu ñàhá-xi xii-güedé sá sùúnì vãha càa núu ndécú Jèsús, ndihí úú cue tée càhá<sup>n</sup> ndihí-gá-á<sup>n</sup>.

33 Te òré sa ndùcu ndee cue tée úú-á<sup>n</sup> caca-güedé núhú-güedé, te ní xáha<sup>n</sup> tã Pèlú xii-gá:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixi<sup>n</sup>, ì<sup>n</sup> cuu cuèndá-n, te ì<sup>n</sup> cuu cuèndá té Moisés, te ì<sup>n</sup> cuu cuèndá té Èliás —càchí-dé xáha<sup>n</sup>-dě xii-gá.

Dico té Pèlú chí ni mée-dé ñà túú ní cùtnunì iní-dé nása nduu tnúhu ní cáhá<sup>n</sup>-dé.

34 Te nini càhá<sup>n</sup>-dé ní quexìo ì<sup>n</sup> vícò núu ndécú-güedě-á<sup>n</sup> ní dádãhu ñaha-xi xì-güedé, te ní yùhú-güedé sá dúcá<sup>n</sup> ní quexìo vícò-á<sup>n</sup> ní dádãhu ñaha-xi.

35 Te xití vícò-á<sup>n</sup> ní tecú ní cáhá<sup>n</sup> Yá Ndiòxí, te xáha<sup>n</sup>-gã xii-güedé:

—Tée-a cùu-dé Déhe-í, téé ío cùu iní-í, te tni-ndo nchàa tnúhu càhá<sup>n</sup>-dé —duha ní xáha<sup>n</sup>-gã xii-güedé.

<sup>36</sup> Te sáta dúcá<sup>n</sup> nǐ cáhá<sup>n</sup> Yă Ndiöxí, te ní quide cuendá-güedé sá mèdii-ná Jèsús ndécú-gă xiá<sup>n</sup>. Te vá yoo ì<sup>n</sup> nǐ xáha<sup>n</sup>-güedé nàcuáa ndùu nchaa sá nǐ xiní-güedé-á<sup>n</sup>.

*Jèsús quidé tătna-gă ì<sup>n</sup> tée cuechi yìhì ñaha espíritú cündìhì yucu ñávãha*  
(Mt. 17:14-21; Mr. 9:14-29)

<sup>37</sup> Te ingá nduu-ã<sup>n</sup> cuãnuu-gă yucu-á<sup>n</sup> ndìhì-güedé, te ío cuéhé ñáyiu cuáhá<sup>n</sup> tnahá ñáhá xii-gă.

<sup>38</sup> Te ì<sup>n</sup> tée ñùhu tnahá tnuú-yu-á<sup>n</sup> nǐ cáhá<sup>n</sup> níhì-dé, te xáha<sup>n</sup>-dë xii-gă:

—Mèstrú, ío cáhá<sup>n</sup> ndàhú-í núú-n nǔu vá cündèe iní-n càda tătna-n dèhe-í, chi ì<sup>n</sup>dii duha-dé ndécú,

<sup>39</sup> te yìhì ñaha espíritú cündìhì yucu ñávãha xii-dé, te òré ná nàtnì ñaha-xi xii-dé, te dàcana saa ñaha-xi, te ndàda ruú<sup>n</sup> ñáhá-xí xii-dé, te tàva-xi tíñú yuhu-dé. Te ío dândoho ñaha-xi xii-dé, chi ndéé núú ñà cúú-gă, te dàña ñaha tnaa-xi xii-dé.

<sup>40</sup> Te sa ní cáhá<sup>n</sup> ndàhú-í núú cuè tée xica cuu ndìhì-n queñuhu-güedé-xi, dico ñá túú ní ndàcu-güedé —càchí-dé xáha<sup>n</sup>-dë xii-gă.

<sup>41</sup> Te Jèsús ní xáha<sup>n</sup>-gă xii nchaa ñáyiu:

—jNchaa nchòhó ñáyiu ndècu ñuyíú-a ío sáá iní-ndó, chi ñá túú cuíní-ndó quíndáá iní-ndó Yă Ndiöxí! Te ní cuu vâi nduu quide ndee iní-í nchaa sá quidé-ndó, ¿te ná ndéé ama vá dúcá<sup>n</sup>-gă cada-ndo-i? —càchí-gă xáha<sup>n</sup>-gă xii-yu.

Te ní xáha<sup>n</sup>-gă xii tée cùhú dèhe-xi-á<sup>n</sup>:

—Taxi dèhe-n ìha —cachí-gă xáha<sup>n</sup>-gă xii-dé.

<sup>42</sup> Te òré cuáhá<sup>n</sup> tée cuechi-ã<sup>n</sup> nǔú-gă, te espíritú cündìhì yucu ñávãha-á<sup>n</sup> nǐ dándùá ñáhá-xí xii-dé, te sàhni yìhì ñáhá tùcu-xi xii-dé ní cùu, dico Jèsús níhì ní cáhá<sup>n</sup>-gă ní tenáá-gă espíritú-á<sup>n</sup>, te ní quee ñaha-xi xii-dé, te ní nacuáha cuendá ñáhá-gă xii-dé tătá-dë.

<sup>43</sup> Te nchaá-yu ní cuñúhu-yu sá dúcá<sup>n</sup> nǐ cuu, te ní cachí-yu sá ìo càhnu cuu Yă Ndiöxí.

*Jèsús càhá<sup>n</sup> tucu-gă sá cùú-gă*  
(Mt. 17:22-23; Mr. 9:30-32)

Te nini xicuñúhu-yu nàcuáa ní quide Jèsús, te ní xáha<sup>n</sup>-gă xii cue tée xica cuu ndìhì-gă:

<sup>44</sup> —Nchòhó cundedóho váha-ndo tnùhu na càhá<sup>n</sup>-í-a, te vá ná cuànaa-ndo, chi yúhú Téé cùu ñaní tnáhá-ndó nchàa-ndo sáá ì<sup>n</sup> nduu te cuáha cuendá ñáhá-güedé xii-í núú cuè téé cùu úhú iní ñáhá —càchí-gă xáha<sup>n</sup>-gă xii-güedé.

<sup>45</sup> Dico cue téé-á<sup>n</sup> ñà túú ní tècú tnùnì-güedé nàcuáa ndùu tnùhu ní xáha<sup>n</sup>-gă xii-güedé, te duca<sup>n</sup> nǐ yáha-güedé, chi duca<sup>n</sup> tnàhí ní cachí-gă sá vá tècú tnùnì-güedé, te ní yúhú-güedé cáca<sup>n</sup> tnúhú-güedé núú-gă nása ndùu tnúhu ní xáha<sup>n</sup>-gă xii-güedé.

*Cue téé ndùcu tnúhu núú tnáhá nǔu ndèdacàa-güedé ío-gă cúnùu*

(Mt. 18:1-5; Mr. 9:33-37)

<sup>46</sup> Te cue téé xica cuu ndìhì-gă ní ngúita-güedé ndátnùhu-güedé nùu ndèdacàa-güedé ío-gă cúnùu,

<sup>47</sup> dico Jèsús ní cutnùnì iní-gă nàcuáa sàni iní-güedé nùu ní cana-gă ì<sup>n</sup> té ìhli, te ní sanu tnì ñaha-gă ì<sup>n</sup> xio dèhì-gă.

<sup>48</sup> Te ní xáha<sup>n</sup>-gă xii-güedé:

—Nchaa ñáyiu na quèhe<sup>n</sup> cuendá ì<sup>n</sup> té ìhli dàtná té ìhli-a cuendá sá ñúhú ìní ñáhã-yu xii-í ñá, te cada iní-yu sá yúhú ní quehe<sup>n</sup> cuendá-yu, te nchaa ñáyiu na quèhe<sup>n</sup> cuendá ñáhá xii yúhú, te cada iní-yu sá tnàhá Tătà-í Dútú Ndiöxí Yaá ní tendaha ñaha xii-í véxi-í ñuyíú-a ní quehe<sup>n</sup> cuendá-yu. Te nchaa ñáyiu ío ndàhú iní-xi mee-ni xinu cuechí-yu, ñáyiu-á<sup>n</sup> ìo-gă cúnùu-yu —càchí-gă xáha<sup>n</sup>-gă xii-güedé.

*Ñáyiu ñá túú cùu úhú iní ñáhá cündìhì ñáhã-yu xii-o*

(Mr. 9:38-40)

<sup>49</sup> Te té Juáá diu-ni ì<sup>n</sup> téé xica cuu ndìhì-gă ní xáha<sup>n</sup>-dë xii-gă:

—Mèstrú, ní xiní-ndí ì<sup>n</sup> téé càcunehe ñaha-dé xii-n, te ndèñuhu-dé espíritú cündìhì yucu ñávãha yìhì ñaha



xii ñáyi, te nchúhú ñá túú ní dañá-gá-ndí duca<sup>n</sup> càda-dé, chi ñá túú xica cuu ndíhi ñaha-dé xii-o —càchí-dé xáha<sup>n</sup>-dë xii-gá.

50 Te Jèsús ní xáha<sup>n</sup>-gã xii-dé:

—Daña-ndo na càda nahi-dé ní cùu, chi ñáyi ñá túú cùu úhú iní ñáhá xii-o te cùndíhi ñahá-yu —càchí-gá xáha<sup>n</sup>-gã xii-dé.

*Jèsús càhá<sup>n</sup>-gá dóho té Jàcobó ndíhi té Juàá*

51 Te òré sa ta cùyatni ndaa Jesús andíu, te ní xica-gá cuáhá<sup>n</sup>-gá ñuú Jerusàlén, chi duu<sup>n</sup> duu<sup>n</sup> ní sani iní-gá sá quíhí<sup>n</sup>-gá.

52 Te ní tendaha-gã cue téé yòdo nuu cuáhá<sup>n</sup>, te ní quexìo-güedé ì<sup>n</sup> ñuú, te ñuú-á<sup>n</sup> yíndèhu-xi distritú Sàmariá, te ndùcu-güedé ì<sup>n</sup> vehe cada túha-güedé òré quexìo-gá.

53 Dico ñáyi Sàmariá ñá túú ní cuìní-yu cuáñaha nùú-yu vehe, chi cuendá sá ñí cutnùní iní-yu sá ìchi yáha-ni-gá quíhí<sup>n</sup>-gá ñuú Jerusàlén.

54 Te sá dúcá<sup>n</sup> ñí quidé-yu ñá túú ní cuìní-yu cuáñaha nùú-yu vehe ndetatú-gá, núu ní xáha<sup>n</sup> tã Jàcobó ndíhi té Juàá cue téé xica cuu ndíhi-gá xii-gá:

—Mèstrú, ¿cuìní-n càcá<sup>n</sup> táhú-ó nùú Yá Ndiòxí cuendá dangáva-gá ñuhú danàa-gá ñáyi ñuú-a dàtná ní quide té Èliás téé ní xóo cáhá<sup>n</sup> tnúhu Yá Ndiòxí ndéé sanaha-á<sup>n</sup>? —càchí-güedé xáha<sup>n</sup>-güedé xii-gá.

55 Te Jèsús ní nchócótó-gã núu-güedé, te níhi ní cáhá<sup>n</sup>-gá dóho-güedé, te xáha<sup>n</sup>-gã:

—Nchòhó, chi ñá túú vãha iní-ndó te núu duca<sup>n</sup> càhá<sup>n</sup>-ndó.

56 Chi yúhú Téé cùu ñaní tnáhá-ndó nchàa-ndo véxi-í sá dácãcu nihnu-í ñáyi, te ñá díú véxi-í sá dácuíta nihnu-í-yu —càchí-gá xáha<sup>n</sup>-gã xii-güedé.

Te sátá dúcá<sup>n</sup> ñí xáha<sup>n</sup>-gã, te ní xica-gá cuáhá<sup>n</sup>-gá ndíhi-güedé ingá ñuú.

*Ñáyi cuìní chitnahá ñáhá xii Jesús ní cùu*  
(Mt. 8:19-22)

57 Te ñuhu Jesús ichi ndíhi-güedé, te ì<sup>n</sup> téé ní xáha<sup>n</sup>-dë xii-gá:

—Mèstrú, cuìní-í canchicú<sup>n</sup> ñáhà-í xii-n ndëni ní cuu na quíhí<sup>n</sup>-n —càchí-dé xáha<sup>n</sup>-dë xii-gá.

58 Te Jèsús ní xáha<sup>n</sup>-gã xii-dé:

—Nchaa ñúcui chi ndècu yaú cúú vèhe-güedi saquíhi-güedi, te nchaa quíti ndàva caa tacá-güedi díquí yutnu, dico yúhú Téé cùu ñaní tnáhá-ndó nchàa-ndo chi ñá túú ndéé cáá vèhe-í ñuyíú-a ndetatú-í —càchí-gá xáha<sup>n</sup>-gã xii-dé.

59 Te dàtnùní ní xáha<sup>n</sup> tùcu-gá xii ingá-dé:

—Yòhó taquìxi chitnahá ñáhá-n xii-í —càchí-gá xáha<sup>n</sup>-gã xii-dé.

Dico téé-á<sup>n</sup> ñí xáha<sup>n</sup>-dë xii-gá:

—Mèstrú, dañá na nùhú-í cundetú-í cuú tãtã-í te chindúxi-í-dé, te dàtnùní quixi-í chitnahá ñáhá dùca<sup>n</sup>-ná-í xii-n —càchí-dé xáha<sup>n</sup>-dë xii-gá.

60 Te Jèsús ní xáha<sup>n</sup>-gã xii-dé:

—Daña ñáyi ñá túú sàndáá iní ñáhá xii-í ná chindúxi tnàha meé-yu, chi ñáyi-á<sup>n</sup> cúú-yu dàtná ñáyi ní xíhí cuèi ndècu-ní-yu núú ñuyíú-a. Te yòhó taquìxi, chi quíhí<sup>n</sup>-n dànehé-n ñáyi nàcuáa cada Yá Ndiòxí ndíhu ndaha ñàha-gá xii-yu —càchí-gá xáha<sup>n</sup>-gã xii-dé.

61 Te ní xáha<sup>n</sup> tùcu ingá-dé xii-gá:

—Mèstrú, cuìní-í chitnahá ñáhà-í xii-n, dico díhna-gá dañá na nùhú-í cada ndee ìní-í nchaa ñáyi ndècu vehe-í, te dàtnùní quixi-í —càchí-dé xáha<sup>n</sup>-dë xii-gá.

62 Te Jèsús ní xáha<sup>n</sup>-gã:

—Nchaa ñáyi ní sàndáá iní ñáhá xii-í, te núu vá cãchicú<sup>n</sup> nihnu ñáhá-yu ni yùhu ni iní-yu, te cùú-yu dàtná ì<sup>n</sup> téé ní tníi ndaha làtú cutu-dé, chi téé-á<sup>n</sup> nùu na ndàcoto-dé ndàa sátá-dë òré xítú-dë, te vá quíhí<sup>n</sup> ndáá làtú-dé duca<sup>n</sup> sãtnahá-xi cùú-yu. Te cue ñáyi chi vá cúú ndáá-yu nàcuáa ndíhu ndaha-gá dava-gá ñáyi —càchí-gá xáha<sup>n</sup>-gã xii-dé.

## 10

*Jèsús téndàha-gá únídico úxí cue téé quíhí<sup>n</sup> cáhá<sup>n</sup> tnúhu-gá núú ñáyiú*

<sup>1</sup> Te sátá dúcá<sup>n</sup> ñí cuu, te ní cáxi tucu Xítóhó Jesucristú únídico úxí cue téé codonù-güedé quíhí<sup>n</sup>-güedé cáhá<sup>n</sup>-güedé tnúhu-gá nchaa ñuú, ndihí nchaa dava-gá xichi núú quíhí<sup>n</sup>-gá, te ndi ndúú ndi ndúú-güedé tendaha ñàha-gá xii-güedé quíhí<sup>n</sup>-güedé.

<sup>2</sup> Te cùmání-gá caca-güedé, te ní xáha<sup>n</sup>-gá xii-güedé:

–Nchòhó xíní-ndó sã òré ná sàá yóo cuu nchaa sá xítú ñáyiú, te ío vâi cuu. Te na càchí tnúhu ndáá-í xii-ndo sã dàtná vâi sá xítú ñáyiú cùu, duca<sup>n</sup> ío vâi ñáyiú cùmání cund-edóho tnúhu Yá Ndióxi te ío sacú ñáyiú dàcuaha ñaha xii-yu tnúhu-gá, núú xiá<sup>n</sup> xíní ñùhu-xi cáhá<sup>n</sup>-ndó núú Yá Ndióxi cuendá sá ná dàcahá<sup>n</sup>-gá iní ñáyiú cáhá<sup>n</sup>-yu tnúhu-gá núú ñáyiú cùmání cundedóho tnúhu-gá.

<sup>3</sup> Te nchòhó cúú-ndó dàtná cue mbéé cue quíti cuáhá<sup>n</sup> núú yíhí cue quíti déé<sup>n</sup>. Chi tendaha ñaha-í xii-ndo quíhí<sup>n</sup>-ndó núú xíndecu nchaa ñáyiú cuihna iní-xi.

<sup>4</sup> Te vá cánèhe-ndo ñunu cuhu<sup>n</sup> ndachiu<sup>n</sup>-ndo, ni núú cúhú<sup>n</sup> dǐhú<sup>n</sup>-ndó, te ni vâ cádá tǔha-gá-ndó chàú-ndó chi ñu-ni chàú yíhí-ndó-ã<sup>n</sup> xiá<sup>n</sup>-ni quíhí-ndo, te vá ío cuyaa-ndo cáhá<sup>n</sup> ndihí-ndo ñáyiú ñùhu ichi.

<sup>5</sup> Te òré ná quèxio-ndo ñí vehe, te duha cúñaha-ndo xii ñáyiú dii vèhe-xi-á<sup>n</sup>: “Yá Ndióxi chindee ñàha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu.

<sup>6</sup> Te núú ñáyiú-á<sup>n</sup> ñí nduu táhǔ-yu sá cùndecu váha iní-yu núú Yá Ndióxi, te cuu-xi sá váha sá cúú-xi-yu tnúhu cúñaha-ndo-ã<sup>n</sup>, dico núú ñá túú ní càhá<sup>n</sup> váha ndihí ñàhá-yu xii-ndo, te cúñaha-ndo sã vâ cúú-xi sã váha sá cúú-xi-yu. Dico núú ní cáhá<sup>n</sup> váha ndihí ñàhá-yu xii-ndo,

<sup>7</sup> te ñu-ni vehe-á<sup>n</sup> cada vehe tnaa-ndo, te ñá túú-gá ndèé nducu-ndo vèhe cundecu-ndo, te

caxi-ndo nchaa sá ná tàxí-yu, chi nchaa cue téé quide chiu<sup>n</sup> dacuítí tǎu-güedé sá ñihí-güedé sá cáxi-güedé cuendá nchaa chiú<sup>n</sup> quide-güedé.

<sup>8</sup> Te núú ní sáá-ndó ñí ñuú núú ñí quehe<sup>n</sup> cuendá ñáhǎ-yu xii-ndo, te caxi-ndo nchaa sá ná tàxí-yu.

<sup>9</sup> Te cada tátna-ndo cuè ñáyiú cùhú xíndecu ñuú-á<sup>n</sup>, te cúñaha-ndo xii-yu sá sà ní sáá nduu ndíhu ndaha ñàha Yá Ndióxi xii-yu.

<sup>10</sup> Dico núú ní sáá-ndó ñí ñuú núú ñà túú ní quèhe<sup>n</sup> cuendá ñáhǎ-yu xii-ndo, te tñí-ndo ìchi cuita cáhá<sup>n</sup>-ndó cuáhá<sup>n</sup>, te cúñaha-ndo xii-yu:

<sup>11</sup> “Ndéé tícá chúhmá ñí tñí sáhá-ndí ñuú-ndó nàquidi-ndí, te duha quide-ndí cuendá cutnùní iní-ndó sã ñà túú quide váha-ndo ndècu-ndo. Dico cunaha-ndo sã sà ní sáá nduu ndíhu ndaha ñàha Yá Ndióxi xii-ndo ni cùu”, duha cúñaha-ndo xii-yu.

<sup>12</sup> Te na càchí tnúhu-í xii-ndo sã ná sáá nduu càda ndáá Yá Ndióxi cuèchi nchaa ñáyiú, te ñáyiú ñuú-á<sup>n</sup> ío-gá ndohó-yu dàvá-á<sup>n</sup> dàcúxí ñáyiú ñuú Sòdomá –càchí-gá xáha<sup>n</sup>-gá xii-güedé.

*Cuendá ñáyiú dava ñuú ñá túú sàndáá iní tnúhu Xítóhó Jesucristú (Mt. 11:20-24)*

<sup>13</sup> Te Jèsús xáha<sup>n</sup>-gá xii ñáyiú dava ñuú ñá túú sàndáá iní tnúhu-gá:

–¡Ndàhú nchòhó cue ñáyiú ñuú Coràzín! ¡Te ndàhú nchòhó cue ñáyiú ñuú Betsaidá! Chi núú dícó ñuú Tírú, ndihí ñuú Sídón ní quide-í nchaa sá vâ yóo tñáhi ndàcu cada datná ní quide-í ñuú-ndó-á<sup>n</sup> ñí xíní-ndó ñá, te sá ndéé ama-gá cuihnú-yu dóo ndàhú, te cunucóo-yu núú yàá cuendá sá ndíxí cuèchi iní-yu sá ñá túú quide váha-yu ni cùu.

<sup>14</sup> Dico sáá nduu te ío-gá dandòho ñaha Yá Ndióxi xii-ndo dàcúxí ñáyiú ñuú Tírú, ndihí ñáyiú ñuú Sídón.

<sup>15</sup> Te nchòhó ñáyiú ñuú Capèrnaúm quide iní-ndó sã sà cuánda-ndo àndíu, dico ñáhǎ chi núú ùhú núú ndàhú cundecu-ndo –duha ní xáha<sup>n</sup>-gá xii nchaa ñáyiú ñuú-á<sup>n</sup>.

16 Te xăha<sup>n</sup> tùcu-gá xii cue téé ten-daha-gă quíhí<sup>n</sup> cáhá<sup>n</sup> tnúhu-gá-á<sup>n</sup>:

—Nchaa ñáyiú na cùndedóho nchaa tnúhu cáhá<sup>n</sup>-ndó, te cada iní-yu sá yúhú cáhá<sup>n</sup>-í ndedóho-yu, te nchaa ñáyiú na dàquee tihú ñáhá xii-ndo, te tnàhá yúhú daquèe tíhú-yu, te nchaa ñáyiú duca<sup>n</sup> na dàquee tíhú ñáhá xii-í, te tnàhá Tătà-í Dútú Ndiöxí Yaá ní ten-daha ñàha xii-í véxi-í ñuyíú-a dàquee tíhú-yu —càchí-gá xăha<sup>n</sup>-gă xii-güedé.

Te duca<sup>n</sup> te ní xica-güedé cuáhá<sup>n</sup>-güedé

*Ní nasáá cue téé únídico úxí ní ten-daha Jèsús ní sáhá<sup>n</sup> ní cáhá<sup>n</sup> tnúhu-gá núú ñáyiú*

17 Te cue téé únídico úxí-á<sup>n</sup> ní nasáá-güedé te súúni cùdíí iní-güedé, te xăha<sup>n</sup>-güedé xii Jèsús:

—Mèstrú, ndéé espíritú cùndíhi yucu ñávàha sàndáá iní ñáhá-xí xii-ndí òré cáciú nèhe ñàha-ndí xii-n —càchí-güedé xăha<sup>n</sup>-güedé xii-gá.

18 Te Jèsús ní xăha<sup>n</sup>-gă:

—Ndáá cáhá<sup>n</sup>-ndó chi yúhú ní xiní-í cùtnàhá ní xíta nihnu yucu ñávàha, chi dàtná ní ngava ì<sup>n</sup> tasa<sup>n</sup> ní ngava-xi ñuyíú-a.

19 Te dàtná quídé-ndó òré xènihnu-ndo ì<sup>n</sup> cóó, àdi ì<sup>n</sup> nchacua duca<sup>n</sup> cada-ndo daquee tíhú-ndó yucu ñávàha, te ñá túú nă cada ñàha-xi xii-ndo, chi ní taxi-í tnúhu ndee iní ndécú ndíhi-ndo.

20 Dico vá cùdíí iní-ndó cuèndá sá sàndáá iní ñáhá cuè espíritú cùndíhi yucu ñávàha xii-ndo, chi cùdíí iní-ndó cuèndá sá sà yodo tnuní-ndó núú tùtú Yá Ndiöxí Yaá ndécú àndíu —cachí-gá xăha<sup>n</sup>-gă xii-güedé.

*Jèsús cùdíí iní-gá  
(Mt. 11:25-27; 13:16-17)*

21 Te òré-á<sup>n</sup> súúni ní quide díí iní ñáhá Espíritú Yá Ndiöxí xii Jèsús, te ní xăha<sup>n</sup>-gă xii Yá Ndiöxí:

—Yòhó Tătà-í Dútú Ndiöxí, ío chĩñuhu ñàha-í xii-n chi díu-n tàxi tnuní-n àndíu ndíhi ñuyíú-a, te dànehé-n cuè ñáyiú nchaa tnúhu váha, te díu-ni ñáyiú-á<sup>n</sup> cùú-yu ñáyiú ñá túú cùtnuní iní-xi nchaa tnúhu cáhá<sup>n</sup> cue

téé túha, te nchaa tnúhu cáhá<sup>n</sup>-n-ă<sup>n</sup> ñà túú ní dàtúu-n núú ñáyiú càchí sá ío túha, te ío váha sàá díquí-xi. Te duca<sup>n</sup> quide-n, chi duca<sup>n</sup> cuíní-n cùnduu —cachí-gá xăha<sup>n</sup>-gă xii Yá Ndiöxí.

22 Te xăha<sup>n</sup> tùcu-gá xii cue téé ní nasáá-á<sup>n</sup>:

—Mee Tătà-í Dútú Ndiöxí ní cachí-gá sá cùnùu-í núú nchaa-ndi túhú sá ío. Te vá yòo ì<sup>n</sup> xiní nàcuáa sàni iní yúhú Déhe Dútú Ndiöxí, chi ì<sup>n</sup>ndí díí-ni mee-gă xiní-gá nàcuáa sàni iní-í. Te duca<sup>n</sup> ì<sup>n</sup>ndíi-ni yúhú xiní-í nàcuáa sàni iní méé-gă, te nchaa ñáyiú càchí iní-í sá quíní-yu nàcuáa sàni iní Tătà-í Dútú Ndiöxí te xĩtnúhu-í-yu, te vá yòo ì<sup>n</sup>-gă xiní nàcuáa sàni iní-gá chi díu-ni ñáyiú duca<sup>n</sup> xĩtnúhu-í-á<sup>n</sup> xiní-yu —càchí-gá xăha<sup>n</sup>-gă xii-güedé.

23 Te ní nchócótó-gă núú xĩndecu mee-ni cuè téé xica cuu ndíhi-gá, te ní xăha<sup>n</sup>-gă xii-güedé:

—Váha táhú nchòhó ndíhi nchaa ñáyiú ndèhe nchaa nàcuáa quide-í vitna.

24 Chi ío cuéhé cue téé ní xóo cáhá<sup>n</sup> tnúhu Yá Ndiöxí ndéé sanaha, ndíhi cue téé ní xĩndaha ñàha xii ñáyiú ní cuíní-güedé cundehe-güedé nchaa sá ndéhé-ndó quide-í vitna, te ñá túú ní xiní-güedé, te ní cuíní-güedé cund-edóho-güedé nchaa tnúhu cáhá<sup>n</sup>-í ndedóho-ndo vitna, te ñá túú ní xĩndedóho-güedé —càchí-gá xăha<sup>n</sup>-gă xii-güedé.

*Nàcuáa ní quide ì<sup>n</sup> téé distritú Sàmariá*

25 Te ì<sup>n</sup> téé dàcuaha ñàha xii ñáyiú nchaa tnúhu ní chídó tnuní ndíi Moisés ní ndacuíní-dé xító ndéé-dé Jèsús núú nása cunduu tnúhu cáhá<sup>n</sup>-gă, te xăha<sup>n</sup>-dè xii-gá:

—Mèstrú, ¿ná cúú să cáda-í cuèndá nduu táhú-í cundecu-í ndíhi Yá Ndiöxí ni caa ni quíhí<sup>n</sup>-i? —càchí-dé xăha<sup>n</sup>-dè xii-gá.

26 Te Jèsús ní xăha<sup>n</sup>-gă xii-dé:

—Cuíní-í cachí tnúhu-n nása cáhá<sup>n</sup>-xi núú tùtú ndíi Moisés —càchí-gá xăha<sup>n</sup>-gă xii-dé.

27 Te xăha<sup>n</sup>-dè xii-gá:

—Ndíi Moisés càchí ndíi núú tùtú ndíi: “Cuu iní-ndó Dútú Ndiöxí Yaá

cúu Ndiöxí-ndó ñi yuhu ñi iní-ndó, te cani iní-ndó càda-ndo datná cuini mée-gã, te mee-ñi tnúhu váha cani iní-ndó nàcuáa cuu vii cuu váha-ndo núú-gã, te coo iní-ndó cùu iní-ndó-gã. Te cuu iní-ndó tnàha ñáyiu-ndo dàtná cúu iní-ndó mée-ndo”, duha càchí ndíi núú tùtú ndíi —càchí-dé xãha<sup>n</sup>-dë xii-gã.

<sup>28</sup> Te Jèsús ní xãha<sup>n</sup>-gã:

—Váha-ñi càhá<sup>n</sup>-n, te núu cada-n nàcuáa càhá<sup>n</sup>-n ã<sup>n</sup>, te nduu táhú-n cùndecu-n ndihí Yá Ndiöxí ñi caa ñi quíhí<sup>n</sup> —càchí-gã xãha<sup>n</sup>-gã xii-dé.

<sup>29</sup> Te sá dúcá<sup>n</sup> ñi xãha<sup>n</sup> Jèsús xii-dé núu ndùcu-dé nàcuáa cada-dé cácu ni-hnu-dé núú tnúhu ní càhá<sup>n</sup>-dé, te ní xicá<sup>n</sup> tnúhú-dë núú-gã, te xãha<sup>n</sup>-dë:

—¿Yoo cùu tnaha ñáyiu-í-í? —  
càchí-dé xãha<sup>n</sup>-dë xii-gã.

<sup>30</sup> Te Jèsús ní cani-gã ñi<sup>n</sup> cuèndú núú-dë nàcuáa tecú tnùní-dé tnúhu-gã, te xãha<sup>n</sup>-gã:

—Ñi<sup>n</sup> tée ní ndee-dé ñúú Jerusàlén ñúhú-dë ichi cuánuu-dé cuáhá<sup>n</sup>-dë ñúú Jericó, te ní quee ñadúhú ichi-dé ní dúhú-güedë dóó níhnú-dë, ndihí nchaa sá néhé-dë, te ní caniha vihi-güedë, te nchito ñiu-ná-dé ní dáñá ñaha-güedë te cuáhá<sup>n</sup>-güedë.

<sup>31</sup> Te mei òré cãtùu-dé-á<sup>n</sup> ñúhú ñi<sup>n</sup> dútú ichi-á<sup>n</sup>, te òré ní xiní ñáhá dùtú-ã<sup>n</sup> xii-dé, te ñi<sup>n</sup> xio-ñi ní xócõo ndee-dé ní yáha-dé.

<sup>32</sup> Te ñúhu tucu ñi<sup>n</sup> tée cùu levítá ichi-á<sup>n</sup>, te òré ní xiní-dé tée-á<sup>n</sup> cãtùu-dé, te ñiu-ñi duca<sup>n</sup> ñi<sup>n</sup> quide-dé ñi<sup>n</sup> xio-ñi ní xócõo ndee-dé ní yáha-dé.

<sup>33</sup> Dico ñi<sup>n</sup> tée distritú Sãmariá ñúhú tucu-dé ichi-á<sup>n</sup> te òré ní xiní-dé tée-á<sup>n</sup> cãtùu-dé, te ní cundàhú iní ñáhá-dë.

<sup>34</sup> Te ní sáhá<sup>n</sup>-dé núú cãtùu tée-á<sup>n</sup>, te ní quide tátna-dé nchaa núú ñi nícuèhé xii tée-á<sup>n</sup> ñi<sup>n</sup> chihi-dé yúcu, te ní dácútú-dë. Te dàtnùní ní dácáá ñaha-dé sátá quiti-dé, te ndëca ñaha-dé cuáhá<sup>n</sup> ñi<sup>n</sup> vehe núú sácõo cue ñáyiu sácúhu<sup>n</sup> ichi, te yacá<sup>n</sup> ní xito ñaha-dë.

<sup>35</sup> Te ñngá nduu òré ní nucúhu<sup>n</sup> tée Samaritánú-á<sup>n</sup> ichi, te ní tava-dé úú díhú<sup>n</sup> denariú, te ní sáha-dé tée cùu xítohó vehe-á<sup>n</sup>, te ní xãha<sup>n</sup>-dë: “Coto saú-n tée-a, te núu ñá ní tnàhá díhú<sup>n</sup> sã ñi taxi-í, te cuèi na dàndoñuhu-gã-n

díhú<sup>n</sup>-n cuèndá-dé, te òré ná quixi tucu-í te nacháhu-í”, duha ní xãha<sup>n</sup> tée Samaritánú-á<sup>n</sup> xii tée dii vèhe xiá<sup>n</sup>.

<sup>36</sup> Te vitna càhá<sup>n</sup>, te núu ndëdacàa cue tée úní-á<sup>n</sup> cúu-güedë tée váha cùu iní-güedë tnàha ñáyiu-güedë —càchí-gã xãha<sup>n</sup>-gã xii tée dàcuaha ñaha xii-í ñáyiu-á<sup>n</sup> nchaa tnúhu ní chídó tnùní ndíi Moisés.

<sup>37</sup> Te tée-á<sup>n</sup> ñi xãha<sup>n</sup>-dë xii-gã:

—Tée ní cundàhú iní ñáhá xii tée ní dánícuèhé ñáhá cuè ñadúhú-ã<sup>n</sup>, tée-á<sup>n</sup> cúu-dë tée cùu iní tnàha ñáyiu-xi —càchí-dé xãha<sup>n</sup>-dë xii-gã.

Te Jèsús ní xãha<sup>n</sup>-gã:

—Cuáhá<sup>n</sup> te ñiu-ñi duca<sup>n</sup> càda-n tnahá-n —càchí-gã xãha<sup>n</sup>-gã xii-dé.

*Jèsús ndécú-gã vehe tá Mårta ndihí tá Måriá*

<sup>38</sup> Te Jèsús ñúhú-ñi-gã ichi cuáhá<sup>n</sup>-gã ndihí cue tée xica cuu ndihí-gã, te ní sáa-gã ñi<sup>n</sup> ñúú líhli, te xiá<sup>n</sup> ñi<sup>n</sup> quee ñi<sup>n</sup> xíchí nání Mårta ní càhá<sup>n</sup> ñáhá-xi xii-gã vehe-xi.

<sup>39</sup> Te tá Mårta ndëcu ñi<sup>n</sup> cúhú-xi nani-xi Mariá, te xíchí-ã<sup>n</sup> ñi<sup>n</sup> ngóo-xi núú Jèsús ndèdóho-xi nchaa tnúhu càhá<sup>n</sup>-gã.

<sup>40</sup> Te tá Mårta-á<sup>n</sup> ndihí vihi-ñi iní-xi quide-xi chiu<sup>n</sup>-xi, te ní sáhá<sup>n</sup>-xi núú Jèsús, te ní xãha<sup>n</sup>-xi:

—Mèstrú, ¿náa ñá túú tnàhí sàni iní-n sã ñi dándõ ndaha ñaha cúhú-í nchaa chiu<sup>n</sup>-á<sup>n</sup>? Cúñaha saú ná quixi-xi chindee ñaha-xi —cachí-xi xãha<sup>n</sup>-xi xii-gã.

<sup>41</sup> Dico Jèsús ní xãha<sup>n</sup>-gã:

—Yòhó Mårta, ñúhu tneñu vihi-n, te ndíhú iní-n sã ño vai chiu<sup>n</sup>-n ñuhu,

<sup>42</sup> dico xini ñuhu vihi-gã-xi cundèdóho-n tnúhu càhá<sup>n</sup>-í, chi tá Måriá-a sa ndèdóho-xi tnúhu-í, te vá yõo ñi<sup>n</sup> ndacu xocàni tnúhu-í sã ñi ngúndecu ndihí-xi —càchí-gã xãha<sup>n</sup>-gã xii-xi.

## 11

*Jèsús dánèhé-gã cue tée xica cuu ndihí-gã nàcuáa càhá<sup>n</sup> ndihí-güedë Yá Ndiöxí*

(Mt. 6:9-15, 7:7-11)

<sup>1</sup> Te ñi<sup>n</sup> nduu càhá<sup>n</sup> ndihí Jèsús Yá Ndiöxí ñi<sup>n</sup> xichi, te sátá ñi yáha ní càhá<sup>n</sup>

ndihi-gá Yă Ndiöxí, te ní xáha<sup>n</sup> ì<sup>n</sup> téé xica cuu ndihi-gá xii-gá:

—Mèstrú, danèhé ñáhá xii-ndí nása cáhá<sup>n</sup> ndihi-ndí Yă Ndiöxí dàtná ní quide ndí Juáá ní dánèhé ndí cue téé ní xica cuu ndihi ndí —càchí-dé xáha<sup>n</sup>-dē xii-gá.

<sup>2</sup> Te Jèsús ní xáha<sup>n</sup>-gă:

—Òré cáhá<sup>n</sup> ndihi-ndo Yă Ndiöxí, te cachi-ndó:

Yöhó tâtá-ndí Dútú Ndiöxí Yaá ndécú àndíu,  
nchaa ñáyiú na càhá<sup>n</sup>-yu sá cúú-n Yàá ío yíñùhu.

Te xicá<sup>n</sup> táhú-ndí núú-n sá ná sàà nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndíu.

<sup>3</sup> Te xicá<sup>n</sup> táhú-ndí núú-n sá táxí-n sá cándèca iní-ndí ì<sup>n</sup> nduu ì<sup>n</sup> nduu.

<sup>4</sup> Te cada càhnu iní-n nchàa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

Te vá dáñá-n dàcáhá<sup>n</sup> ñáhá yùcu ñávàha xii-ndí cada-ndí sá ñà túú vâha, chi coto ñaha-n xii-ndí cuendá sá vâ dúcá<sup>n</sup> càda ñaha-xi,

duha cáhá<sup>n</sup>-ndó

—càchí-gá xáha<sup>n</sup>-gă xii-güedé.

<sup>5</sup> Te Jèsús ní xáha<sup>n</sup> tùcu-gá:

—Te núu ndédacàa nchóhó ndécú ì<sup>n</sup> téé tnàha tnúhu ndihi-ndo, te dava niú cuáhá<sup>n</sup>-ndó vèhe-dé, te òré ní quexìo-ndo, te xáha<sup>n</sup>-ndo xii-dé: “Véxi-í núu vá cùndèe iní-n tàxi nuu-n úní tnàhá pàá,

<sup>6</sup> chi ì<sup>n</sup> téé xìní tnàhá ndihi-í ñúhú-dē íchi ní quexìo-dé vehe-í, te ñà túú tnàhí ná cuáñaha-í caxi-dé”, quesaha-ndo cùñaha-ndo.

<sup>7</sup> Te téé-án cáhá<sup>n</sup>-dé ndéé xití vehe-dé, te cúñaha-dē xii-ndo: “Vá dásàtú nihá-n chi ndèdí yuyèhe-í, te càa-í ndihi cue landú-í, te vá cúú ndàcòo-í taxi-í sá cuìní-n”, quesaha-dē cúñaha-dē xii-ndo.

<sup>8</sup> Te na càchí tnúhu-í xii-ndo sá cuèi cùu-dé téé tnàha tnúhu ndihi-ndo, dico duca<sup>n</sup> cùñaha-dē xii-ndo, dico dacuítí sá ndácòo-dé taxi-dé sá

cuìní-ndó cuendá sá vâ dásàtú-gá-ndó iní-dé.

<sup>9</sup> Te yúhú càchí-í xii-ndo sá cãcã<sup>n</sup>-ndó núu ná cuìní-ndó núú Yă Ndiöxí te taxi-gá. Te vá dáñá ndèé-ndó cãcã<sup>n</sup>-ndó núú-gă núu ná cuìní-ndó, te duca<sup>n</sup> te níhí-ndó. Te cada iní-ndó sá ñí quexìo-ndo vehe ì<sup>n</sup> tnaha ñáyiú-ndo te ní cáhá<sup>n</sup>-ndó, te ñáyiú-án ñí tedóho ñàhá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yă Ndiöxí tedóho ñaha-gă xii-ndo, te taxi-gá sá ná càcã<sup>n</sup>-ndó núú-gă.

<sup>10</sup> Chi nchaa ñáyiú duca<sup>n</sup> xíquide te Yă Ndiöxí tédóho ñaha-gă xií-yu nihí-yu sá cuìní-yu. Te ñíu-ni duca<sup>n</sup> tùcu nchaa ñáyiú na càcã<sup>n</sup> núú-gă ì<sup>n</sup> sá cuìní-yu, chi sãñaha-gă sá xicá<sup>n</sup>-yu núú-gă. Te ñíu-ni duca<sup>n</sup> tùcu níhí nchaa ñáyiú ñà túú dàña ndéé xicá<sup>n</sup> núú Yă Ndiöxí sá cuìní-yu, chi nihí-yu.

<sup>11</sup> Te nchòhó cue téé cùu tâtá ñà túú cùndee iní-ndó cuáha-ndo cuè déhe-ndo ì<sup>n</sup> yúú caxi-güexi òré xicá<sup>n</sup>-güexi ì<sup>n</sup> pàá núú-ndó càxi-güexi, te ni ñà túú cùndee iní-ndó cuáñaha-ndo ì<sup>n</sup> cóo caxi-güexi òré xicá<sup>n</sup>-güexi ì<sup>n</sup> chácá núú-ndó càxi-güexi.

<sup>12</sup> Te ni ñà túú cùndee iní-ndó cuáñaha-ndo ì<sup>n</sup> nchacua caxi-güexi òré xicá<sup>n</sup>-güexi ì<sup>n</sup> ndíú núú-ndó càxi-güexi.

<sup>13</sup> Te nchòhó cuèi ndèé dau sàà iní-ndó, dico sãha-ndo cuè déhe-ndo sá vâha xèxi-güexi òré xicá<sup>n</sup>-güexi núú-ndó. Te núu nchòhó duca<sup>n</sup> quide-ndo, ÿte uu<sup>n</sup>-gá duca<sup>n</sup> quide Tâtá-ndó Dútú Ndiöxí Yaá ndécú àndíu, chi taxi-gá Espiritú-gá cundeçu ndihi-ndo te núu na càcã<sup>n</sup>-ndó núú-gă! —càchí-gá xáha<sup>n</sup>-gă xii-güedé.

*Càchí-güedé sá ndécú ndíhi Jesús yucu ñávàha*

(Mt. 12:22-30; Mr. 3:20-27)

<sup>14</sup> Te Jèsús ndéñùhu-gá espíritú cùndíhi yucu ñávàha yíhi ñaha xii ì<sup>n</sup> téé ní quide ñíhí-xi, te òré ní ndee ñaha espíritú-án xii téé-án, te ní nacáhá<sup>n</sup>-dé. Te ío ní cuñúhu ñáyiú sá dúcá<sup>n</sup> ñí quide-gá.

15 Te davá-yu ní xítñàhá-yu:

—Tée-a ndèñuhu-dé nchaa espíritú cùndìhi sácúíhná yíhí ñàha xii ñáyíu, chi ñu-ni sácúíhná-ǎ<sup>n</sup> chíndèe ñaha-xi xii-dé, te ñu-ni-xi tàxi tñuní-xi nchaa espíritú-á<sup>n</sup> —càchí-yu xítñàhá-yu.

16 Te davá-yu xito ndeé ñáhǎ-yu xii-gá, te xǎhǎ<sup>n</sup>-yu sá ná cádá-gǎ ñ<sup>n</sup> sá vǎ yǒo tñàhí ndàcu cada ñuyíú-a cundèhé-yu nàcuáa cutnùní iní-yu núu ndáá sá Yǎ Ndiǒxí ní tendaha ñaha-gá xii-gá véxi-gá ñuyíú-a.

17 Dico mee-gǎ sa ní cutnùní iní-gá nchaa nàcuáa sàni iní-yu, núu ní xáha<sup>n</sup>-gǎ xií-yu:

—Te nchòhó xìní-ndó sǎ ñuu ñ<sup>n</sup> tée yíndaha ñ<sup>n</sup> nació<sup>n</sup> vá cúú ñ<sup>n</sup>nuu-dé ndìhi cue tée cùndìhi-dé, te vá cùdǐ-dé cunuu-dé. Te ñu-ni ñu<sup>n</sup> sǎtnahá tucu-xi cùu cue ñáyíu xíndecu ñ<sup>n</sup>-ni vèhe, chi núu vá cúú ñ<sup>n</sup>nuú-yu cundecú-yu, te vá cùdǐ-yu cundecu càhnú-yu.

18 Te ñu<sup>n</sup> sǎtnahá-xi cùu sácúíhná, chi núu vá cúú ñ<sup>n</sup>nuu-xi ndìhi nchaa espíritú cùndìhi-xi te vá cùdǐ-xi cundecu-xi taxi tñuní-xi. Te ñu<sup>n</sup> càhá<sup>n</sup>-í chi nchòhó càchí-ndó sǎ sácúíhná chíndèe ñaha-xi xii-í queñuhu-í nchaa espíritú cùndìhi-xi yíhi ñaha xii ñáyíu.

19 Te núu yúhú quidé cuendá-ndó sǎ sácúíhná chíndèe ñaha-xi xii-í, te xìní ñuhu-xi cada cuendá-ndó yòo chindee ñaha xii cue tée xica cuu ndìhi-ndo queñuhu-güedé nchaa espíritú cùndìhi-xi yíhi ñaha xii ñáyíu. Te mee-güedé càchí-güedé sá nchòhó ñá túú càhá<sup>n</sup> ndáá-ndó sǎ dúcá<sup>n</sup> càhá<sup>n</sup>-ndó.

20 Te ndáá sá Yǎ Ndiǒxí chíndèe ñaha-gá xii-í queñuhu-í nchaa espíritú cùndìhi sácúíhná yíhí ñàha xii ñáyíu, te xǎ<sup>n</sup> cutnùní iní-ndó sǎ sá ní sáá nduu ndìhu ndaha ñàha Yǎ Ndiǒxí xii-ndo.

21 Te núu ñ<sup>n</sup> tée ío ndee, te sùúní ñ<sup>n</sup> cáá-dé, te ndeé-dé vehe-dé cuendá sá vǎ cuíta, te ní quide túha-dé títñí sá dèé<sup>n</sup>, te ío váha nèhe váha-dé nchaa ndachìu<sup>n</sup>-dé.

22 Dico núu quexìo íngá tée ío-gá ñ<sup>n</sup> cáá te ndee-gǎ-dé, te ngüíta-dé nàa-dé ndìhi tée ndeé vehe-xi-á<sup>n</sup>, te cada cànarí ñáhǎ tée-á<sup>n</sup> xii tée ndeé

vehe-xi-á<sup>n</sup>, te quendeé-dé nchaa sá dèé<sup>n</sup> cùndèe iní-dé, te taxi tñuní-na-dé nchaa xǎ<sup>n</sup>, ndìhi nchaa sá ndécú ndìhi-dé, te dàcáhñu-dé nchaa cue tée cùndìhi-dé nchaa sá ná ñìhí-dé.

23 Te nchaa ñáyíu ñá túú cùndìhi ñaha xii-í, te cùu úhú iní ñáhǎ-yu, te nchaa ñáyíu ñá túú chindee ñaha xii-í, te dàquee tíhǔ-yu chìu<sup>n</sup> quide-í.

*Espíritú cùndìhi yucu ñávǎha sá nánchòcáva xito cùu uu*  
(Mt. 12:43-45)

24 Te òré ná quèe ñaha ñ<sup>n</sup> espíritú cùndìhi yucu ñávǎha xii ñ<sup>n</sup> ñáyíu, te cuáhá<sup>n</sup>-xi ndùcu-xi ñ<sup>n</sup> xichi núu cùndècu-xi te ñá ñìhí-xi, te ní sani iní-xi: “Váha-gá núhú tucu-í núu ní xíndecu-í”, ñu<sup>n</sup> ní sani iní-xi.

25 Te cuánuhú-xi, te òré ní nasáá-xi, te ní xini-xi sá cáá iní ñáyíu-á<sup>n</sup> dàtná cáá-nǎ ñ<sup>n</sup> vehe ní natíhú, chi ní nduu vii-ná, vá yǒo-gá ndécú.

26 Te sáta dúcá<sup>n</sup> te ní xica-xi cuáhá<sup>n</sup>-xi cuándúcú-xi úsá tñàhá espíritú cùndìhi-xi sá nèhé víhí-gǎ xíquide, te òré ní níhí-xi cue espíritú-á<sup>n</sup> te ndèca ñaha-xi cuáhá<sup>n</sup> cuendá ngúndecu ndìhi-xi ñáyíu-á<sup>n</sup>, te ñáyíu-á<sup>n</sup> uu<sup>n</sup>-gá nándi yáha-yu dàcúúxí ndèe díhna —càchí-gá xáha<sup>n</sup>-gǎ xií-yu.

*Cuendá ñáyíu cùu váha ndisa iní-xi*

27 Te ñini càhá<sup>n</sup> Jèsús tñuhu-á<sup>n</sup> ñúú ñáyíu ní cáhá<sup>n</sup> níhi ñ<sup>n</sup> ñadìhí tnuú-yu, te xáha<sup>n</sup>-a<sup>n</sup> xii Jèsús:

—¡Sá vǎha táhú ñadìhí ní dácácú ñàha xii-n, te ní dácuéhnú ñàha-a<sup>n</sup>! —cachí-a<sup>n</sup> xáha<sup>n</sup>-a<sup>n</sup> xii-gá.

28 Te Jèsús ní xáha<sup>n</sup>-gǎ:

—¡Váha-gá táhú nchàa ñáyíu sàcúndedóho nchaa tñuhu càhá<sup>n</sup> Yǎ Ndiǒxí te sàndáá iní-yu! —càchí-gá xáha<sup>n</sup>-gǎ xii-a<sup>n</sup>.

*Ñáyíu ñá túú sàndáá iní ñáhǎ xii Jèsús cuíní-yu cada-gá ñ<sup>n</sup> sá vǎ yǒo tñàhí ndàcu cada*

(Mt. 12:38-42; Mr. 8:12)

29 Te ta tàcá vai ñáyíu te dàdehnde tñaha-ná-yu, te ní ngüíta Jèsús xáha<sup>n</sup>-gǎ xií-yu:

—Nchòhó ñáyíu ndècu ñuyíú vitna, chi ío sáá iní-ndó, te cuíní-ndó càda-í

ɛ̃n sá vǎ yǎo tnàhí ndàcu cada cuendá cuíní-ndó cùtnuní iní-ndó nǔu ndisa sá Yǎ Ndiǒxí ní tendaha ñàha-gá xii-í véxi-í. Dico ñá túú nǎgá cada-í quíní-ndó, chi sa ñihí-ndó tnǔhu nàcuáa ní yáha ndíi Jònás téé ní xóo cáhá<sup>n</sup> tnúhu Yá Ndiǒxí ndéé sanaha, te ðiu-ni duca<sup>n</sup> yáha yúhú tucu.

30 Chi nchaa ñáyiú ñuú Nñivé ní cutnùní iní-yu sá Yǎ Ndiǒxí ní tendaha ñàha-gá xii ndíi Jònás ní sáhá<sup>n</sup> ndíi ñuú-yu. Te duca<sup>n</sup> sǎtnahá-xi cùu yúhú Téé cùu ñaní tnáhá-ndó nchàa-ndo, chi sáá nduu te cutnùní iní-ndó sá Yǎ Ndiǒxí ní tendaha ñàha-gá xii-í véxi-í ñuyíú-a.

31 Te na sáá nduu càda ndáá Yǎ Ndiǒxí cuéchi nchaa nchòhó ñáyiú ndècu ñuyíú-a, te dàvá-á<sup>n</sup> quíní-ndó ɛ̃n ñadihí ñaha ní xíndaha ɛ̃n nació<sup>n</sup> cáá ndàa xio cuha núu quéné nchícanchii. Te ñaha-á<sup>n</sup> ïo xica ní xíndecu-a<sup>n</sup>, te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cáhá<sup>n</sup> ndíi Salòmón, chi ndíi-á<sup>n</sup> ïo ní sáá sá xíní tnùní ndíi. Te ñaha-á<sup>n</sup> cǎhá<sup>n</sup>-a<sup>n</sup> dàvá-á<sup>n</sup> sǎ nchòhó ñáyiú ndècu vitna ñá túú ní quide ndáá-ndó. Dico vitna iha ndècu ndihí ñaha-ndo xii yúhú, te ðiu-í ïo-gá cúnùu-í dàcúúxí ndíi Salòmón.

32 Te ðiu-ni nduu càda ndáá Yǎ Ndiǒxí cuéchi nchaa nchòhó ñáyiú ndècu ñuyíú-a vitna, dàvá-á<sup>n</sup> tnàhá cue ñáyiú ní xíndecu ñuú Nñivé cundecú-yu núu Yǎ Ndiǒxí, te tnàhá-yu cachi-yu sá ñà túú ní quide ndáá-ndó. Chi ñáyiú ñuú Nñivé-á<sup>n</sup> ní ndixi túu iní-yu sá ñà túú quide váha-yu ndècú-yu te ní natuhá-yu ichi Yá Ndiǒxí cùtnàhá ní cáhá<sup>n</sup> ndihí ñaha ndíi Jònás tnúhu-gá xii-yu. Dico vitna iha ndècu ndihí ñaha-ndo xii yúhú téé càhá<sup>n</sup> tucu tnúhu Yá Ndiǒxí, te ðiu-í ïo-gá cúnùu-í dàcúúxí ndíi Jònás.

*Núu-ó cùu-xi datná ɛ̃n ñuhú  
(Mt. 5:15; 6:22-23)*

33 Te ñá túú nì ɛ̃n ñáyiú tèñuhú ɛ̃n linterná, te taxi ndecú-yu ɛ̃n núu yídǎhu, àdi chiváha-yu xití ɛ̃n tídihi, chi tàxi ndecú-yu ɛ̃n núu ñnu cuendá nchaa ñáyiú quíhu vehe cutnùní núu-yu.

34 Te núu-ndó cùu-xi datná ɛ̃n ñuhú, chi ɛ̃n sá ná quíní-ndó te ndixi túu iní-ndó nǎ cúu xǎ<sup>n</sup>, te núu càváha núu-ndó, te duca<sup>n</sup> cùtnuní iní-ndó nǎ cúu sǎ ndécú núu-ndó, á<sup>n</sup> te núu cùhú, te vá cùtnùní iní-ndó nǎ cúu sǎ ndécú núu-ndó. Te sá dúcá<sup>n</sup> cùhú núu-ndó te cada iní-ndó sǎ ndécú-ndó dàtná ɛ̃n núu néé.

35 Te ïo cada cuendá-ndó vǎ cání cuèhé iní-ndó cuendá tnúhu Yá Ndiǒxí cuendá cutnùní iní-ndó nàcuáa cundecu-ndo, chi núu na càni cuèhé iní-ndó cuendá tnúhu-gá, te cùu-ndo datná ɛ̃n ñáyiú ñá túú cùtnuní núu-xí.

36 Te núu càndoo canine iní-ndó, te mee-ni sǎ vǎha ñuhu iní-ndó, te cùtnuní váha iní-ndó tnúhu ndáá dàtná cùtnùní váha núu-ndó òré càyú ñuhú, duca<sup>n</sup> cùtnuní iní-ndó —càchí-gá xáha<sup>n</sup>-gǎ xii-yu.

*Jèsús càhá<sup>n</sup>-gá cuendá cue téé cùu fariséu ndihí cue téé dàcuaha ñaha xii-í ñáyiú*

*(Mt. 23:1-36; Mr. 12:38-40; Lc. 20:45-47)*

37 Te òré ní ndihí tnúhu ní cáhá<sup>n</sup> Jèsús, te ɛ̃n téé cùu fariséu ní cáhá<sup>n</sup> ñàhá-dě xii-gá vehe-dé caxi-gá, te cuánguihu-gá vehe-dé, te ní ngóo-gá mèsá.

38 Te téé cùu fariséu-á<sup>n</sup> ïo ní cuñúhu-dé, chi Jèsús ñá túú ní ndàha-gá nàcuáa sàni iní-güedé nduu vétú iní Yǎ Ndiǒxí òré ní ngóo-gá caxi-gá dàtná quidé mèe-güedé.

39 Te Jèsús ní xáha<sup>n</sup>-gǎ xii-dé:

—Nchòhó cue téé cùu fariséu xíní-ndó sǎ ïó ñáyiú nàquete sáta-ni tàsá<sup>n</sup> ndihí sáta-ni còhó, te xití-xi càndehe caduha-ni. Te duca<sup>n</sup> sǎtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú nduu ndoo, te nándi dándahú-ndó tnàha ñáyiú-ndo, te quèhe<sup>n</sup>-ndo sá ndécú ndihí-yu, te nándi-gá nchaa sá cuèhé sá dúhá ñuhu iní-ndó quide-ndo.

40 Te nchòhó cúu-ndó cuè téé ïo ñí iní-xi! ¿Te náa ñá túú cùtnuní iní-ndó sǎ Yǎ Ndiǒxí Yaá ní cadúha yiqui cùnú-ó ðiu-ni-gá ní chihi-gá iní-ó-á<sup>n</sup>?

41 Te nchaa sǎ vǎha ndècu ndihí-ndo cuáha-ndo nchàa ñáyiú xini ñuhu na

cundecu ndihí-yu, te núu duca<sup>n</sup> na càda-ndo, te cuu-ndo ñáyiú sa ní nduu ndoo ní nduu nine iní-xi.

42 '¡Te ndàhú ní cuu nchaa nchòhó cue téé cùu fariséú! Chi sàha-ndo Yá Ndiöxí núú ùxí xichí yúcu nání mèntá, ndihí yúcu rúdá, ndihí nchaa dava-gá núú yúcu quèe comidá, dico ñá túú quide ndáá-ndó, te ni ñá túú ñuhu iní-ndó Yá Ndiöxí. Dico tnúhu càhá<sup>n</sup>-í-a tàú-ndó càda-ndo, te ni vǎ dáñá ndèe-ndó càda-ndo nchaa dava-gá sá váha.

43 '¡Te ndàhú ní cuu nchòhó cue téé cùu fariséú! Chi cuiní-ndó cùnucóo-ndo núú sácóo cue téé ío cùnucóo xiti veñúhu, te cuiní-ndó mèe-ni ndihí tnúhu yíñúhu càhá<sup>n</sup> ndihí ñaha ñáyiú xii-ndo nchaa núú xicá cùu-ndo.

44 '¡Te ndàhú ní cuu nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchòhó cue téé cùu fariséú chi ío dàndahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ì<sup>n</sup> ñáyiú ní xihí te ní nguindüxi, te ñá túú cùtnuní-gá ndèe yíndüxi-yu, te cuèi nà yáha ñáyiú dico ñá túú cùtnuní sá yíndüxi ndíyi. Te duca<sup>n</sup> sǎtnahá-xi cùu nchòhó, chi nchaa ñáyiú ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáha<sup>n</sup>-gǎ xii-güedé.

45 Te ní xáha<sup>n</sup> ì<sup>n</sup> téé dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcá<sup>n</sup> càhá<sup>n</sup>-n te tnàhá nchúhú xicuèhé-n ǎ<sup>n</sup> —càchí-dé xáha<sup>n</sup>-dè xii-gá.

46 Te Jèsús ní xáha<sup>n</sup>-gǎ:

—¡Ndàhú ní cuu tnàhá nchaa nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés! Chi quide-ndo datná quidé ñáyiú dàcuído ì<sup>n</sup> tnaha ñáyiú-xi ì<sup>n</sup> sá ío véé, te mèe-yu ni lùha ñá túú cuiní-yu cuidó-yu. Te duca<sup>n</sup> sǎtnahá-xi quide nchòhó chi dànehé-ndó ñáyiú nàcuáa cadá-yu, dico mee-ndo chi ni lùha ñá túú cuiní-ndó càda-ndo nàcuáa dànehé-ndó-yu.

47 '¡Te ndàhú ní cuu tucu-ndo! Chi càdúha-ndo núú ní nguindüxi cue téé ní xóo cáhá<sup>n</sup> tnúhu Yá Ndiöxí ndéé sanaha cuendá sá cúnàha-ndo núú yíndüxi cue ndíi, te diu-ni cue ñaní tnàhá-ndó ní sahani-güedé cue ndíi.

48 Te nchòhó sa nàha-ndo nàcuáa ní quide cue ñaní tnàhá-ndó, te càchí-ndó sá ní quide váha-güedé sá dúcá<sup>n</sup> ní sahani-güedé cue ndíi-á<sup>n</sup>, te vitna càdúha-ndo núú ní nguindüxi cue ndíi.

49 'Te Yá Ndiöxí ío sáa nchaa sá xini tnùní-gá, te ní cachí-gá sá dácàhá<sup>n</sup>-gá iní cue téé cuendá càhá<sup>n</sup>-güedé tnúhu-gá núú ñáyiú, te cada-güedé nchaa nàcuáa cuiní-gá, te dava-güedé cahni ñàhá-yu xii-güedé, te dava-güedé ío dandòho ñàhá-yu xii-güedé duha ní cachí-gá.

50 Te nchaa ñáyiú ñuyíú vitna tnàhá-yu nacháhu-yu núú Yá Ndiöxí cuendá sá ní sahani-güedé cue téé ní càhá<sup>n</sup> tnúhu-gá ndéé cùtnàhá ní ngáva ñuyíú.

51 Te ndéé ndíi Àbél téé ní sahani-güedé ndéé díhna nuu, ndihí ndéé ndíi Zacàriá téé ní sahani-güedé ndéé núú ní ndihí-ná ndácá<sup>n</sup> cuendá ñàhá Yá Ndiöxí núú ñáyiú ndècu ñuyíú vitna, te diu ndíi-á<sup>n</sup> ní sahani-güedé mei tnúú veñúhu càhnu sá ío cùnucóo, ndihí xito núú sácódó sá ndúú tǎhú Yá Ndiöxí.

52 '¡Te ndàhú ní cuu tucu nchaa nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés! Chi quide-ndo datná quidé ì<sup>n</sup> téé tàxi tnuní ì<sup>n</sup> vehe, chi nacadí-dé te ñá dáñá-dè quíhu ñáyiú te ni mèe-dé ñá túú quíhu-dé. Te duca<sup>n</sup> sǎtnahá-xi quide-ndo, chi dàcuaha-ndo tnúhu Yá Ndiöxí te ñá túú cuiní-ndó quindáa iní-ndó te ni ñá túú dànehé-ndó ñáyiú cuiní tníi tnúhu-gá nàcuáa tàú-xi cunduu cuendá naníhí tǎhú-yu —càchí-gá xáha<sup>n</sup>-gǎ xii-dé.

53 Te òré ní ndee Jèsús vehe téé cùu fariséú-á<sup>n</sup>, te cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí cue téé cùu fariséú ní cudéé<sup>n</sup>-güedé



núú-gă, te ní ngüíta-güedé nándi sá xicá<sup>n</sup> tnúhú-güedě núú-gă cuendá cuíní-güedé núu vá cuíta-gá #<sup>n</sup> tnúhu cãhá<sup>n</sup>-gá

<sup>54</sup> cuendá duca<sup>n</sup> ñihí-güedě nãcuáa cada-güedé cacá<sup>n</sup> cuéchi-güedé cuendá-gá.

## 12

*Jèsús cãhá<sup>n</sup>-gá cuendá cue té dândahú méé-xí*

<sup>1</sup> Te òré-á<sup>n</sup> ñi tacá títí ñáñá núú ndécú Jèsús, te súúni díco ngõnchihi tnàha-ná-yu. Te ndédóho-yu ní xáha<sup>n</sup> Jèsús xii cue té xica cuu ndihí-gá:

—Cada cuendá-ndó vã cáncñicú<sup>n</sup> nihnu-ndo nãcuáa quide cue té cùu fariséú, chi cue té-á<sup>n</sup> ño dândahú-güedé méé-güedě sá quidé ndãá-güedé dico ñá ndãá sá quidé ndãá-güedé.

<sup>2</sup> Te nchaa tnúhu sá cúu yùhu ni cuu vá cúu yùhu-gá, chi nchaa dacuítí sã quée túu-xi núú ñáñá.

<sup>3</sup> Chi nchaa tnúhu cãhá<sup>n</sup> dayuhu-ndo quée túu-xi núú chítú núú tàcá, te nchaa tnúhu cãhá<sup>n</sup> méé-ndó vèhe-ndo dacuítí sã ñihí ñáñá tnúhu.

*Yá Ndiõxí xíní ñùhu-xi yuhú-ó-gă*  
(Mt. 10:26-31)

<sup>4</sup> Te nchòhó cue té ño váha tnàhá tnúhu ndihí-í ná cãchí tnúhu-í xii-ndo sã vã yùhú-ndó cué ñáñá cuéi na cãhni ñhá-yu xii-ndo, chi ñi-ñi yiqui cùñú-ndó ndácú-yu cahní-yu, te ñá túú nãgá ndacú-yu cada ñhá-yu xii-ndo.

<sup>5</sup> Te na cãchí tnúhu-í xii-ndo sã Yá Ndiõxí tàú-ndó yùhú-ndó-gă, chi mee-gă ño cùnuu-gá, te ñi-gá quidé-gă sá vã cùndecu-gá ñáñá ñuyú, te daquihí<sup>n</sup> ñhá-gă xii-yu núú ùhú núú ndàhú, núu xiã<sup>n</sup> cãchí tnúhu-í xii-ndo sã Yá-á<sup>n</sup> tàú-ndó yùhú-ndó-gă.

<sup>6</sup> Te nchòhó xíní-ndó sã ndéé úhú<sup>n</sup> tnàhá tãlãá cùyãhu-di núú úú díhú<sup>n</sup>, dico Yá Ndiõxí ñá túú cùnaa-gá ñi #<sup>n</sup>-güedi, chi nèhe cuendá ñhá-gă xii-güedi.

<sup>7</sup> Te nchòhó ndéé #<sup>n</sup> #<sup>n</sup> idi díquí-ndó yìndehu, núu xiã<sup>n</sup> cãchí-í sá vã yùhú-ndó, chi cùnuu-gá-ndó dàcúúxí tãlãá cuéi vãi vihi-güedi.

*Ñáñá na dàtúu núú dàva-gá ñáñá sá ndécú ndihí-yu Xitohó Jesucristú*  
(Mt. 10:32-33; 12:32; 10:19-20)

<sup>8</sup> Te na cãchí tnúhu-í xii-ndo sã núu na dàtúu-ndo núú dàva-gá ñáñá sá ndécú ndihí ñhá-í xii-ndo. Te duca<sup>n</sup> te tnàhá yùhú Té cùu ñani tnàhá-ndó nchaa-ndo datúu-í núú nchaa cue espíritú xínú cuéchi núú Yá Ndiõxí sá nchòhó ndécú ndihí ñhá-ndo xii-í.

<sup>9</sup> Dico núu na cùñaha-ndo xii ñáñá sá ñá túú ndécú ndihí ñhá-ndo xii-í, te ñi-ñi duca<sup>n</sup> cada yùhú Té cùu ñani tnàhá-ndó nchaa-ndo, chi cùñaha-í xii cue espíritú xínú cuéchi núú Yá Ndiõxí sá ñá túú ndécú ndihí ñhá-í xii-ndo.

<sup>10</sup> Te ndédani cã ñáñá na cãhá<sup>n</sup> cuéhe cuendá yùhú Té cùu ñani tnàhá-ndó nchaa-ndo, te cada cãhni ñi ñhá Yá Ndiõxí xii-yu. Dico ñáñá na cãhá<sup>n</sup> cuéhe cuendá Espíritú Yá Ndiõxí, te ñáñá-á<sup>n</sup> vã cãdá cãhni ñi ñhá-gă xii-yu.

<sup>11</sup> Te òré ná cãndeca ñhá-güedé xii-ndo quihí<sup>n</sup> veñúhu, àdi núú cué té cùchiu<sup>n</sup>, te ñi vã cãní ñi-ndó núu nása cunduu tnúhu cùñaha-ndo xii-güedé, te ñi vã cãní ñi-ndó núu ná tnúhu nadãñhocáva-ndo núu ná tnúhu na cùñaha-güedé xii-ndo,

<sup>12</sup> chi òré-ñá te mee Espíritú Yá Ndiõxí dacàhu ñi ñhá-xí xii-ndo tnúhu cùñaha-ndo xii-güedé —cãchí-gá xáha<sup>n</sup>-gă xii-güedé.

*Cuendá #<sup>n</sup> té cuica*

<sup>13</sup> Te #<sup>n</sup> té ñùhu tnàhá tnuú ñáñá-á<sup>n</sup> ñi xáha<sup>n</sup>-dë xii Jèsús:

—Mèstrú, cùñaha xii ñani-í sá ná chidava-dé sá ñi dãndõ tãtã-ndí cuu cuendá-ndí —cãchí-dé xáha<sup>n</sup>-dë xii-gă.

<sup>14</sup> Te Jèsús ní xáha<sup>n</sup>-gă xii-dé:

—¿Te ná cuendá duca<sup>n</sup> cãhá<sup>n</sup>-n? Te ñá díú chiu<sup>n</sup>-á<sup>n</sup> vëxi-í cada-í, chi ñá díú tã cùchiu<sup>n</sup> cuu-í —cãchí-gă xáha<sup>n</sup>-gă xii-dé.

<sup>15</sup> Te xáha<sup>n</sup>-gă xii nchaa ñáñá xĩndecu-á<sup>n</sup>:

—Nchaa nchòhó ñáyi ndèdóho nchaa tnúhu càhá<sup>n</sup>-í ío váha cada cuèndá-ndó, te vá cání ìní-ndó nándi nducú-ndo cùndecu ndìhi-ndo, chí cuèi vâi vihi na nihí-ndó cùndecu ndìhi-ndo, dico vá chíndèe ñaha-xi cudíi-ndo cùndecu-ndo ñuyíú-a — câchí-gá xáha<sup>n</sup>-gã xií-yu.

16 Te dătnùní ní ngúíta-gá cání-gã ì<sup>n</sup> cuèndú núŷ-yu cuèndá tecú tnùní-yu tnúhu-gá, te xáha<sup>n</sup>-gã:

—Ì<sup>n</sup> tée cuica sùúní ñí cuu nchaa tatá ní xitu-dé núú ñúhú-dě.

17 Te ní ngúíta-dé sání ìní-dé: “¿Te nása cada-í? Te ñá túú ndèe nataxúha-í nchaa sá ñí xitu-í”, duha ní sani ìní-dé.

18 Te dătnùní ní sáha váha tucu-dé cuèndá năcuáa cada-dé, te ní cachí-dé: “Duha na cùnduu, dangòyo-í yacá-í, te ndada càhnu-gá-í, te xití-xi nataxúha-í nchaandi túhú sá ñí xitu-í, ndìhi nchaa dava-gá sá ndécú ndìhi-í.

19 Te sátá dúcá<sup>n</sup>, te cachí-í: Ío vâi sá ndécú ndìhi-í, te cudíi-xi cuéhé cuíá, te vitna ndetatú-í, te coho-í te caxi-í cada-í, te nândi-gá cada-í cuèndá cudíi ìní-í cundecu-í, duha quesaha-í”, câchí-dé.

20 Dico Yá Ndiöxí ní xáha<sup>n</sup>-gã xii-dé: “Yòhó, ñá túú nândíhi sá sání ìní-n, chí yùhú câchí-í sá núú vitna cuú-n, te nchaa sá ndécú ndìhi-n ¿yoo cuu sá vâha xii-a<sup>n</sup>-i?”, câchí-gá xáha<sup>n</sup>-gã xii-dé.

21 Duha yáha nchaa ñáyi nândi sàni ìní-xi cundecu ndìhi-xi ñuyíú-a, dico ñáyi-á<sup>n</sup> ío ndàhú-yu chí ñá túú nă nduu táhú-yu núú Yá Ndiöxí cundecu ndìhi-yu — câchí Jèsús xáha<sup>n</sup>-gã xií-yu.

*Yá Ndiöxí xító-gã nchaa ñáyi sàndáá ìní ñáhá xii-gá*  
(Mt. 6:25-34)

22 Te ní xáha<sup>n</sup> Jèsús xii cue tée xica cuu ndìhi-gá:

—Te na câchí tnúhu-í xii-ndo sã vâ ío cani ìní-ndó núu nása cundecu-ndo, àdi nása níhi-ndó sã caxí-ndó, àdi nása níhi-ndó dǒo cuihnu-ndo.

23 Chí cùnuu-gá méé-ndó dâcúúxí sã nchító-ndó, te duca<sup>n</sup> yìqui

cuúú-ndó cùnuu-gá-xi dâcúúxí dǒo sâcúhnu-ndo.

24 Te chí cuáha cuèndá năcuáa quide cue tícacá, chí ní ñà túú chìhi-güedi tatá cuu itú natahu-güedi te ní ñà túú ndèe nútnñi yacá-güedi, te nihí-güedi xèxi-güedi, chí Yá Ndiöxí xító ñaha-gá xii-güedi. ¿Te nchòhó cùnuu-gá-ndó dâcúúxí nchàa cue quiti ndava!

25 Te cuèi nândi sá sání vîhi ìní-ndó ndècu-ndo, dico ñá ndâcú-ndó càda-ndo năcuáa cuehnu-ndo cuèdicó ì<sup>n</sup> yìqui-gã.

26 Te núu ní sã lúhá xǎ<sup>n</sup> ñá ndâcú-ndó càda-ndo, ¿te ná cuèndá ío sâni ìní-ndó cuèndá nchaa sá cuíni-ndó nihí-ndó cùndecu ndìhi-ndo?

27 Te chí cádá cuèndá năcuáa sâhnu ì<sup>n</sup> tnu itá, chí ní ñà túú quide chiu<sup>n</sup>-xi, te ní ñà túú quèhe<sup>n</sup>-xi idi. Te na câchí tnúhu-í xii-ndo sã ndíi Salòmón ío vii ní cáa nchaa sá ñí xíndecu ndìhi ndíi, dico vií-gá tucu càa nchaa itá dâcúúxí nchàa sá ñí xíndecu ndìhi ndíi.

28 Te cùhú sã ío vitna tnaa-ni cudíi-xi te sâhmí-yu, te cuèi duca<sup>n</sup> dico ío vii càdúha Yá Ndiöxí nchaa cùhú-ã<sup>n</sup>. ¿Te nchòhó ío cùnuu-ndo dâcúúxí nchàa cùhú-ã<sup>n</sup>, núu xǎ<sup>n</sup> ío xító ñaha-gá xii-ndo, te dicó yica cùu ìní-ndó sàndáá ìní-ndó-gã!

29 Te vá ío canchicú<sup>n</sup> nihnu-ndo sã cóhó sã caxí-ndó, te ní vâ dândihú-ndó ìní-ndó núu nása cada-ndo nihí-ndó.

30 Chí nchaa ñáyi ñá túú sàndáá ìní ñáhá xii Yá Ndiöxí duca<sup>n</sup> mèe-ni sá cóhó sã caxí-yu xica nchicú<sup>n</sup> nihnú-yu. Dico mee Tătá-ó Dütú Ndiöxí sa nâha-gá nândi cùu sá xíní ñùhu-ndo, te taxi-gá.

31 Te cada-ndo nchàa năcuáa càhá<sup>n</sup> Yá Ndiöxí Yaá yíndàha ñaha xii-ndo, te duca<sup>n</sup> te taxi-gá nchaa sá xíní ñùhu-ndo.

*Cuèndá sá vâha nduu táhú-ó núú Yá Ndiöxí*  
(Mt. 6:19-21)

32 Te vá yùhú nchòhó cue tée ndècu ndìhi-í cuèi ío sacú-ndó, chí Tătá-ó Dütú Ndiöxí ní cachí-gá sá ndúú táhú-ndó cùndecu-ndo núú ndécú-gã taxi tnùní-ndó tnàhá-ndó.

33 Te chí díco nchàa sá ndécú ndìhi-ndo, te chí cuàha nchaa ñáyiú ndàhú díhú<sup>n</sup>-ndó ñáyiú xini ñuhu, te cada váha-ndo cùndecu-ndo, te duca<sup>n</sup> te nduu táhú-ndó sã ïo-gá váha núú Yã Ndiõxí cundecu ndìhi-ndo, te xiã<sup>n</sup> vá cúú túhú tnàhí-gá-xi, te ni vã ndíhí ñihnu-gá-xi, te ni ñadúhú vã ndácú-güedë duhu-güedë, te ni tĩquidi vá quéé-dí.

34 Te núu xiã<sup>n</sup> cúú cuendá-ndó ñá, te diu-ni xiã<sup>n</sup> ñúhú ìní-ndó, á<sup>n</sup> te núu mee-ni sã ndécú ñùyíú-a ndècu ndìhi-ndo, te diu-ni nchaa xiã<sup>n</sup> ñúhú ìní-ndó.

#### *Xini ñuhu-xi quíhi iní-ó cùndecu-o*

35-36 Te ío quíhi iní-ndó cùndecu-ndo, te cada-ndo dàtná quidé dáva cue téé xinu cuechi sacúndecu túha-güedé cuëi nani òré-á<sup>n</sup> ndétú-güedë patróó<sup>n</sup>-güedë ná òré nasáá-dé sá cuahá<sup>n</sup>-dé vico tnãndaha. Te núu niú te sa cúú cáyú-ni ñuhú-güedé sá cùndetu ñaha-güedé, chi òré ná nasáá-dé dacàsa<sup>n</sup>-dé yuyèhe, te ndíhi-ni nacaá<sup>n</sup>-güedé ndíhu-dé.

37 Te váha táhú nchaa cue téé xinu cuechi-á<sup>n</sup>, chi ndècu túha-ni-güedé ndétú-güedë ndéé òré ní nasáá patróó<sup>n</sup>-güedë, te na cãchí tnúhu ndáá-í xii-ndo sã òré ná nasáá patróó<sup>n</sup>-güedë-á<sup>n</sup> te chihi ñaha-dé mèsá xii-güedé, te ndacá<sup>n</sup> ndee-dé dóó níhnú-dë núú yíquí-dë, te ngüíta-dé cani-dé cóhó-güedë cuendá caxi-güedé.

38 Te diu-ni duca<sup>n</sup> càda-dé cuëi dava niú, àdi tacuíhndá-gá, te núu ñá túú xidí-güedé òré nasáá-dé, te cue téé xinu cuechi-á<sup>n</sup> ïo váha tnahá-güedé.

39 Te núu díco ñ<sup>n</sup> téé cùu xítóhó ñ<sup>n</sup> vehe xini-dé ná òré quíhu ñadúhú vehe-dé ñá, te quíhi iní-dé te vá cùdú-dé, te vá dáñá-dë nacaá<sup>n</sup>-güedé yuyèhe-dé quíhu-güedé duhu-güedé.

40 Te nchòhó tucu nchaa-ni nduu quíhi iní-ndó cùndecu túha-ndo, chi na cuahá<sup>n</sup> nduu ñá túú yíhi iní-ndó, te quixi tucu yúhú Téé cùu ñani tnahá-ndó nchàa-ndo —cachí-gá xáha<sup>n</sup>-gã xii-güedé.

#### *Cue téé quide ndáá ndíhi cue téé ñá túú quide ndáá*

(Mt. 24:45-51)

41 Te té Pèlú ní xicá<sup>n</sup> tnúhú-dë núú Jèsús, te xáha<sup>n</sup>-dë:

—Mèstrú, ¿te tnúhu ní cáhá<sup>n</sup>-n-ã<sup>n</sup> cùu-xi mee-ni cuendá nchúhú ã<sup>n</sup> cuendá nchaa ñáyiú? —cãchí-dé xáha<sup>n</sup>-dë xii-gá.

42 Te Jèsús ní xáha<sup>n</sup>-gã:

—Cáhá<sup>n</sup>-í cuendá ñáyiú quide váha dàtná quidé ñ<sup>n</sup> téé tàxi tnuní ñáhá xii cue ñáyiú xinu cuechi ndecu vehe patróó<sup>n</sup>-xi, chi téé-á<sup>n</sup> ïo váha tècú tnùní-dé, te quide-dé nchaa nàcuáa càhá<sup>n</sup> patróó<sup>n</sup>-dë, te dàcaxi-dé cue ñáyiú xinu cuechi òré tàú-xi caxí-yu.

43 Te núu duca<sup>n</sup> quide váha téé tàxi tnuní ñáhá xii cue ñáyiú xinu cuechi-á<sup>n</sup> ñá, te ío váha tnahá-dé òré nasáá patróó<sup>n</sup>-dë núu ndéé cuahá<sup>n</sup>-dé.

44 Te na cãchí tnúhu ndáá-í xii-ndo sã tèé quide ndáá táxi tnùní ñáhá xii cue ñáyiú xinu cuechi-á<sup>n</sup> cũñaha-ñá patróó<sup>n</sup>-dë xii-dé sá ncháándi túhú-ñá sá ndécú ndíhi-dé quindaha-dë.

45 Dico núu téé tàxi tnuní ñáhá xii cue ñáyiú xinu cuechi-á<sup>n</sup> ná càni iní-dé sá cùyàa patróó<sup>n</sup>-dë vá nasáá ndíhi-ni-dé ñá, te ngüíta-dé cani-dé nchaa ñáyiú xinu cuechi, cuëi téé cuëi ñadíhí, te ngüíta-dé caxi-dé coho-dé, te dàxini-dé méé-dë,

46 te nduu ñá túú yíhi iní-dé te nasáá patróó<sup>n</sup>-dë, te dandòho ñaha patróó<sup>n</sup>-dë-á<sup>n</sup> xii-dé, te daquíhí<sup>n</sup> ñáhá-dë xii-dé núu ndécú ñáyiú ñá túú ní quide ndáá.

47 Te dava cue téé xinu cuechi xini-güedé nàcuáa cuíni patróó<sup>n</sup>-güedé cada-güedé te ñá túú quide-güedé, te ni ñá túú cuíni-güedé cundecu túha-güedé cundetú-güedé patróó<sup>n</sup>-güedé, te nchaa cue téé duca<sup>n</sup> xiquide dandòho ñaha patróó<sup>n</sup>-güedé, chi ñani víhi-güedé.

48 Te dava cue téé xinu cuechi ñá túú xini-güedé nàcuáa cuíni patróó<sup>n</sup>-güedé cada-güedé, te ní quide-güedé sá néñuú-güedé ñ<sup>n</sup> sá ñá túú tàú-güedé cada-güedé ñá, te cue téé-á<sup>n</sup> sacú-gá dandòho ñaha patróó<sup>n</sup>-güedé, chi

sacú-gá ñáni-güedé. Te ñáyiú cùtnuní iní-xi nàcuáa cuíní Yá Ndiõxí cadá-yu, te diu-ni duca<sup>n</sup> tàú-yu cadá-yu nàcuáa cuíní-gá. Te ñáyiú vai-gá tècú tnùní nàcuáa càhá<sup>n</sup>-gá, te diu-ni duca<sup>n</sup> vai nchaa sá càhá<sup>n</sup>-gá tàú-yu cadá-yu.

*Ñá túú cùu ì<sup>n</sup>nuu ñáyiú*  
(Mt. 10:34-36)

<sup>49</sup> Te yúhú véxi-í ñuyíú-a cuendá cutnùní iní ñáyiú nàcuáa cada ñaha Yá Ndiõxí xií-yu, ìte cuíní-í sá ndìhi-ni cada-gá nàcuáa sàni iní-gá!

<sup>50</sup> Te yúhú ío vai tnúhu sàni iní-í, ìchi sáá nduu te ío ndoho-í, te diu-ni xiá<sup>n</sup> cuhu<sup>n</sup> iní-í ndéé ná sáá nduu dùca<sup>n</sup> yáha-í!

<sup>51</sup> Te nchòhó vá cání iní-ndó sá yúhú véxi-í ñuyíú-a te cundecu ndìhi tnàha váha-ni ñáyiú, te ñáhá chi da ngüíta-yu vá cúú ì<sup>n</sup>nuú-yu cundecú-yu.

<sup>52</sup> Te ndéé není vitna ngüíta ñáyiú vá cúú ì<sup>n</sup>nuú-yu cundecú-yu, te na càda-o cuendá te núu úhú<sup>n</sup> ñáyiú xíndecu ì<sup>n</sup>-ni vèhe, te vá cúú ì<sup>n</sup>nuu-gá-yu, chi úní-yu ndatnúhu-yu te nàá-yu ndìhi úú-gá-yu, àdi ñáyiú úú-á<sup>n</sup> ndatnúhu-yu te nàá-yu ndìhi ñáyiú úní-á<sup>n</sup>.

<sup>53</sup> Te dava cue téé cùu tátá vá cúú ì<sup>n</sup>nuu-gá-güedé ndìhi déhe ducu<sup>n</sup>-güedé, te ni dàva cue ñáyiú cùu náná vá cúú ì<sup>n</sup>nuu-gá-yu ndìhi déhe yòcò-yu, te ni sànu-yu vá cúú ì<sup>n</sup>nuu ndìhi-gá-yu. Te duca<sup>n</sup> cadá-yu chi davá-yu quíndáá iní ñáhã-yu xii-í, te davá-yu vá quíndáá iní ñáhã-yu — càchí-gá xáha<sup>n</sup>-gã xii-güedé.

*Ñáyiú cùtnuní iní-xi nàcuáa quide-xi ñuyíú ndìhi andìu*  
(Mt. 16:1-4; Mr. 8:11-13)

<sup>54</sup> Te Jèsús ní xáha<sup>n</sup>-gã xii nchaa ñáyiú xíndecu-á<sup>n</sup>:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sá cúú<sup>n</sup> dàú, te diu duca<sup>n</sup> ndìsa quide-xi.

<sup>55</sup> Te òré ná quène táchí ndàa xio datni nàcuáa quène nchíanchii, te

càchí-ndó sá ío cada ihni-xi, te diu duca<sup>n</sup> ndìsa quide-xi.

<sup>56</sup> Te nchòhó ío váha cùtnuní iní-ndó nàcuáa quide-xi andìu ndìhi ñuyíú, ìte ná cuendá quidé-ní-ndó sá ñã tècú tnùní-ndó nàcuáa quide Yá Ndiõxí vitna? Te sá dúcá<sup>n</sup> quide-ndo-á<sup>n</sup> ío dándahú-ndó mèe-ndo sá ío váha cùtnuní iní-ndó, chi ñá ndàá sá cùtnùní iní-ndó.

*Nducu-o nàcuáa nucúndecu ndìhi váha-o ñáyiú cùu úhú iní ñáhá*  
(Mt. 5:25-26)

<sup>57</sup> Te nchòhó, ìná cuendá ñá túú dándixi túu-ndo iní-ndó càda-ndo mee-ni sá váha sá tàú-ndó càda-ndo-í?

<sup>58</sup> Te núu ío ì<sup>n</sup>-ndo ñí sacá<sup>n</sup> cuéchi ñáyiú cuendá-ndó cuendá ì<sup>n</sup> sá ñí quide-ndo, te cuáhá<sup>n</sup>-ndó ndìhí-yu núú tèe cùchiu<sup>n</sup>, te nini ñùhu-ndo ndìhí-yu ichi, te nducu-ndo nàcuáa cada-ndo nàcáhá<sup>n</sup> cáhnú iní tnáhá-ndó ndìhí-yu cuendá sá vã cándèca ñaha-gá-yu quíhí<sup>n</sup> núú tèe cùchiu<sup>n</sup>, chi núu duca<sup>n</sup> na càdá-yu te téé cùchiu<sup>n</sup>-á<sup>n</sup> nachìhi ñaha-dě ndaha cue téé cùu poleciá, te cue téé-á<sup>n</sup> chíhi ñaha-güedé vecaá xii-ndo.

<sup>59</sup> Te na càchí tnúhu-í xii-ndo sá ñúu na ngáva-ndo vecaá, te vá cãcu-ndo te núu vá náchãhu-ndo nchàa sá tàú-ndó —càchí-gá xáha<sup>n</sup>-gã xií-yu.

## 13

*Xini ñuhu-xi natuha-o ichi Yá Ndiõxí*

<sup>1</sup> Te diu-ni òré-á<sup>n</sup> ñí ngúnutnii ì<sup>n</sup> úú ñáyiú núú Jèsús cání-yu cuendú núú-gã nàcuáa ní quide ñaha té Pilatú xii cue téé distritú Galileá cue téé ní sahni quiti nduu táhú Yá Ndiõxí, te mei òré ní sahni-güedé cue quiti-á<sup>n</sup> ñí táuchíú<sup>n</sup> tè Pilatú cue sandádú-dé ní sahni-güedé cue téé Galileá-á<sup>n</sup>, te ní xica níñí-güedé núú ñúhú ndìhi níñí cue quiti-á<sup>n</sup>, te ní nadácánuu-xi.

<sup>2</sup> Te Jèsús ní xáha<sup>n</sup>-gã xií-yu:

—Te núu nchòhó sání iní-ndó sá sá dúcá<sup>n</sup> ñí yáha cue téé distritú Galileá-á<sup>n</sup> te cùu-güedé cue téé ndècu vihi-gá cuéchi-xi dàcúxí cuè téé ñúú-güedé ñá.

<sup>3</sup> Te na càchí tnúhu-í xii-ndo sá ñáhá. Te núu nchòhó vá ndixí cuéchi

iní-ndó cuendá nchaa sá cuèhé sá dúhá quide-ndo ndecu-ndo ña, te tnàhá nchaa nchòhó cuíta nihnu-ndo te núu vá nátní-ndo ichi Yá Ndiöxí.

<sup>4</sup> Te núu nchòhó sání iní-ndó sã ñáyiú sáhú<sup>n</sup> úní ní xíhí ní táú ñáhá vèhe ducú<sup>n</sup> Silòé ío-gá ndécú cuèchi-yu dàcúúxí nchàa ñáyiú xĩndecu ñuú Jerusàlén ñá,

<sup>5</sup> te na càchí tnúhu tucu-í xii-ndo sã ñáhá. Te núu nchòhó vá ndíxí cuèchi iní-ndó cuendá nchaa sá cuèhé sá dúhá quide-ndo ndecu-ndo ña, te tnàhá nchaa nchòhó cuíta nihnu-ndo te núu vá nátní-ndo ichi Yá Ndiöxí — càchí-gá xáha<sup>n</sup>-gã xii-yu.

*Yutnu ngüxí ñá túú cùu<sup>n</sup> sávidí-xi*

<sup>6</sup> Te Jèsús ní caní tucu-gá ñ<sup>n</sup> cuendú núu-yu nàcuáa tecú tnùní-yu tnúhu-gá, te xáha<sup>n</sup>-gã:

— ñ<sup>n</sup> téé nùtní ñ<sup>n</sup> yutnu ngüxí núú ñúhú-dě, te cuáhá<sup>n</sup> ndéhé-dě núu ní cuu<sup>n</sup> sávidí-xi ní cùu, te ní ñ<sup>n</sup> ñá túú ní cùu<sup>n</sup>.

<sup>7</sup> Te ní xáha<sup>n</sup> tēe-á<sup>n</sup> xii téé ndèé ñuhu-dé: “Nàha-n sá vitna ní cuu úní cuiá quíxí còto-í yutnu ngüxí-a te ñá túú xini-í ní ñ<sup>n</sup> sávidí-xi. Te quehndé-n vitna, chí àú<sup>n</sup> ñá cuu nùtní-xi quide tneñu-xi núú ñuhu-á<sup>n</sup>”, càchí-dé xáha<sup>n</sup>-dě xii téé ndèé ñuhu-dé-á<sup>n</sup>.

<sup>8</sup> Te téé ndèé ñuhu-á<sup>n</sup> ñí xáha<sup>n</sup>-dě: “Pàtróó<sup>n</sup>, ñá ña cuñhu-xi cuiá vitna-ñá, te na nàdatayá-í ñuhu núú sàhá-xi, te chíhí-í sahá<sup>n</sup>.

<sup>9</sup> Te ñá cuu te cudana cuu<sup>n</sup> sávidí-xi, àdi núu ñá túú ní cùu<sup>n</sup> sávidí-xi ña te téhndé-ñá-xi”, càchí-dé xáha<sup>n</sup>-dě xii pàtróó<sup>n</sup>-dě — càchí-gá xáha<sup>n</sup>-gã xii-yu.

*Jèsús quidé tátna-gá ñ<sup>n</sup> ñadìhí ní nduu cueyi sãtá-xi nduu ndetátú ñáyiú*

<sup>10</sup> Te ñ<sup>n</sup> xito cùu-xi nduu ndetátú ñáyiú, te yíhí Jesús ñ<sup>n</sup> veñúhu dànehé-gá ñáyiú.

<sup>11</sup> Te xiá<sup>n</sup> ndécú ñ<sup>n</sup> ñadìhí ní cuu sáhú<sup>n</sup> úní cuiá sã cùhú-a<sup>n</sup> yíhí ñaha espíritú cùndìhí yucu ñávãha xii-a<sup>n</sup>, te xiá<sup>n</sup> ní ndada cueyi-xi sãtá-a<sup>n</sup>, te ñá dáñá-gã-xi nucúnutnì ndáá-a<sup>n</sup>.

<sup>12</sup> Te òré ní xini ñáhá Jèsús xii-a<sup>n</sup> te ní cana ñaha-gã, te xáha<sup>n</sup>-gã:

— Yòhó ñaha cùhú, ndúha-n cuèhé tnàhá-n — càchí-gá xáha<sup>n</sup>-gã xii-a<sup>n</sup>.

<sup>13</sup> Te ní dácáa-gá ndaha-gá ní tendaha ñaha-gá xii-a<sup>n</sup>, te òré-ni-á<sup>n</sup> ñí ndúha-a<sup>n</sup> te ní nucúnutnì ndáá-a<sup>n</sup>, te ní ngüta-a<sup>n</sup> ní cachí-a<sup>n</sup> sá ío càhnu cuu Yá Ndiöxí.

<sup>14</sup> Dico téé tàxi tnuní veñúhu ní cudéé<sup>n</sup>-dě sá dúcá<sup>n</sup> ñí quide Jèsús ní quide tátna-gá ñaha cùhú-á<sup>n</sup> nduu ndetátú-yu, te ní xáha<sup>n</sup>-dě xii-yu:

— Ío íñú nduu tàú-ó càda chiu<sup>n</sup>-o, te ndédani càa nduu-á<sup>n</sup> quixi-ndo cùtátna-ndo, dico ñá díú nduu cuu-xi nduu ndetátú-ó — càchí-dé xáha<sup>n</sup>-dě xii-yu.

<sup>15</sup> Te ní xáha<sup>n</sup> Jèsús:

— Nchòhó chí ío dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿ñá ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó á<sup>n</sup>?

<sup>16</sup> Te ñadìhí-a cùu-a<sup>n</sup> ñaní tnàhá ndí Abrahám, te dícó-ni sá yùcu ñávãha quide duha cùhú-a<sup>n</sup> ní cuu sáhú<sup>n</sup> úní cuiá, ¿te náa ñá túú xini ñuhu-xi cùtátna-a<sup>n</sup> cuèi cùu-xi nduu ndetátú-ó á<sup>n</sup>? — càchí-gá xáha<sup>n</sup>-gã xii-dé.

<sup>17</sup> Te sá dúcá<sup>n</sup> ñí cáhá<sup>n</sup> Jèsús, núu nchaa cue téé cùu úhú iní ñáhá xii-gá ní cucaha<sup>n</sup> núu-güedé, dico nchaa dava-gá ñáyiú chí xicudí iní-yu xindéhé-yu nchaa sá vã yòo tnàhí ndàcu cada quide-gá.

*Cuendá ndíquí<sup>n</sup> yutnu nàni mostázá (Mt. 13:31-32; Mr. 4:30-32)*

<sup>18</sup> Te ní xáha<sup>n</sup>-gã xii-yu:

— Na càni-í ñ<sup>n</sup> cuendú núu-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndiöxí xii-ndo.

<sup>19</sup> ñ<sup>n</sup> téé ní quehe<sup>n</sup>-dé ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dě te ní xinu-xi, te ní sahnu-xi ní cuu dúcú<sup>n</sup>-xi, te cue quiti ndàva núú tàchí cádúha-güedi tacá-güedi núú dité-xi — càchí-gá xáha<sup>n</sup>-gã xii-yu.

*Nàcuáa quide levadurá (Mt. 13:33)*

<sup>20</sup> Te ní xáha<sup>n</sup> tucu Jesús xii-yu:

—Te na càchí tnúhu tucu-í xii-ndo nàcuáa cada tucu Yá Ndiöxí òré ndíhu ndaha ñaha-gá xii-ndo.

21 Ì<sup>n</sup> ñadihí ní quehe<sup>n</sup>-a<sup>n</sup> levadùrá ní chihi-a<sup>n</sup> úní arròbá yuchi triú, te levadùrá-á<sup>n</sup> ní quide-xi ní ndaa ñihí yusa<sup>n</sup>-á<sup>n</sup> —càchí-gá xáha<sup>n</sup>-gá xií-yu.

*Yuyèhe cuiñi*

(Mt. 7:13-14, 21-23)

22 Te ichi ñuhu Jesús cuáhá<sup>n</sup>-gá ñuú Jerusàlén, te nchaa ñuú náhnú, ndíhi nchaa ñuú líhli ta yáha-gá duca<sup>n</sup> ta dānehé-gá ñáyiú tnúhu-gá cuáhá<sup>n</sup>.

23 Te ì<sup>n</sup> ñuú-á<sup>n</sup> ní xáha<sup>n</sup> ì<sup>n</sup> tée xii-gá: —Mèstrú, cuíní-í cáca<sup>n</sup> tnúhu-í ì<sup>n</sup> tnúhu núú-n, ¿ndáá sá ïo sacú ñáyiú nānīhí tàhú-á<sup>n</sup>? —càchí-dé xáha<sup>n</sup>-dē xii-gá.

Te Jèsús ní xáha<sup>n</sup>-gá xii-dé ndíhi nchaa ñáyiú:

24 —Cada-ndo sá nānīhí tàhú-ndó, te tñi-ndo ìchi Yá Ndiöxí, te ichi-gá-á<sup>n</sup> cúú-xí dàtná ì<sup>n</sup> yuyèhe cuiñi, te càchí tnúhu-í xii-ndo sá ïo cuéhé ñáyiú cachí iní-yu quíhu-yu yuyèhe cuiñi-á<sup>n</sup> dico vá ndácú-yu.

25 Te na càni tucu-í ingá cuèndú núú-ndó nàcuáa tecú tnùní-ndó tnúhu càhá<sup>n</sup>-í. Te òré ná ndacuíñi tée cùu xítóhó vehe, te nacadí-dé yuyèhe, te nchaa nchòhó ñáyiú na quèndóo quehé dacàsa<sup>n</sup>-ndo yuyèhe, te que-saha-ndo cūñaha-ndo xii-dé: “Tátá, nacaá<sup>n</sup> yuyèhe na quíhu-ndí”, que-saha-ndo cūñaha-ndo xii-dé. Dico tée cùu xítóhó vehe-á<sup>n</sup> cūñaha-dē xii-ndo: “Ná túú xìní-í nchòhó ndèé ñáyiú cùu-ndo”, duha cūñaha-dē xii-ndo.

26 Te dàtnùní ngūita nchòhó cūñaha-ndo xii-dé: “Nchúhú ní xexi ndíhi ñaha-ndí, te ní xihí ndíhi ñaha-ndí xii-n, te nchaa ichi ní xóo dacuàha ñaha-n xii-ndí”, que-saha-ndo cūñaha-ndo xii-dé.

27 Dico cachí tucu tée cùu xítóhó vehe-á<sup>n</sup> cūñaha-dē xii-ndo: “Sa ní cachí-í sá ñà túú xìní-í ndèé ñáyiú cùu-ndo. Te chí xócuñi nchòhó ñáyiú ndècu ichi cuehé ichi duha núú ndècu-í”, quesaha-dē cūñaha-dē xii-ndo.

28 Te na sàá nduu dùca<sup>n</sup> cada-xi te quini-ndó tē Abrahám, ndíhi tē Isàác, ndíhi tē Jàcób, ndíhi nchaa cue tée ní xóo cáhá<sup>n</sup> tnúhu Yá Ndiöxí, te nchaa cue tée-á<sup>n</sup> ndécú-güedē núú ndécú-gã táxi tnùní-gá, te nchòhó quee tíhú-ndó núú-gã sá tnúhu ñá túú ní cuíní cada ndáá, te dàvá-á<sup>n</sup> ndāhyú-ndó te cuu rúhñú-ñá núhu-ndo sá sàtú iní-ndó cuèndá sá ndòhó-ndó.

29 Te dàvá-á<sup>n</sup> quíhu nchaa ñáyiú ndi cùmí xio ñuyíú núú ndécú Yá Ndiöxí táxi tnùní-gá caxí-yu ndíhi-gá, te cundecú-yu ndíhi-gá.

30 Te dava ñáyiú nchìcú<sup>n</sup> ñá túú cūnuu ndecu ichi Yá Ndiöxí vitna, ñáyiú-á<sup>n</sup> sáá nduu te ío cunúú-yu. Te dava ñáyiú cūnuu ndecu ichi-gá vitna, ñáyiú-á<sup>n</sup> sáá nduu te vá ïo-gá cunúú-yu —càchí-gá xáha<sup>n</sup>-gá xií-yu.

*Jèsús ndāhyú-gá cuèndá ñáyiú ñuú Jerusàlén*

(Mt. 23:37-39)

31 Te diu-ni nduu-á<sup>n</sup> ní quexìo ì<sup>n</sup> úú cue tée cùu fariséú núú ndécú-gã, te xáha<sup>n</sup>-güedē xii-gá:

—Quee-n ìha quíhí<sup>n</sup>-n núu ndèé quíhí<sup>n</sup>-n, chi tée cùu Herodés cuíní-dé cahni ñaha-dē xii-n —càchí-güedē xáha<sup>n</sup>-güedē xii-gá.

32 Te Jèsús ní xáha<sup>n</sup>-gã:

—Chí cuáhá<sup>n</sup> te cūñaha-ndo xii tée nèhe mañá-á<sup>n</sup> sá càchí-í sá ná cūndedóho váha-dé ì<sup>n</sup> tnúhu càhá<sup>n</sup>-í, chi cūmání ì<sup>n</sup> úú-gá nduu cundecu-í xocàni-í nchaa espíritú cūndíhi yucu ñávāha yíhi ñaha xii ñáyiú, te cada tátna-í nchaa dava-gá ñáyiú cùhú, te duca<sup>n</sup> te ndíhi chìu<sup>n</sup>-í, duha cūñaha-ndo xii-dé.

33 Dico dacuítí sá cūhù<sup>n</sup>-í ichi ì<sup>n</sup> úú-gá nduu, te duca<sup>n</sup> te sáá-í núú quíhí<sup>n</sup>-í, chi vá cúú tnàhí cuú ì<sup>n</sup> tée càhá<sup>n</sup> tnúhu Yá Ndiöxí ingá ñuú, chi mei ñuú Jerusàlén cuú-güedē —càchí-gá xáha<sup>n</sup>-gã xii-güedē.

34 Te ní xáha<sup>n</sup>-gã xii ñáyiú ñuú Jerusàlén:

—Nchòhó chi sàhni-ndo nchaa cue tée càhá<sup>n</sup> tnúhu Yá Ndiöxí, cue tée

ní tendaha-gã véxi, te mee-ni ndíhi yúu sáhní-ndó-güedě. ¡Te titní xito ní cuini-í nadatácá ñáhà-í xii-ndo dátiná nadatácá ñá nchuxi cuè déhe-di sàquihí-güedi xití ndíxí-di, dico ñá ní cuini-ndó, te duca<sup>n</sup>-ni sàni iní-í ndéé vitna!

<sup>35</sup> Te chí cúndedóho tucu ingá tnúhu na càhá<sup>n</sup>-í-a: Yá Ndiõxí dañá ñàha-gá xii-ndo. Te na càchí tnúhu tucu-í xii-ndo sã vã quini ñáhá-gã-ndó xii-í, dico sáá nduu te quini ñáhá tucu-ndo, te nduu-ã<sup>n</sup> cachí-ndó sã ïo càhnu cuu yúhú Yáá ní tendaha Dütú Ndiõxí véxi ñuyúú-a —càchí-gá xáha<sup>n</sup>-gã xii-yu.

## 14

*Jèsús quidé tátna-gá ñá té ñùhu cuiñu*

<sup>1</sup> Te duha ní cuu ñá nduu, nduu ndetátú ñá yiu chí ñá té cuu fariséu cùnùu ní cáhá<sup>n</sup>-dé Jèsús vehe-dé caxi-gá, te cue té ndècu vehe-dé ndéhé-güedě nùu nása cada-gá.

<sup>2</sup> Te xía<sup>n</sup> ndécú tnàhá ñá té cùhú ñùhú-dě cuiñu.

<sup>3</sup> Te Jèsús ní xicá<sup>n</sup> tnúhú-gã núu cuè té dâcuaha ñaha xii ñá yiu nchaa tnúhu ní chídó tnùní ndí Moisés, ndíhi núu cuè té cuu fariséu, te xáha<sup>n</sup>-gã:

—¿Cuu cada tátna-o ñá ñá yiu cùhú nduu ndetátú-ó ñá ñáhá? —càchí-gá xáha<sup>n</sup>-gã xii-güedě.

<sup>4</sup> Dico cue té-á<sup>n</sup> ñá túú tnàhí ní càhá<sup>n</sup>-güedě. Te ní dácáá-gá ndaha-gá ní tendaha-gã té cùhú-á<sup>n</sup> ñá quide tátna ñaha-gã xii-dé, te ní xáha<sup>n</sup>-gã sá ná ñùhú-dé vehe-dé.

<sup>5</sup> Te ní xicá<sup>n</sup> tnúhú-gã núu nchaa cue té-á<sup>n</sup>, te xáha<sup>n</sup>-gã:

—¿Te núu nchòhó ná ngáúñhnu ñá búrru-ndo àdi ñá ndicutu-ndo déhvá, te vã ná tàva ndíhi-ni-ndo-di cuèi cùu-xi nduu ndetátú-ndó-ã<sup>n</sup>? —càchí-gá xáha<sup>n</sup>-gã xii-güedě.

<sup>6</sup> Te ñá túú ní ñíhí-güedě tnúhu na dànhocáva-güedě.

*Ñá yiu càhá<sup>n</sup>-yu quíhí<sup>n</sup> vico tnándaha*

<sup>7</sup> Te ndèhe Jèsús nâcuáa xiquide nchaa ñá yiu ndècu vico sá súúni ñá nacáxi-yu xilé sácõo nchíhi cue té cùnuu-gá conchihí-yu òré

cuánguìhú-yu mèsá caxi-yu, núu ní xáha<sup>n</sup>-gã xii-yu:

<sup>8</sup> —Òré ná càhá<sup>n</sup> ñáhá ñá ñá yiu xii-ndo ñá vico tnándaha, te vã cóo-ndó núu xilé sácõo cue té cùnuu-gá, chí núu duca<sup>n</sup> na càda-ndo, te cudana quexìo dava-gá ñá yiu cùnuu-gá dàcúúxí nchòhó.

<sup>9</sup> Te ñá yiu ní cáhá<sup>n</sup> ñáhá xii-ndo-á<sup>n</sup> quixí-yu te cúñáhá-yu xii-ndo: “Chí cuñàha xilé núcõo nchíhi-ndo-ã<sup>n</sup> ná cõnchíhi ñá yiu ní quexìo-a”, quesàhá-yu cúñáhá-yu xii-ndo. Te cuini-ndó ñáhá cuèi cùcaha<sup>n</sup> núu-ndó ndàcuíñí-ndó quíhí<sup>n</sup>-ndó ngõo-ndo núu xilé xínutnì ndéé núu ñá ndíhi-ná ndàa sàtá-xi.

<sup>10</sup> Te yúhú càchí-í sá òré ná càhá<sup>n</sup> ñáhá-yu xii-ndo, te ngõo-ndo núu xilé xínutnì ndéé núu ñá ndíhi-ná ndàa sàtá-xi chí cuendá òré ná quexìo ñá yiu ní cáhá<sup>n</sup> ñáhá xii-ndo, te cúñáhá-yu xii-ndo: “Nchòhó cue ñá yiu càhá<sup>n</sup> ndíhi-í, chí yàha núu xilé sácõo cue té cùnuu-gá coo-ndo”, duha cúñáhá-yu xii-ndo. Te duca<sup>n</sup> te cada nínu ñaha nchaa ñá yiu yíhi ndíhi-ndo mesá.

<sup>11</sup> Te nchaa ñá yiu na càda nínu mee-xi, te ñá yiu-á<sup>n</sup> ñá túú cùu nínu-yu, te nchaa ñá yiu ñá túú quide nínu mee-xi, ñá yiu-á<sup>n</sup> cúú nínu-yu —càchí-gá xáha<sup>n</sup>-gã xii-yu.

<sup>12</sup> Te dàtnùní ní xáha<sup>n</sup>-gã xii té ní cáhá<sup>n</sup> ñáhá xii-gá:

—Te yòhó òré cuini-n càda-n ñá vico, te vã càhá<sup>n</sup>-n mèe-ni cue té càhá<sup>n</sup> ndíhi-n, ní cuè ñaní-n, ní cuè ñá yiu cùu ñaní tnàhá-n, ní cuè ñá yiu cuica ndècu yatni ndíhi-n, chí ñá yiu-á<sup>n</sup> duca<sup>n</sup> càdá-yu ñá nduu cáhá<sup>n</sup> ñáhá-yu xii-n te ndéyãhu-ni sá ñá quidé-n-yu.

<sup>13</sup> Te ñáhá chí òré ná càda-n ñá vico, te cáhá<sup>n</sup>-n ñá yiu ndàhú, ndíhi ñá yiu ñá cúú càca, ndíhi ñá yiu yacua, ndíhi ñá yiu cuáá.

<sup>14</sup> Te núu duca<sup>n</sup> na càda-n, te cuu-xi ñá sá vãha xii-n, chí ñá yiu-á<sup>n</sup> vã ñíhí-yu nacoto ñáhá-yu xii-n, dico na cúú-n te sáá nduu ndòto-n ndíhi nchaa ñá yiu ní quide ndáá ní xíndecu ichi Yá Ndiõxí, te dàvá-á<sup>n</sup> taxi-gá

sá ndúú tǎhú-n —càchí-gá xáha<sup>n</sup>-gǎ xii-dé.

*Nàcuáa xǐquide ñáyiu òré càhá<sup>n</sup> ñáhá ì<sup>n</sup> téé cada vico*  
(Mt. 22:1-10)

<sup>15</sup> Te sá dúcá<sup>n</sup> ñí cáhá<sup>n</sup> Jèsús ní tecú dóho cue téé yǐhi mesá-á<sup>n</sup>, núu ní xáha<sup>n</sup> ì<sup>n</sup>-dé xii-gá:

—Ío váha tǎhú nchaa ñáyiu na càxi nchaa sá cuǎha ñaha Yǎ Ndiǒxí nduu na sáa-yu cundecú-yu núú ndécú-gǎ táxí tnùní-gá —càchí-dé xǎha<sup>n</sup>-dǎ xii-gá.

<sup>16</sup> Te Jèsús ní xáha<sup>n</sup>-gǎ xii-dé:

—Í<sup>n</sup> téé quide-dé vico, te ní dátècú tnúhu-dé cuéhé víhí ñáyiu quíhí<sup>n</sup>-yu caxí-yu.

<sup>17</sup> Te òré sa ní cuu-ná sá cǎxí-yu, te ní xáha<sup>n</sup>-dǎ xii téé xǐnu cuechi núú-dǎ sá quíhí<sup>n</sup>-dé cúñaha-dǎ quíhí<sup>n</sup>-yu caxí-yu, chi sa ndècu túha nchaa sá cǎxí-yu.

<sup>18</sup> Dico nchaa-yu ní xáhǎ<sup>n</sup>-yu xii-dé sá ná cádá càhnu iní téé càhá<sup>n</sup> ñáhá-ǎ<sup>n</sup>, chi ñá túú cùyáchí-yu quíhí<sup>n</sup>-yu vico-á<sup>n</sup>. Te téé ní cáhá<sup>n</sup> ndíhi téé xǐnu cuechi-á<sup>n</sup> díhna ní xáha<sup>n</sup>-dǎ: “Íchí ñí saa<sup>n</sup>-í ì<sup>n</sup> pedàsú ñuhu, te quíhí<sup>n</sup> ndéhè-í tnavíí, núu xǐǎ<sup>n</sup> càhá<sup>n</sup> ndàhú-í núú-n sǎ cúñaha-n xii téé càhá<sup>n</sup> ñáhá-ǎ<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dǎ.

<sup>19</sup> Te ìngá-dé ní xáha<sup>n</sup>-dǎ: “Ní saa<sup>n</sup>-í úhú<sup>n</sup> yùndá ndicutu sa xítu, te cue quití-á<sup>n</sup> quíhí<sup>n</sup>-í coto ndeé-í-güedi vitna, núu xǐǎ<sup>n</sup> càhá<sup>n</sup> ndàhú-í núú-n sǎ cúñaha-n xii téé càhá<sup>n</sup> ñáhá-ǎ<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dǎ.

<sup>20</sup> Te ìngá tucu-dé ní xáha<sup>n</sup>-dǎ: “Íchí ñí tnándaha-í núu xǐǎ<sup>n</sup> vá cùyáchí-í quíhí<sup>n</sup>-í”, càchí-dé xǎha<sup>n</sup>-dǎ.

<sup>21</sup> Te òré ní nasáá téé xǐnu cuechi-á<sup>n</sup>, te ní nacani tnúhu-dé núú pàtróó<sup>n</sup>-dǎ nchaa nàcuáa ní xáhǎ<sup>n</sup>-yu. Te ní cudéé<sup>n</sup> tǎe cùu patróó<sup>n</sup>-ǎ<sup>n</sup>, te ní xáha<sup>n</sup>-dǎ xii téé xǐnu cuechi núú-dǎ-á<sup>n</sup>: “Yáchí cuàhá<sup>n</sup> nanducu-n nchaa ñáyiu ndàhú, ndíhi nchaa ñáyiu ñá cúú càca, ndíhi nchaa ñáyiu yacua, ndíhi nchaa ñáyiu cuáá, te ndèni ní

cuu na nàníhí-n-yu te candécá-n-yu quixi”, càchí-dé xǎha<sup>n</sup>-dǎ.

<sup>22</sup> Te sáta ñí nasáá téé xǐnu cuechi-á<sup>n</sup>, te ní xáha<sup>n</sup>-dǎ xii pàtróó<sup>n</sup>-dǎ: “Pàtróó<sup>n</sup>, sa ní quide-í chiú<sup>n</sup> ní tǎhú-n, dico ndècu-gá núú cóo-yu”, càchí-dé xǎha<sup>n</sup>-dǎ.

<sup>23</sup> Te téé cùu patróó<sup>n</sup>-dǎ-á<sup>n</sup> ñí xáha<sup>n</sup>-dǎ: “Cuàhá<sup>n</sup> tucu ndèni ní cuu te cada yica-n na quixí-yu quíhu-yu cuendá ná chítú vehe-í.

<sup>24</sup> Te na càchí tnúhu-í xii-n sǎ ñí ì<sup>n</sup> ñáyiu ní cáhá<sup>n</sup>-í díhna vá cúú-gǎ caxí-yu sá sà ní quide túha-í caxí-yu ñí cùu”, cachí téé-á<sup>n</sup> xǎha<sup>n</sup>-dǎ xii téé xǐnu cuechi núú-dǎ —càchí-gá xáha<sup>n</sup>-gǎ xii téé-á<sup>n</sup>.

*Ndoho-o cùndecu-o ichi Xítóhó Jesu-  
crístú*  
(Mt. 10:37-38)

<sup>25</sup> Te ío cuéhé ñáyiu nchìcú<sup>n</sup>-yu Jèsús, te ní xáha<sup>n</sup>-gǎ xii-yu:

<sup>26</sup> —Te núu dava nchòhó cuení-ndó chítnahá ñáhá-ndó xii-í, te cuu iní ñáhá ndìsa-ndo. Te cuèi na dàndóo-ndo tǎtá-ndó, ndíhi náná-ndó, ndíhi ñadihí-ndó, ndíhi déhe-ndo, ndíhi ñaní-ndó, ndíhi cúha-ndo, te cani iní-ndó sǎ cuèi na cùú-ndó sǎ cuendá-í, te duca<sup>n</sup> te cuu ndisa-ndo cuè ñáyiu tnàhá tnúhu ndíhi-í.

<sup>27</sup> Te nchaa ñáyiu vá cǎnchícú<sup>n</sup> ni-hnu ñaha xii-í cuendá sá yùhú-yu ndohó-yu dàtná ndoho-í, ñáyiu-á<sup>n</sup> vǎ cúú-yu ñáyiu tnahá tnúhu ndíhi-í.

<sup>28</sup> Te núu ì<sup>n</sup> nchòhó ná càni iní-ndó dàcaa-ndo ì<sup>n</sup> vehe ducú<sup>n</sup>, ¿te náa ñá díú díhna-gá cada cuendá-ndó núu ndédau díhú<sup>n</sup> cuu, duca<sup>n</sup> te cutnùní iní-ndó núu tnahá díhú<sup>n</sup>-ndó càa vehe-á<sup>n</sup> àdi ñáhá?

<sup>29</sup> Chi núu vá dúcá<sup>n</sup> càda-ndo, te na ngüíta-ndo tàusaha-ndo te vá xǐnu cada-ndo, te nchaa ñáyiu na cùndehe ñaha xii-ndo, te cáhá<sup>n</sup> cuéhé-yu cuendá-ndó.

<sup>30</sup> Te cachí-yu: “Téé-ǎ<sup>n</sup> ní ngüíta-dé dácàa-dé ì<sup>n</sup> vehe te ñá ní ndàcu-dé xínu”, cachí-yu.

<sup>31</sup> Àdi te núu ì<sup>n</sup> téé yìndaha ñaha xii ñáyiu cuení-dé nàá-dé ndíhi ìngá tucu téé yìndaha ñaha xii ñáyiu, ¿te



náa ñá díú díhna-gá cada cuendá-dé te núu ndacu-dé ndihí úxí mĩl cue sandàdú-dé nàá-güedé, ndihí ócò mĩl cue sandàdú ingá tucu téé yìndaha ñaha xii ñáyiú cùu úhú iní tnáhá ndihí-dé-ã<sup>n</sup>?

<sup>32</sup> Àdi te núu xitò-dé sá vã ndácú-dé ñá, te òré vátá cùyàtni ñaha-gá téé cùu úhú iní tnáhá ndihí-dé-ã<sup>n</sup>, te tendaha-dé ì<sup>n</sup> téé quíhí<sup>n</sup>-dé quíhu-dé tnúhu ndàhú núú tée-ã<sup>n</sup> cuendá sá vã nàá-güedé.

<sup>33</sup> Te duha càhá<sup>n</sup>-í chi núu nchòhó vá cadá ndèe iní-ndó dàña-ndo nchaa sá ndécú ndihí-ndo cuendá chitnahá ñáhá-ndó xii-í, te vá cúú-ndó cuè ñáyiú tnáhá tnúhu ndihí-í.

*Ñí ñí nduu víxi<sup>n</sup>*  
(Mt. 5:13; Mr. 9:50)

<sup>34</sup> Te ñí chi ío váha, dico núu na nduu víxi<sup>n</sup>-xi, ¿te nása-gá cada-o nandíhi-o te núu duca<sup>n</sup>-í?

<sup>35</sup> Chi ñá túú-gã nándíhi-xi nì sá dàcá ñuhu, te nì sá dàcá sahá<sup>n</sup>, chi cuendá-ñã dǎngoyo-o. Te nchaa nchòhó ñáyiú ní xíndedóho tnúhu ní cáhá<sup>n</sup>-í-a xini ñuhu-xi ío váha cuáha-ndo cuendá —càchí-gá xáha<sup>n</sup>-gã xií-yu.

## 15

*Cuendá ì<sup>n</sup> mběé quiti ní xíta*  
(Mt. 18:10-14)

<sup>1</sup> Te cue téé cuihna iní-xi quide cobrá ñáhá xii ñáyiú cuendá impuèstú ndihí cue dava-gá ñáyiú ndècu ichi cuehé ichi duha ní quexió-yu núú ndécú Jèsús cuendá cundedóho-yu tnúhu càhá<sup>n</sup>-gá.

<sup>2</sup> Te ní ngüíta cue téé cùu fariséú, ndihí cue téé dàcuaha ñaha xii ñáyiú nchaa tnúhu ní chídó tnùnì ndíi Moisés xicáhá<sup>n</sup> cuèhé-güedé cuendá-gá, te càchí-güedé:

—Tée-a quèhe<sup>n</sup> cuendá-dé ñáyiú ndècu ichi cuehé ichi duha, te xèxi ndihí ñaha-dé xií-yu —càchí-güedé xítnàha-güedé.

<sup>3</sup> Te Jèsús ní cani-gá ì<sup>n</sup> cuendú nàcuáa tecú tnùnì-güedé tnúhu-gá, te xáha<sup>n</sup>-gã xii-güedé:

<sup>4</sup> —Ì<sup>n</sup> téé ndècu ì<sup>n</sup> ciendú mběé-dé, te ní xíta ì<sup>n</sup>-di, te nchòhó sa cùtnunì iní-ndó nàcuáa cada téé-ã<sup>n</sup>, chi dándóo-dé cùmídícó sǎhú<sup>n</sup> cùmí-di ì<sup>n</sup> yucu, te cúnúndúcú-dé quiti ní xíta xiá<sup>n</sup> ndèe ndée naníhí-dé-di.

<sup>5</sup> Te òré ní naníhí-dé-di te ní dácáá-dé-di chíó-dé ní docó-dé-di sá cùdǎ iní-dé.

<sup>6</sup> Te òré ní nasáá-dé vehe-dé, te ní dátacá-dé nchaa cue téé càhá<sup>n</sup> ndihí-dé, ndihí nchaa ñáyiú ndècu yatni ndihí-dé, te ní xáha<sup>n</sup>-dè: “Chí ná cùdǎ iní-ó vitna, chi ní naníhí-í mběé-í quiti ní xíta ní cùu”, cachí-dé xáha<sup>n</sup>-dè xií-yu.

<sup>7</sup> Te yúhú càchí-í sá ìo-gá cùdǎ iní Yã Ndiòxí ndihí cue espíritú xínú cuèchi núú-gã nüu ì<sup>n</sup> ñáyiú ndècu ichi cuehé ichi duha na ndixi cuèchi iní-yu cuendá nchaa sá ñã túú vãha quidè-yu ndécú-yu te tní-yu ichi-gá, dàcúúxí cùmídícó sǎhú<sup>n</sup> cùmí ñáyiú sa ní tuha ichi-gá, chi ñá túú-gã xini ñuhu-xi ndixi cuèchi iní-yu chi sa ndécú-yu ichi-gá —càchí-gá xáha<sup>n</sup>-gã xii-güedé.

*Cuendá díhú<sup>n</sup> ní xíta*

<sup>8</sup> Te ní cani Jèsús ingá cuendú núú-güedé, te xáha<sup>n</sup>-gã:

—Ì<sup>n</sup> ñadíhí ndécú ndihí-a<sup>n</sup> úxí díhú<sup>n</sup> cuixín, te ní dácúíta-a<sup>n</sup> ì<sup>n</sup> te ní teñuhú-a<sup>n</sup> iti, te ní ngüíta-a<sup>n</sup> nàtihu-a<sup>n</sup> vehe, te súúnì vãha vãha ní nanducu-a<sup>n</sup> ndée ní naníhí-a<sup>n</sup>.

<sup>9</sup> Te òré ní naníhí-a<sup>n</sup>, te ní dátacá-a<sup>n</sup> nchaa ñáyiú díhí càhá<sup>n</sup> ndihí-a<sup>n</sup> ndihí nchaa ñáyiú ndècu yatni ndihí-a<sup>n</sup>, te ní xáha<sup>n</sup>-a<sup>n</sup>: “Chí ná cùdǎ iní-ó vitna chi ní naníhí-í díhú<sup>n</sup>-í sá ñí xíta ní cùu”, cachí-a<sup>n</sup> xáha<sup>n</sup>-a<sup>n</sup> xií-yu.

<sup>10</sup> Te yúhú càchí-í sá dúcá<sup>n</sup> ìo cùdǎ iní nchaa espíritú xínú cuèchi núú Yã Ndiòxí, núu ì<sup>n</sup> ñáyiú ndècu ichi cuehé ichi duha na ndixi cuèchi iní-yu cuendá nchaa sá ñã túú vãha quidè-yu, te tní-yu ichi-gá —càchí-gá xáha<sup>n</sup>-gã xii-güedé.

*Cuendá ì<sup>n</sup> téé ñá túú ní quide váha*

<sup>11</sup> Te ní cani tucu Jèsús ingá cuendú núú-güedé, te xáha<sup>n</sup>-gã:

—Ì<sup>n</sup> téé ndècu úú déhe ducu<sup>n</sup>-dé,

12 te téé lĩhli-gá ní xáha<sup>n</sup>-dě xii tătă-dě: “Táu, taxi-n tǎhú sǎ cúu cuëndá-í”, cǎchí-dé xǎha<sup>n</sup>-dě. Te tătă-dě-á<sup>n</sup> nĩ sǎñaha-dě ndĩ dǐĩ<sup>n</sup> nũú-güedě sǎ cúu cuëndá-güedě.

13 Te núú sàcú-ni nduu, te déhe-dé téé lĩhli-gá-á<sup>n</sup> nĩ nadico-dě nchaa sǎ nĩ sǎñaha tătă-dě, te ní xica-dé cuáhá<sup>n</sup>-dé ì<sup>n</sup> ñuú xícá, te yácá<sup>n</sup> ní tñi<sup>n</sup>-dé ì<sup>n</sup> ichi cuéhé ichi duha, te ní ndĩhi dǐhú<sup>n</sup>-dě ní dándóñũhu-dé ndĩhi cue téé cǎhá<sup>n</sup> ndĩhi-dé, ndĩhi nchaa ñáyiú dǐhí xĩndecu ichi dǐĩ ìní.

14 Te ní ndĩhi ndoo dǐhú<sup>n</sup>-dě ní dándóñũhu-dé, te núú sàcú-ni nduu ní sǎá tnamá ñuú núú ndécú-dě-á<sup>n</sup>, te ñá ñihí-gá-dé sǎ cǎxí-dě, te xihí-dé docó.

15 Núú ní xica-dé cuáhá<sup>n</sup> ndúcú chiu<sup>n</sup>-dé núú ì<sup>n</sup> téé diu-ni ñuú xía<sup>n</sup>, te téé-á<sup>n</sup> nĩ sǎha chiu<sup>n</sup> ñaha-dé ì<sup>n</sup> xichi núú ñũhú-dě coto-dé cùchí.

16 Te súúni xihí-dé docó te cuini-dé caxi-dé nchaa sǎ sǎha-yu cùchí-á<sup>n</sup> ní cùu, dico ñá túú ní sǎñahá-yu xii-dé.

17 Te uu<sup>n</sup>ni ní sani váha iní-dé, te ní cachí-dé: “¡Ío cuéhé cue téé xĩnu cuechi vehe tǎtà-í te ío cuéhé sǎ xéxí-güedě ndécú, te yúhú duha ndòho-í docó iha!

18 Te ndacuñí-í te núhú-í vehe tǎtà-í, te cúñaha-í xii-dé: Táu, ñá túú ní quide váha-í núú Yǎ Ndiõxí te ni ñá túú ní quide váha-í núú-n,

19 te ñá túú-gǎ tàú-í sǎ cúu-í déhe-n vitna, te cada ñaha-nǎ-n xii-í dàtná ì<sup>n</sup> téé xĩnu cuechi núú-n”, duha ní sani iní-dé cúñaha-dě xii tătă-dě.

20 Te sǎtá dúcá<sup>n</sup> nĩ sani iní-dé, te ní natñi<sup>n</sup>-dé ichi cuánuhú-dé vehe tătă-dě, te xica-gǎ cuánuhú-dé ní xiní ñáhá tătă-dě xii-dé te ní cundǎhú iní ñáhá-dě. Te xĩnu tătă-dě-á<sup>n</sup> nĩ sǎhá<sup>n</sup> nútñahá ñáhá-dě, te ní numi ñaha-dě, te ío váha ní cǎhá<sup>n</sup> ndĩhi ñaha-dě.

21 Te ní xáha<sup>n</sup> děhe-dé-á<sup>n</sup> xii-dé: “Táu, ñá túú ní quide váha-í núú Yǎ Ndiõxí te ni ñá túú ní quide váha-í núú-n, te ñá túú-gǎ tàú-í sǎ cúu-í déhe-n vitna”, cachí-dé xǎha<sup>n</sup>-dě.

22 ‘Dico tătă-dě-á<sup>n</sup> nĩ xáha<sup>n</sup>-dě xii cue téé xĩnu cuechi núú-dě: “Chí queñũhu ndĩhi-ni dóó vǎha-gǎ cuáha-ndo děhe-í-a na cuihnu-dé, ndĩhi ì<sup>n</sup> dehé ná quĩhi díquí ndáhá-dě,

ndĩhi chàú váha na quĩhi-dé.

23 Te quĩhí<sup>n</sup> nguehe<sup>n</sup>-ndo ì<sup>n</sup> ndicutu numa quiti caváha-gǎ, te cahni-ndo-di, te na cǎda-o vico, te na cǎxi-o-di.

24 Chi déhe-í-a ní sani iní-í sǎ nĩ xihí-dé ní cùu, te ñáhá chi ndècu vívú-dě, te ní sani tucu iní-í sǎ nĩ xíta-dé ní cùu te ní nasáá méé-dě”, cǎchí-dé xǎha<sup>n</sup>-dě xii cue téé xĩnu cuechi núú-dě-á<sup>n</sup>. Te ní ngũita-güedé ní quide-güedé vico.

25 ‘Te déhe-dé téé sàcuéhé-gǎ cuáhá<sup>n</sup>-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cúu vico.

26 Te ní cana-dé ì<sup>n</sup> téé xĩnu cuechi, te ní xícá<sup>n</sup> tñuhú-dě núú-dě ná cuëndá duca<sup>n</sup> ío yaá.

27 Te téé xĩnu cuechi-á<sup>n</sup> nĩ xáha<sup>n</sup>-dě: “Ñaní-n tée cuáhá<sup>n</sup> ní cùu ní nasáá-dé, te tǎtà-n nĩ táuchíu<sup>n</sup>-dě ní xihí ì<sup>n</sup> ndicutu nùma quiti caváha-gǎ cuëndá sǎ nĩ nasáá váha-dé”, cǎchí-dé xǎha<sup>n</sup>-dě.

28 ‘Dico ñaní-dé téé sàcuéhé-á<sup>n</sup> nĩ cudéé<sup>n</sup>-dě, te ní cachí-dé sǎ vǎ ndĩhu-dé vehe cundecu-dé vico-á<sup>n</sup> ní cùu, dico ní quee tǎtà-güedě ní cǎhá<sup>n</sup> ndáhú-dé núú-dě cuëndá ndĩhu-dé.

29 Te ní xáha<sup>n</sup>-dě xii tătă-dé: “Táu, cundedóho váha saú-n tñũhu na cǎhá<sup>n</sup>-í-a, yúhú ío cuéhé cuía nĩ cuu xĩnu cuechi-í núú-n, te ni ì<sup>n</sup> xito ñá túú quide sǎá iní-í núú-n, te ni ì<sup>n</sup> chivá lĩhli ñá túú tàxi-n-di caxi dǐĩ ìní-í-di ndĩhi cue téé cǎhá<sup>n</sup> ndĩhi-í.

30 Te vitna ní nasáá déhe-n tée ní sǎhá<sup>n</sup> ní dándóñũhu dǐhú<sup>n</sup>-n ndĩhi nchaa ñáyiú xĩndecu ichi dǐĩ ìní. Te ní sahani-n ì<sup>n</sup> ndicutu numa quiti caváha-gǎ sǎ cuëndá-dé”, cǎchí-dé xǎha<sup>n</sup>-dě xii tătă-dě.

31 Te ní xáha<sup>n</sup> tătă-dě xii-dé: “Yòhó déhe-í duca<sup>n</sup>-ni ndècu ndĩhi ñaha-n xii-í, te nchaa sǎ ndécú ndĩhi-í cúu-xí cuëndá-n.

32 Te vitna dacuití<sup>n</sup> tàú-xi sǎ cǎdá-ó vico, te cudǐĩ ìní-ó, chi ñaní-n-á<sup>n</sup> nĩ quide-í cuëndá sǎ nĩ xihí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cǎchí-dé xǎha<sup>n</sup>-dě xii déhe-dé téé

sàcuéhé-gã-á<sup>n</sup> —duha cuáhá<sup>n</sup> cuèndú ní caní Jèsús núú-güedě.

## 16

*Nàcuáa ní quide ì<sup>n</sup> téé tàxi tnuní ñáhá xii cue téé xinu cuechi*

<sup>1</sup> Te Jèsús xáha<sup>n</sup>-gã xii cue téé xica cuu ndihi-gá:

—Ní xindecu ì<sup>n</sup> téé cuica, te duca<sup>n</sup> ñí xindecu ì<sup>n</sup> téé ní taxi tnuní ñáhá xii cue téé ní xinu cuechi núú-dě. Te téé-á<sup>n</sup> ñí xini ñáhá ñáyiú dùhu-dé díhú<sup>n</sup> tée cùu patróó<sup>n</sup>-dě, te cuáhá<sup>n</sup>-dé dándòñuhu-dé, te ní xáhã<sup>n</sup>-yu xii téé cùu patróó<sup>n</sup>-dě sá dúcá<sup>n</sup> quide-dé.

<sup>2</sup> Te téé cùu patróó<sup>n</sup>-dě-á<sup>n</sup> ñí cana ñaha-dě xii-dé, te ní xáha<sup>n</sup>-dě: “¿Ná cuèndá duha càhá<sup>n</sup> ñáyiú cuèndá-n? Yáchí chi na tàxi cuèndá-n nchaa chiu<sup>n</sup> ní quide-n, chi vitna te vá táxi tnuní-gá-n cuè téé xinu cuechi núú-í”, càchí-dé xáha<sup>n</sup>-dě.

<sup>3</sup> Te téé tàxi tnuní ñáhá xii cue téé xinu cuechi-á<sup>n</sup> ñí sani iní-dé: “¿Te nása cada-í vitna na quèhndé patróó<sup>n</sup>-í chiú<sup>n</sup>-í? Chi ñá cùndè-gá-í cada-í chiú<sup>n</sup> véé, te cùcaha<sup>n</sup> núú-í cáca<sup>n</sup> ndàhú-í.

<sup>4</sup> Dico duha cada-í cuèndá quehe<sup>n</sup> cuèndá ñáhá ñáyiú vehé-yu òré ná quèhndé duu<sup>n</sup>-ná patróó<sup>n</sup>-í chiú<sup>n</sup>-í”, duha ní sani iní-dé.

<sup>5</sup> Te sáta dúcá<sup>n</sup> te ní cana-dé ì<sup>n</sup> ì<sup>n</sup> cue téé tàú núú patróó<sup>n</sup>-güedě. Te téé díhna ní xicá<sup>n</sup> tnúhú-dě núú-dě, te xáha<sup>n</sup>-dě: “¿Ndèé dau tàú-n núú patróó<sup>n</sup>-í?”, càchí-dé xáha<sup>n</sup>-dě.

<sup>6</sup> Te téé-á<sup>n</sup> ñí xáha<sup>n</sup>-dě: “Tàú-í ì<sup>n</sup> cièndú bàrríl acití”, càchí-dé xáha<sup>n</sup>-dě. Te téé tàxi tnuní ñáhá xii cue téé xinu cuechi-á<sup>n</sup> ñí xáha<sup>n</sup>-dě: “Iha náu reciú-n-á, te ndadúha ingá sá ùdico úxí taxi-n”, càchí-dé xáha<sup>n</sup>-dě.

<sup>7</sup> Te dàtnuní ní xicá<sup>n</sup> tnúhú tùcu-dé núú ingá-dé, te xáha<sup>n</sup>-dě: “Te yòhó, ¿ndèé dau tàú-n-í?”, càchí-dé xáha<sup>n</sup>-dě. Te téé tàú-á<sup>n</sup> ñí xáha<sup>n</sup>-dě: “Ì<sup>n</sup> cièndú ngohnchi tríú tàú-í”, càchí-dé xáha<sup>n</sup>-dě. Te téé tàxi tnuní ñáhá xii cue téé xinu cuechi-á<sup>n</sup> ñí xáha<sup>n</sup>-dě: “Iha náu reciú-n-á, te cadúha ingá sá cùmídíco-ná taxi-n”, càchí-dé xáha<sup>n</sup>-dě.

<sup>8</sup> Te téé cùu patróó<sup>n</sup>-á<sup>n</sup> ñí cachí-dé sá ò váha ñuhu díquí tée dùhu-á<sup>n</sup>

nàcuáa cada-dé cundecu váha-dé. Te nchaa ñáyiú xindecu ichi cuèhé ichi duha, ò-gá váha ñuhu díquí-yu nàcuáa cada-yu cundecu váha-yu ndihi nchaa ñáyiú cùndihí-yu dàcúúxí ñáyiú ndècu ichi Yá Ndiòxí.

<sup>9</sup> Te yúhú càchí-í sá cáda-ndó sá vâha ndihi nchaa sá ndécú ndihi-ndo ní cuáha ñuyúú yíca cuèchi-a, te duca<sup>n</sup> te coo cue téé ò váha tnahá tnúhu ndihi-ndo, te òré ná ndihi nchaa sá ò ñuyúú-a, te Yá Ndiòxí quehe<sup>n</sup> cuèndá ñáhá-gã xii-ndo, te cundecu-ndo ndihi-gá ní caa ní quíí<sup>n</sup>.

<sup>10</sup> Te núú ì<sup>n</sup> téé quide ndáá cuèi ì<sup>n</sup> chiú<sup>n</sup> líhli na càda-dé, te diu-ni duca<sup>n</sup> quide ndáá-dé cuèi ì<sup>n</sup> chiú<sup>n</sup> cahnu na cada-dé. Dico téé ñá túú quide ndáá, chi cuèi chiú<sup>n</sup> líhli àdi chiú<sup>n</sup> cahnu na cada-dé dico ì<sup>n</sup>-ni quide-dé.

<sup>11</sup> Te núú nchòhó vá cáda-ndó sá vâha ndihi nchaa sá ñí cuáha ñuyúú yíca cuèchi-a ña, te Yá Ndiòxí vá táxi-gã sá vâha ndècu ndihi-gá xii-ndo.

<sup>12</sup> Te núú vá cáda ndáá-ndó còto-ndo nchaa sá táxi núu tnahá ñáyiú-ndo, te vá yòo taxi sá ndúú tàhú-ndó.

<sup>13</sup> Te ní ì<sup>n</sup> téé xinu cuechi vá ndácú-dě cunu cuechi-dě núú úú patróó<sup>n</sup>, chi téé-á<sup>n</sup> cuu váha iní-dé núú ì<sup>n</sup> patróó<sup>n</sup>-dě te tni-dé nchaa tnúhu càhá<sup>n</sup> patróó<sup>n</sup> tée cùu váha iní-dé núú-xi-á<sup>n</sup>. Te núú ingá tucu patróó<sup>n</sup>-dě vá cúú vâha iní-dé, te ní vâ tni-dé tnúhu càhá<sup>n</sup> patróó<sup>n</sup>-dě-á<sup>n</sup>. Te duca<sup>n</sup> sãtnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhu<sup>n</sup> iní-ndó nchaa sá ò ñuyúú-a —càchí-gã xáha<sup>n</sup>-gã xii-güedé.

<sup>14</sup> Te nchaa cue téé cùu fariséú ò ñuhu iní-güedé nchaa sá ò ñuyúú-a, te xindedóho-güedé nchaa tnúhu càhá<sup>n</sup> Jèsús, te ní cáhá<sup>n</sup> yíchí-güedé cuèndá-gá.

<sup>15</sup> Te Jèsús ní xáha<sup>n</sup>-gã xii-güedé:

—Nchòhó cúú-ndó cuè téé ò váha càhá<sup>n</sup> núú ñáyiú cuèndá-ni sá cuíni-ndó cáhá<sup>n</sup> váha-yu cuèndá-ndó, dico Yá Ndiòxí xini ndáá-gã nàcuáa càa iní-ndó ì<sup>n</sup> ì<sup>n</sup>-ndo, te nchaa sá

càchí cue ñáyiú ñuyíú-a sá ïo nàndíhi, Yá Ndiöxí dáquèe tihú-gă.

*Cuëndá nchaa tnúhu ní chídó tnùní ndíi Moisés*

16 "Te nchaa tnúhu ní chídó tnùní ndíi Moisés cúnú-xi ní cuu, ndíhi nchaa tnúhu ní chídó tnùní cue téé ní xóo cáhá<sup>n</sup> tnúhu Yá Ndiöxí ndéé sanaha. Dico cútnàhá ní ngúta té Juáá téé ní xóo dacuàndute ñaha xii ñáyiú ní cáhá<sup>n</sup>-dé tnúhu-í, ndéé dàvá-á<sup>n</sup> ñà túú-gă ní cúnú nchaa tnúhu ní chídó tnùní ndíi Moisés ndíhi nchaa tnúhu ní chídó tnùní cue téé ní xóo cáhá<sup>n</sup> tnúhu Yá Ndiöxí ndéé sanaha. Te ñu-ni ndéé dàvá-á<sup>n</sup> ñi quesaha ta təcú tnùní ñáyiú nàcuáa ndíhu ndaha ñaha Yá Ndiöxí xii-yu, te vài ñáyiú ïo sàni iní-yu vitna nàcuáa cadá-yu ndíhu ndaha ñaha Yá Ndiöxí xii-yu.

17 Te nchaa tnúhu ní chídó tnùní ndíi Moisés ïo ndáá càhá<sup>n</sup>-xi, te ndíhi-gá naa andíu ndíhi ñuyíú dàcúxí sã ndíhi ñi<sup>n</sup> ñi<sup>n</sup> tnúhu-án cada-xi nàcuáa càhá<sup>n</sup>-xi.

*Jèsús càhá<sup>n</sup>-gá cuëndá ñáyiú dàña tnaha*

(Mt. 19:1-12; Mr. 10:1-12)

18 "Te núu ñi<sup>n</sup> téé na dàña tnaha-dé, ndíhi ñadíhi-dé, te tnándaha tucu-dé ndíhi ingá-yu, te nèhé víhi quide-dé te núu duca<sup>n</sup> na càda-dé, te téé na tnándaha ndíhi ñaha ní dáña yè-xi, te ñu-ni duca<sup>n</sup> ñà túú cùu-xi sá vâha te núu duca<sup>n</sup> na cadá-yu –càchí-gá xáha<sup>n</sup>-gă xii-güedé.

*Cuëndá ñi<sup>n</sup> téé nàni Lázarus ndíhi cuëndá ñi<sup>n</sup> téé cuica*

19 Te xáha<sup>n</sup> tucu-gá xii-güedé:

–Ní xindecu ñi<sup>n</sup> téé cuica, te ní xóo cuihnu-dé mee-ni dóo vâha dóo vii càa, te nchaa nduu súuní vâha ní xóo cada-dé vico vehe-dé.

20 Te ní xindecu tucu ñi<sup>n</sup> téé ndàhú ní xínani-dé Lázarus, te téé-án ñi<sup>n</sup> cuhú-dé ní xinde-dé nitùhú-dé ndíhi, te ñi<sup>n</sup> nduu ñi<sup>n</sup> nduu ní xóo taxinucóo ñaha-güedé xii-dé yuyèhe téé cuica-á<sup>n</sup>.

21 Te téé ndàhú-án ñi<sup>n</sup> xóo cuú-dé docó, te ní xóo cuiní-dé caxi-dé nchaa sá ñà túú-gă ní xóo yâha caxi téé cuica-á<sup>n</sup>, te ñà túú ní xóo

níhi-dé. Te cuèi iná ní xóo quíhi<sup>n</sup>-di ní xóo nayuu-di nchaa núu ndíhi ndéé-dé-á<sup>n</sup>.

22 Te ní sáá ñi<sup>n</sup> nduu te ní xíhi téé ndàhú-án, te cue espíritú xínú cuèchi núu Yá Ndiöxí ndécá ñaha-xi xii-dé cuándaá núu ndécú tē Abrahám cundecu-dé. Te ní sáá nduu ñi<sup>n</sup> xíhi téé cuica-á<sup>n</sup> tnàhá-dé, te ní chindúxi ñaha-güedé xii-dé.

23 Te ní sáá-dé núu xindecu nchaa ñáyiú ní xíhi ñà túú ní quide ndáá núu Yá Ndiöxí te xía<sup>n</sup> ïo ndòho-dé ndécú-dé, te ní ndonehe núu-dé te xica ñi<sup>n</sup> xini-dé té Abrahám ndíhi té Lázarus-án xindecu-güedé.

24 Te níhi ní cáhá<sup>n</sup>-dé, te xáha<sup>n</sup>-dè: "Yòhó tātá Abrahám, cundàhú iní ñàhá xii-í, te cūñaha xii té Lázarus ná dandaxi<sup>n</sup>-dé díquí ndàhá-dé, te na quixi-dé dandaxi<sup>n</sup>-dé yàa-í, chi ïo ndòho-í ñùhù-í núu ñùhú núu càyú-a", càchí-dé xáha<sup>n</sup>-dè xii té Abrahám.

25 Dico té Abrahám ní xáha<sup>n</sup>-dè: "Ndàhú yòhó ñani tnàhá-í, dandacu iní sá ïo vâha ní xindecu-n ñuyíú, te té Lázarus ïo ndàhú ní ndòho-dé ní xindecu-dé. Te vitna ní nucúndecu vâha-dé iha, te yòhó ndòhó-n vitna.

26 Te ñà díú-ní sã xiã<sup>n</sup> tucu, chi cuádava ndècu ñi<sup>n</sup> déhvá cúnú ñùhú nèhu-xi núu ndécú-ó, te cuèi nchaa ñáyiú xindecu iha na càchí iní-yu quixi-yu núu ndécú-ndó dico vá ndácú-yu, te ni nchòhó vá ndácú-ndó quixi-ndo núu ndécú-ndí", càchí-dé xáha<sup>n</sup>-dè.

27 Te ní xáha<sup>n</sup> tēe cuica-á<sup>n</sup>: "Te núu duca<sup>n</sup> te càhá<sup>n</sup> ndàhú-í núu yòhó tātá Abrahám vitna sá téndàha-n té Lázarus ná quíhi<sup>n</sup>-dé vehe tātá-í,

28 chi ndècu úhú<sup>n</sup>-gá ñani-í, te na cūñaha-dè xii-güedé sã vâ cadá-güedé dàtná ní quide-í cuëndá sã vâ quixi-güedé tnàhá-güedé núu ndécú-í ndòhó-í-a", càchí-dé xáha<sup>n</sup>-dè.

29 Te téé Abrahám ní xáha<sup>n</sup>-dè: "Mee-güedé ndécú ndíhi-güedé nchaa tnúhu ní chídó tnùní ndíi Moisés, ndíhi nchaa tnúhu ní chídó tnùní cue téé ní xóo cáhá<sup>n</sup> tnúhu Yá Ndiöxí ndéé sanaha, te nchaa tnúhu-án ná tñi-güedé nàcuáa càhá<sup>n</sup>-xi", càchí-dé

xáha<sup>n</sup>-dě xii-dé.

<sup>30</sup> Te ní xáha<sup>n</sup> tùcu téé cuica-ǎ<sup>n</sup>: “Tátá Àbrahám, dico vá cáda cuèndá-güedé nchaa tnúhu-á<sup>n</sup>, dico núu ì<sup>n</sup> ñáyiu ñá túú-gǎ ndécú ñùyíú ì<sup>n</sup> ñáyiu ndècu ndìhi-n quíhí<sup>n</sup>-yu cáhá<sup>n</sup> ndìhi ñàhá-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñà túú quide váha-güedé ndécú-güedé, te cada váha-güedé”, cächí-dé xáha<sup>n</sup>-dě xii-dé.

<sup>31</sup> Dico té Àbrahám ní xáha<sup>n</sup>-dě: “Te núu ñá túú cuìní-güedé tñi-güedé tnúhu ní cáhá<sup>n</sup> ndíi Moisés, ndìhi tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha ña, te diu-ni duca<sup>n</sup> càda-güedé cuèi ì<sup>n</sup> ñáyiu ní xíhí ná ndòtó-yu cúñàhá-yu nàcuáa ndùu tnúhu váha, chi vá quindáa iní-güedé”, cächí té Àbrahám xáha<sup>n</sup>-dě xii téé cuica-ǎ<sup>n</sup> —cächí Jèsús xáha<sup>n</sup>-gǎ xii cue téé cùu fariséú.

## 17

*Quihi iní-ó vǎ cündècu-o ichi cuehé ichi duha*

(Mt. 18:6-7, 21-22; Mr. 9:42)

<sup>1</sup> Te Jèsús ní xáha<sup>n</sup>-gǎ xii cue téé xìca cuu ndìhi-gǎ:

—Dacuití sǎ cóo cuè téé dacàhá<sup>n</sup>-güedé ñáyiu cada-yu nándi sá cuèhé sá dúhá, ÿdico ndàhú ní cuu cue téé duca<sup>n</sup> na dàcàhá<sup>n</sup> ñàhá xii-yu cada-yu nándi sá cuèhé sá dúhá!

<sup>2</sup> Chi váha-gǎ sá nõu na dàcutu ndeé ñáyiu ì<sup>n</sup> yúú yödó dücú<sup>n</sup>-güedé te dàquée ñàhá-yu xii-güedé xití ndute làmár, te ñá díú sǎ cündècu-güedé dacàhá<sup>n</sup>-güedé ñáyiu cada-yu nándi sá cuèhé sá dúhá, cuèi ñáyiu ndàhú iní-xi dandàhú-güedé.

<sup>3</sup> Te ío quihi iní-ndó cündècu-ndo.

“Te núu ì<sup>n</sup> ñaní tnàhá-ndó quide-dé ì<sup>n</sup> sá ñà túú tàú-dé cada-dé sá cúú-xí-ndó te cáhá<sup>n</sup>-ndó dôho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sǎ ñi quide-dé.

<sup>4</sup> Te cuèi úsá xito na càda-dé nándi sá ñà túú tàú-dé cada-dé sá cúú-xí-ndó ì<sup>n</sup> nduu, te núu na quixi-dé úsá xito núú-ndó, te cachí-dé sá vǎ dúcá<sup>n</sup>-gǎ cada-dé, te xini ñuhu-xi cada

cahnu iní-ndó-dé —cächí-gǎ xáha<sup>n</sup>-gǎ xii-güedé.

*Ñáyiu sàndáa ndisa iní-xi*

<sup>5</sup> Te ní xáha<sup>n</sup> cuè téé xìca cuu ndìhi Jèsús xii-gǎ:

—Chindee ñàha xii-ndí cuèndá duca<sup>n</sup> te quindáa-gǎ iní-ndí sá Yá Ndiöxí ndácú-gǎ quidé-gǎ nchaa sá vǎha —cächí-güedé xáha<sup>n</sup>-güedé xii-gǎ.

<sup>6</sup> Te ní xáha<sup>n</sup> Jèsús:

—Te núu nchòhó quindáa ndisa iní-ndó sùúni cuèdicó luha líi dàtná cuìní-ndó càa ì<sup>n</sup> ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> yutnu: “Quene-n ìha te quíhí<sup>n</sup>-n cuìhnu-n xití làmár”, duha cúñaha-ndo. Te duca<sup>n</sup> càda-xi te núu na quindáa ndisa iní ñàhá-ndó xii-í —cächí-gǎ xáha<sup>n</sup>-gǎ xii-güedé.

*Nàcuáa tàú ì<sup>n</sup> téé xìnu cuechi cada-dé*

<sup>7</sup> Te xáha<sup>n</sup> tùcu-gǎ xii-güedé:

—Te núu ì<sup>n</sup> nchòhó ndécú ì<sup>n</sup> téé xìnu cuechi núú-ndó, te cuáhá<sup>n</sup>-dé yucu cuángada chiú<sup>n</sup>-dé, àdi cuáhá<sup>n</sup>-dé yucu oto-dé quiti, te òré ní nasáa-dé vehe sá ñi sáhá<sup>n</sup>-dé yucu, te vá cùñaha nchòhó cue téé cùu patróo<sup>n</sup>-dè xii-dé: “Yáchí nehé caxi-n dítá”, vá dúhá cùñaha-ndo.

<sup>8</sup> Chi nchòhó cue téé cùu patróo<sup>n</sup>-dè cúñaha-ndo xii-dé: “Cundíhí iní cada túha sá cùdini-í, te díhna-gǎ-í caxi-í dítá te dàtnùni caxi-n”, duha cúñaha nchòhó cue téé cùu patróo<sup>n</sup> xii-dé.

<sup>9</sup> Te òré ná ndíhí chiú<sup>n</sup> ní táhú nchòhó cue téé cùu patróo<sup>n</sup> cada téé xìnu cuechi núú-ndó, te ñà túú tàú-ndó ndàcá<sup>n</sup> táhú-ndó nõú tée xìnu cuechi núú-ndó.

<sup>10</sup> Te duha càhá<sup>n</sup>-í chi núu òré ná ndìhi nchaa chiú<sup>n</sup> ní táhú Yá Ndiöxí cada-ndo, te cachí-ndó: “Nchúhú cúú-ndí cue téé xìnu cuechi núú Yá Ndiöxí, dico ñá túú tàú-gǎ ndacá<sup>n</sup> táhú-gǎ núú-ndí, chi mee-ni chiú<sup>n</sup> ní táhú-gǎ ní quide-ndí”, duha cachí-ndó —cächí-gǎ xáha<sup>n</sup>-gǎ xii-güedé.

*Jèsús quidé tātna-gá úxí cue téé tnàhá cuéhé sã dátèhyú nihnu-xi yiqui cùñú ñáyiu*

11 Te ñuhu Jèsús ichi cuáhá<sup>n</sup>-gá ñuú Jerusàlén, te ní yáha-gá núú ràyá distritú Sàmariá ndìhi distritú Galileá.

12 Te ta cùyatni-gá ì<sup>n</sup> ñuú lìhli cuáhá<sup>n</sup>, te ní sátnahá ñáhá ùxí tnàhá cue téé cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu tníi-güedé,

13 te níhi ní cáhá<sup>n</sup>-güedé, te xáha<sup>n</sup>-güedé xii Jèsús:

—¡Mèstrú, cundàhú iní ñáhá xii-ndí!  
—càchí-güedé xáha<sup>n</sup>-güedé xii-gá.

14 Te òré ní xiní ñáhá Jèsús xii-güedé, te ní xáha<sup>n</sup>-gã:

—Chí cuáhá<sup>n</sup> núú dùtú ná cùndehe ñaha-dé xii-ndo —càchí-gá xáha<sup>n</sup>-gã xii-güedé.

Te ní xica-güedé cuáhá<sup>n</sup>-güedé, te ichi-ni ñuhu-güedé cuáhá<sup>n</sup>-güedé ní ndúha-güedé cuéhé tnàhá-güedé.

15 Te nchaa-güedé ní cutnùní iní-güedé sá ñí ndúha-güedé, dico ì<sup>n</sup>-ni-dé ní nacuico-dé, te ní ngüíta-dé níhi ní cáhá<sup>n</sup>-dé, te ní cachí-dé sá ìo càhnu cuu Yá Ndiõxí.

16 Te ní ngüíñí xití-dé núú Jèsús, te ní nuu núú-dé ndàa núú ñúhú ndàcá<sup>n</sup> táhú-dé núú-gã. Te téé-á<sup>n</sup> cúú-dé téé distritú Sàmariá.

17 Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndéé ndécú dàva-gã-güedé-í?

18 ¿Te náa ì<sup>n</sup>dìi-ni téé ingá ñuú-a ní nacuico-dé ndàcá<sup>n</sup> táhú-dé núú Yá Ndiõxí, te càchí-dé sá ìo càhnu cuu-gã ñã? —càchí-gá.

19 Te ní xáha<sup>n</sup>-gã xii téé-á<sup>n</sup>:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yá Ndiõxí —càchí-gá xáha<sup>n</sup>-gã xii-dé.

*Nàcuáa yìndaha ñaha Yá Ndiõxí*

*(Mt. 24:23-28, 36-41)*

20 Te cue téé cùu fariséú ní xicá<sup>n</sup> tnúhú-güedé núú Jèsús núu ná ama ngüíta Yá Ndiõxí ndíhu ndaha-gã ñáyiu. Te ní xáha<sup>n</sup>-gã:

—Ñá túú ñã cada-xi ñuyíú quini-ndó cuendá cutnùní iní-ndó sã ndíhu ndaha ñaha Yá Ndiõxí xii-ndo.

21 Te ni vã yòo cachí: “Iha ndècu-gá táxí tnùní-gá, àdi yacá<sup>n</sup> ndécú-gã táxí tnùní-gá”, chi tnuú-ndó sã ndècu-gá ndìhi nchaa ñáyiu yìndaha-gá —càchí-gá xáha<sup>n</sup>-gã xii-güedé.

22 Te ní xáha<sup>n</sup>-gã xii cue téé xica cuu ndìhi-gá:

—Te nchòhó chi sáá nduu, te cachí iní-ndó sã sùúní cuèdicó ì<sup>n</sup> nduu quini ñáhá-ndó xii yúhú Téé cùu ñaní tnàhá-ndó nchàa-ndo, dico vá quini ñáhá-gã-ndó xii-í.

23 Te coo ñáyiu cúñàhá-yu xii-ndo: “Iha ndècu-gá, á<sup>n</sup> yacá<sup>n</sup> ndécú-gã”, quesàhá-yu cúñàhá-yu xii-ndo. Dico vá quindáá iní-ndó quíhí<sup>n</sup>-ndó ndíhí-yu núú càchí-yu, te ni vã cání iní-ndó quíhí<sup>n</sup> méé-ndó.

24 Chi dàtná cuini-ndó quide-xi oré sáá ndúté àndi, chi uu<sup>n</sup>i dàyehé-xi nihíi ñuyíú, duca<sup>n</sup> càda-xi nduu na quixi tucu yúhú Téé cùu ñaní tnàhá-ndó nchàa-ndo, te dàvá-á<sup>n</sup> quini ñáhá nchàa-ndi túhú ñáyiu xii-í.

25 Dico díhna-gá ndoho vñhi-í, te daquèe tíhú ñáhá ñáyiu ñuyíú-a xii-í.

26 Te cadá-yu dàtná ní quide ñáyiu ní xíndecu cútnàhá ní xíndecu té Nõé, te diu-ni duca<sup>n</sup> sátnahá-xi cada nchaa ñáyiu ndècu vitna ndéé sáá nduu quixi tucu yúhú Téé cùu ñaní tnàhá-ndó nchàa-ndo.

27 Chi caxi-ni-yu, coho-ni-yu, te caca cuu-ni cue téé xica ndáhú, te tnàndaha-ni-yu, chi duca<sup>n</sup> ñí quidé-yu dàvá-á<sup>n</sup> ndéé ní sáá nduu cuãnguee té Nõé xití bàrcú, te ní ngüíta-xi ní cuu<sup>n</sup> dáú ñí ndaa ndute ñuyíú, te ncháa-yu ní xihí ní cáhá-yu dàvá-á<sup>n</sup>.

28 Te diu-ni duca<sup>n</sup> ñí quide tucu ñáyiu cútnàhá ní xíndecu té Lõt, chí xèxí-yu xihí-yu, te sáa<sup>n</sup>-yu te nàdicó-yu, te xixitú-yu nándi sá xixitú-yu, te nchaa cue téé xidácáá-güedé vehe.

29 Te òré ní quee té Lõt ñuú Sòdomá, te ní ngoyo ñuhú andi, te dàcá yúú

sũúni dìcò ní nduu ñuhú-nă-xi, te ní xihí nchaandi túhú ñáyiu ñuú-án.

30 Te ñu-ni duca<sup>n</sup> sãtnahá-xi cada ñáyiu na sãá nduu quixi tucu yúhú Tée cùu ñaní tnáhá-ndó nchaa-ndo ñuyíú-a.

31 Te núu ñu ñáyiu càndodó-yu díquí vehé-yu nduu-án, te nì vá ndihu-gá-yu quehé<sup>n</sup>-yu ñu ndachíu<sup>n</sup>-yu canehé-yu quíhí<sup>n</sup>, te ñáyiu cuáhán yucu, te nì vá nùhú-gá-yu vehé-yu.

32 Te chí dándacu iní nàcuáa ní yáha ñadihí té Lõt.

33 Te nchaa ñáyiu cuení dácácu ni-hnu mee-xi ñuyíú-a ña, te cuíta ni-hnú-yu, te nchaa ñáyiu na cùú sá cuendá-í, te naníhí tàhú-yu.

34 Te na càchí tnúhu tucu-í xii-ndo sã nduu-án, te núu úú-yu càa ñu núu xito, te ñu-yu ndanchitá-yu ndaá-yu andiu, te ñu-yu quendóo.

35 Te núu úú ñáyiu ñihí nchícõ-yu ñu-ni vèhe, te ñu-yu ndanchitá-yu ndaá-yu andiu, te ñu-yu quendóo.

36 Te núu úú cue té yèhi-güedé yucu, te ñu-dé ndànchita-dé ndaa-dé andiu, te ñu-dé quendóo —càchí-gá xáha<sup>n</sup>-gã xii-güedé.

37 Te sá dúcá<sup>n</sup> ñi cáhá<sup>n</sup>-gá ñu ní xicá<sup>n</sup> tnúhú-güedé núú-gã, te xáha<sup>n</sup>-güedé xii-gá:

—Mèstrú, ¿te ndéè duca<sup>n</sup> càda-xi-i? —cachí-güedé xáha<sup>n</sup>-güedé xii-gá.

Te ní xáha<sup>n</sup>-gã:

—Te nchòhó xìní-ndó sã ncháá ñu yúcú yiquí cuñú ní xihí, te yacá<sup>n</sup> tàcá cue ndixíí xéxí-güedé —cachí-gá xáha<sup>n</sup>-gã xii-güedé.

## 18

*Jèsús càhá<sup>n</sup>-gá cuendá ñu juéxí ndihi cuendá ñu ñaha quèé*

1 Te Jèsús ní caní-gá ñu cuendú núu-güedé cuendá sá vã ná túhú iní-güedé cáhá<sup>n</sup> ndihi-güedé Yã Ndiõxí nchaa-ni òré.

2 Te xáha<sup>n</sup>-gã:

—Ñu ñuú ndécú ñu juéxí, te ni ña túú sàndáá iní-dé Yã Ndiõxí, te ni

ñu tnúhu xáha<sup>n</sup> ñáyiu ña túú cuení-dé cada cuendá-dé.

3 Te ñu-ni ñuú-án ndécú tucu ñu ñadihí ñaha quèé, te ní sáhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú juéxí-án cuendá cada ndáá-dé ñu cuéchi.

4 Te titní xito ní cuu sàhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú-dé te ña túú cuení-dé cada cuendá-dé tnúhu càhá<sup>n</sup>-a<sup>n</sup> ni cùu, te ndéé núú ña cùú-gã te ní sani iní-dé: “Te cuéi ña túú sàndáá iní-í Yã Ndiõxí, te ni ña túú quide cuendá-í nchaa tnúhu càhá<sup>n</sup> ñáyiu cada-í,

5 dico na càda ndáá-í cuendá ñaha quèé-a ndihi ñáyiu cùu úhú iní tnáhá ndihi-a<sup>n</sup>, chí vá cùndèe-gá iní-í nuu núu quixi-a<sup>n</sup> dasátú iní ñáhá xii-í”, duha ní sani iní té cùu juéxí-án —càchí-gá xáha<sup>n</sup>-gã xii-güedé.

6 Te ní xáha<sup>n</sup> tucu-gá xii-güedé:

—Cada cuendá-ndó nàcuáa ní sani iní juéxí té cuihna iní-xi-án.

7 Te Yã Ndiõxí ío chindee-gá nchaa ñáyiu ní cáhá<sup>n</sup>-gá cundecu ndihi-gá, chí cuéi nduu cuéi niú càhá<sup>n</sup> ndihi ñàhá-yu xii-gá, te vá cùyaa-gá nachinaa-gá nchaa sá quidé ñaha nchaa ñáyiu cùu úhú iní ñáhá xii-yu.

8 Te ío ndihi duca<sup>n</sup> càda-gá. Te òré ná quixi yúhú Tée cùu ñaní tnáhá-ndó nchaa-ndo, ¿te náa naníhí-gã-í ñáyiu sàndáá ndisa iní Yã Ndiõxí-án? —càchí-gá xáha<sup>n</sup>-gã xii-güedé.

*Nàcuáa quide ñu té cùu fariséu ndihi ñu té cùu cobradór*

9 Te Jèsús ní cáhá<sup>n</sup>-gá núú ñáyiu nàcuáa quide ñáyiu sani iní sá ío quide ndáá te dàquee tíhú-yu tnàha ñáyíú-yu, te xáha<sup>n</sup>-gã xii-yu:

10 —Úú cue té cuáhán-güedé veñúhu càhnu sá ío cùnuu cáhá<sup>n</sup> ndihi-güedé Yã Ndiõxí, te ñu-dé cùú-dé té cùu fariséu, te ingá-dé cùú-dé té cuihna iní-xi quide cobrá ñáhá xii ñáyiu cuendá impuèstú.

11 Te té cùu fariséu-án nútñi-dé càhá<sup>n</sup> ndihi-dé Yã Ndiõxí, te xáha<sup>n</sup>-dè xii-gá: “Yòhó Dútú Ndiõxí ndacá<sup>n</sup> tãhú-í núú-n, chí ña túú quide-í dàtná quidé dàva-gá-güedé, chí dùhu-güedé, càhá<sup>n</sup> ndihi-güedé ñadihí te ña díú ñadihí-güedé cùú-yu, te nándi-gá

nchaa sá cuèhé sá dúhá quide-güedé, te ni ñà túú quide-í dàtná quidé tée cuihna iní-xi quide cobrá ñáhá xii ñáyiú cuendá impuèstú ndécú ìha.

<sup>12</sup> Chi yúhú ñá túú tnàhí ná xéxì-í úú nduu xítí samàná cuendá sá càhá<sup>n</sup> ndìhì ñaha-í xii-n, te nchaa sá ñhí-í te càhu-í úxí xichì, te ñ<sup>n</sup> xichì tàxi-í xii-n”, càchí-dé xáha<sup>n</sup>-dè xii Yá Ndiòxí.

<sup>13</sup> Dico tée cuihna iní-xi quide cobrá ñáhá xii ñáyiú cuendá impuèstú-á<sup>n</sup> chi xica lùha nutñí-dé, te ni lùha ñá túú cùyí-dé ndonehe núú-dé andiú cuendá sá ndíxí cuèchi iní-dé nchaa sá ñà túú vâha quide-dé, te ndedí ndaha-dé pèchú-dé sá ndìhú iní-dé, te xáha<sup>n</sup>-dè xii Yá Ndiòxí: “;Yòhó Dútú Ndiòxí cundàhú iní ñáhá xii-í, chi ío cuéhé sá ñà túú vâha quide-í núú-n!” , càchí-dé xáha<sup>n</sup>-dè xii Yá Ndiòxí.

<sup>14</sup> Te na càchí tnúhu-í xii-ndo sá tée cuihna iní-xi quide cobrá ñáhá xii ñáyiú-á<sup>n</sup> ñí tedóho Yá Ndiòxí nchaa tnúhu ní càhá<sup>n</sup>-dé, te ní quide càhnu iní-gá nchaa sá ñà túú vâha ní quide-dé, te cuánuhú-dé vehe-dé. Te tée cùu fariséú-á<sup>n</sup> ñà túú ní tedóho ñaha Yá Ndiòxí xii-dé. Chi nchaa ñáyiú na cada cahnu mee-xi ñuyíú-a te vâ cúú-yu ñáyiú cùnno, te nchaa ñáyiú ñá túú quide cahnu mee-xi, ñáyiú-á<sup>n</sup> cunúú-yu —càchí Jèsús xáha<sup>n</sup>-gã xií-yu.

*Jèsús quidé ù-gã landú*  
(Mt. 19:13-15; Mr. 10:13-16)

<sup>15</sup> Te ñ<sup>n</sup> úú ñáyiú ndècá-yu landú ìhli cuáhá<sup>n</sup> núú Jèsús chi cuíní-yu sá téndàha ñaha-gá xii-güexi, te òré ní xiní cue tée xica cuu ndìhì-gá sá ndécá-yu landú-á<sup>n</sup> cuáhá<sup>n</sup> núú-gã, te ní ngüíta-güedé ténàá ñáhá-güedé xií-yu, te xáha<sup>n</sup>-güedé sá vâ dúcá<sup>n</sup> càdá-yu.

<sup>16</sup> Dico Jèsús ní cana ñaha-gã xii-güedé, te ní xáha<sup>n</sup>-gã:

—Chí dáñá ná quixi nahi landú ìhli-á<sup>n</sup> núú-í-a, te vâ càdí-ndó ìchi-güexi, chi dàtná cúú vâha iní cue landú ìhli-á<sup>n</sup> duca<sup>n</sup> cùu vâha iní cue ñáyiú yìndaha ñaha Yá Ndiòxí.

<sup>17</sup> Te na càchí tnúhu ndáá-í xii-ndo sá núu vâ quìndáá iní ñáhá-ndó dàtná

quidé dâva landú ìhli sàndáá iní ñáhá xii-í, te vâ ndìhu ndaha ñaha Yá Ndiòxí xii-ndo, te vâ ndúú tãhú-ndó cùndecu-ndo ndìhì-gá ni caa ni quíhì<sup>n</sup> —càchí-gá xáha<sup>n</sup>-gã xii-güedé.

*Ñ<sup>n</sup> tée cuica càhá<sup>n</sup> ndìhì-dé Jèsús*  
(Mt. 19:16-30; Mr. 10:17-31)

<sup>18</sup> Te ñ<sup>n</sup> tée cùnno ní xicá<sup>n</sup> tnúhú-dé núú Jèsús, te xáha<sup>n</sup>-dè xii-gá:

—Yòhó Mèstrú, cùu-n tée ío vâha iní-xi, te cuíní-í núu vâ cùndèe iní-n càchí tnúhu-n ñá cúú sá vâha cada-í cuendá nduu tãhú-í cùndecu-í ndìhì Yá Ndiòxí ni caa ni quíhì<sup>n</sup> —càchí-dé xáha<sup>n</sup>-dè xii-gá.

<sup>19</sup> Te Jèsús ní xáha<sup>n</sup>-gã xii-dé:

—¿Te cùnno iní-n nàcuáa ndùu tnúhu càhá<sup>n</sup>-n sá yúhú vâha iní-ã<sup>n</sup>? Chi ñ<sup>n</sup> dîi díi-ni Yá Ndiòxí vâha iní-gá.

<sup>20</sup> Te yòhó xiní-n nàcuáa ní cachí Yá Ndiòxí cada ñáyiú, te duha ní cachí-gá: “Nchòhó cue tée vâ càhá<sup>n</sup> ndìhì-ndo ñàdìhì te núu ñá díú ñàdìhì-ndó cúú-yu, te duca<sup>n</sup>-ni nchòhó cue ñáyiú dîhì tucu vâ càhá<sup>n</sup> ndìhì-ndo tée te núu ñá díú yì-ndo cuu-güedé, te vâ cáhni-ndó tnàha ñáyiú-ndo, te ni vâ dúhú-ndó sá ndécú ndìhì-yu, te ni vâ dácàcu-ndo cuèchi neñúú sá cúú-xí tnàha ñáyiú-ndo, te canehe-ndo sá yíñuhu núú tãtá-ndó ndìhì núú ñàná-ndó”, duha ní cachí Yá Ndiòxí cada ñáyiú —càchí Jèsús xáha<sup>n</sup>-gã xii-dé.

<sup>21</sup> Te tée-á<sup>n</sup> ñí xáha<sup>n</sup>-dè xii-gá:

—Nchaa xíã<sup>n</sup> ní ngüíta-í quidè-í ndéé cùtnàhá cúú làndú-í —càchí-dé xáha<sup>n</sup>-dè xii-gá.

<sup>22</sup> Te Jèsús ní xáha<sup>n</sup>-gã xii-dé:

—Dico cùmání ìngá núú sá càdá-n, vitna te quíhì<sup>n</sup>-n te dico-n nchàa sá ndécú ndìhì-n, te díhú<sup>n</sup>-n cuàha tãhú-n cuè ñáyiú ndàhú, te duca<sup>n</sup> te nduu tãhú-n cùndecu vâha-n núú ndécú Yá Ndiòxí táxí tnúni-gá, te na yãha duca<sup>n</sup> càda-n te quixi-n chìtnahá ñáhá-n xii-í —càchí-gá xáha<sup>n</sup>-gã xii-dé.

<sup>23</sup> Te sá dúcá<sup>n</sup> ñí xáha<sup>n</sup> Jèsús xii-dé, te ío ní cundìyí-dé, chi ío cuica-dé.



24 Te sá nǐ xini ñáhá Jèsús xii-dé cundiyí-dé, núu ní cachí-gá:

—Ío úhú quíndáá iní ñáyiú cuica Yá Ndiöxí cuendá ndíhu ndaha ñaha-gá xií-yu!

25 Te yáchí-gá yáha ì<sup>n</sup> caméyu yaú ì<sup>n</sup> yiqui ticú dàcúúxí sǎ quíndáá iní ì<sup>n</sup> ñáyiú cuica Yá Ndiöxí cuendá ndíhu ndaha ñaha-gá xií-yu —duha ní cachí-gá.

26 Te nchaa ñáyiú ní tecú dóho-xi tnúhu ní cáhá<sup>n</sup>-gá ní xáhǎ<sup>n</sup>-yu xii-gá:

—¿Te yoo naníhí tǎhú te núu duca<sup>n</sup> vai<sup>n</sup>? —càchí-yu xáhǎ<sup>n</sup>-yu xii-gá.

27 Te Jèsús ní xáha<sup>n</sup>-gǎ xií-yu:

—Cue ñáyiú ñuyíú-a chi vá ndácü-yu ná cadá-yu nàcuáa ndíhu ndaha ñaha Yá Ndiöxí xií-yu, dico mee-gǎ chi ndacu-gá ndíhu ndaha ñaha-gá xií-yu chi nchaa sá vǎha ndàcu-gá quidé-gǎ —càchí-gá xáha<sup>n</sup>-gǎ xií-yu.

28 Te té Pèlú ní xáha<sup>n</sup>-dǎ xii-gá:

—Nchúhú ní dándóo-ndí nchaa sá ndécú ndíhi-ndí, te ní tuha ñaha-ndí xii-n —càchí-dé xáha<sup>n</sup>-dǎ xii-gá.

29 Te ní xáha<sup>n</sup>-gǎ xii ñáyiú:

—Na càchí tnúhu ndáá-í xii-ndo sǎ ncháá ñáyiú na dándóo vehe-xi, àdi tátá-xi, nǎná-xi, ñaní-xi, cúha-xi, ñadìhí-xi, déhe-xi cuendá sá cuíní-yu ndíhu ndaha ñaha Yá Ndiöxí xií-yu,

30 te ío-gá cuéhé sǎ cuǎñaha-gǎ xií-yu cundecu ndíhí-yu, te ñá díú-ní xǎ<sup>n</sup>, chi tnáhá nduu tǎhǎ-yu cundecu ndíhí ñáhá-yu xii-í ní caa ní quíhí<sup>n</sup> ná sáa nduu —càchí-gá xáha<sup>n</sup>-gǎ xií-yu.

*Jèsús càhá<sup>n</sup> tucu-gá sá cáhni ñaha-güedé xii-gá*

*(Mt. 20:17-19; Mr. 10:32-34)*

31 Te Jèsús ní taudí<sup>n</sup>-gá ndí ùxúú cue téé xica cuu ndíhí-gá tnuú ñáyiú, te ní xáha<sup>n</sup>-gǎ xii-güedé:

—Vitna te quíhí<sup>n</sup>-ó ñùú Jerusàlén, chi yáca<sup>n</sup> cada-xi nchaa nàcuáa sa ní chídó tnùní cue téé ní xóo cáhá<sup>n</sup> tnúhu Yá Ndiöxí ndéé sanaha nàcuáa yáha yúhú Téé cùu ñaní tnáhá-ndó nchàa-ndo.

32 Chi cuáha cuendá ñáhá-güedé xii-í núu cuè téé ñá túú cùu cue téé isràél, te cudíquí ndéé ñáhá-güedé xii-í, te cúcuèhé ñáhá-güedé, te túú díí ñáhá-güedé xii-í.

33 Te caniha-güedé ndíhi ñíi, te dàtnùní cahni ñaha-güedé xii-í, dico nduu úní sá cùú-í te ndoto-í —càchí-gá xáha<sup>n</sup>-gǎ xii-güedé.

34 Dico ní ì<sup>n</sup> tnúhu ní cáhá<sup>n</sup>-gá ñá túú ní tècú tnùní-güedé, chi ío yídáhu tnúhu ní cáhá<sup>n</sup>-gá nùu xǎ<sup>n</sup> ní ì<sup>n</sup> ñá túú ní tècú tnùní-güedé.

*Jèsús quidé tǎtna-gá núú ì<sup>n</sup> téé cuàá ñuú Jericó*

*(Mt. 20:29-34; Mr. 10:46-52)*

35 Te òré tá cùyatni Jesús ñuú Jericó cuáhá<sup>n</sup>, te yuhu ìchi cuáhá<sup>n</sup>-gá-á<sup>n</sup> núcóo ì<sup>n</sup> téé cuàá xicá<sup>n</sup> ndàhú-dé.

36 Te òré ní tecú dóho-dé xicáhá<sup>n</sup> vai ñáyiú xiyáha-yu, te ní xicá<sup>n</sup> tnúhú-dé núú ñáyiú ndècu ndíhi-dé ná cuendá duca<sup>n</sup> vai-yu yáha.

37 Te ní xáhǎ<sup>n</sup>-yu sá Jèsús téé ñuú Nazàrét ñuhú-dé ìchi.

38 Te níhi ní cáhá<sup>n</sup>-dé, te xáha<sup>n</sup>-dǎ xii-gá:

—Jèsús ñaní tnáhá ndíi Dàvíi, cundáhú iní ñáhá xii-í! —càchí-dé xáha<sup>n</sup>-dǎ xii-gá.

39 Te ñáyiú xixódó núú nùú Jèsús ní tenáá ñáhǎ-yu xii-dé, te xáhǎ<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dé xáha<sup>n</sup>-dǎ xii-gá:

—Yòhó téé cùu ñaní tnáhá ndíi Dàvíi, cundáhú iní ñáhá xii-í! —càchí-dé xáha<sup>n</sup>-dǎ xii-gá.

40 Te Jèsús ní ngüíñí-gá, te ní táuchíú<sup>n</sup>-gǎ ní sǎnguehe<sup>n</sup> ñaha cuè téé ndíhí-gá. Te òré ní quexìo-dé núú-gǎ, te ní xicá<sup>n</sup> tnúhú-gǎ núú-dé, te xáha<sup>n</sup>-gǎ:

41 —¿Ná cuíní-n càda ñaha-í xii-n-í? —càchí-gá xáha<sup>n</sup>-gǎ xii-dé.

Te téé cuàá-á<sup>n</sup> ní xáha<sup>n</sup>-dǎ:

—Mèstrú, cuíní-í cada tátna-n nùú-í cuendá cundehe-í —càchí-dé xáha<sup>n</sup>-dǎ xii-gá.

42 Te Jèsús ní xáha<sup>n</sup>-gǎ:

—Sa ní ndúha núú-n chi ní sándáá iní-n Yá Ndiöxí —càchí-gá xáha<sup>n</sup>-gǎ xii-dé.

43 Te òré-ni-á<sup>n</sup> nǐ ndúha núú-dě, te ní chinchícú<sup>n</sup>-dé Jèsús, te ní cachí-dé sá ìo càhnu cuu Yá Ndiòxí. Te nchaa ñáyiú ní xini nàcuáa ní cuu ní ndúha núú-dě tnàhá-yu ní cachí-yu sá ìo càhnu cuu Yá Ndiòxí.

## 19

### *Jèsús ndíhi ì<sup>n</sup> té nàni Zaqueú*

1 Te Jèsús ní sáá-gá ñuú Jericó, te ta yàha-gá xití ñuú-á<sup>n</sup> cuáhá<sup>n</sup>.

2 Te ñuú-á<sup>n</sup> ndécú ì<sup>n</sup> té cuica nàni-dé Zaqueú, te cùnno-dé táxí tnùn-dé cue té cùndíhi-dé, cue té cuihna ìní-xi quide cobrá ñáhá xì ñáyiú cuendá impuèstú.

3 Te té-á<sup>n</sup> cuini-dé quini-dé Jèsús òré-á<sup>n</sup> ní cùu te ñá ní ndàcu-dé, chí ìo cuéhé ñáyiú, te ñá túú dùcú<sup>n</sup>-dé.

4 Te xinu-dé ní ngódó núú-dě te ní sáá-dé díquí ì<sup>n</sup> yutnu sìcómorú nùtní yatni yuhu ìchi núú yàha Jèsús cuendá cuini-dé quini ñáhá-dě xii-gá.

5 Te òré tá yàha Jèsús xiá<sup>n</sup>, te ní ndonehe núú-gá díquí yutnu núú cándòdo-dé-á<sup>n</sup>, te ní xáha<sup>n</sup>-gá xii-dé:

—Zaqueú, tanùu ndíhi díquí yutnu-á<sup>n</sup>, chí tnavíi quexìo-í vehe-n ndètátú-í —càchí-gá xáha<sup>n</sup>-gá xii-dé.

6 Te té Zaqueú-á<sup>n</sup> nǐ nuu ndíhi-dé díquí yutnu-á<sup>n</sup>, te ìo ní cudíi ìní-dé ní quehe<sup>n</sup> cuendá-dé Jèsús vehe-dé.

7 Te sá nǐ xini ñáyiú ní quexìo Jesús vehe-dé, te ncháa-yu ní ngúita-yu càhá<sup>n</sup> cuéhé-yu cuendá-gá, te xitnàhá-yu:

—Tée-a cuánguihu-dé vehe ì<sup>n</sup> té ndècu ìchi cuéhé ìchi duha —càchí-yu xitnàhá-yu.

8 Te té Zaqueú-á<sup>n</sup> nǐ ndacuíñí-dé tnuú-yu, te xáha<sup>n</sup>-dě xii Jèsús:

—Yòhó Mèstrú, na cuáha-í ñáyiú ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùní-gá tnàhá sá nǐ dúhù-í-yu nacuañaha-í xii-yu —càchí-dé xáha<sup>n</sup>-dě xii-gá.

9 Te Jèsús ní xáha<sup>n</sup>-gá xii té Zaqueú:

—Vitna ní naníhí tàhú-n ndíhi nchaa ñáyiú xindecu vehe-n, chí

tnàhá-n cùu-n ñaní tnàhá ndíi Abrahám.

10 Te yúhú Tée cùu ñaní tnàhá-ndó nchaa-ndo véxi-í nándùcu-í ñáyiú ní xita nihnu cuendá dàcácu nihnu-í-yu núú ùhú núú ndàhú —càchí-gá xáha<sup>n</sup>-gá xii-dé.

*Nàcuáa ní quide-güedé ndíhi díhú<sup>n</sup> cuáá<sup>n</sup>*

(Mt. 25:14-30)

11 Te nchaa ñáyiú-á<sup>n</sup> nǐ sani ìní-yu sá ndíhi-ni ndíhu ndaha ñaha Yá Ndiòxí xii-yu cuendá sá nǐ cuyatni Jèsús ñuú Jerusàlén, te xiá<sup>n</sup> núu ní ngúita Jèsús ní cani-gá ì<sup>n</sup> cuendú núu-yu cuendá tecú tnùn vaha-yu tnúhu-gá.

12 Te xáha<sup>n</sup>-gá xii-yu:

—Ní xindecu ì<sup>n</sup> té cùu ñaní tnàhá ñáyiú cùnno, te cuáhá<sup>n</sup>-dé ìngá ñuú xicá cuendá yàcá<sup>n</sup> cuáha ñaha-güedé chiú<sup>n</sup> coo-dé, te dàtnùn ndixi-dé quindaha-dě titní ñuú.

13 Te cùmání-gá quee-dé quíhí<sup>n</sup>-dé, te ní cana-dé úxí cue té xinu cuechi núú-dě, te ní sáñaha-dě ndí díi<sup>n</sup> núú-güedé ì<sup>n</sup> caa ì<sup>n</sup> caa díhú<sup>n</sup> cuáá<sup>n</sup>, te ní xáha<sup>n</sup>-dě: “Chí cádá ndàhú ndíhi díhú<sup>n</sup>-á<sup>n</sup> ndèé ná sàa nduu nàsáá-í”, càchí-dé xáha<sup>n</sup>-dě xii-güedé.

14 Dico nchaa ñáyiú ñuú quindaha-dě-á<sup>n</sup> ñà túú tnàhá ìní-yu sá quindaha ñaha-dé, núu ní tendàhá-yu cue té nèhe tnúhu cuáhá<sup>n</sup> núú cuè té cuáñaha chiú<sup>n</sup> coo-dé-á<sup>n</sup>, te ní xáhá<sup>n</sup>-yu sá cùñaha-güedé sá ñà túú tnàhá ìní-yu sá té-á<sup>n</sup> quindaha ñaha-dé xii-yu.

15 Dico dacuitíi sá nǐ sáha-güedé té-á<sup>n</sup> chiú<sup>n</sup> coo-dé sá díú-dě quindaha-dě ñáyiú nchaa ñuú-á<sup>n</sup>, te ní nacuico-dě cuánuhú-dé ñuú-dé. Te òré ní nasáá-dé vehe-dé, te ní tendaha-dě ì<sup>n</sup> té ní sánúcana ñaha xì cue té xinu cuechi núú-dě, cue té ní dándòo ndaha-dě díhú<sup>n</sup> cuendá cácá<sup>n</sup> tnúhú-dě núú-güedé ì<sup>n</sup> ì<sup>n</sup>-güedé núu ndèé dau ní chídó-xí díquí díhú<sup>n</sup> sá nǐ dándòo ndaha ñaha-dé-á<sup>n</sup>.

16 Te té ní ndèxio díhna xáha<sup>n</sup>-dě: “Pàtróo<sup>n</sup>, ní quide-í ndàhú ndíhi díhú<sup>n</sup>-n sá nǐ dándòo ndaha ñaha-n xii-í, te sá ì<sup>n</sup> nǐ taxi-n te ní chídó-xí

ǔxí-gá tnàhá te náu-a naquehe<sup>n</sup> cuèndá-n”, cächí-dé xǎha<sup>n</sup>-dě.

17 Te tée cùu patróón-dě-án nǐ xǎha<sup>n</sup>-dě: “Ío váha tée xìnu cuechi cuu-n chí ío váha ní quide-n, te sá nǐ quide váha-n ndìhi sacú díhú<sup>n</sup> sǎ nǐ dándõ ndaha ñaha-í xii-n, te xǎ<sup>n</sup> nõu yúhú cächí-í sá táxí tnùní-n ǔxí ñuú vitna”, cächí-dé xǎha<sup>n</sup>-dě.

18 Te ní ndexìo ingá-dé, te ní xǎha<sup>n</sup>-dě: “Pàtróón, ní quide-í ndáhú ndìhi díhú<sup>n</sup>-n sǎ nǐ dándõ ndaha ñaha-n xii-í, te sá ñ<sup>n</sup> nǐ taxi-n te ní chídó-xí ǔhú<sup>n</sup>-gá tnàhá te náu-a naquehe<sup>n</sup> cuèndá-n”, cächí-dé xǎha<sup>n</sup>-dě.

19 Te ní xǎha<sup>n</sup> tée cùu patróón-dě-án xii-dé: “Te yòhó taxi tnùní-n ǔhú<sup>n</sup> ñuú”, cächí-dé xǎha<sup>n</sup>-dě xii tée xìnu cuechi-án.

20 Te dǎtnùní ní ndexìo tucu ingá-dé, te xǎha<sup>n</sup>-dé: “Pàtróón, náu díhú<sup>n</sup>-n-á, te naquehe<sup>n</sup> cuèndá-n chí ní taxúha-í ní chidúcú<sup>n</sup>nuu-í ñ<sup>n</sup> pàñú te ñá túú ní quide-í ndáhú ndìhi díhú<sup>n</sup>-n,

21 chí ní yùhú ñáhà-í xii-n, chí cùu-n ñ<sup>n</sup> tée díí, te nàquehe<sup>n</sup>-n ñ<sup>n</sup> sá ñà túú ní tàxi ndecu-n, te nàtahu-n ñ<sup>n</sup> xichi núú ñà túú ní chihi-n tatá”, cächí-dé xǎha<sup>n</sup>-dě xii pàtróón-dě.

22 Te ní xǎha<sup>n</sup> pàtróón-dě xii-dé: “Yòhó cúu-n ñ<sup>n</sup> tée cuihna ìní-xi xìnu cuechi núu-í, te ñi-ni nchaa tnúhu càhá<sup>n</sup>-n-á<sup>n</sup> cächí tnùní-xi nàcuáa cuu ndáá cuéchi-n. Te núu sàni ìní-n sǎ cúu-í ñ<sup>n</sup> tée díí, te nàquehe<sup>n</sup>-í ñ<sup>n</sup> sá ñà túú ní tàxi ndecu-í, te nàtahu-í ñ<sup>n</sup> xichi núú ñà túú nǐ chihi-í tatá,

23 te núu duca<sup>n</sup> ña, ¿te ná cuèndá ñá túú ní càhu ìní-n dása<sup>n</sup> nuu-n díhú<sup>n</sup> nǐ taxi-í, te cúñaha-n chǎhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naquehe<sup>n</sup> cuèndá-í ní cùu-í?”, cächí-dé xǎha<sup>n</sup>-dě xii tée xìnu cuechi-án.

24 Te ní xǎha<sup>n</sup> tée cùu patróón-án xii cue tée xíndecu xía<sup>n</sup>: “Chí quèndèé díhú<sup>n</sup> cuáá<sup>n</sup> néhé téa, te cuáha-ndo téa nèhe úxí tucu díhú<sup>n</sup> cuáá<sup>n</sup>-án”, cächí-dé xǎha<sup>n</sup>-dě xii-güedé.

25 Te ní xǎha<sup>n</sup>-güedé: “Pàtróón, dico sa nèhe-dé úxí díhú<sup>n</sup> cuáá<sup>n</sup>”,

cächí-güedé xǎha<sup>n</sup>-güedé.

26 Te ní xǎha<sup>n</sup> téa cùu patróón-án: “Na cächí tnúhu-í xii-ndo sǎ cùe ñáyiú ío xii-xi te níhí-gǎ-yu cundecu ndìhi-yu, te cue ñáyiú sacú ndécú ndìhi cuita ndìhi nihnu nchaa sá ndécú ndìhi-yu”, cächí téa cùu patróón-án xǎha<sup>n</sup>-dě xii-güedé.

27 Te xǎha<sup>n</sup> tucu-dé xii-güedé: “Nchaa ñáyiú cùu úhú ìní ñáhá xii-í ñá tnàhá ìní-yu quindaha-í-yu, te chí cándecá-yu taquixi iha, te cahni-ndõ-yu núu-í-a”, cächí téa cùu patróón-án xǎha<sup>n</sup>-dě xii-güedé —duha cuáhá<sup>n</sup> cuèndú ní cani Jèsús núu ñáyiú.

*Jèsús cuánguihu-gá ñuú Jerusalén*  
(Mt. 21:1-11; Mr. 11:1-11; Jn. 12:12-19)

28 Te sátá dúcá<sup>n</sup> nǐ cáhá<sup>n</sup>-gá, te ní nucúhu<sup>n</sup> ichi-gá cuáhá<sup>n</sup>-gá ñuú Jerusalén.

29 Te òré sa ní cuyatni-gá ñuú Bèttagé, ndìhi ñuú Bètaniá te xía<sup>n</sup> cáa yùcu nani Olívú, te ní xǎha<sup>n</sup>-gǎ xii úú cue téa xica cuu ndìhi-gá:

30 —Chí cuáhá<sup>n</sup> ñuú cáa yàtni yacá<sup>n</sup>, te òré quexìo-ndo yacá<sup>n</sup>, te naníhí-ndó ñ<sup>n</sup> búrru ndètníi-di, te vátá yõ ñ<sup>n</sup>-gá codo ñaha xii-di, te nandaxi-ndo-di te candeca-ndo-di quixi.

31 Te núu yoo na càcá<sup>n</sup> tnúhu núu-ndó ñà cuèndá nándaxi-ndo-di, te cúñaha-ndo xii-yu sá yúhú Yaá xicá cùu ndìhi-ndo xini ñuhu-í-di —cächí-gá xǎha<sup>n</sup>-gǎ xii-güedé.

32 Te cue téa-án nǐ xica-güedé cuáhá<sup>n</sup>-güedé, te nchaa-ni nàcuáa ní xǎha<sup>n</sup> Jèsús duca<sup>n</sup> nǐ cuu,

33 chí mei òré nándaxi-güedé búrru-án nǐ quexìo cue ñáyiú cùu xítóhó-di xicá<sup>n</sup> tnúhu-yu núu-güedé, te xǎhá<sup>n</sup>-yu:

—¿Ná cuèndá nándaxi-ndo búrru-ndí-i?  
—cächí-yu xǎhá<sup>n</sup>-yu.

34 Te ní xǎha<sup>n</sup>-güedé xii-yu:

—Nà ndaxi-ndí-di chí Yaá xicá cùu ndìhi-ndí xini ñuhu ñaha-gá xii-di —cächí-güedé xǎha<sup>n</sup>-güedé xii-yu.

35 Te ndèca-güedé-di cuáhá<sup>n</sup> núu ndécú Jèsús, te òré ní quexìo-güedé

ndihi-di núú ndécú-gã te ní sacá<sup>n</sup> ndodo-güedé dóó-güedé sátá-di, te ní ngódó ñáhá-gã xii-di.

<sup>36</sup> Te ío cuéhé ñáyiú ta sàcá<sup>n</sup>-yu dóó-yu ichi cuáhá<sup>n</sup>-gá cuendá núú dǒo-yu-á<sup>n</sup> yáha-gá ndihi quiti yòdo-gá.

<sup>37</sup> Te ní nucuíta nuu-gá ichi tindúú yucu Òlívú tá cùyatni-gá ñuú Jerusàlén cuáhá<sup>n</sup>, te nchaá ñáyiú sàndáá iní ñáhá xii-gá nchìcú<sup>n</sup> ñáhã-yu te ní ngüíta-yu níhi càhá<sup>n</sup>-yu sá cùdí<sup>n</sup> iní-yu, te càchí-yu sá ío càhnu cuu Yá Ndiǒxí cuendá sá ñí xiní-yu nchaá sá vã yǒo tñahí ndàcu cada ní quide-gá.

<sup>38</sup> Te càchí-yu:

—Ío càhnu cuu Yaá véxi quindaha ñaha xii-o, te diu-gá cúú-gã Yaá ní tendaha Yá Ndiǒxí véxi quide núú-gã! ¡Te ío càhnu cuu mee-gá! ¡Te andiu ñà túú tñahí ná cúú! —duha càchí-yu.

<sup>39</sup> Te ñí<sup>n</sup> úú cue téé cùu fariséú ñúhú tñahá tnuú ñáyiú-á<sup>n</sup> ñí xáha<sup>n</sup>-güedé xii Jèsús:

—Mèstrú, cúñaha nchàa ñáyiú ndihi-n na càdí-yu yuhú-yu —càchí-güedé xáha<sup>n</sup>-güedé xii-gá.

<sup>40</sup> Dico Jèsús ní xáha<sup>n</sup>-gã xii-güedé:

—Te na càchí tñúhu-í xii-ndo sã ñúu ñáyiú-a na càdí-yu yuhú-yu ña, te nchaá yúú càhá<sup>n</sup> níhi-xi dàtná ñí<sup>n</sup> ñáyiú —càchí-gá xáha<sup>n</sup>-gã xii-güedé.

<sup>41</sup> Te òré ní cuyatni-gá ñuú Jerusàlén te ní xiní-gá, te ní ndáhyú-gá cuendá nchaá ñáyiú dii ñúú-xi-á<sup>n</sup> sã ndihú iní-gá.

<sup>42</sup> Te ní xáha<sup>n</sup>-gã xii cue ñáyiú-á<sup>n</sup>:

—Ío cuu váha iní-í te núú dìcò nchòhó tecú tñúú-ndó vitna ñí<sup>n</sup> tñúhu sá cádá váha ñaha xii-ndo, chi ñá túú-gã ná cuu cundecu-ndo, te núu na tècú tñúú-ndó. Dico ñá tècú tñúú-ndó, chi ío yidáhu tñúhu-a.

<sup>43</sup> Te sáá nduu tñúndòho tñúhu ndàhú sá cúú-xí-ndó, te nchaá cue téé dava-gá ñuú cúú ùhú iní tñahá ndihi-ndo quixi-güedé chidoco ñaha-güedé xii-ndo, te ñí càndéé núú ndécú-ndó-á<sup>n</sup> dacàa-güedé ndóho cuendá xiá<sup>n</sup> quíhi váha-güedé nàá ndihi ñaha-güedé xii-ndo, te vá dáñá-güedé cunu-ndo.

<sup>44</sup> Te cahni ñaha-güedé xii-ndo, te ndihi nchaá vehe-ndo dāngoyo-güedé ndéé cimièntú-xi, chi ñá túú ní cuíní-ndó nàcuáha-ndo cuendá òré ní quixi coto ñaha Yá Ndiǒxí xii-ndo —duha ní xáha<sup>n</sup>-gã xii ñáyiú ñuú-á<sup>n</sup>.

*Jèsús ñá túú tñahá iní-gá nàcuáa quidé-yu veñúhu*

(Mt. 21:12-17; Mr. 11:15-19; Jn. 2:13-22)

<sup>45</sup> Te Jèsús cuánguihu-gá xití veñúhu càhnu sá ío cùnuu, te xití veñúhu-á<sup>n</sup> xíndecu cue ñáyiú quide ndáhu ndihi cue ñáyiú xísaa<sup>n</sup>. Te ní queñuhu ñaha Jèsús xií-yu quehé.

<sup>46</sup> Te ní xáha<sup>n</sup>-gã xií-yu:

—Núú tütú Yá Ndiǒxí càhá<sup>n</sup>-xi nàcuáa ní càhá<sup>n</sup>-gá, te duha ní cachí-gá: “Vehe-í cúú-xí núú càhá<sup>n</sup> ndihi ñaha ñáyiú xii-í”, duha ní càhá<sup>n</sup>-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáha<sup>n</sup>-gã xií-yu.

<sup>47</sup> Te Jèsús nchaá nduu dānehé-gá ñáyiú xití veñúhu, dico cue téé cùu dütú cùnuu, ndihi cue téé dàcuaha ñaha xii ñáyiú nchaá tñúhu ní chídó tñúú ndíi Moisés, ndihi cue téé cùnuu ñuú-á<sup>n</sup> ndúcú-güedé nàcuáa cada-güedé cahni ñaha-güedé xii-gá.

<sup>48</sup> Dico ñá ñihí-güedé nàcuáa cada-güedé, chi cuendá nchaá ñáyiú ío cùdí<sup>n</sup> iní-yu ndédòho-yu nchaá tñúhu càhá<sup>n</sup>-gá.

## 20

*Jèsús ndécú ndihi-gá tñúhu ndee iní*  
(Mt. 21:23-27; Mr. 11:27-33)

<sup>1</sup> Te ñí<sup>n</sup> nduu yíhi Jèsús xití veñúhu càhnu sá ío cùnuu dānehé-gá ñáyiú tñúhu sá càhá<sup>n</sup> nàcuáa naníhí tàhú-yu. Te ní quexìo cue téé cùu dütú cùnuu ndihi cue téé dàcuaha ñaha xii ñáyiú nchaá tñúhu ní chídó tñúú ndíi Moisés, ndihi cue téé cùu sacuéhé núú ñáyiú isràél,

<sup>2</sup> te ní xáha<sup>n</sup>-güedé xii-gá:

—Cuíní-ndí cachí tñúhu-n xii-ndí nása ndùu tñúhu ndee iní ndécú ndihi-n núu quide-n nándi sá quidé-n. ¿Te yoo duca<sup>n</sup> ñí taxi tñúhu ndee iní-á<sup>n</sup>?

xii-n? —càchí-güedé xǎha<sup>n</sup>-güedé xii-gá.

<sup>3</sup> Te Jèsús ní xáha<sup>n</sup>-gǎ:

—Yúhú tñàhá-í cuíní-í cǎcá<sup>n</sup> tñúhu-í ì<sup>n</sup> sá cǎcá<sup>n</sup> tñúhu-í núú-ndó, te cachí tñúhu-ndo.

<sup>4</sup> Te chí cǎchí tñúhu xii-í yoo ní táuchíú<sup>n</sup> ñí dǎcuándüte ndíi Juàá ñáyiu. ¿Yá Ndiǒxí ǎ<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndíi? —càchí-gá xáha<sup>n</sup>-gǎ xii-güedé.

<sup>5</sup> Te ní ngüíta-güedé xǐtnàha-güedé:

—¿Nása cúñaha-o? Chí núu nà cúñaha-o sǎ Yá Ndiǒxí ní táuchíú<sup>n</sup> dùca<sup>n</sup> ní quide ndíi Juàá ñá, te quesaha-dé: “¿Ná cuendá ñá túú ní sàndáá iní-ndó tñúhu ní cǎhá<sup>n</sup> ndíi vǎi<sup>n</sup>?”, quesaha-dé.

<sup>6</sup> Àdi te núu nà cúñaha-o sǎ cuè ñáyiu ñuyíú-a ní táuchíú<sup>n</sup> dùca<sup>n</sup> ní quide ndíi ñá, te nchaa ñáyiu cuáha ñàhá-yu yúú xii-o, te cahni ñàhá-yu, chí cǎchí-yu sá ndáá sá Yá Ndiǒxí ní táuchíú<sup>n</sup>-gǎ ní cǎhá<sup>n</sup> ndíi Juàá tñúhu-gá núú ñáyiu —càchí-güedé xǐtnàha-güedé.

<sup>7</sup> Te ní xáha<sup>n</sup>-güedé xii-gá sá ñá túú xíní-güedé yoo ní táuchíú<sup>n</sup> dùca<sup>n</sup> ní dǎcuándüte ndíi Juàá ñáyiu.

<sup>8</sup> Te ní xáha<sup>n</sup> Jèsús xii-güedé:

—Te núu duca<sup>n</sup> te ni yǔhú vá cǎchí tñúhu-í xii-ndo yòo ní taxi tñúhu ndee ìní duha quide-í —càchí-gá xáha<sup>n</sup>-gǎ xii-güedé.

*Cuendá cue téé cuihna iní-xi  
(Mt. 21:33-44; Mr. 12:1-11)*

<sup>9</sup> Te sátá dúcá<sup>n</sup> te ní ngüíta Jèsús ní cani-gá ì<sup>n</sup> cuendú núú ñáyiu nàcuáa tecú tñúní-yu tñúhu-gá, te xáha<sup>n</sup>-gǎ xii-yu:

—Ì<sup>n</sup> téé ní xitu-dé mee-ni yòho yaha stilé núú ñúhú-dé. Te ní sáá ì<sup>n</sup> nduu quǐngaca cuu xica-dé vǎi nduu te ní dándóo ndaha-dé sá ñí xitu-dé-á<sup>n</sup> xii ì<sup>n</sup> úú cue téé cǎhá<sup>n</sup> ndíi-dé cuendá cada chiu<sup>n</sup>-güedé, te ní ndatnúhu-güedé sá òré ná cùu te cuu cuendá dava-güedé te duca<sup>n</sup> te ní quee-dé cuáhá<sup>n</sup>-dé.

<sup>10</sup> Te sátá ñí sáá nduu ñí cuu nchaa ndéhé yoho yàha stilé sá ñí xitu-dé-á<sup>n</sup>, te ní xáha<sup>n</sup>-dǎ xii ì<sup>n</sup> téé xínu cuechi núú-dé: “Cuáhá<sup>n</sup> cǎcá<sup>n</sup>-n

sǎ cúú cuendá-í núú cuè téé ní dándóo ndàha-í nchaa yoho yàha stilé sá ñí xitu-í”, cǎchí-dé xáha<sup>n</sup>-dǎ. Te téé xínu cuechi-á<sup>n</sup> ñí xica-dé cuáhá<sup>n</sup>-dé, dico cue téé ndéé nchaa yoho yàha stilé-á<sup>n</sup> ñí tñii-güedé téé xínu cuechi-á<sup>n</sup> te ní caniha-güedé, te ní nacuícú<sup>n</sup> ñàhá-güedé xii-dé, te ñá túú tñàhí ná ní sǎñaha-güedé.

<sup>11</sup> Te dǎtnúní téé cùu xítóhó nchaa yoho yàha stilé-á<sup>n</sup> ñí tendaha tucu-dé ingá téé xínu cuechi núú-dé cuáhá<sup>n</sup>-dé, dico diu-ni duca<sup>n</sup> ñí quide ñaha-güedé xii-dé, chí ní xícuèhé ñàhá-güedé, te ní caniha-güedé te ní nacuícú<sup>n</sup> ñàhá-güedé, te ñá túú tñàhí ná ní sǎñaha-güedé.

<sup>12</sup> Te téé cùu xítóhó nchaa yoho yàha stilé-á<sup>n</sup> ñí tendaha tucu-dé ingá-dé cuáhá<sup>n</sup>-dé, te diu-ni duca<sup>n</sup> ñí quide ñaha tucu-güedé, chí ní dǎnícuehé ñàhá-güedé, te ní nacuícú<sup>n</sup> ñàhá-güedé.

<sup>13</sup> Te téé cùu xítóhó nchaa yoho yàha stilé-á<sup>n</sup> ñí sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a núhú-dé, chí cudana te òré quiní ñàhá-güedé xii-dé, te canehe-güedé sá yǐñuhu núú-dǎ”, duha ní sani iní-dé.

<sup>14</sup> Dico òré ní xíní cue téé quide chiu<sup>n</sup>-á<sup>n</sup> déhe xítóhó nchaa yoho yàha stilé-á<sup>n</sup>, te ní xǐtnàha-güedé: “Téé-á<sup>n</sup> téé véxi nduu táhú ñuhu-a ndíi nchaa sá cáá núú-xi, dico cahni-o-dé te mee-o nduu táhú-ó sǎ ndúú táhú-dǎ”, cǎchí-güedé xǐtnàha-güedé.

<sup>15</sup> Te ní queñuhu ñaha-güedé ì<sup>n</sup> xio yuhu ñuhu-á<sup>n</sup>, te ní sahani ñaha-güedé xii-dé —duha cuáhá<sup>n</sup> cuendú ní cani Jèsús núú-yu.

Te dǎtnúní ní xáha<sup>n</sup> tucu-gá xii-yu:

—¿Te nchòhó sa cùtnuní iní-ndó nàcuáa cada ñaha xítóhó ñuhu-á<sup>n</sup> xii cue téé-á<sup>n</sup> ñá?

<sup>16</sup> Chí núhú-dé te cahni-dé cue téé-á<sup>n</sup>, te dándóo ndaha-dé ñuhu-dé xii cue téé cùtnuní iní-dé cada ndáá —càchí-gá xáha<sup>n</sup>-gǎ xii-yu.

Te sá dúcá<sup>n</sup> ñí cǎhá<sup>n</sup>-gá, núu ní cachí-yu:

—¿Sá vǎ cǎchí Ndiǒxí sá dúcá<sup>n</sup> yàha-o! —càchí-yu.

17 Te Jèsús ní ndacoto-gá núŷ-yu, te ní xáha<sup>n</sup>-gã:

—Chí cächí tnúhu nása quèe-xi nacuáa càhá<sup>n</sup>-xi núú tütú Yă Ndiöxí, núú cächí-xi:

Yúú sã ní dáquéé tǎhú cue téé dàcaa vehe ní saa-xi cùu-xi yúú cùnùu vitna.

Duha cächí-xi núú tütú-gá.

18 Te nchaa ñáyiu ñá túú cuení tñi tnúhu-í, te ndohó-yu dàtná ñi ñáyiu tñahnú duu<sup>n</sup> òré ndúá-yu núú yúú, àdi núu na tàú ñáhá-xí te dàcachi duu<sup>n</sup> ñaha-xi —cachí-gá xáha<sup>n</sup>-gã xii-yu.

### *Cuèndá impuèstú*

(Mt. 21:45-46; 22:15-22; Mr. 12:12-17)

19 Te cue téé cùu dútú cùnùu, ndihi cue téé dàcuaha ñaha xii ñáyiu nchaa tnúhu ní chídó tnùní ndíi Moisés ní cuení-güedé tñi-güedé Jèsús òré-ni-á ní cùu, chi ní cutnùní iní-güedé sá cuèndá-güedé ní cáhá<sup>n</sup>-gá, dico ní yuhú-güedé cuèndá sá ïo vãi ñáyiu.

20 Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue téé cuáhá<sup>n</sup> ngoto dayuhu ñaha xii-gá, te cuáhá<sup>n</sup>-güedé dàtná cue téé váha iní-xi, te ndùcu-güedé nàcuáa cada-güedé núu cáhá<sup>n</sup>-gá ñi tnúhu sá ñà túú tàú-gá cáhá<sup>n</sup>-gá cuèndá duca<sup>n</sup> te candeca ñaha-güedé xii-gá quíhí<sup>n</sup> cuáha cuèndá ñáhá-güedé núú tē cùnùu.

21 Te ní xáha<sup>n</sup>-güedé xii Jèsús:

—Mèstrú, ñihí-ndí tnúhu sá dánèhé-n ñáyiu mee-ni tnúhu váha, te cuèi ndédani càa ñáyiu ñi-ni càhá<sup>n</sup>-n ndihí-yu, te càhá<sup>n</sup> ndáá-n nàcuáa càhá<sup>n</sup> Yă Ndiöxí cundecu-o ñùyíú-a.

22 Te cachí tnúhu xii-ndí núu váha-ni cháhu-ndí té Cèsár téé ïo cùnùu cuèndá impuèstú ã<sup>n</sup> ñáhá —cächí-güedé xáha<sup>n</sup>-güedé xii-gá.

23 Dico Jèsús ní cutnùní iní-gá sá xító ndèé ñáhá-güedé xii-gá, núú ní xáha<sup>n</sup>-gá xii-güedé:

24 —Chí dánèhé ñáhá xii-í ñi díchú<sup>n</sup> cuixí<sup>n</sup> te cachí tnúhu-ndo núu yoo núú-xi ndèé, ndihi yoo diu-xi ndeé —cächí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Núú tē Cèsár ndèé ndihi diu-dé —cächí-güedé xáha<sup>n</sup>-güedé xii-gá.

25 Te ní xáha<sup>n</sup> tucu-gá xii-güedé:

—Te núu duca<sup>n</sup> te chí nàcuáha té Cèsár sá cúú cuèndá-dé, te sá cúú cuèndá méé Yă Ndiöxí, te xíá<sup>n</sup> nacuáha-ndo-gã —cächí-gá xáha<sup>n</sup>-gã xii-güedé.

26 Te ñá ní ndàcu tnahí-güedé datìcànùu ñaha-güedé xii-gá núú tnúhu càhá<sup>n</sup>-gá, chi òré ní cáhá<sup>n</sup>-gá, te da ní cuñúhu-güedé nchaa tnúhu ní cáhá<sup>n</sup>-gá, te váha-gá ní sadí-güedé yuhu-güedé.

### *Cuèndá nchaa ñáyiu ndoto*

(Mt. 22:23-33; Mr. 12:18-27)

27 Te sátá dúcá<sup>n</sup> te ní sáá ñi úú cue téé cùu saducéú núú ndécú Jèsús. Te cue téé-á<sup>n</sup> ñà túú sàndáá iní-güedé sá ndótó cuè ñáyiu ní xihí, te ní xáha<sup>n</sup>-güedé xii-gá:

28 —Mèstrú, ndíi Moisés cächí ndíi núú tütú ndècu vitna sá núu ñi tē na cùu, te quendóo ñadihí-dé te ñá túú dēhe-dé ní xõ ndihi-a<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuèndá coo déhe-dé ndihi-a<sup>n</sup> cuèndá ñaní-dé téé ní xihí-á<sup>n</sup>.

29 Te ní xíndecu úsá tñahá cue téé mee-ni ndí ñaní-güedé. Te téé díhna ní níhí ñadihí-dé, dico ñá túú ní cùdí-dé cundecu-dé chi ní xihí-dé, te ñi ñi déhe-dé ñá túú ní xõ ndihi ñadihí-dé-á<sup>n</sup>.

30 Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup> dico ní xihí tucu-dé, te ñi ñi tucu déhe-dé ñá túú ní xõ ndihi ñaha-á<sup>n</sup>.

31 Te téé cùu uní ní naquehe<sup>n</sup> tucu-dé ñaha ní quendóo quèé-á<sup>n</sup>, te diu-ni duca<sup>n</sup> ñi xihí-dé, te ní xínu ndí úsá-güedé ní cándeca ñaha-güedé xii ñaha-á<sup>n</sup>, dico ñi ñi-güedé ñá túú ní xõ déhe-güedé ndihi-a<sup>n</sup>, te ní ndihi-güedé ní xihí.

32 Te ndéé núú ñi ndihi-ná ní xihí tñahá ñadihí-á<sup>n</sup>.

33 Te na sáá nduu ndòto-güedé ndihi ñaha-á<sup>n</sup> ¿Te ndédacàa-güedé ñadihí-güedé cuu-a<sup>n</sup>-i? Chi ndí

ùsá-güedé ní cándeca ñaha-güedě xii-a<sup>n</sup>  
—càchí-güedé xáha<sup>n</sup>-güedě xii-gá.

<sup>34</sup> Te Jèsús ní xáha<sup>n</sup>-gá xii-güedé:

—Nchaa ñáyiú ñuyíú-a tnándahá-yu.

<sup>35</sup> Dico nchaa ñáyiú ní nduu táhú  
ndoto díhna nuu ñáyiú-á<sup>n</sup> cundecú-yu  
ndihi Yá Ndiöxí ni caa ni quíhí<sup>n</sup>, te  
yácá<sup>n</sup> ñá túú-gá sá cándeca tnahá-yu.

<sup>36</sup> Te ni ñá túú-gá tnúhu xihí, chi  
cuu-ná-yu dàtná cue espíritú xínú  
cuèchi núú Yá Ndiöxí cuendá sá ñí  
ndotó-yu, chi cùú-yu déhe-gá.

<sup>37</sup> Te ndéé ndíi Moisés ní chídó tnùní  
ndíi núú tütú ndíi sá ncháá ñáyiú ní  
xihí ndotó-yu, te ñu-ni xía<sup>n</sup> càhá<sup>n</sup>-xi  
cuendá tnutáú nchicú<sup>n</sup> ñuhú, te ñu-ni  
xía<sup>n</sup> càchí tucu-xi sá Yá Ndiöxí cúú-gá  
Ndiöxí ndíi Àbrahám, ndíi Isàác, ndihi  
ndíi Jácób.

<sup>38</sup> Te cue téé-á<sup>n</sup> chi cuèi ní  
xihí-güedé sá cúú-xí nchòhó, dico  
sá cúú-xí Yá Ndiöxí chi ndècu  
vívú-ni-güedé. Chi cùtnuní iní-ó sá  
Yá Ndiöxí cúú-gá Ndiöxí mee-ni cuè  
ñáyiú xíndecu vívú, te ñá túú cùú-gá  
Ndiöxí cue ñáyiú ñá túú ndècu vívú.  
Te sá cúú-xí mée-gá chi nchaa ñáyiú  
ndècu ndihi-gá ndécú vívú-yu cuèi  
sa ní xihí-yu núú ñuyíú-a —càchí-gá  
xáha<sup>n</sup>-gá xii-güedé.

<sup>39</sup> Te ñí<sup>n</sup> téé dàcuaha ñaha xii ñáyiú  
nchaa tnúhu ní chídó tnùní ndíi  
Moisés ní xáha<sup>n</sup>-dě xii Jèsús:

—Mèstrú, váha-ni càhá<sup>n</sup>-n —càchí-dé  
xáha<sup>n</sup>-dě xii-gá.

<sup>40</sup> Te ñá túú-gá ní cùú-ñí-güedé cáca<sup>n</sup>  
tnúhú-güedé ni ñí<sup>n</sup> tnúhu núú-gá.

*Yoo déhe-xi cùú Cristú*  
(Mt. 22:41-46; Mr. 12:35-37)

<sup>41</sup> Te Jèsús ní xáha<sup>n</sup>-gá xii-güedé:

—¿Te nása càchí-tu-yu sá Cristú  
Yaá tendaha Yá Ndiöxí quixi ñuyíú-a  
cùú-gá déhe ndíi Dàvií?

<sup>42</sup> Te mee ndíi Dàvií-á<sup>n</sup> ñí cachí ndíi  
núú libré Sálmu:

Dútú Ndiöxí ní xáha<sup>n</sup>-gá xii Yaá cúú  
Xítóhó-í:

“Ngóo xio cùha-í,

<sup>43</sup> te yúhú cada-í te nchaa sá cúú  
ùhú iní ñáhá xii-n canehe-xi sá  
yíñùhu núú-n.”

Duha ní xáha<sup>n</sup> Dútú Ndiöxí xii Yaá cúú  
Xítóhó-í càchí ndíi núú libré Sálmu.

<sup>44</sup> ¿Te nása cùú Cristú déhe ndíi Dàvií,  
te mee ndíi ní cachí ndíi sá cúú-gá  
Xítóhó ndíi-i? —càchí Jèsús xáha<sup>n</sup>-gá  
xii-güedé.

*Jèsús càhá<sup>n</sup>-gá cuendá cue téé  
dàcuaha ñaha xii ñáyiú nchaa tnúhu ní  
chídó tnùní ndíi Moisés*

(Mt. 23:1-36; Mr. 12:38-40; Lc.  
11:37-54)

<sup>45</sup> Te òré ndátnùhu Jèsús ndihi cue  
téé xica cuu ndihi-gá xíndedóho ñaha  
ñáyiú, te xáha<sup>n</sup>-gá xii-güedé:

<sup>46</sup> —Cada cuendá-ndó vǎ cáda-ndó  
nàcuáa quide cue téé dàcuaha ñaha  
xii ñáyiú nchaa tnúhu ní chídó tnùní  
ndíi Moisés, chi tnahá iní-güedé cui-  
hnu-güedé dóo nání sǎ sácùhnu cue  
téé cùnuu. Te nchaa núú tàcá ñáyiú  
cuini-güedé sá ndihi tnúhu yíñùhu  
cáhá<sup>n</sup> ndihi ñáhá-yu xii-güedé, te  
nàcáxi-güedé xilé sácóo nchihí cue téé  
cùnuu-gá xití veñúhu conchihí-güedé,  
te duca<sup>n</sup>-ni quide-güedé cuèi òré  
quíhu-güedé mèsá caxi-güedé òré  
ndécú-güedé ñí<sup>n</sup> vico, chi mee-ni núú  
sácóo cue téé cùnuu-gá cuini-güedé  
coo-güedé.

<sup>47</sup> Te quèndeé-güedé vehe nchaa  
ñáyiú díhí ñáyiú quèé, te ío  
naha càhá<sup>n</sup> ndihi-güedé Yá Ndiöxí  
cuendá cuini-güedé cáhá<sup>n</sup> váha-yu  
cuendá-güedé. Te sá dúcá<sup>n</sup>  
quide-güedé te sáá nduu te ío-gá  
ndoho-güedé núú ùhú núú ndàhú  
dàcúxí dàva-gá ñáyiú —càchí-gá  
xáha<sup>n</sup>-gá xii-güedé.

## 21

*Díhú<sup>n</sup> nduu táhú Yá Ndiöxí ní dáquée*  
*ñí ñaha ndàhú ñaha quèé*

(Mr. 12:41-44)

<sup>1</sup> Te Jèsús ní xiní-gá xití veñúhu  
xidáquée cue téé cuica díhú<sup>n</sup> nduu  
táhu Yá Ndiöxí xití alcanciá.

<sup>2</sup> Te ní xiní-gá tnahá ñí<sup>n</sup> ñaha ndàhú  
ñaha quèé ní dáquée-a<sup>n</sup> úú díhú<sup>n</sup> còbrí,

<sup>3</sup> te ní xáha<sup>n</sup> Jèsús xii cue ñáyiú  
xíndecu-á<sup>n</sup>:

—Na cächí tnúhu ndáá-í xii-ndo sã ñaha ndahú ñaha quèé-a ío-gá nándíhi díhú<sup>n</sup> nĩ dáquëe-a<sup>n</sup> xití alcanciá nduu táhú Yã Ndiõxí dàcúúxí díhú<sup>n</sup> nĩ dáquëe dava-gá-yu.

4 Chi nchaa ñáyiú-á<sup>n</sup> nĩ dáquëe-yu mee-nã sá nĩ ndóo-ná, dico ñaha quèé-a cuèi ndahú-a<sup>n</sup> dico ní dáquëe-a<sup>n</sup> nihí díhú<sup>n</sup> sã cuáá-á<sup>n</sup> sã cáxí-á<sup>n</sup> ní cùu —cachí-gá xáha<sup>n</sup>-gã xií-yu.

*Jèsús cächí-gá sá ngóyó veñúhu*  
(Mt. 24:1-2; Mr. 13:1-2)

5 Te ì<sup>n</sup> úú ñáyiú xícáhá<sup>n</sup>-yu cuendá veñúhu càhnu sá ío cùnuu sá ío vii càa nchaa yúu yíhi, ndíhi cuendá nchaa sá nĩ sãñaha táhú ñáyiú yíhi xití-xi. Te Jèsús ní xáha<sup>n</sup>-gã xií-yu:

6 —Sáá nduu te nchaa sá cúñúhu-ndo-a vã cùndúu-gá-xi dàtná cáá-xí vitna, chi ni ì<sup>n</sup>-gá yúu vã códó nchíhi tnaha-gá-xi chi ndíhi ngoyo —cächí-gá xáha<sup>n</sup>-gã xií-yu.

*Nàcuáa cada-xi nduu ta cùyatni naa ñuyúú*

(Mt. 24:3-28; Mr. 13:3-23)

7 Te cue téé xĩndecu-á<sup>n</sup> nĩ xícá<sup>n</sup> tnúhú-güedé núú Jèsús, te xáha<sup>n</sup>-güedé xii-gá:

—Mèstrú, ¿te ná nduu dùca<sup>n</sup> cada-xi ngoyo veñúhu, àdi nándi cùu sá cáda-xí cuendá cutnùní iní-ndí sá sá ta cuyatni nduu duca<sup>n</sup> cada-xi-í? —cachí-güedé xáha<sup>n</sup>-güedé xii-gá.

8 Te Jèsús ní xáha<sup>n</sup>-gã xii-güedé:

—Ío quíhi iní-ndó cùndecu-ndo, te vá dáñá-ndó mèe-ndo dandahú ñáhá ñáyiú xii-ndo. Chi ío cuéhé cue téé coo ñuyúú-a, te danàni-güedé méé-güedé dàtná nání-í te cachí-güedé: “Yúhú cùu-í Crístú Yá ní tendaha Yã Ndiõxí véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáhá<sup>n</sup>-í”, duha cachí-güedé. Dico vá quíndáá iní-ndó, te nĩ vá túhá-ndó-güedé.

9 Te òré ná nihí-ndó tnúhu sá títí nàció<sup>n</sup> xĩnàá-güedé te dava ñúú xĩnàá-güedé ndi mèe-güedé, te vá yùhú-ndó chi dacutíí sã dúcá<sup>n</sup>

càda-xi, dico vátá sáá-gá nduu nàa ñuyúú òré duca<sup>n</sup> càda-xi —cachí-gá xáha<sup>n</sup>-gã xii-güedé.

10 Te xáha<sup>n</sup> tucu-gá xii-güedé:

—Nchaa cue téé ì<sup>n</sup> nàció<sup>n</sup> nàá-güedé ndíhi cue téé ingá nàció<sup>n</sup>, te títí ñúú ngúíta-güedé nàá-güedé.

11 Te títí xichi ñuyúú nĩhi vìhi tnáa, te títí tucu xichi ñuyúú coo tnamá, te títí tucu xichi ñuyúú quixi cuéhé, te títí núú sã cáda-xí àndiú, te yùhú ñáyiú.

12 Te òré cùmání-gã cada-xi nchaa nàcuáa cáhá<sup>n</sup>-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedé xii-ndo quíhí<sup>n</sup> xití veñúhu-güedé cada ndáá-güedé cuéchi-ndo, te chíhi ñaha-güedé vecá xii-ndo, te candeca ñaha-güedé quíhí<sup>n</sup> núú cuè téé cùnuu yĩndaha nàció<sup>n</sup> àdi núú dàva-gá cue téé cùnuu sá cuendá-í.

13 Te òré duca<sup>n</sup> na càda ñaha-güedé xii-ndo, te òré-á<sup>n</sup> tàú-xi cáhá<sup>n</sup> váha-ndo cuendá-í núú-güedé.

14 Te vá cání iní-ndó nũu nása cunduu tnúhu cúñaha-ndo xii-güedé cuendá cácu nihnu-ndo.

15 Chi yúhú dacàhu iní ñáhà-í xii-ndo tnúhu cúñaha-ndo xii-güedé, te taxi-í sá vátá quíni tñuní-gá-ndó, te ni ì<sup>n</sup> ñáyiú cùu úhú iní ñáhá xii-ndo vá nihí-gá-yu tnúhu cúñáhá-yu xii-ndo.

16 Te ndéé tãtá-ndó, ndíhi ñaní-ndó, ndíhi cue ñáyiú cùu ñaní tnáhá-ndó, ndíhi cue ñáyiú cáhá<sup>n</sup> ndíhi váha-ndo cuáha cuendá ñáhá-yu xii-ndo nũu cuè téé cùchiu<sup>n</sup>, te dava-ndo càhni ñaha-güedé xii-ndo.

17 Te ío cuéhé ñáyiú cuu úhú iní ñáhá-yu xii-ndo sã cuendá-í.

18 Dico Yá Ndiõxí ío coto ñaha-gã xii-ndo chi ndéé idi díquí-ndó còto-gá.

19 Te núu na càda ndee iní-ndó càncicu<sup>n</sup> nihnu ñaha-ndo xii-í, te nduu táhú-ndó cùndecu-ndo ndíhi Yá Ndiõxí ni caa ni quíhí<sup>n</sup>.

20 Te nduu na quíni-ndó ñúhu doco sandadú ni càndéé yuhu ñúú Jerusalén, te sa cutnùní iní-ndó sã sã ní cuyatni nduu dànaa-güedé ñúú-á<sup>n</sup>.



21 Te dàvá-á<sup>n</sup> nchaa ñáyiú xĩndecu distritú Jùdeá xíní ñùhu-xi cunú-yu quíhí<sup>n</sup>-yu xití yucu, te nchaa ñáyiú xĩndecu ñuú Jerusálén queé-yu xití ñuú-á<sup>n</sup>, te ñáyiú ñá túú xĩndecu ñuú-á<sup>n</sup> vǎ ndíhu-gá-yu.

22 Chi dàvá-á<sup>n</sup> cuu-xi nduu tnũndòho tnúhu ndàhú, te duca<sup>n</sup> càda-xi chi duca<sup>n</sup> ndèé tnuní núú tútú Yǎ Ndiòxí nàcuáa dandòho ñaha-gá xií-yu.

23 ;Te ndàhú ní cuu nchaa ñáyiú dìhí ñúhú dèhe-xi, ndíhi nchaa ñáyiú ndèca déhe vitna sàdi na sáá nduu dũca<sup>n</sup> cada-xi! Chi ío cuéhé tnũndòho tnúhu ndàhú coo núú ndécũ-yu dàvá-á<sup>n</sup>, te xíǎ<sup>n</sup> cuu-xi ì<sup>n</sup> tnũndòho tendaha Yǎ Ndiòxí quixi sá cúú-xí-yu.

24 Te dava cue téé cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhí<sup>n</sup> nchaa ñuú xícá, te cue téé dava-gá ñuú cunuu-güedé ñuú Jerusálén, te mee Yǎ Ndiòxí cachí-gá te núu ná daha nduu cunuu-güedé ñuú-á<sup>n</sup>.

*Nàcuáa cada-xi òré quixi tucu Téé cùu ñaní tnáhá cué ñáyiú*

*(Mt. 24:29-35, 42-44; Mr. 13:24-37)*

25 'Te cada-xi ì<sup>n</sup> sá vǎtá quìní-gá ñáyiú núú nchàanchii, ndíhi núú yóó, ndíhi núú nchàa chódíní, te ñuyíú-a coo tnúhu ndíhú iní-xi te vǎ cútnuní iní-yu nása cadá-yu cuéndá sá ío dusa<sup>n</sup> càda ndute lamár òré candaundéé tnáhá-xí.

26 Te nchaa ñáyiú cuneé-yu sá yùhú-yu, ndíhi sá ndíhú iní-yu cuéndá nchaa sá cadá-xí ñuyíú-a, te quidi-xi andíu.

27 Te sátá dúcá<sup>n</sup> te quìní-ndó yùhú Téé cùu ñaní tnáhá-ndó nchàa-ndo quee-í andíu quìxi-í ichi xití vícó, te dàvá-á<sup>n</sup> quìní ñáhá nchàa ñáyiú sá ío cùnuu-í te ndàcu-í quide-í nchaa sá vǎha.

28 Te òré ná ngũta-xi duca<sup>n</sup> càda-xi, te cuita cundee-gǎ iní-ndó quíhí<sup>n</sup>, te quíhi iní-ndó chi sa ní cuyatni vií-nǎ nduu càcu nihnu-ndo vǎ cùndècu-gá-ndó núú ñuyíú yícá cuèchi-a –càchí-gá xáha<sup>n</sup>-gǎ xii-güedé.

29 Te ní cani-gá ì<sup>n</sup> cuèndú núú-güedé nàcuáa tecú tnùní vǎha-güedé tnúhu-gá, te xáha<sup>n</sup>-gǎ xii-güedé:

–Chí cùndèhe yutnu ngúxí ndíhi nchaa dava-gá yutnu.

30 Chi nàtahú ndaha-xi, te òré duca<sup>n</sup> quide-xi te càchí-ndó sǎ sǎ ní cuyatni nuu cahni.

31 Te dũ-ñi duca<sup>n</sup> sǎtnahá-xi cùu oré ná quìní-ndó càda-xi nchaa nàcuáa càhá<sup>n</sup>-í, te sá dúcá<sup>n</sup> te cutnùní iní-ndó sǎ sǎ ní cuyatni nduu ndíhu ndaha ñàha Yǎ Ndiòxí xii-ndo.

32 'Te na càchí tnúhu ndáá-í xii-ndo sǎ òré vǎtá cùú-gá cue ñáyiú xĩndecu ñuyíú-a vitna, te cada-xi nchaa nàcuáa ní cáhá<sup>n</sup>-í.

33 Te andíu ndíhi ñuyíú-a chi ndíhi nihnu-xi, dico tnúhu-í chi vǎ ndíhí nihnu-xi, chi cùu-xi tnúhu ndáá.

34 'Te quíhi iní-ndó vǎ cùndècu-ndo ichi cuéhé ichi duha, te vǎ cúú-ndó ñáyiú quíhu, te vǎ cúhú<sup>n</sup> iní-ndó mèe-ni nchaa sá ío ñuyíú-a, chi núu duca<sup>n</sup> na càda-ndo te nacuanaa-ndo sǎ sǎá nduu càda-xi nàcuáa ní cáhá<sup>n</sup>-í. Te uu<sup>n</sup>i sáá nduu-ǎ<sup>n</sup>,

35 te cada-xi dàtná cuìní-ndó quide ì<sup>n</sup> trampá chi uu<sup>n</sup>i ngáva-xi, te duca<sup>n</sup> càda-xi nchaa ñáyiú xĩndecu ñuyíú-a, chi uu<sup>n</sup>i sáá nduu-ǎ<sup>n</sup>.

36 Te nchòhó cundecu túha-ndo te ío cáhá<sup>n</sup> ndíhi-ndo Yǎ Ndiòxí cuéndá ndacu-ndo yǎha-ndo nchàa tnũndòho quixi ñuyíú-a, te duca<sup>n</sup> te nasáá-ndó cùndecu-ndo núú ndécú yùhú Téé cùu ñaní tnáhá-ndó nchàa-ndo –cachí-gá xáha<sup>n</sup>-gǎ xii-güedé.

37 Te nduu ndùu ní xóo danèhé Jèsús ñáyiú tnúhu-gá xití veñúhu càhnu sá ío cùnuu, te niú niú ní xóo quíhí<sup>n</sup> ngúdú-gá xití yucu Òlívú.

38 Te nehé nehé ní xóo quíhí<sup>n</sup> nchaa ñáyiú veñúhu-á<sup>n</sup> ní xóo cundedóho-yu nchaa tnúhu càhá<sup>n</sup>-gá.

## 22

*Ndùcu-güedé nàcuáa cada-güedé cahni-güedé Jèsús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

1 Te sa ní cuyatni nduu tnàhá vico pascuá, te vico-án xéxi ñáyiú pàá sá ñà túú yìhi levadurá.

2 Te cue téé cùu dútú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nàcuáa cada-güedé cahni-güedé Jèsús, te dícó-ni sá xiyùhú-güedé ñáyiú.

3 Te yucu ñávàha ní dácáhu ìni ñáhá-xi xii té Jùdás déhe té Iscàrioté, te núú tnàhá téé-án cúú ùxúú tnàhá cue téé xica cuu ndihi-gá ní cùu.

4 Te té Jùdás-án ñi sáhá-dé ní ndatnúhu-dé ndihi cue téé cùu dútú cùnùu, ndihi cue téé tàxi tnuní ñáhá xii cue téé quide cuendá veñúhu nàcuáa cada-dé cuáha cuendá-dé Jèsús núú-güedé.

5 Te ío ní cudíi ìni-güedé, te ní xáha-güedé xii-dé sá cuñaha-güedé díhú,

6 te ní xáha-dé sá cúú quehe-dé díhú-án, te ní ngüíta-dé ndúcú-dé nàcuáa cada-dé cuáha cuendá-dé Jèsús núú-güedé òré ñà túú ñáyiú.

*Cùdini Jesús ndihi cue téé xica cuu ndihi-gá*

(Mt. 26:17-29; Mr. 14:12-25; Jn. 13:21-30; 1 Co. 11:23-26)

7 Te ní sáá nduu ñi quesaha vico xexí-yu pàá sá ñà túú yìhi levadurá, te diu-ni nduu-án sáhní-güedé ñi mbéé líhli xèxí-yu.

8 Te Jèsús ní xáha-gã xii té Pèlú ndihi té Juáa:

—Chí cuáhán chi cada túha-ndo núú cùdini-o sacuaa nduu vico pascuá —càchí-gá xáha-gã xii-güedé.

9 Te ní xicá tnúhú-güedé núú-gã, te xáha-güedé xii-gá:

—¿Te ndéé cáá vèhe cuiní-n cada túha-ndí-i? —càchí-güedé xáha-güedé xii-gá.

10 Te ní xáha Jèsús xii-güedé:

—Chí cùndèdóho na càchí tnúhu-í xii-ndo nàcuáa cada-ndo. Òré quíhu-ndo xití ñúú núú quíhí-ndó, te naníhí-ndó ñi téé tànehe ñi yoó ndute, te téé-án candéndaha-ndo-dé quíhí,

te núú ndédacàa vehe na ndíhu-dé te xíá quíhu-ndo.

11 Te cúñaha-ndo xii xitohó vehe-án: “Yaá cúú Mèstrú càchí-gá núu ndédacàa xichi xití vehe-n cuñaha núu-n xii-gá cùdini-gá ndihi cue téé xica cuu ndihi-gá sacuaa nduu vico pascuá”, duha cúñaha-ndo.

12 Te dàtnùní danèhé ñáhá-dé xii-ndo ñi quartú cáhnú càa núú ñinu, chi vehe yòdo tnaha cuu-xi, te sa ní quide túha-dé nchaa sá ná ndíhi, te nchòhó dícó-nã sá cùdini-o cada túha-ndo —càchí-gá xáha-gã xii-güedé.

13 Te ní xica-güedé cuáhán-güedé, te nchaa-ni nàcuáa ní xáha Jèsús xii-güedé ní cuu, chi nchaa sa ndècu túha, te ní quide túha-güedé sá cùdini-güedé ndihi-gá sacuaa nduu vico pascuá-án.

14 Te sátá ñi tnahá òré cùdini Jesús ndihi cue téé ní táuchíú-gã cáhán tnúhu-gá núú ñáyiú, te cuánguìhu ndihi ñaha-gã xii-güedé mèsá.

15 Te xáha-gã xii-güedé:

—¡Ducan-ni ìo sàni ìni-í sá cùdini ndihi ñaha-í xii-ndo sàcuua nduu vico pascuá òré cùmání-gã sáá nduu ndòho-í te cuú-í!

16 Te na càchí tnúhu-í xii-ndo sã vã dúhá-gã caxi ndihi ñaha-í xii-ndo nduu vico pascuá, chi ndéé òré ná sáá nduu nàsáá-ndó núú táxi tnùní Yá Ndiòxí cundecu-o, te dàvá-án cada ìni-ndó sã dàtná sá cáxi tùcu-o chi ío váha cuu ìni-ó cùndecu-o —càchí-gá xáha-gã xii-güedé.

17 Te ní quehe-gá ñi vàsú ñúhú ndùdí ndéhé yoho yàha stilé, te ní ndacá táhú-gã núú Yá Ndiòxí, te dàtnùní ní xáha-gã xii-güedé:

—Chí quéhé vàsú ñúhú ndùdí ndéhé yoho yàha stilé-a, te coho-ndo lùha lùha nchaa-ndo.

18 Te na càchí tnúhu tucu-í xii-ndo sã vítná-nã duha xiihi ndihi ñaha-í xii-ndo ndùdí ndéhé yoho yàha stilé-a te vá cóhó ndihi ñaha-gá-í, dico na sáá nduu naníhí tnàhá-ó núú ndécú Tàtà-í Dútú Ndiòxí táxi tnùní-gá, te dàvá-án cada ìni-ó sã dàtná sá cóhó

ndìhi ñaha tucu-í xii-ndo, chi ío cudíí ìní-ó —càchí-gá xáha<sup>n</sup>-gã xii-güedé.

19 Te sátá nǐ túhú cóhó-güedé ní cudìni-güedé, te ní quehe<sup>n</sup>-gá pàá te ní ndacá<sup>n</sup> táhú tucu-gá núú Yá Ndiöxí, te dàtnùní ní táhú cuèchi-gá, te ní dácãhñu ñaha-gã xii-güedé, te xáha<sup>n</sup>-gã:

—Pàá-a cùu-xi datná yiqui cùñú-í, chi cahni ñaha-güedé xii-í sá cuendá-ndó, te duca<sup>n</sup>-ni càxi-ndo paá-a cuendá ndacu ìní ñáhá-ndó xii-í —càchí-gá xáha<sup>n</sup>-gã xii-güedé.

20 Te ñu-<sup>n</sup>i duca<sup>n</sup> nǐ quide-gá ndìhi vàsú ñúhú ndùdí ndéhé yoho yàha stilé, chi ní quehe<sup>n</sup>-gá te òré sãñaha-gã xii-güedé coho-güedé, te ní xáha<sup>n</sup>-gã:

—Ndudí ñúhú vàsú-a cada ìní-ndó sã cúú-xí dàtná ñíñí-í sá cãtí òré cahni ñaha-güedé xii-í. Te sá dúcá<sup>n</sup> cãtí ñíñí-í xíã<sup>n</sup> cutnùnì ndáá sá Yá Ndiöxí cada-gá ìngá núú sã vãha sá cúú-xí-ndó.

21 Dico vitna chi iha tñàhá téé cuáha cuendá ñáhá xii-í núú cuè téé cùu úhú ìní ñáhá yíhi-dé mèsá.

22 Te yúhú Téé cùu ñanì tñáhá-ndó nchàa-ndo ñuhu ichi-í cuáhá<sup>n</sup>-í cuú-í dàtná ní cachí Yá Ndiöxí. ¡Dico ndàhú ní cuu téé duca<sup>n</sup> na cuáha cuendá ñáhá xii-í núú cuè téé cùu úhú ìní ñáhá! —càchí-gá xáha<sup>n</sup>-gã xii-güedé.

23 Te ní ngüíta-güedé ndúcú tñuhu núú tñáhá-güedé ñuu ndéda càa-güedé duca<sup>n</sup> càda cuáha cuendá ñáhá xii-gá núú cuè téé cùu úhú ìní ñáhá.

*Xíndatnúhu-güedé ndëdacàa-güedé cunuu-gã*

24 Te sátá dúcá<sup>n</sup> te ní ngüíta-güedé xíndatnúhu-güedé ñuu ndëdacàa-güedé tàú-güedé cunuu-güedé.

25 Dico Jèsús ní xáha<sup>n</sup>-gã xii-güedé:

—Nchaa cue téé yíndaha ñaha xii ñáyiu ío tàxi tñunì-güedé, te mee-güedé cùnì-güedé sá càhá<sup>n</sup> váha ñáyiu cuendá-güedé.

26 Dico nchòhó vá dúcá<sup>n</sup> càda-ndo, chi núú ñ<sup>n</sup>-ndo cùnuu te cada-<sup>n</sup>i-ndo sã ñà túú cùnuu-ndo, àdi cuu-ndo ñ<sup>n</sup> téé tàxi tñunì ñáhá xii cue téé xínu cuechi, te cada-<sup>n</sup>i-ndo sã cúú-ndó ñ<sup>n</sup> téé xínu cuechi-á<sup>n</sup>.

27 Te vá càchí-ó sã tée xínu cuechi cunuu-gá-dé, chi téé quíhu mèsá cùnuu-gá-dé. Dico yúhú ndécú ndìhi ñaha-í xii-ndo dàtná ñ<sup>n</sup> téé xínu cuechi.

28 Te nchòhó duca<sup>n</sup>-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sá táyáha-í véxi.

29 Te Tãtà-í Dútú Ndiöxí ní cachí-gá sá táxi tñunì-í, te yúhú càchí-í xii-ndo sã sãá nduu te tñàhá-ndó tàxi tñunì-ndó.

30 Te dàvá-á<sup>n</sup> caxi-o coho-o càda-o núú táxi tñunì-í, te yacá<sup>n</sup> ngüíta-ndo càda ndáá-ndó cuèchi ndi úxúú xi-chi ñáyiu isràél —càchí-gá xáha<sup>n</sup>-gã xii-güedé.

*Jèsús càhá<sup>n</sup>-gá sá tẽ Pèlú cúñaha-dẽ xii ñáyiu sá ñà túú xini ñáhá-dẽ xii-gá (Mt. 26:31-35; Mr. 14:27-31; Jn. 13:36-38)*

31 Te Xítohó Jesucrístú ní xáha<sup>n</sup>-gã xii té Xímú:

—Yòhó Xímú, cundedóho váha ñ<sup>n</sup> tñuhu na càhá<sup>n</sup>-í-a, chi dàtná cùnì-n quide táchí tríú sàcá<sup>n</sup>-xi duha sàcá<sup>n</sup>-xi dácá<sup>n</sup>, duca<sup>n</sup> quèsaha yucu ñávãha cada ñaha-xi xii-ndo. Chi coto ndeé ñáhá-xi xii-ndo te núu ndisa sàndáá ìní ñáhá-ndó xii-í.

32 Dico yúhú xicá<sup>n</sup> táhù-í núú Yá Ndiöxí cuendá-n, cuendá sá vã dáñá ndeé-n quíndáá ìní ñáhá-n xii-í. Te òré ndixi túu ìní-n sã ñà túú ní quide váha-n, te quíhí<sup>n</sup>-n cuáha-n cuè téé cùnìhi-n tñuhu ndeé ìní cuendá canchicú<sup>n</sup> nihnu-ni-güedé ichi Yá Ndiöxí —càchí-gá xáha<sup>n</sup>-gã xii-dé.

33 Te ní xáha<sup>n</sup>-dè xii-gá:

—Mèstrú, sa ndècu túha-í sá quíhí<sup>n</sup> ndìhi ñaha-í xii-n vècaá, àdi cuéi na cúú ndìhi ñaha-í xii-n —càchí-dé xáha<sup>n</sup>-dè xii-gá.

34 Te Jèsús ní xáha<sup>n</sup>-gã:

—Pèlú, na càchí tñuhu-í xii-n sã cùmánì-gã cana ñ<sup>n</sup> líhi te únì xito càhá<sup>n</sup>-n núú ñáyiu sã ñà túú xini ñáhá-n xii-í —càchí-gá xáha<sup>n</sup>-gã xii-dé.

*Sa ní cuyatni ndoho Jèsús*

35 Te Jèsús ní xáha<sup>n</sup>-gã xii-güedé:

—Te cùnàhá ní tendaha ñaha-í xii-ndo ní sáhá<sup>n</sup>-ndó chiu<sup>n</sup>-í, chi ñà túú ní cãnehe-ndo nì ñ<sup>n</sup> sá cúhú<sup>n</sup> dñhú<sup>n</sup>-ndó, te nì ñ<sup>n</sup> sá cúhú<sup>n</sup>

ndàchiu<sup>n</sup>-ndo ñá túú ní cãnehe-ndo, Te chí cãchí tnúhu núu ió ñ<sup>n</sup> sá ñi cumání xii-ndo —cãchí-gá xáha<sup>n</sup>-gã xii-güedé.

Te ní xáha<sup>n</sup>-güedé:

—Ñáhá, chí ñi ñ<sup>n</sup> sá ñá túú ní cùmání xii-ndí —cãchí-güedé xáha<sup>n</sup>-güedé xii-gá.

<sup>36</sup> Te ní xáha<sup>n</sup>-gã:

—Te vitna núu ndècu ndihi-ndo sá sácũhu<sup>n</sup> díhú<sup>n</sup>-ndó, àdi sá sácũhu<sup>n</sup> ndachiu<sup>n</sup>-ndo te canehe-ndo. Te núu ñá túú ndècu ndihi-ndo machití, te nadico-ndo dǒó tĩcachi ñihnu-ndo te cuaa<sup>n</sup>-ndo.

<sup>37</sup> Te na cãchí tnúhu-í xii-ndo sã dácuití sá yáha-í nãcuáa cãhá<sup>n</sup>-xi núu tütú Yã Ndiõxí núu cãchí-xi: “Ñ<sup>n</sup>-ni ñi quide ñaha-güedé xii-gá, ndihi cue téé ndècu cuéchi-xi”, duha cãchí-xi núu tütú-gá. Te ñá díú-ní xǎ<sup>n</sup> yáha-í chí nchaandi túhú nãcuáa cãhá<sup>n</sup>-xi núu tütú-gá yáha-í —cãchí-gá xáha<sup>n</sup>-gã xii-güedé.

<sup>38</sup> Te xáha<sup>n</sup>-güedé:

—Mèstrú, iha ndècu úú machití —cãchí-güedé xáha<sup>n</sup>-güedé xii-gá.

Te ní xáha<sup>n</sup>-gã:

—Chí náví-nã yuhu-ndo, vá cãhá<sup>n</sup>-gã-ndó —cãchí-gá xáha<sup>n</sup>-gã xii-güedé.

*Jèsús cãhá<sup>n</sup> ndihi-gá Yã Ndiõxí yucu Òlívú*

(Mt. 26:36-46; Mr. 14:32-42)

<sup>39</sup> Te Jèsús ní quee-gá cuáhá<sup>n</sup>-gá yucu Òlívú, chí duca<sup>n</sup> tnàhí quide-gá. Te cue téé xica cuu ndihi-gá nchicú<sup>n</sup> ñáhá-güedé xii-gá cuáhá<sup>n</sup>.

<sup>40</sup> Te òré ní quexìo-gá xiá<sup>n</sup>, te ní xáha<sup>n</sup>-gã xii-güedé:

—Chí cãhá<sup>n</sup> ndihi Yã Ndiõxí cuendá sá vã dácãhá<sup>n</sup> ñáhá yucu ñávãha xii-ndo càda-ndo sá ñá túú tàú-ndó càda-ndo —cãchí-gá xáha<sup>n</sup>-gã xii-güedé.

<sup>41</sup> Te sátá dúcá<sup>n</sup> te ní quee dè<sup>n</sup>-gá tnuú-güedé cuáhá<sup>n</sup>-gá ñ<sup>n</sup> xio, te sa ñùnchíí luha ní xica ndehe-gá núu ndécú-güedé, te xiá<sup>n</sup> ñi ngüíñí xití-gá cãhá<sup>n</sup> ndihi-gá Tãtã-gã Dútú Ndiõxí.

<sup>42</sup> Te xáha<sup>n</sup>-gã:

—Táu, te núu dícó cachí-n te tauni-hnu ñaha-n xii-í cuendá sá vã ndóhò-í ná sãá òré, dico vá cadá-n nãcuáa cãchí iní mée-í, chí cada-n nãcuáa cãchí iní mée-n —cãchí-gá xáha<sup>n</sup>-gã xii Tãtã-gã Dútú Ndiõxí.

<sup>43</sup> Te sátá dúcá<sup>n</sup> te ní quexìo ñ<sup>n</sup> espíritú xínú cuèchi núu Yã Ndiõxí ní sãñaha-gã-xi tnúhu ndee iní xii-gá.

<sup>44</sup> Te òré súúni ndihú iní-gá, te uu<sup>n</sup>-gá súúni ñi yuhu ñi iní-gá cãhá<sup>n</sup> ndihi-gá Dútú Ndiõxí, te tnée-gã cáá dàtná cáá ñíñí te ngóyó núu ñúhú.

<sup>45</sup> Te sátá ñi yáha ní cãhá<sup>n</sup> ndihi-gá Tãtã-gã Dútú Ndiõxí, te ní ndacuíñí-gá cuánuhú-gá núu ñi dándõo-gá cue téé-á<sup>n</sup>, te òré ní nasáá-gá te xixídí-güedé cuendá sá ño cuéhé tnúhu sãni iní-güedé cuendá-gá.

<sup>46</sup> Te xáha<sup>n</sup>-gã xii-güedé:

—¿Ná cuendá xidí-ndó? Chí ndácõo, te cãhá<sup>n</sup> ndihi-ndo Yã Ndiõxí cuendá sá vã dácãhá<sup>n</sup> ñáhá yucu ñávãha xii-ndo càda-ndo sá ñá túú tàú-ndó càda-ndo —cãchí-gá xáha<sup>n</sup>-gã xii-güedé.

*Ní tñi-güedé Jèsús ndécá ñaha-güedé cuáhá<sup>n</sup>*

(Mt. 26:47-56; Mr. 14:43-50; Jn. 18:2-11)

<sup>47</sup> Te cãhá<sup>n</sup> dúcá<sup>n</sup>-ní Jèsús ní quexìo vai cue téé, te ñ<sup>n</sup> téé xica cuu ndihi-gá nání Jùdás cúnùu-dé yódó ñu-dé núu-güedé ní quexìo ndée núu-gã, te ní teyuhu ñaha-dé xii-gá, te núu tnàhá téé-á<sup>n</sup> cúú ùxúú cue téé xica cuu ndihi-gá.

<sup>48</sup> Te ní xáha<sup>n</sup> Jèsús xii-dé:

—Jùdás, ¿te yòhó cuáha cuendá ñáhá-n xii yúhú Téé cùu ñani tnàhá-ndó nchàa-ndo núu cuè téé cùu úhú iní ñáhá xii-í cãhá<sup>n</sup>-n ñu duha tèyuhu ñaha-n-á<sup>n</sup>? —cãchí-gá xáha<sup>n</sup>-gã xii-dé.

<sup>49</sup> Te sátá ñi xiní nchaa cue téé cundihí Jèsús nãcuáa cùu cue téé ní quexìo-á<sup>n</sup>, núu ní xicá<sup>n</sup> tnúhú-güedé núu-gã, te xáha<sup>n</sup>-güedé xii-gá:

—Mèstrú, ¿cùu nãá-ndí ndihi-güedé ndihi machití-a ñã? —cãchí-güedé xáha<sup>n</sup>-güedé xii-gá.

50 Te ñ<sup>n</sup>-dé ní xehndé-ni-dé lóho xio cùha ñ<sup>n</sup> cue téé ní quexìo-á<sup>n</sup>, te téé-á<sup>n</sup> xínú cuèchi-dé núú dùtú cúnùu-gá, te ní quendéé duu<sup>n</sup> lóho-dé.

51 Te Jèsús ní xáha<sup>n</sup>-gã xii-güedé:  
—Chí dáñá-güedé, vá dúcá<sup>n</sup> càda-ndo —cachí-gá xáha<sup>n</sup>-gã xii-güedé.

Te ní dácáa-gá ndaha-gá ní tendaha-gá núú ñí xíndeé lóho téé-á<sup>n</sup>, te ní nduu váha dàtná-ni càa.

52 Te nchaa cue téé cùu dùtú cúnùu, ndihi cue téé tàxi tñuní nchaa cue téé quide cuendá veñúhu sá ño cúnuu, ndihi cue téé cùu sacuéhé núú ñáyi isràél, nchaa cue téé-á<sup>n</sup> vèxi tñi ñaha-güedé xii-gá, te ní xáha<sup>n</sup>-gã xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécù-í, dàtná quidé-ndó ñ<sup>n</sup> ñadúhú quidé ñaha-ndo xii-í.

53 Te duca<sup>n</sup>-ni ñí xini-ndó ñí xíndecù-í xití veñúhu càhnu sá ño cúnuu ní xóo danèhé-í ñáyi, te ni lùha ñá túú ní cùu tnándeé ñáhá-ndó xii-í òré-á<sup>n</sup>, te vitna ní sáá òré duca<sup>n</sup> càda-ndo, te cada sácúhná nàcuáa cùu iní-xi —cachí-gá xáha<sup>n</sup>-gã xii-güedé.

*Té Pèlú càhá<sup>n</sup>-dé núú ñáyi sá ñà túú xini-dé Jèsús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Te ní tñi-güedé Jèsús, te ndèca ñaha-güedé xii-gá cuáhá<sup>n</sup> vehe téé cùu dùtú cúnùu-gá, te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup>.

55 Te òré ní quexìo-güedé xía<sup>n</sup> te ní dátñáhá-güedé ñuhú quehé vehe-á<sup>n</sup>, te ni càndéé yuhu ñuhú-á<sup>n</sup> ñí ngóo teté-güedé, chí quide víxi-xi, te tnàhá té Pèlú ní ngóo teté ndihi ñaha-dé xii-güedé.

56 Te xía<sup>n</sup> ndécú ñ<sup>n</sup> xíchí xínú cuèchi vehe-á<sup>n</sup>, te òré ní xini-xi núcóo teté tnàhá té Pèlú, te ní ndacoto-xi núú-dé, te ní xáha<sup>n</sup>-xi xii-güedé:

—Tnàhá téé-a xica cuu ndihi-dé téé ndèca-güedé cuánguihu-á<sup>n</sup> —cachí-xi xáha<sup>n</sup>-xi xii-güedé.

57 Dico té Pèlú ñá túú ní ññuu-dé, te xáha<sup>n</sup>-dè xii-xi:

—Yúhú ñá túú xini-í téé-á<sup>n</sup> —cachí-dé xáha<sup>n</sup>-dè xii-xi.

58 Te tna tnaa-ni ní cuu, te ní xini ñáhá tucu ñ<sup>n</sup>-dé, te xáha<sup>n</sup>-dè:

—Yòhó tnàhá-n xica cuu ndihi-n téé ndèca-güedé cuánguihu-á<sup>n</sup> —cachí-dé xáha<sup>n</sup>-dè xii-dé.

Dico té Pèlú ní xáha<sup>n</sup>-dè:

—Ñáhá, ñá díú yúhú xica cùu ndihi-í-dé —cachí-dé xáha<sup>n</sup>-dè.

59 Te sa ní cuu dàtná ñ<sup>n</sup> òré te càchí tucu ingá-dé:

—Ndáá sá tēe-a xica cuu ndihi-dé téé ndèca-güedé cuánguihu-á<sup>n</sup>, chí tnàhá-dé cùu-dé téé distritú Galileá —cachí-dé xáha<sup>n</sup>-dè xii-güedé.

60 Te té Pèlú ní xáha<sup>n</sup>-dè xii téé-á<sup>n</sup>:

—Yúhú ñá túú cùnuní iní-í nása nduu tñuhu càhá<sup>n</sup>-n —cachí-dé xáha<sup>n</sup>-dè.

Te ni vátá xinu duca<sup>n</sup>-gã tñuhu càhá<sup>n</sup>-dé ní cana-ni ñ<sup>n</sup> líhi.

61 Te Xitohó Jesucristú ní nchócótó-gã núú-dé, te òré-ni-á<sup>n</sup> ñí ndacu iní-dé tñuhu ní xáha<sup>n</sup>-gã xii-dé sá cùmání-gã cana ñ<sup>n</sup> líhi, te úní xito càhá<sup>n</sup>-dé sá ñà túú xini ñáhá-dè xii-gá.

62 Te té Pèlú ní quee-dé tnuú-güedé cuáhá<sup>n</sup>-dé ñ<sup>n</sup> xio, te ní ndáhyú víhí-dé ní ndixi cuèchi iní-dé.

*Cùdiquí ndeé-güedé Jèsús*

(Mt. 26:67-68; Mr. 14:65)

63-64 Te cue téé ndéé ñáhá xii Jèsús ní cudíquí ndeé ñáhá-güedé xii-gá, te ní dádáhu-güedé núú-gá, te ní caniha-güedé xii-gá, te xáha<sup>n</sup>-güedé:

—¡Cáhá<sup>n</sup> ná cótó yòo ní caniha xii-n! —cachí-güedé xáha<sup>n</sup>-güedé xii-gá.

65 Te cuéhé víhí-gã tñuhu cuéhé ní xáha<sup>n</sup>-güedé xii-gá.

*Jèsús ndécú-gã jündá*

(Mt. 26:59-66; Mr. 14:55-64; Jn. 18:19-24)

66 Te sátá ñí túnndá, te ní tacá cue téé cùu sacuéhé núú ñáyi isràél, ndihi cue téé cùu dùtú cúnùu, ndihi cue téé dàcuaha ñaha xii-yu nchaa tñuhu ní chídó tñuní ndí Moisés, te ndèca-güedé Jèsús cuáhá<sup>n</sup> núú cáda-güedé jündá, te òré ní quexìo-güedé ndihi-gá núú cáda-güedé jündá-á<sup>n</sup>, te ní xáha<sup>n</sup>-güedé xii-gá:

67 —Cuini-ndí cachí tñuhu-n xii-ndí núu diu-n cùu-n Cristú Yáá ní tendaha

Yă Ndiöxí véxi ñuyíú-a —càchí-güedé xăha<sup>n</sup>-güedě xii-gá.

Te ní xăha<sup>n</sup>-gă xii-güedé:

—Te núu na cächí-í sá díú-í cúú Cristú ñá, te nì vá quíndáá iní-ndó,

<sup>68</sup> àdi te núu ì<sup>n</sup> sá ná cacă<sup>n</sup> tnúhu-í núú-ndó, te nì vá cächí tnúhu-ndo, te nì vá dáñá ñàha-ndo.

<sup>69</sup> Dico vitna ní cuyatni nduu ngóo yúhú Tée cùu ñaní tnáhá-ndó nchàa-ndo xio cuha Dútú Ndiöxí Yaá ío cùnuu —cachí-gá xăha<sup>n</sup>-gă xii-güedé.

<sup>70</sup> Te dătnùní nchaa-güedé ní xícá<sup>n</sup> tnúhú-güedě núú-gă, te xăha<sup>n</sup>-güedě xii-gá:

—¿Te yòhó cúú-n Dêhe Yá Ndiöxí te núu duca<sup>n</sup> vâni? —cächí-güedé xăha<sup>n</sup>-güedě xii-gá.

Te ní xăha<sup>n</sup> Jèsús:

—Ndáá sá díú Dêhe-gá cúú-í dàtná cächí méé-ndó-ă<sup>n</sup> —cächí-gá xăha<sup>n</sup>-gă xii-güedé.

<sup>71</sup> Te ní xítñàha-güedé:

—Ñá túú-gă xíní ñùhu-xi cue tée cáhá<sup>n</sup> nùu ndáá sá ndècuéchi-dé àdi ñá túú ndècuéchi-dé chi yuhu mee-dé ní cáhá<sup>n</sup>-dé vitna ní xíndedóho-o —cächí-güedé xítñàha-güedé.

## 23

*Jèsús ndécú-gă núú tē Pìlatú*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Te nchaa-güedé ní ndacuíñí-güedé, te ndèca-güedé Jèsús cuáhá<sup>n</sup> núú tē Pìlatú,

<sup>2</sup> te núú tē-á<sup>n</sup> nì ngúita-güedé sàcá<sup>n</sup> cuéchi-güedé cuèndá-gá, te xăha<sup>n</sup>-güedě:

—Ní naníhí-ndí tée-a dândahú-dé ñáyíu ñuú-ó, chi xăha<sup>n</sup>-dě xii-yu sá vă chăhu-gá-yu impuèstú xii tē Cèsár tée ío cùnuu, te cächí-dé sá díú-dě cúú-dě Cristú Yaá ní tendaha Yă Ndiöxí véxi ñuyíú-a te yíndaha-dé ñáyíu cächí-dé —cächí-güedé xăha<sup>n</sup>-güedě xii-dé.

<sup>3</sup> Te tē Pìlatú ní xícá<sup>n</sup> tnúhu-dé núú-gă, te xăha<sup>n</sup>-dě xii-gá:

—¿Ndáá sá díú-n cùu-n tée yíndaha ñaha xii ñáyíu isràél-ă<sup>n</sup>? —cächí-dé xăha<sup>n</sup>-dě xii-gá.

Te Jèsús ní xăha<sup>n</sup>-gă xii-dé:

—Díu-í yíndàha-í-yu —cächí-gá xăha<sup>n</sup>-gă xii-dé.

<sup>4</sup> Te tē Pìlatú ní xăha<sup>n</sup>-dě xii nchaa ñáyíu, ndíhi cue tée cùu dútú cùnùu:

—Yúhú cútñùní iní-í sá ñà túú nì ì<sup>n</sup> cuéchi tée-a —cächí-dé xăha<sup>n</sup>-dě xii-yu.

<sup>5</sup> Dico níhi-gá ní cáhá<sup>n</sup>-güedé, te xăha<sup>n</sup>-güedě:

—Cächí-ndí sá ío dusa<sup>n</sup> xíquide ñáyíu cuèndá nchaa sá dánèhé ñáhá-dě xii-yu, te ní quesaha-dě ndéé distritú Galileá, te ní yáha-dé ñíhí distritú Jùdeá dánèhé-dé ñáyíu, te vitna ní sáa-ni-tu-dé ndéé ndíha dānehé-dé-yu —cächí-güedé xăha<sup>n</sup>-güedě xii tē Pìlatú.

*Jèsús ndécú-gă núú tē Hèrodés*

<sup>6</sup> Te sá dúcá<sup>n</sup> nì tecú dóho tē Pìlatú ní cacu nehé-yu distritú Galileá, núu xíá<sup>n</sup> ní xícá<sup>n</sup> tnúhú-dě núú-yu núu tē Galileá cúú-gă.

<sup>7</sup> Te ní xáhă<sup>n</sup>-yu sá díú tēe yàcá<sup>n</sup> cúú-gă, núu xíá<sup>n</sup> ní na dàyáha ñaha-dě xii-gá ndaha tē Hèrodés tée cùu gobiernú distritú Galileá chi nduu-ă<sup>n</sup> ndécú-dě tnáhá-dé ñuú Jerusalén-á<sup>n</sup>.

<sup>8</sup> Te òré ní xíní tē Hèrodés-á<sup>n</sup> Jèsús te ío ní cudíí ìní-dé, chi ní cunaha dùca<sup>n</sup>-ni cuíní-dé quíní ñáhá-dě xii-gá te ñá túú tnàhí xíní ñáhá-dě xii-gá ní cùu, chi cuèndá-ni tnúhu ñíhí-dé cuèndá-gá, te ndètu-dé sáá ì<sup>n</sup> nduu quíní ñáhá-dě xii-gá, te cada-gá ì<sup>n</sup> sá vă yòo tnàhí ndàcu cada cundehe-dé ní sani iní-dé.

<sup>9</sup> Te vâi sá nì xícá<sup>n</sup> tnúhú-dě núú Jèsús, dico ní ì<sup>n</sup> tnúhu ñá túú ní cáhá<sup>n</sup>-gá.

<sup>10</sup> Te xíá<sup>n</sup> xíndecu tnàhá cue tée cùu dútú cùnùu, ndíhi cue tée dàcuaha ñaha xii ñáyíu nchaa tnúhu ní chídó tnùnì ndíi Moisés, te cue tē-á<sup>n</sup> sùúnì ío iní-güedé sàcá<sup>n</sup> cuéchi-güedé cuèndá-gá.

<sup>11</sup> Te tē Hèrodés ndíhi cue tée cùu sandadú-dé ñá túú ní cùu vâha iní-güedé núú Jèsús, te ní cudíquí ndéé ñáhá-güedě xii-gá, te ní dácúihnú ñaha-güedé dóó vâha xii-gá dàtná cáá dóó sácúihnu cue tée sàquíndaha ñaha xii ñáyíu. Te dătnùní

té Hèrodés ní dánùhú ñáhá tùcu-dé xii-gá ndaha té Pilatú.

<sup>12</sup> Te nduu-ǎ<sup>n</sup> ñí tnahá tnúhu té Pilatú ndíhi té Hèrodés, chí cùu úhú iní tnahá-güedé ní cùu.

*Càchí-güedé sá cáhni-güedé Jèsús*

(Mt. 27:15-26; Mr. 15:6-15; Jn. 18:39-19:16)

<sup>13</sup> Te té Pilatú ní nadatàcá-dé nchaa cue téé cùu dútú cùnùu ndíhi dava-gá cue téé cùnùu, ndíhi nchaa ñáyiu ñuú-á<sup>n</sup>,

<sup>14</sup> te ní xáha<sup>n</sup>-dè:

—Nchòhó ndécá-ndó tēe-a véxi ní taxi cuendá-ndó-dé iha, te càchí-ndó sǎ ïo dusa<sup>n</sup> quide ñáyiu cuendá nchaa sá dánèhé ñáhá-dé xii-yu, te núú-ndó ndùcu tnúhu-í núú-dé ñuú ná ní quide-dé. Dico yúhú cùtnùní iní-í sá ñà túú nì ì<sup>n</sup> cuéchi-dé dàtná càhá<sup>n</sup>-ndó-ǎ<sup>n</sup>.

<sup>15</sup> Te cuéi té Hèrodés ñuú-á<sup>n</sup> duca<sup>n</sup> càhá<sup>n</sup>-dé sá ñà túú cuéchi-dé ñuú ní techiù<sup>n</sup> ñaha tucu-dé cuándixi-dé iha. Te vitna sa ní cutnùní iní-ó sǎ ñà túú tàú-xi cahni-o-dé chí ñà túú cuéchi ní quide-dé.

<sup>16</sup> Te na dàndoho-ni-í-dé te dàcácu-í-dé —càchí-dé xáha<sup>n</sup>-dè xii-yu.

<sup>17</sup> Te ndí tnahá nduu víco pascuá te dacuití sǎ dácácu té Pilatú-á<sup>n</sup> ì<sup>n</sup> cue téé yíhi vecaá, chí duca<sup>n</sup> tnàhí quide-dé.

<sup>18</sup> Dico nchaá-yu ní cuáá-yu, te xáha<sup>n</sup>-yu xii-dé:

—¡Queñuhu téé nàni Jesús-á<sup>n</sup>, te cahni-n-dé! ¡Te dàcácu-n tē Barrábás! —càchí-yu xáha<sup>n</sup>-yu xii-dé.

<sup>19</sup> Te té Barrábás-á<sup>n</sup> ñí sanu ichi-dé ñáyiu ñuú ingá ichi, te ní ngüíta-yu ndíhi-dé ní cuu úhú iní-yu cue téé cùchiu<sup>n</sup>, te ní sahani-dé ndíyí núu xíá<sup>n</sup> ní chíhi ñaha-güedé vecaá xii-dé.

<sup>20</sup> Te té Pilatú cuíni-dé dàcácu-dé Jèsús ñuú xíá<sup>n</sup> càhá<sup>n</sup> ndíhi ñaha tùcu-dé xii-yu ní cùu,

<sup>21</sup> dico uu<sup>n</sup>-gá níhi ní cuáá-yu, te ní xáha<sup>n</sup>-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáha<sup>n</sup>-yu xii-dé.

<sup>22</sup> Te xito cuu úní ní xáha<sup>n</sup> tē Pilatú:

—¿Te ná cúu cuéchi ní quide-dé te núu duca<sup>n</sup> cuíni-ndó càda-í-dé-í? Te yúhú cùtnùní iní-í sá ñà túú cuéchi ní quide-dé ñuú xíá<sup>n</sup> ñà túú tàú-xi cahni-o-dé, te na dàndoho-ni-í-dé te dàcácu-í-dé —càchí-dé xáha<sup>n</sup>-dè xii-yu.

<sup>23</sup> Dico níhi-ni càhá<sup>n</sup>-yu xáha<sup>n</sup>-yu sá ná càta caa ñaha-dé xii-gá núú cùrúxí, te ñáyiu-á<sup>n</sup> ndíhi nchaa cue téé cùu dútú cùnùu xicáhá<sup>n</sup> níhi-güedé ndíhi-yu ndéé ní xínu iní té Pilatú cada-dé nàcuáa càchí iní-yu.

<sup>24</sup> Te ní xáha<sup>n</sup>-dè xii-yu sá cúu càda-dé nàcuáa xáha<sup>n</sup>-yu.

<sup>25</sup> Te duca<sup>n</sup> te ní dácácu-dé té Barrábás téé ní sanu ichi ñáyiu ñuú ingá ichi, te ñuú-á<sup>n</sup> ní sahani-dé ndíyí núu xíá<sup>n</sup> ní xíhi-dé vecaá, te dàtnùní ní táuchíu<sup>n</sup>-dè cada-güedé Jèsús nàcuáa xáha<sup>n</sup>-yu.

*Sàta caa-güedé Jèsús núú cùrúxí*

(Mt. 27:32-44; Mr. 15:21-32; Jn. 19:17-27)

<sup>26</sup> Te ndéca-güedé Jèsús cuáhá<sup>n</sup> núú catá càa ñaha-güedé xii-gá, te ichi cuáhá<sup>n</sup>-güedé ndíhi-gá ní tñi-güedé ì<sup>n</sup> téé ñuú Cirené nání-dé Xímú ñúhú-dé ichi duha cuándixi-dé ní sáhá<sup>n</sup>-dé yucu, te ní dácúidó ñaha-güedé xii-dé cùrúxí nchídó Jèsús, te ní ngüíta nchicú<sup>n</sup>-dé sátá-gǎ.

<sup>27</sup> Te ío cuéhé ñáyiu nchicú<sup>n</sup> ñáhá xii-gá cuáhá<sup>n</sup>, te vǎi ñáyiu ñuú ïo níhi ndàhí-yu sá ndíhú iní-yu cuendá Jèsús.

<sup>28</sup> Te Jèsús ní nchócótó-gǎ núu-yu, te ní xáha<sup>n</sup>-gǎ:

—Nchòhó ñáyiu ñuú Jerusàlén, vá ndàhyú-ndó cuendá-í chí ndàhyú cuendá méé-ndó ndíhi cuendá déhe-ndo.

<sup>29</sup> Chí sáá nduu quèsaha ñáyiu: “Sá vǎha táhú nchaa ñáyiu ñà túú càcu déhe-xi, ndíhi nchaa ñáyiu vátá quíni-gá cuhu<sup>n</sup> déhe-xi, chí ní ñà túú xini-yu dacadí-yu”, duha quesàhá-yu.

<sup>30</sup> Te dàvá-á<sup>n</sup> cññaha ñáyiu xii nchaa tindúú ndíhi nchaa núú xìquí: “Chí tácu<sup>n</sup> ngónchihi ñaha-ndo xii-ndí”, duha cúñahá-yu.

31 Te núu yúhú tée quide ndáa duha quide ñaha-güedé xii-í vitna, te ndèé-gá cada-güedé nchaa ñáyi ndècu ichi cuehé ichi duha —càchí-gá xáha<sup>n</sup>-gã xii-yu.

32 Te ndèca tucu-güedé úu tnàhá cue tée ndècu ndisa cuéchi-xi cuáhá<sup>n</sup> cuèndá cahni ñaha-güedé xii-güedé ndihi Jèsús.

33 Te òré ní quexio-güedé ndihi-gá ñ<sup>n</sup> xichi núu nání Yìquí Díquí Ndiyi, te xiá<sup>n</sup> ní sata caa ñaha-güedé xii-gá núu cùrúxí, ndihi úu cue tée ndècu ndisa cuéchi-xi-á<sup>n</sup>, te ñ<sup>n</sup>-dé ní sata caa-güedé xio cùha-gá te ingá-dé ní sata caa-güedé xio dàtni-gá diu-ni núu cùrúxí tucu.

34 Te ní xáha<sup>n</sup>-gã xii Tàtá-gã Dútú Ndióxi:

—Táu, cada càhnu iní sá quidé-güedé, chi ñá túu cùtnuní iní-güedé ná cúu sá quidé-güedé —càchí-gá xáha<sup>n</sup>-gã.

Te cue tée cùu sandadú ní xito ndèé-güedé núu ndèdacàa-güedé cuu cuèndá-güedé dóo-gã.

35 Te nchaa ñáyi xĩndecu-á<sup>n</sup> ndéhě-yu nàcuáa quide-güedé Jèsús, te nchaa cue tée cùnuu ní cudíquí ndeé ñáhá-güedé xii-gá, te ní xitnàha-güedé:

—Te dava ñáyi ní ndacu-dé ní dácácu nihnu-dé, te vitna na dácácu nihnu-dé méé-dé, te núu ndisa sá Cristú Yaá ní tendaha Yá Ndióxi véxi ñuyíú-a cùu-dé —càchí-güedé xitnàha-güedé.

36 Te tnàhá cue tée cùu sandadú ní cudíquí ndeé ñáhá-güedé xii-gá, chi ní sàndehe yatni-güedé núu táca-gá sãñaha-güedé ndudí íá còho-gá ní cùu,

37 te ní xáha<sup>n</sup>-güedé xii-gá:

—Te núu yòhó cúu-n tée yìndaha ñaha xii ñáyi isràél, te dácácu nihnu mee-n —càchí-güedé xáha<sup>n</sup>-güedé xii-gá.

38 Te ní taxi ndecu-güedé ñ<sup>n</sup> sá ndèé lètrá ndàa díquí-gã te ndèé úní núu tnùhu, tnùhu griégú, ndihi tnùhu làtín, ndihi tnùhu hèbreú, te duha quèe-xi ndi nuní núu tnùhu-á<sup>n</sup> “Tée-a cùu-dé tée yìndaha ñaha xii ñáyi isràél”, duha quèe-xi.

39 Te ñ<sup>n</sup> tée ndècu ndisa cuéchi-xi, tée ní sata caa-güedé diñi-gá xicuehé ñáhá-dé xii-gá, te xáha<sup>n</sup>-dè:

—Te núu yòhó cúu-n Cristú Yaá ní tendaha Yá Ndióxi véxi ñuyíú-a, te dácácu nihnu mee-n, te dácácu nihnu ñaha xii nchúhú tnàhá-ndí tucu —càchí-dé xáha<sup>n</sup>-dè xii-gá.

40 Dico ingá tée cùndihi-dé tée tàcaa ingá xio diñi-gá ní tenàá ñáhá-dé xii-dé, te xáha<sup>n</sup>-dè:

—¿Te náa ñá túu ndàcu iní-n Yá Ndióxi vitna duha càa-o ndoho-o ndihi tée nani Jesús-a ñá?

41 Chi nchoo tàú ndisa-o sã dúhá ndòho-o nacháhu-o cuéchi-o, dico Jèsús-a chi ñá túu cuéchi-dé —càchí-dé xáha<sup>n</sup>-dè xii tée tàcaa ndihi-dé-á<sup>n</sup>.

42 Te dàtnuní ní xáha<sup>n</sup>-dè xii-gá:

—Jèsús, ndacu iní ñáhá-n xii-í òré ná quixi-n taxi tnuní-n ñuyíú-a —càchí-dé xáha<sup>n</sup>-dè xii-gá.

43 Te Jèsús ní xáha<sup>n</sup>-gã:

—Na càchí tnùhu ndáá-í xii-n sã méi ndùu vitna cundecu ndihi ñaha-í xii-n núu ní nduu táhú-í cundecu-í —càchí-gá xáha<sup>n</sup>-gã xii-dé.

### Ní xihí Jèsús

(Mt. 27:45-56; Mr. 15:33-41; Jn. 19:28-30)

44 Te òré ní cuu cuádava nduu. Te ní cunee nihí ñuyíú, te duca<sup>n</sup>-ni càa ní cuu ndèé caá úní sacuaa.

45 Chi ñá túu-gã ní dàyehé nchíanchii te ní ndátá dõó cúu còrtiná veñuhu càhnu sá ío cùnuu ní quée dava ndáa.

46 Te níhi ní cáhá<sup>n</sup> Jèsús, te xáha<sup>n</sup>-gã xii Tàtá-gã Dútú Ndióxi:

—Táu, naquehe<sup>n</sup> cuèndá-n espíritú-í —càchí-gá xáha<sup>n</sup>-gã xii Tàtá-gã.

Te tnùhu-ná-á<sup>n</sup> ní cáhá<sup>n</sup>-gã te ní xihí-ni-gá.

47 Te òré ní xiní tée cùu capitá<sup>n</sup> sá dúcá<sup>n</sup> ní cuu, te ní ndacu iní-dé Yá Ndióxi, te ní cachí-dé:

—Sá ndáa ndisa sá tée-a cùu-dé ñ<sup>n</sup> tée ío quide ndáa ndécú ñuyíú-a ní cùu —duha ní cachí-dé.

48 Te chitu ñáyi ní tacá xiá<sup>n</sup> chi cuíní-yu cundehé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedé xii-gá,



te ní ndihí-yu ní ndaca ta caní-yu pèchú-yu cuánuhú sá ndihú iní-yu.

<sup>49</sup> Dico ndècu tnahá cue ñáyiú xíní tnahá ndihí Jesús, ndihí ñáyiú dñí ní chinchícú ñáhá xii-gá ndéé distritú Galileá, te ñáyiú-án xica-ni xixínutñí-yu xíndéhě-yu nchaa nàcuáa ní quide ñaha-güedě xii-gá.

*Chindúxi-güedě Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Te ndècu ñí tée ñuú Arimàtea nání-dě Chèé, te ñuú-án yíndèhu-xi distritú Jùdeá, te ío váha iní-dé te quide ndáá-dé núú Yá Ndiöxí, te tñáhá-dé cúú-dě chiu<sup>n</sup> te ní xíndecu-dé jundá cue tée israél.

<sup>51</sup> Te ñá ní tñáhá tñahí iní-dé nàcuáa ní cáhá<sup>n</sup>-güedě núú jundá nàcuáa cada-güedě Jesús. Te tée-án ndétú-dě sáá nduu ndihu ndaha ñaha Yá Ndiöxí xii-dé ndihí ñáyiú.

<sup>52</sup> Te tée-án ñí sáhá<sup>n</sup>-dé núú tē Pilatú te ní xáha<sup>n</sup>-dě sá ñúú vá cundèe iní-dé dañá-dé chindúxi-dé yiqui cùñú Jesús. Te tē Pilatú-án ñí sáha-dé tñúhu.

<sup>53</sup> Te ní nunehe-dé yiqui cùñú-gá núú cùrúxí, te ní chidúcú<sup>n</sup>nuu-dé ñí dóó cuixí<sup>n</sup>, te ní chihi-dé ñí yaú nchii yiqui naha càva, te vátá yōo ñí-gá nguíndüxi yaú-án.

<sup>54</sup> Te cùu-xi nduu vispré nduu ndètatú ñáyiú, núú xíquide túha-ná-yu sá cúú ìngá nduu.

<sup>55</sup> Te nchaa ñáyiú dñí ní chinchícú<sup>n</sup> ñáhá xii Jesús ndéé distritú Galileá ndèndàhá-yu tē Chèé ní sáhá<sup>n</sup> núú nchii yaú-án, núú ní xiní-yu nàcuáa ní sacá<sup>n</sup>-dé yiqui cùñú-gá xití yaú-án.

<sup>56</sup> Te duca<sup>n</sup> te cuánuhú-yu vehé-yu, te ní quide túha-yu acití sáhá<sup>n</sup> tñámí, ndihí pomadá, te ní ndetatú-yu ìngá nduu-án ñí quidé-yu nàcuáa càhá<sup>n</sup> tñúhu Yá Ndiöxí.

## 24

*Ní ndoto Jesús*

(Mt. 28:1-10; Mr. 16:1-8; Jn. 20:1-10)

<sup>1</sup> Te ndumìngú nehé víhí-ní cuáhá<sup>n</sup> tucu ñáyiú dñí núú nchii yaú ní

chihi-güedě yiqui cùñú Jesús, te nèhé-yu nchaa sá sáhá<sup>n</sup> tñámí ñí quide túha-yu-án cuáhá<sup>n</sup>, te tñáhá tucu ñí ùú-gá tñaha dñí-yu nchícú<sup>n</sup> ñáhá xii-yu cuáhá<sup>n</sup>.

<sup>2</sup> Te òré ní quexió-yu yuhu yaú-án te ní xiní-yu sá yúú ndèdí ñí xio-ná ndécú,

<sup>3</sup> te ní quíhu-yu xití yaú-án, dico ñá túú-gá yiqui cùñú Jesús yíhí.

<sup>4</sup> Te ñá ní cùtnuní tñahí iní-yu ndéé ichi cuáhá<sup>n</sup> yiqui cùñú-gá, te ní xiní-yu úú espíritú xínú cuèchi núú Yá Ndiöxí xínutñí-xi dñí-yu te xixíhnu-xi dóó chàhchí.

<sup>5</sup> Te ní yùhú-yu te ñá túú ní cùyí<sup>n</sup>-yu cundèhé-yu cue espíritú-án, te cue espíritú-án ñí xáha<sup>n</sup>-xi xii-yu:

—¿Ná cuendá nándücu-ndo Jesús Yaá ndécú vívú núú yíndüxi ñáyiú ní xihí-i?

<sup>6</sup> Te ñá túú-gá yiqui cùñú-gá ndécú ìha chi sa ní ndoto-gá, te chí dándàcu iní nàcuáa ní cáhá<sup>n</sup>-gá cùtnàhá ní xíndecu-ndo ndihí-gá distritú Galileá,

<sup>7</sup> chi ní cachí-gá sá méé-gá cúú-gá ñaní tñáhá-ndó nchàa-ndo, te dacuítí cuáha cuendá ñáhá-güedě xii-gá núú cuè tée ndècu ichi cuehé ichi duha, te cata caa ñaha-güedě xii-gá núú cùrúxí, te núú cùrúxí-án cuú-gá dico nduu úní sá cùú-gá te ndoto-gá, duha ní cachí-gá xii-ndo.

<sup>8</sup> Te òré-án ñí ndacu iní-yu tñúhu ní cáhá<sup>n</sup> Jesús.

<sup>9</sup> Te sátá dúcá<sup>n</sup> te ní naquehé<sup>n</sup>-yu ichi cuánuhú-yu, te ní caní-yu cuèndú núú ndi úxí ñí cue tée ní táuchíú<sup>n</sup> Jesús cáhá<sup>n</sup> tñúhu-gá, ndihí núú dàva-gá ñáyiú.

<sup>10</sup> Te ñáyiú duca<sup>n</sup> ñaha tñúhu cuánuhú núú-güedě-án cúú tã Màriá Magdaléná, ndihí tá Juáná, ndihí tá Màriá náná tē Jàcobó, ndihí dava-gá ñáyiú dñí.

<sup>11</sup> Dico cue tée-án ñí sani iní-güedě sá dícó cáhú ìní-yu tñúhu xáhá<sup>n</sup>-yu xii-güedě ñúú ñá túú ní sàndáá iní-güedě nàcuáa ní xáhá<sup>n</sup>-yu.

12 Dico té Pèlú ní quee-dé xínú-dě cuáhá<sup>n</sup> cuándéhé-dě yaú núú nǐ chihi-güedé yiqui cùñú Jèsús, te ní sáá-dé te ní ngáundeyi-dé xító nihni-dé xítí yaú-á<sup>n</sup> te ní xiní-dé sá méé-nǎ dóó nǐ xíducú<sup>n</sup> nuu-gá yúcu ñ<sup>n</sup> xio, te ío ní cuñúhu-dé sá dúcá<sup>n</sup> nǐ cuu, te ní natnñ-dé ichi cuánuhú-dé vehe núú xíndecu-güedé.

*Ichi ñuú Emàús*  
(Mr. 16:12-13)

13 Te ñi-ni nduu-ǎ<sup>n</sup> ñúhú ùú cue téé ní xica cuu ndihí Jèsús ichi cuáhá<sup>n</sup>-güedé ñ<sup>n</sup> ñuú nání Emàús, te sàcúhu<sup>n</sup>-güedé dàtná úú òré ichi ndéé ñuú Jerusálén, te ndéé ñuú Emàús.

14 Te ta ndàtnúhu-güedé cuáhá<sup>n</sup> nchaa nàcuáa ní cuu,

15 te ñini dùca<sup>n</sup> xícáhá<sup>n</sup>-güedé, te Jèsús ní natnahá ñáhá-gǎ xii-güedé te ndèca tnahá-gá ndihí-güedé cuáhá<sup>n</sup>.

16 Te cuèi ndèhe ñaha-güedé xii-gá dico dàtná ñ<sup>n</sup> sá ndèdí núú-güedé, chi ñá ná quini ñáhá-güedé xii-gá ní cùu.

17 Te Jèsús ní xícá<sup>n</sup> tnúhú-gǎ núú-güedé, te xáha<sup>n</sup>-gǎ:

—¿Ná tnúhu xícáhá<sup>n</sup>-ndó ñuhu-ndo ichi núu duca<sup>n</sup> ño cùu ndiyí-ndó-í? —càchí-gá xáha<sup>n</sup>-gǎ xii-güedé.

18 Te ñ<sup>n</sup> téé nani Cleofás ní xáha<sup>n</sup>-dě xii-gá:

—¿Te ná cuendá nchaa ñáyiú íchí nǐ sáá ñuú Jerusálén xini-yu nchaa nàcuáa ní cuu, te ñ<sup>n</sup> ñi-ná yòhó ñá túú xini-n-í? —càchí-dé xáha<sup>n</sup>-dě xii-gá.

19 Te ní xáha<sup>n</sup>-gǎ xii-güedé:

—¿Te ná ní cuu-í? —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé xii-gá:

—Cuendá Jèsús téé ñuú Nazàrét càhá<sup>n</sup>-ndí, chi téé-á<sup>n</sup> cúú-dě ñ<sup>n</sup> téé càhá<sup>n</sup> tnúhu Yá Ndióxi, te ío váha ndùu tnúhu càhá<sup>n</sup>-dé ní cùu, te quide-dé sá vǎ yòo tnàhí ndàcu cada nacúáa cudíí ñini Yá Ndióxi ndihí ñáyiú ní cùu.

20 Te cue téé cùu dútú cùnùu, ndihí cue téé cùnùu taxi tnuní ñáhá xii-ndí ní sáha cuendá ñáhá-güedé xii-dé núú tǎ Pilatú te ní sata caa ñaha-güedé te núú cùrúxí-á<sup>n</sup> nǐ xihí-dé.

21 Dico vitna sa ní cuu úní nduu sá ní xihí-dé, te nchúhú ní sani iní-ndí sá tǎe-á<sup>n</sup> dàcácu nihnu ñaha-dě xii nchúhú ñáyiú isràèl núú nchàa tnúndòho tnúhu ndàhú ndécú-ndí.

22 Dico ío cùñúhu-ndí cúú, chi ñ<sup>n</sup> ùú ñáyiú ñihí ní tuha ñaha xii-dé ndécú ndihí-ndí ní sáhá<sup>n</sup> ngotó-yu ndéxuehe tàcúhndá-gá yaú núú nǐ chihi-güedé yiqui cùñú-dé,

23 te ní nasáa-yu càchí-yu xii-ndí sá ña túú-gǎ yiqui cùñú-dé yihí xítí yaú-á<sup>n</sup>. Te ní xiní-yu espíritu xínú cuèchi núú Yá Ndióxi, te ní xáha<sup>n</sup>-xii xii-yu sá ndécú vǐvú-dě.

24 Te sáta dúcá<sup>n</sup> te ñ<sup>n</sup> ùú cue téé cùndihí-ndí ní sáhá<sup>n</sup> ndéhé-güedé yaú-á<sup>n</sup>, te ní xiní-güedé sá ndàa cúú-xí nchàa tnúhu ní cáhá<sup>n</sup> ñáyiú ñihí-á<sup>n</sup>, dico ñá túú ní xini-güedé téé-á<sup>n</sup> —càchí-güedé xáha<sup>n</sup>-güedé xii-gá.

25 Te Jèsús ní xáha<sup>n</sup>-gǎ xii-güedé:

—¿Ío cùmání sǎ xini tnúni-ndó, chi ío cuèé sàndáa iní-ndó tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndióxi ndéé sanaha!

26 ¿Te ná ñá túú tàú-xi sá ndóhó Crístú òré cùmání-gǎ sáa nduu ndàa-gá andíu nùú ndécú Dütú Ndióxi cundecu-gá-á<sup>n</sup>? —càchí-gá xáha<sup>n</sup>-gǎ xii-güedé.

27 Te ní ngúita-gá xáha<sup>n</sup>-gǎ nàcuáa quèe-xi nchaa tnúhu càhá<sup>n</sup>-xi núú tütú Yá Ndióxi cuendá-gá, te díhna-gá ní cáhá<sup>n</sup>-gá nàcuáa ndùu nchaa tnúhu yòdo tnuní núú tütú ndíi Moisés, te dàtnúni ní cáhá<sup>n</sup>-gá nàcuáa ndùu nchaa tnúhu yòdo tnuní núú tütú nchaa cue téé ní xóo cáhá<sup>n</sup> tnúhu Yá Ndióxi ndéé sanaha.

28 Te òré ní quexio-güedé yuhu ñuú núú cuáhá<sup>n</sup>-güedé-á<sup>n</sup>, te Jèsús ní quide-ni-gá sá yáha-gá quíhí<sup>n</sup>-gá ingá xichi ní cùu.

29 Dico ní cáhá<sup>n</sup> ndàhú-güedé núú-gǎ sá quéndòo-gá xía<sup>n</sup> ndetatú-gá ndihí-güedé, te xáha<sup>n</sup>-güedé xii-gá:

—Quendóo ndihí ñaha xii-ndí iha ndetatú-n chi sa ní cuaa, te tnaví cundiqui<sup>n</sup> —càchí-güedé xáha<sup>n</sup>-güedé xii-gá.

Te xiá<sup>n</sup> cáá ñ<sup>n</sup> vehe cuánguihu-güedé ndetatú-güedé ndihi-gá.

30 Te òré sa yih-güedé mèsá ndihi-gá cùdini ndihi ñaha-güedé, te ní quehe<sup>n</sup>-gá pàá te ní ndacá<sup>n</sup> táhú-gã núú Yá Ndiöxí, te ní táhú cuèchi-gá te dàtnùní ní dácãhñu ñaha-gã xii-güedé.

31 Te òré-á<sup>n</sup> ñí naquiní ñáhá-güedé xii-gá ní cùu, dico uu<sup>n</sup>ni ní ndóñúhú-gã.

32 Te ní xitnàha-güedé:

—Te ndáá sá sùúni cùdíí ìní-ó òré tá ndàtnúhu-o ndihi Jesús véxi ichi, te ta dánhé ñáhá-gã xii-o nchàa nacuaá quèe-xi tnúhu càhá<sup>n</sup>-xi núú tütú Yá Ndiöxí —càchí-güedé xitnàha-güedé.

33 Te ñá túú-gã ní xíndetu-güedé chi ndihi-ni ní natnii-güedé ichi cuánuhú-güedé ñuú Jerusálén, te ní nasáá-güedé núú xíndecu ndi ùxí ñ<sup>n</sup> cue téé ní táuchíú<sup>n</sup> Jesús cáhá<sup>n</sup> tnúhu-gá, ndihi dava-gá ñáyi.

34 Te cue téé xíndecu-á<sup>n</sup> xãhá<sup>n</sup>-güedé:

—Ndáá sá ñí ndoto Yaá cúú Mèstrú, chi ní xiní ñáhá tã Xímú —càchí-güedé xãhá<sup>n</sup>-güedé.

35 Te cue téé ní nasáá-á<sup>n</sup> ñí cani-güedé cuèndú nàcuáa ní cuu ichi, ndihi nàcuáa ní cuu ní naquiní-güedé Jesús òré ní táhú-gã pàá ní dácãhñu ñaha-gã xii-güedé.

*Jesús ní quexio-gá núú xíndecu cue téé ní xica cuu ndihi-gá*

(Mt. 28:16-20; Mr. 16:14-18; Jn. 20:19-23)

36 Te càhá<sup>n</sup> dúcá<sup>n</sup>-ní-güedé nàcuáa ní cuu ní quexio Jesús ní ngúnutnii-gá ndéé tnuú-güedé, te xãhá<sup>n</sup>-gã xii-güedé:

—Yá Ndiöxí chíndèe ñaha-gá xii-ndo ïo váha cùu ìní-ndó ndècu-ndo —cachí-gá xãhá<sup>n</sup>-gã xii-güedé.

37 Te da ní yùhú-güedé, te ní sani ìní-güedé sá dícó ñ<sup>n</sup> espíritú cúú sã ndéhé-güedé ní cùu.

38 Dico Jesús ní xãhá<sup>n</sup>-gã xii-güedé:

—¿Ná cuèndá yùhú-ndó, te sàni ñ<sup>n</sup> sani úú ìní-ndó-í?

39 Chí cùndèhe ndaha-í ndihi sáhà-í te quiní-ndó nã ñu-ni-í. Te chí tэндàha ñaha xii-í te cundehe-ndo, te

núu ñ<sup>n</sup> espíritú ndécú yiqui cuñú-xi dàtná ndécú ndihi yúhú —càchí-gá xãhá<sup>n</sup>-gã xii-güedé.

40 Te sátá dúcá<sup>n</sup> ñí xãhá<sup>n</sup>-gã te ní dánèhé ñáhá-gã xii-güedé ndaha-gá ndihi sáhá-gã.

41 Te ío ní cuñúhu-güedé, te ní cudíí ìní-güedé sá ndécú-gã tnuú-güedé dico sàni ñ<sup>n</sup> sani úú ìní-güedé, te ní xãhá<sup>n</sup> Jèsús xii-güedé:

—¿Ndècu ndihi-ndo luha sá cáxí-ó ìha ñá? —càchí-gá xãhá<sup>n</sup>-gã xii-güedé.

42 Te ní sãñaha-güedé xii-gá luha chácá ñí chíhó, ndihi dítá ñũñú ñúhú ndúdí,

43 te ní quehe<sup>n</sup>-gá te ndèhe-güedé ní xexi-gá.

44 Te dàtnùní ní xãhá<sup>n</sup>-gã:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnàhá ndécú ndihi ñaha-gá-í xii-ndo, chi ní cachí-í sá dàcuítí càda-xi nchaa nacuaá càhá<sup>n</sup>-xi núú tütú ndí Moisés, ndihi núú tütú ndéé tnúhu ní càhá<sup>n</sup> cue téé ní xóo càhá<sup>n</sup> tnúhu Yá Ndiöxí ndéé sanaha, ndihi núú librú Sãlmú —càchí-gá xãhá<sup>n</sup>-gã xii-güedé.

45 Te òré-á<sup>n</sup> ñí sãñaha-gã sá xìní tnùnigüedé, te ní tecú tnùnigüedé nchaa tnúhu càhá<sup>n</sup>-xi núú tütú Yá Ndiöxí.

46 Te ní xãhá<sup>n</sup>-gã xii-güedé:

—Duca<sup>n</sup> ndéé tnuní núú tütú Yá Ndiöxí sá dàcuítí sã yùhú Crístú cuú-í, te nduu úní ndoto-í.

47 Te ñihí ñuyíú cùtenuu tnúhu ní càhá<sup>n</sup>-í, dico díhna nuu-gã ñuú Jerusálén ngüita-yu cacunehe ñáhá-yu xii-í, te càhá<sup>n</sup>-yu nàcuáa ní dánèhé-í-yu, te cuñáhá-yu xii cue ñáyi sá ná dándixi túu-yu ìní-yu sá ñà túú quide váha-yu, te dàñá-yu nchaa ichi cuèhé ichi duha ndécú-yu, te natnii-yu ichi Yá Ndiöxí, te duca<sup>n</sup> te cada càhnu ìní-gá nchaa yíca cuèchi-yu.

48 Te vitna nchòhó cuu-ndo cuè téé càhá<sup>n</sup> ndáá nchaa nàcuáa ní cuu chi ní xiní núú-ndó.

49 Te yùhú tendaha-í Espíritú Yá Ndiöxí quixi cundecu ndihi-ndo, chi duca<sup>n</sup> ñí cachí-gá. Dico chí cùndècu-ni ñuú Jerusálén-á<sup>n</sup> ndéé ná

quèxio Espíritú Yă Ndiõxí ngúndecu ndihi-ndo cuèndá chindee ñàha-xi xii-ndo cada-ndo nchaa nacuáa ní cáhá<sup>n</sup>-í —càchí-gá xáha<sup>n</sup>-gă xii-güedé.

*Jèsús cuánda-gá andiu*

*(Mr. 16:19-20)*

<sup>50</sup> Te Jèsús ní queñuhu ñaha-gă xii-güedé ñuú Jerusàlén ndécá ñaha-gá cuáhá<sup>n</sup> ñuú Bètaniá, te xía<sup>n</sup> nǐ ndonehe-gá ndaha-gá núú nǐnu, te ní xicá<sup>n</sup> táhú ñaha-gá xii-güedé núú Yă Ndiõxí.

<sup>51</sup> Te sátá nǐ xicá<sup>n</sup> táhú ñaha-gá xii-güedé núú Yă Ndiõxí, te ní quee-gá tnuú-güedé cuánda-gá andiu.

<sup>52</sup> Te ní ngüíta-güedé ní cachí-güedé sá ïo càhnu cuu Jesús, te ní natnii-güedé ichi cuánuhú-güedé ñuú Jerusàlén, te súúní cùdíí ìní-güedé ñúhú-güedě ichi.

<sup>53</sup> Te nchaa nduu ní xíndecu-güedé veñúhu càhnu sá ïo cùnuu ní ndacá<sup>n</sup> táhú-güedě núú Yă Ndiõxí, te ní cachí-güedé sá ïo càhnu cuu-gá. Duha ní cuu dává-á<sup>n</sup>.

## TNÚHU NÍ CHÍDÓ TNÜNÍ TÉ JUÀÁ

### *Déhe Yá Ndiöxí ní cuu-gá ññ ñáyi*

1 Cùmání-gã ngáva ñuyú, te sa ndècu ndihí Yá Ndiöxí Déhe-gá. Te ññ-ni xícuu-gá. Te Déhe-gá-án ññ cuu-gá dàtná ññ tnúhu, chi ní cachí tnúhu-gá nàcuáa càa Tátá-gã Dútú Ndiöxí.

2 Te sa ndècu-gá ndihí Dútú Ndiöxí te ní ngáva ñuyú.

3 Te ññ-ni tnúhu mee Dútú Ndiöxí ní cuu ní cadúha Déhe-gá nchaa sá ññ ñuyú. Te núu ñá túú Déhe-gá ñá, te ñá túú nã coo ñuyú-a ni cùu.

4 Te ññ-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o.

5 Te tnúhu-gá ní xité nuu-xi núu ndécú nchaa ñáyi ññhu ichi cuehé ichi duha. Te ñáyi-án cùu-yu dàtná cue ñáyi ndècu ññ núu néé, te ññ-ni-yu cachí iní-yu xocàni-yu tnúhu-gá dico vá ndácú-yu.

6-7 Te ní xíndecu ññ téé ní xínani-dě Juàá, te téé-án ní táuchíú<sup>n</sup> Yá Ndiöxí sá càhá<sup>n</sup>-dë tnúhu-gá núu ñáyi. Te ní xáha<sup>n</sup>-dë xií-yu sá vëxi Déhe-gá ñuyú-a, te dandixi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá.

8 Te ñá díú mèe té Juàá ní dandixi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chi cuendá-ni ní xica cuu-dé ní càhá<sup>n</sup>-dë sá Déhe Yá Ndiöxí véxi-gá dandixi túu-gá iní-yu.

9 Te ndáá ndisa sá mée-gã dandixi túu-gá iní ñáyi ñuyú-a cuendá cutnùní iní-yu nàcuáa ndùu cuendá Yá Ndiöxí.

10 Te ní xíndecu-gá ñuyú-a, te ñáyi ñuyú-a ñá ní cutnùní iní-yu yoo cùu-gá, te ññ-ni mee-gã ní cadúha-gá ñuyú-a ní quide-gá chù<sup>n</sup> ní táhú Dútú Ndiöxí.

11 Te ní quixi-gá ñuyú ññ cadúha mee-gã, dico cue ñáyi ñuyú-a ñá ní cùu váha iní-yu núu-gã.

12 Dico davá-yu ní sándáá iní ñáhã-yu xii-gá, te ní nduu táhù-yu ní nduu déhe ñaha Yá Ndiöxí xií-yu.

13 Te ñá túú ní ndùu déhe ñaha-gã xií-yu sá cùu-yu déhe ñáyi ñuyú-a, àdi sá ndécú tãtã-yu, nãñã-yu chi mee Yá Ndiöxí duca<sup>n</sup> ní cuiní-gá cunduu sá ndúú dëhe ñaha-gã xií-yu.

14 Te Déhe-gá ní quixi túu-gá ñuyú-a, te ní cuu-gá ññ yiqui cùñú ní xíndecu ndihí ñaha-gã xii nchoo cue ñáyi ní xica cuu túu ndihí-gá. Te ní xini-ó sã ññ càhnu cuu-gá cuendá sá ññ dñi díi-ni-gã cùu-gã Déhe Yá Ndiöxí, te ío cùndahú iní ñáhã-gã chíndè ñaha-gã xii nchoo ñáyi ndècu ñuyú-a, te ío ndáá càhá<sup>n</sup>-gá.

15 Te duha ní càhá<sup>n</sup> té Juàá cuendá Déhe Yá Ndiöxí ní xáha<sup>n</sup>-dë xii ñáyi:

—Cuendá téé iha ni càhá<sup>n</sup>-í ndéé cãni-gá ní cachí-í sá quixí ññ téé quixi. Te téé-án cùñu-gá-dé, chi díhna-gá-dé sa ndècu-dé dàcúxí yùhú —duha ní xáha<sup>n</sup>-dë xií-yu.

16 Te ío váha iní Yaá-án chi xito ñaha-gã xii-o nchaa-o ññ nduu ññ nduu.

17 Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ichi ñaha xii-o nàcuáa cundecu-o, dico Déhe-gá Xítohó Jesucristú ní cachí-gá sá ññ cùu iní ñáhã Yá Ndiöxí xii-o. Te ní càhá<sup>n</sup>-gá nchaa dava-gá tnúhu ndáá.

18 Te ñá ññ ñáyi xini túu-yu Yá Ndiöxí. Dico ññ dñi díi-ni Déhe-gá Yaá ndécú ndihí-gá càhí tnúhu-gá nàcuáa càa-gá.

*Té Juàá téé dàcuandute ñaha xii ñáyi càhá<sup>n</sup> váha-dé cuendá Xítohó Jesucristú (Mt. 3:11-12; Mr. 1:7-8; Lc. 3:15-17)*

19 Te cue téé israhél ndécú ññú Jerusalén ní tendaha-güedë cue dútú ndihí cue téé cùu levítá cuhá<sup>n</sup>-güedé núu ndécú tã Juàá ndécú tnúhu-güedé núu-dë ññ ná téé cùu-dé.

20 Te ní càhá<sup>n</sup> ndáá-dé ní xáha<sup>n</sup>-dë xii-güedé:

—Yúhú, ñá díú Crìstú Yaá ní tendaha Yă Ndiöxí véxi ñuyíú-a cùu-í — cächí-dé xăha<sup>n</sup>-dë.

<sup>21</sup> Te ní xăha<sup>n</sup> tùcu-güedé:

—¿Te yoo cùu yohó váí<sup>n</sup>? ¿Á yohó cúú-n tĕ Èliás? —cächí-güedé xăha<sup>n</sup>-güedë xii-dé.

Te ní xăha<sup>n</sup> tĕ Juàá:

—Yúhú, ñá díú tĕ Èliás cúu-í — cächí-dé xăha<sup>n</sup>-dë.

Te xăha<sup>n</sup> tùcu-güedé:

—¿Te yohó cúú-n tĕe ní cachí cue tĕe ndéé sanaha quixi cáhá<sup>n</sup> tnúhu Yă Ndiöxí-ă<sup>n</sup>? —cächí-güedé xăha<sup>n</sup>-güedë xii-dé.

Te ní xăha<sup>n</sup>-dë:

—Ní ñá díú tĕe-á<sup>n</sup> cúu-í —cächí-dé xăha<sup>n</sup>-dë xii-güedé.

<sup>22</sup> Te ní xăha<sup>n</sup> tùcu-güedé:

—¿Te ná tĕe cùu yohó váí<sup>n</sup>?, cuëndá duca<sup>n</sup> nàcani tnúhu-ndí núú cuè tĕe ní tendaha ñàha xii-ndí véxi-ndí, te cáhá<sup>n</sup> duu<sup>n</sup>-n nūu ná tĕe cùu-n — cachí-güedé xăha<sup>n</sup>-güedë xii-dé.

<sup>23</sup> Te ní xăha<sup>n</sup> tĕ Juàá:

—Yúhú cúu-í tĕe xica cáhá<sup>n</sup> xití yucu nàcuáa ní cáhá<sup>n</sup> ndí Chàiaá, chi ndí-á<sup>n</sup> nĭ cachí ndí: “Chí dáñá ìchi cuehé ìchi duha ndècu-ndo te tñi-ndo ìchi váha, chi véxi Yaá ío cūnuu”, duha ní cachí ndí —cächí tĕ Juàá xăha<sup>n</sup>-dë xii-güedé.

<sup>24</sup> Te cue tĕe ndècu tnúhu núú tĕ Juàá nūu ná tĕe cùu-dé, cue tĕe-á<sup>n</sup> nĭ tendaha ñàha cue tĕe cùu fariséu xii-güedé.

<sup>25</sup> Te ní xăha<sup>n</sup> tùcu-güedé xii tĕ Juàá:

—¿Ná cuëndá dăcuândute-n ñáyiu te núu ñá díú Crìstú cúu-n, te ni ñá díú tĕ Èliás, te ni ñá díú tĕe véxi cáhá<sup>n</sup> tnúhu Yă Ndiöxí cúu-n váí<sup>n</sup>? —cächí-güedé xăha<sup>n</sup>-güedë xii-dé.

<sup>26-27</sup> Te ní xăha<sup>n</sup> tĕ Juàá:

—Yúhú ní ngódó núu-í dăcuândute-í ñáyiu. Dico nchícú<sup>n</sup> ì<sup>n</sup> tĕe véxi, te tĕe-á<sup>n</sup> cūnuu-gá-dé dăcúúxí yŭhú, chi yúhú cúu-í ì<sup>n</sup> tĕe duu<sup>n</sup> duu<sup>n</sup> ñá túú tàú nandaxi cuèdicó ñi chăú-dé dico quide-í chiu<sup>n</sup>-dé. Te tĕe-á<sup>n</sup> sa ñūhu tnahá-dé tñuú-ndó dicó-ni sá ñă túú xini-ndó-dé —cächí-dé xăha<sup>n</sup>-dë.

<sup>28</sup> Duha ní cuu ñuú Bétábará ñuú cáá ndaa ingá xio yúte Jórdán, yacá<sup>n</sup>

ní xindecu tĕ Juàá ní dăcuândute-dé ñáyiu.

*Jèsús quidé cāhnu iní-gá nchaa yicá cuēchi ñáyiu*

<sup>29</sup> Te nduu tnĕé ní xiní tĕ Juàá Jèsús véxi yatni-gá núú ndécú-dë ndihí ñáyiu. Te ní xăha<sup>n</sup>-dë xií-yu:

—Chí cūndĕhe tĕe-ă<sup>n</sup>, chi tĕe-ă<sup>n</sup> cúu-dĕ Crìstú Yaá ní tendaha Yă Ndiöxí véxi ñuyíú-a, te véxi-dé cada cāhnu iní-dé nchaa yicá cuēchi ñáyiu ñuyíú. Te cūu-dé dātná ì<sup>n</sup> mbĕé quiti ío váha iní-xi.

<sup>30</sup> Te ñu tĕe-ă<sup>n</sup> ní cachí-í sá cānchícú<sup>n</sup>-dé quixi. Te cūnuu-gá-dé dăcúúxí yŭhú, chi dĭhna-gá-dé sa ndècu ní cachí-í xii-ndo.

<sup>31</sup> Te ni yúhú ñá túú xini-í-dé ní cūu, dico xica cuu-í dăcuândute-í ñáyiu cuëndá nchaa ñáyiu isràél quini ñáhă-yu xii-dé —cächí-dé xăha<sup>n</sup>-dë xií-yu.

<sup>32</sup> Te ní xăha<sup>n</sup> tùcu-dé:

—Ní xiní-í Espiritú Yă Ndiöxí ní quee-xi andĭu véxi cuu<sup>n</sup>-xi ngūndecu ndihí ñaha-xi xii-dé, te dātná cáá lōmá cáá Espiritú-á<sup>n</sup> véxi cuu<sup>n</sup>-xi.

<sup>33</sup> Te yúhú ñá túú xini-í-dé ní cūu, dico Yă Ndiöxí Yaá ní tendaha ñàha xii-í xicá cūu-í dăcuândute-í ñáyiu, Yaá-á<sup>n</sup> nĭ cachí tnúhu-gá sá tĕe na quini-í ngūndecu ndihí Espiritú-gá sá véxi cuu<sup>n</sup> andĭu, te tĕe-á<sup>n</sup> taxi-dé Espiritú-gá cundecu ndihí-o.

<sup>34</sup> Te yúhú ní xiní-í-dé te xini ndáá-í sá Dĕhe Dútú Ndiöxí cúu-dĕ. Te xíă<sup>n</sup> cächí tnúhu-í xii-ndo —cächí tĕ Juàá xăha<sup>n</sup>-dë xií-yu.

*Cue tĕe dĭhna nuu xica cuu ndihí Jèsús*

<sup>35</sup> Te nduu tnĕé-á<sup>n</sup> ñu-ni xíă<sup>n</sup> ndécú tĕ Juàá ndihí úú cue tĕe xica cuu ndihí-dé.

<sup>36</sup> Te ní xiní-dé Jèsús ñūhú-gă ìchi, te ní xăha<sup>n</sup>-dë xii cue tĕe xica cuu ndihí-dé-á<sup>n</sup>:

—Chí cūndĕhe tĕe-ă<sup>n</sup>, chi tĕe-ă<sup>n</sup> cúu-dĕ Crìstú Yaá ní tendaha Yă Ndiöxí véxi ñuyíú-a. Te cūu-dé dātná ì<sup>n</sup> mbĕé quiti ío váha iní-xi —cächí-dé xăha<sup>n</sup>-dë.

37 Te sá dúcá<sup>n</sup> ñí cáhá<sup>n</sup> té Juàá núú cuè téé úú ndíhi-dé-á<sup>n</sup> núú ní chinchícú<sup>n</sup>-güedé Jèsús.

38 Te ní nchócótó-gă ndàa sátá-gă, te ní xiní-gá sá nchícú<sup>n</sup> ñáhá-güedé xii-gá. Te ní xáha<sup>n</sup>-gă xii-güedé:

—¿Ná nándùcu-ndo? —cachí-gá xáha<sup>n</sup>-gă xii-güedé.

Te ní xáha<sup>n</sup>-güedé:

—¿Ndéé ndécú-n, Ràbíí? —cachí-güedé xáha<sup>n</sup>-güedé xii-gá.

Te Ràbíí-á<sup>n</sup> quée-xí Mèstrú tnúhu mee-güedé.

39 Te ní xáha<sup>n</sup> Jèsús xii-güedé:

—Chí nèhé te quiní-ndó —cachí-gá xáha<sup>n</sup>-gă.

Te ní xica-güedé cuáhá<sup>n</sup>-güedé, te ní quexio-güedé núú quidé vèhe-gá. Te ndècu-ni-güedé ndíhi-gá ní cuaa, chí dàtná òré caa cúmí sacuaa ní sáá-güedé.

40 Te úú cue téé-á<sup>n</sup> ñí tñii-güedé tnúhu ní cáhá<sup>n</sup> té Juàá, te ní chinchícú<sup>n</sup>-güedé Jèsús. Te núú úú cue téé-á<sup>n</sup>, ñí-dé nání-dé Ndríxí, te ñaní-dé cúú tē Xímú, àdi Pelú chí úú diù-dé.

41 Te té Ndríxí-á<sup>n</sup> ñí nanducu-ni-dé ñaní-dé te ní xáha<sup>n</sup>-dē:

—Ní naníhí-ndí téé cùu Mesiás —cachí-dé xáha<sup>n</sup>-dē.

Te Mesiás-á<sup>n</sup> quée-xí Crìstú tnúhu mee-güedé, Yaá ní tendaha Yă Ndiöxí véxi ñuyúú-a.

42 Te ndéca té Ndríxí ñaní-dé cuáhá<sup>n</sup> núú ndécú Jèsús. Te òré ní xiní ñáhá Jèsús xii té Xímú, te ní xáha<sup>n</sup>-gă:

—Yòhó cúú-n tē Xímú déhe té Jònás, te vitna danàni ñaha-í Céfás xii-n —cachí-gá xáha<sup>n</sup>-gă.

Te Céfás-á<sup>n</sup> quée-xí Pèlú tnúhu mee-güedé.

*Jèsús ní cáhá<sup>n</sup>-gá té Lìpé ndíhi té Natanàél*

43 Te nduu tñéé ní sani iní-gá quíhí<sup>n</sup>-gá distritú Galileá. Te ní naníhí-gă ñí téé nàni Lìpé, te ní xáha<sup>n</sup>-gă xii-dé:

—Néhé ná quíhí<sup>n</sup>-ó núú quíhí<sup>n</sup>-í-a —cachí-gá xáha<sup>n</sup>-gă.

44 Te té Lìpé-á<sup>n</sup> cúú-dē téé ñúú Bètsaidá. Te diu-ni ñúú yacá<sup>n</sup> cúú ñúú té Ndríxí ndíhi té Pèlú.

45 Te té Lìpé ní naníhí tnáhá-dē ndíhi té Natanàél, te ní xáha<sup>n</sup>-dē:

—Ní naníhí-ndí téé dii cuèndú-xi ní chídó tnùní ndí Moisés ndíhi dava-gá cue téé ní xóo cáhá<sup>n</sup> tnúhu Yă Ndiöxí ndéé sanaha. Te téé-á<sup>n</sup> nání-dé Jèsús déhe té Chèé, téé ñúú Nazàrét —cachí-dé xáha<sup>n</sup>-dē.

46 Te ní xáha<sup>n</sup> tē Natanàél xii té Lìpé:

—¿Te náa ío váha càa ñúú Nazàrét núu da yacá<sup>n</sup> quee téé cáhá<sup>n</sup> tnúhu Yă Ndiöxí? —cachí-dé xáha<sup>n</sup>-dē.

Te ní xáha<sup>n</sup> tē Lìpé:

—Néhé ná quíhí<sup>n</sup>-ó te quiní-n —cachí-dé xáha<sup>n</sup>-dē.

47 Te òré ní xiní Jèsús té Natanàél tá cùyatni-dé cuáhá<sup>n</sup>, te ní cáhá<sup>n</sup>-gá cuèndá-dé te ní cachí-gá:

—Téé véxi-á<sup>n</sup> cúú-dé mei tēe isràèl, te ñá ñí ndúu dandahú-dé ñáyiú —cachí-gá xáha<sup>n</sup>-gă.

48 Te ní xáha<sup>n</sup> tē Natanàél xii Jèsús:

—¿Te nása náquiní ñáhá-n? —cachí-dé xáha<sup>n</sup>-dē.

Te ní xáha<sup>n</sup> Jèsús:

—Yúhú sa ní xiní ñáhà-í xii-n òré ndécú-gă-n càha yutnu ngúxí-á<sup>n</sup> te ní tē Lìpé vátá cáná ñàha-gá-dé xii-n òré-á<sup>n</sup> —cachí-gá xáha<sup>n</sup>-gă xii-dé.

49 Te sá dúcá<sup>n</sup> ñí cáhá<sup>n</sup>-gá, núu ní xáha<sup>n</sup> tē Natanàél xii-gá:

—Mèstrú, yòhó cúú-n Dèhe Dútú Ndiöxí yíndàha-n ñáyiú isràèl —cachí-dé xáha<sup>n</sup>-dē xii-gá.

50 Te Jèsús ní xáha<sup>n</sup>-gă:

—Cuèndá sá ñí xiní ñáhà-í xii-n càha yutnu ngúxí xiá<sup>n</sup> iní ñáhá-n, dico cuéhé-gă núú sã quiní-n —cachí-gá xáha<sup>n</sup>-gă xii-dé.

51 Te ní xáha<sup>n</sup> tùcu-gá:

—Na cachí tnúhu ndáá-í sá sàa nduu, te quiní-ndó nàcaá<sup>n</sup> andíu. Te quiní-ndó cuè espíritú xínú cuèchi núú Yă Ndiöxí sá ndàa nuu-xi quide-xi núú cùndècu yúhú Téé cùu ñaní tnáhá-ndó nchàa-ndo —cachí-gá xáha<sup>n</sup>-gă xii-güedé.

## 2

*Vico tnăndaha ío ñúú Cànaá*

<sup>1</sup> Te nduu úní sá dúcá<sup>n</sup> nǐ cuu te ní xóo ì<sup>n</sup> vico tnãndaha ñuú Cànaá, ì<sup>n</sup> ñuú yíndèhu distritú Galileá. Te yàcá<sup>n</sup> ní xíndecu nãná Jèsús.

<sup>2</sup> Te tnàhá Jèsús ndihi cue té xica cuu ndihi-gá ní cáhá<sup>n</sup>-yu cuáhá<sup>n</sup>-gá ndihi-güedé vico-á<sup>n</sup>.

<sup>3</sup> Te òré ní ndihi vínú, te ní xáha<sup>n</sup> nãná Jèsús xii-gá:

—Ñá túú-gã vínú ndécú ndihí-yu — cãchí-a<sup>n</sup> xáha<sup>n</sup>-a<sup>n</sup>.

<sup>4</sup> Te ní xáha<sup>n</sup> Jèsús xii-a<sup>n</sup>:

—Nãá, ñá túú xini ñuhu-xi da yúhú cúñaha-n cuendá vínú-á<sup>n</sup>, chi vátá tnàhá-gá òré quiní-yu yoo cùu yúhú — cãchí-gá xáha<sup>n</sup>-gã xii-a<sup>n</sup>.

<sup>5</sup> Te ní xáha<sup>n</sup>-a<sup>n</sup> xii ñáyiú xinu cuechi:

—Cada-ndo nchàa nacuáa na càhá<sup>n</sup> Jèsús —cãchí-a<sup>n</sup> xáha<sup>n</sup>-a<sup>n</sup>.

<sup>6</sup> Te yàcá<sup>n</sup> nútnǎ ìñú quídi yúú te quée dàtná ì<sup>n</sup> ciendú lítrú ndute ì<sup>n</sup> ì<sup>n</sup> quídi-á<sup>n</sup>. Te ndute-á<sup>n</sup> nándihi ñáyiú isràél ndáhã-yu te nàqueté-yu cóhõ-yu chi duca<sup>n</sup> tnàhí quidé-yu nacuáa sãndáá iní-yu Yá Ndiõxí.

<sup>7</sup> Te ní xáha<sup>n</sup> Jèsús xii nchaa cue té xinu cuechi:

—Nadachítú-ndó ndùte ndi nchaa quídi-á<sup>n</sup> —cãchí-gá xáha<sup>n</sup>-gã xii-güedé.

Te ní nadachítú-güedé.

<sup>8</sup> Te ní xáha<sup>n</sup>-gã:

—Vitna te tava-ndo lùha, te canehe-ndo quíhí<sup>n</sup> cuáha-ndo tée quide vico —cachí-gá xáha<sup>n</sup>-gã xii-güedé.

Te duca<sup>n</sup> nǐ quide-güedé ní tava-güedé luha nèhe-güedé cuáhá<sup>n</sup> ní sáha-güedé té quide vico.

<sup>9</sup> Te ní xito ndéé té quide vico-á<sup>n</sup>, te sa ní nduu-xi vínú, te ñá túú ní xini-dé ndéé véxi-xi, dico mee cue té xinu cuechi sa naha-güedé núú nǐ tava-güedé. Duca<sup>n</sup> te té quide vico-á<sup>n</sup> ní cana-dé té tnãndaha.

<sup>10</sup> Te ní xáha<sup>n</sup>-dè:

—Nchaa ñáyiú quide vico queñuhú-yu díhna-gá vínú váha. Te sa vai vínú váha xihí-yu, te dàtnúni queñuhú-yu vínú ndàhú. Te yòhó díhna-gá vínú ndàhú ní queñuhu-n, te ndéé núú nǐ

ndihi-ná ní queñuhu-n vínú váha — cãchí té quide vico-á<sup>n</sup> xáha<sup>n</sup>-dè xii té tnãndaha-á<sup>n</sup>.

<sup>11</sup> Te sá nǐ nadatiú Jesús ndute-á<sup>n</sup> nǐ nduu-xi vínú cúú-xí ì<sup>n</sup> chiu<sup>n</sup> díhna nuu sã vã yõo tnàhí ndacu cada ní quide-gá ñuú Cànaá, ì<sup>n</sup> ñuú yíndèhu distritú Galileá, te chiu<sup>n</sup> ní quide-gá-á<sup>n</sup> cúú-xí ì<sup>n</sup> chiu<sup>n</sup> cahnu vihi, núu xíã<sup>n</sup> ní cutnúni iní-yu sá ìo càhnu cuu-gá, te ní sãndáá iní ñáhá nchàa cue té xica cuu ndihi-gá.

<sup>12</sup> Te sátá nǐ yáha vico, te ní xica Jèsús ndihi nãná-gã, ndihi cue ñaní-gá, ndihi nchaa cue té xica cuu ndihi-gá cuáhá<sup>n</sup>-yu ñuú Capèrnaúm. Te yàcá<sup>n</sup> ní xíndecú-yu ì<sup>n</sup> úú nduu ndihi-gá.

*Jèsús ñá túú tnàhá iní-gá nacuáa quide ñáyiú xití veñúhu*

(Mt. 21:12-13; Mr. 11:15-18; Lc. 19:45-46)

<sup>13</sup> Te ta cùyatni cada ñáyiú isràél vico pãscuá, te ní xica Jèsús cuáhá<sup>n</sup>-gá ñuú Jerusalén.

<sup>14</sup> Te sátá nǐ sáa-gá yàcá<sup>n</sup>, te ní xica-gá cuáhá<sup>n</sup>-gá veñúhu càhnu sá ìo cùnuu, te xití veñúhu-á<sup>n</sup> nǐ xini-gá ndécú ñáyiú dìcò-yu ndicutu, mbéé ndihi lõmá, te tnàhá ñáyiú dàma díhú<sup>n</sup> núcõo-yu ní xini-gá.

<sup>15</sup> Te ní quehe<sup>n</sup>-gá ì<sup>n</sup> úú yoho, te ní cáunuu tnàha-gá, te ní dáyùhu-gá ñáyiú ní queé-yu quehé veñúhu, ndihi ndicutú-yu ndihi mbéé-yu. Te cue ñáyiú dàma díhú<sup>n</sup>-ã<sup>n</sup> ní dãngõyo-gá díhú<sup>n</sup>-yu, te ní dándüá-gá mèsá-yu.

<sup>16</sup> Te ní xáha<sup>n</sup>-gã xii cue ñáyiú dìcò lómá:

—¡Queñuhu-ndo nchàa quití-a xití veñúhu-a! ¡Vá cáda-ndó vèhe núú yáhu núú cúú vèhe Tátà-í Dútú Ndiõxí! —cãchí-gá xáha<sup>n</sup>-gã xii-yu.

<sup>17</sup> Te xíã<sup>n</sup> ní ndacu iní cue té xica cuu ndihi-gá sá dúcá<sup>n</sup> yòdo tnuní núú tütú-gá, te cãchí-xi: “Ío cùyica iní-í chi ñá cuíni-yu canehe ì<sup>n</sup>-yu vehe Tátà-í”, duha cãchí-xi núú tütú-gá.

<sup>18</sup> Te ní xáha<sup>n</sup> cue té isràél xii-gá:

—¿Ná cúú sã vã yõo tnàhí ndacu cada, cada-n cuendá cutnúni iní-ndí sá cúú dùha taxi tnuní ñáhá-n



xii-ndí-i? —càchí-güedé xáha<sup>n</sup>-güedé xii-gá.

<sup>19</sup> Te ní xáha<sup>n</sup> Jèsús:

—Chí dängòyo veñúhu-a, te neni xití úní nduu te sa nadàxínu-í —càchí-gá xáha<sup>n</sup>-gá xii-güedé.

<sup>20</sup> Te ní xáha<sup>n</sup> tùcu cue téé isràél:

—Údico íñú cuía nǐ xíndecuu-güedé ní sáá veñúhu-a, te yòhó cuíní-n nàdaxínu-n xití úní-ni nduu —càchí-güedé xáha<sup>n</sup>-güedé xii-gá.

<sup>21</sup> Dico sá nǐ cáhá<sup>n</sup>-gá chi ñá díú cuendá veñúhu ni cáhá<sup>n</sup>-gá chi cuendá yiqui cùñú-gá ní cáhá<sup>n</sup>-gá.

<sup>22</sup> Núu sátá nǐ xihí-gá, te ní ndoto-gá, te òré-á<sup>n</sup> nǐ ndacu iní cue téé ní xica cuu ndihí-gá nàcuáa ní cáhá<sup>n</sup>-gá, núu xíá<sup>n</sup> ní sándáá iní-güedé tnúhu yòdo tnuní núu tütú-gá. Te duca<sup>n</sup> te ní sándáá iní-güedé tnúhu ní cáhá<sup>n</sup>-gá.

*Jèsús xini-gá nàcuáa càa iní nchaa ñáyiu*

<sup>23</sup> Te òré ndécú Jèsús vico pàscuá, te ío vai ñáyiu ní sándáá iní ñáhá xii-gá cuendá ío titní sá vǎ yòo tnàhí ndàcu cada ní quide-gá ní xini-yu.

<sup>24</sup> Dico Jèsús ñá ní cáhá<sup>n</sup>-gá nchaa tnúhu ñuhu iní-gá, chi sa ní cutnùnì iní-gá sá ñà túú cùu váha iní-yu.

<sup>25</sup> Te ñá túú xini ñuhu-gá ñá ñáyiu cúñaha nàcuáa càa iní nchaa tnàha ñáyiu-yu, chi mee-gá sa nàha ndáá-gá nàcuáa càa iní-yu ncháá-yu.

### 3

*Jèsús ndihí té Nicòdemú*

<sup>1</sup> Ní xíndecu ñá téé cùu fariséu ní xínani-dé Nicòdemú, te ní cuu-dé ñá téé cùnuu núu ñáyiu isràél.

<sup>2</sup> Te téé-á<sup>n</sup> nǐ sáhá<sup>n</sup>-dé niú ní cáhá<sup>n</sup> ndihí-dé Jèsús, te ní xáha<sup>n</sup>-dé:

—Mèstrú, yúhú ndihí dava-gá-güedé sa nàha-ndí sá Yá Ndiòxí ní tendaha ñàha-gá xii-n vèxi-n dànehé ñáhá-n xii-ndí, chi núu ñá túú Yá Ndiòxí ndécú ndihí-n, te vá ndácú-n càda-n nchaa sá vǎ yòo tnàhí ndàcu cada quide-n —cachí-dé xáha<sup>n</sup>-dè.

<sup>3</sup> Te ní xáha<sup>n</sup> Jèsús:

—Na càchí tnúhu ndáá-í xii-n sǎ ncháá ñáyiu vá ná càcu saa tucu, te vá ndíhu ndaha ñàha Yá Ndiòxí xii-yu —càchí-gá xáha<sup>n</sup>-gá xii-dé.

<sup>4</sup> Te ní xáha<sup>n</sup> té Nicòdemú:

—¿Te nása cada ñá ñáyiu sa ní yá te cacu-ni tucú-yu? ¿Náa ndíhu tucú-yu xití nǎnǎ-yu te cacu tucú-yu xito cùu uú-á<sup>n</sup>? —càchí-dé xáha<sup>n</sup>-dè xii-gá.

<sup>5</sup> Te ní xáha<sup>n</sup> Jèsús:

—Na càchí tnúhu ndáá-í xii-n sǎ ncháa ñáyiu na nduu ndoo nduu nine iní-xi cuú-yu ñáyiu ní na càcu saa ndihí ndute ndihí Espiritú Yá Ndiòxí, ñáyiu-á<sup>n</sup> ndíhu ndaha ñàha-gá xii-yu.

<sup>6</sup> Te nchaa ñáyiu càcu ñuyú-a, chi déhe ñáyiu ñuyú-a cùu-yu. Te ñáyiu ní nduu ndoo ní nduu nine iní-xi, ñáyiu-á<sup>n</sup> nǐ nduu táhü-yu Espiritú Yá Ndiòxí te tàxi tnuní ñáhá-nǎ Espiritú-gá xii-yu.

<sup>7</sup> Te vá cúñühu-n tnúhu ní cáhá<sup>n</sup>-í-a, chi nchaa ñáyiu ní sándáá iní ñáhá xii-í ní nduu ndoo ní nduu nine iní-yu, te ñáyiu-á<sup>n</sup> cúu-yu dàtná ñáyiu ní nacacu saa.

<sup>8</sup> Táchí ndèni xía<sup>n</sup> tècú dóho-o xico-xi, dico ñá túú xini-ó ndèé ichi véxi-xi, te ní ñà túú xini-ó ndèé ichi cuáhá<sup>n</sup>-xi. Duca<sup>n</sup> sǎtnahá-xi cùu Espiritú-gá ndécú ndihí ñáyiu ní nduu ndoo ní nduu nine iní-xi —càchí-gá xáha<sup>n</sup>-gá xii-dé.

<sup>9</sup> Te dàtnùnì ní xicá<sup>n</sup> tnúhú tùcu té Nicòdemú núu-gá, te xáha<sup>n</sup>-dè xii-gá:

—¿Te nása nduu tnúhu càhá<sup>n</sup>-n dùca<sup>n</sup> càhá<sup>n</sup>-n? —càchí-dé xáha<sup>n</sup>-dè xii-gá.

<sup>10</sup> Te ní xáha<sup>n</sup> Jèsús:

—Yòhó cúu-n ñá téé cùtnunì iní-xi, chi dàcuaha-n ñáyiu isràél, ¿te ñá tècú tnùnì-n tnúhu càhá<sup>n</sup>-í-u?

<sup>11</sup> Te na càchí tnúhu ndáá-í xii-n sǎ nchühú càhá<sup>n</sup>-ndí ñá sá nǐ tecú tnùnì-ndí, te càhá<sup>n</sup> ndáá-ndí cuendá ñá sá nǐ xini-ndí. Dico nchòhó ñá tècú tnùnì-ndó tnúhu càhá<sup>n</sup>-ndí.

<sup>12</sup> Te ñá sándáá iní-ndó tnúhu càhá<sup>n</sup>-í cuendá nchaa nàcuáa cùu ñuyú-a, te uu<sup>n</sup>-gá cada-ndo núu càhá<sup>n</sup>-í cuendá nchaa nàcuáa cùu andü.

<sup>13</sup> Vǎ yòo ñá sáa andü, te cani-xi cuendú nàcuáa càa. Chi ñá dñi dí-ni yúhú véxi cuu<sup>n</sup>-í andü, te cùu-í ñani

tnáhá-ndó nchàa-ndo. Te òu-ni yàcá<sup>n</sup> ndaa-í cundecu-í.

14 Te dàtná ní ndanehe ndíi Moisés cóo ñí sata caa ndíi-di xití yucu, duca<sup>n</sup> càda ñaha-güedé cata caa ñaha-güedé núu cùrúxí xii yúhú Tée cùu ñaní tnáhá-ndó nchàa-ndo ì<sup>n</sup> nduu,

15 te duca<sup>n</sup> yáha-í cuendá nchaa ñáyiu na quindáá iní ñáhá xii-í te nduu táhü-yu cundecú-yu ndíi Yá Ndiöxí ñí caa ñí quíhí<sup>n</sup> —càchí-gá xáha<sup>n</sup>-gã xii-dé.

#### *Yá Ndiöxí ío cùu iní-gá ñáyiu ñuyíú-a*

16 Te Yá Ndiöxí ío cùu iní-gá ñáyiu ñuyíú-a. Te ì<sup>n</sup>di-ni Déhe-gá ndécú, te ní tendaha ñàha-gá ní quixi-gá ñuyíú-a, te núu na quindáá iní ñáhá ñáyiu, te vá cuíta nihnú-yu, chi nduu táhü-yu cundecú-yu ndíi-gá ñí caa ñí quíhí<sup>n</sup>.

17 Te Yá Ndiöxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyiu, chi ní tendaha-gá Déhe-gá ní quixi-gá sá dácäcu nihnu-gá ñáyiu ñuyíú-a núu ùhú núu ndàhú.

18 Nchaa ñáyiu sàndáá iní ñáhá xii Déhe-gá, te vá cuíta nihnú-yu. Te nchaa ñáyiu ñá túú sàndáá iní ñáhá xii Déhe-gá ñùhú-yu ichi cuáhá<sup>n</sup>-yu núu ùhú núu ndàhú, chi ñá túú sàndáá iní-yu Déhe Dútú Ndiöxí.

19 Chi ní quixi Déhe-gá ñuyíú-a ní dándíxí tũu-gá iní-yu cuendá cutnùní iní-yu nàcuáa ndùu cuendá Yá Ndiöxí te tní<sup>n</sup>-yu ì<sup>n</sup> ichi váha ñí cùu, te ñá ní tnàhá iní-yu, chi ní cudíí-gã iní-yu nchaa sá cuèhé sá dúhá dácúxí sã váha, núu xíá<sup>n</sup> tá xíta nihnú-yu cuáhá<sup>n</sup>.

20 Te nchaa ñáyiu quide nchaa sá cuèhé sá dúhá ñá tnàhá iní-yu cutnùní iní-yu nàcuáa ndùu cuendá Yá Ndiöxí, te ñá tní<sup>n</sup>-yu tnúhu-gá cuendá yùhú-yu nduu tnùní nchaa sá quidě-yu.

21 Te nchaa ñáyiu ñùhu ichi ndáá cuíní-yu cutnùní iní-yu nàcuáa ndùu cuendá Yá Ndiöxí, te cutnùní sá chindèe ñaha-gá xii-yu, chi quide váha-yu.

#### *Té Juàá tée dàcuandute ñaha xii ñáyiu càhá<sup>n</sup> váha tucu-dé cuendá Jesús*

22 Te sátá dúcá<sup>n</sup> ñí cuu, te ní quee Jesús cuáhá<sup>n</sup>-gá ndíi cue tée xica cuu ndíi-gá distritú Jüdeá. Te yàcá<sup>n</sup> ní xíndecu tnaa-gá ndíi-güedé ní xóo dacuandute-güedé ñáyiu.

23 Te ndècu té Juàá ì<sup>n</sup> xichi núu nání Ènón yatni ñuu Sàlém dácuaandute-dé ñáyiu, chi yàcá<sup>n</sup> ío váha ñùhu ndute, núu xíá<sup>n</sup> ní xóo quíhí<sup>n</sup> ñáyiu yàcá<sup>n</sup> ní xóo cuanduté-yu.

24 Duha ní cuu cútnàhá vátá ngává-gã té Juàá vecaá.

25 Te ní cacu ì<sup>n</sup> cuendú ní cáhá<sup>n</sup> cue tée xica cuu ndíi té Juàá ndíi ì<sup>n</sup> ùú cue tée isràél, núu ndèdacàa sá váha-gá cada ñáyiu cuendá nduu ì<sup>n</sup>-yu.

26 Te ní sáhá<sup>n</sup>-güedé núu ndécú té Juàá ní xáha<sup>n</sup>-güedé:

—Mèstrú, tée ní quixi núu ñí xíndecu-n ndàa ingá xio yúte Jòrdán, tée dii cuendú-xi ní cáhá<sup>n</sup>-n, tée-ã<sup>n</sup> dácuaandute-dé tnàhá-dé ñáyiu. Te ío vai ñáyiu ní chinchícú<sup>n</sup> ñáhá xii-dé —càchí-güedé xáha<sup>n</sup>-güedé xii-dé.

27 Te ní xáha<sup>n</sup> tã Juàá:

—Te vá yõ ì<sup>n</sup> ndàcu cada ì<sup>n</sup> chiu<sup>n</sup> nacuáa cuu váha iní Yá Ndiöxí, te núu ñá túú mèe-gá chindèe ñaha-gá xii-yu.

28 Te nchòhó sa nàha-ndo sá yùhú ní cáhá<sup>n</sup> ndáá-í sá ñá díú Crístú cùu-í, dico mee Yá Ndiöxí ní tendaha ñàha-gá yódó nùu-í véxi núu Yàá-á<sup>n</sup>.

29 Te nchòhó xini-ndó sã ì<sup>n</sup> tée tnàndaha te xichí tnàndaha ndíi-ná-dé cundíi-dé. Te tée ní xica ndáhu ío cùdí iní-dé ndèdóho-dé nchaa tnúhu càhá<sup>n</sup> tée tnàndaha-á<sup>n</sup>. Te duca<sup>n</sup> sãtnahá-xi cùu yúhú, chi ío cùdí iní-í sá vái ñáyiu ta chinchícú<sup>n</sup> ñáhá xii Jesús cuáhá<sup>n</sup>.

30 Te uu<sup>n</sup>-gá cuita cuu vai ñáyiu cutnùní iní-xi sá ìo cùnuu-gá, te yúhú cuita ndóo ndee-í quíhí<sup>n</sup> —càchí-dé xáha<sup>n</sup>-dẽ xii-güedé.

#### *Crístú véxi cuu<sup>n</sup>-gá andíu*

31 Te ì<sup>n</sup>di díi-ni Crístú Yáá véxi cuu<sup>n</sup> andíu cùnuu-gá núu ñuyíú-a. Te nchaa ñáyiu ndècu ñuyíú-a cùu-yu ñáyiu ñuyíú iha, te càhá<sup>n</sup>-yu sá cúu-xí

ñùyíú-a. Dico Crìstú Yaá véxi cuu<sup>n</sup> andíu

<sup>32</sup> càhá<sup>n</sup>-gá ì<sup>n</sup> sá ñí xíní-gá, te càhá<sup>n</sup>-gá ì<sup>n</sup> sá ñí tecú dóho-gá. Te ñá túú cuení-yu quindáá iní-yu tnúhu càhá<sup>n</sup>-gá.

<sup>33</sup> Te nchaa ñáyiú tñi tnúhu càhá<sup>n</sup> Yaá véxi cuu<sup>n</sup> andíu-á<sup>n</sup> càhá<sup>n</sup>-yu sá tnúhu Yá Ndiöxí cúú-xí ì<sup>n</sup> sá ndáá.

<sup>34</sup> Te Déhe-gá Yaá véxi cuu<sup>n</sup> andíu càhá<sup>n</sup>-gá mee-ni tnúhu-gá. Te ñá ùhú iní-gá ní sáñaha-gá Espiritú-gá ndécú ndíhi Déhe-gá.

<sup>35</sup> Te Dútú Ndiöxí ío cùu iní-gá Déhe-gá, núu ní xáha<sup>n</sup>-gá sá méé-gá taxi tnúni-gá nchaandi túhú sá ío.

<sup>36</sup> Te nchaa ñáyiú na quindáá iní ñáhá xii Déhe-gá, ñáyiú-á<sup>n</sup> cundecú-yu ndíhi-gá ni caa ni quíhí<sup>n</sup>. Te nchaa ñáyiú vá quindáá iní ñáhá xii Déhe Yá Ndiöxí ío dandòho ñaha-gá xií-yu.

## 4

### *Jèsús ndíhi ì<sup>n</sup> ñaha Sàmariá*

<sup>1</sup> Te ní níhí cue téé cùu fariséu tnúhu sá vèi-gá ñáyiú ta chìnchícú<sup>n</sup> ñáhá xii Jesús. Te duca<sup>n</sup> vèi-gá-yu ta dàcuandute-gá cuáhá<sup>n</sup> dàcúúxí tè Juàá.

<sup>2</sup> Te cuèi ñá díú mèe-gá dácúandute ñaha-gá xií-yu, dico cue téé xica cuu ndíhi-gá dácúandute ñaha-güedé xií-yu.

<sup>3</sup> Te ní níhí Jèsús tnúhu nàcuáa càhá<sup>n</sup> cue téé cùu fariséu, núu ní ndee-gá distritú Jùdeá cuánuhú tucu-gá distritú Galiléa.

<sup>4</sup> Te ichi ñùhu-gá ní nayáha-gá distritú Sàmariá.

<sup>5</sup> Te ní sáá-gá ì<sup>n</sup> ñúú nání Sícár te ñúú-á<sup>n</sup> yíndèhu-xi distritú Sàmariá. Te xíá<sup>n</sup> cáá yàtni ñuhu núú ñí sáha táhú ndíi Jàcób déhe ndíi ndíi Chèé.

<sup>6</sup> Te yàcá<sup>n</sup> cáá dòco ní cuu cuendá ndíi Jàcób. Te cùu-xi datná cuádava nduu ñùhu Jesús ichi, te ío ní xàú-gá núu ní sáá-gá yuhu dòco-á<sup>n</sup> ñí ngóo-gá ndétátú-gá.

<sup>7-8</sup> Te ní xica cue téé xica cuu ndíhi-gá cuáhá<sup>n</sup>-güedé xiti ñúú Sícár cuánguaa<sup>n</sup>-güedé sá cáxí-güedé. Te

yuhu dòco-á<sup>n</sup> núcõo-gá ní sáá ì<sup>n</sup> ñadíhí ñaha distritú Sàmariá véxi quèhnu-a<sup>n</sup> ndute, te ní xáha<sup>n</sup> Jèsús:

—Taxi táhú luha ndute na còho-í —càchí-gá xáha<sup>n</sup>-gá.

<sup>9</sup> Te ní xáha<sup>n</sup> ñadíhí-á<sup>n</sup>:

—¿Ná cuendá da núu-í xicá<sup>n</sup>-n ndute coho-n? Te yòhó cúú-n tèe isràél, te yúhú cúu-í ñaha Sàmariá —càchí-a<sup>n</sup> xáha<sup>n</sup>-a<sup>n</sup> xii-gá.

Te duca<sup>n</sup> ñí xáha<sup>n</sup>-a<sup>n</sup>, chi ñá túú ndècu váha ñáyiú isràél ndíhi ñáyiú distritú Sàmariá.

<sup>10</sup> Te ní xáha<sup>n</sup> Jèsús xii-a<sup>n</sup>:

—Ñá cútnùni iní-n ñá taxi Yá Ndiöxí xii-n, te ñí ñá cútnùni iní-n yòo xicá<sup>n</sup> ndute núu-n. Te núu dicó xini-n yòo cuu yúhú á, te da mee-n cãcá<sup>n</sup>-n ndute núu-í coho-n, te yúhú taxi-í ndute cundecu ndíhi-n núú cuáhá<sup>n</sup> núú véxi —càchí-gá xáha<sup>n</sup>-gá.

<sup>11</sup> Te ní xáha<sup>n</sup> tucu ñadíhí-á<sup>n</sup>:

—Tátá, ñí sá quèhnu-n ndute ñá túú nèhe-n, te doco-a cùnú víhí, te ñá túú ndèé quínguehe<sup>n</sup>-n ndute taxi-n coho-í.

<sup>12</sup> Ndíi Jàcób ñaní tnáhá-ndí ní xíndecu ndèé sanaha ñí cadúha ndíi doco-a ñí tóo ndute ní xihí ndíi, ndíhi nchaa déhe ndíi, ndíhi nchaa quiti ndíi, te ní ndóo cùu cuendá-ndí. ¿Te násai, te yòhó cùnùu-gá-n dàcúúxí ndíi-á<sup>n</sup>? —càchí-a<sup>n</sup> xáha<sup>n</sup>-a<sup>n</sup> xii-gá.

<sup>13</sup> Te ní xáha<sup>n</sup> Jèsús:

—Nchaa ñáyiú xihí ndute doco-a, te vá cúú vètú dúcá<sup>n</sup> iní-yu chi dayìchí ñáhá-ní tucu-xi ndute-a.

<sup>14</sup> Dico nchaa ñáyiú na còho ndute na cuáñaha-í, te vá ì<sup>n</sup> ndúu-gá dayìchí ñáhá-xí ndute-á<sup>n</sup> xií-yu, chi ndute cuáñaha-í cúú-xí ndute váha-gá. Te dàtná quée ñihni ndute xiti doco-a, nchaa-ni nduu ñùhu ñá túú yìchí, duca<sup>n</sup> sãtnahá-xi cada-xi chi candeca-xi iní-yu ni caa ni quíhí<sup>n</sup>, te núu na còhó-yu ndute cuáñaha yúhú —càchí-gá xáha<sup>n</sup>-gá xii-a<sup>n</sup>.

<sup>15</sup> Te ní xáha<sup>n</sup>-a<sup>n</sup>:

—Tátá, taxi ndute-á<sup>n</sup> ná còho-í cuendá sá vá dayìchí ñáhá tráhí-gá-xi ndute. Te vá quíxí-gá-í quixi quèhnu-í ndute doco-a —càchí-a<sup>n</sup> xáha<sup>n</sup>-a<sup>n</sup> xii-gá.

16 Te ní xáha<sup>n</sup> Jèsús:

—Cuàhá<sup>n</sup> cuángàna yìi-n, te quixi-ndo ìha —cachí-gá xáha<sup>n</sup>-gã xii-a<sup>n</sup>.

17 Te ní xáha<sup>n</sup>-a<sup>n</sup>:

—Ñá túú yì-í —càchí-a<sup>n</sup> xǎha<sup>n</sup>-a<sup>n</sup> xii-gá.

Te ní xáha<sup>n</sup> tùcu Jesús:

—Ndáá càhá<sup>n</sup>-n sǎ ñà túú yì-n.

18 Dico ní cuu úhú<sup>n</sup> téé cǎndeca-n, te téé ndèca-n vitna chi ñá díú yì-n cuu-dé, te ndáá càhá<sup>n</sup>-n sǎ ñà túú yì-n —cachí-gá xáha<sup>n</sup>-gã xii-a<sup>n</sup>.

19 Te sá dúcá<sup>n</sup> ñí xáha<sup>n</sup>-gã ñúu ní xáha<sup>n</sup> tùcu-a<sup>n</sup>:

—Tǎtá, yúhú sání ìní-í sá yòhó cúu-n ì<sup>n</sup> téé càhá<sup>n</sup> tnúhu Yá Ndiǒxí.

20 Te cue ñaní tnáhá-ndí ní xíndecu ndéé sanaha ñí xóo cada càhnú-yu Yá Ndiǒxí tindúú-a, dico nchòhó ñáiyu isràél càchí-ndó sǎ ndéé ñúú Jerusàlén cada càhnu-o-gá —càchí-a<sup>n</sup> xǎha<sup>n</sup>-a<sup>n</sup> xii-gá.

21 Te ní xáha<sup>n</sup> Jèsús xii-a<sup>n</sup>:

—Ì<sup>n</sup> tnúhu na càhá<sup>n</sup>-í-a, te quíndáá ìní-n. Sa ta cùyatni sáá nduu sá ñà díú-gã mee-ni tindúú-a, te ni ñà díú-gã mee-ni ñúú Jerusàlén cada càhnu-ndo Tǎtá-ó Dütú Ndiǒxí, chi ndèni ní cuu cada càhnu-ndo-gá.

22 Te nchòhó cue ñáiyu Sàmariá chi ñá cùtnùní ìní-ndó ñá cúú sǎ quidé càhnu-ndo, dico nchúhú ñáiyu isràél, chi cùtnuní ìní-ndí ná cúú sǎ quidé càhnu-ndí. Chi ì<sup>n</sup> téé isràél véxi-dé dàcácu nihnu-dé ñáiyu cuèndá vá quèhí<sup>n</sup>-yu núú ùhú núú ndàhú.

23 Te není vitna ngüíta-yu cada càhnu ndisá-yu Tǎtá-ó Dütú Ndiǒxí, te cadá-yu ñí yùhu ñí ìní-yu sá cúú-xí-gã, chi mee-gã duca<sup>n</sup> cuìní-gá cadá-yu cada càhnú-yu-gá.

24 Te Yá Ndiǒxí chi ì<sup>n</sup> espíritú cúú-gã. Te nchaa ñáiyu na càda cahnu ñaha, te cadá-yu ñí yùhu ñí ìní-yu sá cúú-xí-gã te cadá-yu dàtná càhá<sup>n</sup> tnúhu-gá —càchí-gá xáha<sup>n</sup>-gã xii-a<sup>n</sup>.

25 Te ní xáha<sup>n</sup> ñàdihí-á<sup>n</sup>:

—Xìní-í sá quíxí tée cùu Mesiás, téé càchí-güedé nání Crìstú. Te téé-ǎ<sup>n</sup> ná

sàá-dé, te cachí tnúhu ndáá-dé nàcuáa cuu —càchí-a<sup>n</sup> xǎha<sup>n</sup>-a<sup>n</sup> xii-gá.

26 Te ní xáha<sup>n</sup> Jèsús:

—Diu téé-á<sup>n</sup> cúú yùhú téé ndàtnúhu ndihí-n —càchí-gá xáha<sup>n</sup>-gã xii-a<sup>n</sup>.

27 Te òré-á<sup>n</sup> ñí ndexìo cue téé xìca cuu ndihí-gá, te ní cuñúhu-güedé sá ndàtnúhu-gá ndihí ñàdihí-á<sup>n</sup>. Dico ni ì<sup>n</sup>-güedé ñá ní xicá<sup>n</sup> tnúhú-güedé núú-gã ñúu ná cuèndú ndàtnúhu-gá ndihí ñàdihí-á<sup>n</sup>.

28 Duca<sup>n</sup> te ní dándõo ñàdihí-á<sup>n</sup> yoó ndute-a<sup>n</sup> xíá<sup>n</sup>, te ní xica-a<sup>n</sup> cuánuhú-a<sup>n</sup> ñúú cùtnúhu-a<sup>n</sup> ñáiyu cuèndá Jèsús.

29 Te ní xáha<sup>n</sup>-a<sup>n</sup>:

—Chí nèhé ná quèhí<sup>n</sup>-ó, chi quini-ndó ñá cúú ì<sup>n</sup> téé núcóo yuhu dòco-á<sup>n</sup> ñúu ñá díú Crìstú Yaá ní tendaha Yá Ndiǒxí véxi ñuyíú-a cùu-dé ñúu ní càhá<sup>n</sup> ndáá-dé nàcuáa cùu ndecu-í —càchí-a<sup>n</sup> xǎha<sup>n</sup>-a<sup>n</sup> xii-yu.

30 Te sá ñí níhí ñáiyu ñúú-á<sup>n</sup> tnúhu, xíá<sup>n</sup> ní xicá-yu cuáhá<sup>n</sup>-yu.

31 Te òré vátá sàá-gá-yu xíá<sup>n</sup> ñí xáha<sup>n</sup> cuè téé xìca cuu ndihí-gá xii-gá:

—Mèstrú, cudèhñu na cudehñu-o —cachí-güedé xǎha<sup>n</sup>-güedé xii-gá.

32 Te ní xáha<sup>n</sup>-gã:

—Ndècu ì<sup>n</sup> sá cáxì-í, ì<sup>n</sup> sá ñà túú xìní nchòhó —càchí-gá xáha<sup>n</sup>-gã xii-güedé.

33 Te cue téé xìca cuu ndihí-gá xìtnàha-güedé:

—Váa ío ñáiyu ní quixi nehe sá ñí xexi-gá ñúu duha càhá<sup>n</sup>-gá —càchí-güedé xìtnàha-güedé.

34 Te ní xáha<sup>n</sup>-gã:

—Dàtná cuìní-ndó cùu vétú ìní-ó òré xéxi-ó, duca<sup>n</sup> cùu vétú ìní-í quidè-í nchaa nàcuáa ní càhá<sup>n</sup> Yá Ndiǒxí Yaá ní tendaha ñaha xii-í véxi-í ñuyíú-a, te chiú<sup>n</sup>-gá ío cùdíí ìní-í dandihí-í.

35 Te nchòhó càchí-ndó sǎ cùmání cùmí-gã yóo te cuu itú. Dico yúhú càchí-í sá cùndehe-ndo ñáiyu-ǎ<sup>n</sup>, chi sa ndècu túha-yu, dàtná cúú-ñá itú sá sá ní cuu-ná natahu-o cùú-yu, chi sa ndècu túha-ná-yu cundedóho-yu tnúhu-í.

36 Te dàtná cúú ñáiyu nàtahu itú chi sa cúhu<sup>n</sup> yáhu-yu, duca<sup>n</sup> sǎtnahá-xi cùu ñáiyu na càhá<sup>n</sup> tnúhu-í, chi cuáñaha-í sá ndúú tǎhú-yu na sàá

nduu. Te nchaa ñáyiú na tñi tñúhu-í te nduu táhũ-yu cundecu-í ndihí-yu ni caa ni quihí<sup>n</sup>. Te dàtná cúú ñáyiú ní chihí tatá-xi, ndihí ñáyiú ní natahu ítú-xi cùdíi-nă iní-yu. Duca<sup>n</sup> sãtnahá-xi cùú ñáyiú na càhá<sup>n</sup> tñúhu-í.

37 Chi ndáá quée-xí nàcuáa cuáhá<sup>n</sup> ì<sup>n</sup> cuèndú sá càchí-xi: “Tucu téé ní chihí tatá, te tucu téé ní natahu”, duha cuáhá<sup>n</sup> cuèndú-á<sup>n</sup>.

38 Te yúhú tendaha ñaha-ĩ xii-ndo quihí<sup>n</sup>-ndó cãhá<sup>n</sup>-ndó tñúhu-í núú sà ní yáha-güedé ní cáhá<sup>n</sup>-güedé tñúhu-í. Te nchòhó quihí<sup>n</sup>-ndó dicó-nă nduu cuèndá-ndó chù<sup>n</sup>-á<sup>n</sup> — càchí-gá xáha<sup>n</sup>-gã xii-güedé.

39 Te ío cuéhé ñáyiú ñuú-á<sup>n</sup> ní xíndedóho-yu cuèndú ní cani ñadìhí-á<sup>n</sup> nũ-yu sá Jèsús ní xáha<sup>n</sup>-gã nchaa nàcuáa quide-a<sup>n</sup>, te xiã<sup>n</sup> ío vâi-yu ní sándáá iní-yu Jèsús.

40 Te ní quexió-yu núú ndécú-gã, te ní cáhá<sup>n</sup> ndàhú-yu núú-gã sá quèndõ-gá ñuú-yu, núú xiã<sup>n</sup> ní xíndecu-gá ndihí-yu úú nduu.

41 Te ío cuéhé-gã-yu ní sándáá iní-yu tñúhu ní cáhá<sup>n</sup> méé-gã.

42 Te ní xáhã<sup>n</sup>-yu xii ñadìhí-á<sup>n</sup>:

—Vitna te ñá díú mèe-ni tñúhu ní cáhá<sup>n</sup>-n ní sándáá iní-ndí-gá, chi ní cáhá<sup>n</sup> méé-gã ní xíndedóho-ndí vitna núú ní sándáá ndisa iní-ndí sá díú-gã cúú-gã Crístú Yaá ní tendaha Yã Ndiõxí véxi ñuyíú-a dàcácu nihnu-gá ñáyiú núú ùhú núú ndàhú —càchí-yu xãhã<sup>n</sup>-yu xii-a<sup>n</sup>.

*Jèsús quidé tãtna-gá déhe ì<sup>n</sup> téé ndèè chíú<sup>n</sup> nũú gobièrnú*

43 Te nduu úní ní nucúhu<sup>n</sup> Jèsús ichi cuáhá<sup>n</sup>-gá distritú Galileá.

44 Te cuáhá<sup>n</sup>-gá yacá<sup>n</sup>, chi mee-gã ní cachí-gá sá nũu ì<sup>n</sup> téé na càhá<sup>n</sup>-dé tñúhu Yã Ndiõxí ñuú núú ní cacu-dé, te ñá túú nèhé-yu sá yíñùhu núú-dé.

45 Te òré ní sáá-gá distritú Galileá, te ío váha ní cuu iní ñáhã-yu xii-gá, chi cuèndá tñàhá-yu ní xíndecu ndihí-gá vico pascuá ñuú Jerusálén. Te yacá<sup>n</sup> ní xíní-yu nchaa sá ní quide-gá.

46 Te ní sáhá<sup>n</sup> tucu-gá ñuú Cànaá ì<sup>n</sup> ñuú yíndèhu distritú Galileá, núú ní nadatiú-gá ndute ní nduu-xi vínú. Te ñuú Capèrnaúm ndécú ì<sup>n</sup> téé ndèè chíú<sup>n</sup> nũú téé cùu gobièrnú, te téé-á<sup>n</sup> cùhú ì<sup>n</sup> déhe-dé.

47 Te ní níhí-dě tñúhu sá ní ndee Jèsús distritú Jùdeá ní ndexio-gá distritú Galileá, núú ní sáhá<sup>n</sup>-dé núú ndécú-gã, te ní cáhá<sup>n</sup> ndàhú-dé núú-gã sá quihí<sup>n</sup>-gá cada tãtna-gá déhe-dé, chi sa ndècu-na-dé sá cùú-dé.

48 Te ní xáha<sup>n</sup> Jèsús xii-dé:

—Nchòhó, chi vá quèndáá iní ñáhã-ndó xii-í te núú vá cadà-í ì<sup>n</sup> sá vâ yõo tñàhí ndàcu cada quini-ndó — càchí-gá xáha<sup>n</sup>-gã xii-dé.

49 Te ní xáha<sup>n</sup> tucu téé cùhú déhe-xi-á<sup>n</sup> xii-gá:

—Tãtá, cundee ìní-n ná quihí<sup>n</sup>-ni-o cada tãtna-n dèhe-í ná cuu-dé, chi càhú víhí tñàhá-dé —càchí-dé xãha<sup>n</sup>-dě xii-gá.

50 Te ní xáha<sup>n</sup> Jèsús:

—Cuanùhú te quini-n nă ní ndúha déhe-n —càchí-gá xáha<sup>n</sup>-gã xii-dé.

Te ní sándáá iní-dé tñúhu ní cáhá<sup>n</sup> Jèsús, te cuánuhú-dé.

51 Te ñùhu-dé ichi cuánuhú-dé ní sánú tñàhá ñáhã cuè téé xínu cuechi núú-dé. Te ní xáha<sup>n</sup>-güedé sá sà ta ndúha déhe-dé cuáhá<sup>n</sup>.

52 Te ní xicá<sup>n</sup> tñúhú-dé núú-güedé ná òré cúú-xí ní ngüíta-xi ta quètaú cuéhé-dé. Te ní xáha<sup>n</sup>-güedé:

—Icu dàtná òré caá ì<sup>n</sup> sacuaa ní nchíco-dé cahni —càchí-güedé xãha<sup>n</sup>-güedé xii-dé.

53 Te tãtá tée cùhú-á<sup>n</sup> ní ndacu iní-dé sá díú òré ní quètaú cuéhé-dé ní cáhá<sup>n</sup> ndihí-dé Jèsús ní xáha<sup>n</sup>-gã sá ndúha déhe-dé. Te xiã<sup>n</sup> nũu ndi nchàa téé-á<sup>n</sup> vehe-dé ní sándáá iní-yu Jèsús.

54 Te sá ní quide-gá-á<sup>n</sup> cúú úú xito quide-gá sá vâ yõo tñàhí ndàcu cada. Te sá ní quide-gá xito cùu uú-á<sup>n</sup> cúú-xí sã ní quide-gá cútnàhá ní ndee-gá distritú Jùdeá cuánuhú-gá distritú Galileá.

## 5

*Jèsús quidé tātna-gá ì<sup>n</sup> té cùhú ì<sup>n</sup> xichì núú nání Bètesdá*

<sup>1</sup> Te sátá dúcá<sup>n</sup> nǐ cuu, te ní tnahá nduu nǐ quide ñáyiú isràél ì<sup>n</sup> vico. Te ní sáhá<sup>n</sup> Jèsús ñuú Jerusàlén.

<sup>2</sup> Te ní càa xico yuhu ñuú-á<sup>n</sup> ñúhú dòco, te titní yèhe-xi ndecu. Te ì<sup>n</sup> yèhe-xi-á<sup>n</sup> nání Yùyehe Mbéé, te yatni xíá<sup>n</sup> cáá ì<sup>n</sup> tanquí ndute dàna-ní-yu Bètesdá tnúhu mèé-yu tnúhu hèbreú, te yuhu tànquí-á<sup>n</sup> cáá ùhú<sup>n</sup> corrèdór.

<sup>3</sup> Te xití corrèdór-á<sup>n</sup> xǐndecu cuéhé ñáyiú cùhú, ñáyiú cuáá, ñáyiú yacua, ñáyiú ñá cúú-gǎ candá nihnu, ndètú-yu candá ndute-á<sup>n</sup>.

<sup>4</sup> Chi nihí-yu tnúhu sá ãma nihnu cùu<sup>n</sup> ì<sup>n</sup> espíritú xínú cuèchi núú Yǎ Ndiòxí, te dàcandá-xi ndute ñúhu tanquí-á<sup>n</sup>. Te ñáyiú díhna nuu nà quée xití ndute-á<sup>n</sup>, te òré-ni ndúha-yu.

<sup>5</sup> Te yacá<sup>n</sup> ñútnahá ì<sup>n</sup> té ní cuu ócó sáhú<sup>n</sup> úní cuiá sǎ cùhú-dé.

<sup>6</sup> Te ní xiní Jèsús cáá-dě, te ní cutnùnì iní-gá sá nǐ cuu cuéhé cuiá cùhú-dé, te ní xáha<sup>n</sup>-gǎ:

—¿Cuínì-n ndúha-n-ǎ<sup>n</sup>? —càchí-gá xáha<sup>n</sup>-gǎ xii-dé.

<sup>7</sup> Te ní xáha<sup>n</sup> tée cùhú-á<sup>n</sup>:

—Tàta, vá yòo nihí-í dàquée ñaha xì-í xití tànquí-a òré càndá ndute, chi òré cuínì-í quée-í, te ingá-ni tucú-yu quènduú-yu núu-í cuángueé-yu —càchí-dé xáha<sup>n</sup>-dě xii-gá.

<sup>8</sup> Te ní xáha<sup>n</sup> Jèsús:

—Ndacuíñí, te ndaca-ni-n yùu-n, te caca-n —càchí-gá xáha<sup>n</sup>-gǎ xii-dé.

<sup>9</sup> Te òré-ni-á<sup>n</sup> nǐ ndúha tée cùhú-á<sup>n</sup>, te ní ndaca-ni-dé yuu-dé, te ní xica-dé cuáhá<sup>n</sup>-dé. Te nduu-ǎ<sup>n</sup> cúú-xí ndùu ndetatú ñáyiú,

<sup>10</sup> núu ní xáha<sup>n</sup> cuè tée isràél xii tée ní cuhú-á<sup>n</sup>:

—Vitna cùu-xi nduu ndetatú-ó núu vá cúú cuído-n yuu-n —càchí-güedé xáha<sup>n</sup>-güedé xii-dé.

<sup>11</sup> Te ní xáha<sup>n</sup>-dě:

—Mee tée ní quide tātna ñaha xì-í ní cachí-dé sá ndácàni-í yuu-í, te caca-í —càchí-dé xáha<sup>n</sup>-dě xii-güedé.

<sup>12</sup> Te ní xáha<sup>n</sup>-güedé:

—¿Te ná cúú tée duca<sup>n</sup> nǐ cachí sá ndácàni-n yuu-n te caca-n-í? —càchí-güedé xáha<sup>n</sup>-güedé xii-dé.

<sup>13</sup> Dico tée ní cùhú-á<sup>n</sup> ñà túú ní cutnùnì iní-dé ná cúú tée ní quide tātna ñaha xì-dé, chi Jèsús òré-ni ní xica-gá cuáhá<sup>n</sup>-gá tnuú nchaa ñáyiú chitu xǐndecu xíá<sup>n</sup>.

<sup>14</sup> Te sátá dúcá<sup>n</sup> te ní naníhí tnahá Jèsús ndíhi tée ní quide tātna-gá-á<sup>n</sup> xití veñúhu càhnu sá ìo cùnuu, te ní xáha<sup>n</sup>-gǎ xii-dé:

—Ní xiní-n nǎ ní ndúha-n-va. Te vitna vá cáda-gǎ-n nǎndì sá cuéhé sá dúhá, chi núu na càda-ni-n ña, te quixi ingá cuéhé, te vǐhi-gá ndoho-n —càchí-gá xáha<sup>n</sup>-gǎ xii-dé.

<sup>15</sup> Duca<sup>n</sup> te ní xica tée ní cùhú-á<sup>n</sup> cuángúñaha-dé xii cue tée isràél sá Jèsús ní quide tātna ñaha-gǎ xii-dé.

<sup>16</sup> Núu sátá nǐ níhí cue tée isràél tnúhu, te ní cuu úhú iní-güedé Jèsús. Te ní cuínì-güedé cahni ñaha-güedé xii-gá cuèndá sá dúcá<sup>n</sup> nǐ quide tātna-gá nduu ndetatú-güedé.

<sup>17</sup> Te ní xáha<sup>n</sup> Jèsús xii-güedé:

—Tàtà-í Dútú Ndiòxí quidé chiú<sup>n</sup>-ni-gá núu xíá<sup>n</sup> quidé chiú<sup>n</sup>-í tnahá-í —càchí-gá xáha<sup>n</sup>-gǎ xii-güedé.

<sup>18</sup> Te ní cudéé<sup>n</sup>-güedé sá ñá ní cànehe í-gǎ nduu ndetatú-güedé, te ní cuínì-güedé cahni ñaha-güedé, te uu<sup>n</sup>-gá ní cuínì-güedé cahni ñaha-güedé xii-gá sá ní cachí-gá sá Tàtà-gǎ cúú Dútú Ndiòxí, chi ní sani iní-güedé sá cuínì-gá nútnahá-gá Yǎ Ndiòxí núu xíá<sup>n</sup> ìo ní cudéé<sup>n</sup>-güedé.

*Jèsús Déhe Yá Ndiòxí táxí tnùnì-gá*

<sup>19</sup> Te ní xáha<sup>n</sup> tùcu Jesús xii-güedé:

—Na càchí tnúhu ndáá-í xii-ndo sǎ yǐhú chi ní ì<sup>n</sup> sá ñǎ ndácù-í cada mee-í núu ñá túú mèe Tàtà-í dánèhé ñáhá-gǎ xii-í nàcuáa cada-í, chi nchaa sá quidé Tàtà-í quidè-í tnahá-í.

<sup>20</sup> Te Tàtà-í ìo cùu iní ñáhá-gǎ xii-í núu dànèhé ñáhá-gǎ nchaa nàcuáa quide-gá. Te vitna ndècu vai-gá chiú<sup>n</sup> tahu-gá cada-í, chiú<sup>n</sup> sá vǎtá quínì-gá-ndó càda-í nàcuáa cuñúhu vǐhi-ndo.

<sup>21</sup> Chi Tàtà-í dandòto-gá ñáyiú ní xíhí. Te yúhú cada-í te nduu táhú

nchaa ñáyiú càchí iní-í cundecu ndihi ñàhá-yu xii-í ni caa ni quíhí<sup>n</sup>.

22 Te na sáá nduu te ñá díú Tătà-í cada ndáá-gá cuéchi ñáyiú, chi ní cachí-gá sá yúhú cada ndáá-í

23 cuèndá nchaa ñáyiú canehé-yu sá yíñùhu núú-í dàtná néhě-yu sá yíñùhu núú Tătà-í Yaá ní tendaha ñàha xii-í véxi-í ñuyíú-a. Te nchaa ñáyiú ñá túú nèhe sá yíñùhu núú yúhú, te ni núú Tătà-í ñá túú nèhé-yu sá yíñùhu.

24 "Te na càchí tnúhu ndáá-í xii-ndo sã nchaa ñáyiú na cùndedóho tnúhu na càhá<sup>n</sup>-í, te núu na quíndáá iní-yu Dútú Ndiöxí Yaá ní tendaha ñàha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihi-gá ni caa ni quíhí<sup>n</sup>.

25 Te vitna na càchí tnúhu ndáá-í xii-ndo sã nchaa ñáyiú ndècu ichi cuehé ichi duha cùú-yu dàtná ì<sup>n</sup> ñáyiú ní xíhí, te vitna ní sáá nduu cùndedóho-yu tnúhu càhá<sup>n</sup> yúhú Déhe Dútú Ndiöxí, te nchaa ñáyiú na quíndáá iní-xi, te naníhí tàhú-yu.

26 Te dàtná quidé mée Tátà-í dácácu nihnu-gá ñáyiú, duca<sup>n</sup> ñí cachí-gá cada-í dácácu nihnu-í-yu.

27 Te ní cachí tucu-gá sá sáá ì<sup>n</sup> nduu, te cada ndáá-í cuéchi nchaa ñáyiú ñá túú quide ndáá, chi yúhú táxi tnùn-í, te cùú-í ñani tnáhá-ndó nchaa-ndo.

28 Te ni vã cúñùhu-ndo tnúhu càhá<sup>n</sup>-í, chi sáá nduu te nchaa ñáyiú ní xíhí tecú dóho-yu tnúhu càhá<sup>n</sup>-í.

29 Te ndoto nchaa ñáyiú ní quide váha cundecu ndihi-í-yu ni caa ni quíhí<sup>n</sup>, te ndoto tnàhá nchaa ñáyiú ní quide cuèhé ní quide duha, te ñáyiú-á<sup>n</sup> quíhí<sup>n</sup>-yu núú ùhú núú ndàhú.

### *Yá Ndiöxí chindèe tnúhu-gá Jèsús*

30 "Te yúhú, chi ni ì<sup>n</sup> sá ñã ndácù-í cada mee-í núu ñá díú mée Yá Ndiöxí táuchíu<sup>n</sup>-gá nàcuáa cada-í. Te quide ndáá-í cuéchi ñáyiú nàcuáa tàxi tnun-í-gá cada-í, te yúhú ñá túú quide-í sá cúú iní mée-í chi Tătà-í ní táuchíu<sup>n</sup>-gã nàcuáa cada-í.

31 Te núu na càhá<sup>n</sup>-í sá mée-í táxi tnùn-í, te vá quíndáá iní-ndó.

32 Chi Yá Ndiöxí chindèe tnúhu ñàha-gã xii-í, te yúhú xìn-í sá tnúhu càhá<sup>n</sup>-gá cuèndá-í cúú-xí ì<sup>n</sup> sá ndáá.

33 Te nchòhó ní téchíu<sup>n</sup>-ndó cuè téé ní sáhá<sup>n</sup> ní ndúcú tnúhu-güedé núú tè Juáa núu ná tnúhu càhá<sup>n</sup>-dé cuèndá-í, te téé-ã<sup>n</sup> ní càhá<sup>n</sup> ndáá-é nàcuáa nduu cuèndá-í.

34 Dico yúhú, chi ñá túú xini ñuhu-í ì<sup>n</sup> ñáyiú ñuyíú-a chindee tnúhu ñàhá-yu xii-í, dico té Juáa ní càhá<sup>n</sup> váha-é cuèndá-í, te xíã<sup>n</sup> càchí tnúhu tucu-í cuèndá quíndáá iní-ndó, te naníhí tàhú-ndó.

35 Te dàtná cuini-ndó cùu ì<sup>n</sup> iti ndéñuhú te dáyehé-xi, duca<sup>n</sup> sãtnahá-xi ní cuu té Juáa, chi sacú-ni nduu ío ní cudí iní-ndó tnúhu ní càhá<sup>n</sup>-dé.

36 Te váha-ni ní càhá<sup>n</sup> té Juáa, dico yúhú chi ndècu nchaa sá tá quide-í véxi nàcuáa ní táuchíu<sup>n</sup> Yá Ndiöxí cada-í, te nchaa xíã<sup>n</sup> cúú-xí ì<sup>n</sup> sá cùnùn-í iní-ndó sã mée Yá Ndiöxí ní tendaha ñàha-gã xii-í véxi-í ñuyíú-a.

37 Te ñu-ni-gá chindèe tnúhu ñàha-gã xii-í, dícó-ni sá mée-ndó ña túú cuini-ndó cada cuèndá-ndó tnúhu càhá<sup>n</sup>-gá, te ni ña túú xìn-í-ndó nàcuáa càa-gá.

38 Te ñá túú quèe iní nchòhó tnúhu càhá<sup>n</sup>-gá, chi ñá túú sàndáá iní ñàhá-ndó xii yúhú Déhe-gá.

39 Te dàcuaha vihi-ndo tutú ndèe tnúhu-gá, chi sàni iní-ndó sã xíã<sup>n</sup>-ni dacuàha-ndo te naníhí tàhú-ndó. Te váha-ni quide-ndo, chi ñu tutú-á<sup>n</sup> càhá<sup>n</sup>-xi cuèndá-í.

40 Te nchòhó ñá túú cuini-ndó quíndáá iní ñàhá-ndó xii-í cuèndá naníhí tàhú-ndó.

41 "Te yúhú, ñá túú xini ñuhu-í sá cáda càhnu ñàha-ndo xii-í.

42 Dico sa xìn-í nàcuáa sàni iní-ndó chi ña túú cùu iní-ndó Yá Ndiöxí.

43 Te yúhú véxi-í ñuyíú-a chi Tătà-í ní tendaha ñàha-gá, te nchòhó ña túú cuini-ndó tnè-ndo tnúhu càhá<sup>n</sup>-í, dico núu quixi ì<sup>n</sup> téé càhá<sup>n</sup> cuèndá mée-xí, chi quíndáá iní-ndó.

44 Te ná váha nchòhó ná tnè-ndó tnúhu càhá<sup>n</sup>-í, te xio xio-ni quide

cahu tnahá-ndo, te ñá túú quide cuendá-ndó sã tnũhu váha càhá<sup>n</sup> Yã Ndiõxí cuu xii-ndo.

<sup>45</sup> Te vá cání ìní-ndó sã yũhú ndàcá<sup>n</sup> cuéchi-í núú Tãtã-í nàcuáa quide-ndo, chi ndíi Moisés ní chídó tnùní ndíi núú tütú Yã Ndiõxí nàcuáa quide-ndo sã ñà túú quide váha-ndo, te mee-ndo sàni iní-ndó sã nánihí tãhú-ndó cuendá tnũhu ní cáhá<sup>n</sup> ndíi.

<sup>46</sup> Chi núu nchòhó sàndáa ndisa iní-ndó tnũhu ní cáhá<sup>n</sup> ndíi Moisés ñã, te duca<sup>n</sup> te quindáa iní-ndó yũhú ní cùu, chi ndíi-ã<sup>n</sup> ní chídó tnùní ndíi nàcuáa cada-í ñuyú-a vitna.

<sup>47</sup> Te núu ñã túú sàndáa iní-ndó tnũhu ní chídó tnùní ndíi, te ñi-ñi duca<sup>n</sup> càda ñaha-ndo xii-í vá quindáa iní-ndó tnũhu càhá<sup>n</sup>-í —càchí-gá xáha<sup>n</sup>-gã xii-güedé.

## 6

*Jèsús dácàxi-gá úhú<sup>n</sup> mĩ ñáyi*  
(Mt. 14:13-21; Mr. 6:30-44; Lc. 9:10-17)

<sup>1</sup> Te sátá dúcá<sup>n</sup> ñi cuu, te ní quee Jèsús cuáhá<sup>n</sup>-gá ìngá xio yuhu làgúná Galileá, àdi Tiberiás chi úú ñi-xi.

<sup>2</sup> Te ío cuéhé ñáyi nchìcú<sup>n</sup> ñáhá xii-gá cuáhá<sup>n</sup> cuendá sã ñi xini-yu nchaa sã vã yõ tnahí ndàcu cada ní quide-gá, chi ní quide tátna-gá nchaa ñáyi cùhú.

<sup>3</sup> Te ní sáa Jèsús ndíhi cue téé xica cuu ndíhi-gá ñi núú tìndúú, te xiá<sup>n</sup> ñi ngóo-gá ndíhi-güedé.

<sup>4</sup> Te ta cùyatni coo vico pascuá, vico quide ñáyi isràél.

<sup>5</sup> Te ní xini-gá sã ño vài ñáyi nchìcú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gã xii té Lìpé:

—¿Ndéé quíhí<sup>n</sup>-ó quĩguaa<sup>n</sup>-o sã cáxi nchàa ñáyi-a? —càchí-gá xáha<sup>n</sup>-gã xii-dé.

<sup>6</sup> Te duca<sup>n</sup> ñi xáha<sup>n</sup>-gã xii-dé cuendá sã cuíni-gá quini-gá nása cunduu tnũhu cáhá<sup>n</sup>-dé, dico mee-gã sa xini-gá nàcuáa cada-gá.

<sup>7</sup> Te ní xáha<sup>n</sup> tã Lìpé xii-gá:

—Te cuéi úú ciendú díhú<sup>n</sup> denàriú ná dãndoñuhu-o cuaa<sup>n</sup>-o paá, te ní

vã tnahá caxi-yu luha luha —càchí-dé xáha<sup>n</sup>-dẽ xii-gá.

<sup>8</sup> Te té Ndríxí ìngá téé xica cuu ndíhi-gá, ñani té Ximú, àdi Pelú chi úú ñi-dé, ní xáha<sup>n</sup>-dẽ:

<sup>9</sup> —Iha ndècu ñi<sup>n</sup> té ñhli nèhe-dé úhú<sup>n</sup> paá cebàdá te úú chácá, dico ndéé tnahá xéhé, te cuéhé víhí ñáyi —càchí-dé xáha<sup>n</sup>-dẽ xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cũñaha nã ngóo-yu nchaa-yu —càchí-gá xáha<sup>n</sup>-gã.

Te ñáyi-á<sup>n</sup> ñi ngóo-yu, te càa vihi ité núú ñi ngóo-yu-á<sup>n</sup>, te xinu dàtná úhú<sup>n</sup> mĩ mee-ni cué téé, te ñi<sup>n</sup> ñáyi ñi ndíhi landú.

<sup>11</sup> Te ní quehe<sup>n</sup> Jèsús paá, te ní ndacá<sup>n</sup> táhú-gã núú Yã Ndiõxí, te ní sãñaha-gã paá-á<sup>n</sup> xii cue téé xica cuu ndíhi-gá, te cue téé-á<sup>n</sup> ñi dácãhñu-güedé ní xexi nchaa ñáyi xixúcu-á<sup>n</sup>. Te ñi-ñi duca<sup>n</sup> ñi quide-gá chácá, te ní dácãhñu tucu-güedé-ñi ní xexi ñáyi ní ndahá xití-yu.

<sup>12</sup> Te òré ní túhú cóhõ-yu, te ní xáha<sup>n</sup> Jèsús xii cue téé xica cuu ndíhi-gá sã ná nàquehe<sup>n</sup>-güedé nchaa sã ñi quendóo cuendá sã vã quíhí<sup>n</sup>-xi núú míhí.

<sup>13</sup> Te cue téé-ã<sup>n</sup> ní naquehe<sup>n</sup>-güedé nchaa sã ñi quendóo, te ní chítú ùxúú tídihi núú ùhú<sup>n</sup>-ni paá cebàdá.

<sup>14</sup> Te sã ñi xini-yu ní nadacáyá-gá sã ñi xexí-yu, xiá<sup>n</sup> ní ngúita-yu ní xitnãhá-yu:

—Ndáa sã tãe-a sa ío cuendú sã quíxi-dẽ ñuyú-a cáhá<sup>n</sup>-dé tnũhu Yã Ndiõxí —càchí-yu xitnãhá-yu.

<sup>15</sup> Te ní cutnùní iní Jèsús sã cáda yicá-yu candeca ñáhá-yu xii-gá quíhí<sup>n</sup> cuendá cundecu-gá quindaha ñaha-gá xií-yu ni cùu, núu xiá<sup>n</sup> ní xica tucu-gá cuáhá<sup>n</sup>-gã xití yucu mee ñi chícuú-gá.

*Jèsús xicá-gã núú ndute*

(Mt. 14:22-27; Mr. 6:45-52)

<sup>16</sup> Te òré ní cuu ndíqui<sup>n</sup>, te cuáhá<sup>n</sup> cue téé xica cuu ndíhi-gá yuhu làgúná.

<sup>17</sup> Te ní quée-güedé bàrcú cuáhá<sup>n</sup>-güedé ñuú Capèrnaúm cáa ndaa ìngá xio



yuhu làgúná, te sa ní cuu ndiqui<sup>n</sup>, te ñá túú Jèsús quexìo quée-gá bàrcú ñúhú-güedě-á<sup>n</sup>.

<sup>18</sup> Te ní ngüíta-xi quène táchí ñíhi, te ñíhi dàcandau ndéé tnáhá ndùte làgúná-á<sup>n</sup>.

<sup>19</sup> Te sa ní cuu dàtná úhú<sup>n</sup> kilómetrú cuáhá<sup>n</sup>-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núú ndúté, te ní yùhú-güedé.

<sup>20</sup> Te ní xáha<sup>n</sup> Jèsús xii-güedé:  
—Yùhú véxi-í, vá yùhú-ndó —  
càchí-gá xáha<sup>n</sup>-gá xii-güedé.

<sup>21</sup> Te ío ní cudíí ìní-güedé sá ñí quexìo-gá cuánguee-gá bàrcú, te òré-ñí ní quexìo-güedé ndíhi-gá ndéé ìngá xio yuhu làgúná núú cuáhá<sup>n</sup>-güedé.

### *Ñáyiú nànducu ñaha xii Jèsús*

<sup>22</sup> Te ìngá nduu-á<sup>n</sup> xíndecu-ñí nchaa ñáyiú ní quendóo yuhu làgúná. Te ní quide cuendá-yu sá ñí ñí dèi-ná bàrcú nútñí-á<sup>n</sup> ní cùu ñá túú-gá, chi cue téé xica cuu ndíhi Jèsús ní quée-güedé bàrcú-á<sup>n</sup> cuáhá<sup>n</sup>-güedé. Te ní ñíhi-yu tnúhu sá ñà túú ní quée tnáhá Jèsús.

<sup>23</sup> Te ñíhi-nduu-á<sup>n</sup> ñí quée ñí ùú bàrcú ñúú Tiberiás ní sáá-xi yatni núú ñí xexí-yu pàá sá ñí ndacá<sup>n</sup> táhú Jèsús núú Yá Ndiòxí.

<sup>24</sup> Te ní xiní-yu sá ñà túú Jèsús ndíhi cue téé xica cuu ndíhi-gá, núú ní quée-yu bàrcú-á<sup>n</sup> cuáhá<sup>n</sup>-yu ñúú Capernaúm cuánúndúcú ñàhá-yu xii-gá.

### *Jèsús cúú-gá dàtná ñí sá nchító-ó*

<sup>25</sup> Te ní sáá-yu ìngá xio yuhu làgúná, xíá<sup>n</sup> ñí naníhi-yu Jèsús, te ní xáhá<sup>n</sup>-yu xii-gá:

—Mèstrú, ¿ná òré ní sáá-n ìha? —  
cachí-yu xáhá<sup>n</sup>-yu xii-gá.

<sup>26</sup> Te ní xáha<sup>n</sup> Jèsús:

—Na càchí tnúhu ndáá-í sá nchòhó nánducu ñaha-ndo xii-í cuendá-ñí sá ñí xexi-ndo ñí ndahá xiti-ndó, dico ñá díú cuendá sá ñí quide-í sá vǎ yǎo tnáhi ndàcu cada nanducu ñaha-ndo.

<sup>27</sup> Te vá cada cuendá-ndó sá mée-ñí sǎ cáxí-ndó cada chiú<sup>n</sup>-ndo chi xíá<sup>n</sup> vá cúdí-xi. Chi ío-gá xiní ñúhu-xi cada cuendá-ndó tnúhu Yá Ndiòxí

te tní-ndo, te naníhi tàhú-ndó. Te tnúhu-á<sup>n</sup> cachí tnúhu yúhú Téé cùu ñaní tnáhá-ndó nchàa-ndo, te xíá<sup>n</sup> candeca-xi iní-ndó ñí caa ñí quíhí<sup>n</sup>, chi mee Dütú Ndiòxí ní cachí-gá sá dúcá<sup>n</sup> cada-í —càchí-gá xáha<sup>n</sup>-gá xii-yu.

<sup>28</sup> Te ní xáhá<sup>n</sup>-yu:

—¿Nása cada-ndí cuendá ngúnu ichi-ndí nàcuáa cuení Yá Ndiòxí cundu-í? —càchí-yu xáhá<sup>n</sup>-yu xii-gá.

<sup>29</sup> Te ní xáha<sup>n</sup> Jèsús xii-yu:

—Yá Ndiòxí cuení-gá sá quíndáá iní ñáhá-ndó xii yúhú, téé ní tendaha-gǎ véxi ñuyíú-a —càchí-gá xáha<sup>n</sup>-gǎ xii-yu.

<sup>30</sup> Te ní xáha<sup>n</sup> tùcú-yu xii-gá:

—¿Ná cúú sǎ vǎ yǎo tnáhi ndàcu cada, cada-n cùndehe-ndí cuendá quíndáá iní ñáhá-ndí xii-n-í? ¿Ádi nágá cúú sǎ cáda-n cuendá cutnùní iní-ndí sá ndáa càhá<sup>n</sup>-n-í?

<sup>31</sup> Chi cue ñaní tnáhá-ó ñí xíndecu ndéé sanaha ñí xexí-yu pàá naní mànáá xití yucu dàtná yódó tnùní núú tùtú Yá Ndiòxí núú càchí-xi: “Yá Ndiòxí ní sáñaha-gǎ sá ñí xexí-yu, te ní cuu<sup>n</sup> túu-xi andíu”, duha càchí-xi núú tùtú-gá —càchí-yu xáhá<sup>n</sup>-yu xii-gá.

<sup>32</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sǎ ñà díú ndí Moisés ní sáñaha ndí pàá ní cuu<sup>n</sup> andíu ñí xexí-yu, chi mee Tǎtá-í ní sáñaha-gǎ sá ñí xexí-yu. Te sǎ táxí-gǎ vitna cùu-xi

<sup>33</sup> datná pàá véxi cuu<sup>n</sup> andíu cǎndeca-xi iní-ndó ñí caa ñí quíhí<sup>n</sup> —càchí-gá xáha<sup>n</sup>-gǎ xii-yu.

<sup>34</sup> Te ní xáhá<sup>n</sup>-yu xii-gá:

—Tǎtá, mee-ñí pàá-á<sup>n</sup> taxi-n cǎxi-ndí —càchí-yu xáhá<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yùhú cúú-í dàtná ñí sá xexí-ndó cǎndeca-xi iní-ndó. Te duha ndúu tnúhu càhá<sup>n</sup>-í, chi nchaa ñáyiú na quíndáá iní ñáhá xii-í, te vá ndóhó-gǎ-yu docó te vá ndóhó-gǎ-yu ndute.

<sup>36</sup> Dico-ñí sá nchòhó ñá túú sàndáá iní ñáhá-ndó cuéi xiní ñáhá-ndó xii-í.

37 Te nchaa ñáyi na cächí Tàtá-í nduu cuendá-í nasaá-yu núu-í, te ñáyi-á<sup>n</sup> vǎ dáquèe tíhù-í-yu.

38 Te ñá díú yúhú sá vèxi cuu<sup>n</sup>-í andiu te quide-í nchaa sá cúu iní mèe-í, chi véxi cuu<sup>n</sup>-í sá cáda-í nchaa nàcuáa ní táuchíú<sup>n</sup> mèe Tàtá-í Dútú Ndióxi Yáa ní tendaha ñàha xii-í véxi-í ñuyíú-a.

39 Te cuini-gá sá ncháá ñáyi ní cachí-gá nduu cuendá-í vǎ dáñà-í-yu cuíta nihnú-yu, te na sáá nduu te ñu-ni-í dandòto-í-yu.

40 Chi duca<sup>n</sup> ñí cachí Dútú Ndióxi cunduu sá ncháá ñáyi na tñi tñuhu cǎhá<sup>n</sup>-í, te quindáá ndisa iní ñáhǎ-yu xii yúhú Déhe-gá, te nduu táhù-yu cundecú-yu ndihí Yá Ndióxi ní caa ní quíhí<sup>n</sup>, te yúhú dandòto-í-yu na sáá nduu —cächí-gá xáha<sup>n</sup>-gǎ xií-yu.

41 Te ñá ní tñàhá iní ñáyi isràél tñuhu ní cáhá<sup>n</sup> Jèsús núu ní ngüíta-yu ní cáhá<sup>n</sup> cuèhé-yu cuendá-gá cuendá sá ní xáha<sup>n</sup>-gǎ sá mèe-gǎ cúu-gǎ dàtná sá xéxi-ó véxi cuu<sup>n</sup> andiu.

42 Te ní xitnàhá-yu:

—¿Náa ñá díú tée-a cùu-dé Jèsús déhe té Chèe? Nchoo xini-ó tǎtá-dě, te xini-ó nǎná-dě, ñá cachí-tu tée-a sá andiu véxi cuu<sup>n</sup>-dé! —cächí-yu xitnàhá-yu.

43 Te ní xáha<sup>n</sup> Jèsús xií-yu:

—Vǎ cǎhá<sup>n</sup> cuèhé-gá-ndó cuendá-í, chí dáñá.

44 Vǎ yǎo quindáá iní ñáhǎ xii yúhú núu ñá túú mèe Tàtá-í táxi cuendá ñáhǎ-gǎ xií-yu. Te ñu-gá ní tendaha ñàha-gá xii-í véxi-í, te yúhú dandòto-í-yu na sáá nduu.

45 Te núu tütú cue tée ní xóo cáhá<sup>n</sup> tñuhu Yá Ndióxi ndéé sanaha cächí-xi: “Yá Ndióxi danèhé ñáhǎ-gǎ xií-yu tñuhu-gá”, duha cächí-xi. Te nchaa ñáyi na cùndedóho nchaa tñuhu cǎhá<sup>n</sup> Dútú Ndióxi, te cutúha-yu nàcuáa cǎhá<sup>n</sup>-gá, te ñáyi-á<sup>n</sup> quindáá iní ñáhǎ-yu xii yúhú.

46 Te vǎ yǎo xini ñáhǎ xii Dútú Ndióxi chí ñ<sup>n</sup>dli-ni yúhú xini-í-gá, chí núu ndécú-gǎ ní quee-í véxi cuu<sup>n</sup>-í —cächí-gá xáha<sup>n</sup>-gǎ xií-yu.

47 Te xáha<sup>n</sup> tucu-gá:

—Na cächí tñuhu ndáá-í xii-ndo sǎ nchaa ñáyi na quindáá iní ñáhǎ xii-í, te naníhí tǎhù-yu.

48 Te yúhú cùu-í dàtná ñ<sup>n</sup> sá xéxi-ndó cǎndeca-xi iní-ndó, te duca<sup>n</sup> sǎtnahǎ-xi cùu-í chí yúhú cada-í te nduu táhù-ndó cùndecu-ndo ndihí Yá Ndióxi ní caa ní quíhí<sup>n</sup>.

49 Te cue ñaní tñáhǎ-ó ñí xíndecu ndéé sanaha ñí xéxi-yu pǎá nání mànáá xití yucu, dico ní sáá nduu te dacuítí ñí xihí-yu.

50-51 Te yúhú cǎhá<sup>n</sup>-í cuendá mèe-í, chí véxi cuu<sup>n</sup>-í andiu. Te cùu-í dàtná ñ<sup>n</sup> sá nchító-ndó, te nchaa ñáyi na cǎxi te candeca-xi iní-yu ní caa ní quíhí<sup>n</sup> te vǎ cuíta nihnu-gá-yu. Te sá táxi-í xii-ndo xiǎ<sup>n</sup> cúu-xí yiqui cuñú-í, te cùu-xi cuendá nchaa ñáyi nihí ñuyíú cuendá nduu táhù-yu cundecú-yu ndihí Yá Ndióxi ní caa ní quíhí<sup>n</sup> —cächí-gá xáha<sup>n</sup>-gǎ xií-yu.

52 Te ní ngüíta ñáyi isràél xitnàhá-yu:

—¿Nása cada-tu tée-a núu cächí-tu-dé sá yiqui cuñú-dé taxi-dé caxi-o-i? —cächí-yu xitnàhá-yu.

53 Te ní xáha<sup>n</sup> Jèsús:

—Na cächí tñuhu ndáá-í xii-ndo sǎ núu na cǎda iní-ndó sǎ dàtná sá cáxi-ndó yiqui cuñú yúhú Tée cùu ñaní tñáhǎ-ndó nchaa-ndo, te cada tucu iní-ndó sǎ dàtná sá cohó-ndó ñíñi-í ñá, te xiǎ<sup>n</sup> quéé-xi sǎ quindáá iní ñáhǎ-ndó ní yuhu ní iní-ndó te naníhí tǎhù-ndó, te núu ñáhǎ te cuíta nihnu-ndo.

54 Nchaa ñáyi na cǎda iní-xi sǎ dàtná sá cáxi-yu yiqui cuñú-í te cohó-yu níñi-í, ñáyi-á<sup>n</sup> naníhí tǎhù-yu te yúhú dandòto-í-yu na sáá nduu.

55 Chi yiqui cuñú-í ndihí níñi-í cúu-xí mèe-í.

56 Te nchaa ñáyi na cǎda iní-xi sǎ dàtná sá cáxi-yu yiqui cuñú-í te cohó-yu níñi-í, te ñáyi-á<sup>n</sup> ñ<sup>n</sup>-nǎ cuu-í ndihí-yu chí cundecu ndihí-í-yu.

57 Te yúhú nchìto-í chí duca<sup>n</sup> nchìto Tàtá-í Yáa ní tendaha ñàha xii-í véxi-í ñuyíú-a. Te ñu-ni duca<sup>n</sup> nchaa ñáyi

na quìndáá iní ñáhá xii-í te cundecu ndihi-í-yu ni caa ni quíhí<sup>n</sup>.

58 Te yúhú cúu-í dàtná ì<sup>n</sup> sá nchító-ndó vèxi cuu<sup>n</sup> andiù, dico ñá díú pàá sá nání mànáá ní xèxi cue ñaní tnáhá-ó nǐ xíndecu ndéé sanaha, chi ní xexí-yu pàá te dacuéi ní xíhí-yu. Te nchaa ñáiyu na quìndáá iní ñáhá xii yúhú Yaa véxi cuu<sup>n</sup> andiù, te cundecu ndihi-í-yu ni caa ni quíhí<sup>n</sup> —càchí-gá xáha<sup>n</sup>-gá xii-yu.

59 Nchaa tnúhu-a ní cáhá<sup>n</sup>-gá xití veñúhu ñáiyu ñuú Capèrnaúm.

*Jèsús càchí tnúhu-gá nàcuáa naníhí tành-ó*

60 Te sá dúcá<sup>n</sup> nǐ cáhá<sup>n</sup>-gá nǔu vai ñáiyu nchícú<sup>n</sup> ñáhá xii-gá ní xitnàhá-yu:

—Vá tní<sup>í</sup> cuíti-o tnúhu càhá<sup>n</sup>-dé chi ñá díú tnúhu sá cúú vaha iní-ó càhá<sup>n</sup>-dé —càchí-yu xitnàhá-yu.

61 Te ní cutnùní iní Jèsús sá ñà túú càhá<sup>n</sup> váha-yu cuèndá tnúhu ní cáhá<sup>n</sup>-gá, núu ní xáha<sup>n</sup>-gá xii-yu:

—¿Náa ñá tnàhá iní-ndó nàcuáa càhá<sup>n</sup>-í-a?

62 Te uu<sup>n</sup>-gá cada nchòhó nǔu quiní-ndó yúhú Téé cùu ñaní tnáhá-ndó nchàa-ndo ndaa-í núú nǐ xíndecu-í díhna.

63 Te espíritú ndécú ndihi yiqui cuñú-ó, xiá<sup>n</sup> ndécá ñaha-xi xii-o, te núu ñá túú xiá<sup>n</sup>, te yiqui cuñú-ó ñà túú nàndíhi-xi. Dico núu nchaa tnúhu càhá<sup>n</sup>-í-a quée-xi iní-ndó ñá, te quiní-ndó nǎ xéhé candeca ñaha-xi xii-ndo núú cuáhá<sup>n</sup> núú vèxi.

64 Te dava nchòhó chi ñá túú sàndáá iní-ndó —càchí-gá xáha<sup>n</sup>-gá xii-yu.

Te duca<sup>n</sup> nǐ xáha<sup>n</sup>-gá chi sa nàha-gá nándi cùu ñáiyu vá quìndáá iní ñáhá xii-gá. Te duca<sup>n</sup> sà naha-gá ndèdacàa téé cuáha cuèndá ñáhá xii-gá núú cuè téé cùu úhú iní ñáhá.

65 Te ní xáha<sup>n</sup> tùcu Jesús xii-yu:

—Te duha càhá<sup>n</sup>-í chi sa ní cachí tnúhu-í xii-ndo sǎ vǎ yòo ì<sup>n</sup> cuìní tní tnúhu-í te núu ñá túú Tǎtà-í Dútú Ndióxi sánú ìchi ñaha-gá xii-yu —càchí-gá xáha<sup>n</sup>-gá xii-yu.

66 Te òré-á<sup>n</sup> ìo vai ñáiyu nchícú<sup>n</sup> ñáhá xii-gá ní xócòo-yu ñá ní xica cuu-gá-yu ndihi-gá.

67 Te xiá<sup>n</sup> ní xáha<sup>n</sup> Jèsús xii ndi ùxúú cue téé xica cuu ndihi-gá:

—¿Cuìní-ndó dàndóo ñaha-ndo tnàhá-ndó-ǎ<sup>n</sup>? —càchí-gá xáha<sup>n</sup>-gá xii-güedé.

68 Te ní xáha<sup>n</sup> tǎ Xímú, àdi Pelú chi úú dèu-dé:

—Mèstrú, ñá túú-gá ndéé quíhí<sup>n</sup>-ndí, chi nchúhú náhá-ndí sá tnúhu mee-n cùu-xi sá vaha candeca-xi iní-ndí ni caa ni quíhí<sup>n</sup>.

69 Chi nchúhú sa ní sàndáá iní ñáhá-ndí xii-n chi nàha-ndí sá yòhó cúú-n Cristú Déhe Dútú Ndióxi yaa ndécú àndiù —cachí-dé xáha<sup>n</sup>-dè xii-gá.

70 Te ní xáha<sup>n</sup> Jèsús:

—Nàha-ndo sá yúhú ní cáhá<sup>n</sup> ñáhà-í xii ndi ùxúú-ndó xica cuu ndihi ñaha-í xii-ndo, dico ì<sup>n</sup>-ndo quíhu ñaha yùcu ñávaha xii-ndo —càchí-gá xáha<sup>n</sup>-gá xii-güedé.

71 Duha ní cáhá<sup>n</sup> Jèsús cuèndá té Jùdás déhe té Xímú Iscarioté ì<sup>n</sup> téé ñùtnahá núú ùxí ì<sup>n</sup> cue téé xica cuu ndihi-gá, chi sa nàha-gá sá tǎe-ǎ<sup>n</sup> cuáha cuèndá ñáhá-dè xii-gá ì<sup>n</sup> nduu núú cuè téé cùu úhú iní ñáhá.

## 7

*Cue ñaní Jèsús ñá túú sàndáá iní-güedé nàcuáa ndiù tnúhu càhá<sup>n</sup>-gá*

1 Te sáta dúcá<sup>n</sup> nǐ cuu, te ní xica cuu Jèsús distritú Galileá, te ñá ní sáhá<sup>n</sup>-gá distritú Jùdeá, chi yacá<sup>n</sup> cuìní cue téé isràél cahni ñaha-güedé xii-gá ní cùu.

2 Te ní cuyatni nduu càdá-yu vico, vico sá dánàni-yu Vico Vehe Tnuvixi<sup>n</sup>.

3 Te ní xáha<sup>n</sup> cuè ñaní Jèsús xii-gá:

—Váha-gá quíhí<sup>n</sup>-n distritú Jùdeá te vá cùndècu-n iha, chi yacá<sup>n</sup> cada-n nchàa sá quidé-n ìha cuèndá quiní nchaa ñáiyu cùndihi ñaha xii-n ndecu yacá<sup>n</sup>.

4 Chi núu cuìní-ó quiní nchaa ñáiyu ná chiu<sup>n</sup> cada-o te vá cadá dàyuhu-o. Te yòhó cuéhé nǔú sǎ quidé-n, te cada-n na quìní nchaa ñáiyu —càchí-güedé xáha<sup>n</sup>-güedé xii-gá.

<sup>5</sup> Duca<sup>n</sup> nĩ cáhá<sup>n</sup> cue ñaní-gá, chi ni mée-güedé ñá túú sàndáá iní-güedé nàcuáa ndùu tnúhu càhá<sup>n</sup>-gá.

<sup>6</sup> Te ní xáha<sup>n</sup> Jèsús xii-güedé:

—Vátá tnàhá-gá òré quíhí<sup>n</sup>-í dico nchòhó ndédani càa oré cuu quíhí<sup>n</sup>-ndó.

<sup>7</sup> Chi nchaa ñáyiu ñùhu ichi cuehé ichi duha chi ñá túú cùu úhú iní ñáhã-yu xii nchòhó. Dico yúhú chi cùu úhú iní ñáhã-yu xii-í cuendá sá càhá<sup>n</sup>-í sá quídě-yu nchaa sá cuehé sá dúhá.

<sup>8</sup> Te chí cuáhá<sup>n</sup> nchòhó vico chi yúhú vá quíhí<sup>n</sup>-ni-í chi vátá tnàhá-gá òré quíhí<sup>n</sup>-í —càchí-gá xáha<sup>n</sup>-gã xii-güedé.

<sup>9</sup> Te duca<sup>n</sup> nĩ xáha<sup>n</sup>-gã te ní ndóo-gá Galilea, te cue téé-á<sup>n</sup> cuáhá<sup>n</sup>-güedé.

*Jèsús ndécú-gã ñ<sup>n</sup> vico chiñuhú-yu Yá Ndiöxí*

<sup>10</sup> Dico sátá cuáhá<sup>n</sup> cue ñaní-gá, te ní xica-gá cuáhá<sup>n</sup>-gá tnàhá-gá dícó-ni sá dáyuhu cuáhá<sup>n</sup>-gá.

<sup>11</sup> Te ñáyiu isràél ñáyiu xĩndecu vico nànducú-yu Jèsús, te xĩtnàhá-yu:

—¿Ndèé ndécú Jèsús? —càchí-yu xĩtnàhá-yu.

<sup>12</sup> Te nchaa ñáyiu xĩndecu vico xĩndatnúhu-yu cuendá-gá. Te davá-yu xĩtnàhá-yu sá ïo váha iní-gá, te davá-yu xĩtnàhá-yu sá ñà díú tée váha cùu-gá, chi dándahú-gá ñáyiu.

<sup>13</sup> Dico mee-ni xícáhá<sup>n</sup> náhĩ-yu, chi xiyùhú-yu cue téé cùnmu núu-yu.

<sup>14</sup> Te ta ngũhu<sup>n</sup> dava vico, te cuánguĩhu Jèsús veñúhu càhnu sá ïo cùnmu, te ní ngüíta-gá dácuàha-gá ñáyiu.

<sup>15</sup> Te ñáyiu isràél ní cuñúhu vihí-yu sá ïo váha càhá<sup>n</sup>-gá, te ní xĩtnàhá-yu:

—¿Ná cuendá ïo váha ñùhu-tu díquí tée-a tnúhu cáhá<sup>n</sup>-dé te ñá túú ní dàcuaha-dé-í? —càchí-yu xĩtnàhá-yu.

<sup>16</sup> Te ní xáha<sup>n</sup> Jèsús:

—Ñá díú cuendá mée-í cúu-xí sá dánèhé ñáhã-í xii-ndo, chi cuendá Dútú Ndiöxí Yá ní tendaha ñàha xii-í véxi-í cúu-xí.

<sup>17</sup> Te núu ïo dava-ndo nĩ yuhu ni iní-ndó cuení-ndó càda-ndo nacuáa

cuení Yá Ndiöxí cunduu, te cutnùni ndáá iní-ndó sã tnúhu dàcuaha ñàha-í xii-ndo cùu-xi cuendá mée Dútú Ndiöxí, te ñá díú cuendá mée-í cúu-xí.

<sup>18</sup> Te téé cuení sá cáda càhnu ñàha ñáyiu xii-dé, téé-á<sup>n</sup> càhá<sup>n</sup>-dé nàcuáa véxi iní mée-dě. Dico yúhú cuení-í sá cáda càhnú-yu Dútú Ndiöxí Yá ní tendaha ñàha xii-í véxi-í ñuyú-a, te càhá<sup>n</sup> ndáá-í te ñá túú dàcuandehnde-í.

<sup>19</sup> Te ndí Moisés ní taxi ndí tnúhu sá sánú ìchi ñàha xii-ndo nacuáa cundecu-ndo, te ni dùca<sup>n</sup> ñá túú sàndáá iní-ndó nàcuáa càhá<sup>n</sup> tnúhu-á<sup>n</sup>. ¿Te ná cuendá cuení-ndó càhni ñàha-ndo xii-í? —càchí-gá xáha<sup>n</sup>-gã xií-yu.

<sup>20</sup> Te ní xáhá<sup>n</sup>-yu xii-gá:

—Yucu ñávãha dàcoto ñàha xii-ó, chi vá yõo ñ<sup>n</sup> cuení cahni ñàha xì-n —cachí-yu xãhá<sup>n</sup>-yu xii-gá.

<sup>21</sup> Te ní xáha<sup>n</sup> Jèsús xií-yu:

—Sá nĩ quide-í ñ<sup>n</sup> sá vã yõo tnàhí ndàcu cada nduu cuu-xi nduu ndetatú-ó, xiá<sup>n</sup> ïo ní cuñúhu ñàha-ndo xì-í.

<sup>22</sup> Te ndí Moisés ní cachí ndí sá cuàha-yu sèñá ñ<sup>n</sup> cue landú téé, dico ñá díú mée ndí ni càhu iní ndí chi duca<sup>n</sup> tnàhí ní xóo cada cue ñaní tnàhá-ó dàvá-á<sup>n</sup>, núu xiá<sup>n</sup> nchòhó sãha-ndo sèñá ñ<sup>n</sup> landú téé cuéi cùu-xi nduu ndetatú-ó.

<sup>23</sup> Te duca<sup>n</sup> quide-ndo cuendá sá ñà túú nã cumání-ndó núu tnúhu sá sánú ìchi ñàha xii-ndo ní dándõo ndí Moisés. ¿Te ná cuendá cudèé<sup>n</sup>-ndó núu-í sá nĩ quide tátna-í téé cùhú nduu ndetatú-ó-í?

<sup>24</sup> Te váha váha cada cuendá-ndó, te vá cuendá-ni cáhá<sup>n</sup>-ndó sã yúhú ndècuéchi-í chi ñá túú xìní-ndó —càchí-gá xáha<sup>n</sup>-gã xií-yu.

*Jèsús xáha<sup>n</sup>-gã xií-yu núu vëxi-gã*

<sup>25</sup> Te dava ñáyiu ñuú Jerusálén ní ngüíta-yu xĩtnàhá-yu:

—¿Náa ñá díú tée-á<sup>n</sup> nándùcu-güedé cahni-güedé?,

<sup>26</sup> núu náí-dé nútñ<sup>n</sup> núu chítú núu tàcá-á<sup>n</sup> càhá<sup>n</sup>-dé, te vá yõo cùy<sup>n</sup> cùñaha xì-dé ñ<sup>n</sup> tnúhu. Cudana te cue téé cùchiu<sup>n</sup> sandáá iní-güedé sá díú-dě cúu-dě Crístú Yá ní tendaha Yá Ndiöxí véxi ñuyú-a.

<sup>27</sup> Dico nchoo xìní-ó ndèé ichi véxi téé-á<sup>n</sup>, dico Crístú ná quixi-gã chi vá

yõo #<sup>n</sup> quini ndeé ichi quixi Yaá-á<sup>n</sup> — cächí-yu xitnàhá-yu.

<sup>28</sup> Te yìhi Jesús xití veñúhu càhnu sá ïo cùnuu danehe-gá ñáyiu, te ní tecú dóho-gá tnúhu càhá<sup>n</sup>-yu. Te níhi ní càhá<sup>n</sup>-gá, te xáha<sup>n</sup>-gã xií-yu:

—¡Ná quini-tu nchòhó ndeé ichi véxi yúhú! Yúhú véxi-í dico ñá díú sã cúú ìní méè-í, chi Yá Ndiõxí Yaá quidé nchàa-ndi túhú sá vãha ní tendaha ñàha-gá xii-í véxi-í, te nchòhó ñá túú xini-ndó-gã.

<sup>29</sup> Te yúhú xini-í-gá chi núú ndécú-gã ní quee-í véxi-í, te ñu mee-gã ní tendaha ñàha-gá véxi-í — cächí-gá xáha<sup>n</sup>-gã xií-yu.

<sup>30</sup> Te sá dúcá<sup>n</sup> ñi càhá<sup>n</sup>-gá, núú cuini-güedé tñi ñaha-güedé xii-gá quihí<sup>n</sup>-gá vecaá ní cùu, dico vá yõo #<sup>n</sup> ñi cùyi tñi ñaha xii-gá chi vátá sàá-gá òré tñi ñaha-güedé.

<sup>31</sup> Dico vai-yu ní sándáá ìní ñáhã-yu xii-gá, te ní xitnàhá-yu:

—¿Nágá cúú sã cáda Crístú ná quixi-gá-i?, te téa-á ïo cuéhé núú sã tá quide-dé véxi. Váa ñu téa-á cùu-dé Crístú Yaá ní tendaha Yá Ndiõxí véxi ñuyíú-a — cächí-yu xitnàhá-yu.

*Cue téa cùu fariséu cuini-güedé quihí<sup>n</sup> Jesús vecaá*

<sup>32</sup> Te ní níhi cue téa cùu fariséu tnúhu nàcuáa càhá<sup>n</sup> ñáyiu cuendá Jesús, núú ní ndatnúhu-güedé ndihí cue dútú cùnùu, te ní techiù<sup>n</sup>-güedé cue téa quide cuendá veñúhu cuáhá<sup>n</sup>-güedé cuátni ñaha-güedé xii-gá ní cùu.

<sup>33</sup> Te ní xáha<sup>n</sup>-gã xii-güedé:

—Sacú duha nduu cundecu ndihí ñaha-í xii-ndo, te núhú tucu-í núú ndécú tãtã-í Yaá ní tendaha ñàha xii-í véxi-í ñuyíú-a.

<sup>34</sup> Te cuéi na nãnducu ñaha-ndo dico vá ná ñihí ñáhã-ndó chi vá sàá-ndó núú cündecu-í — cächí-gá xáha<sup>n</sup>-gã xii-güedé.

<sup>35</sup> Te ní ngüíta ñáyiu isràel xitnàhá-yu:

—¿Ndeé quihí<sup>n</sup>-tu téa-á te vá ná ñihí-ó-dé-i? ¿Àdi quihí<sup>n</sup>-dé na chitnahá-dé ñáyiu isràel ñáyiu

nchitenuu nchaa ñuú xicá cuendá danèhé-dé ñáyiu griégú?

<sup>36</sup> ¿Náa càhá<sup>n</sup>-tu-dé duha càhá<sup>n</sup>-dé: “Nãnducu ñàha-ndo te vá nãñihí ñáhã-ndó chi vá sàá-ndó núú cündecu-í”, cächí-tu-dé? —cächí-yu xitnàhá-yu.

*Nàcuáa cada Espiritú Yã Ndiõxí ìní-ó*

<sup>37</sup> Te nduu ñi yáha-ná vico cùu-xi nduu cahnu vihi, te nduu-ã<sup>n</sup> ñi ngúnu tñi Jesús tnuú ñáyiu, te níhi ní càhá<sup>n</sup>-gá, te xáha<sup>n</sup>-gã xií-yu:

—Núu ìó dava-ndo yìchí-ndó ndüte, te quixi-ndo núu-í, te coho-ndo.

<sup>38</sup> Duha càhá<sup>n</sup>-í chi nchaa ñáyiu na quindáá ìní ñáhã xii-í, te cada-xi ìní-yu dàtná #<sup>n</sup> núú xicá ndüte, nchaa-ni nduu xica ñá túú yìchí, duca<sup>n</sup> càda-xi ìní-yu núú cuáhã<sup>n</sup> núú véxi dàtná càhá<sup>n</sup>-xi núú tütú Yã Ndiõxí — cächí-gá xáha<sup>n</sup>-gã xií-yu.

<sup>39</sup> Te duca<sup>n</sup> ñi càhá<sup>n</sup>-gá cuendá sã quixí Espiritú Yã Ndiõxí ngúndecu ndihí nchaa ñáyiu na quindáá ìní ñáhã xii-gá, chi sáá nduu ndàa-gá andiù càda cahnu ñaha Tátã-gã xii-gá, te dàvá-á<sup>n</sup> te quixi Espiritú Yã Ndiõxí cundecu ndihí-yu.

*Ñá ní cùu #<sup>n</sup>nuú-yu cuendá tnúhu ní càhá<sup>n</sup> Jesús*

<sup>40</sup> Te dava ñáyiu ní xindedóho tnúhu ní càhá<sup>n</sup> Jesús ní xitnàhá-yu:

—Ndáá sã téa-á cùu-dé téa cächí-yu quixi càhá<sup>n</sup> tnúhu Yá Ndiõxí — cächí-yu xitnàhá-yu.

<sup>41</sup> Te dava tucú-yu xitnàhá-yu:

—Téa-á cùu-dé Crístú Yaá ní tendaha Yã Ndiõxí véxi ñuyíú-a — cächí-yu xitnàhá-yu.

Te dava-gá tucú-yu xitnàhá-yu:

—¿Náa ndàa distritú Galileá quixi Crístú Yaá tendaha Yã Ndiõxí quixi ñuyíú-a?

<sup>42</sup> Chi núú tütú Yã Ndiõxí cächí-xi sã Crístú Yaá tendaha Yã Ndiõxí quixi ñuyíú-a cuu-gá #<sup>n</sup> ñaní tñáhã ndií Dàvíí, te quee-gá ñuú Bèlén ñuú méé ndií Dàvíí, duha càhá<sup>n</sup>-xi núú tütú Yã Ndiõxí — cächí-yu xitnàhá-yu.

43 Te xiá<sup>n</sup> nõu ñá ní cùu ì<sup>n</sup>nuú-yu cuèndá Jèsús.

44 Te davá-yu cuìní-yu tñí-yu Jèsús quíhí<sup>n</sup>-gá vecaá ní cùu, dico ni ì<sup>n</sup>-yu ñá túú ní cùyí<sup>n</sup>-yu tñí ñàhá-yu xii-gá.

*Cue téé cùchiu<sup>n</sup> ñá túú sàndáá iní-güedé Jèsús*

45 Te cue téé cuáhá<sup>n</sup> tñí ñaha xii Jèsús ní cùu ní ndexio-güedé núú cuè téé cùu fariséu ndihí núú cuè dútú cúnú. Te xáha<sup>n</sup> cuè téé cùnuu-á<sup>n</sup>:

—¿Ná cuèndá ñá ní cãndeca-ndo tée-á<sup>n</sup> quixi? —càchí-güedé xáha<sup>n</sup>-güedé.

46 Te cue téé ní sáhá<sup>n</sup> chiú<sup>n</sup> ní xáha<sup>n</sup>-güedé:

—Ni ì<sup>n</sup> téé ñá túú xini-ndí cáhá<sup>n</sup> dàtná cáhá<sup>n</sup> tée-á<sup>n</sup> —càchí-güedé xáha<sup>n</sup>-güedé.

47 Te ní xáha<sup>n</sup> cuè téé cùu fariséu:

—¿Náa tñàhá nchòhó ní sãndáá iní-ndó tñuhu ndehnde cáhá<sup>n</sup> tée-á<sup>n</sup>?

48 ¿Náa ñá túú xini-ndó sã ní ì<sup>n</sup> cue téé tàxi tñuní nchúhú, te ni ì<sup>n</sup> nchúhú cue téé cùu fariséu ñá túú sãndáá iní-ndí tée-á<sup>n</sup> ñá?

49 Nchaa ñáyiú tùha ñaha xii tée-á<sup>n</sup> ñá túú sãndáá iní-yu nacuáa cáhá<sup>n</sup> tñuhu sá sánú ìchi ñaha xii-o, dico cuíta nihnú-yu sá dúcá<sup>n</sup> quidé-yu —càchí-güedé xáha<sup>n</sup>-güedé xii cue tée-á<sup>n</sup>.

50 Te té Nicòdemú tée ní sáhá<sup>n</sup> niú ní ndatnúhu-dé ndihí Jèsús cúú-dé tñàhá-dé ì<sup>n</sup> tée fariséu, te ní xáha<sup>n</sup>-dè xii-güedé:

51 —Tnúhu sá sánú ìchi ñaha xii-o nacuáa cundecu-o càchí-xi sá ndèé cundedóho-o nása cáhá<sup>n</sup> tée tau cuéchi cuèndá cutnùní iní-ó ñá ní quide-dé, te dàtnùní cáhá<sup>n</sup>-ó nõu ndisa ndècuéchi-dé àdi ñá túú ndècuéchi-dé —càchí-dé xáha<sup>n</sup>-dè.

52 Te ní xáha<sup>n</sup>-güedé:

—Cùu ní cachí sá tñàhá-ò cúú-n tée distritú Galileá nõu duca<sup>n</sup> cáhá<sup>n</sup>-n. Dacuáha tutú yódó tñuní tñuhu Yá Ndiõxí te quiní-n nacuáa cáhá<sup>n</sup>-xi sá ní ì<sup>n</sup> tée véxi distritú Galileá ñá túú cáhá<sup>n</sup>-dè tñuhu Yá Ndiõxí —càchí-güedé xáha<sup>n</sup>-güedé.

53 Duca<sup>n</sup> te ndi díí<sup>n</sup> cañuhú-güedé vehe-güedé.

## 8

*Ì<sup>n</sup> ñadìhí ndécú vìhi cuéchi-xi*

1 Te Jèsús cuáhá<sup>n</sup>-gá yucu Òlívú.

2 Te sátá ñí tundaá nduu tñéé, te cuáhá<sup>n</sup> tucu-gá veñúhu càhnu sá ìo cùnuu. Te ìo cuéhé ñáyiú ní chítú níhnú-yu núú-gã, te ní ngóo-gá ní dánèhé ñàhá-gã xií-yu.

3 Te ní quexìo cue téé dàcuaha ñaha xií-yu nchaa tñuhu ní chídó tñuní ndí Moisés, ndihí cue téé cùu fariséu, te ndèca-güedé ì<sup>n</sup> ñadìhí ní sáá, te ñaha-á<sup>n</sup> ní xini ñàhá-yu cáhá<sup>n</sup> ndihí-a<sup>n</sup> ì<sup>n</sup> tée dico ñá díú yì-a<sup>n</sup> cuu-dé, te ní sanutñí ñaha-güedé xii-a<sup>n</sup> tnuú nchaa ñáyiú xĩndecu núú Jèsús.

4 Te ní xáha<sup>n</sup>-güedé xii Jèsús:

—Mèstrú, ñadìhí-a ní xini ñàhá ñáyiú xii-a<sup>n</sup> cáhá<sup>n</sup> ndihí-a<sup>n</sup> ì<sup>n</sup> tée dico ñá díú yì-a<sup>n</sup> cuu-dé.

5 Te tñuhu ní chídó tñuní ndí Moisés càchí-xi sá yúú cahni-o nchaa ñáyiú dìhí duha quide. Te yòhó, ¿nása càchí-n cùnduu-i? —cachí-güedé xáha<sup>n</sup>-güedé xii-gá.

6 Duha ní cáhá<sup>n</sup>-güedé chi cuèndá sá cuìní-güedé coto ndèé ñàhá-güedé xii-gá nõu nása cáhá<sup>n</sup>-gá cuèndá núcóo nchihí ñaha-güedé xii-gá ní cáhá<sup>n</sup>-güedé. Te ní ngúnu ndeyi-gá te ní ngúta-gá tée-gã ndihí díquí ndàhá-gã lètrá núú ñúhú.

7 Te xicá<sup>n</sup> tñuhú-ní tucu-güedé núú-gã nõu ní ndonehe núú-gã, te ní xáha<sup>n</sup>-gã:

—Ndèdani càa nchòhó te núú ñá túú ñá cuéchi quide-ndo te díhna nuu-gã-ndó chí cuáha-a<sup>n</sup> yúú —càchí-gã xáha<sup>n</sup>-gã xii-güedé.

8 Te ní ngúnu ndeyi tucu-gá tée tucu-gá lètrá núú ñúhú.

9 Te sá dúcá<sup>n</sup> ní xáha<sup>n</sup>-gã xii-güedé te ní ndixi túu iní-güedé sá ñá túú quide váha mee-güedé tñàhá-güedé, nõu da ì<sup>n</sup> da ì<sup>n</sup>-güedé ní ndee, te díhna-gá cue téé cùu sacuéhé ní ndee te ní ngúta nchicú<sup>n</sup> dava-gã-güedé. Te sátá ñí ndihí-güedé ní ndee, te ní quendóo mee-ñá Jèsús ndihí ñadìhí-á<sup>n</sup>.

10 Te ní ndonehe núú Jèsús te ní xini-gá sá ñí ndihí-güedé cuáhá<sup>n</sup> te mee-ñá ñadìhí-á<sup>n</sup> ní ndóo-a<sup>n</sup>, te ní xáha<sup>n</sup>-gã xii-a<sup>n</sup>:

—¿Ndèndi cuhá<sup>n</sup> cue tée càchí sá ní quide-n cuèchi? ¿Ni ì<sup>n</sup>-güedé ñá ní cùndee tnúhu-güedé quíhí<sup>n</sup>-n càstiú-va? —càchí-gá xáha<sup>n</sup>-gã xii-a<sup>n</sup>.

11 Te ní xáha<sup>n</sup>-a<sup>n</sup> xii Jèsús:

—Ñáhá, chi ni ì<sup>n</sup>-güedé ñá ní ndàcu-güedé —càchí-a<sup>n</sup> xáha<sup>n</sup>-a<sup>n</sup>.

Te ní xáha<sup>n</sup> Jèsús:

—Te ni yúhú vá dáquìhí<sup>n</sup> ñáhà-í castiú xii-n. Te vitna te núhú-n te vá cáda-gã-n nàndi sá cuèhé sá dúhá —càchí-gá xáha<sup>n</sup>-gã xii-a<sup>n</sup>.

### *Jèsús dándixi túu-gá iní-ó*

12 Te ní cáhá<sup>n</sup> tucu Jèsús núú ñáyiu, te xáha<sup>n</sup>-gã xii-yu:

—Yúhú cùú-í dàtná ì<sup>n</sup> ñuhú dáyèhe-í ñuyíú-a, te nchaa ñáyiu na chítnahá ñáhá xii-í, te vá cùndècu-gá-yu ichi cuèhé ichi duha, chi yúhú dándixi túu-í iní-yu cuèndá cutnùní iní-yu nàcuáa ndùu cuèndá Yá Ndiòxí, te cundecu-í ndihí-yu ni caa ni quíhí<sup>n</sup> —càchí-gá xáha<sup>n</sup>-gã xii-yu.

13 Te ní xáha<sup>n</sup> cuè tée cùu fariséu xii-gá:

—Medì-n cahá<sup>n</sup>-n sã cùú-n tée váha, te vá yóo ì<sup>n</sup>-gá chindèe tnúhu ñaha xii-n núu ná tée cùu-n, dico xíá<sup>n</sup> ñá túú nàndíhi-xi —càchí-güedé xáha<sup>n</sup>-güedé xii-gá.

14 Te ní xáha<sup>n</sup> Jèsús:

—Cuèi càhá<sup>n</sup>-í cuèndá mée-í dico nàndíhi tnúhu càhá<sup>n</sup>-í. Chi yúhú ñaha-í ndèé ichi véxi-í, te xini-í ndèé ichi núhú-í, dico nchòhó chi ñá túú xini-ndó ndèé ichi véxi-í, te ni ñá túú xini-ndó ndèé ichi quíhí<sup>n</sup>-í.

15 Te nchòhó chi cuèndá-ni càhá<sup>n</sup>-ndó cuèndá ñáyiu núu quide váha-yu àdi ñá túú quide váha-yu. Te yúhú ñá túú càhá<sup>n</sup>-í cuèndá ñáyiu núu quide váha-yu àdi ñá túú quide váha-yu.

16 Àdi núu càhá<sup>n</sup>-í dico ì<sup>n</sup> tnúhu ndáá càhá<sup>n</sup>-í chi ñá díú-ní mée-í càhá<sup>n</sup>, chi tnàhá Tàtà-í Yaá ní tendaha ñaha xii-í véxi-í ñuyíú-a càhá<sup>n</sup>-gá chindèe tnúhu ñaha-gã xii-í.

17 Te tnúhu sá sánú ichi ñaha xii-ndo cachi-xi sá núu na cundecu úú cue tée cáhá<sup>n</sup> ndáá-güedé nàcuáa cùu ì<sup>n</sup>

sá cùndáá, te núu ì<sup>n</sup>-ni tnúhu na càhá<sup>n</sup>-güedé ndi ndùu-güedé te xíá<sup>n</sup> nàndíhi-xi, duha càchí tnúhu-á<sup>n</sup>.

18 Te ñiu-ni duca<sup>n</sup> cùu-xi yúhú chi càhá<sup>n</sup>-í ì<sup>n</sup> tnúhu ndáá sá cùú-xi mée-í, te ñiu-ni dàtná càhá<sup>n</sup>-í càhá<sup>n</sup> Tàtà-í Yaá ní tendaha ñaha xii-í véxi-í ñuyíú-a —càchí-gá xáha<sup>n</sup>-gã xii-güedé.

19 Te ní xáha<sup>n</sup>-güedé xii-gá:

—¿Te ndèé ndécú Tàtà-n-í? —càchí-güedé xáha<sup>n</sup>-güedé.

Te ní xáha<sup>n</sup> Jèsús:

—Te núu dìcò xini-ndó yóo cuu yúhú-á te duca<sup>n</sup> te quini-ndó Tàtà-í. Te ni yúhú ñá túú xini-ndó yóo cuu-í núu xíá<sup>n</sup> ñá túú xini-ndó Tàtà-í —càchí-gá xáha<sup>n</sup>-gã xii-güedé.

20 Duha ní cáhá<sup>n</sup> Jèsús nini dàcuaha-gá ñáyiu xití veñúhu núu ndécú àlcanciá díhú<sup>n</sup>. Te vá yóo ì<sup>n</sup> ni cùyii tñii ñaha xii-gá chi vátá sàá-gá òré tñii ñaha-güedé.

### *Ñáyiu ñá túú sàndáá iní ñáhá xii Jèsús vá ndácú-yu quíhí<sup>n</sup>-yu núu nùhú-gá cundecu-gá*

21 Te ní xáha<sup>n</sup> tucu Jèsús xii-güedé:

—Yúhú núhú-í te nanducu ñaha-ndo te vá nánihí ñáhá-ndó, te cuú-ndó núu yíca cuèchi-ndo, chi vá ndácú-ndó sã-ndó núu nùhú-í cundecu-í —càchí-gá xáha<sup>n</sup>-gã xii-güedé.

22 Te ní xitnàha cue tée isràèl:

—¿Te náa cahni-dé mée-dé núu càchí-dé sá vã ndácú-ó sàá-ó núu quíhí<sup>n</sup>-dé-ã<sup>n</sup>? —càchí-güedé xitnàha-güedé.

23 Te ní xáha<sup>n</sup> Jèsús xii-güedé:

—Nchòhó chi cue tée ñuyíú-a cùu-ndo, núu ío ñuhu iní-ndó sã ío ñuyíú-a. Te yúhú chi tée núu ñnu cùu-í núu xíá<sup>n</sup> ñá túú sã ío ñuyíú-a ñuhu iní-í.

24 Te xíá<sup>n</sup> núu càchí-í sá cùú-ndó núu yíca cuèchi-ndo, chi ñá cuini-ndó quèndáá iní-ndó sã yúhú véxi cuu<sup>n</sup>-í andiu, te núu xíá<sup>n</sup> ñiu-ni núu yíca cuèchi-ndo cùú-ndó —càchí-gá xáha<sup>n</sup>-gã xii-güedé.

25 Te ní xicá<sup>n</sup> tnúhú-güedé núú-gã, te xáha<sup>n</sup>-güedé:

—¿Te ná cúu yòhó nũ duca<sup>n</sup> càhá<sup>n</sup>-n-í? —càchí-güedé xáha<sup>n</sup>-güedé xii-gá.

Te ní xáha<sup>n</sup>-gã:

—Sa ní cachí tnúhu-í xii-ndo ndëé díhna —càchí-gá xáha<sup>n</sup>-gã xii-güedé.

<sup>26</sup> Te xáha<sup>n</sup> tùcu-gá:

—Ndècu cuéhé tnúhu càhá<sup>n</sup>-í cada ndáá-í cuendá nchòhó. Te Tãtã-í Yaá ní tendaha ñaha xii-í véxi-í ñuyíú-a càhá<sup>n</sup>-gá tnúhu ndáá, te tnúhu càhá<sup>n</sup> yúhú ñuyíú-a cùu-xi tnúhu ní càhá<sup>n</sup>-gá ní xíndedóho-í —càchí-gá xáha<sup>n</sup>-gã xii-güedé.

<sup>27</sup> Te mee-güedé ñá túú ní tècú tnùn-í-güedé sá cuendá Dútú Ndiöxí ní càhá<sup>n</sup> Jèsús.

<sup>28</sup> Te ní xáha<sup>n</sup>-gã xii-güedé:

—Òré ná catá càa ñaha-ndo xii yúhú Tée cùu ñaní tnáhá-ndó nchàa-ndo núu cùrúxí cahni ñaha-ndo, te òré-á<sup>n</sup> cutnùn-í iní-ndó yòo cuu-í, te ñá túú quide-í sá cúu iní mée-í, chi yúhú càhá<sup>n</sup>-í nàcuáa ní dánèhé ñáhá Tãtã-í.

<sup>29</sup> Yaá ní tendaha ñaha xii-í véxi-í. Te ñu-gá ndécú ndíhi ñaha-gá xii-í, te ñá túú dàña nihnu ñaha-gá chi quide-í nchaa nàcuáa cùu iní-gá —càchí-gá xáha<sup>n</sup>-gã xii-güedé.

<sup>30</sup> Te sá dúcá<sup>n</sup> ní càhá<sup>n</sup>-gá nũ ío vãi ñáyiu ní sándáá iní ñáhá xii-gá.

*Ñáyiu sándáá iní ñáhá xii Yá Ndiöxí ndíhi ñáyiu ndècu ichi cuéhé ichi duha*

<sup>31</sup> Te ní xáha<sup>n</sup> Jèsús xii ñáyiu israél ñáyiu ní sándáá iní ñáhá xii-gá:

—Te núu vá dáña ndèé-ndó càda-ndo nchaa nàcuáa càhá<sup>n</sup>-í, te cuu ndisa-ndo cuè téé tnáhá tnúhu ndíhi-í,

<sup>32</sup> te tecú tnùn-í-gá-ndó tnúhu ndáá, te duca<sup>n</sup> te cácu nihnu-ndo —càchí-gá xáha<sup>n</sup>-gã xii-yu.

<sup>33</sup> Te ní xáha<sup>n</sup>-yu:

—Nchúhú cúu-ndí cue ñaní tnáhá ndíhi Abrahám, te ní ñá nduu ñá túú ndèé sácüdedí nihnu-ndí ndoho tnáhá-ndí nũ cáchí-ò sá dàcácu nihnu ñaha-n xii-ndí —càchí-yu xáha<sup>n</sup>-yu xii-gá.

<sup>34</sup> Te ní xáha<sup>n</sup> Jèsús xii-yu:

—Na càchí tnúhu ndáá-í xii-ndo sã nchàa ñáyiu quide nchaa sá cuéhé sá dúhá tàxi tnuní ñáhá-nã-xi xii-yu.

<sup>35</sup> Te cue ñáyiu xínu cuechi te vá cúu ñá-ná cúu-yu ndíhi ñáyiu dii vèhe-xi xínu cuechí-yu, dico cue déhe ñáyiu dii vèhe-xi-á<sup>n</sup> chi ñá-ni cùu ndíhi ñaha-güexi xii-yu.

<sup>36</sup> Te núu yúhú Yaá cúu Dèhe Yá Ndiöxí dàcácu nihnu ñaha-í xii-ndo nũ nchàa yíca cuèchi-ndo, te ndáá sá nchòhó cácu nihnu ndisa-ndo.

<sup>37</sup> Te yúhú sa xini-í sá nchòhó cúu-ndó ñaní tnáhá ndíhi Abrahám, te dicó-ni sá ñá tnáhá iní-ndó tnúhu càhá<sup>n</sup>-í nũ xiá<sup>n</sup> cuini-ndó cahni ñaha-ndo.

<sup>38</sup> Te yúhú càhá<sup>n</sup>-í nàcuáa ní dánèhé ñáhá Tãtã-í, te nchòhó quidé-ndó nàcuáa càhá<sup>n</sup> tãtã-ndó —càchí-gá xáha<sup>n</sup>-gã xii-yu.

<sup>39</sup> Te ní xáha<sup>n</sup>-yu:

—Ndíhi Abrahám cúu tãtã-ndí —càchí-yu xáha<sup>n</sup>-yu xii-gá.

Te ní xáha<sup>n</sup> Jèsús:

—Núu ndisa ñaní tnáhá ndíhi Abrahám cúu-ndó, te cada-ndo nàcuáa ní xoo cada ndíhi ni cùu.

<sup>40</sup> Te yúhú cuéi càhá<sup>n</sup>-í ñá tnúhu ndáá nàcuáa càhá<sup>n</sup> Yá Ndiöxí càchí tnúhu-gá xii-í, te cuini-ndó cahni ñaha-ndo. ¡Dico ndíhi Abrahám chi ñá túú dùca<sup>n</sup> ni quide ndíhi!

<sup>41</sup> Te nchòhó quidé-ndó nàcuáa quide tãtã-ndó —càchí-gá xáha<sup>n</sup>-gã xii-yu.

Te ní xáha<sup>n</sup>-yu:

—Nchúhú, ñá túú yàyacá<sup>n</sup> ndécú tãtã-ndí, chi ñá ndíhi Yá Ndiöxí cúu tãtã-ndí —càchí-yu xáha<sup>n</sup>-yu xii-gá.

<sup>42</sup> Te ní xáha<sup>n</sup> Jèsús:

—Núu dicó Yá Ndiöxí ndisa cùu Tãtã-ndó te cuu iní ñáhá-ndó xii-í ní cùu chi yúhú ní quee-í núu ndécú-gã véxi-í ñuyíú-a. Te ñá túú véxi-í sá cúu iní mée-í, chi mee-gã ní tendaha ñaha-gá véxi-í.

<sup>43</sup> Te ñá túú tècú tnùn-í-ndó tnúhu càhá<sup>n</sup>-í chi ñá túú tnáhá iní-ndó.

<sup>44</sup> Te nchòhó chi tãtã-ndó cùu yucu ñávaha núu cùdíhi iní-ndó quide-ndo nchaa nàcuáa cùu iní-xi, chi ndéé òré ní ngáva ñuyíú duca<sup>n</sup>-ni ndècu-xi dacáhá<sup>n</sup>-xi iní-ndó sãhni tnaha-ndo. Te ñá ñá nduu càhá<sup>n</sup>-xi ñá tnúhu ndáá chi ñá túú xica-xi ichi ndáá, chi





chi mee Yă Ndiöxí ní cuiní-gá sá dúcá<sup>n</sup> cunduú-dé sáá-dé ñuyíú-a cuendá sá ñuyíú-a quini ñáyiú nása cada ñaha Yă Ndiöxí xii-dé ndúha núú-dě.

<sup>4</sup> Te vitna ió-gá nduu cùyica sá cáda-í nchaa chiú<sup>n</sup> ní táhú Yáá ní tendaha ñaha xii-í véxi-í ñuyíú-a, chi sáá nduu te vá ndácú-gă-í cada-í chiú<sup>n</sup>-gá.

<sup>5</sup> Te ñini ndècu-gá-í ñuyíú-a te dândixi túu-í iní nchaa ñáyiú cuendá cutnùní iní-yu nàcuáa ndùu cuendá Yă Ndiöxí —càchí-gá xáha<sup>n</sup>-gă xii-güedé.

<sup>6</sup> Te sátá dúcá<sup>n</sup> ñí cáhá<sup>n</sup>-gá, te ní sati-gá díí-gá núú ñúhú te ní dácá-gă luha ñuhu ní cuáha ndéhyú, te ndéhyú-ă<sup>n</sup> ñí dácánùu-gá ndúú xio núú tée cuáá-á<sup>n</sup>.

<sup>7</sup> Te ní xáha<sup>n</sup>-gă xii-dé:

—Quíhí<sup>n</sup>-n nàquete-n núú-n ndùte tanquí Silòé —càchí-gá xáha<sup>n</sup>-gă xii-dé. Te Silòé-á<sup>n</sup> queé-xí tñuhu mèe-yu: Tée xica chiu<sup>n</sup>.

Te ní sáhá<sup>n</sup> tée cuáá-á<sup>n</sup> ñí naquete-dé núú-dě, te òré ní ndexiò-dé te sa ndèhe-dé.

<sup>8</sup> Te nchaa ñáyiú ndècu yatni núú ndécú-dě ndihí nchaa ñáyiú xini ñáhá xii-dé núú xicá<sup>n</sup> ndàhú-dé ní xitnàhá-yu:

—¿Náa ñá díú tée-ă<sup>n</sup> ní xóo cáca<sup>n</sup> ndàhú-dé? —càchí-yu xitnàhá-yu.

<sup>9</sup> Te davá-yu càchí-yu sá díú-dě, te davá-yu càchí-yu sá ñà díú-dě, dico duca<sup>n</sup> càa-dé, càchí-yu xitnàhá-yu.

Dico mee-dě ní xáha<sup>n</sup>-dě xii-yu sá díú-dě.

<sup>10</sup> Te ní xicá<sup>n</sup> tñúhú-yu núú-dě, te xáhă<sup>n</sup>-yu:

—¿Nása ní cuu núu ní ndúha núú-n ndèhe-n vitna? —cachí-yu xáhă<sup>n</sup>-yu xii-dé.

<sup>11</sup> Te ní xáha<sup>n</sup>-dě:

—Tée nani Jesús-ă<sup>n</sup> ní cadúha-dé luha ndéhyú te ní dácánùu-dé núú-í, te ní táuchíú<sup>n</sup>-dě ní sáhá<sup>n</sup>-í tànquí Silòé ní naquete-í núú-í, te òré-á<sup>n</sup> ñí cuu cundehe-í —càchí-dé xáha<sup>n</sup>-dě xii-yu.

<sup>12</sup> Te ní xicá<sup>n</sup> tñúhú tucú-yu núú-dě, te xáhă<sup>n</sup>-yu:

—¿Te ndèe ndécú tée-á<sup>n</sup>? —càchí-yu xáhă<sup>n</sup>-yu xii-dé.

Te ní xáha<sup>n</sup>-dě:

—Ñá túú xini-í —càchí-dé xáha<sup>n</sup>-dě xii-yu.

*Cue tée cùu fariséú ndátnñhu-güedé ndihí tée ní ndúha núú-xi*

<sup>13</sup> Te ndèca-güedé tée ní ndúha núú-xi-á<sup>n</sup> cuáhă<sup>n</sup> núú cuè tée cùu fariséú.

<sup>14</sup> Te cuendá sá ndùu ndetatú-yu ní cadúha Jèsús ndéhyú ñí dácánùu-gá núú tée-á<sup>n</sup> te ní ndúha,

<sup>15</sup> xáhă<sup>n</sup> núu ní xicá<sup>n</sup> tñúhú cuè tée cùu fariséú núú-dě, te xáhă<sup>n</sup>-güedé:

—¿Nása ní cuu ní ndúha núú-n? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dě xii-güedé:

—Í<sup>n</sup> tée ní dácánùu-dé ndéhyú núú-í te ní sáhá<sup>n</sup>-í ní naquete-í, te ní cuu ndèhe-í vitna —càchí-dé xáha<sup>n</sup>-dě xii-güedé.

<sup>16</sup> Te dava cue tée cùu fariséú ní xitnàha-güedé:

—Ñá díú Yă Ndiöxí ní tendaha ñaha-gá xii tée-ă<sup>n</sup> véxi-dé núu duha quide-dé nchaa sá vá yóo tñahí ndàcu cada, te ñá túú sàndáá iní-dé canehe íí-dě nduu ndetatú-ó —càchí-güedé xitnàha-güedé.

Te dava-güedé ní xitnàha-güedé:

—¿Nása ndacu-dé cada-dé sá vá yóo tñahí ndàcu cada te núu cùu-dé tée yicá cuèchi? —càchí-güedé xitnàha-güedé.

Te ñá túú ní cùu ñ<sup>n</sup>nuu-güedé tñuhu ní cáhá<sup>n</sup>-güedé.

<sup>17</sup> Te ní xicá<sup>n</sup> tñúhú tucú-güedé núú tée ní ndúha núú-xi-á<sup>n</sup>, te xáhă<sup>n</sup>-güedé:

—Te yòhó, ¿nása càchí-n cuendá tée ní quide tátna núú-n te ní ndúha? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dě:

—Yúhú càchí-í sá í<sup>n</sup> tée càhá<sup>n</sup> tñuhu Yá Ndiöxí cúú-dě —càchí-dé xáha<sup>n</sup>-dě xii-güedé.

<sup>18</sup> Dico cue tée isràél ñá ní sàndáá iní-güedé sá cuáá-dé ní cùu, chi cuendá sa ní ndúha núú-dě ní xini ñáhá-güedé, te xáhă<sup>n</sup> núu ní cana-güedé tátá-dě ndihí ñáná-dě,

19 te ní xíca<sup>n</sup> tnúhú-güedě núu-yu, te xáha<sup>n</sup>-güedě:

—¿Diu téa-a déhe-ndo tée cächí-ndó cuàá-dé ní cacu-dé-ǎ<sup>n</sup>? ¿Te nása ní cuu ní ndúha núú-dě? —cächí-güedě xáha<sup>n</sup>-güedě xii-yu.

20 Te ní xáha<sup>n</sup> tǎtá-dě ndihí nǎná-dě:  
—Diu déhe-ndí cúú-dě te sa cuàá ndisa-dé ní cacu-dé,

21 dico ñá túú xìní-ndí nása ní cuu ní ndúha núú-dě, te ni ñà túú xìní-ndí yoo ní quide tǎtna. Chí cǎcá<sup>n</sup> tnúhú núú méé-dě xǎá<sup>n</sup> núu sa sàcuéhé-dě, te na cǎhá<sup>n</sup>-dé núu nása ní cuu ní ndúha núú-dě —cächí-yu xǎhá<sup>n</sup>-yu xii-güedě.

22 Duha ní cǎhá<sup>n</sup> tǎtá-dě ndihí nǎná-dě ní xǎhá<sup>n</sup>-yu xii-güedě cuendá sá yùhú-yu cue tée cùnūu núú ñáyiū isráel, chí cue tée-ǎ<sup>n</sup> sa ní ndatnúhu-güedě ní cuu ñ<sup>n</sup>nuu-güedě sá núu ndédacáa ñáyiū na cǎhá<sup>n</sup> sá Jèsús cúú-gǎ Crístú Yaa ní tendaha Yá Ndiöxí véxi ñuyíú-a, te vá dáñá-gǎ-güedě quíhu-yu veñúhu.

23 Núu xǎá<sup>n</sup> ní xáha<sup>n</sup> tǎtá-dě ndihí nǎná-dě sá ná cǎcá<sup>n</sup> tnúhú-güedě núú méé-dě chí sa sacuéhé-dě.

24 Te xǎá<sup>n</sup> núu ní cana tucu-güedě tée ní ndúha núú-xi-á<sup>n</sup>, te ní xáha<sup>n</sup>-güedě:

—Cǎhá<sup>n</sup>-n ñ<sup>n</sup> tnúhu ndáá chí Yá Ndiöxí ndéhé ndí-gǎ nàcuáa ní cuu ní ndúha núú-n, chí nchúhú xìní-ndí sá dìcò ñ<sup>n</sup> tée ndècu yíca cuèchi-xi cùu tée cächí-n ñ<sup>n</sup> quide tǎtna núú-n —cächí-güedě xáha<sup>n</sup>-güedě xii-dé.

25 Te ní xáha<sup>n</sup>-dě:

—Yúhú, ñá túú xìní-í te núu tée ndècu yíca cuèchi-xi cùu-dé àdi ñáhá. Dìcò-ñi sá xìní-í sá cuàá-í ní cùu te vitna ní cuu cundehe-í —cächí-dé xáha<sup>n</sup>-dè xii-güedě.

26 Te ní xíca<sup>n</sup> tnúhú tucu-güedě núú-dě, te xáha<sup>n</sup>-güedě:

—¿Nása ní quide ñaha-dè xii-n te ní ndúha núú-n-í? —cächí-güedě xáha<sup>n</sup>-güedě xii-dé.

27 Te ní xáha<sup>n</sup>-dè:

—Yúhú sa ní cǎhá<sup>n</sup>-í te ñá túú quide cuendá-ndó. ¿Te ná cuendá cuíní-ndó cächí tnúhu-ni tucu-í? ¿Á tnàhá-ndó cuíní-ndó quíndáá iní-ndó tnúhu cǎhá<sup>n</sup>-dé? —cächí-dé xáha<sup>n</sup>-dè xii-güedě.

28 Te ní cudéé<sup>n</sup>-güedě núú-dě, te ní xáha<sup>n</sup>-güedě xii-dé:

—Te núu yòhó cuíní-n chinchícú<sup>n</sup>-n tée-ǎ<sup>n</sup> te cuáhá<sup>n</sup>, dico nchúhú chí canchicú<sup>n</sup> nihnu nahi-ni-ndí nàcuáa ní cǎhá<sup>n</sup> ndíi Moisés.

29 Te nchúhú chí nàha-ndí sá Yá Ndiöxí ní cǎhá<sup>n</sup> ndihí-gǎ ndíi Moisés, dico tée cächí-n-ǎ<sup>n</sup> chí ni ñà túú xìní-ndí ndéé tée cùu-dé —cächí-güedě xáha<sup>n</sup>-güedě xii-dé.

30 Te ní xáha<sup>n</sup> tée ní ndúha núú-xi-á<sup>n</sup>:

—¿Te náa ñá díú nchòhó cächí-ndó sǎ ño túha-ndo? Te núu duca<sup>n</sup> cǎhá<sup>n</sup>-ndó sǎ ñà túú xìní-ndó ndéé tée cùu-dé, te diu-dé ní quide tǎtna-dé núú-í ní ndúha —cächí-dé xáha<sup>n</sup>-dè xii-güedě.

Te xáha<sup>n</sup> tucu-dé:

31 —Xìní-ó sǎ Yá Ndiöxí ñá túú tédòho-gǎ tnúhu cǎhá<sup>n</sup> ñáyiū quide nchaa sá cuéhé sá dúhá, chí nchaa ñáyiū quide cahnu ñaha xii-gǎ te quidé-yu nchaa nàcuáa cùu iní-gǎ, te ñáyiū-á<sup>n</sup> tédòho-gǎ tnúhu cǎhá<sup>n</sup>-yu.

32 Te ñá ñ<sup>n</sup> ndùu cǎhá<sup>n</sup> ñáyiū cuendá ñ<sup>n</sup> tée cada tǎtna núú ñ<sup>n</sup> ñáyiū cuàá ndéé ní cacu-xi te ndúha.

33 Te núu ñá díú mèe Yá Ndiöxí ní tendaha ñaha-gǎ xii tée-ǎ<sup>n</sup> véxi-dé ñá, te vá ndácú-dé cada tǎtna-dé núú-í ní cùu —cächí-dé xáha<sup>n</sup>-dè xii-güedě.

34 Te ní xáha<sup>n</sup>-güedě:

—Dico yòhó ndèe yatni vài cuéchi sa ta quide-n véxi, ¿te vitna nacanu ichi ñaha-n xii-ndí cǎhá<sup>n</sup>-n-ǎ<sup>n</sup>? —cächí-güedě xáha<sup>n</sup>-güedě xii-dé.

Te ní queñuhu ñaha-güedě xii-dé tnuú-güedé ñá túú ní dáña-gǎ-güedé níhí tnáhá ndihí ñaha-dé xii-güedé.

*Ñáyiū ñá túú ndixi túu iní cuendá nchaa sá cuéhé sá dúhá quidé-yu*

35 Te ní níhí Jèsús tnúhu sá ñ<sup>n</sup> queñuhu-güedé tée ní cuhú núú-xi-á<sup>n</sup> tnuú-güedé cuendá sá vǎ tnàhá tnúhu ndihí ñaha-gǎ-dé xii-güedé, te ní naníhí ñáhá-gǎ xii-dé te ní xáha<sup>n</sup>-gǎ:

—¿Sàndáá iní-n Dèhe Yá Ndiöxí-ǎ<sup>n</sup>? —cächí-gǎ xáha<sup>n</sup>-gǎ.

36 Te ní xáha<sup>n</sup> tée ní cuhú núú-xi-á<sup>n</sup>:

—Mèstrú, cachí tnúhu núu ndèé ndécú tée-án cuendá quíndáá iní-í-dé —càchí-dé xáha<sup>n</sup>-dë xii-gá.

<sup>37</sup> Te ní xáha<sup>n</sup> Jèsús:

—Sa xìní-n-dë chi diu-dé cúú yúhú tée ndàtnúhu ndìhi-n —càchí-gá xáha<sup>n</sup>-gã xii-dé.

<sup>38</sup> Te ní ngüíñí xítí-dë núú-gã, te ní xáha<sup>n</sup>-dë:

—Xítohó Jesucristú, sàndáá iní ñáhà-í xii-n —càchí-dé xáha<sup>n</sup>-dë xii-gá.

<sup>39</sup> Te ní xáha<sup>n</sup> tùcu Jèsús:

—Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quide váha cúú-yu dàtná ñá ñáyiú cuáá, dico nchaa ñáyiú cùtnuní iní-xi sá ñà túú quide váha, te núu na quíndáá iní-yu tnúhu càhá<sup>n</sup>-í, te cada iní-ndó sã dàtná sá ñí nacaá<sup>n</sup> núú-yu chi tní-yu tnúhu càhá<sup>n</sup>-í. Te ñáyiú càchí sá quidé váha vá ñúu núu-yu cuéchi-yu chi quesàhá-yu sá ío ndáá quidé-yu, ñáyiú-án cúú-yu dàtná ñá ñáyiú cuáá, chi vá ndíxí túu iní-yu sá ñà túú quide váha-yu ndécú-yu, te vá tní-yu tnúhu càhá<sup>n</sup>-í —càchí-gá xáha<sup>n</sup>-gã xii-dé.

<sup>40</sup> Te sá dúcá<sup>n</sup> ñí càhá<sup>n</sup>-gá, núu ní càhá<sup>n</sup> ñí ùú cue tée cùu fariséú, te xáha<sup>n</sup>-güedé:

—¿Te náa tnàhá nchúhú cuáá-ndí càhá<sup>n</sup>-n-á<sup>n</sup>? —càchí-güedé xáha<sup>n</sup>-güedé xii-gá.

<sup>41</sup> Te ní xáha<sup>n</sup> Jèsús:

—Te núu dicó nchòhó cuáá-ndó ñá, te vá cùndècu cuéchi-ndo ní cùu, dico càchí-ndó sã ndéhé-ndó ñá sá quidé-ndó te ñá ndáá, núu xíá<sup>n</sup> ío ndècu cuéchi-ndo.

## 10

### *Jèsús càhá<sup>n</sup>-gá cuendá cùrrálí mběé*

<sup>1</sup> Te na càchí tnúhu ndáá-í xii-ndo sã ñí tée ñá túú quíhu ndàa yuyehe ñí cùrrálí mběé, te cùtexínu-ni na cùidó-dé, tée-án cúú-dë ñádúhú.

<sup>2</sup> Dico tée quíhu ichi yèhe cùrrálí-güedi, tée-án cúú-dë xítohó-güedi xii-güedi, te tée-án cuendá-ni sá ñúhú yáhu-dé xító-dë-güedi.

<sup>3</sup> Te tée ndéé yèhe cùrrálí-güedi nacaá<sup>n</sup>-dé te cuánguìhu xítohó-güedi te ní càhá<sup>n</sup>-dé, te ní nucúhu<sup>n</sup> ndudú

ñáhà-güedi xii-dé. Te ní càhá<sup>n</sup> díú-dë-güedi te ní queñuhu-dé-güedi cùrrálí.

<sup>4</sup> Te sátá ñí quee-güedi cùrrálí, te ní ngódó núú-dë núú-güedi, te ní ngüita nchicú<sup>n</sup> ñáhà-güedi xii-dé chi ní nucúhu<sup>n</sup> ndudú ñáhà-güedi.

<sup>5</sup> Te ñá túú chìnchícú<sup>n</sup>-güedi ñí tée tátú, chi núcúhu<sup>n</sup> ndudú-güedi sá ñà díú xítohó-güedi cùu-dé, núu xíá<sup>n</sup> xínú-güedi núú-dë —càchí-gá xáha<sup>n</sup>-gã xii-güedé.

<sup>6</sup> Duha ní càhá<sup>n</sup> Jèsús cuendá sá cuíní-gá dacuahá-yu tnúhu-gá ní cùu, dico ñá ní tècú tnùní-yu nása ndùu tnúhu ní càhá<sup>n</sup>-gá.

### *Jèsús cúú-gã dàtná ñí toli*

<sup>7</sup> Te ní xáha<sup>n</sup> tùcu Jèsús xii-güedé:

—Na càchí tnúhu ndáá-í xii-ndo sã yúhú cúú-í dàtná ñí yèhe cùrrálí núu ndíhu cue mběé.

<sup>8</sup> Te nchaa cue tée sa yòdo nuu-gá ní quixi ní dándàhú-güedé ñáyiú cùu-güedé dàtná ñádúhú dùhu-güedé cue mběé ní cùu, dico ñá ní quide cuendá ñáhà-güedi xii-güedé, chi ní cùtnuní iní-güedi sá ñà díú xítohó-güedi cùu-güedé.

<sup>9</sup> Te yúhú cúú-í dàtná yuyèhe cùrrálí cue mběé. Te duca<sup>n</sup> sàtnahá-xi cùu-í chi nchaa ñáyiú na tùha ñaha xii-í te naníhí tàhú-yu. Te cúú-yu dàtná cue mběé quití xíquee cùrrálí-xi cuáhà<sup>n</sup>-güedi núú cáá ité caxi-güedi, te dàtnuní cuándihu-ná-güedi cùrrálí, duca<sup>n</sup> sàtnahá-xi cúú-yu.

<sup>10</sup> Ñádúhú òré véxi-dé chi dùhu-dé, sàhni-dé te dànaa-dé mběé, dico yúhú chi véxi-í cuendá sá naníhí tàhú-ndo te ío cudí iní-ndó cùnu cuechi-ndo núu Dütú Ndióxi ní caa ní quíhí<sup>n</sup>.

<sup>11</sup> Te yúhú cúú-í dàtná ñí toli tée ío nèhe cuendá mběé-xi, chi tée-án cuéi na cúú-dé sá cúú-xi mběé-dé cuendá-ná sá ná càcu-güedi.

<sup>12</sup> Te núu ñí tée na còto ñaha xii-güedi, te tée-án cuendá-ni sá ñúhú yáhu-dé xító-dë-güedi. Te núu na quíní-dé sáá ñí quití déé<sup>n</sup> te dàña-dé-güedi xínu-dé, te ndìhi-güedi

xité nuu ñaha quiti déé<sup>n</sup>-ă<sup>n</sup>, chi ñá díú mèi xítohó-güedi cùu-dé.

13 Chi cuendá-ni sá ñúhú yáhu-dé xító-dě-güedi núu ñá túú ñá ndihú iní-dé cuéi na dândihí ñaha quiti cui-hna.

14 Te yúhú cùu-í dàtná ì<sup>n</sup> tée ío váha xító mbéé-xi, chi tée-á<sup>n</sup> da ì<sup>n</sup> da ì<sup>n</sup>-dì xìní-í-dé nàcuáa ndáa-dì, te duca<sup>n</sup> xìní ñáhá-güedi xii-dé. Te duca<sup>n</sup> sãtnahá-xi cùu yúhú ndihí nchaa ñáyiu sàndáá iní ñáhá xii-í, chi yúhú xìní-í-yu te duca<sup>n</sup> mèe-yu xìní ñáhá-yu xii-í.

15 Te ñá-ni duca<sup>n</sup> cùu-í ndihí Tãtã-í, chi xìní ñáhá-gã xii-í te xìní-í-gá. Te sáá nduu cùu-í cuendá nchaa ñáyiu sàndáá iní ñáhá xii-í.

16 Te ndècu-gá ñáyiu vátá quindáá iní ñáhá-gã xii-í. Te xìní ñuhu-xi cundedóho-yu tnúhu-í te quindáá iní ñáhá-yu cuendá ì<sup>n</sup>-nã ichi cuú-yu, te duca<sup>n</sup> cùndecu ì<sup>n</sup>-ná tée coto ñaha xii-yu cuu-dé dàtná ì<sup>n</sup> tòlí-yu, te tée coto ñaha xii-yu-á<sup>n</sup> cúu yúhú.

17 Te Tãtã-í ío cùdí ìnì ñáhá-gã xii-í cuendá sá sáá ì<sup>n</sup> nduu te cuú-í, te cuú-í chi duca<sup>n</sup> càchí iní-í, te ñá díú sá cúu ìnì ñáyiu ñuyíú-a cuú-í, te cuú-í dico ndoto-í.

18 Te vá yóo ì<sup>n</sup> te ndacu cahni ñaha xii-í, te núu ñá díú sá cúu ìnì mèe-í cuú-í. Te dàtná-ni cùu iní-í sá cùu-í te ñá-ni duca<sup>n</sup> ndòto-í chi duca<sup>n</sup> ñá càchí Tãtã-í Dútú Ndiöxí cunduu — càchí-gá xáha<sup>n</sup>-gã xii-güedé.

19 Te sá dúcá<sup>n</sup> ñá cáhá<sup>n</sup>-gá te ñá ní cùu ì<sup>n</sup>nuu tucu ñáyiu isràél.

20 Te davá-yu ní xitnàhá-yu:

—¿Ná cuendá sàndáá-tu iní-ndó tnúhu càhá<sup>n</sup> tée-ă<sup>n</sup>, te yucu ñávãha ndècu ndihí-dé, lúcú tée-ă<sup>n</sup>? — càchí-yu xitnàhá-yu.

21 Te davá-yu ní xitnàhá-yu:

—¿Náa xìní-ndó ì<sup>n</sup> tée ndècu ndihí yucu ñávãha duha váha càhá<sup>n</sup>-dé? ¿Náa xìní-ndó ñuu ndàcu yucu ñávãha cada tátna-xi núu ì<sup>n</sup> tée cuáá te ndúha? —càchí-yu xitnàhá-yu.

### *Ñáyiu isràél dáquèe tíhũ-yu Jèsús*

22 Te ndi tnahá cuiá ndádá càhnú-yu vico veñúhu càhnu sá ío cùnuu ñuu

Jerusalén, te mei yóo quidé vixi<sup>n</sup>-xi quidé-yu vico-á<sup>n</sup>.

23 Te corrèdór veñúhu-á<sup>n</sup> nání-xí Sàlomón, te xía<sup>n</sup> xicá cùu Jesús.

24 Te ní chítú ñíhnú ñáyiu isràél núu-gã, te ní xáhá<sup>n</sup>-yu:

—¿Ná ndéé òré cachí tnúhu ndáá-n, te núu sá Crístú Yaá ní tendaha Yã Ndiöxí véxi ñuyíú-a cùu-n, àdi ná tée cùu-n?, cáhá<sup>n</sup>-ni-n —càchí-yu xáhá<sup>n</sup>-yu xii-gá.

25 Te ní xáha<sup>n</sup> Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái núu sá quidé-í sá ñá táuchíú<sup>n</sup> Tãtã-í cada-í, te cùu-xi ì<sup>n</sup> sá cútnùní iní-ndó ñá tée cùu-í.

26 Dico nchòhó ñá sàndáá iní-ndó, chi ñá túú cùu-ndo ñáyiu ní chitnahá ñáhá xii-í.

27 Chi nchaa ñáyiu ní chitnahá ñáhá xii-í cùu-yu dàtná cue mbéé quiti xñdecu ndihí xítohó-xi chi núcúhu<sup>n</sup> ndudú-güedi xítohó-güedi, te duca<sup>n</sup> nàquiní ñáhá-ní xítohó-güedi xii-güedi. Duca<sup>n</sup> sãtnahá-xi cùu nchaa ñáyiu ní chitnahá ñáhá xii-í.

28 Te yúhú cada-í te nduu táhũ-yu cundecu ndihí ñáhá-yu xii-í ni caa ni quíhí<sup>n</sup> te vá ì<sup>n</sup> ndùu-gá cuíta ñíhnú-yu, te ni vã yóo ì<sup>n</sup> ndacu naquendeé ñáhá xii-yu ndaha-í.

29 Chi Tãtã-í ní taxi cuendá ñáhá-gã xii-yu. Te ío cùnuu-gá ñuu xía<sup>n</sup> vá yóo ì<sup>n</sup> ndacu naquendeé ñáhá xii-yu ndaha-gá.

30 Yúhú ndihí Tãtã-í Dútú Ndiöxí ì<sup>n</sup>-ni cùu-ndí —càchí-gá xáha<sup>n</sup>-gã xii-yu.

31 Te ní quehe<sup>n</sup> tucu ñáyiu isràél yúu cuãha ñáhá-yu xii-gá ní cùu.

32 Te ní xáha<sup>n</sup>-gã xii-yu:

—Ío cuéhé sã vãha ní quide-í núu-ndó ñá chindee ñaha Tãtã-í Dútú Ndiöxí. ¿Te ndèdacáa sá ñá tnahá iní-ndó ñuu cuiní-ndó cuãha ñaha-ndo yúu xii-í-í? —càchí-gá xáha<sup>n</sup>-gã xii-yu.

33 Te ní xáha<sup>n</sup> ñáyiu isràél:

—Ñá díú cuendá nchaa sá vãha ní quide-n cuiní-ndí cuãha ñaha-ndí yúu xii-n, chi ì<sup>n</sup> ñá-ni sá ío càhá<sup>n</sup> úhú-n cuendá Yã Ndiöxí. Te dìcò ì<sup>n</sup> tée

ñuyíú-a cùu-n te cächí-n sã cúu-n Ndiöxi —cächí-yu xähã<sup>n</sup>-yu xii-gá.

<sup>34</sup> Te ní xáha<sup>n</sup> Jèsús:

—Núu tütú Yã Ndiöxi sá ndécú ndihí-ndo cáhá<sup>n</sup>-xi nàcuáa ní cáhá<sup>n</sup>-gá, te duha ní cachí-gá: “Nchòhó quidé-ndó nũù-í”, duha ní cachí-gá.

<sup>35</sup> Te ñaha-o sá vã cúu quèndé nihnu-o tnũhu yòdo tnuní núu tütú Yã Ndiöxi, chi mee-gã ní cachí-gá sá cáda-yu núu-gã, te vã cächí-ó sã ñã ndàá.

<sup>36</sup> Te núu duca<sup>n</sup> ñi cáhá<sup>n</sup>-gá sá nũu-gã quidé nchàa ñáyiu ní sándáá iní ñáhá xii-gá ñá, ¿te ná cuèndá cúdeé<sup>n</sup>-ndó núu yũhú sá cächí-í sá cúu-í Déhe-gá? Te mee Yã Ndiöxi ní tendaha ñaha-gá xii-í véxi-í ñuyíú-a sá cáda-í chiũ<sup>n</sup>-gá.

<sup>37</sup> Te núu ñá túu quide-í nàcuáa ní táuchíú<sup>n</sup> Tãtà-í cada-í ñá, te vã quèndáá iní ñáhá-ndó.

<sup>38</sup> Te núu quide-í ñá, te cuèi vã quèndáá iní ñáhá-ndó xii mee-í dico quèndáá iní-ndó nchàa chiu<sup>n</sup> quide-í. Duca<sup>n</sup> te cutnùní ndáá iní-ndó sã Yã Ndiöxi ndécú ndihí-í te ñ<sup>n</sup>-ni cùu-ndí —cächí-gá xáha<sup>n</sup>-gã xii-yu.

<sup>39</sup> Te ní cuini-güedé tñi ñaha tucu-güedé xii-gá quihí<sup>n</sup>-gá vecaá ní cùu, dico ní xinu núu ñáhá-gã xii-güedé.

<sup>40</sup> Te ní xica-gá cuáhá<sup>n</sup>-gá ndàa ingá xio yúte Jòrdán núu ñi xóo dacuàndute ndí Juàá ñáyiu ndéé díhna, yàcá<sup>n</sup> ní xindecu-gá.

<sup>41</sup> Te yàcá<sup>n</sup> ío vai ñáyiu ní sáhá<sup>n</sup> ní cáhá<sup>n</sup> ndihí ñaha xii-gá, te ní xitnàhá-yu:

—Ndí Juàá, cuèi ñá túu ní quide ndí sá vã yòo tnàhí ndàcu cada dico ndáá ní cáhá<sup>n</sup> ndí, chi dàtná-ni ní cáhá<sup>n</sup> ndí quide té-a —cächí-yu xitnàhá-yu.

<sup>42</sup> Te yàcá<sup>n</sup> ío vai-yu ní sándáá iní ñáhã-yu xii-gá.

## 11

### *Ní xihí té Lázaru*

<sup>1</sup> Núu Bètaniá ní xindecu ñ<sup>n</sup> téé ní xínani-dé Lázaru. Te cãhú víhí ñi tnàhá-dé ní cùhú-dé, te ní xindecu

ndihí-dé cue cúha-dé tá Màriá ndihí tá Màrta chi xía<sup>n</sup> ñuú-yu.

<sup>2</sup> Te tá Màriá-á<sup>n</sup> cúu-xí xíchí ñi sódo àcítí sàhá<sup>n</sup> tnámí sàhá Jèsús, te ní na-dayìchí-xi sáhá-gã ndihí idi díquí-xi. Te cuèndá sá cùhú cúha-yu té Lázaru,

<sup>3</sup> núu ní tendàhá-yu ñáyiu ñaha tnúhu cuáhá<sup>n</sup> núu Jèsús, te xähã<sup>n</sup>-yu xii-gá:

—Mèstrú, téé ío cùu iní-n ío cãhú tnàhá-dé cùhú-dé —cächí-yu xähã<sup>n</sup>-yu xii-gá.

<sup>4</sup> Te sá dúcá<sup>n</sup> càa tnúhu ní sáá, núu ní xáha<sup>n</sup> Jèsús xii-yu:

—Dico cuéhé-ã<sup>n</sup> chi vã cùu-dé sá cùu dúcá<sup>n</sup>-dè, chi Yã Ndiöxi cuini-gá sá quini-yu nchaa sá cáda-gã cuèndá chiñuhu ñáhá-yu xii-gá, te ñu-ni duca<sup>n</sup> chiñuhu ñáhá-yu xii yúhú Déhe-gá —cächí-gá xáha<sup>n</sup>-gã xii-yu.

<sup>5</sup> Te cuèi ío cùu iní ñáhá Jèsús xii té Lázaru ndihí cue cúha-dé

<sup>6</sup> dico òré ní níhí-gã tnúhu, te ní cuyaa-gã úu-gá nduu núu ndécú-gã.

<sup>7</sup> Te ní xáha<sup>n</sup>-gã xii cue téé xica cuu ndihí-gá:

—Na quihí<sup>n</sup> tucu-o dìstrítú Jùdeá —cächí-gá xáha<sup>n</sup>-gã xii-güedé.

<sup>8</sup> Te ní xáha<sup>n</sup> cuè téé xica cuu ndihí-gá xii-gá:

—Mèstrú, vitna-ni cuini cue téé is-ràel xindecu yàcá<sup>n</sup> cuáha ñaha-güedé xii-n yúu ní cùu, ¿te cuini-ni tucu-n quihí<sup>n</sup>-n-ú? —cächí-güedé xähã<sup>n</sup>-güedé xii-gá.

<sup>9</sup> Te ní xáha<sup>n</sup> Jèsús:

—Úxúú òré cúu ñ<sup>n</sup> nduu, te núu nduu na càca cuu-o, te ñá túu ñã can-daundeé-ó chi cùnùní núu-ó chi dìtó.

<sup>10</sup> Dico núu níu ná càca cuu-o, te ío ná candaundeé-ó chi vã cùnùní núu-ó —cächí-gá xáha<sup>n</sup>-gã xii-güedé.

<sup>11</sup> Te ní xáha<sup>n</sup> Jèsús:

—Té Lázaru téé ío váha tnàhá tnúhu ndihí-o ñi xidí-dé dico quihí<sup>n</sup>-ó chi ndocani-o-dè —cächí-gá xáha<sup>n</sup>-gã xii-güedé.

<sup>12</sup> Te ní xáha<sup>n</sup>-güedé xii-gá:

—Mèstrú, te núu xidí-dé te váa sa ta ndũha-dé cuáhá<sup>n</sup> —cächí-güedé xähã<sup>n</sup>-güedé xii-gá.

13 Duha ní cáhá<sup>n</sup> Jèsús, chi té Lăzarú sa ní xihí-dé te cue tée xica cuu ndihí-gá ní sani iní-güedé sá nǐ xidí ndisa-dé.

14 Te Jèsús ní xáha<sup>n</sup> ndăá-gá xii-güedé:

—Sa ní xihí té Lăzarú.

15 Váha-gá sá ñă ní sǎhá<sup>n</sup>-í quíngoto-í-dé, chi ndècu ingá chiú<sup>n</sup> cada-í quini-ndó, te quindáá iní ñáhá-gă-ndó xii-í, te vitna na quihí<sup>n</sup>-ó núú ndécú yiqui cuñú ndíi —càchí-gá xáha<sup>n</sup>-gă xii-güedé.

16 Te té Măxí tée xáha<sup>n</sup>-güedé cuáchí ní xáha<sup>n</sup>-dê xii dava-gă-güedé:

—Na quihí<sup>n</sup>-ó nchaa-o chi yacá<sup>n</sup> cuú-ó ndihí-dé —càchí-dé xáha<sup>n</sup>-dê xii-güedé.

*Jèsús càhá<sup>n</sup>-gá sá cuèi na cùú ñáyiú dico ndotó-yu cundecú-yu ndihí-gá*

17 Te òré ní sáá Jèsús ñuú Bêtaniá, te ní xáhá<sup>n</sup>-yu sá sà ní cuu cúmí nduu ní xihí té Lăzarú.

18 Te ñuú-á<sup>n</sup> cáá yàtni-ni-gá ñuú Jerusálén, dàtná cuádava-ná òré cuhu<sup>n</sup>-o ìchi te saá-ó.

19 Núú xíá<sup>n</sup> vâi ñáyiú isrâél ní sáhá<sup>n</sup>-yu ní cáhá<sup>n</sup> ndihí-yu tá Mărta ndihí cúhú-xi tá Măriá, te ní sáñhá<sup>n</sup>-yu tnúhu ndee iní sá dúcá<sup>n</sup> ní xihí cúha-yu.

20 Te ní níhí tá Mărta tnúhu sá ñúhú Jèsús ichi cuáhá<sup>n</sup>-gá núú ndécú-yu núú ní sáhá<sup>n</sup>-xi ní sátnahá-xi-gá, te cúhú-xi tá Măriá ní ndóo-xi vehe.

21 Te òré ní naníhí tá Mărta Jèsús, te ní xáha<sup>n</sup>-xi xii-gá:

—Mèstrú, te núú dicó ní xĩndecu-n ìha te vá cùú cúha-ndí ní cùu.

22 Te cuèi vitna te núú ná sá ná càcá<sup>n</sup>-n núú Yă Ndióxí te taxi-gá xii-n —càchí-xi xáha<sup>n</sup>-xi xii-gá.

23 Te ní xáha<sup>n</sup> Jèsús:

—Vá ndihú iní-n chi ndoto cúha-n —càchí-gá xáha<sup>n</sup>-gă xii-xi.

24 Te ní xáha<sup>n</sup> tá Mărta:

—Ndáá chi sa xini-í sá ndótó-dê ná quítnahá nduu ndòto nchaa ñáyiú ní xihí —càchí-xi xáha<sup>n</sup>-xi xii-gá.

25 Te ní xáha<sup>n</sup> Jèsús:

—Yúhú dandòto-í-yu cuëndá cundecú-yu ní caa ní quihí<sup>n</sup> ná sàá nduu.

Te nchaa ñáyiú na quindáá iní ñáhá xii-í, te cuèi na cùú-yu dico ndotó-yu cundecu-í ndihí-yu ní caa ní quihí<sup>n</sup>.

26 Te nchaa ñáyiú ndècu vívú ñuyíú-a te núu na quindáá iní ñáhá-yu xii-í, te cundecu ndihí-í-yu ní caa ní quihí<sup>n</sup>. ¿Sàndáá iní-n tnúhu-a ñă? —càchí-gá xáha<sup>n</sup>-gă xii tá Mărta.

27 Te xáha<sup>n</sup>-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yă Ndióxí, Yaá ní tendaha-gă véxi ñuyíú-a —càchí-xi xáha<sup>n</sup>-xi xii-gá.

*Jèsús ndàhí-gá núú nǐ nguíndüxi té Lăzarú*

28 Sátá dúcá<sup>n</sup> ní cáhá<sup>n</sup>-xi te ní sáhá<sup>n</sup> ngana-xi cúhú-xi tá Măriá, te dayuhu ní xáha<sup>n</sup>-xi:

—Yacá<sup>n</sup> ní quexio Mèstrú, te càna ñaha-dé xii-n —càchí-xi xáha<sup>n</sup>-xi.

29 Te sá dúcá<sup>n</sup> xáha<sup>n</sup> cúhú tá Măriá sá cáná ñàha Jèsús xii-xi, núú ndihí-ni ní xica-xi cuáhá<sup>n</sup>-xi núú ndécú-gă.

30 Te Jèsús vátá quíhu-gá xití ñuú, chi ndècu-ni-gá núú ní sáhá<sup>n</sup> tnahá ñáhá tá Mărta.

31 Te ñáyiú isrâél ndécú sáñaha tnúhu ndee iní xii tá Măriá ndihí cúhú-xi ní sani iní-yu sá cuáhá<sup>n</sup>-xi núú yĩndüxi cúha-xi ndáhyú-xi ní cáhá<sup>n</sup>-yu, núú nchicú<sup>n</sup>-yu-xi cuáhá<sup>n</sup>.

32 Te ní sáá tá Măriá núú ndécú Jèsús te ní nguíñí xití-xi núú-gă, te xáha<sup>n</sup>-xi xii-gá:

—Mèstrú, te núú dicó ní xĩndecu-n ìha te vá cùú cúha-ndí ní cùu —cachí-xi xáha<sup>n</sup>-xi xii-gá.

33 Te sá ní xiní Jèsús ndáhyú tá Măriá ndihí ñáyiú isrâél nchicú<sup>n</sup> ñáhá cuáhá<sup>n</sup>, xíá<sup>n</sup> ío ní cuyica iní-gá.

34 Te ní xáha<sup>n</sup>-gă xií-yu:

—¿Ndéé ní taxi ndecu-ndo yiqui cuñú-dé-i? —càchí-gá xáha<sup>n</sup>-gă xií-yu.

Te ní xáhá<sup>n</sup>-yu:

—Mèstrú, néhé ná quihí<sup>n</sup>-ó te quini-n —càchí-yu xáhá<sup>n</sup>-yu xii-gá.

35 Te ní ndáhyú-gă tnahá-gă.

36 Te ní xitnàha ñáyiú isrâél:

—Súuní cùu iní-dé ndíi ní cùu —cachí-yu xitnàhá-yu.

37 Te davá-yu xitnàhá-yu:

—Tée-a ní quide tátna-dé núú tée cuáá te ní ndúha. ¿Te nása ní cuu núu ñá túú ní quide tátna-dé té Lázaru cuendá sá vǎ cùú-dé ní cùu-i? — cachí-yu xitnàhá-yu.

*Jèsús dándòto-gá té Lázaru*

<sup>38</sup> Te ío ní cuyica tucu iní Jèsús òré ní quexìo-gá yuhu yàú núú ní chihi-güedé yiqui cùñú té Lázaru. Te yuhu yàú-án ndèdí ìñ yúú.

<sup>39</sup> Te ní xáha<sup>n</sup> Jèsús xii-yu:

—Chí xócàni yúú-ǎ<sup>n</sup> —càchí-gá xáha<sup>n</sup>-gǎ xii-yu.

Te ní xáha<sup>n</sup> tă Mǎrta cúha tée ní xihí-án:

—Mèstrú, sa tucu sàhá<sup>n</sup>-dé chi sa ní cuu cúmí nduu sá ní xihí-dé —càchí-xi xáha<sup>n</sup>-xi xii-gá.

<sup>40</sup> Te ní xáha<sup>n</sup> Jèsús:

—¿Náa ñá díú ní cachí-í sá nùu na quindáá iní-n, te quiní-n sǎ ìo càhnu cuu Yá Ndiòxí? —càchí-gá xáha<sup>n</sup>-gǎ xii-xi.

<sup>41</sup> Te ní xócání-yu yúú ndèdí yuhu yàú-án. Te ní ndacoto-gá andiu, te ní xáha<sup>n</sup>-gǎ xii Tǎtá-gǎ Dútú Ndiòxí:

—Táu, ndàcán táhù-í núú-n sǎ ní tédoho-n tnúhu ní cáhá<sup>n</sup>-í.

<sup>42</sup> Te yúhú sa nàha-í sá ncháá-ni òré ndèdóho ñaha-n xii-í, dico duha càhá<sup>n</sup>-í cuendá sá ná tècú dóho nchaa ñáyiú ndècu iha cuendá quindáá iní-yu sá díú-n ní tendaha ñaha-n xii-í véxi-í ñuyíú-a —càchí-gá xáha<sup>n</sup>-gǎ xii Dútú Ndiòxí.

<sup>43</sup> Te sátá dúcán ní cáhá<sup>n</sup>-gá ndihí Yá Ndiòxí, te níhi ní cáhá<sup>n</sup>-gá xáha<sup>n</sup>-gǎ xii tée ní xihí-án:

—¡Lázaru, tandèe xía<sup>n</sup>! —càchí-gá xáha<sup>n</sup>-gǎ xii-dé.

<sup>44</sup> Te ní ndee tée ní xihí-án yaú-án, te ndùtu dóó cuíñí ndàha-dé ndihí sáhá-dé, te dàhu tucu ìñ dóó nùú-dé. Te ní xáha<sup>n</sup> Jèsús xii-yu:

—Chí nándàxi-dé te dañà-ndo-dé ná cǎcá-dé —càchí-gá xáha<sup>n</sup>-gǎ xii-yu.

*Ndùcu-güedé nàcuáa cada-güedé cahni-güedé Jèsús*

(Mt. 26:1-5; Mr. 14:1-2; Lc. 22:1-2)

<sup>45</sup> Te nchaa ñáyiú nchìcú<sup>n</sup> ñáhá xii tá Màriá cuáhán ío vai-yu ní sándáá

iní-yu Jèsús sá ní xiní-yu nàcuáa ní quide-gá.

<sup>46</sup> Dico davá-yu ní sáhán-yu núú cuè tée cùu fariséú, te ní caní-yu cuendú núú-güedé nàcuáa ní quide Jèsús.

<sup>47</sup> Te cue tée cùu fariséú ndihí cue dútú cùnùu ní nataká-güedé ní xóo-güedé jündá, te ní xitnàha-güedé:

—¿Nása cada-o?, chi tée-ǎ<sup>n</sup> ío vai sá vǎ yòo tnàhí ndàcu cada quide-dé.

<sup>48</sup> Te núu na dàña ío te nchaa ñáyiú quindáá iní ñáhá-yu xii-dé, te quixi cue tée ñuú Rómá dangoyo-güedé veñúhu-o te danàa-güedé nchaa ñuú-ó —càchí-güedé xitnàha-güedé.

<sup>49</sup> Te ìñ cue tée-án nání-dé Caifás, te cùnùu-gá-dé núú dàva-gá cue dútú cuíá-ǎ<sup>n</sup>, te ní xáha<sup>n</sup>-dè xii-güedé:

—Nchòhó ni lùha ñá túú cùnùní iní-ndó.

<sup>50</sup> Te ni ñǎ sàha-ndo cuendá sá vǎha-gá tnahá-ó, te núu na cùú ìñ-ni tée cuendá nchaa ñáyiú isràél, te ñá díú sǎ dánàa ñaha-güedé xii-yu —càchí-dé xáha<sup>n</sup>-dè xii-güedé.

<sup>51</sup> Dico té Caifás chi ñá díú sǎ cúú iní mée-dé ní cáhá<sup>n</sup>-dé, chi cuendá sá cuíá-ǎ<sup>n</sup> ní cunuu-dé núú cuè dútú, núu xía<sup>n</sup> Yá Ndiòxí ní dácáhu iní ñáhá-gǎ nàcuáa cáhá<sup>n</sup>-dé sá Jèsús cuú-gá sá cúú-xi ncháa ñáyiú isràél.

<sup>52</sup> Te ñá díú cuendá mee-ni ñáyiú-án cuú-gá, chi cuú-gá tnàhá cuendá nchaa ñáyiú ní sándáá iní ñáhá xii-gá, ñáyiú nchiténuu nihí ñuyíú, te ìñ-ná cuú-yu ndihí-gá.

<sup>53</sup> Núu ndéé nduu-ǎ<sup>n</sup> ní ndatnúhu cue tée cùnùu núú ñáyiú isràél nàcuáa cada-güedé cahni-güedé Jèsús.

<sup>54</sup> Te xía<sup>n</sup> nùu ñá ní xica cuu-gá Jèsús quiní ñáhá ñáyiú isràél, te ní quee-gá cuáhán-gá ñuú Efraín, ìñ ñuú cáá yàtni yucu, yàcán ní ngüñí-gá ndihí cue tée xica cuu ndihí-gá.

<sup>55</sup> Te ta cùyatni nduu cadá-yu vico páscaú. Te cuéhé ñáyiú ní quee-yu ñuú-yu cuáhán-yu ñuú Jerusalén cuendá sá sà ndihí-yu ncháa-yu nduu íi, te tnahá nduu vico páscaú.

<sup>56</sup> Te yàcán nándúcú-yu Jèsús ní cùu te ñá túú-gǎ òré-án, te ní nanihí tnàhá-yu xití veñúhu, te xitnàhá-yu:



—¿Nása sàni iní-ndó-í? ¿Quixi Jèsús vico ãñ ñáhá? —càchí-yu xítñàhá-yu.

<sup>57</sup> Te cue tée cùu fariséú ndihí cue dútú cúnùu sa ní xáha<sup>n</sup>-güedě xii ñáyiú sá nùu nděda-ni càá-yu xìní-yu núú ndécú Jèsús te na càhá<sup>n</sup>-ni-yu cuendá tñi ñaha-güedě xii-gá.

## 12

*Ɔñ ñadhí chíhí-á<sup>n</sup> Jèsús acítí*  
(Mt. 26:6-13; Mr. 14:3-9)

<sup>1</sup> Íñú-gá nduu cùmání tnahá vico pàscuá, te ní sáhá<sup>n</sup> Jèsús ñuú Bètaniá, ñuú té Lázaruú té ní dándótó-gă.

<sup>2</sup> Te xía<sup>n</sup> ñi cadúha-yu sá ñi cudini Jesús. Te tá Mărta ní sani-xi cóhó, te té Lázaruú yíhí-dě mèsá ndihí Jèsús, ndihí dava-gá-güedě xéxi-güedě.

<sup>3</sup> Te tá Măriá néhé-xí cuădava lítrú acítí sáhá<sup>n</sup> tñámí sá ío ndeyáhu, te acítí-á<sup>n</sup> ñi cuáha mee-ni yúcú nărdú, te ní sódo-xi sáhá Jèsús, te ní nadayíchí-xi ndihí idi díquí-xi sáhá-gă. Te ñihí xítí vehe ní xité nuu dicó acítí-á<sup>n</sup>.

<sup>4</sup> Te té Júdás déhe té Xímú Iscarioté diu-ni ñ<sup>n</sup> té xica cuu ndihí-gá, té cuáha cuendá ñáhá xii-gá núú cué tée cùu úhú iní ñáhá ñi xáha<sup>n</sup>-dě xii-gá:

<sup>5</sup> —¿Ná cuendá ñá ní cùyáhu acítí-a sá ùní ciendú díhú<sup>n</sup> denariú cuu cuendá ñáyiú ndàhú? —càchí-dé xáha<sup>n</sup>-dě xii-gá.

<sup>6</sup> Dico sá dúcá<sup>n</sup> ñi càhá<sup>n</sup> té Júdás chí ñá díú sã ndísá ñùhu iní-dé ñáyiú ndàhú chí dicó-ni ñ<sup>n</sup> ñádúhú cúú-dě, chí diu-dé néhé cuendá-dé díhú<sup>n</sup>-güedě nchaa-güedě te ní xóo duhu ñaha-dé xii-güedě.

<sup>7</sup> Te ní xáha<sup>n</sup> Jèsús:

—Daña, vá dásatú-n iní xíchí-a na tàxúha nahi-xi àcítí-a, chí nándihí ndéé òré ná nguñdúxi-í.

<sup>8</sup> Chí nchòhó chí cuhú<sup>n</sup> tnahá-ni ñáyiú ndàhú tnuú-ndó, dico yúhú chí vá ncháá ndùu cundecu ndihí ñaha-í xii-ndo —càchí-gá xáha<sup>n</sup>-gă xii-dé.

*Tnahá té Lázaruú cuíní-güedě cahni ñaha-güedě xii-dé*

<sup>9</sup> Te vai ñáyiú isràél ní níhí-yu tñúhu sá ndécú Jèsús ñuú Bètaniá.

Te ní sáhá<sup>n</sup>-yu cuendá quíní-yu-gá, te quíní-yu tñàhá té Lázaruú té ní dándótó-gă.

<sup>10</sup> Te cue dútú cúnùu ní ndatnúhu-güedě ní cuu ñ<sup>n</sup>nuu-güedě cuendá sá cahní-güedě tñàhá té Lázaruú ní cùu,

<sup>11</sup> chí diu cuendá té-á<sup>n</sup> ñi cuu cuéhé ñáyiú isràél tá daña nihnú-yu-güedě cuáhá<sup>n</sup> cuendá sá ñi sándáá iní-yu Jèsús.

*Jèsús cuánguñhu-gá ñuú Jerusalén*  
(Mt. 21:1-11; Mr. 11:1-11; Lc. 19:28-40)

<sup>12</sup> Te nduu tñéé-á<sup>n</sup> vai ñáyiú ní quexio ñuú Jerusalén cuendá cundecú-yu vico, te ní níhí-yu tñúhu sá Jèsús sáá-gá tñàhá-gá cundecu-gá vico-á<sup>n</sup>,

<sup>13</sup> núu ní xehndé-yu ndaha yùtnu ñuú, te nēhé-yu ní sáhá<sup>n</sup> ní sátnahá ñáhá-yu xii-gá. Te níhi ní càhá<sup>n</sup>-yu, te càchí-yu:

—Ío càhnu cuu Yá Ndiòxí! Te duca<sup>n</sup>-ni ío càhnu cuu Yaá ní tendaha-gă véxi quindaha ñaha xii-o —duha ní cachí-yu.

<sup>14</sup> Te Jèsús ní níhí-gă ñ<sup>n</sup> bürü, te yòdo-gá-di cuáhá<sup>n</sup>. Te duca<sup>n</sup> ñi cuu chí ní quee ndáá-xi nàcuáa càhá<sup>n</sup>-xi núú tütú Yá Ndiòxí núú càchí-xi:

<sup>15</sup> Vá yùhú nchòhó cue ñáyiú ndècu ñuú Sìón,

chí iha véxi té yindaha ñaha xii-ndo yodo-dé ñ<sup>n</sup> bürü.

Duha càchí-xi núú tütú-gá.

<sup>16</sup> Dico cue té xica cuu ndihí Jesús ñá ní ndàcu iní-güedě nàcuáa càhá<sup>n</sup>-xi núú tütú Yá Ndiòxí nàcuáa cada Jèsús. Dico sátá cuándaa-gă andiu cada cahnu ñaha Tátá-gă xii-gá, te ní ndacu iní-güedě sá dúcá<sup>n</sup> yòdo tñuní nàcuáa cada-gá, te duca<sup>n</sup> ñi cuu.

<sup>17</sup> Nchaa ñáyiú ní xindecu ndihí Jèsús òré ní dándótó-gă té Lázaruú, ya yacá<sup>n</sup> ní caní-yu cuendú núú ñáyiú nàcuáa ní quide ñaha-gă xii-dé.

<sup>18</sup> Te vai-yu ní sáhá<sup>n</sup>-yu núú ndécú Jèsús cuendá sá ñi níhí-yu tñúhu ní quide-gá sá vã yòo tñàhí ndàcu cada.

<sup>19</sup> Te cue té cùu fariséú ní xítñàha-güedě:

—Ní xito-ndo nã ñá túú nàndihí sá quidé-ó-vá, chí nchaa ñáyíu ní chinchícú<sup>n</sup> ñáhã-yu xii-dé — càchí-güedé xítñaha-güedé.

*Ñáyíu ñá túú cùu ñáyíu isràél nándùcú-yu Jèsús*

20 Te tnàhá ñáyíu ñá túú cùu ñáyíu isràél ní sáhá<sup>n</sup>-yu vico ñúú Jerusàlén ní quide càhnú-yu Yá Ndiöxí.

21 Te ñáyíu-á<sup>n</sup> ñí sáhá<sup>n</sup>-yu núú tẽ Lìpé tée ñúú Bètsaidá, te ñúú-á<sup>n</sup> yíndèhu-xi distritú Galileá. Te ní xáhã<sup>n</sup>-yu xii-dé:

—Tátá, vá cùndèe iní-n càchí tnúhu-n nũu ndèé ndécú Jèsús, chí cuìní-ndí cáhá<sup>n</sup> ndihí-ndí-gá — càchí-yu xáhã<sup>n</sup>-yu xii-dé.

22 Te té Lìpé ní naníhí-dẽ té Ndríxí te ní xáhã<sup>n</sup>-dẽ nàcuáa càhá<sup>n</sup>-yu, te ndi ndùú-güedé ní sáhã<sup>n</sup>-güedé ní xáhã<sup>n</sup>-güedé xii Jèsús nàcuáa càhá<sup>n</sup>-yu.

23 Te ní xáhã<sup>n</sup> Jèsús xii-güedé:

—Vitna ní cuyatni òré cada càhnu ñaha Tátá-í xii-í, te quiní-yu sá ïo càhnu cuu yúhú Tée cùu ñaní tnáhã-yu nchaá-yu.

24 Te na càchí tnúhu ndáá-í xii-ndo sã nũu ì<sup>n</sup> tatá vá ngává-xí nũú ñúhú tẽhyú-xi ña, te ñúu-ni duca<sup>n</sup> cùnduu-xi cundecu-xi. Dico ì<sup>n</sup> tatá ná ngává nũú ñúhú xínu déhe-xi, te xiã<sup>n</sup> nádacayá tnáhã-xí, te mee-xi tẽhyú-xi.

25 Te nchaa ñáyíu ío ñúhu iní-xi cundecu ñuyíú-a ñá túú ñúhu iní-yu Yá Ndiöxí, te ñáyíu-á<sup>n</sup> cuíta nihnú-yu. Te nchaa ñáyíu ío ñúhu iní ñáhã xii Yá Ndiöxí, ñáyíu-á<sup>n</sup> cundecú-yu ndihí-gá ni caa ni quíhí<sup>n</sup>.

26 Te nchaa ñáyíu cuìní cunu cuechi nũú-í xini ñúhu-xi natuha ñahã-yu xii-í, te nduu táhũ-yu cundecú-yu núú nùhú-í cundecu-í. Te nchaa ñáyíu na cunu cuechi núú-í, te cada càhnu ñaha Tátá-í xii-yu —càchí-gá xáhã<sup>n</sup>-gã xii-güedé.

*Jèsús càhá<sup>n</sup>-gá sá cáhni ñaha-güedé xii-gá*

27 Te ní xáhã<sup>n</sup> tùcu-gá:

—Ío ndihú iní-í. Te cúñaha-í xii Tátá-í taunihnu ñaha-gã nũu dicó sá

cúú, dico vá cúú chí cuendá tnàhí-a véxi-í —càchí-gá xáhã<sup>n</sup>-gã xii-güedé.

28 Te ní xáhã<sup>n</sup>-gã xii Tátá-gã Dútú Ndiöxí:

—Táu, cada nàcuáa ní sani iní-n cùnduu cuendá sá ná cada càhnu ñaha ñáyíu xii-n —càchí-gá xáhã<sup>n</sup>-gã.

Te duca<sup>n</sup> te ní tecú ní cáhá<sup>n</sup> Yá Ndiöxí ndéé andíu, te càchí-gá:

—Sa ní quide-í nàcuáa cachí ñáyíu sá ïo càhnu cuu-í. Te cada tucu-í cuendá cada càhnu ñaha-gá-yu xii-í —càchí Yá Ndiöxí xáhã<sup>n</sup>-gã xii Déhe-gá.

29 Te nchaa ñáyíu xíndecu ní tecú dóho-yu ní cáhá<sup>n</sup>-gá, dico ñá túú ní sàni iní-yu sá méé-gã ní cáhá<sup>n</sup>, chí davá-yu ní xítñahã-yu sá ñúhu ní cáhá<sup>n</sup>, te davá-yu ní xítñahã-yu sá ì<sup>n</sup> espíritú xínu cuèchi núú Yá Ndiöxí ní cáhá<sup>n</sup>.

30 Te ní xáhã<sup>n</sup> Jèsús xií-yu:

—Ñá díú cuendá yúhú ní cáhá<sup>n</sup> Yá Ndiöxí, chí ní cáhá<sup>n</sup>-gá cuendá sá nchòhó cundedóho-ndo.

31 Te vitna ní sáá nduu càda ndáá Yá Ndiöxí cuèchi nchaa ñáyíu ñuyíú-a, te duca<sup>n</sup> te vá cùnùu-gá yucu ñávãha.

32 Te na càta caa ñaha-güedé xii-í núú cùrúxí, te xiá<sup>n</sup> cuú-í te níhí-yu tnúhu ni càa xico ñuyíú, te quindáá iní-yu tnúhu-í —càchí-gá xáhã<sup>n</sup>-gã xií-yu.

33 Duha ní cáhá<sup>n</sup>-gá cuendá cutnùnì iní-yu nàcuáa ndoho-gá òré cuú-gá.

34 Te ní xáhã<sup>n</sup>-yu xii-gá:

—Nihí-ndí tnúhu sá nũú tùtú yódó tnùnì tnúhu Yá Ndiöxí càhá<sup>n</sup>-xi sá Crìstú Yaá tendaha-gã quixi ñuyíú-a cundecu-gá ni caa ni quíhí<sup>n</sup>. ¿Te yòhó nása càhá<sup>n</sup>-tu-n sã ì<sup>n</sup> tée cùu ñaní tnáhã nchaa ñáyíu ñuyíú-a cahni ñaha-güedé núú cùrúxí? Te cachí tnúhu-n nã cúú tẽ-á<sup>n</sup> —càchí-yu xáhã<sup>n</sup>-yu xii-gá.

35 Te ní xáhã<sup>n</sup> Jèsús:

—Yúhú cúu-í dàtná ì<sup>n</sup> ñuhú dáyehe ñuyíú-a, dico sacú-ni nduu ndècu ndihí ñaha-í xii-ndo. Te caca-ndo ìchi ndáá vitna dàyehe-gá-í núú-ndó chí na cùnee te vá cùtnùnì-gá núú-ndó ndèé ichi quíhí<sup>n</sup>-ndó.

36 Quindáá iní ñáhá-ndó xii-í vitna ndècu ndihi ñaha-gá-í xii-ndo dándixi túu-í iní-ndó, cuendá cutnùní iní-ndó nàcuáa ndùu cuendá Yă Ndiöxí, te cuu-ndo dèhe-í —càchí-gá xáha<sup>n</sup>-gă xií-yu.

Te sátá dúcá<sup>n</sup> ñí cáhá<sup>n</sup> Jèsús, te ní quee-gá cuáhá<sup>n</sup>-gá ì<sup>n</sup> núú vă ná nihí ñáhă-yu xii-gá.

*Ñáyiú isràél ñá cuìní-yu quindáá iní-yu Jèsús*

37 Te cuèi ío vâi sá vă yôo tnàhí ndàcu cada ní quide Jèsús ní xiní-yu, dico ni dùca<sup>n</sup> ñá túú ní sàndáá iní-yu-gá.

38 Te duca<sup>n</sup> ñí quidé-yu chi dacuítí ñí quee ndáá-xi nàcuáa ní chídó tnùní ndíi Chàia ndíi ní cáhá<sup>n</sup> tnúhu Yă Ndiöxí ndéé sanaha núú tütú-gá núú càchí-xi:

Yôhó Yaá cúú Xìtohó-í, vá yôo ì<sup>n</sup> sàndáá iní tnúhu càhá<sup>n</sup>-ndí. Te vá yôo ì<sup>n</sup> cùtnuní iní-xi sá ìo càhnu cuu-n.

Duha ní chídó tnùní ndíi Chàia núú tütú-gá.

39 Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndíi Chàia núú tütú Yă Ndiöxí nàcuáa cáhá<sup>n</sup> Jèsús:

40 Mee Yă Ndiöxí ní quide-gá sá vă tècú tnùní-yu, chi ní dádăhu ndodo iní ñáhá-gă xií-yu,

chi ío sàá iní-yu núú ñá ní cuìní-gá-yu quindáá iní ñáhă-yu xii-gá.

Te ní vă túhá ñáhá-yu xii yúhú cuendá dacăcu nihnu-í-yu.

41 Duha ní chídó tnùní ndíi Chàia nàcuáa cáhá<sup>n</sup> Jèsús chi ní xiní ndíi sá ìo càhnu cuu-gá.

42 Te cuèi duca<sup>n</sup> ñí cuu dico títí cue téé cùnùu núú ñáyiú isràél ní sàndáá iní ñáhá-güedé xii-gá. Dico ñá túú ní xôo cáhá<sup>n</sup> ndáá-güedé chi ní xôo yúhú-güedé sá vă dáñá-gă cue téé cùu fariséú quíhu-güedé veñúhu.

43 Chi ní xôo cudíí-gă iní-güedé sá càhá<sup>n</sup> ñáyiú dâcúxí tnúhu càhá<sup>n</sup> Yă Ndiöxí.

*Ñáyiú ñá túú sàndáá iní tnúhu Jèsús cúita nihnú-yu*

44 Jèsús níhi ní cáhá<sup>n</sup>-gá, te càchí-gá: —Nchaa ñáyiú na quindáá iní ñáhá xii-í, te ñá díú-ní mèe-í quindáá iní-yu, chi tnàhá Tătà-í Yaá ní tendaha ñàha xii-í véxi-í ñuyíú-a quindáá iní-yu.

45 Te ñáyiú xiní ñáhá xii yúhú xiní-yu tnàhá Tătà-í.

46 Te yúhú véxi-í dandixi túu-í iní ñáyiú ñuyíú-a cuendá cutnùní iní-yu nàcuáa ndùu cuendá Yă Ndiöxí, te nchaa ñáyiú na quindáá iní ñáhá xii-í te vá cùndècu-gá-yu ichi cuèhé ichi duha.

47 Te núu ìo davá-yu ndèdóho-yu nàcuáa càhá<sup>n</sup>-í te ñá túú tně-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dâcuíta nihnu-í-yu, chi véxi-í sá dâcăcu nihnu-í-yu.

48 Te nchaa ñáyiú na cùyíchí iní ñáhá xii-í te ñá túú quide cuendá-yu nàcuáa càhá<sup>n</sup>-í, te ñáyiú-án ná sàá nduu te cúita nihnú-yu chi ñá ní tně-yu tnúhu ní cáhá<sup>n</sup>-í.

49 Te yúhú ñá túú càhá<sup>n</sup>-í tnúhu véxi iní mèe-í, chi mee Tătà-í Yaá ní tendaha ñàha xii-í véxi-í ñuyíú-a ní cachí tnúhu-gá nàcuáa cunduu tnúhu cáhá<sup>n</sup>-í danèhé-í ñáyiú.

50 Te yúhú xiní-í sá tnúhu ní táuchíú<sup>n</sup> Tătà-í cáhá<sup>n</sup>-í cúú-xí ì<sup>n</sup> sá văha sá cúú xii-ndo chi nduu táhú-ndó cùndecu-ndo ndihi-gá ni caa ni quíhí<sup>n</sup>, núu xíă<sup>n</sup> càhá<sup>n</sup>-í nchaa nàcuáa ní táuchíú<sup>n</sup>-gă —càchí-gá xáha<sup>n</sup>-gă xií-yu.

## 13

*Jèsús náquète-gá sáhá cuè téé xica cuu ndihi-gá*

1 Te cùmání-gă tnahá vico pàscuá, te Jèsús sa nàha-gá sá sà ní cuyatni òré dândóo-gă ñuyíú-a, te ndaa-gá núú ndécú Tătá-gă. Te ío ní cuu iní-gá nchaa ñáyiú ní sàndáá iní ñáhá xii-gá, te ní quide ndisa-gá sá ñí cuu iní ñáhá-gă xií-yu.

2-4 Te ní quíhu yucu ñávăha díquí tè Júdás déhe té Xímú Iscarioté, te ní sani iní-dé nàcuáa cada-dé cuáha cuendá-dé Jèsús núú cuè téé cùu úhú

iní ñáhá xii-gá. Te Jèsús sa nàha-gá sá méé Yă Ndiöxí Yaá cúú Tătá-gă ní sãñaha-gă tnúhu ndee iní xii-gá sá cádá-gă núú-gă, te nàha-gá sá díú núú Tătá-gă ní quee-gá véxi-gá ñuyú-a. Te sáá nduu nàsáá tucu-gá núú Tătá-gă. Te cùdini Jèsús ndihí cue téé xica cuu ndihí-gá ní cùu, te ní ndacuíñí-gá yuhu mèsá, te ní taunuu-gá ì<sup>n</sup> dóó níhnú-gă, te ní quehe<sup>n</sup>-gá ì<sup>n</sup> dóó ní dácútú-gă núú yíquí-gă.

<sup>5</sup> Te ní chihí-gá ndute ì<sup>n</sup> tĩná, te xíá<sup>n</sup> ní naquete-gá sáhá cuè téé xica cuu ndihí-gá, te ndihí dóó ndútú núú yíquí-gă-á<sup>n</sup> ní nadayìchí-gá sáhá-güedě.

<sup>6</sup> Te òré naquete-gá sáhá tẽ Ximú, àdi Pelú, ní cùu ní xáha<sup>n</sup>-dẽ xii-gá:

—Mèstrú, ¿te yòhó naquete-n sãhà-í-u? —càchí-dé xáha<sup>n</sup>-dẽ xii-gá.

<sup>7</sup> Te ní xáha<sup>n</sup> Jèsús:

—Vitna ñá cùtnùní iní-n sã quidè-í-a dico sáá nduu te cutnùní iní-n —càchí-gá xáha<sup>n</sup>-gă xii-dé.

<sup>8</sup> Te ní xáha<sup>n</sup> tẽ Pèlú:

—Yúhú chi vá ì<sup>n</sup> ndùu te naquete-n sãhà-í —càchí-dé xáha<sup>n</sup>-dẽ xii-gá.

Te ní xáha<sup>n</sup> Jèsús:

—Te núu vá náquète-í sáhá-n á<sup>n</sup>, te vá cádá-gă-n cuendá sá ndécú ndihí ñaha-í xii-n —càchí-gá xáha<sup>n</sup>-gă xii-dé.

<sup>9</sup> Te ní xáha<sup>n</sup> tẽ Pèlú:

—Te núu duca<sup>n</sup> te vá méé-ní sãhà-í naquete-n, chi naquete-n tnàhá ndaha-í ndihí díquí-í —càchí-dé xáha<sup>n</sup>-dẽ xii-gá.

<sup>10</sup> Te ní xáha<sup>n</sup> Jèsús xii-dé:

—Téé íchí ní xichí chi xini ñuhu-xi sá sáhá-na-dẽ ndoo, te duca<sup>n</sup> te nduu ndoo-dé nihí-dé. Te nchòhó sa càndoo-ndo cuéi ñá ncháá-ndó càndoo —cachí-gá xáha<sup>n</sup>-gă xii-dé.

<sup>11</sup> Te duca<sup>n</sup> ní cáhá<sup>n</sup> Jèsús chi sa nàha-gá sá ì<sup>n</sup> cuè téé-á<sup>n</sup> cuãha cuendá ñáhá-güedě xii-gá núú cuè téé cùu úhú iní ñáhá, xiá<sup>n</sup> núu ní xáha<sup>n</sup>-gă sá ñá túú càndoo-güedé nchaa-güedé.

<sup>12</sup> Te sátá ní naquete-gá sáhá-güedě, te ní ndécúñhu-gá dóó-gă, te ní nucóo-gá yuhu mèsá, te ní xáha<sup>n</sup>-gă xii-güedé:

—¿Te ní cutnùní iní-ndó sã ní quide ñaha-í xii-ndo-ã<sup>n</sup>?

<sup>13</sup> Te nchòhó váha-ni càhá<sup>n</sup>-ndó sã cùnùu-í, te dãnani ñaha tucu-ndo Mèstrú xii-í, te ndáá càhá<sup>n</sup>-ndó.

<sup>14</sup> Te núu yúhú cúu-í Mèstrú, te cùu tucu-í téé cùnùu te nàquete-í sáhá-ndó, te diu-ni duca<sup>n</sup> càda nchohó tucu naquete sáhá tnàhá-ndó.

<sup>15</sup> Yúhú sànu ichi ñaha-í xii-ndo nàcuáa cada-ndo.

<sup>16</sup> Te na càchí tnúhu ndáá-í xii-ndo sã ní ì<sup>n</sup> téé xinu cuechi ñá túú cùnùu-dé dácúxí pàtróo<sup>n</sup>-dẽ, te ní ì<sup>n</sup> téé xica chiu<sup>n</sup> ñá túú cùnùu-dé dácúxí téé tendaha ñaha xii-dé cuáhá<sup>n</sup>-dé chiú<sup>n</sup>. Te duca<sup>n</sup> sãtnahá-xi cùu yúhú ndihí nchòhó.

<sup>17</sup> Te núu ní cutnùní iní-ndó nàcuáa ní quide ñaha-í xii-ndo ña, te duca<sup>n</sup> càda tnaha-ndo te cuu váha iní ñáhá Yă Ndiöxí xii-ndo.

<sup>18</sup> Yúhú, ñá túú càhá<sup>n</sup>-í cuendá-ndó nchaa-ndo, chi yúhú sa nàha-í nàcuáa sàni iní ì<sup>n</sup> ì<sup>n</sup> nchòhó cue téé ní nanducu nihnu-í tnuú nchaa ñáyiu ñuhu ichi cuehé ichi duha ní cachí-í chitnahá ñáhá-ndó xii-í. Chi dacuítí sã quée ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi: “Téé xèxi ndihí ñaha xii-í ngóo-dé cuu úhú iní ñáhá-dẽ”, duha càchí-xi núú tütú-gá.

<sup>19</sup> Te cùmání-gă sáá nduu càda ñaha-dé sá sání iní-dé, núu xiá<sup>n</sup> càchí tnúhu-í xii-ndo nàcuáa cada-dé, chi na sáá nduu-ã<sup>n</sup> te cutnùní iní-ndó sã yúhú cúu-í Crístú Yaá ní tendaha Yă Ndiöxí véxi ñuyú-a.

<sup>20</sup> Te na càchí tnúhu ndáá-í xii-ndo sã nchaa ñáyiu na quèhe<sup>n</sup> cuendá ñáhá xii cue téé tendaha-í cáhá<sup>n</sup> tnúhu-í, te cada iní-yu sá tnàhá yúhú ní quehe<sup>n</sup> cuendá-yu. Te nchaa ñáyiu na quèhe<sup>n</sup> cuendá ñáhá xii-í, te cada iní-yu sá tnàhá Tătá-í Dútú Ndiöxí Yaá ní tendaha ñaha xii-í véxi-í ñuyú-a ní quehe<sup>n</sup> cuendá-yu —càchí-gá xáha<sup>n</sup>-gă xii-güedé.

*Jèsús càchí-gá sá tẽ Jüdás cuáha cuendá ñáhá-dẽ xii-gá núú cuè téé cùu úhú iní ñáhá*

*(Mt. 26:20-25; Mr. 14:17-21; Lc. 22:21-23)*

<sup>21</sup> Te sátá dúcá<sup>n</sup> ní cáhá<sup>n</sup> Jèsús te ío ní ndíhú iní-gá, te ní xáha<sup>n</sup>-gă xii-güedé:

—Na càchí tnúhu ndáá-í xii-ndo sã diú-ní ì<sup>n</sup> nchohó cuáha cuèndá ñáhá-ndó xii-í núú cuè téé cùu úhú iní ñáhá —càchí-gá xáha<sup>n</sup>-gã xii-güedé.

22 Te ní ngüíta cue téé xica cuu ndihi-gá ndéhé ì<sup>n</sup> ndehe ì<sup>n</sup> núú tnáhá-güedé, chi ñá ní cùtnuní iní-güedé ndëdacàa-güedé cuèndá-güedé ní cáhá<sup>n</sup>-gá.

23 Te ì<sup>n</sup> téé-án ïo cùdíí iní ñáhá Jèsús, te ndècu yatni-dé dñi-gá cùdñi-dé ndihi-gá.

24 Te té Ximú, àdi Pelú chi úú diu-dé, ní quide-dé seña núú téé ndècu yatni dñi-gá-án sá càcá<sup>n</sup> tnúhú-dé núú-gã nñu ndëdacàa-güedé cuèndá-güedé ní cáhá<sup>n</sup>-gá.

25 Te téé-án ní sáhá<sup>n</sup> ndehe yatni-gá-dé dñi Jèsús, te ní xáha<sup>n</sup>-dë xii-gá:

—Mèstrú, ¿ndëdacàa-ndí cuèndá-ndí ní cáhá<sup>n</sup>-n-í? —càchí-dé xáha<sup>n</sup>-dë xii-gá.

26 Te ní xáha<sup>n</sup> Jèsús:

—Na chindóyo-í luha pàá, te téé na cuáha-í te téé-án cúú-dë —càchí-gá xáha<sup>n</sup>-gã xii-dé.

Te ní chindóyo-gá luha pàá, te ní sáha-gá té Jüdás déhe té Ximú Iscarioté.

27 Te òré ní quehe<sup>n</sup>-dé pàá, te ní ngúndecu ndihi ñaha dùu<sup>n</sup>-ná yucu ñávãha xii-dé. Te ní xáha<sup>n</sup> Jèsús:

—Sá nñi sani iní-n càda-n te cada ndihi-ni-n —càchí-gá xáha<sup>n</sup>-gã xii-dé.

28 Te ní ì<sup>n</sup> cue téé cùdini ndihi-gá ñá ní təcú tnùn-güedé nása ndùu tnúhu ní xáha<sup>n</sup>-gã xii té Jüdás.

29 Te dava-güedé ní sani iní-güedé sã sã cuèndá sã ndécú ndihi-dé sã ñúhú díhú<sup>n</sup>, te vaa ió ì<sup>n</sup> sã cuáá<sup>n</sup>-dë nandíhi-güedé vico, àdi díhú<sup>n</sup> cuáha-dé ñáyiu ndàhú xáha<sup>n</sup>-gã ní cáhá<sup>n</sup>-güedé.

30 Te sa ní cundiqui<sup>n</sup> ní quehe<sup>n</sup> cuèndá té Jüdás pàá caxi-dé, te òré ní níhí-dë pàá-án te ní quee-dé cuáhá<sup>n</sup>-dë.

*Jèsús càchí tnúhu-gá nàcuáa cada-o*

31 Te sátá nñi quee té Jüdás cuáhá<sup>n</sup>-dë, te ní xáha<sup>n</sup> Jèsús xii dava-gá-güedé:

—Vitna te quiní-ndó ndihi nchaa ñáyiu sã ïo càhnu cuu yúhú Téé cùu ñani tnáhá-ndó nchaa-ndo, te òré-án cutnùní iní-ndó sã ïo càhnu cuu tucu mee Yá Ndióxi.

32 Te núu yúhú quidé càhnu-í Yá Ndióxi, te diu-ni duca<sup>n</sup> càda cahnu ñaha-gá xii yúhú, te ñá túú-gã titní nduu te duca<sup>n</sup> càda-gá.

33 Te nchòhó cue déhe-í na càchí tnúhu-í sã sácú duha-ná nduu ndècu ndihi ñaha-í xii-ndo. Te nchòhó nanducu ñaha-ndo xii-í dico vá ná nihí ñáhá-ndó dàtná ní xáha<sup>n</sup>-í xii ñáyiu israhél, te diu-ni duca<sup>n</sup> cáhá<sup>n</sup>-í núú-ndó sã vã ndácú-ndó quíhí<sup>n</sup>-ndó núú quíhí<sup>n</sup>-í.

34 Te duha sànu ichi ñaha tucu-í xii-ndo nàcuáa cada-ndo sã cúú iní tnáhá-ndó ì<sup>n</sup> ì<sup>n</sup>-ndo datná yúhú cúú iní ñáhà-í xii-ndo.

35 Te núu na cùu iní tnáhá-ndó ì<sup>n</sup> ì<sup>n</sup>-ndo ña, te duca<sup>n</sup> te cutnùní iní nchaa ñáyiu sã cúú-ndó cuè téé ní chitnahá ñáhá xii-í —càchí-gá xáha<sup>n</sup>-gã xii-güedé.

*Jèsús cáhá<sup>n</sup>-gá sã tẽ Pelú vá nñuu-dé sã xicá cùu ndihi ñaha-dé xii-gá*

*(Mt. 26:31-35; Mr. 14:27-31; Lc. 22:31-34)*

36 Te ní xáha<sup>n</sup> tẽ Ximú, àdi Pelú chi úú diu-dé, xii Jèsús:

—Mèstrú, ¿ndèé quíhí<sup>n</sup>-n-í? —càchí-dé xáha<sup>n</sup>-dë xii-gá.

Te ní xáha<sup>n</sup> Jèsús:

—Vitna te vá ndácú-n cànchicún ñáhá-n quíhí<sup>n</sup> núú quíhí<sup>n</sup>-í, dico na sáa nduu te dai sáa-n nñu cùndècu-í —càchí-gá xáha<sup>n</sup>-gã xii-dé.

37 Te ní xáha<sup>n</sup> tẽ Pelú xii-gá:

—Mèstrú, ¿te ná cuèndá nñu vá ndácú-í canchicún ñáhà-í xii-n quíhí<sup>n</sup> vitna-í? Chi yúhú ñá túú tnàhí yúhú-í cuèi na cùú-í sã cuèndá-n —càchí-dé xáha<sup>n</sup>-dë xii-gá.

38 Te ní xáha<sup>n</sup> Jèsús:

—¿Te ndáá sã xèndé iní-n sã cuèi na cùú-n cuèndá-í-u? Te na càchí tnúhu ndáá-í xii-n sã cùmání-gã cana líhi, te úní xito cáhá<sup>n</sup>-n sã ña túú xini ñáhá-n xii-í —càchí-gá xáha<sup>n</sup>-gã xii-dé.

## 14

*Jèsús dánèhé ñáhá-gã nàcuáa cada-o nàsáá-ó núú ndécú Yă Ndiöxí*

<sup>1</sup> Te ní xáha<sup>n</sup>-gã xii-güedé:

—Te ñá túú nă cani iní-ndó. Quindáá iní-ndó Yă Ndiöxí, te quindáá iní-ndó yúhú.

<sup>2</sup> Chi núú ndécú Tătà-í ío nùne núú cundècu-o, chi núú ñáhá ñá te sa cachí tnúhu-í xii-ndo ni cùu. Te vitna na nùhú-í te cada túha-í núú cundècu-ndo.

<sup>3</sup> Te dătnùní quixi tucu-í te candeca ñaha-í xii-ndo quíhí<sup>n</sup> cuendá ñ<sup>n</sup>-ni xíchi cundècu-o.

<sup>4</sup> Te sa nàha-ndo ndéé quíhí<sup>n</sup>-í te sa xìní-ndó ichi —cachí-gá xáha<sup>n</sup>-gã xii-güedé.

<sup>5</sup> Te ní xáha<sup>n</sup> tē Măxí xii-gá:

—Mèstrú, ñá túú xìní-ndí ndèé quíhí<sup>n</sup>-n te da ichi-ná quiní-ndí —cachí-dé xáha<sup>n</sup>-dē xii-gá.

<sup>6</sup> Te ní xáha<sup>n</sup> Jèsús:

—Yúhú cùú-í dătná ñ<sup>n</sup> ichi te cáhá<sup>n</sup>-í tnúhu ndáá, te yúhú cada-í te naníhí táhú-ndó. Te ñ<sup>n</sup> dîi díi-ni yúhú cada-í te sáá-ndó núú Yă Ndiöxí cundècu-ndo te núú na quindáá iní ñáhá-ndó xii-í.

<sup>7</sup> Te núú dicó cutnùní ndisa iní-ndó yòo cuu-í-án, duca<sup>n</sup> te cutnùní iní-ndó yòo cuu Tătà-í ní cùu. Dico vitna dătná sá ñí xìní núú-ndó Dútú Ndiöxí Yáá cùú Tătà-í cada iní-ndó, chi ní xìní-ndó yúhú —cachí-gá xáha<sup>n</sup>-gã xii-dé.

<sup>8</sup> Te ní xáha<sup>n</sup> tē Lìpé xii-gá:

—Mèstrú, dánèhé ñáhá xii-ndí Dútú Ndiöxí chi na cùu váha iní-ndí —cachí-dé xáha<sup>n</sup>-dē xii-gá.

<sup>9</sup> Te ní xáha<sup>n</sup> Jèsús xii-dé:

—Lìpé, ¿te náa ñá túú xìní ñáhá-n xii-í? Te sa ní cuu vai nduu ndècu ndíhí ñaha-í xii-ndo, chi ñáyíu xìní ñáhá xii-í te xìní-yu tñhá Tătà-í. ¿Te ná cuendá yòhó cachí-n sã dánèhé ñáhá-í xii-ndo Tătà-í?

<sup>10</sup> ¿Náa ñá túú sàndáá iní-ndó sã yúhú ndécú-í ndíhí Tătà-í? Te mee-gã ndécú ndíhí ñaha-gá xii-í. Te nchaa tnúhu cáhá<sup>n</sup>-í núú-ndó ñá túú cáhá<sup>n</sup>-í sã véxi iní mée-í, chi Tătà-í Yáá

ndécú ndíhí ñaha xii-í chindèe ñaha-gá quidè-í chiú<sup>n</sup>-gá.

<sup>11</sup> Te quindáá iní-ndó sã yúhú ndécú-í ndíhí Tătà-í, te duca<sup>n</sup> mée-gá ndécú ndíhí ñaha-gá xii-í. Te núú ñá túú sàndáá iní-ndó tñhu cáhá<sup>n</sup>-í-a, te dandacu iní-ndó nchàa chiú<sup>n</sup> ta quide-í véxi, te quindáá iní ñáhá-ndó.

<sup>12</sup> Te na cächí tnúhu ndáá-í xii-ndo sã nchàa ñáyíu na quindáá iní ñáhá xii-í, te cadá-yu chiú<sup>n</sup> quide-í te cahnú-gá chiú<sup>n</sup> cadá-yu chi yúhú nùhú-í núú ndécú Tătà-í cundècu-í nàcuáa níhí ndéé-gã-yu cundècu-yu.

<sup>13</sup> Te nchaa sá ná cacă<sup>n</sup>-ndó te taxi-í te núú na quindáá iní ñáhá-ndó xii-í, te nchaa cada-í cuendá cutnùní iní ñáyíu sã ío cahnú cuu Tătà-í Dútú Ndiöxí.

<sup>14</sup> Te yúhú cada-í nchaa sá cuíní-ndó cacă<sup>n</sup> táhú-ndó nùú-í, te núú na quindáá iní ñáhá ndisa-ndo xii-í.

*Jèsús cächí-gá sá téndàha-gá Espiritú Yă Ndiöxí quixi cundècu ndíhí-o*

<sup>15</sup> Te núú nchòhó cùú iní ñáhá-ndó xii-í te tñi-ndo nchàa tnúhu cáhá<sup>n</sup>-í.

<sup>16</sup> Te yúhú cacá<sup>n</sup> táhú-í núú Tătà-í sá téndàha-gá Espiritú-gá quixi cundècu ndíhí-ndo cànu ichi ñaha-xi xii-ndo nacuáa cundècu-ndo, te chindee ñaha-xi xii-ndo ni caa ni quíhí<sup>n</sup>.

<sup>17</sup> Te nchaa ñáyíu ndècu ichi cuehé ichi duha ñá túú xìní-yu Espiritú Yă Ndiöxí te ni vã cùú cundècu ndíhí-yu. Dico nchòhó sa xìní-ndó Espiritú-gá te ndècu ndíhí ñaha-xi xii-ndo. Te sáá ñ<sup>n</sup> nduu te cunuu Espiritú-gá iní-ndó.

<sup>18</sup> Te yúhú vá dáñá ñhnu ñaha-í xii-ndo, chi quixi tucu-í cundècu ndíhí ñaha-í xii-ndo.

<sup>19</sup> Te sácú duha-ná nduu ndècu-í te vá quiní ñáhá-gã ñáyíu xii-í, dico nchòhó chi quiní ñáhá-ní-ndó xii-í. Te duca<sup>n</sup>-ni cundècu-ndo ichi váha chi cundècu ndíhí ñaha-í xii-ndo ni caa ni quíhí<sup>n</sup>.

<sup>20</sup> Te dàvá-án cutnùní iní-ndó sã ndécú-í ndíhí Tătà-í, te duca<sup>n</sup> nchòhó cundècu ndíhí ñaha-ni-ndo xii-í.

<sup>21</sup> Te nchaa ñáyíu dăcuaha tnúhu-í te tñi-yu, ñáyíu-án quidé ndisá-yu sá cùú iní ñáhá-yu xii-í. Te duca<sup>n</sup> Tătà-í

cúu ìní ñáhá-gă xii-yu, te duca<sup>n</sup>-ni yùhú cúu ìní-í-yu tucu, te duca<sup>n</sup> te cùtnuní iní-yu sá ndécú ndìhi-í-yu — cächí-gá xáha<sup>n</sup>-gă xii-dé.

22 Te ní cáhá<sup>n</sup> ì<sup>n</sup> tée nàni Judás dico ñá díú tē Jùdás déhe té Xímú Iscarioté ní cáhá<sup>n</sup>, chí ìngá té Jùdás ní xáha<sup>n</sup>-dē xii-gá:

—Mèstrú, ¿nása cada-n cuèndá cutnùní iní-ndí sá cùndècu ndìhi ñaha-n xii-ndí, te ñáyiú ñùhu ichi cuehé ichi duha vá cùndècu ndìhí-n-yu-i? —cächí-dé xáha<sup>n</sup>-dē xii-gá.

23 Te ní xáha<sup>n</sup> Jèsús xii-güedé:

—Nchaa ñáyiú cùu iní ñáhá xii-í te tñí-yu tnúhu càhá<sup>n</sup>-í, te ñáyiú-á<sup>n</sup> cúu ìní ñáhá Tātá-í xii-yu, te yúhú ndìhi Tātá-í ndécú-ndí ndìhí-yu.

24 Te nchaa ñáyiú ñá túú cùu iní ñáhá xii-í te ñá túú tñí-yu tnúhu càhá<sup>n</sup>-í. Te nchaa tnúhu ní cáhá<sup>n</sup>-í ní xíndèdóho-ndo chí Tātá-í Yáá ní tendaha ñaha xii-í véxi-í ñuyíú-a ní dácáhu ìní ñáhá-gă xii-í, te ñá díú mè-í ní càhu iní-í tnúhu càhá<sup>n</sup>-í.

25 'Duha ndùu tnúhu càhá<sup>n</sup>-í núu-ndó vitna ndecu ndìhi ñaha-gá-í xii-ndo.

26 Dico Yá Ndiõxí tendaha-gă Espiritú-gá quixi-xi cada-xi núu-í taxi-xi tnúhu ndee ìní xii-ndo, te ñu-xi chindee ñaha-xi xii-ndo te danèhé ñáhá-xí xii-ndo nchaa sá cúmání quini-ndó, te ñu-ni-xi dandàcu iní ñáhá-xí xii-ndo nchaa nacuaá ní cáhá<sup>n</sup>-í.

27 'Te yúhú chindee chítuu ñaha-í xii-ndo ño váha cuu iní-ndó cùndecu-ndo datná yúhú ño váha cùu iní-í ndécú-í, chí sa ta cùyatni nduu núhú-í. Te yúhú cächí tnúhu ndáá-í sá chíndèe ñaha-í xii-ndo, te vá cáda-í dàtná quidé ñáyiú ñùhu ichi cuehé ichi duha. Te ni vā ndìhú iní-ndó, te ni vā yúhú-ndó.

28 Te sa ní xíndèdóho-ndo ní cáhá<sup>n</sup>-í sá núhú-í, te quixi tucu-í cundecu ndìhi ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tñùhu sá núhú-í núu ndécú Tātá-í, te cudí ìní-ndó ní cùu, chí ño càhnu cuu-gá dàcúxí yúhú.

29 Te sa ní cachí tnúhu-í sá núhú-í, te na sàá òré núhú-í núu ndécú Tātá-í, te quindáá iní ñáhá-ndó xii-í.

30 'Te ñá túú-gă vāi tnúhu ndatnúhu ndìhi ñaha-í xii-ndo chí sa véxi yucu ñávãha sá táxi tnùní ñuyíú-a, dico vá táxi tnùní ñáhá-xí xii yúhú.

31 Te cada-í nchaa nàcuáa ní táuchíú<sup>n</sup> Tātá-í cuèndá cutnùní iní nchaa ñáyiú ñuyíú-a sá yúhú ño cùu iní-í-gá. Te vitna chí ndacuñí ná quihí<sup>n</sup>-ó —cächí-gá xáha<sup>n</sup>-gă xii-güedé.

## 15

*Cuèndá yoho yàha stilé ndìhi nchaa dité-xi*

1 Te ní xáha<sup>n</sup> tucu-gá xii-güedé:

—Yúhú cùu-í dàtná yoho yàha stilé, te Tātá-í cúu-gă dàtná ì<sup>n</sup> tée xito yoho yaha stilé-á<sup>n</sup>.

2 Te nchaa ñáyiú ní sándáá iní ñáhá xii-í cúu-yu dàtná dité nchaa yoho yàha stilé-á<sup>n</sup>. Te tée xito yoho yaha stilé-á<sup>n</sup> xèhndé-dé nchaa dité-xi sá ñá cuini-gá-xi cuu<sup>n</sup> ndéhé-xi, te ndàda ndoo-dé nchaa dité-xi sá cúu<sup>n</sup> cuèndá cuu<sup>n</sup>-gá.

3 Te duca<sup>n</sup> sãtnahá-xi cùu nchohó, chí sa ní xócuñí nchaa sá cuehé sá dúhá ndècu ndìhi-ndo, chí ní sándáá iní-ndó tñùhu ní cáhá<sup>n</sup>-í.

4 Te cuu ì<sup>n</sup>nuu-ndo cùndecu ndìhi ñaha-ndo xii-í, te núu duca<sup>n</sup> na càda-ndo, te cundecu ndìhi ñaha-í xii-ndo. Chí núu ì<sup>n</sup> yutnu vídí ná quèndèe dité-xi, te dité-xi sá ní quen-deé-á<sup>n</sup> vā cúu<sup>n</sup>-gă sávidí-xi chí duu<sup>n</sup> duu<sup>n</sup> ní xíta-xi. Duca<sup>n</sup> sãtnahá-xi cùu nchohó chí vá ndácú-ndó càda-ndo chiu<sup>n</sup>-í, te núu vá cùndècu ndìhi ñaha-í xii-ndo.

5 'Chí yúhú cùu-í dàtná yutnu vídí-á<sup>n</sup>, te nchòhó cúu-ndó dàtná nchaa dité-xi. Te nchaa ñáyiú cùu ì<sup>n</sup>nuu ndìhi ñaha xii-í, te ndècu ndìhi-í-yu, te ndácú-yu quidé-yu chiu<sup>n</sup>-í. Te núu vá cúu ì<sup>n</sup>nuu ndìhi ñáhá-yu xii-í, te vá ndácú-yu cadá-yu chiu<sup>n</sup>-í.

6 Te nchaa ñáyiú vá cúu ì<sup>n</sup>nuu ndìhi ñaha xii-í, te yàha-yu dàtná yàha ì<sup>n</sup> dité yutnu vídí sá ñá túú cùu<sup>n</sup>

sávidí-xi, chi xèhndé-güedé yìchí-xi, te sàhmi-güedé.

7 'Cuu ì<sup>n</sup>nuu ndìhi ñaha-ndo xii-í, te vá nàcuànaa-ndo nacuáa ní cáhá<sup>n</sup>-í. Te núu duca<sup>n</sup> na càda-ndo, te nani cuìní-ndó cǎcǎ<sup>n</sup>-ndó nǔù-í te taxi-í.

8 Te núu nchòhó ná cádá vǎha-ndo cùndecu-ndo, te ío cada càhnu-ndo Tǎtà-í, te duca<sup>n</sup> cùtnuní sá ndísá cùu-ndo cue téé ní chitnahá ñáhá xii-í.

9 Te yúhú ío cùu iní ñáhà-í xii-ndo dàtná cúu iní ñáhá Yǎ Ndiǒxí xii-í. Te cada-ni-ndo mèe-ni sá vǎha cuèndá cudí<sup>í</sup> iní ñáhá-gǎ-í xii-ndo.

10 Te núu na quìndáá iní-ndó càda-ndo nchaa nacuáa ní cáhá<sup>n</sup>-í, te ío cuu iní ñáhà-í xii-ndo, chi yúhú duca<sup>n</sup> ío sàndáá iní-í Tǎtà-í quídè-í nchaa nàcuáa ní cáhá<sup>n</sup>-gá, te xiǎ<sup>n</sup> nǔù ío cùu iní ñáhá-gǎ xii-í.

11 'Duha càhá<sup>n</sup>-í núu-ndó cuèndá cudí<sup>í</sup> ndísa iní-ndó dàtná cudí<sup>í</sup> iní mèè-í.

12 Te duha ndùu tnúhu càhá<sup>n</sup>-í cuèndá sá cúu iní tnáhá-ndó ì<sup>n</sup> ì<sup>n</sup>-ndo datná cúu iní ñáhà-í xii-ndo.

13 Te núu ní xíhó sǎ cúu-xí ì<sup>n</sup> téé ío vǎha tnáhá tnúhu ndìhi-o, te xiǎ<sup>n</sup> cutnùní iní ñáyiu sá ío cùu iní-ó-dé.

14 Te nchòhó cuu-ndo cuè téé ío vǎha tnáhá tnúhu ndìhi-í te núu na càda-ndo nchaa nacuáa càhá<sup>n</sup>-í.

15 Te vá cǔñaha-gǎ-í xii-ndo sǎ cúu-ndó cuè téé xínu cuechi núu-í, chi ní ì<sup>n</sup> téé xínu cuechi ñá túú xini-dé ná quídé pàtróo<sup>n</sup>-dé. Te yúhú cǎchí-í xii-ndo sǎ cúu-ndó cuè téé ío vǎha tnáhá tnúhu ndìhi-í, chi ní cǎchí tnúhu-í nchaa nàcuáa ní cáhá<sup>n</sup> Tǎtà-í.

16 Te ñá díú nchòhó ní càhá<sup>n</sup> ñáhá-ndó xii yúhú, chi yúhú ní cáhá<sup>n</sup> ñáhà-í xii-ndo. Te yúhú tauchi<sup>n</sup>-í quíhí<sup>n</sup>-ndó càda-ndo nchaa nacuáa ní cáhá<sup>n</sup>-í, chi tnúhu-á<sup>n</sup> vǎ ndìhí nihnu-xi. Te duca<sup>n</sup> nchaa sá ná cǎcǎ<sup>n</sup>-ndó nǔù Tǎtà-í Yǎ Ndiǒxí te taxi-gǎ, te núu na quìndáá iní ñáhá-ndó xii-í.

17 Te yúhú càhá<sup>n</sup>-í dóho-ndo sǎ cúu iní tnáhá-ndó ì<sup>n</sup> ì<sup>n</sup>-ndo.

*Ñáyiu ndècu ichi cuehé ichi duha cùu úhú iní-yu Jèsús ndìhi nchaa ñáyiu sàndáá iní tnúhu-gá*

18 'Te nchaa ñáyiu ndècu ichi cuehé ichi duha ñá cúu quìní ñáhá-yu

xii-ndo, te sa nàha-ndo sá díhna-gá yúhú ní ngúíta-yu duca<sup>n</sup> ñà cúu quìní ñáhá-yu xii-í.

19 Te núu dìcò tnáhá nchòhó ndécú-ndó ìchi cuehé ichi duha ña, te cuu iní ñáhá-yu xii-ndo dàtná cúu iní tnáhá-yu ndi mèe-yu ni cùu. Te yúhú ní nanducu nihnu ñaha-í xii-ndo tnúú ñáyiu ndècu ichi cuehé ichi duha, núu xiǎ<sup>n</sup> ío cùu úhú iní ñáhá-yu xii-ndo cuèndá sá ñà túú-gǎ chítnáhá-ndó-yu.

20 Te dandàcu iní-ndó nàcuáa ní cáhá<sup>n</sup>-í sá ní ì<sup>n</sup> téé xínu cuechi ñá túú cùnuu-dé dàcúúxí pàtróo<sup>n</sup>-dé. Te yúhú cúu úhú iní ñáhá-yu, te díu-ni duca<sup>n</sup> càda ñahá-yu xii nchòhó. Te núu dìcò ní tní<sup>í</sup>-yu tnúhu ní cáhá<sup>n</sup>-í ñá, te díu-ni duca<sup>n</sup> tní<sup>í</sup>-yu tnúhu cáhá<sup>n</sup>-ndó nǔù-yu ni cùu.

21 Te duca<sup>n</sup> càda ñahá-yu xii-ndo sǎ cuèndá-í, chi ñá xini-yu Tǎtà-í Yaá ní tendaha ñàha xii-í véxi-í ñuyíú-a.

22 'Te vǎa vá cùndècu cuechi-yu ni cùu, te núu ñá túú yúhú ní cáhá<sup>n</sup>-í nǔù-yu, te vitna vá cúu tnàhí cachí-yu sá ñà túú cuechi-yu.

23 Chi nchaa ñáyiu cùu úhú iní ñáhá xii-í, te cùu úhú iní-yu tnáhá Tǎtà-í.

24 Te vǎa ní ì<sup>n</sup> cuechi-yu vá cùndècu ni cuu, te núu dìcò ñá túú ní xini-yu nchaa sá ní quídè-í sá vǎ yòo tnàhí ndàcu cada. Te cuèi ní xini-yu dico dai cùu úhú iní ñáhá-yu xii-í ndìhi Tǎtà-í.

25 Te duha quídè-yu chi dacuítí quèe ndáá-xi nàcuáa yòdo tnuní núu tütú Yǎ Ndiǒxí sá dácuàhá-yu, chi cǎchí-xi sá ñà túú ñá cuechi-í te cuu úhú iní ñáhá-yu xii-í.

26 'Te Espiritú Tǎtà-í Dútú Ndiǒxí sá ndécú nǔù-gǎ tendaha-í quixi chindee ñàha-xi xii-ndo, te canu ichi ñàha-xi nàcuáa cundecu-ndo, te Espiritú-á<sup>n</sup> cǎhá<sup>n</sup> ndáá-xi cuèndá cutnùní iní nchaa ñáyiu yoo cùu-í.

27 Te nchòhó tnáhá-ndó cǎhá<sup>n</sup> vǎha-ndo cuèndá-í cuèndá cutnùní iní-yu yoo cùu-í, chi nàha-ndo sá ndèé òré ní ngúíta-í quídè-í chi<sup>n</sup> Tǎtà-í ní chitnahá ñáhá-ndó xii-í —cǎchí-gá xáha<sup>n</sup>-gǎ xii-güedé.

## 16

<sup>1</sup> Te ní xáha<sup>n</sup> tùcu-gá xii-güedé:



—Duha càhá<sup>n</sup>-í cuendá ná nanchòcáva tnùnì ñuyíú-a quíhí<sup>n</sup>-xi núú ùhú núú iní-ndó nùhú-ndó ìchi cuehé ìchi duha. ndàhú.

<sup>2</sup> Chi vá dáñá-gă-güedé quíhu-ndo vèñúhu, te ni vâ cúú-gă quiní ndeé ñáhá-güedě xii-ndo. Te sáá ì<sup>n</sup> nduu te cahni ñaha-güedě xii-ndo, te xíá<sup>n</sup> cuu caha<sup>n</sup>-güedě sá quidé-güedě chiú<sup>n</sup> Yá Ndiöxí.

<sup>3</sup> Te duca<sup>n</sup> càda-güedé chi ñá túú xìní-güedé Tătà-í, te ni ñà túú xìní ñáhá-güedě xii yúhú.

<sup>4</sup> Te duha ndùu tnúhu càhá<sup>n</sup>-í núú-ndó, chi na sáá òré te ndacu iní-ndó nchàa tnúhu sá sà ní cachí tnúhu-í xii-ndo nàcuáa cada ñaha-güedě xii-í.

### *Nchaa chiú<sup>n</sup> quide Espíritú Yá Ndiöxí*

Te ñá túú ní càchí tnúhu-í xii-ndo nděé díhna chi ndècu ndìhi ñaha-í xii-ndo.

<sup>5</sup> Dico vitna sa ta cùyatni nduu nùhú-í núú ndécú Tătà-í Yaá ní tendaha ñàha xii-í véxi-í ñuyíú-a. Te ni ì<sup>n</sup> nchohó ñá túú xìcá<sup>n</sup> tnúhú-ndó nùu-í nùu ndèé quíhí<sup>n</sup>-í.

<sup>6</sup> Chi mee-ni sã ndìhú iní-ndó sã dúcá<sup>n</sup> ñí càhá<sup>n</sup>-í.

<sup>7</sup> Te na càchí tnúhu ndáá-í xii-ndo sã vâha-gă sá cúú-xí-ndó nùu nùhú-í, chi tendaha-í Espíritú Yá Ndiöxí quixi cundecu ndìhi-ndo chindee ñaha-xi, chi núu vá nùhú-í te vá quíxí Espíritú-gă cundecu ndìhi-ndo chindee ñaha-xi xii-ndo.

<sup>8</sup> Te na quixi Espíritú-gă te dandixi túu-xi iní nchaa ñáyiu ndècu ìchi cuehé ìchi duha sá ñà túú quide váha-yu. Te dacàhu iní ñáhá-xí sã ndécú ì<sup>n</sup> ìchi váha ìchi ndáá. Te Espíritú-gă-á<sup>n</sup> cada-xi nàcuáa cutnùnì iní-yu sá Yá Ndiöxí cada ndáá-gă cuéchi-yu.

<sup>9</sup> Te duca<sup>n</sup> te cutnùnì iní-yu sá ndécú cuéchi-yu, chi ñá túú sàndáá iní ñáhă-yu xii-í.

<sup>10</sup> Te duca<sup>n</sup> te cutnùnì iní-yu nàcuáa ndùu cuendá ìchi váha ìchi ndáá, chi yúhú nùhú-í núú ndécú Tătà-í, te nchòhó vá quìnì ñáhá-gă-ndó.

<sup>11</sup> Te duca<sup>n</sup> te cutnùnì iní-yu sá Yá Ndiöxí cada ndáá-gă cuéchi-yu, chi sa ní càhá<sup>n</sup>-gă sá yúcu ñávâha sá táxi

tnùnì ñuyíú-a quíhí<sup>n</sup>-xi núú ùhú núú ndàhú.

<sup>12</sup> Te vâi-gă tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna.

<sup>13</sup> Te na quixi Espíritú Yá Ndiöxí, Espíritú càhá<sup>n</sup> ndáá cuiti, te Espíritú-á<sup>n</sup> danèhé ñáhá-xí nchàa tnúhu váha tnúhu ndáá. Te vá dacàhu iní ñáhá-xí xii-ndo sá véxi iní méé-xí chi dacàhu iní ñáhá-xí nchàa sá càhá<sup>n</sup> Yá Ndiöxí, te cachí tnúhu-xi nchaa nàcuáa cada-xi ndéé núú cuáhá<sup>n</sup> núú véxi-gă.

<sup>14</sup> Te Espíritú-gă-á<sup>n</sup> cada càhnu ñaha-xi xii yúhú chi ndècu ndìhi-xi tnúhu-í, te danèhé ñáhá-xí xii-ndo.

<sup>15</sup> Te nchaa sá ndécú ndìhi Tătà-í ndécú ndìhi-í tnàhá-í, núu xíá<sup>n</sup> càchí-í sá Espíritú-gă danèhé ñáhá-xí nchàa tnúhu-í xii-ndo.

### *Nchaa ñáyiu ndìhú iní-xi nduu dǎ iní-yu na quixi tucu Jesús*

<sup>16</sup> Te ì<sup>n</sup> úú-nă nduu ndècu-í te vá quìnì ñáhá-gă-ndó xii-í, dico núú sàcú-ni nduu te quiní ñáhá tucu-ndo xii-í, te duca<sup>n</sup> chi nùhú-í núú ndécú Tătà-í —càchí-gă xáha<sup>n</sup>-gă xii-güedé.

<sup>17</sup> Te sá dúcá<sup>n</sup> ñí càhá<sup>n</sup>-gă nùu ní ngúita ì<sup>n</sup> úú cue tée xica cuu ndìhi-gă xitnàha-güedé:

—¿Nása ndùu-tu tnúhu càhá<sup>n</sup>-gă sá càchí-gă sá ì<sup>n</sup> úú-nă nduu ndècu-gă te vá quìnì-gă-ó-gă, dico núú sàcú-ni nduu te quiní tucu-o-gă-i?, chi nùhú-gă núú ndécú Tătà-gă —càchí-güedé xitnàha-güedé.

<sup>18</sup> Te xitnàha tucu-güedé:

—¿Nása cuáhá<sup>n</sup>-tu tnúhu-ă<sup>n</sup> sá sàcú-ni nduu? Te ñá tècú tnùnì-ó nása ndùu tnúhu càhá<sup>n</sup>-gă —càchí-güedé xitnàha-güedé.

<sup>19</sup> Te Jèsús ní cutnùnì iní-gă sá cuìnì-güedé cacá<sup>n</sup> tnúhú-güedě núú-gă nása ndùu tnúhu ní càhá<sup>n</sup>-gă, núu ní xáha<sup>n</sup>-gă:

—Cuendá sá ñí cachí-í sá ì<sup>n</sup> úú-nă nduu ndècu-í te vá quìnì ñáhá-gă-ndó xii-í, dico núú sàcú-ni nduu te quiní ñáhá tucu-ndo xii-í ní cachí-í, ¿xíá<sup>n</sup> ndécú tnúhu núú tnàhá-ndó-ă<sup>n</sup>? —càchí-gă xáha<sup>n</sup>-gă xii-güedé.

20 Te ní xáha<sup>n</sup> tùcu-gá:

—Te na càchí tnúhu ndáá-í xii-ndo sã nchòhó ndíhú víhí ìní-ndó te ndáhyú-ndó, dico nchaa ñáyiú ndècu ichi cuehé ichi duha chi da cudíí ìní-yu. Dico nchòhó ñáyiú ndáhyú chi sáá nduu te nduu díí ìní-ndó.

21 Chi dàtná cuìní-ndó cùu ñ<sup>n</sup> ñadihí ñaha ní tnahá nduu cacu déhe-xi vãi saní ìní-a<sup>n</sup> sá quidé úhú ñáhá-xí. Dico na yãha cacu déhe-a<sup>n</sup>, te ñá túú-gã ndácú ìní-a<sup>n</sup> sá ní quide úhú ñáhá-xí xì-a<sup>n</sup> chi mee-nã sá cudíí ìní-a<sup>n</sup> déhe-a<sup>n</sup>.

22 Duca<sup>n</sup> sãtnahá-xi cùu nchòhó vitna chi ndíhú ìní-ndó sã nùhú-í, dico quixi tucu-í quixi coto ñaha-í xii-ndo, te òré-á<sup>n</sup> te cudíí ndisa ìní-ndó, te vá yõo ñ<sup>n</sup>-gá dandíhú ìní ñáhá xì-ndo davá-á<sup>n</sup>.

23 "Te davá-á<sup>n</sup> ñã túú-gã ná nducu tnúhu-ndo nùú-í. Te na càchí tnúhu ndáá-í xii-ndo sã Tãtã-í taxi-gá nchaa sá ná càcá<sup>n</sup>-ndó nùú-gã nùu na quèndáá ìní ñáhá-ndó xì-í.

24 Te ndéé vitna vátá dúcá<sup>n</sup>-gã cada-ndo càcá<sup>n</sup>-ndó. Dico càcá<sup>n</sup>-ndó nùú-gã nùu ná cuìní-ndó te taxi-gá cuèndá cudíí ndisa ìní-ndó —càchí-gá xáha<sup>n</sup>-gã xii-güedé.

*Xítóhó Jesucristú ní cunuu tnúhu-gá núú yucu ñãvãha*

25 Te xáha<sup>n</sup> tùcu-gá xii-güedé:

—Mee-ni ní chidáhu ndodo-í tnúhu ní cáhá<sup>n</sup>-í núú-ndó, dico sáá nduu te vá chidáhu-gá-í tnúhu cáhá<sup>n</sup>-í, chi cáhá<sup>n</sup> ndáá-na-í cuèndá Tãtã-í.

26 Te davá-á<sup>n</sup> càcá<sup>n</sup>-ndó núú Tãtã-í nùu ná cuìní-ndó te taxi-gá, te núu na quèndáá ìní ñáhá-ndó xì yúhú Déhe-gá. Te ñá túú-gã xíní ñùhu-xi sá yúhú càcá<sup>n</sup>-í núú-gã cuèndá-ndó chi càcá<sup>n</sup> méé-nã-ndó.

27 Chi mee Tãtã-í ío cùu ìní ñáhá-gã xii-ndo cuèndá cúú ìní ñáhá-ndó xì-í, te sàndáá ìní-ndó sã nùú-gã ní quee-í véxi-í.

28 Te yúhú ní quee-í núú Tãtã-í véxi-í ñuyúú-a, te vitna dándóo-í ñuyúú-a te núhú-í núú ndécú-gã —càchí-gá xáha<sup>n</sup>-gã xii-güedé.

29 Te ní xáha<sup>n</sup> cuè téé xica cuu ndíhi-gá:

—Vitna chi cáhá<sup>n</sup> ndáá-nã-n, ñá túú-gã chidáhu-n tnúhu cáhá-n.

30 Te vitna ní xiní-ndí sá ío váha cùtnuní ìní-n nchàa nacuáa cùu, te cùtnuní ìní-n nchàa nacuáa sàni ìní nchaa ñáyiú. Te ñá túú xini ñuhu-xi nágá nducu tnúhu-yu núú-n chi nchaa sa ní dátúu-n nùú-yu. Te xiã<sup>n</sup> nùu sàndáá ìní-ndí sá nùú Yã Ndiõxí ní quee-n véxi-n —càchí-güedé xáha<sup>n</sup>-güedé xii-gá.

31 Te ní xáha<sup>n</sup> Jèsús:

—¿Te vitna sàndáá ìní-ndó-ã<sup>n</sup>?

32 Vitna ní sáá nduu ní sáá òré sá ncháá nchòhó cuténuu-ndo cãa ñ<sup>n</sup> caa úú cuu-ndo, te dándóo mee ñaha-ndo xii-í. Dico ñá díú mèe dii-í quèndóo chi ndècu ndíhi-í Tãtã-í.

33 Duha cáhá<sup>n</sup>-í cuèndá cuu váha ìní-ndó cùndecu-ndo, chi ñuyúú-a cuu úhú ìní ñáhã-yu xii-ndo, dico ní vã yúhú-ndó chi yúhú sa ní dáquéeé tìhù-í nchaa sá cuèhé sá dúhá ío ñuyúú-a —càchí-gá xáha<sup>n</sup>-gã xii-güedé.

## 17

*Jèsús xìcá<sup>n</sup> táhú-gã núú Tãtã-gã Dútú Ndiõxí cuèndá cue téé xìca cuu ndíhi-gá*

1 Te sátá dúcá<sup>n</sup> ní cáhá<sup>n</sup> Jèsús te ní ndacoto-gá andíu, te ní xáha<sup>n</sup>-gã xii Tãtã-gã Dútú Ndiõxí:

—Táu, vitna ní sáá nduu càda cahnu ñaha-n xii-í cuèndá duca<sup>n</sup> càda cahnu ñaha-í xii-n.

2 Chi mee-n ní cachí-n sã táxí tnùn-í nchaa ñáyiú ñuyúú-a, te dàcacu nihnu-í nchaa ñáyiú ní cachí-n nàníhí tãhú.

3 Te cundecu ndíhi-õ-yu ní caa ní quíhí<sup>n</sup>, chi sàndáá ìní ñáhã-yu sá íí<sup>n</sup> dii díi-ni yòhó cúú-n Ndiõxí ndisa, te duca<sup>n</sup> xini ñáhã-yu xii yúhú Jesucristú téé ní tendaha-n véxi ñuyúú-a.

4 "Te yúhú ní chiñuhu ñaha-í xii-n ñuyúú-a, te ní xínu chiu<sup>n</sup> ní cachí-n càda-í.

5 Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cùtnahá vátá ngãva-gá ñuyúú.

6 "Te nchaa ñáyiú ní nanducu nihnu-n tnuú nchaa ñáyiú ndècu ichi

cuehé ichi duha, ní taxi cuendá-n-yu, te ní xáha<sup>n</sup>-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sándáá iní-yu tnúhu-n.

<sup>7</sup> Te vitna ní cutnùníní iní-yu sá ncháá tnúhu ndècu ndihí-í ðiu-ni mee-n ní taxi-n.

<sup>8</sup> Te ní dánèhé-í-yu nchaa tnúhu sá ní dánèhé ñáhá-n xii-í, te ní sándáá iní-yu. Te ní cutnùníní iní-yu sá nùú-n ní quee-í véxi-í, te ní sándáá iní-yu sá yòhó ní tendaha ñàha-n xii-í véxi-í ñuyíú-a.

<sup>9</sup> Te yúhú càhá<sup>n</sup> ndàhú-í núú-n cuendá nchaa ñáyiu ní taxi cuendá-n. Te ñá túú càhá<sup>n</sup> ndàhú-í núú-n cuendá ñáyiu ndècu ichi cuehé ichi duha, chi cuendá nchaa ñáyiu ní taxi cuendá-n càhá<sup>n</sup>-í, chi cuendá-n cùu-yu.

<sup>10</sup> Te nchaa sá cúu cuendá-í cúu-xi cuendá-n, te nchaa sá cúu cuendá-n cùu-xi cuendá-í tnàhá-í. Te xíquide càhnu ñahá-yu xii-í.

<sup>11</sup> Te yúhú vá cùndècu-gá-í ñuyíú-a, dico mèe-yu chi cundecu-ní-yu, te yúhú ndixi-í núú ndécú-n. Táu, yòhó ío yíñuhu ndecu-n, te yúhú càhá<sup>n</sup> ndàhú-í núú-n sá ní yùhu ni iní-n còto-n nchaa ñáyiu ní taxi cuendá-n, ñáyiu ní sándáá iní tnúhu-í cuendá sá ñí<sup>n</sup>-ní ichi cuú-yu cundecú-yu dàtná ñí<sup>n</sup>-ni cùu nchoo.

<sup>12</sup> Chi òré ndécú-í ndihí-yu ñuyíú-a ní xito-í-yu nàcuáa cùu iní-n, te ní ñí<sup>n</sup>-yu ñá túú ní xíta nihnu, chi ñí<sup>n</sup>-ni té Jùdás ní xíta nihnu tnàhí-dé, te duca<sup>n</sup> ní cuu cuendá sá ní quee ndáá-xi nàcuáa yòdo tnuní núú tütú-n.

<sup>13</sup> Te vitna sa ndixi-í núú ndécú-n, dico ñini ndècu-gá-í ñuyíú-a duha càhá<sup>n</sup>-í cuendá sá cúdí iní-yu dàtná cúdí iní mèe-í.

<sup>14</sup> Te yúhú ní dánèhé-í-yu tnúhu-n, dico nchaa ñáyiu ndècu ichi cuehé ichi duha cùu úhú iní ñáhá-yu xii-yu cuendá sá ñà túú-gã ndécú-yu ichi cuehé ichi duha-á<sup>n</sup> dàtná yúhú ñá túú ndècu-í ichi-á<sup>n</sup>.

<sup>15</sup> Te ñá túú càhí-í sá xócàní-n-yu ñuyíú-a, dico càhá<sup>n</sup> ndàhú-í núú-n sá

dácăcu ñihnú-n-yu núú yucu ñávăha.

<sup>16</sup> Te yúhú ñá túú ndècu-í ichi cuehé ichi duha, te duca<sup>n</sup> mèe-yu ñá túú-gã ndécú-yu ichi cuehé ichi duha.

<sup>17</sup> Te ío na cùndecu yíhi ñuhu-gá-yu núú-n dàcuahá-yu tnúhu-n, chi cùu-xi ñí<sup>n</sup> tnúhu ndáá.

<sup>18</sup> Te dàtná ní tendaha ñàha-n xii yúhú véxi-í tnuú nchaa ñáyiu ndècu ichi cuehé ichi duha, duca<sup>n</sup> càda-í tendaha-í-yu quíhí<sup>n</sup>-yu càhá<sup>n</sup>-yu tnúhu-í tnuú nchaa ñáyiu ndècu ichi cuehé ichi duha.

<sup>19</sup> Te yúhú ndécú yíñuhu-í núú-n, te cada ñàha-n xii-í nàcuáa cùu iní-n sá cuendá-yu, te duca<sup>n</sup> te cundecu yíñuhú-yu núú-n dàcuahá-yu tnúhu-n.

<sup>20</sup> Te ñá díú cuendá mee-ni ñáyiu sa ní sándáá iní-xi càhá<sup>n</sup> ndàhú-í núú-n, chi tnàhá cuendá nchaa ñáyiu na quíndáá iní ñáhá xii-í ndéé idá-gá ñuu na cùndedóho-yu tnúhu càhá<sup>n</sup> ñáyiu na tendaha-í.

<sup>21</sup> Te xicá<sup>n</sup> táhú-í núú-n sá ncháá-yu ñí<sup>n</sup>-ná ichi na cùu-yu, te ñí<sup>n</sup>-ná caní iní ndihí ñahá-yu xii-o dàtná cúu nchòo ñí<sup>n</sup>-ni cuu-o. Te duca<sup>n</sup> ñí<sup>n</sup>-ná cuu-o ndihí-yu cuendá sá ná quíndáá iní nchaa ñáyiu ndècu ichi cuehé ichi duha sá díú-n ní tendaha ñàha-n xii-í véxi-í ñuyíú-a.

<sup>22</sup> Te nchaa sá văha ní taxi-n ndècu ndihí-í ní dánèhé-í-yu cuendá sá ñí<sup>n</sup>-ná cuú-yu cundecú-yu dàtná ndécú nchòo.

<sup>23</sup> Te yúhú cundecu ndihí-í-yu, te yòhó cundecu ndihí ñàha-n xii yúhú cuendá ñí<sup>n</sup>-ná cuu ndisá-yu cundecú-yu. Te duca<sup>n</sup> te cutnùníní iní nchaa ñáyiu ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúu iní ñáhá-n xii yúhú.

<sup>24</sup> Táu, mee-n ní taxi cuendá-n-yu, te cuíní-í sá cùndecú-yu núú cùndècu-í cuendá quíní-yu sá quídé càhnu ñàha-n xii-í chi duca<sup>n</sup>-ni cùu iní ñáhá-n xii yúhú ndéé cùtnàhá vátá ngăva-gá ñuyíú.

<sup>25</sup> Táu, yòhó ío yíñuhu ndecu-n. Te ñáyiu ndècu ichi cuehé ichi duha ñá

túu xini ñáhã-yu xii-n, dico yúhú chi xini ñáhã-í xii-n, dico ñáyiú ní sándáá iní ñáhã xii-í sa xini-yu sá díú-n ní tendaha ñaha-n xii-í véxi-í ñuyíú-a.

<sup>26</sup> Te sa xãha<sup>n</sup>-í xii-yu yoo cùu-n, te ñu-ni duca<sup>n</sup> càda-í cuendá cuu iní tnáhã-yu dàtná cúú iní ñáhã-n xii-í, te duca<sup>n</sup> cùndecu-í ndihí-yu —càchí-gá xãha<sup>n</sup>-gã xii Tãtã-gã Dútú Ndiõxí.

## 18

*Ní tñi-güedé Jèsús ndécá ñaha-güedé cuáhã<sup>n</sup>*

*(Mt. 26:47-56; Mr. 14:43-50; Lc. 22:47-53)*

<sup>1</sup> Te sátá dúcã<sup>n</sup> ní cáhá<sup>n</sup> Jèsús, te ní quee-gá ndihí cue téé xica cuu ndihí-gá cuáhã<sup>n</sup>-güedé ndàa ingá xio yuhu yúú Cèdrón. Te yacã<sup>n</sup> cáá ñ<sup>n</sup> lahuertá, te xití lahuertá-á<sup>n</sup> cuãnguïhu Jèsús ndihí cue téé xica cuu ndihí-gá.

<sup>2</sup> Te té Jüdás déhe té Xímú Iscarioté téé ní sãha cuendá ñáhã xii-gá núú cuè téé cùu úhú iní ñáhã sa xini-dé lahuertá-á<sup>n</sup> chi titní xito ní sãhá<sup>n</sup> Jèsús ndihí-güedé xiã<sup>n</sup>.

<sup>3</sup> Núú ndáá ichi xiã<sup>n</sup> ní sãá té Jüdás ndihí vai sandadú, ndihí cue téé quide cuendá veñúhu ní techiú<sup>n</sup> ñaha cue dútú cúnúu, ndihí cue téé cùu fariséú. Te xínehe-güedé machití ndihí ñ<sup>n</sup> úú-gá sá dëé<sup>n</sup>, te yòtnúú-güedé linterná ndihí iti ní sãá.

<sup>4</sup> Te Jèsús sa ñaha-gá nchaa nãcuãa cada ñaha-güedé xii-gá núú ní sãhá<sup>n</sup> tuha ñaha-gã xii-güedé, te ní xãha<sup>n</sup>-gã:

—¿Yoo nãnducu-ndo? —cachí-gá xãha<sup>n</sup>-gã xii-güedé.

<sup>5</sup> Te ní xãha<sup>n</sup>-güedé:

—Jèsús téé ñuú Nazàrét nãnducu-ndí —càchí-güedé xãha<sup>n</sup>-güedé xii-gã.

Te ní xãha<sup>n</sup> Jèsús:

—Yúhú duca<sup>n</sup> nãni-í, te náu-í ndécú-á te núú yúhú nãnducu-ndo —cachí-gá xãha<sup>n</sup>-gã xii-güedé.

Te tnáhã té Jüdás téé ní sãha cuendá ñáhã xii-gá ndihí-güedé.

<sup>6</sup> Te òré ní xãha<sup>n</sup> Jèsús sá díú-gã cúú téé nãnducu-güedé, te ní nacaca dùma-güedé te ní nduã-güedé ndéé ñuhu.

<sup>7</sup> Te ní xicã<sup>n</sup> tnúhú tucu Jèsús núú-güedé yoo nãnducu-güedé. Te ní xãha<sup>n</sup> tucu-güedé sá Jèsús téé ñuú Nazàrét nãnducu-güedé,

<sup>8</sup> núú ní xãha<sup>n</sup>-nã Jèsús:

—Sa ní cáhá<sup>n</sup>-í sá díú yúhú duca<sup>n</sup> nãni-í, te núú yúhú nãnducu-ndo, te dañã-ndo nchãa cue téé iha na nùhú-güedé —càchí-gá xãha<sup>n</sup>-gã xii-güedé.

<sup>9</sup> Duha ní cuu chi ní quee ndáá-xi nãcuãa ní cáhá<sup>n</sup> méé Jèsús chi ní cachí-gá sá nchãá ñáyiú ní sãha cuendá ñáhã Yã Ndiõxí cundecu ndihí-gá vá cuíta niñnú-yu.

<sup>10</sup> Te té Xímú, àdi Pelú chi úú ñu-dé, néhé-dé ñ<sup>n</sup> machití, te ní tava-dé machití-á<sup>n</sup> ñ<sup>n</sup>-xi te ní xehndé-dé lóho xio cùha ñ<sup>n</sup> téé nãni Malcú ní quendéé duu<sup>n</sup>. Te téé-á<sup>n</sup> xínú cuèchi-dé núú dútú cúnúu-gã.

<sup>11</sup> Te ní xãha<sup>n</sup> Jèsús xii té Pelú:

—Nataxúha machití-á<sup>n</sup> núú ñúhú-xí, chi dacuití sã ndóhò-í nãcuãa ní cachí Tãtã-í cunduu —càchí-gá xãha<sup>n</sup>-gã xii-dé.

*Jèsús ndécú-gã núú dútú cúnúu-gã*

*(Mt. 26:57-58; Mr. 14:53-54; Lc. 22:54)*

<sup>12</sup> Te cue sandadú ndihí cue téé cúnúu-gã núú-güedé, ndihí cue téé quide cuendá veñúhu ní tñi-güedé Jèsús, te ní dácútú ñaha-güedé.

<sup>13</sup> Te ndéca ñaha-güedé xii-gã cuáhã<sup>n</sup> núú ndécú téé Ànás, te té Ànás-á<sup>n</sup> cúú-dé tãtã ñadihí té Caifás. Te té Caifás-á<sup>n</sup> ní cuu-dé dútú cúnúu-gã cuíã-ã<sup>n</sup>.

<sup>14</sup> Te ñu-ni téé-á<sup>n</sup> ní xãha<sup>n</sup>-dë xii ñáyiú isràél sã vãha-gã sã ñ<sup>n</sup>-ní téé na cùú-dé sã cuendá-yu nchãá-yu.

*Té Pelú càhá<sup>n</sup>-dé núú ñáyiú sã ñã túú xini-dé Jèsús*

*(Mt. 26:69-70; Mr. 14:66-68; Lc. 22:55-57)*

<sup>15</sup> Te té Pelú, àdi Xímú chi úú ñu-dé, ndihí ingá tucu-dé nãcuãa xica cuu ndihí-güedé Jèsús nchicú<sup>n</sup> ñáhã-güedé xii-gã cuáhã<sup>n</sup>. Te ñ<sup>n</sup> téé-á<sup>n</sup> xini tnáhã-dé ndihí dútú cúnúu-á<sup>n</sup> núú nchicú<sup>n</sup>-dé tnáhã-dé Jèsús cuãnguïhu ndéé núú cáá vèhe téé cúnúu-á<sup>n</sup>.

16 Dico té Pèlú ní ndóo-dé yuyèhe ndaa quehé, núu ní ndee té ndihi té Pèlú-án ní cáhá<sup>n</sup> ndihi-dé ñaha ndéé yuyèhe, te ndèca-dé té Pèlú cuánguihu.

17 Te ní xáha<sup>n</sup> ñaha ndéé yuyèhe-án xii té Pèlú:

—¿Náa ñá díú yòhó tnàhá-n xica cuu ndihi-n té ndèca-güedé cuánguihu-a? —càchí-a<sup>n</sup> xáha<sup>n</sup>-a<sup>n</sup> xii-dé.

Te ní xáha<sup>n</sup> tē Pèlú:

—Ñáhá, ñá túú tē-á<sup>n</sup> xíca cùu ndihi-ú —càchí-dé xáha<sup>n</sup>-dē xii-a<sup>n</sup>.

18 Te ío víxi<sup>n</sup> quide-xi núu cue té xinu cuechi, ndihi cue té quide cuendá veñúhu ní dátñahá-güedé ñuhú, te xínutñi teté-güedé ndihi té Pèlú.

*Dútú cúnúu nducu tnúhu-dé núu Jèsús*

(Mt. 26:59-66; Mr. 14:55-64; Lc. 22:66-71)

19 Te dútú cúnúu ní xíca<sup>n</sup> tnúhú-dé núu Jèsús núu nándi cùu cue té xica cuu ndihi-gá, te nándi sá dánèhé ñáhá-gă xii-güedé.

20 Te ní xáha<sup>n</sup>-gă:

—Yúhú càhá<sup>n</sup> ndodo-í núu nchaa ñáyiu cuēi xití veñúhu càhnu sá ïo cúnúu, te cuēi xití nchaa dava-gá veñúhu núu tàcá nchaa ñáyiu isràél duca<sup>n</sup>-ni dānehé-í-yu, te ñá túú dáyuhu cáhá<sup>n</sup>-í.

21 Núu vá càcá<sup>n</sup> tnúhú-n nùu-í. Cáca<sup>n</sup> tnúhú nùu nchaa ñáyiu sàcúndedóho tnúhu càhá<sup>n</sup>-í, te na càhá<sup>n</sup>-yu núu nása ndúu tnúhu càhá<sup>n</sup>-í chi xini-yu —càchí-gá xáha<sup>n</sup>-gă xii-dé.

22 Te sá dúcá<sup>n</sup> ní cáhá<sup>n</sup> Jèsús núu ñ<sup>n</sup> té quide cuendá veñúhu nùtni-dé tnàhá-dé te ní cani-dé ñ<sup>n</sup> déhndé nùú-gă. Te ní xáha<sup>n</sup>-dē:

—¿Ná cuendá duca<sup>n</sup> càhá<sup>n</sup>-n nùú dütú cúnúu-í? —cachí-dé xáha<sup>n</sup>-dē xii-gá.

23 Te ní xáha<sup>n</sup> Jèsús xii-dé:

—Te núu nèhé ní cáhá<sup>n</sup>-í te cáhá<sup>n</sup>-n nása ndúu tnúhu ní cáhá<sup>n</sup>-í, te yúhú càhá<sup>n</sup> váha-í te duca<sup>n</sup> caniha-n —cachí-gá xáha<sup>n</sup>-gă xii-dé.

24 Te ndútu yoho-ni Jesús ní dánúhú ñáhá tē Ànás xii-gá ndaha té Caifás dútú cúnúu-gá.

*Té Pèlú càhá<sup>n</sup> tucu-dé núu ñáyiu sá ñà túú xini-dé Jèsús*

(Mt. 26:71-75; Mr. 14:69-72; Lc. 22:58-62)

25 Te té Pèlú nùtni teté-ni-dé, te ní xáha<sup>n</sup>-güedé xii-dé:

—¿Náa ñá díú tnàhá yòhó xíca cùu ndihi té ndèca-ndí véxi-á<sup>n</sup>? —càchí-güedé xáha<sup>n</sup>-güedé xii-dé.

Te ní xáha<sup>n</sup> tē Pèlú:

—Ñáhá, ñá túú tē-á<sup>n</sup> xíca cùu ndihi-ú —càchí-dé xáha<sup>n</sup>-dē xii-güedé.

26 Te ñ<sup>n</sup> ñani tnàhá tē ní xehndé té Pèlú lóho-xi-á<sup>n</sup> xínú cuēchi-dé tnàhá-dé núu dütú cúnúu. Te tē-á<sup>n</sup> ní xáha<sup>n</sup>-dē xii té Pèlú:

—¿Náa ñá díú tnàhá-n ndihi-n-dé ní xini ñáhá-í òré ní tn<sup>n</sup>-ndí-dé xití lahuertá? —càchí-dé xáha<sup>n</sup>-dē xii-dé.

27 Te té Pèlú ní xáha<sup>n</sup> tucu-dé sá ñá díú-dē, te òré-á<sup>n</sup> ní cana ñ<sup>n</sup> líhi.

*Jèsús ndécú-gă núu tē Pilatú*

(Mt. 27:1-2, 11-14; Mr. 15:1-5; Lc. 23:1-5)

28 Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáhá<sup>n</sup> vechi<sup>n</sup> té cùu gobiernú. Te sa ta cùditó-ni-gá cuáhá<sup>n</sup> núu ñá ní cuini cue té isràél quíhu-güedé xití vechi<sup>n</sup> té cùu gobiernú-á<sup>n</sup>. Te núu nì quíhu-güedé vechi<sup>n</sup>-á<sup>n</sup> ñá, te vá cúú-gă quíhu-güedé cudini-güedé vico pascuá ní cùu chi duca<sup>n</sup> tnàhí quide-güedé.

29 Núu té Pilatú té cùu gobiernú ní quee-dé vechi<sup>n</sup>-dé ní cáhá<sup>n</sup> ndihi ñaha-dē xii-güedé, te ní xáha<sup>n</sup>-dē:

—¿Ná cuēchi ní quide té-a núu ndèca-ndo-dé véxi? —càchí-dé xáha<sup>n</sup>-dē xii-güedé.

30 Te ní xáha<sup>n</sup>-güedé:

—Te núu dicó ñá túú cuēchi-dé-á<sup>n</sup> te vá cándeca-ndí-dé quixi núu-n ní cùu —cachí-güedé xáha<sup>n</sup>-güedé xii-dé.

31 Te ní xáha<sup>n</sup> tucu té Pilatú xii-güedé:

—Chí cándeca-dé cuánúhú, te cada ndáá-ndó cuēchi-dé nàcuáa càa leí méé-ndó —càchí-dé xáha<sup>n</sup>-dē xii-güedé.

Te ní xáha<sup>n</sup>-güedé:

—Dico nchúhú ñáyiú isràél chi ñá túú dùca<sup>n</sup> taxi tñuní lèi sá cáhni-ndí — cächí-güedé xáha<sup>n</sup>-güedé xii-dé.

32 Te duca<sup>n</sup> ñí cuu chi dacuití ñí quee ndáá-xi nàcuáa ní cáhá<sup>n</sup> méé Jèsús cada-xi cuú-gá.

33 Te cuándihu té Pìlatú vechiù<sup>n</sup>-dé, te ní cana-dé Jèsús ní xicá<sup>n</sup> tñuhú-dé núú-gă, te xáha<sup>n</sup>-dë:

—¿Yòhó yìndaha-n ñáyiú isràél-ă<sup>n</sup>? —cächí-dé xáha<sup>n</sup>-dë xii-gá.

34 Te ní xáha<sup>n</sup> Jèsús:

—¿Te xíă<sup>n</sup> cáhá<sup>n</sup>-n sã vëxi iní méé-n, àdi íó ñí ñáyiú ní cachí tñuhu xii-n cuëndá-í? —cächí-gá xáha<sup>n</sup>-gă xii-dé.

35 Te ní xáha<sup>n</sup> tã Pìlatú xii-gá:

—Ñá díú tã isràél cúu-í nũ duca<sup>n</sup> cáhá<sup>n</sup>-n, chi cue ñaní tñáhá-n cuè téé isràél ndíhi cue dútú cúnũ ní taxi cuëndá ñáhá-güedé xii-n iha. ¿Te ná ní quide-n? —cächí-dé xáha<sup>n</sup>-dë xii-gá.

36 Te ní xáha<sup>n</sup> Jèsús:

—Ñá díú tã ñuyíú-a cùu-í te ní ñà túú vëxi-í taxi tñuní-í ñuyíú-a, chi núu dícó iha tàxi tñuní-í á<sup>n</sup> te cue téé xica cuu ndíhi-í nàá-güedé ndíhi cue téé isràél cuëndá sá vã tñí ñàha-güedé xii-í ní cùu, dico ñá túú vëxi-í sá táxi tñuní-í ñuyíú-a —cächí-gá xáha<sup>n</sup>-gă xii-dé.

37 Te ní xáha<sup>n</sup> tã Pìlatú:

—¿Te téé yìndaha ñáyiú cùu-ó vání? —cächí-dé xáha<sup>n</sup>-dë xii-gá.

Te ní xáha<sup>n</sup> Jèsús:

—Te dàtná cächí-n-ă<sup>n</sup> yìndaha ndisa-í ñáyiú, chi yúhú véxi-í ñuyíú-a te iha ní cacu-í te cáhá<sup>n</sup>-í mee-ni tñuhu ndáá. Te nchaa ñáyiú na cùdí ìní-xi tñuhu ndáá, te tedóho-yu nchaa tñuhu cáhá<sup>n</sup>-í —cächí-gá xáha<sup>n</sup>-gă xii-dé.

38 Te ní xáha<sup>n</sup> tã Pìlatú:

—¿Te ná cúu-tu tñuhu ndáá-ái<sup>n</sup>? —cächí-dé xáha<sup>n</sup>-dë xii-gá.

*Cächí-güedé sá cáhni-güedé Jèsús*  
(Mt. 27:15-31; Mr. 15:6-20; Lc. 23:13-25)

Te sáta ñí yáha ní xicá<sup>n</sup> tñuhú tã Pìlatú núú Jèsús, te ní quee tucu-dé quehé, te xáha<sup>n</sup>-dë xii cue téé isràél:

—Ñá túú ñá cuéchi téé-a.

39 Te váha-ni chi duca<sup>n</sup> tñahí quide nchohó sá ndí tñahá nduu vico pascuá cuìní-ndó sã dácăcu-í ñí<sup>n</sup> téé yìhi vecaá. Te núu cuìní-ndó te na dácăcu-í téé yìndaha ñaha xii-ndo —cächí-dé xáha<sup>n</sup>-dë xii-güedé.

40 Te sá dúcá<sup>n</sup> ñí cáhá<sup>n</sup>-dé, núu nchaa-güedé níhi ní cáhá<sup>n</sup>-güedé, te xáha<sup>n</sup>-güedé:

—¿Vá dácăcu-n tã-á<sup>n</sup>, té Barrábás dácăcu-n! —cächí-güedé xáha<sup>n</sup>-güedé xii-dé.

Te té Barrábás-á<sup>n</sup> ñí cuu-dé ñí<sup>n</sup> ñadúhú.

## 19

1 Te té Pìlatú ní táuchíú<sup>n</sup>-dë ní tñí ñaha cuè sandadú xii Jèsús, te ní caniha-güedé xii-gá ndíhi ñí.

2 Te díu-ni cue téé-á<sup>n</sup> ñí cadúha-güedé ñí<sup>n</sup> coróná iñu ní chihi-güedé díquí-gă, te ní dáquũ nuu ñaha-güedé xii-gá ñí<sup>n</sup> dóó tícuèhé víhí.

3 Te ní sáhá<sup>n</sup> ndehe yatni-gá-güedé núú-gă, te ní xáha<sup>n</sup>-güedé:

—¿Ío cànno cuu yohó téé yìndaha ñaha xii ñáyiú isràél! —cächí-güedé xáha<sup>n</sup>-güedé cúdíquí ndeé ñáhá-güedé xii-gá.

Te ní cani-güedé déhndé nũú-gă.

4 Te ní quee tucu té Pìlatú quehé te ní xáha<sup>n</sup>-dë xii nchaa ñáyiú xíndecu quehé:

—Te cundehe-ndo-dë ná ndéé ñuhu-í-dé iha, chi yúhú sáha-í cuëndá sá ñà túú cuéchi-dé —cächí-dé xáha<sup>n</sup>-dë xii-yu.

5 Te ní ndeñuhu ñaha té Pìlatú xii Jèsús xití vechiù<sup>n</sup>-dé te ñuhu ñí<sup>n</sup> coroná iñu díquí-gă, te ñihnu-gá dóó tícuèhé víhí-ă<sup>n</sup>. Te ní xáha<sup>n</sup> tã Pìlatú xii-yu:

—¿Nái-dé-a! —cächí-dé xáha<sup>n</sup>-dë xii-yu.

6 Te ní xini ñáhá cuè dútú cúnũ ndíhi cue téé quide cuëndá veñuhu. Te ní cuáá-güedé, te xáha<sup>n</sup>-güedé:

—¿Cata caa-dé! ¿Cata caa-dé núú cùrúxí! —cächí-güedé xáha<sup>n</sup>-güedé xii-dé.

Te ní xáha<sup>n</sup> tã Pìlatú:

—Váha-gá nũ candeca mee-ndo-dë quíhí<sup>n</sup> cata caa-ndo-dë núú cùrúxí,

chi yúhú cútnùní iní-í sá ñà túú na cuéchi-dé —càchí-dé xǎha<sup>n</sup>-dě xii-güedé.

<sup>7</sup> Te ní xáha<sup>n</sup> cuè téé isràél:

—Lèi ndécú ndìhi nchúhú càchí-xi sá dàì cuú-dé, chi càchí-dé sá Dèhe Yá Ndiòxí cúú-dé —càchí-güedé xǎha<sup>n</sup>-güedé xii-dé.

<sup>8</sup> Te sá dúcá<sup>n</sup> ñí xáha<sup>n</sup>-güedé xii té Pilatú, te vaa-gá ní yùhú-dé.

<sup>9</sup> Núu cuándihu tucu-dé vechiù<sup>n</sup>-dé, te ní xáha<sup>n</sup> tùcu-dé xii Jèsús:

—¿Te yòhó ndèé téé cùu-n-i? —cachí-dé xǎha<sup>n</sup>-dě xii-gá.

Dico Jèsús ñá túú ní cǎhá<sup>n</sup>-gá.

<sup>10</sup> Núu ní xáha<sup>n</sup> tǎ Pilatú xii-gá:

—¿Te vá càchí tnúhu-n ñúu ndèé téé cùu-n-u? ¿Náa ñá túú xìní-n sǎ yúhú táxí tnùní-í, te cuu-ni tauchiù<sup>n</sup>-í cata caa ñaha-güedé xii-n ñúú cùrúxí cuú-n, te cuu-ni dàcácu ñaha-í xii-n-ǎ<sup>n</sup>? —càchí-dé xǎha<sup>n</sup>-dě xii-gá.

<sup>11</sup> Te ní xáha<sup>n</sup> Jèsús:

—Yòhó ñá túú sǎ táxí tnùní ñáhá-n xii yúhú ní cùu núu ñá túú Yá Ndiòxí ní cuìní-gá sá dúcá<sup>n</sup> cùnduu, te téé ní taxi cuèndá ñáhá xii-í núu-n tǎe-á<sup>n</sup> ïo-gá ndècuéchi-dé dàcúxí yòhó —càchí-gá xǎha<sup>n</sup>-gǎ xii-dé.

<sup>12</sup> Te òré-á<sup>n</sup> ñí ngüíta té Pilatú ndúcú-dé nàcuáa cada-dé dàcácu-dé Jèsús ní cùu, dico cue téé isràél ní ngüíta-güedé ní cuáá-güedé, te xǎha<sup>n</sup>-güedé:

—Te núu na dàcácu-n tǎe-á<sup>n</sup>, te ñá díú tǎe tnàhá tnúhu ndìhi té Cèsár cúú-n. Chi ndèda-ni càa téé na càchí sá cúú-dé téé yìndaha ñaha xii ñáyiú cùu úhú iní-dé té Cèsár. Te té Jèsús-á<sup>n</sup> càchí-dé sá táxí tnùní-dé —càchí-güedé xǎha<sup>n</sup>-güedé xii-dé.

<sup>13</sup> Te sá dúcá<sup>n</sup> ñí xáha<sup>n</sup>-güedé xii té Pilatú ñúu ní quee-dé ndìhi Jèsús cuáhá<sup>n</sup> ndìhi ñaha-dé corrèdór núu ñí quee mee-ni yúú vǎha núu ñúhú, te xiá<sup>n</sup> nání-xí Gǎbatá tnúhu hèbreú. Te xiá<sup>n</sup> ndécú xilé sácòo nchìhi té Pilatú xèhndé-dé cuéchi ñáyiú, núu ní nucóo-dé núu xilé-dé òré ní quexiò-dé ndìhi Jèsús.

<sup>14</sup> Te cùu-xi datná cuádava nduu, nduu víspré vico pàscuá. Te ní xáha<sup>n</sup> tǎ Pilatú xii ñáyiú isràél:

—¡Nái téé yìndaha ñaha xii-ndo-a! —cachí-dé xǎha<sup>n</sup>-dě xii-yu.

<sup>15</sup> Te ní cuáá-yu, te xǎhá<sup>n</sup>-yu:

—¡Cahni-dé! ¡Cahni-dé! ¡Cata caa-dé núu cùrúxí! —càchí-yu xǎhá<sup>n</sup>-yu.

Te ní xáha<sup>n</sup> tǎ Pilatú:

—¿Te yúhú cata caa-í téé yìndaha ñaha xii-ndo-u? —cachí-dé xǎha<sup>n</sup>-dě xii-yu.

Te cue dútú cùnùu ní xáha<sup>n</sup>-güedé:

—Nchúhú ñá túú-gǎ téé yìndaha ñaha xii-ndí, chi ñndì-ni té Cèsár yìndaha ñaha-dé xii-ndí —càchí-güedé xǎha<sup>n</sup>-güedé xii-dé.

<sup>16</sup> Te té Pilatú ní xáha<sup>n</sup>-dě ní quehe<sup>n</sup> cuèndá-güedé Jèsús ndécá ñaha-güedé cuáhá<sup>n</sup> cata caa ñaha-güedé núu cùrúxí.

*Sàta caa-güedé Jèsús núu cùrúxí*  
(Mt. 27:32-44; Mr. 15:21-32; Lc. 23:26-43)

<sup>17</sup> Te ní quee Jèsús nchídó-gǎ cùrúxí cuáhá<sup>n</sup> ñí xichi núu nání Yìqui Díqui Ndiyi. Te tnúhu hèbreú quée-xí Gólgotá.

<sup>18</sup> Te yàcá<sup>n</sup> ní sata caa ñaha-güedé xii-gá núu cùrúxí-á<sup>n</sup>. Te xio xio dñi-gá ní sata caa-güedé úu cue téé ndècu ndisa cuéchi-xi dñu-ni núu cùrúxí tucu.

<sup>19</sup> Te ní táuchíú<sup>n</sup> tǎ Pilatú ní taxi ndecu-güedé ñí sá ndèé lètrá núu cùrúxí tá càa-gá, te duha càchí lètrá-á<sup>n</sup>: “Jèsús téé ñúú Nazàrét, téé yìndaha ñaha xii ñáyiú isràél”, duha càchí-xi.

<sup>20</sup> Te vǎi ñáyiú isràél ní xiní-yu nàcuáa càhá<sup>n</sup> lètrá-á<sup>n</sup>, chi yatni-ni yuhu ñúú ní sata caa ñaha-güedé xii-gá núu cùrúxí. Te lètrá-á<sup>n</sup> càhá<sup>n</sup>-xi tnúhu hèbreú, te càhá<sup>n</sup>-xi tnúhu griégú, te càhá<sup>n</sup>-xi tnúhu làtín.

<sup>21</sup> Te ní xáha<sup>n</sup> cuè dútú cùnùu xii té Pilatú:

—Vá táuchiù<sup>n</sup>-n tee-güedé lètrá càhá<sup>n</sup>-xi “Téé yìndaha ñaha xii ñáyiú isràél” ní cùu, vǎha-gá tauchiù<sup>n</sup>-n tee-güedé lètrá càhá<sup>n</sup>-xi “Téé càchí

yíndàha ñaha xii ñáyiú isràél ní cùu”  
—cachí-güedé xăha<sup>n</sup>-güedé xii-dé.

22 Te ní xăha<sup>n</sup> tĕ Pìlatú:  
—Năcuăa ní táuchíu<sup>n</sup>-í ní tee-güedé  
te duca<sup>n</sup> quëndóo-xi —càchí-dé  
xăha<sup>n</sup>-dĕ xii-güedé.

23 Te sátá nĭ sata caa ñaha cuè san-  
dadú xii Jèsús núú cùrúxí, te cúmí  
xichi ní quide-güedé dóó-gă, te ĩ<sup>n</sup> ĩ<sup>n</sup>  
xichi dóó-gă ní cáhñu cue sandàdú-án.  
Te ndècu ĩ<sup>n</sup> dóó-gă dóó cání ñà túú ní  
tĭcu.

24 Te cuendá dóó-ă<sup>n</sup> nĭ xítñaha cue  
sandadú-án:  
—Vá ndátá-ó dđó-a, váha-gá nŭu  
na còto ndéé-ó cuendá quiní-ó  
ndĕdacàa-o cuu cuendá-ó —càchí-güedé  
xítñaha-güedé.

Te duca<sup>n</sup> nĭ quide-güedé chi ní  
quee ndáá-xi năcuăa càhá<sup>n</sup>-xi núú  
tùtú Yă Ndiöxí núú càchí-xi: “Tĭtní  
xichi ní cáhñu-güedé dóó-í. Te ní xito  
ndéé-güedé cuendá cutnùní iní-güedé  
ndĕdacàa-güedé níhí-güedé dóó-í”,  
duha càchí-xi núú tùtú-gá. Te sá  
dúcá<sup>n</sup> càhá<sup>n</sup>-xi núú tùtú Yă Ndiöxí nŭu  
xíă<sup>n</sup> duca<sup>n</sup> nĭ quide cue sandàdú-án.

25 Te yatni dĭñi curúxí núú táca  
Jesús nútnĭ năná-gă, ndihi cùhú-xi,  
ndihi tá Màriá ñadĭhí té Clèofás, ndihi  
tá Màriá Magdalèná.

26 Te ní xiní Jèsús năná-gă nútnĭ-a<sup>n</sup>  
dĭñi ĩ<sup>n</sup> tée ní xica cuu ndihi-gá, tée ío  
cùu iní-gá, te ní xăha<sup>n</sup>-gă xii năná-gă:

—Năá, tée nùtnĭ-án nduu-dé dàtná  
dĕhe mee-n —càchí-gá xăha<sup>n</sup>-gă xii-a<sup>n</sup>.

27 Te ní xăha<sup>n</sup>-gă xii tée ní xica cuu  
ndihi-gá-án:

—Ñaha-án nduu-a<sup>n</sup> dàtná năná  
méé-n —càchí-gá xăha<sup>n</sup>-gă xii-dé.

Núu ndéé dàvâ-án nĭ nduu năná  
ñáhá tĕe-án xii năná-gă.

*Ní xĭhí Jèsús*

(Mt. 27:45-56; Mr. 15:33-41; Lc.  
23:44-49)

28 Te ní cutnùní iní Jèsús sá nĭ ndihi  
chìu<sup>n</sup> ní táhú Tátá-gă Dútú Ndiöxí ní  
quide-gá nŭu ní cachí-gá:

—Yĭchí-í ndute —càchí-gá.

Te duha ní cáhá<sup>n</sup>-gá chi ní quee  
ndáá-xi năcuăa càhá<sup>n</sup>-xi núú tùtú Yă  
Ndiöxí.

29 Te ndècu ĩ<sup>n</sup> lítu ñùhu ndudí íá. Te  
sá dúcá<sup>n</sup> nĭ cáhá<sup>n</sup>-gá sá yĭchí-gá ndute,  
núu xíă<sup>n</sup> ní quehe<sup>n</sup>-güedé cachí te ní  
chindóyo-güedé xití ndudí íá-ă<sup>n</sup>, te  
ní chinenu-güedé díquí ĩ<sup>n</sup> dité yutnu  
nàni hisópó, te ní ndocani-güedé ní  
chihi-güedé yuhu-gá.

30 Te sátá nĭ xihí-gá ndudí íá-ă<sup>n</sup>, te  
càchí-gá:

—Vitna ní dăxĭnu cava-í nchaa  
chìu<sup>n</sup> ní cachí Tátá-í cada-í —duha ní  
cachí-gá.

Te ní xócuĭta dúcú<sup>n</sup>-gă ndàa núú-gă,  
te ní xĭhí-ni-gá.

*Ī<sup>n</sup> sandàdú ní caá<sup>n</sup>-dé yiqui naha  
Jèsús ndihi ĩ<sup>n</sup> pùyá yĭhí càà núú-xi*

31 Te cuendá sá nduu vispré vico  
pàscuá cúú-xí nŭu ñá ní cuñí cue tée  
isràél cundecu-ni yiqui cùñú-gá núú  
cùrúxí ndihi yiqui cùñú cue tée ní sata  
caa-güedé dĭñi-gá, chi cuendá nduu  
tnĕé-án cúú-xí nduu ndetatú ñáyiú, te  
íó quide cahnú-yu nduu-ă<sup>n</sup>, núu ní  
xăha<sup>n</sup>-güedé xii té Pìlatú sá táuchìu<sup>n</sup>-dé  
quíhĭ<sup>n</sup> cue tée cáhnú-güedé díhĭ<sup>n</sup> Jèsús  
ndihi díhĭ<sup>n</sup> cue tée tàcaa ndihi-gá,  
te xocàni-güedé yiqui cùñú-gá ndihi  
yiqui cùñú-güedé yàcá<sup>n</sup>.

32 Te sátá dúcá<sup>n</sup> te ní sáhá<sup>n</sup> cue  
sandàdú ní sáhnú-güedé díhĭ<sup>n</sup> cue tée  
tàcaa xio xio dĭñi Jesús.

33 Te òré ní cuyatni-güedé núú-gă,  
te ní xiní-güedé sá sà ní xĭhí-gá nŭu ñá  
ní sáhnú-güedé díhĭ<sup>n</sup>-gá.

34 Dico ĩ<sup>n</sup> sandàdú-án nĭ cúxi-dé  
pùyá néhé-dĕ ĩ<sup>n</sup> xio yiqui naha-gă, te  
yĭhí caá núú-xi núu ní caá<sup>n</sup>-xi yiqui  
naha-gă ní quee níñí ndihi ndute cuí.

35 Te yúhú té Juáá tée ní cadúha  
tutú-a ní xiní-í năcuăa ní cuu ní xĭhí  
Jèsús, te xíă<sup>n</sup> nŭu càhá<sup>n</sup> ndáá-í cuendá  
quíndáá iní-ndó.

36 Te duca<sup>n</sup> nĭ cuu ñá ní sáhnú-güedé  
díhĭ<sup>n</sup> Jèsús, chi ní quee ndáá-xi  
năcuăa càhá<sup>n</sup>-xi núú tùtú Yă Ndiöxí  
núú càchí-xi: “Vá cahnú-güedé nĭ ĩ<sup>n</sup>  
yiqui-gá”, duha càchí-xi.

37 Te duca<sup>n</sup> nĭ quide-güedé Jèsús  
ní caá<sup>n</sup>-güedé yiqui naha-gă, chi ingá  
xichi núú tùtú Yă Ndiöxí càchí-xi:



“Sáá nduu te quini-güedé ñ<sup>n</sup> téé ní dancüehé-güedé”, duha cächí-xi.

*Chindúxi-güedé Jèsús*  
(Mt. 27:57-61; Mr. 15:42-47; Lc. 23:50-56)

<sup>38</sup> Te sáta dúcá<sup>n</sup> ñ<sup>n</sup> cuu, te té Chèé téé ñúú Arimateá tnahá-dé ní sándáá iní-dé tñúhu Jèsús dico dayuhu, chi ní xóo yùhú-dé cue téé cùnnu núú ñáyiú isráél. Te téé-á<sup>n</sup> ñ<sup>n</sup> xáha<sup>n</sup>-dè xii té Pilatú núu vá dáñá-dé canehe-dé yiqui cùñú Jèsús quíhí<sup>n</sup> chindúxi-dé, te té Pilatú ní xáha<sup>n</sup>-dè xii-dé sá cúú canehe-dé yiqui cùñú Jèsús quíhí<sup>n</sup>, núu ní sáhá<sup>n</sup>-dé ní nuu nehe-dé yiqui cùñú-gá núú cùrúxí nchídó-dé cuáhá<sup>n</sup>.

<sup>39</sup> Te té Nicòdemú téé ní sáhá<sup>n</sup> niú ní cáhá<sup>n</sup> ndíhi-dé Jèsús ndéé díhna, téé-á<sup>n</sup> néhé-dé ócó úxí kílú yuchi ní cuáha mee-ni yúcú sã nání mìrrá ndíhi yúcú sã nání ãloés. Te ío váha tñami sahá<sup>n</sup>.

<sup>40</sup> Te ní naníhí tnahá-dé ndíhi té Chèé, te ní chidúcú<sup>n</sup> nuu-güedé yiqui cùñú Jèsús mee-ni dõó vãha, te nãcuáa ta dùcu<sup>n</sup> nuu-güedé yiqui cùñú-gá dõó-ã<sup>n</sup>, te duca<sup>n</sup> ta chido-güedé yuchi sáhá<sup>n</sup> tñámí-ã<sup>n</sup> núú dõó-ã<sup>n</sup> chi duca<sup>n</sup> tñahí quide ñáyiú isráél òré chindúxi tnahá-yu.

<sup>41</sup> Te yatni núú ñ<sup>n</sup> sata caa-güedé Jèsús cáá ñ<sup>n</sup> lahuertá. Te xití lahuertá-á<sup>n</sup> nchíí ñ<sup>n</sup> yaú cava duha cuáhá<sup>n</sup> ndáá-xi, te vátá yõo ñ<sup>n</sup>-gá nguindúxi xíá<sup>n</sup>.

<sup>42</sup> Te cuendá sá ñ<sup>n</sup> cuyatni tnahá nduu ndetatú ñáyiú isráél núu xíã<sup>n</sup> yaú cava nchíí yatni-ni xíá<sup>n</sup> ñ<sup>n</sup> chihi-güedé yiqui cùñú Jèsús.

## 20

*Jèsús ní ndoto-gá*  
(Mt. 28:1-10; Mr. 16:1-8; Lc. 24:1-12)

<sup>1</sup> Te ndumìngú tacuñhdá-gá cuáhá<sup>n</sup> tá Màriá Magdalèná cuáhá<sup>n</sup> ngoto-xi yaú núú ñ<sup>n</sup> chihi-güedé yiqui cùñú Jèsús, te ní sáá-xi ní xiní-xi sá ñá túú-gã ndèdí yúú yèhe yaú-á<sup>n</sup>.

<sup>2</sup> Núu xìnu-xi cuánuhú núú ndécú tẽ Xímú, àdi Pelú chi úú ñiú-dé, ndíhi

ingá téé ní xica cuu ndíhi-gá téé ío cùú iní-gá, te ní xáha<sup>n</sup>-xi xii-güedé:

—Nèhe-güedé yiqui cùñú Jèsús cuáhá<sup>n</sup>, te ñá xiní-ó ndéé ní taxi ndecu-güedé —cächí-xi xáha<sup>n</sup>-xi xii-güedé.

<sup>3</sup> Te ní quee té Pèlú ndíhi ingá téé-á<sup>n</sup> cuáhá<sup>n</sup> ndéhe-güedé yaú núú ñ<sup>n</sup> chihi-güedé yiqui cùñú-gá.

<sup>4</sup> Te ndúú-güedé xínú-güedé cuáhá<sup>n</sup> ní cùú, dico ingá téé-á<sup>n</sup> ñ<sup>n</sup> cuu níhi-gá sáhá-dé cuáhá<sup>n</sup>-dé núu díhna-gá-dé ní sáá-dé yuhu yaú núú ñ<sup>n</sup> chihi-güedé yiqui cùñú Jèsús ní cùú.

<sup>5</sup> Te ní ngáundeyi-dé xító ñihni-dé xití yaú-á<sup>n</sup>, te ní xiní-dé mee-nã dóó vãha sá ñ<sup>n</sup> xiducú<sup>n</sup> nuu-gá yúcú, dico ñá ní quíhu-dé.

<sup>6</sup> Te sáta ñ<sup>n</sup> sáá té Pèlú te cuánguñhu-dé xití yaú-á<sup>n</sup>, núu tnahá-dé ní xiní-dé nchaa dóó ñ<sup>n</sup> xiducú<sup>n</sup> nuu-gá yúcú-ã<sup>n</sup>.

<sup>7</sup> Te ní xiní-dé sá dõó ñ<sup>n</sup> xindútú díquí-gã ñá túú càtuu jundú-xi ndíhi dóó ñ<sup>n</sup> xiducú<sup>n</sup> nuu-gá chi ní nadúcú<sup>n</sup> nuu-ná càtùú ñ<sup>n</sup> xio.

<sup>8</sup> Te nchícú<sup>n</sup> tucu téé ní sáá díhna-gá-á<sup>n</sup> cuánguñhu xití yaú-á<sup>n</sup>, te ní xiní-dé sá dõó-nã yúcú, te ñá túú-gã yiqui cùñú Jèsús núu ní sándáá iní-dé sá ñ<sup>n</sup> ndoto-gá.

<sup>9</sup> Chi vátá tècú tñuní-gá-güedé nãcuáa càhá<sup>n</sup>-xi núú tütú Yã Ndiõxí núú cächí-xi sá Jèsús ndoto-gá.

<sup>10</sup> Te ní xícó ndí ndúú cue téé ní sãngoto yaú núú ñ<sup>n</sup> chihi-güedé yiqui cùñú Jèsús ní cùú cuánuhú-güedé vehe-güedé.

*Jèsús ní naníhí tnahá-gã ndíhi tá Màriá Magdalèná*

(Mr. 16:9-11)

<sup>11</sup> Te ní sáá tucu tá Màriá yuhu yaú núú ñ<sup>n</sup> chihi-güedé yiqui cùñú Jèsús te ní ngüíta-xi ndàhyú-xi, te ní ngáundeyi-xi xitò ñihni-xi xití yaú-á<sup>n</sup>.

<sup>12</sup> Te xití yaú-á<sup>n</sup> ñ<sup>n</sup> xiní-xi úú espíritú xínú cuèchi núú Yã Ndiõxí xíxíhnu-xi mee-ni dõó cuixí<sup>n</sup> xíndecu-xi núú ñ<sup>n</sup> cáa yiqui cùñú-gá. Te ñ<sup>n</sup>-xi núcóo núú ñ<sup>n</sup> cáa díquí-gã, te ñ<sup>n</sup>-xi núcóo núú ñ<sup>n</sup> cáa sáhá-gã.

13 Te espíritú-án nǐ xáha<sup>n</sup>-xi xì tá Màriá:

—¿Ná cuèndá ndàhyú-n? —càchí-xi xǎha<sup>n</sup>-xi.

Te ní xáha<sup>n</sup> tă Màriá:

—Ndàhyú-í chi nèhe-güedé yìqui cùñú Yaá cúú Xìtohó-í cuáhá<sup>n</sup>, te ñá túú xìní-í ndèé ní taxi ndecu-güedé —càchí-xi xǎha<sup>n</sup>-xi xì cue espíritú-án.

14 Te tnúhu-ni-án nǐ cáhá<sup>n</sup>-xi te ní nchócótó-xí ñ<sup>n</sup> xio, te ní xiní-xi Jèsús nútñ<sup>n</sup>-gá dico ñá túú ní cùnuni iní-xi sá díú mèe-gá.

15 Te ní xáha<sup>n</sup> Jèsús xii-xi:

—¿Ná cuèndá ndàhyú-n? ¿Yoo nànducu-n? —cachí-gá xáha<sup>n</sup>-gǎ xii-xi.

Te mee-xi nǐ sani iní-xi sá tée xito lahuertá-án cúú tée-án, núu ní xáha<sup>n</sup>-xi:

—Tàta, te núu yòhó néhé-n yìqui cùñú Jèsús cuáhá<sup>n</sup>, te cáhá<sup>n</sup>-n ndèé ní taxi ndecu-n chi cuèndá naquehe<sup>n</sup>-í canehe-í núhú —càchí-xi xǎha<sup>n</sup>-xi.

16 Te ní cáhá<sup>n</sup> díú ñàha-gá xii-xi, te xáha<sup>n</sup>-gǎ:

—¿Màriá! —càchí-gá xáha<sup>n</sup>-gǎ xii-xi.

Te ní ndacoto-xi núú-gǎ, te ní cáhá<sup>n</sup>-xi tnúhu hèbreú, te xǎha<sup>n</sup>-xi:

—¿Rabóni! —càchí-xi xǎha<sup>n</sup>-xi. Te tnúhu-án quée-xí Mèstrú.

17 Te ní xáha<sup>n</sup> Jèsús:

—Daña vá ngání ñàha-n chi vátá ndáa-gǎ-í núú ndécú Tàtà-í. Te núhú-n cùñaha-n xì cue tée ío váha ní tnahá tnúhu ndìhi-í sá ndáa-í núú ndécú Tàtà-í Dútú Ndiõxí, te ñu-gá cúú Tàtà-ndó nchàa-ndo, te ñu-ni-gá cúú Ndiõxí-ndó —càchí-gá xáha<sup>n</sup>-gǎ xii-xi.

18 Te ní natñ<sup>n</sup> tá Màriá Magdalená ichi cuánuhú-xi cùñaha-xi xì cue tée ní xica cuu ndìhi-gá sá nǐ xiní-xi Jèsús, te ní xáha<sup>n</sup>-xi xii-güedé nchaa nàcuáa ní xáha<sup>n</sup>-gǎ xii-xi.

*Ní quexìo Jesús núú xñndecu cue tée ní xica cuu ndìhi-gá*

(Mt. 28:16-20; Mr. 16:14-18; Lc. 24:36-49)

19 Te ñu-ni ndumìngú sandiqui<sup>n</sup> ní natacá cue tée ní xica cuu ndìhi-gá, te xñndedí nihnu-güedé vehe sá xiyùhú-güedé cue tée cùnuu núú

ñǎyiu isràél. Te ní quíhu Jèsús ndéé tnuú-güedé ní ngúnutñ<sup>n</sup>-gá, te ní xáha<sup>n</sup>-gǎ:

—Yá Ndiõxí chíndèe ñaha-gá xii-ndo ño váha cùu iní-ndó ndècu-ndo —cachí-gá xáha<sup>n</sup>-gǎ xii-güedé.

20 Te ní dánèhé ñáhá-gǎ ndaha-gá ndìhi yìqui naha-gǎ xii-güedé. Te ío ní cudí iní-güedé sá díú ndisa-gá ní xiní ñáhá-güedé.

21 Te ní xáha<sup>n</sup> tucu Jesús xii-güedé:

—Yá Ndiõxí chíndèe ñaha-gá xii-ndo ño váha cùu iní-ndó ndècu-ndo. Te dàtná ní tendaha ñàha Tàtà-í Dútú Ndiõxí xii-í véxi-í ñuyíú-a, te duca<sup>n</sup> tendaha ñaha-í xii-ndo quíhí<sup>n</sup>-ndó cáhá<sup>n</sup>-ndó tnúhu-í núú ñǎyiu —càchí-gá xáha<sup>n</sup>-gǎ xii-güedé.

22 Te ní chiyóco-gǎ núú-güedé, te ní xáha<sup>n</sup>-gǎ:

—Chí ndúú tàhú Espíritú Yá Ndiõxí cundecu ndìhi-ndo.

23 Te nchaa ñáyiu na quìndáa iní-xi tnúhu-í te cùñaha-ndo xii-yu sá nǐ quide càhnu iní Yá Ndiõxí nchaa cuéchi-yu. Te nchaa ñáyiu vá quìndáa iní tnúhu-í te cùñaha-ndo xii-yu sá vǎ cadá càhnu iní-gá cuéchi-yu —càchí-gá xáha<sup>n</sup>-gǎ xii-güedé.

### *Té Mǎxí càhá<sup>n</sup> ndìhi-dé Jèsús*

24 Te núú ùxúú cue tée ní xica cuu ndìhi-gá, te ñ<sup>n</sup>-dé nání-dé Mǎxí tée ní xóo danàni-güedé Cuächí, te tée-án ñà túú-dé ndécú ndìhi-güedé òré ní sáhá<sup>n</sup> Jèsús.

25 Te dava-gá cue tée ní xica cuu ndìhi-gá ní xáha<sup>n</sup>-güedé xii-dé:

—Ní xiní-ndí Jèsús —càchí-güedé xǎha<sup>n</sup>-güedé.

Te ní xáha<sup>n</sup> tē Mǎxí:

—Te vá quìndáa iní-í, chi ndéé quíní-í ndaha-gá núú nǐ quée nduyú, te dàquíhu-í díquí ndáhà-í núú nǐ caá<sup>n</sup> nduyú-án, te dàquíhu ndàha-í yìqui naha-gǎ núú nǐ caá<sup>n</sup>, duca<sup>n</sup> te quìndáa iní-í —càchí-dé xǎha<sup>n</sup>-dē xii-güedé.

26 Te núú ùná tucu nduu ní natacá tucu cue tée ní xica cuu ndìhi Jèsús ñ<sup>n</sup> vehe, te nduu-án tnahá té Mǎxí

ndécú ndìhi-güedé. Te cuèi ndèdí ni-hnu-güedé vehe-án, te ní quíhu Jèsús ndéé tnuú-güedé, te ní xáha<sup>n</sup>-gã:

—Yá Ndiöxí chindèe ñaha-gá xii-ndo ïo váha cùu iní-ndó ndècu-ndo —càchí-gá xáha<sup>n</sup>-gã xii-güedé.

<sup>27</sup> Te ní xáha<sup>n</sup>-gã xii té Mǎxí:

—Cundehe ndàha-í te dàquíhu-n dǐquí ndáhá-n nǔú nǐ quée nduyú, te dàquíhu-n ndàha-n yiqui naha-í-a cuendá quíndáá iní-n te vá cání ñ<sup>n</sup> caní úú iní-n —càchí-gá xáha<sup>n</sup>-gã xii-dé.

<sup>28</sup> Te ní xáha<sup>n</sup> tǎ Mǎxí xii-gá:

—ÿòhó cúú-n Xítóhó-í! ÿòhó cúú-n Ndiöxí-í! —càchí-dé xáha<sup>n</sup>-dǎ xii-gá.

<sup>29</sup> Te ní xáha<sup>n</sup> Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xì-í te ní sándáá iní-n, dico cùdíí-gã iní nchaa ñáyu ñá túú ní xiní núú ñáhá xì-í, te ní sándáá iní-yu —càchí-gá xáha<sup>n</sup>-gã xii-dé.

*Quíndáá iní-ó tnǔhu yòdo tnuní núú tütú-a*

<sup>30</sup> Te vai-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndìhi-gá.

<sup>31</sup> Dico dava-gá ní ngódó tnùní núú tütú-a cuendá sá quíndáá iní-ndó sǎ Jèsús cúú-gã Crístú Déhe Dútú Ndiöxí, te naníhí tàhú-ndó te núu na quíndáá iní-ndó-gã.

## 21

*Úsá cue téé ní xica cuu ndìhi Jèsús ní xiní ñáhá-güedǎ xii-gá*

<sup>1</sup> Te ingá nduu tucu xǐndecu cue téé ní xica cuu ndìhi Jèsús yuhu làgúná ñuú Tiberiás, te ní sáhá<sup>n</sup>-gá núú xǐndecu-güedé-án. Te duha ní cuu ní xiní ñáhá-güedǎ xii-gá.

<sup>2</sup> Te ndècu té Xímú, àdi Pelú chi úú diu-dé, ndìhi té Mǎxí téé ní xóo cúñaha-güedǎ Cuǎchí, ndìhi té Natanàél téé ñuú Cànaá, te ñuú-án yíndèhu-xi distritú Galileá, te tnàhá ndì ndùú déhe té Zebèdeú, ndìhi úú-gá tucu cue téé ní xica cuu ndìhi-gá.

<sup>3</sup> Te ní xáha<sup>n</sup> tǎ Pèlú xii-güedé:

—Quíhí<sup>n</sup>-í quítní<sup>n</sup>-í chácá —càchí-dé xáha<sup>n</sup>-dǎ xii-güedé.

Te ní xáha<sup>n</sup>-güedǎ:

—Tnàhá nchúhú canchicú<sup>n</sup> ñáhá-ndǎ xii-n quíhí<sup>n</sup> tucu —càchí-güedǎ xáha<sup>n</sup>-güedǎ xii-dé.

Te ní xica-güedé cuáhá<sup>n</sup>-güedé ní sáa-güedé núú ndécú bàrcú, te ní quée-güedé xití bàrcú-án cuáhá<sup>n</sup>-güedé. Te niú-án ñǎ ní ñíhí tnàhí-güedé chácá.

<sup>4</sup> Te sa ta cùditó-ñǎ cuáhá<sup>n</sup> ní xiní-güedé Jèsús yuhu làgúná, dico ñá ní cùtnuní iní-güedé sá díú-gã.

<sup>5</sup> Te ní xáha<sup>n</sup>-gã xii-güedé:

—Cue téé cuechi, ¿ní níhí-ndó chácá caxi-o ñǎ? —càchí-gá xáha<sup>n</sup>-gã xii-güedé.

Te ní xáha<sup>n</sup>-güedǎ:

—Védana chácá ñá túú ní ñíhí-ndǎ —càchí-güedé xáha<sup>n</sup>-güedǎ xii-gá.

<sup>6</sup> Te ní xáha<sup>n</sup> Jèsús:

—Chí dáquèe ñunu-ndo ndàa xio cuha barcú chi níhí-ndó-dí —càchí-gá xáha<sup>n</sup>-gã xii-güedé.

Te duca<sup>n</sup> nǐ quide-güedé, te òré nátava-güedé ñunu xití ndute, te ñá cùndèe-gá-güedé natava-güedé cuendá sá nǐ chítú chácá xití-xi.

<sup>7</sup> Te téé ní xica cuu ndìhi-gá téé ío cùu iní-gá ní xáha<sup>n</sup>-dǎ xii té Pèlú:

—ÿdiu Xítóhó Jesucristú! —càchí-dé xáha<sup>n</sup>-dǎ xii-dé.

Te sá nǐ tecú dóho té Pèlú sá dúcá<sup>n</sup> càhá<sup>n</sup>-dé núu ní ndíunuu-dé dóó-dǎ, chi dóó sǎ yímàa-ni-dé níhnú-dǎ ní cùu. Duca<sup>n</sup> te ní nuu ndava-dé bàrcú ní ngaunihnu-dé ndute, te cuáhá<sup>n</sup>-dé núú ndute-án nǐ quene-dé ndéé ñuhu yìchí.

<sup>8</sup> Te dava-gá cue téé ndìhi té Pèlú diu-ni cue téé ní xica cuu ndìhi Jèsús ní quendóo-güedé dàtná ñ<sup>n</sup> cièndú-gá mètrú te quene-güedé yuhu ndute. Te tǎñuhu-ni-güedé ñunu-güedé chitu chácá nǐ quene-güedé ndéé yuhu ndute.

<sup>9</sup> Te òré ní quene-güedé ñuhu yìchí, te ní xiní-güedé càyú ñuhú, te núú ñuhú-án ñuhú ñ<sup>n</sup> chácá ndìhi ñ<sup>n</sup> pàá.

10 Te ní xáha<sup>n</sup> Jèsús xii-güedé:

—Quíhí<sup>n</sup> ngehe<sup>n</sup>-ndo ì<sup>n</sup> úú chácá quití íchí nǐ tñi-ndo —càchí-gá xáha<sup>n</sup>-gǎ xii-güedé.

11 Núu té Pèlú ní sáhá<sup>n</sup>-dé núu ndécú bàrcú, te ní quée-dé xití-xi ní cándéé-dé ñunu ñuhu chácá táñuhu-dé ní quene ndéé ñuhu yìchí, te chitu chácá náhnú, te ñuhu ì<sup>n</sup> ciendú údico úxí úní-dí xití ñunu-á<sup>n</sup>, te cuèi duca<sup>n</sup> vài-dí ñuhu dico ñá ní ndátá ñunu-á<sup>n</sup>.

12 Te ní xáha<sup>n</sup> Jèsús:

—Chí nèhé cadí iní-ndó —càchí-gá xáha<sup>n</sup>-gǎ xii-güedé.

Dico nǐ ì<sup>n</sup> cue téé ní xica cuu ndihí-gá-á<sup>n</sup> ñǎ ní xicá<sup>n</sup> tñuhú-güedé núu-gǎ nǔu yoo cùu-gá, chí sa ní cutnùní iní-güedé sá díú Jèsús cúu-gǎ.

13 Te Jèsús ní sáhá<sup>n</sup>-gá ní quehe<sup>n</sup>-gá pàá ní sáñaha-gǎ xii-güedé caxi-güedé, te dátñuní ní quehe<sup>n</sup> tucu-gá chácá nǐ sáñaha-gǎ xii-güedé.

14 Vitna cùu úní xito sá xìní ñáhá cue téé ní xica cuu ndihí-gá sátá nǐ ndoto-gá.

### *Jèsús càhá<sup>n</sup> ndihí-gá té Pèlú*

15 Te sátá nǐ túhú cóhó-güedé ní sadí iní-güedé te ní xicá<sup>n</sup> tñuhú Jèsús núu tǐ Xímú, àdi Pèlú chí úú díu-dé, te xáha<sup>n</sup>-gǎ:

—Xímú, déhe té Jònás, ¿cùu iní-gá-n yǔhú dàcúxí dàva-gá cue téé-a ñǎ? —càchí-gá xáha<sup>n</sup>-gǎ xii-dé.

Te ní xáha<sup>n</sup> té Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dǎ xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéé líhli-í —càchí-gá xáha<sup>n</sup>-gǎ xii-dé.

Te cue mbéé-á<sup>n</sup> cúu-güèdǐ ñáyiú cùu cuendá-gá.

16 Te ní xáha<sup>n</sup> tucu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —càchí-gá xáha<sup>n</sup>-gǎ xii-dé.

Te ní xáha<sup>n</sup> tucu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dǎ xii-gá.

Te ní xáha<sup>n</sup>-gǎ:

—Te núu duca<sup>n</sup>, te coto-n cuè mbéè-í —càchí-gá xáha<sup>n</sup>-gǎ xii-dé.

17 Te xito cùu úní ní xáha<sup>n</sup> tucu-gá xii té Pèlú:

—Xímú, déhe té Jònás, ¿cùu iní ñáhá-n-ǎ<sup>n</sup>? —càchí-gá xáha<sup>n</sup>-gǎ xii-dé.

Te té Pèlú ío ní cundiyí-dé sá dúcá<sup>n</sup> nǐ cuu úní xito xicá<sup>n</sup> tñuhú-gǎ núu-dǎ nǔu ndisa sá cúu iní ñáhá-dǎ xii-gá, te ní xáha<sup>n</sup>-dǎ:

—Mèstrú, yòhó nchaa sa xìní-n, te sa cùtnuní iní-n sǎ cúu iní ñáhà-í xii-n —càchí-dé xáha<sup>n</sup>-dǎ xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéè-í.

18 Te na càchí tñuhu ndáá-í xii-n sǎ cùtnáhá cuechí-gǎ-n nǐ xóo ndécuhnu mee-n dǎo-n, te ní xóo quíhí<sup>n</sup>-n nděni ní xóo cachí iní-n, dico na yì-n te dacàá-n ndàha-n, te ingá téé dacuhnu ñaha xii-n dóo-n te cada yica-dǎ candeca ñaha-dǎ xii-n quíhí<sup>n</sup> ì<sup>n</sup> núu ñà túú tñáhá iní-n —càchí-gá xáha<sup>n</sup>-gǎ xii-dé.

19 Te sá dúcá<sup>n</sup> nǐ cáhá<sup>n</sup> Jèsús cúu-xí sǎ nǐ dátécú tñuhu ñaha-gǎ xii té Pèlú nàcuáa cada-xi cuú-dé, te duca<sup>n</sup> càda cahnu-dé Yǎ Ndiòxí, te ní xáha<sup>n</sup>-gǎ xii-dé:

—¡Canchicú<sup>n</sup> ñáhá-n xii-í! —càchí-gá xáha<sup>n</sup>-gǎ xii-dé.

### *Téé ío cùu iní-gá*

20 Te ní nchócótó tǐ Pèlú ndàa sátá-dǎ, te ní xini-dé sá nchicú<sup>n</sup> ñáhá ingá téé xica cuu ndihí-gá cuáhá<sup>n</sup>, téé ío cùu iní-gá téé ní xínucóo dǐñi-gá òré ní cudini ndihí ñaha-gá xii-güedé, te díu-ni téé-á<sup>n</sup> nǐ xicá<sup>n</sup> tñuhú-dǎ núu-gǎ dàvá-á<sup>n</sup> nǔu nděda cǎa téé cuáha cuendá ñáhá xii-gá núu cuè téé cùu úhú iní ñáhá.

21 Te òré ní xini té Pèlú sá nchicú<sup>n</sup> ñáhá tǎe-á<sup>n</sup>, te ní xicá<sup>n</sup> tñuhú-dǎ núu Jèsús, te xáha<sup>n</sup>-dǎ:

—Mèstrú, te téé-ǎ<sup>n</sup>, ¿ná cúu sǎ yǎha-dé-í? —càchí-dé xáha<sup>n</sup>-dǎ xii-gá.

22 Te ní xáha<sup>n</sup> Jèsús:

—Te núu yúhú cuiní-í sá cùndècu-ni-dé ndéé ná quixi tucu-í ñuyíú-a, ¿te yòhó ná cuendá-n nǔu xicá<sup>n</sup> tñuhú-n? Yòhó canchicú<sup>n</sup> ñáhá-ní xii-í —càchí-gá xáha<sup>n</sup>-gǎ xii-dé.

23 Te ní xinu tñuhu núu nchàa ñáyiú sàndáá iní tñuhu-gá sá téé-ǎ<sup>n</sup>

vă cùú-dé. Dico Jèsús ñá túú dùca<sup>n</sup> ní xáha<sup>n</sup>-gă sá vă cùú-dé, chi ní xáha<sup>n</sup>-gă: “Núu yúhú cuìní-í sá tẽe-ă<sup>n</sup> cundecu-ni-dé ndéé ná quìxi tucu-í ñuyíú-a, ¿te yòhó ná cuèndá-n?”, duha ní xáha<sup>n</sup>-gă xii té Pèlú.

<sup>24</sup>Te ðiu-ni yúhú té Juàá téé ní sani iní-yu sá vă cùú càhá<sup>n</sup> ndáá-í nchaa nàcuáa ní cuu, te duca<sup>n</sup> ñ tee-í núú tútú-a, te cùtnuní iní-ndó sã tnùhu ndáá cúú-xí.

<sup>25</sup>Te ndècu vai-gá núú sã ñ quide Jèsús. Te núu ðicó ní ngǔndee nchaandì túhú ñá, te vaa ni te ñihì ñuyíú te vá tnàhá núú-xi cundecu lìbrú, te núu ðicó ní ngǔndee nchaa. Te ðuca<sup>n</sup> na cùnduu. Te ío chí cádá ndèe iní-ñã vitna.

## NCHAA NÀCUÁA NÍ QUIDE CUE TÉE NÍ TÁÚCHÍÚ<sup>n</sup> JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáá-gá sá quíxí Espíritú Yă Ndiöxí cundecu ndihi ñáyiu*

<sup>1</sup> Te duha ní cáhá<sup>n</sup> té Lùcá ní xíi-dé té Tèofilú: Yúhú sa ní chídó tnùn-í núú librú ndéé díhna nchaa sá ñ quide Jèsús, ndihi nchaa sá ñ dácuhá-gă ñáyiu. Te ní chídó tnùn-í nchaa sá ñ quide-gá ndéé nduu ní quesaha-gă quidé chiú<sup>n</sup>-gá,

<sup>2</sup> ndihi nchaa sá ñ quide-gá ndéé òré cuánda-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue tée ní cáhá<sup>n</sup>-gá dacuàha ñaha xii ñáyiu tnúhu-gá, te mee Espíritú Yă Ndiöxí ní chindee ñaha-xi xii-gá ní xáha<sup>n</sup>-gă nàcuáa cada-güedé.

<sup>3</sup> Te sáta ñ xíi-gá te ní ndoto-gá, te ní xíndecu-gá údico nduu. Te titní xito ní sáhá<sup>n</sup>-gá núú ñ xíndecu-güedé, te duca<sup>n</sup> ñ quide-gá cuéndá quini-güedé sá ndáá ní ndoto-gá, te ní xáha<sup>n</sup>-gă nàcuáa quide Yă Ndiöxí ndihu ndaha-gă ñáyiu.

<sup>4</sup> Te ñ<sup>n</sup> nduu ndècu ndihi ñaha-gá xii-güedé, te ní xáha<sup>n</sup>-gă:

—Vá quéé-ní-ndó ñúú Jerusàlén, chi cundetú-ndo quíxi Espíritú Yă Ndiöxí cundecu ndihi-ndo, chi sa ní cachí tnúhu-í sá dúcá<sup>n</sup> ñ cáhá<sup>n</sup> Tátá-ó Dütú Ndiöxí Yaá ndécú andiu nacuáa cunduu.

<sup>5</sup> Te ndáá sá ndí Juáá ní dácúandüte ñaha ndíi xii-ndo, dico vitna ñá túú-gă cuéhé nduu, te quexìo Espíritú Yă Ndiöxí cundecu ndihi-ndo —càchí-gá xáha<sup>n</sup>-gă xii-güedé.

*Jèsús cuánda-gá andiu*

<sup>6</sup> Te òré ní xíndecu-güedé ndihi Jèsús, te ní xáha<sup>n</sup>-güedé xii-gá:

—Mèstrú, cuíní-ndí cachí tnúhu-n ñú sa ta cùyatni nduu chindee-n ñáyiu ñúú Isràèl cuéndá taxi tnùn-í tucú-yu ñúú-yu —càchí-güedé xáha<sup>n</sup>-güedé xii-gá.

<sup>7</sup> Te ní xáha<sup>n</sup> Jèsús xii-güedé:

—Ñá túú xìni ñuhu-xi cunaha nchohó xíá<sup>n</sup>, chi Tátá-ó Dütú Ndiöxí náhá-gă ná nduu càda-gá nchaa sá ñ cáhá<sup>n</sup>-gá.

<sup>8</sup> Te òré quexìo Espíritú Yă Ndiöxí cundecu ndihi-ndo, te cuyí-ndo ñ yuhu ní iní-ndó quíhí<sup>n</sup>-ndó cáhá<sup>n</sup>-ndó tnúhu-í núú ñáyiu ñúú Jerusàlén ndihi núú ñáyiu distrítú Jùdeá ndihi núú ñáyiu distrítú Sàmariá. Te duca<sup>n</sup>-ni cáhá<sup>n</sup>-ndó quíhí<sup>n</sup>-ndó ñ caxico ñuyú —càchí-gá xáha<sup>n</sup>-gă xii-güedé.

<sup>9</sup> Te sáta dúcá<sup>n</sup> ñ cáhá<sup>n</sup>-gá, te ndèhe-güedé ní ndanchita-gá cuánda-gá andiu cuándihu-gá xití vícò, te ñá túú-gă ní xìni ñáhá-güedé xii-gá.

<sup>10</sup> Te ndèhe vihi-güedé andiu núú ndéé quini ñáhá-güedé xii-gá yòtnúhu, te ní quexìo cunu úú cue tée nihnu dóó cuíxí<sup>n</sup> núú ndécú-güedé.

<sup>11</sup> Te xáha<sup>n</sup>-güedé:

—Nchòhó cue tée Galileá, ¿ná cuéndá ndéhé-ndó andiu? Te dàtná-ni càa Jesús cuánda-gá andiu vitna, te duca<sup>n</sup>-ni cunduu-gá quixi tucu-gá —càchí cue tée nihnu dóó cuíxí<sup>n</sup>-á<sup>n</sup> xáha<sup>n</sup>-güedé.

*Cuéndá sá ñà túú-gă ndí Jùdás ñúú ní nanducu-güedé té Màtiá ní nucúnutní-dé núú ndí*

<sup>12</sup> Te ní ndee-güedé yucu Òlívú cuánuhú-güedé ñúú Jerusàlén, te ní xúhu<sup>n</sup>-güedé cuèdicó cuádava òré ichi.

<sup>13</sup> Te òré ní ndexìo-güedé ñúú-á<sup>n</sup>, te cuánda-güedé cuártú ndéé núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juáá, té Ndríxí, té Lìpé, té Măxí, té Bartolòmé, té Mâteú, té Jàcobó déhe té Àlfeú, ndihi té Xímú tée ní cundihí cue tée canànistá, ndihi té Jùdás ñani té Jàcobó.

<sup>14</sup> Te ní naníhí tnáhá-güedé nchaa-güedé yàcá<sup>n</sup> ndihi tá Màriá

nǎná Jèsús, ndihí cue ñaní-gá ndihí dava-gá cue ñáyiú dǐhí. Te ñ<sup>n</sup>-ni ní cuú-yu ní cáhá<sup>n</sup> ndihí-yu Yá Ndiöxí.

15 Te ñ<sup>n</sup> nduu ní xíndecu dàtná ñ<sup>n</sup> cièndú ócó mee-ni ñáyiú sàndáá iní tnúhu Jèsús, te ní ngúnutnǐi té Pèlú núu-yu, te ní xáha<sup>n</sup>-dè xií-yu:

16-17 —Nchòhó cue ñáyiú ndècu ndihí-í ichi Xítóhó Jesucristú, na càni-í cuèndú núú-ndó nàcuáa ní chídó tnùnǐ ndíi Dàvií téé ní xíndecu ndéé sanaha nàcuáa ní cáhá<sup>n</sup> Espíritú Yá Ndiöxí cuèndá té Jùdás. Te dacuití dùca<sup>n</sup> ní cuu, chi tnàhá té Jùdás ní xíndecu ndihí-o, te ní xinu cuechi-o ndihí-dé núú-gǎ sá dǐhna, te duca<sup>n</sup> ní quide-dé ní sáha cuèndá-dé Jèsús núú cuè téé cùu úhú iní ñáhá xii-gá.

18 Te ní cháhu ñaha-güedè xii-dé cuèndá sá ní sáha cuèndá ñáhá-dè xii-gá. Te ní sáhá<sup>n</sup>-dè ñ<sup>n</sup> xichi ní sata caa-dé méé-dè, te ní ngava-dé, te ní cahndí duu<sup>n</sup> xití-dé te xía<sup>n</sup> ní xihí-dé. Te ní naquehe<sup>n</sup>-güedé dǐhú<sup>n</sup> sǎ ní cháhu-güedé ndíi, te ní nacuaa<sup>n</sup>-güedé ñuhu núú ní ngava ndíi-á<sup>n</sup>.

19 Te nchaa ñáyiú Jerusàlén ní níhǐ-yu tnúhu, te ní dánánǐ-yu ñuhu-á<sup>n</sup> Acèldamá. Te tnúhu mèé-yu quèe-xi: Ñuhu núú ní sati níñǐ.

20 Te duha ní cáhá<sup>n</sup> ndíi Dàvií ní chídó tnùnǐ ndíi núú librú Sǎlmú ní dándóo ndíi: “Nà ndóo nahi vèhe-dé, vá yóo ñ<sup>n</sup> quíhǐ<sup>n</sup> cundecu”, duha ní cáhá<sup>n</sup> ndíi. Te ingá tucu tnúhu ní cachí ndíi: “Na nànducu-güedé ingá téé nucúnutnǐi núú ndíi”, duha ní cáhá<sup>n</sup> ndíi Dàvií —càchí té Pèlú xáha<sup>n</sup>-dè xií-yu.

21-22 Te ní xáha<sup>n</sup> tùcu-dé:

—Te duca<sup>n</sup> ní cáhá<sup>n</sup> ndíi Dàvií, te vitna xini ñuhu-xi nanducu-o ñ<sup>n</sup> téé nucúnutnǐi-dé núú ndíi Jùdás, te xini ñuhu-xi diu-ni ñ<sup>n</sup> téé ní xica cuu ndihí Xítóhó Jesucristú cútnàhá ní xica cuu-o ndihí-gá, ñ<sup>n</sup> téé ní xiní ndéé òré ní dácuàndùte ñaha ndíi Juàá xii-gá, te ndéé òré cuàndaa-gá andiu. Te téé nanducu-o cùndecu-dé cáhá<sup>n</sup>-dè nàcuáa ní cuu ní ndoto-gá —càchí té Pèlú xáha<sup>n</sup>-dè xií-yu.

23 Te ní cacunehe-güedé úú tnàhá-güedé núu ndèdaca-güedé nduu táhú-güedé nucúnutnǐi-güedé núú ndíi. Te ñ<sup>n</sup>-dè nání-dè Chèè Barsàbás, àdi Justú chi úú diu-dé, te ingá-dé nání-dè Màtiá.

24 Te ní cáhá<sup>n</sup> ndihí-güedé Yá Ndiöxí, te xáha<sup>n</sup>-güedé xii-gá:

—Yòhó Dútú Ndiöxí xiní-n iní nchaa ñáyiú, te mee-n nàha-n núu ndéda cãa núú úú cue téé-a tnàhá iní-n

25 cáhá<sup>n</sup>-güedé tnúhu-n núú ñáyiú, te téé-á<sup>n</sup> nucúnutnǐi-dé núú ndíi Jùdás, chi cuáhá<sup>n</sup> ndíi núú ùhú núú ndàhú núú tàú-xi quíhǐ<sup>n</sup> ndíi —càchí-güedé xáha<sup>n</sup>-güedé xii-gá.

26 Te ní xito ndéé-güedé, te ní cutnùnǐ sá téé nàni Matiá quendóo-dé ndihí úxí ñ<sup>n</sup> cue téé ní táuchíú<sup>n</sup>-gǎ dacuàha ñaha xii ñáyiú tnúhu-gá.

## 2

*Ní quexìo Espíritú Yá Ndiöxí cundecu ndihí ñáyiú*

1 Te ní sáá nduu còo viço Pentecostés te xíndecu nchaa ñáyiú ñ<sup>n</sup>-ni xìchi.

2 Te ní tecú dóho-yu uu<sup>n</sup>ni ní níhi andiu, dàtná quidé ñ<sup>n</sup> táchí níhi vìhi ní quide-xi, te duca<sup>n</sup> ní cuu ndéé xití vehe núú ndécü-yu nchaá-yu.

3 Te ní xiní-yu dàtná cáá itá ñuhú cáá sǎ ndécú xití vehe, te ní xité nuu-xi ní ngoyo ndodo-xi díquǐ-yu nchaá-yu.

4 Te duca<sup>n</sup> ní quide-xi òré ní quexìo Espíritú Yá Ndiöxí ní ngúndecu ndihí-yu nchaá-yu. Te ní ngúita-yu ní cáhá<sup>n</sup>-yu tnúhu cue ñáyiú ñá túú cùu ñáyiú isràél, te nchaa xía<sup>n</sup> ní quide Espíritú Yá Ndiöxí.

5 Te vai ñáyiú isràél xíndecu nchaa dava-gá ñuú ní tacá-yu ñuú Jerusàlén, te ñáyiú-á<sup>n</sup> ïo ndùcu ndéé-yu dàcuahá-yu nchaa ndudú sá dácuàha tnahí-yu.

6 Te òré ní tecú dóho-yu níhi, te ní sáhá<sup>n</sup>-yu ní xíndedóho-yu tnúhu càhá<sup>n</sup> méé-yu ñ<sup>n</sup> ñ<sup>n</sup> ñuú-yu, chi ndí dǐñ<sup>n</sup> ndí dǐñ<sup>n</sup> tnúhu càhá<sup>n</sup> ñáyiú ndècu-á<sup>n</sup>.

7 Te xǎn ío ní cuñúhu ñáyiú véxi dava-gá ñuú, te ní xǐtnàhá-yu:

—Ñáyiú duca<sup>n</sup> xǐcáhá<sup>n</sup> cúu-yu ñáyiú distritú Galileá.

8 ¿Te nása ní quidé-yu ní cutúha-yu nàcuáa càhá<sup>n</sup>-ó ñ<sup>n</sup> ñ<sup>n</sup>-o ndéé líhli-o?

9 Te iha véxi ñáyiú dava nàción, chi véxi ñáyiú Pàrtiá, véxi ñáyiú Mèdiá, véxi ñáyiú Èlám, véxi ñáyiú Mesopòtamiá, véxi ñáyiú Jùdeá, véxi ñáyiú Capadociá, véxi ñáyiú Pòntó, véxi ñáyiú Àsiá,

10 véxi ñáyiú Frìgiá, véxi ñáyiú Pànfilíá, véxi ñáyiú Ègiptú, véxi ñáyiú Áfricá ñáyiú ndècu ndéé núú-gǎ-xi ñuú Cirené. Te tnàhá ñáyiú ñuú Rómá véxi, te ñáyiú-á<sup>n</sup> chi ñá díú mèe-ni ñáyiú isràél cúu-yu nchaá-yu, dico ñ<sup>n</sup>-ni cúu sá dácuàhá-yu.

11 Te véxi ñáyiú Crètá, véxi ñáyiú Àrabiá. Te nchaá-o sa ndèdóho-o càhá<sup>n</sup>-yu nàcuáa cuáhá<sup>n</sup> tnúhu mee-o ñ<sup>n</sup> ñ<sup>n</sup>-o. Te nchaá ñáyiú xǐcáhá<sup>n</sup> tnúhu-o càhá<sup>n</sup>-yu cuèndá nchaá sá vǎ yóo tnàhí ndàcu cada ní quide Yá Ndiòxi—càchí-yu xǐtnàhá-yu.

12 Te ní cuñúhu vihí-yu, te ñá ná sàá iní-yu nása ní cuu, te xǐtnàhá-yu:

—¿Nása ní cuu duha càhá<sup>n</sup>-yu tnúhu-o?—càchí-yu xǐtnàhá-yu.

13 Te davá-yu ní sácú ndéé yíchi ñáhǎ-yu, te xǐtnàhá-yu:

—Xǐxíni ñáyiú-á<sup>n</sup> nǎ ñá náhǎ-yu tnúhu càhá<sup>n</sup>-yu—càchí-yu xǐtnàhá-yu.

#### *Tnúhu ní xáha<sup>n</sup> tǎ Pèlú xii cue ñáyiú*

14 Te ní ngúnutnǎi té Pèlú ndihí úxi ñ<sup>n</sup> cue té ní táuchíú<sup>n</sup> Jèsús dacuàha ñaha xii ñáyiú tnúhu-gá, te níhi ní càhá<sup>n</sup>-dé, te xǎha<sup>n</sup>-dǎ xií-yu:

—Nchaá nchòhó ñáyiú distritú Jùdeá ndihí nchòhó ñáyiú ñuú Jerusàlén, cundedóho váha-ndo tnúhu na càhá<sup>n</sup>-í-a.

15 Ná ndáá tnúhu càhá<sup>n</sup>-ndó, chi ñá túú xǐni-ndí te duca<sup>n</sup> càhá<sup>n</sup>-ndó, chi davitna cùu-xi caá ñ<sup>n</sup> dátneé, vátá tnàhá-gá òré coho ñáyiú ndidí.

16 Te yúhú ná càchí tnúhu-í xii-ndo vitna nacuáa ní xáha<sup>n</sup> Yá Ndiòxi xii ndíi Joél té ní xóo càhá<sup>n</sup> tnúhu-gá

ndéé sanaha nàcuáa cada ñaha-gǎ xii ñáyiú, te ndíi-á<sup>n</sup> ní chídó tnùní ndíi nàcuáa ní càhá<sup>n</sup>-gá.

17 Te duha ní xáha<sup>n</sup>-gǎ xii ndíi:

Cùmání-gǎ sáá nduu nàa ñuyíú, te cuáñaha-ǐ Espiritú-í cundecu ndihí nchaá ñáyiú na quìndáá iní ñáhá xii-í.

Te cue déhe-yu càhá<sup>n</sup>-yu tnúhu-í, te cue té cuechi dacòto núú ñáhá-xí xii-güedé,

te duca<sup>n</sup>-ni cuè téé ni sàhnu càhá<sup>n</sup> saní-güedé,

te diu-ni cuèndá nchaá sá quídè-í duca<sup>n</sup> dàcoto núú ñáhá-xí xii-güedé.

18 Te nchaá ñáyiú xínu cuechi núu-í càhá<sup>n</sup>-yu tnúhu-í, te cuáñaha-ǐ Espiritú-í cundecu ndihí-yu.

19 Te ndéé andiu, yàcá<sup>n</sup> vài sá cadà-í nàcuáa cuñúhu vihí-yu,

te núú ñuyíú-a cada-í ñ<sup>n</sup> sá vátá quìní tnàhí-gá-yu,

te ngoyo níñi te ngoyo ñuhú te quene vihí ñúhmá.

20 Te vǎ dáyèhé-gǎ nchíanchii, cuu nee ñuyíú te cuu tǐcuèhé núú yóo dàtná tǐcuèhé níñi.

Te davá-á<sup>n</sup> sáá nduu quixi Yáa cúu Xítóhó-yu,

te nduu-ǎ<sup>n</sup> cuu-xi ñ<sup>n</sup> nduu càhnu vihi, chi cada-gá nchaá sá ñà túú xíní-yu, te cuñúhu vihí-yu.

21 Te òré xía<sup>n</sup> te nchaá ñáyiú càhá<sup>n</sup> ndihí ñaha xii Yáa cúu Xítóhó-yu-á<sup>n</sup> naníhí tàhú-yu.

Duha ní xáha<sup>n</sup> Yá Ndiòxi xii ndíi Joél ní chídó tnùní ndíi.

22 Te nchòhó ñáyiú isràél, cundedóho váha-ndo tnúhu na càhá<sup>n</sup>-í-a cuèndá Jèsús téé ñuú Nazàrét. Te Jèsús ní quide-gá chiu<sup>n</sup> Yá Ndiòxi, chi mee Yá Ndiòxi ní chindee ñaha-gá ní quide Jèsús ná daha núú chiu<sup>n</sup>, núú xǎn ní ndacu-gá ní quide-gá nchaá sá vǎ yóo tnàhí ndàcu cada, te xǎn ní cuñúhu vihí-ndo. Te sa nàha-ndo nacuáa ní quide-gá cútnàhá ní xica cuu-gá ñuyíú.

23 Te ndíi Jùdás ní taxi cuèndá ñáhá ndíi Jèsús xii nchòhó cue téé ní cuu úhú iní ñáhá xii-gá, te ní ndúcú-ndó



cuè téé úhú iní-xi ní tñi ñaha-güedë xii-gá te ní sata caa ñaha-güedë núú cùrúxí, te núú cùrúxí-á<sup>n</sup> ñí xíhí-gá. Dico sa ní cutnùní iní Yă Ndiöxí sá dúcá<sup>n</sup> càda-ndo Jesús, te mee Yă Ndiöxí ní cachí-gá sá dúcá<sup>n</sup> ndòho Jesús.

<sup>24</sup> Te ñu-ni mee Yă Ndiöxí ní dándótó-gă Jesús, chi sa ní cáhá<sup>n</sup>-gá sá òré cuú-gá te vá cùú dúcá<sup>n</sup>-gă.

<sup>25</sup> Te ndí Dàvíí téé ní xíndaha ñaha xii cue ñaní tnáhá-ó ñí xíndecu ndéé sanaha ñí chídó tnùní ndí nàcuáa ní cáhá<sup>n</sup> Jesús, te duha ní cáhá<sup>n</sup>-gá:

Cùnùní iní-í sá ncháá ndùu ndecu ndíhí-í Yă Ndiöxí, te ío chindee ñaha-gá xii-í,

te ñá túú tnàhí sá yùhú-í.

<sup>26</sup> Te ío ndàcá<sup>n</sup> táhù-í núú Yă Ndiöxí chi cùdí iní-í, chi sa nàha-í sá cùú-í dico ndoto-í,

<sup>27</sup> chi vá dáñá-gă quíhí<sup>n</sup> dúcá<sup>n</sup> àlmá-í núú ndécú ñáyiú ní xíhí,

te vá dáñá-gă téhyú yiqui cùnú-í chi cùú-í Déhe-gá, te yúhú sa nàha-í sá cùú iní ñáhá-gă xii-í.

<sup>28</sup> Te sa ní cachí tnúhu-gá nàcuáa cada-í cundecu-í ichi váha, te cuendá sá ndécú ndíhí ñaha-gá xii-í núú ío cùdí iní-í.

Duha ní cáhá<sup>n</sup> Jesús, te duca<sup>n</sup> ñí chídó tnùní ndí Dàvíí.

<sup>29</sup> Te nchòhó cue ñaní tnáhà-í, na càchí tnúhu ndáá-í xii-ndo cuendá ndí Dàvíí téé ní xíndecu ndéé sanaha vîhi, chi ní xíhí-dé, te ní chindúxi ñaha-güedë, te nàha-o tnavíí núú ñí chindúxi ñaha-güedë.

<sup>30</sup> Te ndí Dàvíí ní xóo cáhá<sup>n</sup> ndí tnúhu Yă Ndiöxí, te sa nàha ndí sá Yă Ndiöxí ní cáhá<sup>n</sup> ndáá cuíti-gá sá díú-ní ñí tnaha ndí taxi tnùní-dé ñáyiú isràél ndéé cuèé-gá dàtná ní xóo taxi tnùní méé ndí cùtnáhá ní xíndecu ndí, te téé taxi tnùní-á<sup>n</sup> cúú Crìstú chi cùú-gá ñí tnàha ndí.

<sup>31</sup> Te sa ní cutnùní iní ndí sá ndótó Crìstú, núú xíà<sup>n</sup> ní chídó tnùní ndí sá vá dáñá Yă Ndiöxí sá quíhí<sup>n</sup> dúcá<sup>n</sup> àlmá-gá cundecu-xi núú ndécú ñáyiú ní xíhí, te vá dáñá-gă téhyú yiqui cùnú-gá.

<sup>32</sup> Te ndáá chi Yă Ndiöxí ní dándótó-gă Jesús, te nchúhú ní xiní-ndí sá ñí ndoto-gá.

<sup>33</sup> Te ní xáha<sup>n</sup> Yă Ndiöxí xii Jesús sá cundecu ndíhí ñaha-gá, te taxi tnùní Jesús ní caa ní quíhí<sup>n</sup>. Te Yă Ndiöxí ní sáñaha-gă Espíritú-gá ní ngúndecu ndíhí-gá nàcuáa ní xáha<sup>n</sup>-gă, te ñu Jesús ní quide-gá nchaa sá ñí xiní-ndó vitna ndíhí nchaa sá ñí xíndedóho-ndo.

<sup>34</sup> Te ndí Dàvíí ñá túú ní ndáa túú ndí andíu ndíhí yiqui cunú ndí, te òré ndécú-gă ndí ñuyíú-a ní cachí ndí:

Dútú Ndiöxí ní xáha<sup>n</sup>-gă xii Yaá cúú Xítohó-í:

“Ngóo xio cùha-í,

<sup>35</sup> te yúhú cada-í te nchaa sá cúú úhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dútú Ndiöxí xii Yaá cúú Xítohó-í càchí ndí.

<sup>36</sup> Te nchòhó ñáyiú isràél cùu-ndo ndí mee-í, te cuíní-í cundedóho váha-ndo ñí tnúhu na càhá<sup>n</sup>-í-a. Jesús ní sata caa-ndo-gă núú cùrúxí, dico Yă Ndiöxí ní cachí-gá sá Jesús dacăcu nihnu-gá ñáyiú, te vá cání ñí cani úú iní-ndó, chi ñu-gá cùnùu-gá núú nchàa ñáyiú —càchí té Pèlú xáha<sup>n</sup>-dë xii-yu.

<sup>37</sup> Te ñáyiú ní xíndedóho tnúhu ní cáhá<sup>n</sup> té Pèlú ní ndixi túu iní-yu nàcuáa quidé-yu ndécú-yu, te ní xáhá<sup>n</sup>-yu xii-dé ndíhí dava-gá cue téé ní táuchíú<sup>n</sup> Jesús dacuàha ñaha xii-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —càchí-yu xáhá<sup>n</sup>-yu xii-güedé.

<sup>38</sup> Te ní xáha<sup>n</sup> tē Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yă Ndiöxí nchaa yíca cuèchi-ndo. Te cuandute-ndo cuendá quiní-yu sá ñí natuha-ndo ìchi Jesús, te duca<sup>n</sup> te taxi Yă Ndiöxí Espíritú-gá cundecu ndíhí-ndo,

<sup>39</sup> chi cuíní-gá taxi-gá Espíritú-gá xii mee-ndo ndíhí déhe-ndo, te cuáñaha-gă Espíritú-gá xii nchaa ñáyiú ní caa xico ñuyíú, ñáyiú cáhá<sup>n</sup>-gá

cundecu ichi-gá ndéé ìdá-gá —càchí té Pèlú xǎha<sup>n</sup>-dě xií-yu.

40 Te titní-gá tnúhu ní xáha<sup>n</sup>-dě nàcuáa cadá-yu, te xǎha<sup>n</sup> tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sá quidé dǎva-gá-yu —càchí-dé xǎha<sup>n</sup>-dě.

41 Te nchaa ñáyiú ní sándáá iní-xi tnúhu ní cáhá<sup>n</sup> té Pèlú ní sanduté-yu, te ñu-ni nduu-ǎ<sup>n</sup> ní cuu dàtná úní mǐ ñáyiú ní sándáá iní-xi ní xíndecu ndihí ñáyiú xídácuáhá tnúhu Yá Ndiǒxí.

42 Te ío ní xíndedóho-yu tnúhu ní cáhá<sup>n</sup> cue téé ní táuchíú<sup>n</sup> Jèsús dacuàha ñaha xií-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá náhǎ-yu sá dúcá<sup>n</sup> ní quide Jèsús cútnáhá vátá cáhni ñaha-gá-güedé xii-gá, te ní xóo cáhá<sup>n</sup> ndihí-yu Yá Ndiǒxí.

*Nàcuáa ní quide nchaa ñáyiú ní sándáá iní tnúhu Jèsús ndéé díhna nuu*

43 Te nchaá-yu ní cuñúhu vǐhí-yu, chi cue téé ní táuchíú<sup>n</sup>-gǎ dacuàha ñaha xií-yu tnúhu-gá ní quide-güedé titní núú sǎ vǎ yǒo tnàhí ndàcu cada, te xiǎ<sup>n</sup> ní cutnùní iní-yu sá méé Yá Ndiǒxí chíndèe ñaha-gá xii-güedé.

44 Te nchaa ñáyiú sándáá iní tnúhu Jèsús càhá<sup>n</sup> ndihí tnàha váha-yu, te cuèi-ni nchaa ndachìu<sup>n</sup> nandíhi-yu ndècu cahnu.

45 Te ní dícǒ-yu nchaa ndachìu<sup>n</sup> sá ñà túú xìni ñuhú-yu, te ní níhí-yu díhú<sup>n</sup> te ní sáñàhá-yu xii nchaa ñáyiú ñá nihí.

46 Te ñ<sup>n</sup> nduu ñ<sup>n</sup> nduu ní xóo quíhí<sup>n</sup> ndihí tnàhá-yu veñúhu càhnu sá ño cùnuu. Te ní xexi ndihí tnàhá-yu vehé-yu. Te ío ní cudíí iní-yu chi ñ<sup>n</sup>-ni ní cuú-yu nchaá-yu.

47 Te ío ní ndacá<sup>n</sup> táhǎ-yu núú Yá Ndiǒxí, te nchaa dǎva-gá ñáyiú ní cáhá<sup>n</sup> váha-yu cuèndá ñáyiú-á<sup>n</sup>. Te mee Yá Ndiǒxí ní quide-gá ní sándáá iní vai-gá ñáyiú, te ní xíndecú-yu ndihí dǎva-gá ñáyiú xídácuáhá tnúhu-gá.

### 3

*Quide tátna-güedé ñ<sup>n</sup> téé yacua*

1 Te ñ<sup>n</sup> nduu òré caá úní sacuaa, òré xícáhá<sup>n</sup>-yu ndihí Yá Ndiǒxí cuáhá<sup>n</sup> té Pèlú ndihí té Juàá veñúhu càhnu sá ño cùnuu sácúú-xí ñǎyiú isràél.

2 Te ndècu ñ<sup>n</sup> téé yacua, te duca<sup>n</sup>-ni càa-dé ní cacu-dé. Te sàhá<sup>n</sup> ndihí ñáhá-yu veñúhu càhnu sá ño cùnuu, te sàcòo-dé ñ<sup>n</sup> xio yuyèhe veñúhu sá nání Yèhe Vii Caa, chi duca<sup>n</sup> nàni-xi, te xícá<sup>n</sup> ndàhú-dé núú nchaa ñáyiú sàhá<sup>n</sup> veñúhu.

3 Te ní xiní-dé té Pèlú ndihí té Juàá cuánguihu-güedé veñúhu, te xícá<sup>n</sup> ndàhú-dé núú-güedé.

4 Te ní ndacoto-güedé núú-dé, te ní xáha<sup>n</sup> tǎ Pèlú xii téé yacua-ǎ<sup>n</sup>:

—Cundehe ñàha xii-ndí —càchí té Pèlú xǎha<sup>n</sup>-dě xii-dé.

5 Te ní xíndéhe ñàha-dé xii-güedé, chi ní cáhá<sup>n</sup>-dě sá ño ñ<sup>n</sup> sá cuañaha-güedé.

6 Te ní xáha<sup>n</sup> tǎ Pèlú:

—Ñá túú tnàhí díhú<sup>n</sup> néhè-í dico chindee ñàha-í xii-n, te Xítóhó Jesucristú Yaá ní xíndecu ñuú Nazàrét, ndacu-gá cada tátna ñaha-gǎ xii-n, ndacuíñí te caca-n —càchí-dé xǎha<sup>n</sup>-dě.

7 Te té Pèlú ní tní-dé ndaha cùha téé yacua-ǎ<sup>n</sup>, te ní ngüíta-dé ndácàni ñaha-dé, te òré xiá<sup>n</sup> ní naníhí ndéé-dé, te ní ndúha sáhá-dé.

8 Te ní ndacuíñí cunu mee-dé te ní xica-dé, te ní cachí-dé sá ño càhnu cuu Yá Ndiǒxí cuèndá sá ñí ndúha-dé, te ta sǎndava-dé cuánguihu ndihí ñaha-güedé veñúhu.

9 Te nchaa ñáyiú xíndecu-á<sup>n</sup> ní xiní-yu sá ñí nduu váha-dé, te ndèhé-yu ndàcá<sup>n</sup> táhú-dé núú Yá Ndiǒxí.

10 Te ní naquiní ñáhǎ-yu xii-dé sá díú tǎe xícá<sup>n</sup> ndàhú téé ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vǐhí-yu sá ñí ndúha-dé.

*Té Pèlú ní cáhá<sup>n</sup>-dé corredór sá néhé ñuú ndí Salòmón*

11 Te sátá veñúhu càa corredór sá néhé ñuú ndí Salòmón. Yàcá<sup>n</sup> ndécú tǎ Pèlú ndihí té Juàá ndihí téé ní ndúha sáhá-xi, te ñá cuíni téé ní ndúha sáhá-xi-á<sup>n</sup> daña-dé quíhí<sup>n</sup>-güedé dandò ñaha-güedé

xii-dé. Te chítú-yu ní quexìo coyó-yu núú ndécú-güedě, te ní cuñúhu vîhî-yu sá ñî ndúha sáhá tēe cùhú-án.

12 Te té Pèlú ní xiní-dé ní quexìo coyó-yu, te ní xáha<sup>n</sup>-dě xií-yu:

—Nchòhó ñáyiu isràél, ¿ná cuendá ndéé dúcá<sup>n</sup> ndèhe ñaha-ndo xii-ndí te cuñúhu-ndo sá ñî ndúha tēe yacua-ái<sup>n</sup>? Nchòhó cáhá<sup>n</sup>-ndó sá méé-ndí ní quide tátna-ndí-dé sá ïo váha iní-ndí, dico ñáhá chi ñá díú mèe-ndí ní quide tátna-ndí-dé.

13 Chi Yá Ndiöxí ní ndadúha ñaha-gă xii-dé, chi ñu-gá cúú Ndiöxí ndíi Àbrahám ndíi ndíi Isàác ndíi ndíi Jácób, te ñu-ni cue tēe-án cúú ñaní tnáhá-ó ñî xíndecu ndéé sanaha vîhi. Te ñu-ni Ndiöxí-án ñî xáha<sup>n</sup>-gă xii Déhe-gá Jèsús sá táxí tnùnî-gá nchaa sá ïo andíu ndíi nchaa ñáyiu ndècu ñuyíú-a, dico mee-ndo ñî sáha cuendá-ndó Jèsús núú tēe cùchiu<sup>n</sup>. Te té Pilatú ní cuiní-dé dacăcu-dé Jèsús ní cùu, te mee-ndo ñî ní cuiní-ndó.

14 Te Yá Ndiöxí ní cachí-gá sá ïo váha iní Jèsús te ñá túú tnáhí cuéchi-gá. Te mee-ndo ñá túú ní cuiní-ndó căcu-gá ñúu ní xáha<sup>n</sup>-ndo xii té Pilatú sá váha-gá dacăcu-dé ñî tēe ndècu vîhi cuéchi-xi, te vá dacăcu-dé Jèsús.

15 Te ní xáha<sup>n</sup>-ndo sá cáhnî-güedě Jèsús Yaá quidé nchîto-o ndecu-o, dico Yá Ndiöxí ní dándótó ñaha-gá, te ní xiní-ndí sá ndàá ní ndoto-gá.

16 Te nchúhú sa nàha-ndí sá díú Xítohó Jesucristú ní ndadúha-gá tēe yacua, te náí-dé nútnî-a. Te duca<sup>n</sup> ñî quide-gá chi ní sándáá iní ñáhá-dě xii-gá, te vitna ní xiní-ndó sá ndàá ní ndúha-dé.

17 Te nchòhó ndíi cue tēe cùnūu ní sahnî-ndo Xítohó Jesucristú, chi ñá ní cùtnuní iní-ndó sá ñî quide-ndo.

18 Te cue tēe ní xóo cáhá<sup>n</sup> tnúhu Yá Ndiöxí ndéé sanaha ñî chídó tnùnî-güedé năcuáa ní xáha<sup>n</sup> Yá Ndiöxí xii-güedé sá Cristú quixi-gá ñuyíú-a, te ndoho vîhi-gá, te xiă<sup>n</sup> ñúu duca<sup>n</sup> ñî cuu ío ní ndoho-gá.

19 Te vitna te dañá-ndo nchàa sá cuèhé sá dúhá quide-ndo. Te quindáá iní-ndó Yá Ndiöxí, te duca<sup>n</sup> te cada

càhnu iní-gá nchaa sá ñá túú váha ní quide-ndo ñuyíú-a, te canu ichi ñaha-gă xii-ndo ñî ichi váha.

20 Te ní tendaha-gă Cristú ní quixi-gá ñuyíú-a, chi mee Yá Ndiöxí ní cachí-gá sá díú Cristú taunihnu ñaha-gă xii-ndo.

21 Te dacuítí cùndecu-gá andíu ndéé ná sàá nduu nătaxi ndecu-gá nchaa sá ndécú ñuyíú năcuáa sàni iní méé-gă. Te ñu duca<sup>n</sup> ñî cáhá<sup>n</sup> Yá Ndiöxí ñúu duca<sup>n</sup> ñî chídó tnùnî cue tēe ní xóo cáhá<sup>n</sup> tnúhu-gá ndéé sanaha.

22 Te ndíi Moisés ní xáha<sup>n</sup> ndíi xii cue ñaní tnáhá-ó ñî xíndecu ndéé sanaha: “Yá Ndiöxí tendaha-gă ñî tēe quixi-dé cáhá<sup>n</sup>-dé tnúhu-gá dàtná cuiní-ndó ñî quide ñaha-gă xii yúhú, te tēe-án cuu-dé ñî ñaní tnáhá-ndó. Te cundého váha-ndo nchàa tnúhu cáhá<sup>n</sup>-dé.

23 Te nchaa ñáyiu vá quindáá iní tnúhu cáhá<sup>n</sup>-dé, te cuíta nihnú-yu chi vá quíhî-yu núú quíhî ñáyiu sándáá iní tnúhu Yá Ndiöxí”, duha ní xáha<sup>n</sup> ndíi Moisés xií-yu —càchí té Pèlú xáha<sup>n</sup>-dě xií-yu.

24 Te ní xáha<sup>n</sup> tùcu té Pèlú xií-yu:

—Ndíi Sàmuél ndíi nchaa cue tēe nchícú<sup>n</sup>-gá ní xóo cáhá<sup>n</sup> tnúhu Yá Ndiöxí ndéé sanaha ñî cáhá<sup>n</sup>-güedé năcuáa cada-xi vitna.

25 Te Yá Ndiöxí ní cáhá<sup>n</sup>-gá ndíi cue tēe ní cáhá<sup>n</sup> tnúhu-gá ndéé sanaha. Te ní quide ndáá-gá ndíi nchaa ñaní tnáhá-ó ñî xíndecu ndéé sanaha năcuáa cada-gá naníhî tàhú-ó. Te duha ní xáha<sup>n</sup>-gă xii ndíi Àbrahám: “Ío nduu cacu ñî tnàha-n, te tēe-án cada-dé te naníhî tàhú ñáyiu ñuyíú-a”, duha ní xáha<sup>n</sup>-gă xii ndíi Àbrahám.

26 Núu xiă<sup>n</sup> ní tendaha-gă Déhe-gá ní quixi-gá núú ndécú-ndó cuendá dañá-ndo nchàa sá cuèhé sá dúhá quide-ndo, te naníhî tàhú-ndó —càchí té Pèlú xáha<sup>n</sup>-dě xií-yu.

## 4

*Té Pèlú ndíi té Juàá ndécú-güedě ndaha tēe cùchiu<sup>n</sup>*

1 Te té Pèlú ndíi té Juàá càhá<sup>n</sup> dúcá<sup>n</sup>-ni-güedě ndíi ñáyiu, ní quexìo

cue dútú ndihi tée tàxi tnuní ñáhá xii cue té quide cuendá veñúhu càhnu sá ïo cùnuu, ndihi cue tée cùu saducéú.

<sup>2</sup> Te ní cudéé<sup>n</sup>-güedë nchaa-güedé núú tē Pèlú ndihi té Juàá sá xáha<sup>n</sup>-güedë xii ñáyiú sá ndótó ñáyiú ní xíhí dàtná ní ndoto Jèsús.

<sup>3</sup> Te ní tñi ñaha-güedë ní chihí ñaha-güedë vecaá xii-güedé, te ñá ní quide ndáá tée cùchiu<sup>n</sup> cuéchi-güedé nduu-á<sup>n</sup> chi sa ní cuaa.

<sup>4</sup> Te ío vai ñáyiú ní sándáá iní-yu tnúhu ní cáhá<sup>n</sup>-güedé, te ñáyiú-á<sup>n</sup> ndihi ñáyiú sa ní sándáá iní-xi ndéé cãni-gá ní xínu dàtná úhú<sup>n</sup> mĩ mee-ni cuè tée, te ði<sup>n</sup> ñáyiú ðihí ndihi landú.

<sup>5</sup> Te nduu tnéé-á<sup>n</sup> ðiu-ni ñuú Jerusálén-á<sup>n</sup> ñi tacá cue tée yindaha veñúhu, ndihi cue tée cùu sacuéhé núú ñáyiú isràél ndihi cue tée dàcuaha ñaha xii-yu nchaa tnúhu ní chídó tnùní ndí Moisés.

<sup>6</sup> Te tnàhá dútú cùnùu-gá tée nani Anás ndécú ndihi té Caifás, ndihi té Juàá, ndihi té Lijandrú ndihi dava-gá ñani tnàhá dútú cùnùu-gá-á<sup>n</sup> ndécú.

<sup>7</sup> Te ní xáha<sup>n</sup>-güedë xii cue tée xínu cuechi núu-güedë:

—Chí cuàhá<sup>n</sup> queñuhu-ndo tē Pèlú ndihi té Juàá vecaá, te na quixi-güedé iha —càchí-güedé xáha<sup>n</sup>-güedé.

Te ní quexìo té Pèlú ndihi té Juàá núú cuè tée cùnuu, te cue tée cùnuu-á<sup>n</sup> ñi xícá<sup>n</sup> tnúhú-güedé núu-güedé, te xáha<sup>n</sup>-güedé:

—¿Nása ní quide-ndo cuendá tée yacua-á<sup>n</sup>? ¿Yoo ní táuchíu<sup>n</sup> dùca<sup>n</sup> cada-ndo? —cachí-güedé xáha<sup>n</sup>-güedé.

<sup>8</sup> Te ndècu ndihi té Pèlú Espiritú Yá Ndiöxí, núu xiá<sup>n</sup> ní xáha<sup>n</sup>-dë xii-güedé:

—Nchòhó cue tée cùchiu<sup>n</sup> ndihi nchòhó cue tée cùu sacuéhé núú ñáyiú isràél,

<sup>9</sup> te núu cuini-ndó quini-ndó nása ní quide-ndí ní ndúha tée yacua-á<sup>n</sup>,

<sup>10</sup> te cundedóho-ndo ñi tnúhu na cáhá<sup>n</sup>-í-a. Xini ñuhu-xi cundedóho nchaa ñáyiú isràél cuendá quini-yu nàcuáa ní cuu ní ndúha tée-á<sup>n</sup>. Xitohó Jesucristú Yá ní xindecu ñuú Nazàrét ní quide tátna-gá sáhá tēe yacua ní

ndúha, te ðiu-ni-gá ní sata caa-ndo núu cùrúxí te núu cùrúxí-á<sup>n</sup> ñi xíhí-gá, te ní dándótó ñaha Yá Ndiöxí xii-gá.

<sup>11</sup> Te núu tütú Yá Ndiöxí càchí-xi: “Cristú cúu-gá dàtná ñi<sup>n</sup> yúu ndécú xiquí ñi<sup>n</sup> vehe. Te yúu càchí-yu sá ñà túu nandíhi, te ðiu xiá<sup>n</sup> ní nandíhi-xi ní ngúnutñi-xi xiquí véhé”, duha càchí-xi núu tütú-gá. Te duca<sup>n</sup> sàtnahá-xi cùu Jèsús, chi càchí-ndó sá ñà túu nandíhi-gá,

<sup>12</sup> dico Yá Ndiöxí ñá túu ndéé ní tàxi ndecu-gá ingá tée dàcácu nihnu ñaha xii-o núu úhú núu ndàhú, chi ñi<sup>n</sup> ðií-ni Déhe-gá Xitohó Jesucristú dacácu nihnu ñaha-gá xii-o —càchí té Pèlú xáha<sup>n</sup>-dë xii-güedé.

<sup>13</sup> Te té Pèlú ndihi té Juàá ñá túu tūha-güedé, te cùñúhu cue tée cùchiu<sup>n</sup> sá ïo ñi<sup>n</sup> xindáa-güedé. Te ní cutnùní iní cue tée cùchiu<sup>n</sup>-á<sup>n</sup> sá Jèsús ní xica cuu ndihi-güedé, núu xiá<sup>n</sup> ñá túu tnàhí yuhú-güedé càhá<sup>n</sup>-güedé.

<sup>14</sup> Te cuendá ndécú ndihi té Pèlú ndihi té Juàá tée ní ndúha sáhá-xi, núu xiá<sup>n</sup> ñá ní ñihí cue tée cùchiu<sup>n</sup> tnúhu cáhá<sup>n</sup>-güedé.

<sup>15</sup> Te ní xáha<sup>n</sup>-güedë xii té Pèlú ndihi té Juàá sá queé-güedé quehé cuendá ndóo mee-güedé ndatnúhu-güedé.

<sup>16</sup> Te ní xitnàha-güedé:

—¿Nása cada-o úu cue tée-á<sup>n</sup>?, chi nchaa ñáyiú ñuú Jerusálén nàhá-yu sá ñi quide tátna-güedé ñi<sup>n</sup> tée yacua, te xiá<sup>n</sup> xicuñúhu vñhi ñáyiú. Te vá cúu càchí-ó sá ñà ndàá, chi vai ñáyiú ní xiní nàcuáa ní cuu.

<sup>17</sup> Te dayùhú-ó-güedé te cúñaha-o sá vñ cáhá<sup>n</sup>-gá-güedé tnúhu Jèsús, chi núu ñáhá te quindáá-gá iní-yu —càchí-güedé xitnàha-güedé.

<sup>18</sup> Te ní cana tucu-güedé té Pèlú ndihi té Juàá, te xáha<sup>n</sup>-güedé sá vñ dácua<sup>n</sup>-gá-güedé ñáyiú tnúhu Jèsús.

<sup>19</sup> Te té Pèlú ndihi té Juàá ní xáha<sup>n</sup>-güedé:

—Chí cuàha cuendá, te núu sá càchí nchòhó cada-ndí àdi sá cáhá<sup>n</sup> Yá Ndiöxí cada-ndí. Te cada càhnu iní-ndó chi vá cúu cada-ndí sá càchí-ndó, chi cada nahi-ni-ndí sá càchí Yá Ndiöxí.

20 Chi dacuítíi cǎhá<sup>n</sup>-ndíi nàcuáa ní cǎhá<sup>n</sup> Jèsús, te cǎhá<sup>n</sup>-ndíi nchaa sá ní xiní-ndíi ní quide-gá —cǎchí-güedé xǎha<sup>n</sup>-güedé.

21 Te cue tée cùchiu<sup>n</sup> níhi-gá ní cǎhá<sup>n</sup>-güedé xǎha<sup>n</sup>-güedé sá cáda cǎstíu ñáhá-güedé nñu vá dáñá-güedé sá dǎcuàha-güedé ñáyi. Te duca<sup>n</sup> te ní dáñá ñàha-güedé cuánuhú-güedé, chi ñá ní níhí-güedé nása cada-güedé cada castíu ñáhá-güedé, chi nchaá-yu ndàcá<sup>n</sup> táhǔ-yu núú Yǎ Ndiöxí sá ní ndúha tée yacua.

22 Te tée ní quide tátna-güedé-á<sup>n</sup> ndécú-dé vǐhi-gá údico cuía-dé, te ío ní cuñúhu-yu sá ní ndúha-dé.

*Ñáyi sándáa iní tnúhu Jèsús xicán táhǔ-yu núú-gǎ sá vǎ yùhú-yu cǎhá<sup>n</sup>-yu tnúhu-gá*

23 Te ní ndee té Pèlú ndíhi té Juáa cuánuhú-güedé núú ndécú cuè tée cùndíhi-güedé, te ní nacani tnúhu-güedé nàcuáa ní xáha<sup>n</sup> cuè dútú cúnùu ndíhi cue tée cùu sacuéhé nñu ñáyi israél.

24 Te sátá ñí xíndedóho-yu tnúhu ní cǎhá<sup>n</sup>-güedé, te ñ<sup>n</sup>-ni tnúhu ní cǎhá<sup>n</sup>-yu nchaá-yu ndíhi Yá Ndiöxí, te ní xáhǎ<sup>n</sup>-yu xii-gá:

—Yòhó Dútú Ndiöxí, ní cadúha-n àndíu, ní cadúha-n ñyíyú, ní cadúha-n làmár, ní cadúha-n nchàandi túhú sá ío ñyíyú.

25 Te ndíi Dávíi ní sándáa iní ndíi tnúhu ní cǎhá<sup>n</sup>-n, te ní chídó tnùní ndíi nàcuáa ní xáha<sup>n</sup>-n cǎhá<sup>n</sup> ndíi, te ñ<sup>n</sup>-ni Espíritú-n ñí chindee ñàha-xi xii ndíi ní chídó tnùní ndíi, te duha ní chídó tnùní ndíi:

Ñáyi ñá túú cùu ñáyi israél ío cùdèé<sup>n</sup>-yu núú Yǎ Ndiöxí, te cuíni-yu nǎa-yu ndíhi-gá, dico vá ndácǔ-yu chi mee-gǎ cúnùu-gá.

26 Te cue tée yíndaha nació<sup>n</sup> ndíhi cue tée cùchiu<sup>n</sup> tacá-güedé nǎa-güedé ndíhi Dútú Ndiöxí ndíhi Crístú Yaá ní quixi ñyíyú-a.

Duha ní chídó tnùní ndíi Dávíi nàcuáa ndùu tnúhu ní cǎhá<sup>n</sup>-n —cǎchí-yu xáhǎ<sup>n</sup>-yu xii Yá Ndiöxí.

27 Te xáha<sup>n</sup> tucú-yu xii-gá:

—Ndáa ní cǎhá<sup>n</sup> ndíi Dávíi chi ñ<sup>n</sup>-ni ñuú iha ní tacá té Hèrodés ndíhi té Pòncíu Pilatú ndíhi ñáyi ñá túú cùu ñáyi israél ndíhi ñáyi israél ní cǎhá<sup>n</sup> cuèhé-yu cuèndá Jèsús. Te Yòhó Dútú Ndiöxí, Déhe-n cùu Jesús nñu ío váha iní-gá, te ní sáha chiú<sup>n</sup>-n-gá, te ío úhú ní cuu iní ñáhá ñáyi xii-gá.

28 Te ní quide-yu nàcuáa ní sani iní-n cáda-yu ndéé sanaha, ndéé cùtnáhá ní ngáva ñyíyú.

29 Te Yòhó Dútú Ndiöxí sa nàha-n nása cǎhá<sup>n</sup> cue tée cuíni cáda úhú ñáhá xii-ndíi. Te quide-ndíi chiú<sup>n</sup> tahu-n, te vitna chindee ñàha-n xii-ndíi cuèndá sá vǎ yùhú-ndíi cǎhá<sup>n</sup>-ndíi tnúhu-n.

30 Te cada tátna-n ñáyi cùhú, te chindee ñàha-n xii-ndíi, te cada-ndíi nchaa sá vǎ yòo tnàhí ndàcu cada nacuáa cuñúhu vǐhí-yu. Te xiní-ndíi sá méé Jèsús chindee ñàha-gá xii-ndíi, chi quide-gá chiú<sup>n</sup> tahu-n —cachí-yu xáhǎ<sup>n</sup>-yu xii Yá Ndiöxí.

31 Te sátá ñí yáha ní cǎhá<sup>n</sup>-yu ndíhi Yá Ndiöxí, te ní quidi-xi vehe núú xíndecú-yu, te òré-á<sup>n</sup> ñí cutáhú tucú-yu nchaá-yu Espíritú-gá. Te ní cǎhá<sup>n</sup>-yu tnúhu Yá Ndiöxí, te ñá túú tnàhí ni yùhú-yu.

*Cuèndá nchaa ndachiú<sup>n</sup> cǎnehe chiú<sup>n</sup>-yu*

32 Te nchaa ñáyi ní sándáa iní tnúhu Yá Ndiöxí ñ<sup>n</sup>-ni tnúhu ní cǎhá<sup>n</sup>-yu nchaá-yu. ñ<sup>n</sup>-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhǎ-yu nchaa sá xíní ñùhú-yu, te ní ñ<sup>n</sup>-yu ñá túú ní cǎhá<sup>n</sup>-yu sá ndàchiú<sup>n</sup>-yu ñ<sup>n</sup>-ni-ní-yu cùu nchaa sá ndécú ndíhi-yu.

33 Te cue tée ní táuchíu<sup>n</sup> Jèsús dacuàha ñàha xii-yu tnúhu-gá ío váha ní cǎhá<sup>n</sup>-güedé nàcuáa ní cuu ní ndoho Xítoho Jesucristú. Te ío ní chindee ñàha Yá Ndiöxí ní cǎhá<sup>n</sup>-yu tnúhu-gá, te ñá túú ní cǎhá<sup>n</sup> cuèhé dava-gá-yu cuèndá ñáyi dàcuaha tnúhu-gá.

34 Te ñá túú tnàhí ni cùndahú-yu díhú<sup>n</sup>, chi nchaa ñáyi ndècu ndíhi

ñuhu-xi, ndihí nchaa ñáyiù càu vehe-xi ní nadìcò-yu, te da ì<sup>n</sup> da ì<sup>n</sup> ndachìù<sup>n</sup>-yu ní nadìcò-yu òré xíní ñùhú-yu díhú<sup>n</sup>.

<sup>35</sup> Te ní sàñhàhá-yu xii cue téé ní táúchíú<sup>n</sup> Jèsús dacuàha ñaha xii-yu tnúhu-gá, te cue téé-á<sup>n</sup> ñí dácàhñu-güedé nchaa ñáyiù xìnì ñuhu.

<sup>36</sup> Te distrítú Chìpré ndécú ì<sup>n</sup> téé nàni-dé Chèè ñanì tnáhá ndíi Lèví, te ní xóo cunu cuechi-dě veñúhu ñáyiù isràél. Te cuendá sá sàñaha-dě tnúhu ndee ìní xii-yu, xiá<sup>n</sup> nùu ní dánání ñaha-güedé Vèé xii-dé.

<sup>37</sup> Te téé-á<sup>n</sup> ñí nadico-dě luha ñuhu-dé, te nèhe-dé díhú<sup>n</sup> cuáhá<sup>n</sup> núú cuè téé ní táúchíú<sup>n</sup>-gã dacuàha ñaha xii-yu tnúhu-gá.

## 5

*Té Ananiás ndihí tá Sàfirá ñá túú ní quide ndáá-yu*

<sup>1</sup> Te ndècu ì<sup>n</sup> téé nàni Ananiás, te ñadihí-dé nánì-á<sup>n</sup> Sàfirá, te ñáyiù-á<sup>n</sup> ñí nadìcò-yu luha ñuhú-yu.

<sup>2</sup> Te ní taxúha-dé sacú díhú<sup>n</sup>, te sacú-gá néhé-dě cuáhá<sup>n</sup> ní sàñaha-dě xii cue téé ní táúchíú<sup>n</sup> Jèsús dacuàha ñaha xii ñáyiù tnúhu-gá, te ní dándahú ñáhá-dě xii-güedé, chí ní xáha<sup>n</sup>-dě sá ñihí ní sàñaha-dě, te nàha ñadihí-dé sá dúcá<sup>n</sup> ñí quide-dé.

<sup>3</sup> Te ní xáha<sup>n</sup> tẽ Pèlú xii-dé:

—Ananiás, ¿ná cuendá duca<sup>n</sup> ñí quide-n ñí dáñá-n ñí quíhu sácúíhná ìní-n? Te ní dácúándèhnde-n núú Espíritú Yá Ndiòxí, te ní taxúha-n sácú díhú<sup>n</sup> ñí níhí-n cuendá ñuhu-n.

<sup>4</sup> ¿Te ñuhu-á<sup>n</sup> cuendá sá ñúhú mèe-n, àdi díhú<sup>n</sup>-á<sup>n</sup> cuendá sá díhú<sup>n</sup> méé-n cùu-xi, te cuu-ñí cada-n nàcuáa càchí ìní-n càha<sup>n</sup>-n ñá? ¿Ná cuendá duca<sup>n</sup> ñí quide-n? ¿Ná ní quide-xi ìní-n nùu ní dácúándèhnde-n núú Yá Ndiòxí? Chí ñá díú-ní mèe-ni ñáyiù ñí dándahú-n — càchí té Pèlú xáha<sup>n</sup>-dě xii-dé.

<sup>5</sup> Te òré ní ndihí tnúhu ní xáha<sup>n</sup> tẽ Pèlú, te uu<sup>n</sup>ni ní nduá-dé te ní xihí-ni-dé. Te nchaa ñáyiù ní níhí tnúhu sá ñí xihí-dé, te ní yùhú víhí-yu.

<sup>6</sup> Te ní quixi ì<sup>n</sup> ùú cue téé cuechi, te ní ndanehe ñaha-güedé ní sacá<sup>n</sup> ñáhá-güedé núú yuu, te ní ducu<sup>n</sup>

nuu ñaha-güedé yuu-á<sup>n</sup>, te ní xido ñaha-güedé néhé ñaha-güedé cuáhá<sup>n</sup> chindúxi ñaha-güedé xii-dé.

<sup>7</sup> Te ní cuu úú uní òré, te ní quexio ñadihí téé ní xihí-á<sup>n</sup>, te vátá quìní-gá-a<sup>n</sup> sá ñí xihí yíi-a<sup>n</sup>.

<sup>8</sup> Te ní xáha<sup>n</sup> tẽ Pèlú xii-a<sup>n</sup>:

—Cuìní-í cachí tnúhu ndáá-n. ¿Ndédau ní dícó-ndó ñuhu, ní dícó-ndó nàcuáa ní cachí yíi-n á<sup>n</sup>? —càchí té Pèlú xáha<sup>n</sup>-dě xii-a<sup>n</sup>.

Te ní xáha<sup>n</sup>-a<sup>n</sup>:

—Ndáá sá díú-ní dùca<sup>n</sup> —cachí-a<sup>n</sup> xáha<sup>n</sup>-a<sup>n</sup>.

<sup>9</sup> Te ní xáha<sup>n</sup> tẽ Pèlú:

—¿Ná cuendá duca<sup>n</sup> ñí chitnàha tnúhu-ndo dùca<sup>n</sup> ní quide-ndo ñí cuini-ndó dándahú-ndó Espíritú Yá Ndiòxí? Quini-n, chí sa cuándixi cue téé ní sáhá<sup>n</sup> ní chindúxi yíi-n, te yòhó tnáhá-n càndeca ñaha tucu-güedé xii-n quíhí vitna —càchí-dé xáha<sup>n</sup>-dě xii-a<sup>n</sup>.

<sup>10</sup> Te òré-á<sup>n</sup> ñí nduá-a<sup>n</sup> núú tẽ Pèlú, te ní xihí-ni-a<sup>n</sup>. Te cuándihu cue téé cuechi-á<sup>n</sup> xití vehe, te ní xiní-güedé sá sá ní xihí-a<sup>n</sup>, núú ní xido ñaha tucu-güedé cuáhá<sup>n</sup> chindúxi-güedé-a<sup>n</sup> diñi yíi-a<sup>n</sup>.

<sup>11</sup> Te ní yùhú víhí ñáyiù ní sándáá ìní tnúhu Yá Ndiòxí, ndihí dava-gá ñáyiù ní níhí tnúhu nàcuáa ní cuu.

*Ní quide-güedé titní núú sã vã yõo tnàhí ndàcu cada te ío ní cuñúhu ñáyiù*

<sup>12</sup> Te cue téé ní táúchíú<sup>n</sup> Jèsús dacuàha ñaha xii-yu tnúhu-gá titní víhí sã vã yõo tnàhí ndàcu cada ní quide-güedé, te ní cuñúhu víhí-yu. Te nchaa ñáyiù ní sándáá ìní-xi tnúhu Jèsús ní xóo tacá-yu corrèdór néhé diù ndíi Salòmón.

<sup>13</sup> Te nchaa ñáyiù ñá túú dàcuaha tnúhu-gá ñá ní cùyíi-yu chitnahá-yu ñáyiù ní sándáá ìní-xi tnúhu-gá, dico ncháa-yu ní cáhá<sup>n</sup> váha-yu cuendá ñáyiù ní sándáá ìní-xi tnúhu-gá.

<sup>14</sup> Te vài téé, vài ñadihí ní sándáá ìní-yu tnúhu-gá.

<sup>15</sup> Te cuendá sá ñí níhí-yu tnúhu sá quidé tãtna cue téé ní xica cuu ndihí Jèsús, núú xiá<sup>n</sup> ní queñuhú-yu nchaa ñáyiù cùhú ichi, te davá-yu ní quide túha-yu camá te davá-yu ní

quide túha-yu yuu, núu núu nchàa xíã<sup>n</sup> tá sàcá<sup>n</sup>-yu cue ñáyi cuhú-án cuáhá<sup>n</sup>, te xíã<sup>n</sup> cáã-yu ndètú-yu, chi ní sani iní-yu sá òré yáha té Pèlú te cuèdicó cuándáhú-dé yáha ndodo ñaha-xi xii-yu te ndúha-yu.

<sup>16</sup> Te ní quixi ñáyi ñuú yatni Jerusálén ndécã-yu ñáyi cuhú, ndihi ñáyi yíhi ñaha espíritú cundíhi yucu ñávaha ní quixi, te nchaá-yu ní ndúha.

### *Ío ní quide úhú-güedé té Pèlú ndihi té Juáá*

<sup>17-18</sup> Te dútú cúnú-gá ndihi cue té cùu saducéú cue té cundíhi-dé ní cudéé<sup>n</sup>-güedé sá ïo chítú-yu dâcuaha tnúhu Jèsús, núu xíã<sup>n</sup> ní tñi-güedé cue té ní táuchíú<sup>n</sup> Jèsús dacuaha ñaha xii-yu tnúhu-gá ní chihi ñaha-güedé vecaá.

<sup>19</sup> Te xití niú-án ñi quexio ñi espíritú xínú cuèchi núu Yá Ndióxi ní nacaá<sup>n</sup>-xi yèhe vecaá ní quee-güedé, te ní xáha<sup>n</sup>-xi xii-güedé:

<sup>20</sup> —Quíhí<sup>n</sup>-ndó veñúhu cãhnu sá ïo cúnúu te cúñaha-ndo xii ñáyi nâcuáa cadá-yu naníhi tãhú-yu —càchí espíritú-án xáha<sup>n</sup>-xi xii-güedé.

<sup>21</sup> Te sá dúcá<sup>n</sup> ñi xáha<sup>n</sup>-xi ñu sátá ñi túndaá, te ní sáhá<sup>n</sup>-güedé veñúhu cãhnu sá ïo cúnúu sá cúu-xi ñáyi isráel ní dâcuáhá ñaha-güedé xii-yu.

Te dútú cúnú-gá ndihi cue té cundíhi-dé ní nadatãcã tñáhá-güedé ndihi ncha cue té cùu sacuéhé ñuú ñáyi isráel ndihi cue té cùchiu<sup>n</sup>, te ní tendaha-güedé sandàdú cuáhá<sup>n</sup> queñuhu-güedé cue té yíhi vecaá ní cùu.

<sup>22</sup> Te ní quexio-güedé yèhe vecaá, te ní xiní-güedé sá ñi ñi-gá cue té dâcuaha ñaha xii ñáyi tnúhu Jèsús ña túu-gã-güedé yíhi. Te cuánuhú-güedé

<sup>23</sup> ní xitñúhu-güedé cue té cùchiu<sup>n</sup>, te xáha<sup>n</sup>-güedé:

—Ní sáhá<sup>n</sup>-ndí ní sándéhé-ndí vecaá, te ndéé chóo-ñi, te xindecu-ñi sandàdú cue té xindeé yèhe vecaá. Te ní nacaá<sup>n</sup>-ndí vecaá, te vá yõ ñi-gá yíhi —càchí-güedé xáha<sup>n</sup>-güedé.

<sup>24</sup> Te sá dúcá<sup>n</sup> ñi xáha<sup>n</sup>-güedé, te cuáhá<sup>n</sup> iní cue dútú cúnú ndihi té

tãxi tnuní cue té xindeé veñúhu cãhnu sá ïo cúnúu, te ní xitñaha-güedé:

—¿Nása cada-xi vitna duha càa ní cuu ní xinú cue té yíhi vecaá-i? —càchí-güedé xitñaha-güedé.

<sup>25</sup> Te ní quexio ñi té ní xáha<sup>n</sup>-dè:

—Cundedóho-ndo na càchí tnúhu-í ñi tnúhu. Cue té ní chihi-ndo vecaá ndécú-güedé veñúhu cãhnu sá ïo cúnúu dacuaha-güedé ñáyi —càchí-dé xáha<sup>n</sup>-dè.

<sup>26</sup> Te cue té ndéé veñúhu ndihi té tãxi tnuní ñáhá xii-güedé cuánguaca ñaha-güedé, te ña túu ní quide úhú ñáhá-güedé, chi ní yuhú-güedé cuáha yúu ñáhá ñáyi dii ñuú-xi-án.

<sup>27</sup> Te ní ndexio ndihi ñaha-güedé núu cuè té cùu sacuéhé ndihi núu cuè té cùchiu<sup>n</sup>. Te dútú cúnú-gá ní ngúita-dé ténã ñáhá-dé xii-güedé, te xáha<sup>n</sup>-dè:

<sup>28</sup> —Te náa ña díu ñi cachí-ndí sá vã dacuaha-gá-ndó ñáyi tnúhu Jèsús te dâcuaha-ñi-ndó-yu, te vitna ncha ñáyi ñuú Jerusálén ní níhi-yu tnúhu nâcuáa cãhá<sup>n</sup>-ndó. ¿Te ná cuendã duca<sup>n</sup> quide-ndo, te càchí-ndó sã nchúhú ndécuéchi-ndí ní sañi-ndí Jèsús-i? —càchí dútú cúnú-gá xáha<sup>n</sup>-dè xii-güedé.

<sup>29</sup> Te té Pèlú ndihi dava-gá cue té ní táuchíú<sup>n</sup> Jèsús dacuaha ñaha xii-yu ní xáha<sup>n</sup>-güedé xii cue té cùchiu<sup>n</sup>:

—Nchúhú, Yá Ndióxi cúnú-gá sandáá iní-ndí tnúhu cãhá<sup>n</sup>-gá dâcúxí tñúhu cãhá<sup>n</sup> ñáyi.

<sup>30</sup> Te nchòhó ní sata caa-ndo Jèsús núu cùrúxí te núu cùrúxí-án ñi xíhí-gá, dico ní dándótó ñaha Yá Ndióxi xii-gá. Te Yá Ndióxi ní sandáá iní cue ñani tñáhá-ndí ní xindecu ndéé sanaha.

<sup>31</sup> Te Yá Ndióxi ní xáha<sup>n</sup>-gã sá cundecu Jesús xio cùha-gá cuendã taxi tñuní-gá te dacãcu nihnu-gá ñáyi isráel núu úhú núu ndáhú. Te duca<sup>n</sup>-ni dacãcu nihnu-gá ncha ñáyi na dàña ncha sá cuéhé sá dúhá, te cada cãhnu iní-gá ncha yíca cuèchi-yu.

<sup>32</sup> Te ní xiní-ndí nâcuáa ní quide-gá, núu xíã<sup>n</sup> cáni-ndí cuendú núu nchàa ñáyi, te Espíritú Yá Ndióxi chindé

ñaha-xi xii-ndí cãhá<sup>n</sup>-ndí tnúhu-gá. Te ðiu-ni Espiritú-gá ní sãñaha-gã xii nchaa ñáyiu ní sãndáá iní-xi tnúhu-gá —cãchí té Pèlú ndihi dava-gá-güedé xãha<sup>n</sup>-güedë xii cue tée cùchiu<sup>n</sup>.

33 Te sátá dúcá<sup>n</sup> ñí xãha<sup>n</sup>-güedë xii cue tée cùchiu<sup>n</sup>, te ní cudéé<sup>n</sup>-güedë, te ní ndatnúhu-güedé sá cáhni ñaha-güedé.

34 Te ñ<sup>n</sup> tée cùu fariséu tnàha-dé cúu-dë chiú<sup>n</sup>, te nàni-dé Gamaliél, te cùu-dé mèstrú dácua<sup>n</sup>-dë ñáyiu nàcuáa ní chídó tnùní ndí Moisés, te ío yíñùhu cãhá<sup>n</sup> ndihi ñàhá-yu xii-dé. Te ní ngúnutnì-dé, te ní xãha<sup>n</sup>-dë sá ná quèe tnaa té Pèlú ndihi dava-gá-güedé quehé.

35 Te ní xãha<sup>n</sup>-dë xii cue tée cùchiu<sup>n</sup>:

—Nchòhó cue tée isràél, xini ñuhu-xi sá cání vãha iní-ndó nãsa cada-ndo ndihi cue tée-ã<sup>n</sup>.

36 Chi ní cunaha ñí xíndecu ñ<sup>n</sup> tée ní xínani Tèudás, te ní cachí-dé sá cùnùu-dé, te ní cundihí-dé dàtná cúmí cièndú cue tée, te ñá ní cuíní-güedé cuu ñ<sup>n</sup>nuu-güedë ndihi cue tée cùchiu<sup>n</sup>. Te ní sahani ñaha cuè tée cùchiu<sup>n</sup>-ã<sup>n</sup> xii tée Tèudás, te ní ndihi cue tée ní xica cuu ndihí-dé ní xité nuu-güedé, te ñá túú-gã ní quide-güedé nàcuáa ní sani iní-güedé cada-güedé.

37 Te sátá nì xíhí tée-ã<sup>n</sup>, te ní tnahá nduu núcódó tnùní ñáyiu. Te dàvá-ã<sup>n</sup> ñí xíndecu ñ<sup>n</sup> tée ðistrítú Galiléa ní xínani-dë Jüdás. Te titnì-güedé ní chitnahá ñàhá-güedë xii-dé. Te tnàhá-dé ní sahani ñaha tùcu cue tée cùchiu<sup>n</sup>, te nchaa cue tée ní xica cuu ndihí-dé ní xité nuu-güedé.

38 Te na cãchí tnúhu-í sá dáñá-ndó cuè tée-ã<sup>n</sup>, te ní ñà túú nãgá tnúhu cúñaha-ndo xii-güedé, chi núu chiú<sup>n</sup> mee-güedé quidé-güedë te cuíta-güedé,

39 dico núu chiú<sup>n</sup> Yá Ndiõxí quidé-güedë, te vá ndínihnu chiú<sup>n</sup> quide-güedé. Te núu quide-güedé chiú<sup>n</sup> Yá Ndiõxí, te vá nàá-ndó ndihí-güedé, chi Yá Ndiõxí nàá ndihí-ndo sã dúcá<sup>n</sup> xíquide-ndo —cãchí té Gamaliél xãha<sup>n</sup>-dë xii cue tée cùchiu<sup>n</sup>.

40 Te nchaa-güedé ní cãhá<sup>n</sup> sá tnúhu ndáá cãhá<sup>n</sup>-dë. Te dàtnùní ní nacana tucu-güedé té Pèlú ndihi dava-gá-güedé te ní caniha-güedë, te ní cãhá<sup>n</sup> níhi-güedé, te xãha<sup>n</sup>-güedë sá vã cãhá<sup>n</sup>-gã-güedé tnúhu Jèsús, te dàtnùní ní dáñá ñaha-güedé cuánuhú-güedé.

41 Te ío ní cudí<sup>n</sup> iní-güedé, chi mee Yá Ndiõxí ní cachí-gá sá dúcá<sup>n</sup> ndòho-güedé dácua<sup>n</sup>-güedé ñáyiu tnúhu Jèsús.

42 Te ñ<sup>n</sup> nduu ñ<sup>n</sup> nduu ní dácua<sup>n</sup>-güedë ñáyiu xití veñúhu càhnu sá ío cùnùu ndihi nchaa vehé-yu. Te ní xãha<sup>n</sup>-güedë xií-yu sá Jèsús cúu-gã Crístú Yáa ní quixi ñuyíú-a.

## 6

*Ní ndúcú-güedë úsá cue tée cundecu dacãhñu sá cáxí ñáyiu*

1 Te ðiu-ni dàvá-ã<sup>n</sup> ñí sãndáá iní vài ñáyiu tnúhu Jèsús. Te cue ñáyiu griégú ní cãhá<sup>n</sup> cuèhé-yu cuèndá ñáyiu isràél, sá ñáyiu ðihí ñáyiu quèe ñáyiu cãhá<sup>n</sup> tnúhu griégú ñá túú tnàhá sá cáxí-yu, chi ñá túú sãñaha ñ<sup>n</sup>nuu-güedé.

2 Te cue tée úxúú ní táuchíú<sup>n</sup> Jèsús dácua<sup>n</sup>-güedé ñaha xií-yu tnúhu-gá, cue tée-ã<sup>n</sup> ñí cana-güedé nchaa ñáyiu sãndáá iní tnúhu Jèsús. Te ní xãha<sup>n</sup>-güedë xií-yu:

—Nchúhú chi vá cúu dàcãhñu-ndí sá cáxí-yu, chi mee-ni tnúhu Yá Ndiõxí cãhá<sup>n</sup>-ndí.

3 Te nchòhó cue tée ndècu ndihí-ndí ichi Xítohó Jesucristú cãhá<sup>n</sup> ndihí-ndo úsá cue tée xíndecu iha, cue tée cãhá<sup>n</sup> ndihí ñàhá-yu mee-ni tnúhu yíñùhu, cue tée ndècu ndihí Espiritú Yá Ndiõxí, mee-ni cuè tée cùtnuní váha iní-xi. Te cue tée-ã<sup>n</sup> cuãha-ndí-güedé chiú<sup>n</sup> cada-güedé dacãhñu-güedé sá cáxí-yu.

4 Te nchúhú mee-ni Yá Ndiõxí cãhá<sup>n</sup> ndihí-ndí, te mee-ni tnúhu-gá dácua<sup>n</sup>-ndí-yu —cãchí-güedé xãha<sup>n</sup>-güedë xií-yu.

5 Te nchaá-yu ní tñí-yu tnúhu ní cãhá<sup>n</sup>-güedé, núu ní ndúcú-yu cue tée



cada chi<sup>n</sup>-án. Te ñ<sup>n</sup>-dé nání-dě Těvá, te ío váha sándáá iní-dé Yă Ndiöxí, te ndècu ndihí-dé Espiritú-gá. Te duha ní xínani dàva-gá-güedé: té Lìpé, té Pröcoró, té Nicànor, té Tìmon, té Pàrmenás, té Lăxí tée ñuú Antiòquia tée ní sándáá iní-xi sá dăcuàha ñáyiu isràél te vitna ní sándáá iní-dé tnúhu Jèsús.

<sup>6</sup> Te úsá cue tée-á<sup>n</sup> ñí sáhá<sup>n</sup>-güedé núú cuè tée úxúú ní táuchíú<sup>n</sup> Jèsús dăcuàha ñaha xii-yu tnúhu-gá, te cue tée úxúú-á<sup>n</sup> ñí cáhá<sup>n</sup> ndihí-güedé Yă Ndiöxí, te ní sacá<sup>n</sup> ndodo-güedé ndaha-güedé díquí cuè tée úsá-á<sup>n</sup>.

<sup>7</sup> Te ñáyiu ní sándáá iní tnúhu Jèsús cuáhá<sup>n</sup>-yu titní xichi cáhá<sup>n</sup>-yu tnúhu-gá. Te vâi-gá ñáyiu ta sándáá iní-yu tnúhu-gá cuáhá<sup>n</sup>, te ní xíndecú-yu ndihí dăva-gá ñáyiu dăcuaha tnúhu-gá ñuú Jerusálén. Te titní dútú ñí sándáá iní-güedé tnúhu-gá.

### *Ní tñi-güedé té Těvá*

<sup>8</sup> Te té Těvá ní quide-dé titní núú să vă yôo tnàhí ndàcu cada, te ní cuñúhu vîhí-yu sá dúcá<sup>n</sup> ñí quide-dé, te duca<sup>n</sup> ñí quide-dé chi ndècu ndihí-dé Yă Ndiöxí chíndèe ñaha-gá.

<sup>9</sup> Te ní xíndecu cue tée ní xóo cunu cuechi núú ñ<sup>n</sup> tée tàxi tnuní, te tée tàxi tnuní-á<sup>n</sup> ñă ní xôo dăña tnàhí-dé quee-güedé núú chíú<sup>n</sup>-dë, te ní xinu-ná-güedé. Te sátá xă<sup>n</sup>, te ní dácáá-güedé veñúhu-güedé, te veñúhu-á<sup>n</sup> sáhá<sup>n</sup> ñáyiu ñuú Cirené, ñáyiu ñuú Alejándriá, ñáyiu ñuú Cìliciá, ndihí ñáyiu distrítú Àsiá. Te nchaa ñáyiu-á<sup>n</sup> ñí nàá ndihí-yu té Těvá.

<sup>10</sup> Te ñá ní ñihí-yu tnúhu cáhá<sup>n</sup>-yu, chi ío váha ní sáá díquí-dë năcuáa ní xáha<sup>n</sup>-dë xii-yu, chi Espiritú Yă Ndiöxí ní chindee ñaha-xi xii-dé.

<sup>11</sup> Te ní cháhu-yu cue tée ní dăcuándèhnde tnúhu ní cáhá<sup>n</sup> té Těvá núú-yu. Te ní xáha<sup>n</sup>-güedé sá cáhá<sup>n</sup> cuèhé-dé cuendá ndí Moisés ndihí cuendá Yă Ndiöxí.

<sup>12</sup> Te cuendá sá dúcá<sup>n</sup> ñí dăcuándèhnde núú ní sándáá iní-yu, te ní cudéé<sup>n</sup>-yu núú tē Těvá. Te ní cudéé<sup>n</sup> cue tée

cúu sacuéhé, te tnàhá cue tée dăcuaha ñaha xii-yu nchaa tnúhu ní chídó tnúní ndí Moisés ní cudéé<sup>n</sup>-güedé. Te ní sáhá<sup>n</sup>-güedé ní tñi-güedé té Těvá ndécá ñaha-güedé cuáhá<sup>n</sup> núú quidé cuè tée cùchiu<sup>n</sup> jundá, ndihí cue tée cúu sacuéhé.

<sup>13</sup> Te ndécá-yu cue tée dăcuandehnde cuáhá<sup>n</sup> núú quidé-güedé jundá, te ní quesaha-ni tūcu-güedé cáhá<sup>n</sup> cuèhé-güedé, te xăha<sup>n</sup>-güedé:

—Tée-a mee-ni cáhá<sup>n</sup> cuèhé-dé cuendá veñúhu sá ío cūnuu, veñúhu ní cuu íi, te cáhá<sup>n</sup> cuèhé-dé cuendá nchaa sá ñí chídó tnúní ndí Moisés.

<sup>14</sup> Te ní tecú dóho-ndí cāchí-dé sá Jèsús tée ñuú Nazàrét dangoyo-dé veñúhu cāhnu sá ío cūnuu te vá dāñá-gă-dé cada-ndí năcuáa ní cachí ndí Moisés cada-ndí —cāchí-güedé xăha<sup>n</sup>-güedé.

<sup>15</sup> Te nchaa cue tée ndècu jundá ní ndacoto váha-güedé núú tē Těvá. Te ní dáyèhé-xi núú-dë dātná quidé-xi núú espíritú xínú cuèchi núú Yă Ndiöxí.

## 7

### *Té Těvá xăha<sup>n</sup>-dë sá ña túú cuèchi-dé*

<sup>1</sup> Te ní xáha<sup>n</sup> dútú cúnū-gá xii-dé:

—¿Ndáá tnúhu cáhá<sup>n</sup>-güedé cuendá-n-ă<sup>n</sup>? —cāchí-dé xăha<sup>n</sup>-dë.

<sup>2</sup> Te té Těvá ní xáha<sup>n</sup>-dë xii-güedé:

—Nchòhó cue ñaní tnáhà-í ndihí nchòhó cue tée cúu sacuéhé, cund-edóho-ndo ñ<sup>n</sup> tnúhu na cáhá<sup>n</sup>-í-a. Yă Ndiöxí ío cūnuu-gá, te ní cáhá<sup>n</sup> ndihí-gá ndí Àbrahám nació<sup>n</sup> Mesopòtamiá cútnàhá vátá quihí<sup>n</sup>-gá ndí cundecu ndí ñuú Hārán.

<sup>3</sup> Te ní xáha<sup>n</sup>-gá xii ndí: “Dăña-n nchàa ñaní tnáhá-n, te dăña-n ñūhu-n, te quihí<sup>n</sup>-n ñ<sup>n</sup> xichi núú dānèhé ñáhà-í cundecu-n”, duha ní xáha<sup>n</sup> Yă Ndiöxí xii ndí Àbrahám.

<sup>4</sup> Te sátá dúcá<sup>n</sup> ñí xáha<sup>n</sup> Yă Ndiöxí xii ndí Àbrahám, te ní ndee ndí ñuú Căldeá, te cuáhá<sup>n</sup> ndí cundecu ndí ñuú Hārán. Te sátá ñí xihí tātá ndí, te ní xáha<sup>n</sup> Yă Ndiöxí quixi ndí cundecu ndí núú ndécú-ó vitna.

<sup>5</sup> Te Yă Ndiöxí ña túú ní săñaha-gă ñí lūha ñūhu cuu cuendá ndí núú ñí xíndecu ndí. Te ní xáha<sup>n</sup> ndăá Yă

Ndiöxí xii ndíi sá cuãñaha-gã ñuhu cuu cuendá ndíi, te na cùú ndíi, te ndóo ndihí nchaa ñaní tnáhá ndíi cacu túu ndéé cuéé-gá. Te duca<sup>n</sup> ñí xáha<sup>n</sup>-gã cuéi vátá cündecu-gá ni ñí<sup>n</sup> déhe ndíi.

6 Te ní xáha<sup>n</sup> tucu Yá Ndiöxí xii ndíi Ábrahám sá díú-ní ñaní tnáhá ndíi quíhí<sup>n</sup>-yu núu xíca cündecú-yu cúmí ciendú cuíá, te vá dáññ-yu queé-yu núu chíú<sup>n</sup>-yu, te ío dandòho ñaha-güedé núu cündecú-yu. Duha ní xáha<sup>n</sup> Yá Ndiöxí xii ndíi, te ndáá duca<sup>n</sup> ñí cuu.

7 Te ní xáha<sup>n</sup> tucu Yá Ndiöxí xii ndíi Ábrahám: “Yúhú dandòho-ínchaa ñáyíu na dandòho ñaha xii cue ñaní tnáhá-n. Te dàvá-á<sup>n</sup> te ndee cue ñaní tnáhá-n núu cündecú-yu, te quixí-yu chiñuhu ñahá-yu xii-í iha”, duha ní xáha<sup>n</sup> Yá Ndiöxí xii ndíi Ábrahám, te ndáá duca<sup>n</sup> ñí cuu.

8 Te Yá Ndiöxí ní quide ndáá-gá ndihí ndíi Ábrahám, te ní xáha<sup>n</sup>-gã xii ndíi sá cuãha-güedé señá ñí<sup>n</sup> nchaa landú téé cuendá cunáhá-yu nacuáa ndùu sá ñí quide ndáá-gá ndihí ndíi Ábrahám. Núu xíá<sup>n</sup> núu ùná nduu sá ñí cacu té Isàác déhe ndíi Ábrahám, te ní sáha ndíi señá ñí<sup>n</sup>-dé. Te díu-ní duca<sup>n</sup> ñí quide tucu té Isàác déhe-dé té Jácób, te díu-ní duca<sup>n</sup> ñí quide té Jácób, chi úxúú déhe-dé ní xíndecu, te nchaa-güedé duca<sup>n</sup> ñí quide-dé. Te ndí ùxúú cue téé-á<sup>n</sup> ñí cuu-güedé ñaní tnáhá-ó.

9 Te ñí<sup>n</sup> déhe té Jácób ní xínani-dě Chèé. Te ñá ní cùú váha iní cue ñaní-dé núú-dě, núu ní díco ñaha-güedé ní quehe<sup>n</sup> ñaha cuè téé cuáhá<sup>n</sup> nació<sup>n</sup> Ègiptú, te Yá Ndiöxí ñá ní dàña ñaha-gá xii-dé cuíta nihnu-dé.

10 Te ní chindee ñaha-gá xii-dé ní cacu-dé cúnahá ní ndoho vìhi-dé, Te téé yíndaha Ègiptú ío ní cudíí iní-dé té Chèé, te ní cutnùní iní-dé sá ío váha túha té Chèé, te duca<sup>n</sup> ñí cutnùní iní-dé, chi Yá Ndiöxí ní chindee ñaha-gá xii té Chèé. Te ní xáha<sup>n</sup> téé yíndaha Ègiptú xii té Chèé sá díú tẽ Chèé coo-dé gobièrnú Ègiptú, te taxi tnùní-dé nchaa ñáyíu xínu cuechi núu téé yíndaha Ègiptú-á<sup>n</sup>.

11 Te ní quíhu tnamá ñíhí nació<sup>n</sup> Ègiptú ndihí nació<sup>n</sup> Cànaá, te ío ní ndohó-yu. Te nchaa ñaní tnáhá-ó ñí xíndecu ndéé sanaha ñá ní xõo níhí-gã-yu sá cáxí-yu.

12 Te ní níhí tẽ Jácób tnúhu sá ío triú Ègiptú, núu ní tendaha-dẽ cue déhe-dé ní sáhá<sup>n</sup>-güedé ní ságuaa<sup>n</sup>-güedé triú-á<sup>n</sup>, te dàvá-á<sup>n</sup> ñí sáhá<sup>n</sup> cue ñaní tnáhá-ó xito díhna nuu nació<sup>n</sup> Ègiptú.

13 Te xito cùú uú cuáhá<sup>n</sup>-güedé, te ní xáha<sup>n</sup> tẽ Chèé sá ñaní-dé cúú-güedé. Te téé yíndaha Ègiptú ní cutnùní iní-dé sá díú-ní ñaní té Chèé cúú-güedé.

14-15 Te ní cana té Chèé tãtã-dě té Jácób ndihí nchaa ñaní tnáhá-dẽ. Te cùu-xi datná únídico sáhú<sup>n</sup>-yu ndèca té Jácób cuáhá<sup>n</sup> nació<sup>n</sup> Ègiptú núu ndécú tẽ Chèé, te xíá<sup>n</sup> ñí quexió-yu ní ngóo-yu. Te yàcá<sup>n</sup> ní xíhí té Jácób ndihí nchaa déhe-dé cue ñaní tnáhá-ó.

16 Te sátá ñí cuu titní cuíá, te ní natava-güedé yiquí ndíi Jácób ndihí nchaa déhe ndíi nchido-güedé cuáhá<sup>n</sup> ñuu Síquém. Te ndíi Ábrahám sa ní cuu titní-gá cuíá sã ñí nacuaa<sup>n</sup> ndíi ñuhu núu cuè déhe ndíi Hámór. Te xíá<sup>n</sup> nchíi yaú ní nachínduxi-güedé yiquí-á<sup>n</sup>.

17 Te cútnahá vátá nátava-gá-güedé yiquí cue ndíi, te sa ta tnáhá yatni cada Yá Ndiöxí nacuáa ní xáha<sup>n</sup>-gã xii ndíi Ábrahám cada-gá sá cúú-xí ñáyíu isràél ndécú Ègiptú, te ta cãyá víhí-yu cuáhá<sup>n</sup>.

18 Te dàvá-á<sup>n</sup> chi ingá téé yíndaha nació<sup>n</sup> Ègiptú, te ñá túú-gã ní xíní-dé nása ní xóo cada ndíi Chèé.

19 Te téé yíndaha Ègiptú ñá ní quide ndáá-dé, chi ío ní dándóhó-dě ñaní tnáhá-ó ñí xíndecu dàvá-á<sup>n</sup>. Te ní táuchíú<sup>n</sup>-dẽ sá xócuíñí-yu dándóo-yu déhe yiquí<sup>n</sup> cuendá ndihí-güexi cuú.

20 Te dàvá-á<sup>n</sup> ñí cacu té Moisés, te ío ní cudíí iní ñahá Yá Ndiöxí xii-dé. Te ní xíndecu ndihí ñaha náná-dě ndihí tãtã-dě úní-ní yóó.

21 Te ndèca ñahá-yu cuáhá<sup>n</sup> ingá xichi, te yàcá<sup>n</sup> ní dándóo ñahá-yu

xii-dé, te ní naníhí ñáhá dèhe yoco té yìndaha Egiptú, te ní xito-xi-dé dàtná xító-xí ì<sup>n</sup> dèhe mee-xi nǐ xito-xi-dé ndéé ní sahnu-dé.

22 Te ní cutúha-dé nchaa sá xìní cue téé ègiptú, te ío váha ní sáa díquí-dě tnúhu cáhá<sup>n</sup>-dé ndíhi nchaa sá cáda-dě.

23 Te cútnàhá ndécú-dě údico cuíá-dě, te ní cachí-dé sá quihí<sup>n</sup>-dé cáhá<sup>n</sup> ndíhi-dé cue ñaní tnáhá-dě ñáyiú isràél.

24 Te ní xiní-dé ní caniha ì<sup>n</sup> téé ègiptú xii ì<sup>n</sup> téé isràél, te ñá ní cùndee iní-dé cundehe-dě nǔu ní sáhá<sup>n</sup>-dé ní chindee-dě téé isràél, te ní sahní-dé téé ègiptú,

25 chi ní cachí Yă Ndiöxí sá díú-dě dacăcu-dé ñaní tnáhá-dě ñáyiú isràél núu cuè téé ègiptú. Te ní sani iní-dé sá cùtnùní iní-yu năcuáa ní xáha<sup>n</sup> Yă Ndiöxí xii-dé, dico ñá túú ní cùtnuní iní-yu.

26 Te nduu tněé ní xiní-dé năá úú cue téé isràél, te ñá túú ní tnáhá iní-dé năá-güedé nǔu ní xáha<sup>n</sup>-dě xii-güedé: “¿Ná cuendá duca<sup>n</sup> xĩnăá-ndó? ¿Náa ñá díú ndimee-ndo núu duca<sup>n</sup> xĩnăá-ndó?” Duha ní xáha<sup>n</sup> tē Moisés xii-güedé.

27 Te téé ndècuéchi ní sáhá<sup>n</sup>-dé ní chindaha ñihnu-dé té Moisés ì<sup>n</sup> xio, te ní xáha<sup>n</sup>-dě: “¿Ná cúú yòhó nǔu véxi-n tàxi tñuní ñáhá-n?”

28 Te tnáhá-ni tucu yúhú cahni-n dàtná ní sahní-n tē ègiptú icu càha<sup>n</sup>-n á”, duha ní xáha<sup>n</sup>-dě xii té Moisés.

29 Te sá dúcá<sup>n</sup> nǐ cáhá<sup>n</sup> téé isràél nǔu ní yúhú té Moisés ní xinú-dé cuáhá<sup>n</sup>-dé ní sáá-dé nació<sup>n</sup> Mèdián. Yàcá<sup>n</sup> ní ngóo-dé, te yàcá<sup>n</sup> ní tnándaha-dé, te ní cacu úú dèhe téé-dé.

30 Te sáta nǐ xínú údico cuíá, te ní sáhá<sup>n</sup> té Moisés ì<sup>n</sup> xio yucu Sinái. Te yàcá<sup>n</sup> ní xiní-dé ì<sup>n</sup> tñutàú nchìcú<sup>n</sup> ñuhú, te xití itá ñuhú-á<sup>n</sup> nǐ xiní-dé yíhí ì<sup>n</sup> espíritú xínú cuèchi núú Yă Ndiöxí.

31 Te òré ní xiní-dé sá yíhí-xí xití itá ñuhú-á<sup>n</sup>, te ní cuñúhu vîhi-dé sá nǐ xiní-dé espíritú-á<sup>n</sup> xití itá ñuhú-á<sup>n</sup>, te ní sândehe-gá-dé, te ní xíndéhe vâha-dé. Te ní tecú dóho-dé ní cáhá<sup>n</sup> Yă Ndiöxí, te xáha<sup>n</sup>-gă xii-dé:

32 “Yúhú cúú-í Ndiöxí ní cáhá<sup>n</sup> ndíhi cue ñaní tnáhá-n ndéé sanaha, ndíi Àbrahám ndíhi ndíi Isàác ndíhi ndíi Jâcób, ndíhi dava-gá cue ñaní tnáhá-n. Nchaa cue ndíi-á<sup>n</sup> nǐ xóo cáhá<sup>n</sup> ndíhi-í.” Duha ní xáha<sup>n</sup>-gă xii té Moisés. Te ní quidi ñaha-xi xii té Moisés sá nǐ yúhú-dé, te ñá ní cùyii-gá-dé cundehe-dě tñutàú nchìcú<sup>n</sup> ñuhú-á<sup>n</sup>.

33 Te Yă Ndiöxí ní xáha<sup>n</sup>-gă xii-dé: “Queñuhu chàú-n, chi núú ñuhú nǐ cuu íi nútnǐ-n.

34 Te yúhú ndéhè-í sá ío ndòho nchaa ñáyiú cùu cuendá-í, ñáyiú ndècu nació<sup>n</sup> Ègiptú. Te ní tecú dóho-í sá ío ndàhú xĩcáhá<sup>n</sup>-yu, núu xĩá<sup>n</sup> véxi-í càchí tnúhu-í sá nùhú-n nació<sup>n</sup> Ègiptú cuendá ndeñùhú-n-yu yàcá<sup>n</sup>.” Duha ní xáha<sup>n</sup> Yă Ndiöxí xii té Moisés.

35 Te ñá ní sândáá iní-yu té Moisés ndéé díhna, chi ní xáhă<sup>n</sup>-yu: “¿Ná cuendá véxi-n tàxi tñuní ñáhá-n xii-ndí?” Duha ní xáhă<sup>n</sup>-yu xii té Moisés. Te ñu-ni té Moisés ní tendaha ñaha Yă Ndiöxí ní sáhá<sup>n</sup>-dé dacăcu-dé ñáyiú isràél nació<sup>n</sup> Ègiptú cuèi ñá ní sândáá iní ñáhă<sup>n</sup>-yu xii-dé. Dico ní taxi tñuní-dé-yu, chi duca<sup>n</sup> nǐ xáha<sup>n</sup>-gă òré ní xiní-dé espíritú xínú cuèchi núú-gă xití tñutàú nchìcú<sup>n</sup> ñuhú.

36 Te té Moisés ní ngüíta-dé ní quide-dé sá vă yòo tnàhí ndàcu cada, te ní cuñúhu vîhí-yu sá dúcá<sup>n</sup> nǐ quide-dé, te duca<sup>n</sup> nǐ quide-dé Ègiptú ndíhi Làmar Tícuèhé. Te ní ngódó núú-dě núŷ-yu ní queé-yu Ègiptú cuáhá<sup>n</sup>-yu ì<sup>n</sup> ichi xití yucu núú vă yòo tnàhí ndècu, te ní xíhi-yu údico cuíá xití yucu-á<sup>n</sup>, te xíá<sup>n</sup> nǐ xóo cada-dé sá vă yòo tnàhí ndàcu cada.

37 Te ñu-ni té Moisés ní xáha<sup>n</sup>-dě xii cue ñaní tnáhá-dě dàvá-á<sup>n</sup>: “Yă Ndiöxí cada-gá te coo ì<sup>n</sup> ñaní tnáhá-ndó ndéé cuèé-gá, te téé-á<sup>n</sup> cáhá<sup>n</sup>-dé tnúhu-gá núú-ndó dàtná cuíní-ndó nǐ cachí-gá quidé yúhú, te ío xini ñuhu-xi cundèdóho-ndo tñuhu cáhá<sup>n</sup>-dé”, duha ní xáha<sup>n</sup> tē Moisés xii-yu dàvá-á<sup>n</sup>.

38 Te ñu-ni té Moisés ní xíndecu ndíhi-dé ñáyiú isràél xití yucu, te ní sáá-dé yucu Sinái, te xíá<sup>n</sup> nǐ quixi ì<sup>n</sup>

espíritú xínú cuèchi núú Yă Ndiöxí ní cáhá<sup>n</sup> ndihí ñaha-xi xii-dé, te yacá<sup>n</sup> ní dácuahá ñaha-xi tnúhu-gá, te ñu-ni tnúhu-á<sup>n</sup> ní ndóo dácuaaha-o.

39 Te cue ñaní tnáhá-ó ní xíndecu ndéé sanaha ñá ní sándáá iní-yu té Moisés, te ñá ní ndéé iní ñáhă-yu xii-dé, chi ní cuiní-yu nuhú tucú-yu ñuú Ègiptú cundecú-yu.

40 Te òré ndécú tē Moisés yucu ní xáhă<sup>n</sup>-yu xii ñaní-dé té Àrón: “Cadúha-n ñ<sup>n</sup> úú ndiöxí díhú<sup>n</sup> cuáá<sup>n</sup> codonuu núú-ó cùhu<sup>n</sup>-o ichi, chi ñá túú cùtnuní iní-ó ndéé ichi cuáhá<sup>n</sup> té Moisés, té yòdo nuu núú-ó ndùu ní quee-o Ègiptú”, duha ní xii-yu té Àrón.

41 Te dāvá-á<sup>n</sup> ní cadúha-güedé ñ<sup>n</sup> chēhlu mee-ni díhú<sup>n</sup> cuáá<sup>n</sup>, te ní sahani-güedé ñ<sup>n</sup> úú quiti nchito ní quide cāhnu-güedé chēhlu-á<sup>n</sup>. Te ío ní cudí<sup>n</sup> iní-yu quiti-á<sup>n</sup>, chi ní cachí-yu sá díú-ní ndiöxí cúú-dí.

42 Te sá dúcá<sup>n</sup> ní quidé-yu, xiá<sup>n</sup> ní dáñá ñaha Yá Ndiöxí xii-yu. Te ní dáñá-gă ní xóo cada cāhnú-yu nchíanchii, ndihí yóó, ndihí nchaa chódíní. Te duha ní chídó tnùní ñ<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha nācuáa ní xáha<sup>n</sup>-gă xii ñayiu dāvá-á<sup>n</sup>:

Nchòhó ñayiu isràél, ní cuu údico cuía yíhí-ndó yucu,

te ní sahani-ndo quiti-ndo ní quide cāhnu ñaha-ndo xii-í cáhá<sup>n</sup>-ndó, dico ñáhă chi ní sahani-ndo-güedé ní quide cāhnu-ndo sá ñ<sup>n</sup> cadúha mee-ndo.

43 Te ní cadúha-ndo ñ<sup>n</sup> veñúhu líhli, te ní sanutñí-ndo Mòlóc sá cāchí-ndó cùu ndiöxí-ndó xica nchido-ndo xití yucu,

te ní cadúha-ndo ñ<sup>n</sup> chódíní, te quiti-ă<sup>n</sup> cāchí-ndó sá cúú-dí ndiöxí Rēnfán,

te ndi ndúú sá ñ<sup>n</sup> cadúha-ndo-ă<sup>n</sup> ní quide cāhnu-ndo.

Te cuendá sá dúcá<sup>n</sup> ní quide-ndo te yúhú queñuhu ñaha-í xii-ndo quíhí<sup>n</sup>-ndó cùndecu-ndo ingá xio nació<sup>n</sup> Babiloniá.

Duha ní xáha<sup>n</sup> Yă Ndiöxí xii-yu, te duca<sup>n</sup> ní chídó tnùní téé ní xóo cáhá<sup>n</sup> tnúhu-gá.

44 Te xití yucu-á<sup>n</sup> ní dácáá-güedé ñ<sup>n</sup> veñúhu vehe dóó. Te vehe-á<sup>n</sup> ní cuu-xi ñ<sup>n</sup> sá cùtnuní iní-yu sá Yă Ndiöxí ndécú ndihí ñaha-gá xii-yu. Te vehe-á<sup>n</sup> ní dácáá-güedé nācuáa ní xáha<sup>n</sup> Yă Ndiöxí xii té Moisés, chi ní dánèhé ñáhă-gă xii-dé nācuáa dacāa-güedé.

45 Te sátá ní xihí nchaa cue téé-á<sup>n</sup>, te ní ndóo ndihí nchaa déhe-güedé veñúhu-á<sup>n</sup>. Te ní xido tucu-güedé veñúhu-güedé cuáhá<sup>n</sup>-güedé, te cuáhá<sup>n</sup> ndihí-güedé té Jòsué núú cùndécú-yu. Te sátá ní quexió-yu, te ní dácúnú-yu ñayiu dii ñuú-xi-á<sup>n</sup> chi mee Yă Ndiöxí ní chindee ñaha-gá xii-yu. Te sátá ní ndihí nchaa ñayiu ní xica nchido veñúhu dóó-ă<sup>n</sup> ní xihí, te ní ndóo ndihí dava-gá-yu. Te duca<sup>n</sup>-ni ndecu-xi ní cacu té Dàvií, téé ní xindaha ñaha xii-yu.

46 Te Yá Ndiöxí ní cudí<sup>n</sup> víhí iní-gá té Dàvií. Te ní xicá<sup>n</sup> tnúhú-dé núú-gă ñuú cuu dacāa-dé veñúhu cuu cuendá-gá, chi ñ<sup>n</sup>-ni Yá Ndiöxí ní xóo cada cāhnu té Dàvií ndihí té Jácób, ñaní tnáhá-ó ní xíndecu ndéé sanaha víhi-gá.

47 Te Yá Ndiöxí ñá ní dàña-gá dacāa té Dàvií veñúhu-gá dico déhe-dé té Salòmón, chi ní dáñá-gă ní dácáá-dé veñúhu cuu cuendá-gá

48 cuéí ñá túú sàcùndecu-gá veñúhu dācaa cue téé ñuyíú-a, chi ndēni xiá<sup>n</sup> ndécú-gă chi espíritú cúú-gă. Te duha ní chídó tnùní téé ní xóo cáhá<sup>n</sup> tnúhu Yá Ndiöxí ndéé sanaha nācuáa ní cáhá<sup>n</sup>-gá:

49 Yúhú táxi tnùní-í andiū ndihí ñuyíú, te xiá<sup>n</sup> ñuú nchòhó vá ndácú-ndó chihí ñaha-ndo xití veñúhu dátñá quidē-yu sá cāchí-yu cùu ndiöxí-yu ní cadúha-yu.

Te ñá túú xini ñuhu-í núú ndétátú-í, 50 chi yúhú ní cadúha-í nchaa sá ío ñuyíú-a.

Duha ní cáhá<sup>n</sup> Yă Ndiöxí, te ñu-ni duca<sup>n</sup> ní chídó tnùní téé ní xóo cáhá<sup>n</sup> tnúhu-gá —duha ndùu nchaa tnúhu ní xáha<sup>n</sup> té Těvá xii-güedé.

51 Te ní xáha<sup>n</sup> tùcu-dé:  
 —Nchòhó, ío sàá iní-ndó chi quide-ndo datná quidé ñáyiú ñá túú cùu ñáyiú isràél chi ñá túú tédóho-ndo tnùhu càhá<sup>n</sup> Yá Ndiòxí, chi ñá cuìní-ndó quìndáá iní-ndó tnùhu-gá, mee-ni cùu úhú iní-ndó Espiritú-gá dàtná ní xóo cada cue ñani tnáhá-ndó ñi xíndecu ndéé sanaha.

52 Chi cue tée-á<sup>n</sup> ío ní xóo dandòho-güedé nchaa cue tée ní xóo cáhá<sup>n</sup> tnùhu Yá Ndiòxí ndéé sanaha. Te ní sahani-güedé nchaa cue tée ní cáhá<sup>n</sup> sá quixí Crìstú ñuyíú-a, te Yaá-á<sup>n</sup> ñà túú cuèchi-gá. Te ñu-ni duca<sup>n</sup> ñi quide-ndo Crìstú cútnàhá ní quixi-gá ñuyíú-a, chi ní sáha cuèndá-ndó-gá núu cuè tée ní cuu úhú iní ñáhá xì-gá ní sahani ñaha-güedé.

53 Te ndècu ndihí-ndo tnùhu ní chídó tnùnì ndíi Moisés nàcuáa ní xáha<sup>n</sup> espíritú xínú cuèchi núu Yá Ndiòxí xii ndíi, te ní dùca<sup>n</sup> ñá túú sàndáá iní-ndó tnùhu-á<sup>n</sup> núu ní sahani-ndo Jèsús. Te ñu-ni tnùhu-á<sup>n</sup> ndécú ndihí-ndo ndéé vitna —càchí té Tévá xáha<sup>n</sup>-dè xii-güedé.

#### *Ní sahani-güedé té Tévá*

54 Te sá dúcá<sup>n</sup> ñi xáha<sup>n</sup> tè Tévá xii-güedé, te ní cudéé<sup>n</sup> víhí-güedé núu-dé, núu ní quide rúhñú-güedé núu-güedé sá sàtú iní-güedé.

55 Te té Tévá ndécú ndihí-dé Espiritú Yá Ndiòxí, te ní ndacoto váha-dé andíu, te ní xíní-dé súúnì dàtása<sup>n</sup>-xi núu ndécú Yá Ndiòxí, te ní xíní-dé Xítóhó Jesucristú nútníi-gá xio cùha Yá Ndiòxí.

56 Te ní xáha<sup>n</sup> tè Tévá xii-güedé:

—Chí cùndèhe andíu chi yúhu ndéhè-í Xítóhó Jesucristú nútníi-gá xio cùha Yá Ndiòxí, te ñu-gá cúú-gá ñani tnáhá-ndó nchaa-ndo —cachí-dé xáha<sup>n</sup>-dè.

57 Te ní sadí-güedé dóho-güedé cuèndá sá ñá ní tnáhá iní-güedé cundedóho-güedé tnùhu càhá<sup>n</sup>-dé, te uu<sup>n</sup>ni ní cuáá-güedé, te ní taxi ndaha ñaha-güedé xii-dé

58 ndécá ñaha-güedé cuáhá<sup>n</sup> ndéé ñi<sup>n</sup> xio yuhu ñúú, te yàcá<sup>n</sup> ní sáñaha-güedé yúu xii-dé. Te ndècu ñi<sup>n</sup> tée cuechi nàni-dé Sàulú, te tée-á<sup>n</sup>

ñi quide cuèndá-dé dóo-güedé cuèndá ní nune ndaha-güedé ní sáñaha-güedé yúu xii té Tévá.

59 Te òré sáñaha-güedé yúu, te ní cáhá<sup>n</sup> ndihí-dé Xítóhó Jesucristú te xáha<sup>n</sup>-dè:

—Yòhó Xítóhó Jesucristú, naquehe<sup>n</sup>-n ñni-í —càchí-dé xáha<sup>n</sup>-dè xii-gá.

60 Te ní ngüíñí xítí-dé, te níhi ní cáhá<sup>n</sup>-dé, te xáha<sup>n</sup>-dè:

—Yòhó Xítóhó Jesucristú, vá təcüèchi-n cuè tée-a sá dúhá quide ñaha-güedé xii-í —càchí-dé xáha<sup>n</sup>-dè xii-gá.

Te xiá<sup>n</sup>-ná ní cáhá<sup>n</sup>-dé, te ní xihí-dé.

## 8

### *Té Sàulú chíhí-dé ñáyiú sàndáá iní-xi tnùhu Jèsús vecaá*

1 Te té Sàulú ní nduu vétú iní-dé sá ñi sahani-güedé té Tévá.

Te ñu-ni nduu-á<sup>n</sup> ñi cuu níhi cuèndá nchaa ñáyiú sàndáá iní-xi tnùhu Jèsús ñuú Jerusalén. Te ní ndihí-yu ní xité nuu cuáhá<sup>n</sup>-yu distritú Júdeá ndihí distritú Sàmariá. Te cue tée ní táuchíú<sup>n</sup> Jèsús dácuaha ñaha xií-yu tnùhu-gá ní ndóo-güedé ñuú Jerusalén.

2 Te nchaa cue tée càhá<sup>n</sup> ndihí Yá Ndiòxí ní chindúxi-güedé ndíi Tévá. Te ío ní ndáhyú ñáyiú ní sàndáá iní tnùhu Jèsús sá ñi xihí ndíi.

3 Te té Sàulú ío dándoho-dé-yu, chi ndi vehe ndi vehe cuáhá<sup>n</sup>-dé cuátníi-dé cuèi tée cuèi ñadíhi ndécá-dé cuáhá<sup>n</sup> vecaá.

### *Càhá<sup>n</sup>-yu tnùhu Yá Ndiòxí distritú Sàmariá*

4 Te nchaa ñáyiú ní xité nuu cuáhá<sup>n</sup>-yu càhá<sup>n</sup>-yu tnùhu Jèsús nchaa núu quèxìó-yu.

5 Te té Lìpé cuáhá<sup>n</sup>-dé distritú Sàmariá càhá<sup>n</sup>-dé tnùhu Xítóhó Jesucristú Yaá ní tendaha Yá Ndiòxí ní quixi ñuyíú-a.

6 Te ío vai núu sá vǎ yòo tnàhí ndàcu cada ní quide-dé, te ní cuñúhu víhí-yu, te ní xíndedóho váha-yu nchaa tnùhu ní cáhá<sup>n</sup>-dé.

7 Te vai ñáyiú yíhi ñaha espíritú cùndíhi yucu ñávaha ní queñuhu-dé

nchaa espíritú-á<sup>n</sup> yiqui cùñú-yu, te ní cana saa-xi òré ní ndee-xi yiqui cùñú-yu cuáhá<sup>n</sup>-xi, te ní ndúha-yu. Te vai ñáyiu cùhú ñá cúú-gã candá nihnú-yu ndihí ñáyiu yacua ní quide tátna-dé, te ní ndúha-yu.

8 Te sá dúcá<sup>n</sup> ñí cáhá<sup>n</sup>-dé tnúhu Jèsús te ní quide tátna-dé-yu, xíã<sup>n</sup> ío ní cudíi ñí ñáyiu ñuú-á<sup>n</sup>.

9 Te ñuú-á<sup>n</sup> ndécú ñí tée nàni Xímú, te tée-á<sup>n</sup> xíní-dé cada ndùu-dé, te ní cuu naha dùca<sup>n</sup> quide-dé, te ní xóo cuñúhu ñáyiu distritú Sàmariá sá dúcá<sup>n</sup> quide-dé, te ní cachí-dé sá díú-ní-dě cúnùu.

10 Te nchaa ñáyiu cuèi ñáyiu cuica te cuèi ñáyiu ndàhú ío nèhé-yu sá yíñuhu núú-dě, te xitnàhá-yu:

—Tée-ã<sup>n</sup> ío chindee ñaha Yá Ndiöxí xii-dé núu vai núú sá quidé-dě — cachí-yu xitnàhá-yu.

11 Te ní sándáá ñí-yu nàcuáa ní xóo cada ndùu-dé, te ní xóo cuñúhu vñí-yu, te ní cuu naha dùca<sup>n</sup>-ni dan-dahú ñáhá-dě xii-yu.

12 Te té Lìpé ní cáhá<sup>n</sup>-dé tnúhu Xítóhó Jesucristú, te ní xáha<sup>n</sup>-dě xii-yu sá Yá Ndiöxí cuíní-gá ndíhu ndaha ñaha-gá xii-yu. Te cuèi tée cuèi ñadìhí ní sándáá ñí-yu tnúhu-gá, te ní sanduté-yu.

13 Te tnàhá té Xímú ní sándáá ñí-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núú sá vã yõo tnàhí ndàcu cada ní quide té Lìpé, te ní cuñúhu vñi nchaa ñáyiu.

14 Te dava-gá cue tée ní táuchíú<sup>n</sup> Jèsús dacuàha ñaha xii ñáyiu tnúhu-gá ní níhí-güedě tnúhu sá ñáyiu distritú Sàmariá ní sándáá ñí-yu tnúhu Yá Ndiöxí. Te ní tendaha-güedě té Pèlú ndihí té Juáa cuáhá<sup>n</sup>-güedé distritú Sàmariá.

15 Te ní quexìo-güedé, te ní cáhá<sup>n</sup> ndihí-güedé Yá Ndiöxí ní xicá<sup>n</sup>-güedé Espíritú-gá quixi cundecu ndihí-yu.

16 Chi ní ñí<sup>n</sup>-yu vátá sàá-gá Espíritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé.

17 Te òré ní sacá<sup>n</sup> ndodo-güedé ndaha-güedé díquí<sup>n</sup>-yu, te ní quexìo Espíritú-gá ní ngúndecu ndihí-yu.

18 Te ní xíní té Xímú nàcuáa ní quide-güedé ní quexìo Espíritú-gá ní ngúndecu ndihí-yu, te cuíní-dé cuañaha-dě díhú<sup>n</sup> xii té Pèlú ndihí té Juáa ní cùu.

19 Te ní xáha<sup>n</sup>-dě:

—Chindee ñaha-ndo cuendá ndèda-ni càa-yu cacá<sup>n</sup> ndodo-í ndaha-í díquí<sup>n</sup>-yu, te níhí-yu Espíritú Yá Ndiöxí cundecu ndihí-yu — cachí-dé xáha<sup>n</sup>-dě xii-güedé.

20 Te té Pèlú ní xáha<sup>n</sup>-dě xii-dé:

—Yòhó cuíta nihnu-n ndihí díhú<sup>n</sup>-n, chi cuíní-n cuàa<sup>n</sup>-n sá vaha quide Yá Ndiöxí.

21 Yòhó vá cúú càda-n chiu<sup>n</sup> quide-ndí, chi ñá túú ndècu vaha ñí-ni núú Yá Ndiöxí.

22 Te vá dúcá<sup>n</sup> cáhá<sup>n</sup>-n, chi ío nèhé cáhá<sup>n</sup>-n sá dúcá<sup>n</sup> cáhá<sup>n</sup>-n. Te cáhá<sup>n</sup> ndàhú-n núú Yá Ndiöxí sá ná cáda càhnu ñí-gá tnúhu ní cáhá<sup>n</sup>-n.

23 Te yúhú sa xíní-í sá ño úhú ñí-n, chi mee-ni sá cuèhé sá dúhá chido nuu-n quide-n — cachí té Pèlú xáha<sup>n</sup>-dě xii té Xímú.

24 Te ní xáha<sup>n</sup> tẽ Xímú xii-güedé:

—Cáhá<sup>n</sup> ndàhú-ndó núú Yá Ndiöxí sá ña túú nã tnahá-í sá dúcá<sup>n</sup> ní cáhá<sup>n</sup>-í — cachí-dé xáha<sup>n</sup>-dě.

25 Te té Pèlú ndihí té Juáa ní cáhá<sup>n</sup>-güedé tnúhu Yá Ndiöxí núú ñáyiu ñuú-á<sup>n</sup>. Te ní xáha<sup>n</sup>-güedé nchaa nàcuáa ní quide Jèsús ní xíní-güedé òré ní xica cuu-gá ñuyú<sup>n</sup>-a. Te ní tñi-güedé ichi cuánuhú-güedé ñuú Jerusalén, te ní yáha-güedé titní ñuú yíndèhu distritú Sàmariá, te ní cáhá<sup>n</sup>-güedé tnúhu-gá.

#### *Té Lìpé ndihí ñí tée ñuú Etiópia*

26 Te ñí<sup>n</sup> espíritú xínú cuèchi núú Yá Ndiöxí ní quexìo-xi ñuú Jerusalén ní xáha<sup>n</sup>-xi xii té Lìpé:

—Cada túha-n chi quée nuu-n ñuú Gázá, dico mee-ni xití yucu cuáhá<sup>n</sup> ichi — cachí-xi xáha<sup>n</sup>-xi xii-dé.

27 Te ní xica-dé cuáhá<sup>n</sup>-dé, te ní natnahá-dé ñí<sup>n</sup> tée nàció<sup>n</sup> Etiópia ñuhú-dě ichi. Te cùu-dé tesorèrú

xínú cuèchi-dé núú ìñ ñadìhí ñaha yìndaha nació<sup>n</sup> Etiòpiá, te ñaha-á<sup>n</sup> nání-á<sup>n</sup> Cànacé.

<sup>28</sup> Te té etiòpiá-á<sup>n</sup> ñí sáhá<sup>n</sup>-dé ñúú Jerusàlén ní cáhá<sup>n</sup> ndihí-dé Yá Ndiòxí, te ñùhu-dé ichi cuánuhú-dé ñúú-dé ñúhú-dé carretà, te dàcuaha-dé tnúhu ní chídó tnùní ndí Chàíá té ní xóo cáhá<sup>n</sup> tnúhu Yá Ndiòxí ndéé sanaha.

<sup>29</sup> Te ní xáha<sup>n</sup> Espiritú Yá Ndiòxí xii té Lìpé:

—Quíhí<sup>n</sup> tuha-n càrretá-á<sup>n</sup> —càchí Espiritú-gá xáha<sup>n</sup>-xi xii-dé.

<sup>30</sup> Te té Lìpé ní sàtuha-dé carretà-á<sup>n</sup>, te ní tecú dóho-dé nàcuáa cáhá<sup>n</sup> té etiòpiá-á<sup>n</sup>, té ñùhu carretà-á<sup>n</sup> dácuaha-dé nàcuáa ní chídó tnùní ndí Chàíá. Te ní xáha<sup>n</sup> tē Lìpé xii té etiòpiá-á<sup>n</sup>:

—¿Técú tnùní-n nchàa tnúhu dàcuaha-n-á<sup>n</sup>? —càchí té Lìpé xáha<sup>n</sup>-dē xii-dé.

<sup>31</sup> Te ní xáha<sup>n</sup> tē etiòpiá:

—¿Nása tecú tnùní-í te vā yōo dānehé ñáhá xii-í? Ta quène iha coo-n chi danèhé ñáhá-n —càchí-dé xáha<sup>n</sup>-dē xii té Lìpé.

Te cuáaá té Lìpé núú carretà ní ngóo-dé.

<sup>32</sup> Te ndèdóho-dé nàcuáa dàcuaha té etiòpiá-á<sup>n</sup> nàcuáa ní chídó tnùní ndí Chàíá núú tùtú Yá Ndiòxí núú càchí-xi:

Dàtná quídé ìñ mbéé cada-dé òré candeca ñaha-güedē xii-dé quíhí<sup>n</sup> cahni ñaha-güedē chi ñá túú nā cada-dé,

dàtná cuíní-ndó quide mbéé òré dèté-di ñá túú ndáhí-di duca<sup>n</sup> càda-dé òré cahni ñaha-güedē chi ni vā cáhá<sup>n</sup>-dé.

<sup>33</sup> Te mee-ni cùdiquí ndéé ñáhá-güedē xii-dé, te ni vā ndúcú tnúhu-güedē núú-dē ñú ndáá ndècuèchi-dé.

Te ío cuu nduu cuihna ìní cue ñaní tñáhá-dē, chi cahni ñaha-güedē xii-dé ñuyíú-a.

Duha cáhá<sup>n</sup> tutú ní dácuáhá tē etiòpiá ní xíndedóho té Lìpé.

<sup>34</sup> Te ní xáha<sup>n</sup> tùcu té Etiòpiá xii té Lìpé:

—Cundee ìní-n càchí tnúhu-n yòo cacunehe té ní cáhá<sup>n</sup> tnúhu Yá Ndiòxí

ndéé sanaha, núú cáhá<sup>n</sup>-dé cuèndá mée-dē àdi cáhá<sup>n</sup>-dé cuèndá ingá ñáyiú —càchí té etiòpiá-á<sup>n</sup> xáha<sup>n</sup>-dē xii té Lìpé.

<sup>35</sup> Te té Lìpé ní cani-dé cuèndú núú tē etiòpiá nàcuáa ní cáhá<sup>n</sup> ndí Chàíá nàcuáa cada Jèsús òré quixi-gá ñuyíú-a. Te ní xáha<sup>n</sup>-dē nàcuáa ndùu tnúhu Jèsús ndihí nàcuáa ní quide-gá.

<sup>36</sup> Te ñùhu-güedē ichi cuáhá<sup>n</sup>-güedē ní naníhí-güedē ìñ xichi núú ñúhú ndute, te ní xáha<sup>n</sup> tē etiòpiá:

—Iha ñùhu ndute, ¿te vā cúu cuàndute-í iha-á<sup>n</sup>? —càchí-dé xáha<sup>n</sup>-dē xii té Lìpé.

<sup>37</sup> Te xáha<sup>n</sup> tē Lìpé:

—Te núú sàndáá ndisa ìní-n Jèsús, te cuu cuandute-n —càchí-dé xáha<sup>n</sup>-dē.

Te ní xáha<sup>n</sup> tē etiòpiá:

—Sàndáá ndisa ìní-í sá Dēhe Yá Ndiòxí cúu Xítoho Jesucristú —càchí-dé xáha<sup>n</sup>-dē.

<sup>38</sup> Te ní ngani-dé carretà, te ní nuu-güedē ndí ndúú-güedē, te cuánguee-güedē xití ndute, te ní dácuándute ñaha té Lìpé xii-dé.

<sup>39</sup> Te òré ní nene-güedē xití ndute, te ndéca ñaha Espiritú Yá Ndiòxí xii té Lìpé cuáhá<sup>n</sup>. Te ñá túú ní xini té ní sandute-á<sup>n</sup> ndèé ichi cuáhá<sup>n</sup> té Lìpé. Te ío ní cudí ìní-dé sá ñí natuha-dé ichi Yá Ndiòxí, te cuánda-dé núú carretà-dé cuánuhú-dé.

<sup>40</sup> Te ní quexio té Lìpé ñúú Àzotó, te ndí tñáhá ñúú ndí tñáhá ñúú cuáhá<sup>n</sup>-dé cáhá<sup>n</sup>-dé tnúhu Yá Ndiòxí, te ní yáha-dé cuáhá<sup>n</sup>-dé ní quexio-dé ndéé ñúú Cèsareá.

## 9

*Té Sàulú ní tuha-dé ichi Xítoho Jesucristú*

(Hch. 22:6-16; 26:12-18)

<sup>1</sup> Te té Sàulú mee-ni cáhá<sup>n</sup> cuèhé-dé cuèndá ñáyiú ní sàndáá ìní tnúhu Jèsús, te cuíní-dé cahni ñaha-dē xii-yu. Te ní sáhá<sup>n</sup>-dé núú dütú cúnú-gá,

<sup>2</sup> te ní xáha<sup>n</sup>-dē sá cādūha dütú-á<sup>n</sup> ìñ tutú canehe-dé quíhí<sup>n</sup> cuáha-dé cue téé xindeé nchito veñúhu ñúú Dàmascú, chi cuíní-dé tñí-dé nchaa ñáyiú dàcuaha tnúhu Xítoho Jesucristú candeca ñaha-dē quíhí<sup>n</sup> ñúú Jerusàlén.

3 Te ní xica-dé cuáhá<sup>n</sup>-dé tá cùyatni-dé ñuú Dàmascú, te uu<sup>n</sup>ni ní quee ñuhú andi<sup>u</sup>, te ní dáyyèhé-xi ndéé núú nútníi-dé.

4 Te ní nduá-dé ndéé ñuhu, te ní tecú dóho-dé càhá<sup>n</sup> ñ<sup>n</sup> sá càhá<sup>n</sup> núú ñínu, te xáha<sup>n</sup>-xi xii-dé:

—Yòhó Sàulú, ¿ná cuendá cúú ùhú iní ñáhá-n xii-í te dándoho ñaha-n? — cachí sá càhá<sup>n</sup>-á<sup>n</sup> xáha<sup>n</sup>-xi xii-dé.

5 Te ní xáha<sup>n</sup>-dè:

—¿Ná cúú yòhó sá càhá<sup>n</sup>-á<sup>n</sup>-i? — cächí-dé xáha<sup>n</sup>-dè.

Te ní xáha<sup>n</sup> sá càhá<sup>n</sup> xii-dé:

—Yúhú cúú-í Jèsús téé cùu úhú iní-n. Te ío dándoho-n mee-n, chi dàtná quidé ndìcutu quide-n, chi quiti-á<sup>n</sup> núu na cùxi-güedé-di pùyá te sáha-di patadá núú-xi, te quide úhú-di mee-di. Te duca<sup>n</sup> sàtnahá-xi cùu yohó chi ñá túú sàndáá iní ñáhá-n xii-í —cächí sá càhá<sup>n</sup>-á<sup>n</sup> xáha<sup>n</sup>-xi xii-dé.

6 Te té Sàulú ní quidi ñaha-xi xii-dé sá ñí yùhú-dé, te ní xáha<sup>n</sup>-dè:

—Xítohó Jesucristú, ¿te ná cuini-n cada-í-i? —cächí-dé xáha<sup>n</sup>-dè.

Te Jèsús ní xáha<sup>n</sup>-gã xii-dé:

—Ndacóo, te quíhí<sup>n</sup>-n ñuú-ã<sup>n</sup>, te yacá<sup>n</sup> tecú tnúhu-n ná cúú sá cáda-n —cächí-gã xáha<sup>n</sup>-gã xii-dé.

7 Te cue téé cuáhá<sup>n</sup> ndihí té Sàulú ní tecú dóho-güedé càhá<sup>n</sup> ñ<sup>n</sup> sá càhá<sup>n</sup>, dico vá yòo tnàhí ni xini-güedé, te ní yùhú víhí-güedé, te ñá túú tnàhí ni càhá<sup>n</sup>-güedé.

8 Te ní ndacóo té Sàulú, te ñá ní cùu-gá cundehe-dè, chi ní cuaa-dé, te ní tní-güedé ndaha-dé ndéca ñaha-güedé cuáhá<sup>n</sup> ñuú Dàmascú.

9 Te yacá<sup>n</sup> ní xindecu-dé úní nduu, te ñá ní cùu tnahí cundehe-dè, te ñá túú ná ní xèxi-dé, te ñá túú ní xihí-dé ndute.

10 Te ndècu téé sàndáá iní tnúhu Jèsús ñuú Dàmascú, nání-dè Ananiás, te ní sáhá<sup>n</sup> Jèsús núú sàní-dé, te ní xáha<sup>n</sup>-gã xii-dé:

—¡Ananiás! —cächí-gã xáha<sup>n</sup>-gã.

Te ní xáha<sup>n</sup>-dè:

—¿Yúhú càhá<sup>n</sup> ndihí-n-ã<sup>n</sup>? — cächí-dé xáha<sup>n</sup>-dè.

11 Te ní xáha<sup>n</sup>-gã:

—Ndacuíñí, te quíhí<sup>n</sup>-n ñ<sup>n</sup> chiu<sup>n</sup> ichi núú dánàni-güedé Ichi Ndáá, te yacá<sup>n</sup>

manducu-n vèhe té Jùdás, chi vehe téé-á<sup>n</sup> ndécú ñ<sup>n</sup> téé ñuú Tàrsú nání-dè Sàulú, te téé-á<sup>n</sup> sa càhá<sup>n</sup> ndihí ñaha-dè xii-í.

12 Te téé-á<sup>n</sup> ñí dácótó ñaha-xi sá ñí xiní ñáhá-dè xii-n ñí quexio-n núú ndécú-dè, te ní sacá<sup>n</sup> ndodo-n ndaha-n díquí-dè, te duca<sup>n</sup> te ní nacaá<sup>n</sup> núú-dè ní dácótó ñaha-xi xii-dé —cächí-gã xáha<sup>n</sup>-gã.

13 Te té Ananiás ní xáha<sup>n</sup>-dè:

—Yòhó Xítohó Jesucristú, cächí tnúhu-í xii-n sá ñí níhí-í tnúhu nacuáa quide-dé sá ío quide úhú-dé ñáyi<sup>u</sup> càhá<sup>n</sup> ndihí-n ñuú Jerusálén.

14 Chi nèhe-dé tutú ní sáñaha cue dútú cúnúu cuendá níhí-dè nacuáa cada-dé tní-dé nchaa ñáyi<sup>u</sup> sàndáá iní ñáhá xii-n —cächí-dé xáha<sup>n</sup>-dè xii-gã.

15 Te Jèsús ní xáha<sup>n</sup>-gã xii-dé:

—Quíhí<sup>n</sup>-n ndàtnúhu-n ndihí-dé, chi cuini-í cada-dé chi<sup>u</sup>-í, quíhí<sup>n</sup>-dè càhá<sup>n</sup>-dè tnúhu-í núú cue ñáyi<sup>u</sup> isràél, ndihí núú cue ñáyi<sup>u</sup> ñá túú cùu ñáyi<sup>u</sup> isràél, ndihí núú cue téé yìndaha ñaha xii-yu.

16 Te yúhú cúñaha-í xii-dé sá ndóhó vñhi-dé cuendá-í —cächí-gã xáha<sup>n</sup>-gã xii té Ananiás.

17 Te cuáhá<sup>n</sup> té Ananiás vehe núú ndécú té Sàulú te ní sacá<sup>n</sup> ndodo-dé ndaha-dé díquí té Sàulú, te ní xáha<sup>n</sup>-dè:

—Yòhó té Sàulú téé ndècu ndihí-í ichi Xítohó Jesucristú, diu-ni Xítohó Jesucristú Yaá ní càhá<sup>n</sup> ndihí ñaha xii-n ichi ní tendaha ñaha-gã véxi-í cuendá cacá<sup>n</sup> táhù-í núú-gã cuendá-n te ndúha núú-n, te dàtnùní quixi Espiritú-gã cundecu ndihí-n —cächí-dé xáha<sup>n</sup>-dè.

18 Te dàtná sá ñí xócání-ó ñ<sup>n</sup> sá ndèdí núú-dè ní quide ñaha-xi xii-dé, te ní nacaá<sup>n</sup> núú-dè, te ní sandute-dé.

19 Te ní xexi-dé, te ní naníhí ndéé-dè, te titní nduu ní xindecu ndihí-dé ñáyi<sup>u</sup> ní sàndáá iní tnúhu-gã ñuú Dàmascú.

*Te Sàulú dácùaha-dé ñáyi<sup>u</sup> tnúhu Yá Ndiõxí ñuú Dàmascú*

20 Te sátá ñí ndúha núú-dè, te ní sáhá<sup>n</sup>-dè veñúhu cue ñáyi<sup>u</sup> isràél ní



xáha<sup>n</sup>-dě sá Jèsús cúu-gă Déhe Yá Ndiöxí.

21 Te nchaa ñáyiú ní xíndedóho tnúhu ní cáhá<sup>n</sup>-dě, te ní cuñúhu vîhî-yu, te ní xítñàhá-yu:

—Dîu tée-ă<sup>n</sup> ní sahnî-dé ñáyiú ní xóo chiñuhu ñaha xîi Jesús ñuú Jerusàlén. Te ní quixi-dé iha ní cuinî-dé tñî ñaha-dě xîi-yu candeca ñaha-dě quîhî<sup>n</sup> núú cuè dútú cúnùu ni cuu —cachî-yu xítñàhá-yu.

22 Te ío inî-gá té Sàulú xăha<sup>n</sup>-dě xîi-yu sá díú Jèsús cúu-gă Crîstú Yaa ní tendaha Yă Ndiöxí ní quixi ñuyíú-a, te xîă<sup>n</sup> ñá ní ñîhî ñăyiú isrâél ndécú ñùú Dàmascú tnúhu cáhá<sup>n</sup>-yu, te ní cuñúhu vîhî-yu.

#### *Té Sàulú ní dáxió-dě núú ñăyiú isrâél*

23 Te sátá ñî cuu titní nduu, te ní ndatnúhu cue tée isrâél sá cáhnî-güedě té Sàulú.

24 Te té Sàulú ní ñîhî-dě tnúhu năcuáa cáhá<sup>n</sup>-güedě cada ñaha-güedě xîi-dé, te cuèi nduu cuèi niú néhé cuendá-güedě yuyèhe núú ñúdòco ndóho yuhu ñuú cuendá cuinî-güedě tñî ñaha-güedě xîi-dé te cahni ñaha-güedě.

25 Te ì<sup>n</sup> niú ndécá ñaha cue tée ní sándáá inî-xî tnúhu Jèsús cuáhá<sup>n</sup> ndéé núú ñúdòco ndóho yuhu ñuú. Te ní sáa-güedé núú ndóho, te ní chîhî ñaha-güedě xîi-dé xítî tídihi te ní dánděe ñaha-güedě núú ñúhú, te ní quene-dé cuáhá<sup>n</sup>-dě.

#### *Te Sàulú ndécú-dě ñuú Jerusàlén*

26 Te té Sàulú ní nasáa-dé ñuú Jerusàlén, te cuinî-dé chitnahá-dé ñáyiú sándáá inî tnúhu Jèsús, te ní yùhú-yu chí ní cáhá<sup>n</sup>-yu sá dándàhú ñàhá-dě sá sándáá inî-dé Jèsús.

27 Te té Bèé ndécá-dě té Sàulú cuáhá<sup>n</sup> núú ndécú cuè tée ní táuchíú<sup>n</sup> Jèsús dacuàha ñaha xîi-yu tnúhu-gă. Te ní canî té Bèé cuendú núú-güedě năcuáa ní cuu ní nanîhî tñàhá tē Sàulú ndîhî Jèsús ichî, te ní cáhá<sup>n</sup> ndîhî ñaha-gă xîi-dé. Te ní xáha<sup>n</sup> tùcu té Bèé năcuáa ní cáhá<sup>n</sup> té Sàulú tnúhu Jèsús núú ñăyiú Dàmascú, te ñá túú tñàhî

ni yùhú-dé ní cáhá<sup>n</sup>-dě, càchî té Bèé xăha<sup>n</sup>-dě xîi-güedé.

28 Te ní xíndecu té Sàulú ndîhî ñáyiú xídăcuáhá tñuhu-gă ñuú Jerusàlén. Te ní ndîcuu ndîcuu-dé ní cáhá<sup>n</sup>-dě tnúhu Jèsús, te ñá túú tñàhî ni yùhú-dé

29 ní cáhá<sup>n</sup> ndîhî-dé ñáyiú isrâél ñáyiú cáhá<sup>n</sup> tnúhu grîégú. Te ñáyiú-ă<sup>n</sup> ñî ngüíta-yu ndatnúhu-yu sá cáhnî ñàhá-yu xîi-dé.

30 Te ñáyiú sándáá inî tnúhu-gă ní ñîhî-yu tnúhu năcuáa cuinî ñáyiú cáhá<sup>n</sup> tnúhu grîégú cada ñàhá-yu xîi té Sàulú, núú ní sândeca ñàhá-yu xîi-dé ñuú Cèsareá, te yàcá<sup>n</sup> ní tendaha ñàhá-yu cuánuhú-dé ñuú Tàrsú.

31 Te sátá xîă<sup>n</sup> te ní sanaá-yu ñá túú-gă ní xóo cada úhú-yu nchaa ñáyiú sándáá inî tnúhu Jèsús ñîhîi distrítú Jùdeá, ndîhî distrítú Galileá, ndîhî distrítú Sàmariá. Te ní ñîhî ndéé-yu ní quidé-yu năcuáa ní xáha<sup>n</sup> Yă Ndiöxí cadá-yu, te ío ní xíndecu yîñuhú-yu núú-gă, te Espíritú-gă ní chindee ñaha-xî xîi-yu, te vâi-gă ñáyiú ní sándáá inî-yu tnúhu-gă.

#### *Té Pèlú ní quide tátna-dé té Èneás*

32 Titní xîchî ní sáhá<sup>n</sup> té Pèlú ní cáhá<sup>n</sup>-dě tnúhu Yá Ndiöxí. Te ì<sup>n</sup> nduu ní sáhá<sup>n</sup>-dě ñuú Lidá ní cáhá<sup>n</sup> ndîhî-dé ñáyiú sándáá inî ñàhá xîi Jesús.

33 Te yàcá<sup>n</sup> ní nanîhî-dě ì<sup>n</sup> tée nàni Èneás, te ní cuu úná cuíá cùhú-dé, te ní lùha ñá cúu-gă candá nihnu-dé.

34 Te ní xáha<sup>n</sup> tē Pèlú xîi-dé:

—Èneás, Xítóhó Jesucristú cada tátna ñaha-gă xîi-n tñàvîi. Ndacóo te ndocani-n yùu-n —cachî-dé xăha<sup>n</sup>-dě.

Te òré-ni ní ndacóo-dé.

35 Te nchaa ñáyiú ñuú Lidá ndîhî ñáyiú ñuú Sàrón ní xîinî-yu sá ñî ndúha-dé, te ní sándáá vîhî inî-yu Xítóhó Jesucristú.

#### *Ní ndoto tá Dòrcás*

36 Te ñuú Jòpé ndécú ì<sup>n</sup> ñadîhî sándáá inî-a<sup>n</sup> tnúhu Jèsús, te nàni-a<sup>n</sup> Tabítá, te tnúhu grîégú xăhá<sup>n</sup>-yu Dòrcás, te ío váha ní xóo cada-a<sup>n</sup> chí ío váha inî-a<sup>n</sup>, te ní xóo chindee-a<sup>n</sup> ñăyiú ndàhú.

37 Te váha-ni ndècu-a<sup>n</sup> ni cuu, te ní tñî ñaha cuèhé ñî xîhî-a<sup>n</sup>, te

ní nadacùchi ñahá-yu, te ní chihi ñahá-yu ñ<sup>n</sup> cuàrtú ndécú ndéé núú nñu.

<sup>38</sup> Te ñáyiú ní sándáá iní tnúhu Jèsús ñuú Jòpé ní níhí-yu tnúhu sá ndécú tē Pèlú ñuú Lìdá. Te yatni-ni càa ñuú-á<sup>n</sup>, te ní tendàhá-yu úú cue tée cuáhá<sup>n</sup>-güedé núú ndécú-dē cuendá cùñaha-güedē candeca ñaha-güedē xii-dé quíhí<sup>n</sup> núú ndécü-yu. Te ní xáha<sup>n</sup>-güedē xii té Pèlú:

—Yáchí ná quíhí<sup>n</sup>-ó ñuú-ndí, chi yàcá<sup>n</sup> cáná ñahá-yu quíhí<sup>n</sup>-n tnáví — càchí-güedé xáha<sup>n</sup>-güedé xii té Pèlú.

<sup>39</sup> Te té Pèlú ní xica-dé cuáhá<sup>n</sup>-dé ndihí cue tée-á<sup>n</sup> ñuú Jòpé, te òré ní quexìo-güedé ndihí-dé, te cuásá ndihí ñaha-güedē cuàrtú ndéé núú nñu. Te nchaa ñáyiú dìhí ñáyiú quèé ní tacá ndéé ñáhá xii ndíyi-á<sup>n</sup> xindáhyú-yu, te ní dánèhé ñáhá-yu nchaa dóó nñ cadúha ñaha ní xihí-á<sup>n</sup>. Chí ní xóo cadúha-a<sup>n</sup> dícú<sup>n</sup>, te ní xóo cadúha-a<sup>n</sup> díó òré ní xíndecu-a<sup>n</sup> ñuyíú-a, te nchaa xíá<sup>n</sup> ní dánèhé ñáhá-yu xii té Pèlú.

<sup>40</sup> Te té Pèlú ní xáha<sup>n</sup>-dē sá quèé-yu ncháa-yu quehé, te ní queé-yu. Te ní ngüíñí xítí-dē te ní cáhá<sup>n</sup> ndihí-dé Yá Ndiöxí, te dàtnùnì ní ndacoto-dé núú cándòdo ndíyi-á<sup>n</sup>, te ní xáha<sup>n</sup>-dē:

—Tàbitá, ndacóo —càchí-dé xáha<sup>n</sup>-dē.

Te ní ndacoto-a<sup>n</sup> núú tē Pèlú te ní ndacóo-a<sup>n</sup>.

<sup>41</sup> Te ní tní-dé ndaha-a<sup>n</sup> ní nacanutñí ñaha-dē. Te ní cana-dé nchaa ñáyiú dìhí ñáyiú quèé ndihí nchaa ñáyiú sándáá iní tnúhu Jèsús cuendá quini-yu sá nñ ndoto-a<sup>n</sup>.

<sup>42</sup> Te nchaa ñáyiú ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xihí-á<sup>n</sup>, te vái-yu ní sándáá iní-yu Xítoho Jesucristú.

<sup>43</sup> Te titñí nduu ní xíndecu té Pèlú vehe té Xímú tée dàcuitá ñí.

## 10

### *Té Pèlú ndihí té Còrneliú*

<sup>1</sup> Te ndècu ñ<sup>n</sup> tée nàni-dé Còrneliú ñuú Cèsareá te cùu-dé capitá<sup>n</sup>, te ndècu ndihí-dé ñ<sup>n</sup> cièndú sandàdú. Te cue tée-á<sup>n</sup> nání-güedé Sandàdú Itàlianú.

<sup>2</sup> Te tée cùu capitá<sup>n</sup> ío váha iní-dé, te mee-dē ndihí ñadìhí-dé ndihí nchaa landú-dé ío nèhé-yu sá yíñùhu núú Yá Ndiöxí, te sáha-dé ñáyiú ndàhú ñáyiú isràél díhú<sup>n</sup>, te ío càhá<sup>n</sup> ndihí-dé Yá Ndiöxí.

<sup>3</sup> Te ñ<sup>n</sup> nduu dàtná òré caá úní sacuaa ní dácótó núú ñáhá-xí xii-dé sá ní sáhá<sup>n</sup> ñ<sup>n</sup> espíritú xínú cuèchi núú Yá Ndiöxí núú-dē, te ní xáha<sup>n</sup>-xi:

—Còrneliú —càchí-xi xáha<sup>n</sup>-xi xii-dé.

<sup>4</sup> Te ní xiní-dé ndi ndùú xio núú-dé espíritú-á<sup>n</sup>. Te ío ní yuhú-dé. Te ní xáha<sup>n</sup>-dē:

—¿Ná chíú<sup>n</sup> vèxi-n? —càchí-dé xáha<sup>n</sup>-dē.

Te xáha<sup>n</sup>-xi:

—Ío càhá<sup>n</sup> ndihí-n Yá Ndiöxí, te ñáyiú ndàhú sàñaha-n díhú<sup>n</sup>-n, te nchaa xíá<sup>n</sup> sa nàha-gá.

<sup>5</sup> Te vitna tendaha-n cuè tée na quíhí<sup>n</sup>-güedé ñuú Jòpé quíngana-güedé ñ<sup>n</sup> tée nàni Xímú, àdi Pèlú chí úú diù-dé, te candeca ñaha-güedē quixi.

<sup>6</sup> Te òré quexìo-dé te cachí tnúhu-dé nchaa dava-gá sá cuìní Yá Ndiöxí cada-n. Te ndècu-dé vehe ingá tucu tée nàni Xímú tée dàcuitá ñí, te vehe tée-á<sup>n</sup> caá ñ<sup>n</sup> xio yuhu lamár —càchí-xi xáha<sup>n</sup>-xi xii-dé.

<sup>7</sup> Te sátá cuáhá<sup>n</sup> espíritú-á<sup>n</sup>, te té Còrneliú ní cana-dé úú tnàhá cue tée xínu cuèchi núú-dē ndihí ñ<sup>n</sup> sandàdú xínú cuèchi tucu núú-dē, te tnàhá sandàdú-á<sup>n</sup> ío càhá<sup>n</sup> ndihí-dé Yá Ndiöxí.

<sup>8</sup> Te té Còrneliú ní cani-dé cuèndú núú-güedē nàcuáa ní cáhá<sup>n</sup> espíritú xínú cuèchi núú Yá Ndiöxí. Te ní tendaha ñàha-dé xii-güedé cuáhá<sup>n</sup>-güedé ñuú Jòpé.

<sup>9</sup> Te nduu tnéé-á<sup>n</sup> ñúhú-ní-güedē ichi cuáhá<sup>n</sup>-güedé, te cùu-xi datná òré caúxúú nduu ta cùyatni-güedé ñuú-á<sup>n</sup>, te òré-á<sup>n</sup> nñ sáá té Pèlú díquí véhé càhá<sup>n</sup> ndihí-dé Yá Ndiöxí.

<sup>10</sup> Te òré-á<sup>n</sup> sa xihí-dé docó cuìní-dé caxi-dé, te nini càdúha-yu sá caxí-dé ní dácótó núú ñáhá-xí

<sup>11</sup> sá nñ xiní-dé ñ<sup>n</sup> sá ndécú àndiú, te càa datná caá ñ<sup>n</sup> dóó cáhnú nchicú<sup>n</sup> yoho ndi cùmí xíquí-xi véxi cuu<sup>n</sup> núú ñúhú.

12 Te núú dǒó-ǎ<sup>n</sup> yódó cǒó ndihí  
quiti ndáva ndihí nchaa núú quiti  
ndèé cúmí sǎhá-xi.

13 Te ní tecú dóho-dé cǎhá<sup>n</sup> ì<sup>n</sup> sá  
cǎhá<sup>n</sup>, te xǎha<sup>n</sup> sǎ cǎhá<sup>n</sup>-á<sup>n</sup> xii-dé:

—Pèlú, ndacuíñí cahni-n ndèda-ni  
cǎa quiti-a caxi-n-di —cachí sá  
cǎhá<sup>n</sup>-á<sup>n</sup> xǎha<sup>n</sup>-xi xii-dé.

14 Te té Pèlú ní xǎha<sup>n</sup>-dě:

—Vá cǎhni-í-di chí cǎchí tnúhu sá  
sánú ìchi ñaha xii nchúhú ñáyiú isràél  
sá vǎ cúú cǎxi-ndí nchaa quiti-a chí  
cuu cuéchi, te vátá cǎxí-gǎ-í-di ní ì<sup>n</sup>  
xito —cachí-dé xǎha<sup>n</sup>-dě.

15 Te ní cǎhá<sup>n</sup> tucu sá ní cǎhá<sup>n</sup>-á<sup>n</sup>, te  
xǎha<sup>n</sup>-xi:

—Vá cúú cǎchí-n sǎ vǎ cúú cǎxi-n-di,  
chí mee Yǎ Ndiǒxí ní cachí-gá sá díú  
nchaa quiti-a cuu caxi-o vitna —cachí  
sá ní cǎhá<sup>n</sup>-á<sup>n</sup> xǎha<sup>n</sup>-xi xii-dé.

16 Te duca<sup>n</sup> ní cǎhá<sup>n</sup> sá ní cǎhá<sup>n</sup>-á<sup>n</sup>  
ǎní xito, te dǎtnú<sup>n</sup>í cuánda tucu  
dóó-ǎ<sup>n</sup> andiú.

17 Te té Pèlú ñá ní cùtnuní iní-dé ná  
cuèndá duca<sup>n</sup> ní dácótó núú ñǎhá-xí  
xii-dé, núú xǎǎ<sup>n</sup> ío cuéhé ní sani iní-dé.  
Te òré-á<sup>n</sup> ní quexìo cue téé ní ten-  
daha té Còrneliú ndéé yuyèhe, chí ndí  
vehe ndí vehe cuáhá<sup>n</sup>-güedé ndúcú  
tnúhu-güedé ndèé cáá vèhe té Xímú  
téé díi vèhe-xi ndecu té Pèlú.

18 Te ní cǎhá<sup>n</sup> níhi-güedé, te  
xǎha<sup>n</sup>-güedé:

—Ñá túú cùdana iha ndecu ì<sup>n</sup>  
téé nànducu-ndí nání-dě Xímú, àdi  
Pèlú chí úú díu-dé —cǎchí-güedé  
xǎha<sup>n</sup>-güedé.

19 Te té Pèlú vǎi sani iní-dé sá ní  
dácótó núú ñǎhá-xí xii-dé. Te òré-á<sup>n</sup>  
ní xǎha<sup>n</sup> Espiritú Yǎ Ndiǒxí xii-dé:

—Cundedóho-n ì<sup>n</sup> tnúhu na  
cǎhá<sup>n</sup>-í-a. Ní quexìo úní cue téé  
nànducu ñaha xii-n.

20 Yáchí, cuandèe chí quíhí<sup>n</sup>-n  
ndíhi-güedé, te vǎ yùhú-n chí yùhú ní  
xǎha<sup>n</sup>-í véxi cuaca ñaha-güedé xii-n —  
cǎchí Espiritú-gá xǎha<sup>n</sup>-xi xii té Pèlú.

21 Te ní xica-dé cuándeé-dé núú  
ndécú cuè téé xica nanducu ñaha  
xii-dé, te xǎha<sup>n</sup>-dě xii-güedé:

—Yùhú cúú tée nànducu-ndo-á<sup>n</sup>,  
Náu-í-a núú ná chíú<sup>n</sup> cuení ñǎhá-ndó  
—cǎchí-dé xǎha<sup>n</sup>-dě xii-güedé.

22 Te xǎha<sup>n</sup>-güedé:

—Tée cùu capitá<sup>n</sup> téé nàni Corneliú  
ní tendaha ñaha-dé véxi-ndí, te téé-á<sup>n</sup>  
íó váha iní-dé, chí ío sàndáá iní-dé  
Yǎ Ndiǒxí, te nchaa ñáyiú isràél  
íó váha cǎhá<sup>n</sup>-yu cuèndá-dé. Te ì<sup>n</sup>  
espíritú xínú cuèchi núú Yǎ Ndiǒxí ní  
xǎha<sup>n</sup>-xi xii-dé sá cáná ñaha-dé xii-n  
quíhí<sup>n</sup>-n vèhe-dé dacuàha-n-dé tnúhu  
Yǎ Ndiǒxí —cǎchí cue téé ní tendaha  
té Còrneliú xǎha<sup>n</sup>-güedé xii té Pèlú.

23 Te ní xǎha<sup>n</sup> tǎ Pèlú sá quíhu-güedé  
vehe-dé, te candeca tnàha-güedé  
ndíhi-dé quíhí<sup>n</sup> ndéé nduu tnéé. Te  
nduu tnéé-á<sup>n</sup> ní xica-güedé ndécá  
tnàha-güedé ndíhi té Pèlú cuáhá<sup>n</sup>,  
te tnàhá ì<sup>n</sup> úú cue téé sàndáá iní  
tnúhu Jèsús ñuú Jopé cuáhá<sup>n</sup> ndíhi  
ñaha-güedé xii-dé.

24 Te ndéé ingá nduu ní quexìo-güedé  
ñuú Cèsareá. Te té Còrneliú ndétú  
ñaha-dé xii-güedé vehe-dé te sa ndècu  
túha-dé ndíhi ñadìhí-dé ndíhi nchaa  
landú-dé ndíhi cue téé ío váha tnàhá  
tnúhu ndíhi-dé, chí ní cana ñaha-dé  
ní nítnáhǎ-yu ndíhi-dé cundetú-yu té  
Pèlú.

25 Te sátá ní quèxio té Pèlú vehe  
té Còrneliú, te ní quee-dé quehé, te  
ní ngüíñí xítí-dě núú tǎ Pèlú chíñùhu  
ñaha-dé ní cùu.

26 Te té Pèlú ní xǎha<sup>n</sup>-dě:

—Ndacuíñí vá ngüíñí xítí-n núù-í  
chí ñá díú Ndiǒxí cùu-í, dícó ì<sup>n</sup> téé  
ñuyíú-a cùu-í —cǎchí té Pèlú xǎha<sup>n</sup>-dě  
xii-dé.

27 Te ta cǎhá<sup>n</sup> té Pèlú ndíhi té  
Còrneliú cuánguìhu-güedé xítí vehe, te  
chitu ñáyiú xìxíhi xítí vehe.

28 Te ní xǎha<sup>n</sup> tǎ Pèlú xii-yu:

—Sa nàha-ndo sá cǎchí tnúhu sá  
sánú ìchi ñaha xii nchúhú ñáyiú isràél  
sá vǎ cúú quixi-ndí vehe ní ì<sup>n</sup> nchohó  
ñáyiú ñá túú cùu ñáyiú isràél te ní  
vǎ cúú tnàhá tnúhu ndíhi ñaha-ndí  
xii-ndo. Dico Yǎ Ndiǒxí ní cachí-gá sá  
vǎ cúú cǎhá<sup>n</sup>-í sá vǎ cúú cǎhá<sup>n</sup> ndíhi-í  
ñáyiú ñá túú cùu ñáyiú isràél, chí cuu  
cuéchi.

29 Núú xǎǎ<sup>n</sup> ndíhi-ni véxi-í òré ní  
quexìo tnúhu sá cáná ñaha-ndo. Te  
cachí tnúhu-ndo nǎ cuèndá cáná  
ñaha-ndo —cachí té Pèlú xǎha<sup>n</sup>-dě  
xii-yu.

30 Te té Còrneliú ní xáha<sup>n</sup>-dě:

—Ní cuu cúmí nduu, te ðiu-ni ðàtná òré iha cùu-xi, te yúhú ndècu-í ðiu-ni vehe-í, te ñá túú tnàhí ná xéxì-í cáhá<sup>n</sup> ndìhì-í Yá Ndiòxí, te òré-á<sup>n</sup> nǐ quexìo ì<sup>n</sup> espíritú xínú cuèchi núú-gá níhnú-xí dóó cuìxí<sup>n</sup> dóó chàhnchí.

31 Te cächí-xi: “Còrneliú, ní xíndedóho Yá Ndiòxí tnúhu ní cáhá<sup>n</sup>-n ndìhì-gá, te xíní-gá sá sǎñaha-n ðíhú<sup>n</sup> xii ñáyiu ndàhú.

32 Te ñuú Jòpé ndécú ì<sup>n</sup> téé nàni Xímú, àdi Pelú chi úú ðiù-dé, te ndècu-dé vehe ì<sup>n</sup> téé nàni tucu Xímú téé ðàcuitá ñì, te càa vehe-dé ì<sup>n</sup> xio yuhu làmár, te cana-n-dě ná quixi-dé ndatnúhu-n ndìhì-dé”, duha ní cáhá<sup>n</sup> espíritú xínú cuèchi núú Yá Ndiòxí.

33 Núu xǎ<sup>n</sup> ndìhì-ni ní cana ñaha-í xii-n. Te táxáhu xii-n sá vèxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiòxí, te cuíní-ndí cachí tnúhu-n nchàa tnúhu ní cachí Yá Ndiòxí cáhá<sup>n</sup>-n — cächí té Còrneliú xáha<sup>n</sup>-dě.

*Té Pèlú ní ndatnúhu-dé ndìhì ñáyiu ní tacá vehe té Còrneliú*

34 Te té Pèlú xáha<sup>n</sup>-dě xií-yu:

—Vitna ní xíní-í sá Yá Ndiòxí cáhá<sup>n</sup> ndìhì-gá ñáyiu cuèi ndéda-ni càa ñuú, te ì<sup>n</sup>-ni quide-gá ndìhì nchaa-yu.

35 Te nchaa ñáyiu nèhe sá yíñùhu núú Yá Ndiòxí, te xǐquide váha-yu, te nchaa-yu cùu váha iní ñáhá-gǎ xií-yu. Te ñá túú quide cuendá-gá cuèi ná ñáyiu ñuú cúu-yu.

36 Te Yá Ndiòxí ní tendaha-gǎ Xítóhó Jesucristú ní sáhá<sup>n</sup>-gá ní xíndecu-gá nació<sup>n</sup> Isràél, te ní xáha<sup>n</sup>-gǎ xií-yu ì<sup>n</sup> tnúhu váha nàcuáa cuu váha iní-yu. Te ðiu-ni mee Jèsús cùnù-gá núú ñáyiu nǐ càa xico ñuyú.

37 Te nàha-ndo sá ðíhna-gá ndí Juàá ní cáhá<sup>n</sup> ndí tnúhu Yá Ndiòxí núú ñáyiu, te ní ðàcuándute ñaha ndí xií-yu. Te ðàtnùní ní ngúita Jèsús ní cáhá<sup>n</sup>-gá tnúhu-gá ðístrítú Galileá, te ðàtnùní ní sáhá<sup>n</sup>-gá ñìhì nació<sup>n</sup> Isràél ní cáhá<sup>n</sup>-gá tnúhu-gá núú ñáyiu.

38 Te sa nàha-ndo sá Yá Ndiòxí ní sǎñaha-gǎ Espíritú-gá xii Jèsús téé ñuú Nazàrét ndécú ndìhì-dé chíndèe ñaha-xi xii-dé. Te nàha-ndo sá nǐ

xica cuu Jèsús ní quide tátna-gá nchaa ñáyiu yìhì ñaha espíritú cùndìhì yucu ñávàha. Te ío vài-gá sá vǎha ní quide ñaha-gǎ xií-yu, te duca<sup>n</sup> nǐ quide-gá, chi Yá Ndiòxí ní chindee ñaha-gá.

39 Te mee-ndí ní xíní-ndí nàcuáa ní quide Jèsús ñuú Jerusalén ndìhì ñìhì nació<sup>n</sup> Isràél. Te ní sata caa ñaha-güedé xii-gá núú cùrúxí te yàcá<sup>n</sup> ní xíhì-gá.

40 Te núú ùní nduu ní ðándótó ñaha Yá Ndiòxí xii-gá. Te ní cuíní-gá sá cùndècu Xítóhó Jesucristú titní nduu sátá nǐ ndoto-gá cuendá cáhá<sup>n</sup> ndìhì ñaha-gǎ xii-ndí nchaa-ndí nàcuáa ní xica cuu-ndí ndìhì-gá.

41 Te ñá ncháá ñáyiu nǐ xíní ñáhá xii-gá, chi mee-ni nchùhú cue téé ní cachí-gá sá cáhá<sup>n</sup> ndáá-ndí sá nǐ ndoto-gá, chi ní xíndecu ndìhì-ndí-gá, te ní xihì ní xexi-ndí ndìhì-gá, núu cáhá<sup>n</sup> ndáá-ndí sá nǐ ndoto-gá.

42 Te ní cachí-gá sá nchùhú quíhì<sup>n</sup>-ndí cúñaha-ndí xii ñáyiu sá méé Yá Ndiòxí ní táuchíú<sup>n</sup>-gǎ sá Jèsús cada ndáá-gá cuèchi nchaa ñáyiu ndècu vívú ndìhì cuèchi nchaa ñáyiu ní xíhì. Te duca<sup>n</sup> nǐ xáha<sup>n</sup> Yá Ndiòxí xii Jèsús, te ðiu-ni duca<sup>n</sup> nǐ cachí Jèsús cáhá<sup>n</sup>-ndí.

43 Te cue téé ní cáhá<sup>n</sup> tnúhu Yá Ndiòxí ndéé sanaha nǐ cáhá<sup>n</sup>-güedé sá quíxí Jèsús, te ní cachí-güedé sá ncháá ñáyiu na quíndáá iní ñáhá xii Jèsús, te cada càhnu iní-gá nchaa cuèchi-yu — cächí té Pèlú xáha<sup>n</sup>-dě xií-yu.

*Ní quexìo Espíritú Yá Ndiòxí ní ngúndecu ndìhì cue ñáyiu ñá túú cùu ñáyiu isràél*

44 Te mei òré cáhá<sup>n</sup>-dé ndèdóho-yu ní quexìo Espíritú Yá Ndiòxí ní ngúndecu ndìhì nchaa ñáyiu-á<sup>n</sup>.

45 Te cue téé isràél cuáhá<sup>n</sup> ndìhì té Pèlú, cue téé ní sándáá iní tnúhu Jèsús ní cuñúhu vèhì-güedé sá nǐ quexìo Espíritú Yá Ndiòxí ní ngúndecu ndìhì-yu, chi cuendá sá ñá ðiú ñáyiu isràél cúu-yu núu xǎ<sup>n</sup> ní cuñúhu-güedé.

46 Te ní cutnùní sá nǐ quexìo Espíritú Yá Ndiòxí ní ngúndecu

ndihí-yu, chi ní ngüíta-yu càhá<sup>n</sup>-yu tnúhu sá dácàhu iní ñàhá Espiritú-gá, tnúhu sá ñà túú xini-yu càhá<sup>n</sup>-yu. Te ní ndacá<sup>n</sup> táhũ-yu núú Yă Ndiõxí cuendá nchaa sá ñi quide-gá.

<sup>47</sup> Te dătnùní ní xáha<sup>n</sup> tē Pèlú:

—Vitna te cuandute ñáyu ní natuha ichi Xítóhó Jesucristú chi sa ndècu ndihí-yu Espiritú Yă Ndiõxí dătná cuiní-ndó ndècu ndihí nchoo, núu xiá<sup>n</sup> vâ cúú cächí dava-gá ñáyu sá vâ cúú cuandutè-yu —cächí-dé xăha<sup>n</sup>-dē xií-yu.

<sup>48</sup> Te dătnùní ní xáha<sup>n</sup>-dē xii ñáyu:

—Vitna te cuandute-ndo, te òré-án te cacunehe-ndo Xítóhó Jesucristú —cächí-dé xăha<sup>n</sup>-dē xií-yu.

Te dătnùní ní càhá<sup>n</sup> ndàhú-yu núú tē Pèlú cundecu ndihí ñaha-dē xií-yu ñi ũú nduu.

## 11

*Té Pèlú ní cani-dé cuendú núú ñáyu sândáá iní tnúhu Jèsús ñuú Jerusàlén*

<sup>1</sup> Te cue tée ní táuchíú<sup>n</sup> Jèsús dacuàha ñaha xii ñáyu tnúhu-gá, ndihí cue ñáyu ní sândáá iní tnúhu-gá, ñáyu ndècu distritú Jùdeá ní nihí-yu tnúhu sá ñáyu ñá túú cùu ñáyu isràél ní sândáá iní-yu tnúhu Yă Ndiõxí.

<sup>2</sup> Te òré ní ndexìo té Pèlú ñuú Jerusàlén, te ñáyu isràél ñáyu ní cächí sá cādá nchàa nacuáa ní càhá<sup>n</sup> ndí Moisés ní satnuhu ñàhá-yu xii-dé.

<sup>3</sup> Te ní xáhă<sup>n</sup>-yu xii té Pèlú:

—¿Ná cuendá ní sáhá<sup>n</sup>-n ndēé ndiácá<sup>n</sup> ní càhá<sup>n</sup> ndihí-n ñáyu-ă<sup>n</sup>, te ñá túú quidé-yu dătná quidé nchòo-i? Te ní sáhá<sup>n</sup>-n yacá<sup>n</sup> ní xexi-n ndihí-yu —cächí-yu xăhă<sup>n</sup>-yu xii-dé.

<sup>4</sup> Te té Pèlú ní cani-dé cuendú nacuáa ní cuu núú ñi sáhá<sup>n</sup>-dē, te xăha<sup>n</sup>-dē:

<sup>5</sup> —Ní xindecu-í ñuú Jòpé. Te òré càhá<sup>n</sup> ndihí-í Yă Ndiõxí, te ní dácótó ñaha-xi xii-í sá vèxi cuu<sup>n</sup> ñi dódó cáhnú àndiú, te ndùtu ndi cumí xiquí-xi, te ní ngava-xi núú ndécù-í.

<sup>6</sup> Te ní xindéhé vâha-í, te ní xini-í nchaa quiti yòdo núú-xi. Te ñi xichi yòdo quiti cúmi sáhá-xi, te ñi xichi

yòdo quiti déé<sup>n</sup>, te ñi xichi yòdo cóo, te ñi xichi yòdo quiti ndava.

<sup>7</sup> Te ní tecú dóho-í càhá<sup>n</sup> ñi sá càhá<sup>n</sup>, te cächí-xi: “Pèlú, ndacuíñi cahni-n ndēda-ni cāa quiti-a caxi-n-di”, cächí sá ñi càhá<sup>n</sup>-án.

<sup>8</sup> Te ní xáha<sup>n</sup>-í: “Vâ cahní-í-di chi cächí tnúhu sá sánú ichi ñaha xii nchúhú ñáyu isràél sá vâ cúú caxi-ndí nchaa quiti-a”, xăha<sup>n</sup>-í.

<sup>9</sup> Te ní tecú dóho-í càhá<sup>n</sup>-ni tucu núú ñinu, te cächí sá càhá<sup>n</sup>-án: “Vâ cúú cächí-n sâ vâ cúú caxi-n-di, chi mee Yă Ndiõxí ní cächí-gá sá díú nchāa quiti-án cuu caxi-o”, cächí sá càhá<sup>n</sup>-án.

<sup>10</sup> Te duca<sup>n</sup> ñi càhá<sup>n</sup> sá ñi càhá<sup>n</sup>-án ũni xito, te dătnùní cuāndaa dódó-ă<sup>n</sup> ndihí nchaa quiti-án andiú.

<sup>11</sup> Te òré-ni ní quexìo úní cue tée vehe núú ndécù-í. Te cue tée-án ñi tendaha ñaha ñi tée ñuú Cèsareá nánducu ñaha-güedé xii-í.

<sup>12</sup> Te mee Espiritú Yă Ndiõxí ní cächí-xi sá quihí<sup>n</sup>-í ndihí-güedé, te ní cächí-xi sá ñà túú ñà cani iní-í. Te tñàhá ñiú cue tée ndècu iha ní sáhá<sup>n</sup> ndihí ñaha-güedé xii-í, te nchaa-ndí ní sáhá<sup>n</sup>-ndí vehe té Còrneliú ñuú Cèsareá.

<sup>13</sup> Te ní cani-dé cuendú nacuáa ní cuu ní sáhá<sup>n</sup> ñi espíritú xínú cuèchi núú Yă Ndiõxí vehe-dé, te ní quihu-xi ndéé xiti vehe-dé, te ní xáha<sup>n</sup>-xi xii-dé: “Tendaha-n cuè tée na quihí<sup>n</sup>-güedé ñuú Jòpé quingana-güedé ñi tée nani Xímú, àdi Pelú chi úú diu-dé. Te candeca ñaha-güedé quixi.

<sup>14</sup> Te tée-án cächí tnúhu-dé nása cada-n nánihí tãhú-n ndihí ñadihí-n, ndihí landú-n, ndihí nchaa ñáyu xinu cuechi vehe-n”, duha ní xáha<sup>n</sup> espíritú-án xii té Còrneliú.

<sup>15</sup> Te òré ní ngüíta-í càhá<sup>n</sup> ndihí-í-yu ní quexìo Espiritú Yă Ndiõxí ní ngúndecu ndihí-yu dătná ní quide-xi cútñahá ní taxi Yă Ndiõxí Espiritú-gá ndéé díhna ní ngúndecu ndihí nchoo.

<sup>16</sup> Te ní ndacu iní-í nacuáa ní càhá<sup>n</sup> Xítóhó Jesucristú, te duha ní cächí-gá: “Té Juáá ní xóo dacuandute-dé ñáyu, dico yúhú sãñaha-í Espiritú Yă Ndiõxí cundecu ndihí-yu”, duha ní cächí-gá.

17 Te Yá Ndiöxí ní sãñaha-gã Espiritú-gá cundecu ndihí ñáiyu ñá túú cùu ñáiyu isràèl dàtná ní quide-gá cútnàhá ní sándáá iní-ó tnúhu Jèsús, núu xiã<sup>n</sup> vá càchí-í sá vã cúú cada-í ì<sup>n</sup> sá cuiní Yã Ndiöxí cada-í —càchí té Pèlú xãha<sup>n</sup>-dẽ xií-yu.

18 Te sátá dúcá<sup>n</sup> ñí xáha<sup>n</sup> tẽ Pèlú, te ñá túú-gã ná tnúhu ní cãhá<sup>n</sup>-yu, te ío ní cudíí ìní-yu nchaa nàcuáa ní quide Yá Ndiöxí, te ní xítnàhá-yu:

—Tnàhá nchaa ñáiyu ñá túú cùu ñáiyu isràèl naníhí tãhú-yu núu na dàñá-yu nchaa sá cuèhé sá dúhá quidè-yu, chi duca<sup>n</sup> cuiní Yã Ndiöxí cunduu —càchí-yu xítnàhá-yu.

*Ñáiyu sándáá iní tnúhu Jèsús ñuú Antiòquiá*

19 Te sátá ñí sahní-güedé té Těvá, te ní cuiní-güedé cada úhú-güedé nchaa ñáiyu ní sándáá iní-xi tnúhu Jèsús, te ní xité nuú-yu ndi tnahá ì<sup>n</sup> ì<sup>n</sup> ñuú. Te davá-yu cuáhá<sup>n</sup>-yu ndéé distritú Fèniciá ndihí distritú Chìpré ndihí ñuú Antiòquiá. Te ní cãhá<sup>n</sup>-yu tnúhu Jèsús núu mee-ni ñáiyu isràèl, te ñá ní xítnúhu-yu dava-gá-yu.

20 Te dava-gá ñáiyu distritú Chìpré ndihí ñáiyu ñuú Cìrené ní sáhá<sup>n</sup>-yu ñuú Antiòquiá. Te ñá díú mèe-ni ñáiyu isràèl ní cãhá<sup>n</sup> ndihí-yu, chi tnàhá ñáiyu ñá túú cùu ñáiyu isràèl ní xáhã<sup>n</sup>-yu tnúhu Jèsús.

21 Te ní chindee ñàha-gá xii ñáiyu càhá<sup>n</sup> tnúhu-gá, te vãi-gá-yu ní sándáá iní-yu-gá chi ní tuhá-yu ichi-gá.

22 Te ñáiyu ndècu ñuú Jerusalén ñáiyu ní sándáá iní tnúhu Jèsús ní níhí-yu tnúhu nàcuáa ní cuu, núu xiã<sup>n</sup> ní tendàhá-yu té Bèé cuáhá<sup>n</sup>-dé ñuú Antiòquiá.

23 Te òré ní quexìo té Bèé, te ní xiní-dé nàcuáa ní quide ñaha-gã xií-yu sá ñí naníhí tãhú-yu, núu xiã<sup>n</sup> ío ní cudíí ìní-dé. Te ní dácáhu ìní ñáhã-dẽ, te ní xáha<sup>n</sup>-dẽ:

—Ío nducu ndèe-ndo cada-ndo nchaa sá càchí Yã Ndiöxí cada-ndo —càchí-dé xãha<sup>n</sup>-dẽ xií-yu.

24 Te té Bèé cúú-dẽ ì<sup>n</sup> tée váha iní-xi, te ndècu ndihí-dé Espiritú Yã Ndiöxí,

te ío sándáá iní-dé tnúhu Jèsús. Te vãi vihi ñáiyu ní tuhá-yu ichi-gá.

25 Te dàtnùní cuáhá<sup>n</sup> té Bèé ñuú Tarsú cuánúndúcú-dẽ té Sàulú.

26 Te òré ní naníhí ñáhã-dẽ, te ndèca ñaha-dé cuáhá<sup>n</sup> ñuú Antiòquiá, te yacá<sup>n</sup> ní xíndecu-güedé ì<sup>n</sup> cuíá ndihí ñáiyu ní sándáá iní tnúhu Jèsús, te vãi-yu ní dácúáhã ñàha-güedé tnúhu-gá. Te diu-ni ñuú Antiòquiá ní dánání ñáhã-yu Cristiànú xii nchaa ñáiyu sándáá iní tnúhu Jèsús.

27 Te ndéé dàvá-á<sup>n</sup> ñí quee ì<sup>n</sup> úú cue tée càhá<sup>n</sup> tnúhu Yá Ndiöxí ñuú Jerusalén cuáhá<sup>n</sup>-güedé ñuú Antiòquiá.

28 Te ì<sup>n</sup>-dé nání-dẽ Àgabú, te ní chindee ñàha Espiritú Yã Ndiöxí xii-dé, te ní sáhã<sup>n</sup>-dé núu nchaa ñáiyu sándáá iní tnúhu-gá, te ní xáha<sup>n</sup>-dẽ xií-yu sá quíxí ì<sup>n</sup> tnamá ñihí ñuyíú. Te duca<sup>n</sup> ñí cuu sátá ñí ngúnutnìí té Claudiú tée yìndaha cuèhé nació<sup>n</sup>.

29 Núu xiã<sup>n</sup> nchaa ñáiyu sándáá iní tnúhu Jèsús ñuú Antiòquiá ní ndatnúhu-yu sá chindèé-yu nchaa ñáiyu sándáá iní tnúhu-gá ndécú distritú Jùdeá cuendá vá ndóhó vihí-yu docó. Te nàcuáa ní níhí-yu, te duca<sup>n</sup> ñí sacá<sup>n</sup> tnáhã-yu.

30 Te ní tacá díhú<sup>n</sup>-ã<sup>n</sup>, te nèhe té Bèé ndihí té Sàulú cuáhá<sup>n</sup>, cuáha-güedé cue tée yìndaha ñáiyu sándáá iní tnúhu-gá.

## 12

*Sátá ñí xíhí té Jàcobó, te ní ngava té Pèlú vecaá*

1 Te ndéé dàvá-á<sup>n</sup> ñí ngúíta té Hèrodés tée yìndaha ñaha xii ñáiyu isràèl ní quide úhú-dé ì<sup>n</sup> úú ñáiyu sándáá iní tnúhu Yá Ndiöxí.

2 Te ní táuchíú<sup>n</sup>-dẽ ní tñi-güedé té Jàcobó ñaní té Juáá, te ní sahní ñaha-güedé ndihí machití.

3 Te ío ní cudíí ìní dava ñáiyu isràèl cuendá sá ñí sahní ñaha-güedé xii té Jàcobó, núu xiã<sup>n</sup> ní tendaha tucu té Hèrodés sandadú-dé ní sáhã<sup>n</sup> tñi tucu-güedé té Pèlú. Te duca<sup>n</sup>

nĩ quide-dé cútnàhá ní xóo vico ní xexí-yu pàá sá ñà túú yìhi levadurá.

<sup>4</sup> Te ní naníhí-güedë té Pèlú, te ní tñi ñaha-güedë ndécá ñaha-güedë cuáhá<sup>n</sup> vecaá. Te té Hèrodés ní táúchíú<sup>n</sup>-dë cuáhá<sup>n</sup> sáhú<sup>n</sup> ì<sup>n</sup> sandàdú cùndeé-güedë té Pèlú. Te ní xáha<sup>n</sup>-dë:

—Cundeé-ndó ndì cúmí ndì cúmí-ndó tē-ã<sup>n</sup> —càchí-dé xāha<sup>n</sup>-dë xii-güedë.

Te té Hèrodés ní sani iní-dé queñuhu-dé té Pèlú vecaá òré ná yāha vico cuendá cahni ñaha-güedë cáhá<sup>n</sup>-dë ní cùu.

<sup>5</sup> Te ní xihí-ni té Pèlú vecaá, te ní xindeé cuaa ñaha sàndadú xii-dé. Te cue ñāyiu sàndáá iní tñúhu Yá Ndiöxí ío ní xícá<sup>n</sup> táhū-yu núú-gã cuendá sá ñà túú nã cada ñaha-güedë xii-dé.

*Yá Ndiöxí ní dácäcu-gá té Pèlú vecaá*

<sup>6</sup> Ì<sup>n</sup> niú-gá quihí té Pèlú vecaá ní cùu, te nduu tñé tauchìu<sup>n</sup> té Hèrodés quihí<sup>n</sup> sandàdú queñuhu ñaha-güedë xii-dé vecaá cuendá quiní nchaa ñāyiu nása cada ñaha-güedë ní cùu. Te té Pèlú cáá-dë xidí-dé xití vecaá, te ndì ndúú dúcú<sup>n</sup> ndáhá-dë ndútú càdená, te xio xio dñi-dé ndécú sàndadú, te dava-gá sandàdú xindeé-güedë yèhe vecaá.

<sup>7</sup> Te ní quexìo ì<sup>n</sup> espíritú xínú cuèchi núú Yá Ndiöxí xití vecaá núú cáá tē Pèlú xidí-dé, te uu<sup>n</sup>ni ní dáyèhé-xi xití vecaá, te ní dānguihi ñaha-xi xii-dé, te xāha<sup>n</sup>-xi xii-dé:

—Yáchí, ndácóo —càchí-xi xāha<sup>n</sup>-xi xii-dé.

Te ní ndacóo-dé, te nchaa cadèná ndútú dúcú<sup>n</sup> ndáhá-dë ní nandáxí.

<sup>8</sup> Te ní xáha<sup>n</sup> tucu espíritú-á<sup>n</sup> xii-dé:

—Yáchí, nucuíhnu dóo-n, te ndíhu-n chàu-n —càchí-xi xāha<sup>n</sup>-xi xii-dé.

Te ní ndíhu nuu-dé dóo-dë, te ní xáha<sup>n</sup> tucu espíritú-á<sup>n</sup>:

—Candixi dóo-n, te na quihí<sup>n</sup>-ó —càchí-xi xāha<sup>n</sup>-xi xii-dé.

<sup>9</sup> Te té Pèlú ní chinchícú<sup>n</sup>-dë espíritú-á<sup>n</sup>, te ñá ní cùtnuní iní-dé nñu ndáá ì<sup>n</sup> espíritú xínú cuèchi núú Yá Ndiöxí duca<sup>n</sup> quide àdi ñáhá, te dácoto ñaha-xi xii-dé ní sani iní-dé.

<sup>10</sup> Te ndëndaha-ni-dë espíritú-á<sup>n</sup> cuáhá<sup>n</sup> ní yāha-dé nācuāa xñutñi

sandàdú, te ta yāha-gá-dé núú ndécú dàva-gá-güedë. Te ní sáá-dé ndéé yuyèhe núú ndèdí caá nācuāa ní yāha ichi sá cuáhá<sup>n</sup> ndéé xití ñuú, te ní nacaá<sup>n</sup> méé yèhe-á<sup>n</sup>, te ní quee-dé cuáhá<sup>n</sup>-dë ndihí espíritú-á<sup>n</sup>. Te ní tnahá-dé ì<sup>n</sup> tnuú, te yácá<sup>n</sup> ní dāndōo ñaha espíritú-á<sup>n</sup> xii-dé.

<sup>11</sup> Te dātnuní ní nene váha sani núú-dë, te ní cutnùní iní-dé, te ní cachí-dé:

—Ndáá sá Yá Ndiöxí ní tendaha-gã espíritú-á<sup>n</sup> ní quixi-xi ní dácäcu ñaha-xi xii-í cuendá sá vā cáhni ñaha té Hèrodés. Te dava ñāyiu israél ío ní cudíí iní-yu cuendá sá ñi cuiní té Hèrodés cahni ñaha-dë xii-í —duha ní cachí-dé sātá ñi cutnùní iní-dé.

<sup>12</sup> Te sātá ñi cutnùní iní-dé sá ñi cácu-dé, te cuáhá<sup>n</sup>-dë vehe ì<sup>n</sup> ñaha nāni Mariá nāná tē Juāá, àdi Mácú chí úú diu-dé, te xía<sup>n</sup> ndécú vāi-yu càhá<sup>n</sup> ndihí-yu Yá Ndiöxí.

<sup>13</sup> Te té Pèlú ní quexìo-dé ndéé yuyèhe ní dácásá<sup>n</sup>-dë, te ní quixi ì<sup>n</sup> xíchí nāni Ròdé ní quixi ndehe-xi nã cúú ñāyiu dācasa<sup>n</sup>.

<sup>14</sup> Te ní nucúhu<sup>n</sup> ndudú-xi sá díú tē Pèlú, te ní cudíí víhí iní-xi, dico ñá ní nacaá<sup>n</sup>-xi yuyèhe. Te ní quene cunu-xi cuáhá<sup>n</sup> ngúñaha-xi xii-yu sá núnñi té Pèlú yuyèhe ndaa quehé.

<sup>15</sup> Te ñá ní sàndáá iní-yu tñúhu ní cáhá<sup>n</sup>-xi, te xāhã<sup>n</sup>-yu xii-xi:

—¡Ná tñúhu vñhi cáhá<sup>n</sup>-õ<sup>n</sup> xíchí lúcú! —càchí-yu xāhã<sup>n</sup>-yu.

Te xāha<sup>n</sup>-xi sã ndáá núnñi-dé, te xāhã<sup>n</sup>-yu:

—Ñá díú tē Pèlú chí espíritú sá xító ñaha xii-dé cúú sã càhá<sup>n</sup> —càchí-yu xāhã<sup>n</sup>-yu xii-xi.

<sup>16</sup> Te òré duca<sup>n</sup> xñtnàhá-yu, te té Pèlú ní dácásá<sup>n</sup> tucu-dé yuyèhe. Te ní sáhá<sup>n</sup>-yu ní nacaá<sup>n</sup>-yu yuyèhe, te ní xiní-yu sá díú tē Pèlú, te ní cuñúhu víhí-yu.

<sup>17</sup> Te ní quide-dé ndaha-dé núú-yu cuendá cadí-yu yuhú-yu. Te ní ngúita-dé ní caní-dé cuendú nācuāa ní quide ñaha Yá Ndiöxí xii-dé sá ñi dácäcu ñaha ì<sup>n</sup> espíritú xínú cuèchi

núú-gă xii-dé vecaá, te ní xáha<sup>n</sup>-dě xií-yu:

—Cúu-ndo tē Jàcobó ndihì dava-gá ñáyiú sàndáá iní tnúhu Jèsús nàcuáa ní quide ñaha Yá Ndiòxí xii-í —càchí-dé xăha<sup>n</sup>-dě xií-yu.

Te sáta dúcá<sup>n</sup> ñí xáha<sup>n</sup>-dě, te ní quee-dé cuáhá<sup>n</sup>-dé ingá xichi.

18 Te sáta ñí túndaá, te ní ngüíta nchaa sandàdú càhá<sup>n</sup> ñí càhá<sup>n</sup> ñí<sup>n</sup>-güedé, te xítnàha-güedé:

—Ñá túú-gă té Pèlú yíhí vècaá, ¿te nása cada-o-i? —càchí-güedé xítnàha-güedé.

19 Te té Hèrodés ní tendaha-dě títñí sandàdú cuáhá<sup>n</sup>-güedé cuánúndúcú ñàha-güedé, te ñá ní nàníhí ñáhá-güedé xii-dé. Te dàtnùní ní cana-dé sandàdú cue tée ní xindeé ñáhá xii té Pèlú, te ní tenáá ñáhá-dě xii-güedé, te ní xáha<sup>n</sup>-dě xii dava-gá cue sandàdú-dé:

—Cahni-ndo cuè tée-á<sup>n</sup> —càchí té Hèrodés xăha<sup>n</sup>-dě.

Te dàtnùní ní quee té Hèrodés distritù Jùdeá cuáhá<sup>n</sup>-dé ñuú Cèsareá, yàcá<sup>n</sup> ní ngúndecu-dé.

#### *Ní xihí té Hèrodés*

20 Té Hèrodés ní cudéé<sup>n</sup>-dě núú ñáyiú ñuú Tírú ndihì núú ñáyiú ñuú Sìdón. Te xiá<sup>n</sup> ní ndatnúhu-yu ní cuu ñí<sup>n</sup>nuu tnúhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndihì ñáhá-yu xii-dé, te ní ndatnúhu ndihì-yu té Blástú. Te tée-á<sup>n</sup> cúú-dě chiú<sup>n</sup> quide-dé núú tē Hèrodés, te ní chindee tnúhu ñaha-dě xií-yu, chi ní càhá<sup>n</sup> ndàhú-yu núú tē Hèrodés sá vă cáda úhú ñáhá-dě xií-yu. Te duca<sup>n</sup> ñí quidé-yu cuendá ñuú té Hèrodés-á<sup>n</sup> queé sá xéxi-yu.

21 Te ní xáha<sup>n</sup> tē Hèrodés ná nduu quíhí<sup>n</sup>-yu ndatnúhu ndihì ñaha-dě xií-yu, te nduu-á<sup>n</sup> ñí quíunuu-dé ñí<sup>n</sup> dóo vâha, ñí<sup>n</sup> sá sácúihnu tée tàxi tnuní. Te ní ngóo-dé núú xilé vâha, xilé sá sácóo nchihì tée tàxi tnuní, te ní ngüíta-dé ní càhá<sup>n</sup> sàhú-dé dóho-yu.

22 Te uu<sup>n</sup>i ní cuáá-yu te càchí-yu:

—¿Tée-a càhá<sup>n</sup>-dé dico ñá díú tē ñuyíú-a cùu-dé chi ndiòxí cúú-dě! —càchí-yu xítnàhá-yu.

23 Te diu-ni òré-á<sup>n</sup> ñí yáha ñí<sup>n</sup> espíritú xínú cuèchi núú Yá Ndiòxí, te ní sáñaha-xi cuèhé xii té Hèrodés. Te duca<sup>n</sup> ñí tnahá-dé chi mee-dě ñá ní xáha<sup>n</sup>-dě sá ñáyiú cùu-dé, te ní càhá<sup>n</sup>-yu sá ndiòxí cúú-dě. Te nchìto-gá-dé ní sanú ñáhá tìndácú xii-dé, te dàtnùní ní xihí-dé.

24 Te ío títñí xichi ní sáhá<sup>n</sup> ñáyiú sàndáá iní tnúhu Yá Ndiòxí ní càhá<sup>n</sup>-yu tnúhu-gá, te ío chítú-yu ní sàndáá iní-yu tnúhu-gá.

25 Te té Bèé ndihì té Sàulú ní ndihì chiú<sup>n</sup>-güedé, te ní ndee-güedé ñuú Jerusalén cuáhá<sup>n</sup>-güedé ndihì té Juáá, àdi Mácú chi úú diu-dé.

## 13

### *Té Bèé ndihì té Sàulú cuáhá<sup>n</sup>-güedé dácua<sup>n</sup>ha-güedé ñáyiú tnúhu Yá Ndiòxí nchaa ñuú xicá*

1 Te ñuú Antiòquia ndécú ñí<sup>n</sup> úú cue tée càhá<sup>n</sup> tnúhu Yá Ndiòxí núú nchaa ñáyiú ní sàndáá iní-xi tnúhu-gá. Te ndécu tucu ñí<sup>n</sup> úú cue tée cùu mestrú dácua<sup>n</sup>ha ñaha-güedé xií-yu tnúhu-gá. ñí<sup>n</sup>-dé nání-dě Bèé, te ñí<sup>n</sup>-dé nání-dě Xímú, te té Xímú-á<sup>n</sup> xáha<sup>n</sup>-güedé Nègrú chi tnuu-dě. Te ingá-dé nání-dě Lúciú, te tée-á<sup>n</sup> cúú-dě tée ñuú Cirené. Te ingá-dé nání-dě Sàulú, te ingá tucu-dé nání-dě Manàén. Te té Manàén-á<sup>n</sup> ndihì té Hèrodés tée cùu gobiernú Galileá ío vâha ní xóo càhá<sup>n</sup> ndihì tnàha-güedé cútnàhá ní cuu lihli-güedé.

2 Te ñí<sup>n</sup> nduu ñá túú nă ní xèxi ñáyiú ní sàndáá iní tnúhu Yá Ndiòxí cuendá mee-ni-gă ní càhá<sup>n</sup> ndihì-yu, te ní xáha<sup>n</sup> Espíritú Yá Ndiòxí xií-yu:

—Tendaha-ndo tē Bèé ndihì té Sàulú quíhí<sup>n</sup>-güedé dava-gá ñuú cada-güedé chiú<sup>n</sup> tahu-í, chi duca<sup>n</sup> cuini-í cunduu —càchí Espíritú-gá xáha<sup>n</sup>-xi xií-yu.

3 Te ní càhá<sup>n</sup> ndihì tucú-yu Yá Ndiòxí, te ñá túú tnàhí ná ní xèxi tucú-yu, te ní sacá<sup>n</sup> ndodo-güedé ndaha-güedé díquí tē Bèé ndihì té Sàulú. Te sáta dúcá<sup>n</sup> ñí quide-güedé, te ní quide ndee iní ñáhá-yu xii-güedé.



*Té Bèé ndihi té Sàulú cuáhán-güedé distritú Chìpré cáhán-güedé tnúhu Yá Ndiöxí*

<sup>4</sup> Te té Bèé ndihi té Sàulú ní quee-güedé cuáhán-güedé cuèndá duca<sup>n</sup> cuìní Espíritú Yá Ndiöxí cundu sá cáca cùu-güedé dava-gá ñuú, te ní quexìo-güedé ñuú Selèuciá, te yàcá<sup>n</sup> ní quée-güedé bàrcú cuáhán-güedé distritú Chìpré. Te ñuú-á<sup>n</sup> cáá xití lámár chi ndècu ñuhu yichí xití ndute.

<sup>5</sup> Te ní quexìo-güedé mei ñuú Salàminá, te ní quene-güedé bàrcú, te ní xica-güedé cuáhán-güedé nchaa veñúhu ñáyiú isràél càhán-güedé tnúhu Yá Ndiöxí. Te cuáhán ndihi-güedé té Juàá cuèndá chindee ñaha-dé xii-güedé.

<sup>6</sup> Te ní tñi-güedé ichi cuáhán-güedé ñuú Páfós cáá ndàa ingá xio Chìpré, te yàcá<sup>n</sup> ní naníhí tnáhá-güedé ndihi ì<sup>n</sup> tée isràél nání-dé Barjèsús, te té-á<sup>n</sup> xìní-dé cada ndùu-dé, te càchí-dé sá càhán-dé tnúhu Yá Ndiöxí dico ña ndàá.

<sup>7</sup> Te té-á<sup>n</sup> quidé chiù<sup>n</sup>-dé ndihi té Sèrgiú, àdi Páblú chi úú diu-dé, te cùu-dé gobièrnú Chìpré, te ío túha-dé. Te ní cana-dé té Bèé ndihi té Sàulú, chi cuìní-dé cundedóho-dé tnúhu Yá Ndiöxí.

<sup>8</sup> Te té quide nduu-á<sup>n</sup> ñá ní dàña-dé cáhán-güedé tnúhu-gá, chi ñá ní cuìní-dé sá té cùu gobièrnú-á<sup>n</sup> tuha-dé ichi Yá Ndiöxí. Te duca<sup>n</sup> ñi quide té Barjèsús, tée xáha<sup>n</sup>-güedé Èlimás.

<sup>9</sup> Te tnáhá tucu té Sàulú ndécú ùú diu-dé chi xáha<sup>n</sup> tùcu-güedé Páblú, te ndècu ndihi-dé Espíritú Yá Ndiöxí. Te ní xíndéhé ñí ñáhá-dé xii té quide nduu-á<sup>n</sup>.

<sup>10</sup> Te ní xáha<sup>n</sup>-dè:

—Yòhó, chi dàtná quidé yùcu ñáváha quide-n chi mee-ni dàndahú-n ñáyiú. Yòhó cúu-n dèhe sácuihná, chi nchaa tnúhu váha cuìní Yá Ndiöxí cáhán-yu, te yòhó ñá dáña-n.

<sup>11</sup> Te vitna quini-n nàcuáa cunduu, chi taxi Yá Ndiöxí ì<sup>n</sup> castiú xii-n chi vá cùnùní-gá núu-n càca cuu-n ì<sup>n</sup> úú nduu —càchí-dé xáha<sup>n</sup>-dè xii té quide nduu-á<sup>n</sup>.

Te òré duca<sup>n</sup> ñi xáha<sup>n</sup> tē Páblú xii-dé, te òré-ni ní cuaa-dé, te ñá túú ní cùnùní tnáhí-gá núu-dè, te ní xóo nducu-nă-dé ñáyiú ní xóo cuita nehe ñaha xii-dé.

<sup>12</sup> Te té cùu gobièrnú ní xìní-dé nàcuáa ní quide té Páblú, te ío ní cuñúhu-dé. Te ní tnáhá iní-dé tnúhu Jèsús, núu xíá<sup>n</sup> ní sándáá iní-dé.

*Té Páblú ndihi té Bèé ndécú-güedé ñuú Antiòquiá Pìsidiá*

<sup>13</sup> Te té Páblú ndihi dava-gá cue té xica cuu ndihi-dé ní quée-güedé bàrcú, te ní quee-güedé ñuú Páfós cuáhán-güedé ñuú Pèrgé, te ñuú-á<sup>n</sup> yíndèhu-xi distritú Pànfilíá. Te té Juàá ní nacuico-dé ní dándóo ñaha-dé xii-güedé cuánuhú-dé ñuú Jerusalén.

<sup>14</sup> Te dava-gá-güedé ní quee-güedé ñuú Pèrgé cuáhán-güedé ñuú Antiòquiá, te Pìsidiá yíndàha-xi ñuú-á<sup>n</sup>. Te nduu xíndetatú-yu, te ní sáhán-güedé veñúhu ñáyiú isràél, te ní ngóo-güedé xití veñúhu.

<sup>15</sup> Te cue té ndècu veñúhu ní quehe<sup>n</sup>-güedé tutú yódó tnùní nchaa tnúhu sá ñi chídó tnùní ndíi Moisés ndihi tutú yódó tnùní nchaa tnúhu sá ñi chídó tnùní dava-gá cue té ní xóo cáhán tnúhu Yá Ndiöxí ndéé sanaha, te ní dácuáhá-güedé ní xíndedóho cue ñáyiú, te dàtnùní cue té yíndaha veñúhu-á<sup>n</sup> ñi xáha<sup>n</sup>-güedé xii té Páblú ndihi dava-gá-güedé:

—Nchòhó cue té cùu ñaní tnáhá-ndí, te núu cuìní-ndó càhán-ndó tnúhu Yá Ndiöxí, te cuu cáhán-ndó tnávíi cuèndá cutúha-yu —càchí-güedé xáha<sup>n</sup>-güedé.

<sup>16</sup> Te té Páblú ní ndacuíñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáhán-dé, te ní xáha<sup>n</sup>-dè:

—Te nchòhó ñáyiú quide nchaa nacuáa càhán Yá Ndiöxí ndihi nchaa nchòhó ñáyiú isràél, cundedóho-ndo nchaa-ndo ì<sup>n</sup> tnúhu na càhán-í-a.

<sup>17</sup> Te cuéi ndéé sanduu te cuéi vitna chindee ñaha-ni Yá Ndiöxí xii nchaa ñáyiú isràél, te ní nacáxi ñaha-gá xii-yu te ní chindee ñaha-gá cuèndá cáyá-yu, chi cuìní-gá sá cúu vai-yu,

te duca<sup>n</sup> ñi quide-gá cútnàhá ní xíndecú-yu nació<sup>n</sup> Ègiptú. Te dàtnùní ní dácăcu ñaha-gă xií-yu ñuú-á<sup>n</sup>, chi mee-gă nchaa ndăcu-gă quidé-gă.

<sup>18</sup> Te ní xíndecú-yu ñ<sup>n</sup> xichi núú ñà túú tnàhí sàcúndecu ñáyiú údico cuía, te xití údico cuía-ă<sup>n</sup> ñi cundee ñni-gă nchaa sá ñi quidé-yu.

<sup>19</sup> Te Yá Ndiöxí ní chindee ñaha-gă xii ñáyiú isrâél, te ní dánăă-yu úsá nació<sup>n</sup>, chi cuendá ní cuini-gă cuu cuendá-yu ñuhú-á<sup>n</sup>.

<sup>20</sup> Te dàtnùní ní cachí Yá Ndiöxí sá díú-ní cuè té cuchia<sup>n</sup> taxi tñuní-güedé nchaa ñáyiú, te duca<sup>n</sup> ñi quide-güedé dàtná cúmí ciendú dăva cuía. Te sátá xîă<sup>n</sup>, te ní xíndecu té Sămuél té ní cáhă<sup>n</sup> tñuhu Yá Ndiöxí.

<sup>21</sup> Te dăvă-á<sup>n</sup> ñi cuini ñáyiú isrâél sá cündecu ñ<sup>n</sup> té quindaha ñaha-dé xií-yu, te Yá Ndiöxí ní cachí-gă sá tē Săul quindaha-dē-yu, te té-á<sup>n</sup> ñi cuu-dé déhe té Cîs, te té Benjămín té ní xíndecu ndéé sanaha-gă ní cuu ñani tnáhă-dē. Te té Săul ní xíndaha-dē ñáyiú údico cuía.

<sup>22</sup> Te Yá Ndiöxí ñá ní cuini-gă cundecu-ni-dé quindaha-dē ñáyiú, chi ní cuini-gă sá tē Dăvií ndihu ndaha-dē cue ñáyiú isrâél, te ní cachí-gă: “Ío vâha ní tnahá ñni-í năcuăa quide té Dăvií déhe té Isăi, te cada-dé nchaa năcuăa cúñaha-î xii-dé”, duha ní cachí Yá Ndiöxí —cachí té Păblú xăha<sup>n</sup>-dē xií-yu.

<sup>23</sup> Te ní xăha<sup>n</sup> tucu té Păblú:

—Diu-ni ñani tnáhă tē Dăvií cúú Jêsús. Te Yá Ndiöxí ní tendaha-gă Jêsús ní quixi-gă ñuyíú-a cuendá nchaa ñáyiú isrâél ná quindăá ñni ñáhă xii Jêsús naníhí tăhú-yu, chi duca<sup>n</sup> ñi cachí Yá Ndiöxí cunduu.

<sup>24</sup> Te cútnàhá vátă ngüŷta-gă Jêsús cáhă-gă tñuhu Yá Ndiöxí, te ní cáhă<sup>n</sup> té Juăá núú ñáyiú isrâél sá xini ñuhu-xi dăñă-yu nchaa sá cuéhé sá dúhá, te cuanduté-yu.

<sup>25</sup> Te sa ta cüyatni-ni-gă cuú-dé, te ní xăha<sup>n</sup>-dē xií-yu: “Nchöhó cachí-ndó sá yúhú cúú-í Crístú Yăá ndétú-ndó dico ñáhă, chi ñá díú yúhú cúú-í Crístú, chi davitna quixi Crístú Yăá

tendaha Yă Ndiöxí quixi ñuyíú-a. Te yúhú cúú-í ñ<sup>n</sup> té duu<sup>n</sup> duu<sup>n</sup> ñá túú tàú nandaxi cuèdicó chàú-gă dico quide-í chiu<sup>n</sup>-gă”, duha ní cáhă<sup>n</sup> te Juăá —cachí té Păblú xăha<sup>n</sup>-dē xií-yu.

<sup>26</sup> Te ní xăha<sup>n</sup> tucu té Păblú:

—Cundedóho tucu-ndo ñngă tñuhu na cáhă-í. Nchöhó tnáhă-ndó cūu-ndo ñani tnáhă ndi Abrahám, te xini-ndó sá Yă Ndiöxí cūnuu-gă. Te diu-ni-gă cuini-gă sá nchăá-ndó cundedóho-ndo tñuhu-gă, chi cūu-xi tñuhu sá cáhă<sup>n</sup> năcuăa naníhí tăhú-ndó.

<sup>27</sup> Te nchaa ñáyiú ndecu ñuú Jerusălén ndihi nchaa cue té cūnuu ñá ní cūtnuní ñni-yu ndihi-güedé sá Yă Ndiöxí ní tendaha-gă Jêsús ní quixi-gă ñuyíú-a. Te ñá ní săha-yu cuendá sá díú Jêsús ní cacunehe cue té ní cáhă<sup>n</sup> tñuhu Yá Ndiöxí ndéé sanaha cuè ní dăcuăhă-yu tñuhu-gă veñuhu-yu ndi tnahá únă nduu, nduu ndêtatú-yu. Te ní cachí-yu sá ndecuéchi Jêsús, te ní xăhă<sup>n</sup>-yu sá cahní ñaha-güedé xii-gă. Te xîă<sup>n</sup> sa naha cue té ní xóo cáhă<sup>n</sup> tñuhu-gă ndéé sanaha să dúcá<sup>n</sup> cáhă<sup>n</sup>-yu.

<sup>28</sup> Te cuèi ñá túú nă ní quide-gă te ní xăhă<sup>n</sup>-yu xii té Pilatú té cūu gobiernú sá táuchiu<sup>n</sup>-dé cahni ñaha-güedé xii-gă.

<sup>29</sup> Te xîă<sup>n</sup> nūu ní sata caa ñaha-güedé xii-gă núú cürúxí. Te ní quide-güedé nchaa năcuăa ní chídó tñuní cue té ní cáhă<sup>n</sup> tñuhu Yá Ndiöxí ndéé sanaha. Te sátă ñi xihí-gă, te ní nunehe ñaha-güedé xii-gă núú cürúxí, te nchido ñaha-güedé cuáhă<sup>n</sup>, te ní chihí ñaha-güedé ñ<sup>n</sup> xití yaú.

<sup>30</sup> Te Yá Ndiöxí ní dándótó-gă Jêsús.

<sup>31</sup> Te titní xito ní sáhă<sup>n</sup> Jêsús núú ndécú ñáyiú ní xica cuu ndihi-gă, ñáyiú ní quee distritú Galileá ní sáhă<sup>n</sup>-yu ndihi-gă ñuú Jerusălén. Te vitna nchaa ñáyiú-á<sup>n</sup> xăhă<sup>n</sup>-yu xii dăva-gă ñáyiú isrâél năcuăa ní cuu ní ndoto-gă.

<sup>32</sup> Te nchúhú cáhă<sup>n</sup>-ndí năcuăa cada-ndo naníhí tăhú-ndó, chi Yá Ndiöxí ní xăha<sup>n</sup>-gă xii cue ñani tnáhă-ó ñi xíndecu ndéé sanaha sá

téndàha-gá Déhe-gá Jèsús quixi-gá ñuyíú-a.

33 Te ní quixi-gá ní xíhí-gá, te ní dándótó ñàha Yá Ndiöxí xii-gá, te núu xíã<sup>n</sup> naníhí tàhú-ó núu na quìndáá iní-ó-gã. Te ì<sup>n</sup> téé ní cáhá<sup>n</sup> tnúhu Yá Ndiöxí ndéé sanaha ní chídó tnùní-dé núú sàlmú cúú ùú nàcuáa ní cáhá<sup>n</sup> Yá Ndiöxí ní xáha<sup>n</sup>-gã xii Déhe-gá, te duha ní xáha<sup>n</sup>-gã: “Yòhó cúú-n Dèhe-í, te vitna cutnùní iní ñáyíu sá yùhú cúú-í Tàtá-n”, duha ní xáha<sup>n</sup>-gã xii Jèsús. Te ñíu-ni duca<sup>n</sup> ní chídó tnùní téé ní cáhá<sup>n</sup> tnúhu-gá ndéé sanaha.

34 Te ñngá xichi tucu núú tùtú-gá ní chídó tnùní ì<sup>n</sup> téé ní xíndecu ndéé sanaha nàcuáa ní xáha<sup>n</sup>-gã xii Déhe-gá, te duha ní xáha<sup>n</sup>-gã: “Mee-ni sã vãha cada ñaha-í dàtná ní xíí-í té Dàvíí”, duha ní xáha<sup>n</sup>-gã. Te duca<sup>n</sup> ní chídó tnùní téé ní xíndecu ndéé sanaha nàcuáa ní cáhá<sup>n</sup> Yá Ndiöxí, chi òré ní xíhí Jèsús te ní dándótó ñàha-gá cuèndá sá vã tíú yìquì cuñú-gá.

35 Te núu xíã<sup>n</sup> duha ní chídó tnùní ì<sup>n</sup> téé ní xíndecu ndéé sanaha núú librú Sàlmú nàcuáa ní xáha<sup>n</sup>-dè xii-gá: “Vá dáñá-n sã tíú yìquì cuñú Déhe-n chi ío váha quide-gá”, duha ní chídó tnùní téé ní xíndecu ndéé sanaha —càchí té Pàblú xáha<sup>n</sup>-dè xii-yu.

36 Te xáha<sup>n</sup> tùcu-dé:

—Te té Dàvíí ní quide-dé nchaa chiú<sup>n</sup> ní táhú Yá Ndiöxí cada-dé, te dàtnùní ní xíhí-dé. Te ní chindúxi ñaha-güedè xii-dé yatni nàcuáa yìndúxi cue ñaní tnáhá-dè ndéé sanaha-gã, te xíá<sup>n</sup> ní téhyú yìquì cuñú-dé.

37 Te Jèsús chi ñá ní tēhyú yìquì cuñú-gá, chi ní dándótó ñàha Yá Ndiöxí xii-gá.

38 Te cuìní-í cachí tnúhu-í xii-ndo cuèndá cutnùní iní-ndó nchaa-ndo sá cáda càhnu iní Yá Ndiöxí nchaa cuéchi-o, chi ní xíhí Jèsús cuèndá naníhí tàhú-ó.

39 Te nchaa ñáyíu na quìndáá iní ñáhá xii Jèsús te cada càhnu iní-gá nchaa sá ñà túú vãha ní quidé-yu, chi núu mee-ni tnúhu ní chídó tnùní ndíi Moisés ná quìndáá iní-yu te vá nánihí tàhú-yu.

40-41 Te ío coto-ndo mèe-ndo cuèndá sá vã yãha-ndo dàtná ní cachí Yá Ndiöxí yãha cue ñáyíu ñá túú ní quide váha ní xíndecu ndéé sanaha. Te nàcuáa ní cáhá<sup>n</sup>-gá ní chídó tnùní ì<sup>n</sup> téé ní cáhá<sup>n</sup> tnúhu-gá ndéé sanaha, te duha ní xáha<sup>n</sup>-gã xii-yu dàvá-á<sup>n</sup>:

Cundedóho nchaa nchòhó ñáyíu cuèhé yuhu-xi na càhá<sup>n</sup>-í ì<sup>n</sup> tnúhu te quini-ndó ñá cuñúhu-ndo,

yúhú quidè-í vai núú sã ío váha vitna ndècu-ndo ñuyíú-a,

te cuèi na còo ñáyíu cachí tnúhu xii-ndo nàcuáa ndúu nchaa sá vãha-á<sup>n</sup>, dico nchòhó vá quìndáá iní-ndó,

te sá dúcá<sup>n</sup> càda-ndo vá quìndáá iní-ndó, te dàcuíta nihnu-ndo mèe-ndo.

Duha ní xáha<sup>n</sup>-gã xii-yu te duca<sup>n</sup> ní chídó tnùní téé ní cáhá<sup>n</sup> tnúhu-gá ndéé sanaha —càchí té Pàblú xáha<sup>n</sup>-dè xii-yu.

42 Te òré ní ndee té Pàblú veñúhu ñáyíu isràél ndíhi cue téé xica cuu ndíhi-dé, te ní cáhá<sup>n</sup> ndàhú ñáyíu yìhi veñúhu núú-dè sá quíhí<sup>n</sup>-dè núú ùná nduu, te ñíu-ni tnúhu ní cáhá<sup>n</sup>-dè cáhá<sup>n</sup> tucu-dé òré quexìo-dé.

43 Te sátá ní túhú veñúhu-yu, te vai ñáyíu isràél ndíhi ñáyíu ní chitnahá ñáhá xii-yu nchícú<sup>n</sup> nihnu quide nacuáa quidé-yu càhá<sup>n</sup> ndíhi-yu Yá Ndiöxí cuáhá<sup>n</sup> ndíhi-yu té Pàblú ndíhi té Bèé. Te ní xáha<sup>n</sup>-güedè xii-yu sá vã dáñá ndèé-yu canchicú<sup>n</sup> nihnú-yu tnúhu sá càhá<sup>n</sup> nàcuáa quide Yá Ndiöxí sá cúú-xí-yu.

44 Te núú ùná nduu, nduu ndètatú-yu ní quexìo vai vihi ñáyíu, chi nihí ñúú ní quexìo ndedóho-yu tnúhu Yá Ndiöxí.

45 Te cuèndá sá ío vai ñáyíu ní quexìo, núu xíã<sup>n</sup> ní cuu cuédú iní ñáhá ñáyíu isràél xii té Pàblú, te ní xícuèhé ñáhá-yu xii-dé. Te ní xáhá<sup>n</sup>-yu xii-dé sá dándàhú ñáhá-dè xii-yu ndíhi tnúhu càhá<sup>n</sup>-dè.

46 Te té Pàblú ndíhi té Bèé ñá túú ní yùhú ñáhá-güedè xii-yu. Te ní xáha<sup>n</sup>-güedè:

—Xini ñuhu-xi díhna-gá nchòhò ñáiyu isràél cáhá<sup>n</sup> ndihí-ndí tnúhu Yá Ndiöxí, te mee-ndo ñă cuiní-ndó cùndedóho-ndo. Te sá dúcá<sup>n</sup> quide-ndo, te vá nánihí tãhú-ndó, te ni vã cáhá<sup>n</sup>-gá-ndí tnúhu Yá Ndiöxí núu-ndó, dico cáhá<sup>n</sup>-ndí núu dâva-gá ñáiyu cuëi ñá díú ñáiyu isràél cúu-yu,

<sup>47</sup> chi duca<sup>n</sup> ñi táuchíú<sup>n</sup> Yã Ndiöxí cada-ndí. Te ní cachí-gá:

Cuini-í cundecu-ndo dàtná ì<sup>n</sup> tée yòtnuú ñuhú cundecu-ndo

cáhá<sup>n</sup>-ndó tnúhu-í núu nchàa ñáiyu ñá túu cùndihí-ndo ñáiyu ndècu nihí ñuyíú, te naníhí tãhú-yu, duha ní cáhá<sup>n</sup>-gá —càchí té Pãblú ndihí té Bèe xãhá<sup>n</sup>-güedë xii-yu.

<sup>48</sup> Te ñáiyu ñá túu cùu ñáiyu isràél ío ní cudíí iní-yu sá dúcá<sup>n</sup> ñi cáhá<sup>n</sup>-güedë, te ní xitnãhá-yu sá ío váha cuáhã<sup>n</sup> tnúhu Yá Ndiöxí. Te mee Yã Ndiöxí sa ñaha-gá nãndi cùu ñáiyu naníhí tãhú, te ñu-ni ñáiyu-ã<sup>n</sup> ñi sãndãá iní-yu.

<sup>49</sup> Te nchaa xichi xíã<sup>n</sup> ñi sãhá<sup>n</sup>-yu ní cáhá<sup>n</sup>-yu tnúhu-gá.

<sup>50</sup> Te cue tée isràél ní ndatnúhu-güedë ndihí cue tée cùnuu, ndihí cue ñáiyu ñihí cùnùu, te ñáiyu ñihí-ã<sup>n</sup> ñá túu tnãhí cùmãñi-yu veñúhu. Te ní xãhá<sup>n</sup>-güedë sá cádá ùhú-yu té Pãblú ndihí té Bèe, te dàtnùní cuicú<sup>n</sup> ñãhá<sup>n</sup>-yu xii-güedë, te duca<sup>n</sup> ñi quidé-yu.

<sup>51</sup> Te ní casa<sup>n</sup> ñuhu té Pãblú ndihí té Bèe sãhá-güedë ní naquidi-güedë tíca chùhmã ñi tníi sãhá-güedë. Te duca<sup>n</sup> ñi quide-güedë cuendã cutnùní iní-yu sá ñá túu ní quide váha-yu. Te dàtnùní ní quee-güedë cuáhã<sup>n</sup>-güedë ñuú Ìconiú.

<sup>52</sup> Te ñáiyu ní sãndãá iní-xi tnúhu Jèsús ío váha ní cuu iní-yu cuendã sã ñi naníhí tãhú-yu, te ncháá-yu sa ndècu ndihí-yu Espiritú Yã Ndiöxí.

## 14

*Té Pãblú ndihí té Bèe ndécú-güedë ñuú Ìconiú*

<sup>1</sup> Te ní quexìo té Pãblú ndihí té Bèe ñuú Ìconiú. Te ní sãhá<sup>n</sup>-güedë veñúhu ñáiyu isràél, te ío váha ní cáhá<sup>n</sup>-güedë

tnúhu Yá Ndiöxí, te vai ñáiyu isràél ndihí ñáiyu ñá túu cùu ñáiyu isràél ní sãndãá iní-yu tnúhu-gá.

<sup>2</sup> Te dava ñáiyu isràél ñá ní sãndãá iní-yu, te ní cáhá<sup>n</sup> cuéhé-yu cuendã té Pãblú ndihí té Bèe cuendã sã vã quindãá iní ñáiyu ñá túu cùu ñáiyu isràél.

<sup>3</sup> Te ní xíndecu-güedë titní nduu, te ñá túu tnãhí ní yùhú-güedë ní dácuahã-güedë ñáiyu tnúhu Yá Ndiöxí. Te mee-gã ní chindee ñãhá-gá ní quide-güedë titní núu sã vã yõ tnãhí ndàcu cada, te ío ní cuñúhu-yu. Te duca<sup>n</sup> ñi quide-gá cuendã cutnùní iní-yu sã ndãá cáhá<sup>n</sup>-güedë sã mée-gã ío cùu iní ñãhá-gã xii-yu, te naníhí tãhú-yu núu na quindãá iní-yu tnúhu-gá.

<sup>4</sup> Te ní quee dava ñáiyu ñuú Ìconiú, davá-yu cùndihí-yu ñáiyu isràél ñáiyu ñá túu sãndãá iní tnúhu Jèsús. Te davá-yu cùndihí-yu cue tée ní táuchíú<sup>n</sup> Jèsús cáhá<sup>n</sup> tnúhu-gá.

<sup>5</sup> Te ñáiyu isràél ndihí dava-gá ñáiyu ñá túu sãndãá iní-xi ní cuu ñi nùu-yu ndihí cue tée cùnuu sã cáñi-yu-güedë, te cuãha yúú ñãhá<sup>n</sup>-yu xii-güedë.

<sup>6</sup> Te té Pãblú ndihí té Bèe ní níhí-güedë tnúhu sá cuini-yu canihá-yu, núu xíã<sup>n</sup> dayuhu ñi quee-güedë cuáhã<sup>n</sup>-güedë ñuú Listrã ndihí ñuú Dèrbé. Te ndi ndùú ñuú-ã<sup>n</sup> yíndèhu-xi Licaoniã. Te ní sãhá<sup>n</sup>-güedë dava-gá ñuú líhli càa yatni xíã<sup>n</sup>.

<sup>7</sup> Te nchaa ñuú-ã<sup>n</sup> ñi cáhá<sup>n</sup>-güedë tnúhu Jèsús.

*Ñuú Listrã ní sãha yúú ñãhá<sup>n</sup>-yu xii té Pãblú*

<sup>8</sup> Te ñuú Listrã ndécú ì<sup>n</sup> tée yacua, mee-ni núcóo-dé chi duca<sup>n</sup> tnãhí càa-dé ní cacu-dé.

<sup>9</sup> Te ndedóho-dé tnúhu cáhá<sup>n</sup> té Pãblú, te ní cutnùní iní té Pãblú sã ío sãndãá iní tée yacua-ã<sup>n</sup> sã Yã Ndiöxí cada tátna ñãhá-gã xii-dé, núu xíã<sup>n</sup> ní xíndéhé ñãhá váha té Pãblú xii-dé.

<sup>10</sup> Te té Pãblú ní cáhá<sup>n</sup> níhí-dé, te ní xãhá<sup>n</sup>-dë:

—Ndacuíñí cunutñí váha-n —  
càchí-dé xáha<sup>n</sup>-dè.

Te ní ndacuíñí cunu-dé te ní  
xica-ni-dé.

11 Te òré ní xiní-yu sá tē Pāblú  
ní quide tátna-dé tēe yacua-ǎ<sup>n</sup>, te  
nchaá-yu ní cáhá<sup>n</sup>-yu tnúhu mēe-yu  
tnúhu Licàoniá. Te ní cáhá<sup>n</sup> níhi-yu, te  
xítnàhá-yu:

—Cue tēe-ǎ<sup>n</sup> sànuu sá ñáyu  
cùu-güedé dico ñáhá, chi ndiöxí  
cúu-güedé te ní quexìo-güedé ñuyíu-a  
—càchí-yu xítnàhá-yu.

12 Te ní cachí-yu sá tē Bèe cúu-dé  
ndiöxí dánàni-yu Jüpitér, te tē Pāblú  
cúu-dé ndiöxí dánàni-yu Mèrcuriú,  
chi cuendá tēe-án cúu-dé tēe cáhá<sup>n</sup>.

13 Te càa ñ<sup>n</sup> veñúhu yuhu ñúú-án  
núu quidé càhnú-yu ndiöxí sá  
dánàni-yu Jüpitér. Te dútú yíndàha  
veñúhu-án ndécá-dé ñ<sup>n</sup> úú ndicutu  
cuáhá<sup>n</sup> quehé veñúhu, te ñúhu itá  
dúcú<sup>n</sup>-güedé. Te cue quití-án cahni-dé  
cada càhnú-dé ndihí-yu tē Bèe ndihí tē  
Pāblú ní cùu, chi duca<sup>n</sup> quidé-yu quide  
cahnú-yu ndiöxí-yu.

14 Te tē Bèe ndihí tē Pāblú ní  
níhi-güedé tnúhu nàcuáa sàni iní-yu  
cadá-yu, te ní ndátá-güedé dóo-güedé  
cuendá cutnùní iní-yu sá ñă tnàhá  
iní-güedé nàcuáa sàni iní-yu cadá-yu.  
Te xínu-güedé cuánguihu-güedé  
tnuú-yu, te níhi ní cáhá<sup>n</sup>-güedé, te  
xáha<sup>n</sup>-güedé:

15 —¿Ná cuendá duca<sup>n</sup> cuiní-ndo  
cada-ndo? Te ñiu-ni tnàha ñáyu-ndo  
cùu-ndí, dícó-ni tnúhu Yá Ndiöxí  
véxi-ndí dacuàha ñaha-ndí xii-ndo  
cuendá sá vǎ cadá-gǎ-ndó nàcuáa  
quide-ndo, te quíndáá iní-ndó Yá  
Ndiöxí, chi ñ<sup>n</sup>dii-ni Yá Ndiöxí ndécú.  
Te ñiu-gá ní cadúha-gá andiu ndihí  
ñuyíu-a ndihí lámár ndihí nchaandi  
túhú sá ío ñuyíu-a.

16 Te ndéé sanaha ñí dáñá Yá  
Ndiöxí ní quidé-yu nàcuáa cuáhá<sup>n</sup> iní  
mēe-yu.

17 Te ní xóo cada-gá sá vǎha cuendá  
cutnùní iní-yu sá ío váha iní-gá. Te  
ñiu-gá dácùu<sup>n</sup>-gá dáú, te tàxi-gá sá  
nchitó-ó chi xìto-gá nchaa tatá xítú-ó,

te xǎ<sup>n</sup> cudíí iní-ó ndècu-o ñuyíu-a —  
càchí tē Pāblú ndihí tē Bèe xáha<sup>n</sup>-güedé  
xíi-yu.

18 Te cuèi duca<sup>n</sup> ñí xáha<sup>n</sup>-güedé  
nchaa tnúhu-án, dico ío úhú ní sándáá  
iní-yu ñá ní sàhní-yu ndicutu-án  
chi cuendá duca<sup>n</sup> tnàhí quidé-yu  
sàhní-yu ndicutu òré quidé càhnú-yu  
ndiöxí-yu.

19 Te ñuú Antiòquiá ndihí ñuú  
Ìconiú xíndecu dava ñáyu isràél, te  
ní queé-yu cuáhá<sup>n</sup>-yu ñuú Lìstrá núu  
ndécú tē Pāblú. Te xǎ<sup>n</sup> ñí quexìo-yu  
te ní xáhǎ<sup>n</sup>-yu xii ñáyu dii ñúú xǎ<sup>n</sup>  
sǎ cáhní-yu tē Pāblú. Te ní sáha  
yúú ñáhǎ-yu xii-dé, te ní cáhá<sup>n</sup>-yu  
sá ñí xíhí-dé, te ní tní ñaha-güedé  
xii-dé, te tàñuhu ñaha-güedé xii-dé  
cuáhá<sup>n</sup> ñ<sup>n</sup> xio yuhu ñúú ní sá dáquéné  
ñaha-güedé.

20 Te ní quexìo cue ñáyu sándáá  
iní tnúhu Jèsús núu cátuu-dé-án, te ní  
nadúcú<sup>n</sup> ndèé ñáhǎ-yu xii-dé, te ñini  
xínutñí-yu-án ñí ndacóo-dé cuánuhú  
ndihí ñaha tucu-dé xíi-yu xítí ñuú. Te  
nduu tnèe-án ñí ndee-dé ndihí tē Bèe  
cuáhá<sup>n</sup>-güedé ñuú Dèrbé.

21 Te ní cáhá<sup>n</sup>-güedé tnúhu Yá Ndiöxí  
ñuú-án, te ío vǎi ñáyu ní sándáá iní-yu  
tnúhu-gá. Te dàtnùní ní quee-güedé  
cuáhá<sup>n</sup> tucu-güedé ñuú Lìstrá, ndihí  
ñuú Ìconiú, ndihí ñuú Antiòquiá.

22 Te ní xáha<sup>n</sup>-güedé xíi-yu sá vǎ  
dáñá ñihnú-yu tnúhu Jèsús. Te sá  
dúcá<sup>n</sup> ñí cáhá<sup>n</sup>-güedé, te vǐhi-gá ní  
cudíí iní-yu cadá-yu nàcuáa cuiní Yá  
Ndiöxí cadá-yu, te ní xáha<sup>n</sup>-güedé:

—Dacuitíí cùndecu-o ñuyíu-a  
ndoho-o, te dàtnùní duca<sup>n</sup> te nacuaca  
ñaha Yá Ndiöxí xii-o —càchí-güedé  
xáha<sup>n</sup>-güedé xíi-yu.

23 Te ní sáhá<sup>n</sup>-güedé ndi tnahá ñ<sup>n</sup> ñ<sup>n</sup>  
xichi núu ndécú ñáyu dàcuaha tnúhu  
Yá Ndiöxí, te ní taxi ndecu-güedé cue  
tēe quíndaha ñaha xíi-yu, te ní cáhá<sup>n</sup>  
ndihí-güedé Yá Ndiöxí, te ñá túú tnàhí  
ná ní xèxi-güedé cuendá sá ñí cáhá<sup>n</sup>  
ndihí-güedé-gá. Te ní xáha<sup>n</sup>-güedé  
sá Yá Ndiöxí coto ñaha-gǎ xíi-yu chi  
ñiu-ni-gá ní sándáá iní-yu.

*Té Păblú ndihî té Bèé cuáhá<sup>n</sup> tucu-güedé ñuú Antiòquiá Siríá*

24-25 Te dătnùní ní quee té Păblú ndihî té Bèé cuáhá<sup>n</sup>-güedé, ní yáha-güedé distrítú Pisidiá. Te ní quexio-güedé ñuú Pèrgé, xíá<sup>n</sup> nǐ cáhá<sup>n</sup>-güedé tnúhu Jèsús. Te ñuú-á<sup>n</sup> yíndèhu-xi Panfilíá. Te dătnùní cuáhá<sup>n</sup>-güedé ñuú Àtaliá.

26 Te yàcá<sup>n</sup> ní quée-güedé bàrcú cuánuhú tucu-güedé ñuú Antiòquiá. Te ñuú-á<sup>n</sup> cúú-xí ñùú núú nǐ xíá<sup>n</sup> táhǔ-yu núú Yă Ndiòxí cuendá sá chíndèe ñaha-gá xii-güedé chiu<sup>n</sup> quide-güedé. Te cuendá sá nǐ ndihî chiu<sup>n</sup>-güedé nchaa ñuú núú nǐ sáhá<sup>n</sup>-güedé, núu xǎ<sup>n</sup> cuánuhú-na-güedé.

27 Te ní ndexio-güedé ñuú-á<sup>n</sup>, te ní cana-güedé nchaa ñáyiú sàndáá iní tnúhu-gá, te ní caní-güedé cuendú núú-yu nchaa nàcuáa ní cuu núú nǐ sáhá<sup>n</sup>-güedé, te xáha<sup>n</sup>-güedé: “Yă Ndiòxí ío ní chindee ñàha-gá xii-ndí ní cáhá<sup>n</sup>-ndí tnúhu-gá núú nǐ sáhá<sup>n</sup>-ndí, te mee-gă ní quide sá tnàhá ñáyiú ñá túú cùu ñáyiú isràél ní xíndedóho-yu tnúhu-gá cuendá quíndáá iní-yu”, cächí-güedé xáha<sup>n</sup>-güedé xii-yu.

28 Te vâi nduu ní xíndecu-güedé ñuú Antiòquiá ndihî nchaa ñáyiú ní sàndáá iní tnúhu Jèsús.

## 15

*Ní natacá ñáyiú sàndáá iní tnúhu Jèsús ñuú Jerusalén*

1 Te ní quee ñ<sup>n</sup> úú cue téé distrítú Jùdeá cuáhá<sup>n</sup>-güedé ñuú Antiòquiá, te ní sáá-güedé, te ní xáha<sup>n</sup>-güedé xii ñáyiú sàndáá iní tnúhu Jèsús sá núu vá cuáha-güedé sèñá ñ<sup>n</sup> nchaa cue téé dătná ní cachí ndíi Moisés, te vá nánihí tàhú-güedé.

2 Te sá dúcá<sup>n</sup> nǐ cáhá<sup>n</sup> cue téé-á<sup>n</sup>, te ní ngúita té Păblú ndihî té Bèé ní tenáa-güedé cue téé-á<sup>n</sup>, chí dandàhú ñáhá-güedé cuñí-güedé ní cùu. Te nchaa ñáyiú sàndáá iní tnúhu-gá ní cachí-yu sá quíhí<sup>n</sup> té Păblú ndihî té Bèé ndihî ñ<sup>n</sup> úú-gá-güedé ñuú Jerusalén. Te yàcá<sup>n</sup> cada-güedé ñ<sup>n</sup>

jùndá ndihî mee-ni cuè téé ní táuchíú<sup>n</sup> Jèsús càhá<sup>n</sup> tnúhu-gá, ndihî cue téé yíndaha ñáyiú sàndáá iní tnúhu-gá ñuú-á<sup>n</sup>, te jùndá-á<sup>n</sup> cada ndáa-güedé tnúhu ní cáhá<sup>n</sup> cue téé ní sáá ñuú Antiòquiá.

3 Te nchaa ñáyiú sàndáá iní tnúhu-gá ní quide ndee iní ñáhă-yu xii-güedé, te ní tn<sup>n</sup>-güedé ichi cuáhá<sup>n</sup>-güedé. Te ní yáha-güedé distrítú Fèniciá ndihî distrítú Sàmariá, te yàcá<sup>n</sup> ní caní-güedé cuendú nása ní cuu ní tuha ñáyiú ñá túú cùu ñáyiú isràél ichi Yă Ndiòxí, te ní cudíí víhí iní nchaa ñáyiú ní xíndedóho-á<sup>n</sup>.

4 Te té Păblú ndihî té Bèé ní ndexio-güedé ñuú Jerusalén, te ío ní cudíí iní-yu sá nǐ ndexio váha-güedé. Te ndècu dava-gá cue téé ní táuchíú<sup>n</sup> Jèsús dácuàha ñaha xii-yu tnúhu-gá, ndihî cue téé yíndaha ñaha xii-yu, ndihî dava-gá ñáyiú sàndáá iní tnúhu-gá, te ní caní-güedé cuendú núú-yu nàcuáa ní quide Yă Ndiòxí ní chindee ñàha-gá xii-güedé ní quide-güedé chiu<sup>n</sup>-gá.

5 Te ndècu ñ<sup>n</sup> úú cue téé ní tuha ichi Yă Ndiòxí, te cue téé-á<sup>n</sup> cúú-güedé cue téé farisèú, te ní ndacuñí-güedé, te ní xáha<sup>n</sup>-güedé:

—Dacuñí xini ñuhu-xi sá cuáha-güedé sèñá ñ<sup>n</sup> cue téé cùmání cue téé ñá túú cùu ñáyiú isràél, te cùñaha-ndo sá ná cáda-güedé nchaa nàcuáa ní chídó tnùní ndíi Moisés —cächí cue téé cùu farisèú-á<sup>n</sup> xáha<sup>n</sup>-güedé xii-güedé.

6 Te cue téé ní táuchíú<sup>n</sup> Jèsús dácuàha ñaha xii ñáyiú tnúhu-gá, ndihî cue téé yíndaha ñáyiú sàndáá iní tnúhu-gá ní quide-güedé jùndá cuendá ní ndatnúhu-güedé nása cunduu.

7 Te vâi vihi tnúhu ní cáhá<sup>n</sup>-güedé. Te té Pèlú ní ndacuñí-dé, te ní xáha<sup>n</sup>-dè xii-güedé:

—Nchòhó cue téé ndècu ndihî-í ichi Xítohó Jesucristú, chí cùndedóho ñ<sup>n</sup> tnúhu na càhá<sup>n</sup>-í-a. Sa nàha-ndo sá nǐ cachí Yă Ndiòxí sá diú-í cáhá<sup>n</sup>-í tnúhu Jèsús núú ñáyiú ñá túú cùu ñáyiú isràél cuendá sá quíndáá iní-yu, te naníhí tàhú-yu.

8 Dico Yá Ndiöxí sa nàha-gá nása cãa iní ì<sup>n</sup> ì<sup>n</sup> ñáyiu. Te cùnuni iní-ó sã cúu iní ñáhá-gã xii cue ñáyiu ñá túú cùu ñáyiu isràél, chi ní sãñaha-gã Espiritú-gá ndécú ndihí-yu dàtná cuiní-ndó nĩ taxi-gá ndécú ndihí nchoo.

9 Chi Yá Ndiöxí ì<sup>n</sup>nuu-ni cùu iní ñáhá-gã xii-o nchãa-o ndihí cue ñáyiu ñá túú cùu ñáyiu isràél, chi tnàhá-yu ní xócání-gã nchaa sã cuèhé sã dúhá nĩ xóo cadá-yu ndéé òré ní sándáá iní-yu Jèsús.

10 ¿Te ná cuendá nchòhó cuiní-ndó càda ñáyiu ní sándáá iní tnúhu-gá ì<sup>n</sup> sã ñã tnàhá iní-gá sã cadã-yu? Te cuiní-ndó dândoho-ndó-yu. Te ni nchòo te ni cue ñaní tnàhá-ó nĩ xíndecu ndéé sanaha ñã ní ndàcú-yu cadá-yu nchaa xĩã<sup>n</sup>.

11 Te vá dúcã<sup>n</sup> cãhá<sup>n</sup>-ndó, chi sa nàha-ndo sã Yá Ndiöxí ní cundàhú iní ñáhá-gã xii-o, te dió duca<sup>n</sup> nĩ quide-gá sã nánihí tàhú-ó nchãa-o. Te ñiu-ni duca<sup>n</sup> nĩ quide-gá ñáyiu ñá túú cùu ñáyiu isràél, te ní naníhí tàhú-yu — cãchí té Pèlú xãha<sup>n</sup>-dẽ xii-güedé.

12 Te dàtnùní té Bèé ndihí té Pãblú ní ngúita-güedé ní cãhá<sup>n</sup>-güedé, te ní xíndedóho-yu nchaa tnúhu ní cãhá<sup>n</sup>-güedé. Te ní xãha<sup>n</sup>-güedé xii-yu nãcuãa ní chindee ñaha Yá Ndiöxí xii-güedé, te ní quide-güedé vai núú sã vã yõo tnàhí ndàcu cada, te duca<sup>n</sup> te ní cutnùní iní ñáyiu ñá túú cùu ñáyiu isràél sã ndàá cãhá<sup>n</sup>-güedé.

13 Te òré ní ndihí cuendú ní cãhá<sup>n</sup>-güedé, te té Jàcobó ní xãha<sup>n</sup>-dẽ:

—Nchòhó cue té ndècu ndihí-í ichi Xítóhó Jesucristú, chí cùndedóho ì<sup>n</sup> tnúhu na cãhá<sup>n</sup>-í-a.

14 Té Ximú, àdi Pelú chi úú ñiù-dé, ní caní-dé cuendú nãcuãa ní quide Yá Ndiöxí ndéé díhna ní dáquéé ñiù-gá ñáyiu ñá túú cùu ñáyiu isràél tnuú nchaa ñáyiu ñá túú ndècu ichi-gá, cuendá cuiní-gá chiñuhu ñahá-yu xii-gá.

15 Te dàtnùní ní cãhá<sup>n</sup>-dé nãcuãa ní cãhá<sup>n</sup> Yá Ndiöxí ndéé sanaha. Te duha ní chídó tnùní cue té ní xóo cãhá<sup>n</sup> tnúhu-gá ndéé sanaha nãcuãa ní cãhá<sup>n</sup>-gá, te duha ní cachí-gá:

16 Dàtná cuiní-ndó cùu ì<sup>n</sup> vehe ní sãá te ní ngoyo te dãndaa-güedé xito cùu úú, duca<sup>n</sup> sãtnahá-xi cada-xi ì<sup>n</sup> nduu,

chi ñaní tnàhá ndĩ Dàvií ní xóo cãhá<sup>n</sup> ndihí ñahá-yu xii-í ní cùu, te ní dáñá ndéé-yu ichi-í,

te na quixi-í te natuha ñaha tùcú-yu.

17 Te duca<sup>n</sup> te vai ñáyiu ñá túú cùu ñáyiu isràél nandúcú-yu ichi-í te cãhá<sup>n</sup> ndihí ñahá-yu.

18 Duha ní cãhá<sup>n</sup> Yá Ndiöxí, te duca<sup>n</sup> nĩ chídó tnùní cue té ní xóo cãhá<sup>n</sup> tnúhu-gá ndéé sanaha —cãchí té Jàcobó xãha<sup>n</sup>-dẽ xii-güedé.

19 Te xãha<sup>n</sup> tùcu-dé:

—Yúhú cãchí iní-í sã vã cúú dàsatú-ó iní nchaa ñáyiu ta sãndáá iní-xi tnúhu Yá Ndiöxí, ñáyiu ñá túú cùu ñáyiu isràél, te ì<sup>n</sup> úú-ni tnúhu cúñaha-o nãcuãa cadá-yu.

20 Dico xini ñuhu-xi daquihí<sup>n</sup>-ó tùtú cúñaha-o sã vã cãxí-gã-yu nchaa sã nchító-ó nduu táhú nchaa sã cãchí-yu cùu ndiõxí-yu. Te cúñaha-o sã vã cãhá<sup>n</sup> ndihí cue té ñadìhí te núú ñá díú ñadìhí-güedé cúú-yu, te ni cue ñáyiu ñiù vá cãhá<sup>n</sup> ndihí-yu té te núú ñá díú yĩ-yu cùu-güedé, te vá cãxí-yu níñí.

21 Te duca<sup>n</sup> cùñaha-o, chi ndi tnahá ñuu núú ndécú-yu, te xíndecu ñáyiu isràél dácuahá-yu tnúhu ní chídó tnùní ndí Moisés, te ndi tnahá nduu ndètatú-yu dàcuahá-yu tnúhu ndí veñúhu-yu —cãchí té Jàcobó xãha<sup>n</sup>-dẽ xii-güedé.

22 Te dàtnùní cue té ní táuchíú<sup>n</sup> Jèsús dacuàha ñaha xii-yu tnúhu-gá, ndihí cue té yìndaha ñáyiu sãndáá iní tnúhu-gá ní cachí-güedé sã ndúcú-güedé ì<sup>n</sup> úú-gá cue té quíhí<sup>n</sup> ndihí té Pãblú ndihí té Bèé ñuu Antiòquiá, te ñiu-ni duca<sup>n</sup> nĩ cãhá<sup>n</sup> dava-gá ñáyiu ndècu ichi-gá. Te úú cue té ní ndúcú-güedé, ì<sup>n</sup>-dé nání-dẽ Silás, te ì<sup>n</sup>-dé nání-dẽ Judás, àdi Barsabás chi úú ñiù-dé, te cùnuu-güedé ndi ndúú-güedé.

23 Te ní cadúha nchaa cue té cùnuu tutú canehe-güedé quíhí<sup>n</sup>, te duha cãhá<sup>n</sup>-xi:

“Cóvãha dǐi-ndó nchàa-ndo. Nchúhú cue téé ní táuchíú<sup>n</sup> Jèsús cáhá<sup>n</sup>-ndí tnúhu-gá, ndíhi cue téé yǐndaha cue ñáyíu sàndáá iní tnúhu-gá quide ndee iní ñáhá-ndí xii nchòhó cue ñáyíu ndècu ndíhi-ndí ichi-gá cuèi ñá díú ñáyíu isràèl cúú-ndó. Te nchòhó ñáyíu xǐndecu ñuú Antiòquiá, ndíhi nchòhó ñáyíu ndècu distritú Sìriá, ndíhi nchòhó ñáyíu ndècu distritú Cìliciá, càchí tnúhu-ndí xii-ndo sǎ

<sup>24</sup> ñí níhí-ndí tnúhu sá ì<sup>n</sup> úú cue téé ndècu iha ní quixi-güedé núú ndécú-ndó, te ñá túú chiu<sup>n</sup> ni tahu-ndí quixi-güedé. Te sá ì<sup>n</sup> tñúhu ní cáhá<sup>n</sup>-güedé ní xáha<sup>n</sup>-güedé xii-ndo sǎ ngǔndecu sèñá ñíi-ndo, te canchicú<sup>n</sup> nihnu-ndo nchàa nacuáa ní chídó tñúni ndí Moisés, te xǎ<sup>n</sup> ní sani ì<sup>n</sup> ní sani úú iní-ndó, chi ñá túú xǐní-ndó núu ndáá tnúhu cáhá<sup>n</sup>-güedé àdi ñá ndàá.

<sup>25</sup> Te ní ndatnúhu-ndí nàcuáa cunduu sá téndàha-ndí úú cue téé quixi-güedé ndíhi té Bèé ndíhi té Pǎblú, cue téé ío cùu iní-ndí, te cue téé-á<sup>n</sup> cáhá<sup>n</sup>-güedé nàcuáa cáhá<sup>n</sup>-ndí-a.

<sup>26</sup> Te ñíu-ni té Bèé ndíhi té Pǎblú ní sáhá<sup>n</sup>-güedé ní cáhá<sup>n</sup>-güedé tnúhu Xítóhó Jesucristú nchaa xichi. Te ndí tnahá cuáhá<sup>n</sup>-güedé cuíni-yu cahni ñáhá-yu xii-güedé.

<sup>27</sup> Te tendaha-ndí té Jùdás ndíhi té Silás quixi-güedé tñahá-güedé cachí tnúhu váha-güedé nàcuáa cuáhá<sup>n</sup> tnúhu cáhá<sup>n</sup>-ndí.

<sup>28</sup> Te ñíu-ni duca<sup>n</sup> cáhá<sup>n</sup>-ndí càchí tnúhu-ndí nàcuáa cáhá<sup>n</sup> Espiritú Yá Ndiöxí cada-ndo, chi nchúhú vá cáhá<sup>n</sup>-ndí sá cádá-ndó nchàa sá ñí cáhá<sup>n</sup> ndí Moisés cada ñáyíu, chi ío úhú, te vá yóo ndacu cada. Te vitna na cáhá<sup>n</sup>-ndí ì<sup>n</sup> úú-ni tnúhu nàcuáa cada-ndo.

<sup>29</sup> Vá cáxí-ndó sǎ nchító-ó ndùu táhú nchaa sá càchí ñáyíu cùu ndióxí-yu, te vá cáxí-ndó ñíñí, te vá cáxí-ndó cùnú quiti cuèhné, te vá cáhá<sup>n</sup> ndíhi cue téé ñadíhí te núu ñá díú ñadíhí-güedé cúú-yu, te ni cuè

ñáyíu ñíhí vá cáhá<sup>n</sup> ndíhí-yu téé te núu ñá díú yǐ-yu cùu-güedé. Te núu na càda-ndo nchaa nacuáa cáhá<sup>n</sup>-ndí-a, te cada váha-ndo. Te vitna ío cada ndee iní-ndó nchàa-ndo-na.” Duha ní chídó tñúni-güedé núú tütú ní tendaha-güedé cuáhá<sup>n</sup>.

<sup>30</sup> Te ní quide ndee iní-yu cue téé quíhí<sup>n</sup> ñuú Antiòquiá, te duca<sup>n</sup> te ní xica-güedé cuáhá<sup>n</sup>-güedé. Te òré ní quexílo-güedé ñuú-á<sup>n</sup>, te ní cana-güedé nchaa ñáyíu sàndáá iní tnúhu Jèsús, te ní sáñaha-güedé tutú xii-yu.

<sup>31</sup> Te ní dácuáhá-yu tutú ní sáñaha-güedé-á<sup>n</sup>, te ní cudíí víhí iní-yu chí ío váha cáhá<sup>n</sup> tutú-á<sup>n</sup>.

<sup>32</sup> Te té Jùdás ndíhi té Silás tñahá-güedé ní nduu táhú-güedé cáhá<sup>n</sup>-güedé tnúhu sá dácàhu iní ñáhá Yá Ndiöxí. Te ní xáha<sup>n</sup>-güedé vai tnúhu nàcuáa cada-yu, te víhi-gá ní cudíí iní-yu cada-yu nàcuáa cáhá<sup>n</sup> Yá Ndiöxí cada-yu.

<sup>33</sup> Te ní xǐndecu-güedé ì<sup>n</sup> úú nduu ndíhí-yu, te dàtñúni ní quide ndee iní ñáhá-yu xii-güedé cuèndá sá nùhú-güedé núú vèxi-güedé, te mee-ni té Jùdás cuánuhú-dé.

<sup>34</sup> Te té Silás ní xáha<sup>n</sup>-dè sá vǎ nùhú-ni-dé.

<sup>35</sup> Te té Pǎblú ndíhi té Bèé ní ndóo-güedé ní cáhá<sup>n</sup>-güedé tnúhu Yá Ndiöxí ñuú Antiòquiá, te vai-gá tucu ñáyíu Antiòquiá ní cáhá<sup>n</sup>-yu tnúhu-gá.

*Xito cùu úú cuáhá<sup>n</sup> té Pǎblú cáhá<sup>n</sup>-dè tnúhu Yá Ndiöxí núú ñáyíu*

<sup>36</sup> Te sátá ñí cuu cuéhé nduu, te ní xáha<sup>n</sup> té Pǎblú xii té Bèé:

—Na quíhí<sup>n</sup>-ó nchàa ñuú núú ñí sáhá<sup>n</sup>-ó ñí cáhá<sup>n</sup>-ó tñúhu Yá Ndiöxí cáhá<sup>n</sup> ndíhi-o nchàa ñáyíu ní tuha ichi-gá cuèndá quini-ó núu ndècu váha-yu —càchí-dé xáha<sup>n</sup>-dè.

<sup>37</sup> Te té Bèé ní xáha<sup>n</sup>-dè sá quíhí<sup>n</sup> ndíhi-güedé té Juáá, àdi Mácú chí úú ñíu-dé.

<sup>38</sup> Dico té Pǎblú ñá ní dàña-gá-dé quíhí<sup>n</sup> té Juáá, chí ní dándóo ñaha-dè xii-güedé cútnahá ní xǐndecu-güedé Pànfilíá, te ní nacuico-dé cuánuhú-dé,



te ñá túú-gã ní sãhá<sup>n</sup> ndihí ñaha-dě xii-güedé.

<sup>39</sup> Xí<sup>n</sup> ní cuu ní tenàá tnáhá tẽ Bèé ndihí té Pãblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáhá<sup>n</sup>-güedé Chìpré.

<sup>40</sup> Te té Pãblú ní xáha<sup>n</sup>-dẽ xii té Silás sá quíhí<sup>n</sup> ndihí ñaha-dẽ, te ñáyíu sándáá iní-xi tnúhu Jèsús ní cáhá<sup>n</sup> ndihí-yu Yá Ndiõxí sá chíndèe ñaha-gá xii-güedé.

<sup>41</sup> Te ní xica-güedé cuáhá<sup>n</sup>-güedé te ní yáha-güedé nihíi distritú Siríá ndihí distritú Ciliciá. Te ní cáhá<sup>n</sup>-güedé tnúhu Jèsús núú nchàa ñáyíu ní sándáá iní tnúhu-gá, núú xí<sup>n</sup> ío-gá ní cudíí iní-yu cadá-yu nàcuáa càhá<sup>n</sup> Yá Ndiõxí.

## 16

*Tnàhá té Timùteú cuáhá<sup>n</sup> ndihí-dé té Pãblú ndihí té Silás*

<sup>1</sup> Te té Pãblú ndihí té Silás cuáhá<sup>n</sup>-güedé ñuú Dèrbé ndihí ñuú Lìstrá, te ñuú Lìstrá yàcá<sup>n</sup> ndécú ñ<sup>n</sup> tée nàni Timuteú. Te tée-á<sup>n</sup> sándáá iní-dé tnúhu Jèsús, te tnàhá náná-dẽ sándáá iní-a<sup>n</sup> tnúhu-gá, te ñaha isràél cúú-á<sup>n</sup>, te tée griégú cúú tãtá-dẽ.

<sup>2</sup> Te nchaa ñáyíu ní sándáá iní tnúhu-gá ñáyíu ndècu ñuú Lìstrá, ndihí ñáyíu ñuú Iconiú, nchaa ñáyíu-á<sup>n</sup> cudíí iní-yu nàcuáa quide-dé.

<sup>3</sup> Te ní cuiní té Pãblú sá tnàhá té Timùteú quíhí<sup>n</sup> ndihí-dé dava-gá ñuú, núú xí<sup>n</sup> díhna-gá sèñá ní sáha té Pãblú ñ<sup>n</sup> té Timùteú, chi ñá ní tnàhá iní té Pãblú sá càhá<sup>n</sup> cuèhé ñáyíu isràél cuèndá té Timùteú. Te nchaa ñáyíu isràél ndécú ñuú-á<sup>n</sup> xini-yu sá tée griégú cúú tãtá-dẽ, te ñá díú tée isràél cúú-dẽ, te xí<sup>n</sup> ní sáha té Pãblú sèñá ñ<sup>n</sup> té Timùteú.

<sup>4</sup> Te ndi tnahá ñuú ndi tnahá ñuú cuáhá<sup>n</sup>-güedé càhá<sup>n</sup> ndihí-güedé nchaa ñáyíu ní sándáá iní tnúhu Jèsús. Te ní xáha<sup>n</sup>-güedé nàcuáa càhá<sup>n</sup> tutú ní cadúha cue tée ní táuchíú<sup>n</sup> Jèsús dacuàha ñaha xii-yu tnúhu-gá, ndihí cue tée yìndaha ñáyíu sándáá iní tnúhu-gá ñuú Jerusalén.

<sup>5</sup> Te cuèndá duca<sup>n</sup> ñí sáhá<sup>n</sup>-güedé nchaa ñuú núú ndécú ñáyíu sándáá iní tnúhu-gá ní dacuáhá ñàha-güedé xii-yu, núú xí<sup>n</sup> tá cùu túha-gá-yu tnúhu Yá Ndiõxí, te vài-gá-yu ní tuhá-yu ichi-gá.

*Ní dácótó ñàha-xi xii té Pãblú sá ñí xini-dé ñ<sup>n</sup> tée distritú Macèdoniá*

<sup>6</sup> Te ñá ní dàña Espiritú Yá Ndiõxí quíhí<sup>n</sup>-güedé cáhá<sup>n</sup>-güedé tnúhu-gá distritú Àsiá, núú ní sáhá<sup>n</sup>-güedé distritú Frìgiá ndihí distritú Gàlaciá cáhá<sup>n</sup>-güedé tnúhu-gá.

<sup>7</sup> Te ní sáá-güedé yuhu distritú Mìsiá. Te quíhí<sup>n</sup>-güedé distritú Bìtiniá ní cùu, dico ñá ní dàña Espiritú Yá Ndiõxí quíhí<sup>n</sup>-güedé yàcá<sup>n</sup>.

<sup>8</sup> Te ní yáha-güedé Mìsiá, te ní quexìo-güedé ñuú Tròás, te yàcá<sup>n</sup> ní nanítnáhá-ndí ndihí-dé.

<sup>9</sup> Te ñ<sup>n</sup> niú ní dácótó-xí núú tẽ Pãblú sá ñí xini-dé ñ<sup>n</sup> tée distritú Macèdoniá nùtní-dé, te ní xáha<sup>n</sup> tẽ-á<sup>n</sup> xii té Pãblú: “Cada ndee iní-n quíhí<sup>n</sup>-n Màcedoniá chi dacuàha ñaha-n nchaa sá xini-n”, càchí-dé xáha<sup>n</sup>-dẽ, ní dácótó ñàha-xi xii té Pãblú.

<sup>10</sup> Te cuèndá sá dúcá<sup>n</sup> ñí dácótó ñàha-xi xii té Pãblú núu ní ndatnúhu-ndí quíhí<sup>n</sup>-ndí Macèdoniá, chi ní cutnùní iní-ndí sá cáná ñàha Yá Ndiõxí quíhí<sup>n</sup>-ndí cáhá<sup>n</sup>-ndí tnúhu-gá núú ñáyíu yàcá<sup>n</sup>.

*Té Pãblú ndihí té Silás ndécú-güedé ñuú Filipú*

<sup>11</sup> Te ní quée-ndí bàrcú ñuú Tròás, te cuáhá<sup>n</sup> ndáá-ndí ñuú Samòtraciá, te yàcá<sup>n</sup> ní quexìo-ndí, te ní yáha-ni-ndí cuáhá<sup>n</sup>-ndí. Te nduu tnèé ní quexìo-ndí ñuú Nèápolis.

<sup>12</sup> Te yàcá<sup>n</sup> ní quene-ndí bàrcú, te xica-na-ndí cuáhá<sup>n</sup>-ndí ñuú Filipú te ñuú-á<sup>n</sup> yìndèhu-xi distritú Macèdoniá. Te yàcá<sup>n</sup> ní cudíi-ndí ní xìndecu tnaa-ndí. Te ñuú Filipú-á<sup>n</sup> ío cùnuu-xi, chi ío chitu ñáyíu ròma ní ngóo-yu.

<sup>13</sup> Te nduu ndètatú-yu ní quee-ndí ñuú cuáhá<sup>n</sup>-ndí ñ<sup>n</sup> xio yuhu yùte, chi yàcá<sup>n</sup> sáhá<sup>n</sup>-yu càhá<sup>n</sup> ndihí-yu Yá

Ndiöxí. Te òré ní quexìo-ndí, te ní naníhí tnáhá-ndí ndihí mee-ni ñáyiú dñí, te ní cáhá<sup>n</sup>-ndí tnúhu Yá Ndiöxí ní xíndedóho-yu.

14 Te ndècu ñ<sup>n</sup> ñaha nani Lidiá ní xíndedóho-a<sup>n</sup> nàcuáa ní cáhá<sup>n</sup>-ndí, te ñaha ñuú Tiàtirá cúú-á<sup>n</sup>, te òco-a<sup>n</sup> dóo muradú, te ío càhá<sup>n</sup> ndihí-a<sup>n</sup> Yá Ndiöxí. Te òyiú-ni mee Yá Ndiöxí ní chindee ñaha-gá ní sándáa iní-a<sup>n</sup> tnúhu ní cáhá<sup>n</sup> té Páblú.

15 Te ní sandute-a<sup>n</sup> ndihí landú-a<sup>n</sup>, ndihí nchaa ñáyiú xínu cuechi núú-a<sup>n</sup>, te ní cachí-a<sup>n</sup> xii-ndí:

—Te núú ní cutnùní iní-ndó sá ñí sándáa ndisa iní-í tnúhu Jèsús, te cundecu tnaa-ndo vèhe-í —cachí-a<sup>n</sup> xii-ndí.

Te ní quide yica-a<sup>n</sup> ñí xíndecu-ndí vehe-a<sup>n</sup>.

16 Te ñ<sup>n</sup> nduu ñùhu-ndí ichi cuáhá<sup>n</sup>-ndí núú càhá<sup>n</sup> ndihí-yu Yá Ndiöxí, te ní naníhí-ndí ñ<sup>n</sup> xíchí ñúhú ìchi, te yìhí ñaha espíritú cundihí yucu ñávaha xii-xi. Te xíá<sup>n</sup> ní quide ní cáhá<sup>n</sup>-xi nchaa sá vǎ yòo tnàhí cùtnuní iní-xi núú nchaa ñáyiú ní sángándihí ñaha xii-xi. Te ñáyiú dìi vèhe-xi xínu cuechi-xi ío vǎi díhú<sup>n</sup> ñí níhí-yu chí ní cháhu nchaa ñáyiú ní sángándihí ñaha xii-xi.

17 Te xíchí-á<sup>n</sup> ñí chinchícú<sup>n</sup> ñáhá-xí xii-ndí ndihí té Páblú ndëndaha ñaha-xi cuáhá<sup>n</sup>, te ní cáhá<sup>n</sup> níhí-xi xáha<sup>n</sup>-xi xii dava-gá ñáyiú:

—Cue té-a xínu cuechi-güedé núú Yá Ndiöxí, chí ío càhnu cuu-gá, te cachí tnúhu-güedé nása cada-ndo nánihí tǎhú-ndó —cachí-xi xáha<sup>n</sup>-xi xii-yu.

18 Te titní xito ní yáha-ndí duca<sup>n</sup>-ni ñí cáhá<sup>n</sup>-xi. Te ñá ní cundee-gá iní té Páblú sá dúcá<sup>n</sup> càhá<sup>n</sup>-xi, núú ní nanchocuñhu-dé núú nútñí-xi, te ní xáha<sup>n</sup>-dē xii espíritú cundihí yucu ñávaha yìhí ñaha xii-xi:

—Ío càhnu cuu Xítohó Jesucristú, núú xíá<sup>n</sup> cachí-í sá xócuñí-n vǎ quíhí-gá-n yiquí cuñú xíchí-a —cachí-dé xáha<sup>n</sup>-dē.

Te òré-ni ní quee espíritú cundihí yucu ñávaha-á<sup>n</sup> yiquí cùñú-xi.

19-20 Te ñáyiú dìi vèhe-xi xínu cuechi-xi-á<sup>n</sup> ñí cutnùní iní-yu sá vǎ ñihí-gá-yu díhú<sup>n</sup> cuendá tnúhu càhá<sup>n</sup>-xi, núú ní tñí-yu té Páblú ndihí té Silás ndécá ñáhá-yu cuáhá<sup>n</sup> núú cuè téa cùchiu<sup>n</sup> Romá, te xáha<sup>n</sup>-yu xii-güedé:

—Cue té-a cùu-güedé cue téa israhél, te ío dusa<sup>n</sup> xíquide-güedé ñuú-ó.

21 Te cuñí-güedé cada-o nàcuáa quide-güedé, te vǎ cúú dùca<sup>n</sup> cada-o chí ñáyiú nació<sup>n</sup> Rómá cúú-ó —cachí-yu xáha<sup>n</sup>-yu xii cue téa cùchiu<sup>n</sup>.

22 Te uu<sup>n</sup>ni ní cáhá<sup>n</sup> nchaa-yu, te xáha<sup>n</sup>-yu sá ñá túú quide váha té Páblú ndihí té Silás. Te cue téa cùchiu<sup>n</sup> ní cändeé-güedé dóo tē Páblú ndihí dóo tē Silás ní ndátá-güedē, te ní táuchíu<sup>n</sup>-güedē caniha-güedē ndihí tnudli xii-güedé.

23 Te ní caniha-güedē, te dǎtnùní ní chíhí ñaha-güedē vecaá. Te ní xáha<sup>n</sup>-güedē xii téa ndēnchito vecaá sá cadá cuèdadú víhí-dē cuendá ná canú-güedé vecaá.

24 Te cuendá sá dúcá<sup>n</sup> ñí cáhá<sup>n</sup>-güedé, núú téa ndēnchito vecaá ní dáya<sup>n</sup> ñaha-dē ingá cuártú ndécú xiti vecaá, te ní chíhí-dé sáha-güedē yaú nduhu, te ní quide tñí-dé.

25 Te dava niú ní cáhá<sup>n</sup> ndihí té Páblú ndihí té Silás Yá Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue téa yìhí vecaá ní xíndedóho-güedé nàcuáa ní xita-güedé.

26 Te uu<sup>n</sup>ni níhí vèhí ní tnáa ní quidi-xi ndéé cimientú vecaá, te ní nacaá<sup>n</sup> nchaa yèhe vecaá, te ní ndihí cadená ndútú cuè téa yìhí vecaá ní nandaxí.

27 Te ní ndiquíú cúnú ñí téa ndēnchito vecaá, te ní quide cuendá-dé nchii nchaa yèhe vecaá. Te ní tava-dé machiti-dé cahni-dé méé-dē ní cùu, chí ní cáhá<sup>n</sup>-dē sá ñí ndihí cue téa yìhí vecaá ní xínu ni cùu.

28 Te té Páblú ní cáhá<sup>n</sup> níhí-dé, te xáha<sup>n</sup>-dē xii téa ndēnchito vecaá:

—Vǎ dúcá<sup>n</sup> càda-n cahni-n mee-n, chí nchaa-ni-ndí yíhí —cachí-dé xáha<sup>n</sup>-dē xii téa ndēnchito vecaá.

29 Te dātnùnì ní xícá<sup>n</sup> té ndēnchito vecaá ñuhú, te xìnu-dé cuánguihu xítì vecaá núú yíhí tē Pāblú ndìhí té Silás, te quìdi ñaha-ná-xi xii-dé ní quexìo-dé ní ngüñí xítì-dē núú-güedē.

30 Te dātnùnì ndécá ñaha-dé xii-güedé ní ndee vecaá, te ní xícá<sup>n</sup> tnúhú-dē núú-güedē, te xāha<sup>n</sup>-dē:

—Nchòhó cachí tnúhu-ndo nāsa cada-í naníhí tǎhú-í —càchí-dé xāha<sup>n</sup>-dē.

31 Te ní xāha<sup>n</sup>-güedē:

—Quindáá iní-n ndìhí ñadihí-n, ndìhí landú-n, ndìhí nchaa ñáyìu xìnu cuechi núú-n tnúhu càhá<sup>n</sup> Xítóhó Jesucristú, te naníhí tǎhú-ndó —càchí-güedé xāha<sup>n</sup>-güedē.

32 Te ní dácuáhá ñaha-güedé xii té ndēnchito vecaá ndìhí nchaa ñáyìu ndècu vehe-dé tnúhu Yá Ndiòxí.

33 Te ñu-ni òré-á<sup>n</sup> nǐ naquete-dé sátá-güedé núú nǐ ñani, te dātnùnì ní sandute-dé ndìhí-yu.

34 Te ndèca ñaha-dé cuáhá<sup>n</sup> vehe-dé ní sǎñaha-dē sǎ nǐ xexi-güedé, te ní cudíí víhí iní té ndēnchito vecaá ndìhí nchaa-dé vehe-dé sǎ nǐ tuhá-yu ichi Yá Ndiòxí. Te cuándihu tucu té Pāblú ndìhí té Silás vecaá.

35 Te nduu tnéé ní xāha<sup>n</sup> cuè té cùchiu<sup>n</sup> xii poleciá cuáhá<sup>n</sup>-güedé cùu-güedé té ndēnchito vecaá queñuhu-dé úú cue té cuánguihu ndedí nduu ìcu núhú-güedé.

36 Te té ndēnchito vecaá ní xāha<sup>n</sup>-dē xii té Pāblú ndìhí té Silás:

—Cue té cùchiu<sup>n</sup> ní cachí-güedé sǎ quéé-ndó nǔhú-ndó, chi ñá túú-gǎ ná cada-güedé, chi sa ní yáha cuendá-ndó —càchí té ndēnchito vecaá xāha<sup>n</sup>-dē xii-güedé.

37 Te té Pāblú ní xāha<sup>n</sup>-dē xii cue té cùu poleciá:

—Té rómá cúú-ndí, te vá cúú dùca<sup>n</sup>-ni cunduu, chi ní caniha-güedé tnudì xii-ndí, te ní xini-yu nchaá-yu. Te ñá túú tnàhí ní xicá<sup>n</sup> tnúhú-güedé nǔ ndáá ndècuéchi-ndí àdi ñáhá, chi cuendá-ni ní chihi ñaha-güedé vecaá xii-ndí. Te vitna cuíní-güedé dacacu ñaha-güedé núhú-ndí cuendá sǎ vǎ yóo quiní ñáhá nǔhú-ndí càhá<sup>n</sup>-güedé,

dico vá cúú dùca<sup>n</sup> cada ñaha-güedé xii-ndí. Chí cuáhá<sup>n</sup> cúñaha-ndo na quìxi mee-güedé queñuhu ñaha-güedé —càchí té Pāblú xii-dé cue poleciá.

38 Te cue té cùu poleciá cuánuhú-güedé núú ndécú cuè té cùchiu<sup>n</sup>, te ní xāha<sup>n</sup>-güedé nàcuáa ní càhá<sup>n</sup> té Pāblú. Te sǎ dúcá<sup>n</sup> nǐ xāha<sup>n</sup> pòleciá sǎ tē rómá cúú-güedé, xíá<sup>n</sup> ní yùhú-güedé.

39 Te ní sáhá<sup>n</sup> cue té cùchiu<sup>n</sup> yehe vecaá, te ní xāha<sup>n</sup>-güedé sǎ cadá càhu iní-güedé sǎ nǐ chihi ñaha-güedé vecaá, te ní ndēñuhu ñaha-güedé vecaá. Te ní càhá<sup>n</sup> ndàhú-güedé núú cuè té ní xíhí vecaá sǎ ndéé-güedé ñuú-á<sup>n</sup> nǔhú-güedé.

40 Te ní ndee-güedé vecaá, te cuáhá<sup>n</sup>-güedé vehe tá Lidiá, te ní ndatnúhu-güedé ndìhí nchaa ñáyìu ní sándáá iní-xi tnúhu Jèsús, te ní xāha<sup>n</sup>-güedé xii-yu nàcuáa cadá-yu, te ío ní cudíí iní-yu, te duca<sup>n</sup> te ní xica-güedé cuáhá<sup>n</sup>-güedé.

## 17

### *Ío dusa<sup>n</sup> quide ñáyìu ñuú Tesalónica*

1 Te ní yáha-güedé ñuú Ànfípolís ndìhí ñuú Apòloniá, te ní quexìo-güedé ñuú Tesalónica, te yàcá<sup>n</sup> cáá ñ<sup>n</sup> veñúhu ñáyìu isràel.

2 Te ní sáhá<sup>n</sup> té Pāblú veñúhu-á<sup>n</sup>, chi duca<sup>n</sup> tnàhí quide-dé, te ndì tnahá nduu ndètatú-yu ní sáhá<sup>n</sup>-dé veñúhu-á<sup>n</sup> ùnǐ xito. Te ní ndatnúhu ndìhí ñaha-dē xii-yu nàcuáa ní chídó tnùnì cue té ní xóo càhá<sup>n</sup> tnúhu Yá Ndiòxí ndéé sanaha.

3 Te ní xitnúhu ñaha-dē nàcuáa ní càhá<sup>n</sup> cue té-á<sup>n</sup> sǎ Crístú Yaá tendaha Yá Ndiòxí quixi ñuyíú-a ndoho vǐhi-gá, te cuú-gá, te ndoto-gá, te xāha<sup>n</sup>-dē:

—Te ñu Jèsús cúú Crístú Yaá ní tendaha Yá Ndiòxí ní quixi ñuyíú-a, núu xíá<sup>n</sup> càchí tnúhu-í vitna —càchí té Pāblú xāha<sup>n</sup>-dē xii-yu.

4 Te dava ñáyìu isràel ní sándáá iní-yu tnúhu ní càhá<sup>n</sup> té Pāblú, te ní níhí tnáhǎ-yu ndìhí-dé, ndìhí té Silás. Te vǎi ñáyìu griégú ñáyìu càhá<sup>n</sup> ndìhí Yá Ndiòxí ní sándáá iní-yu tnúhu Jèsús. Te ndècu tǐtní ñáyìu ñáhí ñáyìu

cùnuu, te ñáyiú-á<sup>n</sup> tnàhá-yu ní sándáá iní-yu tnúhu-gá.

<sup>5</sup> Te dava ñáyiú isràél ñá túú ní cùu váha iní-yu núú tẽ Páblú ñúu ní ndúcü-yu cue tée cuihna iní-xi tuhío-güedé cada chiú<sup>n</sup>-güedé, chi ndi cuihnu ndi cuihnu-ni-güedé, te nchaá-yu ndihi cue tée-á<sup>n</sup> ndi coyo ndi coyó-yu xícuáá-yu. Te sátá ñi tecú dóho dava-gá-yu, te ní sáhá<sup>n</sup> tuhá-yu, te ío ní quide dùsá<sup>n</sup>-yu. Te nísáhá<sup>n</sup>-yu vehe té Jàsón, te ní quide yicá-yu ní quíhu-yu vehe-dé nándúcü-yu té Páblú ndihi té Silás cuendá queñuhu ñàhá-yu núú nchaa ñáyiú.

<sup>6</sup> Te ñá ní nàníhí ñáhã-yu xii-güedé, núu xíã<sup>n</sup> ní tñí-yu té Jàsón ndihi ñ<sup>n</sup> úú-gá cue tée sándáá iní tnúhu Jèsús, te tañuhu ñàhá-yu xii-güedé cuáhá<sup>n</sup> núú cuè tée cùchiu<sup>n</sup>. Te òré ní quexió-yu núú ndécü cuè tée cùchiu<sup>n</sup>, te ní ngúíta-yu ní cuáá-yu, te xáhã<sup>n</sup>-yu xii-güedé:

—Ní quexió cue tée-ã<sup>n</sup> ñúú-ó, te ío dusa<sup>n</sup> quide-güedé, te duca<sup>n</sup>-ni quide-güedé nchaa ñúú núú xíca cùu-güedé.

<sup>7</sup> Te té Jàsón-ã<sup>n</sup> ní xáha<sup>n</sup>-dẽ sá cúu cùndecu-güedé vehe-dé, te ñá túú sándáá iní-güedé nàcuáa càhá<sup>n</sup> té Cèsár té yìndaha cuéhé nàció<sup>n</sup>, te càchí-güedé sá ndécü ñngá té cùnuu-gá tucu nàni-dé Jèsús — càchí-yu xáhã<sup>n</sup>-yu xii cue tée cùchiu<sup>n</sup>.

<sup>8</sup> Te sátá dúcá<sup>n</sup> ñi càhá<sup>n</sup>-yu, te ní cudéé<sup>n</sup> víhí cuè tée cùchiu<sup>n</sup> ndihi dava-gá ñáyiú ndédóho.

<sup>9</sup> Te vài díhú<sup>n</sup> ñi xíca<sup>n</sup> cue tée cùchiu<sup>n</sup> núú tẽ Jàsón ndihi dava-gá cue tée cuáhá<sup>n</sup> ndihi-dé cuendá té Páblú ndihi té Silás, te núu na ndèe-güedé nùhú-güedé, te nacuáñaha cuè tée cùchiu<sup>n</sup> díhú<sup>n</sup>-güedé.

*Té Páblú ndihi té Silás ndécü-güedé ñúú Bèreá*

<sup>10</sup> Te òré ní cundiqui<sup>n</sup>, te ní quide ndee iní ñàhá ñáyiú sándáá iní tnúhu Jèsús xii té Páblú ndihi té Silás, te ní xica-güedé cuáhá<sup>n</sup>-güedé ñúú Bèreá. Te diu-ni nduu ñi sáá-güedé yacá<sup>n</sup> ní sáhá<sup>n</sup>-güedé veñúhu ñáyiú isràél.

<sup>11</sup> Te váha-gá iní ñáyiú ñúú Bèreá dàcúúxí ñáyiú ñúú Tesalónica, chi ío ní cudíí iní-yu ní xíndedóho-yu tnúhu Jèsús, te ñ<sup>n</sup> nduu ñ<sup>n</sup> nduu ní dácúáhã-yu tnúhu ní chídó tnùní cue tée ní xóo càhá<sup>n</sup> tnúhu Yá Ndióxi ndéé sanaha cuendá cuení-yu quini-yu núu ndáá càhá<sup>n</sup> té Páblú ndihi té Silás.

<sup>12</sup> Te titní ñáyiú isràél ní sándáá iní-yu tnúhu-gá ndihi titní cue tée griégú ndihi ñáyiú dìhí ñáyiú cùnuu ní sándáá iní-yu.

<sup>13</sup> Te dava ñáyiú isràél ndécü-yu ñúú Tesalónica, te ñáyiú-á<sup>n</sup> ñi níhí-yu tnúhu sá ndécü tẽ Páblú ndihi té Silás ñúú Bèreá càhá<sup>n</sup>-güedé tnúhu Yá Ndióxi, núu xíã<sup>n</sup> ní sáhá<sup>n</sup>-yu ñúú Bèreá ní dácúándèhndé-yu núú nchaa ñáyiú vátá dácúàha-gá. Te ñáyiú-á<sup>n</sup> ñi sándáá iní-yu tnúhu ndehnde te ní cudéé<sup>n</sup> víhí-yu núú-güedé.

<sup>14</sup> Te òré-á<sup>n</sup> ñi xáha<sup>n</sup> ñáyiú sándáá iní tnúhu-gá xii té Páblú sá quíhí<sup>n</sup>-dé yuhu làmár, te ní xica-dé cuáhá<sup>n</sup>-dé, te té Silás ndihi té Timùteú ní quendóo-güedé ñúú Bèreá.

<sup>15</sup> Te ñ<sup>n</sup> úú-güedé cuáhá<sup>n</sup> ndihi-güedé té Páblú, te ndèca ñaha-güedé cuáhá<sup>n</sup> ndéé ñúú Àtenás, te ní xáha<sup>n</sup> tẽ Páblú xii-güedé:

—Núu na nùhú-ndó, te cúu-ndo tẽ Silás ndihi té Timùteú ná quíxí ndíhí-ni-güedé nanítnáhá-ndí iha — càchí-dé xáha<sup>n</sup>-dẽ.

Te ní xica-güedé cuánuhú-güedé.

*Té Páblú ndécü-dẽ ñúú Àtenás*

<sup>16</sup> Te ñúú Àtenás ndétú tẽ Páblú quíhí<sup>n</sup> té Silás ndihi té Timùteú. Te yacá<sup>n</sup> ní xiní-dé sá ío cuéhé sá càchí-yu cùu ndióxi-yu ndècu te ñá ndáá sá díú ndiόxi cúu-xí, te xíã<sup>n</sup> ñá túú ní cùu váha iní-dé, chi ñá tnàhá iní-dé nàcuáa quidé-yu.

<sup>17</sup> Te ní sáhá<sup>n</sup>-dé veñúhu ní càhá<sup>n</sup> ndihi-dé ñáyiú isràél ndihi dava-gá ñáyiú càhá<sup>n</sup> ndihi Yá Ndióxi. Te ñ<sup>n</sup> nduu ñ<sup>n</sup> nduu sáhá<sup>n</sup>-dé xití ñúú càhá<sup>n</sup>-dé tnúhu-gá ndihi nchaa ñáyiú xica cuu yacá<sup>n</sup>.

<sup>18</sup> Te cue tée cùu epicureú ndihi cue tée cùu estoicú, cue tée-á<sup>n</sup> ñi

ndatnúhu-güedé ndihi té Páblú, te dava-güedé xitnáha-güedé:

—¡Ná tnúhu vîhi cáhá<sup>n</sup> tée lùcú-ã<sup>n</sup>! —  
càchí-güedé xitnáha-güedé.

Te dava-güedé xitnáha-güedé:

—Sàni iní-ndí sá càhá<sup>n</sup>-dé cuendá ndiöxí sá vátá quini-gá-ó —càchí-güedé xitnáha-güedé.

Te duca<sup>n</sup> xitnáha-güedé, chi càhá<sup>n</sup> té Páblú tnúhu Jèsús, te ní cáhá<sup>n</sup>-dé nàcuáa ní dándótó ñàha Yá Ndiöxí xii-gá, xiã<sup>n</sup> núu duca<sup>n</sup> xitnáha-güedé.

<sup>19</sup> Te ndèca ñaha-güedé xii té Páblú cuáhá<sup>n</sup> ñ<sup>n</sup> xichi núu nání Àreópagú, te ní xáha<sup>n</sup>-güedé xii-dé:

—Cachí tnúhu ndáa-n nãsa cuáhá<sup>n</sup> tnúhu càhá<sup>n</sup>-n, chi na cùtnuní ndáa iní-ndí,

<sup>20</sup> chi duca<sup>n</sup>-ni càhá<sup>n</sup>-n tnúhu sá ñà túú sàcúndèdóho-ndí, te cuini-ndí cachí tnúhu ndáa-n nãsa ndúu tnúhu-á<sup>n</sup> cuendá cutnùní váha iní-ndí —càchí-güedé xáha<sup>n</sup>-güedé xii-dé.

<sup>21</sup> Te nchaa ñáyiú ñuú Àtenás ndihi ñáyiú dava-gá ñuú, mee-ni tnúhu saa cuini-yu cáhá<sup>n</sup>-yu, nchaa sá vátá cùndèdóho-gá-yu cuini-yu cundèdóho-yu.

<sup>22</sup> Te té Páblú ní ngúnutnii-dé núu xixúcu-yu ncháa-yu, te xáha<sup>n</sup>-dè:

—Nchòhó cue ñáyiú ñuú Àtenás, cundèdóho-ndo nchaa tnúhu na càhá<sup>n</sup>-í-a. Ío quide cahnu nchohó sá càchí-ndó cùu ndiöxí-ndó.

<sup>23</sup> Te vitna ní quexio-í ñuú-ndó, te ní xiní-í sá yàyacá<sup>n</sup> ndécú nchaa sá càchí-ndó cùu ndiöxí-ndó càhá<sup>n</sup> ndihi-ndo. Te ní xiní-í ñ<sup>n</sup> xichi núu ndèe tnuní quidé càhnu-ndo Yá Ndiöxí Yaá ñà túú xini-ndó, te ñu-ni duca<sup>n</sup> càhá<sup>n</sup> lètrá ndèe tnuní xiã<sup>n</sup>, te càchí-xi: “Iha quide cahnu-ndí Ndiöxí sá ñà túú xini-ndí”, duha càhá<sup>n</sup> lètrá-á<sup>n</sup>. Te quide cahnu-ndo Yá Ndiöxí cáhá<sup>n</sup>-ndó, dico ñà túú xini-ndó nãsa càa-gá, te yúhú xiní ndáa-í nàcuáa càa Yá Ndiöxí, chi ñu-ni Yá Ndiöxí càhá<sup>n</sup> ndihi-í, te ñu-ni tnúhu-gá càhá<sup>n</sup>-í vitna.

<sup>24</sup> Te ñu-ni Yá Ndiöxí ní cadúha-gá ñu-yú-a ndihi nchaa sá ío, núu ñu-ni-gá cúu Xitohó ñu-yú-a ndihi andíu. Te

ñà túú xini ñuhu-gá vehe dàcaa ñáyiú ñu-yú-a cundecu-gá.

<sup>25</sup> Te ñà túú xini ñuhu-gá ñáyiú chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yócó tãchí-ó ndihi nchaa sá xiní ñuhu-o.

<sup>26</sup> Te ndèe sanaha ñi cadúha-gá ñ<sup>n</sup> ñu-ni té, te ñu-ni ní ñi-dé cúu ñáyiú ndècu nicaxico ñu-yú. Te ñu-ni mee Yá Ndiöxí ní xáha<sup>n</sup>-gá nchaa núu cùndécú-yu, te mee-gá ní cáhá<sup>n</sup>-gá ná dàha cuíá cudíi nchaa nació<sup>n</sup> ndihi mèe-yu.

<sup>27</sup> Te cuini-gá sá ncháa ñáyiú nanducu ñàhá-yu cáhá<sup>n</sup> ndihi ñàhá-yu xii-gá, te mee-gá ndécú túha-gá sá càhá<sup>n</sup> ndihi ñaha-gá xii-yu ñ<sup>n</sup> ñ<sup>n</sup>-yu.

<sup>28</sup> Te ñu-ni Yá Ndiöxí xitó ñàha-gá xii-yu núu cùdíi-yu ndécú-yu te càndá-yu. Te duha ní cáhá<sup>n</sup> ñ<sup>n</sup> ñaní tnáhá-ndó, té ní cutnùní iní-xi ní xindecu ndèe sanaha, te ní xáha<sup>n</sup>-dè xii-yu: “Nchaa-o cùu-o déhe Yá Ndiöxí”, duha ní xáha<sup>n</sup>-dè xii-yu.

<sup>29</sup> Te núu déhe Yá Ndiöxí cúu-yu ncháa-yu, te vá cúu càhá<sup>n</sup>-yu sá Yá Ndiöxí cúu sá ñi cadúha-yu ndahá-yu. Te sá ñi cadúha-yu cùu ndiöxí-yu-á<sup>n</sup>, dava cùu-xi díhú<sup>n</sup> cuáa<sup>n</sup>, dava cùu-xi díhú<sup>n</sup> cuixí<sup>n</sup>, dava cùu-xi yúu. Te mèe-yu ní cahu iní-yu nàcuáa cunduu sá cúu ndiöxí-yu.

<sup>30</sup> Te cùtnáhá ñà túú ní cùtnuní iní-yu sá nèhé ní quidé-yu ní cadúha-yu nchaa xiã<sup>n</sup>, te ñà túú ní quide cuendá Yá Ndiöxí sá dúcá<sup>n</sup> ñi quidé-yu. Te vitna càchí Yá Ndiöxí sá dáñá nchaa ndi túhú-yu nchaa sá cuèhé sá dúhá quidé-yu.

<sup>31</sup> Te Yá Ndiöxí náhá-gá ná nduu cundecu nchaa ñáyiú núu-gá, te mee-gá sa nàha-gá ndèndida càa ñáyiú ní quide váha, te ndèndida càa ñáyiú ñà túú ní quide váha. Te mee-gá ní xáha<sup>n</sup>-gá xii Déhe-gá Yaá nání Jèsús cùñaha-gá xii-yu núu ndèndida càa-yu ní quide váha te ndèndida càa-yu ñà túú ní quide váha. Te mee Jèsús cáhá<sup>n</sup> ndáa cùti-gá, te sa nàha-o sá ncháa xiã<sup>n</sup> cada Jèsús, chi ñu-ni cuendá-á<sup>n</sup> ñi dándótó ñàha Yá Ndiöxí xii-gá —càchí

té Păblú xăha<sup>n</sup>-dĕ xií-yu.

<sup>32</sup> Te òré ní cáhá<sup>n</sup> té Păblú sá nĭ ndoto Jĕsús, te dava ñáyiú ñá ní tnàhá iní-xi tnúhu ní cáhá<sup>n</sup>-dĕ ní cáhá<sup>n</sup> yíchí-yu. Te davá-yu ní xáhă<sup>n</sup>-yu xii-dé:

—Te ingá xito quixi-n, te cáhá<sup>n</sup> tucu-n tnúhu ní cáhá<sup>n</sup>-n vitna — cachí-yu xáhă<sup>n</sup>-yu xii-dé.

<sup>33</sup> Te ní xica-dé cuáhă<sup>n</sup>-dĕ.

<sup>34</sup> Te dava ñáyiú ní xĭndedóho tnúhu ní cáhá<sup>n</sup> té Păblú ní sándáá iní-yu Jĕsús, te ní chindee tnúhu ñàhá-yu xii-dé. Te ì<sup>n</sup> tée cùchiu<sup>n</sup> Areópagú nání-dĕ Nĭxú ndihĭ ì<sup>n</sup> ñadìhĭ nání-á<sup>n</sup> Dămarís, tnàhá-yu ní sándáá iní-yu tnúhu-gá ndihĭ dava-gá-yu.

## 18

### *Té Păblú ndécú-dĕ ñuú Còrintú*

<sup>1</sup> Te té Păblú ní quee-dé ñuú Àtenás cuáhă<sup>n</sup>-dĕ ñuú Còrintú.

<sup>2</sup> Te yacá<sup>n</sup> ní naníhĭ tnàhá-dĕ ndihĭ ì<sup>n</sup> tée isràél nání-dĕ Àquilú, te tée-á<sup>n</sup> cúú-dĕ tée distritú Pòntó, te ní xĭndecu-dé ndihĭ ñadìhĭ-dé tá Priscilá ñuú Rómá. Te té Cèsár tée yĭndaha cuéhé nàció<sup>n</sup>, tée nàni Claudiú ní xăha<sup>n</sup>-dĕ sá vâ cúú-gă cundecu ñáyiú isràél ñuú Rómá, te xiă<sup>n</sup> nŭu ní ndee té Àquilú ndihĭ ñadìhĭ-dé cuáhă<sup>n</sup>-yu ñuú Còrintú. Te sácú-nĭ nduu ní cuu sá nĭ quexiò-yu ñuú-á<sup>n</sup>, te ní sáhă<sup>n</sup> té Păblú ní ndatnúhu ndihĭ ñaha-dĕ xií-yu vehé-yu.

<sup>3</sup> Te ní xáhă<sup>n</sup>-yu sá cündĕcu-dé cada chiú<sup>n</sup> ndihĭ ñàhá-yu, chi ì<sup>n</sup>-nĭ chiú<sup>n</sup> quide-dé ndihĭ-yu, te ní xóo dacáa-yu vehe dóó. Te núu xiă<sup>n</sup> ní xĭndecu ndihĭ ñaha tĕ Păblú ní quide chiú<sup>n</sup> ndihĭ ñaha-dé xií-yu.

<sup>4</sup> Te núu ùná núu ùná nduu, nduu ndĕtatú-yu, ní xóo quíhĭ<sup>n</sup>-dĕ veñúhu ñáyiú isràél. Te ní ndatnúhu-dé ndihĭ ñáyiú isràél ndihĭ ñáyiú ñá túú cùu ñáyiú isràél, te ní xăha<sup>n</sup>-dĕ sá quĭndáá iní-yu tnúhu Jĕsús.

<sup>5</sup> Te té Silás ndihĭ té Timùteú ní quee-güedé distritú Macèdoniá cuáhă<sup>n</sup>-güedé núu ndécú tĕ Păblú. Te òré ní quexiò-güedé, te ní cáhá<sup>n</sup>-nĭ té Păblú tnúhu Yá Ndiòxí núu ñáyiú

isràél, te xăha<sup>n</sup>-dĕ xií-yu sá Jĕsús cúú-gă Crístú Yáá ní tendaha Yă Ndiòxí ní quixi ñuyú-a.

<sup>6</sup> Te sá dúcá<sup>n</sup> nĭ cáhá<sup>n</sup>-dĕ nŭu ní nàá ndihĭ ñàhá-yu xii-dé, te ní cáhá<sup>n</sup> cuéhé-yu cuendá-dĕ, núu xiă<sup>n</sup> ní naquidi-dé dóó-dĕ. Te duca<sup>n</sup> nĭ quide-dé cuendá sá cùtnùní iní-yu sá ñá ní tnàhá iní-dé nàcuáa ní cáhá<sup>n</sup>-yu, te ní xăha<sup>n</sup>-dĕ xií-yu:

—Yúhú ñá túú cuĕchi-í, te núu ní xíta nihnu-ndo, xiă<sup>n</sup> quĕndóo cuĕchi mee-nă-ndó. Te vitna quíhĭ<sup>n</sup>-í cáhá<sup>n</sup> ndihĭ-í ñáyiú ñá túú cùu ñáyiú isràél, te vâ nándĕcu-gá-í nchòhò ñáyiú isràél cáhá<sup>n</sup> ndihĭ ñaha-í xii-ndo —càchĭ-dé xăha<sup>n</sup>-dĕ xií-yu.

<sup>7</sup> Te ní xica-dé cuáhă<sup>n</sup>-dĕ vehe ì<sup>n</sup> tée nàni Justú, te tée-á<sup>n</sup> ndécú yàtni-dé núu cáá veñúhu, te tnàhá-dé càhá<sup>n</sup> ndihĭ-dé Yă Ndiòxí.

<sup>8</sup> Te té Crispú tée yĭndaha veñúhu-á<sup>n</sup> nĭ sándáá iní-dé Jĕsús ndihĭ ñadìhĭ-dé ndihĭ landú-dé. Te vâi ñáyiú ñuú Còrintú ní sáhă<sup>n</sup>-yu ní xĭndedóho-yu tnúhu-gá, te ní sándáá iní ñáhă-yu xii-gá, te ní sanduté-yu.

<sup>9</sup> Te ì<sup>n</sup> niú ní cáhá<sup>n</sup> saní té Păblú sá ní xăha<sup>n</sup> Yă Ndiòxí xii-dé:

—Cáhă<sup>n</sup>-ni-n tnúhu-í, te vâ yùhú-n nchàa tnúhu cuéhé tnúhu duha càhá<sup>n</sup> ñáyiú,

<sup>10</sup> chi yúhú chindee ñaha-í xii-n, te vâ yôo ì<sup>n</sup> cada úhú ñáhă xii-n, te vâi-gá ñáyiú ñuú-á<sup>n</sup> quĭndáá iní-yu tnúhu-í —càchĭ-gá xăha<sup>n</sup>-gă núu saní-dé.

<sup>11</sup> Te ñuú Còrintú ní xĭndecu té Păblú ì<sup>n</sup> cuíá dava, te mee-nĭ tnúhu Yă Ndiòxí ní xóo dacuàha-dé ñáyiú.

<sup>12</sup> Te ndĕcu-gá-dé ñuú-á<sup>n</sup> nĭ ngóo té Gàlĭón chiú<sup>n</sup> taxi tñuní-dé distritú Acăyá. Te dàvá-á<sup>n</sup> nĭ cudé<sup>n</sup> ñáyiú isràél núu tĕ Păblú, te ní tñĭ ñàhá-yu xii-dé ndécá ñàhá-yu cuáhă<sup>n</sup> núu cuĕ tée cùchiu<sup>n</sup>.

<sup>13</sup> Te ní xáhă<sup>n</sup>-yu xii té Gàlĭón tée cùu gobiernú:

—Tée-a ní quexiò-dé ñuú-ó xica cuu-dé te cuĭní-dé dandàhú ñàhá-dĕ chitnahá-ndĭ-dé cada-ndĭ nàcuáa quide-dé quidé càhnu-dé Ndiòxí-dĕ, te dañă-ndĭ vâ cádá-gă-ndĭ nàcuáa

càhá<sup>n</sup> tnúhu sá sánú ìchi ñaha xii-o nacuáa cundecu-o cuíní-dé —càchí-yu xáhã<sup>n</sup>-yu xii tée cùu gobiernú.

14 Te té Păblú cuíní-dé cani-dé cuèndú ní cùu, te ní ngüita té Gàlión càhá<sup>n</sup>-dé, te xáhã<sup>n</sup>-dë xii-yu:

—Nchòhó ñáyiú isràél, cund-edóho-ndo tnúhu na càhá<sup>n</sup>-í-a. Te núu ndècu núú ì<sup>n</sup> cuéchi ní quide-dé àdi ní sahani-dé ì<sup>n</sup> ndíyi, te cuu cundáá-xi iha, te càhá<sup>n</sup>-ndó núu nándi cùu sá ní quide-dé,

15 àdi dico-ni sá ì<sup>n</sup> tnúhu ní càhá<sup>n</sup>-dé, te yáchí-gá chí cuàhá<sup>n</sup> yàcá<sup>n</sup> ndatnúhu-ndo núú méé-ndó, chi mee-ni sã ñà túú quide-dé nàcuáa càhá<sup>n</sup> tnúhu sá sánú ìchi ñaha xii-ndo càhá<sup>n</sup>-ndó, te yúhú ñà túú tnàhá iní-í cada ndáá-í nchaa xíã<sup>n</sup> —càchí-dé xáhã<sup>n</sup>-dë.

16 Te ní cudéé<sup>n</sup>-dë, te ní ndeñuhu ñaha-dë xii-yu vechiú<sup>n</sup>.

17 Te ñáyiú ñà túú cùu ñáyiú isràél ní tñí-yu té Söstenés té yindaha veñúhu ñáyiú isràél, te ndèhe té Gàlión té cùu gobiernú ní canihá-yu xii-dé, dico ñà túú tnàhí ná tnúhu ni càhá<sup>n</sup>-dé tauni-hnu-dé té ní caní-yu-á<sup>n</sup>.

*Té Păblú cuáhã<sup>n</sup> tucu-dé ñuú Antiòquiá, te yàcá<sup>n</sup> ní xica tucu-dé cuáhã<sup>n</sup>-dé dava-gá ñuú càhá<sup>n</sup>-dé tnúhu Yá Ndiöxí*

18 Te titní-gá nduu ní xíndecu té Păblú ñuú Còrintú, te ní quide ndee iní-dé nchaa ñáyiú ní sándáá iní-xi tnúhu Jèsús, te ní tñí-dé ìchi cuáhã<sup>n</sup>-dé distritú Sirjá ndihi té Àquilú ndihi ñadìhí té Àquilú-á<sup>n</sup> tă Priscilá, te ní quexiò-yu ñuú Cèncreá. Te cùmání-gã tñí-yu ìchi quíhí<sup>n</sup>-yu ñuú Éfesú, te ní dèté díquí tē Păblú, chi duca<sup>n</sup> ñi xáhã<sup>n</sup>-dë xii Yá Ndiöxí sá ndéé xínu ì<sup>n</sup> chiu<sup>n</sup> ní sani iní-dé cada-dé cuèndá-gá, te dätñuní dèté-dé. Te ní quée-yu bàrcú cuáhã<sup>n</sup>-yu.

19 Te ní quexiò-yu ñuú Éfesú, te yàcá<sup>n</sup> ní xáhã<sup>n</sup> tē Păblú sá cündècu té Àquilú ndihi ñadìhí-dé, te mee-dë quíhí<sup>n</sup>-dé dava-gá ñuú. Te cùmání-gã caca-dé quíhí<sup>n</sup>-dé, te ní sáhã<sup>n</sup>-dé

veñúhu ñáyiú isràél ní ndatnúhu ndihi ñaha-dë xii-yu.

20 Te ní xáhã<sup>n</sup>-yu sá cündècu-dé titní nduu, te ñà ní cuíní-dé cundecu-dé.

21 Te ní xáhã<sup>n</sup>-dë:

—Núhú-í chí dacuítí xini ñuhu-xi cundecu-í vico coo ñuú Jerusalén, te quixi tucu-í te núu Ndiöxí ná càchí-gá, te vitna chí cáda ndèe iní —càchí-dé xáhã<sup>n</sup>-dë xii-yu.

Te ní quée-dé bàrcú cuáhã<sup>n</sup>-dé.

22 Te ní quexiò-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexiò-dé, te ní dándácõo váha-dé ñáyiú ndècu ìchi Yá Ndiöxí, te dätñuní ní xica-dé cuáhã<sup>n</sup>-dé ñuú Antiòquiá.

23 Te yàcá<sup>n</sup> ní xíndecu-dé titní nduu, te dätñuní ní tñí-dé ìchi cuáhã<sup>n</sup>-dé. Te ní sáhã<sup>n</sup>-dé ndihi distritú Gàlaciá ndihi distritú Frigiá. Te ndi tnahá ñuú ní sáhã<sup>n</sup>-dé ní càhá<sup>n</sup>-dé ndihi ñáyiú sándáá iní tnúhu Yá Ndiöxí, te ní ndúcú ndéé-gã-yu ní quidé-yu nchaa nàcuáa ní xáhã<sup>n</sup>-dë cadá-yu.

*Té Àpolós càhá<sup>n</sup>-dé tnúhu Yá Ndiöxí ñuú Éfesú*

24 Te dàvá-á<sup>n</sup> ñi quèxio ì<sup>n</sup> té is-ràél ñuú Éfesú, te nàni-dé Àpolós, te cùu-dé té ñuú Alejandriá, te ío váha túha-dé tnúhu Yá Ndiöxí, te ío váha ñuhu díquí-dë nàcuáa càhá<sup>n</sup>-dé,

25 chí sa xini-dé nàcuáa ní xóo càhá<sup>n</sup> ndí Juáa cùtnàhá ní xóo dacuàndute ndí ñáyiú. Te ío ní cudí iní-dé ní càhá<sup>n</sup>-dé nchaa nàcuáa ní cuu cuèndá Jèsús, dico vátá dacuàha-gá-dé nchaa tnúhu ní càhá<sup>n</sup> méé Jèsús.

26 Te ní sáhã<sup>n</sup>-dé veñúhu ñáyiú isràél, te yàcá<sup>n</sup> ní càhá<sup>n</sup>-dé ni yùhu ni iní-dé. Te ndècu té Àquilú ndihi ñadìhí-dé tá Priscilá ndèdóho-yu tnúhu ní càhá<sup>n</sup>-dé, te ní xáhã<sup>n</sup>-yu sá quíhí<sup>n</sup>-dé vehé-yu, te ní sáhã<sup>n</sup>-dé, te ní xitnúhu ñahá-yu xii-dé dava-gá tnúhu Yá Ndiöxí sá ñà túú xini-dé.

27 Te ní cachí té Àpolós sá quíhí<sup>n</sup>-dé distritú Acãyá, núu xíã<sup>n</sup> ní cadúha ñáyiú ñuú Éfesú ì<sup>n</sup> tutú canehe-dé quíhí<sup>n</sup> ndaha ñáyiú sándáá iní tnúhu-gá xíndecu Acãyá. Te xáhã<sup>n</sup>-yu

núú tütú-yu: “Cáhá<sup>n</sup> váha-ndo ndihí té Àpolós núu ní quexìo-dé”, cächí-yu xähá<sup>n</sup>-yu núú tütú-yu. Te ní xica-dé cuáhá<sup>n</sup>-dé, te ní quexìo-dé Acäyá. Te nchaa ñáyiú sàndáá iní tnúhu-gá yàcá<sup>n</sup>, diu-ni mee Yă Ndiöxí ní chindee ñàha-gá ní sàndáá iní ñáhă-yu xii-gá. Te té Àpolós ío váha ní cáhá<sup>n</sup>-dé tnúhu Yă Ndiöxí núú-yu, te xíă<sup>n</sup> ío ní ndúcú ndéé-gă-yu ní quidé-yu chiú<sup>n</sup>-gá.

<sup>28</sup> Te té Àpolós ní ndatnúhu-dé ndihí ñáyiú isràél, te ní xíndedóho dava-gá-yu. Te ío váha ní cani-dé cuèndú nchaa nàcuáa ní xóo cáhá<sup>n</sup> cue téé ndéé sanaha sá quíxí Cristú ñuyíú-a. Te ní cáhá<sup>n</sup> ndáá-dé ní xáha<sup>n</sup>-dë sá díú-ní Jèsús cúú-gă Cristú Yaá ní tendaha Yă Ndiöxí ní quixi ñuyíú-a. Te ñáyiú isràél xíndatnúhu-yu sá ñă ndáa nàcuáa cáhá<sup>n</sup>-dé, dico ñá ní ñihí-yu tnúhu cúñáhá-yu xii-dé, chi ío váha ñùhu díquí-dë tnúhu cáhá<sup>n</sup>-dé.

## 19

### *Té Păblú ndécú-dë ñuú Éfesú*

<sup>1</sup> Te cútnàhá ndécú-gă té Àpolós ñuú Còrintú, te ní xica té Păblú cuáhá<sup>n</sup>-dé tá yăha-dé mee-ni xití yucu cuáhá<sup>n</sup>, te ní sáa-dé ndéé ñuú Éfesú. Te ñuú-á<sup>n</sup> ñí naníhí tnáhá-dë ndihí cue téé sàndáá iní tnúhu Jèsús.

<sup>2</sup> Te ní xícá<sup>n</sup> tnúhú-dë núú-güedë, te xähá<sup>n</sup>-dë:

—¿Sa ní quexìo Espíritú Yă Ndiöxí ní ngúndecu ndihí-ndo ndéé òré ní sàndáá iní-ndó Jèsús-ă<sup>n</sup>? —cächí-dé xähá<sup>n</sup>-dë xii-güedé.

Te ní xáha<sup>n</sup>-güedë:

—Ñá túú xini-ndí sá ío Espíritú Yă Ndiöxí —cächí-güedé xähá<sup>n</sup>-güedë xii-dé.

<sup>3</sup> Te ní xáha<sup>n</sup> tùcu-dé:

—¿Nása ní cáhá<sup>n</sup> téé ní dăcuándüte ñàha xii-ndo-i? —cachí-dé xähá<sup>n</sup>-dë xii-güedé.

Te ní xáha<sup>n</sup>-güedë:

—Ní cáhá<sup>n</sup>-dé nàcuáa ní xóo cáhá<sup>n</sup> ndí Juàá —cächí-güedé xähá<sup>n</sup>-güedë xii-dé.

<sup>4</sup> Te ní xáha<sup>n</sup> tē Păblú:

—Ndí Juàá ní dăcuándüte ñàha ndí xii ñáyiú, chi ní cuini-yu sá dáñă-yu nchaa sá cuèhé sá dúhá quidé-yu. Te ní xáha<sup>n</sup> ndí xii-yu: “Quindáá iní-ndó tnúhu Jèsús chi dacuití quixi-gá ñ<sup>n</sup> nduu”, duha ní xáha<sup>n</sup> ndí Juàá xii-yu —cächí té Păblú xähá<sup>n</sup>-dë xii-güedé.

<sup>5</sup> Te sá dúcá<sup>n</sup> ñí cáhá<sup>n</sup> té Păblú xähá<sup>n</sup>-dë xii-güedé, núu xíă<sup>n</sup> ní sandute-güedé nàcuáa ní dándöo tnúhu Jèsús.

<sup>6</sup> Te ní sacá<sup>n</sup> ndodo té Păblú ndahá-dé díquí-güedë, te òré-ni ní quexìo Espíritú Yă Ndiöxí ní ngúndecu ndihí-güedé, te ní ngúita-güedé ní cáhá<sup>n</sup>-güedé tnúhu sá dăcàhu iní ñáhá Espíritú-gá, tnúhu sá ñà túú xini-güedé cáhá<sup>n</sup>-güedé, te ní cáhá<sup>n</sup>-güedé tnúhu Yă Ndiöxí nàcuáa ní dăcáhu iní ñáhá Espíritú-gá xii-güedé.

<sup>7</sup> Te cùu datná úxúú tnàhá-güedé.

<sup>8</sup> Te té Păblú ní sáhá<sup>n</sup>-dé veñúhu ñáyiú isràél ní cáhá<sup>n</sup> ndihí-dé-yu, te úní yóo ñí xínu ní xica cuu-dé veñúhu-yu. Te ío váha ñùhu díquí-dë tnúhu cáhá<sup>n</sup>-dé, núu xíă<sup>n</sup> ní cuyi-dë ní cáhá<sup>n</sup>-dé, te ní xáha<sup>n</sup>-dë sá quindáá iní-yu tnúhu Jèsús, te duca<sup>n</sup> te ndíhu ndaha ñàha Yă Ndiöxí xii-yu.

<sup>9</sup> Te davá-yu ío sáa iní-yu ñá ní cuini-yu quindáá iní-yu, te ío ní cáhá<sup>n</sup> cuèhé-yu cuèndá Jèsús xití veñúhu núú dăva-gá-yu. Te té Păblú ní ndee-dé veñúhu cuáhá<sup>n</sup>-dé ndihí ñáyiú sàndáá iní tnúhu Jèsús. Te ñ<sup>n</sup> nduu ñ<sup>n</sup> nduu ní sáhá<sup>n</sup>-dé scuèlá té Tiranú ní dăcuáhá ñàha-dé xii-yu.

<sup>10</sup> Te úú cuíá duca<sup>n</sup> ñí sáhá<sup>n</sup>-dé scuèlá ní dăcuáhá-dë ñáyiú. Te nchaa ñáyiú isràél ñáyiú ndëcu ñihí distritú Àsiá ndihí nchaa ñáyiú ñá túú cùu ñáyiú isràél ní xíndedóho-yu tnúhu Jèsús.

<sup>11</sup> Te té Păblú ío ní chindee ñàha Yă Ndiöxí xii-dé ní quide-dé vâi núú sá vâ yôo tnàhí ndăcu cada.

<sup>12</sup> Te pañú díquí-dë ndihí dóo cándéé núú yíquí-dë ní xícá<sup>n</sup>-yu nèhé-yu ní sáhá<sup>n</sup> núú ndécú ñáyiú cùhú, te xíă<sup>n</sup> ní tñi ñáyiú cùhú ndihí



ñáyiú yìhi ñaha espíritú cúndìhi yucu ñávãha, te ní ndúha-yu.

13 Te ñuú Isràél véxi cue té tãtãna xica cuu-güedé quidé tãtãna-güedé ñáyiú yìhi ñaha espíritú cúndìhi yucu ñávãha. Te ní ngüíta-güedé ní cacu nèhe-güedé Jèsús cuendá quee espíritú-án yiqui cùñú-yu, te ní xãha<sup>n</sup>-güedé:

—Xocuñí-n, chi càchí Jèsús sá vã cùndècu ndìhi-gá-n tãe-a. Te diu-ni Jèsús cacú nèhe té Pãblú òré càhá<sup>n</sup>-dé tnúhu-gá —càchí-güedé xãha<sup>n</sup>-güedé xii espíritú-án.

14 Te úsá tnàhá-güedé duca<sup>n</sup> ní xóo cada-güedé. Te tãtã-güedé ní xínani-dě Esevã, te tãe-án ní cuu-dé dútú cùnù.

15 Te sá dúcã<sup>n</sup> ní càhá<sup>n</sup>-güedé, te ní xãha<sup>n</sup> espíritú cúndìhi yucu ñávãha-án xii-güedé:

—¿Te ná cúú nchòhó nõu dayùhu ñáhã-ndó? Te xíní-í Jèsús, te xíní-í yoo cùu té Pãblú, te nchòhó ñã túú xíní ñáhã-í xii-ndo —càchí espíritú-án xãha<sup>n</sup>-xi xii-güedé.

16 Te tãe yìhi ñaha espíritú cúndìhi yucu ñávãha-án ní ndanchita-dé ní tñi-dé cue té tãe quide tãtãna-án, te ní ndìhi dóo-güedé ní ndátã-dě, te ní dánicuehé ñáhã-dě xii-güedé, te ní xinu-güedé cuáhã<sup>n</sup>-güedé.

17 Te nchaa ñáyiú isràél ndécú ñuú Éfesú ndìhi dava-gã ñáyiú ndècu diu-ni ñuú-án ní ñihí-yu tnúhu nãcuãã ní cuu, te ío ní yùhú-yu, te vãi-yu ní cachí sã ïo càhnu cuu Xítóhó Jesucristú.

18 Te dava ñáyiú ní sãndãã iní-xi tnúhu Jèsús ní sãhá<sup>n</sup>-yu núú ndécú tã Pãblú, ndìhi núú ndécú nchãã ñáyiú ní sãndãã iní tnúhu-gã ní nãhmã-yu nãcuãã ní xóo cadã-yu.

19 Te titní ñáyiú ní xóo cada ndùu nehé-yu tutú-yu ní sãhá<sup>n</sup> núú ndécú nchãã ñáyiú sãndãã iní-xi tnúhu-gã, te yacã<sup>n</sup> ní ndada cuendã-yu sã ïo yahu ní sãha-yu tutú-yu, chi ndéé údico úxí mĩl díhú<sup>n</sup> cuixí<sup>n</sup> ní sãha-yu núú nchãã. Te nchãã-yu ní sahmí-yu tutú-yu.

20 Te sãtã ní cãyú nchaa tutú-án, te vãi-gã ñáyiú ní tuhá-yu ichi Yã Ndiõxí, te ní sãha-yu cuendã sã ïo xini ñuhu tnúhu Yã Ndiõxí.

21 Te ní cachí té Pãblú sã quihí<sup>n</sup>-dé distrítú Macèdoniã ndìhi distrítú Acãyã, te dãtnùní núhú-dé ñuú Jerusalén, te duca<sup>n</sup> te dãtnùní quihí<sup>n</sup>-dé ñuú Ròmã.

22 Te ndècu ndìhi-dé té Timùteú ndìhi té Èrastú cue té tãe chindee ñaha xii-dé. Te té Pãblú ní xãha<sup>n</sup>-dẽ xii-güedé sã códó nõu-güedé quihí<sup>n</sup> Macèdoniã, te ní xica-güedé cuáhã<sup>n</sup>-güedé, te mee-dẽ ní quendóo-dé.

*Ñáyiú Éfesú ío dusa<sup>n</sup> quidé-yu ñuú-yu*

23 Te dàvã-án ïo ní cudé<sup>n</sup>-yu núú nchãã ñáyiú ní tuha ichi Yã Ndiõxí.

24 Te ì<sup>n</sup> tãe ñuú Éfesú nãní-dẽ Demètriú. Te tãe-án ní xóo canehé chiú<sup>n</sup>-dé mee-ni díhú<sup>n</sup> cuixí<sup>n</sup> ní xóo cadúha-dé veñúhu lihli, dãtnã cùnì-ndó càa veñúhu Diãnã sã cúú ndiõxí-yu. Te vãi díhú<sup>n</sup> ní xóo ñihí-dẽ ndìhi cue té ní xóo cada chiú<sup>n</sup> ndìhi-dé.

25 Te ní canã-dé cue té tãe quide chiú<sup>n</sup> ndìhi-dé, ndìhi nchaa cue té tãe quide chiú<sup>n</sup> ndìhi díhú<sup>n</sup> cuixí<sup>n</sup>, te ní xãha<sup>n</sup>-dẽ xii-güedé:

—Nãha-ndo sã ïo váha ñihí-ó díhú<sup>n</sup> cuendã chiú<sup>n</sup> quide-o.

26 Te nãha-ndo sã càchí té Pãblú sã ñã díú ndiõxí cúú sã ní cadúha ñáyiú ñuyíú-a. Te duca<sup>n</sup> càhá<sup>n</sup>-dé ñuú-ó, te duca<sup>n</sup>-ni càhá<sup>n</sup>-dé ñihí distrítú Àsiã, te ío-gã vãi ñáyiú sãndãã iní tnúhu càhá<sup>n</sup>-dé.

27 Te ío úhú nõu na cuíta chiú<sup>n</sup> quide-o, vá yõo-gã cuaa<sup>n</sup> sã cadúha-o. Te ngüíta-yu càhá<sup>n</sup>-yu sã veñúhu Diãnã ñã túú càvãha, te vá cadã càhnu-gã-yu sãndú-ó. Te nãha-ndo sã ïo càhnu cuu Dianã, chi nchaa ñáyiú distrítú Àsiã quidé càhnu ñahã-yu ndìhi ñáyiú xĩndecu ni càa xico ñuyíú —càchí té Demètriú xãha<sup>n</sup>-dẽ xii-güedé.

28 Te sã dúcã<sup>n</sup> ní càhá<sup>n</sup> té Demètriú, xiã<sup>n</sup> ní cudé<sup>n</sup>-güedé núú tã Pãblú, te uu<sup>n</sup>-ni ní cuãã-güedé te càchí-güedé:

—¡Ío càhnu cuu Dianã sãndú ñáyiú Éfesú! —càchí-güedé.

29 Te nchaa ñáyiú ñuú Éfesú ndi coyo ndi coyo-yu xicáhá<sup>n</sup>-yu. Te tnàhá úú cue téé distritú Macèdoniá xicá cùu-güedé ndihí té Păblú, ñ<sup>n</sup>-dé nání-dě Găyú, te ñ<sup>n</sup>-dé nání-dě Aristarcú. Te ní tñi-güedé úú cue téé-á<sup>n</sup>, te cuánguihu coyo ndihí ñaha-güedé vehe núú quidé-güedé jundá.

30 Te té Păblú cuiní-dé quihu-dé tnàhá-dé vehe-á<sup>n</sup> cáhá<sup>n</sup> ndihí ñaha-dě ní cùu, te ñá ní ðaña cue téé ní sándáá iní tnúhu-gá.

31 Te ñ<sup>n</sup> úú cue téé cùnuu distritú Àsiá ní cáhá<sup>n</sup> váha-güedé cuendá té Păblú, te ní xáha<sup>n</sup>-güedé xii ñ<sup>n</sup> téé xinu cuechi núú-güedé ní sáhá<sup>n</sup>-dé ní xáha<sup>n</sup>-dě xii té Păblú sá vă quihu-dé vehe núú quidé-güedé jundá.

32 Te uu<sup>n</sup>ni ní cuáá-yu nchaá-yu, te ñá ñ<sup>n</sup>-ní tnúhu ní cáhá<sup>n</sup>-yu, chi ndi dñ<sup>n</sup> tnúhu ní cáhá<sup>n</sup>-yu ñ<sup>n</sup> ñ<sup>n</sup>-yu. Te chitu-gă ñáyiú ñá ní cùtnuní iní-yu ná cuendá ní dátacá ñáhá-güedé xití vehe-á<sup>n</sup>, chi ñá ñ<sup>n</sup>-ní tnúhu ní cáhá<sup>n</sup>-yu.

33 Te davá-yu ní cáhá<sup>n</sup>-yu sá cuéchi té Lijandrú cúú-xí, chi ní xáha<sup>n</sup> ñáyiú isràél xii-dé sá cáhá<sup>n</sup>-dé yuhú-yu chindee tnúhu ñaha-dě xii-yu. Te ní quide-dé ndaha-dé núú-yu sá cündedóho-yu tnúhu cáhá<sup>n</sup>-dé chindee tnúhu ñaha-dě xii-yu yòtnúhu.

34 Te ní cutnùní iní-yu sá tēe isràél cúú-dě, te uu<sup>n</sup>ni ní cuáá tucú-yu, ñá ní ðañá-yu cáhá<sup>n</sup>-dé, te cächí-yu:

—Ío cùnuu Dianá sàndú ñuú Éfesú! —cächí-yu. Te ðatná úú òré ñ<sup>n</sup>-ní tnúhu ní cáhá<sup>n</sup>-yu.

35 Te téé cùu secretariú-ni-gá ní cáhá<sup>n</sup>-dé, te ðatnùní cuéé cuéé ní sadí-yu yuhú-yu. Te ní xáha<sup>n</sup>-dě xii-yu:

—Nchaa-ndo cündedóho-ndo ñ<sup>n</sup> tnúhu na cáhá<sup>n</sup>-í-a. Ío cùnuu Dianá, te nchaandi túhú ñáyiú sa nahá-yu sá ncháá-ó ío nèhe cuendá-ó veñúhu-á<sup>n</sup>. Te nahá-yu sá néhe cuendá-ó sàndú-á<sup>n</sup>, chi véxi cuu<sup>n</sup>-gá andi.

36 Te vá yóo ñ<sup>n</sup> cächí sá ñă ndáá. Te coto-ndo mēe-ndo, te vá cuídó-ndó càda-ndo, te vá cuídó-ndó cáhá<sup>n</sup>-ndó.

37 Te ná cuendá ndécá-ndó cué téé-á<sup>n</sup> vëxi, te ñá túú ñá ní quide-güedé, te ñá túú ñá ní dùhu-güedé veñúhu, te ñá túú cáhá<sup>n</sup> cuéhé-güedé cuendá Diáná.

38 Te núu ío yoo náa ndihí ñaha xii té Demètriú ndihí cue téé quide chiu<sup>n</sup> ndihí-dé, te quíhí<sup>n</sup>-güedé cacá<sup>n</sup> cuéchi-güedé núú cué téé cùchiu<sup>n</sup>. Te cue téé cùchiu<sup>n</sup> na cundoho-güedé nùu quehdé-güedé cuéchi-yu àdi ñáhá.

39 Àdi ío-gá ná cuendú ñúhú iní-ndó, te cáhá<sup>n</sup>-ndó òré ná cóo jundá.

40 Te ío úhú nùu na nihí téé tàxi tnuní ñáhá xii-o tnúhu sá dúhá ío quide dusa<sup>n</sup>-o, te cachí-dé sá ndècuéchi-o chi ñá túú sàndáá iní-ó-dě quesaha-dě. Te ñá túú tnàhí ndùu váha-xi sá dúhá càda-o ni cuu, te vitna duha ní quide-o, te ñá cùtnuní iní-ó năsa cúñaha-o xii téé tàxi tnuní ñáhá xii-o núu na càna ñaha-dé —cächí téé cùu secretariú xáha<sup>n</sup>-dě xii-yu.

41 Te ní xáha<sup>n</sup>-dě sá nùhú-yu te ní ndihí-yu cuánuhú.

## 20

*Té Păblú cuáhá<sup>n</sup>-dé distritú Macèdoniá ndihí distritú Grèciá*

1 Te òré ñá túú-gă ní quide dusa<sup>n</sup>-yu, te ní cana ñaha tē Păblú xii nchaa ñáyiú sàndáá iní tnúhu Jèsús ní cáhá<sup>n</sup>-dé dóho-yu nàcuáa cadá-yu. Te ní quide ndee iní ñáhá-dě xii-yu, te ní tñi-dé ichi cuáhá<sup>n</sup>-dé distritú Macèdoniá.

2 Te tayáha-dé cuáhá<sup>n</sup> ñ<sup>n</sup> ñ<sup>n</sup> ñuú yíndèhu Macedoniá. Te cáhá<sup>n</sup>-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudíí iní-yu cadá-yu nàcuáa cáhá<sup>n</sup> Yă Ndióxi cadá-yu sá dúcá<sup>n</sup> ní cáhá<sup>n</sup>-dé dóho-yu. Té ní quexìo-dé distritú Grèciá.

3 Te xiá<sup>n</sup> ní xíndecu-dé úní yóo. Te xiá<sup>n</sup> quēe-dé bàrcú quíhí<sup>n</sup>-dé distritú Sìriá ní cùu, te ní níhí-dě tnúhu sá ndétú ñàha ñ<sup>n</sup> úú cue téé isràél cahni ñaha-güedé xii-dé ní cùu, núu xiá<sup>n</sup> ní tñi-dé ichi cuáhá<sup>n</sup>-dé ní yáha-dé ichi distritú Macèdoniá.

4 Te cuáhá<sup>n</sup> ndihí-dé té Sopàtér téé ñuú Bèreaá, ndihí té Aristarcú, ndihí ñ<sup>n</sup> téé nàni Segundú. Te ndí nduú cue téé-á<sup>n</sup> cúú-güedě cue téé ñuú Tesalónicá. Te tnàhá té Găyú téé ñuú Dèrbé, ndihí té Timùteú cuáhá<sup>n</sup> ndihí-dé, te tnàhá té Tìquicú ndihí té Trõfimú cuáhá<sup>n</sup> ndihí-dé, te úú cue téé-á<sup>n</sup> cúú-güedě cue téé distritú Àsiá. Te nchaa cue téé-á<sup>n</sup> cuáhá<sup>n</sup> ndihí-güedé té Păblú.

5-6 Te ní quexìo-güedé ñuú Filipú, te yàcá<sup>n</sup> ní naníhí ñáhá-güedě xii-ndí. Te té Păblú ní tendaha-dě cue téé ndihí-dé cuáhá<sup>n</sup>-güedé ñuú Tròás, te ní xáha<sup>n</sup>-dě sá díú-ní yàcá<sup>n</sup> cundetu ñaha-güedě xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhi levadurá. Te sátá ñí yáha vico, te ní quée-ndí bàrcú cuáhá<sup>n</sup>-ndí, te ní xúhu<sup>n</sup>-ndí ichi úhú<sup>n</sup> nduu, te ní quexìo-ndí ñuú-á<sup>n</sup>. Te yàcá<sup>n</sup> ní naníhí tnáhá-ndí ndihí cue téé yòdo nuu cuáhá<sup>n</sup> ní xíndecu-ndí úsá nduu.

*Té Păblú cuáhá<sup>n</sup> ngándihí-dé ñáyíu ñuú Tròás*

7 Te ñ<sup>n</sup> nduu ndumìngú ní naníhí tnáhá-ndí ndihí nchaa ñáyíu ní sàndáá iní-xi tnúhu Jèsús ní xexi-ndí pàá ndihí-yu. Te duca<sup>n</sup> ñí quide-ndí, chi ní cachí Jèsús sá dúcá<sup>n</sup> càda-o cuendá sá vă nácuànaa-o sá ñí xihí-gá cuendá naníhí tãhú-ó. Te té Păblú ní ngüíta-dé càhá<sup>n</sup>-dé tnúhu-gá, te càhá<sup>n</sup>-dé ní cuu dava niú, chi cuendá ná tũndaá ingá nduu-á<sup>n</sup>, te caca-dé quíhí<sup>n</sup>-dé ingá xichí.

8 Te ndècú-yu vehe yòdo tnaha, te yìhí-yu ndéé cuàrtú cúú ùní núú ñíu, te càyú víhí ñùhú xití cuàrtú-á<sup>n</sup>.

9 Te ñ<sup>n</sup> téé sa ta cùu sacuéhé luha nàni-dé Eùticú núcõo-dé yèhe ventaná, cuíní-dé cúdú-dé, chi ní cunaha vìhi cahá<sup>n</sup> té Păblú, te ní tñi ñaha sàní xii-dé ní xidí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xihí-dé, chi ío dùcú<sup>n</sup> ní ngava-dé.

10 Te tnàhá té Păblú nchìcú<sup>n</sup>-dé ní nuu. Te ní quexìo cunu-dé núú cãtùu téé ní xihí-á<sup>n</sup>, te ní numi ñaha-ni-dě, te ní xáha<sup>n</sup>-dě xií-yu:

—Vá ndìhú iní-ndó, chi ní ndoto-dé —càchí-dé xáha<sup>n</sup>-dě xií-yu.

11 Te dătnùní cuándaá ndihí ñaha tùcu-dé xií-yu cuàrtú núú yìhí-yu ní cùu, te yàcá<sup>n</sup> ní xexi ndihí ñaha-dě xií-yu, dătnùní ní ngüíta-dé vài-gá tnúhu ní cahá<sup>n</sup>-dé, te càhá<sup>n</sup>-ni-dé ní tũndaá, te dătnùní ní xica-dé cuáhá<sup>n</sup>-dé.

12 Te téé ní ngava-á<sup>n</sup> ní sánúndeca ñàhá-yu xii-dé ndéé vehe-dé, te ío ní cudí iní-yu sá ñí ndoto-dé.

*Ní quée-güedé ñuú Tròás cuáhá<sup>n</sup>-güedé ñuú Miletú*

13 Te té Păblú ní cachí-dé sá quíhí<sup>n</sup>-ndí ndihí bàrcú ndéé ñuú Àsón, te mee-dě caca saha-dě, te yàcá<sup>n</sup> naníhí tnáhá-ndí ndihí-dé te quée-dé bàrcú, te ní quée-ndí bàrcú cuáhá<sup>n</sup>-ndí.

14 Te ní naníhí tnáhá-ndí ndihí-dé ñuú Àsón, te yàcá<sup>n</sup> ní quée-dé bàrcú tnàhá-dé cuáhá<sup>n</sup>-ndí ñuú Mitilené.

15 Te ní quexìo-ndí ndéé ingá nduu yatni ñuú Quiú, te ndéé nduu tnéé ní quexìo-ndí ñuú Sãmú te yàcá<sup>n</sup> ní yáha-ndí, te ní quexìo-ndí ñuú Trògiliú. Te ndéé nduu idá ní quexìo-ndí ñuú Miletú.

16 Te té Păblú ñá ní cuíní-dé yáha-ndí ñuú Éfesú, chi ñá túú ní tnàhá iní-dé cuyaa-dě ichi, chi ío ndíhí iní-dé cuendá cuíní-dé quíní-dé ñuú vá ndácú-dě ndexìo-dé ñuú Jerusalén cundecu-dé vico Pentecostés.

*Té Păblú càhá<sup>n</sup> ndihí-dé cue téé yìndaha ñaha xii ñáyíu sàndáá iní tnúhu Jèsús ñuú Éfesú*

17 Te òré ndécú tē Păblú ñuú Miletú, te ní cana-dé cue téé yìndaha ñaha xii ñáyíu sàndáá iní tnúhu Jèsús ñuú Éfesú sá quíhí<sup>n</sup>-güedé núú ndécú-dě.

18 Te sátá ñí quexìo-güedé, te ní xáha<sup>n</sup>-dě xii-güedé:

—Nàha-ndo nacuáa ní quide-í ndéé cùtnàhá ní quexìo-í distritú Àsiá.

19 Chi ní quide-í nàcuáa ní cáhá<sup>n</sup> Yă Ndiõxí cada-í, ñá túú ní tühío-í, te ñá túú ní quide cahnu-í méè-í, te ío ní ndáhyú-í sá quidé dàvá-yu, chi ío sàà iní-yu. Te sa nàha-ndo sá tìtní xito ní cuiní ñáyiu isràèl cahni ñàhá-yu xii-í ní cùu, te ío ní ndoho-í ní cácu-í.

20 Te sa nàha-ndo sá ncháándì túhú sa ní cachí tnúhu-í nàcuáa cada-ndo cuendá sá chindèe ñaha Yă Ndiõxí xii-ndo. Te ní cáhá<sup>n</sup>-í tnúhu-gá núú-ndó nchàa-ndo, te ñu-í duca<sup>n</sup> ní quixi-í ndi tnahá vehe-ndo ní cáhá<sup>n</sup>-í tnúhu-gá núú-ndó.

21 Te ní xáha<sup>n</sup>-í xii ñáyiu isràèl ndihí ñáyiu ñá túú cùu ñáyiu isràèl sá dáñă-yu nchaa sá cuèhé sá dúhá quidé-yu te quindáá iní-yu tnúhu Xítohó Jesucristú.

22 Te dacuítí quíhí<sup>n</sup>-í ñuú Jerusálén, chi Espíritú Yă Ndiõxí ní cachí-xi sá dáí quíhí<sup>n</sup>-í, te ñá túú xini-í nándi cada ñaha-güedě xii-í yàcá<sup>n</sup> te núu na quèxio-í.

23 Te ñuú ñuú sàhá<sup>n</sup>-í cächí tnúhu Espíritú-gá sá chíhí ñaha-güedě vecaá, te cada úhú ñàhá-güedě.

24 Dico ñá túú tnàhí ná cuu cuèi na cahni ñaha-güedě xii-í, dico cuiní-í sá dñí iní dandihí-í nchaa sá ní cachí Xítohó Jesucristú cada-í. Te ní cachí Yă Ndiõxí sá cáhá<sup>n</sup>-í núú ñáyiu sá ío cùu iní ñàhá-gă xii-yu, te naníhí tãhú-yu núu na quindáá iní-yu tnúhu-gá.

25 Te sa ní cachí tnúhu-í xii-ndo nchàa-ndo sá ñuú na quindáá iní-ndó Yă Ndiõxí, te ndihu ndaha ñaha-gá xii-ndo. Te na cächí tnúhu-í sá ní ñuú nduu-gá vá quini ñàhá-ndó xii-í ñuyíú-a.

26-27 Te yúhú ñá túú cuèchi-í ñuú ío ñáyiu vá naníhí tãhú, chi sa ní cachí tnúhu-í nchaa sá ní cáhá<sup>n</sup> méé Yă Ndiõxí cada-ndo.

28 Te coto-ndo mèe-ndo, te coto-ndo tnàhá ñáyiu sàndáá iní tnúhu-gá, chi Espíritú-gá ní cachí-xi sá cùnùu-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbèé-ndó

cùu-yu, te mee-ndo cùu-ndo datná toli xito-ndó-yu duca<sup>n</sup> càda-ndo cuendá, chi nàha-ndo sá Jèsús ní sati níñí-gă, te ní xihí-gá cuendá naníhí tãhú-ó ndihí-yu.

29 Te yúhú sa cùtnuní iní-í sá òré ñá túú-gă-í ndécú, te quixi ñáyiu dandàhú ñàhá xii-ndo cuendá dañà-ndo tnúhu Yă Ndiõxí, te cada ñàhá-yu xii-ndo dàtná quidé ñàñá òré tnii-dí mbèé.

30 Te ñu-í ñuú ñuú cue téé ndècu ndihí-ndo, cue téé-á<sup>n</sup> dacuàndehnde-güedé, te cudana davá-yu quindáá iní-yu chítnàhá ñàhá-yu xii-güedé.

31 Te xiã<sup>n</sup> ñuú cächí tnúhu-í sá ío quihí iní-ndó cùndecu-ndo ndihí nchaa ñáyiu sàndáá iní tnúhu-gá. Te nàha-ndo sá yúhú ní xindecu-í úní cuíá ní cáhá<sup>n</sup>-í tnúhu Jèsús núú ñáyiu cuèi nduu cuèi níú. Te áma ní xóo ndáhyú-í, chi ñá ní cuiní-yu quindáá iní-yu ncháa-yu tnúhu ní cáhá<sup>n</sup>-í — cächí té Pãblú xãha<sup>n</sup>-dě xii-güedé.

32 Te xãha<sup>n</sup> tùcu-dé:

—Nchòhó cue téé ndècu ndihí-í ichi Xítohó Jesucristú, ío cuiní-í sá méé Yă Ndiõxí chindee ñaha-gá xii-ndo. Te mee-gă ní cáhá<sup>n</sup>-gá sá ío cùdí iní ñàhá-gă xii-ndo. Te naníhí tãhú-ndó ndihí nchaa ñáyiu cùu cuendá-gá, te chindee ñaha-gá xii-ndo cuendá cada-ndo nchàa sá cáhá<sup>n</sup>-gá.

33 Te òré ní xindecu ndihí ñaha-í xii-ndo, te ní dñí<sup>n</sup> ní dóó ñá túú ní cùdí iní-í.

34 Te mee-ndo sà naha-ndo sá yúhú ní quide chiú<sup>n</sup>-í, te ní níhí-í nchaa sá ní nandihí-í ndihí cue téé xica cuu ndihí-í.

35 Te sa ní xini-ndó nàcuáa ní quide-í ní quide chiú<sup>n</sup>-í, te ñu-í duca<sup>n</sup> càda chiú<sup>n</sup>-ndo cuendá chindee-ndo nchàa ñáyiu ndàhú, chi sa nàha-ndo nacuáa ní cachí Xítohó Jesucristú, te duha ní cachí-gá: “Cùdí-gă iní-ó cuãha-o ñáyiu ndàhú sá xini ñuhú-yu dàcúúxí sã táxí-yu xii mee-o”, duha ní cachí-gá —cächí té Pãblú xãha<sup>n</sup>-dě xii-güedé.

36 Te sáta dúcá<sup>n</sup> ní cáhá<sup>n</sup>-dé, te ní ngüíñí xití-dě ndihí dava-gá-güedé, te

ní cáhá<sup>n</sup> ndihí-dé Yă Ndiöxí.

<sup>37</sup> Te sátá ní túhú tnúhu ní cáhá<sup>n</sup>-dé ndihí Yă Ndiöxí, te ní ndáhyú víhí-güedě sá quihí<sup>n</sup>-dé, te ní numi ñaha-güedě, te ní teyuhu ñaha-güedě.

<sup>38</sup> Te ní ndíhú víhí ìní-güedě, chi ní xáha<sup>n</sup> tē Păblú sá nì ì<sup>n</sup> nduu-gá vá nánihí tnáhá-güedě cáhá<sup>n</sup> ndihí tnàha-güedě. Te cuáhá<sup>n</sup> ndihí ñaha-güedě xii-dé núú ndécú bàrcú.

## 21

### *Té Păblú cuáhá<sup>n</sup>-dé ñuú Jerusàlén*

<sup>1</sup> Te ní quide ndee ìní-ndí nchaa cue tée cùnuu. Te ní quée-ndí bàrcú cuáhá<sup>n</sup> ndáá ichi-ndí ñuú Cös. Te nduu tněé ní sáhá<sup>n</sup>-ndí ñuú Ròdás, te ní yáha-ndí cuáhá<sup>n</sup>-ndí ñuú Pàtará.

<sup>2</sup> Te yàcá<sup>n</sup> ní naníhí-ndí ì<sup>n</sup> bàrcú ñúhú ichi-xi quihí<sup>n</sup>-xi distrítú Fènicía, xíá<sup>n</sup> ní quée-ndí cuáhá<sup>n</sup>-ndí.

<sup>3</sup> Te ichi cuáhá<sup>n</sup>-ndí ní xiní-ndí distrítú Chìpré cáá cuădava xítí làmár, te ní yáha-ndí, te ní quendóo ñuú-án xio dàtni-ndí. Te cuáhá<sup>n</sup>-ndí ñuú Tírú ì<sup>n</sup> ñuú yîndèhu distrítú Síría cuendá yàcá<sup>n</sup> tava-güedě nchaa sá nchídó bàrcú.

<sup>4</sup> Te yàcá<sup>n</sup> ní naníhí tnáhá-ndí ndihí ñáyíu ní sándáá ìní tnúhu Jèsús, te ní xíndecu-ndí úsá nduu ndihí-yu. Te ní xáhá<sup>n</sup>-yu sá vă quihí<sup>n</sup> té Păblú ñuú Jerusàlén, chi Espíritú Yă Ndiöxí ní xáha<sup>n</sup>-xi xii-yu sá ndóhó víhi-dé nùu na quihí<sup>n</sup>-dé.

<sup>5</sup> Te sátá ní yáha nduu úsá, te ní quee-ndí cuáhá<sup>n</sup>-ndí yuhu làmár. Te ní quee nchaa ñáyíu ní sándáá ìní tnúhu-gá, tée, ñadíhí, nchaa landú, nchaá-yu ní sàndeca ñáhá-yu yuhu làmár, te òré ní quexìo-ndí, te ní ngüíñí xítí-ndí ní cáhá<sup>n</sup> ndihí-ndí Yă Ndiöxí.

<sup>6</sup> Te ní quide ndee ìní tnáhá-ndí ndihí-yu, te dàtnùnì ní quée-ndí bàrcú, te ní naquehé<sup>n</sup>-yu ichi cuánuhú-yu vehé-yu.

<sup>7</sup> Te ní xica bàrcú ñúhú-ndí ní quee-xi ñuú Tírú cuáhá<sup>n</sup>-ndí ndihí-xi

ñuú Tolèmaidá. Te xíá<sup>n</sup> ní sáá-xi te ní quene-ndí, te ní sáhá<sup>n</sup>-ndí ní cáhá<sup>n</sup> ndihí-ndí nchaa ñáyíu sándáá ìní-xi tnúhu Jèsús, te ní xíndecu-ndí ndihí-yu ì<sup>n</sup> nduu.

<sup>8</sup> Te nduu tněé ní ndée tucu-ndí bàrcú cuáhá<sup>n</sup>-ndí ñuú Cèsareá, te yàcá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lìpé cundecu-ndí ndihí-dé. Te tée-án ní xóo cada chiú<sup>n</sup> ndihí-dé ìñú-gá cue tée ní chindee ñaha xii ñáyíu sándáá ìní tnúhu-gá ñuú Jerusàlén ní xóo cuáñaha-güedě sá ní xóo caxí-yu. Te dàtnùnì mee-nă tnúhu Yă Ndiöxí cáhá<sup>n</sup>-dé xíá cùu-dé.

<sup>9</sup> Te té Lìpé-án ndècu cùmí dēhe dīhí-dé, te ní ì<sup>n</sup>-yu vátá ndúcú ñaha-gá tée xii-yu, te nchaá-yu cáhá<sup>n</sup>-yu tnúhu Yă Ndiöxí tnúhu sá dácàhu ìní ñáhá mē-gá.

<sup>10</sup> Te xíá<sup>n</sup> ní cuu titní nduu ndècu-ndí, te ní quexìo ì<sup>n</sup> tée nàni Agabú ñuú-án, véxi-dé distrítú Jùdeá, te tée-án tnáhá-dé cáhá<sup>n</sup>-dé tnúhu Yă Ndiöxí.

<sup>11</sup> Te ní níhí-dě tnúhu núú ndécú-ndí nùu ní quixi-dé ní cáhá<sup>n</sup> ndihí ñaha-dě xii-ndí. Te ní xíá<sup>n</sup>-dé cìrchú té Păblú, te ní ngóo-dé, te ní ngüíta-dé ní dácútú-dě sáhá-dě ndihí ndaha-dé, te ní cachí-dé xii-ndí:

—Espíritú Yă Ndiöxí ní cachí-xi sá tēe dii cìrchú-xi-a tñi ñaha cuè tēe isràel ñuú Jerusàlén, te duha dacùtu ñaha-güedě xii-dé, te cuáha cuendá ñáhá-güedě xii-dé núú cuè tēe ñuú Rómá. Duha ní cáhá<sup>n</sup> Espíritú-gá — càchí té Àgabú.

<sup>12</sup> Te sá dúcá<sup>n</sup> ní cáhá<sup>n</sup>-dé, te ní xáha<sup>n</sup>-ndí nchaa-ndí sá vă quihí<sup>n</sup> té Păblú ñuú Jerusàlén.

<sup>13</sup> Te té Păblú ní cachí-dé:

—¿Ná cuendá ndée dúcá<sup>n</sup> ndàhyú-ndó dāndihú ìní ñáhá-ndó xii-í-í? Te ñá túú nă cuu cuèi na dácùtu ñaha-güedě, àdi cuèi na càhni ñaha-güedě xii-í cuendá sá cáhá<sup>n</sup> ndihí-í Jèsús, chi sa ndècu túha-í sá cùú-í —càchí-dé.

<sup>14</sup> Te ñá túú ní sándáá ìní-dé sá dúcá<sup>n</sup> xáha<sup>n</sup>-ndí, núu xíá<sup>n</sup> ñá túú-gă ná ní xáha<sup>n</sup>-ndí xii-dé sá vă quihí<sup>n</sup>-dé, te ní xítñaha-ndí:

—Mee-ni-gă Yă Ndiöxí ná cùnaha-gá nása sàni iní-gá cada-gá —xìtnàha-na-ndí. **15** Te ní quehe<sup>n</sup>-ndí ndàchiu<sup>n</sup>-ndí, te ní xica-ndí cuáhá<sup>n</sup>-ndí ñúú Jerusàlén.

**16** Te cuáhá<sup>n</sup> ndìhi-ndí ñúú cue té Cèsareá, cue té ní sándáá iní tnúhu Jèsús. Te ndèca ñaha-güedé xii-ndí cuáhá<sup>n</sup> vehe té Mnàsón, te té-á<sup>n</sup> cúu-dé té distritú Chìpré, te ndècu-dé ñúú Jerusàlén, te sa ní cuu vài nduu ní sándáá iní-dé tnúhu-gá, te vehe té-á<sup>n</sup> ní xíndecu-ndí.

*Té Păblú ndátñúhu-dé ndìhi té Jàcobó*

**17** Te òré ní quexìo-ndí ñúú Jerusàlén, te nchaa ñáyiú ní sándáá iní tnúhu Jèsús ní quixí-yu ní dándácõ vâha ñàhá-yu, chi ní cudíí víhí iní-yu sá ñí quexìo-ndí.

**18** Te nduu tnèé cuáhá<sup>n</sup> ndìhi-ndí té Păblú cuendá cáhá<sup>n</sup> ndìhi-ndí té Jàcobó, te òré ní quexìo-ndí núú ndécú-dé, te ndècu ndìhi-dé nchaa cue té yíndaha ñaha xii ñáyiú sándáá iní tnúhu Jèsús.

**19** Te té Păblú ní dándácõ vâha ñaha-dé xii-güedé, te ní xáha<sup>n</sup>-dè nàcuáa ní quide Yá Ndiöxí ní chindee ñàha-gá xii-dé ní cáhá<sup>n</sup>-dé tnúhu-gá núú ñáyiú ñá túú cùu ñáyiú isràél.

**20** Te sátá ñí yâha ní cáhá<sup>n</sup>-dé, te ní ndácá<sup>n</sup> táhü-yu núú Yă Ndiöxí cuendá nchaa sá ñí quide-gá. Te dàtnùní ní xáha<sup>n</sup>-güedé xii té Păblú:

—Yòhó sa nâha-n sá ñí cuu titní mîl ñáyiú isràél ní sándáá iní-yu tnúhu Jèsús, te cächí-yu sá ïo xini ñuhu-xi cada-yu nchaa nàcuáa cáhá<sup>n</sup> tnúhu sá ñí chídó tnùní ndí Moisés.

**21** Te ní níhí-yu tnúhu sá dácuàha-n ñáyiú isràél ñáyiú ndècu ñúú xícá cuendá sá vâ cádá-gă-yu nàcuáa ní cachí ndí Moisés cada-yu. Te xáha<sup>n</sup>-n xii-yu sá vâ cuàha-gá-yu señá ñí landú-yu, te vâ cádá-gă-yu dàtná ní xóo cada ñáyiú ndéé sanaha, duha dàcuaha-n ñáyiú ní níhí-yu tnúhu.

**22** Te na níhí-yu tnúhu sá ndécú-n ìha, te tnàvíí ngúíta-yu cáhá<sup>n</sup> cuèhé-yu cuendá-n.

**23** Te na cächí tnúhu-ndí nàcuáa cada-n. Ndècu cúmí cue té vátá

cádá-gă-güedé nàcuáa ní cáhá<sup>n</sup> ndéé-güedé sá cádá-güedé cuendá nduu vétú iní Yă Ndiöxí.

**24** Te quíhí<sup>n</sup>-n ndìhi-güedé te cada-n nchâa nàcuáa ní xóo cada ñáyiú ndéé sanaha cuendá nduu vétú iní Yă Ndiöxí. Te tava-n dîhú<sup>n</sup> cuu núú-güedé cháhu-güedé veñúhu, te duca<sup>n</sup> te dàtnùní ndacu dèté díquí-güedé. Nchaa xíá<sup>n</sup> cada-n, te quíní ñáyiú sá ñá ndáá tnúhu cáhá<sup>n</sup> nchaa ñáyiú cáhá<sup>n</sup> cuèhé cuendá-n. Te na cùtnuní iní-yu sá tnàhá-n quide-n nchaa nàcuáa ní chídó tnùní ndí Moisés cada-yu.

**25** Te sa ní quide ndáá-ndí cuendá nchaa ñáyiú ñúú xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyiú-á<sup>n</sup> sá vâ caxí-yu nchaa sá nchító-ó nduu táhú nchaa sá cächí-yu cùu ndiöxí ní cadúha cue ñáyiú ñuyú-a. Te ní xáha<sup>n</sup>-ndí sá vâ caxí-yu níñí, te vâ caxí-yu cuñú nchaa quiti cuèhné. Te vâ cáhá<sup>n</sup> ndìhi cue té ñadìhí te núú ñá díú ñadìhí-güedé cúu-yu, te ní cuè ñáyiú dîhí vâ cáhá<sup>n</sup> ndìhí-yu té te núú ñá díú yí-yu cùu-güedé. Duha ní tee-ndí núú tütú cuáhá<sup>n</sup> —cächí-güedé xáha<sup>n</sup>-güedé xii té Păblú.

*Ní tnî-güedé té Păblú xití veñúhu ñáyiú isràél*

**26** Te nduu tnèé cuáhá<sup>n</sup> té Păblú ndìhi cúmí cue té veñúhu càhnu sá ïo cùnuu núú ñáyiú isràél cada-güedé nàcuáa ní xóo cada ñáyiú ndéé sanaha cuendá nduu vétú iní Yă Ndiöxí. Te ní quíhu-dé veñúhu càhnu sá ïo cùnuu-á<sup>n</sup> ní xáha<sup>n</sup>-dè ná daha-gá nduu cùmání dandìhi-güedé nàcuáa ní xóo cada ñáyiú ndéé sanaha, te dàtnùní cànehe-güedé sá ndúú táhú Yă Ndiöxí quíhí<sup>n</sup> veñúhu.

**27** Te cùmání-gă cuu úsá nduu sá ñí sáhá<sup>n</sup>-güedé veñúhu càhnu sá ïo cùnuu, te sa ndècu tucu té Păblú veñúhu. Te cue té isràél véxi distritú Asiá ní xiní-güedé té Păblú yíhí-dé veñúhu, te ní tnî ñaha-güedé xii-dé, te ïo ní cáhá<sup>n</sup> cuèhé-güedé cuendá-dé núú

dáva-gá ñáyiú yìhi veñúhu cuendá sá cúdeè<sup>n</sup>-yu núú tē Páblú.

28 Te níhi ní cáhá<sup>n</sup>-güedé, te xáha<sup>n</sup>-güedé xii-yu:

—¡Nchòhó ñáyiú isràél, yáchí-ndó chì cuánùndaha ñaha-ndo! Chì téé-a yayàcá<sup>n</sup> cuáhá<sup>n</sup>-dé càhá<sup>n</sup>-dé sá ñà túú nàndíhi-o, te càhá<sup>n</sup>-dé sá vǎ cádá-ó nchàa nacuáa càhá<sup>n</sup> tnúhu sá ñì chídó tnùnì ndíi Moisés, te càchí-dé sá ñà túú nàndíhi veñúhu-a. Te ñà díú-ní xǎ<sup>n</sup> chi sa ní quíhu-dé veñúhu-a ndíhi cue téé ñà túú cùu ñáyiú isràél, te sá dúcá<sup>n</sup> ñì quide-dé, te ñà túú-gǎ ní cǎnehe íí-dě xítí veñúhu. Te veñúhu-a cùu-xi vehe Yá Ndiòxí —càchí-güedé xáha<sup>n</sup>-güedé xii-yu.

29 Te duca<sup>n</sup> ñì cáhá<sup>n</sup>-güedé chì ní sani iní-güedé sá ñì quíhu ndíhi-dé té Tròfimú veñúhu-güedé, chì ní xiní-güedé xícá cùu ndíhi ñaha-dé xítí ñúú. Te téé-á<sup>n</sup> cúú-dě téé ñúú Éfesú, te ñà díú téé isràél cúú-dě.

30 Te chitu ñáyiú ñúú-á<sup>n</sup> ñì tacá-yu ní tñí-yu té Páblú táñùhu ñahá-yu ní ndee veñúhu càhnu sá ñò cùnùu, te òré-ni ní nacadí-güedé yèhe veñúhu-á<sup>n</sup>.

31 Te sa cahní-yu té Páblú ní cùu, te ní sáhá<sup>n</sup> ñì<sup>n</sup> úú-güedé núú ndécú téé cùu capitá<sup>n</sup> cùnùu-gá, te ní xáha<sup>n</sup>-güedé xii-dé sá ncháá ñáyiú ñúú Jerusàlén xǎnàá-yu.

32 Te òré-á<sup>n</sup> cuáhá<sup>n</sup> téé cùu capitá<sup>n</sup> cùnùu-gá ndíhi dava-gá cue téé nchìcú<sup>n</sup>-gá ndíhi sandàdú-dé. Te òré ní xiní-yu ní quexìo coyo-güedé núú xǎxúcu-yu, te ní yùhú-yu ñà túú-gǎ ní cání-yu té Páblú.

33 Te téé cùu capitá<sup>n</sup> ní sátuha-dé té Páblú, te ní xáha<sup>n</sup>-dě xii cue sandàdú-dé sá tñí ñaha-güedé dacùtu ñaha-güedé úú cadèná. Te dàtnùnì ní xícá<sup>n</sup> tnúhú-dě núú-yu, te xáha<sup>n</sup>-dě:

—¿Ná cúú téé-a? ¿Ná ní quide-dé? —càchí-dé xáha<sup>n</sup>-dě xii-yu.

34 Te téé cùu capitá<sup>n</sup>-á<sup>n</sup> ñǎ ní cùtnunì iní-dé núu ná cúú sǎ ñì quide té Páblú, chì uu<sup>n</sup>ni ní cuáá-yu. Te tucu càhá<sup>n</sup> ñì<sup>n</sup>, tucu càhá<sup>n</sup> ñì<sup>n</sup>-yu, núu xǎ<sup>n</sup> ní xáha<sup>n</sup>-dě cue sandàdú-dé sá cándèca

ñaha-güedé xii-dé quíhí<sup>n</sup> cuàrtél núú ndécú-güedé.

35-36 Te nchìcú<sup>n</sup> ñáhǎ-yu cuáhá<sup>n</sup> ní quexìo ndéé nàcuáa càa nchio cùnì-yu cahni ñahá-yu xii-dé ní cùu. Te níhi ní cáhá<sup>n</sup>-yu xǎhǎ<sup>n</sup>-yu sá cáhni ñaha-güedé, te xǎ<sup>n</sup> ní ndacani ñaha-güedé ndécá ñaha-güedé cuáaá nchio-ǎ<sup>n</sup>.

*Té Páblú xáha<sup>n</sup>-dě xii-güedé sá ñà túú cuèchi-dé*

37 Te cuánguihu-güedé cuàrtél ndíhi té Páblú ní cùu, te ní xáha<sup>n</sup>-dě xii téé cùu capitá<sup>n</sup> cùnùu-gá:

—Càhá<sup>n</sup> ndàhú-í núú-n cùndetu-n na cùñaha-í ñì<sup>n</sup> úú tnúhu xii-yu —càchí-dé xáha<sup>n</sup>-dě.

Te téé tàxi tnuní-á<sup>n</sup> ñì xáha<sup>n</sup>-dě:

—¿Náa tnàhá yòhó càhá<sup>n</sup>-n tnúhu grìégú?

38 Te ní cáhà<sup>n</sup>-í sá téé ègiptú cúú-n, chì ñíu-n ñì ndúcú-n cuè téé ní nàá ndíhi téé cùchiu<sup>n</sup> Cesár ní cáhà<sup>n</sup>-í, chì ñíu ñì<sup>n</sup> téé yàcá<sup>n</sup> ní ndúcú-dě cúmí mǐl cue téé ní sahani ndíyi. Te ndèca tnaha-güedé ní sáhá<sup>n</sup> xítí yucu ní xǎhi váha-güedé —càchí-dé xáha<sup>n</sup>-dě xii té Páblú.

39 Te té Páblú ní xáha<sup>n</sup>-dě:

—Ñà díú téé ègiptú cúú-í, chì téé isràél cúú-í, chì ñíu-ni téé isràél cúú tǎtǎ-í, te dìcò-ni sá ñì cacu-í ñúú Tàrsú ñúú cáhnú, te ñúú-á<sup>n</sup> yíndèhu-xi distritú Cìlicia. Te cùnì-í cada ndee ñì-ñ dàña-n na cahá<sup>n</sup> ndíhi-í-yu —càchí-dé xáha<sup>n</sup>-dě.

40 Te ní xáha<sup>n</sup> téé cùu capitá<sup>n</sup> cùnùu-gá sá cúú càhá<sup>n</sup> té Páblú, núu ní ngúnutnì-dé núú nchio, te ní quide-dé ndaha-dé sá cùndèdóho-yu. Te ní sadí-yu yuhú-yu, te ní cáhá<sup>n</sup>-dé tnúhu ñáyiú isràél, te xáha<sup>n</sup>-dě xii-yu:

## 22

1 —Chí cádá càhnu iní nchòhó cue téé sa cuéhé ndíhi nchòhó cue téé cuechi, na càhá<sup>n</sup>-í ñì<sup>n</sup> tnúhu cundèdóho-ndo sǎ ñà túú cuèchi-í, chì ñà túú ñǎ ní quide-í, te ní ñà túú ñǎ tnúhu càhá<sup>n</sup>-í —càchí-dé xáha<sup>n</sup>-dě xii-güedé.

2 Te cuendá sá dúcá<sup>n</sup> ñì cáhá<sup>n</sup>-dé tnúhu mèé-yu núu tnáví-ñǎ ní

sadí-yu yuhú-yu ní xíndedóho-yu ní cáhá<sup>n</sup>-dé, te xáha<sup>n</sup>-dě:

3—Yúhú cù-í tée isràél, te ní cacu-í ñuú Tàrsú, te ñuú-á<sup>n</sup> yíndèhu-xi Cili-ciá. Te davitna lìhli-í cùtnàhá ní quexìo-í ñuú Jerusàlén ní dácuaá há ñàha té Gamaliél. Te ní dácuaá-há nchaa tnúhu ní chídó tnùnì nchaa cue tée ndéé sanaha nàcuáa cada ñáyi. Te yúhú ní cahu iní-í ní quide-í títñí núu chi<sup>n</sup> nàcuáa cuu váha iní Yá Ndiöxí ní cáhá<sup>n</sup>-í, te diu-ni duca<sup>n</sup> quide nchohó tucu.

4 Te ní sánú ndúcù-í nchaa ñáyi sàndáá iní-xi tnúhu Jèsús, cuèi tée, cuèi ñáyi dñí ní dácútù-í-yu, te ní chihi-í-yu vecaá, te ní níhì-í tnúhu ndee iní sá cáhni-ndí-yu.

5 Te dútú cùnù-gá ndihì cue tée cùnùu núu-ndó nàha-güedé sá ndá cáhá<sup>n</sup>-í chi mee-güedé ní taxi-güedé tutú cuáñaha-í xii ñáyi isràél ñáyi ndècu ñuú Dàmascú cuendá cutnùnì iní-yu ná chíu<sup>n</sup> cuáhá<sup>n</sup>-í ní cù. Te ñùhu-í ichi cuáhá<sup>n</sup>-í ñuú-á<sup>n</sup> cuánúndúcù-í ñáyi ní sàndáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñáhá-güedé xií-yu ni cù.

*Té Páblú xáha<sup>n</sup>-dě xii ñáyi nàcuáa ní cuu ní tuha-dé ichi Jèsús (Hch. 9:1-19; 26:12-18)*

6 Te ta cùyatni-í ñuú Dàmascú cuáhá<sup>n</sup>-í, te cù-xi datná òré cauxú nduu, te uu<sup>n</sup> ní quee ñuhú andi, te ní dáyèhé-xi ndéé núu nùtní-í.

7 Te ní quide nee-xi núu-í, xí<sup>n</sup> ní nduá-í ndéé ñuhu. Te ní tecú dóho-í cáhá<sup>n</sup> ñ<sup>n</sup> sá cáhá<sup>n</sup> andi, te cächí-xi: “Yòhó té Sàulú, ¿ná cuendá cúu ùhú iní ñáhá-n dándoho ñaha-n xii-í?”, cächí sá cáhá<sup>n</sup>-á<sup>n</sup>.

8 Te ní xáha<sup>n</sup>-í: “¿Ná cúu yòhó sá cáhá<sup>n</sup>-ái?”, xáha<sup>n</sup>-í. Te ní cáhá<sup>n</sup> tucu ingá xito te cächí-xi: “Yúhú cù-í Jèsús tée ní xíndecu ñuú Nazàrét, te duca<sup>n</sup> ò dándoho ñaha-n xii-í”, cächí sá cáhá<sup>n</sup>-á<sup>n</sup>. Te xí<sup>n</sup> ní cutnùnì iní-í sá diú Jèsús cáhá<sup>n</sup>.

9 Te nchaa cue tée ndihì-í ní xiní-güedé ní dáyèhé ñuhú, te ní

yuhú-güedé, dico ñá túu ní tècú dóho-güedé òré ní cáhá<sup>n</sup>-gá.

10 Te ní xáha<sup>n</sup>-í xii-gá: “Yòhó Xítohó Jesucristú, ¿ná cuini-n cada-í?”, xáha<sup>n</sup>-í xii-gá. Te ní cachí-gá: “Ndacóo, te quíhí<sup>n</sup>-n ñuú Dàmascú, yacá<sup>n</sup> tecú tnúhu-n nchaa nàcuáa cuini Yá Ndiöxí cada-n”, cächí-gá — cächí té Páblú xáha<sup>n</sup>-dě xií-yu.

11 Te ní xáha<sup>n</sup> tucu té Páblú:

—Te cuendá sá ñí dácuaá ñàha ñuhú xii-í núu ní tñí cue tée ndihì-í ndaha-í ndécá ñàha-güedé cuáhá<sup>n</sup> ndéé ñuú Dàmascú.

12 Te yacá<sup>n</sup> ndécú ñ<sup>n</sup> tée nàni Ananiás, te ío vèi sá ñí chídó tnùnì ndí Moisés cada-yu quide-dé. Te nchaa ñáyi ñuú Dàmascú ío váha cáhá<sup>n</sup> ndihì ñàhá-yu xii-dé.

13 Te ní quexìo-dé núu ndécù-í, te ní cachí-dé: “Yòhó té Sàulú, tée ndècu ndihì-í ichi Xítohó Jesucristú, ndúha núu-n”, cächí-dé. Te òré-ni ní nacaá<sup>n</sup> núu-í te ní xiní-í-dé.

14 Te dātñùnì ní cachí-dé: “Yá Ndiöxí ní cáhá<sup>n</sup> ndihì-gá ñani tnáhá-ò ñí xíndecu ndéé sanaha. Te diu-gá ní cáxi ñaha-gá xii-n cuendá quini-n nchaa sá váha cuini-gá cada-n. Te quini-n Jèsús Yá ñá túu cuèchi-xi, te diu-ni mee-gá cáhá<sup>n</sup> ndihì ñaha-gá xii-n.

15 Te cáhá<sup>n</sup>-n tnúhu Jèsús núu nchaa ñáyi, te cáhá<sup>n</sup>-n nchaa sá ñí xiní-n ndihì nchaa sá ñí xíndedóho-n.

16 Tnáví, te quíhí<sup>n</sup>-n cuandute-n, te cáhá<sup>n</sup> ndihì-n Yá Ndiöxí cuendá cada càhnu iní-gá nchaa sá cuèhé sá dúhá ñí quide-n”, duha ní cachí té Ananiás xii-í — cächí té Páblú xáha<sup>n</sup>-dě xií-yu.

*Té Páblú ní cani-dé cuendú nàcuáa ní xáha<sup>n</sup> Jèsús cada-dé quíhí<sup>n</sup>-dé ñuú núu xíndecu ñáyi ñá túu cù ñáyi isràél*

17 Te ní xáha<sup>n</sup> tucu té Páblú:

—Te ní ndee-í cuandixi-í ñuú Jerusàlén. Te ní sáhá<sup>n</sup>-í veñuhu càhnu sá ío cùnùu ní cáhá<sup>n</sup> ndihì-í Yá Ndiöxí, te ní dácótó núu ñáhá-xí sá mée Jèsús ní xiní-í xití veñuhu,

18 te ní cachí-gá: “Yáchí, quee-n ñuú Jerusàlén, chi ñáyi-a vá quindáá iní-yu nàcuáa ní cachí-í cùñaha-n



xii-yu cuendá-í”, duha ní cachí-gá xii-í.

19 Te ní xáha<sup>n</sup>-í xii-gá: “Yòhó Xítohó Jesucrístú, sa xìní-n sã ncháá ñáyiú nàhá-yu sá ñí sáhá<sup>n</sup>-í ndi tnahá ñ<sup>n</sup> ndi tnahá ñ<sup>n</sup> veñúhu nànducu-í ñáyiú sàndáá iní tnúhu-n, te ní tñi-í-yu, ní chihi-í-yu vecaá, te ní táuchíu<sup>n</sup>-í ní caniha-güedé xii-yu.

20 Te cútnàhá ní sahani-güedé ndí Tèvá téé ní xóo cáhá<sup>n</sup> tnúhu-n, te tnàhá-í ndécú òré-á<sup>n</sup> te ní xindeé-í dóo cue téé ní sahani ñaha xii ndí. Te yúhú ní cáhá<sup>n</sup>-í sá ñí quide váha-güedé sá dúcá<sup>n</sup> ñí quide-güedé”, duha ní xáha<sup>n</sup>-í xii-gá.

21 Te ní cachí tnúhu-gá xii-í: “Cuáhá<sup>n</sup> chi cuíní-í quíhí<sup>n</sup>-n ncháa ñuú xicá núú xíndecu cue ñáyiú ñá túú cùu ñáyiú israhél cáhá<sup>n</sup>-n tnúhu-í”, càchí-gá —càchí té Páblú xáha<sup>n</sup>-dè xii-yu.

*Te Páblú ndíhi téé tàxi tnuní ñáhá xii cue sandadú*

22 Te sá dúcá<sup>n</sup> ñí cáhá<sup>n</sup>-dè, te ñá ní tnàhá-gá iní-yu cundedóho-yu tnúhu càhá<sup>n</sup>-dè. Te ñ<sup>n</sup>-ni ñí cuú-yu ncháa-yu, te ní cuáa-yu, te xähä<sup>n</sup>-yu:

—¡Chí cáhni-dè! ¡Ñá díú sã cündècu-dé ñuyú-a! —càchí-yu xähä<sup>n</sup>-yu.

23 Te mei òré duca<sup>n</sup> ñí cáhá<sup>n</sup>-yu, te ní ndátã-yu dóo-yu, te ní dáquénè-yu núú ñínu sá sätú iní-yu. Te ní quéhnu-yu ñuhu, te ní dácácòyó-yu núú ñínu sá ïo sätú iní-yu.

24 Te téé cùu capitá<sup>n</sup> cùnùu-gá ní xáha<sup>n</sup>-dè xii cue sandadú-dé:

—Chí dítá-dè ná quíhu-dé ndéé xití vehe, te cani-ndo-dè ñí, chi na quène yuhu-dé ná tnúhu ní cáhá<sup>n</sup>-dè ñú ndéé dúcá<sup>n</sup> cùdèè<sup>n</sup>-yu núú-dè —càchí-dé xáha<sup>n</sup>-dè xii-güedé.

25 Te sátá ñí dácútú ñaha-güedé xii té Páblú sá cání ñaha-güedé ní cùu, te ní xáha<sup>n</sup>-dè xii téé cùu capitá<sup>n</sup> ndécú-ã<sup>n</sup>:

—Te na càchí tnúhu-í sá vã cúu caniha-güedé ñí, chi téé rómá cúu-í, te vátá quíní ndáa-gá-ndó ñú ndècuéchi-í àdi ñáhá —càchí-dé xáha<sup>n</sup>-dè xii téé cùu capitá<sup>n</sup>.

26 Te sá dúcá<sup>n</sup> ñí cáhá<sup>n</sup>-dè, te ní sáhá<sup>n</sup> téé cùu capitá<sup>n</sup> núú téé cùnùu-gá, te ní xáha<sup>n</sup>-dè:

—Vã cúu càni-o téé-ã<sup>n</sup>, chi téé rómá cúu-dè —càchí-dé xáha<sup>n</sup>-dè.

27 Te ní sáhá<sup>n</sup> téé cùu capitá<sup>n</sup> cùnùu-gá ndéé núú tè Páblú, te ní xáha<sup>n</sup>-dè:

—Cáhá<sup>n</sup> ndáa-n ñú ndisa téé rómá cúu-n —càchí-dé xáha<sup>n</sup>-dè.

Te ní xáha<sup>n</sup> tè Páblú:

—Ndáa sá tèé rómá cúu-í —càchí té Páblú xáha<sup>n</sup>-dè xii téé cùnùu-á<sup>n</sup>.

28 Te ní xáha<sup>n</sup> tèé cùnùu-á<sup>n</sup>:

—Yúhú tnàhá-í cúu-í téé rómá, chi vãi díhú<sup>n</sup> ñí cháhu-í —càchí-dé xáha<sup>n</sup>-dè.

Te té Páblú ní xáha<sup>n</sup>-dè:

—Tnàhá-í cúu-í téé yacá<sup>n</sup> tucu, chi tãtä-í cúu-dè téé rómá —càchí té Páblú xáha<sup>n</sup>-dè xii téé cùu capitá<sup>n</sup> cùnùu-gá.

29 Te uu<sup>n</sup>ni ní nacaca sata cuè téé cuáhá<sup>n</sup> caniha xii-dé ní cùu. Te ní yúhú téé tàxi tnuní sá dúcá<sup>n</sup> ñí xáha<sup>n</sup> tè Páblú sá téé rómá cúu-dè, chi ní xáha<sup>n</sup>-dè ní dácútú ñaha-güedé xii-dé, núu xíã<sup>n</sup> ní yùhu-dé.

*Té Páblú ní cáhá<sup>n</sup> ndíhi-dé cue téé cùnùu oré ní quide-güedé jündá*

30 Te téé tàxi tnuní sandadú ñá ní xìní-dé ná cuéchi ní dácáa ñáyiú israhél díquí tè Páblú, núu xíã<sup>n</sup> nduu tnèé ní cana-dé cue dútú cùnùu, ndíhi cue téé cùchiu<sup>n</sup>, ndíhi cue téé cùu sacuéhé, te ní xáha<sup>n</sup>-dè sá cáda-güedé jündá cuendá nducu tnúhu-güedé núú tè Páblú ná cuéchi ní dácáa-yu díquí-dè. Te ní xáha<sup>n</sup>-dè xii cue sandadú sá nãndãxi ñaha-güedé cadèna ndútú-dé, te candeca ñaha-güedé quíhí<sup>n</sup> núú cáda-güedé jündá. Te ní sáhá<sup>n</sup>-güedé ní nãndaxi ñaha-güedé xii-dé ndécá ñaha-güedé cuáhá<sup>n</sup> jündá, te ní quexio-güedé, te ní ngúnutñí-dé núú cuè téé cùchiu<sup>n</sup>.

## 23

1 Te yacá<sup>n</sup> ní xíndéhé vãha té Páblú núú ncháa-güedé, te ní xáha<sup>n</sup>-dè:

—Cada càhnu iní nchòhó cue téé cùchiu<sup>n</sup>, te duca<sup>n</sup> nchòhó cue téé cùu sacuéhé, véxi-í càchí tnúhu-í sá ñã túú cuéchi-í, chi mee Yã Ndiõxí nãhá-gã nása ndècu-í ñuyú-a, te ñã túú cùcaha<sup>n</sup>

nùu-í núu-gã —càchí té Păblú xăha<sup>n</sup>-dë xii-güedé.

<sup>2</sup> Te té Ananiás tée cùu dútú cúnùu-gá ní xăha<sup>n</sup>-dë xii cue tée nùtnîi yatni dîñi té Păblú sá cáni-güedë déhndé yuhu-dé.

<sup>3</sup> Te té Păblú ní xăha<sup>n</sup>-dë xii dútú-ă<sup>n</sup>: —Yòhó, chi úhú tnàhí iní-n, chi ní ndúcú-n tée ní caniha xî-í, te ñá túú cuèchi-í, dico quiní-n nă cada ñaha Yă Ndiôxí xii-n. Te yòhó ní cana ñaha-n ndùcu tnúhu-n nùu quide-í nchaa năcuáa cãhá<sup>n</sup> tnúhu sá ní chídó tnùnî ndîi Moisés cada-o. Te mee-n ní ndúcú-n tée ní caniha, te ñá túú òuca<sup>n</sup> ní cãhá<sup>n</sup> ndîi cada-o —càchí té Păblú xăha<sup>n</sup>-dë xii dútú cúnùu-gá-ă<sup>n</sup>.

<sup>4</sup> Te cue tée xînutnîi dîñi té Păblú ní xăha<sup>n</sup>-güedë xii-dé:

—Nèhé ní quide-n chi ní xícuèhé-n dütú cúnùu-gá tée xînu cuechi núu Yă Ndiôxí —càchí-güedé xăha<sup>n</sup>-güedë xii té Păblú.

<sup>5</sup> Te té Păblú ní xăha<sup>n</sup>-dë xii-güedé:

—Cada cãhnu iní-ndó chi ñá túú xîní-í sá dütú cúnùu-gá cúu-dé, chi núu tütú Yă Ndiôxí càchí-xi sá vã cúu cãhá<sup>n</sup> cuèhé-ó cuendá ì<sup>n</sup> tée cùnùu ñúú-ó yòtnúhu. Te yúhú ñá túú xîní-í sá tée cùnùu cuu-dé nùu ní sácóo-í ní cãhá<sup>n</sup>-í —càchí té Păblú xăha<sup>n</sup>-dë xii-güedé.

<sup>6</sup> Te òré-ă<sup>n</sup> ní cutnùnî iní té Păblú sá dáva-güedë cündîhi-güedé cue tée cùu saducéu, te dava-güedé cündîhi-güedé cue tée cùu fariséu, te níhi ní cãhá<sup>n</sup>-dë ní xăha<sup>n</sup>-dë xii-güedé:

—Yúhú cúu-í tée fariséu, te tnàhá tătà-í ndîhi xî-í cúu-güedë cue tée fariséu tucu. Te tnàhá yúhú sândáá iní-í sá ndótó nchaa ñáyiú ní xîhí, te núu xîă<sup>n</sup> cuiní-ndó ndùcu tnúhu-ndo nùu-í cáná ñaha-ndo —cachí-dé xăha<sup>n</sup>-dë xii-güedé.

<sup>7</sup> Te sá dúcá<sup>n</sup> ní cãhá<sup>n</sup>-dë xîă<sup>n</sup> ní năá ndîhi tnàha cue tée cùu fariséu ndîhi cue tée cùu saducéu, chi ñá ì<sup>n</sup>-ní tnúhu ní cãhá<sup>n</sup>-güedé, chi ní ndî quehe<sup>n</sup> ndî quehe<sup>n</sup>-güedé sá ní cãhá<sup>n</sup>-güedé.

<sup>8</sup> Te cue tée cùu saducéu càchí-güedé sá vã ndótó cuè ñáyiú ní xîhí, te cue tée cùu fariséu càchí-güedé sá ndótó-yu. Te cue tée cùu saducéu

càchí-güedé sá ñà túú espíritú xínú cuèchi núu Yă Ndiôxí, te cue tée cùu fariséu càchí-güedé sá òo espíritú xínú cuèchi núu-gã.

<sup>9</sup> Te ta cùdée<sup>n</sup>-güedë cuáhá<sup>n</sup>, te níhi-gá cúu ìní-güedé cãhá<sup>n</sup>-güedé, te ì<sup>n</sup> úú cue tée cùu fariséu cue tée òacuaha ñaha xii ñáyiú nchaa tnúhu ní chídó tnùnî ndîi Moisés ní cãhá<sup>n</sup> níhi-güedé, te xăha<sup>n</sup>-güedé:

—Ñá túú cuèchi-dé, te cudana te ní cãhá<sup>n</sup> ndîhi-dé ì<sup>n</sup> espíritú xínú cuèchi núu Yă Ndiôxí te vã ngõo vã cúu vãha iní-ó núu-gã —càchí cue tée cùu fariséu xăha<sup>n</sup>-güedë xii-güedé.

<sup>10</sup> Te cuendá sá òo xînáá-güedé, xîă<sup>n</sup> ní yúhú tée cùu capitá<sup>n</sup> cúnùu-gá sá cãhni-güedë té Păblú, núu xîă<sup>n</sup> ní xăha<sup>n</sup>-dë sá quîhî<sup>n</sup>-güedé cúnúcuaca ñaha-güedë candeca ñaha-güedë núhú cuártel.

<sup>11</sup> Te ndée níú cúu úú ní quexîo Xítóhó Jesucristú núu ndécú tã Păblú, te ní xăha<sup>n</sup>-gã:

—Ñîi cunduu-n, vã yúhú-n, chi năcuáa ní cãhá<sup>n</sup>-n ní cacunehe ñaha-n xî-í iha, te òiu-ni òuca<sup>n</sup> cãhá<sup>n</sup>-n cãcunehe ñaha-n xii-í quîhî<sup>n</sup>-n ñúú Rómá —càchí-gá xăha<sup>n</sup>-gã xii-dé.

#### *Cãhni-güedé té Păblú ní cùu*

<sup>12-13</sup> Te nduu tnée ní natacá vîhi-gá údico cue tée isrâél ní ndatnúhu-güedé sá cãhni-güedë té Păblú, te ní xîtnàha-güedé:

—Ní òitá vã cãxí-ó te ní ndùte vã cóhó-ó ndée ndacu-o cãhni-o té Păblú, te òatnùnî caxi-o òitá, te coho-o ndùte, chi sa ní sani iní-ó sã cãdá-ó, te cuu cuèchi xii-o nùu vã cãdá-ó —càchí-güedé xîtnàha-güedé.

<sup>14</sup> Te ní sáhá<sup>n</sup>-güedé núu ndécú nchaa dütú cúnùu ndîhi nchaa cue tée cùu sacuéhé, te ní xăha<sup>n</sup>-güedé:

—Ní cachí-ndî sá ní òitá vã cãxí-ndî ndée nùu ní ndacu-ndî ní sahni-ndî té Păblú, chi sa ní sani iní-ndî sá cãdá-ndî, te cuu cuèchi núu vã cãdá-ndî.

<sup>15</sup> Te duha cada-ndo ndîhi dava-gá cue tée cùnùu, chi cúñaha-ndo xîi tée cùu capitá<sup>n</sup> cúnùu-gá: “Quixi ndîhi-n tã Păblú núu ndécú-ndî cuendá

ndatnúhu ndihí-ndí-dé, chi cuíní-ndí nducu tnúhu váha-gá-ndí ná cúu sã ní quide-dé”, duha cúñaha-ndo xii té tãxi tnuní sandádú. Te duca<sup>n</sup>-ni cúñaha-ndo dándahú-ndó-güedé cuendá quixi ndihí-güedé té Páblú, te nchúhú sa cundetu-ndí-güedé ichi, chi quiní té Páblú ná cahni-ndí-dé –cächí-güedé xãha<sup>n</sup>-güedé xii cue té cùchiu<sup>n</sup>.

16 Te déhe cúha té Páblú ní níhí-dé tnúhu nãcuáa cada-güedé ditó-dé. Te ní sáhá<sup>n</sup>-dé cuártél, te ní xãha<sup>n</sup>-dë xii ditó-dé nãcuáa cãhá<sup>n</sup>-güedé cada ñaha-güedé.

17 Te ní cana té Páblú ñ<sup>n</sup> té cùu capitá<sup>n</sup>, te ní xãha<sup>n</sup>-dë:

–Vá cündèe iní-n, quíhí<sup>n</sup> ndihí-n tãe-a na cãhá<sup>n</sup> ndihí-dé té cùnuu-gá, chi ndëcu ñ<sup>n</sup> cuendú cúñaha-dë cuíní-í –cächí té Páblú xãha<sup>n</sup>-dë xii té cùu capitá<sup>n</sup>.

18 Te dãtnúní ní xica té cùu capitá<sup>n</sup> ndécá-dë dáxí<sup>n</sup> tã Páblú cuáhá<sup>n</sup> núu ndécú té cùnuu-gá, te òré ní quexìo-güedé núu-dë, te ní xãha<sup>n</sup> tã cùu capitá<sup>n</sup> xii-dé:

–Té Páblú té yíhi vecaá ní cana ñaha-dë xii-í, te ní cachí-dé véxi-í ndihí té-a cuendá cachí tnúhu-dé ñ<sup>n</sup> cuendú cuíní-dé –cächí-dé xãha<sup>n</sup>-dë xii té cùnuu-gá.

19 Te té cùnuu-á<sup>n</sup> ní tñi-dé ndaha dáxí<sup>n</sup> tã Páblú, te tãnehe ñaha-dé cuáhá<sup>n</sup> ñ<sup>n</sup> xio, te ní xícá<sup>n</sup> tnúhú-dë núu-dë, te xãha<sup>n</sup>-dë:

–¿Ná cuendú cuíní-n cãhá<sup>n</sup>-n? – cächí-dé xãha<sup>n</sup>-dë xii dáxí<sup>n</sup> té Páblú.

20 Te ní xãha<sup>n</sup>-dë xii té cùnuu-á<sup>n</sup>:  
–Cue tée israhél ní ndatnúhu ndáa-güedé sã quixí-güedé tneé cãhá<sup>n</sup> ndáhú-güedé núu-n cãndeca-n té Páblú quíhí<sup>n</sup> jündá, te yacá<sup>n</sup> cacá<sup>n</sup> tnúhú ndáa-güedé núu-dë ná cúu sã ní quide-dé, cächí-güedé xitnaha-güedé.

21 Te vá quíndáa iní-n chi dicó dandáhú ñáhá-güedé, chi vñhi-gá údico-güedé ndatnúhu-güedé cundedí-güedé ichi cahni ñaha-güedé. Te xitnaha-güedé sã ni dítá vã cáxí-güedé, te ni ndüte vá cóhó-güedé ndéé núu ní ndacu-güedé ní sahani

ñaha-güedé, te dãtnúní caxi-güedé dítá, te coho-güedé ndute, chi sa ní sani iní-güedé sã cáda-güedé, te cuu cuéchi núu vá cáda-güedé, cächí-güedé xitnaha-güedé. Te cundecu túha-ná-güedé cundetu ñaha-güedé tneé, te núu na quíndáa iní-n cãndeca-n-dé quíhí<sup>n</sup> jündá – cächí-dé xãha<sup>n</sup>-dë xii té cùnuu-á<sup>n</sup>.

22 Te té cùnuu-á<sup>n</sup> ní xãha<sup>n</sup>-dë:

–Cuanúhú, te vá yõo tnáhí cúñaha-n sã ní quixi-n ní cachí tnúhu-n nãcuáa cãhá<sup>n</sup>-güedé cada-güedé té Páblú –cächí-dé xãha<sup>n</sup>-dë.

*Ndëca-güedé té Páblú cuáhá<sup>n</sup> núu tã Juéli té cùu gobiernú*

23 Te té cùnuu-gá ní cana-dé úu cue té cùu capitá<sup>n</sup>, te xãha<sup>n</sup>-dë:

–Tava-ndo úu ciendú sandádú cue té xica saha, ndihí únídico úxí sandádú cue té yõdo cuayú, ndihí úu ciendú sandádú mee-ni cuè té xínehe lãnzá. Te cada túha-ndo chi caca-ndo òré caá ñ<sup>n</sup> niú quíhí<sup>n</sup>-ndó ñúu Cèsareá ndihí té Páblú.

24 Te nducu-ndo cuèdicó ñ<sup>n</sup> úu cuayú codo-dë ndihí cue té ndéé ñáhá xii-dé. Te cada cuedádú-ndó-dë ichi, te candeca-ndo-dë quíhí<sup>n</sup> quíndeca-ndo-dë núu tã cùu gobiernú –cächí té cùnuu-á<sup>n</sup> xãha<sup>n</sup>-dë xii cue té cùu capitá<sup>n</sup>.

25 Te té cùnuu-á<sup>n</sup> ní cadúha-dé tutú cuendá quíhí<sup>n</sup> ndaha té Juéli té cùu gobiernú. Te duha ní chídó tnúní-dé núu tutú cuáhá<sup>n</sup>:

26 “Cóvãha díi-n, tãtã gobernádór. Ío cada cãhnu iní, yúhú nãni-í Claudiú Lìsiás. Yúhú ní tendaha-í ñ<sup>n</sup> tutú véxi ndaha-n cuendá quiní tnúní-n nãcuáa ní cuu iha.

27 Cue tée israhél ní tñi-güedé ñ<sup>n</sup> té nãni Páblú cuíní-güedé cahni ñaha-güedé ní cùu, te ní níhí-í tnúhu sã tã rómá cúu-dë núu ní sáhá<sup>n</sup>-í ndihí sandádú-í ní dácãcu-ndí-dé.

28 Te ní cuíní-í quiní-í ná cuendá té ñaha-güedé cuéchi xii-dé, núu xíã<sup>n</sup> ndécá-í-dé ní sáhá<sup>n</sup> núu ní quide cue té cùchiu<sup>n</sup> israhél jündá.

29 Te yacá<sup>n</sup> ní níhí-í tnúhu sã ñã túu nã cuéchi ní quide-dé, chi cuendá-ni sã ní níhí-güedé tnúhu sã ñã túu

sàndáá iní-dé cada-dé nchaa sá nǐ xóo cada ñáyiú ní xíndecu ndéé sanaha nchícú<sup>n</sup> nihnu-güedé quide-güedé, xǎ<sup>n</sup> ní cudéé<sup>n</sup>-güedé núú-dě. Te ñá túú cuěchi càhnu ni quide-dé nǔu quíhí<sup>n</sup>-dé vecaá àdi cahni-í-dé.

<sup>30</sup> Te ní níhí-í tnúhu sá cuè téé isràél ndúcú-güedé nàcuáa cada-güedé cahni ñaha-güedé xii-dé, xǎ<sup>n</sup> ní xáha<sup>n</sup>-í xii sandàdú-í sá cándeca ñaha-güedé quixi xǎ<sup>n</sup>. Te ní xáha<sup>n</sup>-í xii cue téé tèe ñaha cuéchi sá quíxí-güedé ndéé xǎ<sup>n</sup> cǎhá<sup>n</sup>-güedé nǔu ná cuéchi ní quide-dé. Te cada càhnu iní-n chi duha-ni ndúu tnúhu cǎhá<sup>n</sup>-í, te cundee iní-n quèhe<sup>n</sup> cuendá-n-dě”, duha ní chídó tnúní téé ní cadúha tutú cuáhá<sup>n</sup> ndaha té Juéí.

<sup>31</sup> Te cue sandàdú ní quide-güedé nàcuáa ní xáha<sup>n</sup> tèe tàxi tnuní ñáhá xii-güedé chi ní xica-güedé ndíhi té Pǎblú òré caá í<sup>n</sup> niú, te ñu-ni niú-án nǐ quexìo-güedé ñuú Antìpatrís.

<sup>32</sup> Te sáta nǐ túndaá, te ní nacuico cuè téé xínehe lǎnzá ndíhi dava-gá sandàdú xícá sàha cuánuhú-güedé cuàrtél, te mee-nǎ sandàdú cue téé yòdo cuayú cuáhá<sup>n</sup> ndíhi té Pǎblú.

<sup>33</sup> Te òré ní quexìo-güedé ñuú Cèsareá, te ní sáha-güedé téé cùu gobiernú tutú néhé-güedé cuáhá<sup>n</sup>. Te ní quehe<sup>n</sup> cuendá-dé té Pǎblú.

<sup>34</sup> Te sáta nǐ dácuáhá tèe cùu gobiernú-án tutú-án te ní xícá<sup>n</sup> tnúhú-dě núú tǎ Pǎblú, te xáha<sup>n</sup>-dě:

—¿Ndéé téé cùu-n? —cachí-dé xáha<sup>n</sup>-dě.

Te ní xáha<sup>n</sup> tǎ Pǎblú:

—Téé Ciliciá cùu-í —càchí-dé xáha<sup>n</sup>-dě.

<sup>35</sup> Te ní xáha<sup>n</sup> tèe cùu gobiernú-án:

—Òré quexìo cue téé tèe ñaha cuéchi xii-n, te cǎhá<sup>n</sup>-n nǎsa ní cuu, chi níhí-í nàcuáa cada ndáá-í cuendá-n —càchí-dé xáha<sup>n</sup>-dě xii té Pǎblú.

Te ní xáha<sup>n</sup>-dě xii sandàdú sá cùndéé-güedé té Pǎblú vehe càhnu té Hèrodés.

## 24

*Té Pǎblú xáha<sup>n</sup>-dě xii té Juéí sá ñá túú cuěchi-dé*

<sup>1</sup> Te sáta nǐ cuu úhú<sup>n</sup> nduu, te té Ananiás dútú cúnúu-gá cuáhá<sup>n</sup>-dé

ñuú Cèsareá ndíhi cue téé cùu sacuéhé ndíhi í<sup>n</sup> téé nàni Tértulú té cǎhá<sup>n</sup> yuhu-güedé. Te cuáhá<sup>n</sup>-güedé núú tèe cùu gobiernú cuáhá<sup>n</sup> dácuándèhnde-güedé núú-dě sá ndècuéchi té Pǎblú.

<sup>2</sup> Te ní ságuaca-güedé té Pǎblú. Te òré ní quexìo-dé núú-güedé, te ní ngúita té Tértulú xáha<sup>n</sup>-dě xii té Juéí nàcuáa càa cuéchi tèe-güedé té Pǎblú:

—Ío càhnu cada iní tǎtá gobernàdór. Duha ndúu chiu<sup>n</sup> ndéé iní ñáhá-ndí xii-n vǎxi-ndí, núu nǎsa cachí-n cùnduu. Tǎxáhu xii-n, chi ío váha ndècu nchaa ñáyiú, te ñá túú nà-yu chi ío váha quide-n.

<sup>3</sup> Te ío cùdí<sup>n</sup> iní-yu chi nchaa-ni nduu xíndecu váha-yu ncháa-yu, te ío tǎxáhu Ndióxi xii-n sǎ dúcá<sup>n</sup> quide-n.

<sup>4</sup> Te cada càhnu iní, cuíní-í ndatnúhu-o í<sup>n</sup> úu-ni cuendú cuendá sá vǎ cùyáa-o dacuíta-í chiu<sup>n</sup>-n.

<sup>5</sup> Te í<sup>n</sup> téé iha ío dàsatú iní ñáhá-dě, chi ndèni ní cuu cuáhá<sup>n</sup>-dé ndatnúhu-dé ndíhi ñáyiú isràél dánàa-dé-yu. Te nèhé quidé-dě chi cuáhá<sup>n</sup>-dé dácáhá<sup>n</sup>-dé nchaa ñáyiú cuendá quíndáa iní-yu tnúhu téé ní xíndecu ñuú Nazàrét.

<sup>6</sup> Chi duca<sup>n</sup> cǎhá<sup>n</sup> cue téé iha sá nǐ sáhá<sup>n</sup>-dé veñúhu càhnu sá ío cùnuu, te cuíní-dé daquèe tíhú-dě veñúhu cuendá cuíní-dé xocàni-dé sá lí ndécú, núu xǎ<sup>n</sup> ní tní ñaha-güedé ndécá ñaha-güedé cuáhá<sup>n</sup> núú cuè téé cùchiu<sup>n</sup> cuendá cáca<sup>n</sup> tnúhú-güedé núú-dě nǔu ná cuendá duca<sup>n</sup> cuíní-dé cada-dé, chi duca<sup>n</sup> càa leí ndécú ndíhi-güedé sá cáda ndáa-güedé nǔu ná í<sup>n</sup> sá cúu.

<sup>7</sup> Te té Lisiú téé cùu capitá<sup>n</sup> cúnúu-gá ní quexìo-dé ndíhi sandàdú, te ní dácúnú-güedé nchaa cue téé nùtní ndíhi té Pǎblú, te dàtnúní ní tní ñaha-güedé xii-dé ndécá ñaha-güedé cuáhá<sup>n</sup>.

<sup>8</sup> Te sáta xǎ<sup>n</sup>, te ní xáha<sup>n</sup>-dě sá quíxí-güedé ndéé ndíha cundáa cuéchi-dé. Te yòhó cundee iní-n cáca<sup>n</sup> tnúhú-n nǔú-dě, te núu ndáa duca<sup>n</sup> nǐ quide-dé àdi ñáhá —càchí té Tértulú xáha<sup>n</sup>-dě xii té Juéí téé cùu gobiernú.

<sup>9</sup> Te dava-gá cue téé isràél xínutní

xíá<sup>n</sup> nǐ cáhá<sup>n</sup>-güedé sá ndáá cáhá<sup>n</sup> té Tértulú.

<sup>10</sup> Te tée cùu gobiernú nǐ quide-dé ndaha-dé núú tǎ Páblú cuendá cáhá<sup>n</sup>-dé, te té Páblú nǐ xáha<sup>n</sup>-dě:

—Yòhó sa nǐ cuu titní cuía ndécú-n ìha xehndé-n cuèchi nchaa ñáyiu xǐnàá, núú xíá<sup>n</sup> ío cùdíí ìní-í sá ndíha téhndé cuèchi tǎ ñaha-güedé xii-í. Te cundee ìní-n cùndedóho-n na càni-í cuèndú nàcuáa nǐ cuu.

<sup>11</sup> Te nducu tnúhu-n te quiní-n nǎ cáhá<sup>n</sup> ndáá-í, chí sa nǐ cuu úxúú nduu sá nǐ sáhá<sup>n</sup>-í veñúhu càhnu sá ío cùnuu ñuú Jerusalén nǐ cáhá<sup>n</sup> ndíhi-í Yá Ndiöxí.

<sup>12</sup> Te nǐ ñà túú nǐ nàá-í ndíhi ñáyiu xití veñúhu, te ñà túú nǐ xáha<sup>n</sup>-í nàá-yu nǐ ñà xichi, te nǐ ñà veñúhu líhli nǐ sáhá<sup>n</sup>-í ñà túú nǎ nǐ xáha<sup>n</sup>-í cada-yu.

<sup>13</sup> Te nǐ ñà túú quèñuhu-güedé cue tée cáhá<sup>n</sup> ndáá te núú ndáá duca<sup>n</sup> nǐ quide-í.

<sup>14</sup> Te yúhú cáhá<sup>n</sup> ndáá-í sá cáhá<sup>n</sup> ndíhi-í Yá Ndiöxí, chí ðiu-ni Yá Ndiöxí nǐ xóo cáhá<sup>n</sup> ndíhi ñáyiu ndéé sanaha, núú xíá<sup>n</sup> nǐ tuha-í ichi-gá. Te cue tée-a càchí-güedé sá ñà díú ñà ichi váha ni tuha-í. Te yúhú sàndáá ìní-í nchaa sá nǐ chídó tnùnǐ ndíi Moisés ndíhi ðava-gá cue tée nǐ xóo cáhá<sup>n</sup> tnúhu Yá Ndiöxí ndéé sanaha.

<sup>15</sup> Te sàndáá tucu ìní-í sá ndótó nchaa ñáyiu nǐ xíhí, cuèi ñáyiu váha ìní-xi, te cuèi ñáyiu úhú ìní-xi, dico ndotó-yu. Te duca<sup>n</sup> nǐ xóo quindáá ìní nchaa ñáyiu nǐ xindecu ndéé sanaha.

<sup>16</sup> Te yúhú ío ndùcu ndee-í quidè-í nchaa sá cáhá<sup>n</sup> Yá Ndiöxí cuendá sá vǎ cúú cáhá<sup>n</sup> núú-í núú-gá ndíhi núú ñáyiu ñuyíú-a.

<sup>17</sup> Te sa nǐ cuu titní cuía sǎ ñà túú-gá sáhá<sup>n</sup>-í ñuú Jerusalén, te nǐ sáhá<sup>n</sup> tucu-í néhè-í díhú<sup>n</sup> nǐ taxi ñáyiu ñuú xicá cuendá cuañaha-í xii ñáyiu ñuú Jerusalén. Te nǐ ndúcù-í sá cuaha táhù-í Yá Ndiöxí.

<sup>18</sup> Te nǐ xindecu-í veñúhu càhnu sá ío cùnuu nǐ quide-í nchaa nàcuáa nǐ xóo cada ñáyiu nǐ xindecu ndéé sanaha cuendá nduu vétú ìní Yá Ndiöxí. Te ñà túú chítú-yu nǐ sáhá<sup>n</sup>, te nǐ ñà túú nǎ

nǐ cùu, te nǐ naníhí ñáhá ñà úú cue tée isràel xii-í, cue tée véxi distritú Àsiá.

<sup>19</sup> Te quixi mee-güedé ìha cáhá<sup>n</sup>-güedé, te núú sá ndáá nǐ xini-güedé sá yúhú ndècuèchi-í nǐ cùu,

<sup>20</sup> àdi ñáhá. Dico çachí tnúhu cue tée-á<sup>n</sup> nása nǐ cuu òré nǐ xindecu-í jundá-güedé núu ndècuèchi-í àdi ñà túú ndècuèchi-í.

<sup>21</sup> Dico ñà túú cuèchi-í chí ñà ñà-ni tnúhu nǐ cáhá<sup>n</sup>-í nǐ xáha<sup>n</sup>-í xii-güedé sá sàndáá ìní-í sá ndótó nchaa ñáyiu nǐ xíhí, te ðiu-ni núú xíá<sup>n</sup> càchí-güedé sá ndècuèchi-í —càchí té Páblú xáha<sup>n</sup>-dě xii té Juéli.

<sup>22</sup> Te té Juéli sa xini váha-dé nàcuáa cuahá<sup>n</sup> tnúhu Jesús, núú xíá<sup>n</sup> ñà nǐ cuini-gá-dé ndatnúhu-dé ndíhi té Páblú, te nǐ xáha<sup>n</sup>-dě:

—Sa nǐ cuu, cundetu-n na quèxio té Lisiú té cùu capitá<sup>n</sup> cùnuu-gá, te òré-á<sup>n</sup> cundáá cuendá-n —càchí té Juéli xáha<sup>n</sup>-dě.

<sup>23</sup> Te nǐ xáha<sup>n</sup>-dě xii té cùu capitá<sup>n</sup>:

—Cundee-n tǎ Páblú-á<sup>n</sup>, te núú nása càchí-dé cada-n, te ðaña-n na cáhá<sup>n</sup> ndíhi-dé cue tée xini tnáhá ndíhi-dé núu cuañaha-güedé nchaa sá xini ñuhu-dé àdi nása cada-güedé —càchí té Juéli xáha<sup>n</sup>-dě xii té cùu capitá<sup>n</sup>.

<sup>24</sup> Te nǐ cuu titní nduu, te nǐ sáhá<sup>n</sup> té Juéli vechiú<sup>n</sup> ndíhi ñadíhí-dé, te ñaha-á<sup>n</sup> nání-á<sup>n</sup> Drùsilá, te ñaha isràel cúú-á<sup>n</sup>. Te nǐ xáha<sup>n</sup>-dě sá quingueñuhu-güedé té Páblú, te òré nǐ quèxio-dé vechiú<sup>n</sup>, te nǐ cáhá<sup>n</sup>-dé núú-yu nchaa-yu sá quindáá ìní-yu tnúhu Xitohó Jesucrìstú.

<sup>25</sup> Te nǐ xáha<sup>n</sup>-dě:

—Mee-ni sǎ vǎha cada-ndo. Te coto-ndo mèe-ndo, te vǎ cada-ndó nǐ ñà sá cuèhé sá dúhá, chí ñà nduu cáhá<sup>n</sup> Yá Ndiöxí ndédacàa ñáyiu váha ìní-xi, te ndédacàa ñáyiu úhú ìní-xi —càchí té Páblú xáha<sup>n</sup>-dě.

Te sá dúcá<sup>n</sup> nǐ xáha<sup>n</sup>-dě, te nǐ yúhú té Juéli, te nǐ xáha<sup>n</sup>-dě:

—Vǎ cáhá<sup>n</sup>-gá-ó tnávíi, cuahá<sup>n</sup>, te òré cùyáchí-í, te cana ñaha-í xii-n —càchí-dé xáha<sup>n</sup>-dě.

<sup>26</sup> Te té Juéli nǐ quide-dé cuendá sá cuañaha tǎ Páblú díhú<sup>n</sup> te vǎ ndíhu-gá-dé vecaá nǐ cùu, núú xíá<sup>n</sup>

títní xito ní cana-dé té Páblú vechiù<sup>n</sup> ní ndatnúhu ndíhi tnàha-güedé, dico ñá túú ní chãhu-dé.

<sup>27</sup> Te úú cuía duca<sup>n</sup> nĩ quide-güedé, te dãtnùní ní xínu té Juéli chiù<sup>n</sup>-dé, te ní ngúnutnĩi té Pòrsiú Fèstú. Te òré ní xínu té Juéli chiù<sup>n</sup>-dé, te ní dándõo-dé té Páblú yíhí-ni-dě vecaá. Te duca<sup>n</sup> nĩ quide-dé cuendá ní cuini-dé cudìu-dé núú cuè téé isràél.

## 25

### *Té Páblú càhá<sup>n</sup> ndíhi-dé té Fèstú*

<sup>1</sup> Te ní cuu úní nduu sá nĩ quexìo té Fèstú ñuú Cèsareá ní quehe<sup>n</sup>-dé chiù<sup>n</sup>, te ní quee-dé cuáhá<sup>n</sup>-dé ñuú Jerusàlén.

<sup>2</sup> Te yacá<sup>n</sup> ní naníhí tnáhá-dě ndíhi nchaa dútú cùnù ndíhi nchaa cue téé tàxi tnuní ñáhá xii ñáyiù isràél, te xãha<sup>n</sup>-güedě xii té Fèstú sá ndáa ndècuéchi té Páblú.

<sup>3</sup> Te ní cáhá<sup>n</sup> ndàhú-güedé núú-dě sá téndàha-dé sandàdú-dé quíngueñuhu ñaha-güedě vecaá xii-dé ndéé ñuú Cèsareá te candeca ñaha-güedé quíhí<sup>n</sup>. Te duca<sup>n</sup> nĩ cáhá<sup>n</sup>-güedé, chi ní ndatnúhu-güedé sá cáhni ñaha-güedé xii té Páblú ichi ní cùu.

<sup>4</sup> Te té Fèstú ní xãha<sup>n</sup>-dě:

—Vá cúú quixi-dé ndéé ndíha. Na cùndetu-dé ñuú Cèsareá chi sacú-ni nduu cuyaa-í iha te dãtnùní núhú-í yacá<sup>n</sup>.

<sup>5</sup> Te yachí-gá quíhí<sup>n</sup> ndíhi-í cue téé cùnù-gá, te yacá<sup>n</sup> cuu cáhá<sup>n</sup>-ndó nũ ndáa ndècuéchi-dé àdi cáhá<sup>n</sup> méé-dě nũ ndáa ndècuéchi-dé àdi ñáhá, te cutnùní iní-ndó —càchí-dé xãha<sup>n</sup>-dě.

<sup>6</sup> Te ní xíndecu té Fèstú úná úxí nduu ñuú Jerusàlén, te dãtnùní cuánuhú-dé ñuú Cèsareá. Te nduu tněé cuáhá<sup>n</sup>-dé vechiù<sup>n</sup>, te òré ní quexìo-dé, te ní xãha<sup>n</sup>-dě xii cue sandàdú xínu cuèchi sá quíhí<sup>n</sup>-güedé queñuhu-güedé té Páblú vecaá te candeca ñaha-güedě quíhí<sup>n</sup> vechiù<sup>n</sup>.

<sup>7</sup> Te òré ní quexìo té Páblú vechiù<sup>n</sup>, te sa ndècu cue téé isràél cue téé ní quee ñuú Jerusàlén, te cuánguihu-güedé ndéé dñi té Páblú ní ngúnutnĩi-güedé, te xãha<sup>n</sup>-güedě xii

cue téé cùchiu<sup>n</sup> sá ndècuéchi vñi-dé, dico ñá túú ní cùndee tnúhu-güedé.

<sup>8</sup> Te té Páblú ní xãha<sup>n</sup>-dě xii té Fèstú:

—Ñá túú ndècuéchi-í, ñá túú nã ní quide-í, chi ñá túú tnáhá iní-í cada-í iñ sá càchí lèi sá vã cúú càda-o. Te ni xiti veñúhu càhnu sá ío cùnù ñá túú nã quidè-í, te ni té Cèsár téé yìndaha cuéhé nació<sup>n</sup> ñá túú càhá<sup>n</sup> cuéhé-í cuendá-dé —càchí té Páblú xãha<sup>n</sup>-dě xii-dé.

<sup>9</sup> Te té Fèstú ní cuini-dé cada-dé nàcuáa cudìu-dé núú cuè téé isràél ní cùu, núu xíã<sup>n</sup> ní xãha<sup>n</sup>-dě xii té Páblú:

—¿Cundee iní-n quíhí<sup>n</sup>-n ñuú Jerusàlén-ã<sup>n</sup>? Te yacá<sup>n</sup> cundáa cuèchi sá sàa díquí-n —càchí té Fèstú xãha<sup>n</sup>-dě xii té Páblú.

<sup>10</sup> Te xãha<sup>n</sup> tẽ Páblú:

—Díu-ni iñ vechiù<sup>n</sup> téé cùchiu<sup>n</sup> Cèsár ndècù-í iha, te díu-ni iha cada ndáa-n nũ cuini-n ní cùu. ¿Te ná cuendá candeca ñaha-n quíhí<sup>n</sup> ingá xichi? Yòhó tnáhá-n xini-n sã ñá túú nã quidè-í ñáyiù isràél.

<sup>11</sup> Chi núú dícó yúhú ní quide-í iñ cuèchi càhnu, te ñá túú nã cada-xi cuèi na càhni ñaha-ndo xii-í ní cùu. Te sa ní cutnùní iní-n sã ñá ndáa, chi mee-ni tnũhu ndehnde xicáhá<sup>n</sup>-güedé, te ñá túú nduu yáha-xi duca<sup>n</sup> càda-n cúñaha-n sã quíhí<sup>n</sup>-í ndíhi-güedé ingá xichi. Te xíã<sup>n</sup> cuini-í quíhí<sup>n</sup>-í núú tẽ Cèsár téé yìndaha cuéhé nació<sup>n</sup>, te yacá<sup>n</sup> cáhá<sup>n</sup> méé-dě nũ ndáa ndècuéchi-í —càchí té Páblú xãha<sup>n</sup>-dě xii té Fèstú.

<sup>12</sup> Te ní ndatnúhu té Fèstú ndíhi cue téé chindee tnúhu ñaha xii-dé, te dãtnùní ní xãha<sup>n</sup>-dě xii té Páblú:

—Te sa ní cáhá<sup>n</sup>-n sã quíhí<sup>n</sup>-n quítnahá-n tẽ Cèsár te díu-ni quíhí<sup>n</sup>-n, te quiní-n nãsa cáhá<sup>n</sup> téé-ã<sup>n</sup> yacá<sup>n</sup> —càchí-dé xãha<sup>n</sup>-dě xii té Páblú.

### *Té Páblú càhá<sup>n</sup> ndíhi-dé té Àgripá téé yìndaha nació<sup>n</sup> Isràél*

<sup>13</sup> Te sáta nĩ cuu cuéhé nduu, te ní quee té Àgripá téé yìndaha nació<sup>n</sup> Isràél cuáhá<sup>n</sup>-dé ñuú Cèsareá ndíhi ñadíhí-dé, te ñaha-á<sup>n</sup> nání-á<sup>n</sup> Berènicé te òré ní quexìo-yu, te ní cáhá<sup>n</sup> ndíhi-yu té Fèstú.

14 Te sáta nǐ cuu titní nduu, te ní cáhá<sup>n</sup> té Fèstú cuendá té Páblú ní xíi-dé té Àgripá:

—Ndècu ì<sup>n</sup> té ní dándõo té Juéli vecaá nání-dě Páblú.

15 Te cùtnàhá ní sáhá<sup>n</sup>-í ñúú Jerusàlén ní nanítnàhá-í ndihì cue dútú cùnùu ndihì cue té cùu sacuéhé nùú ñàyiù isràél. Te ní dácáá díquí-güedé té Páblú cuéchi, te ní cachí-güedé sá táúchìu<sup>n</sup>-í cahni ñaha-güedé xii-dé ní cùu.

16 Te ní xáha<sup>n</sup>-í xii-güedé sá vǎ cúu, chi ñá túú dùca<sup>n</sup> quide nchúhú cue tée rómá cùtexínu cada castiú-ndí ñáyiu, chi díhna-gá ndúcú tnùhu-ndí nùú ñáyiu sàá cuéchi díquí-xi cuendá quiní-ndí nùu nása cáhá<sup>n</sup> méè-yu ndihì ñáyiu sàcá<sup>n</sup> cuéchi cuendá-yu, te òré-á<sup>n</sup> cùtnùní iní-ndí nùu ndáá ndècuéchi-yu àdí ñáhá, te duca<sup>n</sup> te nihí-ndí nàcuáa quide ndáá-ndí cuendá-yu, duha ní xáha<sup>n</sup>-í xii-güedé —càchí té Fèstú xáha<sup>n</sup>-dë xii té Àgripá.

17 Te ní xáha<sup>n</sup> tùcu té Fèstú:

—Te sáta nǐ quexìo-güedé ndéé ndíha, te nduu tnéé ní sáhá<sup>n</sup>-ni-ndí vechiù<sup>n</sup>. Te ní xáha<sup>n</sup>-í sá quíngueñuhu-güedé té Páblú candeca ñaha-güedé quixi, te òré ní quexìo-dé,

18 te ní ngüíta-güedé xáha<sup>n</sup>-güedé sá ndècuéchi-dé. Te ní sani iní-í sá ì<sup>n</sup> cuéchi càhnu tee ñaha-güedé dico ñáhá, chi dicó-ni sá ì<sup>n</sup> tnùhu ní cáhá<sup>n</sup>-dé, xiǎ<sup>n</sup> duca<sup>n</sup> nǐ quide-güedé.

19 Te ní tenáa ñáhá-güedé xii-dé, chi càchí-güedé sá ñà túú càhá<sup>n</sup> váha-dé cuendá ndiõxí-güedé. Te tnàhá-ni cuendá ì<sup>n</sup> té nàni Jesús càhá<sup>n</sup>-dé, chi càchí-dé sá nǐ xíhí té-á<sup>n</sup> te ní ndoto-dé càchí-dé xáha<sup>n</sup>-dë xii-güedé, càchí-güedé.

20 Te ñá ní cùtnuní iní-í nása cúñaha-í xii-güedé cuendá téhndé cuéchi-dé. Te xiǎ<sup>n</sup> ní xícá<sup>n</sup> tnùhu-í nùú tǎ Páblú nùu cundee iní-dé quíhí<sup>n</sup>-dë ñúú Jerusàlén, te ndéé ndíácá<sup>n</sup> cada ndáá-ndí cuendá-dé, te nùu ndáá ndècuéchi-dé nàcuáa càhá<sup>n</sup>-güedé àdí ñáhá ní cùu.

21 Te dàtnùní té Páblú ní cachí-dé sá cùndècu tnaa-dé vecaá te dàtnùní

quíhí<sup>n</sup>-dë nùú tǎ Cèsár, te té-á<sup>n</sup> cada ndáá-dé cuendá-dé. Te cuendá sá dúcá<sup>n</sup> nǐ cáhá<sup>n</sup> té Páblú, xiǎ<sup>n</sup> nùu ní xáha<sup>n</sup>-í sá cùndèé ñáhá cuè sandadú xii-dé, nini na còto-í nása cada-í quíhí<sup>n</sup>-dë nùú tǎ Cèsár, duha ní xáha<sup>n</sup>-í xii-güedé —càchí té Fèstú xáha<sup>n</sup>-dë xii té Àgripá.

22 Te té Àgripá ní xáha<sup>n</sup>-dë xii té Fèstú:

—Te tnàhá yúhú ío cudíí iní-í cundedóho-í tnùhu càhá<sup>n</sup>-dé —càchí-dé xáha<sup>n</sup>-dë.

Te ní xáha<sup>n</sup> tǎ Fèstú:

—Tneé cana-í-dé te cundedóho-n nása cáhá<sup>n</sup>-dé —càchí-dé xáha<sup>n</sup>-dë.

23 Te nduu tnéé ní quexìo té Àgripá ndihì ñadihí-dé tá Berènicé vechiù<sup>n</sup>, te ío ní quide càhnu ñaha-güedé xií-yu. Te cuánguihú-yu vechiù<sup>n</sup> ndihì cue tée cùu capitá<sup>n</sup> cùnùu-gá ndihì cue tée cùnùu ñúú Cèsareá. Te té Fèstú ní xáha<sup>n</sup>-dë sá quíngueñuhu-güedé té Páblú vecaá, te òré ní quexìo-dé,

24 te ní xáha<sup>n</sup> tǎ Fèstú xii té Àgripá ndihì nchaa ñáyiu xíndecu-á<sup>n</sup>:

—Chí cùndèhe tée iha chi té-á càchí cue tée isràél sá ndècuéchi-dé, te cùtnàhá ní xíndecu-í ñúú Jerusàlén ní cachí-güedé sá ndáá ndècuéchi-dé, te diu-ni duca<sup>n</sup> càhá<sup>n</sup>-güedé iha. Te nchaa-güedé ní cuáá-güedé te càchí-güedé sá táúchìu<sup>n</sup>-í cahni ñaha-güedé xii-dé ní cùu.

25 Te sáta nǐ ndihì cuendú ní cáhá<sup>n</sup>-güedé, te ní cùtnùní iní-í sá ñà túú nǐ ì<sup>n</sup> cuéchi càhnu nǐ quide-dé, nùu ñá túú ní tàuchiù<sup>n</sup>-í cahni ñaha-güedé xii-dé. Te mee-dë ní cachí-dé sá quíhí<sup>n</sup>-dë nùú tǎ Cèsár tée yíndaha cuéhé nàció<sup>n</sup>, te ní xáha<sup>n</sup>-í sá cúu quíhí<sup>n</sup>-dë.

26 Te ñá túú ní xìní váha-í nása ní quide-dé, nùu xiǎ<sup>n</sup> ñá ní ñhí-í nàcuáa cadúha-í tutú quíhí<sup>n</sup> ndaha té Cèsár, te xiǎ<sup>n</sup> ní cana-í-dé véxi-dé iha cuendá nchaa-ndo càhá<sup>n</sup> ndihì-ndo-dë. Te duca<sup>n</sup> cànuu cadíhna-gá yòhó tǎtá Àgripá cáca<sup>n</sup> tnùhú-n nùú-dë nùu nása cáhá<sup>n</sup>-dé, te òré-á<sup>n</sup> cùtnùní iní-í nása cada-í cadúha-í tutú quíhí<sup>n</sup> ndaha té Cèsár.

27 Chi sàni iní-í sá ñà túú ndùu váha-xi sá quihí<sup>n</sup> ì<sup>n</sup> tée tàú cuéchi te núu vá códó tnùnì núú ì<sup>n</sup> tutú nàcuáa càa cuéchi tàú-dé —càchí té Fèstú xáha<sup>n</sup>-dè xii-güedé.

## 26

### *Te Păblú càhá<sup>n</sup> ndihi-dé té Àgripá*

1 Te dătnùnì ní xáha<sup>n</sup> tē Àgripá tée yìndaha nació<sup>n</sup> Isràél xii té Păblú:

—Te vitna càhá<sup>n</sup>-n nùu nása ní cuu cuendá-n —càchí-dé xáha<sup>n</sup>-dè.

Te té Păblú ní ndacani-dé ndaha-dé sá cùndedóho-güedé, te ní xáha<sup>n</sup>-dè xii té Àgripá tée yìndaha nació<sup>n</sup> Isràél:

2-3 —Tătá Àgripá, ío cùdíí iní-í sá ní naníhí tnáhá-ó vitna, chi yòhó ío váha xìnì-n nchàa nacuáa quide ñáyiú isràél quidé càhnú-yu Yá Ndiöxí, te ío váha xìnì-n nchàa tnúhu xìtnáhá-yu. Te vitna cundee iní-n cùndedóho-n ì<sup>n</sup> úú tnúhu na càhá<sup>n</sup>-í. Na càchí tnúhu-í sá ñă ndáá ní quide-í nchaa sá càhá<sup>n</sup> cue tée isràél.

### *Té Păblú càhá<sup>n</sup>-dé nàcuáa ní quide-dé cùtnáhá vátá túhá-gă-dé ichi Yá Ndiöxí*

4 Te sa nàha nchaa cue tée cùnùu núú ñáyiú isràél nàcuáa ní quide-í ñuú-í ndihi ñuú Jerusàlén cùtnáhá ní cuu landú-í.

5 Te mee-güedě náhá-güedě sá ndéé lìhli-í ní chitnahá-í cue tée cùu fariséú. Te núu cuinì-güedé càhá<sup>n</sup>-güedé sá tēe fariséú cùu-í àdi ñáhá dico nchaa-güedé sa nàha-güedé sá cuè tēe-á<sup>n</sup> ní chitnahá-í. Te cue tēe cùu fariséú-á<sup>n</sup> ío cuinì-güedé cada-güedé nchaa nàcuáa nchìcú<sup>n</sup> nihnu ñáyiú quidé-yu. Te yúhú nchaa sá nchìcú<sup>n</sup> nihnú-yu quidé-yu-á<sup>n</sup> ní quide-í.

6 Te vitna ndècu-í iha, te càhá<sup>n</sup>-n nùu váha-ni quide-í àdi ñáhá, chi cue tēe-á<sup>n</sup> tēe ñàha-güedé cuéchi xii-í cuendá sá sàndáá iní-í sá ndótó nchàa ñáyiú ní xíhí. Te ñu-ni duca<sup>n</sup> ní xáha<sup>n</sup> Yá Ndiöxí xii nchaa ñani tnáhá-ó ní xìndecu ndéé sanaha.

7 Te nchaa ñáyiú-á<sup>n</sup> xìndetú-yu nduu ndòto ñáyiú ní xíhí ní cùu. Te ñu-ni duca<sup>n</sup> ndètu nchaa ñani tnáhá-ó ndècu ñuyíú-a ndéé vitna,

te xíá<sup>n</sup> nùu cuèi nduu cuèi niú càhá<sup>n</sup> ndihi-yu Yá Ndiöxí. Te sá sàndáá iní-í nùu xíá<sup>n</sup> ní càhá<sup>n</sup>-í, te tēe ñàha cue tēe isràél cuéchi xii-í.

8 ¿Te ná cuendá nchòhó cue tēe isràél ñà túú cuinì-ndó quìndáá iní-ndó sá dándòto Yá Ndiöxí nchaa ñáyiú ní xíhí? —càchí té Păblú xáha<sup>n</sup>-dè.

### *Té Păblú caní-dé cuendú sá ní xóo chihi-dé ñáyiú sàndáá iní tnúhu Jèsús vecaá*

9 Te ní xáha<sup>n</sup> tucu té Păblú:

—Ndéé ðavá-á<sup>n</sup> ní quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní càhá<sup>n</sup>-í sá váha-ni ní quide-í sá dúcá<sup>n</sup> ní quide-í.

10 Te ñu-ni duca<sup>n</sup> ní quide-í ñuú Jerusàlén. Te cue dútú cùnùu ní taxi-güedé ì<sup>n</sup> tutú cuendá tni-í ñáyiú ní sàndáá iní tnúhu Jèsús, te vài-yu ní chihi-í vecaá. Te òré ní càhá<sup>n</sup>-güedé sá càhnì-güedé ñáyiú-á<sup>n</sup>, te tnáhá-í ní càhá<sup>n</sup>-í sá cùu càhni ñàha-güedé xii-yu.

11 Te tìtní xito ní sáhá<sup>n</sup>-í nchaa veñúhu ñáyiú isràél, te ní caní-í-yu te ní xáha<sup>n</sup>-í sá dáñá-yu ichi Jèsús. Te cuendá ío ní cudéè<sup>n</sup>-í núú-yu, xíá<sup>n</sup> ní sáhá<sup>n</sup>-í nchaa ñuú xíca ní sànúndúcù-í ðava-gá ñáyiú sàndáá iní tnúhu-gá cuendá dandòho ñàha-güedé xii-yu.

### *Té Păblú càhá<sup>n</sup> tucu-dé nása ní cuu ní tuha-dé ichi Yá Ndiöxí (Hch. 9:1-19; 22:6-16)*

12 Te cuendá xíá<sup>n</sup> ní xica tucu-í cuáhá<sup>n</sup>-í ñuú Dàmascú, néhè-í tutú ní taxi cue dútú cùnùu cuáhá<sup>n</sup>, cuendá sá ndácù-í tni-í nchaa ñáyiú sàndáá iní tnúhu Jèsús ní cùu.

13 Te òré cauxúú nduu ñùhu-í ichi cuáhá<sup>n</sup>-í, te uu<sup>n</sup>ni ní quee ñuhú andiú ní ðáyèhé-xi ndéé núú nútñ-í ndihi cue tēe ndèca tnaha ndihi-í, te níhi-gá ní ðáyèhé-xi ðacúúxí nchìcanchii.

14 Te nchaa-ndí ní nduá-ndí ndéé ñuhu, te ní tecú dóho-í càhá<sup>n</sup> ì<sup>n</sup> sá càhá<sup>n</sup> tnúhu ñáyiú isràél, te càchí-xi: “Yòhó Sàulú, ¿Ná cuendá cùu úhú iní ñáhá-n xii-í dándòho ñàha-n? Te ío dándòho-n mee-n, chi ðàtná cuinì-n quide ndìcutu quide-n chi qui<sup>n</sup>ti-á<sup>n</sup> òré cùxi-güedé-di pùyá te sàha-di patàdá núú-xi, te sá dúcá<sup>n</sup> quide-di te quide úhú-di mee-di. Te duca<sup>n</sup> sàtnáhá-xi



cùu yohó chi ñá túú sàndáá iní ñáhá-n xii-í”, cächí sá ñí cáhá<sup>n</sup>-á<sup>n</sup>.

15 Te ní xáha<sup>n</sup>-í: “¿Ná cúú yohó sá ñí cáhá<sup>n</sup>-ái<sup>n</sup>?”, xǎha<sup>n</sup>-í. Te cächí sá cáhá<sup>n</sup>-á<sup>n</sup>: “Yúhú cúú-í Jèsús Yaá cúú úhú iní-n”, duha ní cachí sá cáhá<sup>n</sup>-á<sup>n</sup>. Te xǎ<sup>n</sup> ní cutnùní iní-í sá Jèsús cáhá<sup>n</sup>.

16 Te ní cachí-gá: “Ndacuíñí-n chi yúhú cáhá<sup>n</sup>-í chi cuíní-í quíhí<sup>n</sup>-n càda-n chiu<sup>n</sup>-í, chi quíhí<sup>n</sup>-n cǎhá<sup>n</sup>-n núú ñáyu nàcuáa ní cuu ní xiní ñáhá-n xii-í vitna, te quixi tucu-í cáhá<sup>n</sup> ndihí ñaha-í xii-n, te cúñaha-n xii-yu nàcuáa cáhá<sup>n</sup>-í.

17 Chi cuíní-í quíhí<sup>n</sup>-n cǎhá<sup>n</sup>-n tnúhu-í núú ñáyu isràél ndihí núú ñáyu ñá túú cùu ñáyu isràél, te coto ñaha-í xii-n cuendá vá cáhí ñáhá-yu xii-n.

18 Te cuíní-í quíhí<sup>n</sup>-n cǎñaha-n xii-yu sá dáñá-yu nchaa ichi cuèhé ichi duha ndécú-yu, te tuhá-yu ichi váha cuendá vá quíndáá iní-yu cadá-yu sá cáhá<sup>n</sup> yucu ñávǎha, te quíndáá iní-yu cadá-yu nchaa nàcuáa cáhá<sup>n</sup> Yǎ Ndiǒxí. Te núu na quíndáá iní-yu tnúhu cáhá<sup>n</sup>-í, te cadá càhnu iní-í nchaa cuéchi-yu, te naníhí tàhú-yu ndihí dava-gá ñáyu sa ní xócuíñí nchaa sá cuèhé sá dúhá ñí xíndecu iní-yu”, duha ní cachí-gá xii-í —cächí té Pǎblú xǎha<sup>n</sup>-dě xii té Àgripá té yíndaha nació<sup>n</sup> Isràél.

*Té Pǎblú quíde-dě nchaa nàcuáa ní xǎha<sup>n</sup> Jèsús cada-dé*

19 Te ní xáha<sup>n</sup> tùcu té Pǎblú xii té Àgripá:

—Ñá túú dàña ndeé-í quíde-í nchaa nàcuáa ní cáhá<sup>n</sup> Jèsús òré ní cáhá<sup>n</sup>-gá andíu.

20 Te díhna-gá ñáyu ñuú Dàmascú ní cáhá<sup>n</sup>-í tnúhu-gá núú-yu, te ní xáha<sup>n</sup>-í xii-yu sá dáñá-yu nchaa sá cuèhé sá dúhá quíde-yu, te cáhá<sup>n</sup> ndihí-yu Yǎ Ndiǒxí, te cadá-yu mee-ni sǎ vǎha cuendá cutnùní iní dava-gá-yu sá ñí dáñá-yu nchaa sá ñá túú vǎha ní xóo cadá-yu. Te duca<sup>n</sup>-ni ñí xáha<sup>n</sup>-í xii ñáyu ñuú Jerusálén ndihí ñáyu ñihí

nació<sup>n</sup> Isràél ndihí nchaa ñáyu ñá túú cùu ñáyu isràél.

21 Te cuendá sá dúcá<sup>n</sup> ñí cáhá<sup>n</sup>-í núu ní tní ñaha cuè té isràél xii-í cútnàhá ní sáhá<sup>n</sup>-í veñúhu càhnu sá ío cùnuu cahni ñaha-güedé ní cùu.

22 Te ñu-ni mee Yǎ Ndiǒxí ní chindee ñaha-gá xii-í núu ndècu-í iha tnáví cáhá<sup>n</sup>-í tnúhu-gá, te mee-ni tnúhu-gá cáhá<sup>n</sup> ndihí-í nchaa-yu, cuèi ñáyu cuica, te cuèi ñáyu ndàhú. Te ndí Moisés ndihí dava-gá cue té ní xóo cáhá<sup>n</sup> tnúhu Yǎ Ndiǒxí ndéé sanaha ñí cáhá<sup>n</sup>-güedé nàcuáa cada-xi vitna, te ñu-ni duca<sup>n</sup> cáhá<sup>n</sup>-í nchaa-ni nduu.

23 Te cue té-á<sup>n</sup> ñí cachí-güedé sá Crístú Yaá tendaha Yǎ Ndiǒxí quixi ñuyíú-a ndoho tnahá-gá, te cuú-gá, te dàtnùní ndoto-gá. Te duca<sup>n</sup> càda-xi nchaa ñáyu ní xihí ndotó-yu núu na sáa nduu chi duca<sup>n</sup> càda-xi ní cachí méé Yǎ Ndiǒxí. Te cuendá sá dúcá<sup>n</sup> ñí ndoto-gá, xǎ<sup>n</sup> cútnùní sá cúú naníhí tàhú ñáyu, cuèi ñáyu isràél, te cuèi ñáyu ñá túú cùu ñáyu isràél. Te dàtná-ni nduu tnúhu ní cáhá<sup>n</sup> cue té ní xóo cáhá<sup>n</sup> tnúhu-gá ndéé sanaha-ǎ<sup>n</sup>, te ñu-ni duca<sup>n</sup> cáhá<sup>n</sup> yúhú tucu —cächí té Pǎblú xǎha<sup>n</sup>-dě.

*Té Pǎblú xǎha<sup>n</sup>-dě xii té Àgripá sá quíndáá iní-dé tnúhu Jèsús*

24 Te sá dúcá<sup>n</sup> ñí cáhá<sup>n</sup> té Pǎblú, te ní cáhá<sup>n</sup> níhi té Fèstú, te xǎha<sup>n</sup>-dě:

—Pǎblú, jíu lùcú cáhá<sup>n</sup>-n! Cuendá ío vǎi ní dácuáhá-n, núu xǎ<sup>n</sup> ndádá lùcú ñáhá-xí xii-n —cachí-dé xǎha<sup>n</sup>-dě.

25 Te ní xáha<sup>n</sup> tǎ Pǎblú:

—Ñáhá, vá dúcá<sup>n</sup> cǎhá<sup>n</sup>-n chi ñá díú sǎ lùcú-í duha cáhá<sup>n</sup>-í, chi tnúhu ndáá cáhá<sup>n</sup>-í.

26 Te té Àgripá-a sa nàha-dé ndihí nchaa ñáyu isràél nàcuáa ní cuu, chi sa ní níhí-dě tnúhu ndihí dava-gá-yu nàcuáa ní cáhá<sup>n</sup>-í, núu xǎ<sup>n</sup> cúyí-í cáhá<sup>n</sup> ndihí-í-dé —cächí-dé xǎha<sup>n</sup>-dě xii té Fèstú.

27 Te ní xáha<sup>n</sup>-dě xii té Àgripá:

—Yúhú sa xiní-í sá sàndáá iní-n tnúhu ní chídó tnùní cue té ní xóo cáhá<sup>n</sup> tnúhu Yǎ Ndiǒxí ndéé sanaha —cächí-dé xǎha<sup>n</sup>-dě.

28 Te ní xáha<sup>n</sup> tǎ Àgripá:

—¿Quède-n cuendá sá ñí ùú tñuhu ní cáhá<sup>n</sup>-n te quindáá iní-í tñuhu Jèsús cáhá<sup>n</sup>-n-ñ<sup>n</sup>? —càchí-dé xáha<sup>n</sup>-dë.

<sup>29</sup> Te ní xáha<sup>n</sup> tucu té Páblú:

—Cuèi vitna te cuèi ndéé cuèé-gá dico cuini-í sá dàcutíí sá quindáá iní-n tñuhu Jèsús. Te ñi-ñi duca<sup>n</sup> xicá<sup>n</sup> táhù-í núú Yá Ndiöxí sá ncháá ñáyi ndècu ndihí-o iha quindáá iní-yu tñuhu-gá dàtná cuini-n ñi quide yúhú, duca<sup>n</sup> càdá-yu. Dìcò-ni sá ñuu vá quihí<sup>n</sup>-ni-yu vecaá dàtná cuini-n ndòho yúhú —càchí-dé xáha<sup>n</sup>-dë xii té Àgripá.

<sup>30</sup> Te sáta dúcá<sup>n</sup> ñi cáhá<sup>n</sup>-dé, te ní ngúnutñi té Àgripá té yíndaha nació<sup>n</sup> Israél, ndihí té Fèstú té cùu gobiernú, ndihí tá Berènicé ndihí dava-gá ñáyi xñucóo yatni.

<sup>31</sup> Te ní tnahá-yu ndèca tnahá-yu cuáhá<sup>n</sup> ñi xio. Te ní xitnahá-yu:

—Té-ñ<sup>n</sup> ñá túú ñá cuéchi ni quède-dé ñuu chihi ñaha-güedé vecaá àdi cahni ñaha-güedé —càchí-yu xitnahá-yu.

<sup>32</sup> Te té Àgripá ní xáha<sup>n</sup>-dë xii té Fèstú:

—Cuéchi mee-dë chi ní cachí-dé sá quitnahá-dé té Cèsár, xiá<sup>n</sup> ñuu ndihu tucu-dé vecaá, te núu ñá túú dùca<sup>n</sup> ni cáhá<sup>n</sup>-dé, te cácu-dé ní cùu —cachí-dé xáha<sup>n</sup>-dë xii té Fèstú.

## 27

### *Té Páblú cuáhá<sup>n</sup>-dé ñuu Ròmá*

<sup>1-2</sup> Te ní ndatnúhu-güedé sá quihí<sup>n</sup> té Páblú ndihí bàrcú nació<sup>n</sup> Itàliá, te tnahá yúhú quihí<sup>n</sup>-í ndihí-dé. Te tnahá ñi té nani Aristarcú cuini-dé quihí<sup>n</sup> ndihí-ndí-dé, te cùu-dé téé ñuu Tesalónica, te ñuu-á<sup>n</sup> yíndèhu-xi distritú Macèdoniá. Te ní sáha cuendá-güedé té Páblú ndihí ñi ùú-gá cue téé xixíhi vecaá ní quehe<sup>n</sup> cuendá ñahá té Jülüú téé cùu capitán, téé yíndaha nchaá sandadú nani Àgustú, te ní quée-ndí nchaá-ndí bàrcú ñuu Adramitiú. Te ní xica bàrcú-á<sup>n</sup> cuáhá<sup>n</sup>-ndí ndihí-xi te cuita yáha-ndí ñi ùú ñuu yíndèhu distritú Àsiá quihí<sup>n</sup>.

<sup>3</sup> Te nduu tñéé ní quexio-ndí ñuu Sidón. Te ío váha ní quide té Jülüú, chi ní dáñá-dë ní quene té Páblú ní sáhá<sup>n</sup>-dé ní cáhá<sup>n</sup> ndihí-dé cue téé ío váha tnahá tñuhu ndihí-dé ñuu cudana cundahú iní ñahá-güedé cuáhá-güedé nchaá sá xini ñuhu-dé.

<sup>4</sup> Te dàtnúni ní ndéé tucu-dé bàrcú cuáhá<sup>n</sup>-ndí. Te ío níhi táchí te ñá ní dàña-xi caca ndáá bàrcú, te ní sáhá<sup>n</sup> bàrcú ndéé yatni yuhu distritú Chìpré, te distritú-á<sup>n</sup> cáá cuádava xití lámár, te xiá<sup>n</sup> ñá túú cuéhé táchí ni yáha-ndí.

<sup>5</sup> Te ta yáha-ndí cuáhá<sup>n</sup>, te ní yáha-ndí ñi xio yuhu distritú Cìliciá ndihí yuhu distritú Pànfiliá, te ní sáa-ndí ndéé ñuu Mírá ñi ñuu yíndèhu distritú Liciá.

<sup>6</sup> Te ní quene téé cùu capitán cuándúcú-dé ingá bàrcú, te ní níhi-dé ñi bàrcú téé ñuu Alejándriá, ñuhú ìchi-xi quihí<sup>n</sup>-xi nació<sup>n</sup> Itàliá. Te ní ndicuaca ñaha-dë xii-ndí cuáhá<sup>n</sup>-ndí ní quée-ndí bàrcú-á<sup>n</sup>, te ní xica-xi cuáhá<sup>n</sup>-xi.

<sup>7</sup> Te ío cuèé cuáhá<sup>n</sup> bàrcú-á<sup>n</sup>, cuéhé nduu ní xúhu<sup>n</sup>-xi ìchi, te yica-ni ñi quexio-ndí yuhu ñuu Nidú, te ñá ní dàña-gá táchí quihí<sup>n</sup> ndáá bàrcú ñuu ní xicó ndúú-xi. Te ní yáha-ndí ñi xio yuhu distritú Crètá núu ñá túú quène vihi táchí, te ñi-ñi cuádava tucu lámár cáá distritú-á<sup>n</sup>. Te ní yáha-ndí yuhu ñuu Salmón, te ñi-ñi Crètá yíndaha-xi ñuu-á<sup>n</sup>.

<sup>8</sup> Te ní yáha-ndí cuáhá<sup>n</sup>-ndí mee-ñá núu ràyá distritú Crètá, te ío ní ndoho-ndí ní sáa-ndí ñi xichi núu nani Puertú Váha, yatni vii-ni-gá ñuu Làseá.

<sup>9</sup> Te ní cuyaa vihi-ndí ìchi, duca<sup>n</sup>-ni cùu-ndí ní tnahá yóó cúú<sup>n</sup> dáu táchí, te ío úhú yáha bàrcú ñuu na quihí<sup>n</sup>-ni-xi.

<sup>10</sup> Te ní xáha<sup>n</sup> té Páblú xii-güedé:

—Nchaá-ndo cùndedóho-ndo tñuhu na cáhá<sup>n</sup>-í-a. Ío úhú núu na càda yica-o quihí<sup>n</sup>-ó ndihí bàrcú chi cuíta càrgá te cuíta bàrcú, te cuu-ni iní-xi tnahá-ni mee-o cùú-ó chi cáhá-ó ñuu na ngàunihnu-o xití ndute —càchí-dé xáha<sup>n</sup>-dë xii-güedé.

11 Te tée cùu capitá<sup>n</sup> ñá ní sàndáá iní-dé tnúhu ní cáhá<sup>n</sup> té Păblú. Dico tnúhu ní cáhá<sup>n</sup> tée dàcaca barcú ndihí xítóhó-xi chí ní sàndáá iní-dé.

12 Te ñá ní tnàhá iní-güedé Puèrtú Váha cuendá sá ní tnahá yóó cúú<sup>n</sup> dăú táchí, te ñá túú dăhu váha táchí xíá<sup>n</sup>, núu vâi-güedé ní cuiní-güedé yáha-güedé quíhí<sup>n</sup>-güedé sáa-güedé ndéé ñúú Fènicé ní cùu. Te yàcá<sup>n</sup> cundecu-güedé yóó cúú<sup>n</sup> dăú táchí cuèi ñá túú cāvâha vîhi, chí nchíi nâcuâa yâha bàrcú, te yàcá<sup>n</sup> quíhu táchí, dico dăhu-gá. Núu xíá<sup>n</sup> ndéé ndíácă<sup>n</sup> nâtácă bàrcú yóó cúú<sup>n</sup> dăú táchí, te diu-ni Crětá yîndâha-xi ñúú-á<sup>n</sup>.

### *Nitùhú làmár cúú<sup>n</sup> dăú táchí*

13 Te duha ní quene nuu luha táchí, xíá<sup>n</sup> ní sani iní-güedé sá ndácú-güedé quíhí<sup>n</sup>-güedé, núu ní natava-güedé caá ndètníi ndéé bàrcú, te ní xica-xi cuáhá<sup>n</sup>-xi ní yáha-ndí yatni vii yuhu dîstrítú Crětá.

14 Te tnaa-ni ní cuu sá ní xica bàrcú, te duha ní cunuu dăú táchí ñ<sup>n</sup> xio yuhu ñúú-á<sup>n</sup>

15 te nchîta ichi cuáhá<sup>n</sup> bàrcú. Te ñá ní ndâcu-gá-xi quíhí<sup>n</sup> ndáá-xi nâcuâa cuáhá<sup>n</sup>-xi ní cùu, núu ní dáñá-ndí cuáhá<sup>n</sup> méé-nă bàrcú.

16 Te ní yáha-ndí ñ<sup>n</sup> ñúú nání Clàudá, te ñúú-á<sup>n</sup> cáá cuădava xítí làmár. Te ñ<sup>n</sup> xio yuhu ñúú núú ñá túú quène vîhi táchí ní yáha-ndí, te bàrcú lîhli sá nchícú<sup>n</sup> sátá bàrcú cáhnú, chí ní ndacu-ndí ní taxúha-ndí xítí bàrcú cáhnú.

17 Te sátá ní ndacu-ndí ní taxúha-ndí bàrcú lîhli, te ní ducunúu-güedé yoho bàrcú cáhnú. Te ío ní yùhú-güedé sá yâha bàrcú ndéé núú ñúhú cŭchí yuhu ñúú Sîrté, núu xíá<sup>n</sup> ní ndihí dóó nchítá dĭquí bàrcú ní nuu nehe-güedé, chí dóó-ă<sup>n</sup> ío níhi chîndaha táchí, núu xíá<sup>n</sup> cuáhá<sup>n</sup> bàrcú ñ<sup>n</sup> xio. Te ní dáñá-güedé ñá túú-gă ní dàcaca-güedé, núu cuáhá<sup>n</sup> méé-nă-xi ta chîndaha táchí cuáhá<sup>n</sup>.

18 Te ío níhi dăú táchí, te ñá ní cuiní tnàhí-xi yáha. Te nduu úú sá dúcá<sup>n</sup> ñá túú-gă ní dàcaca-güedé bàrcú

te ní ngüíta-güedé ní dăngöyo-güedé sá nchídó-xí cuendá cuiní-güedé nduu ñamá-xi.

19 Te nduu úní ní dăngoyo-güedé nchaa ndachîu<sup>n</sup> cânehe chîu<sup>n</sup>-güedé xítí bàrcú.

20 Te cuéhé nduu ñá túú ní xîní-ndí ní chòdíní ní nchîcanchîi, chí ío níhi ní cuu<sup>n</sup> dăú táchí, núu ní cáhá<sup>n</sup>-ndí sá vă căcu-ndí, chí ndihí-ndí cáhá<sup>n</sup> ní cáhá<sup>n</sup>-ndí.

21 Te ní cuu titní nduu ñá túú-gă xéxí-ndí, núu xíá<sup>n</sup> ní ngúnutníi té Păblú núu-güedé, te xâha<sup>n</sup>-dĕ:

—Quindáá iní-ndó tnúhu ní cáhá<sup>n</sup>-í, te cundecu nahi-o Crětá ní cùu. Te núu ní tnîi-ndo tnúhu-í, te vá dăcuíta-o cărgă ndihí dava-gá ndăchîu<sup>n</sup> ní cuu.

22 Te vá yùhú-ndó chí vá cùú ní ñ<sup>n</sup>-ndo dico bàrcú chí cuíta.

23 Te nâha-ndo sá yùhú căhá<sup>n</sup> ndihí-í Yă Ndiôxí te quide-í nâcuâa căhá<sup>n</sup>-gá. Te diu-ni mee-gă ní techîu<sup>n</sup>-gá ñ<sup>n</sup> espíritú xínú cuèchi núú-gă ní quixi,

24 te ní cachí-xi xii-í: “Vă yùhú-n chí vá cùú-n, dico dacuitíi quíhí<sup>n</sup>-n căhá<sup>n</sup> ndihí-n tĕ Cēsár. Te ní ñ<sup>n</sup> tée ndihí-n vă cùú, chí ío cŭdĭí iní ñáhá Yă Ndiôxí xii-n”, duha ní cáhá<sup>n</sup> espíritú xínú cuèchi núú-gă ní cachí tnúhu-xi xii-í.

25 Núu xíá<sup>n</sup> căchí tnúhu-í sá vă yùhú-ndó, chí sa cŭtnuní iní-í sá cádá Yă Ndiôxí nâcuâa ní cáhá<sup>n</sup> espíritú xínú cuèchi núú-gă.

26 Te mee tăchí chîndaha-xi bàrcú daquíhí<sup>n</sup>-xi ndéé yuhu ndute —cachí té Păblú xâha<sup>n</sup>-dĕ xii-güedé.

27 Te sa ní cuu sáhú<sup>n</sup> nduu sáhú<sup>n</sup> niú sá ní ngüíta-xi cùu<sup>n</sup> dăú táchí, te ñá túú-gă dăcaca-güedé bàrcú, chí mee-nă táchí tá chîndaha-xi barcú cuáhá<sup>n</sup> núú ndute làmár Adriá. Te sátá ní cuu dava niú, te ní quide cuendá cue tée dàcaca barcú sá tá cŭyatni-güedé ñuhu yîchí.

28 Te ní chîcuahá-güedé ná daha-gă mĕtrú néhé-xí să cùnú xítí ndute cuendá cutnùní iní-güedé sá tá cŭyatni-xi ndéé yuhu làmár, te nèhe-xi ócó sáhú<sup>n</sup> ñ<sup>n</sup>-ni-gă mĕtrú. Te ní xica tucu bàrcú luha-gă, te dătnùní ní

chicuàhá tucu-güedé, te xía<sup>n</sup> néhé-xí ócó úsá-ni-gá mètrú.

<sup>29</sup> Te ní yùhú-güedé sá candaundeé-xi cava, te ní quehe<sup>n</sup>-güedé cúmí caá náhnú sá nchicú<sup>n</sup> yoho, te ní dáquëe-güedé xití ndute ndàa sáta bàrcú, te dàtnùní ní ngüíñí-xi ñá ní xica-gá-xi, te ní cuiní-güedé sá òré-ni túndaá ní cùu.

<sup>30</sup> Te cue tée dàcaca barcú ní natava-güedé bàrcú lĩhli dándée-güedé núu ndute ni cùu, te ní cachí-güedé sá quihí<sup>n</sup>-güedé ndàa núu bàrcú dàquëe-güedé úú-gá caá cuendá cuita candeé-xi bàrcú cáhnú cuendá sá vǎ cáca-xí. Te cuiní-güedé dandàhú-güedé dava-gá nchúhú cue tée ñùhu ndihí-güedé bàrcú, chi ní ndatnúhu-güedé sá cúnú-güedé ní cùu.

<sup>31</sup> Te té Pǎblú ní xáha<sup>n</sup>-dǎ xii tée cùu capitá<sup>n</sup> ndihí dava-gá sandàdú:

—Te núu na dándóo ñaha cuè tée dàcaca barcú cunu-güedé, te vǎ càcu-o —cachí-dé xǎha<sup>n</sup>-dǎ.

<sup>32</sup> Te sá dúcá<sup>n</sup> ñí xáha<sup>n</sup>-dǎ núu ní sáhá<sup>n</sup> sandàdú ní xehndé-güedé yoho nchicú<sup>n</sup> bàrcú lĩhli dǎngáúnihnu-güedé xití ndute cuáhá<sup>n</sup>-xi.

<sup>33</sup> Te váha váha-ni ta túndaá cuáhá<sup>n</sup>, te ní xáha<sup>n</sup> tǎ Pǎblú:

—Sa ní cuu sáhú<sup>n</sup> nduu ñá túú tnàhí xèxi-ndo sá ndihú iní-ndó.

<sup>34</sup> Te vitna yáchí-ndó, chi caxi-ndo cuendá naníhí ndéé-ndó, te vǎ yùhú-ndó chi ñá túú ñǎ tnahá ni ñ<sup>n</sup>-ndo —cachí-dé xǎha<sup>n</sup>-dǎ xii-güedé.

<sup>35</sup> Te sáta dúcá<sup>n</sup> ñí cáhá<sup>n</sup>-dé, te ní quehe<sup>n</sup>-dé ñ<sup>n</sup> pàá, te ní ndacá<sup>n</sup> táhú-dǎ núu Yǎ Ndiöxí, te núu-güedé nchaa-güedé duca<sup>n</sup> ñí quide-dé, te dàtnùní ní táhú-dǎ luha ní xexi-dé.

<sup>36</sup> Te duca<sup>n</sup> te dàtnùní ní cuyí-güedé ní xexi-güedé nchaa-güedé.

<sup>37</sup> Te úú ciendú únídico sáhú<sup>n</sup> ñ<sup>n</sup>-ndí ñùhú bàrcú núu tnàhá té Pǎblú, te nchaa-ndí ní xexi ndihí-ndí-dé.

<sup>38</sup> Te ní xexi-ndí ní ndahá xití-ndí, Te dàtnùní ní ngüíta-güedé ní tava-güedé nchaa ngohnchi triú ní dǎngoyo-güedé xití ndute cuendá nduu ñamá-gá bàrcú.

### *Ní dáhu bàrcú xití làmár*

<sup>39</sup> Te sáta ñí túndaá, te ñá ní cùtnuní-gá iní-güedé ndéé cúú-xi núu ñí sáá-güedé, te ní xiní-güedé ñ<sup>n</sup> xichi núu ñí xícó ndúú luha yuhu làmár, te vǎi vihi cúhí dándáá-xí yuhu ndute, te xía<sup>n</sup> ñá túú dàcandá víhí táchí ndute. Te ní ndatnúhu-güedé sá ndácú-güedé dacàca-güedé bàrcú quihí<sup>n</sup>-xi ndéé núu ñùhú cùhí.

<sup>40</sup> Te xǎ<sup>n</sup> núu ní sáhá<sup>n</sup>-güedé ní xehndé-güedé nchaa yoho nchicú<sup>n</sup> caá tácàndeé bàrcú ní ndóo xití làmár, te ní nadatáyá-güedé vítú sǎ dácuico-xi barcú, te ní nacata caa-güedé ñ<sup>n</sup> dóo dǎquí bàrcú, te ta chindaha táchí cuáhá<sup>n</sup> yuhu làmár tá cùyatni-xi ñuhu yichí cuáhá<sup>n</sup>.

<sup>41</sup> Te ndècu ñ<sup>n</sup> xichi ní natacá víhí cùhí xití ndute, te xía<sup>n</sup> ñí nguindúxi nihnu bàrcú-güedé, te ní cutí-xi xití cùhí, te ñá ní ñihí-gǎ-güedé nàcuáa cada-güedé nene-xi. Te ío níhí ní dácandá táchí ndute, te ní chúcú ndéé-xi ndàa sáta bàrcú, te ní ndihí ní táhú-xí.

<sup>42</sup> Te cue sandàdú ní xitnáha-güedé sá cáhní-güedé nchaa cue tée ní xihí vecaá cuendá sá vǎ quihí<sup>n</sup>-güedé núu ndute te cunu-güedé.

<sup>43</sup> Te tée cùu capitá<sup>n</sup> ñá ní dàña-dé cahni-güedé cue tée ní xihí vecaá, chi ñá ní cùndee iní-dé cahni-güedé tnàhá té Pǎblú. Te ní xáha<sup>n</sup>-dǎ xii-güedé sá cuè tée xícuu cada quihí<sup>n</sup> núu ndute te na yǎha-güedé ndute quene-güedé yuhu làmár.

<sup>44</sup> Te dava cue tée ñá cúú càda, ní xáha<sup>n</sup>-dǎ nanducu-güedé vítú ñí àdi vítú ñí táhú sǎ ñí xihí bàrcú, te núu xǎ<sup>n</sup> caundodo-güedé yáha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

## 28

### *Té Pǎblú ndécú-dǎ ñuú Mǎltá cáa cuǎdava làmár*

<sup>1</sup> Te sáta ñí cácu-ndí ní nene-ndí ñuhu yichí, te ní níhí-ndí tnúhu nàcuáa

nàni ñuú núú nĩ sáá-ndí, te ñuú-án nání-xí Máltá, te càa-xi cuádava làmár.

<sup>2</sup> Te ío quide víxi<sup>n</sup>-xi cuendá ío cùu<sup>n</sup> dáú. Te ñáyiú ñuú-án nĩ cundàhú iní ñáhã-yu xii-ndí, ní dátñahá-yu ñuhú te ní cana ñahá-yu ní sáhá<sup>n</sup>-ndí ní nacuídí-ndí.

<sup>3</sup> Te té Păblú dátacá-dé nducú, te tñahá-ni ñ<sup>n</sup> cóó dēē<sup>n</sup> nĩ tñi ñi-hnu-dé-di, te òré cuáhá<sup>n</sup> ndaha-dé chucu-dě núú ñuhú, te ní ñani-di cahni, te ní ndee-di xití nducú ní sándúú-di ndaha-dé, te ní xexiha<sup>n</sup>-di xii-dé.

<sup>4</sup> Te nchaa ñáyiú ndèhé-yu sá tácandeé-di ndaha-dé, te ní ngüíta-yu ní xitñahá-yu:

—Váa ndíyi ní sahani téa, te ñá ní xihí-dé làmár, te dacuitíi sã cùú-dé vitna, chí sa ñaha Yá Ndiöxí ná ní quide-dé ñuyíú-a —cächí-yu xitñahá-yu.

<sup>5</sup> Te té Păblú ní quidi-dé ndaha-dé ní ngaunihnu-di núú ñuhú, te ñá túú tñahí ná ní cùu núú nĩ xexi-di.

<sup>6</sup> Te ñáyiú ñuú-án xĩndéhě-yu núu daquihí<sup>n</sup>-xi chúhú<sup>n</sup> àdi nduá-dé cuú-dé. Te naha nĩ xĩndéhé ñahá-yu núu nása cada ñaha-xi xii-dé, te ñá túú tñahí ná ní quide ñaha-xi, te ní xitñahá-yu:

—Váa ndiöxí cúú tēa núu dàcá<sup>n</sup> ñá túú tñahí ná ní quide-xi ndaha-dé núú nĩ xexi cóó —cächí-yu xitñahá-yu.

<sup>7</sup> Te yatni núú dúcá<sup>n</sup> nĩ xexiha<sup>n</sup> cóó-ã<sup>n</sup> cáá ñuhu xitu téa nàni Publiú, te téa-án táxi tñuní-dé ñihí ñuú cáá cuádava xití làmár núú ndécú-ndí nduu-ã<sup>n</sup>. Te ío váha iní-dé chí ní cana ñaha-dé ní sáhá<sup>n</sup>-ndí ní xindecu-ndí úní nduu vehe-dé.

<sup>8</sup> Te tátá tē Pùbliú-án cáá-dě cùhú-dé ñuhú-dě cahni, te tñahá-dé daxi. Te té Păblú ní sáhá<sup>n</sup>-dé núú cáá-dě, te ní cáhá<sup>n</sup> ndihí-dé Yá Ndiöxí, te ní sacá<sup>n</sup> ndodo-dé ndaha-dé díqui tē cùhú-án, te duca<sup>n</sup>-ni nĩ quide-dé, te ní ndúha tē cùhú-án.

<sup>9</sup> Te sátá dúcá<sup>n</sup> nĩ quide té Păblú, te ní quixi nchaa ñáyiú cùhú núú ndécú-ndí, te ní quide tátna ñaha tē Păblú xií-yu te ní ndúha-yu.

<sup>10</sup> Te òré ndécú-ndí xía<sup>n</sup>, te vãi sá nĩ taxi táhú-güedě, te òré ní xica-ndí ní taxi tucu-güedé nchaa sá xíní ñuhu-ndí ichi.

### *Té Păblú ní quexio-dé ñuú Rómá*

<sup>11</sup> Te yacá<sup>n</sup> ní xindecu-ndí úní yóó, te sa ndècu ñ<sup>n</sup> barcú tē ñuú Alejandriá òré ní quexio-ndí, te ní xindecu-xi ñihí yóó cúú<sup>n</sup> dáú táchí. Te núú-xi càndodo sandú sá dánani-güedé Càstór ndihí sándú sá dánani-güedé Pólux, te xití bārcú-án nĩ quēe-ndí cuáhá<sup>n</sup>-ndí.

<sup>12</sup> Te ní quexio-ndí ñuú Siracusá, te yacá<sup>n</sup> ní xindecu-ndí úní nduu.

<sup>13</sup> Te ní xica tucu bārcú cuáhá<sup>n</sup>-xi, te ní quexio-ndí ñuú Règiú. Te nduu tñéé duha ní quene nuu táchí. Te ní xica bārcú cuáhá<sup>n</sup>-xi, te ndéé nduu úú ní quexio-ndí ñuú Pùteolí.

<sup>14</sup> Te yacá<sup>n</sup> ní naníhí tñahá-ndí ndihí ñáyiú sándáá iní tñuhu Jèsús, te ní cachí-yu sá cùndècu-ndí úná nduu, núu xía<sup>n</sup> ní xindecu-ndí úná nduu ndihí-yu. Te ní xica tucu bārcú cuáhá<sup>n</sup>-xi, te ní quexio-ndí ñuú Rómá.

<sup>15</sup> Te ñáyiú rómá ñáyiú sándáá iní tñuhu Jèsús, ní ñihí-yu tñuhu sá cuáhá<sup>n</sup>-ndí, te ní quixí-yu ní quixi tñahá ñáhã-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òré ní xíní té Păblú nchaa ñáyiú véxi tñahá ñahá xii-ndí, te ndee ndèe ní cuu iní-dé, te ní ndacá<sup>n</sup> táhú-dé núú Yá Ndiöxí sá dúcá<sup>n</sup> ní quide-yu.

<sup>16</sup> Te sátá nĩ quexio-ndí ñuú Rómá, te cue tē cùchiu<sup>n</sup> ní xáha<sup>n</sup>-güedě xii té Păblú sá cùndècu ñ<sup>n</sup>-dé, te ní xindeé ñahá cuàa sandadú xii-dé.

### *Té Păblú càhá<sup>n</sup>-dé tñuhu Yá Ndiöxí ñuú Rómá*

<sup>17</sup> Nduu úní sá nĩ quexio té Păblú, te ní cana-dé cue tē cùnuu núú ñáyiú israhél ndécú ñuú Rómá, te ní sáhá<sup>n</sup>-güedé núú ndécú-dě, te ní xáha<sup>n</sup>-dē:

—Nchòhó cue tē israhél, cächí tñuhu-í sá ñà túú ñá ní quide-í ní ñ<sup>n</sup> ñáyiú cùtñahá ní xindecu-í ñuú

Jerusalén. Te ñá túú ní cǎhá<sup>n</sup> cuèhé-í sá quidě-yu nchaa nàcuáa ní xóo cada cue ñaní tñáhá-ó nǐ xindecu ndéé sanaha, te ñá túú ñǎ ní quide-í te ní tñi ñaha-güedě ní sáha cuendá ñáhá-güedě xii-í núú cuè téé rómá, cue téé ndècu yacá<sup>n</sup>.

18 Te cue téé-á<sup>n</sup> nǐ ndúcu tñuhu-güedé nǔu ndáá ndècuéchi-í, te ní cutnùní iní-güedé sá ñǎ túú ñǎ ní quide-í, te xiǎ<sup>n</sup> cuini-güedé queñuhu ñaha-güedě xii-í vecaá ní cùu.

19 Te ñi-ni cue téé israél ñǎ ní dàña-güedé cácu-í, chi cuini-güedé sá cáhni ñaha cue téé rómá, cue téé xindecu yacá<sup>n</sup> xii-í ní cùu, te xiǎ<sup>n</sup> nǔu ní xáha<sup>n</sup>-í sá quixi-í cáhá<sup>n</sup> ndihi-í té Cèsár cuendá iha cada ndáá méé-dě cuendá-í, te vǎ yóo ñ<sup>n</sup> tee-í cuéchi.

20 Núu xiǎ<sup>n</sup> ní cana ñaha-í xii-ndo cuendá cunaha-ndo nàcuáa ní cuu. Te ní xáha<sup>n</sup>-í sá sàndáá iní-í sá ndótó ñǎyiu ní xihí, te ñi-ni duca<sup>n</sup> cǎhá<sup>n</sup> dava-gǎ ñáyiu israél, te sá dúcá<sup>n</sup> nǐ cáhá<sup>n</sup>-í, te ní chihi ñaha-güedě vecaá, te xindeé ñáhá-güedé ndéé vitna — cǎchí té Pǎblú xáha<sup>n</sup>-dě xii-güedé.

21 Te ní xáha<sup>n</sup>-güedě xii-dé:

—Ñá túú tñahí tutú ní tëndaha cue téé distritú Júdeá quixi cuendá-n. Te ní cuè téé israél ñǎ túú ní quixi-güedé cáhá<sup>n</sup> cuèhé-güedé cuendá-n.

22 Te cuini-ndí cundedóho-ndí nása cunduu tñuhu cáhá<sup>n</sup>-n, chi sa ní níhi-ndí tñuhu sá ncháá xichi ío xicáhá<sup>n</sup> cuèhé-yu cuendá nchaa ñáyiu sàndáá iní tñuhu Jèsús — cǎchí-güedé xáha<sup>n</sup>-güedé xii té Pǎblú.

23 Te ní xáha<sup>n</sup>-güedě nduu cùyáchí-güedé te quixi-güedé cundedóho-güedé dava-gǎ cuendú cáhá<sup>n</sup> té Pǎblú. Te ní tñahá nduu nǐ ndatnúhu-güedé quihí<sup>n</sup>-güedé núú quidé vehe-dé, te vǎi-yu ní sáhá<sup>n</sup>-yu ní xindedóho-yu tñuhu ní cáhá<sup>n</sup>-dé, te nchaca nchaa ní cáhá<sup>n</sup> ndihi-dé-yu. Te ní xáha<sup>n</sup>-dě xii-yu sá ndíi Moisés ndihi dava-gǎ cue téé ní xóo cáhá<sup>n</sup> tñuhu Yá Ndiöxí ndéé sanaha nǐ chidó tñuni-güedé núú tutú-güedé sá díu-gǎ tendaha-gǎ Crìstú quixi-gǎ ñuyíu-a. Te ní chidó tñuni-güedé nchaa nàcuáa cada-gǎ, te ñi-ni

nàcuáa cǎhá<sup>n</sup> tutú-güedé cada Crìstú, te duca<sup>n</sup> nǐ quide-gǎ cùtnáhá ní xica cuu-gǎ ñuyíu-a, núu xiǎ<sup>n</sup> ní cutnùní sá díu Jèsús cúu-gǎ Crìstú Yaá ní tendaha Yá Ndiöxí ní quixi ñuyíu-a. Te núu quindáá iní-yu, te ndíhu ndaha ñaha Yá Ndiöxí xii-yu.

24 Te davá-yu ní sàndáá iní-yu tñuhu ní cáhá<sup>n</sup>-dé, te davá-yu ñǎ túú ní sàndáá iní-yu.

25 Te cuendá sá ñǎ ñ<sup>n</sup>-ní tñuhu ní cǎhá<sup>n</sup>-yu, núu xiǎ<sup>n</sup> cuini-yu núhu-yu ní cùu. Te ní xáha<sup>n</sup> té Pǎblú sá cündetu tnaá-yu cáhá<sup>n</sup>-dé ingá tñuhu, te xáha<sup>n</sup>-dě:

—Ní xáha<sup>n</sup> Espiritú Yá Ndiöxí xii ndíi Chàíá nàcuáa cáhá<sup>n</sup> ndíi núú ncháa ñaní tñáhá-ó nǐ xindecu ndéé sanaha. Te ní cáhá<sup>n</sup> Espiritú-gǎ ñ<sup>n</sup> sá ndáá ní xáha<sup>n</sup>-xi xii ndíi, te duha ní xáha<sup>n</sup>-xi:

26 Quihí<sup>n</sup>-n te cùñaha-n xii ñáyiu: Nchòhó mee-ni cundedóho-ndo tñuhu cǎhá<sup>n</sup> Yá Ndiöxí, dico ní vǎ tēcú tñuni-ndó.

Te cada-gǎ titní núú sǎ vǎ yóo tñahí ndàcu cada, dico ní vǎ cùtnùní iní-ndó nàcuáa ndùu sá cádá-gǎ,

27 chi cuendá sá ño sàá iní-ndó, xiǎ<sup>n</sup> duca<sup>n</sup> ñǎ túú sǎha-ndo cuendá nása cuáhá<sup>n</sup> tñuhu cǎhá<sup>n</sup>-gǎ, chi ñǎ cuini-ndó cundedóho-ndo, te ní ñǎ sàndáá iní-ndó.

Te ní ñǎ cuini-ndó dàña-ndo nchaa sá cuèhé sá dúhá quide-ndo cuendá xocani-gǎ nchaa xiǎ<sup>n</sup> iní-ndó, duha cùñaha-n xii-yu.

Cǎchí Espiritú-gǎ xáha<sup>n</sup>-xi xii ndíi.

28 Te na cǎchí tñuhu-í sá quihí<sup>n</sup> cue téé cǎhá<sup>n</sup> tñuhu Yá Ndiöxí cáhá<sup>n</sup>-güedé tñuhu-gǎ núú ñáyiu ñǎ túú cùu ñáyiu israél, chi ñáyiu israél ñǎ túú cuini-yu cundedóho-yu. Dico ñáyiu ñǎ túú cùu ñáyiu israél chi cùdíi iní-yu cundedóho-yu, núu xiǎ<sup>n</sup> naníhi tǎhú-yu — cǎchí té Pǎblú xáha<sup>n</sup>-dě xii-yu.

29 Te sátá nǐ ndihi cuendú ní xáha<sup>n</sup>-dě, te ní ndéé-yu cuánuhú-yu ta ndatnúhu-yu cuáhá<sup>n</sup>.

30 Te úu cuía nǐ xínu ní xindecu té Pǎblú ñ<sup>n</sup> vehe ní cháhu-dé. Te ní xóo cáhá<sup>n</sup> váha-dé ndihi nchaa ñáyiu ní xóo quihí<sup>n</sup> vehe-dé.

<sup>31</sup> Te ní xáha<sup>n</sup>-dě sá ndĩhu ndaha ñàha Yá Ndiõxí xií-yu núu quindáá iní-yu tnúhu-gá, te vá yõo #<sup>n</sup> ni sàdí yuhu-dé. Te mee-ni tnũhu Xítóhó Jesucristú ní cáhá<sup>n</sup>-dé núũ-yu.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ RÒMÁ

*Té Păblú cadúha-dé tutú quíhí<sup>n</sup> ndaha ñáyiú xñdecu ichi Xítóhó Jesucristú ndécú ñúú Ròmá*

<sup>1</sup> Yúhú té Păblú xínú cuèchi-í núú Xítóhó Jesucristú, chi mee Yă Ndiöxí ní cachí-gá sá cùu-í ì<sup>n</sup> tée cáhá<sup>n</sup> tnúhu-gá núú ñáyiú, te tnúhu-gá cùu-xí tnúhu sá cáhá<sup>n</sup> nàcuáa naníhí tǎhú-ó, núú ñuú-gá ní tendaha ñaha-gá xii-í xicá cùu-í cáhá<sup>n</sup>-í tnúhu-gá.

<sup>2</sup> Te ndéé sanaha ñí cachí Yă Ndiöxí sá dàcuítí sáa nduu ngñdecu ndíhí ñáyiú tnúhu-gá. Te duca<sup>n</sup> ñí xáha<sup>n</sup>-gá xii cue tée ní cáhá<sup>n</sup> tnúhu-gá dàvá-á<sup>n</sup> ñí chídó tnùní-güedé núú tütú-gá.

<sup>3</sup> Te tnúhu-gá sá cáhá<sup>n</sup>-í-a cáhá<sup>n</sup>-xi ñuú-ni cuendá Xítóhó Jesucristú Yaá cùu Dêhe-gá. Te Dêhe-gá-á<sup>n</sup> cùu-gá ì<sup>n</sup> ñáyiú, te cùu-gá ñaní tnáhá ndí Dávíí.

<sup>4</sup> Te cùu-gá Yaá ñá túú tnàhí cuéchi-xi. Te ní xíhí-gá te ní ndoto-gá, te xíá<sup>n</sup> cùtnùní iní-ó sá cùu-gá Dêhe Yă Ndiöxí, te ío càhnu cuu-gá.

<sup>5</sup> Te ñuú-ni Xítóhó Jesucristú ní quide-gá ní nduu tǎhú-í núú Yă Ndiöxí sá cáhá<sup>n</sup>-í tnúhu-gá núú cuè ñáyiú ñuyíú-a cuendá quíndáá iní-yu tnúhu-gá te canchicú<sup>n</sup> nihnú-yu cadá-yu nchaa nàcuáa cáhá<sup>n</sup>-xi, te duca<sup>n</sup> ío cuu càhnu-gá.

<sup>6</sup> Te tnáhá nchòhó cùu-ndó ñáyiú sa nchícú<sup>n</sup> nihnu quide-ndo nchaa nacuáa cáhá<sup>n</sup> tnúhu-á<sup>n</sup>, chi ní cachí Yă Ndiöxí sá nchòhó tnáhá tnúhu-ndo ndíhí Xítóhó Jesucristú.

<sup>7</sup> Te nchòhó ñáyiú xñdecu ñuú Ròmá, ñáyiú ío cùu iní ñáhá Yă Ndiöxí, cadúha-í tutú-a daquixi-í ndaha-ndo. Te ñuú-ni nchòhó cùu-ndó cuè ñáyiú ní cachí Yă Ndiöxí cada ndáá cundecu-ndo núu-gá. Te xicá<sup>n</sup> tǎhú-í núú Tǎtá-ó Dütú Ndiöxí ndíhí núú Xítóhó Jesucristú sá ío na chindee chitúu ñaha-gá xii-ndo, te duca<sup>n</sup> ndí

nduú-gá ná càda te ío váha cuu iní-ndó cùndecu-ndo.

*Té Păblú cuíní-dé quíhí<sup>n</sup> ngoto-dé cue ñáyiú xñdecu ichi Xítóhó Jesucristú ndécú ñúú Ròmá*

<sup>8</sup> Te díhna nuu-gá càchí tnúhu-í xii-ndo sá ío ndàcá<sup>n</sup> tǎhú-í núú Yă Ndiöxí cuendá sá ío sàndáá iní-ndó-gá, te nchaa ñáyiú nihí-yu tnúhu sá dúcá<sup>n</sup> quide-ndo. Te Xítóhó Jesucristú dáyǎha-gá nchaa tnúhu cáhá<sup>n</sup>-í núú Yă Ndiöxí.

<sup>9</sup> Te ndí tnáhá òré cáhá<sup>n</sup> ndíhí-í Yă Ndiöxí duca<sup>n</sup>-ni xicá<sup>n</sup> tǎhú-í núu-gá cuendá-ndó, te mee-gá náhá-gá sá cáhá<sup>n</sup> ndáá-í, te ñuú-ni núu-gá xínú cuèchi-í ñí yùhu ñí iní-í, chi cáhá<sup>n</sup>-í nàcuáa ní quide Dêhe-gá Xítóhó Jesucristú cuendá naníhí tǎhú-ó.

<sup>10</sup> Te xicá<sup>n</sup> tǎhú-í núú Yă Ndiöxí sá ñuú mee-gá ná càchí te sáá ì<sup>n</sup> nduu quixi coto ñaha-í xii-ndo.

<sup>11</sup> Chi ío cuíní-í cundecu ndíhí ñaha-í xii-ndo dànehé ñáhà-í ì<sup>n</sup> úú tnúhu nàcuáa ío-gá chindee ñaha Espíritú Yă Ndiöxí xii-ndo, te duca<sup>n</sup> ío-gá cuita nducu ndèe-ndo cada-ndo nchaa nacuáa cuíní-gá.

<sup>12</sup> Te ío chí ná cuǎha tnàha-o tnúhu ndee iní cundecu-o ichi-gá, chi nchòhó ndíhí yúhú ío sàndáá iní-ó-gá.

<sup>13</sup> Te nchòhó ñáyiú ndècu ndíhí-í ichi Xítóhó Jesucristú na càchí tnúhu-í xii-ndo sá dúcá<sup>n</sup>-ní ío sàni iní-í quixi coto ñaha-í xii-ndo. Te cuíní-í sá òré quixi coto ñaha-í xii-ndo, te vá cuíta chiú<sup>n</sup> quixi-í dàtná quidè-í òré sǎngoto-í nchaa ñáyiú dava-gá ñuú ñá túú xíta chiú<sup>n</sup>-í chí ío váha sàhúu<sup>n</sup>-yu tnúhu cáhá<sup>n</sup>-í, dico ñá ndácù-í quixi-í quixi coto ñaha-í xii-ndo.

<sup>14</sup> Te yúhú yídiquí-í cáhá<sup>n</sup>-í tnúhu Xítóhó Jesucristú núú nchaa ñáyiú cáhá<sup>n</sup> tnúhu grìégú, ndíhí núú nchaa ñáyiú cáhá<sup>n</sup> dava-gá núú tnúhu, ndíhí núú nchaa ñáyiú túha, ndíhí núú nchaa ñáyiú ñá túú túha.

<sup>15</sup> Te cuendá sá dúhá yídiquí-í cáhá<sup>n</sup>-í tnúhu-gá, xíá<sup>n</sup> ío cuíní-í danèhé ñáhà-í xii nchaa nchòhó ñáyiú ñuú Ròmá nàcuáa nduu tnúhu sá cáhá<sup>n</sup> nàcuáa naníhí tǎhú-ó.



*Ío cùnuu tnúhu Xítóhó Jesucristú*

16 Te yúhú ñá túú tnàhí cùcaha<sup>n</sup> nùu-í cáhá<sup>n</sup>-í tnúhu Xítóhó Jesucristú, chi cùu-xi tnúhu ío cùnuu, chi Yá Ndióxi ní cachí-gá sá ncháá ñáyiú na quíndáá iní-xi tnúhu-á<sup>n</sup> te naníhí tãhú-yu. Te ní cachí-gá sá ðihnanuu-gã ñáyiú isràél ngúndecu ndihí-yu tnúhu-á<sup>n</sup> te ðàtnùní ngúndecu ndihí ñáyiú ñá túú cùu ñáyiú isràél.

17 Te tnúhu-á<sup>n</sup> dánèhé ñáhá-xí xii-o sá cúdiu-o núú Yã Ndióxi te núu mee-ni sã quíndáá iní-ó-gã ðàtná càhá<sup>n</sup>-xi núú tütú-gá núú càchí-xi: “Nchaa ñáyiú sãndáá iní ñáhá xii Yá Ndióxi cúdiú-yu núú-gã, te ndècu ndihí ñáhá-yu xii-gã”, duha càchí-xi núú tütú-gá.

*Nchaa ñáyiú ndècu ñuyíú ndècuéchi-yu*

18 Te ndéé andiú tëndaha Yá Ndióxi sá ùhú quixi sá cúú-xi ncháa ñáyiú ñá túú quíde ndáá núú-gã, ñáyiú quíde nchaa sá cuèhé sá dúhá. Te cuèndá nchaa sá quíde-yu-á<sup>n</sup> xíã<sup>n</sup> ñá túú cuíni-yu tñí-yu tnúhu ndáá tnúhu Yá Ndióxi cuèndá cuu-xi ñí sá vãha sá cúú-xi-yu.

19 Te cuèi duca<sup>n</sup> quíde-yu dico cùtnuní ndáá iní-yu nàcuáa ndùu sá sání iní Yã Ndióxi ndihí nàcuáa ndùu sá quíde-gã ðàtná cùtnuní iní nchaa dava-gá-yu, chi ðiu-gá dánèhé ñáhá-gã xii-yu.

20 Te ni vã ndácú-ó quíni núú-ó ñãsa càa-gá, te ni vã ndácú-ó quíni-ó ñãsa càa iní-gá, te ni vã ndácú-ó quíni-ó ñãsa quíde-gã táxi tnùnigá nchaa nduu nchaa quíú. Te cuèi duca<sup>n</sup> dico ndéé cùtnàhá ní ngáva ñuyíú ñí ngúíta nchaa ñáyiú tècú tnùnigá vãha-yu nàcuáa ndùu sá sání iní-gá ndihí nàcuáa ndùu sá quíde-gã te duca<sup>n</sup> tècú tnùnigá-yu cuèndá nchaa sá ñí cadúha-gã ndéhè-yu ío ñuyíú-a, núu xíã<sup>n</sup> vã càchí-yu sá ñá túú cuèchi-yu.

21 Te cuèi duca<sup>n</sup> ñí cutnùnigá iní-yu cuèndá Yã Ndióxi dico ñá túú cuíni-yu canehé-yu sá yíñùhu núú-gã nàcuáa tàú-xi cunduu. Te ni ñá túú cuíni-yu ndacá<sup>n</sup> tãhú-yu núú-gã cuèndá nchaa sá vãha quíde ñaha-gã xii-yu, chi

mee-ni ncháa sá ñá túú vèdana nãndíhi ñùhu iní-yu. Te quíde-yu ðàtná quíde ñí ñáyiú ñá túú ndècu ndihí nchaa sá xini tnùnigá-xi. Te uu<sup>n</sup>-gã uu<sup>n</sup>-gã tá quíde-yu cuáhá<sup>n</sup>.

22 Te càchí-yu sá cúú-yu ñáyiú ío vãha sãá sá xini tnùnigá-xi dico ñá ndáá, chi cúú-yu ñáyiú ío ñí ðíqui-xi.

23 Te ñá túú cuíni-yu cáhá<sup>n</sup>-yu sá ío càhnu cuu Yá Ndióxi Yá ndécú ncháa nduu nchaa quíú, chi da nchaa sá ñí cadúha mèe-yu quíde cahnú-yu. Te ní cadúha-yu nchaa sá nãhá ñáyiú ñá túú cùdí ndècu ñuyíú-a. Te ní cadúha-yu sá nãhá quíti ndáva, ndihí sá nãhá quíti sàcuíta ñuhu mee-xi, ndihí sá nãhá nchaa dava-gã quíti, nchaa xíã<sup>n</sup> quíde cahnú-yu.

24 Te xíã<sup>n</sup> núu ní dáñá Yã Ndióxi quíde-yu nchaa sá cuèhé sá dúhá sãni iní-yu. Te xíã<sup>n</sup> ío quíde ndihí tnahá-yu sá cuèhé sá dúhá sàcúú-xi yiqui cuñú-yu.

25 Te duca<sup>n</sup> quíde-yu chi ñá túú sãndáá iní-yu tnúhu ndáá tnúhu Yá Ndióxi. Te mee-ni tnúhu ndehnde sãndáá iní-yu, te nèhé-yu sá yíñùhu núú ðáva sá ñí cadúha-gã ío ñuyíú-a ndihí ðáva sá ndéé andiú te quíde cahnú-yu, te ñá túú càchí-yu sá mée-gã ío càhnu cuu-gã, dico mee-gã xini ñùhu-xi cáhá<sup>n</sup>-yu sá ío càhnu cuu-gã ñí caa ñí quíhí<sup>n</sup>. Te ndáá ndisa sá ío càhnu cuu-gã.

26 Te sá dúcá<sup>n</sup> ñá túú quíde vãha-yu núu xíã<sup>n</sup> ní dáñá-ñã Yã Ndióxi quíde-yu nchaa sá cuèhé sá dúhá sãni iní mée-yu. Te ðáva ñáyiú ðihí càhá<sup>n</sup> ndihí tnahá-yu ndi mèe ðihí-yu te ñá túú quíde-yu nàcuáa ní nduu tãhú-yu cadá-yu.

27 Te ðiu-ni duca<sup>n</sup> xiquide ðáva cue tée chi sãni cuèhé sání ðuha iní-güedé sá cúú-xi yiqui cuñú-güedé ndi mèe tnahã tée-güedé, chi càhá<sup>n</sup> ndihí tnahã ndi mee-güedé te ñá túú quíde-güedé nàcuáa ní nduu tãhú-güedé cada-güedé, te sá dúcá<sup>n</sup> quíde-güedé te ñá túú tnàhí cùu vãha iní-güedé ndécú-güedé, te duca<sup>n</sup> tnàhí tàú-xi ndoho-güedé cundecu-güedé.

28 Te ñá túú tnàhí ñùhu iní-yu Yá Ndiöxí nùu xiã<sup>n</sup> duu<sup>n</sup> duu<sup>n</sup> ní dáñá ñihnu ñaha-gá xií-yu sàni cuehé sání dùha iní-yu, te quidé-yu nchaa sá ñá túú tàú-yu cadá-yu.

29 Te nchaa núú sã cuèhé sá dúhá cùnuu quidé-yu. Te cue téé càhá<sup>n</sup> ndihí-güedé ñáyiú dñí te ñá díú ñàdñí-güedé cúú-yu. Te diu-ni duca<sup>n</sup> xĩquide cue ñáyiú dñí chi càhá<sup>n</sup> ndihí-yu cue téé te ñá díú yĩ-yu cùu-güedé. Te mee-ni sã ñá túú vãha quidé-yu sá cúú-xí tnàha ñáyiú-yu, te xihó-yu cundecu ndihí-yu sá ndécú ndihí dava-gá tnàha ñáyiú-yu, te ío sàni cuehé sání dùha iní-yu sá cúú-xí tnàha ñáyiú-yu, te ío cuédú ín-yu, te sàhni tnahá-yu, te ío plètú-yu, te dandahú tnáhã-yu, te cùu úhú iní-yu cue tnàha ñáyiú-yu, te ío yiti yùhú-yu.

30 Te càhá<sup>n</sup> cuèhé-yu cuendá nchaa dava-gá tnàha ñáyiú-yu, te cùu úhú iní-yu Yá Ndiöxí, te xio xio cuini-yu cunuu tnúhu-yu, te mee-ni sàni iní-yu sá ío vãha cunduú-yu, te ío quide cahnú-yu mée-yu, te ío sàni iní-yu sá cadá úhú-yu tnàha ñáyiú-yu, te ñá túú sàndáá iní-yu ni tãtä-yu ni ñãñã-yu.

31 Te ñá túú tècú tnùní-yu sá vãha, te ñá túú quidé-yu ñ<sup>n</sup> sá càhá<sup>n</sup>-yu, te ñá túú cùu iní-yu ñi ñáyiú cùu ndi meé-yu, te ni dàva-gá tnàha ñáyiú-yu, te ñá túú quide cahnu iní-yu ñ<sup>n</sup> sá cúmãní nùú tnáhã-yu, te ni ñá túú cùndahú iní-yu tnàha ñáyiú-yu.

32 Te Yá Ndiöxí ní cachí-gá sá ncháá ñáyiú duca<sup>n</sup> xĩquide quíhí<sup>n</sup>-yu núú ùhú núú ndàhú. Te xìní-yu sá Yá Ndiöxí daquihí<sup>n</sup> ñáhã-gã xií-yu núú ùhú núú ndàhú sá dúcã<sup>n</sup> quidé-yu, dico uu<sup>n</sup>-gá quidẽ-yu chi vãha-gá cúú iní-yu cue ñáyiú quide datná quidé mée-yu.

## 2

*Yá Ndiöxí cada ndáá-gá cuéchi nchaa ñáyiú ndècu ñuyúú*

1 Te nchòhó ñáyiú càchí sá ío ndècu cuéchi dava-gá ñáyiú tnàhá-ndó ío ndècu cuéchi-ndo cuéi nágá ñáyiú cùu-ndo, chi tnàhá-ndó quide-ni-ndo

nchaa nacuáa quide dava-gá ñáyiú càchí-ndó ndècu cuéchi-xi, te sá dúcã<sup>n</sup> càhá<sup>n</sup>-ndó sã ndécú cuéchi ñáyiú-á<sup>n</sup> te dàcaa-ndo cuéchi díquí-ndó chi tnàhá-ndó quide-ndo datná quidẽ-yu.

2 Te nchoo xìní-ó sã Yá Ndiöxí ío vãha cùnnuní iní-gá nàcuáa cada ndáá-gá cuéchi ñ<sup>n</sup> ñ<sup>n</sup> nchoo ñáyiú ndècu ñuyúú-a, chi daquihí<sup>n</sup>-gá nchaa ñáyiú quide nacuáa ní càhá<sup>n</sup>-í núú ùhú núú ndàhú.

3 Te nchòhó ñáyiú ñ<sup>n</sup>-ni quide ndihí ñáyiú càchí mée-ndó sã ndécú cuéchi-xi dacuítí sã ná chãhu-ndo nùú Yá Ndiöxí sá dúcã<sup>n</sup> quide-ndo.

4 Te ñá túú cùu vãha iní-ndó sã Yá Ndiöxí cùndahú iní ñáhã-gã xii-ndo, te ni ñá túú cùu vãha iní-ndó sã ío cuini-gá cada càhnu iní-gá nchaa sá ñá túú vãha quide-ndo, te ni ñá túú quide cuendá-ndó sã Yá Ndiöxí quidé vãha ñaha-gã xii-ndo cuendá cuini-gá sá nchòhó ndixi túu iní-ndó sã ñá túú quide vãha-ndo ndècu-ndo.

5 Te nchòhó cúú-ndó ñáyiú ío sáá iní-xi, chi ñá túú cuini-ndó ndixi túu iní-ndó sã ñá túú quide vãha-ndo ndècu-ndo, te xiã<sup>n</sup> nùu ío-gá tá cùu vai tnúndòho sá cúú-xí-ndó. Te na sáá nduu tnúhu ndòho tnúhu ndàhú te ío ndoho-ndo, chi Yá Ndiöxí cada ndáá-gá nàcuáa nduu cuéchi-ndo.

6 Te dàvá-á<sup>n</sup> cada ndáá Yá Ndiöxí nchaa nàcuáa nduu nchaa sá ñi quide ñ<sup>n</sup> ñ<sup>n</sup> ñáyiú ndècu ñuyúú-a.

7 Te nchaa ñáyiú nchícú<sup>n</sup> ñihnu-ni quide mee-ni sá vãha, ñáyiú-á<sup>n</sup> nduu táhú-yu cundecú-yu ndihí Yá Ndiöxí ni caa ni quíhí<sup>n</sup>, te duca<sup>n</sup> quide vãha-yu chi cuini-yu sá Yá Ndiöxí cuu vãha iní ñáhã-gã xií-yu, te cuini tucú-yu nduu táhú-yu núú ío vãha cãa ndècu Yá Ndiöxí cundecú-yu ni caa ni quíhí<sup>n</sup>.

8 Te ío cùdée<sup>n</sup>-gã núú nchãa ñáyiú ñùhu iní mee-ni sã cúú-xí mée-xi, te ñá túú sàndáá iní-yu tnúhu ndáá chi mee-ni sã cuèhé sá dúhá quidé-yu.

9 Te nchaa ñáyiú duca<sup>n</sup> xĩquide ío ndíhú iní-yu. Te díhna-gá ñáyiú isràel ngúíta-xi ndohó-yu, te dàtnuní ngúíta-xi ndoho nchaa ñáyiú ñá túú

cùu ñáyiú isràél.

10 Te nchaa ñáyiú ní quide váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ñí quide váha-yu, te ïo váha cuu iní-yu cundecú-yu. Te díhna-gá ñáyiú isràél ñáyiú ní quide váha duca<sup>n</sup> càda ñaha-gá xií-yu, te dàtnùní duca<sup>n</sup> càda ñaha-gá xii ñáyiú ñá túú cùu ñáyiú isràél ñáyiú ní quide váha.

11 Te ñá túú quide cuendá-gá cuèi náí ñáyiú cùú-yu.

12 Te nchaa ñáyiú ndècu ndihí nchaa tnúhu ní chídó tnùní ndí Moisés, Yá Ndiöxí cada ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Te nchaa ñáyiú ñá túú ndècu ndihí tnúhu ní chídó tnùní ndí-á<sup>n</sup>, Yá Ndiöxí vá cáda ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Dico nchaa ñáyiú quide nándi sá cuèhé sá dúhá dàcutíí cuíta nihnú-yu cuèi ndècu ndihí-yu tnúhu ní chídó tnùní ndí Moisés àdi ñá túú ndècu ndihí-yu.

13 Te nchaa ñáyiú dicó-ni sàcúndedóho nchaa tnúhu ní cáhá<sup>n</sup> ndí Moisés te ñá túú tní-yu, ñáyiú-á<sup>n</sup> ñá túú cùdú-yu núú Yá Ndiöxí, dico nchaa ñáyiú tní nchaa tnúhu ní cáhá<sup>n</sup> ndí, ñáyiú-á<sup>n</sup> cachí Yá Ndiöxí sá cúdú-yu núú-gá, chi ñá túú-gá cuéchi-yu ndècu núú-gá.

14 Te nchaa ñáyiú ñá túú ndècu ndihí tnúhu ní chídó tnùní ndí Moisés, te núu quidé-yu nchaa nàcuáa ní cáhá<sup>n</sup> ndí te cùu-xi ñ<sup>n</sup> sá sání tnàhí iní méé-yu cadá-yu, te sá sání iní-yu-á<sup>n</sup> cúú-xi ñ<sup>n</sup> tnúhu váha sá sánú ìchi ñaha xií-yu nàcuáa cada váha-yu cundecú-yu.

15 Te sá dúcá<sup>n</sup> quidé-yu xiá<sup>n</sup> cútnùní sá sání iní-yu dàtná càhá<sup>n</sup> tnúhu ní chídó tnùní ndí Moisés cada ñáyiú isràél, te ïo váha cùtnuní iní-yu nchaa nàcuáa quidé-yu chi ndixi túu iní-yu òré ñá túú quide váha-yu.

16 Te sáá nduu te Yá Ndiöxí cúñaha-gá xii Xítóhó Jesucristú cada ndáá-gá nchaa cuéchi ñáyiú, nchaa sá sání iní méé-yu ndùu yuhu, te cada-gá dàtná càhá<sup>n</sup> tnúhu sá sánú ìchi ñaha xii-o nàcuáa naníhí tãhú-ó, tnúhu sá dánèhé ñáhà-í xii-ndo.

*Cuendá ñáyiú isràél ndihí cuendá nchaa tnúhu ní chídó tnùní ndí Moisés*

17 Te nchòhó ñáyiú isràél nchaa-ndo cùu-ndo ndi mee-í, te cachí-ndó sá nchícú<sup>n</sup> nihnu-ndo quide-ndo nchaa tnúhu ní cáhá<sup>n</sup> ndí Moisés núu xiá<sup>n</sup> ndécú váha-ndo, te cachí-ndó sá ïo càhnu cuu-ndo sá ndécú ndihí-ndo Yá Ndiöxí.

18 Te cùtnuní iní-ndó nchàa nacuáa cuení Yá Ndiöxí cada-ndo, te sá dúcá<sup>n</sup> nchícú<sup>n</sup> nihnu-ndo quide-ndo nacuáa càhá<sup>n</sup> tnúhu-á<sup>n</sup> xiá<sup>n</sup> cútnùní iní-ndó nchàa sá ïo-gá váha xini ñuhu-xi cada-ndo.

19 Te cachí-ndó sá ïo váha xini-ndó cànuichi-ndo nchaa ñáyiú ñá túú cùtnuní iní-xi, te cachí tucu-ndo sá ïo váha xini-ndó nà canu ichi-ndo nchaa ñáyiú ndècu ichi cuehé ichi duha.

20 Te sànu ichi-ndo nchaa ñáyiú ïo ñí dǐquí-xi, ndihí nchaa ñáyiú vitna ta tècú tnùní nchaa sá váha, te duca<sup>n</sup> quide-ndo chi ndècu ndihí-ndo nchaa tnúhu ní chídó tnùní ndí Moisés, te tnúhu-á<sup>n</sup> cúú-xi tnúhu ndáá, chi sànu ichi ñaha-xi xii-ndo nacuáa cada-ndo.

21 Te nchòhó dàcuaha-ndo ñáyiú nàcuáa cadá-yu, te mee-ndo ñá túú dàcuaha-ndo cada-ndo nchaa nacuáa tàú-xi cunduu, te xáha<sup>n</sup>-ndo xií-yu sá vǎ cúú dùhú-yu te mee-ndo dùhu-ndo.

22 Te dàcuaha-ndó-yu sá cuè téé vá cúú càhá<sup>n</sup> ndihí-güedé ñáyiú dǐhí te núu ñá díú ñàdihí-güedé cúú-yu, te duca<sup>n</sup>-ni cuè ñáyiú dǐhí, vá cúú càhá<sup>n</sup> ndihí-yu téé te núu ñá díú yǐ-yu cùu-güedé. Te nchaa sá xáha<sup>n</sup>-ndo vǎ cúú càda ñáyiú te mee-ndo quide-ni-ndo, te xáha<sup>n</sup>-ndo xií-yu sá vǎ cànèhé-yu sá yǐñùhu núu nchàa sá cachí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñùhu.

23 Te cachí-ndó sá ïo cùnuu nchaa tnúhu ní chídó tnùní ndí Moisés, te ñá túú quide-ndo nchaa nacuáa ní cáhá<sup>n</sup> ndí, te sá dúcá<sup>n</sup> quide-ndo-á<sup>n</sup> te dàquee tíhú-ndó Yá Ndiöxí.

24 Te quèè ndáá-xi nàcuáa càhá<sup>n</sup>-xi núu tütú Yá Ndiöxí nàcuáa quide-ndo-á<sup>n</sup> núu cachí-xi sá ncháá

ñáiyu ñá túú cùu ñáiyu isràél càhá<sup>n</sup> cuèhé-yu cuèndá Yă Ndiöxí sá cuèndá-ndó.

<sup>25</sup> Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñi-ndo, te vâha-ni sá dúcá<sup>n</sup> te núu quide-ndo nchaa nacuaá ní cáhá<sup>n</sup> ndii Moisés. Dico núu ñá túú quide-ndo nchaa nacuaá ní cáhá<sup>n</sup> ndii ña, te ñá túú nândihí-xi sá cúú-ndó ñáiyu isràél cuèi ndècu seña ñi-ndo.

<sup>26</sup> Te nchaa ñáiyu ñá túú ndècu ndihí seña ñi-xi, te núu quide-yu nchaa nacuaá ní cáhá<sup>n</sup> ndii Moisés, te cùu-yu dàtná cue ñáiyu ndècu ndihí seña ñi-xi, chi quide-yu nchaa nacuaá ní cáhá<sup>n</sup> ndii.

<sup>27</sup> Te ñáiyu ñá túú ndècu ndihí seña ñi-xi, te núu na càdá-yu nchaa nacuaá ní cáhá<sup>n</sup> ndii Moisés, te ñáiyu-á<sup>n</sup> cachí-yu sá ña túú quide ndáá nchaa nchòhó ñáiyu ndècu ndihí seña ñi-xi, chi ndècu ndihí-ndo nchaa tnúhu ní chidó tnúni ndii te ña túú quide-ndo nacuaá càhá<sup>n</sup> tnúhu-á<sup>n</sup>.

<sup>28</sup> Te nchòhó ñáiyu isràél, ñáiyu nchicú<sup>n</sup> nihnu-ni quide nchaa nacuaá ta quide tnahi-ndo véxi, ñá túú quide-ndo sá cúú-ndó ñáiyu isràél, te mee-ndo ndècu seña ñi-ndo dico ñá túú quide-ndo nacuaá tàú-xi cada nchaa ñáiyu ndècu seña ñi-xi, te mee-ni seña-á<sup>n</sup> sâha-ndo ñi-ndo te ñá túú quide-ndo nacuaá cuini Yă Ndiöxí cada-ndo.

<sup>29</sup> Te nchaa ñáiyu sândáá ndisa iní-xi Yă Ndiöxí, ñáiyu-á<sup>n</sup> cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yă Ndiöxí duca<sup>n</sup> ñi quide-xi, dico ñá díú sá sâha-yu seña ñi-yu dàtná ní cachí ndii Moisés. Te ñáiyu-á<sup>n</sup> cúú vâha iní ñáhá Yă Ndiöxí xií-yu cuèi ñá túú càhá<sup>n</sup> vâha tnàha ñáiyu-yu cuèndá-yu.

### 3

<sup>1</sup> Te sá dúhá càhá<sup>n</sup>-í te ió dava ñáiyu quesàhá-yu sá ñi-ní cùu ñáiyu ñá túú cùu ñáiyu isràél ndihí nchoo ñáiyu isràél, te quesaha tucú-yu sá ñi-ní quide

tucu-xi cuèi na cuâha àdi vá cuâha seña ñi-yu.

<sup>2</sup> Dico yúhú càchí-í sá ncháá ñáiyu isràél ío-gá cúnúu-yu, chi ío titní núú sá vâha ní quide ñaha Yă Ndiöxí xií-yu, chi ní sâñaha-gă tnúhu-gá ndécú ndihí-yu.

<sup>3</sup> Te davá-yu ñá túú cuini-yu cada ndáá-yu, dico ñá díú sá xiá<sup>n</sup> te cùyica iní Yă Ndiöxí ñá túú quide ndáá-gá.

<sup>4</sup> Dico ñáhá chi xini ñuhu-xi sá ncháá ñáiyu cada cuèndá-yu sá Yă Ndiöxí cúú-gă Yaá quide ndáá cuiti, te cuèi ncháá-yu na càchí-yu sá ña túú quide ndáá-gá, dico mee-gă chi quide ndáá-ni-gá. Te núú tütú-gá càhá<sup>n</sup>-xi nacuaá ní xáha<sup>n</sup> ñi<sup>n</sup> tée ní xindecu ndée sanaha xií-gá, te duha ní xáha<sup>n</sup>-dê:

Yòhó Dútú Ndiöxí, cùtnuní iní ñáiyu sá ío ndáá càhá<sup>n</sup>-n,

te cùnuu nahi-ni tnúhu-n cuèi òré càchí ñáiyu sá ña túú càhá<sup>n</sup> ndáá-n.

Duha ní xáha<sup>n</sup> tée ndée sanaha-ă<sup>n</sup> xií-gá càchí-xi núú tütú-gá.

<sup>5</sup> Te cuèndá nchaa sá cuèhé sá dúhá quide ñáiyu, xiá<sup>n</sup> cùtnuní iní-yu sá Yă Ndiöxí cúú-gă Yaá ío vâha quide ndáá, chi mee-gă ñá túú dùca<sup>n</sup> quide-gá. Te cuèi duca<sup>n</sup> dico vá caní iní-yu sá Yă Ndiöxí ñá túú quide ndáá-gá sá dándòho ñaha-gă xií-yu na sàá nduu, te núu duca<sup>n</sup> na caní iní-yu, te sàni iní-yu dàtná sání iní cue ñáiyu ñá túú ndècu ichi-gá.

<sup>6</sup> Te vá dúcá<sup>n</sup> caní iní-yu, chi núu Yă Ndiöxí ñá túú quide ndáá-gá ña, te vá cúú càda ndáá-gá nchaa cuèchi cue ñáiyu ñuyíú-a te núu duca<sup>n</sup>.

<sup>7</sup> Te núu yúhú ná caní iní-í cáhá<sup>n</sup>-í ñi<sup>n</sup> tnúhu ndehnde, te sá tnúhu-á<sup>n</sup> te caní tucu iní-í sá quide càhnu-gá-í tnúhu ndáá tnúhu Yă Ndiöxí, te sá dúcá<sup>n</sup> ná càhá<sup>n</sup>-í te caní tucu iní-í sá vâ cúú càhá<sup>n</sup> Yă Ndiöxí sá ndécú cuèchi-í.

<sup>8</sup> Te núu na caní tucu iní-í sá vâha-gá cada-í nchaa sá cuèhé sá dúhá cuèndá Yă Ndiöxí cada-gá sá vâha, dico ñá ndáá. Te ió ñáiyu càhá<sup>n</sup> cuèhé cuèndá-í te càchí-yu sá díú-ní dùca<sup>n</sup> dacuaha-í ñáiyu dico ñá ndáá sá dúcá<sup>n</sup> dânehé-í-yu, te ñáiyu-á<sup>n</sup>

nacháhu-yu tnúhu càhá<sup>n</sup>-yu, chi duca<sup>n</sup> tàú-xi cunduu.

*Nchaa ñáyiú ñuyíú-a ndècuéchi-yu*

<sup>9</sup> Te vitna càchí dava ñáyiú sá ïo-gá cúnùu nchoo cue ñáyiú isràél dàcúúxí dâva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sá nchaa ñáyiú ndècuéchi-yu cuèi ñáyiú isràél te cuèi ñáyiú ñá túú cùu ñáyiú isràél.

<sup>10</sup> Te núú tùtú Yá Ndiöxí càchí-xi: Vá yõo ñ<sup>n</sup> quide ndáá,

<sup>11</sup> te ni vá yõo ñ<sup>n</sup> tècú tnùní tnúhu váha, te ni vá yõo ñ<sup>n</sup> nànducu nihnu Yá Ndiöxí.

<sup>12</sup> Chi nchaá-yu ñá túú nchícú<sup>n</sup> nihnú-yu ichi váha, te nchaá-yu cùu-yu ñáyiú xíndecu neñúú sá cùu-xí Yá Ndiöxí.

Te ni ñ<sup>n</sup>-yu ñá túú quidé-yu ñ<sup>n</sup> sá váha.

<sup>13</sup> Te cada iní-ndó sá yúhú-yu cùu-xi datná cùu ñ<sup>n</sup> yaú núú yíndüxi ndíyí núú ïo ndehe sàhá<sup>n</sup>,

te duca<sup>n</sup> sãtnahá-xi cùu yuhú-yu, chi ío càhá<sup>n</sup> cuèhé-yu, te mee-ni dàndahú-yu nchaa tnàha ñáyiú-yu.

Te cada iní-ndó sá vènenú cóo yíhí yúhú-yu chi mee-ni càhá<sup>n</sup> úhú-yu cuendá tnàha ñáyiú-yu.

<sup>14</sup> Te ío iní-yu càhá<sup>n</sup> úhú tnáhã-yu.

<sup>15</sup> Te àú<sup>n</sup> nã cuu àú<sup>n</sup> nã xíã<sup>n</sup> xíahni tnàhá-yu.

<sup>16</sup> Te nchaa núú xicá cùu-yu quide úhú iní-yu nchaa tnàha ñáyiú-yu nàcuáa ndíhú iní ñáyiú-á<sup>n</sup>.

<sup>17</sup> Te ñá túú cuení-yu cundecu ndíhí tnàha váha-yu.

<sup>18</sup> Te ñá túú sàni iní-yu canehé-yu sá yíñùhu núú Yá Ndiöxí.

Duha quidé-yu càchí-xi núú tùtú-gá.

<sup>19</sup> Te cùtnùní iní-ó sá nchaa tnúhu ní chídó tnùní ndíi Moisés cùu-xí cuendá nchaa ñáyiú nchícú<sup>n</sup> nihnu nchaa tnúhu-á<sup>n</sup>. Te tnúhu-á<sup>n</sup> cùu-xí cuendá sá vá yõo tnàhí cachí sá ñà túú cuèchi-xi, te duca<sup>n</sup> te nchaandi túhú ñáyiú cutnùní iní-yu sá ná chãhu-yu nchaa sá quidé-yu núú Yá Ndiöxí.

<sup>20</sup> Te duca<sup>n</sup> càda-xi chi ni ñ<sup>n</sup> ñáyiú vá càchí-ó sá vá cùndècu cuéchi-yu núú

Yá Ndiöxí cuendá-ni sá nchícú<sup>n</sup> nihnú-yu nchaa tnúhu sá ní chídó tnùní ndíi Moisés, te tnúhu-á<sup>n</sup> càchí tnúhu-xi cuendá-ni sá cùtnùní iní-ó sá ndécú-ó ichi cuehé ichi duha.

*Te núu na quíndáá iní-ó Xítohó Jesucristú te naníhí tàhú-ó*

<sup>21</sup> Te vitna ní cutnùní iní-ó sá ñà díú sá cadá-ó nchaa nacuáa ní càhá<sup>n</sup> ndíi Moisés cùu-o núú Yá Ndiöxí, chi mee-gá quidé cùu-o núú-gá. Te núú tùtú ndíi Moisés ndíhí núú tùtú cue téé ní xóo càhá<sup>n</sup> tnúhu Yá Ndiöxí ndéé sanaha càhá<sup>n</sup>-xi nàcuáa cada ñaha-gá xii-o vitna.

<sup>22</sup> Te duca<sup>n</sup> cùu-o núú Yá Ndiöxí te núu na quíndáá iní-ó Xítohó Jesucristú. Te ñ<sup>n</sup>-ni duca<sup>n</sup> cùu nchaa ñáyiú ñuyíú te núu na quíndáá iní ñáhã-yu xii-gá, chi ñ<sup>n</sup>-ni cùu-o nchaa-o sá cùu-xí Yá Ndiöxí.

<sup>23</sup> Chi nchaá-yu ndècu cuéchi-yu, chi ñá ñ<sup>n</sup>-yu quidé-yu nàcuáa càhá<sup>n</sup> Yá Ndiöxí sá cùu-yu ñáyiú quide váha.

<sup>24</sup> Dico Yá Ndiöxí ío váha iní-gá chi ní quide ñaha-gã xii-o ñ<sup>n</sup> sá váha, chi dícó-ni duca<sup>n</sup> ní quide-gá nàcuáa vá cùndècu-gá cuéchi-o núú-gã, chi Xítohó Jesucristú ní sati níñí-gã te ní xíhí-gá, te duca<sup>n</sup> ní yáha-gá cuendá sá vá cùndècu-gá cuéchi-o.

<sup>25</sup> Te Yá Ndiöxí ní taxi ndecu-gá Xítohó Jesucristú núú ñáyiú ñuyíú-a, te ní xíhí-gá sá cuendá nchaa yicá cuéchi-yu, te duca<sup>n</sup> ní cuu cuendá sá ncháá ñáyiú na quíndáá iní ñáhã xii-gá te vá náchãhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuèhé sá dúhá ní quide cue ñáyiú ní xíndecu ndéé sanaha. Te xíã<sup>n</sup> ní xíhí Xítohó Jesucristú cuendá cutnùní iní-ó sá Yá Ndiöxí cùu-gã Yaá ío váha quide ndáá cuèi duca<sup>n</sup> ní quide ndee iní-gá nchaa sá ní quide cue ñáyiú-á<sup>n</sup>.

<sup>26</sup> Núu xíã<sup>n</sup> vitna ní cutnùní ndisa iní-ó sá quidé ndáá-gá, te quide-gá sá cuè ñáyiú vá cùndècu-gá cuéchi-yu núú-gã, te núu na quíndáá iní-yu Xítohó Jesucristú.

<sup>27</sup> Te vitna vá càchí-ó sá ïo càhnu cuu-o cuendá sá ñà túú-gã cuéchi-o

ndècu núú Yă Ndiöxí, te duca<sup>n</sup> ñà túú-gă cuéchi-o ndècu núú-gă cuendá sá sàndáá iní-ó Xítóhó Jesucristú, te ñà díú sá cuendá nchaa tnúhu ní cáhá<sup>n</sup> ndíi Moisés.

<sup>28</sup> Te cùtnuní iní-ó sá ndèda-ni càa ñáyiu vá cùndècu-gá cuéchi-yu núú Yă Ndiöxí te núu na quìndáá iní-yu Xítóhó Jesucristú cuéi ní quidé-yu nchaa nàcuáa ní cáhá<sup>n</sup> ndíi Moisés àdi ñà túú ní quidé-yu.

<sup>29</sup> Te cùtnuní iní-ó sá Yă Ndiöxí cúú-gă Ndiöxí nchaandi túhú ñáyiu, te ñà díú mèe-ni Ndiöxí ñáyiu isràél cúú-gă.

<sup>30</sup> Te ñà díú ní cáhá<sup>n</sup> ndíi dídí-gă cúú-gă Ndiöxí, te nchaa ñáyiu sàndáá iní ñáhá xii Xítóhó Jesucristú te vá cùndècu-gá cuéchi-yu núú Yă Ndiöxí cuéi cùú-yu ñáyiu isràél àdi ñà túú cùú-yu.

<sup>31</sup> Te ñà díú sá sàndáá iní-ó Xítóhó Jesucristú te cachí-ó sá ñà túú nàndíi nchaa tnúhu sá sánú ìchi ñaha xii-o nacuáa cada-o, te ñáhá chi sá dúhá sàndáá iní-ó-gă te xiá<sup>n</sup> nchicú<sup>n</sup> ni-hnu-o quide-o nacuáa càhá<sup>n</sup> tnúhu-á<sup>n</sup>.

## 4

### *Cuendá ndíi Àbrahám*

<sup>1</sup> Te vitna na càchí tnúhu-í xii-ndo cuendá ndíi Àbrahám téé ní cuu ñani tnáhá-ó ní xíndecu ndéé sanaha.

<sup>2</sup> Te ndíi-á<sup>n</sup> ñà túú ní xíndecu cuéchi ndíi núú Yă Ndiöxí, dico ñà díú cuendá ñà túú ní xíndecu cuéchi ndíi núú-gă. Chi núu cuendá ñà túú ní quide ndíi duca<sup>n</sup> ñà túú ní xíndecu cuéchi ndíi núú Yă Ndiöxí ñà, te cada càhnu ndíi mee ndíi ni cùu, dico ñà díú núú Yă Ndiöxí cada càhnu ndíi mee ndíi te núu duca<sup>n</sup> ní quide ndíi.

<sup>3</sup> Te chí dándàcu iní nàcuáa càhá<sup>n</sup>-xi núú tütú Yă Ndiöxí núú càchí-xi: “Té Àbrahám ní sàndáá iní-dé Yă Ndiöxí, te xiá<sup>n</sup> ní cachí-gá sá cúú-dé núú-gă”, duha càchí-xi núú tütú-gă.

<sup>4</sup> Te sá cúhú<sup>n</sup> yáhu ñà túú téé quide chiu<sup>n</sup>, te vá càchí-ó sá xiá<sup>n</sup> cúú-xi ñà túú táhú sá cúú-xi-dé chi yáhu tnáhí-dé cúú-xi.

<sup>5</sup> Te vá yóo ñà túú ndàcu cada ñà túú chiu<sup>n</sup> nacuáa cudíu-xi núú Yă Ndiöxí. Te ñà túú ná chiu<sup>n</sup> xini ñuhu-xi cada

ñáyiu te cudíu-yu núú-gă, chi xini ñuhu-ni-xi sá quìndáá-ni iní-yu-gá. Te díu-gá càchí-gá sá ñáyiu ndècu ichi cuhé ichi duha vá cùndècu-gá cuéchi-yu núú-gă, te núu na quìndáá iní ñáhá-yu xii-gă.

<sup>6</sup> Te díu-ni duca<sup>n</sup> ní cáhá<sup>n</sup> ndíi Dàvií, chi ní cachí ndíi sá ñà váha táhú nchaa ñáyiu ní cachí Yă Ndiöxí cudíu núú-gă, dico ñà díú cuendá ñà túú quidé-yu cudíu-yu núú-gă.

<sup>7</sup> Te duha ní cachí ndíi:

Váha táhú nchaa ñáyiu quide cahnu iní Yă Ndiöxí nchaa cuéchi-xi, te ñà túú-gă quidé cuendá-gá nchaa sá cuhé sá dúhá ní quidé-yu.

<sup>8</sup> Váha táhú-yu chi Yă Ndiöxí càchí-gá sá ñà túú-gă cuéchi-yu.

Duha ní cachí ndíi Dàvií.

<sup>9</sup> Te ñà díú mèe-ni ñáyiu ngúndecu seña ñà túú duca<sup>n</sup> váha táhú-yu, chi tnáhá ñáyiu ñà túú ngúndecu seña ñà túú duca<sup>n</sup> váha táhú-yu. Te sa nàha-o sá Yă Ndiöxí ní cachí-gá sá cúú ndíi Àbrahám núú-gă cuendá sá ni sàndáá iní ñáhá ndíi xii-gă.

<sup>10</sup> Te cunaha-ndo sá díhna-gá ní cachí Yă Ndiöxí sá cúú ndíi Àbrahám núú-gă te dàtnuní ngúndecu seña ñà túú ndíi.

<sup>11</sup> Te ní ngúndecu seña ñà túú ndíi cuendá xiá<sup>n</sup> cuu-xi ñà túú seña sá cúú ndíi núú Yă Ndiöxí. Te ndéé cùtnáhá vátá ngúndecu-gá seña ñà túú ndíi, te sa cùú ndíi núú-gă chi ní sàndáá iní ñáhá ndíi xii-gă. Te sá dúcá<sup>n</sup> ñà túú ndècu seña ñà túú ndíi cùtnáhá ní sàndáá iní ndíi Yă Ndiöxí xiá<sup>n</sup> ní cuu ndíi dàtná ñà túú díhí dütú nchaa ñáyiu sàndáá iní ñáhá xii-gă, ñáyiu ñà túú ní ngúndecu seña ñà túú-xi, te cùú-yu núú-gă.

<sup>12</sup> Te ndíi Àbrahám ní cuu tucu ndíi dàtná ñà túú díhí dütú nchaa ñáyiu ní ngúndecu seña ñà túú-xi, dico ñà díú cuendá-ni sá ní ngúndecu seña ñà túú-yu cùu ndíi díhí dütú-yu, chi cuendá sá sàndáá iní-yu Yă Ndiöxí nchicú<sup>n</sup> ni-hnú-yu nàcuáa ní quide ndíi ní sàndáá iní ñáhá ndíi xii-gă ndéé cùtnáhá vátá ngúndecu-gá seña ñà túú ndíi.

*Yá Ndiöxí cada-gá nchaa nàcuáa ní cachí-gá te núu na quíndáa iní-ó-gă*

13 Te Yá Ndiöxí ní xáha<sup>n</sup>-gă xii ndíi Àbrahám sá ndúú tǎhú ndíi cunuu ndíi ñuyíú, ndíhi cue déhe ndíi, ndíhi nchaa dava-gá cue ñaní tnáhá ndíi vitna cacu túu. Te duca<sup>n</sup> ñí xáha<sup>n</sup> Yá Ndiöxí xii ndíi ndíhi cue ñaní tnáhá ndíi, chí ní sándáa iní ñáhá ndíi xii-gá núu xiǎ<sup>n</sup> ní cudíu ndíi núú-gă. Te duca<sup>n</sup> ñí xáha<sup>n</sup>-gă xii ndíi dico ñá díú cuendá sá ñí quide ndíi nàcuáa ní xáha<sup>n</sup> Yá Ndiöxí xii ndíi Moisés cada ñáyíu ndéé cuéé-gá.

14 Te núu mee-ni ñáyíu nchícú<sup>n</sup> ni hnu quide nacuáa ní cáhá<sup>n</sup> ndíi Moisés ní ndúu tǎhú-yu cunúú-yu ñuyíú-a ní cùu ña, te ñá túú xini ñuhu-xi quíndáa iní-ó Yá Ndiöxí, te ñá túú nàndíhi tnúhu ní xáha<sup>n</sup> Yá Ndiöxí xii ndíi Àbrahám ní cùu te núu duca<sup>n</sup>.

15 Te núu ñí ñáyíu ñá túú quide nacuáa càhá<sup>n</sup> tnúhu sá sánú ìchi ñaha xii-o nacuáa cada-o te nacháhu-yu sá dúcá<sup>n</sup> quidé-yu. Te núu ñá túú tnúhu sá sánú ìchi ñaha-xi xii-o nacuáa cada-o ní cùu ña, te ñá túú cuéchi-o ní cùu.

16 Te duca<sup>n</sup> ñí xáha<sup>n</sup> Yá Ndiöxí xii ndíi Àbrahám nàcuáa cada-gá, chí cuendá sá ní sándáa iní ñáhá ndíi xii-gă. Te duca<sup>n</sup> ñí quide-gá chí ío váha iní-gă, dico ñá díú sǎ ñí chiu<sup>n</sup> ní quide ndíi duca<sup>n</sup> ñí xáha<sup>n</sup>-gă. Te sá dúcá<sup>n</sup> ñí cuu te cùu-xi ñí tnúhu ndáa sá cúú-xí nchaa ñaní tnáhá ndíi, ñáyíu sándáa iní ñáhá xii-gă dàtná ní sándáa iní ñáhá mèe ndíi xii-gă, te ñá díú mèe-ni cuendá nchaa ñaní tnáhá ndíi nchícú<sup>n</sup> ni hnu nchaa nàcuáa ní cáhá<sup>n</sup> ndíi Moisés, chí ndíi Àbrahám-á<sup>n</sup> ñí cuu ndíi dàtná ñí díhí dütú cue ñáyíu sándáa iní ñáhá xii Yá Ndiöxí.

17 Te núú tütú Yá Ndiöxí càhá<sup>n</sup>-xi nàcuáa ní xáha<sup>n</sup>-gă xii ndíi, te duha ní xáha<sup>n</sup>-gă: “Yòhó té Àbrahám ní quide ñaha-í xii-n dàtná ñí díhí dütú cue ñáyíu xíndecu ñíhí ñuyíú.” Duha ní xáha<sup>n</sup> Yá Ndiöxí xii ndíi, càchí-xi núú tütú-gă. Te Yá Ndiöxí náhá ndáa-gá sá cádá-xí nàcuáa ní xáha<sup>n</sup>-gă xii ndíi Àbrahám, te ñíu-ni-gá cúú

Yáa ní sándáa iní ndíi, te ñíu-ni-gá dándòto-gá ñáyíu ní xíhí, te ñíu-ni-gá quidé tá ngündecu nchaa sá vǎtá cündècu-gá ñuyíú-a.

18 Te Yá Ndiöxí ní xáha<sup>n</sup>-gă xii ndíi Àbrahám sá ío cuéhé dèhe ndíi coo, te ío ní sándáa iní ndíi nàcuáa ní xáha<sup>n</sup>-gă dico ñá túú ní cùtnuní iní ndíi nása cada-gá, chí ío ní sahnú ndíi. Te cuendá sá dúcá<sup>n</sup> ío ní sándáa iní ndíi tnúhu ní xáha<sup>n</sup>-gă núu xiǎ<sup>n</sup> ní cuu ndíi díhí dütú vǎi ñáyíu xíndecu ñíhí ñuyíú.

19 Te ndíi Àbrahám ñuhu ndíi ñí ciendú cuía cùtnáhá duca<sup>n</sup> ñí xáha<sup>n</sup> Yá Ndiöxí xii ndíi, te ní cùtnuní iní ndíi sá ñá túú tǎhú ndíi sá cóó dèhe ndíi ndíhi ñadíhí ndíi ndíi Sǎrá, chí ndíi ndúú-yu sa ní sahnú vǎhí-yu, te cuéi duca<sup>n</sup> dico ní sándáa-ni iní ndíi nàcuáa ní xáha<sup>n</sup> Yá Ndiöxí.

20 Te ñá túú ní sàni ñí sàni úú iní ndíi nàcuáa ní xáha<sup>n</sup> Yá Ndiöxí cada-gá sá cúú-xí ndíi, chí da uu<sup>n</sup>-gá váha ní sándáa iní ndíi nàcuáa ní xáha<sup>n</sup>-gă, te ní cachí ndíi sá ío càhnú cuu-gă.

21 Te ní cùtnuní ndáa iní ndíi sá Yá Ndiöxí ndácú-gă quidé-gă nchaa sá càhá<sup>n</sup>-gă.

22 Te sá ní sándáa iní ndíi nàcuáa ní cáhá<sup>n</sup> Yá Ndiöxí, núu xiǎ<sup>n</sup> ní cachí-gá sá cúú ndíi ñí tée ñá túú cuéchi-xi núú-gă.

23 Te ní ngódó tnùní núú tütú Yá Ndiöxí cuendá ndíi Àbrahám sá ñí cachí-gá sá ñá túú cuéchi ndíi núú-gă, te ñá díú-ní cuendá méé ndíi ní ngódó tnùní núú tütú-gă.

24 Chí tnáhá cuendá-ó nchaa-o ní ngódó tnùní núú tütú-gă. Te càchí-gá sá ñá túú cuéchi-o núú-gă chí sándáa iní-ó-gă, te ñíu-gá cúú-gă Yáa ní dándótó ñaha xii Xitohó Jesucristú Yáa cúú Xitohó-ó.

25 Te Yá Ndiöxí ní cachí-gá sá díú Xitohó Jesucristú cuú-gá cuendá nacháhu-gá nchaa cuéchi-o. Te ní xíhí-gá te ní ndoto-gá cuendá nchaa-o vǎ cündècu-gá cuéchi-o núú Yá Ndiöxí te núu na quíndáa iní-ó-gă.

## 5

*Ío váha tnáhá ñáyíu càchí Yá Ndiöxí*

*sá ñà túú cuéchi-xi*

<sup>1</sup> Te vitna, ñá túú-gã cuéchi-o ndècu núú Yá Ndiöxí chi sàndáá iní-ó Xítóhó Jesucristú, te ío váha ndècu ndìhi-o Yá Ndiöxí vitna sá cuèndá Xítóhó Jesucristú.

<sup>2</sup> Te cuèndá sá ni sàndáá iní-ó Xítóhó Jesucristú xiã<sup>n</sup> ñá díu-gá ní quide ní ngúndecu váha-o núú Yá Ndiöxí, te duca<sup>n</sup>-ni cùndecu-o, te ío cùdíí iní-ó chi ndècu ndìhi-o tnúhu ndee iní sá sáá nduu ngúndecu-o núú ío váha càa ndecu Yá Ndiöxí.

<sup>3</sup> Te ñá díu-ní sá cuèndá sá ndúú táhú-ó cùndecu-o núú ndécú-gá cùdíí iní-ó, chi cùdíí iní-ó ndòho-o cuèndá-gá, chi cùtnuní iní-ó sá ñuu na ndòho-o cuèndá-gá te cunduu càhnu-gá iní-ó,

<sup>4</sup> te núu cùu-o ñáyiu ta quide cahnu-gá iní-xi te cùtnuní sá cùú-ó ñáyiu quide váha, te núu cùu-o ñáyiu quide váha te uu<sup>n</sup>-gá tá ngúndecu ndìhi-o tnúhu ndee iní cuáhá<sup>n</sup> sá cáda váha ñaha Yá Ndiöxí xii-o.

<sup>5</sup> Te núu duca<sup>n</sup> te vá ñá ndúu ndixi cuéchi iní-ó sá ndécú ndìhi-o tnúhu ndee iní ngúndecu váha-o. Te Espíritú sá ñí taxi Yá Ndiöxí ndécú ndìhi-o xiã<sup>n</sup> quidé-xí cùtnuní iní-ó sá ío cùu iní ñáhá Yá Ndiöxí xii-o.

<sup>6</sup> Te nchoo ñà túú vèdana ná ní ndàcu-o cada-o cuèndá dàcácu ni-hnu-o mèe-o, dico Xítóhó Jesucristú ní xihí-gá cuèndá-ó, ndìhi cuèndá nchaa dava-gá ñáyiu ñá túú tnàhá tnúhu ndìhi Yá Ndiöxí, te ní xihí-gá mei ndúu taú-xi cuú-gá.

<sup>7</sup> Te cudana-ni núu xihí ñá ñáyiu sá cuèndá ñá ñáyiu quide ndáá, te áma xihí tucu ñá-yu sá cuèndá ñáyiu quide váha tnàhá ñáyiu-xi.

<sup>8</sup> Te Yá Ndiöxí ní quide-gá sá nchóo cùtnuní iní-ó sá ío cùu iní ñáhá-gá xii-o, chi cùtnàhá ndécú-ó ìchi cuehé ìchi duha te ní tendaha-gã Xítóhó Jesucristú ní quixi-gá ñuyú-a ní xihí-gá cuèndá-ó.

<sup>9</sup> Te sá cuèndá sá ñí xihí Xítóhó Jesucristú xiã<sup>n</sup> ñá túú-gã cuéchi-o ndècu núú Yá Ndiöxí, te vitna ní cutnùní ndáá iní-ó sá vã dáquihí<sup>n</sup> ñáhá-gã Yá Ndiöxí xii-o núú ùhú núú ndàhú sá

cuèndá Xítóhó Jesucristú.

<sup>10</sup> Te cùtnàhá ñá túú tnàhá tnúhu-o ndìhi Yá Ndiöxí ní cùu ní xihí Xítóhó Jesucristú Yaá cùú Dèhe-gá cuèndá cuu váha iní ñáhá-gã xii-o, te duca<sup>n</sup> te nduu táhú-ó cùndecu-o ndìhi-gá ni caa ni quihí<sup>n</sup> cuèndá sá ñí ndoto Xítóhó Jesucristú.

<sup>11</sup> Te ndètu-o sáá nduu ngúndecu-o ndìhi-gá ni caa ni quihí<sup>n</sup>, te ñá díu-ní xiã<sup>n</sup> quidé-ó chi tnàhá cùdíí iní-ó Yá Ndiöxí, chi Xítóhó Jesucristú ní quide-gá duca<sup>n</sup> cùdíí iní-ó-gã, te díu-ni Xítóhó Jesucristú ní quide-gá ní nucúndecu váha-o ndìhi Yá Ndiöxí.

*Nàcuáa ní quide ndíi Àdán ndìhi nàcuáa ní quide Xítóhó Jesucristú*

<sup>12</sup> Te ndíi Àdán ñá túú ní quide ndáá ndíi núú Yá Ndiöxí ñuu xiã<sup>n</sup> ní ngúndecu nchaa sá cuèhé sá dúhá ñuyú-a, te sá cuèndá nchaa sá cuèhé sá dúhá quide ñáyiu xiã<sup>n</sup> xihí-yu, te ncháa-yu xihí-yu chi ncháa-yu quidé-yu nchaa sá cuèhé sá dúhá.

<sup>13</sup> Te sa quide-gá-yu nchaa sá cuèhé sá dúhá te dàtnùní ní ngúndecu nchaa tnúhu sá ñí chídó tnùní ndíi Moisés nàcuáa ní xáha<sup>n</sup> Yá Ndiöxí cada ñáyiu, te nchoo cùtnuní iní-ó sá ñuu ñá túú tnúhu sá sánú ìchi ñaha xii-o nàcuáa cada-o, te ñá túú cuéchi-o sànuu.

<sup>14</sup> Te ndéé cùtnàhá ní xindecu ndíi Àdán ní quesaha-xi xihí ñáyiu, te duca<sup>n</sup>-ni xihí-yu ndéé ní sáá nduu ñí xindecu ndíi Moisés. Te duca<sup>n</sup> ñí xihí-yu chi ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chi ndíi-án ñá túú ní sàndáá iní ndíi nàcuáa ní xáha<sup>n</sup> Yá Ndiöxí cada ndíi. Te ndíi Àdán ní cuu ndíi ñá tée cùu cahnu ní xindecu ñuyú-a, te sátá dúcá<sup>n</sup> te ní quixi Xítóhó Jesucristú te Yaá-án ño-gá càhnu cuu-gá.

<sup>15</sup> Te sá ñí quide ndíi Àdán te vá càchí-ó sá ñá-ní cùu-xi ndìhi sá ñí cachí Yá Ndiöxí nduu táhú-ó vitna. Te sá ñà túú ní quide ndáá ndíi xiã<sup>n</sup> nchaa ñáyiu xihí-yu, dico Yá Ndiöxí ío váha iní-gá chi ío váha ní quide-gá sá cùú-xí nchaa nchoo ñáyiu ndècu ñuyú-a, chi dicó duca<sup>n</sup> ñí cachí-gá sá



nánihí tànhú-ó, te ì<sup>n</sup>dii-ni téè tnhá-dé ío váha ní quide-dé sá cúú-xí-ó, te téè-án cúú-dé Xítohó Jesucristú.

16 Te sá ní quide ì<sup>n</sup>dii-ni ndíi Àdán ñá túú ì<sup>n</sup>-ni cuu-xi ndíhi sá ní quide Yá Ndióxi sá cúú-xí-ó, chi ndíi-án ñà túú ní quide ndáá ndíi núú-gã. Te sá dúcá<sup>n</sup> ní quide ndíi te xíá<sup>n</sup> ní cuu-xi cuéchi díhna nuu ní quide ndíi, núu xíá<sup>n</sup> ní cachí Yá Ndióxi sá cuè ñáyiu quíhí<sup>n</sup>-yu núú ùhú núú ndáhú nacháhu-yu nchaa sá cuéhé sá dúhá quidé-yu. Dico mee-gã ní quide sá cuè ñáyiu naníhí tànhú-yu dícó-ni duca<sup>n</sup>, te duca<sup>n</sup> te vá cundècu-gá cuéchi-yu núú-gã cuèi ío vài cuéchi-yu.

17 Te sá dúcá<sup>n</sup> ñà túú ní quide ndáá ì<sup>n</sup>dii-ni ndíi Àdán-án núú Yá Ndióxi, xíá<sup>n</sup> ní quide-xi xihí nchaa ñáyiu. Te sá cuendá sá ní quide ì<sup>n</sup>dii-ni Xítohó Jesucristú xíá<sup>n</sup> ío váha ní quide ñaha Yá Ndióxi xii ñáyiu, chi dícó-ni duca<sup>n</sup> ní nduu táhú-yu cùdú-yu núú-gã. Te nchaa ñáyiu duca<sup>n</sup> cùdú-yu núú-gã nduu táhú-yu cunúú-yu ndíhi Xítohó Jesucristú cuendá sá ní quide-gá sá vaha sá cúú-xí-yu.

18 Te sá dúcá<sup>n</sup> ní quide ndíi Àdán ñá túú ní quide ndíi nàcuáa ní xáha<sup>n</sup> Yá Ndióxi xii ndíi ì<sup>n</sup> xito, núu xíá<sup>n</sup> ní cachí-gá sá ncháá ñáyiu tàú-yu nacháhu-yu nchaa cuéchi-yu, dico Xítohó Jesucristú ní quide-gá ì<sup>n</sup> sá vaha cuendá nchaa ñáyiu vá cundècu-gá cuéchi-yu núú Yá Ndióxi te núu na quíndáá iní ñáhã-yu xii-gã, te duca<sup>n</sup> te cundecú-yu ndíhi-gá ni caa ni quíhí<sup>n</sup>.

19 Te sá ñà túú ní sàndáá iní ì<sup>n</sup>dii-ni ndíi Àdán nàcuáa ní xáha<sup>n</sup> Yá Ndióxi xii ndíi, xíá<sup>n</sup> ní nguínchicú<sup>n</sup> nihnu nchaa ñáyiu quidé-yu nchaa sá cuéhé sá dúhá. Te duca<sup>n</sup> ì<sup>n</sup>dii-ni Xítohó Jesucristú ní quide-gá nàcuáa ní xáha<sup>n</sup> Yá Ndióxi cuendá sá Yá Ndióxi cachí-gá sá cúdú-yu núú-gã.

20 Te Yá Ndióxi ní xáha<sup>n</sup>-gã xii ndíi Moisés nàcuáa cada ñáyiu, te sá cuendá tnhú-án uu<sup>n</sup>-gá ní nguíta nchaa ñáyiu quidé-yu nchaa sá cuéhé

sá dúhá, te Yá Ndióxi uu<sup>n</sup>-gá cundàhú iní ñáhã-gã xii-yu tucu.

21 Te sá cuendá nchaa cuéchi ñáyiu xíá<sup>n</sup> xihí-yu, dico Yá Ndióxi ío váha iní-gá chi dñu-gá ní cachí-gá sá ncháá ñáyiu na tnhá tnhúhu ndíhi ñaha xii-gá cudú-yu núú-gã, te cundecú-yu ndíhi-gá ni caa ni quíhí<sup>n</sup>, te duca<sup>n</sup> chi Xítohó Jesucristú ní quide-gá sá vaha sá cúú-xí-yu.

## 6

*Ñáyiu ñá túú-gã ndécú ichi cuehé ichi duha ndécú-yu cuendá Xítohó Jesucristú*

1 Te sá dúcá<sup>n</sup> quide Yá Ndióxi, te vá cání iní-ó cànchicú<sup>n</sup> nihnu-ni-o ichi cuehé ichi duha, chi ñá díú sã cànchicú<sup>n</sup> nihnu-o ichi-án te ngóo càni iní-ó sã ío-gá cundàhú iní ñáhã-gã xii-o.

2 Te vá cúú cànchicú<sup>n</sup> nihnu-o ichi cuehé ichi duha, chi nchoo cùu-o datná cue ñáyiu sa ní xihí, núu xíá<sup>n</sup> vá cúú-gã canchicú<sup>n</sup> nihnu-o ichi-án.

3 Te sa nàha-o sá cuendá sá ní sandute-o quèe-xi sá tnhá tnhúhu-o ndíhi Xítohó Jesucristú. Te sá ní sandute-o quèe tucu-xi sá cúú-ó datná ñáyiu ní xihí ndíhi-gá.

4 Te ñá díú-ní sã ní xihí-ó ndíhi-gá chi quèe tucu-xi sá ní nguíndúxi-o ndíhi-gá te ní ndoto-o datná ní ndoto mee-gã ní dándótó ñaha Dútú Ndióxi Yaá ío càhnu cuu, te duca<sup>n</sup> ní cuu cuendá sá vã cundècu-gá-ó datná ní xíndecu-o.

5 Te núu ì<sup>n</sup>-ni cùu-o ndíhi Xítohó Jesucristú cuendá sá cúú-ó datná ñáyiu ní xihí ndíhi-gá, te ndáá sá cúú-ó datná ñáyiu ní ndoto ní nguíndecu váha datná ní ndoto mee-gã ní nucúndecu váha-gá.

6 Te nchoo nàha-o sá cúú-ó ñáyiu ío ndècu cuéchi-xi ni cùu, dico sátá ní cuu-o datná ñáyiu ní xihí datná ní xihí Xítohó Jesucristú núú cùrúxi, te ndéé dàvá-án ní dáñá-ó nchaa ichi cuehé ichi duha ndècu-o ni cuu, te ñá túú-gã cúnúu sá cuéhé sá dúhá iní-ó.

7 Chi nchaa ñáyiu ní xihí ñá túú-gã ndécú-yu ichi cuehé ichi duha.

<sup>8</sup> Te núu cùu-o datná ñáyiú ní xíhí dātá ní xíhí Xítóhó Jesucristú ñá, te cùtnuní ndáá iní-ó sà cùndècu-o ndìhi-gá ni caa ni quíhí<sup>n</sup>.

<sup>9</sup> Te sa nàha-o sá Xítóhó Jesucristú ní xíhí-gá te ní ndoto-gá te vá ñá ndùu ñá quíú-gã te cuú-gá, chi ñá túú nãgá sá cáda cùú-gá.

<sup>10</sup> Te Xítóhó Jesucristú ní xíhí-gá ñá xito-ni sá cuendá nchaa cuéchi nchoo ñáyiú ñuyúú, te vá ñá ndùu-gá cuú-gá, te ndècu-ni-gá sá cúú-xí Yá Ndiöxí.

<sup>11</sup> Núu xíá<sup>n</sup> nchòhó cada iní-ndó sã dātá sá ní xíhí-ndó vã cùndècu-gã-ndó sá cúú-xí ichi cuehé ichi duha, chi ndècu-ná-ndó sá cúú-xí Yá Ndiöxí, chi ní tnahá tnúhu-ndo ndìhi Xítóhó Jesucristú Yá cúú Xítóhó-ó.

<sup>12</sup> Te núu xíá<sup>n</sup> vá dáñá-gã-ndó cùnùu ni ñá sá cuèhé sá dúhá iní-ndó cuendá sá vã cáda-gã-ndó ni ñá sá cuèhé sá dúhá sàni iní-ndó.

<sup>13</sup> Te vá dáñá-ndó tàxi tnuní ñáhá ni ñá sá cuèhé sá dúhá-ã<sup>n</sup> xii-ndo cuendá sá vã cáda-gã-ndó, te chí dáñá ná tàxi tnuní ñáhá Yá Ndiöxí xii-ndo, te chí dáñá ná chindee ñaha-gá cada-ndo mèe-ni sá vãha, te duca<sup>n</sup> te cada iní-ndó sã cúú-ndó dātá ñáyiú ní xíhí te ní ndoto ndècu.

<sup>14</sup> Te duca<sup>n</sup> càda-ndo chi vá ndácú-gã ni ñá sá cuèhé sá dúhá tàxi tnuní ñáhá-xí xii-ndo, chi Yá Ndiöxí cùndàhú iní ñáhá-gã chindèe ñaha-gá xii-ndo. Te duca<sup>n</sup> chi ñá túú-gã cùnùu nchaa tnúhu sá ní chídó tnùní ndíi Moisés cada ñáyiú.

### *Ñáyiú nchìcú<sup>n</sup> nihnu sá vãha*

<sup>15</sup> Te ñá díú sã cùndàhú iní ñáhá Yá Ndiöxí xii-o chindee ñaha-gá ndìhi sá ñá túú-gã cùnùu nchaa tnúhu ní chídó tnùní ndíi Moisés, te cachí-ó sã cúú-ni cùndècu-o ichi cuehé ichi duha.

<sup>16</sup> Te nchoo xini-ó sã núu na cuãha-o tnúhu cunu cuechi-o núú ñá ñáyiú cuíni cunu cuechi-o núú-xi, te cùu-ná-ó ñáyiú xinu cuechi núú-yu te quide-o nchaa chiu<sup>n</sup> tahu-yu. Te duca<sup>n</sup> sãtnahá-xi cùu nchaa ñáyiú quide nchaa sá cuèhé sá dúhá chi tàxi tnuní ñáhá-nã-xi xii-yu, te diu nchaa xíá<sup>n</sup> dácuita nihnu ñaha-xi xii-yu, te diu-ni duca<sup>n</sup> sãtnahá-xi cùu nchaa

ñáyiú sàndáá iní ñáhá xii Yá Ndiöxí chi tàxi tnuní ñáhá-gã xii-yu, te quide-yu nchaa sá vãha nãcuáa cuíni mèe-gã cáda-yu.

<sup>17</sup> Te nchòhó duca<sup>n</sup> ní xóo cada-ndo nchaa sá cuèhé sá dúhá ní cùu, dico tàxahu xii Yá Ndiöxí chi vitna ni yuhu ni iní-ndó quide-ndo nchaa nacuáa càhá<sup>n</sup> tnúhu-gá sá ní ngúndecu ndìhi-ndo.

<sup>18</sup> Te vitna ñá túú-gã táxi tnùní ñáhá ni ñá sá cuèhé sá dúhá xii-ndo, te quide-ná-ndó nchaa sá vãha tàchiu<sup>n</sup> Yá Ndiöxí cada-ndo.

<sup>19</sup> Te duha càhá<sup>n</sup>-í cuendá cue ñáyiú xinu cuechi cuendá sá nchòhó tecú tnùní-ndó nacuáa ndùu tnúhu càhá<sup>n</sup>-í. Te nchòhó ní dáñá-ndó ní tàxi tnùní ñáhá nchaa sá cuèhé sá dúhá xii-ndo, te ñá túú ní quide-ndo nacuáa ní càhá<sup>n</sup> Yá Ndiöxí cada-ndo chi da vñhi-gá ní quide-ndo, te diu-ni duca<sup>n</sup> chí dáñá ná tàxi tnuní ñáhá Yá Ndiöxí xii-ndo vitna cuendá cada-ndo mèe-ni sá vãha nacuáa cuíni mèe-gã cada-ndo, te duca<sup>n</sup> te cuu-ndo ñáyiú quide ndáá cundecu núú-gã.

<sup>20</sup> Te nchoo cùtnahá ní xóo cada-ndo nchaa sá cuèhé sá dúhá ñá túú ní xóo cada-ndo ni ñá sá vãha cuíni Yá Ndiöxí cada-ndo.

<sup>21</sup> Te dícó sácá<sup>n</sup>núú sãñaha nchaa sá cuèhé sá dúhá-ã<sup>n</sup> te núu na càda-o, te ni ñá sá vãha vá ñhí-ó te núu na càda-o nchaa xíá<sup>n</sup>, te diu nchaa xíá<sup>n</sup> dácuita nihnu ñaha-xi xii-o.

<sup>22</sup> Te vitna ñá túú-gã cúú-ó ñáyiú ndècu ichi cuehé ichi duha, chi cùu-ná-ó ñáyiú quide nchaa nacuáa càhá<sup>n</sup> Yá Ndiöxí. Te sá dúhá quide-o cuu ndisa-xi ñá sá vãha sá cúú-xí-ó, te cùu-o ñáyiú quide ndáá ndécú-ó núú-gã vitna, te sáá nduu cùndècu-o ndìhi-gá ni caa ni quíhí<sup>n</sup>.

<sup>23</sup> Te nchaa sá cuèhé sá dúhá dícó dácuita nihnu ñaha-xi xii-o, dico Yá Ndiöxí ní quide-gá sá dícó-ni duca<sup>n</sup> ndùu táhú-ó cùndècu-o ndìhi-gá ni caa ni quíhí<sup>n</sup>, chi ní tnahá tnúhu-o ndìhi Xítóhó Jesucristú Yá cúú Xítóhó-ó.

## 7

### *Cuendá ñáyiú tnãndaha*

1 Te nchaa nchòhó ñáiyu ndècu ndìhi-í ichi Xítohó Jesucrìstú sa nàha-ndo nacuáa càhá<sup>n</sup> tnúhu sá dánèhé ñáhá xii-o nacuáa cada-o cùndecu-o, chi tnúhu-á<sup>n</sup> càhá<sup>n</sup>-xi dóho nchaa ñáiyu xíndecu vívú ñuyú-a.

2 Te nchaa ñáiyu òhí sa ndècu yíi-xi, te òhu tnúhu-á<sup>n</sup> dánèhé ñáhá-xi xii-yu sá vǎ dáñá-yu yíi-yu, dico núu na cùu yíi-yu te ñá túú-gǎ ná càhá<sup>n</sup> tnúhu-á<sup>n</sup> cuèndá-yu.

3 Dico núu vátá cùu-gǎ yíi-yu te ñá túú ndùu váha-xi naquehé<sup>n</sup>-yu ingá téé, dico núu na cùu yíi-yu te quendóo mée-yu, te ñá túú ñǎgá càhá<sup>n</sup> tnúhu sá dánèhé ñáhá xii-yu nàcuáa cada-yu te duca<sup>n</sup> te cuu naquehé<sup>n</sup>-yu ingá téé, te ñá túú cùu-xi ì<sup>n</sup> cuèchi.

4 Te nchòhó cue ñáiyu ndècu ndìhi-í ichi Xítohó Jesucrìstú cùu-ndó dàtná ñáiyu ní xíhí dàtná ní xíhí-gǎ. Te xíá<sup>n</sup> ñá túú-gǎ táxi tnùnì ñáhá nchàa tnúhu ní chídó tnùnì ndíi Moisés xii-ndo. Te duca<sup>n</sup> ñí cuu cuèndá nchòhó ngúndecu-ndo ndìhi Xítohó Jesucrìstú Yáá ní xíhí ní cùu te ní ndoto-gǎ. Te duca<sup>n</sup> ñí cuu cuèndá nchaa nchoo ñáiyu ndècu ichi-gǎ cada-o nchàa nacuáa càhá<sup>n</sup> Yǎ Ndiòxí.

5 Te nchoo ñí xíndecu-o ìchi cuehé ichi duha, te tnúhu sá sánú ìchi ñaha xii-o nacuáa cada-o cùndecu-o cachí-xi sá ñá túú-gǎ vǎha cùndecu-o ìchi-á<sup>n</sup>, te nchoo dà uu<sup>n</sup>-gǎ ní quide-o nchàa sá cuèhé sá dúhá sá dúcá<sup>n</sup> càhá<sup>n</sup> tnúhu-á<sup>n</sup>, te sá dúcá<sup>n</sup> ñí quide-o te ta xíta nihnu-o cuáhá<sup>n</sup> ní cùu.

6 Te vitna cada iní-ó sǎ cùu-ó dàtná ñáiyu ní xíhí sá cùu-xi tnúhu sá dánèhé ñáhá xii-o nacuáa cada-o cùndecu-o, chi ñá túú-gǎ cùnùu-xi, te vitna mee-ñǎ Espíritú Yǎ Ndiòxí chíndèe ñaha-xi xii-o xinu cuechi-o núu-gǎ, te ñá díú cuèndá nchaa tnúhu sá ñí ngúndéé ndéé díhna cada ñáiyu xínu cuechi-o núu-gǎ vitna.

#### *Nchaa sá cuèhé sá dúhá ñùhu iní-í*

7 Te cuèi duha càhá<sup>n</sup>-í dico vǎ cùu tnàhí càhá<sup>n</sup>-ó sǎ tnúhu sá sánú ìchi ñaha xii-o nacuáa cada-o cùndecu-o ñá díú tnúhu váha cùu-xi. Te yúhú ñá túú cùtnunì iní-í ná cùu nchàa sá cuèhé sá dúhá ní cùu te núu ñá túú tnúhu-á<sup>n</sup>

ní càchí tnúhu-xi xii-í, te ni ñá túú cùtnunì tucu iní-í núu váha àdi ñá túú vǎha sá nchídó iní-í sá ndécú ndìhi tnaha ñáiyu-o ní cùu te núu ñá túú tnúhu-á<sup>n</sup> ní càchí-xi sá vǎ cùu cùu iní-í sá ndécú ndìhi-yu.

8 Te tnúhu-á<sup>n</sup> ñí dánèhé ñáhá-xi xii-í sá vǎ cùu càda-í ní ì<sup>n</sup> sá cuèhé sá dúhá, dico sá cuèndá tnúhu-á<sup>n</sup> uu<sup>n</sup>-gǎ duca<sup>n</sup> ñí sani iní-í ní quide-í. Te núu ñá túú tnúhu sá sánú ìchi ñaha xii-o nacuáa cada-o cùndecu-o ña, te ñá túú cùtnunì iní-í sá quidè-í nándi sá cuèhé sá dúhá ní cùu.

9 Te cùtnàhá vátá nihí-gǎ-í tnúhu-á<sup>n</sup> te ñá túú tnàhí ná sánì iní-í ndécú-í ní cùu, dico sátá ní nihí-í tnúhu-á<sup>n</sup> te ní cùtnunì iní-í sá ndécú cuèchi-í, te ta xíta nihnu-í cuáhá<sup>n</sup> ní cùu.

10 Te núu ní quide-í nchaa nàcuáa càhá<sup>n</sup> tnúhu-á<sup>n</sup> te sa ndéé ama-gǎ naníhí tǎhú-í ní cùu, dico ñá túú ní quide-í núu ní cùtnunì iní-í sá tá xíta nihnu-í cuáhá<sup>n</sup> ní cùu.

11 Te sá xíi tnúhu-á<sup>n</sup> xíá<sup>n</sup> uu<sup>n</sup>-gǎ ní cunuu nchàa sá cuèhé sá dúhá ñí dándàhú ñáhá-xi xii-í te ní quide-í, te ta dàcuíta nihnu ñaha-xi xii-í cuáhá<sup>n</sup> ní cùu.

12 Te tnúhu sá sánú ìchi ñaha xii-o nacuáa cada-o cùndecu-o cuu-xi tnúhu ío yíñùhu ní taxi Yǎ Ndiòxí, te ì<sup>n</sup> ì<sup>n</sup> tnúhu-á<sup>n</sup> cùu-xi mée-ni tnúhu váha, te ni ì<sup>n</sup> tnúhu cuèhé tnúhu duha ñá túú ñùhu tnahá.

13 Te vǎ cùu càchí-í sá tnúhu váha-á<sup>n</sup> ñí quide-xi ta xíta nihnu-í cuáhá<sup>n</sup> ní cùu, chi nchaa sá cuèhé sá dúhá ñí quide-í, xíá<sup>n</sup> tá dàcuíta nihnu ñaha-xi xii-í cuáhá<sup>n</sup> ní cùu, te sá cuèndá tnúhu váha-á<sup>n</sup> ñí cùtnunì iní-í sá quidè-í nchaa sá cuèhé sá dúhá, te xíá<sup>n</sup> tá xíta nihnu-í cuáhá<sup>n</sup> ní cùu. Te sá cuèndá nchaa nàcuáa càhá<sup>n</sup> tnúhu sá sánú ìchi ñaha xii-o nacuáa cada-o cùndecu-o ní cùtnunì iní-í sá xidó ndécú cuèchi-í ní cùu.

14 Te tnúhu-á<sup>n</sup> ñí taxi Espíritú Yǎ Ndiòxí ndécú ndìhi-o cachí tnúhu-xi nàcuáa cada váha-o. Te nchoo cùu-o mee-ni ñáiyu yíca cuèchi, te tàxi tnunì ñáhá nchàa sá cuèhé sá dúhá xii-o ní cùu.

15 Dico nchoo tnàhá iní-ó càda-o nchaa sá vǎha dico ñá túú quide-o, te da nchaa sá ñá túú tnàhá iní-ó càda-o

quide-o, te ñá túú cùtnuní iní-ó nã cuendá duca<sup>n</sup> quide-o.

16 Te sá dúcá<sup>n</sup> quide-o nchaa sá ñà túú tnàhá iní-ó, te xiá<sup>n</sup> ndíxí túu iní-ó sã tnúhu sá dúcá<sup>n</sup> sãnu ichi ñaha xii-o nacuáa cada-o cùndecu-o cuu-xi tnúhu ío váha.

17 Te cùtnuní iní-ó sã nchàa sá cuèhé sá dúhá ñúhu iní-ó, xiá<sup>n</sup> quidé-xí dùca<sup>n</sup> quide-o sá ñà túú váha, te ñá díú sã cáhú iní méé-ó dùca<sup>n</sup> quide-o.

18 Te cùu-o cue ñáyiú sàni cuèhé sání dùha iní-xi, te cuíní-ó càda-o nchaa sá váha dico ñá túú ñihí ndéé-ó càda-o.

19 Te cuíní-ó càda-o nchaa sá váha dico ñá ndácú-ó, te ñá túú cuíní-ó càda-o datná quidé nchàa ñáyiú ndècu ichi cuèhé ichi duha, chi ñáyiú-á<sup>n</sup> mee-ni nchàa sá cuèhé sá dúhá quidé-yu, dico ñu-ni nchaa xiá<sup>n</sup> quidé-ó tnàhá-ó.

20 Te sá dúcá<sup>n</sup> quide-o nchaa sá ñà túú tnàhá iní-ó càda-o te ñá díú mèe-o duca<sup>n</sup> cahú iní-ó quide-o, chi nchaa sá cuèhé sá dúhá ñúhu iní-ó xiá<sup>n</sup> quidé-xí dùca<sup>n</sup> quide-o.

21 Te duca<sup>n</sup> tnàhí yáha-o òré cuíní-ó càda-o sá váha, chi da mee-ni nchàa sá cuèhé sá dúhá quide-o.

22 Te ío cùdí iní-ó càda-o nchaa nacuáa càhá<sup>n</sup> Yá Ndiöxí,

23 te dicó-ni sá ncháá sã cuèhé sá dúhá ñúhu iní-ó, xiá<sup>n</sup> quidé-xí ngàni ñaha-xi xii-o ñá túú quide-o sá váha sàni iní-ó càda-o, te duca<sup>n</sup> yáha-o chi nchaa sá cuèhé sá dúhá-á<sup>n</sup> cúnùu-xi taxi tnuní ñáhá-xí xii-o.

24 ¡Te ndàhú ní cuu nchoo! Chi vá yõ ñ<sup>n</sup> ni ndàcu cada nacuáa vá táxí tnùní ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáhá<sup>n</sup> ní cùu.

25 Te táxãhu xii Yá Ndiöxí sá Xítóhó Jesucristú ní quide-gá cuendá sá vá táxí tnùní ñáhá-gã ni ñ<sup>n</sup> sá cuèhé sá dúhá xii-o, sá tá dàcuíta nihnu ñaha xii-o cuáhá<sup>n</sup> ní cùu. Te mee-o sàni iní-ó càda-o nchaa nacuáa càhá<sup>n</sup> Yá Ndiöxí, dico núu nchaa sá cuèhé sá dúhá ná cúnùu-xi taxi tnuní ñáhá-xí xii-o, te ñu-ni nchaa xiá<sup>n</sup> cada-o.

## 8

*Ñáyiú quide nchaa nacuáa càhá<sup>n</sup>*

### *Espíritú Yá Ndiöxí*

1 Te vitna nchaa nchoo ñáyiú tnàhá tnúhu ndihí Xítóhó Jesucristú vá cuíta nihnu-gá-ó, chi ñá túú-gã ndécú-ó ichi cuèhé ichi duha, chi mee-nã nchaa nacuáa càhá<sup>n</sup> Espíritú Yá Ndiöxí quidé-ó.

2 Te Espíritú Yá Ndiöxí-á<sup>n</sup> táxí tnùní ñáhá-xí xii-o, te duca<sup>n</sup> chi ndècu ndihí-o Xítóhó Jesucristú, te sá dúcá<sup>n</sup> táxi tnuní ñáhá Espíritú-gá xii-o núu xiá<sup>n</sup> ñá túú-gã táxí tnùní ñáhá ni ñ<sup>n</sup>-gá sá cuèhé sá dúhá xii-o, te duca<sup>n</sup> quide Espíritú-gá cuendá sá vá cuíta nihnu-o, te ñu-ni Espíritú-gá quidé-xí cuendá sá nchóó ndùu táhú-ó cùndecu-o ndihí-gá ni caa ni quíhí<sup>n</sup>.

3 Te nchoo ñá ní ndàcu-o cada-o nchaa nacuáa càhá<sup>n</sup> tnúhu sá sánú ichi ñaha xii-o nacuáa cada-o cùndecu-o, núu xiá<sup>n</sup> tnúhu-á<sup>n</sup> ñà túú ní ñihí ndéé-xí càda-xi cuendá sá nchóó vá cuíta nihnu-o. Dico Yá Ndiöxí ní tendaha-gã Déhe mee-gã ní quixi ñuyíú-a, te Yaá-á<sup>n</sup> cúú-gã ñ<sup>n</sup> ñáyiú, te càa-gá datná cáá ñáyiú ndècu cuéchi-xi xíndecu ñuyíú-a, te sá cuendá nchaa cuéchi nchaa nchoo ñáyiú xíndecu ñuyíú-a ní quixi-gá, te ndéé dàvá-á<sup>n</sup> ñí quide-gá cuendá sá vá táxí tnùní ñáhá-gã ni ñ<sup>n</sup> sá cuèhé sá dúhá xii-o.

4 Te duca<sup>n</sup> ñí quide-gá cuendá nchoo nchicú<sup>n</sup> nihnu-o quide-o nacuáa càhá<sup>n</sup> tnúhu sá sánú ichi ñaha xii-o nacuáa cada-o, chi ñá túú-gã cúnùu ni ñ<sup>n</sup> sá cuèhé sá dúhá iní-ó, chi Espíritú Yá Ndiöxí-nã táxí tnùní ñáhá-xí xii-o.

5 Te nchaa ñáyiú cúnùu nchaa sá cuèhé sá dúhá iní-xi mee-ni xiá<sup>n</sup> ñúhú iní-yu te quidé-yu. Dico nchoo ñáyiú quide nchaa nacuáa cuíní Espíritú Yá Ndiöxí ñúhú iní-ó mèe-ni nacuáa càhá<sup>n</sup> Espíritú-gá-á<sup>n</sup> te quide-o.

6 Te núu mee-ni nchàa sá cuèhé sá dúhá cúnùu iní-ó, te cuíta nihnu-o, dico núu mee-ni nchàa tnúhu càhá<sup>n</sup> Espíritú Yá Ndiöxí cúnùu iní-ó, te ío váha cuu iní-ó cùndecu-o ndihí-gá ni caa ni quíhí<sup>n</sup>.

7 Te nchaa ñáyiú ñúhu iní mee-ni sã cuèhé sá dúhá cùu úhú iní-yu Yá Ndiöxí, te ñá túú cuíní-yu cadá-yu

nàcuáa càhá<sup>n</sup>-gá, te ni ñă ndácŭ-yu cada-yu.

<sup>8</sup> Te nchaa ñáyi duca<sup>n</sup> cùnū nchaa sá cuèhé sá dúhá ìní-xi-á<sup>n</sup> ñà túú cùdiú-yu núú Yá Ndiöxi.

<sup>9</sup> Te nchòhó chi ñá túú-gă cùnū sá cuèhé sá dúhá ìní-ndó, chi mee-ñă nàcuáa càhá<sup>n</sup> Espiritú Yá Ndiöxi quidé-ndó, te duca<sup>n</sup> quide-ndo chi ndècu ndihi-ndo Espiritú-gá, te diu-ni Espiritú-gá-á<sup>n</sup> ñă tendaha Xitohó Jesucristú véxi ndècu ndihi-o, te nchaa ñáyi ñà túú ndècu ndihi Espiritú sá ñă tendaha Xitohó Jesucristú véxi ndècu ndihi-o ñà túú ndècu ndihi ñahá-yu xii-gá.

<sup>10</sup> Te núu ndècu ndihi-ndo Xitohó Jesucristú, te cuèi na cùú yiqui cùñú-ndó sá cuèndá nchaa sá cuèhé sá dúhá ío ñuyíú-a, dico ìní-ndó chi cundecu ndihi-xi Yá Ndiöxi chi ñà túú-gă cuèchi-ndo ndècu núú-gă.

<sup>11</sup> Te núu ndècu ndihi-ndo Espiritú Yá Ndiöxi Yaá ní dándótó ñaha xii Xitohó Jesucristú, te diu-ni-gá cada te ndoto yiqui cùñú-ndó sá tá xita nihnu cuáhá<sup>n</sup> núu na cùú-xi, te duca<sup>n</sup> chi ndècu ndihi-ndo Espiritú-gá.

<sup>12</sup> Te nchòhó ñáyi ndècu ndihi-í ichi Xitohó Jesucristú, ñà túú-gă tàú-ndó cùnū ni ñ<sup>n</sup> sá cuèhé sá dúhá ìní-ndó nàcuáa vá cùndècu-gá-ndó ichi cuèhé ichi duha.

<sup>13</sup> Chi núu na cùnū sá cuèhé sá dúhá ìní-ndó te cuíta nihnu-ndo, chi quíhí<sup>n</sup>-ndó núú ùhú núú ndàhú. Dico núu dañá-ndo mée-ndo chindee ñaha Espiritú Yá Ndiöxi xii-ndo cuèndá sá vă cùnū-gá sá cuèhé sá dúhá ìní-ndó ñà, te nduu táhú-ndó cùndecu-ndo ndihi-gá ni caa ni quíhí<sup>n</sup> te núu duca<sup>n</sup> na càda-ndo.

<sup>14</sup> Chi nchaa ñáyi quide nchaa nacuáa sànu ichi ñaha Espiritú Yá Ndiöxi cúú-yu déhe-gá.

<sup>15</sup> Te Espiritú sá ñă taxi Yá Ndiöxi ndécú ndihi-o ñà túú quide-xi sá nchóó yùhú-ó cùnū cuechi-o núú-gă, chi Espiritú-á<sup>n</sup> quidé-xi sá nchóó cùu-o déhe-gá, te diu-ni Espiritú-á<sup>n</sup> quidé xăha<sup>n</sup>-o xii Yá Ndiöxi: “iYòhó Dútú Ndiöxi cúú-n Tătá méé-ndí!”, duha xăha<sup>n</sup>-o xii-gá.

<sup>16</sup> Te diu-ni Espiritú-gá-ă<sup>n</sup> tnhá tnhú-xi ndihi ìní-ó, te càhá<sup>n</sup> ndáá-xi sá nchóó cùu-o déhe-gá.

<sup>17</sup> Te sá dúcá<sup>n</sup> cùu-o déhe Yá Ndiöxi xiă<sup>n</sup> ní cachí-gá sá tnhá-ó ndùu táhú-ó sá ñă nduu táhú Xitohó Jesucristú, te duca<sup>n</sup> ndùu táhú-ó te núu na càda ndee ìní-ó ndòho-o datná ní ndòho Xitohó Jesucristú, te núu duca<sup>n</sup> te ío cuu càhnu-o ndihi-gá ni caa ni quíhí<sup>n</sup>.

<sup>18</sup> Te yúhú càhí-í sá ñà túú ñă cada-xi cuèi ndòho-o cuèndá-gá ndécú-ó ñuyíú-a, chi ío váha càa núu ndúú táhú-ó cùndecu-o na saá nduu.

<sup>19</sup> Te nchaandi túhú sá ñă cadúha Yá Ndiöxi ní taxi ndecu-gá ñuyíú-a ndètu cahnu-ná-xi saá nduu càhí-gá sá ío càhnu cuu nchaa déhe-gá.

<sup>20</sup> Te nchaa sá ñă cadúha Yá Ndiöxi ní taxi ndecu-gá ñuyíú-a ní saá nduu ñà túú-gă cúú-xi sá vâha sá cúú-xi-gă. Te ñà díú mée sá ñă taxi ndecu Yá Ndiöxi ñuyíú-a duca<sup>n</sup> ni sàni ìní-xi cunduu, chi mee-gă duca<sup>n</sup> tnhá ní cachí-gá cunduu sá saá nduu vă cúú-xi sá vâha sá cúú-xi-gă, dico saá tucu nduu te nchaa xiă<sup>n</sup> cuu tucu-xi sá vâha sá cúú-xi-gă.

<sup>21</sup> Te nchaa sá ñă taxi ndecu-gá ñuyíú-a vá cùndùu-gá-xi dàtná cáá-xi vitna te ni vă dánà-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá.

<sup>22</sup> Te naha-o sá ncháándi túhú sá nchító ñă cadúha Yá Ndiöxi ndécú ñuyíú-a ndòho-xi vitna datná ndóhó ñ<sup>n</sup> ñadihí sa ní tnhá òré cacu déhe-xi.

<sup>23</sup> Te ñà díú-ni nchaa sá dúcá<sup>n</sup> ñă cadúha-gá-ă<sup>n</sup> duca<sup>n</sup> ndòho-xi, chi tnhá nchoo dùca<sup>n</sup> ndòho-o ndecu-o ñuyíú-a tucu, te nchoo sà ní nduu táhú-ó Espiritú Yá Ndiöxi Espiritú sá ñă cachí méé-gă nduu táhú-ó dñhanuu. Te ío ndòho tnhá-ó ndècu-o ñuyíú-a te ndètu cahnu-ná-ó saá nduu ndàda saa-gá yiqui cùñú-ó, te càhá<sup>n</sup>-gá sá cúú-ó déhe-gá.

<sup>24</sup> Te Yá Ndiöxi ní quide-gá ní naníhí táhú-ó núu xiă<sup>n</sup> ní ngúndecu ndihi-o tnhú ndee ìní ndétú-ó saá nduu càda-gá nàcuáa ní cachí-gá, te núu sa ndècu ndihi-o sá ndúú táhú-ó te

vá cúú cǎhá<sup>n</sup>-ó sǎ cùndètu-o sá ndúú táhú-ó chí sa ndècu ndìhi-o.

<sup>25</sup> Dico sá ndétú-ó ndúu táhú-ó cùu-xi sá vátá cùndècu ndìhi-gá-ó, te xìni ñuhu-ni-xi cada ndee-ni iní-ó cùndetu-o ndéé sáá nduu ndúu táhú-ó sǎ dúcá<sup>n</sup> ñí cachí Yǎ Ndiǒxí nduu táhú-ó.

<sup>26</sup> Te Espíritú-gá chindee ñàha-xi xii-o nacuáa ñíhí ndéé-ó cùndecu-o, te nchoo ñà túú xìní-ó cǎhá<sup>n</sup> ndìhi-o Yǎ Ndiǒxí nàcuáa tàú-xi cunduu dico Espíritú-gá cǎhá<sup>n</sup> ndàhú-xi núú-gǎ cuèndá-ó cuèi òré ñá ñíhí-ó tnúhu cǎhá<sup>n</sup>-ó cuèndá nchaa sá ìo cuìní-ó cǎcǎ<sup>n</sup>-ó núú-gǎ.

<sup>27</sup> Te Yá Ndiǒxí sa nàha ndáá-gá nchaa nàcuáa sàni iní-ó, te duca<sup>n</sup> sá naha ndáá-gá nchaa nàcuáa sàni iní Espíritú-gá. Te Espíritú-gá cǎhá<sup>n</sup> ndàhú-xi núú-gǎ cuèndá nchoo ñáyíu yìndaha-gá, te cǎhá<sup>n</sup> ndàhú-xi núú-gǎ nàcuáa cuìní méé-gǎ cunduu.

*Nchaa sá ná càda ñaha ñáyíu te vá ndácú-yu nadatùhú-yu iní-ó chí ndacu nahi-ni-o yǎha-o nchàa sá ná càdá ñàhá-yu*

<sup>28</sup> Te sa nàha-o sá Yǎ Ndiǒxí quidé-gǎ sá ncháá sǎ yǎha-o ndècu-o ñuyíú-a cùu-xi sá vǎha sá cúú-xí nchòo cue ñáyíu cùu iní ñàhá xii-gá, chí cùu-o ñáyíu ní cǎhá<sup>n</sup>-gá cundecu ndìhi-gá dàtná ní cachí iní méé-gǎ.

<sup>29</sup> Te ndéé cùtnàhá vátá ngǎva-gá ñuyíú, te Yá Ndiǒxí sa nàha-gá nándi cùu ñáyíu cundecu ndìhi-gá, te diu-ni ndéé dàvá-á<sup>n</sup> ñí cachí-gá sá ñáyíu-á<sup>n</sup> cunduu váha iní-yu dàtná váha iní Déhe mee-gǎ, te duca<sup>n</sup> ñí cachí-gá cuèndá sá Déhe mee-gǎ-á<sup>n</sup> cunuu-gá núú nchàa ñáyíu cundecu ndìhi-gá.

<sup>30</sup> Te nchaa ñáyíu duca<sup>n</sup> ñí cachí-gá cundecu ndìhi-gá ndéé cùtnàhá vátá ngǎva-gá ñuyíú cǎhá<sup>n</sup> ñàhá-gǎ xii-yu vitna, te nchaa ñáyíu duca<sup>n</sup> cǎhá<sup>n</sup>-gá cǎchí-gá sá ñà túú-gǎ cuéchi-yu ndècu núú-gǎ, te diu-ni ñáyíu-á<sup>n</sup> cachí-gá sá ìo càhnu cuú-yu.

<sup>31</sup> Te vitna ní cutnùníní iní-ó, te ñá túú nǎgá caní iní-ó, chí Yá Ndiǒxí ndécú ndìhi ñaha-gá xii-o, te vá yǒo ì<sup>n</sup>-gá ndacu quehdé nihnu cuèndá sá vǎ chíndèe ñaha-gá xii-o.

<sup>32</sup> Te Yá Ndiǒxí ñá túú ní cùdí iní-gá Déhe-gá sá cùú-gá cuèndá nchaa nchoo ñáyíu xǐndecu ñuyíú-a, te sá dúcá<sup>n</sup> ndéé Déhe-gá ñá túú ní cùdí iní-gá xǐ<sup>n</sup> cùtnùníní iní-ó sǎ táxí-gǎ nchaandi túhú sá xìní ñuhu-o.

<sup>33</sup> Te vá yǒo ì<sup>n</sup> ndacu cacá<sup>n</sup> cuéchi núú Yá Ndiǒxí cuèndá nchaa ñáyíu ní cachí-gá cundecu ndìhi-gá te núu ná cúú cuéchi-yu ndècu. Chí mee-gǎ cǎchí-gá sá ñà túú ndècu cuéchi-yu núú-gǎ.

<sup>34</sup> Te vá yǒo ì<sup>n</sup> ndacu daquìhí<sup>n</sup> ñàhá xii-o núú ùhú núú ndàhú, chí Xítóhó Jesucristú ní xíhí-gá te ní ndoto-gá, te cuándaa-gá núú ndécú Dútú Ndiǒxí núcòo-gá xio cùha-gá, te duca<sup>n</sup> ìo cunuu-gá, te yàcá<sup>n</sup> cǎhá<sup>n</sup> ndàhú-gá núú Dútú Ndiǒxí cuèndá-ó.

<sup>35</sup> Te vá yǒo ì<sup>n</sup> ndacu cada ñaha xii-o ì<sup>n</sup> sá ñà túú vǎha cuèndá sá vǎ cúú iní ñàhá-gǎ Xítóhó Jesucristú xii-o, te ní tnúndòho tnúhu ndàhú, te ní sá ndìhú iní-ó ñá cùtnùníní iní-ó nǎsa cada-o cǎcu nihnu-o ì<sup>n</sup> sá ná yǎha-o, te ní nchàa sá càdá ñàha ñáyíu sá cuèndá-gá, te cuèi-ni sá vǎ ñíhí-ó sǎ cóhó sǎ cǎxí-ó, te cuèi-ni sá vǎ ñíhí-ó dǒo cuihnu-o, te cuèi ndècu-ná-ó sǎ yǎha-o ì<sup>n</sup> sá yǎha-o, te cuèi sa ndècu-ná-ó sǎ cǎhni ñàhá-yu, dico Xítóhó Jesucristú vá dàñá ndèé-gá sá cúú iní ñàhá-gǎ xii-o.

<sup>36</sup> Te quee ndáá-xi nàcuáa ní cǎhá<sup>n</sup> ì<sup>n</sup> téé ní xóo cǎhá<sup>n</sup> tnúhu Yá Ndiǒxí ndéé sanaha ñí ngódó tnùníní núú tütú-gá núú cǎchí-xi:

Yòhó Dútú Ndiǒxí nchaa-ni nduu nchaa-ni òré cuìní ñáyíu cahni ñàhá-yu xii-ndí sá cuèndá-n,

te cǎchí-yu sá cúú-ndí dàtná cue mbéé cue quití sa ndècu túha-ná cahni-yu.

Duha ní cachí téé ní xóo cǎhá<sup>n</sup> tnúhu-gá-á<sup>n</sup>, te duca<sup>n</sup> ñí ngódó tnùníní núú tütú-gá.

<sup>37</sup> Te cuèi duca<sup>n</sup> nándi sá ná càda ñàhá-yu xii-o, dico vá ndácú-yu nadatùhú-yu iní-ó chí ndacu nahi-ni-o yǎha-o nchàa sá dúcá<sup>n</sup> ná càda ñàhá-yu xii-o, te duca<sup>n</sup> chí Xítóhó Jesucristú Yaá ìo cùu iní ñàhá xii-o ndecu ndìhi ñaha-gá chíndèe ñaha-gá.

38-39 Te yúhú cútnùnì ndáá iní-í sá ñi sá ío ñuyú-a vá ndácú-xí càda-xi cuendá sá vǎ cúú iní ñáhá-gǎ Yǎ Ndiǒxí xii-o, te ni sǎ cùú-ó, te ni sǎ cùndècu-o ñuyú-a, te ni ñi espíritú sá ío cùnūu cundihì yucu ñávǎha te ni ñi dava-gǎ cue espíritú cundihì-xi vá ndácú-xí càda-xi cuendá sá vǎ cúú iní ñáhá Yǎ Ndiǒxí xii-o. Te ni sǎ cúú ñuyú-a vitna, te ni sǎ cúú ndéé cuèé-gǎ, te ni ñi sá ndécú àndi, te ni ñi sá ndécú ñuyú-a, te ni ñi sá ñi cadúha mee Yǎ Ndiǒxí, ni ñi xǎ vá ndácú-xí càda-xi cuendá sá vǎ cúú iní ñáhá-gǎ xii-o chí ndècu ndihì-o Xítóhó Jesucristú Yáá cúú Xítóhó-ó.

## 9

*Yá Ndiǒxí ní cachí-gǎ sá ñáyiū isràél cuú-yu ñáyiū canchicú<sup>n</sup> nihnu ñaha xii-gǎ*

<sup>1</sup> Te yúhú càhá<sup>n</sup> ndáá-í chí cùu-í ñi tée ndècu ndihì Xítóhó Jesucristú, te ndècu ndihì-í Espíritú Yǎ Ndiǒxí ñu xǎ cútnùnì iní-í sá càhá<sup>n</sup> ndáá-í.

<sup>2</sup> Te nchaa-ñi nduu nchaa-ñi òré ío ndihú iní-í, te duca<sup>n</sup>-ni ío quide úhú-xi iní-í

<sup>3</sup> sá cuendá nchaa ñáyiū cùu ndi mee-í. Te núu dícó cúú-xí ñi sá chindèe ñaha xii-yu nucúndecu váha-yu núu Yǎ Ndiǒxí ñá, te dàña-í mée-í dàcuíta nihnu ñaha Xítóhó Jesucristú ñu dícó sá cúú.

<sup>4</sup> Te nchaa ñáyiū cùu ndi mee-í-á<sup>n</sup> cúú-yu ñáyiū isràél, te Yá Ndiǒxí ní cachí-gǎ sá cúú-yu déhe-gǎ, te ní quide-gǎ nàcuáa ní cutnùnì iní-yu sá ío càhnu cuu-gǎ, te ní cáhá<sup>n</sup> ndáá-gǎ núu-yu nàcuáa cada ñaha-gǎ xii-yu, te ní xáha<sup>n</sup>-gǎ xii ndí Moisés ní chídó tnùnì ndí nàcuáa cadá-yu cundecú-yu. Te ní xáha<sup>n</sup>-gǎ xii-yu nàcuáa cadá-yu cada càhnu ñáhá-yu xii-gǎ, te ní xáha<sup>n</sup> tùcu-gǎ xii-yu nchaa nàcuáa cada-gǎ ndéé cuèé-gǎ.

<sup>5</sup> Te nchaa ñáyiū-á<sup>n</sup> cúú-yu ñani tnáhá nchaa cue tée ní cunūu ñi xíndecu ndéé sanaha, te diu-ni ñani tnáhá-yu cùu Xítóhó Jesucristú Yáá ní tendaha Dütú Ndiǒxí ní quixi ñuyú-a, te tnáhá-gǎ cúú-gǎ Ndiǒxí

te ío cùnūu-gǎ, te nchaa nduu nchaa quíú ío càhnu cuu-gǎ. Te duca<sup>n</sup> na cùnduu.

<sup>6</sup> Te vá càchí-ó sǎ Yǎ Ndiǒxí ñá túú ní quide-gǎ nchaa nàcuáa ní cachí-gǎ cada-gǎ cuendá sá ñá túú sàndáá iní ñáhá dàva ñáyiū isràél xii-gǎ. Te sá dúcá<sup>n</sup> xíquide davá-yu te ñá túú quidé-yu nàcuáa tàú-xi cadá-yu sá cúú-yu ñáyiū isràél. Te ñáyiū duca<sup>n</sup> xíquide-á<sup>n</sup> cúú-yu ñáyiū ñá túú cùu cuendá ñáhá Yǎ Ndiǒxí.

<sup>7</sup> Te cuèi nchaá-yu cùu-yu ñani tnáhá ndí Àbrahám dico ñá túú quidé-yu nchaa nàcuáa tàú-xi cunduu cadá-yu sá cúú-yu ñani tnáhá ndí. Te Yá Ndiǒxí ní xáha<sup>n</sup>-gǎ xii ndí Àbrahám: “Nchaa cue ñani tnáhá tē Isàác tē cùu déhe ducu<sup>n</sup>-n, mee-ni cuè ñáyiū-á<sup>n</sup> cuu ñani tnáhá-n”, duha ní xáha<sup>n</sup>-gǎ xii ndí Àbrahám.

<sup>8</sup> Te xǎ cútnùnì iní-ó sǎ ñá ncháá ñáyiū cùu ñani tnáhá ndí Àbrahám cúú-yu ñáyiū cùu cuendá Yǎ Ndiǒxí, chí mee-ni ñáyiū sàndáá iní nàcuáa ní cáhá<sup>n</sup>-gǎ cada-gǎ, ñáyiū-á<sup>n</sup> cúú cuendá-gǎ.

<sup>9</sup> Te duha ndūu tnúhu ní xáha<sup>n</sup> Yǎ Ndiǒxí xii ndí Àbrahám: “Sáá ndūu te yúhú cada-í te coo ñi déhe-n ndihì ñadihì-n tǎ Sǎrá”, duha ní xáha<sup>n</sup>-gǎ xii ndí.

<sup>10</sup> Te ñá díu-ni xǎ ní quide Yá Ndiǒxí, chí tnáhá ní ndatnúhu-gǎ ndihì ndí Rèbecá cútnáhá vitna ñuhu úú déhe ndí ndihì ndí Isàác tē ní cuu ñani tnáhá-ó ñi xíndecu ndéé sanaha.

<sup>11-13</sup> Te cútnáhá vitna ñuhu-gǎ déhe ndí Rèbecá, cútnáhá vátá cadá-gǎ-güexi ni ñi sá cuèhé sá dúhá, te ni ñi sá vǎha, ní xáha<sup>n</sup> Yǎ Ndiǒxí xii ndí: “Déhe-n tē díhna na càcu te tē-á<sup>n</sup> tñi-dé nchaa tnúhu cáhá<sup>n</sup> déhe-n tē cùu uú ná càcu”, duha ní xáha<sup>n</sup>-gǎ xii ndí Rèbecá. Te ní quee ndáá-xi nàcuáa ní cáhá<sup>n</sup> Yǎ Ndiǒxí núu tütú-gǎ núu càchí-xi: “Tē Jácób ní cuu váha iní-í núu-dé, te tē Esáu ñá túú ní cùu váha iní-í núu-dé”, duha càchí-gǎ núu tütú-gǎ. Te duca<sup>n</sup> ñi cuu chí duca<sup>n</sup> ñi cachí mée-gǎ cunduu sá càhá<sup>n</sup>-gǎ nchaa ñáyiū cuini mée-gǎ, te ñá díu cuendá ñi chiu<sup>n</sup> quidé-yu càhá<sup>n</sup>

ñáhá-gă xii-yu.

14 Te vá cúú tnàhí cáhá<sup>n</sup>-ó sǎ Yǎ Ndiǒxí ñá túú quide váha-gá sá dúcá<sup>n</sup> quide-gá chi mee-gă ío ndáá quidé-gă!

15 Te mee-gă ní xáha<sup>n</sup>-gă xii ndíi Moisés: “Cundàhú iní-í chindee-í mee-ní cuè ñáyiú cǎchí iní-í”, duha ní xáha<sup>n</sup>-gă xii ndíi.

16 Te xiǎ<sup>n</sup> cútnùní iní-ó sǎ cundàhú iní-gá ñáyiú chi duca<sup>n</sup> cuini méé-gă cunduu, dico ñá túú cundahú iní ñáhá-gă xii-yu cuendá sá dúcá<sup>n</sup> cuini-yu cada-gá, te ni ñà túú cundahú iní ñáhá-gă xii-yu cuendá sá ío ndècu ndeé-yu quidé-yu ì<sup>n</sup> sá quidè-yu.

17 Te núú tùtú Yǎ Ndiǒxí càhá<sup>n</sup>-xi nàcuáa ní xáha<sup>n</sup>-gă xii téé ní cuu Faràón téé ní xindaha nàció<sup>n</sup> Ègiptú, te duha ní xáha<sup>n</sup>-gă: “Yúhú ní quide-í yíndàha-n ñáyiú cuendá cada-í tñní núú sǎ cáda-í núú-n cuendá cutnùní iní-n sǎ ío càhnu cuu-í, te duca<sup>n</sup> nchàa ñáyiú ñuyíú cutnùní iní-yu sá yúhú cúu-í Ndiǒxí”, duha ní xáha<sup>n</sup>-gă xii téé ní cuu Faràón.

18 Te xiǎ<sup>n</sup> cútnùní iní-ó sǎ Yǎ Ndiǒxí cundàhú iní-gá mee-ní cuè ñáyiú cǎchí iní méé-gă, te duca<sup>n</sup> ndàda díi-gá iní nchaa ñáyiú cǎchí iní méé-gă duca<sup>n</sup> càda-gá.

19 Te sá dúhá càhá<sup>n</sup>-í te dava-ndo quèsaha-ndo: “Ná cuendá Yǎ Ndiǒxí dácàa-gá cuéchi díquí ñáyiú núu ni ì<sup>n</sup>-yu ñá ndácǔ-yu quehdé nihnú-yu cuendá sá vǎ cáda Yǎ Ndiǒxí nàcuáa cuini-gá”, quesaha-ndo.

20 Te chí cuǎha cuendá sá dìcò ñáyiú ñuyíú-a cúu-ndo te ñá túú ndùu váha-xi sá nchòhó cáhá<sup>n</sup>-ndó ì<sup>n</sup> tnúhu sá ñà túú ndùu váha sá cúú-xí Yǎ Ndiǒxí. Te duha na càhá<sup>n</sup>-í núú-ndó nàcuáa tecú tnùní-gá-ndó nàcuáa ndùu tnúhu càhá<sup>n</sup>-í. Te ñá túú xìní-ó sǎ ì<sup>n</sup> quídi ñuhu cúñaha-xi xii ñáyiú ní cadúha ñaha xìi-xi: “Ná cuendá duha ní cadúha ñaha-n xìi-í”, cúñaha-xi.

21 Chi ñáyiú càdúha nchaa quídi-á<sup>n</sup> cuu-ni cadúha-yu ndíhi ñuhu cuèi nása na cunduu quídi cadúha-yu canehe chiú<sup>n</sup>-yu, chi ì<sup>n</sup>-ni ñuhu cadúha-yu quídi cánehe chiú<sup>n</sup>-yu ndí tnahá nduu sàcòo-yu vico ndíhi quídi

sá cǎnehe chiú<sup>n</sup>-yu nduu cùtexínu.

22 Te diu-ni duca<sup>n</sup> quide Yá Ndiǒxí, chi cuini-gá dandòho-gá ñáyiú ñá túú quide nchaa nàcuáa nduu vétú iní-gá, te cada-gá nàcuáa cutnùní iní-yu sá ío càhnu cuu-gá. Te sa ndècu túha-ná-yu sá quíhí<sup>n</sup>-yu núú ùhú núú ndàhú, te cuèi duca<sup>n</sup> dico ío ta quide cahnu iní-gá cuáhá<sup>n</sup>.

23 Te duca<sup>n</sup> quide-gá cuendá cutnùní iní nchaa ñáyiú ñuyíú sǎ ío váha quide-gá sá cúú-xí nchàa nchoo ñáyiú cundahú iní-gá, chi ní cachí-gá sá nchóo cuè ñáyiú cundahú iní-gá nduu táhú-ó cundecu-o ndíhi-gá núú ío váha càa ndecu-gá.

24 Te dava nchoo ñáyiú ní cáhá<sup>n</sup> Yǎ Ndiǒxí cúú-ó ñáyiú isràél, te dava-o cùu-o ñáyiú ñá túú cùu ñáyiú isràél.

25 Te ní quee ndáa-xi nàcuáa ní xáha<sup>n</sup> Yǎ Ndiǒxí xii ndíi Òseás téé ní xóo cáhá<sup>n</sup> tnúhu-gá ndéé sanaha ní chídó tnùní ndíi núú tùtú-gá núú cǎchí-xi:

Ñáyiú ñá túú cùu cuendá-í ní cùu te nduu cuendá-í-yu,

te diu-ni ñáyiú-á<sup>n</sup> ñà túú cùu váha iní-í núú-yu ní cùu, dico vitna cùu váha iní-í núú-yu.

26 Te diu-ni ñuú núú dúcá<sup>n</sup> ní cachí-í sá ñà túú ñáyiú cùu cuendá-í diu-ni ñuú-á<sup>n</sup> coo ñáyiú cuu déhe yúhú Dútú Ndiǒxí Yaá ndécú tǔu andíu.

Duha ní xáha<sup>n</sup> Yǎ Ndiǒxí xii ndíi Òseás ní chídó tnùní ndíi núú tùtú-gá.

27 Te ndíi Chàíá téé ní xóo cáhá<sup>n</sup> tucu tnúhu Yá Ndiǒxí ndéé sanaha ní cáhá<sup>n</sup> ndíi cuendá ñáyiú isràél, te duha ní cachí ndíi: “Cuèi cuéhé víhí ñáyiú isràél dàtná cuéhé ñuhu cúchí làmár dico sacú-ni-yu vá quini-yu tnúndòho tnúhu ndàhú.

28 Te Yá Ndiǒxí ío ndíhi cada-gá nchaa nàcuáa càhá<sup>n</sup>-gá ñuyíú”, duha ní cachí ndíi.

29 Te ní cáhá<sup>n</sup> tucu ndíi nàcuáa cada-xi ndéé cuéé-gá, te ní cachí ndíi:

Yá Ndiǒxí Yaá táxí tnùní nchaandi túhú sá ío andíu ndíhi ñuyíú ñà



túú ní dànaa-gá nchaa ñáyiú is-  
raél, chi núu ni ndíhí-yu danàa  
ñaha-gá,  
te nchoo cùu-o datná ní cuu nchaa  
ñáyiú ní xíndecu ñuú Sòdomá  
ndíhí nchaa ñáyiú ní xíndecu  
ñuú Gòmorrá, te ndíhí-o nàa  
datná ní naa nchaa ñáyiú-án ní  
cùu.  
Duha ní cachí ndí.

*Ñáyiú israél ñá túú sàndáá iní-yu  
tnúhu Xítohó Jesucristú*

<sup>30</sup> Te sá cuendá xíá<sup>n</sup> ñúu vitna càchí  
tnúhu-í xii-ndo sá cuè ñáyiú ñá túú  
cùu ñáyiú israél ñá túú ní nànducu ni-  
hnú-yu nàcuáa cadá-yu cudíú-yu núú  
Yá Ndiöxí, dico vitna cùdú-yu núú-gá  
chi ní sàndáá iní-yu Xítohó Jesucristú.

<sup>31</sup> Te ñáyiú israél nchícú<sup>n</sup> nihnú-yu  
tnúhu sá dánèhé ñáhá xii-yu nàcuáa  
cadá-yu cudíú-yu núú Yá Ndiöxí  
dico ñá túú cùdú-yu núú-gá chi  
ñá ndácú-yu cadá-yu nchaa nàcuáa  
càhá<sup>n</sup>-xi.

<sup>32</sup> Te duca<sup>n</sup> ñà túú cùdú-yu núú  
Yá Ndiöxí chi ñá túú sàndáá iní-yu  
Xítohó Jesucristú, te sàni iní-yu sá  
sá cuendá mee-ni nchàa sá quidé  
mèe-yu cudíú-yu núú-gá, te sá dúcá<sup>n</sup>  
quidé-yu te cùú-yu datná ñ<sup>n</sup> ñáyiú  
nguñenu ñ<sup>n</sup> yúú te nduá-yu. Te duca<sup>n</sup>  
sátnahá-xi cùú-yu chi ñá túú cùu váha  
iní-yu núú Xítohó Jesucristú.

<sup>33</sup> Te quèe ndáá-xi nàcuáa ní cáhá<sup>n</sup>  
Yá Ndiöxí ñ<sup>n</sup> xichi núú tütú-gá núú  
càchí-xi:

Yúhú táxí ndècu-í ñ<sup>n</sup> téé ñuú Sìón, te  
cúu-dé datná ñ<sup>n</sup> yúú, te yúú-á<sup>n</sup>  
nguñenu ñáyiú te nduá-yu,

te nchaa ñáyiú na quíndáá iní ñáhá  
xii-dé, te vá ndíxí cuèchi iní-yu  
sá dúcá<sup>n</sup> ní sàndáá iní ñáhá-yu  
xii-dé.

Duha càchí-gá núú tütú-gá.

## 10

<sup>1</sup> Te nchòhò ñáyiú ndècu ndíhí-í ichi  
Xítohó Jesucristú càchí tnúhu-í xii-ndo  
sá cáhá<sup>n</sup> ndíhí-í Yá Ndiöxí cuendá  
ñáyiú israél, chi ío cuíní-í sá náníhí  
tàhú-yu.

<sup>2</sup> Te na càhá<sup>n</sup> ndáá-í cuendá-yu sá ío  
ndúcu ndeé-yu xínu cuechí-yu núú Yá  
Ndiöxí, te dícó-ni sá ñà túú quidé-yu  
nàcuáa cuíní mèe-gá cadá-yu.

<sup>3</sup> Chi ñá túú quíde cuendá-yu  
nàcuáa cuíní Yá Ndiöxí cada ñaha-gá  
xii-yu nàcuáa cudíú-yu núú-gá, te  
quíde-ní-yu nàcuáa sàni iní mèe-yu  
cudíú-yu núú-gá te ñá túú cuíní-yu  
tní-yu tnúhu càhá<sup>n</sup>-gá nàcuáa  
cudíú-yu núú-gá.

<sup>4</sup> Te Xítohó Jesucristú ní quíde-gá  
cuendá sá vǎ cúnú-gá nchaa tnúhu  
ní chídó tnúní ndí Moisés, te nchaa  
ñáyiú na quíndáá iní ñáhá xii-gá  
te díu-gá cada te cudíú-yu núú Yá  
Ndiöxí.

<sup>5</sup> Te ndí Moisés càhá<sup>n</sup> ndí núú  
tütú ndí cuendá ñáyiú cuíní cudíú  
núú Yá Ndiöxí cuendá sá nchícú<sup>n</sup>  
nihnú-yu nchaa nàcuáa ní cáhá<sup>n</sup>  
ndí. Te ní cachí ndí sá ncháá ñáyiú  
na càda nchaa nàcuáa ní xáha<sup>n</sup> Yá  
Ndiöxí xii ndí ní chídó tnúní ndí te  
naníhí tàhú-yu, te núu dícó ndacú-yu  
cadá-yu nchaa nàcuáa ní cáhá<sup>n</sup> ndí.

<sup>6</sup> Dico vitna núu na quíndáá iní-ó  
Xítohó Jesucristú, te cudíú-o núú Yá  
Ndiöxí. Te duha càchí tnúhu ní chídó  
tnúní ndí núú tütú-gá: “Vá cání  
iní-ndó sá xíní ñúhu-xi cada-ndo ñ<sup>n</sup>  
sá vǎ yóo tnáhí ndàcu cada sá cáá  
túu-ndo àndú te cúñaha-ndo xii Cristú  
cúu<sup>n</sup>-ndo ndíhí-gá núú ñúyúú-a.

<sup>7</sup> Te ni vǎ cání tucu iní-ndó sá quíhí<sup>n</sup>  
túu-ndo ñúú xíndecu nchaa ñáyiú ní  
xíhí te cada-ndo sá Crístú ndoto-gá”,  
duha càchí tnúhu-án sǎ vǎ dúcá<sup>n</sup> càni  
iní-ó.

<sup>8</sup> Te càchí tucu tnúhu-án: “Tnúhu Yá  
Ndiöxí sá ndécú ndíhí ñaha-xi xii-ndo  
chí sàni iní-ndó cuendá tnúhu-án te  
càhá<sup>n</sup>-ndó”, duha càchí tnúhu-án. Te  
tnúhu sá ndécú ndíhí-ndo-án cúú-xí  
tnúhu càhá<sup>n</sup>-ndí núú ñáyiú, te xínu  
ñúhu-xi sá quíndáá iní-yu tnúhu-án.

<sup>9</sup> Te núu na ñúnuu-ndo cáhá<sup>n</sup>-ndó sǎ  
Xítohó Jesucristú cúú-gá Xítohó-ndó,  
te quíndáá iní-ndó ñí yuhu ni iní-ndó  
sǎ Yá Ndiöxí ní dándótó-gá Xítohó Je-  
sucristú, te naníhí tàhú-ndó te núu  
duca<sup>n</sup> na càda-ndo.

10 Te nchaa ñáyiú duca<sup>n</sup> sàndáá iní te cáhá<sup>n</sup>-yu sá Xítóhó Jesucristú cúú-gã Xítóhó-yu, ñáyiú-án cúúú-yu núú Yã Ndiõxí te náníhí tàhú-yu.

11 Te núú tùtú Yã Ndiõxí càchí-xi sá nì ñáyiú sàndáá iní ñáhá xii Xítóhó Jesucristú vá ndíxí cuèchi iní-yu sá dúcá<sup>n</sup> sàndáá iní ñáhã-yu xii-gá.

12 Te sá cúú-xí Xítóhó Jesucristú chi ñáyiú-á<sup>n</sup> cùu ñáyiú isràél ndíhí ñáyiú ñá túú cùu ñáyiú isràél, chi ñáyiú-gá cúú-gã Yaá cùnùu taxi tnuní-gá nchaa ñáyiú, te ío váha quide-gá sá cúú-xí ncháa ñáyiú càhá<sup>n</sup> ndíhí ñaha xii-gá.

13 Te quèe ndáá-xi nàcuáa càhá<sup>n</sup>-xi núú tùtú Yã Ndiõxí núú càchí-xi: “Nchaa ñáyiú na càhá<sup>n</sup> ndàhú núú Xítóhó Jesucristú sá dácãcu nihnu ñaha-gã xii-yu, te ñáyiú-án naníhí tàhú-yu”, duha càchí-xi núú tùtú-gá.

14 Te ñáyiú-án vã nihí-yu nàcuáa cáhá<sup>n</sup> ndàhú-yu núú-gã te núú ñá túú sàndáá iní ñáhã-yu xii-gá, te ni vã nihí-yu nàcuáa cadá-yu quindáá iní ñáhã-yu xii-gá te núú vátá cùndedóho-gá-yu tnúhu-gá, te ni vã nihí-yu tnúhu-gá te núú vá yõo quíhí<sup>n</sup> cùtnuhu ñaha xii-yu.

15 Te ni vã yõo quíhí<sup>n</sup> duca<sup>n</sup> cùtnuhu ñaha xii-yu tnúhu-gá te núú Yã Ndiõxí vá téndaha-gá ñáyiú quíhí<sup>n</sup> cùtnuhu ñaha xii-yu. Te núú tùtú Yã Ndiõxí càchí-xi: “Ío vii ío váha cùu iní-ó vèxi ñáyiú dānehé ñáhá xii-o nàcuáa ndùu tnúhu sá càhá<sup>n</sup> nàcuáa naníhí tàhú-ó”, duha càhá<sup>n</sup>-xi núú tùtú-gá.

16 Te ñá ncháã-yu cuíní-yu quindáá iní-yu tnúhu-á<sup>n</sup>. Te ní quee ndáá-xi nàcuáa ní xáha<sup>n</sup> ndí Chàíá xii Yã Ndiõxí te duha ní xáha<sup>n</sup> ndí xii-gá: “Yòhó Dútú Ndiõxí na nàcāni tnúhu-í núú-n sá ío sacú-ni ñáyiú sàndáá iní-yu tnúhu càhá<sup>n</sup>-ndí”, duha ní xáha<sup>n</sup> ndí xii-gá.

17 Te xini ñuhu-xi sá dīhna-gá cund-edóho-yu tnúhu-á<sup>n</sup> cuendá duca<sup>n</sup> te quindáá iní-yu, te tnúhu-á<sup>n</sup> cúú-xí tnúhu Xítóhó Jesucristú.

18 Te vá cúú cáhá<sup>n</sup>-ó sã ñá túú ní ñíhí ñáyiú isràél tnúhu-gá, chi ncháa-yu

ní ñíhí-yu tnúhu-gá, chi núú tùtú Yã Ndiõxí càchí-xi:

Cue tée ní cáhá<sup>n</sup> tnúhu Yã Ndiõxí ní cáhá<sup>n</sup>-güedé tnúhu-gá núú ñáyiú,

te tnúhu-á<sup>n</sup> ñí xité nuu-xi ñíhí ñuyúú. Duha càchí-xi núú tùtú-gá.

19 Te ni vã cáhá<sup>n</sup>-ó sã ñáyiú isràél ñá túú ní cùu tnuní iní-yu nàcuáa ndùu tnúhu-gá chi ní tecu tnùní-yu. Te ndéé sanaha ñí chídó tnùní ndí Moisés nàcuáa ní xáha<sup>n</sup> Yã Ndiõxí xii ñáyiú isràél, te duha ní xáha<sup>n</sup>-gã xii-yu:

Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cùtnuní iní-xi nàcuáa cada váha cundecu núú-í,

te nchòhó cudéé<sup>n</sup>-ndó ñũ-yu te cuu cuédú iní-ndó-yu.

Duha ní xáha<sup>n</sup> Yã Ndiõxí xii-yu te duca<sup>n</sup> ñí chídó tnùní ndí Moisés.

20 Te ndí Chàíá ñá túú tnàhí ni yúhú ndí ní quide ndí núú Yã Ndiõxí ní cáhá<sup>n</sup> ndí tnúhu-gá, te ní cachí ndí:

Ñáyiú ñá túú nànducu ñaha xii-í ní cùu ní naníhí ñáhã-yu xii-í,

te ni ñá túú ndùcu tnúhu ñáhã-yu xii-í ní cùu te ní xini ñáhã-yu.

Duha ní cachí ndí Chàíá ní cáhá<sup>n</sup> ndí tnúhu Yã Ndiõxí.

21 Te ní quide tucu ndí núú Yã Ndiõxí ní cáhá<sup>n</sup> ndí tnúhu-gá cuendá ñáyiú isràél, te ní cachí ndí: “Nchaa-ni nduu yíhí-í càhá<sup>n</sup>-í ñáyiú isràél te ñá túú cuíní-yu quindáá iní-yu chi ío sáa iní-yu”, duha ní cachí ndí Chàíá ní cáhá<sup>n</sup> ndí tnúhu Yã Ndiõxí.

## 11

*Cuendá ñáyiú isràél ñáyiú naníhí tàhú*

1 Te cuèi duca<sup>n</sup> dico vá càhá<sup>n</sup>-ó sã Yã Ndiõxí dáquèe tíhú-gã ñáyiú isràél chi ñáyiú-án cúú cuendá-gá, chi yúhú tnàhá-í cúú-í mei téè isràél, te ñaní tnàhá-í ní cuu ndí Àbrahám téè ní xindecu ndéé sanaha víhí-gá, te ñáyiú-án ñaní tnàhá-í ní cuu tucu ndí Benjámin.

2 Te ndéé sanaha dùca<sup>n</sup> ní cachí Yã Ndiõxí sá nchúhú ñáyiú isràél cúú-ndí ñáyiú cùu cuendá-gá, te ñá túú dàquee tíhú ñáhã-gã xii-ndí, te nchòhó sa

xiní-ndó nàcuáa càhá<sup>n</sup>-xi núú tütú Yá Ndiöxí núú càchí-xi nàcuáa ní quide té Èliás ní ndacá<sup>n</sup> cuéchi-dé núú-gă cuendá ñáyiú isràél.

<sup>3</sup> Te duha ní xáha<sup>n</sup>-dě xii-gá: “Yòhó Dútú Ndiöxí, ná nàcani tnúhu-í núú-n sá ñi sahní-yu cue téa càhá<sup>n</sup> tnúhu-n, te ní dátanú-yu núú xihí quiti ndùu tǎhú-n, te yúhú-nǎ ní cácu-í ndécù-í dico nànducu ñahá-yu chi tnàhá-í cuiní-yu cahni ñahá-yu xii-í”, duha ní xáha<sup>n</sup>-dě xii Yá Ndiöxí.

<sup>4</sup> Te Yá Ndiöxí ní xáha<sup>n</sup>-gă xii-dé: “Sa ní dáquée dî<sup>n</sup>-í úsá mîl cue téa cùu cuendá-í, te ñá túú nèhe-güedé sá yíñùhu núú Bàál sá càchí-yu cùu ndiöxí-yu te ñá ndàá sá ndiöxí cúú-xí”, duha ní xáha<sup>n</sup>-gă xii té Èliás.

<sup>5</sup> Te duca<sup>n</sup> sǎtnahá-xi cùu vitna chi xîndecu ñáyiú ní cáhá<sup>n</sup>-gá ní chîtnahá ñáhá xii-gá, te duca<sup>n</sup> ñi quide-gá chi ní cundàhú iní ñáhá-gă xii-yu.

<sup>6</sup> Te duca<sup>n</sup> ñi cáhá<sup>n</sup> ñáhá-gă xii-yu sá cundàhú iní ñáhá-gă, te ñá díú cuendá ì<sup>n</sup> chîu<sup>n</sup> quidé-yu duca<sup>n</sup> ñi cáhá<sup>n</sup> ñáhá-gă xii-yu, chi núú dicó cuendá ì<sup>n</sup> chîu<sup>n</sup> quidé-yu duca<sup>n</sup> ñi cáhá<sup>n</sup> ñáhá-gă xii-yu ña, te ñá díú-gă sá cúú iní méé-gă duca<sup>n</sup> ñi cáhá<sup>n</sup> ñáhá-gă xii-yu te núú duca<sup>n</sup>.

<sup>7</sup> Te na càchí tnúhu-í xii-ndo nàcuáa cùu vitna sá ñáyiú isràél cuiní-yu cudú-yu núú Yá Ndiöxí dico ñá ndácù-yu, dico dava ñáyiú ní cáhá<sup>n</sup>-gá ñáyiú-á<sup>n</sup> cudú-yu núú-gă, te ñáyiú duca<sup>n</sup> ñá túú cùu núú-gă-á<sup>n</sup> ìo ní cuu sáá iní-yu núú-gă.

<sup>8</sup> Te ní quee ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi: “Yá Ndiöxí ní cachí-gá sá cúú-yu ñáyiú ìo ñi díquí-xi, chi cuéi ndèhé-yu nàcuáa càhá<sup>n</sup> tnúhu-gá dico ñá cùtnùní iní-yu nàcuáa càhá<sup>n</sup>-xi, te cuéi ndèdóho-yu dico ñá túú quée díquí-yu, te duca<sup>n</sup>-ni quidé-yu ndéé vitna”, duha càchí-xi núú tütú-gă.

<sup>9</sup> Te ndí Dàvíí ní cachí ndí: Ñáyiú ìo váha ndècu te cùdí iní-yu quidé-yu vico, dico yáha-yu dátaná yáha ì<sup>n</sup> quiti ngáva trampá àdi ì<sup>n</sup> quiti ñá cùtnùní

iní-xi quée xití ñunu, chi cuíta nihnú-yu te nacháhu-yu nchaá sá quídě-yu.

<sup>10</sup> Te cùú-yu ñáyiú ñá túú vèdana tècú tnùní, te cùu tucú-yu dátaná ì<sup>n</sup> ñáyiú ìo ndòho nchido ì<sup>n</sup> sá vèe. Duha ní cachí ndí Dàvíí.

*Ñáyiú ñá túú cùu ñáyiú isràél naníhí tǎhú-yu*

<sup>11</sup> Te cuéi duca<sup>n</sup> dico vá càchí-ó sá sá dúcá<sup>n</sup> ñá túú ní quide ndáá ñáyiú isràél te ní xíta nihnu duú<sup>n</sup>-yu, te ñáhá chi sá dúcá<sup>n</sup> ñi quidé-yu te ní ngúndecu ndíhi dava-gă ñáyiú tnúhu sá càhá<sup>n</sup> nàcuáa naníhí tǎhú-yu, te ñáyiú isràél quiní-yu nàcuáa naníhí tǎhú ñáyiú ñá túú cùu ñáyiú isràél, te tnàhá-yu cudú iní-yu naníhí tǎhú-yu.

<sup>12</sup> Te sá dúcá<sup>n</sup> ñi quide sáá iní-yu ñá túú ní quide ndáá-yu núú Yá Ndiöxí, te xíá<sup>n</sup> ní cuu-xi ì<sup>n</sup> sá váha sá cúú-xí ñáyiú nihí ñuyíú, dico sáá nduu te cada ñáyiú isràél nchaá nàcuáa càhá<sup>n</sup> Yá Ndiöxí, te dàvá-á<sup>n</sup> ìo-gă váha cuu xii nchaá ñáyiú nihí ñuyíú.

<sup>13</sup> Te nchòhó ñáyiú ñá túú cùu ñáyiú isràél càchí tnúhu-í xii-ndo sá Yá Ndiöxí ní cachí-gá sá càhá<sup>n</sup>-í tnúhu-gá núú-ndó, te yúhú càchí-í sá ìo càhnu cuu chiu<sup>n</sup> quide-í.

<sup>14</sup> Te duha càhá<sup>n</sup>-í cuendá sá ñu cu-dana ìo dava ñáyiú cùu ndi mee-í cudú iní-yu cada váha ñaha Yá Ndiöxí xii-yu dátaná quidé váha ñaha-gă xii-ndo, te naníhí tǎhú-yu.

<sup>15</sup> Te sá cuendá sá ñi quee tíhú ñáyiú isràél ní nacáhá<sup>n</sup> cáhnú iní tnáhá ñáyiú nihí ñuyíú ndíhi Yá Ndiöxí, dico na sáá nduu núcúndecu váha ñáyiú isràél ndíhi Yá Ndiöxí, te ìo-gă váha tnahá ñáyiú nihí ñuyíú, te ñáyiú-á<sup>n</sup> cada iní-ó sá cúú-yu dátaná ñáyiú ní xihí, dico dàvá-á<sup>n</sup> cada tucu iní-ó sá cúú-yu dátaná ñáyiú ní ndoto chi nucúndecu váha-yu ndíhi-gă.

<sup>16</sup> Te núú sá lúhá-ní ì<sup>n</sup> tílúlú yusa<sup>n</sup> càváha te díu-ni duca<sup>n</sup> càváha nihí. Te núú càváha yóho ì<sup>n</sup> yutnu te díu-ni duca<sup>n</sup> càváha-xi nihí-xi. Te díu-ni duca<sup>n</sup> sǎtnahá-xi cùu ñáyiú isràél, chi ñaní tnáhă-yu ní xîndecu ndéé sanaha

nĩ cuú-yu ñáyiú ní cuu cuendá ñáhá Yá Ndiöxí, te diu-ni duca<sup>n</sup> cùu cuendá ñáhá-gã xii mèé-yu ndéé vitna.

17 Te ío ì<sup>n</sup> yutnu váha nàni olívú, te dava dité yutnu-á<sup>n</sup> nĩ téhndé te ní nucódó dité yutnu òlívú cùtexínu, te mee-nã yutnu òlívú váha-á<sup>n</sup> ìo váha quide-xi nchito dité yutnu òlívú cùtexínu-á<sup>n</sup>. Te dité nchaa yutnu òlívú váha-á<sup>n</sup> cúú-xí dàtná ñáyiú isràél, te nchaa dité-xi sá nĩ téhndé-á<sup>n</sup> cúú-xí diu-ni ñáyiú isràél ñáyiú ñá túú tnàhá tnúhu ndìhi Yá Ndiöxí. Te dité yutnu òlívú cùtexínu sá nĩ nucódó tnáhá-á<sup>n</sup> cúú-xí dàtná ñáyiú ñá túú cùu ñáyiú isràél tnàhá tnúhu ndìhi Yá Ndiöxí.

18 Te vá cání ìní-ndó sã sã dúcá<sup>n</sup> ndècu váha-ndo ndìhi Yá Ndiöxí te ío cùnùu-ndo dacúúxí ñáyiú isràél, te vá dúcá<sup>n</sup> càni ìní-ndó chi sá cuendá nchaa ñani tnáhá ñáyiú isràél ní xíndecu ndéé sanaha duca<sup>n</sup> ndècu váha-ndo ndìhi Yá Ndiöxí vitna, te ñá díú sã cuendá nchòhó ndécú ndìhi váha ñáyiú-á<sup>n</sup> Yá Ndiöxí vitna.

19 Te cudana sàni ìní-ndó te càchí-ndó sã ñáyiú isràél ní quee tíhũ-yu cuendá sá nchòhó nucuíñí-ndó nũ-yu nucúndecu váha-ndo ndìhi Yá Ndiöxí.

20 Te ndáá sá nĩ quee tíhũ-yu chi ñá túú ní sàndáá ìní ñáhã-yu xii-gá, te nchòhó ío váha cùu ndecu-ndo ndìhi-gá chi ní sàndáá ìní-ndó-gã, dico vá càchí-ndó sã ìo càhnu cuu-ndo, te ío váha chí cuãha cuendá nàcuáa cundecu-ndo.

21 Te cue ñáyiú isràél cúú-yu ñáyiú cùu cuendá-gá ní cùu te ní dáquéé tíhú ñáhá-gã xii-yu cuendá sá ñá túú ní sàndáá ìní ñáhã-yu xii-gá, te tnàhá nchòhó daquéè tíhú ñáhá-gã xii-ndo te núu na càda-ndo datná ní quide ñáyiú-á<sup>n</sup>.

22 Te chí cáda cuendá sá Yá Ndiöxí ío váha ìní-gá, dico cùdéé<sup>n</sup>-gã núú nchàa ñáyiú ñá túú sàndáá ìní ñáhá xii-gá, dico sá cúú-xí nchòhó cue ñáyiú sàndáá ìní ñáhá xii-gá chi ío váha ìní-gá. Te duca<sup>n</sup>-ni cùnduu váha ìní-gá sá cúú-xí-ndó te núu vá dáñá ndéé-ndó càda-ndo nacuáa càhá<sup>n</sup>-gá cuendá sá ìo váha ìní-gá, te núu ñáhá

te tnàhá nchòhó quee tíhú-ndó dàtná ní quee tíhú ñáyiú isràél, ñáyiú ñá túú ní sàndáá ìní ñáhá xii-gá.

23 Dico núu ñáyiú isràél ñáyiú ní dáquéé tíhú ñáhá Yá Ndiöxí quíndáá ìní ñáhã-yu xii-gá te nduu cuendá ñáhá tucu-gá xii-yu, te ñáyiú-á<sup>n</sup> cúú-yu dàtná dava dité yutnu òlívú sá nĩ téhndé te ní nucódó tnáhá tucu. Te duca<sup>n</sup> sãtnahá-xi cúú-yu te núu na quíndáá ìní ñáhã-yu xii-gá.

24 Te nchòhó cúú-ndó dàtná nchaa dité yutnu òlívú cùtexínu, chi ñá díú ñáyiú isràél cúú-ndó, te dité nchaa yutnu òlívú cùtexínu-á<sup>n</sup> nĩ nucódó-xi núú dité yutnu òlívú váha-á<sup>n</sup>. Te yáchí-gá nucúndecu váha ñáyiú isràél ndìhi Yá Ndiöxí, chi cúú-yu dàtná nchaa dité yutnu òlívú váha sá nĩ téhndé te ní nucódó tnáhá tucu. Te duca<sup>n</sup> sãtnahá-xi cúú-yu te núu na quíndáá ìní ñáhã-yu xii-gá.

#### *Sáa nduu te naníhí tàhú ñáyiú isràél*

25 Te nchòhó ñáyiú ndècu ndìhi-í ichi Xítohó Jesucristú, na càchí tnúhu-í xii-ndo ì<sup>n</sup> tnúhu nduu yuhu ni cuu, cuendá sá vá cání ìní-ndó sã ìo-gá váha sàá díquí-ndó dacúúxí ñáyiú isràél, chi dava ñáyiú isràél cúú sàá ìní-yu núú Yá Ndiöxí ñini na ndìhi ñáyiú ní cachí Yá Ndiöxí ngúndecu váha ndìhi ñáhã-yu xii-gá, ñáyiú ñá túú cùu ñáyiú isràél.

26 Te nduu na ndìhi ñáyiú-á<sup>n</sup> ngúndecu váha-yu ndìhi Yá Ndiöxí, te dàvá-á<sup>n</sup> naníhí tàhú ñáyiú isràél chí quee ndáá-xi nàcuáa càhá<sup>n</sup> Yá Ndiöxí núú tütú-gá núú càchí-xi:

Ndàa ñuú Siòn quixi Yaá cada naníhí tàhú nchaa ñáyiú,  
te diu-ni Yaá-á<sup>n</sup> cada-gá cuendá sá dáñá nchàa ñáyiú isràél ichi cuèhé ichi duha.

27 Te yúhú cada càhnu ìní-í nchaa cuèchi ñáyiú isràél, chí cada-í dàtná ní cachí-í ndéé sanaha.  
Duha càchí Yá Ndiöxí núú tütú-gá.

28 Te sá cuendá tnúhu sá càhá<sup>n</sup> nàcuáa naníhí tàhú-ó xiã<sup>n</sup> cúú úhú ìní ñáyiú isràél Yá Ndiöxí, te sá dúcá<sup>n</sup> quidé-yu xiã<sup>n</sup> nchòhó ní

níhí-ndó tnũhu sá cãhá<sup>n</sup> nãcuáa naníhí tãhú-ndó. Te ní cachí Yã Ndiõxí sá ñãyiú isràél cuu cuendá-gá, te cùu iní ñáhá-ní-gã xii-yu, te duca<sup>n</sup> quide-gá chi duca<sup>n</sup> ñí xãhá<sup>n</sup>-gã xii cue ñaní tnãhá-yu ní xíndecu ndéé sanaha.

<sup>29</sup> Te Yã Ndiõxí ñá túú ndùu úhú iní-gá ì<sup>n</sup> sá táxí-gã, te ñí ñà túú ndìxi cuèchi iní-gá sá cãhá<sup>n</sup> ñáhá-gã xii-o.

<sup>30</sup> Te nchòhó chi ñá túú sãndáá iní-ndó Yã Ndiõxí ní cùu, dico vitna ñini ñà túú sãndáá iní ñáhá ñãyiú isràél xii-gá, te ní cundàhú iní ñáhá-gã ní dácãcu nihnu ñaha-gã xii-ndo núú ùhú núú ndàhú.

<sup>31</sup> Te vitna quidé-yu dàtná ní xóo cada nchòhó cùnãhá ñá túú ní xóo quindáá iní-ndó-gã. Dico sáá nduu te natuha ñáhá-yu xii-gá te dácãcu nihnu ñaha-gã xii-yu sá cundàhú iní ñáhá-gã dàtná ní quide ñaha-gã xii nchòhó.

<sup>32</sup> Te Yã Ndiõxí ní dáñá-gã sá dúcá<sup>n</sup> cùnduu saá iní nchaa ñãyiú cuendá cuiní-gá cundàhú iní ñáhá-gã xii-yu.

<sup>33</sup> Te súúní vãha quide ñaha Yã Ndiõxí xii-o, te ío vãha xìní-gá nchaa cuèi sá ío andiú te cuèi sá ío ñuyíú-a, te duca<sup>n</sup> ío vãha sàá nchaa sá xìní tnùní-gã. Te ñá ndácú-ó cùnùní iní-ó ñá cùú nchàa sá sání iní-gá cada-gá, te ñí ñã ndácú-ó cùnùní iní-ó nãcuáa ndùu cuendá nchaa sá quidé-gã.

<sup>34</sup> Te núú tütú-gá cãchí-xi: “Vã yõo ì<sup>n</sup> cùnùní iní-xi nãcuáa sãni iní Yã Ndiõxí, te ñí vã yõo ì<sup>n</sup> ndãcu dacahu iní ñáhá xii-gã nãcuáa cãhá<sup>n</sup>-gã.

<sup>35</sup> Te Yã Ndiõxí ñá túú quide yica iní-gá cada-gá sá vãha sá cùú-xí ñãyiú cuendá ì<sup>n</sup> sá sãñãhá-yu xii-gá chi ñá túú dùca<sup>n</sup> quide-gã”, duha cãchí-xi núú tütú-gã.

<sup>36</sup> Te duca<sup>n</sup> chi mee Yã Ndiõxí ní taxi ndecu-gá nchaandi túhú sá ío ñuyíú, te ñíu-ni mee-gã táxí tnùní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná cãchí-ó sã ío cãhnu cuu-gá ñí caa ñí quíhí<sup>n</sup>. Te duca<sup>n</sup> na cùnduu.

## 12

*Cada-o nãcuáa nduu vétú iní Yã Ndiõxí*

<sup>1</sup> Te vitna nchòhó ñãyiú ndècu ndìhi-í ichi Xítóhó Jesucristú cãchí tnúhu-í xii-ndo sã Yã Ndiõxí cundàhú iní ñáhá-gã xii-o chindee ñaha-gã, núú xíã<sup>n</sup> cãhá<sup>n</sup> ndàhú-í núú-ndó sã dáñá-ndó mèe-ndo núú ndáhá-gã, te cada iní-ndó sã cùú-ndó dàtná ì<sup>n</sup> tãhú sã nchító-ó ñí nduu tãhú-gã. Te cuu-ndo ñãyiú vãha ñãyiú cada nchaa nãcuáa nduu vétú iní Yã Ndiõxí chi duca<sup>n</sup> tàú-ndó càda-ndo sá cùú-xí-gã.

<sup>2</sup> Te vã cãchìcú<sup>n</sup> nihnu-gã-ndó càda-ndo datná xiquide nchaa ñãyiú ndècu ichi cuehé ichi duha ndècu ñuyíú-a, te vã cùhú<sup>n</sup>-gã iní-ndó ichi cuehé ichi duha-á<sup>n</sup>, chi mee-ñá sã vãha cuhu<sup>n</sup> iní-ndó, te duca<sup>n</sup> te cutnùní iní-ndó nchaa nãcuáa cuiní Yã Ndiõxí càda-ndo, te nchaa sá cuiní-gã càda-ndo cùu-xi mee-ñí sã vãha, sã ío vãha ndùu vétú iní-gá, te cùu-xi nchaa sá xíní ñũhu-xi càda-ndo núú-gã.

<sup>3</sup> Te sá cuendá chiù<sup>n</sup> ní cundàhú iní ñáhá Yã Ndiõxí ní taxi-gã xii-í xíã<sup>n</sup> nõu na cãhá<sup>n</sup>-í dóho-ndo vitna: Vã cãní iní-ndó ì<sup>n</sup> sá ñá túú tàú-ndó cãni iní-ndó te cucãhã<sup>n</sup>-ndo sã ío cãhnu cuu-ndo. Te nchòhó ní sãndáá iní-ndó Yã Ndiõxí nõu chindee ñaha-gã xii-ndo, te vitna chí cuãha cuendá nõu ná daha núú chiù<sup>n</sup>-gã ndacu-ndo càda-ndo.

<sup>4</sup> Te nchoo tìtní xichi cùu yiquí cuñú-ó, te ndì díí<sup>n</sup> ndì díí<sup>n</sup> chiù<sup>n</sup> quide-xi ì<sup>n</sup> ì<sup>n</sup>-xi.

<sup>5</sup> Te duca<sup>n</sup> sãtnãhá tucu-xi cùu nchoo ñãyiú ndècu ndìhi Xítóhó Jesucristú chi cuèi ná daha tnãhá-ó dico ì<sup>n</sup>-ni cùu-o ndìhi-gã, te duca<sup>n</sup> mèe-o tucu ì<sup>n</sup>-ni cùu-o.

<sup>6</sup> Te mee Yã Ndiõxí ní cundàhú iní ñáhá-gã xii-o ñí taxi-gã chiù<sup>n</sup> taú-ó càda-o ì<sup>n</sup> ì<sup>n</sup>-o te chindee ñaha-gã xii-o, te xìní ñũhu-xi càda-o nãcuáa ndùu chiù<sup>n</sup> ní taxi-gã càda-o. Te núú ñí nduu tãhú-ó núú-gã sã cãhá<sup>n</sup>-ó tnũhu sã dácãhu iní ñáhá mèe-gã xii-o te cãhá<sup>n</sup>-ó nãcuáa sãndáá iní-ó chindee ñaha-gã xii-o,

<sup>7</sup> àdi ní nduu tãhú-ó nõú-gã sã ío vãha chindee-o tnãha ñãyiú-o te ñíu-ni duca<sup>n</sup> càda-o, àdi ní nduu tãhú-ó dãnehé-ó ñãyiú tnúhu-gã te ñíu-ni duca<sup>n</sup> càda-o,

8 àdi ní nduu táhú-ó nǔú-gǎ sá dácàhá<sup>n</sup>-ó ñáiyu canchicú<sup>n</sup> nihnú-yu ichi-gá te ðiu-ni duca<sup>n</sup> càda-o, àdi ní nduu táhú-ó nǔú-gǎ sá cuǎñaha-o xii tnaha ñáiyu-o sá nihí-ó ndècu ndihí-o te ðiu-ni duca<sup>n</sup> càda-o, dico ni yùhu ni iní-ó cuǎñaha-o xii-yu, àdi ní nduu táhú-ó nǔú-gǎ taxi tnùní-ó te ðiu-ni duca<sup>n</sup> càda-o, te ni yùhu ni iní-ó càda-o, àdi ní nduu táhú-ó nǔú-gǎ chindee-o cuè ñáiyu ndècu ndihí tnúndòho tnúhu ndàhú te ðiu-ni duca<sup>n</sup> càda-o, te ío cudí<sup>í</sup> iní-ó càda-o chiu<sup>n</sup>-á<sup>n</sup>.

*Nchaa nàcuáa tàú-xi cada nchaa ñáiyu ndècu ichi Xítóhó Jesucristú*

9 Te cuu iní tnáhá ndiṣa-ndo ì<sup>n</sup> ì<sup>n</sup>-ndo, te daña-ndo nchaa sá cuèhé sá dúhá te cada-ndo mée-ni sá vǎha.

10 Te ío cuu iní tnáhá-ndó, te cada-ndo cuèndá sá ì<sup>n</sup>-ní ñáiyu cùu-ndo, te ì<sup>n</sup> ì<sup>n</sup>-ndo càni-gá iní-ndó cànehe yiñuhu núú tnáhá-ndó.

11 Te nducu ndèe-ndo cada-ndo nchaa chiu<sup>n</sup> tahu Xítóhó Jesucristú vá tùhío-ndo, te cada-ndo ni yuhu ni iní-ndó sá cúú-xí-gǎ.

12 Te ío cudí<sup>í</sup> iní-ndó cùndecu-ndo chi ní ngúndecu ndihí-ndo tnúhu ndee iní sá cùndècu ndihí-ndo Xítóhó Jesucristú, te cada càhnu iní-ndó cuèi nándi na càda ñaha ñáiyu xii-ndo sá cuèndá-gá, te vá dáñá ndèé-ndó cǎhá<sup>n</sup> ndihí-ndo Yǎ Ndiǒxí.

13 Te chindee tnàha-ndo te núu ió dava nchòhó ñáiyu ndècu ichi-gá ió ì<sup>n</sup> sá cúmǎní xii-ndo, te ío váha cuu iní-ndó còto-ndo ñáiyu véxi vehe-ndo.

14 Te cǎcá<sup>n</sup> táhú-ndó nǔú Yǎ Ndiǒxí cuèndá nchaa ñáiyu nándi quide ñaha xii-ndo, te cǎcá<sup>n</sup> táhú-ndó nǔú-gǎ sá ná chindee ñaha-gá xii-yu te ñá díú dà cǎcá<sup>n</sup> táhú-ndó nǔú-gǎ sá ná dàcuíta nihnu ñaha-gǎ xii-yu.

15 Te núu ió ñáiyu cùdí<sup>í</sup> iní-xi te cudí<sup>í</sup> iní-ndó ndihí-yu, te núu ió ñáiyu ndihú iní-xi te ndihú iní-ndó ndihí-yu.

16 Te cuu ì<sup>n</sup>nuu-ndo cùndecu-ndo, te vá cǎdá càhnu-ndo mee-ndo, te tnahá tnúhu-ndo ndihí nchaa ñáiyu

ndàhú iní-xi, te vá cǎní iní-ndó sá ió-gá túha-ndo.

17 Te vá nánchòcáva-ndo nàchinaa-ndo ì<sup>n</sup> sá quidé ñaha ñáiyu xii-ndo, te ío nducu ndèe-ndo cada-ndo mee-ni sá vǎha nàcuáa cuu váha iní ñáiyu.

18 Te ío nducu ndèe-ndo cada-ndo sá ndácú-ndó cùndecu váha-ndo ndihí nchaa ñáiyu.

19 Te nchòhó ñáiyu ío cùu iní-í, vá cǎní iní-ndó nàchinaa-ndo ì<sup>n</sup> sá cǎdá ñaha ñáiyu xii-ndo, chi cundetú-ndo sá mée Yǎ Ndiǒxí ná nàchinaa-gá sá quidé ñahá-yu xii-ndo, chi quee ndáá-xi nàcuáa cǎhá<sup>n</sup> Yǎ Ndiǒxí núú tütú-gá núú cǎchí-xi: “Yúhú dandòho-í-yu chi nachinaa-í nchaa sá quidé-yu”, duha cǎchí-gá núú tütú-gá.

20 Te xini ñuhu tucu-xi cada-ndo nàcuáa cǎhá<sup>n</sup> tucu-xi ingá xichi núú tütú-gá núú cǎchí-xi: “Te núu ñáiyu cùu úhú iní ñahá xii-ndo ñá túú sá cóhó sá cǎxí-yu te cuǎñaha-ndo xii-yu, te núu duca<sup>n</sup> na càda-ndo te ío cucaha<sup>n</sup> núú-yu”, duha cǎchí-xi núú tütú-gá.

21 Te núu ió ì<sup>n</sup> sá quidé ñaha tnaha ñáiyu-ndo xii-ndo te vá nánchòcáva-ndo nàchinaa-ndo sá quidé ñahá-yu xii-ndo, chi cada-ndo sá vǎha sá cúú-xí-yu, te duca<sup>n</sup> te vá cǎdá-ndó sá ñà túú tàú-ndó càda-ndo núú Yǎ Ndiǒxí dàtná quidé-yu.

## 13

1 Te nchaa ñáiyu tàú-yu quindáá iní-yu nchaa cue té cùchiu<sup>n</sup>, chi Yǎ Ndiǒxí ní cǎchí-gá sá cùndècu té cùchiu<sup>n</sup> ñuyú-a, núu xí<sup>n</sup> xíndecu-güedé vitna.

2 Te nchaa ñáiyu ñá túú sàndáá iní ñahá xii cue té cùchiu<sup>n</sup> ñá túú tnáhá iní Yǎ Ndiǒxí sá dúcá<sup>n</sup> quidé-yu, chi mee-gǎ ní cǎchí-gá sá cùndècu-güedé. Te nchaa ñáiyu duca<sup>n</sup> ñà túú sàndáá iní ñahá xii cue té cùchiu<sup>n</sup> nacháhu-yu sá dúcá<sup>n</sup> quidé-yu.

3 Te nchaa ñáiyu quide váha ñá túú yùhú-yu cue té cùchiu<sup>n</sup> chi quide váha-yu, dico nchaa ñáiyu ñá túú quide váha chi xiyùhú-yu cue té cùchiu<sup>n</sup>. Te vitna núu nchòhó cuini-ndó sá vǎ yùhú-ndó cuè té

cùchiu<sup>n</sup> te chí cáda vâha, te duca<sup>n</sup> te cáhá<sup>n</sup> váha-güedé cuendá-ndó.

4 Te Yá Ndiöxí duca<sup>n</sup> ñí cachí-gá cundecu-güedé cuendá cada-güedé sá ñà túú nã cuu cundecu-ndo, te núu ñá túú quide váha-ndo ndècu-ndo te quiyùhú iní-ndó núú-güedé, chí ñá túú àú<sup>n</sup> nã cuu ndècu ndihí-güedé tnúhu ndee iní dandòho-güedé nchaa ñáyiú ñá túú quide váha, chí Yá Ndiöxí duca<sup>n</sup> ñí cachí-gá cundecu-güedé sá dúcá<sup>n</sup> càda-güedé dandòho-güedé nchaa ñáyiú ñá túú quide váha.

5 Núu xiá<sup>n</sup> ío xìni ñuhu-xi sá quèndáá iní-ndó nchaa cue téè cùchiu<sup>n</sup>, te ñá díú sã yùhú-ndó dandòho ñaha-güedé xii-ndo, chí cada-ndo sã cùtnùni iní-ndó sã cúú-xí ñí sã vâha.

6 Chí diu cuendá xiá<sup>n</sup> sàcá<sup>n</sup>-ndó dñíhú<sup>n</sup> núú cuè téè cùchiu<sup>n</sup>, te duca<sup>n</sup> chí Yá Ndiöxí duca<sup>n</sup> ñí cachí-gá cundecu-güedé te diu-ná chiú<sup>n</sup> ndeé-güedé ñúhú iní-güedé.

7 Te nacháhu-ndo nchaa sá tàú-ndó núú nchaa ñáyiú tàú-ndó núú-xi, te cuèi díhú<sup>n</sup> tàú-ndó cuendá ñuhu-ndo núú cuè téè cùchiu<sup>n</sup> àdi nágá díhú<sup>n</sup> tàú-ndó núú-güedé te nacháhu-ndo núú-güedé. Te ío-gá canehe-ndo sã yíñuhu núú nchaa ñáyiú cùnùu, te cáhá<sup>n</sup> váha-ndo ndihí-yu.

8 Te vá dácuidó-ndó ndùu nacháhu-ndo sã tàú-ndó núú tnàha ñáyiú-ndo, te cuu iní tnàhá-ndó ñí ñí-ndo. Te núu duca<sup>n</sup> quide-ndo ndecu-ndo ña, te quide-ndo nchaa nacuaá càhá<sup>n</sup> tnúhu sá sánú ìchi ñaha xii-o nacuaá cada-o cundecu-o.

9 Te duha ndùu tnúhu càhá<sup>n</sup> Yá Ndiöxí cuendá nchaa sá vã cúú càda-o: “Nchaa nchòhó cue téè vã càhá<sup>n</sup> ndihí-ndo ñáyiú dìhí te núu ñá díú ñàdihí-ndó cùú-yu, te duca<sup>n</sup>-ni nchaa nchòhó cue ñáyiú dìhí tucu vã càhá<sup>n</sup> ndihí-ndo téè te núu ñá díú yí-ndo cuu-güedé, te vã cáhní-ndó tnàha ñáyiú-ndo, te vã dúhú-ndó sã ndécú ndihí-yu, te vã dácàcu-ndo cuèchi neñùú, te vã xíhó-ndó sã ndécú ndihí tnaha ñáyiú-ndo”, nchaa xéhe cachí Yá Ndiöxí sá vã cúú càda-o. Te tnúhu-a quide-o ndihí nchaa dava-gá

tnúhu sá sánú ìchi ñaha xii-o nacuaá cada-o cundecu-o, te núu quide-o ingá tnúhu sá cächí-xi: “Cuu iní-ndó nchaa tnaha ñáyiú-ndo dàtná cúú iní-ndó mèe-ndo”, duha càhá<sup>n</sup> tnúhu-á<sup>n</sup>. Te nchaa dava-gá quidé-ó te núu quide-o nacuaá càhá<sup>n</sup> tnúhu-a.

10 Te nchaa ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núu duca<sup>n</sup> cùu iní-yu tnàha ñáyiú-yu te quidé-yu nacuaá càhá<sup>n</sup> tnúhu sá sánú ìchi ñaha xii-o nacuaá cada-o cundecu-o.

11 Te duca<sup>n</sup> xìni ñuhu-xi cada-ndo chí sa ní cutnùni iní-ndó nacuaá ta xìca nduu cuahá<sup>n</sup> ñuyúú-a, te ní sáá nduu sá ío xìni ñuhu-xi ndixi túu iní-ó càda-o nchaa nacuaá càhá<sup>n</sup> Yá Ndiöxí, chí vitna sa ní cuyatni-gá nduu nacuaa ñaha Xítohó Jesucristú xii-o dàcúúxí ndèé cùtnàhá ní sándáá iní-ó tnúhu-gá.

12 Te cada iní-ndó sã dàtná ñí níú sá sã ta cuyatni túndaá, duca<sup>n</sup> sãtnahá-xi cùu ñuyúú yíca cuèchi-a chí sa ta cùyatni nduu quixi tucu Xítohó Jesucristú, te núu xiá<sup>n</sup> xìni ñuhu-xi dañá-o nchaa sá cuèhé sá dúhá te cada-o mèe-ni sá vâha, te duca<sup>n</sup> te ní ñí sá cuèhé sá dúhá vã cùnùu-xi taxi tnuni ñáhá-xí xii-o, te duca<sup>n</sup> te vã cúú-gã-ó dàtná ñáyiú ndècu núú néé chí cuu-ná-ó dàtná ñáyiú ndècu núú dìtó.

13 Te cada-o nchaa nacuaá tàú-xi cunduu cundecu-o dàtná tàú-xi cada ñáyiú ndècu ìchi Xítohó Jesucristú, te vã quíhí-ó vico cuèhé vico duha, te vã cúú-ó ñáyiú quihu, te ní vã càhá<sup>n</sup> ndihí-o ñáyiú dìhí te núu ñá díú ñàdihí-ó cùú-yu, te duca<sup>n</sup>-ni cuè ñáyiú dìhí tucu vã càhá<sup>n</sup> ndihí-yu téè te núu ñá díú yí-yu cùu-güedé, te ní vã cùndècu-o ìchi díí iní, te ní vã nàá-ó ndihí tnaha ñáyiú-o, te ní vã cúú-ó ñáyiú cuédú iní.

14 Te vitna nchòhó dañá-ndo mèe-ndo sá Xítohó Jesucristú ná chindee ñaha-gá xii-ndo càda váha-ndo cundecu-ndo datná quidé mèe-gá ndécú-gã, te vã cání-gã iní-ndó càda-ndo datná ní xóo cada-ndo cùtnàhá ní cùnùu nchaa sá cuèhé sá dúhá iní-ndó.

## 14

*Vá cuátnùhu tnaha-o nacuaá ndècu-o ichi Xítóhó Jesucristú*

<sup>1</sup> Te núu ì<sup>n</sup> ñáyiu ndècu ichi Xítóhó Jesucristú ñá túú tècú tnùnì váha-yu nàcuáa cuiní Yă Ndiöxí cadá-yu, te quehe<sup>n</sup> cuendá-ni-ndö-yu te vá ténàa tnáhá-ndó ndìhí-yu.

<sup>2</sup> Chi íó ñáyiu sàni iní sá cúú vâha iní Yă Ndiöxí sá cúú càxí-yu nání nìhí-yu, te dava ñáyiu ñá túú cùtnunì váha iní-yu nàcuáa càhá<sup>n</sup> Yă Ndiöxí te mee-ni yücú xéxí-yu.

<sup>3</sup> Te ñáyiu xèxi nchaa núú sã nìhí-yu te vá dáquèe tíhũ-yu ñáyiu ñá túú xèxi, te duca<sup>n</sup>-ni ñáyiu duca<sup>n</sup> ñà túú xèxi-á<sup>n</sup> vã cuátnùhũ-yu nchaa ñáyiu duca<sup>n</sup> xèxi nchaa núú sã nìhí-xi-á<sup>n</sup>, chi tnáhá ñáyiu duca<sup>n</sup> xèxi nchaa núú sã nìhí-xi-á<sup>n</sup> quéhé<sup>n</sup> cuendá ñáhá Yă Ndiöxí xií-yu.

<sup>4</sup> Te ñá túú ndècu ndìhi-o tnúhu ndee iní cuatnúhu-o ñáyiu xínu cuechi, chi mee ñáyiu cùu patród<sup>n</sup>-yu tàú-yu cáhá<sup>n</sup>-yu te núu cundáá ñáyiu xínu cuechi núú-yu àdi ñá túú cundáá-yu. Te duca<sup>n</sup> sãtnahá-xi cùu ñáyiu xínu cuechi núú Yă Ndiöxí, chi mee-gã cáhá<sup>n</sup>-gá te núu nása quidé-yu, te ñiu-ni mee-gã cada te cundáá-yu cundécú-yu núú-gã.

<sup>5</sup> Te na càchí tnúhu tucu-í xii-ndo sã íó ñáyiu càchí sá íó dava nduu ío càhnu cuu-xi, te íó tucu dava ñáyiu càchí-yu sá ì<sup>n</sup>-ni cuu-xi nchaa-ni nduu, te xini ñuhu-xi sá cùtnunì ndáá iní-yu sá ndáá cúú-xí nàcuáa càhá<sup>n</sup>-yu ì<sup>n</sup> ì<sup>n</sup>-yu.

<sup>6</sup> Te ñáyiu cánehe íí dava nduu quidé-yu sá nêhẽ-yu sá yíñùhu núú Yă Ndiöxí, te ñáyiu càchí sá ì<sup>n</sup>-ní cùu-xi nchaa-ni nduu quidé-yu sá nêhẽ-yu sá yíñùhu núú Yă Ndiöxí tnáhá-yu. Te ñiu-ni duca<sup>n</sup> sãtnahá-xi cùu nchaa ñáyiu xèxi nchaa nání nìhí-yu, chi quidé-yu sá nêhẽ-yu sá yíñùhu núú Yă Ndiöxí, chi ndàcá<sup>n</sup> táhũ-yu núú-gã cuendá nchaa sá nìhí-yu. Te ñiu-ni duca<sup>n</sup> sãtnahá-xi cùu nchaa ñáyiu ñá túú xèxi nchaa núú sã nchító-ó chi quidé-yu sá nêhẽ-yu sá yíñùhu núú

Yă Ndiöxí, te ndàcá<sup>n</sup> táhũ-yu núú-gã cuendá nchaa sá nìhí-yu.

<sup>7</sup> Te nchoo cuèi vitna ndècu vívú-ó àdi cuèi na cùú-ó dico ñá ñá díú cuendá méé-ó cùú-ó.

<sup>8</sup> Chi vitna ndècu vívú-ó te ndècu-o sá cúú-xí Xítóhó Jesucristú àdi cuèi na cùú-ó dico cuú-ó ñiu-ni sá cúú-xí-gã, núu xiá<sup>n</sup> cuèi vitna ndècu vívú-ó àdi cuèi na cùú-ó dico ñiu-ni Xítóhó Jesucristú cúú cuendá ñáhá-gã xii-o.

<sup>9</sup> Chi Xítóhó Jesucristú ní xíhí-gá te ní ndoto-gá, te vitna cùu-gá Xítóhó nchaa ñáyiu, cuèi ñáyiu xíndecu vívú te cuèi ñáyiu ní xíhí.

<sup>10</sup> Te nchòhó, ñá túú nduu váha-xi cuatnuhu tnàha-ndo nacuaá ndècu-ndo ichi Xítóhó Jesucristú, te ni ñà túú nduu váha-xi daquèe tíhũ tnáhá-ndó, chi nchaa-o sãá nduu cùndecu-o núú Xítóhó Jesucristú, te mee-gã cachí-gá te núu ní quide ndáá-ó àdi ñá túú ní quide ndáá-ó.

<sup>11</sup> Te Yá Ndiöxí càchí-gá núú tütú-gá:

Yúhú Yă Ndiöxí ndécú-í càchí tnúhu ndáá-í xii-ndo sã nchaa ñáyiu ngüíñí xití-yu núú-í, te nchaa-yu cáhá<sup>n</sup>-yu sá yühú cùú-í Ndiöxí.

Duha càchí Yă Ndiöxí núú tütú-gá.

<sup>12</sup> Núu xiá<sup>n</sup> nchaa-o ndì díí<sup>n</sup> nàcanj tnúhu-o núú Yă Ndiöxí nchaa sá ní quide-o.

*Vá dácuíta nìhnu tnàha-o*

<sup>13</sup> Núu xiá<sup>n</sup> vã cuátnùhu tnaha-gá-ndó, te cada yica-ndo càda-ndo mee-ni sá vâha, te vá cadá-ndó ì<sup>n</sup> sá ñà túú tàú-ndó càda-ndo cuendá sá vã cuíta nìhnu dava ñáyiu ndècu ndìhi-ndo ichi Xítóhó Jesucristú.

<sup>14</sup> Te yühú ndécú ndìhi-í Xítóhó Jesucristú te cùtnunì ndáá iní-í sá ncháá núú sá cúú càxi-o cuu-ni càxi-o te vá cúú cuèchi. Te ñáyiu sàni iní sá vã cúú càxí-yu te núu na càxí-yu te cuu cuèchi xií-yu.

<sup>15</sup> Te nchòhó, te núu cuendá sá xéxí-ndó nchaa núú sã cúú càxi-ndo, cuendá xiá<sup>n</sup> ñá túú-gã cúú vâha iní nchaa ñáyiu ndècu ndìhi-ndo ichi Xítóhó Jesucristú, te ñá túú-gã quidé-ndó sã cúú iní ndisa-ndö-yu



te núu duca<sup>n</sup> na càda-ndo, te núu ì<sup>n</sup> sá sání ìní-ndó càxi-ndo te cùtnuní ìní-ndó sá xǎ<sup>n</sup> cada-xi cuíta nihnu ñáyiú ndècu ndìhi-ndo ichi Xítóhó Jesucristú te vá cáxi-ndó xǎ<sup>n</sup> te núu duca<sup>n</sup>, chi Xítóhó Jesucristú ní xíhí-gá cuèndá-yu.

16 Te núu ì<sup>n</sup> sá quidé-ndó sàni ìní-ndó sá cúú-xí ì<sup>n</sup> sá vǎha, te ñáyiú càchí-yu sá ñà túú vǎha te vá cádá-ndó cuèndá sá vǎ càhá<sup>n</sup> cuèhé-yu cuèndá-ndó.

17 Te sá yíndàha ñaha Yá Ndiöxí xii-o xǎ<sup>n</sup> ío xini ñuhu-xi cada ndáá-ó cùndecu-o, te cundecu váha ndìhi tnàha-o, te cudíí ìní-ó cùndecu-o chi Espíritú-gá ndécú ndìhi ñaha-xi xii-o, te nchaa xéhé ío-gá cúnùu dacúxí sá cóhó sá cáxi-ó.

18 Te nchaa ñáyiú duca<sup>n</sup> quide nchaa sá ío-gá xíní ñuhu-xi, xinu cuechí-yu núu Xítóhó Jesucristú, te sá dúcá<sup>n</sup> quidé-yu te ndùu vétú ìní Yá Ndiöxí, te cùdiú-yu núu ñáyiú.

19 Te nchoo chí ná ndùcu-o nacuaá cada-o cùndecu ndìhi váha tnàha-o, te nducu tùcu-o nacuaá cada-o chindee tnúhu tnàha-o nacuaá cuíta cundáá-gá-ó núu Xítóhó Jesucristú quíhí<sup>n</sup>.

20 Te ñà díú sá cuèndá ì<sup>n</sup> núu sá xéxí-ó, te dàquee tíhú-ó sá vǎha ní quide ñaha Yá Ndiöxí xii tnàha ñáyiú-o. Te na càchí tnúhu ndáá-í xii-ndo sá ncháá-ní núu sá cúú càxi-o, te dìcò-ní sá ñà túú ndùu váha-xi núu sá cuèndá-ní sá cáxi-ó ì<sup>n</sup> núu sá cúú càxi-o cuíta nihnu ì<sup>n</sup> tnàha ñáyiú-o.

21 Te váha-gá sá vǎ cáxi-ó cùñú te vá cóhó ndídí, te ní ñà túú nǎgá cada-o te núu xító-o sá xǎ<sup>n</sup> cada te ngúíta tnàha ñáyiú-o càdá-yu sá ñà túú vǎha, àdi xító-o sá xǎ<sup>n</sup> cada te ngúíta-yu caní ì<sup>n</sup> caní úú ìní-yu cundecú-yu ichi Xítóhó Jesucristú, te vá cundáá-gá-yu núu-gǎ te núu duca<sup>n</sup> na càda-o.

22 Te núu ì<sup>n</sup> sá vǎha sàni ìní-ó càda-o, te vá dátúu-o núu ñáyiú chí mee-ní núu Yá Ndiöxí dátúu-o. Te nchoo cùu-o ñáyiú ío váha táhú-xi te núu cùtnuní ndáá ìní-ó sá quidé ndáá-ó núu nándi cùu sá quidé-ó, te cùtnuní ìní-ó sá ñà díú ì<sup>n</sup> cuéchi cùu-xi sá

quidé-ó.

23 Te núu nchoo sàni ìní-ó sá quidé vǎha-o àdi ñà túú quide váha-o òré xéxí-ó ì<sup>n</sup> núu sá xéxí-ó, te cuu cuéchi xii-o te núu duca<sup>n</sup> na càda-o. Te duca<sup>n</sup> cùu cuéchi xii-o chí ñà túú ì<sup>n</sup>-ní sá sání ìní-ó, chí nchaa núu sá quidé-ó sàni ì<sup>n</sup> sàni úú ìní-ó núu váha-ni àdi ñà túú vǎha-ni, te cuu cuéchi xii-o sá dúcá<sup>n</sup> quide-o.

## 15

*Cada-o sá vǎha sá cúú-xí tnàha ñáyiú-o*

1 Te nchoo ñáyiú ío váha sàndáá ìní ñáhá xii Xítóhó Jesucristú, xini ñuhu-xi cuáñaha-o tnúhu ndee ìní xii ñáyiú ñà túú nihí ndéé cùndecu ichi-gá, te vá cádá-ó mèe-ní sá cúú-xí mèe-o.

2 Te cada-o sá vǎha nàcuáa cuu váha ìní tnàha ñáyiú-o cuèndá cuu-xi sá vǎha sá cúú-xí-yu, te duca<sup>n</sup> cuíta níhí ndéé-gǎ-yu quindáá ìní-yu Xítóhó Jesucristú.

3 Te Xítóhó Jesucristú ñà túú ní quide-gá mee-ní sá cúú vǎha ìní méé-gǎ, te ní quee ndáá-xi nàcuáa càhá<sup>n</sup>-xi núu tütú Yá Ndiöxí nàcuáa ní xáha<sup>n</sup> Xítóhó Jesucristú xii-gá, te càchí-xi: “Nchaa ñáyiú cùu úhú ìní ñáhá xii-n ní xícuèhé ní xíduha ñáhá-yu xii-í”, duha càhá<sup>n</sup>-xi núu tütú Yá Ndiöxí nàcuáa ní xáha<sup>n</sup> Xítóhó Jesucristú xii-gá.

4 Te ndéé sanaha ní ngúndeé nchaa tnúhu Yá Ndiöxí núu tütú-gá, te duca<sup>n</sup> ní ngúndeé cuèndá dacuàha-o, te tnúhu-á<sup>n</sup> dánèhé ñáhá-xí cùnduu cahnu ìní-ó cuèi nándi nà yáha-o cùndecu-o ichi-gá, te sá xíi tnúhu-á<sup>n</sup> te vá ndìhú-gá ìní-ó cùndecu-o, te diu-ní sá xíi tnúhu-á<sup>n</sup> cundecu ndìhi-o tnúhu ndee ìní.

5 Te Yá Ndiöxí quidé-gǎ ndécú ndìhi-o tnúhu càhnu ìní, te diu-ní-gá quidé-gǎ ñà túú ndìhú ìní-ó ndècu-o. Te xicá<sup>n</sup> táhú-í núu-gǎ sá díú-gǎ ná cádá te cuu ì<sup>n</sup>nuu-ndo cùndecu-ndo datná ní quide mee Xítóhó Jesucristú cùtnàhá ní xíndecu-gá ñuyúú-a.

6 Te duca<sup>n</sup> nchàa-ndo cuu ì<sup>n</sup>nuu-ndo, te daníhí tnáhá-ndó yóçó táchí-ndó te cachí-ndó sá ío càhnu

cuu Yá Ndiöxí Yaa cúú Tátá Xítóhó Jesucristú.

*Ñáyiú ñá túú cùu ñáyiú isràél ní ñíhí-yu tnúhu Xítóhó Jesucristú*

7 Te núu xíã<sup>n</sup> chí quéhé<sup>n</sup> cuendá tnáhá dàtná ní quide Xítóhó Jesucristú ní quehe<sup>n</sup> cuendá ñáhá-gã xii-o, te núu duca<sup>n</sup> na càda-ndo te ío cuu càhnu Yá Ndiöxí.

8 Te na càchí tnúhu-í xii-ndo sã Xítóhó Jesucristú ní quixi-gá ní quide-gá sá vãha sá cúú-xí ñáyiú isràél, te sá dúcá<sup>n</sup> ñí quide-gá xíã<sup>n</sup> cútnùní ndáá iní-ó sã Yá Ndiöxí quidé-gã ì<sup>n</sup> sá càhá<sup>n</sup>-gá, chí Xítóhó Jesucristú ní quide-gá nchaa nàcuáa ní xáha<sup>n</sup> Yá Ndiöxí xii cue ñaní tnáhá-ó ní xíndecu ndéé sanaha.

9 Te duca<sup>n</sup> ñí quide Xítóhó Jesucristú sá vãha sá cúú-xí ñáyiú isràél cuendá nchaa ñáyiú ñá túú cùu ñáyiú isràél cachí-yu sá ío càhnu cuu Yá Ndiöxí, te duca<sup>n</sup> quèsahá-yu chí ío cùndahú iní ñáhá-gã chíndèe ñaha-gá xii-yu, te quee ndáá-xi nàcuáa càhá<sup>n</sup>-xi núu tütú Yá Ndiöxí núu càchí-xi:

Yúhú cachí-í sá ío càhnu cuu-n núu nchaa ñáyiú ñá túú cùu ñáyiú isràél,

te cata-í ndudú chiñuhu ñaha-í xii-n.

Duha càchí-xi núu tütú-gá

10 Te càchí tucu-xi núu tütú-gá:

Te nchòhó ñáyiú ñá túú cùu ñáyiú isràél ío chí cúdí<sup>í</sup> iní ndíhi ñáyiú isràél ñáyiú ndècu ndíhi-í.

Duha càchí-xi núu tütú-gá.

11 Te càchí tucu-xi íngá xichi núu tütú-gá:

Nchaa nchòhó ñáyiú ñá túú cùu ñáyiú isràél chí càhá<sup>n</sup> sá ío càhnu cuu Yá Ndiöxí,

te nchaa ñáyiú na càhá<sup>n</sup>-yu sá ío càhnu cuu-gá.

Duha càchí-xi núu tütú-gá.

12 Te ndíi Chàíá càchí tucu ndíi núu tütú Yá Ndiöxí:

Coo ì<sup>n</sup> ñaní tnáhá ndíi Isáí téé ní xíndecu ndéé sanaha,

te téé-á<sup>n</sup> taxi tnùní-dé cue ñáyiú ñá túú cùu ñáyiú isràél,

te ñáyiú-á<sup>n</sup> cundee cùu cahnu iní ñáhã-yu xii-dé.

Duha ní càhá<sup>n</sup> ndíi Chàíá càchí-xi núu tütú-gá.

13 Te xicá<sup>n</sup> táhù-í núu Yá Ndiöxí Yaa ní taxi tnúhu ndee iní ndécú ndíhi-o sá méé-gã ná càda ío cudí<sup>í</sup> iní-ndó cùndecu-ndo, te duca<sup>n</sup> ío vãha cundecu iní-ndó núú-gã chí sàndáá iní-ndó-gã, te duca<sup>n</sup> Espíritú-gá ná càda te uu<sup>n</sup>-gá uu<sup>n</sup>-gá cuíta ngùndecu ndíhi-ndo tnúhu ndee iní quíhí<sup>n</sup> sá cáda vãha ñaha-gã xii-ndo.

14 Te nchòhó ñáyiú ndècu ndíhi-í ichi Xítóhó Jesucristú cùtnuní ndáá iní-í sá nchòhó ío vãha iní-ndó, te duca<sup>n</sup> ío vãha cùtnuní iní-ndó nchaa tnúhu vãha, te duca<sup>n</sup> ío dásahú tnáhá-ndó nàcuáa cundecu-ndo.

15 Te dava tnúhu ní chídó tnùn-í núu tütú-a cùu-xi tnúhu sá ío càhá<sup>n</sup>-í dóho-ndo, te duca<sup>n</sup> ñí tee-í cuendá sá nchòhó dandàcu iní-ndó tnúhu-á<sup>n</sup>, te ní tee-í chí Yá Ndiöxí ní cundahú iní ñáhá-gã xii-í ní taxi-gá chiú<sup>n</sup> quide-í

16 xínú cuèchi-í núu Xítóhó Jesucristú càhá<sup>n</sup>-í tnúhu-gá núu ñáyiú ñá túú cùu ñáyiú isràél. Te tnúhu-á<sup>n</sup> cúú-xí tnúhu sá sánú ichi ñaha xii-o nàcuáa naníhí táhú-ó, te duca<sup>n</sup> dānehé-í ñáyiú ñá túú cùu ñáyiú isràél tnúhu Yá Ndiöxí cuendá cuú-yu dàtná ì<sup>n</sup> sá ndúú táhú-gã, te Espíritú-gá quidé-xí cùu-yu ñáyiú cùdú núú-gã, te cùu vãha iní ñáhá-gã xii-yu.

17 Te ío vãha cùu iní-í cuendá nchaa chiú<sup>n</sup> quide-í sá cúú-xí Yá Ndiöxí, chí Xítóhó Jesucristú ndécú ndíhi ñaha-gá xii-í.

18 Te mee-ni nàcuáa quide Xítóhó Jesucristú chíndèe ñaha-gá xii-í xíã<sup>n</sup>-ni càhá<sup>n</sup>-í, te sá dúcá<sup>n</sup> quide-gá xíã<sup>n</sup> ní sàndáá iní cue ñáyiú ñá túú cùu ñáyiú isràél tnúhu-gá. Te duca<sup>n</sup> chí ní chindee ñaha-gá xii-í ní càhá<sup>n</sup>-í tnúhu-gá te duca<sup>n</sup>-ni ñí chindee ñaha-gá xii-í ní quide-í títní núu sã ñí quide-í núú-yu ní xiní-yu.

19 Te Espíritú Yá Ndiöxí ní quide-xi ní quide-í títní núu sã vã yõ tnàhí ndàcu cada ní xiní-yu te ío ní cuñúhu-yu. Te nchaa ñuú ní sáhã<sup>n</sup>-í ní càhá<sup>n</sup>-í tnúhu Xítóhó Jesucristú núu ñáyiú cuèi ndéé ñuú Jerusàlén, te cuèi ndéé distrítú Ílírícú, núu nchaa ñuú-á<sup>n</sup>

nĩ sáhá<sup>n</sup>-í ní cáhá<sup>n</sup>-í núu-yu tnúhu sá cáhá<sup>n</sup> nàcuáa naníhí tǎhú-ó.

<sup>20</sup> Te duca<sup>n</sup> ïo ndùcu ndee-í cáhá<sup>n</sup>-í tnúhu sá cáhá<sup>n</sup> nàcuáa naníhí tǎhú-ó núu vátá nihí-gá-yu tnúhu cuendá Xítohó Jesucristú, te duca<sup>n</sup> quide-í chi ñá túú cuini-í quihí<sup>n</sup>-í cáhá<sup>n</sup>-í tnúhu-gá núu sà xindecu ñáyu cáhá<sup>n</sup> tnúhu-gá.

<sup>21</sup> Te quide-í nàcuáa cáhá<sup>n</sup>-xi núu tütú Yǎ Ndiöxí núu cǎchí-xi: Ñáyu vátá nihí-gá tnúhu cuendá Yaá quixi ñuyú te nihí-yu, te duca<sup>n</sup> təcú tnúhu-gá. Duha cǎchí-xi núu tütú-gá.

*Té Pǎblú cuini-dé quihí<sup>n</sup>-dé ñuú Rómá*

<sup>22</sup> Te sá dúcá<sup>n</sup> cáhá<sup>n</sup>-í tnúhu-gá ñuú xǎ<sup>n</sup> ñá túú ní ndàcu-í quixi-í quixi coto ñaha-í xii-ndo cuèi duca<sup>n</sup>-ni sàni iní-í quixi coto ñaha-í.

<sup>23</sup> Te ní cuu titní cuía duca<sup>n</sup>-ni sàni iní-í quixi coto ñaha-í xii-ndo, te vitna ní ndihí-í nchaá iha ní cáhá<sup>n</sup>-í tnúhu Xítohó Jesucristú núu nchàa ñáyu.

<sup>24</sup> Núu xǎ<sup>n</sup> sání iní-í sá ndùu na quihí<sup>n</sup>-í nació<sup>n</sup> España te yáha cáhá<sup>n</sup>-í quini-í nása ndècu-ndo, te dàvá-án ïo cudí<sup>n</sup> iní-ó cùndecu tnaa-o, te duca<sup>n</sup> te òré nucúhu<sup>n</sup> tucu-í ichi te cada ndee iní-ndó chindee ñaha-ndo xii-í.

<sup>25</sup> Te vitna quihí<sup>n</sup>-í ñuú Jerusalén quínehe-í sá ndúú tǎhú ñáyu ndècu ichi Xítohó Jesucristú xindecu yacá<sup>n</sup>.

<sup>26</sup> Te ñáyu xindecu ichi Xítohó Jesucristú ndécú distritú Macèdoniá, ndihí distritú Acáyá ní cuu ñnùu-yu ní sacá<sup>n</sup> tnáhá-yu sá ndúú tǎhú ñáyu ndàhú xindecu ichi-gá ndécú ñuú Jerusalén.

<sup>27</sup> Te duca<sup>n</sup> tnàhí ní cudí<sup>n</sup> iní-yu cadá-yu, te duca<sup>n</sup> tnàhí tàú-yu cadá-yu chindèe-yu ñáyu xindecu ñuú Jerusalén. Te ñáyu Macèdoniá ndihí ñáyu Acáyá-án ñá túú cùu-yu ñáyu isràél. Te ñáyu xindecu ñuú Jerusalén cùu-yu mee-ni ñáyu isràél, te duca<sup>n</sup> tàú-yu cadá-yu chi sá cuendá ñáyu isràél-án nĩ nihí-yu tnúhu sá cáhá<sup>n</sup> nàcuáa naníhí tǎhú-yu, núu xǎ<sup>n</sup> tàú-yu chindee ñahá-yu ndihí nchaá sá nihí-yu.

<sup>28</sup> Te sátá ná yáha quínguáha cuendá-í-yu sá ndúú tǎhú-yu, te duca<sup>n</sup> te dǎtnúni quee-í quihí<sup>n</sup>-í nació<sup>n</sup> España, te ichi yáha-í yáha cáhá<sup>n</sup>-í núu ndécú-ndó.

<sup>29</sup> Te cùtnuní ndáá iní-í sá òré ná quèxio-í núu ndécú-ndó, te Xítohó Jesucristú ïo chindee ñaha-gá xii-í cáhá<sup>n</sup>-í tnúhu-gá núu-ndo nàcuáa ïo váha cundecu-ndo ichi-gá.

<sup>30</sup> Te nchòhó ñáyu ndècu ndihí-í ichi Xítohó Jesucristú cáhá<sup>n</sup> ndàhú-í núu-ndó sǎ ïo chindee ñaha-ndo xii-í cáhá<sup>n</sup> ndihí-o Yǎ Ndiöxí cuendá-í, te duca<sup>n</sup> càda-ndo chi ndècu ndihí-ndo Xítohó Jesucristú. Te Espíritú Yǎ Ndiöxí quidé-xí cùu iní tnáhá-ó ñn-ó.

<sup>31</sup> Te ïo chí cǎcá<sup>n</sup> tǎhú núu Yǎ Ndiöxí sá ná coto ñaha-gá xii-í, te ñá túú ná cada ñaha nchàa ñáyu ñá túú sàndáá iní ñahá xii-gá xindecu distritú Júdeá. Te cǎcá<sup>n</sup> tǎhú tucu-ndo núu-gǎ sá ncháá sǎ cǎnehe-í quihí<sup>n</sup> nduu tǎhú ñáyu ndècu ichi-gá ndécú ñuú Jerusalén ïo váha cuu iní-yu quehe<sup>n</sup> cuendá-yu.

<sup>32</sup> Te duca<sup>n</sup> càda-ndo cuendá sá ñuú Yǎ Ndiöxí ná cǎchí-gá te ïo cudí<sup>n</sup> iní-í òré quexio-í núu ndécú-ndó, te ïo váha cuu iní-í cundecu ndihí ñaha tnàhí xii-ndo.

<sup>33</sup> Te vitna xicá<sup>n</sup> tǎhú-í núu Yǎ Ndiöxí Yaá quidé ïo váha cùu iní-ó ndècu-o sá ná chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu.

## 16

*Té Pǎblú quidé ndèe iní-dé ñáyu ndècu ñuú Rómá*

<sup>1</sup> Te yúhú tendaha-í tá Fèbé quixi-xi núu ndécú-ndó, te tnàhá-xi ndècu-xi ichi Xítohó Jesucristú, te quide-xi chiu<sup>n</sup> Yǎ Ndiöxí sá cúu-xi ñáyu ndècu ichi Xítohó Jesucristú xindecu ñuú Cèncreá.

<sup>2</sup> Te cuini-í sá ïo váha cuu iní-ndó quèhe<sup>n</sup> cuendá-ndó-xí, chi ndècu ndihí-xi Xítohó Jesucristú, te cada-ndo nàcuáa tàú-xi cunduu dǎtná tàú-xi cada ñáyu ndècu ichi-gá, te ïo chindee-ndo-xi te núu ná cúu sǎ xini ñuhu-xi, chi tnàhá-xi ïo chindee-xi cue

ñáiyu ndècu ichi Xítohó Jesucristú, te tnàhá yúhú duca<sup>n</sup> ïo chìndee-xi.

<sup>3</sup> Te cúñaha-ndo ïo na càda ndee iní té Àquilú ndihí ñadìhí-dé tá Prìscilá, chi ñáiyu-á<sup>n</sup> nǐ quide chi<sup>u</sup>-í ndihí-yu ní quide-ndí chi<sup>u</sup><sup>n</sup> Xítohó Jesucristú.

<sup>4</sup> Chi mèe-yu ní cácu cuú-yu sá cuendá sá nǐ dácäcu ñàhá-yu xii-í sá nǐ yáha-í, núu xiá<sup>n</sup> ïo ndàcá<sup>n</sup> táhù-í núu-yu, te ñá díú-ní yúhú duca<sup>n</sup> ïo ndàcá<sup>n</sup> táhù-í núu-yu chi tnàhá nchaa ñáiyu ñá túú cùu ñáiyu isràél xĩndecu ichi-gá xĩndecu nchaa xichi duca<sup>n</sup> ïo ndàcá<sup>n</sup> táhù-yu núú tē Àquilú ndihí núú ñadìhí-dé tá Prìscilá.

<sup>5</sup> Te cúñaha tùcu-ndo sá ïo na càda ndee iní nchaa ñáiyu xĩndecu ichi Xítohó Jesucristú tàcá vehe té Àquilú ndihí tá Prìscilá dácuahá-yu tnúhu-gá, te cúñaha tùcu-ndo sá ïo na càda ndee iní té Epènetú chi tnàhá-dé ïo ñùhu iní-í-dé, chi té-á<sup>n</sup> cúú-dě tée díhna nuu nǐ sándáá iní tnúhu Xítohó Jesucristú distritú Acáyá.

<sup>6</sup> Te cúñaha tùcu-ndo sá ïo na càda ndee iní tá Màriá xíchí ndécú ndihí-ndo, xíchí ïo ndùcu ndee xinu cuechi núú Xítohó Jesucristú.

<sup>7</sup> Te cúñaha tùcu-ndo sá ïo na càda ndee iní cue tée cùu ndi mee-í té Andrónicú ndihí té Jùniás, chi tnàhá-güedé ní xíhi ndihí ñaha-güedě xii-í vecaá, te ïo cùdiu-güedé núú nchaa cue tée ní táuchíú<sup>n</sup> Jèsús cáhá<sup>n</sup> tnúhu-gá. Te díhna-gá-güedé ní sándáá iní-güedé tnúhu Xítohó Jesucristú dácúxí yúhú.

<sup>8</sup> Te cúñaha-ndo sá ná càda ndee iní té Àmpliás chi tnàhá-dé ïo ñùhu iní-í-dé, te ndècu-dé tnàhá-dé ichi Xítohó Jesucristú.

<sup>9</sup> Te cúñaha tùcu-ndo xii té Bănú tée cùndihí ñaha xii-o quide-o chi<sup>u</sup><sup>n</sup> Xítohó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tnàhá-dé ïo ñùhu iní-í-dé.

<sup>10</sup> Te cúñaha tùcu-ndo xii té Àpelés sá ïo na càda ndee iní-dé, chi té-á<sup>n</sup> ïo váha cùndáá-dé núú Xítohó Jesucristú, te cúñaha tùcu-ndo xii ñáiyu xĩndecu

vehe té Arístóbulú sá ïo na càda ndee iní-yu.

<sup>11</sup> Te cúñaha-ndo xii té Herodión tée cùu ndi mee-í sá ïo na càda ndee iní-dé, te cúñaha-ndo xii ñáiyu ndècu ichi Xítohó Jesucristú xĩndecu vehe té Nàrcisú sá ïo na càda ndee iní-yu.

<sup>12</sup> Te cúñaha-ndo xii tnàhá tá Trifená ndihí tá Trifosá sá ïo na càda ndee iní-yu, chi tnàhá-yu quidè-yu chi<sup>u</sup><sup>n</sup> Xítohó Jesucristú. Te tnàhá tá Pèrsidá xíchí ndécú ndihí-o ichi Xítohó Jesucristú cúñaha-ndo xii-xi sá ïo na càda ndee iní-xi, chi tnàhá-xi ïo ndùcu ndee-xi quide-xi chi<sup>u</sup><sup>n</sup> Xítohó Jesucristú.

<sup>13</sup> Te cúñaha-ndo tnàhá té Rűfú tée ïo váha sándáá iní tnúhu Xítohó Jesucristú sá ïo na càda ndee iní-dé ndihí náná-dě, chi ñaha-á<sup>n</sup> quidè iní-í sá cúú-á<sup>n</sup> dàtná náná-í.

<sup>14</sup> Te cúñaha-ndo sá ïo na càda ndee iní té Asíncritú, ndihí té Flègonté, ndihí té Hèrmás, ndihí té Pàtrobás, ndihí té Hèrmés, ndihí nchaa dava-gá cue ñáiyu ndècu ndihí-o ichi Xítohó Jesucristú xĩndecu ndihí-güedé.

<sup>15</sup> Te cúñaha tùcu-ndo sá ïo na càda ndee iní té Filológó, ndihí tá Jùliá, ndihí té Nèréú, ndihí cúha té Nèréú, ndihí tá Òлимпás, ndihí nchaa dava-gá ñáiyu sándáá iní tnúhu Xítohó Jesucristú xĩndecu ndihí-yu.

<sup>16</sup> Te ïo yĩñùhu cada ndee iní tnàhá-ndó ñ<sup>n</sup> ñ<sup>n</sup>-ndo. Te nchaa ñáiyu tàcá nchaa iha dácuaaha tnúhu Xítohó Jesucristú quidè ndee iní ñáhá-yu xii-ndo.

<sup>17</sup> Te nchòhó ñáiyu ndècu ndihí-í ichi Xítohó Jesucristú càhá<sup>n</sup>-í dóho-ndo sá cádá cuendá-ndó núu ïó ñáiyu quide nacuaá vá cúú ñ<sup>n</sup>nuu-ndo cundecu-ndo, chi ñáiyu-á<sup>n</sup> sánú ichi ñahá-yu ñ<sup>n</sup> ichi ñá túú vǎha, chi ñá túú ñ<sup>n</sup>-ni cuu-xi tnúhu càhá<sup>n</sup>-yu ndihí tnúhu sá nǐ níhí-ndó ndècu ndihí-ndo, te ñáiyu duca<sup>n</sup> xĩquide vá nihí tnàhá-gǎ-ndó ndihí-yu.

<sup>18</sup> Chi ñáiyu-á<sup>n</sup> ñà túú quidè-yu chi<sup>u</sup><sup>n</sup> sá cúú-xí Xítohó Jesucristú, chi mee-ni sá cúú-xí mèe-yu quidè-yu, te mee-ni nchaa tnúhu sá ïo vii ïo váha cuáhá<sup>n</sup> càhá<sup>n</sup>-yu òré cuáhá<sup>n</sup>-yu

dàndahú-yu nchaa ñáyiú ío yáchí sàndáá iní-xi ì<sup>n</sup> tnúhu.

<sup>19</sup> Te nchaa ñáyiú ñihí-yu tnúhu sá nchòhó sàndáá iní-ndó tnúhu Xítóhó Jesucristú, núu xíá<sup>n</sup> ío cùdíí iní-í. Te cuíní-í sá nchòhó ío váha cutnùní iní-ndó nàcuáa cada-ndo mèe-ni sá váha, te vá cání iní-ndó càda-ndo datná xíquide nchaa ñáyiú ndècu ichi cuehé ichi duha.

<sup>20</sup> Te Yá Ndiöxí Yaa quidé ìo váha cùu iní-ó ndècu-o ío ndíhi cada-gá cuèndá sá sàculhá ñà túú-gã ná cada ñaha-xi xii-ndo, te xìcá<sup>n</sup> táhù-í núú Xítóhó Jesucristú sá ìo na chindee chítúu ñaha-gã xii-ndo.

<sup>21</sup> Te té Timùteú téé quide ndíhi-í chiu<sup>n</sup> Xítóhó Jesucristú iha quide ndee iní ñáhá-dě xii-ndo, te tnàhá té Lùciú, ndíhi té Jàson, ndíhi té Sosipàtér cue téé cùu ndí mee-í quidé ndèe iní ñáhá-güedě xii-ndo.

<sup>22</sup> Te tnàhá yúhú té Tèrciú téé càdúha tutú-a cuèndá té Páblú quidé ndèe iní ñáhá-í xii-ndo, chi ì<sup>n</sup>-ni cùu-o ndíhi Xítóhó Jesucristú.

<sup>23</sup> Te tnàhá té Gáyú téé dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítóhó Jesucristú. Te tnàhá té Èrastú téé yìndaha díhú<sup>n</sup> ñùú quidé ndèe iní ñáhá-dě xii-ndo, te tnàhá té Cuártú téé ndècu ndíhi-o ichi Xítóhó Jesucristú quidé ndèe iní ñáhá-dě xii-ndo.

<sup>24</sup> Te xìcá<sup>n</sup> táhù-í núú Xítóhó Jesucristú sá ìo na chindee chítúu ñaha-gã xii-ndo nchàa-ndo. Te duca<sup>n</sup> na cùnduu.

*Cáhá<sup>n</sup>-ó sã ìo càhnu cuu Yá Ndiöxí*

<sup>25</sup> Te vitna chí ná càchí-ó sã ìo càhnu cuu Yá Ndiöxí, chí mee-gã cada te ío-gá cuita níhí ndéé-gã-ndó cùndecu-ndo ichi Xítóhó Jesucristú dàtná càchí tnúhu sá càhá<sup>n</sup> nàcuáa naníhí táhù-ó, tnúhu sá dánèhé-í ñáyiú cuèndá Xítóhó Jesucristú, te nchaa tnúhu-a ì<sup>n</sup>-ni cùu-xi ndíhi nchaa tnúhu sá ní cachí Yá Ndiöxí cuu yuhu ndéé cùtnàhá ní ngáva ñuyíú, te vitna ní quee túu-xi,

<sup>26</sup> chí mee Yá Ndiöxí ní dátüu-gá núú-ó vitna, te càhá<sup>n</sup>-ndí nàcuáa ní chídó tnùní cue téé ní xóo càhá<sup>n</sup> tnúhu Yá Ndiöxí ndéé sanaha. Te duca<sup>n</sup> tnúhu sá ndúú yùhu ní cuu ta xité nuu-xi ñihí ñuyíú cuáhá<sup>n</sup>, chí duca<sup>n</sup> ní cachí Yá Ndiöxí Yaa ndécú nchàa nduu nchaa quíú cunduu cuèndá sá quèndáá iní ñáhá ñáyiú xii-gá, te tní<sup>n</sup>-yu nchaa tnúhu càhá<sup>n</sup>-gá.

<sup>27</sup> ;Te ì<sup>n</sup>dii-ni Yá Ndiöxí cúú-gã Yaa ío sàá sá xìní tnùní-xi! ;Te nchaa-o chí ná càchí-ó sã ìo càhnu cuu-gá, chí ndècu ndíhi-o Xítóhó Jesucristú, te duca<sup>n</sup>-ni càda-o ní caa ní quíhí<sup>n</sup>! Te duca<sup>n</sup> na cùnduu. Te ío chí cadá ndèe iní-ñã vitna.

## TUTÚ DÍHNA NUU NĪ CADÚHA TÉ PĀBLŪ QUIHĪ<sup>n</sup> NDAHA ÑÁYIU ÑUÚ CÒRINTÚ

*Té Pāblū cādūha-dé tutú quihĭ<sup>n</sup> ndaha ñáyiu xĭndecu ichi Xítóhó Jesucristú ndécú ñuú Còrintú*

<sup>1</sup> Yúhú té Pāblū ní cáhá<sup>n</sup> ñáhá Yă Ndiöxí xii-í cuendá sá cáhá<sup>n</sup>-í tnúhu Xítóhó Jesucristú núú ñáyiu, chi duca<sup>n</sup> nĭ cachí Yă Ndiöxí cunduu. Te càdúha-í tutú-a ndihĭ té Sōstenés té ndècu ndihĭ-o ichi Xítóhó Jesucristú

<sup>2</sup> cuendá daquixi-í ndaha nchòhó ñáyiu xĭndecu ichi Yă Ndiöxí ndécú ñuú Còrintú, chi nchòhó cúú-ndó ñáyiu cùu cuendá Yă Ndiöxí cuendá sá ndécú ndihĭ-ndo Xítóhó Jesucristú. Te ñu-ni-ndo cùu-ndo ñáyiu ní cáhá<sup>n</sup> ñáhá Yă Ndiöxí cuendá cundecu yĭñúhu-ndo núú-gă, ndihĭ nchaa dava-gá ñáyiu ndècu nchaa xichi, ñáyiu cachí sá ĩo càhnu cuu Xítóhó Jesucristú. Te Yaá-á<sup>n</sup> cúú-gă Xítóhó-yu, te ñu-ni-gă cúú-gă Xítóhó nchoo tucu.

<sup>3</sup> Te xicá<sup>n</sup> táhù-í núú Tătá-ó Dütú Ndiöxí ndihĭ núú Xítóhó Jesucristú sá ndĭ nduú-gá ĩo na chĭndee chitúu ñaha-gă xii-ndo, te ĩo váha cuu iní-ndó cundecu-ndo.

*Yă Ndiöxí ĩo chĭndee ñaha-gá xii-o cuendá sá ndécú-ó ndihĭ Xítóhó Jesucristú*

<sup>4</sup> Te duca<sup>n</sup>-ni ĩo ndácá<sup>n</sup> táhù-í núú Yă Ndiöxí cuendá-ndó, chi mee-gă ĩo chĭndee chitúu ñaha-gá xii-ndo sá cuendá Xítóhó Jesucristú.

<sup>5</sup> Te cuendá sá ndécú-ndó ndihĭ Xítóhó Jesucristú, núú xĭá<sup>n</sup> Yă Ndiöxí ĩo chĭndee ñaha-gá xii-ndo sá dĭquí-ndó nàcuáa cáhá<sup>n</sup>-ndó, ndihĭ nàcuáa cùtnuní iní-ndó,

<sup>6</sup> chi tnúhu sá ni nihĭ-ndó cuendá Xítóhó Jesucristú ní quée-xi iní-ndó.

<sup>7</sup> Te xĭá<sup>n</sup> nŭu nchaa sá vāha ñá túú tnàhĭ cùmánĭ xii-ndo chi Yă Ndiöxí ĩo chĭndee ñaha-gá. Te duca<sup>n</sup> quide-gá nĭni nchòhó nĭ yùhu nĭ

iní-ndó ndètu-ndo sáá nduu quixi tucu Xítóhó Jesucristú.

<sup>8</sup> Te Yă Ndiöxí duca<sup>n</sup>-ni ĩo chĭndee ñaha-gá xii-ndo cuendá sá vā yōo teñaha cuēchi nduu na quixi tucu Xítóhó Jesucristú.

<sup>9</sup> Te nchaa sá cáhá<sup>n</sup> Yă Ndiöxí dacuítĭ quide-gá, te ñu-gá cúú-gă Yaá ní cáhá<sup>n</sup> ñáhá xii-ndo cuendá cuu ĩ<sup>n</sup>nuu-ndo ndihĭ Déhe-gá Xítóhó Jesucristú Yaá cúú Xítóhó-ó.

*Ñá túú cùu ĩ<sup>n</sup>nuu ñáyiu ndècu ichi Xítóhó Jesucristú*

<sup>10</sup> Te nchòhó ñáyiu ndècu ndihĭ-í ichi Xítóhó Jesucristú cáhá<sup>n</sup>-í dóho-ndo sá vā ndĭ dĭí<sup>n</sup> càni iní-ndó, te ĩo cuu ĩ<sup>n</sup>nuu-ndo cundecu-ndo, te ĩ<sup>n</sup>-ni càni iní-ndó, te ĩ<sup>n</sup>-ni càda-ndo chi duca<sup>n</sup> cuinĭ-gá cunduu.

<sup>11</sup> Te duha cáhá<sup>n</sup>-í dóho nchòhó ñáyiu ndècu ndihĭ-í ichi Xítóhó Jesucristú, chi cue ñáyiu vehe té Clòé ní cachí tnúhu-yu xii-í sá ñà túú cùu ĩ<sup>n</sup>nuu-ndo ndecu-ndo.

<sup>12</sup> Te duha ndūu tnúhu ní nihĭ-í nàcuáa cùu ndecu-ndo, chi dava-ndo càchĭ-ndó: “Yúhú cúú-í cuendá té Pāblū.” Te dava-ndo càchĭ-ndó: “Yúhú cúú-í cuendá té Àpolós.” Te dava-ndo càchĭ-ndó: “Yúhú cúú-í cuendá té Pēlū.” Te dava tucu-ndo càchĭ-ndó: “Yúhú cúú-í cuendá Xítóhó Jesucristú”, duha càchĭ-ndó.

<sup>13</sup> Te vá dúcá<sup>n</sup> cáhá<sup>n</sup>-ndó chi ñá túú nă daha Xítóhó Jesucristú ndécú chi ĩ<sup>n</sup>ndĭ-ni-gă. Te ñá dĭú yŭhú té Pāblū ní xĭhĭ-í núú cùrúxĭ sá cuendá-ndó, te ni ñà túú ní sàndute-ndo cuendá sá yŭhú cuu cuendá ñáhà-í xii-ndo.

<sup>14</sup> Te táxāhu xii Yă Ndiöxí chi ñá dĭú nchàa-ndo ni dacuandute-í, chi té Crispú-ni ndihĭ té Găyú-ni ní dācuándute-í-güedé.

<sup>15</sup> Te xĭá<sup>n</sup> nŭu vá cúú tnàhĭ cáhá<sup>n</sup>-ndó sá nĭ sandute-ndo sá cúú cuendá ñáhà-í xii-ndo.

<sup>16</sup> Te ní ndacu tucu iní-í sá tnàhā tucu ñáyiu cùu ndĭ mee té Estēfanás ní dācuándute-í, te ñu-ná ñáyiu-á<sup>n</sup> te sànuu sá ñà túú-gă nágá ñáyiu ni dācuandute-í.

<sup>17</sup> Te Xítóhó Jesucristú ñá túú ní tendaha ñaha-gá xii-í sá dācuándute-í ñáyiu, chi ní tendaha ñaha-gá xii-í

sá cãhá<sup>n</sup>-í tnúhu-gá núŷ-yu, tnúhu sá cãhá<sup>n</sup> nãcuáa naníhí tãhú-ó. Te ñá túú cãhá<sup>n</sup>-í dàtná cãhá<sup>n</sup> ñáyiu túha. Te duca<sup>n</sup> quide-í cuendá sá nchòhó quíndáá váha iní-ndó tnúhu sá cãhá<sup>n</sup> nãcuáa ní xíhí Xítohó Jesucristú núú cùrúxí. Chi núu na cãhá<sup>n</sup>-í dàtná cãhá<sup>n</sup> ñáyiu túha te nchòhó vá quíndáá iní-ndó tnúhu-á<sup>n</sup> nãcuáa tàú-xi cundu.

*Sá cuendá Xítohó Jesucristú cútnùnì iní-ó sã ïo cãhnu cuu Yá Ndiõxí*

18 Te nchaa ñáyiu ta xíta nihnu cuáhá<sup>n</sup> cãchí-yu sá ñà túú nãndíhi tnúhu sá cãhá<sup>n</sup> nãcuáa ní xíhí Xítohó Jesucristú núú cùrúxí, dico sá cúú-xí nchò ñáyiu sa ní naníhí tãhú, chi tnúhu-á<sup>n</sup> cúú-xí ì<sup>n</sup> tnúhu sá ñí taxi Yá Ndiõxí ndécú ndíhi-o cuendá ndacu-gá cada-gá nchaa nãcuáa cuíní-gá iní-ó,

19 te quèe ndáá-xi nãcuáa cãhá<sup>n</sup>-gá núú tütú-gá núú cãchí-xi:

Yúhú cada-í te nchaa ñáyiu túha vá nãndíhi-gá nchaa sá xínì tnùnì-yu,

te nchaa ñáyiu ío váha sàá díquí-xi vá nãndíhi-gá nchaa nãcuáa sàni iní-yu.

Duha cãchí Yá Ndiõxí núú tütú-gá.

20 Te xíã<sup>n</sup> cútnùnì iní-ó sã ncháá ñáyiu sàni iní-xi sá ïo túha ndècu ñuyíú-a, ndíhi nchaa cue tée dàcuaha ñaha xií-yu nchaa tnúhu ní chídó tnùnì ndíi Moisés, ndíhi nchaa ñáyiu ío váha sàá díquí-xi cãhá<sup>n</sup> cuendá nchaa sá ío ñuyíú-a, te nchaa ñáyiu-á<sup>n</sup> cãchí Yá Ndiõxí sá ñà túú nãndíhi nchaa sá xínì tnùnì-yu sá cúú-xí-gã.

21 Te Yá Ndiõxí ío váha cùtnùnì iní-gá nãcuáa quide-gá, chi ñá túú dàña-gá cundecu ndíhi ñãhá-yu xii-gá sá cuendá nchaa sá ñí sáá díquí méè-yu, te duca<sup>n</sup> quide-gá chi cuíní-gá sá cùndedóho-yu tnúhu sá sánì iní-yu ñá túú nãndíhi. Te sá cuendá tnúhu-á<sup>n</sup> te naníhí tãhú-yu te núu na quíndáá iní ñãhá-yu xii-gá.

22 Te cue ñáyiu isràél cuínì-yu quinì-yu sá vã yóo tnàhí ndàcu cada,

te cue ñáyiu griégú nchicú<sup>n</sup> nihnú-yu nchaa sá dácuaaha ñáyiu ío túha.

23 Dico nchoo yìhi-o cãhá<sup>n</sup>-ó núú ñáyiu sá Xítohó Jesucristú ní xíhí-gá núú cùrúxí. Te cue ñáyiu isràél ñá túú tnàhí tnàhá iní-yu cundedóho-yu tnúhu-á<sup>n</sup>. Te cue ñáyiu ñá túú cùu ñáyiu isràél cãchí-yu sá ñà túú vèdana nãndíhi tnúhu-á<sup>n</sup>.

24 Dico sá cúú-xí nchaa ñáyiu ní cãhá<sup>n</sup> ñãhá Yá Ndiõxí chi cuèi cúú-yu ñáyiu isràél àdi ñá túú cúú-yu, dico ñáyiu-á<sup>n</sup> cãchí-yu sá sã cuendá Xítohó Jesucristú cútnùnì iní-yu sá ïo cãhnu cuu Yá Ndiõxí te ndècu ndíhi-gá nchaa sá xínì tnùnì-gá.

25 Te sá quidé Yá Ndiõxí cãchí ñáyiu ñuyíú-a sá ñà túú nãndíhi, dico xíã<sup>n</sup> ío-gá nãndíhi dàcúúxí sã sánì iní méè-yu. Te sá ñí xíhí Xítohó Jesucristú núú cùrúxí, xíã<sup>n</sup> cãchí ñáyiu sá ñá túú ní nihí ndéé Yá Ndiõxí cada-gá sá ñí sani iní-gá cada-gá. Dico sá dúcá<sup>n</sup> ñí quide Yá Ndiõxí, xíã<sup>n</sup> cúú-xí sã ïo-gá ní níhí ndéé-gã ní quide-gá ì<sup>n</sup> sá ñí sani iní-gá dàcúúxí sã sánì iní méè ñáyiu ñuyíú-a.

26 Te nchòhó ñáyiu ndècu ndíhi-í ichi Xítohó Jesucristú, chí dándàcu iní nãcuáa ndècu-ndo cútnàhá ní cãhá<sup>n</sup> ñãhá Yá Ndiõxí xii-ndo, chí sacú-ni-ndo túha dàcúúxí ñáyiu ñá túú ndècu ichi-gá. Te duca<sup>n</sup> sàcú-ni-ndo tàxi tnùnì-ndó, te ñiu-ni duca<sup>n</sup> sàcú-ndó nèhe ñáyiu sá yíñùhu núú-ndó.

27 Te ñáyiu ñá túú ndècu ichi Yá Ndiõxí cãchí-yu sá ñà túú tnàhí túha dava-gá tnàha ñáyíú-yu, dico dava ñáyiu ñá túú túha-á<sup>n</sup> cãhá<sup>n</sup> ñãhá Yá Ndiõxí xií-yu cundecu-yu ichi-gá, te cundecu ndíhi ñaha-gã xií-yu, te duca<sup>n</sup> dándóo canúú-yu nchaa ñáyiu cãchí sá ïo túha. Te cãhá<sup>n</sup> tucu-gá ñáyiu cãchí dava-gá ñáyiu sá ñà túú tnàhí tàú cunuu cùndecu-yu ichi-gá, te duca<sup>n</sup> cùndecu ndíhi ñaha-gá xií-yu, te dándóo canúú-yu nchaa ñáyiu cãchí sá táxi tnùnì.

28 Te duca<sup>n</sup> Yá Ndiõxí cãhá<sup>n</sup>-gá ñáyiu ñá túú tnàhí cùnuu cundecu ndíhi-gá,

ndihi ñáyiú quèe tíhú núú dàva-gá tnàha ñáyiú-xi, ndihi ñáyiú càchí-yu sá ñà túú vèdana nàndíhi, nchaa ñáyiú-án càhá<sup>n</sup>-gá cundecu ndihi-gá, te duca<sup>n</sup> quide-gá cuendá dándóo canúu-yu nchaa ñáyiú càchí sá ïo cùnuu.

<sup>29</sup> Te núú xíá<sup>n</sup> ni ì<sup>n</sup> ñáyiú vá cúú càchí-yu sá ïo càhnu cuú-yu núú Yá Ndiöxí.

<sup>30</sup> Dico nchòhó chi mee Yá Ndiöxí ní quide-gá ndécú-ndó ndihi Xítohó Jesucristú, te Xítohó Jesucristú ní quide-gá ní cutnuni iní-ó sá Yá Ndiöxí cúú-gá Yaá ndécú ndihi nchaa sá xini tnùní-gá. Te ñu-ni Xítohó Jesucristú ní quide-gá cuendá sá nchóó vǎ cundecu-gá cuéchi-o núú Yá Ndiöxí, te duca<sup>n</sup> cundecu yíñuhu-o núú-gá, te nduu táhú-ó cundecu-o ndihi-gá ni caa ni quíhí<sup>n</sup>.

<sup>31</sup> Te sá dúcá<sup>n</sup> quide-gá núú xíá<sup>n</sup> xini ñuhu-xi cada-o nacuaá càhá<sup>n</sup>-xi núú tütú Yá Ndiöxí núú càchí-xi: “Vá càchí-ndó sá mée-ndó ïo càhnu cuu-ndo, chi cachí-ndó sá Yáa cúú Xítohó-ndó ïo càhnu cuu-gá”, duha càchí-xi núú tütú-gá.

## 2

*Tnúhu sá càhá<sup>n</sup> nàcuáa ní cuu ní xíhí Xítohó Jesucristú núú cùrúxí*

<sup>1</sup> Te nchòhó ñáyiú ndècu ndihi-í ichi Xítohó Jesucristú sa nàha-ndo sá cùtnàhá ní quixi-í ní cáhá<sup>n</sup>-í tnúhu Yá Ndiöxí núú-ndó, te ñá túú ní cáhá<sup>n</sup>-í dàtná càhá<sup>n</sup> ì<sup>n</sup> ñáyiú ïo váha sáa díquí-xi, àdi datná càhá<sup>n</sup> ì<sup>n</sup> ñáyiú ïo túha.

<sup>2</sup> Chi cùtnàhá ní xindecu ndihi ñaha-í xii-ndo chi ní sani iní-í sá mée-ní cuendá Xítohó Jesucristú cáhá<sup>n</sup>-í núú-ndó ndihi nacuaá ní cuu ní xíhí-gá, te ñu duca<sup>n</sup> ní quide-í.

<sup>3</sup> Te cùtnàhá ní quexio-í núú ndécú-ndó te ni ñá cùtnuni iní-í nása cada-í ní cùu, te ïo ní quiyùhú iní-í ní cáhá<sup>n</sup>-í tnúhu-gá núú-ndó.

<sup>4</sup> Te cùtnàhá ní cáhá<sup>n</sup>-í nàcuáa ndùu tnúhu Xítohó Jesucristú núú-ndó, te nàha-ndo sá Espiritú Yá Ndiöxí ní chindee ñaha-xi xii-í ní cáhá<sup>n</sup>-í tnúhu-gá núú-ndó, te tnúhu-án ní quée-xi iní-ndó. Te ñá túú ní cáhá<sup>n</sup>-í

ì<sup>n</sup> tnúhu càhnu núú-ndó tnúhu sá càhá<sup>n</sup> cue ñáyiú ïo váha sáa díquí-xi.

<sup>5</sup> Te duca<sup>n</sup> ní cuu cuendá sá nchòhó quíndáa iní-ndó tnúhu Yá Ndiöxí chi ní quide-gá sá váha sá cúú-xi iní-ndó, te ñá díú sá cuendá tnúhu sá càhá<sup>n</sup> ñáyiú càchí sá ïo túha duca<sup>n</sup> ní sándáa iní-ndó tnúhu-gá.

*Espiritú Yá Ndiöxí quidé-xi cùtnuni iní-ó nàcuáa sàni iní-gá*

<sup>6</sup> Te nchoo càhá<sup>n</sup>-ó tnúhu càhnu núú ñáyiú sa ní níhí ndéé ndècu ichi Xítohó Jesucristú. Te tnúhu-án ñà túú càhá<sup>n</sup> ñáyiú ñá túú ndècu ichi-gá, te ni cuè téé yíndaha ñaha xii-yu ñá túú càhá<sup>n</sup>-güedé tnúhu-án chi cue téé-án naa-güedé.

<sup>7</sup> Te tnúhu càhnu-án cúú-xi tnúhu Yá Ndiöxí, te mee-gá ní cachí-gá ndéé cùtnàhá vátá ngáva-gá ñuyúú sá ncháa ñáyiú na quíndáa iní tnúhu-án te nduu táhú-yu cundecu-yu ndihi-gá núú ïo váha càa ndecu-gá ni caa ni quíhí<sup>n</sup>. Te tnúhu-án ndúú yùhu-xi ni cuu.

<sup>8</sup> Te ni ì<sup>n</sup> cue téé yíndaha cue ñáyiú ñuyúú-a ñá túú tècú tnùní-güedé tnúhu-án, chi núú dìcò tècú tnùní-güedé tnúhu-án te vá catá càa-güedé Xítohó Jesucristú núú cùrúxí cahni ñaha-güedé xii-gá ní cùu. Te ñu-ni Yaá-án ïo càhnu cuu-gá.

<sup>9</sup> Dico duca<sup>n</sup> ní cuu chi ní quee ndáa-xi nàcuáa càhá<sup>n</sup>-xi núú tütú Yá Ndiöxí núú càchí-xi:

Yá Ndiöxí sa ní sani iní-gá nchaa nàcuáa cada-gá sá cúú-xi cuendá nchaa ñáyiú cùu iní ñáhá xii-gá.

Te sá ní sani iní-gá cada-gá cúú-xi sá vátá quini-gá ñáyiú te ni vátá cùndèdóho-gá-yu,

te ni ñà túú tnàhí cùtnuni iní-yu nása cada-gá.

Duha càchí-xi núú tütú-gá.

<sup>10</sup> Te mee Yá Ndiöxí ní cachí-gá sá Espiritú-gá cada-xi te nchoo cùtnuni iní-ó nchaa nacuaá sàni iní-gá cada-gá, núú xíá<sup>n</sup> duca<sup>n</sup> tècú tnùní-ó vitna, chi Espiritú-gá xini-xi nchaandi túhú nàcuáa sàni iní-gá cada-gá.





tée nàcuhñu. Te duca<sup>n</sup> sãtnahá-xi cùu nchúhú cue tée xiquide chi<sup>n</sup> Yá Ndiõxí, te nàcuáa ndùu chi<sup>n</sup> ní quide-ndí te duca<sup>n</sup> cùnduu táhú taxi Yá Ndiõxí nduu táhú-ndí.

<sup>9</sup> Te nchòhó cúú-ndó dàtná ì<sup>n</sup> xichi núu ní quée tatá, te nchúhú cúú ì<sup>n</sup>nuu-ndí quidé chi<sup>n</sup>-ndí xiá<sup>n</sup>. Te duca<sup>n</sup> sãtnahá-xi cùu-ndo chi cùu cuendá ñáhá Yá Ndiõxí xii-ndo, te nchúhú cúú ì<sup>n</sup>nuu-ndí quidé-ndí chi<sup>n</sup>-gá.

Te cùu tucu-ndo datná ì<sup>n</sup> vehe sá vítná sáá, te duca<sup>n</sup> sãtnahá-xi cùu-ndo chi Yá Ndiõxí quidé-gã tá sàhnu ni-hnu-ndo ichi-gá cuáhá<sup>n</sup>.

<sup>10</sup> Te yúhú cúú-í dàtná ì<sup>n</sup> tée cùnuu daciaa vehe te ní tava-í cimiéntú-xi, te dè<sup>n</sup> cue tée véxi dàcaa-güedé ndóho, te ì<sup>n</sup> ì<sup>n</sup> cue tée-á<sup>n</sup> ïo xìni ñuhu-xi cada cuendá-güedé nàcuáa dacàa-güedé. Núu duca<sup>n</sup> sãtnahá-xi cùu yúhú chi Yá Ndiõxí ní taxi-gá chi<sup>n</sup> quide-í te chindee ñaha-gá, chi díhna-gá-í ní quixi-í ní cáhá<sup>n</sup>-í tnúhu Xítóhó Jesucrístú núú-ndó, te dè<sup>n</sup> cue tée véxi dàcuaha ñaha-ná xii-ndo tnúhu-gá, te ì<sup>n</sup> ì<sup>n</sup> cue tée-á<sup>n</sup> ïo xìni ñuhu-xi cada cuendá-güedé nàcuáa dacuàha ñaha-güedé xii-ndo tnúhu-gá.

<sup>11</sup> Te cimiéntú vehe-á<sup>n</sup> cada iní-ó sã cúú-xí mèe Xítóhó Jesucrístú, te duca<sup>n</sup> chi yúhú ní dánèhé ñáhà-í xii-ndo ní ngúndecu ndìhi-ndo Xítóhó Jesucrístú, te vá yõo-gá cundecu ndìhi-ndo chi ì<sup>n</sup>dìi díi-ni-gã ndécú.

<sup>12</sup> Te dava cue tée dàcaa-güedé vehe váha te chìhi-güedé díhú<sup>n</sup> cuáá<sup>n</sup>, ndìhi díhú<sup>n</sup> cuixí<sup>n</sup>, ndìhi yúú sã ïo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixi<sup>n</sup>.

<sup>13</sup> Te sáá nduu te nchaa vehe-á<sup>n</sup> cãyú-xi, te vehe vítú-á<sup>n</sup> ndìhi vehe ité-á<sup>n</sup> ndìhi vehe tnuvixi<sup>n</sup>-á<sup>n</sup> ndoo ndoo cãyú, te nchaa vehe váha-á<sup>n</sup> vã cãyú-xi cuèi na yãha ñuhú. Te nchaa cue tée ní dácáá vèhe váha-á<sup>n</sup> cada iní-ó sã cúú-güedé ñáyiu ío váha quide chi<sup>n</sup> Yá Ndiõxí. Te nchaa cue tée ní dácáá vèhe vítú, ndìhi cue tée ní dácáá vèhe ité, ndìhi cue tée ní dácáá vèhe

tnuvixi<sup>n</sup> cada iní-ó sã cúú-güedé ñáyiu ñá túú cuení cada chi<sup>n</sup> Yá Ndiõxí nàcuáa tàú-xi cunduu. Te sáá nduu te cutnùni nàcuáa ndùu chi<sup>n</sup> ní quide ì<sup>n</sup> ì<sup>n</sup> ñáyiu, chi Yá Ndiõxí cáhá<sup>n</sup>-gá nàcuáa ndùu chi<sup>n</sup> ní quide ì<sup>n</sup> ì<sup>n</sup> ñáyiu ní quide chi<sup>n</sup>-gá.

<sup>14</sup> Te cue ñáyiu ío váha xiquide chi<sup>n</sup> Yá Ndiõxí te cùdí chi<sup>n</sup> quidé-yu, te ñáyiu-á<sup>n</sup> ñìhí-yu sá ndúú tãhú-yu.

<sup>15</sup> Te cue ñáyiu ñá túú quide chi<sup>n</sup> Yá Ndiõxí nàcuáa tàú-xi cunduu, te vá cùdí chi<sup>n</sup> ní quidé-yu chi cuíta te ndóo-ná-yu duha, dico mèe-yu chi naníhí tãhú-yu.

<sup>16</sup> Te yúhú càhá<sup>n</sup>-í dóho-ndo dándacu-í iní-ndó sã cúú-ndó dàtná vehe Yá Ndiõxí, chi Espíritú-gá ndécú ndìhi ñaha-xi xii-ndo.

<sup>17</sup> Te núu yoo na dànaa ñaha xii nchohó ñáyiu cùu veñuhu-gá, te Yá Ndiõxí danàa ñaha-gá xii ñáyiu-á<sup>n</sup>, te duca<sup>n</sup> càda-gá chi nchòhó cúú-ndó ñáyiu cùu cuendá-gá.

<sup>18</sup> Te vá dándàhú-ndó mèe-ndo sã ïo túha-ndo. Te núu ío dava-ndo sàni iní-ndó sã túha-ndo dàtná sání iní cue ñáyiu ñá túú ndècu ichi Yá Ndiõxí, te cada-ndo sã cúú-ndó dàtná ñáyiu ñá túú tnàhí túha, te duca<sup>n</sup> te cuu ndisa-ndo ñáyiu túha sá cúú-xí Yá Ndiõxí.

<sup>19</sup> Te nchaa sá xìni tnùnì nchaa ñáyiu càchí sá ïo túha ñá túú ndècu ichi Yá Ndiõxí ñá túú nàndìhi-xi sá cúú-xí-gã. Te càchí-xi núú tütú-gá: “Nchaa ñáyiu càchí sá ïo túha te Yá Ndiõxí dandõo canúú ñáhá-gã xií-yu núú nchàa sá quidé-yu”, duha càchí-xi núú tütú-gá.

<sup>20</sup> Te càchí tucu-xi ìngá xichi: “Yá Ndiõxí cùtnùnì iní-gá nchaa nàcuáa sàni iní ñáyiu càchí sá ïo túha. Te nchaa nàcuáa sàni iní-yu-á<sup>n</sup> càchí-gá sá ñà túú vèdana nàndìhi-xi”, duha càchí-xi núú tütú-gá.

<sup>21</sup> Núu xiá<sup>n</sup> càhá<sup>n</sup>-í dóho-ndo sã vã càchí-ndó sã nchúhú cue tée dānehé ñáhá xii-ndo tnúhu-gá ío càhnu cuu-ndí. Te nchaa sá ío ñuyúú-a cùu-xi sá vãha sá cúú-xí-ndó.

<sup>22</sup> Te cuèi yúhú ndìhi té Àpolós ndìhi té Pèlú ndécú-ndí sá cúú-xí-ndó,

te cuêi nchaa sá ío ñuyú-a te cuêi nchaa nduu ndècu-ndo te cuêi sá cùu-ndó dico nchaa cùu-xi sá vâha sá cúu-xí-ndó. Te cuêi nchaa sá ndécú tnáví, te cuêi nchaa sá cóo ndèé cuéé-gá nchaa cùu-xi sá vâha sá cúu-xí-ndó.

<sup>23</sup> Te mee-ndo ndècu-ndo sá cúu-xí Xítohó Jesucristú, te mee Xítohó Jesucristú ndécú-gã sá cúu-xí Yã Ndiõxí.

#### 4

*Nàcuáa ndùu chiu<sup>n</sup> quide cue téé ní táuchú<sup>n</sup> Xítohó Jesucristú cáhá<sup>n</sup> tnúhu-gá*

<sup>1</sup> Te cada cuendá-ndó sã nchũhú dicó-ni cue téé xínu cuechi núu Xítohó Jesucristú cúu-ndí, te chiú<sup>n</sup>-á<sup>n</sup> ñí taxi Yã Ndiõxí quidé-ndí cáhá<sup>n</sup>-ndí tnúhu sá ñí cachí-gá yíyùhu ni cuu.

<sup>2</sup> Te xini ñuhu-xi sá ncháá ñáyiú duca<sup>n</sup> ñí sãñaha Yã Ndiõxí chiú<sup>n</sup> quidé-yu cada ndáá-yu cadá-yu chiú<sup>n</sup>-á<sup>n</sup>.

<sup>3</sup> Te yúhú ñá túú quide cuendá-í nõu nása ndùu tnúhu cáhá<sup>n</sup>-ndó cuendá-í nõu cùu-í téé vâha àdi ñá túú cùu-í. Te diu-ni duca<sup>n</sup> ñá túú quide cuendá-í nõu nása-gá cáhá<sup>n</sup> nchaa dava-gá ñáyiú cuendá-í. Te ni mée-í ñá túú cáhá<sup>n</sup>-í nõu cùu-í téé vâha àdi ñá túú cùu-í.

<sup>4</sup> Te sànuu iní-í sá ñá túú ñá cúmãni-í núu Yã Ndiõxí, dico ñá diú sã xiã<sup>n</sup> te cachí-í sá ñá túú cuèchi-í ndécú nõu-gã, chi mee-gã náhá ndáá-gá te núu nása quide-í ndécù-í.

<sup>5</sup> Te nchòhó vá cáhá<sup>n</sup>-gá-ndó sã ñá túú cùndáá ñáyiú núu Yã Ndiõxí, chi vátá sàá-gá nduu cùndáá cuèchi-yu. Te na sàá nduu quixi tucu Xítohó Jesucristú te dàvá-á<sup>n</sup> dàtúu-gá nchaa sá quidè-yu, nchaa sá ñá túú xini-ó quidé-yu vitna, te duca<sup>n</sup> dàtúu-gá nchaa nàcuáa sàni iní-yu. Te Yã Ndiõxí cáhá<sup>n</sup> vâha-gá cuendá nchaa ñáyiú ní quide vâha.

<sup>6</sup> Te nchòhó ñáyiú ndècu ndihi-í ichi Xítohó Jesucristú, càcunehe-í té Àpolós ndihi yúhú núu-ndó dànehé ñáhà-í xii-ndo nàcuáa cada-ndo cuendá duca<sup>n</sup> cùu-xi ñí sá vâha sá cúu-xí-ndó, ndihi cuendá sá nchòhó canchicú<sup>n</sup> nihnu-ndo càda-ndo mee-ni nchaa

nacuáa yòdo tnuní núu tùtú Yã Ndiõxí. Te duca<sup>n</sup> te vá càchí-ndó sã ñí tée cáhá<sup>n</sup> tnúhu Yã Ndiõxí ío-gá càhnu cuu-dé dàcúúxí ñngá-dé.

<sup>7</sup> Te nchòhó vá càchí-ndó sã ío-gá cùnùu-ndo dacúúxí dàva-gá ñáyiú chi Yã Ndiõxí ní quide-gá ní ngúndecu ndihi-ndo ncháa sá xini tnuní-ndó. Te mee-gã duca<sup>n</sup> ní quide-gá ¿Te ná cuendá nchòhó duca<sup>n</sup> quide cahnu-ndo mee-ndo? Te quide-ndo datná tnúhu sá mée-ndó ñí quide-ndo dùca<sup>n</sup> ní ngúndecu ndihi-ndo ncháa sá xini tnuní-ndó.

<sup>8</sup> Te nchòhó quidé-ndó sã ñá túú tnàhí-gá ná cúmãni-ndó nõu Yã Ndiõxí, te quide-ndo sá ni ñíhí-ndó ncháa sá cuini-ndó nõu-gã ndécú ndihi-ndo, te sànuu sá cúu-ñá-ndó dàtná cue téé yìndaha ñáyiú, te nchúhú ñá túú cùu ñí nuu ndihi ñaha-ndí xii-ndo quìndaha ndihi ñaha-ndí xii-ndo ñáyiú, ÿte vâha-ni te núu dicó ndisa sá yìndaha-ndo ñáyiú chi tnàhá nchúhú ní tnahá ndihi ñaha-ndí xii-ndo quìndaha-ó-yu te núu dicó cúu-xí ñí sá ndáá dico ñáhá!

<sup>9</sup> Te yúhú quidé cuendá-í sá nchũhú cue téé ní táuchú<sup>n</sup> Xítohó Jesucristú cáhá<sup>n</sup> tnúhu-gá núu ñáyiú ní cachí Yã Ndiõxí sá cúu-ndí cue téé ñá túú nàndíhi sá cúu-xí dàva-gá ñáyiú. Te ní cachí tucu-gá sá cúu-ndí dàtná cue ñáyiú sa ní tnahá òré cuú-xi quíhí<sup>n</sup> nacháhu cuèchi-xi, te nchaa ñáyiú cùñúhu ñáhà-yu xii-ndí sá dúcá<sup>n</sup> ndòho-ndí, te tnàhá nchaa espíritú cùñúhu ñaha-xi xii-ndí.

<sup>10</sup> Te cuendá sá xínú cuèchi-ndí núu Xítohó Jesucristú, xiã<sup>n</sup> cúu-ndí dàtná cue téé ñá túú vèdana nàndíhi sá cúu-xí ñáyiú. Te nchòhó quidé-ndó sã cúu-ndó ñáyiú ío túha ndècu ndihi Xítohó Jesucristú. Te ñáyiú càchí-yu sá nchũhú cúu-ndí cue téé ñá túú ndàcu cada ñí sá cáda sá cúu-xí Yã Ndiõxí. Te nchòhó quidé-ndó sã cúu-ndó ñáyiú ío vâha ndàcu quide ñí sá sání ñni-ndó sã cúu-xí-gã. Te cue ñáyiú dàquee tihú ñáhã-yu xii-ndí, te nchòhó nêhè-yu sá

yíñùhu núú-ndó.

<sup>11</sup> Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dǒó-ndí, te nchaa ñáyiú quide úhú ñáhă-yu xii-ndí, te ni vèhe-ndí ñá túú ndèè cáá cùndecu-ndí.

<sup>12</sup> Te ío ndòho-ndí quidé chiù<sup>n</sup>-ndí nihí-ndí sá xéxí-ndí. Te cue ñáyiú xǐcuèhé ñáhă-yu xii-ndí dico xicá<sup>n</sup> táhú-ndí núú Yă Ndiǒxí cuendá-yu, te ñá cúú tnàhí quiní ndéé ñáhă-yu xii-ndí dico quide cahnu iní-ndí nchaa sá quidé ñàhá-yu.

<sup>13</sup> Te mee-ni tnúhu cuèhé tnúhu duha càhá<sup>n</sup>-yu cuendá-ndí dico sàcahnu iní-ndí te dàsahú-ndí-yu mee-ni tnúhu váha. Te cǎchí-yu sá cúú-ndí dàtná ì<sup>n</sup> sá ñà túú-gǎ vèdana nàndihí, te nchaa-ni nduu duca<sup>n</sup> càhá<sup>n</sup>-yu xǎhă<sup>n</sup>-yu xii-ndí.

<sup>14</sup> Te yúhú duha càhá<sup>n</sup>-í núú tütú-a dàsahú ñáhà-í xii-ndo, dico ñá díú tnúhu sá cúú càhá<sup>n</sup> núú-ndó càhá<sup>n</sup>-í. Te duha càhá<sup>n</sup>-í dóho-ndo chi quide iní-í sá sǔúní dàtná déhe mee-í cúú-ndó chi ío cùu iní ñáhà-í xii-ndo.

<sup>15</sup> Te nchaa-o ndècu-o ichi Xítóhó Jesucristú vitna, dico yúhú cùu-í téé díhna nuu ñí dánèhé ñáhá xii-ndo nacuáa ndúu tnúhu sá càhá<sup>n</sup> nàcuáa naníhí táhú-ó, núú xǎ<sup>n</sup> cùu-í dàtná tátá-ndó. Te cuèi vǎi vihi cue téé na quixi-güedé danèhé ñáhá-güedé xii-ndo tnúhu-gá dico ì<sup>n</sup> dìi-ni yúhú cùu-í téé díhna nuu-gǎ ní dánèhé ñáhá xii-ndo tnúhu-gá.

<sup>16</sup> Núú xǎ<sup>n</sup> càhá<sup>n</sup>-í dóho-ndo sǎ cǎnchǐcú<sup>n</sup> nihnu-ndo càda-ndo nchaa nacuáa quide-í.

<sup>17</sup> Te xǎ<sup>n</sup> nǔu sa ní tendaha-í té Timùteú véxi coto ñaha-dé xii-ndo, te téé-án ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te téé-án cǎchí tnúhu-dé xii-ndo nchaa nacuáa quide-í ndécù-í ichi-gá. Te ñi-ni nàcuáa na cǎchí tnúhu-dé-án ñi-ni duca<sup>n</sup> quide-í nchaa xichi núú tàcá ñáyiú dàcuaha tnúhu Xítóhó Jesucristú.

<sup>18</sup> Te dava nchòhó ío quide cahnu-ndo mee-ndo chi sàni iní-ndó

sǎ vǎ quixí-gǎ-í quixi coto ñaha-í xii-ndo.

<sup>19</sup> Dico núú mee Yă Ndiǒxí ná cǎchí-gá te ío ndihí quixi coto ñaha-í xii-ndo, te dàvá-án quiní-í te núú nása quide nchaa ñáyiú duca<sup>n</sup> ío xǐquide càhnu mee-xi-án ndécù-yu ichi Xítóhó Jesucristú. Te vá cáda cuendá-í tnúhu càhá<sup>n</sup>-yu chi chiù<sup>n</sup> quidé-yu cada cuendá-í.

<sup>20</sup> Te vitna yìndaha ñaha Yá Ndiǒxí xii-o, te chìndee ñaha-gá xii-o quide-o nchaa sá váha sàni iní-ó quide-o te ñá díú mèe-ni sá càhá<sup>n</sup>-ó.

<sup>21</sup> Te ío chí cǎní iní nǔu ndèdacaá sá váha-gá cada-í òré ná quèxio-í núú ndécù-ndó, núú sá ténàá ñáhà-í xii-ndo àdi sá càhá<sup>n</sup> ndihí ñaha-í xii-ndo ndihí tnúhu vii tnúhu váha nàcuáa cutnùní iní-ndó sǎ cúú iní ñáhà-í xii-ndo.

## 5

### *Ì<sup>n</sup> cuèchi càhnu vihi*

<sup>1</sup> Te yúhú sa ní nihí ndáá-í tnúhu nàcuáa cùu ndecu-ndo, chi ì<sup>n</sup> téé ndècu ndihí-ndo ndeca-dé nǎná chàhá-dé. Te xǎ<sup>n</sup> cúú-xí ì<sup>n</sup> cuèchi càhnu vihi, chi ndéé nchaa ñáyiú ñá túú ndècu ichi Yá Ndiǒxí cǎchí-yu sá vǎ cúú tnàhí duca<sup>n</sup> càda-o.

<sup>2</sup> ;Te nchòhó ío quide cahnu-ni-ndo mee-ndo xǐndecu-ndo! ;Te tàú-ndó sǎ cùndiyí-ndó ndixi cuèchi iní-ndó sǎ dúcá<sup>n</sup> cùu ndecu-ndo ni cuu! Te téé duca<sup>n</sup> quide-án xíní ñùhu-xi sá vǎ dáñá-gǎ-ndó nihí tnàhá ndihí ñaha-dé xii-ndo ni cùu dico ñá túú dùca<sup>n</sup> quide-ndo.

<sup>3</sup> Te yúhú ñá túú ndècu ndihí ñaha-í xii-ndo dico dàtná tnúhu sá ndécù ndihí ñaha-í xii-ndo chi duca<sup>n</sup>-ni ío ñùhu iní ñáhà-í xii-ndo. Te yúhú cǎchí-í sá nǎchǎhu téé-án cuèchi-dé sá dúcá<sup>n</sup> quide-dé, te ñi-ni duca<sup>n</sup> càhá<sup>n</sup>-í núú-ndó te núú dìcò ndécù ndihí ñaha-í xii-ndo.

<sup>4</sup> Te òré nàtàcá-ndó càhá<sup>n</sup> ndihí-ndo Yă Ndiǒxí te ñi-ni Xítóhó Jesucristú ñá túú dàña ndéé-gá chǐndèe ñaha-gá xii-ndo, te òré-án cada-ndo nàcuáa cuìní Xítóhó Jesucristú cada-ndo, te cada iní-ndó sǎ tnàhá-í ndécù ndihí ñaha-í xii-ndo.

5 Chi tàú-xi sá tǎe duca<sup>n</sup> quide-á<sup>n</sup> daquèe tíhú-ndó-dě, te duca<sup>n</sup> te sácúíhná dandòho ñaha-xi xii-dé cuéi na cúú-dé, dico na sàá nduu te nduu táhú-dě cundecu-dé ndihí Xítóhó Jesucristú.

6 Te nchòhó ñá túú ndùu váha-xi sá cǎchí-ndó sǎ ìo cǎhnu cuu-ndo. Te xini-ndó sǎ cuéi luha-ni levadùrà ná quíhu yuchi cuáha pàá dándàa-xi cuéi luha-ni nà quíhu te nihí-ni yuchi sàhá<sup>n</sup> ndoho-xi. Te duca<sup>n</sup> sǎtnahá-xi cùu nchohó chi núu ndècu ndihí-ndo ì<sup>n</sup> ñáyiu quide sá ñà túú váha te nchaa-ndo ñà túú-gǎ cúú váha iní-ndó ndècu-ndo.

7 Te xini ñuhu-xi sá cáda-ndó dàtná quidé cuè ñáyiu quide vico pascuá, chi ñá túú chihí-yu levadùrà yuchi cuáha pàá xéxi-yu nduu quidé-yu vico-á<sup>n</sup>. Te sá quíhu pàá-á<sup>n</sup> cada iní-ó sá cúú-xi nchaa sá cuèhé sá dúhá ñi xóo cada-ndo. Te vá cáda-gǎ-ndó ñi ì<sup>n</sup> sá cuèhé sá dúhá, te duca<sup>n</sup> te cuu-ndo ñáyiu váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-á<sup>n</sup> cada iní-ó sá cúú-güedi datná Xítóhó Jesucristú nàcuáa ní xihí-gá núu cùrúxí.

8 Te núu xiǎ<sup>n</sup> xini ñuhu-xi sá vǎ cáda-gǎ-ndó ñi ì<sup>n</sup> sá cuèhé sá dúhá sá ñi xóo cada-ndo, te ni vǎ cúhú<sup>n</sup>-gǎ iní-ndó te ni vǎ cáda-gǎ-ndó, te ni yuhu ni iní-ná-ndó càda-ndo mee-ni sá váha.

9 Te tutú sá sà ní dáquixì-í ndaha-ndo ñi cǎchí-í sá vǎ nihí tnáhá-ndó ndihí cue ñáyiu ndècu ichi díí iní.

10 Te sá dúcá<sup>n</sup> cǎhá<sup>n</sup>-í núu tütú ní dáquixì-í ndaha-ndo te vá cání iní-ndó sǎ yǔhú cǎchí-í sá vǎ cúú-gǎ tnahá tnúhu-ndo ndihí cue ñáyiu ndècu ichi cuèhé ichi duha, ndihí ñáyiu ndècu ichi díí iní, ndihí ñáyiu xìho nchaa sá ió ñuyúú, ndihí ñáyiu dùhu sá ndécú ndihí tnaha ñáyiu-xi, ndihí ñáyiu quide cahnu sá cǎchí-yu cùu ndióxí te ñá ndàá sá ndiöxí cúú-xí chi dícó cue téé ñuyúú-a ní cadúha nchaa xiǎ<sup>n</sup>, chi núu duca<sup>n</sup> na càda-ndo vá tnahá tnúhu-gá-ndó ndihí-yu te xini

ñuhu-xi sá vǎ cùndècu-gá-ndó núu ndécú-yu.

11 Te ñá túú dùca<sup>n</sup> quee-xi nacúaa cǎhá<sup>n</sup>-í núu tütú-í, chi yúhú cǎchí-í sá vǎ cúú tnahá tnúhu-ndo ndihí ñáyiu cǎchí sá ndécú ìchi Xítóhó Jesucristú te ñá ndàá sá ndécú-yu ichi-gá. Te núu cúú-yu ñáyiu ndècu ichi díí iní, àdi cuú-yu ñáyiu xìho nchaa sá ió ñuyúú-a, àdi cuú-yu ñáyiu quide cahnu nchaa sá cǎchí-yu cùu ndióxí te ñá ndàá chi dícó cue téé ñuyúú-a ní cadúha nchaa xiǎ<sup>n</sup>, àdi cuú-yu ñáyiu yiti yuhu-xi, àdi cuú-yu ñáyiu quíhu, àdi cuú-yu ñáyiu dùhu sá ndécú ndihí tnaha ñáyiu-xi, te nchaa ñáyiu duca<sup>n</sup> cǎchí sá ndécú ìchi-gá te ñá ndàá te duca<sup>n</sup> xíquidè-yu, te ni vǎ cúú nihí tnáhá-ndó ndihí-yu caxi-ndo ndihí-yu.

12-13 Te ñá díú yǔhú cúú-í téé cǎhá<sup>n</sup> cuendá nchaa ñáyiu ñá túú ndècu ichi Xítóhó Jesucristú núu quide ndáá-yu àdi ñá túú quide ndáá-yu ndécú-yu, chi mee Yǎ Ndiöxí cǎhá<sup>n</sup>-gá te núu nása quidé-yu ndécú-yu. Dico nchòhó chi tàú-ndó càda cuendá-ndó núu nása quide cue ñáyiu ndècu ndihí-ndo ichi Xítóhó Jesucristú. Núu xiǎ<sup>n</sup> xini ñuhu-xi daquee tíhú-ndó tǎe duca<sup>n</sup> ñà túú quide váha ndècu ndihí-ndo-á<sup>n</sup>, te vá dáñá-gǎ-ndó nihí tnáhá ndihí ñaha-dé xii-ndo.

## 6

*Nàcuáa tàú-xi cada ñáyiu ndècu ichi Xítóhó Jesucristú te núu ñá túú ndècu ndihí váha tnáhá-yu*

1 Te dava nchòhó òré ñá túú ndècu ndihí váha tnaha-ndo te cùyi-ndo cuáhá<sup>n</sup>-ndó núu cuè téé cùchiu<sup>n</sup> ñá túú ndècu ichi Xítóhó Jesucristú sácá<sup>n</sup> cuéchi-ndo, te ñá túú dùca<sup>n</sup> taú-xi cada-ndo chi núu cuè téé ndècu ichi-gá duca<sup>n</sup> tàú-ndó quíhí<sup>n</sup>-ndó cǎcá<sup>n</sup> cuéchi-ndo.

2 Te nchòhó sa naha-ndo sá ncháá ñáyiu cùu cuendá Yǎ Ndiöxí sáa nduu cǎhá<sup>n</sup>-yu te núu ní quide ndáá nchaa dava-gá ñáyiu àdi ñá túú ní quide ndáá-yu, te nchòhó tnáhá-ndó cùu-ndo ñáyiu duca<sup>n</sup> cǎhá<sup>n</sup>,

te núu duca<sup>n</sup> te cutnùnì iní-ndó sã ndácú-ndó càda ndáá-ndó nchàa cuéchi sã ñã túú úhú cundáá vitna ndècu-ndo ñuyú-a.

<sup>3</sup> Te nchòhó sa nàha-ndo sã ncháá ndéé cue espíritú xínú cuéchi núú Yã Ndiõxí sáá nduu cãhá<sup>n</sup>-ó te núu nása quide-xi ndecu-xi. ¡Núu xiã<sup>n</sup> cutnùnì iní-ó sã úú<sup>n</sup>-gã ndacu-o càda ndáá-ó nchàa cuéchi sã ió ñuyú-a!

<sup>4</sup> Te núu ió dava-ndo ió nása cùu ndecu-ndo te xínáá-ndó, te vá quihí<sup>n</sup>-ndó càcá<sup>n</sup> cuéchi-ndo núú cue téé ndèhe-ndo sã ñà túú ndècu-güedé ichi Yã Ndiõxí, dico nchòhó chi da núú cue téé-á<sup>n</sup> cuãhá<sup>n</sup>-ndó sàcá<sup>n</sup> cuéchi-ndo.

<sup>5</sup> Te duha càhá<sup>n</sup>-í cuendá cucaha<sup>n</sup> núú-ndó chi ñã túú quide váha-ndo sã dúcá<sup>n</sup> quide-ndo. ¿Te náa dícó-ñã ñã túú tnahí ì<sup>n</sup> téé cùtnunì iní-xi nàcuáa cada ndáá cuéchi-ndo ndècu ndihí-ndo ichi Xítóhó Jesucristú-ã<sup>n</sup>?

<sup>6</sup> Te nchòhó, ñã túú quide váha-ndo, chi dava-ndo cuãhá<sup>n</sup>-ndó núú cue téé ñã túú ndècu ichi Xítóhó Jesucristú sàcá<sup>n</sup> cuéchi-ndo cuendá dava-gá cue ñáyiu ndècu ndihí-ndo ichi-gá.

<sup>7</sup> Te ñã túú quide váha-ndo sã dúcá<sup>n</sup> náa ndihí tnahá-ndo te cuãhá<sup>n</sup>-ndó sàcá<sup>n</sup> cuéchi-ndo, te váha-gá sã cáda càhnu iní-ndó cuéi nándi na càda ñaha tnahá ñáyiu-ndo xii-ndo cuéi dùhú-yu sã ndécú ndihí-ndo dico cada càhnu-ni iní-ndó.

<sup>8</sup> Dico nchòhó chi ñã túú quide cahnu iní-ndó chi da uu<sup>n</sup>-gá ñã túú quide váha-ndo sàcúú-xí tnahá ñáyiu-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítóhó Jesucristú duca<sup>n</sup> quide tnahá-ndo.

<sup>9</sup> Te nchòhó sa nàha-ndo sã ncháá ñáyiu ndècu ichi cuehé ichi duha vá ndúú tãhú-yu cundecú-yu núú ndécú Yã Ndiõxí táxi tnùnì-gá, núu xiã<sup>n</sup> vá cánì iní-ndó sã ñáyiu-ã<sup>n</sup> nduu tãhú-yu cundecú-yu ndihí-gá. Te ni cue ñáyiu ndècu ichi díí iní, te ni cue ñáyiu quide cahnu nchaa sã càchí-yu cùu ndióxí te ñã ndáa chi dícó cue téé ñuyú-a ní cadúha nchaa xiã<sup>n</sup>, te ni cue téé càhá<sup>n</sup> ndihí ñadihí te ñã díú ñadihí-güedé cúú-yu, te ni cue ñáyiu dñí càhá<sup>n</sup> ndihí

tée te ñã díú yí-yu cùu-güedé, te ni cue téé càhá<sup>n</sup> ndihí tnahá téé-xi,

<sup>10</sup> te ni cue ñáyiu dùhu, te ni cue ñáyiu xihó sã ndécú ndihí tnahá ñáyiu-xi, te ni cue ñáyiu quihu, te ni cue ñáyiu càhá<sup>n</sup> úhú, te ni cue ñáyiu dñícuèhé tnahá ñáyiu-xi te dùhu ñahá-yu, te ni ì<sup>n</sup> cue ñáyiu duha xiquide vá ndúú tãhú-yu cundecú-yu núú ndécú Yã Ndiõxí táxi tnùnì-gá.

<sup>11</sup> Te dava nchòhó duca<sup>n</sup> ní xóo cada-ndo ni cùu, te vitna ní cuu-ndo ñáyiu sa ní nduu ndoo ní nduu nine iní-xi, te ní cuu-ndo ñáyiu cùu cuendá Yã Ndiõxí, te ní cuu tucu-ndo ñáyiu ñã túú-gá cuéchi-xi ndècu núú-gá. Te duca<sup>n</sup> ní quide ñaha Yã Ndiõxí xii-ndo sã vãha sã cuendá Xítóhó Jesucristú, te ní ngúndecu ndihí-ndo Espíritú Yã Ndiõxí.

#### *Nàcuáa nduu cuendá yiqui cùñú-ó*

<sup>12</sup> Te càchí ñáyiu sã ncháá sã sání iní-ó cuu cada-o, te ndáá càhá<sup>n</sup>-yu dícó-ni sã ñã ncháá cùu-xi sã vãha sã cúú-xi-ó. Te núu cùñí nchaa sã sání iní-ó-ã<sup>n</sup> taxi tnùnì ñahá-xi te vá cáda-ó.

<sup>13</sup> Te nchòhó sa xíní-ndó sã ncháá sã xéxí-ó cuãguee-xi xiti-ó, te xiti-ó ñi cuáha tnahí-xi sã cúhú<sup>n</sup> nchaa sã cáxí-ó, dico xiti-ó ndihí nchaa sã xéxí-ó chi naa-xi. Te Xítóhó Jesucristú néhé cuendá-gá yiqui cùñú-ó, te duca<sup>n</sup> yiqui cùñú-ó cùu-xi cuendá-gá, te ñã túú ní cuãha yiqui cùñú-ó sã cùndècu-xi ichi díí iní.

<sup>14</sup> Te dàtná ní quide Yã Ndiõxí ní dándótó-gã Xítóhó Jesucristú duca<sup>n</sup> càda ñaha-gá xii nchoo tucu chi dandòto ñaha-gá xii-o núu na cùú-ó, chi ndàcu-gá quidé-gã nchaa sã vãha.

<sup>15</sup> Te nchòhó sa nàha-ndo sã yiqui cùñú-ó cùu-xi cuendá Xítóhó Jesucristú chi ì<sup>n</sup>-ni cùu-o ndihí-gá, núu xiã<sup>n</sup> ñã túú tnahí nduu váha-xi càhá<sup>n</sup> ndihí-o ñáyiu ndècu ichi díí iní, chi yiqui cùñú-ó cùu-xi cuendá Xítóhó Jesucristú, te núu duca<sup>n</sup> na càda-o te cada iní-ó sã cuendá-ñã ñáyiu-ã<sup>n</sup> cúú yiqui cùñú-ó, núu xiã<sup>n</sup> ñã túú tnahí nduu váha-xi duca<sup>n</sup> càda-o.

16 Te sa xíní-ndó sǎ nǔu ìí tée na càhá<sup>n</sup> ndìhì-dé ìí ñadìhì ndécú ìchi díí ìní te cada iní-ó sǎ ìí<sup>n</sup>-nǎ yìqui cùñú cúú-yu. Te duca<sup>n</sup> càhá<sup>n</sup>-xi núú tütú Yǎ Ndiöxí núú càchí-xi: “Ìí tée na càhá<sup>n</sup> ndìhì-dé ìí ñadìhì te ìí<sup>n</sup>-nǎ yìqui cùñú cúú-yu”, duha càchí-xi.

17 Te duca<sup>n</sup> sǎtnahá-xi cùu nchaa ñáyiú tnàhá tnúhu ndìhì Xítóhó Jesu-crístú, chi ìí<sup>n</sup>-nǎ cúú-yu ndìhì-gá.

18 Te núu xǎ<sup>n</sup> càhá<sup>n</sup>-í dóho-ndo sǎ vǎ cùndècu-ndo ìchi díí ìní, chi núu duca<sup>n</sup> na càda-ndo te ñá túú tnàhí sǎ vǎha cùu-xi sǎ cúú-xí yìqui cuñú-ndó chi ío dàcuíta nihnu-xi yìqui cùñú-ndó. Te nchaa dava-gá sǎ cuèhé sǎ dúhá ñà túú quìde-xi yìqui cuñú-ndó dàtná quidé xǎ<sup>n</sup>.

19 Te nchòhó sa cùtnuní iní-ndó sǎ yìqui cuñú-ndó cùu-xi datná ìí<sup>n</sup> vehe núú ndécú Espíritú Yǎ Ndiöxí. Te duca<sup>n</sup> sǎtnahá-xi cùu yìqui cuñú-ndó chi ndècu-ndo ndìhì Espíritú-gá. Te mee-gǎ ní taxi-gá Espíritú-gá ndécú ndìhì-ndo, te ñá díú mèe-ndo cuu cuendá-ndó mèe-ndo chi Yǎ Ndiöxí cúú cuendá ñáhá-gǎ xii-ndo.

20 Te duca<sup>n</sup> cùu-ndo ñáyiú cùu cuendá Yǎ Ndiöxí chi Xítóhó Jesu-crístú ní nacháhu-gá nchaa yíca cuèchi-ndo. Te núu xǎ<sup>n</sup> xíní ñùhu-xi sǎ ñihí ní ndúú-ndó càda-ndo nacuáa cuu càhnu Yǎ Ndiöxí, te duca<sup>n</sup> tàú-xi cada-ndo chi espíritú-ndó ndìhì yìqui cuñú-ndó cùu-xi cuendá-gá.

## 7

### *Sáhú sǎ cúú-xí ñáyiú ní tnándaha*

1 Te ní quexìo tutú sǎ ní dáquíxí-ndó ndàha-í, te vitna na càchí tnúhu-í xii-ndo cuendá tnúhu càhá<sup>n</sup>-ndó nǔú tütú-ndó. Te vǎha cada-xi te núu vǎ cándèca tée ñadìhì, te duca<sup>n</sup>-ni vǎha cada-xi te núu ñáyiú dìhí vǎ cándècá-yu tée.

2 Te dicó-ni sǎ nǔu duca<sup>n</sup> na càda-ndo te dava-ndo càni iní-ndó cùndècu-ndo ìchi díí ìní. Núu xǎ<sup>n</sup> xíní ñùhu-xi sǎ ncháá cuè tée ndi díí<sup>n</sup> cùndècu ñadìhì-güedé, te duca<sup>n</sup>-ni tucu nchaa cue ñáyiú dìhí ndi díí<sup>n</sup> cùndècu yíí-yu.

3 Te càchí tnúhu-í xii-ndo sǎ ncháá cuè tée vǎ cúú càchí-güedé sǎ vǎ cúú càhá<sup>n</sup> ndìhì-güedé ñadìhì-güedé, te ñu-ni duca<sup>n</sup> cuè ñáyiú dìhí tucu, vǎ cúú càchí-yu sǎ vǎ cúú càhá<sup>n</sup> ndìhì-yu yíí-yu.

4 Te nchaa cue ñáyiú dìhí chi ñá díú mèe-ní-yu cùu cuendá-yu yìqui cùñú-yu chi tnàhá cúú cuendá yíí-yu, te duca<sup>n</sup>-ni nchaa cue tée tucu chi ñá díú-ní mèe-güedé cúú cuendá-güedé yìqui cùñú-güedé chi tnàhá cúú cuendá cue ñadìhì-güedé.

5 Te cue tée vǎ cúú càchí-güedé sǎ vǎ cúú càhá<sup>n</sup> ndìhì-güedé ñadìhì-güedé. Te ni cuè ñáyiú dìhí vǎ cúú càchí-yu sǎ vǎ cúú càhá<sup>n</sup> ndìhì-yu yíí-yu. Àdi te núu ní ndatnúhu-yu sǎ vǎ dúcá<sup>n</sup> càdá-yu ìí<sup>n</sup> úú nduu cuendá sǎ cuíní-yu ío càhá<sup>n</sup> ndìhì-yu Yǎ Ndiöxí, dico nà yáha núu ná daha nduu duca<sup>n</sup> ní ndatnúhu-yu sǎ vǎ dúcá<sup>n</sup> càdá-yu te naníhí tnàhá tucú-yu, chi núu ñáhá te cudana te vǎ cuácàhnu iní-yu te sácúhna dacàhá<sup>n</sup> ñáhá-xí xii-yu cadá-yu sǎ ñà túú tàú-yu cadá-yu.

6 Te tnúhu càhá<sup>n</sup>-í-a quèe-xi sǎ tée ndìhì ñadìhì cuu candeca tnàhá-yu dico ñá túú quìde yica-í sǎ dúcá<sup>n</sup> càdá-yu.

7 Te yúhú sání ìní-í sǎ nǔu dicó sǎ cúú te nchaa-ndo cùndècu-ndo datná ndécú-í, dico ñáhá chi mee Yǎ Ndiöxí ní cachí-gá nàcuáa nduu táhú-ó ìí<sup>n</sup> ìí<sup>n</sup>-o cùndècu-o, chi dava-o ní cutáhú-ó nǔú-gǎ sǎ cùndècu ñadìhì-ó te dava-o ñáhá.

8 Te càchí tnúhu-í xii nchòhó cue tée vátá ñihí-gá ñadìhì-xi sǎ vǎha-gá sǎ nǔu vǎ cùndècu ñadìhì-ndó dàtná yúhú. Te duca<sup>n</sup>-ni nchòhó cue ñáyiú dìhí ñáyiú vátá ñihí-gá yíí-xi sǎ vǎha-gá sǎ nǔu vǎ cùndècu yíí-ndo. Te ñu-ni duha càhá<sup>n</sup>-í sǎ cúú-xí nchaa nchòhó ñáyiú dìhí ní quendóo quèe sǎ vǎha-gá sǎ nǔu vǎ cándèca-gá-ndó tée.

9 Te càchí tnúhu-í xii nchaa-ndo sǎ nǔu xito-ndo sǎ vǎ cùndècú iní-ndó cùndècu mee-ndo te vǎha-gá sǎ

nũu tnándaha-ndo, te ñá díú sã méé-ní cãni cuehé cani duha iní-ndó cùndecu-ndo.

10 Te nchaa nchòhó ñáyiú sa ní tnándaha càhá<sup>n</sup>-í dóho-ndo, te ñá díú mèe-í duha càhu iní-í càhá<sup>n</sup>-í dóho-ndo chi Xítohó Jesucristú duca<sup>n</sup> dàcahu iní ñáhá-gã xii-í, chi mee-gã cuiní-gã cada-ndo nacuáa na càhá<sup>n</sup>-í-a. Te nchaa nchòhó cue ñáyiú ñáhá càhá<sup>n</sup>-í dóho-ndo sã vã dáñá-ndó yíi-ndo.

11 Te núu ió dava-ndo sà ní dáñá-ndó yíi-ndo, te xini ñuhu-xi sã vã cándeca-gá-ndó tée, chi cundecu mee-nã-ndó àdi núu ñáhá te naquehe<sup>n</sup> tucu-ndo tée ní cuu yíi-ndo. Te nchaa nchòhó cue tée ndècu ñadíhí-xi càhá<sup>n</sup>-í dóho-ndo sã vã dáñá-ndó ñáyiú cùu ñadíhí-ndó.

12 Te tnúhu na càhá<sup>n</sup>-í-a cùu-xi sã ní sani iní mèe-í te ñá díú tnúhu sã ní cachí Xítohó Jesucristú cáhá<sup>n</sup>-í cúu-xi. Te núu dava nchòhó cue tée ndècu ichi Xítohó Jesucristú ndécá-ndó ñáyiú ñáhá ñáyiú ñá túú ndècu ichi-gá, te vá dáñá-ndó-yu te núu cùu váha iní-yu ndèca ñáhá-yu xii-ndo.

13 Te núu dava nchòhó cue ñáyiú ñáhá ñáyiú ndècu ichi Xítohó Jesucristú ndécá-ndó cuè tée ñá túú ndècu ichi-gá te vá dáñá-ndó-güedé te núu cùu váha iní-güedé ndécá ñàha-güedé xii-ndo.

14 Te núu ñá tée ñá túú sàndáa iní-dé Xítohó Jesucristú te ñadíhí-dé sàndáa iní ñáhá-á<sup>n</sup> xii-gá, te tée-á<sup>n</sup> ní cuu-dé ñá tée sa ní cuyatni tnahá tnúhu ndíhi ñaha xii-gá sã cuèndá ñadíhí-dé. Te duca<sup>n</sup> sãtnahá-xi cùu tucu ñadíhí ñá túú sàndáa iní ñáhá xii Xítohó Jesucristú te yíi-a<sup>n</sup> sàndáa iní ñáhá-dé xii-gá, te ñaha-á<sup>n</sup> sa ní cuyatni tnahá tnúhu-a<sup>n</sup> ndíhi-gá sã cuèndá yíi-a<sup>n</sup>, te ñáyiú duca<sup>n</sup> sãtnahá-xi cùu cue landú-yu chi sa ní cuyatni tnahá tnúhu-güexi ndíhi-gá. Te núu vá dúcá<sup>n</sup> cùu te cue landú-yu-á<sup>n</sup> ñá xica cùndecu-güexi núu-gã.

15 Te núu ñá tée ñá túú sàndáa iní ñáhá xii Xítohó Jesucristú cuiní-dé ñáyiú tnahá-dé ndíhi ñadíhí-dé ñaha sàndáa iní ñáhá xii Xítohó Jesucristú,

te ñáyiú na càda-dé nacuáa sàni iní-dé. Te ñáyiú duca<sup>n</sup> túcu te núu ñadíhí ñaha ñá túú sàndáa iní ñáhá xii Xítohó Jesucristú cuiní-a<sup>n</sup> ñáyiú-a<sup>n</sup> tée sàndáa iní ñáhá xii-gá, tée cùu yíi-a<sup>n</sup> te ñáyiú na càda-a<sup>n</sup> nacuáa sàni iní-a<sup>n</sup>. Chi tée sàndáa iní ñáhá xii Xítohó Jesucristú ñá túú tàu-dé cada yica-dé ñadíhí-dé cundecu ndíhi ñaha-a<sup>n</sup> xii-dé te núu ñá túú cuiní-a<sup>n</sup>. Te ñáyiú duca<sup>n</sup> ñadíhí ñaha sàndáa iní ñáhá xii-gá ñá túú tàu-a<sup>n</sup> cada yica-a<sup>n</sup> cùndecu ndíhi ñaha yíi-a<sup>n</sup> xii-a<sup>n</sup> te núu ñá túú cuiní-dé cundecu ndíhi ñaha-dé xii-a<sup>n</sup>, chi Yá Ndióxi cuiní-gá sã ncháa nchòhó ñáyiú ndècu ichi-gá cundecu váha-o vã ñáá-ó.

16 Chi cue tée sàndáa iní tnúhu Xítohó Jesucristú ñá túú cùtnuní iní-güedé te núu ndacu-güedé canu ichi-güedé ñadíhí-güedé ichi-gá àdi ñáhá te núu ñá túú sàndáa iní ñáhá-yu xii-gá, te duca<sup>n</sup>-ni cuè ñáyiú ñáhá sàndáa iní tnúhu Xítohó Jesucristú ñá túú cùtnuní iní-yu te núu ndacú-yu canu ichi-yu yíi-yu ichi-gá àdi ñáhá te núu ñá túú sàndáa iní ñáhá-güedé xii-gá.

17 Te duha na cachí tnúhu-í xii-ndo, nchaa chiu<sup>n</sup> ní nduu táhú-ndó nũú Yá Ndióxi quidé-ndó ndéé cùtnahá ní cáhá<sup>n</sup> ñáhá-gã xii-ndo ní natuha-ndo ichi-gá te ñáyiú chiu<sup>n</sup>-á<sup>n</sup> cada-ndo cùndecu-ndo. Te nchaa xichi núu tàcá ñáyiú dàcuaha tnúhu-gã ñáyiú duha càhá<sup>n</sup>-í dóho-yu.

18 Te nchaa cue tée ndècu seña ñá-xi dàtná ní cachí ndíi Moisés, cue tée ní cáhá<sup>n</sup> Yá Ndióxi ndécú ichi-gá, te ñáyiú duca<sup>n</sup> cùnduu-güedé cundecu-güedé, te nchaa cue tée ñá túú ndècu seña ñá-xi ní cáhá<sup>n</sup>-gá cundecu ichi-gá, ñáyiú duca<sup>n</sup> cùnduu-güedé cundecu-güedé vá cuáha-güedé seña ñá-güedé.

19 Te ñá-ni cùu-xi cuéi na cuáha-o seña ñá-o àdi vá cuáha-o. Te sã ñá-gá xini ñuhu-xi cada-o xíá<sup>n</sup> cúu-xi sã cáda-ó ncháa nacuáa cuiní Yá Ndióxi.

20 Chi xini ñuhu-xi sã cùndecu-ni-o dàtná ndécú-ó cùtnahá ní cáhá<sup>n</sup> ñáhá Yá Ndióxi xii-o ní ngúndecu-o ichi-gá.

21 Te núu cùu-ndo ñáyiú ñá túú tnahá dàñá quee núu chíu<sup>n</sup> patróo<sup>n</sup>-xi



cútnàhá ní cáhá<sup>n</sup> ñáhá Yă Ndiöxí xii-ndo, te ñá túú nă cani iní-ndó, dico núu dăña ñaha patróó<sup>n</sup>-ndó quee-ndo núu chíú<sup>n</sup>-ndó te váha-ni quee-ndo núu chíú<sup>n</sup>-ndó.

22 Te sátá nǐ cáhá<sup>n</sup> ñáhá Xítóhó Jesucristú xii nchòhó ñáyiu duca<sup>n</sup> ñà túú tnàhí dăñá quee núu chíú<sup>n</sup> pàtróó<sup>n</sup>-xi-á<sup>n</sup>, te ní cuu-ndo dàtná ñáyiu dăñá quee núu chíú<sup>n</sup> pàtróó<sup>n</sup>-xi sá cúu-xí-gă, te duca<sup>n</sup> chi ñá túú-gă ndécú-ndó ìchi cuehé ichi duha. Te nchòhó ñáyiu dăñá quee núu chíú<sup>n</sup> pàtróó<sup>n</sup>-xi cùu-ndo datná ñáyiu ñá túú tnàhí dăñá quee núu chíú<sup>n</sup> pàtróó<sup>n</sup>-xi sá cúu-xí Xítóhó Jesucristú, te duca<sup>n</sup> chi xinu cuechi-ná-ndó núu-gă.

23 Te Yă Ndiöxí ní nduu cuendá ñáhá-gă xii-o chi Xítóhó Jesucristú ní nacháhu-gă nchaa yíca cuéchi-o sá ndécú núu Yă Ndiöxí ní cùu, te vá dăñá-ndó să tnàha ñáyiu-ndo nàdatuhú iní ñáhă-yu xii-ndo vă cúnú cuèchi-ndo núu Xítóhó Jesucristú nàcuáa tàù-xi cunduu.

24 Te núu xiă<sup>n</sup> càchí tnúhu-í xii nchaa nchòhó ñáyiu ndècu ndìhi-í ichi Xítóhó Jesucristú sá cùndècu-ni-ndo datná-ni ndècu-ndo ndéé cútnàhá ní cáhá<sup>n</sup> ñáhá-gă xii-ndo, te d̄u-ni duca<sup>n</sup> cùndècu-ndo ichi-gă.

25 Te càchí tnúhu tucu-í xii-ndo să Xítóhó Jesucristú ñá túú càchí tnúhu-gă xii-í nùu nása cáhá<sup>n</sup>-í cuendá nchaa ñáyiu vátá tnăndaha-gă. Te duha sàni iní-í cáhá<sup>n</sup>-í cuendá-yu, te nchòhó cuu quíndáá iní-ndó tnúhu càhá<sup>n</sup>-í chi Xítóhó Jesucristú chindèe chítúu ñaha-gă xii-í.

26 Te yúhú càchí-í sá să cuendá nchaa tnúndòho tnúhu ndàhú íó ñuyíú-a vitna, te váha-gă sá ncháá ñáyiu te núu nása xíndecú-yu te duca<sup>n</sup>-ni na cùndecú-yu.

27 Te nchaa cue téé ndècu ñadìhí-xi te duca<sup>n</sup>-ni na cùndècu-güedé ndìhí-yu, te nchaa cue téé ñá túú ñadìhí-xi te duca<sup>n</sup>-ni na cùnduu-güedé vá ndúcú-güedé ñadìhí-güedé.

28 Dico nchaa cue téé na ndècu ñadìhí-xi te ñá díú ì<sup>n</sup> cuéchi cùu-xi sá dúcá<sup>n</sup> ná ndùcu-güedé ñadìhí-güedé,

te d̄u-ni duca<sup>n</sup> cùu tucu cue ñáyiu d̄ihí te núu na nìhí-yu yí-yu chi ñá díú ì<sup>n</sup> cuéchi cùu-xi sá dúcá<sup>n</sup> ñhí-yu yí-yu. Te núu cue téé na nìhí-güedé ñadìhí-güedé te nándi ndohó-yu cundecú-yu ñuyíú-a, te núu xiă<sup>n</sup> duha càhá<sup>n</sup>-í cuendá sá vă ndúcú-güedé ñadìhí-güedé cuendá sá vă ndóhó-yu.

29 Te nchaa nchòhó ñáyiu ndècu ndìhi-í ichi Xítóhó Jesucristú na càchí tnúhu-í xii-ndo să ñá túú-gă vâ nduu cumání te quixi tucu Xítóhó Jesucristú, núu xiă<sup>n</sup> xíní ñùhu-xi sá ndéé vitna ngüíta nchaa cue téé ndècu ñadìhí-xi cada-güedé chùu<sup>n</sup> Xítóhó Jesucristú, te cada-güedé dàtná sá ñà túú ñadìhí-güedé.

30 Te nchaa ñáyiu ndìhú iní-xi te na càda-ní-yu sá ñà túú ndìhú iní-yu cadá-yu chùu<sup>n</sup> Yă Ndiöxí. Te nchaa ñáyiu cùdíí iní-xi te na càda-ní-yu sá ñà túú cùdíí iní-yu cadá-yu chùu<sup>n</sup>-gă, te nchaa ñáyiu ndècu ndìhi nándi sá ndécú ndìhi te na càda-ní-yu sá ñà túú nă ndécú ndìhí-yu cadá-yu chùu<sup>n</sup>-gă.

31 Te nchaa ñáyiu nèhe chiu<sup>n</sup> nchaa sá íó ñuyíú-a te na càda-ní-yu cuendá sá ñà túú nă néhé chíú<sup>n</sup>-yu cadá-yu chùu<sup>n</sup> Yă Ndiöxí, chi nchaa sá íó ñuyíú-a sa ñùhu-xi ichi cuáhá<sup>n</sup>-xi núu ndìhí ñhnu-xi.

32 Te cùní-í sá vă cùhú<sup>n</sup> iní-ndó nándi sá íó ñuyíú-a, te ni ñà túú tnàhí ná cani iní-ndó cùndècu-ndo, chi nchaa cue téé ndècu ichi Xítóhó Jesucristú xíndècu mee íó ñùhu iní-güedé cada-güedé chùu<sup>n</sup>-gă nàcuáa cud̄u-güedé núu-gă.

33 Te nchaa cue téé sa ndècu ñadìhí-xi cue téé ndècu ichi-gă ñùhu iní-güedé nàcuáa cada-güedé cundècu-güedé ñuyíú-a cuendá duca<sup>n</sup> cùd̄u-güedé núu ñadìhí-güedé.

34 Te d̄u-ni duca<sup>n</sup> cùu tucu cue ñáyiu d̄ihí chi ñá túú ì<sup>n</sup>-ni cuu ñáyiu sa ndècu yí-xi ndìhi ñáyiu vátá cùndècu-gă yí-xi, chi ñáyiu ndècu ichi Xítóhó Jesucristú ñá túú ndèca téé íó ñùhu iní-yu cadá-yu chùu<sup>n</sup>-gă nàcuáa ñhí ní ndúŷ-yu cundècu yíñhú-yu

núú Yă Ndiǒxí, dico cue ñáyiu ðìhí ndécá tē ndècu ichi-gá ío ñùhu iní-yu nàcuáa cundecú-yu ñuyíú-a cuendá cudíú-yu núú yí-yu.

<sup>35</sup> Te duha càhá<sup>n</sup>-í cuendá cúú-xí ñ<sup>n</sup> sá vâha xii-ndo, te cudíú núú tnáhá-ndó, te cuu-ndo ñáyiu cada ndáá núú Xítohó Jesucristú, te mee-ni-gă cuhu<sup>n</sup> iní-ndó. Te ñá díú sá dúhá càhá<sup>n</sup>-í te quide yica-í sá cádá-ndó nàcuáa càhá<sup>n</sup>-í.

<sup>36</sup> Te núu ío dava-ndo sàni iní-ndó sá ñà túú ndùu váha-xi sá ío cuu sacuéhé ðēhe yoco-ndo cundecú-yu ña, te núu sàni iní-ndó sá vâha-gá candecá-yu tē te cada-ndo nàcuáa sàni iní-ndó, chi ñá díú ñ<sup>n</sup> cuéchi cùu-xi.

<sup>37</sup> Te núu dava-ndo ndècu ðēhe yoco-ndo, te vá yǒo ñ<sup>n</sup> cada yica ñàha xii-ndo sá cándecá-yu tē. Te núu mee-ndo sàni váha iní-ndó nàcuáa cada-ndo, te núu vá dásá<sup>n</sup>-ndó ðēhe yoco-ndo càndeca ñàha tē te quide váha-ndo sá dúcá<sup>n</sup> quide-ndo.

<sup>38</sup> Te nchaa ñáyiu ðása<sup>n</sup> ðēhe yoco-xi càndeca ñàha tē te váha-ni quide-yu, te nchaa ñáyiu ñá túú ðása<sup>n</sup> ðēhe yoco-xi càndeca ñàha tē te váha-gá tucu quide-yu sá dúcá<sup>n</sup> quide-yu.

<sup>39</sup> Te nchaa ñáyiu ðìhí ndécú yí-xi xini ñuhu-xi sá cundècu-ní-yu ndìhí yí-yu ñini ndècu vívú-güedē chi duca<sup>n</sup> càhá<sup>n</sup> tnúhu sá dánèhé ñáhá xii-o nàcuáa cada-o cundècu-o, dico núu na cùu-güedē te cuu naquehé<sup>n</sup>-yu ingá tē candecá-yu ðicó-ni sá ðiú-ni tē ndècu ichi Xítohó Jesucristú.

<sup>40</sup> Te yúhú sání iní-í sá ío-gá váha cundecú-yu te núu vá nándúcú-yu ingá tē candecá-yu, te duha càhá<sup>n</sup>-í chi Espíritú Yă Ndiǒxí duca<sup>n</sup> ðàcahu iní ñáhá-xi xii-í càhá<sup>n</sup>-í.

## 8

*Cuendá nchaa sá nchító-ó sãñaha ñáyiu ndùu táhú nchaa sá càchí-yu cùu ndióxí*

<sup>1</sup> Te vitna na càhá<sup>n</sup>-í cuendá nchaa sá nchító-ó sãñaha ñáyiu ndùu táhú nchaa sá càchí-yu cùu ndióxí te ñá ndáá chi ðicó ndaha cue tee ñuyíú-a ní cuáha nchaa xíá<sup>n</sup>. Te nchoo sa cùtnuní váha iní-ó cuendá nchaa xíá<sup>n</sup>,

ðicó-ni sá cuendá nchaa sá cùtnuní váha iní-ó xíá<sup>n</sup> quidé càhnu-o mee-o, dico núu cùu iní-ó tnàha ñáyiu-o te canu ichi-ǒ-yu ichi váha.

<sup>2</sup> Te núu dava-ndo sàni iní-ndó sá túha-ndo dico cùu-ndo ñáyiu vátá cútúha-gá nàcuáa tàú-xi cunduu.

<sup>3</sup> Te núu nchòhó cúú iní-ndó Yă Ndiǒxí te mee-gă càhá<sup>n</sup>-gá sá cúú-ndó ñáyiu cùu cuendá-gá.

<sup>4</sup> Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñáyiu ndùu táhú nchaa sá càchí-yu cùu ndióxí te ñá ndáá chi ðicó ndaha cue tē ñuyíú-a ní cuáha nchaa xíá<sup>n</sup>. Te nchoo cùtnuní iní-ó sá ncháá sá càchí ñáyiu cùu ndióxí cáðúha-yu ñuyíú-a ñá túú cùu-xi ndióxí, chi ñ<sup>n</sup> díí-ni Yă Ndiǒxí ndécú.

<sup>5</sup> Te cue ñáyiu ñuyíú-a càchí-yu sá cuéi andíu te cuéi ñuyíú-a ndècu titní ndióxí. Te ndáá sá ndèni ní cuu ndècu espíritú sá càchí ñáyiu cùu ndióxí te ñá ndáá sá ndióxí cúú-xí, te nchaa xíá<sup>n</sup> táxí tnùní ñáhá-xi xii-yu.

<sup>6</sup> Te nchoo cùtnuní ndáá iní-ó sá ñ<sup>n</sup> díí-ni Yă Ndiǒxí ndécú te ðiú-gá cúú-gă Tátá-ó, te nchoo cùu-o ñáyiu cùu cuendá-gá. Te ðiú-ni mee-gă ní táuchíú<sup>n</sup>-gă ní cuáha nchaa sá ío ñuyíú-a, te cùtnuní tucu iní-ó sá ñ<sup>n</sup> díí-ni Xítohó Jesucristú ndécú, te Yaá-á<sup>n</sup> ñí quide-gá nchaa chiú<sup>n</sup> ní táhú Dútú Ndiǒxí ní cadúha-gá nchaandi túhú sá ío ñuyíú. Te ðiú-ni mee Xítohó Jesucristú quidé ndècu-o ichi-gá vitna.

<sup>7</sup> Te ñá ncháá nchòhó ñáyiu ndècu ichi Xítohó Jesucristú cùtnuní iní-ndó nàcuáa ndùu tnúhu càhá<sup>n</sup>-í. Chi sa ní cáa<sup>n</sup>-ndo quide cahnu-ndo nchaa sá càchí-yu cùu ndióxí ní cùu. Te cuendá xíá<sup>n</sup> núu nàquehe<sup>n</sup>-ni-ndo nchaa sá nchító-ó ndùu táhú nchaa sá càchí-yu cùu ndióxí-á<sup>n</sup> xéxi-ndó, te sàni-ni iní-ndó sá quidé càhnu-ndo nchaa sá càchí-yu cùu ndióxí-á<sup>n</sup> te ñá ndáá sá ndióxí cúú-xí. Te núu sàni iní-ndó sá ñá túú váha caxi-ndo sá dúcá<sup>n</sup> ndùu táhú-xi-á<sup>n</sup> te xéxi-ndo te xíá<sup>n</sup> ñá túú cùu váha iní-ndó cuendá sá dúcá<sup>n</sup> quide-ndo.

8 Te ñá díú nchàa sá xéxí-ó quide-xi cudíu-o núú Yá Ndiöxí, chi ñ<sup>n</sup>-ni quide-xi cuéi na càxi-o àdi vá caxí-ó chi ni ñ<sup>n</sup> sá caxí-ó vǎ chindèe ñaha-xi cudíu-o núú Yá Ndiöxí. Te cuéi vá caxí-ó dico ñá díú xiǎ<sup>n</sup> cada sá vǎ cudíu-o núú-gǎ.

9 Te cuu-ni caxi-ndo nchàa nání nihí-ndó. Te dicó-ni sá cada cuendá-ndo sǎ ñá díú cuendá sá xéxí-ndo-ǎ<sup>n</sup> cuíta nihnu dava ñáyi ndècu ndihí-ndo ichi Xítóhó Jesucristú cadá-yu nándi sá cadǎ-yu nàcuáa vá cúú vǎha iní Yá Ndiöxí chi ñáyi-á<sup>n</sup> ñá túú cùtnuní iní-yu.

10 Te nchòhó ñáyi xìní váha cuendá nchaa sá cǎchí-yu cùu ndióxí, te núu na quihí<sup>n</sup>-ndó núú ndécú nchaa xiǎ<sup>n</sup> te ngóo-ndo càxi-ndo nchaa sá ñí cutáhú-xi, te quiní ñáyi ndècu ndihí-ndo ichi Xítóhó Jesucristú, ñáyi vátá cùtnuní-gǎ iní-xi nàcuáa ndùu cuendá nchaa sá dúcá<sup>n</sup> cǎchí-yu cùu ndióxí-á<sup>n</sup>, te cuéi sàni iní-yu sá ñá túú quide váha-ndo sǎ dúcá<sup>n</sup> quide-ndo te cudana te cada yicá-yu caxí-yu tnàhá-yu nchaa sá dúcá<sup>n</sup> ñí nduu táhú nchaa sá cǎchí-yu cùu ndióxí-á<sup>n</sup> te ñá ndàá sá ndiöxí cúú-xí.

11 Te núu duca<sup>n</sup> cùtnuní iní-ndo nàcuáa ndùu cuendá nchaa xiǎ<sup>n</sup> te duca<sup>n</sup> quide-ndo, te sá dúcá<sup>n</sup> quide-ndo-á<sup>n</sup> te dàcuíta nihnu-ndo dǎva-gǎ ñáyi ndècu ndihí-ndo ichi Xítóhó Jesucristú, ñáyi vátá cùtnuní-gǎ iní-xi nàcuáa ndùu cuendá nchaa xiǎ<sup>n</sup>, te diu cuendá tnàhá ñáyi-á<sup>n</sup> ñí xihí Xítóhó Jesucristú.

12 Te sá dúcá<sup>n</sup> quide-ndo-á<sup>n</sup> cúú-xí ñ<sup>n</sup> cuéchi núú Xítóhó Jesucristú, chi quide-ndo nàcuáa xínu iní-yu cadá-yu ñ<sup>n</sup> sá sání iní-yu ñá túú vǎha, núu xiǎ<sup>n</sup> ñá túú quide váha-ndo sǎ cúú-xí-yu.

13 Te núu yúhú cùtnuní iní-í sá sǎ cuendá ñ<sup>n</sup> sá cǎxí-í te ngóo ñ<sup>n</sup> ñáyi ndècu ndihí-í ichi Xítóhó Jesucristú cadá-yu ñ<sup>n</sup> sá vǎ cúú vǎha iní Yá Ndiöxí, te váha-gǎ sá vǎ cǎxí-gǎ-í xiǎ<sup>n</sup> cuendá sá vǎ cadǎ-yu ñ<sup>n</sup> sá vǎ cúú vǎha iní-gǎ.

*Nchaa sá cúú cada cue téé ní táuchíú<sup>n</sup> Xítóhó Jesucristú cǎhá<sup>n</sup> tnúhu-gǎ*

1 Te yúhú chi cuu cada-í nchaa sá sání iní-í, chi tnàhá-í ní táuchíú<sup>n</sup> Xítóhó Jesucristú cǎhá<sup>n</sup>-í tnúhu-gǎ núú ñáyi. Te yúhú ní xiní núú-í Xítóhó Jesucristú Yaá cúú Xítóhó-ó te nchòhó cúú-ndo ñáyi ní sándáá iní tnúhu-gǎ sá cǎhá<sup>n</sup>-í te duca<sup>n</sup> chi ndècu ndihí-í-gǎ.

2 Te ió dava ñáyi ñá túú sándáá iní-yu sá Xítóhó Jesucristú ní táuchíú<sup>n</sup>-gǎ cǎhá<sup>n</sup>-í tnúhu-gǎ, dico nchòhó chi cùtnuní ndáá iní-ndo sǎ díú-gǎ ní tendaha ñàha-gǎ xii-í xicá cùu-í cǎhá<sup>n</sup>-í tnúhu-gǎ, te duca<sup>n</sup> chi yúhú ní cǎhá<sup>n</sup>-í tnúhu-gǎ núú-ndo te ní sándáá iní-ndo-gǎ te xiǎ<sup>n</sup> cùtnuní sá díú-gǎ ní tendaha ñàha-gǎ xii-í xicá cùu-í cǎhá<sup>n</sup>-í tnúhu-gǎ núú ñáyi.

3 Te duha ndùu tnúhu cǎhá<sup>n</sup>-í cuendá cundedóho nchaa ñáyi sàtnuhu ñaha xii-í.

4 Chi yúhú cuu-ni caxi-í nchaa núú sǎ cúú càxi-o na taxi ñáyi.

5 Te cuu-ni cundecu ñadìhí-í te caca ndeca-í-yu nchaa núú xicá cùu-í cǎhá<sup>n</sup>-í tnúhu Yá Ndiöxí dàtná quidé dǎva-gǎ cue téé cǎhá<sup>n</sup> tnúhu-gǎ, ndihí cue téé cùu ñaní Xítóhó Jesucristú, ndihí té Pèlú.

6 Te tnàhá yúhú ndihí té Bèe cuu dañá-ndí chiu<sup>n</sup> quide-ndí te cada-ndí dàtná xíquide dava-gǎ-güedé cǎhá<sup>n</sup>-güedé tnúhu Xítóhó Jesucristú.

7 Te nchoo xìní-ó sǎ ncháá cue sandadú dacuítí sǎ ñúhú yǎhu-güedé xínu cuèchi-güedé, te ñá túú dicó duca<sup>n</sup> xínu cuechi-güedé. Te duca<sup>n</sup> sàtnahá-xi cùu tucu ñáyi xitu ñ<sup>n</sup> sá xítú chi dacuítí nihí-yu ñ<sup>n</sup> sá xítú-yu xéxí-yu, te ñá díú dicó duca<sup>n</sup> xítú-yu. Te duca<sup>n</sup> cùu tucu cue téé cùu toli chi quihni-güedé dícu quiti xito-güedé xihí-güedé te ñá túú dicó duca<sup>n</sup> xito-güedé-di.

8 Te vá cání iní-ndo sǎ sá dúhá cǎhá<sup>n</sup>-í te cǎhu iní mée-í duha cǎhá<sup>n</sup>-í, chi tnúhu cǎhá<sup>n</sup>-í-a ñ<sup>n</sup>-ni quèe-xi ndihí tnúhu ní cǎhá<sup>n</sup> ndí Moisés.

9 Chi ndii-á<sup>n</sup> nĩ chídó tnùnĩ ndii núú tütú ndii nàcuáa ní xáha<sup>n</sup> Yá Ndiöxí xii ndii, te cächí-xi: “Vá chíhí-ndó ñunu yuhu ndicutu oré dánchezí-dí triú”, duha cächí-xi núú tütú ndii. Te ñá díú sá dúcá<sup>n</sup> nĩ cáhá<sup>n</sup> Yá Ndiöxí te cáhá<sup>n</sup>-gá mee-ni cuendá ndicutu-á<sup>n</sup>.

10 Chi ní cáhá<sup>n</sup>-gá cuendá nchoo cue ñáyiú ndècu ichi-gá, te ndáá sá díú cuendá-ó dùca<sup>n</sup> ní cáhá<sup>n</sup>-gá. Te nchaa cue téé xitu chihi tatá sàni iní-güedé sá díú tátá chíhí-güedé-á<sup>n</sup> cuu sá cáxi-güedé, te ñu-ni duca<sup>n</sup> cùu tucu cue téé xicani triú chi càni-güedé cuendá quee caxi-güedé.

11 Te duca<sup>n</sup> sãtnahá-xi cùu nchúhú cue téé cáhá<sup>n</sup> tnúhu Xítoho Jesucristú, chi dānehé ñáhá-ndĩ xii-ndo cuendá nchaa sá vāha quide ñaha Yá Ndiöxí xii-o, núu xiã<sup>n</sup> dai tãu-xi sá nchòhó chindee ñaha-ndo xii-ndĩ nõu ná cúú sá xíní ñuhu-ndĩ.

12 Te núu dava cue téé cáhá<sup>n</sup> tnúhu Yá Ndiöxí chindèe-ndo-güedé, te uu<sup>n</sup>-gá duca<sup>n</sup> tãu-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tãu ndisa-ndo sã chindèe ñaha-ndo xii-ndĩ dico ñá túú dùca<sup>n</sup> cahá<sup>n</sup>-ndĩ núú-ndó càda-ndo, te quide cahnu iní-ndĩ cuèi nãndĩ sá tá yãha-ndĩ véxi. Te duca<sup>n</sup> quide-ndĩ cuendá sá ñà túú nã cani iní ñáyiú cuendá-ndĩ te duca<sup>n</sup> cuíta cuténuu-gá tnúhu sá cáhá<sup>n</sup> nàcuáa naníhí tãhú-ó quíhí<sup>n</sup>.

13 Te nchòhó xíní-ndó sã ncháá cue téé xinu cuechi veñúhu ñu-ni xiã<sup>n</sup> nihí-güedé xéxi-güedé, te ñu-ni cue téé-á<sup>n</sup> xínú cuèchi-güedé núú xihí quiti ndùu tãhú Yá Ndiöxí, te ñu-ni xiã<sup>n</sup> nihí tucu-güedé sá xéxi-güedé.

14 Te ñu-ni duca<sup>n</sup> sãtnahá-xi cùu nchúhú cue téé cáhá<sup>n</sup> tnúhu sá cáhá<sup>n</sup> nàcuáa naníhí tãhú-ó, chi Xítoho Jesucristú ní cachí-gá sá díú-ni cuendá chiú<sup>n</sup> quide-ndĩ nihí-ndĩ caxi-ndĩ.

15 Te ñá ñi<sup>n</sup> ndùu cáhá<sup>n</sup>-í núú-ndó càda-ndo nàcuáa tãu-xi cunduu sá cúú-xi-í, te vá cání iní-ndó sã sá dúhá cáhá<sup>n</sup>-í te ñi<sup>n</sup> sá xicá<sup>n</sup>-í núú-ndó. ¡Chi cuèi na cùú-í sá ndóhò-í te ñá díú sá cáhá<sup>n</sup> ñáyiú sá sã cuendá sá cáhá<sup>n</sup>-í

tnúhu Xítoho Jesucristú nihí-í xéxi-í!

16 Te yúhú ñá túú quide cahnú-í mée-í sá cáhá<sup>n</sup>-í tnúhu sá cáhá<sup>n</sup> nàcuáa naníhí tãhú-ó, chi tãu tñahá-í sá càdà-í chi duca<sup>n</sup> nĩ cachí Yá Ndiöxí cada-í. ¡Te ndáhú ní cuu yúhú te núu vá cáhá<sup>n</sup>-í tnúhu-á<sup>n</sup>!

17 Te ñá túú cáhá<sup>n</sup>-í tnúhu-gá sá cúú iní mée-í chi mee-gã ní táuchíú<sup>n</sup>-gã cáhá<sup>n</sup>-í tnúhu-gá. Te núu cáhá<sup>n</sup>-í tnúhu-gá sá cúú iní mée-í te tãu-í nihí-í sá ndúú tãhú-í ní cùu.

18 Dico sá sã ní nduu tãhú-í cúú-xi sã ño cùdí iní-í sá dícó duca<sup>n</sup> cáhá<sup>n</sup>-í tnúhu sá cáhá<sup>n</sup> nàcuáa naníhí tãhú-ó. Te cuèi tãu-í quehe<sup>n</sup>-í sá táxi-ndó ndùu tãhú-í sá cuendá sá cáhá<sup>n</sup>-í tnúhu Xítoho Jesucristú, dico ñá túú dùca<sup>n</sup> quide-í.

19 Te sá dúcá<sup>n</sup> dícó duca<sup>n</sup> cáhá<sup>n</sup>-í tnúhu sá cáhá<sup>n</sup> nàcuáa naníhí tãhú-ó, xiã<sup>n</sup> ní ñi<sup>n</sup> ñáyiú ñuyíú-a vá cúú cächí-yu sá táxi tnùnĩ ñáhã-yu xii-í, te cuèi duca<sup>n</sup> dico mee-í ní sani iní-í sá cúú-í dàtná ñi<sup>n</sup> téé xinu cuechi núú nchaa ñáyiú cuendá duca<sup>n</sup> cuíta cuu vaí-yu tuhá-yu ichi Xítoho Jesucristú quíhí<sup>n</sup>.

20 Te òré ñúhú tñahí tnuú cue ñáyiú israhél te quide-í sá ñi<sup>n</sup>-ní cùu-í ndihí-yu cuèi ñá túú nchícú<sup>n</sup> nihnu-í tnúhu ní cáhá<sup>n</sup> ndii Moisés, te duca<sup>n</sup> quide-í cuendá sá ñáyiú-á<sup>n</sup> quíndáá iní-yu tnúhu cáhá<sup>n</sup>-í te tuhá-yu ichi Xítoho Jesucristú.

21 Te òré ñúhú tñahí tnuú nchaa ñáyiú ñá túú nchícú<sup>n</sup> nihnu tnúhu ní cáhá<sup>n</sup> ndii Moisés, te quide-ni-í sá quidè-í dàtná quidé mée-yu cuendá quíndáá iní-yu tnúhu cáhá<sup>n</sup>-í, te tuhá-yu ichi Xítoho Jesucristú. Te cuèi duca<sup>n</sup> quide-í dico ñá túú dàña ndeé-í quidè-í nchaa nàcuáa cuíni Yá Ndiöxí cada-o, te duca<sup>n</sup> chi nchícú<sup>n</sup> nihnu-í quidè-í nchaa nàcuáa cáhá<sup>n</sup> Xítoho Jesucristú.

22 Te òré ndécù-í ndihí nchaa ñáyiú ñá túú cùtnuní váha iní-xi nàcuáa cundecu ichi Xítoho Jesucristú, te tñahá-í quidè-í dàtná quidè-yu cuendá sá ná tédóho-yu nchaa tnúhu cáhá<sup>n</sup>-í te duca<sup>n</sup> cùtnuní-gá iní-yu nàcuáa cundecú-yu ichi-gá. Te nchaandi

túhú ñáyiú quide-í sá ñ<sup>n</sup>-ni cuu-í ndihí-yu cuendá duca<sup>n</sup> ñihí-í nàcuáa cada-í te cundedóho-yu tnúhu càhá<sup>n</sup>-í te tñí-yu ichi Xítóhó Jesucristú te naníhí tãhú-yu.

<sup>23</sup> Te duha quide-í cuendá sá cuíta quindáá iní-yu tnúhu sá càhá<sup>n</sup> nàcuáa naníhí tãhú-ó quíhí<sup>n</sup>, te duca<sup>n</sup> te tnàhá yúhú ío váha cundecu-í dàtná càhá<sup>n</sup> tnúhu-á<sup>n</sup>.

<sup>24</sup> Te nchòhó sa xìní-ndó sã ncháá cuè téé xínu quíhu màrcúhyú nchaa-güedé xínú-güedé, dico ñ<sup>n</sup>-ni-dé cúú tée ndàcu ngodó núú te téé-á<sup>n</sup> cúú tée ñihí sá ndúú tãhú-xi, te duca<sup>n</sup> xìni ñuhu-xi cada nchohó tucu chi cada-ndo nchàa nacuáa cuini Yã Ndiöxí cada-ndo cuendá duca<sup>n</sup> ñihí-ndó sã ndúú tãhú-ndó.

<sup>25</sup> Te nchaa cue téé xìní dadiqui te váha váha quide cuendá-güedé ñúu ná cúú sã cáda tñèñu te xòcani-güedé cuendá sá ñà díú xĩã<sup>n</sup> cada te cuíta-güedé òré dadiqui-güedé. Te duca<sup>n</sup> quide-güedé cuendá cuini-güedé ñihí-güedé sá ndúú tãhú-güedé, te sá ndúú tãhú-güedé-á<sup>n</sup> cúú-xi ñ<sup>n</sup> sá ndihí ñihnu ñuyú-a. Dico nchoo ndùcu ndee-o quide-o nacuáa ñihí-ó sã ndúú tãhú-ó, te xĩã<sup>n</sup> cudíi-xi cundecu ndihí-o ñi caa ñi quíhí<sup>n</sup>.

<sup>26</sup> Te yúhú quidè-í dàtná quidé cuè téé xínu, chi cue téé-á<sup>n</sup> xìní-güedé núú quéxìo-güedé, te quide tucu-í dàtná xiquide cue téé sa ní cutúha naá, te ñá túú quide-í dàtná quidé cuè téé vitna dàcuaha naá. Te duca<sup>n</sup> chi yúhú quidè-í nchaa nàcuáa cuini Yã Ndiöxí cunduu.

<sup>27</sup> Te yúhú ñá túú dàña-í taxi tñuni ñáhá ñi ñ<sup>n</sup> sá cuèhé sá dúhá xii-í chi yòtñi-í mée-í. Te duca<sup>n</sup> quide-í chi yúhú càhá<sup>n</sup>-í tnúhu Xítóhó Jesucristú núú ñáyiú, te cuini-í sá vã cuíta sá ñi cachí Yã Ndiöxí nduu tãhú-í.

## 10

*Cuendá nchaa sá ñi cadúha cue téé ñuyú-a quide cahnu ñáyiú*

<sup>1</sup> Te nchòhó ñáyiú ndècu ndihí-í ichi Xítóhó Jesucristú na càchí tnúhu-í xii-ndo cuendá nchaa ñani tnàhá-ndí

ñáyiú isràél ní xíndecu ndéé sanaha, chi vitna tnàhá nchòhó cúú-ndó dàtná cue ñani tnàhá nchàa ñáyiú-á<sup>n</sup> chi ndècu-ndo ichi-gá. Te nchaa ñáyiú-á<sup>n</sup> ñi taxi ndecu Yã Ndiöxí ñ<sup>n</sup> vícò ñi dánhé ñáhá-xi xii-yu ichi quíhí<sup>n</sup>-yu, te ní quée dava ndute lámár naní Mår Tícuèhé te ncháa-yu ní yáha-yu.

<sup>2</sup> Te sá dúcá<sup>n</sup> ñi cuu te ncháa-yu ñ<sup>n</sup>-ná ní cuú-yu ndihí ndíi Moisés, te ní xihí ndaha ñaha ndíi xií-yu.

<sup>3</sup> Te ncháa-yu ní xexí-yu sá ñi sãñaha Yã Ndiöxí xií-yu.

<sup>4</sup> Te duca<sup>n</sup> nchàa tucú-yu ní xihí-yu ndute sá ñi sãñaha-gã xií-yu, ndute sá ñi quée yiqui ñaha cava. Te cava-á<sup>n</sup> cada iní-ó sá cúú-xi dàtná Xítóhó Jesucristú te duca<sup>n</sup> chi ndihí ñaha-gã xií-yu ichi cuáhá<sup>n</sup>-yu dàvá-á<sup>n</sup>.

<sup>5</sup> Dico ío vãi-yu ñá túú ní quidé-yu nàcuáa càhá<sup>n</sup> Yã Ndiöxí, te xĩã<sup>n</sup> ñá túú ní cùu váha iní ñáhá-gã xií-yu. Te sá dúcá<sup>n</sup> ñi quidé-yu núu xĩã<sup>n</sup> òré ñúhú-yu ichi cuáhá<sup>n</sup>-yu xití yucu ío vãi-yu ní xihí.

<sup>6</sup> Te duca<sup>n</sup> ñi cuu cuendá nchoo vã cãchícú<sup>n</sup> ñihnu-o càda-o nacuáa ní quidé-yu, chi ñáyiú-á<sup>n</sup> mee-ni nchàa sá cuèhé sá dúhá ñi sani iní-yu ní quidé-yu. Te nchoo xini ñuhu-xi sá vã dúcá<sup>n</sup> càda-o.

<sup>7</sup> Te yúhú càhá<sup>n</sup>-í dóho-ndo sã vã quindáá iní-ndó te ñi vã cáda càhnu-ndo ñi ñ<sup>n</sup> sá càchí-yu cùu ndiöxí ní cadúha cue téé ñuyú-a dàtná ní quide cue ñani tnàhá-ndí ní xíndecu ndéé sanaha. Chi ñáyiú-á<sup>n</sup> ñi quidé-yu dàtná càhá<sup>n</sup>-xi núú tütú Yã Ndiöxí núú càchí-xi: “Nchaa ñáyiú ní xexí-yu ní xihí-yu ní quidé-yu vícò, ní quide cãhnú-yu sá càchí-yu cùu ndiöxí ní cadúha-yu te ñá ndáá sá ndiöxí cúú-xi”, duha càchí-xi núú tütú-gá.

<sup>8</sup> Te ñi vã cùndecu-ndo ichi díi iní dàtná ní quide dava ñáyiú-á<sup>n</sup>, chi sá dúcá<sup>n</sup> ñi quidé-yu te ní xihí ócò úní mĩl-yu ñ<sup>n</sup>-ni nduu.

<sup>9</sup> Te vá cãní iní-ndó sã sã cãhnú iní Yã Ndiöxí te nãndi sá cuèhé sá dúhá càda-ndo cuendá cuini-ndó quini-ndó núu nása cada ñaha-gã xii-ndo, chi

ñáyiú ní xíndecu ndéé sanaha-ǎ<sup>n</sup> duca<sup>n</sup> nǐ xóo cadá-yu, te ní xíhí-yu ní xexiha<sup>n</sup> cǒo.

<sup>10</sup> Te nǐ vǎ cǎhá<sup>n</sup> cuèhé-ndó cuendá Yǎ Ndiǒxí, chí dava ñáyiú ní xíndecu ndéé sanaha-ǎ<sup>n</sup> duca<sup>n</sup> nǐ quidé-yu ní cǎhá<sup>n</sup> cuèhé-yu cuendá-gá te ní quixi espíritú xínú cuèchi núú-gǎ ní sahní ñaha-xi xíí-yu.

<sup>11</sup> Te duca<sup>n</sup> nǐ cuu te duca<sup>n</sup> nǐ ngúndéé núú tütú Yǎ Ndiǒxí cuendá dacuàha-o vitna ta cuyatni nduu naa ñuyíú-a. Te nchaa tnúhu sá nǐ ngódó tnùnǐ-ǎ<sup>n</sup> cǎhá<sup>n</sup> dóho ñaha-xi xíi-o cuendá sá vǎ cadá-ó dàtná ní quide ñáyiú-ǎ<sup>n</sup>.

<sup>12</sup> Te xǎ<sup>n</sup> nǔu nchaa nchòhó ñáyiú sàni iní sá ïo váha cùndáá ndécú ìchi Xítohó Jesucristú cada cuendá-ndó sǎ dúcá<sup>n</sup>-ní cùndáá-ndó nǔú-gǎ, te vǎ dáná cuendá-ndó cǎda-ndo sá ñà túú cùu váha iní Yǎ Ndiǒxí.

<sup>13</sup> Te ðiu-ni dàtná quidé sàcuíhná dǎcǎhá<sup>n</sup>-xi iní nchaa dava-gá ñáyiú nándi quidé-yu, te ðiu-ni duca<sup>n</sup> quide ñaha-xi xii-ndo. Dico mee Yǎ Ndiǒxí cúú-gǎ Yaá quide ndǎá chí quide-gǎ nchaa sá cǎhá<sup>n</sup>-gá, te ñá dǎñá-gǎ sá sùúnǐ cuídó sàcuíhná coto ndéé ñáhá-xí xii-ndo, chí není-ni nàcuáa cùndee iní-ndó dǎña-gá duca<sup>n</sup> quide ñaha-xi xii-ndo. Te ðiu-ni-gá chindee ñaha-gá xii-ndo cùndee iní-ndó vǎ cadá-ndó cuèi nándi sá ná dàcahu iní ñáhá-xí xii-ndo.

<sup>14</sup> Te xǎ<sup>n</sup> nǔu cǎhá<sup>n</sup>-í dóho nchòhó ñáyiú ío cùu iní-í sá vǎ quíndáá iní-ndó nǐ ð<sup>n</sup> sá cǎchí-yu cùu ndióxí te ñá ndǎá chí ðicó ndaha cue téé ñuyíú-a ní cuáha nchaa xǎ<sup>n</sup>, te nǐ vǎ cadá cǎhnu-ndo.

<sup>15</sup> Te ðuha cǎhá<sup>n</sup>-í chí cùu-ndo ñáyiú tècú tnùnǐ, te mee-ndo ïo váha cuáha-ndo cuendá te núu váha-ni cǎhá<sup>n</sup>-í àdi ñá túú vǎha-ni.

<sup>16</sup> Te nchoo ndàcá<sup>n</sup> táhú-ó nǔú Yǎ Ndiǒxí cuendá ndudí ndéhé yoho yàha stilé sá xíhí-ó, te sá dúcá<sup>n</sup> xíhí-ó ndùdí ndéhé yoho yàha stilé-ǎ<sup>n</sup>, te xǎ<sup>n</sup> ndácú ìní-ó sǎ ð<sup>n</sup>-ní cùu-o ndìhi Xítohó Jesucristú cuendá sá nǐ sati níñí-gǎ ní xíhí-gá núú cùrúxí, te ðiu-ni duca<sup>n</sup> sǎtnahá tucu-xi cùu paá sá xéxí-ó òré xíhí-ó ndùdí ndéhé yoho yàha

stilé-ǎ<sup>n</sup>, chí sá dúcá<sup>n</sup> xéxi-o paá-ǎ<sup>n</sup> xǎ<sup>n</sup> ndácú ìní-ó sǎ ð<sup>n</sup>-ní cùu-o ndìhi Xítohó Jesucristú sá cuendá yiqui cùñú-gá.

<sup>17</sup> Te cuèi vǎi vihi-o ðico ð<sup>n</sup> ðii-ni paá xéxí-ó, te sá dúcá<sup>n</sup> ð<sup>n</sup> ðii-ni paá xéxí-ó xǎ<sup>n</sup> ndácú ìní-ó sǎ ð<sup>n</sup>-ní cùu-o ndìhi Xítohó Jesucristú.

<sup>18</sup> Te cada cuendá-ndó nàcuáa quide ñáyiú isràél, chí ñáyiú-ǎ<sup>n</sup> xéxí-yu sá ndúú táhú Yǎ Ndiǒxí. Te sá dúcá<sup>n</sup> quide-yu-ǎ<sup>n</sup> cùtnùnǐ iní-ó sǎ tnàhá tnúhu-yu ndìhi-gá.

<sup>19</sup> Te vǎ cǎní ìní-ndó sǎ sá dúhá cǎhá<sup>n</sup>-í te cǎchí-ndó sǎ cùnuu nchaa sá cǎchí-yu cùu ndióxí ní cadúha cue téé ñuyíú-a chí ñá túú nǎ cúú nǐ ð<sup>n</sup> nchaa xǎ<sup>n</sup>. Te ðiu-ni duca<sup>n</sup> cùu tucu nchaa sá sǎñaha ñáyiú nduu táhú-xi chí ñá túú cùnuu-xi, chí ð<sup>n</sup>-ni cùu-xi ndìhi nchaa dava-gá sá xéxí-ó.

<sup>20</sup> Te yúhú cǎchí-í sá sǎ dúcá<sup>n</sup> quide nchaa ñáyiú ñá túú tnàhá tnúhu ndìhi Yǎ Ndiǒxí, te ðicó nchaa espíritú cùndìhi yucu ñávǎha sǎñàhá-yu sá ndúú táhú-xi sá dúcá<sup>n</sup> quide-yu. Te ñá ðíú Yǎ Ndiǒxí sǎñàhá-yu sá ndúú táhú-gǎ. Te yúhú cuìní-í sá vǎ tnàhá tnúhu-ndo ndìhi cue espíritú cùndìhi yucu ñávǎha.

<sup>21</sup> Te duca<sup>n</sup> chí vǎ cúú tnàhá tnúhu-o ndìhi cue espíritú cùndìhi yucu ñávǎha te tnàhá tnúhu-o ndìhi Xítohó Jesucristú, te ñá túú nduu váha-xi ngóo cǎxi-o coho-o sá ndúú táhú cue espíritú cùndìhi yucu ñávǎha-ǎ<sup>n</sup>, te ngóo cǎda-o nacuáa ní dándóo tnúhu Xítohó Jesucristú coho-o ndùdí ndéhé yoho yàha stilé, te caxi-o paá cada-o sǎ ndácú ìní-ó sǎ nǐ xíhí-gá núú cùrúxí.

<sup>22</sup> Te vǎ cǎní ìní-ó dùcá<sup>n</sup> cada-o cuendá sá vǎ cùdée<sup>n</sup> Yǎ Ndiǒxí, chí ñá túú nǎ cǎhnu cuu-o núu cada-o nǎni véxi iní méé-ó, chí mee-gǎ ío cǎhnu cuu-gá.

*Cada-o nchàa nacuáa cuu cǎhnu Yǎ Ndiǒxí*

<sup>23</sup> Te ndǎá sá ncháá sǎ cuìní-ó cǎda-o te cuu cada-o ðico ñá ncháá cùu-xi sá váha sá cúú-xí-ó, te nǐ ñá ncháá-xi chindee ñaha-xi nacuáa níhí ndéé-gǎ-ó cùndecu-o ichi Xítohó Jesucristú.

24 Te xini ñuhu-xi sá cáda-ó sã vãha sá cúu-xí tnàha ñáyi-u-o te ñá díú mèe-ni sá cúu-xí mèe-o cada-o.

25 Te nchòhó cuu caxi-ndo nchàa cuñú sá cùyãhu cuñú sá xini caxi-ndo, te vá ndúcú tnũhu-ndo te núu cùu-xi cuñú sá ñi nduu táhú sã càchí-yu cùu ndiòxí. Te ñá túú ñã cani iní-ndó caxi-ndo,

26 chi ñuyíú-a ndihi nchaa sá ió cúu-xí cuendá Yã Ndiòxí.

27 Te núu ñã ñáyi-u ñá túú ndècu ichi Xitohó Jesucristú càhá ñáhã-yu xii-ndo quíhí-ndó caxi-ndo dítã vehé-yu, te núu sàni iní-ndó sã quíhí-ndó te cuu quíhí-ndó te caxi-ndo cuèi náí cùu sá táxí-yu dico vá càcá ònùhú-ndó nũ-yu núu ndèé ní níhí-yu, te duca<sup>n</sup> te cuu váha iní-ndó caxi-ndo.

28 Te núu ñã ñáyi-u càchí-yu sá xĩã<sup>n</sup> cúu-xí sã ñi nduu táhú sã càchí-yu cùu ndiòxí te vá caxí-ndó cuendá sã ñáyi-u duca<sup>n</sup> càhá-án<sup>n</sup> cuu váha iní-yu te ñá túú tnàhí ná cani iní-yu.

29 Te yúhú càhá-í cuendá nàcuáa sàni iní méé ñáyi-u duca<sup>n</sup> càhá-án<sup>n</sup> te ñá díú sã nàcuáa sàni iní méé-ndó quide-ndo.

Te dava-ndo càchí-ndó: “Cuu-ni cada-o nchàa nàcuáa sàni iní méé-ó cuèi dava-gã ñáyi-u sàni iní-yu sã ñá túú nduu váha-xi sá dúcá<sup>n</sup> càda-o”, duha càchí-ndó.

30 Te càchí tucu-ndo: “Ñá túú tàú-xi càhá<sup>n</sup> cuèhé ñáyi-u cuendá-ó sã cuendá nchaa sá xéxi-ó chi ndàcá<sup>n</sup> táhú-ó nũ Yã Ndiòxí òré xéxi-ó”, duha càchí-ndó.

31 Te cuèi nándi sá xini caxi-ndo nihí-ndó xèxi-ndo àdi quide-ndo, te cada-ndo nàcuáa càhá<sup>n</sup> váha ñáyi-u cuendá Yã Ndiòxí.

32 Te vá cáda-ndó sã ñã túú tàú-ndó càda-ndo cuendá sã vã cáda ñáyi-u ñã sá ñã túú cùu váha iní Yã Ndiòxí. Te ni sã cúu-xí cuè ñáyi-u isràél, te ni sã cúu-xí cuè ñáyi-u ñã túú cùu ñáyi-u isràél, te ni sã cúu-xí cuè ñáyi-u ndècu ichi-gã vá dúcá<sup>n</sup> càda-ndo sá cúu-xí-yu.

33 Te yúhú ío ndècu ndee-í quidè-í nàcuáa cudù-í núu nchàa ñáyi-u, te quide-í sã vãha sá cúu-xí-yu, te ñá túú quide-í mee-ni sã cúu-xí mèe-í. Te

duca<sup>n</sup> quide-í cuendá quindáá iní-yu tnúhu Xitohó Jesucristú te naníhí tàhú-yu.

## 11

1 Te chí cáncàcú<sup>n</sup> nihnu cada-ndo nchàa nàcuáa quide-í nchicú<sup>n</sup> nihnu-í nchaa nàcuáa quide Xitohó Jesucristú.

*Nàcuáa tàú-xi cada nchaa ñáyi-u òhí núu tàcá-yu dàcuahá-yu tnúhu Yã Ndiòxí*

2 Te nchòhó ñáyi-u ndècu ndihi-í ichi Xitohó Jesucristú càchí tnúhu-í xii-ndo sã ò cùdí<sup>n</sup> iní-í, chi ndàcu iní ñáhã-ndó xii-í, te quide-ndo nchaa nàcuáa ní dánèhé ñáhã-í xii-ndo.

3 Te cuini-í sá nchòhó cutnùní iní-ndó sã ñã dui-ni Yã Ndiòxí cúu-gã Yá cùnùu taxi tnuní ñáhã xii Xitohó Jesucristú, te duca<sup>n</sup> Xitohó Jesucristú ñã dui-ni-gã cùnùu taxi tnuní-gã nchaa cue téé, te nchaa cue téé òu-ni mee-güedé cùnùu-güedé táxi tnuní-güedé ñãdihí-güedé.

4 Te núu nchoo cuè téé na dàdãhu-o díquí-ó òré càhá-ó nũ ñáyi-u tnúhu sá dácãhu iní ñáhã Yã Ndiòxí xii-o àdi òré càhá<sup>n</sup> ndihi-o-gã, te ñã sácã<sup>n</sup> núu cúu-xí te núu duca<sup>n</sup> na càda-o dadãhu-o díquí-ó.

5 Dico núu ñáyi-u òhí vá dàdãhu-yu díquí-yu òré càhá<sup>n</sup> ndihi-yu Yã Ndiòxí, àdi òré càhá<sup>n</sup> yu tnúhu sá dácãhu iní ñáhã-gã xii-yu núu tnàhá ñáyi-u-yu, te sácã<sup>n</sup> núu cúu-xí te núu vá dàdãhu-yu díquí-yu, chi ñã-ni cùu-xi te núu na dèté ndii-yu díquí-yu.

6 Te núu ñã túú cuini cue ñáyi-u òhí dàdãhu-yu díquí-yu te váha-gã sá ná dèté ndii-yu díquí-yu. Te núu cùcaha<sup>n</sup> nũ-yu sá dèté díquí-yu te váha-gã sá ná dàdãhu-yu díquí-yu.

7 Te nchoo cuè téé vá cúu dàdãhu-o díquí-ó òré càhá<sup>n</sup> ndihi-o Yã Ndiòxí ni òré càhá-ó tnúhu sá dácãhu iní ñáhã-gã xii-o nũ ñáyi-u chi díhna-gã-ó ñi cadúha ñaha Yã Ndiòxí xii-o, te ní taxi ndecu-gã nchaa sá xini tnuní-ó dàtnã ndécú nchàa sá xini tnuní méé-gã. Te duca<sup>n</sup> ñi quide-gã chi cuini-gã sá nchóó càda-o nàcuáa càhá<sup>n</sup>

nchaa dava-gá ñáyiú sá ïo càhnu cuu-gá, te cue ñáyiú ðìhí quídě-yu nàcuáa cunuu nchòo cue tée.

<sup>8</sup> Te Yá Ndiòxí ní cadúha-gá tée, dico ñá ðíú yìqui naha ñadihí ní quènehe-gá ní cadúha-gá tée chi yìqui naha tée ní quènehe-gá ní cadúha-gá ñadihí.

<sup>9</sup> Te sá cuèndá tée duca<sup>n</sup> ñí cadúha-gá ñadihí-á<sup>n</sup> te ñá ðíú sá cuèndá ñadihí ní cadúha-gá tée.

<sup>10</sup> Núu xíá<sup>n</sup> tàú-xi sá ncháá ñáyiú ðìhí dàdàhu-yu ðíquí-yu cuèndá duca<sup>n</sup> cùtnuní sá ñà túú cùnúú-yu dàtná cùnúu nchoo cue tée. Te duca<sup>n</sup> xini ñuhu-xi cadá-yu sá cuèndá nchaa espíritú xínú cuèchi núú Yá Ndiòxí.

<sup>11</sup> Te vitna nchoo ñáyiú ndècu ichi Xítóhó Jesucristú, vá càchí-ó sá cuè tée ñá túú xini ñuhu-güedé cue ñáyiú ðìhí chindee ñáhá-yu, te ni vâ càchí-ó sá cuè ñáyiú ðìhí ñá túú xini ñuhú-yu cue tée chindee ñàha-güedé xii-yu.

<sup>12</sup> Te ì<sup>n</sup> yìqui naha tée ní queñuhu Yá Ndiòxí ní cadúha-gá ñadihí, dico vitna chi ñáyiú ðìhí dácàcú-yu tée. Te tée, ñadihí ní cadúha Yá Ndiòxí, te ðiu-ni duca<sup>n</sup> ñí cadúha-gá nchaa dava-gá sá ío.

<sup>13</sup> Te mee-ndo càda cuèndá-ndó te núu ndùu váha-xi sá vâ dàdàhu cue ñáyiú ðìhí ðíquí-yu òré càhá<sup>n</sup> ndihí-yu Yá Ndiòxí àdi ñáhá.

<sup>14</sup> Te nchaa ñáyiú càhá<sup>n</sup>-yu sá ñà túú ndùu váha-xi sá cuè tée cunduu nàni idi ðíquí-güedě, chi ì<sup>n</sup> sácá<sup>n</sup>ñúú cúú-xi càchí-yu.

<sup>15</sup> Te nchaa ñáyiú ðìhí ñáyiú nàni idi ðíquí-xi càchí ñáyiú sá ì<sup>n</sup> sá vâha cùu-xi sá cúú-xi-yu sá dúcá<sup>n</sup> nàni idi ðíquí-yu. Te duca<sup>n</sup> chi Yá Ndiòxí ní cachí-gá sá dúcá<sup>n</sup> cùnúú-yu cuèndá quídáhu-xi ðíquí-yu.

<sup>16</sup> Te núu ío ñáyiú cuení dacàa cuèndú cuèndá sá ñí càhá<sup>n</sup>-í-a, te na cùnàhá-yu sá ncháá nchùhú cue tée càhá<sup>n</sup> tnúhu Xítóhó Jesucristú ðiu-ni duca<sup>n</sup> sàni iní-ndí cada nchaa ñáyiú ðìhí. Te ðiu-ni duca<sup>n</sup> sàni iní nchaa ñáyiú ndècu ichi-gá.

*Cuèndá ñáyiú ñá túú quide datná ní quide Xítóhó Jesucristú cùtnàhá ní cudìni-gá ndihí cue tée ní xica cuu ndihí-gá*

<sup>17</sup> Te nchòhó ñá túú quide váha-ndo ndècu-ndo núu xíá<sup>n</sup> ðuha na càhá<sup>n</sup>-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá vâha, chi da nàdatuhú iní tnáhá-ndó nàcuáa ndècu-ndo.

<sup>18</sup> Te ðihna-gá na càchí tnúhu-í xii-ndo sá ñihí-í tnúhu sá òré tàcá-ndó quide-ndo nacúáa ní càhá<sup>n</sup> Xítóhó Jesucristú, te ñá túú cùu ì<sup>n</sup>nuu-ndo òré duca<sup>n</sup> quide-ndo nacúáa ní càhá<sup>n</sup>-gá. Te dava sá càhá<sup>n</sup> ñáyiú sàndáá iní-í te dava ñáhá.

<sup>19</sup> ¡Te ndáá sá dúcá<sup>n</sup> tnàhí cada-xi vá cúú ì<sup>n</sup>nuu-ndo cuèndá duca<sup>n</sup> cùtnuní núu ndèdacàa-ndo sandáá ndisa iní-ndó tnúhu Xítóhó Jesucristú te ndèdacàa-ndo ñáhá!

<sup>20</sup> Te ndi tnahá òré tàcá-ndó quide-ndo datná ní quide Xítóhó Jesucristú cùtnàhá ní cudìni-gá ndihí cue tée ní xica cuu ndihí-gá, te ñá túú quide-ndo nacúáa tàú-xi cunduu chi cùtexínu-ni quide-ndo.

<sup>21</sup> Chi òré tàcá-ndó quide-ndo nacúáa ní cachí Xítóhó Jesucristú, te dava-ndo ngòdó núú-ndó ðihna-gá-ndó xèxi-ndo sá néhé-ndó te ñá túú sá cùndetu tnaha-ndo, te ñá túú càhá<sup>n</sup> tnáhá-ndó núu xíá<sup>n</sup> ðaya-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xini-ndo.

<sup>22</sup> Te vá dúcá<sup>n</sup> càda-ndo chi càa vehe-ndo núu dúcá<sup>n</sup> càxi-ndo coho-ndo cada-ndo ndéé ndahá xití-ndó, chi sá dúcá<sup>n</sup> quide-ndo te dàquee tíhú-ndó nchàa dava-gá ñáyiú ndècu ndihí-ndo ichi Yá Ndiòxí, te dándóo canúú-ndó nchàa ñáyiú ndàhú sá dúcá<sup>n</sup> quide-ndo. ¡Núu xíá<sup>n</sup> vá cúú càchí-í sá cúú-ndó ñáyiú quide váha chi ñá túú quide váha-ndo sá dúcá<sup>n</sup> quide-ndo ndècu-ndo!

*Xítóhó Jesucristú ní dándóo tnúhu-gá sá cóhó-ó ndùdí ndéhé yoho yàha stilé*



*te caxi-o pàa cuendá ndacu iní-ó sã ní xihí-gá*

(Mt. 26:26-29; Mr. 14:22-25; Lc. 22:14-20)

<sup>23</sup> Te dàtná-ni ní dánèhé ñáhá Xítohó Jesucristú xii-í te diu-ni duca<sup>n</sup> ní dánèhé ñáhà-í xii-ndo, chi diu-ni niú cútnàhá ní sáha cuendá ñáhá ndí Júdás Iscarioté xii-gá núu cuè téé cùu úhú iní ñáhá ní quehe<sup>n</sup>-gá pàá,

<sup>24</sup> te ní ndacá<sup>n</sup> táhú-gá núu Yã Ndiõxí, te ní táhú cuèchi-gá, te ní xáha<sup>n</sup>-gá xii cue téé xica cuu ndíhi-gá: “Chí quéhé<sup>n</sup> pàa-a caxi-ndo te cada iní-ndó sã cúu-xí dàtná yiqui cùñú-í, chi yúhú cuú-í sácuendá-ndó. Te duca<sup>n</sup>-ni càda-ndo cundecu-ndo cuendá ndacu iní ñáhá-ndó xii-í”, cachí-gá xáha<sup>n</sup>-gá xii-güedé.

<sup>25</sup> Te sátá ní yáha ní xexi-güedé pàa sã ní sáñaha-gá, te ní quehe<sup>n</sup>-gá tásá<sup>n</sup> ñúhú ndúdí ndéhé yoho yáha stilé, te ní ndacá<sup>n</sup> táhú tucu-gá núu Yã Ndiõxí. Te ní xáha<sup>n</sup>-gá xii cue téé xica cuu ndíhi-gá: “Chí cóhó ndúdí ndéhé yoho yáha stilé-a, te cada iní-ndó sã cúu-xí dàtná níñi-í, te cuendá níñi-í sã cáti òré cuú-í cutnùní ndáá sã Yã Ndiõxí cada-gá ingá núu sã váha sã cúu-xí ñáyi. Te ndi tnahá òré coho-ndo ndúdí ndéhé yoho yáha stilé-á<sup>n</sup> te ndacu iní ñáhá-ndó xii-í, te duca<sup>n</sup>-ni càda-ndo cundecu-ndo”, cachí-gá xáha<sup>n</sup>-gá xii-güedé.

<sup>26</sup> Te ndi tnahá òré xéxi-ndó pàa te xihí-ndo ndudí ndéhé yoho yáha stilé, te xiá<sup>n</sup> dátü-ndo núu ñáyi sã Xítohó Jesucristú ní xihí-gá cuendá-yu, te duca<sup>n</sup>-ni càda-ndo cundecu-ndo ndéé ná sã nduu quixi tucu Xítohó Jesucristú.

*Nàcuáa cada-o òré caxi-o pàa ndíhi òré coho-o ndúdí ndéhé yoho yáha stilé dàtná ní cachí Xítohó Jesucristú*

<sup>27</sup> Te dava-ndo ñà túu quide-ndo nacuáa cuini Yã Ndiõxí cada-ndo òré xéxi-ndó pàa ndíhi òré xihí-ndó ndúdí ndéhé yoho yáha stilé, te sã dúcá<sup>n</sup> quide-ndo-á<sup>n</sup> te cucuéchi xii-ndo chi ñà túu nèhe-ndo sã yíñuhu sã cúu-xí yiqui cuñú Xítohó Jesucristú, te ni

ñà túu nèhe-ndo sã yíñuhu sã cúu-xí níñi-gá.

<sup>28</sup> Te ío váha cada cuendá-ndó te núu ndècu váha iní-ndó núu Xítohó Jesucristú òré cúmání-gá caxi-ndo pàa ndíhi òré cúmání-gá coho-ndo ndúdí ndéhé yoho yáha stilé. Te núu ndècu váha iní-ndó núu-gá te caxi-ndo te coho-ndo.

<sup>29</sup> Te dava nchòhó ñà túu sàni váha iní-ndó cuendá yiqui cuñú Xítohó Jesucristú te xèxi-ndo paá te xihí-ndo ndudí ndéhé yoho yáha stilé, te nacháhu-ndo sã dúcá<sup>n</sup> ñà túu sàni váha iní-ndó.

<sup>30</sup> Te diu sã dúcá<sup>n</sup> quide-ndo núu xiá<sup>n</sup> vèi-ndo cuhú, te ío ndàhú ndécú-ndó, te dava ñáyi ndècu ndíhi-ndo sa ní xihí-yu.

<sup>31</sup> Dico núu ío váha sáha-o cuendá nàcuáa ndècu-o núu Yã Ndiõxí, te vá dúcá<sup>n</sup> dándoho ñaha-gá xii-o.

<sup>32</sup> Te òré ndéhé Yã Ndiõxí sã ñà túu quide ndáá-ó ndècu-o te dándoho ñaha-gá xii-o. Te duca<sup>n</sup> quide-gá cuendá sã vã cuíta nihnu-o, chi núu ñáhá te cuíta nihnu-o ndíhi nchaa ñáyi ndècu ichi cuehé ichi duha.

<sup>33</sup> Te núu xiá<sup>n</sup> càhá<sup>n</sup>-í dóho nchaa nchòhó ñáyi ndècu ndíhi-í ichi Xítohó Jesucristú sã òré tacá-ndó càda-ndo nacuáa ní quide Xítohó Jesucristú cútnàhá ní cudini-gá ndíhi cue téé ní xica cuu ndíhi-gá, te cundetu tñaha-ndo nduu nchaa-ndo te dàtnùní duca<sup>n</sup> càda-ndo.

<sup>34</sup> Te núu dava-ndo xihí-ndó dòcò te caxi duu<sup>n</sup>-ndo vèhe-ndo te dàtnùní natacá-ndó, cuendá òré natacá-ndó te vá cádá-ndó ñà sã ñà túu tàú-ndó càda-ndo cuendá sã vã dándoho ñaha Yã Ndiõxí xii-ndo. Te òré quixi coto ñaha-í xii-ndo te dàvá-á<sup>n</sup> cachí tñuhu-í xii-ndo nchaa dava-gá sã cúmání.

## 12

*Nàcuáa chindee ñaha Espiritú Yã Ndiõxí cada-o ñà ñà*

<sup>1</sup> Te nchòhó ñáyi ndècu ndíhi-í ichi Xítohó Jesucristú cuini-í cachí tñuhu-í xii-ndo nàcuáa chindee ñaha Espiritú Yã Ndiõxí xii-o ñà ñà cuendá cutnùní iní-ndó.

2 Te nchòhó sa nàha-ndo sá cǔtnàhá vátá cǔndecu-gá-ndó ìchi Xítóhó Jesucristú ní xóo dandàhú ñáhá yùcu ñávàha xii-ndo, te ní xóo quíndáá iní-ndó nchàa sá ñí cadúha cue ñáyíu ñuyíú-a nchaa sá cǎchí-yu cùu ndiòxí te ñá ndáá sá ndiòxí cúú-xí, te nchaa xíá<sup>n</sup> ñá túú cǎhá<sup>n</sup>-xí.

3 Te cuíní-í sá nchòhó cutnùní iní-ndó sá Espíritú Yá Ndiòxí ñá túú chindee-xi ní ñí ñáyíu cuendá sá cǎhá<sup>n</sup> úhú-yu Xítóhó Jesucristú. Te ní ñí ñáyíu ñá túú cǎhu iní-yu cǎhá<sup>n</sup>-yu sá Xítóhó Jesucristú cúú-gǎ Xítóhó-yu te núu ñá túú Espíritú Yá Ndiòxí dǎcǎhu iní ñáhá-xí xíi-yu.

4 Te ndi dǐí<sup>n</sup> ndi dǐí<sup>n</sup> ndùu chiu<sup>n</sup> ní cachí Espíritú Yá Ndiòxí cada-o, te diu-ni ñí dǐi-ni Espíritú-gá ndécú.

5 Te ndi dǐí<sup>n</sup> ndùu chiu<sup>n</sup> guide-o xinu cuechi-o núu ñí dǐi-ni Xítóhó Jesucristú.

6 Te ndi dǐí<sup>n</sup> ndi dǐí<sup>n</sup> chindee ñaha Yá Ndiòxí xii-o nàcuáa cada-o chiu<sup>n</sup>-gá, te diu-ni ñí dǐi-gá ndécú chindee-gá nchaa ñáyíu.

7 Te Espíritú Yá Ndiòxí quidé-xí sǎ nchóó cǎda-o sá vǎha, te duca<sup>n</sup> chindee-o cue ñáyíu ndècu ndihi-o ìchi Xítóhó Jesucristú.

8 Te dava-o ñí nduu táhú-ó núú Yá Ndiòxí sá Espíritú-gá cada te ndacu-o cǎhá<sup>n</sup>-ó tñùhu sá ñó cǎhnu cuu diu-ni tñùhu mee Yá Ndiòxí, te dava tucu-o ñí nduu táhú-ó cǔtnuní iní-ó nàcuáa cǎhá<sup>n</sup> tñùhu-gá te cǎhá<sup>n</sup>-ó nàcuáa cuíní Espíritú-gá.

9 Te dava tucu-o ñí nduu táhú-ó sǎ ñó quíndáá iní-ó Xítóhó Jesucristú cuendá cada-gá ñí sá cuíní-ó, te duca<sup>n</sup> chi Espíritú Yá Ndiòxí chíndèe ñaha-xi xii-o. Te dava tucu-o ñí nduu táhú-ó sǎ cǎcǎ<sup>n</sup> táhú-ní-ó núú Xítóhó Jesucristú cuendá ñáyíu cùhú te ndúha-yu.

10 Te dava tucu-o ñí nduu táhú-ó sǎ ndácú-ó cǎda-o nchaa sá vǎ yóo tñàhí ndàcu cada, te dava tucu-o ñí nduu táhú-ó núú Yá Ndiòxí sá cǎhá<sup>n</sup>-ó tñùhu sá dǎcǎhu iní ñáhá-gǎ xii-o, te dava tucu-o ñí nduu táhú-ó sǎ cǔtnuní iní-ó núu diu Espíritú Yá Ndiòxí chíndèe ñaha-xi xii ñáyíu òré cǎhá<sup>n</sup>-yu tñùhu-gá àdi cue espíritú

cúndihi yucu ñávàha. Te dava tucu-o ñí nduu táhú-ó cǎhá<sup>n</sup>-ó tñùhu sá dǎcǎhu iní ñáhá Espíritú Yá Ndiòxí xii-o tñùhu sá ñà túú xíní-ó, te dava tucu-o ñí nduu táhú-ó cǎhá<sup>n</sup>-ó nàcuáa quèe-xi nchaa tñùhu-á<sup>n</sup>.

11 Te ñí dǐi-ni Espíritú Yá Ndiòxí duca<sup>n</sup> chindee ñaha-xi, te diu-ni Espíritú-gá dǎcǎhñu ñaha-xi xii-o ndi dǐí<sup>n</sup> núú chiu<sup>n</sup> sá cuíní méé-xí cǎda-o.

### *Nchaa-o ñí-ni cuu-o ndihi Xítóhó Jesucristú*

12 Te nchoo ñáyíu ndècu ñuyíú-a titní xichi cùu yiqui cuñú-ó dico ñí-ni cùu-xi, te diu-ni duca<sup>n</sup> sǎtnahá-xi cùu-o vitna ndecu-o ìchi Xítóhó Jesucristú chi ñí-ni cùu-o ndihi-gá.

13 Te dava-o cùu-o ñáyíu isràél, te dava-o ñà túú cùu-o ñáyíu isràél, te dava-o cùu-o ñáyíu ñá túú tñàhí dàñá quee núú chíú<sup>n</sup> pàtróó<sup>n</sup>-xi, te dava-o cùu-o ñáyíu dàñá quée núú chíú<sup>n</sup> pàtróó<sup>n</sup>-xi. Te mee Espíritú Yá Ndiòxí ní guide-xi sá ncháá-ó ñí-ná cúú-ó ndècu-o ndihi Xítóhó Jesucristú. Te Yá Ndiòxí ní cachí-gá sá ncháá-ó cùndecu ndihi-o Espíritú-gá.

14 Te nchòhó xíní-ndó sǎ titní xichi cùu yiqui cuñú-ó te ñá díú ñí-ni xichi cuu-xi.

15 Te cuèi sǎhá-ó ndihi ndaha-o ñá túú ñí-ni cuu-xi dico vá cúú cǎchí-ó sǎ sǎhá-ó ñà túú cùu-xi yiqui cuñú-ó.

16 Te cuèi lóho-o ndihi tinuu-o ñá túú ñí-ni cuu-xi dico vá cǎchí-ó sǎ lóho-o ñà túú cùu-xi yiqui cuñú-ó.

17 Te núu ñihíí ní ndúú yiqui cuñú-ó ní xǐndéé mee-ni tinuu-o, te ñá túú ndèe cundeé lóho-o cùndedóho ni cùu te núu duca<sup>n</sup>, àdi núu ñihíí yiqui cuñú-ó ní xǐndéé mee-ni lóho-o te ñá túú ndèe cundeé dítní-ó ní cùu te núu duca<sup>n</sup>.

18 Dico mee Yá Ndiòxí ní taxi ndecu-gá ñí ñí xichi yiqui cuñú-ó nàcuáa ní cachí iní méé-gǎ.

19 Te núu ñí-ni sǎ ní xǐndecu ñihíí yiqui cuñú-ó, te vá cùndu-xi nàcuáa taú-xi cunduu ni cùu te núu duca<sup>n</sup>.

20 Dico titní xichi cùu yiqui cuñú-ó, te ñí-ni cùu-xi ñihíí-xi.

21 Te sa nàha-o sá vǎ cúú cǎchí-ó sǎ tǎnuu-o ñá túú xǐni ñuhu-xi ndaha-o, àdi díquí-ó ñà túú xǐni ñuhu-xi sáhá-ó.

22 Te nchoo sà naha-o sá dǎvá xǐchi yǐqui cuñú-ó sǎ cǎchí-ó sǎ ñà túú cùnuu ío-gá xǐní ñuhu-xi.

23 Te dava xǐchi yǐqui cuñú-ó sǎ ñà túú quǐde cuendá cǎvíhí-ó nchàa xǎn sá quǐdáhu dóó sǎcuǐhnu-o, te dava xǐchi yǐqui cuñú-ó ñà cúú cùtúu chi dacuítí sǎ quǐdáhu.

24 Te nchaa xǐchi yǐqui cuñú-ó sǎ cúú cùtúu ñá túú xǐni ñuhu-xi quǐdáhu. Te Yá Ndiǒxí ní taxi ndecu-gá nchaa xǐchi yǐqui cuñú-ó nàcuáa tàú-xi cunduu. Te ní cachí-gá sá dǎvá-gǎ xǐchi yǐqui cuñú-ó núú vǎ cúú cùtúu quǐdáhu.

25 Te duca<sup>n</sup> ñǐ quǐde-gá cuendá sá ñǐ<sup>n</sup>-ní cùu yǐqui cuñú-ó. Te duca<sup>n</sup> ndǐ tnahá ñǐ<sup>n</sup> xǐchi yǐqui cuñú-ó chǐndee tnahá-xi. Te duca<sup>n</sup> sǎtnahá-xi cùu nchoo vitna ndecu-o ichi Xítóhó Jesucristú chi chǐndee tnahá-o.

26 Te núu ñǐ<sup>n</sup> xǐchi yǐqui cuñú-ó ná tnahúhú te ñǐhí-ó quǐde úhú-xi, te núu ñǐ<sup>n</sup> xǐchi yǐqui cuñú-ó ío váha ndècu-xi te duca<sup>n</sup> ñǐhí yǐqui cuñú-ó cúú vǎha-xi. Te duca<sup>n</sup> sǎtnahá-xi cùu-o vitna ndecu-o ichi Xítóhó Jesucristú.

27 Te nchoo ndècu ndǐhi-o Xítóhó Jesucristú, te cùu-o datná yǐqui cuñú-gá te ñǐ<sup>n</sup> ñǐ<sup>n</sup>-o cùu-o datná ñǐ<sup>n</sup> ñǐ<sup>n</sup> xǐchi yǐqui cuñú-gá.

28 Te duca<sup>n</sup> sǎtnahá-xi cùu-o chi Yá Ndiǒxí ní taxi-gá ndǐ dí<sup>n</sup> ndǐ dí<sup>n</sup> chǐu<sup>n</sup> quǐde-o sá cúú-xí nchàa ñáyiu ndècu ichi-gá. Te díhna-gá cue téé caca cuu cǎhá<sup>n</sup> tnúhu-gá núú ñáyiu ní taxi ndecu-gá, te dǎtnú<sup>n</sup> ní taxi ndecu-gá cue téé cǎhá<sup>n</sup> tnúhu-gá nàcuáa dàcahu iní ñáhá mèe-gá, te dǎtnú<sup>n</sup> ní taxi ndecu-gá cue téé dǎnehé ñáhá xǐ ñáyiu tnúhu-gá núú tàcá-yu, te dǎtnú<sup>n</sup> ní taxi ndecu tucu-gá cue téé ndàcu quǐde sá vǎ yǒo tnahí ndàcu cada. Te ní taxi ndecu tucu-gá cue téé xǐcá<sup>n</sup> táhú-ní núú Xítóhó Jesucristú cuendá ñáyiu cùhú te ndúha-yu. Te ní taxi ndecu tucu-gá cue téé chǐndee cue ñáyiu

ndècu ichi-gá. Te ní taxi ndecu tucu-gá cue téé yǐndaha ñaha xǐ ñáyiu ndècu ichi-gá, te ní taxi ndecu tucu-gá cue téé cǎhá<sup>n</sup> tnúhu sá dǎcàhu iní ñáhá Espíritú-gá tnúhu sá ñà túú xǐní-güedé.

29 Te ñá ncháá-ó cùu-o cue téé ní táuchú<sup>n</sup> Xítóhó Jesucristú cǎhá<sup>n</sup> tnúhu-gá núú ñáyiu, te ñá ncháá-ó cùu-o cue téé cǎhá<sup>n</sup> tnúhu sá dǎcàhu iní ñáhá Yá Ndiǒxí xǐi-o. Te ñá ncháá-ó cùu-o cue téé dǎcuaha ñaha xǐi-yu. Te ñá ncháá-ó cùu-o cue téé quǐde sá vǎ yǒo tnahí ndàcu cada.

30 Te ñá ncháá-ó cùu-o cue téé dǐcó-ni cǎcá<sup>n</sup> táhú núú Xítóhó Jesucristú cuendá ñáyiu cùhú te ndúha-yu. Te ñá ncháá-ó cùu-o cue téé cǎhá<sup>n</sup> tnúhu sá dǎcàhu iní ñaha Espíritú Yá Ndiǒxí tnúhu sá ñà túú xǐní-ó, te ñá ncháá-ó cùu-o cue téé cùtnuní iní-xi cǎhá<sup>n</sup> nàcuáa nduu tnúhu-á<sup>n</sup>.

31 Te ío nducu ndèe-ndo cada-ndo nacuáa nduu táhú-ndo núú Yá Ndiǒxí nchaa sá ío-gá cúnúu cada-ndo. Te vitna na dǎnehé ñáhá tucu-í xǐi-ndo nàcuáa cada-ndo, dǐco sá dǎnehé ñáhà-í-a ío-gá cúnúu-xi.

## 13

### *Cuu iní-ó tnahá ñáyiu-o*

1 Te núu nchoo xǐní-ó cǎhá<sup>n</sup>-ó tnúhu sá ío víi ío váha cuáhá<sup>n</sup> cǎhá<sup>n</sup> ñáyiu ñuyíú-a, àdi xǐní-ó cǎhá<sup>n</sup>-ó tnúhu sá ío víi ío váha cuáhá<sup>n</sup> cǎhá<sup>n</sup> cue espíritú xǐnú cuèchi núú Yá Ndiǒxí, te núu xǐní-ó cǎhá<sup>n</sup>-ó nchàa tnúhu-á<sup>n</sup> te ñá túú cùu iní-ó cuè tnahá ñáyiu-o ña, te ñá túú nǎndǐhi-xi sá xǐní-ó cǎhá<sup>n</sup>-ó tnúhu-á<sup>n</sup> te cùu-o datná dava caá sá ío dusa<sup>n</sup> quǐde.

2 Te núu cùu-o ñáyiu cǎhá<sup>n</sup> tnúhu sá dǎcàhu iní ñáhá Yá Ndiǒxí, àdi cuu-o ñáyiu cùtnuní iní-xi nàcuáa cuáhá<sup>n</sup> nchaa tnúhu nduu yuhu ni cuu, àdi cuu-o ñáyiu ío váha cùtnuní iní-xi nchaa nàcuáa quǐde Yá Ndiǒxí, àdi cuu-o ñáyiu ío váha sǎndáá iní ñáhá xǐ Yá Ndiǒxí nàcuáa ndacu-o cùu-o ñǐ<sup>n</sup> yucu xocuíñí-xi núú ndécú-xí, te núu nchaa xǐá<sup>n</sup> xǐní-ó càda-o te ñá túú cùu iní-ó cuè tnahá ñáyiu-o ña, te ñá túú vǐdana nǎndǐhi-xi te núu vá cúú iní-ó

tnàha ñáyi-u-o cuèi na càda-o nchaa xíá<sup>n</sup>.

<sup>3</sup> Te cuèi nchaa sá ndécú ndìhi-o na dacáhñu-o, te cuèi na cuàha cuèndá-ó mèe-o cáyú-ó sá cúu-xí Yá Ndiòxí, dico ñá túú vèdana chindee ñaha-xi xii-o sá dúcá<sup>n</sup> càda-o te núu ñá túú cùu iní-ó cuè tnahà ñáyi-u-o.

<sup>4</sup> Dico núu cùu iní-ó cuè tnahà ñáyi-u-o, te càhnu iní-ó, te quide váha-o, te ñá túú cùu-o ñáyi-u cuédú iní, te ni ñà túú càhá<sup>n</sup>-ó núu cùu cahnu-o, te ni ñà túú sàni iní-ó càda cahnu-o mee-o,

<sup>5</sup> te ni ñà túú ñùhu cuehé iní-ó, te ni ñà túú ndùcu-o mee-ni sá cúu-xí mèe-o, te ni ñà túú-gã cúdeé<sup>n</sup>-ó cuèndá ì<sup>n</sup> sá cúu, te ni ñà túú-gã sácùhu<sup>n</sup> iní-ó sá quidé ñàha tnahà ñáyi-u-o xii-o.

<sup>6</sup> Te ni ñà túú-gã cúdí<sup>í</sup> iní-ó nchàa sá ñà túú váha quide ñáyi-u, chi mee-ñà cuèndá nchaa sá váha cùdí<sup>í</sup> iní-ó.

<sup>7</sup> Te nchaa sá yàha-o sàcahnu iní-ó, te sàni váha iní-ó cuèndá nchaa ñáyi-u, te sàni iní-ó sá díú-ní nchàa sá váha cuu xii nchaa tnahà ñáyi-u-o ndèe cuèé-gá, te ío quide cahnu iní-ó cuèi nándí sá yàha-o, te nchaa xíá<sup>n</sup> quidé-ó te núu cùu iní-ó cuè tnahà ñáyi-u-o.

<sup>8</sup> Te ni caa ni quíhí<sup>n</sup> duha-ni cuu iní-ó cuè tnahà ñáyi-u-o. Dico sáá nduu te vá cóo-gã ñáyi-u cáhá<sup>n</sup> tnúhu sá dácàhu iní ñáhá Yá Ndiòxí, te ni vã cóo-gã ñáyi-u cáhá<sup>n</sup> tnúhu sá dácàhu iní ñáhá Espíritú Yá Ndiòxí tnúhu sá ñà túú xini-yu, te ni vã cóo-gã ñáyi-u túha dàtná túha ñáyi-u vitna.

<sup>9</sup> Te vitna ñá túú cùtnuní iní-ó nchàa nacuáa sàni iní Yá Ndiòxí chi sacú-ni cùtnuní iní-ó, te duca<sup>n</sup> sàcú-ni càhá<sup>n</sup>-ó nacuáa ndùu tnúhu-gá, dico càhá<sup>n</sup>-ó tnúhu-gá nacuáa dácàhu iní ñáhá-gã xii-o.

<sup>10</sup> Te na sáá nduu càda Yá Ndiòxí nchaa nacuáa tàú-xi cunduu, te dàvá-án te nchaa sá càchí-gá ñá túú ndècu-xi nacuáa tàú-xi cunduu vá dúcá<sup>n</sup>-gã cundecu-xi.

<sup>11</sup> Te yúhú cútnàhá ní cuu landú-í ní xóo cada-í sá cùu-í landú, ní xóo cáhá<sup>n</sup>-í, ní xóo cani iní-í, te ní xóo tecú tnùn-í dàtná quidé cuè landú xindecu vitna, dico sátá ní cuu-í ì<sup>n</sup> téé cùu

sacuéhé te ñá túú-gã quidé-í dàtná ní xóo cada-í cútnàhá ní cuu landú-í.

<sup>12</sup> Te duca<sup>n</sup> sãtnahá-xi cùu-o vitna ndecu-o ichi Xítóhó Jesucristú, chi ñá túú cùtnuní váha iní-ó nacuáa cùu cuendá Yá Ndiòxí, te cùu-o datná ñáyi-u ndèhe ì<sup>n</sup> núu yútátá sá ñà túú tũu váha núu-xi, te duca<sup>n</sup> sãtnahá-xi cùu-o chi ñá túú cùtnuní váha iní-ó nãsa cùu cuendá-gá, dico sáá nduu quini núu-ó-gã. Te nchoo sàcú-ni cùtnuní iní-ó nacuáa ndùu-gá vitna dico na sáá nduu te quini ndáá-ó nacuáa càa nacuáa ndùu-gá dàtná xini ñáhá mèe-gá xii-o.

<sup>13</sup> Te ni caa ni quíhí<sup>n</sup> duca<sup>n</sup>-ni quindáá iní-ó Yá Ndiòxí, te duca<sup>n</sup>-ni cùndecu ndìhi-o tnúhu ndee iní cundecu-o ndìhi-gá, te duca<sup>n</sup>-ni ío cuu iní-ó-gã ndìhi tnahà ñáyi-u-o. Te sá cúu iní-ó Yá Ndiòxí ndìhi sá cúu iní-ó tnahà ñáyi-u-o xíá<sup>n</sup> ío-gá cùnùu-xi dacúxí dàva-gá.

## 14

*Ñáyi-u càhá<sup>n</sup> tnúhu sá dácàhu iní ñáhá Espíritú Yá Ndiòxí*

<sup>1</sup> Te vá dáñá ndèe-ndó cùu iní-ndó tnahà ñáyi-u-ndo, te cuhu<sup>n</sup> iní-ndó sá ndùu táhú-ndó núú Yá Ndiòxí titní núu chiú<sup>n</sup> cada-ndo nacuáa chindee ñàha Espíritú-gá xii-ndo, te ío cuhu<sup>n</sup> iní-ndó sá ndúú táhú-ndó cáhá<sup>n</sup>-ndó tnúhu sá dácàhu iní ñáhá Yá Ndiòxí xii-ndo.

<sup>2</sup> Te cue ñáyi-u càhá<sup>n</sup> tnúhu sá dácàhu iní ñáhá Espíritú Yá Ndiòxí tnúhu sá ñà túú xini-yu, te tnúhu càhá<sup>n</sup>-yu-án cúu-xí sá cúu-xí Yá Ndiòxí te ñá díú sá cúu-xí ñáyi-u chi ñá túú tècú tnùn-í-yu, te mee Espíritú Yá Ndiòxí quidé-xí dùca<sup>n</sup> cahá<sup>n</sup>-yu tnúhu yiyuhu.

<sup>3</sup> Te cue ñáyi-u ní nduu táhú núú Yá Ndiòxí cáhá<sup>n</sup> tnúhu sá dácàhu iní ñáhá-gã xii-yu, te ñáyi-u-án dácàhá<sup>n</sup>-yu ñáyi-u nacuáa cuita níhí ndèé-gã-yu cundecu-yu ichi-gá, te duca<sup>n</sup> cuãñàhá-yu tnúhu ndee iní xii-yu òré ndìhú iní-yu.

<sup>4</sup> Te ñáyi-u càhá<sup>n</sup> tnúhu sá dácàhu iní ñáhá Espíritú Yá Ndiòxí xii-yu tnúhu sá ñà túú xini-yu-án, ñáyi-u-án mee-ni-yu níhí ndèé-yu ndècú-yu

ichi-gá. Dico ñáyiú cãhá<sup>n</sup> tnúhu sá dácàhu iní ñáhá-gã xii-yu, cãhá<sup>n</sup>-yu tnúhu-á<sup>n</sup> nàcuáa níhí ndéé dàva-gá ñáyiú nchìcú<sup>n</sup> nihnu ichi-gá.

5 Te yúhú ío cudíí iní-í te núu nchaa-ndo cãhá<sup>n</sup>-ndó tnúhu sá dácàhu iní ñáhá Espíritú Yá Ndiõxí xii-ndo tnúhu sá ñà túú xini-ndó. Dico ío-gá cudíí iní-í te núu nchaa-ndo cãhá<sup>n</sup>-ndó tnúhu sá dácàhu iní ñáhá-gã, chí ío-gá xini ñuhu-xi sá cãhá<sup>n</sup>-ndó tnúhu-á<sup>n</sup> dàcúxí sá cãhá<sup>n</sup>-ndó tnúhu sá dácàhu iní ñáhá Espíritú-gá cãhá<sup>n</sup>-ndó tnúhu sá ñà túú xini-ndó. Dico ñ<sup>n</sup>-ni nũtnahá-xi quide-ndo te núu nchòhó ñáyiú cãhá<sup>n</sup> tnúhu sá dácàhu iní ñáhá Espíritú-gá cãhá<sup>n</sup>-ndó nàcuáa quèe-xi tnúhu-á<sup>n</sup>. Te duca<sup>n</sup> te nchaa ñáyiú ndècu ichi Yá Ndiõxí cuita níhí ndéé-gã-yu quíhí<sup>n</sup> cundecú-yu ichi-gá.

6 Te núu yúhú quexìo-í núu ndécú nchòhó ñáyiú ndècu ndihí-í ichi Xitohó Jesucristú, te ngüíta-í cãhá<sup>n</sup>-í mee-ni tnúhu sá dácàhu iní ñáhá Espíritú Yá Ndiõxí xii-í tnúhu sá ñà túú xini-í, te ñà túú ñà sá vãha cuu-xi sá cúu-xi-ndó. Dico cuu-xi sá vãha xii-ndo te núu na cãhá<sup>n</sup>-í núu-ndó nchaa tnúhu sá dánèhé ñáhá Yá Ndiõxí xii-í tnúhu sá vãtá dácuaã-gá-í, ndihí nchaa tnúhu sá sá xini-í, ndihí nchaa tnúhu sá dácàhu iní ñáhá-gã xii-í cãhá<sup>n</sup>-í, ndihí nchaa dava-gá tnúhu-gá.

7 Te na càda-o cuendá sá núu ñ<sup>n</sup> téé tìú-dé vïlu àdi cani-dé àrpá te núu ñà túú sàhnú-dé ndihí-xi ñ<sup>n</sup> yaá, te ñà cùtnùnì iní-ó ñà yaá caní-dé àdi ná yaá tìú-dé te núu duca<sup>n</sup> na càda-dé.

8 Te ñ<sup>n</sup>-ni duca<sup>n</sup> sãtnahá-xi cùu tucu téé cùu sandadú tìú cútú, chí núu vá tìú vãha-dé nàcuáa tàú-xi cunduu òré quíhí<sup>n</sup>-güedé nàá-güedé, te vá ngündecu túha dava-gá cue sandadú te núu duca<sup>n</sup> na càda-dé vá tìú vãha-dé.

9 Te duca<sup>n</sup> sãtnahá-xi cùu nchohó te núu vá cãhá<sup>n</sup>-ndó ñ<sup>n</sup> tnúhu nàcuáa tàú-xi cunduu núu ñáyiú te vá tècú tnùnì-yu tnúhu cãhá<sup>n</sup>-ndó. ¡Chí àú<sup>n</sup> ñà cuu cãhá<sup>n</sup>-ndó te núu duca<sup>n</sup> na càda-ndo!

10 Te ío tìtní núu tnúhu òó ñuyíú, te ñ<sup>n</sup> ñ<sup>n</sup> núu tnúhu-á<sup>n</sup> cùtnùnì iní ñáyiú nàcuáa quèe-xi.

11 Te núu nchoo ñã tècú tnùnì-ó ñ<sup>n</sup> tnúhu cãhá<sup>n</sup> ñ<sup>n</sup> ñáyiú, te quide-ó-yu ñáyiú ñuú xicá chí ñà túú cãhá<sup>n</sup>-yu tnúhu cãhá<sup>n</sup>-ó, te ñ<sup>n</sup>-ni duca<sup>n</sup> quide ñáhá-yu xii nchoo tucu.

12 Te xíã<sup>n</sup> núu càchí tnúhu-í xii nchaa nchòhó ñáyiú ío cuiní nduu táhú núú Yá Ndiõxí sá Espíritú-gá chindee ñaha-xi xii-ndo cada-ndo ná daha núú chiu<sup>n</sup>, te ío nducu ndèe-ndo cada-ndo chiu<sup>n</sup> sá ñ<sup>n</sup> nduu táhú-ndó nàcuáa cuita níhí ndéé-gã ñáyiú ndècu ichi-gá quíhí<sup>n</sup>.

13 Te núu cãhá<sup>n</sup>-ndó tnúhu sá ñà túú xini-ndó, tnúhu sá dácàhu iní ñáhá Espíritú Yá Ndiõxí xii-ndo, te xini ñuhu-xi sá càcá<sup>n</sup> táhú-ndó núú Yá Ndiõxí cuendá sá ná chindee ñaha-gá xii-ndo cãhá<sup>n</sup>-ndó núú ñáyiú núu nása quèe-xi tnúhu-á<sup>n</sup>.

14 Chí núu nchoo na cãhá<sup>n</sup> ndihí-o Yá Ndiõxí ndihí tnúhu sá ñà túú xini-ó, te ñ<sup>n</sup> yùhu ñ<sup>n</sup> iní-ó cãhá<sup>n</sup> ndihí-o-gã dícó-ni sá ñã tècú tnùnì-ó nàcuáa nduu tnúhu cãhá<sup>n</sup>-ó.

15 Te xíã<sup>n</sup> núu xini ñuhu-xi cãhá<sup>n</sup> ndihí-o Yá Ndiõxí ñ<sup>n</sup> yùhu ñ<sup>n</sup> iní-ó nàcuáa chindee ñaha Espíritú-gá xii-o te cãhá<sup>n</sup>-ó nàcuáa tecú tnùnì-ó, te ñ<sup>n</sup>-ni duca<sup>n</sup> càda-o oré xitá yùhu-o chiñuhu-o Yá Ndiõxí, chí ñ<sup>n</sup> yùhu ñ<sup>n</sup> iní-ó dùca<sup>n</sup> cada-o nàcuáa chindee ñaha Espíritú-gá xii-o, te cùtnùnì iní-ó nàcuáa cuahá<sup>n</sup> nchaa tnúhu cãhá<sup>n</sup>-ó xita-o.

16 Chí núu nchoo na ndacá<sup>n</sup> táhú-ó núú Yá Ndiõxí ndihí mee-ni tnúhu sá ñà túú xini-ó tnúhu sá dácàhu iní ñáhá Espíritú-gá xii-o, te ñáyiú ñà túú ní nduu táhú cãhá<sup>n</sup> tnúhu cãhá<sup>n</sup>-ó ndedóho ñáhá-yu xii-o, te ñáyiú-á<sup>n</sup> vã ndácü-yu cãhá<sup>n</sup>-yu tnúhu cãhá<sup>n</sup>-ó ndacá<sup>n</sup> táhú-ó ndihí-yu núú Yá Ndiõxí chí ñà túú tècú tnùnì-yu tnúhu cãhá<sup>n</sup>-ó.

17 Te vãha-ni quide-o sá dúcá<sup>n</sup> cãhá<sup>n</sup>-ó ndacá<sup>n</sup> táhú-ó núú Yá Ndiõxí, te dícó-ni sá tnúhu-á<sup>n</sup> ñà túú chindee-xi ñáyiú nàcuáa cuita níhí ndéé-gã-yu cundecú-yu ichi-gá.

18 Te yúhú ío ndacá<sup>n</sup> táhú-í núú Yá Ndiõxí chí cãhá<sup>n</sup>-í tnúhu sá ñà

túú xini-í tnúhu sá dácàhu iní ñáhá Espiritú-gá xii-í, te cãhá<sup>n</sup>-gá-í dácúúxí nchàa nchohó.

19 Te òré tàcá ñáyiu ndècu ichi Yá Ndiöxí dácuahá-yu tnúhu-gá, te cãhá<sup>n</sup>-í tnúhu-gá núu-yu sá sà ní cutnùní iní mèè-í nàcuáa duca<sup>n</sup> cùtnuní iní-yu nàcuáa ndùu tnúhu cãhá<sup>n</sup>-í. Te tnàhá-gá iní-í cãhá<sup>n</sup>-í úhú<sup>n</sup>-ni tnúhu-á<sup>n</sup> núu-yu dácúúxí sã cãhá<sup>n</sup>-í úxí mĩ tnúhu sá ñà túú xini-í, tnúhu sá dácàhu iní ñáhá Espiritú Yá Ndiöxí xii-í cãhá<sup>n</sup>-í.

20 Te nchòhó ñáyiu ndècu ndihi-í ichi Xitohó Jesucristú, vá cání iní-ndó dàtná sání iní cue landú, chi caní iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú lihli vá cundècu-ndo ichi cuehé ichi duha, chi cue landú-á<sup>n</sup> ñà túú ndècu-güexi ichi-á<sup>n</sup>.

21 Te núú tùtú Yá Ndiöxí cãhá<sup>n</sup>-xi nàcuáa ní cãhá<sup>n</sup>-gá, te cãchí-xi: “Cue téé ñuú xicá cãhá<sup>n</sup> ndi ðí<sup>n</sup> núú tnúhu quíhí<sup>n</sup>-güedé cãhá<sup>n</sup>-güedé tnúhu-í núú ñáyiu isràél cada-güedé núu-í, te cuéi duca<sup>n</sup> dico vá quindáá iní-yu tnúhu-í”, duha ní cachí Yá Ndiöxí te duca<sup>n</sup> ní ngundeé núú tùtú-gá.

22 Te tnúhu sá dácàhu iní ñáhá Espiritú Yá Ndiöxí xii-o tnúhu sá ñà túú xini-ó, xiá<sup>n</sup> cúu-xí cuendá sá cùtnùní iní cue ñáyiu ñà túú sãndáá iní tnúhu Yá Ndiöxí sá ñà túú cùu váha iní ñáhá-gã xii-yu. Dico sá cúu-xí cue ñáyiu sãndáá iní tnúhu-gá ñà túú nã quidé-xí sã cúu-xí-yu. Te tnúhu sá dácàhu iní ñáhá Yá Ndiöxí xii-o, xiá<sup>n</sup> cúu-xí cuendá sá cùtnùní iní cue ñáyiu sãndáá iní tnúhu-gá sã ndécú ndihi ñaha-gá xií-yu, dico ñà túú dùca<sup>n</sup> sani iní cue ñáyiu ñà túú sãndáá iní tnúhu-gá.

23 Te núú ní tacá nchaa nchòhó ñáyiu ndècu ichi Yá Ndiöxí, te nchaa-ndo ní ngüíta-ndo cãhá<sup>n</sup>-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te mei òré-á<sup>n</sup> quexio cue ñáyiu ñà túú sãndáá iní tnúhu-gá, ndihi cue ñáyiu vátá quini dana-gá tnúhu-gá núú ndécú-ndó, te ñáyiu-á<sup>n</sup> quesàhá-yu sá lúcú-ndó te núu duca<sup>n</sup> cãhá<sup>n</sup>-ndó tnúhu sá dácàhu iní ñáhá

Espiritú-gá xii-ndo òré quexió-yu.

24 Dico núu nchaa-ndo cãhá<sup>n</sup>-ndó tnúhu sá dácàhu iní ñáhá Yá Ndiöxí xii-ndo, te mei òré-á<sup>n</sup> quexio cue ñáyiu duca<sup>n</sup> ñà túú sãndáá iní-xi tnúhu-gá, ndihi cue ñáyiu duca<sup>n</sup> ñà túú xini dana tnúhu-gá-á<sup>n</sup>, te ñáyiu-á<sup>n</sup> cutnùní iní-yu sá ndécú cuéchi-yu núu-gã, te ngüíta-yu cuáha-yu cuendá sá ñà túú quide váha-yu ndécú-yu cuendá sá cãhá<sup>n</sup>-ndó tnúhu-gá ndèdóho-yu.

25 Te nchaa sá cuéhé sá dúhá ní quidé-yu sãni iní-yu yiyuhu ndacu iní-yu, te ngüíta-yu náhmá-yu nchaa sá ñà túú váha ní quidé-yu núú Yá Ndiöxí, te cachí-yu sá ïo cãhnu cuu-gá, te cachí tucú-yu sá ndàá ndécú ndihi-ndo-gá.

#### *Cada-o nàcuáa tàú-xi cunduu*

26 Te vitna nchòhó ñáyiu ndècu ndihi-í ichi Xitohó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiöxí, te dava-ndo dàsahú-ndó ñáyiu tnúhu-gá, te dava-ndo cãhá<sup>n</sup>-ndó nàcuáa dàquixi túu Yá Ndiöxí iní-ndó, te dava-ndo cãhá<sup>n</sup>-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te dava-ndo cãhá<sup>n</sup>-ndó nàcuáa quèe-xi tnúhu-á<sup>n</sup>. Te nchaa sá quidé-ndó ná cùu-xi nacuáa chindee-xi ñáyiu nàcuáa cuita níhí ndéé-gã-yu cundecú-yu ichi-gá.

27 Te òré cãhá<sup>n</sup>-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te úu-ni-ndo àdi úní-ni tnàhá-ndó cãhá<sup>n</sup>-ndó tnúhu-á<sup>n</sup> te vá úu<sup>n</sup> ní cãhá<sup>n</sup>-ndó chi ndéé ndihi ï<sup>n</sup>-ndo te dàtnùní ngüíta ingá-ndó cãhá<sup>n</sup>-ndó. Te xini ñuhu-xi sá ï<sup>n</sup> ñáyiu cãhá<sup>n</sup>-yu nàcuáa quèe-xi tnúhu cãhá<sup>n</sup>-ndó-á<sup>n</sup>.

28 Te núu ñà túú ñáyiu tècú tnùní nàcuáa quèe-xi tnúhu cãhá<sup>n</sup>-ndó-á<sup>n</sup>, te núú mée núú ï<sup>n</sup>-ní-ndó cãhá<sup>n</sup>-ndó tnúhu-á<sup>n</sup> cãhá<sup>n</sup> ndihi-ndo Yá Ndiöxí te vá cãhá<sup>n</sup>-ndó núú ñáyiu.

29 Te òré cãhá<sup>n</sup>-ndó tnúhu sá dácàhu iní ñáhá Yá Ndiöxí xii-ndo te úu-ni-ndo àdi úní-ni tucu-ndo cãhá<sup>n</sup>, te dava-gá-ndó cundèdóho-ndo

tnũhu-á<sup>n</sup> te cáhá<sup>n</sup>-ndó nõu váha-ni cáhá<sup>n</sup>-güedé àdi ñá túú váha-ni.

30 Te núu ì<sup>n</sup>-ndo ñí dácáhú ìní ñáhá Yá Ndiõxí xii-ndo ì<sup>n</sup> tnũhu cáhá<sup>n</sup>-ndó, te núu ì<sup>n</sup>-ndo sà cáhá<sup>n</sup>-ndó te ngüíñí-ndó te quíhu tucu ingá-ndó cáhá<sup>n</sup>-ndó nàcuáa ní dácáhú ìní ñáhá Yá Ndiõxí xii-ndo.

31 Te nchaa nchòhó ñáyiu ní nduu táhú cáhá<sup>n</sup> tnũhu sá dácàhu ìní ñáhá Yá Ndiõxí, te vá úú<sup>n</sup>-ní cáhá<sup>n</sup>-ndó chi díhna-gá ì<sup>n</sup>-ndo cáhá<sup>n</sup> te dătnùní cáhá<sup>n</sup> tucu ingá-ndó. Te duca<sup>n</sup> càda-ndo cuendá nchaa-ndo tècú tnùní-ndó nàcuáa ndùu tnũhu cáhá<sup>n</sup> ì<sup>n</sup> ì<sup>n</sup>-ndo, te duca<sup>n</sup> te cudí<sup>n</sup>-gă ìní-ndó cànchicú<sup>n</sup> nihnu-ndo ìchi-gá.

32 Te nchaa ñáyiu cáhá<sup>n</sup> tnũhu Yá Ndiõxí sa nàha-ná mée-yu nàcuáa quidé-yu cáhá<sup>n</sup>-yu tnũhu-gá nàcuáa ñá túú quide cutexínu-yu.

33 Te Yá Ndiõxí cúú-gă Yaá quidé ïo váha cùu ì<sup>n</sup>nuu-ndo ndecu-ndo, te ñá túú datìcá nuu ñaha-gă xii-ndo.

Te na cächí tnũhu-í xii-ndo nàcuáa cáhá<sup>n</sup>-í nchaa núú tàcá cue ñáyiu ndècu ndihí-o ichi Xítohó Jesucristú.

34 Te yúhú cächí-í sá vă cúú cáhá<sup>n</sup> cue ñáyiu ðihí òré tàcá-ndó dàcuaha-ndo tnũhu-gá, chi ñá túú dùca<sup>n</sup> cuiní-gá cadá-yu, te quíndáá-ni ìní-yu cadá-yu nàcuáa tàú-xi cunduu.

35 Te núu ì<sup>n</sup> sá cuiní-yu nducu tnũhu-yu te ndée òré nasáa-yu vehé-yu te nducu tnũhu-yu núú yí-yu, chi ñá túú ndùu váha-xi sá cáhá<sup>n</sup>-yu núú tàcá nchaa ñáyiu dàcuáha ndihí-yu tnũhu-gá.

36 Te chí dándàcu ìní sá ñà díú nchòhó cúú-ndó ñáyiu ní ngúndecu ndihí tnũhu Yá Ndiõxí díhna nuu nàcuáa datècú tnũhu-ndo dàva-gá ñáyiu, te ni ñà díú mée-ni nchòhó sa ní ngúndecu ndihí-ndo tnũhu Yá Ndiõxí vitna, núu xiá<sup>n</sup> vá cächí-ndó sã ïo cùnno-ndo.

37 Te núu ðava nchòhó sání ìní-ndó sã cáhá<sup>n</sup>-ndó nàcuáa dàcahu ìní ñáhá Yá Ndiõxí xii-ndo àdi sani ìní-ndó sã quidé-ndó nàcuáa chindee ñaha Espiritú-gá xii-ndo, te cuáha váha-ndo cuendá sá ncháá tnũhu cáhá<sup>n</sup>-í-a

cùu-xi tnũhu sá ñí cachí tnũhu mee Xítohó Jesucristú cada-o.

38 Te ndèda-ni càa ñáyiu ndècu ndihí-ndo te núu ñá túú sàndáá ìní-yu tnũhu cáhá<sup>n</sup>-í, te vá cadá cuendá-ndó tnũhu cáhá<sup>n</sup>-yu.

39 Te vitna nchòhó ñáyiu ndècu ndihí-í ichi Xítohó Jesucristú, ïo cani ìní-ndó cáhá<sup>n</sup>-ndó tnũhu sá dácàhu ìní ñáhá Yá Ndiõxí núú ñáyiu, te ðaña-ndo na cáhá<sup>n</sup> cue ñáyiu ní nduu táhú nõú Yá Ndiõxí sá cáhá<sup>n</sup>-yu tnũhu sá dácàhu ìní ñáhá Espiritú-gá xií-yu tnũhu sá ñá túú xini-yu.

40 Te cada-ndo nchàa nàcuáa tàú-xi cunduu nàcuáa ñá túú ñá cuu cundecu-ndo.

## 15

### *Ní ndoto Xítohó Jesucristú*

1 Te vitna nchòhó ñáyiu ndècu ndihí-í ichi Xítohó Jesucristú cuiní-í sá dándàcu ìní-ndó nàcuáa ní dánhèhé ñáhà-í xii-ndo tnũhu sá cáhá<sup>n</sup> nàcuáa naníhí tàhú-ó, chi ðiu tnũhu-á<sup>n</sup> ñí sàndáá ìní-ndó te nchìcú<sup>n</sup> nihnu-ndo.

2 Te sá xíí tnũhu-á<sup>n</sup> níhnú-ndó ìchi cuáhá<sup>n</sup>-ndó nõú ndúú táhú-ndó cundecu-ndo ndihí Yá Ndiõxí ñí caa ñí quíhí<sup>n</sup>, te duca<sup>n</sup> ndùu táhú-ndó nõú cundècu-ndo ñí caa ñí quíhí<sup>n</sup> ndihí Yá Ndiõxí te núu nchìcú<sup>n</sup> nihnu-ndo nàcuáa ní dánhèhé ñáhà-í xii-ndo, te núu ñá túú nchìcú<sup>n</sup> nihnu-ndo te ñá túú ní sàndáá ìní-ndó nàcuáa tàú-xi cunduu.

3 Te yúhú sa ní cachí tnũhu-í xii-ndo ì<sup>n</sup> tnũhu sá ïo cùnno ní níhí-í, chi ní cachí tnũhu-í xii-ndo sã Xítohó Jesucristú ní xihí-gá cuendá nchaa yíca cuèchi-o, te duca<sup>n</sup> ñí cuu chi duca<sup>n</sup> cáhá<sup>n</sup>-xi núú tütú Yá Ndiõxí sá dúcá<sup>n</sup> yáha-gá.

4 Te ní chindúxi ñaha-güedé xii-gá te nduu úní ní dándótó ñaha Yá Ndiõxí xii-gá, te duca<sup>n</sup> ñí cuu chí duca<sup>n</sup> cáhá<sup>n</sup>-xi núú tütú Yá Ndiõxí.

5 Te sátá ñí ndoto-gá te ní quee túu-gá núú tè Pèlú, te dătnùní ní quee túu-gá núú dàva-gá cue téé ní táuchíú<sup>n</sup>-gă cáhá<sup>n</sup> tnũhu-gá.

6 Te sátá dúcá<sup>n</sup> te dătnùní ní quee túu-gá núú ùhú<sup>n</sup> cièndú cue ñáyiu

ndècu ichi-gá, te vâi-yu xĩndecu-ní-yu vitna chi sacú-ni-yu ní xíhí.

7 Te dătnùnı́ ní quee túu-gá núú tē Jăcobó, te sátá dúcá<sup>n</sup> te dătnùnı́ ní quee túu-gá núú nchaa cue tée ní táúchı́ú<sup>n</sup>-gă cĂhá<sup>n</sup> tnúhu-gá.

8 Te ndéé núú nı́ ndıhi-ná te ní quee túu-gá núú mée-ı́, te òré ní quee túu-gá núú-ı́ te cùu-ı́ dătná ĩ<sup>n</sup> déhe yıquı<sup>n</sup> vătá sĂá-gá nduu cĂcu chi cùu-ı́ ĩ<sup>n</sup> tée ĩá túú sàni vĂha inı́-xi cuendá-gá ní cùu.

9 Te yúhú ĩá túú cùnıuu-ı́ dătná cùnıuu cue tée ní táúchı́ú<sup>n</sup> Xıtohó Jesucristú cĂhá<sup>n</sup> tnúhu-gá. Te cùu-ı́ ĩ<sup>n</sup> tée ní táúchı́ú<sup>n</sup>-gă cĂhá<sup>n</sup> tnúhu-gá, cuēi ĩá túú tĂú-ı́ sá cĂhá<sup>n</sup>-ı́ tnúhu-gá, chi ní xóo cuu úhú inı́-ı́ cue ĩáıııu ndècu ichi Yă Ndiöxı́.

10 Dico Yă Ndiöxı́ ío vĂha inı́-gá chi ní quide ĩaha-gă xii-ı́ ĩ<sup>n</sup> tée vĂha, chi ĩá túú-gă quidē-ı́ dătná ní xóo cada-ı́. Te ío cundahú inı́ ĩáhá-gă chındèe ĩaha-gá xii-ı́ dico ĩá túú àú<sup>n</sup> nă cuu chındee ĩaha-gá, chi ío-gá vâi chiu<sup>n</sup>-gá ní cuu sa ta quide-ı́ cuáhá<sup>n</sup> dăcúúxı́ dăva-gá cue tée ní táúchı́ú<sup>n</sup>-gă cĂhá<sup>n</sup> tnúhu-gá te ĩá díú mée-ı́ duca<sup>n</sup> quide-ı́ chi mee Yă Ndiöxı́ ío cundahú inı́ ĩáhá-gă chındèe ĩaha-gá xii-ı́ quidē-ı́ chıu<sup>n</sup>-gá.

11 Te ĩá túú nă cada-xi cuēi dăva-gá-güedé sa ní cuu vâi-gá chıu<sup>n</sup>-gá quidē-güedé àdi yúhú, chi ĩ<sup>n</sup>-ni tnúhu cĂhá<sup>n</sup>-ndı́ te tnúhu-á<sup>n</sup> cúu tnúhu ní sĂndáá inı́-ndó.

### *Cue ĩáıııu ní xıhı́ ndotó-yu*

12 Te nchúhú cue tée cĂhá<sup>n</sup> tnúhu Xıtohó Jesucristú cĂhá<sup>n</sup>-ndı́ sá nı́ xıhı́-gá te ní ndoto-gá, ¿te ná cuendá dăva nchòhó cĂchı́-ndó să vă ndótó cuē ĩáıııu ní xıhı́?

13 Te núu duca<sup>n</sup> sàni inı́-ndó să vă ndótó cuē ĩáıııu ní xıhı́ te ní Xıtohó Jesucristú ĩá túú ní ndòto-gá te núu duca<sup>n</sup>.

14 Te núu dicó Xıtohó Jesucristú ĩá túú ní ndòto-gá ĩá, te nchaa tnúhu sá dĂnehé ĩáhá-ndı́ xii-ndo ĩá túú nĂndıhi-xi te núu duca<sup>n</sup>, te àú<sup>n</sup> nă cuu sĂndáá inı́-ndó-gă te núu duca<sup>n</sup>.

15 Te núu dicó cúu-xı́ ĩ<sup>n</sup> sá ndáá tnúhu sàni inı́ dăva-ndo ĩá, te dĂcuandehnde-ndı́ sá cĂhá<sup>n</sup>-ndı́ tnúhu Yă Ndiöxı́ núú-ndó te núu duca<sup>n</sup>, te ĩá túú cĂhá<sup>n</sup> ndáá-ndı́ núú-ndó să Yă Ndiöxı́ ní dĂndótó-gă Xıtohó Jesucristú, te núu ndáá nĂcuáa sàni inı́ dăva-ndo să vă ndótó cuē ĩáıııu ní xıhı́, dico ĩá ndáá nĂcuáa sàni inı́-ndó.

16 Te núu vĂ ndótó cuē ĩáıııu ní xıhı́ te ní Xıtohó Jesucristú ĩá túú ní ndòto-gá.

17 Te núu Xıtohó Jesucristú ĩá túú ní ndòto-gá ĩá, te àú<sup>n</sup> nă cuu sĂndáá inı́-ndó-gă te núu duca<sup>n</sup>, te ndècu-nı́ cuēchi-ndo nı́ú Yă Ndiöxı́ te núu duca<sup>n</sup>.

18 Te núu ndáá nĂcuáa sàni inı́-ndó ĩá te cue ĩáıııu ní sĂndáá inı́ ĩáhá xii Xıtohó Jesucristú ĩáıııu ní xıhı́ ní xıta nihnú-yu te núu duca<sup>n</sup>.

19 Te núu nchoo ndècu ndıhi-o tnúhu ndee inı́ núú Xıtohó Jesucristú cuendá-nı́ sá cundècu-o ĩıuyı́-a ĩá, te cùu-o ĩáıııu ío-gá duu<sup>n</sup> duu<sup>n</sup> ndàhú sá cúu-xı́ dăva-gá ĩáıııu te núu duca<sup>n</sup>.

20 Dico ndáá sá Xıtohó Jesucristú ní xıhı́-gá te ní ndoto-gá nı́ú xıá<sup>n</sup> cıtnùnı́ inı́ dăva-o să ndótó cuē ĩáıııu ní xıhı́ ĩáıııu ní sĂndáá inı́ tnúhu-gá.

21 Te sá cuēchi ĩ<sup>n</sup>dıi-nı́ tée ní xındecu ĩıuyı́-a xıá<sup>n</sup> xıhı́ ĩáıııu, te sá cuendá ĩ<sup>n</sup>dıi-nı́ tucu ingá tée te ndoto cue ĩáıııu ní xıhı́.

22 Te nchaa ĩáıııu xıhı́-yu sá cuēchi ĩ<sup>n</sup> tée, te tée-á<sup>n</sup> cúu-dē ndıı Ádán tée díhna nuu nı́ cuu ĩanı́ tnáhá cuē ĩáıııu ĩıuyı́. Te dıu-nı́ duca<sup>n</sup> să cuendá ĩ<sup>n</sup>dıi-nı́ tée te ndoto cue ĩáıııu ní xıhı́, te tée-á<sup>n</sup> cúu-dē Xıtohó Jesucristú chi nchaa ĩáıııu ndècu ndıhi-gá ndotó-yu.

23 Te díhna-gá Xıtohó Jesucristú ní ndoto-gá xıá<sup>n</sup> cıtnùnı́ inı́ dăva-o să ndıu na quixi tucu-gá ĩıuyı́-a te dăvĂ-á<sup>n</sup> ndoto nchaa ĩáıııu ní xıhı́ ĩáıııu ní sĂndáá inı́ tnúhu-gá.

24 Te dătnùnı́ duca<sup>n</sup> te sáá nduu nĂ nchaa sá ío ĩıuyı́, te Xıtohó Jesucristú danĂa-gá nchaa ndı́ túhú sá cùnıuu ío ĩıuyı́-a, chi danĂa-gá nchaa ĩáıııu ío cùnıuu, ndıhi yucu ĩăvĂha, ndıhi nchaa espıritú xınú cuēchi núú-xi. Te duca<sup>n</sup>



te cúñaha-gã xii Tátá-ó Dǔtú Ndiǒxi taxi tnùnì-gá.

<sup>25</sup> Chi Xítohó Jesucristú dacuitíi tàxi tnùnì-gá ndéé ná sàá nduu dànaa-gá nchaa sá cúú úhú iní ñáhá xii-gá.

<sup>26</sup> Te ndéé núú ñí ndihi-ná te danàa-gá sá quidé xihí ñáiyu.

<sup>27</sup> Te duca<sup>n</sup> chi càhá<sup>n</sup>-xi núú tǔtú Yá Ndiǒxí sá méé-gã ní nachihi-gá nchaa sá ió ndaha Xítohó Jesucristú cuendá sá méé Xítohó Jesucristú taxi tnùnì-gá, te vá yǒo ñí tàxi tnùnì ñáhá xii Yá Ndiǒxí, chi mee Yá Ndiǒxí cúú-gã Yaá ní nachihi-gá nchaa sá ió ndaha Xítohó Jesucristú.

<sup>28</sup> Te díhna-gá ní xáha<sup>n</sup> Yá Ndiǒxí xii Xítohó Jesucristú Yaá cúú Dèhe-gá sá quíndaha-gá nchaa sá ió, te òré ná quíndaha Xítohó Jesucristú nchaa sá ió, te cúñaha-gã xii Yá Ndiǒxí taxi tnùnì ñáhá-gã xii-gá, te duca<sup>n</sup> te mee-nã Yá Ndiǒxí taxi tnùnì-gá nchaandi túhú sá ió.

<sup>29</sup> Te núú ñá túú ndáá càhá<sup>n</sup>-í, te ná cuendá dava ñáiyu sànduté-yu cuendá ñáiyu ní xihí núú ñá túú ndáá sá ndótó ñáiyu ní xihí?

<sup>30</sup> Te nchúhú duca<sup>n</sup>-ni sàni iní ñáiyu cahni ñàhá-yu xii-ndí, te núú vá ndótó ñáiyu ní xihí te àú<sup>n</sup> nã cuu duca<sup>n</sup> quíde cahnu iní-ndí duca<sup>n</sup> cuínì-yu cahni ñàhá-yu xii-ndí te núú duca<sup>n</sup>.

<sup>31</sup> Te nchòhó ñáiyu ndècu ndihi-í ichi Xítohó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo sã ñí nduu ñí nduu ndéé iní ñáhá ñáiyu cahni ñàhá-yu xii-í.

<sup>32</sup> Te núú dicó ndáá sá vã ndótó ñáiyu ní xihí dàtná càchí dava ñáiyu, te àú<sup>n</sup> nã cuu ní xíndecu-í ñuú Éfesú ní cuu úhú iní ñáhá ñáiyu xii-í te núú duca<sup>n</sup>, chi ñáiyu-án ñí quidé-yu dàtná quidé ñí quiti déé<sup>n</sup> sã cúú-xi-í. Te núú ndáá sá vã ndótó ñáiyu ní xihí ñá, te váha-gá núu cachí-ó dàtná càchí ñáiyu: “Vitna na còho-o te na càxi-o chi tneé idá cuú-ó”, duha càchí-yu.

<sup>33</sup> Te vá dáñá-ndó mèe-ndo dan-dahú ñáhá ñáiyu ndècu ichi cuehé ichi duha xii-ndo, te ngüíta-ndo càni

iní-ndó dàtná sání iní-yu. Chi quèe ndáá-xi nàcuáa càhá<sup>n</sup> tucu dava-gá ñáiyu, chi càchí-yu sá núu ñáiyu quíde váha na ñihí tnáhã-yu ndihi ñáiyu ndècu ichi cuehé ichi duha, te ngüíta ñáiyu quíde váha-án cadá-yu tnàhá-yu nchaa sá cuèhé sá dúhá dàtná quíde ñáiyu-án.

<sup>34</sup> Te ío váha cuáha-ndo cuendá nàcuáa cundecu-ndo, te vá cadá-gã-ndó dàtná quíde cuè ñáiyu ndècu ichi cuehé ichi duha. Te dava-ndo quíde-ndo datná quíde cuè ñáiyu ndècu ichi cuehé ichi duha chi ñá túú sàndáá iní-ndó Yá Ndiǒxí. Te duha càhá<sup>n</sup>-í cuendá sá cúcàha<sup>n</sup> núú-ndó cuendá nchaa sá ñà túú vãha quíde-ndo.

#### *Nàcuáa ndoto ñáiyu ní xihí*

<sup>35</sup> Te cudana dava-ndo ndècu tnúhu-ndo núu nása ndoto ñáiyu ní xihí, te nása cunduu yiqui cùñú-yu òré ndotó-yu.

<sup>36</sup> Te nchòhó ñáiyu duca<sup>n</sup> càhá<sup>n</sup> cúú-ndó ñáiyu ñá túú tnàhí cùtnuní iní-xi, te duha na càhá<sup>n</sup>-í nàcuáa tecú tnùnì-ndó. Te núú ñí tatá ná chíhí-ó te tēhyú méé-xí te xínu déhe-xi.

<sup>37</sup> Dico ñá díú sã sã ní xínu ta sàhnu cuáhá<sup>n</sup> ní cùxi-o, te diu-ni duca<sup>n</sup> quíde-o cuéi triú ndihi nchaa dava-gá tatá xítú-ó.

<sup>38</sup> Te Yá Ndiǒxí quíde-gã sácūnduu tatá xínu-án dàtná cuínì méé-gã cunduu. Te ndèda-ni càa tatá te diu-ni-gá quíde-gã sácūnduu-xi nàcuáa tàú-xi cunduu.

<sup>39</sup> Te ndi díí<sup>n</sup> ndáa nchaa yiqui cùñú, chi tucu càa yiqui cuñú nchoo cuè ñáiyu, te tucu càa yiqui cuñú nchaa quiti xica núú ñúhú, te tucu càa yiqui cuñú nchaa quiti ndàva, te tucu càa yiqui cuñú nchaa chácá.

<sup>40</sup> Te duca<sup>n</sup> ñà túú ñí-ni caa nchaa yiqui cuñú sá ió andiú ndihi nchaa yiqui cuñú ñáiyu ió ñuyíú-a, te duca<sup>n</sup> ñà túú ñí-ni ndáa vii nchaa sá ió andiú ndihi ñuyíú-a.

<sup>41</sup> Te duca<sup>n</sup> cùu tucu-xi nchícanhii chi tucu dàyehé-xi, te tucu dàyehé yóó, te tucu dàyehé nchaa chódíní, te duca<sup>n</sup> ñà túú ñí-ni dayehé nchaa chódíní.

42 Te duca<sup>n</sup> sãtnahá-xi cùu ñáyiu ní xihí te ndoto, chi tucu càa yiqui cuñú-yu sá nguĩndũxi te tucu cunduu yiqui cuñú-yu òré ndotó-yu, te yiqui cuñú sá ndótó ndihí-yu-á<sup>n</sup> vã ndihí nihnu-gá-xi.

43 Te yiqui cuñú ñáyiu xihí ñá túú nãndihí-xi, dico yiqui cuñú sá ndótó ndihí-yu te ío váha cunduu. Te nchaa yiqui cuñú ñáyiu xihí ñá túú tnàhí-gã ndee-xi, dico yiqui cuñú ndoto ndihí-yu xiã<sup>n</sup> ío cunduu ndee-xi.

44 Te yiqui cuñú nchaa ñáyiu xihí cúu-xí cuendá ñuyú-a, dico yiqui cuñú sá ndótó ndihí-yu xiã<sup>n</sup> cundecu-ná-xi cuendá Espiritú Yã Ndiõxí. Te dàtná ío yiqui cuñú sá cúu-xí cuendá ñuyú-a, te duca<sup>n</sup> ío yiqui cuñú sá cúu-xí cuendá mee-nã Espiritú Yã Ndiõxí.

45 Te núú tütú Yã Ndiõxí càchí-xi: “Ndíi Àdán ndíi ní xindecu ndéé díhna ní chihi Yã Ndiõxí iní ndíi”, duha càchí-xi núú tütú-gá. Te ingá tucu téé cùu-dé dàtná ndíi Àdán te téé-á<sup>n</sup> cúu-dě Xítohó Jesucristú, te Yaá-á<sup>n</sup> quidé-gã sá mèe-ná Espiritú Yã Ndiõxí quidé-xí ndècu-o ichi-gá vitna.

46 Te díhna-gá yiqui cuñú cuendá ñuyú-a ní nguĩndecu, te dàtnúni nguĩndecu yiqui cuñú cundecu ndihí mee-nã Espiritú Yã Ndiõxí.

47 Te téé díhna nuu ñí xindecu ñuyú-a chi ñuhu ní cadúha ñaha Yã Ndiõxí xii-dé, te téé-á<sup>n</sup> cúu-dě ndíi Àdán, te ingá tucu téé ní cuu<sup>n</sup>-dé andiu te téé-á<sup>n</sup> cúu-dě Xítohó Jesucristú.

48 Te nchaa ñáyiu càa yiqui cuñú-yu dàtná cáa yiqui cuñú té Àdán téé duca<sup>n</sup> ñí cuáha ñuhu-á<sup>n</sup>, te nchaa ñáyiu ní nduu táhú cundecu ndihí téé duca<sup>n</sup> vëxi cuu<sup>n</sup> andiu-á<sup>n</sup>, ñáyiu-á<sup>n</sup> nduu yiqui cuñú-yu dàtná cáa yiqui cuñú ní nduu táhú-dě ndécú ndihí-dé vitna, te téé-á<sup>n</sup> cúu-dě Xítohó Jesucristú.

49 Te nchaa ñáyiu ñuyú-a càa-yu dàtná-ni càa datná-ni ndùu téé duca<sup>n</sup> ñí cuáha ñuhu-á<sup>n</sup>. Te nchaa nchoo ñáyiu ní nduu táhú cundecu ndihí téé duca<sup>n</sup> vëxi cuu<sup>n</sup> andiu-á<sup>n</sup> nduu-o

dàtná-ni càa datná-ni ndùu téé-á<sup>n</sup> tucu.

50 Te nchòhó ñáyiu ndècu ndihí-í ichi Xítohó Jesucristú càchí tnúhu-í xii-ndo sã ncháá nàcuáa càa yiqui cuñú ñáyiu xindecu vitna vá sàá-xi cundecu-xi núú ndécú Yã Ndiõxí táxí tnùní-gá, chi ñuyú-a ndihí nihnu-xi. Dico sá tàú-xi sáá núú ndécú-gã táxí tnùní-gá xini ñuhu-xi cuu-xi sá cùdĩ cundecu.

51 Te na càchí tnúhu-í xii-ndo ñ<sup>n</sup> tnúhu sá yiyùhu ni cuu: Dava-o cùú-ó te dava-o cundecu-ni-o, dico nchaa-o nàdáma yiqui cuñú-ó.

52 Te uu<sup>n</sup>ni duca<sup>n</sup> nàdáma yiqui cuñú-ó òré cáhá<sup>n</sup> ñ<sup>n</sup> cútú, te cútú-ã<sup>n</sup> cáhá<sup>n</sup>-xi òré sa ta cùyatni naa ñuyú. Te òré cáhá<sup>n</sup> cútú-ã<sup>n</sup> te ndoto nchaa ñáyiu ní xihí ñáyiu ní xindecu ichi Xítohó Jesucristú, te duca<sup>n</sup> te vá ñ<sup>n</sup> ndùu ñ<sup>n</sup> quíú-gã cuú-yu. Te nchaa ñáyiu ndècu vívú te nàdáma yiqui cuñú-yu tnàhá-yu.

53 Te nchaa yiqui cuñú ndécú ndihí nchaa ñáyiu ndècu ñuyú-a vitna ñá túú cùdĩ-xi chi xihí-xi, dico yiqui cuñú nduu táhú nchoo ñáyiu ndècu ichi Xítohó Jesucristú chi cudĩ-xi ni caa ni quíhí<sup>n</sup> chi vá cùú-gá-xi.

54 Te òré ná ndùu táhú-ó yiqui cuñú sá dúcá<sup>n</sup> cùdĩ ni caa ni quíhí<sup>n</sup>-á<sup>n</sup>, te vá cùndècu ndihí-gá-ó yiqui cuñú sá ñá túú cùdĩ. Te dàvá-á<sup>n</sup> te quee ndáá-xi nàcuáa càhá<sup>n</sup>-xi núú tütú Yã Ndiõxí núú càchí-xi: “Vitna ñá túú-gã xihí ñáyiu chi mee-nã Yã Ndiõxí cùnùu-gá táxí tnùní ñáhá-gã xií-yu.

55 Te ñá túú tnàhí-gá ná ndoho ñáyiu sá cuendá tnúhu xihí, chi vá cóó-gã tnúhu xihí”, duha càchí-xi núú tütú Yã Ndiõxí.

56 Te cue ñáyiu ndècu ndihí-yu tnúhu sá sánú ichi ñaha xií-yu nàcuáa cadá-yu cundécú-yu dico uu<sup>n</sup>-gá quídè-yu nchaa sá cuèhé sá dúhá. Te sá cuendá nchaa sá cuèhé sá dúhá quidé-yu-á<sup>n</sup>, te xiã<sup>n</sup> ní nguĩndecu tnúhu xihí dándòho ñaha-xi xií-yu.

57 Dico táxãhu xii Yã Ndiõxí chi ní taxi-gá tnúhu ndee ìní ndécú ndihí-o sá sáá nduu te vá quíni-gá-ó tnúhu

xihí, te duca<sup>n</sup> chi ndècu ndihí-o Xítoho Jesucristú.

<sup>58</sup> Te xiá<sup>n</sup> ñuu càhá<sup>n</sup>-í dóho nchòho cue ñáyu ndècu ndihí-í ichi Xítoho Jesucristú chi ío cùu iní ñáhà-í xii-ndo, te càhá<sup>n</sup>-í dóho-ndo sã cãchícú<sup>n</sup> ni-hnu-ni-ndo ichi Xítoho Jesucristú cuèi nãndi na càda ñaha ñáyu xii-ndo sã cuendá-gá, te ío nducu ndèe-ni-ndo cada-ndo chiu<sup>n</sup>-gá, chi sa ñaha-ndo sã ncháá chiú<sup>n</sup> quide-o cuendá-gá ñá túú àú<sup>n</sup> ñã cuu quide-o.

## 16

### *Nàcuáa sàcá<sup>n</sup> tnáhá ñáyu díhú<sup>n</sup>*

<sup>1</sup> Te ña càchí tnúhu-í xii-ndo cuendá díhú<sup>n</sup> sã sàcá<sup>n</sup> tnáhá-ndó sã cúu-xí ñáyu ñuu Jerusálén, chi ñu-ni duha ní dánèhé-í cue ñáyu xíndecu ichi Xítoho Jesucristú ndécú ñ<sup>n</sup> ñ<sup>n</sup> xichi distritú Gálaciá.

<sup>2</sup> Te duha cada-ndo ndi tnahá nduu ndumíngú, te ñ<sup>n</sup> ñ<sup>n</sup>-ndo dàquee ñ<sup>n</sup>-ndo sacú díhú<sup>n</sup> nàcuáa chindee ñaha Yá Ndióxi xii-ndo ñihí-ndó cuendá òré quexìo-í te sa cundecu túha díhú<sup>n</sup>-ã<sup>n</sup>.

<sup>3</sup> Te òré quexìo-í te mee-ndo cãxi-ndõ-yu núu ndèdacàa-yu sãni iní-ndó càda ndáá canehe díhú<sup>n</sup>-ã<sup>n</sup> quíhí<sup>n</sup> ndaha ñáyu xíndecu ichi Xítoho Jesucristú ndécú ñuu Jerusálén. Te cadúha-í ñ<sup>n</sup> ùú tutú canehe-yu quíhí<sup>n</sup> cuendá cutnùní iní ñáyu ñuu Jerusálén nàcuáa nduu chiu<sup>n</sup> cuáhá<sup>n</sup>-yu.

<sup>4</sup> Te núu xini ñuhu-xi sã quíhí<sup>n</sup>-í te candeca-í-yu quíhí<sup>n</sup>.

### *Té Pãblú sání iní-dé quíngoto-dé cue ñáyu ndècu ichi Xítoho Jesucristú*

<sup>5</sup> Te yúhú sání iní-í yáha-í ñ<sup>n</sup> ùú ñuu cáá distritú Macèdoniá, te dàtnùní duca<sup>n</sup> te sáá-í núu ndécú-ndó.

<sup>6</sup> Te òré quexìo-í te cudana cundecu ndihí ñaha-í xii-ndo vai nduu, àdi cudana te cundecu ndihí ñaha-í xii-ndo ndèe yáha nchaa yóo quidé víxi<sup>n</sup>-xi. Te sátá dúcá<sup>n</sup> te cada ndee iní-ndó chindee ñaha-ndo xii-í òré nucúhu<sup>n</sup> ichi-í te núu ndèe ichi na quíhí<sup>n</sup>-í.

<sup>7</sup> Te duha càhá<sup>n</sup>-í chi núu Yá Ndióxi ná càchí-gá te cundecu ndihí ñaha

tnàa-í xii-ndo òré quexìo-í te ñá díú dicó-ni ichi yáha-í.

<sup>8</sup> Te cundecu-ni-í ñuu Éfesú-a ndée tnahá vico Pentecostés.

<sup>9</sup> Te duca<sup>n</sup> chi iha ío tèdóho ñáyu tnúhu Xítoho Jesucristú sã càhá<sup>n</sup>-í núu-yu. Núu xiá<sup>n</sup> ío váha quèe cuendá cada-í chiú<sup>n</sup>-gá cuèi ío vai ñáyu ñá túú tnàhá iní-yu sã càhá<sup>n</sup>-í tnúhu-gá.

<sup>10</sup> Te núu na quixi coto ñaha té Timùteú xii-ndo, te ío váha cuu iní-ndó càhá<sup>n</sup> ndihí-ndo-dé cuendá duca<sup>n</sup> ñá túú ñã caní iní-dé cundecu ndihí ñaha-dé xii-ndo, chi tnàhá-dé cúu-dé té quide chiu<sup>n</sup> Xítoho Jesucristú dàtná quide-í.

<sup>11</sup> Te cuiní-í sã ñi ñ<sup>n</sup>-ndo vá caní cuèhé iní-ndó cuendá-dé, te chindee-ndo-dé nàcuáa cuu váha iní-dé òré quixi-dé quixi coto ñaha-dé xii-í, chi yúhú ndihí dava-gá ñáyu ndècu ichi Xítoho Jesucristú ndétú-ndí-dé quexìo-dé.

<sup>12</sup> Te ío ní càhá<sup>n</sup> ndàhú-í núu tã Àpolós té ndècu ndihí-o ichi Xítoho Jesucristú cuendá quixi-dé ndihí dava-gá cue té ndècu ndihí-o ichi-gá quixi coto ñaha-güedé xii-ndo dico ñá túú ní cuiní-dé quixi-dé vitna, dico quixi-dé ndée cuèé-gá.

### *Tnúhu ndée núu ñi ndihí-ná*

<sup>13</sup> Te ío quíhí iní-ndó cundecu-ndo ichi Xítoho Jesucristú, te vá dáñá ndèe-ndó quíndáá iní-ndó-gã, te ío yíi cunduu iní-ndó cundecu-ndo ichi-gá, te ío nducu ndèe-ndo canchícú<sup>n</sup> ni-hnu-ndo ichi-gá.

<sup>14</sup> Te ío váha cuu iní tnáhá-ndó, te duca<sup>n</sup> ío váha cada tnàha-ndo te núu nãndi cùu sã váha sãni iní-ndó càda-ndo.

<sup>15</sup> Te nchòho ñáyu ndècu ndihí-í ichi Xítoho Jesucristú sa ñaha-ndo sã ñihnanuu cuè ñáyu cùu ndi mee té Èstefanás ndécú distritú Acãyá ní sándáá iní-yu tnúhu Xítoho Jesucristú. Te vitna ñá túú dàña ndèe-yu quidé-yu sã váha sã cúu-xí dàva-gá ñáyu sándáá iní tnúhu-gá.

<sup>16</sup> Te càhá<sup>n</sup> ndàhú-í núu-ndó sã quíndáá iní-ndó nchaa ñáyu duca<sup>n</sup> xíquide, ndihí nchaa dava-gá ñáyu

ío ndùcu ndee quide chiu<sup>n</sup> ndihì-ndo cuendá Xítóhó Jesucristú.

<sup>17</sup> Te ío cùdíí ìní-í sá ñí quexìo té Èstéfanás, ndihì té Fortunátú, ndihì té Acàicú, chi cue téé-á<sup>n</sup> ñí quide-güedé núú-ndó ñí quide-güedé nchaa sá ñà túú ndàcu-ndo cada-ndo cuendá-í ní cùu.

<sup>18</sup> Te ío tàxi-güedé tnúhu ndee ìní xii-í, te diu-ni duca<sup>n</sup> tàxi-güedé tnúhu ndee ìní xii nchòhó tucu, te núu xíá<sup>n</sup> xíní ñùhu-xi sá cánèhe-ndo sá yíñùhu núú nchàa cue téé duha xíquide váha.

<sup>19</sup> Te nchaa ñáyiú xíndecu ichi Xítóhó Jesucristú ndécú distritú Àsiá quide ndee ìní ñáhà-yu xii-ndo, te ío cada ndee ìní-ndó càchí té Àquilú ndihì ñadíhí-dé tá Priscilá, te duca<sup>n</sup> quide ndee ìní ñáhà tucu nchaa ñáyiú tàcá dácua<sup>n</sup>ha tnúhu Yá Ndiõxí vehé-yu xii nchaa nchòhó ñáyiú ndècu ichi-gá.

<sup>20</sup> Te cada ndee ìní tucu-ndo càchí cue dava-gá ñáyiú ndècu ndihì-o ichi Xítóhó Jesucristú. Te ñí yùhu ñí ìní-ndó càda ndee ìní tnáhà-ndó ñí<sup>n</sup> ñí<sup>n</sup>-ndo.

<sup>21</sup> Te vitna ndaha mee yùhú té Páblú tée-í tnúhu-a quide ndee ìní ñáhà-í xii-ndo.

<sup>22</sup> Te ñáyiú ñá túú cùu váha ìní-xi núú Xítóhó Jesucristú te na cuíta nihnú-yu. Te vitna nchaa-o chí ná càchí-ó sá Xítóhó Jesucristú quixi tucu-gá.

<sup>23</sup> Te xicá<sup>n</sup> táhù-í núú Xítóhó Jesucristú sá ná chìndee chitúu ñaha-gá xii-ndo.

<sup>24</sup> Te ío cùu ìní ñáhà-í xii-ndo nàcuáa ndècu-o ichi Xítóhó Jesucristú, te duca<sup>n</sup> na cùnduu, te ío chí cadá ndèe ìní-ñá vitna.

## TUTÚ CÚÚ ÛÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ CÒRINTÚ

*Té Păblú cādūha-dé tutú quihí<sup>n</sup>  
ndaha ñáyiu xĩndecu ichi Xítohó Jesu-  
crístú ndécú ñuú Còrintú*

<sup>1</sup> Yúhú té Păblú cāhán-í tnúhu Xítohó Jesucristú chi duca<sup>n</sup> ñ cachí Yá Ndiöxí cunduu. Te cādúha-í tutú-a ndihí té Timúteú té ndècu ndihí-o ichi-gá cuendá daquixi-í ndaha nchòhó ñáyiu xĩndecu ichi Yá Ndiöxí ndécú ñuú Còrintú, te tutú-a cuu-xi tnàhá cuendá nchaa ñáyiu cùu cuendá Yá Ndiöxí xĩndecu nchaa ñuú yĩndèhu distritú Acáyá.

<sup>2</sup> Te xicá<sup>n</sup> táhù-í núú Tātá-ó Dütú Ndiöxí ndihí núú Xítohó Jesucristú sá ïo na chĩndee chitúu ñaha-gă xii-ndo, te diu-ni ndi ndùu-gá ná càda te ïo váha cuu iní-ndó cùndecu-ndo.

*Té Păblú cāhán-dé nchaa nàcuáa  
ndòho-dé*

<sup>3</sup> Te chí ná cāchí-ó sã ïo váha iní Dütú Ndiöxí Yaá cúú Tātá Xítohó Jesucristú, te diu-ni Dütú Ndiöxí cúú-gă Yaá ïo cùndahú iní ñáhá xii-o, te diu-ni-gá cúú-gă Yaá táxí tnúhu ndee iní.

<sup>4</sup> Te cuèi nándi ndòho-o ndecu-o dico diu-ni Dütú Ndiöxí táxí-gă tnúhu ndee iní xii-o, te duca<sup>n</sup> quide-gá cuendá sá nchóó cuãñaha-o tnúhu ndee iní xii nchaa ñáyiu nándi ndòho ndecu, te diu-ni nchaa tnúhu ndee iní táxí-gă xii-o diu-ni nchaa tnúhu ndee iní-á<sup>n</sup> cuãñaha-o xii-yu.

<sup>5</sup> Te Xítohó Jesucristú ïo ní ndoho-gá, te duca<sup>n</sup> nchòo tucu ïo ndòho-o, te duca<sup>n</sup> ïo vâi tnúhu ndee iní ñihí-ó ndècu ndihí-o chi ndècu-o ndihí Xítohó Jesucristú.

<sup>6</sup> Te nchúhú nándi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihí-ndo te naníhí tàhú-ndó. Te Yá Ndiöxí táxí-gă tnúhu ndee iní xii-ndí, te duca<sup>n</sup> quide-gá cuendá sá nchòhó

tnàhá-ndó ñihí-ndó tnúhu ndee iní-á<sup>n</sup> te naníhí tàhú-ndó, te duca<sup>n</sup> càda ndee cada cahnu iní-ndó ndòho-ndo datná ndòhó nchúhú.

<sup>7</sup> Te nchúhú ïo váha sàni ndáá iní-ndí cuendá-ndó chi ndòho-ndo datná ndòhó-ndí, te duca<sup>n</sup> tàxi Yá Ndiöxí tnúhu ndee iní xii-ndo datná táxí-gă xii-ndí.

<sup>8</sup> Te nchòhó ñáyiu ndècu ndihí-ndí ichi Xítohó Jesucristú cuiní-ndí cachí tnúhu-ndí xii-ndo nàcuáa ní yáha-ndí cùtnàhá ní xĩndecu-ndí distritú Àsiá chi dàvá-á<sup>n</sup> ïo ní ndoho-ndí, te luha-ná te vá cùndèe iní-ndí yáha-ndí nchaa tnúndòho-á<sup>n</sup> ní cùu chi ní xehndé iní-ndí sá vã cãcu-ndí.

<sup>9</sup> Chi ní sani iní-ndí sá ndíyi-ná cuu-ndí ní cùu, te duca<sup>n</sup> ñ yáha-ndí cuendá sá ïo-gá quĩndáá iní-ndí Yá Ndiöxí sá díú-gă taunihnu ñaha-gă xii-ndí, te ñá díú mèe-ndí taunihnu-ndí mée-ndí, te diu-gá cúú-gă Yaá dándòto cuèi ñáyiu sa ní xíhí.

<sup>10</sup> Te diu-ni-gá ní taunihnu ñaha-gă ñá túú ní sàhni ñaha ñáyiu xii-ndí, te diu-ni-gá táunihnu ñaha-gă xii-ndí cuèi vitna, te cùtnuní ndáá iní-ndí sá díú-ní-gă taunihnu ñaha-gă xii-ndí núú cuahá<sup>n</sup> núú vèxi te vá cáhni ñàha ñáyiu.

<sup>11</sup> Te nchòhó tnàhá-ndó chĩndee ñaha-ndo xii-ndí chi cāhán ndihí-ndo Yá Ndiöxí cuendá-ndí, te ïo vâi ñáyiu cāhán ndihí ñàhá-yu xii-gá cuendá-ndí, te duca<sup>n</sup> ïo vâi ñáyiu ndàcá<sup>n</sup> táhú-yu núú-gă cuendá nchaa sá vãha quide ñaha-gă xii-ndí.

*Té Păblú cāhán-dé ná cuendá ñá túú  
ní nâyáha-dé ñuú Còrintú*

<sup>12</sup> Te ïo váha cùu iní-ndí chi cùtnuní iní-ndí sá cúú-ndí cue tée cùu ndáá datná cuiní Yá Ndiöxí cunduu ndècu-ndí ñuyíú-a, te diu-ni duca<sup>n</sup> quide-ndí sá cúú-xi-ndó chi mee-gă cùndahú iní ñáhá-gă xii-ndí chĩndèe ñaha-gă, te ñá túú quide-ndí datná sání iní cue ñáyiu ñuyíú-a.

<sup>13-14</sup> Nchaa nàcuáa ndùu tnúhu chido tnuní-ndí dáquixi-ndí ndaha-ndo

cùu-xi mee-ni tnúhu sá ñà túú ũhú tecú tnùnín-dó. Te nchòhó sa cùtnuní luha iní-ndó nàcuáa quide-ndí ndécú-ndí, te cuíní-ndí sá ïo-gá váha tecú tnùnín-dó cuendá sá òré ná quixi tucu Xítohó Jesucristú, te dàvá-án ïo cada nínu ñaha-ndo xii-ndí dàtná cada nínu ñaha-ndí xii-ndo.

<sup>15</sup> Te cuendá xián nũu ní sani iní-í yáha cáhá-í úú xito núú ndécú-ndó cuendá ío cudíí iní-ndó.

<sup>16</sup> Chi ní sani iní-í sá òré quíhí-í distritú Macèdoniá te yáha cáhá-í núú ndécú-ndó, te òré ndixi tucu-í te nayáha cáhá-í tucu-í, te òré nayáha cáhá-í te taxi-ndo sá cúú ichi-í cuendá quíhí-í distritú Jùdeá, duha ní sani iní-í ní cùu.

<sup>17</sup> Te sá dúcá-ñà túú ní quixi coto ñaha-í xii-ndo te cudana sàni iní-ndó sá yũhú ñà túú ní sáha váha-í cuendá nàcuáa ní sani iní-í cada-í, àdi cudana ñáyiu ndècu ichi cuehé ichi duha, chi cue ñáyiu-án tnaa càchí-yu sá cúú càdá-yu ï- sá sání iní-yu cadá-yu te tnaa càchí-yu sá ñáhá.

<sup>18</sup> Dico Yá Ndiõxí Yaá ío váha quide ndáá ñaha ndáá náhá càxi-gá sá nchũhú ñà túú dàma-ndí sá cáhá-ndí.

<sup>19</sup> Te yũhú ndíhi té Silvanú ndíhi té Timùteú dánèhé ñáhá-ndí xii-ndo cuendá Xítohó Jesucristú Yaá cúú Dèhe Yá Ndiõxí, te Xítohó Jesucristú cúú-gá Yaá ñà túú dàma-gá tnúhu cáhá-gá, chi cùu-gá Yaá cáhá mee-ni tnũhu ndáá tnũhu cuiti.

<sup>20</sup> Te diu-ni Xítohó Jesucristú cúú-gá Yaá quidé nchàa nacuáa ní cachí Yá Ndiõxí. Te sá cuendá sá dúcá-ñà quide Xítohó Jesucristú xián càchí-ó sá ïo càhnu cuu Yá Ndiõxí. Te nchaa-o na càchí-ó sá díú-ní dùca-ñà na cada-gá.

<sup>21</sup> Te mee Yá Ndiõxí quidé-gá ndécú-ní-ó ïchi Xítohó Jesucristú. Te diu-ni mee-gá ní cáhá-ñáhá-gá xii-o cuendá cunu cuechi-o nũú-gá.

<sup>22</sup> Te Yá Ndiõxí ní quide-gá sá nchóo cùu-o ñáyiu cùu cuendá-gá, te ní taxi-gá Espíritú-gá ní ngúndecu ndíhi-o cuendá cutnùnín iní-ó sá ndáa cada ñaha-gá xii-o nàcuáa ní cachí-gá cada-gá.

<sup>23</sup> Te Yá Ndiõxí náhá-gá sá

yũhú cáhá-ñdá-í ná cuendá vátá quíxi-gá-í quixi coto ñaha-í xii-ndo, te vátá quíxi-gá-í chi ñà túú cuíní-í dandíhú-í iní-ndó.

<sup>24</sup> Te nchũhú ñà túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndiõxí, chi sa sàndáá váha iní-ndó-gá, chi nchũhú cuíní-ndí chindee tnũhu ñaha-ndí xii-ndo nàcuáa ío-gá cudíí iní-ndó cùndecu-ndo.

## 2

<sup>1</sup> Te ní sani ndáá iní-í sá vã quíxi ndíhi-ni-í quixi coto ñaha-í xii-ndo cuendá sá vã dandíhú-í iní-ndó.

<sup>2</sup> Te nchòhó cúú-ndó ñáyiu tàxi tnúhu ndee iní xii-í cudíí iní-í ndécú-í, te xián nũu ñà túú cuíní-í dandíhú-í iní-ndó, chi núu duca-ñà na càda-í te vã cùndècu váha-gá iní-ndó nàcuáa taxi-ndo tnũhu ndee iní xii-í.

<sup>3</sup> Te xián nũu ní tendaha-í tutú véxi ndaha-ndo cuendá sá òré quixi coto ñaha-í xii-ndo, te dàvá-án quíni-í sá quidé-ndó nàcuáa cudíí iní-í te ñà díú dà dandíhú-ndó iní-í òré quexìo-í, chi nchòhó tàú-ndó càda-ndo sá yũhú cudíí iní-í. Te cùtnuní ndáá iní-í sá nũu yũhú cudíí iní-í te tnáhá nchòhó cudíí iní-ndó cuendá sá dúcá-ñà cùdíí iní-í.

<sup>4</sup> Te ndàhyú-í sá ndíhú iní-í òré ní cadúha-í tutú ní dáquixì-í ndaha-ndo, chi ío cuehé sá sání iní-í, te ñà túú ní dàquixi-í tutú-án ndaha-ndo cuendá sá dandíhú iní ñáhà-í xii-ndo, chi ní dáquixì-í cuendá sá nchòhó cutnùnín iní-ndó sá ïo cùu iní ñáhà-í xii-ndo.

*Nàcuáa tàú ñáyiu ñuú Còrintú cadá-yu cuendá ï- ñáyiu ñà túú quide ndáá*

<sup>5</sup> Te na càchí tnúhu-í xii-ndo cuendá ï- té ní quide ï- sá ñà túú tàú-dé cada-dé ndécú ndíhi-ndo, te ní quide ndáhú-xi luha iní-í cuendá sá ñí quide-dé-án dico nchòhó tnáhá-ndó ñí dandíhú-dé luha iní-ndó, te duha càchí-í sá lúhá-ní ñí dandíhú-dé iní-ndó cuendá sá vã cuídó-gá-í ná tnúhu cáhá-í.

6 Te nàcuáa ní ndatnúhu-ndo ní quide ndáá-ndó cuèchi téé-á<sup>n</sup> te sa ndói-gá cuu nàcuáa ní quide-ndo-dě.

7 Te vitna tàú-ndó càda cahnu iní-ndó sã ní quide-dé, te cuãñaha-ndo tnũhu ndee ìní xii-dé chi núu ñáhá te vá nihí ndéé-gã-dé cada-dé sã vãha cuendá sã ndìhú iní-dé.

8 Te xiã<sup>n</sup> nõu càhá<sup>n</sup> ndàhú-í núú-ndó sã cáda tùcu-ndo sã cúú ìní-ndó-dě.

9 Te ñi-ñi cuendá iha càhá<sup>n</sup>-í ñ<sup>n</sup> núú tùtú sã sã ní dáquixi-í ndaha-ndo, te duca<sup>n</sup> ní quide-í xító ndéé ñáhà-í xii-ndo nõu ndisa cuèni-ndó càda-ndo nchaa nacuaá càhá<sup>n</sup>-í.

10 Te ndéda-ni cà ñáyi na càda cahnu iní-ndó ñ<sup>n</sup> sã quidě-yu, te tnàhá yúhú cada càhnu iní-í sã quidě-yu tucu. Te núu lò ñ<sup>n</sup> sã xini ñũhu-xi cada cahnu iní-í te quide cahnu iní-í, te mee Xítóhó Jesucristú náhá-gã sã dúcá<sup>n</sup> quide-í, te duca<sup>n</sup> quide-í cuendá sã nchòhó cuu-xi sã vãha xii-ndo.

11 Te duca<sup>n</sup> te sácúhna vá nihí-xi ná cada ñaha-xi xii-o, chi nchoo sã xini-ó nàcuáa quide-xi.

### *Té Pãblú ndìhú iní-dé ndécú-dě ñuú Tròás*

12 Te ní xica-í cuáhá<sup>n</sup>-í ñuú Tròás cuendá yacá<sup>n</sup> càhá<sup>n</sup>-í tnũhu sã càhá<sup>n</sup> nàcuáa naníhí tàhú-ó tnũhu Xítóhó Jesucristú, te òré ní quexi-í te ní níhí-í ñ<sup>n</sup> ichi càhnu càhá<sup>n</sup>-í tnũhu-gá.

13 Dico ñá túú ní cùu váha iní-í chi ñá túú ní naníhí-í té Titú té ndècu ndìhí-o ichi Xítóhó Jesucristú, núu xiã<sup>n</sup> ní quide ndee ìní tnáhà-í ndìhí cue ñáyi ñuú-á<sup>n</sup>, te ní xica-í cuáhá<sup>n</sup>-í distritú Macèdoniá.

### *Dàquetihú-ó yùcu ñávãha chi ndècu ndìhí-o Xítóhó Jesucristú*

14 Te táxãhu xii Yá Ndiõxí chi duca<sup>n</sup>-ni sãnu ichi ñaha-gá xii-ndí nàcuáa cunuu-ndí núu yucu ñávãha chi ndècu ndìhí-ndí Xítóhó Jesucristú, te mee Yá Ndiõxí sáchiu<sup>n</sup> ñaha-gá xii-ndí càhá<sup>n</sup>-ndí tnũhu-gá. Te cada iní-ó sã tnũhu-gá-á<sup>n</sup> cúú-xí dàtná ñ<sup>n</sup> yúcu sã ìo váha sãhá<sup>n</sup> te ta xiténuu dicó-xi ndèni ní cuu cuáhá<sup>n</sup>. Te duca<sup>n</sup> sãtnahá-xi cùu tnũhu-gá chi nchúhú quidè-ndí nàcuáa ta xiténuu ndèni ní cuu cuáhá<sup>n</sup>.

15 Te cùu-ndí dàtná dicó ñ<sup>n</sup> yúcu sã ìo váha sãhá<sup>n</sup>, te nàcani cuendá Xítóhó Jesucristú núu Yá Ndiõxí, te dicó yúcu-ã<sup>n</sup> nchítá cuèi núu xíndecu cue ñáyi sa ní naníhí tàhú, te cuèi núu xíndecu cue ñáyi ta xita nihnu cuáhá<sup>n</sup>.

16 Te sã cúú-xí cuè ñáyi ta xita nihnu cuáhá<sup>n</sup>-á<sup>n</sup>, dicó yúcu-ã<sup>n</sup> cúú-xí dàtná ñ<sup>n</sup> sã sáhní ñaha xii-yu, dico sã cúú-xí cuè ñáyi sa ní naníhí tàhú, dicó yúcu-ã<sup>n</sup> cúú-xí dàtná ñ<sup>n</sup> sã ndécá ìní-yu, duca<sup>n</sup> sãtnahá-xi cùu nchúhú. Te vitna chí cuãha cuendá nõu ná cúú ñáyi sãni iní-ndó ndàcu cada nacuaá nduú tnũhu càhá<sup>n</sup>-í-a.

17 Chi nchúhú càhá<sup>n</sup>-ndí tnũhu Yá Ndiõxí dico ñá túú ndàhú quidè-ndí ndìhí tnũhu-gá dàtná xíquide dava-gá-güedé, chi quide ndáá-ndí càhá<sup>n</sup>-ndí tnũhu-gá, te mee-gã ní cachí-gá sã dúcá<sup>n</sup> càda-ndí te ndèhe-gá sã nchúhú quidè-ndí nàcuáa ní cachí-gá, chi ndècu ndìhí-ndí Xítóhó Jesucristú.

## 3

### *Cuendá ingá núú sã vãha ní cachí Yá Ndiõxí cada-gá ñáyi*

1 Te cuèi duha càhá<sup>n</sup>-ndí núú-ndó dico ñá túú xini ñũhu-xi sã cũñaha-ndí xii-ndo sã cúú-ndí cue téé quide váha, te ni ñá túú xini ñũhu-xi cacanehe-ndí ñ<sup>n</sup> tutú núu càhá<sup>n</sup>-xi sã cúú-ndí cue téé váha danèhé ñáhá xii-ndo dàtná xíquide dava-gá-güedé, te ni ñá túú xini ñũhu-xi sã nchòhó taxi-ndo ñ<sup>n</sup> tutú núu càhá<sup>n</sup>-ndó sã nchúhú cúú-ndí cue téé quide váha.

2 Te ñá túú xini ñũhu-xi duca<sup>n</sup> cada-ndí. Te cùnuni ndáá iní-ndí sã nchòhó cúú-ndó dàtná ñ<sup>n</sup> tutú sã ìo váha càhá<sup>n</sup> cuendá-ndí. Te duca<sup>n</sup> sãtnahá-xi cùu-ndo chi nchaa ñáyi nihí-yu tnũhu nàcuáa quide-ndo ndecu-ndo, te xiã<sup>n</sup> cùnuni iní-yu sã nchúhú cúú-ndí cue téé quide váha.

3 Te nchòhó cúú-ndó cuendá Xítóhó Jesucristú, te cùu-ndo dàtná tutú-gá te tutú-á<sup>n</sup> ní táuchíu<sup>n</sup>-gã xii-ndí ní cadúha-ndí, te mee-ni ndìhí Espiritú Yá Ndiõxí ní ngúndeé tnũhu-á<sup>n</sup> te ñá

díú ndíhi tindá ní ngúndeé. Te ñá díú ñ<sup>n</sup> núú yúú ní ngúndeé chi iní-ndó cùu-xi núú dúcá<sup>n</sup> ní ngúndeé tnúhu-á<sup>n</sup> te duca<sup>n</sup> sãtnahá-xi cùu-ndo.

4 Te duha càhá<sup>n</sup>-ndí chi cùtnuní ndáá iní-ndí sá Yá Ndiõxí quidé vaha ñaha-gã xii-ndí, chi ndècu ndíhi-ndí Xítóhó Jesucristú.

5 Te nchúhú chi ndàcu-ndí quidé-ndí sá vaha dico ñá díú mèe-ndí duca<sup>n</sup> ndàcu-ndí quidé-ndí, chi mee Yá Ndiõxí chíndèe ñaha-gá xii-ndí nùu ndàcu-ndí quidé-ndí sá vaha.

6 Te mee Yá Ndiõxí ní quide-gá sá nchúhú ndacu-ndí cunu cuechi-ndí núú-gã cáhá<sup>n</sup>-ndí núú ñáyiu cuendá ingá núú sã vaha ní cachí-gá cada ñaha-gã xii-yu. Te sá vaha ní cachí-gá cada ñaha-gã xii-yu-á<sup>n</sup> ñà túú ñ<sup>n</sup>-ni cuu-xi ndíhi nchaa tnúhu sá ñí xáha<sup>n</sup>-gã xii ndíi Moisés ní chídó tnùní ndíi, te duca<sup>n</sup> chi espíritú Yá Ndiõxí néhé chiú<sup>n</sup>-xi nchaa tnúhu sá càhá<sup>n</sup> cuendá nchaa sá vaha-á<sup>n</sup>. Te nchaa tnúhu ní chídó tnùní ndíi Moisés, dándixi túu-xi iní nchaa ñáyiu ndècu ndíhi tnúhu-á<sup>n</sup> sã cuíta nihnú-yu cuendá nchaa cuéchi-yu, dico cue ñáyiu ndècu ndíhi Espíritú Yá Ndiõxí ñáyiu-á<sup>n</sup> ndécú ndíhi-yu tnúhu ndee iní sá cãcu nihnú-yu.

7 Te tnúhu sá ñí cáhá<sup>n</sup> Yá Ndiõxí ndéé díhna nàcuáa cada ñáyiu ní ngúndeé-xi ñ<sup>n</sup> núú yúú quèhé<sup>n</sup>. Te òré ní dátúu ndíi Moisés nàcuáa càhá<sup>n</sup> tnúhu sá ñí cáhá<sup>n</sup> Yá Ndiõxí ndéé núú yúú-á<sup>n</sup> núú cue ñáyiu isràél, te súúni ñí tása<sup>n</sup> núú ndíi te ñá túú-gã ní cùu cundehé-yu núú ndíi, te duca<sup>n</sup>-gã duca<sup>n</sup>-gã quidé-xí dátása<sup>n</sup>-xi núú ndíi ni cùu ñá túú-gã duca<sup>n</sup> ni quide-xi. Te tnúhu ndéé núú yúú-á<sup>n</sup> dándixi túu-xi iní cue ñáyiu sá cuíta nihnú-yu sá cuendá nchaa cuéchi-yu, te ío vaha ní quide-xi cùtnahá ní ngúndecu ndíhi cue ñáyiu isràél tnúhu-á<sup>n</sup>.

8 Te sá dúcá<sup>n</sup> ñí quide-xi xiá<sup>n</sup> cùtnùní sá tnúhu càhá<sup>n</sup> Espíritú Yá Ndiõxí vitna uu<sup>n</sup>-gá duca<sup>n</sup> ño-gá vaha quide-xi.

9 Te núu duca<sup>n</sup> ño vaha ní quide-xi

cùtnahá ní ngúndecu ndíhi cue ñáyiu isràél tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uu<sup>n</sup>-gá duca<sup>n</sup> vaha quide-xi vitna ní ngúndecu ndíhi-o tnúhu sá càhá<sup>n</sup> nàcuáa quide Yá Ndiõxí cuendá sá vã cùndecu-gá cuéchi ñáyiu núú-gã.

10 Te vá càchí-ó sã cùtnahá ní ngúndecu ndíhi cue ñáyiu isràél tnúhu ndéé núú yúú-á<sup>n</sup> ño-gá vaha ní quide-xi, te ñáhá chi uu<sup>n</sup>-gá vaha quide-xi vitna cuendá tnúhu sá càhá<sup>n</sup> nàcuáa quide Yá Ndiõxí.

11 Te núu duca<sup>n</sup> ño vaha ní quide-xi cùtnahá ní ngúndecu ndíhi ñáyiu isràél tnúhu sá ñà túú ní cùdíi, te uu<sup>n</sup>-gá duca<sup>n</sup> ño vaha quide-xi vitna ní ngúndecu ndíhi-o tnúhu sá vã ndíhi ñihnu tnahí-gá.

12 Te cùtnuní iní-ndí sá vã ndíhi ñihnu sá dúcá<sup>n</sup> ño vaha quide-xi, núu xiá<sup>n</sup> ío vii ío vaha cùu iní-ndí càhá<sup>n</sup>-ndí tnúhu sá ñí ngúndecu ndíhi-o.

13 Te ñá túú quide-ndí dàtná ní xóo cada ndíi Moisés, chi ndíi-á<sup>n</sup> ñí xóo dàdáhu ndíi núú ndíi òré dátása<sup>n</sup>-xi núú ndíi cuendá sá vã quini cue ñáyiu isràél òré ñá túú-gã dátása<sup>n</sup>-xi núú ndíi.

14 Te cue ñáyiu isràél ñá túú ní tècú tnùní vaha-yu nàcuáa ní xóo danèhé ñáhá ndíi Moisés xii-yu, te cuéi ndéé vitna ñá túú tècú tnùní-yu òré dácuahá-yu tnúhu sá ñí cáhá<sup>n</sup> Yá Ndiõxí ndéé díhna nàcuáa cada-gá, te cada iní-ó sã dàtná sá ñí xidáhu núú ndíi Moisés yidáhu núú-yu cuendá sá vã cùtnùní núú-yu cundehé-yu te tecú tnùní-yu, dico núu tnahá tnúhu-yu ndíhi Xítóhó Jesucristú te tecú tnùní-yu.

15 Te cuéi ndéé vitna òré dácuahá-yu nchaa tnúhu sá ñí chídó tnùní ndíi Moisés nchaa núú tütú ndíi, te cada iní-ó sã dàtná sá ñí xidáhu núú ndíi yidáhu núú-yu chi ñá túú tècú tnùní-yu.

16 Dico cue ñáyiu na tùha ñaha xii Xítóhó Jesucristú te tècú tnùní-yu tnúhu-gá.

17 Te Xítóhó Jesucristú ñ<sup>n</sup>-ni cùu-gá



ndihi Espiritú Yă Ndiöxí, te nchaa ñáyi ndècu ndihi Espiritú-gá ñá túú-gă táxi tnùnì ñáhá nì ì<sup>n</sup> sá ñà túú vâha xií-yu.

18 Te dàtná cúú ì<sup>n</sup> yutátá sã dánèhé núú ñáhá-xí xii ñáyi ì<sup>n</sup> sá vâha, duca<sup>n</sup> sãtnahá-xi cùu-o chi quide-o nacuaá cáhá<sup>n</sup> ñáyi sá ïo càhnu cuu Xítóhó Jesucristú, te duca<sup>n</sup> ùu<sup>n</sup>-gá uu<sup>n</sup>-gá tá cundáá-ó ndècu-o ichi-gá dàtná quidé mèe-gá quidé ndáá-gá. Te Espiritú-gá quidé-xí dùca<sup>n</sup> ta cundáá-ó núú-gă cuáhá<sup>n</sup>.

#### 4

1 Te mee Yă Ndiöxí ní cundàhú iní ñáhá-gă xii-ndí ní taxi-gá chi<sup>n</sup> quide-ndí càhá<sup>n</sup>-ndí tnúhu-gá, núu xí<sup>n</sup> ñá túú tnàhí nàtúhú iní-ndí càhá<sup>n</sup>-ndí tnúhu-gá.

2 Te nchúhú dàquee tíhú-ndí nchaandi túhú sá ñà túú vâha quide dayuhu ñáyi, chi nchaa xí<sup>n</sup> cúú-xí ì<sup>n</sup> sácá<sup>n</sup> núú sã cúú-xí-yu, te nchúhú ñá túú sàni iní-ndí dandàhú-ndí ñáyi te ni ñá túú sàni iní-ndí dama-ndí nacuaá cáhá<sup>n</sup> tnúhu Yă Ndiöxí, chi càhá<sup>n</sup> ndáá-ndí nacuaá tàú-xi cáhá<sup>n</sup>-ndí, te mee Yă Ndiöxí náhá-gă nacuaá ndùu tnúhu càhá<sup>n</sup>-ndí núú ñáyi, te ñáyi-á<sup>n</sup> cùnùnì iní-yu sá nchúhú càhá<sup>n</sup> vâha-ndí.

3 Te cue ñáyi ñá túú tècú tnùnì nacuaá ndùu tnúhu sá càhá<sup>n</sup> nacuaá naníhí tàhú-ó càhá<sup>n</sup>-ndí núú-yu, ñáyi-á<sup>n</sup> cúú-yu ñáyi ta xíta nihnu cuáhá<sup>n</sup>.

4 Te cue ñáyi-á<sup>n</sup> cúú-yu ñáyi ïo sáá iní-xi chi ñá túú cuiní-yu quíndáá iní-yu tnúhu Xítóhó Jesucristú, te xí<sup>n</sup> núu sácúhna cùnùu-xi núú-yu te nihí-xi nacuaá quide-xi dadáhu ndodo iní ñáhá-xí xii-yu cuendá sá vã tècú tnùnì-yu tnúhu sá càhá<sup>n</sup> nacuaá naníhí tàhú-yu, te tnúhu-á<sup>n</sup> cúú-xí tnúhu sá ïo vâha chi càhá<sup>n</sup>-xi sá ïo càhnu cuu Xítóhó Jesucristú, te cùu-gá dàtná mèe Tãtã-gă Dútú Ndiöxí.

5 Te nchúhú ñá túú càhá<sup>n</sup>-ndí cuendá sá cúú-xí mèe-ndí núú-ndó

chi càhá<sup>n</sup>-ndí cuendá Xítóhó Jesucristú, te càhí-ndí xii-ndo sã díú-gă cúú-gă Yaá ïo cùnùu, te càhí-ndí xii-ndo sã mèe-ndí cúú-ndí dícó-ni cue téé xinu cuechi sá cúú-xí-ndó, te duca<sup>n</sup> quide-ndí nacuaá cuu vii cuu vâha iní Xítóhó Jesucristú.

6 Te Yă Ndiöxí Yaá ní dáyèhé ndéé cúnahá nee ñuyú ní cùu, Yaá-á<sup>n</sup> ñí cachí-gá sá Xítóhó Jesucristú cada-gá nacuaá tecú tnùnì-ó sã ïo càhnu cuu mee Yă Ndiöxí. Te sá dúcá<sup>n</sup> ñí quide-gá te cada iní-ó sã dàtná tnúhu sá ñí dáyèhé-gá iní-ó.

#### *Ío quíndáá iní-ó Yă Ndiöxí*

7 Te nchúhú ndécú ndihi-ndí tnúhu Xítóhó Jesucristú, te tnúhu-gá cúú-xí dàtná ì<sup>n</sup> sá ïo vâha ñùhu ì<sup>n</sup> xití quídi ñuhu, te nchúhú cúú-ndí dàtná quídi-á<sup>n</sup>. Te duca<sup>n</sup> sãtnahá-xi cùu-ndí chi tnúhu-gá ïo càhnu cuu-xi te mee-ndí ñáhá, te duca<sup>n</sup> cùu nacuaá cutnùnì sá mèe Yă Ndiöxí quidé-gă nchaa sá vâha te ñá díú mèe-ndí.

8 Te cuéi ïo ndòho-ndí ndécú-ndí dico nihí-ndí nacuaá quide-ndí tá yâha-ndí nchaa tnúndòho-á<sup>n</sup> cuáhá<sup>n</sup>, cuéi áma sa ndètu víi-ñã quehndé iní-ndí sá vã ndácú-ndí yâha-ndí nchaa tnúndòho-á<sup>n</sup>, dico ndàcu-ndí yâha-ndí.

9 Te cuéi nànducu ñaha ñáyi cuiní-yu ná cada ñáhá-yu xii-ndí dico ñá túú dàña ñaha Yă Ndiöxí xii-ndí, te cuéi cànihá-yu xii-ndí dico cãcu-ndí ñá túú sàhni ñahá-yu.

10 Te ndëni ní cuu cuáhá<sup>n</sup>-ndí xícá cùu-ndí, te cãcu cãcu cahni ñáhá-yu xii-ndí dàtná ní quidé-yu Xítóhó Jesucristú, te duca<sup>n</sup> yâha-ndí cuendá cutnùnì sá ndécú tũu Xítóhó Jesucristú andi<sup>n</sup> te chindee ñaha-gă xii-ndí.

11 Te nchúhú nini ndècu-ndí ñuyú-a te nchaa-ni nduu cãcu cãcu cahni ñaha ñáyi xii-ndí sá cuendá Xítóhó Jesucristú, te duca<sup>n</sup> yâha-ndí ndécú-ndí cuendá cutnùnì sá Xítóhó Jesucristú

ndécú ndìhi ñaha-gá xii-ndí cuèi vá cúdii yiqui cùñú-ndí cundecu-xi.

12 Te sá dúcá<sup>n</sup> cācu cācu cahni ñaha ñāyiu xii-ndí xiǎ<sup>n</sup> nchòhó uu<sup>n</sup>-gá tá nihí ndéé-ndó cuáhá<sup>n</sup> ndécú-ndó ichi Xítóhó Jesucristú.

13 Te ì<sup>n</sup> téé ní xíndecu ndéé sanaha nǐ chídó tnùnì-dé núú tütú Yǎ Ndiǒxí núú cāchí-xi: “Yúhú ní sándáá iní-í Yǎ Ndiǒxí núu xiǎ<sup>n</sup> ní cáhá<sup>n</sup>-í”, duha ní cachí téé-á<sup>n</sup>. Te dàtná-ni ní sani iní téé-á<sup>n</sup> nǐ cáhá<sup>n</sup>-dé te ñu-ni duca<sup>n</sup> sàni iní nchúhú tucu núu xiǎ<sup>n</sup> cāchí-ndí: “Sándáá iní-ndí Yǎ Ndiǒxí núu xiǎ<sup>n</sup> cáhá<sup>n</sup>-ndí”, duha cāchí-ndí.

14 Te cùtnuní iní-ndí sá núu na cùú-ndí te Yǎ Ndiǒxí dandòto ñaha-gá xii-ndí dàtná ní dándótó-gǎ Xítóhó Jesucristú, te tnàhá nchòhó duca<sup>n</sup> càda ñaha-gá xii-ndo, te dàvá-á<sup>n</sup> candeca ñaha-gǎ xii-o quíhí<sup>n</sup> nucúndecu-o núú-gǎ.

15 Te nchúhú nándi cùu sá tá yǎha-ndí véxi cuendá nchòhó ngúndecu váha-ndo, te duca<sup>n</sup> cùita cāyá-gá ñāyiu ngúndecu váha sá xíi Yǎ Ndiǒxí, te ñu-ni duca<sup>n</sup> cùita cuu vai-gá ñāyiu ndacá<sup>n</sup> táhú-yu núú-gǎ te cachí-yu sá ño cāhnu cuu-gá.

16 Te xiǎ<sup>n</sup> núu nchúhú ñá túú tnàhí nàtúhú iní-ndí ndécú-ndí ichi Xítóhó Jesucristú, te cuèi yiqui cùñú-ndí tá xàú-xi cuáhá<sup>n</sup> dico iní-ndí chi uu<sup>n</sup>-gá uu<sup>n</sup>-gá tá nihí ndéé-xí cuáhá<sup>n</sup>.

17 Te nchaa sá ndóhó-ndí ñuyíú-a ñá túú cāchí-ndí sá cùú-xí ì<sup>n</sup> tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yǎ Ndiǒxí ío váha cada ñaha-gǎ xii-ndí nduu na sàá-ndí núú ndécú-gǎ, te ñu-ni duca<sup>n</sup> càda ñaha-gá xii-ndí nǐ caa nǐ quíhí<sup>n</sup>.

18 Te nchúhú ñá túú nchìcú<sup>n</sup> nihnu-ndí sá tǔu ndèhe-ndí ío ñuyíú-a, chi nchìcú<sup>n</sup> nihnu-ndí sá vátá quínì-gá-ndí ndécú àndiú, te duca<sup>n</sup> quède-ndí chi nchaa sá tǔu ndèhe-ndí ío ñuyíú-a vá cúdii-xi cundecu-xi, te nchaa sá ñá túú tǔu ndècu andiú xiǎ<sup>n</sup> cudíi-xi cundecu-xi nǐ caa nǐ quíhí<sup>n</sup>.

## 5

1 Te yiqui cùñú-ó cùu-xi datná ì<sup>n</sup> vehe, te vehe-á<sup>n</sup> ñá túú cùdíi-xi, te duca<sup>n</sup> sǎtnahá-xi cùu yiqui cùñú-ó chi vá cúdii-xi, te na sàá nduu vǎ cùndècu-gá-ó ndìhi yiqui cùñú-ó, te Yǎ Ndiǒxí taxi-gá ì<sup>n</sup> yiqui cùñú sáá sá cùú-xí-ó, te xiǎ<sup>n</sup> cùú-xí dàtná ì<sup>n</sup> vehe sá ñá túú ní càdúha cue ñāyiu ñuyíú-a, chi mee Yǎ Ndiǒxí ní cadúha-gá vehe-á<sup>n</sup> te vehe-á<sup>n</sup> cudíi-xi cundecu-xi nǐ caa nǐ quíhí<sup>n</sup> andiú. Te duca<sup>n</sup> sǎtnahá-xi cùu yiqui cùñú sá táxi Yǎ Ndiǒxí xii-o chi cudíi-xi cundecu-xi nǐ caa nǐ quíhí<sup>n</sup>.

2 Te nchúhú ndècu ndìhi-gá-ndí yiqui cùñú-ndí sá ndécú ndìhi-ndí vitna te sama cuínì-ndí sá ño ndìhi taxi Yǎ Ndiǒxí yiqui cùñú sáá cùndecu ndìhi-ndí.

3 Chi mee-gǎ vá dáñá-gǎ sá dúcá<sup>n</sup>-ní cùnduu-ndí cundecu-ndí, chi dai taxi-gá yiqui cùñú sáá-á<sup>n</sup> xii-ndí.

4 Te nini ndècu-ndí ndìhi yiqui cùñú-ndí vitna ío sàni iní-ndí te ndìhú iní-ndí, dico ñá díú sá dúhá quède-ndí te ñá túú-gǎ tnàhá iní-ndí cundecu-ndí ndìhi yiqui cùñú-ndí, chi cuínì-ndí sá Yǎ Ndiǒxí ío ndìhi taxi-gá yiqui cùñú sáá nduu táhú-ndí, chi xiǎ<sup>n</sup> cudíi-xi nǐ caa nǐ quíhí<sup>n</sup> te yiqui cùñú-ndí sá tá ndìhi nihnu cuáhá<sup>n</sup>-a vá cúdii-xi cundecu-xi.

5 Te duca<sup>n</sup> tnàhí ní cachí Yǎ Ndiǒxí cunduu sá dúcá<sup>n</sup> nduu táhú-ó yiqui cùñú sáá-á<sup>n</sup>, te ní taxi-gá Espiritú-gá ní ngúndecu ndìhi-o cuendá cutnùnì iní-ó sá ndàá taxi-gá yiqui cùñú sáá-á<sup>n</sup> nduu táhú-ó.

6 Te xiǎ<sup>n</sup> núu nchúhú nihí ndéé-ndí ndécú-ndí, te cùtnuní iní-ndí sá nini ndècu-ndí ndìhi yiqui cùñú-ndí sá ndécú ndìhi-ndí vitna te vátá sàá-gá-ndí cundecu-ndí mei núú ndécú Xítóhó Jesucristú.

7 Te duca<sup>n</sup> cùtnuní iní-ndí chi sándáá iní-ndí Yǎ Ndiǒxí ndécú-ndí ñuyíú-a cuèi ñá túú xìnì-ndí-gá.

8 Te ío váha cùu iní-ndí ndécú-ndí, te sàni iní-ndí sá váha-gá sá núu vá

cúndècu-gá-ndí ndìhi yiqui cùñú-ndí sá ndécú ndìhi-ndí vitna. Te duca<sup>n</sup> sàni iní-ndí chi váha-gá cundecu-ndí mei núú ndécú Xítohó Jesucristú.

9 Te ío ndùcu ndee-ndí quidé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíú-a, te diu-ni duca<sup>n</sup> càda-ndí cuèi òré vá cúndècu-gá-ndí.

10 Te dacuitíi sã ncháá-ó cùndecu-o núú Xítohó Jesucristú ì<sup>n</sup> nduu, te dává-á<sup>n</sup> mee-gã cáhá<sup>n</sup>-gá te núú nása ndùu chiu<sup>n</sup> ní quide-o ì<sup>n</sup> ì<sup>n</sup>-o, núú ní quide váha-o àdi ñá túú ní quide váha-o, te nàcuáa ndùu chiu<sup>n</sup> ní quide-o ì<sup>n</sup> ì<sup>n</sup>-o te duca<sup>n</sup> ndùu sá táxi-gã nduu táhú-ó.

*Nàcuáa ní cuu ní ngúndecu váha-o ndìhi Yá Ndiõxí*

11 Te nchúhú quíyùhú iní-ndí nàcuáa cada Xítohó Jesucristú, núú xiã<sup>n</sup> càhá<sup>n</sup>-ndí tnúhu-gá núú ñáyiú cuèndá xínu iní-yu tuha ñàhá-yu xii-gá. Te mee Yá Ndiõxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí.

12 Te sá dúhá càhá<sup>n</sup>-ndí te vá cání iní-ndó sã nchúhú càhá<sup>n</sup> váha-ndí cuèndá-ndí nàcuáa nchòhó cuu váha iní ñàhá-gã-ndó xii-ndí te ñàhá, chi duha càhá<sup>n</sup>-ndí cuèndá sá nchòhó níhí-ndó tnúhu cáhá<sup>n</sup> váha-gã-ndó cuèndá-ndí núú ñáyiú. Te duca<sup>n</sup> níhí-ndó tnúhu cúñaha-ndo xii cue ñáyiú quide nínu mee-xi, chi cue ñáyiú-á<sup>n</sup> ñà túú quide cuèndá-yu nása ndècu iní-yu.

13 Te núú nchòhó sání iní-ndó sã lúcú-ndí cuèndá nàcuáa quide-ndí ndécú-ndí te cùu-xi cuèndá Yá Ndiõxí, àdi núú sàni iní-ndó sã ñà túú lúcú-ndí cuèndá nàcuáa quide-ndí ndécú-ndí te cùu-xi sá váha sá cúú-xí-ndó.

14 Te quide-ndí nàcuáa cuení Xítohó Jesucristú chi cùtnuní iní-ndí sá ío cùu iní-gá nchaa ñáyiú, te duca<sup>n</sup> xíní ndáá-ndí sá ñí xíhí-gá cuèndá ncháá-yu, te xiã<sup>n</sup> núu cada iní-ó sã

dàtná tnúhu sá ncháá ñáyiú ní xíhí-yu ndìhi-gá.

15 Te duca<sup>n</sup> ñí xíhí Xítohó Jesucristú cuèndá nchaa ñáyiú chi cuení-gá sá ncháá-yu cundécú-yu cadá-yu nàcuáa cuení méé-gã te vá cadá-yu nàcuáa cuení méé-yu, chi mee-gã ní xíhí-gá te ní ndoto-gá cuèndá cuu-xi sá váha sá cúú-xí-yu.

16 Te xiã<sup>n</sup> núu nchúhú ñá túú-gã ná sání iní-ndí cuèndá tnàha ñáyiú-ndí núu nàndíhi-yu àdi ñá túú nàndíhi-yu dàtná ní xóo caní iní-ndí cùtnàhá ní xíndecu-ndí ichi cuèhé ichi duha, te dává-á<sup>n</sup> ñí xóo caní iní-ndí cuèndá Xítohó Jesucristú dàtná sání iní cue ñáyiú ndècu ichi cuehé ichi duha vitna.

17 Te nchaa nchoo ñáyiú ní tnahá tnúhu ndìhi Xítohó Jesucristú ní nduu-o dàtná ì<sup>n</sup> ñáyiú saa, te duca<sup>n</sup> chi ñá túú-gã quidé-ó dàtná ní xóo cada-o cùtnàhá ní xíndecu-o ichi cuehé ichi duha, chi ní ngúita-o quide-o mee-ná sá váha te nchaa xiã<sup>n</sup> cúú-xí sã sáá sã cúú-xí-ó chi vátá quení-gá-ó càda-o.

18 Te duca<sup>n</sup> quide-o ndecu-o chi mee Yá Ndiõxí quidé-gã sá dúcá<sup>n</sup> càda-o cundecu-o. Te Xítohó Jesucristú ní quide-gá ní ngúndecu váha-o ndìhi Yá Ndiõxí vitna, te duca<sup>n</sup> chi mee Yá Ndiõxí duca<sup>n</sup> tnàhí ní cachí-gá cunduu, te diu-ni mee Yá Ndiõxí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá nàcuáa ngúndecu váha cue ñáyiú ndìhi-gá.

19 Te duca<sup>n</sup> chi mee-gã ní cachí-gá sá Xítohó Jesucristú cada-gá nàcuáa nucúndecu váha nchaa nchoo cue ñáyiú ndècu ñuyíú-a ndìhi Yá Ndiõxí. Te nchaa ñáyiú ní tuha ñaha xii-gá ñá túú-gã sání iní-gá sá ñáyiú-á<sup>n</sup> nacháhu-yu cuéchi-yu núú-gã. Te mee Yá Ndiõxí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá núú ñáyiú nàcuáa ngúndecu ndìhi ñaha váha-yu xii-gá.

20 Te Xítohó Jesucristú ní cachí-gá sá nchúhú cáhá<sup>n</sup>-ndí tnúhu-gá núú nchaa ñáyiú, te sá dúhá quide-ndí

càhá<sup>n</sup>-ndí tnúhu-gá te quide-ndí núú Yá Ndiöxí càhá<sup>n</sup>-ndí yuhu-gá, te xiã<sup>n</sup> nũu càhá<sup>n</sup> ndàhú-ndí núú-ndó sã tnàhá tnúhu-ndo ndìhi Yá Ndiöxí cuendá cundecu váha-ndo ndìhi-gá, te duha càhá<sup>n</sup>-ndí chi duca<sup>n</sup> càchí Xítóhó Jesucristú cada-ndí.

<sup>21</sup> Te Xítóhó Jesucristú cúú-gã Yaa ñá túú tnàhí cuéchi-xi, dico Yá Ndiöxí ní quide ñaha-gã xii-gá dàtná ì<sup>n</sup> ñáyiú ndècu cuéchi-xi, te duca<sup>n</sup> chi Xítóhó Jesucristú ní xido-gá cuéchi nchaa nchoo ñáyiú ñuyíú-a, te duca<sup>n</sup> ñi xido Xítóhó Jesucristú nchaa cuéchi-o cuendá sá nũu na tnàhá tnúhu-ndo ndìhi-gá te cudíu-o núú Yá Ndiöxí, te duca<sup>n</sup> ñi cuu chi mee Yá Ndiöxí duca<sup>n</sup> ñi cachí-gá cunduu.

## 6

<sup>1</sup> Te nchoo ì<sup>n</sup>-ni cùu-o quide chiu<sup>n</sup>-o cuendá Yá Ndiöxí nũu xiã<sup>n</sup> càhá<sup>n</sup> ndàhú-ndí núú-ndó sã vã dícó-ni duca<sup>n</sup> cùndedóho-ndo tnúhu Yá Ndiöxí, chi cada-ndo nàcuáa na chindee ñaha-ni-gá.

<sup>2</sup> Chi mee-gã càchí-gá ì<sup>n</sup> xichi núú tütú-gá núú càchí-xi:

Sáa nduu te cundàhú iní ñàhà-í xii-ndo chindee ñaha-í cuendá naníhí tãhú-ndó,

te ní sáa nduu tàú-xi sá cundàhú iní ñàhà-í xii-ndo chindee ñaha-í cuendá naníhí tãhú-ndó, núú xiã<sup>n</sup> ní xíndedóho-í tnúhu ní càhá<sup>n</sup>-ndó te ní chindee ñaha-í xii-ndo nàcuáa naníhí tãhú-ndó.

Duha càchí-gá núú tütú-gá. Te vitna cùu-xi nduu cundahú iní ñàhà Yá Ndiöxí chindèe ñaha-gá, te cùu-xi nduu naníhí tãhú-ó.

<sup>3</sup> Te nchúhú ñá túú quide-ndí ì<sup>n</sup> sá ñà túú tàú-ndí cada-ndí sá cúú-xi ñáyiú, chi cuìní-ndí sá vã càhá<sup>n</sup> cuèhé-yu cuendá chiu<sup>n</sup> quide-ndí.

<sup>4</sup> Te nchaa sá quidé-ndí cúú-xi nàcuáa cutnùní iní cue ñáyiú sá nchúhú xínú cuéchi-ndí núú Yá Ndiöxí, te ío quide cahnu iní-ndí cuendá nchaa sá ndóhó-ndí, chi nándí quide ñaha ñáyiú xii-ndí, te duca<sup>n</sup>-ni

ta quide cahnu iní-ndí cuèi nándí-gá nchaa sá tá yãha-ndí véxi.

<sup>5</sup> Te duha ta yãha-ndí véxi, núú cànha ñáyiú xii-ndí, núú chíhí ñàhá-yu vecaá, núú cuàá ndeé ñàhá ñáyiú xii-ndí xícuèhé ñàhã-yu, te ío ndòho-ndí quidé-ndí chiu<sup>n</sup> Yá Ndiöxí, te áma xidí-ndí te áma ñá túú xidí-ndí, te áma ñihí-ndí sá xéxi-ndí te áma ñá túú ñihí-ndí.

<sup>6</sup> Te quide ndáá-ndí ndécú-ndí, te cùtnuní váha iní-ndí nàcuáa càhá<sup>n</sup> tnúhu Yá Ndiöxí, te quide cahnu iní-ndí cuèi nándí quide ñaha ñáyiú xii-ndí, te cundahú iní-ndí tnàha ñáyiú-ndí, te quide-ndí nchaa sá váha nàcuáa chindee ñaha Espíritú Yá Ndiöxí xii-ndí, te ío ndisa iní-ndí cúú iní-ndí cue tnàha ñáyiú-ndí.

<sup>7</sup> Te dànehé-ndí ñáyiú mee-ni tnúhu ndáá, te nchaa chiu<sup>n</sup> quide-ndí te quide-ndí nàcuáa chindee ñaha Yá Ndiöxí xii-ndí, te cuendá sá quidé ndáá-ndí ndécú-ndí nũu xiã<sup>n</sup> ñihí ndeé-ndí dáquèe tihú-ndí nchaa sá cuèhé sá dúhá.

<sup>8</sup> Te dava ñáyiú quide nínu ñàhá-yu xii-ndí, te davá-yu tnúhu cuèhé tnúhu duha càhá<sup>n</sup>-yu xãhã<sup>n</sup>-yu xii-ndí, te davá-yu xicáhã<sup>n</sup> váha-yu cuendá-ndí te davá-yu xicáhã<sup>n</sup> cuèhé-yu, te davá-yu càchí-yu sá dándàhú-ndí ñáyiú dico ñá ndáá chi càhá<sup>n</sup> ndáá-ndí.

<sup>9</sup> Te davá-yu càchí-yu sá ñà túú xíní-yu ná ñáyiú cùu-ndí, te davá-yu càchí-yu sá xíní-yu yoo cùu-ndí, te davá-yu cuìní-yu cahni ñàhá-yu xii-ndí dico vátá cáhni ñaha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñá túú cùu-xi sá cùu-ndí.

<sup>10</sup> Te cuèi ndìhú iní-ndí dico ñá túú dàña ndeé-ndí sá cúdí iní-ndí, te cùu-ndí cue téé ndàhú dico sànu ichi-ndí vãi ñáyiú ichi Yá Ndiöxí cuendá ngúndecu váha-yu sá

cuendá-gá, te cuèi ñá túú ñă ndécú ndìhi-ndí dico ñá túú ñă cúmăní xii-ndí.

11 Te nchòhó ñáiyu ndècu ndìhi-í ichi Xítohó Jesucrìstú ndécú ñúú Còrintú ío cùu iní ñáhá-ndí xii-ndo, te ni yùhu ni iní-ndí càhá<sup>n</sup>-ndí nchaa tnúhu càhá<sup>n</sup>-ndí sá cúú-xí-ndó.

12 Te nchúhú chi ni yùhu ni iní-ndí cúú iní ñáhá-ndí xii-ndo, dico nchòhó chi ñá túú òuca<sup>n</sup> quide-ndo sá cúú-xí-ndí.

13 Te yúhú càhá<sup>n</sup> ndàhú-í núú-ndó dàtná quidé ì<sup>n</sup> tée cùu tátá òré càhá<sup>n</sup> ndìhi-dé cue déhe-dé sá ni yuhu ni iní-ndó cùu iní ñáhá-ndó xii-ndí dàtná quidé mèe-ndí cúú iní ñáhá-ndí xii-ndo.

*Nchoo cùu-o datná ì<sup>n</sup> vehe Yá Ndiòxí*

14 Te cue ñáiyu ñá túú sàndáá iní tnúhu Xítohó Jesucrìstú, te vá cúú ì<sup>n</sup>nuu-ndo ndìhi-yu cada-ndo dàtná xíquidé-yu, chi òuca<sup>n</sup> cuu nchaa sá vâha te òuca<sup>n</sup> cuu nchaa sá cuèhé sá dúhá, te ñúmí nchìcanchii ndìhi niú chi ñá túú ì<sup>n</sup>-ni cuu-xi. Te duca<sup>n</sup> sàtnahá-xi cùu nchaa sá vâha ndìhi nchaa sá cuèhé sá dúhá chi ñá túú ì<sup>n</sup>-ni cuu-xi.

15 Te òuca<sup>n</sup>-ni duca<sup>n</sup> ñá túú ì<sup>n</sup>-ni cuu Xítohó Jesucrìstú ndìhi sácúlhná, te òuca<sup>n</sup>-ni duca<sup>n</sup> ñă túú ì<sup>n</sup>-ni cuu ñáiyu sàndáá iní ñáhá xii Xítohó Jesucrìstú ndìhi ñáiyu ñá túú sàndáá iní ñáhá xii-gá.

16 Te òuca<sup>n</sup>-ni duca<sup>n</sup> sàtnahá tucu-xi cùu vehe Yá Ndiòxí ndìhi nchaa sá càchí ñáiyu cùu ndiòxí ní cadúha cue tée ñuyú-a, chi vá cúú quèhi ni ì<sup>n</sup> xíá<sup>n</sup> xití vehe-gá. Te nchoo cùu-o datná vehe Yá Ndiòxí Yaá ndécú tûu andiú, chi mee-gă càchí-gá núú tûtú-gá núú càchí-xi:

Yúhú vá cúmăní cundecu-í ndìhi-yu ndèni ní cuu na cùndecú-yu,

te òuca<sup>n</sup>-ni yúhú cuu-í Ndiòxí-yu,

te mèe-yu cúú-yu ñáiyu cùu cuendá-í. Duha càchí-gá núú tûtú-gá.

17 Te xíá<sup>n</sup> nûu càchí tucu-gá ìngá xichi núú tûtú-gá núú càchí-xi:

Chí tá quèe tnuú nchaa ñáiyu ñá túú sàndáá iní ñáhá xii-í,

te vá cání iní-ndó càda-ndo ni ì<sup>n</sup> sá cuèhé sá dúhá,

te duca<sup>n</sup> te quehe<sup>n</sup> cuendá ñáhà-í xii-ndo,

18 te yúhú cuu-í Tátá-ndó,

te nchòhó cuu-ndo cue déhe ducu<sup>n</sup>-í, ndìhi cue déhe yoco-í,

duha càhá<sup>n</sup> yúhú Yaá ío càhnu cuu.

Duha càchí-gá núú tûtú-gá.

## 7

1 Te sá dúcá<sup>n</sup> ò vâha càhá<sup>n</sup> Yá Ndiòxí sá cúú-xí-ó nûu xíá<sup>n</sup> càhá<sup>n</sup>-í dóho nchòhó ñáiyu ío cùu iní-í sá dùu<sup>n</sup> duu<sup>n</sup> dañá-o nchaa sá cuèhé sá dúhá, chi nchaa xíá<sup>n</sup> ñá túú cùu-xi sá vâha sá cúú-xi iní-ó ndìhi yiqui cuñú-ó, te cada-o nàcuáa tàú-xi cunduu nàcuáa cundáá-ó nûú Yá Ndiòxí, te cada-o sã néhé-ó sã yíñùhu núú-gă.

*Cue ñáiyu ñúú Còrintú quidé vâha-yu*

2 Te ni yùhu ni iní-ndó chì cúú iní ñáhá xii-ndí, chi nchúhú vá yôo ì<sup>n</sup> quide úhú iní-ndí, te ni vâ yôo ì<sup>n</sup> dàcuíta nihnu-ndí, te ni vâ yôo ì<sup>n</sup> dândahú-ndí.

3 Te sá dúhá càhá<sup>n</sup>-í te vá cání iní-ndó sã ì<sup>n</sup> cuéchi dàcaa-í díquí-ndó, chì dàtná sa ní càchí-í xii-ndo sã yúhú ío cùu iní ñáhà-í xii-ndo, te cuèi vitna ndècu-gá-ó ñùyú-a àdi cuéi na cùú-ó dico òuca<sup>n</sup>-ni duca<sup>n</sup> cùu iní ñáhà-í xii-ndo.

4 Te yúhú ío vâha sàni iní-í cuendá-ndó, te duca<sup>n</sup> ò vâha càhá<sup>n</sup>-í cuendá-ndó, te ío ndècu ndìhi-í tnúhu ndee iní cuendá-ndó, te ío cùdí iní-í sá cuendá-ndó cuèi nándi ndòho-í ndìhi dava-gá-güedé ndécú-ndí.

5 Te nchúhú cùtnahá ní sáhá<sup>n</sup>-ndí distrítú Macèdoniá, te ñá túú tnàhí ni ndètatú-ndí cuendá nchaa sá ñí yáhandi chi ío ní ndoho-ndí cuendá nchaa sá ñí quidé-yu, chi ío ní cuándeé ñáhă-yu xii-ndí, te ío ní sani iní-ndí nûu nása-gá yâha-ndí ní cùu.

6 Dico Yá Ndiòxí ní taxi-gá tnúhu ndee iní xii-ndí òré ní quexìo té Títú núú ndécú-ndí, te òuca<sup>n</sup>-ni Yaá-á<sup>n</sup>

cúu-gã Yaá sãñaha-gã tnúhu ndee ìní xii cue ñáyiú ndìhú ìní-xi.

<sup>7</sup> Te duca<sup>n</sup> ñí taxi Yá Ndiõxí tnúhu ndee ìní xii-ndí cuendá sá ñí quexìo té Títú núú ndécú-ndí, te ñá díú-ní sá cuendá ní quexìo-dé chi ní níhí tucu-ndí tnúhu ndee ìní cuendá ní cani-dé cuendú núú-ndí sá nchòhó ní sãñaha-ndo tnúhu ndee ìní xii-dé, te ní cachí tnúhu-dé xii-ndí sá nchòhó ío cuíní-ndó cãhá<sup>n</sup> ndìhí ñaha-ndo xii-ndí, te ní cachí tnúhu tucu-dé xii-ndí sá nchòhó ío ndìhú ìní-ndó cuendá nàcuáa cùu ndecu-ndo ni cuu, ndìhí cuendá sá ío sãni ìní-ndó cuendá-í, te sá dúcá<sup>n</sup> ndùu cuendú ní cani-dé núú-ndí nùu xiã<sup>n</sup> ío ní cudíí ìní-í.

<sup>8</sup> Te nchòhó ní ndìhú ìní-ndó cuendá tnúhu cãhá<sup>n</sup>-í núú tütú sá ñí dáquixì-í ndaha-ndo, te òré ní níhí-í tnúhu sá ndìhú ìní-ndó te tnaa-ni ní ndixi cuéchi ìní-í sá dúcá<sup>n</sup> ñí quide-í te dãtnùní ñá túú-gã ní ndixi cuéchi ìní-í.

<sup>9</sup> Te vitna ní ndìhú ìní-ndó, te xiã<sup>n</sup> ní quide-xi ní ndixi cuéchi ìní-ndó sã ñà túú quide váha-ndo ndècu-ndo ni cuu, te ní cudíí ìní-í dico ñá díú cuendá sá ni ndìhú ìní-ndó ñí cudíí ìní-í chi cuendá sá ñí ndixi cuéchi ìní-ndó, te ní ndìhú ìní-ndó nàcuáa ní cuu váha ìní Yá Ndiõxí, te xiã<sup>n</sup> nùu ní cuu-xi ñ<sup>n</sup> sá váha sá cúu-xí-ndó cuendá tnúhu ní cãhá<sup>n</sup>-í te ñá túú ní cùu-xi ñ<sup>n</sup> sá cuèhé sá cúu-xí-ndó.

<sup>10</sup> Te nchoo nùu na ndìhú ìní-ó nàcuáa cuu váha ìní Yá Ndiõxí, te ndixi cuéchi ìní-ó te núú ñá túú quide váha-ndo ndècu-o, te sá dúcá<sup>n</sup> quide-o te nàníhí tàhú-ó, te vá ndìhú ìní-ó sã dúcá<sup>n</sup> ñí quide-o, te dava ñáyiú xíndecu ichi cuèhé ichi duha ndìhú ìní-yu dico ñá túú ndixi cuéchi ìní-yu cuendá nchaa sá ñà túú váha quidé-yu, te sá dúcá<sup>n</sup> quidé-yu te cuíta nihnú-yu.

<sup>11</sup> Te sá dúcá<sup>n</sup> ñí ndìhú ìní-ndó nàcuáa ní cuu váha ìní Yá Ndiõxí, te xiã<sup>n</sup> nùu ndùcu ndee-ndo quide-ndo nchaa nacuáa tàú-xi cunduu, te vitna ni yùhu ni ìní-ndó cãhá<sup>n</sup>-ndó sã quidé váha-ndo, te ío cùdéé<sup>n</sup>-ndó nùú méé-ndó sã ñà túú quide váha-ndo

ndècu-ndo ni cuu, te yùhú-ndó ndècu-ndo cuendá sá ñà túú quide váha-ndo ni cùu, te ío ní xùhu<sup>n</sup> ìní ñáhá-ndó xii-í, te ní ndúcú ndéé-ndó ñí quide ndáá-ndó cuendá té ndècuéchi ndècu ndìhí-ndo, te sá dúcá<sup>n</sup> ñí quide-ndo te xiã<sup>n</sup> ní cutnùní sá méé-ndó ñà túú cuéchi-ndo.

<sup>12</sup> Te ní cadúha-í tutú ní dáquixì-í ndaha-ndo, te ní quide-ndo nàcuáa ní cãhá<sup>n</sup>-í, te sá dúcá<sup>n</sup> ñí quide-ndo xiã<sup>n</sup> ní cutnùní ìní-ndó sã ío cùu ìní ñáhá-ndó xii-í. Te Yá Ndiõxí nãhá-gã sá díú cuendá xiã<sup>n</sup> ní dáquixì-í tutú ndaha-ndo, te ñá díú-ní cuendá sá sání ìní-í cuendá té ndècuéchi ndècu ndìhí-ndo, te ni ñà díú-ní cuendá ñáyiú ní dándìhú té ndècuéchi-á<sup>n</sup> ìní-xi ní càdúha-í tutú ní dáquixì-í ndaha-ndo.

<sup>13</sup> Te cuendá sá quidé váha-ndo ndècu-ndo xiã<sup>n</sup> cúu-xí tnúhu ndee ìní ndécú ndìhí-ndí.

Dico ñá díú-ní xiã<sup>n</sup> chi tnahá ío cùdíí ìní-ndí cuendá sá ío cùdíí ìní té Títú, te duca<sup>n</sup> cùdíí ìní-dé chi nchòhó ní sãñaha-ndo tnúhu ndee ìní xii-dé.

<sup>14</sup> Te yùhú ñá túú cùcaha<sup>n</sup> núu-í sá ni cãhá<sup>n</sup> váha-í cuendá-ndó nùú té Títú cùtnahá vátá quixì-gã-dé núú ndécú-ndó, chi ní cutnùní ìní-dé sá ndáá cãhá<sup>n</sup> váha-í nàcuáa quide-ndo datná cúu-xí sã ndáa nchaa tnúhu dácuaaha ñaha-í xii-ndo.

<sup>15</sup> Te vitna ío-gã váha cùu ìní té Títú cuendá-ndó, chi ndàcu ìní-dé sá ncháá-ndó ío váha ní tñi-ndo nchaa tnúhu ní cãhá<sup>n</sup>-dé núú-ndó, te ndàcu tucu ìní-dé sá ñí quehe<sup>n</sup> cuendá váha-ndo-dé, te ní dátúu-ndo nùú-dé sá ío ní quiyùhú ìní-ndó sã vã ndácú-ndó càda-ndo nchaa nacuáa tàú-xi cunduu.

<sup>16</sup> Te ío cùdíí ìní-í cuendá-ndó chi cùtnuní ndáá ìní-í sá ñà túú dàña ndéé-ndó quide-ndo nchaa nacuáa tàú-xi cunduu.

## 8

### *Ío váha cuu ìní-ó chindee tnaa-o*

<sup>1</sup> Te nchòhó ñáyiú ndècu ndìhí-ndí ichi Xítóhó Jesucristú càchí tnúhu-ndí xii-ndo nàcuáa quide ñaha Yá Ndiõxí xii cue ñáyiú xíndecu ichi-gã ndécú

distritú Macèdoniá, chi ío chindee ñaha-gá xii-yu cuendá sá quidé vâha-yu ndécú-yu.

<sup>2</sup> Te cuéi ndòho vihi-yu ndécú-yu dico ío-ni cùdí ìní-yu, te cuendá xiá<sup>n</sup> nũu ni yùhu ni iní-yu ní sacá<sup>n</sup> tnáhã-yu díhú<sup>n</sup> sã cúú-xí tnàha ñáyíu-yu, te ñá túú tnàhí ni xĩnduu díi-yu cuéi ío ndàhú-yu.

<sup>3</sup> Te ñá díú-ní nàcuáa ní sani iní-yu ndacú-yu cacá<sup>n</sup> tnáhã-yu, chi ní quide yica iní-yu ní sacá<sup>n</sup> tnáhã-gã-yu, te yúhú càchí tnúhu ndáá-í xii-ndo sã ni yuhu ni iní-yu duca<sup>n</sup> ñí quidé-yu.

<sup>4</sup> Te ío ní cáhá<sup>n</sup> ndàhú-yu núú-ndí cuendá sá cuãha-ndí tnúhu sá tnàhá-yu chindéé-yu dava-gá cue ñáyíu cùu cuendá Yã Ndiõxí.

<sup>5</sup> Te ñá díú-ní nàcuáa ní sani iní-ndí ní quidé-yu, chi ní xídó-gã-yu ní quide váha-yu, te duca<sup>n</sup> chi mée-yu ní sani iní-yu sá cadã-yu nchaa nàcuáa cuiní Yã Ndiõxí, te dàtnúni duca<sup>n</sup> te ní cachí-yu sá cúú cadã-yu nchaa nàcuáa na cũñaha-ndí xii-yu. Te duca<sup>n</sup> ñí quidé-yu chi duca<sup>n</sup> ñí cuiní mée Yã Ndiõxí cunduu.

<sup>6</sup> Te sá dúcã<sup>n</sup> ñí quide ñáyíu-á<sup>n</sup> nũu xiá<sup>n</sup> càhá<sup>n</sup> ndàhú-ndí núú tẽ Titú sá quixí túcu-dé núú ndécú-ndo cuendá dàxínu cava-dé chiú<sup>n</sup> sá sã ní ngúíta-dé quidé-dé dátacã-dé díhú<sup>n</sup> sã sã ní ngúíta-ndo sãcã<sup>n</sup> tnáhã-ndó, te duca<sup>n</sup> quide-ndo chi cundahú iní-ndó tnàha ñáyíu-ndo.

<sup>7</sup> Te nchòhó cúú-ndó ñáyíu ío ngòdónúú quide nchaa sá vâha, te ío váha sãndáá iní-ndó Xítohó Jesucristú, te ío váha cùtnuní iní-ndó nàcuáa càhá<sup>n</sup> tnúhu-gá, te ío váha dàcuaha-ndo ñáyíu tnúhu-gá, te ío ndùcu ndee-ndo quide-ndo mee-ni sá vâha, te duca<sup>n</sup> ío cùu iní ñáhã-ndó xii-ndí, te sá dúcã<sup>n</sup> quide-ndo núu xiá<sup>n</sup> càhá<sup>n</sup> ndàhú-í núú-ndó sã ngòdó núú-gã-ndó càda-ndo sá cúú-xí tnàha ñáyíu-ndo.

<sup>8</sup> Dico yúhú ñá túú tàuchiú<sup>n</sup>-í sá dúcã<sup>n</sup> càda-ndo, chi cuendá-ni sá càchí tnúhu-í xii-ndo nàcuáa quide dava-gá cue ñáyíu ndècu ichi Xítohó Jesucristú,

chi cue ñáyíu-á<sup>n</sup> ni yùhu ni iní-yu quidé-yu sá vâha sá cúú-xí tnàha ñáyíu-yu, te càchí tnúhu-í xii-ndo nàcuáa quidé-yu cuendá cutnùní nũu nása cada-ndo nũu ndisa sá cúú iní-ndó cuè tnàha ñáyíu-ndo.

<sup>9</sup> Te nchòhó sa xini-ndó sã Xítohó Jesucristú ío cundahú iní ñáhã-gã xii-o, te ío váha ndècu-gá ní cùu te ní quixi-gá ñuyíú-a ní quide váha ñaha-gã xii-o, te ñuyíú-a ñá túú ní xĩndecu váha-gã, te duca<sup>n</sup> ñí quixi-gá ñuyíú-a cuéi ñá túú ní xĩndecu váha-gã cuendá sá nchóó ngũndecu váha-o núú ndécú-gã.

<sup>10</sup> Te na càchí tnúhu-í xii-ndo nàcuáa sãni iní-í. Chiú<sup>n</sup> sá ni yuhu ni iní-ndó ñí ngúíta-ndo quide-ndo cuía ni yáha chi cùu-xi sá vâha sá cúú-xí-ndó nũu na dàxínu cava-ndo.

<sup>11</sup> Te dàtnã-ni ni yùhu ni iní-ndó ñí tausaha-ndo chiú<sup>n</sup>-á<sup>n</sup> te duca<sup>n</sup>-ni ni yuhu ni iní-ndó dàxínu cava-ndo, te cacá<sup>n</sup> tnáhã-ndó sã ndécú ndíhi-ndo nàcuáa xito mee-ndo ndacu-ndo.

<sup>12</sup> Te núu nchòhó ni yùhu ni iní-ndó càcã<sup>n</sup> tnáhã-ndó sã xító mée-ndo ndacu-ndo ña, te cùu váha iní Yã Ndiõxí, chi mee-gã sa nàha-gá nása ndècu-o te ndùu vétú-ni iní-gã.

<sup>13</sup> Te sá dúhá ndùu tnúhu càhá<sup>n</sup>-í te vá cãní iní-ndó sã yúhú cuiní-í sã nchòhó ndoho-ndo cundecu-ndo te dava-gã-yu ngũndecu váha-yu sã cuendá-ndó.

<sup>14</sup> Te vitna ndècu ndee iní-ndó nàcuáa ndacu-ndo chindee-ndo cue ñáyíu xini ñuhu, te nduu ñá túú ndècu ndee iní-ndó te cue ñáyíu-á<sup>n</sup> chindee ñáhã-yu xii-ndo te núu ndècu ndee iní-yu, te duca<sup>n</sup> te ni nchòhó ñá túú ñá cumání xii-ndo te ni cuè ñáyíu-ã<sup>n</sup> ñá túú ñá cumání xii-yu.

<sup>15</sup> Te duca<sup>n</sup> te quee ndáá-xi nàcuáa càhá<sup>n</sup>-xi núú tütú Yã Ndiõxí núú càchí-xi: “Cue ñáyíu ío vai sã ni ñíhí ñá túú ní cùu sobrá xii-yu, te cue ñáyíu sacú ní ñíhí ñá túú ní cumání xii-yu”, duha càchí-xi núú tütú-gã.

*Té Titú ndíhi cue té cundíhi-dé*

<sup>16</sup> Te ndacã<sup>n</sup> táhú-í núú Yã Ndiõxí chi mee-gã ní quide sã tẽ Titú ío ñuhu iní ñáhã-dẽ xii-ndo dàtnã ñúhú iní ñáhã-í xii-ndo.

17 Te yúhú ní xáha<sup>n</sup>-í xii-dé sá quíxí coto ñaha-dé xii-ndo te ní sáha-dé tnúhu, te ñá díú mée-ni sá dúcá<sup>n</sup> ní xáha<sup>n</sup>-í xii-dé quixi coto ñaha-dé xii-ndo, chi mee-dé cúdí<sup>í</sup> tnàhí iní-dé quixi coto ñaha-dé xii-ndo.

18 Te tendaha-ndí ì<sup>n</sup> tée ndècu ndihí-o ichi Xítóhó Jesucristú quixi-dé ndihí té Títú, te tée quixi ndihí té Títú-á<sup>n</sup> cúú-dě ì<sup>n</sup> tée ío váha càhá<sup>n</sup> cue ñáyiú xíndecu ichi Xítóhó Jesucristú cuendá-dé cuendá sá ío váha quide-dé chiú<sup>n</sup> Xítóhó Jesucristú càhá<sup>n</sup>-dé tnúhu-gá tnúhu sá càhá<sup>n</sup> nàcuáa naníhí tãhú-ó.

19 Te cue ñáyiú xíndecu ichi Xítóhó Jesucristú ñá díú-ní sã càhá<sup>n</sup> váha-yu cuendá-dé, chi tnàhá ní cáxi ñàhá-yu xii-dé cuendá sá cáca cùu ndihí ñaha-dé xii-ndí chindee ñàhá-dé tacá sá cúú-xí ñáyiú ndàhú, te quide-ndí chiú<sup>n</sup>-a cuendá ío cuu càhnu Yá Ndióxi, te cue ñáyiú cutnùní iní-yu sá nchòhó ní yúhu ní iní-ndó quide-ndo nchaa sá váha sá cúú-xí cuè tnaha ñáyiú-ndo.

20 Te cuíní-ndí sá vã càhá<sup>n</sup> cuèhé ñáyiú cuendá nàcuáa quide-ndí ndihí sá ngãutnàha sá cúú-xí cuè tnaha ñáyiú-o, te ío vãi cuu-xi.

21 Chi ndùcu ndee-ndí quidé-ndí nàcuáa cáhá<sup>n</sup> váha Xítóhó Jesucristú cuendá-ndí, te quide tucu-ndí nàcuáa cáhá<sup>n</sup> váha ñáyiú sá quidé vãha-ndí.

22 Te tendaha tucu-ndí ingá tucu tée ndècu ndihí-o ichi Xítóhó Jesucristú quixi-dé ndihí cue tée úú quixi coto ñaha xii-ndo, te tée quixi ndihí-güedé-á<sup>n</sup> ní cuu vãi xito quide-dé nàcuáa cutnùní iní-ndí sá ío ndùcu ndee-dé quidé-dě sá vãha, te vitna ío-gá cuíní-dé cada-dé sá vãha vitna quixi-dé núú ndécú-ndó, chi cutnùní ndáá iní-dé sá cúú-ndó cuè ñáyiú quide váha.

23 Te càchí tnúhu-í xii-ndo sã tẽ Títú cúú-dě ì<sup>n</sup> tée cùndihí-í quidé-ndí chiú<sup>n</sup> Xítóhó Jesucristú, te tnàhá-dé cúú-dě ì<sup>n</sup> tée xínu cuechi núú-ndó càhá<sup>n</sup>-dé tnúhu-gá. Te càchí tnúhu tucu-í xii-ndo cuendá cue tée úú quixi ndihí-dé, chi cue tée-á<sup>n</sup> cúú-güedě

cue tée tendaha cuè ñáyiú xíndecu ichi Xítóhó Jesucristú quixi coto ñaha xii-ndo. Te cue tée-á<sup>n</sup> quidé-güedě nàcuáa cachí ñáyiú sá ío càhnu cuu Xítóhó Jesucristú.

24 Te chí cáda sã cúú iní ndisa-ndo-güedě cuendá duca<sup>n</sup> na cutnùní iní nchaa dava-gá ñáyiú xíndecu ichi Xítóhó Jesucristú sá ndáá ndisa duca<sup>n</sup> quide-ndo, te duca<sup>n</sup> cutnùní iní-yu sá ndáá ndisa quide váha-ndo dàtná càhá<sup>n</sup>-ndí cuendá-ndó sá quidé vãha-ndo.

## 9

*Cuendá sá ngãutnàha sá cúú-xí cue ñáyiú xíndecu ichi Xítóhó Jesucristú*

1 Te cuendá sá ngãutnàha sá cúú-xí cuè ñáyiú ndècu ichi Xítóhó Jesucristú ñá túú-gã xíní ñùhu-xi cachí tnúhu-í xii-ndo núú tütú-a nàcuáa cada-ndo,

2 chi sa cutnùní iní-í sá ío cuíní-ndó chindee-ndó-yu. Te duca<sup>n</sup>-ni ío váha càhá<sup>n</sup>-í cuendá-ndó núú ñáyiú xíndecu ichi Xítóhó Jesucristú ndécú dístítú Macèdoniá, te xáha<sup>n</sup>-í xií-yu sá nchòhó ñáyiú xíndecu ichi Xítóhó Jesucristú ndécú dístítú Acáyá sa ní cuu ì<sup>n</sup> cuía duca<sup>n</sup> cuíní-ndó càcá<sup>n</sup> tnàhá-ndó sã cúú-xí cuè ñáyiú ndàhú ndécú ìchi-gá. Te vãi cue ñáyiú dístítú Macèdoniá cuíní-yu cacá<sup>n</sup> tnàhá-yu sá cúú-xí cuè ñáyiú ndàhú ndécú ìchi Xítóhó Jesucristú cuendá sá ní níhí-yu tnúhu sá nchòhó ío cuíní-ndó dùca<sup>n</sup> cada-ndo.

3 Te cuendá sá sání iní-ndó cada-ndo xiá<sup>n</sup> tendaha-í cue tée ndècu ndihí-o ichi Xítóhó Jesucristú quixi-güedě núú ndécú-ndó cuendá dátúha ñaha-güedě xii-ndo, cuendá sá vã quée ndèhnde-í núú ñáyiú sá ní cáhá<sup>n</sup> váha-í cuendá-ndó, te duca<sup>n</sup> cùndecu túha ndisa-ndo dàtná sa ní cáhá<sup>n</sup>-í núú-yu.

4 Chi na cuáhá<sup>n</sup> ndèé quixi-í ndihí ì<sup>n</sup> úú cue ñáyiú dístítú Macèdoniá núú ndécú-ndó te quiní-yu sá ñà túú ndècu túha-ndo, te cucaha<sup>n</sup> núú-í núú-yu sá ní cáhá<sup>n</sup> váha-í cuendá-ndó te núú ñá túú ndècu túha-ndo, te tnàhá-ndó cùcaha<sup>n</sup> núú-ndó.

5 Te xiá<sup>n</sup> núú ní saní iní-í sá vãha-gá codonùu cue tée ndècu ndihí-o ichi Xítóhó Jesucristú quixi



coto ñaha-güedě xii-ndo cuendá chindee ñaha-güedé tacá sá ñi sani iní-ndó càcá<sup>n</sup> tnáhá-ndó cuendá sá cündècu túha-xi, te cuu-xi dàtná ñ<sup>n</sup> táhú sá ñi quene cuu iní méé-ndó càcá<sup>n</sup> tnáhá-ndó sá cúu-xí cuè tnaha ñáyi-ndo. Te duca<sup>n</sup> te vá yõ cani iní-xi quesàhá-yu sá nchũhú ní quide yica-ndí duca<sup>n</sup> ñi sacá<sup>n</sup> tnáhá-ndó.

6 Te nchòhó sa xíní-ndó sá ñáyi na chihi vai tatá te vai ñí-yu cùu, te cue ñáyi na chihi sacú tatá te sacú ñí-yu cùu. Duca<sup>n</sup> sãtnahá-xi cùu ñáyi sacá<sup>n</sup> tnáhá sá cúu-xí tnaha ñáyi-yu.

7 Te ñ<sup>n</sup> ñ<sup>n</sup>-ndo càcá<sup>n</sup> tnáhá-ndó nàcuáa quene cuu iní méé-ndó, te ío váha cuu iní-ndó dùca<sup>n</sup> cada-ndo te vá cáda-ndó cuendá-ni sá quidé yica ñaha ñáyi xii-ndo, chi Yá Ndiõxí cúu vãha iní-gá núu nchàa ñáyi cùdí iní sacá<sup>n</sup> tnáhá sá cúu-xí cuè tnaha ñáyi-xi.

8 Te Yá Ndiõxí ndacu-gá chindee ñaha-gá xii-ndo nàcuáa cundecu váha-ndo, chi diu-gá cada te níhí-ndó nchàa núu sá xíní ñũhu-ndo cundecu ndihí-ndo, te ñá túu tnáhí-gá ná cumání xii-ndo, te mee-gã chindee ñaha-gá xii-ndo níhí-ndó ío vai cundecu ndihí-ndo cuendá duca<sup>n</sup> chindee-ndo cue tnaha ñáyi-ndo.

9 Te núu tütú Yá Ndiõxí càchí-xi ñ<sup>n</sup> xichí:

Ñ<sup>n</sup> ñáyi ío vai sá ñi sãñàhá-yu xii ñáyi ndàhú,

te sá ñi quide ñáyi-á<sup>n</sup> ñi cuu-xi sá vãha sá vã yõ cùnaa.

Duha càchí-xi núu tütú-gá.

10 Te mee Yá Ndiõxí táxi-gã nchaa sá cúu tàtá nchaa nchòhó ñáyi xitu nándi sá xítú cuendá cuu sá cúu nchito-ndo, te diu-gá cada te ío vai sá níhí-ndó cundecu ndihí-ndo, te duca<sup>n</sup> ío-gá vai sá vãha cada-ndo sá cúu-xí cuè tnaha ñáyi-ndo.

11 Te Yá Ndiõxí taxi-gá vai núu sá cündècu ndihí-ndo cuendá duca<sup>n</sup> ñi yuhu ñi iní-ndó vai cuãñaha-ndo sá cúu-xí tnaha ñáyi-ndo. Te cuendá nchaa sá sacá<sup>n</sup> tnáhá-ndó quèhe<sup>n</sup> cuendá-ndí cuu xii tnaha ñáyi-ndo, te cue ñáyi-á<sup>n</sup> ío ndacá<sup>n</sup> táhũ-yu

núu Yá Ndiõxí cuendá sá dúcá<sup>n</sup> sacá<sup>n</sup> tnáhá-ndó sá cúu-xi-yu.

12 Te sá dúcá<sup>n</sup> quide-ndo sacá<sup>n</sup> tnáhá-ndó sá cúu-xí cuè ñáyi cùu cuendá Yá Ndiõxí, te ñáyi-á<sup>n</sup> ñà túu-gã ná cumání xií-yu, te ío ndacá<sup>n</sup> táhũ-yu núu Yá Ndiõxí sá dúcá<sup>n</sup> quide-ndo.

13 Te ñáyi-á<sup>n</sup> cutnùní iní-yu sá nchòhó quidé-ndó sá sãndáá ndisa iní-ndó tnũhu Xítohó Jesucristú, te cuendá xiã<sup>n</sup> te ñáyi-á<sup>n</sup> chiñũhú-yu Yá Ndiõxí, te cuendá sá dúcá<sup>n</sup> ñi yuhu ñi iní-ndó sacá<sup>n</sup> tnáhá-ndó sá cúu-xi-yu ndihí sá cúu-xí nchàa dava-gã ñáyi, te cachí-yu sá ío càhnu cuu Yá Ndiõxí.

14 Te ñáyi-á<sup>n</sup> cãhá<sup>n</sup> ndihí-yu Yá Ndiõxí cuendá-ndó, te ío cuu váha iní ñáhã-yu xii-ndo cuendá sá Yá Ndiõxí chindèe ñaha-gã xii-ndo quide-ndo sá vãha sá cúu-xi-yu ndihí dava-gã ñáyi.

15 Te ío ndacá<sup>n</sup> táhũ-ó núu Yá Ndiõxí cuendá sá ñi taxi-gá sá ío váha ndècu ndihí-o, te ñi ñã cùtnùní iní-ó ñasa cundu tñũhu cáhá<sup>n</sup>-ó cuendá sá vãha ní taxi-gá.

## 10

*Té Pãblú ndécú ndihí-dé tñũhu ndee iní sá càhá<sup>n</sup>-dé tñũhu Xítohó Jesucristú*

1 Te Xítohó Jesucristú ío càhnu iní-gá, te cùndahú iní ñáhã-gã xii-o chindee ñaha-gã, núu xiã<sup>n</sup> yúhú té Pãblú duca<sup>n</sup> quide-í càhá<sup>n</sup> ndàhú-í núu-ndó nàcuáa cada-ndo. Te dava-ndo càchí-ndó sá yúhú ío ndàhú iní-í òré ndécú ndihí ñaha-í xii-ndo, te òré ñá túu ndècu ndihí ñaha-í xii-ndo te ío ñí cáa-í.

2 Te càhá<sup>n</sup> ndàhú-í núu-ndó sã cáda-ndó nàcuáa vá càhá<sup>n</sup> ñí-í núu-ndó òré quixi-í quixi coto ñaha-í xii-ndo. Te cuíní-í sá ndihí tñũhu ñí iní-xi cáhá<sup>n</sup> ndihí-í cue ñáyi càchí sá ñ<sup>n</sup>-ni cuu-í ndihí cue ñáyi ñá túu sãndáá iní tñũhu Xítohó Jesucristú.

3 Te nchúhú cùu-ndí cue tée ñuyíu-a, dico ndùcu ndee-ndí quidé-ndí nàcuáa ndàcu-ndí dáquèe tíhũ-ndí

nchaa sá cuèhé sá dúhá, dico ñá díú mèe-ndí duca<sup>n</sup> ndàcu-ndí quidé-ndí,

<sup>4</sup> te ni ì<sup>n</sup> sá íó ñuyú-a ñá túú chindee ñaha-xi, chi mee Yă Ndiöxí chindèe ñaha-gá xii-ndí dáquèe tíhú duu<sup>n</sup>-ndí nchaa núú sá cuèhé sá dúhá.

<sup>5</sup> Te xǎ<sup>n</sup> nǔu ñihí-ndí tnúhu càhá<sup>n</sup>-ndí sàdí-ndí yuhu cue ñáyiú càhá<sup>n</sup> tnúhu sá ñà túú cùu váha iní Yă Ndiöxí, ñáyiú xiquide nínu mee-xi cǎchí sá ñà túú nàndíhi tnúhu-gá. Te quide-ndí sá ñáyiú-án quindáá iní-yu tnúhu Xítohó Jesucristú.

<sup>6</sup> Te nchúhú sa ndècu túha-ndí sá dáquétíhú-ndí cue ñáyiú ñá túú cuiní cada nàcuáa cuiní Xítohó Jesucristú, dico díhna-gá xíní ñùhu-xi sá ncháa nchòhó ñáyiú cuiní cada nàcuáa cuiní-gá cundáá-ndó.

<sup>7</sup> Te nchòhó nàcuáa ndùu sá ndéhe-ndó te duca<sup>n</sup> sàni iní-ndó, dico vá dúcá<sup>n</sup> cǎni iní-ndó cuendá-ndí. Chi nǔu cùtnuní ndáá iní-ndó sá cúu-ndó cuendá Xítohó Jesucristú, te ñu-ni duca<sup>n</sup> tàú-ndó cǎni iní-ndó cuendá-ndí tucu.

<sup>8</sup> Te Xítohó Jesucristú ní taxi-gá tnúhu ndee iní ndécú ndíhi-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá quíhí<sup>n</sup>, te ñá díú sá dánèhé ñáhá-ndí xii-ndo nàcuáa cuita nihnu-ndo, te cuéi na chido-gá-í càhá<sup>n</sup>-í cada nínu-í mée-í cuendá tnúhu ndee iní ní taxi Xítohó Jesucristú ndécú ndíhi-ndí, dico vá cúcàhá<sup>n</sup> núu-í chi càhá<sup>n</sup> ndáá-í.

<sup>9</sup> Te ñá túú cuiní-í sá nchòhó cǎni iní-ndó sá yúhú dáyùhú ñáhà-í xii-ndo nàcuáa ndùu tnúhu càhá<sup>n</sup>-í núú tütú-í.

<sup>10</sup> Te dava-ndo cǎchí-ndó sá ténàá ñáhà-í xii-ndo núú tütú-í, te mee-ni tnúhu cǎhnu sá ío cùnuu cuu-xi, te cǎchí tucu-ndo sá òré ndécú ndíhi ñaha-í xii-ndo te ñá túú cǎa-í sá cúu-í ì<sup>n</sup> téé cùu váha cùu dico iní-ndó, te cǎchí tucu-ndo sá ñà túú tnàhá iní-ndó nàcuáa quide-í òré dácuàha ñaha-í xii-ndo.

<sup>11</sup> Te nchòhó ñáyiú duca<sup>n</sup> càhá<sup>n</sup> cada cuendá váha-ndo sá dàtná-ni càhá<sup>n</sup>-ndí núú tütú-ndí ñu-ni duca<sup>n</sup> quide-ndí òré ndécú ndíhi ñaha-ndí

xii-ndo.

<sup>12</sup> Te nchúhú, vá cúú tnàhí càhá<sup>n</sup>-ndí sá ì<sup>n</sup>-ni cuu-ndí ndíhi cue ñáyiú càhá<sup>n</sup> váha cuendá mée-xí, chi ñáyiú-án sání iní-yu ná cúú sǎ váha te quidé-yu te xǎ<sup>n</sup> cǎchí-yu sá ío váha quidé-yu, te cǎchí-yu sá quidé váha-gá-yu dàcúúxí tnàha ñáyiú-yu, te sá dúcá<sup>n</sup> càhá<sup>n</sup>-yu te quidé-yu dàtná quidé cuè ñáyiú ñá túú tnàhí cùtnuní iní-xi.

<sup>13</sup> Te dico nchúhú ñá túú xidó-ndí càhá<sup>n</sup> váha-ndí cuendá-ndí, chi càhá<sup>n</sup> váha-ndí cuendá-ndí dico nàcuáa ndùu chiu<sup>n</sup> ní taxi Yă Ndiöxí càhá<sup>n</sup>-ndí, chi mee-gǎ ní cǎchí-gá ndéé neni sáá-ndí càhá<sup>n</sup>-ndí tnúhu-gá, te ní sáá-ndí ndéé ñuú-ndó càhá<sup>n</sup>-ndí tnúhu-gá.

<sup>14</sup> Te vitna ndècu ndíhi-ndí tnúhu ndee iní sá tnàhá nchòhó cuu càhá<sup>n</sup> ndíhi ñaha-ndí xii-ndo, chi díhna-gá nchúhú ní quixi-ndí ní càhá<sup>n</sup>-ndí tnúhu Xítohó Jesucristú ñuú-ndó, tnúhu sá càhá<sup>n</sup> nàcuáa naníhí tàhú-ó.

<sup>15</sup> Te nchúhú ñá túú quide cǎhnu-ndí mée-ndí cuendá chiú<sup>n</sup> quide dava-gá-güedé quesaha-ndí sá chíú<sup>n</sup> mèe-ndí cúu-xí. Te cuiní-ndí sá nchòhó cuita quindáá-gá iní-ndó Xítohó Jesucristú, te duca<sup>n</sup> te níhí-gǎ-ndí nàcuáa cada-ndí chiú<sup>n</sup>-gá nchaa dava-gá xichi núú ní cǎchí-gá cada-ndí chiú<sup>n</sup>-gá.

<sup>16</sup> Chi càhá<sup>n</sup>-ndí tnúhu-gá tnúhu sá càhá<sup>n</sup> nàcuáa naníhí tàhú-ó, te yáha-gá-ndí ñuú-ndó quíhí<sup>n</sup>-ndí nchaa dava-gá xichi càhá<sup>n</sup>-ndí, te vá cǎdá cǎhnu-ndí mée-ndí cuendá chiú<sup>n</sup> sá sá ní quide dava-gá-güedé.

<sup>17</sup> Te cue ñáyiú cuiní cada cǎhnu mee-xi te vá dúcá<sup>n</sup> cǎdá-yu, chi mee Xítohó Jesucristú ná cǎda cǎhnú-yu-gá.

<sup>18</sup> Te nchaa ñáyiú na càhá<sup>n</sup> váha Xítohó Jesucristú cuendá-yu, ñáyiú-án cúdíú-yu núú-gǎ, te ñá túú cùdíú-yu núú-gǎ cuendá sá càhá<sup>n</sup> váha-yu cuendá mée-yu.

*Cuendá té Păblú ndihî cuendá cue té cächî sá cãhá<sup>n</sup> tnúhu Yă Ndiöxî te ñã ndää*

<sup>1</sup> Te cuinî-í sá nchòhó cada ndee iní-ndó cùndedóho-ndo tnúhu na cãhá<sup>n</sup>-í, chi cãhá<sup>n</sup>-í dàtná cãhá<sup>n</sup> cue ñáyu ñã túú cùtnunî iní-xi, te cuëi nása-gá ná cùnduu tnúhu cãhá<sup>n</sup>-í dico chí cáda ndèe iní cundedóho-ndo.

<sup>2</sup> Chi yúhú ío ñùhu iní ñáhà-í xii-ndo dàtná ñúhú iní ñáhá mèe Yă Ndiöxî xii-o, te ní cãhá<sup>n</sup>-í tnúhu Xítohó Jesucristú núú-ndó nõu xiã<sup>n</sup> ní tnahá tnúhu-ndo ndihî-gá vitna, te sá dúcã<sup>n</sup> ñi quide-í te cada iní-ndó sã yúhú cúú-í dàtná ñ<sup>n</sup> tée xica ndáhú te nchòhó cúú-ndó dàtná ñ<sup>n</sup> xíchî cuéchi, te Xítohó Jesucristú cúú-gã dàtná ñ<sup>n</sup> tée tnándaha ndihî xíchî cuéchi-ã<sup>n</sup>. Te duca<sup>n</sup> càda iní-ndó chí na sãá nduu te yúhú na càni cuendá ñáhà-í xii-ndo nõú Xítohó Jesucristú, te cuu-ndo ñáyu vá cùndècu tnahî-gá cuéchi-xi.

<sup>3</sup> Te yúhú-í sá sàcuíhná dandàhú ñáhá-xí xii-ndo vá cánî-gã iní-ndó càncicú<sup>n</sup> nihnu-ndo ñi yuhu ñi iní-ndó ichi Xítohó Jesucristú dàtná nchicú<sup>n</sup> nihnu-ndo vitna. Te yúhú-í ná yáha-ndo dàtná ní yáha tá Èvá, chi sàcuíhná ñi nduu-xi cóó ñi dándàhú ñáhá-xí xii-xi, chi sàcuíhná-ã<sup>n</sup> ío váha ní xito-xi nàcuáa ní quide-xi ní dándàhú-xi tá Èvá-á<sup>n</sup>.

<sup>4</sup> Te nchòhó, quidé ndèe iní-ndó sàcùndedóho-ndo nchàa tnúhu cãhá<sup>n</sup> cue té cãhá<sup>n</sup> ingá núú tnúhu cuendá Jèsús tnúhu sá ñã túú dànehé ñáhá-ndî xii-ndo, te quide ndee tucu iní-ndó ndèdóho-ndo dànehé ñáhá-güedë xii-ndo cuendá ingá espíritú, te ñã díú cuendá Espíritú Yă Ndiöxî sá ñi ngúndecu ndihî-ndo dànehé ñáhá-güedë xii-ndo, te quide ndee tucu iní-ndó ndèdóho-ndo dànehé ñáhá-güedë xii-ndo ingá núú tnúhu sá cächî-güedë cãhá<sup>n</sup> nàcuáa naníhî tãhú-ndó, te ñã díú nàcuáa ndùu tnúhu sá ñi sãndáá iní-ndó cuendá naníhî tãhú-ndó cãhá<sup>n</sup>-güedë.

<sup>5</sup> Te cue té duca<sup>n</sup> cãhá<sup>n</sup>-á<sup>n</sup> cächî-güedë sá Yă Ndiöxî ní tendaha ñàha-gá xii-güedë xicá cùu-güedë cãhá<sup>n</sup>-güedë tnúhu-gá te

ío cùnuu-güedë, dico ñã ndää sá cãhá<sup>n</sup>-güedë tnúhu-gá. Te yúhú cùtnunî iní-í sá cuë té-ã<sup>n</sup> ñã túú cùnuu-güedë dàtná cùnuu yúhú.

<sup>6</sup> Te cuëi ñã túú cãhá<sup>n</sup>-í dàtná cãhá<sup>n</sup> cue tée ío váha sãá díquí-xi dico ío váha cùtnunî iní-í cuendá nchaa sá dácua<sup>n</sup>-í, te yúhú sa quide-í nàcuáa cùtnunî iní-ndó sã ío váha cùtnunî iní-í nàcuáa ndùu nchaa tnúhu cãhá<sup>n</sup>-í.

<sup>7</sup> Te cudana te sãni iní-ndó sã yúhú ñã túú ní quide váha-í sá ñi quide-í mèe-í dàtná ñ<sup>n</sup> tée ío ndàhú iní-xi, chi ñã túú ní xicã<sup>n</sup>-í yáhu-í núú-ndó cuendá sá ñi cãhá<sup>n</sup>-í tnúhu Yă Ndiöxî tnúhu sá cãhá<sup>n</sup> nàcuáa naníhî tãhú-ó nõú-ndó.

<sup>8</sup> Te ní quehe<sup>n</sup>-í díhú<sup>n</sup> ñi taxi dava-gá cue ñáyu ndècu ichi Xítohó Jesucristú, te díhú<sup>n</sup>-ã<sup>n</sup> ñi dándóñùhu-í ní saa<sup>n</sup>-í nchaa sá ñi xini ñùhu-í cùtnáhá ní cãhá<sup>n</sup>-í tnúhu Xítohó Jesucristú núú-ndó.

<sup>9</sup> Te cùtnáhá ní xíndecu ndihî ñàha-í xii-ndo te áma ní xóo cumánî sã xínî ñùhu-í, te ñã túú ñã ní xicã<sup>n</sup>-í núú ñi ñ<sup>n</sup>-ndo. Chi cue ñáyu xíndecu ichi Xítohó Jesucristú ndécú dístítú Macèdoniá ní quixí-yu ní taxí-yu sá cúmãní xii-í, te ñã túú tnahî ñi dàsatú iní ñáhà-í xii-ndo cãcã<sup>n</sup>-í núú-ndó nõu ná cúú sã xínî ñùhu-í, te díu-ñi duca<sup>n</sup> càda-í.

<sup>10</sup> Te díu-ñi duha cãhá<sup>n</sup> váha-í cuendá-í te ñi ñ<sup>n</sup> cue ñáyu dístítú Acãyá vá ñihî-yu tnúhu cùñáhá-yu xii-í cuendá cadí-yu yuhu-í. Te mee Xítohó Jesucristú nãhá-gã sá ndää cãhá<sup>n</sup>-í dàtná cãhá<sup>n</sup> ndää mèe-gã.

<sup>11</sup> Te cudana te sãni iní-ndó sã sã dúhá cãhá<sup>n</sup>-í te ñã túú cùu iní ñáhà-í xii-ndo, dico ñáhá chí mee Yă Ndiöxî nãhá-gã sá yúhú ío cùu iní ñáhà-í xii-ndo.

<sup>12</sup> Te nàcuáa-ñi ta quide-í véxi te díu-ñi duca<sup>n</sup> càda-í cuendá sá cuë té cuinî cada ñinu mee-xi cächî sá ñ<sup>n</sup>-ni cuu ndihî ñàha-güedë xii-í vá ñihî-güedë tnúhu cãhá<sup>n</sup>-güedë cachî-güedë sá ñ<sup>n</sup>-ni chiu<sup>n</sup> quide ndihî ñàha-güedë xii-í.

<sup>13</sup> Te cue té-ã<sup>n</sup> cächî-güedë sá Yă Ndiöxî ní tendaha ñàha-gá xii-güedë xicá cùu-güedë cãhá<sup>n</sup>-güedë

tnúhu-gá dico ñá ndàá, chi mee-ni dándahú-güedé ñáyiú ndihí tnúhu càhá<sup>n</sup>-güedé, te quíde-güedé dàtná quíde cuè téè càhá<sup>n</sup> tnúhu Xítoho Jesucristú dico ñá ndàá sá cúu-güedé cue téè càhá<sup>n</sup> tnúhu-gá.

14 Te vá cúñhu-o sá dúcá<sup>n</sup> quíde cue téè-án, chi mee sàcúhná quíde-xí sá cúu-xí dàtná ñ<sup>n</sup> espíritú xínú cuèchi núú ío váha càa ndecu Yá Ndiõxí dico ñá ndàá sá xínú cuèchi-xí xíá<sup>n</sup>.

15 Te xíá<sup>n</sup> vá cúñhu-o sá cuè téè xínu cuèchi núu-xí quíde-güedé sá cúu-güedé cue téè quíde váha chi ñá ndàá sá quíde váha-güedé chi dándahú-güedé ñáyiú. Te nàcuáa ndúu nchaa sá quíde-güedé te duca<sup>n</sup> nàcháhu-güedé núú Yá Ndiõxí.

*Té Páblú ío ndòho-dé cuendá sá cúu-dé téè càhá<sup>n</sup> tnúhu Xítoho Jesucristú*

16 Te yúhú càhá<sup>n</sup> tucu-í dóho-ndo sá vǎ cáni iní-ndó sá yúhú cúu-í ñ<sup>n</sup> téè càhá<sup>n</sup> lúcú càhá<sup>n</sup> duha, te núu dava-ndo dùca<sup>n</sup> sani iní-ndó dico chí cáda ndèe iní cundedóho-ndo tnúhu na càhá<sup>n</sup>-í cuendá duca<sup>n</sup> tnàhá-í cada nínu-í mée-í.

17 Te vitna na càhá<sup>n</sup>-í dàtná càhá<sup>n</sup> ñ<sup>n</sup> téè ñá túu cùtnuní iní-xí, chi tnúhu càhá<sup>n</sup>-í ñá túu ñ<sup>n</sup>-ni cuu-xí ndihí tnúhu Xítoho Jesucristú, chi vitna càhá<sup>n</sup>-í nàcuáa cada nínu-í mée-í.

18 Te ío cuéhé ñáyiú quíde nínu mee-xi cuendá nchaa sá ío ñuyíú-a te xíá<sup>n</sup> núu tnàhá-í cuñí-í cada nínu-í mée-í.

19 Chi cùtnuní sá nchòhó quíde ndèe iní-ndó sácúndedóho-ndo nchàa tnúhu càhá<sup>n</sup> cue téè càhá<sup>n</sup> lúcú càhá<sup>n</sup> duha, te duca<sup>n</sup> quíde ndee iní-ndó sácúndedóho-ndo tnúhu càhá<sup>n</sup>-güedé chi càchí-ndó sá ío túha-ndo.

20 Te nchòhó, quíde ndee iní-ndó tní-ndo nchaa tnúhu càhá<sup>n</sup> cue téè quíde yica ñaha xii-ndo sá cúnú cuèchi-ndo núu-güedé, te xicá<sup>n</sup>-güedé nándi sá xicá<sup>n</sup>-güedé núu-ndó, te tàxi tnuní ñáhá-güedé xii-ndo, te quíde-güedé sá ío cùnúu-güedé ndécú ndihí ñaha-güedé xii-ndo, te càniha-güedé xii-ndo, te cuèi nchaa xíá<sup>n</sup> quíde ñaha-güedé xii-ndo dico quíde ndee-ni iní-ndó.

21 Te nchòhó càchí-ndó sá cúu-ndí cue téè ñá túu ní cùyí cada nándi sá cáda, te ndàá chi ñá túu ñ<sup>n</sup>-ni cuu-ndí ndihí cue téè duca<sup>n</sup> xíquide.

Dico núu cue téè-án cùyí-güedé quíde nínu-güedé mée-güedé, te tnàhá-í cùyí-í duca<sup>n</sup> càda-í. Te sá dúhá càhá<sup>n</sup>-í te càhá<sup>n</sup>-í dàtná ñ<sup>n</sup> téè ñá túu cùtnuní iní-xí.

22 Te núu quíde cahnu-güedé mée-güedé cuendá sá càhá<sup>n</sup>-güedé tnúhu hèbreú, te yúhú tucu ñ<sup>n</sup>-ni téè càhá<sup>n</sup> tnúhu hèbreú cúu-í, àdi quíde cahnu-güedé mée-güedé cuendá sá cúu-güedé cue téè isràél, te yúhú tucu tnàhá-í cúu-í téè isràél, àdi quíde cahnu-güedé mée-güedé cuendá sá cúu-güedé ñani tnàhá ndíi Àbrahám, te tnàhá yúhú cúu-í ñani tnàhá ndíi Àbrahám tucu.

23 Àdi quíde cahnu-güedé mée-güedé cuendá sá sání iní-güedé sá díú núú Xítoho Jesucristú xínú cuèchi-güedé, dico yúhú ío-gá xínú cuèchi ndisa-í núu-gá. Te sá dúhá quíde cahnu-í mée-í te càhá<sup>n</sup>-í dàtná ñ<sup>n</sup> téè ñá túu cùtnuní iní-xí, te yúhú cúu-í ñ<sup>n</sup> téè ío-gá quíde chiu<sup>n</sup>-gá dàcúxí cuè téè-án, te vǎi xito ní cuu càniha ñáyiú xii-í, te vǎi xito ní cuu chihí ñáhá-yu vecaá xii-í, te vǎi xito ní cuu càcu càcu cahni ñaha ñáyiú xii-í.

24 Te cue ñáyiú isràél ní canihá-yu xii-í úhú<sup>n</sup> xito, te ndi tnàhá ñ<sup>n</sup> ñ<sup>n</sup> xito ní canihá-yu ní dáquèe-yu ócò sáhú<sup>n</sup> cúmí ñí sàtá-í.

25 Te úní xito ní caniha tucu ñáyiú xii-í ndihí carrutí, te ñ<sup>n</sup> xito ní sáha yúú ñáhá-yu xii-í, te ní cuu úní xito quèe naa bàrcú xití ndute òré sácúhu<sup>n</sup>-í, te ñ<sup>n</sup> xito ío ní ndòho-í ní xíndecu-í ñ<sup>n</sup> nduu ñ<sup>n</sup> niú núu ndute làmár.

26 Te ío titní xichi ní cuu xica cuu-í, te dava xichi ní càcu cuido ñaha ndute ñuhu xii-í, te dava xichi ní càcu duhu ñadúhú nchaa ndachù<sup>n</sup>-í, te dava xichi ní càcu cada ñaha cuè ñáyiú cùu ndi mee-í ñ<sup>n</sup> sá cáda ñáhá-yu xii-í, te ñ<sup>n</sup>-ni duca<sup>n</sup> ñí càcu cada ñaha tucu cue ñáyiú ñá túu cùu ndi mee-í ñ<sup>n</sup> sá cáda ñáhá-yu xii-í ní cùu, te

cuëi xití ñuú te cuëi xití yucu căcu căcu cada ñaha ñăyiu xii-í ñ<sup>n</sup> sá cáda ñáhá-yu, te ñu-ni duca<sup>n</sup> căcu căcu quini-í tnúndòho oré ñúhù-í bàrcú cuáhá<sup>n</sup> núú ndute làmár. Te cue ñăyiu cächí sá ndécú ìchi Xítóhó Jesucristú te ñá ndáá căcu căcu cada ñáhá-yu xii-í ñ<sup>n</sup> sá cáda ñáhá-yu.

27 Te ío ndòho-í cuendá chiu<sup>n</sup> quide-í chi ío xàú-í, te ní cuu vai xito ñá túú xidí-í, te titní xito ní cuu xihí víhì-í docó, te titní xito ní cuu yìchí-í ndute, te titní xito ní cuu ñá túú tnàhí ná xéxi-í cuendá chiu<sup>n</sup> quide-í, te titní xito ní cuu ndòho-í sá vïxi<sup>n</sup>, te titní xito ní cuu ñá túú nihí-í dóó cuihnu-í.

28 Te ñá díú-ní xiă<sup>n</sup> chi ñ<sup>n</sup> nduu ñ<sup>n</sup> nduu ío sàni iní-í cuendá nchaa ñăyiu ndècu ìchi Xítóhó Jesucristú xíndecu nchaa xichi.

29 Te ndéda-ni càa ñăyiu ñá túú nihí ndéé cùndecu ìchi Xítóhó Jesucristú, te ío cùndahú iní-í chi sànuu sá tnàhá-í ñá túú nihí ndéè-í cundecu-í ìchi-gá sá dúcá<sup>n</sup> quidé-yu. Te núu ñ<sup>n</sup> ñăyiu quidé-yu sá ñ<sup>n</sup> nchóhó ñăyiu ndècu ìchi Xítóhó Jesucristú quidé-ndó ñ<sup>n</sup> sá ñà túú tàú-ndó càda-ndo te vá cúú váha iní-í chi cudéè<sup>n</sup>-í.

30 Te núu xìni ñuhu-xi sá cáda càhnu-í mée-í, te cuu duca<sup>n</sup> càda-í te cáhá<sup>n</sup>-í mee-ni cuendá nchaa sá quidé nàcuáa ñá túú nihí ndéé yiqui cuñú-í.

31 Te Dútú Ndiöxí Yaa cúú Tătá Xítóhó Jesucristú nàhá-gă sá yúhú cáhá<sup>n</sup> ndáá-í núú-ndó, te ñu-gá tàú-gá cachí-ó sã ío càhnu cuu-gá ni caa ni quíhí<sup>n</sup>.

32 Te cútnàhá ní xíndecu-í ñuú Dàmascú te tée cùu gobiernú tée cùndihí tée yíndaha ñăyiu nàni Aretás ní taxi ndecu-dé cue tée ní xíndedí yuyèhe sá ñúhú dòco ñuú cuendá òre quee-í te tñi ñaha-güedé xii-í ní cùu.

33 Dico yúhú ní queè-í ñ<sup>n</sup> xití tídihi, te cue ñăyiu cùndihí ñaha xii-í ní queñuhu ñáhá-yu ndàa ventaná nchí yiqui naha sã ñúhú dòco ñuú-á<sup>n</sup>, te duca<sup>n</sup> te ní cácu-í ñá túú ní ndàcu-güedé tñi ñaha-güedé xii-í.

## 12

*Té Păblú cáhá<sup>n</sup>-dé sá ío vii càa sá ñi dánèhé núú ñáhá Xítóhó Jesucristú xii-dé*

1 Te ñá túú ndéé nándihí-xi sá cáhá<sup>n</sup> váha-o cuendá mée-ó, dico vitna xìni ñuhu-xi duca<sup>n</sup> càda-í chi cáhá<sup>n</sup>-í nàcuáa ní quide ñaha Xítóhó Jesucristú xii-í, chi ní quide-gá sá ñi cutnùni iní-í nàcuáa ndùu tnúhu-gá, te vai núú sã ñi dánèhé núú ñáhá-gă xii-í.

2 Te yúhú xìni-í ñ<sup>n</sup> tée sàndáa iní ñáhá xii Xítóhó Jesucristú, te sa ní cuu úxícúmí cuíá sã tée-á<sup>n</sup> ñi sáá-dé ndéé andiú cùu uní, te ñá túú xìni-í te núu ndihí yiqui cuñú-dé ní sáá-dé àdi ñáhá, chi ñ<sup>n</sup>dii díi-ni Yá Ndiöxí nàhá-gă te núu nása càa-dé ní sáá-dé.

3 Te yúhú cáhá<sup>n</sup> ndáá-í cuendá tée-á<sup>n</sup>, dico dàtná ní cachí-í sá ñà túú xìni-í te núu ndihí yiqui cuñú-dé ní sáá-dé andiú àdi ñáhá, chi mee Yá Ndiöxí nàhá-gă te núu nása càa-dé ní sáá-dé.

4 Te tée-á<sup>n</sup> ñi sáá-dé ñ<sup>n</sup> xichi núú ío váha càa andiú, te yacá<sup>n</sup> ní xíndedóho-dé tnúhu mee-ni sã cúú-xi cuendá mée-dé, te tnúhu-á<sup>n</sup> vã cúú tnàhí cáhá<sup>n</sup>-dé núú ñi ñ<sup>n</sup> ñăyiu.

5 Te yúhú quidé ñinu-í tée-á<sup>n</sup>, dico mee-í ñá túú cáhá<sup>n</sup> váha-í cuendá-í cuendá cada ñinu-í mée-í, chi cáhá<sup>n</sup>-ni mee-ni cuendá nchaa sá quidé nàcuáa ñá túú nihí ndéé yiqui cuñú-í.

6 Te núu dícó yúhú cuñi-í te cuu cáhá<sup>n</sup> váha-í cuendá-í cuendá cada ñinu-í mée-í, te núu duca<sup>n</sup> na cáhá<sup>n</sup>-í te ñá túú cùu-xi ñ<sup>n</sup> tnúhu neñúú cáhá<sup>n</sup>-í, chi cùu-xi ñ<sup>n</sup> sá cáhá<sup>n</sup> ndáá-í te núu na cáhá<sup>n</sup>-í. Dico vá dúcá<sup>n</sup> càda-í chi cuñi-í sá nchòhó cada cuendá-ndó nàcuáa ndùu tnúhu cáhá<sup>n</sup>-í ndihí nàcuáa quide-í, te duca<sup>n</sup> mée-ndo cáhá<sup>n</sup>-ndó te núu ná tée cùu-í, te ñá díú sã yúhú cáhá<sup>n</sup> váha-í cuendá mée-í cuendá nchòhó cachí-ndó sã ío cùnuu-í.

7 Te sã ñi dánèhé núú ñáhá Xítóhó Jesucristú xii-í cúú-xi sã xidó ío váha, te cuendá sã vã cáda càhnu-í mée-í ñuú xiă<sup>n</sup> Xítóhó Jesucristú ní quide-gá duha ndòho yiqui cuñú-í vitna. Te sã dúcá<sup>n</sup> quide ñaha-gă xii-í te xiă<sup>n</sup> sácuíhná ñi nihí-xi ìchi càhnu dan-dòho ñaha-xi xii-í.

<sup>8</sup> Te ní cuu úní xito càhá<sup>n</sup> ndàhú-í núú Xítohó Jesucristú sá ná cáda-gã nàcuáa vá ndóhó-gã yiqui cùñú-í.

<sup>9</sup> Dico mee-gã càchí-gá xii-í: “Yúhú ío cùndahú iní ñàhà-í xii-n chindee ñaha-í, te ñá túú nã cúmăní xii-n, te cùtnuní sá ïo-gá chindèe-í cue ñáyiu ñá túú nihí ndéé cùndecu”, duha ní cachí-gá xii-í. Te xiã<sup>n</sup> núu yúhú ío cùdíí iní-í sá ñá túú nihí ndéè-í ndécù-í, chi díu cuendá xiã<sup>n</sup> Xítohó Jesucristú ñá túú dàña nihnu ñaha-gá xii-í chindèe ñaha-gá.

<sup>10</sup> Te xiã<sup>n</sup> núu cùdíí iní-í sá dúhá ñá túú nihí ndéè-í ndécù-í, te cùdíí tucu iní-í cuendá nchaa tnúhu cuèhé tnúhu duha càhá<sup>n</sup> ñáyiu cuendá-í, te cùdíí iní-í cuendá nchaa sá ndóhò-í, te cùdíí tucu iní-í cuendá sá quidé ñaha ñáyiu xii-í, te cùdíí tucu iní-í cuendá nchaa dáva-gá sá ndóhò-í cuendá Xítohó Jesucristú. Te òré ñá túú nihí ndéè-í te Xítohó Jesucristú chindèe ñaha-gá xii-í nihí ndéè-í.

*Té Păblú ío sàni iní-dé cuendá cue ñáyiu xindecu ichi Xítohó Jesucristú ndécú ñúú Còrintú*

<sup>11</sup> Te cùu-í dàtná ï<sup>n</sup> téé ñá túú cùtnuní iní-xi sá dúhá càhá<sup>n</sup> váha-í cuendá-í, te duca<sup>n</sup> quide-í chi mee-ndo quide-ndo sá dúcá<sup>n</sup> cãhá<sup>n</sup>-í, dico mee-ndo tàú-ndó cãhá<sup>n</sup> váha-ndo cuendá-í ní cùu. Te dáva cue téé ío quide cahnu-güedé méé-güedé, te càchí-güedé sá Xítohó Jesucristú ní táuchíú<sup>n</sup>-gã sá càhá<sup>n</sup>-güedé tnúhu-gá, dico yúhú cúnúu-gá-í dàcúxí cuè téé-á<sup>n</sup> cuèi ñá túú vëdana ná cùu-í ndécù-í ñuyú-a.

<sup>12</sup> Te cùtnàhá ní xindecu ndihí ñaha-í xii-ndo ío ní quide càhnu iní-í nándi sá ñí yáha-í ní quide-í chiú<sup>n</sup> Xítohó Jesucristú sá cúu-xí-ndó. Te ní chindee ñaha-gá xii-í ní quide-í tñní núú sã vã yõ tnahí ndàcu cada te ní cuñúhu-ndo, te sá dúcá<sup>n</sup> ñí chindee ñaha-gá xii-í ní cutnùní iní-ndó sã yúhú cúu ndisa-í ï<sup>n</sup> téé ní cachí Xítohó Jesucristú sá càhá<sup>n</sup>-í tnúhu-gá.

<sup>13</sup> Te yúhú ï<sup>n</sup>-ni quide ndihí ñaha-í xii-ndo ndihí nchaa dáva-gá cue ñáyiu ndècu ichi Xítohó Jesucristú, te dícó-ni sá yúhú ñá túú ní cuñí-í

taxi-ndo sã xíní ñùhu-í dàtná ní quide-í dáva-gá-yu. Te núu ñá túú ní quide váha-í sá dúcá<sup>n</sup> ñí quide-í ñá túú ní cuñí-í chindee ñaha-ndo te chí cáda càhnu iní ñáhá xii-í.

<sup>14</sup> Te vitna sa ndècu túha-í sá quixí-í núú ndécú-ndó, te sá quixí còto ñaha tucu-í xii-ndo cùu-xi xito cuu úní sá quixí-í, te cuñí-í sá vã dándihú-ndó iní-ndó ndècu-ndo sá táxí-ndó cùu xii-í, chi ñá díú xiã<sup>n</sup> ndéé iní-í chi mee-ndo ndéé iní-í quixi-í. Te duha càhá<sup>n</sup>-í chi nchòhó xíní-ndó sã cuè téé cùu tátá sãñaha-güedé sá cúu-xi cuè déhe-güedé te ñá díú cuè déhe-güedé sãñaha-güedé sá cúu-xi mèe-güedé.

<sup>15</sup> Te yúhú ío váha cùu iní-í dandòñuhu-í sá ndécú ndihí-í nàcuáa ndacu-í chindee ñaha-í xii-ndo cùndecu váha-ndo sã cúu-xi Yã Ndiõxí chi ío cùdíí iní-í, te cuèi na cùu-í sá cuendá-ndó, chi ío cùu iní ñàhà-í xii-ndo, te sá dúcá<sup>n</sup> cùu iní ñàhà-í xii-ndo, te sànuu sá nchòhó ñá túú cùu iní ñáhá càvihu-ndo xii-í.

<sup>16</sup> Te ñaha-ndo sá ñá túú ní dándihú-í iní-ndó nã taxi-ndo cùu xii-í, dico dáva-ndo càchí-ndó sã ïo váha ní xito-í nàcuáa ní quide-í nàcuáa ní dándahú ñàhà-í xii-ndo.

<sup>17</sup> Te chí càhá<sup>n</sup> te núu yúhú ní dándahú ñàhà-í xii-ndo ndihí cue téé ní tendaha-í ní quixi coto ñaha xii-ndo.

<sup>18</sup> Te ní càhá<sup>n</sup> ndàhú-í núú tẽ Títú ndihí núú ñngá tucu téé ndècu ndihí-o ichi Xítohó Jesucristú ní quixi coto ñaha-güedé xii-ndo. Te nchòhó cùtnuní iní-ndó sã tẽ Títú ñá túú ní dándahú ñáhá-dé xii-ndo, te duca<sup>n</sup> chí ï<sup>n</sup>-ni sàni iní-ndí te ï<sup>n</sup>-ni quide-ndí.

<sup>19</sup> Te cudana te sàni iní-ndó sã sã dúhá càhá<sup>n</sup>-ndí te tàunihnu-ndí méé-ndí, dico ñá díú dùca<sup>n</sup> quee-xi tnúhu càhá<sup>n</sup>-ndí, chi càhá<sup>n</sup>-ndí nàcuáa tàú-xi càhá<sup>n</sup>-ndí chi ndècu ndihí-ndí Xítohó Jesucristú, te mee Yã Ndiõxí ñáhá ndáá-gá nàcuáa ndùu tnúhu càhá<sup>n</sup>-ndí, te nchaa sá càhá<sup>n</sup>-ndí cúu-xi cuendá nchòhó cue ñáyiu ío cùu iní-ndí, te càhá<sup>n</sup>-ndí nàcuáa cundecu váha-ndo ichi Xítohó Jesucristú.

<sup>20</sup> Te ío sàni iní-í cuendá-ndó chi na cuáhá<sup>n</sup> te òré quixi-í quixi coto ñaha-í

xii-ndo, te ñá túú quide-ndo nacuaáa cuu váha iní-í, te sá ducá<sup>n</sup> te yúhú cáhá<sup>n</sup>-í nàcuáa vá cúú vâha iní-ndo, te duca<sup>n</sup> ïo sàni iní-í cuendá-ndó chi na cuáhá<sup>n</sup> òré quexìo-í te nàá-ndó, àdi ndecu-ndo ichi cuédú íní, àdi cudéé<sup>n</sup> núú tnáhá-ndó, àdi ñá túú cùu ì<sup>n</sup>nuu-ndo ndecu-ndo, àdi cáhá<sup>n</sup> cuèhé-ndó cuendá tnàha ñáyi-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusa<sup>n</sup> dóho tnàha-ndo.

<sup>21</sup> Te ïo sàni iní-í cuendá-ndó chi na cuáhá<sup>n</sup> òré quixi-í, te Yá Ndiöxí cada-gá te cucaha<sup>n</sup> núú-í sá cuendá-ndó, te ïo ndíhú iní-í cuendá-ndó te núu vátá dáñá-gã-ndó nchàa sá cuèhé sá dúhá nĩ ngúita-ndo quide-ndo ndéé sanduu, te vâi-ndo ní ngúita-ndo dùca<sup>n</sup> quide-ndo, chi ndècu-ndo ichi dîí ìní te nândi-gá nchaa sá cuèhé sá dúhá quide-ndo, te duca<sup>n</sup> ïo ndíhú iní-í te núu vátá dáñá-gã-ndó nchàa xiá<sup>n</sup>.

### 13

#### *Tnúhu ndéé núú nĩ ndihí-ná*

<sup>1</sup> Te sá quixi-í vitna núú ndécú-ndó cùu-xi xito cuu úní sá quixí còto ñaha-í xii-ndo. Te càchí tnúhu-í xii-ndo sã òré cundáá cuéchi-ndo te canehe núú ùú àdi úní ñáyi-ú cáhá<sup>n</sup> ndáá nàcuáa ndùu cuéchi-ndo.

<sup>2</sup> Te yúhú sa ní cáhá<sup>n</sup>-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te dîu-ni duca<sup>n</sup> càhá<sup>n</sup> tucu-í dóho-ndo vitna vátá quixí tucu-gá-í quixi coto ñaha-í xii-ndo. Te nchòhó ñáyi-ú ní cunduu nĩ ngúita quide nchaa sá cuèhé sá dúhá, tenàá ñáhà-í xii-ndo òré quexìo-í te núu vátá dáñá-gã-ndó nchàa sá cuèhé sá dúhá quide-ndo te tnàhá nchaa dava-gã-ndó tènàá ñáhà-í xii-ndo.

<sup>3</sup> Te nchòhó cuiní-ndó quini-ndó núu ndáá sá quidè-í núú Xítohó Jesucristú càhá<sup>n</sup>-í yuhu-gá, dico dàvá-á<sup>n</sup> cutnùní ndáá iní-ndó. Te Xítohó Jesucristú quidè-gã nàcuáa cutnùní iní-ndó sã ïo cahnu cuu-gá te ñá túú quide-gá dàtná quidè ì<sup>n</sup> ñáyi-ú ñá túú nihí ndéé cundecu.

<sup>4</sup> Te Xítohó Jesucristú ní ndoho-gá dàtná ì<sup>n</sup> ñáyi-ú ñá túú nihí ndéé cundecu, chi ní sahani ñaha-güedè xii-gá núú cùrúxí dico mee Yá Ndiöxí ní quide-gá ní nihí ndéé Xítohó Jesucristú ní ndoto-gá ndécú-gã vitna, te tnàhá nchúhú tucu duca<sup>n</sup> yâha-ndí ñá túú nihí ndéé-ndí cundecu-ndí, dico mee Yá Ndiöxí chindè ñaha-gá xii-ndí nihí ndéé-ndí ndécú-ndí cuendá sá ndécú ndihí-ndí Xítohó Jesucristú, te xiá<sup>n</sup> núu ndàcu-ndí quidè-ndí nàcuáa tau-xi cunduu sá cúú-xí-ndó.

<sup>5</sup> Te chí cáda cuendá váha te núu ndisa sá sàndáá iní-ndó tnúhu Xítohó Jesucristú, te núu ndáá sá ndécú-ndó ìchi-gá te cùtnuní iní-ndó sã ndécú-ndó ndihí-gá.

<sup>6</sup> Te cuiní-ndí sá nchòhó cutnùní ndáá iní-ndó sã nchúhú ndécú ndihí ndisa-ndí Xítohó Jesucristú.

<sup>7</sup> Te nchúhú càhá<sup>n</sup> ndihí-ndí Yá Ndiöxí cuendá-ndó cuendá sã vâ cáda-ndó nĩ ì<sup>n</sup> sá cuèhé sá dúhá, te vá cání ìní-ndó sã sà ducá<sup>n</sup> càhá<sup>n</sup> ndihí-ndí-gá cuendá-ndó, te cuiní-ndí sá nchòhó cutnùní iní-ndó sã nchúhú ïo ndècu yiñuhu-ndí núú-gã, te ñáhá chi càhá<sup>n</sup> ndihí-ndí-gá cuendá-ndó chi cuiní-ndí sá nchòhó cada váha-ndo cundecu-ndo cuéi sàni iní-ndó sã nchúhú cúú-ndí cue téé ñá túú ndècu yiñuhu núú-gã.

<sup>8</sup> Te nchúhú mee-ni càhá<sup>n</sup> váha-ndí cuendá tnúhu ndáá tnúhu Yá Ndiöxí, te ñá túú càhá<sup>n</sup>-ndí ì<sup>n</sup> tnúhu sã ñá túú tau-xi cáhá<sup>n</sup>-ndí cuendá tnúhu-á<sup>n</sup>.

<sup>9</sup> Te cùdí ìní-ndí sá ñá túú-gã xíní ñùhu-xi cada-ndí nàcuáa nihí ndéé-ndí tenàá ñáhá-ndí xii-ndo càhá<sup>n</sup>-ndí dóho-ndo, chi nchòhó sa ní nihí ndéé-ndó ndècu-ndo ichi-gá. Te nchúhú càhá<sup>n</sup> ndihí-ndí Yá Ndiöxí cuendá-ndó cuendá sá nchòhó cundáá-ndó cundecu-ndo ñá túú-gã ná cumání-ndó núú-gã.

<sup>10</sup> Te xiá<sup>n</sup> núu duha ndùu nchaa tnúhu téé-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sã òré ná cundecu ndihí ñaha-í xii-ndo te vá ïo nihí cáhá<sup>n</sup>-í dóho-ndo nàcuáa ndùu tnúhu ndee ìní ní taxi Xítohó Jesu-

crìstú ndécú ndìhi-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhí<sup>n</sup>, te ñá díú cuendá sá cánúichi ñaha-í xii-ndo cuíta nihnu-ndo.

<sup>11</sup> Te vitna nchaa nchòhó ñáyiú ndècu ndìhi-ndí ichi Xítóhó Jesucrìstú ío quide ndee ìní ñáhá-ndí xii-ndo, te ío chí ndúcú nàcuáa cada-ndo cùndáá-ndó núú Yá Ndiõxí cuendá sá ñà tuú tnàhí-gá ná cùmání-ndó núú-gã, te ndee ndèe cada ìní-ndó cùndecu-ndo, te chí cúú ì<sup>n</sup>nuu cundecu ndìhi tnaha, te duca<sup>n</sup> te Yá Ndiõxí cundecu ndìhi ñaha-gã xii-ndo chí ío cùu ìní ñáhá-gã xii-o, te diu-gá quidé-gã ío váha cùu ìní-ó ndècu-o.

<sup>12</sup> Te ndìhi tnúhu yiñùhu chí cáda ndèe ìní tnáhá.

<sup>13</sup> Te nchaa ñáyiú cùu cuendá Yá Ndiõxí ndécú ìha quide ndee ìní ñáhã-yu xii-ndo.

<sup>14</sup> Te xìcá<sup>n</sup> táhú-ndí núú Xítóhó Jesucrìstú sá ío na chìndee chítúu ñaha-gã xii-ndo. Te mee Yá Ndiõxí ná cáda-gã nàcuáa cutnùní ìní-ndó sá ío cùu ìní ñáhá-gã xii-ndo, te Espíritú-gá cundee cùu cahnu ìní-ndó cùndecu-ndo. Te duca<sup>n</sup> na cùnduu. Te ío chí cáda ndèe ìní-nã vitna.



## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU DISTRITÚ GÁLACIÁ

*Té Päblú cádüha-dé tutú quihi<sup>n</sup> ndaha nchaa ñáyiú sàndáá iní ñáhá xii Xítohá Jesucristú ndécú dīstritú Gálaciá*

<sup>1</sup> Te yúhú té Päblú ní tendaha ñaha Xítohá Jesucristú, ndihi Dútú Ndiöxí véxi-í càhá<sup>n</sup>-í tnúhu-gá. Te diu Yá Ndiöxí ní dándótó-gã Xítohá Jesucristú Yaá ní xíhí ní cùu. Te cächí tnúhu-í xii-ndo sã ñà díú ñáyiú ñuyíú-a ni tendaha ñaha xii-í véxi-í, te ni Yá Ndiöxí te ni Xítohá Jesucristú ñá túú ní xãhá<sup>n</sup>-gã xii ñáyiú quixí-yu cachí tnúhu-yu nàcuáa cada-í.

<sup>2</sup> Te yúhú té Päblú cádüha-í tutú-a ndihi nchaa dava-gã ñáyiú ndècu ichi Yá Ndiöxí ndécú ndihi-í iha cuendá daquixi-í ndaha nchòhó ñáyiú sàndáá iní ñáhá xii Xítohá Jesucristú ndécú dīstritú Gálaciá.

<sup>3</sup> Te xicá<sup>n</sup> táhù-í núú Dútú Ndiöxí, ndihi núú Xítohá Jesucristú sá ïo na chindee chitúu ñaha-gã xii-ndo, te duca<sup>n</sup> ndi nduú-gã ná cádá te ïo váha cuu iní-ndó cūndecu-ndo.

<sup>4</sup> Te Xítohá Jesucristú ní xíhí-gã sá cuendá nchaa cuèchi nchoo cuè ñáyiú ndècu ñuyíú-a. Te duca<sup>n</sup> ñi quide-gã, chi cuini-gã sá vã cūndecu-o ichi cuehé ichi duha. Te duca<sup>n</sup> ñi cuu, chi Dútú Ndiöxí duca<sup>n</sup> ñi cuini-gã cunduu.

<sup>5</sup> Te ïo chí ná ndàcá<sup>n</sup> táhù-ó núú Yá Ndiöxí cuendá sá ïo càhnu cuu-gã, te diu-ni duca<sup>n</sup> càda-o ni caa ni quihi<sup>n</sup>! Te duca<sup>n</sup> na cūnduu.

*Mee-ni tnúhu Xítohá Jesucristú cúu-xi tnúhu sá càhá<sup>n</sup> nàcuáa naníhí tàhù-ó*

<sup>6</sup> Te ïo cūnúhu-í cúu chi ïo ndihi ní dāñá-ndó ichi Yá Ndiöxí. Te Yaá-á<sup>n</sup> ñi càhá<sup>n</sup> ñáhá-gã xii-ndo, chi Xítohá Jesucristú ïo ní cundàhú iní ñáhá-gã ní quide váha ñaha-gã xii-ndo, te vitna dàcuaha tucu-ndo ñngá tnúhu,

te cächí-ndó sã xĩã<sup>n</sup> dàcácu nihnu ñaha-xi xii-ndo núú ùhú núú ndàhú.

<sup>7</sup> Dico ñáhá, chi ñá túú-gã tnúhu sá dàcácu nihnu ñaha xii-o núú ùhú núú ndàhú. Te dicó-ni sá ïo ñáyiú véxi dàticá nuu ñahá-yu xii-ndo dānehé ñáhã-yu tnúhu sá dácuíta nihnu ñaha xii-ndo, chi tnúhu-á<sup>n</sup> ñà túú cūu-xi tnúhu Xítohá Jesucristú.

<sup>8</sup> Te yúhú càhá<sup>n</sup>-í tnúhu Xítohá Jesucristú, dico núú ïo ñáyiú véxi dānehé ñáhá xii-ndo ñngá tnúhu sá ñà túú ní dānehé ñáhà-í xii-ndo, te nchòhó cachí-ndó sã ñáyiú-á<sup>n</sup> nacháhu-yu núú Yá Ndiöxí sá dúcá<sup>n</sup> quidé-yu. Te cuèi yúhú, te núu na dàma-í tnúhu dānehé ñáhà-í xii-ndo, te diu-ni duca<sup>n</sup> càhá<sup>n</sup>-ndó sã nácháhu-í núú-gã te núu duca<sup>n</sup> na càda-í. Àdi te núu ñ<sup>n</sup> espíritú xínú cuèchi núú-gã véxi-xi càhá<sup>n</sup>-xi ñngá tnúhu sá ñà túú ní dānehé ñáhà-í xii-ndo nàcuáa naníhí tàhù-ndó ñá, te diu-ni duca<sup>n</sup> càhá<sup>n</sup>-ndó sã nácháhu-xi núú Yá Ndiöxí te núu duca<sup>n</sup> na càda-xi.

<sup>9</sup> Te diu-ni duha sa ní dānehé ñáhà-í xii-ndo sã núu véxi ñáyiú dānehé ñáhá ñngá tnúhu sá ñà túú ní dānehé ñáhà-í xii-ndo nàcuáa naníhí tàhù-ndó ñá, te cachí-ndó sã ñáyiú-á<sup>n</sup> nacháhu-yu núú Yá Ndiöxí sá dúcá<sup>n</sup> quidé-yu, duha ní cachí-í xii-ndo.

<sup>10</sup> Te duha nduu tnúhu càhá<sup>n</sup>-í chi nchòhó sa xini-ndó sã yúhú cuini-í sá Yá Ndiöxí càhá<sup>n</sup>-gã sá quidé vãha-í ndécù-í, te ñá díú sã ñáyiú ñuyíú-a cachí-yu sá quidé vãha-í, àdi sá ïo cūdíí ñi-yu nchaa nàcuáa quide-í ndécù-í. Te núu na càni iní-í cudùu-í núú ñáyiú ñuyíú-a, te ñá túú cūu-í té xinu cuechi núú Xítohá Jesucristú te núu duca<sup>n</sup> na càda-í.

*Nàcuáa ní cuu ní ngüita té Päblú càhá<sup>n</sup>-dé tnúhu Yá Ndiöxí*

<sup>11-12</sup> Te nchòhó ñáyiú ndècu ndihi-í ichi Xítohá Jesucristú cächí tnúhu-í xii-ndo sã tnúhu sá dānehé ñáhà-í xii-ndo nàcuáa naníhí tàhù-ndó cūu-xi tnúhu sá ñi cachí tnúhu mee Xítohá Jesucristú xii-í, te ñá díú ñ<sup>n</sup> ñáyiú ñuyíú-a ni càhu iní-yu tnúhu-á<sup>n</sup>, àdi dānehé ñáhã-yu xii-í, chi mee Xítohá Jesucristú ní dānehé ñáhá-gã.

13 Te nchòhó sa nìhí-ndó tñuhu nàcuáa ní xóo cada-í cútnàhá nchìcú<sup>n</sup> nihnu-í nchaa nàcuáa dàcuaha ñáyiú cùu ndi mee-í ñáyiú isràél ní cùu. Te dàvá-á<sup>n</sup> ìo ní xóo cuu úhú iní-í nchaa ñáyiú ndècu ichi Yá Ndiòxí, te nándi sá ñi xóo cada-í-yu, te ní cuiní-í danàa-í-yu ni cùu.

14 Te yúhú ío-gá ní xóo quene cáva-í ní xóo dacuàha-í nchaa sá dacuàha ñáyiú cùu ndi mee-í dàcúúxí ñáyiú ì<sup>n</sup>-ni cuíà-í ndihí-yu ni cùu, te ío-gá ní xóo cuiní-í cada ndáá-í canchicú<sup>n</sup> nihnu-í nchaa nàcuáa ní dánèhé ñáhá cuè ñani tñàhá-í ní xíndecu ndéé sanaha ni cùu.

15 Te ndéé cútnàhá vátá cácu-gã-í Yá Ndiòxí sa nèhe váha ñaha-gã xii-í cuendá sá càhá<sup>n</sup>-í tñuhu-gá, núu xíá<sup>n</sup> ní cáhá<sup>n</sup> ñáhá-gã xii-í quidè-í chiu<sup>n</sup>-gá vitna, te sá dúcá<sup>n</sup> ñi quide-gá te ío váha ní quide ñaha-gã xii-í.

16 Te òré ní cáhá<sup>n</sup> ñáhá Yá Ndiòxí xii-í te ní cachí tñuhu-gá cuendá Déhe-gá Xítohó Jesucristú. Te duca<sup>n</sup> ñi quide Yá Ndiòxí cuendá sá cuiní-gá sá cñaha-í xii ñáyiú ñá túú cùu ñáyiú isràél cuendá Yaá cúú Dèhe-gá. Te cútnàhá ní cáhá<sup>n</sup> ñáhá Yá Ndiòxí xii-í, te vá yòo ì<sup>n</sup> dìi núú-xi ni nducu tñuhu-í nàcuáa cada-í.

17 Te ní ñà túú ní sáhá<sup>n</sup>-í ñuú Jerusàlén nducu tñuhu-í núú cuè téé díhna nuu ñi tendaha Xítohó Jesucristú càhá<sup>n</sup> tñuhu-gá núu nása cada-í, chi ndihí-ni ní sáhá<sup>n</sup>-í distritú Àrabiá ní xíndecu tnaa-í te dàtnùni cuánuhú tucu-í ñuú Dàmascú.

18 Te núú ùni cuíá sã ñi cáhá<sup>n</sup> ñáhá Yá Ndiòxí xii-í, te ní sáhá<sup>n</sup> tucu-í ñuú Jerusàlén ní cáhá<sup>n</sup> ndihí-í té Pèlú, te ní xíndecu-í ndihí-dé sáhú<sup>n</sup> nduu.

19 Te tñàhá té Jàcobó ñani Xítohó Jesucristú ní cáhá<sup>n</sup> ndihí-í. Te ñá túú ní xini-í dava-gá cue téé ní tendaha Xítohó Jesucristú càhá<sup>n</sup> tñuhu-gá.

20 Te Yá Ndiòxí ndéhé ndi<sup>n</sup> ndehe caxi-gá sá ncháá tñuhu tèe-í núú tütú-a sá cúú-xi-ndó cùu-xi ì<sup>n</sup> sá ndàá.

21 Te sátá ñi sáhá<sup>n</sup>-í ñuú Jerusàlén, te dàtnùni ní sáhá<sup>n</sup>-í distritú Sìriá, ndihí distritú Cìliciá.

22 Te nchaa ñáyiú xíndecu ichi Xítohó Jesucristú ndécú distritú Jùdeá ñá túú

xini ñáhá-yu xii-í ní cùu.

23 Dico ní xóo níhí-yu tñuhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáyiú ndècu ichi Xítohó Jesucristú càhá<sup>n</sup>-dé tñuhu-gá núú ñáyiú cuendá quíndáá iní ñáhá-yu xii-gá, te diu-dé nándi sá quidé ñaha-dé, te cuiní-dé danàa ñaha-dé cuendá sá vã cóo-gã ñáyiú quíndáá iní ñáhá xii-gá ní cùu”, duha ní cachí-yu cuendá-í.

24 Te ní ngúita-yu ní cachí-yu sá ìo càhnu cuu Yá Ndiòxí cuendá sá ñà túú-gã quidè-í dàtná ní xóo cada-í.

## 2

*Té Păblú ní nìhí tñàhá-dé ndihí dava-gá cue téé càhá<sup>n</sup> tñuhu Yá Ndiòxí*

1 Te ní nútnahá úxícúmí cuíá sã ñi sáhá<sup>n</sup>-í ñuú Jerusàlén ní cáhá<sup>n</sup> ndihí-í té Pèlú, te dàtnùni ndécá-í té Bèe ní sáhá<sup>n</sup>, te tñàhá té Títú ní sáhá<sup>n</sup> ndihí-ndí-dé.

2 Te ní sáhá<sup>n</sup>-í chi mee Yá Ndiòxí ní cachí-gá sá quihí<sup>n</sup>-í. Te yacá<sup>n</sup> ní tacá mee-ni cuè téé cùnunu. Te ní xáha<sup>n</sup>-í xii-güedé nàcuáa ndùu tñuhu dànèhé-í ñáyiú ñá túú cùu ñáyiú isràél cuendá naníhí tãhú-yu. Te duca<sup>n</sup> ñi quide-í cuendá cuiní-í quini-güedé nàcuáa ndùu chiu<sup>n</sup> quide-í, chi nacuahá<sup>n</sup> cachí-güedé sá ñà túú nàndihí-xi.

3 Te té Títú téé ndècu ndihí-í chi ñá díú tèe isràél cúú-dé, dico ñá túú ní quide yica-güedé cuáha-güedé seña ñi-dé.

4 Te ñáyiú càchí sá ndécú ichi Xítohó Jesucristú te ñá ndàá sá ndécú-yu ichi-gá, ñáyiú-á<sup>n</sup> ñi chitnahá ñáhá-yu xii-ndí cuendá cuiní-yu quini-yu nása quide-ndí ndécú-ndí ichi Xítohó Jesucristú. Te duca<sup>n</sup> ñi quidé-yu cuendá sá nchùhú sa ní cácu nihnu-ndí ñá túú-gã quidé-ndí nchaa nàcuáa ní cáhá<sup>n</sup> ndi Moisés. Te cuiní-yu sá núcuíta saa tucu-ndí cada-ndí nchaa nàcuáa ní cáhá<sup>n</sup> ndi nucúndecu-ndí dàtná ní xíndecu-ndí cútnàhá vátá cácu nihnu-gá-ndí núú tñuhu-á<sup>n</sup> ni cùu.

5 Te nchúhú ñá túú tñàhí ni dàña-ndí méé-ndí dandàhú ñáhá-yu

xii-ndí. Te duca<sup>n</sup> ñí quide-ndí, chi cuení-ndí sá ñà túú ñágá tnúhu dácánuu ndihí tnúhu sá cáhá<sup>n</sup> nàcuáa naníhí tǎhú-ó ndècu ndihí-ndo.

<sup>6</sup> Te ñí ñí<sup>n</sup> tnúhu sá vǎtá quini-gá-í ñá túú ní cǎchí tnúhu cue tée cùnuu núú ñáyiú cada-í. Dico yúhú chi ñá túú ní quide cuendá-í núu cùnuu-güedé àdi ñá túú cùnuu-güedé, chi núú Yǎ Ndiǒxí ñí<sup>n</sup>-ni cùu-o nchaa-o.

<sup>7</sup> Te ní cutnùní iní-güedé sá Yǎ Ndiǒxí ní cachí-gá xii-í sá cáhá<sup>n</sup>-í tnúhu-gá núú ñáyiú ñá túú cùu ñáyiú isràél dǎtná ní quide-gá té Pèlú ní xáha<sup>n</sup>-gǎ cáhá<sup>n</sup>-dé tnúhu-gá núú ñáyiú isràél.

<sup>8</sup> Te duca<sup>n</sup> ñí cutnùní iní-güedé, chi ñí<sup>n</sup>-ni Yǎ Ndiǒxí Yaá chíndèe ñaha xii té Pèlú cáhá<sup>n</sup>-dé tnúhu-gá núú ñáyiú isràél, ñí<sup>n</sup>-ni Yaá-á<sup>n</sup> chíndèe ñaha-gá xii-í cáhá<sup>n</sup>-í tnúhu-gá núú ñáyiú ñá túú cùu ñáyiú isràél.

<sup>9</sup> Te té Jàcobó, ndihí té Pèlú, ndihí té Juáá, cue tée ío cùnuu-gá ní cutnùní iní-güedé sá Yǎ Ndiǒxí ío chíndee ñaha-gá xii-í quidè-í chíu<sup>n</sup>-gá. Te ío váha ní cáhá<sup>n</sup> ndihí ñaha-güedé xii-í, ndihí té Bèé, te ní cuu ñí<sup>n</sup>-nuu-ndí sá nchúhú quíhí<sup>n</sup>-ndí cáhá<sup>n</sup>-ndí tnúhu Yǎ Ndiǒxí núú nchàa ñáyiú ñá túú cùu ñáyiú isràél, te mee-güedé cáhá<sup>n</sup>-güedé tnúhu-gá núú ñáyiú isràél.

<sup>10</sup> Te ñí<sup>n</sup>-ni tnúhu ní cáhá<sup>n</sup>-güedé dóho-ndí te ní cachí-güedé xii-ndí sá chíndèe-ndí cue ñáyiú ndàhú, te sa duca<sup>n</sup> tnàhí sàni iní-ndí cada-ndí.

#### *Té Pǎblú cáhá<sup>n</sup>-dé dóho té Pèlú ñí<sup>n</sup> Antiòquiá*

<sup>11</sup> Te cùtnàhá ní sáhá<sup>n</sup> té Pèlú ñí<sup>n</sup> Antiòquiá yáca<sup>n</sup> ní cáhá<sup>n</sup>-í dóho-dé, chi quide-dé ñí<sup>n</sup> sá ñà túú tǎu-dé cada-dé ní cùu.

<sup>12</sup> Te quide váha-dé ní cùu chi xèxi-dé ndihí ñáyiú ñá túú cùu ñáyiú isràél, dico òré ní sáá ñí<sup>n</sup> úú ñáyiú cùndihí té Jàcobó, te òré-á<sup>n</sup> ñà túú-gǎ ní cuení-dé caxi-dé ndihí ñáyiú-á<sup>n</sup>. Te duca<sup>n</sup> ñí quide-dé chi ní yùhú-dé cue ñáyiú nchìcú<sup>n</sup> nihnu quide nchaa nacuáa ní cáhá<sup>n</sup> ndí Moisés sá vǎ cáhá<sup>n</sup> váha-yu cuendá-dé.

<sup>13</sup> Te tnàhá dava-gá ñáyiú isràél xǐndecu ichi Yǎ Ndiǒxí ñá túú quide váha-yu, chi quidé-yu dǎtná quidé té Pèlú ní cùu, te ndéé tnàhá té Bèé ní ngüita-dé duca<sup>n</sup> quide-dé ní cùu.

<sup>14</sup> Te òré ní xini-í sá ñà túú quide-güedé ndihí-yu nàcuáa cáhá<sup>n</sup> tnúhu Yǎ Ndiǒxí, te núú nchàa ñáyiú ndècu ichi Yǎ Ndiǒxí ní xáha<sup>n</sup>-í xii té Pèlú: “Yòhó cúu-n tée isràél, te ñá túú quide-n nchaa nacuáa quide ñáyiú isràél, chi quide-ni-n dǎtná quidé nchàa ñáyiú ñá túú cùu ñáyiú isràél. Te núu duca<sup>n</sup> quide-n, ¿te ná cuendá dǎnèhé-n ñáyiú ñá túú cùu ñáyiú isràél sá cǎdá-yu nchaa nàcuáa quide ñáyiú isràél?”, duha ní xáha<sup>n</sup>-í xii té Pèlú.

#### *Ñí<sup>n</sup>-ni naníhí tǎhú-ó ndihí ñáyiú isràél núu na quindáá iní-ó Xítóhó Jesucristú ndihí-yu*

<sup>15</sup> Te yúhú ndihí té Pèlú cúu-ndí ñani tnàhá ñáyiú isràél, te ñá túú ndècu-ndí ichi cuèhé ichi duha dǎtná ndécú nchàa ñáyiú ñá túú cùu ñáyiú isràél.

<sup>16</sup> Te xini-ó sǎ vǎ cùndecu-gá cuéchi-o núú Yǎ Ndiǒxí te núu na quindáá iní-ó Xítóhó Jesucristú, te ñá díú sǎ cǎnchìcú<sup>n</sup> nihnu-o cǎda-o nchaa nacuáa ní cáhá<sup>n</sup> ndí Moisés. Te tnàhá dava nchúhú ñáyiú isràél sǎndáá iní-ndí Xítóhó Jesucristú, te xǎ<sup>n</sup> cùtnùní iní-ndí sá ñà túú-gǎ cuéchi-ndí ndécú núú-gǎ, dico ñá díú sǎ ñí cǎnchìcú<sup>n</sup> nihnu-ndí ní quide-ndí nàcuáa ní cáhá<sup>n</sup> ndí Moisés, chi cuendá sá sǎndáá iní-ndí Xítóhó Jesucristú. Te vǎ yóo ñí<sup>n</sup> cachí-ó sá ñà túú ndècu cuéchi-xi núú Yǎ Ndiǒxí cuendá sá nchìcú<sup>n</sup> nihnú-yu nchaa nàcuáa ní cáhá<sup>n</sup> ndí Moisés.

<sup>17</sup> Te núu cuení-ó sǎ vǎ cùndecu cuéchi-o núú Yǎ Ndiǒxí cuendá sá sǎndáá iní-ó Xítóhó Jesucristú, te xǎ<sup>n</sup> cùtnùní iní-ó sǎ ñà túú quide váha-o. ¿Te vǎ cúu tnàhí cani iní-ó sǎ Xítóhó Jesucristú dǎnèhé ñáhá-gǎ xii-o sǎ vǎ cǎdá vǎha-o cùndecu-o!

<sup>18</sup> Te yúhú cǎchí-í sá vǎ cǎnchìcú<sup>n</sup> nihnu-gá-ó nchàa nacuáa ní cáhá<sup>n</sup> ndí Moisés, dico núu vitna cǎchí-í sá xini ñí<sup>n</sup>-ni xii cada-o nchaa nacuáa ní cáhá<sup>n</sup>

ndíi ña, te ñá túú quide váha-í núú Yá Ndiöxí te núu duca<sup>n</sup> na càda-í.

<sup>19</sup> Te yúhú duu<sup>n</sup> duu<sup>n</sup> ní cutnùní iní-í sá vǎ ndácù-í cada-í nchaa nàcuáa ní cáhá<sup>n</sup> ndíi Moisés nũu xiǎ<sup>n</sup> ní dáña-í ñá túú-gǎ nchicú<sup>n</sup> nihnu-í nchaa nàcuáa ní cáhá<sup>n</sup> ndíi cuendá sá cuíní-í cundecu-í sá cúú-xí Yá Ndiöxí.

<sup>20</sup> Te Xítohó Jesucristú ní xihí-gǎ cuendá-í, dico dàtná tnúhu sá tnàhá-í ní xihí ndíhi-gǎ, chi ñá cúú-gǎ cada-í nchaa nàcuáa sàni iní mée-í, chi Xítohó Jesucristú-nǎ ndécú ndíhi ñaha-gǎ xii-í táxi tnùní ñáhá-gǎ. Te vitna ndècu-í ñuyú-a, te ío sàndáá iní-í Xítohó Jesucristú Déhe Yá Ndiöxí, te chindee ñaha-gǎ xii-í. Te diu-ni Xítohó Jesucristú ío cùu iní ñáhá-gǎ xii-í nũu ní xihí-gǎ núú cùrúxí sá cuendá-í.

<sup>21</sup> Te vitna ñá túú dàquee tíhù-í sá váha ní quide ñaha Yá Ndiöxí xii-í, chi núu ni ndàcu-o vá cùndècu cuéchi-o núú Yá Ndiöxí cuendá sá nchicú<sup>n</sup> nihnu-o quide-o nchaa nàcuáa ní cáhá<sup>n</sup> ndíi Moisés ní cùu ña, te àú<sup>n</sup> nǎ cuu ní xihí Xítohó Jesucristú ní cùu te núu duca<sup>n</sup>.

### 3

*Vá dáña ndèé-ó quèndáá iní-ó tnúhu Xítohó Jesucristú*

<sup>1</sup> Te nchòhó ñáyiú distritú Gàlaciá, ñáyiú sa xĩndecu ichi Xítohó Jesucristú, ¿ná cuendá ío ñí iní-ndó ñá cuíní-ndó tnè-ndo nchaa tnúhu càhá<sup>n</sup>-gǎ?, ¿te yoo ní dádǎhu ndodo iní ñáhá xii-ndo núu duca<sup>n</sup> quide-ndo? Te ñaha-ndo sá ío váha ní dánèhé ñáhá-ndí xii-ndo nàcuáa ní cuu ní xihí Xítohó Jesucristú.

<sup>2</sup> Te vitna cáhá<sup>n</sup>-ndó nũu sá nchicú<sup>n</sup> nihnu-ndo nchaa nàcuáa ní cáhá<sup>n</sup> ndíi Moisés ní níhí-ndó Espiritú Yá Ndiöxí ndécú ndíhi-ndo, àdi sá ni sàndáá iní-ndó tnúhu Xítohó Jesucristú sá ní dánèhé ñáhá-ndí xii-ndo ní níhí-ndó Espiritú-gǎ ndécú ndíhi-ndo.

<sup>3</sup> Te nchòhó ío nĩ dǐquí-ndó chi Espiritú Yá Ndiöxí tá quide váha ñaha-xi xii-ndo cuáhá<sup>n</sup> ní cùu. ¿Te náa vitna mee-nǎ-ndó cuíní-ndó

càda-ndo nàcuáa ta quide ñaha Espiritú-gǎ cuáhá<sup>n</sup> xii-ndo ni cùu-án?

<sup>4</sup> Te sàni ñí<sup>n</sup> sani úú iní-í cuendá-ndó sǎ àú<sup>n</sup> nǎ cuu nándi yáha-ndo ndècu-ndo ichi Yá Ndiöxí.

<sup>5</sup> Te xini-ndó sǎ Yá Ndiöxí ní taxi-gǎ Espiritú-gǎ ní ngúndecu ndíhi-ndo, te ní quide-gǎ sá vǎ yòo tnàhí ndàcu cada núú-ndó ní xini-ndó. Te duca<sup>n</sup> ní quide-gǎ, chi ní sàndáá iní-ndó-gǎ, dico ñá díú cuendá nchaa nàcuáa ní cachí ndíi Moisés cada ñáyiú duca<sup>n</sup> ní quide-gǎ.

<sup>6</sup> Te ndíi Àbrahám duca<sup>n</sup> ío ní sàndáá iní ndíi Yá Ndiöxí, núu xiǎ<sup>n</sup> ní cachí-gǎ sá ní cudíu ndíi núú-gǎ sá dúcá<sup>n</sup> ní quide ndíi.

<sup>7</sup> Te càchí tnúhu ndáá-í xii-ndo sǎ ncháá ñáyiú sàndáá iní ñáhá xii Yá Ndiöxí dàtná ní sàndáá iní ñáhá ndíi Àbrahám xii-gǎ, ñáyiú-án ñí<sup>n</sup>-ni cùu-yu ndíhi ndíi núú-gǎ.

<sup>8</sup> Te núú tütú Yá Ndiöxí ní ngódó tnùní tnúhu váha, tnúhu sá ní xáha<sup>n</sup> Yá Ndiöxí xii ndíi Àbrahám, te duha ní xáha<sup>n</sup>-gǎ xii ndíi: “Nchaa ñáyiú nihí ñuyú cada váha-í-yu sá cuendá-n”, duha ní xáha<sup>n</sup>-gǎ xii ndíi. Te sá dúcá<sup>n</sup> ní ngódó tnùní núú tütú Yá Ndiöxí ndéé dàvá-án, te xiǎ<sup>n</sup> cùtnùní sá sáá nduu, te cue ñáyiú ñá túú cùu ñáyiú isràél vá cùndècu-gǎ cuéchi-yu núú-gǎ te núu na quèndáá iní ñáhá-yu xii-gǎ.

<sup>9</sup> Te xiǎ<sup>n</sup> nũu nchaa ñáyiú sàndáá iní ñáhá xii Yá Ndiöxí cada váha ñaha-gǎ xií-yu dàtná ní quide váha-gǎ ndíi Àbrahám, chi ndíi-án duca<sup>n</sup> ní sàndáá iní ñáhá ndíi xii-gǎ.

<sup>10</sup> Te nchaa ñáyiú cuíní cada nchaa nàcuáa ní cáhá<sup>n</sup> ndíi Moisés cuendá sá cuíní-yu sá vǎ cùndècu-gǎ cuéchi-yu núú Yá Ndiöxí, ñáyiú-án dáña nihnu ñaha-gǎ xií-yu, chi vá ndácù-yu cada-yu nàcuáa sàni iní-yu, te duca<sup>n</sup> càda-gǎ chi quèe ndáá-xi nàcuáa càhá<sup>n</sup>-xi núú tütú-gǎ núú càchí-xi sá ncháá ñáyiú ñá túú quide nchaandi túhú nàcuáa ní cáhá<sup>n</sup> ndíi Moisés te dáña nihnu ñaha-gǎ xií-yu.

<sup>11</sup> Te núu na cànchicú<sup>n</sup> nihnu-ni-o càda-o nàcuáa ní cáhá<sup>n</sup> ndíi Moisés, te ñá túú vèdana chindee ñaha-xi xii-o nàcuáa vá cùndècu-gǎ cuéchi-o núú

Yă Ndiöxí. Te ndáá chi núú tütú-gá cächí-xi sá ncháá ñăyiu sàndáá iní ñáhá xì-gá, ñăyiu ñá túú-gă cuéchi-xi ndècu ío váha ndècú-yu núú-gă.

12 Te núu dícó ío ñăyiu quide nchaandi túhú nàcuáa ní cáhá<sup>n</sup> ndí Moisés ñá, te ñá túú xìni ñuhu-xi quindáá iní-yu tnúhu Xítohó Jesucristú, chi núú tütú Yă Ndiöxí cächí-xi sá núu dícó ío ñăyiu ndacu cada ncha nàcuáa ní cáhá<sup>n</sup> ndí Moisés ñá, te cundecu váha-yu núú Yă Ndiöxí.

13 Te tnúhu ní chídó tnùní ndí Moisés cächí-xi sá ío ndècu cuéchi-o núú Yă Ndiöxí cuendá sá ñă ndácú-ó càda-o ncha nacuáa ní cáhá<sup>n</sup> ndí, te cuendá xíá<sup>n</sup> tá dàña nihnu ñaha-gá xii-o cuáhá<sup>n</sup>. Dico Xítohó Jesucristú ní xido-gá ncha cuéchi-o cuendá sá vă dáña nihnu ñaha-gá Yă Ndiöxí xii-o. Te cächí-xi núú tütú Yă Ndiöxí: “Í<sup>n</sup> téé na càta caa-güedé ì<sup>n</sup> yutnu, te téé-á<sup>n</sup> cúú-dě téé dàña nihnu ñaha Yă Ndiöxí”, duha cächí-xi núú tütú-gá.

14 Te duca<sup>n</sup> ñă yáha Xítohó Jesucristú, chi cuíní Yă Ndiöxí sá ndùu táhú ncha ñăyiu ñá túú cùu ñăyiu isràél cundecu váha-yu dàtná ní nduu táhú ndí Àbrahám ndécú vâha ndí. Te duca<sup>n</sup> ñă yáha-gá cuendá ncha nchoo ñăyiu sàndáá iní ñáhá xì-gá ngúndecu ndíhi-o Espíritú Yă Ndiöxí sá ñă cachí méé-gă taxi-gá.

#### *Nàcuáa ní cachí Yă Ndiöxí cada-gá*

15 Te nchòhó cue ñăyiu ndècu ndíhi-í ichi Yă Ndiöxí na cächí tnúhu-í xii-ndo nàcuáa quide cue ñăyiu ñuyíú-a cuendá tecú tnùní-gá-ndó nàcuáa quide Yă Ndiöxí. Chi ñăyiu-á<sup>n</sup> òré cuíní-yu cadá-yu ì<sup>n</sup> sá cadá-yu, te díhna-gá ndátnúhu-yu te òré cúú ì<sup>n</sup>nuú-yu, te sáha firmá-yu ì<sup>n</sup> tutú te tutú-á<sup>n</sup> vă yõo ì<sup>n</sup> ndacu cáhá<sup>n</sup> sá vă nándíhi-gá-xi, te ni vă yõo-gá ndacu nágá tnúhu chido tnùní núú-xí.

16 Te duca<sup>n</sup> ñă quide Yă Ndiöxí ndíhi ndí Àbrahám, chi ní xáha<sup>n</sup>-gă xii ndí nàcuáa cada-gá, te tnúhu-á<sup>n</sup> cúú-xí cuendá méé ndí ndíhi cuendá ì<sup>n</sup> ñaní tnáhá ndí cundecu ñuyíú-a ndéé cuéé-gá. Te núú tütú-gá cächí-xi sá tnúhu-á<sup>n</sup> cúú-xí cuendá ì<sup>n</sup>-ni ñaní

tnáhá ndí te ñá díú cuendá nchaá-yu. Te ñaní tnáhá ndí téé cùu cuendá tnúhu-á<sup>n</sup> cúú Xítohó Jesucristú.

17 Te na cächí tnúhu-í xii-ndo sá Yă Ndiöxí ní quide ndáá duu<sup>n</sup>-gá ndíhi ndí Àbrahám nàcuáa cada-gá. Te sa ní cuu cúmí ciendú ócú úxí cuíá sá dúcá<sup>n</sup> ñă xáha<sup>n</sup> Yă Ndiöxí xii ndí Àbrahám, te dàtnùní ní xáha<sup>n</sup>-gă xii ndí Moisés chido tnùní ndí nàcuáa cada ñăyiu, te ncha tnúhu ní chídó tnùní ndí Moisés ñá túú dàquee tíhú-xi tnúhu sá ñă xáha<sup>n</sup> Yă Ndiöxí xii ndí Àbrahám nàcuáa cada-gá.

18 Te núu dícó cuendá ncha tnúhu sá ñă chídó tnùní ndí Moisés ní náníhí tàhú-ó ñá, te ñá túú-gă xíní ñuhu-xi cada cuendá-ó tnúhu ní xáha<sup>n</sup> Yă Ndiöxí xii ndí Àbrahám cada-gá ní cùu te núu duca<sup>n</sup>. Te ndí-á<sup>n</sup> ñă naníhí tàhú ndí chí duca<sup>n</sup> ñă cachí Yă Ndiöxí cada ñaha-gă xii ndí.

19 Te ncha tnúhu ní cáhá<sup>n</sup> ndí Moisés ní ngódó núú-xí nchícú<sup>n</sup> nihnu ñăyiu cuendá duca<sup>n</sup> cùtnuní iní-yu sá ndécú cuéchi-yu, te nchícú<sup>n</sup> nihnu-ní-yu ndéé ní sáá nduu ñă quexío Yaá cúú ñaní tnáhá ndí Àbrahám, chi Yaá-á<sup>n</sup> duca<sup>n</sup> ñă xáha<sup>n</sup> Yă Ndiöxí quixi-gá cada váha-gá ncha ñăyiu. Te ncha tnúhu ní chídó tnùní ndí Moisés, chi Yă Ndiöxí ní tendaha-gă cue espíritú xínú cuéchi núú-gă ní sáhá<sup>n</sup>-xí ní xítnúhu ñaha-xi xì ndí nàcuáa danèhé ndí ñăyiu.

20 Te Yă Ndiöxí ñá túú ní cáhá<sup>n</sup>-gá núú méé ñăyiu, chi ndí Moisés ní cáhá<sup>n</sup> ndí yuhu-gá núú-yu, dico cùtnáhá ní cáhá<sup>n</sup> ndíhi-gá ndí Àbrahám chi núú méé núú ì<sup>n</sup> ndí ndíhi-gá ní xáha<sup>n</sup>-gă xii ndí nàcuáa cada-gá.

#### *Nàcuáa ndùu ncha tnúhu ní chídó tnùní ndí Moisés*

21 Te ncha nàcuáa ní chídó tnùní ndí Moisés, ndíhi ncha nàcuáa ní xáha<sup>n</sup> Yă Ndiöxí xii ndí Àbrahám cada-gá, ñá túú dàquee tíhú tnáhá-xí. Te núu dícó náníhí tàhú ñăyiu nchícú<sup>n</sup> nihnu ncha nàcuáa ní cáhá<sup>n</sup> ndí Moisés ñá te cudíú-yu núú-gă cuendá-ni sá nchícú<sup>n</sup> nihnú-yu ncha nàcuáa ní cáhá<sup>n</sup> ndí ni cùu.

22 Te núú tùtú Yă Ndiõxí cächí-xi: “Nchaa nchòhó ñáyiú ndècu ñuyíú ndécú cuèchi-ndo”, duha cächí-xi. Te duca<sup>n</sup> cáhá<sup>n</sup>-xi cuendá quíndáá iní-ó Xítohó Jesucristú, te naníhí tǎhú-ó chi duca<sup>n</sup> ñí cachí Yă Ndiõxí cada-gá.

23 Te cútnáhá vátá cùndècu ndìhì-gá-ó tnùhu Xítohó Jesucristú, te nchìcú<sup>n</sup> nihnu-o nchàa nacuáa ní cáhá<sup>n</sup> ndí Moisés, te ní cutnùní iní-ó sǎ ïo ndècu cuèchi-o ní cùu. Te duca<sup>n</sup>-ní nchìcú<sup>n</sup> nihnu-o ndéé ní sǎá nduu ní quexìo Xítohó Jesucristú ñuyíú-a, te ní sándáá iní-ó-gǎ.

24 Te nchaa tnùhu sǎ ñí chídó tnùnì ndí Moisés ní sanu ichi ñaha-xi xii-o nacuáa cada-o cùndecu-o, te duca<sup>n</sup>-ní sǎnu ichi ñaha-xi xii-o ndéé ní sǎá nduu ní quexìo Xítohó Jesucristú ñuyíú-a. Te duca<sup>n</sup> ñí cuu cuendá quíndáá iní-ó-gǎ, te vá cùndècu-gá cuèchi-o núú Yă Ndiõxí.

25 Te vitna ní ngúndecu ndìhì-o tnùhu Xítohó Jesucristú, te ñǎ túú-gǎ xíní ñùhu-xi canu ichi ñaha nchaa tnùhu ní chídó tnùnì ndí Moisés.

26 Te vitna tnáhá nchaa nchòhó cúú-ndó dèhe Yă Ndiõxí, chi ní sándáá iní-ndó Xítohó Jesucristú.

27 Te nchòhó ní sandute-ndo dàtná cächí-gá, te ndècu-ndo ndìhì-gá, te quède-ndo nchaa nacuáa ní cáhá<sup>n</sup>-gá ndécú-ndó, te ío ndècu yíñuhu-ndo núú Yă Ndiõxí dàtná ndécú yíñuhu mee Xítohó Jesucristú.

28 Te vitna ì<sup>n</sup>-ni cùu-o nchaa-o ndecu-o ndìhì Xítohó Jesucristú cuèi cùu-o ñáyiú isràél àdi ñǎ túú cùu-o, te cuèi cùu-o ñáyiú ñǎ túú tnàhí dàñá quee núú chíú<sup>n</sup> pàtróó<sup>n</sup>-xi àdi cuu-o ñáyiú dàñá quéé núú chíú<sup>n</sup> pàtróó<sup>n</sup>-xi, te cuèi téte te cuèi ñadìhí ì<sup>n</sup>-ni cùu-o nchaa-o ndecu-o ndìhì Xítohó Jesucristú.

29 Te nchòhó ndécú ndìhì-ndo Xítohó Jesucristú, te cùu-ndo datná cue ñaní tnáhá ndí Àbrahám, chi ní nduu tǎhú-ndó cùndecu váha-ndo núú Yă Ndiõxí dàtná ní nduu tǎhú ndí-á<sup>n</sup> ndécú váha ndí núú-gǎ, te duca<sup>n</sup> chi mee-gǎ duca<sup>n</sup> ñí cachí-gá cunduu.

#### 4

<sup>1</sup> Te nchòhó xíní-ndó sǎ ì<sup>n</sup> té lǐhli

chi vátá nǎgá cuǎñaha tǎtá-dě cuu cuendá-dé chi lǐhli-dé, te ì<sup>n</sup>-ni cùu-dé ndìhì téte xínu cuechi, dico na sǎá nduu cuèhnu-dé, te nduu tǎhú-dě nchaa sǎ ndécú ndìhì tǎtá-dě.

<sup>2</sup> Te xító-yu té lǐhli-á<sup>n</sup> sǎhnú-dě ndéé sǎá nduu ñí cachí tǎtá-dě sǎ cuǎñaha-dě sǎ ndúú tǎhú-dě.

<sup>3</sup> Te duca<sup>n</sup> sǎtnahá-xi cùu nchoo, chi nchìcú<sup>n</sup> nihnu-o nchàa nacuáa ní cáhá<sup>n</sup> cue téte ní xíndecu ndéé sanaha ní cùu.

<sup>4</sup> Te ní sǎá nduu ñí quide Yă Ndiõxí dàtná ní cachí-gá, te ní tendaha-gǎ Déhe-gá Xítohó Jesucristú ní quixi-gá ñuyíú-a, ní dácácú ñaha ì<sup>n</sup> ñadìhí te ní cuu-gá ñáyiú, te ní quide-gá nchaa nacuáa ní cáhá<sup>n</sup> ndí Moisés.

<sup>5</sup> Te duca<sup>n</sup> ñí tendaha Yă Ndiõxí Déhe-gá cuendá sǎ vá cǎnchìcú<sup>n</sup> nihnu-gá-ó nchàa nacuáa ní chídó tnùnì ndí Moisés cuendá duca<sup>n</sup> te cuu-o dèhe Yă Ndiõxí.

<sup>6</sup> Te Yă Ndiõxí ní taxi-gá Espiritú Déhe-gá Xítohó Jesucristú ndécú ndìhì-ndo chi cùu-ndo dèhe-gá, te Espiritú-á<sup>n</sup> chíndèe ñaha-xi xii-ndo te cächí-ndó: “Yòhó Dútú Ndiõxí cúú-n Tǎtá méé-ndí”, duha cächí-ndó.

<sup>7</sup> Te xǎ<sup>n</sup> cútnùnì iní-ndó sǎ cúú-ndó dèhe Yă Ndiõxí vitna, te ñǎ túú-gǎ cúú-ndó dàtná cue ñáyiú ñǎ túú tnàhí dàñá quee núú chíú<sup>n</sup> pàtróó<sup>n</sup>-xi. Te sǎ dúcá<sup>n</sup> cùu-ndo dèhe-gá, te Xítohó Jesucristú taxi-gá nchaa sǎ váha ní cachí Yă Ndiõxí nduu tǎhú-ndó.

*Té Pǎblú ío sàni iní-dé cuendá nchaa ñáyiú ndècu ichi Xítohó Jesucristú*

<sup>8</sup> Te cútnáhá vátá quíndáá-gá iní-ndó tnùhu Yă Ndiõxí ní xínu cuechi-ndo núú nchàa sǎ cächí-yu cùu ndiõxí te ñǎ ndàá sǎ ndiõxí cúú-xí.

<sup>9</sup> Te vitna nchòhó cáhá<sup>n</sup> ndìhì-ndo Yă Ndiõxí, te mee-gǎ xíní ñáhá-gǎ xii-ndo, te ñǎ túú nduu váha-xi nanchòcáva iní-ndó càda tucu-ndo nacuáa ní xóo cada-ndo dǐhna, chi nchaa xǎ<sup>n</sup> ñǎ túú vèdana nàndìhì-xi.

<sup>10</sup> Te nchòhó cǎnehe íí-ni-ndo nduu cachí-ndó íí, te ñu-ni duca<sup>n</sup> quède-ndo dava yoó ndìhì dava cuíá, te ndi tnáhá nduu sàcòo vico ñu-ni duca<sup>n</sup> quède-ndo cǎnehe íí-ndó nduu-á<sup>n</sup>.

11 Te ío sàni iní-í cuendá-ndó, chi na cuáhá<sup>n</sup> àú<sup>n</sup> nã cuu ní dánèhé ñàhà-í xii-ndo tnúhu Yã Ndiõxí.

12 Te càhá<sup>n</sup> ndàhú-í núú nchòhó ñáyíu ndècu ndihí-í ichi Xítohó Jesucristú sá cáda-ndó dàtná quidè-í ñá túú nchìcú<sup>n</sup> nihnu-í nchaa tnúhu ní cáhá<sup>n</sup> ndíi Moisés, chi yúhú quidè-í vitna dàtná ní quide nchòhó ñá túú ní cãchicú<sup>n</sup> nihnu-ndo nãcuáa ní cáhá<sup>n</sup> ndíi. Te cùtnàhá ní xindecu ndihí ñaha-í xii-ndo ní quide váha ñaha-ndo xii-í.

13 Te sa nàha-ndo sá cùtnàhá ní cáhá<sup>n</sup>-í tnúhu Xítohó Jesucristú núú-ndó ndéé díhna ní cuhú-í, núu xiã<sup>n</sup> ní xindecu ndihí ñaha-í xii-ndo ní cáhá<sup>n</sup>-í tnúhu-gã núú-ndó.

14 Te cuéhé sã ní tnahá-í-á<sup>n</sup> cúú-xí ì<sup>n</sup> cuéhé sã vã yõo tnàhí cundee iní-xi cundecu ndihí ñaha xii-í ní cùu, dico nchòhó chi ío váha ní cáhá<sup>n</sup> ndihí ñaha-ndo xii-í, te ñá túú ní sàni cuehé ní sàni duha iní-ndó cuendá-í, te ní cáhá<sup>n</sup> ndihí ñaha-ndo xii-í dàtná tnúhu sá yúhú cúú-í ì<sup>n</sup> espíritú xínú cuèchi núú Yã Ndiõxí àdi datná méé Xítohó Jesucristú.

15 ¿Te ná ní tnahá-ndó nõu ñá túú-gã sání váha iní-ndó cuendá-í dàtná ní xóo cada-ndo ndéé díhna ío váha ní xóo caní iní-ndó cuendá-í? Te na càchí tnúhu ndáá-í xii-ndo sã ío ní cuu iní ñáhá-ndó xii-í cùtnàhá ní xindecu ndihí ñaha-í xii-ndo, te nãndi sá ndécú ndihí-ndo taxi-ndo xii-í ní cùu, te núu dicó sá cúú te ndéé tinúu-ndo tava-ndo te taxi-ndo xii-í ní cùu.

16 ¿Te náa cùu úhú iní ñáhá-ndó xii-í vitna cuendá sá càhá<sup>n</sup>-í tnúhu ndáá tnúhu Yã Ndiõxí núú-ndó-ã<sup>n</sup>?

17 Te ío ñáyíu ío váha càhá<sup>n</sup> ndihí ñaha xii-ndo, dico ñáyíu-á<sup>n</sup> ñúhú cuéhé iní-yu, chi cuíní-yu sá vã cúú-gã cáhá<sup>n</sup> ndihí tnàha-o, chi mee-nã-yu cundecu ndihí-ndo cuíní-yu.

18 Te váha quide ñáyíu càhá<sup>n</sup> ndihí ñaha xii-ndo ndihí tnúhu yíñùhu, te núu cuíní-yu cadá-yu ì<sup>n</sup> sá váha sá cúú-xí-ndó. Te duca<sup>n</sup>-ni na càdá-yu cuèi òré ñá túú ndècu ndihí ñaha-í xii-ndo.

19 Te nchòhó ñáyíu ní sanu ichi-í ichi Xítohó Jesucristú càchí tnúhu-í

xii-ndo sã quidé-xí iní-í dàtná quidé-xí iní ì<sup>n</sup> ñadìhí ñaha sa ní tnahá òré cacu déhe-xi, te duca<sup>n</sup> quide-xi iní-í, chi ío vãi sani iní-í cuendá-ndó dàtná ní xóo cada-í ndéé díhna, te duca<sup>n</sup>-ni càdá-í ndéé ná sàá nduu càda-ndo nchaa nacuáa càhá<sup>n</sup> Xítohó Jesucristú.

20 ¿Te ío váha cada-xi te núu dicó tnavíi sa ndècu ndihí ñaha-í xii-ndo cuendá cáhá<sup>n</sup>-í núú-ndó nãcuáa cada-ndo, te ñá cùtnúni iní-í nása cada-í cuendá-ndó!

### *Cuendá ndíi Àgár ndihí ndíi Sãrá*

21 Te nchòhó ñáyíu cuíní canchicú<sup>n</sup> nihnu nchaa tnúhu ní cáhá<sup>n</sup> ndíi Moisés, ¿náa ñá túú tècú tnúni-ndó nãcuáa cáhá<sup>n</sup>-xi tnúhu ní chídó tnúni ndíi?

22 Chi càchí tnúhu ní chídó tnúni ndíi-á<sup>n</sup> sã ndíi Àbrahám ní xindecu úú déhe ducu<sup>n</sup> ndíi, te ì<sup>n</sup>-dé ní cuu déhe ndíi ndihí ñadìhí méé ndíi ndíi Sãrá, te ingá-dé ní cuu-dé déhe ndíi ndihí ì<sup>n</sup> ndíi ní xinu cuechi nõu-yu ní xínani Àgár.

23 Te sá dúcá<sup>n</sup> ní cacu déhe ndíi Sãrá, chi mee Yã Ndiõxí ní cundàhú iní ñáhá-gã xii-a<sup>n</sup>, chi duca<sup>n</sup> ní cachí-gã cada-gã. Dico ndíi ní xinu cuechi-ã<sup>n</sup> chi duca<sup>n</sup> tnàhí ní nduu táhú ndíi-á<sup>n</sup> sã cóo déhe ndíi.

24 Te na càchí tnúhu-í xii-ndo nã cúú sã nánèhé ndí ndúú cue ndíi dîhí-á<sup>n</sup>. Te úú xito ní cáhá<sup>n</sup> Yã Ndiõxí nãcuáa cada-gã, te ì<sup>n</sup> ndíi-á<sup>n</sup> nánèhé ndíi nãcuáa ní cáhá<sup>n</sup> Yã Ndiõxí xito díhna nuu, te ingá tucu ndíi-á<sup>n</sup> nánèhé ndíi nãcuáa ní cáhá<sup>n</sup> tucu-gã xito cùu uú. Te ndíi Àgár-á<sup>n</sup> nánèhé ndíi nãcuáa ní xáha<sup>n</sup> Yã Ndiõxí xii ndíi Moisés yucu Sinái cada ñáyíu, te nchaa ñáyíu nchìcú<sup>n</sup> nihnu nchaa tnúhu-á<sup>n</sup> cúú-yu dàtná déhe ndíi Àgár téé ní xinu cuechi, chi téé-á<sup>n</sup> ñá túú tnàhí ní dàñá-dé quee-dé núú chíú<sup>n</sup> patróo<sup>n</sup>-dè, te duca<sup>n</sup> sãtnahá-xi cúú-yu chi nchìcú<sup>n</sup> nihnú-yu nchaa nãcuáa ní xáha<sup>n</sup> Yã Ndiõxí xii ndíi Moisés.

25 Te tnúhu Àgár quée-xi: Yucu Sinái, te yucu-á<sup>n</sup> yíndèhu-xi nació<sup>n</sup> Àrabíá. Te ndíi Àgár-á<sup>n</sup> nánèhé tucu

ndíi cue ñáyiú ndècu ñuú Jerusàlén, chi ñáyiú-á<sup>n</sup> ndécú-ní-yu dàtná ní xíndecu ndíi Àgár ndihí déhe ndíi, chi cue ndíi-á<sup>n</sup> ní cuu cue ndíi ñáyiú ñá túú tnàhí ní dàná quee núú chíú<sup>n</sup> pàtróó<sup>n</sup>-xi, te duca<sup>n</sup> sàtnahá-xi cùu ñáyiú-á<sup>n</sup> chi nchìcú<sup>n</sup> nihnu-ní-yu nchaa nàcuáa ní cáhá<sup>n</sup> ndíi Moisés.

<sup>26</sup> Dico nchoo ñí nduu táhú-ó cùndecu-o ñuú Jerusàlén sáá núú ndécú Yá Ndiòxí, te vitna chi ñá túú-gã nchìcú<sup>n</sup> nihnu-o nchaa nàcuáa ní cáhá<sup>n</sup> ndíi Moisés.

<sup>27</sup> Te duha càhá<sup>n</sup>-í, chi núú tütú Yá Ndiòxí càchí-xi:

Yòhó ñaha ní nduu táhú vã cóó dèhe-xi ní cùu, vitna cana saa-n sã cùdíi ìní-n cuèi vátá quìní-gá-n ñãsa càcu ì<sup>n</sup> landú.

Te cuèi ní cuu táhú-n sã vã cóó dèhe-n ní cùu dico ío-gá titní déhe-n còo dacúxí xíchí ñí cuu táhú tnàhí sã cóó dèhe-xi.

Duha càchí-xi núú tütú-gã.

<sup>28</sup> Te nchoo cuè ñáyiú ndècu ichi Xítohó Jesucristú vitna cùu-o datná ndíi Isàác, chi ndíi-á<sup>n</sup> ní cacu ndíi, chi mee Yá Ndiòxí ní cachí-gã sã cácu ndíi. Te duca<sup>n</sup> sàtnahá-xi cùu nchoo chi ní nduu-o dèhe-gã vitna chi duca<sup>n</sup> ní cachí tucu-gã cunduu.

<sup>29</sup> Te déhe ndíi Àgár ní nduu táhú tnàhí ndíi sã cácu ndíi ñuyú-a, te ndíi-á<sup>n</sup> ñí cuu úhú iní ndíi ndíi Isàác, te ndíi Isàác-á<sup>n</sup> chi Espiritú Yá Ndiòxí ní quide ní cacu ndíi. Te duca<sup>n</sup> sàtnahá-xi cùu vitna, chi nchaa nchoo ñáyiú ndècu ndihí Espiritú Yá Ndiòxí cúú úhú iní ñáhã ñáyiú xii-o.

<sup>30</sup> Te núú tütú Yá Ndiòxí càchí-xi: “Chí nàcuí<sup>n</sup> xíchí xínú cuèchi ndihí déhe-xi na nùhú-yu, chi déhe xíchí xínú cuèchi-á<sup>n</sup> ñã túú ñã níhí-dè nduu táhú-dè, chi mee-ni dèhe ñaha ndècu vehe-xi nduu táhú-dè sã cuãñaha tãtã-dè”, duha càchí-xi núú tütú-gã.

<sup>31</sup> Te nchoo cuè ñáyiú ndècu ichi Xítohó Jesucristú ñã túú-gã cúú-ó dàtná cúú dèhe ndíi ní xínu cuechi-ã<sup>n</sup>, chi ní cuu-o vitna datná cúú ndíi ní nduu táhú nchaa sã ní sãñaha tãtã-xi-á<sup>n</sup>. Te duca<sup>n</sup> ñí cuu, chi Yá Ndiòxí ní dácãcu ñaha-gã xii-o cuèndá

sã vã cãnhìcú<sup>n</sup> nihnu-gã-ó nchaa nàcuáa ní cáhá<sup>n</sup> ndíi Moisés.

## 5

*Canchicú<sup>n</sup> nihnu-ni-o ichi Xítohó Jesucristú*

<sup>1</sup> Te Xítohó Jesucristú ní quide-gã nàcuáa vã cãní ìní-ó sã nãnihí tàhú-ó te núu na cãnhìcú<sup>n</sup> nihnu-o nàcuáa ní cáhá<sup>n</sup> ndíi Moisés, te ñiu-ni duca<sup>n</sup> cãní ìní-ó cùndecu-o te vã ngòo cãní ìní-ó sã nãnihí tàhú-ó te núu na cãnhìcú<sup>n</sup> nihnu-o càda-o nàcuáa ní cáhá<sup>n</sup> ndíi, chi núu duca<sup>n</sup> na càda-o te ío dandòho-o mee-o datná ní xóo ndoho-o cùtnahã vátá cùndecu-gã-ó ichi-a.

<sup>2</sup> Te yúhú té Pãblú cuìní-í sã cùndedòho-ndo ì<sup>n</sup> tnúhu na càhá<sup>n</sup>-í-a. Te núu nchòhó cuãha-ndo seña ñii-ndo cuèndá sã sãndáá ìní-ndó nàcuáa ní cachí ndíi Moisés cada-ndo, te núu duca<sup>n</sup> na càda-ndo ñã, te àú<sup>n</sup> ñã cuu ndècu-ndo ichi Xítohó Jesucristú te núu duca<sup>n</sup>.

<sup>3</sup> Te dàtná ní cachí-í xii-ndo, te ñiu-ni duca<sup>n</sup> càhá<sup>n</sup> tucu-í vitna sã núu ndèda-ni cãa ì<sup>n</sup> tée na cuãha-dé seña ñii-dé, te xini ñuhu-xi sã dácuití tãú-dé cada-dé nchaa nàcuáa ní cáhá<sup>n</sup> ndíi Moisés.

<sup>4</sup> Te nchaa nchòhó ñáyiú sãní iní sã ñã túú-gã cuèchi-xi ndècu núú Yá Ndiòxí cuèndá sã nchìcú<sup>n</sup> nihnu-ndo nchaa nàcuáa ní cáhá<sup>n</sup> ndíi Moisés, ñã túú-gã ndécú-ndó ndihí Xítohó Jesucristú, te ni Yá Ndiòxí ñã túú-gã cùndàhú iní ñáhã-gã xii-ndo càda vãha ñaha-gã.

<sup>5</sup> Dico nchaa nchoo ñáyiú sãndáá ìní ñáhã xii-gã cùñiu-o núú-gã, chi chindee ñaha Espiritú-gã xii-o, te ndètu cahnu-ná-ó sãá nduu cùñaha núú Yá Ndiòxí xii-o sã cùñiu-o núú-gã.

<sup>6</sup> Te nchoo cuè ñáyiú ndècu ndihí Xítohó Jesucristú ì<sup>n</sup>-ni quide-xi cuèi na cuãha-o seña ñii-o àdi vã cuãha-o, chi ñã túú chindee ñaha-xi xii-o nàcuáa cundecu vãha-o ndihí-gã. Te ì<sup>n</sup>ndii díi-ni sã xíní ñuhu-xi quìndáá ìní-ó Xítohó Jesucristú, te núu duca<sup>n</sup> na càda-o te cuu ìní-ó cuè tñaha ñáyiú-o.

<sup>7</sup> Te nchòhó ío vãha quide-ndo ndècu-ndo ichi Yá Ndiòxí ní cùu, te vitna cùñúhu-í sã ñã túú-gã sãndáá



váha iní-ndó tnũhu-gá, te duca<sup>n</sup> quède-ndo chi ndècu ñáyiú sànu ichi ñaha xii-ndo ingá ichi.

8 Te ñá díú Yá Ndiõxí Yaá ní cáhá<sup>n</sup> ñáhá xii-ndo duca<sup>n</sup> ni cachí-gá cada-ndo sã vã quindáá-gá iní-ndó tnũhu-gá.

9 Te nchòhó xini-ndó sã nõu luha levadurá ná quihu yuchi te dândaa-xi. Duca<sup>n</sup> sãtnahá-xi cùu ñáyiú dândahú ñáhá xii-ndo, chi cuini-yu dàcuíta ni-hnu ñahá-yu xii-ndo nchàa-ndo.

10 Te yúhú cútnùní ndáá iní-í sá Xítóhó Jesucristú chindee ñaha-gá xii-ndo cuendá sá ñã túú ñãgá tnúhu quindáá iní-ndó, dico nchaa ñáyiú duca<sup>n</sup> dândahú ñáhá xii-ndo nacháhu-yu núú Yá Ndiõxí nchaa sá quidè-yu cuèi náí-gá ñáyiú cùú-yu.

11 Te cãchí tnúhu-í xii nchòhó ñáyiú ndècu ndihí-í ichi Yá Ndiõxí sá nõu dicó dãnehé-ni-í ñáyiú sá cuãha-yu sèñá ñí-yu dàtná ní cachí ndí Moisés ñá, te vá yõo cuu úhú iní ñáhá xii-í ní cùu, te ni vã tũu úhú iní-yu cuendá sá ní xihí Xítóhó Jesucristú núú cùrúxí ní cùu.

12 Te nchaa ñáyiú dàsatú iní ñáhá xii-ndo sã cuãha-ndo sèñá ñí-ndo, te váha-gá sá ná cádã-yu mèé-yu ñ<sup>n</sup> tnúndòho, te ñá díú sã dúcá<sup>n</sup> cànuichi ñahá-yu xii-ndo cùndecu-ndo.

13 Te nchòhó ñáyiú ndècu ndihí-í ichi Xítóhó Jesucristú ñu-gá ní taunihnu ñaha-gã xii-ndo cuendá sã vã cáncicú<sup>n</sup> nihnu-gá-ndó nchàa nacuáa ní cáhá<sup>n</sup> ndí Moisés, dico vá cáni iní-ndó sã sã dúcá<sup>n</sup> ñí taunihnu ñaha-gã xii-ndo, te cuu-ni cada-ndo nãndi sã cuèhé sã dúhá vèxi iní-ndó, dico cuu iní tnáhá-ndó ñ<sup>n</sup> ñ<sup>n</sup>-ndo te chindee tnàha-ndo.

14 Chi duca<sup>n</sup> càhá<sup>n</sup> Yá Ndiõxí sá cúú iní-ó cuè tnaha ñáyiú dàtná cúú iní-ó mèe-o. Te núu duca<sup>n</sup> na càda-o, te quède-o nchaa nacuáa tàú-xi cada-o dàtná càhá<sup>n</sup> nchaa tnúhu ní chídó tnùní ndí Moisés.

15 Te núu nchòhó cúú úhú iní tnáhá-ndó ndècu-ndo, te ñã túú quède váha-ndo te núu duca<sup>n</sup> quède-ndo, dico yúhú cãchí-í sã vã dúcá<sup>n</sup>-gã

cada-ndo cùndecu-ndo cuendá sã vã dàcuíta nihnu tnàha-ndo.

*Nacuáa sàni iní ñáyiú ndècu ichi cuehé ichi duha ndihí nacuáa sàni iní ñáyiú ndècu ndihí Espiritú Yá Ndiõxí*

16 Te na cãchí tnúhu-í xii-ndo sã cáda-ndó nchàa nacuáa cuini mèé Espiritú Yá Ndiõxí cada-ndo, te duca<sup>n</sup> te vá cáni-gã iní-ndó càda-ndo nãndi nchaa sã cuèhé sã dúhá sàni iní mèé-ndó.

17 Chi nchaa xíã<sup>n</sup> ñá túú tnáhá tnúhu-xi ndihí Espiritú Yá Ndiõxí. Te ñu-ni duca<sup>n</sup> quède Espiritú Yá Ndiõxí, chi ñã túú tnáhá iní-xi nchaa sã cuèhé sã dúhá sàni iní-ndó. Te sã dúcá<sup>n</sup> ñã túú tnáhá tnúhu tnàha-xi xíã<sup>n</sup> ñã túú ñihí ndéé-ndó càda-ndo ñ<sup>n</sup> sã váha sàni iní-ndó càda-ndo.

18 Te núu quède-ndo nchaa nacuáa sànu ichi ñaha Espiritú Yá Ndiõxí, te ñã túú-gã táxi tnùní ñáhá nchàa tnúhu ní chídó tnùní ndí Moisés xii-ndo.

19 Te nchaa ñáyiú xini-yu nchaa nacuáa quède ñáyiú quède cuehé quidè dùha. Te duha quidè-yu: Cue téé càhá<sup>n</sup> ndihí-güedé ñáyiú ñihí te ñã díú ñãndihí-güedé cúú-yu, te ñu-ni duca<sup>n</sup> xíquide cue ñáyiú ñihí, te nãndi-gã nchaa sã cuèhé sã dúhá cuãhá<sup>n</sup> vèxi-yu quidè-yu.

20 Te quède cahnú-yu nchaa sã cãchí-yu cùu ndiõxí te ñã ndáá sã ndiõxí cúú-xí, te quède nduu tnahá-yu, te cùu úhú iní tnáhã-yu, te nãá-yu, te cùu cuiñú tnáhã-yu, te ío yáchí cùdèè<sup>n</sup>-yu, te ndúcú-yu mee-ni sã cúú-xí mèé-yu, te ñã túú cùu ñ<sup>n</sup>nuú-yu cundecú-yu, te quède ñ<sup>n</sup> tnahá-yu.

21 Te cùu cuedú iní-yu nchaa sã ndécú ndihí dava-gá-yu, te sãhni tnahá-yu, te ío quihú-yu, te ndí cuu ndí cuú-yu quidè-yu nchaa sã cuèhé sã dúhá, te nãndi-gã nchaa sã cuèhé sã dúhá quidè-yu. Te sa cãchí tnúhu-í xii-ndo sã nchãá ñãyiú duca<sup>n</sup> xíquide vá ndúú tãhũ-yu cundecú-yu núu ndécú Yá Ndiõxí táxi tnùní-gã.

22 Dico Espiritú Yá Ndiõxí chíndèe ñaha-xi xii-o cuu iní tnáhá-ó, te cùdíí iní-ó ndècu-o, te ío váha cùu iní-ó, te

càhnu iní-ó, te váha iní-ó, te cùndahú iní tnáhá-ó, te quide ndáá-ó ndècu-o.

<sup>23</sup> Te ndàhú iní-ó, te quide-o nchaa nacuáa tàú-ó càda-o, te nchaa xiá<sup>n</sup> chindèe ñaha Espiritú Yá Ndiöxí quidé-ó, te núu duca<sup>n</sup> quide-o, te vá yóo ñ<sup>n</sup>-gá cáhá<sup>n</sup> sá ñà túú quide váha-o ndècu-o.

<sup>24</sup> Te nchoo cuè ñáyiu ndècu ndihi Xítohó Jesucristú, sa nàha-o sá ñí xihí-gá núú cùrúxí sá cuendá-ó, núu xiá<sup>n</sup> duu<sup>n</sup> duu<sup>n</sup> ní dáñá-ó nchàa ichi cuehé ichi duha, te ñá túú-gá táxí tnùní ñáhá ñí ñ<sup>n</sup> sá cuehé sá dúhá sá ñí xóo cani iní-ó ní cùu.

<sup>25</sup> Te vitna ní ngúndecu ndihi-o Espiritú Yá Ndiöxí chindèe ñaha-xi, te xini ñuhu-xi sá cadá-ó nàcuáa sànu ichi ñaha Espiritú-gá cada-o.

<sup>26</sup> Te vá cadá càhnu-o mee-o, te vá ndúcú-ó plètú, te ni vǎ cúú cuèdú iní-ó sǎ ndécú ndihi tnaha ñáyiu-o.

## 6

### *Chindee tnàha-o ñ<sup>n</sup> ñ<sup>n</sup>-o*

<sup>1</sup> Te nchòhó ñáyiu ndècu ndihi-í ichi Xítohó Jesucristú càchí tnúhu-í xii-ndo sǎ nùu ñ<sup>n</sup> ñáyiu ndècu ndihi-ndo ichi-gá ní quidé-yu ñ<sup>n</sup> sǎ ñà túú tàú-yu cadá-yu núú-gǎ, te nchòhó ñáyiu quide váha ndècu ndihi Espiritú Yá Ndiöxí cáhá<sup>n</sup>-ndó dǎho cue ñáyiu duca<sup>n</sup> xǐquide-á<sup>n</sup> cuendá nucúnu ichí-yu, te vii vii cáhá<sup>n</sup> ndihi-ndǎ-yu, te ío coto-ndo mèe-ndo cuendá sǎ vǎ cadá-ndó ñ<sup>n</sup> sǎ ñà túú tàú-ndó càda-ndo núú-gǎ.

<sup>2</sup> Te ío chindee tnàha-ndo, te cuáha tnàha-ndo tnúhu ndee iní cundecu-ndo cuendá nchaa sǎ yáha-ndo. Te núu duca<sup>n</sup> na càda-ndo, te quide-ndo nchaa nacuáa ní cáhá<sup>n</sup> Xítohó Jesucristú cada-o.

<sup>3</sup> Te núu ío ñ<sup>n</sup>-ndo càchí-ndó sǎ ïo váha quide-ndo ndecu-ndo ichi Yá Ndiöxí te ñá ndáá ñá, te dicó dándàhú-ndó mèe-ndo sǎ dúcá<sup>n</sup> quide-ndo.

<sup>4</sup> Te ndi dǐí<sup>n</sup> ndi dǐí<sup>n</sup> càda cuendá-ndó nùu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudǐí iní-ndó sǎ cúú-xí mèe-ndo, te

vǎ cání iní-ndó sǎ quidé vǎha-gá-ndó dàcúúxí dàva-gá-yu.

<sup>5</sup> Chi tàú-ó sǎ ndi dǐí<sup>n</sup> ndi dǐí<sup>n</sup> càda cuendá-ó nàcuáa ndècu-o.

<sup>6</sup> Te nchaa nchòhó ñáyiu dàcuaha tnúhu Yá Ndiöxí chindee-ndo cuè téè dàcuaha ñaha xii-ndo tnúhu-gá cuáñaha-ndo nǎndi sǎ xini ñuhu-güedé.

<sup>7</sup> Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yá Ndiöxí, chi nchòhó xini-ndó sǎ nùu na càda váha-o cundecu-o, te cùu-xi ñ<sup>n</sup> sǎ vǎha sǎ cúú-xí-ó, dico núu vá cadá váha-o ña, te ío ndoho-o te núu duca<sup>n</sup> na càda-o.

<sup>8</sup> Te núu quide-o nchaa sǎ cuehé sǎ dúhá sàni iní-ó, te diu-ni xiá<sup>n</sup> dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espiritú Yá Ndiöxí xii-o, te cundecu ndihi-o Yá Ndiöxí ni caa ni quihí<sup>n</sup>.

<sup>9</sup> Te xini ñuhu-xi vá dáñá ndeé-ó càda váha-o cundecu-o, te duca<sup>n</sup> te sǎá nduu càda váha ñaha Yá Ndiöxí xii-o, te núu vá ná tǔhú iní-ó càda váha-o cundecu-o.

<sup>10</sup> Te cada-o sǎ vǎha sǎ cúú-xí nchàa tnaha ñáyiu-o vitna ndecu-o ñuyíú-a, te ío-gá tàú-ó chindee-o cue ñáyiu ndècu ndihi-o ichi Xítohó Jesucristú.

### *Tnúhu ndeé núú ñí ndihi-ná*

<sup>11</sup> Te cundehe-ndo sǎ ndáa ndáa letrá téè-í núú tǔtú-a sǎ cúú-xí-ndó.

<sup>12</sup> Te nchaa ñáyiu quide yicá sǎ cuáha-ndo sèñá ñ<sup>n</sup>-ndo dàtná ní cachí ndií Moisés, ñáyiu-á<sup>n</sup> cúú-yu ñáyiu cuini cudíu núú tnàha ñáyiu-xi. Te duca<sup>n</sup> quidé-yu cuendá sǎ vǎ ndóhǎ-yu cuendá nchaa tnúhu sǎ dánèhé ñáhá sǎ ñí xihí Xítohó Jesucristú núú cùrúxí.

<sup>13</sup> Te ni ñáyiu sa ní ngúndecu ndihi sèñá ñ<sup>n</sup>-xi ñá túú quidé-yu nchaa nàcuáa ní cáhá<sup>n</sup> ndií Moisés, dico mèe-yu cuini-yu sǎ cuáha-ndo sèñá ñ<sup>n</sup>-ndo. Te duca<sup>n</sup> quidé-yu chi quide cahnú-yu mèe-yu núú nchàa dàva-gá ñáyiu.

<sup>14</sup> Te yúhú chi ñá túú quide cahnu-í mèe-í cuendá nchaa sǎ quidé-í, chi mee-ni sǎ ïo cùu váha iní-í sǎ Xítohó Jesucristú ní xihí-gá núú cùrúxí cuendá-ó. Te diu cuendá sǎ ñí xihí-gá

ñá túú-gǎ ndécù-í ichi cuèhé ichi duha, te ni ñà túú-gǎ táxí tnùní ñáhá nì ìí<sup>n</sup> sá cuèhé sá dúhá xì-í.

<sup>15</sup> Te ñá túú ñǎ chindèe ñaha-xi xii-o cuéi na cuǎha-o sèñá ñí-o àdi vá cuǎha-o, chi ndècu ndíhi-o Xítóhó Jesucristú, te ní nduu-o dàtná ìí<sup>n</sup> ñáyiú saa, te xǎ<sup>n</sup> cúú-xí sǎ ïo-gá xíní ñùhu-xi.

<sup>16</sup> Te xicá<sup>n</sup> táhù-í núú Yǎ Ndiöxí sá ncháá nchòhó ñáyiú quide nchaa nacuáa càhá<sup>n</sup>-í-a cundecu nahi-ndo, nchòhó ñáyiú cùu cuendá Yǎ Ndiöxí dàtná ñáyiú isràél chi ñáyiú-á<sup>n</sup> ñí cachí-gá sá cúú cuendá-gá. Te mee-gǎ ío cundàhú iní ñáhá-gǎ xii-ndo chindee ñaha-gá.

<sup>17</sup> Te není vitna cuìní-í sá vǎ yǒo ìí<sup>n</sup>-gá chidácá nihnu ñaha xì-í cuendá chiu<sup>n</sup> quide-í, chi yayàcá<sup>n</sup> sa ní nduu tílòhó ñí-í cuendá sá ndóhò-í cuendá Xítóhó Jesucristú.

<sup>18</sup> Te nchòhó ñáyiú ndècu ndíhi-í ichi Xítóhó Jesucristú xicá<sup>n</sup> táhù-í núú-gǎ sá ïo na chindee ñaha-gá xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-ñǎ vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ ÉFESÚ

*Té Păblú cádüha-dé tutú quihi<sup>n</sup> ndaha ñáyiú xñdecu ichi Xítóhó Jesucristú ndécú ñuú Éfesú*

<sup>1</sup> Yúhú té Păblú ní tendaha ñaha Yá Ndiöxí càhá<sup>n</sup>-í tnúhu Xítóhó Jesucristú núú ñáyiú, chi duca<sup>n</sup> ñí cachí Yá Ndiöxí cunduu, te vitna càdüha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiöxí xñdecu ñuú Éfesú, te ñuú-ni nchòhó cúú-ndó ñáyiú sándáá iní ñáhá xì Xítóhó Jesucristú.

<sup>2</sup> Te xicá<sup>n</sup> táhù-í núú Dütú Ndiöxí Yá cúú Tátá-ó, ndihi núú Xítóhó Jesucristú sá ná chindee chitúu ñaha-gă xii-ndo, te duca<sup>n</sup> ndi nduú-gá ná cáda te ío váha cuu iní-ndó cundecu-ndo.

*Espiritú Yá Ndiöxí chindèe ñaha-xi xii-o chi ndècu ndihi-o Xítóhó Jesucristú*

<sup>3</sup> Te cachí-ó sã ío càhnu cuu Yá Ndiöxí Yá cúú Tátá Xítóhó Jesucristú, te ndéé andiú quide Yá Ndiöxí nchaa sá vâha sá cúú-xí-ó cuendá sá ndécú ndihi-o Espiritú-gá, te duca<sup>n</sup> quide-gá chi ndècu ndihi-o Xítóhó Jesucristú.

<sup>4</sup> Te ndéé cútnàhá vátá ngăva-gá ñuyíú ñí cachí Yá Ndiöxí sá nchóó cùu-o ñáyiú cùu cuendá-gá, te duca<sup>n</sup> ñí cachí-gá sá cuendá Xítóhó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gă, te duca<sup>n</sup> te vá cundècu cuéchi-o.

<sup>5</sup> Te Yá Ndiöxí ío cùu iní ñáhá-gă xii-o ñuú xíã<sup>n</sup> duca<sup>n</sup> ñí cachí-gá ndéé cútnàhá vátá ngăva-gá ñuyíú sã nchóó ndùu-o déhe-gá. Te sá cuendá nchaa sá cáda Xítóhó Jesucristú sá cúú-xí-ó, xíã<sup>n</sup> duca<sup>n</sup> ñí cachí Yá Ndiöxí, te duca<sup>n</sup> ñí cachí-gá chi duca<sup>n</sup> tnàhí ní sani iní-gá cunduu.

<sup>6</sup> Te xíã<sup>n</sup> ñuú xini ñuhu-xi sá nchóó càchí-ó sã ío càhnu cuu Yá Ndiöxí, chi ío cundahú iní ñáhá-gă chindèe ñaha-gá xii-o. Te duca<sup>n</sup> quide-gá chi

ndècu ndihi-o Xítóhó Jesucristú Yá ío cùu iní-gá.

<sup>7</sup> Te Yá Ndiöxí ío cùu iní ñáhá-gă xii-o ñuú xíã<sup>n</sup> Xítóhó Jesucristú ní sati ñíã<sup>n</sup>-gă te ní xíhí-gá cuendá dacăcu nihnu ñaha-gă xii-o ñuú ùhú núú ndàhú, te duca<sup>n</sup> càda cahnu iní-gá nchaa yícá cuéchi-o.

<sup>8</sup> Te Yá Ndiöxí ío cundahú iní ñáhá-gă chindèe ñaha-gá xii-o, năcuáa ngúndecu ndihi-o nchàa sá xini tnùnì-ó te duca<sup>n</sup> te cuu-o ñáyiú təcú tnùnì.

<sup>9</sup> Te Yá Ndiöxí ní dánèhé ñáhá-gă xii-o nchàa sá ndúú yùhu, nchaa sá ñí sani iní-gá cada-gá. Te duca<sup>n</sup> ñí quide-gá chi duca<sup>n</sup> ñí sani iní-gá cunduu.

<sup>10</sup> Te sá ñí sani iní-gá cada-gá te dacuítí sã cáda-gă ná sàa nduu, te na sàa nduu-á<sup>n</sup> te mee-gă cada sá Xítóhó Jesucristú quindaha-gă nchaa sá ío andiú, ndihi nchaa sá ío ñuyíú-a.

<sup>11</sup> Te nchoo ñí nduu táhú-ó ñí nduu-o ñáyiú cùu cuendá Yá Ndiöxí chi ndècu ndihi-o Xítóhó Jesucristú. Te duca<sup>n</sup> ñí cuu chi duca<sup>n</sup> tnàhí ní sani iní Yá Ndiöxí cunduu. Te nchaandi túhú sá quidé-gă, quide-gá năcuáa sàni iní mée-gă cunduu.

<sup>12</sup> Te duca<sup>n</sup> ñí cuu cuendá sá nchùhú ñáyiú díhna nuu ñí sándáá iní tnúhu Xítóhó Jesucristú cáhá<sup>n</sup>-ndí sá ío càhnu cuu mee Yá Ndiöxí cuendá nchaa sá vâha quide-gá.

<sup>13</sup> Te nchòhó tucu cútnàhá ní xindedóho-ndo tnùhu ndáá tnúhu sá càhá<sup>n</sup> năcuáa naníhí tàhú-ó ní cuu ñnuu-ndo ndihi Xítóhó Jesucristú chi ní sándáá iní-ndó-gă. Te xíã<sup>n</sup> cútnùnì sá nchòhó ní nduu-ndo ñáyiú cùu cuendá Yá Ndiöxí, chi ní ngúndecu ndihi-ndo Espiritú-gá sá ñí cachí-gá taxi-gá.

<sup>14</sup> Te sá ndécú ndihi-o Espiritú Yá Ndiöxí xíã<sup>n</sup> cútnùnì sá ndáá nduu táhú-ó cundecu-o ndihi-gá ná sàa nduu năcuaca ñaha-gá xii nchaa nchoo ñáyiú cùu cuendá-gá, te sá dúcá<sup>n</sup> càda-gá ñuú xíã<sup>n</sup> tàú-ó càchí-ó sã ío càhnu cuu-gá.

*Té Păblú xicá<sup>n</sup> táhú-dé núú Yá*

*Ndiöxí cuendá cue ñáyi ndècu ichi-gá*

<sup>15</sup> Te yúhú ñíhí-í tnúhu sá nchòhó ío váha sàndáá iní-ndó Xítohó Jesucristú, te nchaa ñáyi cùu cuendá Yá Ndiöxí ío cùu iní-ndö-yu.

<sup>16</sup> Te xíá<sup>n</sup> núu ñá túú dàña ndeé-í ndàcá<sup>n</sup> táhù-í núú-gá cuendá-ndó, te ío xìcá<sup>n</sup> táhù-í

<sup>17</sup> núú Yá Ndiöxí Yaá cùú Tátá Xítohó Jesucristú cuendá-ndó. Te ñíu-ni Yá Ndiöxí cùú-gá Yaá ío càhnu cuu. Te xìcá<sup>n</sup> táhù-í núú Yá Ndiöxí sá mée-gá ná cádá sá Espíritú-gá chindee ñàha-xi xii-ndo cuendá cuu-ndo ñáyi təcú tnùnì, te na càda-xi sá cùtnùnì iní-ndó nàcuáa sàni iní Yá Ndiöxí.

<sup>18</sup> Te duca<sup>n</sup> xìcá<sup>n</sup> táhù-í núú Yá Ndiöxí cuendá-ndó, cuendá sá nchòhó tecú tnùnì-ndó nàcuáa ndùu tnúhu ndee iní ní taxi-gá ní ngúndecu ndìhi-ndo cùtnàhá ní cáhá<sup>n</sup> ñáhá-gá xii-ndo. Te duca<sup>n</sup> cùtnùnì tucu iní-ndó sá ncháá sá ñí cachí-gá taxi-gá nduu táhú nchoo cuè ñáyi cùu cuendá-gá cùú-xi mée cuií-ni sá ño-gá váha.

<sup>19</sup> Te cùtnùnì tucu iní-ndó sá Yá Ndiöxí ío càhnu cuu-gá quidé-gá nchaa núú sá váha sá cùú-xi nchòhó ñáyi sàndáá iní ñáhá xii-gá, chi quide-gá sá vǎ yǎo tnàhí ndàcu cada sá cùú-xi-ó dàtná ní quide-gá

<sup>20</sup> ní dándótó-gá Xítohó Jesucristú cùtnàhá ní xíhí-gá. Te ní taxinucóo-gá Xítohó Jesucristú xio cùha-gá táxi tnùnì-gá.

<sup>21</sup> Te Xítohó Jesucristú ío-gá cùnùu-gá dàcúxí nchàa núú cuè espíritú, ndìhi dàcúxí nchàa cue té yìndaha ñáyi, ndìhi dàcúxí nchàa dava-gá cue té cùnùu. Te cuèi vitna te cuèi ndeé núú cuàhá<sup>n</sup> núú vèxi duca<sup>n</sup>-ni ío cùnùu-gá taxi tnùnì-gá.

<sup>22</sup> Te mee Yá Ndiöxí ní quide-gá sá Xítohó Jesucristú taxi tnùnì-gá nchaandi túhú sá ío, te ñíu-ni mee Yá Ndiöxí ní cachí-gá sá ncháá ñáyi cùu cuendá-gá quindaha ñàha Xítohó Jesucristú.

<sup>23</sup> Te cada iní-ó sá ncháá ñáyi cùu cuendá Yá Ndiöxí cùú-yu yìqui cùñú Xítohó Jesucristú, chi ñí-ni cùú-yu ndìhi-gá, te mee-gá táxi tnùnì-gá nchaandi túhú sá ío.

## 2

*Yá Ndiöxí ío cùndahú iní ñáhá-gá xii-o núu xíá<sup>n</sup> ní dácácu nihnu ñàha-gá*

<sup>1</sup> Te nchòhó cùú-ndó dàtná ñáyi ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndìhi Yá Ndiöxí ni caa ni quíhí<sup>n</sup>.

<sup>2</sup> Te duca<sup>n</sup> ní xíndecu-ndo ñíhi cuehé ichi duha, chi ní cáncicú<sup>n</sup> nihnu-ndo nchàa sá cuèhé sá dúhá ío ñuyíu-a, te ní xóo cada-ndo nchàa nacuáa càhá<sup>n</sup> sácúhna, te ñíu-ni sácúhna-á<sup>n</sup> táxi tnùnì-xi nchaa dava-gá espíritú cùndìhi-xi, te ñíu-ni-xi ndècu ndìhi-xi nchaa ñáyi ñá túú cùnì tñi tnúhu càhá<sup>n</sup> Yá Ndiöxí, te dàcahá<sup>n</sup> ñáhá-xi xii-yu cuendá cundecu-ni-yu ichi cuèhé ichi duha.

<sup>3</sup> Te nchaa-o dùca<sup>n</sup> ní xóo cada-o dàtná quidé cuè ñáyi-á<sup>n</sup>, chi ní xóo cada-o nchàa sá cuèhé sá dúhá ñí xóo canì iní-ó, te nàndi-gá nchaa sá cuèhé sá dúhá ñí xóo cahu iní-ó ñí xóo cada-o, núu xíá<sup>n</sup> tàú-ó sá dándòho ñàha Yá Ndiöxí xii-o ni cùu datná tàú-xi dándòho-gá nchaa ñáyi duca<sup>n</sup> ndècu ichi cuehé ichi duha-á<sup>n</sup>.

<sup>4</sup> Te Yá Ndiöxí ío cùu iní ñáhá-gá xii-o núu xíá<sup>n</sup> ní cùndahú iní ñáhá-gá xii-o

<sup>5</sup> cuèi cùu-o datná ñáyi ní xíhí sá cuendá nchaa sá cuèhé sá dúhá quide-o ni cuu. Te duca<sup>n</sup> ní quide-gá ní cùndahú iní ñáhá-gá xii-o cuendá cundecu-o ndìhi Xítohó Jesucristú vitna, te cuu ñínuu-o ndìhi-gá. Te sá cuendá-ni sá cùndahú iní ñáhá Yá Ndiöxí xii-o xíá<sup>n</sup> ní quide-gá nàcuáa nchoo nàhíhí tàhú-ó.

<sup>6</sup> Te cada iní-ó sá dàtná ní quide Yá Ndiöxí cùtnàhá ní dándótó-gá Xítohó Jesucristú cùtnàhá ní xíhí-gá duca<sup>n</sup> ñí quide ñàha-gá xii-o chi ndècu-o ndìhi-gá vitna. Te Xítohó Jesucristú sa ndècu-gá andìu núú ndécú Yá Ndiöxí. Te cada iní-ó sá Yá Ndiöxí sa ní quide-gá sá nchóo ñí ngúndecu túu-o ndìhi Xítohó Jesucristú, chi ío váha ndècu-o vitna.

<sup>7</sup> Te Yá Ndiöxí quidé váha ñàha-gá xii-o vitna cuendá sá ná sàá nduu, te ñíu-ni mee-gá cada te cùtnùnì iní

nchaa ñáyiú sá ïo cùu iní ñáhá-gă xii-o, te duca<sup>n</sup> ïo chìndee chitúu ñaha-gă xii-o cuendá sá ndécú ndìhi-o Xítohó Jesucristú.

8 Te Yá Ndiöxí ío cùndahú iní ñáhá-gă xii-ndo núu xiã<sup>n</sup> ní quide-gá sá nchòhó naníhí tàhú-ndó. Te duca<sup>n</sup> ní quide-gá chí ní sándáá iní-ndó-gă. Te ñá díú sã cuendá ì<sup>n</sup> chiu<sup>n</sup> ní quide-ndo duca<sup>n</sup> ní naníhí tàhú-ndó, chí mee Yá Ndiöxí ní cuiní-gá sá dicó-ni duca<sup>n</sup> naníhí tàhú-ndó.

9 Te mee Yá Ndiöxí ní cachí-gá sá ñà díú cuendá ì<sup>n</sup> chiu<sup>n</sup> quide-o naníhí tàhú-ó, te duca<sup>n</sup> ní cachí-gá cuendá sá vã cádá càhnu-o mee-o.

10 Te Yá Ndiöxí ní quide ñaha-gă xii-o dàtná ì<sup>n</sup> ñáyiú saa cuendá sá ñí tnahá tnúhu-o ndìhi Xítohó Jesucristú, te duca<sup>n</sup> ní quide-gá cuendá sá cádá-ó mèe-ni sá vãha. Te Yá Ndiöxí duca<sup>n</sup> tnahí ní sani iní-gá cunduu sá nchóo cùu-o ñáyiú cada mee-ni sã vãha.

*Xítohó Jesucristú quidé-gă ío vãha cùu iní-ó ndècu-o*

11 Te nchòhó chí dándàcu iní nàcuáa ní xíndecu-ndo ní cùu, chí ñá túú cùu-ndo ñáyiú isràél, te ní ñà túú quide-ndo datná quidé ñáyiú-á<sup>n</sup>, chí ñáyiú-á<sup>n</sup> sãha-yu sèñá ñí<sup>n</sup>-yu, te dàquee tíhũ-yu nchaa ñáyiú ñá túú ndècu sèñá ñí<sup>n</sup>-xi.

12 Te chí dándàcu iní nàcuáa ní xíndecu-ndo, chí dàvã-á<sup>n</sup> ñà túú ní xíndecu-ndo ndìhi Xítohó Jesucristú, te ní ñà túú ní xõo cuu tnahá tnúhu-ndo ndìhi ñáyiú isràél, te ní ñà túú ní xìní tnùní-ndó nàcuáa ndùu tnúhu sá ñí cáhá<sup>n</sup> ndáá Yá Ndiöxí nàcuáa cada vãha-gá ñáyiú, te ní ñà túú ní cùu-ndo ñáyiú quíndaha-gă, te ní ñà túú ní xõo níhí-ndó tnúhu ndee iní sá cùndècu-ndo ndìhi-gá.

13 Te cuèi ní cuu-ndo ñáyiú ñá túú tnahá tnúhu ndìhi Yá Ndiöxí ní cùu, dico vitna ní tnahá tnúhu-ndo ndìhi-gá chí cùu ì<sup>n</sup> nuu-ndo ndìhi Xítohó Jesucristú, cuendá sá ñí satí níñí-gă te ní xíhí-gá te xiã<sup>n</sup> duca<sup>n</sup> tnahá tnúhu-ndo ndìhi Yá Ndiöxí vitna.

14 Te Xítohó Jesucristú ní quide-gá sá nchóo ïo vãha cuu iní-ó cùndecu-o,

te ðiu-ni-gá ní quide cuendá sá vã dáquèe tíhú ñáhá ñáyiú isràél xii ñáyiú ñá túú cùu ñáyiú isràél, te duca<sup>n</sup> ì<sup>n</sup>-ná cuú-yu cundecú-yu.

15 Te sá ñí xíhí Xítohó Jesucristú, xiã<sup>n</sup> ñá túú-gă cùnùu nchaa tnúhu sá sánú ìchi ñaha xii ñáyiú nàcuáa cáda-yu cundecú-yu ní cùu. Te duca<sup>n</sup> ñí xíhí Xítohó Jesucristú cuendá sá cuè ñáyiú isràél ndìhi cue ñáyiú ñá túú cùu ñáyiú isràél ì<sup>n</sup>-ná cuú-yu cundecú-yu ìchi-gá, te duca<sup>n</sup> te vã dáquèe tíhú tnahá-gă-yu, te ío vãha cundecu ndìhi tnahá-yu.

16 Te duca<sup>n</sup> ñí quide Xítohó Jesucristú ní xíhí-gá núú cùrúxí cuendá sá cuè ñáyiú cùu ñáyiú isràél ndìhi cue ñáyiú ñá túú cùu ñáyiú isràél vã dáquèe tíhú tnahá-gă-yu. Te duca<sup>n</sup> ñí xíhí-gá cuendá ì<sup>n</sup>-ná cuú-yu tnahá tnúhu-yu ndìhi Yá Ndiöxí nàcuáa cuu vãha iní ñáhá-gă xií-yu.

17 Te cuèi cùu-ndo ñáyiú ñá túú tnahí xìní ndáá cuendá Yá Ndiöxí ní cùu, dico Xítohó Jesucristú ní quixí-gá ñuyíú-a ní cáhá<sup>n</sup>-gă tnúhu vãha nàcuáa ío vãha cuu iní-ndó cùndecu-ndo ndìhi Yá Ndiöxí. Te ðiu-ni duca<sup>n</sup> ní quide-gá sá cúú-xí nchaa ñáyiú sa xìní cuendá Yá Ndiöxí, ðiu-ni ñáyiú isràél.

18 Te cuèi cùu-o ñáyiú isràél àdi ñá túú cùu-o dico ðiu-ni mee Xítohó Jesucristú ní quide-gá sá ncháá-ó tnahá tnúhu-o ndìhi Dútú Ndiöxí Yá cúú Tãtã-ó. Te duca<sup>n</sup> ñí tnahá tnúhu-o ndìhi Yá Ndiöxí chí ní ngúndecu ndìhi-o Espíritú-gá.

19 Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnahá tnúhu ndìhi Yá Ndiöxí ní cùu, dico vitna chí ì<sup>n</sup>-ná ní cuu-ndo ndìhi nchaa dava-gá ñáyiú cùu cuendá-gá chí cùu-ndo déhe-gá.

20 Te cada iní-ó sã cuè téé ní táuchíú<sup>n</sup> Xítohó Jesucristú cáhá<sup>n</sup> tnúhu-gá, ndìhi cue téé ní xóo cáhá<sup>n</sup> tnúhu Yá Ndiöxí ndéé sanaha cùu-güedé dàtná cimientú ì<sup>n</sup> vehe, te nchòhó cúú-ndó dàtná ndóhõ sá sãa vehe-á<sup>n</sup>, te cada tucu iní-ó sã Xítohó Jesucristú cúú-gă ì<sup>n</sup> yúú cùnùu cuu cimientú vehe-á<sup>n</sup>.

21 Te duca<sup>n</sup> ïo váha cùu ì<sup>n</sup>nuu nchaa ndóho-á<sup>n</sup> ndìhì yúú cùnùu-á<sup>n</sup>, te duca<sup>n</sup> tucu ïo váha ta quëe tnàha nchaa ndóho-á<sup>n</sup> cuãsaá. Te xiã<sup>n</sup> cada iní-ó sã cúu-xí vèhe Yá Ndiöxí, vehe sã ïo ní cuu íí. Te duca<sup>n</sup> sãtnahá-xi cùu nchaa ñáyiú ndècu ichi Xítóhó Jesucristú chi ní tnahá tnúhu-yu ndìhì-gá, te ì<sup>n</sup> nduu ì<sup>n</sup> nduu ta cùu vii cuu váha-gá-yu núú Yá Ndiöxí cuáhá<sup>n</sup>.

22 Te tnàhá nchòhó duca<sup>n</sup> sãtnahá-xi cùu-ndo chi ní ngúndecu ndìhì-ndo Xítóhó Jesucristú, te duca<sup>n</sup> ta cùu vii cuu váha tucu-ndo núú Yá Ndiöxí cuáhá<sup>n</sup>, te cùu-ndo datná vehe Yá Ndiöxí chi ndècu ndìhì-ndo Espiritú-gá.

### 3

*Té Păblú yíhì dǐquí-dě cáhá<sup>n</sup>-dé tnúhu Xítóhó Jesucristú núú ñáyiú ñá túú cùu ñáyiú isràél*

1 Te yúhú té Păblú yíhì-í vecaá sã cuendá sã cáhá<sup>n</sup>-í tnúhu Xítóhó Jesucristú núú nchòhó ñáyiú ñá túú cùu ñáyiú isràél, núú xiã<sup>n</sup> ñiú cuendá-gá duha yíhì-í vecaá vitna.

2 Te nchòhó sa nàha-ndo sã Yá Ndiöxí ní cundàhú iní ñáhá-gã xii-í, te ní cachí-gá sã yúhú quihì dǐquí-í cáhá<sup>n</sup>-í tnúhu Xítóhó Jesucristú núú-ndó, te cuendá sã cáhá<sup>n</sup>-í tnúhu-gá núú-ndó te cuu-xi sã váha sã cúu-xí-ndó.

3 Te yúhú sa ní cachí tnúhu-í xii-ndo lùha nacuaá ndùu tnúhu ndùu yuhu ní cuu, sã ñí cachí tnúhu Yá Ndiöxí xii-í.

4 Te òré dàcuaha-ndo tnúhu ndùu yuhu-á<sup>n</sup> ní cùu te quini-ndó sã yúhú tècú tnùnì-í nàcuáa ndùu tnúhu-á<sup>n</sup>, te tnúhu-á<sup>n</sup> cáhá<sup>n</sup>-xi cuendá Xítóhó Jesucristú.

5 Te tnúhu-á<sup>n</sup> cúu-xí tnúhu sã vã yòo tnàhì xini ní cùu, dico cue téé ní táuchíú<sup>n</sup> Xítóhó Jesucristú cáhá<sup>n</sup> tnúhu-gá, ndìhì cue téé cáhá<sup>n</sup> nàcuáa dàcahu iní ñáhá Yá Ndiöxí ní níhì-güedé tnúhu ndùu yuhu-á<sup>n</sup>, chi Espiritú Yá Ndiöxí ní xáha<sup>n</sup>-xi xii-güedé.

6 Te duha cáhá<sup>n</sup> tnúhu ndùu yuhu-á<sup>n</sup> ní cùu: “Cuëi ñáyiú ñá túú cùu ñáyiú isràél te cuëi ñáyiú cùu ñáyiú isràél

dico ì<sup>n</sup>-ni ndùu táhü-yu sã váha núú Yá Ndiöxí, te núu na quindáá iní-yu tnúhu sã cáhá<sup>n</sup> nàcuáa naníhì tãhü-yu, te ì<sup>n</sup>-nã cúu-yu cundecú-yu, te duca<sup>n</sup> ì<sup>n</sup>-ni cada váha ñaha Yá Ndiöxí xii-yu te núu na cùndecu ndìhì-yu Xítóhó Jesucristú”, duha ndùu tnúhu ndùu yuhu-á<sup>n</sup> ní cùu.

7 Te Yá Ndiöxí ní cundàhú iní ñáhá-gã xii-í ní taxi-gá chiú<sup>n</sup> quide-í cáhá<sup>n</sup>-í tnúhu-gá, te mee-gã quidé-gã sã yúhú ndacu-í cáhá<sup>n</sup>-í tnúhu-gá.

8 Te nchaa ñáyiú cùu cuendá Yá Ndiöxí cúu-yu ñáyiú ïo-gá cùnùu cadá-yu chiú<sup>n</sup>-gá dàcúxí yúhú, te cuëi duca<sup>n</sup> dico Yá Ndiöxí ní cundàhú iní ñáhá-gã xii-í ní taxi-gá chiú<sup>n</sup> quide-í cáhá<sup>n</sup>-í tnúhu-gá núú cue ñáyiú ñá túú cùu ñáyiú isràél. Te tnúhu-gá-á<sup>n</sup> cáhá<sup>n</sup>-xi sã sùúni ïo váha cada ñaha Xítóhó Jesucristú xii-o.

9 Te duca<sup>n</sup> ñí cachí Yá Ndiöxí sã cáhá<sup>n</sup>-í tnúhu-gá cuendá danèhé-í nchaa ñáyiú. Te sã dánèhé-í-yu-á<sup>n</sup> cúu-xí tnúhu ndùu yuhu sã ñí sani iní-gá ndéé sanaha nàcuáa cada váha-gá cue ñáyiú. Te ndéé dàvá-á<sup>n</sup> ñí quesaha ndùu yuhu tnúhu-á<sup>n</sup> ní cùu. Te ñiú-ñi-gá cúu-gã Yá ní cadúha nchaandi túhú sã ïo.

10 Te duca<sup>n</sup> ndùu yuhu tnúhu-á<sup>n</sup> ní cùu cuendá sã ncháá espíritú cùnùu ndecu andiú quini-xi vitna nàcuáa quide nchaa ñáyiú ní tuha ñaha xii Yá Ndiöxí cuendá duca<sup>n</sup> cùtnuní iní-xi sã ïo váha cùtnuní iní-gá nàcuáa cada-gá.

11 Te Yá Ndiöxí ní sani iní-gá ndéé sanaha nàcuáa ní cuini-gá cada Xítóhó Jesucristú, te ní sáá nduu ñí quide Xítóhó Jesucristú nàcuáa ní cuini Yá Ndiöxí cada-gá.

12 Te vitna cùyi-o cáhá<sup>n</sup> ndìhì-o Yá Ndiöxí cuendá sã ndécú ndìhì-o Xítóhó Jesucristú, te sãndáá iní-ó-gã.

13 Te núu xiã<sup>n</sup> cáhá<sup>n</sup>-í dóho-ndo sã cuëi duha ndòho-í vitna dico vá ná túhú iní-ndó cãchicú<sup>n</sup> nihnu-ndo ichi Xítóhó Jesucristú. Te sã dúhá ndòho-í te cùu-xi sã váha sã cúu-xí-ndó, chi cuu-ndo ñáyiú cùu cahnu núú Yá Ndiöxí.

*Xítóhó Jesucristú ïo cùu iní ñáhá-gã*

*xii-o*

14 Te sá cuendá nchaa sá nǐ sani iní Dútú Ndiöxí quidé-gã xíã<sup>n</sup> yúhú ngüñí xítí-í núú-gã càhá<sup>n</sup> ndihí-í-gá, te ñiú-ni-gá cúú Yáá cúú Tátá Xítohó Jesucristú.

15 Te mee Yá Ndiöxí ní cachí-gá sá ncháá espíritú ndécú àndiú cunduu-xi datná ní cachí méé-gã cunduu-xi. Te ní cachí tucu-gá sá nchóó cùu-o ñáyiú, te cunduu-o datná cuini méé-gã cunduu-o.

16 Te xicá<sup>n</sup> táhú-í núú Dútú Ndiöxí sá Espíritú-gá ná cada nacuáa cuita níhí ndéé-gã-ndó quíhí<sup>n</sup> cundecu-ndo ìchi-gá, te duca<sup>n</sup> xicá<sup>n</sup> táhú-í núú-gã cada Espíritú-gá chí ío càhnu cuu-gá.

17 Te xicá<sup>n</sup> táhú tucu-í núú Yá Ndiöxí sá Xítohó Jesucristú ná cundecu ndihí ñaha-ni-gá xii-ndo chí sandáá iní-ndó-gã, te duca<sup>n</sup> te vá dáñá ndéé-ndó ío cuu iní tnáhá-ndó.

18 Te xicá<sup>n</sup> táhú tucu-í núú Yá Ndiöxí cuendá-ndó ndihí cuendá dava-gá ñáyiú cùu cuendá-gá, cuendá sá cùtnùní iní-ndó sã sùúní cùu iní ñáhá Xítohó Jesucristú xii-o.

19 Te duha xicá<sup>n</sup> táhú-í núú Yá Ndiöxí chí cuini-í sá ncháá-ndó tècú tnùní-ndó sã ío cùu iní ñáhá Xítohó Jesucristú xii-o cuèi vá ndácú càva-o quini-ó nacuáa cùu iní ñáhá-gã xii-o. Te xicá<sup>n</sup> táhú tucu-í núú Yá Ndiöxí sá ío na cundecu ndihí ñaha-gá xii-ndo, te duca<sup>n</sup> càncicú<sup>n</sup> nihnu-ndo càda-ndo nchaa nacuáa quide mee-gá.

20 Te Yá Ndiöxí ío-gá vai sá ndácú-gã táxi-gã dàcúxí sã xicá<sup>n</sup>-ó nùú-gã, te cuèi ndéé nchaa sá ñà túú sàni iní-ó níhí-ó te tàxi-gá, te duca<sup>n</sup> chí mee-gã ndécú ndihí ñaha-gá xii-o, te ndàcu-gá quidé-gã nándi sá vaha sá cúú-xí-ó.

21 Te vitna nchaa nchoo ñáyiú ndècu ichi Xítohó Jesucristú chí ná càchí-ó sã ío càhnu cuu Yá Ndiöxí, te duca<sup>n</sup>-ni càhá<sup>n</sup>-ó sã ío càhnu cuu-gá ni caa ni quíhí<sup>n</sup> chí ndècu ndihí-o Xítohó Jesucristú. Te duca<sup>n</sup> na cunduu.

## 4

*Espíritú Yá Ndiöxí quidé-xí cùu ñ<sup>n</sup>nuu-o ndecu-o*

1 Te yúhú té Páblú yíhí-í vecaá sá cuendá Xítohó Jesucristú, te càhá<sup>n</sup> ndáhú-í núú-ndó sã cada vaha-ndo cundecu-ndo datná tàú-xi cada cue ñáyiú ní càhá<sup>n</sup> Yá Ndiöxí cundecu ndihí-gá. Te nchòhó tnáhá-ndó cùu-ndo ñáyiú ní càhá<sup>n</sup> ñáhá Yá Ndiöxí cundecu ndihí-gá.

2 Te vá cada càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nacuáa duca<sup>n</sup> cundèe iní-ndó nùu ná cúú sã cùmání nùú tnáhá-ndó.

3 Te ío nducu ndèe-ndo cuu ñ<sup>n</sup>nuu-ndo cundecu-ndo, chí Espíritú Yá Ndiöxí chindee ñaha-xi xii-ndo, te duca<sup>n</sup> ío váha cuu iní-ndó cundecu-ndo chí cùu ñ<sup>n</sup>nuu-ndo.

4 Te nchoo ñáyiú ndècu ichi Xítohó Jesucristú ñ<sup>n</sup>-ni cùu-o, te duca<sup>n</sup> ñ<sup>n</sup>-ni Espíritú Yá Ndiöxí ndécú, te ñiú-ni duca<sup>n</sup> ñ<sup>n</sup>-ni tnúhu ndèe iní ní ngúndecu ndihí-o cùtnáhá ní càhá<sup>n</sup> ñáhá Yá Ndiöxí xii-o.

5 Te ñ<sup>n</sup>-ni Xítohó Jesucristú ndécú tàxi tnuní ñáhá-gã xii-o, te ñ<sup>n</sup>-ni cùu-o sandáá iní-ó tnúhu-gá, te ñ<sup>n</sup>-ni ní sandute-o.

6 Te ñ<sup>n</sup>-ni Dútú Ndiöxí cúú Yáá cúú Tátá-ó ncháa-o, te ñiú-gá cùnùu-gá yíndàha ñaha-gá xii-o ncháa-o. Te Yá Ndiöxí dácàhá<sup>n</sup>-gá iní-ó quide-o chiu<sup>n</sup>-gá, te duca<sup>n</sup> ndècu ndihí ñaha-gá xii-o ncháa-o.

7 Te nchoo ndè dñ<sup>n</sup> ndè dñ<sup>n</sup> chindee ñaha Yá Ndiöxí xii-o quide-o nacuáa ndùu chiu<sup>n</sup> ní cachí Xítohó Jesucristú cada-o.

8 Te quèe ndáá-xi nacuáa càhá<sup>n</sup>-xi núú tütú Yá Ndiöxí núú càchí-xi:

Xítohó Jesucristú cuánda-gá andiú te ío cùnùu-gá,

chí nchaa cue espíritú cúú ùhú iní ñáhá xii-gá ñà túú ní ndàcu-xi naá ndihí ñaha-xi xii-gá,

te mee-gã ní cachí-gá nacuáa ndùu chiu<sup>n</sup> nduu táhú ñ<sup>n</sup> ñáyiú cadá-yu.

Duha càchí-xi núú tütú-gá.

9 Te sá dúcá<sup>n</sup> càhá<sup>n</sup>-xi sá cuánda-gá andiú xíã<sup>n</sup> cùtnùní iní-ó sã ní cuu<sup>n</sup>-gá ñuyíú-a.

10 Te Xítohó Jesucristú ní cuu<sup>n</sup>-gá ñuyíú-a, te ñiú-ni-gá cuánda-gá



andi u cuendá ío cunuu-gă taxi  
tnùnî-gá nchaandi túhú sá ío.

11 Te ní dácăhñu-gă cue tée xinu  
cuechi núú-gă ññ núú chiun  
cada-güedé. Te ní cachî-gă sá  
dăva-güedé cĂhá<sup>n</sup>-güedé tnúhu-gă,  
te dăva-güedé ní cachî-gă sá  
cĂhá<sup>n</sup>-güedé năcuăa dăcahu iní ñĂhá  
Yă Ndiôxî xii-güedé. Te dăva-güedé ní  
cachî-gă sá cúú-güedé cue tée datécú  
tnúhu cue ñăyiu năcuăa cadă-yu  
naníhî tĂhú-yu. Te dăva-güedé  
ní cachî-gă sá cúú-güedé cue tée  
quindaha ñăha xii ñăyiu dăcuăha  
ñăha-güedé xii-yu tnúhu-gă.

12 Te duca<sup>n</sup> ñî cachî-gă cada  
cue tée-ă<sup>n</sup> cuendá canu ichi-güedé  
cue ñăyiu cùu cuendá Yă Ndiôxî  
cuendá duca<sup>n</sup> ñăyiu-ă<sup>n</sup> ñîhî-yu năcuăa  
cadă-yu chiun-gă, te duca<sup>n</sup> cuita ñîhî  
ndée-gă-yu cundecú-yu ichi Xítohó  
Jesucristú.

13 Te duca<sup>n</sup> ñî cachî Xítohó Jesu-  
cristú cunduu ndée sáá nduu cùu  
ññnuu-o quindáá iní-ó tnúhu-gă,  
te duca<sup>n</sup> cùu ññnuu-o tecú tnùnî-ó  
năcuăa ndùu cuendá-gă chi dîu-gă  
cúú-gă Déhe Yă Ndiôxî, te cuu-o ñăyiu  
ío quide ndáá dătná quidé mée Xítohó  
Jesucristú. Te duca<sup>n</sup> te ñă túú tnĂhî-gă  
ná cùmánî-ó nùú Yă Ndiôxî.

14 Te duca<sup>n</sup> te vá cúú-gă-ó dătná  
cue landú vátá cùtnùnî váha-gă iní-xi,  
te ni vĂ cadă-gă-ó dătná quidé ndùte  
lamár, chi ndute-ă<sup>n</sup> òré quéné tĂchî  
te cuĂhá<sup>n</sup>-xi duha cuĂhá<sup>n</sup>-xi dăcá<sup>n</sup>, te  
duca<sup>n</sup> chi vá quindáá-gă iní-ó tnúhu  
cĂhá<sup>n</sup> nchaa ñăyiu dăndahú ñĂhá xii-o,  
chi ñăyiu-ă<sup>n</sup> ío váha xitó-yu năcuăa  
dăndĂhú ñĂhá-yu xii-o chi cĂchî-yu  
sá cĂhá<sup>n</sup>-yu tnúhu Yă Ndiôxî dico ñă  
ndáá.

15 Te nchoo ío cuu iní tnĂhá-ó, te vá  
dăndĂhú tnĂhá-ó, chi cĂhá<sup>n</sup>-ó mée-ni  
sá ndáá. Te xini ñuhu-xi sá ññ nduu  
ññ nduu cuita cada ndáá-gă-ó quíhî<sup>n</sup>  
dătná quidé ndáá mée-gă, te dîu-ni-gă  
cúú-gă Yăá cúnùu cuu díhna tĂxi tnunî  
ñĂhá-gă xii-o.

16 Te dîu-ni Xítohó Jesucristú quidé  
ñăha-gă xii nchaa nchoo ñăyiu ndècu  
ichi-gă dătná yiqui cùñú mée-gă, chi

ññ yiqui cùñú ío váha ní quée tnăha  
ññ ññ xichi, te duca<sup>n</sup> yîhî túchi yiqui  
cùñú-ă<sup>n</sup> yótnñ-xi nchaa năcuăa ní  
quée tnăha. Te duca<sup>n</sup> sĂtnahá-xi cùu  
nchoo chi ññ-ni cùu-o ndecu-o ichi  
Xítohó Jesucristú táxi tnùnî ñĂhá-gă  
xii-o. Te núu nchoo quide-o nchaa  
năcuăa tĂú-xi cunduu te cùu iní  
tnĂhá-ó, te duca<sup>n</sup> ta ñîhî ndée-gă-ó  
cuĂhá<sup>n</sup> ndécú-ó ichi-gă.

*Vă cadă-gă-ó dătná ní xóo cada-o  
cùtnĂhá ní xindecu-o ichi cuehé ichi  
duha*

17 Te vitna yúhú cĂhá<sup>n</sup>-í dóho-ndo  
quide-í núú Xítohó Jesucristú sá vĂ  
cúndecu-gă-ndó dătná xindecu ñăyiu  
ñă túú sândáá iní ñĂhá xii Yă Ndiôxî,  
chi nchaa ñăyiu-ă<sup>n</sup> ñă túú vĂdana  
năndĂhî nchaa sá sánî iní-yu.

18 Te ni ñă túú vĂdana cùtnunî iní-yu  
năcuăa ndùu tnúhu ndáá tnúhu Yă  
Ndiôxî. Te ñăyiu-ă<sup>n</sup> ñă túú ndùu  
tĂhú-yu cundecú-yu năcuăa cùinî  
Yă Ndiôxî, chi ñă túú vĂdana tĂcú  
tnùnî-yu te duca<sup>n</sup> chi ío sáá iní-yu.

19 Te ñă túú tnĂhî-gă ná sánî iní-yu  
ndécú-yu ichi cuehé ichi duha, te ío  
cùdí iní-yu ndécú-yu ichi dí iní, te  
ñă díú-ní xĂ<sup>n</sup> chi năndî-gă nchaa sá  
cuehé sá dúhá quidé-yu ndécú-yu.

20 Dico tnúhu Xítohó Jesucristú sá ñî  
sândáá iní-ndó chi ñă túú dăca<sup>n</sup> sanu  
ichi ñăha-xi xii-ndo cada-ndo.

21 Te nchòhó ní cùtnùnî iní-ndó  
năcuăa ndùu cuendá Xítohó Jesu-  
cristú, te dăcuaha-ndo tnúhu ndáá  
dîu-ni tnúhu-gă năcuăa ndècu-ndo  
ichi-gă.

22 Te vitna vá cĂnî-gă iní-ndó  
cĂda-ndo datná ní xóo cada-ndo  
cùtnĂhá ní xindecu-ndo ichi cuehé ichi  
duha, chi núu nchaa-ni sá cuehé sá  
dúhá-ă<sup>n</sup> ná cùhu<sup>n</sup>-ni iní-ndó cĂda-ndo,  
te uu<sup>n</sup>-gă uu<sup>n</sup>-gă cuita dăcuăa ni-  
hnu ñăha-xi xii-ndo quíhî<sup>n</sup>, chi núu  
nchaa-ni sá cuehé sá dúhá-ă<sup>n</sup> ná  
cùhu<sup>n</sup>-ni iní-ndó te dĂticá nuu ñăha-xi  
xii-ndo.

23 Te nchòhó, xini ñuhu-xi sá vĂ  
dúcá<sup>n</sup>-gă canî iní-ndó cĂda-ndo te  
tĂú-ndó ndùu-ndo datná ññ ñăyiu ní  
cacu túu saa.

24 Te nduu iní-ndó dàtná cuení mée Yá Ndiöxí cunduu, chi nduu-xi nàcuáa càa iní mée-gã, te duca<sup>n</sup> te cuu-ndo ñáyiú ío váha cada ndáá, te cuu ndisa-ndo ñáyiú ñá túú tnàhí ná cumání cundecu núú-gã.

25 Te cuendá xiã<sup>n</sup> núu càhá<sup>n</sup>-í dóho-ndo sã nchòhó vá dácua<sup>n</sup>ndehnde-gã-túú dàtná ní xóo cada-ndo, te mee-nã sã ndáá cáhá<sup>n</sup> ndìhi tnàha-ndo, chi ì<sup>n</sup>-ni cùu-o ndecu-o ichi Xítóhó Jesucristú.

26 Te núu cùdée<sup>n</sup>-ndó te cada cuendá-ndó sã vã cáda-ndó ì<sup>n</sup> cuéchi sã dúcá<sup>n</sup> cùdée<sup>n</sup>-ndó, te vá dúcá<sup>n</sup>-ní cùhu<sup>n</sup> iní-ndó tnùhu sàtú iní-á<sup>n</sup>.

27 Te vá dáñá-ndó mée-ndo dan-dahú ñáhá sàcúh<sup>n</sup>á xii-ndo.

28 Te núu dava-ndo cùu-ndo ñadúhú te vá dúcá<sup>n</sup>-gã cada-ndo, chi nducu-nã-ndó ì<sup>n</sup> chiu<sup>n</sup> váha cada-ndo nàcuáa duca<sup>n</sup> ñhí-ndó sã chindèe-ndo cue ñáyiú ndàhú ñáyiú ñá túú ñà ndécú ndìhi.

29 Te vá càhá<sup>n</sup>-gã-ndó nì ì<sup>n</sup> tnùhu cuèhé, chi mee-nã tnùhu vii tnùhu váha cáhá<sup>n</sup>-ndó nàcuáa duca<sup>n</sup> ngünu ichi cue ñáyiú ndèdóho ñaha xii-ndo, te núu duca<sup>n</sup> na càda-ndo te cuu-xi sã váha sã cúú-xi ñáyiú duca<sup>n</sup> ndèdóho ñaha xii-ndo-á<sup>n</sup>.

30 Te vá cáda-gã-ndó nì ì<sup>n</sup> sã ñà túú tàú-ndó càda-ndo cuendá sã vã dándihú-ndó iní Espíritú Yá Ndiöxí, chi ðiu Espíritú-gã ndécú ndìhi-ndo, te xiã<sup>n</sup> cùtnùni iní-ndó sã sàá nduu nàcuaca ñaha-gã xii-ndo cundecu-ndo ndìhi-gã nì caa nì quíhí<sup>n</sup>.

31 Te vá dásàtú-gã-ndó iní tnàha ñáyiú-ndo, te nì vã cúhú<sup>n</sup> iní-ndó tnùhu sàtú iní, te nì vã cùdée<sup>n</sup>-gã-ndó, te cuèi núú chítú núú tàcá vã càhá<sup>n</sup> cana-ndo cùcuèhé-ndó tnàha ñáyiú-ndo, te nì vã cuátnùhu-ndo tnàha ñáyiú-ndo, te nì vã cáni cuèhé cani duha iní-ndó cuendá tnàha ñáyiú-ndo.

32 Te cundàhú iní tnàhá-ndó, te cada tnàha-ndo sã váha, te cada càhnu iní tnàhá-ndó núu ná cúú sã cúmání núú tnàhá-ndó dàtná ní quide Yá Ndiöxí ní quide càhnu iní-gã nchaa yíca cuèchi-ndo sã cuendá Xítóhó Jesucristú.

## 5

*Nàcuáa tàú-xi cundecu nchaa ñáyiú cùu déhe Yá Ndiöxí*

1 Te nchòhó cúú-ndó ñáyiú ío cùu iní ñáhá Yá Ndiöxí, te ðiu déhe-gã cúú-ndó núu xiã<sup>n</sup> xini ñùhu-xi can-chicú<sup>n</sup> ñihnu-ndo càda-ndo datná quide mée-gã.

2 Te ío cuu iní tnàhá-ndó cundecu-ndo datná cúú iní ñáhá Xítóhó Jesucristú xii-ndo, chi ðiu-gã ní cachí-gã sã cùú-gã cuendá nchaa cuéchi-o te ní xihí-gã, te sã dúcá<sup>n</sup> ñi xihí-gã te ní cuu-gã dàtná ì<sup>n</sup> táhú sã cúú-xi Yá Ndiöxí, te ío váha ní cuu iní Yá Ndiöxí sã dúcá<sup>n</sup> ñi quide-gã.

3 Te sã cuendá sã nchòhó cúú-ndó ñáyiú cùu cuendá Yá Ndiöxí núu xiã<sup>n</sup> nchaa nchòhó cue téé vã càhá<sup>n</sup> ndìhi-ndo ñáyiú ðihí te núu ñá díú ñàdihí-ndó cùu-yu, te duca<sup>n</sup>-ni nchàa nchohó cue ñáyiú ðihí tucu vã càhá<sup>n</sup> ndìhi-ndo cuè téé te núu ñá díú yì-ndo cuu-güedé, te nì vã cáni tnàhí iní-ndó cundecu-ndo ichi díí iní, te nì vã xihó-ndó nì ì<sup>n</sup> sã ndécú ndìhi tnàha ñáyiú-ndo, te nì ì<sup>n</sup> nchaa xiã<sup>n</sup> vã cáni iní-ndó càda-ndo, te nì vã cáci nèhe-ndo.

4 Te nì vã càhá<sup>n</sup>-ndó ì<sup>n</sup> tnùhu sã nì vã cúú cùndedóho ñáyiú, te nì vã càhá<sup>n</sup>-ndó ì<sup>n</sup> tnùhu cùtexínu, te nì dàva-gã nchaa tnùhu sã ñà túú vèdana nàndihí vã càhá<sup>n</sup>-ndó, chi nchaa tnùhu-á<sup>n</sup> ñà túú tàú-xi cáhá<sup>n</sup>-ndó, te xini ñùhu-xi sã váha-gã sã ndácá<sup>n</sup> táhú-ndó núú Yá Ndiöxí cuendá nchaa sã váha quide-gã.

5 Te nchòhó sa xini ndáá-ndó sã ncháá cuè téé càhá<sup>n</sup> ndìhi ñáyiú ðihí te ñá díú ñàdihí-güedé cúu-yu, ndìhi cue ñáyiú ðihí càhá<sup>n</sup> ndìhi cue téé te ñá díú yì-yu cùu-güedé, nchaa ñáyiú-á<sup>n</sup> vã ndúú tãhú-yu cundecú-yu núú ndécú Yá Ndiöxí ndìhi Xítóhó Jesucristú táxi tnùni-gã. Te nì cuè ñáyiú xindecu ichi díí iní, te nì cuè ñáyiú xihó nchaa sã ndécú ndìhi tnàha ñáyiú-xi vã ndúú tãhú-yu cundecú-yu ndìhi-gã núú ndécú-gã táxi tnùni-gã. Te tnùhu sã càhí-ó xihó-o nchaa sã ndécú

ndìhi tnaha ñáyiu-o, ì<sup>n</sup>-ni cùu-xi ndìhi tnúhu sá càchí ñáyiu quìde cahnú-yu nchaa sá càchí-yu cùu ndiòxí te ñá ndàá sá ndiòxí cúu-xí.

<sup>6</sup> Te vá quìndáá iní-ndó nì ì<sup>n</sup> tnúhu sá ñà túú nàndìhi càhá<sup>n</sup> ñáyiu, chi ñáyiu-án ìo dandòho ñaha Yá Ndiòxí xii-yu cuèndá nchaa sá cuèhé sá dúhá quidè-yu chi ñá túú sàndáá iní ñáhã-yu xii-gá.

<sup>7</sup> Núu xiã<sup>n</sup> càhá<sup>n</sup>-í dóho-ndo sã vã nhí tnáhã-ndó ndìhi cue ñáyiu-án.

<sup>8</sup> Te nchòhó ní cuu-ndo dàtná cue ñáyiu ní xíndecu núú néé chi ní xíndecu-ndo ìchi cuehé ichi duha, dico vitna ní ngúndecu-ndo ìchi Xítohó Jesucristú, te ñá túú-gã ndécú-ndó núú néé dàtná ní xíndecu-ndo nì cùu. Te vitna cada-ndo nchaa nacuaá tàú-xi cunduu chi ndècu-ndo ichi-gá.

<sup>9</sup> Te sá cuèndá sá ndécú-ndó ìchi-gá núu xiã<sup>n</sup> cúu-ndó ñáyiu váha, te quìde ndáá-ndó ndècu-ndo, te ñá túú dàcuandehnde-ndo chi càhá<sup>n</sup>-ndó mèe-nì sá ndáá.

<sup>10</sup> Te ío váha cada cuèndá-ndó nchaa sá cúu váha iní Xítohó Jesucristú, te xiã<sup>n</sup> cada-ndo.

<sup>11</sup> Te vá cáncñícú<sup>n</sup> nihnu-ndo tnáhã-ndó càda-ndo datná quidè cue ñáyiu ndècu ichi cuehé ichi duha, chi nchòhó tàú-ndó càhá<sup>n</sup>-ndó dóho nchaa ñáyiu duca<sup>n</sup> ndècu ichi cuehé ichi duha-án cuèndá nchaa sá quidè-yu.

<sup>12</sup> Te cucaha<sup>n</sup> núú-ndó vã càhá<sup>n</sup>-ndó cuèndá nì ì<sup>n</sup> sá cuèhé sá dúhá quidè dayuhu nchaa ñáyiu-án.

<sup>13</sup> Dico òré dándixi túu tnúhu Yá Ndiòxí iní-yu nacuaá quidè-yu te cùtnuní iní-yu sá ñá túú quidè váha-yu, te duca<sup>n</sup> ndìxi cuéchi iní-yu cuèndá nchaa sá cuèhé sá dúhá quidè-yu.

<sup>14</sup> Te núu tùtú Yá Ndiòxí càchí-xi: Nchòhó cúu-ndó dàtná ñáyiu xidí, te vitna ndiquíú iní-ndó,

te cùu tucu-ndo datná ñáyiu ní xihí, te vitna ndoto-ndo,

te Xítohó Jesucristú chindee ñaha-gá xii-ndo nacuaá vá cùndècu-gá-ndó ìchi cuehé ichi duha.

Duha càhá<sup>n</sup>-xi núu tùtú-gá.

<sup>15</sup> Te ío váha cada cuèndá-ndó nacuaá cada-ndo cùndecu-ndo, te vá cáda-ndó dàtná xiquide cue ñáyiu ñá túú tècú tnùnì, chi cada-ndo dàtná xiquide ñáyiu ío váha sàá díquí-xi.

<sup>16</sup> Te ì<sup>n</sup> nduu ì<sup>n</sup> nduu canì iní-ndó càda-ndo nchaa nacuaá tàú-xi cunduu, chi vitna ío cùnuu nchaa sá cuèhé sá dúhá.

<sup>17</sup> Te cuu-ndo ñáyiu tècú tnùnì cuèndá duca<sup>n</sup> cùtnuní iní-ndó nacuaá cuìnì Yá Ndiòxí cada-ndo, te vá cáda-ndó dàtná xiquide cue ñáyiu ñá túú tnàhí cùtnuní iní-xi nacuaá cuìnì Yá Ndiòxí cada-yu.

<sup>18</sup> Te vá cúu-ndó ñáyiu quihu chi núu duca<sup>n</sup> na càda-ndo te dàcuíta nihnu-ndo mèe-ndo, te dañã-ndo mèe-ndo sá Espiritú Yá Ndiòxí ná tàxi tnuní ñáhã-xí xii-ndo.

<sup>19</sup> Te càhá<sup>n</sup>-ndó nacuaá-ni cuáhã<sup>n</sup> ndudú sá nì xóo cata nchaa cue ñáyiu ndéé sanaha nì xóo chiñuhu-yu Yá Ndiòxí. Te càhá<sup>n</sup>-ndó nacuaá cuáhã<sup>n</sup> ndudú sá chíñuhu-ndo Yá Ndiòxí, te cata-ndo. Te cuéi nchaa dava-gá ndudú ñu-nì duca<sup>n</sup> càhá<sup>n</sup>-ndó te cata-ndo. Te nì yùhu nì iní-ndó càta-ndo nchaa ndudú-án chíñuhu-ndo Yá Ndiòxí.

<sup>20</sup> Te vá dañã ndéé-ndó ndàcã<sup>n</sup> táhú-ndó núú Tãtã-ó Dütú Ndiòxí cuéi ndècu váha-ndo àdi ñá túú ndècu váha-ndo. Te duca<sup>n</sup> càda-ndo chi ndècu ndìhi-ndo Xítohó Jesucristú.

*Tàú-xi sá quìndáá iní tnáhã cue ñáyiu ndècu ichi Xítohó Jesucristú*

<sup>21</sup> Te nchòhó ñáyiu ndècu ichi Xítohó Jesucristú tàú-xi sá quìndáá iní tnáhã-ndó, te duca<sup>n</sup> càda-ndo chi nèhe-ndo sá yíñuhu núu Yá Ndiòxí.

<sup>22</sup> Te nchaa nchòhó ñáyiu dìhí ndécú yì-xi, xìni ñuhu-xi sá quìndáá iní-ndó yì-ndo datná sàndáá iní-ndó Xítohó Jesucristú.

<sup>23</sup> Chi yì-ndo tàxi tnuní ñáhã-güedè xii-ndo dàtná quidè Xítohó Jesucristú táxi tnùnì ñáhã-gã xii nchoo cue ñáyiu ndècu ichi-gá. Te ñu-gá cúu-gã Yaá ní dácãcu nihnu ñaha xii-o núu ùhú núu ndáhú, te cùu-o datná yiqui cùñú-gá.

<sup>24</sup> Te dàtná quidè nchòhó ñáyiu ndècu ichi Xítohó Jesucristú sàndáá iní-ó

tn̄i-o nchaa tn̄uhu càhá<sup>n</sup>-gá, duca<sup>n</sup> tàú-xi cada nchaa nchòhó ñáyiú dìhí quíndáá iní-ndó tn̄i-ndo nchaa tn̄uhu càhá<sup>n</sup> ȳi-ndo.

25 Te tn̄há nchaa nchòhó cue téé tucu tàú-xi sá ïo cuu iní-ndó ñàdihí-ndó dàtná quidé Xítóhó Jesucristú cúú iní ñáhá-gă xii nchaa nchoo ñáyiú ndècu ichi-gá, chi mee-gă ní xihí-gá sá cuendá-ó sã cúú iní ñáhá-gă xii-o.

26 Te duca<sup>n</sup> ñi quide-gá cuendá sá ncháá ñáyiú vitna ngūndecu ichi-gá cuu ȳiñùhú-yu núú Yá Ndiõxí, te duca<sup>n</sup> ndàda ndoo ndada nine-gá iní-yu sá cuendá sá quíndáá iní-yu tn̄uhu Yá Ndiõxí, te cuanduté-yu.

27 Te duca<sup>n</sup> ñi quide-gá cuendá sá ncháá ñáyiú na ngūndecu ichi-gá ío váha cundecú-yu núú-gă, te duca<sup>n</sup> vã cūndècu-gá ñi ñ<sup>n</sup> cuéchi-yu núú-gă, te ñi ñ<sup>n</sup>-gá sá ñà túú-gă ná cumán̄i-yu núú-gă chi ío cundecu ȳiñùhú-yu.

28 Te sá dúcá<sup>n</sup> quide Xítóhó Jesucristú sá cúú-xí cuè ñáyiú ndècu ichi-gá, xiã<sup>n</sup> tàú-xi sá nchòhó cue téé x̄ndecu ñàdihí-xi cuu iní-ndó ñàdihí-ndó, te coto-ndõ-yu dàtná xító-ndó ȳiqui cuñú méé-ndó, te cada iní-ndó sã ncháá cuè téé ío cū iní ñàdihí-xi cū iní-güedé méé-güedé chi ñ<sup>n</sup>-nã cúú-yu.

29 Te nchoo sà nahã-o sá ñi ñ<sup>n</sup> ñáyiú ñá túú dàquee t̄ih̄u-yu ȳiqui cūñú-yu, chi da uu<sup>n</sup>-gá chindèé-yu te xító-yu. Te diu-ni duca<sup>n</sup> quide Xítóhó Jesucristú ndihí nchaa ñáyiú ndècu ichi-gá,

30 chi cū-o datná ȳiqui cūñú méé-gă, te duca<sup>n</sup> chi ñ<sup>n</sup>-ni cū-o ndihí-gá.

31 Te tn̄uhu Yá Ndiõxí càchí-xi: “Sá cuendá xiã<sup>n</sup> ñu nchaa cue téé na ñihí ñàdihí-xi te diñ<sup>n</sup>-ná cada-güedé tãtã-güedé ndihí ñãná-güedé, te ñàdihí-nã-güedé cuu cuu ndihí-güedé, te duca<sup>n</sup> ñ<sup>n</sup>-ná cuu-güedé ndihí-yu”, duha càchí-xi.

32 Te tn̄uhu-a cū-xi ñ<sup>n</sup> tn̄uhu càhnu vihi, te duca<sup>n</sup> sã tn̄há-xi cū Xítóhó Jesucristú ndihí cue ñáyiú ndècu

ichi-gá.

33 Te càhá<sup>n</sup>-ni tucu-í dóho nchaa nchòhó cue téé x̄ndecu ñàdihí-xi sá ïo cuu iní-ndó ñàdihí-ndó te coto-ndõ-yu dàtná xító-ndó mèe-ndo, te duca<sup>n</sup>-ni nchaa nchòhó ñáyiú dìhí tucu canehe-ndo sã ȳiñùhu núú ȳi-ndo.

## 6

1 Te nchaa nchòhó cue landú, quíndáá iní-ndó tãtã-ndó ndihí ñãná-ndó chi duca<sup>n</sup> cuñí Yá Ndiõxí cunduu, te diu duca<sup>n</sup> tn̄há tàú-xi cada-ndo.

2 Te Yá Ndiõxí ní cachí-gá sá cànèhe-ndo sá ȳiñùhu núú tãtã-ndó ndihí núú ñãná-ndó. Te tn̄uhu-ã<sup>n</sup> cúú-xí tn̄uhu cūnuu ní càhá<sup>n</sup>-gá cada cue ñáyiú cuendá cada váha ñaha-gă xií-yu.

3 Te ní cachí-gá sá ñu duca<sup>n</sup> na càda-ndo te ío váha cundecu-ndo, te duca<sup>n</sup> ïo naha cūdí-ndo cūndecu-ndo ñuyú-a.

4 Te nchaa nchòhó cue téé cū tãtã, vá dásatú-ndó iní cue déhe-ndo chi canu ichi-ndo-güèxi nacuáa tàú-xi cunduu, te dacuàha-ndo-güèxi nchaa tn̄uhu váha nacuáa cuñí Yá Ndiõxí cunduu.

5 Te nchaa nchòhó cue ñáyiú x̄nu cuechi, quíndáá iní-ndó cuè ñáyiú dii chiu<sup>n</sup>-xi quide-ndo, te canehe-ndo sã ȳiñùhu núú-yu, te ío váha cuu iní-ndó càda-ndo chiú<sup>n</sup>-yu, te duca<sup>n</sup> ñi yuhu ñi iní-ndó càda-ndo. Te cada iní-ndó sã dàtná tn̄uhu sá chíú<sup>n</sup> Xítóhó Jesucristú quidé-ndó.

6 Te dava ñáyiú x̄nu cuechi, mee-ni òré ndéhé ñáyiú dii chiu<sup>n</sup>-xi quidé-yu ío ndūcu ndeé-yu quide chiu<sup>n</sup> váha-yu cuendá cuñí-yu cudú-yu. Dico nchòhó vá dúcá<sup>n</sup> càda-ndo, chi cuèi ndècu ñáyiú dii chiu<sup>n</sup>-xi quide-ndo àdi ñá túú-yu dico cada chiu<sup>n</sup> váha-ni-ndo, te cada iní-ndó sã dàtná tn̄uhu sá chíú<sup>n</sup> Xítóhó Jesucristú quidé-ndó, te cada-ndo ñi yuhu ñi iní-ndó nacuáa cuñí Yá Ndiõxí cunduu.

7 Te ío váha cuu iní-ndó càda-ndo chiu<sup>n</sup>-ã<sup>n</sup>, chi cada iní-ndó sã dàtná

tnúhu sá chíú<sup>n</sup> Xítohó Jesucristú quidé-ndó te ñá díú chiú<sup>n</sup> cue ñáyiú ñuyíú-a.

<sup>8</sup> Te nchòhó sa cùtnuní iní-ndó sã nàcuáa ndúu chiú<sup>n</sup> váha ní quide-ndo ñ<sup>n</sup> ñ<sup>n</sup>-ndo, te duca<sup>n</sup> cùnduu sá táxí Xítohó Jesucristú nduu táhú-ndó cuéi cùu-ndo ñáyiú dàñá queé núú chíú<sup>n</sup> pàtróó<sup>n</sup>-xi àdi cuu-ndo ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi.

<sup>9</sup> Te nchaa nchòhó ñáyiú xñdecu ndíhi ñáyiú xínu cuechi, tnàhá-ndó tàú-ndó càda váha-ndo sã cúú-xí cuè ñáyiú xínu cuechi núú-ndó, te vá cùndúu nínu iní-ndó núú-yu, te chí cuàha cuèndá sá díú-ní Xítohó Jesucristú Yaá ndécú àndúu taxi tñuní ñáhá-gã xii-ndo ndíhi-yu, te sá cúú-xí mèe-gá chí ñ<sup>n</sup>-ni cùu-ndo núú-gã, te ñ<sup>n</sup>-ni càda ñaha-gá xii-ndo.

*Yá Ndiòxí chindèe-gá cue ñáyiú ndècu ichi-gá cuèndá sá vã ndácú sàcuíhná nàá ndíhi ñaha-xi xii-yu*

<sup>10</sup> Te vitna nchaa nchòhó ñáyiú ndècu ndíhi-í ichi Xítohó Jesucristú càchí tñúhu-í xii-ndo sã ío nducu-ndo nàcuáa cada-ndo ñíhí ndéé-ndó cùu ñ<sup>n</sup>nuu-ndo ndíhi Xítohó Jesucristú, chí mee-gã ío càhnu cuu-gá, te chindee ñaha-gá xii-ndo.

<sup>11</sup> Te díu-ni nchaa sá ñí nduu táhú-ndó núú Yá Ndiòxí díu-ni nchaa xíã<sup>n</sup> cuhu<sup>n</sup> iní-ndó, chí xíã<sup>n</sup> chindee ñaha-xi xii-ndo níhí ndéé-ndó cùndecu-ndo cuèndá sá vã dándàhú ñáhá sàcuíhná xii-ndo.

<sup>12</sup> Chí nchoo ñà díú cuè ñáyiú ñuyíú-a nàá ndíhi-o, chí ndíhi cue espíritú cùndíhi yucu ñávãha, te díu-ni nchaa espíritú-á<sup>n</sup> cùnùu-xi cuéi núú ñínu quide-xi nchaa sá cuèhé sá dúhá, te díu-ni-xi cùnùu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá.

<sup>13</sup> Te ío cuhu<sup>n</sup> iní-ndó nchaa sá ñí nduu táhú-ndó núú Yá Ndiòxí cuèndá duca<sup>n</sup> ñíhí ndéé-ndó cùndecu-ndo, te vá ndácú yùcu ñávãha ná cada ñaha-xi xii-ndo oré cuíní-xi coto ndéé ñáhá-xí. Te sátá ná dàquee tíhú-ndó yùcu ñávãha te ñíí-ni cunduu-ndo cùndecu-ndo ichi Yá Ndiòxí.

<sup>14</sup> Te duca<sup>n</sup> cùndecu-ni-ndo ichi Yá Ndiòxí cada-ndo dàtná xíquide cue sandàdú, chí cue téé-á<sup>n</sup> ío ñíí xíndáa-güedé. Te càhá<sup>n</sup>-ndó mèe-ni tñúhu ndáá tñúhu Yá Ndiòxí, te cuu-ndo dàtná cue sandàdú cue téé ndàda tíi xití-xi òré quíhí<sup>n</sup>-güedé nàá-güedé. Te duca<sup>n</sup> sãtnahá-xi cuu-ndo te núu na càhá<sup>n</sup>-ndó mèe-ni tñúhu ndáá tñúhu Yá Ndiòxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xíxíhnu sá yídãhu ñaha xii-güedé òré nàá-güedé cuèndá sá vã ñícuèhé-güedé. Te duca<sup>n</sup> sãtnahá-xi cuu-ndo te núu na càda ndáá-ndó cùndecu-ndo ichi-gá.

<sup>15</sup> Te cùndecu túha-ndo càhá<sup>n</sup>-ndó tñúhu Xítohó Jesucristú, tñúhu sá càhá<sup>n</sup> nàcuáa cuu váha iní ñáyiú cundécú-yu, te cuu-ndo dàtná cue sandàdú cue téé ndíhu zapátú-xi quíhí<sup>n</sup>-güedé nàá-güedé. Te duca<sup>n</sup> sãtnahá-xi cuu-ndo te núu na cùndecu túha-ndo càhá<sup>n</sup>-ndó tñúhu Xítohó Jesucristú núú ñáyiú.

<sup>16</sup> Te càchí tñúhu tucu-í xii-ndo sã ío quindáá iní-ndó Yá Ndiòxí cuèndá sá vã ndácú sàcuíhná nã cada ñaha-xi xii-ndo, te duca<sup>n</sup> te cuu-ndo dàtná cue sandàdú cue téé xínehe vítú chínèe-güedé sáquídáhu ñaha-xi xii-güedé cuèndá sá vã cuicú<sup>n</sup>-güedé sá nchicú<sup>n</sup> ñuhú téé ñaha cue téé nàá ndíhi-güedé. Te duca<sup>n</sup> sãtnahá-xi cuu-ndo te núu na quindáá iní-ndó Yá Ndiòxí.

<sup>17</sup> Te ío cuhu<sup>n</sup> iní-ndó sã ñí naníhí tàhú-ndó, te cuu-ndo dàtná cue sandàdú cue téé ñúhu mbelú cáxí<sup>n</sup>. Te duca<sup>n</sup> sãtnahá-xi cuu-ndo te núu na cùhu<sup>n</sup> iní-ndó sã ñí naníhí tàhú-ndó. Te ío cuhu<sup>n</sup> iní-ndó tñúhu Yá Ndiòxí, chí tñúhu-á<sup>n</sup> ñí taxi Espíritú-gá ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuáhá<sup>n</sup>-güedé nàá-güedé. Te duca<sup>n</sup> sãtnahá-xi cuu-ndo te núu na cùhu<sup>n</sup> iní-ndó tñúhu Yá Ndiòxí.

<sup>18</sup> Te vá dàñá ndéé-ndó càhá<sup>n</sup> ndíhi-ndo Yá Ndiòxí nàcuáa chindee ñaha Espíritú-gá xii-ndo, te cáca<sup>n</sup> táhú-ndó núú-gã núu ná cuíní-ndó, te ío cùndecu túha-ndo càhá<sup>n</sup>

ndihí-ndo-gă, te vá nátùhú iní-ndó cǎcá<sup>n</sup> táhú-ndó nǔú-gă cuendá nchaa dava-gá cue ñáyiú cùu cuendá-gá.

<sup>19</sup> Te tnàhá cuendá-í cǎcá<sup>n</sup> táhú-ndó nǔú Yă Ndiǒxí cuendá sá ná chindee ñaha-gá xii-í níhì-í tnúhu cáhá<sup>n</sup>-í òré cǎhá<sup>n</sup>-í tnúhu-gá, te duca<sup>n</sup> vǎ yùhú-í cáhá<sup>n</sup>-í nàcuáa ndùu tnúhu sá cǎhá<sup>n</sup> nàcuáa naníhí tǎhú-ó nǔú ñáyiú tnúhu sá vǎtá cùndedóho-gá-yu.

<sup>20</sup> Te Yá Ndiǒxí ní cachí-gá sá yǔhú cuu-í ì<sup>n</sup> téé cada-í nǔú-gă cáhá<sup>n</sup>-í tnúhu-gá nǔú ñáyiú, te ðiú cuendá tnúhu-á<sup>n</sup> yíhì-í vecaá vitna. Te ío cǎcá<sup>n</sup> táhú-ndó nǔú Yă Ndiǒxí cuendá-í cuendá sá yǔhú cuyì-í ñi yùhu ñi iní-í cáhá<sup>n</sup>-í tnúhu-gá nǔú ñáyiú nàcuáa tàú-xi cunduu.

*Tnúhu ndéé nǔú ñi ndihí-ná*

<sup>21</sup> Te té Tìquicú téé ío cùu iní-í ndécú ndihí-o ichi Xítóhó Jesucristú cúú-dě ì<sup>n</sup> téé ío váha quide ndáá xínú cuèchi-dé nǔú Xítóhó Jesucristú, téé-á<sup>n</sup> cachí tnúhu-dé xii-ndo nàcuáa cùu ndecu-í ndihí nchaa nàcuáa quide-í cuendá duca<sup>n</sup> cùtnuní iní-ndó.

<sup>22</sup> Te cuendá xiǎ<sup>n</sup> nǔú cuiní-í tendaha-í-dé quixi-dé nǔú ndécú-ndó cuendá cachí tnúhu-dé xii-ndo nchàa nacuáa cùu ndecu-ndí iha, te duca<sup>n</sup> tàxi-gá-dé tnúhu ndee ìní cundecu ndihí-ndo.

<sup>23</sup> Te xicá<sup>n</sup> táhú-í nǔú Tǎtá-ó Dǔtú Ndiǒxí ndihí nǔú Xítóhó Jesucristú sá ncháá nchòhó ñáyiú ndècu ndihí-í ichi-gá sá ðiú-gá ná cádá te ío váha cuu iní-ndó cùndecu-ndo, te duca<sup>n</sup> ío cuu iní tnáhá-ndó, te ío quindáá iní-ndó-gă.

<sup>24</sup> Te nchòhó ío cùu iní-ndó Xítóhó Jesucristú, te ñá túú dàña ndeé-ndó cùu iní-ndó-gă. Te mee Yă Ndiǒxí ío na chindee chitúu ñaha-gă xii-ndo. Te duca<sup>n</sup> na cùnduu. Te ío chí cádá ndèe iní-nǎ vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ FÌLIPÚ

*Té Păblú cadúha-dé tutú quihi<sup>n</sup> ndaha ñáyiú quide ndáá xĩndecu ichi Xítóhó Jesucristú ndécú ñuú Fìlipú*

<sup>1</sup> Yúhú té Păblú ndihi té Timùteú cúú-ndí cue téé xĩnu cuechi núú Xítóhó Jesucristú, te tëndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndihi cue téé chĩndee ñaha xii-ndo, ndihi nchaa dava-gá ñáyiú xĩquide ndáá ndécú ìchi-gá ñuú Fìlipú.

<sup>2</sup> Te xicá<sup>n</sup> táhù-í núú Tătá-ó Dütú Ndiöxí ndihi núú Xítóhó Jesucristú sá ná chĩndee chitúu ñaha-gá xii-ndo, te duca<sup>n</sup> ndí nduú-gá ná cadá te ío váha cuu iní-ndó cùndecu-ndo.

*Té Păblú càhá<sup>n</sup> ndihi-dé Yă Ndiöxí cuendá nchaa ñáyiú ndècu ichi-gá*

<sup>3</sup> Te ndi tnahá òré ndácú iní ñáhà-í xii-ndo, te ndàcá<sup>n</sup> táhù-í núú Tătá-ó Dütú Ndiöxí sá ndécú-ndó ìchi-gá.

<sup>4</sup> Te ndi tnahá òré duca<sup>n</sup> quide-í te ío cùdí iní-í càhá<sup>n</sup> ndihi-í-gá cuendá-ndó.

<sup>5</sup> Chi ndéé cùtnhá ní sándáá iní-ndó-gá ní ngũita-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú.

<sup>6</sup> Te yúhú sàni ndáá iní-í sá Yă Ndiöxí Yaá ní quesaha chĩndee ñaha xii-ndo quide váha-ndo ndècu-ndo, te ñu-ni-gá chĩndee ñaha-gá xii-ndo càda váha-ndo cùndecu-ndo ndéé ná sáá nduu quixi tucu Xítóhó Jesucristú.

<sup>7</sup> Te duca<sup>n</sup> tnahí tàú-xi cani iní-í sá cúú-xi-ndó, chi ío cùu iní ñáhà-í xii-ndo. Te tnahá-ndó ío chĩndee chitúu ñaha Yă Ndiöxí xii-ndo ndècu-ndo, te ñu-ni duca<sup>n</sup> chĩndee ñaha-gá xii-ndo tnahá-ndó cuèi vitna yìhi-í vecaá, te ñu-ni duca<sup>n</sup> chĩndee ñaha-gá xii-í cuèi òré cuáhà<sup>n</sup>-í núú cuè ñáyiú ñá túú tnahá iní tnúhu-gá,

chi ñihí-í tnúhu nàdanchocáva-í nõu ná tnúhu càhá<sup>n</sup>-yu cuendá-gá, te nchaa ñáyiú xăhá<sup>n</sup>-í xií-yu sá tnúhu-gá cúú-xi tnúhu ndáá cuiti.

<sup>8</sup> Te mee Yă Ndiöxí náhá ndáá-gá sá yùhú ío cùu iní ñáhà-í xii-ndo dàtná cúú iní ñáhá mèè Xítóhó Jesucristú xii-o.

<sup>9</sup> Te xicá<sup>n</sup> táhù-í núú Yă Ndiöxí sá díú-gá ná chĩndee ñaha-gá xii-ndo te uu<sup>n</sup>-gá cuita cuu iní tnahá-gá-ndó quĩhi<sup>n</sup>, te duca<sup>n</sup> ío váha cuita cutnùní iní-ndó nchaa nacúáa sàni iní-gá cada-ndo, te duca<sup>n</sup> ío váha cuita cutnùní tucu iní-ndó nàcuáa cundecu-ndo.

<sup>10</sup> Te duca<sup>n</sup> cùtnuní tucu iní-ndó nchaa sá ío-gá váha xini ñuhu-xi cada-ndo, te duca<sup>n</sup> te cuu-ndo ñáyiú cada mee-ni sá vâha, te duca<sup>n</sup> ñà túú tnahí ná cùmání-ndó nõu Yă Ndiöxí ndéé ná sáá nduu quixi tucu Xítóhó Jesucristú.

<sup>11</sup> Te ñu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá vâha nàcuáa cuini Yă Ndiöxí. Te sá dúcá<sup>n</sup> ná càda-ndo te ío cada càhnu-ndo-gá, te nchaa dava-gá ñáyiú càhá<sup>n</sup> váha-yu cuendá-gá.

*Xítóhó Jesucristú ío cùnuu-gá ndécú ndihi-gá té Păblú*

<sup>12</sup> Te nchaa nchòhó ñáyiú ndècu ndihi-í ichi Xítóhó Jesucristú na càchí tnúhu-í xii-ndo sá úú<sup>n</sup>-gá tá xité nuu tnúhu-gá vitna yìhi-í vecaá.

<sup>13</sup> Te nchaa cue téé cùu sandadú xĩndecu vechiú<sup>n</sup> núú ndécú tèe cùnuu xini-güedé sá sá cuendá sá càhá<sup>n</sup>-í tnúhu Xítóhó Jesucristú duha yìhi-í vecaá, te ñu-ni duca<sup>n</sup> sá xini nchaa dava-gá ñáyiú sá sá càhá<sup>n</sup>-í tnúhu-gá duha yìhi-í vecaá.

<sup>14</sup> Te cuendá sá dúhá yìhi-í vecaá xĩ<sup>n</sup> ío-gá vâi ñáyiú ndècu ichi Yă Ndiöxí ta cùtnuní-gá iní-yu sá cúú-gá ñ<sup>n</sup> Yaá ío quide ndáá, te uu<sup>n</sup>-gá tá cùyí-yu càhá<sup>n</sup>-yu tnúhu-gá, te ñá túú tnahí-gá yùhú-yu càhá<sup>n</sup>-yu.

<sup>15</sup> Te na càchí-í tnúhu ndáá-í xii-ndo sá dàva ñáyiú càhá<sup>n</sup>-yu tnúhu Xítóhó Jesucristú cuendá-ni sá cúú cuèdú iní ñáhă-yu xii-í sá ío chĩndee ñaha-gá xii-í

càhá<sup>n</sup>-í tnúhu-gá. Te duca<sup>n</sup> quidé-yu chi cuini-yu nàa ndihi ñàhá-yu xii-í, dico davá-yu chi ío váha sàni iní-yu càhá<sup>n</sup>-yu tnúhu-gá.

16-17 Te ñáyiú-á<sup>n</sup> càhá<sup>n</sup>-yu tnúhu-gá chi cùu iní ñáhã-yu xii-í, te sa nàhá-yu sá sã cuendá sá càhá<sup>n</sup> váha-í cuendá tnúhu-gá núú ñáyiú ñá túú tnàhá iní tnúhu-gá, cuendá xiã<sup>n</sup> yíhì-í vecaá. Te dava-gá-yu càhá<sup>n</sup>-yu tnúhu Xítohó Jesucristú cuendá-ni sá cuini-yu cuu sá váha xii mèe-yu, te ñá díú sã càhá<sup>n</sup>-yu cuendá sá sání váha iní-yu. Te duca<sup>n</sup> quidé-yu chi cuendá cuini-yu sá nãndi-gá cada ñaha-güedë xii-í.

18 Dico ío cùdíí iní-í sá càhá<sup>n</sup>-yu tnúhu Xítohó Jesucristú cuëi cùu váha iní-yu àdi ñá túú cùu váha iní-yu càhá<sup>n</sup>-yu.

Te ñu-ni duca<sup>n</sup> cùdíí iní-í núú cuahá<sup>n</sup> núú vëxi.

19 Te cùtnuní iní-í sá sã cuendá nchaa sá quidé ñaha-güedë xii-í, cuendá xiã<sup>n</sup> cada váha ñaha Yã Ndiöxí xii-í, chi nchòhó ío càhá<sup>n</sup> ndihi-ndo-gã cuendá-í, te Espiritú ní taxi Xítohó Jesucristú ndécú ndihi-o ío chindee ñaha-xi xii-í.

20 Te cuini-í sá ña túú tnàhí ná cumáni-í núú Yã Ndiöxí cuendá sá vã cúú càhá<sup>n</sup> núú-í, te cùtnuní iní-í sá díú-gã chindee ñaha-gá xii-í. Te cuini tucu-í sá ío cuyi-í càhá<sup>n</sup>-í tnúhu-gá vitna dàtná tá quide-í véxi, te duca<sup>n</sup> ío cada nínu-í Xítohó Jesucristú cuëi vitna ñini ndècu-í ñuyíú-a te cuëi na cùú-í duca<sup>n</sup>-ni càda nínu-í-gá.

21 Te ñini ndècu-í ñuyíú-a te Xítohó Jesucristú ío cùnuu-gá ndécú ndihi ñaha-gá xii-í, te na sàá nduu cùú-í te ío-gá váha tnàhá-í chi nucundecu-í ndihi-gá.

22 Te núu na cundecu-gá-í ñuyíú-a te cada-gá-í chiú<sup>n</sup> sá cúú-xí Yã Ndiöxí, te ñá cùtnuní iní-í nása cada-í núu sá cundecu-í àdi sá cùú-í.

23 Te ío vãi saní iní-í te cuini-í cuú-í chi ío-gá váha cundecu-í núú ndécú Xítohó Jesucristú.

24 Dico sá cúú-xí nchòhó chi ío xini ñuhu-xi cundecu-í.

25 Te cùtnuní ndáá iní-í sá ñi<sup>n</sup> tnúhu ndáá càhá<sup>n</sup>-í, te cùtnuní tucu iní-í

sá cundecu-ni-í cundecu ndihi ñaha-í xii-ndo nchaa-ndo cuendá chindee ñaha-í xii-ndo cuita quindáá-gá iní-ndó Xítohó Jesucristú quíhí<sup>n</sup>, te duca<sup>n</sup> ío cùdíí iní-ndó cundecu-ndo.

26 Te duca<sup>n</sup> te uu<sup>n</sup>-gá cachí-ndó sã ío càhnu cuu Xítohó Jesucristú cuendá sá ñi dácãcu ñaha-gã xii-í ndécú ndihi ñaha-í xii-ndo.

27 Te xini ñuhu-xi cada-ndo nchaa nacuaá càhá<sup>n</sup> tnúhu Xítohó Jesucristú. Te núu ní ndacu-í véxi coto ñaha-í xii-ndo, te dàvã-á<sup>n</sup> quini ndáá-í sá ndécú-ni-ndó ìchi Xítohó Jesucristú. Dico núu ñá túú ní ndacu-í quixi coto ñaha-í xii-ndo ña, te ñu-ni níhì-í tnúhu sá ndécú-ni-ndó ìchi-gá, te níhí tucu-í tnúhu sá ñi<sup>n</sup>-ní cùu-ndo ndecu-ndo, te níhí tucu-í tnúhu sá ñi<sup>n</sup>nuu nducu ndee-ndo càhá<sup>n</sup>-ndó tnúhu Yã Ndiöxí núú ñáyiú, tnúhu sá sãndáá iní-ndó.

28 Te ñá túú yùhú-ndó nchaa sá quidé ñaha ñáyiú cùu úhú iní ñáhã xii-ndo, te sá dúcã<sup>n</sup> quide-ndo ñá túú yùhú-ndó nchaa sá quidé ñàhá-yu xii-ndo, te ndixi túu iní-yu sá nchòhó ndécú-ndó ñi<sup>n</sup> ìchi núú nánihí tãhú-ndó, te ñáyiú-á<sup>n</sup> cuita nihnú-yu, chi duca<sup>n</sup> ñi cachí Yã Ndiöxí cunduu.

29 Te mee Yã Ndiöxí ní taxi-gá tnúhu ndee iní sá quindáá iní-ó Xítohó Jesucristú, te ñá díú-ni sã quindáá iní-ó-gã chi tnàhá ndoho-o cuendá-gá.

30 Te tnàhá nchòhó ndóhó-ndó cuendá-gá vitna, te nchòhó ní xiní núú-ndó nãcuáa ní ndoho-í, te vitna nihí-ndó tnúhu nchaa nãcuáa ndòho tucu-í.

## 2

*Xítohó Jesucristú ñá túú ní quide nínu-gá mée-gã dico Yã Ndiöxí ní quide nínu ñaha xii-gá*

1 Te Xítohó Jesucristú dácãhu iní ñáhã-gã xii-ndo nãcuáa cundecu-ndo, te cùu iní ñáhã-gã xii-ndo nãcuáa cuu váha iní-ndó cundecu-ndo, te ndècu ndihi-ndo Espiritú Yã Ndiöxí, te ío cundahú iní tnàhá-ndó.

2 Te xiã<sup>n</sup> núu càhá<sup>n</sup>-í dóho-ndo sã ío cuu ñi<sup>n</sup>nuu-ni-ndo cundecu-ndo nacuaá ío-gá cùdíí iní-í, te ñi<sup>n</sup>-ni cùu



iní tnáhá-ndó, te ì<sup>n</sup>-ni càni iní-ndó, te ì<sup>n</sup>-ni càda-ndo.

<sup>3</sup> Te vá cáda ññu-ndo mée-ndo nducu-ndo mee-ni sá cúú-xí mée-ndo, chi cunduu ndáhú iní-ndó, te cani iní-ndó sã tnàha ñáyiu-ndo ò-gá cùnùú-yu dàcúúxí mée-ndo.

<sup>4</sup> Te ni vã cáni ìní-ndó ndùcu-ndo mee-ni sá vaha sá cúú-xí mée-ndo, chi nducu-ndo sã cúú-xí tnáhá cuendá tnàha ñáyiu-ndo.

<sup>5</sup> Te ío váha cani iní-ndó nàcuáa cundecu-ndo dàtná quidé mée Xítóhó Jesucristú.

<sup>6</sup> Te ì<sup>n</sup>-ni cùu Xítóhó Jesucristú ndihí Yá Ndiöxí. Te cuèi duca<sup>n</sup> dico mee Xítóhó Jesucristú ní sani iní-gá sã ñà túú cùyica cundecu-gá taxi tnùní-gá ndihí Yá Ndiöxí.

<sup>7</sup> Te ní dáñá-gã sá cùnùu-gá andi<sup>u</sup> te ní quixi-gá ñuyíú-a ní cuu-gá ì<sup>n</sup> ñáyiu, te ní quide-gá dàtná quidé ì<sup>n</sup> téé xinu cuechi.

<sup>8</sup> Te ní cuu-gá ì<sup>n</sup> téé dàtná ndãa cue téé xindecu ñuyíú-a, te ní cuu-gá ì<sup>n</sup> téé ío ndáhú iní-xi chi ñà túú ní quide nínu-gá méé-gã, te ní sándáá iní-gá ní quide-gá nchaa nàcuáa ní xáha<sup>n</sup> Yá Ndiöxí xii-gá cútnáhá ní quixi-gá ñuyíú-a. Te sá dúcá<sup>n</sup> ñí sándáá iní-gá xíã<sup>n</sup> ní xihí-gá núú cùrúxí.

<sup>9</sup> Te xíã<sup>n</sup> ío ní quide nínu ñaha Yá Ndiöxí xii Xítóhó Jesucristú cuendá ío cunuu-gã. Te ní xáha<sup>n</sup> Yá Ndiöxí xii Xítóhó Jesucristú sá cúú-gã Xítóhó nchaa ñáyiu ndècu ñuyíú-a.

<sup>10</sup> Te duca<sup>n</sup> ñí quide Yá Ndiöxí cuendá nchaa Espíritú ndécú andi<sup>u</sup>, ndihí nchaa ñáyiu ndècu ñuyíú-a, ndihí nchaa ñáyiu ní xihí ngúíñí xítí-yu ndihí nchaa espíritú-á<sup>n</sup> te cachí-yu ndihí-xi sá ío càhnu cuu Xítóhó Jesucristú.

<sup>11</sup> Te ncháa-yu cachí-yu sá Xítóhó Jesucristú cúú-gã Yaá táxi tnùní. Te sá dúcá<sup>n</sup> càda-yu, te quide cahnú-yu Dútú Ndiöxí.

*Ñáyiu ndècu ichi Xítóhó Jesucristú cùu-yu dàtná ì<sup>n</sup> ñuhú*

<sup>12</sup> Te xíã<sup>n</sup> núu nchaa nchòhó ñáyiu ío cùu iní-í cuìní-í sá quindáá iní ñáhá-ndó xii-í dàtná ní quide-ndo

cútnáhá ní xindecu ndihí ñaha-í xii-ndo, chi dàvá-á<sup>n</sup> ñà túú tnáhí ní dàña ndeé-ndó ní sándáá iní ñáhá-ndó xii-í. Te cuìní-í sá úú<sup>n</sup>-gã quindáá iní ñáhá-ndó xii-í vitna ñà túú ndècu ndihí ñaha-í xii-ndo. Te ío nducu ndèe-ndo cada-ndo nchaa nacuáa tàú-xi cunduu ndéé ná sáa nduu nduu táhú-ndó cundecu-ndo ndihí Xítóhó Jesucristú, te ío canehe-ndo sã yíñùhu núú-gã.

<sup>13</sup> Te Yá Ndiöxí ío váha dàcahu iní ñáhá-gã xii-ndo càda-ndo nchaa nacuáa cuìní méé-gã, te di<sup>u</sup>-ni mee-gã chindèe ñaha-gã xii-ndo dùca<sup>n</sup> quide-ndo.

<sup>14</sup> Te vá cáni ìní-ndó ñà tnúhu cáhá<sup>n</sup>-ndó cuendá ñáyiu, te ni ñà túú nãndi tnúhu cútnàha-ndo ndihí-yu,

<sup>15</sup> te duca<sup>n</sup> te cuu-ndo ñáyiu ñà túú cuèchi-xi núú Yá Ndiöxí. Te nchòhó ñáyiu cùu déhe Yá Ndiöxí, ñà túú tnáhí-gá ná cumání-ndó núú-gã ñini ndècu-ndo tnuú nchaa ñáyiu ndècu ichi cuehé ichi duha ñuyíú-a, ñáyiu cuihna ìní-xi. Te cuu-ndo dàtná chòdíní sã dáyèhé niú nee,

<sup>16</sup> te duca<sup>n</sup> chi dàcuaha-ndo ñáyiu tnúhu Yá Ndiöxí tnúhu sá càhá<sup>n</sup> nàcuáa naníhí tàhú-yu. Te núu duca<sup>n</sup>-ni na càda-ndo te òré ná sáa nduu càda ndáá Xítóhó Jesucristú nchaa yíca cuèchi ñáyiu, te dàvá-á<sup>n</sup> vã cúú càha<sup>n</sup> núú-í, chi ñà túú dió duca<sup>n</sup> ni sàhni iní-í cada-í nchaa chi<sup>u</sup> ní táhú-gã.

<sup>17</sup> Te nchòhó ío váha quide-ndo ndecu-ndo ichi Yá Ndiöxí chi sándáá iní-ndó-gã, te yúhú cahni ñaha-güedé xii-í cuendá nchaa sá vaha quide-ó. Te xíã<sup>n</sup> ío cùdñí ìní-í te cùdñí tucu iní-í dàtná cùdñí ìní-ndó cuendá nchaa sá vaha quide-ndo.

<sup>18</sup> Te di<sup>u</sup>-ni duca<sup>n</sup> ío chí cùdñí ìní dàtná cùdñí ìní méè-í cuendá nchaa sá yãha-í ndécú-í.

*Té Timùteú ndihí té Epafrodítú*

<sup>19</sup> Te núu Xítóhó Jesucristú ná càchí-gá te ndihí-ni tendaha-í té Timùteú quixi-dé quixi coto ñaha-dé xii-ndo nàcuáa cudñí ìní-ndó. Te òré ndixi-dé canaha-dé tnúhu ndixi núu nása cùu ndecu-ndo, te tnáhá yúhú ío cudñí ìní-í tucu.

20 Te núú ncháá cuè téé ndècu ndihí-í te ì<sup>n</sup>dì-ì ní té Timùteú-a cùu-dé téé ío váha sàni iní-xi dàtná sání iní-í, chí diu tñahí-ni-dé ío sàni iní-dé nùu nása ndècu-ndo.

21 Chí dava-gá-güedé mee-ni sá cùu-xí mèe-güedé ío sàni iní-güedé, te ñá túú sàni iní-güedé cada-güedé chiù<sup>n</sup> tahu Xítóhó Jesucristú.

22 Te nchòhó sa xìní-ndó sá tē Timùteú-a cùu-dé ì<sup>n</sup> téé quide váha chí nándi sá tá yáha-dé véxi te quide ndee iní-dé. Te cùu-dé dàtná ì<sup>n</sup> déhe-í ndécú ndihí ñaha-dé xii-í xínú cuèchi-ndí núú Xítóhó Jesucristú càhá<sup>n</sup>-ndí tñuhu-gá núú ñáyi.

23 Te òré ná cùnuni nùu nása cada ñaha-güedé xii-í te ndihí-ni tendaha-í-dé quixi coto ñaha-dé xii-ndo.

24 Te sàni iní-í sá Xítóhó Jesucristú cada-gá te tñahá mèe-í ío ndihí quixi coto ñaha-í xii-ndo.

25 Te tñahá sání iní-í sá ío xini ñuhu-xi tendaha-í té Epafrodítú téé ndècu ndihí-o ichi Xítóhó Jesucristú ndixi coto ñaha-dé xii-ndo, chí tñahá-dé quidé-dé chiù<sup>n</sup>-gá te quide ndee iní-dé tñahá-dé nándi yáha-dé sá cuendá-gá, te diu mee-ndo ní tendaha-ndo-dé véxi-dé cuendá coto ñaha-dé xii-í.

26 Te duca<sup>n</sup> cuini-í tendaha-í-dé ndixi-dé chí mee-dé ío sàni iní-dé ndixi cáhá<sup>n</sup> ndihí ñaha-dé xii-ndo, te ío ndihú iní-dé sá ni ñihí-ndó tñuhu sá cùhú-dé ní cùu.

27 Te ndáá sá ñi cuhú-dé chí luha ndiqui<sup>n</sup>-ná cuú-dé ní cùu, dico Yá Ndiöxí ní cundahú iní ñáhá-gá xii-dé ní quide tátna ñaha-gá te ní ndúha-dé. Te ñá díú-ni mèe-dé duca<sup>n</sup> ni cundahú iní ñáhá-gá xii-dé chí tñahá yúhú ío ní cundahú iní ñáhá-gá xii-í, chí núu ni xihí-dé te ío-gá ndihú iní-í ní cùu.

28 Te xiá<sup>n</sup> ío ndihí cuini-í tendaha-í-dé ndixi-dé cuendá òré nasáá-dé núú-ndó te ío cudí iní-ndó, te duca<sup>n</sup> yúhú ñá túú-gá ná caní iní-í.

29 Te òré nasáá-dé te ío cudí iní-ndó nàquehe<sup>n</sup> cuendá-ndó-dé, te duca<sup>n</sup> ío ndacá<sup>n</sup> táhú-ndó núú Xítóhó Jesucristú cuendá-dé. Te ío canehe-ndo sá yíñuhu núú nchàa cue téé quide datná quidé-dé.

30 Chí téé-a sa luha ndiqui<sup>n</sup>-ná cuú-dé ní cùu sá xínú cuèchi-dé núú Xítóhó Jesucristú, te ní sàni iní-dé sá ñá túú ñá cada-xi cuèi na cùu-dé ní quide-dé nchaa chiù<sup>n</sup> sá cúmání cada-ndo cuendá-í ní cùu.

### 3

#### *Ñáyi cundáá núú Yá Ndiöxí*

1 Te vitna nchaa nchòhó ñáyi ndècu ndihí-í ichi Xítóhó Jesucristú càhá<sup>n</sup> ndahú-í núú-ndó sá ío cudí iní-ndó sá yíndaha ñaha-gá xii-ndo. Te yúhú ñá túú cùu dusa<sup>n</sup>-í tee tucu-í nchaa tñuhu sá sá ní dánèhè ñáhá-í xii-ndo, chí cùu-xi tñuhu sá ío chindee ñaha-xi xii-ndo.

2 Te ío quihí iní-ndó vā cadá cuendá-ndó ni ì<sup>n</sup> tñuhu càhá<sup>n</sup> cue téé ío cuihna iní-xi ñá túú tñahí cuini cada sá váha, chí cue téé-á<sup>n</sup> néhé-güedé iní iná chí càchí-güedé sá ncháá cuè téé xini ñuhu-xi cuáha-güedé seña ñi-güedé cuendá duca<sup>n</sup> cùdiu-güedé núú Yá Ndiöxí.

3 Dico nchoo chí cùdiu-o núú Yá Ndiöxí cuèi dava-o sá ní ngúndecu seña ñi-o te dava-o ñáhá, chí Espiritú-gá chindèe ñaha-xi xii-o quide-o nchaa nacuaa taú-xi cunduu cuendá cuu càhnu-gá. Te ío cudí iní-ó càchí-ó sá ío càhnu cuu Xítóhó Jesucristú, te ñá túú sàni iní-ó sá sá cuendá nchaa sá váha quide-o cùdiu-o núú Yá Ndiöxí.

4 Te núu dicó cuendá nchaa sá váha quide-o cùdiu-o núú Yá Ndiöxí, te yúhú sa ama-gá cùdiu-í núú-gá cuendá nchaa sá ñi quide-í ní cùu te núu dicó duca<sup>n</sup>. Te ío cue téé càchí-güedé sá cùdiu-güedé núú Yá Ndiöxí cuendá nchaa sá váha quide-güedé. Te yúhú uu<sup>n</sup>-gá duca<sup>n</sup> càhá<sup>n</sup>-í nùu dicó sá cùu chí yúhú ní xidó-gá-í ní quide-í dàcúxí dàva-gá-güedé.

5 Te núu ùná-ni nduu sá ñi cacu-í te ní sáha-güedé seña ñi-í, te yúhú cùu-í téé israhél, te mei ñaní tñahá ndí Benjámín téé ní xíndecu ndéé sanaha cùu-í. Te càhá<sup>n</sup>-í tñuhu hèbreú tñuhu càhá<sup>n</sup> tátá-í ndihí náná-í, te ní cundihí-í nchaa cue téé cùu fariséú, te ní cáncicú<sup>n</sup> nihnu-í nchaa nàcuáa

ní cáhá<sup>n</sup> ndíi Moisés dàtná xĩquide mee-güedě. ichi-gá.

6 Te yúhú ní sani iní-í sá ì<sup>n</sup> ichi ndáá ndécù-í ní cùu, te ío ní cuiní-í cunu cuechi-í núú Yá Ndiöxí, núu xíá<sup>n</sup> nándi sá nĩ quide-í nchaa ñáyiú ndècu ichi Xítóhó Jesucrístú, te vá yõo ì<sup>n</sup> ni xóo cúñaha ì<sup>n</sup> tnúhu xii-í cachí-yu sá ñà túú quide-í nàcuáa ní cáhá<sup>n</sup> ndíi Moisés ní cùu.

7 Te nchaa sá sání iní-í sá ío nàndíhi nchícú<sup>n</sup> nihnu-í ní cùu, ní cutnùní iní-í sá ñà túú tnàhí chindee ñaha-xi nacuáa cundáá-í núú Yá Ndiöxí, núu xíá<sup>n</sup> duu<sup>n</sup> duu<sup>n</sup> ní xehndé iní-í sá vǎ chindèe ñaha-xi cuendá sá nĩ cuiní-í cundecu ndíhi-í Xítóhó Jesucrístú.

8 Te nchaa sá cǎchí ñáyiú chindee ñaha cundáá-ó núú Yá Ndiöxí ní cutnùní iní-í sá ñà túú chindee ñaha-xi. Te yúhú ní cutnùní iní-í sá ío-gǎ váha tnahá tnúhu-o ndíhi Xítóhó Jesucrístú. Te nchaa sá sání iní-í chindèe ñaha xii-í ní cùu, ñà túú-gǎ sàndáá iní-í sá chindèe ñaha-xi vitna chi ní cutnùní iní-í sá ñà túú nàndíhi-xi. Te duca<sup>n</sup> quide-í ñà túú-gǎ sàndáá iní-í nchaa xíá<sup>n</sup> sá chindèe ñaha-xi, chi cuiní-í sá úú<sup>n</sup>-gǎ cuita tnahá tnúhu-í ndíhi Xítóhó Jesucrístú quíhí<sup>n</sup>,

9 te cuu ì<sup>n</sup>nuu-í ndíhi-gǎ, te duca<sup>n</sup>-ni cundáá-í núú Yá Ndiöxí dàtná cundáá-í vitna, dico ñà díú cuendá sá nchícú<sup>n</sup> nihnu-í nàcuáa ní cáhá<sup>n</sup> ndíi Moisés ní cùu, chi cuendá sá sàndáá iní-í Xítóhó Jesucrístú. Te Yá Ndiöxí ní quide-gǎ cundáá-í núú-gǎ, te duca<sup>n</sup> chi ní sàndáá iní-í Xítóhó Jesucrístú.

10 Te cuiní-í cutnùní iní-í nchaa nàcuáa sàni iní Xítóhó Jesucrístú, te cuiní-í sá ío chindee ñaha-gǎ, te díu-ni-gǎ cúú-gǎ Yaá ní xíhí te ní ndoto-gǎ, te duca<sup>n</sup> cuiní-í cada-gǎ cuendá cada-í nchaa nàcuáa cuiní-gǎ. Te cuiní-í tnàhá-í ndoho-í dàtná ní ndoho-gǎ. Te yúhú cuiní-í sá vǎ cǎdà-í ni ì<sup>n</sup> sá ñà túú tnàhá iní Yá Ndiöxí, chi díu cuendá-á<sup>n</sup> nĩ xíhí Xítóhó Jesucrístú.

11 Te cuiní-í sá Yá Ndiöxí cachí-gǎ te tnàhá-í ndoto na sàá nduu ndòto nchaa ñáyiú sa ní xíhí ní xindecu

*Cada-o nchaa nacuáa tàú-xi cunduu cuendá nihí-ó sǎ ndúú tǎhú-ó*

12 Te cùmání-gǎ cada-í nchaa nàcuáa cǎhá<sup>n</sup>-í-a, te cumání-gǎ cada-í nchaa nàcuáa cǎhá<sup>n</sup> Yá Ndiöxí cuendá sá ñà túú-gǎ ná cumání-í núú-gǎ. Te ío ndùcu ndee-í nchícú<sup>n</sup> nihnu-í quidè-í nàcuáa duca<sup>n</sup> ñà túú-gǎ ná cumání-í núú-gǎ, chi díu cuendá-á<sup>n</sup> nĩ cáhá<sup>n</sup> ñáhá Xítóhó Jesucrístú xii-í.

13 Te nchaa nchòhó ñáyiú ndècu ndíhi-í ichi Xítóhó Jesucrístú cǎchí tnúhu-í xii-ndo sǎ cutnùní ndáá iní-í sá vitná cùmání-gǎ cada-í nchaa nàcuáa ñà túú-gǎ ná cumání-í núú-gǎ. Te ní nihí-í ì<sup>n</sup> sá ío xini ñuhu-xi cada-í te xíá<sup>n</sup> quidè-í, te ñà túú-gǎ quidé cuendá-í nchaa sá nĩ xóo cada-í, te ío ndùcu ndee-í quidè-í nchaa nàcuáa cǎhá<sup>n</sup> Yá Ndiöxí.

14 Te ndùcu ndee vihi-í nchícú<sup>n</sup> nihnu-í quidè-í nchaa nàcuáa cǎhá<sup>n</sup>-gǎ, te díu-ni duca<sup>n</sup> cǎdà-í ndéé ná sàá nduu sàá-í núú ndécú-gǎ taxi-gǎ sá ndúú tǎhú-í. Te duca<sup>n</sup> tnàhí sa ní cáhá<sup>n</sup> ñáhá-gǎ xii-o cundecu-o ndíhi-gǎ, te duca<sup>n</sup> nĩ cáhá<sup>n</sup> ñáhá-gǎ xii-o sǎ cuendá Xítóhó Jesucrístú chi tnàhá tnúhu-o ndíhi-gǎ.

15 Te nchaa nchòhó ñáyiú quide váha ndècu ichi Yá Ndiöxí xini ñuhu-xi cani iní-ndó dàtná sání iní-í-a, àdi núu dava-ndo ñà túú sàni iní-ndó dàtná sání iní-í-a, dico mee Yá Ndiöxí dandixi túu-gǎ iní-ndó te cutnùní iní-ndó nàcuáa cada-ndo.

16 Te xini ñuhu-ni-xi cada-o nchaa nacuáa ta quide-o véxi.

17 Te nchaa nchòhó ñáyiú ndècu ndíhi-í ichi Xítóhó Jesucrístú cǎhá<sup>n</sup>-í dóho-ndo sǎ cǎnchícú<sup>n</sup> nihnu-ndo cǎdà-ndo datná quidè-í. Te cundehe-ndo nàcuáa quide nchaa ñáyiú sa nchícú<sup>n</sup> nihnu nchaa nàcuáa dǎnehé ñáhà-í xii-ndo cuendá duca<sup>n</sup> cǎdà-ndo tnahá-ndó.

18 Te sa ní cuu vǎi xito cachí tnúhu-í xii-ndo sǎ ío ñáyiú ñà túú tnàhí cùu váha iní-xi sá nĩ xíhí Xítóhó Jesucrístú núú cùrúxí cuendá sá nánihí tǎhú-ó. Te ndíhi ndute núú-í dǎndacu iní ñáhà-í xii-ndo cuendá-yu.

19 Te sáá nduu te nchaa ñáyiú duca<sup>n</sup> xǐquide-á<sup>n</sup> cuíta nihnú-yu, chi mee-ni nchàa sá cuèhé sá dúhá ñùhu iní-yu te ñu-ni nchaa xǐá<sup>n</sup> cúnùu quidé-yu, te cucaha<sup>n</sup> núu-yu cuèndá nchaa sá quidé-yu núu dícó sá cúú, dico ñáhá chi da quide cahnú-yu mèé-yu cuèndá nchaa xǐá<sup>n</sup>. Te mee-ni nchàa sá ò ñuyíú-a ñùhu iní-yu.

20 Dico nchoo chi andiú ndècu núu cúú ñúú-ó, te ndètu cahnú-o sáá nduu quixi tucu Xítohó Jesucristú nacuaca ñaha-gǎ xii-o. Te ñu-ni-gǎ cúú-gǎ Yaá ní dácacu nihnu ñaha xii-o núu ùhú núu ndàhú.

21 Te yiqui cùñú-ó chi vá cúdǐi-xi cundecu-xi dàtná cáá-xí vìtna, dico mee Xítohó Jesucristú nadama-gǎ yiqui cùñú-ó te ndada-gǎ dàtná ní nduu yiqui cùñú méé-gǎ cútnàhá ní ndoto-gǎ. Te duca<sup>n</sup> càda-gǎ chi ndàcu-gǎ quidé-gǎ nchaa sá vǎha càchí iní-gǎ, te duca<sup>n</sup> tàxi tnuní-gǎ nchaandi túhú sá ò.

## 4

### *Ío cudǐí iní-ó sǎ ndécú-ó ichi Xítohó Jesucristú*

1 Te nchaa nchòhó ñáyiú ío cùu iní-í ndécú ndíhi-í ichi Xítohó Jesucristú ío cuíní-í cáhá<sup>n</sup> ndíhi ñaha-í xii-ndo. Te ío cudǐí iní-í cuèndá nchaa sá vǎha quide-ndo chi ñá túú ní xǐta chiú<sup>n</sup> Yá Ndiõxí ní quide-í sá cúú-xí-ndó, te ñu-ni nchòhó ñáyiú ío cùu iní-í càhá<sup>n</sup>-í dóho-ndo sǎ cǎnchícú<sup>n</sup> nihnu-ni-ndo ichi Xítohó Jesucristú.

2 Te yòhó tá Vòdiá ndíhi yòhó tá Sǐntiqué càhá<sup>n</sup> ndàhú-í núu-ndó sǎ cúú ñ<sup>n</sup>nuu-ndo cundecu-ndo ichi Xítohó Jesucristú.

3 Te yòhó té cùndíhi-í quide ndáá quidé nchàa chiú<sup>n</sup> quide-í, càhá<sup>n</sup> ndàhú-í núu-n sǎ chǐndèe tnúhu-n úú ñáyiú ñíhi-á<sup>n</sup> cuèndá sá ná cùu ñ<sup>n</sup>nuú-yu cundecú-yu, chi cútnàhá ní xǐndecu ndíhi ñáhá-yu xii-í ío ní chindee ñáhá-yu xii-í, ndíhi té Clèmenté, ndíhi nchaa dava-gǎ-yu ní quide-ndí chiú<sup>n</sup> Xítohó Jesucristú, te nchaa ñáyiú-á<sup>n</sup> sa yòdo tnuní-yu

núu tùtú Yá Ndiõxí sá ndúú tǎhǔ-yu cundecú-yu ndíhi-gǎ ni caa ni quíhí<sup>n</sup>.

4 Te nchaa-ni nduu ío cudǐí iní-ndó sǎ ndécú-ndó ichi Xítohó Jesucristú. Te càhá<sup>n</sup>-ni tucu-í dóho-ndo sǎ cudǐí ndisa iní-ndó!

5 Te ío vǎha cuu iní-ndó càhá<sup>n</sup> ndíhi-ndo ñáyiú cuèndá ná cùtnuní iní-yu sá cúú-ndó ñáyiú vǎha iní-xi, chi sa ta cùyatni nduu quixi tucu Xítohó Jesucristú.

6 Te ñá túú tnàhí ná cani iní-ndó te núu nása cùu ndecu-ndo, chi cáhá<sup>n</sup> ndíhi-ndo Yá Ndiõxí cuèndá sá ná chindee ñaha-gǎ xii-ndo. Te ío ndacá<sup>n</sup> táhú-ndó núu-gǎ.

7 Te núu duca<sup>n</sup> na càda-ndo te Yá Ndiõxí cada-gǎ te ío vǎha cuu iní-ndó cundecu-ndo. Te nchoo ñáyiú ñá túú cùtnuní iní-ó nása quide-gǎ ndéé duca<sup>n</sup> ío vǎha cùu iní-ó, te duca<sup>n</sup> ío vǎha cùu iní-ó chi cùu ñ<sup>n</sup>nuu-o ndíhi Xítohó Jesucristú.

### *Mee-ni sǎ vǎha cuhu<sup>n</sup> iní-ó*

8 Te càhá<sup>n</sup> ndàhú tucu-í núu nchàa nchòhó ñáyiú ndècu ndíhi-í ichi Xítohó Jesucristú sá méé-ní sǎ vǎha cuhu<sup>n</sup> iní-ndó. Te xǐni ñuhu-xi cuhu<sup>n</sup> iní-ndó mèe-ni nchaa tnúhu ndáá, ndíhi nchaa tnúhu yǐñùhu, ndíhi nchaa tnúhu sá ío cudǐí iní-ó, ndíhi nchaa tnúhu sá ío víi ío vǎha cuáhá<sup>n</sup>, ndíhi nchaa tnúhu sá ñà túú ñùhu tnàhá tnúhu cuèhé, ndíhi nchaa tnúhu sá càchí ñáyiú vǎha, ndíhi nchaa dava-gǎ tnúhu sá sání ñí méé-ndó sǎ ío vǎha te ñu-ni nchaa xǐá<sup>n</sup> cuhu<sup>n</sup> iní-ndó.

9 Te cútnàhá ní xǐndecu ndíhi ñaha-í xii-ndo ní dǎnèhé ñáhà-í nàcuáa cada-ndo te ní sǎndáá iní-ndó. Te xǐá<sup>n</sup> càhá<sup>n</sup>-í dóho-ndo sǎ vǎ dáñá ndèé-ndó càda-ndo, te ñu-ni duca<sup>n</sup> vǎ dáñá ndèé-ndó càda-ndo nchaa nacuáa ní quide-í ní xǐní-ndó. Te núu duca<sup>n</sup> na càda-ndo te Yá Ndiõxí Yaá quidé ío vǎha cùu iní-ó ndècu-o cundecu ndíhi ñaha-gǎ xii-ndo.

### *Ñáyiú ñuú Filipú ndécú ichi Xítohó Jesucristú sǎñàhá-yu sá ndúú tǎhǔ tǎ Pǎblú*

10 Te cudǐí víhí iní-í ndacá<sup>n</sup> táhú-í núu Xítohó Jesucristú sá ñí ndacu iní ñáhá-ndó xii-í, dico ñá díú sǎ ñà túú

ñùhu iní ñáhá-ndó xii-í chi dìcò sá ñá ñihí-ndó nàcuáa cada-ndo chindee ñaha-ndo xii-í ní cùu.

11 Te ñá díú sá dúhá càhá<sup>n</sup>-í te cani iní-ndó sá càchí tñúhu-í xii-ndo sá ió ñ<sup>n</sup> sá cúmání xii-í, chi yúhú cùu váha-ni iní-í nùu ió xii-í àdi ñá túú ió.

12 Te xini-í cunduu ndàhú-í, te xini-í cunduu cuica-í, te xini-í caxi-í ndahá xiti-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndìhi-o, te xini-í nàcuáa quide-xi oré xidó ndécú ndìhi-o. Te duca<sup>n</sup> ñi cutúha-í quidè-í cuendá nchaa nàcuáa ta yáha-í véxi.

13 Te nchaa ndàcu-í quidè-í chi Xítóhó Jesucristú chindèe ñaha-gá xii-í.

14 Te nchòhó ío váha ní quide-ndo ñi cundàhú iní ñáhá-ndó xii-í ní chindee ñaha-ndo vitna ndecu ndìhi-í tñúndòho.

15 Te nchòhó cue ñáyiú ñuú Filipú sa ñaha-ndo nàcuáa ní cuu cútnàhá ní ngúíta-í càhá<sup>n</sup>-í tñúhu Xítóhó Jesucristú distritú Macèdoniá, te cútnàhá ní ndee-í distritú-án te díu tñàhí-ni nchòhó ní taxi-ndo sá ndúú tãhù-í, te nchaa ñáyiú ndècu ichi Xítóhó Jesucristú dava-gá xichi ñá túú tñàhí ni chindee ñahá-yu xii-í.

16 Te cuèi cútnàhá ní xindecu-í ñuú Tesalónica tñi xito ní tendaha-ndo sá ndúú tãhù-í sá ñi cutnùní iní mée-ndó ñi xini ñùhu-í.

17 Te vá cání iní-ndó sá sá dúhá càhá<sup>n</sup>-í te cuini-í nándi-gá taxi táhú-ndó, te duha càhá<sup>n</sup>-í chi Yá Ndiòxí ío-gá vai sá váha cada ñaha-gá xii-ndo sá dúcá<sup>n</sup> quide-ndo.

18 Te ní xidó vai nchaa sá xini ñùhu-í ndécú ndìhi-í vitna, te duca<sup>n</sup> ío vai sá ndécú ndìhi-í ní cuu chi ní tendaha tucu-ndo sá ndúú tãhù-í véxi ndìhi té Epafròditú. Te táhú-a cùu-xi datná ñ<sup>n</sup> táhú sá ñi sáha-ndo mée Yá Ndiòxí, te cùu vii cuu váha iní-gá sá dúcá<sup>n</sup> ñi quide-ndo.

19 Te núu ná cúú sá xini ñùhu-ndo, te mee Yá Ndiòxí ío vai taxi-gá chi ío vai sá ndécú ndìhi-gá, te duca<sup>n</sup> càda-gá chi ndècu ndìhi-o Xítóhó Jesucristú.

20 Te vitna nchaa-o chí ná càchí-ó sá ío càhnu cuu Tátá-ó Dütú Ndiòxí ni caa ni quíhí<sup>n</sup>. Te duca<sup>n</sup> na cunduu.

### *Tñúhu ndée núu ñi ndìhi-ná*

21 Te cúñaha-ndo sá ío na càda ndee iní nchaa ñáyiú ndècu ichi Xítóhó Jesucristú, ñáyiú cùu cuendá Yá Ndiòxí. Te tñàhá nchaa ñáyiú xindecu ichi Xítóhó Jesucristú ndécú ndìhi-í quidé ndèe iní ñáhã-yu xii-ndo.

22 Te nchaa ñáyiú cùu cuendá Yá Ndiòxí xínú cuèchi vehe té Cèsár té yindaha cuéhé nàció<sup>n</sup> quidé ndèe iní ñáhã-yu xii-ndo, ndìhi nchaa dava-gá ñáyiú cùu cuendá-gá.

23 Te Xítóhó Jesucristú ío na chindee chitúu ñaha-gá xii-ndo nchaa-ndo. Te duca<sup>n</sup> na cunduu. Te ío chí càdá ndèe iní-ñá vitna.

## TUTÚ NÍ CADÚHA TÉ PĀBLÚ QUIHI<sup>n</sup> NDAHA ÑÁYIU ÑUÚ CÒLOSÁ

*Té Pāblú cādūha-dé tutú quihi<sup>n</sup> ndaha ñáyiu xñdecu ichi Xítoho Jesucristú ndécú ñuú Còlosá*

<sup>1</sup> Yúhú té Pāblú ní tendaha ñaha Yá Ndiöxí cāhá<sup>n</sup>-í tnúhu Xítoho Jesucristú núú ñáyiu chi duca<sup>n</sup> cuiní méé Yá Ndiöxí cunduu, te cādúha-í tutú-a ndihi té Timùteú

<sup>2</sup> cuendá daquixi-í ndaha nchòhó ñáyiu ñuú Còlosá, ñáyiu cùu cuendá Yá Ndiöxí, ñáyiu quide ndáá ndécú ichi Xítoho Jesucristú, te xicá<sup>n</sup> táhù-í núú Tātá-ó Dütú Ndiöxí sá ïo na chindee chitúu ñaha-gã xii-ndo, te duca<sup>n</sup> ndì nduú-gá ná cádá te ïo váha cuu iní-ndó cùndecu-ndo.

*Té Pāblú cāhá<sup>n</sup> ndihi-dé Yá Ndiöxí cuendá ñáyiu sàndáá iní ñáhá xì Xítoho Jesucristú*

<sup>3</sup> Te duca<sup>n</sup>-ni cāhá<sup>n</sup> ndihi-ndí Yá Ndiöxí Yaá cúu Tātá Xítoho Jesucristú ndacá<sup>n</sup> táhù-ndí núú-gã cuendá nchaa nacuáa quide-ndo ndecu-ndo,

<sup>4</sup> chi ñihí-ndí tnúhu sá ïo sàndáá iní-ndó Xítoho Jesucristú, te duca<sup>n</sup> ïo cùu iní-ndó nchàa ñáyiu cùu cuendá Yá Ndiöxí.

<sup>5</sup> Te duca<sup>n</sup> quide-ndo chi sàndáá iní-ndó sã ndúú táhù-ndó cùndecu-ndo núú ndécú Xítoho Jesucristú, te tnúhu-á<sup>n</sup> ñí ñihí-ndó cùtnàhá ní xíndedóho-ndo tnúhu ndáá tnúhu Xítoho Jesucristú.

<sup>6</sup> Te tnúhu Xítoho Jesucristú tá xíté nuu-xi ñihí ñuyíu cuáhá<sup>n</sup>. Te vai ñáyiu ta sàndáá iní-yu cuáhá<sup>n</sup>, te ta quidé-yu mee-ni sã vāha cuáhá<sup>n</sup> ndécú-yu ichi-gá. Te nchòhó chi ndéé cùtnàhá ní tecú dóho-ndo tnúhu-gá ní quesaha-xi ta cùu vai ñáyiu ñuú-ndó tá quide ndáá-yu núú-gã cuáhá<sup>n</sup>. Te dāvá-á<sup>n</sup> ñí cutnùní ndáá ndisa iní-ndó sã Yá Ndiöxí ïo chindee chitúu ñaha-gã xii-ndo.

<sup>7</sup> Te duca<sup>n</sup> ñí dánèhé ñáhá tē Ēpafrás tée ïo cùu iní-ndí, chi tnàhá-dé ïo quide ndáá-dé xínú cuèchi-dé núú Xítoho Jesucristú quidé-dé núú-ndí dācuāha ñaha-dé xii-ndo tnúhu-gá.

<sup>8</sup> Te cāchí tnúhu-dé xii-ndí sá ïo cùu iní ñáhá-ndó xii-ndí, te duca<sup>n</sup> quide-ndo chi Espiritú Yá Ndiöxí chindèe ñaha-xi xii-ndo.

<sup>9</sup> Te ndéé cùtnàhá ní ñihí-ndí tnúhu nacuáa quide-ndo ndecu-ndo ndéé dāvá-á<sup>n</sup> ñí ngüita-ndí ñá túú dàña ndee-ndí xicá<sup>n</sup> táhù-ndí núú Yá Ndiöxí cuendá-ndó sã Espiritú-gá ná tàxi-xi nchaa-gá sá cùmāní quini tnùní-ndó, te duca<sup>n</sup> te cutnùní váha-gá iní-ndó nacuáa cuiní Yá Ndiöxí cada-ndo.

<sup>10</sup> Te sá dúcá<sup>n</sup> te ndacu-ndo càda-ndo mee-ni sá vāha dàtná cùiní Xítoho Jesucristú cada nchaa ñáyiu ndècu ichi-gá. Te duca<sup>n</sup> ïo nduu vétú iní-gá te núu na càda-ndo nchaa núú sã vāha. Te duca<sup>n</sup> ïo-gá cuita cutnùní iní-ndó nchàa nacuáa cuiní Yá Ndiöxí cada-ndo.

<sup>11</sup> Te mee-gã cúu-gã Yaá ïo cùnuu, te ñu-gá ïo chindee ñaha-gã xii-ndo, te cudí iní-ndó cuèi nāndi na càda ñaha ñáyiu xii-ndo sã cuendá-gá, te duca<sup>n</sup> ïo cunduu cāhnu iní-ndó.

<sup>12</sup> Te ndacá<sup>n</sup> táhù-ó núú Dütú Ndiöxí chi ní quide túha ñaha-gã xii-o cuendá nduu táhù-ó cùndecu-o ndihi nchaa dava-gá ñáyiu yindaha-gá xñdecu núú cāndò canine ñá túú tnàhí-gá ní ñí<sup>n</sup> cuèchi ïó.

<sup>13</sup> Te ñu-gá ní quide ní dáñá-ó nchàa ichi cuehé ichi duha núú táxi tnùní yucu ñāvāha, te ní nachihi ñaha-gã xii-o ndàha Déhe-gá Yaá ïo cùu iní-gá.

<sup>14</sup> Te Déhe-gá ní xihí-gá cuendá sá nchóó cācu nihnu-o núú ùhú núú ndàhú, te ní quide cāhnu iní-gá nchaa sá cuèhé sá dúhá ñí quide-o.

*Ñáyiu cùu ñí<sup>n</sup> nuu ndihi Yá Ndiöxí cuendá sá ñí xihí Xítoho Jesucristú*

<sup>15</sup> Te Yá Ndiöxí cúu-gã Yaá vá cúu quini-ó dico Xítoho Jesucristú chi ní quixi túu-gá ñuyíu-a, te ní quide-gá nchaa nacuáa sàni iní-gá. Te dàtná-ni sàni iní-gá te duca<sup>n</sup> sàni iní Yá Ndiöxí,

te Yaá-án duca<sup>n</sup>-ni ndècu-gá ndéé cútnàhá vátá ngáva-gá ñuyíú.

16 Te Xítohó Jesucristú ní quide-gá núú Yá Ndiòxí ní cadúha-gá nchaa sá ió andiu ndìhi nchaa sá ió ñuyíú-a, te ní cadúha-gá nchaa sá cúú quini núú-ó cundehe-o, ndìhi nchaa sá vǎ quini tnahí-o, ndìhi nchaa espíritú cúnúu vihi xinu cuechi núú Yá Ndiòxí, ndìhi nchaa dava-gá espíritú xínu cuèchi. Te nchaa ní cadúha Xítohó Jesucristú chi duca<sup>n</sup> ñí cachí Yá Ndiòxí cunduu. Te duca<sup>n</sup> ñí cachí Yá Ndiòxí cunduu cuèndá nchaa cuu-xi mee-ni sá vǎha sá cúú-xí Xítohó Jesucristú.

17 Te Xítohó Jesucristú duca<sup>n</sup>-ni ndècu-gá ndéé cútnàhá vátá ngáva-gá ñuyíú-a, te diu núú ndáhá-gǎ cándodo ñuyíú-a, ndìhi andiu, ndìhi nchaandi túhú sá ió.

18 Te diu Xítohó Jesucristú cúnúu-gá yíndàha ñaha-gá xii nchaa nchoo ñáyiú ndècu ichi-gá, te diu-gá quidé-gǎ ndécú vǎha-o núú-gǎ. Te núú ncháá ñáyiú ndoto diu-gá cúú-gǎ Yaá ío càhnu cuu sa ní ndoto, te sá dúcá<sup>n</sup> ní ndoto-gá te xiǎ<sup>n</sup> cúú-gǎ Yaá ío tàxi tnuní nchaandi túhú sá ió ñuyíú-a ndìhi andiu.

19 Te duca<sup>n</sup> ío cúnúu-gá táxi tnùnì-gá chi ndáá sá ñ<sup>n</sup>-ni cuu-gá ndìhi Yá Ndiòxí.

20 Te Xítohó Jesucristú ní xihí-gá núú cùrúxí, chi duca<sup>n</sup> ñí cuini Yá Ndiòxí cunduu cuèndá sá vǎ yǎo ñ<sup>n</sup>-gá cuu úhú iní ñáhá xii-gá cuèi ñáyiú xíndecu ñuyíú-a, te cuèi cue espíritú ndécú àndiu.

21 Te nchòhó cútnàhá vátá cùndècu-gá-ndó ichi Xítohó Jesucristú ñá túú tnahí ñí xǎo cáhá<sup>n</sup> ndìhi-ndo-gǎ, chi mee-ni ñí xǎo cuu úhú iní-ndó-gǎ, te mee-ni ncháa sá cuèhé sá dúhá ñí xǎo cunuu ñí xǎo cada-ndo ñí cùu, dico Xítohó Jesucristú ní quide-gá ní tnahá tnúhu-ndo ndìhi Yá Ndiòxí vitna.

22 Chi diu cuèndá-án ñí xihí Xítohó Jesucristú núú cùrúxí cuèndá sá nchóó ndúu ndoo nduu nine iní-ó ngúndecu-o núú Yá Ndiòxí, te duca<sup>n</sup> te ñá túú tnahí-gá ná cumánì-ó núú-gǎ, te vǎ yǎo ñ<sup>n</sup>-gá cachí sá nchóó ndècu

cuèchi-o.

23 Te núú vǎ dáñá ndèé-ndó quíndáá iní-ndó Xítohó Jesucristú, te cundecu-ni-ndo ichi-gá, te vǎ cánì iní-ndó dàña-ndo tnúhu ndee iní ní taxi-gá ndécú ndìhi-o. Te nchaa tnúhu-gá-án tá xité nuu-xi ñihí ñuyíú cuáhá<sup>n</sup>, te diu-ni tnúhu-án càhá<sup>n</sup> yúhú té Páblú dánèhé-í ñáyiú.

*Té Páblú yihí díquí-dě cáhá<sup>n</sup>-dé tnúhu Xítohó Jesucristú núú ñáyiú ndècu ichi-gá*

24 Te vitna ío cùdí iní-í ndóhò-í cuèndá-ndó, chi Xítohó Jesucristú ío ní ndoho-gá cuèndá-ó, te tnahá yúhú ndóhò-í cuèndá nchaa ñáyiú ndècu ichi-gá, dico vitna cumánì-gǎ ndoho-í cuèndá-yu.

25 Te Yá Ndiòxí ní cachí-gá sá yúhú quíhi díquí ñáhà-í xii nchaa nchòhó ñáyiú ndècu ichi-gá cuèndá danèhé ñáhá vǎha-í xii-ndo tnúhu-gá cuèndá cuu-xi sá vǎha sá cúú-xí-ndó.

26 Te nchaa tnúhu sá dánèhé ñáhà-í xii-ndo ñá túú ní təcú dóho nchaa ñáyiú ní xíndecu ndéé sanaha, te mee-gǎ ní cuini-gá sá ncháá nchòhó ñáyiú yíndaha-gá vitna cundecu ndìhi-o tnúhu-án.

27 Te mee-gǎ ní cachí-gá sá dátúu-gá nchaa tnúhu sá ío vii ío vǎha cuáhá<sup>n</sup> núú ncháa ñáyiú yíndaha-gá. Te tnúhu-án cúú-xí cuèndá tnahá nchaa nchòhó ñáyiú ñá túú cùu ñáyiú is- rael. Te tnúhu-án dánèhé ñáhá-xí xii-ndo sá Xítohó Jesucristú ndécú ndìhi ñaha-gá xii-ndo. Te cuèndá xiǎ<sup>n</sup> ní ngúndecu ndìhi-ndo tnúhu ndee iní cundecu-ndo ndìhi-gá ñí caa ñí quíhí<sup>n</sup>.

28 Te nchúhú mee-ni cuèndá Xítohó Jesucristú càhá<sup>n</sup> vǎha-ndí, te dàsahú-ndí ñáyiú nàcuáa cadá-yu. Te vǎha vihi danèhé-ndí nchaa ñáyiú nàcuáa tecú tnùnì-yu tnúhu-gá, te duca<sup>n</sup> dānehé-ndí-yu nàcuáa cundáa-yu núú Yá Ndiòxí, te duca<sup>n</sup> chi tnahá tnúhu-yu ndìhi Xítohó Jesucristú.

29 Te cuèndá xiǎ<sup>n</sup> ío ndècu ndee-í quidé-í chiú<sup>n</sup> Xítohó Jesucristú, te

mee-gă ío chindee ñaha-gá xii-í nũu xíã<sup>n</sup> ndácù-í quidè-í chiù<sup>n</sup>-gá.

## 2

<sup>1</sup> Te cuiní-í sá nchòhó cutnùnì iní-ndó sã ío sàni iní-í cuendá-ndó, ndihì cuendá nchaa ñáyiu ndècu ñuú Laodiceá, ñáyiu xindecu ichi Xítohó Jesucristú. Te duca<sup>n</sup>-ni ío sàni iní-í cuendá nchaa ñáyiu vátá quinì ñáhá-gá xii-í.

<sup>2</sup> Te cuiní-í sá nchòhó ndihì nchaa ñáyiu-á<sup>n</sup> ío nducu ndèe-ndo canchicú<sup>n</sup> nihnu-ndo ichi Xítohó Jesucristú, te ío cuu iní tnáhá-ndó, te duca<sup>n</sup> cùu ì<sup>n</sup>nuu-ndo cundecu-ndo. Te cuiní-í sá nchòhó ndihì dava-gá ñáyiu-á<sup>n</sup> ío váha sáá sá xínì tnùnì-ndó cuendá tecú tnùnì-ndó nchaa nacuaá ndùu cuendá Xítohó Jesucristú chi ío ndùu yuhu ni cuu, dico vitna ní dátũu-gá núú-ó.

<sup>3</sup> Te Xítohó Jesucristú néhé vâha-gá nchaa tnúhu sá ío xìnì ñuhu-xi tecú tnùnì-ó.

<sup>4</sup> Te duha càhá<sup>n</sup>-í chi cuiní-í sá vâ quindáá iní-ndó nì ì<sup>n</sup> tnúhu càhá<sup>n</sup> nchaa ñáyiu cuinì dandàhú ñáhá xii-ndo cuéi ío váha càhá<sup>n</sup>-yu.

<sup>5</sup> Te cuéi ñá túú ndècu ndihì ñaha-í xii-ndo dico duca<sup>n</sup>-ni ío ñuhu iní ñáhá-í, te ío cù<sup>n</sup> iní-í chi ñihí-í tnúhu sá ío cùu ì<sup>n</sup>nuu-ndo ndecu-ndo, te ñá túú dàña ndéé-ndó sándáá iní-ndó Xítohó Jesucristú.

<sup>6</sup> Te dàtná-ni ní sándáá iní-ndó Xítohó Jesucristú, te duca<sup>n</sup>-ni quindáá iní-ndó-gá canchicú<sup>n</sup> nihnu-ndo ichi-gá.

<sup>7</sup> Te nì yùhu nì iní-ndó cànchicú<sup>n</sup> nihnu-ndo ichi-gá, te duca<sup>n</sup> cùita cutnùnì-gá iní-ndó nchaa nacuaá càhá<sup>n</sup>-gá quíhì<sup>n</sup>. Te vá dáña ndèe tnàhí-ndo quindáá iní-ndó nchaa tnúhu sá nì dánèhé ñáhá cuè téé càhá<sup>n</sup> tnúhu-gá xii-ndo. Te xìnì ñuhu-xi ndacá<sup>n</sup> táhú vîhi-ndo núú Yã Ndiõxí cuendá nchaa tnúhu-á<sup>n</sup>.

*Ñáyiu ío váha tnàhá tnúhu ndihì Xítohó Jesucristú*

<sup>8</sup> Te ío quíhì iní-ndó cùndecu-ndo chi xíca cuu ñáyiu cuinì dandàhú ñáhá xii-ndo, te ñáyiu-á<sup>n</sup> càhá<sup>n</sup>-yu

mee-ni nchaa tnúhu ní cahu iní nchaa cue téé ñuyíú-a, te nchaa tnúhu-á<sup>n</sup> ñá túú vèdana nàndíhì-xi. Te duca<sup>n</sup> quidè-yu chi nchicú<sup>n</sup> nihnu-ní-yu nchaa nacuaá ní xóo cada ñáyiu ní xindecu ndéé sanaha. Te càhá<sup>n</sup>-yu nacuaá sàni iní yucu ñávâha, te ñá túú càhá<sup>n</sup>-yu nacuaá cuinì méé Xítohó Jesucristú.

<sup>9</sup> Te Xítohó Jesucristú cúu-gá ì<sup>n</sup> ñáyiu dico ì<sup>n</sup>-ni cùu-gá ndihì Dútú Ndiõxí.

<sup>10</sup> Te nchòhó chi ñá túú tnàhí-gá ná cùmání-ndó nũú-gá chi ndècu ndihì-ndo Xítohó Jesucristú. Te ío cùnuu-gá te tàxi tnùnì-gá nchaa núú cuè espíritú cùnùu.

<sup>11</sup> Te mee-gá ní ndada ndoo ní ndada nine-gá iní-ndó chi ní ngúndecu ndihì-ndo-gá te duca<sup>n</sup> ñá túú-gá ndécú-ndó ichi cuehé ichi duha, te cada iní-ndó sã nì ngúndecu ndihì-ndo ì<sup>n</sup> seña, chi ní ndada ndoo ní ndada nine-gá iní-ndó, dico ñá díú ì<sup>n</sup>-ni cuu-xi ndihì seña sá sãha cue téé isràél ñi-güedé.

<sup>12</sup> Te nchòhó sa ní sandute-ndo te cada iní-ndó sã dàtná tnúhu sá nì xíhì-ndó ndihì Xítohó Jesucristú, te ní nguindũxi-ndo ndihì-gá, te ní ndoto-ndo ndihì-gá, te duca<sup>n</sup> càda iní-ndó chi ñá túú-gá ndécú-ndó ichi cuehé ichi duha. Te duca<sup>n</sup> chi sándáá iní-ndó nchaa nacuaá quide Yã Ndiõxí, te diu-gá ní dándótó-gá Xítohó Jesucristú.

<sup>13</sup> Te nchòhó cùtnàhá ndécú-ndó ichi cuehé ichi duha cùu-ndo dàtná ñáyiu ní xíhì, chi ñá túú tnàhá tnúhu-ndo ndihì Yã Ndiõxí ní cùu, te nì ñá díú ñáyiu isràél cúu-ndó. Te Yã Ndiõxí ní cachí-gá sá nchóo ío váha tnàhá tnúhu-o ndihì Xítohó Jesucristú vitna. Te duca<sup>n</sup> nì quide-gá chi sa ní quide càhnu iní-gá nchaa sá cuèhé sá dúhá nì xóo cada-o.

<sup>14</sup> Te vitna duu<sup>n</sup> duu<sup>n</sup> ñá túú-gá cuéchi-o ndècu núú-gá. Te nchoo ñá túú cuinì-ó càda-o nacuaá càhá<sup>n</sup>-gá, te cuendá xíã<sup>n</sup> ío ndècuéchi-o, te vâi nacháhu-o nũú-gá ní cùu. Te vitna ñá túú-gá nì ì<sup>n</sup> cuéchi-o ndècu núú-gá,



chi ñi cuendá-án ñi xíhí Xítohó Jesucristú núu cùrúxí.

15 Te sá dúcáñ ñi xíhí Xítohó Jesucristú núu cùrúxí, te duuñ duuñ ní dáquéé tihú-gã sácuíhná ndihí nchaa espíritú cundíhí-xi, te ní quendóo canúu-xi, te mee-gã ío cunuu-gá táxí tnùní-gá.

*Nanducu ñihnu-o mee-ni sá vãha cãchí Xítohó Jesucristú*

16 Te núu dava ñáyíu xícuèhé ñáhã-yu xii-ndo cuendá sá ñà túú xèxi-ndo xihí-ndo datná quidé meé-yu te vá cáda cuendá-ndó, te ní vã cáda cuendá-ndó te núu xícuèhé ñáhã-yu xii-ndo cuendá sá ñà túú cãnehe íí-ndó vico quide meé-yu núu cuíá núu cuíá, ndihí vico quidé-yu ndi tnahá yóó, ndihí cuendá sá ñà túú cãnehe íí-ndó nduu ndetatú-yu.

17 Te nãcuáa quidé-yu ndi tnahá òré quidé-yu nchaa vico-án, ndihí nãcuáa quidé-yu ndi tnahá nchaa nduu cãnehe íí-yu-án, te cada iní-ó sã sã quidé-yu-án dánèhé núu ñáhã-xí nãcuáa cada Xítohó Jesucristú núu cuáhãñ núu vèxi.

18 Te vá quindáá iní-ndó ñi ñi tnúhu cãháñ ñáyíu cãchí sá cuíta ñihnu-ndo cuendá sá ñà túú tní-ndo tnúhu cãháñ-yu, chi cãchí-yu sá ío xini ñihu-xi cada cahnu-o nchaa cue espíritú xinú cuèchi núu Yã Ndiõxí, te ní yùhu ní iní-ó cãnehe-o sá yíñùhu núu-xi. Te ñáyíu-án cãchí-yu sá ndàá cãháñ-yu chi dàcoto ñaha saní-yu nãcuáa cãháñ-yu, te ío quide cahnú-yu meé-yu cuendá nchaa sá sání iní meé-yu quidé-yu, te ñà túú vèdana nandíhí nchaa sá quidé-yu.

19 Te nchaa ñáyíu ducañ xíquide-án ñà túú tnahá tnúhu-yu ndihí Xítohó Jesucristú. Te mee-gã cúu-gã Yaá cùnùu taxi tnuní ñáhã-gã xii nchaa nchoo ñáyíu ndècu ichi-gá, te chindee ñaha-gã xii-o ndècu-o ichi-gá, te mee-gã quidé-gã cúu ñiñuu-o ndecu-o, te ta quide-o nchaa nãcuáa cuení Yã Ndiõxí cuáhãñ.

20 Te nchòhó cúu-ndó dàtná ñáyíu ní xíhí ndihí Xítohó Jesucristú cuendá

sá vã cãchicúñ ñihnu-gã-ndó nãcuáa cãháñ ñáyíu ñà túú ndècu ichi-gá. Te núu ducañ ña, çte ná cuendá tní-ñi-ndó tnúhu cãháñ ñáyíu-án te quide-ni-ndo datná quidé-yu?

21 Chi ñáyíu-án cãchí-yu sá ío sá ní vã cúu tètè ndaha-o, te dava ní vã cúu cãxi-o, te dava ní vã cúu tní-o.

22 Te nchaa xíñ, núu néhé chiñ-ni-o ndihí ñihnu-xi. Te nchaa sá dúcáñ cãháñ-yu-án cúu-xí mèe-ni sá ní cahú iní meé nchaa ñáyíu ñuyíú-a nãcuáa cada-yu cundecú-yu.

23 Te nchaa tnúhu cãháñ-yu-án sánùu sá cúu-xí ñiñ tnúhu cãháñ ñiñ tée ío vãha sãá díquí-xi, chi cãchí-yu sá cáda cãhnu-o Yã Ndiõxí nãcuáa véxi iní meé-ó, te cunduu ndáhú iní-ó dico ñà túú dãnehé ñáhã-yu nãcuáa tàú-xi cunduu. Te cãchí tucú-yu sá cáda ùhú-ó mèe-o, chi ducañ cuení Yã Ndiõxí cada-o cãchí-yu. Te nchaa xíñ ñà túú vèdana chindee ñaha-xi xii-o cuendá sá vã táxí tnùní ñáhã ñi ñi sã cuèhé sá dúhá sãni iní-ó.

### 3

1 Te nchòhó cada iní-ndó sã ní xíhí-ndó ndihí Xítohó Jesucristú te ní ndoto-ndo ndihí-gá, núu xíñ tàú-ndó càda-ndo nchaa sá vãha dàtná cuení meé-gã chi mee-gã núcóo-gã xio cùha Dútú Ndiõxí chi tnahá-gá ío cunuu-gá.

2 Te ío cuhuñ iní-ndó nchaa sá vãha cãchí Xítohó Jesucristú nduu táhú-ndó cundecu ndihí-ndo, te vá cúhúñ iní-ndó mèe-ni nchaa sá ío ñuyíú-a.

3 Te ducañ càda-ndo chi cùu-ndo datná ñáyíu ní xíhí ndihí Xítohó Jesucristú, chi ñà túú-gã ndécú-ndó ichi cuehé ichi duha. Te Yã Ndiõxí néhé cuendá ñáhã-gã xii-ndo chi tnahá tnúhu-ndo ndihí Xítohó Jesucristú.

4 Te Xítohó Jesucristú cúu-gã Yaá ndécú ndihí ñaha xii-o vitna, te sáa nduu quèe túu ndihí ñaha-gã xii-o àndi, te tnahá-ó ío cunuu-o ndihí-gá.

*Duuñ duuñ dañ-a-o nchaa sá cuèhé sã dúhá ñihu iní-ó te cada-o mèe-ni sá vãha*

5 Te duuñ duuñ dañ-a-ndo nchaa sá cuèhé sã dúhá ñihu iní-ndó. Te nchaa

nchòhó cue téé vá càhá<sup>n</sup> ndihí-ndo ñáyiú dìhí te núú ñá díú ñàdihí-ndó cùú-yu, te duca<sup>n</sup>-ni nchàa nchohó cue ñáyiú dìhí tucu vá càhá<sup>n</sup> ndihí-ndo cuè téé te núú ñá díú yì-ndo cuu-güedé, te nchaa-ndo vǎ cání-gǎ iní-ndó càda-ndo ni ì<sup>n</sup> sá cuèhé sá dúhá ndihí tnaaha ñáyiú-ndo. Te vá cání cuèhé cani duha-gá iní-ndó sǎ cúú-xí-ndó ndihí-yu, te vá cání-gǎ iní-ndó ni ì<sup>n</sup> sá cuèhé sá dúhá, te ni vǎ xíhó-ndó ì<sup>n</sup> sá ndécú ndihí tnaaha ñáyiú-ndo, chi núú duca<sup>n</sup> na càda-ndo xiho-ndo sá ndécú ndihí-yu te ì<sup>n</sup>-ni cùu-ndo ndihí ñáyiú chĩñuhu nchaa sá càchí-yu cùu ndiòxí te ñá ndáá sá ndiòxí cúú nchàa xiǎ<sup>n</sup>.

<sup>6</sup> Te nchaa ñáyiú duca<sup>n</sup> xĩquide ío dandòho ñaha Yá Ndiòxí xií-yu na sàá nduu tnúndòho tnúhu ndàhú, chi ñá túú sàndáá iní ñáhǎ-yu xii-gǎ.

<sup>7</sup> Te nchòhó cútnàhá ní xíndecu-ndo ìchi cuehé ichi duha, te tnàhá-ndó ní xóo cada-ndo dàtná quidé nchàa ñáyiú-á<sup>n</sup>.

<sup>8</sup> Te vitna duu<sup>n</sup> duu<sup>n</sup> dañà-ndo nchàa sá ná càchí tnúhu-í-a: Vá cúdéé<sup>n</sup>-gǎ-ndó, te ni vǎ cùndùu líhli-gǎ iní-ndó, te ni vǎ cúú ùhú-gǎ iní-ndó tnàha ñáyiú-ndo, te ni vǎ cǔcuèhé-gǎ-ndó-yu, te ni ì<sup>n</sup>-gǎ tnúhu cuèhé vá càhá<sup>n</sup>-ndó.

<sup>9</sup> Te ni vǎ dácuàndehnde-gǎ-ndó, chi nchòhó sa ní dáñá-ndó nchàa ichi cuehé ichi duha, te ñá túú-gǎ sání cuèhé sání dùha iní-ndó nǎ cada-ndo vitna datná ní xóo cada-ndo.

<sup>10</sup> Te vitna nchòhó ní nduu-ndo ñáyiú váha, te uu<sup>n</sup>-gǎ tá cùtnuní iní-ndó nchàa nacuáa cuení Yá Ndiòxí cada-ndo, te duca<sup>n</sup> ta ndùcu ndee-ndo quide-ndo mee-ni sá vǎha dàtná quidé mèe-gǎ.

<sup>11</sup> Te vitna ní ngúndecu ndihí-ndo Xítohó Jesucristú, te vá cáda cuèndá-gǎ-ndó núu cùu-ndo ñáyiú israél àdi ñá túú cùu-ndo, te ni vǎ cáda cuèndá-ndó núu cùu-ndo ñáyiú ní ngúndecu sèñá ñì-xi àdi ñáhá, te ni vǎ cáda cuèndá-ndó núu cùu-ndo ñáyiú véxi ñuú xíca, te ni vǎ cáda cuèndá-ndó núu cùu-ndo ñáyiú cùu neñuú, te ni vǎ cáda cuèndá-ndó núu cùu-ndo ñáyiú ñá túú tnàhí dàñá

quee núú chíú<sup>n</sup> pàtróó<sup>n</sup>-xi, te ni vǎ cáda cuèndá-ndó núu cùu-ndo ñáyiú dàñá queé núú chíú<sup>n</sup> pàtróó<sup>n</sup>-xi, chi Xítohó Jesucristú cùnùu-gǎ ndécú ndihí ñaha-gǎ xii-o nchàa-o.

<sup>12</sup> Te Yá Ndiòxí ní dáqueé dì<sup>n</sup> ñaha-gǎ xii-ndo cuèndá cundecu-ndo ndihí-gǎ, te vitna cùu-ndo ñáyiú quide ndáá ndécú ìchi-gǎ. Te mee-gǎ ío cùu iní ñáhá-gǎ xii-ndo núu xíǎ<sup>n</sup> tàù-ndó cùndahú iní tnàhá-ndó, te ío váha cuu iní-ndó chĩndee tnaaha-ndo, te cuu-ndo ñáyiú ndàhú iní-xi, te ío vii ío váha cuu iní-ndó cùndecu ndihí tnaaha-ndo, te ío càhnu cunduu iní-ndó cuèndá nchaa sá quidé ñàha ñáyiú xii-ndo.

<sup>13</sup> Te duca<sup>n</sup> cànehe-ndo tnúhu càhnu iní núú ndi mèe-ndo nacuáa ndècu-ndo ìchi-gǎ, te cada càhnu tucu iní-ndó núu ná cúú sǎ cúmǎní núú tnàhá-ndó. Te dàtná ní quide càhnu iní Xítohó Jesucristú nchaa sá ñà túú vǎha ní xóo cada-ndo duca<sup>n</sup> càda-ndo cada cahnu iní-ndó nchàa sá cúmǎní núú tnàhá-ndó ndècu-ndo.

<sup>14</sup> Te xini ñuhu vihi-xi sá ío cuu iní tnàhá-ndó cùndecu-ndo, chi núú duca<sup>n</sup> na càda-ndo, te quide-ndo nchaa dava-gǎ sá càhá<sup>n</sup>-í, te ñá túú tnàhí-gǎ ná cúmǎní-ndó.

<sup>15</sup> Te dañà-ndo sǎ Yá Ndiòxí ná chĩndee ñaha-gǎ nàcuáa ío váha cuu iní-ndó cùndecu-ndo, chi diu cuèndá-á<sup>n</sup> ní càhá<sup>n</sup> ñáhá Yá Ndiòxí xii-ndo cuèndá cuu ì<sup>n</sup>nuu-ndo ndihí nchaa dava-gǎ ñáyiú ndècu ìchi-gǎ, te duca<sup>n</sup>-ni ío ndacá<sup>n</sup> táhú-ndó núú-gǎ.

<sup>16</sup> Te ío cuhu<sup>n</sup> iní-ndó tnúhu Xítohó Jesucristú, te ío váha cuáha-ndo cuèndá nàcuáa càhá<sup>n</sup> tnúhu-gǎ te duca<sup>n</sup> dànehé tnàhá-ndó. Te ío càhá<sup>n</sup> dóho tnàha-ndo nacuáa cada-ndo càncicú<sup>n</sup> nihnu-ndo càda-ndo nchaa nacuáa càhá<sup>n</sup> tnúhu-gǎ, te cata-ndo ndùdú ndèé núú tútú Yá Ndiòxí, ndihí nchaa dava-gǎ ndudú sá xini mèe-ndó xita-ndo te nchaa xíǎ<sup>n</sup> cata-ndo chĩñuhu-ndo Yá Ndiòxí. Te òré xítá-ndó te ni yùhu ni iní-ndó ndàcá<sup>n</sup> táhú-ndó núú-gǎ.

<sup>17</sup> Te cuhu<sup>n</sup> iní-ndó Xítohó Jesucristú òré sání iní-ndó càda-ndo ì<sup>n</sup> chiu<sup>n</sup> àdi ná tnúhu cuení-ndó

cáhá<sup>n</sup>-ndó, te diu-ni-gá cuhu<sup>n</sup> iní-ndó. Te xini ñuhu-xi ndacá<sup>n</sup> táhú-ndó núú Yá Ndiöxí, te diu-ni Xítohó Jesucristú chindee ñàha-gá xii-ndo ndacá<sup>n</sup> táhú-ndó núú Tàtá-ó Dütú Ndiöxí.

*Nàcuáa tàú ñáyiú ndècu ichi Xítohó Jesucristú cadá-yu sá cúú-xí ndí meé-yu*

18 Te nchaa nchòhó ñáyiú dìhí ñáyiú ndècu yì-xi quindáá iní-ndó yì-ndo, chi duca<sup>n</sup> tàú-xi cada nchaa ñáyiú dìhí ndécú ichi Xítohó Jesucristú.

19 Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cùcuèhé-ndó-yu.

20 Te nchaa nchòhó ñáyiú ndècu tátá-xi ndihí náná-xi quindáá iní-ndó-yu, chi núú duca<sup>n</sup> na càda-ndo te ndùu vétú iní Yá Ndiöxí.

21 Te nchaa nchòhó ñáyiú cùu tátá ndihí náná vá dásàtú-ndó iní cue déhe-ndo, chi núú duca<sup>n</sup> na càda-ndo te ni vǎ quíxí-gǎ iní-güexi cada-güexi sá vǎha.

22 Te nchaa nchòhó ñáyiú xínu cuechi quindáá iní-ndó nchàa ñáyiú cùu patróo<sup>n</sup>-ndó, te ni yùhu ni iní-ndó càda-ndo nchaa chiu<sup>n</sup> tahú-yu cuèi òré ndécü-yu àdi òré ñá túú-yu, te ñá díú òré-ni ndèhé-yu cada-ndo cuèndá-ni sá cuìní-ndó cùdiu-ndo núú-yu, chi cada-ndo sǎ néhé-ndó sǎ yíñùhu núú Xítohó Jesucristú.

23 Te nchaa chiu<sup>n</sup> sani iní-ndó càda-ndo te cada-ndo nì yuhu ni iní-ndó, te sá dúcá<sup>n</sup> càda-ndo-á<sup>n</sup> te cada-ndo cuèndá sá xínú cuèchi-ndo núú Xítohó Jesucristú te ñá díú núú ñáyiú ñuyíú-a xínu cuechi-ndo.

24 Te nchòhó sa nàha-ndo sá Xítohó Jesucristú taxi-gǎ sá ndúú táhú-ndó te núú duca<sup>n</sup> na càda-ndo, chi cùu-ndo ñáyiú xínu cuechi núú-gǎ.

25 Te nchaa ñáyiú quède nchaa sá cuèhé sá dúhá nàcháhu-yu núú Yá Ndiöxí cuèndá nchaa sá quidè-yu, te mee-gǎ vá cáda cuèndá-gǎ cuèi náí ñáyiú cùú-yu, chi ncháa-yu nacháhu-yu nchaa sǎ ñà túú vǎha quidè-yu núú-gǎ.

## 4

1 Te nchaa nchòhó ñáyiú cùu patróo<sup>n</sup> cuu-ndo ñáyiú vǎha, te cada-ndo nchàa nacuáa tàú-xi cunduu ndihí nchaa ñáyiú xínu cuechi núú-ndó, te cunaha-ndo sǎ àndiu ndecu Yá cúú Xítohó-ndó tàxi tñuní ñáhá-gǎ xii-ndo.

2 Te nchaa nchòhó ñáyiú ndècu ichi Xítohó Jesucristú, vá dáña ndèé-ndó cáhá<sup>n</sup> ndihí-ndo Yá Ndiöxí, te ío cuhu<sup>n</sup> iní-ndó-gǎ òré cáhá<sup>n</sup> ndihí-ndo-gǎ, te òré-á<sup>n</sup> ío ndacá<sup>n</sup> táhú-ndó núú-gǎ.

3 Te cáca<sup>n</sup> táhú-ndó tñàhá cuèndá-ndí núú-gǎ cuèndá sá díú-gǎ ná cáda te ndacu-ndí cáhá<sup>n</sup>-ndí tñúhu-gǎ núú nchàa dava-gǎ ñáyiú, te duca<sup>n</sup> cáhá<sup>n</sup>-ndí tñúhu Xítohó Jesucristú sǎ ñǎ túú ní xíndecu ndihí nchaa ñáyiú ní xíndecu ndéé sanaha, te diu cuèndá tñúhu-á<sup>n</sup> yíhí-í vecáa vitna.

4 Te cáhá<sup>n</sup> ndihí-ndo Yá Ndiöxí cuèndá cáhá<sup>n</sup>-í nàcuáa tàú-xi cunduu te tecú tñuní-yu.

5 Te cada-ndo nchàa nacuáa tàú-xi cunduu sá cúú-xí nchàa ñáyiú ñǎ túú ndècu ichi-gǎ, te duca<sup>n</sup>-ni ío nducu ndèe-ndo cada-ndo nchaa nacuáa tàú-xi cunduu.

6 Te cada cuèndá-ndó sǎ ío vii ío vǎha cunduu tñúhu cáhá<sup>n</sup> ndihí-ndó-yu, te cáhá<sup>n</sup>-ndó ñ<sup>n</sup> tñúhu nàcuáa cuu vǎha iní-yu, te ío vǎha cundehe-ndo nàcuáa cunduu tñúhu cúñaha-ndo xii ñ<sup>n</sup> ñ<sup>n</sup>-yu.

*Tnúhu ndéé núú nǐ ndihí-ná*

7 Te té Tiquicú téé ío cùu iní-ó ndècu ndihí-o ichi Xítohó Jesucristú, téé-á<sup>n</sup> cachí tñúhu-dé nchaa nàcuáa cùu ndecu-í. Te tñàhá-dé xínú cuèchi-dé núú Xítohó Jesucristú te ío vǎha quède ndáá-dé.

8 Te tendaha-í-dé quixi-dé cachí tñúhu-dé nchaa nàcuáa cùu ndecu-ndí iha, te taxi-dé tñúhu ndee iní cundecu ndihí-ndo.

9 Te tñàhá tucu té Onésimú téé ío cùu iní-ó ndècu ndihí-o ichi Xítohó Jesucristú quixi ndihí-dé, te diu-ni téé ñúú-ndó cùu-dé te tñàhá-dé ío vǎha quède ndáá-dé. Te ndí ndúú-güedé cachí tñúhu-güedé nchaa nàcuáa cùu iha.

10 Te té Arìstarcú téé yìhi ndìhi-í vecaá quidé ndèe iní ñáhá-dě xii-ndo ndìhi té Mácú ñaní p̄rímú tē Bèé. Te sa nàha-ndo nchaa nacuáa ní cáhá<sup>n</sup>-í cada-ndo quèhe<sup>n</sup> cuendá-ndó tē Mácú, te núu na quixi-dé quixi coto ñaha-dě xii-ndo, te ío váha cuu iní-ndó quèhe<sup>n</sup> cuendá-ndó-dě.

11 Te tnàhá téé nàni Jesús, àdi Bustú chi úú ðiù-dé, quidé ndèe iní ñáhá-dě xii-ndo. Te cue téé-a cùu-güedé cue téé isràél ní chitnahá ñáhá-güedě xii-í càhá<sup>n</sup>-ndí núú ñáyiù nàcuáa ndìhu ndaha ñaha Yá Ndiöxí xií-yu, te ni ñ<sup>n</sup>-gá ñáyiù isràél ñá túú quide datná quidé-güedě. Te ío váha tàxi-güedé tnúhu ndee iní xii-í.

12 Te tnàhá téé ñuú-ndó tē Ępafrás quidé ndèe iní ñáhá-dě xii-ndo, te cùu-dé tnàhá-dé téé xìnu cuechi núú Xìtohó Jesucristú. Te duca<sup>n</sup>-ni nì yuhu ni iní-dé xìcá<sup>n</sup> táhú-dě núú Yá Ndiöxí cuendá-ndó cuendá sá cànchicú<sup>n</sup> nihnu-ni-ndo ìchi-gá, te duca<sup>n</sup> te ío váha tecú tnùn-í-ndó nchàa nacuáa cuiní Yá Ndiöxí cada-ndo, te ðiù-ni duca<sup>n</sup> cànchicú<sup>n</sup> nihnu-ndo càda-ndo.

13 Te yúhú cächí tnúhu ndáá-í xii-ndo sá sùúni sàni iní-dé sá méé-ní sá váha cuu xii-ndo cùndecu-ndo ndìhi nchaa ñáyiù x̄ndecu ichi Xìtohó Jesucristú ndécú ñuú Laodiceá, ndìhi nchaa ñáyiù x̄ndecu tucu ichi-gá ndécú ñuú Hièrápolis.

14 Te tnàhá téé Lùcá téé xìní nchaa núú yücú sá quidé tátna quide ndee iní ñáhá-dě xii-ndo téé ío cùu iní-ó, te tnàhá tucu té Dēmás quidé ndèe iní ñáhá-dě xii-ndo.

15 Te cúñaha-ndo na càda ndee iní nchaa ñáyiù ndècu ndìhi-o ichi Xìtohó Jesucristú ndécú ñuú Laodiceá, ndìhi tá Mĩnfás, ndìhi nchaa ñáyiù ndècu ichi-gá tàcá vehe-xi dàcuahá-yu tnúhu-gá.

16 Te tutú cádũha-í-a tendaha-í quixi ndaha-ndo, te òré ná ndìhi dàcuaha-ndo te tendaha-ndo quíhí<sup>n</sup> ndaha ñáyiù x̄ndecu ichi-gá ndécú ñuú Laodiceá cuendá dacuahá-yu tnàhá-yu. Te ðiù-ni duca<sup>n</sup> dàcuaha-ndo tutú tendaha-í quíhí<sup>n</sup> ndaha ñáyiù ñuú Laodiceá òré ná dāndixí-yu

ndaha-ndo.

17 Te na cächí tnúhu-í xii-ndo nàcuáa cúñaha-ndo xii té Arquipú, te duha cúñaha-ndo xii-dé: “Yá Ndiöxí ní taxi-gá chiù<sup>n</sup> quide-n, te ío váha cada cuendá-n càda-n nchaa nacuáa ní cachí-gá”, duha cúñaha-ndo xii-dé.

18 Te yúhú téé Păblú ndìhi ndaha mee-í téé-í ñ<sup>n</sup> úú tnúhu-a quide ndee iní ñáhá-í xii-ndo, te cunaha-ndo sá yúhú yíhí-í vecaá. Te Yá Ndiöxí ío na chĩndee chitúu ñaha-gã xii-ndo. Te duca<sup>n</sup> na cùnduu. Te ío chí cādá ndèe iní-nã vitna.

## TUTÚ DÍHNA NUU NĪ CADÚHA TÉ PĀBLŪ QUIHĪ<sup>n</sup> NDAHA ÑÁYIU ÑUÚ TESÀLÓNICÁ

*Té Pāblū ndihi cue té cūndihi-dé cādūha-güedé tutú quihĪ<sup>n</sup> ndaha ñáyiu xĭndecu ichi Xítohó Jesucristú ndécú ñuú Tesàlónicá*

<sup>1</sup> Yúhú té Pāblū cādūha-í tutú-a ndihi té Silvanú, ndihi té Timùteú cuèndá daquixi-í ndaha nchòhó ñáyiu ndècu ndihi-ndí ichi Xítohó Jesucristú ndécú ñuú Tesàlónicá, chi cūu ñnuu-ndo ndihi Tátá-ó Dütú Ndiöxí, ndihi Xítohó Jesucristú. Te xicá<sup>n</sup> táhú-í núú Dütú Ndiöxí, ndihi núú Xítohó Jesucristú sá ïo na chindee chitúu ñaha-gã xii-ndo, te duca<sup>n</sup> ndí nduú-gá ná càda te ío váha cuu iní-ndó cūndecu-ndo.

*Ñáyiu ñuú Tesàlónicá ío váha sàndáá iní-yu Yá Ndiöxí*

<sup>2</sup> Te ndi tnahá òré càhá<sup>n</sup> ndihi-ndí Yá Ndiöxí ndàcá<sup>n</sup> táhú-ndí núú-gã sá ïo quide váha-ndo ndècu-ndo, te duca<sup>n</sup> xicá<sup>n</sup> táhú-ndí núú-gã sá ná còto ñaha-gã xii-ndo.

<sup>3</sup> Te ío ndàcá<sup>n</sup> táhú-ndí núú Tátá-ó Dütú Ndiöxí sá ñi yuhu ni iní-ndó sàndáá iní-ndó-gã, te xĭnu cuechi-ndo núú-gã, te cūu iní tnahá-ndó nàcuáa ndècu-ndo ichi-gã ñuú xĭá<sup>n</sup> ío xito tñaha-ndo. Te cūtnuní ndáá iní-ndó sá quixí tūcu Xítohó Jesucristú ñuú xĭá<sup>n</sup> ñá túú dàña ndeé-ndó ndètu-ndo-gã.

<sup>4</sup> Te nchòhó ñáyiu ndècu ndihi-ndí ichi Xítohó Jesucristú sa ñaha-ndí sá Yá Ndiöxí ío cūu iní ñáhá-gã xii-ndo, te ñuú-gã ní càhá<sup>n</sup> ñáhá-gã xii-ndo cuèndá cūndecu-ndo ichi-gã.

<sup>5</sup> Te cūtnáhá ní dánèhé ñáhá-ndí xii-ndo tñuhu-gã, chi ñá díú sá cūú iní méé-ndí duca<sup>n</sup> ñi dànèhé ñáhá-ndí xii-ndo, chi mee Espiritú Yá Ndiöxí ní chindee ñaha-xi ní càhá<sup>n</sup>-ndí ni

yùhu ni iní-ndí tñuhu-gã núú-ndó. Te ñaha-ndo sá cūtnáhá ní xĭndecu ndihi ñaha-ndí xii-ndo ñi quide-ndí nàcuáa càhá<sup>n</sup> Yá Ndiöxí cuèndá sá cūú-xí sã váha sá cūú-xí-ndó.

<sup>6</sup> Te nchòhó nchicú<sup>n</sup> nihnu-ndo quide-ndo vitna datná quidé-ndí, chi quide váha-ndo datná quidé mèe Xítohó Jesucristú, te díí iní ní tñi-ndo ìchi-gã cuèi ní ndoho ní tnahá-ndó, chi mee Espiritú-gã ní chindee ñaha-xi xii-ndo.

<sup>7</sup> Te sá dúcá<sup>n</sup> quide váha-ndo ñuú Yá Ndiöxí, xĭá<sup>n</sup> yĭnchĭcú<sup>n</sup> nihnu ñáyiu distritú Macèdoniá, ndihi ñáyiu distritú Acãyá xĭquide váha-yu tnahá-yu, ñáyiu xĭndecu ichi-gã.

<sup>8</sup> Te ñuú-ndo ñi sanu ichi-ndo ñáyiu distritú Macèdoniá, ndihi ñáyiu distritú Acãyá, te ñá díú-ní ñáyiu nchaa ñuú-á<sup>n</sup> chi nchaa ñáyiu dava-gã ñuú ñihí-yu tñuhu sá ïo sàndáá iní-ndó Yá Ndiöxí. Te ñá túú-gã ná tñuhu càhá<sup>n</sup>-ndí cuèndá-ndó, chi nchaa-yu sa ñihí-yu tñuhu sá ïo váha quide-ndo ndecu-ndo.

<sup>9</sup> Te mèe-yu xĭcáhá<sup>n</sup> váha-yu cuèndá-ndó sã ïo váha ní quehe<sup>n</sup> cuèndá ñáhá-ndó xĭi-ndí cūtnáhá ní quixi-ndí díhna nuu. Te ní dáñá-ndó nchaa sá càchí-ndó cūu ndióxí-ndó chi ñá díú ndiöxí cūú-xí, te ní tñi-ndo ìchi Yá Ndiöxí Yá ndécú tūu andiū chi ñuú-gã cūú-gã Ndiöxí ndisa, te xĭnu cuechi-ndo núú-gã vitna,

<sup>10</sup> te ndètu-ndo quixi tucu Xítohó Jesucristú Déhe Yá Ndiöxí Yá ndécú andiū, chi ñuú-ni-gã ní quixi-gã ñuyú-a ní xĭhí-gã, te ní ndoto-gã ní dándótó ñaha Yá Ndiöxí xii-gã. Te ñuú-ni Xítohó Jesucristú dácãcu nihnu ñaha-gã xii-o ñuú ùhú núú ndàhú, chi sàndáá iní-ó-gã.

## 2

*Nàcuáa ndiū chiu<sup>n</sup> ní quide té Pāblū ñuú Tesàlónicá*

<sup>1</sup> Te nchòhó ñáyiu ndècu ndihi-ndí ichi Xítohó Jesucristú ñaha-ndo sá ñá díú àú<sup>n</sup> ná cuu ni quixi coto ñaha-ndí xii-ndo, chi ní sàndáá iní-ndó tñuhu Yá Ndiöxí.

2 Te nàha-ndo sá cǔtnàhá ní xíndecu-ndí ñuú Fìlipú ío ní xúhu<sup>n</sup> tnúhu cuèhé tnúhu duha núú-ndí, te ní caniha-güedë xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáhá<sup>n</sup>-ndí tnúhu Yá Ndiöxí núú-ndó, chi mee-gã ní chindee ñàha-gá xii-ndí cuèi ío chitu ñáyiu ní cuu úhú iní ñáhá xii-ndí.

3 Te ñá túú ní dándahú ñáhá-ndí xii-ndo chi mee-ni tnúhu ndáá ní cáhá<sup>n</sup>-ndí núú-ndó, te ni ñá túú ni ñá<sup>n</sup> tnúhu cuèhé ñúhú iní-ndí ní cáhá<sup>n</sup>-ndí tnúhu-gá núú-ndó chi sa ní nduu ndoo ní nduu nine iní-ndí.

4 Te mee Yá Ndiöxí ní cachí-gá sá càhá<sup>n</sup>-ndí tnúhu-gá, te càhá<sup>n</sup>-ndí nàcuáa cùu iní méé-gã, chi sa nàha-gá nàcuáa càa iní-ndí, te ñá túú càhá<sup>n</sup>-ndí nàcuáa cùu iní ñáyiu.

5 Te nàha-ndo sá ñà díú ñá<sup>n</sup> tnúhu cudí iní-ndó cùndecu-ndo ichi ñuyú ní cáhá<sup>n</sup>-ndí núú-ndó cuendá taxi-ndo díhú<sup>n</sup>. Te Yá Ndiöxí sa nàha-gá sá càhá<sup>n</sup> ndáá-ndí.

6 Te ñá ñá<sup>n</sup> ndùu ni quide-ndí ñá<sup>n</sup> sá cáda-ndí cuendá-ni sá cáda càhnu ñaha-ndo xii-ndí, àdi cada cahnu ñaha dava-gá ñáyiu, te cuèi tàú ndisa-ndí sá cáda càhnu ñaha-ndo xii-ndí ní cùu, chi chiú<sup>n</sup> Xítohó Jesucristú quidé-ndí, te dícó-ni sá nchùhú ñá túú ní cuini-ndí sá dúcá<sup>n</sup> càda-ndo.

7 Te ío vii ío váha ní cáhá<sup>n</sup>-ndí núú-ndó, dàtná quidé ñá<sup>n</sup> ñaha cuu náná vii vii càhá<sup>n</sup> ndíhi cue déhe-a<sup>n</sup> dàcuehnu ñaha-a<sup>n</sup> xii-güexi.

8 Te duca<sup>n</sup> ío cùu iní ñáhá-ndí xii-ndo, dico ñá díú-ni sá ñá cáhá<sup>n</sup>-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñàha-xi, te núu dícó ní cùu-xi sá cúú, cuendá sá ío cùu iní ñáhá-ndí xii-ndo.

9 Te nchòhó ñáyiu ndècu ndíhi-ndí ichi Xítohó Jesucristú nàha-ndo sá ío ní quide chiú<sup>n</sup>-ndí cuendá ní níhí-ndí sá ñá xexi-ndí. Te cuèi nduu cuèi niú ní quide chiú<sup>n</sup>-ndí ní níhí-ndí sá ñá xexi-ndí ní cáhá<sup>n</sup>-ndí tnúhu Yá Ndiöxí núú-ndó cuendá sá ñá túú ní cuini-ndí

chichìu<sup>n</sup> ñaha-ndí xii-ndo.

10 Te nchòhó ñáyiu sàndáá iní tnúhu Yá Ndiöxí xini ndáá-ndó sá cúú-ndí cue téé váha te duca<sup>n</sup> sá naha Yá Ndiöxí tucu, te ní xica-ndí ichi ndáá òré ní cáhá<sup>n</sup>-ndí tnúhu-gá núú-ndó te diu-ni duca<sup>n</sup> quide-ndí vitna. Te vá yóo ñá<sup>n</sup> càhá<sup>n</sup> sá ñá túú quide ndáá-ndí ndécú-ndí.

11 Te nàha tucu-ndo sá ñá dácàhá<sup>n</sup> ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ñá<sup>n</sup> tátá ndíhi cue déhe-dé ní quide-ndí.

12 Te ní cachí-ndí xii-ndo sá cáda ndáá-ndó cùndecu-ndo nacuáa tàú-xi cada nchaa ñáyiu tnhá tnúhu ndíhi Yá Ndiöxí, chi mee-gã ní cáhá<sup>n</sup> ñáhá-gã xii-o cuendá nduu táhú-ó cùndecu-o ndíhi-gá núú ío váha càa ndecu-gá táxi tnúni-gá.

13 Te xíá<sup>n</sup> ío ndàcá<sup>n</sup> táhú-ndí núú Yá Ndiöxí sá nchòhó òré ní tedóho-ndo tnúhu-gá ní cáhá<sup>n</sup>-ndí, te ní sàndáá iní-ndó chi ní cutnùni iní-ndó sá díú tnúhu Yá Ndiöxí cúú-xi, te ñá díú tnúhu ñáyiu ñuyú-a cùu-xi. Te ndáá sá cúú-xi ñá<sup>n</sup> sá ío váha sá cúú-xi nchòo cue ñáyiu ní sàndáá iní tnúhu-gá.

14 Te nchòhó ñáyiu ndècu ndíhi-í ichi Xítohó Jesucristú, ío ní ndoho ní tnhá-ndó sá ñá quide ñaha ñáyiu ñuú-ndó. Te nchòhó ní ndoho-ndo dàtná ní ndoho nchaa ñáyiu tàcá dácùaha tnúhu Xítohó Jesucristú ndécú distritú Jùdeá, chi tnhá-yu ío ní dándóhó ñaha ñáyiu ñuú-yu.

15 Te diu-ni ñáyiu distritú Jùdeá-án ñá sahní-yu cue téé ní xóo cáhá<sup>n</sup> tnúhu Yá Ndiöxí ndéé sanaha. Te diu-ni ñaní tnhá-yu cùu cue ñáyiu ní sahní ñaha xii Xítohó Jesucristú, te sátá xíá<sup>n</sup> te ní ngúita-yu ní cuu úhú iní ñáhá-yu xii-ndí, núu xíá<sup>n</sup> ñá túú tnhá iní Yá Ndiöxí nchaa sá quidé-yu, te ndéé nchaa dava-gá ñaní tnhá-yu cùu úhú iní-yu.

16 Te ío chidácá nihnu ñáhá-yu xii-ndí òré càhá<sup>n</sup>-ndí tnúhu Yá Ndiöxí núú ñáyiu ñá túú cùu ñáyiu israhél, te duca<sup>n</sup> quide ñáyiu-án cuendá cuini-yu sá vã càhá<sup>n</sup>-ndí tnúhu-gá, sá cáda

cuendá naníhí tàhú ñáiyu ñá túú cùu ñáiyu israél-án, te sá dúcá<sup>n</sup> quidé-yu te ío ta cùu vai-gá cuéchi-yu cuáhá<sup>n</sup>. Te Yá Ndiöxí ío cùdéé<sup>n</sup>-gã núu-yu, te tendaha-gã ì<sup>n</sup> tnúndòho quixi sá cúu-xí-yu te ío ndohó-yu.

*Té Păblú cuìní-dé quíngoto-dé ñáiyu xñdecu ichi Xítóhó Jesucristú ndécú ñúú Tesalónicá*

<sup>17</sup> Te nchòhó ñáiyu ndècu ndìhi-ndí ichi Xítóhó Jesucristú ní quee-ndí núu-ndó, te cuèi ní cuxica-ndí dico duca<sup>n</sup>-ni ñùhu iní ñáhá-ndí xii-ndo, te ío ñùhu iní-ndí sá quíxí còto ñaha tucu-ndí xii-ndo.

<sup>18</sup> Te yúhú té Păblú duca<sup>n</sup>-ni ñùhu iní-í sá cuèdicó mèè-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í.

<sup>19</sup> Te nchoo ñáiyu ndècu ichi Xítóhó Jesucristú ndètu-ni-gá-ó quèxio-gá candeca ñaha-gã xii-o ndàa andiù cundecu-o ndìhi-gá. Te cùdíí vîhí iní-ndí sá cuendá-gá chi ní chindee ñàha-gá ní sanu ichi ñaha-ndí xii-ndo ìchi-gá, te ío vâi ñáiyu cáhá<sup>n</sup> váha-yu cuendá-ndí ná sàá nduu quixi tucu-gá.

<sup>20</sup> Te duca<sup>n</sup> ìo vâi ñáiyu cáhá<sup>n</sup> váha-yu cuendá-ndí cuendá sá ñi sanu ichi ñaha-ndí xii-ndo ìchi-gá, te quide váha-ndo. Te xíá<sup>n</sup> ío cùdíí iní-ndí.

### 3

<sup>1-2</sup> Te sa ní cunduu ñá túú-gã cáhá<sup>n</sup> ndìhi tnàha-o, núu xíá<sup>n</sup> ñá ní cùndee-gá iní-ndí ní tendaha-ndí té Timùteú ní quixi coto ñaha-dé xii-ndo, te nchúhú ní quendóo-ndí ñúú Àtenás, chi tnàhá-dé xínú cuèchi-dé núú Yá Ndiöxí, ndìhi núú Xítóhó Jesucristú cáhá<sup>n</sup>-dé tnúhu-gá núú ñáiyu. Te ní quixi-dé ní taxi-dé tnúhu ndee iní xii-ndo cuendá sá ìo quíndáá-ni iní-ndó Xítóhó Jesucristú, te canchicú<sup>n</sup> nihnu-ni-ndo ñi yuhu ñi iní-ndó ìchi-gá.

<sup>3</sup> Te vá nátùhú iní-ndó càncchicú<sup>n</sup> nihnu-ndo ìchi-gá sá dúhá cùu úhú iní ñáhá ñáiyu xii-o, te nchòhó sa

náha-ndo sá dàcuitíí sã ndóhó vîhi-o cuendá-gá.

<sup>4</sup> Te ndéé cùtnàhá ndécú ndìhi ñaha-gá-ndí xii-ndo ñi cachí tnúhu ndáá-ndí sá ìo ndoho-o, te duca<sup>n</sup> ndìsa quide-xi.

<sup>5</sup> Te xíá<sup>n</sup> núu ñá ní cùu váha-gá iní-í chi cuendá ñá túú-gã ní ñìhi-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núu-ndó núu ndècu-ni-ndo ichi Xítóhó Jesucristú, chi ní sani ì<sup>n</sup> ní sani úú iní-í sá cúu-xí-ndó, chi ná ndéé chidácá nihnu ñaha yùcu ñávàha xii-ndo te cuíta chùu<sup>n</sup> ní quide-ndí sá cúu-xí-ndó ñi cáhá<sup>n</sup>-í.

<sup>6</sup> Te ñáhá, chi ní ndexìo té Timùteú sá ñi quixi-dé ñúu-ndó, te náha-dé tnúhu ní nasáá sá ñi yuhu ñi iní-ni-ndo sàndáá iní-ndó Yá Ndiöxí, te cùu iní-ndó cuè tnaha ñáiyu-ndo. Te càchí-dé sá ìo ñùhu iní ñáhá-ndó xii-ndí, te ío cuìní-ndó cáhá<sup>n</sup> ndìhi ñaha-ndo, te ñi-ndi duca<sup>n</sup> ìo cuìní nchúhú cáhá<sup>n</sup> ndìhi ñaha-ndí xii-ndo tucu.

<sup>7</sup> Te ío ndòho-ndí chi ío cùu úhú iní ñáhá ñáiyu xii-ndí, dico sá ñi ñìhi-ndí tnúhu sá nchòhó ñáiyu ndècu ndìhi-ndí ichi Xítóhó Jesucristú ñá túú dàña ndéé-ndó sàndáá iní-ndó Yá Ndiöxí, te xíá<sup>n</sup> cúu-xí ì<sup>n</sup> tnúhu càhnu iní ní ñìhi-ndí chi ní naníhí ndéé-ndí.

<sup>8</sup> Te ní nduu vétú iní-ndí sá ñi ñìhi-ndí tnúhu ndècu-ni-ndo ichi-gá.

<sup>9</sup> Te òré cáhá<sup>n</sup> ndìhi-ndí Yá Ndiöxí, te ío ndàcá<sup>n</sup> táhú-ndí núu-gã cuendá sá ñá túú dàña nihnu-ndo ichi-gá, núu xíá<sup>n</sup> ío cùdíí iní-ndí.

<sup>10</sup> Te cuèi nduu cuèi níú xìcá<sup>n</sup> táhú-ndí núú Yá Ndiöxí sá méé-gã ná càda te sáá ì<sup>n</sup> nduu nàníhí tnàhá-ó cuendá danèhé ñáhá váha-gá-ndí tnúhu-gá sá cúmăní-gã xii-ndo.

<sup>11</sup> Te mee Tătá-ó Dütú Ndiöxí, ndìhi Xítóhó Jesucristú chindee ñàha-gá xii-ndí te quixi-ndí quixi coto ñaha-ndí xii-ndo.

<sup>12</sup> Te mee Xítóhó Jesucristú ná chindee ñaha-gá xii-ndo, te ío-gá cuita cuu iní tnàhá-gã-ndó nàcuáa

ndècu-ndo ichi-gá ndihi nchaa dava-gá ñáyiú dàtná cúú ìní ñáhá-ndí xii-ndo.

<sup>13</sup> Te xicá<sup>n</sup> táhú tùcu-ndí núú Tátá-ó Dütú Ndiöxí sá ñi yuhu ñi iní-ndó cànchicú<sup>n</sup> nihnu-ni-ndo ìchi-gá, te duca<sup>n</sup> te cundáá-ndó nñú-gã, te ñá túú-gã ná cumání-ndó òré ná sàá nduu quixi tucu Xítohó Jesucristú ndihi nchaa ñáyiú sa ndècu ndihi-gá.

## 4

### *Nàcuáa cuìní Yá Ndiöxí cada-o*

<sup>1</sup> Te nchòhó ñáyiú ndècu ndihi-í ichi Xítohó Jesucristú càhá<sup>n</sup> ndàhú-í núú-ndó sã cùndèdóho-ndo na càhá<sup>n</sup>-í nàcuáa nduu tnúhu càhá<sup>n</sup> Xítohó Jesucristú, chi mee-gã cuìní-gá sá cáda-ndó nàcuáa ní dánèhé ñáhá-ndí xii-ndo cuendá cuu váha iní Yá Ndiöxí núú-ndó, te duca<sup>n</sup>-ni càda-ndo ndéé núú cuahá<sup>n</sup> núú vëxi.

<sup>2</sup> Te nchòhó sa nàha-ndo nàcuáa ní càhá<sup>n</sup>-ndí núú-ndó, chi ní càhá<sup>n</sup>-ndí nàcuáa ní táuchíú<sup>n</sup> Xítohó Jesucristú te ní cachí-gá sá

<sup>3</sup> Yá Ndiöxí cuìní-gá sá cáda ndáá-ó cùndecu-o ichi-gá. Te nchoo cuè téé vá càhá<sup>n</sup> ndihi-o ñáyiú òhí te núú ñá díú ñàdihí-ó cùú-yu, te ñi cuè ñáyiú òhí vá càhá<sup>n</sup> ndihi-yu téé núú ñá díú yí-yu cùu-güedé.

<sup>4</sup> Te núú xíã<sup>n</sup> nchaa nchòhó tnàha téé-í ndí díí<sup>n</sup> cùndecu ñadhi-ndó, te òhí-ndí duca<sup>n</sup> nchòhó cue ñáyiú òhí tucu ndí díí<sup>n</sup> cùndecu yí-ndo, te mee-ni tnúhu yíñùhu càhá<sup>n</sup> ndihi tnàha-ndo.

<sup>5</sup> Te vá cání cuèhé cani duha iní-ndó dàtná quidé cuè ñáyiú ñá túú sàndáá iní tnúhu Yá Ndiöxí.

<sup>6</sup> Te ñi ñá-ndo vá cání ìní-ndó dándahú-ndó tnàha téé-ndo càhá<sup>n</sup> ndihi-ndo ñadhi-güedé. Te duca<sup>n</sup>-ni nchòhó cue ñáyiú òhí tucu vá cání ìní-ndó dándahú-ndó tnàha òhí-ndó càhá<sup>n</sup> ndihi-ndo yí-yu. Chi núú duca<sup>n</sup> na càda-ndo, te Yá Ndiöxí ío dandòho ñaha-gá xii-ndo dàtná ní cachí-ndí ndéé díhna.

<sup>7</sup> Chi Yá Ndiöxí ní càhá<sup>n</sup> ñáhá-gã xii-o cuendá sá cáda-ó mèe-ni sá váha, te ñá díú sã cuèhé sá dúhá.

<sup>8</sup> Te nchaa ñáyiú na càda sáá iní-xi tnúhu càhá<sup>n</sup>-ndí, te quide sáá iní-yu núú Yá Ndiöxí, chi ñá díú tnúhu téé ñuyíú-a cùu-xi, chi tnúhu Yá Ndiöxí, Yaá ní taxi Espiritú-gá ndécú ndihi-o cuu-xi.

<sup>9</sup> Te nchòhó ñáyiú ndècu ndihi-í ichi Xítohó Jesucristú, ñá túú-gã xíni ñùhu-xi cachí tnúhu-í xii-ndo sã cúú ìní tnàhá-ndó, chi Yá Ndiöxí sa ní dánèhé ñáhá-gã xii-ndo nàcuáa cuu iní tnàhá-ndó, ndihi nàcuáa cuu iní-ndó dàva-gá tnàha ñáyiú-ndo.

<sup>10</sup> Te duca<sup>n</sup> xíquide-ndo ndihi nchaa ñáyiú ndècu ndihi-ndo ichi Xítohó Jesucristú ndécú dístítú Macèdoniá. Te càhá<sup>n</sup> ndàhú-ndí núú-ndó sã cáda ndáá-gá-ndó, te cuita cuu iní-gá-ndó cuè tnàha ñáyiú-ndo quíhí<sup>n</sup>.

<sup>11</sup> Te cada ndee ìní-ndó cùndecu ñucaxi iní-ndó, te cuhu<sup>n</sup> iní-ndó chiú<sup>n</sup> mee-ndo, te xíã<sup>n</sup> cada-ndo dàtná ní dánèhé ñáhá-ndí xii-ndo.

<sup>12</sup> Te duca<sup>n</sup> te tnàhá nchaa ñáyiú ñá túú sàndáá iní tnúhu Yá Ndiöxí càhá<sup>n</sup> váha-yu cuendá-ndó, te duca<sup>n</sup> te ñá túú tnàhí-gá ná cumání xii-ndo.

### *Nàcuáa cada-xi òré quixi tucu Xítohó Jesucristú*

<sup>13</sup> Te vitna na càhí tnúhu-ndí xii nchòhó ñáyiú ndècu ndihi-ndí ichi Xítohó Jesucristú cuendá nchaa ñáyiú sa ní xíhí, ñáyiú ní sàndáá iní tnúhu Yá Ndiöxí cuendá sá vá ndíhú iní-ndó cuendá-yu dàtná xíquide nchaa ñáyiú ñá túú yíhí iní-xi sá quixí tùcu Xítohó Jesucristú ñuyíú-a.

<sup>14</sup> Te nchoo sàndáá iní-ó sã ñi xíhí Xítohó Jesucristú te ní ndoto-gá ní dándótó ñàha Yá Ndiöxí, te sàndáá tucu iní-ó sã dàtná ní dándótó Yá Ndiöxí Xítohó Jesucristú, duca<sup>n</sup> dándoto-gá nchaa ñáyiú ní xíhí ñáyiú ní sàndáá iní ñáhá xii-gá.

<sup>15</sup> Te na càhí tnúhu tucu-ndí ingá tnúhu nàcuáa ní càhá<sup>n</sup> Xítohó Jesucristú, chi ní cachí-gá sá ná sàá nduu quixi tucu-gá te nchaa ñáyiú sàndáá iní tnúhu-gá ndécú vívú ñuyíú-a vá



códó nùú-yu núú ñáyiu ní xíhí ndaa andiú, chi jùndú candeca ñaha-gã xií-yu ndaa.

<sup>16</sup> Chi Xítohó Jesucristú quee túu-gã andiú, te cana-gã nchaa ñáyiu ní sándáá iní tnúhu-gã, te òré-á<sup>n</sup> Yã Ndiõxí cada-gã te òré-á<sup>n</sup>, cáhá<sup>n</sup> ñ<sup>n</sup> cútú te òré-ni-á<sup>n</sup> ndoto nchaa ñáyiu ní xíhí, ñáyiu ní sándáá iní tnúhu-gã.

<sup>17</sup> Te dàtnùní nchaa nchoo ñáyiu xĩndecu vívú ñuyíú-a naníhí tnáhá-ó ndìhí-yu, te ndanchita-o ndìhu-o xítí vícò naníhí tnáhá-ó ndìhí Xítohó Jesucristú, te candeca ñaha-gã xii-o ndaa andiú cundecu ndìhí-o-gã ni caa ni quíhí<sup>n</sup>.

<sup>18</sup> Núu xiǎ<sup>n</sup> chí cuǎha tnàha tnúhu ndee iní, te vá ndìhú iní-ndó chi naníhí tǎhú-ndó nùú-gã.

## 5

<sup>1</sup> Te nchòhó ñáyiu ndècu ndìhí-í ichi Xítohó Jesucristú ñá túú-gã xíní ñùhu-xi sá cǎchí tnúhu-í xii-ndo sǎ quixí tucu-gã, te ni ñá túú-gã xíní ñùhu-xi sá cǎchí tnúhu-í xii-ndo ñasa cada-xi òré quixi-gã.

<sup>2</sup> Chi nchòhó sa nàha ndáá-ndó sǎ Xítohó Jesucristú quixi-gã nduu ñá túú yìhí iní-ó, chi dàtná quidé ñ<sup>n</sup> ñadúhú cada-gã òré quixi-gã, chi nduu ñá túú ñá yíhí iní-ó quixi tucu-gã.

<sup>3</sup> Te sáá nduu te cachí nchaa ñáyiu ndècu ichi cuehé ichi duha: “Vitna ío váha cùu iní-ó ndècu-o, te ñá túú-gã ná cúmǎní xii-o”, duha quesàhá-yu. Te ñáyiu-á<sup>n</sup> òré ñá túú ñá yíhí iní-yu, te quèxio tnúndòho tnúhu ndàhú sá cúu-xí-yu. Chi cada-xi dàtná quidé-xí ñ<sup>n</sup> ñáyiu dìhí ní tnahá òré cacu déhe-xi, chi na iní-yu ní dátñuhú ñáhá-xí te vá cǎcu-yu núú tnúndòhó-yu, te duca<sup>n</sup> sǎ tnáhá-xi yáha nchaa ñáyiu ñá túú ndècu ichi-gã, chi na iní-yu quexio tnúndòho sá cúu-xí-yu te vá cǎcu-yu núú tnúndòho-á<sup>n</sup>.

<sup>4</sup> Te nchòhó ñáyiu ndècu ndìhí-í ichi Xítohó Jesucristú, ñá túú-gã ndécú-ndó ichi cuehé ichi duha, núu xiǎ<sup>n</sup> sa yìhí-ná iní-ndó ndùu

quixi-gã te vá yáha-ndo dàtná yáha nchaa ñáyiu ñá túú ndècu ichi-gã, chi ñáyiu-á<sup>n</sup> ñá túú ñá yíhí iní-yu sá quixí-gã. Te na iní-yu quexio-gã dàtná quidé ñadúhú na iní-ó quìhu-güedé vehe-o dùhu-güedé duca<sup>n</sup> càda-gã òré quixi-gã.

<sup>5</sup> Te nchoo ñá túú-gã ndécú-ó ichi cuehé ichi duha, te ichi-á<sup>n</sup> cúu-xí dàtná ñ<sup>n</sup> ichi nee ndècu-o ni cuu, te vitna sa ní ngúndecu-o ichi váha, te duca<sup>n</sup> chi Yá Ndiõxí ní dándíxí tũu-gã iní-ó cuendá cutnùní iní-ó nàcuáa ndùu cuendá-gã.

<sup>6</sup> Te xìni ñuhu-xi dandixi túu-o iní-ó, te cada váha-o cùndecu-o ichi-gã, te vá cáda-ó dàtná quidé nchaa ñáyiu ñá túú sándáá iní ñáhá xii-gã, chi ñáyiu-á<sup>n</sup> ñá túú-gã quidé cuendá-yu te núu quide váha-yu àdi ñá túú quide váha-yu ndécú-yu.

<sup>7</sup> Te nchaa ñáyiu quide cuehé quidé dùha cuú-yu dàtná ñ<sup>n</sup> ñáyiu xidí àdi xíni, chi ñá túú quide cuendá-yu nàcuáa cada-yu ñ<sup>n</sup> sá váha dàtná cuìní Yã Ndiõxí.

<sup>8</sup> Te nchòhó ñáyiu sa ní cutnùní iní-xi nàcuáa ndùu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yã Ndiõxí, te cuu iní-ndó cuè tnahá ñáyiu-ndo te duca<sup>n</sup> te vá táxí tnùnì ñáhá ni ñ<sup>n</sup> sá cuehé sá dúhá xii-ndo. Te ío cuhu<sup>n</sup> iní-ndó sǎ cùndècu-ndo ndìhí-gã ni caa ni quíhí<sup>n</sup>.

<sup>9</sup> Chi Yá Ndiõxí ní cachí-gã sá vá quíhí<sup>n</sup>-ó nùú ùhú núú ndàhú, chi mee-gã nacuaca ñaha-gã xii-o cùndecu-o ndìhí-gã, chi ní sándáá iní-ó Xítohó Jesucristú.

<sup>10</sup> Te mee Xítohó Jesucristú ní xíhí-gã sá cuendá nchaa yíca cuèchi-o, te ní ndoto-gã cuendá nduu tǎhú-ó cùndecu-o ndìhí-gã andiú na sáá nduu cuèi sa ní xíhí-ó, àdi vátá cùu-gã-ó.

<sup>11</sup> Núu xiǎ<sup>n</sup> chí cuǎha tnàha tnúhu ndee iní, te chindee tnàha-ndo cundecu-ndo ichi-gã dàtná tá quide-ndo véxi.

*Té Pǎblú dáquìní sàhú-dé ñáyiu ndècu ichi Xítohó Jesucristú*

12 Te nchòhó ñáyi ndècu ndìhi-ndí ichi Xítóhó Jesucristú, càhá<sup>n</sup> ndàhú-ndí núú-ndó sã cánèhe-ndo sá yíñùhu núú cuè téé cùnuu xinu cuechi núú Yã Ndiõxí, cue téé dānehé ñáhá xii-ndo nacuáa cundecu-ndo ichi-gá.

13 Te càhá<sup>n</sup> váha-ndo ndìhi-güedé, te cuu iní-ndó-güedé, chi ñaha-ndo sá chíú<sup>n</sup> Yã Ndiõxí quidé-güedé. Te cundecu ndìhi váha tñaha-ndo nchaa-ndo.

14 Te càhá<sup>n</sup> ndàhú tucu-ndí núú-ndó sã càhá<sup>n</sup>-ndó dôho nchaa ñáyi ñá túú cuíní cada chiú<sup>n</sup>, te duca<sup>n</sup> cuñaha-ndo tñuhu ndee iní xii nchaa ñáyi quíyuhu iní-xi canchicú<sup>n</sup> nihnu ichi-gá, te chindee tucu-ndo nchaa ñáyi vátá ngũnu ichi váha-gá, te cunduu càhnu iní-ndó nũ-yu nchaa-yu.

15 Te cada ndee iní-ndó te núú ndècu tñaha ñáyi-ndo cùu úhú iní ñáhã-yu xii-ndo, te vá tñahá-ni-ndo cùu úhú iní-ndó-yu. Te mee-ni sã váha cada-ndo sã cúú-xí nchaa tñaha ñáyi-ndo.

16 Te nchaa nduu ío cudí iní-ndó cundecu-ndo.

17 Te ñ<sup>n</sup> nduu ñ<sup>n</sup> nduu càhá<sup>n</sup> ndìhi-ndo Yã Ndiõxí.

18 Te ndacá<sup>n</sup> táhú-ndó nũú-gã te núú nándi cùu sã yãha-ndo ndècu-ndo, chi duca<sup>n</sup> cuíní-gá cada-o, te ñ<sup>n</sup> duca<sup>n</sup> nduu tñuhu càhá<sup>n</sup> Xítóhó Jesucristú.

19 Te vá quèhndé nihnu-ndo chiú<sup>n</sup> quide Espiritú Yã Ndiõxí iní-ndó.

20 Te vá cáda sàá iní-ndó nũú cuè téé càhá<sup>n</sup> tñuhu Yã Ndiõxí nacuáa dācahu iní ñáhã-gã xii-güedé.

21 Te cada cuèndá váha-ndo nacuáa càhá<sup>n</sup>-güedé, te tñi-ndo nchaa tñuhu váha càhá<sup>n</sup>-güedé.

22 Te dañã-ndo nchaa ichi cuehé ichi duha.

23 Te mee Yã Ndiõxí quidé-gã ío váha cùu iní-ó ndècu-o ichi-gá. Te xicá<sup>n</sup> táhú-í núú-gã sá ná càda íí ñáhã-gã xii-ndo, te na còto ñaha-gã xii-ndo ndìhi iní-ndó cuèndá sá vã cáda-gã-ndó ñ<sup>n</sup> sá cuèhé sá dúhá, te ñ<sup>n</sup> duca<sup>n</sup> na càda-gá sá cúú-xí-ndó ndéé ná sàá nduu quíxi tucu Xítóhó Jesucristú ñuyíú-a.

24 Chi Yã Ndiõxí Yaá ní càhá<sup>n</sup> ñáhã xii-o cada-gá nacuáa ní càhá<sup>n</sup>-gã, te chindee ñaha-gã xii-ndo.

*Té Păblú quidé ndè iní-dé ñáyi xñdecu ichi Xítóhó Jesucristú ndécú ñúú Tesalónica*

25 Te nchòhó ñáyi ndècu ndìhi-í ichi Xítóhó Jesucristú, cãcã<sup>n</sup> táhú-ndó núú Yã Ndiõxí sá ná chindee ñaha-gã xii-ndí.

26 Te cúñaha-ndo xii nchaa ñáyi ndècu ndìhi-o ichi Xítóhó Jesucristú sá ñ<sup>n</sup> yuhu ñ<sup>n</sup> iní-ndí quidé ndè iní ñáhã-ndí xii-ndo ndìhi-yu.

27 Te vitna mee Yã Ndiõxí ndéhé-gã sã càhá<sup>n</sup> ndàhú-í núú-ndó sã dācuáha-ndo tutú-a núú nchaa ñáyi ndècu ndìhi-o ichi-gá.

28 Te Xítóhó Jesucristú ío na chindee chitúu ñaha-gã xii-ndo núú cuáhã<sup>n</sup> núú vèxi. Te duca<sup>n</sup> na cunduu. Te ío chí cáda ndè iní-ñã vitna.

## TUTÚ CÚÚ ÒÚ NÍ CADÚHA TÉ PĀBLÚ QUIHÍ<sup>n</sup> NDAHA ÑÁYIU ÑUÚ TESÀLÓNICÁ

*Té Pāblú ndihi cue té cùndihi-dé cādúha-güedé tutú quíhí<sup>n</sup> ndaha ñáyiu xñdecu ichi Xítóhó Jesucristú ndécú ñúú Tesàlónicá*

<sup>1</sup> Yúhú té Pāblú cādúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiu ndècu ndihi-ndí ichi Xítóhó Jesucristú ndécú ñúú Tesàlónicá, chi tnàhá tnúhu-ndo ndìhi Tátá-ó Dütú Ndiöxí, ndihi Xítóhó Jesucristú.

<sup>2</sup> Te xicá<sup>n</sup> táhú-ndí núú Dütú Ndiöxí, ndihi núú Xítóhó Jesucristú sá ná chindee chitúu ñaha-gá xii-ndo, te duca<sup>n</sup> ndì nduú-gá ná cādá te ío váha cuu iní-ndó cùndecu-ndo.

*Yá Ndiöxí cada ndáá-gá cuéchi nchaa ñáyiu ndècu ichi cuehé ichi duha na sàá nduu quixi tucu Xítóhó Jesucristú*

<sup>3</sup> Te nchòhó ñáyiu ndècu ndihi-ndí ichi Xítóhó Jesucristú, cāhí tnúhu-í xii-ndo sã cúnàha-ndo sá ñà túú dāña ndee-ndí ndácá<sup>n</sup> táhú-ndí núú Yá Ndiöxí cuendá-ndó, chi dacuítí<sup>n</sup> dùca<sup>n</sup> taú-xi cunduu chi ío-gá tá sàndáá iní-ndó-gá cuáhá<sup>n</sup>, te duca<sup>n</sup> ùu<sup>n</sup>-gá tá cùu iní tnàhá-ndó nàcuáa ndècu-ndo ichi Yá Ndiöxí.

<sup>4</sup> Núu xíá<sup>n</sup> nchúhú ío váha cāhá<sup>n</sup>-ndí cuendá-ndó núú nchaa ñáyiu sàndáá iní tnúhu Yá Ndiöxí nchaa núú tàcá-yu dācuahá-yu tnúhu-gá, chi ío sàndáá iní-ndó-gá, te ñá túú dāña ndeé-ndó nchìcú<sup>n</sup> nihnu-ndo ìchi-gá, te quide cahnu-ni iní-ndó cuèi nāndi sá yāha-ndo ndècu-ndo ichi-gá.

<sup>5</sup> Te sá dúcá<sup>n</sup> quide váha-ndo ndècu-ndo xíá<sup>n</sup> cùtnùní nàcuáa cada ñaha Yá Ndiöxí xii-ndo na sàá nduu, chi nduu táhú-ndó cùndecu-ndo núú táxí tnùnì-gá, te duca<sup>n</sup> càda-gá chi cùu-gá Yaá quidé ndáá cuítì. Te vitna

ndòho-ndo nacuáa ndíhu ndaha-gã dava-gá ñáyiu.

<sup>6</sup> Te Yá Ndiöxí ío váha ndáá quidé-gã, chi mee-gã nachinaa-gã nchaa sá quidé ñàha ñáyiu cùu úhú iní ñáhá xii-ndo,

<sup>7</sup> te nchoo ñáyiu ndòho cuendá Xítóhó Jesucristú nucúndecu váha-o na sàá nduu núu túu-gá andíu, te tnàhá cue espíritú xínú cuèchi núú Yá Ndiöxí cuu<sup>n</sup> ndihi-gá, te cue espíritú-á<sup>n</sup> quidé-xí nchaa núú chiú<sup>n</sup> tahu-gá. Te òré nuu túu-gá andíu ndihi cue espíritú-á<sup>n</sup>, te ío dātása<sup>n</sup>-xi andíu.

<sup>8</sup> Te dandòho-gá nchaa ñáyiu ñá túú tnàhá tnúhu ndihi Yá Ndiöxí, ñáyiu ñá túú sàndáá iní tnúhu Xítóhó Jesucristú tnúhu sá cāhá<sup>n</sup> nàcuáa naníhí tãhú-yu.

<sup>9</sup> Te nchaa ñáyiu-á<sup>n</sup> ío dandòho ñaha-gá xii-yu, chi ndohó-yu ni caa ni quíhí<sup>n</sup>, te vá cùndécú-yu núú ío váha càa ndecu-gá táxí tnùnì-gá.

<sup>10</sup> Te duca<sup>n</sup> càda ñaha-gá xii-yu na sàá nduu, te dāvā-á<sup>n</sup> ío cada càhnu ñaha nchaa ñáyiu sàndáá iní ñáhá xii-gá. Te tnàhá nchaa nchòhó ñáyiu ní sàndáá iní tnúhu ní cāhá<sup>n</sup>-ndí duca<sup>n</sup> càda-ndo, te nchaa-o ío cuñúhu-o-gã dāvā-á<sup>n</sup>.

<sup>11</sup> Te cuendá xíá<sup>n</sup> núu ío xicá<sup>n</sup> táhú-ndí núú Dütú Ndiöxí sá ná chindee ñaha-gá xii-ndo cùndecu váha-ndo ìchi-gá dātná cuíní mēé-gã cundecu nchaa ñáyiu ní cāhá<sup>n</sup>-gá cundecu ndihi-gá. Te xicá<sup>n</sup> táhú tucu-ndí núú-gá sá ío na chindee ñaha-gá xii-ndo càda-ndo nchaa sá vāha sàni iní-ndó, ndihi cuendá chiú<sup>n</sup> quide-ndo cuendá-gá, te duca<sup>n</sup> chi sàndáá iní-ndó-gá.

<sup>12</sup> Te núu duca<sup>n</sup> na càda-ndo, te cāhá<sup>n</sup> váha ñáyiu cuendá Xítóhó Jesucristú, te tnàhá-ni nchòhó cāhá<sup>n</sup> váha-yu cuendá-ndó, chi mee Yá Ndiöxí ndihi Xítóhó Jesucristú cùndáhú iní ñáhá-gã chindēe ñaha-gá xii-ndo.

## 2

*Té quixi dandàhú ñáyiu*

<sup>1</sup> Te nchòhó ñáyiú ndècu ndìhi-ndí ichi Xítohó Jesucristú cächí tnúhu-ndí xii-ndo nàcuáa cada-xi nduu na quìxi tucu-gá, chi quixi-gá nacuaca ñaha-gã xii-o, núu xiã<sup>n</sup> cãhá<sup>n</sup>-ndí dóho-ndo.

<sup>2</sup> Te ñá díú sã ñ<sup>n</sup> tnúhu tecú dóho-ndo te nguíta-ndo cãni ñ<sup>n</sup> caní úú iní-ndó, te ni vã yuhú-ndó te núu véxi ñ<sup>n</sup> tée cächí-dé sã cãhá<sup>n</sup>-dé tnúhu Yá Ndiõxí, te cächí-dé sã sã véxi Xítohó Jesucristú, te vã quindáa iní-ndó tnúhu cãhá<sup>n</sup>-dé chi ñá ndàá, àdi véxi ñ<sup>n</sup> tée nèhe ñ<sup>n</sup> tutú núú-ndó te cächí-dé sã yuhú ní tendaha-í véxi, te núu tütú-á<sup>n</sup> cãhá<sup>n</sup>-xi sã sã véxi Xítohó Jesucristú, te ñ<sup>n</sup> vã quindáa iní-ndó nàcuáa cãhá<sup>n</sup>-xi, te ndèda-ni cãa ñáyiú cãhá<sup>n</sup>-yu dàvã-á<sup>n</sup> sã sã véxi-gá dico vã quindáa tnàhí iní-ndó.

<sup>3</sup> Núu xiã<sup>n</sup> dátũha ñaha-í xii-ndo cuendá sã vã dáñá tnàhí-ndo mèe-ndo dandahú ñáhã ñáyiú. Chi cùmání-gã sáa nduu quìxi tucu Xítohó Jesucristú, te nguíta nchaa ñáyiú cuu úhú iní-yu Yá Ndiõxí, te dàvã-á<sup>n</sup> quini-yu ñ<sup>n</sup> tée xidó quidé nchaa sã cuèhé sã dúhá, te tée-á<sup>n</sup> quíhí<sup>n</sup>-dé núu ùhú núu ndàhú ni caa ni quíhí<sup>n</sup>.

<sup>4</sup> Te ñ<sup>n</sup> vã ndèe iní-dé nchaa sã cächí ñáyiú cùu ndiõxí-yu ndìhi nchaa dava-gá sã quidé cahnú-yu, te cachí-dé sã ño cùnũu-dé, te quíhu-dé ndéé xití veñúhu núu ndécú cuè ñáyiú chiñuhu ñaha xii Yá Ndiõxí coo-dé, te cùñaha-dé xií-yu sã cúú-dé Yá Ndiõxí.

<sup>5</sup> Te dandàcu iní-ndó chi nchaa tnúhu-a sã ní cachí tnúhu-í xii-ndo cùtnàhá ní xíndecu ndìhi ñaha-í.

<sup>6</sup> Te nchòhó sa cùtnuní iní-ndó ñá cúú sã ngání ñaha xii tée-á<sup>n</sup> núu ñá túú-dé vitna, dico na sáa nduu tàú-xi quee-dé caca cuu-dé te dàvã-á<sup>n</sup> quini ñáhã nchaa ñáyiú.

<sup>7</sup> Te ío titní núú sã cuèhé sã dúhá quide yucu ñávãha dícó-ni sã vátã quini-gã ñáyiú, dico ndècu ñ<sup>n</sup> sã ñá dáñá càda-xi nchaandi túhú nàcuáa cächí iní-xi, dico sáa nduu xòcuiñí sã ñá dáñã-ã<sup>n</sup> te dàvã-á<sup>n</sup> cada-xi nchaa nàcuáa cächí iní-xi.

<sup>8</sup> Te sáa nduu quini-yu tée quide

nchaa sã cuèhé sã dúhá-ã<sup>n</sup> ñuyíú-a. Te òré ná quìxi túu Xítohó Jesucristú, te mee-ni sã dátãsa<sup>n</sup>-xi, ndìhi yócó yuhu-gá cuú tée-á<sup>n</sup>.

<sup>9</sup> Te sácuihná tendaha-xi tée-á<sup>n</sup> quixi-dé, te cuãñaha-xi tnúhu ndee iní cada-dé nándi sã cádá-dé. Te cada-dé sã ñá túú tnàhí ndàcu ni ñ<sup>n</sup> ñáyiú ñuyíú-a cada-yu, dico mee-ni dandahú ñáhã-dé xií-yu caca cuu-dé.

<sup>10</sup> Te nchaa núú sã cuèhé sã dúhá càda-dé dandahú-dé nchaa ñáyiú sa ñuhu ichi cuáhã<sup>n</sup> núú ùhú núú ndàhú, chi ñá túú ní cuini-yu quindáa iní-yu tnúhu ndáa tnúhu Yá Ndiõxí cuendá naníhí tãhú-yu.

<sup>11</sup> Te sã dúcã<sup>n</sup> ñá túú ní cuini-yu quindáa iní-yu tnúhu ndáa, núu xiã<sup>n</sup> ñáña Yá Ndiõxí dacãhá<sup>n</sup> yucu ñávãha iní-yu quindáa iní-yu nchaa tnúhu ndehnde

<sup>12</sup> cuendá cuíta nihnú-yu, te duca<sup>n</sup> yãha-yu chi ñá túú sãndáa iní-yu tnúhu ndáa cãhá<sup>n</sup> Yá Ndiõxí, chi mee-ni nchaa sã cuèhé sã dúhá cùdíí iní-yu quidé-yu, te cuíta nihnú-yu chi duca<sup>n</sup> ñí cachí Yá Ndiõxí cunduu.

### *Ñáyiú ní cachí Yá Ndiõxí naníhí tãhú*

<sup>13</sup> Te nchòhó ñáyiú ndècu ndìhi-ndí ichi Xítohó Jesucristú, ñáyiú ío cùu iní-gã cächí tnúhu-ndí xii-ndo sã ñá túú ñáña ndee-ndí ndácã<sup>n</sup> tãhú-ndí núú Yá Ndiõxí cuendá-ndó, chi duca<sup>n</sup> tàú-xi cunduu, chi Yá Ndiõxí ní cachí-gã ndéé cùtnàhá vátã ngãva-gã ñuyíú sã naníhí tãhú-ndó, te ñ<sup>n</sup> Espiritú-gã dacãhá<sup>n</sup>-xi iní-ndó ndècu yíñuhu-ndo núú-gã, te sãndáa iní-ndó tnúhu ndáa cãhá<sup>n</sup>-gã núu xiã<sup>n</sup> ní naníhí tãhú-ndó.

<sup>14</sup> Chi cuendá tnàhí-a ní cãhá<sup>n</sup> ñáhã Yá Ndiõxí xii-ndo, te duca<sup>n</sup> ñí naníhí tãhú-ndó chi ní sãndáa iní-ndó tnúhu Xítohó Jesucristú ní cãhá<sup>n</sup>-ndí núú-ndó, te sáa nduu te cundecu-ndo tnàhá-ndó núú ño váha cãa ní nduu tãhú Xítohó Jesucristú ndécú-gã.

<sup>15</sup> Núu xiã<sup>n</sup> nchòhó ñáyiú ndècu ndìhi-ndí ichi Xítohó Jesucristú ío cãhá<sup>n</sup>-ndí dóho-ndo sã vã dáñá ñihnu-ndo ichi-gã, te ni vã nàcuànaa-ndo nchaa tnúhu ní cãhá<sup>n</sup>-ndí núú-ndó cùtnàhá ní xíndecu

ndihi ñaha-ndí xii-ndo, te ñu-ni duca<sup>n</sup> cada-ndo nchaa tnúhu tëndaha-ndí véxi.

16-17 Te xicá<sup>n</sup> táhú-ndí núú-gã sá ná dàcahá<sup>n</sup>-gá iní-ndó cùndecu-ni-ndo ichi-gá, te duca<sup>n</sup> ño na chindee ñaha-gá xii-ndo cãhá<sup>n</sup>-ndó mée-ni tnúhu váha, te cada váha-ndo cùndecu-ndo nacuaá cuu váha iní-gá, chi mee Dútú Ndiöxi ío cùu iní ñáhá-gã xii-o, te ñu-gá ní taxi-gá tnúhu ndee iní cundecu ndihi-o ní caa ní quíhí<sup>n</sup>, te ní cachí tnúhu tucu-gá ingá tnúhu váha sá cùndetu-o Xítóhó Jesucrístú.

### 3

*Cáhá<sup>n</sup> ndihi-ndo Yã Ndiöxi cuendá-ndí*

1 Te nchòhó ñáyiú ndècu ndihi-ndí ichi Xítóhó Jesucrístú, ndéé núú ndíhí-ñá cächí tnúhu-í xii-ndo sã cãhá<sup>n</sup> ndihi-ndo Yã Ndiöxi cuendá-ndí cuendá sá ná chindee ñaha-gá xii-ndí, te duca<sup>n</sup> ndíhi-ni cuténuu tnúhu Xítóhó Jesucrístú nchaa xichi, te cudí iní-yu tnúhu-gá dàtná quidé nchòhó.

2 Te cáhá<sup>n</sup> ndihi tucu-ndo Yã Ndiöxi cuendá sá ná còto ñaha-gá xii-ndí, te ñá túú ñá cada ñaha ñáyiú cuihna iní-xi ndècu ichi cuehé ichi duha xii-ndí, chi ñá ncháã-yu sàndáá iní-yu tnúhu-gá.

3 Dico Xítóhó Jesucrístú quidé-gã nchaa sá cãhá<sup>n</sup>-gá, te ñu-gá cada te nchòhó cundecu-ni-ndo ichi-gá, te coto ñaha-gã xii-ndo cuendá sá ñá túú ñá cada ñaha yècu ñáváha.

4 Te Xítóhó Jesucrístú quidé-gã cùtnùní iní-ndí sá nchòhó quidé-ndó ncháa nacuaá ní dánèhé ñáhá-ndí xii-ndo, te ñu-ni duca<sup>n</sup> cada-ndo cundecu-ndo.

5 Te xicá<sup>n</sup> táhú-ndí núú Yã Ndiöxi sá ná chindee ñaha-gá xii-ndo cùu iní-ndó-gã, te ñu-ni-gá ná chindee ñaha-gá xii-ndo cùnduu cahnu iní-ndó, chi Xítóhó Jesucrístú duca<sup>n</sup> ño cãhnu iní-gá.

*Tàú-ó cada chiú<sup>n</sup>-o*

6 Te nchòhó ñáyiú ndècu ndihi-í ichi Xítóhó Jesucrístú, cãhá<sup>n</sup>-í dóho-ndo sã méé-gã cuíní-gá sá vã ñihí

tnáhá-gã-ndó ndihi ndéda-ni cãa ñáyiú cächí sá sàndáá iní tnúhu-gá, ñáyiú ñá túú cuíní cada chiú<sup>n</sup>, chi ñáyiú duca<sup>n</sup> xíquide ñá túú cuíní-yu tní-yu tnúhu sá ní dánèhé ñáhá-ndí xii-ndo.

7 Te nchòhó sa xìní-ndó nàcuáa cada-ndo cùndecu-ndo canchicú<sup>n</sup> nihnu-ndo nàcuáa quide-ndí. Te cùtnáhá ní xíndecu ndihi ñaha-ndí xii-ndo chi ní ñ<sup>n</sup> nduu ñá túú ní tühío-ndí.

8 Te ní ñá túú dicó duca<sup>n</sup> ní quèhe<sup>n</sup>-ndí sá ndécú ndihi ñáyiú caxi-ndí àdi canehe-ndí, chi cuèi nduu cuèi niú ío ní quide chiú<sup>n</sup>-ndí ní níhí-ndí díhú<sup>n</sup> ní saa<sup>n</sup>-ndí nchaa sá ní nàndíhi-ndí cuendá sá ñá túú ní cuíní-ndí chichíu<sup>n</sup> ñaha-ndí xii-ndo.

9 Te cuèi tàú ndisa-ndí cachí tnúhu-ndí xii-ndo sã chíndèe ñaha-ndo xii-ndí ní cùu, dico ní quide chiú<sup>n</sup>-ndí cuendá ní cuíní-ndí dánèhé ñáhá-ndí xii-ndo nàcuáa cada-ndo cùndecu-ndo.

10 Te cùtnáhá ní xíndecu ndihi ñaha-ndí xii-ndo ní cachí-ndí sá ncháá ñáyiú ñá túú cuíní cada chiú<sup>n</sup> te vá cuãha-ndõ-yu sá cáxí-yu.

11 Te vitna ñihí-ndí tnúhu sá ío dava nchòhó ñá túú tnàhí quide chiú<sup>n</sup>-ndo, chi àú<sup>n</sup> ñá cuu ndí cuu ndí cuu-ni-ndo núú ndécú dàva-gá tnàha ñáyiú-ndo.

12 Te yúhú cãhá<sup>n</sup>-í dóho nchaa nchòhó ñáyiú duca<sup>n</sup> ñá túú cuíní cada chiú<sup>n</sup> sá cádá chiú<sup>n</sup>-ndo cuendá níhí-ndó ncháa sá cóhó sã cáxí-ndó, te duha cãhá<sup>n</sup>-í dóho-ndo, chi duca<sup>n</sup> cuíní Xítóhó Jesucrístú Yaá táxí tnùní ñáhá xii-o cada-ndo, te òré cada chiú<sup>n</sup>-ndo te vá ño cada dusa<sup>n</sup>-ndo.

13 Te nchòhó ñáyiú ndècu ndihi-í ichi Xítóhó Jesucrístú, vá dáñá ndèé-ndó cada-ndo mee-ni sá váha.

14 Te núú ñ<sup>n</sup> ñáyiú ndècu ndihi-ndo ñá túú cuíní-yu tní-yu tnúhu cãhá<sup>n</sup>-ndí núú tütú-a, te cundehe-ni-ndo núú ndéda cãá-yu, te vá ñihí tnáhá-gã-ndó ndíhi-yu cuendá sá ná cùcahá<sup>n</sup> núú-yu,

15 dico vá cúú ùhú iní-ndõ-yu, chi cáhá<sup>n</sup>-ndó dóho-yu cada-ndo

să ndécú-ndó ìchi Xítóhó Jesucristú ndihí-yu.

*Tnúhu ndéé núú nǐ ndihí-ná*

<sup>16</sup> Te mee Xítóhó Jesucristú ío váha cùu iní-gá ndécú-gă, te xicá<sup>n</sup> táhù-í núú-gă sá méé-gă ná cádá te ío váha cuu iní-ndó tnàhá-ndó cùndecu-ndo cuéi nása-gă ná cùndecu-ndo. Te mee-gă ná cùndecu ndihí ñaha-gă xii-ndo nchàa-ndo.

<sup>17</sup> Te vitna yúhú té Păblú tée-í tnúhu-a quide ndee iní ñáhà-í xii-ndo, te diu-ni duha càa nchaa letrá-í nchaa núú tütú cáđúha-í.

<sup>18</sup> Te xicá<sup>n</sup> táhù-í núú Xítóhó Jesucristú sá ïo na chindee chitúu ñaha-gă xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nă vitna.

## TUTÚ DÍHNA NUU NĪ CADÚHA TÉ PĀBLŪ QUIHĪ<sup>n</sup> NDAHA TÉ TIMŪTEÚ

*Té Pāblū cādūha-dé tutú quihĪ<sup>n</sup>  
ndaha té Timūteú*

<sup>1</sup> Yúhú té Pāblū ní tendaha ñaha Yá Ndiöxí cāhá<sup>n</sup>-í tnúhu Xítohó Jesucristú núú ñáyiú chi duca<sup>n</sup> nĭ cachí Yá Ndiöxí cunduu, te diu-gá cúú-gă Yaá ní dácăcu nihnu ñaha xĭi-o núú ùhú núú ndàhú. Te tnàhá Xítohó Jesucristú duca<sup>n</sup> nĭ cachí-gá sá cāhá<sup>n</sup>-í tnúhu-gá, te diu-gá ní taxi-gá tnúhu ndee ìní xii-o sã cündecu-o ndihĭ-gá nĭ caa nĭ quihĪ<sup>n</sup>.

<sup>2</sup> Te yòhó té Timūteú cúú-n ĩ<sup>n</sup> tée ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te cādúha-í ĩ<sup>n</sup> tutú daquixi-í ndaha-n. Te xicá<sup>n</sup> táhù-í núú Tátá-ó Dŭtú Ndiöxí ndihĭ núú Xítohó Jesucristú sá ío na chĭndee chitúu ñaha-gă xii-n, te duca<sup>n</sup> ndĭ nduú-gá ná cādá te ío váha cuu iní-n cündecu-n.

*Cuèndá nchaa ñáyiú dāndahú tnàha ñáyiú-xi*

<sup>3</sup> Te nàha-n nacuáa ní cāhá<sup>n</sup>-í cŭtnàhá ní quee-í ñuú Éfesú véxi-í distritú Macèdoniá, chi ní cachí-í sá quéndōo-n ñuú-á<sup>n</sup> cāhá<sup>n</sup>-n dōho nchaa ñáyiú dāndahú ñáhá cāhĭ sá cāhá<sup>n</sup> tnúhu Yá Ndiöxí te ñá ndáá sá cāhá<sup>n</sup>-yu tnúhu-gá, te diu-ni duca<sup>n</sup> cāhá<sup>n</sup>-í vitna cada-n cündecu-n.

<sup>4</sup> Te cúñaha-n xĭi-yu sá vã cādá cuèndá-yu nchaa cuèndú nihĭ-yu nàcuáa ní xóo cada ñáyiú ní xĭndecu ndéé sanaha, te nchaa cuèndú-á<sup>n</sup> dĭcó chĭnàá ñáhá-xĭ chi ñá túú vĕdana nāndĭhĭ-xĭ, te ni ñà túú chĭndee ñaha-xĭ cada-o nacuáa cuĭní Yá Ndiöxí, chi mee-ni sã quĭndáá iní-ó-gă quĭdĕ-xĭ quĭde-o nchaa nacuáa cuĭní-gă.

<sup>5</sup> Te duha cāhá<sup>n</sup>-í cúñaha-n xĭi-yu cuèndá sá ná cùu iní-yu tnàha ñáyiú-yu, te xĭni ñuhu-xĭ nduu ndoo

nduu nine iní-yu, te cunduu váha iní-yu, te quĭndáá iní-yu Yá Ndiöxí, te vá cāní ĩ<sup>n</sup> canĭ úú iní-yu, te núu duca<sup>n</sup> na cādá-yu te cuu iní ndisá-yu nchaa tnàha ñáyiú-yu.

<sup>6</sup> Chi dava ñáyiú ñá túú-gă quĭdĕ-yu nchaa nàcuáa cāhá<sup>n</sup>-í-a, chi mee-nă nchaa cuèndá sá ñă túú vĕdana nāndĭhĭ xĭcāhá<sup>n</sup>-yu.

<sup>7</sup> Te cuĭní-yu cāhá<sup>n</sup>-yu nchaa tnúhu ní cāhá<sup>n</sup> ndĭi Moisés dĭcō ñă ndácŭ-yu, chi cuĕi nĭ yùhu nĭ iní-yu cāhá<sup>n</sup>-yu dĭcō ñă tĕcú tnùnĭ-yu nàcuáa ní cāhá<sup>n</sup> ndĭi, te ni tnúhu cāhá<sup>n</sup> méĕ-yu ñă cŭtnùnĭ iní-yu nàcuáa ndùu-xĭ.

<sup>8</sup> Te sa nàha-o sá ncháá tnúhu ní cāhá<sup>n</sup> ndĭi Moisés váha, te núu na tĕcú tnùnĭ-ó ñă cuèndá duca<sup>n</sup> nĭ ngŭndecu nchaa tnúhu-á<sup>n</sup>.

<sup>9</sup> Te cŭtnunĭ iní-ó sã ñà díú sã cúú-xĭ nchàa ñáyiú quĭde váha ndĕcu ñuyú-a ni ngŭndecu nchaa tnúhu-á<sup>n</sup>, chi ní ngŭndecu-xĭ sá cúú-xĭ nchàa ñáyiú ñá túú quĭde váha, ndihĭ cuèndá nchaa ñáyiú ío sàá iní-xĭ, ndihĭ cuèndá nchaa ñáyiú quĭde cuehé quĭdĕ dŭha, ndihĭ cuèndá nchaa ñáyiú ío ndĕcu cuĕchi-xĭ, ndihĭ cuèndá nchaa ñáyiú ñá túú nèhe vĕdana sá yĭñùhu núú Yá Ndiöxí, ndihĭ cuèndá nchaa ñáyiú ñá túú cāhá<sup>n</sup> váha cuèndá ichi Yá Ndiöxí, ndihĭ cuèndá nchaa ñáyiú sàhni tátá-xĭ ndihĭ nāná-xĭ, ndihĭ cuèndá nchaa dava-gă ñáyiú sàhni tnaha,

<sup>10</sup> ndihĭ cuèndá nchaa cue tĕe cāhá<sup>n</sup> ndihĭ ñáyiú dĭhĭ te ñă díú ñāndĭhĭ-güedĕ cúú-yu, ndihĭ cuèndá tucu nchaa ñáyiú dĭhĭ cāhá<sup>n</sup> ndihĭ cue tĕe te ñă díú yĭ-yu cùu-güedĕ, ndihĭ cuèndá nchaa cue tĕe cāhá<sup>n</sup> ndihĭ tnàha ndĭ mee tĕe-xĭ, ndihĭ cuèndá nchaa ñáyiú chĭváha tnàha ñáyiú-xĭ cuèndá sá cuĭní-yu nihĭ-yu díhú<sup>n</sup>, ndihĭ cuèndá nchaa ñáyiú ndehnde, ndihĭ cuèndá nchaa ñáyiú cācunehe ndéé Yá Ndiöxí cuèndá cuĭní-yu cutnùnĭ iní tnàha ñáyiú-yu sá cāhá<sup>n</sup> ndáá-yu, te ñă ndáá sá cāhá<sup>n</sup> ndáá-yu, ndihĭ cuèndá nchaa ñáyiú quĭde nchaa dava-gă sá ñă túú tàuchiun Yá Ndiöxí cadá-yu. Cuèndá nchaa ñáyiú duca<sup>n</sup> xĭquĭde ní ngŭndecu nchaa tnúhu-á<sup>n</sup>.

11 Te nchaa tnúhu-á<sup>n</sup> ñ<sup>n</sup>-ni cùu-xi ndihì nchaa tnúhu sá nì cachí Yá Ndiöxí cáhá<sup>n</sup>-í, te tnúhu-á<sup>n</sup> cúu-xí tnúhu váha vihi, chi mee-gá ío váha iní-gá.

*Té Păblú ndàcá<sup>n</sup> táhú-dě núú Yá Ndiöxí sá nì cundàhú iní ñáhá-gă xii-dé*

12 Te Xítohó Jesucristú ní cutnùní iní-gá sá cádá ndáá-í cada-í nchaa chiú<sup>n</sup> tahu-gá. Te ndàcá<sup>n</sup> táhú-í núú-gă sá nì taxi-gá chiú<sup>n</sup>-gá quidè-í, te ío chindee ñaha-gá xii-í.

13 Te ní taxi-gá chiú<sup>n</sup>-gá quidè-í cuèi ní xóo cáhá<sup>n</sup> cuèhé-í cuèndá-gá, te cuèi ní xóo cúu cuèhé cúu duhá-í nchaa ñáyiú ndècu ichi-gá, te cuèi nándi-gá sá nì xóo cada-í-yu dico ní cundàhú iní ñáhá Yá Ndiöxí xii-í, chi vátá quindáá-gá iní-í Xítohó Jesucristú cútnàhá duca<sup>n</sup> nì xóo cada-í, te nì ñá cútnùní iní-í nchaa sá quidè-í ní cùu, te cuèi duca<sup>n</sup> nì xóo cada-í,

14 dico Yá Ndiöxí ío ní cundàhú iní ñáhá-gă xii-í te chindee ñaha-gá. Te mee Xítohó Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

15 Te nihí-ó tnúhu sá Xítohó Jesucristú ní quixi-gá ñuyíú-a cuèndá sá dácăcu nihnu-gá nchaa ñáyiú ndècu ichi cuèhé ichi duha. Te tnúhu-á<sup>n</sup> cúu-xí ñ<sup>n</sup> tnúhu ndáá, te xìni ñuhu-xi quindáá iní nchaa nchoo ñáyiú ndècu ñuyíú-a. Te yúhú cúu-í téé ío-gá ndécú cuèchi-xi núú Yá Ndiöxí ní cùu.

16 Te Yá Ndiöxí ní cundàhú iní ñáhá-gă ní dácăcu nihnu ñaha-gă xii yúhú téé xidó ndécú cuèchi-xi ní cùu, cuèndá cutnùní iní nchaa ñáyiú sá Xítohó Jesucristú ío cànhu iní-gá. Te sá dúcá<sup>n</sup> nì quide ñaha-gă xii-í, te xiá<sup>n</sup> cutnùní iní-yu sá nùu na quindáá iní ñáhă-yu xii-gá te cundécú-yu ndihì-gá nì caa nì quíhí<sup>n</sup>.

17 Te nchaa-o chí ná cächí-ó sã ío cànhu cuu Yá Ndiöxí, te canehe-o sã yíñùhu núú-gă nì caa nì quíhí<sup>n</sup>, chi mee-gá cúu-gă Yaá táxí tnùnì nchaa nduu nchaa quíú. Te cùu-gá ñ<sup>n</sup> Yaá ñá túú xìní núú-ó, te ñ<sup>n</sup>dìi díí-ni-gă ío ndècu ndihì-gá nchaa sá xìní tnùnì-gá.

18 Te yòhó té Timùteú téé cùu datná ñ<sup>n</sup> déhe mee-í sa nàha-n nacuaá ní cáhá<sup>n</sup> dava-gá cue téé cãhá<sup>n</sup> tnúhu Yá Ndiöxí cuèndá-n, te diu-ni duca<sup>n</sup> cãhá<sup>n</sup>-ú tucu, te cada-n nchàa nacuaá cãhá<sup>n</sup> tnúhu-á<sup>n</sup> chi diu nchaa tnúhu-á<sup>n</sup> canu ichi ñaha-xi xì-n cada-n nchaa nacuaá cuiní Yá Ndiöxí.

19 Te ío quindáá iní-n Xítohó Jesucristú, te cada váha-n cundecu-n nacuaá cundecu váha iní-n, chi dava ñáyiú ñá túú-gă duca<sup>n</sup> quidè-yu núu xiá<sup>n</sup> ñá túú-gă sàndáá iní-yu nàcuáa cãhá<sup>n</sup> tnúhu-gá.

20 Te diu-ni duca<sup>n</sup> nì quide té Himèneú ndihì té Lijandrú ní dáñá ndèé-güedé ñá túú-gă sàndáá iní-güedé nàcuáa cãhá<sup>n</sup> tnúhu Xítohó Jesucristú, te ní xáha<sup>n</sup>-í xii-güedé sá ná cundoho-ná-güedé nùu nása cada ñaha sàcuíhná xii-güedé, te duca<sup>n</sup> nì xáha<sup>n</sup>-í cuèndá sá vã cãhá<sup>n</sup> cuèhé-gá-güedé cuèndá Yá Ndiöxí.

## 2

*Nàcuáa cáhá<sup>n</sup> ndihì-o Yá Ndiöxí*

1 Te na cächí tnúhu-í xii-n nchàa nacuaá cada-n. Te díhna-gá cächí tnúhu-í sá cãhá<sup>n</sup> ndihì-n Yá Ndiöxí cuèndá nchaa ñáyiú te núu nása cùu xíndécú-yu, te cácá<sup>n</sup> táhú-n núú-gă cuèndá-yu, te duca<sup>n</sup> ío ndacá<sup>n</sup> táhú-n núú-gă cuèndá nchaa sá vãha quide ñaha-gá xii-yu.

2 Te duca<sup>n</sup> cãhá<sup>n</sup> ndihì-n Yá Ndiöxí cuèndá nchaa cue téé cùnuu ndihì cuèndá nchaa dava-gá cue téé cùchiu<sup>n</sup> cuèndá cada váha-güedé, te duca<sup>n</sup> nchòo ñá túú nã cuu cundecu-o, te ñá túú tnàhí ná canì iní-ó cundecu-o, te ío cundecu yíñùhu-o núú Yá Ndiöxí, te cada-o nchàa nacuaá tàú-xi cunduu.

3 Te núu duca<sup>n</sup> na càda-o cáhá<sup>n</sup> ndihì-o Yá Ndiöxí cuèndá nchaa ñáyiú te quide váha-o, te ndùu vétú iní Yá Ndiöxí Yaá ní dácăcu nihnu ñaha xì-o núú ùhú núú ndàhú.

4 Te mee-gă cuiní-gá sá ncháá ñáyiú tecú tnùnì-yu nchaa tnúhu cãhá<sup>n</sup>-gá, chi cuiní-gá sá nánihí tàhú-yu.

5 Te ñ<sup>n</sup>-ni Dútú Ndiöxí ndécú, te ñ<sup>n</sup>-ni Xítohó Jesucristú, te medli-ni Xítohó Jesucristú quidè-gă tnàhá tnúhu-o ndihì Yá Ndiöxí.



6 Te Xítohó Jesucristú ní dǎñá-gǎ méé-gǎ ní sahní ñaha-güedě xii-gǎ cuendá sá cuíní-gǎ sá cǎcu nihnu nchaa ñáyiú ndècu ñuyíú núú ùhú núú ndàhú. Te Yá Ndiǒxí cuíní-gǎ sá ncháá ñáyiú ñuyíú ndécú vìtna níhí-yu tnúhu nàcuáa ní cuu ní xihí Xítohó Jesucristú.

7 Te Yá Ndiǒxí ní cachí-gǎ sá cǎhá<sup>n</sup>-í tnúhu-á<sup>n</sup> ndèni ní cuu núú xǐndecu ñáyiú ñá túú cùu ñáyiú israhél, te mee-ni tnúhu ndáá dánèhé-í-yu nàcuáa quindáá iní ñáhǎ-yu xii-gǎ, te yúhú cǎhá<sup>n</sup> ndáá-í sá Yá Ndiǒxí ní cachí-gǎ sá cǎhá<sup>n</sup>-í tnúhu-gǎ chi ndècu ndihí-í Xítohó Jesucristú, te ñá túú dándahú ñáhà-í xii-n.

8 Te yúhú cuíní-í sá ncháá xìchi cǎhá<sup>n</sup> ndihí cue téé Yá Ndiǒxí, te na cùnduu ndoo cunduu nine iní-güedé òré ndonehe-güedé ndaha-güedé cǎhá<sup>n</sup> ndihí ñaha-güedě xii-gǎ, chi vá cúú cùdée<sup>n</sup>-güedě cuendá nchaa sá quidé ñaha ñáyiú xii-güedé, te ni vǎ cání ìní-güedé cúcuèhé tnáhá-güedé ndihí-yu.

9 Te cǎchí tnúhu-í xii-n sǎ ncháá ñáyiú dǐhí ná cùnduu dío-yu nàcuáa tàú-xi cunduu, te vá cùndùu cuehé cunduu duha dàtná cáá dǐo nchaa ñáyiú ndècu ichi cuehé ichi duha, te na ndádá-yu díquǐ-yu nàcuáa tàú-xi cunduu, te vá ndádá cuèhé ndada duhá-yu, te vá cání ìní-yu cunduu vií-yu ndihí sá ïo ndèyáhu, te ni vǎ cání ìní-yu cuihnú-yu dóó sǎ ïo ndèyáhu.

10 Te mee-ni sǎ vǎha cadá-yu, chi duca<sup>n</sup> tàú-xi cada nchaa ñáyiú dǐhí ndécú ichi Yá Ndiǒxí.

11 Te òré tàcá-yu núú dǎcuahá-yu tnúhu Yá Ndiǒxí, te cue ñáyiú dǐhí-á<sup>n</sup> na nǎhi dacuahá-yu tnúhu-gǎ, te cadá-yu nchaa nàcuáa cǎhá<sup>n</sup> cue téé dǎcuaha ñaha xii-yu tnúhu-gǎ.

12 Te yúhú cǎchí-í sá vǎ cúú dǎcuaha ñáyiú dǐhí cue téé, te ni vǎ cúú tàxi tnuní ñáhǎ-yu xii-güedé chi cunduu tnàvǐí-ni yuhú-yu cundedóho-yu.

13 Te duca<sup>n</sup> xini ñuhu-xi cadá-yu, chi Yá Ndiǒxí ní cadúha-gǎ dǐhna-gǎ té Ádán te dǎtnùní ní cadúha-gǎ tá Èvá.

14 Te ñá díú mèe té Ádán ní dándahú ñáhá sǎcuíhná xii-dé, chi tá Èvá ní dándahú-xi, te ñá túú ní quide váha-xi núú Yá Ndiǒxí sá dúcá<sup>n</sup> ñí sándáá iní-xi tnúhu ní cǎhá<sup>n</sup> sǎcuíhná-ǎ<sup>n</sup>.

15 Dico ñáyiú dǐhí ní nduu táhǔ-yu sá cóo dèhe-yu, te naníhí tàhú-yu te núu vá dǎñá ndèé-yu canchicú<sup>n</sup> nihnú-yu ichi Yá Ndiǒxí, te cundecu yǐñùhú-yu núú-gǎ, te cuu iní-yu nchaa tnàha ñáyiú-yu, te cadá-yu nchaa nàcuáa tàú-xi cunduu cundécú-yu.

### 3

*Nàcuáa tàú cue téé yǐndaha ñaha xii ñáyiú ndècu ichi Yá Ndiǒxí cada-güedé*

1 Te ò ío ì<sup>n</sup> tnúhu cǎhá<sup>n</sup> ñáyiú sá núu ì<sup>n</sup> téé cuíní quindaha ñaha xii ñáyiú ndècu ichi Yá Ndiǒxí, te ì<sup>n</sup> sá vǎha cuíní-dé cada-dé cǎchí-yu, te ndáá quée-xi tnúhu cǎhá<sup>n</sup>-yu.

2 Te yúhú cǎchí-í sá cuè téé duca<sup>n</sup> na quindaha ñaha xii ñáyiú te xini ñuhu-xi cuu-güedé cue téé quide ndáá cuendá sá vǎ cǎhá<sup>n</sup> ñáyiú cuendá-güedé sá ñà túú quide ndáá-güedé. Te na cùu-güedé cue téé ndèca ì<sup>n</sup> caa-ni ñadihí, te na cùu-güedé cue téé ñá túú quide cùtexínu ndècu, te na cùu-güedé cue téé quide nchaa nàcuáa tàú-xi cunduu, te na cùu-güedé cue téé sǎñaha núu vehe ndetatú nchaa ñáyiú ñuhu ichi, te na cùu-güedé cue téé dǎnehé ñáhá vǎha xii ñáyiú tnúhu Yá Ndiǒxí.

3 Te vá cúú-güedé cue téé quihu, te ni vǎ cúú-güedé cue téé ndùcu pletú, te ni vǎ cúú-güedé cue téé dǐcò-ni duca<sup>n</sup> ñihí dǐhú<sup>n</sup>, te ni vǎ cúú-güedé cue téé sǎni iní nàá, te ni vǎ cúú-güedé cue téé ñuhu iní mee-ni dǐhú<sup>n</sup>. Chi na cùu-güedé cue téé váha iní-xi te cunduu cǎhnu iní-güedé.

4 Te na cùu-güedé cue téé ío váha sǎnu ichi ñadihí-xi ndihí landú-xi, te na cùu-güedé cue téé quide nàcuáa sándáá iní ñáhá landú-xi cuendá canehe-güexi sá yǐñùhu núú-güedé.

5 Chi núu cùu-güedé cue téé ñá ndácú cǎnuichi ñadihí-xi ndihí

landú-xi, te vá ndácú-güedë quindaha-güedë te vá cúú càhá<sup>n</sup> núú-güedë cue ñáyiú ndècu ichi Yá Ndiöxí. càhá<sup>n</sup>-güedé núú ñáyiú tnúhu Xítóhó Jesucristú sá sàndáá iní-güedé.

<sup>6</sup> Te vá cúú-güedë cue téé íchí ní sàndáá iní-xi tnúhu Yá Ndiöxí, chi na cuáhá<sup>n</sup> te cada nínu-güedé méé-güedé te cuíta nihnu-güedé dàtná ní xíta nihnu sácuíhná.

<sup>7</sup> Te xìni ñuhu-xi cuu-güedé cue téé càhá<sup>n</sup> váha ñáyiú cuendá-xi, cuéi ñá díú ñáyiú ndècu ichi Yá Ndiöxí cuendá sá vǎ cuátnúhu ñaha ñáyiú xii-güedé, chi núú ñáhá te cudana te sácuíhná quesaha-xi tàxi tnuní ñáhá-xí xii-güedé.

*Cue téé chindee ñaha xii cue téé yìndaha ñaha xii ñáyiú ndècu ichi Yá Ndiöxí*

<sup>8</sup> Te tnàhá cue téé chindee ñaha xii cue téé yìndaha ñaha xii ñáyiú ndècu ichi Yá Ndiöxí xíní ñuhu-xi cuu-güedé cue téé quide nchaa nacuaa tàú-xi cunduu, te vá cúú-güedé cue téé càchí sá càhá<sup>n</sup> ndáá te ñá ndáá, te ní vǎ cúú-güedé cue téé quihu, te ní vǎ cúú-güedé cue téé sàni iní-xi dícó-ni duca<sup>n</sup> ñíhí dǐhú<sup>n</sup>.

<sup>9</sup> Te xìni ñuhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío váha cùu iní-xi cuendá nchaa sá vǎha quide-güedé.

<sup>10</sup> Te xìni ñuhu-xi coto ndeé ñáhá xii-güedé te núú cùu-güedé cue téé quide váha, te núú cùu-güedé cue téé quide váha ña te cuu chindee-güedé cue téé yìndaha ñaha xii ñáyiú ndècu ichi Yá Ndiöxí.

<sup>11</sup> Te tnàhá tucu nchaa ñáyiú dǐhí ná càdá-yu nchaa nàcuáa tàú-xi cunduu, te vá cúnduu yiti yuhú-yu, te ní vǎ cúú-yu ñáyiú quide cutexínu ndècu, te na cúú-yu ñáyiú ío váha quide ndáá.

<sup>12</sup> Te nchaa cue téé chindee ñaha xii cue téé yìndaha ñaha xii ñáyiú ndècu ichi Yá Ndiöxí, xìni ñuhu-xi cuu-güedé cue téé ndècu ì<sup>n</sup> caa-ni ñadihí-xi, te na cùu-güedé cue téé sànu ichi váha ñadihí-xi ndihí landú-xi.

<sup>13</sup> Te núú na càda ndáá-güedé chindee-güedé cue téé yìndaha ñaha xii ñáyiú ndècu ichi Yá Ndiöxí, te canehé-yu sá yíñùhu núú-güedé, te

*Ío càhnu cuu tnúhu càhá<sup>n</sup> Yǎ Ndiöxí*

<sup>14</sup> Te cuení-í ndihí-ni quixi coto ñaha-í xii-n dico dǐhna-gǎ cǎdúha-í tutú-a daquixi-í ndaha-n

<sup>15</sup> chi na cuáhá<sup>n</sup> cuyaa-í. Te xía<sup>n</sup> núú cǎdúha-í tutú-a daquixi-í ndaha-n cuendá cutnúni iní-n ñasa cada-n cùndecu-n ndihí nchaa ñáyiú ndècu ichi Yá Ndiöxí. Te ñáyiú-á<sup>n</sup> cúú-yu dàtná ì<sup>n</sup> vehe cùu cuendá Yǎ Ndiöxí Yaá ndécú nchaa nduu nchaa quíú, chi ndècu ndihí ñaha-gǎ xii-yu, te cúú-yu ñáyiú càhá<sup>n</sup> váha cuendá tnúhu-gǎ.

<sup>16</sup> Te cùtnuní ndáá iní-ó sǎ ío càhnu cuu tnúhu càhá<sup>n</sup> Xítóhó Jesucristú, tnúhu sá càhá<sup>n</sup> nàcuáa nduu ichi ndecu-o, te duha càhá<sup>n</sup> tnúhu-á<sup>n</sup>:

Te ní quixi Yá cúú Ndiöxí ñuyíú-a ní cuu-gǎ ì<sup>n</sup> ñáyiú,

te Espíritú Yǎ Ndiöxí ní càhá<sup>n</sup> ndáá-xi sá cúú-gǎ ì<sup>n</sup> Yaá ío váha quide ndáá,

te cue espíritú xínú cuèchi núú Yǎ Ndiöxí ní xíní ndáá-xi nchaa nàcuáa ní quide Yaá ní quixi ñuyíú-a.

Te ní xité nuu tnúhu-gǎ ñihí ñuyíú-a, te ndèni ní cuu ní ngúita-yu sàndáá iní ñáhá-yu xii-gǎ,

te mee-gǎ cuándaa-gǎ andiú.

Duha càchí tnúhu-á<sup>n</sup>.

## 4

*Ñáyiú dàña nihnu vá quìndáá-gǎ iní-yu Yá Ndiöxí*

<sup>1</sup> Te Espíritú Yǎ Ndiöxí càhá<sup>n</sup> ndáá-xi sá sàá nduu dàña nihnu dava ñáyiú ndècu ichi-gǎ vá quìndáá iní ñáhá-gǎ-yu xii-gǎ, te duca<sup>n</sup> chi cue espíritú cúndihí yucu ñávǎha dandáhú ñáhá-xí xii-yu, te mee-ñǎ nchaa tnúhu càhá<sup>n</sup> nchaa ñáyiú cùndihí nchaa espíritú-á<sup>n</sup> cuhu<sup>n</sup> iní-yu.

<sup>2</sup> Te nchaa ñáyiú duca<sup>n</sup> cùndihí cue espíritú cúndihí yucu ñávǎha-á<sup>n</sup> cúú-yu ñáyiú ío dandáhú méé-xí chi càchí-yu sá càhá<sup>n</sup> ndáá-yu te ñá

ndàá, te ñá túú tnàhí-gá ná quidé-xí ìní-yu cuèndá nchaa sá cuèhé sá dúhá quidé-yu.

<sup>3</sup> Te ñáyiu-á<sup>n</sup> quesàhá-yu sá vǎ cúú càndeca tnaha ñáyiu, te ni vǎ cúú càxí-yu dava núú sǎ xìní-yu caxí-yu, dico Yá Ndiǒxí ní cadúha-gá nchaa sá nchító-ó cuèndá caxi-o, te cuení-gá sá ncháá nchòo ñáyiu sàndáá iní tnúhu-gá ndacá<sup>n</sup> táhú-ó núú-gǎ òré caxi-o.

<sup>4</sup> Te nchaa sá nǐ cadúha Yá Ndiǒxí cúú-xí sǎ vǎha te vǎ dáquèe tíhú-ó, te xìni ñuhu-xi ndacá<sup>n</sup> táhú-ó núú-gǎ cuèndá nchaa xǎ<sup>n</sup>.

<sup>5</sup> Te Yá Ndiǒxí càchí-gá sá méé-gǎ quidé-gǎ cúú-xí sǎ vǎha sá cúú-xí-ó te núu na ndacá<sup>n</sup> táhú-ó núú-gǎ.

#### *Tée quide ndáá xínú cuèchi núú Xítóhó Jesucristú*

<sup>6</sup> Te núu na dàcuaha-n ñáyiu ndècu ndíhi-o ichi Xítóhó Jesucristú nchaa nàcuáa càhá<sup>n</sup>-í-a ña, te cuu-n ñ<sup>n</sup> tée quide ndáá xínú cuèchi núú-gǎ, te nducu ndèe-ni-n dacuaha-n tnúhu Yá Ndiǒxí sá sàndáá iní-n, te canchicú<sup>n</sup> nihnu-ni-n càda-n nchaa nàcuáa càhá<sup>n</sup>-gá, te núu duca<sup>n</sup> nà cada-n, te níhí ndéé-n cùndecu-n ichi-gá.

<sup>7</sup> Te vǎ cáda cuèndá-n nchàa cuendú cuèhé cuèndú duha càhá<sup>n</sup> ñáyiu, ndíhi nchaa dava-gá cuèndú sá ñà túú nàndíhi cuèndá sá ñà túú nǎ cumání-n cùndecu-n núú Yá Ndiǒxí.

<sup>8</sup> Te núu ñ<sup>n</sup> chiu<sup>n</sup> cada-o te nàcaá luha yiqui-o te nàndíhi-xi luha, dico ío-gá nándíhi-xi te núu cada-o sǎ cùndècu yíñuhu-o núú Yá Ndiǒxí. Te núu duca<sup>n</sup> na càda-o te cùu-xi ñ<sup>n</sup> sǎ vǎha sá cúú-xí-ó vitna, te ni caa ni quíhí<sup>n</sup> duca<sup>n</sup> cùu-xi ñ<sup>n</sup> sǎ vǎha sá cúú-xí-ó.

<sup>9</sup> Te xìni ñuhu-xi sá ncháá-ndó quíndáá iní-ndó nchàa tnúhu càhá<sup>n</sup>-í-a chi cùu-xi tnúhu ndáá.

<sup>10</sup> Te vitna ío ndùcu ndee-o quide-o chiu<sup>n</sup> Yá Ndiǒxí Yaá ndécú nchàa nduu nchaa quíú te quide ndee iní-ó cuèndá nchaa sá quidé ñaha ñáyiu xii-o, chi sàndáá iní-ó sǎ díú-gǎ chíndèe ñaha-gá xii-o. Te nchaa ñáyiu cùndahú iní ñáhá-gǎ te chindee

ñaha-gá xii-yu, dico ñáyiu sàndáá iní ñáhá xì-gá ío-gá cúnúú-yu chindee ñaha-gá xii-yu, chi dàcácu nihnu ñaha-gǎ núú ùhú núú ndàhú.

<sup>11</sup> Te nchaa tnúhu-á<sup>n</sup> cǔñaha-n xii-yu, te cáhá<sup>n</sup>-n dǒho-yu sá ná càdá-yu nchaa nàcuáa càhá<sup>n</sup>-xi.

<sup>12</sup> Te ío cada vǎha-n cùndecu-n cuendá sá vǎ yǒo daquèe tíhú ñáhá xì-n cuendá sá cúú-n tée cuechi, te ío vǎha cada-n nchàa sá tàú-n càda-n cuendá duca<sup>n</sup> cànchicú<sup>n</sup> nihnu nchaa ñáyiu ndècu ichi Yá Ndiǒxí, te vii vii cáhá<sup>n</sup> ndíhí-n-yu, te cuu iní-n-yu, te ío quíndáá iní-n Yá Ndiǒxí, te mee-ni sǎ vǎha caní iní-n, te duca<sup>n</sup> càda-n cuendá canchicú<sup>n</sup> nihnú-yu.

<sup>13</sup> Te nini cùyaa-í quixi-í, te ío nducu ndèe-n cáhá<sup>n</sup> ndodo-n tnúhu Yá Ndiǒxí núú-yu, te dacuàhá-n-yu nàcuáa càhá<sup>n</sup> tnúhu-gá, te cáhá<sup>n</sup>-n dǒho-yu nàcuáa cuu vii cuu vǎha iní-yu cundecú-yu ichi Yá Ndiǒxí.

<sup>14</sup> Te vǎ dáñá ndèe-n càda-n nàcuáa ndùu táhú nǐ taxi Yá Ndiǒxí ní ngúndecu ndíhi-n cǔtnàhá ní sacá<sup>n</sup> ndodo cue tée yíndaha ñaha xii ñáyiu ndècu ichi Yá Ndiǒxí ndaha-güedé díquí-n, te ní cachí tnúhu-güedé sá dúcá<sup>n</sup> nǐ cuiní Yá Ndiǒxí cunduu.

<sup>15</sup> Te ni yùhu ni iní-n càda-n nchaa nàcuáa càhá<sup>n</sup>-í-a cuèndá sá ná quíní ñáyiu sá ío-gá vǎha ta quide-n cuáhá<sup>n</sup>.

<sup>16</sup> Te ío vǎha cundehe-n nchàa nàcuáa quide-n, ndíhi nchaa nàcuáa dǎnehé-n-yu, te vǎ dáñá ndèe-n dùca<sup>n</sup> cada-n. Te núu duca<sup>n</sup> na càda-n te nduu táhú-n cùndecu vǎha-n núú Yá Ndiǒxí ni caa ni quíhí<sup>n</sup> ndíhi nchaa ñáyiu na tédóho nchaa tnúhu càhá<sup>n</sup>-n.

## 5

### *Nàcuáa tàú-xi cada-o cùndecu-o ndíhi ñáyiu sàndáá iní tnúhu Yá Ndiǒxí*

<sup>1</sup> Te vǎ ténáá-n nchàa cue tée cùu sacuéhé chi vii vii cáhá<sup>n</sup>-n dǒho-güedé, te cada iní-n sǎ dàtná tǎtá-n cùu-güedé, te díu-ni duca<sup>n</sup> vìi vii cáhá<sup>n</sup>-n dǒho nchaa cue tée cuechi, te cada iní-n sǎ dàtná cue ñaní-n cùu-güedé.

<sup>2</sup> Te díu-ni duca<sup>n</sup> vìi vii cáhá<sup>n</sup> tucu-n dǒho nchaa ñáyiu díhí ñáyiu cùu

sacuéhé, te cada iní-n sǎ dàtná nǎná-n cùú-yu, te òu-ni duca<sup>n</sup> vìi vìi cáhá<sup>n</sup> tucu-n dôho nchaa ñáyiú òí ñáyiú cuechi, te cada iní-n sǎ dàtná cue cúha-n cùú-yu, te ío cuu váha iní-n òré duca<sup>n</sup> cáhá<sup>n</sup>-n dôho nchaa ñáyiú cuechi-ǎ<sup>n</sup>.

<sup>3</sup> Te canehe-n sǎ yíñùhu núú ñáyiú òí ní quendóo quèé, te chindèé-n-yu núú ndàhú-yu.

<sup>4</sup> Te núú ì<sup>n</sup> ñaha quèé ndécú cuè déhe-a<sup>n</sup> àdi cue déhe ñani-a<sup>n</sup>, te ío xini ñuhu-xi cada-güexi nchaa nacuaá tàú-xi cunduu núú-a<sup>n</sup> chi duca<sup>n</sup> cuini Yá Ndiòxí cada-güexi. Te núú duca<sup>n</sup> na càda-güexi te nànchocáva-güexi quède-güexi sá vǎha sá cúú-xí ñáyiú ní dácuéhnú ñaha xii-güexi. Te núú duca<sup>n</sup> na càda-güexi te quède váha-güexi te ío nduu vétú iní Yá Ndiòxí.

<sup>5</sup> Te ñáyiú quèé ñáyiú ndàhú ndécú ìchi Yá Ndiòxí sàndáá iní-yu sá díú-gǎ chindèe ñaha-gǎ xii-yu, te cuèi nduu cuèi níú ñá túú dàña ndeé-yu càhá<sup>n</sup> ndihi ñahá-yu xii-gǎ.

<sup>6</sup> Te nchaa ñáyiú quèé cúdí iní quidé nchaa sá cuèhé sá dúhá cùú-yu dàtná ñáyiú ní xihí cuèi ndècu vívǔ-yu.

<sup>7</sup> Te cúñaha-n xii nchaa ñáyiú sá ná cáda-yu nchaa tnúhu càhá<sup>n</sup>-í-a cuèndá sá ñà túú nǎ cumáni-yu cundécú-yu, te duca<sup>n</sup> vǎ yòo cáhá<sup>n</sup> cuèhé cuèndá-yu.

<sup>8</sup> Te ío xini ñuhu-xi chindeé-yu cue tnàha ñáyiú-yu, dico ío-gǎ xini ñuhu-xi chindeé-yu cue ñáyiú cùu ndi meé-yu ndècu ndihí-yu, te núú vá dúcá<sup>n</sup> càda-yu te ñá túú-gǎ sàndáá iní-yu cadá-yu nàcuáa càhá<sup>n</sup> Yá Ndiòxí. Te sá dúcá<sup>n</sup> ná càda-yu te vìhi-gǎ quidé-yu dàcúxí ñáyiú ndècu ìchi cuehé ìchi duha.

<sup>9</sup> Te chido tnùní-n mèe-ni ñáyiú quèé ñáyiú sa ndècu únídico cuía-xi àdi vìhi-gǎ cuèndá ñáyiú-á<sup>n</sup> cadá-yu nchaa nàcuáa cuini Yá Ndiòxí núú nchaa ñáyiú ndècu ìchi-gǎ, te ñáyiú-á<sup>n</sup> xini ñuhu-xi cuú-yu mee-ni ñáyiú ní quide ndáá ní xindecu ndihi yí-xi.

<sup>10</sup> Te na cùú-yu ñáyiú quèé quidé vǎha cùú-yu núú nchaa ñáyiú, te na cùú-yu ñáyiú quèé xini canu ìchi

váha cue landú-xi, te na cùú-yu ñáyiú sǎñaha nùu vehe ndetatú cue ñáyiú ñùhu ìchi, te na cùú-yu ñáyiú ndècu túha quède náni chiu<sup>n</sup> cuèndá cue ñáyiú ndècu ìchi Yá Ndiòxí, te na cùú-yu ñáyiú chindee nchaa ñáyiú ndècu ndihi tnúndòho tnúhu ndàhú, te na cùú-yu ñáyiú ñá túú dàña ndeé quidé nchaa núú sǎ vǎha.

<sup>11</sup> Te vá chídó tnùní-n ñáyiú quèé ñáyiú ñá túú ndècu únídico cuía-xi cada chiu<sup>n</sup> Yá Ndiòxí, chi núú cuechi-gǎ-yu ña, te vá cundáá-yu cadá-yu chiu<sup>n</sup>-gǎ, chi quesàhá-yu natnándaha tucú-yu.

<sup>12</sup> Te sá cuèndá xǎ<sup>n</sup> te nacháhu-yu núú Yá Ndiòxí, chi vá cáda-gǎ-yu nàcuáa ní cuu tnúhu cadá-yu ni cùu.

<sup>13</sup> Te ngúita-yu cani iní-yu quíhí<sup>n</sup>-yu ndi vehe ndi vehe caca nihní-yu, te nchaa ñáyiú duca<sup>n</sup> quède ío cùu cuhndú-yu, te cùyiti yuhú-yu, te ndèni ní cuu cuhá<sup>n</sup>-yu chinee díquí-yu vehe tnàha ñáyiú-yu ndèhé-yu núú nása ndécú-yu, te ñá túú tàú-yu duca<sup>n</sup> càda-yu, te càhá<sup>n</sup>-yu mee-ni tnúhu sá ñà túú nàndíhi.

<sup>14</sup> Núú xǎ<sup>n</sup> cuini-í sá ncháá ñáyiú quèé ñáyiú cuechi na natnándaha tucú-yu cuèndá cuú-yu nǎná, te duca<sup>n</sup> càda-yu nchaa sá xini ñuhu-xi cadá-yu vehé-yu, te núú duca<sup>n</sup> na càda-yu, te nchaa ñáyiú cùu úhú iní ñahá xii-o vá nihí-gǎ-yu tnúhu cáhá<sup>n</sup> cuèhé-yu cuèndá tnúhu Yá Ndiòxí.

<sup>15</sup> Te dava ñáyiú quèé ndécú ìchi Yá Ndiòxí ní cùu ní dáñá-yu te ní tní-yu tnúhu càhá<sup>n</sup> sácuíhná.

<sup>16</sup> Te núú dava ñáyiú ndècu ìchi Yá Ndiòxí ndécú ndihí-yu ì<sup>n</sup> ñaha quèé cúú ndi meé-yu ña, te tàú-yu chindee ñahá-yu xii-a<sup>n</sup> cuèndá sá vǎ ío chi chiu<sup>n</sup>-a<sup>n</sup> nchaa ñáyiú ndècu ìchi Yá Ndiòxí, te duca<sup>n</sup> te nchaa ñáyiú ndècu ìchi-gǎ-á<sup>n</sup> nihí ndeé-gǎ-yu chindèe-yu dava-gǎ ñáyiú quèé ñá túú vèdana ndècu ndihi.

<sup>17</sup> Te nchaa cue téé ío váha quède yindaha ñaha xii ñáyiú ndècu ìchi Yá Ndiòxí ío xini ñuhu-xi canehe sá yihí ñuhu núú-güedé, te chindee ñaha

xii-güedé. Te uu<sup>n</sup>-gá tàú ñáyiú duca<sup>n</sup> càdá-yu sá cúú-xí nchàa cue téé ni yùhu ni iní càhá<sup>n</sup> tnúhu-gá.

18 Te núú tùtú Yá Ndiöxí càchí-xi: “Vá chíhí-ndó ñunu yuhu ndicutu oré dánchezí-dí triú”, duha càchí-xi. Te càchí tucu-xi ingá xichi: “H<sup>n</sup> téé quède chiu<sup>n</sup> dacuití tàú-xi sá cúhú<sup>n</sup> yáhu-dé”, duha càchí-xi núú tùtú-gá.

19 Te núú ió ñáyiú véxi sàcá<sup>n</sup> cuéchi núú-n cuendá h<sup>n</sup> téé yíndaha ñaha xii ñáyiú ndècu ichi Yá Ndiöxí ñá, te cada cuendá-n tnúhu càhá<sup>n</sup>-yu te núú véxi-yu ndihí úú àdi úní ñáyiú càhá<sup>n</sup> ndáá nàcuáa ní cuu, á<sup>n</sup> nùu ñáhá te vá cáda cuendá-n tnúhu càhá<sup>n</sup>-yu.

20 Te núú cue téé yíndaha ñaha xii ñáyiú-á<sup>n</sup> ndécú cuéchi-güedé, te càhá<sup>n</sup>-n dõho-güedé núú nchàa ñáyiú ndècu ichi-gá cuendá sá dává-gá-yu vá cúyí-yu duca<sup>n</sup> càdá-yu.

21 Te Yá Ndiöxí ndihí Xítóhó Jesucristú náhá-gá ndihí cue espíritú xínú cuéchi núú-gá sá yùhú càhá<sup>n</sup>-í dóho-n sá cáda-n nchàa nacuáa càhá<sup>n</sup>-í-a, te h<sup>n</sup>-ni càhá<sup>n</sup> ndihí-n cué téé xíní tnáhá ndihí-n, ndihí cue téé ñá túú xíní tnáhá ndihí-n.

22 Te vá ió cundihí iní-n tàxi ndecu-n h<sup>n</sup> téé quíndaha ñaha xii ñáyiú, chi díhna-gá cada cuendá-n te núú cùu-dé h<sup>n</sup> téé quède ndáá, chi núú cuendá-ni na tàxi ndecu-n-dé te vá cáda ndáá-dé, te yòhó ndaa díquí-n cuendá nchaa sá cuèhé sá dúhá cáda-dé, te ió coto-n mée-n vá cáda-n ni h<sup>n</sup> sá cuèhé sá dúhá.

23 Te duca<sup>n</sup> ió mee-ni cùhú xití-n te vá cóhó-n mée-ni ndute, chi tnáhá luha vínú ndéhé yoho yàha stilé coho-n cuendá cada tátna-xi.

24 Te dava ñáyiú cùtnuní nchaa sá cuèhé sá dúhá quède-yu, te cùtnuní tucu sá náchãhu-yu na sàá nduu, te dava tucú-yu chi ñá túú cùtnuní nchaa sá cuèhé sá dúhá quède-yu, dico na sàá nduu cùndáá cuéchi-yu te dàvá-á<sup>n</sup> cutnùní.

25 Te duca<sup>n</sup> sãtnahá-xi cùu nchaa sá vãha quède dáva-yu chi cùtnuní, te cuéi ñá túú cùtnuní òré-ni dico dacuití sã sàá nduu cùtnuní.

## 6

1 Te nchaa ñáyiú ndècu tnuú quidé chiú<sup>n</sup> ndihí h<sup>n</sup> patróo<sup>n</sup> xini ñuhu-xi ió canehé-yu sá yíñùhu núú-dé cuendá sá vã càhá<sup>n</sup> cuèhé ñáyiú cuendá Yá Ndiöxí, te ni vã càhá<sup>n</sup> cuèhé-yu cuendá tnúhu-gá.

2 Te núú patróo<sup>n</sup> cue ñáyiú xínu cuechi-á<sup>n</sup> sàndáá iní-dé Yá Ndiöxí, te ñá díú sã dúcá<sup>n</sup> sàndáá iní-dé Yá Ndiöxí te vá cánèhé-yu sá yíñùhu núú-dé, chi uu<sup>n</sup>-gá tàú-yu cada váha-yu cunu cuéchi-yu núú-dé, te duca<sup>n</sup> na càdá-yu chi xínu cuechi-yu núú tée sàndáá iní ndihí-yu tnúhu Yá Ndiöxí. Te vá dáñá ndée-n dānehé-n-yu nchaa nàcuáa càhá<sup>n</sup>-í-a, te cúñaha-n xii-yu sá ná càdá-yu.

### *Nduu vétú iní-ó cùndecu-o*

3 Te ió cue téé ñá túú tnè-güedé nàcuáa càhá<sup>n</sup> tnúhu Xítóhó Jesucristú, te cue téé-á<sup>n</sup> càchí-güedé sá càhá<sup>n</sup> ndáá-güedé dico ñá ndáá, chi ñá túú càhá<sup>n</sup>-güedé nàcuáa cuáhá<sup>n</sup> tnúhu-gá. Te nchaa tnúhu Xítóhó Jesucristú cúú-xí mée-ni tnúhu ndáá, te chindee ñaha-xi cada ndáá-ó cùndecu-o ichi-gá.

4 Te nchaa cue téé duca<sup>n</sup> xíquide quède cahnu-güedé mée-güedé dico ñá túú vèdana xíní-güedé, te cue téé-á<sup>n</sup> ñá túú ndècu váha iní-güedé chi nándi tnúhu sá ñá túú nāndihí cuíní-güedé cùtnàha-güedé. Te ngüita-güedé cúú cuèdú iní tnáhá-güedé, te nāá ndihí tnáhá-güedé, te xicuèhé tnáhá-güedé, te ñá túú-gá cúú vãha iní núú tnáhá-güedé.

5 Te cue téé-á<sup>n</sup> mee-ni nāá-güedé chi ñá túú sàni váha iní-güedé, te ni ñá túú xíní-güedé nàcuáa cuáhá<sup>n</sup> tnúhu ndáá tnúhu Yá Ndiöxí, te càchí-güedé sá ió váha cundecu-güedé ichi-gá chi sàni iní-güedé sá ió vāi díhú<sup>n</sup> ñihí-güedé cundecu ndihí-güedé. Te yùhú càhá<sup>n</sup>-í dóho-n sã vã ñihí tnáhá-n ndihí nchaa cue téé duca<sup>n</sup> xíquide.

6 Te ndáá sá ichi Yá Ndiöxí cúú-xi h<sup>n</sup> ichi sá ió váha cundecu-o, dico xini ñuhu-xi nduu vétú iní-ó nàcuáa ndècu-o ñuyíú-a.

7 Te nchoo cuè ñáyu chi ñá túú vèdana nèhe-o ní quexìo ñuyíú-a, te ñu-ni duca<sup>n</sup> ñà túú vèdana canehe-o quíhí<sup>n</sup> òré ná cùú-ó.

8 Te ío xini ñuhu-xi nduu vétú iní-ó te núu ndècu-ni sá cunchìto-o ndihì dóo cuihnu-o.

9 Te ío ñáyu ío cuení-yu cuu cuicá-yu, te ñáyu-á<sup>n</sup> dácàhu iní ñáhá yùcu ñávàha xii-yu cadá-yu nándi sá cuèhé sá dúhá, te nándi-gá nchaá sá cuèhé sá dúhá càhu iní-yu quidé-yu, te nchaá sá quidè-yu-á<sup>n</sup> ñà túú vèdana nàndihì-xi chi uu<sup>n</sup>-gá ndádá ndàhú ñáhá-xi xii-yu, te dàcuíta nihnu ñaha-xi.

10 Chi nchaá ñáyu ñuhu iní mee-ni dǐhú<sup>n</sup>, te xǐ<sup>n</sup> quidé-xi ngüita-yu sàni iní-yu cadá-yu nándi sá cuèhé sá dúhá. Te ío ñáyu ndècu ichi Yá Ndiöxí te sá tñuhu duca<sup>n</sup> ñuhu iní mee-ni dǐhú<sup>n</sup> ñi dáñá-yu ñá túú-gǎ sàndáá iní ñáhá-yu xii-gǎ, te vitna ñá túú tnahí-gǎ ndécú váha iní-yu.

*Cahni iní-ó càda-o nchaá nacuáa càhá<sup>n</sup> Yá Ndiöxí chi sàndáá iní-ó-gǎ*

11 Te yòhó té quide chiu<sup>n</sup> Yá Ndiöxí xini ñuhu-xi vá cadá-n dàtná quidé nchàa ñáyu ní cachí-í sá ñà túú quide ndáá, te vá dáñá ndèé-n càda ndáá-n cùndecu-n, te cada-n nàcuáa nduu vétú iní Yá Ndiöxí, te ío quindáá iní-n-gǎ, te cuu iní-n nchàa tnahá ñáyu-n, te cada càhnu iní-n nchàa sá ná yàha-n cùndecu-n ichi-gǎ, te cunduu ndàhú iní-n.

12 Te cahni iní-n càda-n nchaá nacuáa cuení Yá Ndiöxí chi sàndáá iní-n-gǎ, te ío cuhu<sup>n</sup> iní-n sá cùndècu-n ndihì Yá Ndiöxí ñi caa ñi quíhí<sup>n</sup>, chi ñu cuendá tnahí-á<sup>n</sup> ñi cáhá<sup>n</sup> ñáhá-gǎ xii-n, te ní cáhá<sup>n</sup> ndáá-n núú vai ñáyu sá ío váha sàndáá iní-n-gǎ.

13 Te Yá Ndiöxí Yaá quidé nchìto nchaandi túhú sá ío ñuyíú nàha-gǎ sá càhá<sup>n</sup>-í dóho-n vitna, te ñu-ni duca<sup>n</sup> nàha tucu Xitohó Jesucristú Yaá ní cáhá<sup>n</sup> tñuhu ndáá núú tè Pilatú

14 sá quindáá iní-n càda-n nchaá nacuáa càhá<sup>n</sup> Yá Ndiöxí, te nchaá tñuhu càhá<sup>n</sup>-gǎ cada-n nàcuáa vá dáquèe tíhú ñáhá ñáyu xii-n, te

duca<sup>n</sup>-ni càda-n ndéé ná sàá nduu quixi tucu Xitohó Jesucristú.

15 Te quixi tucu-gǎ chi duca<sup>n</sup> ñi cachí Yá Ndiöxí cunduu, te mee Yá Ndiöxí náhá-gǎ ná nduu quixi tucu Xitohó Jesucristú. Te Yá Ndiöxí ío váha cùu iní-gǎ te ñ<sup>n</sup>dìi díi-ni-gǎ ío-gǎ cùnùu-gǎ dácúxí cuè téé tàxi tñuní ñ<sup>n</sup> ñ<sup>n</sup> nàció<sup>n</sup> ndihì nchaá dává-gǎ cue téé cùnùu, chi tàxi tñuní ñáhá-gǎ xii-güedé, te nchaá ñáyu ndècu ñuyíú-a tàxi tñuní-gǎ.

16 Te ñu-gǎ cúú-gǎ Yaá ndécú nchàa nduu nchaá quíú, te ío càhnu cuu-gǎ chi dàtná dáyèhé nchíanchii dáyèhé-xi núú ndécú-gǎ, te vá yòo ñ<sup>n</sup> cùy<sup>h</sup> dayatni núú ndécú-gǎ, te ñi ñá túú ñi ñ<sup>n</sup> ñáyu xini ñáhá xii-gǎ te ñi vá ndácú-yu quini ñáhá-yu xii-gǎ. Te ío na cànehe nchaá ñáyu sá yíñuhu núú-gǎ ñi caa ñi quíhí<sup>n</sup>, te duca<sup>n</sup> ío na tàxi tñuní-gǎ ñi caa ñi quíhí<sup>n</sup>. Te duca<sup>n</sup> na cùnduu.

17 Te cáhá<sup>n</sup>-n dóho nchaá ñáyu cuica ndècu ndihì nchaá sá ío ñuyíú-a cuendá sá vá cadá càhnú-yu mée-yu, te duu<sup>n</sup> duu<sup>n</sup> vá cùndéé iní-yu ñi ñ<sup>n</sup> sá ndécú ndihì-yu chi vá cùdǐ-xi, te cáhá<sup>n</sup>-n dóho-yu sá ná cùndéé iní-yu Yá Ndiöxí chi ñu-gǎ cúú-gǎ Yaá ndécú nchàa nduu nchaá quíú, te chitu núú ndáhá tàxi-gǎ nchaá sá xini ñuhu-o, chi cuení-gǎ sá ío cuu váha iní-ó cùndecu-o.

18 Te cáhá<sup>n</sup> tucu-n dóho-yu sá ná cadá-yu mee-ni sǎ váha, te cuendá nchaá sá váha cadá-yu-á<sup>n</sup> te cuú-yu ñ<sup>n</sup> ñáyu cuica sǎ cúú-xi Yá Ndiöxí, te na cùndecu túha-yu chindéé-yu cue ñáyu ndàhú cuáñàhá-yu sá xini ñuhú-yu.

19 Te núu duca<sup>n</sup> na cadá-yu te Yá Ndiöxí cuáñàhá-gǎ sá ndúú tǎhú-yu na sàá nduu, te ngùndecu váha-yu ndihì-gǎ ñi caa ñi quíhí<sup>n</sup>.

*Tñuhu ndéé núú ñi ndihì-ná*

20 Te yòhó té Timùteú càhá<sup>n</sup>-í dóho-n sǎ ío cada cuendá-n vá dǎma tñuhu ní taxi Yá Ndiöxí danèhé-n ñáyu, te vá cadá cuendá-n nchàa cuendú cuèhé cuendú duha ío ñuyíú-a chi ñá túú nàndihì-xi, te ñi vá cadá

cuèndá-n nchàa tnúhu xǐtnàha ñáyiú  
càchí sá xícá nàha tnúhu cue téé túha  
chi ñá díú ì<sup>n</sup> tnúhu ndáá cúú-xí.

<sup>21</sup> Te íó ñáyiú ñá túú-gǎ sàndáá  
iní-yu tnúhu Yá Ndiǒxí, chi ní quide  
cuèndá-yu nchaa tnúhu xíca naha  
ñáyiú-á<sup>n</sup>.

Te Yá Ndiǒxí ná chìndee chitúu  
ñaha-gǎ xii-n. Te duca<sup>n</sup> na cùnduu. Te  
íó cada ndee ìní-nǎ vitna.

## TUTÚ CÚÚ ÒÚ NÍ CADÚHA TÉ PÄBLÚ QUIHÍ<sup>n</sup> NDAHA TÉ TIMÛTEÚ

*Té Păblú cádŭha-dé tutú quihí<sup>n</sup>  
ndaha té Timùteú*

<sup>1</sup> Yúhú té Păblú ní tendaha ñàha Yá Ndiöxí cǎhá<sup>n</sup>-í tnúhu Xítóhó Jesucristú núú ñăyiu, chi duca<sup>n</sup> ní cachí Yă Ndiöxí cunduu. Te cǎhá<sup>n</sup>-í dàtná ní cachí Yă Ndiöxí sá ncháá nchòo ñăyiu ndècu ndihí Xítóhó Jesucristú naníhí tǎhú-ó.

<sup>2</sup> Te yúhú té Păblú cádŭha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te diu-í ní sanu ichi ñaha-í xii-n ìchi Xítóhó Jesucristú, te xicá<sup>n</sup> tǎhú-í núú Dütú Ndiöxí ndihí núú Xítóhó Jesucristú sá ío na chindee chitúu ñaha-gǎ xii-n, te cundǎhú iní ñáhá-gǎ, te duca<sup>n</sup> ndi nduú-gǎ ná cǎdá te ío váha cuu iní-n cùndecu-n.

*Cǎhá<sup>n</sup> váha-o cuendá Xítóhó Jesucristú*

<sup>3</sup> Te cuèi nduu cuèi niú duca<sup>n</sup>-ní cǎhá<sup>n</sup> ndihí-í Yă Ndiöxí cuendá-n, te ndacá<sup>n</sup> tǎhú-í núú-gǎ, te xinu cuechi-í núú-gǎ dàtná ní quide cue ñaní tnáhà-í ní xindecu ndéé sanduu, te cùtnuní iní-í sá quidé ndáá-í núú-gǎ dàtná ní xóo cada-güedé.

<sup>4</sup> Te ío sàni iní-í naníhí tnáhá-ó cuendá ío cudí<sup>n</sup> iní-í, chi ndàcu iní-í sá ío ní ndáhyú-n sǎ ndihú iní-n cùtnáhá ní quide ndee iní-í tnáhá-ó.

<sup>5</sup> Te nàha-í sá sàndáá ndisa iní-n Yă Ndiöxí dàtná ní ngüíta díhna-gǎ xǐtná-n tǎ Lòidá ndihí nǎná-n tǎ Èunicé quidé-yu, te cùtnuní ndáá iní-í sá díú tnáhá-n ío váha sàndáá iní-n-gǎ.

<sup>6</sup> Te xǐǎ<sup>n</sup> dándàcu iní ñáhà-í xii-n cuendá sá ío-gǎ nducu ndèe-n cada-n chiu<sup>n</sup> ní nduu tǎhú-n núú Yă Ndiöxí cada-n, chi ní taxi-gǎ tnúhu ndee iní ní ngúndecu ndihí-n cùtnáhá ní sacá<sup>n</sup> ndodo-í ndaha-í díquí-n sǎ díú chiú<sup>n</sup>-gǎ cada-n.

<sup>7</sup> Te Espíritú sá nǐ taxi Yá Ndiöxí ndécú ndihí-o ñá túú cùu-xi ì<sup>n</sup> Espíritú sá cǎdá nàcuáa yùhú-ó, chi cùu-xi ì<sup>n</sup> Espíritú sá táxí tnúhu ndee iní cada-o chiú<sup>n</sup>-gǎ, te diu-xi quide cuu iní tnáhá-ó ì<sup>n</sup> ì<sup>n</sup>-o, te diu-ni tucu-xi quide cutnuni iní-ó nàcuáa cada-o cùndecu-o.

<sup>8</sup> Te xǐǎ<sup>n</sup> núu vá cùcàha<sup>n</sup> núú-n cǎhá<sup>n</sup> váha-n cuendá Xítóhó Jesucristú, te nǐ vǎ cùcàha<sup>n</sup> núú-n sǎ dúhá yìhí-í ve-cáá sá cuendá-gǎ, te xini ñuhu-xi sá tnáhá-n ndòho-n sá cuendá tnúhu-gǎ, te cundee iní-n ndòho-n, chi Yá Ndiöxí chindee ñaha-gǎ xii-n.

<sup>9</sup> Te Yá Ndiöxí ní dácăcu nihnu ñaha-gǎ xii-o núú ùhú núú ndàhú, te ní cachí-gǎ sá cǎdá-ó nchàa nacuáa cuení méé-gǎ cunduu, te duca<sup>n</sup> ní quide-gǎ chi duca<sup>n</sup> ní sani iní méé-gǎ cunduu sá cǎdá váha ñaha-gǎ xii-o, te ñá díú sǎ ío váha quide-o ndecu-o duca<sup>n</sup> ní quide-gǎ. Te ndéé cùtnáhá vátá ngăva-gǎ ñuyúú nǐ cachí-gǎ sá cǎdá váha ñaha-gǎ xii nchaa nchoo ñăyiu ní ngúndecu ndihí Xítóhó Jesucristú vitna.

<sup>10</sup> Te vitna cùtnuní iní-ó sǎ ío váha quide ñaha-gǎ xii-o, chi ní quixi Xítóhó Jesucristú ñuyúú-a ní dácăcu nihnu ñaha-gǎ xii-o núú ùhú núú ndàhú, te Yaá-á<sup>n</sup> nǐ quide-gǎ cuendá sá vǎ cùú-gǎ-ó cùú dúcá<sup>n</sup>-ó, chi ní cachí-gǎ sá cùndecu-o ní caa ní quihí<sup>n</sup> te núu na quíndáá iní-ó tnúhu-gǎ.

<sup>11</sup> Te ní cachí-gǎ sá cǎhá<sup>n</sup>-í tnúhu-gǎ núú ñăyiu ñá túú cùu ñăyiu isràél te dacuàha váha-í-yu tnúhu-gǎ, te cuèi ndèni ní cuu ndécú-yu te quihí<sup>n</sup>-í cǎhá<sup>n</sup>-í tnúhu-gǎ núú-yu chi duca<sup>n</sup> ní cachí-gǎ cunduu.

<sup>12</sup> Te cuendá xǐǎ<sup>n</sup> nándi sá ndóhò-í vitna cuendá-gǎ, dico ñá túú cùcaha<sup>n</sup> núú-í chi cùtnuní váha iní-í nàcuáa sàni iní Xítóhó Jesucristú Yaá sàndáá iní-í, te yúhú ní dáñà-í méè-í núú ndáhá-gǎ, te cùtnuní ndáá iní-í sá cótó ñaha-gǎ xii-í ndéé ná sáá nduu nàcuaca ñaha-gǎ.

<sup>13</sup> Te vá dáñá ndèe-n cǎda-n nchaa nacuáa cǎhá<sup>n</sup> tnúhu váha ní dánèhé ñáhà-í xii-n, te ío quíndáá iní-n Yă



Ndiöxí, te nchaa-o nàcuáa ndècu-o ndìhi Xítóhó Jesucrístú ío cuu iní tnáhá-ó ì<sup>n</sup> ì<sup>n</sup>-o.

<sup>14</sup> Te cada cuèndá váha-n sǎ vǎ dǎma tnúhu Yá Ndiöxí sǎ nǐ taxi-gá ndécú ndìhi-n, te Espíritú-gá sǎ nǐ taxi-gá ndécú ndìhi-o chindee ñaha-xi xii-n.

<sup>15</sup> Te yòhó sa xìní-n sǎ nchàa ñáyiu ndècu distritú Àsiá, ñáyiu ní sándáá iní tnúhu Xítóhó Jesucrístú ní dáñá ñahá-yu xii-í, te tnáhá té Fígeló ndìhi té Hèrmógenés ní dáñá ñaha-güedé xii-í.

<sup>16</sup> Te xicá<sup>n</sup> táhù-í núú Xítóhó Jesucrístú sǎ ná chindee-gá cue ñáyiu cùu ndi mee té Onèsíforó, chi diu-dé ío vǎi xito ní quixi-dé ní quide cuèndá ñahá-dé xii-í, te ní taxi-dé tnúhu ndee iní, te ñá túú ní cùcaha<sup>n</sup> núú-dé sǎ yíhì-í vecaá.

<sup>17</sup> Te cùtnáhá ní xíndecu-dé ñúú Ròmá duca<sup>n</sup>-ni nǐ xóo nanducu ñaha-dé xii-í ndéé ndéé naníhí ñahá-dé.

<sup>18</sup> Te xicá<sup>n</sup> táhù tùcu-í núú Xítóhó Jesucrístú sǎ ná cùndahú iní ñahá-gǎ xii-dé nduu na sǎá cundáá cuèchi nchaa ñáyiu. Te yòhó sa xìní ndáá-n sǎ ío ní chindee ñaha-dé xii-o cùtnáhá ní xíndecu-o ñúú Éfesú.

## 2

*Tée quide ndáá xínú cuèchi núú Xítóhó Jesucrístú*

<sup>1</sup> Te yòhó téé cùu datná ì<sup>n</sup> déhe mee-í ío nducu ndèe-n cada-n nacuáa níhí ndéé-gǎ-n cùndecu-n ichi Xítóhó Jesucrístú chi diu-gá chindee ñaha-gǎ xii-n.

<sup>2</sup> Te nchaa tnúhu sǎ nǐ dánèhé ñahá-í xii-n ndìhi nchaa dava-gǎ ñáyiu, xǎ<sup>n</sup> danèhé-n dàva-gǎ cue téé quide ndáá cuèndá danèhé-güedé dava-gǎ ñáyiu.

<sup>3</sup> Te cahni iní-n ndòho-n cunu cuechi-n núú Xítóhó Jesucrístú datná cùiní-n ndòho ì<sup>n</sup> sandadú sǎhni iní-dé xínú cuèchi-dé.

<sup>4</sup> Chi ní ì<sup>n</sup> sandadú ñá túú nǎgǎ sání iní-dé cada-dé òré xínú cuèchi-dé cuèndá cudìu-dé núú tèe tàxi tnuní ñahá.

<sup>5</sup> Te diu-ni duca<sup>n</sup> sǎtnahá-xi cùu tucu ì<sup>n</sup> téé dàdiquí, chi núu vá

dádiquí-dé nàcuáa tàú-xi cunduu te vá níhí-dé sǎ ndúú tǎhù-dé.

<sup>6</sup> Te núu ì<sup>n</sup> téé xínu cuechi ío ndècu ndee-dé quidé chùu<sup>n</sup>-dé chíhí-dé tatá, te diu-dé tàú-dé dǐhna-gǎ-dé níhí-dé sǎ cùhú<sup>n</sup> yǎhu-dé.

<sup>7</sup> Te cani iní-n nchàa tnúhu càhá<sup>n</sup>-í-a, te Xítóhó Jesucrístú chindee ñaha-gǎ xii-n te tecú tnùní-n nchàa.

<sup>8</sup> Te ndacu iní-n sǎ Xítóhó Jesucrístú ní cuu-gǎ ñaní tnáhá ndi Dàvií, te ní xíhí-gǎ te ní ndoto-gǎ, te diu duca<sup>n</sup> nduu tnúhu dànehé-í ñáyiu.

<sup>9</sup> Te ío dàndoho ñaha ñáyiu xii-í cuèndá sǎ càhá<sup>n</sup>-í tnúhu-gǎ, te quide ñahá-yu xii-í datná quidè-yu ì<sup>n</sup> téé ní quide ì<sup>n</sup> cuèchi càhnu, chi ní chihi ñahá-yu vecaá xii-í, dico tnúhu Yá Ndiöxí chi vá ndácù-yu nganí-yu.

<sup>10</sup> Te xǎ<sup>n</sup> núu cuèi nándi cùu nchaa sǎ quidé ñahá-yu xii-í, dico quide cahnu iní-í cuèndá sǎ naníhí tǎhù tnáhá nchaa dava-gǎ ñáyiu cùiní Yá Ndiöxí cundecu ndìhi-gǎ, chi nchaa ñáyiu na tnáhá tnúhu ndìhi Xítóhó Jesucrístú nduu tǎhù-yu cundecú-yu ndìhi-gǎ núú ío váha càa ndecu-gǎ ni caa ni quíhí<sup>n</sup>.

<sup>11</sup> Te xéhé cùú-xí ì<sup>n</sup> tnúhu ndáá cuítì:

Nchoo cùu-o datná ñáyiu ní xíhí ndìhi Xítóhó Jesucrístú chi ñá túú-gǎ ndécú-ó ìchi cuehé ichi duha, te xǎ<sup>n</sup> núu cuèi na sǎá nduu cùú-ó ñùyíú-a, dico diu-ni cundecu-o ndìhi-gǎ.

<sup>12</sup> Te núu na cùndee iní-ó ndòho-o nándi sǎ ndóhó-ó sǎ cuèndá-gǎ, te sǎá nduu te cunu-o ndìhi-gǎ.

Te núu na càhá<sup>n</sup>-ó sǎ ñà túú xìní-ó-gǎ, te diu-ni duca<sup>n</sup> cùñaha-gǎ xii-o sǎ ñà túú xìní ñahá-gǎ ná sǎá nduu càda ndáá-gǎ cuèchi nchaa ñáyiu.

<sup>13</sup> Te núu nchoo ñà túú quide ndáá-ó ndècu-o núú-gǎ ñá, dico mee-gǎ chi ío ndáá quidé-gǎ, chi Yá Ndiöxí nchaa sǎ sání iní-gǎ quidé-gǎ.

*Tée quide nacuáa nduu vétú iní Yá Ndiöxí*

14 Te dandàcu iní-n nchàa ñáiyu ndècu ndìhi-o ichi Xítóhó Jesucristú nchaa tnúhu càhá<sup>n</sup>-í-a, te cúñaha-n xíi-yu sá Xítóhó Jesucristú cuíní-gá sá ñà túú-gă nándi tnúhu cútnàhá-yu, chi nchaa tnúhu càhá<sup>n</sup>-yu-á<sup>n</sup> dácuita ni-hnu-xi ñáiyu ndèdóho ñaha xíi-yu, chi ñà túú vèdana nándihi nchaa tnúhu-á<sup>n</sup>.

15 Te ío nducu ndèe-ñ cada ndáá-n cùndecu-n núú Yá Ndiòxí, te cada-n chiú<sup>n</sup>-gá nàcuáa nduu vétú iní-gá, te càhá<sup>n</sup> ndáá-n tnúhu-gá, cuendá sá vă cùcàh<sup>n</sup> núú-n nùú-gă.

16 Te vă cáda cuendá-ñ nchàa tnúhu sá ñà túú vèdana nándihi càhá<sup>n</sup> ñáiyu cuendá Yá Ndiòxí, chi nchaa ñáiyu càhá<sup>n</sup> tnúhu-á<sup>n</sup> ndìhi nchaa ñáiyu sàcúndedóho ñaha xíi-yu uu<sup>n</sup>-gá quidè-yu nchaa sá cuèhé sá dúhá.

17 Te nchaa tnúhu-á<sup>n</sup> cùténuu-xi dàtná quidé ñ<sup>n</sup> cuèhé sá ñàni ñaha xíi ñáiyu xité nuu-xi nihíi yiqui cùñú-yu. Te tnàhá té Himèneú ndìhi té Filetú càhá<sup>n</sup>-güedé tnúhu-á<sup>n</sup> quidé-güedé dàtná quidé ñáiyu-á<sup>n</sup>.

18 Te cue tée-á<sup>n</sup> ñà túú-gă càhá<sup>n</sup> ndáá-güedé dàtná càhá<sup>n</sup> tnúhu Yá Ndiòxí, chi càchí-güedé sá ncháa nchòo ñáiyu ndècu ichi Yá Ndiòxí cúú-ó dàtná cue ñáiyu sa ní ndoto, dico na cùú ndisa-o te vă ndótó-gă-ó càchí-güedé. Te dava ñáiyu ní dáñá-yu sá sàndáá iní-yu tnúhu Yá Ndiòxí sá dúcá<sup>n</sup> càhá<sup>n</sup>-güedé.

19 Te cuèi duca<sup>n</sup> quide davá-yu, dico Yá Ndiòxí ní taxi ndecu-gá cue ñáiyu ni yùhu ni iní ndécú ichi-gá, te cùtnuní sá ndécú ndìhi ñaha-gá xíi-yu, chi ñ<sup>n</sup> xichi núú tütú-gá càchí-xi sá mée-gă xíní-gá cue ñáiyu cùu cuendá-gá. Te ñngá tucu xichi núú tütú-gá càchí-xi sá ncháa ñáiyu sàndáá iní ñáhá xíi Xítóhó Jesucristú xíní ñùhu-xi sá vă cùndècu-gá-yu ichi cuèhé ichi duha.

20 Te ñáiyu cuica chi ndècu ndìhi-yu vehé-yu cóhó sá ñi cuáha mee-ni dñhú<sup>n</sup> cuáá<sup>n</sup>, ndìhi cóhó sá ñi cuáha mee-ni dñhú<sup>n</sup> cuixí<sup>n</sup>, te nchaa cóhó-á<sup>n</sup> cúú-xí dàtná cue ñáiyu ñà túú ñà cùmáñi nùú Yá Ndiòxí. Te ndècu ndìhi tucú-yu cóhó sá ñi cuáha mee-ni ñùhu, ndìhi cóhó sá ñi cuáha mee-ni

yùtnu, te nchaa cóhó-á<sup>n</sup> cúú-xí dàtná cue ñáiyu ñà túú quide ndáá núú Yá Ndiòxí.

21 Te nchaa ñáiyu ío ndècu yiñuhu núú Yá Ndiòxí cúú-yu ñáiyu ñà túú nihí tnàhá ndìhi cue ñáiyu ñà túú quide ndáá núú-gă, te cue ñáiyu ndècu yiñuhu núú-gă-á<sup>n</sup> ñà túú tnàhí quée cáva-yu quidé-yu nchaa chiú<sup>n</sup> tahu-gá.

22 Te ío cada cuendá-n vă cáda-n nàcuáa quide cue tée cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiòxí, te quindáá iní-n-gă, te cuu iní-n nchàa tnaha ñáiyu-n, te cundecu nahi-n, chi duca<sup>n</sup> tàú-xi cada-n ndìhi nchaa dava-gá ñáiyu sa ní nduu ndoo ní nduu nine iní-xi ñáiyu càhá<sup>n</sup> ndìhi ñaha xíi Yá Ndiòxí.

23 Te vă cáda cuendá-n ñ<sup>n</sup> tnúhu xítñaha ñáiyu chi ñà túú vèdana nándihi-xi, chi núu na càda cuendá-ó te dicó dánáá ñáhá-xí.

24 Chi nchaa cue tée xínu cuechi núú Yá Ndiòxí xíní ñùhu-xi càhá<sup>n</sup> vaha-güedé ndìhi nchaa ñáiyu, te danèhé ñáhá vaha-güedé tnúhu-gá, te cunduu càhnu iní-güedé te vă nàá-güedé.

25 Te vii vii càhá<sup>n</sup>-güedé dóho nchaa ñáiyu sàá iní-xi, ñáiyu ñà túú tnàhá iní tnúhu ndáá tnúhu Yá Ndiòxí, te duca<sup>n</sup> te cudana Yá Ndiòxí cada-gá te ndixi túu iní-yu sá ñà túú quide vaha-yu ndècú-yu te quindáá iní-yu tnúhu-gá.

26 Te duca<sup>n</sup> te cutnùní iní-yu sá sàcuíhná cùnùu-xi taxi tnuní ñáhá-xí xíi-yu, chi dàcahu iní ñáhá-xí xíi-yu quidé-yu nchaa nàcuáa cùu iní-xi ni cùu.

### 3

*Nàcuáa cada ñáiyu òré sa ta cùyatni sáá nduu quixi tucu Xítóhó Jesucristú*

1 Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quixi tucu Xítóhó Jesucristú, chi dàvá-á<sup>n</sup> ío cada úhú-xi.

2 Chi ngüíta ñáiyu cuhu<sup>n</sup> iní-yu mee-ni sá cúú-xí mée-yu, te cuhu<sup>n</sup> iní-yu mee-ni dñhú<sup>n</sup>, te ío cada càhnú-yu mée-yu, te cunduu yíchí

iní-yu, te cáhá<sup>n</sup> cuèhé-yu cuendá Yá Ndiöxí, te vá quindáá-gá iní-yu ni tātá-yu ni nānā-yu, te ni vā ndacá<sup>n</sup> táhú núú tnáhá-yu cuendá nchaa sá vāha cada tnáhá-yu, te cadá-yu mee-ni sá ñà túú tnáhá iní Yá Ndiöxí.

<sup>3</sup> Te vá cúú iní tnáhá ndí meé-yu, te nāá-yu te vá cuánāá-yu, te tee tnáhá-yu cuéchi neñúú, te vá cuánāá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnáhá iní-yu nchaa sá vāha.

<sup>4</sup> Te dayuhu cuāha cuendá tnáhá-yu núú cuè téé cūchiu<sup>n</sup>, te ío cunduu yí iní-yu cadá-yu nāndi sá ñà túú vāha, te ío cada nínu-yu mēé-yu, te mee-ni nchāa sá cúdí iní-yu cadá-yu, te vá cúdí iní-yu nanducu nihnú-yu Yá Ndiöxí.

<sup>5</sup> Te quesāhá-yu sá tnáhá-yu ndécú-yu ichi Yá Ndiöxí dico vá cadá-yu nchaa nācuāa cāhá<sup>n</sup>-gá.

Te yúhú cāchí tnúhu-í xii-n sá vā nihí tnáhá-n ndíhi nchaa ñáyiu duca<sup>n</sup> quide.

<sup>6</sup> Te dava ñáyiu-á<sup>n</sup> quíhí<sup>n</sup>-yu dava vehe núú xīndecu ñáyiu, te ngúita-yu dandāhú-yu ñáyiu dīhí ñà túú xini dana cuendá Yá Ndiöxí, te ñáyiu dīhí-á<sup>n</sup> cúú-yu ñáyiu ndècu vihi cuéchi-xi, chi ío cūdí iní-yu quidé-yu nchaa nāni sá cuèhé sá dúhá sàni iní-yu.

<sup>7</sup> Te cuéi ío dācuahá-yu, dico ñà túú cūtnuní iní-yu nāsa cuāhá<sup>n</sup> tnúhu ndāá tnúhu Yá Ndiöxí.

<sup>8</sup> Te ñáyiu duca<sup>n</sup> dāndahú ñáhá xii cue ñáyiu dīhí-á<sup>n</sup> ñà túú cāhá<sup>n</sup> vāha-yu cuendá tnúhu Yá Ndiöxí, chi quidé-yu datná ní quide ndíi Jānés ndíhi ndíi Jāmbrés chi cue ndíi-á<sup>n</sup> ñà túú ní cūú vāha iní cue ndíi núú ndíi Moisés cuendá tnúhu ní cáhá<sup>n</sup> ndíi. Te ñáyiu-á<sup>n</sup> cúú-yu ñáyiu sàni iní mee nīne-ni nchaa sá cuèhé sá dúhá, te cuéi cāchí-yu sá sāndāá iní-yu Yá Ndiöxí dico ñà ndāá sá sāndāá iní ñáhá-yu xii-gá.

<sup>9</sup> Dico vá ndácú-gā-yu dandāhú-yu vai ñáyiu, chi nchaa ñáyiu cutnūnī

iní-yu sá ío nī dīquī-yu, te ñà túú cāhá<sup>n</sup> ndāá-yu datná ní quide cue téé úú ñà túú ní tnáhá iní tnúhu ní cáhá<sup>n</sup> ndíi Moisés.

#### *Té Pāblú dāsāhú-dé té Timùteú*

<sup>10</sup> Te yòhó quidé-n nchāa nacuāa ní dānehé ñáhá-í xii-n, te ní xiní-n nchāa nacuāa quide-í ndécú-í, te cūtnuní iní-n nācuāa sàni iní-í ndécú-í ñuyiú-a, te xini-n sá ío sāndāá iní-í Yá Ndiöxí, te ío cāhnu iní-í, te cūú iní-í nchaa ñáyiu, te xiní tucu-n sá ío quide cāhnu iní-í cuéi nāndi sá yāha-í ndécú-í dico ñà túú dāña ndeé-í ichi-gá.

<sup>11</sup> Te ío vai sá quidé ñāha ñáyiu xii-í dāndòho ñahá-yu sá ndécú-í ichi Xitohó Jesucristú, te sa nāha tucu-n datná ní quide ñahá-yu xii-í cūtnáhá ní xīndecu-í ñuú Antiòquiá, ndíhi ñuú Ìconiú, ndíhi ñuú Lìstrá, chi ío ní dāndóhó ñahá-yu xii-í sá cuendá-gá. Dico Xitohó Jesucristú ío ní xito ñaha-gā xii-í te ní chindee ñāha-gá cuéi nāndi cūú sá ñi yāha-í.

<sup>12</sup> Te na cāchí tnúhu ndāá-í xii-n sá ío vai sá ñà túú vāha cada ñāha ñáyiu xii nchaa ñáyiu cūnī sá ñà túú nā cumānī núú Yá Ndiöxí cuendá sá ndécú ndíhi-yu Xitohó Jesucristú.

<sup>13</sup> Dico dava ñáyiu cāchí-yu sá cāhá<sup>n</sup>-yu tnúhu Yá Ndiöxí te ñà ndāá sá cāhá<sup>n</sup>-yu tnúhu-gá, ñáyiu-á<sup>n</sup> uu<sup>n</sup>-gá cuita cada-gā-yu nchaa sá cuèhé sá dúhá quíhí<sup>n</sup>, te duca<sup>n</sup>-ni ío dandāhú tnáhá-yu.

<sup>14</sup> Te yòhó chi ío vāha ní sāndāá iní-n tnúhu Yá Ndiöxí sá dācuāha-n, te vitna cāhá<sup>n</sup>-í dóho-n sá vā dāñā ndeé-n quindāá iní-n tnúhu-á<sup>n</sup>, te yòhó sa nāha-n ná cúú ñáyiu ní dānehé ñáhá xii-n tnúhu-gá.

<sup>15</sup> Te yòhó chi ndeé cūtnáhá cúú lāndú-n ñi ngúita-n dācuāha-n tnúhu ndeé núú tūtú Yá Ndiöxí, te dīu-ni nchaa tnúhu-gá canu ichi ñaha-xi xii-n te naníhí tāhú-n, chi sāndāá iní-n Xitohó Jesucristú.

<sup>16</sup> Te nchaa cue téé ní tee tnúhu Yá Ndiöxí, chi dīu-ni mee-gā ní dācāhú iní ñáhá-gā xii-güedé nācuāa tee-güedé, te tnúhu-gá ío vāha dacuāha-o nchaa dava-gā ñáyiu, te

càhá<sup>n</sup>-xi dóho-o sã vã cùndècu-gá-ó ìchi cuehé ichi duha, te núu ñá túú quìde ndáá-ó ndècu-o te nàcanu ichi ñaha-xi, te dànehé ñáhá-xí nàcuáa cada-o cùndáá-ó núú Yã Ndiõxí.

<sup>17</sup> Te ñu-ni tnúhu-gá dátũha ñaha vãha-xi xii nchoo cuè ñáyiú ndècu ndìhi-gá cuèndá cada-o nchàa núú sã vãha.

#### 4

<sup>1</sup> Te Xítóhó Jesucristú quixi-gá taxi tnùnì-gá ñuyíú-a, te cada ndáá-gá cuéchi nchaa ñáyiú sa ní xíhí, ndìhi cuéchi nchaa ñáyiú xĩndecu vívú. Te mee-gã ndìhi Yá Ndiõxí nánhá-gã sã ño càhá<sup>n</sup>-í dóho-n vitna

<sup>2</sup> sã ño dacuàha-n ñáyiú tnúhu-gá, te vã dáñá ndèé-n dàcuahá-n-yu ndèda-ni càa oré cuèi ñá túú cuiní-yu cundedóho-yu, te nchaa ñáyiú ñá túú cuiní cada ndáá cúñaha ndáá-n nchàa nacuáa quìde-yu. Te cúñaha tùcu-n xii-yu sã vã dúcá<sup>n</sup>-gã cadá-yu, te cáhá<sup>n</sup>-n dóho-yu cuèndá cada ndáá-yu cundecú-yu. Te ío cunduu cahnu iní-n òré cáhá<sup>n</sup>-n dóho-yu, te ío dacuàhá-n-yu tnúhu-gá.

<sup>3</sup> Chi sáa nduu te vã càchí-gá-yu cundedóho-yu nchaa tnúhu sã sánú ìchi ñaha cundecu vãha-o núú Yã Ndiõxí, chi mee-nã nchaa sã cúdí ìní mée-yu cundedóho-yu, te ndúcú-yu cue téè danèhé ñáhá xii-yu nchaa tnúhu cùu iní-yu-á<sup>n</sup>.

<sup>4</sup> Te vã cadá cuèndá tnàhí-gá-yu tnúhu ndáá tnúhu Yá Ndiõxí, chi mee-nã tnúhu sã ñà túú nàndìhi cada cuèndá-yu.

<sup>5</sup> Dico yòhó ío quíhi iní-n cùndecu-n, te cahni iní-n cuèi nándi na ndòho-n, te dacuàha-ni-n ñáyiú tnúhu Yá Ndiõxí, ñáyiú vátá quìndáá iní ñáhá-gã xii-gá, te cada-ni-n nchàa chiu<sup>n</sup> ní táhú-gã cada-n.

<sup>6</sup> Te yúhú sa ñuhu ichi-ná-í quíhí<sup>n</sup>-í núú ndécú Yã Ndiõxí cundecu-í, chi sa ní cuyatni cahni ñaha-güedé xii-í cuèndá sã xínú cuèchi-í núú-gã.

<sup>7</sup> Te ní quide-í nchaa chiú<sup>n</sup> ní táhú Yã Ndiõxí cada-í te vitna ní xínu cava nchaa chiú<sup>n</sup> ní táhú-gã-á<sup>n</sup> ñí quide-í, te ñá túú ní dàña ndeé-í ní sándáá

iní-í-gá, te duca<sup>n</sup>-ni sándáá iní-í-gá ndeé vitna.

<sup>8</sup> Te vitna sa ndècu túha-ná sã ndúú tãhù-í cuèndá sã quìde ndáá-í núú Yã Ndiõxí, te Xítóhó Jesucristú taxi-gá táhú-ã<sup>n</sup> nduu táhù-í ná sáa nduu, chi cùu-gá ñ<sup>n</sup> Yaá quìde ndáá cuiti, te ñá díú-ní yúhú taxi-gá táhú-ã<sup>n</sup> cuu cuèndá-í, chi tnàhá nchaa ñáyiú ndètu cahnu-ná sáa nduu quixi tucu-gá ñuyíú-a cuáñaha-gã táhú-ã<sup>n</sup> nduu táhù-yu.

#### *Chiú<sup>n</sup> tahu té Pãblú cada té Timùteú*

<sup>9</sup> Te cuiní-í sã ño ndìhi quixi-n quixi coto ñaha-n xii-í.

<sup>10</sup> Chi té Dêmás ñá túú-gã quìde cuèndá ñáhá-dé xii-í, chi mee-nã nchaa sã ño ñuyíú-a ío cùdí ìní-dé. Te ní dándõo ñaha-dé cuáhá<sup>n</sup>-dé ñuu Tesalónica, te té Crèscenté cuáhá<sup>n</sup>-dé cundecu-dé distritú Gàlaciá, te té Titú cuáhá<sup>n</sup>-dé cundecu-dé distritú Dalmaciá.

<sup>11</sup> Te ñ<sup>n</sup>dii-ná té Lùcá ndécú ndìhi ñaha-dé xii-í, te cúñaha-n xii té Mácú quixi-n ndìhi-dé, chi téè-á<sup>n</sup> ndacu-dé cada-dé ñ<sup>n</sup> chiú<sup>n</sup>-í.

<sup>12</sup> Te té Tiquicú ní tendaha-í-dé cuáhá<sup>n</sup>-dé ñuu Éfesú.

<sup>13</sup> Te òré quixi-n te yáha-n vèhe té Càrpú cáá ñuu Tròás canehe-n ñ<sup>n</sup> dóo tĩcachi ní dándõo-í vehe-dé quixi, ndìhi nchaa lìbrú-í, te tnàhá nchaa dava-gá tutú-í ndécú vèhe-dé canehe-n quixi chi xíã<sup>n</sup> ío-gá xíní ñuhu-í.

<sup>14</sup> Te té Lijandrú téè cùu rerú ío vài sã ñà túú vãha ní cuu quide ñaha-dé xii-í, dico mee Yã Ndiõxí nánhá-gã nása cada ñaha-gã xii-dé cuèndá sã dúcá<sup>n</sup> quide-dé.

<sup>15</sup> Te vã ñíhí tnàhá-n ndìhi-dé chi ío càhá<sup>n</sup> cuèhé-dé cuèndá nchaa tnúhu càhá<sup>n</sup>-ó.

<sup>16</sup> Te cútnàhá ndécá ñaha-güedé xii-í ní sáhá<sup>n</sup> núú cuè téè cùchiú<sup>n</sup> xito díhna nuu, chi mee ñí ní sáhá<sup>n</sup> te ñá túú ní sáhá<sup>n</sup> ní ñ<sup>n</sup> cue téè cùndìhi-í, chi nchaa-güedé ní dándõo ñaha-güedé xii-í, te yúhú xicá<sup>n</sup> táhù-í núú Yã Ndiõxí sã vã cadá cuèndá-gá sã dúcá<sup>n</sup> ñí quide-güedé.

<sup>17</sup> Dico Xítoho Jesucristú ní chindee ñaha-gá xii-í, chi ní taxi-gá tnúhu ndee iní ní cáhá<sup>n</sup>-í tnúhu-gá nàcuáa tàú-xi cunduu núú cuè téé-á<sup>n</sup> ndihi núú nchàa ñáyiú, dico ñá díú ñáyiú isràél cúú-yu, te ñu-gá ní dácăcu ni-hnu ñaha-gă xii-í ñá túú ní sàhni ñaha-güedé.

<sup>18</sup> Te mee Xítoho Jesucristú coto ñaha-gă xii-í te ñá túú nă cuu cuèi nándi sá ná cádá ñaha ñáyiú xii-í te ñu-ni-gá coto ñaha-gă xii-í ndéé ná sàá nduu sǎá-í andiú núú ndécú-gă táxi tnùn-í-gá. Te nchaa-o chí ná càchí-ó sǎ ïo càhnu cuu-gá ni caa ni quíhí<sup>n</sup>. Te duca<sup>n</sup> na cùnduu.

*Tnúhu ndéé núú ní ndihi-ná*

<sup>19</sup> Te ïo cúñaha-n na càda ndee iní tá Priscá, ndihi té Aquilú, ndihi cue ñáyiú cùu ndi mee té Onèsíforó.

<sup>20</sup> Te té Èrastú ní quendóo-dé ñuú Còrintú, te té Trófimú ní dándóo-í-dé ñuú Miletú chi cùhú-dé.

<sup>21</sup> Te ïo cundihí iní-n quixi-n oré vátá sàá-gá yóó quidé víxi<sup>n</sup>-xi. Te ïo cada ndee iní-n càchí té Èúbulú, ndihi té Pudenté, ndihi té Línú, ndihi tá Claudiá, ndihi nchaa dava-gá ñáyiú sàndáá iní tnúhu Xítoho Jesucristú.

<sup>22</sup> Te xicá<sup>n</sup> táhù-í núú Xítoho Jesucristú sá ná cùndecu ndihi ñaha-gá xii-n ndihi nchaa dava-gá-yu. Te duca<sup>n</sup> ïo na chindee chitúu ñaha-gă xii-ndo nchàa-ndo. Te duca<sup>n</sup> na cùnduu. Te ïo chí cádá ndèe iní-nă vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA TÉ TITÚ

*Té Päblú cadúha-dé tutú quihi<sup>n</sup>  
ndaha té Titú*

<sup>1</sup> Yúhú té Päblú xínú cuèchi-í núú Yă Ndiöxí, te ðiu-gá ní tendaha ñaha-gá xii-í cáhá<sup>n</sup>-í tnúhu Xítóhó Jesucristú núú ñáyiú cuèndá quíndáá iní nchaa ñáyiú ní cachí Yă Ndiöxí naníhí tǎhú, ndíhi cuèndá sá təcú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá.

<sup>2</sup> Te yúhú dácuàha-í-yu tnúhu-gá cuèndá cundecu ndíhi-yu tnúhu ndee iní sá cündecu ndíhi-yu Yă Ndiöxí ní caa ní quihi<sup>n</sup>, chi ndéé cútnàhá vátá ngáva-gá ñuyíú-a ní cachí-gá sá cündecu ndíhi ñaha-gá xii-yu, te ñá túú dándahú ñáhá-gǎ, chi quide-gá ñ<sup>n</sup> sá cáhá<sup>n</sup>-gá.

<sup>3</sup> Te ní sáá nduu ñí cachí-gá sá nihí-yu tnúhu nàcuáa cuáhá<sup>n</sup> tnúhu-gá, te ðiu-ni tnúhu-á<sup>n</sup> ñí cachí Yă Ndiöxí Yaá dácácu nihnu ñaha xii-o núú ùhú núú ndàhú sá dácuàha-í ñáyiú.

<sup>4</sup> Te tutú-a cadúha-í cuèndá daquixi-í ndaha yòhó té Titú, téé ní sanu ichi ndisa-í ichi Xítóhó Jesucristú, chi ñ<sup>n</sup>-ni tnúhu sándáá iní-ó. Te xicá<sup>n</sup> táhú-í núú Tátá-ó Dütú Ndiöxí sá ïo na chindee chitúu ñaha-gǎ xii-n, te ðiu-ni-gá ná càda te ïo váha cuu iní-n cündecu-n. Te xicá<sup>n</sup> táhú tucu-í núú Xítóhó Jesucristú Yaá dácácu nihnu ñaha xii-o núú ùhú núú ndàhú sá ðíú-ní ðuca<sup>n</sup> na cada ñaha-gá xii-n.

*Chiu<sup>n</sup> quide té Titú ðistritú Crétá*

<sup>5</sup> Te yúhú ní dándóo ñaha-í xii-n ðistritú Crétá, chi cuíní-í cada-n nchaa chiu<sup>n</sup> cumání, te cuíní-í taxi ndecu-n cuè téé quíndaha ñaha xii cue ñáyiú sándáá iní tnúhu Yă Ndiöxí xíndecu ñ<sup>n</sup> ñ<sup>n</sup> ñúú yíndèhu ðistritú-á<sup>n</sup>, te cada-n nàcuáa ní cachí-í cada-n.

<sup>6</sup> Te cue téé cada chiu<sup>n</sup>-á<sup>n</sup> xíní ñúhu-xi cuu-güedé mee-ni cuè téé ïo váha quide ndáá nàcuáa vá yóo cáhá<sup>n</sup> dóho-güedé, te na cù-güedé cue téé ndècu ñ<sup>n</sup> dii-ni ñadíhí-xi. Te duca<sup>n</sup> nchaa landú-güedé ná cù-güexi landú sándáá iní ñáhá xii Yă Ndiöxí cuèndá sá vá yóo cuatnuñaha xii-güexi quesahá-yu sá ïo sàá iní-güexi te quide-güexi nándi sá ñà túú táu-güexi cada-güexi.

<sup>7</sup> Chi xini ñúhu-xi sá ncháá cuè téé quíndaha ñaha xii ñáyiú sándáá iní tnúhu Yă Ndiöxí ïo cundecu yíñúhu-güedé, chi duca<sup>n</sup> táu-xi cada nchaa cue téé quide chiu<sup>n</sup> Yă Ndiöxí, te xini ñúhu tucu-xi sá vá cúú-güedé cue téé ñí iní-xi, te ni vá cúú-güedé cue téé líhli iní-xi, te ni vá cúú-güedé cue téé quihu, te ni vá cúú-güedé cue téé plètú, te ni vá cúú-güedé cue téé ðicó-ni duca<sup>n</sup> ñíhí ðíhú<sup>n</sup>.

<sup>8</sup> Te xini ñúhu-xi cuu-güedé cue téé sǎñaha núu vehe ndetatú cue ñáyiú ñúhu ichi, cue téé quide váha sá cúú-xí tnàha ñáyiú-xi, cue téé ïo váha cùtnuní iní-xi nàcuáa cada cundecu ñuyíú-a, cue téé quide ndáá xíndecu, cue téé quide nchaa nàcuáa nduu vétú iní Yă Ndiöxí, cue téé xito mee-xi ñá túú quide cutexínu.

<sup>9</sup> Te na cù-güedé cue téé ïo váha sándáá iní tnúhu váha tnúhu Yă Ndiöxí sá ñí dánèhé ñáhà-í xii-ndo cuèndá duca<sup>n</sup> te cue téé-á<sup>n</sup> ndacu-güedé cáhá<sup>n</sup>-güedé dóho ñáyiú cuèndá cáda-yu nchaa nàcuáa cáhá<sup>n</sup> Yă Ndiöxí, te níhí-güedé tnúhu cáhá<sup>n</sup> váha-güedé núú nchaa ñáyiú dàquee tíhú tnúhu Yă Ndiöxí, te mee-ni cuè téé duca<sup>n</sup> quide váha taxi ndecu-n quíndaha-güedé ñáyiú sándáá iní tnúhu-gá.

<sup>10</sup> Te na càhí tnúhu-í xii-n sǎ vái ñáyiú sáá iní-xi ïó, te cáhá<sup>n</sup>-yu mee-ni tnúhu sá ñà túú nándíhi, te dándahú-yu tnàhá ñáyiú-yu, te ñáyiú isráel ïo-gá vai-yu duca<sup>n</sup> xíquide.

<sup>11</sup> Te nchaa ñáyiú duca<sup>n</sup> xíquide xini ñúhu-xi nducu-o tnúhu cúñaha-o xii-yu cuèndá cadí-yu yuhú-yu, chi dānehé-yu dava-gá ñáyiú ñ<sup>n</sup> sá ñà túú

tàú-yu dacuàhá-yu, te duca<sup>n</sup> quidé-yu cuendá-ni sá nihí-yu díhú<sup>n</sup>, te ío títní xichi ní cuu dāndahú-yu nchaa ñáyiú xīndecu ñ<sup>n</sup>-ni vèhe.

<sup>12</sup> Te ní cachí ñ<sup>n</sup> tée ío váha sàá díquí-xi ndècu mei ñuú distritú Crètá sá ncháá ñáyiú ñuú-dé-á<sup>n</sup> ío ndèhdé-yu, te ío cuihna iní-yu, te ío vài xexí-yu, te cùhdú-yu.

<sup>13</sup> Te ndáá ní cáhá<sup>n</sup>-dé chi duca<sup>n</sup> quidé-yu, te xiá<sup>n</sup> ío cáhá<sup>n</sup>-n dōho-yu cuendá sá ná quíndáá váha iní-yu tnúhu Yá Ndiǒxí.

<sup>14</sup> Te cúñaha-n xí-yu sá vǎ cáda cuendá-yu nchaa tnúhu ndehnde càhá<sup>n</sup> ñáyiú isràél, te ni vǎ cáda cuendá-yu nchaa tnúhu càhá<sup>n</sup> ñáyiú ñá túú cuení quíndáá iní tnúhu Yá Ndiǒxí.

<sup>15</sup> Te nchaa sá ñí cadúha Yá Ndiǒxí ío ñuyíú-a cùu-xi mee nine-ni sá vǎha sá cúu-xí nchaa ñáyiú sa ní nduu ndoo ní nduu nine iní-xi ndècu ichi Yá Ndiǒxí. Dico nchaa sá ñí cadúha-gá ñá túú cùu-xi sá vǎha sá cúu-xí nchaa ñáyiú ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sǎ cuèhé sá dúhá ñuhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu.

<sup>16</sup> Te càchí-yu sá sàndáá iní-yu Yá Ndiǒxí, dico nchaa sá quidè-yu-á<sup>n</sup> càchí tnùní-xi sá ñǎ ndáá. Te Yá Ndiǒxí chi duu<sup>n</sup> duu<sup>n</sup> ñá túú tnàhá iní-gá nchaa nàcuáa quidé-yu, chi ío sàá iní-yu, te ñá túú quidé-yu ni ñ<sup>n</sup> sá vǎha.

## 2

### *Tnúhu váha tnúhu Yá Ndiǒxí*

<sup>1</sup> Te yòhó òré dánèhé-n ñáyiú, te danèhé-n-yu mee-ni nàcuáa càhá<sup>n</sup> tnúhu váha tnúhu Yá Ndiǒxí.

<sup>2</sup> Te nchaa cue tée cùu sacuéhé ná càda cuendá-güedé vǎ cáda cùtexínu-güedé cundecu-güedé, te na cùndecu yíñuhu-güedé, te na cuǎha váha-güedé cuendá nàcuáa cada-güedé cundecu-güedé, te na quíndáá váha iní-güedé Yá Ndiǒxí, te na cùu iní-güedé tnàhá ñáyiú-güedé, te

na cùnduu cahnu iní-güedé cuèi nándi sá ná yǎha-güedé.

<sup>3</sup> Te vitna càhá<sup>n</sup> tucu-í sá cúu-xí nchaa ñáyiú díhí ñáyiú cùu sacuéhé sǎ ná cùndecu yíñuhu-yu, te vǎ cúu-yu ñáyiú yiti yùhu-xi, te ni vǎ cúu-yu ñáyiú quihu, te na dānehé-yu nchaa dava-gá ñáyiú cada váha-yu.

<sup>4</sup> Te na dāsahú-yu nchaa ñáyiú díhí ñáyiú cuechi cuendá ná cùu iní-yu yí-yu, ndihí cue landú-yu,

<sup>5</sup> ndihí cuendá sá ná càni váha iní-yu nàcuáa cundecu-yu, ndihí cuendá sá vǎ càni iní-yu cada-yu ni ñ<sup>n</sup> sá cuèhé sá dúhá, ndihí cuendá sá ná càda-yu nchaa chiú<sup>n</sup> ñuhu vehé-yu, ndihí cuendá sá cáda vǎha-yu nchaa tnàhá ñáyiú-yu, ndihí cuendá sá ná cáda-yu nchaa nàcuáa càhá<sup>n</sup> yí-yu, te duca<sup>n</sup> xini ñuhu-xi cada-yu cuendá sá vǎ yòo cáhá<sup>n</sup> cuèhé cuendá tnúhu Yá Ndiǒxí. Duha cúñaha-n xii cue ñáyiú díhí ñáyiú cùu sacuéhé cuendá duca<sup>n</sup> dāsahú-yu nchaa ñáyiú díhí ñáyiú cuechi.

<sup>6</sup> Te yòhó cáhá<sup>n</sup>-n dōho nchaa cue tée cuechi cuendá sá ná càni váha iní-güedé nàcuáa cundecu-güedé,

<sup>7</sup> te cada-n mèe-ni sá vǎha cuendá duca<sup>n</sup> cànchicú<sup>n</sup> nihnu-güedé cada-güedé, te òré danèhé-n-güedé te ío váha cuu iní-n dānehé-n-güedé, te ndihí tnúhu yíñuhu cáhá<sup>n</sup> ndihí-n-güedé.

<sup>8</sup> Te cáhá<sup>n</sup>-n mèe-ni tnúhu váha, te duca<sup>n</sup> te vǎ yòo ñ<sup>n</sup> cáhá<sup>n</sup> cuèhé cuendá tnúhu càhá<sup>n</sup>-n, te nchaa ñáyiú cùu úhú iní ñáhá xii-o cucaha<sup>n</sup> núu-yu, te vǎ nihí-yu tnúhu cáhá<sup>n</sup> cuèhé-yu cuendá-ó.

<sup>9</sup> Te ío cáhá<sup>n</sup>-n dōho nchaa cue tée xinu cuechi sá ná quíndáá iní-güedé cada-güedé nchaa chiú<sup>n</sup> tahu patrón-güedé nàcuáa cudù-güedé núu cuè tée-á<sup>n</sup>, te vǎ càhá<sup>n</sup> sàá iní-güedé.

<sup>10</sup> Te vǎ càni iní-güedé duhu-güedé, te cada ndáá-güedé cuendá sá ñá túú nǎ cani iní ñáhá cuè patrón-güedé, te duca<sup>n</sup> te cutnùní iní ñáyiú sá tnúhu Yá Ndiǒxí ío váha dānehé ñáhá-xí nàcuáa cada-o cùndecu-o, te diu-gá cúu-gǎ Yaá dácǎcu nihnu ñaha xii-o núu úhú

núú ndàhú.

<sup>11</sup> Te nchoo ñi cutnùní iní-ó sã Yã Ndiõxí ío cùndahú iní-gá nchaa nchoo ñãyiú ndècu ñuyíú-a, te ní taxi-gá tnúhu ndee iní sá nánihí tãhú nchaandi túhú ñãyiú te núu na quèndáá iní ñáhã-yu xii-gá.

<sup>12</sup> Te ní cachí-gá sá dáñá-ó nchàa ichi cuehé ichi duha chi ñá tnàhá iní-gá cundecu-o ìchi-án, te vã ío cuhu<sup>n</sup> iní-ó nchàa sá ío ñuyíú-a, te ní cachí tucu-gá sá ío cani iní-ó nàcuáa cundecu-o vitna ndecu-o ñuyíú-a te cada ndáá-ó cundecu-o cuendá nduu vétú iní-gá.

<sup>13</sup> Te cundetu-o sãá nduu càhnu vihi, nduu quixi tucu Xitohó Jesucristú Yáa cúú Ndiõxí-ó, te ñiu-gá ní dácãcu nihnu ñaha-gã xii-o núú ùhú ndàhú. Te nduu-ã<sup>n</sup> ío cudíí iní-ó.

<sup>14</sup> Te mee-gã ní xihí-gá chi duca<sup>n</sup> ñi cuiní-gá cunduu, te duca<sup>n</sup> ñi quide-gá cuendá nchoo vã cùndècu-gá-ó ìchi cuehé ichi duha, te nduu ndoo nduu nine iní-ó, te duca<sup>n</sup> te cuu-o cuè ñãyiú quindaha-gã, te ñi yùhu ñi iní-ó càda-o mee-ñi sã vãha.

<sup>15</sup> Te nchaa tnúhu-á<sup>n</sup> danèhé-n-yu te cúñaha-n xii-yu nàcuáa cadá-yu, te cáhá<sup>n</sup>-n dõho-yu te núu ñá túú quide ndáá-yu. Te cada-n sã cúú-n ñi<sup>n</sup> téé xínu cuechi núú Yã Ndiõxí, te vã dáñá-n mèe-n daquee tíhú ñáhã ñãyiú xii-n.

### 3

*Nchaa sá tàú ñãyiú ndècu ichi Yá Ndiõxí cadá-yu*

<sup>1</sup> Te cúñaha-n xii-yu sá ná quèndáá iní-yu cadá-yu nchaa nàcuáa cáhá<sup>n</sup> nchaa cue téé cùchiu<sup>n</sup>, te tàú-yu chindee ñáhã-yu xii-güedé nchaa chiú<sup>n</sup> váha quide-güedé.

<sup>2</sup> Te vã cáhá<sup>n</sup> cuèhé-yu cuendá ñãyiú, te vã cùndùu pletú-yu, te na cúú-yu ñãyiú ndàhú iní-xi, te na cùndahú iní-yu nchaa tnàha ñãyiú-yu.

<sup>3</sup> Te tnàhá-ó ñi xóo cada-o dàtná quidé ñãyiú-á<sup>n</sup> vitna, chi ío ñi díquí-ó chi ñá tècú tnùn-ó nàcuáa cáhá<sup>n</sup> tnúhu Yá Ndiõxí ní cùu, te ío ní xínduu sãá iní-ó núú-gã, te ní xíndecu-o ñi<sup>n</sup> ichi

sá ñã túú tàú-ó cùndecu-o ni cuu, te nándi sá cuèhé sá dúhá ío ñuyíú-a ní xóo cudíí iní-ó ñi xóo cada-o chi ní xóo taxi tnùn-ó ñáhã-xí xii-o, te ní xóo cada cuèhé ní xóo cada duha-o ni cùu, te ní xíndecu-o ìchi cuedú iní, te cuendá nchaa sá ñi xóo cada-o-ã<sup>n</sup> xíã<sup>n</sup> ío ní xóo cuu úhú iní ñáhã ñãyiú xii-o, te duca<sup>n</sup>-ni nchòo tucu ní xóo cuu úhú iní-ó-yu.

<sup>4</sup> Te Yá Ndiõxí Yáa ní dácãcu nihnu ñaha xii-o núú ùhú núú ndàhú ní dándixí túu-gá iní-ó nàcuáa cutnùní iní-ó sã ío váha iní-gá, te cùu iní ñáhã-gã xii nchaa nchoo ñãyiú ndècu ñuyíú-a.

<sup>5</sup> Te Yá Ndiõxí ní dácãcu nihnu ñaha-gã xii-o núú ùhú núú ndàhú, dico ñá díú cuendá ñi<sup>n</sup> sá vãha quide-o ndecu-o ñuyíú-a duca<sup>n</sup> ñi quide-gá, chi mee-gã duca<sup>n</sup> tnàhí ní cundàhú iní ñáhã-gã xii-o. Te ní nduu ndoo ní nduu nine iní-ó, te ní cuu-o dàtná ñi<sup>n</sup> ñãyiú saa, chi Espiritú Yá Ndiõxí duca<sup>n</sup> ñi quide ñaha-xi xii-o.

<sup>6</sup> Te Espiritú-gá ní taxi-gá ñi yùhu ñi iní-gá ndécú ndíhi-o, te duca<sup>n</sup> ñi quide-gá chi ní sándáá iní-ó Xitohó Jesucristú Yáa ní dácãcu nihnu ñaha xii-o núú ùhú núú ndàhú.

<sup>7</sup> Te ío cùndahú iní ñáhã-gã xii-o núu sa ní quide ndáá-gá cuèchi-o te ní cuu-o ñehe-gá, núu xíã<sup>n</sup> vitna ndètu-ná-ó sãá nduu nduu táhú-ó cundecu-o ndíhi-gá ñi caa ñi quíhí<sup>n</sup>.

<sup>8</sup> Te tnúhu ní cáhá<sup>n</sup>-í-a cùu-xi tnúhu ndáá cuiti, te cùn-í sá ñi yuhu ñi iní-n cáhá<sup>n</sup>-n tnúhu-gá núú-yu cuendá sá ncháá ñãyiú sándáá iní ñáhã xii Yá Ndiõxí nducu ndéé-yu cadá-yu mee-ñi sã vãha, te tnúhu-á<sup>n</sup> cúú-xi mèe-ñi tnúhu váha, te ío váha sá cúú-xi-yu.

<sup>9</sup> Te vã cádá cuendá-n nchàa tnúhu sá ñã túú nándíhi xitnàha ñãyiú, te vã cádá cuendá-n ñãyiú nándi cáhá<sup>n</sup> cuendá nchaa sá ñi xóo cada cue ñãyiú ní xíndecu ndéé sanaha, te vã cádá cuendá-n nchàa tnúhu xitnàha ñãyiú xicuehé tnàhá cuendá tnúhu ní chídó tnùn-ó ndíi Moisés, chi nchaa tnúhu xitnàhá-yu-á<sup>n</sup> ñã túú tnàhí nándíhi-xi, te dàcuíta ñaha-xi xii-o.



<sup>10</sup> Te núu ío ñáyiú ní ngüíta-yu nándi tnúhu càhá<sup>n</sup>-yu cuendá sá vǎ cúu ñ<sup>n</sup>nuu cue ñáyiú ndècu ichi Yá Ndiöxí ñá, te ñáyiú-á<sup>n</sup> cǎhá<sup>n</sup> sàhú-n dǒho-yu ñ<sup>n</sup> úú xito, te núu vá tnǎ<sup>n</sup>-yu tnúhu càhá<sup>n</sup>-n ñá, te vá nihí tnáhá-gǎ-n ndihí-yu.

<sup>11</sup> Te duca<sup>n</sup> càda-n, chi ñáyiú-á<sup>n</sup> duu<sup>n</sup> duu<sup>n</sup> ñá túú-gǎ cuení-yu cadá-yu sá vǎha, chi mee-nǎ sá cuèhé sá dúhá tnáhá iní-yu cadá-yu, te cùtnuní iní méè-yu sá ñà túú quide ndáá-yu, te sáá nduu te nacháhu-yu nchaa sá quidè-yu.

*Nàcuáa cada té Títú*

<sup>12</sup> Te cuení-í tendaha-ǎ té Àrtemás quixi-dé núú ndécú-n àdi té Tiquicú, te òré ná quèxio ndéda-ni càa ñ<sup>n</sup> cue téa-núú ndécú-n, te ío nducu ndèe-n quihí<sup>n</sup>-n ñùú Nìcópólís núú quihí<sup>n</sup>-í cundecu-í, chi yàcá<sup>n</sup> cuení-í quihí<sup>n</sup>-í cundecu-í yóó quidé vǎxi<sup>n</sup>-xi.

<sup>13</sup> Te ío cuáñaha-n nchàa sá xíní ñùhu té Zénás téa ío váha xíní nchaa nàcuáa càhá<sup>n</sup> lèi, ndihi té Àpolós cuendá sá ñà túú ñǎ cumání xii-güedé ichi.

<sup>14</sup> Te cuení-í sá ncháá ñáyiú ndècu ndihí-o ichi Yá Ndiöxí cada váha-yu, te cuáñahá-yu ñ<sup>n</sup> sá xíní ñùhu ñáyiú, te ío váha chiu<sup>n</sup> cadá-yu te núu duca<sup>n</sup> na càda-yu.

*Tnúhu ndéé núú ñǎ ndihí-ná*

<sup>15</sup> Te vitna ío cada ndee iní-n càchí nchaa ñáyiú ndècu ndihí-í iha, te cúñaha-n sǎ ío na càda ndee iní nchaa ñáyiú cùu iní ñáhá xii-o, ñáyiú sàndáá iní ñáhá xii Yá Ndiöxí. Te Yá Ndiöxí ío na chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cáda ndèe iní-nǎ vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA TÉ FILEMÓN

*Té Păblú cādūha-dé tutú quihi<sup>n</sup> ndaha té Filèmon*

<sup>1</sup> Te yúhú té Păblú té yìhi vecaá sá cuendá Xítóhó Jesucristú cādūha-í ì<sup>n</sup> tutú ndìhi té Timùteú cuendá daquixi-í ndaha yòhó té Filèmon, te ío cùu iní ñàhà-í xii-n chi tnàhá-n quide-n chiu<sup>n</sup> Yá Ndiöxí. Te tutú-a tëndaha-í quixi ndaha-n

<sup>2</sup> ndìhi ndaha ñaha nàni Apiá ñaha ndècu ndìhi-o ichi Xítóhó Jesucristú, ndìhi ndaha té Àrquipú, chi tnàhá-dé quidé-dé chiu<sup>n</sup> Yá Ndiöxí, ndìhi ndaha nchaa ñáyiú tàcá vehe-n dàcuahá-yu tnúhu-gá.

<sup>3</sup> Te xicá<sup>n</sup> táhù-í núú Tătá-ó Dütú Ndiöxí ndìhi núú Xítóhó Jesucristú sá ìo na chindee chitúu ñaha-gă xii-ndo, te duca<sup>n</sup> ndì nduú-gá ná cádá te ío váha cuu iní-ndó cundecu-ndo.

*Té Filèmon ío sàndáá iní-dé Xítóhó Jesucristú te cùu iní-dé tnàha ñáyiú-dé*

<sup>4</sup> Te ndi tnàhá òré càhá<sup>n</sup> ndìhi-í Yá Ndiöxí cuendá-n ndàcá<sup>n</sup> táhù-í núú-gă.

<sup>5</sup> Chi nihí-í tnúhu sá ìo sàndáá iní-n Xítóhó Jesucristú, te cùu iní-n cuè ñáyiú ndècu ichi-gá.

<sup>6</sup> Te xicá<sup>n</sup> táhù-í núú Yá Ndiöxí sá dàtná-ni sàndáá iní-n-gă duca<sup>n</sup>-ni dānehé-n ñáyiú cuendá duca<sup>n</sup> ngūnu ichí-yu tnàhá-yu, te cutnūnī iní-yu nācuāa ndūu nchaa sá vāha tàxi Xítóhó Jesucristú xii-o, te tnàhá-yu nduu táhū-yu nchaa sá vāha-á<sup>n</sup>.

<sup>7</sup> Te yòhó té Filèmon cúu-n tēe ndècu ndìhi-í ichi Xítóhó Jesucristú càchí tnúhu-í xii-n sá ìo cùdì iní-í cuendá sá ìo váha quide-n ndecu-n, chi cùu iní-n nchaa ñáyiú ndècu ichi Yá Ndiöxí, te uu<sup>n</sup>-gá nihí ndèe-í sá dúcá<sup>n</sup> quide-n, te ñu-n ìo sáhā-n-yu tnúhu ndee iní ndécú ndìhi-yu.

*Té Păblú chindèe tnúhu-dé té Ònésimú*

<sup>8</sup> Te yúhú té Păblú ní taxi Xítóhó Jesucristú tnúhu ndee iní ndécú ndìhi-í sá táxi tnūnī ñàhà-í xii-n te tahu-í chiu<sup>n</sup> cada-n, dico vá táxi tnūnī ñàhà-í xii-n,

<sup>9</sup> chi váha-gá sá càhá<sup>n</sup> ndàhú-í núú-n sá cádá-n nchaa nacuāa càhá<sup>n</sup>-í chi ío cùu iní ñàhà-í xii-n. Chi yúhú sa ta yì-í cuáhá<sup>n</sup>, te yìhi-í vecaá cuendá sá càhá<sup>n</sup>-í tnúhu Xítóhó Jesucristú.

<sup>10</sup> Te càhá<sup>n</sup> ndàhú-í núú-n sá ñà túú nă cani iní-n cuendá té Ònésimú, chi ní cuu-dé vitna dàtná ì<sup>n</sup> déhe-í, chi ní sàndáá iní-dé tnúhu Yá Ndiöxí ní xáha<sup>n</sup>-í xii-dé vitna yìhi-í vecaá.

<sup>11</sup> Te nàha-n sá cūtnàhá ní xīndecu ndìhi-n-dē ñá túú ní quide ndáá-dé, dico vitna ío váha quide-dé ndécú ndìhi-í-dé, te ñu-ni duca<sup>n</sup> càda-dé òré cundecu ndìhi tucu-n-dē.

<sup>12</sup> Te vitna tendaha-í-dé ndixi-dé cundecu tucu-n ndìhi-dé, te òré quehe<sup>n</sup> cuendá-n-dē, te cada iní-n sá yúhú ní quehe<sup>n</sup> cuendá-n.

<sup>13</sup> Te vitna yìhi-í vecaá sá cuendá tnúhu Xítóhó Jesucristú, te cuiní-í ngani-í-dé cunu cuechi-dé núu-í cuendá cada-dé núu-n ní cùu.

<sup>14</sup> Dico ñá túú ní ngāni-í-dé, chi vátá ndátnūhu ndìhi ñaha-gă-í xii-n nūu nása cachí-n cūnduu. Te ñá cūndēe iní-í cada yica-í cada-n ì<sup>n</sup> sá vāha sá cúu-xi-í, chi cuiní-í sá méé-n cāni iní-n nūu cuu àdi sá vā cúu.

<sup>15</sup> Te ní cunduu nī quee té Ònésimú vehe-n, te cudana te mee Yá Ndiöxí duca<sup>n</sup> nī cachí-gá cunduu cuendá dacuāha-dé cada váha-dé. Te ndixi tuçu-dé cundecu ndìhi duca<sup>n</sup>-nă-n-dē.

<sup>16</sup> Te vá cúu-gă-dé dàtná ì<sup>n</sup> tēe xīnu cuechi chi ní cuu-dé dàtná ì<sup>n</sup> ñaní-ó chi ní sàndáá iní-dé Yá Ndiöxí, te yúhú ío cùu iní-í-dé, dico yòhó uu<sup>n</sup>-gá cuu iní-n-dē, chi cùu-dé ì<sup>n</sup> tnàha ñáyiú-o, te ndècu-dé ichi Yá Ndiöxí.

<sup>17</sup> Te ì<sup>n</sup>-ni cùu-o ndecu-o ichi Yá Ndiöxí nūu xiá<sup>n</sup> càhá<sup>n</sup> ndàhú-í núú-n sá quéhé<sup>n</sup> cuendá-n-dē dàtná quéhé<sup>n</sup> cuendá-n yúhú òré quéxió-í vehe-n.

<sup>18</sup> Te núu ìó ì<sup>n</sup> sá nī cumání-dé núu-n ñà túú ní quide ndáá-dé

cútnàhá ní xíndecu-n ndìhi-dé, àdi ío ìí<sup>n</sup> sá tàú-dé te vá ndàcá<sup>n</sup> cuèndá-n nũú-dé, chí yúhú ndacá<sup>n</sup> cuèndá-n nũú-í.

<sup>19</sup> Te ndaha mee yúhú té Páblú cádũha-í tutú-a cächí tnúhu-í xii-n sã ná chãhu-í nchaa sã nĩ quide-dé. Dico dandàcu saú iní-n sã yúhú ní sanu ichi ñaha-í xii-n ìchi Xítóhó Jesucristú.

<sup>20</sup> Dico yòhó té ndècu ndìhi-í ichi Xítóhó Jesucristú cada ndee ìní-n càda-n tnúhu ndàhú càhá<sup>n</sup>-í núú-n chí ndècu-o ichi-gá. Te duca<sup>n</sup> càda-n nacúaa cuu-xi dàtná ìí<sup>n</sup> tnúhu ndee ìní sá cúú-xi-í, chí ndì ndũú-ó ndècu-o ichi-gá.

<sup>21</sup> Te cùtnuní iní-í sá cádá-n nchàa nacúaa càhá<sup>n</sup>-í, te cùtnuní tucu iní-í sá ìo-gá vãi sá vãha cada-n dàcúúxí tnũhu ndàhú càhá<sup>n</sup>-í núú-n, núu xíã<sup>n</sup> tëndaha-í tutú-a véxi ndaha-n.

<sup>22</sup> Te vitna cùní-í cada túha-n ìí<sup>n</sup> vehe cundecu-í, chí sàni iní-í sá quíxí còto ñaha-í xii-ndo, te ndètu-í sáa nduu-ã<sup>n</sup> chí nchòhó xicá<sup>n</sup> táhú-ndó nũú Yã Ndiõxí cuèndá-í.

*Tnúhu ndéé núú nĩ ndìhi-ná*

<sup>23</sup> Te ío cada ndee ìní-n cächí té Ępafrás té yìhi ndìhi-í vecaá sá cuèndá tnúhu Xítóhó Jesucristú.

<sup>24</sup> Te ío cada ndee ìní tucu-n cächí té Măcú, ndìhi té Arìstarcú, ndìhi té Dēmás, ndìhi té Lùcá, chí tnàhá cue té-ã<sup>n</sup> quide-güedé chiũ<sup>n</sup> Xítóhó Jesucristú.

<sup>25</sup> Te Xítóhó Jesucristú ío na chìndee chitúu ñaha-gã xii-ndo nchàa-ndo. Te duca<sup>n</sup> na cùnduu. Te ío chí cádá ndèe ìní-nã vitna.

## TUTÚ QUIHI<sup>n</sup> NDAHA CUE ÑÁYIU HÈBREÚ

*Dútú Ndiõxí ní cachí-gá sá Dēhe-gá cada núú-gă*

<sup>1</sup> Te ndéé sanaha, Yá Ndiõxí ní xáha<sup>n</sup>-gă xii cue téé ní cachí iní méé-gă cada núú-gă cáhá<sup>n</sup>-güedé tnúhu-gá núú nchàa ñani tnáhá-ó nǐ xíndecu ndéé dāvá-á<sup>n</sup> te ñu duca<sup>n</sup> nǐ quide-güedé. Te tǐni xito duca<sup>n</sup> nǐ xáha<sup>n</sup>-gă xii-güedé ní cáhá<sup>n</sup>-güedé tnúhu-gá. Te ndi ñǐ<sup>n</sup> ndi ñǐ<sup>n</sup> nǐ xítñuhu ñaha-gă xii-güedé nàcuáa cáhá<sup>n</sup>-güedé tnúhu-gá núú-yu.

<sup>2</sup> Te sátá nǐ cuu vâi nduu ta yáha cuáhá<sup>n</sup>, te ní sáa nduu nǐ cachí Yá Ndiõxí sá Dēhe-gá cada núú-gă cáhá<sup>n</sup> tnúhu-gá núú-ó. Te ñu-ni mee-gă ní táuchíú<sup>n</sup> nǐ cadúha Dēhe-gá ñuyíú ndihí nchaa sá ió, te ní cachí-gá sá ncháa cùu-xi cuendá Dēhe-gá.

<sup>3</sup> Te Dēhe Yá Ndiõxí ío cànnu cuu-gá dàtná cànnu cuu mee-gá, te dàtná-ni sàni iní méé-gă ñu-ni duca<sup>n</sup> sàni iní Dēhe-gá chi tnáhá-gá cúú-gă Ndiõxí, te sá cuendá tnúhu cáhá<sup>n</sup> Dēhe-gá xǐ<sup>n</sup> ndécú-ní nchàa sá ió ñuyíú, te duca<sup>n</sup> chi ío cànnu cuu Dēhe-gá, te ñu-ni Dēhe-gá ní quide nàcuáa vá cùndecu-gá cuèchi-o. Te sátá dúcá<sup>n</sup> te ní ngóo-gá xio cùha Tátá-gă Dútú Ndiõxí Yá ío cùnnu ndecu andiú.

*Dēhe Dútú Ndiõxí ío-gá cùnnu-gá dàcúúxí cuè espíritú xínú cuèchi núú-gă*

<sup>4</sup> Te Dēhe Yá Ndiõxí ío-gá cùnnu-gá dàcúúxí cuè espíritú xínú cuèchi núú-gă, te duca<sup>n</sup> chi ní nduu táhú-gă núú Tátá-gă Dútú Ndiõxí sá ío-gá cùnnu-gă dàcúúxí cuè espíritú-á<sup>n</sup>.

<sup>5</sup> Chi Yá Ndiõxí ñá túú ní xáha<sup>n</sup>-gă xii ni ñ<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Dēhe-gá, te duha ní xáha<sup>n</sup>-gă:

Yòhó cúú-n Dēhe mee-í,  
te duca<sup>n</sup>-ni cùndecu-n núú ndécú-í.  
Duha ní xáha<sup>n</sup>-gă. Te ní cachí tucu Yá Ndiõxí:  
Yúhú cúú-í Tátá Yáa-á<sup>n</sup>,

te mee-gă cúú-gă Dēhe-í.

Duha ní cachí-gá.

<sup>6</sup> Te cùtnáhá ní tendaha-gă Dēhe-gá Yá ío cùnnu ní quixi-gá ñuyíú-a, te ní cachí-gá:

Tàú-xi sá ncháa cuè espíritú xínú cuèchi núú-í chiñuhu-xi Dēhe-í.

Duha ní cachí-gá.

<sup>7</sup> Te Yá Ndiõxí ní cáhá<sup>n</sup>-gă cuendá cue espíritú xínú cuèchi núú-gă, te ní cachí-gá:

Yúhú quídè-í sá ncháa cuè espíritú xínú cuèchi núú-í cúú-xí dàtná táchí,

te ñu-ni cue espíritú-á<sup>n</sup> quídè-í sá cúú-xí dàtná itá ñuhú.

Duha càchí-gá.

<sup>8</sup> Dico Dēhe-gá chi ñá túú dùca<sup>n</sup> ni xáha<sup>n</sup>-gă, chi duha ní xáha<sup>n</sup>-gă:

Yòhó tnáhá-n cùu-n Ndiõxí dàtná cúú yúhú Yáa cúú Tátá-n,

te duca<sup>n</sup>-ni tàxi tnuní-n nǐ caa ni quíhí<sup>n</sup>,

te ío váha ndáa quídè-n tàxi tnuní-n.

<sup>9</sup> Te dàquee tihú-n nchàa sá cuèhé sá dúhá, te cùu iní-n nchàa sá vâha,

núu xǐ<sup>n</sup> yúhú Yáa cúú Tátá-n nǐ quide-í sá ío-gá vii ío-gá váha cuu iní-n,

dàcúúxí nchàa dava-gá ñáyiú ndècu ndihí-n.

Duha ní xáha<sup>n</sup>-gă xii Dēhe-gá.

<sup>10</sup> Te ní xáha<sup>n</sup> tucu Yá Ndiõxí xii Dēhe-gá:

Yòhó cúú-n Yáa ío cùnnu, chi ndéé cùtnáhá ñá túú vèdana ná ió te ní cadúha-n ñuyíú ndihí andiú.

<sup>11</sup> Te andiú ndihí ñuyíú chi naa-xi, dico yòhó chi cundecu-ni-n nǐ caa ni quíhí<sup>n</sup>.

Te andiú ndihí ñuyíú chi ndihí-xi dàtná ndihí ñ<sup>n</sup> dóó,

<sup>12</sup> te dàtná cuíní-n quide ñáyiú ndihí ñ<sup>n</sup> dóó òré ndàcá<sup>n</sup> tnáhnǔ-yu tàxi ndécú-yu ñ<sup>n</sup> xio, duca<sup>n</sup> càda-n ñuyíú ndihí andiú,

te dàtná nádâma dóó ñáyiú duca<sup>n</sup> càda tucu-n ñuyíú ndihí andiú.

Te yòhó dàtná-ni càa-n ndecu-n vitna duca<sup>n</sup>-ni cùnduu-n cundecu-n

ni caa ni quíhí<sup>n</sup>, chi vá yíí  
tnàhí-n.

Duha ní xáha<sup>n</sup> Yă Ndiöxí xii Déhe-gá.

<sup>13</sup> Te Yă Ndiöxí ñá túú ní xáha<sup>n</sup>-gă xii  
ni ì<sup>n</sup> cue espíritú xínú cuèchi núú-gă  
dàtná ní xáha<sup>n</sup>-gă xii Déhe-gá, te duha  
ní xáha<sup>n</sup> tùcu-gá:

Ngóo xio cùha-í taxi tnùní-n,

te yúhú cada-í te nchaa sá cúú ùhú iní  
ñáhá xii-n canehe-xi sá yíñùhu  
núú-n.

Duha ní xáha<sup>n</sup>-gă xii Déhe-gá.

<sup>14</sup> Te nchaa espíritú xínú cuèchi núú  
Yă Ndiöxí mee-ni chù<sup>n</sup>-gă quidé-xí,  
chi tëndaha-gá cue espíritú-á<sup>n</sup>  
cuáhá<sup>n</sup>-xi nchaa núú ndécú cuè  
ñáyiu ní nduu táhú cundecu ndíhí-gá  
chindee ñaha-xi xií-yu.

## 2

*Vá dáñá ndèé-ó tnùhu sá càhá<sup>n</sup>  
nàcuáa naníhí tǎhú-ó*

<sup>1</sup> Te sá cuendá sá ìo cùnuu Xítohó  
Jesucristú, núu xiá<sup>n</sup> ìo xini ñuhu-xi  
cada cuendá-ó nchaa tnúhu càhá<sup>n</sup>-gá  
sá sà ní xíndedóho-o cuendá sá vǎ  
dáñá nihnu-o.

<sup>2</sup> Te cue espíritú xínú cuèchi núú  
Yă Ndiöxí ní cáhá<sup>n</sup>-xi tnúhu-gá  
ndéé sanaha, te tnúhu ní cáhá<sup>n</sup> cue  
espíritú-á<sup>n</sup> cúú-xí sǎ ndáá cuiti. Te  
nchaa ñáyiu ñá túú ní cuíni tñi nchaa  
tnúhu ní cáhá<sup>n</sup> cue espíritú-á<sup>n</sup>, te ni ñà  
túú ní cuíni-yu cundedóho-yu, nchaa  
ñáyiu-á<sup>n</sup> ñi nacháhu-yu nàcuáa ndùu  
nchaa cuéchi ní quidé-yu ì<sup>n</sup> ì<sup>n</sup>-yu.

<sup>3</sup> Te sá dúcá<sup>n</sup> ñi yáha cue ñáyiu-á<sup>n</sup>,  
xiá<sup>n</sup> cútnùní ndáá iní-ó sǎ vǎ cǎcu ni-  
hnu-o te núu na dáña nihnu-o tnúhu  
sá càhá<sup>n</sup> nàcuáa naníhí tǎhú-ó, tnúhu  
sá ìo cùnuu, chi nacháhu-o te núu  
duca<sup>n</sup> na càda-o. Te díhna-gá Xítohó Je-  
sucristú ní cáhá<sup>n</sup>-gá tnúhu-á<sup>n</sup> te nchaa  
ñáyiu ní xíndedóho nchaa nàcuáa ndùu  
tnúhu-á<sup>n</sup> ñi cáhá<sup>n</sup> ndáá-yu tnúhu-á<sup>n</sup>  
núú-ó.

<sup>4</sup> Te tnàhá Yă Ndiöxí cúndíhí-gá  
nchaa ñáyiu-á<sup>n</sup> quidé-gă nàcuáa  
cutnùní iní-ó sǎ tnùhu-á<sup>n</sup> cúú-xí tnùhu  
ndáá, chi quide-gă titní núú sǎ vǎ yóo  
tnàhí ndàcu cada te ìo cùnùhu-o. Te  
Espíritú Yă Ndiöxí quidé-xí nàcuáa  
nduu táhú-ó ndì díí<sup>n</sup> núú chù<sup>n</sup> cada-o

nacuáa cuíni méé-gă. Te sá dúcá<sup>n</sup>  
quide Yă Ndiöxí nchaa xiá<sup>n</sup>, xiá<sup>n</sup>  
cútnùní iní-ó sǎ tnàhá-gá càhá<sup>n</sup>-gá sá  
tnùhu-á<sup>n</sup> cúú-xí tnùhu ndáá.

*Xítohó Jesucristú ní xínduu yíqui  
cuñú-gá dàtná cáá yíqui cuñú nchoo  
cuè ñáyiu ñuyúú-a*

<sup>5</sup> Te Yă Ndiöxí vá táxí ndècu-gá  
cue espíritú xínú cuèchi núú-gă taxi  
tnùní-xi ñuyúú sáá sǎ vǎtá quíni-gá-ó,  
te díu cuendá xiá<sup>n</sup> càhá<sup>n</sup>-í.

<sup>6</sup> Te núú tùtú Yă Ndiöxí càchí-xi:  
Yòhó Dútú Ndiöxí ñá túú ñá cúú  
cuè ñáyiu ñuyúú núu ndacu  
iní-n-yu, àdi chindee-n-yu.

<sup>7</sup> Te yòhó ní cachí-n sǎ nchaa ñáyiu  
ñuyúú-a vá cùnùú-yu dàtná  
cùnùu cue espíritú xínú cuèchi  
núú-n,

dico ní cachí-n sǎ sáá nduu te ìo  
cunùú-yu tnàhá-yu, te mee-n  
cáhá<sup>n</sup>-n sǎ ìo càhnu cuú-yu,

te ní cachí tucu-n sǎ táxí tnùní-yu  
nchaa sá ñi cadúha-n.

<sup>8</sup> Te duca<sup>n</sup> nchàandi túhú sá ìo  
quindàhá-yu.

Duha càchí-xi núú tùtú-gá. Te sá  
dúcá<sup>n</sup> ñi cachí Yă Ndiöxí sá quindàha  
ñáyiu ñuyúú nchaa sá ìo, xiá<sup>n</sup> cútnùní  
sá ncháandi túhú sá ìo taxi tnùní-yu,  
dico vǎtá sáá-gă nduu dùca<sup>n</sup> quíni-ó  
càda-xi.

<sup>9</sup> Te nchoo sa nàha-o sá tnáá-ní ñi  
quide Yă Ndiöxí cuendá sá vǎ cùnùu  
Xítohó Jesucristú dàtná cùnùu cue  
espíritú xínú cuèchi núú-gă. Te duca<sup>n</sup>  
ñi quide Yă Ndiöxí chi ní cundàhú  
iní-gá nchaa ñáyiu ñuyúú-a, chi ní  
cachí-gá sá Dèhe-gá cuú cuendá  
ncháa-yu, te Xítohó Jesucristú ìo ní  
ndoho-gá òré ní xíhí-gá, núu xiá<sup>n</sup> ní  
nduu táhú-gă cùnùu vihi-gá vitna. Te  
mee Yă Ndiöxí càchí-gá sá ìo càhnu  
cuu Déhe-gá.

<sup>10</sup> Te Yă Ndiöxí ní cadúha-gá  
nchàandi túhú sá ìo nàcuáa ní cachí  
iní méé-gă, te sá dúcá<sup>n</sup> ñi quide-gă  
núu xiá<sup>n</sup> váha-ni sá ñi cachí-gá sá  
Xítohó Jesucristú nándi ndoho-gá te  
cuú-gá cuendá duca<sup>n</sup> ñà túú tnàhí-gá  
ná cùmání-gă núú Yă Ndiöxí. Te  
sá dúcá<sup>n</sup> ñi cuu núu xiá<sup>n</sup> ní níhí Yă

Ndiöxí nàcuáa cada-gá càn-deca-gá nchaa ñáyiú cùu déhe-gá quíhí<sup>n</sup> núú ïo váha càa cundecú-yu ndihí-gá ní caa ní quíhí<sup>n</sup>. Te Xítohó Jesucristú cúú-gã Yaá ní quide nàcuáa nduu táhú cue ñáyiú cundecú-yu ndihí Yá Ndiöxí.

11 Te Xítohó Jesucristú cúú-gã Yaá quidé ndècu yiñuhu ñáyiú núú Yá Ndiöxí ñáyiú sàndáá iní ñáhá xii-gá, te Xítohó Jesucristú ndihí cue ñáyiú-á<sup>n</sup> ì<sup>n</sup>-ni Yáá cúú Tãtã-yu ndihí-gá, núu xiã<sup>n</sup> Xítohó Jesucristú Yaá cúú Dèhe Dútú Ndiöxí ñá túú cùcaha<sup>n</sup> núú-gã càhá<sup>n</sup>-gá sá ñàní-gá ndihí cúha-gá cúú nchàa ñáyiú-á<sup>n</sup>.

12 Te quèe ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi nàcuáa ní xáha<sup>n</sup> Xítohó Jesucristú xii Tãtã-gã Dútú Ndiöxí, te duha ní xáha<sup>n</sup>-gã:

Cáhá<sup>n</sup> váha-í cuendá-n núú nchàa cue tée cùu datná ñàní-í ndihí núú nchàa cue ñáyiú ìhí cúú datná cúha-í,

te cata-í ndudú chiñuhu ñaha-í xii-n núú tàcá-yu.

Duha yòdo tnuní núú tütú-gá nàcuáa ní xáha<sup>n</sup> Dèhe-gá xii-gá.

13 Te ìngá tucu xichi núú tütú Yá Ndiöxí càhá<sup>n</sup>-xi nàcuáa ní càhá<sup>n</sup> Xítohó Jesucristú cuendá-gá, te duha ní cachí-gá:

Yúhú nchaa-ni nduu quindáá iní-í Tãtã-í Dútú Ndiöxí.

Duha càchí-xi núú tütú Yá Ndiöxí nàcuáa ní càhá<sup>n</sup> Xítohó Jesucristú. Te ìngá tucu xichi núú tütú Yá Ndiöxí càhá<sup>n</sup>-xi nàcuáa ní càhá<sup>n</sup> tucu Xítohó Jesucristú, te duha ní cachí-gá:

Iha ndècu ndihí-í nchaa ñáyiú cùu déhe Tãtã-í Dútú Ndiöxí, te ñu-ni ñáyiú-á<sup>n</sup> ñí taxi cuendá Tãtã-í cuu cuendá-í.

Duha càchí-xi núú tütú-gá nàcuáa ní càhá<sup>n</sup> Xítohó Jesucristú.

14 Te sá cuendá nchaa ñáyiú cùu déhe Yá Ndiöxí cúú-yu yiquí cùñú, núu xiã<sup>n</sup> duca<sup>n</sup> tnàhá Xítohó Jesucristú ní cuu-gá yiquí cùñú, te duca<sup>n</sup> ñí cuu-gá yiquí cùñú cuendá cuú-gá, te sá dúcá<sup>n</sup> cúú-gá te ndacu-gá daquèe tíhú-gá

sácuíhná, te ñu sácuíhná-ã<sup>n</sup> quidé-xi xihí ñáyiú.

15 Te duca<sup>n</sup> ñí quide-gá cuendá sá cuè ñáyiú ñuyíú-a vá yùhú-gá-yu sá cúú-yu, chi nchaa-ni nduu yùhú-yu sá cúú-yu.

16 Te na càchí tnúhu ndáá-í sá Xítohó Jesucristú ní quixi-gá cuendá chindee-gá cue ñáyiú cùu ñàní tnàhá ndíi Àbrahám, te ñá díú cuendá sá chindèe-gá cue espíritu xínú cuèchi núú Yá Ndiöxí.

17 Te cuendá xiã<sup>n</sup> núu dai ní xini ñuhu-xi sá cúú-gã ñáyiú cuendá yãha-gá nándi sá yãha-gá datná yãha cue ñáyiú cùu ndi mee-gá cuendá duca<sup>n</sup> cùu-gá dútú ïo cùnuu te cuu ndáá-gá núú Yá Ndiöxí, te cundàhú iní-gá nchaa ñáyiú te cuú-gá cuendá sá vá cùndècu-gá cuèchi-yu núú Yá Ndiöxí.

18 Te mei òré ndóhó Xítohó Jesucristú ní xito ndéé ñáhá sàcuíhná xii-gá te núu ndisa sá vá càdá-gá ní ì<sup>n</sup> sá ñà túú tàú-gá cada-gá, te sá dúcá<sup>n</sup> ñí ndoho-gá xiã<sup>n</sup> núu ndácú-gã chindèe-gá nchaa ñáyiú duca<sup>n</sup> yãha.

### 3

*Xítohó Jesucristú ïo-gá cùnùu-gá dàcúúxí ndíi Moisés*

1 Te nchòhó cúú-ndó ñáyiú ndècu ndihí-í ichi Xítohó Jesucristú ñáyiú cùu cuendá Yá Ndiöxí, te tnàhá-ndó cùu-ndo ñáyiú ní càhá<sup>n</sup> ñáhá-gã cuendá cundecu-ndo ndihí-gá. Te yúhú càchí tnúhu-í xii-ndo sã ïo váha cada cuendá-ndó nàcuáa nduu cuendá Xítohó Jesucristú, chi ñu-gá cúú-gã Yaá ní tendaha ñàha Dútú Ndiöxí ní quixi-gá ñuyíú-a, te ñu-gá cúú-gã Dútú ïo cùnuu chi quide-gá núú Yá Ndiöxí. Te ñu-ni cuendá Xítohó Jesucristú càhá<sup>n</sup> tnúhu sá ní sàndáá iní-ó.

2 Te mee Yá Ndiöxí ní sáha chiu<sup>n</sup>-gá Xítohó Jesucristú, te ïo ndáá quidé-gã chiu<sup>n</sup>-á<sup>n</sup> sã cúú-xi Yá Ndiöxí, te ñu-ni duca<sup>n</sup> ñí quide ndíi Moisés ní quide ndíi chiu<sup>n</sup> ní táhú Yá Ndiöxí, te ïo ndáá ní quide ndíi chiu<sup>n</sup>-gá sá cúú-xi nchàa ñáyiú cùu cuendá-gá, te cue ñáyiú-á<sup>n</sup> cúú-yu datná vehe mee-gã.

3 Te ñ<sup>n</sup> tée dàcaa ñ<sup>n</sup> vehe váha ío càhnu-gá cúú-dě dácúúxí vehe dácaa-dé. Te duca<sup>n</sup> sãtnahá-xi cùu Xítóhó Jesucristú chi ío-gá càhnu cuu-gá dácúúxí ndíi Moisés.

4 Te nchoo sà naha-o sá ncháá vèhe dacuití ndècu cue tée ní dácáá, dico sa naha tucu-o sá Yã Ndiõxí quidé-gã ndécú ncháa sá ío ñuyíú-a.

5 Te ndíi Moisés-á<sup>n</sup> ío ndáá ní quide ndíi chiú<sup>n</sup> ní táhú Yã Ndiõxí ní quide ndíi sá cúú-xí ncháa ñáyiu cùu cuendá-gá. Te sá dúcá<sup>n</sup> ñí quide ndíi xíã<sup>n</sup> ní cuu ndíi ñ<sup>n</sup> tée ní xinu cuechi núú Yã Ndiõxí. Te ní xáha<sup>n</sup> ndíi xii ncháa ñáyiu cùu cuendá-gá nãcuáa cáhá<sup>n</sup>-gá ndéé cuéé-gá.

6 Dico Xítóhó Jesucristú cúú-gã Déhe mee Yã Ndiõxí, te cùu-gá Yaá ío quide ndáá yíndàha-gá ncháa ñáyiu cùu cuendá Yã Ndiõxí. Te tnàhá-ó cùu-o ñáyiu cùu cuendá-gá, te ñiu-ni duca<sup>n</sup> cùu cuendá ñáhá-gã xii-o te núu na càncicú<sup>n</sup> nihnu-ni-o càni ndáá iní-ó cuendá-gá ndéé ná sáá nduu ngündecu-o ndíhi-gá.

*Cue ñáyiu cùu cuendá Yã Ndiõxí ío váha cùu iní-yu ndécú-yu ndíhi-gá*

7 Te núu tütú Yã Ndiõxí yódó tnùnì nãcuáa ní cáhá<sup>n</sup> Espíritú-gá, te duha ní cachí-xi:

Te núu nchòhó ndèdóho-ndo ncháa tnúhu càhá<sup>n</sup> Yã Ndiõxí vitna,

8 te vá cündùu sáá iní-ndó dàtná ní xínduu sáá iní ñáyiu ní dáquéé tǐhú tnúhu Yã Ndiõxí, ñáyiu ní xíndecu xití yucu,

chi ñáyiu-á<sup>n</sup> ñí xito ndéé-yu Yã Ndiõxí núu nása cada ñaha-gã xií-yu.

Duha ní cachí Espíritú-gá.

9 Te càchí tucu Espíritú Yã Ndiõxí nãcuáa ní cáhá<sup>n</sup> méé-gã, te duha ní cachí-gá:

Xití yucu ní xito ndéé ñáhá cuè ñaní tnáhá-ndó ñí xíndecu ndéé sanaha xii-í,

te duca<sup>n</sup> ñí quide ñáhá-yu cuèi ní xiní-yu ncháa sá ñí quide-í ndí ùdico cuíá ñí xíndecú-yu xití yucu-á<sup>n</sup>.

10 Te sá dúcá<sup>n</sup> ñí quidé-yu núu xíã<sup>n</sup> ní cudéè<sup>n</sup>-í núú-yu,

núu xíã<sup>n</sup> ní cáhá<sup>n</sup>-í cuendá-yu, te ní cachí-í:

“Ñáyiu-a quide-ní-yu ncháa sá ñà túú tauú-yu cadá-yu te ni ñà túú cuíní-yu cadá-yu ncháa nãcuáa sàni iní-í,

te ni ñà túú cuíní-yu cadá-yu nãcuáa cáhá<sup>n</sup>-í”,

duha ní cáhá<sup>n</sup>-í cuendá-yu.

11 Te xíã<sup>n</sup> núu ní cudéè<sup>n</sup>-í núú-yu te ní xáha<sup>n</sup> ndáá-í xií-yu sá vã ndúú tãhú-yu cundecu váha-yu núu ndécú-í.

Duha ní cachí Yã Ndiõxí càchí Espíritú-gá.

12 Te nchòhó ñáyiu ndècu ndíhi-í ichi Xítóhó Jesucristú, càhá<sup>n</sup>-í dóho-ndo sã ío cada cuendá-ndó vã cání cuèhé iní-ndó te ngóo-ndo vã quíndáá-gá iní-ndó Yã Ndiõxí te ñaña-ndo ìchi-gá, te ñiu-gá cúú-gã Yaá ndécú ncháa nduu ncháa quíú.

13 Te ñ<sup>n</sup> nduu ñ<sup>n</sup> nduu ío chí cuãha tnàha tnúhu ndee iní cundecu-ndo ñini ndecu-ndo ñuyíú-a cuendá sá vã xínu iní-ndó càda-ndo nãndí sá cuèhé sá dúhá, te duca<sup>n</sup> te vá cúú sáá iní-ndó núú Yã Ndiõxí.

14 Te vá dáñá ndéé-ó càni ndáá iní-ó nãcuáa cada ñaha Yã Ndiõxí xii-o, te dàtná-ni ní sani iní-ó ndéé cútnáhá ní tuha-o ìchi Yã Ndiõxí, te ñiu-ni duca<sup>n</sup> càni iní-ó ndéé ná sáá nduu vã cündecu-gá-ó ñuyíú-a, te núu duca<sup>n</sup> na càda-o te cùu ñ<sup>n</sup>nuu-o ndíhi Xítóhó Jesucristú.

15 Te duha càhá<sup>n</sup>-xi ñ<sup>n</sup> xichi núu tütú Yã Ndiõxí:

Te núu nchòhó ndèdóho-ndo nãcuáa càhá<sup>n</sup> Yã Ndiõxí vitna,

te vá cündùu sáá iní-ndó dàtná ní xínduu sáá iní cue ñáyiu ní dáquéé tǐhú tnúhu-gá ndéé sanaha.

Duha càchí-xi núu tütú-gá.

16 Te cue ñáyiu duca<sup>n</sup> ñí xínduu sáá iní-xi cúú-yu ñáyiu ní ndeñuhu ndíi Moisés nació<sup>n</sup> Ègíptú, te ñáyiu-á<sup>n</sup> ñí xíndedóho-yu tnúhu ní cáhá<sup>n</sup> Yã Ndiõxí te ní quide sáá iní-yu ní dáquéé tǐhú-yu tnúhu-gá.

17 Te ndí ùdico cuíá ñí xúhu<sup>n</sup>-yu ichi ío ní cudéè<sup>n</sup> Yã Ndiõxí núú-yu cuendá sá

nǐ quidé-yu nándi nchaa sá cuèhé sá dúhá, te ñáyiu-án nǐ xihí-yu xití yucu.

18 Te nchaa ñáyiu-án ñà túú ní cuíní-yu tñí-yu tnúhu ní cáhá<sup>n</sup> Yă Ndiöxí nǔu xiă<sup>n</sup> ní cáhá<sup>n</sup> ndáá-gá sá vǎ ndúú tǎhǔ-yu cundecu-yu núú ïo váha càa ndecu-gá.

19 Te xiă<sup>n</sup> nǔu nchoo cùnuni iní-ó sǎ nchaa ñáyiu-án ñà túú ní ndúú tǎhǔ-yu cundecu váha-yu núú ndécú-gǎ, chi ñá túú ní sàndáá iní-yu tnúhu ní cáhá<sup>n</sup>-gá.

#### 4

1 Te vitna ndècu ndihí-gá-ó tnúhu Yă Ndiöxí tnúhu sá dánèhé ñáhá xii-o sá cúú cundecu váha-o núú ndécú-gǎ, te tàú-xi quiyùhú iní-ó chi na cuáhá<sup>n</sup> te vǎ ndúú tǎhǔ-ó cundecu váha-o nǔu ndécú-gǎ.

2 Te tnàhá nchoo nǐ ngúndecu ndihí-o tnúhu sá càhá<sup>n</sup> nàcuáa naníhí tǎhǔ-ó dàtná ní xíndecu ndihí cue ñáyiu ndéé sanaha, dico ñáyiu-án chi ñá túú vèdana ní nàndíhí-xi cuèi ní xíndedóho-yu tnúhu-án chi ñá túú ní sàndáá iní ñáhǎ-yu xii-gá.

3 Dico nchoo cùu-o ñáyiu ní sàndáá iní tnúhu Yă Ndiöxí, núu xiă<sup>n</sup> nduu tǎhǔ-ó cundecu váha-o núú ndécú-gǎ, te ní quee ndáá-xi nàcuáa càhá<sup>n</sup>-gá núú tütú-gá núú cǎchí-xi:

Yúhú ní cudèè<sup>n</sup>-í núu-yu, te ní cáhá<sup>n</sup> ndáá-í sá vǎ ndúú tǎhǔ-yu cundecu váha-yu núú ndécú-í.

Duha ní cachí-gá. Te cuu nduu tǎhǔ-yu cundecu váha-yu núú ndécú Yă Ndiöxí ní cùu, chi sa ní xínu cava nchaa chiú<sup>n</sup> ní quide-gá sá nǐ cadúha-gá ñuyú.

4 Te núú tütú Yă Ndiöxí càhá<sup>n</sup>-xi nàcuáa ní quide-gá nduu úsá, te duha cǎchí-xi:

Yă Ndiöxí ní quide chiú<sup>n</sup>-gá ínú nduu ní quide-gá nchaa chiú<sup>n</sup>-gá te ní ndetatú-gá nduu úsá.

Duha cǎchí-xi núú tütú-gá.

5 Te cǎchí tucu-xi núú tütú Yă Ndiöxí nàcuáa ní cáhá<sup>n</sup>-gá cuèndá cue ñáyiu ndéé sanaha, te duha ní cachí-gá:

Cue ñáyiu-a vǎ ndúú tǎhǔ-yu cundecu váha-yu núú ndécú-í ndétátú-í. Duha ní cachí-gá.

6 Te ñáyiu ní xíndedóho tnúhu sá càhá<sup>n</sup> nàcuáa naníhí tǎhǔ-ó ndéé sanaha, ñá túú ní ndúú tǎhǔ-yu cundecu váha-yu núú ndécú Yă Ndiöxí ndétátú-gá, te duca<sup>n</sup> chi ñá túú ní sàndáá iní ñáhǎ-yu xii-gá, dico ïo-gá ñáyiu nduu tǎhǔ cundecu váha núú ndécú-gǎ ndétátú-gá.

7 Te ní xica cuèhé nduu sá dúcá<sup>n</sup> ñà túú ní sàndáá iní ñáhá ñáyiu-án xii-gá, te dàtnúni ní cáhá<sup>n</sup> ndíi Dàvií yuhu-gá nàcuáa cada-gá vitna, te ñu-ni nàcuáa sa yòdo tnuni ñu-ni duca<sup>n</sup> chido tnuni tucu-í nàcuáa ní cáhá<sup>n</sup> ndíi yuhu-gá, te duha ní cachí-gá:

Te núu nchòhó ndèdóho-ndo tnúhu càhá<sup>n</sup>-í te vǎ cadá sàá iní-ndó. Duha ní cachí-gá.

8 Te ndíi Jòsué ní sanu ichi ndíi ñáyiu núú quihí<sup>n</sup>-yu cundecu váha-yu, dico ñá díú cuèndá xiă<sup>n</sup> ní càhá<sup>n</sup> Yă Ndiöxí, chi cuèndá nàcuáa cada-gá vitna ní cáhá<sup>n</sup>-gá.

9 Núu xiă<sup>n</sup> sáá nduu ndúú tǎhǔ nchaa ñáyiu cùu cuèndá Yă Ndiöxí ngúndecu váha-yu núú ndécú-gǎ ndétátú-gá.

10 Te nchaa ñáyiu duca<sup>n</sup> na ndúú tǎhǔ cundecu váha núú ndécú Yă Ndiöxí ndétátú-gá, te tnàhá-yu ndetatú-yu cuèndá nchaa sá vǎha ní quidé-yu dàtná ndétátú méé-gǎ.

11 Te xini ñuhu-xi sá nchóo ïo nducu ndéè-o nducu-o nàcuáa cada-o cuèndá nduu tǎhǔ-ó ngúndecu váha-o núú ndécú Yă Ndiöxí ndétátú-gá, chi na cuáhá<sup>n</sup> dava-ndo càda-ndo dàtná ní quide cue ñáyiu ñá túú ní sàndáá iní ñáhá xii-gá, te vǎ ndúú tǎhǔ-ndó cundecu váha-ndo núú ndécú-gǎ te núu duca<sup>n</sup> na càda-ndo.

12 Te tnúhu Yă Ndiöxí cúú-xi dàtná ï<sup>n</sup> sá nchító-ó chi quide-xi nándi sá quidé-xí, te cùu-xi dàtná ï<sup>n</sup> sá dèé<sup>n</sup> víhí-gǎ dàcúúxí ï<sup>n</sup> yuchí sá ndéé úú xio núú-xi. Te duca<sup>n</sup> sǎtnahá-xi cùu tnúhu-gá chi quée-xi iní-ó, te dǎndixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o.

13 Te ní ï<sup>n</sup> sá nǐ cadúha Yă Ndiöxí vǎ cáni iní-ó sǎ ndácú-xí nguivǎha-xi núú-gǎ, chi nchaandi túhú sá sání iní-ó ndècu túu-xi núú-gǎ, te ñu núú



Yàá-á<sup>n</sup> na càni cuendá-ó nchaa sá quidé-ó.

*Xítóhó Jesucristú cúú-gă Dútú ïo cùnnuu*

<sup>14</sup> Te Xítóhó Jesucristú cúú-gă Dútú ïo cùnnuu ndecu ndihí-o, te ðiu-gă cúú-gă Déhe Dútú Ndiöxí, te Yaá-á<sup>n</sup> cuãndaa-gă andiu nĩ nucúndecu-gă núú Yă Ndiöxí, núu xíã<sup>n</sup> tàú-xi sá cáncñicú<sup>n</sup> nihnu-ni-o quĩndáá iní-ó-gă.

<sup>15</sup> Te mee Yàá-á<sup>n</sup> ïo cùnnuu-gă cúú-gă dútú-ó ndecu ndihí-o, te ïo na cùndahú iní ñáhá-gă xii-o cuendá sá ñă nihí ndéé-ó cùndecu-o. Te duca<sup>n</sup> càda-gă chi ní yáha-gă dàtná yáha mee-o, chi nchaa sá nĩ yáha-gă-á<sup>n</sup> nĩ cuu-xi sá cáda-gă nándi nchaa sá cuèhé sá dúhá ní cùu dico ni ñ<sup>n</sup> ñă túú ní quide-gă.

<sup>16</sup> Núu xíã<sup>n</sup> tàú-ó sã nchóó nì yuhu ni iní-ó cáhá<sup>n</sup> ndihí-o Yă Ndiöxí Yaá ïo cùndahú iní ñáhá xii-o chindee ñaha-gă, te duca<sup>n</sup> càda-o te cundahú iní ñáhá-gă chindee ñaha-gă xii-o ndèda-ni càa oré xíní ñùhu-o-gă.

## 5

<sup>1</sup> Te nchaa cue dútú cùnnuu núu ñáyiu israél ðiu-ni ñáyiu cùu-güedé, te duca<sup>n</sup> nĩ ngúndecu-güedé cuendá cada-güedé chiú<sup>n</sup> sá cúú-xi Yă Ndiöxí cuendá-yu, chi ðiu cue téé-á<sup>n</sup> nĩ xóo nacani cuendá-güedé núú-gă quiti ní xóo cahni-güedé ní xóo nduu táhú-gă, te duca<sup>n</sup> nĩ xóo cada-güedé cuendá sá cáda càhnu iní Yă Ndiöxí cuéchi-yu, te duca<sup>n</sup> nĩ xóo nacani cuendá tucu-güedé núú-gă nchaa dava-gă sá nĩ xóo níhí-güedé ní xóo nduu táhú-gă.

<sup>2</sup> Te nchaa cue dútú-ã<sup>n</sup> nĩ xóo cundee iní-güedé nchaa sá nĩ xóo cada nchaa ñáyiu ñă túú ní quide ndáá ñáyiu ñă túú cùtnuní iní-xi, te duca<sup>n</sup> nĩ xóo cada cue dútú-ã<sup>n</sup> chi tnàhá-güedé ñă túú ní xóo níhí ndéé-güedé cundecu-güedé cuendá nchaa sá nĩ xóo yáha-güedé.

<sup>3</sup> Te sá cuendá sá dúcá<sup>n</sup> ñă túú ní xóo níhí ndéé-güedé nũu xíã<sup>n</sup> dai ní xini ñuhu-xi sá tnàhá-güedé cuáha-güedé Yă Ndiöxí sá ndúú táhú-gă cuendá

méé-güedé dàtná quidé-güedé cuendá ñáyiu.

<sup>4</sup> Te ni ñ<sup>n</sup> téé vá ndácú-dé cuu-dé dútú cùnnuu cuendá-ni sá càchí iní méé-dé te núu ñă ðiú mèe Yă Ndiöxí duca<sup>n</sup> cuini-gă sá cúú-dé dútú cùnnuu datná ní quide-gă ndíi Àrón.

<sup>5</sup> Te cuèi Xítóhó Jesucristú chi ñă ðiú mèe-gă ní quide-gă méé-gă ñ<sup>n</sup> dútú cùnnuu nacúaa cada nínu-gă méé-gă, chi mee Tătá-gă Dútú Ndiöxí duca<sup>n</sup> nĩ cachí-gă sá cúú-gă Dútú cùnnuu, te duca<sup>n</sup> chi Yă Ndiöxí ní xáha<sup>n</sup>-gă:

Yòhó cúú-n Dèhe-í,

te cuini-í sá dúhá-ni cùndecu-n núú ndécù-í.

Duha ní xáha<sup>n</sup>-gă xii Xítóhó Jesucristú.

<sup>6</sup> Te núú tütú Yă Ndiöxí yódó tnùnì nàcuáa ní xáha<sup>n</sup> tucu-gă xii Xítóhó Jesucristú, te duha ní xáha<sup>n</sup>-gă:

Yòhó cúú-n dútú cundecu ni caa ni quíhí<sup>n</sup>,

te cùu-n datná ní cuu ndíi Melquisèdec.

Duha ní xáha<sup>n</sup>-gă xii Xítóhó Jesucristú.

<sup>7</sup> Te cùtnàhá ní xíndecu Xítóhó Jesucristú ñuyíú-a te níhi ní xóo cáhá<sup>n</sup> ndihí-gă Yă Ndiöxí te ní xóo cáhá<sup>n</sup> ndàhú-gă núú-gă, te ní xóo ndáhyú-gă òré duca<sup>n</sup> nĩ xóo cáhá<sup>n</sup> ndihí-gă Yă Ndiöxí, te duca<sup>n</sup> nĩ quide-gă chi nàha-gă sá Yă Ndiöxí cúú-gă Yaá ndacu dàcácu nihnu ñaha xii-gă cuendá sá vã cùú dúcá<sup>n</sup>-gă. Te Yă Ndiöxí ní xíndedóho-gă nchaa tnúhu ní cáhá<sup>n</sup> Xítóhó Jesucristú cuendá sá nĩ quide-gă nchaa nàcuáa ní xáha<sup>n</sup> Yă Ndiöxí cada-gă.

<sup>8</sup> Te sá cuendá nchaa sá nĩ ndoho Xítóhó Jesucristú xíã<sup>n</sup> ní cutnùnì iní-gă cada-gă nchaa dava-gă sá vãha nàcuáa cuini méé Yă Ndiöxí cada-gă. Te duca<sup>n</sup> nĩ cuu cuèi cùu-gă Déhe Yă Ndiöxí.

<sup>9</sup> Te sá dúcá<sup>n</sup> nĩ quide-gă nchaa nàcuáa cuini méé Yă Ndiöxí, xíã<sup>n</sup> nũu vitna cùu-gă Yaá dàcácu nihnu nchaa ñáyiu sàndáá iní ñáhá xii-gă núú ùhú núú ndàhú.

<sup>10</sup> Te mee Yă Ndiöxí ní cachí-gă sá Xítóhó Jesucristú cúú-gă dútú cùnnuu datná ní cunuu ndíi Melquisèdec cùtnàhá ní cuu ndíi dútú ñuyíú-a.

*Cuendá ñáyiú cuini daña ñihnu ichi Yá Ndiöxí*

11 Te vâi-gá tnúhu ndècu cáhá<sup>n</sup>-í nâcuáa ndùu cuendá Xítóhó Jesucristú, ndihí ndí Melquisèdec, te dicó-ni sá nchòhó ío cuèé tècú tnùnì-ndó, te yúhú ío úhú ñihí-í nâcuáa cáhá<sup>n</sup>-í nâcuáa tecú tnùnì-ndó.

12 Te nchòhó sa ní cuu cuéhé nduu ndècu-ndo ichi Xítóhó Jesucristú, te tàú-ndó dânehé-ndó cuè ñáyiú ndècu ichi-gá tnúhu-gá ñuu dicó sá cúú, dico xini ñuhu-ni-xi sá cündècu ñáyiú danèhé ñáhá tnúhu-gá xii-ndo, tnúhu sá ñi dâcuáhá-ndó ndéé díhna sá ñà túú ùhú tecú tnùnì-ndó. Te sá dúcá<sup>n</sup> quide-ndo núu xiá<sup>n</sup> cúú-ndó dàtná cue landú vitna sâdi camá, landú vátá cúú-gã caxi dítá.

13 Chi nchaa ñáyiú cùu datná landú vitna sâdi, ñáyiú-á<sup>n</sup> cúú nèñuú-yu ñà túú cùtnuní iní-yu nâcuáa càhá<sup>n</sup> tnúhu sá càhá<sup>n</sup> nâcuáa cada ndáá-yu cundecú-yu.

14 Te nchaa sá vátá cúú-gã caxi cue landú yíquí<sup>n</sup> xiá<sup>n</sup> cúú-xí cuendá cue ñáyiú sacuéhé, te xiá<sup>n</sup> cúú-xí dàtná tnúhu sá dâcuàha ñáyiú sa ní ñihí ndéé ndècu ichi-gá, ñáyiú sa ní cutnùnì váha iní-xi nândi cùu nchaa sá cuéhé sá dúhá, ndihí nândi cùu nchaa sá vâha.

## 6

1 Te xiá<sup>n</sup> ñuu vitna xini ñuhu-xi dacuaha-o dava-gá tnúhu Yá Ndiöxí cuendá duca<sup>n</sup> te cuu-o ñáyiú tècú tnùnì nchaa tnúhu-gá. Te xini ñuhu-xi sá ncháá tnúhu Xítóhó Jesucristú sá ñi dâcuáhá-ó ndéé díhna vá dâcuàha-gá-ó dàtná ní dâcuáhá-ó chi sa tècú tnùnì-ó. Te ñà túú-gã xini ñuhu-xi dacuaha-o datná ní dâcuáhá-ó ndéé díhna nâcuáa cada-o ndixi cuéchi iní-ó cuendá nchaa sá cuéhé sá dúhá quide-o, sá tá dâcuíta ñihnu ñaha xii-o cuáhá<sup>n</sup> ní cùu. Te duca<sup>n</sup> vâ dâcuàha-gá tucu-o dàtná ní dâcuáhá-ó ndéé díhna nâcuáa cada-o quindáá iní-ó Yá Ndiöxí,

2 ndihí cuendá nâcuáa ní dâcuáhá-ó nâcuáa cuandute-o, ndihí cuendá nâcuáa cada-o càcá<sup>n</sup> ndodo-o ndàha-o díquí ñáyiú ní sândáá iní ñáhá xii-gá.

Te duca<sup>n</sup> ñà túú-gã xini ñuhu tucu-xi dacuaha-o datná ní dâcuáhá-ó ndéé díhna cuendá nâcuáa ndoto cue ñáyiú ní xihí, ndihí cuendá nâcuáa ní dâcuáhá-ó sá Yá Ndiöxí daquihí<sup>n</sup>-gá ñáyiú núú ùhú núú ndàhú ni caa ni quihí<sup>n</sup>.

3 Te núu Yá Ndiöxí ná càchí-gá, te cuita dacuàha-gá-ó nchâa dava-gá tnúhu sá cùmăní quihí<sup>n</sup>.

4 Te cue ñáyiú sa tècú tnùnì tnúhu Yá Ndiöxí, ñáyiú sa xini nchaa nâcuáa ndùu nchaa sá vâha quide ñaha Yá Ndiöxí xii-o ndihí-yu, ñáyiú sa chindee ñaha Espiritú Yá Ndiöxí,

5 ñáyiú sa cùtnuní iní-xi sá ío váha tnúhu Yá Ndiöxí, ñáyiú sa xini nâcuáa ta quide Yá Ndiöxí véxi nchaa sá vâ yoo tnàhí ndàcu cada,

6 te núu ñáyiú-á<sup>n</sup> ná ngüita tucú-yu daquèe tíhú duú<sup>n</sup>-yu tnúhu Yá Ndiöxí, te vá ndácú-gã-ó nâ canu ichi-ó-yu nâcuáa ndixi cuéchi iní-yu te núu duca<sup>n</sup> na càdá-yu, te sá dúcá<sup>n</sup> ná càdá-yu te tnàhá-yu cùú-yu dàtná cue téé ní sahani ñaha xii Xítóhó Jesucristú Déhe Yá Ndiöxí núú cùrúxí. Te sá dúcá<sup>n</sup> ná càdá-yu te ngóo dava-gá ñáyiú cáhá<sup>n</sup> cuéhé-yu cuendá Xítóhó Jesucristú.

7 Te nchaa ñáyiú cùú-yu dàtná ñuhu, chi ñuhu-á<sup>n</sup> ndi tnàhá òré cúú<sup>n</sup> dâú te xihí-xi ndute, te dava ñuhu váha cùu sá xítú ñáyiú, te sá cúú núú ñuhu-á<sup>n</sup> ío nândihí-xi, te mee Yá Ndiöxí quidé-gã cúú sá vâha núú ñuhú-á<sup>n</sup>.

8 Dico núu da iñu na ndâa núú ñuhu-á<sup>n</sup> te ñà túú vèdana nândihí-xi te núu duca<sup>n</sup>, te Yá Ndiöxí vá cúú vâha iní-gá cuendá ñuhu-á<sup>n</sup> sá dúcá<sup>n</sup> dà iñu ndaa núú-xi, te iñu-á<sup>n</sup> ndihí-xi cáyú. Te duca<sup>n</sup> sâtnahá-xi cùu ñáyiú dàquee tíhú tnúhu Yá Ndiöxí chi ñà túú cùu váha iní-gá núú-yu.

*Ñihí-ó sâ ndétú-ó ndùu táhú-ó*

9 Te cuèi duha càhá<sup>n</sup>-í dico nchòhó cue ñáyiú ío cùu iní-í, chi cùtnuní ndáá iní-í sá vâ càdá-ndó dàtná xiquide dava-gá ñáyiú, te mee-ni sá vâha cuu xii-ndo chi cùu-ndo ñáyiú sa ní naníhí tàhú.

10 Te duca<sup>n</sup> chi Yá Ndiöxí cúú-gã Yaa ío váha quide ndáá, te vá dáná ndòdo iní-gá nchaa sá váha quide-ndo, te ni vá dáná ndòdo iní-gá nàcuáa quide-ndo cuu iní-ndó-gã, te sá dúcá<sup>n</sup> quide-ndo cuu iní-ndó-gã xíã<sup>n</sup> chindèe-ndo cue ñáyiú ndècu ndihí-ndo ichi Xítóhó Jesucristú, te duca<sup>n</sup>-ni ta quide-ndo véxi ndéé vitna.

11 Te cuiní-í sá ì<sup>n</sup> ì<sup>n</sup>-ndo nducu ndee-ndo cada-ndo nacuáa cuiní Yá Ndiöxí dàtná tá quide-ndo véxi, te ñáyiú-ndi duca<sup>n</sup> càda-ndo ndéé ná sàá nduu ndùu táhú-ndó cùndecu-ndo ndihí-gá núú ndécú-gã, te duca<sup>n</sup> te níhí-ndó nchàandi túhú sá ndétú-ndó ndùu táhú-ndó cùndecu ndihí-ndo ni caa ni quíhí<sup>n</sup>.

12 Te yúhú cuiní-í sá nchòhó vá túhío-ndo càda-ndo nchaa nacuáa cuiní Yá Ndiöxí, te cada-ndo dàtná quidé ñáyiú sàndáá iní tnúhu-gã, ñáyiú càhnu iní-xi. Te sá dúcá<sup>n</sup> quidé-yu xíã<sup>n</sup> níhí-yu nchaa sá ñí cachí Yá Ndiöxí nduu táhú-yu.

13 Te cútnàhá ní xáha<sup>n</sup> Yá Ndiöxí xii ndíi Àbrahám nàcuáa cada-gã, te ní cacunehe-gã méé-gã nàcuáa cutnùnì iní ndíi sá ndáá cada-gã nàcuáa ní xáha<sup>n</sup>-gã xii ndíi, te vá yõo ì<sup>n</sup> ni càcunehe-gã cuendá sá quíndáá iní ndíi tnúhu ní cáhá<sup>n</sup>-gã. Te duca<sup>n</sup> ñí quide-gã chi ì<sup>n</sup>dìi díi-ni mee-gã ío cùnuu-gã.

14 Te duha ní xáha<sup>n</sup>-gã xii ndíi Àbrahám: “Yòhó té Àbrahám na càchí tnúhu ndáá-í xii-ñ sã ío chindee ñàhá-í xii-n, te cáyá cuéhé víhí ñàni tnáhá-n”, duha ní xáha<sup>n</sup>-gã xii ndíi.

15 Te ndíi Àbrahám ío ní quide ndee iní ndíi ní xíndetu ndíi, te duca<sup>n</sup> te Yá Ndiöxí ní quide-gã nàcuáa ní xáha<sup>n</sup>-gã cada-gã sá cúú-xí ndíi.

16 Te núu ì<sup>n</sup> ñáyiú càhá<sup>n</sup> ì<sup>n</sup> tnúhu ndáá cuíti te càcu nehé-yu Yá Ndiöxí cuendá quíndáá iní tnàhá ñáyiú-yu tnúhu càhá<sup>n</sup>-yu, te òré duca<sup>n</sup> na càhá<sup>n</sup>-yu te ñá túú-gã sá dácàá ñáyiú càhá<sup>n</sup> ndihí-yu cuèndú.

17 Te duca<sup>n</sup> ñí quide Yá Ndiöxí ní cáhá<sup>n</sup> ndáá-gã sá cádá-gã nàcuáa ní cachí-gã, te duca<sup>n</sup> ñí cáhá<sup>n</sup>-gã cuendá

nchaa ñáyiú ní cachí-gã nduu táhú sã cádá-gã nàcuáa cutnùnì iní-yu sá quidé-gã ì<sup>n</sup> sá càhá<sup>n</sup>-gã, te ni ñà túú nàdáma-gã ì<sup>n</sup> sá càhá<sup>n</sup>-gã.

18 Te nchoo ñí natuha-o Yá Ndiöxí cuendá dácacu nihnu ñaha-gã xii-o núú ùhú núú ndàhú, te ní níhí-ó tnúhu ndee iní ndécú ndihí-o cuendá sá vá dáñá ndéé-ó cùndetu-o sáá nduu ndùu táhú-ó cùndecu-o ndihí-gã. Te duca<sup>n</sup> ñí níhí-ó tnúhu ndee iní chi Yá Ndiöxí ní cáhá<sup>n</sup> ndáá-gã sá cádá-gã nàcuáa ní cachí-gã, te ñá túú dandahú ñàhá-gã, te ni ñà túú nàdáma-gã ì<sup>n</sup> sá ñí cachí-gã cada-gã.

19 Te tnúhu ndee iní ndécú ndihí-o xíã<sup>n</sup> quidé-xí cutnùnì ndáá iní-ó sã ndúú táhú-ó cùndecu-o ndihí Yá Ndiöxí núú ndécú-gã, te duca<sup>n</sup> cutnùnì ndáá ndisa iní-ó sã cuendá Xítóhó Jesucristú Yaa ndécú núú Yá Ndiöxí.

20 Te duca<sup>n</sup> ñí nucúndecu Xítóhó Jesucristú núú Yá Ndiöxí cuendá duca<sup>n</sup> càncicú<sup>n</sup> nihnu-o càda-o, te duca<sup>n</sup> ñí nucúndecu-gã núú Yá Ndiöxí chi cùu-gã dútú cùnùu datná ní cunuu ndíi Melquisèdèc ñuyúú-a, te duca<sup>n</sup>-ni cùu-gã dútú cùnùu ni caa ni quíhí<sup>n</sup>.

## 7

### *Xítóhó Jesucristú cúú-gã dútú dàtná ní cuu ndíi Melquisèdèc*

1 Te ndíi Melquisèdèc ní xíndaha ndíi cue ñáyiú ñuú Sàlém, te ní cuu ndíi dútú ñí xinu cuechi ndíi núú Dútú Ndiöxí Yaa ío cùnuu. Te ndíi Melquisèdèc-á<sup>n</sup> ñí xicá<sup>n</sup> táhú ndíi núú Yá Ndiöxí cuendá ndíi Àbrahám cútnàhá ní sáhá<sup>n</sup> ndíi Àbrahám-á<sup>n</sup> ñí nàá ndíi ndihí cue dava-gã cue téé yíndaha ñáyiú. Te cue téé-á<sup>n</sup> ñà túú ní ndàcu-güedé nàá-güedé ndihí ndíi Àbrahám-á<sup>n</sup> chi ní xíta-güedé.

2 Te nchaa sá ñí níhí ndíi Àbrahám-á<sup>n</sup> núú ñí nàá ndíi, te ní quide ndíi úxí xichi te ì<sup>n</sup> xichi núú ùxí-á<sup>n</sup> ñí sáñaha ndíi xii ndíi Melquisèdèc. Te ñáyiú ndíi Melquisèdèc-á<sup>n</sup> quée-xí: Téé ío váha quide ndáá yíndaha ñaha xii ñáyiú, duha quée-xi. Te ní xóo danàni ñàhá-yu xii ndíi Téé yíndaha ñuú

Sàlém, duha ní xóo danàni ñahá-yu. Te tnúhu Sàlém-á<sup>n</sup> quée-xí: Ñuú ndécú nàhi, duha quèe-xi tnúhu-á<sup>n</sup>. Núu xíá<sup>n</sup> quée tùcu-xi nacuáa nàni ndíi Téeyìndaha ñuú ndécú nàhi, duha quèe tucu-xi ñuú ndíi.

<sup>3</sup> Te ñá túú tnúhu núu yoo cùu tátá ndíi ndihí náná ndíi, te ni ñà túú tnúhu núu yoo cùu xíi ndíi ndihí xítná ndíi, te ni ñà túú tnúhu núu nándi cùu ñáyiu ní cuu ñaní tnáhá ndíi ní xíndecu ndéé sanaha-gã, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-á<sup>n</sup> duca<sup>n</sup>-ni ní cuu ndíi dútú ní xíndecu ndíi, te duca<sup>n</sup> sãtnahá-xi cùu Xítohó Jesucristú déhe Yá Ndiòxí chi cuu-gá dútú ni caa ni quíhí<sup>n</sup>.

<sup>4</sup> Te vitna chí cuáha váha cuendá sá ndíi Melquisèdec ní cuu ndíi ñ<sup>n</sup> téé ío ní cuu càhnu ní xíndecu ñuyíú-a, chi ndíi Àbrahám téé ní cuu ñaní tnáhá-ó ní xíndecu ndéé sanaha ní quide ndíi úxí xichi nchaá sá ní níhí ndíi núú ní nàá ndíi. Te ñ<sup>n</sup> xichi núú ùxí-á<sup>n</sup> ní sãñaha ndíi xii ndíi Melquisèdec.

<sup>5</sup> Te ndíi Moisés ní chídó tnùnì ndíi nàcuáa cada nchaá dútú, cue téé ní cuu ñaní tnáhá ndíi Lèví sá cuè téé-á<sup>n</sup> quehe<sup>n</sup>-güedé ñ<sup>n</sup> xichi núú ùxí xichi sá níhí cue ñáyiu isràél ñáyiu cùu ñaní tnáhá-güedé cuu cuendá-güedé. Te duca<sup>n</sup> quide-güedé cuèi ñaní tnáhá-güedé ndihí-yu ní cuu ndíi Àbrahám.

<sup>6</sup> Te cuèi ñá díú ñaní tnáhá ndíi Melquisèdec cúu ndíi Àbrahám dico ní quehe<sup>n</sup> ndíi Melquisèdec-á<sup>n</sup> ñ<sup>n</sup> xichi núú ùxí xichi nchaá sá ní níhí ndíi Àbrahám. Te ndíi Melquisèdec-á<sup>n</sup> ní xíca<sup>n</sup> táhú ndíi núú Yá Ndiòxí cuendá ndíi Àbrahám. Te ñuú ndíi Àbrahám-á<sup>n</sup> ní xáha<sup>n</sup> Yá Ndiòxí xii ndíi sá cadá vaha ñaha-gã xii ndíi.

<sup>7</sup> Te sa cùnuni iní-ó sã ñuú ñ<sup>n</sup> téé na càcá<sup>n</sup> táhú-dé núú Yá Ndiòxí cuendá ñ<sup>n</sup> ñáyiu, te téé-á<sup>n</sup> cùnùu-gá-dé.

<sup>8</sup> Te cue dútú ñáyiu isràél quéhé<sup>n</sup>-güedé ñ<sup>n</sup> xichi núú ùxí xichi nchaá sá níhí-yu cùu cuendá-güedé, te cue téé-á<sup>n</sup> cuú-güedé. Te núú tütú Yá Ndiòxí càchí-xi sá ndíi Melquisèdec ndécú-ní ndíi, te duca<sup>n</sup> càhá<sup>n</sup>-xi chi ñá

túú tnúhu sá ní xíhí ndíi.

<sup>9-10</sup> Te sá dúcá<sup>n</sup> ní sãñaha ndíi Àbrahám sá ní nduu táhú ndíi Melquisèdec, te xíá<sup>n</sup> cada iní-ó sá sá ndecu ndihí ndíi Àbrahám cue ñaní tnáhá ndíi Lèví cue téé cùu dútú, cue téé quehe<sup>n</sup> ñ<sup>n</sup> xichi núú ùxí xichi nchaá sá níhí ñáyiu isràél cuèi vátá cãcú-gã-güedé. Te cada iní-ó sá tnáhá-güedé ní sãha-güedé ndíi Melquisèdec ñ<sup>n</sup> xichi núú ùxí xichi nchaá sá ní níhí ndíi Àbrahám núú ní nàá ndíi. Te duca<sup>n</sup> cada iní-ó chí cue téé-á<sup>n</sup> cuú-güedé ñaní tnáhá ndíi Àbrahám cuèi vátá cãcú-gã-güedé dàvá-á<sup>n</sup>.

<sup>11</sup> Te sá cuendá cue dútú cue téé cùu ñaní tnáhá ndíi Lèví ní ngúndecu ndihí cue ñáyiu isràél tnúhu sá sánú ìchi ñaha xii-yu nàcuáa cada-yu cundecú-yu. Te ñaní tnáhá ndíi Àrón cúu cuè dútú-á<sup>n</sup>. Te núu dícó cue dútú-á<sup>n</sup> ní ndàcu-güedé cada-güedé nàcuáa cudíu ñáyiu isràél núú Yá Ndiòxí, te ñá túú-gã xíni ñuhu-xi ngúndecu ingá dútú dàtná ndíi Melquisèdec ní cùu. Te dútú-á<sup>n</sup> ñà túú ní cùu-dé dàtná ní cuu cue ñaní tnáhá ndíi Àrón.

<sup>12</sup> Te núú cuè dútú cue téé cùu ñaní tnáhá ndíi Lèví-á<sup>n</sup> ní ngúndecu ingá dútú. Te sá dúcá<sup>n</sup> ní ngúndecu ingá dútú xíá<sup>n</sup> dacuítí ní xini ñuhu-xi sá dãma nàcuáa ndùu tnúhu sá sánú ìchi ñaha xii-yu nàcuáa cada-yu cundecú-yu.

<sup>13-14</sup> Te ñuú ndíi cuendá dútú-á<sup>n</sup> sa níhí-ó tnúhu, te dútú-á<sup>n</sup> cúu Xítohó Jesucristú, te ñá díú ñaní tnáhá ndíi Àrón cúu-gã chí ñaní tnáhá ndíi Jùdá cúu-gã. Te nchaá-o tà xíni ndáá-ó sá ñaní tnáhá ndíi Jùdá cúu-gã, te ndíi Moisés ñá túú tnáhí ná ní càchí ndíi cuendá cue ñaní tnáhá ndíi Jùdá sá cúu-güedé dútú, chí ni ñ<sup>n</sup>-güedé ñá túú ní cùu-güedé dútú ní cùu.

<sup>15</sup> Te vitna cùnuni ndáá iní-ó nàcuáa ní cuu, chí Xítohó Jesucristú cúu-gã ingá dútú dàtná ní cuu ndíi Melquisèdec.

<sup>16</sup> Te ñá díú cuendá tnúhu sá sánú ìchi ñaha xii ñáyiu nàcuáa cada-yu cundecú-yu duca<sup>n</sup> ni cùu-gá dútú, chí ní cuu-gá dútú cuendá sá cúu-gã Yáá

cundecu ni caa ni quíhí<sup>n</sup> chi vá íí<sup>n</sup> ndùu te ndìhì nihnu-gá.

17 Te duha ní xáha<sup>n</sup> Yá Ndiöxí xii-gá: Yòhó cúú-n dütú dàtná ní cuu ndí Melquisèdec,

te cundecu-n nchàa nduu nchaa quíú. Duha ní xáha<sup>n</sup> Yá Ndiöxí xii-gá.

18 Te xiá<sup>n</sup> nñu nchaa tnúhu ndéé díhna, tnúhu sá nǐ xíndecu ndìhì cue dütú ñà túú-gá cúnùu-xi vitna chi ñá túú-gá xíní ñùhu-xi te ni ñà túú nǎ chíndèe ñaha-xi.

19 Te ñu-ni tnúhu-á<sup>n</sup> cúú-xí tnúhu sá nǐ chídó tnùnì ndí Moisés canu ichi ñaha xii ñáyiú nàcuáa cada-yu cundecu-yu. Te tnúhu-á<sup>n</sup> ñà túú vèdana ni quide-xi nacuáa chindee-xi ñáyiú cudíu-yu núú Yá Ndiöxí. Dico vitna ní ngúndecu ndìhì-o tnúhu ndee iní sá ïo-gá váha dàcúxí tnúhu ndéé díhna, chi ndècu ndìhì-o Xítohó Jesucristú Yá cúú dütú-ó. Te Yá-á<sup>n</sup> quidé-gá tnàhá tnúhu-o ndìhì Yá Ndiöxí vitna.

20 Te Yá Ndiöxí ní cáhá<sup>n</sup> ndáa cuíti-gá sá Xítohó Jesucristú cuu-gá dütú.

21 Dico ñá túú dùca<sup>n</sup> ní cáhá<sup>n</sup>-gá cuèndá cue ñanì tnàhá ndí Lèví cue téé ní cuu dütú, cuèi mei òré ní chisaha-güedé ní cuu-güedé dütú. Te cútnàhá ní chisaha Xítohó Jesucristú cúú-gá dütú, te Yá Ndiöxí ní xáha<sup>n</sup> ndáa cuíti-gá xii-gá, te duha ní xáha<sup>n</sup>-gá:

Yúhú Dütú Ndiöxí cáhá<sup>n</sup> ndáa cuíti-í te vá dàmà-í tnúhu cáhá<sup>n</sup>-í:

“Yòhó cúú-n dütú dàtná ndí Melquisèdec,

te cundecu-n ni caa ni quíhí<sup>n</sup>.”

Duha ní xáha<sup>n</sup> Yá Ndiöxí xii Xítohó Jesucristú.

22 Te Xítohó Jesucristú quidé-gá nàcuáa cutnùnì ndáa iní-ó sǎ Yá Ndiöxí cada-gá ñngá núú sǎ váha sá cúú-xí-ó dàtná ní cachí-gá, te xiá<sup>n</sup> cúú-xí sǎ ïo-gá váha dàcúxí tnúhu ní cáhá<sup>n</sup>-gá ndéé díhna.

23 Te ío cuéhé cue ñanì tnàhá ndí Lèví ní cuu-güedé dütú, te duca<sup>n</sup> cuèndá sá ñà túú ní cùdí-güedé cundecu-güedé chi ní ndìhì-güedé ní xíhí.

24 Dico Xítohó Jesucristú chi vá cùu-gá, chi cundecu-gá ni caa ni

quíhí<sup>n</sup> nñu xiá<sup>n</sup> ñu-ni-gá cuu-gá dütú, te vá yò íí<sup>n</sup>-gá cuu dütú cada núú-gá.

25 Te núu xiá<sup>n</sup> Xítohó Jesucristú dácácu nihnu ñaha-gá xii nchoo ñáyiú núú ùhú núú ndàhú, nchoo ñáyiú sàndáa iní ñáhá xii-gá, te ñu-ni nchoo cùu-o ñáyiú tnàhá tnúhu ndìhì Yá Ndiöxí, te vá íí<sup>n</sup> ndùu-gá te cuíta nihnu-o. Te duca<sup>n</sup> chi Xítohó Jesucristú ñá túú xòcuíñí-gá núú Yá Ndiöxí cáhá<sup>n</sup> ndàhú-gá cuèndá-ó.

26 Te Xítohó Jesucristú cúú-gá Yá cúú dütú cúnùu xini ñuhu-o cundecu ndìhì-o, te ñu-gá cúú-gá Yá chíndèe chítúu ñaha xii-o, te cùu-gá Yá ío quide ndáa núú Yá Ndiöxí, te cùu-gá Yá cándòo canine chi ñá túú tnàhí cuéchi-gá. Te ñá túú tnàhí quide-gá dàtná quidé nchàa cue ñáyiú ndècu ichi cuehé ichi duha, te cùu-gá Yá ní nucúndecu andíu nñu ndécú Yá Ndiöxí te yáca<sup>n</sup> táxí tnùnì-gá.

27 Te ñá túú quide-gá dàtná ní quide cue dütú ní cunuu nǐ xíndecu, chi cue dütú-á<sup>n</sup> íí<sup>n</sup> nduu íí<sup>n</sup> nduu ní xóo cahni-güedé cuíti ní xóo nduu táhú Yá Ndiöxí, te díhna-gá cuèndá nchaa cuéchi mee-güedé duca<sup>n</sup> nǐ xóo cada-güedé te dàtnùnì duca<sup>n</sup> nǐ xóo cada tucu-güedé cuèndá nchaa cuéchi ñáyiú. Dico Xítohó Jesucristú chi íí<sup>n</sup> xito-ni ní xíhí-gá sá cúú-xí nchàa ñáyiú chi duca<sup>n</sup> nǐ sani iní-gá, te vá íí<sup>n</sup> ndùu-gá duca<sup>n</sup> càda tucu-gá.

28 Te sá cuèndá nchaa tnúhu ní chídó tnùnì ndí Moisés xiá<sup>n</sup> ní xíndecu cue téé ní cuu dütú cúnùu, te cue téé-á<sup>n</sup> nǐ cuu-güedé cue téé yíca cuéchi-xi. Te sátá dúca<sup>n</sup> nǐ chídó tnùnì ndí Moisés nàcuáa cada ñáyiú, te ní xica cuéhé víhí ndùu te dàtnùnì ní cáhá<sup>n</sup> ndáa cuíti Yá Ndiöxí sá Dèhe-gá cuu-gá dütú cúnùu. Te Yá cúú Dèhe-gá-á<sup>n</sup> nǐ quide-gá nchaa nàcuáa tàu-xi cunduu, te ñu-ni duca<sup>n</sup> càda-gá ni caa ni quíhí<sup>n</sup>.

## 8

### *Xítohó Jesucristú cúú-gá dütú cúnùu*

1 Te Xítohó Jesucristú Yá cúú dütú cúnùu ndecu ndìhì-o cuándaa-gá andíu, te ní ngóo-gá xio cùha Dütú

Ndiöxí Yaá ío cùnunu, te tnàhá-gá cùnunu-gá. Te ñu cuendá-a cùu-xí sá ño-gá cùnunu ta cáhá<sup>n</sup>-ndí véxi.

<sup>2</sup> Te núu ndécú Yă Ndiöxí cúu-xí núu ñí víhí. Te cada iní-ó sá cúu-xí ñ<sup>n</sup> vehe te xía<sup>n</sup> ndécú Xítóhó Jesucristú cúu-gă dútú, te vehe-á<sup>n</sup> ñí dácáá mèe Yă Ndiöxí te ñá díu cuè tée ñuyíu-a.

<sup>3</sup> Te sá cuendá nchaa tnúhu ní chídó tnùní ndí Moisés xía<sup>n</sup> ní xíndecu cue dútú cùnunu cuendá sá cáhni-güedé quiti nduu táhú Yă Ndiöxí, te nacani cuendá-güedé núu-gă nchaa dava-gá sá ñihí-güedé nduu táhú-gă. Te xía<sup>n</sup> núu dai ní xini ñuhu-xí sá tnàhá Xítóhó Jesucristú cuañaha-gă ñ<sup>n</sup> sá ndúú táhú Yă Ndiöxí, te táhú-ă<sup>n</sup> cúu-xí mèe-gá chi ní xihí-gá ní cuu-gá dàtná ñ<sup>n</sup> táhú sá cúu-xí Yă Ndiöxí.

<sup>4</sup> Te núu ní xíndecu-ni Xítóhó Jesucristú ñuyíu-a te vá cúu-gă dútú ní cùu, chi sa ndècu cue dútú sãñaha nchaa sá ndúú táhú Yă Ndiöxí dàtná càhá<sup>n</sup> nchaa tnúhu ní chídó tnùní ndí Moisés.

<sup>5</sup> Te nchaa sá quidé cuè dútú ñáyiú isràél nũtnahá-xi luha nchaa sá quidé Xítóhó Jesucristú Yaá cúu dútú cùnunu ndecu andiú. Te quèe ndáá-xi nàcuáa ní xáha<sup>n</sup> Yă Ndiöxí xii ndí Moisés cùtnàhá tá cùyatni ngüíta ndí dacàa ndí vehe-gá, te duha ní xáha<sup>n</sup>-gă: “Ío váha cada cuendá-n nàcuáa dacàa-n vehe-í dàtná cáá sá ñí dánèhé ñàhá-í xii-n xiti yucu”, duha ní xáha<sup>n</sup>-gă xii ndí.

<sup>6</sup> Dico vitna chi Xítóhó Jesucristú cúu-gă dútú cùnunu, te ío-gá càhnu nduu chiu<sup>n</sup> quide-gá dácúxí cuè dútú cue ñáyiú isràél. Te ñu Xítóhó Jesucristú cúu-gă Yaá quidé tnàhá tnúhu-o ndíhi Yă Ndiöxí, te duca<sup>n</sup> chi Yă Ndiöxí ío-gá váha ndùu tnúhu ní cáhá<sup>n</sup>-gá xito cùu uú dácúxí tnúhu ní cáhá<sup>n</sup>-gá ndéé díhna, te duca<sup>n</sup> ío váha ndùu tnúhu ní cáhá<sup>n</sup>-gá xito cùu uú chi ní cachí-gá sá ñngá núu sá ño-gá váha cada ñaha-gă xii-o vitna.

<sup>7</sup> Te núu nàcuáa ní cachí Yă Ndiöxí cada ñaha-gă xii-o ndéé díhna ní quide-xi nchaa nacuáa tàú-xi cunduu nàcuáa nduu táhú-ó cùndecu váha-o núu-gă ñá, te ñá túu xini ñuhu-xí cáhá<sup>n</sup>

tucu-gá sá cádá-gă ñngá núu sá váha sá cúu-xí-ó vitna ní cuu.

<sup>8</sup> Te Yă Ndiöxí ñá túu ní cùu váha iní-gá núu ñáyiú isràél núu xía<sup>n</sup> ní cáhá<sup>n</sup>-gá cuendá-yu, te duha ní cachí-gá:

Yúhú cúu-í Dútú Ndiöxí, te duha ndùu tnúhu na càhá<sup>n</sup>-í: Sáá nduu te cada-í ñngá núu sá váha sá cúu-xí cuè ñaní tnàhá ñáyiú isràél, ndíhi cue ñaní tnàhá ndí Jùdá ñu-ni ñáyiú isràél.

<sup>9</sup> Te tnúhu sá càhá<sup>n</sup>-í-a ñá túu ñ<sup>n</sup>-ni cuu-xí ndíhi tnúhu sá ñí xáha<sup>n</sup>-í xii cue ñáyiú ní cuu ñaní tnàhá-yu ní xíndecu ndéé sanaha càda-í-yu,

te ñu-ni dàvá-á<sup>n</sup> ñí quide yica-í ní ndeñuhu-í-yu nació<sup>n</sup> Ègíptú,

te ñá túu ní cuini-yu tní-yu tnúhu ní xáha<sup>n</sup>-í xii-yu cuendá duca<sup>n</sup> càda váha-í-yu,

te xía<sup>n</sup> núu ní dáñá ñihnu-í-yu ñá túu-gă ní quide cuendá-í-yu.

<sup>10</sup> Te na sáá nduu te duha ndùu tucu ñngá núu sá váha cada-í cue ñáyiú isràél.

Te yúhú cada-í nàcuáa cutnùní váha iní-yu nàcuáa cuini-í cadá-yu,

te duca<sup>n</sup> ñí yuhu ní iní-yu cadá-yu.

Te yúhú Yă Ndiöxí quindaha-í-yu, te mèe-yu cuú-yu ñáyiú cùu cuendá-í.

<sup>11</sup> Te dàvá-á<sup>n</sup> chi ní ñáyiú cùu ndí meé-yu,

te ní cuè dava-gá ñáyiú vá cùtnúhu tnàhá-yu sá nátúha ñàhá-yu xii-í,

chi dàvá-á<sup>n</sup> nchaa ñáyiú cundecu ndíhi ñàhá-yu xii-í,

cuèi ñáyiú cùnunu te cuèi ñáyiú ñá túu cùnunu.

<sup>12</sup> Te dàvá-á<sup>n</sup> cada càhnu iní-í nchaa sá cuèhé sá dúhá quidé-yu,

te vá ñ<sup>n</sup> ndùu-gá ndacu iní-í nchaa sá quidè-yu.

Duha ní cachí Yă Ndiöxí cuendá ñáyiú isràél.

<sup>13</sup> Te sá dúcá<sup>n</sup> ñí cáhá<sup>n</sup> Yă Ndiöxí sá cádá-gă ñngá núu sá váha sá cúu-xí ñáyiú xía<sup>n</sup> cùtnùní sá tnúhu sá ñí cáhá<sup>n</sup>-gá díhna ñá túu-gă xini ñuhu-xí. Te cada iní-ó sá tnúhu-á<sup>n</sup> cúu-xí ñ<sup>n</sup> sá ñí cunaha ndècu te ñá

túu-gã nándĩhi-xi te cuíta-ná-xi, duca<sup>n</sup> sãtnahá-xi cùu tnúhu sá ñĩ cáhá<sup>n</sup>-gã ndéé díhna.

## 9

### *Cuendá vehe Yá Ndiõxí*

<sup>1</sup> Te tnúhu sá ñĩ cáhá<sup>n</sup> Yá Ndiõxí ndéé díhna cùu-xi cuendá nàcuáa cada ñáyiu isràél chiñuhu ñàhá-yu xii-gá, ndihí cuendá vehe-gá caa ñuyíu-a.

<sup>2</sup> Te ñáyiu isràél ní dácáã-yu vehe Yá Ndiõxí, te vehe-á<sup>n</sup> ñĩ cuu-xi vehe dóo te ní xúhu<sup>n</sup> nehu xití-xi. Te cuàrtú díhna ní xínani-xi cuàrtú ní cuu íí, te xíá<sup>n</sup> ñĩ xíndecu ñĩ sá ndéé dité-xi sá ñĩ cándodó ñĩ caa candíl núú dité-xi, te ní xínutnĩ ñĩ mèsá ní xóo códó pàá ní xóo nduu táhú Yá Ndiõxí.

<sup>3</sup> Te cuàrtú cúú ùú ní xínani-xi cuàrtú ní cuu íí víhí-gã.

<sup>4</sup> Te xití cuàrtú-á<sup>n</sup> ñĩ xínutnĩ ñĩ sá ñĩ cuáha mee-ni díhú<sup>n</sup> cuáá<sup>n</sup> te núú xíá<sup>n</sup> ní xóo cahmi-güedé dúsa sá sàhá<sup>n</sup> tnámí. Te ñi-ni xíá<sup>n</sup> ñĩ xíndecu tucu ñĩ càjá ní cuu mee-ni díhú<sup>n</sup> cuáá<sup>n</sup> te xití càjá-á<sup>n</sup> ñĩ xúhu<sup>n</sup> ñĩ lítu ní cuáha mee-ni díhú<sup>n</sup> cuáá<sup>n</sup>, te xití lítu-á<sup>n</sup> ñĩ xúhu<sup>n</sup> mànáá sá ñĩ xóo caxí-yu dàvá-á<sup>n</sup>. Te ñi-ni xití càjá-á<sup>n</sup> ñĩ xúhu<sup>n</sup> tnuði ndíi Àrón sá ñĩ saa itá-xi, ndihí yúú sã ñĩ xíndéé tnúhu ní cáhá<sup>n</sup> Yá Ndiõxí nàcuáa cada ñáyiu. Te duha ní xínani càjá-á<sup>n</sup>: Càjá sá ñíhú tnúhu ní cáhá<sup>n</sup> Yá Ndiõxí sá cúú-xí ñáyiu, duha ní xínani-xi.

<sup>5</sup> Te núú càjá-á<sup>n</sup> ñĩ cándodó ùú tnàhá sá ñĩ cadúha-yu, te xíá<sup>n</sup> cáá-xí dàtná cáá espíritú xínú cuèchi núú Yá Ndiõxí. Te cuendá úú xíá<sup>n</sup> ní cutnùní iní-yu sá ño càhnu cuu Yá Ndiõxí, te sá ñĩ cadúha-yu-á<sup>n</sup> ndéé ndíxí<sup>n</sup>-xi, te ndíxí<sup>n</sup>-xi-á<sup>n</sup> dàhu-xi xio xio núú quidé càhnu iní Yá Ndiõxí nchaa yíca cuèchi ñáyiu, dico vá cúú-gã cáhá<sup>n</sup>-í cuendá nchaa dava-gã xíá<sup>n</sup> vitna.

<sup>6</sup> Te nchaa xíá<sup>n</sup> ní xíndecu xití vehe Yá Ndiõxí, te cue dútú ñĩ xóo quíhu-güedé ñĩ nduu ñĩ nduu xití cuàrtú díhna ní xóo cada-güedé nàcuáa tàú-güedé cada-güedé sá cúú-xí Yá Ndiõxí.

<sup>7</sup> Te cuàrtú cúú ùú-á<sup>n</sup> chi mee-ni dútú cúnúu ní xóo quíhu-dé ñĩ xito-ni ndi tnahá cuía. Te ndi tnahá òré duca<sup>n</sup> ñĩ xóo quíhu dútú cúnúu-á<sup>n</sup> te ní xóo canehe-dé ñĩ ñĩ ñĩ xóo quíhu ní xóo nduu táhú Yá Ndiõxí. Te duca<sup>n</sup> ñĩ xóo cada dútú-á<sup>n</sup> cuendá sá Yá Ndiõxí cada càhnu iní-gá nchaa yíca cuèchi mee-dé, ndihí nchaa yíca cuèchi ñáyiu.

<sup>8</sup> Te sá dúcá<sup>n</sup> mèe-ni dútú cúnúu ní xóo quíhu-dé xití cuàrtú ní cuu íí-gã-á<sup>n</sup>, xíá<sup>n</sup> Espíritú Yá Ndiõxí quidé-xí cutnùní iní-ó sã ñini duca<sup>n</sup> ní xíndecu vehe-á<sup>n</sup> ñĩ xóo cada-yu nàcuáa ní xóo cúñaha Yá Ndiõxí cada-yu. Te xíá<sup>n</sup> cutnùní sá vátá sàá-gá nduu càhá<sup>n</sup> ndihí-yu Yá Ndiõxí nàcuáa tàú-xi cunduu.

<sup>9</sup> Te sá dúcá<sup>n</sup> ñĩ xíndecu vehe-á<sup>n</sup>, ndihí sá dúcá<sup>n</sup> ñĩ xóo cada nchaa cue dútú-á<sup>n</sup>, xíá<sup>n</sup> cutnùní iní-ó nàcuáa quide Yá Ndiõxí vitna, chi nchaa quití ní xóo cahni cue dútú-á<sup>n</sup> ñĩ xóo nduu táhú Yá Ndiõxí, ndihí nchaa dava-gá sá ñĩ xóo nduu táhú-gã ñá túú ní quide-xi nàcuáa nduu ndoo nduu nine iní cue ñáyiu nàcuáa cutnùní iní-yu sá ñà túú-gã cuèchi-yu ndècu núú Yá Ndiõxí.

<sup>10</sup> Te sá dúcá<sup>n</sup> ñĩ xóo cada nchaa dútú-á<sup>n</sup> ñĩ níhí tnàhá-xí ndihí nchaa tnúhu sá dánhé ñàhá xii ñáyiu ná cúú sã caxí-yu ndihí ná cúú sã cúú còhó-yu ndihí nàcuáa ndàhá-yu. Te tnúhu-á<sup>n</sup> ñĩ cuu-xi mee-ni sã ñĩ sanu ichi ñaha xii-yu nàcuáa cundecú-yu ñuyíu-a. Te tnúhu-á<sup>n</sup> ñĩ nándĩhi-xi ndéé ní sáá nduu ñĩ nadama Yá Ndiõxí tnúhu-á<sup>n</sup> cuendá sá vã dúcá<sup>n</sup>-gã cada-yu cundecú-yu.

<sup>11</sup> Te Xítohó Jesucristú ní quixi-gá ñuyíu-a, te ñi-gá cúú-gã Yaá cúú dútú cúnúu, te xíá<sup>n</sup> núu quide-gá nchaa sá vãha sá cúú-xí-ó. Te vitna ní nucúndecu-gá núú ño víi ño vãha càa, te núú ndécú-gã-á<sup>n</sup> ñà túú cùu-xi ñĩ vehe sá ñĩ dácáá cue tée ñuyíu-a.

<sup>12</sup> Te cada iní-ó sã Xítohó Jesucristú cuànguñhu-gá xití cuàrtú núú ñĩ cuu íí víhí dàtná ní xóo cada dútú cúnúu ní xíndecu ndéé sanaha, chi ní nucúndecu-gá núú ndécú Yá

Ndiöxí. Dico ñá túú ni quide-gá dàtná ní xóo cada dútú cúnúu ní xíndecu ndéé sanaha, chi dútú-á<sup>n</sup> òré ní xóo quíhu-dé xítí cuàrtú ní cuu íí-gã-á<sup>n</sup>, te ní xóo canehe-dé níñí chivá ndíhi níñí chēhlu ní xóo quíhu. Dico Xítóhó Jesucrístú chi níñí méé-gã ní sati ní xíhí-gá núú cùrúxí, te xiá<sup>n</sup> duu<sup>n</sup> duu<sup>n</sup> cuáhá<sup>n</sup>-gá ní nucúndecu-gá núú ndécú Yá Ndiöxí. Te sá dúcá<sup>n</sup> ní quide-gá xiá<sup>n</sup> ní naníhí tàhú-ó.

13 Te nchaa ñáyiú ní xóo cada nàcuáa vá cúú-gã-yu ñáyiú ní cuu íí, ñáyiú-á<sup>n</sup> ní xóo códó ñáhá cuè dútú níñí ndicutu, ndíhi níñí chivá, ndíhi yáá cúnú chēhlu quítí sàhni-güedé cuèndá nduu íí tucú-yu.

14 ¡Dico níñí Xítóhó Jesucrístú chi ío-gá nándíhi-xi sá cúú-xí nchòo ñáyiú xíndecu vitna! Te cuèndá níñí-gã-á<sup>n</sup>, chi Espíritú Yá Ndiöxí sá ndécú nchaa nduu nchaa quíú ní cuu ì<sup>n</sup>nuu-xi ndíhi Xítóhó Jesucrístú sá cúú cùú-gá cuèndá cuu-gá dàtná ì<sup>n</sup> táhú sá cúú-xí Yá Ndiöxí cuèi cùu-gá Yáá ñá túú tnàhí cuèchi-xi, te ní sati níñí-gã te ní xíhí-gá. Te cuèndá xiá<sup>n</sup> ní cutnùní iní-ó sã Yá Ndiöxí ní quide càhnu iní-gá nchaa sá ñà túú vãha ní quide-o, te ní nduu ndoo ní nduu nine iní-ó. Te duca<sup>n</sup> ní nduu ndoo ní nduu nine iní-ó cuèndá sá ndácú-ó cunu cuechi-o núú Yá Ndiöxí Yáá ndécú nchaa nduu nchaa quíú.

15 Te Xítóhó Jesucrístú ní quide ndáá-gá núú Yá Ndiöxí cuèndá cue ñáyiú ndècu ñuyú-a. Te cuèndá xiá<sup>n</sup> Yá Ndiöxí cada-gá ingá núú sã vãha sá cúú-xí-yu dàtná ní cachí-gá, te duca<sup>n</sup> càda-gá sá cuèndá nchaa ñáyiú ní cáhá<sup>n</sup>-gá cundecu ndíhi-gá, chi ñáyiú-á<sup>n</sup> nduu táhú-yu cundecu ndíhi vãha ñàhá-yu xii-gá ní caa ní quíhí<sup>n</sup> chi duca<sup>n</sup> ní cachí-gá, te duca<sup>n</sup> chi Xítóhó Jesucrístú ní xíhí-gá núú cùrúxí cuèndá sá Yá Ndiöxí cada càhnu iní-gá nchaa yíca cuèchi-yu, nchaa cuèchi sá ní quidé-yu cútnàhá ní cunuú tnúhu sá ní cáhá<sup>n</sup>-gá díhna.

16 Te nchoo xíní-ó sã núu ì<sup>n</sup> tée na càdúha ì<sup>n</sup> tutú nàcuáa cada ñáyiú

dàcáhñu-yu nchaa sá ndécú ndíhi-dé, te tutú-á<sup>n</sup> xíní ñùhu-xi ndéé ná yãha nduu cùú-dé.

17 Te ñá túú tàú-xi cada ñáyiú nàcuáa càhá<sup>n</sup>-xi núú tùtú-á<sup>n</sup> nini ndècu tée ní cadúha, dico sátá ná yãha cuú-dé te cadá-yu nàcuáa càhá<sup>n</sup>-xi.

18 Te cuèi tnúhu ní cáhá<sup>n</sup> Yá Ndiöxí ndéé díhna nàcuáa cada vãha-gá ñáyiú, te ñu-ni ndíhi níñí ní cundáá-xi chi ní sàhni-güedé quítí te ní sati níñí-güedi.

19 Te ndíi Moisés ní cáhá<sup>n</sup> ndodo ndíi núú nchaa ñáyiú nàcuáa ní cachí Yá Ndiöxí cada-yu, te nàcuáa-ni nduu tnúhu ní chídó tnùní ndíi núú tùtú ndíi ní cáhá<sup>n</sup> ndíi, te ní dácá ndíi ndute níñí chēhlu ndíhi níñí chivá líhli, te ní quehe<sup>n</sup> ndíi ì<sup>n</sup> dité yutnu nani hisópó ndíhi luha idi tìcuèhé, te ní chindóyo ndíi níñí-á<sup>n</sup>. Te ní sódó ndíi núú tùtú ndéé tnúhu Yá Ndiöxí sá ní chídó tnùní ndíi-á<sup>n</sup>, te tnàhá cue ñáyiú xíndecu-á<sup>n</sup> ní chúcú ndíi.

20 Te ní xáha<sup>n</sup> ndíi Moisés xií-yu: “Cuèndá níñí-a ní cundáá sá Yá Ndiöxí cada ñaha-gã xii-ndo sã vãha chi duca<sup>n</sup> ní cachí-gá cada-gá sá cúú-xí-ndó”, duha ní xáha<sup>n</sup> ndíi xií-yu.

21 Te ñu-ni duca<sup>n</sup> ní quide tucu ndíi ní chúcú ndíi níñí vehe-gá ndíhi nchaa sá nándíhi-güedé òré chíñùhu-güedé Yá Ndiöxí ndécú xítí vehe-gá-á<sup>n</sup>.

22 Te tnúhu ní chídó tnùní ndíi Moisés càchí-xi sá méé-ní níñí chucu-güedé nchaa sá cànehe chiu<sup>n</sup>-güedé òré chíñùhu-güedé Yá Ndiöxí, te sacú-nã te ndíhi ndoo nchaa xiá<sup>n</sup> chucu-güedé níñí ní cùu. Te dacuítí ní xini ñuhu-xi sã cáti níñí cuèndá duca<sup>n</sup> càda càhnu iní Yá Ndiöxí nchaa yíca cuèchi ñáyiú.

*Xítóhó Jesucrístú ní xíhí-gá núú cùrúxí cuèndá sá vã cùndècu-gá cuèchi-o núú Yá Ndiöxí*

23 Te sá cuèndá sá ní xíhí Xítóhó Jesucrístú núú cùrúxí, xiá<sup>n</sup> ñá túú-gã cuèchi-o ndècu núú Yá Ndiöxí. Te cuèndá nchaa sá ní xíhí xítí vehe-gá sá ní dácáá ñáyiú isràél xiá<sup>n</sup> cútnùní iní-ó nàcuáa quide-xi núú



ndécú-gă. Te dacuítí ní xini ñuhu-xi sã cáhni-güedě cue quití ní cachí Yã Ndiõxí cuendá nduu íí nchaa sá ñí xíhi xítí vehe-gá-á<sup>n</sup>. Te cuëi duca<sup>n</sup> ñí sahani-güedé cue quití-á<sup>n</sup> dico ñá túú ní quide-xi nacuáa ngúndecu váha-o núú Yã Ndiõxí. Dico Xítohó Jesucristú ní xíhí-gá, te sá ñí xíhí-gá xiã<sup>n</sup> ní quide-gá nacuáa ngúndecu váha-o núú Yã Ndiõxí.

<sup>24</sup> Te Xítohó Jesucristú cuánda-gá andíu núú ndécú Yã Ndiõxí cáhá<sup>n</sup> ndáhú-gá cuendá-ó, te Xítohó Jesucristú chi ñá díú ñí vehe ní dácáa cuè téé ñuyíú-a cuánguihu-gá. Te vehe Yã Ndiõxí sá ñí dácáa cuè ñáyíu isràél ñuyíú-a ndéé sanaha, ndíhi nchaa nacuáa ní xóo cada-güedé xítí vehe-gá-á<sup>n</sup> xiã<sup>n</sup> cútnùní iní-ó nacuáa quide-xi núú ndécú-gă.

<sup>25</sup> Te dútu cúnúu núú ñáyíu isràél ní xóo quíhu-dé núú cuíá núú cuíá xítí cuártú ní cuu íí víhí-gă-á<sup>n</sup>, te ní xóo canehe-dé níñí ñí xóo quíhu xítí cuártú-á<sup>n</sup> dico ñá díú níñí méé-dě. Dico Xítohó Jesucristú chi ñá túú duca<sup>n</sup> ní quide-gá chi ñí xito-ni ní satí níñí-gă te ní xíhí-gá.

<sup>26</sup> Chi núu ní xíhí-gá nuu núu te ndéé cútnàhá ní ngáva ñuyíú duca<sup>n</sup> ngüíta-gá cada-gá ní cùu, te vitna ta ndíhi nduu cuáhá<sup>n</sup> ní quixi-gá ñuyíú-a ní xíhí-gá ñí xito-ni cuendá cuu-gá dàtná ñí táhú sã cúú-xí Yã Ndiõxí, te duca<sup>n</sup> ñí quide-gá cuendá sá vã cúndècu-gá cuéchi ñáyíu núú Yã Ndiõxí.

<sup>27</sup> Te nchoo cuè ñáyíu ñuyíú-a chi ñí xito-ni cuú-ó te dàtnùní duca<sup>n</sup> te cada ndáá Yã Ndiõxí cuéchi-o.

<sup>28</sup> Te duca<sup>n</sup> sãtnahá-xi cùu Xítohó Jesucristú chi ñí xito-ni ní xíhí-gá cuendá sá vã cúndècu-gá cuéchi ñáyíu núú Yã Ndiõxí, te duca<sup>n</sup> ñí cuu ní xíhí-gá chi mee-gă duca<sup>n</sup> ñí cachí-gá cunduu. Te quixi tucu Xítohó Jesucristú ñuyíú-a dico ñá díú-gă sá cáda-gă cuendá sá vã cúndècu-gá cuéchi ñáyíu núú Yã Ndiõxí, chi quixi-gá nacuaca-gá nchaa ñáyíu ndètu ñaha xii-gá cuendá cundecú-yu

ndíhi-gá ní caa ní quíhí<sup>n</sup>.

## 10

<sup>1</sup> Te nchaa tnúhu ní xáha<sup>n</sup> ndíi Moisés xii ñáyíu isràél cadá-yu, nchaa tnúhu-á<sup>n</sup> ñí quide-xi ní cutnùní luha iní-yu nacuáa cada Yã Ndiõxí cada váha ñaha-gă xii-o vitna. Dico ñá díú mèi nacuáa ní xáha<sup>n</sup> ndíi Moisés xii ñáyíu quide Yã Ndiõxí vitna chi dâma quide-gá. Te nchaa tnúhu ní cáhá<sup>n</sup> ndíi Moisés ñá túú ní ndàcu-xi cada-xi nacuáa cundáá nchaa ñáyíu túha ñaha xii Yã Ndiõxí cuëi ní xóo cahni-güedé quití ní xóo nduu táhú-gă núú cuíá núú cuíá.

<sup>2</sup> Te núu dícó sá ñí xóo cahni-güedé quití ní xóo nduu táhú Yã Ndiõxí ní quide-xi nacuáa nduu ndoo nduu nine iní cue ñáyíu, te vá cáhni-gă-güedé cue quití-á<sup>n</sup> nduu táhú-gă ní cùu, te duca<sup>n</sup> te cutnùní iní-yu sá ñà túú-gă cuéchi-yu ndècu núú Yã Ndiõxí ní cùu.

<sup>3</sup> Te sá dúcá<sup>n</sup> ñí xóo cahni-güedé quití ní xóo nduu táhú Yã Ndiõxí núú cuíá núú cuíá, xiã<sup>n</sup> ní xóo ndacu iní cue ñáyíu nchaa sá cuéhé sá dúhá ñí xóo cadá-yu.

<sup>4</sup> Te duca<sup>n</sup> chi níñí ndicutu-á<sup>n</sup> ndíhi níñí chivá-á<sup>n</sup> ñà túú ní xóo ndacu-xi cada-xi nacuáa vá cúndècu cuéchi-yu núú Yã Ndiõxí.

<sup>5</sup> Te xiã<sup>n</sup> núu cútnàhá ní quexìo Xítohó Jesucristú ñuyíú-a ní xáha<sup>n</sup>-gă xii Yã Ndiõxí:

Yòhó Tătà-í, ñá túú ndùu vétú váha iní-n sã sáhni-güedě quití ndùu táhú-n,

te ni ñá túú ndùu vétú váha tucu iní-n cuendá nchaa dava-gá sá táxi-güedě ndúú táhú-n,

núu xiã<sup>n</sup> ní quide túha-n yiqui cuñú-í cuendá yúhú cuú-í te nduu táhú ñáhá-n xii-í.

<sup>6</sup> Te ni ñà túú ndùu vétú váha iní-n cuendá quití sáhmi-güedě ndúú táhú-n te ni ñà túú ndùu vétú váha iní-n cuendá nchaa dava-gá sá táxi-güedě ndúú táhú-n cuendá sá vã cúndècu-gá cuéchi ñáyíu núú-n.

<sup>7</sup> Núu xiã<sup>n</sup> yúhú ní cachí-í xii yòhó Tătà-í Dútu Ndiõxí sá yúhú

véxi-í ñuyíú-a cada-í nchaa sá cuení-n càda-í dàtná yódó tnùní cuendá-í núú tütú-n.

Duha ní xáha<sup>n</sup> Xítohó Jesucristú xii Tătá-gă Dútú Ndiöxí.

8 Te Xítohó Jesucristú díhna-gá ní xíi-gá Yă Ndiöxí Yaá cúú Tătá-gă: “Yòhó Tătá-í ñá túú ndùu vétú váha iní-n cuendá quiti sàhni-güedé ndúú tǎhú-n, ndihí cuendá quiti sàhmi-güedé ndúú tǎhú tucu-n cuendá sá vǎ cündècu-gá cuéchi ñáyiu núú-n, ndihí cuendá nchaa dava-gá tǎhú sǎ táxi-güedé xii-n ñà túú ndùu vétú váha iní-n cuendá nchaa xiǎ<sup>n</sup>”, duha ní xáha<sup>n</sup> Xítohó Jesucristú xii Tătá-gă Dútú Ndiöxí. Te duca<sup>n</sup> ñí xáha<sup>n</sup>-gă cuèi núú tütú ndíi Moisés yódó tnùní sá dúcá<sup>n</sup> càda-güedé.

9 Te sátá dúcá<sup>n</sup> te ní xáha<sup>n</sup> tùcu-gá xii Tătá-gă Dútú Ndiöxí: “Yòhó Tătá-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuení-n”, duha ní xáha<sup>n</sup>-gă xii Tătá-gă. Te sátá dúcá<sup>n</sup> nì cáhá<sup>n</sup> Xítohó Jesucristú xiǎ<sup>n</sup> ní cutnùní sá ñà túú-gă xíní ñùhu-xi duca<sup>n</sup> cada-güedé cahni-güedé nchaa quiti-á<sup>n</sup>, te duca<sup>n</sup> chi mee Xítohó Jesucristú ní xíhí-gá ní cuu-gá dàtná ñí tǎhú sǎ cúú-xí Yă Ndiöxí, te duca<sup>n</sup> ñí cuu chi duca<sup>n</sup> tnàhí ní cachí Yă Ndiöxí cunduu.

10 Te Xítohó Jesucristú ní quide-gá nàcuáa ní cuení Yă Ndiöxí cada-gá, chi ní xíhí-gá núú cùrúxí chi duca<sup>n</sup> ñí cuení méé-gă cunduu, te ñí xito-ni ní xíhí-gá sá cuendá nchaa ñáyiu, te cuendá xiǎ<sup>n</sup> nùu ndècu yíñuhu-o núú-gă vitna.

11 Te cue dútú ñáyiu isràél chi ñí nduu ñí nduu ní xóo cahni-güedé quiti ní xóo nduu tǎhú-gă, te ñá túú ní dàma-güedé nàcuáa ní xóo cada-güedé. Te nchaa sá ñí xóo cada-güedé-á<sup>n</sup> ñà túú ní quide-xi nàcuáa vá cündècu-gá cuéchi ñáyiu núú Yă Ndiöxí.

12 Dico Xítohó Jesucristú ní cachí-gá sá cúú cùú-gá, te ní xíhí-gá núú cùrúxí cuendá nchaa yíca cuéchi nchaa nchoo ñáyiu ndècu ñuyíú-a. Te sátá dúcá<sup>n</sup> te dàtnùní ní ngóo-gá xio cùha

Dútú Ndiöxí táxi tnùní-gá, te vá ñí nduu ñí quíú-gă te cuú-gá.

13 Te ñíu-ni xiǎ<sup>n</sup> cundecu-gá cundetu-gá ndéé sáá nduu cànehe nchaa sá cúú ùhú iní ñáhá xì-gá sá yíñuhu núú-gă.

14 Te cuendá sá ñí xíhí Xítohó Jesucristú ñí xito-ni xiǎ<sup>n</sup> ní cuu-gá dàtná ñí tǎhú sǎ cúú-xí Yă Ndiöxí, xiǎ<sup>n</sup> ní quide-xi sá ncháá ñáyiu cùu cuendá-gá ñá túú-gă ná cumání-yu núú-gă ní caa ní quíhí<sup>n</sup>.

15 Te mee Espíritú Yă Ndiöxí càhá<sup>n</sup> ndáá-xi nàcuáa ní cáhá<sup>n</sup>-gá cuendá-ó, te duha ní cáhá<sup>n</sup>-gá:

16 Sáá nduu te cada-í nchaa ñáyiu nàcuáa na càhá<sup>n</sup>-í-a, te cada-í nàcuáa cutnùní iní-yu tnúhu sá dánèhé-í-yu tnúhu sá cánùlchi ñaha xií-yu nàcuáa cadá-yu cundecú-yu,

te cada tucu-í sá tní-yu nchaa tnúhu-á<sup>n</sup>.

Duha ní cachí-gá.

17 Te ní cachí tucu-gá:

Te vá ñí nduu ñí quíú-gă ndacu iní-í sá quidé sáá iní-yu tnúhu-í,

te ní vǎ ñí nduu ñí quíú-gă te ndacu iní-í nchaa sá cuèhé sá dúhá quidé-yu.

Duha ní cáhá<sup>n</sup> Yă Ndiöxí càchí Espíritú-gá.

18 Te sátá dúcá<sup>n</sup> quide cahnu iní Yă Ndiöxí nchaa cuéchi-o, núu xiǎ<sup>n</sup> ñá túú-gă xíní ñùhu-xi cuú quiti nduu tǎhú-gă cuendá nchaa sá cuèhé sá dúhá quide-o.

*Tàú-ó sǎ tnàhá tnúhu-o ndíhi Yă Ndiöxí*

19 Te cue dútú ñí xóo cunuu nùu ñáyiu isràél cue téé-á<sup>n</sup> ñí xóo quíhu-güedé xítí cuàrtú ní cuu íí víhí-gă. Dico nchoo cuè ñáyiu ndècu ichi Xítohó Jesucristú vitna tàú-ó sǎ ní yuhu ní iní-ó tnàhá tnúhu-o ndíhi Yă Ndiöxí. Te cuu tnàhá tnúhu-o ndíhi-gá chi Xítohó Jesucristú ní sati níñí-gă te ní xíhí-gá núú cùrúxí.

20 Te cada iní-ó sǎ dóo sǎ ñí xíndedí nàcuáa ní xóo quíhu-güedé xítí cuàrtú

ní cuu íí víhí-gǎ-á<sup>n</sup> ní xócuíñí, te duca<sup>n</sup> càda iní-ó chi Xítohó Jesucristú ní xíhí-gǎ cuendá nchoo ñhí-ó nàcuáa cada-o ngündecu váha-o sǎ cúú-xí-gǎ.

<sup>21</sup> Te ñu-gǎ cúú-gǎ Yaá cúú ñtú-ó, te ñu-gǎ cúú-gǎ Dútú cúnù ndecu-gǎ núú ndécú Yǎ Ndióxi.

<sup>22</sup> Núu xíñí xíní ññu-xi sǎ ño tnahá tñuhu-o ññi Yá Ndióxi, te vá cání ññi caní úú iní-ó, te ío váha quindáá iní-ó-gǎ chi ñu-gǎ ní ndada ndoo ní ndada nine-gǎ iní-ó cuendá nchoo cùtnuní iní-ó sǎ ñà túú-gǎ cuéchi-o ndècu núú-gǎ. Te ní sandute-o cuendá sǎ dúcá<sup>n</sup> ní nduu ndoo ní nduu nine iní-ó.

<sup>23</sup> Te nchoo càhá<sup>n</sup> ndáá-ó sǎ ndécú ññi-o tñuhu ndee ñní sǎ ndúú tǎhú-ó cùndecu ññi-o Yá Ndióxi, te xíní ññu-xi sǎ vǎ dáñá ndèé-ó cànchicú<sup>n</sup> ññu-o tñuhu ndee ñní-á<sup>n</sup> chi Yá Ndióxi cada-gǎ nàcuáa ní cachí-gǎ sǎ cúú-xí-ó.

<sup>24</sup> Te xíní ññu-xi cuhu<sup>n</sup> iní tñáhá-ó te chindee tñaha-o nàcuáa duca<sup>n</sup> cùu iní tñáhá-gǎ-ó, te cada-o mée-ni sǎ váha.

<sup>25</sup> Te nchoo vǎ dáñá ndèé-ó nàtacá-ó núú dácuàha-o tñuhu Yá Ndióxi, te vá cadá-ó dàtná xíquide davá-yu ñà túú-gǎ cuíni-yu quixí-yu núú dácuàha-o tñuhu-gǎ. Chi xíní ññu-xi sǎ cuàha tñaha-o tñuhu ndee ñní cànchicú<sup>n</sup> ññu-o ñchi-gǎ, te uu<sup>n</sup>-gǎ duca<sup>n</sup> tàú-xi cada-o vitna ta cuyatni nduu quixi tucu Xítohó Jesucristú ññuyú-a.

<sup>26</sup> Te cue ñáyiu sa ní tecú tñuní nàcuáa càhá<sup>n</sup> tñuhu Yá Ndióxi te núu na ngüita-yu ññu<sup>n</sup> cadá-yu nándi sǎ cuèhé sǎ dúhá, te àú<sup>n</sup> nǎ cuu ní xíhí Xítohó Jesucristú cuendá-yu, te ní vǎ yóo ññi-gǎ cuú cuendá sǎ vǎ cùndècu-gǎ cuéchi-yu núú Yá Ndióxi.

<sup>27</sup> Te núu duca<sup>n</sup> na cadá-yu nándi sǎ cuèhé sǎ dúhá, te ío quiyùhú iní-yu nàcuáa cada ñaha Yá Ndióxi xii-yu. Chi nchaa ñáyiu cùu úhú iní ñáhá xii-gǎ daquíhí<sup>n</sup> ñáhá-gǎ xii-yu núú ññu<sup>n</sup> núú càyú núú ño ndohó-yu.

<sup>28</sup> Te nchaa ñáyiu ní xóo daquèe tñu<sup>n</sup> tñuhu ní cáhá<sup>n</sup> ndí Moisés, te núu ndècu úú àdi úní ñáyiu càhá<sup>n</sup> ndáá sǎ dúcá<sup>n</sup> ní dáquèe tñu<sup>n</sup>-yu tñuhu ní

cáhá<sup>n</sup> ndí, te vá yóo ní xóo cundàhú iní ñáhá xii nchaa ñáyiu duca<sup>n</sup> ní xóo cada chi ní xóo cahni ñaha-güedè.

<sup>29</sup> Te núu duca<sup>n</sup> ní ndoho cue ñáyiu duca<sup>n</sup> ní dáquèe tñu<sup>n</sup> tñuhu ní cáhá<sup>n</sup> ndí Moisés-á<sup>n</sup>, te uu<sup>n</sup>-gǎ ndoho cue ñáyiu dàquèe tñu<sup>n</sup> ñáhá xii Xítohó Jesucristú Yaá cúú Dèhe Yá Ndióxi ñu-ni ñáyiu cǎchí sǎ ñà túú nándi<sup>n</sup> níñi-gǎ. Te níñi-gǎ-á<sup>n</sup> ní sati, te ní xíhí-gǎ, te duca<sup>n</sup> ní cuu cuendá cada Yá Ndióxi ñngǎ núú sǎ váha sǎ cúú-xí nchòo ñáyiu ndècu ññuyú-a dàtná ní cachí-gǎ cada-gǎ. Te ñu-ni cuendá níñi-gǎ-á<sup>n</sup> ní nduu ndoo ní nduu nine iní cue ñáyiu-á<sup>n</sup> ní cùu, te ñu-ni ñáyiu-á<sup>n</sup> càhá<sup>n</sup> úhú-yu Espiritú Yá Ndióxi sǎ chindèe chitúu ñaha xii-o.

<sup>30</sup> Te nchoo sǎ ñaha-o sǎ Yá Ndióxi cǎchí-gǎ ññi xichi núú tütú-gǎ: “Yúhú cada-í te nacháhu ñáyiu nchaa sǎ quidè-yu, te duha càhá<sup>n</sup>-í chi nachinaa-í cuendá nchaa sǎ quidè-yu-á<sup>n</sup>”, duha cǎchí-gǎ. Te sa ñaha tucu-o nàcuáa càhá<sup>n</sup>-xi núú tütú-gǎ núú cǎchí-xi: “Yá Ndióxi cada ndáá-gǎ cuendá nchaa sǎ quidè ñáyiu cùu cuendá-gǎ”, duha cǎchí-xi núú tütú-gǎ.

<sup>31</sup> Te ío ndàhú ndoho cue ñáyiu na dàndoho ñaha Yá Ndióxi, te ñu-gǎ cúú-gǎ Yaá cúnù nchaa nduu nchaa quíú!

<sup>32</sup> Te chí dándàcu iní nàcuáa ní quide-ndo cùtnáhá vitna cuu saa ní tecú tñuní-ndó tñuhu Yá Ndióxi, chi davá-á<sup>n</sup> ní quide cànñu iní-ndó cuéi nándi sǎ ní yáha-ndo cuendá-gǎ.

<sup>33</sup> Te dava-ndo ní quide úhú ñáhá ñáyiu xii-ndo núú chítú núú tàcá, te nándi tñuhu cuèhé tñuhu duha ní xáhá<sup>n</sup>-yu xii-ndo. Te dava-ndo ní cuyi-ni-ndo ní xíndecu ññi tñaha-ndo cuéi nándi ní ndoho dava-gǎ-ndó.

<sup>34</sup> Te ní cundàhú iní-ndó cuè ñáyiu yíhi vecáa, te cuéi ní quendeé ñáyiu sǎ ndécú ññi-ndo dícó ñà túú ní ññi<sup>n</sup> iní-ndó chi ní cudí<sup>n</sup>-ni iní-ndó. Te duca<sup>n</sup> ní quide-ndo chi sa ñaha-ndo sǎ ndúú tǎhú-ndó sǎ ño-gǎ váha, te xíñí<sup>n</sup> cundecu ññi-ndo ní caa ní quíhí<sup>n</sup>.

35 Te xiǎ<sup>n</sup> vá dáñá ndèé-ndó quíndáá iní-ndó nàcuáa ní cachí Yá Ndiöxí cada ñaha-gã xii-ndo, chi sáa nduu te ío váha cada ñaha-gã xii-ndo.

36 Te nchòhó xíní ñùhu-xi ío cada ndee iní-ndó càda-ndo nchaa nacuáa càhá<sup>n</sup> Yá Ndiöxí, te duca<sup>n</sup> te nduu táhú-ndó sã ñí cachí-gá nduu táhú-ndó cùndecu ndìhi-ndo ni caa ni quíhí<sup>n</sup>.

37 Te Yá Ndiöxí càchí-gá núú tütú-gá:

Ta cùyatni vií-nã nduu quèxi Yaá quixi ñuyíú-a, te vá cùyàa-gá.

38 Te nchaa ñáyiu cùndáá núú-í ñá túú dàña ndeé-yu sàndáá iní ñáhã-yu xii-í,

te cuèndá xiǎ<sup>n</sup> cundecu-ní-yu ichi-í, dico núu na dàñá-yu ichi-í te vá cúú vãha iní-í núú-yu.

Duha càchí Yá Ndiöxí núú tütú-gá.

39 Dico nchoo chi ñá túú cùu-o ñáyiu duca<sup>n</sup> xíquide dàñá-ó ìchi Yá Ndiöxí, chi cùu-o ñáyiu nchìcú<sup>n</sup> nihnu-ni sàndáá iní-ó-gã, te sá dúcá<sup>n</sup> te nduu táhú-ó cùndecu-o ndìhi-gá ni caa ni quíhí<sup>n</sup>, te ñá túú cùu-o ñáyiu dàña nihnu ichi-gá te xíta nihnú-yu.

## 11

### *Ñáyiu sàndáá iní ñáhá xii Yá Ndiöxí*

1 Te núu sàndáá ndisa iní-ó Yá Ndiöxí te duca<sup>n</sup> cùtnuní ndáá iní-ó sã ñihí-ó sã cuíní-ó núú-gã. Te núu sàndáá iní-ó-gã te duca<sup>n</sup> cùtnuní ndáá tucu iní-ó sã càhá<sup>n</sup> ndáá-gá cuèndá nchaa sã ñà túú xíní-ó.

2 Te duca<sup>n</sup> ñí quide ñáyiu ní xíndecu ndéé sanaha ío ní sàndáá iní-yu Yá Ndiöxí te xiǎ<sup>n</sup> núu ío váha ní cuu iní ñáhã-gã xii-yu.

3 Te núu nchoo sàndáá ndisa iní-ó Yá Ndiöxí te cùtnuní ndáá iní-ó sã sã cuèndá tñuhu ní càhá<sup>n</sup>-gã ní cuáha andiú ndìhi ñuyíú-a. Te cùtnuní iní-ó sã ñà díú sã cuèndá ì<sup>n</sup> sã tñu ndèhe-o ío ñuyíú-a ní cuáha andiú ndìhi ñuyíú-a.

4 Te ndíi Àbél ío ní sàndáá iní ndíi Yá Ndiöxí núu xiǎ<sup>n</sup> ío-gá ní cuu iní-gá sã ñí sãñaha ndíi ní nduu táhú-gã dàcúxí sã ñí sãñaha ndíi Càín xii-gá

ní nduu táhú-gã. Te ndíi Àbél-án ñí cutnùní iní ndíi sá ñí cudíu ndíi núú Yá Ndiöxí cuèndá sã ñí quehe<sup>n</sup> cuèndá-gá sã ñí sãñaha ndíi ní nduu táhú-gã. Te cuèi ñá túú-gã ndíi ndècu ñuyíú-a dico yòdo tnuní sã ñí sàndáá iní ndíi Yá Ndiöxí cuèndá duca<sup>n</sup> càda-o canchicú<sup>n</sup> nihnu-o.

5 Te té Ènóc téé ní xíndecu ndéé sanaha ñà túú ní xíhí-dé chi ní nacuaca ñaha túu Yá Ndiöxí xii-dé cuèndá sã ñí sàndáá iní ñáhã-dé xii-gá. Te vá yòo ni nànihí ñáhã xii-dé chi mee-gã ní nacuaca ñaha-gã xii-dé. Te núú tütú Yá Ndiöxí càchí-xi sá cùtnáhá vátá nacuàca ñaha-gá xii té Ènóc, te ní quide-dé mee-ni nacuáa ní cuu váha iní ñáhã-gã xii-dé.

6 Te nchaa ñáyiu ñá túú sàndáá iní ñáhã xii Yá Ndiöxí ñá ndácú-yu cadá-yu nacuáa cudíu-yu núú-gã, chi nchaa ñáyiu cuíní tuha ñaha xii-gá xíní ñùhu-xi sã quíndáá iní-yu sã ndécú-gã, te quíndáá iní-yu sã núu na nànducu nihnu ñáhã-yu xii-gá te cuáñaha-gã xii-yu sã ndúú tãhú-yu.

7 Te Yá Ndiöxí ní dátũha-gá ndíi Nöé nchaa nacuáa cada-gá. Te ní quide ndíi nchaa nacuáa ní xáha<sup>n</sup> Yá Ndiöxí cada ndíi, te ní cadúha ndíi ì<sup>n</sup> bàrcú cuèndá xití bàrcú-án quèe ndíi ndìhi nchaa ñáyiu vehe ndíi cuèndá cácu nihnú-yu. Te duca<sup>n</sup> ñí quide ndíi chi ní sàndáá iní ndíi Yá Ndiöxí. Te sá dúcá<sup>n</sup> ñí sàndáá iní ndíi-án Yá Ndiöxí xiǎ<sup>n</sup> ní cutnùní sã ncháá ñáyiu ío ndècu cuèchi-yu, chi ñá túú ní cãchicú<sup>n</sup> nihnú-yu cadá-yu nacuáa ní quide ndíi. Te sá dúcá<sup>n</sup> ñí quide ndíi ní sàndáá iní ndíi Yá Ndiöxí xiǎ<sup>n</sup> ío ní cundáá ndíi núú-gã.

8 Te Yá Ndiöxí ní xáha<sup>n</sup>-gã xii ndíi Àbrahám sá queé ndíi ñuú núú ndécú ndíi quíhí<sup>n</sup> ndíi ingá xichi cundecu ndíi. Te ní quide ndíi nacuáa ní xáha<sup>n</sup> Yá Ndiöxí chi ní quee ndíi cuáhã<sup>n</sup> ndíi núú cuáñaha Yá Ndiöxí cundecu ndíi. Te òré ní quee ndíi núú ndécú ndíi te ñá túú ní cùtnuní iní ndíi ndéé cúú núú cuáhã<sup>n</sup> ndíi cundecu ndíi. Te duca<sup>n</sup> ñí quide ndíi chi ní sàndáá iní ndíi Yá Ndiöxí.

9 Te sá dúcá<sup>n</sup> nǐ sándáá iní ndíi Yá Ndiöxí nǐu xíá<sup>n</sup> ní xíndecu ndíi núú nǐ sáñaha-gǎ cundecu ndíi, te cuéi duca<sup>n</sup> dico ñá túú ní quide ñuú ndíi xíá<sup>n</sup>. Te ní xóo cundecu ndíi vehe cùtexínu vehe dóó. Te ñu-ni duca<sup>n</sup> nǐ quide ndíi Isàác ndíi Jàcób chi tnàhá cue ndíi-á<sup>n</sup> nǐ cachí Yá Ndiöxí sá ndúú tǎhú cue ndíi xíá<sup>n</sup> cundecu cue ndíi.

10 Te duca<sup>n</sup> nǐ quide ndíi Àbrahám chi ní xíndetu ndíi ndéé ní sáá nduu ndúu tǎhú ndíi cundecu ndíi núú ndécú Yá Ndiöxí. Te núú ndécú-gǎ-á<sup>n</sup> cúu-xí ñuú ní cadúha mee-gǎ, te ñuú-á<sup>n</sup> cudíi-xi ni caa ni quíhí<sup>n</sup>.

11 Te ndíi Sǎrá, sa ní xídó cuíá ndíi sá cóo déhe ndíi chi sa ní sahnu vǐhi ndíi, dico Yá Ndiöxí ní quide-gǎ te ní xóo ñ<sup>n</sup> déhe ndíi. Te duca<sup>n</sup> chi ní sándáá iní ndíi Yá Ndiöxí te ní cutnùní ndáá iní ndíi sá cadá-gǎ nàcuáa ní xáha<sup>n</sup>-gǎ xii ndíi.

12 Te cuéi ío ní sahnu ndíi Àbrahám ndíi ñadíhí ndíi, ndíi Sǎrá dico dacuítí nǐ nduu tǎhú-yu ní xóo ñ<sup>n</sup> déhe-yu. Te xíá<sup>n</sup> nǐu ío cuéhé ndíi quí<sup>n</sup> yává ndíi Àbrahám ní cáyá dàtná cuéhé chòdíní ndéé andíu, ndíi dàtná cuéhé ñuhu cúchí làmár, chi ni vǎ yóo ñ<sup>n</sup> ndacu cahu ñaha xii-yu sá cuéhě-yu.

13 Te cue ndíi-á<sup>n</sup> duca<sup>n</sup>-ni nǐ sándáá iní cue ndíi Yá Ndiöxí ndéé ní sáá nduu nǐ xíhí cue ndíi. Te cue ndíi-á<sup>n</sup> ñá túú ní ndúu tǎhú cue ndíi quíní cue ndíi nchaa nàcuáa ní cachí Yá Ndiöxí cada-gǎ, dico ní cutnùní ndáá iní cue ndíi-á<sup>n</sup> nàcuáa cada-gǎ núu cuàhá<sup>n</sup> núu vǎxi. Te ío ní cudíi iní cue ndíi, te ní cachí cue ndíi sá dícó-ni ichi yáha cue ndíi ñuyú-a, chi ñá díú ñuyú-a cundecu duca<sup>n</sup> cuè ndíi.

14 Te sá dúcá<sup>n</sup> ndúu tnúhu ní cáhá<sup>n</sup> cue ndíi-á<sup>n</sup>, xíá<sup>n</sup> ní cutnùní sá cuíní cue ndíi ñgá xichi núu cùndècu cue ndíi.

15 Te ni ñá díú ñuú núu nǐ quee cue ndíi ni cuíní cue ndíi núhú cue ndíi. Chi núu duca<sup>n</sup> ni sǎni iní cue ndíi te núhú cue ndíi ni cùu.

16 Dico ñáhá chi cuíní cue ndíi quíhí<sup>n</sup> cue ndíi ñ<sup>n</sup> xichi núu vǎha-gǎ cáá cùndecu cue ndíi. Te núu dúcá<sup>n</sup> ío-gǎ vǎha cǎa-á<sup>n</sup> cúu-xí ñuú núu

ndécú Yá Ndiöxí, te sá dúcá<sup>n</sup> nǐ sǎni iní cue ndíi xíá<sup>n</sup> nǐu ío vǎha cùu iní Yá Ndiöxí cǎchí-gǎ sá ñá túú cùcaha<sup>n</sup> núu-gǎ cúu-gǎ Ndiöxí cue ndíi-á<sup>n</sup>, te cùtnuní iní-ó sǎ ndáá sá dúcá<sup>n</sup> cǎhá<sup>n</sup>-gǎ chi ní quide túha-gǎ ñ<sup>n</sup> xichi núu cùndècu cue ndíi-á<sup>n</sup>.

17 Te ndíi Àbrahám ní xíndecu ñ<sup>n</sup>ndíi-ni déhe ndíi ndíi ñadíhí ndíi, te cùtnàhá ní xito ndéé ñáhá Yá Ndiöxí xii ndíi ní xíá<sup>n</sup>-gǎ déhe ndíi, ndíi Isàác cuendá nduu tǎhú ñáhá-gǎ xii ndíi. Te ní xáha<sup>n</sup> ndíi sá cúu ndúu tǎhú-gǎ déhe ndíi, te duca<sup>n</sup> nǐ quide ndíi chi ní sándáá iní ñáhá ndíi xii-gǎ. Te sa ndècu túha ndíi sá cuǎñaha ndíi déhe ndíi xii-gǎ cuéi mee Yá Ndiöxí ní xáha<sup>n</sup> ndáá-gǎ xii ndíi

18 sá sǎ cuendá ndíi Isàác te ngúndecu cue ñaní tnàhá ndíi.

19 Te duca<sup>n</sup> nǐ quide ndíi Àbrahám, chi ní cutnùní ndáá iní ndíi sá Yá Ndiöxí ndácú-gǎ dándòto-gǎ cuéi ñáyiu sa ní xíhí. Te sá dúcá<sup>n</sup> nǐ xáha<sup>n</sup> ndíi xii Yá Ndiöxí sá cúu ndúu tǎhú-gǎ déhe ndíi, te xíá<sup>n</sup> cada iní-ó sǎ sà ní xíhí ndíi Isàác te ní ndoto tucu ndíi ní nucúndecu ndíi ndíi tǎtá ndíi, ndíi Àbrahám.

20 Te ndíi Isàác ní xíá<sup>n</sup> tǎhú ndíi núu Yá Ndiöxí cuendá sá cadá vǎha-gǎ cue déhe ndíi, ndíi Jàcób ndíi ndíi Eşáú núu cuàhá<sup>n</sup> núu vǎxi. Te duca<sup>n</sup> nǐ quide ndíi chi ní sándáá iní ndíi Yá Ndiöxí.

21 Te sa ta cùyatni-ná nduu cùu ndíi Jàcób, te ní xíá<sup>n</sup> tǎhú ndíi núu Yá Ndiöxí cuendá cue déhe ñaní ndíi déhe ndíi Chèé. Te yítuu-ná ndíi tatnu ndíi ní chiñuhu ndíi Yá Ndiöxí. Te duca<sup>n</sup> nǐ quide ndíi chi ní sándáá iní ñáhá ndíi xii-gǎ.

22 Te cùtnàhá sa ta cùyatni vií-nǎ nduu cùu ndíi Chèé, te ní cachí ndíi sá cuè ñáyiu isràél sáá nduu quèé-yu núu xíndecu-yu-á<sup>n</sup>. Te ní cáhá<sup>n</sup> tucu ndíi nàcuáa cadá-yu yiqui cùñú ndíi na sáá nduu quèé-yu núu ndécú-yu-á<sup>n</sup>. Te duca<sup>n</sup> nǐ quide ndíi chi ní sándáá iní ndíi Yá Ndiöxí.

23 Te cùtnàhá ní cacu ndíi Moisés te ní chiváha ñaha ñaná ndíi ndíi tǎtá ndíi úní yóó. Te duca<sup>n</sup> nǐ quide cue ndíi-á<sup>n</sup> chi ní sándáá iní cue ndíi Yá

Ndiöxí. Te ní quide cuèndá cue ndíi-án sã ïo váha càa ndíi Moisés déhe cue ndíi, te ñà túú ní yùhú cue ndíi nàcuáa ní cáhá<sup>n</sup> tée cùu Faraón sã cáhni-dé cue landú.

<sup>24</sup> Te sáta ñi sahnú ndíi Moisés te duu<sup>n</sup> duu<sup>n</sup> ní cachí ndíi sã vã cáhá<sup>n</sup> ñáyiú sã déhe yoco tée cùu Faraón cúú nãná ndíi. Te duca<sup>n</sup> ñi quide ndíi chi ní sãndáá iní ndíi Yá Ndiöxí.

<sup>25</sup> Te duca<sup>n</sup> ñi quide tucu ndíi chi ní tnahá-gá iní ndíi ndoho ndíi ndíhi nchaa ñáyiú cùu cuendá Yá Ndiöxí dàcúxí sã cúdíi iní ndíi cundecu tnaa ndíi ichi cuèhé ichi duha.

<sup>26</sup> Chi ní sani iní ndíi sã vãha-gá ndoho ndíi cúcuèhé ñáhá cuè ñáyiú xii ndíi sã cuendá Yaá quixi ñuyúú-a dàcúxí sã cundecu ndíhi ndíi nchaa sã ïo Ègiptú. Te duca<sup>n</sup> ñi quide ndíi chi ní xúhu<sup>n</sup> iní ndíi sã Yá Ndiöxí cuãñaha-gã sã ndúú tãhú ndíi.

<sup>27</sup> Te ndíi Moisés ní quee ndíi nació<sup>n</sup> Ègiptú te ñà túú ní quide cuendá ndíi sã ïo cùdéé<sup>n</sup> tée cùu Faraón núú ndíi. Te duca<sup>n</sup> ñi quide ndíi chi ní sãndáá iní ndíi Yá Ndiöxí. Te ní quide càhnu iní ndíi cuendá nchaa sã ñi yáha ndíi, te ní quide iní ndíi sã Yá Ndiöxí ndécú ndíhi ñaha túu-gá xii ndíi cuèi ñà túú ní xini núú ñáhá ndíi xii-gá. Te duca<sup>n</sup> ñi sani iní ndíi chi Yá Ndiöxí ndécú ndíhi ñaha-gá xii ndíi.

<sup>28</sup> Te ndíi Moisés cúú ndíi tée ní tausaha ñi quide vico pascuá ndíhi cue ñáyiú isràél, te dàvá-án ñi táuchíú<sup>n</sup> ndíi ní sahní-yu mbéé te níñi quiti-án ñi dácánúú-yu yuyèhé-yu. Te duca<sup>n</sup> ñi quide ndíi chi ní sãndáá iní ndíi Yá Ndiöxí. Te duca<sup>n</sup> ñi quide tucu ndíi cuendá sã espíritú sã ñi tendaha Yá Ndiöxí cahni-xi mee-ni déhe tée déhe díhna cue ñáyiú Ègiptú, te vã cáhni-xi ñi ñi déhe cue ñáyiú isràél.

<sup>29</sup> Te ndute lámár sã nání Mãr Tícuèhé ní quee dava-xi ní natúu ñuhu yìchí ní níhí ñi yáha cue ñáyiú isràél. Te duca<sup>n</sup> ñi cuu chi ní sãndáá iní-yu Yá Ndiöxí. Te cue tée Ègiptú tnahá-güedé nchícú<sup>n</sup>-güedé cuáhá<sup>n</sup> dico ñà túú ní ndàcu-güedé yáha-güedé chi ní ndíhi-güedé ní cáhá.

<sup>30</sup> Te cue ñáyiú isràél ní dúcú<sup>n</sup>

ndèé-yu úsá nduu ñuú Jericó te ní ngoyo nchaa sã ñúðoco. Te duca<sup>n</sup> ñi cuu chi ní sãndáá iní-yu Yá Ndiöxí.

<sup>31</sup> Te ñi ñaha ní xíndecu ichi díi iní ní xínani-a<sup>n</sup> Ràháb, ñaha-án ñà túú ní xíhi-a<sup>n</sup> dàtná ní xíhi nchaa ñáyiú ïo ní cuu sãá iní-xi núú Yá Ndiöxí, chi ní cuu váha iní-a<sup>n</sup> núú cuè téé ní tendaha cuè ñáyiú isràél ní sãngoto dayuhu ñúú-a<sup>n</sup>. Te duca<sup>n</sup> ñi quide-a<sup>n</sup> chi ní sãndáá iní-a<sup>n</sup> Yá Ndiöxí.

<sup>32</sup> Te núú dícó sã cúú te cáhá<sup>n</sup>-í cuendá ndíi Gedéon, ndíhi cuendá ndíi Bàrác, ndíhi cuendá ndíi Sãnsón, ndíhi cuendá ndíi Jèté, ndíhi cuendá ndíi Dàví, ndíhi cuendá ndíi Sãmuél, ndíhi cuendá nchaa cue téé ní xóo cáhá<sup>n</sup> tñuhu Yá Ndiöxí ndéé sanaha, te nchaa cuendá cue téé-án cáhá<sup>n</sup>-í te núú dícó cùyáchi-í dico ñà túú cùyáchi-í.

<sup>33</sup> Te nchaa cue ndíi-án ñi sãndáá iní cue ndíi Yá Ndiöxí núu xiã<sup>n</sup> ní xóo ndacu cue ndíi ní xóo nàá cue ndíi ndíhi nchaa ñáyiú dava-gá ñuú. Te nchaa ñáyiú-án ñà túú ní xóo ndacú-yu nàá-yu ndíhi cue ndíi, te ní xóo cada cue ndíi nchaa nàcuáa táu-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gã xii cue ndíi. Te cuèi nchaa cue quiti déé<sup>n</sup> ñà túú ní ndàcu-güedé ná cada ñaha-güedé xii cue ndíi.

<sup>34</sup> Te ní xóo ndacu cue ndíi ní xóo ndahvá cue ndíi ñuhú sã vã yóo tnahí ndàcu ndahvá, te ní cácu cue ndíi vá yóo ñi ndàcu cahni ñaha xii cue ndíi. Te cue ndíi-án ñà túú níhí ndéé cuè ndíi ñi cùu, dico ní níhí ndéé cuè ndíi chi Yá Ndiöxí ní chindee ñaha-gá xii cue ndíi, te nchaa ndíi-án ïo ní níhí ndéé cuè ndíi ní nàá cue ndíi ndíhi nchaa ñáyiú ní cuu úhú iní ñáhá xii cue ndíi, te nchaa ñáyiú duca<sup>n</sup> ñi xóo nàá ndíhi cue ndíi-án ñà túú ní xóo ndacú-yu nàá ndíhi ñáhá-yu xii cue ndíi chi ní xóo cunú-yu. Te duca<sup>n</sup> ñi cuu chi ní sãndáá iní cue ndíi Yá Ndiöxí.

<sup>35</sup> Te dava ñáyiú díhi ní nduu tãhú-yu ní ndoto cue ñáyiú ní xíndecu ndíhi-yu ní nucúndecu ndíhi ñaha tucú-yu.

Te dava ñáyiú ïo ní dándóhó ñaha tnahá ñáyiú-yu te ní xíhi-yu,

dico ñá túú ní dàñá-yu ichi váha nàcuáa cácu nihnú-yu núú tnàha ñáyíu-yu, te duca<sup>n</sup> chi ní cuiní-yu sá ndótó-yu ndéé cuèé-gá nàcuáa ngúndecu váha-yu núú ndécú Yá Ndiöxí.

<sup>36</sup> Te dava cue ndíi ío ní ndoho cue ndíi chí ío ní cudíquí ndéé ñáhá ñáyíu xii cue ndíi, te ní canihá-yu xii cue ndíi, te dava cue ndíi ní dácútú ñáhá-yu, te ní chihi ñáhá-yu xii cue ndíi vecaá.

<sup>37</sup> Te dava cue ndíi ní sahani ñáhá-yu ndihí yúú. Te dava cue ndíi ní chidava ndáá ñáhá-yu ní xehndé ñáhá-yu ndihí sierrá. Te dava cue ndíi ní xito ndéé ñáhá-yu te núú ndisa sá sándáá iní cue ndíi Yá Ndiöxí, te dava cue ndíi ní sahani ñáhá-yu ndihí machití. Te mee-ni ñíi mbéé ndihí ñíi chívá, ní xóo cuu dóo cue ndíi. Te mee-ni ñíi cue quití-á<sup>n</sup> ní xóo cuu dóo cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá ní xóo cada ñáhá-yu xii cue ndíi ní xóo dandòho ñáhá-yu.

<sup>38</sup> Te cue ndíi-á<sup>n</sup> ío-gá ní xínduu váha iní cue ndíi dácúxí nchàa dava-gá ñáyíu. Te nchaa cue ndíi-á<sup>n</sup> ní xica cuu cue ndíi cuèi nchaa núú ñà túú vǎ yǎo tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchíi yaú ní xóo cundecu cue ndíi.

<sup>39</sup> Te ío ní cudíu cue ndíi núú Yá Ndiöxí cuendá sá ní sándáá iní ñáhá cuè ndíi xii-gá. Te cuèi duca<sup>n</sup> ní quide cue ndíi dico ñá túú ní xíní cue ndíi nchaa sá ní cachí Yá Ndiöxí cada-gá.

<sup>40</sup> Te duca<sup>n</sup> ní cuu chí ñíi sá ío-gá váha ní cachí Yá Ndiöxí cada-gá. Te sá dúcá<sup>n</sup> ío-gá váha ní cachí-gá cada-gá cúu-xí cuendá nchoo ndihí cuendá cue ndíi-á<sup>n</sup> cuendá sá ñà díú mèe-ñi cue ndíi-á<sup>n</sup> cundáá cue ndíi núú-gǎ, chí tnàhá nchoo cundáá-ó núú-gǎ.

## 12

### *Ío cuhu<sup>n</sup> iní-ó Xítoho Jesucristú*

<sup>1</sup> Te cue ñáyíu ní xíndecu ndéé sanaha ní quidé-yu nàcuáa ní cutnùni

sá ní sándáá iní-yu Yá Ndiöxí. Te cada iní-ó sǎ ncháá ñáyíu-á<sup>n</sup> xíndéhe ñáhá-yu xii-o vitna. Núú xǎ<sup>n</sup> xíní ñúhu-xi sá vǎ cáda-ó ní ñíi sá cuèhé sá dúhá chí diu nchaa xǎ<sup>n</sup> quidé-xí ñà túú cundáá-ó núú Yá Ndiöxí. Te vǎ cáda cuendá-ó nchàa sá quidé tñèñu iní-ó nàcuáa ndacu-o càda-o nchaa nacuaá càhá<sup>n</sup>-gá. Te ío càhnu cunduu iní-ó cànchicú<sup>n</sup> nihnu-o càda-o nchaa nacuaá ní cachí-gá cada-o cundecu-o ñuyíu-a.

<sup>2</sup> Te ío cuhu<sup>n</sup> iní-ó Xítoho Jesucristú, chí diu-gá ní quide ní sándáá iní-ó Yá Ndiöxí, te diu-ni duca<sup>n</sup> quide-gá cuèi vitna te cuèi ndéé núú cuahá<sup>n</sup> núú vǎxi diu-ni duca<sup>n</sup> càda-gá sá quíndáá iní-ó Yá Ndiöxí. Te Xítoho Jesucristú ío ní quide ndee iní-gá ní ndoho-gá te ní xihí-gá núú cùrúxí, te ñá túú ní quide cuendá-gá cuèi ñíi sácá<sup>n</sup> núú cúu-xí sǎ dúcá<sup>n</sup> ní ndoho-gá. Te duca<sup>n</sup> ní quide-gá chí sa nàha-gá sá ná yǎha sá dúcá<sup>n</sup> ndòho-gá te ío cudíi iní-gá. Te vitna núcóo-gá xio cùha núú núcóo Yá Ndiöxí te tàxi tnuní-gá.

<sup>3</sup> Te xíní ñúhu-xi sá ío cada cuendá-ndó nàcuáa ní quide Xítoho Jesucristú chí Yaá-á<sup>n</sup> ío ní quide càhnu iní-gá nchaa sá ní ndoho-gá ní quide ñaha nchàa ñáyíu ndècu ichi cuèhé ichi duha xii-gá. Te duca<sup>n</sup> càda cuendá-ndó nàcuáa ní quide-gá cuendá sá vǎ túu dusa<sup>n</sup>-ndo, te ní vǎ nátùhú iní-ndó càda-ndo nchaa nacuaá càhá<sup>n</sup>-gá.

<sup>4</sup> Te nchòhó dáquèe tihú-ndó nchàa sá cuèhé sá dúhá dico vátá càhni ñaha-gá-yu xii-ndo sǎ dúcá<sup>n</sup> quide-ndo.

<sup>5</sup> Te ndacu iní-ndó nàcuáa càhá<sup>n</sup> Tátá-ó Dútú Ndiöxí dásàhú ñáhá-gǎ xii nchoo cuè ñáyíu cùu déhe-gá. Te duha càchí-gá núú tütú-gá:

Nchòhó cue déhe mee-í, vá cání iní-ndó sǎ àú<sup>n</sup> nǎ cuu dándoho ñaha-í xii-ndo,

te ní vǎ nátùhú iní-ndó òré càhá<sup>n</sup>-í dóho-ndo nàcuáa cada-ndo cundecu-ndo.

<sup>6</sup> Chí mee-í dándòho-í nchaa ñáyíu cùu iní-í cuendá sá cundáá-yu núu-í,

te quide úhú-í-yu, te ñi-yu ní-yu cùú-yu ñáyiu cächí-í cùú ðehe-í.

Duha cächí-gá núú tütú-gá.

7 Te ío cada ndee ñí-ndó sã dúcá<sup>n</sup> ðãndoho ñaha Yã Ndiõxí xii-ndo, chi quide-gá sã cùú-gã Tãtã-ó. Te ñã túú ñi ñ<sup>n</sup> tée cùú tãtã te cachí-ó sã ñã túú sãnu ichi-ðe cue ðehe-ðe ñacuãa tàú-xi cunduu.

8 Te núú Yã Ndiõxí ñã túú ðãndoho ñaha-gá xii-ndo ðãtnã ðãndõho-gá cue ñáyiu cächí-gá cùú ðehe-gá, te ñã ðíú ðehe mee-gã cùú-ndó te núú duca<sup>n</sup>, chi cùu-ndo ðãtnã cue ñáyiu ñã túú cùtnuní yoo cùú tãtã-xi.

9 Te nchoo sã naha-o sã cùtnãhá ní cuu landú-ó ñi sanu ichi ñaha tãtã-ó ñacuãa tàú-xi cunduu, te duca<sup>n</sup> ñi xoo canehe-o sã yíñuhu núú-güedë te ði-yu ní duca<sup>n</sup> ñehe-o sã yíñuhu núú-güedë vitna. Te núú duca<sup>n</sup> ñi sãndãá ñí-ó tãtã-ó, te ío-gã xíní ñuhu-xi quíndãá ñí-ó Tãtã-ó Dütú Ndiõxí cuendã duca<sup>n</sup> nduu táhú-ó cùndecu-o ñihi-gã ñi caa ñi quíñ<sup>n</sup>, chi ði-yu-gã cùú-gã Yãá ní chihi ñí-ó.

10 Te cùtnãhá ní cuu landú-ó, ñã túú tìtní nduu ñi cãniha tãtã-ó ñi sanu ichi ñaha-güedë xii-o ñacuãa ní cuu ñí-ó mee-güedë. Te Yã Ndiõxí duca<sup>n</sup> ðãndoho ñaha-gá xii-o sãnu ichi ñaha-gã cuendã cùú-xí sã vãha sã cùú-xí-ó, te duca<sup>n</sup> quide-gã cuendã nchoo càda ñãá-ó ðãtnã quíde mée-gã.

11 Te òré véxi ñ<sup>n</sup> tnúndõho sã cùú-xí-ó te ñã túú cùú ñí-ó ñí-ó chi ðãndíhú ñí-ó ñãhá-xí xii-o. Te nchaa ñáyiu ngúnu ichi sã cuendã nchaa tnúndõho-ã<sup>n</sup> te ngüita-yu quide ñãá-yu, te ío vãha cùú ñí-ó yu ñècú-yu.

### *Vã dáquèe tihú-ó tnũhu Yã Ndiõxí*

12 Te núú xíã<sup>n</sup> ío chí ndúcú ñèe-gã canchicú<sup>n</sup> ñihnu-ndo ñchi Xítõhó Jesucristú, te vã ðicó yica cùú ñí-ó cãncicú<sup>n</sup> ñihnu-ndo ñchi-gã.

13 Te cada vãha-ndo cùndecu-ndo ñchi-gã cuendã nchaa ñáyiu sãni ñ<sup>n</sup> sãni úú ñí-xi ñíhi ñèé-yu cundecú-yu ñchi-gã te vã ñã tũhú ñí-ó yu canchicú<sup>n</sup> ñihnú-yu.

14 Te nducu-ndo ñacuãa cada-ndo cùndecu vãha-ndo ñihi cue tñaha ñáyiu-ndo, te ío cada vãha-ndo cùndecu-ndo ñacuãa cundãá-ndó ñúú Yã Ndiõxí chi núú vã dúcã<sup>n</sup> càda-ndo te vã ndúú táhú-ndó cùndecu-ndo ñihi-gã.

15 Te ío vãha cada cuendã-ndó ñacuãa cada-ndo cùndecu-ndo, chi núú ñãhá te vã chíndëe ñaha-gã Yã Ndiõxí xii-ndo. Te ío vãha cada cuendã tucu-ndo ñacuãa cundecu-ndo vã cãní cuèhé ñí-ó cuendã Yã Ndiõxí, chi núú duca<sup>n</sup> ñã càda-ndo te ðava-gã ñáyiu ñècú ñihi-ndo ñchi-gã tñãhá-yu ngüita-yu duca<sup>n</sup> càdá-yu, te vã cùndecu vãha-gã-ndó ñihi-yu ñchi-gã.

16 Te cada cuendã tucu-ndo sã vã cùndecu-ndo ñchi ðíi ñí, te ñi vã dáquèe tihú-ndó ñi ñ<sup>n</sup> sã cùú cuendã Yã Ndiõxí ðãtnã ní quide ñíi Esãú, chi sã cuãñaha tãtã ñíi-ã<sup>n</sup> nduu táhú ñíi ñi cùú ní ðama ñíi ñ<sup>n</sup> cóhó comidã.

17 Te nchõhó sã ñaha-ndo sã cùtnãhá ní cuini ñíi Esãú cãcã<sup>n</sup> táhú tãtã ñíi núú Yã Ndiõxí cuendã nchaa sã ndúú táhú ñíi ñi cùú, te ñã túú ní xicã<sup>n</sup> táhú tãtã ñíi núú Yã Ndiõxí ñacuãa cuini mee ñíi ñi cùú. Te ñi ñãhyú víhi ñíi, te cuèi duca<sup>n</sup> ñi quide ñíi ðico ñã túú ní ñacu-gã ñíi ñãníhi ñíi táhú sã ñi ðama ñíi comidã.

18 Te cue ñáyiu isrãel ní sãtuhã-yu ñ<sup>n</sup> yucu núú cãyú ñuhú, te nchõhó ñã túú ñèe duca<sup>n</sup> sãhá<sup>n</sup> tuha-ndo ñ<sup>n</sup> yucu núú cãyú ñuhú ðãtnã ní quide cue ñáyiu-ã<sup>n</sup>. Te cùtnãhá duca<sup>n</sup> ñi sãtuhã-yu yucu-ã<sup>n</sup> te ñi cunee víhi ñihi yucu-ã<sup>n</sup>, te ñi quene táchi ñihi.

19 Te ñi tecú ðõho-yu ní cãhá<sup>n</sup> ñ<sup>n</sup> cútú, te ñi tecú tucu ðõho-yu ní cãhá<sup>n</sup> Yã Ndiõxí ní cãhá<sup>n</sup> ñihi ñaha-gã xii-yu. Te nchaa ñáyiu ní tecú ðõho-xi ní cãhá<sup>n</sup>-gã te ñi cuini-yu sã vã cãhá<sup>n</sup>-gã.

20 Te duca<sup>n</sup> ñi quíde-yu chi ñã túú ní cùndee ñí-ó yu ñacuãa ní cãhá<sup>n</sup>-gã, te duha ñi cachí-gã: “Te cuèi ñ<sup>n</sup> quiti ñã yãha xití yucu-a, te cãni-ndo-ði ñihi yúú àdi ñihi ñ<sup>n</sup> yutnu puyã”, duha ñi cachí-gã.

21 Te sã dúcã<sup>n</sup> ñi quide-xi ní xini-yu



xíã<sup>n</sup> ío ní dáyùhú ñáhá-xí xii-yu. Te tnàhá té Moisés ní yùhú-dé, te ní cachí-dé: “Quìdi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiu-á<sup>n</sup> ñí sáhá<sup>n</sup> tuhá-yu yucu-á<sup>n</sup>, dico cada iní-ndó sã sà ní tuha-ndo yùcu Sión sá ndécú nùú ndécú Yã Ndiõxí, ndihí ñuú-gá ñuú Jerusàlén sá cáá àndiu te ñuú-gá cúú-gã Yaá ndécú nchàa nduu nchaa quíú. Te ñuú-ni xíã<sup>n</sup> xĩndecu cuéhé víhí cuè espíritú xínú cuèchi núú-gã

23 chíñùhu ñaha-xi xii-gã. Te nchòhó cúú-ndó cuè ñáyiu cùu cuendá Yã Ndiõxí, te ní tnahá tnúhu-ndo ndihí nchaa dava-gã ñáyiu cùu cuendá-gã, ñáyiu yòdo tnuní núú tütú-gã ndécú àndiu, te ñuú-ni ñáyiu-á<sup>n</sup> cuãñaha-gã xii-yu sá ndúú tãhú-yu. Te nchòhó ní tuha-ndo Yã Ndiõxí Yaá cada ndáá yicá cuèchi nchaa ñáyiu. Te cada iní-ndó sã ñí tnahá tnúhu-ndo ndihí cue ñáyiu ní quide ndáá ní xĩndecu ichi Yã Ndiõxí ñuyíú-a. Te ñáyiu-á<sup>n</sup> ñà túú tnáhí-gã ná cúmãní-yu vitna ndécú-yu núú-gã.

24 Te ní tnahá tnúhu-ndo ndihí Xítohó Jesucristú Yaá ní quide nacuáa cada Yã Ndiõxí ñngá núú sã vãha sá cúú-xí nchàa nchoo ñáyiu ndècu ñuyíú-a, chi ní satí ñíñí-gã te ní xíhí-gã núú cùrúxí. Te ñíñí Xítohó Jesucristú ñá túú ñíñí-ni cuu-xi ndihí ñíñí ndí Àbél, chi ñuú cuendá ñíñí-gã-á<sup>n</sup> ñí quide càhnu iní Yã Ndiõxí nchaa cuèchi-o.

25 Núú xíã<sup>n</sup> ío cada cuendá-ndó vã dáquèe tihú-ndó tnúhu càhá<sup>n</sup> Yã Ndiõxí, chi nchaa ñáyiu ní xĩndecu ndéé sanaha dùca<sup>n</sup> ní quidé-yu ní dáquèé tihú-yu tnúhu ní cáhá<sup>n</sup>-gã ñuyíú-a sá cúú-xí-yu. Te ñá túú ní cãcu-yu chi ní nacháhu-yu sá dúcá<sup>n</sup> ñí quidé-yu. Te uu<sup>n</sup>-gã tucu nchoo chi vã cãcu-o te núú duca<sup>n</sup> na dàquee tihú-ó tnúhu càhá<sup>n</sup> Yã Ndiõxí ndéé àndiu sã cúú-xí-ó.

26 Te cútnahá ní cáhá<sup>n</sup> Yã Ndiõxí ndéé sanaha te ní quidi-xi ñuyíú. Te vitna càchí-gã: “Yúhú quidi tucu-í

ingá xito ñuyíú, te ñá díú mèe-ni ñuyíú duca<sup>n</sup> quidi-í chi tnàhá àndiu quidi-í”, càchí-gã.

27 Te sá dúcá<sup>n</sup> càhá<sup>n</sup>-gã sá ñngá xito tucu duca<sup>n</sup> càda-gã xíã<sup>n</sup> cùtnuní sá ncháándi túhú sá tũu ndèhe-o danaa-gã. Te nchaa sã ñà túú ndéé tũu quini-ó ñuyíú-a xíã<sup>n</sup> vã quidi-xí te ni vã náá-xí.

28 Te núú ñí cachí Yã Ndiõxí nduu táhú-ó cùndecu-o chi mee-gã táxí tnuní-gã xíã<sup>n</sup>, te ni vã quidi-xí te ni vã náá-xí. Te xíã<sup>n</sup> ío xini ñuhu-xi ndacá<sup>n</sup> táhú-ó núú-gã, te yíñùhu yíñùhu cunu cuechi-o núú-gã nacuáa cuu vãha iní-gã, te duca<sup>n</sup> cùhu<sup>n</sup> iní-ó sã ío càhnu cuu-gã.

29 Te Tãtá-ó Dütú Ndiõxí cúú-gã datná ñí ñuhú chi danàa-gã nchaa sã ñà túú quide nacuáa cuu vãha iní-gã.

## 13

*Nacuáa tàú-xi cada-o cuendá cuu vãha iní Yã Ndiõxí*

1 Te nchaa nchòhó ñáyiu ndècu ichi Xítohó Jesucristú, vã dáñá ndéé-ndó cùu iní tnáhá-ndó nacuáa ndècu-ndo ichi-gã.

2 Te cunaha-ndo sã nũu lò ñáyiu ñùhu ichi ní quexió-yu vehe-ndo te cuãñaha-ndo vèhe ndetatú-yu, te cuãñaha-ndo sã cáxí-yu. Chi davá-yu ndéé espíritú xínú cuèchi núú Yã Ndiõxí ní sáhá<sup>n</sup> vehé-yu ní quehe<sup>n</sup> cuendá-yu te ñá túú ní cùtnuní iní-yu sá díú espíritú xínú cuèchi núú-gã cúú-xí.

3 Te ndacu tucu iní-ndó cuè ñáyiu xixíhi vecaá, te cada iní-ndó sã tnàhá-ndó yíhi-ndo vecaá ndihí-yu. Te ndacu tucu iní-ndó nchàa ñáyiu ío ndòho, te cada iní-ndó sã tnàhá-ndó ndòho-ndo ndihí-yu.

4 Te nchaa ñáyiu na càchí-yu sã ñíñí sã vãha cùu-xi sã ñíñí tée ndihí ñíñí ñadìhí ná ñíhí tnáhã-yu candeca tnàhá-yu. Te nchòhó cue tée vã cání iní-ndó càhá<sup>n</sup> ndihí-ndo ñadìhí te núú ñá díú ñadìhí-ndó cùu-yu. Te duca<sup>n</sup>-ni nchòhó cue ñáyiu ñíhí tucu vã cání iní-ndó càhá<sup>n</sup> ndihí-ndo tée te núú ñá

díú yì-ndo cuu-güedé, chi Yá Ndiöxí dandòho-gá nchaa ñáyiundu cu ichi díí ìní.

<sup>5</sup> Te vá cùhú<sup>n</sup> ìní-ndó mèe-ni díhú<sup>n</sup>. Te núu nándi cùu nchaa sá ndécú ndìhi-ndo te diu-ni nchaa xíá<sup>n</sup> sa nduu vétú ìní-ndó, chi Yá Ndiöxí ní cachí-gá: “Ni ì<sup>n</sup> nduu vá dáñá ñìhnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

<sup>6</sup> Te xíá<sup>n</sup> núu nchoo ñi yuhu ñi ìní-ó cãhá<sup>n</sup>-ó ì<sup>n</sup> ì<sup>n</sup>-o, te cachí-ó: Yá Ndiöxí cúu-gã Yaá chindèe ñaha xii-í, núu xíá<sup>n</sup> ñá túu yùhú-í cuèi nándi cãhá<sup>n</sup> ñáyiundu cada ñàhá-yu xii-í. Duha cachí-ó.

<sup>7</sup> Chí ndácú ìní cue tée ní sanu ichi ñaha xii-ndo ichi Xítóhó Jesucristú cue tée ní cãhá<sup>n</sup> tnúhu Yá Ndiöxí núu-ndó, te ío váha chí nácuáha cuendá nãcuáa ní quide nchaa cue tée-á<sup>n</sup> ñi xíndecu-güedé ndéé ní sáa nduu ñi xíhí-güedé. Te ío quindáa ìní-ndó Yá Ndiöxí dàtná ní xóo cada cue tée-á<sup>n</sup>.

<sup>8</sup> Te dàtná-ni ní quide Xítóhó Jesucristú ndéé sanaha diu-ni duca<sup>n</sup> quide-gá vitna, te diu-ni duca<sup>n</sup> càda-gá ndéé núu cuahá<sup>n</sup> núu vëxi.

<sup>9</sup> Te vá dáñá-ndó mèe-ndo dandahú ñàhá ñáyiundu dacãhá<sup>n</sup> ñàhá xii-ndo natuha-ndo ingá ichi, ñáyiundu dãnehé tnàha ñáyiundu-xi nándi sá ñi cutúha-yu, te nchaa xíá<sup>n</sup> ñá túu ì<sup>n</sup>-ni cãhá<sup>n</sup>-xi ndìhi tnúhu sá ndécú ndìhi-ndo. Te Yá Ndiöxí chindèe ñaha-gã xii-o nãcuáa ñíhí ndéé-ó cùndecu-o ichi-gá, te duca<sup>n</sup> te cuu-xi sá váha sá cúu-xí-ó, te ñá díú cuendá ì<sup>n</sup> sá xéxi-ó ñíhí ndéé-ó ndècu-o ichi-gá. Te dava ñáyiundu cãchí-yu sá dává núu comidá cuu caxi-o te dava ñàhá nãcuáa ñíhí ndéé-ó cùndecu-o ichi-gá, dico ñá ndàá sá sã dúcã<sup>n</sup> vã cáxi-ó nchaa núu comidá ñíhí ndéé-ó cùndecu-o ichi-gá.

<sup>10</sup> Chi Xítóhó Jesucristú ní xíhí-gá cuendá-ó núu cùrúxi, te nchaa ñáyiundu nchicú<sup>n</sup> ñìhnu-ni quide nchaa nãcuáa ní quide nchaa dútú ñi xinu cuechi núu Yá Ndiöxí ndéé sanaha, ñáyiundu-á<sup>n</sup> vã cúu tnàhá tnúhu-yu ndìhi Xítóhó Jesucristú Yaá ní xíhí núu cùrúxi sá dúcã<sup>n</sup> quidé-yu.

<sup>11</sup> Chi dútú cùnùu-gá ní xíndecu ndìhi cue ñáyiundu isràél, tée-á<sup>n</sup> ñi xóo canehe-dé ñíñi nchaa quiti ní xóo cahni-dé ní xóo quihu ndéé xití cuártú ní cuu íi-gã. Te duca<sup>n</sup> ñi xóo cada dútú-á<sup>n</sup> cuendá cada càhnu ìní Yá Ndiöxí nchaa yíca cuèchi ñáyiundu, te cuñú nchaa quiti-á<sup>n</sup> ñi xóo cahmi-güedé ì<sup>n</sup> xio yuhu ñiú.

<sup>12</sup> Te duca<sup>n</sup> ñi yáha Xítóhó Jesucristú chi ndéé ì<sup>n</sup> xio yuhu ñiú ní sahani ñaha-güedé xii-gá. Te cuendá ñíñi-gã sá ñi satí núu cùrúxi núu ñi xíhí-gá, ní nduu ndoo ní nduu nine ìní cue ñáyiundu sãndáa ìní ñàhá xii-gá.

<sup>13</sup> Te vitna chí ná tùha-o Xítóhó Jesucristú te cada ndee ìní-ó ndòho-o datná ní ndòho-gá.

<sup>14</sup> Te ñuyíu-a ñi ì<sup>n</sup> xichi ñá túu ndéé cáa ì<sup>n</sup> ñiú cudíi ñi caa ñi quíhí<sup>n</sup> cuendá cundecu-o, dico duca<sup>n</sup>-ni ñiú ìní-ó ì<sup>n</sup> xichi núu ndúu táhú-ó cùndecu-o ñi caa ñi quíhí<sup>n</sup>.

<sup>15</sup> Te núu xíá<sup>n</sup> xíni ñiúhu-xi sá vã dáñá ndéé-ó chihuhu-o Dútú Ndiöxí chí Xítóhó Jesucristú ní quide-gá nãcuáa ndacu-o tnàhá tnúhu-o ndìhi Yá Ndiöxí, te òré cãhá<sup>n</sup> ndìhi-o-gã te nuu núu ndacã<sup>n</sup> táhú-ó núu-gã. Te nchaa tnúhu cãhá<sup>n</sup>-ó òré cãhá<sup>n</sup> ndìhi-o-gã cúu-xi dàtná ì<sup>n</sup> táhú sã cúu-xí-gã.

<sup>16</sup> Te vá dáñá ndéé-ndó càda-ndo mee-ni sá váha cundecu-ndo, te duca<sup>n</sup> chindee tnàha-ndo ì<sup>n</sup> ì<sup>n</sup>-ndo ndìhi sá ndécú ndìhi-ndo. Te núu duca<sup>n</sup> na càda-ndo te cani ìní-ndó sã cúu-xi dàtná ì<sup>n</sup> táhú sã ío váha cùu ìní Yá Ndiöxí.

<sup>17</sup> Te quindáa ìní-ndó càda-ndo nchaa nãcuáa cãhá<sup>n</sup> cue tée yìndaha ñaha xii-ndo nãcuáa ndècu-ndo ichi Xítóhó Jesucristú, chi diu cue tée-á<sup>n</sup> quidé cuendá ñàhá-güedé xii-ndo nãcuáa cundecu váha-ndo núu-gã. Te sáa nduu nãcãni tnúhu-güedé núu-gã núu ní quide váha-güedé àdi ñá túu ní quide váha-güedé ní xíndecu ndìhi ñaha-güedé xii-ndo. Te núu duca<sup>n</sup> na càda-ndo quindáa ìní-ndó-güedé te cudíi ìní-güedé cundecu ndìhi ñaha-güedé xii-ndo, te vá ndìhú

iní-güedé. Te núu vá dúcá<sup>n</sup> càda-ndo te vá cúu-xí sã vãha xii-ndo nchàa sã quidé-güedé sã cúu-xí-ndó.

18 Te càhá<sup>n</sup> ndàhú-í núu-ndó sã càhá<sup>n</sup> ndihí-ndo Yã Ndiöxí cuendá-ndí. Te nchúhú cútnùní ndáá iní-ndí sã ñã túú nã cúmãní-ndí núu Yã Ndiöxí, te duca<sup>n</sup> chi ndùcu-ndí nàcuáa quide-ndí cundáá-ndí núu-gã.

19 Te càhá<sup>n</sup> ndàhú tuçu-í núu-ndó sã ño cáca<sup>n</sup> táhú-ndó núu Yã Ndiöxí cuendá sã méé-gã ná cádá te ío ndihí quixi coto ñaha tùcu-í xii-ndo.

### *Tnúhu ndéé núu ní ndihí-ná*

20 Te Yã Ndiöxí Yaá quidé cùu vãha iní-ó ndècu-o, Yaá-á<sup>n</sup> ní dándótó-gã Xítohó Jesucristú. Te Xítohó Jesucristú-á<sup>n</sup> cúu-gã dàtná ì<sup>n</sup> toli ío-gã quéné cãva xito mbéé. Te duca<sup>n</sup> sãtnahá-xi cùu-gã cuendá sã ní sati níñí-gã te ní xihí-gã, te duca<sup>n</sup> ní cuu cuendá sã ní quide ndáá-gã ndihí Yã Ndiöxí sã cádá-gã ñngá núu sã vãha sã cúu-xí nchòo cue ñáyiú ndècu ñuyíú-a. Te nàcuáa ní quide ndáá-gã ndihí Yã Ndiöxí te diu-ni duca<sup>n</sup> càda-xi núu cuahá<sup>n</sup> núu vèxi.

21 Te xicá<sup>n</sup> táhú-í núu Yã Ndiöxí sã méé-gã ná chindee ñaha-gã xii-ndo cuendá cada-ndo mée-ni sã vãha nàcuáa cuini méé-gã, te mee-gã ná cádá ñaha-gã xii-o nchàa sã vãha sã sání iní-gã. Te diu-ni duca<sup>n</sup> na tàuchiu<sup>n</sup>-gã cada Xítohó Jesucristú sã cúu-xí-ó, duha xicá<sup>n</sup> táhú-í núu-gã. Te vitna nchaa-o chí ná càchí-ó sã ño càhnu cuu Xítohó Jesucristú ni caa ni quíhí<sup>n</sup>. Te duca<sup>n</sup> na cùnduu.

22 Te càhá<sup>n</sup> ndàhú-í núu nchòhó ñáyiú ndècu ndihí-í ichi Xítohó Jesucristú sã cádá càhnu iní-ndó nàcuáa ndùu nchaa tnúhu càhá<sup>n</sup>-í dásàhú ñáhà-í xii-ndo, chí ñã túú vãi tnúhu chido tnuní-í núu tùtú-a sã cúu-xí-ndó.

23 Te càchí tnúhu-í xii-ndo sã tẽ Timùteú téé ndècu ndihí-o ichi Xítohó Jesucristú ní cácu-dé ñã túú-gã yíhí-dě vecaá. Te núu na quèxio ndihí-dé núu ndécù-í te quixi-í ndihí-dé núu ndécú-ndó quixi coto ñaha-ndí.

24 Te cúñaha-ndo sã ño na càda ndee iní nchaa cue téé yìndaha ñaha xii-ndo nacuáa ndècu-ndo ichi Yã Ndiöxí. Te duca<sup>n</sup> cúñaha tùcu-ndo xii nchaa dava-gã ñáyiú cùu cuendá-gã sã ño na càda ndee iní-yu. Te cue ñáyiú nàció<sup>n</sup> Itàliá ñáyiú ndècu ndihí-o ichi-gã càchí-yu sã ño cada ndee iní-ndó.

25 Te Yã Ndiöxí ío na chindee chítúu ñaha-gã xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nã vitna.

## TUTÚ NÍ CADÚHA TÉ SÀNTIAÚ

*Té Sàntiaú cadúha-dé tutú quíhí<sup>n</sup> ndaha ñáyiú isràél nchíté nuu nihí ñuyú*

<sup>1</sup> Yúhú té Sàntiaú xínú cuèchi-í núú Yă Ndiôxí ndihí núú Xítohó Jesucristú, te tèe-í tnúhu-a quide ndee iní ñáhà-í xii nchòhó ñáyiú isràél nchíté nuu nihí ñuyú-a.

*Yă Ndiôxí táxí-gă sá xini tnùnì-ó*

<sup>2</sup> Te nchòhó ñáyiú ndècu ndihí-í ichi Xítohó Jesucristú, ío cudí iní-ndó cundecu-ndo cuéi ná cùu sá ùhú véxi cuèndá-ndó,

<sup>3</sup> chi duca<sup>n</sup> te cutnùnì iní-ndó sã sàndáá ndisa iní-ndó-gă, te cunduu càhnu iní-ndó cuéi ná ná yáha-ndo.

<sup>4</sup> Te cunduu càhnu-ni iní-ndó te duca<sup>n</sup> te cuu-ndo ñáyiú váha, te cundáá-ndó núú Yă Ndiôxí, te duca<sup>n</sup> te ñá túú-gă ná cumánì-ndó núú-gă.

<sup>5</sup> Te núu cùmání sã xini tnùnì-ó, te cãcã-ó núú Yă Ndiôxí te mee-gă taxi-gă, chi ío váha iní-gă, te ñá túú cùnini iní-gă núú-ó.

<sup>6</sup> Te ni yùhu ni iní-ó cãcã-ó núú-gă, te quindáá ndisa iní-ó sã táxí-gă sá cúmání quini tnùnì-ó, te vá cánì ñ<sup>n</sup> cani úú iní-ó. Chi nchaa ñáyiú sàni ñ<sup>n</sup> sàni úú iní-xi cùu-yu dàtná ndute làmár cuáhã<sup>n</sup>-xi duha cuáhã<sup>n</sup>-xi dàcã<sup>n</sup> nãá-xi òré quéné tãchí.

<sup>7</sup> Te nchaa ñáyiú duca<sup>n</sup> sàni iní-xi, te vá cánì iní-yu sá nihí-yu sá xicã<sup>n</sup>-yu núú-gă.

<sup>8</sup> Chi nchaa ñáyiú sàni ñ<sup>n</sup> sàni úú iní-xi ñá cùtnùnì iní-yu ndèdacàa sá sání iní-yu cadá-yu.

<sup>9</sup> Te nchaa ñáyiú ndàhú ñáyiú ndècu ichi-gă, xini ñuhu-xi ñá túú-gă ná cani iní-yu, mee-nã cudí iní-yu, chi Yă Ndiôxí chindèe ñaha-gă xii-yu.

<sup>10</sup> Te nchaa ñáyiú cuica xini ñuhu-xi cundecu váha iní-yu núú Yă Ndiôxí cuéi ná ná yáha-yu. Chi ñáyiú-á<sup>n</sup> cùu-yu dàtná itá nchaa cùhú sã ñá túú cùdí naha.

<sup>11</sup> Chi òré ní cuu níhi cahni nchícanhii, te ní dádii-ni-xi nchaa cùhú cuí-ã<sup>n</sup> te ní cóyo-ni nchaa itá-xi, te ñá túú-gă cáá vìi. Te duca<sup>n</sup> sãtnahã-xi cùu ñáyiú cuica chi núú chíú<sup>n</sup>-ni-yu xihí-yu.

*Nchaa ñáyiú quide cahnu iní-xi nchaa sã yãha-yu*

<sup>12</sup> Te váha táhú nchaa ñáyiú quide cahnu-ni iní-xi cuéi nándi sã yãha-yu ndècú-yu ichi Yă Ndiôxí, chi òré ná ndíhí nchãa xíã<sup>n</sup> yãha-yu, te cuãñaha Yă Ndiôxí ñ<sup>n</sup> coróná váha vìhi cundecu ndihí-yu, te ndáá chi duca<sup>n</sup> càhá<sup>n</sup> Yă Ndiôxí sá táxí-gă xii nchaa nchoo ñáyiú ñuhu iní ñáhã xì-gă.

<sup>13</sup> Te nchaa ñáyiú sàni iní-xi cada nándi sã cuèhé sá dúhá, te vá cánì iní-yu sá Yă Ndiôxí táuchiu<sup>n</sup>-gã duca<sup>n</sup> cadá-yu, chi Yă Ndiôxí ñá quíú te cani iní-gã cada-gã ñ<sup>n</sup> sã cuèhé sá dúhá, te ni ñá túú tàuchiu<sup>n</sup>-gã sá dúcã<sup>n</sup> cadá-yu.

<sup>14</sup> Te cuinì-yu cadá-yu nchaa sã cuèhé sá dúhá chi duca<sup>n</sup> vèxi iní-yu.

<sup>15</sup> Te nchaa ñáyiú ío ñuhu iní nchaa sã cuèhé sá dúhá te quidè-yu, te núu na càda-ni-yu te cuíta nihnú-yu.

<sup>16</sup> Te nchòhó ñáyiú ío cùu iní-í ndècú ndihí-í ichi Xítohó Jesucristú, vá dáñã-ndó mèe-ndo dandahú ñáhã ñáyiú xii-ndo.

<sup>17</sup> Chi nchaa sã váha véxi-xi núú Yă Ndiôxí Yaá ndècú àndiu, chi diu mee-gă ní cadúha-gã àndiu ndihí nchaa chódínì, ndihí yóó, ndihí nchícanhii. Te Yă Ndiôxí ñá túú ndì quehe<sup>n</sup> ndi quehe<sup>n</sup>-gã sá cánì iní-gă, te ni ñá túú cùu-gã dàtná ñ<sup>n</sup> cuándáhú cuáhã<sup>n</sup>-xi duha cuáhã<sup>n</sup>-xi dàcã<sup>n</sup>, chi ñ<sup>n</sup>-ni sã sání iní-gă.

<sup>18</sup> Te Yă Ndiôxí ní cuinì-gã sá cúú-ó dèhe-gã, te ndáá sá cúú-ó dèhe-gã chi sàndáá iní-ó tnúhu-gã. Te nchoo ñáyiú sàndáá iní-xi tnúhu-gã cùnù-gã-ó chi ní nduu-o dèhe-gã.

*Ichi ndáá cuíti*

<sup>19</sup> Te nchòhó ñáyiú ío cùu iní-í ndècú ndihí-í ichi Xítohó Jesucristú, cundedóho-ndo ñ<sup>n</sup> tnúhu na càhá<sup>n</sup>-í-a. Te cuinì-í sá cundecu túha-ndo cundedóho-ndo tnúhu Yă

Ndiöxí, te cani váha iní-ndó nàcuáa cáhá<sup>n</sup>-ndó, te cunduu càhnu iní-ndó te vá cùdèé<sup>n</sup>-ndó.

<sup>20</sup> Chi núu na cùdèé<sup>n</sup>-ó te ñá túú quide váha-o núú Yá Ndiöxí.

<sup>21</sup> Te dañà-ndo nchàa sá cuèhé sá dúhá íó ñuyíú-a. Te quindáá iní-ndó tnùhu Yá Ndiöxí ndécú ndìhi-ndo, te vá cùndùu sáá iní-ndó, te duca<sup>n</sup> te naníhí tãhú-ndó.

<sup>22</sup> Te quindáá iní-ndó tnùhu-gá te vá cuèndá-ni cundedóho-ndo, chi núu na cùndedóho-ndo te vá tníí-ndó ñá, te òcò-ni dandahú-ndó mèe-ndo te vá naníhí tãhú-ndó.

<sup>23</sup> Chi nchaa ñáyiú dícó-ni sàcùndedóho tnúhu-gá te ñá túú sàndáá iní-yu, ñáyiú-á<sup>n</sup> cúú-yu dàtná ñáyiú sàcùndéhé-ní núú-xi núú yùtátá.

<sup>24</sup> Chi nini ndèhé-yu ní xiní-yu núú-yu, te ní xócání-yu te ní nacuanaa-ní-yu nàcuáa càa núú-yu. Te duca<sup>n</sup> sãtnahá-xi cùu ñáyiú sàcùndedóho tnúhu Yá Ndiöxí, te ñá túú tníí-yu.

<sup>25</sup> Te nchaa ñáyiú dàcuaha ndisa tnúhu ní dándóo Yá Ndiöxí ñihnu-ní-yu ichi-gá, chi ñá díú ñá sá vèe cùu-xi. Te ñáyiú-á<sup>n</sup> ñá túú dícó-ni sàcùndedóho-yu chi quide ndáá-yu núú-gã, te cùdíí iní-yu xĩndecú-yu.

<sup>26</sup> Te nchaa ñáyiú càchí sá ndécú ichi ndáá te cùtèxínu-ni càhá<sup>n</sup>-yu, te xíã<sup>n</sup> dícó-ni dandahú-yu mèe-yu sá ndécú-yu ichi ndáá.

<sup>27</sup> Te núu ndècu-o ichi ndáá cuiti ichi Dútú Ndiöxí, te chindee-o nchaa ñáyiú ní ndóo ndàhú, ndìhi ñáyiú quèé ndécú ndìhi tnúndòho tnúhu ndàhú, te vá càdá-ó nãndi sá cuèhé sá dúhá íó ñuyíú-a.

## 2

*Ñáyiú-ni cùu iní-ó nchaa tnaha ñáyiú-o*

<sup>1</sup> Te nchòhó ñáyiú ndècu ndìhi-í ichi Xítóhó Jesucristú Yaá cùnùu, ñáyiú-ni cáhá<sup>n</sup> ndìhi váha-ndo nchaa tnaha ñáyiú-ndo.

<sup>2</sup> Te núu núú nátàcá-ndó chĩñuhu-ndo Yá Ndiöxí ní sáá ñá tée ío váha càa dóo

ñihnú-dě, te ní sáá tucu ñá tée ñihnu dóo ndàhú,

<sup>3</sup> te núu tée ñihnu dóo váha-ni-á<sup>n</sup> néhé-ndó sã yĩñùhu núú-dě, te taxinucóo-ndo-dě ñá núú xilé váha, te tée ndàhú-á<sup>n</sup> daxòcòo-ndo-dě ñá xio àdi canucóo-ndo-dě núú ñúhú,

<sup>4</sup> te núu duca<sup>n</sup> na càda-ndo te ñá túú quide váha-ndo. Chi ñá-ni-dé cúú iní-ndó, te ñá-dé ñá túú cùu iní-ndó.

<sup>5</sup> Te nchòhó ñáyiú ío cùu iní-í ndécú ndìhi-í ichi Xítóhó Jesucristú, chí cùndedóho tucu tnúhu na càhá<sup>n</sup>-í-a. Yá Ndiöxí càhá<sup>n</sup>-gá vãi ñáyiú ndàhú cuèndá tnahá tnúhu ndìhi ñàhá-yu xii-gá, te ndècu váha-gá-yu dàcúúxí ñáyiú cuica ñáyiú ñá túú sàndáá iní tnúhu-gá, chí ní cachí-gá sá ncháá ñáyiú na cùu iní ñàhá xii-gá nduu tãhú-yu cundecú-yu ndìhi-gá ni caa ni quíhí<sup>n</sup>.

<sup>6</sup> Te nchòhó, ñá túú nèhe-ndo sá yĩñùhu núú ñáyiú ndàhú, chí núú ñáyiú cuica-ni nèhe-ndo sá yĩñùhu. ¿Te náa ñá cùtnùní iní-ndó sã ñáyiú cuica dandòho ñaha-gá-yu xii-ndo, te càndeca ñàhá-yu sàhá<sup>n</sup> núú cuè tée cùchiú<sup>n</sup>-á<sup>n</sup>?

<sup>7</sup> Te diu-ní-yu ío càhá<sup>n</sup> cuèhé-yu cuèndá Xítóhó Jesucristú, te nchòhó sa ní nduu-ndo dèhe-gá.

<sup>8</sup> Te ñá ndudú cùnùu-gá ní cáhá<sup>n</sup> Yá Ndiöxí ní ngódó tnùní núú tütú-gá càchí-xi sá cúú iní-ó tnàha ñáyiú-o dàtná cúú iní-ó mèe-o. Te núu duca<sup>n</sup> na càda-o te quide váha-o.

<sup>9</sup> Dico núu ñá túú cùu iní ñáyiú-o cuè tnaha ñáyiú-o, te cuu cuèchi xii-o chí ñá túú quide-o nacuaá càhá<sup>n</sup> Yá Ndiöxí.

<sup>10</sup> Te núu ñá ñáyiú ndàunihnu ñá sá càhá<sup>n</sup> Yá Ndiöxí, te dava-ni quide-yu ña, te ñáyiú-á<sup>n</sup> ñá túú quide-yu nàcuáa càhá<sup>n</sup> ndudú Yá Ndiöxí.

<sup>11</sup> Te Yá Ndiöxí ní cachí-gá sá tée ndècu ñadìhí-xi vá càhá<sup>n</sup> ndìhi-dé ingá ñadìhí. Te diu-ni-gá ní cachí-gá sá vã cáhni-ó tnàha ñáyiú-o. Te cuèi ñá túú càhá<sup>n</sup> ndìhi-o ingá ñadìhí, te núu sãhni-o tnaha ñáyiú-o te ñá túú quide-o nacuaá càhá<sup>n</sup> ndudú Yá Ndiöxí.

12 Te nchoo xini ñuhu-xi cáhá<sup>n</sup>-ó tnúhu váha te cada ndáá-ó, chi ñá díú ñ<sup>n</sup> sá vëe cùu-xi sá ñí cachí Yá Ndiöxí cada-o. Te mee-gã ní cachí-gá sá cádá ndáá-gá cuéchi-o na sàá nduu.

13 Te nchaa ñáyiú ñá túú cùndahú iní tnàha ñáyiú-xi, te vá cùndahú iní ñáhá-gã xií-yu na sàá nduu càda ndáá-gá cuéchi-yu. Te nchaa ñáyiú cùndahú iní tnàha ñáyiú-xi te Yá Ndiöxí cùndahú iní ñáhá-gã xií-yu na sàá nduu-ã<sup>n</sup>.

### *Quindáá iní-ó Yá Ndiöxí te cada váha-o*

14 Te nchòhó ñáyiú ndècu ndihi-í ichi Xítóhó Jesucristú, te núu càchí-ó sá sàndáá iní-ó Yá Ndiöxí te ñá túú quide-o sá váha, te ñá túú ndèe nándihi-xi, chi vá nánihí tàhú-ó te núu duca<sup>n</sup> na càda-o.

15 Te núu ndèhe-o ñ<sup>n</sup> tnaha ñáyiú-o ñá túú dõo-yu àdi ñá túú sá cùchitó-yu,

16 te xáha<sup>n</sup>-o: “Núhú-n te nducu-n dõo cuihnu-n te nducu-n sá cáxí-n”, xáha<sup>n</sup>-o, te ñá túú ñá sãñaha-o, te sá dúcá<sup>n</sup> quide-o te ñá túú quide váha-o.

17 Te núu càchí-ó sá sàndáá iní-ó Yá Ndiöxí te ñá túú quide váha-o ndècu-o, te vèdana nándihi-xi.

18 Te ió ñáyiú càchí-yu sá sàndáá iní-yu Yá Ndiöxí, te ió ñáyiú càchí-yu sá méé-ní sá váha quidé-yu. Te yúhú càchí-í sá núu ñá túú quide-o sá váha, te ñá túú sàndáá iní-ó Yá Ndiöxí. Te nchoo quide-o sá váha núu xiá<sup>n</sup> cútnùní iní-ó sá sàndáá iní-ó-gã.

19 Te ió ñáyiú càchí sá ñ<sup>n</sup>dii-ni Yá Ndiöxí ndécú, te váha-ni càhá<sup>n</sup>-yu. Te tnàhá yucu ñávàha ndihi nchaa espíritú cùndihi-xi xiní-xi sá ndécú ñ<sup>n</sup>dii-ni Yá Ndiöxí, te yùhú-xi dico ñá túú tnè-xi tnúhu-gá.

20 Te ió ñ<sup>n</sup> dǐquí-ó te núu na càchí-ó sá sàndáá iní-ó Yá Ndiöxí, te vá cádá-ó sá váha.

21 Te ñaní tnáhá-ó ndihi Àbrahám téé ní xíndecu ndéé sanaha ñí ngúndecu váha ndíí núú Yá Ndiöxí, chi ní xito ndéé ñáhá-gã xii ndíí núu ndisa sá cáhni ndíí déhe ndíí té Isàác nduu tàhú-gã ní cùu, te dàvá-á<sup>n</sup> ní cutnùní

iní-gá sá ño sàndáá iní ñáhá ndihi xii-gá, núu ñá ní dàña-gá cahni ndíí déhe ndíí.

22 Te nàha-o sá ndihi Àbrahám ñá díú-ní sá méé-ní sá ñí sàndáá iní ñáhá ndihi xii-gá, chi ní tnè ndíí tnúhu-gá.

23 Te duca<sup>n</sup> ñí quee ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi: “Ndíí Àbrahám ní sàndáá iní ndíí ní quide ndíí nchaa nàcuáa ní xáha<sup>n</sup> Yá Ndiöxí, te ní ngúndecu váha ndíí núú-gã, te ní cachí-gá sá cúú ndihi téé ió váha tnàhá tnúhu ndihi-gá”, duha càchí-xi núú tütú-gá.

24 Te xiá<sup>n</sup> cútnùní iní-ó sá ñá díú mèe-ni sá quindáá iní-ó Yá Ndiöxí, chi núu na càda-o nàcuáa cuu váha iní-gá te ngúndecu váha-o núú-gã

25 dàtná ní quide-gá tá Ràháb ñ<sup>n</sup> ñadìhí ní xíndecu ndéé sanaha, chi xíhí-ã<sup>n</sup> ñí xíndecu-xi ichi díú iní, dico ní tuha-xi ichi Yá Ndiöxí te ní ngúndecu váha-xi núú-gã, chi ní chindee-xi cuè téé isràél cue téé ní xica chiú<sup>n</sup>-gá, te ní sanu ichi ñaha-xi xii-güedé ñ<sup>n</sup> ichi núú vã nánihí ñáhá cuè téé cùu úhú iní ñáhá xii-güedé.

26 Te nchaa ñáyiú càchí sá sàndáá iní Yá Ndiöxí, te ñá túú quidé-yu nàcuáa càhá<sup>n</sup>-gá ñáyiú-á<sup>n</sup> cúú-yu dàtná ñ<sup>n</sup> ñáyiú ní xíhí. Chi ñá túú-gã ndíxí tũu iní-yu nchaa sá cuéhé sá dúhá quidé-yu. Duha sãtnahá-xi cùu nchaa ñáyiú ñá túú cuè ní tnè tnúhu càhá<sup>n</sup> Yá Ndiöxí.

## 3

### *Nàcuáa quide yaa-o*

1 Te nchòhó ñáyiú ndècu ndihi-í ichi Xítóhó Jesucristú, vá ncháá-ndó càni iní-ndó cùu-ndo mestríu dacuàha-ndo ñáyiú tnúhu Yá Ndiöxí chi íí cáá-xí. Chi na quítnahá nduu nàcuáha-o cuendá núú-gã, te núu ñá túú ní quide ndáá-ó ñá, te vá cúú váha iní-gá núú-ó.

2 Te nchaa-o ño cuéhé sá ñá túú váha quide-o. Te nchaa ñáyiú ñá túú càhá<sup>n</sup> tnúhu cuéhé tnúhu duha cúú-yu ñáyiú ñá túú ñá cúmání chi ió ndáá quidé-yu. Te xiní-yu cotnè-yu

mèe-yu, te quèide váha-yu núú Yá Ndiöxí.

<sup>3</sup> Te dàtná cuiní-ndó cùu ì<sup>n</sup> quiti te núu na chìhi-o frenú yuhu-dí, te cotnií-o-dí te ngúnu ichi-dí, te duca<sup>n</sup> sãtnahá-xi cùu ñáiyu sãcótñií mee-xi, chi ñá túú càhá<sup>n</sup>-yu tnúhu cuèhé tnúhu duha.

<sup>4</sup> Te dàtná cuiní-ndó cùu barcú cuèi nãhnu vihi-xi, dico òré quéné nihi táchí te tũdaha-xi ì<sup>n</sup> xio, dico téè dàcaca ndacu-dé dáquihí<sup>n</sup>-dé-xi ndihi ì<sup>n</sup> yutnu sá dánani-güedé tímú ndàa núú càchí iní-dé quíhí<sup>n</sup>-xi.

<sup>5</sup> Te duca<sup>n</sup> cùu tucu yaa-o chi ío líhli-xi dico ío cuèhé tnúhu càhá<sup>n</sup>-ó ndihi-xi. Te duca<sup>n</sup>-ni sãtnahá-xi cùu tucu sá lúhá ñùhú chi sãhmi-xi ì<sup>n</sup> yucu.

<sup>6</sup> Te ñu-ni duca<sup>n</sup> sãtnahá-xi cùu yaa-o chi ío cuèhé tnúhu cuèhé tnúhu duha càhá<sup>n</sup>-ó ndihi-xi, te dàcuíta ni-hnu ñaha-xi xii-o. Te ío cuèhé cuèchi quide-o ndihi-xi cuendá sá ñuyíú-a ñùhu tnahá ñùhú tní yucu ñávãha dàticá ni-hnu ñaha-xi.

<sup>7</sup> Te ndacu-o càda masú-ó nchàa núú quiti ío ñuyíú cuèi quiti déé<sup>n</sup> quiti xica núú ñùhú, te cuèi quiti ndàva, te cuèi cóo, te cuèi quiti ñùhu xití ndute làmár, chi duca<sup>n</sup> quide dava cue téè ñuyíú-a.

<sup>8</sup> Dico yaa-o chi vá yõ ì<sup>n</sup> ndàcu cada masú ñáhá xii-xi nacuaá càhá<sup>n</sup>-ó mèe-ni tnúhu váha ndihi-xi, chi mee-ni tnúhu cuèhé tnúhu duha cùnuu-gá càhá<sup>n</sup>-ó ndihi-xi. Te cùu-xi datná ì<sup>n</sup> venènú chi dàti-xi iní-ó.

<sup>9</sup> Te ñu-ni ndihi yaa-o quide cahnu-o Dútú Ndiöxí Yaá cúú Tãtã-ó, te ñu-ni ndihi yaa-o cahá<sup>n</sup> úhú-ó cuè tnahã ñáiyu-o. Te xini ñuhu-xi vá dúcã<sup>n</sup> càda-o, chi mee-gã ní chìhi-gã sá xini tnùní-ó ndihi iní-ó, dàtná cáa mèe-gã ñùhú iní-gã.

<sup>10</sup> Te ñu-ni yuhu-o quèe tnúhu váha càhá<sup>n</sup>-ó, te ñu-ni yuhu-o quèe tnúhu cuèhé tnúhu duha. Te nchòhó ñáiyu ndècu ndihi-í ichi Xitohó Jesucristú cunaha-ndo sã ñã túú ndùu váha-xi duca<sup>n</sup> càda-o.

<sup>11</sup> Te ñá túú xini-ndó sã ì<sup>n</sup> núú quèe nihi ndute, te quèe ndute váha te

quèe ndute úá-ã<sup>n</sup>.

<sup>12</sup> Te nchòhó ñáiyu ndècu ndihi-í ichi Xitohó Jesucristú, te ñã túú xini-ndó sã ì<sup>n</sup> yutnu ngúxí, te cùu<sup>n</sup> aceitúná, àdi xini-ndó sã ì<sup>n</sup> yoho yaha stilé te cùu<sup>n</sup> ngúxí. Te duca<sup>n</sup> cuèi ì<sup>n</sup> núú quèe nihi ndute, vá cúú quèe ndute váha te quèe ndute úhá. Te duca<sup>n</sup> sãtnahá-xi cùu yuhu-o chi vá cúú càhá<sup>n</sup>-ó tnúhu váha te càhá<sup>n</sup>-ó tnúhu cuèhé tnúhu duha.

*Nchaa sã váha xini tnùní-ó taxi Yá Ndiöxí*

<sup>13</sup> Te núu ndècu ñáiyu túha tnuú-ndó ñáiyu cùnuni iní-xi, te xini ñuhu-xi mee-ni sã váha cadá-yu, duca<sup>n</sup> te cutnùní iní-ó sã túha ndisá-yu, te vá cadá càhnú-yu mèe-yu.

<sup>14</sup> Te núu nchoo cuèdú iní-ó te cuiní-ó cùnuu-o núú tnàha ñáiyu-o, te vá càchí-ó sã túha-o, chi ñã túú quide ndáá-ó te núu duca<sup>n</sup> na càda-o.

<sup>15</sup> Chi ñã díú xã<sup>n</sup> ní dànehé ñáhá Yá Ndiöxí, chi ñuyíú iha ní cacu ni-hnu-xi cuendá sá yùcu ñávãha dàcahu iní ñáhá-xí.

<sup>16</sup> Te núú ndécú ñáiyu cuèdú iní ñáiyu cuiní cunuu, te yacã<sup>n</sup> mee-ni ndáhú nãá xĩndecú-yu, te ñã túú quide váha-yu, chi mee-ni nchàa sã cuèhé sá dúhá quidè-yu.

<sup>17</sup> Te núu ní taxi Yá Ndiöxí sã xini tnùní-ó, te cada váha-o, te càhá<sup>n</sup> ndihi váha-o nchàa tnahã ñáiyu-o, te tñi-o tnúhu váha càhá<sup>n</sup>-yu, te cundáhú iní-ó-güè-yu te chindee-õ-yu, te vá cání ì<sup>n</sup> caní úú iní-ó, te ío cunduu ndáá iní-ó.

<sup>18</sup> Te núu cuiní-ó ñã túú ñã cuu cundecu-o ñuyíú-a, te cada váha-o sã cúú-xí tnàha ñáiyu-o cuendá sã ñã túú ñã cuu cundecu-o ndihi-yu. Te duca<sup>n</sup> te nguínchicú<sup>n</sup> dava-gã tnàha ñáiyu-o càda váha-yu.

## 4

*Vá cúú cundecu-o ichi Yá Ndiöxí te cada-o nãndi sã cuèhé sã dúhá*

<sup>1</sup> ¿Te xini-ndó ñã cuendá nãá ñáiyu te xĩsahni tnàhá-yu-ã<sup>n</sup>? Te nãá-yu sã tnúhu cuèdú iní, chi ñu-ni xã<sup>n</sup> ñùhú iní-yu, te ñã túú ndècu váha iní-yu.

2 Chi cuiní-yu cundecu ndihí-yu ìñ sá ñà túú ndècu ndihí-yu, te ñá túú nihí-yu núu xíáñ xícuu cuédú iní tnáhã-yu, te xícuehé tnáhã-yu, te càni tnahá-yu, te xíahni tnáhã-yu. Te ñá túú nihí-yu sá cuiní-yu chi ñá túú xicáñ-yu núú Yã Ndiöxí.

3 Te cuëi xicáñ-yu ìñ sá cuiní-yu núú-gã te ñá túú sãñaha-gã, chi ñá túú xicáñ-yu ìñ sá cúú xii-yu sá vãha, chi ìñ sá ná ndíhi-yu núú cádá-yu nchaa sá cuèhé sá dúhá xicáñ-yu, núu xíáñ ñá nihí-yu.

4 Te nchaa ñáyiú ducañ xíquide ío cùu sáá iní-yu núú Yã Ndiöxí. Te naha-ndo sá ncháá ñáyiú cùdíí iní-xi cundecu ichi cuèhé ichi duha cùu úhú iní-yu Yã Ndiöxí, chi vá cúú cundecu-o ichi cuèhé ichi duha, te cundecu-o ìchi-gá.

5 Te ñá túú dió ducañ càháñ-xi núú tùtú Yã Ndiöxí núú càchí-xi: “Yã Ndiöxí ní taxi-gá Espíritú-gá ndécú ndíhi-o. Te Espíritú-gá-áñ cuiní-xi sá méé-ní-gã cuhuñ iní-ó”, duha càchí-xi núú tùtú-gá.

6 Te Yã Ndiöxí ío chindee ñaha-gá cuendá cada ndáá-ó núú-gã dàtná càchí tucu-xi núú tùtú-gá núú càchí-xi: “Yã Ndiöxí ñá túú cùu vãha iní-gá núú nchaa ñáyiú quide cahnu mee-xi, dico chindee-gá cue ñáyiú ndàhú iní-xi”, duha càháñ-xi núú tùtú-gá.

7 Te cada-ndo nàcuáa càháñ Yã Ndiöxí. Te vá cádá-ndó nàcuáa cuiní yucu ñãvãha, ducañ te xóo cóo ndéé ñáhã-xi xii-ndo.

8 Te tñi-ndo tnũhu càháñ Yã Ndiöxí te cundecu ndíhi ñaha-gã xii-ndo. Te nchaa nchòhó ñáyiú ndècu ichi cuehé ichi duha dañã-ndo ìchi-áñ te cada vãha-ndo. Te nchaa nchòhó ñáyiú sàni iní cunu cuechi núú Yã Ndiöxí te quide-ni-ndo nchaa sá cuèhé sá dúhá, te ñá túú quide vãha-ndo núu ducañ, chi xini ñuhu-xi sá càcáñ-ndó núú Yã Ndiöxí sá ná ndádá ndòo ndada nine-gá iní-ndó.

9 Te ndixi cuéchi iní-ndó nchaa sá quidé-ndó ndéé ndáhyú ndisa-ndo sã ndíhú iní-ndó, te ñá díú dà cudíí iní-ndó.

10 Te náhmá-ndó núú Yã Ndiöxí

nchaa sá ñi quide-ndo, te ngúndecu vãha-ndo núú-gã.

*Vá càháñ-ó nchaa sá quidé tnaha ñáyiú-o*

11 Te nchòhó ñáyiú ndècu ndíhi-í ichi Xítóhó Jesucristú, vá cuátnũhu tnaha-ndo, chi nchaa ñáyiú sãtnuhu tnaha dícó-ni ndàa nuú-yu ndèhe tnahá-yu, te ñá túú càháñ vãha-yu cuendá tnũhu Yã Ndiöxí sá sánú ìchi ñaha xii-yu nàcuáa cundecú-yu, chi dàquee tíhũ-yu tnũhu-áñ. Te núu càchí-ndó sã ñá túú càháñ vãha tnũhu Yã Ndiöxí, te xíáñ quée-xi sã ñá túú sàndáá iní-ndó tnũhu càháñ-gá, te cuiní-ndó cùnuu tnũhu-ndo núú tnũhu-gá.

12 Te mee Yã Ndiöxí ní cachí-gá nàcuáa cada-o, te diu-ni mee-gã càháñ-gá te núu ní quide vãha-o, àdi ñá túú ní quide vãha-o. Te diu-ni mee-gã dàcácu nihnu ñaha-gã xii-o núú ùhú núú ndàhú, te diu-ni-gá daquihíñ ñáhã-gã xii-o núú ùhú núú ndàhú-áñ te núu vá cádá vãha-o. Te nchoo ñá túú nã cúú-ó, te núu mee-ni nchaa sá quidé tnaha ñáyiú-o cundehe-o.

*Ñá túú cùtnuní iní-ó nãsa túndaá-ó ìngá nduu*

13 Te dava nchòhó càchí-ndó sã vítná àdi tneé quihíñ-ndó ìñ ñuú, te yacáñ cundecu-ndo ìñ cuíá cada-ndo ìñ ndàhú te níhí-ndó díhúñ.

14 Te ní ñã xini-ndó nã cúú sã yãha-ndo vítna àdi tneé. Te nchoo cùu-o datná ìñ vícú núhú, chi vícú-ãñ tnávii ndéhé-ó te tna tnaa-gá sa ní ndóñúhú-xi. Ducañ sãtnahã-xi cùu nchoo chí ìñ úú nduu duha vëxi-o ñùyiú-a te ndoñuhu-o.

15 Te núu sàndáá iní-ó Yã Ndiöxí te duha càháñ-ó: “Te núu Ndiöxí ná càchí-gá sá cùndècu tnaa-o ñuyiú-a te cada chiun-o”, duha cachí-ó.

16 Dico mee-ndo chí ío ñii iní-ndó cuiní-ndó cùnuu tnũhu-ndo núú Yã Ndiöxí, te ñá túú ndùu vãha-xi sá dúcáñ quide-ndo.

17 Te núu xini-ó càda-o sá vãha te ñá túú quide-o, te cùu-xi ìñ cuéchi núú-gã.



## 5

*Tnúhu sá dátũha ñaha xii nchaa ñáyiu cuica ñà túú sàndáá iní tnúhu Yá Ndiõxí*

<sup>1</sup> Te nchòhó ñáyiu cuica ñáyiu cuihna iní-xi cundedóho-ndo tnúhu na càhá<sup>n</sup>-í-a. Vitna ngüita-ndo ndihú iní-ndó, te ndáhyú víhí-ndó, chi quixi ñ<sup>n</sup> tnúndòho cuendá-ndó te ndoho víhi-ndo.

<sup>2</sup> Te nchaa sá ndécú ndihí-ndo ndihí cuita tũ quĩhí<sup>n</sup>, te quee tíquidi dóó-ndó,

<sup>3</sup> te díhú<sup>n</sup>-ndó caxi cudi ñũhu. Te xiá<sup>n</sup> cuita naquiní ndeé-ndó tnũndòho sá ñà túú quide váha-ndo. Te ndihí-ndo ndihí díhú<sup>n</sup>-ndó sã ñĩ taxúha-ndo, chi vitna sa ta cùyatni sáá nduu ndihí ñuyíú-a.

<sup>4</sup> Te nchaa cue téé ní quide chiú<sup>n</sup>-ndó ñĩ ndatnúhu-ndo ndihí-güedé nàcuáa cháhu-ndo-güedé ní cùu, te ñá túú ní chãhu-ndo-güedé nàcuáa ní xáha<sup>n</sup>-ndo xii-güedé, núu xiã<sup>n</sup> ío ndècuéchi-ndo. Te Yá Ndiõxí Yaá ndécú àndiu ní tecú dóho-gá nàcuáa càhá<sup>n</sup>-güedé sá ñĩ dándàhú-ndó-güedé.

<sup>5</sup> Te nchòhó ñáyiu cuica, sá ndécú váha-ni-ndo cùndee iní-ndó, núu quide-ni-ndo nchaa sá vèxi iní-ndó. Te cùu-ndo datná ñ<sup>n</sup> quiti nùcúhnu mee-ni xèxi-di, te sáá nduu sàhni-güedé-di. Te duca<sup>n</sup> sãtnhá-xi cùu nchòhó chi ndècu váha-ndo vitna, te sáá ñ<sup>n</sup> nduu nàcháhu-ndo nchaa sá quidé-ndó núu Yá Ndiõxí te núu vá quindáá iní-ndó-gã.

<sup>6</sup> Te quide úhú iní-ndó sàhni-ndo cue ñáyiu quide ndáá núu Yá Ndiõxí, te ñá túú nã quidè-yu.

*Cunduu càhnu iní-ó te càhá<sup>n</sup> ndihí-o Yá Ndiõxí*

<sup>7</sup> Te nchòhó ñáyiu ndècu ndihí-í ichi Xítóhó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyíú-a, te cada-ndo datná quidé nchaa ñáyiu chihí tatá chi sàcùndetú-yu ndéé cúú<sup>n</sup> dáú te chihí-yu. Te cùndee-ni iní-yu sàcùndetú-yu ndéé cúú<sup>n</sup>-gã dáú te cùu itú-yu, te ndùdíí iní-yu.

<sup>8</sup> Te duca<sup>n</sup> càda nchòhó tucu cada ndee iní-ndó cùndetu-ndo, chi sa ta cùyatni nduu quixi tucu Xítóhó Jesucristú.

<sup>9</sup> Te duha nduu tnúhu càhá<sup>n</sup>-í núu nchòhó ñáyiu ndècu ndihí-í ichi Xítóhó Jesucristú, vá ndacá<sup>n</sup> cuéchi núu tnáhá-ndó te núu nása cùu ndecu-ndo, chi ñá cuéhé-gá nduu cùmání te quixi Cristú nacuaca ñaha-gã xii-o cùndecu-o núu Yá Ndiõxí, te mee-gã cada ndáá-gá cuéchi-o.

<sup>10</sup> Te nchòhó ñáyiu ndècu ndihí-í ichi Xítóhó Jesucristú, ndacu iní-ndó nàcuáa ní quide nchaa cue téé ní xóo càhá<sup>n</sup> tnúhu Yá Ndiõxí ndéé sanaha sá ío càhnu ní xínduu iní-güedé cuéi nándi ní ndoho-güedé.

<sup>11</sup> Te cùtnuní iní-ó sã cúú-ó ñáyiu ío váha táhú-xi te núu na càda cahnu iní-ó nchaa sá ná yãha-o cuendá Yá Ndiõxí. Te naha-ndo sá ndií Jòb duca<sup>n</sup> ñĩ quide ndií, chi nándi sá ñĩ yáha ndií te ní quide càhnu iní ndií. Te sátá ñĩ yáha ní ndoho ndií, te ío cuéhé sã ñĩ sãñaha Yá Ndiõxí xii ndií. Chi ío váha iní-gá te ío cùndahú iní-gá nchaa ñáyiu ío càhnu iní-xi.

<sup>12</sup> Te nchòhó ñáyiu ndècu ndihí-í ichi Xítóhó Jesucristú, chí cùndedóho tucu tnúhu na càhá<sup>n</sup>-í-a, chi ío xini ñũhu-xi. Vá cácu nèhe-ndo Yá Ndiõxí òré cuìní-ndó sã cùtnuní iní ñáyiu sá ndáá cada-ndo ñ<sup>n</sup> sá càhá<sup>n</sup>-ndó. Te ñĩ vá cácu nèhe-ndo sá càchí-yu cùu ndiõxí cadũha cue téé ñuyíú-a. Te núu ñ<sup>n</sup> sá xicá<sup>n</sup> tnàha ñáyiu-ndo núu-ndó te cúñaha-ni-ndo te núu cuu àdi sá vã cúú. Te vá cácu nèhe-ndo Yá Ndiõxí, duca<sup>n</sup> te vá dándòho ñaha-gã xii-ndo.

<sup>13</sup> Te núu ndòho-ndo te càhá<sup>n</sup> ndihí-ndo Yá Ndiõxí, àdi te núu ndècu váha-ndo te cudíí iní-ndó te chiñuhu-ndo-gã,

<sup>14</sup> àdi núu cùhú-ndó te cana-ndo cué téé yíndaha ñaha xii-ndo nacuáa ndècu-ndo ichi Yá Ndiõxí cuendá tee-güedé acití díquí-ndó, te cáca<sup>n</sup> táhú-güedé núu-gã cuendá-ndó datná ní cachí mée-gã cunduu.

<sup>15</sup> Te núu quindáá ndisa iní-ndó sã ndũha-ndo, te ndúha-ndo chi Yá Ndiõxí cada tátna ñaha-gã xii-ndo, àdi

núu ní quide-ndo ì<sup>n</sup> sá ñà túú tàú-ndó  
càda-ndo núú-gă te cada càhnu iní-gá  
cuéchi-ndo.

<sup>16</sup> Te xìni ñuhu-xi cútnùhu  
tnàha-ndo oré ñá túú cùndáá-ndó  
núú Yă Ndiöxí cuëndá chindee tnùhu  
tnàha-ndo cáhá<sup>n</sup> ndihí-ndo-gă te  
xocani-gá cuéhé-ndó, te cada càhnu  
iní-gá nchaa sá ñà túú vâha ní  
quide-ndo te núu cundecu váha  
iní-ndó. Te nchaa ñáyiu ndècu váha  
iní-xi núú Yă Ndiöxí na càcá<sup>n</sup>-yu ì<sup>n</sup>  
sá cuìní-yu núú-gă te nihí-yu, chi sàá  
tnúhu-yu núú-gă.

<sup>17</sup> Te té Èliás, téé ní xíndecu ndéé  
sanaha ñí cáa-dé dàtná cáá nchòo.  
Te ní cáhá<sup>n</sup> ndihí-dé Yă Ndiöxí ñí  
yùhu ñí iní-dé ní xáha<sup>n</sup>-dè xii-gá sá vâ  
dácùu<sup>n</sup>-gá dáú, te ní tni-gă tnúhu ní  
cáhá<sup>n</sup>-dé, te ñá ní dàcuu<sup>n</sup>-gá dáú ùní  
cuíá dava.

<sup>18</sup> Te dătnùní duca<sup>n</sup> te ní cáhá<sup>n</sup> ndihí  
tucu té Èliás-á<sup>n</sup> Yă Ndiöxí sá dácùu<sup>n</sup>-gá  
dáú te ní cuu<sup>n</sup>, te ní cuu tucu nchaa sá  
ñí xitu-güedé.

<sup>19</sup> Te nchòhó ñáyiu ndècu ndihí-í  
ichi Xítohó Jesucristú, te núu  
dava-ndo sà ndecu-ndo ichi Yă  
Ndiöxí ní cùu te ní dáñá-ndó, te  
ndècu tucu dava-ndo nadaxñu  
iní tnáhá-ndó núcúndecu tucu-ndo  
ìchi-gá,

<sup>20</sup> te núu duca<sup>n</sup> na càda-ndo te  
dàcácu nihnu tnàha-ndo núú ùhú núú  
ndàhú, te mee Yă Ndiöxí cada càhnu  
iní ñáhá-gă xii-ndo cuèi ío cuéhé  
cuéchi ní quide-ndo.

## TUTÚ DÍHNA NUU NĪ CADÚHA TÉ PÈLÚ

*Té Pèlú cadúha-dé tutú sá cúu-xí cuè ñáyiu sàndáá iní ñáhá xii Yá Ndiõxí*

<sup>1</sup> Yúhú té Pèlú ní tendaha ñaha Xítóhó Jesucristú xíca cùu-í càhá<sup>n</sup>-í tnúhu-gá, te cadúha-í tutú-a sá cúu-xí nchóhó ñáyiu xínchíté nuu ndècu distritú Pòntó, ndihí distritú Gàlaciá, ndihí distritú Capadociá, ndihí distritú Àsiá, ndihí distritú Bìtiniá.

<sup>2</sup> Chi Dútú Ndiõxí ní cachí-gá sá cúu-ndó dèhe-gá ndéé cútñahá vátá ngáva-gá ñuyú, te Espiritú-gá ní quide-xí ndècu yíñuhu-ndo núu-gá vitna. Te ní cachí-gá sá cúu-ndó dèhe-gá cuèndá tñi-ndo nchàa tnúhu càhá<sup>n</sup> Xítóhó Jesucristú, ndihí cuèndá nduu ndoo nduu nine iní-ndó, chi ñi cuèndá-án ñí xíhí Xítóhó Jesucristú. Te xíca<sup>n</sup> táhù-í núu Yá Ndiõxí sá ño na chindee chítúu ñaha-gá xii-ndo cuèi vitna te cuèi núu cuáhá<sup>n</sup> núu vèxi, te ñi-ni-gá ná cadá te ño váha cuu iní-ndó cùndecu-ndo.

*Tnúhu ndee iní sá ndécú ndihí ñáyiu sàndáá iní ñáhá xii Yá Ndiõxí*

<sup>3</sup> Te vitna chí ná càchí-ó sá ño càhnu cuu Yá Ndiõxí Yaá cúu Tātá Xítóhó Jesucristú, chí ñi-gá ño ní cundàhú iní ñáhá-gá xii-o núu xíá<sup>n</sup> ní quide-gá sá nchóó ñí nduu-o dàtná ñí ñáyiu saa vitna. Te duca<sup>n</sup> ñí quide ñaha-gá xii-o cuèndá sá Xítóhó Jesucristú ní xíhí-gá te ní ndoto-gá. Te cuèndá sá ñí nduu-o dàtná ñí ñáyiu saa, xíá<sup>n</sup> ní ngúndecu ndihí-o tñuhu ndee iní

<sup>4</sup> sá cùndecu ndihí-o-gá ñí caa ñí quíhí<sup>n</sup>, chí duca<sup>n</sup> ñí cachí-gá cunduu. Te yacá<sup>n</sup> vá quíni-gá-ó ñí ñí sá cuèhé sá dúhá, te ño cudíí iní-ó cùndecu-o ndihí-gá ñí caa ñí quíhí<sup>n</sup>.

<sup>5</sup> Te sá sàndáá iní-ó Yá Ndiõxí, núu xíá<sup>n</sup> coto ñaha-gá xii-o ndéé ná sàa nduu nàquehe<sup>n</sup> cuèndá ñáhá-gá chí ño càhnu cuu-gá.

<sup>6</sup> Te xíá<sup>n</sup> ño cudíí iní-ndó ndècu-ndo, te cuèi nándi ndòho-ndo ndècu-ndo dico sacú-ñí nduu duca<sup>n</sup> ndòho-ndo.

<sup>7</sup> Te òré ná cadá càhnu iní-ndó yáha-ndo nchàa sá ná càda ñaha ñáyiu xii-ndo, te duca<sup>n</sup> te cutnùni sàndáá ndisa iní-ndó Yá Ndiõxí, te sá dúcá<sup>n</sup> sàndáá iní-ndó Yá Ndiõxí ño-gá váha dàcúxí dñhú<sup>n</sup> cuáá<sup>n</sup> chí xíá<sup>n</sup> ñá túu cudíi-xi. Te cuèi duca<sup>n</sup> dico xító ndéé nàhí-ñí-güedé núu ndisa cùu-xí dñhú<sup>n</sup> cuáá<sup>n</sup>. Te duca<sup>n</sup> sätñahá-xi cùu nchóhó cuèndá nchaa sá ndóhó-ndó, te na sàa nduu quixi tucu Xítóhó Jesucristú te cúñaha-gá xii-ndo: “Ío váha ní quide-ndo, te vitna ño càhnu cuu-ndo, te tàú-ndó nùcùndecu váha-ndo”, duha cúñaha-gá xii-ndo.

<sup>8</sup> Te vitna ño cùu iní-ndó Xítóhó Jesucristú cuèi vátá quíni-gá-ndó-gá, te duca<sup>n</sup> ño sàndáá iní-ndó-gá, te ño cudíí iní-ndó te súúni ñí ñá cútñúni iní-ndó ñáa cunduu tnúhu càhá<sup>n</sup>-ndó sá dúcá<sup>n</sup> ño cudíí iní-ndó

<sup>9</sup> cuèndá sá ñí naníhí tàhú-ndó, chí ní sàndáá iní-ndó-gá.

<sup>10</sup> Te cue téé ní xóo càhá<sup>n</sup> tñuhu Yá Ndiõxí ndéé sanaha ñí cachí-güedé nàcuáa cada-gá cundàhú iní ñáhá-gá xii-o vitna. Te cue téé-án ño váha ní dàcuáhá-güedé nàcuáa cada Yá Ndiõxí dàcácu ñihnu ñaha-gá xii-o vitna.

<sup>11</sup> Te Espiritú Xítóhó Jesucristú ní ngúndecu ndihí cue téé-án ñí xáha<sup>n</sup>-xi xii-güedé nàcuáa ndoho-gá, te ní xáha<sup>n</sup> tucu-xi xii-güedé sá sáta ná yáha ndoho-gá te ño cunuu-gá ndihí Yá Ndiõxí. Te ño ní sani iní-güedé núu ná nduu sáa duca<sup>n</sup> càda-xi, ndihí nchaa nándi-gá cúu sá cadá-xí.

<sup>12</sup> Te Yá Ndiõxí ní xáha<sup>n</sup>-gá xii-güedé sá ncháa tñuhu váha càhá<sup>n</sup>-güedé vá cúu-xí cuèndá méé-güedé, chí cuèndá nchoo cuè ñáyiu ndècu ñuyú-a vitna cùu-xi. Te ñi-ni tñuhu-án cúu tñuhu càhá<sup>n</sup> nchúhú cue téé càhá<sup>n</sup> tñuhu Yá Ndiõxí núu-ndó. Te Espiritú sá ñí taxi Yá Ndiõxí ndécú ndihí-o chindee ñaha-xi xii-ndí càhá<sup>n</sup>-ndí tñuhu-gá. Te cue espíritú xínú cuèchi núu Yá Ndiõxí ño cùni-xi quíni ndáa-xi nchaa nàcuáa cuáhá<sup>n</sup> tñuhu-án.

*Yá Ndiõxí càchí-gá sá cadá-ó mèe-ni sá vãha*

<sup>13</sup> Te sá dúcá<sup>n</sup> ño váha ní quide ñaha Yá Ndiõxí xii-ndo xíá<sup>n</sup> xíní ñuhu-xi

ío váha cuáha-ndo cuèndá nàcuáa cundecu-ndo te vá cání iní-ndó càda-ndo ni ì<sup>n</sup> sá cuèhé sá dúhá, te ío quindáá iní-ndó sã Yã Ndiõxí cada váha ñaha-gã nduu na quixi tucu Xítoho Jesucristú.

14 Te ío tñi-ndo nchàa tnúhu càhá<sup>n</sup> Yã Ndiõxí, te vá cúhú<sup>n</sup>-gã iní-ndó nãndi sá cuèhé sá dúhá sã ñí xúhu<sup>n</sup> iní-ndó cùtnàhá vátá cùndècu-gá-ndó ìchi-gá te ni vã cáda-ndó.

15 Te cada-ndo mèe-ni sá vãha cundecu-ndo dàtná quidé mèe Yã Ndiõxí Yaá ní cáhá<sup>n</sup> ñáhá xì-o cundecu-o ndihí-gá.

16 Te càchí-gá núú tütú-gá: “Cada-ndo mèe-ni sá vãha cundecu-ndo, chi duca<sup>n</sup> quide yúhú”, duha càchí-gá núú tütú-gá.

17 Te Yã Ndiõxí cada ndáá-gá cuéchi nchaa ñáyiu, te vá cáda cuèndá-gá cuèi náí ñáyiu cùú-yu, te nchòhó càchí-ndó sã díú Tãtã-ndó cùu-gá te ndáá, núu xiã<sup>n</sup> xíní ñùhu-xi canehe-ndo sá yíñùhu núú-gã ndi nchàa nduu cundecu-ndo ñuyíú-a.

18 Te ñu-gá ní dácãcu nihnu ñaha-gã xii-ndo ì<sup>n</sup> ichi sá ñà túú nàndíhi ní sanu ichi ñaha cuè ñani tnáhá-ndó ñí xíndecu ndéé sanaha ni cùu, te nchòhó sa nàha-ndo sá sã dúcá<sup>n</sup> ñí quide ñaha Yã Ndiõxí ní dácãcu nihnu ñaha-gã xii-ndo ìchi-án ñà túú ní chãhu-gá ni ì<sup>n</sup> díhú<sup>n</sup> cuàá<sup>n</sup>, te ni ì<sup>n</sup> díhú<sup>n</sup> cuixí<sup>n</sup> sá ndihí nihnu ñuyíú-a cuèndá-ndó.

19 Chi Xítoho Jesucristú ní quixi-gá ní sati níñí-gã, te ní xíhí-gá núú cùrúxí cuèndá sá nchóó nàníhí tãhú-ó, te cùu-gá dàtná ì<sup>n</sup> mbéé quiti ío váha iní-xi, quiti càndoo canine.

20 Te duca<sup>n</sup> ñí ndoho Xítoho Jesucristú, chi duca<sup>n</sup> tnàhí ndéé tnuní ndoho-gá ndéé cùtnàhá vátá ngãva-gá ñuyíú. Te duca<sup>n</sup> ñí yáha-gá cùtnàhá ní quixi-gá òré vitna cùmání sãá nduu nàa ñuyíú-a cuèndá nchoo cùu-xi sá vãha xii-o vitna.

21 Te nchòhó sa nihí-ndó tnúhu nàcuáa ní yáha Xítoho Jesucristú cùtnàhá ní quixi-gá ñuyíú-a, núu xiã<sup>n</sup> sàndáá iní-ndó Yã Ndiõxí. Te Yã Ndiõxí ní dándótó-gã Xítoho Jesucristú, te sátá ñí dándótó ñaha-gá

te ní cachí-gá sá ío càhnu cuu Xítoho Jesucristú. Te sá dúcá<sup>n</sup> ñí cuu, xiã<sup>n</sup> ío sàndáá iní-ndó Yã Ndiõxí, te ní taxi-gá tnúhu ndee iní ndécú ndihí-ndo sá sãá nduu cundecu-ndo ndihí-gá ni caa ni quíhí<sup>n</sup>.

22 Te Espíritú Yã Ndiõxí ní guide-xi te ní sàndáá iní-ndó tnúhu-gá, te xiã<sup>n</sup> ní nduu ndoo ní nduu nine iní-ndó, te cùu iní tnáhá ndisa-ndo nacuáa ndècu-ndo ichi Yã Ndiõxí, te xini ñuhu ndisa-xi sá ío ni yùhu ni iní-ndó cùu iní tnáhá-ndó ì<sup>n</sup> ì<sup>n</sup>-ndo.

23 Te nchòhó ní nduu-ndo dàtná ì<sup>n</sup> ñáyiu saa sá cuèndá tnúhu Yã Ndiõxí, te tnúhu-á<sup>n</sup> candeca-xi iní-ndó ñí caa ni quíhí<sup>n</sup>, te vá ì<sup>n</sup> nduu ndihí nihnu-xi, te ñá díú cuèndá ñáyiu ñuyíú-a ni nduu-ndo ì<sup>n</sup> ñáyiu saa chi cuèndá tnúhu-gá.

24 Chi núú tütú Yã Ndiõxí càchí-xi: Nchaa ñáyiu ndècu ñuyíú-a cùú-yu dàtná cúhú, chi cúhú-ã<sup>n</sup> tnaa-ni cùdí-xi te xíhí-xi, duca<sup>n</sup> sãtnahá-xi cùú-yu.

Te nchaa sá ndécú ndihí-yu cùu-xi datná ì<sup>n</sup> itá cúhú-ã<sup>n</sup>, chi itá-ã<sup>n</sup> tnaa-ni tucu cùdí-xi te ndàhvã-xi, duca<sup>n</sup> sãtnahá-xi cùu nchaa sá ndécú ndihí-yu.

25 Dico tnúhu Yã Ndiõxí chi vá náá tnàhí-xi, chi duha-ni ndècu-xi, te ñu-ni duha cundecu-xi ni caa ni quíhí<sup>n</sup>.

Duha càchí-xi núú tütú-gá. Te ñu tnúhu-á<sup>n</sup> ñí dánhé ñáhá nchùhú cue tée càhá<sup>n</sup> tnúhu Yã Ndiõxí xii-ndo.

## 2

1 Te xiã<sup>n</sup> xíní ñùhu-xi dañã-ndo nchaa núú sá cuèhé sá dúhá, te dañã-ndo ìchi tnúhu ndehnde, te dañã-ndo vã dándàhú-gá-ndó mèe-ndo sá quidé vãha-ndo, te dañã-ndo ìchi cuedú íní, te dañã-ndo nchàa tnúhu yiti.

2 Te cada-ndo cuèndá sá cúú-ndó dàtná cue landú yíquí<sup>n</sup> vitna sadi camá, chi landú-ã<sup>n</sup> mee-ni sadi-güexi te sãhnu-güexi. Te cada iní-ndó sã dúcá<sup>n</sup> càda-ndo chi xini ñuhu-xi sá ío cuhu<sup>n</sup> iní-ndó dàcuaha-ndo tnúhu Yã Ndiõxí, chi xiã<sup>n</sup> cúú-xi mèe-ni tnúhu

váha, te duca<sup>n</sup> te cuita cuehnu nihnu-ndo ìchi-gá quíhí<sup>n</sup> ndéé ná sàà nduu cùndecu-ndo núú ndécú-gă.

<sup>3</sup> Te duca<sup>n</sup> xini ñuhu-xi cada-ndo, chi nchòhó sa ní cutnùnì ndisa iní-ndó sã Yă Ndiöxí ío váha iní-gă.

*Xítohó Jesucristú cúú-gă dàtná ì<sup>n</sup> yúú*

<sup>4</sup> Te ío nanducu nihnu-ni-ndo Xítohó Jesucristú Yaá quidé nàcuáa naníhí tǎhú-ó. Te ñu-gă ní cuu-gă dàtná ì<sup>n</sup> yúú sã ñà túú nàndihí sá cúú-xí ñáyiú ñuyúú-a, chi ní dáquée tǎhú ñáhă-yu xii-gă. Dico Yă Ndiöxí ní cachí-gă sá Xítohó Jesucristú cúú-gă dàtná ì<sup>n</sup> yúú sã ío-gă váha, chi ío cùnuu-gă.

<sup>5</sup> Te nchòhó sa ní naníhí tǎhú-ndó, te ío-gă chí nánducu nihnu Yă Ndiöxí cuèndá cuu ì<sup>n</sup>nuu-ndo cùndecu-ndo ndihí Espiritú-gă. Te núu duca<sup>n</sup> na càda-ndo te cuu-ndo dàtná yúú váha dàcaa-güedé dava vehe, te cuu tucu-ndo dàtná cue dútú ñi xinu cuechi núú Yă Ndiöxí ndéé sanaha, nàcuáa ñá túú ñă cumání-ndó núú-gă, chi nchaa cue tée-á<sup>n</sup> ñi xóo cuáha ñaha-güedé sá ñi xóo nduu tǎhú-gă. Te nchòhó vitna tàú-ndó càda-ndo nchaa nacuáa càhá<sup>n</sup>-gă, te nduu vétú iní-gă. Te duca<sup>n</sup> càda-ndo chi ndècu-ndo ndihí Xítohó Jesucristú.

<sup>6</sup> Te Yă Ndiöxí càchí-gă núú tütú-gă: Yúhú taxi ndecu-í ì<sup>n</sup> Yaá ñuú Sión, te cuu-gă dàtná ì<sup>n</sup> yúú váha sá sánútní-güedé xiquí cimièntú ì<sup>n</sup> vehe, chi yúhú ní cachí-í sá Yàá-á<sup>n</sup> ío cunuu-gă.

Te nchaa ñáyiú quèndáá iní ñáhá xii-gă vá ì<sup>n</sup> ndùu ndixi cuéchi iní-yu sá dúcá<sup>n</sup> sàndáá iní ñáhă-yu xii-gă.

Duha càchí-gă núú tütú-gă.

<sup>7</sup> Te nchòhó ñáyiú sàndáá iní ñáhá xii Xítohó Jesucristú ío cùu iní-ndó-gă, te nchaa ñáyiú ñá túú sàndáá iní ñáhá xii-gă quidé-yu dàtná càhá<sup>n</sup>-xi núú tütú Yă Ndiöxí núú càchí-xi:

Yúú sã ñi dáquée tǎhú cue tée dàcaa vehe, xiá<sup>n</sup> cúú-xí yúú sã ío-gă nándihí vitna.

Duha càchí-xi núú tütú-gă. Te yúú-á<sup>n</sup> cada iní-ó sã cúú-xí Xítohó Jesucristú, chi ní dáquée tǎhú ñáhă-güedé xii-gă.

<sup>8</sup> Te càchí tucu-xi ñngá xichi núú tütú Yă Ndiöxí:

Yúú-á<sup>n</sup> nguñenu ñáyiú te ndúá-yu.

Duha càchí-xi núú tütú-gă. Te tnúhu-á<sup>n</sup> quée-xí sã ío quide sáá iní ñáyiú núú-gă, chi ñá túú cuíní-yu tní<sup>n</sup>-yu tnúhu càhá<sup>n</sup>-gă, te duca<sup>n</sup> tnàhí ndéé tnuní sá ncháá ñáyiú ñá túú cuíní tní<sup>n</sup> tnúhu càhá<sup>n</sup>-gă, te ío cùu sáá iní-yu núú-gă.

*Ñáyiú ndècu ndihí Yă Ndiöxí*

<sup>9</sup> Te nchoo cùu-o ñáyiú sa ní dáquée ñi<sup>n</sup> ñaha Yă Ndiöxí xii-o cuèndá cùndecu-o ndihí-gă, te cùu-o dútú xínú cuèchi-o núú-gă, te mee-gă cúú-gă Yaá ío cùnuu, te cùu-o ñáyiú quide ndáá xíndecu ichi-gă te cùu tucu-o ñáyiú yèndaha-gă. Te duca<sup>n</sup> ñi quide ñaha-gă xii-o cuèndá sá cùñaha-o xii nchaa ñáyiú sá ío càhnu cuu-gă, te ío vǎi núú sã váha quide-gă, te ñu-gă ní quide ní dáñá-ó ncháa ichi cuehé ichi duha ndècu-o ní cuu, te ní sanu ichi ñaha-gă xii-o ì<sup>n</sup> ichi váha, te vitna cùtnuní iní-ó sã ío càhnu cuu-gă.

<sup>10</sup> Te nchoo cùu-o ñáyiú ñá túú ndècu ndihí Yă Ndiöxí ní cùu, dico vitna ní ngúndecu ndihí-o-gă, te dàvá-á<sup>n</sup> vǎtá sáá-gă nduu càda váha ñaha-gă xii-o, dico vitna sa ní sáá nduu quide váha ñaha-gă xii-o, chi ío cùndahú iní ñáhă-gă.

*Cada váha-o cùndecu-o cunu cuechi-o núú Yă Ndiöxí*

<sup>11</sup> Te nchòhó ío cùu iní ñáhă-í xii-ndo, te càchí tnúhu-í xii-ndo sã nchóo cùu-o datná cue ñáyiú ndècu tnaduha ì<sup>n</sup> ñuú, te duca<sup>n</sup> sǎtnahá-xi cùu-o chi tnaa-ni ndècu-o ñuyúú-a, te sáá nduu ndùu tǎhú-ó cùndecu-o núú ndécú Yă Ndiöxí táxi tnùnì-gă, te xiá<sup>n</sup> càhá<sup>n</sup> ndàhú-í núú-ndó sã vǎ cáda-ndó ñi ì<sup>n</sup> sá cuéhé sá dúhá sàni iní-ndó, chi nchaa xiá<sup>n</sup> ñá túú cùu-xi sá váha sá cúú-xí-ndó.

<sup>12</sup> Te cada váha-ndo cùndecu-ndo núú ncháa ñáyiú ñá túú ndècu ichi Yă Ndiöxí, te cuèi na càhá<sup>n</sup> ñáyiú sá nchòhó nchìcú<sup>n</sup> nihnu-ndo ìchi cuehé

ichi duha, dico quiní-yu nchaa sá vǎha quide-ndo, dico na sàá nduu dǎndixi túu Yá Ndiǒxí iní-yu sá ñà túú quide váha-yu ndécú-yu, te dǎvá-á<sup>n</sup> cachí-yu sá quidé vǎha-ndo ndecu-ndo, te cada càhnú-yu Yá Ndiǒxí.

13 Te Xítohó Jesucrístú cuení-gá sá nchòhó ío quindáá iní-ndó nchàa cue tée cùchiu<sup>n</sup> taxi tnuní ñáhá xii-ndo, te duca<sup>n</sup>-ni quindáá iní-ndó cuèi mee tée cùnuu vihi-gá yíndàha ñaha xii ñáiyu.

14 Te duca<sup>n</sup>-ni quindáá iní-ndó nchàa dava-gá cue tée cùnuu, chi Yá Ndiǒxí duca<sup>n</sup> ñí cachí-gá cunduu sá cuè tée-á<sup>n</sup> cada ndáá-güedé nchaa cuéchi ñáiyu quide cuehé quidé dùha ndecu, te cáhá<sup>n</sup> váha-güedé cuendá nchaa ñáiyu xíquide váha ndecu.

15 Te Yá Ndiǒxí cuení-gá sá cáda vǎha-ndo cùndecu-ndo cuendá nchaa ñáiyu ío ñí dǐquí-xi cáhá<sup>n</sup> cuèhé cuendá-ndó sá ndécú-ndó ìchi Yá Ndiǒxí vá ñihí-gá-yu tnúhu cáhá<sup>n</sup>-yu.

16 Te nchòhó, Yá Ndiǒxí ní quide-gá sá cúu-ndó ñáiyu cuu cada nàcuáa véxi iní méé-xí, dico ñá dǐú sá dúcá<sup>n</sup> ñí quide ñaha-gǎ xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sá cúu-ndó ñáiyu xínu cuechi núu Yá Ndiǒxí.

17 Te canehe-ndo sá yíñùhu núu nchàa ñáiyu, ndihí núu tée cùnuu vihi yíndaha ñaha xií-yu, te cuu iní tnáhá ndì mee-ndo nacuáa ndecu-ndo ìchi Yá Ndiǒxí, te ío canehe-ndo sá yíñùhu núu-gǎ.

### *Nchaa nàcuáa ndoho-o cùndecu-o ìchi Xítohó Jesucrístú*

18 Te nchaa nchòhó ñáiyu xínu cuechi canehe-ndo sá yíñùhu núu cuè patróo<sup>n</sup>-ndó, te quindáá iní-ndó càda-ndo nchaa chiu<sup>n</sup> tahu-güedé. Te ñí<sup>n</sup>-ni càda-ndo núu cuè tée váha iní-xi, ndihí núu cuè tée ío cuihna iní-xi.

19 Te núu nchòhó ná càda ndee iní-ndó ndòho-ndo nchaa sá ñà túú tàú-ndó ndòho-ndo cuendá sá cuení-ndó cùndáá-ndó núu Yá Ndiǒxí ñá, te ío nduu vétú iní-gá.

20 Te núu nchòhó ní quide-ndo ñí<sup>n</sup> cuéchi, te sàhni iní-ndó dǎndoho ñaha ñáiyu xii-ndo, ¿te ná sá vǎha cùu xiǎ<sup>n</sup>-í? Dico núu nchòhó ná cáda ndèe iní-ndó ndòho-ndo nchaa sá cáda ñaha ñáiyu xii-ndo sá cuendá sá quidé-ndó sá vǎha ña, te núu duca<sup>n</sup> na càda-ndo te cùu-xi ñí<sup>n</sup> sá vǎha núu Yá Ndiǒxí.

21 Te Yá Ndiǒxí ní cachí-gá sá cáda ndèe iní-ó ndòho-o nándi ndoho-o sá cuendá sá quidé-ó sá vǎha, chi ío ní ndoho Xítohó Jesucrístú cuendá-ó, te duca<sup>n</sup> tàú-ó càchicú<sup>n</sup> nihnu-o càda ndee iní-ó ndòho-o nándi ndoho-o, chi duca<sup>n</sup> ñí quide-gá.

22 Te mee-gǎ ñá túú quide-gá ni ñí<sup>n</sup> sá cuèhé sá dúhá, te ni ñí<sup>n</sup> tnúhu ndehnde ñà túú cáhá<sup>n</sup>-gá.

23 Te òré ní xóo cúcuèhé ñáhá-güedé xii-gá, te ñá túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñá túú ní xǎha<sup>n</sup>-gǎ xii-güedé sá ío ná cada ñaha-gǎ, chi núu ndáhá Yá Ndiǒxí ní xóo nachihí-gá méé-gǎ, ndihí nchaa sá sání ñí-güedé cada ñaha-güedé xii-gá. Te Yá Ndiǒxí cúu-gǎ Yaá ío váha cada ndáá cuéchi nchaa ñáiyu na sàá nduu.

24 Te Xítohó Jesucrístú cúu-gǎ Yaá ní xíhí núu cùrúxí cuendá nchaa cuéchi nchoo ñáiyu ndecu ñuyíú-a. Te duca<sup>n</sup> ñí xíhí-gá cuendá nchoo dùu<sup>n</sup> duu<sup>n</sup> dañá-o nchaa ìchi cuehé ìchi duha, te cada ndáá-ó cùndecu-o ìchi-gá. Te ní dǎnícuehé ñáhá-güedé xii-gá, te sá dúcá<sup>n</sup> ñí ndoho-gá xiǎ<sup>n</sup> ní ngúndecu váha nchoo vitna.

25 Te nchoo cùu-o datná cue mbéé cue quiti ní xíta ni cùu, dico vitna ní tuha-o Xítohó Jesucrístú, te Yaá-á<sup>n</sup> cúu-gǎ datná ñí<sup>n</sup> toli xito ñaha-gá xii-o vitna cuendá sá vǎ cuíta nihnu-o.

## 3

### *Nàcuáa tàú ñáiyu tnǎndaha cadá-yu cundecú-yu*

1 Te nchaa nchòhó ñáiyu dǐhí ní tnandaha ío quindáá iní-ndó yí<sup>n</sup>-ndo cuendá sá nùu ñá túú sàndáá iní-güedé tnúhu Yá Ndiǒxí te quindáá iní-güedé cuendá sá ndéhé-güedé

quidé ndää-ndó ndècu-ndo, te ni ñà túú xini ñuhu-xi cáhá<sup>n</sup>-ndó tnùhu-gá núú-güedě.

<sup>2</sup> Chi ndèhe mee-güedé sá nchòhó quidé ndää-ndó ndècu-ndo, te nèhe-ndo sá yíñùhu núú Yá Ndiöxí.

<sup>3</sup> Te vá cání ìní-ndó mèe-ni cundu vii-ndo, te ndada-ndo ñiquí-ndó nàcuáa tàú-xi cunduu, te vá cání ìní-ndó nãndi canehe-ndo, te ni vá cání ìní-ndó cuñhu-ndo mee-ni dóó vâha sá ïo vii ndâa.

<sup>4</sup> Chi ìní-ndó xini ñuhu-xi cunduu vii cunduu váha-xi núú Yá Ndiöxí cuéi vitna te cuéi núú cuáhá<sup>n</sup> núú vëxi, te cuu-ndo ñâyiu ío càhnu ìní-xi, te núú duca<sup>n</sup> na càda-ndo te ío cuu váha ìní Yá Ndiöxí.

<sup>5</sup> Te duca<sup>n</sup> ïo vii ío váha ní xínduu ìní nchaa ñâyiu ñihí ní xíndecu ndéé sanaha, te ñâyiu-án ïo ní sándáá ìní-yu Yá Ndiöxí te ní cudùu-yu núú-gã, te ní tní-yu nchaa tnúhu ní cáhá<sup>n</sup> yí-yu.

<sup>6</sup> Te duca<sup>n</sup> ñi xóo cada ndíi Sără ní xóo quíndáá ìní ndíi yí ndíi, ndíi Àbrahám, te ní cánehe ndíi ñihí-án sá yíñùhu núú yí ndíi. Te núú nchòhó quidé vâha-ndo ndècu-ndo te ñà túú yùhú-ndó nã cada ñaha tnàha ñâyiu-ndo xii-ndo, te núú duca<sup>n</sup> quide váha-ndo ndècu-ndo te quide-ndo datná ní quide ndíi Sără.

<sup>7</sup> Te nchòhó cue tée ndècu ñadihí-xi ío váha cuáha-ndo cuendá nàcuáa cundecu váha-ndo ndíi-yu, te ío vii cáhá<sup>n</sup> ndíi-ndó-yu, chi ñâyiu-án íi-gã-yu dàcúxí nchòo cue tée, te duca<sup>n</sup> càda-ndo chi ndi ndùú-ndó ndùu táhú-ndó cundecu-ndo ndíi Yá Ndiöxí, te núú duca<sup>n</sup> na càda-ndo te òré cáhá<sup>n</sup> ndíi-ndo Yá Ndiöxí te tedóho ñaha-gã xii-ndo.

#### *Ñâyiu quide sá vâha ndòhó-yu*

<sup>8</sup> Te càchí tnúhu tucu-í xii-ndo sã ïo cuu ñnuu-ndo cundecu-ndo, te cundàhú ìní tnáhá-ndó ñi ñi-ndo, te cuu ìní tnáhá tucu-ndo nacuáa ndècu-ndo ichi Yá Ndiöxí, te cuu-ndo ñâyiu ndàhú ìní-xi.

<sup>9</sup> Te núú ñi sã ñà túú vâha quide ñaha ñâyiu xii-ndo, te ñà díú-ní dùca<sup>n</sup> nanhocáva-ndo càda-ndó-yu, àdi xicuèhé ñahã-yu xii-ndo, te vá ná

dànchocáva-ndo ñi-ni tnúhu cuèhé, chi cáhá<sup>n</sup> táhú-ndó núú Yá Ndiöxí cuendá sã ná cádá vâha ñaha-gã xii-yu, te duca<sup>n</sup> càda-ndo chi Yá Ndiöxí ní cáhá<sup>n</sup> ñahá-gã xii-ndo cuendá sã cádá vâha ñaha-gã xii-ndo tnàhá-ndó.

<sup>10</sup> Te núú tütú Yá Ndiöxí càchí-xi: Nchaa ñâyiu cuíni cundecu váha ndi nchaa nduu ñini cundecú-yu ñuyíú-a,

xini ñuhu-xi sã vã càhá<sup>n</sup>-yu tnúhu cùtexínu, te ni vã dácuàndehndé-yu.

<sup>11</sup> Te xini ñuhu-xi duu<sup>n</sup> duu<sup>n</sup> dañá-yu nchaa ichi cuèhé ichi duha, te cadá-yu mee-ni sã vâha,

te ío ndùcú-yu nàcuáa cadá-yu cundecu váha-yu ndíi tnàha ñâyíú-yu te ñi-ni duca<sup>n</sup> càchicú<sup>n</sup> nihnú-yu cadá-yu.

<sup>12</sup> Te Yá Ndiöxí xító-gã nchaa ñâyiu quide ndáá núú-gã

te tedóho-gã nchaa tnúhu càhá<sup>n</sup>-yu, dico nchaa ñâyiu ñà túú cuíni cada ndáá, ñâyiu-án ñà túú cùu váha ìní-gá núú-yu.

Duha càchí-xi núú tütú-gá.

<sup>13</sup> Te vá yõo níhí ndéé càda ñaha xii-o ñi sã ñà túú vâha te núú mee-ni sã vâha na càda-o cundecu-o.

<sup>14</sup> Àdi núú ná cúú sã ná cádá ñaha ñâyiu xii-o sã cuendá sã quidé vâha-o ndècu-o ña, te sã dúcá<sup>n</sup> ná cádá ñahá-yu xii-o cùu-xi ñi sã vâha sã cúú-xí-ó núú Yá Ndiöxí. Te na càchí tnúhu-í xii-ndo sã vã yùhú-ndó-yu, te ni vã cundíyí-ndó cuendá nchaa sã ná càda ñahá-yu xii-ndo.

<sup>15</sup> Te nèhe-ndo sã yíñùhu núú Xítohó Jesucristú. Te ío cundecu túha-ndo dānehé-ndó ñâyiu véxi ndùcu tnúhu núú-ndó nàcuáa ndùu tnúhu ndee ìní ní taxi Xítohó Jesucristú ndécú ndíi-ndo, te cuu vii cuu váha ìní-ndó cáhá<sup>n</sup> ndíi-ndó-yu, te cáhá<sup>n</sup>-ndó núú-yu mee-ni tnúhu yíñùhu nacuáa cùu váha ìní Yá Ndiöxí.

<sup>16</sup> Te ío cada váha-ndo cundecu-ndo cuendá sã vã cundíyí-ndó, te núú duca<sup>n</sup> na càda-ndo, te nchaa ñâyiu xicuèhé ñahá xii-ndo cuendá sã quidé vâha-ndo ndècu-ndo ichi Xítohó Jesucristú quendóo canúú-yu ndíi nchaa

tnúhu càhá<sup>n</sup>-yu, chi nchòhó quidé vâha-ndo ndècu-ndo.

<sup>17</sup> Te vâha-gá sá ndóhó-ó cuendá sá quidé-ó sã vâha te núu mee Yã Ndiöxí duca<sup>n</sup> cuini-gá cunduu, te ñá díú sã ndóhó-ó cuendá sá ñà túú quide-o sã vâha.

<sup>18</sup> Te Xítohó Jesucristú ní xihí-gá sá cuendá nchaa cuéchi nchaa nchoo ñáyiu ndècu ñuyíu-a, te #<sup>n</sup> xito-ni duca<sup>n</sup> ñi xihí-gá te duca<sup>n</sup> te vá cùú tnàhí-gá, te mee-gã cúú-gã Yaá ñá túú tnàhí cuéchi-xi, te duca<sup>n</sup> ñi ndoho-gá cuendá nchaa cuéchi ñáyiu ndècu ñuyíu-a ñáyiu ñá túú cuini cada ndáá núú Yã Ndiöxí, te duca<sup>n</sup> ñi cuu cuendá sá núcündecu váha-yu núú Yã Ndiöxí te núu na quindáá iní ñáhã-yu xii-gá. Te mee-gã ní xihí-gá dico Espiritú-gá chi ní xindecu-ni-xi,

<sup>19</sup> te Espiritú-gá ní sáhã<sup>n</sup>-xi ní cáhá<sup>n</sup>-xi tnúhu Yã Ndiöxí núú nchaa espíritú ñáyiu ndècu núú ùhú núú ndàhú.

<sup>20</sup> Te ñáyiu-á<sup>n</sup> cúú ñáyiu ní xindecu ndéé sanaha cùtnáhã ní xindecu ndíi Noé, chi ñáyiu-á<sup>n</sup> ïo ní quide sãá iní-yu núú Yã Ndiöxí. Te Yã Ndiöxí ïo váha iní-gá, chi ní dácácã-gã nduu ñi xindecuu ndíi Noé ní cadúha ndíi bàrcú cuendá ndétú-gã ndixi cuéchi iní-yu sã ñà túú quide váha-yu ndècú-yu ni cùu. Te dàvã-á<sup>n</sup> ñi ndaa ndute ñuyíu te ní cácu únã duha ná tnáhã ñáyiu, chi ní quée-yu xití bàrcú-á<sup>n</sup>, te ñá túú ní cãhá-yu.

<sup>21</sup> Te sã dúcã<sup>n</sup> ñi cácu ñáyiu únã-á<sup>n</sup> ñà túú ní cãhá-yu ndute ní ndaa ñuyíu dàvã-á<sup>n</sup>. Te xiã<sup>n</sup> quée-xí sã cuándute ñáyiu vitna, te naníhí tãhú-yu te núu na quindáá iní-yu tnúhu ndáá tnúhu Yã Ndiöxí. Te ñá díú sã cuándute-o te nduu ndoo nduu nine yiqui cùñú-ó te naníhí tãhú-ó, chi xini ñuhu-xi nãhmã-ó núú Yã Ndiöxí nchaa yicã cuéchi-o, te nduu ndoo nduu nine iní-ó, te duca<sup>n</sup> te naníhí tãhú-ó, chi Xítohó Jesucristú ní xihí-gá cuendá-ó te ní ndoto-gá.

<sup>22</sup> Te Yaá-á<sup>n</sup> cuãndaa-gã andiu, te ní ngóo-gá xio cùha Yã Ndiöxí, te tàxi tnuni-gã nchaa espíritú cùnùu

ndíhi nchaa dava-gã cue espíritú xínú cuèchi.

## 4

### *Cada-o nàcuáa cuini méé Yã Ndiöxí*

<sup>1</sup> Te Xítohó Jesucristú ní ndoho-gá cùtnáhã ní xindecu-gã ñuyíu-a, te vitna nchòhó cundecu túha-ndo ndòho-ndo cuendá-gá, chi nchaa ñáyiu ndòho nãndi sã ndóhó cuendá-gá dàñã-yu nchaa sã cuèhé sã dúhá.

<sup>2</sup> Te duca<sup>n</sup> ñà túú-gã ndècú-yu ichi cuèhé ichi duha, chi mee-nã nàcuáa càhá<sup>n</sup> Yã Ndiöxí quidé-yu ndècú-yu ñuyíu-a.

<sup>3</sup> Te nchòhó sa nàha-ndo sã ïo cuéhé núú sã cuèhé sã dúhá ñi xóo cada-o cùtnáhã vátã cündecu-gã-ó ìchi Yã Ndiöxí, chi ní xóo cada-o nchaa sã cuèhé sã dúhá cùdíi ìni nchaa ñáyiu ñá túú sãndáá iní tnúhu-gã, te dàvã-á<sup>n</sup> ñi xóo cada-o nchaa núú sã cuèhé sã dúhá, te ní xóo caní cuèhé ní xóo caní duha iní-ó, te ní cuu-o cuè ñáyiu quihu, te ní xóo cundecu-o víco núú ñi xóo cada-o nchaa sã ñà túú vâha, te ní xóo níhí tnáhã-ó ndíhi nchaa tnaha quihu-o, te ní xóo chiñuhu-o nchaa sã càchí-yu cùu ndióxí te ñá ndáá sã ndiöxí cúú nchaa xiã<sup>n</sup>, te nãndi-gã nchaa sã cuèhé sã dúhá ñi xóo cada-o dàvã-á<sup>n</sup>.

<sup>4</sup> Te ñáyiu-á<sup>n</sup> cùñùhu-yu vitna sã ñà túú-gã nihí tnáhã-ó ndíhi-yu cada-o nchaa sã cuèhé sã dúhá quidé-yu, te xiã<sup>n</sup> càhá<sup>n</sup> cuèhé-yu cuendá-ó vitna.

<sup>5</sup> Dico sãá nduu te ñáyiu-á<sup>n</sup> nãhmã-yu nchaa sã quidé-yu núú Xítohó Jesucristú, chi ñiu-gã sa ndècu túha-gã sã cádá ndãá-gã cuéchi nchaa ñáyiu sa ní xihí, ndíhi cuéchi nchaa ñáyiu xindecu vñvú.

<sup>6</sup> Te cue ñáyiu sa ní xihí ní xindedóho tnúhu Xítohó Jesucristú, te cuéi ní xihí-yu dàtnã xihí dava-gã ñáyiu, dico espíritú-yu chi ní nduu tãhú-xi ndècu váha-xi dàtnã ndècú Yã Ndiöxí.

<sup>7</sup> Te vitna ta cùyatni danaa Yã Ndiöxí ñuyíu-a núú xiã<sup>n</sup> ïo váha cuáha-ndo cuendá nàcuáa cundecu-ndo, te cáhá<sup>n</sup> ndíhi-ndo-gã.



8 Te xini ñuhu-xi sá ïo cuu iní tnáhá-ndó ñ<sup>n</sup> ñ<sup>n</sup>-ndo, chi núu duca<sup>n</sup> na cùu iní tnáhá-ndó ñ<sup>n</sup> ñ<sup>n</sup>-ndo, te vá cání-gǎ iní-ndó càda cuendá-ndó nchàa sá ñà túú vǎha quide ñaha ñáyiú xii-ndo,

9 te nchòhó ñáyiú xĩndecu vehe-xi cuáha nùu-ndo vehe xii cue ñáyiú ñuhu ichi na ndetatú-yu, te ío vǎha cuu iní-ndó dùca<sup>n</sup> cada-ndo.

10 Te Yá Ndiõxí ní taxi-gǎ ndí dí<sup>ñ</sup> nũú tǎhú ndécú ndìhi-ndo ñ<sup>n</sup> ñ<sup>n</sup>-ndo, te nàcuáa ndùu tǎhú ñĩnduu tǎhú-ndó ñ<sup>n</sup> ñ<sup>n</sup>-ndo te duca<sup>n</sup> chĩndee tnaha-ndo, te vá dáñá ndèé-ndó càda-ndo nchaa nacuáa tàuchiu<sup>n</sup> Yá Ndiõxí cada-ndo, te chĩndee ñaha-gǎ xii-ndo.

11 Te dava nchòhó ñáyiú càhá<sup>n</sup> tnúhu Yá Ndiõxí núú ñáyiú, xini ñuhu-xi càhá<sup>n</sup>-ndó nàcuáa ndùu tnúhu-gǎ núú-yu, te dava nchòhó ñáyiú quide nchaa núú chiu<sup>n</sup> chĩndee tnaha ñáyiú-xi, xini ñuhu-xi cada-ndo sá Yá Ndiõxí chĩndee ñaha-gǎ xii-ndo, te duca<sup>n</sup> càda-ndo nchaa núú sǎ vǎha, chi Xítóhó Jesucristú tnáhá-gǎ chĩndee ñaha-gǎ xii-ndo, te duca<sup>n</sup> ïo cuu càhnu Yá Ndiõxí. Te vitna tàú-ó càhá<sup>n</sup>-ó sǎ ïo càhnu cuu Xítóhó Jesucristú, chi diu-gǎ cùnùu-gǎ nchaa nduu nchaa quíú, te duca<sup>n</sup> na cùnduu.

### *Ndoho tnáhá-ó cùndecu-o ichi Xítóhó Jesucristú*

12 Te nchòhó ñáyiú ío cùu iní-í, vá cúñũhu-ndo sǎ ïo ndòho-ndo ndecu-ndo ichi Xítóhó Jesucristú, chi sá dúcá<sup>n</sup> ndòho-ndo-á<sup>n</sup> cútnùní ndisa sá sàndáá iní-ndó-gǎ, te vá cání iní-ndó nǎ cuendá duca<sup>n</sup> ndòho-ndo.

13 Chi da cudí<sup>ñ</sup> iní-ndó te núu ndòho-ndo datná ní ndoho Xítóhó Jesucristú, te duca<sup>n</sup> sũúní cùdí<sup>ñ</sup> iní-ndó òré ná quixi tucu-gǎ ñuyíú-a te dǎvá-á<sup>n</sup> quiní-ndó sǎ ïo càhnu cuu-gǎ.

14 Te núu xĩcuèhé ñáhá ñáyiú ndècu ichi cuehé ichi duha xii-ndo cuendá sá ndécú-ndó ichi Xítóhó Jesucristú, te xiǎ<sup>n</sup> cúú-xí ñ<sup>n</sup> sá vǎha sá cúú-xí-ndó nũú-gǎ, te duca<sup>n</sup> chi Espíritú Yá Ndiõxí sá ïo cùnùu ndecu ndìhi ñaha-xi xii-ndo, te nchaa ñáyiú ndècu ichi cuehé ichi duha-ǎ<sup>n</sup> càhá<sup>n</sup> cuèhé-yu

cuendá Xítóhó Jesucristú, dico nchòhó càchí-ndó sǎ ïo càhnu cuu-gǎ.

15-16 Te núu nchòhó dǎndòho ñaha ñáyiú xii-ndo sǎ cuendá sá ndécú-ndó ichi Xítóhó Jesucristú ñá, te vá cúú càhá<sup>n</sup> núú-ndó, chi ndacá<sup>n</sup> tǎhú-ndó nũú Yá Ndiõxí cuendá sá ndécú-ndó ichi-gǎ. Te cuéi ndòho-ndo ndecu-ndo, dico ñá túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quide cuehé quidé dùha, te ni ñà túú cùu-ndo ñáyiú chĩndee tnúhu tnàha ñáyiú-xi ñ<sup>n</sup> sá ñà túú tàú-ndó càda-ndo.

17 Te vitna sa quèsaha Yá Ndiõxí cada ndáá-gǎ nchaa sá quidé nchòo ñáyiú ndècu ndìhi-gǎ, te núu duca<sup>n</sup> te ndèé-gǎ cada-gǎ nchaa ñáyiú ñá túú sàndáá iní ñáhá xii-gǎ òré ná sàá nduu dùca<sup>n</sup> cada ñaha-gǎ xii-yu.

18 Te nchòhó xini-ndó sǎ ñáyiú quide vǎha ndècu ichi Xítóhó Jesucristú ndòho tnáhá-yu ndécú-yu, dico sáá nduu te nduu tǎhũ-yu cundecú-yu ndìhi-gǎ. Te núu duca<sup>n</sup> ndòho nchaa ñáyiú quide vǎha ña, ¿te nása-gǎ yáha nchaa ñáyiú ndècu ichi cuehé ichi duha na sàá nduu càda ndáá Yá Ndiõxí cuéchi-yu-i?

19 Te nchaa nchòhó ñáyiú ndòho nacuáa cuení Yá Ndiõxí xini ñuhu-xi sá vǎ dáñá ndèé-ndó càda vǎha-ndo cùndecu-ndo, te ío quĩndáá iní-ndó sǎ xító ñaha-gǎ xii-ndo. Te diu-gǎ cúú-gǎ Yaá ní cadúha ñaha xii-o, te quide-gǎ ñ<sup>n</sup> sá càhá<sup>n</sup>-gǎ.

## 5

### *Nàcuáa tàú-xi cada ñáyiú ndècu ichi Xítóhó Jesucristú*

1 Te yúhú càhá<sup>n</sup>-í dóho nchaa nchòhó cue téé yĩndaha nchaa dava-gǎ ñáyiú ndècu ichi Xítóhó Jesucristú, chi tnáhá yúhú yĩndàha-í ñáyiú ndècu ichi-gǎ, te sàndáá iní-í tnúhu-gǎ, te ní xini-í nchaa nàcuáa ní ndoho-gǎ, te sáá nduu te tnáhá-í cunuu-í ndìhi-gǎ.

2 Te ío canehe cuendá-ndó nchàa ñáyiú ndècu ichi Yá Ndiõxí yĩndàha-ndo te cada-ndo datná quidé

cuè toli, chi cue téé-án̄ ò váha xito-güedé mbéé-güedé. Te canehe cuëndá-ndó-yu sá cúú iní méé-ndó te ñá díú sã ò ñáyiú cada yica ñàha xii-ndo, te ni ñà díú sã cuiní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi duca<sup>n</sup> cuiní Yã Ndiöxí cunduu.

<sup>3</sup> Te vá cádá-ndó sã ò cùnū-ndo núu-yu, chi cada-ndo mèe-ni sá váha cuëndá duca<sup>n</sup> càncicú<sup>n</sup> nihnú-yu cadá-yu tnàhá-yu.

<sup>4</sup> Te òré ná quíxí tùcu Xítóhó Jesucristú Yá néhé cuëndá ñáhá xii-o nchaa-o ñuyú-a, te taxi-gá sã ò váha nduu táhú-ó, te cunū-o ndìhi-gá ni caa ni quíhí<sup>n</sup>.

<sup>5</sup> Te nchòhó ñáyiú ndècu ichi Xítóhó Jesucristú càhá<sup>n</sup>-í dóho-ndo sã ò quindáá iní-ndó cuè téé yìndaha ñaha xii-ndo nacuáa ndècu-ndo ichi-gá, te nchaa-ndo tàú-ndó quindáá iní tnáhá-ndó ñá<sup>n</sup> ñá<sup>n</sup>-ndo, chi núú tùtú Yã Ndiöxí càchí-xi ñá<sup>n</sup> xichi:

Nchaa ñáyiú quide cahnu mee-xi ñá túú cùu váha iní Yã Ndiöxí núu-yu,

dico nchaa ñáyiú ndàhú iní-xi te chindee ñaha-gá xií-yu.

Duha càchí-xi núú tùtú-gá.

<sup>6</sup> Te dañá-ndo mèe-ndo núú ndáhá Yã Ndiöxí, chi mee-gã ò cùnū-gá. Te núu duca<sup>n</sup> na càda-ndo, te sáá nduu te cada nínu ñaha-gã xii-ndo.

<sup>7</sup> Te nchaa sá yãha-ndo ndècu-ndo te nachihi-ndo ndàha Yã Ndiöxí, chi mee-gã xító ñaha-gá xii-ndo.

<sup>8</sup> Te ò váha cuáha-ndo cuëndá cundecu-ndo, te quíhi iní-ndó chi sácúhná xicá cùu-xi cuiní-xi dacúta nihnu ñaha-xi xii-o, chi ò cùu úhú iní ñáhá-xí, te cùu-xi datná ñá<sup>n</sup> quíti déé<sup>n</sup> xicá ndècu sá cáxí-xí.

<sup>9</sup> Te ò quindáá iní-ndó Xítóhó Jesucristú, te vá dáñá-ndó mèe-ndo dandahú ñáhá sácúhná xii-ndo càda-ndo nacuáa cuiní-xi, chi nàha-ndo sá ncháá ñáyiú ndècu ichi Xítóhó Jesucristú xindecu nihí ñuyú ndóhó-yu dàtná ndóhó nchò ndecu-o ichi-gá.

<sup>10</sup> Dico sacú-ni nduu duha cundoho-o te dàtnú ní ñá túú-gã ná cumání-ó cundecu-o núú Yã Ndiöxí,

te dàvá-án̄ vã cání ñá<sup>n</sup> cani úú iní-ó cundecu-o ichi-gá. Te ò-gá ngúndecu ndìhi-o tnùhu ndee iní cada-o nchaa nacuáa càhá<sup>n</sup>-gá, te duca<sup>n</sup> càda-o chi mee Yã Ndiöxí ò chindee ñaha-gá xii-o, te díu-ni Yáá-án̄ ò cùu iní ñáhá-gã xii-o, chi ní cáhá<sup>n</sup> ñáhá-gã xii-o cundecu-o núú ò váha cà ndecu-gá cundecu-o ni caa ni quíhí<sup>n</sup>, te duca<sup>n</sup> ni quide-gá chi ní sándáá iní-ó Xítóhó Jesucristú.

<sup>11</sup> Te ò ndacá<sup>n</sup> táhú-ó núú Yã Ndiöxí chi ò càhnu cuu-gá, te cùnū-gá nchaa nduu nchaa quíú. Te duca<sup>n</sup> na cunduu.

#### *Tnúhu ndéé núú ni ndìhi-ná*

<sup>12</sup> Te té Silvanú xini-í sá cúú-dé ñá<sup>n</sup> téé quide ndáá ndécú ichi Xítóhó Jesucristú, te díu-dé ní cáhá<sup>n</sup> ndàhú-í núú-dé ní tee-dé ñá<sup>n</sup> úú tnúhu sá ni xáha<sup>n</sup>-í xii-dé núú tùtú-a cuëndá daquixi-í ndaha-ndo, te núú tùtú-a càchí tnúhu ndáá-í xii-ndo sã Yã Ndiöxí ò cùu iní ñáhá-gã, te chindee ñaha-gá xii-ndo ndècu-ndo, te càchí tnúhu tucu-í xii-ndo sã ò quindáá iní-ndó sã ndáa duca<sup>n</sup> quide ñaha-gá xii-ndo.

<sup>13</sup> Te cue ñáyiú ndècu ñuú Babiloniá, ñáyiú ndècu ichi Yã Ndiöxí, díu-ni ñáyiú ní cachí Yã Ndiöxí sá nánihí táhú dàtná cúú nchòhó, ò quide ndee iní ñáhá-yu xii-ndo, te tnàhá té Mácú téé cùu datná ñá<sup>n</sup> déhe-í quidé ndèe iní ñáhá-dé xii-ndo.

<sup>14</sup> Te ndìhi tnúhu yíñùhu cada ndee iní tnáhá-ndó ñá<sup>n</sup> ñá<sup>n</sup>-ndo, te xicá<sup>n</sup> táhú-í núú Yã Ndiöxí sã ò na cundecu nahi nchaa nchòhó ñáyiú ndècu ndìhi Xítóhó Jesucristú. Te duca<sup>n</sup> na cunduu. Te ò chí cádá ndèe iní-nã vitna.

## TUTÚ CÚÚ ÒÚ NÍ CADÚHA TÉ PÈLÚ

*Té Pèlú cadúha-dé tutú quíhí<sup>n</sup> ndaha  
ñáyiú sàndáá iní tnúhu Yá Ndiöxí*

<sup>1</sup> Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chí mee-gã ní tendaha ñàha-gá xii-í xícá cùu-í càhá<sup>n</sup>-í tnúhu-gá. Te cadúha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te duca<sup>n</sup> chi Tátá-ó Dütú Ndiöxí ní dácàhá<sup>n</sup>-gá iní-ó ní sàndáá iní-ó-gã, chí cùu-gá Yaá ío váha quíde ndáá ndihí Xítóhó Jesucristú Yaá dácăcu nihnu ñaha xii-o núú ùhú núú ndàhú.

<sup>2</sup> Te xicá<sup>n</sup> táhù-í núú Yá Ndiöxí sá ùu<sup>n</sup>-gá uu<sup>n</sup>-gá ná cuita chindee chitúu ñaha-gã xii-ndo quíhí<sup>n</sup>, te duca<sup>n</sup> ío váha cuu iní-ndó cùndecu-ndo, te duca<sup>n</sup> càda-gá chí ta cùtnuní-gá iní-ndó nàcuáa ndùu cuendá-gá, te duca<sup>n</sup> ta cùtnuní tucu iní-ndó nchàa nacuáa ndùu cuendá Xítóhó Jesucristú Yaá cúú Xítóhó-ó.

*Nàcuáa quíde ñáyiú ndècu ichi Xítóhó  
Jesucristú*

<sup>3</sup> Te Yá Ndiöxí ío càhnu cuu-gá chí chindee ñaha-gá xii-o quíde ndáá-ó ndècu-o datná cuìní mée-gã, te duca<sup>n</sup> chí cùtnuní iní-ó nàcuáa sàni iní Xítóhó Jesucristú Yaá ní càhá<sup>n</sup> ñáhá xii-o. Te òré ní càhá<sup>n</sup> ñáhá-gã xii-o te ní cutnùní iní-ó sã ío càhnu cuu-gá te ío váha quíde-gá.

<sup>4</sup> Te duca<sup>n</sup> ní cutnùní tucu iní-ó nàcuáa ní càhá<sup>n</sup>-gá cada ñaha-gã xii-o, te tnúhu ní càhá<sup>n</sup>-gá-á<sup>n</sup> ío càhnu cuu-xi te ío váha, te nchoo ní sàndáá iní-ó tnúhu-á<sup>n</sup> nùu xíá<sup>n</sup> ñá túú-gã ndécú-ó ìchi cuehé ichi duha te ní ñà túú-gã sání iní-ó càda-o nándi sá cuehé sá dúhá, te ní cuu vii ní cuu váha iní-ó vùtna.

<sup>5</sup> Te sá dúcá<sup>n</sup> quíde-gá te xíá<sup>n</sup> ío nducu ndèe-ndo cada-ndo nchaa nacuáa càhá<sup>n</sup>-í-a, te nchòhó sàndáá iní-ndó-gã dico ñá díú mèe-ni xíá<sup>n</sup> chí tnàhá xíní ñuhu-xi cada ndáá-ndó

cùndecu-ndo. Te núu quíde ndáá-ndó ndècu-ndo te xíní ñuhu-xi tecú tnùní-ndó tnúhu-gá.

<sup>6</sup> Te núu tècú tnùní-ndó te cùu-ndo ñáyiú xíní cotnii mee-xi, te núu cùu-ndo ñáyiú sàcòo tni mee-xi te xíní ñuhu-xi cunduu cahnu iní-ndó cuèi nándi sá ná yàha-ndo cùndecu-ndo, te núu càhnu iní-ndó te xíní ñuhu-xi cada ndáá-ndó cùndecu-ndo datná cuìní mée Yá Ndiöxí cada-ndo.

<sup>7</sup> Te núu quíde ndáá-ndó ndècu-ndo, te xíní ñuhu-xi ío cuu iní tnàhá ndè mee-ndo nacuáa ndècu-ndo ichi-gá, te núu cùu iní tnàhá ndè mee-ndo te xíní ñuhu-xi cuu iní-ndó nchàa dava-gá tnàha ñáyiú-ndo.

<sup>8</sup> Te núu sa duca<sup>n</sup> quíde-ndo ndecu-ndo te uu<sup>n</sup>-gá cuita duca<sup>n</sup> càda-ndo quíhí<sup>n</sup> núú cuahá<sup>n</sup> núú vèxi, te núu duca<sup>n</sup> quíde-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nacuáa sàni iní Xítóhó Jesucristú quíhí<sup>n</sup>.

<sup>9</sup> Te nchaa ñáyiú ñá túú cuìní duca<sup>n</sup> càda cuú-yu ñáyiú ñá túú tnàhí ndixi túu iní-xi sá Yá Ndiöxí sa ní ndada ndoo ní ndada nine-gá iní-yu cuendá nchaa sá cuehé sá dúhá ní xóo cadá-yu, te ñáyiú-á<sup>n</sup> cúu-yu dàtná ñá ñáyiú cuáa àdi datná ñá ñáyiú ñá túú cùtnuní váha núú-xi, te duca<sup>n</sup> sàtnahá-xi cùu-yu cuendá sá dúcá<sup>n</sup> quíde-yu.

<sup>10</sup> Te xíá<sup>n</sup> nùu yúhú càhá<sup>n</sup>-í dóho nchaa nchòhó ñáyiú ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sã Yá Ndiöxí ní càhá<sup>n</sup> ñáhá-gã xii-ndo, te duca<sup>n</sup> ní quíde-gá chí duca<sup>n</sup> ní cachí-gá cada-gá. Te vá ñá<sup>n</sup> ndùu cani iní-ndó dàña-ndo ichi-gá, te núu vá dáña ndèe-ndó càda-ndo nchaa nacuáa càhá<sup>n</sup>-í-a.

<sup>11</sup> Te núu duca<sup>n</sup> na càda-ndo cundecu-ndo, te ío vii ío váha cada Yá Ndiöxí quehe<sup>n</sup> cuendá ñáhá-gã xii-ndo òré ná sàá-ndó nùú ndécú Xítóhó Jesucristú táxi tnùní-gá nchaa nduu nchaa quíú, te òu-ni Yaá-á<sup>n</sup> cúú Xítóhó-ó te ní dácăcu nihnu ñaha-gã

xii-o núú úhú núú ndàhú.

12 Te duca<sup>n</sup>-ni quèhi-í dandàcu iní ñáhà-í xii-ndo nchàa tnúhu càhá<sup>n</sup>-í-a cuèi sa xini-ndó tnúhu-á<sup>n</sup>, te cuèi sàndáá váha iní-ndó nchàa tnúhu ndáá dácuàha-ndo.

13 Te yúhú quidé cuèndá-í sá ïo tàú-xi càhá<sup>n</sup>-í dóho-ndo ñini ndecu-í ñuyíú-a cuèndá sá vǎ nàcuànaa-ndo nacuáa cada-ndo cùndecu-ndo.

14 Chi Xítohó Jesucristú ní cachí-gá sá ñà túú-gǎ vǎi nduu cundecu-í ñuyíú-a te cuú-í.

15 Te ío nducu ndèe-í nducu-í nàcuáa cada-í cuèndá quendóo ndihí-ndo nchàa tnúhu càhá<sup>n</sup>-í-a, te cuèi na yǎha cuú-í dico vǎ nàcuànaa-ndo cada-ndo nchaa nacuáa càhá<sup>n</sup> tnúhu sá dánèhé ñáhà-í xii-ndo vitna.

*Cue téé ní xini núú sǎ ïo càhnu cuu Xítohó Jesucristú*

16 Te sa ní dánèhé ñáhà-ndí xii-ndo sǎ ïo càhnu cuu Xítohó Jesucristú. Te ní cachí tnúhu tucu-ndí nàcuáa cada-gá òré quixi tucu-gá, te tnúhu-á<sup>n</sup> cúú-xí tnúhu ndáá cuítì te ñà díú tnúhu sá ñi saní iní cue ñáyiu ñuyíú-a cùu-xi, chi nchúhú ní xini núú-ndí nàcuáa ní quide-xi cùtnàhá ní cutnùní iní-ndí sá ïo càhnu cuu Xítohó Jesucristú.

17 Chi dàvá-á<sup>n</sup> ïo váha ní quide Tǎtá-ó Dútú Ndiòxí ní quide càhnu-gá Xítohó Jesucristú, te ñu-ni dàvá-á<sup>n</sup> ñi càhá<sup>n</sup> Dútú Ndiòxí ndéé andíu ñi xáha<sup>n</sup>-gǎ xii Xítohó Jesucristú: “Yòhó cúú-n Dèhe-í téé ío cùu iní-í, te ío cùdí iní ñáhà-í xii-n”, duha ní xáha<sup>n</sup> Yǎ Ndiòxí xii Xítohó Jesucristú.

18 Te nchúhú ní tecú dóho-ndí ní càhá<sup>n</sup> Yǎ Ndiòxí ndéé andíu cùtnàhá duca<sup>n</sup> ñi xáha<sup>n</sup>-gǎ xii Xítohó Jesucristú, chi tnàhá-ndí ndécú-ndí ndihí-gá yucu núú dúcá<sup>n</sup> ñi quide càhnu ñaha Yǎ Ndiòxí xii-gá.

19 Te ndècu ndihí-o nchaa tnúhu ní càhá<sup>n</sup> cue téé ní xóo càhá<sup>n</sup> tnúhu Yǎ Ndiòxí ndéé sanaha te nchaa tnúhu-á<sup>n</sup> càhá<sup>n</sup>-xi nchaa nàcuáa cada-xi vitna, te cùtnuní iní-ó sǎ tnúhu ndáá cúú-xí, te xini ñuhu-xi cada cuèndá váha-ndo nchàa nacuáa càhá<sup>n</sup> tnúhu-á<sup>n</sup>, chi tnúhu-á<sup>n</sup> cúú-xí dátá ñi ñuhú dáyèhé-xi ndéé òré véxi túndaá

quéné chòdíní cáhnú dàyehé-di. Te duca<sup>n</sup> sǎtnahá-xi cùu tnúhu-á<sup>n</sup> chi quide-xi nacuáa cutnùní iní-ó cuèndá Xítohó Jesucristú.

20 Te xini ñuhu-xi sá ïo-gá cada cuèndá-ndó sǎ ñà túú ñáyiu tecú tnùní ní ñi<sup>n</sup> tnúhu sá ñi chídó tnùní cue téé ní càhá<sup>n</sup> tnúhu Yǎ Ndiòxí ndéé sanaha, te núu Yǎ Ndiòxí vǎ cadá-gǎ nàcuáa cutnùní iní-yu nàcuáa càhá<sup>n</sup> nchaa tnúhu-á<sup>n</sup>.

21 Te cue téé-á<sup>n</sup> ïo ní xindecu yíñuhu-güedé núú Yǎ Ndiòxí, te nchaa tnúhu sá ñi càhá<sup>n</sup>-güedé-á<sup>n</sup> ñà túú cùu-xi tnúhu sá ñi cahu iní méé-güedé, chi Espíritú Yǎ Ndiòxí ní dácáhú iní ñáhà-xí xii-güedé nàcuáa cunduu tnúhu càhá<sup>n</sup>-güedé.

## 2

*Cue téé càchí sá càhá<sup>n</sup> tnúhu Yǎ Ndiòxí te ñà ndàá*

1 Te ndéé sanduu chi ní xindecu cue téé ní xóo dandàhú ñáhà xii ñáyiu is-ràel càchí sá càhá<sup>n</sup> tnúhu Yǎ Ndiòxí te ñà ndàá sá càhá<sup>n</sup>-güedé tnúhu-gá, te ñu-ni duca<sup>n</sup> tucu cundecu cue téé dandàhú ñáhà xii-ndo vitna, chi cachí-güedé sá càhá<sup>n</sup>-güedé tnúhu Yǎ Ndiòxí te ñà ndàá. Te cue téé-á<sup>n</sup> ïo yidáhu càhá<sup>n</sup>-güedé, te nchaa tnúhu càhá<sup>n</sup>-güedé-á<sup>n</sup> dacuíta nihnu ñaha-xi xii-ndo te núu na tédóho-ndo, chi cue téé-á<sup>n</sup> vǎ ñunuu-güedé sá Xítohó Jesucristú ní xihí-gá cuèndá-güedé. Te sá dúcá<sup>n</sup> càda-güedé ío-gá ndihí dacuíta nihnu-güedé méé-güedé.

2 Te vǎi ñáyiu xinu iní-yu cadá-yu nándi sá cuèhé sá dúhá cuèndá sá dúcá<sup>n</sup> càda cue téé-á<sup>n</sup>, te cuèndá xí<sup>n</sup> ngóo ñáyiu càhá<sup>n</sup> úhú-yu cuèndá ichi Yǎ Ndiòxí.

3 Te mee-ni tnúhu sá ñi cahu iní cue ñáyiu ñuyíú-a danèhé ñáhà-güedé xii-ndo, te quesaha-güedé sá cúú-xí tnúhu ndáá te ñà ndàá cuèndá-ni sá cuǎñaha-ndo díhú<sup>n</sup> xii-güedé, chi ñu-ni xí<sup>n</sup> tnàhí cuhu<sup>n</sup> iní-güedé, dico Yǎ Ndiòxí sa ní cunaha ndècu túha-gá cuèndá cada ndáá-gá cuéchi-güedé, te na sǎa nduu te cuíta nihnu duu<sup>n</sup>-güedé, chi Yǎ Ndiòxí vǎ nàcuànaa-gá ñi<sup>n</sup> sá ñi cachí-gá cada-gá.

<sup>4</sup> Te Yá Ndiöxí ñá túú ní quide cahnu iní-gá sá ñí quide cue espíritú ñá túú ní cuení cada ndáá xínú cuèchi núú-gã ní cùu, chi ní dáquihí<sup>n</sup> ñáhá-gã xii-xi ì<sup>n</sup> xichi núú ïo ndòho-xi ndecu-xi, te xíá<sup>n</sup> cundedí nihnu-xi ndéé sáá nduu cuíta nihnu duu<sup>n</sup>-ná-xi.

<sup>5</sup> Te Yá Ndiöxí ñá túú ní quide cahnu tucu iní-gá nchaa sá ñí quide ñáyiu ñuyú díhna, chi dàvá-á<sup>n</sup> ñí dándáá-gã ndute ñuyú ñí cáhá nchaa ñáyiu ndècu ichi cuehé ichi duha te ì<sup>n</sup>ndi-ni té Nöé ndihí úsá-gá tucu cue ñáyiu cùu ndi mee-dé ní dácäcu nihnu-gá. Te té Nöé-á<sup>n</sup> cúú-dé téé ní cáhá<sup>n</sup> dóho-yu nàcuáa cada váha-yu cundecú-yu ni cùu te ñá túú ní cuení-yu.

<sup>6</sup> Te Yá Ndiöxí ní dängává-gã ñuhú ní dánáá-gã ñáyiu ñuú Sodomá ndihí ñáyiu ñuú Gómorrá te mee-nã yáá ñí nduu ñuú-á<sup>n</sup>. Te sá dúcá<sup>n</sup> ñí cuu xíá<sup>n</sup> cútnùní iní-ó nàcuáa cada ñaha Yá Ndiöxí xii nchaa ñáyiu ñá túú quide váha.

<sup>7</sup> Dico té Löt téé ní quide ndáá ní xíndecu ì<sup>n</sup> ñuú-á<sup>n</sup> dàvá-á<sup>n</sup> chi ní dácäcu nihnu ñaha-gã xii-dé. Te nchaa ñáyiu ñuú núú ñí xíndecu-dé-á<sup>n</sup> ïo ní xínduu cuihna ìní-yu, te mee-ni ìchi díí ìní ní xíndecú-yu, te sá dúcá<sup>n</sup> ñí xóo cadá-yu xíá<sup>n</sup> ïo ní ndíhú iní té Löt.

<sup>8</sup> Te ì<sup>n</sup> nduu ì<sup>n</sup> nduu ní xóo cada ndàhú-xi iní té Löt-á<sup>n</sup> cuèndá nchaa tnúhu cuèhé tnúhu duha ní xóo cáhá<sup>n</sup>-yu ní xóo cundedóho-dé, ndihí cuèndá nchaa sá cuèhé sá dúhá ñí xóo cadá-yu ní xóo quini-dé, te mee-dé ní cuu-dé ì<sup>n</sup> téé ní xínduu vii ní xínduu váha iní-xi núú Yá Ndiöxí.

<sup>9</sup> Te sá dúcá<sup>n</sup> ñí yáha té Nöé ndihí té Löt, xíá<sup>n</sup> cútnùní iní-ó sã Yá Ndiöxí ïo chindee-gá cue ñáyiu quide ndáá ndécú ìchi-gá cuèndá sá vã cadá-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiöxí càchí-gá sá ncháá ñáyiu ndècu ichi cuehé ichi duha sa ndècu túha-yu sá quihí<sup>n</sup>-yu núú ùhú núú ndàhú nduu ná yáha cundáá cuèchi-yu.

<sup>10</sup> Te uu<sup>n</sup>-gá cada ñaha Yá Ndiöxí xii nchaa cue téé ndècu ichi díí ìní, te dàquee tíhú-güedé nchaa tnúhu sá sánú ìchi ñaha xii-o nacuaa cada-o

cúndecu-o, te cùu-güedé cue téé ñí iní-xi, te yí ìní-güedé, te ñá túú yùhú-güedé cáhá<sup>n</sup> ùhú-güedé cuèndá nchaa espíritú cúnùu.

<sup>11</sup> Te cue espíritú xínú cuèchi núú Yá Ndiöxí ïo cúnuu-xi dacúxí cuè téé-á<sup>n</sup>, dico ñá túú cùyí<sup>n</sup>-xi cáhá<sup>n</sup>-xi dàtná cáhá<sup>n</sup> cue téé-á<sup>n</sup> òré ndàcá<sup>n</sup> cuèchi-xi núú Yá Ndiöxí cuèndá nchaa sá quidé cuè espíritú cúndihí yucu ñávãha.

<sup>12</sup> Te nchaa cue téé dandàhú ñáhá xii-ndo-á<sup>n</sup> cúú-güedé dàtná cue quiti, chi cue quiti-á<sup>n</sup> ñá túú ndècu sá xíní tnùní-güedi, chi cue quiti-á<sup>n</sup> ñí cacu-güedi sá tníí-ó-güedi te cahni-o-güedi. Te duca<sup>n</sup> sãtnahá-xi cùu nchaa cue téé-á<sup>n</sup>, chi cáhá<sup>n</sup> cuèhé-güedé cuèndá ndédani càa espíritú cuèi ñá túú xíní-güedé ná espíritú cúú-xí, te díu-ni mee-güedé dácuíta nihnu-güedé méé-güedé sá dúcá<sup>n</sup> quide-güedé,

<sup>13</sup> te sáá nduu te nacháhu-güedé nchaa sá quidé-güedé-á<sup>n</sup>, te cuèi nduu cuèi niú cúdí ìní-güedé quidé-güedé nchaa núú sã cuèhé sá dúhá sàni ìní-güedé. Te òré nàtacá-ndó càda-ndo ì<sup>n</sup> vico chíñuhu-ndo Yá Ndiöxí te chitnahá ñáhá-güedé xii-ndo, te cada dusa<sup>n</sup>-güedé sá cúdí ìní-güedé sá dándàhú ñáhá-güedé xii-ndo, te dícó sácá<sup>n</sup>-núú cuãha ñaha-güedé xii-ndo dùca<sup>n</sup> na cada-güedé.

<sup>14</sup> Te nchaa cue téé-á<sup>n</sup> òré xíní-güedé ì<sup>n</sup> ñáyiu díhí te ndíhí-ni sàni ìní-güedé cáhá<sup>n</sup> ndihí ñaha-güedé xii-yu, te ñá túú nduu vétú ìní-güedé cuèndá nchaa sá cuèhé sá dúhá quide-güedé chi uu<sup>n</sup>-gá uu<sup>n</sup>-gá sání ìní-güedé cada-güedé. Te cuáhá<sup>n</sup>-güedé dándàhú-güedé nchaa ñáyiu ñá túú ñihí ndéé càda ndáá cuèndá canchicú<sup>n</sup> nihnú-yu nchaa tnúhu cáhá<sup>n</sup>-güedé. Te mee-ni ncháa sá ndécú ndihí tnahá ñáyiu-güedé cúú ìní-güedé, te cue téé-á<sup>n</sup> cúú-güedé cue téé duu<sup>n</sup> duu<sup>n</sup> sa ní xíta nihnu núú Yá Ndiöxí.

<sup>15</sup> Chi cùu-güedé cue téé vá cání-gã iní-xi cada ndáá, te nchicú<sup>n</sup> nihnu-ná-güedé quidé-güedé nàcuáa ní xóo cada ndí Balaám déhe ndí Bèór, chi ndí Balaám-á<sup>n</sup> ñí xóo tnahá iní

ndíi cada ndíi chiù<sup>n</sup> cuehé nàcuáa ní xóo níhí ndíi díhú<sup>n</sup>.

16 Te Yá Ndióxi ní quide-gá ní cáhá<sup>n</sup> bǔrru ndíi ní tenàá ñáhá-dí xii ndíi cuèndá sá vǎ cádá ndíi ñ<sup>n</sup> cuéchi sàni iní ndíi cada ndíi ní cùu. Te sá dúcá<sup>n</sup> ní cuu xiǎ<sup>n</sup> ní nguítuu ndíi ñá túú ní quide ndíi ñ<sup>n</sup> sá ñà túú nàndíhi sàni iní ndíi ní cùu.

17 Te nchaa cue téé duca<sup>n</sup> xǐquide cùu-güedé dàtná ñ<sup>n</sup> doco yíchí, te cùu tucu-güedé dàtná ñ<sup>n</sup> vícò sǎ xídó tǎchí te ñá túú dǎú nchídó-xí, te sa ndècu túha ñ<sup>n</sup> xichi núú ïo nee quíhí<sup>n</sup>-güedé cundecu-güedé ní caa ní quíhí<sup>n</sup>.

18 Te cue téé-á<sup>n</sup> càhá<sup>n</sup>-güedé dàtná càhá<sup>n</sup> ñ<sup>n</sup> téé ío cùu cahnu dico ñá túú vèdana nàndíhi nchaa tnúhu càhá<sup>n</sup>-güedé, te cue téé-á<sup>n</sup> dándàhú-güedé nchaa ñá yiu íchí ní dáñá ìchi cuehé ichi duha, te xǎha<sup>n</sup>-güedé xii-yu sá cúu-ní cadá-yu nchaa sá cuèhé sá dúhá quide nchaa ñá yiu ndècu ichi díí iní,

19 te xǎha<sup>n</sup> tùcu-güedé sá cúu-ní cadá-yu nani véxi iní-yu cuèi sá vǎha te cuèi sá cuèhé, dico mee-güedé chi mee-ni sǎ cuèhé sá dúhá cùnuu quide-güedé. Te nchaa ñá yiu ñá ndácú dàña nándi sá cuèhé sá dúhá cùu-yu dàtná ñ<sup>n</sup> ñá yiu xinu cuechi ñá túú tnàhí dàña quee núú chíú<sup>n</sup> pàtró<sup>n</sup>-xi. Te duca<sup>n</sup> sǎtnahá-xi cùu-yu chi ñá ndácú-yu dàña-yu nándi sá cuèhé sá dúhá quidé-yu.

20 Te núu ñá yiu sa ní dáñá nchàa ichi cuehé ichi duha cuèndá sá ní cutnùní iní-yu nàcuáa ndùu tnúhu Xítoho Jesucristú, Yaá ní dácácu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-ñǎ sá cuèhé sá dúhá tàxi tnuní ñáhá-xí xii-yu, te núu duca<sup>n</sup> te vǎa-gá tucu cadá-yu dácúxí dàtná ní xóo cadá-yu cùtnàhá vátá cùtnùní-gá iní-yu nàcuáa ndùu tnúhu-gá.

21 Te váha-gá sá vǎ ngǔnu ichí-yu ichi ndáá ní cùu te ñá díú sǎ sà ní ngǔnu ichí-yu te ní dáñá-yu nchaa tnúhu-gá sá sà ní níhí-yu ndècu ndíhí-yu sànu ichi ñaha-xi nacuáa cundecú-yu ní cùu.

22 Te ñá yiu duca<sup>n</sup> xǐquide quèe ndáá-xi nàcuáa cuáhá<sup>n</sup> ñ<sup>n</sup> cuèndú sá càchí-xi: “Iná ní nacaxi-dí sá ní ndusa<sup>n</sup>-dí, te cùchí quiti íchí ní xichi ndute càndoo cuáhá<sup>n</sup>-ni tucu-dí cuchi ñuhu-dí núú ndèhyú”, duha cuáhá<sup>n</sup> cuèndú-á<sup>n</sup>.

### 3

#### *Xítoho Jesucristú quixi tucu-gá*

1 Te nchaa nchòhó ñá yiu ío cùu iní-í cùtnuní iní-í sá ïo váha sàni iní-ndó, te xéhé cúu-xí tütú cúu ùú cadúha-í sá cúu-xí-ndó, te ñ<sup>n</sup>-ni càhá<sup>n</sup>-í dándàcu iní ñáhà-í xii-ndo nchàa tnúhu sá sà ní xíndedóho-ndo.

2 Chi cuèni-í sá vǎ nàcuànaa-ndo nchaa tnúhu ní cáhá<sup>n</sup> nchaa cue téé ní xóo càhá<sup>n</sup> tnúhu Yá Ndióxi ndéé sanaha, te ní vǎ nàcuànaa-ndo nchaa tnúhu ní cáhá<sup>n</sup> cue téé ní cáhá<sup>n</sup> tnúhu Xítoho Jesucristú Yaá ní dácácu nihnu ñaha xii-o núú ùhú núú ndàhú, chi dǎu nchaa tnúhu-á<sup>n</sup> sánú ìchi ñaha-xi xii-o nacuáa cada-o cundecu-o.

3 Te ío-gá xini ñuhu-xi cutnuni iní-ndó nàcuáa cada-xi òré vátá sáa-gá nduu quixi tucu Xítoho Jesucristú ñuyíu-a, te càchí tnúhu-í xii-ndo sǎ cùndècu ñá yiu cuhu<sup>n</sup> iní mee-ni nchàa sá cuèhé sá dúhá te mee-ni xiǎ<sup>n</sup> cadá-yu, te càhá<sup>n</sup> cuèhé càhá<sup>n</sup> dúhá-yu cuèndá tnúhu Yá Ndióxi.

4 Te cachí-yu: “Ñá ndáá sá quíxí Xítoho Jesucristú ñuyíu-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna dǎu-ni duha ní quesaha-xi quide-xi ndéé cùtnàhá ní ngáva ñuyíu, te dǎu-ni duha quide-xi ndéé cùtnàhá ní xíndecu cue ñani tnàhá-ó ndéé sanaha, te dǎu-ni duha quide-xi ndéé ní sáa nduu ní xíhí-güedé, te dǎu-ni duha quide-xi ndéé vitna”, duha càhá<sup>n</sup>-yu.

5 Te ñucùu<sup>n</sup> cadá-yu vǎ cádá cuèndá-yu sá Yǎ Ndióxi ní cáhá<sup>n</sup>-gá te ní ngúndecu andǎu ndíhi ñuyíu-a, te dǎu-gá ní quide ní quene ñuhu yíchí xití ndute ní ngúndecu-xi ñ<sup>n</sup> xio.

6 Te ñ<sup>n</sup> xito ní dándáá Yǎ Ndióxi ndute ñuyíu-a ní dánáá-gǎ nchaa sá ío.

7 Te Yá Ndiöxí ní cachí-gá sá cündecu-ni ñuyíú-a ndihi andiú ndéé ná sàá nduu càda-gá nchaa nàcuáa ní cáhá<sup>n</sup>-gá sá cúú-xí nchàa ñáyiú ndècu ichi cuehé ichi duha, te dàvá-á<sup>n</sup> danàa-gá nchaa ñáyiú-á<sup>n</sup> chi cáyú andiú ndihi ñuyíú-a.

8 Te nchaa nchòhó ñáyiú ío cùu iní-í, ío cuhu<sup>n</sup> iní-ndó tnúhu na càhá<sup>n</sup>-í-a, chi Yá Ndiöxí ñá túú sàni iní-gá dàtná sání iní-méé-ó, te ì<sup>n</sup> nduu cùu-xi datná úxí cièndú cuíá, te úxí cièndú cuíá-á<sup>n</sup> cúú-xí dàtná ì<sup>n</sup> nduu sá cúú-xí-gá.

9 Te Yá Ndiöxí ñá túú dàna ndodo iní-gá vá cáda-gá ì<sup>n</sup> sá càhá<sup>n</sup>-gá dàtná càchí cue ñáyiú sá dáná ndòdo iní-gá cada-gá ì<sup>n</sup> sá càhá<sup>n</sup>-gá, chi ñucùu<sup>n</sup> tnahí dácaca-gá nduu cuèndá sá ío cùndahú iní ñáhá-gá xii-o, te cuíní-gá sá ncháá ñáyiú ndixi túu iní-yu sá ñà túú quíde váha-yu ndécú-yu te tuhá-yu ichi-gá, te duca<sup>n</sup> quíde-gá chi cuíní-gá sá vǎ cuíta nihnu ni ì<sup>n</sup>-yu.

10 Te dàtná quíde cuè ñadúhú quíhu-güedé ì<sup>n</sup> vehe dùhu-güedé òré ñá túú yíhi iní xítóhó vehe-á<sup>n</sup>, te duca<sup>n</sup> càda Xítóhó Jesucristú chi nduu ñà túú yíhi iní ñáyiú ñuyíú-a quixi tucu-gá, te dàvá-á<sup>n</sup> cada-xi andiú dàtná quíde-xí òré níhi víhi cahá<sup>n</sup> ñúhu, te ñiú-ni òré-á<sup>n</sup> ndoñuhu àndiú, te cáyú nchaa chódíní, te cáyú tucu tnahá ñuyíú-a ndihi nchaa sá ío.

11 Te vitna nchòhó sa xíní-ndó sǎ náá ñuyíú-a te xǎá<sup>n</sup> ío xìni ñuhu-xi cada váha-ndo cündecu-ndo, te cada-ndo nàcuáa cuíní méé Yá Ndiöxí cunduu.

12 Te ío nducu ndèe-ndo duca<sup>n</sup> cada-ndo cuèndá duca<sup>n</sup> ndihi-ni sáá nduu càda-gá nchaa nàcuáa càhá<sup>n</sup>-gá, te duca<sup>n</sup> nchòhó cündecu túha-ndo sáá nduu-á<sup>n</sup>. Te ñiú-ni nduu-á<sup>n</sup> ndoñuhu àndiú chi cáyú-xi, te ñiú-ni duca<sup>n</sup> ndòñuhu tucu nchaa chódíní chi ndihi-ñi cáyú.

13 Te nchoo ndètu-o sáá nduu cündecu-o ì<sup>n</sup> ñuyíú sáá, te quíní-ó ì<sup>n</sup> andiú saa datná ní cachí Yá Ndiöxí, te yacá<sup>n</sup> chi mee-nǎ cue ñáyiú quíde váha cündecu.

14 Te nchòhó ñáyiú ío cùu iní-í, ñini ndètu-ndo sáá nduu dùca<sup>n</sup> cada-xi ío nducu ndèe-ndo cada-ndo mee-ni

sá vǎha cündecu-ndo ichi Yá Ndiöxí, te cündecu nahi-ndo, te cada-ndo nchàa nàcuáa vá cündecu cuéchi-ndo núú-gá.

15 Te ío cada cuèndá-ndó sǎ dácaca-gá nduu dùca<sup>n</sup> cada-gá chi cuíní-gá sá ncháá ñáyiú naníhi tǎhú-yu. Te té Pǎblú téé ío cùu iní-ó ndècu ndihi-o ichi Xítóhó Jesucristú ñiú-ni nàcuáa càhá<sup>n</sup>-í-a ñiú-ni duca<sup>n</sup> ní tee-dé ì<sup>n</sup> núú tütú ní dáquixí-dé ndaha-ndo, te ní tee-dé nàcuáa ní dácáhú iní ñáhá Yá Ndiöxí xii-dé.

16 Te ñiú-ni duca<sup>n</sup> càhá<sup>n</sup>-dé nchaa dava-gá núú tütú cáduha-dé, te dava tnúhu càhá<sup>n</sup>-dé ío úhú tecú tnúní-ó, núu xǎá<sup>n</sup> ñáyiú ñá túú cùtnuní váha iní-xi, ñáyiú ío yáchí sàndáá iní-xi ì<sup>n</sup> tnúhu, ñáyiú-á<sup>n</sup> tècú tnúní dátñi-yu nchaa tnúhu ní chídó tnúní-dé, ndihi nchaa dava-gá tnúhu yòdo tnuní núú tütú Yá Ndiöxí, te sá dúcá<sup>n</sup> quíde-yu te dacuíta nihnú-yu mèé-yu.

17 Te nchòhó ñáyiú ío cùu iní-í, sa cùtnuní iní-ndó nàcuáa quíde dava ñáyiú, núu xǎá<sup>n</sup> ío xìni ñuhu-xi quíhi iní-ndó cündecu-ndo cuèndá duca<sup>n</sup> cündecu-ni-ndo ichi-gá, te vá dáñá-ndó mèe-ndo dandahú ñáhá nchàa cue téé ndècu ichi cuehé ichi duha, chi cue téé-á<sup>n</sup> ñà túú sàni váha iní-güedé cuèndá tnúhu Yá Ndiöxí. Te núu na dàña-ndo mee-ndo dandahú ñáhá-güedé xii-ndo te vá cündecu váha-gá-ndó ichi-gá dàtná ndécú-ndó vitna.

18 Te nchòhó uu<sup>n</sup>-gá uu<sup>n</sup>-gá cuita cutnúní-gá iní-ndó quíhí<sup>n</sup> nchaa nàcuáa ta chindee ñaha Xítóhó Jesucristú xii-ndo cuáhá<sup>n</sup>. Te duca<sup>n</sup> ío-gá cuita cutnúní iní-ndó nchàa nàcuáa sàni iní-gá, te ñiú-gá cúú-gá Yáá ní dácácu nihnu ñaha xii-o núú ùhú núú ndáhú. Te chí ná càchí-ó sǎ ío càhnu cuu-gá cuèi vitna té cuèi ndéé núú cuáhá<sup>n</sup> núú vǎxi. Te duca<sup>n</sup> na cunduu. Te ío chí cáda ndèe iní-nǎ vitna.

## TUTÚ DÍHNA NÍ CADÚHA TÉ JUÁÁ

*Tnúhu sá cãhá<sup>n</sup> nãcuáa naníhi  
tàhú-ó*

<sup>1</sup> Te yúhú té Juáá cãchí tnúhu-í xii-ndo cuëndá Cristú Yaá cãhá<sup>n</sup> nãcuáa cundecu ndíhi-o Yã Ndiõxí. Te Cristú-á<sup>n</sup> sa ndècu-gá ndéé cútnàhá ní ngáva ñuyú. Te yúhú ní xiní núu-í ndíhi cue téé ní xica cuu ndíhi-í nãcuáa cãa nãcuáa nduu-gá. Te ní xíndedóho-ndí tnúhu ní cãhá<sup>n</sup>-gá, te ní tendaha-ndí-gá te ní cutnùní ndáá iní-ndí sá ñ<sup>n</sup> yiqui cuñú cúu-gã.

<sup>2</sup> Te ní quixi túu-gá ñuyú-a, te ní xiní-ndí-gá, te xíã<sup>n</sup> cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndíhi Tãtã-gã Dútú Ndiõxí ní cùu, te ní quixi-gã ñuyú-a ní xíndecu-ndí ndíhi-gá. Te ní cachí tnúhu-gá xii-ndí sá ndúú tàhú-ó cundecu ndíhi-o Yã Ndiõxí ní cãa ní quíh<sup>n</sup> te núu na quíndáá iní-ó-gã.

<sup>3</sup> Te xíã<sup>n</sup> dátüu-ndí núu-ndó nchãa sá ní xiní-ndí, ndíhi nchãa sá ní xíndedóho-ndí cuëndá cuu ñ<sup>n</sup>nuu-o nchãa-o datná nchúhú cúu ñ<sup>n</sup>nuu-ndí ndíhi Tãtã-ó Dútú Ndiõxí, ndíhi Déhe-gá Xítohó Jesucristú.

<sup>4</sup> Te xíã<sup>n</sup> núu tèe-í nchãa tnúhu-a cuëndá cudí iní-ó nchãa-o.

*Yã Ndiõxí cúu-gã datná ñ<sup>n</sup> ñuhú*

<sup>5</sup> Te nchãa tnúhu ní dánèhé ñáhã Xítohó Jesucristú xii-ndí, xíã<sup>n</sup> dánèhé ñáhã-í xii-ndo. Te ní cachí-gá sá Yã Ndiõxí cúu-gã datná ñ<sup>n</sup> ñuhú dáyèhé-gá iní-ó, te duca<sup>n</sup> sãtnahã-xi cùu-gá chi ío váha quide-gá, te ñá túu quide-gá ní ñ<sup>n</sup> sá cuèhé sá dúhá.

<sup>6</sup> Te núu cãchí-ó sã ndécú-ó ìchi Yã Ndiõxí, te quide-ni-o nchãa sá cuèhé sá dúhá, te dàcuandehnde-o te ñá túu quide ndáá-ó núu-gã.

<sup>7</sup> Te núu na càda váha-o datná quidé mèe-gá, te cuu ñ<sup>n</sup>nuu-o nchãa-o. Te ndada ndoo ndada nine-gá iní-ó, chi cada cãhnu iní-gá nchãa sá cuèhé sá

dúhá quide-o, chi diu cuëndá-á<sup>n</sup> ní xíhí Déhe-gá Xítohó Jesucristú núu cùrúxi.

<sup>8</sup> Te núu cãchí-ó sã ñá túu quide-o ní ñ<sup>n</sup> sá cuèhé sá dúhá, te dándahú-ó mèe-o, te ñá túu quide ndáá-ó núu Yã Ndiõxí.

<sup>9</sup> Te núu na nãhmã-ó nchãa yíca cuèchi-o núu-gã, te mee-gã cada cãhnu iní-gá, te ndada ndoo-gá iní-ó, cuëndá cada ndáá-ó cundecu-o ìchi-gá, chi mee-gã ío váha quide-gá te ío ndáá quidé-gã, duca<sup>n</sup> ní cãhá<sup>n</sup>-gá te duca<sup>n</sup> quide-gã.

<sup>10</sup> Te núu na cãchí-ó sã ñá túu quide-o ní ñ<sup>n</sup> sá cuèhé sá dúhá, te quide-o Yã Ndiõxí ñ<sup>n</sup> ñándéhdé, dico ñá túu ndèhnde-gá. Te ñá túu ndècu tnúhu-gá iní-ó te núu duca<sup>n</sup> na càda-o.

## 2

*Xítohó Jesucristú cãhá<sup>n</sup> ndàhú-gá  
cuëndá-ó*

<sup>1</sup> Te nchòhó ñáyiu cùu datná déhe-í, chìdo tnuní-í nchãa tnúhu-a cuëndá sá vã cadã-ndó ní ñ<sup>n</sup> sá cuèhé sá dúhá. Dico núu ñ<sup>n</sup>-ndo quide-ni-ndo nãndí sá cuèhé sá dúhá, te ndècu ñ<sup>n</sup> Yaá cãhá<sup>n</sup> ndàhú cuëndá-ó núu Yã Ndiõxí. Te Yaá-á<sup>n</sup> cúu-gã Xítohó Jesucristú Yaá quidé ndáá.

<sup>2</sup> Te ní xíhí-gá sá cuëndá nchãa yíca cuèchi-o cuëndá ngúndecu váha-o núu-gã te núu na quíndáá iní-ó-gã. Te ñá díu-ní sã cuëndá yíca cuèchi nchoo ní xíhí-gá, chi tnãhá cuëndá nchãa yíca cuèchi ñáyiu ní cãa xico ñuyú.

<sup>3</sup> Te núu cada-o nchãa nãcuáa cãhá<sup>n</sup> Yã Ndiõxí, te cutnùní iní-ó sã ndécú-ó ìchi-gã.

<sup>4</sup> Te núu cãchí-ó sã ndécú-ó ìchi-gá te ñá túu quide-o nãcuáa cãhá<sup>n</sup>-gã, te dàcuandehnde-o, te ñá túu quide ndáá-ó núu-gã.

<sup>5</sup> Te núu sãndáá ndisa iní-ó tnúhu-gá, te quide-o nchãa nãcuáa cãhá<sup>n</sup>-gã, te duca<sup>n</sup> te cùu iní ndisa-o-gã, te cutnùní ndáá iní-ó sã ndécú-ó ìchi-gã.

<sup>6</sup> Te núu cãchí-ó sã ndécú-ó ìchi Yã Ndiõxí, te xini ñuhú-xi cada ndáá-ó cundecu-o ñuyú-a datná ní quide ndáá Xítohó Jesucristú cútnàhá ní xíndecu-gã ñuyú-a.



### *Ndudú sáá*

7 Te nchòhó ñáyíu ndècu ndìhi-í ichi Xítohó Jesucristú, ñá túú chìdo tnùnì-í ì<sup>n</sup> tnúhu saa sà cúú-xí-ndó, chi diu-ni tnúhu sá ñí ngúndecu ndìhi-ndo ndéé díhna, tnúhu ní xíndedóho-ndo ndéé cútnàhá ní sàndáá iní-ndó-gã, xǎ<sup>n</sup> chídó tnùnì-í.

8 Te tnúhu-a cùu-xi datná ì<sup>n</sup> tnúhu saa tèe-í dándàcu iní ñáhà-í xii-ndo nàcuáa ní quide Xítohó Jesucristú cútnàhá ní quixi-gá ñuyíú-a ní quide váha-gá, te tnàhá nchòhó ní tñi-ndo tnúhu-gá te quide váha-ndo tnàhá-ndó. Te vitna ì<sup>n</sup> nduu ì<sup>n</sup> nduu ta cùu vai ñáyíu ta dàña nchaa sá cuèhé sá dúhá cuáhá<sup>n</sup>, chi Xítohó Jesucristú tá dándixi túu-gá iní-yu cuèndá cutnùnì iní-yu nàcuáa nduu cuèndá Yá Ndiöxí.

9 Te núu cächí-ó sǎ quidé vǎha-o, te cùu úhú iní-ó tnàha ñáyíu-o, te xǎ<sup>n</sup> ñá túú quide ndáá-ó, chi ndècu-ni-o ichi cuèhé ichi duha sá dúcá<sup>n</sup> quide-o.

10 Te núu na cùu iní-ó tnàha ñáyíu-o datná cúú iní ñáhá mèe Yá Ndiöxí xii-o ña, te quide ndáá-ó nǔú-gã, te vá cánúichi-o tnàha ñáyíu-o ì<sup>n</sup> ichi cuèhé ichi duha.

11 Te núu cùu úhú iní-ó tnàha ñáyíu-o, te ñá túú quide váha-o nǔú Yá Ndiöxí, chi ndècu-ni-o ichi cuèhé ichi duha, te ñá túú cùtnùnì iní-ó sǎ quidé-ó. Chi cùu-o datná ì<sup>n</sup> téé ndècu núú néé chi ñá cútnùnì núú-dě ndéé ichi quíhí<sup>n</sup>-dé. Duca<sup>n</sup> sǎtnahá-xi cùu nchoo chi ñá cútnùnì iní-ó ndéé ichi quíhí<sup>n</sup>-ó te núu duca<sup>n</sup> na càda-o cuu úhú iní-ó tnàha ñáyíu-o.

12 Te nchòhó ñáyíu cùu datná déhe-í, yúhú chídó tnùnì-í tnúhu-a ì<sup>n</sup> núú tütú cächí tnúhu-í xii-ndo sǎ ñí quide càhnu iní Yá Ndiöxí nchaa cuéchi-ndo, chi diu cuèndá-á<sup>n</sup> ñí xíhí Xítohó Jesucristú.

13 Te nchòhó ñáyíu sacuéhé, yúhú tèe-í tnúhu-a sá cúú-xí-ndó chi càhá<sup>n</sup> ndìhi-ndo Jesús, te Yaa-á<sup>n</sup> sa ndècu-gá ndéé cútnàhá ní ngáva ñuyíú. Te nchòhó ñáyíu nchìcú<sup>n</sup>-gá téé tucu-í tnúhu-a sá cúú-xí-ndó chi ñá túú sàndáá iní-ndó tnúhu càhá<sup>n</sup> yucu ñávǎha.

Te nchaa nchòhó ñáyíu cùu datná déhe-í, tèe tucu-í tnúhu-a sá cúú-xí-ndó, chi sa càhá<sup>n</sup> ndìhi-ndo Tátá-ó Dütú Ndiöxí.

14 Te nchòhó ñáyíu ni sàhnu, yúhú chídó tnùnì-í tnúhu-a ì<sup>n</sup> núú tütú chi càhá<sup>n</sup> ndìhi-ndo Jesús, te Yaa-á<sup>n</sup> sa ndècu-gá ndéé cútnàhá ní ngáva ñuyíú. Te nchòhó ñáyíu nchìcú<sup>n</sup>-gá, yúhú chídó tnùnì-í tnúhu-a chi ío ñíhí ndéé-ndó ndècu-ndo, chi tñi-ndo tnúhu càhá<sup>n</sup> Yá Ndiöxí. Te ñá túú sàndáá iní-ndó tnúhu càhá<sup>n</sup> yucu ñávǎha.

15 Te vá cúhú<sup>n</sup> iní-ndó ní ì<sup>n</sup> sá cuèhé sá dúhá ío ñuyíú-a, te ni vá cánì iní-ndó càda-ndo. Chi núu na cùhú<sup>n</sup> iní-ó nchaa sá cuèhé sá dúhá ío ñuyíú-a ña, te ñá túú Tátá-ó Dütú Ndiöxí ñúhú iní-ó te núu duca<sup>n</sup> na càni iní-ó.

16 Te nchaa ñáyíu ñuyíú-a quidé-yu nchaa sá cuèhé sá dúhá, chi diu nchaa xǎ<sup>n</sup> cúdí<sup>n</sup> iní-yu cadá-yu. Te nchaa sá cuèhé sá dúhá sàni iní-yu, ndìhi nchaa sá xìnì-yu quidé-yu. Te xíquide nínu-yu mèe-yu cuèndá nchaa sá ndécú ndìhí-yu. Te nchaa sá ñà túú vǎha ní cacu nihnu-xi ñuyíú-a.

17 Te nchaa sá ñà túú vǎha ío ñuyíú-a, ndìhi nchaa sá sání cuèhé sání dùha iní-yu cuita ndìhi nihnu-xi quíhí<sup>n</sup>. Te nchaa ñáyíu tñi tnúhu càhá<sup>n</sup> Yá Ndiöxí cundecú-yu ndìhi-gá ni caa ni quíhí<sup>n</sup>.

### *Tnúhu ndáá tnúhu Yá Ndiöxí ndìhi tnúhu ndehnde*

18 Te nchòhó ñáyíu cùu datná déhe-í, sa ñíhí-ndó tnúhu sá quíxí ì<sup>n</sup> téé cunuu-gã-dé cuu úhú iní-dé Crìstú. Te sa xíndecu-gá ñáyíu cùu úhú iní ñáhá xii-gá, núu xǎ<sup>n</sup> cútnùnì iní-ó sǎ sà ta cuyatni nduu naa ñuyíú-a.

19 Te ñáyíu-á<sup>n</sup> ñí xíndecu ndìhi ñàhá-yu xii-o, te ní queé-yu cuáhá<sup>n</sup>-yu chi ñá túú ní cùu ì<sup>n</sup>nuu-o ndìhí-yu. Chi núu dícó ní cùu ì<sup>n</sup>nuu-o ndìhí-yu te cundecu ndìhi ñàhá-yu xii-o ni cùu. Te duha ní cuu cuèndá cutnùnì ndáá iní-ó nchaa-o sá ñà túú cùu ì<sup>n</sup>nuu-o ndìhí-yu, chi ñá túú sàndáá iní-yu Yá Ndiöxí.

20 Te Xítohó Jesucristú ní taxi-gá Espíritú Yá Ndiöxí ndécú ndìhi-o, núu xiá<sup>n</sup> tècú tnùnì-ó tnùhu-gá.

21 Te cuendá sá xìnì-ndó tnùhu ndáá tnùhu Yá Ndiöxí núu xiá<sup>n</sup> tée-í tnùhu-a, te ñá díú ì<sup>n</sup> sá ñă cútnùnì iní-ndó cùu-xì. Te sa nàha-ndo sá nì ì<sup>n</sup> tnùhu ndehnde ñà túú ñùtnahá-xì núu tnùhu Yá Ndiöxí, chi mee nine-nì tnùhu ndáá cùú-xì.

22 Te nchaa ñáyiú càchí sá ñà díú Jèsús cùú Crìstú Yaá ní tendaha Yá Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te ñà ní-yu càchí-yu sá ñà díú Dèhe Yá Ndiöxí cùú Jèsús, te sá dúcá<sup>n</sup> quidé-yu te cùu úhú iní-yu Yá Ndiöxí ndìhi Dèhe-gá Jèsús.

23 Te nchaa ñáyiú ñà túú sàndáá iní sá Dèhe Yá Ndiöxí cùú Jèsús, ñáyiú-á<sup>n</sup> ñà túú ndécú-yu ichi Tătá-ó Dütú Ndiöxí. Te nchaa ñáyiú cáhá<sup>n</sup> sá Dèhe Yá Ndiöxí cùú Jèsús, ñáyiú-á<sup>n</sup> ndécú-yu ichi Tătá-ó Dütú Ndiöxí.

24 Te nchaa tnùhu Yá Ndiöxí ní tecú dóho-ndo ndéé díhna, tnùhu-á<sup>n</sup> cuhu<sup>n</sup> iní-ndó. Te núu nchaa tnùhu-á<sup>n</sup> ná cùhu<sup>n</sup>-nì iní-ndó, te cundecu ndìhi-ndo Yá Ndiöxí ndìhi Dèhe-gá cuèi vá cùndecu túu-ndo ndìhi-gá ñuyíú-a.

25 Te Jèsús ní cachí-gá sá ndúú tǎhú-ó cùndecu ndìhi-o-gá nì caa nì quíhí<sup>n</sup> andíu.

26 Te cuendá nchaa ñáyiú dándahú ñáhá xii-ndo ní chídó tnùnì-í tnùhu-a,

27 dico nchòhó chi ndècu ndìhi-ndo Espíritú Yá Ndiöxí sá nì taxi Xítohó Jesucristú. Núu xiá<sup>n</sup> ñà túú xìnì ñuhu-ndo ñáyiú danèhé ñáhá xii-ndo, chi mee Espíritú-gá dánèhé ñáhá-xì nchàa sá vǎha. Te nchaa sá dánèhé ñáhá-xì xii-ndo cuu-xì sá ndáá, te ñà díú ì<sup>n</sup> tnùhu ndehnde. Te vitna chí cǎnchícú<sup>n</sup> nihnu-nì ichi Yá Ndiöxí dàtná ní sanu ichi ñaha mée Espíritú-gá xii-ndo.

28 Te nchòhó ñáyiú cùu datná déhe-í, chí cǎnchícú<sup>n</sup> nihnu-nì ichi Xítohó Jesucristú, chi cuendá òré ná quíxì tucu-gá ñuyíú-a te vá yùhú-ndó te nì vá cùú càha<sup>n</sup> núú-ndó nùú-gǎ.

29 Te nchòhó sa nàha-ndo sá mée-gǎ quidé ndáá-gá, te sa xìnì-ndó sǎ ncháá ñáyiú quide ndáá cùú-yu déhe Yá Ndiöxí.

### 3

#### *Ñáyiú cùu déhe Yá Ndiöxí*

1 Te chí cuǎha cuendá sá ìo cùu iní ñáhá Tătá-ó Dütú Ndiöxí xii-o cuendá sá cùú-ó dèhe-gá, chi duca<sup>n</sup> nì cachí-gá, te déhe ndisa-gá cùú-ó. Te núu xiá<sup>n</sup> ñáyiú ndècu ichi cuehé ichi duha ñà cùú quìnì ñáhá-yu xii-o, chi ñà túú xìnì-yu nàcuáa ndùu cuendá Yá Ndiöxí.

2 Te nchòhó ñáyiú ío cùu iní-í, vitna cùu-o déhe Yá Ndiöxí, te vátá cútnùnì váha-gá iní-ó nǎsa cunduu-o ndéé núu cuáhá<sup>n</sup> núú vǎxi. Dico sa cùtnunì iní-ó sǎ òré ná quíxi tucu Xítohó Jesucristú te nduu-o dàtná cáá mée-gá, chi quínì-ó-gǎ nàcuáa-nì càa nacuáa-nì ndùu-gá.

3 Te nchaa ñáyiú sa ndètu ñaha xii-gá sa ta ngǔndecu túha-yu cuáhá<sup>n</sup>, chi ta ndùu ndoo nduu nine iní-yu cuáhá<sup>n</sup> dàtná cáá ndòo caa nine mee-gá.

4 Te nchaa ñáyiú quide nándi sá cuehé sá dúhá ñà túú quide váha-yu núu Yá Ndiöxí, chi ní cachí-gá sá vá dúcá<sup>n</sup> càda-o.

5 Te sa nàha-ndo sá nì quixi túu Xítohó Jesucristú ñuyíú-a cuendá cada càhnu iní-gá nchaa sá cuehé sá dúhá quide-o, chi mee-gǎ ñà túú quide-gá nì ì<sup>n</sup> sá cuehé sá dúhá.

6 Te nchaa ñáyiú ndècu ichi Yá Ndiöxí ñà túú ñùhú-yu ichi cuehé ichi duha. Te nchaa ñáyiú ñùhu ichi cuehé ichi duha ñà túú xìnì-yu nàcuáa ndùu cuendá Xítohó Jesucristú te nì ñà túú xìnì-yu nàsa càa-gá.

7 Te nchòhó ñáyiú cùu datná déhe-í, vá dáñá-ndó mée-ndo dándahú ñáhá ñáyiú ndècu ichi cuehé ichi duha, chí càchí-yu sá cùú cùndecu-o ichi Yá Ndiöxí te cada-o nándi sá cuehé sá dúhá dico ñà ndáá. Te nchaa ñáyiú quide váha quide ndáá-yu dàtná quidé mée Jesús.

8 Te nchaa ñáyiú ndècu ichi cuehé ichi duha ndècu ndìhí-yu yucu

ñávãha, chi duca<sup>n</sup> quide mee-xi ndéé cùtnàhá vátá ngãva-gá ñuyíú. Te xíã<sup>n</sup> ní quixi Jèsús Déhe Yá Ndiöxí ní dáquée òhú-gã nchaa sá quidé yucu ñávãha.

<sup>9</sup> Te nchaa ñáyíu ní natuha ichi Yá Ndiöxí ní nduú-yu déhe-gá, te ñá túú-gã quidé-yu nándi sá cuèhé sá dúhá chi ní ndada ndoo ní ndada nine-gá iní-yu. Núu xíã<sup>n</sup> ñá túú-gã quidé-yu nándi sá cuèhé sá dúhá, chi ní ngúndecu ndíhi ñaha-gã xii-yu.

<sup>10</sup> Te cùtnuní iní-ó nándi cùu ñáyíu cùu déhe Yá Ndiöxí, te cùtnuní iní-ó nándi cùu ñáyíu cùu déhe yucu ñávãha. Te nchaa ñáyíu ñá túú quide ndáá, te cùu úhú iní-yu tnàha ñáyíu-yu, te ñáyíu-á<sup>n</sup> ñà díú dèhe Yá Ndiöxí cùu-yu.

#### *Cuu iní tnáhá-ó ñá ñá-ó*

<sup>11</sup> Te ndéé òré ní natuha-o ìchi Yá Ndiöxí ní tecú dóho-o sá cùú ìní-ó tnàha ñáyíu-o.

<sup>12</sup> Te vá cùndùu úhú iní-ó dàtná ní quide ndí Cãín, chi ndí-á<sup>n</sup> ní xíndecu ndí ndíhi yucu ñávãha núu xíã<sup>n</sup> ní sahni ndí ñaní ndí. Te duca<sup>n</sup> ní quide ndí chi ní xíndecu ndí ichi cuèhé ichi duha, te ñaní ndí ní xíndecu-dé ichi váha.

<sup>13</sup> Te nchòhó ñáyíu ndècu ndíhi-í ichi Xítóhó Jesucrístú, vá cáda cuèndá-ndó sá cùú ùhú iní ñáhá nchaa ñáyíu ndècu ichi cuehé ichi duha xii-ndo.

<sup>14</sup> Te cunaha-ndo na càchí tnúhu-í xii-ndo sá núu na cùu iní-ó tnàha ñáyíu-o, te cùtnuní iní-ó sá sá ní dáñá-ó ìchi sá tá dàcuíta nihnu ñaha xii-o cuáhá<sup>n</sup> ní cùu, te vitna ní tñi-o ìchi váha. Te nchaa ñáyíu ñá túú cùu iní tnàha ñáyíu-xi ñùhu-ní-yu ichi cuáhá<sup>n</sup>-yu núu ùhú núu ndàhú.

<sup>15</sup> Te nchaa ñáyíu ñá cùú quini ndee tnàha ñáyíu-xi cùu-yu dàtná ñá ñáyíu sàhni ndíyí. Te nchòhó sa nàha-ndo sá ní ñá ñáyíu sàhni ndíyí ñá túú ndècu ndíhi-yu tnúhu ndee ìní sá nánihí tàhú-yu.

<sup>16</sup> Te Xítóhó Jesucrístú ní xíhí-gá cuèndá nchaa yíca cuèchi-o, núu xíã<sup>n</sup> cùtnuní iní-ó sá ìo cùu iní ñáhá-gã xii-o. Te xíã<sup>n</sup> cùtnuní iní-ó nàcuáa cada-o cùu iní-ó tnàha ñáyíu-o, te

cuèi na cùú-ó cuèndá sá cùú-xí ñá-yu, cuèndá-nà sá ná dàcácu nihnu-ò-yu núu tnùndòho ndecú-yu.

<sup>17</sup> Te núu ndècu ndíhi-o sá cóhó sá cáxí-ó ndíhi nchaa sá nándíhi-o, te ndècu ñáyíu ndàhú ñá túú vèdana ná ndécú ndíhi, te ñá túú chindee-ó-yu, te ñá túú cùu iní-ó Yá Ndiöxí te núu duca<sup>n</sup> na càda-o.

<sup>18</sup> Te nchòhó ñáyíu cùu datná déhe-í vá cuèndá-ni cùnàha cáhá<sup>n</sup>-ndó sá cùú ìní tnáhá-ndó, chi cuu iní tnáhá ndísa-ndo te coto tnàha-ndo.

#### *Vá yùhú-ó núu Yá Ndiöxí*

<sup>19</sup> Te núu duca<sup>n</sup> na càda-o, te cùtnuní iní-ó sá ndécú-ó ìchi ndáá ichi Yá Ndiöxí, te ñá túú-gã ná quíhi iní-ó núu-gã.

<sup>20</sup> Te núu ndíhú iní-ó cuèndá ñá sá ní quide-o, te sa nàha Yá Ndiöxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càda iní-ó.

<sup>21</sup> Te nchòhó ñáyíu ìo cùu iní-í, na càchí tnúhu-í xii-ndo, te núu ñá túú nà sání ìní-ó te ñá túú nà quidé-ó, te vá yùhú-ó núu Yá Ndiöxí.

<sup>22</sup> Te nchaa sá váha na càcá<sup>n</sup>-ó núu Yá Ndiöxí, te mee-gã taxi-gã chi tñi-o tnúhu càhá<sup>n</sup>-gã, te quide-o nchaa nàcuáa cùu iní-gã.

<sup>23</sup> Te ní cachí Yá Ndiöxí sá quindáá iní-ó Dèhe-gã Xítóhó Jesucrístú, te cuu iní-ó tnàha ñáyíu-o dàtná ní cachí-gã.

<sup>24</sup> Te nchaa ñáyíu tñi tnúhu-gã ndécú-yu ichi-gã, te ndècu ndíhi ñaha-gã xii-yu. Te cùtnuní iní-ó sá ndécú-ó ndíhi-gã chi ní taxi-gã Espíritú-gã ndécú ndíhi-o.

## 4

### *Ñáyíu ndècu ndíhi Espíritú Yá Ndiöxí ndíhi ñáyíu cùu úhú iní ñáhá xii Xítóhó Jesucrístú*

<sup>1</sup> Te nchòhó ñáyíu ìo cùu iní-í, vá cùtexínu quindáá iní-ndó tnúhu càhá<sup>n</sup> nchaa ñáyíu càchí sá ndécú ndíhi Espíritú Yá Ndiöxí. Chi díhna-gã cada cuèndá váha-ndo te núu càhá<sup>n</sup> ndáá-yu nàcuáa càhá<sup>n</sup> tnúhu Yá Ndiöxí, chi ìo vai ñáyíu ñuyíú-a

cachí-yu sá càhá<sup>n</sup>-yu tnúhu-gá dico ñá ndáá.

<sup>2</sup> Te duha cutnùnì iní-ó nãndì cùu ñáyiu ndècu ndìhi Espiritú Yá Ndiòxí. Nchaa ñáyiu càhá<sup>n</sup> ndáá sá Xítóhó Jesucrístú ní quixi-gá ñuyíú-a te ní cuu-gá ì<sup>n</sup> yiqui cùñú, ñáyiu-á<sup>n</sup> cùu-yu ñáyiu cùu cuendá Yá Ndiòxí.

<sup>3</sup> Te nchaa ñáyiu ñá túú càhá<sup>n</sup> nàcuáa càa Jesús cùtnàhá ní quixi-gá ñuyíú-a ñáyiu-á<sup>n</sup> dándàhú ñáhã-yu, chi ñá túú cùu-yu ñáyiu cùu cuendá Yá Ndiòxí. Te diu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiu cuu úhú iní ñáhá xii-gá, dico yúhú càchí tnúhu-í xii-ndo sá sà ndecú-yu.

<sup>4</sup> Te nchòhó ñáyiu cùu datná déhe-í, ndècu ndìhi-ndo Yá Ndiòxí, te ñá dáñá-ndó dándahú ñáhá nchaa ñáyiu càchí sá càhá<sup>n</sup> tnúhu-gá te ñá ndáá. Te ñá túú sàndáá iní-ndó chi Yá Ndiòxí Yaá ndécú ndìhi-ndo taxi tnùnì víhí-gá dácúúxí yùcu ñávàha ndècu ndìhi nchaa ñáyiu ñùhu ichi cuehé ichi duha.

<sup>5</sup> Te nchaa ñáyiu dándahú ñáhá sá càhá<sup>n</sup> tnúhu Yá Ndiòxí ndécú-yu ichi cuehé ichi duha, te mee-ni cuendá nchaa sá ió ñuyíú-a càhá<sup>n</sup>-yu. Te tédóho ñaha nchaa dava-gá ñáyiu ndècu diu-ni ichi cuehé ichi duha.

<sup>6</sup> Te nchoo cùu-o ñáyiu cùu cuendá Yá Ndiòxí. Te nchaa ñáyiu xíndecu ichi-gá tní<sup>n</sup>-yu tnúhu càhá<sup>n</sup>-ó, te nchaa ñáyiu ñá túú ndècu ichi-gá ñá túú tní<sup>n</sup>-yu tnúhu càhá<sup>n</sup>-ó. Te duha te cùtnunì iní-ó nãndì cùu ñáyiu càhá<sup>n</sup> ndáá, te cùtnunì tucu iní-ó nãndì cùu ñáyiu dándahú ñáhá.

*Cuu iní-ó tnàha ñáyiu-o datná cùu iní ñáhá mèe Yá Ndiòxí xii-o*

<sup>7</sup> Te nchòhó ñáyiu ío cùu iní-í, xìni ñuhu-xi cuu iní tnáhá-ó datná cùu iní ñáhá mèe Yá Ndiòxí xii-o, chi mee-gá táxi-gá sá xìní tnùnì-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe Yá Ndiòxí, te cùtnunì ndáá iní-yu sá ndécú ndìhi ñaha-gá xií-yu.

<sup>8</sup> Te nchaa ñáyiu ñá túú cùu iní tnàha ñáyiu-xi ñá túú ndècu ndìhi-yu

Yá Ndiòxí. Te nchaa ñáyiu ndècu ndìhi Yá Ndiòxí, ñáyiu-á<sup>n</sup> sãñaha-gã sá xìní tnùnì-yu cuendá cuu iní-yu tnàha ñáyiu-yu.

<sup>9</sup> Te cùtnunì iní-ó sã cùu iní ñáhá Yá Ndiòxí xii-o nchaa-o, chi ní tendaha-gã ì<sup>n</sup>dì dí-ni Déhe-gá Xítóhó Jesucrístú ní quixi-gá ñuyíú-a cuendá sá díú-gã cada te naníhí tàhú-ó, te núu na quíndáá iní-ó tnúhu-gá.

<sup>10</sup> Te ío cùu iní ñáhá Yá Ndiòxí xii-o nchaa-o. Te ñá díú sã méé-ó cùu iní-ó-gã, chi díhna-gá méé-gã sa cùu iní ñáhá tnàhí-gá xii-o, núu xíã<sup>n</sup> ní tendaha-gã Déhe-gá ní quixi-gá ñuyíú-a ní xíhí-gá sá cuendá nchaa yíca cuèchi-o.

<sup>11</sup> Te nchòhó ñáyiu ío cùu iní-í, xìni ñuhu-xi cuu iní tnáhá-ó, chi mee Yá Ndiòxí ío cùu iní ñáhá-gá xii-o.

<sup>12</sup> Te ni ì<sup>n</sup> nchoo ñáyiu ndècu ñuyíú-a ñá túú xìní-ó nàcuáa càa Yá Ndiòxí, dico nchoo ñáyiu ní tuha ichi-gá chi cùtnunì iní-ó sã ndécú ndìhi ñaha-gá xii-o. Núu xíã<sup>n</sup> cùu iní tnáhá-ó ì<sup>n</sup> ì<sup>n</sup>-o, te cùtnunì iní-ó sã cùu iní ndisa-o-gã.

<sup>13</sup> Te cùtnunì iní-ó sã ndécú-ó ichi-gá, te ndècu ndìhi ñaha-gá xii-o, chi ní taxi-gá Espiritú-gá ndécú ndìhi-o.

<sup>14</sup> Te yúhú ndìhi dava-gá cue téé ní xica cuu ndìhi-gá càhá<sup>n</sup>-ndí sá nì xìní-ndí Jèsús Déhe Yá Ndiòxí ní quixi-gá ñuyíú-a, chi Tátá-ó Dütú Ndiòxí ní tendaha ñaha xii-gá ní quixi-gá cuendá dácácu nihnu-gá nchaa nchoo ñáyiu ndècu ñuyíú-a núu úhú núu ndàhú.

<sup>15</sup> Te nchaa ñáyiu càhá<sup>n</sup> ni yùhu ni iní-xi sá Déhe Yá Ndiòxí cùu Jèsús, ñáyiu-á<sup>n</sup> ndécú-yu ichi-gá te ndècu ndìhi ñaha-gá xii-yu.

<sup>16</sup> Te sàndáá iní-ó nì yuhu ni iní-ó sã Yá Ndiòxí cùu iní ñáhá-gã xii-o, chi duca<sup>n</sup> iní-gá. Te nchaa ñáyiu cùu iní ñáhá xii Yá Ndiòxí ndécú ndìhi ñaha-gá xií-yu.

<sup>17</sup> Te núu ndisa cùu iní-ó Yá Ndiòxí te vá yùhú-ó òré ná sàá nduu tàudì<sup>n</sup> ñaha-gá xii-o tnúu nchaa ñáyiu ndècu

ichi cuehé ichi duha, chi quide ndáá-ó ndècu-o núú-gã ñuyú-a dàtná ní quide mee Jèsús.

18 Chi nchaa ñáyiú cùu iní ñáhá xii Yá Ndiõxí ñá túú-gã yùhú-yu, te núu cùu iní ndisá-yu-gá. Te núu yùhú-yu te xiã<sup>n</sup> sa ndòhó-yu, chi ñùhú-yu ichi cuáhá<sup>n</sup>-yu núu ùhú núu ndàhú, chi nchaa ñáyiú yùhú ñá túú cùu iní ndisá-yu Yá Ndiõxí.

19 Te cuu iní-ó Yá Ndiõxí, chi mee-gã ndéé cútnàhá vátá quìndáá-gá iní-ó tnùhu-gá sa cùu iní ñáhá-gã xii-o.

20 Te nchaa ñáyiú càchí sá cúu iní-yu Yá Ndiõxí, te cùu ùhú iní-yu tnàha ñáyiú-yu, ñáyiú-án dácuañdehndé-yu. Te núu ñá túú cùu iní-yu tnàha ñáyiú-yu ndècu ñuyú-a ña, te uu<sup>n</sup>-gá quidé-yu Yá Ndiõxí Yaá ñá túú xiní núú-yu.

21 Te càchí-gá núu tnùhu-gá sá ñáyiú na cùu iní ñáhá xii Yá Ndiõxí, te duca<sup>n</sup>-ni cùu iní-yu tnàha ñáyiú-yu.

## 5

*Nchaa ñáyiú ní ndacu ní dáñá ichi cuehé ichi duha*

1 Te nchaa ñáyiú sàndáá iní sá Jèsús cúu-gã Crìstú Yaá ní quixi ñuyú-a, ñáyiú-án cúu-yu déhe Yá Ndiõxí. Te cùu iní-yu Tátá-ó Dütú Ndiõxí, te cùu iní-yu Déhe-gá.

2 Te núu cùu iní-ó Yá Ndiõxí te quide-o nacuaá càhá<sup>n</sup>-gá, te cùtnuní iní-ó sá cúu iní tnáhá ndisa-o nacuaá ndècu-o ichi-gá.

3 Te núu cùu iní-ó Yá Ndiõxí te tnè-o tnùhu càhá<sup>n</sup>-gá, chi cùtnuní iní-ó sá ña díú ñ<sup>n</sup> sá ùhú cúu-xí dàtná càchí ñáyiú.

4 Te nchaa nchoo ñáyiú cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús nùu xiã<sup>n</sup> ní ndacu-o ní dáñá-ó ichi-án.

5 Te nchaa ñáyiú sàndáá iní sá Dèhe Yá Ndiõxí cúu Jèsús ní ndacú-yu ní queé-yu ichi cuèhé ichi duha.

*Nàcuáa ní càhá<sup>n</sup> Yá Ndiõxí cuèndá Jèsús*

6 Te Xítóhó Jesucristú ní quixi-gá ñuyú-a, te ní sandute-gá. Te ñá díú-ní xiã<sup>n</sup>, chi ní xihí-gá sá cuèndá nchaa

yíca cuèchi-o. Te Espiritú Yá Ndiõxí càhá<sup>n</sup>-xi mee-ni sá ndáá, chi càhá<sup>n</sup> Espiritú-gá-án sá Jèsús cúu-gã Crìstú Yaá ní quixi ñuyú-a.

7 Te úní testiú ndécú àndiu, Tátá-ó Dütú Ndiõxí, ndihí Déhe-gá Xítóhó Jesucristú, ndihí Espiritú-gá. Te ñ<sup>n</sup>-ni tnùhu càhá<sup>n</sup> ndi nùní testiú-án.

8 Te duca<sup>n</sup> cùu-xi ñuyú-a tucu, chi càhá<sup>n</sup> Espiritú Yá Ndiõxí sá Jèsús cúu-gã Crìstú. Te ní sandute-gá, te ní xihí-gá sá cuèndá nchaa yíca cuèchi-o. Te xiã<sup>n</sup> cútnuní ndáá iní-ó sá díú Jèsús cúu-gã Crìstú.

9 Te núu tnè-o tnùhu váha càhá<sup>n</sup> ñáyiú, te váha-gá tnè-o tnùhu càhá<sup>n</sup> Yá Ndiõxí, chi càhá<sup>n</sup> ndáá-gá sá Dèhe-gá cúu Jèsús.

10 Te nchaa ñáyiú sàndáá iní sá Jèsús cúu-gã Déhe Yá Ndiõxí, ñáyiú-án cútnuní iní-yu sá cúu-xi ñ<sup>n</sup> sá ndáá. Te nchaa ñáyiú ñá túú sàndáá iní tnùhu càhá<sup>n</sup> Yá Ndiõxí quidé-yu-gá ñ<sup>n</sup> ñándéhndé, dico ñá túú ndèhnde-gá, chi mèé-yu ñá túú sàndáá iní-yu sá Dèhe-gá cúu Jèsús dàtná càchí mèé-gá.

11 Te Yá Ndiõxí càchí tnùhu ndáá-gá sá cùndècu-o ndihí-gá ni caa ni quihí<sup>n</sup>. Te duha càhá<sup>n</sup>-gá chi sàndáá iní-ó Dèhe-gá.

12 Te nchaa ñáyiú na quìndáá iní ñáhá xii Déhe-gá cundecú-yu ndihí-gá ni caa ni quihí<sup>n</sup>. Te nchaa ñáyiú ñá túú sàndáá iní ñáhá xii Déhe-gá vá cùndècú-yu ndihí-gá.

*Sáhu ndéé núu ní ndihí-ná*

13 Te cuèndá sá sàndáá iní-ndó Dèhe Yá Ndiõxí nùu xiã<sup>n</sup> chidó tnùní-í tnùhu-a cuèndá cùtnuní iní-ndó sá cùndècu ndihí-o-gá ni caa ni quihí<sup>n</sup>.

14 Te ñá túú tnùhu yùhú càhá<sup>n</sup> ndihí-o Yá Ndiõxí, chi tedóho ñaha-gã xii-o nùu ñ<sup>n</sup>-ná sá ná càcá<sup>n</sup>-ó nùú-gã dàtná cùní mèé-gá.

15 Te cùtnuní iní-ó sá táxi-gá sá xicá<sup>n</sup>-ó nùú-gã, chi nàha-o sá tedóho ñaha-gã xii-o nùu na càcá<sup>n</sup>-ó nàcuáa cùu iní-gá.

16 Te núu xiní-ó ñáyiú ndècu ichi Yá Ndiõxí te quidé-yu sá ña túú váha núú-gã, te ndèhe-o sá ña túú ní xita

nihnu duú<sup>n</sup>-yu, te cáhá<sup>n</sup> ndihí-o Yá Ndióxi cuendá-yu, te dàcácu nihnu ñaha-gã xií-yu te núu na núcúnu ichi váha-yu. Chi ío ñáyiú xidó quidé nãndi sá ñà túú vãha te xíta nihnu duú<sup>n</sup>-yu, te vá cáhá<sup>n</sup> ndihí-gá-ó Yá Ndióxi cuendá-yu.

<sup>17</sup> Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácuíta nihnu ñaha dùu<sup>n</sup>.

<sup>18</sup> Te nãha-o sá nchóó ñáyiú cùu déhe Yá Ndióxi ñá túú-gã sání ìní-ó càda-o nãndi sá cuèhé sá dúhá. Te duca<sup>n</sup> chi mee Jèsús déhe Yá Ndióxi xító ñaha-gá xii-o, núu xíá<sup>n</sup> ñá ndácú-gã yucu ñãvãha dàxínu iní ñáhá-xí xii-o cada-o sá ñà túú vãha.

<sup>19</sup> Te nchoo nãha-o sá ndécú ndihí-o Yá Ndióxi. Te nchaa ñáyiú ndècu ichi cuèhé ichi duha tàxi tnuní ñáhá-ñã yucu ñãvãha xií-yu.

<sup>20</sup> Te nãha tucu-o sá ñùyíú-a ní quixi Jèsús Déhe Yá Ndióxi ní taxi-gá sá xíní tnùn-ó cuendá cutnùn-ó iní-ó sã mée-gã cúú-gã Ndióxi-ó. Te ndècu ndihí-o mee-gá ndihí Déhe-gá Jèsús, te ñndi díí-ni mee-gã cúú-gã Yá Ndióxi, te ndècu dava-gá sá nácuàca ñaha-gá xii-o cùndecu-o ndihí-gá ni caa ni quíhí<sup>n</sup>.

<sup>21</sup> Te nchòhó ñáyiú cùu datná déhe-í, vá quèndáá iní-ndó nchàa sá càchí-yu cùu ndióxí, chi dícó ndaha cue téé ñuyíú-a ní cuáha nchaa xíá<sup>n</sup>. Te duca<sup>n</sup> na cùnduu. Te ío chí cádá ndèe iní-ñã vitna.

## TUTÚ CÚÚ ÒÚ NÍ CADÚHA TÉ JUÁÁ

*Tnúhu Yá Ndiöxí ndihi nàcuáa cuu iní tnáhá-ó*

<sup>1</sup> Te yúhú té Juáá tée yìndaha ñaha xii ñáyiú sàndáá iní tnúhu Jèsús, tée-í tnúhu-a ñí núú tütú daquìxi-í ndaha yòhó ñaha ní cáhá<sup>n</sup> ñáhá Yá Ndiöxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mée-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhà-ndí xii-ndo.

<sup>2</sup> Te cùu iní ñáhà-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te duca<sup>n</sup>-ni cùndecu-o ndihi tnúhu-á<sup>n</sup> ni caa ni quíhí<sup>n</sup>.

<sup>3</sup> Te xicá<sup>n</sup> táhù-í núú Tátá-ó Dütú Ndiöxí, ndihi núú Déhe-gá Xítóhó Jesucristú sá ná chíndèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xicá<sup>n</sup> táhù-í núú-gá chi ndècu ndihi-o tnúhu ndáá tnúhu Yá Ndiöxí, te cùu iní-ó-gá.

<sup>4</sup> Te ío cùdíí iní-í, chi ní naníhí-í ñí ùú déhe-n, te quidé-yu nàcuáa sànu ichi ñaha tnúhu ndáá dàtná ní táúchíú<sup>n</sup> mée Tátá-ó Dütú Ndiöxí.

<sup>5</sup> Te vitna yòhó ñaha ní cáhá<sup>n</sup> ñáhá Yá Ndiöxí, cächí tnúhu-í xii-n sá xíní ñùhu-xi cuu iní-ó tnàha ñáyiú-o. Te ñá díú ñí tnúhu saa cùu-xi, chi díu-ni tnúhu sá ñí ngúndecu ndihi-o ndèe cútnàhá ní tuha-o ichi Yá Ndiöxí.

<sup>6</sup> Te núu cùu iní-ó Yá Ndiöxí, te cùu iní-ó tnàha ñáyiú-o dàtná ní cachí mée-gá, te tñí-o nchaa tnúhu càhá<sup>n</sup>-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndèe cútnàhá ní tuha-o ichi-gá.

*Cue tée dàndahú tnàha ñáyiú-xi*

<sup>7</sup> Te ío vai ñáyiú dàndahú ñáhá xica cuú-yu ñuyíú-a, te cächí-yu sá ñá ndàá sá Xítóhó Jesucristú ní cuu-gá ñí ñáyiú ndisa. Te nchaa ñáyiú duha càhá<sup>n</sup>

dácuàndehndé-yu, te cùu úhú iní-yu Jèsús.

<sup>8</sup> Te quíhi iní-ndó sá vǎ dándàhú ñáhá ñáyiú-á<sup>n</sup> xii-ndo cuèndá sá vǎ cuíta chiú<sup>n</sup> Yá Ndiöxí ní quide-o. Te òré ná quíxí tucu Jesús ñuyíú-a te taxi-gá nchaa sá vǎha cùu iní mée-gá cundecu ndihi-o.

<sup>9</sup> Te nchaa ñáyiú dàña tnúhu Xítóhó Jesucristú, te nàtníí-yu ingá ichi, ñáyiú-á<sup>n</sup> ñà túú ndècu ndihi-yu Yá Ndiöxí. Te nchaa ñáyiú ñá túú dàña tnúhu Xítóhó Jesucristú ndècu ndihi-yu Yá Ndiöxí ndihi Déhe-gá Xítóhó Jesucristú.

<sup>10</sup> Te núu véxi ñáyiú núú ndécú-ndó cächí-yu sá càhá<sup>n</sup>-yu tnúhu Yá Ndiöxí te ñá ndáá, te vá cuáha-ndo tnúhu danèhé ñáhà-yu xii-ndo, te ní vǎ cuáha-ndó-yu tnúhu ndee iní cuèndá chiú<sup>n</sup> quidé-yu.

<sup>11</sup> Chi núu na càhá<sup>n</sup> ndihi váha-ndó-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

*Tnúhu ndée núú ñí ndihi-ná*

<sup>12</sup> Te ío vai-gá tnúhu cuíní-í cachí tnúhu-í xii-ndo, dico vá tée-gá-í chi cuíní-í quixi-í núú ndécú-ndó ndàtnúhu-o cuèndá cudíí víhí iní-ó nchaa-o.

<sup>13</sup> Te nchaa cue déhe cùhú-n, ñáyiú ní cáhá<sup>n</sup> ñáhá Yá Ndiöxí quidé ndèe iní ñáhà-yu xii-n.

## TUTÚ CÚÚ ÒNÍ NÍ CADÚHA TÉ JUÁÁ

### *Càhá<sup>n</sup> váha-yu cuèndá té Gǎyú*

<sup>1</sup> Te yúhú té Juáá té yíndaha ñaha xii ñáyiú sàndáá iní tnúhu Jèsús, chido tnuní-í tnúhu-a ì<sup>n</sup> núú tütú sá cúú-xí yòhó té Gǎyú téé ío cùu iní-í, chi ndècu ndìhi-n tnúhu ndáá tnúhu Yá Ndiòxí.

<sup>2</sup> Te yòhó téé ío cùu iní-í, xìcá<sup>n</sup> táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhú-n, chi sa nàha-í sá ndécú váha-n núú Yá Ndiòxí.

<sup>3</sup> Te ío ní cudíí ìní-í òré ní sáá ñáyiú ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá òu-ni tnúhu-gá te tñì-n nchaa nacuáa càhá<sup>n</sup> tnúhu-á<sup>n</sup>.

<sup>4</sup> Te ío cùdìí ìní-í ní níhì-í tnúhu sá ncháá-ní ñáyiú ní sanu ichi-í ichi Yá Ndiòxí ndécú-ní-yu ichi-gá, te quide-ní-yu nchaa nàcuáa càhá<sup>n</sup>-gá.

<sup>5</sup> Te yòhó téé ío cùu iní-í, ío váha quide-n núú Yá Ndiòxí, chi chindee-n nchaa ñáyiú véxi dava-gá ñúú xícá, ñáyiú sàndáá iní tnúhu Yá Ndiòxí.

<sup>6</sup> Te nchaa ñáyiú-á<sup>n</sup> càhá<sup>n</sup>-yu núú tàcá ñáyiú càhá<sup>n</sup> ndìhi Yá Ndiòxí iha sá ío cùu iní-n nchàa tnaha ñáyiú-n dàtná càhá<sup>n</sup> Yá Ndiòxí. Te yúhú càhá<sup>n</sup> ndàhú-í núú-n sǎ cádá ndèe-ni iní-n chindee-n nchaa ñáyiú-á<sup>n</sup> nchaa sá xíní ñùhú-yu ichi. Te núu duca<sup>n</sup> na càda-n te quide-n nacuáa cùu iní Yá Ndiòxí, te xìnu cuechi-n tnahá-n núú-gǎ.

<sup>7</sup> Chi nchaa ñáyiú-á<sup>n</sup> ní tñí-yu ichi cuáhá<sup>n</sup>-yu càhá<sup>n</sup>-yu tnúhu Jèsús. Te ñá túú tñí-yu ní ì<sup>n</sup> sá sǎñaha ñáyiú ñá túú ndècu ichi Yá Ndiòxí.

<sup>8</sup> Te núu xǎ<sup>n</sup> nchoo xìni ñuhu-xi chindee-o nchaa ñáyiú xìnu cuechi núú-gǎ ñáyiú càhá<sup>n</sup> tnúhu-gá, te duca<sup>n</sup> te cutnùní iní-ó sǎ tnahá-ó xìnu cuechi-o ndìhí-yu núú-gǎ.

### *Ñá túú quide váha té Diótrefés*

<sup>9</sup> Te yúhú ní tendaha-í tutú cuáhá<sup>n</sup> núú tàcá ñáyiú chìñuhú-yu Yá

Ndiòxí, dico ì<sup>n</sup> téé ndècu-á<sup>n</sup> nání-dé Diótrefés, te ñá sàndáá iní-dé nchaa tnúhu càhá<sup>n</sup>-í, chi cuìní-dé cunuu-dé núú-yu.

<sup>10</sup> Te òré quixi-í te cada ndáá-ó nchàa tnúhu cuèhé tnúhu duha càhá<sup>n</sup>-dé cuèndá-í. Te ñá díú-ní xǎ<sup>n</sup> quidé-dé, chi nchaa ñáyiú véxi ingá ñúú càhá<sup>n</sup> tnúhu Yá Ndiòxí ñá túú càhá<sup>n</sup> ñáhá-dé vehe-dé, te ní ñá dáñá-dé càhá<sup>n</sup> ndìhi ñaha dàva-gá ñáyiú xii-yu. Te nchaa ñáyiú cuìní càhá<sup>n</sup> ndìhi ñaha xii-yu, te quèñuhu ñaha duu<sup>n</sup>-ni-dé ñá dáñá-gǎ-dé níhí tnáhǎ-yu ndìhi nchaa ñáyiú tàcá dácùaha tnúhu Yá Ndiòxí.

<sup>11</sup> Te yòhó téé ío cùu iní-í, vá cùndècu-n ichi cuehé ichi duha dàtná quidé nchàa dava-gá ñáyiú, cada-n mèe-ni sá váha. Chi nchaa ñáyiú quide váha ndécú-yu ichi Yá Ndiòxí. Te nchaa ñáyiú quide nchaa sá cuèhé sá dúhá ñà túú ndécú-yu ichi Yá Ndiòxí.

### *Nchaa ñáyiú càhá<sup>n</sup> váha-yu cuèndá té Demètriú*

<sup>12</sup> Te nchaa ñáyiú càhá<sup>n</sup> váha-yu cuèndá té Demètriú, chi quide ndáá-dé dàtná càhá<sup>n</sup> Yá Ndiòxí. Te tnahá yúhú càhá<sup>n</sup>-í cuèndá-dé sá ío váha quide-dé, te nchòhó sa nàha-ndo sá yùhú càhá<sup>n</sup> ndáá-í.

### *Tnúhu ndéé núú ní ndìhi-ná*

<sup>13</sup> Te vǎi-gá tnúhu cuìní-í cachí tnúhu-í xii-n ní cùu, dico ñá ní tèe-gá-í,

<sup>14</sup> chi cuìní-í quixi ndìhi-í, te càhá<sup>n</sup>-ó núú núú-ó.

<sup>15</sup> Te ío cada ndee ìní, te xìcá<sup>n</sup> táhù-í núú Yá Ndiòxí sá ná cùndècu váha-n ñà túú nǎ cuu cundècu-n. Te nchaa cue ñáyiú xíní tnáhá ndìhi-o ndècu iha quide ndee ìní ñáhǎ-yu xii-n. Te yòhó cúñaha-n nchàa ñáyiú xíní tnáhá ndìhi-í ndécú xǎ<sup>n</sup> ná càda ndee ìní-yu. Te ío cada ndee ìní-nǎ vitna.



## TUTÚ NÍ CADÚHA TÉ JUDÁS

*Té Jùdás càdùha-dé tutú quíhí<sup>n</sup>  
ndaha ñáyiú ní cachí Yá Ndiòxí nduu  
cuèndá-gá*

<sup>1</sup> Yúhú té Jùdás ñaní té Jàcobó xínú cuèchi-í núú Xìtohó Jesucristú, te càdúha-í tutú-a sá cúú-xí nchòhó ñáyiú ní cachí Yá Ndiòxí Yaá cúú Tátá-ó ndùu cuendá-gá, ñáyiú ío cùu iní-gá. Te dàtná-ní xìto ñaha-gá xii-ndo vitna ñu-ni duca<sup>n</sup> còto ñaha-gá xii-ndo ndèé ná sàá nduu quìxi tucu Xìtohó Jesucristú ñuyíú-a.

<sup>2</sup> Te xicá<sup>n</sup> táhù-í núú Yá Ndiòxí sá ìo-gá ná chindee chítúu ñaha-gá xii-ndo, te na cùnùn-í-gá iní-ndó sá ìo cùu iní ñáhá-gá xii-ndo, te duca<sup>n</sup> ìo váha cuu iní-ndó cùndecu-ndo.

*Ñáyiú ñá túú càhá<sup>n</sup> tnúhu ndáá  
tnúhu Yá Ndiòxí  
(2 Pedro 2:1-17)*

<sup>3</sup> Te nchòhó ñáyiú ío cùu iní-í, duca<sup>n</sup>-ni ìo sàni iní-í cadúha-í ñ<sup>n</sup> tutú sá cúú-xí-ndó cuèndá danèhé ñáhà-í xii-ndo nàcuáa ní cuu ní naníhí táhù-ó dico ñá túú càdúha-í, dico vitna quide cuendá-í sá xíní ñùhu-gá-xi cáhá<sup>n</sup>-í núú tütú-í sá nchòhó ío cundehe-ndo tnúhu cáhá<sup>n</sup>-ndó ndìhi ñáyiú, te cáhá<sup>n</sup>-ndó nàcuáa ndùu tnúhu sàndáá iní mée-ndó, chi ñu-ni tnúhu-á<sup>n</sup> ní cáhá<sup>n</sup> Yá Ndiòxí sá cúú-xí nchàa ñáyiú ndècu ichi-gá. Te vitna ñá túú-gá ná tnúhu càhá<sup>n</sup>-gá sá cúú-xí-yu, chi sa ní cáhá<sup>n</sup> duu<sup>n</sup>-gá.

<sup>4</sup> Te duha càhá<sup>n</sup>-í núú tütú-a sá cúú-xí-ndó, chi ñihí-í tnúhu sá xicá cùu ñáyiú chìtnahá ñáhá xii-ndo, te ní ñà túú xíní-ndó nã ñáyiú cùú-yu, te ñáyiú-á<sup>n</sup> cùú-yu ñáyiú cùu úhú iní ñáhá xii Yá Ndiòxí. Te ñ<sup>n</sup> xichi núú tütú Yá Ndiòxí càchí-xi sá ñáyiú-á<sup>n</sup> quíhí<sup>n</sup>-yu núú ùhú núú ndàhú, te ñu-ni ñáyiú-á<sup>n</sup> càchí-yu sá ìo váha iní Yá Ndiòxí ñuu xíá<sup>n</sup> cuu-ni cadá-yu nchaa sá cuèhé sá dúhá. Te dàquee tíhù-yu Yá Ndiòxí Yaá ío cùnùu, ndìhi Xìtohó Jesucristú.

<sup>5</sup> Te nchòhó sa xíní váha-ndo nàcuáa ní quide Yá Ndiòxí ndéé sanaha dico dándacu iní ñáhà-í xii-ndo, chi dàvá-á<sup>n</sup> ní queñuhu-gá ñáyiú isràél nàció<sup>n</sup> Ègiptú, te dava ñáyiú-á<sup>n</sup> ñà túú ní sàndáá iní ñáhà-yu xii-gá te ní dánáá ñaha-gá xii-yu.

<sup>6</sup> Te nchaa espíritú ñá túú ní cuèni cada ndáá cunu cuechi núú Yá Ndiòxí ní quee-xi núú ndécú-xí, te mee-gá ní sadí nihnu ñaha-gá xii-xi ñ<sup>n</sup> xichi núú néé te vá càcu-xi, chi sáá nduu te nayáha-xi cundecu-xi núú ùhú núú ndàhú ni caa ni quíhí<sup>n</sup>.

<sup>7</sup> Te dándacu iní ñáhá tucu-í xii-ndo nàcuáa ní yáha ñáyiú ñuú Sodomá, ndìhi ñáyiú ñuú Gòmorrá, ndìhi nchaa ñáyiú ñuú ní cáa yatni xíá<sup>n</sup>, chi tnàhá-yu ñá túú ní quide váha-yu dàtná ní quide nchaa cue espíritú-á<sup>n</sup>. Chi cue téé ní xóo cáhá<sup>n</sup> ndìhi tnàha ndì mee-güedé, te ñu-ni duca<sup>n</sup> ní xóo cada cue ñáyiú ñihí tucu. Te sá dúcá<sup>n</sup> ní quidé-yu núú ní dányóyó Yá Ndiòxí ñuhú ñuú-yu ní dánáá ñaha-gá xii-yu. Te xíá<sup>n</sup> cùnùn-í iní-ó sá nchàa ñáyiú ñá túú cuèni cada váha núú-gá quíhí<sup>n</sup>-yu núú ùhú núú ndàhú ni caa ni quíhí<sup>n</sup>.

<sup>8</sup> Te ñu-ni duca<sup>n</sup> quide ñáyiú chìtnahá ñáhá xii-ndo cuèni-yu dandàhú ñáhà-yu, chi càchí-yu sá dácòto ñaha saní-yu nàcuáa cadá-yu, núú xíá<sup>n</sup> nándi nchaa sá cuèhé sá dúhá quidé-yu sá cúú-xí yiqui cuñú-yu, te dàquee tíhù-yu nchaa nàcuáa càhá<sup>n</sup> Yá Ndiòxí cada-o, te càhá<sup>n</sup> úhú-yu cuèndá nchaa espíritú cùnùu.

<sup>9</sup> Te mee espíritú cùnùu-gá xínú cuèchi núú Yá Ndiòxí nání Mìguél ní nàá-xi ndìhi sácuíhná cuèndá yiqui cuñú ndí Moisés. Te espíritú-á<sup>n</sup> ñà túú ní cùyí-xi cáhá<sup>n</sup> úhú-xi sácuíhná-á<sup>n</sup>, chi ní xáha<sup>n</sup>-ni-xi: “Mee Yá Ndiòxí nàhá-gá te núú nása cada ñaha-gá xii-n”, duha ní xáha<sup>n</sup>-xi.

<sup>10</sup> Te nchaa ñáyiú duca<sup>n</sup> dandahú ñáhá xii-ndo-á<sup>n</sup> càhá<sup>n</sup> cuèhé-yu cuèndá nchaa sá vátá cùnùn-í-gá iní-yu nása ndùu, te quidé-yu dàtná quidé cue quiti chi cue quiti-á<sup>n</sup> quidé-güedé nání véxi iní-güedé, te ni

ñà túú cùtnuní iní-güedi nchaa sá quidé-güedi. Te duca<sup>n</sup> sà tnahá-xi cùú-yu, chi nchaa sá cuèhé sá dúhá vëxi iní-yu quidé-yu, te sá dúcá<sup>n</sup> quidé-yu xiǎ<sup>n</sup> tá xíta nihnú-yu cuáhá<sup>n</sup>.

11 ¡Te ndàhú ní cuú-yu chi ío ndohó-yu!, chi quidé-yu dàtná ní quide ndí Càín. Te nándi sá quidë-yu cuendá sá cuíní-yu díhú<sup>n</sup> dàtná ní xóo cada ndí Balaám. Te ío cùu sáá iní-yu núú Yá Ndiöxí dàtná ní xóo cada ndí Còré, núu xiǎ<sup>n</sup> tá xíta nihnú-yu cuáhá<sup>n</sup>.

12 Te dìcò sácá<sup>n</sup>núú sãha ñahá-yu xii-ndo òré nátacá-ndó quide-ndo vico chiñuhu-ndo Yá Ndiöxí. Te òré xéxi ndíhi ñahá-yu xii-ndo te mee-ni sã cúú-xí mèe-yu quide cuendá-yu, te ñà túú nèhé-yu sá yíñuhu núú Yá Ndiöxí. Te cùú-yu dàtná ì<sup>n</sup> vícò sã cuáhá<sup>n</sup>-xi duha cuáhá<sup>n</sup>-xi dàcá<sup>n</sup> te ñà túú dǎú nchídó-xí, duca<sup>n</sup> sà tnahá-xi cùú-yu. Te cùu tucú-yu dàtná ì<sup>n</sup> yutnu vídí sá ñà túú tnàhí cùu<sup>n</sup> sávídí-xi, te nchaa yutnu duca<sup>n</sup> ñà túú cùu<sup>n</sup> sávídí-xi te tnùhu-güedé ndéé yóho-xi te xihí duu<sup>n</sup>-xi. Te duca<sup>n</sup> sãtnahá-xi cùú-yu, chi ñà túú quide váha-yu.

13 Te cùu tucú-yu dàtná ndute làmár, chi ndute-á<sup>n</sup> òré càndá-xi te quecòo tíñú-xi ì<sup>n</sup> xio. Te cùu tucú-yu dàtná ì<sup>n</sup> chódíní cuáhá<sup>n</sup>-dì duha cuáhá<sup>n</sup>-dì dàcá<sup>n</sup>. Te duca<sup>n</sup> sãtnahá-xi cùú-yu, chi ñà túú cuíní-yu cada váha-yu. Te ñáyíu-á<sup>n</sup> daquihí<sup>n</sup> ñahá Yá Ndiöxí xií-yu ì<sup>n</sup> xichi núú néé núú sã ndecu túha cundecú-yu ni caa ni quihí<sup>n</sup>.

14 Te ndíquí<sup>n</sup> yǎvá ndí Àdán téé cùu usá ní xínani Ènóc ní dácáhu iní ñahá Yá Ndiöxí xii-dé ní cáhá<sup>n</sup>-dé dǎu-ni cuendá nchaa ñáyíu-á<sup>n</sup>. Te ní cachí-dé: “Na cachí tnúhu-í xii-ndo sã Yá Ndiöxí quixi-gá ndíhi cuèhé víhi espíritú xínú cuèchi núú-gǎ.

15 Te dàvá-á<sup>n</sup> cada ndáá-gá cuèchi nchaa ñáyíu te daquihí<sup>n</sup>-gá nchaa ñáyíu ndècu ichi cuèhé ichi duha núú ùhú núú ndàhú, te duca<sup>n</sup> càda ñaha-gá xií-yu, chi mee-ni sã cuèhé sá dúhá quidé-yu, te càhá<sup>n</sup> úhú ñahá-yu xii-gá”, duha ní cachí te Ènóc.

16 Te ñáyíu-á<sup>n</sup> ío yica iní-yu chi ñà túú ndùu vétú iní-yu nàcuáa ndècú-yu ñuyíú-a, te sãtnuhú-yu tnàha ñáyíu-yu te mee-ni sã cuèhé sá dúhá sãni iní-yu quidé-yu, te quide cahnú-yu mèe-yu, te mee-ni càhá<sup>n</sup> váha-yu núú tnàha ñáyíu-yu cuendá cuíní-yu sá cáda váha ñaha ñáyíu-á<sup>n</sup> xií-yu.

*Té Jùdás càhá<sup>n</sup>-dé dóho ñáyíu ndècu ichi Yá Ndiöxí*

17 Te nchòhó ñáyíu ío cùu iní-í, càhá<sup>n</sup> ndàhú-í núú-ndó sã ío cuhu<sup>n</sup> iní-ndó tnùhu sá sã ní dánèhé ñahá cuè téé ní tendaha Xítóhó Jesucristú càhá<sup>n</sup> tnúhu-gá núú ñáyíu.

18 Te sa nàha-ndo sã ní cachí-güedé sã cùmání-gǎ quixi tucu Xítóhó Jesucristú ñuyíú-a, te coo ñáyíu cáhá<sup>n</sup> cuèhé cáhá<sup>n</sup> duha cuendá tnúhu-gá. Te ñáyíu-á<sup>n</sup> cadá-yu mee-ni sã cuèhé sá dúhá vëxi iní mèe-yu.

19 Te ñáyíu-á<sup>n</sup> cùú-yu ñáyíu càhá<sup>n</sup> nándi tnúhu sá ñà túú nàndíhi cuendá sá vǎ cúú ì<sup>n</sup>nuu-ndo cundecu-ndo, te mee-ni sã cuèhé sá dúhá ñùhu iní-yu, te ñà túú ndècu ndíhi-yu Espíritú Yá Ndiöxí.

20 Te nchòhó ñáyíu ío cùu iní-í, ío dacuàha-ndo tnúhu Yá Ndiöxí sã ní sándáá iní-ndó cuendá duca<sup>n</sup> cuíta cuehnu nihnu-ndo ichi-gá quihí<sup>n</sup>, te cáhá<sup>n</sup> ndíhi-ndo Yá Ndiöxí nàcuáa dàcahu iní ñahá Espíritú-gá xii-ndo.

21 Te ío coto-ndo mèe-ndo cundecu-ndo cuendá cuu váha iní ñahá Yá Ndiöxí xii-ndo, te cundetú-ndo sãá nduu quixi Xítóhó Jesucristú ñuyíú-a nacuaca ñaha-gǎ xii-ndo cundecu-ndo ndíhi-gá ni caa ni quihí<sup>n</sup>, chi Yaá-á<sup>n</sup> ío cundahú iní ñahá-gǎ xii-o.

22 Te ñáyíu sãni ì<sup>n</sup> sani úú iní-xi cúñaha-ndo xií-yu nàcuáa cadá-yu cundecú-yu ichi Yá Ndiöxí.

23 Te nchaa ñáyíu ta xíta nihnu ñùhu ichi cuáhá<sup>n</sup> núú ùhú núú ndàhú, ío cundíhi iní-ndó cúñaha-ndo xií-yu tnúhu Yá Ndiöxí cuendá sá ná càcu nihnú-yu, te cundahú iní-ndó-yu, te quihí iní-ndó vǎ cáda-ndó tnàhá-ndó nàcuáa quidé-yu, chi daquèe tíhú-ndó nchaa sã cuèhé sá dúhá quidé-yu-á<sup>n</sup>.

*Nàcuáa ndacá<sup>n</sup> táhú-ó nǔú Yǎ Ndiǒxí*

<sup>24</sup> Te Yá Ndiǒxí chindee ñaha-gá xii-ndo cuendá sá vǎ cúndècu-ndo ichi cuehé ichi duha, te cunduu ndoo cunduu nine iní-ndó càndeca ñaha-gá xii-ndo quíhí<sup>n</sup> cundecu-ndo nǔú ïo váha càa ndecu-gá, te ío cudíí iní-ndó.

<sup>25</sup> Te Yá Ndiǒxí ío ndècu ndihí-gá nchaa sá xìní tnùní-gá te ðiu-gá ní dácǎcu nihnu ñaha-gǎ xii-o nǔú ùhú núú ndàhú, te duca<sup>n</sup> nǐ quide ñaha-gǎ xii-o chi ndècu ndihí-o Xítóhó Jesucristú. Te ío ndacá<sup>n</sup> táhú-ó nǔú Yǎ Ndiǒxí, chi ío càhnu cuu-gá ndécú-gǎ táxí tnùní-gá, te súúní vǎha iní-gá, te ndàcu-gá quidé-gǎ nchaa sá vǎha, te duca<sup>n</sup>-ni ïo càhnu cuu-gá ndéé cútnàhá vátá ngǎva-gá ñuyíú, te duca<sup>n</sup>-ni ïo càhnu cuu-gá ndéé vitna, te ðiu-ni duca<sup>n</sup> ïo càhnu cuu-gá ni caa ni quíhí<sup>n</sup>, duha xìni ñuhu-xi ndacá<sup>n</sup> táhú-ó nǔú-gǎ. Te duca<sup>n</sup> na cùnduu. Te ío chí cádá ndèe iní-nǎ vitna.

## NCHAA SÁ NĪ XINÍ TÉ JUÁÁ NDIĪHĪ NCHAA SÁ NĪ TECÚ DÓHO-DÉ

*Xítóhó Jesucrístú xáha<sup>n</sup>-gă xii té  
Juáá nchaa nàcuáa cada-xi ñuyíú*

<sup>1</sup> Te Yá Ndiöxí ní xáha<sup>n</sup>-gă xii Xítóhó Jesucrístú nchaa sá tá cùyatni víi-nă cada-xi ñuyíú-a cuendá sá cùñaha-gă xii cue tée xínu cuechi núú-gă, te Xítóhó Jesucrístú ní tendaha-gă ì<sup>n</sup> espíritú xínu cuèchi núú-gă ní quíhí-xi ní cachí tnúhu-xi nchaa tnúhu-á<sup>n</sup> xii yúhú té Juáá tée xínu cuechi núú-gă, te nchaa tnúhu-á<sup>n</sup> ndéé núú tütú-a.

<sup>2</sup> Te yúhú cächí tnúhu ndáá-í xii-ndo nàcuáa ní cáhá<sup>n</sup> Yă Ndiöxí, te cáhá<sup>n</sup> ndáá tucu-í cuendá Xítóhó Jesucrístú, ndihí cuendá nchaa sá nĪ xini-í.

<sup>3</sup> Te váha táhú ñáyiu dàcuaha nchaa tnúhu ndéé núú tütú-a, te váha tucu táhú ñáyiu ndédóho, te váha tucu táhú nchaa ñáyiu tnĪ nacuáa cáhá<sup>n</sup>-xi, chi sa ta cùyatni víi-nă nduu càda-xi nchaa nacuáa cáhá<sup>n</sup>-xi.

*Té Juáá cádüha-dé tutú quíhí<sup>n</sup> ndaha  
ndi úsá xichi cue ñáyiu ndècu ichi Yá  
Ndiöxí*

<sup>4</sup> Te yúhú té Juáá cádüha-í tutú daquixi-í ndi úsá xichi núú ndécú nchòhó ñáyiu ndècu ichi Yá Ndiöxí ndécú dīstrítú Àsiá. Te mee-gă ná chīndee chitúu ñaha-gă xii-ndo, te ío váha cuu iní-ndó cūndecu-ndo. Te cuēi ndéé sanaha ñu-ni-gă ndécú, te ñu-ni-gă ndécú cuēi vitna, te duca<sup>n</sup>-ni cūndecu-gă cuēi ndéé núú cuáhá<sup>n</sup> núú vĕxi, te ñu-ni duca<sup>n</sup> ío na chīndee chitúu ñaha ndi úsá cue espíritú ndécú núú-gă xii-ndo, te ío váha cuu iní-ndó cūndecu-ndo.

<sup>5</sup> Te ñu-ni duca<sup>n</sup> na càda tucu Xítóhó Jesucrístú, te ñu-gă cúú-gă Yá cáhá<sup>n</sup> ndáá, te ñu-ni-gă ní xihí-gă te díhna-gă ní ndoto, te dàtnùnĪ ndéé cuéé-gă te ndoto cue ñáyiu ní xihí, te ñu-ni-gă táxĪ tnùnĪ-gă nchaa cue tée yīndaha ñaha xii ñáyiu ndècu ñuyíú-a. Te ío cūu inĪ ñáhá-gă xii-o, te mee-gă

nĪ sati nĪhĪ-gă te ní xihí-gă núú cūrúxĪ sá cuendá nchaa sá cuéhé sá dúhá quide-o, te ní ndada ndoo ní ndada nine-gă inĪ-ó,

<sup>6</sup> te vitna ní quide ñaha-gă xii-o dàtná cue tée yīndaha ñáyiu, te ní quide ñaha tūcu-gă xii-o dàtná cue dūtú xínu cuèchi-o núú Tātá-gă Dūtú NdiöxĪ. Te vitna nchaa-o chí ná cächí-ó să ío cāhnu cuu Xítóhó Jesucrístú, te ío cūnuu-gă, te duca<sup>n</sup>-ni na cūnuu-gă ni caa ni quíhĪ<sup>n</sup>. Te duca<sup>n</sup> na cūnduu.

<sup>7</sup> Te cundehe-ndo àndiu! Chi ichi xitĪ vícú quixi Xítóhó Jesucrístú, te nchaa ñáyiu ndècu ñuyíú-a quini ñáhă-yu xii-gă, te tnáhá nchaa ñáyiu ì<sup>n</sup>-ni cūu ndihĪ ñáyiu ní dánĪcuéhé ñáhá xĪ-gă quini ñáhă-yu, te nchaa ñáyiu xĪndecu nihĪ ñuyíú, ñáyiu ñá túú cūu váha inĪ ñáhá xĪ-gă ndihú inĪ-yu òré quini ñáhă-yu xii-gă, te ndáá sá dúcá<sup>n</sup> càda-xi.

<sup>8</sup> Te Yá NdiöxĪ cächí-gă: “Yúhú ío cūnuu-í chi ñu-í sa ndècu ndéé cūtnáhá ní ngáva ñuyíú, te ñu-ni-í cūndecu ndéé ná sáá nduu nàa-xi ndihĪ nchaa sá ío, chí yúhú cūndecu-í ni caa ni quíhĪ<sup>n</sup>”, duha cächí Yă NdiöxĪ Yá ndácú quide nchaandi túhú sá váha. Chi ñu-ni-gă sa ndècu ndéé cūtnáhá ní ngáva ñuyíú, te ñu-ni-gă ndécú-gă vitna, te duca<sup>n</sup>-ni cūndecu-gă ni caa ni quíhĪ<sup>n</sup>.

*Té Juáá ní xini-dé Xítóhó Jesucrístú  
Yáá ío cūnuu*

<sup>9</sup> Te yúhú té Juáá té ndècu ndihĪ-ndo ichi Xítóhó Jesucrístú, tnáhá-í ndóhò-í cuendá-gă dàtná ndóhó-ndó, te tnáhá-í nduu táhù-í cūndecu ndihĪ ñaha-í xii-ndo núú ndécú Yă NdiöxĪ táxĪ tnùnĪ-gă. Te ío quide cahnu inĪ-ó cuēi nāndĪ yáha-o ndècu-o sá cuendá Xítóhó Jesucrístú. Te yúhú ní ngava-í vecaá ì<sup>n</sup> ñuú nánĪ Pătmós, te ñuú-á<sup>n</sup> cáá xitĪ ndute lámár. Te duca<sup>n</sup> nĪ cuu cuendá sá cáhá<sup>n</sup>-í tnúhu Yá NdiöxĪ, te cáhá<sup>n</sup> váha-í cuendá Xítóhó Jesucrístú.

<sup>10</sup> Te ì<sup>n</sup> nduu ndumĭngú nduu nàtacá-ó chíñuhu-o Yá NdiöxĪ ní quide ñaha Espíritú-gă xii-í nàcuáa cächí

iní-xi, te ní tecú dóho-í níhi ní cáhá<sup>n</sup> ñ<sup>n</sup> sá ní cáhá<sup>n</sup> ndàa sátà-í te dàtná níhi cáhá<sup>n</sup> ñ<sup>n</sup> cútú duca<sup>n</sup> níhi ní cáhá<sup>n</sup>-xi.

<sup>11</sup> Te cächí sá cáhá<sup>n</sup>-á<sup>n</sup>:

—Yúhú sa ndècu-í ndéé cútñàhá ní ngáva ñuyúú, te ñu-ni-í cundecu-í ndéé ná sàá nduu nàa-xi ndihì nchaa sá ió, te chido tnùnì-n ñ<sup>n</sup> núú tütú sá ná dènehé núú ñàhà-í xii-n, te daquìhì<sup>n</sup>-n tütú-á<sup>n</sup> ndì ùsá xichi núú xĩndecu cue ñáyiu ndècu ichi Yá Ndiöxí xĩndecu distritú Àsiá, ndaha ñáyiu ñuú Éfesú, ndaha ñáyiu ñuú Èsmirná, ndaha ñáyiu ñuú Pèrgamú, ndaha ñáyiu ñuú Tiàtirá, ndaha ñáyiu ñuú Sárdís, ndaha ñáyiu ñuú Filàdelfiá, ndaha ñáyiu ñuú Laodiceá, nchaa ñáyiu ñuú-á<sup>n</sup> daquìhì<sup>n</sup>-n tütú-á<sup>n</sup> ndahá-yu —cächí sá cáhá<sup>n</sup>-á<sup>n</sup>.

<sup>12</sup> Te ní nchócuñnu-í ndéhè-í nũu ná cúú sá cáhá<sup>n</sup>-á<sup>n</sup>, te ní xiní-í xĩnutñi ùsá tñàhá sá ní cuáha mee-ni ñhú<sup>n</sup> cuáá<sup>n</sup> sá ndèé dité-xi, te núú dité-xi-á<sup>n</sup> yĩndòdo ñ<sup>n</sup> caa candíl.

<sup>13</sup> Te cuádaya tnuú nchaa xiá<sup>n</sup> ní xiní-í nútñi Yá cáá dàtná cáá nchàa nchoo ñáyiu ndècu ñuyúú-a, te ñhnu-gá ñ<sup>n</sup> dóó cání càa-xi ndéé núú sàhá-gá, te yèdúcú<sup>n</sup>nuu ñ<sup>n</sup> sìrchú ní cuáha mee-ni ñhú<sup>n</sup> cuáá<sup>n</sup> pèchú-gá.

<sup>14</sup> Te idi díquí-gã cuixí<sup>n</sup> quiyí dàtná cuixí<sup>n</sup> idi dava mbéé, àdi yúhá sá quée òré quidé víxi<sup>n</sup>-xi, te tinùu-gá quidé-xí dàtná quidé-xí òré sàá itá ñuhú.

<sup>15</sup> Te sàhá-gã súúní dàtása<sup>n</sup>-xi dàtná dàtása<sup>n</sup> sá nání bròncé òré càyú-xi duca<sup>n</sup> dàtása<sup>n</sup>-xi sàhá-gã, te dónaha tñuhu cáhá<sup>n</sup>-gá quidé-xí dàtná quidé-xí dõndaha titní víhí yũte.

<sup>16</sup> Te xio ndaha cùha-gá nùndàha-gá úsá tñàhá chódíní, te mei yùhu-gá quéné ñ<sup>n</sup> yuchí cáhnú ndèé úú xio núú-xi, te núú-gã quidé-xí dàtná quidé-xí nũú nchĩcanchii òré súúní ngòyo cahni.

<sup>17</sup> Te sá dúcá<sup>n</sup> càa Yáá-á<sup>n</sup> ní xiní-í nũu xiá<sup>n</sup> ní yùhú-í ní nduá-í núú-gã, te ní cuu-í dàtná ñ<sup>n</sup> téé ní xihí sá dúcá<sup>n</sup> òo ní yùhú-í, dico mee-gã ní sacá<sup>n</sup> ndodo-gá ndaha cùha-gá núú yiqui cùnú-í, te ní cachí-gá:

—Vá yùhú-n, chi ñu-ni yùhú sa ndècu-í ndéé cútñàhá ní ngáva ñuyúú, te ñu-ni yùhú cundecu-í ndéé ná sàá nduu nàa-xi ndihì nchaa sá ió.

<sup>18</sup> Te yùhú cùú-í Yáá ní xihí te ní ndoto-í, te vitna ndècu vívù-í, te duca<sup>n</sup>-ni cùndecu-í ñi caa ñi quíhì<sup>n</sup>. Te yùhú cùnùu-í núú nchàa ñáyiu ní xihí te ñu-ni-í cùnùu-í núú ndécũ-yu.

<sup>19</sup> Te chido tnùnì-n nchàa sá ní xiní-n-á<sup>n</sup> ñ<sup>n</sup> núú tütú, ndihì nchaa nàcuáa cùu vitna, ndihì nchaa sá cádá-xí ndèé núú cuáhá<sup>n</sup> núú vèxi-gá.

<sup>20</sup> Te na cächí tñuhu-í xii-ñ nàcuáa quée-xi ndì usá chódíní ní xiní-n yòtni-í xio ndaha cùha-í, ndihì nàcuáa quée-xi ndì usá sá ní cuáha mee-ni ñhú<sup>n</sup> cuáá<sup>n</sup>, sá ndèé dité-xi te yèndodo ñ<sup>n</sup> caa candíl núú dité-xi-á<sup>n</sup>. Te ndì ùsá chódíní-á<sup>n</sup>, xiá<sup>n</sup> cúú-xí sá cútñuní iní-ó sá ndécú ùsá cue téé xĩnu cuechi núú Yá Ndiöxí, te ndì ùsá cue téé-á<sup>n</sup> ndécú-güedè ndì ùsá xichi núú ndécú ñáyiu ndècu ichi Yá Ndiöxí. Te cuendá ndì ùsá sá ndèé dité-xi-á<sup>n</sup>, xiá<sup>n</sup> cúú-xí sá cútñuní iní-ó sá ndécú ùsá xichi ñáyiu ndècu ichi Yá Ndiöxí — duha cächí Yáá cáhá<sup>n</sup>-á<sup>n</sup>.

## 2

*Tñuhu sá cúú-xí ñáyiu xĩndecu ichi Yá Ndiöxí ndécú ñuú Éfesú*

<sup>1</sup> Te ní cachí tucu Yáá cáhá<sup>n</sup>-á<sup>n</sup> xii-í sá chídó tnùnì-í nchaa tñuhu sá vítná cáhá<sup>n</sup>-gá ñ<sup>n</sup> núú tütú, te tendaha-í quíhì<sup>n</sup> ndaha téé xĩnu cuechi núú Yá Ndiöxí ndécú ñuú Éfesú sá cúú-xí cué ñáyiu xĩndecu ichi-gá ndécú ñuú-á<sup>n</sup>, te duha ní cachí-gá: “Yúhú cùú-í Yáá nùndàha úsá chódíní xio ndaha cùha-í, te xica cuu-í núú ndécú ndì usá sá ní cuáha mee-ni ñhú<sup>n</sup> cuáá<sup>n</sup>, sá ndèé dité-xi te yèndodo ñ<sup>n</sup> caa candíl núú dité-xi.

<sup>2</sup> Te yùhú xiní-í nchaa nàcuáa quide nchohó ñáyiu xĩndecu ichi Yá Ndiöxí ndécú ñuú Éfesú, te xiní-í sá òo ndècu ndee-ndo quide chiu<sup>n</sup>-ndo cuendá-gá, te òo quide cahnu iní-ndó ndècu-ndo quide-ndo chiu<sup>n</sup>-gá. Te xiní-í sá ñà túú tñàhí tñàhá iní-ndó nàcuáa quide nchaa ñáyiu ndècu ichi cuehé ichi duha. Te xiní tucu-í sá

xító ndéé-ndó cuè téè cächí sá nǐ tendaha-ǐ véxi cǎhá<sup>n</sup> tnúhu-í te ñǎ ndǎá sá cǎhá<sup>n</sup>-güedé tnúhu-í, te duca<sup>n</sup> te cùtnuní ini-ndó sǎ ñǎ ndǎá sá cǎhá<sup>n</sup>-güedé tnúhu-í.

<sup>3</sup> Te xini tucu-í sá ǐo ndòho-ndo guide-ndo chiu<sup>n</sup> cuendá-í, te duca<sup>n</sup> ǐo guide cahnu ini-ndó cuèi nándi yǎha-ndo, te ñǎ túú cùu dusa<sup>n</sup>-ndo guide-ndo chiu<sup>n</sup>-á<sup>n</sup>.

<sup>4</sup> Dico ñǎ túú cùu váha ini-í chi nchòhó ñǎ túú-gǎ quidé-ndó dàtná ní xóo cada-ndo cùtnáhá vitna cùu vii-ni ní sándáá ini ñáhá-ndó xii-í, chi vitna ñǎ túú-gǎ cúu ini ñáhá vihi-ndo datná ní xóo cada-ndo dàvá-á<sup>n</sup>.

<sup>5</sup> Te chí dǎndacu ini nǎcuáa ní xóo cada-ndo cùtnáhá vitna cùu saa ní sándáá ini ñáhá-ndó xii-í, te ndixi cuèchi ini-ndó sǎ ñǎ túú-gǎ quidé váha-ndo ndècu-ndo vitna, te nucuíta saa tùcu-ndo cada-ndo datná ní xóo cada-ndo ndéé díhna. Te nchòhó cada ini-ndó sǎ ndécú ndih-ndo ǐ<sup>n</sup> sá ní cuáha mee-ni díhú<sup>n</sup> cuáá<sup>n</sup>, sá ndéé dité-xi te yǐndodo ǐ<sup>n</sup> caa candíl núú dité-xi. Te núu vá ndíxí cuèchi ini-ndó nǎcuáa quide-ndo ndecu-ndo ñǎ, te quixi-í xocàni-í xiǎ<sup>n</sup>, te duca<sup>n</sup> sǎtnahá-xi cada ñaha-ǐ xii-ndo te núu vá ndíxí cuèchi ini-ndó nǎcuáa quide-ndo ndecu-ndo, te duca<sup>n</sup> te vá yǒo-gǎ nàtacá chiñuhu ñaha xii-í ñúú-ndó.

<sup>6</sup> Dico quide váha-ndo ǐ<sup>n</sup> xichi chi dàquee tíhú-ndó nchàa sá quidé cuè ñáyiú cùu nicolaitás, te yúhú tnáhá-í dáquèe tíhú-í nchaa sá quidé ñáyiú-á<sup>n</sup>.

<sup>7</sup> Te nchòhó cada cuendá váha-ndo nǎcuáa xǎha<sup>n</sup>-ǐ xii Espíritú Yǎ Ndiǒxí xǎha<sup>n</sup>-xi xii cue ñáyiú ndècu ichi-gǎ xǐndecu nchaa xichi. Te duha ndùu tnúhu xǎha<sup>n</sup>-ǐ xii Espíritú-gǎ xǎha<sup>n</sup>-xi xii-yu: Cúñaha-n xii nchaa ñáyiú sá nùu na càda ndee ini-yu yáha-yu nándi sá ná yǎha-yu sá cuendá-í, te yúhú cada-í te nduu táhú-yu cundecu váha-yu núú ndécú Yǎ Ndiǒxí, duha xǎha<sup>n</sup>-ǐ xii Espíritú-gǎ cúu-xi ñáyiú”, duha cächí Yaá cǎhá<sup>n</sup>-á<sup>n</sup>. Te nchaa tnúhu-á<sup>n</sup> nǐ chídó tnùn-í sá cúu-xí ñáyiú xǐndecu ichi Yǎ Ndiǒxí ndécú ñúú Éfesú.

*Tnúhu sá cúu-xí ñáyiú xǐndecu ichi Yǎ*

*Ndiǒxí ndécú ñúú Èsmirná*

<sup>8</sup> Te ní cachí tucu Yaá cǎhá<sup>n</sup>-á<sup>n</sup> xii-í sá chídó tnùn-í nchaa tnúhu sá vitná cǎhá<sup>n</sup>-gǎ ǐ<sup>n</sup> núú tütú, te tendaha-ǐ quíhí<sup>n</sup> ndaha téè xinu cuechi núú Yǎ Ndiǒxí ndécú ñúú Èsmirná sá cúu-xí cuè ñáyiú xǐndecu ichi-gǎ ndécú ñúú-á<sup>n</sup>, te duha cächí-gǎ: “Yúhú ndécú-í ndéé cùtnáhá ní ngáva ñuyúú, te ðiu-ni-í cundecu-í ndéé ná sǎá nduu nǎa-xi ndih- nchaa sá ǐo, te ðiu-ni-í ní xihí te ní ndoto-í ndécú-í vitna.

<sup>9</sup> Te yúhú xini-í nchaa nǎcuáa quide nchòhó ñáyiú ndècu ichi Yǎ Ndiǒxí ndécú ñúú Èsmirná. Te xini-í sá ǐo ndòho-ndo ndecu-ndo sá cuendá-í, te xini tucu-í sá ǐo ndáhú-ndó dico cùu-ndo ñáyiú xǐndecu váha núú Yǎ Ndiǒxí. Te xini tucu-í sá ǐo cǎhá<sup>n</sup> cuèhé ñáyiú isráel cuendá-ndó, dico ñǎ túú quidé-yu nǎcuáa tàú-yu cada-yu sá cúu-yu ñáyiú isráel, chi cúu-yu ñáyiú xinu cuechi mee-ni núú sǎcuíhna.

<sup>10</sup> Dico nchòhó vá yúhú-ndó cuèi nándi cùu nchaa sá ná ndòho-ndo cuendá-í, chi sǎcuíhna cada-xi te ngava dava-ndo vécaá, te duca<sup>n</sup> càda-xi chi cuíni-xi coto ndéé ñáhá-xí xii-ndo núu ndisa sá vá ná túhú ini-ndó sǎ nchícú<sup>n</sup> nihnu-ndo ichi Yǎ Ndiǒxí. Te ndòho-ndo úxí nduu dico vá dáñá ndéé-ndó cǎnchicú<sup>n</sup> nihnu-ni-ndo ichi-gǎ cuèi na cúu-ndó sǎ cuendá-gǎ, te yúhú cada-í te nduu táhú-ndó cundecu-ndo ndih-gǎ ní caa ní quíhí<sup>n</sup>.

<sup>11</sup> Te nchaa nchòhó cada cuendá váha-ndo nǎcuáa xǎha<sup>n</sup>-ǐ xii Espíritú Yǎ Ndiǒxí xǎha<sup>n</sup>-xi xii cue ñáyiú ndècu ichi-gǎ xǐndecu nchaa xichi, te duha ndùu tnúhu xǎha<sup>n</sup>-ǐ xii Espíritú-gǎ xǎha<sup>n</sup>-xi xii-yu: Cúñaha-n xii nchaa ñáyiú sá nùu na cùndee ini-yu yáha-yu nándi sá ná yǎha-yu sá cuendá-í te vá cuíta nihnú-yu na sǎá nduu cuíta nihnu nchaa dava-gǎ ñáyiú, duha xǎha<sup>n</sup>-ǐ xii Espíritú-gǎ cúu-xi ñáyiú”, duha ní cachí Yaá cǎhá<sup>n</sup>-á<sup>n</sup>. Te nchaa tnúhu-á<sup>n</sup> nǐ chídó tnùn-í sá cúu-xí ñáyiú xǐndecu ichi Yǎ Ndiǒxí ndécú ñúú Èsmirná.

*Tnúhu sá cúu-xí ñáyiú xǐndecu ichi Yǎ Ndiǒxí ndécú ñúú Pèrgamú*



21 Te ní cuu vâi nduu ta dacaca-í ndécú-á<sup>n</sup> cuendá ndixi cuéchi iní-a<sup>n</sup> sá ñà túú quide váha-a<sup>n</sup> ndècu-a<sup>n</sup>, te cuèi duca<sup>n</sup> quide-í dico ñá túú cuini-a<sup>n</sup> dañ-a<sup>n</sup> ni ñ<sup>n</sup> sá cuèhé sá dúhá quide-a<sup>n</sup>.

22 Te vitna yúhú ío dandòho-í-a<sup>n</sup> chi tñi ñaha cuèhé xii-a<sup>n</sup>, te diu-ni duca<sup>n</sup> ío dandòho-í nchaa ñáyiú quide datná quidé-á<sup>n</sup> te núu vá ndíxí cuéchi iní-yu sá ñà túú quide váha-yu ndécú-yu, te dàñá-yu nchaa sá cuèhé sá dúhá quidé-yu.

23 Te nchaa ñáyiú cùndihi ñaha xii ñaha-á<sup>n</sup> cahni-í-yu, te duca<sup>n</sup> te nchòhó ndihi dava-gá nchaa ñáyiú xíndecu ichi Yá Ndiòxí ndécú nchaa xichi cut-nuní iní-ndó ndihí-yu sá yúhú cúu-í Yá xini ndáá nchaa nàcuáa sàni iní ñáyiú, ndihi nchaa nàcuáa quide-xi iní-yu. Te nchòhó nàcuáa ndùu sá quidé-ndó ñ<sup>n</sup> ñ<sup>n</sup>-ndo te duca<sup>n</sup> cùnduu sá táxi-í nduu táhú-ndó.

24 Te dava nchòhó ñáyiú ndècu ñuu Tiàtirá, ñáyiú ñá túú nchìcú<sup>n</sup> nihnu nàcuáa dānehé ñáhá ñaha nani Jez-abél-á<sup>n</sup> ñà túú xini-ndó ñá cúú sá càchí ñáyiú ndùu yuhu dachahu iní ñáhá yùcu ñávaha. Te nchòhó, ñá túú ñágá cachí tñuhu-í xii-ndo càda-ndo

25 diu-ná sá ío nducu ndèe-ndo cada-ndo nchaa nacuaá càhá<sup>n</sup> tñuhu sá ndécú ndihi-ndo, te duca<sup>n</sup>-ni càda-ndo ndéé òré quixi tucu-í.

26 Te nchaa nchòhó ñáyiú na càda ndee iní yáha nāndi sá ná yáha sá cuendá-í, te núu na càda-ni-ndo nchaa nacuaá cuini-í cada-ndo ndéé nduu vá cùndècu-gá-ndó ñùyíú-a, te yúhú taxi-í tñuhu ndee iní xii-ndo sá táxi tñuni-ndó nchaa ñáyiú ñuyíú

27 datná ní quide mee Tātà-í Dútú Ndiòxí ní taxi-gá tñuhu ndee iní ndécú ndihi-í, te duca<sup>n</sup> càda ñaha-í xii-ndo taxi-í tñuhu ndee iní xii-ndo cuendá ío taxi tñuni-ndó, te cada iní-ndó sá cáda-ndó cuè ñáyiú datná quidé-xi ñ<sup>n</sup> quidi òré tàhú-xi càchi duu<sup>n</sup>-xi, te duca<sup>n</sup> chi nchòhó cada-ndo sá ncháá ñáyiú ñá túú quide váha cuíta ni-hnú-yu.

28 Te cada iní-ndó sá datná dáyèhé chódini quití quène oré sa ta

tūndaá-ñá cuáhá<sup>n</sup> duca<sup>n</sup> càda-xi oré ná sáá nduu ngūita-xi cada váha-xi, te duca<sup>n</sup> chi yúhú cada-í nàcuáa nduu táhú-ndó cùndecu ndihi ñaha-ndo xii-í núú ío váha càa ndecu-í.

29 Te nchaa nchòhó cada cuendá váha-ndo nàcuáa xāha<sup>n</sup>-í xii Espiritú Yá Ndiòxí xāha<sup>n</sup>-xi xii cue ñáyiú ndècu ichi-gá xíndecu nchaa xichi”, duha càchí Yá càhá<sup>n</sup>-á<sup>n</sup>. Te nchaa tñuhu-á<sup>n</sup> ñí chídó tñuni-í sá cúu-xi ñáyiú xíndecu ichi Yá Ndiòxí ndécú ñuu Tiàtirá.

### 3

#### *Tñuhu sá cúu-xi ñáyiú xíndecu ichi Yá Ndiòxí ndécú ñuu Sárdís*

1 Te ní cachí tucu Yá càhá<sup>n</sup>-á<sup>n</sup> xii-í sá chídó tñuni-í nchaa tñuhu sá vitná càhá<sup>n</sup>-gá ñ<sup>n</sup> núú tütú, te tendaha-í quihí<sup>n</sup> ndaha té xinu cuechi núú Yá Ndiòxí ndécú ñuu Sárdís sá cúu-xi cuè ñáyiú xíndecu ichi-gá ndécú ñuu-á<sup>n</sup> te duha càchí-gá: “Yúhú cúu-í Yá ndécú ndihi ndi usá espíritú cúu cuendá Yá Ndiòxí, te diu-ni-í cúu-í Yá ndécú ndihi ndi usá chódini. Te yúhú xini-í nchaa nàcuáa quide nchòhó ñáyiú xíndecu ichi Yá Ndiòxí ndécú ñuu Sárdís, te xini-í sá cúu-ndó datná ñáyiú ní xihí cuèi càchí ñáyiú sá ñáhá.

2 Te chí cuāha cuendá nàcuáa quide-ndo ndecu-ndo vitna, te nducu ndèe-ndo cada-ndo ñ<sup>n</sup> úu-gá nchaa sá vāha nchìcú<sup>n</sup> nihnu-ndo vitna, chi sa ndètu vii-ñá dañ-ndo nchaa-ndi túhú sá vāha quide-ndo ni cuu, te quide cuendá-í sá ñà túú quide-ndo nchaa nacuaá cuini Yá Ndiòxí cada-ndo.

3 Te chí dāndacu iní nàcuáa càhá<sup>n</sup> tñuhu sá ñí xíndedòho-ndo cūtnāhá ní tuha-ndo ichi Yá Ndiòxí, te can-chicú<sup>n</sup> nihnu-ndo càda-ndo nacuaá càhá<sup>n</sup> tñuhu-á<sup>n</sup>, te ndixi cuéchi iní-ndó sá ñà túú quide váha-ndo ndècu-ndo, te núu vá nàcuāha-ndo cuendá nàcuáa quide-ndo ndecu-ndo ña, te cada-í datná quidé ñādúhú, chi òré ñá túú ñá yihí iní-ndó quèxio-í núú ndécú-ndó.

4 Dico ndècu ndihi-ndo ñ<sup>n</sup> úu ñáyiú càndoo caa nine iní-xi, chi ñáyiú-á<sup>n</sup> ñí nduu táhū-yu cuihnú-yu dóó cuixí<sup>n</sup> cuendá cundecu ndihi-í-yu, te duca<sup>n</sup> chi cùdiú-yu núu-í.



5 Te nchaa ñáyiú na càda ndee iní-xi yáha nándi sá ná yáha sá cuendá-í, te ñáyiú-án nduu táhú-yu cuihnú-yu dóo cuixí<sup>n</sup>, te vá náquète-í dñú-yu núú tütú núú yódó tnùní cue ñáyiú ní nduu táhú cundecu ndihí-í ni caa ni quíhí<sup>n</sup>, te cúñaha-í xii Tàtà-í Dútú Ndiöxí ndihí cue espíritú xínú cuèchi núú-í sá ñáyiú-án cúú-yu ñáyiú cùu cuendá-í.

6 Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiöxí xáha<sup>n</sup>-xi xii cue ñáyiú ndècu ichi-gá xñdecu nchaa xichi”, duha càchí Yaá càhá<sup>n</sup>-án. Te nchaa tnúhu-án ni chídó tnùní-í sá cúú-xí ñáyiú xñdecu ichi Yá Ndiöxí ndécú ñúú Sárdís.

*Tnúhu sá cúú-xí cuè ñáyiú xñdecu ichi Yá Ndiöxí ndécú ñúú Filàdelfiá*

7 Te ní cachí tucu Yaá càhá<sup>n</sup>-án xii-í sá chídó tnùní-í nchaa tnúhu sá vítná càhá<sup>n</sup>-gá ñúú tütú, te tendaha-í quíhí<sup>n</sup> ndaha téé xínu cuechi núú Yá Ndiöxí ndécú ñúú Filàdelfiá sá cúú-xí cuè ñáyiú xñdecu ichi-gá ndécú ñúú-án, te duha càchí-gá: “Yúhú cúú-í Yaá ío váha quide ndáá te ñá túú tnàhí cuèchi-í. Te díhna-gá ndíi Dàvíí ní taxi tnùní ndíi ñáyiú, te vitna yúhú táxi tnùní-í-yu, te yúhú càhá<sup>n</sup>-í te núu ndëndida cà ñáyiú ndíhu ndaha-í te ndëndida cà ñáyiú vá ndíhu ndaha-í.

8 Te yúhú xíní-í nchaa nàcuáa quide nchòhó ñáyiú xñdecu ichi Yá Ndiöxí ndécú ñúú Filàdelfiá, te yúhú ní quide-í nàcuáa ní níhí-ndó ñúú ichi cahnu quide-ndo chiu<sup>n</sup>-í, te vá yõ ñúú cada nàcuáa vá níhí-gá-ndó nàcuáa cada-ndo chiu<sup>n</sup>-í. Te cuèi ñá túú ío níhí ndéé-ndó cundecu-ndo ichi Yá Ndiöxí dico tnñ-ndo nchaa tnúhu càhá<sup>n</sup>-í, te ní ñúú xito ñá túú càhá<sup>n</sup>-ndó sá ñá túú ndècu ndihí ñaha-ndo xii-í.

9 Te nchaa ñáyiú quide nchaa nàcuáa cuení yucu ñáváha, ñáyiú-án cúú-yu ñáyiú isràél, te cuèi cúú-yu ñáyiú isràél dico ñá túú quidé-yu nàcuáa tàú-yu cadá-yu, te yúhú cada-í sá ncháá ñáyiú-án canehé-yu sá yíñùhu núú-ndó, te cutnùní iní-yu sá yúhú ío cùu iní ñáhà-í xii-ndo.

10 Te ío quide ndee-ni iní-ndó nchícú<sup>n</sup> nihnu-ndo quide-ndo nchaa nàcuáa ní càhá<sup>n</sup>-í, te xíá<sup>n</sup> coto ñaha-í xii-ndo ñá túú nã tnahá-ndó ndùu na quixi nchaa tnúndòho tnúhu ndàhú ñuyúú-a. Te òré quexìo nchaa tnúndòho-án ñuyúú-a te dàvá-án cutnùní nàcuáa ndùu sá quidé ñúú ñáyiú.

11 Te ío ndíhí quixi tucu-í. Te vá dáñá ndèé-ndó càda-ndo nchaa sá váha nchícú<sup>n</sup> nihnu-ndo quide-ndo cuendá sá vã cuíta sá ní cachí Yá Ndiöxí nduu táhú-ndó.

12 Te nchaa nchòhó ñáyiú na càda ndee iní yáha nándi sá ná yáha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tàtà-í Dútú Ndiöxí, te vá ñúú ndùu-gá xocuiñí-ndó núú ndécú-gá. Te cada iní-ndó sã dàtná sá chídó tnùní-í diu Tàtà-í Dútú Ndiöxí ññ-ndo chi duca<sup>n</sup>-ni cundecu-ndo ndihí-gá, te cada tucu iní-ndó sã dàtná sá chídó tnùní-í nàcuáa nàni ñúú-gá ññ-ndo, chi diu ñúú-gá-án cundecu-ndo, te ñúú-án nání-xí Jèrusalén Sáá, duha nàni ñúú-gá. Te ñúú-án quee-xi andíu núú ndécú Yá Ndiöxí Yaá cúú Tàtà-í quèe-xi ñuyúú. Te cada tucu iní-ndó sã dàtná sá chídó tnùní-í diu mee-í ññ-ndo, te xíá<sup>n</sup> cúú-xí ñúú diu saa, te duca<sup>n</sup> càda iní-ndó chi cundecu ndihí ñaha-ndo xii-í.

13 Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiöxí xáha<sup>n</sup>-xi xii cue ñáyiú ndècu ichi-gá xñdecu nchaa xichi”, duha càchí Yaá càhá<sup>n</sup>-án. Te nchaa tnúhu-án ni chídó tnùní-í sá cúú-xí ñáyiú xñdecu ichi Yá Ndiöxí ndécú ñúú Filàdelfiá.

*Tnúhu sá cúú-xí ñáyiú xñdecu ichi Yá Ndiöxí ndécú ñúú Laodiceá*

14 Te càchí tucu Yaá càhá<sup>n</sup>-án xii-í sá chídó tnùní-í nchaa tnúhu sá vítná càhá<sup>n</sup>-gá ñúú tütú, te tendaha-í quíhí<sup>n</sup> ndaha téé xínu cuechi núú Yá Ndiöxí ndécú ñúú Laodiceá sá cúú-xí cuè ñáyiú xñdecu ichi-gá ndécú ñúú-án, te duha càchí-gá: “Yúhú cúú-í Yaá quidé núú Yá Ndiöxí, te cùu-í Yaá quidé ndáá chi càhá<sup>n</sup> ndáá cuítí-í nàcuáa càhá<sup>n</sup> Yá Ndiöxí. Te yúhú cúú-í

Yaá ní quide ní ngúndecu nchaa sá ní cadúha Yá Ndiõxí.

<sup>15</sup> Te yúhú xìní-í nchaa nàcuáa quide nchohó ñáyíu xíndecu ichi Yá Ndiõxí ndécú ñùú Laodiceá, te xìní-í sá ñà túú cuìní-ndó cànchicú<sup>n</sup> nihnu-ndo nchàa nacuáa càhá<sup>n</sup>-í, te ni ñà túú cuìní-ndó dàña duu<sup>n</sup>-ndo. Te váha-gá sá dúú<sup>n</sup> dùu<sup>n</sup> cada-ndo nchaa nacuáa càhá<sup>n</sup>-í àdi núu ñáhá te duu<sup>n</sup> duu<sup>n</sup> daña-ndo.

<sup>16</sup> Te sá dúcá<sup>n</sup> quide-ndo ñá túú cuìní-ndó dùu<sup>n</sup> duu<sup>n</sup>-ni cada-ndo nàcuáa càhá<sup>n</sup>-í, te ni ñà túú cuìní-ndó dùu<sup>n</sup> duu<sup>n</sup>-ni daña-ndo te sáá nduu vǎ cúndèe-gá iní-í cuendá nchaa sá quidé-ndó-ǎ<sup>n</sup>, te daquèe tíhú ñáhà-í xii-ndo.

<sup>17</sup> Te càchí-ndó sǎ cuícá-ndó, te ío váha ta yǎha-ndo nchàa nduu cuáhá<sup>n</sup>, te ñá túú tnahí ná cúmǎní xii-ndo, te ñá túú cùtnuní iní-ndó sǎ cúú-ndó dàtná cue ñáyíu ío ndàhú yǎha, te cùu-ndo datná ñáyíu ndàhú, ñáyíu ío cùndahú iní ñáhá tnahá ñáyíu-xi, te cùu-ndo datná cue ñáyíu cuáá, te cùu tucu-ndo datná cue ñáyíu ndàhú ñá túú tnahí dóó-xi.

<sup>18</sup> Te na càchí tnúhu-í xii-ndo sǎ cadá-ndó dàtná xíquide cue ñáyíu sàa<sup>n</sup> ñ<sup>n</sup> sá ñí cuáha mee-ni dǐhú<sup>n</sup> cuáa<sup>n</sup> sá ío váha càa, te duca<sup>n</sup> quidé-yu te ío-gá cúú cuicá-yu. Te cada tucu-ndo dàtná xíquide cue ñáyíu sàa<sup>n</sup> dóó cuixí<sup>n</sup> sácuíhnu-yu cuendá sá vǎ cúú-yu dàtná ñáyíu ndàhú ñá túú dóó-xi, te cada tucu-ndo dàtná quidé cuè ñáyíu sàa<sup>n</sup> yúcu quèe núú-xi nàcuáa cutnùní váha núú-yu, te duha càhá<sup>n</sup>-í xǎha<sup>n</sup>-í xii-ndo chi cuìní-í sá nàtuha ñaha-ndo xii-í, te ío váha cundecu-ndo sǎ cúú-xí Yá Ndiõxí.

<sup>19</sup> Te càhá<sup>n</sup>-í dóho nchaa ñáyíu cùu iní-í òré ñá túú quide ndáá-yu, te dándoho-í-yu, núu xǎ<sup>n</sup> cuìní-í sá nchòhó ndixi cuèchi iní-ndó sǎ ñà túú quide váha-ndo ndècu-ndo.

<sup>20</sup> Te na càchí tnúhu-í xii-ndo sǎ yúhú cúú-í dàtná ñ<sup>n</sup> tée nùtní<sup>n</sup> yuyèhe ndaa quehé te càhá<sup>n</sup>-í ñáyíu yìhi xití vehe, te núu na càda cuendá-yu sá càhá<sup>n</sup>-í te nacaá<sup>n</sup>-yu yuyèhe te quíhu-í xití vehe cudìni-í ndihí-yu, te duha càhá<sup>n</sup>-í chi cuìní-í cundecu ndihí

ñaha-í xii-ndo.

<sup>21</sup> Te nchaa nchòhó ñáyíu na càda ndee iní-xi yáha nándi sá ná yǎha sá cuendá-í, te yúhú taxi-í xii-ndo ñ<sup>n</sup> xichi núú ndécú-í cundecu-ndo te cunuu-ndo tnahá-ndó dàtná cùnùu-í, chi yúhú duca<sup>n</sup> ñí quide ndee iní-í ní yáha-í nándi sá ñí yáha-í te vitna ní nduu táhù-í ndécú-í núú ndécú Tàtá-í Dútú Ndiõxí cùnùu-í.

<sup>22</sup> Te nchaa nchòhó cada cuendá váha-ndo nàcuáa càhá<sup>n</sup> Espiritú Yá Ndiõxí xǎha<sup>n</sup>-xi xii cue ñáyíu ndècu ichi-gá xíndecu nchaa xichi<sup>n</sup>, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> ñí chídó tnùní-í sá cúú-xí ñáyíu xíndecu ichi Yá Ndiõxí ndécú ñùú Laodiceá.

## 4

*Nàcuáa chìñuhu ñáyíu Yá Ndiõxí andíu*

<sup>1</sup> Te sátá ñí yáha duca<sup>n</sup> ñí cuu te ní xìní-í nchí andíu, te ní càhá<sup>n</sup> tucu Yaá ní càhá<sup>n</sup> ndihí ñaha xii-í díhna, te Yaá-á<sup>n</sup> ñí càhá<sup>n</sup> níhi-gá dàtná càhá<sup>n</sup> níhi ñ<sup>n</sup> cútú, te ní cachí-gá xii-í:

—Taqùene iha te na dànehé ñáhà-í xii-n nchàa nacuáa cada-xi ndéé núu cuáhá<sup>n</sup> núú véxi —càchí-gá.

<sup>2</sup> Te òré-ni-á<sup>n</sup> ñí quide ñaha tucu Espiritú Yá Ndiõxí xii-í nàcuáa càchí iní-xi, te diu-ni òré-á<sup>n</sup> ñí xìní-í nùtní<sup>n</sup> ñ<sup>n</sup> xilé váha andíu te càa datná cáá xilé sáccò nchíhi cue ñáyíu ío cùnùu, te núú xilé váha-á<sup>n</sup> núcò Yaá táxí tnùní.

<sup>3</sup> Te Yaá-á<sup>n</sup> cáá-gǎ dàtná cáá yúú chàhchí yúú váha sá nání jǎspé, te càa tucu-gá dàtná cáá yúú váha sá nání còrnalíná, te ñùhu doco ñaha ñ<sup>n</sup> có yáhchí xii-gá, te tǎsa<sup>n</sup>-dì dàtná tǎsa<sup>n</sup> ñ<sup>n</sup> yúú váha sá nání èsmeraldá.

<sup>4</sup> Te ní xini tucu-í nùtní<sup>n</sup> ócó cúmí xilé váha ñí càndéé núú núcò-gá, te núú xilé-á<sup>n</sup> xínucòó ócó cúmí cue tée cùu sacuéhé te xíxíhnu-güedé mee-ni dóó cuixí<sup>n</sup>, te ñ<sup>n</sup> caa coróná sá ñí cuáha mee-ni dǐhú<sup>n</sup> cuáa<sup>n</sup> xǐxúhu<sup>n</sup> díquí-güedé.

<sup>5</sup> Te núú núcò Yaá táxí tnùní-á<sup>n</sup> sáa nduté, te càhá<sup>n</sup> ñùhu te xica chíhi-xi dóndaha, te cǎyú úsá ití núú núcò-gá, te sá úsá ití-á<sup>n</sup> xǎ<sup>n</sup> cùtnùní sá ndécú úsá espíritú cúú cuendá-gá.

<sup>6</sup> Te ndècu ìí<sup>n</sup> sá ndécú ndàa núú-gǎ te xǎ<sup>n</sup> cáá dàtná cáá làmár, te dàtná cáá vǐdriú cáá ñìhí.

Te ñi càndéé dǐñi Yaa núcǔo-á<sup>n</sup> xǐnutnǐ<sup>n</sup> cúmí quitì te tǐtní vǐhí tǐnuu-güedi ndeé ndàa sátá-güedi ndihì ndàa núú-güedi.

<sup>7</sup> Te quitì dǐhna nuu càa-di datná cáá ndìcaha, te quitì cùu uú cáá-dí dàtná cáá ndìcutu, te quitì cùu uní néhé-dí nǔú tǔe, te quitì cùu cúmí cáá-dí dàtná cáá yàcolo oré cuáhá<sup>n</sup>-di núú tàchí.

<sup>8</sup> Te ndi cúmí quitì-á<sup>n</sup> ndèé ìñú ndíxí<sup>n</sup>-güedi ìí<sup>n</sup> ìí<sup>n</sup>-güedi, te ñihí xítí ndíxí<sup>n</sup>-güedi ndihì ndàa sátá ndíxí<sup>n</sup>-güedi ndèé tǐnuu-güedi, te nduu niú chíñùhu-güedi Yá Ndiǒxí, te xǎha<sup>n</sup>-güedi xii-gá:

Yòhó Dútú Ndiǒxí duca<sup>n</sup>-ni ta quǐde ndáá-n vǔxi, te duca<sup>n</sup>-ni quǐde ndáá-n cuéi vitna, te ñiu-ni duca<sup>n</sup> càda ndáá-n nǔú cuáhá<sup>n</sup> nǔú vǔxi,

te cùu-n Yaa quǐdé nchàa-ndi túhú sá vǎha,

te ñiu-ni-n sà ndecu-n ndéé cútnàhá ní cuáha ñuyíú,

te ñiu-ni-n ndècu-n cuéi vitna, te ñiu-ni-n cùndecu-n cuéi ndéé nǔú cuáhá<sup>n</sup> nǔú vǔxi.

Duha xǎha<sup>n</sup> cué quitì-á<sup>n</sup> xii Yaa núcǔo nǔú xilé váha-á<sup>n</sup> chíñùhu ñaha-güedi.

<sup>9</sup> Te cue quitì-á<sup>n</sup> ìo ndàcá<sup>n</sup> táhú-güedi núú Yaa núcǔo nǔú xilé váha-á<sup>n</sup> cuèndá nchaa sá quǐdé-gǎ. Te Yaa-á<sup>n</sup> cúú-gǎ Yaa ndécú nchàa nduu nchaa quíú. Te cue quitì-á<sup>n</sup> càchí-güedi sá ìo càhnu cuu-gá te nèhe-güedi sá yǐñùhu núú-gǎ. Te ndi tnahá òré duca<sup>n</sup> càhá<sup>n</sup>-güedi,

<sup>10</sup> te ndi òcò cúmí cue tée cùu sacuéhé xǐnucóo-á<sup>n</sup> ngüìñi xítí-güedé núú Yaa núcǔo-á<sup>n</sup>, chí ñiu-gá cúú-gǎ Yaa ndécú nchàa nduu nchaa quíú te chíñùhu ñaha-güedé xii-gá, te tàva-güedé coróná ñuhú dǐquí-güedé te tàxi ndecu-güedé núú-gǎ, te xǎha<sup>n</sup>-güedé xii-gá:

<sup>11</sup> Yòhó cúú-n Dútú Ndiǒxí Yaa cúú cuèndá ñáhá xii-ndí, te ìo càhnu cuu-n, te ìo váha quǐde-n,

te nèhe-ndí sá yǐñùhu núú-n, chí duca<sup>n</sup> tàú-xi cada-ndí, chí yòhó cúú-n Yaa ní cadúha nchaandi túhú sá ìo, te duca<sup>n</sup> ñi ngúndecu nchaa xǎ<sup>n</sup> chí mee-n dùca<sup>n</sup> ní sani iní-n càda-n.

## 5

*Cuèndá Yaa cáá dàtná cáá ìí<sup>n</sup> mbéé quitì ní dánicuéhé-güedé ndihì cuèndá ìí<sup>n</sup> tutú*

<sup>1</sup> Te ní xini tucu-í sá Yaa núcǔo nǔú xilé váha-á<sup>n</sup> núndàha-gá ìí<sup>n</sup> tutú ní nacaúnuu xio ndaha cùha-gá, te ndèé lètrá ndàa sátá-xi ndihì ndàa xítí-xi, te úsá tnahá tutú líhli ñùhu seyú ndèé sátá tütú-á<sup>n</sup> cuèndá sá vǎ dáñá-xí nàcaá.

<sup>2</sup> Te ní xini-í ìí<sup>n</sup> espíritú xínú cuèchi núú Yá Ndiǒxí, te ndee vǐhi-xi te níhi càhá<sup>n</sup>-xi, te càchí-xi:

—¿Yoo tàú-xi xocàni nchaa tutú líhli ñùhu seyú ndèé sátá tütú-a te nadacàa-xi? —càchí espíritú-á<sup>n</sup>.

<sup>3</sup> Dico ni àndiu, te ni nǔú ñùyíú-a, te ni ndàa xítí ñuhu ñá túú ìí<sup>n</sup> ñáyiu tàú-xi nadacàa tutú-á<sup>n</sup> te cundèhé-yu.

<sup>4</sup> Te yúhú ní ngüita-í ndàhyú vǐhi-í cuèndá sá ñà túú ñi ìí<sup>n</sup> ñáyiu tàú-xi nadacàa tutú-á<sup>n</sup> cundèhé-yu.

<sup>5</sup> Te ìí<sup>n</sup> cue tée cùu sacuéhé xǐnucóo xǎ<sup>n</sup> ñi cachí-güedé xii-í:

—Vá ndàhyú-gá-n, te cada cuèndá-n chí Yaa ìo cùnuu cuu ndi mee cue ñáyiu cùu ñani tnahá ndi Judá, ñiu-ni Yaa cúú ñani tnahá ndi Daví, Yaa-á<sup>n</sup> cúú-gǎ Yaa ní ndacu ní yáha nchaa nándi sá ñi yáha, núu xǎ<sup>n</sup> ñiu-gá tàú-gá xocàni-gá nchaa tutú líhli ñùhu seyú ndèé sátá tütú-á<sup>n</sup> te nadacàa-gá —duha càchí tée cùu sacuéhé-á<sup>n</sup>.

<sup>6</sup> Te tnuú ndi òcò cúmí cue tée cùu sacuéhé xǐnucóo-á<sup>n</sup>, ndihì tnuú ndi cúmí quitì xǐnutnǐ-á<sup>n</sup>, ndihì núú núcǔo Yaa táxi tñuní-á<sup>n</sup> ñi xini-í nǔtnǐ ìí<sup>n</sup> Yaa cáá dàtná cáá ìí<sup>n</sup> mbéé quitì ní dánicuéhé-güedé te ní xihí-di ñi cùu te ní ndoto-di, te ndèé úsá ndiqui-di, te ndèé úsá tǐnuu-di, te sá úsá tǐnuu-di-á<sup>n</sup> cútnùní sá ndécú úsá espíritú cúú cuèndá Yá Ndiǒxí, duca<sup>n</sup> càa Yaa-á<sup>n</sup>

nǐ xiní-í. Te cue espíritú-án nǐ ten-  
daha-gǎ xíca cùu-xi ni caa xico ñuyíu.

<sup>7</sup> Te Yaá cáá dàtná cáá ñ<sup>n</sup> mbéé quití  
ní dánícuèhé-güedé-án nǐ sáhá<sup>n</sup>-gá  
núú Yáá núcõo núú xilé váha-án.

<sup>8</sup> Te òré ní quehe<sup>n</sup>-gá tutú-án  
te ndi cùmí quití xǐnutnǐí xía<sup>n</sup> nǐ  
ngüíñí xítí-güedi núú-gǎ, te duca<sup>n</sup>  
nǐ ngüíñí xítí tucu ndi ócò cùmí cue  
téé cùu sacuéhé xǐnucóo-án, te ndi  
dí<sup>n</sup> núú-güedé xǐnehe-güedé yaá sá  
nání àrpá, te xǐnehe tucu-güedé ndí  
dí<sup>n</sup> núú-güedé ñ<sup>n</sup> caa tǐcùú ní cuáha  
mee-ni díhú<sup>n</sup> cuáá<sup>n</sup>, te chitu dǔsa  
sá sáhá<sup>n</sup> tnámí. Te ñúhmá dǔsa sá  
sáhá<sup>n</sup> tnámí-án cúu-xí dàtná nchaa  
tnúhu càhá<sup>n</sup> nchaa ñáyíu ndècu ichi Yá  
Ndiõxí òré càhá<sup>n</sup> ndihí ñàhá-yu xii-gá.

<sup>9</sup> Te xíta-güedé ñ<sup>n</sup> ndudú sáá ndihí  
cue quití-án chíñùhu ñaha-güedé  
xii-gá, te cächí-güedé ndihí cue  
quití-án:

Yòhó tàú-n quèhe<sup>n</sup>-n tutú-a te  
xocani-n nchaa tutú lǐhli ñùhu  
seyú ndéé sátá-xi,

chi yòhó ní sati níñí-n te ní xíhí-n,  
te cuèndá xǐá<sup>n</sup> ní nduu cuèndá Yá  
Ndiõxí cue ñáyíu ñ<sup>n</sup> ñ<sup>n</sup> nació<sup>n</sup>,  
ndihí ñáyíu xǐndecu ñ<sup>n</sup> ñ<sup>n</sup> ñuú,  
ndihí ñáyíu càhá<sup>n</sup> ndí dí<sup>n</sup> ndí  
dí<sup>n</sup> núú tnúhu, ndihí ñáyíu  
xǐndecu ñ<sup>n</sup> ñ<sup>n</sup> xichi.

<sup>10</sup> Te ní quidè-n-yu dàtná cue téé  
yǐndaha ñáyíu, te ní quide  
túcú-n-yu dàtná cue dútú sǎ  
cúu-xí Yá Ndiõxí.

Te sáá nduu te taxi tnùní-yu ñuyíu-a.  
Duha càhá<sup>n</sup> cue téé-án ndihí cue  
quití-án chíñùhu-güedé ndihí-güedi  
Yaá-án.

<sup>11</sup> Te sátá dúcá<sup>n</sup> te ní tecú dóho-í  
ní cáhá<sup>n</sup> cuéhé víhí espíritú xínú  
cuèchi ni candéé núú núcõo Yaá táxí  
tnùní-án, ndihí núú xǐnutnǐí ndi cùmí  
cue quití-án, ndihí núú xǐnucóo cue téé  
cùu sacuéhé-án, te ní xiní-í sá sǔúni  
cuéhé víhí espíritú-án xǐndecu xía<sup>n</sup>,

<sup>12</sup> te níhi ní cáhá<sup>n</sup> cue espíritú-án, te  
cächí-xi:

Yòhó Yaá cáá dàtná cáá ñ<sup>n</sup> mbéé quití  
ní dánícuèhé-güedé te ní xíhí ní  
cùu te ní ndoto,

te yòhó ío càhnu cuu-n, te ndècu  
ndihí-n nchaandi túhú,

te ío ndècu ndihí-n sá xiní tnùní-n,  
te ndàcu-n quide-n nchaa sá cuíni-n,  
te nèhe-ndí sá yíñùhu núú-n, te ío váha  
quide-n,

te chíñùhu ñaha-ndí xii-n, chi duca<sup>n</sup>  
tàú-ndí cada-ndí chi ío càhnu  
cuu-n.

Duha cächí nchaa cue espíritú-án  
xǎha<sup>n</sup>-xi xii-gá chíñùhu ñaha-xi.

<sup>13</sup> Te ní tecú dóho-í ní cáhá<sup>n</sup>  
nchaandi túhú sá ní cadúha Yá Ndiõxí  
ndécú àndiu, ndihí nchaa sá ndécú  
ñuyíu, ndihí nchaa sá ndécú xítí ñuhu,  
ndihí nchaa sá ñúhú xítí ndute làmár,  
te xǐcachí-xi:

Yòhó Yaá núcõo núú xilé váha, ndihí  
yòhó Yaá cáá dàtná cáá ñ<sup>n</sup>  
mbéé quití ní dánícuèhé-güedé  
táxí tnùní-ndó, te nèhe-ndí sá  
yíñùhu núú-ndó,

te duca<sup>n</sup> ío ndàcá<sup>n</sup> táhú-ndí núú-ndó,  
chi ío váha quide-ndo te ío  
cùnuu-ndo,

te díu-ni duha cáhá<sup>n</sup> váha-ndí  
cuèndá-ndó ní caa ni quíhí<sup>n</sup>.

Duha cächí nchaa sá ní cadúha Yá  
Ndiõxí.

<sup>14</sup> Te ndi cùmí cue quití xǐnutnǐí-án  
cächí-güedi:

—¡Duca<sup>n</sup> na cùnduu! —cachí-güedi.

Te ndi ócò cùmí cue téé cùu sacuéhé  
xǐndecu-án nǐ ngüíñí xítí-güedé  
chíñùhu-güedé Yaá ndécú nchaa nduu  
nchaa quíú.

## 6

### *Cuèndá úsá tutú lǐhli ñùhu seyú*

<sup>1</sup> Te sátá dúcá<sup>n</sup> te ní xiní-í sá  
Yáá cáá dàtná cáá ñ<sup>n</sup> mbéé quití ní  
dánícuèhé-güedé-án nǐ xócání-gǎ ñ<sup>n</sup>  
tutú lǐhli ñùhu seyú ndéé sátá tütú sá  
nǐ nadúcú<sup>n</sup> nuu-án, te ní tecú dóho-í  
ní cáhá<sup>n</sup> ñ<sup>n</sup> quití cùmí xǐnutnǐí-án, te  
níhi ní cáhá<sup>n</sup>-di dàtná càhá<sup>n</sup> ñùhu, te  
cächí-di:

—¡Taquixi cundehe-n! —cachí-di.

<sup>2</sup> Te òré-ni-án nǐ xiní-í ñ<sup>n</sup> cuáyú  
cuixí<sup>n</sup> yódó ñàha ñ<sup>n</sup> sá yódó ñàha xii-di,  
te sá yódó ñàha xii-di-án néhé-xí ñ<sup>n</sup>  
arcú sá cúu tnuxí-xi, te ní nduu

táhú-xi ì<sup>n</sup> coróná, te ní ndacu-xi ní cunu-xi te duca<sup>n</sup>-ni ta cunu-xi cuáhá<sup>n</sup>.

<sup>3</sup> Te òré ní xócání-gă tutú lîhli cùu uú ñúhú sèyú ndèé sátá tûtú sá ñí nadúcú<sup>n</sup> nuu-á<sup>n</sup>, te ní tecú dóho-í ní cáhá<sup>n</sup> tucu ingá quiti cùu uú xînutní-á<sup>n</sup>, te cächí-di:

—¡Taquixi cundehe-n! —cachí-di.

<sup>4</sup> Te òré-ni-á<sup>n</sup> ñí xiní tucu-í ì<sup>n</sup> cuàyú tícuèhé ní quee-di cuáhá<sup>n</sup>-di, te yòdo ñaha ì<sup>n</sup> sá yódó ñaha xii-di, te sá yódó ñaha xii-di-á<sup>n</sup> ñí níhí-xi tnúhu ndee ìní sá dátícánuu-xi ñáyíu vá cùndècu ndihi tnaaha váha-gá-yu, te ngúíta ñáyíu cahni tnàhá-yu, te ní nduu táhú-xi ì<sup>n</sup> yuchí cáhnú vîhi.

<sup>5</sup> Te òré ní xócání tucu Yaá-á<sup>n</sup> ingá tutú lîhli cùu uní ñúhú sèyú ndèé sátá tûtú sá ñí nadúcú<sup>n</sup> nuu-á<sup>n</sup>, te ní tecú dóho-í ní cáhá<sup>n</sup> quiti cùu uní xînutní xíá<sup>n</sup>, te cächí-di:

—¡Taquixi cundehe-n! —cachí-di.

Te òré-ni-á<sup>n</sup> ñí xiní tucu-í ì<sup>n</sup> cuàyú tnúú te yòdo ñaha tucu ì<sup>n</sup> sá yódó ñaha xii-di, te sá yódó ñaha-á<sup>n</sup> nùndàha-xi úú yaxí<sup>n</sup> libré.

<sup>6</sup> Te ní tecú dóho-í ní cáhá<sup>n</sup> ì<sup>n</sup> sá ñí cáhá<sup>n</sup> tnuú cue quiti xînutní-á<sup>n</sup>, te cächí-xi:

—Ì<sup>n</sup> cuártú-nă trîú níhí-ndó să ì<sup>n</sup> dîhú<sup>n</sup> denàriú, te úní cuártú-nă cebadá níhí-ndó să ì<sup>n</sup> tucu dîhú<sup>n</sup> denàriú, dico acítí ndihi ndudí ndéhé yoho yàha stilé chi vá ndîhí nihnu —duha cächí sá cáhá<sup>n</sup>-á<sup>n</sup>.

<sup>7</sup> Te òré ní xócání tucu Yaá-á<sup>n</sup> tutú lîhli cùu cumí ñúhú sèyú ndèé sátá tûtú sá ñí nadúcú<sup>n</sup> nuu-á<sup>n</sup>, te ní tecú tucu dóho-í ní cáhá<sup>n</sup> tucu ingá quiti cùu cumí xînutní-á<sup>n</sup>, te cächí-di:

—¡Taquixi cundehe-n! —cachí-di.

<sup>8</sup> Te òré-ni-á<sup>n</sup> ñí xiní tucu-í ì<sup>n</sup> cuàyú yàhá, te yòdo ñaha tucu ì<sup>n</sup> sá yódó ñaha xii-di, te sá yódó ñaha xii-di-á<sup>n</sup> nání-xí Să xîhí, te xíá<sup>n</sup> sáhní-xí ñáyíu, te sátá xíá<sup>n</sup> nchícú<sup>n</sup> sá nèhé núú ndécú ñáyíu ní xîhí. Te cumí xîhí cùu ñuyíú, te sá sáhní ñaha xii ñáyíu-á<sup>n</sup> ñí níhí-xi tnúhu ndee ìní danàa-xi ñáyíu ì<sup>n</sup> xîchi ñuyíú, te davá-yu cahni ñaha-xi ndihi yuchí, te cada-xi sá cóo tnámá te

cuú-yu, te cada tucu-xi sá cóo cuèhé cahni-xi ñáyíu, te diu-ni tucu-xi cada sá ncháá quiti déé<sup>n</sup> cahni-di ñáyíu.

<sup>9</sup> Te òré ní xócání tucu Yaá-á<sup>n</sup> tutú lîhli cùu uhú<sup>n</sup> ñúhú sèyú ndèé sátá tûtú sá ñí nadúcú<sup>n</sup> nuu-á<sup>n</sup>, te òré-á<sup>n</sup> ñí xiní-í nùtnî ì<sup>n</sup> núú sácódó să ndúú táhú Yă Ndiöxí, te ndàa caha xíá<sup>n</sup> ní xiní-í xîndecu nchaa àlmá ñáyíu ní sahní-güedé núú ñuyíú să cuèndá tnúhu Yă Ndiöxí, ndihi sá cuèndá sá ñí cáhá<sup>n</sup> váha-yu cuèndá-gá.

<sup>10</sup> Te nchaa àlmá-á<sup>n</sup> ñíhi xîcáhá<sup>n</sup>-xi, te xáha<sup>n</sup>-xi xii Yă Ndiöxí:

—Yöhó Dútú Ndiöxí cúú-n Yáá ñá túú tnàhí cuéchi-xi, te ñá túú tnàhí quée cáva-n quide-n ì<sup>n</sup> sá cáhá<sup>n</sup>-n. ¿Te ná ndéé ama dandòho-n ñáyíu ndècu ñuyíú nachinaa-n cuèndá sá ñí quide ñàhá-yu xii-ndí-i? —cächí cue àlmá-á<sup>n</sup> xáha<sup>n</sup>-xi xii-gá.

<sup>11</sup> Te sátá dúcá<sup>n</sup> te nchaa cue àlmá ñáyíu-á<sup>n</sup> ñí níhí-xi dóó cuixí<sup>n</sup> ní quée cuíhnu-xi, te ní xítñúhu ñaha xii-xi sá ná ndètatú-xi te cundetú tnaa-xi ndéé ná xînu cava cuú ñáyíu nàcuáa ndéé tnuní dàtná ní xîhí cue ñáyíu dii àlmá-xi cùu-xi. Te ñáyíu sa ní xîhí-á<sup>n</sup> ì<sup>n</sup>-ni cúú-yu ndihi ñáyíu vitna cuú-á<sup>n</sup> chi mee-ni chîu<sup>n</sup> Xitohó Jesucristú quidè-yu, te diu-ni ichi-gá ndécü-yu.

<sup>12</sup> Te òré ní xócání tucu Yaá-á<sup>n</sup> tutú lîhli cùu iñú ñúhú sèyú ndèé sátá tûtú sá ñí nadúcú<sup>n</sup> nuu-á<sup>n</sup>, te ní xiní-í súúní ñíhi ní quidi-xi ñuyíú, te ní cutnuu ñíhí núú nchîcanchii dàtná ì<sup>n</sup> dóó tnúú, te ní cuu tícuèhé níñí ñíhí núú yóó.

<sup>13</sup> Te ní xiní-í ní ngoyo chódíní ñuyíú-a dàtná ngóyó ngüxí yîhí òré quéné tächí ñíhi.

<sup>14</sup> Te ní xiní-í ní nadúcú<sup>n</sup> nuu andîu dàtná nádúcú<sup>n</sup> nuu ì<sup>n</sup> tutú te ní ndóñúhú-xí, te nchaa tîndúú ñí xica ndehe-xi núú ndécú-xí, te duca<sup>n</sup> ñí xica ndehe tucu nchaa tîndúú yîhí ndécú xîti ndute làmár.

<sup>15</sup> Te nchaa cue téé yîndaha ñáyíu ní nguívàha-güedé, ndihi nchaa dava-gá cue téé ío tàxi tnuní, ndihi nchaa ñáyíu cuica, ndihi nchaa cue téé tàxi tnuní sandàdú, ndihi cue sandàdú cue téé ío

váha sáa díquí-xi nàcuáa cada-güedé nàa-güedé, ndihi nchaa ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi, ndihi nchaa ñáyiú dàñá queé núú chíu<sup>n</sup> patróó<sup>n</sup>-xi. Te dava ñáyiú-á<sup>n</sup> ní nguívãha-yu xití yaú, te davá-yu ní nguívãha-yu nchaa tnuú cava.

<sup>16</sup> Te xãhã<sup>n</sup>-yu nchaa tindúú ndihi nchaa cava:

—Chí tácuu<sup>n</sup> chiváha ñaha-ndo xii-ndí cuendá sá vã quini ñáhá Yáa ío tàxi tnuní núcõo núú xilé váha, ndihi cuendá sá vã dándõho ñaha Yáa cáa dàtná cáa ñ<sup>n</sup> mbéé quiti ní dánícuèhé-güedé, chi Yáa-á<sup>n</sup> ío cùdéé<sup>n</sup>-gã núú-ndí —duha càchí nchaa ñáyiú-á<sup>n</sup> xãhã<sup>n</sup>-yu xii nchaa tindúú-ã<sup>n</sup> ndihi nchaa cava-á<sup>n</sup>.

<sup>17</sup> Te vitna ní sáa nduu ío cùu cahnu nduu tnúndõho tnúhu ndàhú, te vá yõo ñ<sup>n</sup> cundee ìní-xi yáha nchaa tnúndõho-a.

## 7

### *Ñáyiú isràél ñáyiú naníhí tàhú*

<sup>1</sup> Te sátá xĩa<sup>n</sup> te ní xiní-í cùmí tnáhá espíritú xínú cuèchi núú Yá Ndiõxí xĩnutnĩ-xi ndi cùmí xio ñuyúú, te cue espíritú-á<sup>n</sup> ñĩ ngani-xi táchí cuendá sá vã cuicó-gã-xi ni lámár, te ni díquí yutnu, te ni ñ<sup>n</sup> xichi ñuyúú vã cuicó-gã-xi.

<sup>2</sup> Te cue espíritú-á<sup>n</sup> ndécú ndihi-xi tnúhu ndee ìní danàa-xi sá ío lámár ndihi sá ío ñuhu yìchí, te ní xiní tucu-í ìngá espíritú xínú cuèchi núú Yá Ndiõxí ní quee nchita-xi ndàa nacuáa quène nchícanhii, te nùndaha-xi seyú Yá Ndiõxí Yáa ndécú nchàa nduu nchaa quíú, te níhi ní cáhá<sup>n</sup>-xi xãha<sup>n</sup>-xi xii ndi cumí cue espíritú-á<sup>n</sup>:

<sup>3</sup> —Vá dánàa-ndo sá ío lámár, te ni vã dánàa-ndo yutnu, te ni ñ<sup>n</sup> sá ío ñuyúú vã dánàa-ndo, chi cundetú-ndo ndèé ná tàxi ndecu-ndí ñ<sup>n</sup> sèñá tneé nchaa ñáyiú xínu cuechi núú Tãtá-ó Dütú Ndiõxí —duha càchí espíritú-á<sup>n</sup> xãha<sup>n</sup>-xi xii ndi cumí espíritú xĩnutnĩ ndi cùmí xichi ñuyúú.

<sup>4</sup> Te ní tecú dóho-í ní cáhá<sup>n</sup> ñ<sup>n</sup> sá ní cáhá<sup>n</sup>, te ní cachí-xi sá núú ndí ùxúú xichi cue ñáyiú isràél te ní xínu ñ<sup>n</sup>

cièndú údico cùmí mĩl-yu ní ngúndecu sèñá tneé-yu.

<sup>5</sup> Te núú ñ<sup>n</sup> cièndú údico cùmí mĩl ñáyiú-á<sup>n</sup>, te ní xínu ùxúú mĩl cue ñaní tnáhá ndí Júdá ní ngúndecu sèñá tneé-yu, te ùxúú mĩl cue ñaní tnáhá ndí Rùbén, te ùxúú mĩl cue ñaní tnáhá ndí Gãd,

<sup>6</sup> te ùxúú mĩl cue ñaní tnáhá ndí Àser, te ùxúú mĩl cue ñaní tnáhá ndí Neftalí, te ùxúú mĩl cue ñaní tnáhá ndí Manàsés,

<sup>7</sup> te ùxúú mĩl cue ñaní tnáhá ndí Míó, te ùxúú mĩl cue ñaní tnáhá ndí Lèví, te ùxúú mĩl cue ñaní tnáhá ndí Isàcár,

<sup>8</sup> te ùxúú mĩl cue ñaní tnáhá ndí Zabulón, te ùxúú mĩl cue ñaní tnáhá ndí Chéé, te ùxúú mĩl cue ñaní tnáhá ndí Benjamín, nchaandi túhu ñáyiú-á<sup>n</sup> ñĩ ngúndecu sèñá tneé-yu.

### *Cuéhé víhí ñáyiú nihnu dóo cuixí<sup>n</sup>*

<sup>9</sup> Te sátá xĩa<sup>n</sup> te ní xiní-í cuéhé víhí ñáyiú, ñáyiú ñ<sup>n</sup> ñ<sup>n</sup> nació<sup>n</sup>, ndihi ñáyiú ñ<sup>n</sup> ñ<sup>n</sup> ñuú, ndihi ñáyiú càhá<sup>n</sup> ndi dí<sup>n</sup> ndi dí<sup>n</sup> núú tnúhu, ndihi ñáyiú ní xíndecu ñ<sup>n</sup> ñ<sup>n</sup> xichi, te nchaa ñáyiú-á<sup>n</sup> xĩnutnĩ-yu ndàa núú Yáa táxi tnuní núcõo núú xilé váha, ndihi núú Yáa cáa dàtná cáa ñ<sup>n</sup> mbéé quiti ní dánícuèhé-güedé, te vá yõo ñ<sup>n</sup> ndàcu cahu ñaha xii-yu chi cuéhé víhí-yu, te nchaá-yu xixihnu-yu mee-ni dóo cuixí<sup>n</sup>, te nùndahá-yu nchaá-yu ñ<sup>n</sup> caa ndàha yutnu ñuú.

<sup>10</sup> Te nchaá-yu níhi xicáhá<sup>n</sup>-yu, te càchí-yu:

Yáa táxi tnuní núcõo núú xilé váha cùu-gá Ndiõxí-ó,

te diu-gá ndihi Yáa cáa dàtná cáa ñ<sup>n</sup> mbéé quiti ní dánícuèhé-güedé ní dácãcu nihnu ñaha-gã xii-o núú ùhú núú ndàhú.

Duha càchí nchaa ñáyiú-á<sup>n</sup>.

<sup>11</sup> Te nchaa espíritú xínú cuèchi núú Yá Ndiõxí ní nadúcú<sup>n</sup>ndèé-xi xĩnutnĩ-xi ñĩ càndéé núú núcõo Yáa núcõo núú xilé váha, ndihi núú xĩnucóo cue téé cùu sacuéhé, ndihi cue ndi cùmí quiti xĩnutnĩ-á<sup>n</sup>, te nchaa-xi ní ngüñí xití-xí te ní ngúnu ndeyi-xi núú Yáa núcõo núú xilé váha-á<sup>n</sup>, te

nchaa-xi ní ngüíta-xi chiñuhu ñaha-xi xii-gá,

<sup>12</sup> te cächí-xi:

Na cáhá<sup>n</sup> ndáá-ndí núú yòhó Tátá-ndí Dútú Ndiöxí sá ío cànhu cuu-n, te ndàcu-n quide-n nchaa sá vâha cuini-n, te ío vâha quide-n, te ndècu ndihi-n nchaa sá xini tnùní-n,

te chiñuhu ñaha-ndí xii-n, te duca<sup>n</sup> ndàcá<sup>n</sup> táhú-ndí núú-n cuendá nchaa sá quidé-n, te nèhe-ndí sá yíñuhu núú-n,

te tnúhu cáhá<sup>n</sup>-ndí-a cùu-xi tnúhu ndáá, te ñu-ni duha cáhá<sup>n</sup>-ndí ndéé núú cuáhá<sup>n</sup> núú vèxi.

Duha cächí nchaa cue espíritú-á<sup>n</sup> xáha<sup>n</sup>-xi xii Yaá núcõo núú xilé vâha-á<sup>n</sup>.

<sup>13</sup> Te ñi<sup>n</sup> cue téé cùu sacuéhé xñdecu-á<sup>n</sup> ní xicá<sup>n</sup> tnúhú-dé núú-í, te cächí-dé:

—¿Yóndi cùu ñáyiu dàcá<sup>n</sup> xixíhnu dóo cuixí<sup>n</sup>-á<sup>n</sup>, te ndéé véxi-yu núu dàcá<sup>n</sup> xindáá-yu-i? —cächí-dé.

<sup>14</sup> Te yúhú ní xáha<sup>n</sup>-í:

—Tátá, ñá túú xini-í, dico mee-n xini-n —duha ní xáha<sup>n</sup>-í xii-dé.

Te dàtnùní ní cachí tnúhu-dé xii-í ná cùú ñáyiu-á<sup>n</sup>, te cächí-dé:

—Nchaa ñáyiu-a cùú-yu ñáyiu ní quee núú ío víhí tnúhu ndòho tnúhu ndàhú sá vâ cùndèe iní-ó te véxi-yu iha, te cùú-yu ñáyiu sa ní nduu ndoo ní nduu nine iní-xi cuendá sá ñi sati ñiñí Yaá cáá dàtná cáá ñi<sup>n</sup> mbéé quiti ní dánicuèhé-güedé, cuendá xiá<sup>n</sup> vitna ní ndihi-yu ní nduu cuixí<sup>n</sup> dóo xixíhnu-yu.

<sup>15</sup> Te núú xiá<sup>n</sup> vitna ní nduu táhú-yu ndécú-yu núú ndécú Yá Ndiöxí Yaá táxi tnùní núcõo núú xilé vâha, te cuèi nduu cuèi niú xínú cuèchí-yu núú-gá vitna, te ñu-gá xító ñaha-gá xii-yu.

<sup>16</sup> Te vitna ní sáá-yu núú-gá cundécú-yu te vá ndóhó-gá-yu docó, te ni vâ quini-gá-yu ndohó-yu yíhí-yu ndute, te ni vâ quini-gá-yu ndohó-yu cahni nchícanhii, te ñá túú-gá ná cahni ndohó-yu.

<sup>17</sup> Te duca<sup>n</sup> chi Yaá cáá dàtná cáá ñi<sup>n</sup> mbéé quiti ní dánicuèhé-güedé ndécú-gá núú nútñi xilé vâha núcõo

Yá Ndiöxí Yaá táxi tnùní, Yaá-á<sup>n</sup> coto ñaha-gá xii-yu dàtná quidé ñi<sup>n</sup> toli oré xító-dé mbéé-dé, te candeca ñaha-gá xii-yu quihí<sup>n</sup> núú tõe ndute, te ndute-á<sup>n</sup> cúú-xi ndute candeca iní-yu, te Yá Ndiöxí cada-gá sá vâ quini-gá-yu tnúhu ndàhyú —duha ní cachí tnúhu téé cùu sacuéhé-á<sup>n</sup> xii-í.

## 8

*Cuendá tícùú sá ñi cuáha mee-ni dñhú<sup>n</sup> cuáá<sup>n</sup>*

<sup>1</sup> Te sátá dúcá<sup>n</sup> te Yaá cáá dàtná cáá ñi<sup>n</sup> mbéé quiti ní dánicuèhé-güedé ní xócáni-gá tutú lihli cùu usá ñúhú sèyú ndéé sátá tütú sá ñi nadúcú<sup>n</sup>nuu-á<sup>n</sup>, te òré-á<sup>n</sup> ñi cunahi sùúni ñavíi-ná ní cuu andiù dàtná cuádava òré.

<sup>2</sup> Te ní xini-í úsá tnàhá espíritú xínú cuèchi núú Yá Ndiöxí xñnutñi-xi núú núcõo-gá, te ní níhí-xi ñi<sup>n</sup> caa cütú xñhehe-xi.

<sup>3</sup> Te dàtnùní ní xini tucu-í ingá espíritú xínú cuèchi núú-gá ní quexiò-xi nehe-xi ñi<sup>n</sup> tícùú ní cuáha mee-ni dñhú<sup>n</sup> cuáá<sup>n</sup> te ñuhu vai dúsa sá sàhá<sup>n</sup> tnámí, te ní ngúnutñi espíritú-á<sup>n</sup> núú ndécú sá ñi cuáha mee-ni dñhú<sup>n</sup> cuáá<sup>n</sup> núú sácõdó sá ndúú táhú Yá Ndiöxí, te xiá<sup>n</sup> nútñi-xi ndàa núú-gá, te dúsa sá sàhá<sup>n</sup> tnámí-á<sup>n</sup> cahmi espíritú-á<sup>n</sup> núú sácõdó sá ndúú táhú-gá-á<sup>n</sup> cuendá ñúhmá ñúsa-á<sup>n</sup> cundihí-xi nchaa tnúhu cáhá<sup>n</sup> ñáyiu cáhá<sup>n</sup> ndihi ñaha xii-gá, nchaa ñáyiu cùu cuendá-gá.

<sup>4</sup> Te nùndaha espíritú-á<sup>n</sup> tícùú ñúhú ñúsa sá sàhá<sup>n</sup> tnámí càyú, te quène ñúhmá nútñi-xi núú Yá Ndiöxí, te ñúhmá-á<sup>n</sup> cundihí-xi nchaa tnúhu cáhá<sup>n</sup> ñáyiu cáhá<sup>n</sup> ndihi ñaha xii-gá, nchaa ñáyiu cùu cuendá-gá.

<sup>5</sup> Te ní quehe<sup>n</sup> espíritú-á<sup>n</sup> tícùú te ní dáchítú-xi ñuhú yódó núú sácõdó sá ndúú táhú Yá Ndiöxí, te ní xítenuu-xi ñuyíú, te òré duca<sup>n</sup> ñi quide-xi te ní cáhá<sup>n</sup> víhí ñuhu, te ío dusa<sup>n</sup> ñi quide-xi ñuyíú, te ní sáá nduté, te níhí víhí ní tnáa.

*Ndi úsá espíritú ní tíú-xi ñi<sup>n</sup> caa cütú xñhehe-xi*

6 Te ndi ùsá cue espíritú xĩnehe ì<sup>n</sup> caa cútú-á<sup>n</sup> nĩ ngúndecu túha-xi cuendá tiú-xi.

7 Te espíritú díhna nuu nĩ tiú-xi cútú néhé-xí, te ñuyíú-a ní ngoyo ñĩñi dácánuu-xi ndihĩ ñuhú ndihĩ níñí, te luha-ná te cuu dava ñuyíú nĩ cáyú, te luha-ná te cuu dava tucu nchaa yutnu ío ñuyíú nĩ cáyú, te luha-ná te cuu dava tucu nchaa cùhú ío ñuyíú nĩ cáyú.

8 Te espíritú cúú ùú ní tiú-xi cútú néhé-xí, te dàtná cáá ì<sup>n</sup> tĩndúú cáá ì<sup>n</sup> sá nĩ ngava xití làmár te nchìcú<sup>n</sup> ñuhú, te luha-ná te cuu dava ndute làmár-á<sup>n</sup> nĩ nduu-xi níñí.

9 Te luha-ná te cuu dava nchaa quiti xĩxúhu<sup>n</sup> xití làmár-á<sup>n</sup> nĩ xihí-güedi, te luha-ná te cuu dava nchaa bàrcú ní quee naa-xi xití ndute.

10 Te espíritú cúú ùní ní tiú-xi cútú néhé-xí, te ní ngava ì<sup>n</sup> chódíní cáhnú ndèé andiú ñuyíú te nchìcú<sup>n</sup> ñuhú-dí, te ñuhú-á<sup>n</sup> cáá dàtná cáá ñùhú iti. Te luha-ná te cuu dava nchaa yúte ní ngava chódíní-á<sup>n</sup>, te luha-ná te cuu dava tucu nchaa núú quènihni ndute ní ngava-dí.

11 Te chódíní-á<sup>n</sup> nání-dí: Yúcú Úá. Te ndute xica nchaa yúte-á<sup>n</sup> ndihĩ nchaa ndute quènihni-á<sup>n</sup> nĩ cuu úá-xi dàtná yúcú úá, te ío cuéhé ñáyiú ní xihí sá dúcá<sup>n</sup> nĩ cuu úá ndute-á<sup>n</sup>.

12 Te espíritú cúú cùmí ní dácàhá<sup>n</sup>-xi cútú néhé-xí, te luha-ná te cuu dava nchìcanchii ñá túú ní dàyehé-xi, te duca<sup>n</sup> lùha-ná tucu cuu dava yóó ñà túú ní dàyehé-dí, te duca<sup>n</sup> lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchìcanchii, te duca<sup>n</sup> lùha-ná te cuu dava niú ñà túú ní dàyehé yóó ndihĩ nchaa chódíní.

13 Te sátá dúcá<sup>n</sup> te ní xiní-í xícó ì<sup>n</sup> espíritú xinú cuèchi núú Yá Ndiöxí núú tàchí, te ní tecú dóho-í níhi càhá<sup>n</sup>-xi, te càchí-xi:

—Ío ndàhú ndoho nchaa ñáyiú xĩndecu ñuyíú òré ná dàcàhá<sup>n</sup> úní-gá cue espíritú cùmání cútú xĩnehe-xi, chi sa xĩndecu túha-ná-xi sá dácàhá<sup>n</sup>-xi!—duha càchí espíritú-á<sup>n</sup>.

## 9

1 Te espíritú cúú ùhú<sup>n</sup> ní tiú-xi cútú néhé-xí, te òré-á<sup>n</sup> nĩ xiní-í ní quee ì<sup>n</sup> espíritú andiú te càa-xi datná cáá ì<sup>n</sup> chódíní, te ní ngava-xi ñuyíú, te ní níhí-xi ì<sup>n</sup> ndacaá néhé-xí cuendá nacaá<sup>n</sup>-xi yuyèhe yaú cùnú víhí.

2 Te ní nacaá<sup>n</sup>-xi yaú-á<sup>n</sup> te ní ngúita-xi ní quene ñúhmá dàtná quéné ñúhmá ì<sup>n</sup> xítnú cáhnú vìhi, te ní quene tàchí ní xítenuu-xi ñúhmá-á<sup>n</sup> te ní sadí-xi núú nchìcanchii, te ní cunee ñuyíú.

3 Te xití ñúhmá-á<sup>n</sup> nĩ quene tíca làngóstá, te ní xítenuu-dí ñuyíú, te déé<sup>n</sup>-güedi dàtná déé<sup>n</sup> nchacua.

4 Te ní ngúndecu ndihĩ-güedi tnúhu ndee ìní cuendá sá dándòho-güedi mee-ni ñáyiú ñá túú ndèé seña Yá Ndiöxí tneé-xi, te ñá túú ñà cada-dí nchaa yutnu ndihĩ nchaa cùhú.

5 Te ñá túú tnúhu ndee ìní ndécú ndihĩ-güedi sá cáhní-güedi ñáyiú, chi mee-ni sá dándòho ñaha-güedi xií-yu úhú<sup>n</sup> yóó. Te òré ní ngúita-güedi dándòho ñaha-güedi xií-yu te tàhú tnùhú núú dáquèe-güedi iñu-güedi dàtná quidé-xí núú dáquèe nchacua iñu-güedi.

6 Te ñáyiú-á<sup>n</sup> xicá<sup>n</sup> táhü-yu sá ndihĩ cuú-yu cuendá sá ío ndòhó-yu dàquèe ñaha nchaa quiti-á<sup>n</sup> iñu-dí xií-yu te ñá cuìní-xi cuú-yu, te ì<sup>n</sup> nduu ì<sup>n</sup> nduu sàni iní-yu cuú-yu te ñá túú cuìní-xi cuú-yu chi ñá túú tnúhu xihí sá cúú-xí-yu.

7 Te nchaa tíca làngóstá-á<sup>n</sup> xĩndáa-güedi dàtná ndáa nchaa cuáyú cue téé cuáhá<sup>n</sup> nàá, te díquí-güedi ñùhu ì<sup>n</sup> sá cáá dàtná cáá còroná ní cuáha mee-ni díhú<sup>n</sup> cuàá<sup>n</sup>, te núú-güedi càa datná cáá núú cuè téé.

8 Te idi díquí-güedi càa datná cáá idi díquí ñáyiú dìhí, te núhu-güedi càa datná cáá núhu ndicaha.

9 Te yídúcú<sup>n</sup>nuu-güedi ì<sup>n</sup> sá cáá dàtná cáá càá, te ndíxí<sup>n</sup>-güedi quide-xi datná quidé-xí núú vèxi cuéhé víhí càrretá sá táñùhu cuayú cuáhá<sup>n</sup>-güede ndihĩ-güedi núú nàá-güede.



10 Te ndéé iñu núú lùhmá-güedi dàtná ndéé iñu núú lùhmá nchacua, te iñu núú lùhmá-güedi-á<sup>n</sup> dáquëe-güedi ñáyiú dándoho ñaha-güedi xií-yu, te duca<sup>n</sup>-ni càda-güedi dándoho ñaha-güedi xií-yu ndéé xínu úhú<sup>n</sup> yóó.

11 Te nchaa tíca làngóstá-á<sup>n</sup> táxí tnùnì ñáhá espíritú sá táxí tnùnì yaú cùnù víhí, te espíritú-á<sup>n</sup> nání-xí Àbadón tnúhu hèbreú, te tnúhu grìégú nání-xí Àpolión, te ndì nduú tnúhu-á<sup>n</sup> quée-xí: Sá dánàa ñáyiú.

12 Te tnúndòho-a cuu-xi tnúndòho díhna nuu, te vitna cùmání úú-gá.

13 Te espíritú cúú iñú ní tíú-xi cútú néhé-xí. Te núú Yă Ndiòxí nùtnhì ì<sup>n</sup> sá ñí cuáha mee-ni díhú<sup>n</sup> cuáá<sup>n</sup> núú sácódó sá ndúú tãhú-gă, te ndì cùmí xíquí-xi xĩndecu ì<sup>n</sup> caa ndìqui, te ní tecú dóho-í ní cáhá<sup>n</sup> ì<sup>n</sup> sá ñí cáhá<sup>n</sup> nihnu ndì cùmí ndìqui-á<sup>n</sup>.

14 Te sá càhá<sup>n</sup> nihnu ndìqui-á<sup>n</sup> xãha<sup>n</sup>-xi xii espíritú cúú iñú sá ñí tíú cútú-ă<sup>n</sup>:

—Cuàhá<sup>n</sup> nandaxi-n ndì cumí espíritú ndútú ndècu yúte càhnu nani Eúfratés —càchí sá càhá<sup>n</sup>-á<sup>n</sup> xãha<sup>n</sup>-xi xii espíritú-á<sup>n</sup>.

15 Te sátá dúcá<sup>n</sup> te ní nandáxí ndì cùmí cue espíritú-á<sup>n</sup> cuendá cahni-xi cuéhé víhí ñáyiú, te sa yatni dàtná cuádava ñáyiú xĩndecu ñuyíú cahni-xi, te duca<sup>n</sup> chi sa ndècu túha tnàhí cue espíritú-á<sup>n</sup> ndétú-xí sáá òré, àdi nduu, àdi yóó, àdi cuíá duca<sup>n</sup> càda-xi cahni-xi ñáyiú.

16 Te ní xiní-í nchaa cue sandàdú cùndìhì-xi xixódó-güedě cuàyú, te ní nihí-í tnúhu sá xĩnu úú cièndú millón-güedě.

17 Te duha xĩndáa cue cuàyú-á<sup>n</sup> ndìhì cue téé yòdo ñaha-á<sup>n</sup> ñí xiní-í: Te cue téé-á<sup>n</sup> yídücü<sup>n</sup> nuu ì<sup>n</sup> sá yídücü<sup>n</sup> nuu pèchú-güedé, te luha tícuéhé te luha cuì datná cuì andiú, te luha cuáá<sup>n</sup>, te nchaa cuàyú-á<sup>n</sup> cáá díquí-güedi dàtná cáá díquí ndìcaha, te yuhu-güedi quène ñuhú ndìhì ñúhmá, ndìhì àzufré nchìcú<sup>n</sup> ñuhú.

18 Te ío cuéhé ñáyiú ñuyíú ñí xihí chi luha-ná te cudavá-yu ní xihí sá

cuendá ñuhú-á<sup>n</sup> ndìhì ñúhmá-ă<sup>n</sup> ndìhì àzufré-á<sup>n</sup>.

19 Te ndìhì núú lùhmá-güedi ndìhì yuhu-güedi dándoho-güedi ñáyiú, te núú lùhmá-güedi nèhe-xi díquí cõó, te diu-ni dàtná cáá cõó cáá nihí lùhmá-güedi.

20 Te nchaa dava-gá ñáyiú ní cácu ñá túú ní xihí núú nchaa tnúndòho-á<sup>n</sup> ñà túú ní cuìni-yu dàñá-yu ichi cuéhé ichi duha ndècú-yu, chi quide cahnu-ni-yu nchaa espíritú cùndìhì yucu ñávãha, ndìhì nchaa sá càchí-yu cùu ndiòxí ní cadúha cue téé ñuyíú-a, te dava xĩá<sup>n</sup> ní cuáha mee-ni díhú<sup>n</sup> cuáá<sup>n</sup>, te dava ní cuáha mee-ni díhú<sup>n</sup> cuixí<sup>n</sup>, te dava ní cuáha sá nánì bròncé, te dava ní cuáha mee-ni yúú, te dava ní cuáha mee-ni yùtnu, te nchaa xĩá<sup>n</sup> ñá túú cùtnunì núú-xi, te ní ñà túú tècú dóho-xi, te ní ñã ndácú-xí càca-xi.

21 Te ní sã sãhni tnàhá-yu, te ní sã sãhni ndùu tnahá-yu, te ní sã ndècú-yu ichi díí ìní, te ní sã dúhú ndàchiu<sup>n</sup> tnahá-yu ñá túú ní cuìni-yu dàñá-yu.

## 10

*Ì<sup>n</sup> espíritú xínú cuèchi núú Yă Ndiòxí néhé-xí ì<sup>n</sup> librú*

1 Te sátá dúcá<sup>n</sup> te ní xiní tucu-í ì<sup>n</sup> espíritú cùnùu xinu cuechi núú Yă Ndiòxí ní quee-xi andiú, te yìhì-xi xití vícò cuãguee-xi ñuyíú te ndàa díquí-xi ndècu ì<sup>n</sup> cóó yáhnchí, te núú-xi súúnì chàhnchí dàtná chàhnchí núú nchìcanchii, te ndì nduú díhì<sup>n</sup>-xi càa datná cáá itá ñuhú.

2 Te nùndaha-xi ì<sup>n</sup> librú líhli ní nandicá, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí.

3 Te espíritú-á<sup>n</sup> ñhì vìhì ní cáhá<sup>n</sup>-xi, te ní quide-xi dàtná quidé ì<sup>n</sup> ndìcaha òré cánásàa-dì, te òré duca<sup>n</sup> ñhì vìhì ní cáhá<sup>n</sup>-xi te úsá xito ní cáhá<sup>n</sup> ñuhú.

4 Te sátá ñí yáha ní cáhá<sup>n</sup> ñuhú-á<sup>n</sup> úsá xito, te chido tnùnì-í ì<sup>n</sup> núú tütú nàcuáa ní cáhá<sup>n</sup>-xi ní cùu, te meì òré-á<sup>n</sup> ñí tecú dóho-í ní cáhá<sup>n</sup> ì<sup>n</sup> sá ñí cáhá<sup>n</sup> andiú te càchí-xi:

—Vá chídó tnùnì-n nàcuáa ní cáhá<sup>n</sup> ñúhu-á<sup>n</sup>, iní méé-ní-n ná cùhu<sup>n</sup> —duha càchí sá ñí cáhá<sup>n</sup>-á<sup>n</sup>.

<sup>5</sup> Te espíritú sá nútñí ñ<sup>n</sup> xio sáhá-xi núú ndute lámár-á<sup>n</sup> ndìhi ingá xio sáhá-xi núú ñuhu yìchí-á<sup>n</sup> ñí xiní-í ní ndonehe-xi ndaha cùha-xi,

<sup>6</sup> te càchí-xi:

—Yá Ndiöxí Yáá ndécú nchàa nduu nchaa quíú Yáá ní cadúha ñuyúú, ndìhi andiù, ndìhi lámár, ndìhi nchaa sá ió, Yáá-á<sup>n</sup> náhá ndáá-gá sá yúhú cáhá<sup>n</sup> ndáá-í, te vá cùyàa vihi

<sup>7</sup> te cada-xi nchaa nàcuáa ndùu tnúhu ndùu yuhu ní cáhá<sup>n</sup>-gá, tnúhu ní xáha<sup>n</sup>-gá xii cue téé ní xinu cuechi núú-gá, cue téé ní xóo cáhá<sup>n</sup> tnúhu-gá ndéé sanaha, chi òré ná tìú espíritú cúú ùsá cútú néhé-xí, te òré-á<sup>n</sup> cada-xi nchaa nàcuáa ndùu tnúhu ndùu yuhu sá ñí xáha<sup>n</sup>-gá xii nchaa cue téé-á<sup>n</sup> —duha càchí espíritú-á<sup>n</sup>.

<sup>8</sup> Te sátá dúcá<sup>n</sup> te ní tecú tucu dóho-í ní cáhá<sup>n</sup> tucu sá ñí cáhá<sup>n</sup> andiù-á<sup>n</sup>, te càchí-xi xii-í:

—Cuàhá<sup>n</sup> te quehe<sup>n</sup>-n libré líhli sá ñí nàndicá nùndàha espíritú-á<sup>n</sup>, espíritú sá nútñí ñ<sup>n</sup> xio sáhá-xi núú ndute lámár, te ñ<sup>n</sup> xio sáhá-xi núú ñuhu yìchí —duha càchí sá ñí cáhá<sup>n</sup>-á<sup>n</sup>.

<sup>9</sup> Te yúhú ní sáhá-í núú ndécú espíritú-á<sup>n</sup> xìcá<sup>n</sup>-í libré líhli nèhe-xi-á<sup>n</sup>, te ní cachí-xi:

—Iha te caxi-n, te cuvídí yuhu-n dàtná cúvídí òré xíhí-n ndúdí ñúñú, dico xítí-n chi cada úá-xi —càchí-xi.

<sup>10</sup> Te ní quehe<sup>n</sup>-í libré líhli nùndaha espíritú-á<sup>n</sup> ní xexi-í, te yuhu-í ní quide vídí-xi dàtná vídí ndudí ñúñú, dico sátá ñí ngava-xi xítí-í te ní quide úá-xi.

<sup>11</sup> Te ní cachí tucu espíritú-á<sup>n</sup> xii-í:

—Dacuití cáhá<sup>n</sup> tucu-n nàcuáa càchí Yá Ndiöxí cuendá ñáyiú títñí víhí nació<sup>n</sup>, ndìhi cuendá ñáyiú títñí víhí ñúú, ndìhi cuendá ñáyiú cáhá<sup>n</sup> ndí díí<sup>n</sup> ndí díí<sup>n</sup> núú tnúhu, ndìhi cuendá cue téé yíndaha ñáyiú.

## 11

*Cuendá úú cue téé cáhá<sup>n</sup> nàcuáa càchí Yá Ndiöxí*

<sup>1</sup> Te ní níhí-í ñ<sup>n</sup> tnuyoo nàcuáa chicùhá-í ñ<sup>n</sup> sá chicùhá-í, te ní cáhá<sup>n</sup> ñ<sup>n</sup> sá ñí cáhá<sup>n</sup>, te càchí-xi:

—Ndacuíñí te chicùhá-n vèhe Yá Ndiöxí, te chicùhá tucu-n núú sácòó sá ndúú tãhú-gá, te cahu-n ná daha tnàhá ñáyiú chìñuhu ñaha xii-gá xíndecu.

<sup>2</sup> Dico vá chicùhá-n ndàa quehé vehe-gá, chi xía<sup>n</sup> ñí nduu cuendá cue ñáyiú ñá túú cùu ñáyiú isràél, te ñáyiú-á<sup>n</sup> nduu nuu-nã-yu núú ñí cuu ñúú-gá, te cadá-yu dàtná càchí iní méé-yu, te údico úú yóó duca<sup>n</sup> cadá-yu.

<sup>3</sup> Te yúhú tendaha-í úú tnàhá cue téé cáhá<sup>n</sup> yuhu-í nàcuáa càchí Yá Ndiöxí, te úxúú cièndú únídico nduu duca<sup>n</sup> cáhá<sup>n</sup>-güedé yuhu-í cada-güedé núú-í, te cuihnu-güedé dóó tnúú sá sácuihnu cue ñáyiú ndìhú iní-xi —duha càchí sá cáhá<sup>n</sup>-á<sup>n</sup>.

<sup>4</sup> Te ndi ndúú cue téé-á<sup>n</sup> cúú-güedé dàtná úú yutnu òlívú sá xínutñí núú Yá Ndiöxí, ndìhi dàtná úú sá ndèé dité-xi, sá yíndòdo ñ<sup>n</sup> caa candíl núú dité-xi ndècu tucu núú-gá, te diu-gá cúú-gá Yáá yíndàha ñuyúú.

<sup>5</sup> Te ñáyiú na càni iní-xi ná cada ñaha xì-güedé te yuhu-güedé quene ñuhú cahmi ñaha-xi xì-yu, te duca<sup>n</sup> càda-güedé cahni-güedé nchaa ñáyiú na cùu úhú iní náhá xì-güedé.

<sup>6</sup> Te ndi ndúú-güedé ndécú ndìhi-güedé tnúhu ndee ñí cada-güedé sá vã cúú<sup>n</sup> dàú, te duca<sup>n</sup> càda-güedé ñíni cáhá<sup>n</sup>-güedé nàcuáa càchí Yá Ndiöxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiú títñí núú tnúhu ndòho, te duca<sup>n</sup> càda-güedé ná daha xito càchí iní méé-güedé.

<sup>7</sup> Te ná yáha sá cáhá<sup>n</sup>-güedé nàcuáa ní cachí Yá Ndiöxí, te dàvá-á<sup>n</sup> quene ñ<sup>n</sup> quití déé<sup>n</sup> yàú cùnú víhí sá ió nèhé cáá, te quití-á<sup>n</sup> ngüita-di nàá-di ndìhi ndi ndúú cue téé-á<sup>n</sup> te cahni ñaha-di xì-güedé.

<sup>8</sup> Te yiqui cùñú cue téé-á<sup>n</sup> cautùu-xi ñ<sup>n</sup> tnuú ñúú cáhnú núu ní sahani-güedé Xítóhó Jesucristú núú cùrúxí, te diu

Yaá-án cúú Xĩtohó-ó ndihí-güedé, te cächí ñáyiú sá ñuú-án cúú-xí dàtná ñuú Sòdomá ndihí nàció<sup>n</sup> Ègiptú.

<sup>9</sup> Te úní nduu dava cautùu yiquí cuñú-güedé xíá<sup>n</sup>, te ñáyiú nchaa nàció<sup>n</sup>, ndihí ñáyiú nchaa ñuú, ndihí ñáyiú cáhán<sup>n</sup> ndí díí<sup>n</sup> ndí díí<sup>n</sup> núú tnúhu, ndihí ñáyiú xĩndecu nchaa xichi quíní-yu yiquí cuñú-güedé, te vá dáñã-yu nguíndüxi.

<sup>10</sup> Te nchaa ñáyiú-án nduu vétú iní-yu sá dúcá<sup>n</sup> cúú cue téé cáhán<sup>n</sup> nàcuáa cächí Yá Ndiöxí-án, te ío cudíí iní-yu, te nándí sá cuãha táhú tnáhã-yu sá cúdíí iní-yu sá dúcá<sup>n</sup> ñí xihí-güedé, te duca<sup>n</sup> chi diu-güedé ní quide ío ní ndohó-yu.

<sup>11</sup> Te sátá ná yáhá úní nduu dava sá dúcá<sup>n</sup> cúú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyiú na quíní sá ndótó-güedé te yuhú víhí-yu.

<sup>12</sup> Te ndí ndúú cue téé-án tecú dóho-güedé cáhán<sup>n</sup> ñí sá cáhán<sup>n</sup> ndéé andíu, te cúñaha-xi xii-güedé:

—Chí táquene iha —duha cúñaha sá cáhán<sup>n</sup>-án xii-güedé.

Te cue téé-án quíhu-güedé ñí xití vícò caa-güedé andíu, te nchaa ñáyiú cúu úhú iní ñáhá xii-güedé quíní ñáhã-yu xii-güedé caa-güedé andíu.

<sup>13</sup> Te òré-án ñíhi víhi tnáa ñuyíú, te úxí xichi cúu-xi ñuú núú cúndècu-güedé-án te ñí xichi ñuú-án naa, te cuú úsá mĩl ñáyiú, te nchaa dava-gá ñáyiú cácu vá cúú yuhú víhí-yu, te cachí-yu sá ío cãhnu cuu Yá Ndiöxí Yaá ndécú andíu.

<sup>14</sup> Te tnúndòho-a cuu-xi tnúndòho cuu úú yáha, te vitna sa ndétu víí-nã tucu sáá tnúndòho cuu úní.

### *Espíritú cúú ùsá tíú-xi cútú néhé-xí*

<sup>15</sup> Te espíritú cúú ùsá ní tíú-xi cútú néhé-xí, te òré-án ñí tecú níhi ní cáhán<sup>n</sup> títní sá ñí cáhán<sup>n</sup> andíu, te cächí-xi:

Nchaa sá cúú cuendá nchaa ñáyiú ñuyíú táxí tnùní-yu ní cùu ní nduu cuendá Tãtá-ó Dütú Ndiöxí táxí tnùní-gá,

Te tnáhá Yaá ní tendaha-gã ní sáhán<sup>n</sup> ñuyíú táxí tnùní-gá nchaa xíá<sup>n</sup>,

te diu-gá taxi tnùní-gá ní caa ní quíhí<sup>n</sup>. Duha ní cáhán<sup>n</sup> nchaa sá ñí cáhán<sup>n</sup>-án.

<sup>16</sup> Te ndí òcò cúmí cue téé sacuéhé xĩnucóo núú xilé váha ní ngüíñí xití-güedé núú Yá Ndiöxí, te ní nuu núú-güedé ndaa núú ñúhú te ní ngüíta-güedé chíñùhu ñaha-güedé xii-gá,

<sup>17</sup> te cächí-güedé:

Ío ndacá<sup>n</sup> táhú-ndí núú yòhó Dütú Ndiöxí,

Yaá ndacú quide nchaandi túhú sá vãha,

te diu-ni-n ndècu-n ndéé cútnáhá ní ngáva ñuyíú, te diu-ni-n ndècu-n vitna, te diu-ni-n cùndecu-n ndéé núú cuahán<sup>n</sup> núú vèxi,

te ío cãhnu cuu-n te ní ngüíta-n ío-gá táxí tnùní-n.

<sup>18</sup> Te nchaa ñáyiú xĩndecu ñuyíú xĩcudéñ<sup>n</sup>-yu núú-n,

te vitna ní sáá nduu dàndohó-n-yu chí ñá túú cùu váha iní-n núú-yu,

te cada ndáá-n cuèchi nchaa ñáyiú sa ní xihí,

te ní sáá tucu nduu cuãñaha-n sá ndúú táhú nchaa ñáyiú ní xinu cuechi núú-n ñí cáhán<sup>n</sup>-yu tnúhu-n, ndihí nchaa dava-gá ñáyiú cúu cuendá-n, chí ñáyiú-án néhẽ-yu sá yíñùhu núú-n,

te cuèi ñáyiú cùnuu ndihí ñáyiú ñá túú cùnuu cuãñaha-n sá ndúú táhú-yu,

te ní sáá tucu nduu dànaa-n nchaa ñáyiú sãhni tnaha ñáyiú-xi.

Duha cächí ndí òcò cúmí cue téé sacuéhé-ã<sup>n</sup> xãha<sup>n</sup>-güedé xii Yá Ndiöxí.

<sup>19</sup> Te ní xiní-í ní nacaá<sup>n</sup> yuyèhe vehe Yá Ndiöxí andíu, te xití vehe-gá-án ñí xiní-í ndécú càjá ñúhú sã yódó tnùní nàcuáa ní cundáa cada-gá sá cúú-xí ñáyiú, te òré-án ñí xiní-í ní sáá ndúté, te ní cáhán<sup>n</sup> ñúhu te ío dusa<sup>n</sup> ñí quide-xi, te níhi víhi ní tnáa, te súúní cãhnu dáú ñíñí ñí cuu<sup>n</sup>.

## 12

*Cuendá ñí ñadhí ndihí cuendá ñí quiti déé<sup>n</sup> nání dragón*

1 Te ío vihi ní quide-xi ñ<sup>n</sup> sá ñ<sup>n</sup> quide-xi andiu, te ní xiní-í ñ<sup>n</sup> ñadìhí te dóo níhnú-á<sup>n</sup> quide-xi datná quidé-xí núú nchĩcanchii, te ndàa núú sàhá-a<sup>n</sup> quide-xi datná quidé-xí núú yóó, te ñùhu ñ<sup>n</sup> coroná díquí-a<sup>n</sup> te ndèé úxúú chódíní.

2 Te ñùhu déhe-a<sup>n</sup> te càna saa-a<sup>n</sup> sá quidé úhú ñáhá-xí xii-a<sup>n</sup> chi sa ndètu vií-nã cacu déhe-a<sup>n</sup>.

3 Te dātñuní ní quide tucu-xi sá ñ<sup>n</sup> quide-xi andiu, te ní xiní-í ñ<sup>n</sup> quiti càhnu quiti ticuehé, quiti déé<sup>n</sup> nání dràgón, te ndèé úsá díquí-di ndihí úxí ndiqui-di, te ñ<sup>n</sup> caa coróná ñúhú ñ<sup>n</sup> caa díquí-di-á<sup>n</sup>.

4 Te quiti-án luha-ná te cuu dava nchaa chódíní dāngòyo-di ñuyúú ndihí lúhmá-di, te quiti-án ñ<sup>n</sup> ngúnu tní-di núú ñaha ndètu vií-nã cacu déhe-xi-á<sup>n</sup> cuendá caxi-di déhe-a<sup>n</sup> òré cacu ni cùu.

5 Te ñaha-án ñ<sup>n</sup> cacu déhe-a<sup>n</sup> te téé cùu-dé, te té líhli-án ío cunuu-dě taxi tnùní-dé nchaa ñáyiu ñuyúú, te mee Yã Ndiõxí ní nacuaca ñaha-gã xii té líhli-án cuendá cundecu ndihí ñaha-dě xii-gã núú ndécú-gã táxí tnùní-gã.

6 Te ñadìhí-án ñ<sup>n</sup> xinu-a<sup>n</sup> cuáhá-a<sup>n</sup> xití yucu núú ñ<sup>n</sup> quide túha Yã Ndiõxí cundecu-a<sup>n</sup> cuendá xiá<sup>n</sup> ñihí-a<sup>n</sup> caxi-a<sup>n</sup>, te duca<sup>n</sup> ñihí-a<sup>n</sup> sá cáxí-á<sup>n</sup> úxúú ciendú únídico nduu chi duca<sup>n</sup> nduu cundecu-a<sup>n</sup> xiá<sup>n</sup>.

7 Te sátá dúcá<sup>n</sup> te andiu ñ<sup>n</sup> xiní-í espíritú cùnùu xinu cuechi núú Yã Ndiõxí nání Mìguél, ndihí nchaa dava-gá espíritú cundìhí-xi, te nchaa espíritú-án nàa-xi ndihí quiti déé<sup>n</sup> nání dràgón ndihí nchaa espíritú cundìhí-di.

8 Te quiti-án ñà túú ní ndàcu-di ndihí nchaa espíritú cundìhí-di, te ñà túú ní ñihí-gã-di núú cundècu-di andiu ndihí nchaa espíritú cundìhí-di-á<sup>n</sup>.

9 Te cue espíritú xínú cuèchi núú Yã Ndiõxí-án ñ<sup>n</sup> dāngává-xí quiti déé<sup>n</sup> nání dràgón-án ndihí nchaa espíritú cundìhí-di ñuyúú, te quiti-án cúu-dí mèi sàcuíhná àdi sá càchí-ó cùu yucu ñávaha, te diu xiá<sup>n</sup> ní dāndàhú-xi ñáyiu ñihí ñuyúú, te diu-ni xiá<sup>n</sup> ní nduu-xi

cóo ñ<sup>n</sup> dāndàhú-xi ñáyiu ndéé sanaha.

10 Te ní tecú dóho-í níhi ní cáhá<sup>n</sup> tucu ñ<sup>n</sup> sá ñ<sup>n</sup> cáhá<sup>n</sup> andiu, te càchí-xi:

—Vitna te Yã Ndiõxí ní quide-gá ní ngúndecu ñáyiu ndihí-gá, te ío càhnu cuu-gá, te ío tàxi tnuní-gá, te tnàhá Crìstú Yaá ní tendaha Yã Ndiõxí ní quixi ñuyúú-a ío tàxi tnuní-gá, te duca<sup>n</sup> chi sa ní xócuíñí sàcuíhná sã sùúni nùnùu sacá<sup>n</sup> cuèchi núú Tātá-ó Dütú Ndiõxí cuendá nchaa ñáyiu ndècu ndihí-o ichi-gá, te nduu núú duca<sup>n</sup> sàcá<sup>n</sup> cuèchi-xi núú-gã cuendá-yu ni cùu.

11 Dico ní ndacú-yu ní cunúu-yu núú sàcuíhná sã dúcá<sup>n</sup> sàcá<sup>n</sup> cuèchi cuendá-yu-á<sup>n</sup> ní cùu, te duca<sup>n</sup> ñ<sup>n</sup> cunúu-yu sá cuendá Yaá cáá datná cáá ñ<sup>n</sup> mbéé quiti ní dánĩcuèhé-güedé, chi Yaá-án ñ<sup>n</sup> sati níñí-gã te ní xihí-gá sá cuendá-yu, te duca<sup>n</sup> ñ<sup>n</sup> cunuu tucú-yu sá cuendá sá sàndáá iní ñáhã-yu xii Yaá-án, te ñà túú ní yuhú-yu cuú-yu sá cuendá-gá.

12 Te vitna ío chí cúdĩ iní nchaa nchòhó espíritú xínú cuèchi núú Yã Ndiõxí, ndihí nchaa nchòhó ñáyiu ndècu andiu, dico ñdàhú ní cuu nchaa ñáyiu xĩndecu ñihí ñuyúú! Chi sùúni cùdéé<sup>n</sup> sàcuíhná ñ<sup>n</sup> ngava-xi te nándi cada ñaha-xi xii-yu, te duca<sup>n</sup> chi cùnùní iní-xi sá sàcú duha-ná nduu cudí-xi cundecu-xi —duha càchí sá ñ<sup>n</sup> cáhá<sup>n</sup> andiu.

13 Te sátá ñ<sup>n</sup> quee quiti déé<sup>n</sup> nání dràgón-án andiu ñ<sup>n</sup> ngava-di ñuyúú quiti cùu mei sàcuíhná-á<sup>n</sup>, te quiti-án ñ<sup>n</sup> chinchícú-di ñadìhí ñaha ní cacu déhe téé-xi-á<sup>n</sup>.

14 Te ñadìhí-án ñ<sup>n</sup> nduu táhú-a<sup>n</sup> ní quene úú ndíxí-a<sup>n</sup>, te càa datná cáá ndíxí<sup>n</sup> ñ<sup>n</sup> yacòlo cahnu vihi cuendá ndava-a<sup>n</sup> núhú-a<sup>n</sup> yucu núú ñ<sup>n</sup> cachí Yã Ndiõxí cundecu-a<sup>n</sup>, te yàcá<sup>n</sup> cundecu-a<sup>n</sup> úní cuiá dava cuendá sá vã ñihí ñáhá quiti déé<sup>n</sup> quiti nàni dràgón-án te xiá<sup>n</sup> ñihí-a<sup>n</sup> sá cáxí-á<sup>n</sup>, te quiti-án cúu tucu-di datná ñ<sup>n</sup> cóo déé<sup>n</sup>.

15 Te quiti-án ñ<sup>n</sup> quene cuéhé ndute yuhu-di, te ndute ní quene yuhu-di-á<sup>n</sup> ñ<sup>n</sup> cuu-xi ñ<sup>n</sup> yúte, te duca<sup>n</sup> ñ<sup>n</sup> quide-di cuendá ndute-á<sup>n</sup> cuido-xi ñadìhí-á<sup>n</sup> ní cùu.

16 Te ñuhu yìchí ní chindee-xi ñàdihí-án, chi ní ndátá te ní quée naa-ni ndute ní quene yuhu quiti-án.

17 Te sá dúcá<sup>n</sup> ñi quide-xi xíá<sup>n</sup> ní cudéé<sup>n</sup> víhí quiti-án<sup>n</sup> núú ñadihí-án<sup>n</sup>, te ní xica-di cuáhá<sup>n</sup>-di núú xíndecu nchaa dava-gá cue déhe ñadihí-án<sup>n</sup> cuendá nàá ndihí ñaha-di, te ñáyiú-án<sup>n</sup> cúú-yu ñáyiú tñi nchaa tnúhu càhá<sup>n</sup> Yá Ndiöxí, te nchícú<sup>n</sup> nihnú-yu nchaa tnúhu sá càhá<sup>n</sup> váha cuendá Xítoho Jesucristú.

## 13

### *Cuendá úú quiti*

1 Te yúhú ní ngúnu tñi-í yuhu làmár, te ní xiní-í ní quene ñ<sup>n</sup> quiti te ndèé úsá díquí-di te úxí ndiqui-di, te núú ñ<sup>n</sup> ñ<sup>n</sup> ndiqui-di-án<sup>n</sup> ndécú<sup>n</sup> ñ<sup>n</sup> caa coroná. Te ñ<sup>n</sup> ñ<sup>n</sup> díquí-di-án<sup>n</sup> ndèé tnúhu sá càhá<sup>n</sup> úhú-xi cuendá Yá Ndiöxí.

2 Te quiti-án<sup>n</sup> cáá-dí dàtná cáá cuñí, te sáhá-di càa datná cáá sáhá òso, te yuhu-di càa datná cáá yùhu ndicaha. Te quiti déé<sup>n</sup> nání dràgón ní sáñaha-di tnúhu ndee ìní xii quiti-án<sup>n</sup> cuendá taxi tnùnì víhí-dí, te dràgón-án<sup>n</sup> ñi sáñaha-di núú ndécú-dí tàxi tnùnì-di xii quiti ní quene xití làmár-án<sup>n</sup>, te duca<sup>n</sup> ñi quide-di cuendá sá ñihí ndéé quiti-án<sup>n</sup> cunuu-di.

3 Te ñ<sup>n</sup> díquí quiti ní quene xití làmár-án<sup>n</sup> càhú víhí càa ní nícuèhé, te sa ndètu víí-ná cuú-di sànuu dico ní ndúha-di, te ñihí ñuyíú ñi ñihí ñáyiú tnúhu sá dúcá<sup>n</sup> ñi cuu, te ío ní cuñúhu-yu te ní tuhá-yu quiti-án<sup>n</sup>.

4 Te nchaa ñáyiú-án<sup>n</sup> ñi cachí-yu sá ío càhnu cuu quiti déé<sup>n</sup> quiti nani dragón-án<sup>n</sup> cuendá sá ñi sáñaha-di tnúhu ndee ìní sá táxí tnùnì quiti ní quene xití làmár-án<sup>n</sup>, te ní ngúíta-yu ní chiñuhú-yu quiti ní quene xití làmár-án<sup>n</sup>, te càhí-yu:

—Vá yóo ñ<sup>n</sup> nùtnahá ñáhá xii quiti-a, te ni vá yóo ñ<sup>n</sup> ndacu nàá ndihí ñaha xii-di —cachí-yu.

5 Te ní ñihí-di tnúhu ndee ìní sá càhá<sup>n</sup> úhú-di Yá Ndiöxí, te cada

càhnu-di mee-di, te údico úú yóo duca<sup>n</sup> ñi ñihí-di tnúhu ndee ìní-án<sup>n</sup> cunuu-di.

6 Te duca<sup>n</sup> ñi quide-di ní càhá<sup>n</sup> úhú-di Yá Ndiöxí ndihí cuendá nchaa sá quidé-gă, te diu-ni duca<sup>n</sup> ñi càhá<sup>n</sup> úhú-di núú ndécú-gă, te ní càhá<sup>n</sup> úhú tucu-di nchaa ñáyiú ndècu ndihí-gá andiú.

7 Te duca<sup>n</sup> ñi ñihí-di tnúhu ndee ìní sá nàá-di ndihí nchaa ñáyiú cùu cuendá Yá Ndiöxí, te duca<sup>n</sup> nàá ndihí ñaha-di xii-yu ndéé òré vá ndácú-gă-yu nàá ndihí ñáhá-yu xii-di, te tñhá ní ngúndecu ndihí-di tnúhu ndee ìní sá táxí tnùnì-di ñáyiú nchaa nació<sup>n</sup>, ndihí ñáyiú nchaa ñúú, ndihí nchaa ñáyiú càhá<sup>n</sup> ndí díí<sup>n</sup> ndí díí<sup>n</sup> núú tnúhu, ndihí ñáyiú xíndecu nchaa xichi.

8 Te cue ñáyiú ñihí ñuyíú ñi cachí-yu sá ío càhnu cuu quiti-án<sup>n</sup>, te ñáyiú-án<sup>n</sup> cúú-yu ñáyiú ñá túú yòdo tnùnì núú tütú Yá cáá dàtná cáá ñ<sup>n</sup> mbéé quiti ní dánicuèhé-güedé Yá ní xihí ní cùu te ní ndoto. Te ndéé cùtnáhá ní ngáva ñuyíú sa yòdo tnùnì ñáyiú naníhí tàhú, dico ñáyiú càhí sá ío càhnu cuu quiti-án<sup>n</sup> ñá túú yòdo tnùnì-yu núú tütú-gá.

9 Te nchaa nchòhó ñáyiú xíndedóho chí cùndedóho váha nchaa nàcuáa cuáhá<sup>n</sup> tnúhu-án<sup>n</sup>.

10 Te nchaa ñáyiú na chihí tñaha ñáyiú-xi vecaá te sáá nduu te quíhí<sup>n</sup>-yu tñáhá-yu vecaá, te nchaa ñáyiú sàhni tñaha ñáyiú-xi ndihí yuchí te diu-ni ndihí yuchí cuú-yu tñáhá-yu, te xíá<sup>n</sup> núú ío xini ñuhu-xi sá ncháá ñáyiú cùu cuendá Yá Ndiöxí cunduu càhnu ìní-yu, te quíndáá ìní ñáhá-yu xii-gá.

11 Te ní xiní tucu-í íngá quiti ní quene-di núú ñuhu yìchí, te ndèé úú ndiqui-di te càa datná cáá ndiqui canerú, te càhá<sup>n</sup>-di dàtná càhá<sup>n</sup> quiti déé<sup>n</sup> nání dràgón.

12 Te dàtná ndécú ndihí quiti ní quene xití làmár-án<sup>n</sup> tnúhu ndee ìní sá táxí tnùnì-di duca<sup>n</sup> ndècu ndihí quiti ní quene ñuhu yìchí-án<sup>n</sup> tnúhu ndee ìní taxi tnùnì-di cada-di núú quiti ní quene xití làmár-án<sup>n</sup>, te quiti

ní quene ñuhu yìchí-á<sup>n</sup> ñí quide yica-di sã ncháá ñáiyu xĩndecu ñihí ñuyú chiñuhú-yu quití ní quene xití lámár-á<sup>n</sup>, quití càhú víhí ñí tnahá ní nícuèhé te ní ndúha-di.

<sup>13</sup> Te quití ní quene xití ñuhu yìchí-á<sup>n</sup> ñí quide-di titní núú sã vã yõo tnahí ndàcu cada, te nchaa ñáiyu ní xiní-yu sá ndèé andiú ñí dǎngóyó-dí ñùhú ñuyú.

<sup>14</sup> Te sá dúcá<sup>n</sup> ñí ngúndecu ndihí-di tñuhu ndee ìní ní quide-di nchaa xiã<sup>n</sup> ní quide-di núú quití ní quene xití lámár-á<sup>n</sup>, te sá dúcá<sup>n</sup> ñí quide-di te xiã<sup>n</sup> ní dándàhú-di nchaa ñáiyu xĩndecu ñihí ñuyú, te ní xáha<sup>n</sup>-dí xí<sup>n</sup>-yu sá ndúcũ-yu ñí sá cadũha-yu nàcuáa-ni càa nacuáa-ni ndùu quití ní quene xití lámár-á<sup>n</sup>, quití càhú víhí ñí tnahá ní nícuèhé díquí-xi-á<sup>n</sup> ñí quée machití te ñá túú ní xihí-di chi ní xĩndecu-ni-di.

<sup>15</sup> Te quití ní quene xití ñuhu yìchí ní ngúndecu ndihí tucu-di tñuhu ndee ìní sá chíhí-dí ìní sá ñí cadúha-yu-á<sup>n</sup>, sá ñí natavá-yu dàtná cáá quití ní quene xití lámár-á<sup>n</sup>, te duca<sup>n</sup> ñí quide quití-á<sup>n</sup> cuèndá cáhá<sup>n</sup> sá ñí cadúha-yu-á<sup>n</sup>, te xiã<sup>n</sup> cada-xi cuú nchaa ñáiyu ñá túú ní cuìní chiñuhu ñaha xii-di.

<sup>16</sup> Te quití ní quene xití ñuhu-á<sup>n</sup> quidé-dí sã ncháá ñáiyu ngúndeé ñí tñuní ndaha cùhá-yu àdi tneé-yu, te duca<sup>n</sup> ñí quide-di cuèi ñáiyu cùnuu te cuèi ñáiyu ñá túú cùnuu, te cuèi ñáiyu cuica te cuèi ñáiyu ndàhú, te cuèi ñáiyu ñá túú dàñá quee núú chíú<sup>n</sup> pàtró<sup>n</sup>-xi, te cuèi nchaa ñáiyu dàñá quée núú chíú<sup>n</sup> pàtró<sup>n</sup>-xi ncháa-yu duca<sup>n</sup> ñí ngúndeé tñuní ñí<sup>n</sup>-yu.

<sup>17</sup> Te ní quide-di sá ncháá ñáiyu ñá túú ndèé tñuní ñí<sup>n</sup>-xi vá cúú cuáá<sup>n</sup>-yu sá càhí iní-yu te ni vã cúú dícó-yu ñí sá cuìní-yu dícó-yu, te tñuní-á<sup>n</sup> cúú-xí dèu quití ní quene xití lámár-á<sup>n</sup> àdi número-di.

<sup>18</sup> Te xini ñuhu-xi sá ncháá ñáiyu ío váha cùtnuní iní-xi ío váha cuáha-yu cuèndá nàcuáa quèe-xi número quití-á<sup>n</sup>, te número-á<sup>n</sup> cúú-xí ñíú cièndú únídico ñíú, te cùu-xi cuendá

ñí ñáiyu ñuyú.

## 14

*Cuèndá ñí cièndú údico cúmí mĩ ñáiyu*

<sup>1</sup> Te sátá dúcá<sup>n</sup> te ní xiní-í Yá cáá dàtná cáá ñí mbéé quití ní dǎnícuehé-güedé nútní-gá ñí yucu ñuú nání Sión ndécú àndiú, te nutní-gá ndihí ñí cièndú údico cúmí mĩ ñáiyu, te tneé-yu ndèé dèu-gá ndihí dèu tátá-gã Dútú Ndiõxí.

<sup>2</sup> Te ní tecú dóho-í ní quide-xi andiú dàtná quidé-xí núú xícá cuèhé víhí ndüte, te quide tucu-xi datná quidé-xí òré níhi víhi cahá<sup>n</sup> ñuhu, te quide tucu-xi datná quidé-xí òré cuèhé víhí ñáiyu càní-yu àrpá.

<sup>3</sup> Te ní tecú dóho-í xixita yuhu sã xitá yùhu núú Yáá núcõo núú xilè váha, ndihí núú ndi cùmí cue quití xĩnutní-á<sup>n</sup>, ndihí núú nchaa cue tée cùu sacuéhé xĩnucõo-á<sup>n</sup>, te xixita-xi ñí ndudú sáá. Te mee-ni cuè ñáiyu ñí cièndú údico cúmí mĩ-á<sup>n</sup> quée díquí-yu ndudú-á<sup>n</sup>, te ñáiyu-á<sup>n</sup> cúú-yu ñáiyu ní dácãcu nihnu ñaha Yáá cáá dàtná cáá ñí mbéé quití ní dǎnícuehé-güedé núú ñáiyu ndècu ichi cuehé ichi duha xĩndecu ñuyú, te vá yõo ñí-gá quée díquí-xi ndudú sáá-ã<sup>n</sup> chi mee-ni ñáiyu ní cácu nihnu-á<sup>n</sup> quée díquí-yu.

<sup>4</sup> Te ñáiyu ní cácu nihnu-á<sup>n</sup> cúú-yu ñáiyu ñá túú ní xĩndecu ichi dí<sup>n</sup> ìní, te cùu-yu ñáiyu càndoo canine iní-xi, te ndèni ní cuu cuáhá<sup>n</sup> Yá cáá dàtná cáá ñí mbéé quití ní nícuèhé-á<sup>n</sup>, te duca<sup>n</sup>-ni ndèndaha ñàhá-yu xii-gá cuáhá<sup>n</sup>, te ñáiyu-á<sup>n</sup> ñí cácu nihnú-yu núú nchaa ñáiyu ñuyú, ñáiyu ndècu ichi cuehé ichi duha, te ñáiyu ní cácu nihnu-á<sup>n</sup> cúú-yu ñáiyu díhna nuu ñí nduu táhú Yá Ndiõxí cuu cuèndá-gá ndihí Yá cáá dàtná cáá ñí mbéé quití ní dǎnícuehé-güedé.

<sup>5</sup> Te cùu-yu ñáiyu ñá túú càhá<sup>n</sup> ní ñí tñuhu ndehnde, te càndoo canine iní-yu ndécú-yu núú núcõo Yá Ndiõxí táxí tñuní-gá.

*Cuendá úní cue espíritú xínú cuèchi núú Yă Ndiöxí*

<sup>6</sup> Te sátá dúcá<sup>n</sup> te ní xíní-í ì<sup>n</sup> espíritú xínú cuèchi núú Yă Ndiöxí xícó-xí cuädava andiu, te ndècu ndihí-xí tnúhu sá càhá<sup>n</sup> nàcuáa naníhí tàhú-ó, tnúhu sá ñà túú tnàhí ndihí nihnu te tnúhu-á<sup>n</sup> danèhé espíritú-a<sup>n</sup> nchaa ñáyíu ndècu ñuyíú, ñáyíu nchaa nació<sup>n</sup>, ndihí ñáyíu nchaa ñuú, ndihí nchaa ñáyíu càhá<sup>n</sup> ndí díí<sup>n</sup> ndí díí<sup>n</sup> núú tnúhu, ndihí ñáyíu xíndecu nchaa xichi.

<sup>7</sup> Te níhi ní càhá<sup>n</sup>-xí te càchí-xí:  
—Nchaa nchòhó ñáyíu ndècu ñuyíú canehe-ndo sá yíñuhu núú Yă Ndiöxí, te cachí-ndó sá ïo càhnu cuu-gá chí sa ní sáá nduu càda ndáá-gá nchaa cuèchi-ndo, te chiñuhu-ndo-gă chí diu-gá ní cadúha-gá andiu, ndihí ñuhu yíchí, ndihí làmár, ndihí nchaa ndóhó —duha càchí espíritú-á<sup>n</sup>.

<sup>8</sup> Te nchícú<sup>n</sup> tucu ingá espíritú xínú cuèchi núú Yă Ndiöxí, te càchí-xí:

—Vitna ní naa ñuú Babìloniá ñuú ïo cùnuu, te duca<sup>n</sup> ní naa chí cue ñáyíu ñuú-á<sup>n</sup> ní quidé-yu ní xíta nihnu nchaa ñáyíu nihí ñuyíú, chí ní sanu ichi ñàhá-yu ichi cuèhé ichi duha —duha càchí espíritú-á<sup>n</sup>.

<sup>9</sup> Te nchícú<sup>n</sup> tucu ingá espíritú xínú cuèchi núú Yă Ndiöxí te níhi càhá<sup>n</sup>-xí, te càchí-xí:

—Nchaa ñáyíu chiñuhu ñaha xii quiti ní quene xítí làmár, ndihí sá ní natava ñàhá-yu nàcuáa càa-di-á<sup>n</sup>, ñáyíu ní dáñá mèe-xí ní ngúndeé tnuní ndahá-yu àdi tneé-yu,

<sup>10</sup> ñáyíu-á<sup>n</sup> sùúní dándoho ñaha Yă Ndiöxí xíí-yu chí ïo cùdèé<sup>n</sup>-gă, te duca<sup>n</sup> ïo dándoho ñaha-gá xíí-yu chí daquihí<sup>n</sup> ñàhá-gă xíí-yu núú ñùhú núú ñùhú àzufré càyú-xí, te núú cuè espíritú xínú cuèchi núú-gă duca<sup>n</sup> dándoho ñaha-gá xíí-yu, ndihí núú Yá cáá dàtná cáá ì<sup>n</sup> mbéé quiti ní dánícuèhé-güedé.

<sup>11</sup> Te ní caa ní quíhí<sup>n</sup> quene ñúhmá núú dúcá<sup>n</sup> cùndecú-yu ndohó-yu-á<sup>n</sup>, te cuèi nduu cuèi níú duca<sup>n</sup> ndòhó-yu. Te duca<sup>n</sup> ndòho nchaa ñáyíu chiñuhu ñaha xii quiti ní quene xítí làmár, ndihí

sá ní natava ñàhá-yu nàcuáa càa-di-á<sup>n</sup>, te diu-ni ñáyíu-á<sup>n</sup> cúú-yu ñáyíu ní ngúndeé tnuní ndaha-xí àdi tneé-xí —duha càchí espíritú-á<sup>n</sup>.

<sup>12</sup> Te xíá<sup>n</sup> xíní ñùhu-xí sá ncháá ñáyíu cùu cuendá Yă Ndiöxí cunduu càhnu iní-yu, chí diu-ní-yu cúú-yu ñáyíu tnè nchaa tnúhu càhá<sup>n</sup>-gá, te ní yùhu ní iní-yu sàndáá iní-yu Xítohó Jesucristú.

<sup>13</sup> Te sátá dúcá<sup>n</sup> te ní tecú dóho-í ní càhá<sup>n</sup> ì<sup>n</sup> sá ní càhá<sup>n</sup> andiu, te càchí-xí:

—Chido tnùní-n ì<sup>n</sup> núú tùtú nàcuáa na càhá<sup>n</sup>-í-a. “Není vitna ïo váha táhú nchaa ñáyíu sàndáá iní tnúhu Xítohó Jesucristú te xihí-yu” —duha càchí sá ní càhá<sup>n</sup>-á<sup>n</sup>.

Te Espíritú Yă Ndiöxí ní càhá<sup>n</sup>-xí, te càchí-xí:

—Ndáá, chí ndetatú-yu chí ñá túú-gă nágá chù<sup>n</sup> ndohó-yu cadá-yu, te Yă Ndiöxí sa nàha-gá nchaa nàcuáa nduu chiu<sup>n</sup> ní quidé-yu —duha càchí Espíritú-gá.

*Nchaa sá cúú núú ñùhú*

<sup>14</sup> Te sátá dúcá<sup>n</sup> te dàtnùní ní xíní-í ì<sup>n</sup> vícò cuixí<sup>n</sup>, te núú vícò-á<sup>n</sup> ní xíní-í núcò ì<sup>n</sup> Yaá, te càa-gá dàtná cáá ì<sup>n</sup> téé ñuyíú, te díquí-gă ñùhú ì<sup>n</sup> coroná ní cuáha mee-ni díhú<sup>n</sup> cuáá<sup>n</sup>, te nùndaha-gá ì<sup>n</sup> yuchí ndíquí te sùúní dèé<sup>n</sup>.

<sup>15</sup> Te ní xíní-í ì<sup>n</sup> espíritú xínú cuèchi núú Yă Ndiöxí ní quee-xí xítí vehe-gá, te níhi ní càhá<sup>n</sup>-xí xàha<sup>n</sup>-xí xíi Yaá núcò núú vícò-á<sup>n</sup>:

—Sa ní cuu nàquehdé-n nchàa sá ní cuu ñuyíú ndihí yuchí ndíquí-n, chí sa ní cuu nuçóo tnàha-xí —duha càchí espíritú-á<sup>n</sup> xàha<sup>n</sup>-xí xíi Yaá-á<sup>n</sup>.

<sup>16</sup> Te Yaá núcò núú vícò-á<sup>n</sup> ní dáyàha ndodo-gá yuchí ndíquí-gă núú ñuyíú ní nataxi tnàha-gá nchaa sá ní cuu.

<sup>17</sup> Te ní xíní tucu-í ingá espíritú xínú cuèchi núú Yă Ndiöxí ní quee-xí xítí vehe-gá sá cáá àndiu, te nùndaha-xí tnahá-xí ì<sup>n</sup> yuchí ndíquí dèé<sup>n</sup>.

<sup>18</sup> Te ní xíní tucu-í ní quee tucu ingá espíritú xínú cuèchi núú Yă Ndiöxí núú nùtnè núú sácòdó sá ndúú táhú-gă, te ndècu ndihí-xí tnúhu ndee

iní táxí tnùnì-xi ñuhú, te espíritú-án ñhi ní cáhá<sup>n</sup>-xi xăha<sup>n</sup>-xi xì espíritú néhé yùchí ndíquí dĕé<sup>n</sup>-án:

—Ngüita naquehndé-n ndihî yuchî ndíquí-n ndéhé yoho yâha stilé sá ïo ñuyú chi sa ní cuu nâtehndé —duha cächí espíritú-án xăha<sup>n</sup>-xi xì espíritú néhé yùchí ndíquí-án.

<sup>19</sup> Te espíritú néhé yùchí ndíquí-án ñ dáyăha ndodo-xi yuchî ndíquí-xi nŭú ñuyú ñ nâquehndé-xi nchaa ndéhé yoho yâha stilé, te ní chihi-xi ñ<sup>n</sup> xichi núú ñ chihi-xi cuendá xía<sup>n</sup> quihni-xi quee ndudí-xi, te sá dúcá<sup>n</sup> ñ quide-xi xía<sup>n</sup> cútnùnî iní-ó să ïo cùdĕé<sup>n</sup> Yă Ndiôxí núú ñăyiu ñuyú.

<sup>20</sup> Te ndéhé yoho yâha stilé-án ñ quihni-xi ñ<sup>n</sup> xio yuhu ñúú, te ndudí ndéhé yoho yâha stilé-án ñ nduu-xi ñîñî te ní quee-xi núú quihni ñhnu espíritú-án. Te únî ciendú mĭl mĕtrú ní xica ñîñî-án, te dàtná ñ<sup>n</sup> mĕtrú dava ní sáá cuehnu ñîñî-án ñ xica-xi.

## 15

### Úsá tnúndòho

<sup>1</sup> Te ïo vîhi ní quide-xi ñ<sup>n</sup> sá ñ quide-xi andiū te ní cuñuhu vîhi-í, te ní xiní-í úsá tnàhá espíritú xínú cuèchi núú Yă Ndiôxí, te ñ<sup>n</sup> ñ<sup>n</sup> cue espíritú-án ndécú ndihî-xi tnúhu ndee ñí dandòho-xi ñăyiu ñuyú, te nà yâha nchaa tnúndòho-án, te vá cùdĕé<sup>n</sup>-gă Yă Ndiôxí núú-yu dândoho ñaha-gă xií-yu.

<sup>2</sup> Te ní xiní-í ñ<sup>n</sup> làmár te ndute làmár-án cáá dàtná cáá vîdriú, te dácánuu-xi ndihî ñuhú, te yuhu làmár-án xĭnutnĭi nchaa ñăyiu ní ndacu ní dáquĕé tĭhú ñàhá xì quiti ní quene xití làmár-án, te duca<sup>n</sup> ñ ndacú-yu ní dáquĕé tĭhŭ-yu sá ñ natava ñàhá-yu nâcuáa càa-dî-án, te duca<sup>n</sup> ñ ndacu tucú-yu ní dáquĕé tĭhú tucú-yu númerú-dî sá cúú dàtná dĭu-dî, te nchaa ñăyiu-án ñ nduu táhŭ-yu núú Yă Ndiôxí àrpá xĭnehé-yu cuendá caní-yu.

<sup>3</sup> Te xĭxitá-yu ndudú sá ñ xita ndí Moisés ndí ní xinu cuechi nŭú Yă

Ndiôxí ndéé sanaha, te xita tucú-yu ndudú Yaá cáá dàtná cáá ñ<sup>n</sup> mbéé quiti ní dāñcuèhé-güedé, te cächí-yu:

Yòhó Dútú Ndiôxí ïo càhnu cuu-n, chi quide-n nchaa sá vă yòo tnàhî ndàcu cada, te cùu-n Yaá ndácú quide nchaandi túhú sá văha, te ïo ndáá quidé-n te ïo ndáá cáhá<sup>n</sup>-n, te yĭndaha-n nchaa ñăyiu ñhĭí ñuyú.

<sup>4</sup> Te nchaa ñăyiu nĕhé-yu sá yĭñuhu núú-n, te nchaá-yu cächí-yu sá ïo càhnu cuu-n, chi ñ<sup>n</sup>dîi díi-ni yòhó cúú-n Yàá ïo váha quide ndáá, te nchaa ñăyiu ñhĭí ñuyú natacá-yu chiñuhu ñàhá-yu xii-n, te duca<sup>n</sup> càdá-yu chi ndĕhé-yu nchaa sá văha quide-n.

Duha cächí ñăyiu-án xĭxitá-yu.

<sup>5</sup> Te sáta dúcá<sup>n</sup> te ní xiní-í ní nacaá<sup>n</sup> yuyĕhe vehe Yă Ndiôxí andiū, te xití vehe-gă-án ndécú să ndĕé tnúhu-gă.

<sup>6</sup> Te xití vehe-gă-án ñ quee úsá tnàhá espíritú xínú cuèchi núú-gă, te ñ<sup>n</sup> ñ<sup>n</sup>-xi ndĕcu ndihî-xi tnúhu ndee ñí dandòho-xi ñăyiu, te xĭxĭhnu-xi mee-ni dŏó văha, te súúnî văha càndoo, te chàhncĭhî, te yĭdúcú<sup>n</sup>nuu cĭnhú ní cuáha mee-ni dĭhú<sup>n</sup> cuáá<sup>n</sup> pĕchú ndi úsá cue espíritú-án.

<sup>7</sup> Te ñ<sup>n</sup> quiti cúmî xĭnutnĭi núú nŭtnĭi xĭlĕ váha ní sáñaha-dî ñ<sup>n</sup> caa sá nàhá tĭcùú ní cuáha mee-ni dĭhú<sup>n</sup> cuáá<sup>n</sup> xii ñ<sup>n</sup> ñ<sup>n</sup> espíritú-án, te xití nchaa tĭcùú-án ñúhú ñ<sup>n</sup> sá ñúhú te xía<sup>n</sup> cútnùnî sá Yă Ndiôxí dandòho-gă ñăyiu ñuyú, te dĭu-gă cúú-gă Yaá ndécú nchàa nduu nchaa quíú.

<sup>8</sup> Te xití vehe-gă-án ñ chítú ñŭhmá, te duca<sup>n</sup> ñ quide-gă cuendá cutnùnî ñí ñăyiu sá ïo càhnu cuu-gă táxí tnùnî-gă, te vá yòo ñ<sup>n</sup> cuu quíhu xití vehe-gă-án ndĕé ndihî ndi úsá tnúndòho cada ndi usá cue espíritú-án ñuyú.

## 16

*Tnúndòho cada-xi ñuyú*



1 Te sáta dúcá<sup>n</sup> te ní tecú dóho-í níhi ní cáhá<sup>n</sup> ì<sup>n</sup> sá ní cáhá<sup>n</sup> xítí vehe Yá Ndiöxí, te xáha<sup>n</sup>-xi xìi ndi usá cue espíritú-á<sup>n</sup>:

—Chí cuáhá<sup>n</sup> coyo-ndo sã ñúhú xítí nchaa tícúú néhé-ndó-ã<sup>n</sup> núú ñùyíú, chí sá ñúhú-ã<sup>n</sup> cúú-xí tnündòho tendaha Yá Ndiöxí sá cúú-xí nchaa ñáyíu ñuyíú —duha càchí sá càhá<sup>n</sup>-á<sup>n</sup>.

2 Te espíritú díhna ní sáhá<sup>n</sup>-xi ní coyo-xi sá ñúhú xítí tícúú néhé-xí-ã<sup>n</sup> ñuyíú, te nchaa ñáyíu ñùhu tnuní quiti ní quene xítí làmár ñáyíu ní chiñuhu sá ní natava ñàhá-yu xii-di, nchaa ñáyíu-á<sup>n</sup> ní quené-yu ndíhyi tèhyú te súúni dàndòho ñaha-xi xií-yu.

3 Te espíritú cúú ùú ní coyo-xi sá ñúhú xítí tícúú néhé-xí núú làmár, te ndute làmár-á<sup>n</sup> ní nduu-xi níñí te càa-xi datná cáá níñí ñáyíu sa ní xíhí, te nchaa quiti ñùhu xítí làmár-á<sup>n</sup> ní xíhí-güedi.

4 Te espíritú cúú ùní ní coyo-xi sá ñúhú xítí tícúú néhé-xí nchaa yúte ndíhi nchaa núú quèniñni ndute, te ndute nchaa yúte-á<sup>n</sup> ndíhi nchaa ndute quèniñni-á<sup>n</sup> ní nduu-xi níñí.

5 Te sáta dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> espíritú xínú cuèchi núú Yá Ndiöxí, espíritú yíndàha ndute, te xáha<sup>n</sup>-xi xìi Yá Ndiöxí:

—Yòhó Dútú Ndiöxí cúú-n Yàá quidé ndáá cuiti núú duha quíde-n tendaha-n tnündòho-a, te diu-ni-n cùu-n Yáá ndécú ndèé cútnàhá ní ngáva ñuyíú, te diu-ni-n cùu-n Yáá ndécú vitna te ñá túú tnàhí cuéchi-n.

6 Chí cue ñáyíu ñuyíú ní dácácã-yu níñí nchaa ñáyíu ní cáhá<sup>n</sup> tnúhu-n ndíhi nchaa dava-gá ñáyíu cùu cuendá-n, te ní sahní-yu nchaa ñáyíu-á<sup>n</sup>, te vitna ní dátíú-n ndute ní nduu-xi níñí te duca<sup>n</sup>-ni càa ndute-á<sup>n</sup> xíhí-yu, te duca<sup>n</sup> tàú-xi ndohó-yu cuendá sá ní sahní-yu cue ñáyíu cùu cuendá-n —duha càchí espíritú-á<sup>n</sup> xáha<sup>n</sup>-xi xìi-gá.

7 Te ní tecú tucu dóho-í ní cáhá<sup>n</sup> ì<sup>n</sup> sá ní cáhá<sup>n</sup> núú nútníí núú sácódó sá ndúú táhú Yá Ndiöxí, te xáha<sup>n</sup>-xi xìi-gá:

—Ndáá sá yòhó Dútú Ndiöxí Yáá ndácú quíde nchaandi túhú sá vãha dàndòho-n ñáyíu nàcuáa tàú-xi cundu —duha càchí sá càhá<sup>n</sup>-á<sup>n</sup> xáha<sup>n</sup>-xi xìi-gá.

8 Te espíritú cúú cùmí ní coyo-xi sá ñúhú xítí tícúú néhé-xí núú nchíanchii cuendá nchíanchii-á<sup>n</sup> cahmi-xi nchaa ñáyíu ñuyíú.

9 Te ncháa-yu ní ndoho vîhí-yu ní cáyú-yu, te cuèi duca<sup>n</sup> ní ndohó-yu dico ñá túú ní cuíní-yu ndixi cuéchi iní-yu cuendá nchaa sá ñà túú vãha quíde-yu, te ní ñà túú ní càchí-yu sá ïo càhnu cuu Yá Ndiöxí chí da ní cáhá<sup>n</sup> úhú-yu cuendá-gá, te diu-gá cúú-gá Yáá duca<sup>n</sup> ní tendaha tnündòho-á<sup>n</sup> sá cúú-xí-yu.

10 Te espíritú cúú ùhú<sup>n</sup> ní coyo-xi sá ñúhú xítí tícúú néhé-xí núú ndécú quiti ní quene xítí làmár-á<sup>n</sup> táxí tnùní-di, te nchaa núú táxí tnùní-di ní cuu nee, te nchaa ñáyíu ñuyíú ndéé yàa-ná-yu nàcaxi nihnú-yu sá ndòhò-yu.

11 Dico ní dùca<sup>n</sup> ñá túú ní cuíní-yu dàñá-yu ní ì<sup>n</sup> sá cuèhé sá dúhá quíde-yu, chí da ní cáhá<sup>n</sup> úhú-yu cuendá Yá Ndiöxí Yáá ndécú àndiú sá cuendá sá dándòho ñaha ndíhyi tèhyú ndéé-yu-á<sup>n</sup> ndíhi nchaa dava-gá sá yãha-yu.

12 Te espíritú cúú ìñú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-á<sup>n</sup> ní yíchí cuendá yãha cue téé yíndaha ñáyíu xíndecu ndàa xio nacuáa quène nchíanchii.

13 Te ní xiní-í ní quee ì<sup>n</sup> espíritú cùndíhi yucu ñávãha yuhu quiti déé<sup>n</sup> nání dràgón, te ní xiní tucu-í ní quee tucu íngá espíritú cùndíhi yucu ñávãha yuhu quiti ní quene xítí làmár, te ní xiní tucu-í ní quee tucu íngá espíritú cùndíhi yucu ñávãha yuhu téé dàndahú ñáyíu càchí sá càhá<sup>n</sup> tnúhu Yá Ndiöxí te ñá ndáá, te ndi nùni espíritú-á<sup>n</sup> xíndáa-xi datná cáá làhvá.

14 Te ndi nùni espíritú-á<sup>n</sup> quíde-xí sã vã yòo tnàhí ndàcu cada, te xìca datacá-xi nchaa cue téé yíndaha ñaha

xii ñáyiú xĩndecu nihii ñuyíú cuèndá nàá-güedé mei ndùu cachí Yă Ndiöxí coo tnúndòho cahnu vihi-gá, te diu mee Yă Ndiöxí cúú-gă Yaá ío cahnú cuu.

<sup>15</sup> Te Yaá cúú Xitohó-ó nĩ cachí-gá: “Cunaha-ndo chi nduu ñà túú yihi iní-ndó quixi-í núú ndécú-ndó, te cada-í dàtná quidé ñadúhú. Te váha táhú nchaa nchòhó ñáyiú xĩndecu túha, chi cùu-ndo datná cue ñáyiú xĩndecu túha xixihnu-ni dóó-xi cuèndá sá vă cúcàha<sup>n</sup> núú-yu dàtná cúcàha<sup>n</sup> núú cuè ñáyiú ñà túú nihnu dóó-xi, te duha cãhá<sup>n</sup>-í cuèndá sá nchòhó cundecu túha-ndo òrè quexio-í”, duha cachí-gá.

<sup>16</sup> Te ndi nùní cue espíritú cundihí yucu ñávãha-á<sup>n</sup> nĩ dátacá-xi nchaa cue téé yĩndaha ñaha xii ñáyiú, te ní taxí ndecu ñaha-xi ì<sup>n</sup> xichi núú nání Armagedón, duha nani xíá<sup>n</sup> tnúhu hèbreú.

<sup>17</sup> Te espíritú cúú ùsá ní coyo-xi sá ñúhú xití ticúú néhé-xi núú tàchí, te ní tecú dóho-í níhi ní cãhá<sup>n</sup> Yaá núcõo núú xilé váha xití vehe-gá, te cãchí-gá: —Xéhé-nă cúmăní te xínu cava nchaa tnúndòho tnúhu ndàhú —duha cãchí-gá.

<sup>18</sup> Te sátá dúcá<sup>n</sup> te ní sáá nduté te ní cãhá<sup>n</sup> ñúhu, te súúni dusa<sup>n</sup> ní quide-xi, te níhi vihi ní tnáa ñuyíú, te ndéé cúnahá ní ngúndecu ñáyiú ñuyíú te vátá ì<sup>n</sup> xito-gá níhi tnáa dàtná ní quide-xi.

<sup>19</sup> Te ñuú cáhnú ío cùnuu nani Babiloniá ní quée dava-xi ní cuu-xi úní xichi, te nchaa ñuú cáá nihii ñuyíú nĩ ngoyo nchaa vehe, chi Yă Ndiöxí ní ndacu iní-gá nchaa sá cuèhé sá dúhá quide nchaa ñáyiú ñuú Babiloniá-á<sup>n</sup>, te duca<sup>n</sup> nĩ quide ñaha-gă xii-yu chi ío cùdèé<sup>n</sup>-gă núú-yu.

<sup>20</sup> Te nchaa tĩndúú nĩ ndóñúhú-xi cuèi nchaa tĩndúú ñuhu yìchí ndécú xití làmár.

<sup>21</sup> Te ní xiní-í ní cuu<sup>n</sup> ñiñi nahnú vihi ní ngaundodo-xi cue ñáyiú ñuyíú, te nchaa ñiñi-á<sup>n</sup> vëe-xi dàtná údico kílú, te cue ñáyiú ñuyíú nĩ cãhá<sup>n</sup> úhú-yu cuèndá Yă Ndiöxí sá dúcá<sup>n</sup> nĩ dácúú<sup>n</sup>-gă ñiñi nahnú vihi-á<sup>n</sup>, chi

ní cuu-xi ì<sup>n</sup> tnúndòho cahnu vihi sá cúú-xi-yu.

## 17

### *Ñadihí ndécú ichi dǐí iní*

<sup>1</sup> Te núú ùsá espíritú néhé ticúú-á<sup>n</sup>, te ì<sup>n</sup>-xi ní quixi-xi núú ndécú-í, te cãchí-xi xii-í:

—Néhé ná quihí<sup>n</sup>-ó dànehé ñáhà-í xii-n nchaa tnúndòho sá ndóhó ñadihí ñaha ndècu ichi dǐí iní, te ñaha-á<sup>n</sup> cúnúu-a<sup>n</sup> nucóo-a<sup>n</sup> núú ñúhú vihi ndute.

<sup>2</sup> Te ñaha-á<sup>n</sup> ndécú dǐí iní-a<sup>n</sup> ndihí nchaa cue téé yĩndaha ñaha xii ñáyiú xĩndecu nihii ñuyíú, te nchaa dava-gá ñáyiú ñuyíú ío iní-yu nchicú<sup>n</sup> nihnú-yu quidé-yu nchaa nacuáa quide ñaha-á<sup>n</sup> —duha cãchí espíritú-á<sup>n</sup>.

<sup>3</sup> Te òrè duca<sup>n</sup> quide ñaha Espíritú Yă Ndiöxí xii-í nacuáa cãchí iní-xi, te ì<sup>n</sup> espíritú xínú cuèchi núú-gă ndécá ñaha-xi xii-í cuáhá<sup>n</sup> ì<sup>n</sup> xití yucu, te xití yucu-á<sup>n</sup> nĩ xiní-í ì<sup>n</sup> ñadihí yódó-á<sup>n</sup> ì<sup>n</sup> quití ticuehé, te ndéé úsá díqui-di te úxí ndiqui-di, te nihii-di ndéé tnuní-di mee-ni tnúhu sá cãhá<sup>n</sup> úhú cuèndá Yă Ndiöxí.

<sup>4</sup> Te ñadihí-á<sup>n</sup> nihnú-á<sup>n</sup> dǐó muradú ndihí dóó ticuehé, te mee-ni sá nĩ cuáha díhú<sup>n</sup> cuáá<sup>n</sup>, ndihí yúú vãha sá nání pèrlá, ndihí nchaa dava-gá núú yúú vãha, mee-ni nchaa xíá<sup>n</sup> ní cuáha sá yíhí lõho-a<sup>n</sup>, ndihí sá ñúhú dúcú<sup>n</sup>-a<sup>n</sup>, ndihí sá ñúhú dúcú<sup>n</sup> ndáhá-á<sup>n</sup>, te nũndaha-a<sup>n</sup> ì<sup>n</sup> ticúú ní cuáha mee-ni díhú<sup>n</sup> cuáá<sup>n</sup> te ñúhu mee-ni sá cuèhé sá dúhá, te xíá<sup>n</sup> cúnúni iní-ó sá cúú-á<sup>n</sup> ì<sup>n</sup> ñadihí ñaha ndècu ichi cuehé ichi duha.

<sup>5</sup> Te tneé-a<sup>n</sup> ndéé tnuní ì<sup>n</sup> tnúhu, te cãchí-xi: “Ñuú Babiloniá ñuú ío cùnuu, cada iní-ndó sá cúú-xi mèi ñadihí-a, te diu ñadihí-a cùu-a<sup>n</sup> ñaha sanu ichi ñaha xii nchaa ñáyiú dihi ñáyiú ndècu ichi dǐí iní, te nándi-gá nchaa sá cuèhé sá dúhá sanu ichi-a<sup>n</sup> nchaa ñáyiú cadá-yu”, duha cãhá<sup>n</sup> tnúhu ndéé tnuní tneé ñadihí-á<sup>n</sup>. Te vá yõo tècú tnuní ná cuèndá duca<sup>n</sup> cãhá<sup>n</sup> tnúhu-á<sup>n</sup>.

6 Te ní cutnùní iní-í sá díú ñàha-án nǐ dácácá-án nǐñí ñáyiú cùu cuendá Yă Ndiöxí ní sahní ñaha-a<sup>n</sup> xii-yu, te ñáyiú ní xihí-án cúu-yu ñáyiú ní cáhá<sup>n</sup> váha cuendá Xítóhó Jesucristú, te sá dúcá<sup>n</sup> nǐ quide-a<sup>n</sup> te ní nduu-a<sup>n</sup> dàtná ì<sup>n</sup> ñáyiú quihu. Te ío ní cuñúhu-í sá dúcá<sup>n</sup> nǐ cuu ní xiní-í.

7 Te sáta dúcá<sup>n</sup> te espíritú xínú cuèchi núú Yă Ndiöxí-án cächí tucu-xi xii-í:

—Vá ndèé dúcá<sup>n</sup> cuñúhu-n, chi vitna na cächí tñúhu-í xii-n nàcuáa quèe-xi cuendá qui<sup>n</sup> ndèé úsá díquí-xi ndihi úxí ndiqui-xi-án, ndihi nàcuáa quèe-xi cuendá ñadìhí ñaha yòdo ñaha xii-di-án.

8 Te qui<sup>n</sup> ní xiní-n-án cúú-dí ì<sup>n</sup> qui<sup>n</sup> sa ní xíndecu te vitna ñá túú-gã-di ndècu, te sáá nduu te quene-di yaú cùnú vǐhí sǎ ìo nèhé cáá, te dàtnùní sáá nduu te quíhí<sup>n</sup>-di núú ùhú núú ndàhú nǐ caa nǐ quíhí<sup>n</sup>, te cue ñáyiú xíndecu ñuyíú cuñúhu vǐhí-yu qui<sup>n</sup>-án chi cùu-di ì<sup>n</sup> qui<sup>n</sup> sa ní xíndecu ní cùu te sáá nduu cùndecu tucu-di, te ñáyiú duca<sup>n</sup> cuñúhu ñaha xii-di-án ñà túú yòdo tnuní-yu núú tütú núú yódó tnùní cue ñáyiú naníhí tǎhú, chi ndéé cútnàhá vátá ngǎva-gá ñuyíú duca<sup>n</sup> sa yòdo tnuní cue ñáyiú naníhí tǎhú.

9 Te nchaa ñáyiú tècú tnùní xini ñuhu-xi caní váha iní-yu cuendá tñúhu-a. Te ndi ùsá díquí qui<sup>n</sup>-án cada iní-ó sǎ cúú-xí úsá tǐndúú núú núcõo ñadìhí-án.

10 Te ndi ùsá díquí qui<sup>n</sup>-án cada iní-ó sǎ cúú-xí úsá tñàhá cue téé yǐndaha ñaha xii ñáyiú, te úhú<sup>n</sup> cue téé-án ñà túú-gã cùnùu-güedé vitna, te ì<sup>n</sup> téé-án cùnùu-dé vitna te ìngá-dé vátá sáá-gá nduu cùnùu-dé, te na sáá nduu dùca<sup>n</sup> cunuu-dé te sacú-ni nduu cunuu-dé.

11 Te qui<sup>n</sup> ní xíndecu ní cùu te ñà túú-gã-di ndècu vitna, cùu-di datná téé cùu uná yǐndaha ñaha xii ñáyiú, te ì<sup>n</sup>-ni cùu-di ndihi cue téé úsá yǐndaha ñáyiú-án, te qui<sup>n</sup>-án sáá nduu cuíta ni-hnu-di quíhí<sup>n</sup>-di núú ùhú núú ndàhú nǐ caa nǐ quíhí<sup>n</sup>.

12 Te ndi ùxí ndiqui qui<sup>n</sup>-án cada iní-n sǎ cúú-xí úxí tñàhá cue téé quǐndaha ñaha xii ñáyiú, dico vátá sáá-gá nduu cùnùu-güedé quǐndaha ñaha-güedé xii-yu. Te cue téé-án ñihí-güedé tñúhu ndee ìní taxi tñùní-güedé ndihi qui<sup>n</sup>-án, dico tnaa-ni taxi tñùní-güedé ndihi qui<sup>n</sup>-án.

13 Te ndi ùxí cue téé-án cuu ì<sup>n</sup>nduu-güedé taxi tñùní-güedé, te chindee-güedé qui<sup>n</sup>-án cuendá cuu ì<sup>n</sup>nduu-güedé ndihi-di cuendá taxi tñùní-gá-di.

14 Te cue téé-án nàá-güedé ndihi Yaá cáá dàtná cáá ì<sup>n</sup> mbéé qui<sup>n</sup> ní dánicüehé-güedé dico vá ndácú-güedé nàá-güedé ndihi-gá chi cuíta-güedé. Te diu-gá cúú-gã Yaá ío cùnùu taxi tnuní cuèi nchaa téé yǐndaha ñaha xii ñáyiú, te duca<sup>n</sup>-ni tàxi tnuní-gá cuèi nchaa dava-gá-yu. Te mee Yă Ndiöxí ní cachí-gá nándi cùu nchaa ñáyiú cundecu ndihi Yaá cáá dàtná cáá ì<sup>n</sup> mbéé qui<sup>n</sup> ní dánicüehé-güedé-án, te diu-ni ñáyiú-án cúu-yu ñáyiú ní cáhá<sup>n</sup>-gá te cùu-yu ñáyiú quide ndáá ndécú ìchi-gá —duha cächí espíritú xínú cuèchi núú-gã.

15 Te ní cachí tucu espíritú-án xii-í:

—Ndute ñùhu núú núcõo ñadìhí ñaha ndècu ichi díí ìní-án, ndute-án cada iní-n sǎ cúú-xí ñáyiú nchaa nació<sup>n</sup>, ndihi ñáyiú nchaa ñuú, ndihi ñáyiú xíndecu nchaa xichi, ndihi ñáyiú càhá<sup>n</sup> ndí díí<sup>n</sup> ndí díí<sup>n</sup> núú tñúhu.

16 Te dàtná ní cachí-í sá ndi uxí ndiqui qui<sup>n</sup> ní xiní-n-án cúú-xí úxí tñàhá cue téé quǐndaha ñaha xii ñáyiú, te cue téé-án cuu úhú iní-güedé ñadìhí ñaha ndècu ichi díí ìní-án, te ní vǎ cádá cuendá ñàhá-gã-güedé xii-a<sup>n</sup>, te ndada ndàhú ñàhá-güedé, te dacächí ñaha-güedé xii-a<sup>n</sup>, te cahmi ñaha-güedé.

17 Te mee Yă Ndiöxí duca<sup>n</sup> dàcahá<sup>n</sup>-gá iní cue téé-án cuendá cada-güedé nàcuáa cuíni méé-gã, te xǐá<sup>n</sup> núú cuu ì<sup>n</sup>nduu-güedé cuendá cúñaha-güedé xii qui<sup>n</sup>-án cada-di núú-güedé taxi tñùní-di, te duca<sup>n</sup>-ni càda-di núú-güedé taxi tñùní-di ndéé

ná sàá nduu càda Yá Ndiöxí nàcuáa ní cachí-gá.

<sup>18</sup> Te ñadhí ñaha ní xiní-n-ǎ<sup>n</sup> cada iní-n sǎ cúú-á<sup>n</sup> ñúú cáhnú ñúú ío cùnuu, te ñúú-á<sup>n</sup> ndécú tée ío-gá cùnù taxi tnuní nchaa cue tée yìndaha ñaha xii ñáyiu xĩndecu ñuyúú —duha ní cachí espíritú xinú cuèchi núú Yá Ndiöxí xii-í.

## 18

### *Ní naa ñuú Babiloniá*

<sup>1</sup> Te duca<sup>n</sup> te dàtnú ní xiní tucu-í ingá espíritú xinú cuèchi núú Yá Ndiöxí, te ndée andiú nì dátǎsa<sup>n</sup>-xì te ní dáyèhé-xì ñuyúú, te espíritú-á<sup>n</sup> ío cùnù-xì.

<sup>2</sup> Te níhi ní cáhá<sup>n</sup>-xì, te cǎchí-xì:

—Ní sàá nduu nàa ñuú cáhnú ñúú cùnù nani Babiloniá, te xía<sup>n</sup>-nǎ nat-acá nchaa núú espíritú cùndìhi yucu ñávaha cundecu-xì, te vá quée-gǎ-xì xía<sup>n</sup>, te ñuú-ni xía<sup>n</sup> natacá nchaa quiti ndàva núú tàchí nchaa quiti ndehe quide, quiti ñá túú tnàhá iní ñáyiu te xía<sup>n</sup>-nǎ cundecu-güedi.

<sup>3</sup> Te duca<sup>n</sup> chi ñáyiu ñuú-á<sup>n</sup> sánú ìchí-yu nchaa ñáyiu ñhùú ñuyúú ichi cuèhé ichi duha, te duca<sup>n</sup>-ni xĩnchícú<sup>n</sup> ñhnu nchaa ñáyiu ñuyúú xĩquidé-yu, te nchaa cue tée cùnù yìndaha ñaha xii ñáyiu, cue tée-á<sup>n</sup> cúú ñ<sup>n</sup>nuu-güedé ndìhi nchaa ñáyiu ñuú-á<sup>n</sup> quidé-güedé ndìhí-yu nándi sá cuèhé sá dúhá. Te nchaa ñáyiu dìco nándi sá díco quèhe<sup>n</sup> ñáyiu ñuú-á<sup>n</sup> ío cùu cuicá-yu, te duca<sup>n</sup> quèhe<sup>n</sup> nchaa ñáyiu ñuú Babiloniá-á<sup>n</sup> nchaa sá díco ñáyiu-á<sup>n</sup> cuendá xía<sup>n</sup> cǎnehé-yu ndécú-yu ichi cuèhé ichi duha —duha cǎchí espíritú-á<sup>n</sup>.

<sup>4</sup> Te sáta dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> sá ñí cáhá<sup>n</sup> andiú, te cǎchí-xì:

—Nchaa nchòhó ñáyiu cùu cuendá-í quee-ndo ñúú Babiloniá cuendá sá vǎ cùndecu-ndo tnàhá-ndó ichi cuèhé ichi duha dàtná ndécú ñáyiu ñuú-á<sup>n</sup>, te duca<sup>n</sup> te vá quini-ndó tnúndòho tnúhu ndàhú sá quixí cùu xii ñáyiu-á<sup>n</sup>.

<sup>5</sup> Chi ío cuèhé cuèchi-yu ní cuu ndècu núú Yá Ndiöxí, te mee-gǎ nàhá-gǎ nàcuáa ndùu nchaa sá quidé-yu.

<sup>6</sup> Te nchòhó ñáyiu cùu cuendá-í, chí nanchòcáva dandòho-ndo ñáyiu-á<sup>n</sup> dàtná quidé mèe-yu dandòhó-yu cue ñáyiu, te úú xito nanchòcáva-ndo dandòho-ndó-yu, te duca<sup>n</sup> càda-ndo cuendá ío-gá ndohó-yu.

<sup>7</sup> Te ío quide cahnú-yu mèe-yu, te ío cùdí iní-yu quidé-yu nchaa núú sǎ cuèhé sá dúhá, te sá dúcá<sup>n</sup> xidó-yu quidé-yu nchaa sá cuèhé sá dúhá ñuú xía<sup>n</sup> nchòhó ío dandòho-ndó-yu, te duca<sup>n</sup> chi ñáyiu ñuú-á<sup>n</sup> sání iní-yu, te cǎchí-yu: “Nchúhú cúú-ndí dàtná ñ<sup>n</sup> ñadhí ñá túú quée, ñaha ío cùnù yìndaha ñaha xii ñáyiu. Te duca<sup>n</sup> sǎtnahá-xì cùu-ndí chi nchaa-ni nduu ío váha cùu iní-ndí ndécú-ndí, te ni vǎ sàá ñ<sup>n</sup> nduu te ndíhú iní-ndí”, duha cǎchí ñáyiu ñuú-á<sup>n</sup>.

<sup>8</sup> Te sá cuendá nchaa sá quidé-yu-á<sup>n</sup> ñuú xía<sup>n</sup> ñ<sup>n</sup>-ni ndùu sáá tnúndòho sá cúú-xì-yu, te ío ndohó-yu chi ñuú-yu coo tnamá, te coo cuèhé cahni ñaha-xì xii-yu, te ío ndíhú iní-yu, te cǎyú ñuú-yu, te duca<sup>n</sup> ndòhó-yu chi Dútú Ndiöxí ío cùnù-gá, te ñuú-gá duca<sup>n</sup> dandòho ñaha-gá xii-yu —duha cǎchí sá ñí cáhá<sup>n</sup> àndiú-á<sup>n</sup>.

<sup>9</sup> Te nchaa cue tée cùnù yìndaha ñaha xii ñáyiu ío ndáhyú-güedé sá ndíhú iní-güedé òré ná quini-güedé quene ñúhmá cǎyú ñuú cue ñáyiu Babiloniá, chi ñuú cue tée-á<sup>n</sup> cúú-güedé cue tée cùu ñ<sup>n</sup>nuu ndìhí-yu quide-güedé nchaa núú sǎ cuèhé sá dúhá ndìhí-yu, te duca<sup>n</sup> chi ío tnàhá iní-güedé cundecu-güedé ndìhí-yu ichi díí iní.

<sup>10</sup> Te cue tée-á<sup>n</sup> xica-nǎ cundecu-güedé cundehe-güedé nàcuáa ndòho nchaa ñáyiu ñuú-á<sup>n</sup> sǎ yùhú-güedé nchaa tnúndòho-á<sup>n</sup>, te cǎchí-güedé:

—Ndàhú nchòhó ñáyiu ñuú cáhnú ñúú cùnù nani Babiloniá! Chi uu<sup>n</sup> ní sàá nchaa tnúndòho tnúhu ndàhú sá cúú-xì-ndó —duha cǎchí-güedé.

<sup>11</sup> Te nchaa ñáyiu dìco nchaa sá nándìhi ñáyiu ñuú Babiloniá tnàhá-yu ío ndáhyú-yu sá ndíhú iní-yu chi vá yòo-gá cuaa<sup>n</sup> nchaa sá díco-yu.

12 Te dicó-yu nchaa sá ñi cuáha mee-ni díhú<sup>n</sup> cuáá<sup>n</sup>, ndihi nchaa sá ñi cuáha mee-ni díhú<sup>n</sup> cuixí<sup>n</sup>, te dico tucú-yu sá ñi cuáha mee-ni yúú vâha yúú nání pèrlá, ndihi nchaa dava-gá sá ñi cuáha dava-gá yúú vâha, te dicó-yu tnàhá dóó sèdá, ndihi ingá núú dõó vâha sá nání línú, ndihi dóó murádú, ndihi dóó tícuèhé te mee-ni dõó vâha cùu-xi, te dico tucú-yu tnàhá yutnu sá sàhá<sup>n</sup> tnámí, te dico tucú-yu sá ñi cuáha sá nání màrfíl, te dico tucú-yu sá ñi cuáha mee-ni yùtnu vâha sá ño ndèyáhu, te dico tucú-yu sá ñi cuáha mee-ni càá, ndihi sá ñi cuáha mee-ni sá nání brõncé, ndihi sá ñi cuáha mee-ni yúú vâha yúú nání màrmól.

13 Te dico tucú-yu canèlá, ndihi yúcú sá sàhá<sup>n</sup> tnámí, ndihi dúsa sá sàhá<sup>n</sup> tnámí, ndihi yúcú sá nání mìrrá, te dico tucú-yu ingá núú dusa sá sàhá<sup>n</sup> tnámí nani olivánú, te dico tucú-yu ndudí ndéhé yoho yâha stilé, ndihi acítí yutnu nani olívú, ndihi yuchi triú vâha, te dico tucú-yu nchaa dava-gá núú triú, te dicó-yu tnàhá mbèé, ndihi cuàyú, ndihi nchaa dava-gá quití tatá, te dico tucú-yu tnàhá carrètá, te dico tucú-yu tnàhá ñáyíu xínu cuechi, ñáyíu ñá túú tnàhí dàñá quee núú chíú<sup>n</sup> pàtróó<sup>n</sup>-xi.

14 Te nchaa ñáyíu dico-á<sup>n</sup> cùñàhá-yu xii ñáyíu ñuú Babiloniá:

—¡Nchaa sá ño cùdí<sup>n</sup> iní-ndó cùndecu ndihi-ndo ni cuu vá ndácú-gã-ndó ñihí-ndó vitna, te nchaa sá sání iní-ndó sá ño vâha càa ndecu ndihi-ndo ndihi nchaa dava-gá sá ndécú ndihi-ndo ní ndihi nihnu-xi vitna, te ni ñ<sup>n</sup> nduu-gá vá ñihí-ndó ni ñ<sup>n</sup> xíá<sup>n</sup> cundecu ndihi-ndo! —duha cùñaha ñáyíu-á<sup>n</sup> xii-yu.

15 Te nchaa ñáyíu ní cuu cuica ñi xóo dico nándi nchaa sá ñi xóo dico ñi quehe<sup>n</sup> cue ñáyíu ñuú Babiloniá, nchaa ñáyíu-á<sup>n</sup> xica-ñã cundecú-yu cundèhé-yu sá yùhú-yu cuendá nchaa tnúndòho sá yâha cue ñáyíu ñuú-á<sup>n</sup>, te ío ndáhyú-yu sá ndihú iní-yu sá dúcá<sup>n</sup> ndòho ñáyíu-á<sup>n</sup>.

16 Te cùñaha tucú-yu:

—¡Ndàhú nchòhó ñáyíu xíndecu ñuú cáhnú ñuú nání Babiloniá! Chi nchòhó cúú-ndó dàtná ñ<sup>n</sup> ñadihí ñaha nihnu dóó vâha dóó murádú, ndihi dóó tícuèhé, te mee-ni sá ñi cuáha díhú<sup>n</sup> cuáá<sup>n</sup>, ndihi mee-ni sá ñi cuáha yúú vâha yúú nání pèrlá, ndihi sá ñi cuáha dava-gá yúú vâha sá ño vii ndãa mee-ni nchaa xíá<sup>n</sup> ní cuáha sá yíhí lõho-a<sup>n</sup>, ndihi sá ñúhú dúcú<sup>n</sup>-a<sup>n</sup>, ndihi sá ñúhú dúcú<sup>n</sup> ndáhá-á<sup>n</sup>.

17 ¡Te uu<sup>n</sup>ni ní ndihi nihnu nchaandi túhú sá ndécú ndihi ñadihí-á<sup>n</sup>, te duca<sup>n</sup> sãtnahá-xi cùu nchòhó ní cùu! —duha cùñàhá-yu xii cue ñáyíu ñuú Babiloniá.

Te nchaa cue tée dàcaca barcú ndihi nchaa cue tée tàxi tnuni bàrcú-á<sup>n</sup>, ndihi nchaa ñáyíu ñuhu xití bàrcú-á<sup>n</sup>, ndihi nchaa dava-gá cue tée nándi chiú<sup>n</sup> quide ndecu lamár, nchaa ñáyíu-á<sup>n</sup> xica cùndecú-yu

18 te quiní-yu òrè quene ñúhmá cãyú ñuú cue ñáyíu Babiloniá, te níhi cáhá<sup>n</sup>-yu, te cachí-yu:

—Ni ñ<sup>n</sup> ñuú ñá túú nãtnahá-xi ñuú Babiloniá —duha cáhá<sup>n</sup>-yu.

19 Te nchaa ñáyíu-á<sup>n</sup> chidó-yu ñuhu díquí-yu, te ngúíta-yu ndáhí-yu sá ndihú iní-yu, te níhi cáhá<sup>n</sup>-yu, te cachí tucú-yu:

—¡Ndàhú nchòhó ñáyíu xíndecu ñuú cáhnú ñuú nání Babiloniá! Chi ío cuica-ndo ni cùu, te diu-ndo ñi quide ní cuu cuica nchaa ñáyíu ndècu ndihi barcú, te vitna uu<sup>n</sup>ni ní naa-ndo ndihi ñuú-ndó —duha cachí-yu.

20 Te nchaa nchòhó ñáyíu ndècu andiú ío chí cùdí<sup>n</sup> iní sá dúcá<sup>n</sup> dândoho Yá Ndióxi nchaa ñáyíu ñuú Babiloniá-á<sup>n</sup>, te diu-ni duca<sup>n</sup> chí cùdí<sup>n</sup> iní nchaa nchòhó cue tée ní cachí Xítóhó Jesucristú cáhá<sup>n</sup> tnúhu-gá, te diu-ni duca<sup>n</sup> chí cùdí<sup>n</sup> iní nchaa nchòhó cue tée càhá<sup>n</sup> tnúhu Yá Ndióxi nãcuáa dàcahu iní ñãhá-gã xii-ndo, te diu-ni duca<sup>n</sup> chí cùdí<sup>n</sup> iní nchaa dava-gá nchòhó ñáyíu cùu cuendá-gá cuendá sá dúcá<sup>n</sup> dândoho-gá nchaa ñáyíu ñuú-á<sup>n</sup>. Te duca<sup>n</sup> càda ñaha-gá xii cue ñáyíu-á<sup>n</sup> cuendá nchaa sá quidé ñàhá-yu xii-ndo.

21 Te sáta dúcá<sup>n</sup> te ní xiní-í ì<sup>n</sup> espíritú xínú cuèchi núú Yá Ndiöxí, te espíritú-á<sup>n</sup> ìo ndee-xi te ní quehe<sup>n</sup>-xi ì<sup>n</sup> yúú cáhnú dàtná càhnu yódó te ní dáquëe-xi xití ndute làmár, te càchí-xi:

—Dàtná ní quide-í ní dáquëe-í yúú xití ndute duca<sup>n</sup> càda-xi ñúú cáhnú ñúú Babiloniá, chi ñáyiú ñúú-á<sup>n</sup> ìo ndìhi naá-yu ndìhi ñúú-yu, te vá ì<sup>n</sup> ndùu ì<sup>n</sup> quíú-gã quiní ñáhá ñáyiú xií-yu.

22 Te ni ì<sup>n</sup>-gá ñáyiú càni arpá, te ni ì<sup>n</sup>-gá ñáyiú tíú vîlu, te ni ì<sup>n</sup>-gá ñáyiú tíú cútú, te ni ì<sup>n</sup>-gá yaá vá cóo ñúú-á<sup>n</sup>, te ni ì<sup>n</sup>-gá cue ñáyiú xíní cada ì<sup>n</sup> núú chiú<sup>n</sup> vá cóo-gã, te ni vã yôo-gá canehe chiú<sup>n</sup> yúú cúú yódó mulínú.

23 Te ni ì<sup>n</sup>-gá ñuhú vá cündècu ñúú-á<sup>n</sup>, te ni ì<sup>n</sup> nduu-gá vá cóo víco tnándaha, te ñáyiú ñúú-á<sup>n</sup> ñáyiú quide ndáhú cúú-yu ñáyiú ío-gá cuicá-yu dàcúúxí ñáyiú quide ndáhú xíndecu ñìhí ñuyíú, dico nchaá-yu naá-yu chi quide nduú-yu te ío dándahú-yu cue ñáyiú ñuyíú sã dúcá<sup>n</sup> quidè-yu.

24 Te ñuú-á<sup>n</sup> ní dácácã-yu níñí cue téé ní cáhá<sup>n</sup> tnúhu Yá Ndiöxí, te ñuú-á<sup>n</sup> duca<sup>n</sup> ní quidè-yu nchaá dáva-gá cue ñáyiú cùu cuendá-gá, te ñuú-á<sup>n</sup> quide xísahni tnàha ñáyiú ñuyíú —duha càchí espíritú-á<sup>n</sup>.

## 19

1 Te sáta dúcá<sup>n</sup> te ní tecú dóho-í níhi ní cáhá<sup>n</sup> cuéhé víhí ñáyiú andiú, te càchí-yu:

¡Ío càhnu cuu Yá Ndiöxí!, chi ñuú-gá cúú-gã Yaá ní dácácu nihnu ñaha xii-o núú ùhú núú ndàhú, te ío cùnuu-gá, te mee-ni sã vãha quide-gá,

2 te mee-gã ío vãha ndáá quidè-gã quidè ndáá-gá cuèchi nchaá ñáyiú,

chi ñuú-gá ní dáquëhí<sup>n</sup>-gá ñadìhí ñaha ndècu ichi dîí ìní núú ùhú núú ndàhú,

chi ñuú-á<sup>n</sup> ní sanu ichi-á<sup>n</sup> ñáyiú ñuyíú ichi cuéhé ichi duha,

te duca<sup>n</sup> ní dáquëhí<sup>n</sup> ñáhá-gã xii-á<sup>n</sup> núú ùhú núú ndàhú chi nàchinaa-gá sã ní sahani-á<sup>n</sup> cue ñáyiú ní xinu cuechi núú-gã.

Duha càchí-yu.

3 Te càchí tucú-yu:

—¡Ío càhnu cuu Yá Ndiöxí!, chi nchaá nduu nchaá quíú duca<sup>n</sup>-ni quène ñúhmá núú ñúhú ñàha-á<sup>n</sup> càyú-á<sup>n</sup> —duha càchí-yu.

4 Te ndi òcò cúmí cue téé cùu sacuéhé xíndecu-á<sup>n</sup> ní ngúíñí xití-güedé núú Yá Ndiöxí núú núcòo-gá táxí tnùnigá, te tnàhá cue quiti cúmí xínutnì-á<sup>n</sup> ní ngúíñí xití-güedé núú-gã, te cue téé-á<sup>n</sup> càchí-güedé ndìhi cue quiti-á<sup>n</sup>:

—Sá ndáá sã ìo càhnu cuu Yá Ndiöxí —duha càchí-güedé ndìhi cue quiti-á<sup>n</sup>.

5 Te sáta dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> sã ní cáhá<sup>n</sup> mei núú nútñí xilé vãha núcòo Yá Ndiöxí, te càchí sã cáhá<sup>n</sup>-á<sup>n</sup>:

Nchaá nchòhó ñáyiú xínu cuechi núú Yá Ndiöxí, ñuú-ni nchòhó ñáyiú nèhe sã yíñùhu núú-gã,

càhá<sup>n</sup>-ndó sã ìo càhnu cuu-gá cuèi cùnuu-ndo àdi ñá túú cùnuu-ndo.

Duha càchí sã cáhá<sup>n</sup>-á<sup>n</sup>.

*Í<sup>n</sup> vico cùu datná vico tnándaha*

6 Te sáta dúcá<sup>n</sup> te ní tecú dóho-í ní cáhá<sup>n</sup> cuéhé víhí ñáyiú andiú, te òré duca<sup>n</sup> ní cáhá<sup>n</sup>-yu te ní quide-xi dàtná quidè-xí núú xicá cuéhé víhí ndùte, te ní quide tucu-xi dàtná quidè-xí òré cáhá<sup>n</sup> níhi vîhi ñúhu, te càchí-yu:

¡Ío càhnu cuu Dútú Ndiöxí Yaá cúú Tátá-ó! Te ío cùnuu-gá táxí tnùnigá, te quide-gá nchaandi túhú sã vãha.

7 Te ío chí ná cùdíí ìní-ó, te chí ná càchí-ó sã ìo càhnu cuu Yá Ndiöxí,

chi vitna ní sáá nduu càda Yaá cáá dàtná cáá ì<sup>n</sup> mbéé quiti ní dánicuéhé-güedé ì<sup>n</sup> vico, te cùu-xi datná vico tnándaha.

Te nchaá ñáyiú cùu cuendá-gá sa ní ndìhí-yu sa ndècu túha-yu cundecú-yu vico-á<sup>n</sup>, te cada iní-ó

să ñăyiu-á<sup>n</sup> cúu-yu dàtná ì<sup>n</sup> ñadihí xíchí tnãndaha ndihí-gá,  
 8 te ñáyiu-á<sup>n</sup> ní nduu táhũ-yu cuihnú-yu dóó vãha dóó chàhnchí sá ïo váha càndoo.  
 Duha càchí-yu.

Te sá dúcá<sup>n</sup> ní nduu táhũ ñáyiu cùu cuená Yã Ndiõxí dóó vãha ñihnú-yu, xíã<sup>n</sup> cútnùní iní-ó sá cúu-yu ñáyiu quìde ndáá núu-gã.

9 Te ì<sup>n</sup> espíritú xínú cuèchi núu Yã Ndiõxí ní cachí tnúhu-xi xii-í, te càchí-xi:

—Chido tnùní-n ì<sup>n</sup> núu tùtú nàcuáa na càhá<sup>n</sup>-í-a: “Vãha táhũ nchaa ñáyiu ní cáhá<sup>n</sup> ñáhá Yã cáá dàtná cáá ì<sup>n</sup> mbéé quiti ní dánicuèhé-güedé cundecú-yu vico, te vico-á<sup>n</sup> cúu-xí dàtná vico tnãndaha cada-gá”, te duha chido tnùní-n chi tnúhu-a cùu-xi tnúhu ndáá tnúhu Yã Ndiõxí —duha càchí espíritú-á<sup>n</sup>.

10 Te ní ngüñí xití-í núu espíritú-á<sup>n</sup> cuená chiñuhu-í-xi ni cùu, te ní cachí-xi:

—Vã dúcá<sup>n</sup> càda-n, chi tnàhá-í dìcò xínú cuèchi-í núu Yã Ndiõxí dàtná quidé-n xínu cuechi-n núu-gã ndihí nchaa dava-gá ñáyiu ndècu ndihí-n ichi-gá, ñáyiu nchìcú<sup>n</sup> nihnu quìde ni yuhu ni iní nchaa nàcuáa càhá<sup>n</sup> Xítohó Jesucrìstú, te núu xíã<sup>n</sup> càchí-í sá vã dúcá<sup>n</sup> càda-n, chi mee Yã Ndiõxí chiñuhu-n —duha càchí espíritú-á<sup>n</sup>.

Te nchaa cue téè càhá<sup>n</sup> tnúhu Yã Ndiõxí càhá<sup>n</sup>-güedé nàcuáa ndùu tnúhu càhá<sup>n</sup> Xítohó Jesucrìstú.

### *Cuendá Yáá yódó ì<sup>n</sup> cuayú cuixí<sup>n</sup>*

11 Te ní xiní-í nchí andiu, te ní xiní-í ní quee ì<sup>n</sup> Yáá yódó-gã ì<sup>n</sup> cuayú cuixí<sup>n</sup>. Te Yáá-á<sup>n</sup> nání-gã Yáá quidé ndáá cuiti, duha nàni-gá. Te quìde-gá nchaa sá càhá<sup>n</sup>-gá, te ío váha quìde ndáá-gá cuèchi nchaa ñáyiu, te nchaa ñáyiu nàá ndihí ñaha xii-gá ío váha xiní-gá nàcuáa cada ñaha-gã xii-yu chi ío ndáá quidé-gã.

12 Te tinúu-gá dáyèhé-xi dàtná dáyèhé ñuhú, te titní coróná ñuhú dĩquí-gã, te nèhe-gá ì<sup>n</sup> sá ndéè diu-gá, te vá yóo ì<sup>n</sup> cùtnuní iní-xi nása cuáhá<sup>n</sup>

tnúhu-á<sup>n</sup>, chi ì<sup>n</sup>dìi díi-ni mee-gã náhá-gã nàcuáa càhá<sup>n</sup>-xi.

13 Te Yáá-á<sup>n</sup> níhnú-gã ì<sup>n</sup> dóó ní cuu mee-ni ñíñí, te Yáá-á<sup>n</sup> càchí tnúhu-gá nchaa nàcuáa sàni iní Yã Ndiõxí, núu xíã<sup>n</sup> nání-gã Tnúhu Yã Ndiõxí.

14 Te sátá-gã nchìcú<sup>n</sup> nchaa espíritú xínú cuèchi núu Yã Ndiõxí, te cue espíritú-á<sup>n</sup> cúu-xí dàtná sandadú, te xixíhnu-xi dóó cuixí<sup>n</sup> dóó vãha sá càndoo, te xixódó-xi cuayú cuixí<sup>n</sup>.

15 Te yuhu Yáá yódónu-á<sup>n</sup> quéné ì<sup>n</sup> yuchí cáhnú, te ndihí yuchí-á<sup>n</sup> dánícuèhé-gá nchaa ñáyiu xĩndecu ñuyíú, te ío dandòho ñaha-gá xii-yu, te dàtná quidé téè quihni ndéhé yoho yãha stilé duca<sup>n</sup> sãtnahá-xi cada ñaha-gã xii-yu, chi ío dandòho ñaha-gá xii-yu cuená sá ïo cùdèé<sup>n</sup>-gã. Te mee-gã ío cùnnuu-gá táxi tnùní-gá, te quìde-gá nchaandi túhú sá vãha.

16 Te sátá dóó níhnú Yáá-á<sup>n</sup> ndihí núu ticácá<sup>n</sup>-gã yódó tnùní nàcuáa nàni-gá, te duha càhá<sup>n</sup>-xi: “Téè ío cùnnuu taxi tnuní ñáhá xii nchaa cue téè yĩndaha ñaha xii ñáyiu ndihí nchaa dava-gá ñáyiu”, duha ndéè tnuní sátá dóó-gã-á<sup>n</sup> ndihí ticácá<sup>n</sup>-gã-á<sup>n</sup>.

17 Te dãtnùní ní xiní-í ì<sup>n</sup> espíritú xínú cuèchi núu Yã Ndiõxí nùtní-xi núu nchìcanchii, te níhi ní cáhá<sup>n</sup>-xi, te xãhá<sup>n</sup>-xi xii nchaa quiti ndava núu tàchí:

—Nchaa nchòhó quiti ndava, chí táquixi chi caxi-ndo nchaa sá ní quide túha Yã Ndiõxí,

18 chí caxi-ndo cùñú nchaa cue téè yĩndaha ñaha xii ñáyiu, ndihí cuñú nchaa cue téè tàxi tnuní ñáhá xii cue sandadú, ndihí cuñú nchaa cue téè ío ñí xĩndáa, ndihí cuñú nchaa cuayú, ndihí cuñú nchaa cue téè ní xódó ñaha xii-güedi, ndihí cuñú nchaa dava-gá ñáyiu, ñáyiu ñá túú tnàhí ni dàná quee núu chíú<sup>n</sup> patróo<sup>n</sup>-xi, ndihí cuñú nchaa ñáyiu ní dàná ní quee núu chíú<sup>n</sup> patróo<sup>n</sup>-xi, ndihí cuñú nchaa ñáyiu cùnnuu, ndihí cuñú nchaa ñáyiu ñá túú cùnnuu, te nchaa cuñú-á<sup>n</sup> caxi-ndo —càchí espíritú-á<sup>n</sup> xãhá<sup>n</sup>-xi xii nchaa quiti-á<sup>n</sup>.

19 Te sáta dúcá<sup>n</sup> te ní xiní tucu-í quití ní quene xití lámár, ndihí nchaa cue tée yíndaha ñaha xii ñáyiú, ndihí nchaa cue tée cùu sandadú-güedé ní naníhí tnáhá-güedé ndihí quití-á<sup>n</sup> cuendá cuu ñ<sup>n</sup>nuu-güedé ndihí-di nàá-güedé ndihí Yaá yódó cuàyu-á<sup>n</sup>, ndihí nchaa cue espíritú cúu sàndadú ndihí-gá.

20 Te cue espíritú cúu sàndadú ndihí Yaá-á<sup>n</sup> ñí tñí-xi quití-á<sup>n</sup>, ndihí téé ío dándahú ñáhá xii ñáyiú càhí sá càhá<sup>n</sup> tnúhu Yá Ndiöxí te ñá ndàá sá càhá<sup>n</sup>-dé tnúhu-gá, te ñíu-ni téé-á<sup>n</sup> ñí quide-dé titní núú sã vã yõo tnàhí ndàcu cada núú quití-á<sup>n</sup>. Te sá dúcá<sup>n</sup> ñí quide téé-á<sup>n</sup> xíá<sup>n</sup> ní dándahú-dé ñáyiú ní sàndáá iní-yu ní queé-yu tnuní quití-á<sup>n</sup>, te ní chiñuhú-yu sá ñí dándácú ñáhá-yu xii-di, te cue espíritú-á<sup>n</sup> ñí dáquée-xi quití-á<sup>n</sup> núú ñuhú núú ñuhú àzufre càyu-xi, ndihí téé duca<sup>n</sup> dándahú ñáhá xii ñáyiú-á<sup>n</sup>, te xíá<sup>n</sup> cuhu<sup>n</sup> téé-á<sup>n</sup> ndihí quití-á<sup>n</sup>, te ío ndoho-dé ndihí-di.

21 Te ndihí yuchí cáhnú sã quéné yùhu Yaá yódó cuàyu-á<sup>n</sup> ñí sahani-gá nchaa dava-gá cue téé cùndihí quití-á<sup>n</sup>, te nchaa cue quití ndàva ní chítú xití-güedé ní xexi-güedé cuñú nchaa cue téé-á<sup>n</sup>.

## 20

### *Úxí ciendú cuía*

1 Te sáta dúcá<sup>n</sup> te ní xiní-í ñ<sup>n</sup> espíritú xínú cuèchi núú Yã Ndiöxí ní quee-xi andíu, te nùndaha-xi ndacaá nacaá<sup>n</sup>-xi yèhe ñ<sup>n</sup> yaú cùnú víhí núú cùndècu sácúíhná, te nùndaha tucu-xi ñ<sup>n</sup> cadená cáhnú.

2 Te espíritú-á<sup>n</sup> ñí tñí-xi quití déé<sup>n</sup> nání dràgón, te ñíu-ni quití-á<sup>n</sup> cúu-dí mèi yucu ñávãha sá nání sácúíhná, te ñíu xíá<sup>n</sup> ní nduu-xi cóo ndéé sanaha. Te espíritú-á<sup>n</sup> ñí dácútú ñàha-xi xii-di, te duca<sup>n</sup>-ni cùndutu-di ndéé xínu úxí ciendú cuía.

3 Te sáta ñí dácútú ñàha espíritú-á<sup>n</sup> xii-di te ní dáquée ñàha-xi xii-di yaú-á<sup>n</sup> chi ñíu yaú-á<sup>n</sup> tàú-di quee-di cundecu-di. Te ní nacadí-xi yuyèhe yaú-á<sup>n</sup>, te ní tee-xi sèyú yuyèhe-á<sup>n</sup>

cuendá sá vã quéné-gã-di dándahú-di cue ñáyiú ñuyíú, te xíá<sup>n</sup> cundedí ni-hnu-di ndéé xínu úxí ciendú cuía. Te sáta ná yãha úxí ciendú cuía-á<sup>n</sup> te nandáxi-di te quene-di yaú núú ñuhú-dí-á<sup>n</sup> caca cuu tnaa-di ñ<sup>n</sup> úú nduu.

4 Te dàtnùní ní xiní-í xñutñí titní xilé váha, te xíá<sup>n</sup> xñucóo nchaa ñáyiú ní ngúndecu ndihí tnúhu ndee iní cada ndáá cuèchi nchaa ñáyiú, te ní xiní-í xñdecu tnáhá cue ñáyiú ní xehndé-güedé dúcú<sup>n</sup>-xi cuendá sá ñí càhá<sup>n</sup>-yu tnúhu Yá Ndiöxí, ndihí cuendá sá ñí càhá<sup>n</sup> váha-yu cuendá Xítóhó Jesucristú. Te ñíu-ni ñáyiú-á<sup>n</sup> cúu-yu ñáyiú ñá túú ní chiñuhú-yu quití ní quene xití lámár-á<sup>n</sup>, te ní ñá túú ní chiñuhú-yu sá ñí dándácú ñáyiú ní natava ñáhá-yu xii-di, te ní ñá túú ní dañá-yu mèe-yu quee-yu tnuní quití-á<sup>n</sup> chi ní tnéé-yu te ní ndáhá-yu ñá túú ní dañá-yu quee tnuní-di. Te ní xiní-í ní ndoto cue ñáyiú-á<sup>n</sup> cuendá tnáhá-yu cunúu-yu taxi tnuní-yu ndihí Xítóhó Jesucristú úxí ciendú cuía.

5 Te dava ñáyiú ní xíhí ñá túú ní ndótó-yu, chi ndéé yãha úxí ciendú cuía te dàtnùní ndotó-yu. Te ñáyiú ní xiní-í ní ndoto-á<sup>n</sup> cúu-yu ñáyiú ní ndoto díhna nuu.

6 ¡Te ío váha ní tnáhá nchaa ñáyiú ní nduu táhú ñí ndoto díhna nuu!, chi cue ñáyiú-á<sup>n</sup> ío cùdiú-yu núú Yã Ndiöxí, te nchaa ñáyiú-á<sup>n</sup> vã quèhí<sup>n</sup>-yu núú ùhú núú ndàhú, te ñáyiú-á<sup>n</sup> cúu-yu dútú ndécú-yu núú Yã Ndiöxí ndihí núú Xítóhó Jesucristú, te ñáyiú-á<sup>n</sup> cùnúu-yu dàtná cùnùu Xítóhó Jesucristú, te cunuu ndihí ñáhá-yu xii-gá úxí ciendú cuía.

7 Te sáta ná yãha úxí ciendú cuía-á<sup>n</sup> te sácúíhná quee-xi núú yíndedí ni-hnu-xi-á<sup>n</sup>,

8 te ngúíta tucu-xi dándahú-xi nchaa ñáyiú xñdecu nihí ñuyíú, te cuèi ñáyiú ñuú Gög, te cuèi ñáyiú ñuú Màgóg duca<sup>n</sup> quèhí<sup>n</sup>-xi dándahú ñáhá-xí xii-yu, te datàcá-xi nchaa ñáyiú cuendá nàá-yu, te cuéhé víhí-yu dàtná cuéhé ñuhu cúhí lámár.



9 Te nchaa ñáyíu-á<sup>n</sup> tñí<sup>n</sup>-yu ichi quíhí<sup>n</sup>-yu ñ<sup>n</sup> ichi sá cuáhá<sup>n</sup> núú cáá ñ<sup>n</sup> yodo cahnu vihi, te sáá-yu núú xĩndecu ñáyíu cùu cuendá Yă Ndiõxí, te ñáyíu-á<sup>n</sup> chidòcò-yu cue ñáyíu cùu cuendá-gá-á<sup>n</sup> ndihí ñuú-yu, te ñuú-á<sup>n</sup> ïo cùu iní-gá, dico mee Yă Ndiõxí dangòyo-gá ñuhú cahmi-gá nchaa ñáyíu duca<sup>n</sup> chidoco ñaha xii ñáyíu cùu cuendá-gá-á<sup>n</sup>, te nchaa ñáyíu-á<sup>n</sup> cuú.

10 Te sácúíhná sã dúcá<sup>n</sup> dándahú ñáhá xii ñáyíu chidoco ñaha xii ñáyíu cùu cuendá Yă Ndiõxí-á<sup>n</sup> dàquée ñaha-gă xii-xi núú ñuhú núú ñuhú àzufré càyú-xi, te ñuú-ni xíá<sup>n</sup> sa ñuhu quití ní quene xití làmár, ndihí tée ní dándahú ñáyíu ní xáha<sup>n</sup>-dě xii-yu sá càhá<sup>n</sup>-dé tñúhu Yă Ndiõxí te ñá ndáá sá càhá<sup>n</sup>-dé tñúhu-gá, te xíá<sup>n</sup> cuhu<sup>n</sup>-xi ndoho-xi ni caa ni quíhí<sup>n</sup> ndihí quití ní quene xití làmár, ndihí tée càchí sá càhá<sup>n</sup> tñúhu Yă Ndiõxí te ñá ndáá sá càhá<sup>n</sup>-dé tñúhu-gá.

#### *Cùndáá cuéchi ñáyíu*

11 Te ní xiní-í nùtní ñ<sup>n</sup> xilè váha xilè cuixí<sup>n</sup>, te núú xilè-á<sup>n</sup> núcõo ñ<sup>n</sup> Yaá. Te ndèhe Yaá-á<sup>n</sup> ni ndóñúhú àndíu ndihí ñuyíú-a, te duca<sup>n</sup> ni ndóñúhú-xi chí vá cùndècu-gá-xi.

12 Te sátá dúcá<sup>n</sup> te ní xiní-í nchaa ñáyíu ní xihí ní cùu, ñáyíu cùnūu ndihí ñáyíu ñá túú cùnūu xínutñí<sup>n</sup>-yu núú Yáá núcõo núú xilè váha-á<sup>n</sup>, te Yaá-á<sup>n</sup> cúu-gă Yă Ndiõxí, te òré-á<sup>n</sup> ni nandicá nchaa tutú núú yódó tñuní nchaa nàcuáa ndūu sá ni quide ñ<sup>n</sup> ñáyíu-á<sup>n</sup>, te ní nandicá tucu ingá tutú núú yódó tñuní nchaa ñáyíu ní naníhí tàhú, te nchaa ñáyíu ní xihí ní cùu xínutñí<sup>n</sup>-yu núú Yă Ndiõxí cundáá cuéchi-yu, te nchaa nàcuáa ndūu nchaa cuéchi-yu yòdo tñuní núú nchaa tutú-á<sup>n</sup> duca<sup>n</sup> cùndáá.

13 Te nchaa ñáyíu ní xihí xití ndute làmár, ndihí nchaa ñáyíu ní xihí núú ñuhu yìchí nchaa ñáyíu-á<sup>n</sup> cundáá cuéchi-yu nàcuáa ní quide-yu ñ<sup>n</sup> ñ<sup>n</sup>-yu.

14 Te vitna te vá cúu-gá ñáyíu chí ñá túú-gă tñúhu xihí, te nchaa ñáyíu ñuhu núú ñuhú núú càyú ñáyíu-á<sup>n</sup> cúu-yu ñáyíu ní xita nihnu ni caa ni quíhí<sup>n</sup>.

15 Te duca<sup>n</sup> chí nchaa ñáyíu ñá túú yòdo tñuní núú tütú núú yódó tñuní nchaa ñáyíu naníhí tàhú ní dáquée ñaha Yă Ndiõxí xii-yu núú ñuhú núú càyú.

## 21

### *Andíu sàa ndihí ñuyíú sáá*

1 Te sátá dúcá<sup>n</sup> te ní xiní-í andíu sàa ndihí ñuyíú sáá, te andíu sã ndécú dñhna ndihí ñuyíú sã ndécú dñhna ní ndóñúhú-xi, te tñahá làmár ní ndóñúhú-xi.

2 Te yúhú té Juáá ní xiní-í ñuú Jerusàlén sáá ni quee-xi núú ndécú Yă Ndiõxí, te ñuú-á<sup>n</sup> cúu-xi ñuú méé-gă, te ïo vii càa chí càa datná cáá ñ<sup>n</sup> ñadihí xihí tñandaha.

3 Te ní tecú dóho-í níhi ní càhá<sup>n</sup> ñ<sup>n</sup> sá ni càhá<sup>n</sup> andíu, te càchí-xi:

—Chí cùndèdóho ñ<sup>n</sup> tñúhu na càhá<sup>n</sup>-í-a: Yă Ndiõxí ndécú ndihí-gá cue ñáyíu vitna, te duca<sup>n</sup>-nă cundecu ndihí ñaha-gă xii-yu, te ñuú-yu cùu-yu ñáyíu cùu cuendá-gá, te vá ñ<sup>n</sup> ndūu ñ<sup>n</sup> quíú-gă te dañá ñaha-gá xii-yu.

4 Te mee Yă Ndiõxí cada-gá sá ñá túú tñahí-gá ná caní iní-yu cundecu-yu, te ni vă quini-gá-yu tñúhu xihí, te ni vă quini-gá-yu tñúhu ndàhyú, te ni vă quini-gá-yu tñúhu ndihí iní-xi, te ni vă quini-gá-yu tñúhu cùhú, chí nchaa sá ni xiní-yu ñuyíú dñhna vá quini-gá-yu vitna — duha càchí sá ni càhá<sup>n</sup>-á<sup>n</sup>.

5 Te Yaá núcõo núú xilè váha-á<sup>n</sup> ni cachí tñúhu-gá xii-í, te càchí-gá:

—Yúhú quide-í nàcuáa ndūu saa nchaa sá cùndècu vitna. Te vitna chido tñuní-ñ<sup>n</sup> núú tütú nchaa tñúhu sá ni càhá<sup>n</sup>-í-a, chí nchaa tñúhu-a cùu-xi tñúhu ndáá cuítí — duha càchí-gá.

6 Te dàtñuní ní cachí tñúhu tucu-gá xii-í:

—Sa ní xínu cava nchaa chiú<sup>n</sup> ní sani iní-í cada-í, te ñuú-ni yúhú cúu-í Yaá sa ndècu ndéé cùtñahá ní ngáva ñuyíú, te ñuú-ni-í cundecu-í ni caa ni quíhí<sup>n</sup>. Te nchaa ñáyíu cùní tuha ñaha xii-í te cada iní-yu sá dàtná ndute cùu-xi

sá cuãñaha tãhù-í xii-yu candeca-xi iní-yu ni caa ni quíhí<sup>n</sup>.

7 Te nchaa ñáyiú na cùndee iní yáha nándi sá ná yáha-yu sá cuèndá-í, te ñáyiú-á<sup>n</sup> nduu tãhù-yu cundecu váha-yu, te yúhú cuu-í Ndiõxí-yu, te duca<sup>n</sup> mée-yu cuú-yu déhe-í.

8 Te nchaa ñáyiú na yùhú ndoho cuèndá-í quíhí<sup>n</sup>-yu núú ñùhú núú càyú ndihí ñáyiú ñá túú sàndáá iní ñáhá xii-í, ndihí ñáyiú quide nándi nchaa sá cuèhé sá dúhá, ndihí ñáyiú sàhni tnahá, ndihí ñáyiú ndècu ichi díí iní, ndihí ñáyiú quide nduu, ndihí ñáyiú chihñuhu nchaa sá càchí-yu cù ndiõxí ní cadúha cue téé ñuyú-a, ndihí ñáyiú dàcuandehnde, nchaa ñáyiú duca<sup>n</sup> xiquide-á<sup>n</sup> cuíta nihnú-yu chi quíhí<sup>n</sup>-yu núú ñùhú núú ñùhú àzufré càyú-xi —duha ní cáhá<sup>n</sup> Yã Ndiõxí ní cachí tñuhu-gá xii-í.

### *Ñúú Jerusàlén sáá*

9 Te núú ùsá espíritú xínehe tícùú ñùhú tñuhu ndòho, te ñ<sup>n</sup>-xi ní quixi-xi te càchí-xi:

—Taquixi, te na dànehé ñáhà-í xii-n nchaa ñáyiú cùu cuendá Yaa cáá dàtná cáá ñ<sup>n</sup> mbéé quiti ní dánicuehé-güedé, ñáyiú-á<sup>n</sup> cada iní-n sã cúú-yu dàtná ñ<sup>n</sup> xíchí cuéchí vitna tnándaha, te duca<sup>n</sup> càda iní-n sã cúú-yu chi cundecú-yu ndihí-gá —duha ní cachí tñuhu espíritú-á<sup>n</sup> xii-í.

10 Te òré quidé ñàha espíritú Yã Ndiõxí xii-í nacuáa càchí iní-xi, te espíritú néhé tícùú-á<sup>n</sup> ndécá ñàha-xi xii-í cuásaá ñ<sup>n</sup> tìndúú dùcú<sup>n</sup>, te xiá<sup>n</sup> ní dánèhé núú ñáhá-xí xii-í ñúú Jerusàlén te ñúú-á<sup>n</sup> ní quee-xi núú ndécú Yã Ndiõxí, te ñúú-á<sup>n</sup> cúú-xí ñúú mée-gã.

11 Te ñúú-á<sup>n</sup> ïo càhnu cuu-xi chi duca<sup>n</sup> ïo càhnu cuu mee-gã, te dátãsa<sup>n</sup>-xi dàtná dátãsa<sup>n</sup> yúú vãha sá nání jãspé yúú cáá dàtná cáá vidriú sá tũu ingá xio ndàa sátá-xi.

12 Te ni càndéé yuhu ñúú-á<sup>n</sup> sũúni dùcú<sup>n</sup> nchaa sá ñùhú dòco, te nchií úxúú yuyèhe-xi, te ndi tnahá ñ<sup>n</sup> ñ<sup>n</sup> yuyèhe-á<sup>n</sup> xíndecu ñ<sup>n</sup> caa espíritú xínú cuèchi núú Yã Ndiõxí. Te ndi tnahá

ñ<sup>n</sup> ñ<sup>n</sup> yuyèhe-á<sup>n</sup> yódó tñúni ðiú ñ<sup>n</sup> caa xichi cue ñáyiú isràél.

13 Te úní yuyèhe-xi nchií ndàa xio nacuáa quène nchíanchii, te úní tucu yuyèhe-xi nchií ndàa nacuáa quèe nchíanchii, te úní tucu yuyèhe-xi nchií ndàa xio cuha nacuáa quène nchíanchii, te úní tucu yuyèhe-xi nchií ndàa xio datni nacuáa quène tucu nchíanchii.

14 Te sá ñùhú dòco-á<sup>n</sup> chi úxúú tnahá yúú cúú cìmientú-xi, te ndi tnahá ñ<sup>n</sup> ñ<sup>n</sup> yúú-ã<sup>n</sup> ndéé ñ<sup>n</sup> caa ðiú cue téé ní cáhá<sup>n</sup> tñuhu Yaa cáá dàtná cáá ñ<sup>n</sup> mbéé quiti ní dánicuehé-güedé, te ðiú mee-gã ní táuchíú<sup>n</sup>-gã ní cáhá<sup>n</sup>-güedé tñuhu-gá.

15 Te espíritú sá càhá<sup>n</sup> ndihí ñaha xii-í-á<sup>n</sup> néhé-xí ñ<sup>n</sup> sá cání ní cuáha mee-ni díhú<sup>n</sup> cuáa<sup>n</sup>, te ndihí xiá<sup>n</sup> chíchúhá-xi ñúú-á<sup>n</sup>, ndihí sá ñùhú dòco ñúú-á<sup>n</sup>, ndihí nchaa yuyèhe-xi.

16 Te ñúú-á<sup>n</sup> ñ<sup>n</sup>-ni nèhe-xi cuendá quèhé<sup>n</sup>-xi ndihí cuendá càni-xi, te espíritú-ã<sup>n</sup> ní chíchúhá-xi ndihí sá néhé-xí-ã<sup>n</sup> ñúú-á<sup>n</sup>, te nèhe-xi ócó úú cièndú mĩl mètrú sá cání te ðiú-ni duca<sup>n</sup> nèhe-xi cuendá quèhé<sup>n</sup>-xi, te ðiú-ni duca<sup>n</sup> nèhe-xi sá dùcú<sup>n</sup> nchaa vehe càa ñúú-á<sup>n</sup>.

17 Te dàtnúni ní chíchúhá-xi sá ñùhú dòco ñúú-á<sup>n</sup>, te xiá<sup>n</sup> néhé-xí ùnidico cúmí mètrú sá dùcú<sup>n</sup>, te ní chíchúhá-xi dàtná chíchúhá cue ñáyiú ñuyú-a.

18 Te sá ñùhú dòco-á<sup>n</sup> ní cuáha mee-ni yúú vãha yúú sã nání jãspé, te ñihí ñúú-á<sup>n</sup> cúú-xí mèe-ni díhú<sup>n</sup> cuáa<sup>n</sup>, te càa datná cáá vidriú sá ïo vãha càndoo te túu ndàa ingá xio.

19 Te ndi úxúú yúú cúú cìmientú sá ñùhú dòco-á<sup>n</sup> ndéé ndí díí<sup>n</sup> núú yúú vii càa sátá-xi, te yúú díhna ndéé mee-ni yúú vãha sá nání jãspé sátá-xi, te yúú cúú ùú ndéé tucu ingá núú yúú vãha sá nání zàfirú sátá-xi, te yúú cúú ùní ndéé tucu ingá núú yúú vãha sá nání àgatá sátá-xi, te yúú cúú cùmí ndéé ingá núú yúú vãha sá nání èsméraldá sátá-xi.

20 Te yúú cúú ùhú<sup>n</sup> ndéé tucu ingá núú yúú vãha sá nání ònicé sátá-xi, te yúú cúú ìnú ndéé tucu ingá núú yúú vãha sá nání còrnalíná sátá-xi,

te yúú cúú ùsá ndèé tucu ingá núú yúú vâha sá nání crìsólítú sátá-xi, te yúú cúú ùná ndèé tucu ingá núú yúú vâha sá nání bèrilú sátá-xi, te yúú cúú ì<sup>n</sup> ndèé tucu ingá núú yúú vâha sá nání tòpacíú sátá-xi, te yúú cúú ùxí ndèé tucu ingá núú yúú vâha sá nání crìsopásá sátá-xi, te yúú cúú ùxí ì<sup>n</sup> ndèé tucu ingá núú yúú vâha sá nání jácintú sátá-xi, te yúú cúú ùxúú ndèé tucu ingá núú yúú vâha sá nání àmatístá sátá-xi.

21 Te ndi ùxúú yuyèhe sá ñúhú dòco-á<sup>n</sup> cúú-xí mèe-ní yúú vâha sá nání pèrlá, te ndùu ñi yúú cúú ì<sup>n</sup> ì<sup>n</sup> yuyèhe-á<sup>n</sup>. Te tnuú cáhnú ndècu xití ñúú-á<sup>n</sup> cúú-xí mèe-ní díhú<sup>n</sup> cuàá<sup>n</sup>, te càa-xi datná cáá vídriú sá túu ndàa ingá xio.

22 Te ní xiní-í sá ñà túú vèhe núú chíñùhu ñáyiú Dútú Ndiòxí cáá ñúú-á<sup>n</sup>, chi mee-ná Dútú Ndiòxí Yaá quidé nchaa-ndi túhú sá vâha ndècu ñúú-á<sup>n</sup>, ndihí Yaá cáá dàtná cáá ì<sup>n</sup> mbéé quití ní dánícuèhé-güedé.

23 Te ñúú-á<sup>n</sup> ñà túú-gá xíní ñùhu-xi nchícanhii dayèhé-xi, te ni yóó ñà túú-gá xíní ñùhu-xi, chi mee-ná Yá Ndiòxí dáyèhé-gá ñúú-á<sup>n</sup> ndihí Yaá cáá dàtná cáá ì<sup>n</sup> mbéé quití ní dánícuèhé-güedé.

24 Te cue ñáyiú nchaa ñúú cáá ñùyíú, ñáyiú ní naníhí tàhú xíndecu ñúú-á<sup>n</sup> dáyèhé-gá núú-yu, te nchaa cue téé yíndaha ñaha xii-yu nèhe-güedé sá yíñùhu sá cúú-xí ñúú-á<sup>n</sup>, te quide cahnu ñaha-güedé xii-gá.

25 Te yuyèhe ñúú-á<sup>n</sup> ñà túú tnàhí nàndedí, te ñúú-á<sup>n</sup> ñà túú tnàhí cùndiquí<sup>n</sup>.

26 Te nchaa ñáyiú nèhé-yu sá yíñùhu sá cúú-xí ñúú-á<sup>n</sup> te quide cahnu-yu Yá Ndiòxí.

27 Te ñúú-á<sup>n</sup> vâ cúú cùndecu ni ì<sup>n</sup> ñáyiú ndècu ichi cuehé ichi duha, te ni ì<sup>n</sup> ñáyiú ndehnde, te ni ì<sup>n</sup> ñáyiú quide sá ñà túú cùu váha iní Yá Ndiòxí vá cúú cùndecú-yu ñúú-á<sup>n</sup>, chi mee-ni ñáyiú naníhí tàhú ñáyiú yòdo tnuní núú tütú Yaá cáá dàtná

cáá ì<sup>n</sup> mbéé quití ní dánícuèhé-güedé, mee-ni ñáyiú-á<sup>n</sup> cundecú-yu ñúú-á<sup>n</sup>.

## 22

1 Te sátá dúcá<sup>n</sup> te ñúu-ni espíritú-á<sup>n</sup> ní dánèhé núú ñáhá-xí xii-í yúte núú ñúhú ndute candoo canine, te ndute-á<sup>n</sup> candeca-xi iní ñáyiú ni caa ni quíhí<sup>n</sup>, te ndute-á<sup>n</sup> quéé-xí mèi núú núcõo Yá Ndiòxí ndihí Yaá cáá dàtná cáá ì<sup>n</sup> mbéé quití ní dánícuèhé-güedé.

2 Te cuádava tnuú cáhnú yâha xití ñúú-á<sup>n</sup> cáá yúte-á<sup>n</sup>, te xio xio yuhu yúte-á<sup>n</sup> níhnú yùtnu cuu<sup>n</sup> sávidí-xi, te sávidí nchaa yutnu-á<sup>n</sup> cúú tucu-xi sá cándeca iní ñáyiú ni caa ni quíhí<sup>n</sup>, te nchaa yutnu-á<sup>n</sup> cúú<sup>n</sup> sávidí-xi úxúú xito ì<sup>n</sup> cuía chi ndi tnahá yóó cúú<sup>n</sup> sávidí-xi, te nchaa ndaha-xi cùu-xi tátna sá cúú-xí nchaa ñáyiú.

3 Te vá yóo ì<sup>n</sup>-gá cada ì<sup>n</sup> sá ñà túú cùu váha iní Yá Ndiòxí ñúú-á<sup>n</sup>. Chi ñúú-á<sup>n</sup> núcõo mee Yá Ndiòxí ndihí Yaá cáá dàtná cáá ì<sup>n</sup> mbéé quití ní dánícuèhé-güedé xitaxi tnuní-gá, te nchaa ñáyiú xinu cuechi núú-gá cada càhnu ñahá-yu xii-gá.

4 Te nchaa ñáyiú-á<sup>n</sup> cundehe núú-yu Dútú Ndiòxí, te tneé-yu cundeé ñúu-gá.

5 Te ñúú-á<sup>n</sup> vâ quíní-gá-yu niú, te ni vâ cánèhe chiu<sup>n</sup>-gá-yu ñúhú cutnùní núú-yu, te ni nchícanhii ñà túú-gá xíní ñùhu-xi dayèhé ñúú-á<sup>n</sup> chi mee Dútú Ndiòxí dáyèhé-gá, te ni caa ni quíhí<sup>n</sup> cunúú-yu cundecú-yu ñúú-á<sup>n</sup>.

*Sa ta cùyatni nduu quixi tucu Xítoho Jesucristú*

6 Te sátá dúcá<sup>n</sup> te ní cachí tnúhu espíritú xínú cuèchi núú Yá Ndiòxí-á<sup>n</sup> xii-í:

—Nchaandi túhú tnúhu-a cùu-xi mee-ni tnúhu ndáá cuítí. Te Yá Ndiòxí Yaá dácàhu iní nchaa cue téé càhá<sup>n</sup> tnúhu-gá nàcuáa cáhá<sup>n</sup>-güedé ní tendaha-gá ì<sup>n</sup> espíritú xínú cuèchi núú-gá ní quixi-xi ní dánèhé-xi nchaa ñáyiú xinu cuechi núú-gá nchaa nàcuáa cada-gá, te vá cùyàa-gá duca<sup>n</sup> càda-gá —duha càhí espíritú-á<sup>n</sup>.

7 Te ní cáhá<sup>n</sup> Xítoho Jesucristú, te càhí-gá:

—Ío ndíhi quixi tucu-í!

’Te ío váha tnahá nchaa ñáyiú tñi nchaa tnúhu càhá<sup>n</sup> Yá Ndióxi yódó tnùní núú tütú-a! —duha càchí-gá.

<sup>8</sup> Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xiní núú-í nchaa nàcuáa cada-xi ndéé cuéé-gá. Te sátá dúcá<sup>n</sup> ní cuu te ní ngüñí xítí-í núú espíritú sá ní dánèhé núú ñhá nchaa xíá<sup>n</sup> cuendá chiñuhu-í-xi ní cùu.

<sup>9</sup> Te ní cachí-xi:

—Vá dúcá<sup>n</sup> càda-n, chi yúhú dícó xínú cuèchi-í núú Yá Ndióxi dàtná cúú yòhó ndíhi nchaa dava-gá ñáyiú ndècu ndíhi-n ichi-gá càhá<sup>n</sup>-ndó tnúhu-gá, ndíhi nchaa ñáyiú tñi nchaa tnúhu ndéé núú tütú-a, te xíá<sup>n</sup> càchí-í sá vǎ dúcá<sup>n</sup> càda-n, chi mee Yá Ndióxi duca<sup>n</sup> chiñuhu-n-gá —càchí espíritú-á<sup>n</sup> xii-í.

<sup>10</sup> Te ní cachí tnúhu tucu-xi xii-í, te càchí-xi:

—Vá chídáhu-n ní ñ<sup>n</sup> tnúhu Yá Ndióxi ndéé núú tütú-a, chi sa ní cuyatni cada-xi nchaa nàcuáa ndéé tnuní.

<sup>11</sup> Te dañá sǎ ncháá ñáyiú ndècu ichi cuehé ichi duha na cùndecu-ní-yu ichi-á<sup>n</sup>, te duca<sup>n</sup>-ni dañá-n nchaa ñáyiú quide nándi-gá nchaa sá cuéhé sá dúhá ná càda nahi-ní-yu nchaa sá cuéhé sá dúhá sàni iní-yu, te nchaa ñáyiú quide váha te duca<sup>n</sup>-ni na càda váha-yu cundecú-yu, te nchaa ñáyiú quide nchaa nacuáa cùu váha iní Yá Ndióxi te diu-ni duca<sup>n</sup> na càdá-yu cundecú-yu —duha càchí espíritú-á<sup>n</sup>.

<sup>12</sup> Te ní cachí Xítoho Jesucristú:

—Cundedóho-n tnúhu na càhá<sup>n</sup>-í-a. Ío ndíhi quixi tucu-í, te canehe-í nchaa sá ndúú tǎhú ñáyiú quixi, te nàcuáa ndùu chiu<sup>n</sup> ní quidé-yu ñ<sup>n</sup> ñ<sup>n</sup>-yu te duca<sup>n</sup> cùnduu sá cuñaha-í nduu tǎhú-yu.

<sup>13</sup> Te yúhú cúu-í Yaá sa ndècu ndéé cútnàhá ní ngáva ñuyíú, te diu-ni-í cundecu-í ní caa ní quíhí<sup>n</sup> —duha càchí-gá.

<sup>14</sup> Te váha tǎhú nchaa ñáyiú sa ní nduu ndoo ní nduu nine iní-xi, chi ñáyiú-á<sup>n</sup> ní nduu tǎhú-yu quíhu-yu xítí ñuú-á<sup>n</sup>, te caxí-yu sávídí yutnu

nùtní-á<sup>n</sup> te xíá<sup>n</sup> candeca-xi iní-yu ní caa ní quíhí<sup>n</sup>.

<sup>15</sup> Te ñuú-á<sup>n</sup> vǎ cúú quíhu ní ñ<sup>n</sup> ñáyiú ndècu ichi cuehé ichi duha, ní cué ñáyiú quide nduu, te ní cué ñáyiú ndècu ichi díí iní, te ní cué ñáyiú sàhni tnahá ñáyiú-xi, te ní cué ñáyiú chiñuhu nchaa sá ní cadúha cue téé ñuyíú-a càchí-yu cùu ndióxí, te ní cué ñáyiú tnàhá iní dacuàndehnde, te ní ñ<sup>n</sup> ñáyiú duca<sup>n</sup> xíquide vá ndúú tǎhú-yu quíhu-yu xítí ñuú-á<sup>n</sup>.

<sup>16</sup> Te ní cáhá<sup>n</sup> tucu Xítoho Jesucristú, te càchí-gá:

—Yúhú Xítoho Jesucristú ní tendaha-í espíritú xínú cuèchi núú-í cuendá cachí tnúhu-xi xii-n nàcuáa ndùu tnúhu cúñaha-n xii nchaa ñáyiú ndècu ndíhi-n ichi-í dácuàha tnúhu-í ñ<sup>n</sup> ñ<sup>n</sup> ñuú. Te yúhú cúu-í mei ñàní tnàhá ndí Dávíí, te cada iní-n sǎ cúu-í dàtná ñ<sup>n</sup> chódíní quítí quène datnéé —duha càchí-gá.

<sup>17</sup> Te nchaa ñáyiú cùu cuendá Xítoho Jesucristú Yaá cáá dàtná cáá ñ<sup>n</sup> mbéé quítí ní dánícuéhé-güedé, diu-ni ñáyiú-á<sup>n</sup> cúu-yu ñáyiú cada iní-ó sǎ cúu-yu ñ<sup>n</sup> ñadíhí xíchí tnàndaha ndíhi ñaha xii-gá, te ñáyiú-á<sup>n</sup> ñ<sup>n</sup>-ni càhá<sup>n</sup>-yu ndíhi Espíritú Yá Ndióxi, te xǎhǎ<sup>n</sup>-yu ndíhi Espíritú-gá xii nchaa dava-gá ñáyiú:

—Chí táquixi —cachí-yu xǎhǎ<sup>n</sup>-yu ndíhi Espíritú Yá Ndióxi.

Te nchaa ñáyiú duca<sup>n</sup> ndèdóho tnúhu-á<sup>n</sup> vitna, te xini ñuhu-xi duca<sup>n</sup> cáhá<sup>n</sup>-yu tnàhá-yu cúñaha-yu xii nchaa dava-gá ñáyiú-á<sup>n</sup>, te nchaa ñáyiú cùní tuha ichi-gá te na quixí-yu, te dícó duca<sup>n</sup> cùu tǎhú-yu sá cándeca iní-yu ní caa ní quíhí<sup>n</sup>.

<sup>18</sup> Te nchaa nchòhó ñáyiú ndèdóho nchaa nàcuáa càhá<sup>n</sup> tnúhu Yá Ndióxi ndéé núú tütú-a càhá<sup>n</sup>-í dóho-ndo. Te núu ñ<sup>n</sup> ñáyiú na còdo-gá tnúhu chido tnùní-yu núú tütú-a, te Yá Ndióxi ío dandòho ñaha-gá xíí-yu chí yáha-yu nchaa tnúndòho yodo tnuní núú tütú-a te núu duca<sup>n</sup> na càdá-yu.

<sup>19</sup> Te núu ñ<sup>n</sup> ñáyiú na chídáhu dava tnúhu Yá Ndióxi ndéé núú tütú-a te

ñáyu-á<sup>n</sup> vǎ ndúú tǎhǔ-yu cundecú-yu  
ñúú-gá, te ni vǎ ndúú tǎhǔ-yu sá  
cándèca iní-yu ni caa ni quíhí<sup>n</sup> dàtná  
yódó tnùní núú tütú-a.

<sup>20</sup> Te Xítóhó Jesucristú Yaá càhá<sup>n</sup> sá  
ncháá tnǎhu-a cùu-xi tnúhu ndáá ní  
cáhá<sup>n</sup>-gá ní tecú dóho-í, te càchí-gá:

—Ndáá sá ïo ndǎhi quixi tucu-í —

duha càchí-gá.

Te yúhú ní xáha<sup>n</sup>-ǎ xii-gá:

—Duca<sup>n</sup> na cùnduu, taquìxi yohó  
Xítóhó Jesucristú —duha ní xáha<sup>n</sup>-ǎ  
xii-gá.

<sup>21</sup> Te Xítóhó Jesucristú ío na chìndee  
chítúu ñaha-gǎ xii-ndo nchàa-ndo. Te  
duca<sup>n</sup> na cùnduu. Te ío chí cádá ndèe  
iní-nǎ vitna.